


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapẽr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 4 Mar 2019 from source files dated 29 Nov 2017
383a4e22-34cd-505f-9cc2-2f9921e7aa9f

Contents

Matêwre	1
Makre	87
Rukre	137
Juãw	227
Atre	291
Römãn	365
Wam Korõt	408
Sikũn Korõt	446
Karatas	470
Epes	485
Piripos	499
Korosẽ	508
Wam Tesarõn	517
Sikũn Tesarõn	525
Wam Ximotre	529
Sikũn Ximotre	540
Xitre	548
Piremõ	553
Eprêw	555
Xiakre	584
Wam Pêtre	594
Sikũn Pêtre	605
Wam Juãw	611
Sikũn Juãw	620
Hapuhã Juãw	622
Jutre	624
Apokarip	628

Matêwre

Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhĩ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mẽ panhõ pahihtí mex o mex ã harê nê hã kagà. ã na pre Matêwre mẽ pamã Jejus jarê nê hã kagà anê.

Apraãw kanrêhã hkra nê htàmnhwýjê nhĩxi

Rukre 3.23-38

¹ Amnepê m Jejus Kris kormã pika hwýr wrýk kêt ri hkukamã higêtjê nhĩxi na jajaja. Wýj ri higêtjê hõ nhĩxi na pre kêp Tawi.

Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mẽ htôjaja.

³ Nê Juta hkra na pre wa kêp Pere nê Jera.

Nê Pere mẽ Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihti Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre. Tã nhũm pre Uristi ty nhũm Tawija hãmri mýrpê Uristi hprõ ho hprõ nê kamã hkra. Nhũm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonís mẽ htôjaja.

Kormã mẽ htír ri na pre Papirõn nhõ xwýnhjaja kot mẽ hkurê kaxàr kaxyw mẽ hwýr hprõt nê mẽ unê. Ijaew piitã unênh pa nê ma akupým mẽ õ pyka hwýr mẽ ho hapêx nhũm mẽ hpãnhã Papirõn kamã pa ho pa. Jakamã nhũm Josis mẽ hkra Jekonís mẽ htôjaja mẽ hipêêxà pyrã nê Papirõn kamã pa ho pa.

Nê Jekonís kra na pre kêp Saraxi.

Nê Saraxi hkra na pre kêp Joropape.
¹³ Nê Joropape hkra na pre kêp Apiux.
 Nê Apiux kra na pre kêp Eriakī.
 Nê Eriakī hkra na pre kêp Ajo.
¹⁴ Nê Ajo hkra na pre kêp Satok.
 Nê Satok kra na pre kêp Akī.
 Nê Akī hkra na pre kêp Eriux.
¹⁵ Nê Eriux kra na pre kêp Eresa.
 Nê Eresa hkra na pre kêp Matā.
 Nê Matā hkra na pre kêp Jako.
¹⁶ Nê Jako hkra na pre kêp Juje.
 Nê Juje hprō na pre kêp Marir.
 Nê Marir Kra na pre kêp Jejus.

Mê kot kām: “Tirtūm kot mê pakaxyw âm xwÿnh” anhÿr xwÿnhhta na pre.

¹⁷ Nhūm Apraāw kanrēhā axte axpēn kanrēhā mê àptār nywjaja Tawija wÿr kêp 14. Nê Tawi nhîrō pê Papirōn hwÿr mê hapêx kêt ri axpēn kanrēhā mê àptār nywjaja määnēn kêp 14. Nê ra Papirōn kamā mê pa nhîrō pê axpēn kanrēhā Jejus pê Tirtūm kot mê pakaxyw âm xwÿnhhta wÿr määnēn kêp 14. Ā na pre Jejus Kris xwÿj ri higêtjê nhîxi anê.

Jejus Kris kator

Rukre 1.26-38, 2.1-7

¹⁸ Tā ā mê hixi jarēnh kot anhÿr kanrēhā na pre ā Jejus Kris kator anê. Nhūm pre kormā Jujeja Marir o hprō kaxyw. Nom kormā ho hprō hkêt ri nhūm htujarō. Kormā hkukrit tā nhūm Tirtūm Karō tanhmā ho nhūm htujarō. ¹⁹ Hāmri nhūm Jujeja harēnh ma nê tee ri hamaxpēr nê htÿx nhām mēhō kot kêp htu hā hkamnhîx. Juje kot tām amnhî nhîpêx nê tām hamaxpēr jakamā tee ri kot ho hprō hkukamā hamaxpēr. Nê hamaxpēr o:

—Nà pa mǎn ixte hturē hā. Nhām mēhō ra kot ā hipêx anhÿr kēnā. Nà kot paj ho ixprō hkêt nê. Nom kot paj ixkwÿjê mā ā kot amnhî nhîpêx anhÿr o amnhîrīt kêt nê. Kot paj anê nhūm mê kuma nê ho kapēr punuj nhūm amnhî kamā hpijaàm tÿx nê. Ja pymaj kot paj ixkatāt kôt hkaga kurê kumrêx. Nom ixkwÿjê hkàx ā hkaga. Anê.

²⁰ Nê ā hamaxpēr anhÿrja o ra gōr nê nō. Nhūm Tirtūm kapēr o mê wrÿk xwÿnhjê hō hwÿr wrÿ nê hwÿr axàn kuri xa. Hāmri nê kām:

—Pa Juje? E ot pa awÿr tē. Kwa tee ri Marir o aprō hkukamā ajamaxpēr punuj kêt nê. Māmri ho aprō. Mēhō kot apê tanhmā ho hkêt. Tirtūm Karō na pre ā hipêx anê. Jakamā kwa tee ri ajamaxpēr kêt nê māmri ho aprō nê war apa. ²¹ Koja hkrare kato nê myre nê hprêk. Hāmri nê mê kot hkôt amnhî xunhwÿr xwÿnhjaja mê kot amnhî tomnuj piitā pê mê utār pa. Jakamā koja kato ka wa hā hixi mê nhūm kêp Jejus. Anê.

Nhūm pre ā Tirtūm kapēr o mê wrÿk xwÿnhja kām kapēr anê. Ijaew kapēr kām Jejus jarēnhja te kêp “Tirtūm kêp mê papytār xwÿnh” anhÿr pyrāk. Jakamā nhūm Tirtūm kapēr o mê wrÿk xwÿnhja Juje ot kām ā kām Marir jarēnh anê. ²²⁻²³ Nom kormā ā kām kapēr anhÿr xwÿj ri na pre ra Tirtūm nhÿ hā kapēr xwÿnhjê hōja kukamā tanhmā harēnh to nê hā kagà. Nê hā kagà ho:

E mê inhma nê inhmar tÿx nê ho apa. Koja nhÿrmā pyka já kamā mēhō kormā hkukrit tā htujarō. Nê hkra kato nê myre. Nhūm mê omu nê hā hixi mê nhūm kêp Emanuew. Anê.

Ijaew kapēr kām “Emanuew” jarēnhja te kêp “Ota ra Tirtūm mê pahkôt pa ho pa” anhÿr jarēnhhta pyrāk. Jakamā nhūm pre Tirtūm nhÿ hā kapēr xwÿnhja Jejus kukamā ā harēnh anê nê hā kagà.

²⁴ Jakamā nhūm Tirtūm kapēr o mê wrÿk xwÿnhja Juje mā kapēr par mê nhūm hkrākato. Hāmri nê kot kām ujarēnh xá hkôt Marir o hprō. ²⁵ Nom kormā tanhmā ho hkêt nê ri o pa rāhā nhūm hkrareja kato. Hāmri nhūm wa hā hixi mê nhūm kêp Jejus nê määnēn kêp Emanuew.

2

Kanhêti ho studa xwÿnhjê jarênh

¹ Nhũm pre Jejus Perêj kamã kato. Pika pê Jutej kamã. Pahi Erox kormã kot Jutej nhõ xwÿnhjê ho amnhĩptàr o pa ri nhũm õ pika kamã kato. Hãmri nhũm Tirtũmjaja kaxkwa kamã Kra kator jarênh xà hã kanhêti raxta õ nhõ nhũm pika hõ kamã kanhêti ho studa xwÿnhjaja omu. Kanhêtiija pumu nê hkĩnh nê axpên mã:

—Kwa ga mẽ kanhêti raxti mũj pumu. Mãn ra Ijaew nhõ pahi nywta kato nhũm kanhêti mũj kêp ho amnhĩrĩt xà hã ajê. Kwa pu mẽ ma hapêr o mō nê nhÿri tokyx omu nà.

Anê hãmri nê amnhĩ to pikuprõnh pa nê ma hapêr o pa. Ma myt gjêx xà hwÿr hapêr o pa hã apkati xohtõ nê. Hãmri nê ra Ijaew nhõ pika hwÿr pøj nê krĩ pê Jerujarê hwÿr hapêr o mō. Pahi Erox nhõ krĩja wÿr nhũm mẽ hapêr o mō hãmri nê kamã pøj nê mẽ hkrare nywta ã krĩ nhõ xwÿnhjê kukjêr o mō ² nê mẽ kãm:

—Pa? Ot pa mẽ apê Ijaew nhõ pahi nywreta pumunh kaxyw mō. Ham kator xwÿnhhta. Mẽ inhõ pika kamã na pa prem kaxkwa hkrax rũm kot ho amnhĩrĩt xà hã kanhêti raxta pumu. Hãmri nê nhÿri pahi nywre pumunh nê kutã mẽ ixkõn krã ho ixtêm nê ixkrĩ nê kãm mex o mex ã harênh kaxyw nêtãnh mẽ inhõ krĩ rũm hapêr o mō. Kwa mẽ inhmã harê. Nhÿri na? Na pa mẽ inhmã omunh prãm tÿx kumrêx.

Anhÿr o hã mẽ hkukjêr o mör jakamã nhũm mẽ piitã pahi nywja jarênh ma nê axpên mã harênh o hprõt. ³ Nhũm pahi Eroxja harênh ma nê tee ri amnhĩ kukamã hamaxpêr. Pahi nyw kot mẽ ho amnhĩptàr ã hkamnhĩx nhũm já kêp omnuj tÿx nê. Nhũm krĩ nhõ xwÿnhjaja ã hamaxpêr anhÿr ã omu nê tee ri amnhĩ kukamã hamaxpêr o ra kãm ma nê. ⁴ Hãmri nhũm pahi Eroxja amnhĩ wÿr hkwÿjê hã karõ. Mẽ õ patre krãhtũmjaja nê Tirtũm kapêr tũm o mẽ ahkre ho mẽ pa xwÿnhjaja nhũm amnhĩ wÿr mẽ hã karõ nê Tirtũm kot nhÿrmã mẽ hwÿr mênh mã xwÿnhhta ã mẽ hkukjêr kaxyw. Nê mẽ kãm:

—E Tirtũm kot nhÿrmã mẽ pahwÿr mênh mã xwÿnhhta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Kojã nhÿrmã kator kaxyw nê nhÿri kojã we kato? Xà jar mẽ panhõ krĩ kamã nà? Xà nhÿri krĩ hõ kamã? Anê.

⁵ Hãmri nhũm mẽ kuma nê kãm:

—Nà mẽ panhõ pika pê Jutej kamã kojã xep kato. Krĩ pê Perêj kamãã. Na pre Tirtũm nhÿ hã kapêr o mẽ pa xwÿnhja ra hkukamã mẽ panhĩgêjtjê mã tanhmã harênh to nê hã kagà. Nê hã kagà ho:

⁶ Pa Perêj nhõ xwÿnhjaja? E mẽ anhõ krĩ grire htã kamã kojã nhÿrmã mẽ panhõ Pahi Maatija kato. Kojã mẽ pahpê Ijaewjê piitã mẽ pahto amnhĩptàr mex o pa. Jakamã mẽ anhõ krĩ grire htã kojã Ijaew piitã axpên mã mex ã harênh o pa.

Ã na pre Tirtũm kot mẽ pahwÿr mênh mã xwÿnhhta kukamã mẽ kãm harê nê hã kagà anê. Anê.

⁷ Hãmri nhũm pahi Erox tee ri ã harênh anhÿrja ma hãmri nê amnhĩ wÿr mẽ kot hã àhkukjêr o mör xwÿnhjê hã karõ. Nom nhÿri Ijaew kàx ã. Hãmri nhũm mẽ ma hwÿr mra nê agjê nhũm mẽ omu nê pahi nywta ã mẽ hkukja nê mẽ kãm:

—E mẽ aprĩ hã inhmã pahi kator nywta jarê. Tanhmã na pre ra mẽ ate kanhêti pumunh ã mytwrÿ kute? Xà ham na ka prem omu nà amnepê mã? E mẽ aprĩ hã tanhmã inhmã harênh to. Anê.

Hãmri nhũm mẽ ihõja kãm:

—Nà na ra hã amgrã axkrut kaxyw. Na pa prem omu hãmri nê inhnojarê nê man ixpa ho ixpa ry rax nê mẽ awÿr pøj. Anê.

⁸ Nhũm mẽ kuma nê mẽ kãm:

—Tÿ. Nom jar amrakati. Perêj kamã na xep kato. E mẽ mãmri ma hwÿr mō nê kamã hapêr. Hãmri nê nhÿri omu nê akupÿn ixwÿr mō nê inhmã harê. Pa ijaxwÿja ma hwÿr mō nê omu nê mẽ apyrã nê kãm mex o mex ã harê. Ijaxwÿja inhmã omunh prãm tÿx kumrêx. Anê.

Nom hêx rom ã ri mẽ kãm kapêr anê. Kot nhÿri harênh mar nê hã àmnênh nhũm mẽ kot hpĩr kaxyw nhũm hêx rom ã kãm omunh prãm tÿx ã amnhĩ jarênh anê. ⁹⁻¹⁰ Jakamã

nhùm mē kuma hāmri nē kato nē ma Perēj wỳr mōr kurê kumrēx. Hāmri nē kormā mē ò pika kamā mē pa ri kanhêti ho studa xwỳnhhta nhùm mē axte amnhĩ kukamā omu nē hkĩnh nē. Nhùm ma Perēj wỳr mē hkukamā mō nhùm mē omunh pē ma hkôt pa rāhā hwỳr pōj. Nhùm kanhêtija pahi nywre nhōrkwy mỳri ajêt. ¹¹ Jakamā nhùm mē ma hkôt mra nē ixkreja wỳr pōj nē kapem xa. Hāmri nē mē kām kapēr nē mē hwỳr agjê nē Jejus mē katorxàja wa omu. Hāmri nē Jejus kutā hkōn krā ho hkrĩ hpa nē kām kapēr nē kām:

—Pa Xugitre. Hêxta waa nē. Nà amex o amex. Kot kaj nhỹrmā axaptār hāmri nē apē mē inhō Pahi Maati. Nà ãm hāmri na pa mē apumu nē ixkĩnh nē. Anē.

Hāmri nē ahpỳnhā kām hkĩnh xà gō. Kām òr kwỳ gō nē kām mēhkuxwa xà hkwy gō nē kām te kot rāmre kuxware pyrāk pē mĩraja nhùm mē kām hkwy gō. Mē hkĩnh xà hā kàxpore xohtō nhùm prem kām òr pa. ¹² Hāmri nē ra akupỳm Jerujarē kamā pahi Erox wỳr nojarêt. Nhùm kamàt nhùm mē gōr nē hikwy hāmri nē ra amỳti. Nhùm Tĩrtũm mē hpimtir kām mē kām kapēr nē mē kām:

—Pa? E mē inhma. Kêr ka mē akupỳm pahi Erox wỳr amrar nē kām mē hkrata jarēnh kêt nē. ãm kwarĩ ho kwarĩ. Nē kêr ka mē pry hō hā mǎn ma mē anhō pika hwỳr akupỳm apa ho apa.

Anhỹr o mē kām kapēr jakamā nhùm apkati nhùm mē kànhmā hkrĩ hāmri nē Tĩrtũm kot mē kām hā karō xà hkôt ma akupỳm mē ò pika hwỳr pa kurê kumrēx nē akupỳm pahi Erox wỳr mrrar kêt nē.

Juje mē hprō wa kot Erox pymaj ma Jejus o mōr

Apokarip 12.1-6, 12.13-18

¹³ Tā nhùm kanhêti ho studa xwỳnhjaja ma akupỳm hapêx hāmri nhùm Tĩrtũm axte Marir mjên Juje hwỳr kapēr o mē wrỳk xwỳnhjê hō mē. Nhùm kê axte hpimtir kām hwỳr wrỳ nē kām kapēr nē kām:

—Pa Juje. E kwa kànhmā nhỹ. Na ra pahi Eroxja aprō pē hkrata ã amỳnê. Kojatokyx pōristi hkwyjaja mē anhō krĩ hwỳr pōj nē war apē hpĩr kaxyw ri hapêr. Jakamā kwa wa tokyx akato nē ma pika pē Ejit wỳr amōr kurê kumrēx. Nē Ejit kamā apa rāhā pa nhỹrmā akupỳn amnē war amē. E kwa tokyx. Anē.

¹⁴ Hāmri nhùm kuma nē kànhmā nhỹ nē Marir mra nē war amnhĩ to akuprō nē ra nojarêt. Hāmri nē krĩja pē Jejus o kato nē ma o mōr kurê kumrēx. Wa mōr ryy nē hāmri nē Ejit wỳr pōj nē kamā pa ho pa.

¹⁵⁻²⁰ Rôm nhùm pahi Erox tee ri amnhĩ wỳr kanhêti ho studa xwỳnhjê kamā hamak o pa nom nhùm mē akupỳm hwỳr mrrar kêt nē. Jakamā nhùm mē kamā gryk nē hamaxpēr o:

—Tk. Kwa nà. Na mē ãm inhmā hêx nē akupỳn ixwỳr mrrar nē nhỹri inhmā pahi nywta jarēnh kêt nē. Nà kwār mē mǎmri ã inhĩpêx anē. Mē kot ixpê ho hpimxuure kaxyw ã. Nà kot paj mē kēp kupĩ nhùm mē rĩ amnhĩ pumu. Na xep prem kanhêti kot harēnh xàja pumunh ã ra hā amgrà pyxi nē hkôt mytwrỳ kēp 6. Jakamā mǎn mē hkrata ra hā amgrà axkrut kaxyw. Nà na pa ra ijamaxpēr. Kot paj Perēj kamā mē hkra myjaja ra mē hā amgrà axkrut xwỳnhjaja nē kormā mē hā amgrà axkrut kêt xwỳnh piitā mē himex pa. Jao ra mē kamā pahi nywta pĩ. Nà ixte hpĩr mǎ kēnā. Kojat hprêk nē ixpānhā Ijaew o amnhĩptār kêt nē.

Anhỹr o hamaxpēr hāmri nē amnhĩ wỳr ò pōristi hkwyjê hā karō nē mē kām mē hkrajê hā amỳnê nē mē kām:

—E kêr ka mē ma Perēj wỳr mra nē kamā mē kēp mē hkra myrejaja ra mē hā amgrà axkrut xwỳnhjê nhĩmex pa. Nē kormā mē hā amgrà axkrut kêt xwỳnhjaja mǎānēn mē himex par kumrēx. Nē Perēj pu hā ri krĩ hkryre hkôt mǎānēn ri ajapōj nē ã mē himex par anē. Anē.

Hāmri nhùm mē kuma nē ma mē hwỳr mrrar kurê kumrēx. Hāmri nē Perēj wỳr pōj nē mē kēp mē hkra myre piitā mē himex pa. Jakamā nhùm mē katorxà nē mē hipêxàjaja tee ri mē hkra htyk xwỳnhjê pumu nē hkaprĩ htỳx nē mỳr rũnh nē. Nom na pre Tĩrtũm nhỹ hā kapēr jarēnh o mē pa xwỳnh finat Jeremĩstija ra amnepê mē ã mē kot amnhĩ

nhîpêx anhÿrja kukamã mẽ panhîgêjtjê mã mẽ harê nê hã kagà. Na pre mẽ kãm Ijaew kurê xwÿnhjê pynênh nê ma mẽ õ pika hwÿr mẽ ho hapêx par kaxyw. Hãmri nhÿm mẽ panã Rrakewja te ra kot tee ri ja hã mẽ omunh nê tanhmã amnhî nhîpêx to pyrãk nhÿm Jeremîstija tanhmã Ijaewjê jarênh to nê hã kagà. Nê hã kagà ho:

Amnepê m Perêj kamã na pre mẽ panã Rrakewja hpijagri ho nôrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nõ. Nhÿm hkwyjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urãk nê tee ri mẽ hkrare ho hamak xaj mÿr o pa. Mẽ kot mẽ kêp utar nê mẽ himex par jakamã nhÿm mẽ tee ri mẽ ho hamak xaj mÿr o pa. Anê.

Nhÿm pre finat Jeremîsja mẽ hkukamã ã mẽ harê nê mẽ hã kagà anê. Tã ra jarãhã mẽni piitã Rrakew pyrã nê hkrajê o hamak xaj mÿr o pa.

*Wa kot akupÿm wa õ pika hwÿr Jejus o mör
Juãw 7.41-42*

Tã nhÿm mytwrÿ grêre nê hapêx nhÿm pahi Eroxy ty. Jakamã nhÿm kamãt nhÿm Jujeja gôr nê nõ. Nê kê õt kãm axte amÿti. Nhÿm Tirtÿm kapêr o mẽ wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pÿr mã xwÿnhhta ty. Jakamã kwa wa mãmrÿ ma akupÿm mō. Ma akupÿm mẽ apê Ijaewjê nhõ pika hwÿr axãmnhix aprõ mẽ hkrata wa o mō.

Anhÿr o kãm kapêr. Na pre ra amnepê m Tirtÿm nhÿ hã kapêr o mẽ pa xwÿnhjê hõja ja kukamã mẽ panhîgêjtjê mã ja jarê nê hã kagà. Nê hã kagà kot: “Ixpê Tirtÿm kot paj nhÿrmã Ejit rÿm ma akupÿm õ pika hwÿr ixkrata wa mẽ kumê.” Anhÿr o kot hkukamã harênh nê hã kagà.

²¹ Jakamã nhÿm Tirtÿm kapêr o mẽ wrÿk xwÿnhja ã Juje mã karõ anê hãmri nhÿm kuma nê ma akupÿm wa o mō. Ma akupÿm mẽ õ pika hwÿr wa o mō.

²² Tã ra akupÿm hpõx kaxyw htêp o mō. Hãmri nê pahi Eroxy kra Akêrawja ra hipêxã mÿr pê kot Jutej kamã mẽ ho amnhiptar hã harênh ma. Hãmri nê tee ri mẽ amnhî kukamã hamaxpêr nê kãm mẽ hwÿr wa o mör puma nê.

Tã nhÿm kamãt nhÿm Juje ra gôr nê nõ nê kê axte amÿti. Nhÿm kê axte Tirtÿm kapêr o mẽ wrÿk xwÿnhja hwÿr wrÿ nê akupÿm õ pika hkwy pê Jutej wÿr mör nê wa mẽ hkurê nê kãm:

—Pa Juje? E kêr ka Jutej wÿr wa mẽ amör kêt nê. Pãnhã nhãm mẽ anhõ pika hõ hwÿr mãn mō nê kamã ri apa.

Anê nhÿm kuma nê hpãnhã wa mẽ ma mẽ õ pika hkwy pê Garirej wÿr wa mẽ juk nê ma mō. ²³ Nê kamã pøj nê krÿ pê Najare hwÿr mō nê kamã amnhim òrkwy nhîpêx nê kamã wa mẽ pa ho pa. Nhÿm pre ra amnepê m Tirtÿm nhÿ hã kapêr o mẽ pa xwÿnhjê hõja ra ã mẽ kot amnhî nhîpêx anhÿrja kukamã mẽ panhîgêjtjê mã mẽ harê nê hã kagà. Nê hã kagà kot:

Tirtÿm kot mẽ pahwÿr mẽnh mã xwÿnhhta koja kêp Najare nhõ xwÿnh. Anê.

3

*Juãw Paxis kot Tirtÿm kapêr jarênh o pa
Makre 1.1-6; Rukre 3.1-14; Juãw 1.19-23*

¹ Nhÿm pre Juãw Paxisja ã amnhî nhîpêx anê. Nê pika pê Jutej kamã mẽ kãm Tirtÿm kapêr jarênh o pa. No ãm krÿm pa hkêt nê. ãm mẽ hpu hã krÿ pê amÿm ri kapôt ã ri mẽ kãm Tirtÿm kapêr jarênh o pa. ²⁻³ Tirtÿm nhÿ hã kapêr o mẽ pa xwÿnh finat Ijais ra kot Juãw kukamã mẽ panhîgêjtjê mã tanhmã harênh to nê hã kagà xá hkõt. Na pre hkukamã hã kagà ho:

Koja nhÿrmã mẽhõ mõn pøj. Kapôt ã mõn pøj nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tirtÿm tokyx mẽ pahwÿr mẽ panhõ Pahihtija mẽ nhÿm wrÿ nhÿm mẽ piitã omu. Jakamã kwa mẽ tokyx kutêp tãm amnhî nhîpêx o ri apa. Te mẽ kot mẽhõ kutêp pry ho mexta pyrã nê amnhî nhÿ ho tãm amnhî nhîpêx nê

tãm ajamxpêr mex o ri apa. Kêr ka mê Pahihtu kutêp ã amnhĩ nhĩpêx anhÿr o ri apa.” Anhÿr o koja mê kãm ujarênh o pa. Anê.

Na pre finat Ijaisja Juãw Paxis kukamã ã mê kãm harênh anê nê hã kagà. Tã nhũm hã kagà xàja kôt nhũm Juãw Paxisja mõn pøj. Hãmri nê Ijais kot hkukamã harênh xà hkôt kapôt ã ri mê kãm ujarênh o pa nhũm mê kãm mar prãm xwÿnhjaja ma hwÿr mra. Nhũm mê kãm kapêr nê mê kãm:

—E koja Tirtũm tokyx kot mê pakaxyw ãm xwÿnhja o amnhĩrit. Jakamã kwa mê tokyx kutêp amã amnhĩ tomnuj kaga hprãm xaj tãm amnhĩ nhĩpêx o apa.

Anhÿr o Jesus kutêp mê kãm kapêr o pa.

⁴Juãw Paxisja hikãxpore hkêt jakamã na pre ê mex kêt nê pa. ãm mêmõ mry pê kamer kĩ ho amnhĩm ê nhĩpêx nê hagjê nê hã pa. Nê mêmõ mry hkà ho amnhĩ pre nê ri pa. Nê mêmõ mex kur kêt nê ãm krit ku nê menh ôr o ri pa.

⁵Jakamã nhũm kapôt ã ri mê kãm Tirtũm kapêr jarênh o pa nhũm mê kot mar kaxyw ma hwÿr mra. Pika pê Jutej kamã ri mê pa xwÿnhjaja. Nê Jutej kamã krĩ pê Jerujarê nhõ xwÿnhjaja. Nê pyhti pê Jotãw mÿri mê pa xwÿnhjaja. Nhũm prem piitã harênh ma nê kot mar kaxyw ma hwÿr mra. ⁶Hãmri nê kapêr ma nê Tirtũm noo mã mê kot amnhĩ tomnuj xwÿnh ã kãm amnhĩ jarê. Mê kot amnhĩ tomnuj kaga nê tam amnhĩ nhĩpêx o pa hprãm xaj ã kãm amnhĩ jarênh anê. Nhũm Tirtũm kaxkwa kamã hkrĩ htã mê kuma nê amnhĩ katut kôt mê kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tirtũm mã gõx kãm mê hkrã kumrãr pa. Pyhti pê Jotãw kamã mê hkrã kumrã.

⁷Tã nhũm Parijew mê Satusew nhõ xwÿnhjaja mãânên mê hkôt ma Juãw Paxis wÿr mra. Mê urak nê mê kêt Ijaew jakamã haxwÿja Juãw Paxis kot mê hkrã kumrãr kaxyw ma hwÿr mra. No ãm hkwyjê hkĩnhã mê kot amnhĩ tomnuj kaga hprãm xaj kãm amnhĩ jarênh kêt nê. ãm amnhĩ krã hkôt hkwyjê hkôt hwÿr mra nê amnhĩ to kuma. Nom nhũm Juãw Paxisja ra hprĩ hã ã mê hamaxpêr anhÿrja kôt mê omunh mex nê. Jakamã mê kãm:

—Tk kwa nã. Kormã mê ate amnhĩ tomnuj pix o ri apa kênã. Xà kot paj mê ate amnhĩ tomnuj o apa rãhã mê akrã kumrã nhũm Tirtũm ja hã mê apumu nhũm ja kãm mex nê? Nã koja já kãm mex kêt nê. Koja ja mÿrapê nhÿrmã tanhmã mê atomnuj tÿx to ka mê tee ri umaj apimxur prãm kaprÿ. ⁸Na htem amnhĩ tomnuj kaga nê tãm amnhĩ nhĩpêx nê tam xpên nhĩpêx. Jakamã e kwa mê ã amnhĩ nhĩpêx o apa anê pa rĩ kormã mê akrã kumrã. ⁹Na ka htem atÿx ri ajamaxpêr o: “Mê ixpê finat Apraãw kanrêhã htãmnhwÿ hkwy na pa mê. Jakamã koja Tirtũm ja hã mê ixpumu hãmri nê mê ixte amnhĩ tomnuj o ixpa tã nhũm ja hã tanhmã mê ixto hkêt nê. Koja mê ixto mex nê.” Anhÿr o atÿx ri amnhĩ kukamã ajamaxpêr. Nom ja kot anhÿr kêt. Mê apê Apraãw kanrêhã htãmnhwÿ htã mê ate urak nê tãm amnhĩ nhĩpêxre hã. Kot kaj mê apê htãmnhwÿ htã amnhĩ tomnuj o ri apa hãmri nê Tirtũm noo mã te mê apê pikap kênre nhĩkwÿ pix pyrãk. ¹⁰Na ra Tirtũm mê ate amnhĩ tomnuj mÿrapê tanhmã mê ato kaxyw. Te ho mêmõ nhõ mêmõ hpàr ô hkêt nhũm kot tee ri omunh nê krãhyr nê kuwy kamã mênh nê ho kaxàr par pyrãk o koja mê anhĩpêx. Jao amnhĩ nê kuwy hwÿr mê arê ka mê kamã amnhĩ xà htÿx kamã ajamak rãhã ho ri apa. Anê.

Nhũm pre ã Juãw Paxisja Parijew mê Satusew nhõ xwÿnhjê mã kapêr anê. ¹¹Hãmri nê hpãnhã axte mê kot mar kaxyw hwÿr mê mrrar xwÿnhjê mã kapêr nê mê kãm:

—E ra mê ate amnhĩ tomnuj kaga xwÿnhjaja. Na pa Tirtũm mã mê akrã kumrãr kaxyw gõ pix o mê akrã kumrã. Nom koja tokyx ixpãnhã Tirtũm kot mê pakaxyw ãm mã xwÿnhta tãm mê pahwÿr pøj. àhpumunh tÿx o kot ijakrenh par jakamã na pa hte ãm kukwak ri ixpa nê amnhĩ tã hã ixpijaãm o ri ixpa. Koja mê awÿr Tirtũm Karõ rê nhũm mê akarõ mã agjê. Ka mê ÿ hã tam amnhĩ nhĩpêx o ri apa. Nom kormã mê kot tãm amnhĩ nhĩpêx kêt xwÿnhjaja koja Tirtũm kot mê pahwÿr mênh xwÿnhja ja hã mê omu nê mê hipêx o te kuwy kot mêmõj to kaxàr par pyrãk o mê hipêx.

¹²—Na htem pur kãm harøj nhĩkê nê ho grã nê hpãnhã kahtwÿ. Nê kahuk pa hãmri nê hkapĩ nhũm kôk apê nê prÿhkà ho htor pa. Nhũm mê hpãnhã hy ho pa nê ixkre kamã

gôj kãm unhwÿ. Ja pyrã nê koja tokyx Tirtûmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwÿnhjaja koja ma amnhĩ wÿr mẽ ho api nhũm mẽ kuri mex rãhã nê pa ho pa. No mẽ kot amnhĩ tomnuj rãhã ho mẽ pa xwÿnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wÿr pa nê kamã amnhĩ xà htÿx kamã hamak rãhã nê pa ho pa.

Anhÿr o mẽ kãm kapêr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rûm kato nê ma Juãw Paxis wÿr mō. Juãw kot pyhti pê Jotãw kamã hkrã kumrãr kaxyw ma hwÿr mō. Hãmri nê omu nê kãm:

—Pa. E ot pa awÿr amnhĩ to tẽ. Ate mẽ kuxwar ixkrã kumrãr kaxyw. Anê.

¹⁴ Hãmri nhũm tee ri kuma nê kãm:

—Kwa nà. Aa ate amnhĩ tomnure hã kot pa kêt ri akrã kumrã. Nà ka kot kaj ixkrã kumrã. Anê.

¹⁵ Hãmri nhũm kãm:

—Kwa nà. Mãmri ixkrã kumrã Juãw Paxis. Tirtûm kãm ja prãm kênã kot ka kêt ri axtem nê ixkaga. Kot puj mẽ Tirtûm kãm hprãm xà hkôt tanhmã amnhĩ nhĩpêx to ho ri papa. Anê.

Hãmri nhũm kuma nê kãm:

—Tôe. Nà kot paj akrã kumrã. Anê.

¹⁶ Hãmri nê pyhti hwÿr o wrÿ nê kamã hkrã kumrã. Hãmri nê wa akupÿm api nê gô mÿ ri ãm rãhã nhũm kaxkwa axkjê. Hãmri nhũm kurûm Tirtûm Karōja Jejus wÿr te tuuti pyrã nê ahpar mã hwÿr wrÿk o tẽ nê ïkre hã xa. Nhũm Jejus arĩ amnhĩ wÿr wrÿk o htẽm kãm omunh o xa. ¹⁷ Hãmri nhũm Tirtûm kaxkwa rûm kãm kapêr nê kãm:

Pa? E apê ixkra mex na ka. ãm hãmri na ka hte ixkanrêhã ã amnhĩ nhĩpêx mex anê.

Inhmã ajapê kamã na ka ri apa ho apa. Anê.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mãänên Eprêw 2.18, 4.15

¹ Tã nhũm Jejus Tirtûm Karō nhÿ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa. ² Ri pa hã apkati xohtô nê. Ra hã arĩgro pê 40. Nê kormã apkur kêt jakamã ra kãm prãm tÿx kumrêx nê ri pa. ³ Hãmri nhũm Satanastija nhÿhÿnh hwÿr tẽ nê hêx rom kãm kapêr nê kãm:

—Pa. E kwa mãn ka ra amã prãm tÿx nê nà? Nom xep apê Tirtûm Kra jakamã apê mẽmoj hihtÿx kêt. Tirtûm pyrã nê axàhpumunh o axàhpumunh kênã. Jakamã kwa kên nhĩkwÿ mÿj mã anê kê amã pãwti hã amnhĩ jahkre ka aku nê tokyx ho amnhĩ xihtÿx. E kwa tokyx kãm akapêr. Anê.

⁴ Hãmri nhũm kuma nê kãm:

—Tk. Nà kot paj amar xà hkôt ã ri amnhĩ nhĩpêx anhÿr kêt nê. Kojã Tirtûm kãm inhmã mẽmoj nhõr prãm nê inhmã mẽmoj gō pa rĩ kormã kukrê. Kapêr ã kagã htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mãänên Tirtûm kapêr ma nê hkôt amnhĩ nhĩpêx nê htĩr nê pa. Anê.

—ã kapêr ã kagã kamã kot harênh kot anhÿr jakamã kot paj akapêr kôt ri ã amnhĩ nhĩpêx anhÿr kêt nê. ãm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwÿr o mō. Nê Tirtûm mã amnhĩ jarênh xà hã ixkre hprêk nhĩmök wÿr ho api nê kÿxpê hatur xà hã ãm nhũm xa. Hãmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

⁶ —E apê Tirtûm Kra jakamã kwa ja rûm ahpar mã ajarĩ nê ma tẽ nê pikap tẽm. Koja Anhîpêxàja apumunh mex nê ka tanhmã amnhĩ to hkêt nê. Kapêr ã kagà htùm kot harênh kot:

Tirtûm koja kapêr o wryk xwýnh kwýjê mã ajarê ka ajarĩ nê ahpar mã tẽ nhùm mẽ kýx pê amý nhùm mêmoj akà hyr kêt nê. Anê.

—Ã kapêr ã kagà htùm kot ajarênh anhýr jakamã e tokyx ajarĩ. Anê.

⁷ Hãmri nhùm Jejus kuma nê kãm:

—Tk kot paj ri ate inhmã karõ xàja kôt ã amnhĩ nhîpêx anhýr kêt nê. Koja Tirtûm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tirtûm kapêr ã kagà htùm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhîxi jarênh kôt tanhmã amnhĩ nhîpêx to hkêt nê. Anê.

—Ã kot ja nê kapêr kot anhýr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tirtûm tãm kot inhmã ã ixte amnhĩ nhîpêx anhýr ã karõre hã. Anê.

⁸ Hãmri nhùm Satanasti tee ri kuma nê hpãnhã ma nhýri kên prêeti hwýr o tẽ nê himõk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhùm kãm ahkre ho xa. Kàxpore nê mêmoj mex piitã nhùm kãm ahkre nhùm Jejus piitã omunh o xa. ⁹ Hãmri nhùm kê Satanasti axte kãm:

—E mãn ka kam ri mêmoj mex mûj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mêmoj piitã ho anhõ nê ho amnhîptãr o apa. Jakamã e kwa tokyx. Anê.

¹⁰ Hãmri nhùm kuma nê axte kãm kapêr nê kãm:

—Tk kwa ma nhýhým tẽ Satanasti. Kot paj ri amã amex o amex ã ajarênh kêt kumrêx. Tirtûm kapêr ã kagà htùm kot ja nê kapêr kãm hihtýx kênã. Kapêr kot:

Kêr ka mẽ ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka mẽ ã amnhĩ nhîpêx anhýr o ri apa.

—Anhýr o kot hã karõ jakamã kot paj amã amex o amex ã ajarênh kêt kumrêx. Anê.

¹¹ Hãmri nhùm tee ri amnhĩ tã kuma hãmri nê ma tẽ. Tee ri kãm kapêr kapryja ã amnhĩ pumu hãmri nê hkaga nê ma tẽ. Hãmri nhùm Tirtûm kapêr o mẽ wryk xwýnhjaja Jejus wýr wry nê tanhmã ho mex to nê kãm õ nhùm kukrê nê akupým hihtýx.

Jejus kot Garirej kamã kapêr o pa

Makre 1.14-15; Rukre 4.14-15

¹² Tã nhùm Juãw Paxisja mêmoj tã pahi Eroxo mã akir nhùm amnhĩ tã kuma nê gryk xàj haxà nhùm hkrĩ ho hkrĩ. Hãmri nhùm Jejusja harênh ma nê ma akupým Garirej kamã krĩ pê Najare hwýr ma akupým tẽ. ¹³ Hãmri nê ra pøj nom kamã ri pa hkêt nê. Nê hpãnhã kurûm kato nê ma krĩ pê Kapanau hwýr tẽ. Gõ rax pê Garirej mýri na pre. Pika hkwy pê Jepurõ mẽ Natari wa mẽ kamã na pre nhùm Jejus ma hwýr tẽ. Hãmri nê kamã pa. ¹⁴ Nhùm ra amnepêm Tirtûm nhý hã kapêr jarênh o mẽ pa xwýnh finat Ijaisja Jejus kukamã ra mẽ panhîgêjtjê mã ã kot amnhĩ nhîpêx anhýr ã harê nê hã kagà. Jejus kot ã mẽ hwýr mör anhýrja kukamã nhùm pre harê nê hã kagà. ¹⁵ Pika hkwy kamã mẽ pa xwýnhjaja nhùm pre mẽ hkukamã mẽ harênh mex nê. Nê pika pê Garirej kamã mẽ pa xwýnhjaja nhùm pre mãânên mẽ hkukamã mẽ harê. Nê pyhti pê Jotãw mẽ gõ xujanãr wa hkaêx kãm pika piitã kamã mẽ pa xwýnhjaja. Nê krĩ pê Garirej kamã mẽ kêp Ijaew kêt xwýnhjaja nhùm pre mãânên mẽ harê. ã na pre finat Ijaisja mẽ hkukamã Tirtûm nhý hã mẽ piitã mẽ harê nê hã kagà anê. Jejus kot ma mẽ hwýr mörja kukamã nhùm ra hprĩ hã harê nê hã kagà. Nê hã kagàja o:

¹⁶ E. Kot paj mẽ amã mêmoj mex jarê ka mẽ inhma. Mẽ ate Tirtûm pumunh kêt jakamã te mẽ ate kamãt kô kamã ri apa pyrãk. Tã koja Tirtûm mẽ amã amnhĩ to amnhîrit ka mẽ hpãnhã te mẽ ate hirã kamã ri apa pyrãk o amnhĩ nhîpêx nê ra hkôt amnhĩ xunhwý.

Anhýr o mẽ hkukamã mẽ harê nê hã kagà. ¹⁷ Tã nhùm ra kot hkukamã mẽ kãm ujarênh xà hkôt nhùm Jejusja mẽ hwýr mör nê mẽ kãm Tirtûm kapêr jarênh o ri mẽ hkôt pa. Nê

mê kãm tanhmã amnhĩ jarênh to ho pa. Nom kormã hprĩ hã mê kãm amnhĩ jarênh kêt nê. Te ho nhãm mēhõ jarênh pyrãk o mê kãm amnhĩ jarê nê mê kãm:

—E na ra Tĩrtũmja kot mê akaxyw ãm xwỳnhta mê nhũm mê awỳr wrỳ. Jakamã kwa mê tokyx tee ri ate amnhĩ tomnuj ã amnhĩ pumu nê ã ate amnhĩ nhĩpêx anhỳr kaga nê hpãnhã Tĩrtũm kôt mãn amnhĩ nhĩpêx o ri apa.

Anhỳr o mê kãm kapêr o pa pê mê ahkre ho ri mê hkôt pa.

Jejus kot amnhĩ wỳr tep pynênh xwỳnhjê hwỳr

Makre 1.16-20; Rukre 5.1-11

¹⁸ Tã nhũm Jejus ma gô rax pê Garirej mỳ ri pa nê gôx kãm ja wa omu. Simãw Pêtre mê htõ Andreja nhũm wa gôx kãm kryhti rênh o wa xa. Hãmri nhũm Jejus wa hwỳr tẽ nê wa omu nê amnhĩ kôt wa kuwỳ nê wa kãm:

¹⁹ —Pa. E kwa ma ixkôt mãn war apa. Kot paj tanhmã war ajahkre hto ka wa ma mê kãm ijarênh o ri apa. Mê kot war amar nê ra ixkôt amnhĩ xunhwỳr kaxyw. Anê.

²⁰ Hãmri nhũm wa kuma nê kryhti re nê wa ma hkôt htêm kurê kumrêx. ²¹ Hãmri nhũm mê ma nhãm axte mō nê ra jajê hwỳr kato. Jepetew mê hkra Xiakre mê Juãwja nhũm wa mê hwỳr kato. Nhũm mê õ pàr kãm kryhti ho mex o wa mê nhỹ. Hãmri nhũm mê hwỳr mra nhũm Jejus amnhĩ kôt ja wa kuwỳ nê wa kãm:

—Pa Xiakre mê Juãw. E wa ma ixkôt mãn wa apa. Anê.

²² Hãmri nhũm wa kuma nê hipêxà mã amnhĩ jarê nê ma hkôt pa ho pa kurê kumrêx.

Jejus kot tanhmã amnhĩ nhĩpêx to

Rukre 6.17-19

²³ Tã nhũm Jejus Garirej kamã Ijaew mã Tĩrtũm kapêr jarênh o pa. Na pre hte Tĩrtũm kapêr o mê ahkre xà hã ixkre hwỳr agjê nê kamã mê kãm Tĩrtũm kapêr jarênh o hkrĩ nê mê kãm:

—E mê tee ri ate amnhĩ tomnuj ã amnhĩ pumu nê hpãnhã Tĩrtũm kôt mãn amnhĩ nhĩpêx o ri apa. Kot kaj mê ã amnhĩ nhĩpêx anê nhũm ja hã mê apumu nê mê ato hkra kurê kumrêx. Anê.

Hãmri nê akupỹm mê kãm mê à xwỳnhjê ho mex. Ahpỹnhã tanhmã mê à kute xwỳnhjaja nhũm akupỹm mê ho mex o pa. ²⁴ Jakamã nhũm mê piitã pikaja kamã ri axpên mã harênh o hprôt. Nê pika pê Sir kôt mãânên ma ri axpên mã harênh o hprôt. Nhũm mê piitã harênh ma nê ma hwỳr mê à xwỳnhjê ho mra. Ahpỹnhã ri tanhmã mê à kute xwỳnhjaja. Mê à htỳx xwỳnhjaja. Nê mê ĩ kamã mê htyk xwỳnhjaja. Nê mê hkrã pipãnh xwỳnhjaja. Nê mêkarõmnuti kot Satanasti nhỹ hã tanhmã ri mê ho xwỳnhjaja. Nhũm prem mê hamỳ nê ma Jejus wỳr mê o mra nhũm mê omu nê akupỹm mê ho mex pa.

²⁵ Jakamã nhũm mê ohtõ nê ma hkôt pa. Krĩ pê Garirej rũm nê Tekap rũm nê Jerujarê rũm nê pika pê Jutej rũm. Nê pyhti pê Jotãw nhĩkjê rũm mê pa xwỳnhjaja. Nhũm mê ã ohtõ nê ma Jejus kôt omunh o pa anê.

5

Jejus kot tanhmã mê ahkre hto

Rukre 6.20-23

¹ Nhũm Jejus amnhĩ kôt ri mê kot omunh o mê pa xwỳnhjê pumu hãmri nê mê ahkre kaxyw ma tẽ nê hixêt ã api nê himõk ã nhỹ. Hãmri nhũm mê ma hkôt mra nê pu hã hkrĩ pa. ² Hãmri nhũm mê ahkre nê mê kãm:

³ E mê inhma. Kot kaj mê atõ amnhĩ kaxyw tanhmã Tĩrtũm mê wa inhma ajamxpêr to nê ajamxpêr o: “Koja Tĩrtũm inhĩhkõ hã pa hkêt pa ixtỳx ri tanhmã amnhĩ tomnuj to ho ri ixpa rãhã ho ri ixpa.” Anhỳr o ajamxpêr. Hãmri nhũm Tĩrtũm ã ajamxpêr anhỳr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

⁴ Nê kot ka mê atõ tanhmã amnhĩ tomnuj to. Hãmri nê tee ri ja hã amnhĩ pumu nê apijaam nê akapri nê. Nê akapri xaj amỳr o nhỹ. Amỳr rax nê. Hãmri nhũm

Tirtûm ja hã apumu nhûm ja kãm mex nê. Jakamã nhûm anê akaprî hta nê ato mex nê ka ajamakêtkati nê axàmnhîx akînh nê ri apa.

- ⁵ Nê kot ka mē atō agryk tokyx anhÿr kêt nê. Nê kritpê m amnhî tã amã mē hkaprî ho ri apa. Hãmri nhûm Tirtûm ja hã apumu nhûm ja kãm mex nê. Hãmri nhûm ato mex nê ka ajamakêtkati nê axàmnhîx akînh nê ri apa.
- ⁶ Nê kot ka mē atō amã Tirtûm kãm hprãm xà hkôt amnhî nhîpêx o ri apa hprãm nê. Nhûm amnhî tã apumu nhûm ja kãm mex nê. Hãmri nhûm ato mex nê tanhmã akrã hto ka hkôt pix mã amnhî nhîpêx o ri apa. Jao ajamakêtkati nê axàmnhîx akînh nê ri apa.
- ⁷ Nê mē kamã mē axukaprî ho ri apa xwÿnhjaja na hte Tirtûm ja hã mē apumu nhûm ja kãm mex nê. Jakamã na hte mē hã mē apyrà nê mē akamã ukaprî ho pa. Jao mē ato mex nê ka mē ajamakêtkati nê axàmnhîx akînh nê ri apa.
- ⁸ Nê kot ka mē atō ã ajamaxpêr anê nê ajamaxpêr o: “Nà kot paj ãm Tirtûm kapêr kôt pix mã ri amnhî nhîpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhûm Tirtûm amnhî tã mē apumu nê mē ato mex nê. Ka mē ajamakêtkati nê axàmnhîx akînh nê ri apa. Nê nhÿrmã Tirtûm wÿr api nê kuri amex rãhã apa ho apa.
- ⁹ Nê kot ka mē atō mēhō wa kot axpên kutã amnhî xãm xwÿnhta axpên tã wa omu nê wa kot tanhmã axpên nhîpêx tota nê tanhmã wa kãm akapêr to nê akupÿm tãm wa ãm. Hãmri nhûm Tirtûm ja hã apumu nhûm ja kãm mex nê. Nê apê hkra hã ajarê ka ajamakêtkati nê axàmnhîx akînh nê ri apa.
- ¹⁰ Nê koja mēhō mē ate Tirtûm kapêr mar xà hkôt amnhî nhîpêx o apa hã mē apumu nê hã tanhmã mē anhîpêx kati hto. Tã nom koja Tirtûm arî mē ato mex nê. Mē apê hkra jakamã mē kot tanhmã mē anhîpêx hto htã ka mē ajamakêtkati nê axàmnhîx akînh nê ri apa.

¹¹⁻¹² —Kwãr mē mãmri ixtã mē ato kapêr rÿ mē ato hêx rÿ tanhmã ri mē atomnuj to. Kwãr mē mãmri ã mē anhîpêx anê. Nom kêr ka mē arî amnhî kaxyw inhmã ajamaxpêr tÿx rãhã pê ajamakêtkati nê axàmnhîx akînh nê ri apa. Kwãr mē mãmri ixtã ã mē anhîpêx anê nê mē amex kêt ã mē ajarê. Amnepê m na prem ã Tirtûm nhÿ hã kapêr jarênh xwÿnhjê nhîpêx anê. Jakamã koja mē urak nê ã mē anhîpêx anê. Hãmri nhûm Tirtûm ja hã mē apumu nê amnhîm mē amex ã mē ajarê. Hãmri nê nhÿrmã kaxkwa kamã wa inhō krî kamã mē ato mex nê. Jakamã kêr ka mē ã amnhî kukamã ajamaxpêr anhÿr pê mãmri akînh nê ajamakêtkati nê axàmnhîx ri apa. Kwãr mē mãmri ã wa ixtã mē anhîpêx anê. Anê.

Jejus krajaja te kot kaxwa mē kanê hpôk wa urak

Makre 9.49-50; Rukre 13.34-35

¹³ Nhûm Jejus arî mē kãm kapêr nê mē kãm:

—Nê mē ate ixkôt amnhî xunhwÿr xwÿnhjaja te mē ate kaxwa pyrak. Kaxwaja mē apkur xà ho ành mã mex. No koja mēhō tèn kamã pika hkwÿ mē nê ho ahkà. Hãmri tanhmã kot wem ho nê akupÿm ho mex? Nà koja akupÿm mex kêt nê. ãm mē kot hkapîr pix kaxyw koja mex. Ja pyrà nê kot ka mē atō ate inhmã tanhmã amnhî nhîpêx to ho apa hã amnhî jarênh tã gaa nê rî amã ixkôt amnhî nhîpêx prãm kêt nê. Hãmri nê ra te apê kaxwa mē pika pihkarta pyrak. Kwa mē ixujarênh ma nê kãm ajamaxpêr tÿx rãhã ho ri apa.

¹⁴⁻¹⁶ —Nê te mē ate kanê hpôk pyrak. Nê te mē ate hixêt prêk nhîmök ã krî xãm pyrak. Koja krîja hixêt prêêti nhîmök ã xa nhûm mē piitã omu. Nê kanêja. Xà na htem kanê hpôk nê poti ho hpro? Nà na htem hpôk nê kÿx pê mēmoj nhîmök ã unhwÿ nhûm mē piitã mē kãm hirã nhûm mē hirã kamã mēmoj pumunh mex nê. Ja pyrà nê kot kaj mē tãm amnhî nhîpêx o ri apa nhûm mē piitã ja hã mē apumunh kôt ra kaxkwa kamã Tirtûm mex ã harênh o pa. Anê.

Jejus kot tanhmã Mojes kapêr jarênh to

Rukre 16.16-17

¹⁷ Nhùm Jejus arĩ mẽ kãm kapêr nê mẽ kãm:

—Nê amnepêm Mojes kot Tirtũm nhỹ hã Ijaewjê mã tanhmã mẽ kot amnhĩ nhĩpêx to hã mẽ kãm karõja. Nê amnepêm Tirtũm nhỹ hã kapêr jarênh o mẽ pa xwỳnhjê kapêrja. Ixte mẽ kapêr o ijapêx kaxyw na pa pre mẽ awỳr ixwỳk kêt nê. Jakamã kwa mẽ ri ã axpên mã ijarênh anhỹr kêt nê. Kêt ixprĩ hã ixte mẽ amã mẽ kapêr jarênh nhùm mẽ ate mar mex kaxyw na pa pre kaxkwa rùm mẽ awỳr wrỳ.

¹⁸ —Tirtũm kapêr ã kagà htũm kot mẽmoj jarênhja. Koja ujarênh xà hkôt mẽmoj tanhmã amnhĩ to hpar mẽ nhùm rĩ kormã kaxkwa mẽ pika wa hapêx pa nhùm kapêr ã kagàja mãânên hapêx. Nom nhùm Tirtũm kapêr koja mẽmojja pyrã nê aa hapêx kêt nê. Koja rãhã ho rãhã nê aa ihkjê ho tanhmã mẽnh to hkêt nê. Am hãmri na pa ã mẽ amã harênh anê.

¹⁹ —Nê kot ka mẽ atõ Tirtũm kapêr o pixire nê hirõp xa. Hãmri nê ra amnhĩ pyrã nê anhĩõ mã ja hã amỳnê. Apyrã nê kot hirõp am kaxyw ka kãm hã amỳnê. Kot kaj ã amnhĩ nhĩpêx anê hãmri nê apê Tirtũm kra hkêt ã amnhĩ to amnhĩrit. Nom kot ka kêt mẽ tãm amnhĩ nhĩpêx o ri apa. Nê amnhĩ pyrã nê tãm mẽ kot amnhĩ nhĩpêx kaxyw mẽ kãm akapêr o ri apa hãmri nhùm Tirtũm ja hã apumu nê ato hkra nê ato mex nê.

²⁰ —No Parijew nhõ xwỳnhjaja nê Tirtũm kapêr tũm o mẽ ahkre ho mẽ pa xwỳnhjaja. Mẽ kot Tirtũm kapêr kôt amnhĩ nhĩpêx mex ã amnhĩ jarênh tã no am hkôt ã amnhĩ nhĩpêx anhỹr kêt nê. Jakamã kot kaj mẽ hkôt amnhĩ nhĩpêx o ri apa hãmri nê mẽ uràk nê nhỹrmã Tirtũm mẽ wa inhõ krĩ kamã apa hkêt nê. Anê.

Mẽ gryk o mẽ pa xwỳnhjê jarênh

Rukre 12.58-59; mãânên Rõmãn 12.19; Epes 4.26; Wam Ximotre 2.8; Xiakre 1.19-20

²¹ Nhùm Jejus arĩ mẽ kãm kapêr nê mẽ kãm:

—Nê amnepêm na prem mẽ panhĩgêjtê mã Tirtũm kapêr kwỳ jarênh o pa nê mẽ kãm: Kêr ka mẽ axpên par kêt nê. Kot kaj mẽ mẽhõx pĩ nhùm mẽ ja mỳrapê atomnuj nê. Nê ma mẽ anhõ pahĩti hwỳr ato tẽ nhùm mỳrapê tanhmã ato rỳ hkôt apĩ. Anê.

Am hãmri na prem mẽ kãm ja jarê. ²² Tã kot paj ixprĩ hã mẽ amã tanhmã harênh to ka mẽ inhma. Kot kaj mẽ mẽmoj tã anhĩõ kamã agryk. Hãmri nhùm Tirtũm tee ri ja hã apumu nhùm ja kãm mex kêt nê. Jakamã koja mẽ anhõ pahĩti tanhmã ja hã mẽ ato japêr hã koja ja mex nê. Rỳ kot kaj mẽ tanhmã mẽhõ japrỳ hto. Ho hagrô rỳ ho rop. Mỳrapê kop apu akwỳ kot apynênh nê anhõ pahĩti hwỳr ato htêm nê ihkram ajaxar ronhỹx ja inhma mex nê. Rỳ kot kaj mẽ tanhmã anhĩõ mã akapêr punuj to nê kãm: “Tk. Ate ho warêhti hã. Te apê hagrô pyrãk kênã.” Anhỹr o kãm akapêr. Tã kop apu Tirtũm ra ã akapêr anhỹrja mỳrapê mẽ kot amnhĩ xà htỹx kamã hamak tũm xàta wỳr amênh ronhỹx ja inhma mex nê. Ja pumaj kwa kêr ka mẽ ã axpên mã akapêr anhỹr kêt nê. Kêt mẽ axpên mã tãm akapêr pix o ri axpên kôt apa.

²³ —Nê kêr ka mẽ tanhmã ate anhĩõ nhĩpêx hto kamã Tirtũm mã mex o mex ã harênh kêt nê. Kêr ka mẽ kãm amnhĩ jarênh o akrĩ hãmri nê ra mẽhõ kot mẽmoj tã akamã gryk xwỳnh mã ajamxpêr japêr. ²⁴ Hãmri nê akato nê ma hwỳr atêm kurê kumrêx nê wa tãm axpên mã akapêr nê tãm akupỹm axpên xãm. Hãmri nê rĩ kormã ma akupỹm tẽ nê Tirtũm mã amnhĩ jarênh jatur xãm amê nê kãm mex o mex ã harê. Kêr ka mẽ ã amnhĩ nhĩpêx anhỹr o ri apa.

²⁵⁻²⁶ —Na htem tanhmã axpên nhĩpêx to hãmri nê kot tanhmã war axpên to xwỳnhjê hõja ma õ pahi hwỳr tẽ nê kãm tanhmã kot ho xwỳnhhta jarênh kaxyw nojarê. Hãmri nhùm ra kamã gryk xwỳnhhta kot pahi mã harênh kaxyw nojarê ã harênh ma nê tee ri amnhĩ kukamã hamaxpêr nê ma hwỳr tẽ nê wa akupỹm tãm axpên xãm. Na htem ã amnhĩ nhĩpêx anê. Pahi kot wa harênh mar nê tanhmã axpên tã wa ho pymaj na htem ã amnhĩ nhĩpêx anê nê tokyx tãm akupỹm axpên xunhwỳ. No koja mẽ anhỹr kêt nhùm pahija wa harênh ma nê wa kot tanhmã axpên to xwỳnhhta õ jaxà nhùm tee ri kãm kator prãm. Hãmri nê tanhmã amnhĩ to nê ra amnhĩ pãnhã kãm amnhĩrer pa nhùm pahĩtija

rî kormã pôristi mã anê nhũm kãm ure nhũm kato. Ja pyrã nê kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê hkôt amnhĩ nhĩpêx rãhã ho ri apa. Anê.

Tanhmã mẽ pahte mẽ pahprõjê nhĩpêx to

Matêwre 19.3-9; Makre 9.43-47, 10.2-9; mãânên Rukre 16.18

²⁷ Nhũm Jejus arĩ mẽ kãm kapêr nê mẽ kãm:

—Nê na pre finat Mojesja mẽ panhĩgêtjê mã Tĩrtũm kapêr tũm kwỳ jarê nê mẽ kãm: “Kêr ka mẽ amnhĩ prõ pix tânopxar o ri apa. No mẽ kuhpa hã nhãm mễhõ ho amnhĩkati ho ri apa hkêt nê.” Anê. ãm hãmri na pre mẽ kãm ja hã karõ. ²⁸ Tã kot paj ixprĩ hã mẽ amã tanhmã harênh to ka mẽ inhma. Kot kaj mẽ nhãm mễhõ pumu nê amã ho amnhĩkati hprãm mã ajamaxpêr. Jao te ra ate ho amnhĩkati pyrãk o amnhĩ nhĩpêx. Kormã ate ho amnhĩkati hkêt tã ra hkukamã ajamaxpêr jakamã te ra ate ho amnhĩkati pyrãk o amnhĩ nhĩpêx. ²⁹ ã mẽ hamaxpêr punuj anhỹr xwỳnhjaja koja mẽ nhỹrmã ma mẽ kot amnhĩ xà htỳx kamã hamak tũm xàta wỳr ma mra nê kamã pa rãhã ho pa. Jakamã kêr ka mẽ nhãm mễhõ pumu nê amã hkĩnh japêr hãmri nê te ate ano kaxàr nê mễnh nê axte ate omunh kêt pyrãk o amnhĩ nhĩpêx. Jao hkàx ã rĩt nê ma nhỹhỹm atêm kurê kumrêx.

³⁰ —Nê kot kaj mẽ anhĩhkra ho tanhmã amnhĩ tomnuj to kaxyw. Hãmri nê tee ri ja hã amnhĩ pumu nê te ate amnhĩ nhĩhkra krãhyr nê mễnh pyrãk o amnhĩ nhĩpêx nê tanhmã amnhĩ tomnuj to hkêt nê. Mễ ìhkra ho mẽ kot tanhmã amnhĩ tomnuj to ho mẽ pa xwỳnhjaja koja mẽ nhỹrmã ma mẽ kot amnhĩ xà htỳx kamã hamak tũm xàta wỳr ma mra nê kamã pa rãhã ho pa. Anê.

Mễ pahte axpên kaga hkêt

³¹ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêtjê mã Tĩrtũm kapêr tũm kwỳ jarê nê mẽ kãm: “Kot kaj mẽ atõ aprõ kaga kaxyw hãmri nê ate hkaga hã amnhĩ jarênh ã kagã nhĩpêx nê kãm agõ nê rĩ kormã hkaga.” Anê. ãm hãmri na pre ã mẽ kãm Tĩrtũm kapêr tũm jarênh anê. ³² Tã kot paj ixprĩ hã mẽ amã tanhmã harênh to ka mẽ inhma. Kêr ka mẽ atỳx ri amã hprãm xà hkôt aprõ kaga hkêt nê. Nom koja aprõ akuhpa hã nhãm mễhõ ho amnhĩkati ka harênh ma hãmri nê amã ja hã hkaga hprãm nê mãmrĩ kam nê hkaga. Ja tanhmã kute hkêt. Nom koja ã amnhĩ nhĩpêx anhỹr kêt tã ka amnhĩ krã hkôt hkaga. Hãmri nhũm mễhõ apãnhã ho hprõ nê o pa. Hãmri nê ra kot apê aprõ ho amnhĩkati ho pa pyrãk o hipêx. Nê nija haxwỳja. Te arĩ kêp aprõ htã akuhpa hã nhãm myja o amnhĩkati o pa pyrãk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ

Xiakre 5.12

³³ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêt nê pahpãmjê mã Tĩrtũm kapêr tũm jarênh o: “Kêr ka mẽ Tĩrtũm mã mẽmoj to anhỹr ã amnhĩ jarê hãmri nê amnhĩ jarênh xà hkôt kãm tanhmã amnhĩ nhĩpêx to. Nom kêr ka mẽ atỳx ri kãm tanhmã amnhĩ jarênh to ho amnhĩ to axêx kêt nê. ãm akatàt kôt mẽ ate amnhĩ jarênh to xà hkôt kãm tanhmã mẽmoj to.” Anê. ãm hãmri na pre mẽ kãm ja jarê. ³⁴ Tã kot paj ixprĩ hã mẽ amã tanhmã harênh to ka mẽ inhma. Kêr ka mễhõ mã tanhmã amnhĩ jarênh to. Tĩrtũm mã pix mã amnhĩ jarênh kêt nhãm mễhõ mã mãânên tanhmã amnhĩ jarênh to. Nê akatàt kôt kãm amnhĩ jarê. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarênh kôt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhỹr kêt nê. Mễmoj tã amnhĩ jarê nê akatàt kôt amnhĩ jarênh kurê kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarênh kêt nê. Tanhmãn kaxkwa nhĩxi jarênh kôt mẽmoj tã amnhĩ jarênh kêt nê. Kaxkwa kêp Tĩrtũm krĩ xà maati kênã kot ka kêt mẽ axtem nê atỳx ri amnhĩ kaxyw hixi jarê. ³⁵ Rỳ mẽ kot axêx kêt kôt apumunh kaxyw pika nhĩxi jarênh kêt nê. Pika kêp Tĩrtũm par xãm xà kênã kot ka kêt mẽ atỳx ri amnhĩ kaxyw tanhmã hixi jarênh to. Nê krĩ pê Jerujarêja mãânên kêr ka mẽ ri amnhĩ kaxyw tanhmã hixi jarênh to

hkêt nê. Koja nhÿrmã Tÿrtÿm mẽ awÿr Jerujarê hwÿr ixpê pahi maati hã inhmẽ pa kamã mẽ ato amnhÿptãr o ixkrÿ. Jakamã kêr ka mẽ ri atÿx amnhÿ kaxyw tanhmã hixi jarênh to ho ri apa hkêt nê.

³⁶—Nê kêr ka mẽ kot axêx kêt kôt apumunh kaxyw mẽ ri tanhmã amnhÿ krã hkÿ jarênh to hkêt nê. Kot kaj mẽ anê nê ãm tanhmã hã harênh to kaprÿ. Xà kot kaj mẽ ajamaxpêr pix o tanhmã amnhÿ krã hkÿ hto? Nà kot kaj mẽ ho anhÿr kêt nê. Jakamã mẽ ri atÿx tanhmã harênh to hkêt nê.

Nê mẽ atÿx ri mẽmo nhÿxi jarênh kôt mẽmoj tã amnhÿ jarênh o apa hkêt nê. ³⁷ ãm akatãt kôt tãm amnhÿ jarênh kurê kumrêx. Jao mẽ kãm: “Tÿ. Nà kot paj ho anê.” Anhÿr o mẽmoj tanhmã ho. Rÿ mẽ kãm: “Nà kot paj ho anhÿr kêt nê.” Anhÿr o mẽmoj tanhmã ho hkêt nê. ãm akatãt kôt tanhmã mẽmoj tã amnhÿ jarênh to xà hkôt ho anhÿr kurê kumrêx. Mẽ kot Satanasti hkôt amnhÿ nhÿpêx o mẽ pa xwÿnh pixjaja na htem hêx rom mẽmoj nhÿxi jarênh kôt tanhmã amnhÿ jarênh to ho pa. Anê.

Mẽ pahte tanhmã axpên nhÿpêx to hã Jejus kot mẽ pamã karõ

*Rukre 6.27-30, 23.34; mãân*ên Atre 7.60; Rômãn 12.14

³⁸ Nhÿm Jejusja arÿ mẽ kãm kapêr nê mẽ kãm:

—Na prem amnepêm mẽ panhÿgêjtê mã Tÿrtÿm kapêr tÿm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa. Rÿ koja mẽhõ apê axwa hõ hkwÿr hã koja atã mã ho anê nê atã kêp wa hõ hkwÿr.” Anhÿr o mẽ kãm hã karõ. ãm hãmri na prem ã ja jarênh anê. ³⁹ Tã kot paj ixprÿ hã mẽ amã tanhmã ja jarênh to ka mẽ inhma. Koja mẽhõ tanhmã mẽ anhÿpêx to ka mẽ ãm amnhÿ tã omu nê tanhmã amnhÿ tã ho hkêt nê. Koja anhÿnep akura ka ãm omu nê tanhmã amnhÿ tã ho hkêt nê. Te ate kãm ihkjê hpêr nhÿm kot ihkjê kamã hkuranh pyrãk o amnhÿ nhÿpêx nhÿm ja amã mex nê. No amnhÿ tã tanhmã ho hkêt nê.

⁴⁰—Nê koja mẽhõ anhÿnõhkã hã awÿ nhÿm mẽ anhõ pahija amã anê ka mãmrÿ kãm agõ nê tanhmã hã kãm nê hkêt nê. Te ate hkôt kry pê kãm anhÿnõhkã hpakã ry jagjênh xwÿnhhta nhõr pyrãk o amnhÿ nhÿpêx. Nom kêr ka mẽ kamã agryk kamã kãm õr kêt nê.

⁴¹—Nê koja mẽhõ ate kãm jênh tur nê hkôt ho amõr ryy kaxyw amã kapêr ka mãmrÿ kãm ho anê. Nê kot amã nhÿri hã karõ xaja wÿr o põj nom kamã kãm õr kêt nê. Kãm ho hakrenh ryy nê rÿ kormã akupÿm kãm agõ.

⁴²—Nê koja mẽhõ õ mẽmoj kêt nê awÿr tẽ nê mẽmoj tã awÿ ka mãmrÿ kãm agõ. Rÿ nhÿm awÿr tẽ nê apê mẽmoj to ïpresta kaxyw ka mãmrÿ kãm ho ïpresta. Kêr ka mẽ ã axpên nhÿpêx anhÿr o ri apa. Anê.

Mẽ pamã axpên kÿnh ã Jejus kot mẽ pamã karõ

*Rukre 6.32-36; mãân*ên Rômãn 12.14

⁴³ Nhÿm Jejus arÿ mẽ kãm kapêr nê mẽ kãm:

—Nê na prem amnhÿ krã hkôt axtem nê tanhmã mẽ panhÿgêjtê mã mẽmoj jarênh to nê mẽ kãm: “Kêr ka mẽ amã mẽ akrãmnhwÿjê pix kÿnh nê tanhmã mẽ ho mex to. No kêt mẽ kot tanhmã mẽ ato xwÿnhjaja kêr ka mẽ mãmrÿ mẽ kamã axãhkurê ho ri apa.” Anhÿr o mẽ kãm karõ. ⁴⁴ Nom pa kot paj mẽ amã Tÿrtÿm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwÿnhjaja amnhÿ tã tanhmã mẽ ho hkêt nê. ãm tanhmã mẽ ho mex to pix hkukamã mãn ajamaxpêr. Nê mẽ ho Tÿrtÿm wÿr pix kukamã mãn ajamaxpêr. ⁴⁵ Na hte ã kaxkwa kamã Mẽpahpãm Tÿrtÿmja amnhÿ nhÿpêx anhÿr o pa. Mẽ kot amnhÿ tomnuj xwÿnhjaja nê mẽ kot amnhÿ to mex xwÿnhjaja nhÿm hte mẽ ho hpimràatã mẽ ho mex o axpên pyrãk. Jao hamê wa hwÿr na rê nê hamê wa hwÿr myyti rê nhÿm hamê wa kãm hirã ho pa. Jakamã kêr ka mẽ urãk nê mẽ piitã tãm mẽ hipêx o axpên pyrãk. Mẽ kot amnhÿ tomnuj xwÿnhjê mẽ mẽ kot amnhÿ to mex xwÿnhjê mẽ ho apimràatã mẽ ho mex o axpên pyrãk.

⁴⁶—Nê xat kaj mẽ amã mẽ piitã mẽ ho mex prãm kêt nê ãm mẽ kot mẽ ato mex xwÿnh pixjaja ka mẽ amã mẽ ho mex prãm nhÿm Tÿrtÿm ja hã mẽ apumu nhÿm ja kãm mex nê nã? Nà koja kãm mex kêt nê. Koja mẽhõ ato mex kêt tã kêr ka ãm amnhÿ rom ho mex nê.

Nhũm Tĩrtũm ja hã apumu nẽ amnhĩm amex ã ajarẽ. Mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm mẽ amnhĩ xwar mẽ ho mex. No tãm mẽ kot amnhĩ nhĩpêx xwỳnhjaja na htem mẽ piitã mẽ ho mex o axpẽn pyræk. Mẽ kot tãm amnhĩ nhĩpêx xwỳnhjaja nẽ mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpẽn pyræk.

⁴⁷ —Nẽ na hte mẽ hkwyjaja ãm amnhĩ kwỳjê pix mã kapêr mex o pa. Nom mẽ piitã tãm mẽ hipêx kêt nẽ. Nom kêr ka mẽ ã amnhĩ nhĩpêx anhỹr kêt nẽ. Kêr ka mẽ kurom mẽ piitã tãm mẽ hipêx o axpẽn pyræk. Mẽ akwỳjê mẽ mẽ akwỳ hkêt xwỳnhjaja ka mẽ hipêx o axpẽn pyræk. Nẽ tãm mẽ kãm akapêr o axpẽn pyræk. ⁴⁸ Kaxkwa kamã Mẽpahpãm Tĩrtũm pyrã nẽ mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjaja mẽ ho apimràatã mẽ ho mex o axpẽn pyræk. Na hte ã Tĩrtũmja mẽ panhĩpêx anẽ. Anẽ.

6

Mẽ pahte mẽ kêp amrakati xwỳnhjê ho mex rãhã hã mẽ pamã karõ

¹⁻² Nhũm Jejus arĩ mẽ kãm kapêr nẽ mẽ kãm:

—Nẽ na htem mẽ piitã hkwyjê noo mã tanhmã mẽ kêp amrakati xwỳnhjê ho mex to. Nom kãm mẽ hkaprĩ kamã tanhmã mẽ ho mex to hkêt nẽ. ãm hkwyjaja kot ja hã mẽ omunh nẽ mẽ mex ã mẽ harênh pix kaxyw na htem krĩ hkôt ri mẽ kêp amrakati xwỳnh piitã mẽ ho mex o pa. Nẽ mẽ pikuprõnh xà hã ixkre kamã kuhê nẽ tanhmã mẽ ho mex to. Mẽ hkwyjaja kot ja hã mẽ omunh nẽ amnhĩm mẽ mex ã mẽ ho jarkrar kaxyw. Jakamã koja nhỹrmã Tĩrtũmja axte ja hã mẽ kãm mẽmoj mex nhõr kêt nẽ. Ra jar mẽ hkwyjaja kot ja hã mẽ omunh nẽ amnhĩm mẽ mex ã mẽ harênh kênã. Jakamã kwa kêr ka mẽ ho mẽ uræk kêt nẽ. Nẽ tanhmã mẽhõ ho mex to kaxyw nẽ akwỳjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh nẽ ato jarkrar kaxyw tanhmã mẽ ho mex to nhũm kaxkwa kamã Mẽpahpãmja ja hã apumu nẽ mẽ hã tanhmã ato mex to hkêt nẽ. Koja ãm hã apumu.

³ —Ja pymaj kêr ka mẽ mẽ kêp amrakati xwỳnhjê mã mẽmoj nhõr kaxyw hãmri nẽ mẽ piitã mẽ no hkàx ã tanhmã mẽ ho mex to. Hãmri nẽ nhãm ri ja hã mẽ kãm amnhĩ to jarkrar kêt nẽ. Aprõ mã rỳ akrajê mã rỳ akràmnhwỳ mã hã amnhĩ jarênh kêt nẽ. ⁴ Kot kaj mẽ no hkàx ã tanhmã ho mex to no nhũm Tĩrtũm tapxipix apumunh o nhỹ. Hãmri nẽ ja hã ato mex rax nẽ ka amex nẽ apa. Anẽ.

Tanhmã mẽ pahte Tĩrtũm mã amnhĩ jarênh to hã mẽ pamã karõ

Rukre 11.1-13, 18.9-14

⁵ Nhũm Jejus arĩ mẽ kãm kapêr nẽ mẽ kãm:

—Nẽ mãănẽn ja. Na htem hakwa pix o amnhĩ mex ã amnhĩ jarênh xwỳnhjaja Tĩrtũm mã amnhĩ jarênh kaxyw nẽ mẽ kot Tĩrtũm kapêr o mẽ ahkre xà hã ixkreja wỳr agjê. Nẽ mẽ piitã mẽ noo mã kãm tanhmã amnhĩ jarênh to. Rỳ gáp kuhê nẽ mẽ piitã mẽ noo mã kãm amnhĩ jarê. Tã mẽmo kaxyw na htem mẽ noo mã Tĩrtũm mã amnhĩ jarê? Nà ãm mẽ kot ja hã mẽ omunh nẽ mẽ mex ã mẽ ho jarkrar pix kaxyw. Nẽ mẽ harênh o: “E mũjti pumu. Na hte apkati mẽ ã Tĩrtũm mã amnhĩ jarênh anẽ. Kot amnhĩ to mex xwỳnh mãn.” Anhỹr ã harênh kaxyw. Tã ra mẽ piitã mẽ kot ja hã omunh nẽ amnhĩm mex ã ho jarkrar jakamã koja Tĩrtũm axte ja hã tanhmã ho mex to hkêt nẽ. Ra pika ja kamã mẽ kot mẽ omunh nẽ mẽ mex ã mẽ harênh kênã. ⁶ No mẽ kajaja. Kêr ka mẽ uræk nẽ ã amnhĩ nhĩpêx anhỹr kêt nẽ. ãm Tĩrtũm mã amnhĩ jarênh kaxyw nẽ akwỳjê no hkàx ã hitom wỳr agjê nẽ hitom kãm ahte kãm amnhĩ jarê. Hãmri nhũm Tĩrtũm tapxipix ja hã mẽ apumu. Mẽ amã amnhĩ to amnhĩrĩt kêt tã mẽ apumu. Hãmri nẽ mẽ ato mex nẽ.

⁷ —Nẽ mẽ kêp Tĩrtũm kra hkêt xwỳnhjaja na htem sãnti mã amnhĩ jarênh kaxyw nẽ xatã kãm amnhĩ jarê. Nẽ xatã kàx pêê kãm amnhĩ jarê. Nẽ hamaxpêr o: “Kot paj xatã sãnti mã amnhĩ jarê nhũm inhmar japêr.” Anhỹr o hamaxpêr jakamã xatã kãm amnhĩ jarê. No ãm htỳx ã hamaxpêr anhỹr kaprỳ. ⁸ Jakamã kwa kêr ka mẽ ho mẽ uræk kêt nẽ.

Tirtûm ra kot mē ate mēmoj tā hwÿr xàta ra ja kukamā kot omunh mex kēnā kot ka kêt mē xatā hā hwÿr o akuhê.

⁹ —Nê kêr ka mē kām amnhī jarēnh kaxyw nē amnhī krā hkôt tanhmā kām amnhī jarēnh to rÿ kām amnhī jarēnh o:

Pa Mēinhīpêêxà maati pē kaxkwa kamā ri apa xwÿnh? Amex o amex Tirtûm.

¹⁰ Apê mē ijamār mex xwÿnh maati na ka.

Na hte kaxkwa kamā mē kot ri amā tanhmā amnhī nhīpêx to ho mē pa xwÿnhjaja akôt pix mē amnhī nhīpêx o ri pa. Tā ijaxwÿja inhmā mē urāk nē akôt pix mē amnhī nhīpêx o ri ixpa hprām.

¹¹ Nê kwa jarāhā mē inhmā mēmoj gō pa mē akukwak ri ho apku.

¹² Na pa hte tōhā amnhī tomnuj nē Tirtûm. Nom mē kot tanhmā ixtomnuj to xwÿnhjaja na pa hte am mē omu nē amnhī tā tanhmā mē ho hkêt nē. Nē ja ho ijamakêtkati nē axte kām ijamaxpêr kêt nē. Ā ixte amnhī nhīpêx anhÿr jakamā kwa ja hā ixpumu nē ixpyrà nē ixte tanhmā amnhī tomnuj to hā ixpumu nē hā tanhmā ixto hkêt nē. Ām ho ajamakêtkati kurê kumrêx nē axte kām ajamaxpêr kêt nē.

¹³ Nê kot paj nhÿrmā tanhmā amnhī tomnuj to kaxyw ka ja hā ixpumu nē ixte ā amnhī nhīpêx anhÿrja nē ixto htÿx nē pa tanhmā amnhī tomnuj to hkêt nē. Ām mēmoj punuj pē ixpytār rāhā ho apa Tirtûm. Tā am ja pix na hapêx. Anê.

—E kêr ka mē ā Tirtûm mā amnhī jarēnh anê. Anê.

¹⁴ —Nê koja mēhō tanhmā anhīpêx to htā ka ho ajamakêtkati nē axte kām ajamaxpêr pix o ri apa hkêt nē. Hā koja kaxkwa kamā Mēpahpām maatija ja hā apumu nē apyrà nē tanhmā ate amnhī tomnuj to ho hamakêtkati nē axte kām hamaxpêr kêt nē. ¹⁵ Nom kot kaj mē ā amnhī nhīpêx anhÿr kêt nē. Nē tanhmā mē kot mē atota ā anohtÿx rāhā ho apa hāmri nhūm Mēpahpām maatija mē apyrà nē mē ate tanhmā amnhī tomnuj to ho hamakêtkati hkêt nē. Ām hā nohtÿx rāhā ho pa ho pa. Anê.

Tanhmā mē pahte Tirtûm mā mex o mex ā harēnh to

Rukre 18.11-12

¹⁶ Nhūm Jejus arī mē kām kapêr nē mē kām:

—Nê mē kot amnhī to jarkrar xwÿnhjaja na htem Tirtûm mā amnhī jarēnh kaxyw hāmri nē tōhā ho apkur kêt rāhā kām amnhī jarēnh jakamā hkuk kaprī nē hkwyjê hkôt pa. Tā mo kaxyw na htem ā mē noo mā amnhī nhīpêx anê? am mē apkur kêt rāhā Tirtûm mā amnhī jarēnh ā mē omunh pix kaxyw. Tā ra jar pika ja kamā mē kot ja hā mē omunh jakamā koja Tirtûm nhÿrmā ja hā tanhmā mē ho mex to hkêt nē. Jakamā kwa kêr ka mē ho mē urāk kêt nē. ¹⁷ Kêr ka mē tōhā Tirtûm mā amnhī jarēnh rÿy kaxyw axàpkur kaga hāmri nē amnhī krā kahō nē amnhī jaxwÿr mux nē akuk kīnh nē ri akwyjê hkôt apa. ¹⁸ Hāmri nē nhÿri mē hkàx ā ahte kām amnhī jarē nē kām mex o mex ā harē. Kot kaj mē ā mē hkàx ā amnhī nhīpêx anê nhūm mē akwyjaja mē axàpkur kaga hā mē apumunh kêt nē. Nhūm Tirtûm pix ja hā mē apumu. Hāmri nē nhÿrmā ja hā mē ato mex nē. Anê.

Kaxkwa kamā mēmoj mex

Rukre 12.33-34; mǎānēn Sikūn Ximotre 4.8; Wam Pêtre 1.4; Eprêw 10.34

¹⁹ Nhūm Jejus arī mē kām kapêr nē mē kām:

—Nê mǎānēn ja. Kêr ka mē jar pika ja kamā akukrêx rūnh o apa hkêt nē. Kêt jar mē hikukrêx koja kritpēm mex kêt nē. Kot kaj mē ho akuprō nhūm amnhôre apê homnu rÿ paratre apê homnu. Nē kàx o mē akukrêx nhūm haxwÿja apê omnu rÿ nhūm mēhō apê hkwy ho ahkī. ²⁰ Jakamā kêr ka mē akukrêx rūnh o apa hkêt nē. Kaxkwa kamā Tirtûm kot mē akutêp mē akukrêx o pikuprōnhja na kêt mex kumrêx o jar mē hikukrêx jakrenh par. Jakamā kêr ka mē amā nhÿrmā kaxkwa kamā akukrêx mex prām xàj tām mē piitā tām mē hipêx nē mē ho mex o ri apa. Nē mē kamā axukapri nē. Nē Tirtûm kôt ri amnhī nhīpêx mex nē. Hāmri nhūm ā mē ate amnhī nhīpêx anhÿr ā mē apumu nē mē akutêp mē amā mēmoj mex kwÿ jaxwÿ. Kaxkwa kamā mo amnhôre nē mo paratre? Nē kamā mo mē ahkīnh xwÿnh? am kamā amrakati kumrêx. ²¹ Kot kaj mē jar akukrêx rūnh hāmri nē

ãm tanhmã apê homnu hto pix kukamã ajam taxpêr. Nom kot kaj mẽ apê Tirtũm kra hã kaxkwa kamã akukrêx mã ajam taxpêr rãhã ho ra akĩnh nẽ ri apa.

²² —Nẽ kot kaj mẽ ixkapêr ma nẽ ixkõt amnhĩ nhĩpêx hãmri nẽ tãm amnhĩ nhĩpêx. Nẽ tãm axpên hipêx. Jao te hirã kamã arĩt mex pyrãk o amnhĩ nhĩpêx. ²³ No koja mẽhõ ixkapêr ma nẽ ãm kuma nẽ ixkwým ri amnhĩ nhĩpêx o pa. Hãmri nẽ te kamãt kô kamã mẽhõ rĩt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nẽ kãm ajam taxpêr tỳx rãhã ho ri apa.

²⁴ —Nẽ kot kaj apyxi nẽ anhõ patrãw hamẽxkrut hãmri nẽ arĩgro pyxi hã hamẽ wa kãm axapênh o amýkry hkêt nẽ. Kot kaj anẽ nẽ hõ gryk ã ihõ kaga. Ja pyrã nẽ kot kaj mẽ jar akaxpore nẽ akukrêx pix mã ajam taxpêr nẽ amã hapê ho akwýjê pê ho anhõxý ho ri apa. Nẽ gryk ã Tirtũm kãm hprãm xà hkõt tanhmã ho mẽ ho mex to hkêt nẽ. Jakamã kwa kêr ka mẽ Tirtũm pix mã mãn ajam taxpêr rãhã nẽ. Jao akaxpore nẽ akukrêx pix kukamã ajam taxpêr o ri apa hkêt nẽ. Anẽ.

Mẽ pahte tee ri amnhĩ kukamã pajam taxpêr kêt ã mẽ pamã karõ

Rukre 12.22-31; mããnẽn Piripos 4.6; Wam Pêtre 5.7

²⁵ Nhũm Jejus arĩ mẽ kãm kapêr nẽ mẽ kãm:

—E. Kwa kêr ka mẽ tee ri mẽmoj tã amnhĩ kukamã ajam taxpêr kêt nẽ. Tanhmãn axapkur xà rý axê ka mẽ tee ri hkukamã ajam taxpêr kêt nẽ. Mẽmoj piitã hkukamã tee ri ajam taxpêr o ri apa hkêt nẽ. Tirtũmja àhpumunh tỳx o àhpumunh tỳx xwýnh na. Na pre àhpumunh tỳx o mẽ anhĩpêx ka mẽ kukwak ri atĩr nẽ apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tỳx kênã. Kêp mẽ anhĩpêx xwýnh jakamã mããnẽn kêp mẽ amã mẽ anhõ xwýnh. Nẽ kêp mẽ amã mẽ axê nhõr xwýnh.

²⁶ —Mãn ka htem kuwênhre pumu. Na hte tee ri amnhĩ xapkur xà hkukamã ham taxpêr o hkaprĩ nẽ ri pa hkêt nẽ. Mẽ anhĩpêx mã maati tãm na hte kãm õ ho pa. Tã kãm mẽ ajapê htỳx o kot kuwênhre jakrenh jakamã koja urãk nẽ mẽ amã mẽ anhõ rãhã ho pa.

²⁷ —Nẽ xà kot kaj mẽ kritpêm atĩr prãm xaj ja pix kukamã ajam taxpêr rãhã nẽ ra ajam taxpêr kõt kritpêm atĩr nẽ apa? Nà kot kaj mẽ anhỹr kêt nẽ.

²⁸ —Mãn ka htem akunĩ kamã pixõrã pumu. Na hte tee ri tanhmã kute hkukamã ham taxpêr o ra hkaprĩ nẽ harir kêt nẽ. ²⁹ Tã nom muxre nẽ harir ka mẽ omu. Te ho amnepêm pahĩti Sarumãw xê mex pyrãk nom mex o hakre. ³⁰ Pixõrãreja koja mẽmo arĩgro hã htĩr nẽ mux nẽ harir tã mẽmo arĩgro hã ra grã pa nẽ hapêx. Kêp pixõrã pix nẽ hapêx tokyx anhỹr tã nhũm Tirtũm ho mex nẽ nhũm mux nẽ harir. No mẽ kajaja na hte mẽ ato mex o pixõrã ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajam taxpêr o ri akaprĩ nẽ apa? Kot kaj mẽ ã ajam taxpêr anhỹr jao kormã amnhĩ kaxyw Tirtũm mã ajam taxpêr tỳx kêt nẽ.

³¹ —Kwa mẽ tee ri axapkur xà hkukamã ajam taxpêr o ri akaprĩ hkêt nẽ. Nẽ tee ri amnhĩ kukamã tanhmã ajam taxpêr to ho ri akaprĩ hkêt nẽ. ³² Mẽ kot Tirtũm kõt amnhĩ xunhwýr kêt xwýnhjaja na htem ã ri ham taxpêr anhỹr o pa. Tã nom kêr ka mẽ ho mẽ urãk kêt nẽ. Tirtũm ra kot mẽ panhõ mẽmoj kêt kêt mẽ pahpumunh mex kênã. ³³ Jakamã kêr ka mẽ hkõt ri tanhmã amnhĩ nhĩpêx to rãhã ho ri apa. Nẽ amã ja pix tãnopxar prãm. Hãmri nhũm Tirtũm amnhĩ tã mẽ apumu nẽ apkati mẽ mẽ amã mẽmoj nhõr o pa.

³⁴ —Jakamã kwa kêr ka mẽ tee ri amnhĩ kukamã ajam taxpêr o akaprĩ nẽ apa hkêt nẽ. Tirtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajam taxpêr kêt nẽ. Kê apkati mãn. ãm jarãhã pix mã mãn mẽ ate tanhmã amnhĩ nhĩpêx tota kukamã ajam taxpêr. Tirtũm kot mẽ pahpumunh mex o pa rãhã kênã. Anẽ.

7

Mẽ pahte axpên to pakapêr punuj kêt ã kot mẽ pamã karõ

Rukre 6.37-38, 6.41-42; mããnẽn Rõmãn 2.1-3; Wam Korĩt 4.5; Xiakre 4.11-12

¹ Nhũm Jejus arĩ mẽ kãm kapêr nẽ mẽ kãm:

—Nê kêr ka mê atÿx ri amnhî krâ hkôt tanhmã akwÿjê hõ kot amnhî tomnuj to hã harênh kêr nê. Kot kaj mê ã harênh anê nhũm Tirtũm ja hã mê apumu nê mê kajaja ã mê ajarênh anê. ² Na hte tanhmã mê pahte axpên nhîpêx to hã mê pahpumunh kôt tanhmã mê panhîpêx to. ³⁻⁵ Jakamã kwa kêr ka mê mêhõ kot tanhmã amnhî tomnuj to hã omu hãmri nê hã kãm kapêr tokyx anhÿr kêr nê. Akumrêx ate tanhmã amnhî tomnuj to hã amnhî pumu nê hkaga hãmri nê rî kormã ate mêmoj tâ omunh xwÿnhhta wÿr tẽ nê hã tanhmã kãm akapêr to. Kêr ka mê ã amnhî nhîpêx anhÿr o ri apa.

—Nê xà koja mê akwÿjê hõ tanhmã amnhî tomnuj to grire. Ka ate amnhî tomnuj tÿx o hakrenh tâ ã kot amnhî nhîpêx anhÿr ã omu nê hã kãm akir nhũm amã ja mex nê nã? Nã koja amã ja mex kêr nê. Kot ka akumrêx ate tanhmã amnhî tomnuj tota kaga hãmri nê rî kormã anhîõ tanhmã kot amnhî tomnuj to grireta nê kãm akapêr nhũm ja amã mex nê.

⁶ —Nê xà na htem mê apkur xà mex jamÿ nê rop mã kurê? Nã na htem anhÿr kêr nê. Ja pyrã nê kêr ka mê kot Tirtũm kaga xwÿnhjê mã kapêr jarênh o ri apa hkêr nê. Anê.

Mê pahte mêmoj to presija hã amnhî to Tirtũm wÿr

Makre 11.24; Rukre 11.5-13; Juãw 14.13-14; mãânên Wam Tesarõn 5.17; Xiakre 1.5-8, 4.1-3

⁷⁻¹¹ Nhũm Jejus arî mê kãm kapêr nê mê kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhũm krãhyre gre hã awÿ ka axtem nê makre hõ py nê kãm agõ? Nã na ka htem ã mê hipêx anhÿr kêr. Na ka htem kot mêmoj tâ mê awÿr xà hkôt kãm mêmoj gõ. Mê ate amnhî tomnuj tâ na ka htem akrajê ho mex o ri apa. Tã kaxkwa kamã Tirtũmja na hte mê ato mex o mê ate mê akrajê ho mex jakrenh. Kãm mê ajapê htÿx kôt na hte mê amã mêmoj mex nhõr o pa. Jakamã kot ka mê mêmoj tâ awÿ nhũm mê ama nê mê ate mêmoj tâ hwÿr xàta kôt amã kugõ. ãm xatã mê ate hã axàhwÿr o ri apaja nhũm mê amã hprãm xwÿnhhta gõ. ãm mêmoj tâ hwÿr rãhã ho ri apa nhũm mê ama nê mê amã mêmoj tanhmã hipêx to. Te ho mêhõ kãm tep xành nê teprênhxà hpyr nê xatã gõx kãm rênh o ãm pyrã nê xatã mêmoj tâ awÿ. Hãmri nhũm mê ama nê mê amã hprãm xwÿnhhta gõ. Te tep kanhêr xwÿnhhta jatã kot tep kanhêr pyrãk. Jao mê amã mêmoj prãm xwÿnhhta gõ.

¹² —Nê mê piitã mê kot tãm mê anhîpêxja na mê amã hprãm. Tã kêr ka mê amnhî pyrã nê tãm mê piitã mê hipêx o ri apa. Mê kot tãm mê anhîpêx kêr tâ kêr ka mê axãmnhîx mê kêp anhõxÿ hkêr nê tãm mê hipêx. Kot kaj mê ã axpên nhîpêx anê nê finat Mojes mê Tirtũm nhÿ hã mê kapêr o mê pa xwÿnhjê xujarênh xà hkôt axpên nhîpêx mex o ri apa. Anê.

Pry pijakrut jarênh

Rukre 13.24; mãânên Piripos 3.19-21

¹³⁻¹⁴ Nhũm Jejus arî mê kãm kapêr nê mê kãm:

—Tirtũm kapêrja mê kêp hihtÿx jakamã na htem ohtõ nê hkôt amnhî xunhwÿr kêr nê. Na htem ãm hpÿnhre nê hkôt amnhî xunhwÿ nê hkôt amnhî nhîpêx. Jakamã te Tirtũm nhõ krî hwÿr pry grireta ã hpÿnhre nê pa pyrãk. No nhũm Satanasti hkôt mê kot amnhî xunhwÿr xwÿnhjaja na htem Satanasti kôt pix mã tanhmã amnhî tomnuj to hprãm. Mê kãm mex jakamã nhũm mê amnhî nhîpêx o te pry krepak rax ã axpên kôt mê ohtõ nê pa pyrãk o amnhî nhîpêx. Axtem kuwy hwÿr pry krepakja nõr tâ nhũm mê htÿx kuwyja wÿr amnhî to pa. Jakamã Tirtũm kapêrja mê apê hihtÿx tâ kêr ka mê mãmrî hkôt amnhî xunhwÿ. Jao Tirtũm nhõ krî hwÿr pry grireta ã mãn apa. Anê.

Mê kot amnhî to hêx xwÿnhjê jarênh

Rukre 6.43-44; mãânên Xiakre 3.9-12; Wam Juãw 3.10, 4.4-6

¹⁵ Nhũm Jejus arî mê kãm kapêr nê mê kãm:

—E kwa mê o kora. Mê akwÿjaja kot kêp Tirtũm nhÿ hã kapêr jarênh xwÿnh ã amnhî jarênh tâ na htem ja hã amnhî to hêx. Nhũm htem kãm mê kapêr mar prãm nê. Te mê kapêr mex pyrãk tâ no nhũm htem ãm mê kãm amnhî to hêx pix o ri mê hkôt pa. Mê kot mar nê axtem nê Tirtũm kapêr kwÿm tanhmã amnhî nhîpêx to kaxyw nhũm htem hêx rom tanhmã mê kãm kapêr to. Jakamã kwa mê o kora. Mê axkãm ajamak rom nê amnhî

nê mẽ omunh mex nê. ¹⁶ Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nê rĩ kormã tanhmã mẽ harênh to. Mẽ hamaxpêr punuj xwỳnhjaja kêp Tĩrtũm nhỹ hã kapêr jarênh xwỳnh kêt. No koja mẽ tãm hamaxpêr nê tãm amnhĩ nhĩpêx ka ja hã mẽ omu nê mẽ kêp Tĩrtũm nhỹ hã kapêr jarênh xwỳnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nê rĩ kormã tanhmã mẽ harênh to. ¹⁷ Na htem hamaxpêr punuj hãmri nê hkôt tanhmã amnhĩ tomnuj to. Nom koja mẽhõ hamaxpêr mex nê hãmri nê hkôt tãm amnhĩ nhĩpêx mex o pa. ¹⁸ Na htem tanhmã hamaxpêr to xà hkôt tanhmã amnhĩ nhĩpêx to ho pa.

¹⁹ —Nê koja mẽhõ õ pĩ hpàr ô hkêt japêr nhũm tee ri omu hãmri nê krãhta nê kuwym kumê. Ja pyrã nê koja mẽhõ tanhmã amnhĩ tomnuj to ho pa nhũm Tĩrtũm tee ri ja hã omu hãmri nê ã kot amnhĩ nhĩpêx anhỹr o paja mỳrapê kuwy hwỳr kumê. ²⁰ Jakamã kot kaj mẽ tanhmã mẽ kot amnhĩ nhĩpêx to ho pa hã akwỳjê pumu nê ra aprĩ hã tanhmã mẽ kute hã mẽ omunh kurê kumrêx. Mẽ kêp Tĩrtũm nhỹ hã kapêr xwỳnh ã mẽ omu rỳ mẽ kêp hkwỳm ri kapêr xwỳnh ã mẽ omu. Anê.

Mẽ kot Tĩrtũm nhõ krĩ hwỳr gjêx mã xwỳnhjê jarênh

Rukre 13.25-27; mããnên Sikũn Korĩt 13.5; Wam Juãw 2.3-6

²¹⁻²³ Nhũm Jejus arĩ mẽ kãm kapêr nê mẽ kãm:

—Nê Inhĩpêxà Tĩrtũm mẽ wa inhõ krĩja wỳr koja mẽ piitã gjêx kêt nê. ãm mẽ kot kapêr kôt amnhĩ nhĩpêx o mẽ pa xwỳnh pixjaja koja mẽ nhỹrmã ma hwỳr agjê. Na hte mẽ hkwỳjaja ixto “Pahihti” anhỹr ã jarênh tã no ãm ixkôt ri amnhĩ nhĩpêx kêt nê. Jakamã koja mẽ nhỹrmã wa inhõ krĩ hwỳr àpir kêt nê. Kot paj nhỹrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwỳjê jarê nê mẽ kot amnhĩ tomnuj ã mẽ hkwỳjê jarê. Hãmri nhũm mẽ hkwỳ kot ixkôt amnhĩ nhĩpêx o pa hkêt xwỳnhjaja kuwyta wỳr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtĩr ri pikap ixpare ri anhỹ hã aa mẽ kot mẽmoj pumunh kêt kwỳ ho anhỹr rax nê. Nê ixkwỳjê nê mẽkarõmnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhỹr o inhmã amnhĩ jarê.

—Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwỳ hkêt. Mẽ ate ixkôt amnhĩ nhĩpêx o apare hã. ãm mẽ ate amnhĩ tomnuj xwỳnh na ka mẽ. E mẽ ma kuwy hwỳr amrar kurê kumrêx.” Anhỹr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwỳnh pixjaja ma Tĩrtũm mẽ wa inhõ krĩ hwỳr gjêx pa. Anê.

Ixkre pijakrut jarênh

Rukre 6.46-49; mããnên Xiakre 1.22-25; Wam Juãw 2.3-6

²⁴ Nhũm Jejus arĩ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhĩ nhĩpêx o mẽ pa xwỳnhjaja te mẽ kot ixujarênh ja pyrãk. Mẽ kot amnhĩ nhĩpêx o te mẽhõ kot amnhĩ kukamã hamaxpêr mex nê aptỳx kãm amnhĩm òrkwỹ nhĩpêxja pyrãk. ²⁵ Koja mẽhõ aptỳx kãm amnhĩm hipêx nhũm mẽmo arĩgro hã na wrỳk rax nê gô htãm rax nê hanhi no nhũm arĩ ãm tỳx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyrãk. Jao amex nê ajamakêtkati nê ri apa. Te ho gô htãm kot ixkre janhir nhũm arĩ ãm tỳxta pyrãk.

²⁶⁻²⁷ —No mẽ kot ixkapêr mar nê ãm mar xwỳnhjaja. Te mẽ kot mẽhõ kot amnhĩ kukamã hamaxpêr mex kêt nê htỳx mõi nê gô mỳri gyw rerek kãm amnhĩm òrkwỹ nhĩpêx pyrãk. Koja mẽmo arĩgro hã òrkwỹ hã kôk xàpêr tỳx nê na wrỳk rax nê. Nê gô htãm nê hanhi nê kêp grành pa. Jakamã koja mẽhõ ixkôt amnhĩ nhĩpêx kêt nê te kot ã kot amnhĩ nhĩpêx anhỹr xwỳnhhta pyrãk. Jakamã kwa mẽ ixkapêr mar tỳx nê hkôt amnhĩ nhĩpêx rãhã ho ri apa. Te mẽhõ aptỳx kãm òrkwỹ xãm xwỳnhhta pyrãk. Anê.

²⁸ Nhũm pre Jeusja ã mẽ kãm ujarênh ry anê nhũm mẽ amnhĩ jaêr pê kot tanhmã mẽ ahkre htoja mar o hkrĩ. ²⁹ Hãmri nê axpên mã harênh o:

—Hêxta waa nê. ãm hãmri na ã mẽ pamã kapêr anê. àhpumunh tỳx kôt na hte ãm hãmri tanhmã mẽ pamã ujarênh to. Pêr ãm Tĩrtũm kapêr tũm o mẽ ahkre xwỳnhjê kurom àhpumunh tỳx kumrêx. Anê.

8

Kà nhy hkro xàpêr o pa xwỳnh jarênh

Makre 1.40-45; Rukre 5.12-16

¹ Tã nhũm Jeus mẽ kãm kapêr pa hãmri nê hixêr prêeta rũm akupỹn wrỳ nê ma tẽ nhũm mẽ ohtô nê ma hkôt mra. ² Hãmri nhũm mễhõ my hkà nhy hkro xàpêr o pa xwỳnhja omu nê hwỳr tẽ. Hãmri nê kutã hkônkrã ho tẽm nê hipô nê nhỹ nê amnhĩ to kuwỳ nê kãm:

—Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka amã akupỹm ixto mex prãm nê mãmri ixto mex. Anê.

³ Hãmri nhũm Jeus kuma nê hkà punuti hã ãhkra xi. Amnhĩ kamã kahak kêt nê hã ãhkra xi nê kãm:

—Nà kot paj ato mex. E akupỹm akà mex. Anê.

Hãmri nhũm hkà akupỹm mex kurê kumrêx. ⁴ Hãmri nhũm Jeus kãm:

—E kêt ka amnhĩ tã mẽ kãm tanhmã ijarênh to hkêt rãhã ma patre hwỳr tẽ kê akupỹm akà mex ã apumu. Hãmri ka hpãnhã amnepêm finat Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karôta ka kãm ho anê. Kê mẽ piitã akupỹm akà mex ã apumu. Anê.

Pôristi krãhtũm mã àpênh xwỳnh jarênh

Rukre 7.1-10

⁵ Tã nhũm Jeus ma krĩ pê Kapanau hwỳr mō. Hãmri nê hwỳr pōj nhũm Rōm nhõ xwỳnh pê pôristi krãhtũmja omu nê hwỳr tẽ. Kêp Ijaew kêt tã hwỳr tẽ. Na pre kãm àpênh xwỳnh kêp à htỳx nê nō nhũm omu nê tee ri hkukamã hamaxpêr. Hãmri nê Jeus ra ò krĩ hwỳr hpôx ã omu nê hwỳr tẽ nê kãm harê nê kãm:

⁶ —Pa Jeus? E ot pa awỳr tẽ. Inhmã àpênh xwỳnhja na ixpê à htỳx nê. Ra ã kamã htyk pa nê nō. O mũj inhōrkwỹ kamã nō. Anê.

⁷ Nhũm Jeus kuma nê kãm:

—Tỳ? Tôe. Nà pa ma akôt tẽ nê akupỹm amã ho mex. Anê.

⁸⁻⁹ Hãmri nhũm tee ri kuma nê kãm:

—Kwa akĩnhã ixpê Ijaew kêt jakamã ixte amnhĩ kuk ã xpijaam. ãm ja rũm mãn akapêr pix o akupỹm inhmã ho mex nà? Ixpê mẽ hkrãhtũm na pa hte inhõ pôristi mã mẽmoj tã karõ nhũm mẽ inhmar xà hkôt inhmã mẽmoj tanhmã ho. Na pa hte mẽ kãm: “E mẽ ma mra nê ã amnhĩ nhĩpêx anê.” Anê nhũm htem inhma nê ma mrar kurê kumrêx. Rỳ pa mẽ kãm: “E mẽ amnê ixwỳr mra nê ã amnhĩ nhĩpêx anê.” Anê nhũm mẽ inhma nê ixwỳr mra. No kêt ixrom axàhpumunh tỳx kôt na ka hte mẽ àja mã akapêr nhũm ama nê mẽ kêp hapôx nê ma mrar kurê kumrêx. Jakamã kwa ãm ja rũm akapêr pix o akupỹm inhmã ho mex nà? Anê.

¹⁰ Hãmri nhũm Jeus amnhĩ jaêr pê kot kãm ã kapêr anhỹrta ma nê hkĩnh nê. Hãmri nê hã hkôt ri mẽ mōr xwỳnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tã mẽ arom amnhĩ kaxyw inhmã hamaxpêr tỳx nê. Aa mẽ atō urak nê ã amnhĩ kaxyw inhmã ajamaxpêr tỳx anhỹr kêt tã nhũm mẽ arom kãm àpênh xwỳnh kaxyw ã inhmã hamaxpêr tỳx anê. ¹¹ Nà koja nhỹrmã mẽ hkwỳjaja kêp Ijaew kêt tã ohtô nê pika piitã kurũm ma Tĩrtũm mẽ wa inhõ krĩ hwỳr api nê hwỳr agjê. Nê wa ixkuri wa inhõ krĩ kamã Ijaew pàr krax pê Apraaw nê Ijak nê Jako mẽ pimràatã pa ho pa. Mẽ kêp Ijaew kêt tã mẽ ãhkô hã apkur mex o hkrĩ nhũm Tĩrtũm mẽ ho mex rax o pa. ¹² No pêr mẽ apê Ijaew kwỳjaja kot kaj mẽ hkôt hwỳr agjêx kêt nê. Tĩrtũm kãm hwỳr mẽ agjêx prãm tã ka mẽ axtem nê hkaga. Jakamã kot kaj

mê ma kamàt kô xihitÿx rax wÿr ajapêx nê mê kêp awry rax nê mê kot amnhĩ xà htÿx kamã hamak tÿm xàta kamã apa ho apa. Hãmri nê tee ri mê ixwÿr agjêx prãm kaprÿ nê akaprĩ xàj mur nê amnhĩ kamã agryk tÿx nê. No ãm tee ri amnhĩ kamã agryk kaprÿ. Mê ate Tirtÿm kapêr kaga nê hkôt amnhĩ xunhwÿr kêt jakamã kot kaj mê nhÿrmã ã amnhĩ nhĩpêx anê. Anê.

¹³ Nhÿm pre ã Jejusja mê kãm kapêr anê. Hãmri nê pôristi krãhtÿmta mã kãm:

—E mãmrĩ ma akupÿm tẽ nê amã àpênh xwÿnhhta pumu. Ra ate kaxyw inhmã ajamaxpêr tÿx jakamã na pa ra akupÿm amã ho mex. E akupÿm tẽ nê omu.

Anhÿr o kãm kapêr rôm nhÿm ra akupÿm kãm mex kurê kumrêx.

Jejus kot ahpÿnhã mê à xwÿnhjê ho mex

Makre 1.29-31; Rukre 4.38-41

¹⁴ Tã nhÿm Jejus ma Simãw Pêtre nhôrkwÿ hwÿr tẽ nê hwÿr axà. Nhÿm Simãw Pêtre xupãnhgêx ra à nê hkà kagro htÿx nê nõ. ¹⁵ Hãmri nhÿm Jejus hwÿr axà nê omu nê ãhkra hã kupy nhÿm hkà hakry nê akupÿm hihtÿx kurê kumrêx. Jakamã kãnhmã nhÿ nê mê kãm mêõ hã àpênh o ri mra.

¹⁶ Tã nhÿm ra awjakry. Ra kamàtre ho mõ nhÿm mê piitã Jejus wÿr mê à xwÿnhjê ho mra. Nê mêkarõmnuti kot mê hwÿr gjêx xwÿnhjaja nhÿm mê hwÿr mê o mra. Hãmri nhÿm mê omu nê akupÿm mê piitã mê ho mex. Mê à xwÿnhjê ho mex nê mê hkwyjê nê mêkarõmnuti jano. ãm kapêr pix o mê nê mê hano nhÿm mê kêp hapôj nê ma hapêx.

¹⁷ Na pre ra Tirtÿm nhÿ hã kapêr xwÿnh finat Ijaisja ã amnhĩ nhĩpêx anhÿrja kukamã amnepê mẽ kãm harênh o:

Tirtÿm kot mê pahwÿr mênh mã xwÿnhja koja nhÿrmã wrÿ nê mê panê mê paxà piitã rênh pa nê akupÿm mê pahto mex pa. Anê.

Na pre ã finat Ijaisja Jejus kukamã harênh anê. Tã nhÿm wrÿ nê kot harênh xà hkôt ã amnhĩ nhĩpêx anhÿr o pa.

Wa kãm Jejus kôt amnhĩ xãm prãm xwÿnh wa harênh

Rukre 9.57-62

¹⁸ Tã nhÿm Jejus amnhĩ pu hã rĩt nê tee ri hwÿr mê mrar xwÿnhjê pumu hãmri nê hkôt mê pa ho mê pa xwÿnhjê mã kãm:

—E ma pu mê pàr mã agjê nê ma xarmã mõ. Anê.

¹⁹ Hãmri nhÿm mê nojarêt rôm nhÿm Tirtÿm kapêr tÿm o mê ahkre xwÿnhjê hõ Jejus wÿr tẽ nê kãm:

—Pa mê ijahkre xwÿnh? E pa ma akôt ri ixpa ho ixpa nà. Anê.

²⁰ Hãmri nhÿm kuma nê kãm:

—Ko ka mã. Kam nê rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwÿ. Nê kuwênhre pĩ nhĩmök ã hikwÿ. No pa ixpê Tirtÿm kot mê awÿr inhmênh xwÿnh tã mry hkĩnhã inhôrkwÿ hkêt. Na pa hte amarĩ nhãm krĩ hwÿr ixpa nê nhãm hõ hwÿr ixpa. Tã xà kot ka ixpyrà nê ã amnhĩ nhĩpêx anhÿr o ri apa nà? Anê.

²¹ Hãmri nhÿm pãnhã hõja hwÿr tẽ. Ra mê kot hkôt amnhĩ xunhwÿr xwÿnhjê hõja hwÿr tẽ nê kãm:

—Pa Pahihti. E pa amã amnhĩ jarê ka inhma. Kot paj ma akôt ixpa ho ixpa no ãm kormã. Koja nhÿrmã inhĩpêxà tanhmã amnhĩ to nê ty măn. Pa haxà hãmri nê rĩ kormã ma akôt ixpa ho ixpa. Anê.

²² Hãmri nhÿm kuma nê kãm:

—Kwa nà ri ã ajamaxpêr anhÿr kêt nê. Ma ixkôt apa ho apa kurê kumrêx. Kê mêmoj inhnê ano kupy rÿ apê àmnàr kêt nê. Kwãr mê htĩr tÿm nê mê pa hkêt mã xwÿnhjaja măn axwakre kamã amã anhĩpêxà jamãr o pa nê haxà. Anê.

Jejus kot kôk o pinhkrênh jarênh

Makre 4.35-41; Rukre 8.22-25

²³ Tã nhÿm mê ra xarmã nojarêt nhÿm Jejus mê hkôt mê pa ho mê pa xwÿnhjaja pàr wÿr agjê hãmri nê himô raxja ã ma xarmã mõ. ²⁴ Hãmri nhÿm Jejus ra õtxwa nê ra gõr

nê nõ. Puh nhũm naja hkoko ho mõ nê kôk xapêr tỳx kumrêx. Nhũm gô kànhmã harĩ nê axpên tak tỳx nê. Xatã axpên tak nê pàr kre kamã axkapĩ nhũm ra àr o mõ. Hãmri nhũm mẽ tee ri omu nê kãm ma htỳx kumrêx. Nê tee ri amnhĩ nhĩpêx. No nhũm Jejusja htỳx gôr nê nõ. ²⁵ Hãmri nhũm mẽ hwỳr hprôt nê kumra nê kãm:

—Kwa Pahihti. Kot puj mẽ jarãhã pahtyk pa. Kwa tokyx kànhmã nhỹ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrãkato nê kànhmã nhỹ nê kôk mã kapêr nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gôja tãm nõr kurê kumrêx. Hãmri nhũm Jejusja hkôt mẽ pa ho mẽ pa xwỳnhjê hwỳr apkjê nê mẽ kãm:

—Hêxta waa nê. Kwa pêr ãm kormã te mẽ ate amnhĩ kaxyw Tĩrtũm mẽ wa inhmã ajamxpêr tỳx kêt pyrãk. Hã na ka mẽ amã ma xaj tee ri amnhĩ kukamã ajamxpêr. Anê.

²⁷ Hãmri nhũm mẽ amnhĩ jaêr pê ã kot amnhĩ nhĩpêx anhỹrja ã omu nê tee ri hamaxpêr nê axpên pumunh pê omunh o kuhê. Hãmri nê axpên mã:

—Kokỹỹ. Pêr Jejus kêp mẽ panhĩo hkêt. Mẽ pahtõ kot pu we te kot amnhĩ nhĩpêx pyra nê kôk mã pakapêr nhũm hpinhkrênh kurê kumrêx? Nà Jejusja mẽ pakurom àhpumunh tỳx o àhpumunh tỳx. Anê.

Jejus kot wa nê mẽkarõmnuti janor

Makre 5.1-20; Rukre 8.26-39

²⁸ Tã nhũm mẽ ra himô rax pê Garirejja ã rê nê pika pê Geras wỳr pøj nê kamã mõ. Hãmri nhũm ra mễhõ myja wa hamêxkrut nê mẽ kutã tễ. Ra mẽkarõmnuti kot hamê wa hwỳr gjêx xwỳnhja wa. Mẻkarõmnuti xohtô kot tanhmã wa ho jakamã nhũm wa oprê htỳx nê hihtỳx rax nê wa pa. Jakamã nhũm mẽ piitã kãm wa uma nê amnhĩ nê mẽ htykjê jagiênh xà hã kên kre kaêx kãm wa kumê nhũm wa kamã pa ho pa. Jakamã nhũm wa Jejus kutã tễ nê amnhĩ wỳr omu hãmri nê amnhĩ nê tanhmã kãm kapêr to. Nom mẽkarõmnuti nhỹ hã àmra kamã kãm kapêr nê kãm:

²⁹ —Pa Tĩrtũm Kra Jejus? Mo kaxyw na ka mẽ ixwỳr tễ? Kwa tanhmã mẽ ixto hkêt nê. Ate tanhmã mẽ ixtomnu hto hã arĩgrota kormã katoore hã. Anê.

³⁰ Nhũm ra krĩ nhõ xwỳnhjê hkrit hagrô ohtô nê ri mẽ hpum pa. ³¹ Nhũm mẽkarõmnuti mẽ omu hãmri nê amnhĩ to Jejus wỳr nê kãm:

—Kwa kot ka jahti wa nê mẽ ijapôx japêr nê mẽ kot amnhĩ xà htỳx kamã hamak tũm xàta wỳr mẽ ixrênh kêt nê. Hagrô hkwỹ mũj wỳr mãn mẽ ixrê pa mẽ hpãnhã hwỳr mãn hagjê nà? Anê.

³² Hãmri nhũm mẽ kuma nê mẽ kãm:

—Tôe mẽ tãm mẽ hwỳr mãn mra. Anê.

Hãmri nhũm mẽ kuma nê myta wa kêp hapøj nê hagrô hwỳr mrar kurê kumrêx nê hpãnhã kãm gjêx pa. Hãmri nhũm hagrôta mẽkarõmnuti pymaj amỹra nê ma hprôt nê himô hã hixêt prêk ã axpum rôrôk nê gôx kãm mrô nê pikaprãr pa. ³³ Hãmri nhũm hagrô jamãr o ri mẽ pa xwỳnhjaja tee ri omu hãmri nê ma akupỹm krĩm hprôt nê mẽ kãm awjarê. Nê myta wa akupỹm tãm hkrã hã harênh o hprôt. ³⁴ Hãmri nhũm krĩ nhõ xwỳnhjaja tee ri mẽ hkrit jarênh ma nê ma piitã Jejus wỳr mra nê hkaxpa. Hãmri nê amnhĩ nê kãm:

—E kwa mẽ ma amrar kurê kumrêx. Anê.

Hãmri nhũm mẽ kuma nê awjanã nê ma akupỹm pan rê.

9

ĩ kamã htyk xwỳnh jarênh

Makre 2.1-12; Rukre 5.17-26; Juãw 10.37-38

¹ Nhũm Jejus mẽ hkôt mẽ pa ho mẽ pa xwỳnhjaja awjanã nê ma akupỹm pàr wỳr mra nê gjêx pa nê akupỹm xarmã rê nê akupỹm Jejus nhõ krĩ hwỳr mõ. ² Hãmri nê hwỳr pøj nhũm krĩ nhõ xwỳnh kwỳjaja mẽ omu nê ã kamã htyk xwỳnhja mỳ nê Jejus wỳr o tễ. Nõr xà kamã nõr rãhã nhũm mẽ hã hije nê kumỳ nê hwỳr o tễ. Hãmri nhũm amnhĩ tã

mê omu. Ra mê kot hkràmnhwÿta kaxyw kãm hamaxpêr tÿx ã mê omu nê ï kamã htyk xwÿnhhta mã kapêr nê kãm:

—Pa? Kwa tee ri amnhÿ kukamã ajamaxpêr kêt nê. Na pa ra apê tanhmã ate amnhÿ tomnuj to ho ijapêx pa. Kot paj axte kãm ijamaxpêr kêt nê. Anê.

³Hãmri nhÿm Tÿrtÿm kapêr tÿm o mê ahkre xwÿnhjaja tee ri ã kot kãm kapêr anhÿrja ã kuma nê axpên mã:

—Tk. Kwa mêhõ myti mÿj kêp Tÿrtÿm kêt tã te ri kot amnhÿ nhÿpêx pyrãk ã amnhÿ nhÿpêx. Tÿrtÿm pix na kot mê nê mê kot amnhÿ tomnuj o hapêx xwÿnh. Anê.

⁴Hãmri nhÿm Jejus amnhÿ tã mê kuma nê mê kãm:

—Kwa mê ã ajamaxpêr anhÿr kêt nê. ⁵Ixte mê nê mê kot amnhÿ tomnuj o ijapêx par ã amnhÿ jarênh tã mê ate ja kôt ixpumunh kêt jakamã na ka mê ja kaxyw ixkôt ajamaxpêr kêt nê. Nom kot paj mê anoo mã akupÿm ï kamã htyk xwÿnhhta o mex ka mê apiitã hã ixpumu hãmri nê ixkôt ajamaxpêr kurê kumrêx. Ixpê Tÿrtÿm kot mê awÿr inhmênh xwÿnhhta na pa. Ixte mê anê mê ate amnhÿ tomnuj rênh kaxyw na pre mê awÿr inhmê na mê awÿr wrÿ. ⁶Tã mê ate ja hã ixpumunh kaxyw kot paj mê anoo mã ja ho mex.

Anhÿr o mê kãm amnhÿ jarê hãmri nê ï kamã htyk xwÿnhhta mã kãm:

—E kànhmã xa nê anõr xàta py nê ma akupÿm anhõrkwÿ hwÿr tẽ. Anê.

⁷Puh nhÿm kànhmã ãm kurê kumrêx nê nõr xà py nê mê noo mã kato nê ma akupÿm õrkwÿ hwÿr tẽ. ⁸Hãmri nhÿm mê piitã no hapõx rÿnh nê omunh o kuhê nê kamã no puma htÿx nê. Nê tee ri omu nê axpên mã:

—Kokÿÿ. Kwa aa mê pahte ã mêhõ kot amnhÿ nhÿpêx anhÿr ã omunh kêt tã jarãhã ja pumu.

Anhÿr o Jejus jarê hãmri nê ÿ hã Tÿrtÿm mã mex o mex ã harê.

Jejus kot amnhÿ kôt Matêwre hwÿr

Makre 2.13-17; Rukre 5.27-32

⁹Tã nhÿm Jejus mê kêp kato nê hkôt mê pa xwÿnhjê mê nhÿm mê ma mõi. Hãmri nê pa ixpê Matêwre ixpumu. Ixte Rõm kãm mê ho amnhÿptar xwÿnh mã krÿ nhõ xwÿnhjê pê kàxpore hkwy jamÿnh xwÿnh na pa pre. Nom mê kot ho tewên kryre htã ixte amnhÿm hkwy ho ixarÿk prãm xaj na pa pre hte mê kãm ho rÿnh nê harê. Jakamã nhÿm mê piitã kãm ixkÿnh kêt nê. Tã pa pre mê kêp kàxpore jamÿnh xà hã ixkre kamã mê kêp hamÿnh o nhÿ nhÿm Jejus mê hkwyjaja ijãnh mra nê ixpumu nê amnhÿ kôt ixwÿ nê inhmã:

—Pa? E axapênhhta kaga nê hpãnhã amnê mê ixkôt mãn tẽ nê ixkôt mãn ri apa ho apa. Anê.

Hãmri pa kuma nê ixapênh kaga nê ma hkôt tẽ. Nê hpãnhã hkôt ixpa ho ixpa.

¹⁰Hãmri nê mêmõ arÿgro hã amnhÿ nhõrkwÿ hwÿr Jejus nê hkôt mê pa ho pa xwÿnhjaja mê ixkràmnhwÿ hkwyjê hwÿ. Nhÿm mê piitã mra nê inhõrkwÿ hwÿr agjê nê ixkutã apkur o hkrÿ. Nê ixpyrà nê Rõm nhõ pahi mã mê kêp kàxpore hkwy jamÿnh xwÿnh kwÿ haxwÿja ixwÿr mra nê mê ixkutã apkur o hkrÿ. ¹¹Hãmri nhÿm Parijew nhõ xwÿnhjaja mra nê inhõrkwÿ kapem mê ixàpkur ã mê ixpumu. Nê tee ri mê ixkaêx ã Jejus pumu hãmri nê hkôt mê pa ho mê pa xwÿnhjê hwÿr agjê nê mê ixtã mê kãm akir nê mê kãm:

—Kwa mê kot jajê kutã apkur kêt tã mê akrãhtÿmja axtem nê mê kutã apkur o nhÿ. Kwa nã mê kot amnhÿ tomnuj xwÿnh kênã. Jejus kot amnhÿ to mex ronhÿx mê kutã apkur kêt nê. Anê.

¹²Hãmri nhÿm Jejus amnhÿ tã ã mê kapêr anhÿrja ma nê mê kãm:

—Tk. Nà ixte tãm mê unhwÿr kaxyw na pa mê kutã ixàpkur o nhÿ. Xà na hte tõtõja mê mex xwÿnhjê hwÿr mra nê mê hkane? Nà ãm mê à xwÿnhjê pix wÿr na hte mra nê tanhmã mê hkane hto. Ra mê ate ja pumunh mex. Tã ja pyrã nê na pa pre mê kot amnhÿ to mex xwÿnhjê hwÿr ixwÿr kêt nê. Mê kot amnhÿ tomnuj xwÿnhjê pix wÿr na pa pre wrÿ. Ixte tãm mê unhwÿr kaxyw mê hwÿr wrÿ nê ã jajê kutã ixàpkur o inhÿr anê. ¹³Ga mê ma mra nê Tÿrtÿm kapêr ã kagà htÿm kot ja jarênhja kamã harê nê ama. Harênh kot:

Na ka htem inhmã tanhmã amnhĩ jarênh to kaxyw hãmri nê inhmã mêmoj gô nê tanhmã ixto mex to. Nom kêr ka mê ãm ja pix ho anhÿr kêt nê. Mê mãânên mê piitã tanhmã mê ho mex to ho ri apa. Anê.

—Ã Tirtũm kapêr ã kagà htũm kot ja jarênh kot anhÿr. Tã ja pyrã nê na pa pre mê kot amnhĩ tomnuj xwÿnhjê hwÿr wrÿ nê mê kamã ixukaprĩ ho ixpa. Mê kot amnhĩ tomnuj kaga nê hpãnhã tãm amnhĩ nhĩpêx kaxyw na pa pre ã mê hwÿr ixwryk anê. Tã ka mê ri atÿx amnhĩ krã hkôt ã ixto akapêr anê. Anê.

Mê kot mêmoj tã Jejus kukjêr

Makre 2.18-20; Rukre 5.33-35

¹⁴ Tã nhũm Juãw Paxis kôt mê pa xwÿnhjaja Jejus wÿr mra nê mêmoj tã hkukja nê kãm:

—Pa? E ot pa mê awÿr mra. Kwa mê inhmã mêmoj jarê. Na pa htem tãhã Parijew nhõ xwÿnhjê pyrã nê ixàpkur kêt kãm Tirtũm mã amnhĩ jarê. Tã nom akôt mê pa ho mê pa xwÿnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mê ixpyrà nê tãhã apkur kêt kamã kãm amnhĩ jarênh kêt nê? Anê.

¹⁵ Hãmri nhũm mê kuma nê mê kãm:

—Nà mo kaxyw kot kêt mê apkur kêt rãhã kãm amnhĩ jarê? Mê hkaprĩre hã. Mê kot ixkôt pa ho pa hã amnhĩ pumunh jakamã na htem hkĩnh nê ixkôt pa. Kormã ixte mê kamã ixpa kênã kot kêt mê apkur kêt rãhã Tirtũm mã tanhmã amnhĩ jarênh to. Xà na htem hkrãmnhwÿ hã hkĩnh kaxyw hã akuprõ nê hkaprĩ nê apkur kêt o kamãt nê mÿr o hkrĩ? Nà na htem anhÿr kêt nê. Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mê pa ho mê pa xwÿnhjaja ixkôt kormã àmnhĩx hkĩnh nê apkati mê apkur o pa. Nom koja mê kãm ixkurê xwÿnhjaja nhÿrmã tanhmã ixto hãmri nhũm mê hkaprĩ htÿx nê rĩ kormã tãhã apkur kêt rãhã Tirtũm mã amnhĩ jarê. Anê.

Mê pahte Jejus kôt amnhĩ nhĩpêx

Makre 2.21-22; Rukre 5.36-39

¹⁶ Nhũm Jejus mê piitã mê kãm kapêr nê mê kãm:

—Mê kot amnhĩ tomnuj xwÿnhjaja ra mê kot amnhĩ nhĩpêx tũm o amnhĩ pyrãk jakamã na htem tanhmã mê kot amnhĩ nhĩpêx nyw tota kaga. ¹⁷ Tã ixte amnhĩ nhĩpêx nywja te kot mê ate amnhĩ nhĩpêx tũm pyrãk kêt jakamã na ka htem ixkapêr ma nê ãm ama. Kwa mê inhma nê mê ate amnhĩ nhĩpêx tũmja gryk ã ixkaga hkêt nê. Anê.

Mê hkra htyk nê mēhõ ni kamrõ wa harēnh

Makre 5.21-43; Rukre 8.40-56

¹⁸ Nhũm pre ã Jejus mê kãm kapêr anhÿr o xa. Rôm nhũm mēõ pahihtija tē nē mar o xa. Hãmri nê hamaxpêr o:

—Kokÿÿ. Jejusja ãm hãmri kēp pahi maati kumrêx. Hã na ri ã kapêr mex anê. E pa hwÿr tē nē ixkrare ho kuwÿ. Anê.

Hãmri nê hwÿr tē nē kutã hkõnkrã ho nhÿ nê kãm:

—Pa akupÿm mê ixto mex xwÿnh? E ot pa awÿr tē. Kwa ma ixkôt tē nē inhmã ixkra nire pumu nê tanhmã inhmã ho kê akupÿm inhmã htĩr. Na ham ixpê ty pa kaxyw amã ijamaxpêr nê man awÿr tē. Anê.

¹⁹ Hãmri nhũm kuma nê kãm:

—Tõe. Nà kot paj ma akôt tē. Anê.

Hãmri nê ma hkôt tē. Mê ixpê hkôt ixpa ho ixpa xwÿnhjê mê pa mê ma hkôt mō.

²⁰⁻²¹ Nhũm mēhõ ni kamrõ rãhã ho pa xwÿnhja ma mê ixkôt tē. Na pre hte hkamrõ hkryre rãhã ho pa hã amgrã pē 12 nē tee ri kãm amnhĩ mex prãm o pa. Jakamã Jejus jarênh ma nê amnhĩ kaxyw kãm hamaxpêr kurê kumrêx nê hamaxpêr o:

—Ma pa kop ma hwÿr tē nê kēp ê nhĩrê pix kupênh tã akupÿm inhmex japêr. Anê.

Hãmri nê ma mê ohtôjê kaêx kôt hwÿr tē. Nê katut kôt tē nê kēp ê nhĩrê kupê. ²² Hãmri nhũm Jejus ho hakêx nê amnhĩ tã omu nê kãm:

—Pa? Kwa tee ri amnhĩ kukamã ajamaxpêr kêt nê. Ate amnhĩ kaxyw inhmã ajamaxpêr tÿx jakamã na ka ra akupÿm amex. E mãmri ajamakêtkati nê ri apa. Anê.

Hāmri nhūm akupŷm mex nê hkīnh tŷx nê ma akupŷm tē. ²³ Hāmri pa mē ma htyk xwŷnh nhīpêxà hkôt mra nê ōrkwŷ hwŷr agjê nê mē pikuprōnh xwŷnhjê pumu. Nhūm mē ra mē hā htu rax nê. Nê omŷj ri kaprī xaj pifti kakōr o hkrī nê omŷj ri mur. Kàx pē mur nê amnhī tak o hkrī. ²⁴ Hāmri nhūm Jejus mē hwŷr axà nê mē omu. Nê ra kot my hkrata htyk ā omunh tā kuri mē mŷr o mē hkrī xwŷnhjê mā kapēr nê mē kām ām ōt nê nōr ā harē nê mē kām:

—Pa? Kwa mon ka mē ri akaprī nê amŷr o akrī? E mē ma mra. Na wa hkrata wa kēp htyk kēt nê. Na ām gōr nê nō. Anē.

Hāmri nhūm mē kot ra htyk ā omunh mex jakamā kuma nê ām kuma. Nhūm mē hkwyja axtem nê ri axpēn mā hā hpēr o pikēnh o hkrī. ²⁵ Hāmri nhūm kapôt mā mē hano nhūm mē hapōj nê kapôt ā kuhê. Hāmri nhūm Jejusja htyk xwŷnhhta wŷr axà nê hpa hā kupy nê kànhmā ām nhūm akupŷm htīr nê kànhmā ām kurê kumrēx. ²⁶ Hāmri nhūm mē piitā akupŷm htīr kām omu nê ma ri krī piitā hkôt ri mē kām harēnh o hprōt.

Wa nohkre xwŷnh wa harēnh

Matêwre 20.29-34

²⁷ Tā nhūm Jejus kato nê ma tē. Pa mē hkôt ixpa ho ixpa xwŷnhjaja ma hkôt mō. Hāmri nhūm wa myja wa hamēxkrut. Hamē wa nohkre xwŷnh wa Jejus jarēnh ma nê hā ajēt nê hkôt rôrōk o mō. Nê xatā amnhī to hwŷr o hkôt rôrōk o mō nê kām:

—Pa Jejus? E Tīrtūm kot mē ixkaxyw axām jakamā kwa wa ixpumu nê wa ixkamā axukaprī kēt wehe. Anē.

²⁸ Hāmri nhūm wa kuma nê wa hkukamā nhŷri ixkrem axà nhūm wa hkôt axà nê xa nhūm wa omu nê wa kām:

—Pa? E xàn ka wa ra amnhī kaxyw inhmā ajamaxpēr tŷx nê nà? Anē.

Hāmri nhūm wa kām:

—Tŷ. Wa ixte amnhī kaxyw amā ijamaxpēr tŷx kēnā. Anē.

²⁹ Hāmri nhūm wa kuma nê hamē wa no hā ihkra xi nê wa kām:

—Tōe. Nà war ate tanhmā amnhī kaxyw inhmā ajamaxpēr to xà hkôt kot paj war anhīpēx. Anē.

³⁰ Hāmri nhūm wa akupŷm rīt mex kurê kumrēx. Hāmri nê akupŷm kato nê ma htēm kaxyw nhūm wa kām:

—E kēr ka wa nhām mē kām ixte war ato mex ā ijarēnh kēt nê. Ām kwarī ho kwarī.

³¹ Anhŷr tā no nhūm wa kuma nê ām kuma nê wa ma tē nê krī pu hā mē piitā mē kām ri war amnhī tā harēnh o mra.

Kapēr kēt xwŷnh jarēnh

³² Tā nhūm Jejus ma axte nhŷhŷm mē ixto mō. Hāmri nhūm mēhō my mēkarōmnuti kot hwŷr àr nê tanhmā ho nhūm kapēr kēt nê pa xwŷnhja nhūm mē Jejus wŷr o tē.

³³ Hāmri nhūm omu nê nê mēkarōmnuti jano nê kām:

—E kēp akato nê ma tē. Anē.

Hāmri nhūm kuma nê kurūm kato nhūm akupŷm kapēr mex kurê kumrēx. Hāmri nhūm mē kot hā omunh xwŷnhjaja tee ri kot mēkarōmnuti janor ā omu nê kamā no puma nê. Nê axpēn mā:

—Kokŷŷ. Aa mē pahte ā mēhō kot anhŷr pumunh kēt kumrēx tā na pu mē jarāhā ja pumu. Anē.

³⁴ Nom nhūm mē hkwy pē Parijew nhō xwŷnhjaja axtem nê hā mē kām kapēr o:

—Tk. Kot amnhī krā hkôt mē hanor kēt kēnā. Mēkarōmnuti nhō pahi nhŷ hā kot mē nê mē hanor kēnā. Anē.

Jejus kēp mē pakamā ukaprī xwŷnh

Makre 6.34; Rukre 10.2-3; Juāw 4.35

³⁵ Tā nhūm Jejusja krī ho ohtō nê hkôt ri mē kām Tīrtūm kapēr jarēnh o pa. Pa mē hkôt ixpa. Na pre hte nhŷri krī hwŷr pōj nê mē kot Tīrtūm kapēr o mē ahkre xà hā ixkre hwŷr mra nê hwŷr agjê nê mē pikuprōnh xwŷnhjê jahkre. Nê mē kām:

—E mẽ inhma. Tirtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xaj hkõt amnhĩ xunhwỳ mẽ kapër kõt amnhĩ nhĩpêx. Jao amnhĩ nhĩpêx nyw o amnhĩ nhĩpêx o ri apa.

Anhỹr o mẽ kãm kapër. Hãmri nẽ ahpỹnhã ri tanhmã mẽ à kute xwỳnhjê ho mex. Nhũm mẽ ohtô nẽ hkõt mar o pa. ³⁶ Hãmri nhũm mẽ omu nẽ kãm mẽ hkaprĩ nẽ. Na prem tee ri amnhĩ kukamã hamaxpër o pa jao ra hkaprĩ nẽ. Nhũm Jejus ja hã mẽ omu nẽ hamaxpër o:

—Hêxta waa nẽ. Na mẽ mex kêt nẽ pa. Te mẽ kêp ôwêhti jamãr xwỳnh kêt kot amnhĩ nhĩpêx pyrãk o htỳx ri pa. Mẽhõ koja kãm mẽ hkaprĩ nẽ tanhmã mẽ ho mex to ho pa? Anẽ.

Hãmri nẽ mẽ kamã ukaprĩ nẽ. ³⁷ Hãmri nẽ mẽ hã mẽ ixpê hkõt ixpa ho ixpa xwỳnhjê mã kapër nẽ mẽ inhmã:

—Nã na mẽ kormã ohtô rax nẽ Tirtũm kapër mar kêt nẽ. No ãm kormã mẽ ate mẽ kãm kapër jarênh o apa kaxyw mẽ agrêre. Te pur rax kãm ra harôj kamrêk par nẽ ãm tã no ãm kaxyw hikênh xwỳnhjaja grêre pyrãk. ³⁸ Jakamã kwa mẽ ho Tirtũm wỳ kê axte mẽ kaxyw mẽ akwỳjê rê kê mẽ apyrã nẽ ma mẽ hkõt ri mẽ kãm kapër jarênh o pa. Anẽ.

10

Jejus kot mẽ ho 12 nẽ mẽ rênh

Makre 3.13-19; Rukre 6.12-16

¹⁻⁴ Tã nhũm Jejusja hkõt mẽ ixpa ho mẽ ixpa xwỳnhjê ho 12 nẽ mẽ ixrê. Mẽ ixte ma krĩ piitã hwỳr inhmrar nẽ ý hã mẽ ahkre nẽ tanhmã mẽ à kute xwỳnhjê ho mex o ixpa kaxyw. Nẽ ý hã mẽ nẽ mẽkarõmnuti janor o ixpa kaxyw nhũm mẽ ixrê. Na pre mẽ ixto 12 nẽ mẽ ixrê. ã mẽ inhĩxi kot anhỹr.

Pêtre kumrêx na pre kuta. Hixi hõ pê Simãw.

Nẽ hkõt htõ Andreja ta.

Nẽ hkõt Jepetew kra Xiakreja ta.

Nẽ hkõt Xiakre htõ Juãwja ta.

Nẽ hkõt Firiptija ta.

Nẽ hkõt Patoromewja ta.

Nẽ hkõt Tomasja ta.

Nẽ hkõt pa ixpê Matêwre nhũm pre mẽ hkõt ixta.

Ixpê pahĩ nhỹ hã kãm mẽ kêp ixujamỳnh xwỳnh tã nhũm pre jajê hkõt ixta.

Nẽ ixkõt Apew kra Xiakre hõja ta.

Nẽ hkõt Tatewja ta.

Nẽ hkõt Simãw Jeroxja ta.

Nẽ hkõt Jut Kariotja ta.

Kormã kot mẽ kãm Jejus kurê xwỳnhjê nhĩhkram õr mã nhũm Jejus kot amnhĩ kukamã omunh mex tã mẽ hkõt amnhĩ kaxyw kuta.

ã mẽ ixte ý hã mẽ ahkre o ixpa kaxyw mẽ ixrênh xwỳnhjê nhĩxi kot anhỹr.

Jejus kot mẽ kêp 12jê mã mẽ àpênh ã karõ

Makre 6.7-13; Rukre 9.1-6, 10.1-12, 10.14; mããñên Atre 13.50-51, 18.6

⁵ Hãmri nhũm Jejus mẽ ixrênh pa nẽ ma mẽ hwỳr mẽ ixrênh kaxyw tanhmã mẽ inhmã kapër to nẽ mẽ inhmã:

—E. Kêr ka mẽ ma mẽ piitã mẽ kãm ri ijarênh o apa. No ãm kormã mẽ kêp Ijaew kêt xwỳnhjê nhõ pika hwỳr apa hkêt nẽ. Rỳ mẽ kêp Samar nhõ krĩ hwỳr ka mẽ apa hkêt nẽ. ⁶ ãm mẽ pahpê Ijaew nhõ krĩ kõt pix mã mãn ri apa. Mẽ kot tee ri amnhĩ kukamã hamaxpër o pa jakamã te mẽ kêp ôwêhti pikunor nẽ htỳx ri mex kêt nẽ pa pyrãk. ⁷ Jakamã kêr ka mẽ ma mẽ hwỳr apa nẽ ã mẽ hkõt ri mẽ kãm akapër o apa anẽ nẽ mẽ kãm: “E kot kaj mẽ ate amnhĩ tomnuj kaga nẽ Tirtũm kõt amnhĩ xunhwỳ hãmri nhũm amnhĩ tã mẽ apumu nẽ mẽ ato hkra. Jakamã e kwa mẽ tokyx hkõt amnhĩ xunhwỳ.” Anẽ. Kêr ka mẽ ã mẽ kãm akapër anhỹr o ri mẽ hkõt apa. ⁸ Hãmri nẽ akupỹm mẽ à xwỳnhjê ho mex o

ri apa. Nê mẽ htyk xwỳnhjaja ka mẽ akupỳm mẽ ho htír o ri apa. Nê mẽ hkànhy rũnh xwỳnhjaja ka mẽ akupỳm mẽ ho mex o ri apa. Nê mẽ kamã mẽkarõmnuti xwỳnhjaja ka mẽ nê mẽ hano. E kêr ka mẽ ã inhỹ hã mẽ ho mex o ri apa anẽ. Na pa amarĩ tanhmã mẽ ato ka mẽ inhmã amnhĩrer kêt tâ ra mẽ ate tanhmã mẽ ho mex to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkôt apa. No ri mẽ ho mex pãnhã kàxpore hã axàhwỳr kêt nẽ.

⁹⁻¹⁰—Nê kêr ka mẽ ma mẽ hwỳr apa kaxyw anojarêt hãmri nẽ amnhĩ kôt akukrêx rũnh o apa hkêt nẽ. Âm anhỹ kamã mẽ hwỳr apa. Nê akàxpore ho rax nẽ ho apa hkêt nẽ. Rỳ akawà kamã axê hkwy rỳ aparkà hõ xàr nẽ ho amõr kêt nẽ. Rỳ kô hõ py nẽ ri ho apa hkêt nẽ. Âm anhõ mrykà pix jamy nẽ ma ho apa. Kêr kê mẽ ate Tĩrtũm kapêr o mẽ ahkre nẽ mẽ ho mex xwỳnhjaja mãn amnhĩ pãnhã mẽ amã mẽ axàpkur xà gõ ka mẽ kutã axàpkur o ri mẽ hkôt apa.

¹¹—Nê kêr ka mẽ nhỹri krĩ hwỳr ajapõj nẽ kamã mẽhõ kot amnhĩ to mex xwỳnh japêr. Nê ra omu hãmri nẽ kuri mãn põj nẽ hkôt apikamênh tãmtã kurũm akupỳm ajapõj nẽ ma nhãm krĩ hõ hwỳr mra.

¹²—Nê kêr ka mẽ mẽhõ nhõrkwỹ hwỳr põj nẽ mẽ kãm: “E ot pa mẽ awỳr mõ. Nà koja Tĩrtũmja mẽ ato mex nẽ.” Anhỹr o mẽ kãm akapêr. ¹³ Kojã mẽ ama nẽ amnhĩ wỳr awỳ ka mẽ amnhĩ tã mẽ omu nẽ mẽ kãm: “E koja Tĩrtũm mẽ ato mex nẽ ka mẽ ajamakêtkati nẽ ri axãmnhĩx apa.” Anhỹr o mẽ kãm akapêr. No koja mẽ amnhĩ nhõrkwỹ nẽ mẽ akurê nhũm Tĩrtũm ja hã mẽ omu nẽ mẽ ho mex kêt nẽ.

¹⁴—Nê koja nhỹri krĩ hõ kamã mẽ akaga nẽ akapêr mar kêt japêr. Ka mẽ tee ri amnhĩ tã mẽ kamã ama hãmri nẽ tokyx mẽ kurũm ajapõj nẽ ma akupỳm apa. Nê akupỳm anojarêt nẽ mẽ noo mã akuhê nẽ amnhĩ par ã awjagrõ kapĩ nẽ ma apa. Mẽ kot Tĩrtũm kaga hã amnhĩ pumunh kaxyw ka mẽ ã mẽ noo mã amnhĩ nhĩpêx anẽ. Hãmri nẽ ma nhỹhỹm hpãnhã apa. ¹⁵ Kojã nhỹrmã Tĩrtũm mẽ kot amnhĩ tomnuj mỳrapê tanhmã mẽ ho. Na pre ã Sotõ mẽ Komo nhõ xwỳnhjê nhĩpêx anẽ. Na prem amnhĩ tomnuj tỳx nẽ nhũm Tĩrtũm tee ri ja hã mẽ omu nẽ tanhmã hã mẽ homnuj tỳx to. Tã jar mẽ kãm ixkapêr mar prãm kêt nẽ mẽ kot ixkaga xwỳnhjaja koja ja hã mẽ omu nẽ kot Sotõ mẽ Komo nhõ xwỳnhjê nhĩpêx o mẽ hipêx. No âm tanhmã mẽ ho htỳx o mẽ hakre. Anẽ.

Nhũm pre Jejus ã mẽ inhmã mẽ ixàpênh ã karõ anẽ.

Jejus kot mẽ kêp 12jê hkukamã mẽ harênh

Makre 13.9-13; Rukre 12.11-12, mãânênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhũm Jejus arĩ kot mẽ ixrênh xwỳnhjê mã kapêr nẽ mẽ inhmã:

—E kot paj ma mẽ hwỳr mẽ arẽ. Ma mẽ ate Tĩrtũm kapêr o mẽ ahkre ho ri mẽ hkôt apa kaxyw. Jakamã kot kaj mẽ te ôwêhti kot mry xoprê hwỳr amnhĩ to mrrar nhũm kot hkwy hpar pyrak o amnhĩ nhĩpêx. Kojã mẽ hkwyjaja mẽ ate mẽ ahkre ma nhũm ja mẽ kêp omnuj nẽ nhũm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpêr nẽ amã mẽ uma hkêt nẽ.

¹⁷—E kwa mẽ o kora. Kêr ka mẽ ma mẽ hwỳr mra nẽ amnhĩ nê mẽ htãnopxar o ri apa. Kojã mẽ hkwyjaja mẽ akapêr ma nẽ kêp mẽ aprãm nõkati. Nê mẽ apynê nẽ ma mẽ utar xwỳnhjê hwỳr mẽ ato mra nẽ mẽ kãm tanhmã mẽ ato hêx to. Hãmri nhũm mẽ mar xà hkôt mẽ atak. Tĩrtũm kapêr o mẽ ahkre xà hã ixkre kamã koja mẽ ã mẽ anhĩpêx anẽ.

¹⁸—Nê koja mẽ ixtã tanhmã mẽ ato kaxyw mẽ apynê nẽ ma mẽ õ pahi hwỳr mẽ ato mra nẽ tanhmã kãm mẽ ato hêx to. Nom kwâr mẽ mamrĩ ã mẽ anhĩpêx anẽ. Kojã mẽ ato anẽ ka mẽ kutã akrĩ nẽ mẽ kãm Tĩrtũm kapêr jarẽ. Ijaewjê mã nẽ mẽ kêp Ijaew kêt xwỳnhjê mã.

¹⁹—Nê koja mẽ ma mẽ õ pahi hwỳr mẽ ato mra nẽ ã mẽ anhĩpêx anẽ nom kêr ka mẽ tee ri tanhmã mẽ kãm amnhĩ jarênh to hkukamã ajamaxpêr kêt nẽ. Kojã Tĩrtũm Karõ tãm tanhmã mẽ akrã hto ka mẽ ô ri mẽ kãm akapêr mex nẽ. ²⁰ Nê kot kaj mẽ amnhĩ krã hkôt ri mẽ kãm akapêr kêt nẽ. Tĩrtũm Karõ nhỹ hã kot kaj mẽ ô ri mẽ kãm tanhmã axujarênh to.

²¹⁻²² —Nê koja mẽ hkwyjaja ixtã mẽ akamã gryk nê. Nê mẽ atã àmnênh pix o pa. Nê mẽ kot mẽ apar kaxyw mẽ akwyjê hã amýnê. Koja mẽ anhîpêêxã hkwyjaja mẽ apê mẽ hkra hã amýnê. Nhũm mẽ akra hkwyjaja mẽ apê mẽ hipêêxã hã amýnê. Nhũm mẽ atõ hkwyjaja mẽ apê mẽ htõ hã amýnê. Nhũm mẽ akatorxàjaja mẽ atã amýnê. Hãmri nhũm mẽ apa. No ãm kwãr mẽ mãmri ã mẽ anhîpêx anê. Æ mẽ kot mẽ anhîpêx anhÿr tã kêr ka mẽ tee ri amnhî kukamã ajamaxpêr pê ixkaga hkêr nê. Mẽ ãm amnhî to htÿx rãhã ty. Hãmri nê akaxwÿnhja ma Tirtũm mẽ wa inhõ krî hwÿr axàpir kurê kumrêx nê wa ixkuri akupÿm amex nê atir tũm nê apa ho apa.

²³ —Nê koja mẽ nhÿri krî hkwy kamã ixtã tanhmã mẽ anhîpêx hto ka mẽ mãmri mẽ kurũm ajapõj nê ma nhÿhÿm krî hõ hwÿr apa. Nê hpãnhã kamã mẽ kãm ri ijarênh o mẽ hkõt apa. Kot kaj mẽ kormã ljaewjê nhõ krî piitã hwÿr apa hkêr ri pa akupÿn mẽ awÿr wÿr. Kwa kêr ka mẽ ixkapêr mã ajamaxpêr tÿx rãhã ri apa.

²⁴⁻²⁵ —Mẽ ate ixkõt apa ho apa xwÿnh na ka mẽ. No pa na ixpê mẽ ajahkre xwÿnh. Jakamã koja mẽ kot tanhmã inhîpêx to ho mãânên mẽ anhîpêx. Koja mẽ nhÿrmã tanhmã inhîpêx to nê mã ixkõt mẽ ato anê nê. Mẽ pahte amnhî nhîpêxja kot axpên pyrãk. Jakamã koja mẽ ixpê Satanasti hã ijarê nê mãânên tanhmã mẽ ajarênh punuj to ho pa. Mẽ pahte amnhî nhîpêxja kot axpên pyrãk jakamã koja mẽ panhîpêx o axpên pyrãk.

²⁶ —Tã nom kêr ka mẽ tee ri amnhî kukamã ajamaxpêr pê amã mẽ uma ho apa hkêr nê. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamaxpêr piitã amnhîrit pa. Nê mẽmoj piitã ra hpimxur mex tã koja nhÿrmã amnhîrit par kumrêx.

²⁷ —Nê koja nhÿrmã mẽ piitã ixte amnhî nhîpêx kõt ixpumu. Na pa ra mẽ hkàx ã mẽ amã ixujarênh rax nê. Tã kêr ka mẽ ma mẽ piitã mẽ kãm harênh o ri apa. Nê ra ixte mẽ hkàx ã ahte ixte mẽ amã mẽmoj jarênhhta ka mẽ hpãnhã ma mẽ kãm harênh o ri apa kê mẽ apyrã nê harênh ma.

²⁸ —E kêr ka mẽ amã mẽ kot tanhmã mẽ ato mã xwÿnhjê puma ho apa hkêr nê. Mẽ kot mẽ apar mã tã koja mẽ ãm mẽ akrãhkã pix pa nom tanhmã mẽ akaxwÿnh to hkêr nê. Tirtũmja tapxipix na hte mẽ hkrãhkã nê mẽ hkaxwÿnh mẽ ho pimràatã kot amnhî xã htÿx kamã hamak tũm xata wÿr mẽ rênh pumunh. Tã kot hwÿr mẽ arênh pymaj kêr ka mẽ amã kapêr kwÿm ri tanhmã amnhî nhîpêx to puma ho ri apa.

²⁹⁻³¹ —Nê Tirtũm kot mẽ pahto hapêx par pumunh tã mãânên kot mẽ pajamãr mex. Mãn ka htem kuwênhre pumu. Na hte Tirtũm kuwênhre jamãr mex o pa. Mẽ piitã mẽ kot ãm omunh tã nom nhũm Tirtũm mẽ kurom hamãr mex pê mẽ htãnopxar rãhã ho pa. Tã kãm mẽ pajapê htÿx o kot kuwênhre jakrenh jakamã kwa mẽ tee ri amnhî kukamã ajamaxpêr o ri akapri nê apa hkêr nê. Koja Tirtũm mẽ pahtãnopxar rãhã ho pa. Kot mẽ panhî piitã omunh par. Nê ahpÿnhã tanhmã mẽ pahkrã hkî kute hkõt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽ uma ho apa? Anê.

Mẽ pahte Jejus kõt amnhî xunhwÿr rÿ mẽ pahte hkaga jarênh

³² Nhũm Jejus arî kot mẽ hwÿr mẽ ixrênh xwÿnhjê mã kapêr nê mẽ inhmã:

—E kwa mẽ mãmri akwyjê mã mẽ apê ixkwÿ hã amnhî jarênh o ri apa nê amã mẽ uma xaj tee ri amnhî nhîpêx kêt nê. Kot kaj mẽ kãm ra ate ixkõt amnhî xunhwÿr ã amnhî jarê. Pa ja hã mẽ apumu hãmri nê mẽ apyrã nê kaxkwa kamã Inhîpêêxã mã ra ate ixkõt amnhî xunhwÿr ã mẽ ajarê. ³³ Nom kot kaj mẽ kot ixtã tanhmã mẽ ato pymaj apê ixkwÿ hã amnhî jarênh kêt nê. Pa ja hã mẽ apumu hãmri nê nhÿrmã amnhî xwar Inhîpêêxã mã mẽ apê ixkwÿ hkêr ã mẽ ajarê. Jakamã kwa mẽ mãmri mẽ kãm apê ixkwÿ hã amnhî jarênh o ri mẽ hkõt apa kê mẽ ama nê amnhî kaxyw inhmã hamaxpêr japêr. Anê.

Mẽ kãm Jejus ã hkwyjê kurê xwÿnhjaja

Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

³⁴ Nhũm Jejus arî kot mẽ hwÿr mẽ ixrênh xwÿnhjê mã kapêr nê mẽ inhmã:

—Ra mẽ awỳr ixwryk tã koja mẽ piitã ixkukwak ri hamakêtkati nẽ àmnhĩx ri pa hkêt nẽ. Kormã. Koja mẽ akwỳjaja ixkapêr ma nẽ mẽ apyrã nẽ amnhĩ kaxyw ixkôt hamaxpêr. Nhũm mẽ akwỳjaja axtem nẽ kuma nẽ ãm kuma. Hãmri nẽ ixtã tanhmã mẽ atomnuj to ho pa ka mẽ amnhĩ xà htỳx kamã ajamak o ri apa.

³⁵ —Koja mẽ akrajaja ixtã mẽ apê mẽ hipêêxà nẽ mẽ katorxà kutã amnhĩ xunhwỳ. Nhũm mẽ wỳjjaja ixtã mẽ umregêxjê kutã amnhĩ xunhwỳ.

³⁶ —Koja mẽ ã mẽ akwỳjaja ixtã mẽ akutã amnhĩ xunhwỳr anẽ. Mẽ anhõrkwỳ kamã mẽ akukwak ri pa htã ixtã mẽ akutã amnhĩ xunhwỳ.

³⁷ —Nẽ mẽ amã mẽ anhĩpêêxà nẽ mẽ akatorxà japêê. Nẽ mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa hkêt hãmri nẽ apê ixkwỳ mã tãm kêt. ³⁸ Rỳ nhũm mẽ nhỹrmã ixtã mẽ apar kaxyw ka mẽ tee ri amnhĩ kukamã ajamaxpêr nẽ mẽ kot mẽ apar pymaj ixkaga hã kot kaj apê ixkwỳ mã tãm kêt nẽ. ³⁹ Koja mẽ nhỹrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixpyrã nẽ ixtã mẽ apar mã tã kwa kêr ka mẽ amã atyk pymaj ixkaga hkêt nẽ. Kwãr mẽ mãmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xà kamã ajamak kêt nẽ atĩr tũm nẽ amex rãhã apa ho apa. Nom kot kaj mẽ jar amã amex nẽ apa hprãm xaj ixkaga hãmri nẽ nhỹrmã wa ixri atĩr tũm nẽ apa ho apa hkêt nẽ. Anẽ.

Mẽ kot Jejus krajê ho mex xwỳnhjê jarênh

Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mẽ hwỳr mẽ ixrênh xwỳnhjê mã kapêr nẽ mẽ inhmã:

—E koja mẽhõ nhỹri mẽ apumu nẽ mẽ apê ixkra hã tanhmã mẽ ato mex to nẽ te pa kot ixto mex pyrãk. Nẽ kot kaj mẽ tanhmã pa ixto mex to nẽ te Tĩrtũm o mex pyrãk.

⁴¹ —Nẽ kot ka mẽ nhỹri Tĩrtũm nhỹ hã mẽ kãm kapêr jarênh xwỳnhjê hõ tanhmã ho mex to nhũm Tĩrtũm hã apumu nẽ nhỹrmã hã ato mex nẽ. Rỳ ka mẽ mẽhõ kot Tĩrtũm kôt amnhĩ nhĩpêx xwỳnhjê hõ pumu nẽ tanhmã ho mex to. Nhũm Tĩrtũm hã apumu nẽ mãânên hã ato mex nẽ. Te ate mẽhõ ho mexta pyrã nẽ mãânên ato mex nẽ. ⁴² Nhũm mẽhõ nhỹri mẽ kot ixkôt kormã amnhĩ xãm nyw nẽ kormã àhpumunh tohtuj anhỹr xwỳnhjê hõ pumu. Nẽ kãm kôr ã omu nẽ hamaxpêr o: “Kwa Jejus kôt ri pa xwỳnh mũj kãm kôr. Kormã kot Jejus kôt amnhĩ xãm tỳx kêt tã kêp hkwỳy. E kot paj kãm gô hkwy kê ho ixkô.” Anẽ hãmri nẽ kãm hkwy nhũm ho ixkô. Hãmri nhũm Tĩrtũm hã omu nhũm kot kãm gô pix nhõr nhũm kot ho hkõm tã nhũm ja hã ho mex rax nẽ. Anẽ.

Nhũm pre ã Jejus kot mẽ hwỳr mẽ ixrênh xwỳnhjê mã kapêr ry rax anẽ. Mẽ ixpê 12jê mã ã kapêr anẽ.

11

Juãw Paxis kot Jejus jarênh mar

Rukre 7.18-23, 7.5, mãânên Rukre 4.16-21

¹ Tã nhũm Jejus ra kot mẽ hwỳr mẽ ixrênh xwỳnhjê mã kapêr pa hãmri nẽ kato nẽ ma krĩ pu hã krĩ hkwyjê hkôt ri pa. Nẽ mẽ kãm Tĩrtũm kapêr jarênh o ri mẽ hkôt pa.

² Nhũm Juãw Paxisja arĩ kêp prês nẽ mẽ hagjênh xà kamã hkrĩ. Nhũm pre hte hkôt mẽ pa ho mẽ pa xwỳnhjaja hwỳr mra nẽ kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nẽ tee ri hkukamã hamaxpêr. Hãmri nẽ hkôt mẽ pa xwỳnh wa ho axkrut nẽ wa kuta ³ nẽ hwỳr wa kumẽ nẽ wa kãm:

—Kwa wa ma Jejus wỳr tẽ nẽ hkukja nẽ kãm: “Xà ka na pre Tĩrtũm mẽ ixwỳr amẽ nà? Xà kormã axtem mẽhõ na pa mẽ ri hamãr o ri ixpa?” Anhỹr o hkukja hãmri nẽ tanhmã kot amnhĩ jarênh to hã ama nẽ man akupỹn ixwỳr tẽ nẽ inhmã harê. Anẽ.

⁴ Hãmri nhũm wa kuma nẽ ma hwỳr tẽ. Nhũm Jejus kormã tanhmã mẽ à kute xwỳnhjê ho mex o xa. Mẽ nohkre xwỳnhjaja nhũm akupỹm mẽ ho mex. Nẽ mẽkarõmnuti kot mẽ hwỳr gjêx xwỳnhjaja nhũm mẽ nê mẽ hanor o ãm rãhã nhũm Juãw kôt wa pa xwỳnhhta wa hwỳr tẽn pøj. Nẽ kormã mẽ hã omunh o wa xa. Hãmri nẽ kãm Juãw Paxis kapêr jarê nhũm wa kuma nẽ wa kãm:

—Tỳ. Nà ãm hãmri na ja hã ijarẽ. Ixpê mẽ ate ixkamã ajamak o apa xwỳnhta na pa. Na ka wa kam ã ixte amnhĩ nhĩpêx anhỹr ã ixpumu. Jakamã wa ma akupỹm tẽ nẽ aprĩ hã kãm ijarẽ. ⁵ Na pa hte akupỹm mẽ nohkre xwỳnhjê ho mex. Nẽ mẽ hkànhy xwỳnhjaja pa akupỹm mẽ hkà ho mex. Nẽ mẽ hyk o mẽ pa xwỳnhjaja pa akupỹm mẽ hte ho mex. Nẽ mẽ htyk xwỳnhjaja pa akupỹm mẽ ho mẽ htĩr. Nẽ mẽ kêp amrakati nẽ ri mẽ pa xwỳnhjaja pa mẽ kãm mẽmoj mex jarẽnh o ri mẽ hkôt ixpa. ã na pa hte mẽ hipêx anhỹr o ri ixpa. Jakamã e wa ma akupỹm Juãw wỳr tẽ nẽ ã kãm ijarẽnh anẽ. ⁶ Kê ijarẽnh ma nẽ ixkôt hamaxpêr tỳx nẽ tee ri ixkukamã hamaxpêr kêt nẽ. Koja ã amnhĩ nhĩpêx anẽ nẽ hamakêtkati nẽ ri pa. E wa tokyx ma akupỹm tẽ nẽ kãm ã ijarẽnh anẽ. Anẽ.

Jejus kot tanhmã Juãw Paxis jarẽnh to

Rukre 7.24-35

⁷⁻⁹ Nhũm pre ã Jejus Juãw Paxis kôt wa pa ho wa pa xwỳnhja wa kãm amnhĩ jarẽnh anẽ nẽ akupỹm hwỳr wa kumẽ nhũm wa ma akupỹm hwỳr tẽ. Hãmri nhũm Jejus mẽ kot mar o kuhê xwỳnhjê mã tanhmã Juãw Paxisja jarẽnh to nẽ mẽ kãm:

—Na ka pre htem kapôt ã Juãw Paxis mar kaxyw ma hwỳr mra. Nom ê mex ã omunh kaxyw rỳ hpijaàm kãm tanhmã kapêr to hã mar kaxyw na ka prem hwỳr amrar kêt nẽ. Tĩrtũm nhỹ hã kapêr o pa jakamã na ka prem ate mar kaxyw ma hwỳr mra. Tĩrtũm nhỹ hã ixkukamã ijarẽnh o pa xwỳnh na. Ixpê Tĩrtũm kot mẽ akaxyw ixãm xwỳnh ã na hte ijarẽnh o pa. Nẽ hprĩ hã tanhmã mẽ amã ijarẽnh to. Jakamã kapêrja mex o kot wam Tĩrtũm nhỹ hã kapêr jarẽnh xwỳnhjê kapêr piitã hakrenh par. ¹⁰ Tĩrtũm kapêr ã kagà htũm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwỳr harẽnh xwỳnhja mẽ nhũm ma ri kutêp mẽ kãm harẽnh o pa. Mẽ kot mar nẽ kutêp tãm amnhĩ nhĩpêx o pa kaxyw.

—Anhỹr o Tĩrtũm Juãw Paxis kukamã harẽ nhũm prem hã kagà. Tã nhũm ixkukamã mẽ awỳr kumẽ. ¹¹ Juãw Paxisja na mex kumrêx. Na pre hprĩ hã ixkukamã tanhmã ijarẽnh to ho pa. Tã nom ixkôt mẽ pa ho mẽ pa xwỳnhjê hkĩnhã na pre ixkôt pa ho pa hkêt nẽ. Jakamã ixkôt mẽ pa ho mẽ pa xwỳnhjaja kot ixkôt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Anẽ.

¹²⁻¹³ —Na pre finat Mojes kumrêx mẽ kãm Tĩrtũm kapêr kwỳ hã kagà. Tã nhũm hpãnhã Tĩrtũm nhỹ hã kapêr jarẽnh xwỳnhjaja Mojes mỳr pê hkwỳ hã kagà. Nhũm prem kamã harẽ nẽ kuma nẽ hkôt amnhĩ nhĩpêx o pa. Hãmri nhũm Juãw Paxisja mẽ mỳrpê kato nẽ tãm Tĩrtũm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô nẽ inhma nẽ ixkôt amnhĩ xunhwỳ nẽ kãm ixkapêr kôt pix mã amnhĩ nhĩpêx o ri pa hprãm nẽ.

¹⁴ —Amnepêm na pre Tĩrtũm nhỹ hã kapêr jarẽnh xwỳnhjaja mẽhõja kukamã tanhmã harẽnh to ho pa. Nẽ mẽ kãm harẽnh o: “Koja nhỹrmã mẽhõ te Eris kot amnhĩ nhĩpêx pyræk o amnhĩ nhĩpêx nẽ mẽ awỳr mō. Nẽ mẽ amã Tĩrtũm kot mẽ awỳr mẽnh mã xwỳnhja jarẽnh o pa ka mẽ ama.” Anhỹr o mẽ kãm mẽhõ jarẽ. Tã kot paj mẽ amã kot hkukamã harẽnh xwỳnhta nhĩxi jarẽ ka mẽ inhma. Nà Juãw Paxisja kukamã na prem ã harẽnh anhỹr o pa.

¹⁵ —E kot pa mẽ amã mẽ piitã htỳx ri tanhmã mẽ hamaxpêr to ho mẽ pa hã mẽ amã mẽ harẽ ka mẽ harẽnh ma. ¹⁶ Te mẽhprĩre kot amnhĩ nhĩpêx pyræk o na htem amnhĩ nhĩpêx. Mẽhprĩrejaja na htem mẽ òrkwỳ kapem mẽmoj to amnhĩkati nẽ tee ri hkwỳjê kot amnhĩ nhĩpêx pumu nẽ mẽ kãm:

¹⁷ Kwa na pa mẽ amã gre htã ka mẽ ixkutã anhõkrepôx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akaprĩ nẽ amỳr kêt nẽ. Kwa mẽ ri ã amnhĩ nhĩpêx anhỹr kêt nẽ. Anẽ.

—Mẽhprĩjaja na htem ã axpên mã kapêr anẽ. Tã te mẽ ate mẽ uræk. Tĩrtũm kot mẽ awỳr ÿ hã kapêr jarẽnh xwỳnhjê rênh tã ka mẽ te mẽhprĩre kot amnhĩ nhĩpêx pyræk nẽ mẽ ama nẽ ãm mẽ ama nẽ mẽ hkôt amnhĩ nhĩpêx kêt nẽ.

¹⁸ —Juãw Paxis na pre mẽ awỳr mō nẽ ixkĩnhã apkur mex o ri pa hkêt nẽ. Nẽ ixkĩnh ã wĩhti ho hkõm kêt nẽ. Ka mẽ ja hã omu nẽ hkaga nẽ atỳx ri Satanasti nhỹ hã tanhmã

kot amnhî nhîpêx to hã hkamnhîx. Hãmri nê mēhprîre kot amnhî nhîpêxta pyrã nê hkôt amnhî nhîpêx kêt nê.

¹⁹ Tã hãmri pa hpãnhã mē awÿr mō nê Juãw Paxis rom apkati mē ixàpkur mex o ri mē akôt ixpa. Nê kurom mē akutã wîhti hkwȳ ho ixkōm o ri ixpa. Tã ka mē ja hã ixpumu nê atÿx ri ixàpkur rûnh nê ixpipãnh o ri ixpa hã ixkamnhîx nê ã axpēn mã ixto akapēr anê. Nê mē kot amnhî tomnuj xwÿnhjê hkôt ri ixpa xwÿnh ã axpēn mã ijarê. ã na ka htem axpēn mã ijarēnh anê. Jao te mē ate Juãw Paxis nhîpêx pyrã nê ixkaga nê ixkôt amnhî nhîpêx kêt nê. Na hte ã htÿx ri tanhmã mē hamaxpēr to ho mē pa xwÿnhjaja amnhî nhîpêx anê. No tãm ri mē hamaxpēr xwÿnhjaja na htem ahpÿnhã wa ixte amnhî nhîpêx ã wa ixpumu nê axpēn mã wa ijarēnh o: “Nã ahpÿnhã wa kot amnhî nhîpêx tã no ãm hamē Tirtûm nhÿ hã kapēr mex o pa. E pu mē wa uråk nê Tirtûm kôt amnhî xunhwÿ.” Anhÿr o axpēn mã wa ijarê. Anê.

Mē kot Tirtûm kôt mē hamaxpēr kêt xwÿnhjê jarēnh

Rukre 10.13-15

²⁰ Na pre hte Jesus krî piitã hkôt pa nê krî nhō xwÿnhjê mã kapēr nê mē kot amnhî tomnuj ã mē kãm kapēr. Korajî mē Pese nhō xwÿnhjê kumrêx mã kapēr nê mē kãm:

²¹⁻²² —E mē inhma. Amnepēm krî pē Sitō mē Xir wa kamã mē pa xwÿnhjaja na prem tanhmã amnhî tomnuj tÿx to ho pa nhÿm Tirtûm tee ri ja hã mē omu nê mē kot amnhî tomnujta ã tanhmã mē ho. Tã kwa mē o kora Korajî mē Pesêj nhō xwÿnhjaja. Ra ixte mē amã aa mē ate mēmoj pumunh kêt kwÿ ho anhÿr rax tã ka mē omu nê ãm omu nê amnhî tomnuj kaga hkêt nê. Arî tanhmã amnhî tomnuj to ho ri apa. Mÿrapê kot kaj mē amex kêt nê. Kop apu Sitō rÿ Xir kamã mãn ixte mē kãm aa mē kot mēmoj pumunh kêt kwÿ ho anhÿr o ri ixpa ronhÿx mē omu nê mē arom amnhî kaxyw ixkôt hamaxpēr tÿx kurê kumrêx. Nê tee ri kot tanhmã kot amnhî tomnuj to hã amnhî pumu nê hkaprî nê hkaga hpa. No mē kajaja na pa hte tee ri mē amã aa mē ate mēmoj punuj kêt kwÿ ho anhÿr o ixpa kaprÿ. Ka mē ja hã ixpumu nê ãm ixpumu nê amnhî tomnuj kaga hkêt nê. Jakamã koja nhÿrmã Tirtûm tanhmã mē atomnuj tÿx to. Nê tanhmã Sitō mē Xir wa kamã mē pa xwÿnhjê jarēnh to nhÿm mē kot amnhî tomnuj mÿrapê amnhî xà htÿx kamã hamak rãhã ho pa. No mē kajaja mē ate amnhî tomnuj tÿx o mē hakrenh jakamã koja Tirtûm mē hkînhã mē atomnuj tÿx kumrêx. Ka mē amnhî xà htÿx kamã ajamak rãhã ho ri apa kãm ga. Anê.

²³⁻²⁴ Nhÿm pre ã Jesus mē kãm kapēr anê. Nê hpãnhã Kapanau nhō xwÿnhjê mã kapēr nê mē kãm:

—No mē apê Kapanau nhō xwÿnhjaja. Kot kaj mē ajaxwÿja mē uråk nê amex kêt nê. Ra ixte mē amã aa mē ate mēmoj pumunh kêt kwÿ ho anhÿr rax nhÿm mē ate hã ixpumunh tã amnhî tomnuj kaga hkêt tã Tirtûm mē wa inhō krî hwÿr akrã. No ãm hwÿr akrã kaprÿ. Kot kaj mē atō hwÿr axàpir kêt nê. Kop apu Sotō nhō xwÿnhjaja mãn kot ã ixte amnhî nhîpêx anhÿr ã ixpumunh ronhÿx mē ra kot amnhî tomnuj kaga nê ixkôt amnhî xunhwÿr kurê kumrêx. No mē kajaja na ka mē ã amnhî nhîpêx anhÿr kêt nê. Jakamã kot kaj mē nhÿrmã ma kuwy maatita wÿr ajapêx pa kãm ga. Anê.

Jesus kot ò Papaj mã amnhî jarēnh

Rukre 10.21-22

²⁵⁻²⁶ Tã nhÿm Jesus Tirtûm mã amnhî jarē nê kãm:

—Pa Papaj? Nã apê mē inhō Pahi Maati na ka. Pikap ri mē pa xwÿnhjaja nê kaxkwa kamã mē pa xwÿnhjaja apê mē ixpiitã mē inhō Pahi Maati na ka. ãm hãmri na ka hte amnhî nhîpêx mex o ri apa. Na ka hte mē àhpumunh tÿx ã mē kot amnhî to jarkrar xwÿnhjê mã axàhpumunh tÿx o amnhîrît kêt nê. ãm mē àhpumunh kêt ã mē kot amnhî jarēnh xwÿnhjê pix mã na ka hte axàhpumunh tÿx o amnhîrît nhÿm mē tapxipixjaja ja hã apumu. Nã ãm hãmri. ãm hãmri na ka hte amã hprãm xà hkôt ã mē piitã mē hipêx anhÿr o ri apa Papaj. Jakamã mē kot amnhî to hkryre xwÿnh pixjaja na htem hprî hã ate amnhî nhîpêx kôt apumunh o pa. Anê.

Nhũm pre ã Jejus Tĩrtũm mã amnhĩ jarẽnh anẽ. ²⁷ Hãmri nẽ hpãnhã mẽ kot mar o kuhê xwỳnhjê mã kapẽr nẽ mẽ kãm:

—Nà na pre ra Inhĩpêêxàja inhĩhkra kamã mẽmoj piitã hagjênh pa. Ixte kãm ho amnhĩptàr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwỳnhjaja na mẽ kot ja hã ixpumunh kêt. Nẽ papxipix na ixte Inhĩpêêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anẽ nẽ inhmã hprãm xà hkôt mẽ hkwỳjê mã ho amnhĩrĩt o ri ixpa. Jakamã nhũm mẽ ixpyrà nẽ Inhĩpêêxà kot tanhmã amnhĩ nhĩpêx to ho pa hkôt omu.

²⁸⁻³⁰ —Nẽ tee ri amnhĩ kukamã mẽ ajamaxpẽr o ri apa xwỳnhjaja te mẽ ate mẽmoj pytĩ rax tur nẽ ahte ho apa pyræk. Kwa mẽ ixkôt amnhĩ xunhwỳ nẽ ixte amnhĩ nhĩpêx ã ixpumu. Ixte mẽ akamã ixukaprĩ xwỳnh na pa. Na pa hte mẽ akutã inhnojarêr rãhã ho ixpa. Jakamã kot kaj mẽ ixkôt amnhĩ xunhwỳ pa te ixte mẽ anẽ mẽmoj pytĩ ho ixwryk pyræk o mẽ anhĩpêx nẽ tãm mẽ axunhwỳ ka mẽ tãm ajamaxpẽr nẽ tãm amnhĩ nhĩpêx o ri apa. Mo kaxyw koja ixkôt mẽ kot amnhĩ nhĩpêx o pa xwỳnhjaja tee ri amnhĩ kukamã hamaxpẽr o pa? Nà na htem ixkamnàr rom hamakêtkati nẽ àmnhĩx ri pa ho pa. Anẽ.

12

Jejus kêp arĩgromnu hpãm

Makre 2.23-28; Rukre 6.1-5

¹ Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkôt ri mẽ ixpa ho mẽ ixpa xwỳnhjê mẽ pa mẽ ma mẽ hpur kôt ri nhỹhỹm ri ixpa. Hãmri nẽ ra mẽ inhmã prãm nẽ mẽmo hy te kot harøj pyræk xwỳnhja kwỳ rê nẽ kugrà nẽ ma Jejus kôt hkanhar o mō. Mẽ ixpê Ijaew na pa htem axpẽn pur kãm ã amnhĩ nhĩpêx anhỹr o ixpa. ² Hãmri nhũm mẽ ixkwỳ pê Parijew nhõ xwỳnhjaja kãm mẽmoj tã Jejus o kapẽr prãm jakamã ã mẽ ixte amnhĩ nhĩpêx anhỹr ã mẽ ixpumu nẽ mẽ ixtã Jejus kukjêr kurê kumrêx nẽ kãm:

—Kwa Tĩrtũm kapẽr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nẽ mẽ pahkurê htã nhũm ri akôt mẽ pa ho mẽ pa xwỳnhjaja axtem nẽ ã amnhĩ nhĩpêx anhỹr o ri akôt pa. Mẽmo hyta rê nẽ akôt hkanhar o pa. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Na htem arĩgromnu hã mẽmoj tã àpênh kêt kênã. Anẽ.

³⁻⁴ Hãmri nhũm mẽ kuma nẽ hprĩ hã mẽ kãm Tĩrtũm kapẽr jarẽ nẽ mẽ kãm:

—Tk. Xàn ka htem Tĩrtũm kapẽr ã kagà htũm kot pahi Tawi kot tanhmã amnhĩ nhĩpêx tota kamã harênh nẽ mar kêt nẽ? Na pre hkôt ri mẽ pa xwỳnhjê mẽ nhũm mẽ prãm xàj Tĩrtũm mã amnhĩ jarẽnh xà hã ixkre hwỳr agjê. Hãmri nhũm mẽ õ patre maatija mẽ kãm prãm tỳx ã mẽ omu nẽ kãm mẽ hkaprĩ nẽ mẽ kãm mẽmoj gō. Mẽ kot Tĩrtũm noo mã pãwti jaxwỳr xwỳnhhta gō nhũm mẽ kuku. Tĩrtũm kapẽr ã kagà htũm kot ja nẽ mẽ hkurê htã nhũm mẽ kãm prãm tỳx ã mẽ omu nẽ mẽ kamã ukaprĩ xàj mẽ kãm kugō. ãm mẽ õ patre pix kot ja hkur kaxyw tã nhũm mẽ kãm kugō nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nẽ. Kot mẽ kamã ukaprĩ nẽ mẽ kãm õr ã omu nhũm ja kãm mex nẽ.

⁵ —Mẽ panhõ arĩgromnu htã na hte patrejaja arĩ hã Tĩrtũm mã amnhĩ jarẽnh xà hã ixkre kamã àpênh o pa. Tĩrtũm kapẽr ã kagà htũm kôt na htem arĩgromnu htã nhũm mẽ arĩ hã apê nhũm Tĩrtũm pê jamnuj kêt nẽ. Kumã mẽ àpênh xwỳnh kênã. ⁶ ãm hãmri na pa mẽ amã ja jarẽ. Tĩrtũm mã amnhĩ jarẽnh xà hã ixkreta mex tã nom ixpê Tĩrtũm Kra jakamã inhmex o ixte ixkreta jakrenh. ⁷ Tĩrtũm kapẽr ã kagà htũm kot ja harênh kot:

Kêr ka mẽ inhmã amnhĩ jarẽnh kaxyw nẽ ãm inhmã mẽmoj nhõr pix pê inhmã amnhĩ jarẽnh kêt nẽ. Mẽ mãânênh mẽ kamã axukaprĩ o ri apa pê inhmã amnhĩ jarẽ. Ja na kêt inhmã hprãm.

—Ã harênh kot anhỹr. Tã mẽ ate aprĩ hã ja mar ronhỹx ka mẽ ixkôt mẽ pa xwỳnhjê kot mẽmo hy rênh nẽ hkanhar o mōr ã mẽ omu nẽ ri tanhmã mẽ ho akapẽr to hkêt nẽ. ãm mẽ kãm prãm ã mẽ omu nẽ mẽ kamã axukaprĩ nẽ.

⁸ —Kêt pa na pre Tĩrtũm mẽ akaxyw ixãm nẽ mẽ awỳr inhmẽ. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karō. Kwa mẽ jajê pumu

nê mẽ kamã axukapřĩ kêt wehe. Kwãr mẽ mãmri mẽmo hyta rê nê hkanhar o ixkôt mō. Anê.

ĩhkra grã xwỳnh jarēnh

Makre 3.1-6; Rukre 6.6-11

⁹ Nhũm pre ã Jejus Parijew nhõ xwỳnhjê mã kapêr anê hãmri nê Tĩrtũm kapêr o mẽ ahkre xã hã ixkre hwỳr tẽ nê axã. ¹⁰ Nhũm Parijew nhõ xwỳnhjaja tanhmã ho kapêr to kaxyw htãnopxar o kuhê. Jakamã nhũm ixkre kamã mẽhõ my ĩhkra grã xwỳnhja mẽ pikuprõnh xwỳnhjê nhĩhkô hã nhỹ nhũm Parijew nhõ xwỳnhjaja omu nê axpẽn mã:

—Kwa pu mẽ jar pakuhê nê Jejus kot tanhmã amnhĩ nhĩpêx to hã omu. Xã koja arĩgromnu hã mũjti ho mex nã? Koja ho anê nê Tĩrtũm kapêr tũm kuhpa hã amnhĩ nhĩpêx. E pu mẽ kop xa nê hã omu. Anê.

Hãmri nê hã Jejus kukja nê kãm:

—E mẽ inhmã mẽmojarẽ. Xã na htem arĩgromnu hã akupỹm mẽ ho mex nhũm Tĩrtũm kãm ja mex nê nã? Anê.

¹¹ Hãmri nhũm mẽ hamaxpêr kôt mẽ omunh mex nê mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xã koja we mẽ akrit õwêhti ahkrehti kamã tẽm ka omu nê ãm omu nê arĩgro mex jamãr pẽ ho axãpir kêt nê? Nã kot kaj mẽ tee ri omu nê ho axãpir kurê kumrêx. ¹² Arĩgromnu hã mẽ ho mexja ja mex kẽnã. Tĩrtũm mã mẽ pahpê panhĩja na mẽ pamex o mẽ hkrit jakrenh jakamã kêr pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tĩrtũm kãm hprãm.

Anhỹr o mẽ kãm kapêr. ¹³ Hãmri nê hpãnhã myta mã:

—E anhĩhkra katãt. Anê.

Hãmri nhũm ĩhkra katãt nê mex kurê kumrêx. ¹⁴ Hãmri nhũm Parijew nhõ xwỳnhjaja tee ri ja hã omu nê Jejus kamã gryk nê. Arĩgromnu pẽ sap ã kot ho mex jakamã nhũm mẽ kamã gryk tỳx nê. Hãmri nê ma mra nê hapõj nê hã axpẽn kukjêr o kuhê nê axpẽn mã:

—Kwa ã kot amnhĩ nhĩpêx anhỹrja mỳrapê tanhmã kot puj wem ho? ã kapêr anhỹrja o te mẽ papamjaja mẽ pahte hkĩnhã mẽ kamã paxukapřĩ kêt pyrãk ã mẽ pajarẽ. Koja mẽ pahkwỳjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr. Kwa tanhmã kot puj wem ja nê ho?

Anhỹr o axpẽn kukjêr o kuhê.

Jejus kêp Tĩrtũm kot mẽ pahwỳr mẽnh xwỳnh ã harēnh

Makre 3.7-12

¹⁵ Hãmri nhũm Jejus amnhĩ tã Parijew nhõ xwỳnhjê jamaxpêr kôt mẽ omu hãmri nê mẽ kêp kato nê hpãnhã ma nhỹhỹm krĩ hõ hwỳr ma tẽ. Nhũm mẽ ohtõ nê omu nê ma hkôt mra nhũm mẽ omu nê akupỹm mẽ kãm mẽ ã xwỳnh piitã ho mex. ¹⁶ Hãmri nê mẽ kãm:

—E na pa akupỹm mẽ ato mex. Nom kêr ka mẽ amnhĩ tã ixto axãmra ho ri apa hkêt nê. Ixpê Tĩrtũm Kra hã mẽ kãm ijarēnh kêt nê. ãm kwarĩ kumrêx.

Anhỹr o mẽ kãm kapêr. ¹⁷ Na pre ra amnepêm Tĩrtũm nhỹ hã kapêr xwỳnh finat Ijaisja Jejus kukamã mẽ kãm tanhmã harēnh to nê hã kagã. Te Tĩrtũm tãm kapêr pyrãk o harẽ nê hã kagã. Nê hã kagã ho:

¹⁸ Ota ixkôt amnhĩ nhĩpêx o pa xwỳnhnta xa. Pa na pa amnhĩ kaxyw ãm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh tỳx nê. Kot paj hwỳr amnhĩ karõ mẽ nhũm hwỳr axã nhũm ma ã hã pika piitã hkôt mẽ piitã mẽ kãm ijarēnh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

¹⁹ Nom koja ri amnhĩ to ãmra o pa hkêt nê. Rỳ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

²⁰ ãm kapêr xukapřĩ pix o koja mẽ hirerek xwỳnhjê mã kapêr o pa. Nê mẽ kot tee ri amnhĩ nhĩpêx ã amnhĩ pumunh xwỳnhjê kamã ukapřĩ o pa. Nê mẽ kot htỳx ri amnhĩ nhĩpêx o mẽ pa xwỳnhjê kutã nojarêr rãhã ho pa jakamã nhũm mẽ hpãnhã tãm

amnhĩ nhĩpêx o pa. Koja ã amnhĩ nhĩpêx anhÿr o ri mẽ hkôt pa rãhã ra akupÿm mẽmoj piitã tãm haxwÿr pa.

²¹ ã kot amnhĩ nhĩpêx anhÿr o pa jakamã koja pika piitã hkôt mẽ pa xwÿnh kwÿjjaja kukwak ri amnhĩ kaxyw Tirtũm kôt hamaxpêr nê hkôt amnhĩ xunhwÿ. Anê.

Na pre ã finat Ijaisja Tirtũm nhÿ hã kormã Jejus wrÿk nê kator kêt ri tanhmã kot amnhĩ nhĩpêx to ho pa hkukamã harênh nê hã kagã anê. Tã nhũm mẽ hwÿr wrÿ nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harênh

Makre 3.20-30; Rukre 11.14-23, 11.31-32, 12.10

²² Tã nhũm prem Jejus wÿr mẽhõ mÿja o mõi. Mẽkarõmnuti kot hwÿr àr nê ho nohkre nê ho kapêr kêt xwÿnhnta nhũm mẽ hwÿr o mõi. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rÿt mex nê akupÿm kapêr mex nê.

²³ Hãmri nhũm mẽ amnhĩ jaêr pê omu nê kamã no puma nê hã axpên kujêr o:

—Kokÿÿ. Jejus na hte ãm mẽ ho mex o mẽ ho mex o pa. Mãn kêp Tirtũm kot mẽ pahwÿr mẽnh mã xwÿnhnta na nã? ã na hte ã amnhĩ nhĩpêx anhÿr o pa. Mãn kêp pahĩ finat Tawi kanrêhã tãmnhwÿta na nã? Anê.

²⁴ Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwy hã hkamnhix. Jakamã mẽ kot hã axpêr kujêr ã mẽ kuma nê mẽ kãm:

—Tk pêr hinhu nhĩkõõti nhÿ hã na hte mẽ nê amnhĩ kwÿjê japõx o pa. Anê.

Hinhu nhĩkõõti nhĩxi hõ pê Satanasti nhũm prem ã Satanasti nhÿ hã Jejus kot amnhĩ nhĩpêx ã hkamnhix anê. ²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwy hã ixkamnhix xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê anhgrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwÿnhjaja. Rÿ mẽ kot axpên to hkwy xwÿnhjaja mẽmoj tã axpên kãm gryk nê axpên kutã amnhĩ xunhwÿ. Hãmri nê ahpÿnhã awry hã pa nhũm mẽ õ pahija tee ri kãm mẽ hamãr prãm kaprÿ. Mo mẽ hkwyjjaja kot ri mẽ hamãr o pa? No koja pahija tãm amnhĩ nê amnhĩ kwÿjê janor kêt nê. ²⁶ Tã ja pyrã nê ixte Satanasti nhÿ hã tanhmã amnhĩ nhĩpêx to ho ri ixpa ronhÿx pa ri mẽ nê amnhĩ kwÿjê janor kêt nê.

²⁷ —No mẽ akwÿjjaja? Xà Satanasti nhÿ hã na htem mẽ nê mẽkarõmnuti japõx o pa? Kêp apu pa ixte ÿ hã mẽ nê amnhĩ kwÿjê japõx ronhÿx mẽ akwÿjjaja ixpyrã nê ÿ hã mẽ nê amnhĩ kwÿjê japõx o pa. Nã Tirtũm nhÿ hã mẽ ixte mẽ nê mẽ hapõx o ixpa kênã. Jakamã mẽ ate ã ijarênh anhÿrja mex kêt. ²⁸ Tirtũm Karõ nhÿ hã ixte mẽ nê mẽ hapõx jakamã kwa mẽ ja hã ixpumu nê ixte mẽ ato amnhĩptar kaxyw Tirtũm kot mẽ awÿr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh tÿx jakamã na htem tee ri kêp hkôt mẽ kot amnhĩ xunhwÿr xwÿnhjê pytãr kaxyw nhũm mẽ nê mẽ omunh mex nê. Tã nom ixàhpumunh tÿx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkôt amnhĩ xunhwÿr kêt nê. Kwa wem ma amnhĩ to amõr gri nê tokyx ixkôt amnhĩ xunhwÿ kêt wehe. Kot kaj mẽ anhÿr kêt hãmri nê mẽ apê ixkutã amnhĩ xunhwÿr xwÿnh pyrãk o amnhĩ nhĩpêx.

³¹⁻³² —Nê koja mẽhõ ixkapêr ma nê kãm ixprãm kêt nhũm Tirtũm ixtã omu nom tokyx tanhmã ixtã ho hkêt nê. Koja kormã amnhĩ tã hamã. Karõ kot axte kãm ijarênh o amnhĩrÿt nhũm jatã kot mar nê kãm ixprãm nê ixkôt amnhĩ xãm prãm xaj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrÿt to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaãm kêt o amnhĩ nhĩpêx. Mÿrapê koja Tirtũm nhÿrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprÿ kaprÿ. Hãmri nê amnhĩ xà htÿx kamã hamak o pa xatã wÿr ma pa nê kamã pa rãhã nê pa ho pa. Anê.

Mê pajamaxpêr xà hkôt tanhmã ri mê pakapêr to

Rukre 6.43-45

³³ Nhũm Jejus arĩ Parijew nhõ xwỳnhjê mã kapêr nê mê kãm:

—Nê kot kaj mê atõ anhõ mêmõ pàr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mêmõ xõ hpàr pumunh kôt tanhmã kute hã harênh anê. Ja pyrã nê na htem tanhmã mê kot amnhĩ nhĩpêx to hã mê omunh kôt tanhmã mê harênh to. Mê kot amnhĩ tomnuj xwỳnh ã mê harê rỳ mê kot amnhĩ to mex xwỳnh ã mê harê.

³⁴⁻³⁵ —Nê koja mêhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htỳx ri tanhmã amnhĩ tomnuj to ho pa. Na htem ahpỳnhã amnhĩ jamaxpêr xà hkôt tanhmã kapêr to ho pa. No mê kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xà hkôt tanhmã ri kapêr to ho pa. ³⁶⁻³⁷ Koja nhỹrmã Tĩrtũm mê piitã tanhmã mê kapêr to hã mê mar xà hkôt tanhmã mê harênh to. Jakamã mê akapêr mex o mê apa xwỳnhjaja koja mê amex ã mê ajarê. Nom mê atỳx ri akapêr punuj o mê apa xwỳnhjaja koja mê amex kêt ã mê ajarê. Hãmri nê mê akapêr punuj o apaja mỳrapê mê atomnuj tỳx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhũm Tĩrtũm kapêr tũm o mê ahkre xwỳnh mê Parijew nhõ xwỳnh kwỳjaja mêmõj tã Jejus wỳ nê kãm:

—Kwa Pahihti. Mê inhmã aa mê ixte mêmõj pumunh kêt õ ho anê. Kot paj mê omu hãmri nê Tĩrtũm kot mê ixwỳr amênh ã apumunh kurê kumrêx. Jakamã e mê inhmã mêmõj to anê nà. Anê.

³⁹ Hãmri nhũm mê kuma nê mê kãm:

—Tk. Pêr ãm mê ajamaxpêr punuj pix o na ka htem apa. Ixpê Tĩrtũm kot mê awỳr inhmênh xwỳnh tã mê ate ja hã ixpumunh kêt. Nê mê ate ja hã axpên mã ijarênh kêt tã ixte mê amã aa mêmõj pumunh kêt õ ho anhỹr kaxyw hã ixwỳ. Nà pa mê amã ho anhỹr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mê amã harê.

⁴⁰ —Tĩrtũm nhỹ hã kapêr xwỳnh Jõhtija amnepêm na pre tep rax kumrêxja htĩr rãhã kukrê. Nhũm õxàhkre kamã htĩr nê hkrĩ hã apkati axkrunêpxi hãmri nê htĩr rãhã õxàhkre rũm kato. Tã ixpê Tĩrtũm kot mê awỳr inhmênh xwỳnh kot paj nhỹrmã kên kre kamã ixtyk nê inhnõr ã apkati axkrunêpxi. Jõhti hkĩnhã ixtyk kumrêx nê inhnõr ã apkati axkrunêpxi hãmri nhũm Tĩrtũm akupỳm ixto ixtĩr.

⁴¹ —Nê koja nhỹrmã Tĩrtũm akupỳm mê htyk nê mê hikwỳ xwỳnh piitã akupỳm mê ho htĩr hãmri nhũm mê piitã Inhĩpêêxã mê wa ixkutã hkrĩ pa wa tanhmã mê harênh to. Tĩrtũm mê wa ixkuri mê htĩr tũm nê mê pa ho mê pa mã xwỳnhjê hã mê hkwỳjê jarê nê wa ixkuri mê pa ho mê pa hkêt xwỳnhjê jarê. Mê piitã ã ahpỳnhã mê harênh anê. Amarĩ mê pa xwỳnhjaja nê mê õ pahijaja. Jakamã nhũm Nĩniwe nhõ xwỳnhjaja tanhmã wa inhmã mê ajarênh to. Jõhti kot mê hwỳr mõi nê mê kãm Tĩrtũm kapêr jarênh o pa xwỳnhjaja nhũm mê tanhmã wa inhmã mê ajarênh to nê wa inhmã: “Na pre Jõhtija man mê inhõ krĩ hwỳr mõi nê mê inhmã akapêr jarênh o ri mê ixkôt pa. Pa prem kuma nê mê ixte amnhĩ tomnuj kaga nê akôt amnhĩ xunhwỳr kurê kumrêx Tĩrtũm. No or war akutã mê hkrĩ xwỳnh kwỳ ata mê na pre Akra Jejus tãm mê hwỳr mõi nê mê kãm kapêr o ri mê hkôt pa nhũm prem mar tã mê ixkĩnhã mê kot amnhĩ tomnuj kaga nê hkôt amnhĩ xunhwỳr kêt nê. Mê ixkurom mê kot Akra mar tã amnhĩ kaxyw kãm hamaxpêr kêt nê.” Anhỹr o koja mê wa inhmã mê ajarê ka mê tee ri mê ama nê ra mê amã ma nê. Nom ãm mê amã ma kaprỳ.

⁴² —Nê sur kãm mê õ pahi nitita koja mê hpãnhã tanhmã wa inhmã mê ajarênh to nê wa inhmã: “Na pa pre inhmã pahi Sarumãw kot war anhỹ hã ahpumunh tỳx ã harênh ma hãmri nê inhmã mar prãm xàj ma awry hã õ pika hwỳr mõi nê omu nê kapêr ma.

Hămri nê ma akupÿm inhô pika hwÿr mō nê ixkwÿjê mã àhpumunh tÿx ã harênh o ri ixpa. Tã Akra Jejus na kot àhpumunh tÿx o pahi Sarumãw jakrenh tã or war akutã mẽ hkrÿ xwÿnh kwÿ ata mẽ. Mẽ kot kapêr mar tã ixkÿnhã kãm mar prãm kêt. Na prem kuma nê ãm kuma.” Anhÿr o koja wa inhmã mẽ ajarê. Hămri nê ja hã mẽ amã akir ka mẽ tee ri mar o akrÿ nê amnhÿ kamã agryk o akrÿ. Nom ãm amnhÿ kamã agryk kaprÿ. Anê.

Mêkarōmnuti kot tanhmã mēhō hto hã harēnh

Rukre 11.24-26

⁴³ Nhũm Jejus arÿ Parijew nhô xwÿnhjê mẽ Tÿrtũm kapêr tũm o mẽ ahkre xwÿnhjê mã kapêr nê mẽ kãm:

—Te mẽ ate ixte mēhō nê mẽkarōmnuti japōx xwÿnhhta pyrāk. Nhũm te kêp kator nê ma htēm pyrāk. Nê nhÿri amgrã kamã ri pa pyrāk. Koja ja kêp omnuj nhũm tee ri kamã nhÿri hkôt xà japêr o pa. Nom tee ri hapêr o pa kaprÿ. ⁴⁴ Hămri nê tanhmã amnhÿ kukamã hamaxpêr to nê hamaxpêr o: “E kot paj ma akupÿm mẽ kot nê ixkator xwÿnhhta wÿr tē nê axà nê kamã mãn ri ixpa.” ⁴⁵ Anhÿr o hamaxpêr hămri nê ma akupÿm hwÿr tē. Nom kormã akupÿm hwÿr àr kêt ri nhũm kamã amrakati nê ri pa. Jakamã nhũm akupÿm hwÿr axà. Nom ahte hwÿr àr kêt nê. Amnhÿ kôt hkwyjê ho 7 nê hwÿr mẽ ho gjêx pa. Mẽ kêp 7jaja nê wamta mẽ nhũm mẽ piitã hwÿr gjêx pa. No mẽ kêp 7jaja na omnuj tÿx o kot wamta jakrenh jakamã nhũm mẽ kot hwÿr gjêx xwÿnhhta mẽ ÿ hã ra amnhÿ tomnuj tÿx nê oprê htÿx o pa. Wam pyxire kot hwÿr àrta nhÿ hã nhũm amnhÿ tomnuj o ri pa nom kawax pē oprê. Tã nhũm ra axte hwÿr mẽ ohtô nê gjêxta nhÿ hã hămri oprê htÿx kumrêx. Ja pyrã nê kot kaj mẽ tokyx ixkôt amnhÿ xunhwÿr kêt nê hămri nê amnhÿ tomnuj tÿx pix o ri apa. Anê.

Jejus kot tanhmã hkwyjê jarēnh to hã harēnh

⁴⁶ Nhũm Jejus arÿ mẽ ahkre ho nhÿ. Rôm nhũm katorxà nê htōjaja nhÿhÿnh hwÿr mōn pōj. Nom kormã hwÿr gjêx kêt nê. Mẽ kot hã htu rax jakamã nhũm mẽ tee ri hwÿr gjêx kaxyw kormã kapôt ã hã mẽ omunh o kuhê. ⁴⁷ Hămri nhũm mēhōja kapôt ã mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atōjaja awÿr mōn pōj nê tee àr kaxyw. O mÿj mẽ kapôt ã kuhê. Anê.

⁴⁸⁻⁵⁰ Hămri nhũm kuma nê kãm:

—Tôe. Nà kot pa ixkato nê mẽ omu. Inhmã mẽ hapêê. Nom kot kaj mẽ atō Tÿrtũm kapêr ma nê hkôt amnhÿ xãm nê hkôt amnhÿ nhÿpêx. Hã kot kaj te apê ixtō rÿ ixkatorxà pyrāk o pu mẽ axpên nhÿpêx o ri papa. Pa inhmã ixkatorxà nê ixtōjê japê pyrã nê mãânên inhmã mẽ ajapê nê. Anê.

13

Mêmo hy hkre xwÿnh jarēnh

Matêwre 13.18-23; Makre 4.1-9; Rukre 8.4-8

¹ Hămri nhũm Jejus mẽ kãm kapêr pa nê ixkre rũm kato nê ma himô rax wÿr tē nê gô mÿri mẽ kãm ujarēnh kaxyw nhÿ. Pa mẽ ixpê hkôt mẽ ixpa ho ixpa xwÿnhjaja ma hkôt mra. ²⁻³ Hămri nê gôta wÿr pōj nê mÿri ixkrÿ. Nhũm mẽ Jejus ã htu rax nê nhũm tee ri mẽ omunh o nhÿ. Hămri nê hamaxpêr nê kãnhmã xa nê tē nê pàr krem axà nê pàr kre kamã mÿtũm awry rũm mẽ ahkre ho nhÿ nhũm mẽ piitã omunh nê mar mex o hkrÿ. Nhũm mẽ kãm ujarēnh o mẽ ahkre ho nhÿ. Nom mẽ kãm tãm ujarēnh kêt nê. Mẽ kot Tÿrtũm kapêr mar nê tanhmã hkôt amnhÿ nhÿpêx to ho paja nhũm hã kuxi nê mẽ kãm harēnh o nhÿ nhũm mẽ amgrã kamã kÿx pē mar o hkrÿ. Nhũm mẽ kãm:

⁴ —E mẽ inhma. Koja mēhō ma pur mã mō nê pur kãm mẽmo hy ho ukapêr o ri pa. Nom nhũm hy piitã amex kãm rôrôk kêt nê. Koja hkwyja ahpÿnhã nhÿri rôrôk. Kwÿ aptÿx kãm rôrôk nhũm kuwênhre omu nê hwÿr mra nê hkrêr pa.

⁵ —Nê koja kên kãm hkwy rôrôk nê ra higrôt kutã nojarêr nê higrôt pa. Nom nhũm kamã aptÿx nê kêp pika hkryre. ⁶ Jakamã nhũm higrôt nhũm hã myt apha nê arÿgro htÿx mẽ nhũm grã pa. Harê hkryre jakamã grã pa.

⁷ —Nê koja mrônhi kamã hkwy rôrok nê higrôt tâ no nhũm utija kêp amyta nhũm ô hkêt nê.

⁸ —No kêt hirã kamã pika mex kãm rôrok xwýnhja hirã kamã rôrok jakamã higrôt mex nê piitã ô rûnh nê. Kamã ô hkwy kêp 30 nê kamã hkwy kêp 60 nê kamã hkwy kêp 100. ã mẽ ujarênh kot anhÿr. ⁹ Kwa kêr ka mẽ ixujarênhja ma nê kãm ajamaxpêr tÿx rãhã ho apa. Anê.

Mẽmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

¹⁰ Hãmri pa mẽ ixpê Jejus kôt mẽ ixpa ho ixpa xwýnhja Jejus kot mẽ kãm ã ujarênh anhÿrja ã kuma nê tee ri hkukamã ijamaxpêr. Hãmri nê hã hkukja nê kãm:

—Kwa axujarênhta na pa mẽ ixprĩ hã hkôt mẽmoj pumunh kêt nê. Mon ka hte ãm mẽ ujarênh pix o mẽ ahkre? Anê.

¹¹ Hãmri nhũm mẽ inhmã:

—Tõe. Nà kot paj mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tirtũm kot ja hã mẽ omunh nê mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma nê ãm kuma nê htÿx ri pa.

¹² —No kêt mẽ kajaja na ka mẽ ixkôt ri apa ho apa. Nê xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkôt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mõ. No mẽ kot ixkapêr mar nê ãm mar xwýnhja na mẽ akĩnhã inhmar tÿx kêt nê. Jakamã nhũm Tirtũm tanhmã mẽ hkrã hto nhũm mẽ hã no hkêt tokyx anê htÿx ri pa.

¹³ “Ixte mẽ kãm aa mẽ kot mẽmoj pumunh kêt kwÿ ho anhÿr rax tâ nhũm mẽ omu nê ãm omu. Nê ixte amnhĩ nhĩpêxja nhũm mẽ kãm hkĩnh kêt nê. Nê mẽ kot ixkapêr mar tâ ãm inhma nê kãm hprĩ hã inhmar prãm kêt nê.”

—Jakamã na pa hte ã mẽ kãm mẽmoj te ho tãm pyrã nê harê no ãm hã haxwÿ nê mẽ kãm ixujarênh anê.

¹⁴⁻¹⁵ —Na pre ra Tirtũm nhÿ hã kapêr o pa xwýnh Ijaisja amnepêr mẽ hkukamã tanhmã mẽ harênh to nê hã kagã. Mẽ kot inhmar nê ãm inhmar xwýnhjê jarê nê tanhmã mẽ hkukamã mẽ harênh to nê mẽ harênh o:

Koja mẽ ujarênh mex mar pymaj amnhĩ jamak pro nê amnhĩ no hpro nê hkôt hamaxpêr kêt nê. Jakamã koja mẽ kãm mẽ kot amnhĩ nhĩpêx mex prãm kêt nê harênhja ma nê ãm kuma. Nê omu nê ãm omu. Mẽ kãm hprãm kêt jakamã koja mẽ ã amnhĩ nhĩpêx anê. ã mẽ kot amnhĩ nhĩpêx anhÿr kêt ronhÿx mẽ ra Tirtũm kapêr ma nê hkôt amnhĩ xunhwÿ. Hãmri nhũm amnhĩ tâ mẽ omu nê mẽ nê mẽ kot amnhĩ tomnuj rênh pa. Hãmri nhũm mẽ hkôt amnhĩ nhĩpêx mex nê kapêr mar mex o pa. Tã no nhũm mẽ ã amnhĩ nhĩpêx anhÿr kêt nê. Anê.

—ã Ijaisja mẽ hkukamã mẽ harê nê mẽ hã kagã anê.

¹⁶ —No kêt mẽ kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nê mẽ ajamak o ixkapêr mar o ri ixkôt apa. ¹⁷ Amnepêr mẽ akukamã pahijaja nê Tirtũm nhÿ hã mẽ kãm kapêr o ri mẽ pa xwýnhja na prem kãm ixpumunh prãm tÿx o pa. Nê mẽ kãm ixkapêr mar prãm tÿx o pa. No ãm mẽ akĩnhã ixpumunh nê ixkapêr mar kêt rãhã htyk pa. Kormã ixwryk nê jar ixkator kêt jakamã na prem arĩ htĩr nê pa ri ixpumunh kêt rãhã ra htyk pa. ãm mẽ kapxipixjaja na ka mẽ mÿr pê ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar o ixkôt apa jakamã kwa mẽ ja hã amnhĩ pumu nê tãm amnhĩ nhĩpêx o ri apa pê akĩnh nê ri apa. Anê.

Nhũm pre ã Jejus mẽ ixpê hkôt ixpa ho ixpa xwýnhjê mã kapêr anê.

Jejus kot hprĩ hã mẽmo hy jarênh

Makre 4.13-20; Rukre 8.11-15

¹⁸ Hãmri nhũm Jejus mẽ ixpê hkôt ixpa ho ixpa xwýnhjê mã hprĩ hã mẽ ujarênhta jarê nê mẽ inhmã:

—E kot paj ixprî hã mẽ amã mẽmo hy ho ukapêr xwýnh ã ixujarênhhta jarẽ ka mẽ inhma. Nà mẽmo hyta te kêp Tirtũm kapêr pyræk. Nẽ ahpýnhã mẽmo hy rôrøk ã pikata te kêp mẽ apê panhĩ ahpýnhã mẽ ate Tirtũm kapêr mar nõ ahpýnhã hkôt tanhmã amnhĩ nhĩpêx tota pyræk. ¹⁹ Jakamã mẽ kot mar xwýnh kwýjaja te mẽ kot aptýx kãm hy rôrøk nhũm kuwênh kot hwýr mrar nõ hkrêr par xwýnhhta pyræk. Jao Tirtũm kapêr ma no nhũm Satanasti te kuwênh kot hy krêr parta pyrà nõ mẽ kot mar nõ amnhĩ kaxyw hkôt hamaxpêr nõ hkôt amnhĩ xunhwýr pymaj hãmri ra tanhmã kapêrja nõ mẽ hkrã hto. Jakamã nhũm mẽ kuma nom ho hamakêtkati tokyx anẽ nõ axte kãm hamaxpêr kêt nõ pa.

²⁰ —Nẽ mẽ kot mar xwýnh kwýjaja te mẽ kot kênre kamã hy hkwy rôrøk nõ higrôt nõ grà par tokyx anhýr xwýnhhta pyræk. Jao Tirtũm kapêr ma nõ hkính nõ. Nẽ kãm mar prãm nõ. ²¹ Tã nhũm mẽhõ Tirtũm nõ tanhmã mẽ kãm kapêr to nhũm mẽ kuma nõ Tirtũm kaga. Te mẽmo hy higrôt nom ra grà par tokyx anhýrta pyræk.

²² —Nẽ mẽ kot mar xwýnh kwýjaja te mrônhi kamã hy hkwy rôrøk nõ higrôt nhũm mrônhi kot kêp àmnar xwýnhhta pyræk. Jao mẽ kãm Tirtũm kapêr mar prãm tã mãânên kãm mẽ hikukrêx rũnh nõ mẽ hikàxpore rũnh prãm. Hãmri nõ ãm ja pix kukamã hamaxpêr o pa. Nẽ ja gryk ã axte Tirtũm kapêr mã hamaxpêr nõ hkôt amnhĩ nhĩpêx kêt nõ.

²³ —Nẽ mẽ kot mar xwýnh kwýjaja te hirã kamã pika mex kãm hy hkwy rôrøk nõ higrôt nõ ô rũnhhta pyræk. Jao ixkapêr ma nõ amnhĩ krã him hagiênh týx nõ. Nẽ ixkôt ri amnhĩ nhĩpêx mex rãhã ho pa. Jakamã te mẽmo hy ô rũnh nõ ô mex pyræk o amnhĩ nhĩpêx. E ã ixujarênhja kot anhýr. Anẽ.

Harôj kaàkre jarênh

Matêwre 13.36-43; Makre 4.26-29

²⁴ Nhũm Jejus axte mẽ kot mar o hkrĩ xwýnhjê mã awjarẽ nom hprĩ hã mẽ kãm ujarênh kêt nõ. Axte mẽ kãm mẽmoj tã kuxi nõ awjarẽ nõ mẽ kãm:

—Nà nhýrmã Tirtũm mẽ kot kormã htĩr ri tanhmã amnhĩ nhĩpêx to ho pa hã mẽ omunh xà hkôt ahpýnhã tanhmã mẽ harênh toja te mẽ ujarênh ja pyræk. Koja mẽhõ harôj y mex o ukapêr kaxyw ma hpur mã mō. Hãmri nõ hkre hpa nõ ma akupým mō. ²⁵ Tã nhũm kamãt nhũm ra gōr nõ nõ. Hãmri nhũm kãm hkurê xwýnhja ma kêp ihpur wýr tẽ nõ harôj mexta nhĩpy axtem nõ kêp harôj kaàkre hkre. Harôj kaàkreja te kot harôj mex pyræk nom mẽ kot hkur kêt. Tã nhũm kêp harôj y mex nhĩpy hkre hpa hãmri nõ ma akupým tẽ.

²⁶ —Tã nhũm hamẽ higrôt nõ anhĩpê ô. ²⁷ Nhũm kãm mẽ àpênh xwýnhjaja tee ri harôj mex kaêx ã harôj kaàkreta pumu nõ hpur nhõ dōn wýr tẽ nõ kãm harê nõ kãm: “Kwa ate harôj mex pix kre htã pêr hkaêx ã harôj kaàkre mãânên kato. Kwa tanhmã na pre amnhĩ to nõ hkaêx ã kato?” Anẽ. ²⁸ Hãmri nhũm tee ri mẽ kuma nõ mẽ kãm: “Nà mẽhõ kãm ixkurê xwýnh na pre ã inhĩpêx anẽ.” Anẽ hãmri nhũm kãm mẽ àpênh xwýnhhta kãm: “Kwa xà kot paj mẽ tokyx ma hwýr mra nõ nõ harênh pa nõ kurẽ nã?” Anẽ. ²⁹ Nhũm mẽ kãm: “Nà kot kaj mẽ anẽ nõ harôj mexta mẽ ho apimràatã ixpê harênh pa. ³⁰ Kwãr mãmrĩ harôj mex mẽ hpimràatã ô hpa mãn. Ka mẽ rĩ ma hwýr mra nõ harôj kaàkre kumrêx jarênh pa nõ axpên tã harê ho ê nõ ma o mra nõ hpøk. Hãmri nõ rĩ kormã hpãnhã harôj mex jakà nõ ho akuprō nõ ô ho mra nõ ixkre kamã haxwý.” Anẽ. ã mẽ ujarênh kot anhýr.

Anhýr o mẽ kãm kapêr.

Jejus te kot mẽmo hy hkryre pyræk ã harênh

Makre 4.30-32; Rukre 13.18-19

³¹⁻³² Hãmri nhũm Jejus arĩ mẽ kãm amnhĩ tã kuxi nõ ujarênh o nhý. Nẽ tanhmã mẽ kãm amnhĩ tã ujarênh to nõ mẽ kãm:

—Nà Tirtũm kot mẽ awýr ixte mẽ ato amnhĩptar kaxyw inhmênh ã ijarênhja. Te ixte mẽmo hy pixire nhũm mẽ kot hkre nhũm higrôt pyræk. Koja gaa nõ hprêk. Hãmri nõ hpa anhrà nhũm kuwênhre hwýr mra nõ hôptĩ kamã amnhĩm haê nhĩpêx nõ kamã hikwý.

Tã kot paj nhÿrmã mẽmo hy jarênhta pyrã nê ixpyxi htã pika piitã hkôt mẽ ho amnhÿptã nê mẽ omunh mex rãhã ho ixpa. Anê.

Jejus te kot pãwti kaxkrit xà pyrãk ã harênh

Rukre 13.20-21

³³ Nhÿm Jejus arÿ mẽ kãm amnhÿ tã kuxi nê ujarênh o nhÿ nê mẽ kãm:

—E kot pa hpãnhã mẽ amã tanhmã pãwti kaxkrit xà jarênh to ka mẽ inhma. Na hte mênijaja pãwti nhÿpêx kaxyw hãmri nê kaxkrit xà hkwy ho grire nê kupy nê trik xôm mẽ ho ahkã. Hãmri nê ho pãwti nhÿpêx. Kaxkrit xàja grire htã pãwti piitã ho kaxkrit mex nê. Tã ja pyrã nê ixpyxi htã koja mẽ nhÿrmã pika piitã hkôt ixkôt amnhÿ nhÿpêx mex o pa.

Anhÿr o mẽ kãm amnhÿ jarê.

Jejus kot mẽ ujarênh pix kãm mẽ ahkre hã harênh

Makre 4.33-34

³⁴ Na pre ã Jejusja mẽ ujarênh o mẽ ahkre ho pa anê. ãm mẽ ujarênh pix o mẽ ahkre ho pa. Te tãm ujarênh pyrãk no ãm mẽmoj tã haxwÿ rÿ amnhÿ tã haxwÿ nê mẽ kãm tanhmã amnhÿ jarênh to. ³⁵ ã kot mẽ ahkre ho pa anhÿr kukamã na pre ra amnepêm Tÿrtÿm nhÿ hã kapêr o mẽ pa xwÿnhjê hõja harê nê hã kagã. Te Jejus tãm tanhmã amnhÿ jarênh to pyrãk o hkukamã harê nê hã kagã nê hã hkagã ho:

Kot paj mẽ kãm ixujarênh pix kãm mẽ ahkre ho ri ixpa. Mẽmoj te ho tãm pyrã nê harê nom mẽmoj tã haxwÿ nê tanhmã mẽ kãm ixujarênh to. Nê aa mẽ kot mẽmoj mar kêt xwÿnh kwÿ kot paj mẽ kãm harê kê mẽ kuma. Anê.

Jejus kot hprÿ hã harõj kaàkre jarênh

Matêwre 13.24-30, 13.47-50

³⁶ Tã nhÿm Jejus mẽ kãm ujarênh pa nê mẽ kure nê ma tèn ixkrem axã. Hãmri pa mẽ ixpê hkôt ixpa ho ixpa xwÿnhjaja ma hkôt mra nê ixkrem agjê. Hãmri nê harõj kaàkre hã ujarênhta ã hkukja nê kãm:

—Kwa aprÿ hã mẽ inhmã harõj kaàkre jarênhta jarê nã. Na pa mẽ kormã ixprÿ hã mar mex kêt nê. Anê.

³⁷ Hãmri nhÿm mẽ inhmã:

—Tõe pa ixprÿ hã mẽ amã harê. ãm paa.

Ixpê Tÿrtÿm kot mẽ awÿr inhmênh xwÿnh te ixte mẽmo hy mex o ukapêr xwÿnhhta pyrãk.

³⁸ Nê purta te kêt pika piitã pyrãk.

Nê harõj mexta te ra mẽ ate ixkôt amnhÿ xunhwÿr nê ixkôt amnhÿ nhÿpêx o apa xwÿnhjê pyrãk.

Nê harõj kaàkreta te mẽ kot Satanasti hkôt amnhÿ nhÿpêx o mẽ pa xwÿnhjê pyrãk.

³⁹ Nê kot harõj kaàkre hkre xwÿnhhta te Satanasti pyrãk.

Nê harõj jakãr xã hã arÿgrota te Tÿrtÿm kot ahpÿnhã tanhmã mẽ harênh to xã hã arÿgrota pyrãk.

Nê mẽ kot harõj jakãr xwÿnhjaja te Tÿrtÿm kapêr o wÿk xwÿnhjê pyrãk.

⁴⁰ Mẽ ujarênhja kamã na prem harõj kaàkre kumrêx jarê nê hã hpøk jarê. Ja pyrã nê koja nhÿrmã Tÿrtÿm kot ahpÿnhã tanhmã mẽ harênh to xã hã arÿgrota ã hãmri ã mẽ kot amnhÿ tomnuj o mẽ pa xwÿnhjê nhÿpêx anê.

⁴¹ —Kot paj nhÿrmã kãm mẽ piitã mẽ ho amnhÿptãr kaxyw hãmri nê kapêr o mẽ wÿk xwÿnhjê mã anê nhÿm mẽ ma mran wÿr nê mẽ kot amnhÿ tomnuj xwÿnhjê pix o akuprõ. Nê mẽ kot nhãm mẽ hkwyjê kot mẽ urãk nê tanhmã amnhÿ tomnuj to ho pa kaxyw mẽ kãm anhÿr xwÿnhjaja nhÿm mẽ mãânên mẽ ho akuprõ. ⁴² Hãmri nê mẽ ho pikuprõnh pa nê te mẽ kot harõj kaàkreta nhÿpêx pyrã nê kuwy kamã mẽ rênh pa. Hãmri nhÿm mẽ kamã amnhÿ xã htÿx kamã hamak rãhã nê pa ho pa. Nê amnhÿ xã htÿx ã maj tee ri mÿr rãhã ho pa. Nê tee ri amnhÿ xã hã maj amnhÿ nham o axpên kamnhar tÿx kaprÿ.

⁴³ —No ixkôt mẽ kot amnhÿ nhÿpêx xwÿnhjaja koja mẽ mẽ kurom mex kumrêx nê pa. Kot paj mẽ ho mex rax nê nhÿm mẽ mex rãhã nê pa ho pa. Tÿrtÿm kot kormã pika nyw

nhîpêx mã xwÿnhhta kamã nhũm mẽ mex kumrêx nê pa ho pa. E kêr ka mẽ ixujarênhja ma nê kãm ajamaxpêr tÿx rãhã ho apa. Anê.

Mẽ hikukrêx mex o hpimxur jarênh
Pirîpos 3.7

⁴⁴ Nhũm Jejus arî mẽ ixpiitã mẽ inhmã tanhmã ujarênh to. Nom hprî hã ujarênh kêr nê. Kê axte mẽmoj tâ kuxi nê mẽ inhmã tanhmã ujarênh to nê mẽ inhmã:

—Mẽ ate ixkôt amnhî xunhwÿr xwÿnhhaja te mẽ apê mẽ hikukrêx mex ã pika japrôr xwÿnhhta pyrâk. Kojã mẽhõ mẽ hikukrêx mex jamÿ nê o tẽ nê nhÿri amnhîm ho amũxu. Kaxyw kakwÿ nê kamã hagjê nê hity hpa nê ma akupÿm tẽ. Hãmri nhũm jãã nhũm mẽhõ tẽn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tẽ nê inhörkwÿ kamã ixkukrêx piitã ho wênê hpa nê hpãnhã kàxpore jamÿ nê ho amnhîm mẽ hikukrêx mex ã pika japrô nê amnhîm mẽmoj mexta o ixarîk pa.” Anhÿr o hamaxpêr nê akupÿm hity hpa nê ma akupÿm tẽ. Hãmri nê mẽmoj mexta gryk ã õ mẽmoj piitã ho wênê hpa. Hikukrêx nê örkwÿ nhũm piitã ho wênê hpa. Hãmri nê hpãnhã kàxpore jamÿ nê ma o tẽ nê amnhîm pikata japrô. Hãmri nê ma akupÿm hwÿr tẽ nê kamã mẽ hikukrêx mexta kwÿnh pa nê ho õ kumrêx.

—Tã te mẽ ate mẽhõ kot ã amnhî nhîpêx anhÿr xwÿnhhta pyrâk. Na ka mẽ urâk nê inhgryk ã amnhî tomnuj kaga hpa nê hpãnhã ixkôt amnhî nhîpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xã hã pikata japrôr pyrâk. Anê.

Mẽhõ kot kên jaxênh japrôr jarênh

⁴⁵ Nhũm Jejus arî mẽ inhmã awjarê nê mẽ inhmã:

—Nê ja. Na htem kãm hkĩnh nê hamakêtkati nê ri hpa hprãm xaj Tirtũm kôt amnhî xunhwÿ nê hkôt ri amnhî nhîpêx rãhã ho pa. Te mẽhõ my kãm kên jaxênh mex prãm nê ma ri hapêr o pa xwÿnhhta pyrâk. ⁴⁶ Nê ra nhÿri omu nê ma tẽ nê prês ã mẽ hkukja. Nhũm mẽ kãm hã ho ohtô nê harê nhũm ma akupÿm tẽ nê kãm ho õ hprãm xaj hikukrêx piitã ho wênê hpa. Hãmri nê kàxpore jamÿ nê o tẽ nê amnhîm ho haprô. Kên jaxênh mexta pix gryk ã hikukrêx piitã ho wênê hpa nê hpãnhã ho amnhîm haprô.

—Tã ja pyrã nê na ka htem amex nê ajamakêtkati nê axãmnhix ri apa hprãm xaj ixkôt amnhî xunhwÿ nê ixkôt pix mã amnhî nhîpêx o apa. Anê.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhũm Jejus arî mẽ inhmã awjarê nê mẽ inhmã:

—E Tirtũm kot nhÿrmã tanhmã mẽ harênh to xã hã arîgro kot paj ixprî hã tanhmã mẽ amã harênh to. Te ho mẽmyjaja kot himô kamã kryhti rênh pyrâk. Kojã mẽ gôx kãm kumê nê akupÿm ho api nhũm kamã tep ohtô nê. Nhũm omu nê kÿx pê amgrã kamã hkapî nê ahpÿnhã ri tanhmã kamã kute kawrà. Nê kamã mex kawrà nê kawã kamã kugjê nê mẽ kot hkur kêtja nhũm nhãm kurê. ⁴⁹ Ja pyrã nê Tirtũm kot ahpÿnhã ri tanhmã mẽ kot amnhî nhîpêx to hã mẽ omunh xã hkôt tanhmã mẽ hipêx to kaxyw arîgrota ã ã mẽ hipêx anê. Kojã kapêr o mẽ wÿk xwÿnhhaja mẽ kot hkôt amnhî xunhwÿr xwÿnhjê nê mẽ kot amnhî tomnuj o mẽ pa xwÿnhjê kawrà hpa. ⁵⁰ Nê te mẽ kot tep mex nê tep punu kawrà nê nhãm rênhta pyrâk o mẽ hipêx nê ma kuwy hwÿr mẽ o mra nê kamã mẽ kurê. Nhũm mẽ tee ri amnhî xã htÿx ã maj amÿra nê tee ri amnhî nhîpêx kapÿrÿ. Anê.

Nhũm pre ã Jejusja axte mẽ ixpê hkôt mẽ ixpa ho mẽ ixpa xwÿnhjê mã ujarênh anê.

⁵¹ Hãmri nê mẽ inhmã:

—E xãn ka mẽ atã aprî hã ixujarênhhta ma nà?

Anê pa mẽ kãm:

—Tÿ. Nà na pa mẽ atã ixprî hã mar mex nê. Anê.

⁵² Hãmri nhũm mẽ inhmã:

—Tôe. Nà ãm hãmri. Na ka xep mẽ ra ixte mẽ ahkre nywta mar mex nê. Nê mẽ akwÿjaja mãänên Tirtũm kapêr tũm mar mex nê. Te mẽ apê mẽhõ apkur xã rax pyrã

nê ma ho mē piitā mē hipêx o ri mē hkôt paja pyrāk. Ja pyrā nê kêr ka mē ma mē piitā mē hkôt Tirtūm mē wa ixkapêr o mē ahkre ho ri mē hkôt apa. Anê.

Najare nhõ xwýnhjaja kot Jejus kaga hã mē harênh

Makre 6.1-6; Rukre 4.16-30; Juãw 1.11

⁵³ ã Jejus mē inhmã ujarênh par anê. ⁵⁴ Hãmri nê ma akupým Najare hwýr mō nê Tirtūm kapêr o mē ahkre xà hã ixkre hwýr tē nê axà nê mē ahkre ho nhỹ. Nhũm mē amnhĩ jaêr pê tanhmã kot mē ahkre hto hã kuma nê tee ri hkukamã hamaxpêr nê axpên mã:

—Tk. Kwa kêp mē panhiõ htã tanhmã kot we amnhĩ to nê ã àhpumunh tỳx kôt mē pamã kapêr anê nê ri mē kãm aa mē kot mēmoj pumunh kêt kwý ho anhýr o pa? ⁵⁵⁻⁵⁶ Na pre mē panoo mã hprêk nhũm mē pahte pahprĩ hã hkwýjê pumunh. Kêp pĩ kuprãr xwýnh Juje mē hprõ Marir wa hkraa. Nê kêp Xiakre nê Juje nê Simãw nê Jut mē htõõ. Nê htõxjaja jar mē pakamã pa nhũm mē pahte mē piitā mē omunh mex kênã kot kêt we mē kurom ã àhpumunh tỳx anê. Anê.

⁵⁷ Hãmri nê kamã gryk nê hkaga. Hãmri nhũm tee ri amnhĩ tã mē omu nê mē kãm:

—Nà Tirtūm nhỹ hã kapêr jarênh o mē pa xwýnhjaja na htem krĩ hkwý kamã kãm mē mar prãm nê. Nom õ krĩ kamã mē kot karàre rùm hprêk kãm omunh xwýnhjaja na htem kuma nê ãm kuma. Anê.

⁵⁸ Tã mē kot amnhĩ kaxyw hkôt hamaxpêr kêt jakamã nhũm tee ri mē kãm aa mē kot mēmoj pumunh kêt kwý ho anhýr rax prãm. No ãm mē kãm mēmoj to grêre nê ho anê.

14

Mē kot Juãw Paxis pĩr ã mē harênh

Makre 6.14-29; Rukre 9.7-9

¹ Tã nhũm pika pê Garirej kamã mēõ pahihtĩ Erox Jejus jarênh ma ² nê tee ri hkukamã hamaxpêr nê hã õ pôristi mã kapêr nê mē kãm:

—Kwa pêr Juãw Paxis na nà? Ra ixte hã ixàmnênh nhũm mē kot hpĩr tã mãn tanhmã amnhĩ to nê akupým htĩr. Nà pêr tãm kênã. Jakamã na hte aa mē kot mēmoj pumunh kêt kwý ho anhýr o pa. Anê.

³⁻⁵ Na pre ra Erox htõ pê hprõptàn ho hprõ. Tõ arĩ htĩr tã nhũm axtem nê kêp utà nê ho hprõ. Hãmri nhũm Juãw Paxisja harênh ma nê hã kãm akir nê kãm:

—Kwa Eroxis kêp atõ hprõ kênã na ka kêt axtem nê kêp utà nê ho aprõ. Kwa ja omnuj tỳx o omnuj tỳx. Anê.

Hãmri nhũm amnhĩ tã kuma nê kamã gryk nê kot hpĩr kaxyw. Tã nom nhũm Ijaew kot axpên mã kêp Tirtūm nhỹ hã kapêr jarênh xwýnh ã harênh jakamã nhũm mē umaj hpĩr kêt nê. ãm ho prês nê haxà nhũm hkrĩ ho hkrĩ.

⁶ Tã nhũm jãã nhũm Erox kator ã arĩgro kato nhũm mē hã akuprõ nê hã hkĩnh. Hãmri nhũm hprõ nyw kra niti mē hwýr axà nê ahte mē hipôk ri mē kãm gre. Mē kot omunh nê kamã hkurê kaxyw nhũm mē noo mã hpijaàm kêt nê mē kãm gre o xa. Hãmri nhũm pahi Erox omu nhũm ja kãm mex nê nhũm hkĩnh nê kamã nopyma nê. ⁷ Hãmri nê kãm:

—Nà ãm hãmri na ka ã mē inhmã amnhĩ nhĩpêx anê. Jakamã kwa mãmri mēmoj tã ixwý. Amã mēmoj prãm xà hkôt hã ixwý kot paj amã kugõ. ãm hãmri na pa amã anê. E mēmoj na amã hprãm? Anê.

⁸ Hãmri nhũm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwýr o tē nê inhmã agõ. Anê.

Ra katorxà kot kaxyw kãm karõ jakamã nhũm ã hã hwýr anê. ⁹ Hãmri nhũm Eroxa tee ri kuma nhũm ja kêp omnuj nê. Nom ra mē pikuprõnh rax xwýnhjê nhĩpôk ri mē noo mã kot kãm: “E mãmri amã mēmoj prãm xà hkôt hã ixwý pa amã kugõ.” Anhýr jakamã kãm kot kêp nê hprãm kêt nê. Hãmri nê Juãw Paxis wýr õ pôristi hkwý rē ¹⁰ nhũm mē ma mē hagjênh xàta wýr mra nê unê nê mut krãhta. ¹¹ Hãmri nê hkrã mý nê pasiiti kamã kuxà

nê ma akupÿm nita wÿr o tẽ nê kãm kugõ nhũm kumÿ nê ma katorxà hwÿr o tẽ nê kãm kugõ.

¹² Hãmri nhũm Juãw Paxis kôt mẽ pa xwÿnhjaja tee ri mẽ kot hpÿr ã harênh ma nê ma hwÿr mra nê kumÿ nê ma o môn haxà. Hãmri nê ma Jejus wÿr mra nê kãm harê.

Jejus kot mẽ ho ohtô nê mẽ kãm mẽ õ hã harênh

Makre 6.30-44; Rukre 9.10-17; Juãw 6.1-14

¹³ Hãmri nhũm Jejus Juãw Paxis jarênh ma nê hkaprĩ nê. Nê ma himô nhĩkê hwÿr kapôt ã mör kaxyw pàr krem axà nê ma mō. Pa mẽ hkôt ixpa ho ixpa xwÿnhjaja ma hkôt mra. Hãmri nhũm krĩ hkwÿ kamã mẽ pa xwÿnhjaja harênh ma nê ohtô nê ma mẽ inhĩhkrep pikap mra. Nê ra amnhĩ to wa nê mẽ inhmör xàja wÿr pøj nê mẽ ixkutêp hkrĩ. ¹⁴ Jakamã pa mẽ mō nê mẽ hwÿr pøj nê mẽ omu. Hãmri nhũm Jejus mẽ omu nê kãm mẽ hkaprĩ nê mẽ kãm mẽ à xwÿnhjê ho mex pa.

¹⁵ Tã nhũm ra myt àr kaxyw pa mẽ hkôt ixpa ho ixpa xwÿnhjaja tee ri mẽ omu nê Jejus wÿr mra nê kãm:

—Kwa na ra amÿkry htÿx nê. Amnhĩ nê mẽ hano kê mẽ ma nhÿri krĩ hkwÿ hwÿr mra nê tokyx amnhĩm mẽmoj japrô nê kuku. Mo jar mẽ apkur xà hã mẽõ? Jar akunĩ pix kênã. Anê.

¹⁶ Hãmri nhũm mẽ inhma nê mẽ inhmã:

—Nà kot paj mẽ hanor kêt nê. Mẽ kajaja kot kaj mẽ kãm õ nhũm mẽ apku. Anê.

¹⁷⁻²¹ No nhũm mẽ ohtô rax kumrêx. Mẽmyjaja kêp 5.000. Nê kaxyw mẽ hprõ nê mẽ hkrajaja. Jakamã nhũm Jejus ã mẽ inhmã kapêr anê pa mẽ tee ri mẽ hkukamã ijamaxpêr nê kãm:

—Kwa nà mẽ panhōja raxti hã. Mẽ panhō pãwti kêp sĩk pix. Nê kaxyw tep gràja pijakrutre kênã kot kêt mẽ piitã mẽ hipêx. Nà xà kot paj mẽ ma mra nê nhÿri mẽ kãm mẽ mẽmoj japrô nhũm mẽ kuku? Anê.

Hãmri nhũm mẽ inhmã:

—Nà pu mẽ kãm mẽmoj japrôr kêt nê. Kot puj mẽ kãm mẽ panhōta o anhgrà. E mẽ kãm anê kê mẽ ahpÿnhã ri hije nê hkrĩ hpa. Anê.

Hãmri pa mẽ kuma nê mẽ kãm anê nhũm mẽ piitã hkrĩ hpa. Hãmri nhũm Jejus pãwti mẽ tepja jamÿ nê kaxkwa hwÿr rĩt nê ho Tĩrtũm wÿ nê kãm:

—Pa Papaj? Nà apê mẽ inhmã mẽ inhō ho apa xwÿnh jakamã amex o amex. Anê.

Hãmri nê mẽ kãm ho hkry hpa nê hkôt mẽ ixpa ho mẽ ixpa xwÿnhjê mã kugõ pa mẽ ô ri ho mẽ hipêx pa. Nhũm mẽ piitã apkur o hkrĩ. Mẽõja grire htã nhũm Jejus tanhmã mẽ kãm ho rax to nhũm mẽ ohtô rax kumrêx tã piitã kuku nê ho õhy htu hpa nhũm arĩ mẽõ jakrêx prã. Hãmri pa mẽ akupÿm hakrêx o akuprõ nê ho kawà ho 12 nê ho nÿt pa.

Jejus kot gô krãhkà hã ãm nê htêm ã harênh

Makre 6.45-52; Juãw 6.15-21

²²⁻²³ Tã nhũm Jejus mẽ ixpê hkôt ixpa ho ixpa xwÿnhjê mã anê pa mẽ akupÿm pàr mã agjê nê ma xarmã hkukamã mō. Hãmri nhũm mẽ kot mar o kuhê xwÿnhjê jano nhũm mẽ ma akupÿm hapêx. Hãmri nhũm Jejus kot Tĩrtũm mã amnhĩ jarênh kaxyw ahte tẽ nê hixêt ã api nê himök ã kãm amnhĩ jarênh o nhÿ.

Gaa nhũm ra kamàt nhũm arĩ ahte hixêt nhĩmök ã nhÿ.

²⁴ Rôm pa mẽ pàr kãm mẽ inhmör xwÿnhjaja kormã himô nhĩpök ri mō. Pu nhũm kôk xapêr tÿx mẽ ixkaxpa. Nê gô axpên tak tÿx nê pa mẽ tee ri rrêm̄ti ho gô rên̄h nhĩpêx nê tee ri axpên pumu.

²⁵ Tã nhũm krãhyre kà nhũm Jejus man mẽ ixkôt gô krãhkà hã xan tẽ ²⁶ pa mẽ amnhĩ wÿr omu. No nhũm kormã hirã mex kêt jakamã pa mẽ ixprĩ hã omunh mex kêt nê. Hãmri nê tee ri omu nê mẽkarõ hã hkamnhix nê umaj ixàmra rax nê. ²⁷ Hãmri nhũm mẽ inhmã kapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²⁸ Hãmri nhũm Simãw Pêtre kuma nê kãm:

—Kwa xà ka na ka tē? Tôe apê mē inhō Pahihti jakamā kwa amnhī wÿr ixwÿ pa apyrà nē gô krâhkà hã xa nē awÿr tē nà? Anē.

²⁹ Hāmri nhūm kām:

—Tôe mamrī amnē ixwÿr tē. Anē.

Hāmri nhūm kuma nē pâr rūm kato nē hwÿr tē. Uràk nē gô krâhkà hã hwÿr tē. ³⁰ Hāmri nē kormā htêp o htēm mē kôk xàpêrta kamā ama nē tee ri amnhī kukamā hamaxpêr pē ra àr o mō. Hāmri nē àmra kamā Jejus mā amnhī to akir nē kām:

—Kwa tokyx ixto api Pahihti. Anē.

³¹ Hāmri nhūm hpa hã kupy nē ho àpir kurê kumrêx nē kām:

—Kwa pēr àm kormā ate amnhī kaxyw inhmā ajamaxpêr tÿx kêt. Mon ka we ixkamnàr rom māmri man ixwÿr atēmre hkêt nē? Anē.

³² Hāmri nhūm wa akupÿn mē ixwÿr tē nē wa axà. Hāmri nhūm kôk katàt kôt pinhkrênh pa nhūm gô tām nôr kurê kumrêx. ³³ Hāmri pa mē Jejus kot ã amnhī nhîpêx anhÿrja ã omu hāmri nē kām mex o mex ã harē nē kām:

—Kwa àm hāmri na hte amnhī pē Tirtūm Kra hã amnhī jarē. Nà apê Kra kênã. Anē.

Jenējare kamā Jejus kot akupÿm mē ho mex ã harēnh

Makre 6.53-56

³⁴ Tã pa mē ra himô hã rê nē Jenējare hwÿr pôj. ³⁵ Hāmri nē ma kapê hã ri ixpa. Hāmri nhūm pika nhō xwÿnh kwÿjaja Jejus pumu nē mē piitã mē kām harēnh o hprôt nē ahpÿnhã hwÿr nhÿhÿnh mē à xwÿnhjê hã karô. Nhūm mē man mē ixwÿr mē o mra ³⁶ nē mē ho Jejus wÿ nē kām:

—Pa? Kwa kê mē à xwÿnhjaja akupÿm mex kaxyw apê axê kupê nà? Anē.

Hāmri nhūm mē kām:

—Tôe. Kwãr mē māmri mran hkupê. Anē.

Hāmri nhūm mē kuma nē axpên pãnhã hwÿr mra nē kêp ê pix kupênh tã ra akupÿm mex nē ma akupÿm mra.

15

Parijew nhō xwÿnh mē Tirtūm kapêr tūm o mē ahkre xwÿnhjê jarēnh

Makre 7.1-13

¹ Tã nhūm Parijew nhō xwÿnh mē Tirtūm kapêr tūm o mē ahkre ho mē pa xwÿnhjaja Jerujarē rūm ma Jejus wÿr mra. Na htem mē ixkukamā mē inhîgêtjê pyrà nē apkur kaxyw nē amnhī nhîhkra kuhôn h ryy nē. Amnhī nhîhkra htyk pix kuhôn nē hkrī hkêt nē àm amnhī nhîhkra kuhôn japjê nē. Nē ò prat kuhôn japjê nē kormā apkur kaxyw hkrī. Tirtūm kot ja hã mē omunh nē mē mex ã mē harēnh ã amnhī kamnhîx jakamā na pre ã amnhī nhîpêx anhÿr o pa. Jakamā nhūm mē ma Jejus wÿr mra. ² Hāmri nē omu nē kām:

—Pa Jejus? E kwa mē inhmā mēmoj jarē. Amnepê mē panhîgêtjaja na prem apkur kaxyw nē amnhī nhîhkra kuhôn japjê nē rî kormā apku. Tã pa htem arî ijaxwÿja ã amnhī nhîpêx anē. No akôt mē pa ho mē pa xwÿnhjaja na htem mē ixpyrà nē ã amnhī nhîpêx anhÿr kêt nē. Kwa mo na htem amnhī nhîhkra tyk kuhôn tokyx anē nē hkrī nē apku? Anē.

³ Hāmri nhūm mē kuma nē mē kām:

—Tk. Na ka htem àm mē panhîgêtjê hkôt pix mā amnhī nhîpêx o apa no Tirtūm kapêr kôt amnhī nhîpêx kêt nē. ⁴ Tirtūm na pre mēmoj tã mē pamã karô ho:

Kêr ka mē anhîpêxà nē mē akatorxà wa hã apijaàm nē mē ho ajuta rãhã ho ri apa. Kot kaj mē ã amnhī nhîpêx anhÿr kêt nē tanhmã mē kām akapêr punuj to ho ri apa.

Hã koja mē akwÿjaja ja mÿrapê mē apa. Anē.

—Na pre ã Tirtūmja mē pamã karô anē. ⁵ No mē kajaja na ka htem ã akwÿjê mã karô anhÿr kêt nē. Àm kapêrja kwÿm na ka htem mē kām karô nē mē kām:

Kot kaj mē mēmo arîgro hã akàxpore japêr nom kêr ka mē ho tanhmã akatorxà rÿ anhîpêxà ho ajuta hto kaxyw wa kām hkwy nhôr kêt nē. Àm ho ate wa ho ajuta hkêt ã wa kām amnhī jarē hāmri nē Tirtūm mã amnhī jarēnh xà hã ixkre hwÿr

o tē nē mē ixte tanhmā ixkreta ho mex to kaxyw mē inhmā agō. Kot kaj mē ā amnhī nhīpêx anē nhūm Tīrtūm ja hā mē apumu nhūm ja kām mex nē. Kêr ka mē ā amnhī nhīpêx anhÿr o ri apa.

—Anhÿr o na ka htem mē kām karō ho ri apa. ⁶ Nom Tīrtūm kapêr tūm kot ā ja jarēnh anhÿr kêt. Ām amnhī krā hkôt na ka htem ā mē kām karō punuj o ri apa anē. Te mē akapêrja mex o kot Tīrtūm kapêr jakrenh pyrāk. ⁷ Mē ate Tīrtūm kôt amnhī nhīpêx ā amnhī jarēnh tā ām amnhī to axêx nē hkôt amnhī nhīpêx kêt nē. Na pre Tīrtūm amnepê mē akukamā tanhmā mē ajarēnh to. Nhūm ÿ hā mē kām kapêr jarēnh xwÿnh Ijaisja ô ri mē kām mē ajarē nē hā kagà. Te Tīrtūm tām kot mē ajarēnh pyrāk. ⁸ Na pre mē akukamā mē ajarēnh o:

Mē kām ixkīnh ā mē kot amnhī jarēnh tā mē kām ixkīnh kêt. Na htem kām ixprām ā amnhī jarēnh kaprÿ.

⁹ Mē kot ixkuhpa hā amnhī krā hkôt mēmoj tā hkwyjê mā karō ho pa jakamā na htem kot ixkôt amnhī nhīpêx o pa hā amnhī jarēnh kaprÿ. Anē.

—Na pre ā Ijaisja Tīrtūm nhÿ hā mē akukamā mē ajarē nē mē atā kagà anē. Anē.

Nhūm pre ā Jejus Parijew nhō xwÿnhjê mē Tīrtūm kapêr tūm o mē ahkre xwÿnhjê mā kapêr anē.

Mēmoj kot mē pahomnu hā harēnh

Makre 7.14-23

¹⁰ Tā nhūm Jejus amnhī wÿr mē kot mar o kuhê xwÿnhjê hwÿ nē axte mē kām kapêr nē mē kām:

—E mē inhma nē inhmar tÿx nē. ¹¹ Na hte Tīrtūm kapêr tūm o mē ahkre xwÿnhjaja amnhī krā hkôt mē ate amnhī nhīhkra kuhōnh japjê hā mē amā karō ho pa. Nē amnhī krā hkôt mē axàpkur xà hā tanhmā mē amā karō hto ho pa. Tīrtūm kot ja hā mē apumunh kôt mē amex ā mē ajarēnh kaxyw ā mēmoj tā mē amā karō anē. Nom na hte Tīrtūm tanhmā mē kot amnhī nhīhkra kuhōnh to hā mē omunh xà hkôt tanhmā mē harēnh to hkêt nē. Rÿ mē axàpkur xà pumunh kôt mē mex ā mē ajarēnh kêt nē. Ja tanhmā kām kute hkêt. Na hte ā mē kot amnhī nhīpêx anhÿr ā mē omunh xà hkôt mē mex ā mē harēnh rÿ mē mex kêt ā mē harēnh kêt nē. Na hte mēmoj kur ā mē omu nē ām mē omu nē hā tanhmā mē harēnh to hkêt nē. Ām mē kapêr punuj rÿ mē kapêr mex ā mē mar kôt pix mā na hte tanhmā mē harēnh to. Anē.

¹² Nhūm pre ā Jejus mē kām kapêr anē pa mē hkôt mē ixpa ho mē ixpa xwÿnhjaja kuma hāmri nē hwÿr mra nē kām:

—Kwa na ka ā mē kām akapêr anē nhūm Parijew nhō xwÿnhjaja tee ri ama nhūm ja mē kêp omnuj nē. Anē.

¹³⁻¹⁴ Hāmri nhūm mē inhma nē tanhmā mē inhmā Parijew nhō xwÿnhjê jarēnh to nē hprī hā mē hkukamā mē harēnh o:

—Tk. Kwār māmri mē kêp omnuj. Mē kot Tīrtūm kapêr tūm o mē ahkre ho pa htā na htem hkôt amnhī nhīpêx kêt. Jakamā te mē nohkre xwÿnh kot amnhī nhīpêx pyrāk. Koja mēhō nohkre htā amnhī kôt nhÿhÿm nohkre hō ho mō hāmri nē wa hamē pry pumunh kêt nē htÿx mō hāmri nē nhÿri ahkrehti kamā tēm. Tā Parijew nhō xwÿnhjaja te kot wam htēm xwÿnhhta pyrāk nhūm mē kot mē mar xwÿnhjaja te kot wam htēm xwÿnh kôt hō htēmta pyrāk. Jakamā Parijew nhō xwÿnhjaja mē kot mē mar o pa xwÿnhjê mē koja mē hpimràatā nhÿrmā te ahkrehti kamā rôrôk par pyrāk o amnhī nhīpêx nē mex kêt nē pa ho pa. Koja kaxkwa kamā inhō Papaj nhÿrmā amnhī nē mē hanor pa.

—Inhō Papaj te kêp mēmo hy hkre ho pa xwÿnhhta pyrāk. Na htem mēmo hy hkre nhūm higrôt hapôj nē higrôt mex nē. Hāmri nhūm mē hwÿr mra nē omu nē nē mēmoj nhigrôt punuj jarê nē kurê. Ja pyrā nē koja nhÿrmā inhō Papaj amnhī nē Parijew nhō xwÿnhjê janor pa nhūm mē mex kêt nē pa ho pa. Jakamā kwa kêr ka mē hkôt ri amnhī nhīpêx kêt nē. Anē.

Nhūm pre ā Jejus mē ixte hkôt ixpa ho ixpa xwÿnhjê mā hprī hā Parijew nhō xwÿnhjê hkukamā ā mē harēnh anē pa mē mar o ixkrī. ¹⁵ Hāmri nhūm Simāw Pêtre tee ri Tīrtūm

kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhũm kuma nê hprĩ hã mẽ inhmã awjarẽ nê mẽ inhmã:

—Kwa xàn ka mẽ kormã aprĩ hã ja mar kêt nê? ¹⁷ E pa ixprĩ hã mẽ amã harẽ ka mẽ inhma. Nà na htem mêmoj ku nhũm hte mẽ hkrã hi hwỳr gjêx kêt nê. Na hte mẽ õhy pix wỳr agjê nê gaa nê nhãm hapôj nê hapêx. Na htem mẽ apkur xàja ku nê ý hã tanhmã amnhĩ tomnu hto hkêt nê. Jakamã na hte Tĩrtũm ja hã mẽ omunh xà hkôt tanhmã mẽ harênh to hkêt nê. ¹⁸ ãm mẽ hkrã kamã mẽ hamaxpêr punuj pix nhỹ hã mẽ kot tanhmã amnhĩ tomnuj to jakamã na hte Tĩrtũm mẽ hamaxpêr ã mẽ omunh xà hkôt tanhmã mẽ harênh to. ¹⁹ Koja mẽhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprỹ hwỳr mra nê mẽ ho amnhĩkati. Nê tanhmã ri axpên tomnuj to ho pa. ²⁰ Mẽ hamaxpêr punuj nhỹ hã na htem ã amnhĩ nhĩpêx anhỹr o pa. No na hte Tĩrtũm mẽ kot amnhĩ nhĩhkra kuhõnh japjê hkêt ã mẽ omunh xà hkôt mẽ kot amnhĩ to mex xwỳnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwỳnh ni kamã ukaprĩ hã harênh

Makre 7.24-30

²¹ Tã nhũm Jejus mẽ inhmã kapêr pa hãmri nê mẽ inhmã anê pa mẽ ma hkôt mõ. Ma Xir mẽ Sitõja wa pu hã ri ixpa. ²² Nhũm mẽhõ nija omu nê hwỳr tẽ. Mẽ ixkĩnhã kêp Ijaew kêt tã hwỳr tẽ. Kanaã nhõ xwỳnh na pre. Tã Jejus wỳr tẽ nê kãm:

—Ka Pahihti Jejus? Apê Tĩrtũm kot mẽ ixwỳr amênh xwỳnh jakamã xê ixujarênh ma nê ixkamã axukaprĩ hkêt wehe. Na mẽkarõmnutija tanhmã ixpê ixkra ho nhũm ixpê omnuj tỳx kumrêx. Anê.

²³ Hãmri nhũm Jejus kuma nê ãm kuma nê kãm tanhmã nê hkêt nê. Jakamã pa mẽ ixpê hkôt ixpa ho ixpa xwỳnhjaja kãm:

—Kwa hano kê ma akupỹm tẽẽ ri. Na ãm ri mẽ pahkôt xatã hkrata jarênh pix o ri pa. Anê.

²⁴ Nom nhũm kot amnhĩ tã kamã hamak kaxyw tanhmã mẽ inhmã hã kapêr to nê mẽ inhmã:

—Nà ãm Ijaewjê pix wỳr na pre Tĩrtũm inhmẽ. Te mẽ kêp ôwêhti pikunor pyrak o na htem htỳx ri amnhĩ nhĩpêx o pa. Jakamã ãm mẽ hwỳr pix mã na pre inhmẽ. Na kormã inhmã tanhmã nhãm mẽ hkwỳjê jarênh to hkêt nê. Anê.

²⁵ Hãmri nhũm nitita tee ri amnhĩ tã kuma nê hwỳr tẽ nê kutã hkõnkrã ho htêm nê nhỹ nê kãm:

—Xê ma we ixkamã axukaprĩ hkêt wehe. Anê.

²⁶ Hãmri nhũm kãm:

—Nà kormã. Na pre Tĩrtũm mẽ kêp Ijaewjê pix wỳr inhmẽ. Jakamã na pa kormã nhãm tanhmã mẽ akwỳjê ho mex to hkêt nê. Anê.

²⁷ Hãmri nhũm kãm:

—Ma ãm hãmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anê.

²⁸ Hãmri nhũm kuma nê kãm:

—Nà ãm hãmri na ka ã akra kaxyw inhmã ajamaxpêr tỳx anê. Jakamã kot paj nê mẽkarõmnutita jano. Koja axte tanhmã apê ho hkêt kumrêx.

Anhỹr o kãm kapêrja rôm nhũm hkraja akupỹm mex kurê kumrêx.

Jejus kot mẽ à xwỳnhjê ho ohtô nê mẽ ho mex ã harênh

Makre 7.31-37

²⁹ Tã nhũm Jejus mẽ inhmã anê pa mẽ ixrohã krĩja pê ixkato nê ma himô rax pê Garirej wỳr mõ. Nê nhỹri gô mỳri hixêt wỳr mõ nê hã api nê ixkrĩ. ³⁰ Hãmri nhũm mẽ ohtô nê ma mẽ ixkôt mra. Nê mẽ à xwỳnhjaja nhũm mẽ hamỳ nê Jejus wỳr mẽ o mra. Na prem

ohtô rax kumrêx. Ra ri mẽ pa hkêt xwỳnhjaja nẽ mẽ nohkre xwỳnhjaja nẽ mẽ hyk o mẽ pa xwỳnhjaja. Nẽ mẽ kapêr kêt xwỳnhjaja nẽ ahpỳnhã ri tanhmã mẽ à kute xwỳnhjaja nhũm mẽ hamỳ nẽ ma Jesus wỳr mẽ o mra nẽ kutã mẽ haxwỳ. Hãmri nhũm mẽ omu nẽ ahpỳnhã akupỳm mẽ ho mex pa. ³¹ Jakamã na pre mẽ kapêr kêt xwỳnhjaja akupỳm kapêr mex nẽ. Nẽ ri mẽ pa hkêt xwỳnhjaja akupỳm mrar mex nẽ. Nẽ mẽ hyk o mẽ pa xwỳnhjaja akupỳm tãm ri mra. Nẽ mẽ nohkre xwỳnhjaja akupỳm rít mex nẽ. ã ahpỳnhã akupỳm mex par anẽ. Hãmri nhũm mẽ kot hwỳr mẽ hamỳnh nẽ Jesus wỳr mẽ o mrar xwỳnhjaja amnhĩ jaêr pẽ akupỳm mẽ mex ã mẽ omu nẽ mẽ kamã no pyma nẽ hkĩnh nẽ. Hãmri nẽ Tirtũm mã mex o mex ã harẽ nẽ axpẽn mã harẽnh o:

—Nà ãm hãmri mẽ panhõ Tirtũmja ãm mex o mex. Anẽ.

Jejus kot mẽ ho 4.000 nẽ mẽ kãm mẽ õ hã harẽnh

Makre 8.1-10

³² Tã nhũm Jesus mẽ ixte hkôt ixpa ho ixpa xwỳnhjaja amnhĩ wỳr mẽ ixwỳ nẽ mẽ ixkôt mẽ mrar xwỳnhjê jahkre nẽ mẽ inhmã:

—E. Ka mẽ rĩ kam jajê pumu. Na pa ra inhmã mẽ hkaprĩ nẽ. Na mẽ pahkôt ri pa hã apkati axkrunêpxi nhũm ra mẽ kệp mẽõja hapêx pa. Kojã mẽ apkur kêt rãhã ma akupỳm mẽ õ krĩ hwỳr pa hãmri nẽ pry hã hirot nẽ rôrôk o pa. Mẽ õ krĩ hwỳr awryy. Anẽ.

³³ Nhũm pre ã mẽ inhmã mẽ harẽnh anẽ pa mẽ tee ri kuma hãmri nẽ kãm:

—Kwa nom nhỹri kot pu mẽ kãm mẽmoj japrõ nhũm mẽ tokyx kuku? Ja kapôt pix kênã. Nẽ mẽ ohtô griiã. Anẽ.

³⁴ Hãmri nhũm mẽ inhmã:

—No mẽ panhõ pãwtita? Tanhmã na arĩ kute nẽ hikwỳ? Anẽ.

Hãmri pa mẽ kãm:

—Nà ãm kệp 7 pix. Nẽ kaxyw tep kwỳ no ãm grêre. Kot mẽ ho dare kaxyw ã. Anẽ.

³⁵ Hãmri nhũm mẽ inhma nẽ mẽ ixkôt mẽ mrar xwỳnhjê mã anẽ nhũm mẽ hkrĩ pa.

³⁶ Hãmri nhũm pãwti mẽ tep grêreta jamỳ nẽ ho Tirtũm wỳ nẽ kãm:

—Pa Papaj. Nà apê mẽ inhmã mẽ inhõ ho apa xwỳnh jakamã amex o amex. ãm amex kumrêx. Anẽ.

Hãmri nẽ mẽ kãm mẽmojta o hkry hpa nẽ mẽ inhmã kugõ pa mẽ ô ri ho xa nẽ ho mẽ hipêx pa. ³⁷⁻³⁸ Hãmri nhũm mẽ piitã apku nẽ õhy htu hpa. Nhũm prem mẽmyjaja kệp 4.000 nẽ kaxyw mẽnijaja nẽ mẽhprĩjaja. Mẽ ohtô rax kumrêx tã nhũm Jesus mẽõ ho mẽ hipêx pa. Hãmri pa mẽ hakrêx o akuprõ nẽ ho kawà ho 7 nẽ ho nýt. ³⁹ Hãmri nhũm Jesus ma akupỳm mẽ õ krĩ hwỳr mẽ hano pa mẽ pãr krem agjê hãmri nẽ ma ijaxwỳja mõ. Ma pika pẽ Makatã hwỳr mõ.

16

Parijew nhõ xwỳnh kwỳ kot aa mẽ kot mẽmoj pumunh kêt õ ho anhỹr ã Jesus wỳr ã mẽ harẽnh

¹ Tã pa mẽ ra hwỳr pøj nhũm Parijew mẽ Satusew nhõ xwỳnhjaja Jesus pumu nẽ hwỳr mra. Nẽ hêx rom kot kamã hamak kaxyw hwỳr mra nẽ kãm:

—Pa Jesus? E kwa mẽ inhmã aa mẽ ixte mẽmoj pumunh kêt õ ho anẽ nà? Pa mẽ ate ho anhỹr ã apumu nẽ Tirtũm kot mẽ ixwỳr amẽnã ã akôt ijamaxpêr kurê kumrêx. E kwa tokyx. Anẽ.

²⁻³ Hãmri nhũm mẽ kuma nẽ mẽ kãm:

—Tk. Nà kot paj mẽ amã ho anhỹr kêt nẽ. Mẽ ate hã ixpumunh nẽ ixkôt ajamaxpêre kaxyw ã. Na ka htem kaxkwa kamã kakrã pumu nẽ axpẽn mã na wryk ã harẽ. Nẽ kaxkwa mex pumu nẽ axpẽn mã amgrã hã harẽ. Tã ixte tanhmã mẽ amã mẽmoj nhĩpêx to hã ixpumu nom Tirtũm kot mẽ awỳr inhmẽnã xwỳnh ã ixkôt ajamaxpêr kêt nẽ. ⁴ ãm mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awỳr inhmẽnã xwỳnh tã ka mẽ ja hã ixkôt ajamaxpêr kêt nẽ. Tã mẽ ate aa mẽmoj pumunh kêt kwỳ ixte mẽ amã ho anhỹr kaxyw ka mẽ inhmã hã karõ. Nà kot paj mẽ amã ho anhỹr kêt nẽ. Kormã. Kot paj ãm nhỹrmã te amnepêm Jõhti kot amnhĩ nhĩpêx pyrãk o amnhĩ nhĩpêx.

E ja pix kot paj mẽ amã harẽ. Nom kot paj mẽ amã aa mẽ ate mẽmoj pumunh kêt õ ho anhỹr kêt nẽ. Anẽ.

Nhũm pre ã Jejus mẽ kãm kapẽr anẽ hãmri pa mẽ ixrohã mẽ kêp ixkato nẽ ma ixpa.

Jejus kot hkõt mẽ pa xwỳnhjê jahkre hã harẽnh

Makre 8.14-21

⁵ Tã pa mẽ Jejus mẽ ixrohã ma mỗ nẽ pàr mã agjê nẽ ma xarmã akupỹm rê nẽ hikjê hã mỗ. Hãmri nẽ tee ri mẽ ixàpkur xà japêr nẽ axpẽn mã:

—Kwa na pu mẽ panhõ pãwti ho pajamakêtkati nẽ kure. Anẽ.

⁶ Hãmri nhũm Jejus mẽ inhma nẽ tanhmã mẽ inhmã Parijew mẽ Satusew nhõ xwỳnhjê jarẽnh to. Nom pãwti hã kuxi nẽ mẽ inhmã mẽ harẽ nẽ mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwỳnhjê mẽ kêp pãw kaxkrit xà hkwy hpyr kêt nẽ. Anẽ.

⁷ Hãmri pa mẽ tee ri kuma nẽ ixprĩ hã mar mex kêt nẽ. Nẽ arĩ kapêrta ã axpẽn kukjêr o hkõt mỗ nẽ axpẽn mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwỳ hpyr nẽ mẽ pahkurê nã? Anẽ.

⁸ Hãmri nhũm mẽ inhma nẽ mẽ inhmã:

—Hêxta waa nẽ. Mon ka mẽ ãm axpẽn mã mẽ panhõ pãwti hkêt pix jarẽnh o mỗ? Pêr kormã mẽ ate amnhĩ kaxyw inhmã ajamaxpêr tỳx kêt. ⁹ Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajê nhĩpêx par. Nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh par nẽ ho kawà ho 12 nẽ ho hipu. ¹⁰ Nẽ ham pãwti kêp 7 o mẽ kêp 4.000 nhĩpêx par nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh raxja. ¹¹ Ra ixte mẽ anoo mã ja ho anhỹr o axkrut tã ka mẽ ra hã ano hkêt nẽ arĩ axpẽn mã mẽ paxàpkur xà pix jarẽnh o ixkõt mỗ. Nã mẽ paxàpkur xàja na pa harẽnh kêt nẽ. Parijew mẽ Satusew nhõ xwỳnhjê nhõ pãwti kaxkrit xà pix na pa hã kuxi nẽ mẽ amã tanhmã harẽnh to. Anẽ.

¹² Nhũm pre ã mẽ inhmã kapẽr anẽ hãmri pa mẽ atã kuma nẽ kãm:

—Nã na pa xep mẽ hãmri tã ama. Xep mẽ ixte Parijew mẽ Satusew nhõ xwỳnhjê kapêr kõt amnhĩ nhĩpêx nẽ na ka mẽ ixkurê nẽ ã mẽ harẽnh anẽ. Anẽ.

Jejus kot amnhĩ tã hkõt mẽ pa xwỳnhjê kukjêr ã harẽnh

Makre 8.27-30; Rukre 9.18-21

¹³ Tã pa mẽ axte Jejus kõt mỗ nẽ pika pê Sejarej Piripos kamã kormã mỗ nhũm Jejus amnhĩ tã mẽ ixkukja nẽ mẽ inhmã:

—E mẽ inhmã mẽmoj jarẽ. Tanhmã na hte mẽ akwỳjaja axpẽn mã ijarẽnh to wehe? Anẽ.

¹⁴ Hãmri pa mẽ kãm:

—Nã na htem ahpỳnhã tanhmã ajarẽnh to. Na hte kamã mẽ hkwyjaja ajarẽnh o finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ nhũm mẽ hkwyjaja tõhã apê Tĩrtũm nhỹ hã akapêr o apa xwỳnhjê hõ akupỹm atĩr ã ajarẽ. Nẽ tõhã finat Jeremĩstija rỳ axtem hõ hã ajarẽ. ã na htem ahpỳnhã axpẽn mã ajarẽnh anẽ. Anẽ.

¹⁵ Hãmri nhũm mẽ inhma nẽ mẽ inhmã:

—No mẽ kajaja? Ixpê mẽhõ hã na ka htem axpẽn mã ijarẽ? Anẽ.

¹⁶ Hãmri nhũm Simãw Pêtre kãm:

—Nã apê Tĩrtũm kot mẽ ixkaxyw axãm nẽ mẽ ixwỳr amẽnh xwỳnh na ka. Nẽ apê mẽ ixpiitã mẽ inhõ Pahi Maati na ka. ã na pa htem axpẽn mã ajarẽnh anẽ. Anẽ.

¹⁷ Hãmri nhũm kuma nẽ kãm:

—Nã ãm hãmri na ka ã ijarẽnh anẽ Simãw Pêtre. Nom amnhĩ krã hkõt na ka ã ijarẽnh anhỹr kêt nẽ. Tĩrtũm tãm kot amã ixto amnhĩrit xà hkõt na ka ã ijarẽnh anẽ. ¹⁸ Nã akumrêx na ka ã ijarẽnh anẽ. Tã koja mẽ apyrà nẽ nhỹrmã mẽ kot ixkõt amnhĩ xunhwỳr xwỳnhjaja ma hkwyjê mã ja hã ijarẽnh o ri krĩ piitã hkõt pa. Hãmri nhũm mẽ hkwyjaja mẽ kuma nẽ mẽ apyrà nẽ ixkõt amnhĩ xunhwỳ. Hãmri nhũm mẽ kêp ixprãm nõkati xwỳnhjaja tee ri tanhmã mẽ kot ijarẽnh toja ma nẽ ã ijarẽnh anhỹrja nẽ mẽ kãm kapêr

tã nom ho hkapyrÿ. Æ koja ixkôt mẽ kot amnhĩ xunhwÿr xwÿnhjaja mẽ kãm ijarênh o pa anê. Jao te mẽ apê kên nhũm ixte mẽ ato amnhĩm inhõrkwÿ nhĩpêx pyræk. Tã akumrêx ate ã ijarênh kot anhÿr jakamã kot paj te ixte akumrêx amÿnh nê ato ixtêm nê inhõrkwÿ nhĩpêx kaxyw amnhĩm akumrêx axãm pyræk o anhĩpêx Simãw Pêtre.

¹⁹ —E kêr ka ma inhÿ hã tanhmã mẽ piitã mẽ kãm ijarênh to ho ri apa. Mẽ kot hprĩ hã amar kaxyw. Kojã mẽ hkwÿjaja ama nê amnhĩ kaxyw ixkôt hamaxpêr nê ixkôt amnhĩ xunhwÿ. Ka ja hã mẽ omu nê mẽ kãm: “E ra mẽ ate Jejus kôt amnhĩ xunhwÿr jakamã kot ka mẽ nhÿrmã ty nê ma kaxkwa hwÿr api nê Tirtũm mẽ wa kuri amex kumrêx nê atĩr tũm nê apa ho apa.” Anhÿr o mẽ kãm ijarênh o apa. No mẽ kot akapêr mar nê ãm mar nê ixkôt amnhĩ xunhwÿr kêt xwÿnhjaja ka mẽ kãm: “No mẽ kajaja mẽ ate Jejus kôt amnhĩ xunhwÿr kêt jakamã kot kaj mẽ nhÿrmã Tirtũm mẽ Krata wa kuri atĩr tũm nê apa ho apa hkêt nê.” Anhÿr o ã inhÿ hã mẽ kãm akapêr anhÿr o ri mẽ hkôt apa. Jao te ate kaxkwa hwÿr saf pyr nê Tirtũm krajê mã kahê xà rênh nê Tirtũm kra hkêt xwÿnhjê pê kahê pyræk o amnhĩ nhĩpêx o apa. Anê.

Nhũm pre ã Jejus Simãw Pêtre mã kapêr anê. ²⁰ Hãmri nê hpãnhã mẽ xpiitã mẽ inhmã kapêr nê mẽ inhmã:

—E. Kwa kêr ka mẽ kormã mẽ piitã mẽ kãm Tirtũm kot mẽ awÿr inhmênh ã mẽ kãm ijarênh o ri apa hkêt nê. Kormã. Anê.

Jejus kot amnhĩ kukamã amnhĩ jarênh ã harênh

Makre 8.31-33; Rukre 9.22

²¹ Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarênh to nê mẽ inhmã:

—Nã mẽ kajaja mẽ ate aprĩ hã ixpumunh mex. No mẽ pahkwÿjaja kãm hprĩ hã ijarênh mar nê ixpumunh prãm kêt. Ijaew krãhtũmjaja nê Tirtũm kapêr tũm o mẽ ahkre xwÿnhjaja nê patre krãhtũmjaja. Mẽ kãm hprĩ hã ixpumunh nê kãm ixkapêr mar prãm kêt jakamã kot paj tokyx ma Jerujarê hwÿr mõi nhũm mẽ kamã ixpynê nê ixtak rax nê ixpĩ. Nom kot paj ixtyk ã apkati axkrunêpxi nhũm Tirtũm akupÿm ixto ixtĩr. Anê.

²² Hãmri nhũm Simãw Pêtre tee ri kot ã mẽ kãm amnhĩ jarênh anhÿrja ã kuma nê hwÿr tẽ nê hpa hã kupy nê mẽ ixpê ho kato nê mẽ ixkàx ã o xa. Nê ã kot amnhĩ jarênh anhÿrja nê mẽ kãm kapêr nê mẽ kãm:

—Kwa nã Pahilhti. Ri ã amnhĩ jarênh anhÿr kêt nê. Mo kot kêt mẽ ri axtem nê ã anhĩpêx anê? Anê.

²³ Hãmri nhũm kuma nê hwÿr apkjê nê omu nê mẽ kãm:

—Tk. Te apê Satanasti kapêr pyræk o na ka ã inhmã akapêr anê. Kot kaj ã akapêr anê hãmri nê ixkôt apa hkêt nê. Tirtũm kãm hprãm xà hkôt na ã mẽ kot inhĩpêx anhÿr kaxyw kênã. Tã ka Tirtũm jamaxpêr o ajamaxpêr kêt nê amnhĩ jamaxpêr o ã inhmã akapêr anê. Te apê ixpê axãmnar xwÿnh pyræk o amnhĩ nhĩpêx. Anê.

Jejus krajaja kot tanhmã amnhĩ nhĩpêx to hã mẽ harênh

Makre 8.34-9.1; Rukre 9.23-27; Juãw 12.24-26; mããnên Rõmãn 15.1; Wam Korĩt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapêr anê hãmri nê hpãnhã mẽ ixpê hkôt ixpa ho ixpa xwÿnh piitã mẽ inhmã kapêr nê mẽ inhmã:

—E kot kaj mẽ ixkôt amnhĩ xunhwÿr ã amnhĩ jarê hãmri nê mããnên amnhĩ jarênh o: “Jejus kêp inhõ Pahilhti jakamã kot paj kapêr kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx hto.” Anhÿr o amnhĩ jarê.

²⁵ —Kojã mẽ ixtã mẽ atõx pĩ rÿ tanhmã mẽ atõ hto ka ty. Tã nom koja akaxwÿnh ma ixwÿr àpir kurê kumrêx. Hãmri ka ixkuri atĩr tũm nê amex rãhã nê apa ho apa. Nom kot kaj mẽ jar atĩr prãm xaj ixkaga hãmri nê inhõ krĩ hwÿr axàpir kêt nê.

²⁶ —Nê koja mēhõ hikukrêx rax gryk ã Tirtũm kaga. Tã nhÿrmã ty hãmri nê amnhĩ kôt hikukrêx õ hpyr nê o mõi kêt nê. Kojã tee ri kuwy hwÿr mõi pymaj amnhĩ nê hikukrêx rax o amnhĩ pãnhã amnhĩrer prãm kaprÿ. Tanhmã koja amnhĩ to nê Tirtũm mã amnhĩre nê ma õ krĩ hwÿr api? Kojã ã amnhĩ nhĩpêx anhÿr kêt nê.

²⁷ —Nê ixpê Tirtûm kot mẽ awÿr inhmênh xwÿnh kot paj nhÿrmã kaxkwa rûm akupÿn mẽ awÿr wrÿ nhÿm Tirtûm kapêr o mẽ wrÿk xwÿnhjaja man ixkôt wrÿ. Hãmri pa inhô Papaj nhÿ hã ixte mẽ piitã tanhmã mẽ kot amnhÿ nhÿpêx to hã mẽ omunh xà hkôt ahpÿnhã tanhmã mẽ harênh to. ²⁸ ãm hãmri na pa ã mẽ amã amnhÿ jarênh anê. Kot paj nhÿrmã akupÿn ixte mẽ ato amnhÿptâr kaxyw man mẽ awÿr wrÿ. Tã kot kaj mẽ akwÿjaja akupÿn ixwrÿÿta kukamã tokyx ixte tanhmã ixte amnhÿ nhÿpêx to hã ixpumu. Anê.

17

Jejus kot hixêt prêk nhÿmôk ã hirã kamã ãm ã harênh

Makre 9.2-13; Rukre 9.28-36; mããñên Sikûn Pêtre 1.16-18

¹ Tã nhÿm semãnja hapêx nhÿm Jejus ma nhÿri hixêt prêk wÿr mō. Nê kaxyw Simãw Pêtre nê Xiakre nê Xiakre htō Juãwja nhÿm ma amnhÿ kôt wa mẽ o mō. Nhÿm wa mẽ mō nê hixêt prêk ã api nê himôk ã kuhê. ² Hãmri nhÿm Jejus xep ra axtem nê xa. Axtem hkuk nhÿrã htÿx nê xa. Te myyti nhÿrã htÿx pyrãk. Nê ê haka htÿx kumrêx. ³ Hãmri nhÿm xep ja wa kaxkwa rûm hwÿr wrÿ nê kuri kãm kapêr o xa. Mojes mẽ Erisja wa nhÿm hwÿr wrÿ nê kuri xa. Tirtûm amnepêm amnhÿ wÿr wa ho àpir tã wa akupÿn wrÿ nê Jejus mã kapêr o xa. ⁴ Hãmri nhÿm Jejus kôt mẽ mōr xwÿnhjaja wa mẽ omu nhÿm Simãw Pêtre tanhmã hamaxpêr to nê Jejus wÿr tē nê kãm:

—Kwa Pahшти. Nã ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhÿrōnh o axkrunêpxi nê hipêx. Amã hō nhÿpêx nê Mojes mã hō nhÿpêx nê Eris mã hō nhÿpêx ka mẽ kamã akrÿ. E kwa pa mẽ amã ho anê nã?

Anhÿr o kãm kapêr. Nom amnhÿ krã hkôt ã kapêr anê. ⁵ Hãmri nê kormã ã kãm kapêr anhÿr rôm nhÿm ra kakrã jaka htÿxja wrÿ nê wa mẽ hkunor pa nhÿm wa mẽ kamã kuhê. Nhÿm kakrã kamã Tirtûm mẽ kãm kapêr nê mẽ kãm:

—E ota Ixkra xa. Inhmã hapê ho inhmã hapê. E kêr ka mẽ kapêr mar tÿx rãhã ho ri apa. Anê.

⁶ Hãmri nhÿm mẽ tee ri kuma nê kãm ma htÿx nê umaj pikap rôrôk nê htu mÿrpê hikwÿ. ⁷ Hãmri nhÿm Jejus mẽ hwÿr tē nê mẽ hã ãhkra jaxwÿ nê mẽ kãm:

—E mẽ kãnhmã akuhê nê amã ma hkêt nê. Anê.

⁸ Hãmri nhÿm mẽ kuma nê kãnhmã rÿt nê Jejus pix pumu nhÿm ahte xa nhÿm kuri wa ãm xwÿnhhta wa ra ma akupÿm api. ⁹ Hãmri nhÿm mẽ kormã akupÿm hixêt nhÿmôk rûm mẽ ixwÿr wrÿk o mō nhÿm Jejus mẽ kãm:

—E kêr ka mẽ ham ate mẽmoj pumunh xwÿnhhta kormã nhãm mẽ kãm harênh kêt nê. Kot paj nhÿrmã ty nê akupÿm ixtÿr ka mẽ rÿ kormã mẽ kãm ja hã ãjarênh o ri apa. Anê.

¹⁰ Hãmri nhÿm mẽ kormã akupÿn mẽ ixwÿr wrÿk o mō nhÿm mẽ Jejus mã:

—Kwa mẽ inhmã mẽmoj jarê. Na htem Tirtûm kapêr tûm o mẽ ãjahkre xwÿnhjaja mẽ inhmã: “Eris kumrêx koja Tirtûm mẽ pahwÿr kumê nhÿm Krisja kormã hapu hã wrÿ.” Anê. Na htem ã mẽ inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

¹¹ Hãmri nhÿm mẽ kãm:

—Nã ãm hãmri na prem ã wa ãjarênh anê. Na pre ra ixkukamã te Eris kot amnhÿ nhÿpêx pyrãk xwÿnhhta tē nê ixkutêp mẽ kãm ãjarênh o pa. ¹² Tã nom nhÿm mẽ ja hã omunh kêt nê. Na prem axtem nê kãm hprãm xà hkôt tanhmã hipêx to nê kupÿ. Tã koja mẽ nhÿrmã ã hipêx anhÿr pyrãk o inhÿpêx. Anê.

¹³ Hãmri nhÿm mẽ ra hprÿ hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhÿ nhÿpêx pyrãk o amnhÿ nhÿpêx o pa. Tã tãm na mẽ pamã harê. Anê.

Jejus kot mẽhō hkra nê mẽkarōmnuti kator ã harênh

Makre 9.14-29; Rukre 9.37-43

¹⁴ Tã nhũm mẽ ra akupÿm ahpar mã man mẽ ixwÿr hpôx o mō nhũm mẽ ohtô rax nê Jejus kutêp kuhê. Hãmri nhũm mēhō myja mẽ omu nê mẽ kutã tē nê mẽ hkaxpa nê Jejus kutã hkōn krã ho tēm nê nhÿ nê hkra ho kuwÿ nê kãm:

¹⁵ —Pa Jejus. Kwa inhmã ixkra kamã axukapri nê. Na hte mēkarōmnutija xatã tanhmã ixpê ho nhũm hte ÿ hã mra nê rôrôk nê tōhã kuwy kamã rôrôk nê tōhã gōx kãm mran mrō nê ixpê homnuj tÿx nê. ¹⁶ Tã pa akôt mẽ pa ho mẽ pa xwÿnhjê hwÿr o tē nom nhũm mẽ kot inhmã ho mex kaxyw tee ri tanhmã ho hkapyrÿ. Kwa xà kot kaj akupÿm inhmã ho mex nà? Anê.

¹⁷ Hãmri nhũm kuma nê mẽ ixte hkôt ixpa ho ixpa xwÿnhjê mã kapêr nê mẽ inhmã:

—Hêxta waa nê. Ra mẽ ate ixte Tirtũm nhÿ hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhÿr kêt nê. Nà kormã mẽ kaxyw Tirtũm kôt mẽ ajamaxpêr tÿx kêt jakamã na ka mẽ tee mẽ ho mex kaxyw. Anê.

Hãmri nê myta mã kãm:

—E amnê ixwÿr akrata o tē pa omu. Anê.

¹⁸ Hãmri nhũm kuma nê hwÿr o tē nhũm omu nê nê mēkarōmnutija kator nhũm akupÿm mex kurê kumrêx. ¹⁹ Hãmri pa mẽ ixte Jejus kôt ixpa ho ixpa xwÿnhjaja ja hã omu mẽ hkàx ã amnhÿ tã hkukja nê kãm:

—Kwa na pa mẽ axwakre kamã tee ri nê hanor prãm kaprÿ. Kwa mon pa mẽ apyrà nê nê hanor nhũm kator nê ma htēm kêt nê? Anê.

²⁰⁻²¹ Hãmri nhũm mẽ inhmã:

—Nà kormã mẽ ate mẽ kaxyw Tirtũm kôt ajamaxpêr tÿx kêt. Nom kot ka mẽ kaxyw hkôt ajamaxpêr tÿx hãmri nê hkôt amnhÿ nhÿpêx kukwak ri mēmoj tã awÿ nhũm mẽ ama nê mẽ ate mēmoj tã axàhwÿr xà hkôt mẽ amã tanhmã mēmoj nhÿpêx to. Te mẽ ate pÿ hpàr mÿj mã akapêr nê kãm: “Kwa amnhÿ jarê nê ma tē nê gō xujanãr kãm mãn mrō.” Anhÿr nhũm kot amar nê amar xà hkôt ã amnhÿ nhÿpêx anhÿr kurê kumrêx pyràk. Ja pyrà nê kot kaj mẽ amnhÿ kaxyw Tirtũm kôt ajamaxpêr tÿx kukwak ri mēmoj tã awÿ nhũm mẽ ama nê mẽ amã mēmoj tanhmã ho rÿ mẽ amã mēmoj gō. Anê.

Jejus kot htyk kukamã amnhÿ jarēnh ã harēnh

Makre 9.30-32; Rukre 9.43-45

²²⁻²³ Tã hãmri pa mẽ Jejus kôt ma mō nê nhÿri pika pē Garirej kamã kormã ixpa. Hãmri nhũm Jejus axte amnhÿ kukamã mẽ inhmã tanhmã htyk ã amnhÿ jarēnh to nê mẽ inhmã:

—Nà koja mẽ tokyx mẽ kãm ixtã amÿnê nhũm mẽ ixpÿ. Mẽ kot ixpÿr tã kot paj ixtyk ã apkati axkrunēpxi nhũm Tirtũm akupÿm ixto ixtÿr. Anê.

Hãmri pa mẽ tee ri ã kot amnhÿ jarēnh anhÿrja ã kuma nê ixkapri htÿx kumrêx.

Jejus kot Tirtũm nhōrkwÿ hwÿr àr

Rōmãn 13.5-7; Wam Korit 10.32-11.1

²⁴ Tã pa mẽ Jejus kôt ma mō nê ra Kapanau hwÿr pōj. Hãmri nhũm mẽ kot Tirtũm mã amnhÿ jarēnh xà hã ixkre ho mex kaxyw mẽ kēp kàxpore hkwy jamÿnh xwÿnhjaja mẽ ixpumu nê mẽ ixwÿr mra nê Simãw Pêtre mã kãm:

—Pa. Kwa xà na hte mẽ ajahkre xwÿnhja mẽ pahpê hkwyjê pyrà nê Tirtũm mã amnhÿ jarēnh xà hã ixkre ho mex kaxyw kàxpore hkwy nhōr kêt nê nà? Anê.

²⁵ Hãmri nhũm mẽ kuma nê mẽ kãm:

—Tÿ kot mẽ kãm òr o pa kēnã. Anê.

Hãmri nê ma mẽ ixkôt tē nê mẽ ixkôt mēhō nhōrkwÿ hwÿr axà. Hãmri nê kot Jejus mã mẽ harēnh mã tã nhũm ra hamaxpêr ã omu nê kumrêx kãm kapêr nê kãm:

—Kwa inhmã mēmoj jarê Simãw Pêtre. Xà na hte pahi hkrajaja ò papaj mã kàxpore hkwy nhōr o pa nà? Xà na hte ãm hkra hkêt xwÿnh pixjaja kãm hkwy nhōr o pa? Anê.

²⁶ Hãmri nhũm kuma nê mẽ kãm:

—Nà mẽ kēp hkra hkêt xwÿnh pixjaja na hte kãm òr o pa. Anê.

Hãmri nhũm Jejus kãm:

—Tÿ. Nà ãm hãmri na ka ja jarê. Na hte pahi hkrajaja ò papaj mã kàxpore nhōr kêt nê. Mẽ kēp hkra kēnã. Tã ixpê Tirtũm Kra jakamã mo kaxyw kot pa kêt òrkwÿ hwÿr inhgêx

kaxyw kãm kàxpore hkwy gõ? ²⁷ Tã nom kot paj òr kêt nhũm kàxpore hkwy jamýnh xwýnhjaja tee ri ja hã ixpumu nẽ axpẽn mã ixte amnhĩ tomnuj xwýnh ã ijarẽ. Jakamã e ma gônhamã tẽ nẽ tep ò kanhê. Hãmri nẽ ho api nẽ apy nẽ hakwa jakjê nẽ kamã kàxpore htýxre pumu. Nẽ apy nẽ man o tẽ nẽ pahpãnhã kàxpore jamýnh xwýnhhta mã agõ. Anẽ.

Nhũm pre ã Jejus Simãw Pêtre mã karõ anẽ nhũm kuma nẽ ma hwýr tẽ nẽ kot kãm karõ xà hkõt ã amnhĩ nhĩpêx anẽ.

18

Mẽ kot amnhĩ to rũnh xwýnhjê jarênh

Makre 9.33-37; Rukre 9.46-48; mããnẽn Piripos 2.3-7; Wam Pêtre 3.4, 5.5-6

¹ Tã mẽ ixte Jejus kõt ixpa ho ixpa xwýnhjaja amnhĩ kukamã ijamaxpêr nẽ amnhĩ tã Jejus kukja nẽ kãm:

—Kwa mẽ inhmã mẽmoj jarẽ Pahihti. Nhỹrmã mẽ ixpê pahi nẽ anhĩhkô hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwýjê jakre? Anẽ.

² Hãmri nhũm mẽ inhma nẽ amnhĩ wýr mẽhprĩre hõ mã hpa ho apê nhũm hwýr tẽ nẽ mẽ ixkuri xa. ³ Hãmri nhũm Jejus omu nẽ hã mẽ inhmã:

—E mẽ inhma. Kêr ka mẽ apê pahi pyrãk o tanhmã amnhĩ jarênh to ho ri apa hkêt nẽ. ãm te amarĩ ri mẽ apa pyrãk o amnhĩ nhĩpêx. Te mẽhprĩre kot amnhĩ nhĩpêx pyrãk. Kot kaj mẽ ã amnhĩ nhĩpêx anhýr o apa hkêt hãmri nẽ nhỹrmã inhĩhkô hã mẽ ho amnhĩptàr kêt nẽ. ⁴ Jakamã kot kaj mẽ amã nhỹrmã inhĩhkô hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrã nẽ amã amnhĩ to rũnh prãm kêt nẽ apa.

⁵ —Nẽ kêr ka mẽ apê pahi kot amnhĩ nhĩpêx pyrãk o tanhmã amnhĩ jarênh to ho apa hkêt nẽ. ãm te amarĩ ri mẽ apa pyrãk o amnhĩ nhĩpêx. Jao nhỹri mẽhprĩjê hõ pumu nẽ kamã axukapri nẽ kãm mẽmoj tanhmã ho rý kãm mẽmoj gõ. Hãmri nẽ te pa ate tanhmã ixto mex to pyrãk o amnhĩ nhĩpêx. Kot kaj mẽ ã amnhĩ nhĩpêx anhýr o apa hãmri nhũm Tĩrtũm ja hã mẽ apumu nẽ mẽ ate amnhĩ to rũnh kêt tã mẽ ate amnhĩ to rũnh xwýnh ã mẽ ajarẽ. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhýr o ri apa. Anẽ.

Mẽ kot amnhĩ tomnuj xwýnhjê hkukamã mẽ harênh

⁶ Nhũm Jejus arĩ mẽ inhmã mẽhprĩ jarẽ nẽ mẽ inhmã:

—Nẽ mẽhprĩre na htem amnhĩ kaxyw ixkõt hamaxpêr o pa. Tã koja mẽhõ inhnê tanhmã mẽ kãm kapêr to. Mẽ kot tanhmã amnhĩ tomnuj to hprãm xaj tanhmã mẽ kãm kapêr to ho pa. Hãmri nhũm mẽ kuma nẽ mẽ kapêr xà hkõt tanhmã amnhĩ tomnuj to. Hã koja Tĩrtũm ja hã omu hãmri nẽ kot inhnê tanhmã kãm kapêr to xwýnhhta pumu nẽ homnuj tỳx nẽ. Te mẽ kot mẽhõ pynênh nẽ mut ã kên pyti hõ nhôr nẽ ma o htêm nẽ gõ xupým kãm mênh pyrãk o hipêx. Te ho ja pyrãk no ãm homnuj tỳx o hakre.

⁷ —Nẽ koja mẽhõ inhnê tanhmã mẽ kot ixkõt amnhĩ xunhwýr xwýnhjê hõ mã kapêr to. Kot tanhmã amnhĩ tomnuj to hprãm xaj tanhmã kãm kapêr to. Rý kot ixkaga hprãm xaj tanhmã kãm kapêr to. Hãmri nhũm kuma nẽ mar xà hkõt ixkapêr kwým tanhmã amnhĩ tomnuj to. Tã koja Tĩrtũmja ja hã omu nẽ mããnẽn kot inhnê kêp àmnàr xwýnhhta pumu nẽ ã inhnê kãm kapêr anhýrja mýrapê homnuj tỳx kumrêx.

⁸⁻⁹ —E kwa mẽ okora. Kot kaj mẽ anhĩkra ho tanhmã amnhĩ tomnuj to rý apar o tanhmã amnhĩ tomnuj to. Hã kêr ka mẽ axte ã amnhĩ nhĩpêx anhýr pymaj te mẽ ate amnhĩ pê krãhyr nẽ mênh pyrãk o amnhĩ nhĩpêx nẽ axte ã amnhĩ tomnuj anhýr kêt nẽ. Rý ka mẽ ano ho mẽmoj punuj pumu. Hã kêr ka kãm ajamaxpêr pix o apa pymaj te mẽ ate amnhĩ pê ano katõk nẽ kaxàr nẽ mênh pyrãk o amnhĩ nhĩpêx nẽ nhãm arĩt kurê kumrêx. Kêr ka mẽ ã amnhĩ nhĩpêx anhýr o ri apa. Hãmri nẽ nhỹrmã ty nẽ ma Tĩrtũm nhõ krĩ hwýr api. No kot ka mẽ arĩ akutã ano nẽ arĩ akutã apar nẽ arĩ akutã anhĩkra rãhã ri apa htã ho amnhĩ tomnuj o apa. Hãmri nẽ nhỹrmã ty nẽ ate amnhĩ tomnuj mýrapê ma mẽ kot amnhĩ xà htỳx kamã hamak tũm xà hwýr ma mõ.

¹⁰⁻¹¹ —Nê kêr ka mê mēhprīrejê kamã axukapřĩ rãhã ho apa. Na hte kaxkwa kamã Tirtũm kapêr o mê wrýk xwýnh kwýjaja Tirtũm mã mê hamãr mex o pa. Tã koja mēhõ tanhmã kêp hõ hto nhũm mê hã omu nê ma tẽ nê Tirtũm mã harēnh kurê kumrêx. Anê.

ôwêhti pikunor jarēnh

Rukre 15.3-7

¹² Nhũm Jejus arĩ mê inhmã kapêr nê mê inhmã:

—E pa mê amã awjarê ka mê ixujarēnh ma. Nã koja mēhõ my hkrit ôwêhti xohtô nê. Nê apkati mê ma hamãr o pa. Hãmri nhũm pyxire nê tanhmã amnhĩ to nê kêp akunok. Kwý kaga nê ma nhýhým ahte tẽ nê kêp akunok. Hãmri nhũm mytita ma akupým o mör kaxyw hkwy ho pikuprõnh pa hãmri nê tee ri hkwy kaêx ã pikunor xwýnhhta japêr nom nhýri omunh kêt nê. Hãmri nê tee ri hkukamã hamaxpêr nê ma hkwy ho mô nê nhýri kure. Kutêp apkur kaxyw nhýri kure hãmri nê ma akupým pikunor xwýnhhta japêr o tẽ. ¹³ Hãmri nê hapêr ryy nê nhýri hwýr kato nê omu nê hkĩnh nê. Hãmri nê kutu nê ma akupým o tẽ. Na hte pikunor kêt xwýnhjê nhý hã hkĩnh tã pikunor xwýnhhta mã kato nê hkĩnh tỳx nê. Krit xohtô htã nom ãm kãm ho pixi nê ho hpikunor prãm kêt. ã mê ujarēnh kot anhýr. ¹⁴ Ja pyrã nê Tirtũm kãm mēhõ pyxi nê nhýrmã ma kuwy wýr mör prãm kêt kumrêx. Mê piitã mê kot hkõt amnhĩ xunhwýrja na kãm hprãm. Anê.

Jejus kôt mê pahtõjê hõ kot mê pahtomnuj jarēnh

¹⁵ Nhũm Jejus arĩ mê inhmã kapêr nê mê inhmã:

—Nê ja. Koja ixkõt mê atõ rý mê atõx tanhmã atomnuj to. Hã kêr ka ma hwýr tẽ nê kot tanhmã anhĩpêx to hã amnhĩ tã kãm akapêr. Nom kêr ka mê nhãm mēhõ mã harēnh kêt nê. ãm tanhmã kot ato xwýnhhta pix wýr tẽ nê kumê war axpên mã akapêr nê war axpên ma. Nhũm ama nê akupým tãm anhĩpêx hã kêr ka akupým te ixkõt kêp atõ rý atõx pyrãk o ka wa axpên nhĩpêx nê axte jam ajamaxpêr kêt nê. ¹⁶ Nom koja ama nê ãm ama rý tanhmã ato hkêt ã amnhĩ jarēnh japêr. Hã kêr ka ma akupým tẽ nê akupým amnhĩ kôt Kris kôt atõ rý atõx o axkrut rý mê ho axkrunêpxi nê amnhĩ kôt hwýr mê o mra kê mê axpên tã war ama. Amnepêm Tirtũm kapêr ã kagã htũm kot ja jarēnh o: Kêr ka mê atõ tanhmã axpên nhĩpêx to. Hãmri nê hã axpên mã akapêr kaxyw nê amnhĩ kôt akwýjê ho axkrut rý ho axkrunêpxi nê akupým hwýr mê o mra kê mê axpên tã war ama. Anê.

—ã Tirtũm kapêr ã kagã htũm kot ja jarēnh kot anhýr. ¹⁷ Jakamã kêr ka mê amnhĩ kôt akupým kot tanhmã ato xwýnhhta wýr mê o mra kê mê atã kuma. Hãmri nhũm arĩ mê kãm kot tanhmã ato hkêt ã amnhĩ jarê ka tee ri amnhĩ tã omu nê ikrêsti hwýr tẽ nê Kris kwý hã mê pikuprõnh xwýnhjê mã harê. Kê mê ama hãmri nê ja hã axte kot tanhmã ato xwýnhhta mã kapêr. Nhũm mê mar kêt nê arĩ kot tanhmã ato hkêt ã amnhĩ jarê ka mê amnhĩ nê hanor kurê kumrêx. Hãmri nê te kêp Kris kôt mê atõ rý mê atõx kêt pyrãk o hipêx.

¹⁸ —Nê koja mēhõ ixkõt amnhĩ xãm nê Inhĩpêêxã Tirtũm kôt ri amnhĩ nhĩpêx o pa. Ka mê ja hã omu nê inhý hã tanhmã kãm akapêr to nê kãm: “E ra ate Jejus kôt amnhĩ xãm jakamã kot kaj nhýrmã Tirtũm mê wa kuri amex kumrêx nê atĩr tũm nê apa ho apa.” Anhýr o kãm akapêr. Nom mê kot ixkõt amnhĩ xunhwýr kêt xwýnhjaja ka mê ã mê kãm akapêr anhýr kêt nê. ãm inhý hã mê kãm: “No mê kajaja mê ate Jejus kôt amnhĩ xunhwýr kêt jakamã kot kaj mê Tirtũm mê Krata wa kuri atĩr tũm nê amex nê apa hkêt nê.” Anê. Kêr ka mê inhý hã ã ahpýnhã tanhmã mê kãm akapêr to ho apa anê.

¹⁹⁻²⁰ —Nê kot kaj mê Tirtũm mã amnhĩ jarēnh kaxyw te axkrutre rý axkrunêpxire htã axpên wýr akuprõ nom mê kapxipixjaja apikuprõnh kêt nê. Kot paj mê akaêx ã mê anhĩhkõ hã mê amar o xa. Mê ate ano ho ixpumunh kêt tã pa wa mê anhĩhkõ hã mê amar o xa. Jakamã kot kaj mê axpên wýr akuprõ nê mēmoj tã Tirtũm wý nhũm kaxkwa kamã ja hã mê ama. Nê mê ate hã axãhwýr xwýnhhta nhũm mê amã tanhmã ho. Kêr ka mê ã ixkamnar rom axãmnhix amnhĩ to Inhĩpêêxã hwýr anê. Anê.

Nhũm pre ã Jejus mê inhmã kapêr anê.

Mê pahte tanhmã axpên nhîpêx to hã mẽ pamã karõ

Matêwre 6.14-15; Rukre 17.3-4; mããñnê Epes 4.32; Korosê 3.13

²¹ Tã nhũm Simãw Pêtre Jejus wÿr tẽ nẽ mẽmoj tã hkukja nẽ kãm:

—Kwa inhmã mẽmoj jarê Pahihtî. Xà koja akõt ixtõ rÿ ixtõx tanhmã inhîpêx to pa amnhî tã omu nẽ ãm omu nẽ amnhî tã tanhmã ho hkêt nẽ. Nhũm axte tanhmã ixto nẽ axte tanhmã ixto ho 6 tã pa ãm amnhî tã omu nẽ amnhî tã tanhmã ho hkêt nẽ. ãm ho ijamakêtkati nẽ axte kãm ijamaxpêr kêt nẽ. ã amnhî tã hipêx anhÿr o 7 nhũm ja amã mex nẽ nà? Anê.

²² Hãmri nhũm kãm:

—Nà kot kaj ã amnhî tã hipêx anhÿr o 7 pix kêt nẽ. Koja mẽhõ xatã tanhmã ato rãhã nẽ ka amnhî tã omu nẽ ajaxwÿja amnhî tã xatã tanhmã ho hkêt nẽ. ãm amnhî tã omu nẽ ãm omu nẽ tãm hipêx rãhã ho ri apa. Mãmrî ho anhÿr o apa rãhã nẽ aa jam anhÿrer kêt nẽ.

²³ —E kot paj ixprî hã mẽ amã tanhmã ja jarênh to ka mẽ inhma. Tirtũm na hte xatã mẽ ate tanhmã amnhî tomnuj to hã mẽ apumu nẽ mẽ anê rênh o pa. Te kot pahi kot ã hkwyjê nhîpêx anhÿr pyrãk. Koja mẽ õ pahija kãm mẽ àpênh xwÿnhjaja kot kêp kàxpore ho ipresta hã mẽ omunh kaxyw nhÿ. ²⁴ Hãmri nhũm mẽ hwÿr ja ho tẽ nẽ kutã ãm. Ra kot kêp hikàxpore ho ipresta rax xwÿnhja. ²⁵ Tã no ãm aa akupÿm kãm õr kêt nẽ ra kêp ho hapêx pa. Hãmri nhũm pahija tee ri amnhî tã omu nẽ hkwyjê mã hã amÿnê nẽ mẽ kãm: “E. Mẽ ma o tẽ nẽ hprõ nẽ hkrajaja nẽ õrkwÿ nẽ hikukrêx mẽrohã ho wênê hpa nẽ hpãnhã kàxpore py nẽ man inhmã o tẽ. Kot ixpê ixkàxpore ho ipresta nẽ akupÿm inhmã õr kêt mÿrapê.” Anê.

²⁶ —Hãmri nhũm kot ho ipresta xwÿnhhta tee ri amnhî tã kuma nẽ kutã hkõnkrã ho nhÿ nẽ amnhî to hwÿr kãm hihtÿx nẽ kãm: “Kwa nà ri ixto anhÿr kêt nẽ pahihtî. Ixkamã axukaprî nẽ hkêt wehe. Nà kot paj akupÿm amã kugõ kãm ga.” Anê.

²⁷ —Hãmri nhũm amnhî tã kuma nẽ kãm hkaprî nẽ. Hãmri nẽ kãm: “Tõe. Nà kot paj ã anhîpêx anhÿr kêt nẽ. Kot paj anhõ kõt kaxõnh pa nẽ kumê ka mãmrî ma ajamakêtkati nẽ axãmnhix apa.” Anê. ²⁸ Nhũm ã kãm kapêr anê nhũm kuma nẽ hkĩnh nẽ. Hãmri nẽ ma tẽ nẽ kato nẽ ixkre kapem pôristi hõ pumu. Na pre ra kêp kàxpore hkwy ho grire nẽ ho ipresta nhũm kato nẽ omu. Hãmri nẽ hwÿr tẽ nẽ amnhî kĩnhã õkre hã kumÿ nẽ kãm: “Kwa tokyx akupÿm ate ixpê kàxpore ho ipresta pãnhã inhmã agõ.” Anê. ²⁹ Hãmri nhũm tee ri amnhî tã omu nẽ ra ham kot pahi kutã amnhî nhîpêxta pyrã nẽ kutã hkõnkrã ho nhÿ nẽ kãm: “Kwa nà. Kwa ri ixto anhÿr kêt nẽ. Nà kot paj hpãnhã amã kugõ. Kwa ixkamã axukaprî nẽ hkêt wehe.” ³⁰ Anhÿr tã nom nhũm kuma nẽ ãm kuma nẽ hã amÿnê. Hã hkwyjê mã amÿnê nẽ mẽ kãm: “E mẽ ma jahti ho tẽ nẽ haxà. Koja kot ixpê kàxpore ho ipresta pãnhã inhmã kugõ nẽ rî kormã kato nẽ rî amnhî pumu.” Anê. Hãmri nhũm mẽ kuma nẽ ma o tẽ nẽ haxà.

³¹ —Hãmri nhũm hkwyjaja tee ri mar o kuhê nhũm mẽ kêp ja omnuj nẽ nhũm mẽ pahi hwÿr agjê nẽ kãm harê. ³² Hãmri nhũm tee ri harênh ma nẽ kamã gryk tÿx nẽ akupÿm amnhî wÿr hã karõ nhũm akupÿm hwÿr axà nhũm kãm: “Tk. Kwa na ka pre amnhî tomnuj tÿx nẽ. Ate amnhî to ixwÿr nhũm inhmã akaprî nẽ ixte anhõ kõt kaxõnh nẽ mênh tã ³³ ka amnhî kĩnhã anhîõta kamã axukaprî hkêt nẽ ri ã hipêx anê.” Anê. ³⁴ Hãmri nẽ kamã gryk nẽ hã õ pôristi mã amÿnê nhũm mẽ ma o tẽ nẽ haxà. Mẽ kot mẽ hagjênh xà hã ixkre kamã apkati mẽ tanhmã mẽ kot hipêx to kaxyw nhũm mẽ kãm hã amÿnê. Tanhmã mẽ kot hipêx to rãhã nhũm kot akupÿm kàxpore raxta nhõr par nẽ rî kormã kator kaxyw nhũm mẽ ma o tẽn haxà. ã mẽ ujarênh kot anhÿr. Anê.

³⁵ Nhũm pre ã Jejus mẽ ixte hkõt ixpa ho ixpa xwÿnhjê mã kapêr anê. Hãmri nẽ mẽ inhmã:

—Ja pyrã nẽ koja ixkõt mẽ atõ rÿ mẽ atõx tanhmã mẽ atomnuj to ka mẽ amnhî tã omu nẽ ãm omu nẽ ho ajamakêtkati kurê kumrêx nẽ axte kãm ajamaxpêr kêt nẽ. Te pahi kot mẽhõ nhõ kõt kaxõnh par nẽ axte kãm hamaxpêr kêeta pyrãk. No kot kaj mẽ ã amnhî nhîpêx anhÿr kêt nhũm kaxkwa kamã inhõ Papaj ja hã mẽ apumu nẽ te ho pahi tee ri kot

amnhĩ tomnuj xwÿnhhta kot amnhĩ nhĩpêx ã omunh nê hã àmnênh nhũm mẽ kot apkati mẽ tanhmã omnuj tota pyræk o mẽ anhĩpêx. Anê.

19

Jejus kot mẽ pahte axpên kaga nê mẽ pahkurê

*Matêwre 5.31-32; Makre 10.1-12; Rukre 16.18; mãän*ên Wam Korĩt 7.10-16

¹ Tã nhũm Jejus mẽ inhmã kapêr pa nê mẽ inhmã anê pa mẽ ixrohã Garirej rũm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã. ² Hãmri nhũm mẽ ohtô nê Jejus pumu nê man mẽ ixwÿr mra nhũm mẽ omu nê mẽ kãm akupÿm mẽ à xwÿnhjê ho mex. ³ Hãmri nhũm Parijew nhõ xwÿnh kwÿjaja hwÿr mra. Hêx rom kot kamã hamak nê tanhmã ho kapêr punuj to kaxyw hwÿr mra nê kãm:

—Pa? Kwa mẽ inhmã mẽmoj jarê. Tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtjê mã karõ hto? Xà kot mẽ pahprõ pahkwÿm ri tanhmã amnhĩ nhĩpêx to pu mẽ hkaga nhũm ja Tĩrtũm mã mex nê nà? Anê.

⁴ Hãmri nhũm mẽ kãm:

—Nà na ka mẽ aprĩ hã Mojes kot tanhmã ja jarênh to mar mex kêt nê. Ja kot anhÿr kêt. Amnepêm mẽmoj piitã hkrax kãm na pre Tĩrtũm my nê nija wa hipêx. Axpên kaxyw wa hipêx. ⁵ Hãmri nê wa hkukamã tanhmã wa kot amnhĩ nhĩpêx to hã wa harê nê wa harênh o:

Koja mẽmyjaja hprõ kaxyw hãmri nê gryk ã katorxà mẽ hipêêxà wa hkaga nê ãm hprõ kôt pix mã pa ho pa. Te wa tipxi nê ri wa pa pyræk o amnhĩ nhĩpêx. Anê.

—Na pre ã Mojes Tĩrtũm nhÿ hã mẽ kãm ja jarênh anê. ⁶ Jakamã koja te wa tipxi nê ri wa pa pyræk o axpên nhĩpêx o pa. Tĩrtũm tãm kot axpên mã wa õr kênã kot kêt wa axtem nê ri htÿx ri hamaxpêr nê axpên kaga. Anê.

⁷ Hãmri nhũm mẽ kuma nê kãm:

—Tÿ. Nom finat Mojes na pre mẽ pakukamã mẽ panhĩgêjtjê mã ã ja hã karõ anê nê mẽ kãm:

Kot kaj mẽ aprõ kaga kaxyw hãmri nê ra kêp aprõ hkêt ã hã kagà nhĩpêx nê kãm agõ nê amnhĩ nê hano kê ma tẽ.

—Anhÿr o na pre mẽ kãm hã karõ. Tã ka na ka mẽ ixte axpên kaga hkêt ã mẽ inhmã karõ. Anê.

⁸ Hãmri nhũm mẽ kuma nê mẽ kãm:

—Tÿ no ãm mẽ kãm Tĩrtũm kapêr kôt amnhĩ nhĩpêx prãm kêt jakamã na pre ã mẽ kãm ja jarênh anê. No amnepêm mẽmoj piitã hkrax kãm na prem ã amnhĩ nhĩpêx anhÿr o pa hkêt nê. ⁹ Jakamã kêr ka mẽ aprõ kaga hkêt nê apa. Kot kaj mẽ hkaga nê hpãnhã nhãm mẽhõ ho aprõ nhũm Tĩrtũm noo mã te ate wam aprõ kamã nhãm aprõ nyw o amnhĩkati pyræk. Tĩrtũm pê ja omnuj tÿx nê. Rÿ koja mẽhõ hprõ kaga ka hpãnhã ho aprõ nhũm Tĩrtũm noo mã te ate wam mjên pê ho amnhĩkati pyræk. Ja mãänên Tĩrtũm pê omnuj tÿx nê. Anê.

Nhũm pre ã Parijew nhõ xwÿnhjê mã kapêr anê. ¹⁰ Hãmri pa mẽ ixte hkôt ixpa ho ixpa xwÿnhjaja ã kapêr anhÿrja ã kuma nê kãm:

—Xà na hte mẽ mjên ra kãm mẽ hprõ hkĩnh kêt tã hkaga hkêt nê arĩ hkôt pa ho pa nhũm hte Tĩrtũm mã ja mex nê nà? Jakamã kwa xà kot paj mẽ nhÿrmã ixprõ kaga pymaj ixprõ hkêt kumrêx nê ixpa ho ixpa nhũm ja mẽ inhmã mex nê nà? Anê.

¹¹ Hãmri nhũm mẽ inhmã:

—Nà ãm hãmri na ka mẽ ja jarê. No mẽ ate harênhja na mẽ piitã mẽ kãm mex kêt. Koja Tĩrtũm tãm amã aprõ hkêt ã ajarê ka rĩ aprõ hkêt nê ahte ajamakêtkati nê ri apa. ¹² Na htem piitã hprõ nê pa hkêt nê.

Na hte kamã tanhmã mẽ kute xwÿnhjaja kormã hprĩre ri tanhmã kute mÿrapê kãm hprõ hprãm kêt nê pa.

Nê kamã tanhmã mẽ ho mÿrapê nhũm mẽ hkurê hkêt nê hprõ hkêt nê pa.

Nê kamã mẽ kãm Tĩrtũm mã tanhmã amnhĩ to ho pa pix prãm xaj kãm hprõ hprãm kêt nê pa.

Tã kot kaj mẽ jajê pyrà nê ã amnhĩ nhĩpêx anhÿr prãm nê rĩ kam nê aprõ hkêt nê apa. Anê.

Jejus kot amnhĩ nê mẽhprĩjê janor kêt ã harênh

Makre 10.13-16; Rukre 18.15-17

¹³ Tã nhũm Ijaew kwÿjaja Jejus pumu nê hwÿr mẽ hkrarejê jamÿ nê mẽ o mra. Kot mẽ hã ìhkra jaxwÿr nê mẽ ho Tĩrtũm wÿr kaxyw hwÿr mẽ o mra. Hãmri pa mẽ ixte hkôt ixpa ho ixpa xwÿnhjaja tee ri mẽ omu nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wÿr mẽ o mra? Kormã mẽ ràxre kênã. Kwa mẽ ma akupÿm mẽ o mra nã? Anê.

¹⁴ Hãmri nhũm Jejus mẽ inhma nê mẽ inhmã:

—Kwa nã mẽ ri inhnê mẽhprĩjê kurê hkêt nê. Kwãr mẽ mãmri ixwÿr mẽ o mra. Anê.

Hãmri nê amnhĩ wÿr mẽ mẽ kãm hpa ho apê nhũm mẽ hwÿr mẽ o mra nhũm mẽ kuri kuhê nhũm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkĩnh nê ri pa. Nê mẽ kãm amnhĩ to rũnh prãm kêt nê. Tã Tĩrtũm kôt mẽ kot amnhĩ nhĩpêx o mẽ pa xwÿnhjaja te mẽ kot jajê pyrãa nê kãm amnhĩ to rũnh prãm kêt nê pa. Anê.

¹⁵ Hãmri nê mẽ hã ìhkra jaxwÿr nê mẽ ho Tĩrtũm wÿr hãmri nê mẽ inhmã anê pa mẽ ma axte mẽ kurũm mẽ.

Kàxpore rũnh xwÿnh jarênh

Makre 10.17-22; Rukre 18.18-23; mãñnênh Rõmãn 3.19-20; Wam Ximotre 6.6; Xiakre 2.10

¹⁶ Tã nhũm Ijaew ôja Jejus wÿr tẽ nê kãm:

—Pa mẽ ijahkre xwÿnh? Kwa inhmã mẽmoj jarê. Tanhmã kot pa nhÿrmã Tĩrtũm ri ixtĩr tũm nê ixpa ho ixpa kaxyw amnhĩ nhĩpêx to wehe? Anê.

¹⁷ Hãmri nhũm kãm:

—Tk. Ra Tĩrtũm kot nhÿrmã mẽ atĩr tũm nê apa kaxyw mẽmoj tã mẽ amã karõ nhũm ate mar mex kênã kot ka kêt ri axte ja hã ixkukja. Nã Tĩrtũmja mex o mex jakamã kot kaj amã kuri atĩr tũm nê apa hprãm hã kot kaj kapêr kôt amnhĩ nhĩpêx no ri apa. Anê.

¹⁸ Hãmri nhũm kãm:

—No nhÿ kapêr kôt kot paj amnhĩ nhĩpêx o ri ixpa wehe? Anê.

Hãmri nhũm kãm:

—Na pre mẽ amã mẽmoj tã karõ ho:

Kêr ka mẽ axpên par kêt nê.

Nê nhãm mẽ hprõ ho amnhĩkati hkêt nê.

Nê mẽ kêp axàhkĩnh kêt nê.

Nê tanhmã mẽ ho axêx to hkêt nê.

¹⁹ Nê anhĩpêxã mẽ akatorxã wa hã apijaam nê wa ho mex pê wa kutã anojarêt o ri apa.

Nê amã akwÿjê hã ma ho te ka amã amnhĩ tã ma pyrãk o mẽ hipêx. Jao tãm mẽ hipêx o ri apa.

E kot kaj amã nhÿrmã Tĩrtũm kuri atĩr tũm nê apa hprãm hã kêr ka ã amnhĩ nhĩpêx anhÿr o ri apa. Anê.

²⁰ Hãmri nhũm kuma nê kãm:

—Ku nhũm. Ra ã ixte amnhĩ nhĩpêx anhÿr o ri ixpa kênã. Nom te kormã ixtĩr tũm nê ixpa kaxyw ixte tãm kêt pyrãk. Kwa axte inhmã mẽmoj jarê nã? Anê.

²¹ Hãmri nhũm kãm:

—Nã kormã mẽmoj pyxi nê arĩk. Na ka amã akukrêx rax prãm tÿx o amã Tĩrtũm prãm jakre. Jakamã ma akupÿm tẽ nê akukrêx rax o wênê hpa nê hpãnhã kàxpore jamÿ nê ma mẽ kêp amrakati xwÿnhjê mã õr pa. Hãmri nê rĩ akupÿn ixwÿr tẽ nê rĩ ixkôt apa ho apa. Anê.

²² Hãmri nhũm kuma nê tee ri amnhĩ kukamã hamaxpêr. Kãm hikukrêx rax japê nê kãm kamã ìhkra karo hprãm kêt nê. Hãmri nê tee ri Jejus kot ã kãm hã karõ anhÿrja ma nhũm ja kêp omnuj nê nhũm ma akupÿm htêm kurê kumrêx. ²³ Hãmri nhũm Jejus tee ri omu nê mẽ inhmã:

—Hêxta waa nê. Koja mẽ hikukrêx rûnh xwÿnhjaja ohtô nê kãm mẽ hikukrêx japê xaj Tirtûm mẽ wa ixri htîr tûm nê pa ho pa hkêt nê. Wa ixte amnhî nhîpêxja mẽ kêp hihtÿx. ²⁴ Mẽ kãm hikukrêx rûnh mã ìhkra karo hprãm kêt rãhã tee ri kãm Tirtûm kôt amnhî nhîpêx prãm kaprÿ. Te ho mẽhõ kot menh kagô hã hkre nê kãm kagô katõk prãm kêt rãhã kãm guhkrax kãm ar prãm kaprÿta pyrãk. Anê.

Nhũm pre ã Jejus mẽ inhmã kapêr anê. ²⁵ Hãmri pa mẽ kuma nê tee ri amnhî kukamã ijamaxpêr nê kãm:

—Kwa mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtîr tûm nê ixpa ho ixpa hkêt nê nà? Anê.

²⁶ Hãmri nhũm mẽ inhmã:

—Nà kot kaj mẽ amnhî krã hkôt mẽ amã mẽ akukrêx japêja mã anhürer kêt nê. ãm Tirtûm pix na hte ja kaxyw tanhmã mẽ akrã hto ka mẽ amã akukrêx japê hkêt nê. Jao ra mẽ apê Tirtûm mẽ wa ixri atîr tûm nê mẽ apa ho mẽ apa mã xwÿnh. Anê.

²⁷ Hãmri nhũm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nê akôt ixpa ho ixpa. Jakamã kot paj mẽ nhÿrmã war ari ixtîr tûm nê ixpa ho ixpa nà? Anê.

²⁸ Hãmri nhũm kuma nê mẽ ixpiitã mẽ inhmã:

—Tÿ. Kot paj nhÿrmã mẽmoj piitã ho nyw pa hãmri nê ixte mẽ ho amnhîptar o ixkrî xà maati kamã nhÿ nê mẽ piitã mẽ kot tanhmã amnhî nhîpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwÿnhjaja kot kaj mẽ inhmã Ijaew kot amnhî nhîpêx ã mẽ omunh xà hkôt ahpÿnhã tanhmã inhmã mẽ harênh to. Mẽ mex ã mẽ harê rÿ mẽ mex kêt ã mẽ harê. Kot kaj mẽ ã inhmã mẽ harênh anê. ãm hãmri na pa mẽ amã ixkapêr anê.

²⁹ —Nê ka mẽ atõ inhmã tanhmã amnhî nhîpêx to ho apa kaxyw akwÿjê re nê ma inhmã mẽmoj to anhÿr o ri apa. Tanhmã anhörkwÿ rÿ atõ rÿ atõx re. Rÿ aprõ nê akrajê re. Rÿ akatorxã mẽ anhîpêxã war are. Rÿ akukrêx piitã rer pa hãmri nê ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu nê mẽ ato mex rax nê. Hãmri ka mẽ ma mẽ hkôt apa nê mẽ kãm ixkapêr jarênh o apa nhũm mẽ kot mẽ amar xwÿnh kwÿjaja mẽ ama nê kãm mẽ akînh nê. Nê ra mẽ ate akwÿjê rer par tã mẽ tãmjaja te mẽ apê mẽ hkra rÿ mẽ htõ rÿ mẽ htõx pyrãk o mẽ anhîpêx nê mẽ ato mex o pa. Hãmri ka mẽ nhÿrmã ty nê ma Tirtûm mẽ wa inhõ krî hwÿr api nê wa ixkuri amex kumrêx nê atîr tûm nê apa ho apa. ³⁰ Nom kwa kêr ka mẽ amnhî tã ja ma nê amnhî to rûnh xwÿnh ã amnhî kamnhîx kêt nê. Jar mẽ kot amnhî to rûnh ã amnhî to jarkrar xwÿnhjaja koja mẽ nhÿrmã amnhî to hkryre hã amnhî pumu. No jar mẽ kot amnhî to hkryre xwÿnh ã amnhî jarênh xwÿnhjaja koja mẽ nhÿrmã amnhî to rûnh ã amnhî pumu. Anê.

20

Jejus kot nhÿrmã hkrajê ho mex ã harênh

Rômãn 9.14-16

¹ Nhũm Jejus arî mẽ ixte hkôt ixpa ho ixpa xwÿnhjê mã awjarê nê mẽ inhmã:

—Nê kot paj nhÿrmã tanhmã mẽ ato mex to. Te ixpê hpur nhõ dõn kot amnhî nhîpêx pyrãk o mẽ anhîpêx. Koja pur nhõ dõnja ihpur kãm mẽmo xõ ra hkà hpa nhũm omu hãmri nê kaxyw mẽ àpênh xwÿnhjê japêr kaxyw ma gãm tẽ. Nê gáp xa nê mẽ kãm akir nhũm mẽ hã akuprõ. ² Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amÿkry pa hpãnhã mẽ kot apkati pixi hã mẽ àpênh pãnhã mẽ kãm amnhîrer xaja kôt mẽ amã amnhîre.” Anê hãmri nhũm mẽ kuma nê kãm: “Tõe. Nà kot paj mẽ amã apê.” Anê nhũm pur wÿr mẽ kurê nhũm mẽ ma kãm àpênh mã mra.

³ —Tã nhũm arî kÿx mã myt tẽ nhũm pur nhõ dõn akupÿm gãm tẽ nhũm mẽ hkwyja arî kuhê. ⁴ Nhũm tee ri mẽ omu nê mẽ kãm: “Kwa mon ka mẽ axàpênh kêt nê arî akuhê? E. Mẽ ma wamtajê hkôt mra nê inhmã apê pa hpãnhã mẽ amã amnhîrer mex nê.” Anê.

⁵ Hãmri nhũm mẽ kuma nê ma mẽ hkôt mra. Tã nhũm ra myt kaxkwa nhîpõk ri ajêt nhũm hpur nhõ dõnja mã hkwyjê ho anê nê. Kê axte mẽ hkôt jajê jano nhũm mẽ ma mẽ

hkôt mra. Tã nhũm ra myt ahpanh grire nhũm ma akupÿm kêwe gãm tẽ nẽ mã mẽ ho anẽ nẽ axte mẽ hkôt jajê rẽ.

⁶—Tã nhũm ra myt grire nhũm ma akupÿm kêwe gãm tẽ nẽ jajê pumu nhũm kê wem arĩ gáp kuhê. Hãmri nhũm tee ri mẽ omu nẽ mẽ kãm: “Kwa mon ka mẽ axàpênh kêt nẽ atÿx gáp akuhê ho akuhê?” Anẽ. ⁷Hãmri nhũm mẽ kãm: “Nà mēhō kot mẽ inhmã mẽ ixàpênh ã karōre hã.” Anẽ. Hãmri nhũm mẽ kãm: “Tôe. Mẽ ma mẽ hkôt ixpur wÿr mra nẽ inhmã mãn apê.” Anẽ hãmri nhũm mẽ kuma nẽ ma hkwyjê hkôt mra.

⁸—Tã nhũm ra kamát. Hãmri nhũm hpur nhō dōnja kãm àpênh xwÿnhjê krãhtũm wÿr tẽ nẽ kãm: “E. Ma mẽ hwÿr tẽ nẽ mẽ kãm anẽ kê mẽ àpênh kaga nẽ man akôt mra ka inhmã mẽ kãm amnhĩre. Nom kêr ka hapu hã mẽ mōr xwÿnhjê kumrêx mã amnhĩre nẽ wam mẽ mōr xwÿnhjê ho hapu nẽ mẽ kãm amnhĩre.” Anẽ. Hãmri nhũm kãm: “Tôe. Nà kot paj mẽ ho anẽ.” Anẽ. ⁹Hãmri nẽ ã mẽ kãm amnhĩrer anẽ. Hapu hã mẽ mrrar xwÿnhjê kumrêx mã amnhĩre. Te mẽ kot kwÿhtã àpênh o amÿkry pyrãk o nhũm hpãnhã mẽ kãm amnhĩre. ¹⁰Hãmri nhũm wam mẽ mrrar xwÿnhjaja ja hã mẽ omu nẽ hkĩnh nẽ. Hãmri nẽ htÿx hamaxpêr o: “Nà kot paj xep kàxpore jamÿnh rax o mẽ hakre. Ixàpênh rax o ixte mẽ hakrenh kēnã.” Anhÿr tã no nhũm mẽ piitã mẽ kãm amnhĩrer o axpên pyrãk. Ra pur nhō dōn kot kãm hã karō xà hkôt. ¹¹Hãmri nhũm mẽ hamÿ nẽ tee ri hkre kamã omu nẽ we ra hpur nhō dōnja kamã gryk nẽ. ¹²Hãmri nẽ hwÿr mra nẽ kãm: “Kwa jajaja na mẽ amã àpênh o ore pyxi nẽ. No kêt mẽ pajaja na pa mẽ kwÿhtã ixàpênh rax o kamát. Arĩgro htÿx kãm ixàpênh o ixãm o ixtã kamát tã ka pēr ãm mẽ inhmã amnhĩrer o axpên pyrãk. Kwa na ka mẽ ixtomnuj nẽ.” Anẽ. ¹³Hãmri nhũm mẽ kuma nẽ mẽ kãm: “Tk. Nà na pa mẽ atomnuj kêt nẽ. Na pa kwÿhtã tanhmã mẽ amã amnhĩrer to xà jarê ka mẽ inhma nhũm ja mẽ amã mex nẽ ka mẽ ma hwÿr axàpênh mã mra. ¹⁴Kwa mẽ akàxpore jamÿ nẽ ma mra. ãm pa inhmã hprãm xà hkôt na pa ã mẽ amã amnhĩrer anẽ. ¹⁵Ixkàxpore jakamã kot paj nhãm inhmã mēhō mã ōr prãm xà hkôt kãm kugō. Tã ka mẽ ã mẽ hã ixkamã agryk anẽ. E mẽ akàxporeja mÿ nẽ ma mra.” Anẽ. Nhũm ã hpur nhō dōn mẽ kãm kapêr anẽ. ã mẽ ujarênh kot anhÿr. Anẽ.

¹⁶Nhũm pre ã Jejus mẽ inhmã ujarênh anẽ nẽ mẽ inhmã:

—Ja pyrã nẽ wam mẽ ate ixkôt amnhĩ xunhwÿr xwÿnhjaja nẽ hapu hã mẽ kot kormã ixkôt amnhĩ xunhwÿr mã xwÿnhjaja kot paj nhÿrmã mẽ apiitã mẽ ato mex kumrêx o axpên pyrãk. Anẽ.

Jejus kot htyk kukamã amnhĩ jarênh

Makre 10.32-34; Rukre 18.31-34

¹⁷Tã nhũm Jejus mẽ inhmã anẽ pa mẽ ixrohã ma Jerujarê hwÿr mō. Mẽ ohtôjê hkôt mō. Hãmri nhũm Jejus mẽ ixpê 12jê mã anẽ nẽ mẽ ixkwÿjê hkà ã mẽ inhmã kapêr kaxyw ahte hapu hã mẽ ixto mō. ¹⁸Hãmri nẽ mẽ inhmã amnhĩ kukamã tanhmã amnhĩ jarênh to nẽ mẽ inhmã:

—E na pu mẽ ra Jerujarê hwÿr mō. Kamã koja mẽ pahkwÿjaja inhĩpêx kati nẽ. Koja mẽ patre krãhtũmjê mẽ Mojes kapêr o mẽ ahkre xwÿnhjê nhĩhkram ijaxã nhũm mẽ kot ixpĩr kaxyw ixtã amÿnê. ¹⁹Koja mẽ kãm ixkurê xwÿnhjaja ixpynê nẽ Rōm nhō xwÿnhjê nhō pôristijê hwÿr ixto tẽ nẽ mẽ kãm tanhmã ixto hêx to. Hãmri nhũm mẽ kuma nẽ mẽ mar xà hkôt tanhmã inhĩpêx to. Nhũm mẽ hkwyjaja ixtã hpêr o axkê nẽ ixtã akunha nhũm mẽ hkwyjaja ixto kapêr punuj nẽ tanhmã ijapry hto nẽ ixtak. Hãmri nẽ ma ixto tẽ nẽ pĩ kahpa hã inhô nẽ ixpĩ. ã koja mẽ inhĩpêx anẽ. Nom kot paj ixtyk ã ixtã apkati axkrunêpxi nhũm Tĩrtũm akupÿm ixto ixtĩr. Anẽ.

Xiakre mẽ Juãw wa katorxã kot wa ho Jejus wÿr ã harênh

Makre 10.35-45; mãănên Rōmãn 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰Tã nhũm Jepetew prōja amnhĩ kôt Jejus wÿr hkra Xiakre mẽ Juãwja wa o tẽ. Kot wa ho Jejus wÿr kaxyw hwÿr wa o tẽ. Mẽ ixpyrã nẽ wa kot Jejus kôt pa ho pa xwÿnhjê hō

na pre wa nhũm wa katorxàja Jejus wỳr wa o tẽ. Hãmri nẽ kutã hkõnkrã ho tẽm nẽ nhỹ
²¹ nhũm kãm:

—Pa mo na? Anẽ.

Hãmri nhũm kãm:

—Ma ixkrata na pa ixte wa ho awỳr kaxyw awỳr wa o tẽ. Xê kot kaj nhỹrmã ate mẽ piitã mẽ ho amnhĩptàr kaxyw nhỹ nhũm ixkrata wa akutã anhijê nẽ wa kệp anhõ kôwenatõ nẽ akutã anhijê nẽ wa ato nhỹ. Ja prãm xàj na pa ã wa ho awỳr anẽ. Anẽ.

²² Hãmri nhũm kuma nẽ Xiakre mẽ Juãw wa omu nẽ wa kãm:

—Nà na war akatorxàja htỳx ã war ato ixwỳr anẽ. Koja mẽ tokyx ixpĩ kot paj amnhĩ xà htỳx kãm ijamak kãm ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyrà nẽ amnhĩ xà htỳx kãm ijamak kãm ty. Anẽ.

²³ Hãmri nhũm wa kãm:

—Nà ãm hãmri na ka wa amnhĩ jarẽ. War ate ixpyrà nẽ ixkõt amnhĩ xà htỳx kãm ajamak kãm atyk mã kênã. Tã nom war akatorxà kot war ato ixwỳrta ã kot paj tanhmã war amã nẽ hkêt nẽ. Kêt inhõ Papaj tãm koja ixkaxyw mẽhõ japêr nhũm inhĩhkõ hã nhỹ. No pa kot paj amnhĩ kaxyw mẽhõ jarênh kêt nẽ.

Anhỹr o wa kãm kapêr. ²⁴ Hãmri pa mẽ ixte wa uràk nẽ Jejus kõt ixpa ho ixpa xwỳnhjaja wa katorxà kot ã wa ho Jejus wỳr anhỹrja ã kuma nẽ wa kamã inhgryk nẽ. Hãmri nẽ axpẽn mã ixkapêr o:

—Tk. Nà koja Juãw mẽ Xiakre wa nhỹrmã kệp õ kôwenatõ nẽ mẽ pahto amnhĩptàr kêt kumrêx. Anẽ.

²⁵ Nhũm Jejus mẽ inhma nẽ amnhĩ wỳr mẽ ixpiitã mẽ inhmã hpa ho apê nẽ mẽ inhmã:

—E mẽ amnẽ ixwỳr axkamẽ pa mẽ amã awjarẽ mãn. Anẽ.

Hãmri pa mẽ hwỳr axkamẽ nhũm mẽ inhmã:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã amarĩ ixkre hkre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ. Na htem ã amnhĩ nhĩpêx anhỹr o hkrĩ. Nẽ mẽ kot mex ã harênh kaxyw tanhmã mẽ ho mex to ho pa. ²⁶⁻²⁷ Tã no mẽ kajaja. Kêr ka mẽ ho mẽ uràk kêt nẽ. ãm te amarĩ ri mẽ apa pyràk o axpẽn nhĩpêx o ri apa. Nẽ te mẽ apê mẽ kãm axàpênh xwỳnh pyràk o amnhĩ nhĩpêx o ri mẽ hkõt apa. No kêr ka mẽ ho amnhĩptàr mã ajamaxpêr o ri apa hkêt nẽ. ²⁸ Mẽ ate mẽmoj tã pa ixkutã anojarêt ho apa kaxyw na pa pre mẽ awỳr ixwryk kêt nẽ. Ixte amarĩ mẽmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wry. Nẽ mẽ ate ixkõt amnhĩ xunhwỳr xwỳnhjê nẽ ixtyk kaxyw na pa pre wry. Anẽ.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mẽ Jejus kõt kormã Jerujarẽ hwỳr ra Jeriko htêp o mõi. Hãmri nẽ kurũm ixkaton mõi nhũm mẽ ohtõ nẽ mẽ ixkõt mra. ³⁰ Nhũm pry nhĩhkjê hã no hkre xwỳnh wa àhwỳr o hkrĩ xwỳnhja wa amnhĩ wỳr mẽ inhmrar mar o nhỹ. Mẽ ohtõ nẽ Jejus kõt mẽ mrar xwỳnhjê mrar ma nẽ mẽ kãm:

—Kwa mo na? Mẽmoj wỳr na ka mẽ axohtõ nẽ mra? Anẽ.

Hãmri nhũm mẽ wa kãm:

—Nà Jejus pẽ Najare nhõ xwỳnhhta kõt na pa mẽ mra. Anẽ.

Hãmri nhũm wa mẽ kuma hãmri nẽ kàx pẽ Jejus mã kapêr nẽ kãm:

—Pa Pahihti? E apê mẽ inhõ Pahihti mex na ka. Te apê amnepêm anhĩgêt pahihiti Tawita pyràk. Jakamã kwa wa ixkamã axukapri nẽ akupym wa ixto mex. Anẽ.

³¹ Hãmri nhũm Jejus kõt mẽ mõi xwỳnhjaja wa kuma nẽ wa kãm:

—Tk. Kwa war akapêr kêt nẽ nhỹ nà. Anẽ.

Tã no nhũm wa ãm mẽ kuma nẽ xatã amnhĩ to kuwỳ. Kàx pẽ amnhĩ to kuwỳ. ³² Hãmri nhũm Jejus wa kuma nẽ xa nẽ wa omu nẽ wa kãm:

—Pa mo na? Tanhmã kot pa wa ato? Anẽ.

³³ Hāmri nhūm wa kām:

—Nà akupŷm wa inhmā wa ixrīt mex prām. Aně.

³⁴ Hāmri nhūm kām wa hkaprī nē wa no htok nhūm wa akupŷm rīt mex kurê kumrēx. Hāmri nē rīt mex ā amnhī pumu nē hkīnh tŷx nē ma Jejus kôt hkwyjê hkôt mō.

21

Jejus kot Jerujarē hwŷr àr ā harēnh

Makre 11.1-11; Rukre 19.28-40; Juāw 12.12-19

¹ Tā nhūm Jejus kormā Jerujarē hwŷr kormā mō. Pa mē hkôt mō nē ra Petake hwŷr ixàhtêp o mō. Hixêt pê Oriwêhti kahti ri na pre krīja xa. Jakamā pa mē wa hwŷr ixàhtêp o mō nhūm Jejus mē ixte hkôt ixpa ho ixpa xwŷnhjê wa ho axkrut nē amnhī kukamā wa kumē. ² Nē wa kām:

—E wa ma krī mŷj wŷr mē ixkukamā wa tē. Nē wa hwŷr axà nē nhŷri jumēnre mē hkra wa kām ê nē wa ām xwŷnh wa omu hāmri nē kām ê xà hpôt nē man akupŷn amnē hamē wa o tē. ³ Kojā mēhō ja hā war apumu nē hā tanhmā war amā kapēr to ka wa kām ā ijarēnh anē nē kām: “Nà mē panhō Pahihti na hā karō pa wa hwŷr tē.” Anhŷr o wa kām ijarē. Hāmri nhūm war ama nē war amā ōr kurê kumrēx. E wa ma hwŷr tē. Aně.

⁴ Tīrtūm kapēr ā kagà htūm ra kot ja kukamā harēnh. Na pre ra Tīrtūm nhŷ hā kapēr xwŷnhjê hō ja jarē nē hā kagà ho:

⁵ Pa Jerujarē nhō xwŷnhjaja. Kwa mē tee ri amnhī kukamā ajamaxpēr ho amā ma hkôt nē. Ota mē anhō pahi nywta ra jumēnre hā nhŷ nē mē awŷr hpôx o tē. Te kot amnhī to greire xwŷnh pyrāk o amnhī nhīpêx nē tē.

⁶ Anhŷr o kot hkukamā harēnh jakamā nhūm Jejus amnhī kukamā ja wa kumē hāmri nhūm wa ma hwŷr htēm kurê kumrēx. ⁷ Nē krīta wŷr pōj nhūm Jejus kot wa kām harēnh xà hkôt nhūm wa jumēnreta pumu. Hāmri nē hamē wa kām ê xà hpôt nē ma Jejus wŷr wa o tē. Hāmri nē kaxyw amnhī xē hkwȳ hkwrŷ nē kām ho jumēnre nywta kô kahty. Nē kām ho htŷx nē o xa nhūm Jejus hā nhŷ nē hā mō. ⁸ Kormā Jerujarē hwŷr hixêt ā àpir o mō. Nhūm mē kot omunh o kuhê xwŷnhjaja hkīnh nē ma hkukamā pry ho mex kaxyw amnhī xē hkwȳptyr ho mō. Nē pô hkwȳ jakà nē utyr o mō. ⁹ Nhūm mē hkwȳjaja Jejus kukamā mra nhūm mē hkwȳjaja hapu hā hkôt mra. Nē piitā kàx pê Tīrtūm mex o mex ā harēnh o hkôt mō nē harēnh o:

Ota Tīrtūm kot mē pahwŷr mēnh xwŷnhhta ra pōj. Ām hāmri na mē pahwŷr wrŷ. Ja na mex kumrēx. Kêp mē panhō Pahihti mex na. Ām hāmri na pre Tīrtūm mē pahwŷr kumē. Tīrtūm mex kumrēx. Ām mex o mex.

Anhŷr o Jejus kôt Jerujarē hwŷr harēnh o mō. Kot mē ho amnhīptār kurê kumrēx ā hkamnhīx jakamā hkīnh nē hkôt ā harēnh anhŷr o mō. ¹⁰ Hāmri nhūm krī nhō xwŷnhjaja tee ri mē kuma nē axpēn mā:

—Kwa mēhō na we hpôx o mō nhūm mē ā hkôt harēnh anhŷr o mō? Aně.

¹¹ Hāmri nhūm Jejus kôt mē mrar xwŷnhjaja mē kuma nē mē kām:

—Nà Tīrtūm nhŷ hā kapēr jarēnh xwŷnh pê Jejus na. Kêp Garirej kamā krī pê Najare nhō xwŷnhhta na. Aně.

Jejus kot Tīrtūm nhōrkwȳ hwŷr àr ā harēnh

Makre 11.15-19; Rukre 19.45-48; Juāw 2.13-22

¹²⁻¹³ Tā hāmri nhūm Jejus Jerujarē wŷr axà nē jumēnre rūm wrŷ nē ma Tīrtūm mā amnhī jarēnh xà hā ixkre hwŷr tē nē axà. Hāmri nē tee ri mē kot tanhmā ixkre kamā amnhī nhīpêx to hā mē omunh o xa. Nhūm mē axtem nē môx nē ôwêhti nē tuuti ho wēnê ho kuhê. Mē kot haprôr nē Tīrtūm mā amnhī jarēnh kaxyw kām hpar nē ōr kaxyw mē kām ho wēnê ho kuhê. Nom axtem nē mē kām hā ohtô rax kām mē kām ho wēnê. Hāmri nhūm Jejus mē hwŷr axà nē tee ri mē omu nhūm ja kêp omnuj tŷx kumrēx. Hāmri nhūm mē hwŷr tē nē mē kot kàxpore ho pinhpanh xwŷnhjê pê mē ō mēsti rēnh pa. Nē mē kot tuuti ho wēnê xwŷnhjê pê hkrī xà hkujate nē rēnh pa. Hāmri nē mē kām:

—Tk. Kwa Tīrtūm kapēr ā kagà htūm kot ixkreja jarēnh kot:

Inhorkwÿja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anê. E kwa mẽ ajapôx tokyx anê. Anê.

Hãmri nê mẽ kator pa nhũm mẽ ma hapêx. ¹⁴ Hãmri nhũm mẽ no hkre xwÿnhjaja nê mẽ hyk o mẽ pa xwÿnhjaja mra nê agjê nê Jejus kutã kuhê nhũm mẽ omu nê akupÿm mẽ ho mex. ¹⁵⁻¹⁶ Hãmri nhũm mẽhprĩ hkwÿjaja hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tĩrtũm na pre mẽ ixwÿr amê.

Kot kaj te anhĩgêT Tawi pyrã nê mẽ ixto amnhĩptãr o apa.

Anhÿr o kãm grer o kuhê. Hãmri nhũm patre krãhtũm mẽ Tĩrtũm kapêr tũm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nê tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mẽhprĩjaja mẽ grer kãm ã ajarênh anê ka mẽ mar kêt nê? Mẽ grerja mexti hã. Anê.

Hãmri nhũm mẽ kãm:

—Tÿ ixte mẽ mar kênã. Tĩrtũm kãm hprãm xà hkôt na mẽ ã inhmã inhmex o inhmex ã ixtã grer anê. Tĩrtũm kapêr ã kagã htũm kot ã mẽ hkukamã harênh kot anhÿr. Mẽ harênh kot:

Koja mẽhprĩjaja Pahihti mã mex o mex ã grer o kuhê.

Anhÿr o kot mẽ hkukamã harênh kênã. Tã mãn ka mẽ kormã kamã harênh kêt jakamã na ka mẽ ja jarênh mar kêt nê. Kwãr mẽ mãmrĩ ã inhmex ã grer anê.

¹⁷ Anhÿr o mẽ kãm kapêr hãmri nê mẽ inhmã anê pa mẽ ixkreta rũm ijapôj nê ma akupÿm Petãn wÿr mra nê kamã amnhĩm hikra.

*Jejus kot mẽ*mo hpãr mã kapêr ã harênh

Makre 11.12-14; mããnên Xiakre 1.6

¹⁸ Tã nhũm kwÿhtã nhũm Jejus kãnhmã nhÿ nê mẽ inhmã anê pa mẽ ixrohã ma akupÿm Jerujarê hwÿr mra. Hãmri nê kormã mō nhũm Jejus pry kahti ri ra kãm prãm nê. ¹⁹ Hãmri nê mẽmo pĩ pê fikêhti jarênhja pumu nê kot ô hkwy rênh nê hkrêr kaxyw hwÿr mât. Hãmri nê tee ri ô japêr nhũm ô hkêt nê ãm hô hpix harir. Hãmri nhũm tee ri omu nê kãm:

—E kot kaj axte axô hkêt kumrêx.

Anhÿrja o nhũm grã par kurê kumrêx. ²⁰ Hãmri pa mẽ ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhĩ nhĩpêx to nê grã kurê kumrêx? Anê.

²¹ Nhũm mẽ inhmã:

—Nã kot kaj mẽ ixpyrã nê fikêhti kot tanhmã amnhĩ nhĩpêx to kaxyw Tĩrtũm mã ajamxpêr tÿx nê nhũm amã hprãm xà hkôt amã tanhmã hipêx to. Nom kêr ka mẽ ajamxpêr kati ho tee ri hkukamã ajamxpêr kêt nê. ãm kaxyw Tĩrtũm kôt ajamxpêr tÿx nê nhũm mẽ amã tanhmã mẽmoj nhĩpêx to. ãm hãmri na pa mẽ amã ja jarê. No ãm ja pix kêt. Kot kaj mẽ mããnên hixêt mÿj mã akapêr nê kãm: “E anhÿr xàta rũm akato nê ma tẽ nê gô rax kãm mrõ.” Anê nhũm amar xà hkôt ã amnhĩ nhĩpêx anê.

²² —Nê kot kaj mẽ mẽmoj tã Tĩrtũm wÿ nê kaxyw kãm ajamxpêr tÿx kãm hã awÿ nhũm amã mẽmoj prãm xwÿnhhta gō. Anê.

Mêhō nhÿ hã Jejus kot mẽ ahkre hã harênh

Makre 11.27-33; Rukre 20.1-8

²³ Nhũm arĩgro hō hã nhũm Jejus kêwe axte Tĩrtũm mã amnhĩ jarênh xà hã ixkreja wÿr axã nê kamã mẽ ahkre ho nhÿ. Mẽ kãm tanhmã mẽ kot amnhĩ nhĩpêx to nê nhÿrmã Tĩrtũm mẽ wa kuri htĩr tũm nê pa kaxyw tanhmã mẽ kãm kapêr to ho nhÿ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwÿr mra nê hêx rom mẽmoj tã hkukja nê kãm:

—Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỹr o apa? Na ka hte akupỹm mẽ ho mex o apa nẽ tanhmã mẽ ahkre hto ho apa. Xà amnhĩ krã hkõt na ka hte ã amnhĩ nhĩpêx anẽ nà? Anẽ.

²⁴ Hãmri nhũm mẽ kãm:

—Nà kot pa ixkumrêx mẽmoj tã mẽ akukja. Ka mẽ inhma nẽ tanhmã inhmã harênh to pa rĩ kormã mẽ amã amnhĩ jarẽ. ²⁵⁻²⁶ Finat Juãw Paxis ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkõt nà? Xà Tĩrtũm nhỹ hã? E mẽ atõ inhmã ja jarẽ. Anẽ.

Hãmri nhũm mẽ kuma nẽ tee ri kot tanhmã kutã kãm harênh to hkukamã hamaxpêr pê axpên pumunh o kuhê nẽ axpên mã:

—Kwa tanhmã kot puj wem kãm ja jarênh to? Or mẽ kot mar o kuhê xwỳnhjaja na htem kêp Tĩrtũm nhỹ hã kapêr jarênh xwỳnh ã harẽ. Tã kot puj mẽ kãm kot amnhĩ krã hkõt kot mẽ hkrã kumrãr ã harẽ nhũm mẽ tee ri mẽ pama nẽ mẽ pakamã gryk tỳx nẽ. Nẽ mẽ paxêx rom ã mẽ pahte kãm pakapêr anhỹr ã mẽ pahpumu nẽ kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã kot mẽ hkrã kumrãr ã harẽ hãmri nhũm mẽ pamã: “Kwa ã kot anhỹr kênã na ka prem kapêr ma nẽ hkõt ajamaxpêr kêt nẽ?” Anẽ. Jakamã kot puj mẽ ja pymaj tanhmã kãm harênh to hkêt nẽ. Kot puj mẽ ãm kãm aa te mẽ pahte ja jarênh mar kêt pyrãk o harẽ. Anẽ.

Mẽ kot tanhmã Jejus mã nẽ nhũm kot ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm kaprỹ o kuhê. ²⁷ Hãmri nẽ kãm:

—Konẽn. Mẽ ixte mẽhõ nhỹ hã kapêr o pa hã omunhre hã. Anẽ.

Hãmri nhũm mẽ kuma nẽ mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarênh to hkêt nẽ. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽhõ my mẽ hkra wa pijakrut ã wa harênh

Matêwre 7.21-23; Rukre 7.29-30

²⁸ Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nẽ mẽmoj tã kuxi nẽ tanhmã mẽ kãm ujarênh to nẽ mẽ kãm:

—E pa mẽ amã awjarẽ ka mẽ inhma. Koja mẽhõ hkra my hamêxkrut. Hãmri nẽ hkra kot waja mã tanhmã kapêr to nẽ kãm: “E kêr ka jarãhã ma tẽ nẽ inhmã pur kãm apê.” Anẽ. ²⁹ Hãmri nhũm kuma nẽ pur mã htêm kaga nẽ hitõt nẽ. Tãã no ãm hã ahtũmre nẽ tanhmã hamaxpêr to hãmri nẽ ma hwỳr tẽ nẽ kamã àpênh o xa. ³⁰ Hãmri nhũm wa hipêxaja hpãnhã hkra kot hapu hwỳr tẽ nẽ mã kãm kapêr anẽ nẽ kãm: “E kêr ka ajaxwỳja atõ hkõt tẽ nẽ wa inhmã apê.” Anẽ nhũm kuma nẽ kãm: “Tõe. Nà kot paj ma tẽ.” Anhỹr tã no ãm hõta kĩnhã htêm kêt nẽ.

³¹ —Jakamã e. Nhỹ hkra na pre hipêxà kapêr ma nẽ hkõt amnhĩ nhĩpêx nẽ kapêr nhĩrõp ãm kêt nẽ? Xà kot waja nà? Xà kot haputa? E mẽ atõ tanhmã inhmã wa harênh to. Anẽ.

Hãmri nhũm mẽ kuma nẽ kãm:

—Nà kot wata. Kot wata na hitõt tã tanhmã hamaxpêr to nẽ ma tẽ nẽ kãm apê. Anẽ.

Hãmri nhũm mẽ kãm:

—Tỳ ãm hãmri na ka harẽ. No mẽ kajaja te mẽ ate hkra kot haputa kot amnhĩ nhĩpêx pyrãk. Mẽ ate Tĩrtũm kapêr kõt amnhĩ nhĩpêx o apa hã amnhĩ jarênh tã hkwỳm ri amnhĩ nhĩpêx o apa. Te mẽ ate kot hapu kot hipêxà mã àpênh ã amnhĩ jarênh tã kãm àpênh kêeta pyrãk. No kêt mẽ kot amnhĩ tomnuj o mẽ pa xwỳnh kwỳjaja na mẽ arom Tĩrtũm kapêr ma nẽ hkõt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwỳr pa kaxyw ra tãm nẽ. ãm hãmri na pa mẽ amã ixkapêr. ³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nẽ ãm ama nẽ aa kapêr kõt amnhĩ nhĩpêx kêt nẽ. Nom mẽ kot amnhĩ tomnuj o mẽ pa xwỳnh kwỳjaja mẽ arom kuma nẽ Tĩrtũm kõt amnhĩ nhĩpêx. Ka mẽ ja hã mẽ omu nẽ ãm mẽ omu nẽ mẽ urãk nẽ ã amnhĩ nhĩpêx anhỹr kêt nẽ. Anẽ.

Mê àpênh punu xwýnhjê jarênh

Makre 12.1-12; Rukre 20.9-18

³³ Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nê mẽ kãm awjarê nê mẽ kãm:

—Koja mēhō mẽ kot kãm pur kãm àpênh kaxyw hkwyjê mã karõ nhũm mẽ ma hwýr mra nê kamã mẽmo hy hkre nê hkre pa. Hãmri nhũm hpur nhõ dõn nhỹhỹm nojarêt nê kãm mẽ àpênh xwýnhjê mã tanhmã hpur jarênh to nê mẽ kãm: “E or ixpur nõ. Kê kamã mẽmoj kà hpa ka mẽ mãmri kamã axujamýnh pa nê ho axkjê. Nê ixkutêp inhmã inhõ jaxwý nê mãmri anhõ tanhmã ho hprãm xà hkõt tanhmã ho.”

—Anhỹr o mẽ kãm kapêr hãmri nê ma nhỹhỹm mõ. ³⁴ Tã nhũm ra pur kãm mẽmoj hkà pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwýnhjê ho axkrunêpxi nê akupým mẽ hwýr mẽ kurê. Mẽ kot mẽ kãm hkwy nhõr nhũm mẽ ma kot kãm o mör kaxyw nhũm ma mẽ hwýr mẽ kurê. ³⁵ Nhũm mẽ ma hwýr mõ. Mõõ nê ra hwýr pøj nhũm mẽ amnhĩ wýr mẽ omu nê axtem nê mẽ homnuj nê. Nê mẽ unê nê ja tak nê ja pĩ nê hõja nhũm mẽ kên o htak hãmri nê amnhĩ nê wa hano nhũm wa ma akupým ý kamã mõ. ³⁶ Hãmri nhũm mẽ õ patrãwja tee ri wa omu nê hamaxpêr o: “Kwa nà na mẽ ixpê inhmã mẽ àpênh xwýnhjê homnuj tỳx nê. Nà kot paj axte mẽ hwýr mẽ hkwyjê rê. Nom hpãnhã mẽ ho ohtô nê mẽ kurê. Kê mẽ ohtô nê mẽ hwýr mõ nê tã inhmã inhõ hkwy jamý nê man ixwýr o mõ.”

—Anhỹr o hamaxpêr hãmri nê mẽ hwýr jajê rê nhũm mẽ ma akupým mẽ hwýr mõ. Nhũm mẽ amnhĩ wýr mẽ ohtô hã nê mã mẽ ho anê nê mẽ hipêx kati nê nhũm mẽ ý kamã ma õ patrãwja wýr akupým mõ. ³⁷ Hãmri nhũm tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj pêr mẽ hwýr ixkraja mãn mẽ. Inhmã hapê htỳx tã kot paj mẽ hwýr kumê kê ma mẽ hwýr mõ. Hãmri nhũm mẽ kêp ixkra hã omu nê tanhmã ixpê ho hkêt nê. Nê tã inhmã kãm inhõja kwý gõ.” Anê.

—Hãmri nê mẽ hwýr kumê nhũm ma mõ. ³⁸ Tã hãmri ra mẽ hwýr hpõx o mõ nhũm mẽ amým amnhĩ wýr omu nê kêp hkra hã omu nê axtem nê hã axpên mã amýnê nê axpên mã: “E oněj hpur nhõ dõn krata tẽ. Koja nhỹrmã õ papaj mýr pê amnhĩm hpur ã pykata pytà nê ho õ. Jakamã kwa pu mẽ hpĩr kurê kumrêx nê kêp hpur ho arĩk nê ho panhõ. E tokyj pu mẽ kupĩ ri.” Anê.

³⁹ —Hãmri nhũm ra tẽ nê mẽ hwýr pøj nhũm mẽ unê nê hpur nê ho kato nê mã ho anê nê kupĩ. ã mẽ ujarênh kot anhỹr. Anê.

⁴⁰ Nhũm pre ã Jejus mẽ kãm ujarênh anê. Hãmri nê hã mẽ hkukja nê mẽ kãm:

—E koja pur nhõ dõnja hkra jarênh ma hãmri nê tãm mẽ hwýr mõ hãmri nê tanhmã mẽ hipêx to wehe? Anê.

⁴¹ Hãmri nhũm mẽ kãm:

—Nà koja ma akupým mẽ hwýr mõ hãmri nê mẽ homnuj tỳx nê mẽ himex pa. Hãmri nê hpãnhã nhãm hpur ã mẽmojjê rê nhũm mẽ tã katàt kõt kãm àpênh o pa. Anê.

⁴² Hãmri nhũm Jejus mẽ kãm:

—Tỳ ãm hãmri na ka ã mẽ harênh anê. Kot mẽ ho anhỹr mã tãm kênã. Mãn ka prem ra Tĩrtũm kapêr ã kagà htũm kot tanhmã ja jarênh toja ma? Harênh kot:

Mẽ kot kên o amnhĩm õrkwỹ nhĩpêx kaxyw nê kên maati pumu nê htỳx omnuj ã hkamnhĩx nê hkagata. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Tĩrtũm kot kên maati mex ã harênh xwýnhta mẽ pamã mex o mex.

Ã Tĩrtũm kapêr ã kagà htũm kot ja jarênh kot anhỹr. ⁴³ Ja pyrã nê na pre ra Tĩrtũm amnhĩ kaxyw mẽ apê Ijaew xunhwý. Mẽ apê hkra nê hkõt mẽ ate amnhĩ nhĩpêx kaxyw amnhĩ kaxyw mẽ axunhwý. Tã ka mẽ axtem nê hkaga. Te mẽ kot kên maati pumunh nê mex kêt ã hkamnhĩx nê hkagata pyrãk. Jakamã koja mẽ apãnhã Ijaew kêt xwýnh kwýjê xunhwý nhũm mẽ arom hkõt amnhĩ nhĩpêx mex o pa. Jao ra mẽ kêp hkra nê. Anê.

⁴⁴ Nhũm pre ã Jejus mẽ kãm te kêp kên maati pyræk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênh pyræk ã amnhĩ jarê nê mẽ kãm:

—Nà kot kaj mẽ atõ ixkaga hãmri nê te mēhõ htỳx htēm nê kên pumunh kêt nê hã htêk nê tēm pyræk o amnhĩ nhĩpêx. Jao ixkutã amnhĩ xãm. Rỳ ka tanhmã ajamxpêr to nê ixkaga nhũm te kên maati kot anhĩpy tēm nê axôm par pyræk o anhĩpêx ka mẽ amex kêt kumrêx. Anê.

⁴⁵ Nhũm pre ã mẽ kãm ujarênh kãm mẽ harênh anê. Hãmri nhũm patre krãhtũmjê mẽ Parijew nhõ xwỳnhjaja tee ri amnhĩ tã kuma ⁴⁶ nhũm ja mẽ kêp omnuj tỳx jakamã nhũm mẽ kãm unênh nê haxàr prãm nê. No mẽ ãm amnhĩ tã kãm mẽ kot mar o kuhê xwỳnhjê puma nê. Mẽ kurom Jejus kêp Tĩrtũm nhỹ hã kapêr xwỳnh ã hkamnhĩx jakamã nhũm mẽ kãm mẽ uma nê. Hãmri nê kormã tanhmã ho hkêt nê.

22

Pahi kot hkra hprõ kaxyw hkwyjê hwỳr ã harênh

Rukre 14.15-24; mããnēn Wam Korĩt 6.9-11; Epes 5.5-6; Apokarip 19.7-8

¹⁻² Tã nhũm Jejus axte mẽ kãm awjarê. Ijaew kot Tĩrtũm kaga hã mẽ kãm hã kuxi nê awjarê nê mẽ kãm:

—E pa mẽ amã ahpỳnhã mẽ kot Tĩrtũm kapêr mar nê tanhmã amnhĩ nhĩpêx to xwỳnhjê jarê ka mẽ inhma. Te mẽ kot pahihtija kot hkra hprõ kaxyw nhũm kot amnhĩ wỳr hkwyjê hwỳr nhũm mẽ kot harênh mar nê ahpỳnhã tanhmã amnhĩ nhĩpêx to xwỳnhjaja kot amnhĩ nhĩpêx pyræk. Koja pahihtija hkra hã hkĩnh nê hã apkur mex kaxyw amnhĩ wỳr hkwyjê hã karõ. ³ Hãmri nhũm kãm mẽ àpênh xwỳnhjaja ra kot amnhĩ wỳr mẽ hã karõ xwỳnhjê hwỳr mra nê mẽ kãm nojarêt nhũm mẽ kuma nê ãm mẽ kuma nê axtem nê mẽ kêp hitõt nê. Hãmri nhũm mẽ tee ri mẽ kuma nê akupỳm tẽ nê pahihtija mã mẽ harê.

⁴ —Hãmri nhũm tee ri amnhĩ tã mẽ harênh ma nê hpãnhã mẽ hwỳr axtem kãm àpênh xwỳnh kwỳjê rê nhũm mẽ ma mẽ hwỳr mra nê mẽ kãm: “Pa. E kwa mẽ tokyx. Na ra pahihtija mẽ akutêp mẽõ nhĩpêx pa. Na mẽ môx kwỳ hpa nê ho àr mex nê. Nê mẽ akutêp mẽmoj nhĩpêx par jakamã e kwa mẽ tokyx nà.” Anê. ⁵ ã mẽ kãm kapêr anhỹr tã nhũm mẽ kuma nê ãm mẽ kuma nê ma ahpỳnhã nhỹhỹm mra. Nhũm ja ma àpênh mã mra nhũm ja ma ihpur kãm àpênh mã ma tẽ nhũm ja ma nhỹhỹm mẽmo to wênê ho tẽ. ⁶ Nhũm mẽ hkwyjaja mẽ kãm ujarênh xwỳnhjê pynê nê mẽ htak o mẽ kupa.

⁷ —Hãmri nhũm pahihtija mẽ harênh ma nê àhkurê nê. Hãmri nê mẽ hwỳr pòristi hkwy rê nhũm mẽ ma mẽ hwỳr mra nê mẽ unê nê mẽ kupa nê mẽ õ krĩ hã hpòk pa. ⁸ Hãmri nhũm pahihtija kãm mẽ àpênh xwỳnh kwỳjê mã kãm: “Kwa ra ixte mẽ kutêp mẽõ mex kwỳ xunhwỳr tã nhũm mẽ ixwỳr mrar kêt nê. Ixtỳx ho mẽ mex ã mẽ hkamnhĩx nê amnhĩ wỳr mẽ hã karõ no mẽ mex kêt. Mẽ kot mẽ ixkutã apkur mã tãm kêt. ⁹ E kwa mẽ ma krĩ hkôt axtem mẽ hkwyjê japêr o mra. Nê nhỹri mēhõ pumu nê kãm awjarê kê man ixwỳr tẽ nê ixkra hã hkĩnh nê mẽ ixkutã apku. Mẽ ã mẽ kãm axujarênh o amrar anê.” Anê.

¹⁰ —Hãmri nhũm mẽ kuma nê ma mẽ hapêr o mra nê mẽ piitã mẽ kãm anhỹr o mra. Nhũm mẽ kuma nê wam tajê rom ma mẽ hkôt mrar kurê kumrêx. Mẽ kot amnhĩ to mex xwỳnhjaja nê mẽ kot amnhĩ tomnuj xwỳnhjaja hãmri piitã ma mẽ hkôt mra. Hãmri nê ixkreja wỳr mra nê hwỳr gjêx kaxyw nhũm mẽ kãm mẽ ê mex gõ nhũm mẽ hagjê hãmri nê kormã mẽ apkur xà hã ixkre hwỳr agjê nê ho nỳt pa. ¹¹ Hãmri nhũm pahihtija mẽ hwỳr axà nê mẽ piitã mẽ omu. Nhũm ja pixi nê axtem nê hkwyjê hkĩnhã mẽ kot kãm ê mex nhõrja jaxàr kêt rãhã axà nê apkur o nhỹ. ¹² Hãmri nhũm tee ri ja hã omu nê hwỳr tẽ nê kãm: “Pa. Tk. Kwa na htem ixkrem gjêx kaxyw nê mẽ kot mẽ kãm mẽ ê mex nhõr jagjê nê rĩ kormã hwỳr agjê nê apku. Tã mon ka akwỳjê hkĩnhã haxàr kaga? Kwa na htem ã amnhĩ nhĩpêx anhỹr kêt nê.” Anhỹr o kãm kapêr nom nhũm kuma nê ãm kuma nê tanhmã kutã kãm nê hkêt nê. ãm htỳx apkur o nhỹ. ¹³ Jakamã nhũm tee ri omu hãmri nê hã mẽ kot kãm àpênh xwỳnhjê mã amỳnê nê mẽ kãm: “E mẽ hwỳr tẽ nê unê nê hpa nê hte hpre nê ma o tẽ nê kamàt kô kamã amê. Kê tee ri mur nê amnhĩ xà htỳx kamã

hamak o amnhĩ nham o axpên kamnhar tỳx kaprỳ ho nõ nẽ rĩ amnhĩ pumu.” Anẽ. Hãmri nhũm mẽ kuma nẽ kãm ho anẽ. ã mẽ ujarênh kot anhỹr. Anẽ.

¹⁴ Nhũm pre Jejus ã mẽ kãm ujarênh anẽ hãmri nẽ mẽ kãm:

—Nà Tĩrtũm kot pahĩtita pyrà nẽ amnhĩ wỳr mẽ ho ohtô nẽ mẽ hwỳr tã na hte mẽ piitã hkôt amnhĩ xunhwỳr kêt nẽ. Jakamã na hte ãm mẽ ho grêre nẽ amnhĩ wỳr mẽ ho api. Anẽ.

Parijew nhõ xwỳnh kot Jejus kamã hamak ã mẽ harênh

Makre 12.13-17; Rukre 20.20-26; mããnẽn Rõmãn 12.1, 13.7

¹⁵⁻¹⁶ Tã nhũm Parijew nhõ xwỳnhjaja ã Jejus kot mẽ kãm ujarênh anhỹrja ma hãmri nẽ kurũm kato nẽ tanhmã hkukamã axpên mã hã àmnênh to. Hãmri nẽ hwỳr mẽ hkwyjê mẽ Erox kôt mẽ pa xwỳnh kwỳjê rẽ. Hêx rom mẽ kot mẽmoj tã hkukjêr kaxyw hwỳr mẽ kurê nhũm mẽ ma hwỳr mra nẽ omu nẽ kãm:

—Kwa Jejus. Nà ãm hãmri na ka hte Tĩrtũm kapêr o mẽ ahkre mex o ri apa nẽ mẽ kamã akahak o apa hkêt nẽ. Mẽ kot tanhmã ato kapêr punuj to htã ka aprĩ hã mẽ ahkre mex o ri apa. ¹⁷ E kwa mẽ inhmã mẽmoj jarê. Rõm nhõ pahĩti kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm hkwy gõ? Nà xà kot pu mẽ kãm õr kêt nẽ? E kwa mẽ inhmã tanhmã ja jarênh to. Anẽ.

¹⁸ Nhũm prem ã hêx rom àhkukjêr anhỹr tã no nhũm ra mẽ hamaxpêr ã mẽ omu nẽ mẽ kãm:

—Tk. Kwa mon ka mẽ ã axêx rom ja hã ixkukjêr anẽ? ¹⁹⁻²⁰ E mẽ atõ inhmã kàxpore htỳxre hõ gõ pa omu. Anẽ.

Hãmri nhũm mẽ kãm ja gõ nhũm kupy nẽ kànhmã mẽ kãm kupẽ nẽ mẽ kãm:

—E mẽhõ nhĩxi nẽ mẽhõ karõ na ja hã? Anẽ.

²¹ Hãmri nhũm mẽ kãm:

—Pahi Sesti karõ nẽ hixi na hã. Anẽ.

Hãmri nhũm mẽ kuma nẽ mẽ kãm:

—Tỳ. Tô kêr ka mẽ mãmrĩ kãm hkwy nhõr o apa. Hã hkarõ nẽ hã hixi. Tãm kot hipêx xwỳnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anẽ.

²² Hãmri nhũm mẽ amnhĩ jaêr pẽ ã kot kàxpore jarênh anhỹrja ma nẽ axte kãm tanhmã nẽ hkêt nẽ. Hãmri nẽ akryk omu hãmri nẽ ma akupỹm mra.

Akupỹm mẽ htĩr ã mẽ harênh

Makre 12.18-27; Rukre 20.27-40; Juãw 5.21, 6.39-40; mããnẽn Wam Korĩt 6.14, 15.12-28; Wam Tesarõn 4.13-18

²³ Tã nhũm Satusew nhõ xwỳnh kwỳjaja mẽ kot akupỹm mẽ htĩr kêt ã mẽ hkamnhĩx kêt xwỳnhjaja na pre mẽ. Na pre htem mẽ htyk nẽ mẽ hapêx kumrêx ã mẽ hkamnhĩx jakamã axpên mã tanhmã Jejus jarênh to nẽ axpên mã:

—E kwa pu mẽ hwỳr mra nẽ mẽmoj xihtỳx ã hkukja. Kê mẽ pama nẽ tee ri tanhmã mẽ pamã kapêr to hkukamã hamaxpêr kaprỳ. Kê mẽ piitã ja hã omu nẽ àhpumunh kêt ã omunh kurê kumrêx. E tokyx pu mẽ hwỳr.

Anhỹr jakamã Parijew nhõ xwỳnhjê pyrà nẽ hêx rom ma hwỳr mra nẽ hkukja nẽ kãm:

²⁴ —Pa Jejus? Kwa mẽ inhmã mẽmoj jarê. Na pre finat Mojesja Tĩrtũm nhỹ hã ã mẽ panhĩgêjtjê mã karõ anẽ. Mẽ hkra hkêt rãhã mẽ pa nẽ mẽ htyk xwỳnhjaja nhũm mẽ harênh o:

Koja mẽhõ hprõ nẽ kamã hkra hkêt rãhã pan ty. Hã koja hkôt htõja hpãnhã hprõ ho hprõ nẽ kamã hkra. Hãmri nhũm kato nẽ te kêp htõ htyk xwỳnhhta hkra pyrãk. Anẽ.

ã na pre Mojesja Tĩrtũm nhỹ hã mẽ kãm karõ anẽ. ²⁵ Jakamã kwa ga mẽ ixujarênh ma. Koja mẽ kot axpên to htõ xwỳnhjaja kêp 7. Nhũm kot waja hãmri hprõ nẽ wa pa nhũm kamã hkra hkêt rãhã ty. Nhũm hkôt htõja hpãnhã ho hprõ ²⁶ nẽ wa axpên to pa. Nhũm mããnẽn kamã hkra hkêt rãhã ty. Nhũm htõ hõta haxwỳja hpãnhã tãm o hprõ nẽ we wa axpên to pa grire nhũm haxwỳja kamã hkra hkêt rãhã ty. Hãmri nhũm htõ hkwyjaja ni pyxi nẽ axpên pãnhã ho hprõ hpa no mẽhõ kamã hkra hkêt rãhã htyk pa. ²⁷ Hãmri nhũm

mê hprôta mê hkôt amnhî to hitep nê ty. ²⁸ Tã Tirtûm kot akupÿm nhÿrmã mê ho htîr ronhÿx nhÿ nhÿx kêp nija mjên kumrêx? Ra piitã kot ho hprô kênã. E mê inhmã ja jarê. Anê.

²⁹⁻³⁰ Hãmri nhÿm Jejus mê kuma nê mê kãm:

—Nã kaxkwa kamã mê kot amnhî nhÿpêxja axtem na. Mê htîr ri mê kot Tirtûm kôt amnhî xunhwÿr xwÿnhjaja na htem ty hãmri nê Tirtûm nhõ krî kamã axte kãm hprô hprãm kêp nê pa. Jakamã hprô hkêp nê pa. Rÿ ni japêr nê mjên kêp nê pa. Nom ri kãm mjên rÿ hprô hprãm kêp nê pa. Hãmri nê Tirtûm kapêr o mê wrÿk xwÿnhjê pyrã nê axte htyk kêp nê. ãm htîr tûm rãhã nê pa ho pa. Pêr mê ate Tirtûm kapêr ã kagã htûm mar mex kêp jakamã na ka mê ã ja hã ixkukjêr anê. Tirtûm àhpumunh tÿx o àhpumunh tÿx jakamã kumã mê ate mêmôj tã ixkukjêr xwÿnhja na tanhmã kêp kute hkêp. Ra ja kukamã àhpumunh tÿx kênã.

³¹⁻³² —Nom mê ate akupÿm mê htîr kêp ã mê hkamnhÿxja kot paj ixprî hã mê amã harê. Amnepêr na pre Tirtûm pî hpôkja kamã tanhmã Mojes mã kapêr to. Mãn ra mê ate mar. Na pre kãm:

Ixpê Apraãw nhõ Tirtûm na pa. Nê mãânên ixpê Apraãw kra Ijak mê htãmnhwÿ Jako wa õ Tirtûm na pa.

Anhÿr o Mojes mã amnhî jarê nhÿm kuma nê hã kagã. Kêp apu arî mê htyk rãhã nhÿx pre ã mê harênh anhÿr kêp nê. Nhÿx pre mê harênh o: “Amnepêr Apraãw nê hkra nê htãmnhwÿ mê htîr ri ixpê mê õ Tirtûm na pa pre.” Anhÿr o nhÿx pre mê harê. Nom na pre ã amnhî jarênh anhÿr kêp nê. Mê pamã te Apraãwja mê htyk nê mê hapêx pyrãk. Nom nhÿm prem ra Tirtûm ri ra akupÿm htîr nê mex nê pa ho pa. Tã ka htem Tirtûm kapêr kwÿm ri akupÿm mê htîr kêp ã mê harênh o apa.

Anhÿr o Satusew nhõ xwÿnhjê mã kapêr. ³³ Hãmri nhÿm mê kot mar o kuhê xwÿnhjaja amnhî jaêr pê kot mê ahkreja ma.

Tirtûm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

³⁴ Tã nhÿm Parijew nhõ xwÿnhjaja Satusew nhõ xwÿnhjê jarênh ma. Mê kot tee ri kãm hamaxpêr o Jejus jakrenh prãm kaprÿ hã mê harênhja ma hãmri nê axpên wÿr akuprô nê Jejus wÿr mra. Kot mê urãk nê hêx rom àhkukjêr nê hamaxpêr o hakrenh kaxyw hwÿr mra. ³⁵ Hõja kêp Tirtûm kapêr tûm o mê ahkre o mê pa xwÿnh jakamã hêx rom kamã hamak kaxyw kãm kapêr nê kãm:

³⁶ —Kwa Jejus. Ot pa mê awÿr mra. Kwa mê inhmã mêmôj jarê. Na pre Tirtûm ahpÿnhã mêmôj to 10 nê hã mê pamã karõ. Mê pahte hkôt amnhî nhÿpêx kaxyw hã mê pamã karõ. Tã nhÿ kapêr na mex o kot hkwy jakrenh wehe? Anê.

³⁷ Hãmri nhÿm kuma nê mê kãm:

—Nã kot mê pamã hã karõ kot:

Kêr ka mê anhî piitã ho amã Tirtûm kînh tÿx o apa. Mê amã hkînh tÿx o mêmôj piitã hakrenh par o apa.

³⁸ E Tirtûm kot mê pamã hã karõ ja na mex o piitã hakrenh par. ³⁹ Nê hkôt ja:

Kêr ka mê amã akwÿjê hã ma ho te ka amã amnhî tã ma pyrãk. Jao ra tãm mê hipêx.

⁴⁰ ã Tirtûm kapêr ã kagã htûm kot mê pamã hã karõ kot anhÿr. ã mê pahte amnhî nhÿpêx anhÿr o papaja na Tirtûm kãm hprãm tÿx kumrêx. Kot kaj mê ja wa hkôt amnhî nhÿpêx rãhã ho ri apa nê mãânên ra Tirtûm kot mê pamã mêmôj tã karõ xwÿnh piitã hkôt amnhî nhÿpêx. Ja na pre Mojes mê Tirtûm nhÿ hã kapêr xwÿnhjaja amnepêr Tirtûm nhÿ hã mê panhÿgêjtê mã hã karõ ho pa. Anê.

Jejus kot amnhî tã mê hkukjêr ã harênh

Makre 12.35-37; Rukre 20.41-44; mãânên Rômãn 1.3-4

⁴¹ Nhÿm Parijew nhõ xwÿnhjaja arî Jejus mar o kuhê nhÿm amnhî tã tanhmã mê hkukjêr to. Nom te nhãm mêmô hã mê hkukjêr pyrãk o mê hkukja nê mê kãm:

⁴² —E mê inhmã mêmôj jarê. Tanhmã na ka htem axpên mã Tirtûm kot mê akaxyw ãm mã xwÿnhja jarênh to? Kêp mêmô kanrêhã htãmnhwÿ koja wehe? Anê.

Hâmri nhũm mẽ kãm:

—Nà koja kato nê kêp pahi finat Tawi kanrêhã htàmnhwỳ koja.

⁴³ Anê nhũm Jejus mẽ kuma nê mẽ kãm:

—Tỳ. ãm hãmri na ka mẽ harê. No mo na htem axpên mã kêp pahi Tawi hkanrêhã htàmnhwỳ pix ã harê nê mãânên kêp ò pahihti hã harênh kêt nê? Tawi na pre Tirtùm Karô nhỹ hã tanhmã harênh to nê harênh o:

⁴⁴ Na pre Tirtùm inhõ Pahihti mã ã kapêr anê nê kãm: “E amnê ixwỳr tẽ nê inhĩhkô hã nhỹ nê inhmã mẽ ho amnhĩptàr o akrĩ. Kot paj mẽ kot kãm akurê xwỳnh piitã mẽ unênh pa nê awỳr mẽ o mra nê anhĩhkram mẽ haxàr pa.” Anhỹr o pre kãm kapêr.

⁴⁵ ã Tawija Tirtùm kot Kris mã kapêr jarênh nê kêp ò pahi hã kagà anê. Mẽ kajaja na ka htem ãm kêp Tawi tàmnhwỳ pix ã axpên mã harênh o ri apa. No kêt Tawija na pre kêp ò Pahihti hã harênh o pa. Anê.

⁴⁶ Hãmri nhũm mẽ kuma nê tee ri kot tanhmã kutã kãm kapêr to hkukamã hamaxpêr nê axte mẽmoj tã hkukjêr kêt nê. Tanhmã kot mẽ amnhĩ to nê hamaxpêr o hakre? Na prem tee ri kãm hamaxpêr o hakrenh prãm kaprỳ. Jejus mẽmoj piitã hkukamã àhpumunh tỳx o àhpumunh tỳx.

23

Jejus kot tanhmã Parijew nhõ xwỳnhjê jarênh to

Makre 12.38-40; Rukre 11.43-46, 20.45-47

¹ Tã nhũm Jejus mẽ ixte hkôt ixpa ho ixpa xwỳnhjê mẽ mẽ kot mar o kuhê xwỳnhjê mã kapêr nê mẽ inhmã tanhmã Parijew nhõ xwỳnh mẽ Mojes kapêr o mẽ ahkre xwỳnhjê jarênh to nê mẽ inhmã:

² —Nà Parijew nhõ xwỳnh mẽ Tirtùm kapêr tùm o mẽ ahkre xwỳnhjaja na htem hprĩ hã Tirtùm kapêr ã kagà htùm mar mex nê. ³ Jakamã kêr ka mẽ mar tỳx nê mẽ kot ho mẽ ajahkre kôt amnhĩ nhĩpêx. No mẽ kot amnhĩ nhĩpêxja kêr ka mẽ hkôt amnhĩ nhĩpêx kêt nê. Mẽ kot Tirtùm kapêr tùm o mẽ ajahkre htã hkôt amnhĩ nhĩpêx kêt nê. ⁴ Te mẽ kot mēhõ kot mẽ katut ã mẽ kãm mẽ jênh pytĩ janhôr tã no ãm mẽ kuxwar hkwy htur kêt kot amnhĩ nhĩpêx pyrãk o na htem amnhĩ nhĩpêx o pa. Jao mẽ amã mẽmoj tã karô nê mẽ amã: “E kêr ka mẽ ã amnhĩ nhĩpêx anê nê ã amnhĩ nhĩpêx anê.” Anhỹr pix o mẽ amã kapêr o pa. Nom mẽ tãmjaja amnhĩ kapêr kôt amnhĩ nhĩpêx kêt nê.

⁵ —Na htem hkwyjê kot mẽ omunh nê mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nê mẽ mẽ noo mã mẽ ê mex pix kãm pa. Nê amnhĩm Tirtùm kapêr ã kagà htùm kwỳ hã kagà nê amnhĩ nhõkrã hã hanhõ nê amnhĩ pa hã hanhõ nê hã pa. Mẽ kot hã nohtỳx rãhã hã mẽ hkamnhĩx kaxyw nhũm htem ã amnhĩ nhĩpêx anhỹr o pa. Nê mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

⁶ —Nê mẽ pahpê Ijaewjê nhõ Tirtùm kapêr o mẽ ahkre xà hã ixkre kamã mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm. Nê mẽmoj tã mẽ apkur xà mex ã arĩgro hã nhũm htem ma mẽ apkur xà hã ixkre hwỳr akuprõ nhũm mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm. ⁷ Nê nhỹri pry hã mra nhũm mẽ kot mẽ omunh nê mẽ kêp mẽ ahkre xwỳnh maati hã mẽ hã hpijaàm kãm tanhmã mẽ kãm kapêr mex toja nhũm htem kãm hprãm. ã na hte Parijew nhõ xwỳnh mẽ Tirtùm kapêr tùm o mẽ ajahkre xwỳnhjaja hêx rom mẽ anoo mã amnhĩ nhĩpêx anhỹr o pa.

⁸⁻¹⁰ —No mẽ kajaja. Kêr ka mẽ ho mẽ urãk kêt nê. Kê mẽ axpên mã mẽ ajarênh o: “Pahi Maati” anhỹr o mẽ ajarênh kêt nê. Rỳ mẽ ajarênh o: “mẽ ijahkre xwỳnh maati” anhỹr o axpên mã mẽ ajarênh hkêt nê. Kêt paxipix na pre Tirtùm mẽ akaxyw ixãm jakamã paxipix na ixpê mẽ anhõ Pahi Maati. Nê paxipix na ixpê mẽ ajahkre xwỳnh maati. No mẽ kajaja ixkôt mẽ apê axpên to atõx nê atõ na ka mẽ.

—Nê kêr ka mẽ ri axpên jarênh o: “Mêpahpãm” anhỹr kêt nê. Kêt kaxkwa kamã na Mêpahpãmja.

¹¹⁻¹² —Nê kot ka mẽ amnhĩ to rax prãm xàj tanhmã amnhĩ to jarkrar to ho apa htã no nhũm akwỳjaja ama nê ãm ama nê akôt hamaxpêr kêt nê. No kot kaj mẽ piitã mẽ kutã tanhmã anojarêr to ho apa nhũm mẽ amnhĩ tã mẽ apumu nê axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nê ri mẽ piitã mẽ kãm tanhmã amnhĩ nhĩpêx to pê mẽ kutã anojarêr rãhã ho ri apa. Anê.

Jejus kot mẽ hkwỳjê mã kapêr tỳx ã harênh

Makre 12.40; Rukre 11.39-52, 20.45-47

¹³⁻¹⁴ Tã nhũm Jejus hpãnhã Parijew nhõ xwỳnh mẽ Tĩrtũm kapêr tũm o mẽ ahkre ho mẽ pa xwỳnhjê mã kapêr. Nê mẽ kãm kapêr kãm hihtỳx nê mẽ kãm:

—E mẽ apê Parijew nhõ xwỳnh mẽ Tĩrtũm kapêr tũm o mẽ ahkre xwỳnhjaja. E mẽ inhma. Kot kaj mẽ amex kêt nê. Mẽ apê mẽ no kupyw xwỳnh na ka mẽ. Nê mẽ amã Tĩrtũm kôt amnhĩ nhĩpêx prãm kêt. Nê nhỹrmã atyk nê mẽ amã õ krĩ hwỳr axàpir prãm kêt. Nê akwỳjaja kot hwỳr àpir pymaj na ka htem akwỳjê nê tanhmã mẽ kãm axêx to ho apa. Mẽ kot mẽ apyrã nê Tĩrtũm kapêr kwỳm amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwỳr kahêxã kahê htỳx pyrãk o apa.

¹⁵ —Nê mẽ akwỳjaja kot mẽ akôt amnhĩ xunhwỳr nê mẽ akôt amnhĩ nhĩpêx prãm xàj na ka htem ma awry hã nhỹhỹm tanhmã mẽ kãm ri axujarênh to ho ri apa. Jakamã nhũm mễhõ mẽ ama nê mẽ akôt amnhĩ xãm hãmri nê ra amnhĩ tomnuj tỳx o mẽ ajakre. Jakamã koja mẽ nhỹrmã mẽ apyrã nê ma mẽ kot amnhĩ xà htỳx kamã hamak tũm xàta wỳr pa. Jakamã kwa mẽ o kora. Kot kaj mẽ amex kêt nê.

¹⁶ —Hêxta waa nê. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nê Tĩrtũm mã amnhĩ jarênh xà hã ixkre nhĩxi jarênh kôt mễhõ mã amnhĩ jarê nhũm ama nê hamaxpêr o: ‘Ko. Apu ãm hãmri na inhmã amnhĩ jarê rỳ ko na apu ãm amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwỳ gõ hãmri nê ate mẽ kãm õr xàta jarênh kôt ãm hãmri mẽmoj tã mễhõ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot ixkre ho mex kaxyw kàxpore hkwỳ nhõr kôt ã amnhĩ jarênh anê. Jakamã na amnhĩ to hêx kêt nê.’ ” Anhỹr o hamaxpêr. Na ka htem ã mẽ ahkre ho apa anê. ¹⁷ Nom mẽ ate mẽ ahkreta mex kêt. Pêr mẽ ajamaxpêr mexti hã. Tĩrtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nê aa paxêx kêt rãhã ho papaja na Tĩrtũm kãm hprãm.

¹⁸ —Nê na ka htem mẽ kêp mẽ hikukrêx jamỳnh prãm xàj ã atỳx ri mẽ ahkre anê nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nê Tĩrtũm mã mẽmoj nhõr xà hã mễstija jarênh kôt mễhõ mã tanhmã amnhĩ jarênh to. Hãmri nhũm mẽ ama nê hamaxpêr o: ‘Nà ãm hãmri na inhmã amnhĩ jarê rỳ ko na apu ãm inhmã amnhĩ to hêx.’ Anhỹr o hamaxpêr. Nom kot kaj mẽ Tĩrtũm mã mẽmoj nhõr xà hã mễstija ã kãm mẽmoj xi. Hãmri nê ra mẽ ate kãm õr xàta jarênh kôt ãm hãmri mẽmoj tã mễhõ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhỹr jakamã na amnhĩ to hêx kêt nê.’ Anhỹr o hamaxpêr.” Anê. Na ka htem ã mẽ ahkre anê. ¹⁹ Mẽ ajamaxpêr kêt xwỳnh na ka mẽ. Tĩrtũm mã mẽmoj nhõr xà hã mễstija na mex o mẽ kot hã kãm mẽmoj nhõrta jakrenh. Tã na ka htem axtem nê mẽ kot hã kãm mẽmoj nhõrta mex o mễsti jakrenh ã harê. ²⁰ Nom Tĩrtũm mã mễsti mẽ mẽ kot hã kãm mẽmoj nhõrta te kot axpên pyrãk jakamã kot kaj mẽ mễstija jarênh kôt mẽmoj tã amnhĩ jarê nê mããnên mẽ ate hã Tĩrtũm mã mẽmoj xirja jarênh kôt amnhĩ jarê. Hamẽ wa kot axpên pyrãk jakamã hamẽ wa harênh pê amnhĩ to axêx kêt nê. Jakamã kêt ka mẽ mẽmoj tã amnhĩ jarênh kaxyw nê hamẽ wa harênh kôt ãm hãmri mẽmoj tã amnhĩ jarê nê ho axêx kêt nê. ²¹ Tã kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nê Tĩrtũm mã amnhĩ

jarênh xà hã ixkre hkôt hã amnhĩ jarê nê mãânên Tĩrtũm kêp ixkre hpãm kôt hã amnhĩ jarê. Jakamã kêr ka mẽ hamẽ wa harênh pê amnhĩ to axêx kêt nê.

²²—Nê kot kaj mẽ ãm hãmri amnhĩ jarênh ã mẽmoj tă amnhĩ jarênh kaxyw nê kaxkwa jarênh kôt amnhĩ jarênhja o mãânên kaxyw kaxkwa kamã Tĩrtũm krĩ xà maati hkôt amnhĩ jarê. Nê mãânên Tĩrtũm kôt amnhĩ jarê. Jakamã kwa hamẽ wa harênh pê amnhĩ to axêx kêt nê.

²³—Hêxta waa nê. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nê. Mẽ ate mẽ no kupyw xwỳnh na ka mẽ. Na ka htem Tĩrtũm kapêr piitã hkôt amnhĩ nhĩpêx kêt nê ãm hkwy kôt pix mã amnhĩ nhĩpêx o ri apa. Na ka htem ãm kapêr o hpỳnhre nê hkôt amnhĩ nhĩpêx ã amnhĩ pumu nê ate amnhĩ to mex xwỳnh ã amnhĩ jarênh o apa. No Tĩrtũm kãm hprãm xà piitã hkôt amnhĩ nhĩpêx kêt nê. Mẽ ate tãm mẽ hipêx nê mẽ ho mex nê mẽ kamã axukapri hã kot mẽ amã karõja. Nê mẽ amã Tĩrtũm kĩnh ã kapêr kôt amnhĩ nhĩpêx hã karõja ra mẽ ate mar tă hkôt amnhĩ nhĩpêx kêt nê. Mẽ ate kapêr piitã hkôt amnhĩ nhĩpêx ronhỹx ja mẽ amã mex o mex. ²⁴ Mẽ ate ãm kapêr o hpỳnh nê hkôt amnhĩ nhĩpêx jakamã te mẽ ate atỳx ri tanhmã axàpkur to ho mẽ akrĩ pyrãk. Jao te mẽ axàpkur xà hã mẽõ kamã pure pumunh nê nê hanhir nê rênh tă mãânên kamã kên rax pumunh tă nê hanhir nê rênh kêt rãhã hkur pyrãk. Jao Tĩrtũm kapêr o hpỳnhre nê hkôt amnhĩ nhĩpêx no piitã hkôt amnhĩ nhĩpêx kêt nê. Pêr mẽ ajamxpêr kêt tă na ka htem atỳx mẽ ahkre ho ri apa.

²⁵—Hêxta waa nê. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nê. Mẽ ate mẽ no kupyw xwỳnh na ka mẽ. Nã mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tă mex ã harênh nê kamã apkur pyrãk o na ka mẽ. Jao ãm mẽ akrãhkã rũm pix mã mẽ amex. Nê mẽ noo mã te mẽ amex pyrãk no mẽ anhõxãhkre kaxwỳnh kãm mẽ ajamxpêrja mex kêt. Mẽ akapêr prãm nê mẽ axãhkurê nê mẽ anhõxỳy. ²⁶ Mẽ ajamxpêr mex kêt kênã. Kwa kêr ka mẽ tãm ajamxpêr o tãm akwỳjê nhĩpêx o ri apa. Nê axãmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nê amnhĩm mẽ amex ã mẽ ajarê. No na ka htem amã mẽ amnhĩ to mex prãm xaj ãm tee ri amnhĩ kuhõnh japjê kaprỳ.

²⁷—Hêxta waa nê. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre ho mẽ apa xwỳnhjaja kot kaj mẽ amex kêt nê. Te mẽ ate mẽ htykjê jagiênh xà pyrãk. Na htem mẽ hagiênh xà ho mex o pa nom kamã mẽ hi nê ahpunuj pix. ²⁸ Ja pyrã nê ã mẽ ate amnhĩ nhĩpêx anhỹr. Kapôt rũm mẽ anhĩja na mex. Te mẽ ate mẽ ho mex o apa pyrãk o na ka htem amnhĩ nhĩpêx nhũm mẽ ãm akrãhkã pix pumu nom ãm mẽ akrã hi kaxwỳnh kãm mẽ ajamxpêr punuj rãhã hã mẽ apumunh kêt nê. Mẽ ate tanhmã mẽ no kupyw to pix kukamã ajamxpêr jakamã te mẽ ate mẽ htykjê jagiênh xà pyrãk.

²⁹⁻³⁰—Hêxta waa nê. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nê. Mẽ ate mẽ no kupyw xwỳnh na ka mẽ. Na ka htem ma mẽ hã pika hwỳr apa nê Tĩrtũm nhỹ hã kapêr o mẽ pa xwỳnhjê hã pika ho mex. Nê mẽ kot amnhĩ to mex xwỳnhjê hã pika ho mex. Nê axpên mã mẽ harênh o: “Hêxta waa nê. Na pre amnepêm mẽ pakukamã mẽ panhĩgêjtaja Tĩrtũm nhỹ hã mẽ kãm kapêr xwỳnhjê homnuj nê mẽ kupa. No kêt mẽ papajaja mẽ kamã ri papa ronhỹx pu prem mẽ urãk nê ã mẽ hipêx anhỹr kêt nê.” Anhỹr o axpên mã mẽ hkapri ho ri apa. ³¹⁻³² Nom ãm amnhĩ to axêx. Mẽ ate ã amnhĩ nhĩpêx anhỹr o apa kênã. ã mẽ ate amnhĩ nhĩpêx anhỹr jao ra apê mẽ hkanrêhã mẽ hkra kumrêx ã amnhĩ to amnhĩrit mex o apa. ³³ Te mẽ ate kagã xoprê kot mẽ hkamnhar nê mẽ homnuj tỳx pyrãk jakamã koja Tĩrtũm nhỹrmã ma mẽ kot amnhĩ xà htỳx kamã hamak tũm xàta wỳr mẽ ajano ka mẽ ma hwỳr ajapêx. Hãmri nê tee ri amã ajapõx prãm kaprỳ nê rĩ amnhĩ pumu.

³⁴—Kot paj nhỹrmã ma mẽ awỳr inhỹ hã ixkapêr jarênh o mẽ pa xwỳnh kwỳ rê. Nê inhỹ hã mẽ àhpumunh xwỳnh kwỳ rê. Nê ixkapêr o mẽ ahkre xwỳnh kwỳ rê. Nom kot kaj mẽ ãm mẽ kapêr ma nê apê mẽ hprãm nõkati nê tanhmã mẽ homnuj tỳx to ho apa. Nê ixpê mẽ hkwyjê hpar o apa. Jao pi kahpa hã mẽ hanhõr o mẽ hkwyjê hpa. Nhũm

mê hkwyjaja Tirtûm kapêr o mê ahkre xà hã ixkre kamã mê ahkre ho hkrĩ ka mê omu nê mê unê nê ixkreja kamã mê htak. Hãmri nhũm mê apymaj nhãm ahpÿnhã krĩ hkwy hwÿr hprôt nê mra. ã kot kaj mê inhÿ hã ixkapêr jarênh xwÿnhjê nhÿpêx anhÿr o apa.³⁵⁻³⁶ Na prem ra mê himex rax nê. Amnepê m panhĩ kator krax rûm Atãw kra Apewta na pre Tirtûm nhÿ hã kapêr o pa nhũm htôja kãm mar prãm kêt nê kupĩ. Tã nhũm Tirtûm axte mê hwÿr ÿ hã kapêr o mê pa xwÿnh kwÿjê rê nhũm prem mã mê ho anê nê mê hkwyjê nhĩmex. Nhũm pre xatã mê hwÿr mê hkwyjê rê nhũm mê xatã mê kupa. Apew rûm Parakis kra Jakaris wÿr na prem mê himex rûnh nê. Hãmri nhũm prem Tirtûm mã amnhĩ jarênh xà hã ixkre kamã Jakarisja pĩ. Tã mê kajaja mê ate mê urak nê mê amã Tirtûm kapêr mar prãm kêt nê mê urak nê amã Tirtûm nhÿ hã kapêr xwÿnhjê nhĩmex prãm nê. ã mê ate mê anhigêjtê pyrã nê mê hipêx anhÿr mÿrapê koja Tirtûm mê apê mê hkanrêhã mê hkra nê mê htãmnhwÿjaja mê ato hpimràatã tanhmã mê ato htÿx to ka mê amnhĩ xà htÿx kamã ajamak rãhã ho ri apa. Anê.

Jejus kãm Jerujarê nhõ xwÿnhjê japê htÿx ã harênh

Rukre 13.34-35; mããñen Rômãn 11.25-27

³⁷ Hãmri nhũm Jesus te ra kot Jerujarê nhõ xwÿnhjê pumunh nê mê kãm kapêr pyrãk o tanhmã kapêr to ho xa. Nê mê kãm:

—Hêxta waa nê Jerujarê nhõ xwÿnhjaja. Tirtûm kot xatã mê awÿr ÿ hã kapêr jarênh xwÿnhjê rênh nhũm mê kot mê akôt mê amã kapêr jarênh o pa htã ka mê kapêr mar kêt kumrêx. Nê axtem nê kên o mê htak o mê himex o apa. ã na ka htem amnhĩ tomnuj o apa anê. Tã nom arĩ inhmã mê ajamãr o ri ixpa hprãm. Te ho krãhyre kot nore hpro nê ho hikwÿ pyrãk o na pa inhmã mê anhÿpêx prãm nê. Nom mê amã ixprãm nõkati nê mê ate ixkaga kumrêx. ³⁸ Mÿrapê koja Tirtûm mê anhõ krĩ jamãr kêt nê. ³⁹ Kot paj tokyx ty nê mê apiitã mê are nê ma akupÿm api ka mê axte ixpumunh kêt nê. ãm akupÿn ixwÿrk xà hã arĩgrota pix ã koja mê akwÿjaja mê amÿrpê krĩ ja kamã ixpôx ã ixpumu. Hãmri nê mê akurom ixpumu nê hkĩnh tÿx nê. Nê tã ixkôt amnhĩ xunhwÿr kurê kumrêx. Hãmri nê axpên mã ijarênh o:

Ota Tirtûm kot mê pahwÿr mênh xwÿnhnta wrÿ. Nã ãm hãmri na mê pahwÿr wrÿ. Ja mex

o mex.
Koja mê ã axpên mã ijarênh anê. Anê.

24

Jejus kot mê pakukamã mẽmoj jarênh

Makre 13.1-13; Rukre 21.5-19; mããñen Wam Ximotre 4.1-3; Sikũn Ximotre 3.1-9; Apokarip 6.1-17

¹ Tã nhũm Jesus Tirtûm mã amnhĩ jarênh xà hã ixkre rûm kato nê ma tẽ. Pa mê ixte hkôt ixpa ho ixpa xwÿnhjaja kormã ixkreja pumunh o ixkuhê nê kãm harê nê kãm:

—Kwa Pahĩti. Hêxta waa nê. Ixkreja ãm mex kumrêx. Anê.

Hãmri nhũm mê inhmã:

² —Tÿ mex nom koja nhÿrmã mê kãm Tirtûm kurê xwÿnhjaja grãnh pa. Koja arĩ kên õ axkrutre nê axpên mÿnh nê nõr kêt nê. Koja piitã anhrã nê ahpÿnhã ri hikwÿ. Anê.

³ Hãmri pa mê kuma nê tee ri hkukamã ijamaxpêr. Hãmri nhũm Jesus ma tẽ nê hixêtpê Oriwêhti hã api nê hã nhÿ pa mê ma hkôt mra nê mê kot ã ixkre nhÿpêx anhÿrta ã hkukja nê kãm:

—Kwa xà ãm hãmri koja mê ã ixkreta nhÿpêx anê? Kwa mê inhmã aprĩ hã harê. Xà koja mê nhÿrmã ho anê nã? Xà koja mê tokyx ho anê? Nê akupÿn mê ixwÿr awÿrk nhũm mẽmoj piitã hapêxja. Kwa mẽmo koja we wÿj ri tanhmã amnhĩ nhÿpêx to wehe? Anê.

⁴ Hãmri nhũm mê inhmã hprĩ hã tanhmã mẽmoj kot amnhĩ nhÿpêx to hkukamã ujarênh o nhÿ nê mê inhmã:

—Nã nhÿrmã mẽmoj piitã hapêx kaxyw tanhmã amnhĩ nhÿpêx toja kumrêx kot paj mẽ amã harê ka mê inhma. Nã koja mê ohtô nê mê awÿr mra nê hêx rom te pa ixte amnhĩ

nhîpêx pyrâk o amnhî nhîpêx o mē akôt pa. ⁵ Nē mē amā amnhî jarēnh o: “E Tirtūm na pre mē awyr inhmē. Ixpê kaxkwa rūm ixwryk xwynthta na pa.” Anhÿr o mē akôt mē amā amnhî to hêx o pa. Jao ohtô nē mē nokupyr o pa.

⁶ —Nē koja mē nhÿri awry hā axpēn par o pa nē mē atā axpēn par o pa. Nom kêr ka mē harēnh ma nē ri tokyx mēmoj piitā hapêx ā hkamnhîx kêt nē. Kormā mēmoj piitā hapêx xā hā arîgroja kormā. ⁷ Koja mēmoj piitā hapêx kaxyw nhūm ahpÿnhā ri pika piitā hkôt mē pa xwynthjaja pika hō nhō xwynthjê kutā kuhê nē pijapu ho kuhê. Jao ra axpēn par o pa. Hāmri nhūm nhÿri pika hkwy htertēt tÿx kumrêx. Nē mē hpur kām mēōja hapêx nhūm mē kām prām tÿx nē pa. Jakamā nhūm mē ohtô nē prām xāj axkaprā. ⁸ Nom ja kormā mēmoj hapêx kaxyw krax pix na. Te ho mēnijê hō hpijagri kaxyw nē kormā kawax pē ôhy xā pyrâk.

⁹ —Nē koja mē piitā ixkôt mē akamā gryk nē kām mē akurê htÿx o pa. Nē mē awyr mra nē ixtā mē apynê nē mē atomnuj tÿx nē mē apa. ¹⁰ Jakamā koja mē kot ixkôt amnhî xunhwÿr xwynth kwÿjaja mē umaj tee ri amnhî kukamā hamaxpēr hāmri nē ixkaga. Nē ixkôt mē kām axpēn tā amÿnê nē axpēn kām gryk o pa. ¹¹ Nhūm nhÿri mē hkwyjaja Tirtūm nhÿ hā kapēr jarēnh xwynth ā amnhî to hêx o pa. Jao mē ohtô nē mē nokupyr o pa. ¹² Koja mē ā amnhî nhîpêx anhÿrja o ra piitā kām axpēn kamā ukapri hkêt o pa. ¹³ Koja mē ā ixtā mē atomnuj o pa anê. Tā nom kêr ka mē amnhî to htÿx nē ixkaga hkêt nē. Mē kot mē apar tā ka mē kaxkwa kamā akupÿm atîr kurê kumrêx.

¹⁴ —Nē kot kaj mē apê ixkwÿjaja ma krî piitā hkôt Tirtūm kapēr o mē ahkre ho apa. Mē kot amnhî tomnuj kaga nē ixkôt amnhî xunhwÿr nhūm Tirtūm kot ja hā mē omunh nē mē ho hkra hā mē kām harēnh o ri mē piitā mē hkôt apa. Kot kaj mē piitā mē kām ijarēnh pa pa rî kormā akupÿn mē awyr wrÿ. Anê.

Mē pahtomnuj tÿx xwynth maati hā harēnh

Makre 13.14-23; Rukre 21.20-24; mǎānēn Sikūn Tesarōn 2.3-4

¹⁵ Nhūm Jesus arî mēmoj kukamā mē inhmā kapēr nē mē inhmā:

—Amnepēm Tirtūm nhÿ hā kapēr xwynth finat Tāniewja na pre tanhmā mē atomnuj tÿx xwynth maatija jarēnh to. Tā koja nhÿrmā ra kot harēnh xā hkôt axtem nē Tirtūm mā amnhî jarēnh xā hā ixkre hwÿr axā nē Tirtūm xām xā kamā xa. Ka mē ja hā omu hāmri nē mē kot krî grānh par ā hkamnhîx kurê kumrêx. ¹⁶ Koja ā amnhî nhîpêx anê ka mē amÿm amnhî wÿr mē omu hāmri nē ajapôj nē ma aprôt nē amrar kurê kumrêx. Mē apê jar pika pē Jutej kamā mē apa xwynthjaja kaj mē omu hāmri nē mē kot mē apar pymaj aprôt nē ma amrar kurê kumrêx. ¹⁷ Rÿ ka mē anhōrkwy hkrāmnēnh o akrî japêr nē amÿm amnhî wÿr mē omu nē akukrêx wÿr axār nē hō hpyr mā ajamaxpēr kêt nē. Ām wrÿ nē aprôt nē ma atēm kurê kumrêx. ¹⁸ Rÿ ka mē apur kām axāpēnh o apa japêr nē amÿm mē omu hāmri nē akupÿm anhōrkwy hwÿr axê jamÿnh kaxyw atēm kêt nē. Ām mē umaj aprôt nē ma atēm kurê kumrêx.

¹⁹ —No mē htujarô nē mē hkra karàre xwynthjaja koja mē kêp mēmoj omnuj tÿx nē. Tanhmā kot mē amnhî to nē mē umaj hprôt tÿx? Nā pika ja kamā koja mē mex kêt o mex kêt. Mē kot amnhî tomnuj mÿrapê koja Tirtūm tanhmā mē homnuj tÿx to.

²⁰ —Nē kwa kêr ka mē amnhî to Tirtūm wÿr kê ā mē kot amnhî nhîpêx anhÿr xā hā arîgroja na wrÿk pē ā amnhî nhîpêx anhÿr kêt nē. Rÿ mē hkôt xā hā arîgro pē sap ā ā amnhî nhîpêx anhÿr kêt nē.

²¹ —Nē ā mē kot amnhî nhîpêx anhÿr ā arîgroja ā koja mē piitā amnhî xā htÿx kām hamak tÿx kumrêx. Amnepēm Tirtūm kot pika ho kator krax rūm amnē mē pa xwynthjaja kormā aa kot ā amnhî xā htÿx kamā hamak anhÿr kêt tā arîgroja ā koja mē amnhî xā htÿx kumrêx kamā ama. Hāmri nē axte pika ja kamā ā amnhî xā htÿx kumrêx kamā hamak anhÿr kêt nē. ²² Kop apu Tirtūm kot mē kot amnhî xā htÿx kamā hamak xā hā arîgro hkwy ho gri hkêt ronhÿx ka mē apiitā apikaprar pa. Ja pymaj koja mē amā ho gri. Kot ra amnhî kaxyw mē arēnh xwynthjê japê xāj mē amā ho gri.

²³⁻²⁴ —Tã ã mëmoj kot amnhĩ nhĩpêx anhÿr jakamã koja mëmojaja tanhmã më amã ixto hêx to nê më amã: “Ota ra Kris akupÿn wrÿ. Kwa më hwÿr mra nê omu.” Anê. Rÿ më amã: “Krisja krĩ mÿj kamã na raa. Kwa më ma hwÿr mra nê omu.” Anhÿr o më amã ixto hêx o pa. Rÿ më awÿr mra nê më amã amnhĩ to hêx nê më amã: “E. Ot pa ixpê Kris ã më awÿr wrÿ. Tĩrtũm na më awÿr inhmê pa wrÿ.” Anê. Rÿ më amã: “E ixpê Tĩrtũm nhÿ hã ixkapêr xwÿnh na pa më awÿr mōn pōj.” Anhÿr o më amã amnhĩ to hêx. Hãmri nê më anokupÿr kaxyw më amã aa më kot mëmoj pumunh kêt kwÿ ho anhÿr o pa. Tĩrtũm kot amnhĩ kôt më arênh xwÿnhjaja kãm më ate ja hã më omunh nê më gryk ã ixkaga hprãm xàj koja më ã më anoo mã amnhĩ nhĩpêx anhÿr o pa. Nom ãm ã amnhĩ nhĩpêx anhÿr kapÿrÿ ka më ixkaga hkêt nê.

²⁵ —E kwa më inhmar tÿx nê. Na pa ra ixprĩ hã ã më kot amnhĩ nhĩpêx anhÿrja kukamã ã më amã mëmoj jarênh anê. Tã kêr ka më amnhĩ nê ã më kot amnhĩ to hêx anhÿr o më pa xwÿnhjê pumunh mex o apa nê axkãm ajamak rom. ²⁶ Rÿ koja më tanhmã më amã ixto hêx to nê më amã: “Ota Tĩrtũm kot më pahwÿr mēnh xwÿnhhta kapôt ã mōn pōj. E më tokÿx ma hwÿr mra nê omu.” Anhÿr o më amã ijarê ka më ama nê ãm më ama nê hwÿr amrar kêt nê. Rÿ nhũm më amã: “Ota hitom kãm xa. E më mamrĩ hwÿr agjê nê omu.” Anê no ka më ãm më ama nê ãm më ama nê hwÿr agjêx kêt nê. ²⁷ Kot paj nhÿrmã akupÿn më awÿr ixwrÿk kaxyw hãmri nê ixpimxur kãm ixwrÿk kêt nê. Koja pika piitã hkôt më pa xwÿnhjaja anhĩpê ixwrÿk kãm ixpumu. Te më piitã anhĩpê më kot na haxênh pumunh pyrãk o kot kaj më anhĩpê apiitã ixpumu. ²⁸ Te nhÿri mëmoj kro nê nōr nhũm nhōnhti kot omunh nê hã htor nê hpinhpanh nhũm më piitã hã omunh pyrãk o kot paj amnhĩ nhĩpêx. Anê.

Jejus akupÿn wrÿk xwÿj ri mëmoj kukamã harênh

Makre 13.24-31; Rukre 21.25-33; mãänēn Wam Tesarōn 4.16-17

²⁹ Nhũm Jejus arĩ më ixte hkôt ixpa ho ixpa xwÿnhjê mã kapêr nê më inhmã:

—Nê kot paj akupÿn më awÿr inhnojarêth nhũm rĩ Tĩrtũm kaxkwa kamã tanhmã mëmoj nhĩpêx to. Kapêr ã kagà htũm kot tanhmã ja kukamã harênh to nê harênh kot: Koja Tĩrtũm kaxkwa ho àk nhũm kanhêti piitã rôrôk pa nhũm myyti ahtÿk nhũm mytwrÿre urãk nê axte hpôk kêt nê. Anê.

³⁰ Koja ã mëmoj amnhĩ nhĩpêx anhÿr pa hãmri pa kaxkwa hã më amã mëmoj nhō. Hãmri nhũm pika piitã hkôt ri më pa xwÿnhjaja piitã omu nê tee ri amnhĩ kukamã hamaxpêr o hkaprĩ nê mÿr rax kumrêx. No më kajaja kot kaj më omu hãmri nê akupÿn më awÿr ixwrÿk nê më ato amnhĩptàr mã ajamaxpêr kurê kumrêx. Kot paj kakrã kamã hirã htÿx kãm akupÿn ixihÿtÿx kãm më awÿr wrÿ. ³¹ Hãmri nê Tĩrtũm kapêr o më wrÿk xwÿnh maati mã anê nhũm pifti kakô hãmri nhũm hkwyjaja kuma nê ma më awÿr pika piitã hkôt anhgrà nê ma mra nê inhmã më ato akuprō. Ixte amnhĩ kaxyw më axunhwÿr xwÿnhjê o akuprō nê man akupÿn ixwrÿ më ato hapêx. Anê.

Jejus kot mëmo pàr o ejêp jarênh

Makre 13.28-31; Rukre 21.29-33

³² Nhũm Jejus arĩ më inhmã kapêr nê më inhmã:

—E ka më pĩ hpàr mÿj pumu. Na hte mëmo mytwrÿ hã rã nhũm më omu nê ô hkukamã hamaxpêr kurê kumrêx. ³³ Ja pyrã nê koja ã ixte mëmoj jarênh anhÿr xwÿnhja amnhĩ nhĩpêx par më ka më omu nê akupÿn më awÿr ixwrÿk mã ajamaxpêr kurê kumrêx. Kot paj te ra më anhōrkwy kapem ixãm pyrãk o amnhĩ nhĩpêx. ³⁴ Nom akupÿn ixwrÿk kêt ri koja ã më kot mëmoj kot amnhĩ nhĩpêx anhÿr pumunh xwÿnhjaja kormã piitã hÿk kêt ri pa akupÿn wrÿ.

³⁵ —Nê koja nhÿrmã pika nê kaxkwa wa hapêx pa. Tã no ãm ixkapêrja koja wa urãk nê aa hapêx kêt nê. Koja ãm rãhã ho rãhã. Kot paj aa ihkê ho tanhmã mēnh to hkêt nê. Anê.

Më pahte akupÿn Jejus wrÿk xà hã arĩgro pumunh kêt ã më pajarênh

Makre 13.32-37; Rukre 12.37, 17.26-30, 17.34-36; mãänēn Wam Tesarōn 5.2

³⁶ Nhũm Jejus arĩ mẽ inhmã kapêr nê mẽ inhmã:

—Nê ixte akupÿn mẽ awÿr ixwÿrk xà hã arĩgroja mẽ ate omunh kêt. Nê kaxkwa kamã Tĩrtũm kapêr o mẽ wÿrk xwÿnhjaja haxwÿja kot ja pumunh kêt. Nê ijaxwÿja ixpê Tĩrtũm Kra htã ixte ja hã amnhĩ pumunh kêt. ãm inhõ Papaj pix na kot ja pumunh.

³⁷ —Nê kot paj nhÿrmã man akupÿn mẽ awÿr wÿr. Akupÿn mẽ awÿr ixwÿrk xà hã arĩgrota ã koja mẽ htÿx ri amnhĩ tomnuj o pa. Te amnepê m Noehti kormã htĩr ri mẽ pa xwÿnhjaja kot htÿx ri amnhĩ tomnuj o pata pyrãk. ³⁸ Na pre htem amnhĩ kaxyw Tĩrtũm mã hamaxpêr kêt nê. ãm jar mẽ kot amnhĩ nhĩpêx pix kukamã hamaxpêr kêt pix mã amnhĩ nhĩpêx o pa. Rôm nhũm Noehti ja gô htãm pymaj pãr rax nhĩpêxta mã axà. ³⁹ Nhũm mẽ ja hã omu nê ãm omu nê tanhmã ri amnhĩ kukamã hamaxpêr to hkêt nê. Hãmri nhũm naja mẽ haêr pê wÿr nê wÿrk rax o mẽ hanhir pa. Tã akupÿn ixwÿrk xà hã arĩgroja ã koja mẽ htÿx ri ã amnhĩ nhĩpêx anhÿr o paja o pa mẽ haêr pê naja pyrã nê akupÿn wÿr.

⁴⁰ —E kot paj mẽ amã nhÿrmã akupÿn ixwÿrk nê tanhmã mẽ anhĩpêx to hã amnhĩ jarê. Te kot ja pyrãk. Koja mẽmyjê hõ wa hamêxkrut nê hpur kãm àpênh o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr ra kot ixkôt amnhĩ xãm xwÿnhhta o api nhũm kot ixkôt amnhĩ xãm kêt xwÿnhhta hpur kãm ahte arĩ xa. Hãmri nê tee ri hkrãmnhwÿ japêr rĩt o xa. ⁴¹ Rÿ nhũm mẽnijê wa hamêxkrut nê harõj kahuk o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr kot ixkôt amnhĩ xãm xwÿnhhta ho api nhũm kot ixkôt amnhĩ xãm kêt xwÿnhhta tee ri hkrãmnhwÿ japêr rĩt o xa hãmri nê hamaxpêr rax kumrêx. Kot paj nhÿrmã akupÿn wÿr nê ã mẽ anhĩpêx anê. ⁴² Tã mẽ ate akupÿn ixpôx xà hã arĩgro pumunh kêt jakamã kwa kêr ka mẽ ijamãr rãhã ho ri apa. ⁴³ Na htem htÿx ri nhÿri tanhmã amnhĩ nhĩpêx to ho pa nhũm mẽ kêp àhkĩnh xwÿnh mẽ òrkwÿ hwÿr agjê nê mẽ kêp ahkĩ. ⁴⁴ Tã mẽ ate akupÿn ixwÿrk xà hã arĩgro pumunh kêt jakamã kwa kêr ka mẽ ixwakre kamã te mẽ apê mẽ òrkwÿ nhõ dõn kot amnhĩ nhĩpêx pyrã nê atÿx ri tanhmã amnhĩ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhĩ nhĩpêx rãhã ho ri apa. Anê.

Mẽ kãm mẽ àpênh mex xwÿnhjê jarênh

Rukre 12.41-48

⁴⁵ Nhũm Jejus arĩ mẽ inhmã kapêr nê mẽ inhmã:

—E koja mẽ kãm àpênh xwÿnhjê hõ àpênh mex o pa hãmri nhũm ò patrãw àpênh ã omu hãmri nê ma nhÿhÿm mõi kaxyw nê ìhkram mẽmoj piitã haxàr pa nê kãm: “E kêr ka ixwakre kamã inhmã inhõrkwÿ tãnopxar mex nê. Nê inhmã mẽ àpênh xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri nê kato nê ma nhÿhÿm mõi. ⁴⁶ Hãmri nhũm kot kãm àpênh mex xwÿnhjaja wakre kamã kãm àpênh mex o pa. Jakamã nhũm ò patrãw akupÿn hpôx o mõi nhũm amnhĩ wÿr harênh ma nê hkĩnh nê. Nê tee ri amnhĩ kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhĩ kukamã hamaxpêr to hkêt nê. ⁴⁷ Jakamã nhũm ò patrãwja akupÿn põi nê kot kãm àpênh mex ã omu nê hkĩnh nê. Hãmri nê kot kãm ò mẽmoj piitã hamãr o pa kaxyw ìhkram haxàr pa. ⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nà koja tokyx akupÿn mõi kêt nê.” Anhÿr o hkamnhĩx. ⁴⁹ Hãmri nê wakre kamã kãm mẽ àpênh xwÿnhjê htak nê pipãnh pix o pa. Nê kãm kagôxÿhti xành xwÿnhjê kêt pix mã pa. ⁵⁰ Hãmri nhũm ò patrãwja haêr pê akupÿn põi nê tee ri ja hã omu. ⁵¹ Hãmri nê kamã gryk tÿx nê tanhmã homnuj htÿx to nê kãm mẽ àpênh punuj xwÿnhjê mẽ mẽ ho hpimràatã amnhĩ nê mẽ kator pa. Hãmri nê mẽ kot kapêr kwÿm amnhĩ nhĩpêx xwÿnhjê mẽ mẽ ho hpimràatã tanhmã mẽ homnuj to nê amnhĩ nê mẽ kator. Hãmri nhũm mẽ tee ri amnhĩ kukamã hamaxpêr nê mur nê tee ri amnhĩ nhĩpêx. Tã kêr ka mẽ ixwakre kamã ho mẽ urãk kêt nê. Mẽ kurom ixwakre kamã ixkapêr kêt amnhĩ nhĩpêx mex rãhã ho ri apa. Anê.

25

Kormã mē mjên kêt xwýnhjê ho 10 nê mē harênh

Wam Tesarôn 5.1-3

¹ Nhũm Jejus arĩ mē inhmã kapêr nê mē inhmã:

—Nê mē ate Tirtũm kôt amnhĩ nhĩpêx o mē apa xwýnhjaja kêr ka mē akupýn amnhĩ wýr ixkãm ajamak rom nê ri apa. Nom mē kêp Tirtũm prãm nõkati xwýnhjaja koja mē akĩnhã ãm htýx tanhmã amnhĩ to pix kukamã hamaxpêr o pa. Te kormã mē mjên kêt xwýnhjaja kot amnhĩ nhĩpêxta pyrãk. E pa mē amã tanhmã mē harênh to ka mē inhma. Koja kormã mē mjên kêt xwýnh kêp 10jaja ma hkrãmnhwý mjên mã xwýnh kutã pry hã mra. Amnhĩ kôt kanê jamý nê o mra nê kutêp pry nhĩkrep hkrĩ. ²⁻⁴ Nhũm mē kêp 5jaja hkwyjê rom amnhĩ kukamã hamaxpêr mex nê kanê kaxyw amnhĩ kôt orti hkwy ho mō. No nhũm mē kêp 5 nê mē hkĩnhã ãm htýx kanê pix jamý nê o mra. ⁵ Hãmri nê mē mjên mã xwýnhja kutêp axpên mã kapêr o hkrĩ. Nhũm tokyx htêm kêt nhũm mē kutêp hkrĩ nê gaa nê ra õtxwa nê gaa nê hikwý nê ra õt pa.

⁶ —Tã nhũm kôt ã kamãt hãmri nhũm mjên mã xwýnhhta hpõx o tẽ. Hãmri nhũm kot hkukamã harênh xwýnhja mē õt o mē hikwý xwýnhjê mã amýra nê mē kãm: “Kwa mē hãmri. Ota mjên mã xwýnhhta tẽ. Mē tokyx kãnhmã akrĩ pu mē kutã mra.” Anẽ. ⁷ Hãmri nhũm mē hkrã hapôj nê kanê hpõk. ⁸ Nom nhũm mē hkwyjê hkĩnhã õ kanê kaxyw orti ho pa hkêt xwýnhjaja ra mē kêp mē kanêja hkapyr hpa nhũm mē tee ri kot hpõk kaxyw. Hãmri nê orti hkwy hã hkwyjê hwý nê mē kãm: “Xê mē inhmã orti ho inhõ kanê go.” Anẽ. ⁹ Nom nhũm mē kêp nê nê mē kãm: “Ma mē inhõ kanê kamã orti grire kênã kot pa kêt mē amã ho go. Xê mē tokyx ma mra nê nhýri amnhĩm hkwy japró mē.” Anẽ. ¹⁰ Hãmri nhũm mē tee ri mē kuma nê ma amnhĩm hkwy japrór mã ma mra.

—Rôm nhũm mjên mã xwýnhhta mē hãnh tẽ nhũm kanê kamã arĩ mē orti xwýnhjaja omu nê hã jêt kurê kumrêx. Hãmri nê ma hkôt mõn mē pikuprõnh xã hã ixkreja wýr wa hã hkĩnh nê apkur kaxyw gjêx pa nhũm mē hã kahê. Mē gjêx xã hã oreja ra hwýr hpõx jakamã nhũm mē hã kahê.

¹¹ —Tã nhũm ma mē kot orti japrór mã mrrar xwýnhjaja hãmri amnhĩ to hapu nê mra nê tee ri mē hã hakwakre kupê nê htatak nê tee ri mē kãm akir nê mē kãm: “Xê mē inhmã kahê xã mē pa mē awýr agjê.” Anẽ. ¹² Hãmri nhũm hprõ mã xwýnhhta mē kuma nê mē kãm: “Tk. Nã ixte mē apumunhre hã kot pa kêt mē amã kahê xã mē. Kwa mē ma akupým mra.” Anẽ. ã mē ujarênh kot anhýr. Anẽ.

¹³ Nhũm pre ã Jejus mē inhmã ujarênh anẽ. Hãmri nê mē inhmã:

—E kêr ka mē te kot amnhĩ kôt orti hkwy ho mõr xwýnhjaja kot amnhĩ nhĩpêx pyrãk. Mē ate akupýn ixwryk xã hã arĩgro pumunh kêt jakamã kêr ka mē apkati mē ixkamã ajamak rãhã ho apa. Anẽ.

Mē kãm mē àpênh xwýnhjê jarênh

Rukre 19.11-27

¹⁴ Nhũm Jejus arĩ mē inhmã kapêr nê mē inhmã:

—E kêr ka mē ixwakre kamã inhmã tanhmã amnhĩ nhĩpêx mex to ho ri apa pa hpãnhã mē amã amnhĩrer mex nê. Mē ate tanhmã inhmã amnhĩ nhĩpêx to ho apa xã hkôt kot paj mē amã amnhĩre. Te mēhõ my kot kãm mē àpênh xwýnhjê nhĩpêx pyrãk. Koja nhýhým nojarêt nê kãm mē àpênh xwýnhjê mã hikukrêx piitã hkaga hpa. Õrkwy nê hpur nê hkrit. ãm mēmoj piitã mē kot wakre kamã kãm hamãr o pa kaxyw mē kãm hkaga hpa. ¹⁵ Hãmri nê ahpýnhã mē kãm kãxpore hkwy gõ. Mē kot kutêp kãm tanhmã ho rũnh to kaxyw ahpýnhã mē kãm õr pa. Kot kãxpore pumunh mex xwýnhja mã nhũm ho 5.000 nê kugõ. Nê kot hkôt kax pê omunh xwýnhja mã nhũm ho 2.000 nê kugõ. Nê kormã kot omunh týx kêt xwýnhja mã nhũm ãm ho 1.000 pix nê kugõ. Hãmri nê mē kãm amnhĩ jarê nê ma nhýhým mō. ¹⁶ Hãmri nhũm kot ho 5.000 nê hamýnh xwýnhja kãxporeta py nê ma o mõr kurê kumrêx nê tanhmã ho àpênh to ho mõr kãm ra hipy axte ho 5.000 nê kumẽ. ¹⁷ Nhũm kot ho 2.000 nê hamýnh xwýnhja mããnhen tanhmã ho àpênh to ho mõr

kamã ra hipy axte ho 2.000 nê kumê. ¹⁸ Nom nhũm kot ho 1.000 pix nê hp̄yr xw̄ynhja wa hk̄inh ã axtem nê ma o tẽ nê kãm kakw̄y nê kamã haxà nê hity hpa nê ma akup̄ym tẽ.

¹⁹ —Tã nhũm mē õ patrãwja akup̄yn mōn pōj nê mē kãm: “E mē amnē ixw̄yr mra nê ixte mē amã kàxpore ho ixpigrãnh xw̄ynhta jarē. Tanhmã na ka prem ixkutêp inhmã hipêx to?” Anē. ²⁰ Hãmri nhũm kot ho 5.000 nê hp̄yr xw̄ynhta kumrêx hw̄yr tẽ nê kãm: “E ota akàxporeta. Ate inhmã ho 5.000 pix nê õr tã pa amã ho rax nê amã hipy axte ho 5.000 nê kumê nhũm ho axkamur nê ra ho 10.000. Tã ota.” Anh̄yr o kãm kapêr hãmri nê kãm kugō ²¹ nhũm amnhĩm ham̄y nê omu nê hk̄inh nê. Hãmri nê kãm: “Nà ãm hãmri na ka inhmã ho anē. Ixte amã ho 5.000 pix nê õr tã ka ra inhmã ho rax jakamã kot kaj apê inhmã mē àpênh xw̄ynhjê hkrãhtũm. E amnē ixw̄yr axà pu mē apku nê pahk̄inh.” Anē.

²² —Hãmri nhũm hpãnhã kot ho 2.000 nê hp̄yr xw̄ynhta hw̄yr tẽ nê õ patrãwta mã kãm: “E ota akàxporeta. Ate inhmã ho 2.000 pix nê õr tã pa amã ho rax nê amã hipy axte ho 2.000 nê kumê. Tã ota.” Anē.

²³ Hãmri nhũm kuma nê amnhĩm ham̄y nê omu nê hk̄inh nê. Hãmri nê kãm: “Nà ãm hãmri na ka ã inhmã ho rax anē. Ixte amã ho 2.000 pix nê õr tã ka inhmã ho rax jakamã kot kaj apê inhmã mē àpênh xw̄ynhjê hkrãhtũm. E amnē ajaxw̄yja ixw̄yr axà pu mē apku nê pahk̄inh.” Anē.

²⁴ —Tã nhũm kot ho 1.000 pix nê hp̄yr xw̄ynhta hapu hã wa hkôt tẽ. Hãmri nê õ patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax nê anhõ ho rax pix kukamã ajamaxpêr o ri apa. Nom mē pajaja mē ixàpênh rax pix kukwak ri na ka hte akàxpore rax nê apa. ²⁵ Jakamã na pa inhmã apyma nê. Nê akàxporeta py nê ma o tẽ nê kaxyw kre nê kamã haxà. Tã ka akup̄yn mōn pōj pa ajarênh ma hãmri nê hkapa nê man akup̄yn amã o tẽ. Tã ota anhõ 1.000ta.” Anē. ²⁶⁻²⁷ Hãmri nhũm tee ri kuma nê kãm: “Tk. Kwa amã ixpyma nê ate ixpumunh mex anh̄yr tã na ka ixte amã kàxpore nhõrta pyr nê ma ho atêm. Nê mē kot mē kêp kàxpore jam̄ynh o kuhê xà kamã mē kãm õr nhũm mē ixkutêp tanhmã inhmã ho rax to hkêt nê? Pêr ãm amã kaga nê ate amnhĩ tomnu pix o ri apa xw̄ynh.” Anē. ²⁸⁻³⁰ Hãmri nê kêp kàxporeta py nê nhãm jam kugō nê kãm: “E am̄y nê o tẽ nê kot inhmã ho 10.000 nê õr xw̄ynhta mã agō. Hãmri nê jahti pynê nê ma o tẽ nê kamàt kô kamã amē. Apênh mexti hã. Koja tee am̄yra nê amnhĩ xà ht̄yx kamã hamak xaj tee ri amnhĩ nham o axpên kamnhar t̄yx kapr̄y nê rĩ amnhĩ pumu.” Anh̄yr o kãm kapêr nhũm kuma nê hpa hã kupy nê ma o tẽ. Hãmri nhũm mē õ patrãwja mē àpênh xw̄ynhjê mã kãm: “E mē ate ixwakre kamã mē axàpênh mex xw̄ynhjaja kot paj ã mē ato mex rax anē ka mē ak̄inh nê. Nom mē kot inhmã mē àpênh mex kêt xw̄ynhjaja kot paj mē kêp mēõ mēmojta jam̄y nê nhãm mēhõm kugō nhũm hkapr̄i nê.” Anē. ã mē ujarênh kot anh̄yr. Anē.

Jejus kot nh̄yrmã mē piitã tanhmã mē harênh to hã harênh

Matêwre 13.35-43, 13.47-50; mããnên Apokarip 20.11-15

³¹ Nhũm Jejus arĩ mē inhmã kapêr nê mē inhmã:

—Nê kot paj nh̄yrmã akup̄yn mē aw̄yr wr̄y nhũm Tirtũm kapêr o mē wr̄yk xw̄ynh piitã man ixkôt wr̄y. Kot paj wr̄y nê ixpê pahi maati hã ixkr̄i xà maati kamã inhmex nê nh̄y. ³²⁻³³ Hãmri nê Tirtũm kapêr o mē wr̄yk xw̄ynhjê mã anē nhũm mē ma kr̄i piitã hkôt mē apiitã mē ato pikuprõnh pa nê akup̄yn ixw̄yr mē ato hapêx. Pa mē apumu nê tanhmã mē axunhw̄yr to. Te ôwêhti jam̄ar o pa xw̄ynh kot ôwêhti kaêx ã motre pumunh nê nhãm nê motre xunhw̄yr parta pyrãk. ³⁴ Hãmri nê ixupôk rũm mē ate ixkôt amnhĩ xunhw̄yr xw̄ynhjê mã ixkapêr nê mē amã: “E mē kajaja kot kaj mē amex kumrêx nê ri apa ho apa. Amnepêm kormã mēmoj piitã hkêt ri na pa pre Inhípêxã mē wa mē akukamã tanhmã ijamaxpêr to nê mē amã mēmoj mex xunhw̄yr rũnh nê. ³⁵ Tã ka prem ajapôj hãmri nê ixkôt amnhĩ xunhw̄y nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukapr̄i nê inhmã mēmoj gō pa kuku.

Nê na pa pre inhmã kôr nê ixpa ka prem ja hã ixpumu nê inhmã gô pa ho ixkô nê akupÿm ixihtÿx.

Nê aa mē ate ixpumunh kêt tã ka prem nhÿri ixpumu nê amnhĩ nhõrkwÿ hwÿr ixwÿ.

³⁶ Nê na pa pre ixê pynajti nê ri ixpa ka prem ja hã ixpumu nê inhmã axê gô pa haxà nê ri hã ixpa.

Nê na pa pre ixà nê inhikwÿ ka prem ixwÿr mra nê ixkane nê tanhmã ixto mex to pa akupÿm inhmex.

Nhũm prem ijaxà pa mē hagjênh xà kamã ixkrĩ ka prem ixwÿr mra nê tanhmã ixto mex to.

Ã mē ate ixto mex anhÿr o ri apa jakamã nhũm inhõ Papajja ixtã mē apumu. Tã koja ixtã mē ato mex rax nê.” Anê.

³⁷ —Kot paj ã mē ate tãm amnhĩ nhĩpêx xwÿnhjê mã ixkapêr anê. Hãmri ka mē tee ri inhma nê amnhĩ tã ixkukja nê inhmã: “Kwa xà mē pajaja na pa prem ã ato mex anê? Nà mē ixte ã anhĩpêx anhÿr kãm amnhĩ pumunh kêt tã na ka ã mē ijarênh anê. Kwa nhÿri na ka pre amã prãm nê apa pa prem apumu nê amã mēmoj gô ka aku? Nê nhÿri na ka pre amã kôr nê apa pa prem amã gô hkwÿ ka ho ixkô? ³⁸ Nê nhÿri na pa prem apumu nê amnhĩ nhõrkwÿ hwÿr awÿ? Rÿ ka pre axê pynajti nê apa pa prem amã inhĩnôhkà gô ka hagiê? ³⁹ Nê nhÿri na ka pre axà nê anhikwÿ pa prem apumu nê akane? Nê nhÿri na prem ajaxà pa mē hagjênh xàja wÿr mra nê kamã tanhmã ato mex to? Nà mē pa hkêt.” Anhÿr o amnhĩ tã ixkukja. ⁴⁰ Hãmri pa mē amã: “Nà mē kêp amrakati xwÿnhjaja na pre htem pa pyræk. Tã ka prem mē kamã axukapri hã tanhmã mē kutã anojarêt to ho ri apa jao te pa tanhmã ixto mex to ho apa pyræk. ãm hãmri na ka prem ã mē ho mex anhÿr o ri apa.” Anê. Kot paj ã mē ate amnhĩ to mex xwÿnhjê mã ixkapêr anê.

⁴¹ —Hãmri nê hpãnhã apke rũm mē kot ixkôt amnhĩ xunhwÿr kêt xwÿnhjê mã tanhmã ixkapêr to nê mē kãm: “No mē kajaja kot paj ixupôk rũm mē unhwÿr xwÿnhtajê hkĩnhã mē ato mex kêt nê. Amnepê m na pre Tĩrtũmja Satanasti mē mē kot tanhmã kãm amnhĩ nhĩpêx to ho mē pa xwÿnhjê mē mē ho hpimràatã mē kaxyw kuwy rax kumrêxja nhĩpêx. Mē kot amnhĩ tomnuj tÿx mÿrapê nhÿrmã kamã amnhĩ xà htÿx kamã hamak rãhã nê pa ho pa kaxyw. Tã kot kaj mē ajaxwÿja ma mē hkôt hwÿr ajapêx. Mē apê Satanasti hkôt mē ate amnhĩ nhĩpêx o apa xwÿnh jakamã kot kaj mē uràn ma hwÿr ajapêx pa. ⁴² Aa mē ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mēmoj nhõr kêt nê. Nê inhmã kôr nê ixpa hã ixpumu nom inhmã gô hkwÿ hkêt nê. ⁴³ Nê nhÿri ahte ixpa hã ixpumu nom amnhĩ nhõrkwÿ hwÿr ixwÿr kêt nê. Nê ixê pynajre nê ixpa hã ixpumu nom inhmã axê nhõr kêt nê. Nê ixà nê inhikwÿ hã ixpumu nom ixkane hkêt nê. Nê mē kot ijaxàr nhũm arĩ ixkrĩ hã ixpumu nom ixwÿr amrar nê tanhmã ixto mex to hkêt nê. ã mē ate inhĩpêx anhÿr o apa jakamã e mē ma kuwy hwÿr apa kurê kumrêx.” Anê. Kot paj ã mē kãm ixkapêr anê. ⁴⁴ Hãmri nhũm mē tee ri inhma nê amnhĩ tã ixkukja nê inhmã: “Kwa nà ã mē ijarênh anhÿr kêt nê. Aa mē ixte ã anhĩpêx anhÿre hã. Nhÿri na pa prem tanhmã akute hã apumu? Nà aa mē ixte nhÿri ã ate amnhĩ nhĩpêx anhÿr ã apumunhre hã.” Anê.

⁴⁵ —Koja mē ã inhmã amnhĩ tã aprãr anhÿr kaprÿ. Kot paj mē kãm: “Nà na ka pre htem mē kêp amrakati xwÿnhjê pumu nê ãm mē omunh o ri apa nê mē kamã axukapri hkêt nê. ã mē hipêx anhÿr jao te pa ã inhĩpêx anhÿr pyræk. Jakamã kwa mē tokyx ma kuwy hwÿr ajapêx kurê kumrêx.” Anê. Kot paj ã kuwy hwÿr mē hanor anê. ⁴⁶ Hãmri nê hwÿr mē rênh pa nhũm mē ma hwÿr hapêx nê kamã amnhĩ xà htÿx kãm hamak rãhã nê pa ho pa nê aa kator kêt kumrêx. No kêt mē ate tãm amnhĩ nhĩpêx o mē apa xwÿnhjaja kot kaj mē kurom ma Tĩrtũm mē wa inhõ krĩ hwÿr api nê kamã amex nê atĩr tũm nê apa ho pa. Kot paj ã ahpÿnhã mē apiitã mē anhĩpêx anê. Anê.

Nhũm pre ã Jesus akupÿn wrÿk ã amnhĩ kukamã mē inhmã ujarênh anê. Hãmri nê mē inhmã ujarênh pa.

26

Mê kot Jejus ã àmnênh ã amnhĩ jarênh

Makre 14.1-2; Rukre 22.1-2; Juãw 11.45-53

¹ Tã nhũm Jejus mẽ ixte hkôt ixpa ho ixpa xwýnhjê mã ujarênh pa nê mẽ inhmã:

² —E kot puj mẽ axte pahtã apkati axkrut hãmri nhũm arĩgro pê Pas kato. Jakamã koja mẽ piitã amnepêm Tĩrtũm kot Ejit nhõ xwýnhjê pê mẽ pakukamã mẽ panhĩgêjtjê kator mã hamaxpêr nê hã hkĩnh kaxyw Jerujarê hwýr akuprõ. Kamã koja mẽ ixpynê nê pĩ kahpa hã inhõ nê ixpĩ. Koja mẽ tokyx ã inhĩpêx anê. Anê.

Nhũm pre ã amnhĩ kukamã mẽ inhmã amnhĩ jarênh anê. ³ Rôm nhũm Jerujarê kamã patre krãhtũmjê mẽ Ijaew pigêjtjaja patre maati Kajpasja nhõrkwỹ kamã axpên wýr akuprõ. ⁴⁻⁵ Ra mẽ kãm Jejus pĩr prãm tã mẽ kãm mẽ kot hkôt kapêr mar o pa xwýnhjê pyma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩĩ? Kot puj mẽ pahkĩnh kãm tanhmã ho nhũm mẽ hkĩnh xwýnhjaja hã mẽ pakamã gryk tỳx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhỹr o axpên ma.

Mêhõ ni kot Jejus krã gregrer ã harênh

Makre 14.3-9; Rukre 7.36-50; Juãw 12.1-8

⁶ Tã nhũm Jejus kormã krĩ pê Petãn kamã Simãw nhõrkwỹ kamã apkur o nhỹ. Simãwja na pre hkà kro xàpêr tỳx o pa nhũm Jejus ra arĩgro hõ hã akupỹm hkà ho mex. Hãmri nê akupỹm õ krĩ hwýr pøj nê õrkwỹ hwýr tẽ nê kuri apkur o nhỹ. ⁷ Hãmri nhũm mêhõ nija hpõx ã omu nê hamaxpêr o:

—Ma koja pêr Jejusja pa hã apkati grêre hãmri nê ty. An pa ma hwýr tẽ nê mêhkuxwa xà ho hkuxwa.

Anê hãmri nê kên jaka ho kàx kãm mêhkuxwa xàja nhũm kumy nê ma hwýr o tẽ. Hãmri nê ho hkrã gregrer nê hã hkapĩr pa nê ho hkuxwa hpa. Mêhkuxwa xà hã kàxpore xohtõ rax tã nhũm ã hã hkapĩr par anê. ⁸ Hãmri pa mẽ ixte Jejus kôt ixpa ho ixpa xwýnhjaja tee ri ã kot hipêx anhỹr ã omu nê axpên mã:

—Tk. Kwa na hã mêhkuxwa xàta kapĩr pa. ⁹ Kop apu ma kot o htêm nê ho wênê nê hpãnhã kàxpore ho rax kumrêx nê hamýnh nê ho mẽ kêp amrakati xwýnhjê nhĩpêx par o nhỹx ja kãm mex nê. Kwa mo na we ã amnhĩ nhĩpêx anhỹr kêt nê? Anê.

¹⁰ Hãmri nhũm Jejus amnhĩ tã mẽ inhma nê mẽ inhmã:

—Kwa kot ixto mex kaxyw kênã na ka mẽ axtem nê ixtã kãm akir. ¹¹ Mẽ kêp amrakati xwýnhjaja koja mẽ arĩ mẽ akôt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. ¹² Ixtyk nhũm mẽ kot ijaxar kukamã na ã ixkuxwa anê. Æm hãmri na ã inhĩpêx anê. ¹³ Æm hãmri na pa mẽ amã kot ã inhĩpêx anhỹrja jarê. Koja mẽ krĩ piitã hkôt axpên mã ijarênh ã kagã kamã ijarênh o pa nê kamã nija kot ã inhĩpêx anhỹr kamã harê nê kuma. Anê.

Jut Kariot kot mẽ kãm Jejus ã àmnênh

Makre 14.10-11; Rukre 22.3-6

¹⁴ Tã nhũm Jut Kariotja. Kêp mẽ ixpê Jejus kôt ixpa ho ixpa xwýnhjê pê 12 hõ htã ra tanhmã hamaxpêr to nê axtem nê Satanasti nhỹ hã ma patre krãhtũmjê hwýr tẽ nê tanhmã Jejus o mẽ mar to nê mẽ kãm:

¹⁵ —E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhmã amnhĩre nà? Anê.

Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre.

Anê hãmri nê kãm kàxpore ho 30 nê õr kurê kumrêx nhũm hamy nê hkĩnh nê kato nê ma tẽ. ¹⁶ Hãmri nê mẽ kãm Jejus pynênh kaxyw tânopxar o ri hkôt ri pa. Mẽ kot mar o ri pa xwýnhjê hkàx ã unênh nê ma mẽ hwýr o htêm kaxyw.

Jejus kot hkôt mē pa xwÿnhjê kutā apkur

Makre 14.12-21; Rukre 22.7-13; Juāw 13.21-30

¹⁷ Tā nhūm mē hkīnh pê Pasja kato. Amnepēm kormā Ejit kām mē pa ri na pre mē inhīgētjaja ôwēhti hkrare hkwÿ hpa nē ho anē nē kuku. Tirtūm kot ja hā mē omunh nē Ejit nhō xwÿnhjê nē mē kator kaxyw nhūm prem ā amnhī nhīpêx anē. Tā mē ixpē mē hkanrēhā mē htāmnhwÿjaja na pa htem arī amgrā mē arīgro pê Pasja ā axpēn wÿr akuprō nē jam ijamaxpēr pê mē urāk nē ôwēhti hkrare hkwÿ pa nē pāwti kaxkrit kêt kām kuku. Jakamā pa mē ixte Jejus kôt ixpa ho ixpa xwÿnhja wa axkrut nē Jejus wÿr tē nē amnhī tā hkukja nē kām:

—Kwa nhÿri kot paj we wa tē nē mē akutêp Pas ā mē panhō hā apê? Anē.

¹⁸ Hāmri nhūm wa kām:

—Nà wa māmri ma Jerujarēja wÿr wa tē. Nē krīm axà nē mēhō myti pumunh kurē kumrēx nē kām: “E Jejus na wa inhmē pa wa awÿr tē. Na awÿr hpēr mēnh o: ‘E na pa ra inhnojarēt. Jakamā nhÿri kot paj we ixkôt ri mē pa ho mē pa xwÿnhjê mē Pas ā axpēn kutā apku?’ Anhÿr o awÿr hpēr mē.” Anē. E wa ā kām akapēr anē kê war ama nē war amā ôrkwÿ nhīmōk ā ixkre rax ô jahkre. Kamā ra kaxyw mē paxàpkur xà hā mēmoj piitāā. Ka wa omu hāmri nē māmri mē ixkutêp kamā mēmoj tā apê. Anē.

¹⁹ Hāmri nhūm wa kuma nē ma Jerujarē hwÿr tē. Nē hwÿr axà hāmri nē ra kot wa kām mēmoj jarēnh xà hkôt mēmoj piitā omu hāmri nē mē ixkutêp mēō hā àpēnh o wa xa.

²⁰ Tā nhūm kamāt pa mē Jejusja kôt ixkreta wÿr ixpōx pa nē hwÿr agiē nē ixàpkur kaxyw ixkrī. Mē ixte Jejus kôt ixpa ho ixpa xwÿnhjê pê 12jaja pa mē ixpiitā Jejus kutā ixàpkur o ixkrī. ²¹ Hāmri nhūm Jejus tanhmā mē inhīō jarēnh to nē mē inhmā:

—E pa mē amā mēmoj jarē ka mē inhma. Kot kaj mē atō mē kām ixkurē xwÿnhjê nhīhkram ijaxà. Anē.

²² Hāmri pa mē tee ri kuma nē ixkaprī htÿx nē. Hāmri nē axpēn pānhā amnhī tā hkukja nē kām:

—Kwa xà pa? Nà pa hkêt. Kot paj ā anhīpêx anhÿr kêt kumrēx Pahihti.

Anhÿr o axpēn pānhā kām amnhī tā aprā. ²³ Hāmri nhūm mē inhmā:

—Nà am hāmri na pa mē amā ixkapēr. Mē ate ixkutā guhkrax kām anhō pāwti ho mry kagō nhek o akrī xwÿnhjê hō kot kaj mē kām ixtā amÿnē. ²⁴ Tirtūm kapēr ā kagà htūm ra kot ixkukamā harēnh xà hkôt koja mē tanhmā ixto rax nē ixpī. Nom kot mē kām ixtā àmnēnh mā xwÿnhhta hēxta waa nē. Ā kot amnhī nhīpêx anhÿrja mÿrapê koja amnhī xà htÿx kām hamak rax kumrēx. Kop apu aa ô māmāj nhōxà hkre rūm kator kêt ronhÿx ja kām mex nē. Anē.

²⁵ Hāmri nhūm Jut Kariot kot mē kām hā àmnēnh mā xwÿnhhta hāmri amnhī tā kuma nē kām:

—Kwa xà we pa Jejus? Xà pa kot paj ā anhīpêx anē? Kwa nà pa hkêt. Anē.

Hāmri nhūm kām:

—Tÿ. Ka ā ate inhīpêx anhÿr mā kēnā. Anē.

Jejus kot amnhī kamrô pikapīr kukamā harēnh

Makre 14.22-26; Rukre 22.14-23; mǎānēn Wam Korīt 11.23-26

²⁶ Tā nhūm Jejus pāwti hō py nē Tirtūm mā harē nē mē inhmā ho hkry nē ho mē inhīpêx pa nē mē inhmā:

—E na pa ā mē amā pāwti ho hkry nē mē amā ôr anē. Ja pyrā nē koja mē ā inhīpêx anē nē te ixto hkry hpar pyrāk o inhīpêx pa amnhī xà htÿx kamā ijamak kām ty. Nom mē anē kot paj ty. E mē māmri aku.

Anhÿr o mē inhmā amnhī jarē pa mē kuma nē kot mē inhmā ho hkry xwÿnhja ku. ²⁷⁻²⁸ Hāmri nhūm hpānhā kop py nē mā ho anē nē Tirtūm mā harē nē mē inhmā kugō nē mē inhmā:

—Mē kot ixpīr xà hā arīgroja ā koja ixkamrô axkapī. Nom koja mē amarī ixpīr nhūm amarī ixkamrô hpikapīr kêt nē. Ām paa. Pa kot paj mē anē mē ihkram amnhī jaxà nhūm mē ā inhīpêx anē nē ixpī. Koja ixkamrô axkapī nhūm Tirtūm omu nē ixkukwak ri mē

ate ixkôt amnhĩ xunhwÿr xwÿnhjê nê mẽ ate amnhĩ tomnuj piitã te amnhĩ katut kôt rênh par pyrãk o hipêx nê mẽ ato hkra. Ra amnepêm kot ã amnhĩ jarênh anhÿr xà hkôt. Jakamã e mẽ ixkamrô pikapÿr mã ajamaxpêr pê wĩhti ho akôm o axpên nhĩpêx. ²⁹ ãm hãmri na pa ã mẽ amã amnhĩ jarênh anê. Kot paj axte wĩhti ho ixkôm kêt rãhã nhũm nhÿrmã inhô Papaj akupÿn mẽ awÿr inhmê. Hãmri pu mẽ akupÿn ixwrÿk xà hã arĩgrota ã pahkĩnh rax kumrêx. No ãm axtem tanhmã hã pahkĩnh to. Anê.

Nhũm pre ã Jejus mẽ inhmã amnhĩ jarênh anê. Pa mẽ axpên pãnhã kopta py nê wĩta kwÿ ho ixkô. ³⁰ Hãmri nê mẽ ixpiitã ho ixkôm pa nê Tĩrtũm mã mex ã gre. Hãmri nê ijapôj nê hixêt prêk pê Oriwêhti hwÿr ma mra.

Jejus kot Simãw Pêtre mã kapêr ã harênh

Makre 14.27-31; Rukre 22.31-34; Juãw 13.36-38

³¹ Tã nhũm Jejus tanhmã mẽ ixte hkôt ixpa ho ixpa xwÿnhjê jarênh to nê mẽ inhmã:

—E Tĩrtũm kapêr ã kagã htũmta kot tanhmã mẽ akukamã mẽ ajarênh to nê mẽ ajarênh kot:

Kot paj ôwêhti jamãr o pa xwÿnhja pĩ hãmri nhũm ôwêhti hpigrãnh pa nê ma anhrã nê ri mra.

Anhÿr o kot mẽ ajarênh. Te ho mẽ apê ôwêhti pyrã nê ã mẽ ajarênh anê. Tã kamãt ja kamã koja mẽ tanhmã inhĩpêx to ka mẽ ixtã mẽ omu nê mẽ umaj ôwêhti pyrã nê apiitã ixkaga hpa nê ma aprôt nê mra. ³² Nê mẽ kot ixpĩr tã kot paj akupÿm ixtĩr. Hãmri nê ma akupÿm mẽ akukamã pika pê Garirej wÿr mō. Kamã kot puj mẽ axte axpên pumu. Anê.

³³ Hãmri nhũm Simãw Pêtre tee ri tanhmã mẽ kot amnhĩ nhĩpêx to hkukamã amnhĩ jarênhja ma nê hkaprĩ nê kãm:

—Tk. Nà kot paj ã amnhĩ nhĩpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

³⁴ Hãmri nhũm Jejus kãm:

—Nà ra ixte akukamã ixãhpumunh mex. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axãprãr o axkrunêpxi kãm ga. Kwa jam ajamaxpêr tÿx nê. Anê.

³⁵ Hãmri nhũm tee ri kuma nê axte kãm:

—Kwa nã. Mẽ kot ajaxàr nê apĩr tã kot paj arĩ akôt ri ixpa nhũm mẽ pahto amÿrà nê tanhmã panhĩpêx to. Nà kot paj aa akaga hkêt nê.

Anhÿr o kãm amnhĩ jarê. Pa mẽ ijaxwÿja ã kãm amnhĩ jarênh anê.

Jejus kot Tĩrtũm mã amnhĩ jarênh

Makre 14.32-42; Rukre 22.39-46

³⁶ Tã nhũm Jejus mẽ inhmã anê pa mẽ ma nhÿri mẽ kot kãm “Gesêm” anhÿr xwÿnhja wÿr mra. Hãmri nhũm mẽ inhmã:

—E mẽ jar ixkutêp akrĩ. Pa ma mütũm tẽ nê Tĩrtũm mã amnhĩ jarê mãn. Anê.

³⁷ Hãmri nê mẽ ixkwÿjê ho axkrunêpxi nê amnhĩ kôt mẽ kuwÿ. Simãw Pêtre nê Jepetew kra pijakrut pê Xiakre nê Juãwja wa nhũm amnhĩ kôt mẽ kuwÿ nhũm mẽ ma hkôt mra. Hãmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nê amnhĩ kamã kahak tÿx nê. ³⁸ Hãmri nê mẽ kãm:

—Hêxta waa nê. Na pa tee ri amnhĩ xà htÿx kamã ijamakja kukamã ijamaxpêr nê amnhĩ kamã ixkahak tÿx o ra ixkaprĩ nê. Te ixkaprĩ kot ixpĩr o mōr pyrãk. Jakamã e mẽ jar anohtÿx nê ixto Tĩrtũm wÿr o akrĩ kê tanhmã ixto pa mẽ kot tanhmã ixtoja kutã ixihtÿx nê. Anê.

³⁹ Hãmri nê mẽ kurũm htêm grire nê Tĩrtũm mã amnhĩ jarênh kaxyw htu mÿr pê tẽm nê pikap nō nê kãm:

—Kwa Papaj. Hêxta waa nê. Inhmã amnhĩ xà htÿx kãm ijamak prãm kêt kumrêx. Na pa tee ri amnhĩ kukamã ijamaxpêr nê amnhĩ kamã ixkahak tÿx nê. Jakamã kot kaj amã inhnê ja ho ajapêx prãm nê mãmrĩ inhnê ho ajapêx nhũm mẽ kãm ixkurê xwÿnhjaja tanhmã ixto hkêt nê. Rÿ ko. Kot kaj amã mẽ kot tanhmã ixto hprãm kê mẽ mãmrĩ tanhmã inhĩpêx to. Nom pam inhmã hprãm xà hkôt kêt. Anê.

⁴⁰ Hāmri nê kànhmā xa nê akupÿm Simāw Pêtreja mē hwÿr tē nē tee ri mē omu nhūm mē ra ôt pa nē hikwÿ. Nhūm mē omu nē Simāw Pêtre mā kām:

—Kwa Simāw Pêtre. E mē hāmri akrā hapôj. Kwa wem anohtÿx grire ⁴¹ nē ixkutêp amnhī to Inhō Papaj wÿr o akrī kē mē ixkôt tanhmā mē ato htā ka mē amā mē uma xàj ixkaga hkêt nē arī mē kutā amnhī to htÿx nē akuhê. Ā mē amā mē ate amnhī nhīpêx anhÿr prām nom kormā mē amā maa.

⁴² Anhÿr o mē kām kapêr hāmri nē akupÿm tē nē axte Tirtūm mā amnhī jarē nē kām:

—Kwa Papaj. Nà inhmā amnhī xà htÿx kām ijamak prām kêt. Na pa amnhī kukamā ijamaxpêr nē amnhī kamā ixkahak tÿx kumrêx. Jakamā kot kaj amā inhnê ja ho ajapêx prām nē māmri inhnê ho ajapêx kē mē kām ixkurê xwÿnhjaja tanhmā ixto hkêt nē. Nom ko. Kot kaj amā mē kot tanhmā ixto hprām kē mē māmri tanhmā inhīpêx to. Nom pam inhmā ja prām xà hkôt kêt. Anē.

⁴³ Hāmri nê kànhmā xa nê Simāw Pêtreja mē hwÿr akupÿm tē. Nē mē omu nhūm kē mē axte gôr nē hikwÿ. Ra mē ôt xwa htÿx nē axte gôr nē hikwÿ. Nhūm Jejus tē nē tee ri mē omunh o xa ⁴⁴ nom axte tanhmā mē kām nē hkêt nē. Ām awjanā nē akupÿm tē nē kē wam kot Tirtūm mā amnhī jarēnh xà hkôt axte kām amnhī jarē. ⁴⁵⁻⁴⁶ Hāmri nē akupÿm mē hwÿr tē nē mē kām:

—Kwa xàn ka mē arī gôr nē anhīkwÿ? E mē tokÿx akrā hapôj. Na mē ra mē kot ixwÿr mmar nē ixpynênh mā. Kojā mē tokÿx ixkutā mē kot amnhī xunhwÿr xwÿnhjaja mē kām ixtā amÿnê. Ota ra kot ixtā mē kām àmnênh xwÿnhhta tē. E mē tokÿx kànhmā akrī pu mē kutā mra. Anē.

Mē kot Jejus pynênh ā harênh

Makre 14.43-50; Rukre 22.47-53; Juāw 18.2-11

⁴⁷ Nhūm Jejus mē kām kapêr o ām rāhā nhūm Jut Kariot pē mē inhīōja hwÿr tē. Nē amnhī kôt mē ohtô nē hwÿr mē o tē nhūm mē wapohti nē kô jamÿ nē hkôt o mra. Patre krāhtūm mē Ijaew krāhtūmjaja kot Jejus wÿr mē rēnh xwÿnhjaja nhūm mē man hkôt Jejus wÿr mra. ⁴⁸ Na pre ra Jut Kariot amnhī kukamā mē kām amnhī jarēnh o:

—Kot paj ixkumrêx hwÿr tē ka mē ixkôt hapu hā mra. Kot paj hwÿr tē nē kām ixkapêr nē kahti hkôt kumÿ. Ka mē hā ixpumu nē hwÿr mra nē unênh kurê kumrêx. Ixte kahti hkôt mÿnh xwÿnhhta kot kaj mē unê. Anē.

⁴⁹ Hāmri nē Jejus wÿr tē nē kām:

—Pa Jejus? Xàn ka kormā anhôt kêt nē xa?

Anē nē kahti hkôt kumÿ. ⁵⁰ Hāmri nhūm amnhī tā omu nē kām:

—Kwa Jut. Ate tanhmā ixto kaxyw mā xwÿnh jakamā e kam nē māmri tanhmā ixto. Anē.

Hāmri nhūm Jut kôt mē mmar xwÿnhjaja Jut kot kahti hkôt mÿnh ā omu nē hwÿr mra nē unênh kurê kumrêx. ⁵¹ Hāmri nhūm mē inhīōja tee ri ja hā mē omu nē ō wapo kapa nē patre maati mā àpênh xwÿnh kot mē hkôt htēm xwÿnhhta mā ho apê. Nē kot ho hkrā nhīpôn h mā tā kuhpaw nē upôk rūm hamak nhīkjê pix krāhta. ⁵² Hāmri nhūm Jejus omu nē nē kām kapêr nē kām:

—Kwa akupÿm awapota hkàm haxà nē amarī xa. Na htem wapo ho mē oprê ho pa nhūm mē amnhī xwar wapo ho mē kupa. ⁵³ Xà kot paj amnhī to Tirtūm wÿ nhūm ām inhma nē tanhmā jajê pē ixpytār to hkêt nē? Nà kot paj amnhī to kuwÿ nhūm ixwÿr kapêr o mē wrÿk xwÿnhjê rēnh kurê kumrêx nhūm mē ohtô rax kumrêx nē wrÿ nē mē kēp ixpytā. ⁵⁴ Nom kot paj ā amnhī to hwÿr anhÿr kêt nē. Tirtūm kapêr ā kaga htūm kot amnepêm ixkukamā ā mē kot inhīpêx anhÿr ā mē harênh jakamā kwār mē māmri Tirtūm kām hprām xà hkôt ā inhīpêx anē. Anē.

⁵⁵ Hāmri nē hpānhā mē kot unênh xwÿnhjê mā kapêr nē mē kām:

—Kwa na pa pre apkati mē Tirtūm mā amnhī jarēnh xà hā ixkre kamā mē kām ixujarēnh o ixpa. Ka prem tokÿx ixpynênh kêt tā jarāhā te ixte amnhī tomnuj xwÿnh pyrāk o inhīpêx nē ixwÿr wapohti nē kô hā akapên nē ixwÿr tē. ⁵⁶ Tā nom ra Tirtūm

kapêr ã kagà htùm kamã Tirtùm nhỹ hã mẽ kapêr xwỳnh kot mẽ akukamã mẽ ajarênh nê mẽ atã kagà xà hkôt na ka mẽ ri ã inhĩpêx anê. Anê.

Nhũm pre ã Jeusja amnhĩ tã mẽ kãm kapêr anê. Hãmri pa mẽ ixte hkôt ixpa ho ixpa xwỳnhjaja mẽ omu nê tee ri amnhĩ kukamã ijamaxpêr nê mẽ umaj ixprôt nê anhgrà nê ma inhmarr kurê kumrêx.

Mẽ kot patre maati hwỳr Jeus o mõi ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tirtùm kapêr tùm o mẽ ahkre xwỳnhjaja ra patre maati Kajpas nhõrkwỹ hwỳr akuprõ nê Jeus kutêp hkrĩ. Hãmri nhũm mẽ kot unênh xwỳnhjaja ma mẽ hwỳr o tẽ. ⁵⁸ Hãmri nê mẽ hwỳr ho axà nê hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nê kítare hwỳr axà nê pôristi nhĩhkô hã nhỹ. Hãmri nê tee ri Jeus kukamã hamaxpêr o nhỹ nê hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amỳm tanhmã mẽ kot hipêx to hã mẽ omunh o nhỹ. Anê.

⁵⁹ Hãmri nhũm patre krãhtũmjê mẽ juistijaja kãm Jeus pĩr prãm tỳx nê. Jakamã na prem Ijaew wa ho hamêxkrut nê axpên kôt tanhmã mẽ kãm ho hêx to nhũm mẽ kot hã wa mar nê ra hpĩr kaxyw mẽ pikuprõnh xwỳnhjê kapi. ⁶⁰ Jakamã nhũm prem axpên pãnhã mẽ hwỳr mra nê tanhmã ho hêx to. Nom axpên kôt harênh kêt nê. ãm ahpỳnhã tanhmã ri harênh to nom wahõ wa axkrut nê axpên kôt harênh kêt nê. Jakamã nhũm mẽ tee ri hã mẽ kuma.

Tã nhũm ja wa mẽ hwỳr tẽ nê axpên kôt harê nê mẽ kãm:

⁶¹ —Nà na pre tanhmã Tirtùm mã amnhĩ jarênh xà hã ixkre jarênh to nê harênh o: “Kot paj nhỹrmã inhmã ixkreja grãnh par prãm nê kugrà hãmri nê ãm ixtã apkati axkrunêpxi pix nê akupỳm hipêx pa. Ja kaxyw ixãhpumunh tỳx.” Anhỹr o na amnhĩ jarê pa wa kuma.

⁶² Anhỹr o mẽ kãm ho hêx. Hãmri nhũm patre maatija wa kuma nê kãnhmã xa nê Jeus mã kapêr nê kãm:

—Kwa xà ãm hãmri na wa ã ajarênh anê nà? Xàn ka pre ã amnhĩ jarênh anê? E mẽ inhmã tanhmã amnhĩ jarênh to. Anê.

⁶³ Nom nhũm amarĩ mẽ kãm xa nê mẽ kãm tanhmã nê hkêt nê. Hãmri nhũm patre maatija tee ri omu nê axte kãm kapêr nê kãm:

—Kwa aprĩ hã mẽ inhmã tanhmã amnhĩ jarênh to. Tirtùm noo mã amã ixkapêr jakamã kêr ka akatãt kôt mẽ inhmã amnhĩ jarê nê amnhĩ to axêx kêt nê. Xà apê Tirtùm Kra? Xà ka na pre Tirtùm mẽ ixkaxyw axãm? Kwa akatãt kôt mẽ inhmã amnhĩ jarê. Anê.

⁶⁴ Hãmri nhũm tã hprĩ hã mẽ kãm amnhĩ jarê nê mẽ kãm:

—Tỳ. Nà ãm hãmri na ka ã ijarênh anê. Ixpê Tirtùm kot mẽ akaxyw ixãm xwỳnhhta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rùm amnê akupỳn kakrã kamã mẽ awỳr wrỳ. Hãmri nê Tirtùm xãhpumunh o àhpumunh xwỳnhhta nhĩhkô hã nhỹ hãmri nê pam tanhmã mẽ ajarênh to ka mẽ amnhĩ tã ixpumu nê inhma. Anê.

⁶⁵ Hãmri nhũm patre maatija tee ri ã kot amnhĩ jarênh anhỹr ã kuma nê kamã gryk tỳx nê. Hãmri nê gryk xaj kêp patre maati hã ê kapa nê hkaxõnh pa nê kumê nê hkwỳjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harênh xwỳnh õ japêr? Tãm kot amnhĩ pê Tirtùm Kra hã amnhĩ jarênh ã amnhĩ to hêx nhũm mẽ pahte mar kênã. ⁶⁶ Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nà ã kot amnhĩ jarênh anhỹr mỳrapê koja ty. Ra htyk mã tãm kênã. Anê.

⁶⁷ Hãmri nê tanhmã hipêx kati hto. Mẽ hkwỳjaja hkuk kuhtõ nê ãhkra ho htak nhũm mẽ hkwỳjaja ãhkra hpo ho htak nê hã hpêr o axkê nê kãm:

⁶⁸ —E apê Tirtùm Kra hã ate amnhĩ jarênh jakamã mãn urak nê axãhpumunh tỳx. Jakamã e mẽ kot atak xwỳnhhta nhĩxi jarê pa mẽ ama. Anê.

Simāw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juāw 18.15-18, 18.25-27

⁶⁹ Rôm nhũm Simāw Pêtre arĩ kítare kamã nhỹ. Hāmri nhũm mẽ kãm àpênh xwỳnh nitita omu nẽ hprĩ hã omunh kurê kumrêx. Hāmri nẽ kãm:

—Xê pêr apê Jejus kôt mẽ pa xwỳnhjê hõ na ka. Anẽ.

⁷⁰ Hāmri nhũm tee ri amnhĩ tã kuma nẽ kãm mẽ uma xàj mẽ kãm amnhĩ tã aprã nẽ kãm:

—Tk. Kokỹ. Ixte mēhõ my ata pumunhre hã. Anẽ.

⁷¹ Hāmri nẽ mẽ umaj kànhmã xa nẽ tẽ nẽ kítare hwỳr hakwakrem ahte mẽ hkàx ã xa. Tã nhũm hpãnhã hõja omu nẽ hã mẽ kãm:

—Xê ma pêr ãm hāmri na mẽ harẽ. Kêp Jejus kôt ri mẽ pa xwỳnhjê hõ na pêr. Anẽ.

⁷² Hāmri nhũm amnhĩ tã kuma nẽ kãm:

—Tk. Nà mẽ ri ã amnhĩ krã hkôt ri ixto axêx anhỹr kêt nẽ. Ixte aa mēhõta pumunh kêt kumrêx. Anẽ.

⁷³ Tã nhũm mẽ hkwỳjaja hwỳr mra nẽ kãm kapêr nhũm tanhmã mẽ kãm kapêr to nhũm mẽ kuma nẽ kãm:

—Kwa pêr ãm hāmri na mẽ ajarẽ. Apê Jejus kwỳ na ka. War akapêr kot axpên pyrãk kênã. Anẽ.

⁷⁴ Hāmri nhũm tee ri mẽ kuma mẽ kãm amnhĩ tã aprãr kãm hihtỳx nẽ mẽ kãm:

—Kwa nà. Na pa Tirtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà urãk ixpê Garirej nhõ xwỳnhre hã. Ixte mēhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprãr o axkrunêpxi nhũm krãhyre hkàr kurê kumrêx.

⁷⁵ Hāmri nhũm Simāw Pêtre kuma nẽ ra Jejus kot hkukamã krãhyre hkàr kêt ri kot hã amnhĩ aprãr o axkrunêpxi hã harênhta mã hamaxpêr kurê kumrêx. Hāmri nẽ kànhmã hakry hpar o tẽ nẽ hkaprĩ htỳx kumrêx nẽ kítare pê kato nẽ tẽ nẽ awry hã xa nẽ mỳr rax nẽ.

27

Mẽ kot pahшти Pirat wỳr Jejus o htêm ã mẽ harênh

Makre 15.1; Rukre 23.1-2; Juāw 18.28-32

¹ Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpên wỳr pikuprõnh pa. Hāmri nẽ Jejus ã axpên mar o hkrĩ nẽ axpên mã:

—Nà kot puj mẽ hã amỳnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anẽ.

² Hāmri nẽ mẽõ pōristijê mã anẽ nhũm mẽ hpa hpre hpa nẽ ma pahшти Pirat wỳr o tẽ. Pirat kêp Rôm nhõ pahшти nhỹ hã mẽ ixpê Ijaewjê ho amnhĩptàr jakamã nhũm mẽ ma hwỳr o tẽ nẽ ìhkram haxà.

Jut Kariot kot amnhĩ pĩr ã harênh

Atre 1.15-19

³ Rôm nhũm Jut Kariot tee ri mẽ kot Jejus pĩr kaxyw mẽ harênh ma nẽ hkaprĩ nẽ. Ra kot mẽ kãm hã àmnênh tã mẽ kot hpĩr kaxyw ã mẽ harênh ma nẽ tee ri amnhĩ kukamã hamaxpêr o hkaprĩ htỳx nẽ. Hāmri nẽ hamaxpêr o:

—Hêxta waa nẽ. Mo na pa pre ri axtem nẽ ã amnhĩ nhĩpêx anẽ? Nà na pa pre amnhĩ tomnuj tỳx kumrêx. Anẽ.

Hāmri nẽ ra mẽ kot kãm kàxpore ho 30 nẽ òrta jamỳ nẽ ma akupỳm patre krãhtũmjê mẽ Ijaew pigêtjê hwỳr o tẽ. Hāmri nẽ mẽ kot Tirtũm mã amnhĩ jarênh xà hã ixkreja wỳr mẽ hwỳr axà ⁴ nẽ nhỹri mẽ omu nẽ mẽ hwỳr tẽ nẽ mẽ kãm:

—E ota mẽ akàxporeta. Na pa ã mẽ amã Jejus ã ixàmnênh anhỹrja o amnhĩ tomnuj tỳx nẽ. Kot tãm amnhĩ nhĩpêx o pa htã pa axtem nẽ ã mẽ amã hã ixàmnênh anẽ. Jakamã e mĩ. Mẽ akupỳm akàxporeta jamỳ. Kot paj amnhĩm hamỳnh kêt nẽ. Anẽ.

Hāmri nhũm mẽ tee ri kuma nẽ kãm:

—Kokỹ. Nom ka na ka pre mẽ ixwỳr tẽ nẽ ho mẽ inhmar kênã. Anẽ.

⁵⁻⁷ Hāmri nhūm tee ri mẽ kuma hāmri nẽ pikap kàxpore rēnh pa nẽ ma tẽ nẽ kato. Hāmri nẽ hkaprĩ htỳx kumrēx nẽ hamaxpēr o:

—Kwa tanhmã kot pa we amnhĩ to? Nà kot paj amnhĩ pĩ. Anẽ.

Hāmri nẽ krĩ pẽ kato nẽ ma mẽ kot pika kakwỳnh nẽ ho amnhĩm poti nhĩpêx xà hã pika hwỳr tẽ hāmri nẽ amnhĩ mut mã ê nẽ ho amnhĩ pĩ. Hāmri nhūm patre krãhtũmjaja harēnh ma nẽ tee ri kot kàxpore rēnh ta kawrà nẽ hã axpēn kukja nẽ axpēn mã:

—Kwa tanhmã kot puj wem ja ho? Jut kot mẽ pamã Jejus ã àmnēnh nhūm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarēnh xà hã ixkre ho mex kêt nẽ. Finat Mojes kot ja nẽ mẽ panhĩgêtjê kurê jakamã na htem mẽ hpar xà hã kàxpore ho ixkreta ho mex kêt nẽ. Jakamã kwa tanhmã kot puj mẽ ho? Anẽ.

Hāmri nhūm ja mẽ kãm:

—E na pa ra ijamaxpēr. Pu mẽ ho Jut kot amnhĩ pĩr xà hã pikata japrô hāmri nẽ kamã jar mẽ kęp mẽ pahkwỳ hkêt htyk xwỳnhjê jagiēnh o papa. Anẽ.

Hāmri nhūm mẽ kuma nhūm ja mẽ kãm mex nẽ. Jakamã nhūm arĩgro hõ hã nhūm mẽ ma hwỳr mra nẽ haprô. ⁸ Hāmri nẽ hã hixi mẽ nhūm kęp “mẽ hkamrô pikapĩr xà kamã pika”. Mẽ kot Jejus pĩr xà hã kàxpore ho haprô jakamã nhūm prem ã hã hixi mēnh anẽ. Nhūm htem arĩ axpēn mã ã hixi jarēnh anhỹr o pa. ⁹⁻¹⁰ Nhūm pre ra amnepēm Tĩrtũm nhỹ hã kapēr o pa xwỳnh finat Jeremĩsti mẽ hkukamã hprĩ hã ja jarē nẽ hã kagà. Nẽ hã kagà o:

Koja Ijaew nhõ patrejaja mēhõ kot mẽ kãm mēhõ my hã àmnēnh pãnhã kãm kàxpore ho 30 nẽ òr xwỳnhja jamỳ. Hāmri nẽ ma o tẽ nẽ nhỹri mẽ kot amnhĩm pika kakwỳnh nẽ ho poti nhĩpêx o pa xà hã pika hkwỳ japrô. Ra Tĩrtũm kot inhmã mẽ harēnh xà hkôt koja mẽ ã amnhĩ nhĩpêx anẽ. Anẽ.

ã finat Jeremĩsti kot Tĩrtũm nhỹ hã mẽ hkukamã mẽ harēnh nẽ hã kagà anhỹr xà ja kôt nhūm prem ã amnhĩ nhĩpêx anẽ.

Pahihti Pirat kot Jejus kujjêr ã harēnh

Makre 15.2-5; Rukre 23.3-5; Juãw 18.33-38

¹¹ Rôm nhūm mẽ pahihti Pirat wỳr Jejus o tẽ nẽ hwỳr ho axà nẽ kutã ãm nhūm xa nhūm Piratja omu nẽ kãm:

—E. Kwa inhmã amnhĩ jarē. Xà apê Ijaew nhõ pahi na ka nà? Xà ka na htem amnhĩ wỳr ajamãr o pa? Anẽ.

Hāmri nhūm kãm:

—Tỳ. Nà ãm hāmri na ka ijarē. Anẽ.

¹² Hāmri nhūm mẽ hkrãhtũmjê mẽ patre krãhtũmjaja pahihti Pirat mã tanhmã ho kapēr punuj to. Nhūm amnhĩ tã mẽ kuma nom tanhmã kãm amnhĩ tã àprãr to hkêt nẽ.

¹³ Jakamã nhūm pahihti Pirat tee ri ja hã omu nẽ kãm:

—Kwa xà na ka ã mẽ kot ato kapēr anhỹrja mar kêt nẽ nà?

¹⁴ Anhỹr tã nom nhūm Jejus akryk xa nẽ axte tanhmã kãm nẽ hkêt nẽ. Hāmri nhūm Pirat tee ri kot ã amnhĩ nhĩpêx anhỹr ã omu nẽ hamaxpēr o:

—Kokỹỹ. Mẽ kot ho kapēr punuj tã nhūm ãm mẽ kuma nẽ te kãm mẽ uma hkêt pyrà nẽ tanhmã inhmã amnhĩ tã àprãr to hkêt nẽ. Anẽ.

Pirat kot Jejus pĩr kaxyw hã àmnēnh ã harēnh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhūm Pirat kormã mẽ kot axpēn mar xà hã ixkre kamã ỹr rãhã nhūm hprõja hwỳr hpēr mẽ nẽ kãm:

—Xê tanhmã mẽ kãm Jejusja ã axàmnēnh to hkêt nẽ. Na pa kamàt ja kamã hkôt amỹti nẽ tee ri hkukamã ijamaxpēr. Kot amnhĩ to mex xwỳnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnēnh to hkêt nẽ. Kwarĩ. Anẽ.

Hāmri nhūm Piratja kuma nẽ hamaxpēr o:

—Nà ixte Ijaew krähtümjê pumunh tùm. Ijaew kwÿjaja kãm Jejus kïnh nhùm mē hkrähtümjaja kot mē hã Jejus kamã gryk nē. Jakamã ixte tanhmã mē kãm hã ixàmñênh to kaxyw na mē ã ixwÿr o htēm anē. Anē.

Na htem Pas nhô arïgrota hapôx mē nhùm pre htem Ijaew o amnhïptâr xwÿnhja mē kãm mē hagjênh xà kamã hkrï xwÿnhjê ho hpÿnh nē mē hapôj. Mē kãm hprãm xà hkôt nhùm mē kãm mē hapôj nhùm mē akupÿm kapôt ã hamakêtkati nē amnhïx pa. Jakamã nhùm ra mē hagjênh xà kamã mēhō my pê Parapasja hkrï. Na pre tanhmã amnhï tomnuj to nhùm mē mÿrapê unē nē haxà. Jakamã nhùm Ijaewjaja mē ho amnhïptâr xwÿnh Pirat wÿr akuprō nē kuhê nhùm mē kãm:

—E kot paj jarãhã mē amã mē hagjênh xà kamã mē hkrï xwÿnhjê hō mã inhüre kê àmnhïx kato nē ri pa. Nhÿ kot paj mē amã kãm inhüre? Xà Parapas nà? Xà mē akwÿ kot amnhïm ho mē anhō pahïhti Jejus pê Tïrtüm kot mē akaxyw ãm xwÿnhhta kot paj mē amã kãm inhüre? Nhÿ wehe? E mē inhmã nhÿ jarē. Anē.

Pirat na pre mē inhō patre krähtümjê pumunh mex nē. Ijaew kãm Jejus kapër mar prãm tÿx ã nhùm mē hã kamã gryk tÿx nē hwÿr o mrarja kôt nhùm mē omunh mex nē. Jakamã ã hã mē hkukjêr anē. Hãmri nhùm mēhpigêt mē patre krähtümjaja kuma hãmri nē mē pikuprōnh nē mē kuhê xwÿnhjê mã kãm:

—Kwa mē kãm anē kê mē pamã Parapas mã mãn ure nē mãmri Jejus Kris pï. E kwa mē tokyx kãm anē kê Parapas mã ure. Anē.

Hãmri nhùm mē mē kuma nē pahïhti Pirat mã kãm:

—Nà mē inhmã Parapas mã mãn anhüre. Anē.

²² Hãmri nhùm tee ri mē kuma nē mē kãm:

—Kwa no mē ate Jejus pê Tïrtüm kot mē akaxyw ãm xwÿnh ã harênh xwÿnhhta? Tanhmã kot paj hipêx to? Anē.

Hãmri nhùm mē kãm:

—Apï ri. Tokyx pï kahpa hã anhô kê ty. Anē.

²³ Hãmri nhùm tee ri mē kuma nē mē kãm:

—Tk. Kwa nà. Tanhmã kot amnhï tomnuj tore hã kot pa kêt ri pï kahpa kunhō nhùm ty. Anē.

Hãmri nhùm mē xatã àmra kamã kãm:

—Kwa pï kahpa hã mãn anhô kê ty. Kwa tokyx ã mē inhmã hipêx anē. Anē.

²⁴ Hãmri nhùm tee ri ja nē tanhmã mē kãm kapër to no nhùm mē mar kêt nē. Nhùm tee ri mē àmra mar o xa. Hãmri nē kãm Jejus pïr prãm kêt jakamã amnhïm gō hkwy janhi nē mē piitã mē noo mã amnhï nhïhkra kuhōnh o xa. Mē kot hã omunh xà hkôt kãm hpïr prãm kêt ã omunh kaxyw. Hãmri nē mē kãm:

—E na pa mē anoo mã ã amnhï nhïhkra kuhōnh anē ka mē ja hã ixpumu. Nà inhmã hpïr prãm kêt. Tanhmã kot amnhï tomnuj tore hã. Mē kaxipixjaja mē amã hpïr hprãm jakamã mē kam nē tanhmã ho. No pa kot paj tanhmã ho hkêt nē. ãm kwarï ho kwarï. Anē.

²⁵ Hãmri nhùm mē kuma nē kãm:

—Tôe. Nà ãm hãmri. Kot paj mē pamjaja amnhï tã htykja nhô. Nē mē ixkra nē mē ixtàmnhwÿjê mē amnhï to ixpimràatã amnhï tã kunhō. Kê Tïrtüm kãm tanhmã hã mē ixtō hto hprãm nē mãmri tanhmã hã mē ixtō hto. Anē.

²⁶ Hãmri nhùm mē kuma nē mē kãm hprãm xà hkôt mē kãm Jejus ã amÿnê nē mē kãm Parapas mã ure. Ra Parapas kot pahi Pirat pê ò pôristi kutã amnhï xãm nē kêp hōxpïrja mÿrapê nhùm mē kot unênh nē haxàr tã Ijaew kãm hprãm xà hkôt akupÿm kãm ure. Hãmri nē ò pôristijê mã anē nhùm mē Jejus tak. Nē htak rax nē hãmri nhùm Pirat mē kãm hã amÿnê nhùm mē kot pï kahpa hã nhôr o hpïr kaxyw ma o tē.

Pôristi kot Jejus ã hpër o pikênh ã harênh

Makre 15.16-20; Juãw 19.2-3

²⁷ Tã nhùm pôristijaja mē kot pï kahpa hã Jejus nhôr kaxyw ma o tē nē pahïhti Pirat nhôrkwÿ kamã ixkre hō hwÿr ho axà. Nhùm pôristi ohtô nē hwÿr akuprō nē hã pë r o pikênh kaxyw axpën mã:

—E kwa tokyj pu mē kām pahi xê jaxà ri. Kêp pahi hã kot amnhĩ jarēnh kēnã. Anē.

²⁸ Hāmri nē kêp ê kapa nē hpānhã kêp pahi hã mē ê kamrêk mexja py nē kām haxà. ²⁹ Nē kām pahi hã mē ahkà nhîpêx nē hkrām haxà. Nom axtem akunĩ kamã mēmo mrô nhĩ te kot ronh kanêre pyrāk xwýnhja nhũm mē hikāx nē hkrām haxà. Nē kām pahi hã kô gô nhũm kupy nē o xa. Hāmri nhũm mē ho anhÿr pa nē kutã hkôn krã ho rôrôk nē hkrĩ hpa nē hã pēr o pikēnh kamã kām:

—E âm hāmri. Apê Ijaew nhõ pahi punuti na ka. Anē.

³⁰ Hāmri nē kànhmã kuhê nē hkuk kuhtô nē kêp kô pytã nē xatã ho hkrāx pē htak. Nhũm prem ã pēr o pikēnh kām hipêx anē. ³¹ Hāmri nē kêp pahi hã ê kapa nē akupÿm kām ê jaxà nē mē kot pĩ kahpa hã nhôr kaxyw ho kato nē ma o tē.

Pôristi kot pĩ kahpa hã Jejus nhôr ã harēnh

Makre 15.22-32; Rukre 23.27-43; Juãw 19.17-25

³² Nhũm pôristijaja Jejus o kato nē ma kapôt mã o tē. Nē kām pĩ kahpa pytĩja gô nhũm kumÿ nē mē hkôt o hkwÿ. Nom ra hirok tÿx nē nhũm mē tee ri ja hã omu nē mēhõ kot ho ajuta kaxyw mē kot omunh xwýnhjê kapi ho xa. Hāmri nē Sirēn nhõ xwýnh Simãw kã htyk pumu nē unê nē kām kot Jejus o ajuta kaxyw hã karõ nhũm hwÿr tē nē kêp pĩ kahpata mÿ nē hkôt kām kumÿ nē o tē. ³³ Hāmri nhũm mē kēn nhixêt te kot mē hkrã hi pyrāk xwýnhhta wÿr mē o pøj. Mē kapēr kām na prem hixêtja jarēnh o: “Korkot.” No mē pakapēr kām Korkot jarēnhja kêp “mē hkrã hi xà” nhũm mē ma hwÿr Jejus o pøj. ³⁴ Hāmri nē mē kot pĩ kahpa hã nhôr kaxyw nhũm à htÿx kumrêx kamã hamak pymaj kām mēmo mē hkanexàja gô. Wĩhti mē mēmo mry ma xà ho pihkàr nhũm mē kām hkwÿ gô. Nom nhũm hkaki nē mē kot amnhĩ xà htÿx kamã hamak kêt xà hã omunh kurê kumrêx nē hkaga. Nhũm mē tee ri ja hã omu hāmri nē kêp ê kapa nē kumē nē pĩ kahpa hã kuxi nē prek o ìhkra nē hpar o htÿx pa. Hāmri nē kànhmã pĩ jarĩ nē ahkre kamã âm nē ho htÿx nhũm kÿxpê ajêt. ³⁵ Hāmri nhũm pôristi hkwÿjaja axpēn mã ê hkwÿ ho pigràn h kaxyw hã kēnre ho jôka. ³⁶ Hāmri nē ho anhÿr pa nē pikap Jejus jamãr o hkrĩ.

³⁷ Na htem mē hpar kaxyw nē tanhmã mē kot amnhĩ tomnuj to hã kagã nē mē mÿri pĩ kahpa hã hanhõ. Jakamã na prem tapti hõ py nē tanhmã Jejus ã kagã hto nē hã kagã ho:

IJAEW NHÕ PAHI NA JA

HIXI PÊ JEJUS

Hāmri nē hwÿr ho api nē mÿri kunhõ. ã Jejus kot amnhĩ jarēnh anhÿrja mÿrapê na prem kupĩ.

³⁸ Hāmri nhũm mē hpānhã wa àhkĩnh xwýnh wa ho axkrut nē mãänēn pĩ kahpa hã wa kunhõ. Nē akutã ho Jejus nhijê nhũm war ajêt.

³⁹ Tã nhũm pry hã mē mrar xwýnhjaja Jejus pumu nē hã hpēr o pikēnh o mra nē kām:

⁴⁰ —Kwa ka na ka pre ate Tirtũm mã amnhĩ jarēnh xà hã ixkre gràn h par nē atã apkati axkrunēpxi nē akupÿm hipêx par ã amnhĩ jarē. Nē apê Tirtũm Kra hã amnhĩ jarē. Nē axàhpumunh o axàhpumunh jakamã e kwa amnhĩ kapa nē wrÿ pa mē ja hã apumu. Kwa tokyx. Anē.

⁴¹ Nē patre krãhtũmjê mē Tirtũm kapēr tũm o mē ahkre o mē pa xwýnh mē mē hkrãhtũmjaja piitã hwÿr mra nē hã hpēr o axkê. ⁴² Nē axpēn mã harēnh o:

—E jahti na xep pre mē kamã ukapri ho pa nē tanhmã mē ho ajuta hto ho pa. Tã nom tãm tanhmã amnhĩ to nē wrÿk kêt nē. Kwa pu mē arĩ pakuhê nē kot amnhĩ kaxàr nē wrÿk kām omu. Kojã wrÿ pu mē omu nē kêp mē panhõ pahihti hã hkôt pajamxpēr kurê kumrêx. E tokyx wrÿ Jejus. Pa mē awrÿk kām apumu. Nã kot kaj awrÿk rax nē. ⁴³ Na hte amnhĩ kaxyw Tirtũm mã hamaxpēr o pa. Nē kêp Kra hã amnhĩ jarēnh o pa. Jakamã e. Kê Tirtũm tãm hwÿr tē nē kêp Kra hã akupÿm mē pahpê utã. Anē.

⁴⁴ Hāmri nhũm wa kot akutã hijê nē jêt xwýnhhta wa haxwÿja mē mar xà hkôt mã ho kapēr anē.

Jejus tyk ã harēnh

Makre 15.33-41; Rukre 23.44-49; Juãw 19.28-30; mãänēn Eprêw 10.19-20

⁴⁵ Tã nhũm kaxkwa nhĩpòk ri myt ÿr mẽ nhũm te kamàt pyràk nhũm kamàt kô rax kumrêx. Jao hã awry mẽ nhũm ra akupÿm myt katêr o mō. ⁴⁶ Hãmri nhũm Jejus kapêr kãm hihtÿx nê àmra htÿx kãm Tĩrtũm mã kapêr nê kãm:

—Inhō Tĩrtũm inhō Tĩrtũm. Kwa mon ka ixkaga? Anê.

Nom kapêr kamã kãm kapêr o:

—Eri Eri. Rãmã sapatani. Anê.

⁴⁷ Hãmri nhũm mẽ kot mar xwÿnhjaja kot Eri jarênh ã kuma nê htÿx ho finat Eris mã kapêr ã hkamnhĩx. ⁴⁸ Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhÿr ã kuma nhũm mēhō kãm hkaprĩ nê. Hãmri nê mẽmo rerek py nê o tẽ nê kaxyw pĩ rytija py nê ho hkanhwÿ. Nê akupÿn o tẽ nê ho wĩhti nhek nê Jejus kot hkaôr kaxyw kãm kupê. ⁴⁹ Hãmri nhũm hkwyjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã măn. Koja hwÿr tẽ nê ho wrÿk japêr. Anê.

⁵⁰ Hãmri nhũm kamàt kô mẽ nhũm Jejus ra htyk kaxyw nê axte àmra htÿx nê hãmri nê ty. ⁵¹ Tykja kôt nhũm Tĩrtũm mã amnhĩ jarênh xà hã ixkre kamã hakwakre hã kupêxêja kÿj rũm ahar mã axkjê nê amnhĩ kahê xà mēnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mēnh pyràk o ã amnhĩ nhĩpêx anê. Nhũm pika htertet tÿx kumrêx o kēn rũnh kwÿ ohtô nê hkrakrak pa. ⁵² Hãmri nhũm mẽ htyk ã pika kamã mẽ htykjê nhōrkwy ho ohtô nê mẽ hã axkjê nhũm mẽ hikwÿ xwÿnhjaja akupÿm htĩr nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nê akupÿm htĩr nê hapôj nê kuhê. ⁵³ Nom kormã nhÿhÿm mrar kêt nê. Arĩ mẽ hã pika nhĩpy Jejus akupÿm htĩr ã hamãr o kuhê. Tã nhũm Jejus apkati hō hã akupÿm htĩr ã arĩgrota ã nhũm mẽ rĩ kormã ma Jerujarê hwÿr mra nê hwÿr agjê nhũm mẽ ohtô nê akupÿm mẽ htĩr ã mẽ omu.

⁵⁴ Nhũm kormã Jejus htyk o mōrta ã nhũm pōristi krãhtũm mẽ pōristi hkwyjaja hãmri hparpê hamãr o kuhê nê htyk kãm omu. Nê pika htertet kamã ama nê mẽmoj kot tanhmã amnhĩ nhĩpêx toja pumu nê tee ri hamaxpêr nê kãm ma htÿx kumrêx. Hãmri nê axpēn mã:

—Hêxta waa nê. Pêr ãm hãmri na pre htyk xwÿnhhta amnhĩ jarê. Kêp Tĩrtũm Kra kēnã. Tã pu mẽ amarĩ pahtÿx kupĩ. Anê.

⁵⁵⁻⁵⁶ Nhũm pre mēnijaja ohtô nê amÿm Jejus tyk kãm omunh o kuhê. Marir Matarēn nê Xiakre mẽ Juje wa katorxà Marir nê Xiakre hō mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wÿr mō.

Mẽ kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷ Tã nhũm ra myt greire nhũm krĩ pê Arimatej rũm hikàxpore rax xwÿnh pê Jujeja tẽ. Nom axtem Juje hō na pre. Ra kot Jejus kôt amnhĩ xãm jakamã kãm ho wrÿk nê haxàr prãm nê. ⁵⁸ Hãmri nê ma pahi Pirat wÿr tẽ nê ì hã kuwÿ nê kãm:

—E ot pa awÿr tẽ. Kwa inhmã htyk xwÿnhhta gō pa ma o tẽ nê haxà nà? Anê.

Hãmri nhũm kuma nê kãm harê nhũm ma o tẽ nê haxà. ⁵⁹ Kaxyw kupêxê mex ò py nê ho hkupu pa ⁶⁰ nê ma o tẽ nê ò kēn kre kamã haxà. Na pre htyk kukamã kēn kre kakwÿ nhũm mẽ kot kormã kamã mēhō jaxàr kêt tã kamã na pre Jejus jaxà. Hãmri nê hã kēn rax ò xãm nê ho hitom nê ma akupÿm tẽ. ⁶¹ Nhũm Marir Matarēn mẽ Marir òja wa kēn kreta kapem omunh o wa nhÿ.

Pōristi kot kēn kre jamãr o kuhê ã harênh

⁶² Tã nhũm apkati nhũm mẽ inhō arĩgromnu pê sap kato. Hãmri nhũm Parijew nhō xwÿnhjê mẽ patre krãhtũmjaja ma pahi Pirat wÿr mra nê kãm:

⁶³ —Kwa pahihiti. Nà amnhĩ to hêx o pa xwÿnhhta na pre kormã htĩr nê pa ri tanhmã amnhĩ jarênh to ho pa. Nê nhÿrmã ty nê htyk ã apkati axkrunēpxi pix nê akupÿm htĩr ã amnhĩ jarê. ⁶⁴ Jakamã kwa hwÿr anhō pōristi hkwy rē kê mẽ ma hwÿr mra nê hamãr

mex o apkati axkrunêpxi. Kot ka anhÿr kêt nhÿm hkôt mē pa ho mē pa xwÿnhjaja ma hwÿr mra nē ho ahkĭ nē ma o mra nē nhÿri haxà nē mē piitã mē kãm ra akupÿm htĭr ã harēnh o hêx o pa. Te tãm kot amnhĭ kukamã amnhĭ jarēnh pyræk. Nom mē kot axte ã harēnh anhÿrja koja omnuj tÿx o tãm kot ã amnhĭ jarēnh anhÿrja jakre. Anē.

⁶⁵ Hāmri nhÿm mē kuma nē mē kãm:

—Tôe. Nà koja mē ho anē. E mē ma hwÿr amnhĭ kôt pôristi hkwÿ ho mra kê mē hakwakre kahê xà jamār mex o kuhê. Anē.

⁶⁶ Hāmri nhÿm mē kuma nē ma hwÿr mra nē hakwakre hã kēn raxta o htÿx pa. Nē mēhō kot omunh nē kahê mēnh pymaj menh ê ho hkukō. Hāmri nē ho anhÿr pa nē pôristi mã kãm:

—E Kêr ka mē jar kuri hamār mex o akuhê. Kê mēhō tē nē tanhmã ho hkêt nē. Anē.

28

Jejus akupÿm htĭr ã harēnh

Makre 16.1-8; Rukre 24.1-12; Juãw 20.1-10

¹ Tã nhÿm apkati nhÿm tōmĭk. Hāmri nhÿm Marir Matarēn mē Marir ôja kwÿhtã kànhmã nhÿ nē ma akupÿm kēn kreta wÿr wa tē. ² Puh nhÿm pika htertēt tÿx nē nhÿm Tĭrtÿm kapēr o mē wÿk xwÿnhja kēn kre wÿr wÿr nē nhãm hakwakre nē kēn raxta mē nē hã nhÿ. ³ Hirã htÿx kãm nhÿ. Te na jaxēnh pyræk. Nē ê haka htÿx kumrēx. ⁴ Nhÿm pôristijaja tee ri omu nē kãm ma htÿx nē htertēt nē umaj pikap rôrôk pa nē te htyk pyrã nē hikwÿ. ⁵ Hāmri nhÿm wa nita kēn kre hwÿr pōj nē tee ri Tĭrtÿm kapēr o mē wÿk xwÿnhja pumu. Nhÿm wa kãm:

—Kwa wa amã ma hkêt nē. War ate Jejus pumunh kaxyw na ka wa tē. Mē kot pĭ kahpa hã nhôr xwÿnhja. ⁶ Nom jar amrakati. Na ra akupÿm htĭr nē kato nē ma tē. E wa kam nē amnē axà nē nōr xà kaprÿ pumu. Anē.

Hāmri nhÿm wa kuma nē tee ri kēn kre kamã Jejus japêr nhÿm kamã amrakati. ⁷ Hāmri nhÿm Tĭrtÿm kapēr o wÿk xwÿnh ja kãm:

—E wa tokyx ma akupÿm tē nē hkôt mē pa ho mē pa xwÿnhjê mã harē. Koja ma Jejus mē akukamã akupÿm Garirej wÿr mō. Garirej kamã kot kaj mē axte axpēn pumu. Ra kot mē amã amnhĭ jarēnh xà hkôt. E kwa wa tokyx ma akupÿm mē hwÿr tē. Anē.

⁸ Hāmri nhÿm wa kuma nē ma akupÿm hprôt nē htēm kurê kumrēx. Kãm ma htã hkĭnh nē. Nē ma Jejus kôt mē pa ho mē pa xwÿnhjê mã ujarēnh kaxyw ma mē hwÿr hprôt nē wa tē. ⁹ Pu nhÿm ra Jejus tãm wa kutã tē nē wa hkaxpa. Hāmri nē wa haêr pê wa kãm kapēr nē wa kãm:

—Pa? Nhÿhÿm na ka wa tē? Anē.

Hāmri nhÿm wa omu nē hkĭnh tÿx kumrēx nē hwÿr hprôt nē hpar pê hkōn krã ho tēm nē akutã hpar ã kumÿ nē kãm mex o mex ã harē nē kãm:

—Hêxta gàu nē. Ma amex kumrēx. Amex o amex. Anē.

¹⁰ Hāmri nhÿm wa kãm:

—E war amã ma hkêt nē. Mamrĭ ma tē nē ixkôt mē pa ho mē pa xwÿnhjê mã ijarē kê mē ma Garirej wÿr mra. Kamã kot paj mē axte axpēn pumu. Anē.

Pôristi kot kàxpore hprãm xàj Jejus o hêx ã harēnh

¹¹ Rôm nhÿm pôristi hkwÿjaja akupÿm tãm hkrã hāmri nē ma kēn kreta rÿm akupÿm krĭm mra. Hāmri nē patre krãhtÿmjê hwÿr mra nē mē kãm ujarēnh pa. ¹² Hāmri nhÿm mē tee ri mē kuma nē mēhpigêtjê ho akuprō nē mē hã axpēn mar o hkrĭ. Hāmri nē axpēn mar pa nē pôristi mã amnhĭrer rax nē mē kãm:

¹³ —E mē amnhĭm kàxpore jamÿ nē ma ri ã mē kãm amnhĭ jarēnh anhÿr o apa. Nom kêr ka mē kãm amnhĭ to axêx nē mē kãm: “Na pa prem kēn kre kapem ixtÿx gōr nē inhĭkwÿ nhÿm Jejus kôt mē pa ho mē pa xwÿnhjaja mra nē mē ixpê ĩ ho ahkĭ nē ma o mra.” Anhÿr o mē kãm amnhĭ to axêx o apa. Mē ixte kàxpore ho mē amã amnhĭrerta pãnhã. ¹⁴ Koja pahĭhti Piratja mē anhôt ã mē ajarēnh ma nē hã tanhmã mē ato kaxyw hã kot paj mē axy pê tanhmã kãm ixkapēr to nhÿm tanhmã mē ato hkêt nē. Jakamã e.

Mê tee ri amnhî kukamã ajamaxpêr kêt nê. Mê māmri ma mra nê ã mê kãm axujarênh anhÿr o ri apa. Anê.

¹⁵ Hāmri nhũm mê kuma nê mê kot amnhî to hêxta pãnhã kàxpore jamÿ nê ma mê mar xà hkôt mê piitã mê kãm Jesus kôt mê pa xwÿnhjê ho hêx o pa. Tã na htem arî jarãhã Ijaewjaja ã axpên mã mê harênh anhÿr rãhã ho pa.

Jejus kot hkôt mê pa ho mê pa xwÿnhjê mã mê àpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

¹⁶ Tã pa mê ixte Jesus kôt ixpa ho ixpa xwÿnh pê 11jaja hāmri akupÿm Jesus htîr ã harênh ma hāmri nê ma Garirej wÿr mra. Nhÿri Jesus kot mê inhmã mēmo hixêr prêk jarênhja wÿr.

¹⁷ Nê ra hwÿr ixpôx o mrrar mê Jesus pumu. Tã nom nhũm mê ixkwÿjaja tee ri omu nê htÿx ho nhãm mēhõ hã hkamnhix. No kêt mê pajaja na pa prem ixprî hã omunh kurê kumrêx nê ixkînh tÿx nê. Nê ixkînh nê hwÿr ixprôt nê kãm:

—Pa Jesus? Hêxta waa nê. Amex o amex. Anê.

¹⁸ Hāmri nhũm mê inhmã:

—E na pre Tîrtûm ã inhmã kapêr anê nê inhmã: “E kêr ka amnhî nhÿ hã mēmoj piitã tanhmã ho ho apa. Kaxkwa kamã nê pika kamã. Mamri nhÿhÿm amnhî krã hkôt amã tanhmã amnhî to hprãm xà hkôt tanhmã amnhî nhîpêx to ho ri apa.” Anê. Na pre mê akaxyw ã inhmã kapêr anê.

¹⁹ —Jakamã e. Kêr ka mê ma pika piitã hkôt ri mê kãm ijarênh o ri apa. Kê mê ixte mê nê tanhmã amnhî nhîpêx to hã ijarênh ma hāmri nê ixkôt amnhî xunhwÿ nê ixkôt ri amnhî nhîpêx o pa. Nê kêr ka mê ja hã mê omu nê Tîrtûm mê wa inhmã mê hkrã kumrã. Wa ixkarõ nhÿ hã mê hkrã kumrã. Mê kot wa inhÿ hã pix mã tanhmã amnhî nhîpêx to ho pa kaxyw.

²⁰ —Nê mê kãm anê kê mê ixkapêr piitã hkôt amnhî nhîpêx rãhã ho pa. E kêr ka mê ma mê kãm ã ijarênh anhÿr o ri mê hkôt apa. Kot paj mê anhîhkô hã ri ixpa rãhã nhũm nhÿrmã pikaja hapêx o hapêx. Anê.

Na pre ã Jesus mê inhmã mê ixàpênh ã karõ anê.

Matêwre kot Jesus jarênh nê hã kagàja ja kôt na hapêx.

Makre

Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwỳjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkràmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mör xwỳnh Juãw Paxisja nhũm pre mãânên hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Koja Tĩrtũm tokyx mẽ pahwỳr mẽ panhõ Pahihti mẽ nhũm wrỳ pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mēhõ kutêp pry ho mex pyræk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katat nhũm ra katat mux nê nör pyræk o amnhĩ nhĩpêx. E kwa kêr ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tĩrtũm Juãw Paxis kukamã harênh anê nhũm y hã kapêr xwỳnh pê Ijaisja mẽ pamã hã kagà.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tĩrtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tĩrtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtô nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê rũm nhũm mẽ ohtô nê hwỳr mra. Hãmri nê nhỹri omu nê kãm:

—E ixte amnhĩ tomnuj kaga hprãm xàj na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ nê. Hãmri nê ra inhmã amnhĩ tomnuj kaga nê tãm amnhĩ nhĩpêx prãm nê.

Anhỳr ã amnhĩ jarê. Hãmri nhũm Tĩrtũmja kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj piitã rênh pa nê axte kãm hamaxpêr kêt nê. Jakamã nhũm Juãw Paxis gôx kãm mẽ hkrã kumrã. Pyhti pê Jotãw kamã. ⁶ Juãw Paxisja hikàxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm

ê nhîpêx nê hagjê nê hã pa. Nê mêmô mry hkà ho amnhî pre nê ri pa. Nê mêmô mex kur kêt nê ãm krit ku nê menh ôr o ri pa. ⁷ Hãmri nê mêmô kãm tanhmã Jejus jarênh to ho pa nê mêmô kãm:

—E mêmô inhma. Koja tokyx Tîrtûm kot mêmô pakaxyw ãm xwÿnhhta mêmô pahwÿr wrÿ. Ahpumunh tÿx o kot ijakrenh jakamã na pa hte ãm kukwak ri ixpa nê amnhî tã hã ixpijaàm rãhã ho ri ixpa. Te ixkràm ã ixpijaàm o amnhî nhîpêx pyræk. ⁸ Na pa hte gô pix o Tîrtûm mã mêmô akrã kumrâr o ri ixpa. Nom mêmô pahwÿr wrÿk mã xwÿnhja koja mêmô awÿr Tîrtûm Karô rê nhûm mêmô akaxwÿnh mã agjê. Ka mêmô ÿ hã tãm ri amnhî nhîpêx rãhã ho ri apa. Anê.

Juãw Paxis kot Jejus krã kumrâr ã harênh

Matêwre 3.13-17; Rukre 3.21-22; Juãw 1.32-34

⁹ Tã nhûm Jejusja tãm Juãw Paxis wÿr tẽ. Garirej kamã krî pê Najare rûm ma hwÿr tẽn pøj. Hãmri nhûm Juãwja hkrã hkumrã. Pyhti pê Jotãw kamã hkrã kumrã. ¹⁰ Hãmri nê wa gôj rûm api nê mÿr ri kaxkwa pumunh o xa. Nhûm kaxkwa axkjê nhûm kurûm Tîrtûm Karô te tuuti pyrã nê Jejus wÿr wrÿk o tẽ nê ïkre hã xa nhûm amnhî tã omunh o xa. ¹¹ Hãmri nhûm Tîrtûm kaxkwa rûm kãm kapêr nê kãm:

E apê Ixkra mex na ka. ãm hãmri na ka hte ixkanrêhã amnhî nhîpêx mex o apa. Inhmã ajapê kamã na ka ri apa ho apa. Anê.

Jejus kot Satanasti kaga hã harênh

Matêwre 4.1-11; Rukre 4.1-13; mãânên Eprêw 2.18, 4.15

¹² Tã nhûm Tîrtûm Karôja ma kapôt mã Jejus o môm ¹³ nhûm kapôt ã mry xoprê kaêx ã ri mrar o hã arîgro pê 40. Hãmri nhûm Satanasti omu nê ma hwÿr tẽ nê ri hkôt pa. Kapôt ã ri hkôt hêx rom tanhmã kãm kapêr to nhûm kot mar nê hkôt amnhî xãm prãm xàj ma hkôt pa. Nom nhûm Jejus hkaga kumrêx nhûm tee ri ho anhÿr kaprÿ nê ma akupÿm tẽ. Hãmri nhûm Tîrtûm kapêr o mêmô wrÿk xwÿnhjaja Jejus wÿr wrÿ nê tanhmã ho mex to.

Jejus kot Tîrtûm mã ãpênh krax ã harênh

Matêwre 4.12-17; Rukre 4.14-15

¹⁴ Nhûm pre ra mêmô ixpê Ijaew o amnhîptâr xwÿnh pê Eroxa Juãw Paxis kot mêmôj tã kãm ãkjêr mÿrapê nhûm pre ra unê nê haxà. Tã kot haxâr jakành pê nhûm Jejus ma akupÿm pyka pê Garirej wÿr môm nê kamã mêmô kãm Tîrtûm kapêr jarênh o pa. Nê Tîrtûm kot mêmô hwÿr mênh ã amnhî jarênh o pa. Nom te nhãm mêmô jarênh pyræk o amnhî jarê ¹⁵ nê mêmô kãm:

—E na Tîrtûm kãm mêmô ato hkra hprãm nê. Jakamã na ra kot mêmô awÿr ãm xwÿnhhta mêmô nhûm mêmô awÿr wrÿ. Kwa mêmô tokyx kapêrja ma nê amnhî kaxyw hkôt ajamaxpêr. Hãmri nê ate amnhî tomnuj kaga nê Tîrtûm kôt mãn amnhî nhîpêx o ri apa. Kot kaj mêmô ã amnhî nhîpêx anê nhûm Tîrtûm amnhî tã mêmô apumu nê mêmô ato hkra. Anê.

Jejus kot amnhî kôt tep pynênh xwÿnh wa hwÿr ã harênh

Matêwre 4.18-22; Rukre 5.1-11

¹⁶ Tã nhûm Jejus ma Garirej kamã gô rax pê Garirej mÿri môm. Hãmri nê Simãw mêmô htô Andreja wa hwÿr kato nê wa omu. Wa kot tep pynênh xwÿnh jakamã na pre wa gôx kãm kryhti rênh o xa nhûm Jejus wa hãnh tẽ nê wa omu. ¹⁷ Hãmri nê amnhî kôt wa kuwÿ nê wa kãm:

—E war amnê ixkôt tẽ nê ixkôt mãn apa. War apê tep kanhêr rax o ri apa xwÿnh tã kêr ka war axápênhhta kaga nê hpãnhã ixkôt apa ho apa. Kot paj tanhmã war akrã hto ka wa tep pynênh pãnhã ma ri mêmô hkôt mêmô kãm ixkapêr jarênh o ri apa. Mêmô ohtô nê mêmô kot war amar nê Tîrtûm kôt amnhî xunhwÿr kaxyw. Jao kot kaj te war ate tep kanhêr rax nê Tîrtûm mã ôr pyræk o amnhî nhîpêx.

Anhÿr o wa kãm kapêr. ¹⁸ Hãmri nhûm wa kuma nê kryhti kaga nê ma hkôt pa ho pa kurê kumrêx. ¹⁹ Hãmri nê mêmô gô mÿri môm nê Jepetew kra Xiakre mêmô htô Juãw wa hwÿr kato nê wa omu. Nhûm wa kormã hipêêxà nhîhkô hã pâr kãm kryhti ho mex o wa nhÿ nhûm Jejus wa mêmô hwÿr kato nê wa omu nê amnhî kôt wa kuwÿ. ²⁰ Hãmri nhûm wa kuma

ně ma hkôt pa ho pa. Pàr kre kamã mẽ kãm àpênh xwỳnhjê ri hipêêxà re nẽ ma Jejus kôt pa ho pa.

Jejus kot mẽhõ nẽ mẽkarõmnuti janor ã harênh

Rukre 4.31-37

²¹ Hãmri nhũm Jejus mẽ hkôt mẽ pa ho mẽ pa xwỳnhjaja ma krĩ pê Kapanau hwỳr mỗ hãmri nẽ hwỳr pøj. Hãmri nhũm mẽ ixpê Ijaewjê nhõ arĩgromnu pê sap kato nhũm Jejus ma Tĩrtũm kapêr o mẽ ahkre xà hã ixkre hwỳr tẽ nẽ hwỳr axà. Hãmri nẽ kamã mẽ kot Tĩrtũm kapêr mar kaxyw axpên wỳr mẽ pikuprõnh xwỳnhjê jahkre ho nhỹ. ²² Nẽ mẽ ahkre mex nhũm mẽ kuma nẽ tee ri hamaxpêr nẽ axpên mã:

—Hêxta waa nẽ. Pêr ãm hãmri na ã mẽ pamã mẽmoj jarênh anẽ. Tĩrtũm kapêr tũm o mẽ ahkre xwỳnhjê rom àhpumunh tỳx kôt na hprĩ hã mẽ pajahkre mex nẽ. Anẽ.

²³ Hãmri nhũm mẽhõ myja mẽ hwỳr axà. Na pre ra mẽkarõmnuti hwỳr axà nhũm ỹ hã amnhĩ tomnuj o pa. Hãmri nẽ mẽ hwỳr axà nẽ Jejus pumu nẽ kãm kapêr. Nom tãm kapêr kêt nẽ. Mẽkarõmnuti nhỹ hã kãm kapêr. Kàx pê kãm kapêr nẽ kãm:

²⁴ —Pa Jejus? Kwa tanhmã mẽ ixto hkôt nẽ. Ixte apumunh mex. Apê Najare nhõ xwỳnh tã mãânẽn apê Tĩrtũm kot mẽ ixwỳr amênh xwỳnh maati na ka. Tĩrtũm rũm na ka pre mẽ ixwỳr wrỳ. Kwa xà kot kaj mẽ ixto ajapêx nà? Anẽ.

²⁵ Hãmri nhũm kãm:

—Tk. Kwa anhĩkrê nẽ myta kurũm akator kurê kumrêx. Anẽ.

²⁶ Hãmri nhũm kuma nẽ àmra htỳx kãm myja o àk tỳx nẽ kêp kato nẽ ma tẽ nhũm akupỹm mex. ²⁷ Hãmri nhũm mẽ piitã omu nẽ kamã no puma nẽ. Hãmri nẽ xatã axpên mã harênh o pa nẽ axpên mã:

—Kokỹỹ. Jejus na pre àhpumunh tỳx kôt mẽkarõmnuti jano nhũm kuma nẽ mẽ kurũm hapôx kurê kumrêx. Anẽ.

²⁸ Hãmri nhũm Garirej kamã mẽ piitã ri axpên mã harênh o pa.

Jejus kot akupỹm Simãw xupãnhgêx o mex ã harênh

Matêwre 8.14-15; Rukre 4.38-39

²⁹ Tã nhũm Jejus Xiakre mẽ Juãw mẽrohã Tĩrtũm kapêr o mẽ ahkre xà hã ixkre rũm kato nẽ ma Simãw mẽ Andre wa òrkwỹ hwỳr mỗ. ³⁰ Hãmri nẽ mẽ hwỳr agjê. Nhũm Simãw xupãnhgêxja ra à nẽ hkà kagro htỳx nẽ nõ nhũm Jejus mẽ hwỳr axà nhũm mẽ kãm harê. ³¹ Hãmri nhũm mẽ kuma nẽ hwỳr axà nẽ omu nẽ hpa hã kupy nẽ kànhmã ỹr nhũm hkà hakry nẽ akupỹm mex kurê kumrêx. Hãmri nẽ kànhmã xa nẽ tẽ nẽ mẽ kãm mẽmoj nhĩpêx nhũm mẽ hkur o hkrĩ.

Jejus kot akupỹm mẽ hkwỳjê ho mex ã harênh

Matêwre 8.16-17; Rukre 4.40-41

³²⁻³³ Tã nhũm myt axà nhũm mẽ ohtô nẽ Simãw mẽ Andre wa òrkwỹ hwỳr mra nẽ hakwakrem Jejus ã akuprõ. Nẽ amnhĩ kôt mẽ à xwỳnhjê ho mra. Nẽ mẽkarõmnuti kot mẽ hwỳr gjêx xwỳnhjaja nhũm mẽ hwỳr mẽ o mra. ³⁴ Hãmri nhũm Jejus mẽ omu nẽ akupỹm ahpỹnhã mẽ piitã mẽ ho mex pa. Nẽ mẽkarõmnutija nhũm mẽ kurũm mẽ hapôj. Mẽkarõmnuti kot kêp Tĩrtũm Kra hã omunh tã no nhũm kapêr nẽ mẽ hkurê nẽ mẽ hano nhũm mẽ kapêr kêt rãhã mẽ kurũm hapôj nẽ ma mra.

Jejus kot Tĩrtũm mã amnhĩ jarênh ã harênh

Rukre 4.42-44

³⁵ Tã nhũm apkati nhũm kormã myt kator kêt ri nhũm Jejus kànhmã nhỹ nẽ tẽ nẽ kato. Hãmri nẽ ma kapôt ã ahte nhỹhỹm tẽ nẽ nhỹri Tĩrtũm mã amnhĩ jarênh o nhỹ.

³⁶ Hãmri nhũm Simãw Pêtre mẽ hkwỳjaja hkrã hapôj nẽ tee ri ixkre kamã hapêr. Hãmri nẽ hapôj nẽ ma hpri jakop o mỗ. ³⁷ Hãmri nẽ hwỳr kato nẽ omu nẽ kãm:

—Pa. Kwa na mẽ piitã tee ri ajapêr. Anẽ.

³⁸ Hãmri nhũm mẽ kãm:

—Tô ma pu mẽ mỗ. Nom kot puj mẽ akupỹm mẽ hwỳr pamõr kêt nẽ. Kot puj mẽ hpãnhã nhãm krĩ hkwỳ hkôt măn ri pajapôj. Pa kamã mẽ kãm Tĩrtũm kapêr jarê măn.

Ja kaxyw na pre mẽ awỳr inhmẽ. Krĩ piitã hkõt mẽ pa xwỳnhjaja kot kapẽr mar kaxyw. Anẽ.

³⁹ Hãmri nẽ mẽ ma axte Garirej kamã krĩ hkwỹ hkõt pa. Nẽ krĩ piitã hkõt Tĩrtũm kapẽr o mẽ ahkre xà hã ixkre kamã mẽ kãm Tĩrtũm kapẽr jarẽnh o pa. Nẽ mẽ kurũm mẽkarõmnuti japõx o pa.

Jejus kot akupỹm mẽhõ hkàmnu ho mex ã harẽnh

Matêwre 8.1-4; Rukre 5.12-16

⁴⁰ Tã nhũm mẽhõ hkà hkro xàpêr tỳx xwỳnhja Jejus wỳr tẽ. Hãmri nẽ hã hpijaàm kaxyw kutã hkõnkrã ho tẽm nẽ nhỹ nẽ kãm:

—Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka akupỹm amã ixto mex prãm nẽ mãmri akupỹm ixto mex. Anẽ.

⁴¹ Hãmri nhũm kuma nẽ kamã ukapri nẽ hã ìhkra xi nẽ kãm:

—Nà kot paj ato mex. E akupỹm akà mex.

⁴² Anhỳrja kõt nhũm akupỹm hkà mex kurê kumrẽx. ⁴³⁻⁴⁴ Hãmri nhũm Jejus kãm kapẽr kãm hihtỳx nẽ hano nẽ kãm:

—E kër ka amnhĩ tã akwỳjê mã tanhmã ijarẽnh to hkêt rãhã ma patre hwỳr tẽ kê akupỹm akà mex ã apumu. Hãmri ka amnepêm Mojes kot mẽ ate akupỹm mẽ amex ã Tĩrtũm mã tanhmã amnhĩ nhĩpêx to hã karõ xwỳnhhta ka kãm ho anẽ. Kê mẽ piitã akupỹm akà mex ã apumu. Anẽ.

⁴⁵ Hãmri nhũm kuma nẽ ma tẽ. Nom axtem nẽ ma mẽ piitã mẽ kãm amnhĩ jarẽnh o ri mra. Jejus kot kãm karõ xà kuhpa hã ma mẽ kãm amnhĩ jarẽnh o ri mra. Jakamã nhũm mẽ kuma nẽ piitã nhỹhỹnh Jejus wỳr mra. Mẽ ohtõ rax kumrẽx nẽ hwỳr mra nhũm tee ri mẽ noo mã nhỹri krĩm pa mã. Hãmri nẽ ãm krĩ pu hã ri pa htã nom nhũm mẽ arĩ ohtõ nẽ hwỳr mra.

2

Jejus kot akupỹm ì kamã htyk xwỳnh o mex ã harẽnh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nẽ hkõt mẽ pa ho mẽ pa xwỳnhjê mẽrohã ma akupỹm Kapanaũ wỳr mõ. Hãmri nẽ hwỳr põj nhũm mẽ piitã nhỹri mẽhõ nhõrkwỹ kamã hpõx kõt harẽnh ma nẽ hã akuprõ. ² Ra hã pikuprõnh rax nẽ ixkre nhĩtom pa. Nhũm mẽ hkwỹjaja kapõt ã kuhê nhũm Jejus Tĩrtũm kapẽr o mẽ ahkre ho nhỹ. ³ Hãmri nhũm mẽmyjaja kệp kwat nẽ ì kamã htyk xwỳnhja mỳ nẽ Jejus kot ho mex kaxyw hwỳr o tẽ. ⁴ Hãmri nẽ tee ri hã mẽ pikuprõnh rax xwỳnhjê pumu nẽ nhỹhỹnh kot hwỳr o ãr kaxyw tee ri amnhĩ kukamã ho ukapi ho pa. Hãmri nẽ hamaxpêr nẽ ixkre nhĩmõk po hwỳr ho api nẽ himõk kwỳ grã nẽ hkõt ì kamã htyk xwỳnhhta nõr xà mẽrohã hkõt Jejus wỳr haxà. ⁵ Hãmri nhũm mẽ kot kaxyw kãm hamaxpêr tỳx ã mẽ omu nẽ ì kamã htyk xwỳnhhta mã kapẽr nẽ kãm:

—Pa? Kwa tee ri amnhĩ kukamã ajamaxpêr kêt nẽ. Na pa ra anê ate amnhĩ tomnuj piitã ho ijapêx. Kot paj axte kãm ijamaxpêr kêt nẽ. Anẽ.

⁶ Hãmri nhũm Tĩrtũm kapẽr tũm o mẽ ahkre xwỳnhjaja tee ri ã kapẽr anhỳrja ã kuma nẽ hamaxpêr o:

⁷ —Tk. Kwa pêr mẽhõ myti mỳj kệp Tĩrtũm kêt tã te kapẽr pyræk o amnhĩ nhĩpêx nẽ mẽ nê mẽ kot amnhĩ tomnuj o hapêx ã amnhĩ jarẽ. Tĩrtũm pix kot mẽ nê mẽ kot amnhĩ tomnuj o hapêx kênã. Anẽ.

⁸ Nom nhũm Jejus mẽ hamaxpêr kõt mẽ omunh mex nẽ. Mẽ kot Tĩrtũm pix kot mẽ nê mẽ kot amnhĩ tomnuj rênh nẽ akupỹm mẽ ã xwỳnhjê ho mex kõt mẽ hamaxpêrja nhũm mẽ omunh mex nẽ mẽ kãm:

—Kwa mẽ ã ajamaxpêr anhỳr kêt nẽ. ⁹ Ixte mẽ nê mẽ kot amnhĩ tomnuj o ijapêx par ã amnhĩ jarẽnh tã mẽ ate mẽ ano ho ja kõt ixpumunh kêt jakamã na ka htem ja hã ixkõt ajamaxpêr kêt nẽ. Nom kot paj mẽ anoo mã akupỹm myja o mex. Ka mẽ ja hã ixpumu hãmri nẽ ixkõt ajamaxpêr kurê kumrẽx. ¹⁰ Ixpê Tĩrtũm kot mẽ awỳr inhmẽnh xwỳnh na

pa. Ixte mẽ anê mẽ ate amnhĩ tomnuj rênh kaxyw na pre mẽ awỳr inhmẽ pa wrỳ. Tã mẽ ate ja kôt ixpumunh kaxyw kot paj mẽ anoo mã mytija ho mex.

¹¹ Anhỳr o mẽ kãm kapẽr hãmri nê ĩ kamã htyk xwỳnhta mã kapẽr nê kãm:

—E kànhmã xa nê anõr xà mỳ nê ma akupỳm anhõrkwỳ hwỳr tẽ. Anẽ.

¹² Hãmri nhũm kuma nê kànhmã ãm kurê kumrẽx. Hãmri nê akupỳm mex ã amnhĩ pumu nê hkĩnh tỳx nê nõr xà mỳ nê mẽ noo mã kato nê ma akupỳm õrkwỳ hwỳr tẽ. Hãmri nhũm mẽ kot omunh xwỳnhjaja amnhĩ jaêr pê omu nê no hapõx kaxyw nê hkõt omunh o kuhê nê kamã no puma htyx nê. Nê tee ri omu nê axpẽn mã:

—Hêxta waa nê. Aa mẽ pahte ã mēhõ kot amnhĩ nhĩpêx anhỳr ã omunh kêt kumrẽx tã jarãhã ja pumu. Nà Tĩrtũmja ãm mex o mex. Anẽ.

Jejus kot amnhĩ wỳr Rewi hwỳr ã harẽnh

Matêwre 9.9-13; Rukre 5.27-32

¹³ Hãmri nhũm Jejus mẽ ma mra nê akupỳm gõ rax pê Garirej wỳr mra nê gõ mỳ ri pa. Hãmri nhũm mẽ piitã omu nê hwỳr mra nê hã akuprõ nhũm Tĩrtũm kapẽr o mẽ ahkre ho nhỹ. ¹⁴ Hãmri nê mẽ kure nê axte hkõt mẽ pa ho mẽ pa xwỳnhjê mērohã ma axte mra nê nhỹri Apew kra Rewija pumu. Rõm kãm mẽ õ pahĩti mã amnhĩ kwỳjê pê kàxpore hkwy jamỳnh xwỳnh na pre. Jakamã nhũm àpênh o nhỹ nhũm Jejus hãnh tẽ nê omu nê amnhĩ kôt kuwỳ nê kãm:

—Pa? E kwa axàpênhta kaga nê hpãnhã amnẽ mẽ ixkõt mãn ri apa ho apa. Anẽ.

Hãmri nhũm kuma nê àpênh kaga nê ma hkõt mō nê hkõt pa ho pa.

¹⁵ Hãmri nhũm mẽmo arĩgro hã nhũm Rewi nhõ mẽ apkur xà hã mẽõ rax nê. Jakamã nhũm amnhĩ nhõrkwỳ hwỳr hkràmnhwỳjaja nê Jejus mẽ hkõt mẽ pa ho mẽ pa xwỳnhjê hwỳ. Hãmri nhũm mẽ ma hkõt mra nê õrkwỳ hwỳr agjê nê kuri apkur o hkrĩ. Nê mãânẽn mẽ kêp Rõm nhõ pahi mã mẽ kêp kàxpore hkwy jamỳnh xwỳnh kwỳ nê mẽ ohtõ nê mẽ kutã apkur o hkrĩ. ¹⁶ Hãmri nhũm Tĩrtũm kapẽr tũm o mẽ ahkre xwỳnh kwỳ pê Parijew nhõ xwỳnhjaja mra nê mẽ apkur ã mẽ omu. Nê tee ri mẽ hkaêx ã Jejus pumu nê hkõt mẽ pa ho mẽ pa xwỳnhjê hwỳr agjê nê hã mẽ kãm akir nê mẽ kãm:

—Kwa na htem mẽ kot amnhĩ tomnuj xwỳnhjê kutã apkur kêt tã ka mẽ Jejus mẽ apimràatã axtem nê mẽ kutã axàpkur o akrĩ. Mẽ ate amnhĩ to mex ronhỹx ka mẽ kutã axàpkur kêt nê. Anẽ.

¹⁷ Hãmri nhũm Jejus amnhĩ tã mẽ kapẽr ma nê mẽ kãm:

—Tk. Ixte tãm mẽ unhwỳr kaxyw ixte mẽ kutã ixàpkur o inhỳr kênã. Xà na hte tõtõ mẽ mex xwỳnhjê hwỳr mra nê mẽ hkane? Nà na hte ãm mẽ à xwỳnhjê pix kane ho pa. Ra mẽ ate ja pumunh mex. Ja pyrã nê na pa pre mẽ kot amnhĩ to mex xwỳnhjê hwỳr ixwryk kêt nê. ãm mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nê jajê kutã ixàpkur o nhỹ. Mẽ ate amnhĩ tomnuj mã anhũrer nê hpãnhã tãm amnhĩ nhĩpêx o apa kaxyw na pa pre mẽ awỳr wrỳ nê mẽ akamã ixukapĩ ho ri mẽ akõt ixpa. Tã ka mẽ atỳx ã ixte mẽ kutã ixàpkur anhỳrja ã ixto akapẽr anẽ. Anẽ.

Mẽ kot Tĩrtũm mã amnhĩ jarẽnh kaxyw mẽõ kaga hã mẽ harẽnh

Matêwre 9.14-17; Rukre 5.33-39

¹⁸ Juãw Paxis kôt mẽ pa xwỳnhjê mẽ Parijew nhõ xwỳnhjaja na prem tõhã Tĩrtũm mã amnhĩ jarẽnh kaxyw nê apkur kêt rãhã kamã kãm amnhĩ jarẽ. Nom nhũm Jejus kôt mẽ pa ho mẽ pa xwỳnhjaja na prem kãm amnhĩ jarẽnh prãm nê apkur kãm amnhĩx kãm amnhĩ jarẽnh o pa. Jakamã nhũm ljaew kwỳjaja tee ri ja hã mẽ omu nê Jejus wỳr mra nê mẽ hã hkukja nê kãm:

—Pa? Kwa aprĩ hã mẽ inhmã mẽmoj jarẽ. Na hte Parijew nhõ xwỳnhjê mẽ Juãw Paxis kôt mẽ pa xwỳnhjaja tõhã Tĩrtũm mã amnhĩ jarẽnh kaxyw nê apkur kêt rãhã kãm amnhĩ jarẽ. No akõt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarẽnh o pa. Kwa mo na htem mẽ urak nê tõhã apkur kêt rãhã kãm amnhĩ jarẽnh kêt nê? Anẽ.

¹⁹ Hãmri nhũm Jejus mẽ kãm:

—Tk. Mo kaxyw kot mẽ ã amnhĩ nhĩpêx anê? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã na htem hkĩnh nê pa. Kormã ixte mẽ hkôt ixpa kênã kot kêt mẽ Tĩrtũm mã kapêr kaxyw nê ho apkur kêt kamã kãm amnhĩ jarê. Xà na htem hkrãmnhwỳ hã hkĩnh kaxyw hã akuprô nê hkaprĩ nê apkur kêt nê mỳr o hkrĩ? Nà na htem hã akuprô nê hkĩnh nê apkur rũnh nê. Ja pyrã nê na hte ixkôt mẽ pa ho mẽ pa xwỳnhjaja ixkôt kormã ãmnhĩx hkĩnh nê apkati mẽ apkur kãm kãm amnhĩ jarênh o pa. ²⁰ Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ rĩ kormã hkaprĩ htỳx kãm ho apkur kêt rãhã Tĩrtũm mã amnhĩ jarê. Anê.

Nhũm pre ã Jejus mẽ kãm hkôt ri mẽ pa ho mẽ pa xwỳnhjê jarênh anê hãmri nê axte mẽ kãm kapêr nê mẽ kãm:

²¹⁻²² —Mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem inhma nê ãm inhma. Kwa mẽ inhma nê mẽ ate amnhĩ nhĩpêx tũm gryk ã ixkaga hkêt nê. Anê.

Jejus kêp arĩgromnu hpãm ã kot amnhĩ jarênh

Matêwre 12.1-8; Rukre 6.1-5

²³ Tã nhũm mẽ ixpê Ijaew nhõ arĩgromnu pê sap kato nhũm Jejus mẽ hkôt mẽ pa ho mẽ pa xwỳnhjaja ma nhỹhỹm mỗ. Ma mẽ hpur kahti hkôt nhỹhỹm mỗ nhũm hkôt mẽ pa ho mẽ pa xwỳnhjaja ra kãm prãm nê. Hãmri nê prãm xàj purta kamã amnhĩm mẽmo hy te kot harôj pyrãk xwỳnhhta kwỳ rê nê ma Jejus kôt hkanhar o mỗ. Mẽ ixpê Ijaewjaja na pa htem axpên pur kãm ixpa nê ã amnhĩ nhĩpêx anê. ²⁴ Hãmri nhũm Parijew nhõ xwỳnhjaja mẽ hkôt mra nê tee ri ja hã mẽ omu nê Jejus wỳr mra nê mẽ hã kãm akir nê kãm:

—Kwa jarãhã sap tã akôt mẽ pa ho mẽ pa xwỳnhjaja mẽmo hy hkwỳ rê nê akôt hkanhar o pa. Tĩrtũm kapêr ã kagã htũm kot mẽ panhõ arĩgromnu hã mẽ pahte mẽmoj nhĩkênh nê mẽ pahkurê kênã. Kwa mẽ kãm anê kê mẽ ã amnhĩ nhĩpêx anhỹr kêt nê. Anê.

²⁵⁻²⁶ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xàn ka mẽ kormã Tĩrtũm kapêr ã kagã htũm kamã pahĩ Tawi kot tanhmã amnhĩ nhĩpêx to kamã harênh nê mar kêt nê? Kormã Apiatar kêp patre maati ri na pre Tawi hkôt ri mẽ pa xwỳnhjê mẽ prãm xàj Tĩrtũm mã amnhĩ jarênh xà hã ixkre hwỳr agjê. Hãmri nhũm Apiatar mẽ kãm prãm tỳx ã mẽ omu nê mẽ kamã ukaprĩ nê mẽ kãm mẽmoj gô. Mẽ kot Tĩrtũm noo mã pãwti jaxwỳr xwỳnhhta nhũm mẽ kãm kugô nhũm mẽ kuku. Tĩrtũm kapêr ã kagã htũm kot ja nê mẽ kurê htã nhũm mẽ kãm prãm tỳx ã mẽ omu nê mẽ kamã ukaprĩ xàj mẽ kãm kugô. Patre pix kot ja hkur kaxyw tã nhũm mẽ kãm kugô nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nê. Patre kot mẽ kamã ukaprĩ nê mẽ kãm ôr nhũm ja hã omu nhũm ja kãm mex nê. Anê.

Hãmri nê mẽ kãm:

²⁷ —Na pre Tĩrtũm panhĩ kumrêx o kato nê kormã mẽ hkôkôt nê Tĩrtũm mã hamaxpêr o hkrĩ kaxyw arĩgromnu ho kato. No na pre arĩgromnu kumrêx o kato nê hpãnhã kaxyw panhĩ ho kator kêt nê. ²⁸ Tã pa na pre Tĩrtũm mẽ akaxyw ixãm nê mẽ awỳr inhmê. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karô ho ri ixpa. Jakamã kwãr mẽ mãmri mẽmojta rê nê ixkôt hkanhar o mỗ. Anê.

3

Jejus kot akupỹm ãhkra grã xwỳnh o mex ã harênh

Matêwre 12.9-14; Rukre 6.6-11

¹ Tã nhũm mẽ ixpê Ijaewjê nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkreja wỳr tẽ nê axã nê kamã Tĩrtũm kapêr o mẽ ahkre ho nhỹ. Nhũm mẽhõ my ãhkra grã xwỳnhja mẽ ãhkô hã mar o nhỹ. ² Nhũm Parijew nhõ xwỳnhjaja kãm mẽ hkrãhtũmjê mã Jejus o kapêr prãm jakamã htãnopxar o kuhê nê axpên mã:

—E kwa pu mẽ jar pakuhê nê kot tanhmã amnhĩ nhĩpêx to hã omu. Xà koja jarãhã ìhkra grà xwỳnh mỳj o mex nà? Jarãhã arĩgromnu kênã kot kêt kãm ìhkra ho mex. Koja ho anê nê ra Tĩrtũm kapêr tũm nhĩrôp xa. E pu mẽ xa nê hã omu. Anê.

³ Hãmri nhũm Jejus ìhkra grà xwỳnhhta pumu nê kãm:

—Pa? E kànhmã xa nê amnê ixwỳr tẽ. Anê.

Hãmri nhũm kànhmã xa nê hwỳr tẽ nê mẽ piitã mẽ noo mã xa. ⁴ Hãmri nhũm Jejus mẽ kot omunh o hkrĩ xwỳnhjê hwỳr rĩt nê arĩgromnu hã tanhmã mẽ kot amnhĩ nhĩpêx to hã mẽ hkukja nê mẽ kãm:

—E mẽ inhma. Tanhmã na htem arĩgromnu hã axpên nhĩpêx to wehe? Xà kot ka mẽ arĩgromnu hã axà htỳx nê amex prãm xàj ma mẽhõ hwỳr amnhĩ to tẽ nhũm apumu nê apkatim arĩgro mex jamãr pê akane hkêt ka ty nhũm ja amã mex nê? Rỳ nhũm apumu nê tanhmã atomnuj to nê akupỹm amnhĩ nê ajano nhũm ja amã mex nê? Nà koja ã anhĩpêx anê nhũm ja amã mex kêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpên nhĩpêx ã mẽ pamã karõ hto? Xà kot puj mẽ hã axpên kãm paxukaprĩ rỳ hã mẽ pamã axpên kurê ho papa? Xà kot puj mẽ hã mẽmoj punuj pê mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarê. Anê.

Ra kot hprĩ hã mẽ hamaxpêr ã mẽ omunh mex nê ã hêx rom mẽ hkukjêr anê. Nom nhũm mẽhõ tanhmã kutã kãm nê hkêt nê. Mẽ ãm piitã akryk mar pê omunh o hkrĩ. Mẽ kot tanhmã kãm nê nhũm ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm nom akryk mar o hkrĩ. ⁵ Hãmri nhũm Jejus tee ri mẽ ukaprĩ hkêt ã mẽ omu nê hkaprĩ nê mẽ kamã gryk nê. Hãmri nê ìhkra grà xwỳnhja mã kãm:

—Tk. Mẽ kot tanhmã inhmã ujarênh tore hã. E anhĩhkra katàt. Anê.

Hãmri nhũm ìhkra katàt nê akupỹm mex kurê kumrêx. ⁶ Hãmri nhũm Parijew nhõ xwỳnhjaja tee ri ã Jejus kapêr anhỹrja ã kuma nê kot sap ã akupỹm myta o mex ã omu nê kamã gryk tỳx nê. Nê hapôj nê ma pahi Erox kôt mẽ pa xwỳnhjê hwỳr mra nê mẽ kãm harê nê tanhmã hã axpên kukjêr to nê axpên mã:

—Kwa tanhmã kot puj mẽ ho? Na ã kapêr anhỹrja o mẽ pahto kapêr punuj nê. Te hkĩnhã mẽ papamjaja mẽ kamã paxukaprĩ hkêt pyrãk ã mẽ pajarê. Koja mẽ pahkwỳjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr o pa. Ja pymaj kwa tanhmã kot puj mẽ ho? Anê.

Mẽ ohtô nê kot Jejus kapêr mar kaxyw hwỳr mrar ã mẽ harênh

Matêwre 4.23-25; Rukre 6.17-19

⁷⁻⁸ Tã nhũm Jejus mẽ hkôt mẽ pa ho mẽ pa xwỳnhjê mẽrohã ma akupỹm gô rax wỳr mō nhũm mẽ ohtô nê omu nê ma hkôt mra. Pyka pê Garirej mẽ Jutej wa kurũm nê krĩ pê Jerujarê rũm nê pyka pê Itumêj rũm nê pyhti pê Jotãw nhĩkjê hã krĩ hkwy rũm nê krĩ hkwy pê Xir mẽ Sitõ wa pu hã krĩ hkwy rũm ohtô nê ma hwỳr mra. Na prem ra harênh ma nê nhỹhỹm mōr ã omu nê axpên mã harênh o:

—E kwa tokyj pu mẽ ma hwỳr mẽ ã xwỳnhjê o mō kê akupỹm mẽ ho mex. Anê.

Hãmri nê hwỳr mẽ o mra nê hã pikuprõnh rax nê. ⁹⁻¹⁰ Hãmri nhũm Jejus akupỹm mẽ ã xwỳnhjê ho mex. Gô mỳri xa nê tanhmã mẽ ho mex to. Jakamã nhũm mẽ axte ohtô nê hwỳr mra nê piitã kot htok nê akupỹm mex kaxyw hwỳr axpên nhĩgã. Hãmri nhũm tee ri amnhĩ wỳr mẽ omu nê hkôt mẽ pa ho mẽ pa xwỳnhjê mã:

—Kwa mẽ ma mra nê amnê kanõre jêt mỳj kjênh o tẽ nê jar inhmã anhõ. Kê mẽ ixtã axpên nhĩgãnh o ijanênh japêr pa hwỳr axà nê amỳm mẽ ho hpỳnh nê akupỹm mẽ ho mex. Anê.

Hãmri nhũm mẽ kuma nê ma mra nê kãm ja o tẽ nê kunhõ. ¹¹ Na pre mẽkarõmnuti hkwyjja mẽ hkwyjê hwỳr agjê. Jakamã nhũm mẽ Jejus pumu nê mẽkarõmnuti nhỹ hã kêp Tĩrtũm Kra hã omunh kurê kumrêx. Hãmri nê hã hpijaàm kaxyw kutã hkõnkrã ho hkrĩ nê mẽkarõmnuti nhỹ hã kãm kapêr nê kãm:

—Kwa apê Tĩrtũm Kra na ka. Anê.

¹² Hāmri nhūm tee ri amnhĩ tā mẽ kuma. Kām mẽkarōmnuti ã kot harēnh anhỹr prām kêt nē. Ām mẽ piitã mẽ kot kapēr mar nē kot amnhĩ nhĩpêx ã omunh pê kêp Tĩrtũm Kra hã omunhja na kãm hprãm. Jakamã nhūm mẽkarōmnuti ã harēnh anē nhūm ja nē mẽ kãm kapēr nē mẽ kãm:

—Tk kwa nà kêt ka mẽ tanhmã ijarēnh to hkêt nē. Anē.

Jejus kot amnhĩ kaxyw mẽ kêp 12 rēnh ã harēnh

Matêwre 10.1-4; Rukre 6.12-16

¹³ Tã nhūm Jejus hkôt mẽ pa ho mẽ pa xwỳnh kwỳjê mã kãm:

—E pu mẽ ma mō nē krāhakỳx mũj ã api. Anē.

Hāmri nē mẽ ma hwỳr mō nē hã api ¹⁴ nhūm Jejus amnhĩ kaxyw mẽ ho 12 nē mẽ kurê. Mẽ kot ma ã hã Tĩrtũm kapēr o mẽ ahkre ¹⁵ nē ã hã mẽ nē mẽkarōmnuti janor o pa kaxyw. ¹⁶ ã mẽ hixi kot anhỹr.

Na pre ja kêp Simãw no nhūm Jejus hpãnhã hã hixi hõ mẽ nhūm hpãnhã mãänēn kêp Pêtre.

¹⁷ Nē hkôt Jepetew kra Xiakre mẽ htõ Juãwja wa kuta.

Hāmri nē kot Simãw nhĩpêx pyrã nē wa hã hixi hõ mẽ nhūm wa hpãnhã mãänēn kêp Poanes. Wa kot amnhĩ prêprêk jakamã nhūm ã wa hã hixi mēnh anē.

¹⁸ Nē hõ pê Andreja ta.

Nē hkôt Andre htõ Firiptija ta.

Nē hkôt Patoromewja ta.

Nē hkôt Matêwreja ta.

Nē hkôt Tomasja ta.

Nē hkôt Arpêw kra Xiakreja ta.

Nē hkôt Tatewja ta.

Nē hkôt Simãw òja ta.

Simãwja na pre kãm mẽ ixpê Ijaewjê nhõ pika pê Ijaew kĩnh tỳx nē. Jakamã na pre kãm nhãm pika hõ nhõ pahi kot mẽ ho amnhĩptar prãm kêt nē pa.

¹⁹ Nē hkôt Jut Kariotja ta.

Kormã kot mẽ kãm Jejus kurê xwỳnhjê nhĩhkram òr mã nhūm Jejus kot amnhĩ kukamã omunh mex tã mẽ hkôt amnhĩ kaxyw kuta.

Ā mẽ kot ã hã mẽ ahkre o pa kaxyw mẽ rēnh xwỳnhjê nhĩxi kot anhỹr.

Jejus mẽ mẽkarōmnuti wa harēnh

Matêwre 12.22-32; Rukre 11.14-23, 12.10; Juãw 10.19-21

²⁰ Hāmri nhūm Jejus hkôt mẽ pa ho mẽ pa xwỳnh kwỳjê rēnh pa nē ma amnhĩ kôt mēhõ nhõrkwỹ hwỳr mẽ o mō. Na prem apkur kêt ry rax nē ra kãm prãm tỳx nē nhūm ma mẽ apkur kaxyw amnhĩ kôt mẽ o mō. Hāmri nhūm axte mẽ à xwỳnhjaja mẽ omu nē Jejus wỳr pikuprõnh rax nhūm mẽ tokyx apkur kêt nē. ²¹ Hāmri nhūm Jejus katorxã nē htõjaja tee ri mẽ apkur kêt ã mẽ harēnh ma nē axpēn mã:

—Kwa măn ãm ra tanhmã hkrã amnhĩ to nà? Hã na mẽ kot omunh kaxyw hã hpikuprõnh rax jakamã nhūm kormã apkur kêt nē. E tokyx pu mẽ ma hwỳr mra nē omu nē mẽ kêp utã nē akupỹn amnhĩ kôt o mō. Anē.

²² Rôm nhūm Tĩrtũm kapēr tũm o mẽ ahkre xwỳnhjaja Jerujarē rũm Jejus wỳr mõn pøj. Hāmri nē tanhmã ho kapēr punuj to. Kêp mẽkarōmnuti hkwy hã hkamnhĩx jakamã harēnh o:

—Tk pēr hinhu nhĩkõoti nhỹ hã na hte mẽ nē amnhĩ kwỳjê japõx o pa. Anē.

Hinhu nhĩkõoti nhĩxi hõ pê Satanasti nhūm prem ã hã Jejus kot amnhĩ nhĩpêx o pa hã hkamnhĩx. ²³ Hāmri nhūm amnhĩ tã mẽ omu nē amnhĩ wỳr mẽ kãm hpa ho apê nē mẽ kãm amnhĩ jarē. Nom amnhĩ tã kuxi nē mẽ kãm mẽmoj jarē nē mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwỳnhjaja. Xà na hte Satanasti mẽ nē amnhĩ kwỳjê janor o pa? Nà na hte ã amnhĩ nhĩpêx anhỹr kêt nē.

²⁴ Na hte pika nhõ xwỳnhjaja axpēn kutã amnhĩ xunhwỳ nē axpu hāmri nē anhrã nē

ma ahpÿnhã ri pa nê amnhĩ krã hkôt ri tanhmã amnhĩ to ho ri pa. Jakamã nhũm mẽ õ pahija mẽ hamãr o pa hkêt nê. ²⁵ Nê krĩ nhõ xwÿnhjaja haxwÿja. Mẽ kot axpên to hkwÿ xwÿnhjaja koja mẽmoj tã axpên kãm gryk nê axpên kutã amnhĩ xunhwÿ hãmri nê anhrã nê ahpÿnhã pa hãmri nhũm mẽ õ pahi tee ri kãm mẽ hamãr o pa hprãm. Mo hkwÿjaja kot kêt ri mẽ hamãr o pa? Nom tãm kot amnhĩ nê mẽ hanoore hã. Mẽ tãmjaja na prem axpên kãm gryk nê anhrã nê ahpÿnhã pa. ²⁶ Tã ja pyrã nê ixte Satanasti nhÿ hã tanhmã amnhĩ nhĩpêx to ho ixpa ronhÿx pa ri mẽ kurũm amnhĩ kwÿjê japôx o ri ixpa hkêt nê. Mẽkarõmnutijaja kêp Satanasti hkwÿ kênã. Koja Satanasti ixte mẽ kurũm mẽ hapôx kaxyw tanhmã inhmã nê hkêt nê. ²⁷ àhpumunh tÿx jakamã na hte mẽ kot hkôt amnhĩ xunhwÿr xwÿnhjê pumunh tÿx o pa nhũm mẽhõ tee ri kêp mẽ utãr kaxyw. Tã ixàhpumunh tÿx o ixte hakrenh jakamã ixte kêp mẽ utãrja inhmã tanhmã kute hkêt. Na pa hte kêp mẽ utã nhũm mẽ hpãnhã ixkôt amnhĩ nhĩpêx o pa nhũm Satanasti tee ri mẽ hã ixpumunh o pa kaprÿ.

²⁸ — ãm hãmri na pa mẽ amã ixkapêr. Kot kaj mẽ tanhmã amnhĩ tomnuj to ho apa. Nê amnhĩ tomnuj tÿx kumrêx rãhã ho apa. Rÿ tanhmã akapêr punuj to ho apa. Rÿ tanhmã Tirtũm o akapêr punuj to ho apa. Tã tee ri ja hã amnhĩ pumu nê akaprĩ nê ã ate amnhĩ nhĩpêx anhrã kaga nê Tirtũm kôt amnhĩ xunhwÿ. Hãmri nhũm amnhĩ tã mẽ apumu nê amnhĩ katut kôt mẽ ate amnhĩ tomnuj nê mẽ akapêr punuj rênh pa nê axte kãm hamaxpêr kêt nê. Koja ho hapêx par kumrêx. ²⁹ Nom koja Tirtũm Karõ xatã mẽ amã ixto amnhĩrĩt tã ka mẽ ama nê ãm ama nê te kêp amnhĩ jamak pro pyrãk o amnhĩ nhĩpêx. Jao Tirtũm Karõ hã apijaãm kêt ã amnhĩ to amnhĩrĩt. Ja mÿrapê koja Tirtũm nhÿrmã amnhĩ xwar te mẽ apê amnhĩ jamak pro pyrãk o mẽ anhrãpêx ka mẽ tee ri kãm amnhĩ kaprĩ kaprÿ. Hãmri nê mẽ kot amnhĩ xã htÿx kamã hamak o pa htũm xã wÿr ma apa nê kamã apa rãhã apa ho apa. Anê.

³⁰ Mẽ kot Satanasti nhÿ hã mẽ nê mẽkarõmnuti janor o pa hã hkamnhĩx jakamã nhũm pre Jejus ã mẽ kãm kapêr anê.

Jejus katorxã mẽ htõjê jarênh

Matêwre 12.46-50; Rukre 8.19-21; mãänên Eprêw 2.11-12

³¹ Rôm nhũm Jejus katorxã mẽ htõjaja hwÿr mra no ãm kormã hwÿr gjêx kêt nê. Mẽ kot hã htu rax jakamã nhũm mẽ tee ri hwÿr gjêx kaxyw kormã kapôt ã kuhê. Hãmri nê mẽ kot mar o kuhê xwÿnhjê hõ mã kapêr nê kãm:

—Kwa ma tẽn Jejus mã mẽ ijarê kê mẽ ixwÿr kato. Anê.

³² Rôm nhũm ixkre kamã mẽ hkrĩ xwÿnhjaja mẽ omu nê Jejus mã mẽ harê nê kãm:

—Kwa Pahihti. Ota akatorxã mẽ atõjaja awÿr mra nê pøj nê tee ri awÿr gjêx mã nê kormã kapôt ã kuhê nê atã karõ. Anê.

³³⁻³⁵ Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rÿ ixkatorxã kot amnhĩ nhĩpêx pyrãk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

4

Mẽmo hy hkre xwÿnh jarênh

Matêwre 13.1-9; Rukre 8.4-8

¹ Tã nhũm Jejus axte gô jakax ã mẽ ahkre ho nhÿ. Hãmri nhũm mẽ axte hã htu rax jakamã nhũm tee ri mẽ omu hãmri nê pãr krem axã nê gôx kãm amÿm mẽ ahkre ho nhÿ. Nhũm mẽ piitã kÿxpê omunh nê mar mex o kuhê. ² Hãmri nhũm mẽ ahkre ho nhÿ. Nom mẽ ujarênh pix kãm mẽ ahkre. Mẽ kot Tirtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm hã ujarênh o nhÿ nê mẽ kãm:

³ —E mẽ inhma. Koja mẽhõ ma pur mã mõi nê pur kãm mẽmo hy ho ukapêr o pa nom nhũm hy piitã amex kãm rôrôk kêt nê. Koja ahpÿnhã rôrôk. ⁴ Koja hkwÿ aptÿx kãm rôrôk nhũm kuwênhre omu nê hwÿr mra nê hkrêr pa. ⁵⁻⁶ Nê koja kên kãm hkwÿ rôrôk hãmri

nê higrôt kutã nojarêť nê higrôt pa. Nom nhũm kamã aptỳx nê kamã kêp pika hkrye jakamã nhũm higrôt nhũm hã myt apha nê arĩgro htỳx mẽ nhũm grã pa. Harê hkrye jakamã grã pa. ⁷ Nê koja hkwy mrõnhĩ kamã rỏrỏk nê higrôt tã no nhũm utĩa kêp amỳtã nhũm ô hkêť nê.

⁸ —No koja hirã kamã pika mex kãm hkwy rỏrỏk. Hãmri nê hirã kamã rỏrỏk jakamã higrôt mex nê piitã ô rax nê. Kamã ô hkwy kêp 30 nê kamã hkwy kêp 60 nê kamã hkwy kêp 100. Ầ mẽ ujarênh kot anhỳr. ⁹ Kwa mẽ ama nê kãm ajamaxpêr tỳx rãhã ho ri apa. Anê.

Jejus kot hprĩ hã mẽmo hy jarênh

Matêwre 13.10-23; Rukre 8.9-15

¹⁰ Hãmri nhũm mẽ Jejus xujarênh mar pa nê anhgrã nê ma akupỳm mra nhũm hkôt mẽ pa ho pa xwỳnh pê 12 mẽ hkwyjaja pix Jejus ri arĩk. Hãmri nê ujarênhta ầ hkukja nê kãm:

—Kwa mon ka hte ầ mẽ kãm axujarênh anê Pahihti? Na pa mẽ ixprĩ hã amar mex kêt nê. Anê.

¹¹⁻¹² Hãmri nhũm mẽ kãm:

—Nà kot paj ixprĩ hã mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harênh to. Nà mẽ kot amnhĩ tomnu kaga nhũm Tĩrtũm kot ja hã mẽ omunh xà hkôt mẽ ho hkra hã harênhja na pa hte mẽ kãm harê. No mũjjaja mẽ akĩnhã mẽ kãm mar prãm kêt jakamã na pa hte mẽ kãm mẽmoj tã haxwỳ nê awjarê nhũm mẽ ầm ixujarênh pix ma.

Na htem kuma nê ầm kuma nê htỳx ri hã pa. No kêp apu mẽ kãm hprĩ hã mar prãm ronhỳx mẽ ra hprĩ hã kuma nê Tĩrtũm kôt amnhĩ xunhwỳ nhũm amnhĩ tã mẽ omu nê mẽ kot amnhĩ tomnuj o hapêx. Nom mẽ kãm mar prãm kêt. Anê.

¹³ Tã mẽ ate aprĩ hã ixujarênhja mar mex kêt jakamã tanhmã kot kaj mẽ amnhĩ to nê ixujarênh piitã ama? E kot paj ixprĩ hã mẽ amã mẽmo hyta jarê ka mẽ inhma.

¹⁴ —Nà mẽmo hyta te kêp Tĩrtũm kapêr pyrãk. Nê ahpỳnhã rỏrỏk xà hã pikata te kêp ahpỳnhã mẽ kot Tĩrtũm kapêr mar xwỳnhjê kot mar nê ahpỳnhã tanhmã amnhĩ nhĩpêx to pyrãk. ¹⁵ Jakamã mẽ kot mar xwỳnh kwỳjaja hte kot aptỳx kãm hkwy rỏrỏk nhũm kuwênh kot hwỳr mrar nê hkrêr par xwỳnhta pyrãk. Jakamã na htem Tĩrtũm kapêr ma nom nhũm Satanasti te kuwênh kot hy hkrêr parta pyrãk o mẽ hipêx. Nê mẽ kot amnhĩ kaxyw hkôt hamaxpêr nê hkôt amnhĩ xunhwỳr pymaj tanhmã nê mẽ hkrã hto. Jakamã nhũm mẽ Tĩrtũm kapêr ma nom ho hamakêtkati tokyx anê nê axte kãm hamaxpêr kêt nê.

¹⁶ —Nê mẽ kot mar xwỳnh kwỳjaja te kot kênre kamã hkwy rỏrỏk nê higrôt nhũm te hã myt apha nhũm grã par tokyx anhỳr xwỳnhta pyrãk. Na htem Tĩrtũm kapêr ma nê hkĩnh nê. Nê kãm mar prãm nê. Te hy higrôt tokyx anhỳrta pyrãk. ¹⁷ Tã nhũm mẽhõ tẽ nê Tĩrtũm nê tanhmã mẽ kãm kapêr to nhũm mẽ kuma nê hkaga. Rỳ nhũm mẽ Tĩrtũm ầ tanhmã mẽ homnuj to nhũm mẽ tee ri amnhĩ tã mẽ omu nê hkaga. Te mẽmo hy higrôt nê grã par tokyx anhỳrta pyrãk.

¹⁸ —Nê mẽ kot mar xwỳnh kwỳjaja te kot mrõnhĩ kamã hkwy rỏrỏk nê higrôt nhũm mrõnhĩ kot kêp ầmnàr xwỳnhta pyrãk. Nê mẽ kãm Tĩrtũm kapêr mar prãm nê. ¹⁹ Nom mầanên kãm hikukrêx rax nê hikàxpore rax prãm jakamã ầm ja pix kukamã hamaxpêr o ri pa. Jao ra gryk ầ axte Tĩrtũm kapêr mầ hamaxpêr nê hkôt amnhĩ nhĩpêx kêt nê. Te mrõnhĩ kot higrôt pê ầmnàr nhũm ô hkêêta pyrãk.

²⁰ —No mẽ kot mar xwỳnh kwỳjaja te hirã kamã pika mex kãm hy hkwy rỏrỏk nê higrôt nê ô raxta pyrãk. Na htem ixkapêr ma nê amnhĩ krã him hagiênh tỳx nê. Nê ixkôt ri amnhĩ nhĩpêx mex rãhã ho ri pa. Te mẽmo hy hkre kamã ô hkwyjaja kêp 30 nê kamã kêp 60 nê kamã kêp 100ta pyrã nê Tĩrtũm kapêr kôt amnhĩ nhĩpêx mex rãhã ho pa. E ầ ixujarênhja kot anhỳr. Anê.

Kanê hpimxur ầ harênh

Rukre 8.16-18, 8.24-25; Matêwre 13.10-15, 25.14-30

²¹ Nhũm Jejus arĩ hkôt mẽ pa ho pa xwỳnhjê jahkre nẽ mẽ kãm:

—Xà na htem kanê hpòk nẽ poti ho hpro rỳ hitom kãm par krak ri unhwỳ? Nà na htem hpòk hãmri nẽ kỳx pẽ mẽmoj nhĩmòk ã unhwỳ. ²² Ja pyrà nẽ mẽ piitã kot hkwyjê pẽ tanhmã hamaxpêr punuj to ho hpimxur prãm tã tee ri kot ho hpimxur prãm kaprỳ. Koja nhỹrmã mẽ hamaxpêr piitã amnhĩ to amnhĩrit pa. Nẽ mẽmoj piitã ra hpimxur mex tã koja nhỹrmã amnhĩ to amnhĩrit pa. Te mẽ kot kanê hpòk nẽ kỳx pẽ unhwỳr nhũm amnhĩrit mex pyræk. Ja pyrà nẽ na pa hte Tĩrtũm kapêr o ri ixpimxur o ixpa hkêt nẽ. Na pa hte ixprĩ hã mẽ amã harênh mex o ixpa. ²³ Kwa mẽ ixujarênhja ma nẽ kãm ajamaxpêr tỳx rãhã ho ri apa. Anẽ.

Nhũm pre ã Jejus mẽ kãm kapêr anẽ. ²⁴ Hãmri nẽ mẽ kãm:

—Nẽ kêr ka mẽ axpên kãm axukapri ho ri tanhmã axpên to mex to ho ri apa. Kêr kê Tĩrtũm ja hã mẽ apumu nẽ mẽ apyrà nẽ mẽ akamã ukapri pẽ mẽ ato mex o pa. ²⁵ Koja mẽhõ inhmã tanhmã amnhĩ nhĩpêx mex to pa ja hã omu nẽ kot inhmã àpênh mexta pãnhã ho mex nẽ. No koja inhmã àpênh mex kêt pa ja hã omu nẽ hã ho mex kêt nẽ.

—Nẽ koja mẽhõ kãm ixkapêr mar prãm nom kormã hprĩ hã mar mex kêt tã arĩ mar o pa nẽ gaa nẽ mar tỳx o mō. No koja kuma nẽ ãm kuma hãmri nẽ gaa nẽ hã no hkêt. Anẽ.

Pur kãm mẽmo hy hkre xwỳnh jarênh

Matêwre 13.24-30

²⁶ Nhũm Jejus arĩ hkôt mẽ pa ho mẽ pa xwỳnhjê jahkre ho nhỹ nẽ mẽ kãm:

—E pa mẽ amã tanhmã mẽ kot ixkapêr mar tỳx xwỳnhjê jarênh to ka mẽ inhma. Koja mẽhõ ixkapêr mar tỳx nẽ ra hkôt ri amnhĩ nhĩpêx o pa. Hãmri nẽ hamaxpêr nyw o hamaxpêr o pa nẽ amnhĩ nhĩpêx nyw o amnhĩ nhĩpêx o pa. Te mẽ hpur kãm mẽhõ kot mẽmo hy hkre xwỳnh kot amnhĩ nhĩpêx pyræk. Na hte hyja kre ho pa. ²⁷ Hãmri nẽ hkre hpa nẽ kamàt mẽ òt o hikwỳ nẽ arĩgro mẽ mẽmoj tã àpênh o pa. Rãhã nhũm mẽmo hyja arĩ hikwỳ ho hikwỳ hkêt nẽ. Koja amnhĩ nhĩpêx ò ho amnhĩ nhĩpêx nẽ higròt kato nẽ hprêk. Kre xwỳnh kot tanhmã kot amnhĩ nhĩpêx to hã omunh kêt tã nhũm kãm hprêk.

²⁸ —Na hte hpòm hapôx o pa nẽ higròt o pyka kahte. Hãmri nẽ hprêk nẽ hô axpôt nẽ gaa nẽ hpãnhã ô. Hãmri nẽ hkamrêk pa nẽ xa. ²⁹ Hãmri nẽ mẽ kot hikênh mã mex nẽ nhũm kot hkre xwỳnhhta omu nẽ amnhĩm hamỳnh pa. Tã mẽ kot ixkapêr mar mex xwỳnhjaja te mẽmo hy ra higròt kator nẽ hprêk nẽ hô pipôt nẽ ô xwỳnhhta pyræk. Nẽ uræk nẽ amnhĩ nhĩpêx ò ho amnhĩ nhĩpêx o pa. Anẽ.

Jejus te kot mẽmo hy pyræk ã kot amnhĩ jarênh

Matêwre 13.31-32; Rukre 13.18-19

³⁰⁻³² Nhũm Jejus arĩ mẽ ahkre ho nhỹ nẽ mẽ kãm:

—Tĩrtũm kot mẽ awỳr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire pyræk. Koja mẽhõ mẽmo hy hõ pixire nẽ hkre nhũm ra higròt. Nẽ gaa nẽ hprêk. Hãmri nẽ hpa angrã nhũm kuwênhre hwỳr mra nẽ hòptĩ kamã amnhĩm haê nhĩpêx. Mẽmo hyta grire htã nhũm hkre nhũm higròt nẽ ã amnhĩ nhĩpêx anẽ. Tã kot paj nhỹrmã urà nẽ ixpyxi htã kot paj pika piitã hkôt mẽ ho amnhĩptà nẽ mẽ omunh mex rãhã ho ri ixpa. Anẽ.

Ã na pre Jejusja hkôt mẽ pa ho mẽ pa xwỳnhjê mã amnhĩ tã kuxi nẽ ujarênh anẽ. ³³ Mẽ kãm ujarênh kãm mẽ ahkre ho pa. Te nhãm mẽmoj jarênh pyrà nẽ amnhĩ tã haxwỳ nẽ harê. Mẽ kot tanhmã mar to hã mẽ omunh xà hkôt tanhmã mẽ kãm ujarênh to. ³⁴ Na pre ãm ujarênh pix kãm mẽ kãm kapêr mar prãm kêt xwỳnhjê mã amnhĩ jarênh rãhã ho pa. No mẽ kot hkôt pa ho pa xwỳnhjê mã nhũm hprĩ hã ujarênh jarê nhũm mẽhprĩ hã mar mex nẽ.

Jejus kot kòk o pinhkrênh ã harênh

Matêwre 8.23-27; Rukre 8.22-25

³⁵ Tã nhũm amỹkry nhũm Jejus arĩ pàr kre kamã nhỹ. Hãmri nẽ hkôt mẽ pa ho mẽ pa xwỳnhjê mã kãm: “E pu mẽ ma xarmã mō.” ³⁶ Anẽ hãmri nẽ mẽ kot mar o hkri xwỳnhjê re nẽ pàr mã agjê nẽ ma xarmã mō. Garirej rũm kato nẽ ma xarmã pika hõ hwỳr mō.

Nhũm pàr kwỳja ma mẽ hkôt mō. ³⁷⁻³⁸ Nhũm Jejus ra òtxwa nẽ tẽ nẽ pàr kre kamã hkrã japar xà hã hkrã xi nẽ ra òt tỳx nẽ nõ. Nhũm kòk àpêr tỳx nẽ nhũm gô kànhmã harĩ nẽ axpên tak. Ra ri xatã axpên tak nẽ pàr kre kamã axkapĩ nhũm ra mẽ kêp àr o mō. Hãmri nhũm mẽ tee ri amnhĩ nhĩpêx nẽ tee ri amnhĩ kukamã hamaxpêr nẽ Jejus wỳr hprôt nẽ kumra nẽ kãm:

—Kwa kànhmã nhỹ Pahihti. Kot puj mẽ jarãhã pahtyk pa. Anẽ.

³⁹ Hãmri nhũm hkrãkato nẽ kànhmã nhỹ nẽ kòk mẽ gôta pumu nẽ wa kãm kapêr o:

—E kwa wa anhĩkrê. Anẽ.

Hãmri nhũm gô mẽ kòk hpinhkrênh kurê kumrêx.

⁴⁰ Hãmri nhũm Jejus hkôt mẽ pa ho mẽ pa xwỳnhjê mã kãm:

—Hêxta waa nẽ. Kormã mẽ ate amnhĩ kaxyw Tĩrtũm mẽ wa inhmã ajamaxpêr tỳx kêt. Hã na ka mẽ ri amã ma nẽ tee ri amnhĩ kukamã ajamaxpêr. Anẽ.

⁴¹ Hãmri nhũm mẽ amnhĩ jaêr pê ã kot amnhĩ nhĩpêx anhỹr ã omu nẽ tee ri axpên pumunh pê omunh o kuhê. Hãmri nẽ axpên mã:

—Kokỹỹ. Jejus kêp mẽ panhĩõ hkêt. Mẽ pahtõ kot pu te kot amnhĩ nhĩpêx pyrã nẽ kòk mã pakapêr nhũm anhĩkrê? Nà mẽ pakurom àhpumunh tỳx o àhpumunh tỳx. Anẽ.

5

Jejus kot mēhō nê mēkarōmnuti janor ã jarēnh

Matêwre 8.28-33; Rukre 8.26-34

¹ Tã nhũm Jejus mẽ hkôt mẽ pa ho mẽ pa xwỳnhjê mērohã mō nẽ xarmã Geras wỳr pøj. ²⁻⁴ Hãmri nẽ pàr rũm hapøj nhũm mēhō myja Jejus pumu nẽ hwỳr tẽ. Mēkarōmnuti kot hwỳr àr nhũm y hã oprê htỳx kumrêx. Hãmri nẽ hkwỳjê hkàx ã kapôt ã mẽ hã pika kamã ri hkênh nẽ pa ho pa. Nhũm mẽ xatã kàx o hte hpre nẽ hpa hpre htã no nhũm kurê. ⁵ Nẽ kamãt kãm nẽ arĩgro hã àmra htỳx o mrar pê kên o amnhĩ tak o mra. Mẽ hã pyka kamã nẽ kapôt ã hixêt ã amnhĩ tak tỳx rãhã ho mra. ⁶ Tã amỳm Jejus pumu nẽ hwỳr hprôt nẽ hã hpijaàm kaxyw kutã hkõn krã ho tēm nẽ hparpê nhỹ. ⁷⁻⁸ Hãmri nhũm omu nẽ nê mēkarōmnuti mã kapêr nẽ kãm:

—Kwa kurũm akato nẽ ma tẽ. Anẽ.

Hãmri nhũm kuma nẽ tanhmã myta o nhũm tãm mēkarōmnuti nhỹ hã Jejus mã kapêr nẽ àmra kamã kãm:

—Pa Tĩrtũm Kra Jejus? Mo kaxyw na ka ixwỳr tẽ? Kwa tanhmã ixto hkêt nẽ nà?

⁹⁻¹⁰ Anẽ nhũm kãm:

—Tanhmã na anhĩxi te? Anẽ.

Nhũm kãm:

—Nà ixpê Mēohtōhti. Mēkarōmnuti ohtō nẽ kot ixwỳr gjêx jakamã na htem ã inhĩxi jarēnh anẽ. Kwa nê mẽ ijanor kêt nẽ nà? Anẽ.

¹¹⁻¹² Hãmri nhũm mēkarōmnuti tãm amnhĩ to kuwỳ nẽ kãm:

—Kwa kêr ka jahti nê mẽ ijapôx japêr nẽ mẽ kot amnhĩ xà htỳx kamã hamak o mẽ pa htũm xàta wỳr mẽ ixrênh kêt nẽ. Hagrô hkwy mũj wỳr măn mẽ ixrê pa mẽ hpãnhã hwỳr măn hagjê? Anẽ.

¹³ Hãmri nhũm mẽ kãm:

—Tôe. Mẽ tãm hwỳr mra. Anẽ.

Hãmri nhũm mẽmyta pê hapôx pa nẽ ma hagrô hwỳr mrar kurê kumrêx nẽ mẽ kãm gjêx pa nhũm myja akupỳm tãm hkrã. No nhũm hagrôja mēkarōmnuti pymaj amỹra nẽ axkahkũm nẽ hprôt nẽ himô hã krã hixêt ã axpum rôrôk nẽ gôx kãm mrõ nẽ hpikaprãr pa. Ohtô rax kumrêx. Kêp 2.000 tã hpikaprãr pa. ¹⁴ Hãmri nhũm hagrô jamãr o ri mẽ pa xwỳnhjaja tee ri ja hã omu nẽ ma mẽ õ patrãw wỳr akupỳm mẽ piitã mẽ kãm harênh o hprôt nẽ mra. Hãmri nẽ mẽ kãm ujarênh pa. ¹⁵⁻¹⁶ Nhũm mẽ tee ri mẽ kuma nẽ ma Jejus wỳr mra nẽ hkaxpa nẽ kuri myta pumu. Nhũm ra akupỳm tãm hkrã nẽ ê kamã tãm amnhĩ nhĩpêx nẽ nhỹ. Nhũm mẽ kot hã omunh xwỳnhjaja mẽ kãm ujarênh pa nhũm mẽ kuma nẽ myta pumu hãmri nẽ tee ri amnhĩ kukamã hamaxpêr o kãm Jejus puma nẽ.

¹⁷ Hãmri nẽ amnhĩ nê kãm kapêr nẽ kãm:

—Kwa mẽmo kaxyw na ka mẽ ixwỳr rê? Mẽ ma akupỹm amrar tokyx anẽ. Anẽ.

¹⁸ Hãmri nhũm mẽ kuma nẽ akupỹm pàr wỳr agjê nhũm akupỹm mex xwỳnhhta tee ri ja hã mẽ omu nẽ mẽ hkôt hkrà. ¹⁹ No nhũm Jejus kãm:

—Nà kot kaj mẽ ixkôt amõr kêt nẽ. Ma akupỹm anhõ krĩ hwỳr mãn tẽ nẽ mẽ kãm Tĩrtũm kot akupỹm ato mex ã amnhĩ jarẽnh o ri mẽ hkôt apa. Anẽ.

²⁰ Hãmri nhũm kuma nẽ ma akupỹm tẽ. Hãmri nẽ õ pyka pẽ Tekap kãm mẽ kãm Jejus kot tanhmã ho mex to hã harẽnh ri mẽ hkôt pa nhũm mẽ amnhĩ jaẽr pẽ kuma nẽ tee ri hkukamã hamaxpẽr.

Jejus kot akupỹm mẽhõ ho mex nẽ akupỹm mẽhõ ho htĩr ã harẽnh

Matêwre 9.18-26; Rukre 8.40-56

²¹ Tã nhũm Jejus mẽ hkôt mẽ pa ho pa xwỳnhjê mẽrohã akupỹm xarmã mõ nẽ rê. Hãmri nẽ pàr nhõ nẽ api nẽ gõ mỳri kuhê nhũm pika nhõ xwỳnhjaja Jejus pumu nẽ hã pikuprõnh rax nẽ. ²²⁻²³ Hãmri nhũm mẽhõ my pẽ Jajtija hwỳr tẽ nẽ kutã hkõnkrã ho htẽm nẽ nhỹ. Kêp Tĩrtũm kapẽr o mẽ ahkre xà hã ixkre jamãr xwỳnh maati na pre. Nhũm hkra nija kêp à htỳx nẽ htyk kaxyw nẽ nõ. Kormã nyw. Kormã hã amgrà pẽ 12 pix tã ra kêp htyk kaxyw. Hãmri nhũm Jajtija tee ri hkukamã hamaxpẽr nẽ ma Jejus wỳr tẽ nẽ hpar pẽ hkõn krã ho tẽm nẽ ho hwỳr kãm hihtỳx nẽ kãm:

—Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpẽ htyk kaxyw. Pa tee ri omu nẽ kaxyw amã ijamaxpẽr nẽ awỳr tẽ. Jakamã kwa ma ixkôt inhõrkwỹ hwỳr tẽ nẽ inhmã omu nẽ hã anhĩhkra xi nẽ akupỹm inhmã ho mex. Anẽ.

²⁴ Hãmri nhũm kuma nẽ ma hkôt tẽ. Nhũm mẽ ohtõ nẽ axpẽn nhĩgãnh nẽ axpẽn kujahêk o wa hkôt mra. ²⁵ Nhũm mẽhõ nija haxwỳja wa hkôt tẽ. Na pre hte hkamrõ hkryre rãhã ho pa hã ra hã amgrà kêp 12. ²⁶ Nẽ tõtõ mã amnhĩrer rax nẽ nhũm mẽ tee ri kot ho mex kaxyw nom xatã hkane kaprỹ. Hãmri nhũm ra hikàxpore kêp hapêx nhũm arĩ ãm rãhã nẽ pa. ²⁷⁻²⁸ Hãmri nẽ tee ri amnhĩ kukamã hamaxpẽr nẽ Jejus jarẽnh ma nẽ hamaxpẽr o:

—Ma kot paj ma hwỳr tẽ nẽ kêp ê pix kupênh tã akupỹm inhmex japêr. Ma kot paj ho anẽ.

Anhỹr o hamaxpẽr hãmri nẽ ma mẽ hkôt hwỳr htẽm kurê kumrêx. Nhũm mẽ ohtõ raxja kaêx ã mẽ hkôt hwỳr tẽ. Hãmri nẽ katut kôt kêp ê nhĩrê kupê. ²⁹ ãm ê pix kupênh tã akupỹm mex ã amnhĩ pumunh kurê kumrêx. ³⁰ Hãmri nhũm Jejus kot kêp ê kupênh ã amnhĩ tã omu nẽ hêx rom xa nẽ mẽ ho hakêx nẽ amnhĩ tã mẽ kãm kapẽr nẽ mẽ kãm:

—Kwa mẽ atõ na ka ri amnhĩ kaxyw inhmã ajamaxpẽr tỳx pẽ ixpẽ ixê kupê? Anẽ.

Hãmri nhũm mẽ piitã kuma nẽ tee ri axpẽn pumu nẽ kãm amnhĩ tã aprã. ³¹ Hãmri nhũm hkôt mẽ pa ho pa xwỳnhjaja kãm:

—Mẽ kot apê amnàr griã kot ka kêt ri mẽhõ kot apê hkupênh xwỳnh ã ri mẽ hkukja. Kwa mãn ãm mẽhõ amarĩ apê hkupê. Anẽ.

³² Hãmri nhũm mẽ kãm:

—Nà na amarĩ ixpẽ hkupênh kêt nẽ. Na amnhĩ kaxyw inhmã hamaxpẽr tỳx pẽ ixpẽ hkupê. Tã na ixàhpumunh tỳx xà ho akupỹm mex. Nom ra ixte mẽhõ kot ixpẽ hkupênh xwỳnhhta pumunh jakamã na pa ixêx rom ã amnhĩ tã ri mẽ hkukjêr anẽ. E kwa mẽ atõ inhmã amnhĩ jarẽ. Anẽ.

³³ Hãmri nhũm nija kuma nẽ tee ri kêp kot amnhĩ to hpimxur prãm. Hãmri nẽ hpijaam nẽ hwỳr httertet o tẽ nẽ kutã hkõn krã ho tẽm nẽ nhỹ nẽ kãm amnhĩ jarẽ nẽ kãm:

—Ma pa na pa inhmã inhmex prãm xaj apê axê kupê. Tã na pa akupỹm inhmex. Anẽ.

³⁴ Hãmri nhũm kuma nẽ kãm:

—Tỳ. Nà ate amnhĩ kaxyw inhmã ajamaxpẽr tỳx kôt ã ate amnhĩ nhĩpêx anhỹr jakamã na ka akupỹm amex. Kot kaj axte akamrõ rãhã ho ri apa hkêt nẽ. E mãmri ajamakêtkati nẽ ma akupỹm anhõrkwỹ hwỳr tẽ. Anẽ.

Hãmri nhũm kuma nẽ hkĩnh nẽ ma akupỹm tẽ.

³⁵ Rõm nhũm Jajti mã mẽ àpênh xwỳnhjaja õrkwỹ rũm ma õ patrãw kutã mra nẽ wa hkaxpa nẽ Jajti mã kãm:

—Kwa na ra akra apê ty. Mo kaxyw kot ka kêt amnhî kôt Jejus o mô? Kwâr māmri ma akupÿm awjanã nê tẽ. Anẽ.

³⁶ Hāmri nhũm Jejus mẽ kuma nê Jajti mã kãm:

—Kwa tee ri akra hkukamã ajamxpêr kêt nê. Ām kaxyw inhmã mãn ajamxpêr tÿx rãhã nê. Anẽ.

³⁷⁻⁴⁰ Hāmri nhũm mẽ axte mô nê mẽ òrkwÿ hwÿr pòj nê mẽ omu. Nhũm mẽ ra hã hturax nê mÿr o hkrĩ. Hāmri nhũm Jejus mẽ hwÿr axà nê mẽ omu nê kot mẽ hkra htyk kumrêx ã omunh tã mẽ kãm:

—Kwa mẽ hāmri amÿr kêt nê. Na nireta htyk kêt nê. Na ãm gōr nê nō. Anẽ.

Hāmri nhũm mẽ kot ra htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hāmri nhũm Jejus mẽ hanor pa nê hitom kãm htyk xwÿnh wÿr àr kaxyw nê amnhî kôt Juãw nê Xiakre nê Simãw Pêtre nê kaxyw htyk xwÿnh katorxà nê hipêêxà pix amnhî kôt mẽ ho axà. ⁴¹ Hāmri nê htyk xwÿnhhta wÿr tẽ nê hpa hã kupy nê kãm kapêr nê kãm:

—Pa? E kwa kànhmã nhÿ. Anẽ.

Nom amnhî kapêr kãm harê nê kãm:

—Tarit kũm. Anẽ.

⁴² Hāmri nhũm kànhmã ÿr kurê kumrêx nê kànhmã xa nê ri mra. Na pre ra hprêk nê ty. Na ra hã amgrà kêp 12 tã ty nhũm Jejus akupÿm ho htir nê kànhmã ÿr nhũm kànhmã xa nê ri mra. ⁴³ Hāmri nhũm kuri omunh xwÿnhjaja amnhî jaêr pê omu nê kamã no pyma nê hkĩnh tÿx kumrêx. Hāmri nhũm Jejus katorxà mẽ hipêêxàja wa kãm:

—E mãn ra kãm prãm nê. Wa tokyx kãm mẽmoj japêr kê kukrê. Nom kêr ka wa inhmar kumrêx. Kêr ka wa akupÿm ixte ho htir ã ri mẽ kãm ijarênh o ri apa hkêt nê. Ām kwarĩ ho kwarĩ. Anẽ.

6

Najare nhõ xwÿnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma ò krĩ pê Najare hwÿr ma akupÿm mô nhũm hkôt mẽ pa ho mẽ pa xwÿnhjaja ma hkôt mô. ² Hāmri nê hwÿr pòj. Nhũm mẽ ò arĩgromnu pê sap kator jakamã nhũm Jejus ma Tirtũm kapêr o mẽ ahkre xà hã ixkre hwÿr tẽ. Hāmri nê kamã mẽ ahkre ho nhÿ nhũm mẽ amnhî jaêr pê kapêr mex ã kuma nê tee ri axpên pumunh pê hamaxpêr o hkrĩ. Jejus kêp mẽ hkwy hã hkamnhix nom nhũm mẽ kurom àhpumunh tÿx nê kapêr mex jakamã nhũm mẽ kuma nê tee ri hamaxpêr o hkrĩ. Hāmri nê axpên mã:

³ —Kwa kêp mẽ panhĩõ htã tanhmã kot we amnhî to nê ã àhpumunh tÿx kôt mẽ pamã kapêr anê nê ri mẽ kãm aa mẽ kot mẽmoj pumunh kêt kwÿ ho anhÿr o pa? Mẽ panoo mã na pre hprêk. Kêp pĩ kuprãr xwÿnh Juje mẽ hprõ Marir wa hkra na. Nê htõ Xiakre nê Juje nê Simãw nê Jutja ra mẽ pahte mẽ kêp htõ hã omunh mex. Nê htõxjaja jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tÿx anê. Anẽ.

Anhÿr o axpên mã harê. Hāmri nê kamã gryk nê hkaga ⁴⁻⁶ nhũm tee ri amnhî tã mẽ omu nê hamaxpêr o:

—Hêxta waa nê. Mẽ kãm amnhî kaxyw ixkôt hamaxpêr prãm kêt kumrêx. Anẽ.

Hāmri nê mẽ kãm:

—Nà Tirtũm nhÿ hã kapêr jarênh o mẽ pa xwÿnhjaja na htem krĩ hkwy kamã kãm mẽ mar prãm nê. Nom ò krĩ kamã mẽ kot karàre rùm hprêk o mōr kãm omunh xwÿnhjaja na htem kuma nê ãm kuma. Anẽ.

Hāmri nhũm mẽ kot amnhî kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwÿ ho anhÿr rax prãm kaprÿ. Nê ãm mẽ à xwÿnhjê ho grêre nê mẽ hã ìhkra jaxwÿ nê akupÿm mẽ ho mex. Hāmri nê mẽ kurũm kato nê ma krĩ hkwy hkôt ri Tirtũm kapêr o mẽ ahkre ho pa.

Jejus kot mẽmoj tã mẽ kêp 12jê mã karõ hã harênh

Matêwre 10.5-15; Rukre 9.1-6, 10.1-12; mãänên Atre 13.50-51, 18.6

⁷ Tã nhũm Jejus amnhĩ wỳr mẽ kot ỹ hã mẽ ahkre ho pa xwỳnh pê 12jê hwỳ. Ra kot amnhĩ kaxyw mẽ rênh xwỳnhhtaja nhũm amnhĩ wỳr mẽ kuwỳ. Hãmri nê axpên kaxyw mẽ ho axkrut nê mẽ kurê nê mẽ kãm mẽ àpênh ã karō nê ma mẽ hkwyjê hwỳr mẽ kurê. Nê mẽ kãm:

—E kêr ka mẽ ma mẽ pahkwỳjê hwỳr mra nê inhỹ hã Tĩrtũm kapêr jarênh o ri mẽ hkôt apa. Nê mẽ kurũm mẽkarōmnuti japôx o ri mẽ hkôt apa. ⁸⁻⁹ Nom kêr ka mẽ amnhĩ kôt akukrêx rax nê ri apa hkêt nê. Nê kawà htu nê ho ri apa hkêt nê. Nê amnhĩ kôt axàpkur xà ho ri apa hkêt nê. Rỳ akàxpore rax nê ri ho apa hkêt nê. Âm mẽ anhō Kamis nê mẽ apar kà ho pixire nê agjê nê ri hã apa. Nê mẽ amnhĩ kaxpar xà hã mẽ anhō kô pix o apa. Mẽ ã anhỹ kamã mẽ hkôt ri apa anê.

¹⁰ —Nê kêr ka mẽ nhỹri krĩ hō hwỳr pôj. Nê apôx xà kamã mẽhō nhōrkwỹ kamã hkôt ri apikamênh tãmtã kurũm akupỹm ajapôj nê ma hpãnhã nhãm krĩ hō hwỳr apa. Nom atỳx ri nhãm mẽ hwỳr amrar nê nhãm mẽ hwỳr amrar kêt nê.

¹¹ —Nê koja mẽ nhỹri mẽ akapêr kaga ka mẽ tee ri amnhĩ tã mẽ kamã ama hãmri nê tokyx mẽ kurũm ajapôj nê ma apa. Nê anojarêt nê mẽ noo mã akuhê nê amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrà nê mẽ hkaga hã omunh kaxyw ka mẽ ã mẽ noo mã amnhĩ nhĩpêx anê. Hãmri nê hpãnhã ma nhỹhỹm apa.

¹² Anhỹr o mẽ kãm mẽ àpênh ã karō. Nhũm mẽ kuma nê hapôj nê ma mẽ hkwyjê hkôt pa. Ma krĩ piitã hkôt Tĩrtũm kapêr o mẽ ahkre ho ri mẽ hkôt pa nê mẽ kãm:

—E kwa mẽ tokyx amã ate amnhĩ tomnuj kaga hprãm xàj Tĩrtũm kôt mãn amnhĩ xunhwỳ. Anê.

¹³ Hãmri nê mẽ nê mẽkarōmnuti jano. Nê akupỹm mẽ à xwỳnhjê ho mex kaxyw mẽmo htwỳm o mẽ hkrã gregrer nê Jejus nhỹ hã akupỹm mẽ ho mex.

Mẽ kot Juãw Paxis pĩr ã mẽ harênh

Matêwre 14.1-12; Rukre 9.7-9

¹⁴ Tã nhũm mẽ piitã Jejus jarênh ma nê axpên mã tanhmã harênh to ho pa. Nom ahpỹnhã tanhmã harênh to. Na prem kamã harênh o:

—Nà Juãw Paxis pimràata na. Pêr akupỹm htĩr jakamã na hte ã mẽ kot aa mẽmoj pumunh kêt kwỳ ho anhỹr o pa. Anê.

¹⁵ Nê kamã axtem harênh o:

—Nà tãm kêt. Pêr finat Eris na. Anê.

Nê kamã axtem harênh o:

—Nà tãm kêt. Pêr Tĩrtũm nhỹ hã kapêr jarênh xwỳnhjê hō na. Te kot amnepê mẽ kot Tĩrtũm nhỹ hã tanhmã amnhĩ nhĩpêx to xwỳnhjê kot amnhĩ nhĩpêx pyrãk o kot amnhĩ nhĩpêx kênã.

Anhỹr o ahpỹnhã harê. ¹⁶ Hãmri nhũm Ijaew o amnhĩptar xwỳnh pê Erox ãxipasja mẽ kot ã harênh anhỹr ã mẽ kuma nê Juãw Paxis mã hamaxpêr kurê kumrêx. Hãmri nê mẽ kãm:

—Nà pêr Juãw Paxista na. Ixte mẽ kãm hã ixàmnênh nhũm mẽ kot inhmã mut krãhyr xwỳnhhta mãn ra tanhmã amnhĩ to nê akupỹm htĩr. Anê.

¹⁷⁻²⁰ Na pre ra pahi Erox ãxipasja htō Pirip pê hprō Eroxis pytà nê ho hprō nhũm hkra niti mẽ wa hwỳr apha. Hãmri nhũm Juãw Paxisja tee ri ja hã pahihti Erox ãxipasja pumu nê hã kãm akir nê kãm:

—Tk. Kwa Tĩrtũm kêp ja omnuj. Ra kot ja nê mẽ pahkurê htã ka axtem nê ã amnhĩ nhĩpêx anê.

Anhỹr jakamã nhũm hprō Eroxisja amnhĩ tã kuma nê kamã gryk tỳx nê. Nê kãm hpĩr prãm nê. No nhũm pahi Erox ãxipas kãm hpĩr prãm kêt nê. Juãw Paxis kot Tĩrtũm kôt amnhĩ nhĩpêx nhũm kot hã omunh mex jakamã kãm hpĩr prãm kêt nê. Juãw na pre hte xatã kãm Tĩrtũm kapêr jarênh o pa. Nhũm pahihti Erox ãxipasja kormã hprĩ hã mar mex kêt tã hã hpijaàm nê kãm mar prãm nê. Nom nhũm hprō kãm hpĩr prãm jakamã nhũm kêp mẽ kãm hã amỹnê nhũm mẽ ma o tẽ nê haxà nhũm mex nê mẽ hagiênh xà kamã hkrĩ ho krĩ.

²¹⁻²⁴ Tã nhũm jãã nhũm pahi Erox äxipas kator ã arĩgro kato nhũm mẽ piitã hwỳr mra nẽ hã akuprõ nẽ hã hkĩnh nẽ hã apkur o hkrĩ. Õ kôwenatôjaja nẽ hkràmnhwỳjaja nẽ krĩ hkwy kamã mẽõ pahijaja nhũm mẽ ohtõ nẽ hã akuprõ nẽ hã hkĩnh. Hãmri nhũm hprõ Eroxis kra nitija mẽ hwỳr axà nẽ mẽ kãm gre. Mẽ kot omunh nẽ kamã hkurẽ pix kaxyw mẽ noo mã hpijaàm kêt nẽ ã mẽ kãm grer anẽ. Hãmri nhũm pahi Erox omu nhũm ja kãm mex nẽ nhũm mẽ piitã hkĩnh nẽ kamã nopyma nẽ. Nẽ grer kãm hpijaàm kêt nẽ tanhmã mẽ kãm grer to nhũm mẽ omu nẽ kamã no pyma nẽ. Hãmri nhũm pahi Erox äxipasja kãm:

—Nà ãm hãmri. Na ka mẽ inhmã agrer mex nẽ. Jakamã kwa mãmrĩ mẽmoj tã ixwỳ. Amã mẽmoj prãm xà hkõt inhmã mẽmoj jarẽ pa amã kugõ. ãm hãmri na pa amã amnhĩ jarẽ. Na pa Tĩrtũm noo mã ã amã amnhĩ jarẽnh anẽ. Ka mamrĩ ixkukrẽx mex kwỳ hã ixwỳ pu axpẽn mã ho axkjê. E mẽmo na amã hprãm? Anẽ.

Hãmri nhũm kuma nẽ ma katorxà hwỳr tẽ nẽ kãm harẽ nẽ kãm:

—Xê mẽmoj tã kot paj we kuwỳ? Anẽ.

Hãmri nhũm kuma nẽ hamaxpẽr o:

—Ma ãm hãmri koja mẽ tã jarãhã inhmã Juãw Paxis pĩ. Anẽ.

Hãmri nẽ hkrata mã kãm:

—Ma Juãw Paxis krã hã kot kaj awỳ kê mẽ amã kugõ ka man ixwỳr o tẽ. Anẽ.

²⁵ Hãmri nhũm kuma nẽ akupỹm pahi hwỳr axà nẽ kãm:

—Ma Juãw Paxis krã kot kaj inhmã agõ. Pasiiti kamã axà nẽ inhmã agõ pa ma amnhĩm o ixtẽm kurẽ kumrẽx. ãm ja pix na inhmã hprãm. Anẽ.

²⁶ Hãmri nhũm tee ri kuma nẽ hkaprĩ nẽ. Nẽ hamaxpẽr o:

—Hêxta waa nẽ. Inhmã hpĩr prãm kêt. Nom ra ixte ixkutã mẽ hkrĩ xwỳnhjê noo mã inhmã kãm mẽmoj prãm xwỳnh nhõr ã amnhĩ jarẽnh nhũm ixte kãm õr ã amnhĩ jarẽnh nhũm mẽ piitã mẽ kot inhmar jakamã tanhmã kot pa we amnhĩ to nẽ kệp nẽ? Nà pa nẽ hkêt nẽ. Anẽ.

²⁷ Hãmri nẽ õ pôristijê mã kãm:

—E mẽ ma Juãw Paxis wỳr mra nẽ mut krãhta nẽ pasiiti kamã hkrã xà nẽ akupỹn o tẽ nẽ kãm agõ. Anẽ.

Hãmri nhũm mẽ kuma nẽ ma mẽ hagjẽnh xà hwỳr mra nẽ Juãw wỳr axà hãmri nẽ mut krãhta. ²⁸ Hãmri nẽ pasiiti kamã hkrã xà nẽ akupỹm o tẽ nẽ kot hã hwỳr xwỳnh mã kugõ nhũm kumỳ nẽ ma katorxà hwỳr o tẽ nẽ kãm kugõ.

²⁹ Hãmri nhũm Juãw Paxis kõt mẽ pa ho mẽ pa xwỳnhjaja tee ri harẽnh ma nẽ hkaprĩ htỳx nẽ. Hãmri nẽ pahi Erox äxipas wỳr mra nẽ ã hã kuwỳ nhũm mẽ kãm kugõ nhũm mẽ kumỳ nẽ ma o mra nẽ kẽn kre kamã haxà.

Jejus kot mẽ ho 5.000 nẽ mẽ kãm õ hã harẽnh

Matêwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jejus nhỹ hã mẽ ahkre ho mẽ pa xwỳnhjaja akupỹn Jejus wỳr mõn pøj nẽ kãm amnhĩ jarẽ. Tanhmã mẽ kot mẽ ahkre hto ho pa nẽ tanhmã mẽ ho mex to ho pa hã kãm amnhĩ jarẽnh pa.

³¹ Tã nhũm mẽ piitã axpẽn pãnhã kot Jejus mar kaxyw mẽ hwỳr mra nhũm mẽ kormã apkur kêt nẽ. Jakamã nhũm Jejus hkõt mẽ pa ho mẽ pa xwỳnhjê mã:

—E ma pu mẽ awrã kaprỳ hwỳr mõ nẽ nhỹri pahkrĩ nẽ pakõkõt nẽ apku.

³² Anẽ hãmri nhũm mẽ gõx kãm kanõre wỳr agjê nẽ ma ahte xarmã awrã kaprỳ hwỳr mõ. ³³ Nhũm krĩ hkwy nhõ xwỳnhjaja mẽ omu hãmri nẽ nhỹhỹm mẽ mõr xà hã mẽ omunh kurẽ kumrẽx. Hãmri nẽ krĩ hkwy rũm ma mẽ ãhkrep mra nẽ mẽ kãm amnhĩ to wa nẽ pøj nẽ mẽ kutêp hkrĩ. ³⁴ Hãmri nhũm mẽ mõ nẽ mẽ hwỳr pøj nẽ kre kura nẽ kanõre nhõ. Hãmri nhũm Jejus mẽ hwỳr api nẽ mẽ omu nẽ hamaxpẽr o:

—Hêxta waa nẽ. Na mẽ omnu nẽ pa. Te mẽ kệp ôwêhti jamãr xwỳnh kêt nẽ htỳx ri pa xwỳnh kot amnhĩ nhĩpêx pyrãk. Mẽhõ kot mẽ kamã ukaprĩ nẽ tanhmã mẽ ho mex to ho pa? Anẽ.

Hãmri nẽ mẽ kamã ukaprĩ nẽ xa nẽ Tĩrtũm kapẽr o mẽ ahkre rax nẽ.

³⁵⁻³⁶ Tã nhũm myt àr kaxyw nhũm hkôt mẽ kot pa ho pa xwỳnhjaja hwỳr mra nẽ kãm:
 –Kwa hãmri na ra amỹkry htỳx nẽ. Mẽ hano kê mẽ ma nhỹri krĩ hkwy hwỳr mra nẽ tokyx amnhĩm mẽmoj japrô nẽ kuku nẽ hikwỹ nẽ gõr. Mo jar kapôt ã mẽ apkur xà? Anẽ.

³⁷ Hãmri nhũm mẽ kuma nẽ mẽ kãm:

–Kwa nà mẽ kamjaja mẽ kãm mẽmoj gõ kê mẽ kuku. Anẽ.

Hãmri nhũm mẽ kuma nẽ tee ri hamaxpẽr nẽ kãm:

–Kwa mo mẽ kaxyw mẽ pakàxpore rax? Kot pu mẽ pakàxpore ho 200 nẽ ho mẽ kãm mẽmoj japrôr tã nom nhũm mẽ ãm ho hkryre nẽ kuku nẽ ho õhy htu hkêt nẽ. Mẽ ohtô rax kumrẽx kênã. Anẽ.

³⁸ Hãmri nhũm mẽ kãm:

–Nà kot puj mẽ kãm mẽmoj japrôr kêt nẽ. No mẽ panhõ pãwtita? Tanhmã na arĩ kute? E mẽ atô tẽ nẽ omu nẽ akupỹn tẽ nẽ inhmã harẽ. Anẽ.

Hãmri nhũm ja ma tẽ nẽ omu nẽ akupỹn tẽ nẽ kãm:

–Nà pãwti ãm kêp 5 pix. Nẽ kaxyw tep ãm pijakrutre. Anẽ.

³⁹ Hãmri nhũm Jejus kuma nẽ mẽ kãm:

–Tôe. Mẽ kãm anẽ kê mẽ ahpỹnhã ri hije nẽ hkrĩ. Anẽ.

⁴⁰ Hãmri nhũm mẽ piitã ahpỹnhã kêp 50 nẽ hije nẽ hkrĩ hpa.

⁴¹ Nhũm Jejus pãwti mẽ tepta jamỳ nẽ kànhmã kaxkwa hwỳr rĩt nẽ Tĩrtũm mã kupẽ nẽ kãm harẽ nẽ kãm:

–Pa Papaj? Nà ka na apê mẽ inhmã mẽ inhõ ho apa xwỳnh jakamã amex o amex. Anẽ.

Hãmri nẽ mẽ kãm ho hkry hpa nẽ hkôt mẽ pa ho mẽ pa xwỳnhjê mã kugõ nhũm mẽ ô ri ho mra nẽ ho mẽ hipêx pa. Pãwti mẽ tepta nhũm mẽ ho mẽ hipêx pa. ⁴²⁻⁴⁴ Nhũm mẽ piitã apkur mex nẽ. Mẽõja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nẽ ho õhy htu hpa. Mẽmyjaja kêp 5.000 nẽ kaxyw mẽ hprô nẽ mẽ hkrajaja nhũm mẽõja ho mẽ hipêx pa nhũm arĩ hakrẽx prã. Jakamã nhũm Jejus kôt mẽ pa ho mẽ pa xwỳnhjaja akupỹm hakrẽx o pikuprõnh pa nẽ ho kawà o 12 nẽ ho nỳt.

Jejus kot gô krãhkà hã htêm ã harẽnh

Matêwre 14.22-33; Juãw 6.15-21

⁴⁵⁻⁴⁶ Tã nhũm Jejus hkôt mẽ pa ho mẽ pa xwỳnhjê mã kãm:

–E mẽ kanôre mã axà nẽ ma akupỹm ixkukamã krĩ pê Petsêj wỳr rê. Pa jajê jano hãmri nẽ ma tẽ nẽ nhỹri Tĩrtũm mã amnhĩ jarẽ nẽ rĩ ma mẽ akôt tẽ. Anẽ.

Hãmri nhũm mẽ kuma nẽ kanôre mã gjêx pa nẽ ma mỗ nhũm Jejus mẽ kot mar xwỳnhjê janor pa nẽ ma hixêt prêk ã api nẽ Tĩrtũm mã amnhĩ jarẽnh o nhỹ.

⁴⁷ Tã nhũm kamãt nhũm arĩ ahte kỳxpê nhỹ. Nhũm hkôt mẽ pa ho mẽ pa xwỳnhjaja kormã kanôre kamã mỗ. ⁴⁸ Hãmri nhũm Jejus amỹm mẽ omu nhũm kôk ra mẽ kutã àpêr tỳx kumrẽx nhũm mẽ tee ri amnhĩ nhĩpêx nẽ tee ri rrẽmti ho gô rẽn nhĩpêx o hkrĩ.

Tã nhũm ra krãhyre kà nhũm Jejus Tĩrtũm mã amnhĩ jarẽnh pa nẽ kànhmã xa nẽ ma mẽ hkôt tẽ. Nom kanôre kamã htêm kêt nẽ gô krãhkà hã xa nẽ mẽ hwỳr hpar o tẽ.

⁴⁹⁻⁵⁰ Hãmri nẽ mẽ hwỳr kato nẽ mẽ kamã hamak kaxyw hêx rom kot mẽ hakrenh mã. Nhũm mẽ amnhĩ wỳr omu nẽ mẽkarõ hã hkamnhĩx nẽ tee ri amnhĩ kukamã hamaxpẽr nẽ umaj httertet nẽ ãmra rax nẽ. Hãmri nhũm mẽ kãm:

–Tk. Kwa mẽ amã ma hkêt nẽ. Pa na pa mẽ akôt tẽ. Anẽ.

⁵¹ Hãmri nẽ mẽ hwỳr kanôre hkrem axà nhũm kôk xàpêr tỳxta hapêx. Hãmri nhũm mẽ Jejus kamã no puma nẽ tee ri hamaxpẽr nẽ axpẽn mã:

–Kokỹỹ. Tanhmã na we amnhĩ to nẽ gô krãhkà hã hpar o man mẽ pahkôt tẽ mẽ pahwỳr àr mẽ nhũm kôk hapêx par kurê kumrẽx. Anẽ.

Hãmri nẽ tee ri kot ã amnhĩ nhĩpêx anhỹrja kukamã hamaxpẽr o hkrĩ. ⁵² Kormã mẽ kot hprĩ hã Jejus tanhmã kute hã omunh kêt jakamã. Tĩrtũm pyrã nẽ àhpumunh o àhpumunh ã omunh mex kêt jakamã tee ri pãwti grêre ho mẽ hipêx par nẽ gô krãhkà hã htêm nẽ kôk o pinhkrênh ã omu nẽ tee ri ã kot amnhĩ nhĩpêx anhỹrja kukamã hamaxpẽr.

Kenějare kamã Jejus kot akupỹm mẽ ho mex ã harẽnh

Matêwre 14.34-36

⁵³ Tã nhũm mẽ xarmã rê nê krĩ pê Jenějare hwỳr pøj. Hãmri nê kanôre nhô ⁵⁴ nê api nê kuhê nhũm krĩ nhô xwỳnhjaja Jejus pumunh kurê kumrêx nê axpên mã:

—Kwa pěr Jejusta na mô. Nà tãm kênã. Anê.

⁵⁵ Hãmri nê hkĩnh nê ma kape hã mẽ à xwỳnhjê hkôt mrrar kurê kumrêx nê mẽ harir xà rãhã mẽ hamỳ nê akupỳm Jejus wỳr mẽ o mra. Nhỳri hpôx xà kamã omu nê hwỳr mẽ o mra.

⁵⁶ Na pre htem ã Jejus nhĩpêx anê. Jakamã nhũm hte ma nhỹhỹm mra. Krĩ rũnh kôt mra nê krĩ hkryre hkôt mra nhũm mẽ omu nê hwỳr mẽ à xwỳnhjê ho mra nê mẽ ho kuwỳ nê kãm:

—Pa? Kwa kê jajaja akupỳm mex kaxyw apê axê pix kupê nà? Anê.

Hãmri nhũm mẽ kãm:

—Tôe. Nà kwâr mẽ mãmri hkupê. Anê.

Hãmri nê mẽ kot kêp ê kupênh xwỳnh piitã akupỳm mex pa.

7

Mẽ higêt hkôt mẽ kot amnhĩ nhĩpêx xwỳnhjê jarênh

Matêwre 5.21-48, 15.1-20

¹⁻⁴ Tã nhũm Mojes kapêr o mẽ ahkre o mẽ pa xwỳnh kwỳjaja Jerujarê rũm Jejus wỳr mô. Hãmri nê hã akuprô nê hkôt mẽ pa ho mẽ pa xwỳnhjê kot amnhĩ nhĩpêx ã mẽ omunh o kuhê. Ijaew na prem mẽ hkukamã mẽ higêtjê kapêr kôt ri tanhmã amnhĩ nhĩpêx to ho pa. Jakamã mẽ uràk nê apkur kaxyw nê xatã amnhĩ nhĩhkra kuhõnh japjê nê rĩ kormã apku. No mẽ amnhĩ nhĩhkra grã pix kuhõnh nê hkrĩ nê apkur kêt nê. Kuhõnh japjê nê kormã hkrĩ nê apku. Tĩrtũm kot ja hã mẽ omunh nê amnhĩm mẽ mex ã mẽ harênh ã amnhĩ kamnhĩx jakamã na prem ã amnhĩ nhĩpêx anhỹr o pa. Nê nhỹri amnhĩm mẽo hkwy japrô nê akupỳm òrkwy hwỳr o mra nê haxwỳ nê mẽ higêt pyrã nê wỳr japjê rũnh kumrêx nê rĩ kormã apku. Nê mẽ uràk nê poti nê gôj nê papêre hkre kahõnh japjê rũnh nê rĩ kormã kamã ò nhĩpêx. Mẽ higêt pyrã nê ã amnhĩ nhĩpêx anhỹr o pa. Tĩrtũm kot ja hã mẽ omunh nê amnhĩm mẽ mex ã mẽ harênh prãm xaj. Nom nhũm Jejus kôt mẽ pa xwỳnhjaja na prem ã amnhĩ nhĩpêx anhỹr kêt nê. Na prem apkur kaxyw nê katat kôt amnhĩ nhĩhkra kuhõ nê àmnhĩx apkur o hkrĩ. Jakamã nhũm Parijew nhô xwỳnh mẽ Tĩrtũm kapêr tũm o mẽ ahkre xwỳnhjaja tee ri ã mẽ kot amnhĩ nhĩpêx anhỹr ã mẽ omu nê mẽ hã Jejus kukja nê kãm:

⁵ —Pa Jejus? Kwa mẽ inhmã mẽmoj jarê. Amnepêm mẽ panhĩgêtjaja na pre htem apkur kaxyw nê amnhĩ nhĩhkra kuhõnh japjê rũnh kumrêx nê arĩ kormã hkrĩn apku. Jakamã na pa htem mẽ uràk nê ã amnhĩ nhĩpêx anê. No akôt mẽ pa ho mẽ pa xwỳnhjaja na htem ho mẽ ixpyrã kêt nê. Kwa mo na htem ã amnhĩ nhĩpêx anhỹr kêt nê? Anê.

⁶ Hãmri nhũm mẽ kuma nê mẽ kãm amnepêm Tĩrtũm nhỹ hã kapêr xwỳnh pê Ijais kapêr jarê nê mẽ kãm:

—Nà ãm hãmri na pre finat Ijaisja amnepêm tanhmã mẽ ajarênh to. Te Tĩrtũm tãm kapêr pyrãk o mẽ ajarê nê mẽ ajarênh o:

Mẽ kãm ixkĩnh ã amnhĩ jarênh tã mẽ kãm ixkĩnh kêt. Na htem ãm kãm ixprãm ã amnhĩ jarênh kaprỳ.

⁷ Mẽ kot ixkapêr kuhpa hã amnhĩ krã hkôt mẽmoj tã hkwyjê mã karõ ho pa jakamã na htem ãm kot ixkôt amnhĩ nhĩpêx ã amnhĩ jarênh kaprỳ. Anê.

Ã na pre mẽ ajarênh anê. ⁸⁻⁹ ãm hãmri na pre mẽ ajarê. Na ka htem mẽ panhĩgêt kapêr kôt pix mã amnhĩ nhĩpêx o apaja gryk ã ra Tĩrtũm kapêr kaga hpa. Te mẽ akapêr mex o kot Tĩrtũm kapêr jakrenh pyrãk. ¹⁰ Na pre finat Mojes Tĩrtũm nhỹ hã mẽmoj tã mẽ pamã karõ ho:

Ker ka mẽ anhĩpêxà nê mẽ akatorxà wa hã apijaam o ri apa. Jao wa kutã anojarêr rãhã nê. Nom kot kaj mẽ ho mex hkêt nê tanhmã mẽ kãm akapêr punuj to hãmri nhũm mẽ akwỳjaja ja mỳrapê mẽ apa. Anê.

Na pre ã finat Mojesja Tĩrtũm nhỹ hã mẽ pamã karõ anê. ¹¹ No mẽ kajaja na ka mẽ axtem nê tanhmã akwỳjê mã ja hã karõ hto nê mẽ kãm: “Kot kaj mẽ mẽmo arĩgro hã akàxpore

hkwỳ nom anhipêêxà ho ajuta kaxyw kām hkwỳ nhõr kêt nê. ãm wa kām ate ho ajuta kêt ã amnhĩ jarê hāmri nê Tĩrtũm mã amnhĩ jarênh xà hã ixkre hwỳr mǎn o tẽ nê mẽ ixte ixkre ho mex kaxyw mẽ inhmã agõ. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nhũm ja kām mex nê. E kêr ka mẽ ã amnhĩ nhĩpêx anhỹr o ri apa.” Anhỹr o na ka htem akwỳjê mã karõ. ¹² Jao mẽ kot mẽ hipêêxà nê mẽ katorxà ho ajuta nê mẽ hkurê. ¹³ Te mẽ amã mẽ panhĩgêr kapêr mex o kot Tĩrtũm kapêr jakrenh pyræk o na ka htem amnhĩ nhĩpêx. Jao te Tĩrtũm kapêr mex kêt pyræk o hipêx nê mar kêt nê apa. ã na ka htem Tĩrtũm kapêr kuhpa hã amnhĩ nhĩpêx anhỹr o ri apa. Anê.

Mẽ pajamaxpêr punuj kôt mẽ pahtomnu hã harênh

Matêwre 15.10-20

¹⁴ Tã nhũm Jejus Parijew nhõ xwỳnhjê mẽ hkwỳjê mã kapêr pa hāmri nê amnhĩ wỳr ra mẽ kot mar o kuhê xwỳnhjê mã hpa ho apê nê mẽ kām:

—E pa mẽ amã mẽmoj jarê ka mẽ inhma nê inhmar mex nê. ¹⁵⁻¹⁶ Na hte Tĩrtũm kapêr tũm o mẽ ahkre xwỳnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nê amnhĩ krã hkôt mẽ axàpkur xà hã tanhmã mẽ amã karõ hto ho pa. Mẽ ate ã amnhĩ nhĩpêx anhỹr nhũm Tĩrtũm kot ja hã mẽ apumunh kôt amnhĩm mẽ amex ã mẽ ajarênh kaxyw nhũm htem ã mẽmoj tã mẽ amã karõ anê. Nom na hte Tĩrtũm tanhmã mẽ panhĩhkra kuhõnh to hã mẽ pahpumu nê ãm hã mẽ pa hpumu. Nê mẽmo mẽ paxàpkur xà hã mẽ pahpumu nê ãm hã mẽ pahpumu. Ja kām tanhmã kute hkêt. Na hte ja hã mẽ omunh xà hkôt amnhĩm mẽ mex ã mẽ harênh rỳ mẽ mex kêt ã mẽ harênh kêt nê. Rỳ mẽ hakwa ho mẽmoj kur ã mẽ omunh xà hkôt tanhmã mẽ harênh to hkêt nê. ãm mẽ hakwa ho tanhmã kapêr to pix ã mẽ mar kôt na hte tanhmã mẽ harênh to.

Anhỹr o mẽ kām kapêr. ¹⁷ Hāmri nê mẽ kot mar o kuhê xwỳnhjê re nê hkôt mẽ pa ho mẽ pa xwỳnhjê mẽ mẽ amnhĩm hikranh xà hã ixkre hwỳr agjê. Hāmri nhũm hkôt mẽ pa ho mẽ pa xwỳnhjaja tee ri Jejus kot tanhmã mẽ hakwa jarênh to hã kuma nê hã hkukja nê kām:

—Kwa mon ka ri mẽ inhmã ã ja jarênh anê? Anê.

¹⁸ Hāmri nhũm mẽ kām:

—Kwa xàn ka mẽ kormã aprĩ hã ja mar mex kêt nê? E pa ixprĩ hã mẽ amã harê ka mẽ inhma. Nà mẽ apkur xà na hte mẽ hkrã hi kamã mẽ hamaxpêr wỳr gjêx kêt nê. ¹⁹ Na hte ãm mẽ õhy pix wỳr agjê nê gaa nê nhãm hapõj nê hapêx. Na htem mẽ apkur xà nhỹ hã tanhmã amnhĩ tomnu to hkêt nê. Jakamã na hte Tĩrtũm mẽ apkur xà hã mẽ omunh xà hkôt tanhmã mẽ harênh to hkêt nê. Anê.

Nhũm pre ã mẽ kām kapêr anhỹr o mẽ paxàpkur xà piitã mex ã harê. Jakamã na hte Tĩrtũm krajaja àmnhĩx mẽmoj piitã hkur o pa nê kām mẽmoj kur pyma hkêt nê. Jakamã nhũm Jejus ã mẽ kām kapêr anê nê mẽ kām:

²⁰ —Mẽ hkrã hi kamã mẽ hamaxpêr punuj pix nhỹ hã na htem tanhmã amnhĩ tomnuj to. Jakamã na hte Tĩrtũm tanhmã mẽ hamaxpêr to ho pa hã mẽ omunh xà hkôt tanhmã mẽ harênh to. Nom mẽ kot mẽmoj kur ã mẽ omunh xà hkôt rỳ mẽ ihkra kuhõnh japjê hã mẽ omunh xà hkôt tanhmã mẽ harênh to hkêt nê. Ja tanhmã kêp kute hkêt. ²¹⁻²² Nom koja mẽhõ hamaxpêr punuj nê ra hkôt tanhmã amnhĩ tomnuj to.

Jao axpên kamã hpijaàm kêt nê.

Rỳ mẽhõx pĩ rỳ mẽ kêp ahkĩ.

Rỳ mẽ kêp mẽ hprõ rỳ mẽhkuprỳ ho amnhĩkati.

Rỳ ri axpên pê õxỳ.

Rỳ tanhmã hkwỳjê homnuj to.

Rỳ tanhmã mẽ ho kapêr punuj to.

Rỳ hêx rom mẽ no kupyri o ri pa.

Rỳ mẽmoj tã amnhĩ to jarkrar o pa.

Rỳ axpên kukrêx pumu nê kām ho õ hprãm xàj hã õ xwỳnhhta kamã gryk.

Rỳ htỳx ri tanhmã amnhĩ nhĩpêx to.

Mě hamaxpěr punuj jakamã na htem ã ri amnhĩ nhĩpêx anhÿr o pa. ²³ Tã ã mẽ kot amnhĩ nhĩpêx anhÿr ã mẽ omunh xà hkôt na hte Tĩrtũm mẽ kot amnhĩ tomnuj xwÿnh hã mẽ harẽ. Anẽ.

Mẽhõ kot hkra kaxyw Jejus mã hamaxpěr ã harẽnh

Matêwre 5.21-28

²⁴ Tã nhũm Jejus mẽ hkôt mẽ pa ho mẽ pa xwÿnhjaja nhÿhÿm nojarêt hãmri nẽ krĩ rũm hapôj nẽ ma krĩ pê Xir pu hã ri pa. Hãmri nhũm Jejus hkwyjê mã:

—E kwa pu mẽ tokyx ixkre mũj wÿr mō mẽ kuri pōj nẽ kamã amnhĩm hikra. Pu mẽ pahpōx tokyx anẽ kê krĩ nhõ xwÿnhjaja mẽ pahpōx ã mẽ pahpumunh kêt nẽ.

Anhÿr tã nom nhũm mẽ piitã mẽ harẽnh ma nẽ mẽ hã akuprõ. ²⁵⁻²⁶ Nhũm mẽhõ ni haxwÿja Jejus hpōx ã harẽnh ma nẽ ma hwÿr tẽ. Nom kêp Ijaew kêt axtem Gres nhõ xwÿnh na pre. Pika pê Sir kamã krĩ mẽ kot kãm “Wẽnĩs” anhÿr xwÿnh kamã na pre kato. Nhũm pre mẽkarõmnuti kêp hkra ni mã axà. Hãmri nhũm õ mãmãj tee ri omu nẽ ra Jejus hpōx ã harẽnh ma nẽ ma hwÿr tẽ. Hãmri nẽ hwÿr axà nẽ hparpê hkõnkrã ho htẽm nẽ nhÿ nẽ kãm:

—Xê Pahihti. Inhmã ixkra nẽ mẽkarõmnuti jano kê ma tẽ kê akupÿm inhmã mex. Anẽ.

²⁷ Hãmri nhũm kãm:

—Nà kormã. Na pre Tĩrtũm taxy kormã Ijaewjê pix wÿr inhmẽ. Jakamã na pa kormã nhãm mẽ akwyjê hõ tanhmã mẽ ato mex to hkêt nẽ. Anẽ.

²⁸ Hãmri nhũm tee ri amnhĩ tã kuma nẽ kãm:

—Ma ãm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Anẽ.

²⁹ Hãmri nhũm kãm:

—Nà ãm hãmri na ka ã akra kaxyw inhmã ajamaxpěr tÿx anẽ. Jakamã kot paj nẽ mẽkarõmnutita jano. Koja axte tanhmã apê ho hkêt nẽ. E ma akupÿm hwÿr tẽ nẽ omu. Anẽ.

³⁰ Hãmri nhũm kuma nẽ ma akupÿm õrkwÿ hwÿr tẽ nẽ omu. Nhũm ra mẽkarõmnutija kêp kato nẽ ma tẽ nhũm akupÿm tãm hkrã nẽ hkĩnh nẽ par kãm hkõkôt o nõ.

Hamak kro nẽ kapěr krok xwÿnh jarẽnh

Matêwre 15.29-31

³¹ Tã nhũm Jejus mẽ hkôt mẽ pa ho mẽ pa xwÿnhjaja krĩ pê Xir rũm hapôj nẽ akupÿm gô rax pê Garirej wÿr ma mra. Pyka pê Sitõ jakre nẽ mō nẽ pyka pê Tekap jakre. ³² Hãmri nẽ kormã hpōx o mōr rôm nhũm mẽ amnhĩ wÿr Jejus pumu nẽ hwÿr mẽhõ myja o tẽ. Kapěr krok nẽ umar kêt xwÿnhhta nhũm mẽ wÿr o tẽ nẽ kãm:

—Pa? Ot pa mẽ awÿr ixkrãmnhwÿta o tẽ. Kwa hã anhĩhkra xi kê akupÿm mẽ inhmã mex. Anẽ.

³³ Hãmri nhũm omu nẽ hpa hã kupy nẽ mẽ kêp o kato nẽ nhÿri mẽ hkàx ã o xa. Nẽ akutã hamak kre kupê nẽ argōx mẽ nẽ ho õhto htok. ³⁴ Hãmri nẽ kaxkwa hwÿr rĩt nẽ htyk xà mẽnũ tÿx nẽ kãm kapěr. Mẽ pakapěr kãm kãm: “E ajamak katêr nẽ anhõhto kaxkrit.” Anẽ. Nom kapěr kãm kãm: “Epata.” Anẽ. ³⁵ Hãmri nhũm hamak katêr nẽ õhto kaxkrit kurê kumrẽx nẽ tãm kapěr nẽ tãm ama. ³⁶⁻³⁷ Hãmri nhũm mẽ kot omunh xwÿnhjaja amnhĩ jaêr pê Jejus kot ho mex ã omu nẽ kamã no puma nẽ. Hãmri nhũm mẽ kãm:

—Kwa kêr ka mẽ akwyjê mã ja hã ijarẽnh kêt nẽ.

Anhÿr tã no nhũm mẽ kuma nẽ ãm kuma nẽ ma mẽ piitã mẽ kãm harẽnh o ri hprõt nẽ mẽ kãm:

—Kwa Jejus na mex o mex. Na hte mẽ ho mex o pa nhũm mẽ umar kêt xwÿnhjaja akupÿm tãm ama nhũm mẽ kapěr kêt xwÿnhjaja akupÿm tãm kapěr. ãm hãmri na hte ã mẽ hipêx anhÿr o pa. Nà ãm mex o mex. Anẽ.

8

Jejus kot mẽ ho 4.000 nẽ mẽ kãm mẽ õ hã harẽnh

Matêwre 15.32-39

¹⁻² Tã nhũm arĩgro hõ hã nhũm mẽ ohtô nẽ nhỹri kapôt ã Jejus ã htu rax nẽ kot mẽ ahkre mar o kuhê hã apkati axkrunẽpxi. Nhũm mẽ apkur xà hã mẽõja ra mẽ kêp hapêx. Hãmri nhũm Jejus ja hã mẽ omu hãmri nẽ hkôt mẽ pa ho mẽ pa xwýnhjê mã akir nẽ mẽ kãm hpa ho apê nẽ mẽ kãm:

—E mẽ amnê ixwýr mra nẽ ixkapêr ma. Anê.

Nhũm mẽ hwýr mra nẽ kuhê nhũm mẽ kãm:

—Kwa na pa inhmã mẽ kot inhmar o kuhê xwýnhjê kaprĩ nẽ. Na mẽ ra mẽ pahkôt ri pa hã apkati axkrunẽpxi nhũm mẽ apkur xà hã mẽõja mẽ kêp hapêx. ³ Mẽ õ krĩ hwýr awry jakamã koja mẽ mẽmoj kur kêt rãhã ma akupým pa hãmri nẽ pry hã hirot nẽ rôrôk o pa. Hãmri pa inhmã mẽ hkaprĩ nẽ. Anê

⁴ Hãmri nhũm mẽ kuma nẽ axte tee ri hamaxpêr nẽ kãm:

—Kwa nà nhỹhýnh kot puj kêt mẽ kãm mẽmoj to mra? Jar ãm kapôt pix kênã. Anê.

Hãmri nhũm mẽ kãm:

⁵ —Nà tanhmã na mẽ anhõ pãwtija kute? Anê.

Nhũm mẽ kãm:

—Ãm kêp 7 pix. Nẽ kaxyw tep kwý no ãm grêre. Anê.

⁶ Hãmri nhũm mẽ kuma nẽ mẽ kot mar o kuhê xwýnhjê mã anê nhũm mẽ kuma nẽ hkrĩ pa. Hãmri nhũm pãwti jamý nẽ ho Tĩrtũm wý nẽ kãm:

—Pa Papaj. Nà ka na apê mẽ inhmã mẽ inhõ ho apa xwýnh. Jakamã amex o amex. ãm amex kumrêx. Anê.

Hãmri nẽ mẽ kãm ho hkry pa nẽ hkôt mẽ pa ho mẽ pa xwýnhjê mã kugõ nhũm mẽ ho mẽ hipêx pa. ⁷ Nhũm hpãnhã tepta py nẽ mã ho anê nẽ ho Tĩrtũm wý. Hãmri nẽ hkôt mẽ pa ho mẽ pa xwýnhjê mã kugõ nhũm mẽ mã ho anê nẽ hamý nẽ ho mẽ hipêx pa. ⁸⁻⁹ Hãmri nhũm mẽ ohtô rax kumrêx tã piitã apku nẽ õhy htu pa. Mẽmyjaja kêp 4.000 nẽ kaxyw mẽ hprõjaja nẽ mẽ hkrajaja. Tã nhũm Jejus mẽ apkur xàja o mẽ hipêx pa. Nhũm hkôt mẽ pa ho mẽ pa xwýnhjaja hakrêx o akuprõ nẽ ho kawà ho 7 nẽ ho nýt. Hãmri nhũm Jejus ma akupým mẽ õ krĩ hwýr mẽ kot mar xwýnhjê jano nhũm mẽ ma akupým hapêx. ¹⁰ Hãmri nhũm Jejus hkôt mẽ pa ho mẽ pa xwýnhjê mẽ ro hã kanõre hkrem agjê nẽ mẽ hkwym ma Tamanut wýr mõ.

Parijew nhõ xwýnh kwý kot mẽmoj tã Jejus kamã hamak ã mẽ harênh

Matêwre 12.38-42, 16.1-4; Rukre 12.54-59

¹¹ Tã nhũm mẽ Tamanut wýr pøj nhũm Parijew nhõ xwýnh kwýjaja Jejus pumu nẽ ma hwýr mra nẽ mẽmoj tã kuwý nẽ kãm:

—Pa. Ot pa mẽ awýr mra. Kwa mẽ inhmã aa mẽ ixte mẽmoj pumunh kêt õ ho anê. Pa mẽ ja hã apumu nẽ Tĩrtũm kot mẽ ixwýr amênh ã akôt ijamaxpêr kurê kumrêx. E tokyx. Anê.

Kot tee ri mẽ kãm mẽmoj to anhýr kaxyw nẽ ho anhýr kêt nhũm mẽ kot hã omunh nẽ ma hkwyjê mã ho kapêr punuj kaxyw nhũm mẽ ã hêx rom kãm kapêr anê. ¹² Nhũm ra kãm mẽ kot amnhĩ kaxyw hkôt hamaxpêr kêt kãm ã kapêr anhýr mar kaga nẽ. Hãmri nẽ tee ri amnhĩ tã mẽ hamaxpêr ã mẽ omu nẽ htyk xà mênh tỳx nẽ mẽ kãm:

—Hêxta waa nẽ. Mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awýr inhmênh xwýnh tã ka mẽ ja hã ixkôt ajamaxpêr kêt nẽ. Nà mo kaxyw kot pa kêt mẽ amã mẽmoj to anê? Kot paj ho anê ka mẽ omu nẽ ãm omu nẽ ixkôt ajamaxpêr kêt nẽ. Nà kot paj mẽ amã mẽmoj to anhýr kêt nẽ. Anê.

¹³ Hãmri nẽ mẽ kure nẽ hkôt mẽ pa ho mẽ pa xwýnhjê mẽrohã ma mra nẽ akupým kanõre hkrem agjê nẽ ma xarmã mõ.

Jejus kôt mẽ pa xwýnhjaja kot hprĩ hã omunh kêt ã mẽ harênh

Matêwre 16.5-12; mãânên Makre 6.52

¹⁴ Tã nhũm mẽ kormã kanõre kamã xarmã mõi rôm nhũm Jejus kôt mẽ pa ho mẽ pa xwýnhjaja tee ri mẽ apkur xà japêr nẽ axpên mã:

—Kwa hêxta waa nẽ. Na pu mẽ panhõ pãwti re nẽ amnhĩ kôt o pamõi kêt nẽ. Nẽ ãm pixire nẽ o mõi. Anê.

¹⁵ Hāmri nhūm Jejus tee ri mẽ kuma nẽ tanhmã hã mẽ kãm kapẽr to. Nom mẽmoj tã kuxi nẽ mẽ kãm awjarẽ nẽ mẽ kãm:

—Kwa oko kêr ka mẽ amnhĩ nẽ Parijew nhõ xwỳnh mẽ Pahi Erox nhõ pãw kaxkrit xà pumunh mex nẽ. Anẽ.

¹⁶ Hāmri nhūm mẽ kuma nẽ tee ri kapẽrja kukamã hamaxpẽr pẽ hã axpẽn kukjêr o hkrĩ nẽ axpẽn mã:

—Kwa mo na ri ã mẽ pamã pãw kaxkrit xà jarẽnh anẽ? Mãn mẽ panhõ pãwti hkêt ã mẽ pahpumu hã na ri ã harẽnh anẽ nà? Anẽ.

¹⁷ Hāmri nhūm Jejus mẽ kapẽr ã mẽ kuma nẽ mẽ kãm:

—Kwa mon ka wem ãm xatã axpẽn mã mẽ panhõ pãwti hkêt jarẽnh pix o mõi? Xàn pa hte mẽ apyrà nẽ tee ri mẽ paxàpkur xà hkêt kukamã ijamaxpẽr o ixpa? Nà inhmã ja tanhmã kute hkêt. ¹⁸ Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nẽ mẽ ajamak o ixkapẽr mar mex tã aprĩ hã mar tỳx kêt. Kwa wem ixte amnhĩ nhĩpêx mã ajamaxpẽr tỳx nẽ. E mẽ inhmã mẽmoj jarẽ. ¹⁹ Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprõ nẽ ho kawà ho nýt to? E mẽ atõ inhmã harẽ. Anẽ

Hāmri nhūm ja kãm: “Na pa prem ho kawà ho 12 nẽ ho nýt.” Anẽ. ²⁰ Nhūm kuma nẽ mẽ kãm:

—Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrênhta. Tanhmã na ka prem hakrêx ho akuprõ nẽ ho kawà ho nýt to? Anẽ.

Nhūm ja kãm: “Na pa prem ho 7.” Anẽ. ²¹ Hāmri nhūm kuma nẽ mẽ kãm:

—Tỳ ra ixte mẽ anoo mã ã ja ho anhỹr o axkrut tã ka mẽ ra hã ano hkêt nẽ arĩ axpẽn mã mẽ panhõ pãwti hkêt pix jarẽnh o ixkõt mõi. Kormã mẽ ate ixàhpumunh tỳx ã ixpumunh kêt. Anẽ.

Jejus kot akupỹm nohkre xwỳnh o mex ã harẽnh
Juãw 9.1-7

²² Tã nhūm mẽ ma krĩ pẽ Pesêj wỳr mõi nẽ ra hwỳr pøj. Hāmri nhūm krĩ nhõ xwỳnh kwỳjaja mẽ omu nẽ Jejus wỳr mẽhõ myja o tẽ. Ra nohkre nẽ rĩt kêt nẽ pa xwỳnhja nhūm mẽ hpa hã kupyn hwỳr o tẽ. Hāmri nẽ ho kuwỳ nẽ kãm:

—Pa Pahihti? Ot pa mẽ awỳr ja ho tẽ. Kwa hã anhĩhkra xi nẽ akupỹm mẽ inhmã no ho mex. Anẽ.

²³ Hāmri nhūm mẽ kuma nẽ nohkre xwỳnhhta pumu nẽ hpa hã kupy nẽ o tẽ nẽ krĩ pẽ ho kato nẽ nhỹri mẽ hkà ã o xa. Hāmri nẽ no hã argôx mẽ nẽ hã ìhkra xi nẽ kãm:

—E mãn ka mẽmoj pumu nà? Anẽ.

²⁴ Hāmri nhūm kuma nẽ hkrākato nẽ ri rĩt hāmri nẽ kãm:

—Tỳ na pa mẽmoj pumu. Nom ixprĩ hã omunh mex kêt nẽ. Te mẽmo pĩ hpàr kwỳ ri mrrar pyrāk. Anẽ.

²⁵ Hāmri nhūm axte no hã ìhkra xi nhūm tã rĩt mex nẽ. Ri hprĩ hã mẽmoj piitã omunh mex nẽ. ²⁶ Hāmri nhūm Jejus akupỹm òrkwỹ hwỳr kumẽ nẽ kãm:

—E kêr ka kape hã ri amrrar kêt nẽ. ãm ma ma akupỹm anhõrkwỹ hwỳr atẽm kurê kumrêx. Anẽ.

Jejus kot amnhĩ tã hkõt mẽ pa xwỳnhjê kukjêr ã harẽnh
Matêwre 16.13-20; Rukre 9.18-21

²⁷ Tã hāmri nhūm Jejus ma hkõt mẽ pa ho mẽ pa xwỳnhjê mẽ mẽ ma mõi. Ma krĩ pẽ Sejarej Piripos pu hã krĩ hkwy hkõt mõi. Nẽ kormã pry hã mõi nhūm Jejus amnhĩ tã hkõt mẽ pa ho mẽ pa xwỳnhjê kukja nẽ mẽ kãm:

—Kwa mẽ inhmã mẽmoj jarẽ. Tanhmã na htem ahpỹnhã ri axpẽn mã ijarẽnh to wehe? Anẽ.

²⁸ Hāmri nhūm mẽ kãm:

—Nà na htem ahpỹnhã tanhmã ajarẽnh to. Na hte kamã mẽ hkwyjaja axpẽn mã ato finat Juãw Paxis ã ajarẽ. Nẽ kamã mẽ hkwyjaja ato finat Eris ã ajarẽ nẽ mẽ hkwyjaja apẽ Tĩrtũm nhỹ hã kapẽr o pa xwỳnh ra htyk xwỳnhjê hõ hã ajarẽ. ã na htem ahpỹnhã axpẽn mã ajarẽnh anhỹr o pa. Anẽ.

²⁹ Hāmri nhūm mẽ kuma nẽ mẽ kām:

—No we mẽ kajaja? Ixpê mẽhō hã na ka htem axpën mã ijarẽ? Anẽ.

Hāmri nhūm Simāw Pêtre kām:

—Nà mẽ pajaja na pa htem apê Tirtūm kot mẽ ixkaxyw axām nẽ mẽ ixwỳr amēnh xwỳnh ã ajarẽ. Nẽ apê mẽ ixpiitã mẽ inhō Pahi Maati hã ajarẽ. ã na pa htem axpën mã ajarēnh anẽ. Anẽ.

³⁰ Hāmri nhūm kuma nẽ mẽ kām:

—Nà ãm hāmri na ka htem ã ijarēnh anẽ. ã ixte anhỳr. Kwa nom kwa kêr ka mẽ inhma. Kêr ka mẽ kormã ã akwỳjê mã ijarēnh anhỳr kêt nẽ. Anẽ.

Jejus kot amnhĩ kukamã amnhĩ jarēnh ã harēnh

Matêwre 16.21-23; Rukre 9.22

³¹ Tã nhūm Jejus amnhĩ kukamã hkôt mẽ pa ho mẽ pa xwỳnhjê mã tanhmã amnhĩ jarēnh to nẽ mẽ kām:

—Nà ra mẽ ate Tirtūm kot mẽ akaxyw ixām ã ixpumunh mex. No mẽ pahkwỳjaja kām ja hã ijarēnh mar nẽ ixpumunh prãm kêt. Ijaew krãhtūmjê mẽ Tirtūm kapêr tūm o mẽ ahkre o mẽ pa xwỳnhjê mẽ patre krãhtūmjaja na mẽ kām ja hã ixpumunh prãm kêt. Jakamã koja mẽ nhỹrmã ixpynê nẽ ixtak rax nẽ ixpĩ. Nom kot paj ixtyk ã ixtã apkati axkrunēpxi hāmri nhūm Tirtūm akupỳm ixto ixtĩr. Anẽ.

³² Hāmri nhūm mẽ kot hpĩr ã amnhĩ jarēnh ma nẽ tee ri hkukamã hamaxpêr. Hāmri nhūm Simāw Pêtreja hwỳr tẽ nẽ hkwỳjê pẽ ho kato nẽ mẽ hkàx ã o xa nẽ kām:

—Kwa nà Pahihti. Koja Tirtūm anẽ mẽ omunh mex nẽ nhūm mẽ ã anhĩpêx anhỳr kêt nẽ. Kwa ri ã kapêr anhỳr kêt nẽ. Anẽ.

³³ Hāmri nhūm kuma nẽ hwỳr apkjê nẽ pu hã hkôt mẽ pa ho mẽ pa xwỳnh piitã omu. Hāmri nẽ mẽ hamak mã Simāw Pêtre mã kapêr nẽ kām:

—Tk. Kwa na ka ã inhmã akapêr anhỳrja o te Satanasti nhỹ hã akapêr pyrãk. Tirtūm nhỹ hã na ka ã inhmã akapêr anhỳr kêt nẽ. ãm jar mẽ kām Tirtūm kapêr mar prãm kêt xwỳnhjê jamaxpêr o na ka ajamaxpêr nẽ ã inhmã akapêr anẽ. No Tirtūm jamaxpêr o ajamaxpêr kêt nẽ. Anẽ.

Jejus krajaja tanhmã kot amnhĩ nhĩpêx hto hã mẽ harēnh

Matêwre 6.24-28; Rukre 9.23-27; Juãw 12.24-26; mãänēn Apokarip 2.10, 12.11

³⁴ Tã nhūm Jejus amnhĩ wỳr mẽ kot mar o kuhê xwỳnhjê mẽ hkôt mẽ pa ho mẽ pa xwỳnhjê mã anẽ nhūm mẽ hwỳr axkamẽ nẽ kuhê. Hāmri nhūm tanhmã mẽ ahkre hto nẽ mẽ kām:

—E mẽ inhma. Kot kaj mẽ ixkôt amnhĩ xunhwỳr ã amnhĩ jarẽ hã kot kaj mẽ mãänēn amnhĩ jarēnh o: “Jesús kệp inhō Pahihti jakamã kot paj ãm kapêr kôt pix mã amnhĩ nhĩpêx rãhã ho ri ixpa. Kwãr ixkwỳjaja tanhmã hã inhĩpêx to pa arĩ hkôt amnhĩ nhĩpêx rãhã ho ixpa.” Anhỳr o amnhĩ jarẽ.

³⁵ —Koja mẽ ixtã mẽ atõx pĩ rỳ ixtã tanhmã mẽ ato ka ty. Ate tanhmã ijarēnh to ho apa hã nhūm mẽ apĩ. Tã nom koja akaxwỳnh ma inhō krĩ hwỳr àpir kurê kumrêx nẽ kamã atĩr tūm nẽ amex rãhã nẽ apa ho apa. Nom kot kaj mẽ jar atĩr prãm xàj ixkaga hāmri nẽ hwỳr axàpir kêt nẽ.

³⁶⁻³⁷ —Nẽ koja mẽhō hikukrêx gryk ã Tirtūm kaga. Hāmri nẽ nhỹrmã ty nẽ ÿ kamã kuwy hwỳr ma mō nẽ amnhĩ kôt kukrêx õ hpyr nẽ o mōr kêt nẽ. Koja tee ri kuwy hwỳr mōr pymaj amnhĩ nẽ hikukrêx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tirtūm mã amnhĩre nẽ ma õ krĩ hwỳr api? Koja ã amnhĩ nhĩpêx anhỳr kêt nẽ.

³⁸ —Nẽ koja mẽhō ixte mẽ ahkre hã inhma nhūm ja kệp omnuj japêr. Nhūm kot mẽ kām ixprãm nõkati xwỳnhjê hkôt pa gryk ã ixkaga. Hã kot paj nhỹrmã mẽ ato amnhĩptar kaxyw akupỳn wrỳ nẽ amnhĩ xwar kot ixkaga xwỳnhta kaga. ãm hāmri na pa mẽ amã ja hã amnhĩ jarẽ. Kot paj nhỹrmã inhō Papaj nhỹ hã ixte mẽ ho amnhĩptar kaxyw akupỳn wrỳ nhūm kapêr o mẽ wrỳk xwỳnhjaja man ixkôt wrỳ. Pa mẽ wrỳ hāmri nẽ ra mẽ kot ixkaga xwỳnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9

¹ Nhūm Jejus arī mẽ kām kapēr nē mẽ kām:

—Ăm hāmri na pa mẽ amā amnhĩ jarē. Kot paj nhỹrmā akupỹn ixte mẽ ato amnhĩptār kaxyw mẽ awyr wrỳ kām ga. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anē.

Jejus hirã htỳx kām ãm ã harēnh

Matêwre 17.1-9; Rukre 9.28-36; mããnēn Sikūn Pêtre 1.16-18

² Tã nhūm arĩgro kêp 6 nē hapêx nhūm Jejus ma nhỹri hixêt prêk wỳr tễ. Nē Simãw Pêtre nē Xiakre nē Juãwja nhūm ma amnhĩ kôt wa mẽ o mō. Nhūm wa mẽ ahte mō nē hixêt prêk ã api nē himōk ã kuhê. Hāmri nhūm Jejus axtem nē xa. ³ Ra ê haka htỳx kumrêx nē xa. ⁴ Hāmri nhūm ja wa kaxkwa rŭm hwỳr wrỳ nē kuri kām kapēr. Finat Mojes mẽ finat Erisja wa wrỳ nē kuri kām kapēr o xa. Tĩrtŭm amnepê m amnhĩ wỳr wa ho àpir tã nhūm wa akupỹn wrỳ nē kām kapēr. ⁵⁻⁶ Nhūm wa mẽ mex kumrêx nē hirã htỳx kām kuhê nhūm Jejus kôt mẽ mōr xwỳnhjaja wa mẽ omu nē mẽ kamã no puma nē. Nē tee ri mẽ kām tanhmã kapēr to hkukamã hamaxpêr. Hāmri nhūm Simãw Pêtre hamaxpêr nē Jejus mã kām:

—Kwa Pahihti. Nà ãm hāmri na pu mẽ amnē mō. Kwa pu mẽ kritpê m jar axkamē nē tokyx panojarêt kêt nē. Pa mẽ amã pô nhĩrōnh o axkrunêpxi nē hipêx. Amã nē Mojes mã nē Eris mã hō nhĩpêx ka mẽ kamã akrĩ. Kwa xat pa mẽ amã ho anē nà? Anē.

⁷ Hāmri nhūm kakrã jaka htỳx wrỳ nē wa mẽ hkunor pa nhūm wa mẽ kamã kuhê. Hāmri nhūm kakrã kamã Tĩrtŭm mẽ kām kapēr nē mẽ kām:

—Ota Ixkra xa. Inhmã hapê ho inhmã hapê. Kêr ka mẽ kapêr mar tỳx rãhã ho ri apa. Anē.

⁸ Hāmri nhūm mẽ kuma nē amnhĩ pu hã rĩt nhūm ãm Jejus pix mẽ kuri xa nhūm Mojes mẽ Erisja wa ra ma akupỹm api nhūm mẽ ãm Jejus pix pumu.

⁹ Hāmri nhūm mẽ ma akupỹm hkwỳjê hwỳr wrỳk o mō nhūm Jejus mẽ kām:

—Kwa kêr ka mẽ ham mẽ ate mẽmoj pumunh xwỳnhhta kormã nhãm mẽ kām harēnh kêt nē. Kojã mẽ mẽmo arĩgro hã ixpĩ hāmri nhūm Tĩrtŭm akupỹm ixto ixtĩr ka mẽ rĩ kormã mẽ kām ja hã ijarēnh o ri apa.

¹⁰ Anē hāmri nhūm mẽ kuma nē mẽ kām harēnh kêt nē. Ăm axpên mã pix mã harē nē kot akupỹm htĩr ã amnhĩ jarēnhja ã axpên kukjêr o pa nē axpên mã:

—Kwa mo na ri ã akupỹm htĩr ã amnhĩ jarēnh anē? Tanhmã kot we amnhĩ to nē htyk tã akupỹm htĩr? Anē.

Hāmri nē tee ri hkukamã hamaxpêr o hkôt pa.

Juãw Paxis te kot Eris pyrãk ã harēnh

Matêwre 11.13-15, 17.10-13

¹¹ Hāmri nhūm mẽ kormã ahpãr mã wrỳk o mōr mẽ nhūm Jejus kôt mẽ mōr xwỳnhjaja mẽmoj tã hkukja nē kām:

—Kwa mẽ inhmã mẽmoj jarē. Na hte Tĩrtŭm kapêr tŭm o mẽ ahkre xwỳnhjaja mẽ inhmã: “Eris kumrêx kojã Tĩrtŭm mẽ pahwỳr kumē nhūm Krisja hapu hã wrỳ.” Anē. Na htem ã mẽ inhmã war ajarēnh anē. Tã ka na ka ra wrỳ nom nhūm kormã Erisja akukamã wrỳk kêt nē. Anē.

¹²⁻¹³ Hāmri nhūm mẽ kām:

—Nà ãm hāmri na htem mẽ amã ã ja jarēnh anē. Na pre ra ixkukamã te kot Eris kot amnhĩ nhĩpêx pyrãk xwỳnhhta tễ nē ixkutêp mẽ kām ijarēnh o pa. Nom mẽ kot ixkukamã ijarēnh xwỳnh ã omunh kêt jakamã na prem axtem nē kām tanhmã hipêx to hprãm xà hkôt tanhmã hipêx kati hton kupĩ. Tã kojã mẽ ã hipêx anhỹr pyrã nē mã ixto anē nē inhĩpêx kati nē tokyx mẽ kām ixprãm kêt xwỳnhjaja ixpynê nē ixpĩ pa amnhĩ xà htỳx kamã ijamak kãm ty. Tĩrtŭm kapêr ã kagã htŭm kot wa ijamē wa ixkukamã wa ijarēnh xà hkôt. Anē.

Jejus kot mẽhō hkra nē mẽkarōmnuti janor ã harēnh

Matêwre 17.14-21; Rukre 9.37-43

¹⁴ Hāmri nhūm Jejus nē Simāw Pêtre nē Xiakre nē Juāwja mẽ akupým hkwýjê hwýr hpôx o mra nē amnhĩ kukamã hkwýjê pumu nhūm mẽ ohtô nē mẽ hã akuprô nē mẽ kãm kapêr. Nhūm Tirtūm kapêr tūm o mẽ ahkre ho mẽ pa xwýnhjaja mẽmoj tã mẽ hkukjêr o kuhê. ¹⁵ Jakamã nhūm Jejus mẽ hwýr hpôx o tē nhūm mẽ pikuprônh xwýnhjaja amnhĩ wýr omu nē hkĩnh nē. Hāmri nē kutã hprôt nē kãm:

—Pa. Nà ãm hāmri na ka akupým mẽ ixwýr tē. Anē.

¹⁶ Hāmri nhūm mẽ kãm:

—Kwa mẽmoj tã na ka mẽ axpên mã axàkjêr o akuhê? Anē.

¹⁷⁻¹⁸ Hāmri nhūm mẽhõ myja kãm:

—Nà ixkra hã na pa mẽ axpên mã ixkapêr. Na pre mẽkarõmnuti ixpê hwýr axà nē tanhmã ixpê ho nhūm kapêr kêt nē pa. Nhūm hte xatã tanhmã ixpê ho nhūm pykap amnhĩ rē nē hakwa jamrô ho hikwý. Hāmri nē à htýx kamã ama nē amnhĩ nham o axpên kamnhar týx kumrêx pē htýx pa nē hikwý nē ixpê omnuy týx nē. Na hte ã mẽkarõmnuti nhỹ hã amnhĩ nhĩpêx anhýr o pa. Jakamã na pa ate inhmã ho mex kaxyw man o tē nē tee ri ajapêr. Hāmri nē ho akôt mẽ pa ho mẽ pa xwýnhjê hwý nhūm mẽ kot inhmã ho mex kaxyw tee ri tanhmã ho hkaprý. Anē.

¹⁹ Hāmri nhūm Jejus kuma nē hkôt mẽ pa ho mẽ pa xwýnhjê mã kãm:

—Hêxta waa nē. Ra mẽ ate Tirtūm nhỹ hã ixte mẽ ho mex ã ixpumunh ryy htã ixpyrà nē ã amnhĩ nhĩpêx anhýr kêt nē. Mãn ka mẽ kormã kaxyw Tirtūm kôt ajamaxpêr týx kêt nē. E amnē ixwýr akra ho tē pa omu. Anē.

²⁰ Hāmri nhūm mẽ hwýr o tē nhūm mẽkarõmnuti Jejus pumu nē tanhmã hkrata o htýx to nhūm pykap tēm nē hakwa jamrô nē amnhĩ rēnh o nõ. ²¹ Nhūm Jejus omu nē hipêêxã mã:

—Kwa tanhmã na ra kot amnhĩ nhĩpêx ã mytwrý kute? Anē.

Nhūm kãm:

—Nà hprĩre rūm na hte ã amnhĩ nhĩpêx anhýr o pa. ²² Na hte mẽkarõmnuti xatã ixpê hpĩr kaxyw kuwy kamã kurē nē gôx kãm kurē. Kwa kot ka ate ho mex kukamã axàhpumunh japêr nē wa ixkamã axukaprĩ nē akupým inhmã ho mex. Anē.

²³ Hāmri nhūm Jejus kãm:

—Xàn ka tee ri ixte ho mex kaxyw ixkukamã ajamaxpêr? Nà ixte mẽmoj piitã ho anhýr kaxyw ixàhpumunh týx kênã. Kot ka mẽ atõ mẽmoj tã amnhĩ kaxyw ixkôt ajamaxpêr týx hã kot paj amã ho anē. Anē.

²⁴ Hāmri nhūm kuma nē kãm hkra mex prãm týx xàj kapêr týx nē kãm:

—Nà na pa amnhĩ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr týx rãhã ho ri ixpa Pahihti. Anē.

²⁵ Rôm nhūm mẽ ohtô rax nē hwýr kormã mra nhūm Jejus amnhĩ wýr mẽ omu hāmri nē mẽkarõmnutija mã kapêr kurê kumrêx. Nē kãm kapêr kãm hihtýx nē kãm:

—Pa mẽkarõmnuti. E apê mẽ ho mẽ kapêr kêt nē mẽ umar kêt o apa xwýnh ã pa amã ixkapêr ka inhma. Kêr ka mẽ hkrata pē akato nē ma amõr o mō nē axte tanhmã ho hkêt nē. Anē.

²⁶ Hāmri nhūm tee ri kot kãm karõja ma nē gryk xàj xatã amýra nē mẽ hkrata o htýx kumrêx nhūm htertet týx o nõ. Hāmri nhūm kêp kato nē ma tē nhūm te htyk pyrã nē nõ nhūm mẽ tee ri omu nē ra htyk ã hkamnhĩx. ²⁷ Hāmri nhūm Jejus hpa hã kupy nē kãnhmã ãm nhūm akupým mex nē kãnhmã xa nē ri mra. Nē tãm kapêr o mra nē umar mex nē.

²⁸ Tã nhūm Jejus hkôt mẽ pa ho mẽ pa xwýnhjê mẽrohã ma akupým amnhĩm hikranh xà hã ixkreja wýr mra nē hwýr agjê nē hkrĩ. Hāmri nhūm Jejus kôt mẽ pa ho mẽ pa xwýnhjaja amnhĩ tã hkukja nē kãm:

—Kwa mẽ inhmã mẽmoj jarê Pahihti. Na pa mẽ tee ri axwakre kamã mẽ hkrata nē mẽkarõmnuti janor kaprý. Kwa mon pa mẽ apyrã nē ja ho anhýr mex kêt nē? Anē.

²⁹ Hāmri nhūm mẽ kãm:

—Nà axtem na mẽkarõmnuti ja. Na htem mẽ nê hanor tokyx anhýr kêt nē. Na htem ho Tirtūm wýr týx nē rĩ kormã hano. Anē.

Jejus kot htyk kukamã amnhĩ jarēnh

Matêwre 17.22-23; Rukre 9.44-45

³⁰⁻³¹ Tã nhũm Jejus mẽ hkôt ri mẽ pa ho pa xwýnhjê mẽ krĩja rũm hapôj nẽ ma nhãm mỗ. Nẽ ma pyka pê Garirej kahti hkôt mỗ. Nom mẽ piitã mẽ hkàx ã mỗ. Jejus kormã kot amnhĩ tã tanhmã hkôt mẽ pa ho mẽ pa xwýnhjê jahkre hto ho pa jakamã kãm mẽ hkàx ã mẽ o pa hprãm nẽ. Hãmri nẽ amnhĩ kukamã mẽ kãm tanhmã amnhĩ jarēnh to nẽ mẽ kãm:

—E kot paj mẽ amã tanhmã amnhĩ jarēnh to ka mẽ inhma nẽ inhmar tỳx nẽ. Koja mẽ kãm ixprãm kêt xwýnhjaja tokyx mẽ kãm ixtã amýnê nhũm mẽ ixpĩ. Kot paj ixtyk ã ixtã apkati axkrunêpxi hãmri nhũm Tĩrtũm akupým ixto ixtĩr. Kwa kêr ka mẽ ja ma nẽ hã anohtỳx nẽ ho apa. Anẽ.

³² Hãmri nhũm mẽ tee ri ã kot amnhĩ jarēnh anhỹrja ma nẽ axpẽn mã:

—Kwa mo na ri ã mẽ pamã amnhĩ jarēnh anẽ? Nà kêp mẽ panhõ Pahi Maati hã kot amnhĩ jarēnh kênã kot kêt mễhõ kupĩ.

Anhỹr o axpẽn mã harēnh o hkôt mỗ. Hãmri nẽ ã kot amnhĩ jarēnh anhỹr mar prãm kêt jakamã hpri hã tanhmã hkukjêr to hkêt nẽ. ãm akryk hkôt mar o mỗ.

Mẽ kot amnhĩ to rũnh xwýnh jarēnh

Matêwre 18.1-5; Rukre 9.46-48

³³⁻³⁴ Tã nhũm Jejus mẽ hkôt mẽ pa ho pa xwýnhjaja kormã ma krĩ pê Kapanau hwỳr mỗ nhũm hkôt mẽ pa ho mẽ pa xwýnh pê 12jaja tanhmã amnhĩ kukamã hamaxpêr to hãmri nẽ axpẽn mã:

—Kwa mẽ pahtõ kot puj we nhỹrmã pahpê pahi nẽ mẽ ho amnhĩptar rax o ri pahkwỳjê jakre?

Anhỹr o axpẽn kukjêr o Jejus kôt mỗ. Nẽ axpẽn mã: “Nà pa.” Nhũm mẽ hkwỳjaja: “Nà kêt pa.” Anhỹr o hkôt mỗ. Hãmri nhũm Jejus mẽ mar o mỗ. Hãmri nhũm mẽ mỗ nẽ nhỹri amnhĩm hikranh xà hã ixkre hwỳr pôj nẽ hwỳr agjê nhũm mẽ kãm:

—Kwa mẽmoj tã na ka mẽ pry hã amnhĩ jarēnh o mỗ? Anẽ.

Hãmri nhũm mẽ tee ri kuma nẽ hpijaam nẽ. Nẽ kãm tanhmã amnhĩ jarēnh to hkêt nẽ.

³⁵ Jakamã nhũm Jejus nhỹ nẽ mẽ kãm anẽ nhũm mẽ kuri hkrĩ pa nhũm mẽ kot mẽ kãm mẽ ho amnhĩptar rax prãmta ã mẽ kãm kapêr nẽ mẽ kãm:

—E mẽ inhma. Ka mẽ atõ amã mẽ ho amnhĩptar rax prãm. Hã kêr ka te apê mẽ piitã mẽ kãm amarĩ axapênh xwýnh pyrak o amnhĩ nhĩpêx o mẽ hkôt apa. Jao mẽmoj to mẽ kutã anojarêt rãhã nẽ. Anẽ.

³⁶ Hãmri nẽ amnhĩ wỳr mễhprĩre hõ mã hpa ho apê nhũm hwỳr tẽ nhũm kumỳ nẽ o nhỹ nẽ hã mẽ kãm kapêr nẽ mẽ kãm:

³⁷ —E mẽ inhma. Kêr ka mẽ apê pahi pyrak o tanhmã amnhĩ jarēnh to ho ri apa hkêt nẽ. ãm te amarĩ ri mẽ apa pyrak o amnhĩ nhĩpêx o ri apa. Jao nhỹri mễhprĩre hõ pumu nẽ kamã axukaprĩ nẽ kãm mẽmoj tanhmã ho rỳ kãm mẽmoj gõ. Hãmri nẽ ã amnhĩ nhĩpêx anhỹr o te pa ate tanhmã ixto mex to pyrak o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tĩrtũm o mex pyrak o amnhĩ nhĩpêx. E kêr ka mẽ amã amnhĩ to rũnh prãm nẽ ã amnhĩ nhĩpêx anhỹr o ri apa. Anẽ.

³⁸ Hãmri nhũm Juaw nhỹhỹnh tẽn mẽ hwỳr axà nẽ Jejus mã:

—Kwa Pahihti. O mũj mễhõ kêp mẽ pahkwỳ hkêt tã anhỹ hã mẽ nê mẽkarõmnuti janor o pa. Pa mẽ tee ri ja hã omu nẽ kêp mẽ pahkwỳ hkêt jakamã pa mẽ ã kot amnhĩ nhĩpêx anhỹrja nẽ kãm ixkapêr. Anẽ.

³⁹⁻⁴⁰ Hãmri nhũm kuma nẽ kãm:

—Kwa nà nẽ tanhmã kãm nẽ hkêt nẽ. Koja mễhõ inhỹ hã aa mẽ kot mẽmoj pumunh kêt kwỳ ho anẽ hãmri nẽ kêp mẽ panhĩõ nẽ ri mẽ pahkwỳm tanhmã mẽ ahkre hto ho pa hkêt nẽ. Ra mẽ pahkôt kot amnhĩ nhĩpêx mã kênã. Jakamã kwa mẽ ja nẽ tanhmã kãm nẽ hkêt nẽ. Kwār mãmri ã amnhĩ nhĩpêx anẽ. Ja mex kênã.

⁴¹ —Koja mễhõ nhỹri mẽ atõ amã kôr ã apumu nẽ hamaxpêr o: “Kwa Jejus kôt ri pa xwýnh mũj kãm kôr. E pa kãm gô hkwỳ kê ho ixkõ.” Anhỹr o hamaxpêr nẽ apê ixkwỳ

hã amã gô hkwȳ ka ho ixkô. Nhũm ãm kot amã gô pix nhõr nhũm ate ho akõm tã nhũm Tĩrtũm atã omu nẽ ho mex rax nẽ. Anẽ.

Mẽ pahte amnhĩ tomnuj pymaj tanhmã amnhĩ nhĩpêx to hã mẽ pajarẽnh

Matêwre 18.6-9; Rukre 17.1-2

⁴² Nhũm Jejus arĩ hkõt mẽ pa ho mẽ pa xwỳnhjê mã kapêr nẽ mẽ kãm:

—Nẽ mẽ kot ixkõt amnhĩ xunhwỳr tohtuj anhỹr xwỳnhjaja. Koja mẽhõ ma mẽ hwỳr tẽ nẽ inhnê mẽ kãm kapêr. Mẽ kot mẽ mar nẽ tanhmã amnhĩ tomnuj to hprãm xaj hêx rom mẽ kãm kapêr nhũm mẽ mar xà hkõt tanhmã amnhĩ tomnuj to. Hã koja Tĩrtũm ja hã omu nẽ kot inhnê tanhmã kãm nẽ xwỳnhhta pumu nẽ homnuj tỳx nẽ. Te mẽ kot mẽhõ pynênh nẽ mut ã kên pytĩi hõ nhõr nẽ ma o htẽm nẽ gô xupỳm rax kãm mẽnh pyrãk o hipêx. Te ho ja pyrãk no ãm homnuj tỳx o hakre.

⁴³⁻⁴⁷ —E kwa mẽ o kora. Kot kaj mẽ anhĩkra rỳ apar o tanhmã amnhĩ tomnuj to. Hã kêr ka mẽ axte ã amnhĩ nhĩpêx anhỹr pymaj te ate amnhĩ pẽ anhĩkra rỳ apar krãhyr nẽ mẽnh pyrãk o amnhĩ nhĩpêx nẽ axte ã amnhĩ tomnuj anhỹr kêt nẽ. Rỳ ka mẽ ano ho mẽmoj punuj pumu. Hãmri nẽ kãm ajamaxpêr pix o apa pymaj te ate amnhĩ pẽ ano katõk nẽ mẽnh pyrãk o amnhĩ nhĩpêx nẽ nhãm arĩt kurê kumrêx. Kêr ka mẽ ã amnhĩ nhĩpêx o apa rãhã nẽ. Hãmri nẽ nhỹrmã ty nẽ ma Tĩrtũm mẽ wa inhõ krĩ hwỳr api. No kot ka mẽ arĩ akutã ano nẽ arĩ akutã apar nẽ arĩ akutã anhĩkra rãhã ri mrar tã tõhã tanhmã ho amnhĩ tomnuj to. Hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xà pẽ kuwy maatita wỳr ma apa.

⁴⁸ Kuwyja kamã na htem mẽ kot amnhĩ tomnuj mỳrapê amnhĩ xà htỳx kamã hamak rãhã ho pa ho pa hãmri nẽ aa hapõx kêt nẽ.

⁴⁹ ã koja mẽ kot amnhĩ tomnuj o mẽ pa xwỳnh piitã amnhĩ nhĩpêx anhỹr rãhã nẽ pa ho pa. ⁵⁰ Jakamã kwa kêr ka mẽ axpên to mex rãhã ho ri apa. Nom axpên kãm agryk nẽ tanhmã axpên nhĩpêx to ho ri apa hkêt nẽ. Anẽ.

Nhũm pre ã Jejus hkõt ri mẽ pa ho mẽ pa xwỳnhjê jahkre anẽ.

10

Mẽ pahte axpên kaga nẽ Jejus kot mẽ pahkurê

Matêwre 5.31-32, 19.1-12; Rukre 16.18; mããnẽn Wam Korĩt 7.10-16

¹ Tã nhũm Jejus mẽ hkõt mẽ pa ho pa xwỳnh mẽrohã ma pyka pẽ Jutej wỳr mõ. Hãmri nẽ pyhti pẽ Jotãw ã rê nẽ hpãnhã ma xarmã mõ. Nhũm mẽ axte mẽ hã akuprõ nhũm kê Jejus axte mẽ ahkre ho xa. ² Hãmri nhũm Parijew nhõ xwỳnh kwỳjaja hwỳr mra. Mẽ kot hêx rom kamã hamak nẽ mar nẽ tanhmã ho kapêr punuj to kaxyw hwỳr mra nẽ kãm:

—Pa. Ot pa mẽ mẽmoj tã akukjêr kaxyw awỳr mra. Kwa tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtjê mã karõ hto? Xà koja mẽ pahprõ mẽ pakapêr hkwȳm tanhmã amnhĩ nhĩpêx to pu mẽ mỳrapê hkaga nhũm Tĩrtũm ja hã mẽ pahpumu nhũm ja kãm mex nẽ nà? Anẽ.

³ Hãmri nhũm mẽ kãm:

—Tanhmã na pre Mojes Tĩrtũm nhỹ hã ja hã mẽ amã karõ hto? Anẽ.

⁴ Nhũm mẽ kãm:

—Nà na pre harẽnh o:

Kêr ka mẽ aprõ kaga kaxyw hãmri nẽ ate hkaga hã amnhĩ jarẽnh ã kagà nẽ kãm agõ nẽ rĩ kormã hkaga. Anẽ.

Na pre ã mẽ inhmã ja hã karõ anẽ. Anẽ.

⁵ Hãmri nhũm mẽ kãm:

—Tỳ nom mẽ kãm Tĩrtũm kapêr kõt amnhĩ nhĩpêx prãm kêt jakamã na pre ã mẽ kãm ja jarẽnh anẽ. ⁶ Amnepêm mẽmoj piitã hkrax kãm na prem axpên kaga hkêt nẽ. Na pre Tĩrtũm wam myja nhĩpêx nẽ hpãnhã kãm hprõ nhĩpêx. Axpên kaxyw wa hipêx. ⁷ Jakamã na hte mẽmyjaja hprõ kaxyw nẽ gryk ã katorxà nẽ hipêxà wa hkaga nẽ ãm hprõ kõt pix mã pa ho pa. ⁸ Te wa tipxi nẽ ri wa pa pyrãk o axpên nhĩpêx o pa. ⁹ Tĩrtũm tãm kot axpên

mã wa òr kênã kot kêt mēhō wa kot axpēn kaga kaxyw tanhmã wa hipêx to rỳ tanhmã wa kãm kapēr to. Anē.

Nhũm pre ã Jejus mē kãm kapēr anē. ¹⁰ Hãmri nē hkôt mē pa ho mē pa xwỳnhjê mē akupỳm ixkrem agjê nhũm mē kãm:

—Kwa aprĩ hã mē inhmã mē kot axpēn kaga hã mē harēnhhta jarē pa mē ixprĩ hã kuma nã. Anē.

Hãmri nhũm mē kãm:

¹¹ —Nã kot kaj mē aprō kaga nē hpãnhã nhãm mēhō ho aprō nhũm Tĩrtũm noo mã te ate wam aprō kamã nhãm aprō nyw o amnhĩkati pyrãk. Tĩrtũm pē ja omnuj tỳx nē. Rỳ koja mēhō hprō kaga ka hpãnhã ho aprō nhũm Tĩrtũm noo mã te ate wam mjên pē ho amnhĩkati pyrãk. Ja mããnēn Tĩrtũm pē omnuj tỳx nē.

¹² —Nē mēnijaja. Koja mēhō ni ra mjên kaga nē hpãnhã nhãm mēhō ho mjên. Ja mex kêt. Mjên krax kēp mjên kumrēx kênã kot kêt hkaga nē hpãnhã nhãm hō ho mjên. Koja anē nhũm Tĩrtũm noo mã te kot wam mjên kamã nhãm hō ho amnhĩkati pyrãk nhũm Tĩrtũm pē ja omnuj tỳx nē. Anē.

Jejus kot amnhĩ nē mēhprĩjê janor kêt ã harēnh

Matêwre 19.13-15; Rukre 18.15-17

¹³ Tã nhũm Ijaew kwỳjaja Jejus wỳr mē hkrarejê jamỳ nē mē o mra. Kot mē hã ìhkra jaxwỳr nē mē ho Tĩrtũm wỳr kaxyw hwỳr mē o mra. Hãmri nhũm hkôt mē pa ho pa xwỳnhjaja tee ri ja hã mē omu nē mē kãm:

—Kwa mo kaxyw na ka mē Jejus wỳr mē o mra? Kormã mē ràxre kênã. Mē ma akupỳm mē o mra nã? Anē.

¹⁴ Hãmri nhũm Jejus ja hã mē kuma nē mē kãm:

—Kwa nã kwār mē mãmri ixwỳr mē o mra. Mē ri inhnê mēhprĩjê kurê hkêt nē. Anē.

Hãmri nē mē kãm hpa ho apê nhũm mē hwỳr mē o mra nhũm mē kuri kuhê. Hãmri nhũm mē hã hkôt mē pa ho mē pa xwỳnhjê mã kãm:

—E mē jarejê pumu. Na htem hamakêtkati nē hkĩnh nē ri pare. Mē kãm amnhĩ to rũnh prãm kêt nē ri pare. Tã Tĩrtũm kôt mē kot amnhĩ nhĩpêx o ri mē pa xwỳnhjaja na htem mē urãk nē kãm amnhĩ to rũnh prãm kêt nē ri pa.

¹⁵ —Na hte jarejaja hipêêxà nē katorxà wa kapēr ma nē wa hkôt ri amnhĩ nhĩpêx o ri pare. Tã ixpê Tĩrtũm kot mē awỳr inhmēnh xwỳnh na pa. Kot ka mē amã ixkôt amnhĩ xunhwỳr prãm hã kot kaj mē jarejê kot amnhĩ nhĩpêx pyrãk o amnhĩ nhĩpêx. Jao ixkapēr ma nē ixkôt ri amnhĩ nhĩpêx mex o ri apa. Anē.

¹⁶ Hãmri nē mēhprĩrejê jamỳ nē mē hã ìhkra jaxwỳ nē mē ho Tĩrtũm wỳ nē kãm:

—Pa Papaj. E kêr ka jarejê ho mex rãhã nē kê mē mex nē pa. Anē.

Hikàxpore rax xwỳnh jarēnh

Matêwre 19.16-22; Rukre 18.18-23; mããnēn Wam Ximotre 6.6-10; Xiakre 5.1-6

¹⁷ Tã nhũm Jejus mē hkôt mē pa ho pa xwỳnhjaja nhỹri pry hã mō nhũm Ijaew krãhtũmja omu nē hwỳr tē nē mēmoj tã hkukja nē kãm:

—Pa mē ijahkre xwỳnh maati? E kwa inhmã mēmoj jarē. Nhỹrmã Tĩrtũm ri ixtĩr tũm nē ixpa hprãm xàj mēmo kot pa we ho anhỹr o ri ixpa? Ate amnhĩ to mex pix o ri apa xwỳnh jakamã kwa inhmã tanhmã ja jarēnh to. Anē.

¹⁸ Hãmri nhũm kãm:

—Xà ate ixpê Tĩrtũm kwỳ hã ixpumunh kôt na ka ixte urãk nē amnhĩ to mex xwỳnh ã ijarē? Tĩrtũm pix na kot amnhĩ to mex rãhã xwỳnh jakamã kot kaj ã ijarēnh anē nē ixpê Tĩrtũm Kra hã ijarē. Jao urãk nē ixte amnhĩ to mex xwỳnh ã ijarē. Nã xàn ka ãm atỳx ri amnhĩ krã hkôt ã ijarēnh anē?

¹⁹ —Tĩrtũm mex o mex jakamã kot kaj amã nhỹrmã kuri atĩr tũm nē apa hprãm hãmri nē ra kot mēmoj tã mē amã karō xà hkôt amnhĩ nhĩpêx o ri apa. Ra ate mar mex kênã. Na pre mē amã:

Kêr ka mē axàhkĩnh o ri apa hkêt nē.

Nē mē hpar kêt nē.

Ně tanhmã axêx kêt nê.

Ně axêx rom tanhmã mẽ nokupyr to hkêt nê.

Ně mẽ kêp mẽ hprõ ho amnhĩkati hkêt nê.

Ně anhĩpêêxã mẽ akatorxã wa hã apijaãm nê wa ho mex pê wa kutã anojarêr rãhã ho ri apa.

E kot kaj amã nhỹrmã Tĩrtũm kuri atĩr tũm nê apa hprãm hã kot kaj ã amnhĩ nhĩpêx anhỹr o ri apa. Anê.

²⁰ Hãmri nhũm kuma nê kãm:

—Kwa ixprĩre ri ra ã ixte amnhĩ nhĩpêx anhỹr o ri ixpa kênã. Nom te ixtĩr tũm nê ixpa kaxyw ixte kormã tãm kêt pyrãk. Anê.

²¹ Hãmri nhũm kuma nê hprĩ hã omu nê kãm hapê nê. Hãmri nê kãm:

—Nã kormã mẽmoj pyxire nê arĩk. Na ka amã akukrêx rax kĩnh tỳx o Tĩrtũm jakre. Jakamã kêr ka ma akupỹm anhõrkwỹ hwỳr tẽ nê akukrêx rax o wẽnê hpa. Nê kàxpore jamỹ hãmri nê ma mẽ kêp amrakati xwỳnhjê mã õr o ri apa. Hãmri nê akupỹn tẽ nê arĩ ri ixkõt apa ho apa. Anê.

²² Hãmri nhũm kuma nê tee ri hikukrêx rax kukamã hamaxpêr. Kãm hapê jakamã kãm kãm ãhkra karo hprãm kêt nê. Hãmri nê tee ri Jesus kot ã kãm hã karõ anhỹrja ma nhũm ja kãm mex kêt nhũm awjanã nê hkaprĩ nê ma akupỹm tẽ. ²³ Hãmri nhũm Jesus tee ri omu nê hkõt mẽ pa ho mẽ pa xwỳnhjê mã kãm:

—Hêxta waa nê. Koja mẽ hikukrêx rũnh xwỳnhjaja ohtõ nê kãm mẽ hikukrêx japê xàj Tĩrtũm mẽ wa ixri htĩr tũm nê pa ho pa hkêt nê. Wa ixte amnhĩ nhĩpêxja mẽ kêp hihtỳx. Anê.

²⁴ Hãmri nhũm mẽ tee ri kapêrja ma nhũm Jesus mẽ hamaxpêr kõt mẽ omunh mex jakamã axte tanhmã mẽ kãm harênh to nê mẽ kãm:

—Nã Tĩrtũm mẽ wa ixte amnhĩ nhĩpêxja na mẽ hikàxpore rũnh xwỳnhjaja pê ja hihtỳx.

²⁵ Mẽ kãm hikukrêx rax mã ãhkra karo hprãm kêt rãhã tee kãm Tĩrtũm kõt amnhĩ nhĩpêx prãm kaprỹ. Te ho mẽhõ kot menh kagõ hã hkre nê kãm kagõ katõk prãm kêt rãhã kãm guhkrax kãm àr prãm kaprỹta pyrãk. Anê.

²⁶ Hãmri nhũm mẽ kuma nê tee ri amnhĩ kukamã hamaxpêr nê kãm:

—Kwa no mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari ixtĩr tũm nê ixpa ho ixpa hkêt nê? Anê.

²⁷ Hãmri nhũm mẽ kãm:

—Nã kot kaj mẽ amnhĩ krã hkõt mẽ amã mẽ akukrêx japê mã anhũrer kêt nê. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nê. Jao ra mẽ apê Tĩrtũm mẽ wa ixri atĩr tũm nê mẽ apa ho mẽ apa mã xwỳnh. Anê.

²⁸ Hãmri nhũm Simãw Pêtre kãm:

—Kwa Pahihti na pa prem agryk ã mẽmoj piitã hkaga hpa nê akõt ixpa ho ixpa. Jakamã xà kot paj mẽ nhỹrmã war ari ixtĩr tũm nê ixpa ho ixpa kêt nê nã? Anê.

²⁹ Hãmri nhũm kuma nê hkõt mẽ pa ho pa xwỳnh piitã mẽ kãm:

—Nã ka mẽ atõ inhmã tanhmã amnhĩ to ho apa kaxyw akwỳjê re nê ma inhmã tanhmã amnhĩ nhĩpêx to ho ri apa. Anhõrkwỹ re rỳ atõ rỳ atõx rỳ aprõ nê akrajê re. Rỳ akatorxã nê anhĩpêêxã wa are. Rỳ akukrêx piitã rer pa hãmri nê ma ixkapêr o mẽ piitã mẽ ahkre ho ri mẽ hkõt apa. ³⁰ Hã kot paj amnhĩ tã mẽ apumu nê mẽ ato mex rax nê. Hãmri ka mẽ ma mẽ kãm ixkapêr jarênh o mẽ hkõt apa nhũm mẽ kot mẽ amar xwỳnh kwỳjaja mẽ ama nê kãm mẽ akĩnh nê. Nê ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx. Jao tanhmã mẽ ato mex to ho pa.

—Nê koja mẽ kãm ixprãm kêt xwỳnhjaja ixtã tanhmã mẽ atomnuj to hã ka mẽ nhỹrmã ma Tĩrtũm mẽ wa inhõ krĩ hwỳr api nê wa ixkuri amex nê atĩr tũm nê apa ho apa. ³¹ Nom kêr ka mẽ ja hã amnhĩ pumunh kõt amnhĩ to rax xwỳnh ã amnhĩ to jarkrar kêt nê. Mẽ kot amnhĩ to rũnh xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh kêt ã amnhĩ pumu. Nê mẽ kot amnhĩ to hkryre xwỳnhjaja koja mẽ nhỹrmã amnhĩ to rũnh ã amnhĩ pumu. Anê.

Jejus kot amnhĩ kukamã axte amnhĩ jarēnh

Matêwre 20.17-19; Rukre 18.31-34

³² Tã nhũm Jejus hkôt ri mẽ pa ho mẽ pa xwỳnhjê mã kapēr pa hãmri nẽ ma Jerujarē hwỳr mẽ o mō. Ra kamã kãm hkurê xwỳnhjaja kot hpĩr ã amnhĩ jarēnh tã ma hwỳr mẽ o mō. Jakamã nhũm mẽ tee ri hkukamã hamaxpēr o hkôt mō. Nhũm mẽ amarĩ mẽ hkôt mrar xwỳnhjaja haxwỳja kãm ma nẽ. Hãmri nhũm Jejus mẽ kêp 12ta o mō nẽ hkwỳjê hkàx ã amnhĩ kukamã tanhmã mẽ kãm amnhĩ jarēnh to ho mō nẽ mẽ kãm:

³³ —E na pu mẽ ra Jerujarē hwỳr mō. Kot puj mẽ hwỳr pøj nhũm mẽ kãm ixkurê xwỳnhjaja patre krãhtũmjê mẽ Tĩrtũm kapēr tũm o mẽ ahkre xwỳnhjê nhĩhkram ijaxã. Hãmri nhũm mẽ kãm Tĩrtũm kapēr kôt amnhĩ nhĩpêx prãm kêt xwỳnhjaja ixpĩr kaxyw mẽ kãm ixtã amỳnê ³⁴ nhũm mẽ mar xà hkôt tanhmã inhĩpêx kati hto. Nẽ mẽ hkwỳjaja ixtã hpēr o axkê nẽ ixtã akunha. Nẽ mẽ hkwỳjaja tanhmã ijapry hto nẽ ixtã argôx rẽ nẽ ixtak hãmri nẽ ixpĩ. Kojã mẽ ã inhĩpêx anẽ. Nom kot paj ixtyk ã ixtã apkati axkrunēpxi nhũm Tĩrtũm akupỹm ixto ixtĩr. Anẽ.

Xiakre mẽ Juãw wa kot amnhĩ to Jejus wỳr ã wa harēnh

Matêwre 20.20-28; Rukre 22.24-30; mããnēn Piripos 2.3-8; Wam Pêtre 5.3

³⁵ Tã nhũm Jepetew kra Xiakre mẽ Juãw wa tanhmã hamaxpēr to nẽ Jejus mã kãm:

—Kwa mẽ ijahkre xwỳnh. Pa wa amã mẽmoj jarē ka wa inhmã “ỳ” anẽ nà? Anẽ.

Hãmri nhũm wa kãm:

³⁶ —Ko wa mamrĩ inhmã mẽmoj jarē pa wa ama mãn. Anẽ.

³⁷ Hãmri nhũm wa kãm:

—Nà kot kaj nhỹrmã ate mẽ piitã mẽ ho amnhĩptar kaxyw nhỹ pa wa akutã anhĩjê. Nẽ wa papxipix ixpê anhõ kôwenatô nẽ akutã anhĩjê nẽ ato nhỹ. Ja na pa wa inhmã hprãm. Anẽ.

³⁸ Hãmri nhũm wa kãm:

—Nà na ka wa ãm atỳx ri ã amnhĩ to ixwỳr anẽ. Kojã mẽ tokyx ixpĩ pa amnhĩ xà htỳx kamã ijamak rax nẽ ty. Tã xà kojã mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

³⁹ Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyrã nẽ amnhĩ xà htỳx kamã ijamak kãm ty. Anẽ.

Hãmri nhũm wa kãm:

—Nà ãm hãmri na ka wa ja hã amnhĩ jarē. War ate ixpyrà nẽ ixkôt amnhĩ xà htỳx kãm ajamak kãm atyk mã kênã. ⁴⁰ Tã nom war ate amnhĩ to ixwỳrta ã kot paj tanhmã war amã nẽ hkêt nẽ. Inhõ Papaj tãm kojã ja kaxyw mẽhõ japêr nhũm inhĩhkô hã nhỹ. No pa kot paj ri ja kaxyw mẽ atõ rēnh kêt nẽ. Anẽ.

⁴¹ Hãmri nhũm wa urak nẽ Jejus kôt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kumã nẽ wa kamã gryk nẽ. ⁴² Jakamã nhũm Jejus mẽ piitã mẽ ho akuprõ nẽ mẽ kãm:

—E mẽ inhma. Na hte Ijaew kêt xwỳnhjê nhõ pahĩhtijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh jakamã amarĩ ixkre kre jakry kamã hkrĩ ho hkrĩ nẽ kãm mẽ àpēnh xwỳnhjê pix mã mẽmo mẽ àpēnh ã karõ ho hkrĩ. Na htem ã amnhĩ nhĩpêx anẽ. Nẽ mẽ kot amnhĩm mex ã harēnh prãm xaj tanhmã mẽ ho mex to ho pa. ⁴³⁻⁴⁵ Tã no mẽ kajaja kêr ka mẽ atõ amã amnhĩ to rax prãm hãmri nẽ ho mẽ kot amnhĩ nhĩpêx pyrãk kêt nẽ. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axàpēnh o apa kaxyw na pa pre mẽ awỳr ixwryk kêt nẽ. ãm pa ixte tanhmã mẽ amã amnhĩ nhĩpêx to ho ixpa kaxyw na pa pre mẽ awỳr wry. Mẽ ate nhỹrmã kuwy wỳr apa pymaj mẽ anẽ ixtyk kaxyw na pa pre mẽ awỳr wry. Jakamã kot kaj mẽ atõ amã amnhĩ to rax prãm hã kêr ka ixpyrà nẽ akwỳjê kutã anojarêt rãhã ho ri apa. Hãmri nẽ inhmã te ate amnhĩ to rax o amnhĩ nhĩpêx pyrãk o amnhĩ nhĩpêx. Anẽ.

Jejus kot akupỹm Paximew o mex ã harēnh

Matêwre 20.29-34; Rukre 18.35

⁴⁶ Tã nhũm Jejus mẽ hkôt mẽ pa ho mẽ pa xwỳnhjaja kormã Jerujarẽ hwỳr mõi ri ra krĩ pẽ Jeriko hkôt mõi. Hãmri nhũm mẽ ohtõ nẽ mẽ hã ajêt nẽ mẽ hkôt mõi. Nhũm mẽhõ myja pry nhĩhkrep nhỹ. Ximew kra Paximew nohkre xwỳnhja pry kamã ahwỳr o hkrĩ.

⁴⁷ Hãmri nhũm Jejus mẽ hkwỳjaja hwỳr htêp o mõi nhũm amnhĩ wỳr mẽ kuma nẽ mẽ kot Jejus nhĩxi jarẽnh o mõi ã kuma hãmri nẽ kàx pẽ kãm kapẽr nẽ amnhĩ to kuwỳ nẽ kãm:

—Pa Jejus? Nà apê mẽ inhõ Pahihti mex kumrẽx na ka. Te apê amnepêm anhĩgêt pahihti Tawi kot amnhĩ nhĩpêx pyrãk. Jakamã kwa we ixkamã axukapĩ nẽ akupỹm ixto mex kêt wehe. Ixte amnhĩ kaxyw akôt ijamaxpẽr xwỳnh na pa. Anẽ.

⁴⁸ Hãmri nhũm Jejus kukamã mẽ mrar xwỳnhjaja kuma nẽ kãm:

—Tk. Kwa akapẽr kêt nẽ nhỹ nà. Anẽ.

Tã nom nhũm ãm mẽ kuma nẽ xatã amnhĩ to kuwỳ. Kỳx pẽ amnhĩ to kuwỳ nẽ axte kãm:

—Kwa ixkamã axukapĩ nẽ akupỹm ixto mex Pahihti. Anẽ.

⁴⁹ Hãmri nhũm Jejus kuma nẽ xa nẽ hkôt mẽ pa ho mẽ pa xwỳnhjê mã kãm:

—E mẽ atõ hwỳr tẽ nẽ hpa hã apy nẽ amnẽ ixwỳr o tẽ. Anẽ.

Hãmri nhũm mẽ kuma nẽ nohkre xwỳnhhta mã kapẽr nẽ kãm:

—E tee ri amnhĩ kukamã ajamaxpẽr kêt nẽ. Na atã karõ. E tokyx kànhmã xa. Anẽ.

⁵⁰ Hãmri nhũm mẽ kuma nẽ hkĩnh tỳx nẽ. Nẽ kànhmã harĩ nẽ amnhĩ nẽ õ kajaati mẽ nẽ hwỳr htêm kurê kumrẽx. ⁵¹ Hãmri nhũm Jejus kãm:

—Pa mo na? Tanhmã kot pa ato? Anẽ.

Hãmri nhũm kãm:

—Nà akupỹm inhmã ixrĩt mex prãm Pahihti.

⁵² Anẽ nhũm kãm:

—Tõe. Nà ra ate amnhĩ kaxyw inhmã ajamaxpẽr tỳx jakamã kot kaj akupỹm arĩt mex kurê kumrẽx. E mãmri ma akupỹm tẽ. Anẽ.

Nhũm akupỹm rĩt mex ã amnhĩ pumu nẽ hkĩnh o hkĩnh. Hãmri nẽ Jejus ã ajêt nẽ ma hkôt hkĩnh nẽ tẽ.

11

Jejus kot Jerujarẽ hwỳr àr ã harẽnh

Matêwre 21.1-11; Rukre 10.28-40; Juãw 12.12-19

¹ Tã nhũm Jejus mẽ hkôt mẽ pa ho mẽ pa xwỳnhjê mẽ kormã Jerujarẽ hwỳr mõi. Hãmri nẽ krĩ pẽ Petake mẽ hõ pẽ Petãn wỳr ahtêp o mõi. Hixêt pẽ Oriwêhti kahti ri na pre krija wa xa. Jakamã nhũm Jejus hkôt mẽ pa ho mẽ pa xwỳnh wa ho axkrut nẽ mẽ amnhĩ kukamã wa kumẽ ² nẽ wa kãm:

—E wa ma krĩ mũj wỳr mẽ ixkukamã wa tẽ. Hãmri nẽ hwỳr pøj nẽ nhỹri jumẽnre nyw mã ê nẽ ãm xwỳnhhta pumu. Kormã mẽ kot hã hkrĩ hkêt kumrẽx xwỳnhhta. ³ Ka wa omu nẽ kãm ê xà hpôt nẽ man akupỹn ixwỳr o tẽ. Kojã mẽhõ war apumu nẽ hã tanhmã war amã kapẽr to ka wa ã kãm ijarẽnh anẽ nẽ kãm: “Nà mẽ panhõ Pahihti na hã karõ pa wa hwỳr tẽ.” Anhỹr o kãm ijarẽ. E wa ma hwỳr tẽ. Anẽ.

⁴ Hãmri nhũm wa kuma nẽ ma hwỳr htêm kurê kumrẽx nẽ hwỳr pøj. Nhũm Jejus kot wa kãm hã karõ xà hkôt jumẽnre nywreta pumu. ⁵ Hãmri nẽ kãm ê xà hpôt o xa nhũm kuri mẽ kuhê xwỳnhjaja tee ri hã wa omu nẽ wa kãm:

—Kwa mo kaxyw na ka wa kãm ê xà hpôt o xa? Kwa kot ka wa mẽ ixpê ho ahkĩ nà? Anẽ.

⁶ Hãmri nhũm wa mẽ kãm:

—Nà mẽ panhõ Pahihti na wa inhmã hã karõ pa wa hwỳr tẽ. Wa ixte ma hwỳr o ixtêm kaxyw. Anẽ.

Hãmri nhũm mẽ wa kãm:

—Tỳ? Tõe wa mãmri ma kãm o tẽ. Anẽ.

⁷ Hãmri nhũm wa ma akupỹm Jejus wỳr o tẽ. Hãmri nẽ kaxyw amnhĩ xê hkwyè hkwrỹ nẽ kãm ho hkô kahty hpa nẽ kãm ho htỳx nẽ o xa nhũm Jejus hã nhỹ nẽ mõi. ⁸ Nẽ kormã Jerujarẽ hwỳr hixêt ã àpir o mõi. Nhũm mẽ kot omunh o kuhê xwỳnhjaja hkĩnh nẽ ma

hkukamã pry ho mex kaxyw amnhĩ xê hkwỳ hkwrỹ nê ho kãm uty. Nhũm mẽ hkwỳjaja nhỹri pô hkwỳ jakà nê o mra nê hkukamã kãm uty. ⁹⁻¹⁰ Nhũm mẽ hixêt ã api nê ahpar mã wryk o mō nhũm mẽ piitã kax pê Tirtũm mex o mex ã harēnh o hkôt mō. Nhũm mẽ hkwỳjaja kukamã mra nhũm mẽ hkwỳjaja hapu hã mra nhũm prem piitã hkôt Tirtũm mex o mex ã harēnh o mō. Nê harēnh o:

E ota Tirtũm kot mẽ pahwỳr mēnh xwỳnhhta ra pōj. Nà ãm hãmri na mẽ pahwỳr wrỹ. Ja mex kumrēx.

Kêp mẽ panhō Pahihti mex na. Koja mẽ panhīgēt pahi Tawi pyrà nê mẽ pahto amnhĩptã nê mẽ pahto mex o pa.

Ãm hãmri na Tirtũm mẽ pahwỳr kumē.

Tirtũm mex kumrēx. ãm mex o mex. Kukwak ri pix mã na pu htem pajamakêtkati nê paxãmnhĩx papa rãhã ho papa.

Anhỹr o Jejus kôt harēnh o mō. Kot mẽ ho amnhĩptãr kurê kumrēx ã hkãmnhĩx nê hkĩnh nê ã hkôt kapēr anhỹr o mō. ¹¹ Jao ra Jerujarē hwỳr pōj nhũm Jejus Tirtũm mã amnhĩ jarēnh xà hã ixkre hwỳr tēn axà. Nom nhũm ra amỹkry htỳx jakamã nhũm hwỳr axà nê ãm hkre pumunh o xa hãmri nê akupỹm kato nê hkôt mẽ pa ho mẽ pa xwỳnh pê 12jê mẽ nhũm mẽ ma akupỹm Petãn wỳr mra.

Jejus kot pĩ hpàr pê fikêhti mã kapēr ã harēnh

Matêwre 21.18-22

¹² Tã nhũm apkati nhũm Jejus mẽ hkôt mẽ pa ho pa xwỳnhjê mērohã Petãn rũm hapōj nê ma akupỹm Jerujarē hwỳr mra. Nhũm Jejus ra kãm prãm nê mō. ¹³ Hãmri nê amỹm mẽmo pĩ hpàr hōptĩ rax pê fikêhti pumu nê hamaxpēr o:

—E pa hwỳr tē nê ô hkwỳ rē nê kuwô mãn. Anē.

Hãmri nê hwỳr tē. Nhũm kormã ô kaxyw ô mytwrỹ kator kêt jakamã nhũm ô hkêt nê ãm hô pix nê xa. ¹⁴ Hãmri nhũm hwỳr tē nê tee ri ô japēr nê ãm hô pix pumu. Hãmri nê tee ri omu nê kãm:

—E kot kaj axte axô hkêt kumrēx.

Anhỹr o kãm kapēr nhũm hkôt mẽ pa ho mẽ pa xwỳnhjaja hã kuma.

Jejus kot Tirtũm nhōrkwỹ hwỳr àr ã harēnh

Matêwre 21.12-17; Rukre 19.45-46; Juãw 3.13-22

¹⁵⁻¹⁷ Tã nhũm Jejus mẽ hkôt mẽ pa ho mẽ pa xwỳnhjaja Jerujarē hwỳr agjê nê Tirtũm mã amnhĩ jarēnh xà hã ixkre hwỳr agjê. Nhũm Jejus tee ri kamã mẽ kuhê xwỳnhjê pumu. Nhũm mẽ ra ixkre kamã axtem nê mōx nê ôwēhti nê tuuti ho wēnê ho kuhê. Ixkre hwỳr mrrar xwỳnhjaja kot haprôr nê Tirtũm mã amnhĩ jarēnh kaxyw kãm hpar nê òr kaxyw mẽ kãm ho wēnê. Nom axtem nê hã ohtô rax kãm mẽ kãm ho wēnê nhũm mẽ hkwỳjaja mẽ kãm mẽ hikàxpore ho anhĩpa. Hãmri nhũm Jejus mẽ hwỳr axà nê tee ri mẽ kot ã amnhĩ nhĩpêx anhỹr ã mẽ omu nê mẽ kãm akir nê mẽ kãm:

—Tk. Kwa Tirtũm kapēr ã kagà htũm kot òrkwỹ jarēnh kot:

Inhōrkwỹja ãm pika piitã hkôt mẽ piitã kot inhmã amnhĩ jarēnh xà hã ixkre pix kaxyw na.

Anhỹr o kot harēnh tã ka mẽ axtem nê kamã ã amnhĩ nhĩpêx anhỹr o akuhê. E kwa mẽ ma mra nê ajapōx tokyx anē. Anē.

Nhũm pre ã mẽ kãm kapēr anhỹr pê mẽ ahkre hãmri nê ixkreja nê mẽ kator pa. ¹⁸ Hãmri nhũm patre krãhtũmjê mẽ Tirtũm kapēr tũm o mẽ ahkre xwỳnhjaja tee ri ã mẽ hipêx anhỹr ã omu nê kapēr ma nê kamã gryk tỳx nê. Hãmri nê mẽ kot hã àmnēnh kaxyw tanhmã axpēn mar to nê axpēn mã:

—Tk. Kwa na mẽ ohtô nê kãm mar prãm nê. Koja mẽ anē nê gryk ã mẽ pahkaga nê axte mẽ pakapēr mar kêt nê. Kwa pu mẽ kupĩ ri. E tanhmã kot puj mẽ ho nê kupĩ? Anē.

¹⁹ Tã nhũm myt axà nhũm Jejus mẽ hkôt mẽ pa ho pa xwỳnhjaja Jerujarē rũm hapōj nê ma nhỹri amnhĩm hikranh kaxyw mra.

Mẽ pahte tanhmã mẽmoj tã Tirtũm wỳr to hã mẽ pamã karō

Matêwre 6.14-15, 17.20; Makre 11.13; Juãw 14.13; mããnēn Xiakre 1.6; Wam Juãw 3.22

²⁰ Tã nhũm apkati nhũm Jejus mẽ hkôt mẽ pa ho mẽ pa xwỳnhjaja Jerujarẽ hwỳr akupỳm mra. Hãmri nẽ axte pĩ hpàr pẽ fikêhtita pumu. Jejus ra kot kãm kapẽr xwỳnhnta pumu nhũm ra grà pa nẽ xa. ²¹ Hãmri nhũm Simãw Pêtre Jejus kot tanhmã pĩ mã kapẽr toja mã hamaxpẽr nẽ hã kãm:

—Kwa mẽ ijahkre xwỳnh. Ga mẽmoj mỳj pumu. Jãã ate fikêhti mã akapẽr xwỳnhnta na grà par kumrẽx nẽ xa. Anẽ.

²²⁻²³ Hãmri nhũm kuma nẽ mẽ piitã mẽ kãm:

—Tỳ nà ãm hãmri na pa mẽ amã ixkapẽr. Kot kaj mẽ mẽmo kaxyw Tĩrtũm mã ajamaxpẽr tỳx pẽ mẽmoj tã awỳ nhũm ama nẽ amã hprãm xà hkôt tanhmã amã hipêx to. Ka mẽ amnhĩ kaxyw Tĩrtũm mã ajamaxpẽr tỳx pẽ hixêt mỳj mã akapẽr nẽ kãm: “E xa nẽ ma tẽ nẽ gô xujanãr kãm mrõ.” Anhỳr o kãm akapẽr nhũm amar xà hkôt ã amnhĩ nhĩpêx anẽ nẽ tẽn kamã mrõ. ²⁴ Kot kaj mẽ mẽmoj tã Tĩrtũm wỳ nẽ kaxyw ãm pix mã ajamaxpẽr tỳx nẽ nhũm amã ho anẽ.

²⁵⁻²⁶ —Nẽ kot kaj mẽ Tĩrtũm mã amnhĩ jarẽnh kaxyw nẽ ra mẽhõ kot tanhmã ato mã ajamaxpẽr. Hãmri nẽ ja ho ajamakêtkati kurê kumrẽx nẽ axte kãm ajamaxpẽr kêt nẽ. ãm mẽmoj nyw pix mã ajamaxpẽr o tãm amnhĩ nhĩpêx o apa. Hãmri nhũm Tĩrtũm kaxkwa rũm ja hã apumu nẽ apyrã nẽ ate tanhmã amnhĩ tomnuj to ho hamakêtkati nẽ axte kãm hamaxpẽr kêt nẽ. Anẽ.

Mẽhõ kapẽr kôt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

²⁷ Nhũm mẽ akupỳm Jerujarẽ hwỳr agjê nhũm Jejus kê axte Tĩrtũm mã amnhĩ jarẽnh xà hã ixkre hwỳr axà. Nhũm hkôt mẽ pa ho mẽ pa xwỳnhjaja hkôt hwỳr mra nẽ hkôt agjê nẽ kormã kamã kuhê. Hãmri nhũm Ijaew krãhtũmjê mẽ mẽ kot Tĩrtũm kapẽr tũm o mẽ ahkre xwỳnh mẽ mẽ õ patre krãhtũmjaja Jejus pumu nẽ hwỳr mra nẽ hêx rom tanhmã kãm kapẽr to. Na pre ra Jejus ixkreja nẽ mẽmoj to wẽnê xwỳnh mẽ kãxpore o mẽ hpinhpanh xwỳnhjê jano nhũm mẽ tee ri ja hã omu nẽ kamã gryk tỳx nẽ. Jakamã nhũm akupỳn mẽ hwỳr axà nhũm mẽ axte omu nẽ hwỳr mrrar kurê kumrẽx ²⁸ nẽ kãm:

—Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỳr o ri apa? Mẽhõ na pre mẽ ixwỳr amẽ ka pre mõ? Nà xà amnhĩ krã hkôt na ka hte ã amnhĩ nhĩpêx anhỳr o ri apahti? E kwa mẽ inhmã amnhĩ jarẽ. Anẽ.

²⁹ Nhũm Jejus kot tanhmã mẽ hamaxpẽr to hkôt mẽ omunh mex jakamã mẽ kãm:

—Nà kot pa ixkumrẽx mẽmoj tã mẽ akukja. Ka mẽ inhmã harẽ pa rĩ kormã mẽ amã tanhmã amnhĩ jarẽnh to. ³⁰ Finat Juãw Paxisja ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harẽ. Anẽ.

³¹⁻³² Hãmri nhũm mẽ kuma nẽ tee ri kot tanhmã kutã kãm harẽnh to hkukamã hamaxpẽr nẽ axpẽn mã:

—Kwa tanhmã kot puj mẽ kãm ja jarẽnh to? Mẽ kot mar o kuhê xwỳnhjaja na htem Juãw Paxis kêp Tĩrtũm nhỹ hã kapẽr jarẽnh xwỳnh ã axpẽn mã harẽnh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harẽ nhũm mẽ tee ri mẽ pama nẽ mẽ pakamã gryk nẽ. Nẽ mẽ paxêx rom ã kãm mẽ pakapẽr anhỳr ã mẽ pahpumu nẽ kẽn o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harẽ nhũm mẽ pama nẽ mẽ pamã: “Kwa ã kot anhỳr kẽnã na ka prem kapẽr mar tã ixkôt amnhĩ xunhwỳr kêt nẽ?” Anẽ. Nà kot puj pẽr mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprỳ ho kuhê.

³³ Hãmri nẽ Jejus mã kãm:

—Konẽn. Mẽ ixte mẽhõ nhỹ hã kapẽr o pa hã omunhre hã. Anẽ.

Hãmri nhũm mẽ kuma nẽ mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarẽnh to hkêt nẽ. Ijaxwỳja ixte mẽhõ nhỹ hã ã ixte amnhĩ nhĩpêx anhỳr o ri ixpa hã amnhĩ pumunhre hã. Anẽ.

12

Mê àpênh punuj xwýnhjê jarênh

Matêwre 21.33-46; Rukre 20.9-18

¹ Nhũm Jejus arĩ Ijaew krähtũm mẽ mẽo patre krähtũm mẽ Tĩrtũm kapêr tũm o mẽ ahkre xwýnhjê mã kapêr o xa. Nê mẽ kãm mẽ kot tanhmã hipêx to hkukamã mẽ kãm tanhmã amnhĩ jarênh to. No ãm hã kuxi nê mẽ kãm awjarê nê mẽ kãm:

—Koja mẽhõ hpur ã hkwýjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwýr mra nê kamã mẽmo hy hkre nê hkre pa. Hãmri nê pu hã kahê hpa nê pur kaêx kãm ixkre hprêk nhĩpêx. Mẽ kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hãmri nê hipêx pa nhũm mẽo patrãwja awry hã krĩ hõ hwýr nojarêt nê mẽ kãm tanhmã hpur jarênh to nê mẽ kãm: “E or ixpurta nõ. Kê kamã mẽmoj kã hpa ka mẽ mãmrĩ kamã awjamý nê ho axkjê. Hãmri nê ixkutêp inhõ jaxwý nê mãmrĩ anhõ tanhmã ho hprãm xà hkõt tanhmã ho.”

—Anhýr o mẽ kãm kapêr hãmri nê ma mõ. ² Tã nhũm ra pur kãm mẽmoj hkà pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpênh xwýnhjê hõja nhũm akupým mẽ hwýr kumê. Mẽ kot kãm õ hkwý nhõr nhũm ma kot kãm o mõr kaxyw ma mẽ hwýr kumê nhũm ma akupým mẽ hwýr mõ. Mõõ nê ra mẽ hwýr pøj. ³ Hãmri nhũm mẽ omu nê axtem nê homnuj nê. Nê unê nê htak nê akupým hano nhũm ý kamã ma akupým mõ. ⁴ Hãmri nhũm õ patrãwja tee ri omu nê hpãnhã ja mẽ nhũm ma mẽ hwýr mõ. Mõõ nê mẽ hwýr pøj. Hãmri nhũm kê wem omu nê mã ho anê nê. Unê nê htak nê hkrãx pê htak nê akupým hano nhũm wamta pyrã nê ma akupým ý kamã mõ. ⁵ Hãmri nhũm axpên pãnhã kãm mẽ àpênh xwýnh kwýjê rê nhũm mẽ axpên pãnhã ma mẽ hwýr pa. Ma mẽ hwýr pa nê pøj nhũm mẽ te ho wamtajê mẽ hipêx pyrã nê mẽ hkwýjê pynê nê htak rax nê mẽ hano nê mẽ hkwýjê pa. ⁶ Nhũm mẽ õ patrãw mẽ harênh ma nê tee ri amnhĩ kukamã hamaxpêr nê hamaxpêr o: “Hêxta waa nê. Tanhmã kot paj we amnhĩ nhĩpêx to nê inhõta kwý jamý? Nà kot paj mẽ hwýr ixkraja mẽ. Inhmã hapê htã kot paj mẽ hwýr kumê kê ma mẽ hwýr mõ. Hãmri nhũm mẽ kêp ixkra hã omu nê tanhmã ixpê ho hkêt nê. Nê jatã inhmã kãm inhõja kwý gõ nhũm man ixwýr o tẽ. Nà kot paj anê.”

—Anhýr o hamaxpêr hãmri nê ma mẽ hwýr hkraja mẽ nhũm ma mẽ hwýr mõ.

⁷ —Tã mẽ hwýr hpõx o mõ nhũm mẽ amým amnhĩ wýr omu nê kêp hkra hã omunh kurê kumrêx nê hã axpên mã amýnê nê axpên mã: “E. Nà oněj hpur nhõ dõn krata tẽ. Koja nhýrmã õ papaj mýrpê amnhĩm pur ã pyka pytã nê ho õ. Jakamã e pu mẽ kupĩ nê kêp hpur ho arĩk nê ho panhõ. E kwa tokyj pu mẽ kupĩ ri.” Anê.

⁸ —Rõm nhũm ra mẽ hwýr hpõx o tẽ nê ra pøj nhũm mẽ unê nê pur nê ho kato nê ahkã kamã kupĩ. ã mẽ ujarênh kot anhýr. Anê.

⁹ Nhũm pre ã Jejus Ijaew krähtũmjê mã ujarênh anê. Hãmri nê hã tanhmã mẽ hkukjêr to nê mẽ kãm:

—E mẽ inhmã mẽmoj jarê. Koja pur nhõ dõnja tee ri mẽ kot hkra hpĩr ã harênh ma hãmri nê tãm mẽ hwýr mõ hãmri nê tanhmã mẽ hipêx to wehe? Nà koja ma mẽ hwýr mõ nê mẽ himex pa hãmri nê hpãnhã nhãm hpurta ã mẽmojjê rê. ¹⁰ Mãn ka prem ra Tĩrtũm kapêr ã kagã htũm kot ja jarênh ma nà? Harênh kot:

Na prem kên o amnhĩm õrkwý nhĩpêx kaxyw hãmri nê kên maati pumu nê htýx omnuj ã hkamnhĩx nê hkaga. Mẽ kot hkaga htã nom nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

¹¹ ãm hãmri na pre ã mex ã omunh anê. Anê.

ã Tĩrtũm kapêr ã kagã htũm kot harênh kot anhýr. Anê.

¹² Nhũm pre ã Jejus mẽ kãm ujarênh kãm mẽ harênh anê nhũm mẽ amnhĩ tã kuma. Tĩrtũm kapêr tũm o mẽ ahkre xwýnh mẽ mẽ õ patre krähtũm mẽ Ijaew krähtũmjaja nhũm mẽ kot mẽ kãm kên maati kaga xwýnhjê jarênh o te mẽ tãm harênh pyrãkja ma nhũm ja mẽ kêp omnuj nê. Jakamã nhũm mẽ kãm unênh nê haxàr prãm nê. Nom amnhĩ tã kãm mẽ kot mar o kuhê xwýnhjê puma nê. ¹³ Jakamã na prem ma mra nê hapøj hãmri nê Jejus wýr Parijew nhõ xwýnh mẽ pahi Erox kõt mẽ pa xwýnh kwýjê rê. Mẽ kot hêx

rom mēmoj tā hkukjêr nhūm kot mē mar nē tanhmā Rōm nhō xwỳnhjê nhō pahi Sesti kapêr kuhpa hã ri tanhmā mē kãm nē nhūm mē kot mar kaxyw. ¹⁴ Jakamã nhūm mē ma hwỳr mra nē hêx rom kãm kapêr nē kãm:

—Kwa Jejus? Nà ãm hãmri na ka hte Tĩrtũm kapêr o mē ahkre mex nē. Na ka hte mē kamã akahak o apa hkêt nē. Nē mē kot tee ri mē kot tanhmã ato kapêr punuj to htã ka hte arĩ aprĩ hã mē ahkre mex o ri apa. E kwa mē inhmã mēmoj jarê. Rōm nhō pahihti kot mē pahpê Ijaew mē pahte kãm kàxpore hkwy nhōr ã mē pamã karōta. Kwa xà ja amã mex nà? Xà kot pu mē kãm kugō? Xà kot pu mē kãm òr kêt nē? E kwa mē inhmã harê. Anê.

¹⁵ Nhūm prem ã hêx rom ja hã hkukjêr anhỹr tā no nhūm Jejus mē hamaxpêr ã mē omunh mex mē mē kãm:

—Tk. Kwa mon ka mē axêx rom ja hã ixkukja? E mē atō inhmã kàxpore htỳxre hō gō pa omu. Anê.

¹⁶ Hãmri nhūm ja kãm ja gō nhūm kupy nē kànhmã kupê nē mē kãm:

—E mēhō nhĩxi nē mēhō karō na hã? Anê.

Anê nhūm mē kãm:

—Pahi Sesti karō nē hixi na hã.

¹⁷ Anê nhūm mē kãm:

—Tỳ. Tô kêr ka mē mãmri kãm hkwy nhōr o apa. Hã hkarō nē hã hixi. Tãm kot hipêx xwỳnh jakamã ò na. No mē kajaja na pre Tĩrtũm mē anhĩpêx nhūm mē apê ò jakamã kwa kêr ka mē kapêr kôt pix mã ri amnhĩ nhĩpêx o ri apa. Anê.

Nhūm pre ã mē kãm kapêr anê nhūm mē piitã mar o kuhê. Nhūm mē kot hêx rom hkukjêr xwỳnhjaja amnhĩ jaêr pê ã kàxpore jarênh anhỹrja ã kuma nē axpên mã:

—Kwa mē paxêx rom mē pahte hã hkukjêr tā nhūm ãm hãmri mē pakutã mē pamã harê. Kwa tanhmã kot puj wem hkukjêr to nhūm pahi Sesti kapêr kwỳm ri mē pamã mēmoj jarê? Anê.

Hãmri nē tee ri tanhmã hkukjêr to hkukamã hamaxpêr o kuhê.

Akupỹm mē htĩr xwỳnhjê jarênh

Matêwre 22.23-33; Rukre 20.27-40; Juãw 6.21, 6.38-40; mããnên Wam Korĩt 6.14, 15.12-28; Wam Tesarōn 4.13-18

¹⁸ Tã nhūm Satusew nhō xwỳnh kwỳjaja. Mē kot akupỹm mē htĩr mã hamaxpêr kêt xwỳnhjaja na pre mē. Tã mē kot mē htyk nē mē hapêx ã mē hkamnhĩx jakamã na prem axpên mã Jejus jarênh o:

—E kwa pu mē ma hwỳr mra nē mēmoj xihtỳx ã hkukja kê mē pama nē tee ri tanhmã mē pamã kapêr to hkukamã hamaxpêr. Hãmri nhūm mē piitã ja hã omu nē àhpumunh kêt ã omunh kurê kumrêx. E tokyx ma pu mē hwỳr. Anê.

Hãmri nē ma hwỳr mra nē Parijew nhō xwỳnhjê pyrã nē hêx rom kãm:

¹⁹ —Pa Jejus? Kwa mē inhmã mēmoj jarê. Na pre finat Mojesja Tĩrtũm nhỹ hã ã mē panhĩgêjtjê mã karō anê. Mē hkra hkêt rãhã mē pa nē mē htyk xwỳnhjaja nhūm mē harênh o:

Koja mēhō hprō hãmri nē kamã hkra hkêt rãhã pa nē ty. Hã koja hkôt htōja hpãnhã hprō o hprō nē kamã hkra. Hãmri nhūm kato nē te kêp htō htyk xwỳnhhta hkra pyrãk. Anê.

Na pre ã Mojes Tĩrtũm nhỹ hã ja hã mē kãm karō anê. ²⁰ Jakamã kwa ga mē ixujarênh ma. Koja mēmojjaja mē kot axpên to htō xwỳnhjaja kêp 7. Nhūm kot waja hprō. Nē wa pa nhūm myja kormã hprō kamã hkra hkêt rãhã ty. ²¹ Nhūm hkôt htō hōta hpãnhã hprō ho hprō nē wa axpên to pa. Nhūm haxwỳja kamã hkra hkêt rãhã ty. Nhūm hkôt htō hōta haxwỳja ho hprō nē wa axpên to pa grire nhūm wamta wa uràk nē kamã hkra hkêt rãhã ty. ²² Hãmri nhūm htō hkwyjaja piitã nija pyxi nē axpên pãnhã ho hprō nom mēhō kamã hkra hkêt rãhã htyk pa. Hãmri nhūm mē hprōta mē hkôt amnhĩ to hitep nē ty.

²³ Tã Tĩrtũm kot akupỹm nhỹrmã mē ho htĩr ronhỹx nhỹ nhỹx kêp nija mjên kumrêx? Ra piitã kot ho hprō kênã. E kwa mē inhmã ja jarê. Anê.

²⁴ Hãmri nhūm Jejus ã mē ujarênh anhỹrja ma nē mē kãm:

—Tk. Nà mẽ ate Tirtũm kapẽr ã kagà htũm mar mex kêt. Nẽ mẽ aprĩ hã tanhmã Tirtũm kute hã omunh kêt jakamã na ka mẽ ã atỳx ja hã ixkukjêr anẽ. ²⁵ Kormã mẽ htĩr ri mẽ kot Tirtũm kôt amnhĩ xunhwỳr xwỳnhjaja na htem ty hãmri nẽ Tirtũm nhõ krĩ kamã axte kãm hprõ hprãm kêt pa. Rỳ ni japêr nẽ kãm mjên prãm kêt nẽ pa. Hãmri nẽ Tirtũm kapẽr o mẽ wryk xwỳnhjê pyrà nẽ axte htyk kêt nẽ. ãm htĩr tũm rãhã nẽ pa ho pa.

²⁶ —Nom mẽ ate akupỳm mẽ htĩr kêt ã mẽ hkamnhĩxja kot paj ixprĩ hã mẽ amã harẽ. Amnepêm na pre Tirtũm pĩ hpõk kamã tanhmã Mojes mã kapẽr to. Mãn ra mẽ ate mar. Na pre kãm:

Ixpê Apraãw nhõ Tirtũm na pa. Nẽ mãnẽn ixpê Apraãw kra Ijak mẽ htãmnhwỳ Jako wa õ Tirtũm na pa.

Anhỳr o Mojes mã amnhĩ jarẽ nhũm kuma nẽ hã kagà. ²⁷ Kêp apu arĩ mẽ htyk rãhã nhỹx pre ã mẽ harẽn anhỳr kêt nẽ. Nhỹx pre mẽ harẽn o: “Amnepêm Apraãw nẽ hkra nẽ htãmnhwỳ mẽ htĩr ri ixpê mẽ õ Tirtũm na pa pre.” Anhỳr o nhỹx pre mẽ harẽ. Nom na pre ã amnhĩ jarẽn anhỳr kêt nẽ. Mẽ pamã te Apraãwja mẽ htyk nẽ mẽ hapêx pyræk. Nom nhũm prem ra Tirtũm ri akupỳm htĩr nẽ mex nẽ pa ho pa. Tã ka htem Tirtũm kapẽr kwỳm ri akupỳm mẽ htĩr kêt ã mẽ harẽn o apa. Anẽ.

Tirtũm kapẽr maati jarẽn

Matêwre 10.37, 22.34-40; Rukre 10.25-27; mãnẽn Wam Juãw 2.15, 5.3; Apokarip 2.4

²⁸ Tã nhũm Tirtũm kapẽr tũm o mẽ ahkre xwỳnhjê hõ mẽ hwỳr tẽ nẽ mẽ kot axpẽn mã kapẽr ã mẽ omunh o xa. Hãmri nẽ Jejus kot tanhmã Satusew nhõ xwỳnhjê mã kapẽr mex toja ma nẽ kãm:

—Nà ãm hãmri na ka ã mẽ kãm ja jarẽn anẽ Pahihti. Kwa inhmã mẽmoj jarẽ. Na pre Tirtũm ahpỳnhã mẽmoj to 10 nẽ mẽ pamã hã karõ. Mẽ pahte hkõt amnhĩ nhĩpêx o ri papa kaxyw hã mẽ pamã karõ. Tã nhỹ kapẽr na mex o kot hkwỳjê jahkrenh wehe? Anẽ.

²⁹ Hãmri nhũm kãm:

—Nà Tirtũm kapẽr xohtõ. Kapẽr piitã hkõt mẽ pahte amnhĩ nhĩpêx o papaja na kãm hprãm. No pixi na mẽ pahte hkõt amnhĩ nhĩpêx o papaja nhũm kãm hprãm tỳx o kot hkwỳ jakrenh. Kapẽr mex maati na ja. Na pre kapẽr o:

E mẽ apê Ijaew nhõ xwỳnhjaja. Ixpê mẽ anhõ Tirtũm ã ixpìxi mex na pa.

³⁰ Jakamã kêr ka mẽ amã ixkĩnh tỳx o mẽmoj piitã hakrenh pa. Jao mẽ anhĩ piitã ho amã ixkĩnh tỳx kumrêx o ri apa.

³¹ Anhỳr o na pre mẽ pamã karõ. Nẽ hkõt ja:

Kêr ka mẽ nhãm mẽ hipêx o te ka amã amnhĩ tã ma pyræk o mẽ hipêx o ri apa. Jao tãm mẽ hipêx rãhã ho ri apa. Anẽ.

E ja wa kumrêx na Tirtũm kãm mẽ pahte hkõt amnhĩ nhĩpêx o ri papa hprãm tỳx nẽ. Anẽ.

³² Hãmri nhũm kuma nẽ kãm:

—Nà ãm hãmri na ka ja jarẽ Mějiahkre xwỳnh. Tirtũm pyxi mex kẽnã. ³³ Amnepêm na pre htem kãm amnhĩ jarẽn kaxyw nẽ kãm mẽmoj gõ nẽ rĩ kormã tanhmã kãm amnhĩ jarẽn to. Tã nom kot puj mẽ ã ate harẽnhta kôt amnhĩ nhĩpêx anhỳr o papa jao mẽ panhĩ piitã pamã Tirtũm kĩnh. Nẽ mẽ pamã hkĩnh o mẽmoj piitã hakrenh pa. Nẽ nhãm mẽ hipêx o te mẽ papamjaja pamã amnhĩ tã ma pyræk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhĩpêx anẽ nhũm Tirtũm kãm ja mex o mẽ pahte kãm mẽmoj nhõrta jakre.

Anhỳr o kãm kapẽr. ³⁴ Hamaxpêr mex pê ã Jejus mã kapẽr anẽ nhũm kuma nẽ kãm:

—Nà ãm hãmri na ka ja jarẽ. Na ka ra mẽ kot Tirtũm kôt amnhĩ nhĩpêx o amnhĩ nhĩpêx nyw pumunh mex o mõ. Nà te ate tokyx hkõt amnhĩ xãm kaxyw pyræk. Anẽ.

Hãmri nhũm mẽ kãm hkurê xwỳnhjaja tee ri wa kot axpẽn mã kapẽr mar o kuhê nẽ axte kãm mẽmoj tã hkukjêr pyma nẽ. Ra tee ri mẽ kot hêx rom mẽmoj tã hkukjêr kaprỳ jakamã axte tanhmã hkukjêr to hkêt nẽ.

Jejus kêp pahi finat Tawi nhõ Pahihti hã harẽn

Matêwre 22.41-46; Rukre 20.41-44; mãnẽn Rõmãn 1.3-4

³⁵ Hāmri nhūm Jejus arī Tīrtūm mā amnhī jarēnh xà hā ixkre kamā amnhī tā mẽ ahkre. Nom te nhām mẽhō hā mẽ hkukjêr pyrāk amnhī tā mẽ hkukja nē mẽ kām:

—E mẽ inhmā mẽmoj jarē. Tīrtūm kapêr tūm o mẽ ajakre xwỳnhjaja na htem tanhmā mẽ amā Tīrtūm kot mẽ akaxyw âm mã xwỳnh jarēnh to nē mẽ amā harēnh o: “Koja kêp pahi finat Tawi kanrêhā htàmnhwỳ koja.” Anhỹr o kot mẽ amā harē. Âm kêp kanrêhā htàmnhwỳ pix ã mẽ amā harēnh o pa. No na pre pahi Tawija kêp kanrêhā htàmnhwỳ hā harē nē mãnên kêp ò pahihti hā harē. Tā nom nhūm Tīrtūm kapêr tūm o mẽ ajahkre xwỳnhjaja na htem urà nē kêp pahihti hā mẽ amā harēnh kêt nē. Âm kêp kanrêhā htàmnhwỳ pix ã harē. Kwa mo na htem Tawi pyrà nē kêp ò pahi hā harēnh kêt nē?

³⁶ Na pre Tawi tām Tīrtūm kapêr tūm kwỳ hā kagà nē tanhmā Tīrtūm kot mẽ akaxyw âm mã xwỳnhja jarēnh to. Tīrtūm Karō nhỹ hā tanhmā harēnh to. Tīrtūm mex ã mẽ grer xàja kwỳ hā kagà nē hā kagà ho:

Tīrtūm na pre inhō Pahihti mã ã kapêr anē nē kām: “E amnē ixwỳr tē nē inhīhkô hā nhỹ nē inhmā mẽ ho amnhīptār o akrī. Kot paj mẽ kot kām akurê xwỳnh piitā mẽ unēnh pa nē awỳr mẽ o mra nē anhīhkram mẽ haxàr pa.” Anhỹr o pre kām kapêr. Anē.

³⁷ —Na pre ã Tawi Tīrtūm kot Kris mã kapêr jarēnh nē kêp ò pahi hā kagà anē. Tā nom Tīrtūm kapêr tūm o mẽ ajahkre xwỳnhjaja na htem kêp Tawi htàmnhwỳ pix ã ri axpên mã harēnh o ri pa. No kêt Tawija na pre kêp ò Pahihti hā harēnh o pa. Anē.

Nhūm pre ã Jejus mẽ kām amnhī jarēnh anē nhūm mẽ mar o kuhê xwỳnhjaja kuma nē hkīnh nē. Nē kām axte mar prām nē.

³⁸ Hāmri nhūm arī mẽ ahkre ho nhỹ nē mẽ kām:

—Kwa mẽ o kora. Kêr ka mẽ Tīrtūm kapêr tūm o mẽ ahkre ho mẽ pa xwỳnhjê kot amnhī nhīpêx o amnhī nhīpêx kêt nē. Mẽ omu nē âm mẽ omu nē mẽ kot amnhī nhīpêx kôt amnhī nhīpêx kêt nē. Na htem piitā mẽ hā hpijaam kaxyw ê mex pix kām ri pa. Nē mẽ kot amnhīm mẽ rūnh ã mẽ harēnh nhūm mẽ kot amnhī jarēnh marja na htem kām hprām. ³⁹ Nē Tīrtūm kapêr o mẽ ahkre xà hā ixkre kamā mẽ kām amnhī to rūnh xwỳnhjê hkrī xà mex pix kamā na mẽ kām hkrī hprām. Nē mẽmoj tā mẽ apkur xà hā arīgro hā ma hkwyjê hkôt mẽ apkur xà hā ixkre hwỳr akuprō nē kām mẽ kot amnhī to rūnh xwỳnhjê hkrī xà mex pix kamā hkrī hprām.

⁴⁰ —Nē mẽ kot mẽ mjên htyk xwỳnhjê ho mex o pa hā amnhī jarēnh tā amnhī to hêx. Nē na htem axtem nē mẽ nokupyr kaxyw mẽ hwỳr mra nē mẽ kām: “E ot pa awỳr ato ajuta kaxyw tē. Ra amjên apê htyk jakamā kot paj pam amā akukrêx jamār o ixpa.” Anē hāmri nē mẽ kêp mẽ òrkwỳ pytà nē amnhīm mẽ kêp mẽ hikukrêx piitā ho hapêx. Te tām kot mẽ hipêx o pa pyrāk nom tām mẽ hipêx kêt nē. Nē te tām amnhī nhīpêx pyrà nē Tīrtūm mã amnhī jarēnh japjêê ho kuhê. Te mẽ kot Tīrtūm mã âm hāmri amnhī jarēnh pyrāk tā hkwyjaja kot ja hā mẽ omunh pix kaxyw nhūm mẽ ã kām amnhī jarēnh anē. Mỳrapê koja mẽ mex kêt nē. Koja Tīrtūm tanhmā mẽ hipêx kati hto. Jakamā kwa kêr ka mẽ ã mẽ kot amnhī nhīpêx anhỹr o mẽ pa xwỳnhjê kôt amnhī nhīpêx o ri apa hkêt nē. Âm kwarī ho kwarī. Anē.

Kêp mjên htyk xwỳnh jarēnh

Rukre 21.1-4

⁴¹ Nhūm Jejus arī Tīrtūm mã amnhī jarēnh xà hā ixkre kamā mẽ omunh o xa. Na pre hte Ijaew ixkreja o mex kaxyw ixkre jamār xwỳnhjê mã hikàxpore hkwy nhōr o pa. Nhūm mẽ hikàxpore rūnh xwỳnhjaja hwỳr agjê nē kàxpore gjênh xà kamā hkwy ho rax nē hagjê nē ma akupỹm mra. ⁴² Tā nhūm mẽhō ni pē mjên htyk xwỳnhja haxwỳja hwỳr axà. Kêp amrakati kumrêx. Nē hikàxpore tỳxre âm pijakrutre htā kàxpore rūnh xwỳnhjê hpānhā ixkreta wỳr tē. Nē kām Tīrtūm kīnh xàj kàxpore gjênh xà kamā hamē kumē hāmri nē kato nē ma akupỹm tē. ⁴³ Hāmri nhūm Jejus amỹm ã kot amnhī nhīpêx anhỹr ã omunh o xa nhūm ja kām mex nē. Hāmri nē hkôt mẽ pa ho mẽ pa xwỳnhjê mã harē nē mẽ kām:

—E măn ka mēnire htēm mỳj pumu. Na pre mjên kêp ty nhūm kêp amrakati nē hikàxpore grire htā amnhī pē òr pa. Kwỳjê rom kām Tīrtūm kīnh xàj amnhī pē òr pa.

Apkur xà hã hikàxpore na. ⁴⁴ Kêt mẽ hkwỳjaja na hte hikàxpore hkwỳ pix o mra nê gjênh xà kamã hagiê nom arĩ mẽ hikàxpore rũnh. No nija na mẽ urak nê kãm hikàxpore japê hkêt nê. Nê ho õxy hkêt nê àmnhĩx piitã o tẽ nê õr pa. Anê.

13

Jejus kot nhỹrmã mẽmoj piitã ho hapêx ã harênh

Matêwre 24.1-14; Rukre 21.5-9, 21.17-19; mããnên Wam Ximotre 4.1; Sikũn Ximotre 3.1

¹ Tã hãmri nhũm Jejus kôt mẽ pa ho mẽ pa xwỳnhjaja arĩ Tĩrtũm mã amnhĩ jarênh xà hã ixkre kaxwỳnh pumunh o kuhê nê hã Jejus mã:

—Hêxta waa nê. Ixkreja mex kumrêx Pahihti. Kên rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhõr nêj haxwỳja piitã mex kumrêx. Anê.

² Hãmri nhũm mẽ kãm:

—Nà mex tã koja nhỹrmã mẽ kãm Tĩrtũm kurê xwỳnhjaja grành pa. Koja arĩ kên akkrutre axpên myn̄h nê nõr kêt kumrêx. Koja piitã anhgrà nê ahpỳnhã ri hikwỳ.

Anhỹr o mẽ kãm kapêr. ³ Hãmri nê ixkreja rũm kato nê ma tẽ nê hixêt pê Oriwêhti hã api nê hã nhỹ. Tĩrtũm nhõrkwỳ kutã hixêtja nhũm hã api nê hã nhỹ. Hãmri nhũm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nê mẽ kot Tĩrtũm mã amnhĩ jarênh xà hã ixkre grành par ã hkukja nê kãm:

⁴ —Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhỹrmã kugrà nà xà koja mẽ tokyx ho anê? Kwa mẽmo koja we wỳj ri tanhmã amnhĩ nhĩpêx to? Anê.

⁵⁻⁶ Hãmri nhũm mẽ kãm:

—Nà kot paj mẽ amã harê. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkwỳjê hwỳr mra nê hêx rom te pa ixte amnhĩ nhĩpêx pyrak o amnhĩ nhĩpêx o pa. Nê tanhmã mẽ amã amnhĩ jarênh to nê mẽ amã: “E pa na pre Tĩrtũm mẽ awỳr inhmê. Ixpê kaxkwa rũm ixwỳk xwỳnhta na pa.” Anhỹr o mẽ akôt mẽ amã amnhĩ to hêx o pa. Nê mẽ amã: “E na pa mẽ ato amnhĩptar kaxyw mẽ awỳr wrỳ.” Anhỹr o mẽ amã amnhĩ jarê. Nom kêr ka mẽ ama nê ãm mẽ ama. Mẽ kot amnhĩ to hêx xwỳnh na mẽ. Kormã akupỳn ixpôx xà hã arĩgroja kormã.

⁷ —Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx ã hkamnhĩx kêt nê. Mẽmoj piitã hapêx xà hã arĩgroja kormã.

⁸ —Nê koja mẽmoj piitã hapêx kaxyw nhũm ahpỳnhã ri pika piitã hkôt mẽ pa xwỳnh piitã pika hõ nhõ xwỳnhjê kutã amnhĩ xunhwỳ nê axpu nê axpên pa.

—Nê koja pika piitã hkôt tanhmã mẽ à kuteja mẽ hamỳ nhũm mẽ amnhĩ xà htỳx kãm hamak o pa. Nhũm nhỹri pika htertet tỳx nê. Nê nhỹhỹnh pika hkwỳ kamã mẽ pa xwỳnhjaja prãm xàj pikaprãr pa. Tã nom kormã mẽ kot amnhĩ xà htỳx kãm hamak xà hkrax pix na ja. Te mênijaja pijagri kaxyw nê kormã õhy xà hpỳnh pyrak. Koja mẽmoj piitã hapêx kaxyw nê ã amnhĩ nhĩpêx anê.

⁹ —E pa hpãnhã mẽ kot Tĩrtũm mã amnhĩ jarênh xà hã ixkre grành par xwỳj ri mẽmoj tanhmã kot hkukamã amnhĩ nhĩpêx to hã hã harê. Mẽ ate hã ixkukjêr xwỳnhta kot paj mẽ amã harê. Nà koja mẽ kãm ixkurê xwỳnhjaja mẽ awỳr mra nê ixtã mẽ apynê nê mẽ atomnuj nê. Nê ma mẽ pikuprõnh xà hã ixkre hwỳr mẽ ato mra nê mẽ kamã mẽ kãm mẽ ato kapêr punuj nê nhũm mẽ kuma nê ma mẽ ato mra nê mẽ ajagjê. Mẽ ate ixkôt apa ho apa xwỳnh ã ã mẽ anhĩpêx anê. Nê mẽ õ pahihti hwỳr mẽ ato mra nê mẽ kãm tanhmã mẽ ato kapêr punuj to. ¹⁰ Tã nom kwa kêr ka mẽ kutã akuhê nê mãmrĩ tãm mẽ kãm ijarênh o akuhê. ¹¹ Nom kêr ka mẽ kãm amnhĩ jarênh kukamã tee ri ajamaxpêr o ri amã mẽ uma hkêt nê akuhê. Rỳ mẽ ajamaxpêr o: “Hêxta waa nê. Mẽ kot ixkukjêr ã arĩgrota ã tanhmã kot pa we ri mẽ kãm amnhĩ jarênh to?” Anhỹr o tee ri amnhĩ kukamã ajamaxpêr kêt nê. Koja Tĩrtũm Karõ tanhmã mẽ akrã hto ka mẽ ÿ hã akatàt kôt tanhmã mẽ kãm amnhĩ jarênh to.

¹² —Ně mẽ atõ nẽ mẽ anhĩpêxà nẽ mẽ akrajaja koja mẽ ixtã mẽ atã amÿnê nẽ ma pahi hwÿr mẽ ato mra nẽ kãm mẽ ajarẽ nhũm mẽ kuma nẽ mẽ ajagiê nẽ mẽ akwÿjê pa.
¹³ Koja mẽ piitã ixkõt mẽ akamã gryk nẽ ã kãm mẽ akurê ho pa anê. Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx nẽ ixkaga hkêr nẽ. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nẽ mẽ kurom Tĩrtũm mẽ wa ixri atĩr tũm nẽ amex rãhã nẽ apa ho apa. Mẽ kot tanhmã mẽ ato htã mẽ apê akupÿm kaxkwa kamã atĩr tũm nẽ apa mã xwÿnh jakamã kwa tee ri amnhĩ kukamã ajamxpêr o ri apa hkêr nẽ. Anê.

Mẽ pahtomnuj tÿx xwÿnh maati hã harênh

Matêwre 24.15-28; Rukre 21.20-24; mãănẽn Sikũn Tesarõn 2.3-4; Apokarip 13.11-17

¹⁴⁻¹⁶ Nhũm Jejus arĩ mẽ kãm kapêr nẽ mẽ kãm:

—Ně koja nhÿrmã kot mẽ atomnuj tÿx kumrêx xwÿnh maatija axtem nẽ Tĩrtũm mã amnhĩ jarênh xã hã ixkreja kamã amnhĩ xãm. Hãmri ka mẽ ja hã omu nẽ mẽ kot krĩ grãnh par mã ajamxpêr kurê kumrêx. Koja ã amnhĩ nhĩpêx anê ka mẽ amÿm amnhĩ wÿr mẽ omu hãmri nẽ ajapõj nẽ ma aprõt nẽ amrar kurê kumrêx. Mẽ apê jar pika pê Jutej kamã mẽ apa xwÿnhjaja mẽ omu hãmri nẽ mẽ kot mẽ apar pymaj ma aprõt nẽ amrar kurê kumrêx. Hixêr prêk wÿr ajapõj nẽ aprõt nẽ ma mra. Nẽ jar Jerujarê nhõ xwÿnhjaja kê mẽ umaj haxwÿja hapõj nẽ ma hprõt nẽ ma mrar o mra. Nẽ kapõt ã ri mẽ pa xwÿnhjaja kê mẽ ê jamÿnh kaxyw akupÿm krĩ hwÿr gjêx kêr nẽ. Æm ma mẽ umaj hprõt nẽ mrar o mrar kurê kumrêx.

¹⁷ —Ně mẽ htujarõ xwÿnhjaja nẽ mẽ hkra karãre xwÿnhjaja. Jajê pê koja mẽmoj omnuj tÿx nẽ. Tanhmã kot wem amnhĩ to nẽ hprõt tÿx? Nã pika ja kamã koja mẽ mex kêr nẽ. Mẽ kot amnhĩ tomnuj mÿrapê koja Tĩrtũm tanhmã mẽ homnuj tÿx to.

¹⁸⁻¹⁹ —Koja ã mẽmoj amnhĩ nhĩpêx anê hãmri nhũm mẽ piitã amnhĩ xã htÿx kãm hamak rũnh o pa. Tĩrtũm kot mẽ piitã mẽ ho kator krax rũm amnê mẽ pa xwÿnhjaja na mẽ kormã ã htÿx kamã hamak rũnh kêr nẽ. Kormã amnhĩ xã kamã hamak kryre. No nhÿrmã mẽ hprõt xã hã arĩgrota ã koja mẽ amnhĩ xã htÿx kamã hamak rax kumrêx.

—Tã akupÿn ixte mẽ awÿr ixwÿrk xã hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anhÿr pumunh kêr nẽ. Nom kormã akupÿn ixwÿrk xwÿj ri kot kaj mẽ amnhĩ xã htÿx kamã ajamak o apa. Jakamã kêr ka mẽ ã amnhĩ nhĩpêx anhÿrja kukamã amnhĩ to Tĩrtũm wÿ nẽ kãm: “Pa Tĩrtũm. Kwa kê mẽmoj ã amnhĩ nhĩpêx anhÿr kaxyw hãmri kê amgrã pê ã amnhĩ nhĩpêx anê. Koja na pê ã amnhĩ nhĩpêx anê nhũm omnuj tÿx nẽ.” Anhÿr o amnhĩ to awÿ.

²⁰ —Mẽ hprõt xã hã arĩgrota ã koja Tĩrtũm kãm mẽ apê hkrajaja mẽ atyk par pymaj mẽ anê mẽmo punuta ã arĩgro hkwy grã nẽ mẽ akukamã mẽ amã ho grêre. Koja mẽ akamã ukapri xãj ã mẽ anê hipêx anê.

²¹ —Ně koja ã mẽmoj amnhĩ nhĩpêx anhÿr kaxyw hãmri nhũm mẽ hêx o mẽ pa xwÿnhjaja ma mẽ awÿr mra nẽ hêx rom tanhmã mẽ amã kapêr to nẽ mẽ amã: “E ota ra Tĩrtũm kot mẽ pakaxyw ãm xwÿnhhta põj. Kwa mẽ tokyx hwÿr mra nẽ omu nẽ hkõt ri apa.” Anhÿr o mẽ amã hêx. Hãmri nhũm mẽ hkwyjaja tee ri mẽ kuma nẽ mẽ amã: “Nã tãm kêr. Jar mẽ ixkamã na. E mẽ tokyx amnê hwÿr mãn mra nẽ omu.” Anhÿr o mẽ amã hêx o pa. Nom kêr ka mẽ ama nẽ ãm mẽ ama nẽ mẽ hkõt amrar kêr nẽ.

²²⁻²³ —E kwa mẽ inhma. Na pa ra ixpri hã mẽmoj kot ã amnhĩ nhĩpêx anhÿrja kukamã mẽ amã tanhmã harênh to. Tã kêr ka mẽ axkãm ajamak rom nẽ ri apa. Koja mẽ kot amnhĩ to hêx xwÿnhjaja axpên pãnhã mẽ awÿr mra nẽ mẽ amã kêp Tĩrtũm kot mẽ akaxyw ãm xwÿnh ã amnhĩ to hêx. Nẽ mẽ hkwyjaja kêp Tĩrtũm nhÿ hã kapêr jarênh xwÿnh ã amnhĩ to hêx. Hãmri nẽ aa mẽ kot mẽmoj pumunh kêr kwÿ ho anhÿr o pa. Te Tĩrtũm nhÿ hã kot ho anhÿr pyrãk nom hêx rom mẽ apê Tĩrtũm kot amnhĩm mẽ arênh xwÿnhjê nokupyri kaxyw ã amnhĩ nhĩpêx anhÿr o pa. Anê.

Akupÿn Jejus wÿrk xã hã arĩgro jarênh

Matêwre 24.29-31; Rukre 21.25-28; mãănẽn Sikũn Pêtre 3.10; Apokarip 1.7, 19.11-16

²⁴⁻²⁵ Nhũm Jejus arĩ mẽ kãm kapêr nê mẽ kãm:

—Tã koja mẽ kot amnhĩ xà htỳx kamã hamak xà hã arĩgrota hapêx nhũm Tĩrtũm ã mẽmoj nhĩpêx anê.

Koja kaxkwa ho àk tỳx nê nhũm myyti ahtyk.

Nhũm mytwrỳre axte hirã hkêt nê.

Nhũm kanhêti piitã axrê nê rôrôk pa.

²⁶ Hãmri pa man akupỳn pika hwỳr wrỳ nhũm mẽ piitã ixwrỳk kãm ixpumũ. Kagrã kamã kot paj ixihỳtỳx o inhĩrã rax kãm akupỳn mẽ awỳr wrỳ. ²⁷ Hãmri nê ma krĩ piitã hwỳr Tĩrtũm kapêr o mẽ wrỳk xwỳnhjê rê nhũm mẽ ma mra nê amnepê mra ixte amnhĩ kaxyw mẽ axunhwỳr xwỳnh piitã ho akuprô nê akupỳn ixwrỳr mẽ ho mra. Anê.

Jejus kot mẽmo pĩ hpàr ã ejêp jarênh

²⁸ Nhũm Jejus arĩ mẽ kãm kapêr nê mẽ kãm:

—E ka mẽ pĩ hpàr mỳj pumũ. Na hte mẽmo mytwrỳr hã rã nhũm mẽ omũ nê ô hkukamã hamaxpêr kurê kumrêx. ²⁹ Ja pyrã nê koja mẽmoj ã amnhĩ nhĩpêx anhỳr mẽ ka mẽ akupỳn mẽ awỳr ixwrỳk mã ajamxpêr kurê kumrêx. ³⁰ Koja akupỳn ixpôx kêt ri ã mẽ kot mẽmoj kot amnhĩ nhĩpêx anhỳr pumunh xwỳnhjaja kormã piitã htyk par kêt ri pa akupỳn mẽ awỳr wrỳ.

³¹ —Nê koja nhỹrmã pika nê kaxkwa wa hapêx pa. Tã no ãm ixkapêr koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mẽnh to hkêt nê. Anê.

Mẽ pahte akupỳn Jejus wrỳk xà hã arĩgro pumunh kêt ã mẽ pajarênh

Matêwre 24.36-44; Rukre 12.37-40; mãânênh Atre 1.9-11; Wam Tesarôn 5.2; Sikũn Pêtre 3

³² Nhũm Jejus arĩ mẽ kãm kapêr nê mẽ kãm:

—Nom akupỳn ixwrỳk xà hã arĩgroja mẽ ate omunh kêt. Nê kaxkwa kamã Tĩrtũm kapêr o mẽ wrỳk xwỳnhjaja kot ja pumunh kêt. Nê pa ixpê Tĩrtũm Kra htã ijaxwỳja ixte ja hã amnhĩ pumunh kêt. ãm Mêpahpãm maatija tapxipix kot ja pumunh.

³³ —Tã mẽ ate akupỳn ixwrỳk xà hã arĩgro pumunh kêt jakamã kwa kêt ka mẽ axkãm ajamak rom nê ri apa. Nê apkati mẽ amnhĩ wỳr ijapêr arĩt rãhã ho ri apa.

³⁴⁻³⁵ —E pa tanhmã mẽ amã akupỳn ixwrỳk xà hã arĩgro jarênh to ka mẽ inhma. Koja mẽhõ nhỹhỹm nojarêt hãmri nê kãm mẽ ãpênh xwỳnhjê mã mẽ ãpênh ã karõ nê òrkwỹ jamãr xwỳnh mã tanhmã kãm karõ hto. Hãmri nê òrkwỹ kahê xà jamãr xwỳnh mã kãm: “E kêt ka ixwakre kamã ijapêr arĩt rãhã ho ri apa.” Anê hãmri nê ma nhỹhỹm mō. Tã mẽ kot ijapêr rĩt rãhã ho mẽ pa xwỳnhjaja te kot ixkre kahê xà jamãr xwỳnh kot amnhĩ nhĩpêx pyrãk. Ò patrãwja akupỳn hpôx xà hã arĩgro hã omunh kêt jakamã na hte kahê xà jamãr rãhã ho pa. Koja apu axpêr kamãt nhũm akupỳn hpôx japêr. Rỳ kôt ã kamãt rỳ krãhyre kã nhũm akupỳn hpôx japêr. Rỳ kwỳhtyk nhũm akupỳn hpôx japêr. Tã uràk nê mẽ ate akupỳn ixwrỳk xà hã arĩgro pumunh kêt jakamã kêt ka mẽ ijamãr rãhã ho ri apa. Jao ixkutêp inhmã tanhmã amnhĩ nhĩpêx to rãhã nê. Ra ixte mẽ amã hã karõ xà hkôt.

³⁶ Kop ixkre kahê xà jamãr xwỳnhja tee ri ò patrãw kamã ama hãmri nê ra òtxwa nê htỳx òt o ỳr rôm nhũm haêr pê hwỳr hpôx ronhỹx ja kêp mex kêt nê. Ja pyrã nê kêt ka mẽ ixkutêp ixkôt amnhĩ nhĩpêx rãhã ho ri apa. Nom tee ri amnhĩ wỳr ixkãm ama hãmri nê axte inhmã ajamxpêr kêt pê atỳx ri tanhmã amnhĩ tomnuj to ho apa hkêt nê.

³⁷ —E ixte mẽ amã mẽmoj jarênhja na pa hte ixkwỳjê piitã mẽ kãm harê. Jakamã kwa kêt ka mẽ akupỳn ixwrỳk ã ijapêr arĩt rãhã ho ri apa. Anê.

Nhũm pre ã Jejus amnhĩ kukamã mẽ kãm ujarênh anê.

14

Mẽ kot Jejus pĩr kukamã hamaxpêr ã mẽ harênh

Matêwre 26.1-5; Rukre 22.1-2; Juãw 11.45-53

¹ Tã nhũm Ijaew hkĩnhã ã arĩgro pê Pas wỳr apkati axkrut. Pas ã na hte mẽ ixpê Ijaewjaja amnepê mra Tĩrtũm kot pika pê Ejit pê mẽ inhĩgê nê mẽ ixpãmjê kator mã

ijamaxpêr kaxyw axpên wÿr akuprô nê hã ixkînh. Na pa htem arîgroja mã: “Pas” anê. Nê harênh o: “Mê pahte pãw kaxkrit kêt kur ã arîgro” anê. ²Jakamã nhũm mẽ inhõ patre krãhtũmjê mẽ Tirtũm kapêr tũm o mẽ ahkre xwÿnhjaja kãm Jejus pîr prãm nê. Nom mẽ kãm hkôt kapêr mar o mẽ pa xwÿnhjê pyrna nê. Nê tee ri hã amnhî jahkre nê axpên mã:

—Hêxta waa nê. Tanhmã kot puj wem ho nê kupîi? Kot puj mẽ pahkînh kãm tanhmã ho nhũm mẽ hkînh xwÿnhjaja hã mẽ pahpumu nê mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê. Anê.

Mêhõ ni kot Jejus krã gregrer ã harênh

Matêwre 26.6-13; Rukre 7.36-50; Juãw 12.1-8

³Rôm nhũm Jejus Simãw nhõrkwy kamã kormã apkur o nhÿ. Krî pê Petãn kamã. Simãwja na pre hkà kro xapêr tÿx o pa nhũm Jejus akupÿn ho mex. Jakamã akupÿm õ krî hwÿr pøj nê kutã apkur o nhÿ. Hãmri nhũm mêhõ nija harênh ma nê mẽ hkuxwa xà hã kàx õ py nê ma hwÿr o tẽ. Nê mẽ hwÿr axà nê nhÿhÿnh kàx kahte nê mẽ hkuxwa xà ho hkrã gregrer pa. ⁴Hãmri nhũm mẽ apkur o hkrî xwÿnhjaja tee ri ã kot amnhî nhîpêx anhÿr ã omu nê kamã gryk nê. Nê axpên mã:

—Tk. Kwa nà na hã mẽ hkuxwa xàta kapîr par kumrêx. ⁵Kop apu ma o htêm nê ho wênê nê hpãnhã kàxpore ho rax kumrêx nê hamÿnh nê ho mẽ kêp amrakati xwÿnhjê nhîpêx par nhÿx ja kãm mex nê. Mo na ri ã amnhî nhîpêx anhÿr kêt nê?

Anê nê hã kãm akir. ⁶Hãmri nhũm Jejus mẽ kuma nê mẽ kãm:

—Tk. Kwa mẽ kãm axàkjêr kêt nê. ãm hãmri na ã inhîpêx anê. ⁷Mê kêp amrakati xwÿnhjaja koja mẽ arî mẽ akôt pa rãhã nê. Ka mẽ amã mẽmo arîgro hã mẽ ho ajuta hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ are. ⁸Ixyk nhũm mẽ kot ijaxàr kukamã na ã ixkrã gregrer anê. ãm hãmri na ã inhîpêx anê. ⁹ãm hãmri na pa mẽ amã ja jarê. Koja mẽ krî piitã hkôt axpên mã ixte tanhmã mẽ anê amnhî nhîpêx to hã ijarênh o pa nê mãânên kot ã inhîpêx anhÿrja mãânên harênh o pa. Nhũm mẽ piitã kot tanhmã ixto mex to hã harênh ma. Anê.

Jut Kariot kot mẽ kãm Jejus ã àmnênh kaxyw ã harênh

Matêwre 26.14-16; Rukre 22.3-6; Juãw 13.21-30

¹⁰Tã nhũm Jut Kariotja. Jejus kôt mẽ pa ho mẽ pa xwÿnh pê 12 hõ na pre. Tã axtem nê Satanasti nhÿ hã ma patre krãhtũmjê hwÿr tẽ nê axtem nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amÿnê ka mẽ hpãnhã inhãm amnhîre nà? Anê.

¹¹Hãmri nhũm mẽ kuma nê hkînh nê. Hãmri nê kãm:

—Nà kot paj mẽ amã amnhîre. Anê.

Hãmri nhũm mẽ kuma nê kato nê ma tẽ nê Jejus pynênh kaxyw htãnopxar o hkôt ri pa.

Jejus kot ÿ hã kapêr o mẽ pa xwÿnhjê kutã apkur ã harênh

Matêwre 26.17-19; Rukre 22.7-13

¹²Tã nhũm arîgro pê Pas kato. Amnepêm mẽ inhîgêtjaja na prem ôwêhti hkrare hkwy pa. Tirtũm kot ja hã mẽ omunh nê Ejit kãm mẽ kãm mẽ hkurê xwÿnhjê nhîhkra nê mẽ kator kaxyw na prem ã amnhî nhîpêx anê. Jakamã na pa htem arî mẽ ixpê mẽ hkanrêhã mẽ htãmnhwÿjaja Pas ã axpên wÿr akuprô nê jam ijamaxpêr pê mẽ uràk nê ôwêhti hkrare hkwy hpa nê pãwti kaxkrit kêt kãm kuku.

Jakamã nhũm Jejus kôt mẽ pa ho pa xwÿnh pê 12jaja Pas ã mẽ apkur xà hã Jejus kukja nê kãm:

—Kwa nhÿri kot paj mẽ akutêp Pas ã mẽ panhõ hã apê? Anê.

¹³Hãmri nhũm mẽ kuma nê ja wa ho axkrut nê mẽ amnhî kukamã wa kumê nê wa kãm:

—E wa ma Jerujarê hwÿr wa tẽ. Nê hwÿr axà nê mêhõ myja pumunh kurê kumrêx. Nhũm amnhîm gõ ru nê amnhî kre hã poti xãm nê o tẽ ka wa omu nê hã ajêt nê ma

örkwý hwýr hkôt tē. ¹⁴ Hāmri nē ixkre nhō dōn pumu nē kām: “E Jejus na wa inhmē pa wa awýr tē. Na awýr pēr mēnh o: ‘Nhýri kot paj we ixkôt ri mē pa ho pa xwýnhjē mē Pas ā axpēn kutā apku?’ Anhýr o na awýr pēr mē.”

¹⁵ —Wa ā kām akapēr anē kē war ama nē war amā örkwý nhīmōk ā ixkre rax ō jahkre. Ra kamā kaxyw mē paxàpkur xà hā mēmoj piitāā. Ka wa omu nē māmri kamā mē ixkutēp mē panhō hā apē. Anē.

¹⁶ Hāmri nhūm wa kuma nē ma hwýr tē. Nē krīm axà nē ra kot wa kām mēmoj jarēnh xà hkôt mēmoj piitā omu nē mē kutēp mē kām mēō hā àpēnh o wa xa.

Jejus kot mēhō kot mē kām hā àmnēnh ā harēnh

Matêwre 26.20-25; Rukre 22.21-23; Juāw 13.21-30

¹⁷ Tā nhūm kamātre nhūm Jejus mē hkôt mē pa ho pa xwýnhjaja wa hkôt mō. ¹⁸ Hāmri nē kýxpē ixkreja wýr api nē hwýr agjē nē apkur kaxyw hkrī hpa nē kormā apkur o hkrī nhūm Jejus mē kām:

—E pa mē amā mēmoj jarē ka mē inhma nē amnhī krām haxàr tỳx nē. Kot kaj mē ixkutā axàpkur o akrī xwýnhjē hō mē kām ixkurē xwýnhjē mā ixtā amýnē. Anē.

¹⁹ Hāmri nhūm mē tee ri kuma nē hkaprī htỳx nē. Nē axpēn pānhā amnhī tā hkukja nē kām:

—Kwa xà pa kot paj ā anhīpēx anē? Nà pa hkêt. Anē.

²⁰ Hāmri nhūm mē kām:

—Nà mē apē 12jē hō kot kaj ā inhīpēx anē. Mē ate ixkutā guhkrax kām anhō pāwti ho mry kagō nhek o akrī xwýnhjē hō kot kaj ixtā amýnē. ²¹ Tirtūm kapēr ā kagà htūm kot ixkukamā harēnh xà hkôt koja mē tanhmā ixto rax nē xpi. Nom kot mē kām ixtā àmnēnh mā xwýnhta hēxta waa nē. Ā kot amnhī nhīpēx anhýrja mýrapē koja amnhī xà htỳx kām hamak rax kumrēx. Kop apu aa ō māmāj nhōxà hkre rūm kator kêt ronhỳx ja kām mex nē.

²² Anē nē kormā mē apkur o hkrī rōm nhūm pāwti hō py nē ho Tirtūm wý. Hāmri nē mē kām ho hkry nē mē piitā mē kām ōr pa nē mē kām:

—E na pa mē amā pāwti ho hkry nē mē amā kugō. Ja pyrā nē koja mē ā inhīpēx anē nē te ixto hkry hpar pyrāk o inhīpēx pa amnhī xà htỳx kamā ijamak kām ty. Nom mē anē kot paj ty. E mē māmri aku. Anē.

²³⁻²⁴ Nē hpānhā wīhti hā kop py nē mā ho anē nē Tirtūm mā harē. Hāmri nē mē kām kugō nē mē kām:

—E mē kot xpi xà hā arīgrota ā koja ixkamrō axkapī. Nom koja mē amarī xpi nhūm amarī hpikapīr kêt nē. Ām paa. Pa kot paj mē anē mē ihkram amnhī jaxà nhūm mē ā inhīpēx anē. Koja ixkamrō axkapī nhūm Tirtūm omu nē ixkukwak ri mē anē mē ate amnhī tomnuj piitā amnhī katut kôt rēnh pa nē mē ato hkra. Ra amnepēm kot ja hā amnhī jarēnh xà hkôt. Jakamā e. Mē axpēn pānhā ixkamrō pikapīr mā ajamxpēr pē ixte mē amā kop kām wīhti nhōrta o akōm o axpēn nhīpēx. Anē.

Nhūm pre ā mē kām amnhī jarēnh anē nhūm mē piitā ho hkōm o axpēn nhīpēx.

²⁵ Hāmri nhūm mē kām:

—Ām hāmri na pa mē amā amnhī jarē. Kot paj axte wīhti ho ixkōm kêt rāhā nhýrmā Inhō Papaj akupýn mē awýr inhmē. Hāmri pu mē rī kormā akupýn xipōx xà hā arīgrota ā pahkīnh nē. Nom axtem tanhmā hā pahkīnh to. Anē.

²⁶ Nhūm pre ā mē kām kapēr anē hāmri nhūm mē Tirtūm mā mex o mex ā gre hāmri nē hapōx pa nē ma hixêt pē Oriwēhti hwýr mra.

Jejus kot Simāw Pêtre hkukamā tanhmā harēnh to

Matêwre 26.31-35; Rukre 22.31-34; Juāw 13.36-38

²⁷ Tā nhūm Jejus hkôt mē pa ho pa xwýnhjē hkukamā tanhmā mē kām ujarēnh to nē mē kām:

—E mē inhmā. Tirtūm kapēr ā kagà htūm kot ā mē pajarēnh kot anhýr. Kot paj ôwēhti jamār o pa xwýnhja pī hāmri nhūm ôwēhti hpigrānh pa nē ma anhrà nē ri mra.

Anhÿr o te ixpê ôwêhti jamâr xwÿnh nhÿm mē apê ôwêhti pyrāk ā mē pajarēnh. Tā kot puj mē ā amnhī nhīpêx anē. ²⁸ Mē kot ixpīr tā koja Tīrtūm akupÿm ixto ixtīr. Pa akupÿm ixtīr nē ma mē akukamā pika pē Garirej wÿr mō. Kamā kot puj mē axte axpēn pumu. Anē.

²⁹ Hāmri nhÿm Simāw Pêtre tee ri mē amnhī tā kuma nē kām:

—Kwa nà. Ri ā mē ijarēnh anhÿr kêt nē Pahihti. Kot paj akaga hkêt nē. Jajaja koja anhrà nē hprôt nē ma mrar japêr no pa kot paj anhÿr kêt nē. Anē.

³⁰ Hāmri nhÿm kām:

—Nà kot kaj anē Simāw Pêtre. Koja apkati hkôt krāhyre hkâr kêt ri ka ra mē umaj ate ixkôt apa hkêt ā mē kām amnhī tā axàprār o axkrunēpxi kām ga. Kwa jam ajamxpēr tÿx nē. Anē.

³¹ Hāmri nhÿm tee ri amnhī tā kuma kām amnhī tā àprār kām hihtÿx nē kām:

—Tk. Kwa nà. Kot paj ā amnhī nhīpêx anhÿr kêt nē. Koja mē tee akôt ixpīr mā tā no pa ām aa akaga hkêt kumrēx. Kot paj akôt ixpa ho ixpa rāhā nē. Anē.

Hāmri nhÿm hkôt mē pa ho mē pa xwÿnh kwÿjê piitā ā kām amnhī jarēnh anē.

Jejus kot Tīrtūm mā amnhī jarēnh

Matêwre 26.36-46; Rukre 22.39-46

³² Tā nhÿm Jejus ma nhÿri mē kot kām “Gesēm” anhÿr xwÿnhja wÿr hkôt mē pa ho pa xwÿnhjê ho mō. Hāmri nē mē kām:

—E mē jar ixkutêp akrī. Pa ma mütūm tē nē Tīrtūm mā amnhī jarē măn. Anē.

³³ Hāmri nē amnhī kôt mē ho axkrunēpxi nē mē o mō. Simāw Pêtre mē Jepetew kra pijakrut pē Xiakre nē Juāwja nhÿm amnhī kôt mē o mō. ³⁴ Hāmri nē amnhī kukamā mē kām hkurê xwÿnhjaja kot tanhmā hipêx tota kukamā hamaxpēr o ra amnhī kamā kahak tÿx o ra hkaprī nē. Hāmri nē hkôt mē mrar xwÿnhjê mā kām:

—Hêxta waa nē. Na pa tee ri amnhī xà htÿx kamā ijamakja kukamā ijamaxpēr nē amnhī kamā ixkahak tÿx o ixkaprī nē. Te ra ixkaprīja kot ixpīr o mōr pyrāk. Jakamā e mē jar anohtÿx nē ixto Tīrtūm wÿr o akrī kê tanhmā ixto pa mē kot tanhmā ixtoja kutā ixihtÿx nē. Anē.

³⁵ Hāmri nē mē kurūm htēm grire nē amnhī kamā kahak o Tīrtūm mā amnhī jarēnh kaxyw htu mÿr pē htēm nē pikap nō nē kām:

³⁶ —Kwa Papaj. Hêxta waa nē. Inhmā amnhī xà htÿx kām ijamak prām kêt kumrēx. Na pa tee ri amnhī kukamā ijamaxpēr nē amnhī kamā ixkahak tÿx nē. Jakamā kot kaj amā inhnê ja ho ajapêx prām nē māmri ho ajapêx nhÿm mē kām ixkurê xwÿnhjaja tanhmā ixto hkêt nē. Rÿ ko. Kot kaj amā mē kot tanhmā ixto hprām kê mē māmri tanhmā inhīpêx to. Nom pam inhmā hprām xà hkôt kêt.

³⁷ Anhÿr o Tīrtūm mā amnhī jarē hāmri nē kànhmā xa nē akupÿm Simāw Pêtreja mē hwÿr tē nē mē omu nhÿm mē ra htÿx gōr nē hikwÿ. Hāmri nhÿm tee ri mē omu nē Simāw Pêtre mā kām:

—Kwa Simāw Pêtre. E mē hāmri akrā hapôj. Kwa wem anohtÿx grire nē ixkutêp amnhī to Inhō Papaj wÿr o akrī ³⁸ kê mē ixkôt tanhmā mē ato htā ka mē amā mē uma xaj ixkaga hkêt nē arī mē kutā amnhī to htÿx nē akuhê. Ā mē amā mē ate amnhī nhīpêx anhÿr prām nom kormā mē amā maa. Anē.

³⁹ Hāmri nē akupÿm tē nē axte Tīrtūm mā tanhmā amnhī jarēnh to.

⁴⁰ Nē akupÿm mē hwÿr tē nē mē omu nhÿm mē axte ôt pa nē hikwÿ. Nhÿm tē nē tee ri mē omu hāmri nē tanhmā mē kām nē hkêt nē. Ām awjanā nē ma akupÿm tē nē axte Tīrtūm mā amnhī jarē. ⁴¹⁻⁴² Hāmri nē akupÿm mē hwÿr tē nē mē kām:

—Kwa xàn ka mē arī gōr nē anhīkwÿ? E mē tokyx akrā hapôj. Na mē ra ixwÿr mrar nē kot ixpynēnh mā. Koja mē tokyx ixkutā mē kot amnhī xunhwÿr xwÿnhjaja mē kām ixtā amÿnê. Ota ra kot ixtā mē kām àmnēnh xwÿnhhta tē. E mē tokyx kànhmā akrī pu mē kutā mra. Anē.

Mē kot Jejus pynēnh ā mē harēnh

Matêwre 26.47-56; Rukre 22.47-53; Juāw 18.1-11

⁴³ Nhũm Jejus kormã mẽ kãm kapêr o ãm rãhã nhũm Jut Kariotja tẽ. Mẽ hkôt mẽ pa ho mẽ pa xwỳnhjê hõ htã nhũm ra amnhĩ kôt mẽ ohtô nẽ Jejus wỳr mẽ o tẽ nhũm mẽ wapohti nẽ kô jamỳ nẽ hkôt o mra. Patre krãhtũm mẽ Ijaew krãhtũmjê mẽ Tĩrtũm kapêr tũm o mẽ ahkre xwỳnhjaja ra Jut kôt mẽ kurẽ nhũm mẽ man hkôt Jejusja wỳr mra. ⁴⁴ Na pre ra Jut Kariotja mẽ kãm tanhmã amnhĩ jarẽnh to nẽ mẽ kãm:

—E kot paj nhỹri mẽ pahte unênh mã xwỳnhta pumu nẽ hwỳr tẽ nẽ kahti hkôt kumỳ nẽ tanhmã kãm ixkapêr to. Ka mẽ ixpumu nẽ hwỳr tẽ nẽ unê nẽ ma akupỳm o tẽ.

Anẽ hãmri nẽ ma hwỳr mẽ o tẽ. ⁴⁵ Nẽ Jejusja pumu nẽ hwỳr tẽ nẽ kãm: “Pa mẽ ijahkre xwỳnh.” Anẽ hãmri nẽ kahti hkôt kumỳ. ⁴⁶ Hãmri nhũm hkôt mẽ mra xwỳnhjaja omu nẽ Jejus wỳr mra nẽ unênh kurẽ kumrẽx. ⁴⁷ Hãmri nhũm Jejus kôt mẽ pa ho mẽ pa xwỳnhjaja tee ri ja hã mẽ omu nhũm hõja õ wapo kapa nẽ patre maati mã àpênh xwỳnh kot mẽ hkôt htẽm xwỳnhta mã wapo ho apê. Nẽ kot ho hkrã nhĩpôn mã tã kuhpaw nẽ upôk rũm hamak nhĩkjê krãhta. ⁴⁸⁻⁴⁹ Hãmri nhũm Jejus amnhĩ tã mẽ kot unênh xwỳnhjê mã kãm:

—Kwa na pa pre apkati mẽ Tĩrtũm mã amnhĩ jarẽnh xà hã ixkre kamã mẽ kãm ixujarẽnh o ixpa ka prem tokyx ixpynênh kêt nẽ. Tã jarãhã te ixte amnhĩ tomnuj xwỳnh pyrà nẽ ixwỳr wapohti nẽ kô hã akapên nẽ ixwỳr atẽm rax nẽ. Nom ra mẽ ate tanhmã ixto kaxyw arĩgro kator jakamã mẽ mãmri tanhmã amã ixto hprãm xà hkôt tanhmã ixto. Tĩrtũm kapêr ã kagã htũm kot mẽ akukamã ã mẽ ate inhĩpêx anhỹr ã mẽ ajarẽnh xà hkôt. Anẽ.

⁵⁰ Hãmri nhũm hkôt mẽ pa ho mẽ pa xwỳnhjaja tee ri mẽ kot unênh ã mẽ omu hãmri nẽ mẽ umaj Jejus kaga nẽ ma hprôt pa nhũm ahte mẽ kuri xa. ⁵¹⁻⁵² Hãmri nhũm mẽ ma o tẽ. Nhũm kormã mẽhõ nyw xwỳnhja tee ri ja hã mẽ omu nẽ ma Jejus kôt tẽ. Nhũm mẽ amnhĩ kôt omu nẽ kot unênh kaxyw kahty xà hã kupy nhũm mẽ umaj mẽ ãhkra kamã kahty xaja re nẽ ma hkênh nẽ hprôt nẽ tẽn akunok.

Jjaew nhõ patre maati kot Jejus kukjêr ã harẽnh

Matêwre 26.57-68; Rukre 22.63-71; Juãw 18.12-14, 18.19-24

⁵³ Tã nhũm mẽ ma mẽ õ patre maati nhõrkwy hwỳr Jejus o tẽ. Hãmri nhũm patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwỳnhjaja õrkwy hwỳr Jejus ã akuprõ. ⁵⁴ Hãmri nhũm Simãw Pêtre mẽ hkôt tẽ nẽ mẽ hkôt patre maati nhõ kĩtare hwỳr axà nẽ amỳm hã mẽ omunh o xa. Nhũm ra pôristijaja kĩtare kamã amnhĩm kuto nẽ hã ànhunh o hkrĩ nhũm mẽ hwỳr tẽ nẽ mẽ ãhkô hã ànhunh o nhỹ.

⁵⁵⁻⁵⁶ Rõm nhũm ixkre kamã mẽ pikuprõnh xwỳnhjaja tee ri Jejus ã krĩ nhõ xwỳnhjê kukja nẽ mẽ kãm:

—E mẽ atõ na ka pre Jejus kot tanhmã amnhĩ tomnuj to hã omu? Mẽ atõ mẽ inhmã harẽ pa mẽ ama nẽ Rõm nhõ xwỳnhjê nhĩhkram haxà kê mẽ pamã kupĩ. Anẽ.

Hãmri nhũm mẽ axpên pãnhã tanhmã harẽnh to. Tanhmã kot amnhĩ tomnuj to hã harẽnh to htã nom ri ho hêx jakamã axpên kwỳm ri tanhmã ri harẽnh to nhũm mẽ tee ri mẽ kuma nẽ mẽ kãm:

—Tk. Kwa mẽ axpên kwỳm ri tanhmã harẽnh to hkêt nẽ. Axpên kôt mãn ri tanhmã mẽ inhmã harẽnh to. Anẽ.

⁵⁷ Hãmri nhũm mẽ hkwyjaja kãnhmã kuhê nẽ axpên kôt tanhmã ho hêx to nẽ mẽ kãm:

⁵⁸ —Nà kot paj mẽ amã tanhmã kot amnhĩ nhĩpêx to hã harẽ. Na pa prem ã kapêr anhỹr ã kuma. Na pre tanhmã Tĩrtũm mã amnhĩ jarẽnh xà hã ixkreta jarẽnh to nẽ harẽnh o: “Kot paj ixkreja grãnh pa hãmri nẽ ixtã apkati axkrunêpxi nẽ akupỳm hipêx. Nom kot paj amnhĩ nhĩhkra ho hipêx kêt nẽ.” Anhỹr ã ã amnhĩ jarẽnh anẽ pa mẽ kuma.

⁵⁹ Anhỹr o harẽnh tã nom axpên kôt harẽnh kêt nẽ. Arĩ axpên kwỳm ri harẽ. ⁶⁰ Hãmri nhũm mẽõ patre maati tee ri mẽ kot tanhmã ho kapêr toja ma nẽ mẽ aptar tũmjê noo mã kãnhmã xa nẽ Jejus mã kãm:

—E na ka ra mẽ kot ã ajarẽnh anhỹrja ma. Xà kot kaj tanhmã mẽ inhmã amnhĩ tã axaprãr to hkêt nẽ? Xà ãm hãmri na mẽ ajarẽ? E kwa mẽ inhmã tanhmã amnhĩ jarẽnh to. Anẽ.

⁶¹ No nhũm akryk xa nẽ tanhmã kãm nẽ hkêt nẽ. Hãmri nhũm tee ri ã kot amnhĩ nhĩpêx anhỹr ã omu nẽ axte kãm:

—Kwa mẽ inhmã amnhĩ jarẽ. Xà apê Tĩrtũm Kra na ka? Xà ka na apê Tĩrtũm kot mẽ ixwỳr amẽnh xwỳnh na ka? Anẽ.

⁶² Hãmri nhũm tã kãm amnhĩ jarẽ nẽ kãm:

—Tỳ. Ixpê tãmta na pa. Ra mẽ ate jarãhã tanhmã ijarẽnh to kaxyw apikuprõnh tã nom kot paj nhỹrmã mẽ kamjaja tanhmã mẽ ajarẽnh to ka mẽ amnhĩ tã ixpumu. Kot kaj mẽ Tĩrtũm kot mẽ ato amnhĩptàr xà kutã akri hãmri pa hwỳr tẽ nẽ ìhkô hã nhỹ. Kakra kamã kot paj hwỳr tẽ nẽ ìhkô hã nhỹ hãmri nẽ ÿ hã tanhmã mẽ ajarẽnh to ka mẽ amnhĩ tã ixpumu. Anẽ.

⁶³⁻⁶⁴ Hãmri nhũm tee ri ã kot amnhĩ jarẽnh anhỹrja ã kuma nẽ gryk xàj amnhĩ xê kaxô nẽ mẽ àptàr tũmjê mã kãm:

—Kwa mo kaxyw kot puj mẽ axte ri ho tanhmã kot amnhĩ tomnuj to hã harẽnh xwỳnhjê hõ japêr? Ra tãm kot amnhĩ pê Tĩrtũm Kra hã amnhĩ to hêx nhũm mẽ pahte pajamak o mar kênã. E tanhmã kot puj mẽ ho? Anẽ.

Hãmri nhũm mẽ kãm:

—Nà kot puj mẽ kupĩ. Ra htyk mã tãm kênã. E kwa tokyx pu mẽ ma Rõm nhõ pahihiti hwỳr o tẽ kê mẽ pamã hã amýnê kê mẽ kupĩ. Anẽ.

⁶⁵ Hãmri nhũm mẽ hipêx kati rax nẽ. Nẽ hkuk kuhtô nẽ hpãnhã no hpro nẽ htak nẽ kãm:

—E mẽ kot atak xwỳnhjê nhĩxi jarẽ. Apê Tĩrtũm Kra hã ate amnhĩ jarẽnh jakamã mãn urak nẽ axàhpumunh tỳx. Jakamã e mẽ hixi jarẽ. Anẽ.

Nhũm prem ã hipêx anẽ hãmri nẽ pòristijê nhĩhkram haxà nhũm mẽ htak rax o kuhê.

Simãw Pêtre kot Jejus kôt pa hkêt ã kot amnhĩ jarẽnh

Matêwre 26.60-75; Rukre 22.54-62; Juãw 18.15-18, 18.25-27

⁶⁶⁻⁶⁷ Rõm nhũm Simãw Pêtre arĩ kítare kamã mẽ ìhkô hã ànhunh o nhỹ. Hãmri nhũm mẽõ patre maati mã àpênh xwỳnh nitita mẽ hwỳr kato nẽ xa. Hãmri nẽ hirã kamã hprĩ hã Simãw Pêtre pumu nẽ omunh mex kurê kumrêx nẽ kãm:

—Xê pêr apê Najare nhõ xwỳnh Jejus kôt mẽ pa ho mẽ pa xwỳnhjê hõ na ka. Anẽ.

⁶⁸ Hãmri nhũm tee ri kuma nẽ ra kãm ma nẽ. Nẽ kãm amnhĩ tã aprã nẽ kãm:

—Tk. Kokỹ. Ixte mẽhõ my ata pumunhre hã. Anẽ.

Hãmri nẽ kànhmã xa nẽ ma tẽ nẽ kítare hwỳr kahê hkôt ã mẽ hkàx ã ahte xa nhũm krãhyre kà. ⁶⁹ Nẽ gaa nhũm hpãnhã mẽ kãm àpênh xwỳnhjê hõja omu nẽ hã mẽ kãm:

—Xê ma ãm hãmri na harẽ. Kôt ri mẽ pa xwỳnhjê hõ na pêr. Anẽ.

⁷⁰ Hãmri nhũm amnhĩ tã kuma nẽ kãm:

—Tk. Kwa nà. Mẽ ri ã amnhĩ krã hkôt ri ixto axêx anhỹr kêt nẽ. Aa ixte mẽhõ ata pumunh kêt kumrêx. Anẽ.

Hãmri nhũm mẽ hkwỳja gaa nẽ kê axte hprĩ hã omu nẽ kãm:

—Kwa ãm hãmri na mẽ ajarẽ. Apê Jejus hkwỳ na ka. Ajaxwỳja apê Garirej nhõ xwỳnh kênã. Anẽ.

⁷¹ Hãmri nhũm tee ri mẽ kuma nẽ kãm ma htỳx nẽ. Hãmri nẽ mẽ kãm:

—Kwa nà. Na pa Tĩrtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà uràn ixpê Garirej nhõ xwỳnhre hã. Ixte mẽhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹr o ra mẽ kãm amnhĩ tã aprãr o axkrunêpxi. ⁷² Hãmri nhũm axte krãhyre kà. Rao ra hkàr o axkrut. Hãmri nhũm Simãw Pêtre kuma nẽ Jejus kot ra hkukamã ã amnhĩ nhĩpêx anhỹr ã harẽnhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kãm amnhĩ tã aprãr o axkrunêpxi hã harẽnhja mã hamaxpêr. Hãmri nẽ ra kànhmã hakry hpar o tẽ nẽ hkaprĩ htỳx kumrêx. Hãmri nẽ tee ri amnhĩ kukamã hamaxpêr nẽ amnhĩ mã:

—Hêxta waa nẽ. ãm hãmri na pre Jejus ijarẽ. Tã pa kot ijarẽnh xà hkôt ã amnhĩ nhĩpêx anẽ. Kwa mo na pa axtem nẽ ã mẽ kãm amnhĩ to ixêx anẽ?

Anë hāmri nē hkaprī xàj mỳr rax nē.

15

Pirat kot Jejus kujjêr ã harēnh

Matêwre 27.1-2, 27.11-14; Rukre 23.1-5; Juãw 18.28-38

¹ Tã nhũm myt kato nhũm mē axte Jejus ã axpēn wỳr akuprō. Patre krãhtũmjê mē Ijaew krãhtũmjê mē Tĩrtũm kapēr tũm o mē ahkre xwỳnhjê mē Ijaew nhõ juistijaja nhũm mē piitã hã akuprō. Hāmri nē pōristi mã anē nhũm mē Jejus pa hpre nhũm mē ma Rõm nhõ xwỳnhjê nhõ pahi Pirat wỳr o tē. Piratja na pre hte Rõm nhõ xwỳnhjê nhõ pahi Sesti nhỹ hã Ijaew o amnhĩptàr o pa nhũm prem ma hwỳr o tē. ² Hāmri nē kutã ãm nē tanhmã kãm harēnh to nē kãm:

—E ot pa mē awỳr jahti ho tē. Na hte mē inhmã hêx rũnh o pa. Mē ixte Pahihti Sesti kapēr kwỳm ri amnhĩ nhĩpêx prãm xàj tanhmã mē inhmã hêx to. Nē axtem nē mē ixte Sesti mã kàxpore hkwy nhõr kêt ã mē inhmã karō. Nē Tĩrtũm kot mē ixkaxyw kêp mē inhõ pahi hã ãm ã amnhĩ jarēnh o pa. Na hte ã mē inhmã amnhĩ to hêx anhỹr o pa. Anē.

Hāmri nhũm Pirat mē kuma nē Jejus pumu nē tanhmã hkukjêr to nē kãm:

—E inhmã amnhĩ jarē. Xà ãm hāmri na mē ã ajarēnh anē nà? Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anē.

Hāmri nhũm kãm:

—Tỳ. Nà ãm hāmri na ka ã ijarēnh anē. Anē.

³ Hāmri nhũm patre krãhtũmjaja tanhmã kãm ho kapēr to. ⁴ Nhũm mē kuma nē axte hkukja nē kãm:

—Kwa na mē ã ajarēnh anē ka mē ama nē ãm mē ama nē inhmã tanhmã amnhĩ tã axàprãr to hkêt nē. Anē.

⁵ Nom nhũm Jejus ãm akryk xa nē tanhmã axte kãm nē hkêt nē. Jakamã nhũm Pirat tee ri omunh pè hamaxpêr o nhỹ.

Pirat kot Jejus pĩr ã àmnênh ã harēnh

Matêwre 27.15-26; Rukre 23.13-25; Juãw 18.39-19.16

⁶ Na pre hte pahi Pirat arĩgro pè Pasja ã Ijaewjaja kãm hprãm xà hkôt mē hagjênh xwỳnhjê ho hpỳnh nē mē kãm ure. ⁷⁻¹⁰ Jakamã nhũm Ijaew kwỳjaja hwỳr mra nē kãm:

—Pa. Kwa xà kot kaj jarãhã mē inhmã mē hagjênh xwỳnhjê hõ mã anhũre nà? Anē.

Hāmri nhũm mē kuma nē hamaxpêr o:

—E paj Jejus ã mē kuma nē kãm inhũre. Mē piitã mē kãm kapēr mar prãm nhũm mēõ patre krãhtũmjaja pix kot mē hkôt kamã gryk nē ã ixwỳr o mrrar anhỹr kênã. Anē.

Hāmri nē mē kãm:

—Tỳ. Nà kot paj mē amã hõm inhũre. Kwa xà kot pa mē amã mē anhõ “pahihti” jarēnhja mã inhũre nà? Anē.

¹¹ Hāmri nhũm patre krãhtũmjaja tee ri kuma nē mē kãm:

—Kwa mē kãm anē kê Parapas mã mãn ure. Anē.

Hāmri nhũm mē kuma nē Pirat mã kãm:

—Nà Jejus mã anhũrer kêt nē. Parapas mã mãn anhũre. Anē.

¹² Hāmri nhũm mē kãm:

—No mē ate mē anhõ pahi hã harēnh xwỳnhhta? Tanhmã kot paj ho? Anē.

¹³ Hāmri nhũm mē àmra kamã kãm hã amỳnê nē kãm:

—Kwa pĩ kahpa hã anhõ kê ty. Anē.

¹⁴ Hāmri nhũm tee ri mē kuma nē mē kãm:

—Tk. Kwa nà. Tanhmã kot amnhĩ tomnuj tore hã kot pa ã hipêx anē.

Anhỹr tã nhũm mē xatã anhĩpê kãm kapēr kãm hihtỳx nē kãm:

—Kwa pĩ kahpa hã mãn anhõ kê ty. Tokyx ã mē inhmã hipêx anē.

Anhỹr o kuhê. Kàx pè kãm anhỹr o kuhê. ¹⁵ Nhũm tee ri mē kuma hāmri nē mē kãm hprãm xà hkôt mē kãm Parapas mã ure. Nē pōristi hkwyjê mã Jejus ã amỳnê nē mē kãm:

—Tôe. Mě mamří hwỳr tē nē htak hāmri nē kapôt ā mẽ hpar xà hã pika hwỳr o tē nē pĩ kahpa hã anhô. Aně.

Mě kot Jejus tak ā mẽ harēnh

Matêwre 27.27-32; Juãw 19.2-3

¹⁶ Tã nhũm pōristijaja akupým ixkreja wỳr Jejus o axà nē amnhĩ wỳr hkwyjê hã karô nhũm mẽ hwỳr agjê nē Jejus ā akuprô. ¹⁷ Hāmri nē kêp pahi hã hpēr o pikēnh kaxyw kãm pahi hã mẽ ahkà nhĩpêx nē hkrãm haxà. Nom axtem nē akunĩ kamã mẽmo mrô nhĩ te kot ronh kanêre pyrak xwỳnhja nhũm mẽ kãm hikãx nē hkrãm haxà. Hāmri nē kêp ê kapa nē pahi hã mẽ ê kamrêk ô py nē kãm haxà. ¹⁸ Hāmri nē kãm:

—E apê Ijaewjê nhô pahi na ka. Aně.

¹⁹ Hāmri nē xatã axpēn pãnhã hwỳr mra nē pĩ ho hkrãx pê htak nē hkuk kuhtô nē hã hpēr o pikēnh pê hã hpijaàm pyrã nē kutã hkôn krã ho hkrĩ. ²⁰ Hāmri nē kêp pahi xê kapa nē akupým kãm ê jaxà nē pĩ kahpa hã nhôr kaxyw ma o kato nē o tē.

²¹ Nom nhũm ra hiroť tỳx nē nhũm mẽ tee ri omu hāmri nē mẽhō kot ho ajuta kaxyw mẽ kot hkôt omunh o mōr xwỳnhjê kapi ho xa. Hāmri nē Sirēn nhô xwỳnh Simãw hkã htykreja pumu. Aresãn mẽ Rupti wa hipêêxà na pre. Nhũm htỳx hamakêtkati nē mẽ kutã krĩm tē. Hāmri nhũm mẽ haê nē unê nē kãm Jejus o ajuta kaxyw hã karô nhũm kãm pĩ kahpaja mỳ nē mẽ hkôt o tē.

Mě kot pĩ kahpa hã Jejus nhôr ā mẽ harēnh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kēn nhĩxêt te kot mẽ hkrã hi pyrãk xwỳnhja wỳr Jejus o pōj. Mě kot kãm “Korkot” anhỹr xwỳnhja wỳr. Mě pakapēr kãm na htem Korkotja jarēnh o: “Mě hkrã hi xà” aně. Jakamã nhũm mẽ ra hwỳr o pōj. ²³ Hāmri nē kot pĩ kahpa hã nhôr kaxyw wĩhti hkwy ho mẽ mẽmo mẽhkanexà pê mĩra ho ahkà. Kot ho kōm nē amnhĩ xà htỳx kãm hamak kêt kaxyw hipêx nē kãm kugō nom nhũm hkaga nē ho hkōm kêt nē. ²⁴⁻²⁶ Hāmri nhũm myt kaxkwa nhĩpōk wỳr tē nhũm mẽ pĩ kahpata ā Jejus xi nē prek o ĩhkra ho htỳx nē hpar o htỳx. Nē hpãnhã kaxyw kakwỳ nē kãnhmã pĩ kahpa jarĩ nē kre kamã âm nē hity hpa. Nhũm Jejus kỳx pê amnhĩ xà htỳx kumrêx kamã hamak o ajêt. Nhũm pōristi hōja tē nē tapti hō py nē hã kagà ho:

IJAEWJÊ NHÔ PAHI NA JA

Hāmri nē Jejus wỳr ho api nē mỳ ri kunhō. Hāmri nhũm hparpê pōristi hkwyja axpēn mã ê hkwy ho hpigrãnh kaxyw hã kēnre ho jōka ho hkrĩ.

²⁷⁻²⁸ Tã nhũm mẽ wa kot amnhĩ tomnuj xwỳnh wa ho axkrut nē mã wa ho aně nē. Nē pĩ kahpa hã prek o wa ĩhkra ho htỳx nē wa hpar o htỳx hāmri nē akutã ho Jejus nhĩjê nhũm wa ajêt.

²⁹ Hāmri nhũm mẽ kot omunh mã mrar xwỳnhjaja Jejus pumu nē hã hpēr o pikēnh punuj nē hkrã ho apê nē kãm:

—Kwa na ka pre ate Tĩrtũm mã amnhĩ jarēnh xà hã ixkre grãnh par nē atã apkati axkrunēpxi nē akupým hipêx par ā amnhĩ jarēnh o apa. Nē axàhpumunh o axàhpumunh ā amnhĩ jarēnh o apa. ³⁰ Jakamã e kwa amnhĩ kapa nē wrỳ pa mẽ ja hã apumu. E kwa tokyx. Aně.

³¹ Nē patre krãhtũmjê mẽ Tĩrtũm kapēr tũm o mẽ ahkre xwỳnhjaja piitã hwỳr mra nē hã hpēr o pikēnh o kuhê. Nē axpēn mã kapēr o:

—E jahti na xep pre mẽ kamã ukapřĩ ho pa nē tanhmã mẽ ho ajuta hto ho pa. Tã tãm tanhmã amnhĩ to nē wrỳk kêt nē. ³² Kwa pu mẽ arĩ pakuhê nē kot amnhĩ kaxàr nē wrỳk kãm omu. Kojã wrỳ pu mẽ omu nē kêp mẽ panhō pahĩhti hã hkôt pajamaxpēr kurê kumrêx. E tokyx wrỳ Jejus pa mẽ awrỳk kãm apumu. Nã kot kaj awrỳk rax nē. Aně.

Hāmri nhũm akutã wa kot hijê nē jêt xwỳnh wa haxwỳja kãm kapēr punuj o ajêt.

Jejus htyk ā harēnh

Matêwre 27.45-46; Rukre 23.44-49; Juãw 19.28-30

³³ Tã nhũm ra kaxkwa nhĩpòk ri myt nhỹr mẽ nhũm te kamàt pyràk. Nhũm kamàt kò rax kumrêx o ra hã awry mẽ nhũm akupỹm myt katêr o mō. ³⁴ Hãmri nhũm Jejus àmra kamã Tĩrtũm mã kapêr nê kãm:

—Inhō Tĩrtũm inhō Tĩrtũm. Kwa mon ka ixkaga? Anê.

Nom kapêr kãm kapêr o:

—Eri Eri rãmã sapatani. Anê.

³⁵ Hãmri nhũm mẽ kot mar o kuhê xwỹnhjaja kot Eri hã harênh ma nê htỹx ho finat Eris mã kapêr ã hkamnhĩx. ³⁶ Hãmri nhũm ja hprôt nê mẽmo rereeti py nê pĩ ho hkanhwỹ nê o tẽ nê ho wĩhti nhek nê Jejus wỹr o tẽ nê kot hkaôr kaxyw kãm kupê. Hãmri nê hkwyjê mã kãm:

—E hãmri pu mẽ jar hkàx ã pakuhê nê Eris jamã mãn. Koja kuma nê hwỹr tẽ nê o wry nã? Anê.

³⁷ Nom nhũm Jejus ra htyk kaxyw nê àmra htỹx nê ty.

³⁸ Hãmri nhũm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nê amnhĩ kahê xà mẽnh kurê kumrêx. Utĩ rax tã kỹj rũm ahpar mã axkjê nê amnhĩ kahê xà mẽ. Te Jejus htyk o mẽ pahte hkôt amnhĩ xunhwỹr xwỹnhjê mã Tĩrtũm wỹr pry jakwa kre kahê xà mẽnh pyràk o ã amnhĩ kaxônh anê. ³⁹ Nhũm pòristi krãhtũmjê hõja Jejus parpê kutã htyk kãm omunh o xa. Hãmri nê tee ri omu nê hamaxpêr o:

—Hêxta waa nê. ãm hãmri na pre hte kêp Tĩrtũm Kra hã amnhĩ jarênh o pa. Tã pa mẽ amarĩ kupĩ. Anê.

⁴⁰⁻⁴¹ Rôm nhũm mẽni kwỹjaja amỹm htyk kãm omunh o kuhê. Na pre htem Garirej kamã Jejus mẽ hkôt mẽ pa ho mẽ pa xwỹnhjê mã mẽ apkur xà hã àpênh o mẽ hkôt pa nê mẽ hkôt Jerujarê hwỹr mō. Marir Matarên nê Xiakre mẽ Jojes wa katorxà Marirja. Nê Sarome. Nê mãänên mẽni hkwyjaja nhũm mẽ amỹm Jejus htyk kãm omunh o kuhê.

Mẽ kot Jejus jaxàr ã harênh

Matêwre 27.57-61; Rukre 23.50-56; Juãw 19.38-42

⁴² Nhũm prem arĩgro pê sêsta hã Jejus pĩ nhũm ra amỹkry htỹx nê. Sap kukamã na pre htem Ijaewjaja amnhĩm apkur xà hã mẽõ nhĩpêx pa nhũm sap kato nhũm mẽmoj to anhỹr kêt nê. ⁴³ Jakamã nhũm Juje hõ pê Arimatej nhõ xwỹnhja. Kêp Ijaewjê nhõ juisti hõ na pre. Nhũm mẽ piitã kãm hkĩnh nê axpên mã mex o mex ã harênh o pa. Na pre Tĩrtũm kot mẽ pahwỹr Jejus mẽnh kôt hamaxpêr o pa. Tã Jejus htyk ã omu hãmri nê hamaxpêr o:

—E pa ma pahi Pirat wỹr tẽ nê Jejus nhĩ hã kuwỹ. Inhmã uma htã kot paj ma hwỹr tẽ nê hã kuwỹ kê inhmã kugō pa ma o tẽ nê tokyx haxà. Kot paj ho anhỹr tokyx anhỹr kêt nhũm mẽ panhō arĩgromnu pê sapja wỹr ra myt axà hãmri pa haxàr kêt nê.

Anhỹr o hamaxpêr nê ma Pirat wỹr tẽ nê hã kuwỹ. ⁴⁴ Hãmri nhũm amnhĩ jaêr pê ra htyk ã harênh ma nê amnhĩ wỹr pòristi krãhtũmjê hõ hã karō nê hã hkukja nê kãm:

—Kwa xà na ra Jejus ty? Anê.

Hãmri nhũm kãm:

—Tỳ na ra ty. Anê.

⁴⁵ Hãmri nhũm kuma nê Juje mã kãm:

—Tôe. Mamrĩ ma o tẽ nê haxà. Anê.

⁴⁶ Hãmri nhũm kuma nê akupỹm Jejus wỹr tẽ nê pòristi mã anê nhũm mẽ kãm ho wry. Nhũm kumỹ nê kupêxê ho hkupu hpa nê o tẽ nê kên kre kakwỹnh kãm haxà. Hãmri nê kên rax o hitom mex nê ma akupỹm krĩm tẽ. ⁴⁷ Nhũm Marir Matarên mẽ Juje katorxà Marir oja wa ma hkôt tẽ nê kot haxàr kãm omunh o xa. Kot mẽ hkuxwa xà ho gregrer kêt rãhã haxàr kãm omu.

16

Jejus akupỹm htĩr ã harênh

Matêwre 28.1-10; Rukre 24.1-12; Juãw 20.1-10

¹⁻² Tã nhũm apkati. Nom nhũm ra mẽ inhō arĩgromnu pê sap kator jakamã nhũm mẽ kormã akupỹm kênkreta wỹr mrar kêt nê. Hãmri arĩgro mex jamãr pê kôkôt o

hkrī. Hāmri nhūm axte apkati nhūm tōmīk nhūm ra mẽ inhō arīgromnu hapêx nhūm Marir Matarēn mẽ Sarome mẽ Xiakre katorxà Marirja mẽ ma akupỹm kēnkreta wỳr mra. Kormã kwỳhtãã. Kormã myt kator o mōr mẽ nhūm mẽ kànhmã hkrī hāmri nē mẽ kot Jejus gregrer kaxyw mẽ hkuxwa xà hkwỳ jamỳ nē ma hwỳr o mra. ³Hāmri nē kormã mōr ri tee ri amnhī kukamã hamaxpēr nē axpēn mã:

—Xê gàà nē. Mēhō koja mẽ pamã nhām kēnkre nē hitom raxta xām pu mẽ Jejus wỳr agjê nē gregrer? Utĩ rax kumrēx kēnã. Anē.

⁴Hāmri nē hwỳr pōj nē omu nhūm ra hitom xàja kàx ã nō nhūm mẽ tee ri omu. Utĩ rax tã ra kàx ã nō. ⁵Hāmri nhūm mẽ kēnkre hwỳr agjê nē upōk rūm mēhō nyw pumu. Nhūm ê jakajre kamã nhỹ nhūm mẽ amnhī jaēr pē omu nē tee ri hamaxpēr. ⁶Hāmri nhūm mẽ kām:

—Kwa mẽ amã ma hkêt nē. Mē ate Najare nhō xwỳnh pē Jejus pumunh kaxyw na ka mẽ mra. Mē kot pĩ kahpa hã nhōr xwỳnhhta. Nom jar amrakati. Na ra Tĩrtūm akupỹm ho htĩr. E mẽ kam nē amnē agjê nē ano ho nōr xà kaprỳ pumu ⁷nē tokyx ma akupỹm mra nē hkôt mẽ pa ho pa xwỳnhjê mã harē. Koja ma Jejus mẽ akukamã akupỹm Garirej wỳr mō. Garirej kamã kot kaj mẽ axte axpēn pumu. Ra kot mẽ amã amnhī jarēnh xà hkôt. Kwa mẽ tokyx ma akupỹm mẽ hwỳr mra. Nē kwa kê Simãw Pētreja harēnh mar mex nē. Anē.

⁸Hāmri nhūm mẽ kuma nē awjanã nē ma akupỹm hprōt. Nē tee ri hamaxpēr nē kām ma xàj htertēt tỳx jakamã kormã nhām mēhō mã harēnh kêt nē.

Jejus kot Marir Matarēn wỳr kator ã harēnh
Juãw 20.11-18

⁹Nhūm semãn nyw mã àr xà hã arīgro pē tōmīkja ã nhūm Jejus akupỹm htĩr. Hāmri nē Marir Matarēn kumrēx wỳr kato. Kot nē mẽkarōmnuti ho ⁷nē nē hanor xwỳnhhta kumrēx wỳr kato. ¹⁰Hāmri nhūm akupỹm htĩr kām omu nē hkĩnh tỳx kumrēx. Nē ma akupỹm tē nē Jejus kràmnhwỳjê mã harē. Nhūm mẽ hkaprĩ nē mỳr o hkrī nhūm mẽ hwỳr axà nē mẽ omu nē mẽ kām:

¹¹—Xê mẽ amỳr kêt nē. Na ra Jejus akupỹm htĩr nē ham ixwỳr kato pa inhno ho omu. Xê mẽ hāmri axte amỳr kêt nē.

Anhỹr tã nom nhūm mẽ htỳx ho amnhī krã hkôt kot ri ã harēnh anhỹr ã hkamnhĩx jakamã kuma nē ãm kuma.

Jejus kot hkwỳjê hwỳr kator ã harēnh
Rukre 24.13-35

¹²Tã nhūm Jejus axte ja wa hwỳr kato. Kôt mẽ pa ho pa xwỳnh wa ho axkrut nē wa hwỳr kato. Na pre wa Jerujarē rūm kato nē akupỹm wa ò krī hwỳr mōr mẽ nhūm wa hwỳr kato. Nom axtem tanhmã amnhī nhĩpêx to nē wa hwỳr kator jakamã nhūm wa tokyx hprĩ hã kēp Jejus ã omunh kêt nē. ¹³Tã kēp Jejus ã omu hāmri nē akupỹm Jerujarē hwỳr mō nē hkwỳjê mã harēnh kurê kumrēx. Nom nhūm mẽ wa kuma nē ãm wa kuma nē akupỹm htĩr kôt hamaxpēr kêt nē.

Jejus kot hkwỳjê mã mẽmoj tã karō hã harēnh
Matêwre 28.18-20; Rukre 24.44-49; Juãw 20.19-23; mããñēn Atre 1.6-8

¹⁴Tã nhūm Jejus tã hkôt mẽ pa ho mẽ pa xwỳnh pē 11 wỳr kato nhūm mẽ kamã no puma nē hkĩnh tỳx nē omunh o kuhê. Hāmri nhūm mẽ kām:

—Kwa hēxta waa nē. Marir Matarēn mẽ akwỳta mẽ kot akupỹm ixtĩr kām ixpumunh nē mẽ amã ijarēnh tã ka mẽ ama nē ãm mẽ ama. Pēr ãm mẽ akrã hihtỳx jakamã na ka mẽ ama nē mẽ hkôt ajamaxpēr kêt nē. Anē.

¹⁵Hāmri nē mẽ kot tanhmã kām amnhī nhĩpêx to ho pa hã mẽ kām karō nē mẽ kām:

—E kêr ka mẽ ma krī piitã hkôt mẽ kām ijarēnh o ri mẽ hkôt apa. Ixte tanhmã mẽ nē amnhī nhĩpêx toja ka mẽ aprĩ hã mẽ kām ijarēnh o ri mẽ hkôt apa. ¹⁶Nē mẽ kot mẽ akapēr mar nē amnhī kaxyw ixkôt hamaxpēr xwỳnhjaja kêr ka mẽ hkrã kumrã nhūm mẽ nhỹrmã Tĩrtūm mẽ wa ixri htĩr tūm nē mex rãhã nē pa ho pa. No mẽ kot amnhī kaxyw

ixkôt hamaxpër kêt xwỳnhjaja koja Tĩrtũm nhỹrmã amnhĩ nê mẽ hano nhũm mẽ ma kuwy hwỳr pa.

¹⁷—Nê amnhĩ kaxyw ixkôt mẽ ajamaxpër xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anê nê inhỹ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapêr mar kêt tã inhỹ hã ho akapêr mex o apa. Mẽ ate mar kêt tã ra ho akapêr nhũm mẽ kot mẽ kapêrta mar xwỳnhjaja hprĩ hã mẽ amar mex nê. ¹⁸Nê kot kaj mẽ nhỹri atỳx kagã xoprê hõ hpyr tã no nhũm tanhmã mẽ ato hkêt nê. Rỳ atỳx mẽmoj to mẽ hpar xà hkwy ho akõm tã no nhũm tanhmã mẽ ato hkêt nê. Nê inhỹ hã mẽ à xwỳnhjê hã mẽ anhĩhkra jaxwỳ nhũm mẽ akupỹm mex. Kot kaj mẽ amnhĩ kaxyw ixkôt mẽ ajamaxpër xwỳnhjaja ã inhỹ hã amnhĩ nhĩpêx anhỹr o ri apa. Anê.

Jejus kot akupỹm kaxkwa hwỳr àpir ã harênh

Rukre 24.50-53; mããnên Atre 1.6-11

¹⁹Tã nhũm mẽ panhõ Pahihti Jejusja hkôt mẽ pa ho mẽ pa xwỳnhjê mã kapêr pa hãmri nhũm Tĩrtũm ma akupỹm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upôk rũm nhỹ. Kot ãhkô hã mẽmoj piitã ho amnhĩptar kaxyw hkrĩ ho hkrĩ. ²⁰Hãmri nhũm hkôt mẽ pa ho pa xwỳnhjaja ma akupỹm àpir kãm omu hãmri nê anhgrà nê ma krĩ piitã hkôt mẽ kãm Tĩrtũm kapêr jarênh o pa nhũm Pahihti Jejus mẽ ãhkô hã pa ho pa. Nhũm mẽ ma ã hã hkwyjê mã aa mẽ kot mẽmoj pumunh kêt kwỳ ho anhỹr o ri mẽ hkôt pa nhũm mẽ ja hã mẽ omu nê axpên mã mẽ harênh o:

—Nà ãm hãmri na mẽ pamã Tĩrtũm kapêr jarênh o pa nê ho hêx kêt nê. ã hã mẽ kot aa mẽ pahte mẽmoj pumunh kêt kwỳ ho anhỹr o pa kênã. Nà ãm hãmri na ã mẽ pamã kapêr jarênh anhỹr o pa. Anê.

Ja kôt na Makre kot Jejus jarênhja hapêx.

Rukre

Rukre tanhmã Jejus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwỳnh na pre. Tã amnhĩ kaxyw Jejus kôt hamaxpêr. Na pre kêp tôtô nê mẽ hkane ho pa. Nê Jejus nhỹ hã kapêr o pa xwỳnhjê hõ pê Pawreja kôt pa ho pa. Tã tanhmã hamaxpêr to nê hkràmnhwỳ Teopre mã kagàja nhĩpêx nê kamã tanhmã Jejus kot amnhĩ nhĩpêx to ho pa hã harê nê hã kagà.

Nê Jejus kêp Tĩrtũm nhỹ hã kapêr o pa xwỳnh ã harê. Nê mẽ pahpyrà nê ì ho ì hã harê. Nê kêp mẽ pakamã ukapĩ xwỳnh ã harê. Nê kêp mẽ pahte amnhĩ tomnuj o hapêx xwỳnh ã harê. ã na pre Rukreja hkràmnhwỳ Teopre mã Jejus jarê nê hã kagà anê. Nê mãnen mẽ pahpiitã mẽ pakaxyw harê nê hã kagà.

Rukre kot Teopre mã amnhĩ jarênh *Atre 1.1-2*

¹ Pa pahi Teopre. Xà amex? E ot pa awỳr kagà nhĩpêx nê awỳr kumê. Ixte amã Jejus jarênh kaxyw. Na prem ra ohtô nê jar mẽ pahkôt Jejus kot amnhĩ nhĩpêx o pa hã kagà rax nê. ² Jejus nhỹ hã Tĩrtũm kapêr jahkre ho mẽ pa xwỳnhjaja na prem Jejus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mẽ inhmã harê nê hã kagà nhũm mẽ ohtô nê mẽ mar xà hkôt mẽ urà nê kot tanhmã amnhĩ nhĩpêx to ho pa hã kagà. ³ Tã pa mẽ harênh ma nê ijamaxpêr o:

—E kot paj ijaxwỳja Jejus kot amnhĩ nhĩpêx kwỳ hã kagà. Nà kot paj ho anê.

Anhỹr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar tỳx nê mẽ kot amã harênh xwỳnhjê hkôt ajamaxpêr tỳx o apa. ãm hãmri na prem mẽ amã harê. E kot paj amã hkwy hã kagà. Ixpê akràmnhwỳ Rukre kot paj ixprĩ hã amã harê nê hã kagà.

Tĩrtũm kapêr o wrỳk xwỳnh kot Juãw Paxis jarênh

⁵ Juãw Paxis nhĩpêxà finat Jakarisja kumrêx kot paj amã harê. Kêp finat Apiasti kanrêhã htàmnhwỳ jakamã urak nê kêp mẽ apê Ijaew nhõ patre na pre. Pahihti Eroxa kormã kot mẽ anhõ pika kamã mẽ ho amnhĩptar ri nhũm Jakaris kêp patre nê pa. Nê hprõ Ijapew mẽ wa kêp Parãw kanrêhã htàmnhwỳ. ⁶ Nê wa hamê na pre Tĩrtũm kôt tãm amnhĩ nhĩpêx o wa pa. ãm Tĩrtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx tỳx nê.

⁸ Jakamã nhũm Jakaris ma mẽ kot Tĩrtũm mã amnhĩ jarênh xà hã ixkre hwỳr tẽ. Kwỳjê pyrà nê kot Tĩrtũm mã tanhmã amnhĩ nhĩpêx to kaxyw ma mẽ hpãnhã hwỳr tẽ nê axà. ⁹⁻¹⁰ Hãmri nê kamã Tĩrtũm mã amnhĩ jarênh pê kãm mẽ hkuxwaxà ho xêt o xa. Nhũm Ijaew kwỳjaja ixkreta wỳr akuprõ nê kapem kutêp Tĩrtũm mã amnhĩ jarênh o kuhê. ¹¹ Pu nhũm kaxkwa rũm Tĩrtũm kapêr o mẽ wrỳk xwỳnhja wrỳ nê Jakaris kutã xa. Mẽ hkuxwa xà ho xêt xà hã mêt kunihti xupôk rũm xa. ¹² Hãmri nhũm amnhĩ jaêr pê amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tĩrtũm ate akra hã hwỳr o apa hã ama nê hã apumu. Jakamã koja tanhmã aprõ hkra xà ho ka kamã akra. Nhũm nõ nê rax nê kato nê myre. Ka wa hã hixi mẽ nhũm kêp Juãw. ¹⁴ Koja kato ka wa omu nê akĩnh tỳx kumrêx. Nhũm akwỳjaja haxwỳja ohtô nê war akra jarênh ma nê war anhỹ hã hkĩnh nê. ¹⁵ Koja kormã akra kator kêt ri nhũm Tĩrtũm Karõja hkarõ hwỳr axà. Hãmri nhũm kato nê gaa nê hprêk nê Tĩrtũm mã tanhmã amnhĩ nhĩpêx to ho pa. Tĩrtũm kãm hprãm xà hkôt pix mã tanhmã amnhĩ nhĩpêx to ho pa. Nom kêr ka inhmar kumrêx. Kê mẽmoj to wĩhti ho hkõm kêt nê pa. Nê kagõxyhti ho hkõm kêt nê pa. ãm kwarĩ ho kwarĩ. ¹⁶ Koja hprêk hãmri nê mẽ apê Ijaew mã Tĩrtũm kapêr jarênh o mẽ hkôt pa. Nhũm mẽ

ohtô nê kuma nê kot amnhĩ tomnuj kaga nê Tĩrtũm kôt amnhĩ xunhwỳ nê hkôt amnhĩ nhĩpêx mex o pa.

¹⁷ —Tĩrtũm kot mẽ awỳr mẽ apytàr xwỳnh maati mẽnh mã xwỳnh kukamã koja mẽ kãm harênh o pa. Te Tĩrtũm nhỹ hã kapêr jarênh xwỳnh finat Eris kot amnhĩ nhĩpêx pyràk o koja amnhĩ nhĩpêx. Nê uràk nê Tĩrtũm Karô nhỹ hã mẽ amã Tĩrtũm kapêr jarênh o mẽ akôt pa. Jakamã nhũm mẽ akwỳjaja kuma hãmri nê amnhĩ tomnuj kaga hpa nê Tĩrtũm kôt pix mã amnhĩ nhĩpêx o pa. Nê tãm mẽ hkrajê nhĩpêx o pa. Kojam mẽ ã akra Juãwja kôt amnhĩ nhĩpêx anê. Jao Tĩrtũm kot mẽ awỳr mẽnh mã xwỳnhhta kutêp tãm amnhĩ nhĩpêx o pa. Anê.

¹⁸ Nhũm pre ã Tĩrtũm kapêr o wrỳk xwỳnh Jakaris mã hkrata jarênh anê. Hãmri nhũm tee ri kuma nê kãm:

—Kwa xà we ãm hãmri na ka ã inhmã ixkra jarênh anê nà? Ra ixprô mẽ wa ijamẽ wa ixpigêx tỳx kênã kot pa kêt wa ixkra. Anê.

¹⁹ Hãmri nhũm kãm:

—Nà ãm hãmri na pa ã amã harênh anê. Ixpê Gapriew na pa ã awỳr ixwrỳk nê Tĩrtũm nhỹ hã amã harênh anê. Ixte Tĩrtũm nhĩkhô hã ixkuhê xwỳnhjê hõ na pa. Tãm na awỳr inhmẽ pa awỳr wrỳ nê ã amã akra jarênh anê. ²⁰ Tã ate ixkôt ajamxpêr kêt jakamã kot kaj axte axumar kêt nê akapêr kêt rãhã nhũm akra kato. Kojam kato ka rĩ kormã akupỹm akapêr nê akupỹm ama. Ate ixkôt ajamxpêr kêt jakamã kot kaj ã amnhĩ nhĩpêx anê nê rĩ amnhĩ pumu. ãm hãmri na pa ã amã ixkapêr anê. Anê.

Nhũm pre ã Tĩrtũm kapêr o wrỳk xwỳnhja Jakaris mã kapêr anê. Jakamã nhũm tokyx ixkre rũm kator kêt nê.

²¹ Hãmri nhũm ixkre kapem mẽ kuhê xwỳnhjaja tee ri kamã ama nê axpên mã:

—Tk. Kwa mo na we ri hitom kãm ho anhỳr kãm unê nê tokyx kator kêt? Anê.

²² Tã nhũm akupỹn mẽ hwỳr kato. Nê tee ri kot mẽ kãm kapêr kaxyw no ãm ìhkra pix o ri mẽ kãm tanhmã ujahkre hto. Hãmri nhũm mẽ amnhĩ jaêr pê kot ã amnhĩ nhĩpêx anhỳr ã omu nê tee ri hkukamã hamaxpêr nê axpên mã:

—Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anê nà? Anê.

²³ Hãmri nhũm Jakaris ixkre kamã mẽmoj tã àpênh pa hãmri nê ma akupỹm òrkwỹ hwỳr tẽ.

²⁴⁻²⁵ Tã nhũm hprô Ijapewja htujarô. Hãmri nê amnhĩ tujarô hã amnhĩ pumu nê hkĩnh tỳx nê. Nê hamaxpêr o:

—Hêxta gàu nê. Ma ãm hãmri na pa pre ixkra hkêt nê amnhĩ kamã ixpijaàm o ri ixpa. Tã ra ixtujarô. Kot paj wa axte ri amnhĩ kamã ixpijaàm kêt nê. Ma ãm hãmri na Tĩrtũm ã wa inhĩpêx anê. Na pa wa ixkĩnh tỳx kumrêx. Anê.

Nhũm pre ã hamaxpêr anê hãmri nê arĩ òrkwỹ kamã hkrĩ ho hkrĩ. Aa nhỹhỹm kator nê mõi kêt rãhã hã mytwrỳ kêp 5.

Tĩrtũm kapêr o wrỳk xwỳnh kot Marir mã hkra jarênh

Matêwre 1.18-21

²⁶ Tã nhũm Ijapew ra htujarô hã mytwrỳ kêp 6 nhũm Tĩrtũm axte kapêr o wrỳk xwỳnh pê Gapriewja mẽ. Nhỹri Garirej kamã krĩ pê Najare hwỳr kumẽ nhũm ma hwỳr wrỳ.

²⁷ Mẽhõ pê Marir wỳr wrỳ. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrà nê kêp pahi finat Tawi kanrêhã htãmnhwỳ na pre.

²⁸ Jakamã nhũm Gapriew Marir wỳr wrỳ nê kãm:

—Pa Marir? E ot pa amã Tĩrtũm kapêr jarênh kaxyw awỳr wrỳ. Kot akôt pa ho pa jakamã koja ato mex rax kumrêx. Anê.

²⁹ Hãmri nhũm amnhĩ tã kuma nê tee ri hamaxpêr nê hamaxpêr o:

—Xê mẽmo na we ri ã inhmã kapêr anê? Tanhmã koja we Tĩrtũmja ixto mex rax to? Anê.

³⁰ Hãmri nhũm Gapriew kãm:

—Kwa tee ri amnhĩ kukamã ajamaxpër kêt nê. Tĩrtũm kãm ajapêê. ³¹ Kot kaj atujarô nhũm akra kato nê myre. Ka hã hixi mẽ nhũm kêp Jejus. ³²⁻³³ Koja Tĩrtũm amã ho mex rax nê. Nê koja mẽ piitã mẽ kãm kêp amnhĩ Kra hã ho amnhĩrit. Nê mẽ apê Ijaew o amnhĩptâr kaxyw koja mẽ akaxyw ãm nhũm higêt pahi Tawi pyrã nê mẽ ato amnhĩptâr o pa. Mẽ ate amnhĩ wỳr kamã ajamak o apa xwỳnhta koja. Tĩrtũm kãm hprãm xà hkôt koja mẽ ato amnhĩptâr rãhã ho pa. Anê.

³⁴ Nhũm pre ã kãm kapër anê nhũm amnhĩ tã kuma nê tee ri amnhĩ kukamã hamaxpër hãmri nê kãm:

—Xê gàu nê. Tanhmã kot pa kêt we amnhĩ to nê ixtujarô? Kormã ixkukrit nê mo kormã inhmjên? Mê. Xà Juje kot ixkamã hkra hkukamã na ka ã ri inhmã axujarênh anê? Anê.

³⁵ Hãmri nhũm kãm:

—Nà koja Tĩrtũm Karõ tãm tanhmã ato ka ã hã tanhmã amnhĩ to hkêt tã atujarô. Jakamã koja akra kêp Tĩrtũm Kraa. ³⁶⁻³⁷ Na ra haxwỳja anã Ijapewja htujarô. Ra hpigêx tỳx nê aa hkra hkêt nhũm hkwỳjaja kot axpên mã ôhy kamã hkra hkêt kumrêx ã harênh o pa htã ra htujarô. Tĩrtũm kot tanhmã mẽ ho nhũm mẽ htujarô tanhmã kêp kute hkêt. Jakamã nhũm tanhmã ho nhũm mjên tãm htu nhũm ra htujarô hã mytwrỳ kêp 6. Tĩrtũm tãm kot mẽmoj piitã tanhmã ho kaxyw àhpumunh xihtỳx. Jakamã koja urak nê mã ato anê nê ka kormã akukrit tã atujarô. Anê.

³⁸ Nhũm pre ã Gapriew Marir mã kapër anê nhũm amnhĩ tã kuma nê kãm:

—Ko. Kê mãmri kãm tanhmã ixto hprãm xà hkôt mãmri tanhmã inhĩpêx to. Inhmã Tĩrtũm kapër kôt amnhĩ nhĩpêx prãm. Kê mãmri kãm tanhmã ixto hprãm xà hkôt tanhmã inhĩpêx to.

Anê nhũm kuma nê ma akupỳm api.

Marir kot Ijapew wỳr mõi ã harênh

Rukre 11.27

³⁹⁻⁴⁰ Tã nhũm Marir amnhĩ tujarô hã amnhĩ pumu nê nã Ijapew wỳr hkrã kurê kumrêx. Hãmri nê nojarêt nê õ krĩ rũm kato nê ma hwỳr mõi. Ma Ijapew papxã hwỳr mõi. Ijapew nhõ krĩa pika pê Jutej kamã nhỹri hixêt kamã na pre. Nhũm ma hwỳr mõi hãmri nê hwỳr põi nê Ijapew wỳr axã nê omu nê kãm:

—Ka? Xà wa amex? Anê.

⁴¹ Hãmri nhũm kuma nê kãm:

—Ï ma wa inhmex na pa wa ixpa.

Anhỹrja kôt nhũm ôhy kamã hkraja haxwỳja te kot Marir kapër mar nê amnhĩ nhĩpêx pyrãk o htu kamã àxônhtỳx o nõ. Hãmri nhũm Ijapew Tĩrtũm Karõ nhỹ hã tanhmã Marir mã kapër to. ⁴² Kax pê kãm kapër nê kãm:

—Xê gàu nê. Ra Tĩrtũm kot ato mex jakamã na ka akĩnh rax o mẽ inhni hkwỳjê jakrenh pa. Anhõhy kamã akraja koja Tĩrtũm amã ho mex rax nê. ⁴³ Xê mon ka ã ixto mex nê ixwỳr amõi anê? Apê inhõ Pahihti katorxã htã ixto mex nê ã ixwỳr amõi anê. Hêxta gàu nê. ãm hãmri na ka ixwỳr mõi Marir. ⁴⁴ Na ka ixwỳr mõi põi nê inhmã akapër hãmri nhũm ixto kamã ixkrare akapër ma nê hkĩnh xài ixto kamã ixkamnãr tỳx o nõ. ⁴⁵ Na ka pre Tĩrtũm kapër o wryk xwỳnh kot amã kapërja ma nê hkôt ajamaxpêr tỳx nê. Jakamã kot kaj Tĩrtũm nhỹ hã akĩnh nê ajamakêtkati nê amex nê ri apa. Anê.

Marir kot Tĩrtũm mã mex o mex ã grer ã harênh

Rukre 6.20-26

⁴⁶ Hãmri nhũm Marir Ijapew kot ã kãm kapër anhỹrja ma nê kãm Tĩrtũm mex o mex ã gre nê grer o:

Tĩrtũm na mex o mex.

⁴⁷ Kêp ixkaprĩ xwỳnh na.

Kêp ixkaprĩ xwỳnh jakamã na pa inhmex nê ixkĩnh nê ri ixpa.

⁴⁸⁻⁴⁹ Ixte amnhĩ to grire nhũm ja hã ixpumu nê ixkamã ukaprĩ nê ixto mex rax kumrêx.

Jakamã koja mẽ piitã axpên kanrêhã axpên mã ijarênh rãhã ho pa. Tĩrtũm kot tanhmã ixto mex to hã ijarênh rãhã ho pa.

Tirtūm na mex o mex nē hihtỳx o hihtỳx. Tã na ã inhĩpêx anē.

⁵⁰ Ma na hte ã amnhĩ nhĩpêx anē nē axpên kanrêhã mẽ kot hã hpijaàm xwỳnhjê pumu nē mẽ kutã nojarêr rãhã ho pa.

Nē mẽ kamã ukapřĩ rãhã ho pa.
ã na hte mẽ hipêx mex anhỹr o pa.

⁵¹ Nē hihtỳx o hihtỳx jakamã na hte mẽ kot amnhĩ to jarkrar o ri mẽ pa xwỳnhjaja tanhmã mẽ ho nhũm mẽ axkaprã.

⁵² Nē pahihiti hkwȳ kot kapêr mar nē ãm mar xwỳnhjaja.

Na hte amnhĩ tã mẽ omu nē mẽ ãpênh nê mẽ hapôj nē mẽ hpãnhã mẽ kot amnhĩ to hkryre xwỳnh kwỳ jagjê.

⁵³ Na hte mẽ kãm kapêr kôt amnhĩ nhĩpêx prãm xwỳnhjê ho mex o pa nhũm mẽ mex nē pa.

No mẽ kãm hprãm kêt xwỳnhjaja nhũm tanhmã mẽ ho mex to hkêt nē.

⁵⁴⁻⁵⁵ ãm hãmri na pre amnepê mã mẽ panhĩgêt mã amnhĩ jarênh xà hkôt mẽ pahpê Apraãw rũm axpên kanrêhã hkrajaja mẽ pahto mex o pa.

Mẽ pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xaj mẽ pahto mex rãhã ho pa.

Nē mẽ pakamã ukapřĩ rãhã ho pa. Anē.

Nhũm pre ã Marir Ijapew mã Tirtūm mex o mex ã grer anē. ⁵⁶ Hãmri nē ri hkôt pa hã mytwrỳ axkrunêpxi nē ma akupỳm õ krĩ hwỳr mō.

Juãw Paxis kator ã harênh

⁵⁷ Tã nhũm Ijapew hpijagri kaxyw õhy xà nhũm hkrare kato nē myre. ⁵⁸ Hãmri nhũm omu nē hkĩnh tỳx nē. Hãmri nhũm hkwȳjaja Tirtūm kot wa kamã ukapřĩ hã wa kãm wa hkra myre nhõr ã harênh ma nē wa ã hã hkĩnh nē.

⁵⁹ Tã nhũm wa hkraja ra hã arĩgro pê 8 nhũm mẽ hkwȳjaja kot my kwỳt kà krãhyr kaxyw hwỳr akuprõ. Tirtūm kot mẽ kãm hã karõ xà hkôt nhũm mẽ kot kãm õr ã amnhĩ to amnhĩrit kaxyw ã hipêx anhỹr kaxyw. Na htem ã mẽ kêp Ijaew krajê piitã mẽ hipêx anē. Jakamã nhũm prem ã hipêx anē hãmri nē hpãnhã tanhmã kot hã hixi mênh to kaxyw ri hã axpên kukja. Hãmri nē hipêxà hkôt kot hã Jakaris mênh kaxyw. ⁶⁰ Hãmri nhũm katorxà tee ri axpên tã mẽ kuma nē mẽ kãm:

—Ma koja kêp Jakaris kêt nē. Koja kêp Juãw. Anē.

⁶¹ Hãmri nhũm mẽ tee ri kuma nē kãm:

—Kokỹ. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rênh anē. Anē.

⁶² Hãmri nē hixi hã hipêxà kukja. Nom nhũm arĩ umar kêt nē kapêr kêt jakamã nhũm mẽ tanhmã ri kãm mẽ ãhkra nhĩpêx to. ⁶³ Hãmri nhũm ãhkra ho kagã hã ahwỳ nhũm mẽ kãm ja gõ nhũm kupy nē hã mẽ kãm hixi nhĩpêx. Nhũm mẽ kupy nē omu hãmri nē hixi pê Juãw kôt omu. Hãmri nē tee ri hixija kukamã hamaxpêr. ⁶⁴ Rôm nhũm Jakaris akupỳm ama nē kapêr mex kurê kumrêx nē Tirtūm mã mex o mex ã harênh o xa. ⁶⁵⁻⁶⁶ Hãmri nhũm mẽ omu nē ma mẽ piitã mẽ kãm wa hkra jarênh o ri axpên kôt hprõt. Pika pê Jutej kamã hixêt kape hã krĩ hkôt nhũm mẽ ri mẽ piitã mẽ kãm harênh o hprõt. Tirtūm kot wa hkra kôt tãnopxar o pa nē ho mex ã harênh o hprõt. Hãmri nhũm mẽ kuma nē tee ri hkukamã hamaxpêr nē axpên mã:

—Hêxta waa nē. Tirtūm tãm na xep hte jare hkôt ri pa ho pa. Jakamã koja nhỹrmã hprêk hãmri nē tanhmã koja we amnhĩ nhĩpêx to ho pa wehee? Anē.

Jakaris kot Tirtūm nhỹ hã kapêr ã harênh

⁶⁷ Hãmri nhũm Jakaris Tirtūm Karõ nhỹ hã Tirtūm mex o mex ã harênh o xa. Tirtūm kot mẽ kêp Ijaew o mex ã harê nē mẽ kãm:

⁶⁸ Hêxta waa nē. Nà Tirtūmjaja mex o mex. Na pre hte mẽ pahpãmjaja ãm hkôt pix mã amnhĩ nhĩpêx o pa. Jakamã nhũm hte Tirtūm mẽ pahpê hkrajê kamã ukapřĩ nē mẽ pahto mex o pa.

E kwa pu mẽ kãm mex o mex ã harênh rãhã nē.

⁶⁹ Ra kot mẽ pahwỳr mẽ pahkaprĩ xwỳnh pẽ mẽ panhõ pahihti mẽnh mã. Ja kaxyw àhpumunh xihtỳx o hihtỳx jakamã na pre ra mẽ pahwỳr mẽnh ã amnhĩ jarẽ. Koja kệp amnepêm Tĩrtũm mã tanhmã amnhĩ nhĩpêx to ho pa xwỳnh Tawija hkanrêhã htàmnhwỳ.

⁷⁰ Amnepêm Tĩrtũm nhỹ hã kapêr xwỳnhjaja na prem mẽ kãm Tĩrtũm kapêr jarênh o pa nẽ mẽ kãm:

⁷¹ “Koja Tĩrtũm mẽ panê mẽ kãm mẽ pahkurê xwỳnhjê pumunh mex o pa.” Anẽ.

⁷² Tĩrtũm ra kot mẽ pahpãmjê mã amnhĩ jarênh xà hkôt kãm mẽ pakamã ukaprĩ rãhã ho pa hprãm.

Koja aa ja ho anhỳr o hamakêtkati hkêt nẽ.

⁷³⁻⁷⁵ Na pre ra mẽ pahpãm Apraãw mã mẽ pakukamã ã mẽ pahtã amnhĩ jarênh anẽ nẽ kãm: “Kot paj mẽ anê mẽ kãm mẽ akurê xwỳnhjê pumunh mex nẽ mẽ ìhkra nẽ mẽ ato ixkato. Jakamã kot kaj mẽ amnhĩ kamã amã mẽ uma hkêt nẽ axàmnhĩx ri ajamakêtkati nẽ mẽ kamã apa. Nẽ kot kaj mẽ mãmri axàmnhĩx ri inhmã tanhmã amnhĩ nhĩpêx to ho ri apa rãhã nẽ. Nẽ ixkôt amnhĩ nhĩpêx o ri apa rãhã ty.” Anhỳr o na pre Tĩrtũm mẽ pakukamã mẽ pahtã amnhĩ jarẽ. Anẽ.

Nhũm pre ã Jakaris mẽ kãm Tĩrtũm kapêr jarênh anẽ. Hãmri nẽ hkrareja mỳ nẽ o xa nẽ kãm:

⁷⁶ —No ka Xugitre. Kot kaj aprêk hãmri nẽ apê Tĩrtũm maati nhỹ hã kapêr jarênh o apa xwỳnh. Jakamã kot kaj Pahihti hkukamã mẽ piitã mẽ kãm harênh o ri mẽ hkôt apa. Mẽ kot amar nẽ kutêp tãm amnhĩ nhĩpêx kaxyw.

⁷⁷ —Tĩrtũm kot mẽ nẽ mẽ kot amnhĩ tomnuj rênh nẽ mẽ ho hkra hã harênhja kot kaj mẽ hkôt mẽ kãm harênh o ri apa.

⁷⁸ —Na hte Tĩrtũm mẽ pakamã ukaprĩ ho pa nẽ mẽ pakamã gryk tokyx anhỳr kêt nẽ. Jakamã koja mẽ pahwỳr mẽ pahkaprĩ xwỳnhja mẽ. Kormã mẽ pahwỳr wrỳk kêt jakamã te mẽ pahte kamàt kô kamã tee ri mẽ paxàhkupênh o ri papa xwỳnh pyræk.

—Nom koja mẽ pahwỳr wrỳkja o te ra myt kator nẽ mẽ pamã hirã nẽ mẽmoj to amnhĩrit mex pyræk o mẽ panhĩpêx. Ja kaxyw koja Tĩrtũm mẽ pahwỳr mẽ pahkaprĩ xwỳnhhta mẽ nhũm man mẽ pahwỳr wrỳ nẽ mẽ pamã mẽ pahtyk pyma xwỳnhjê mã Tĩrtũm kapêr o amnhĩrit o pa. Mẽ pahte mar nẽ ra pajamakêtkati nẽ paxàmnhĩx ri papa nẽ pahtyk kaxyw.

⁷⁹ —Mẽ kãm mẽ htyk pyma xwỳnhjaja te kamàt kô kamã ri pa pyræk. Tã koja mẽ pahkaprĩ xwỳnhja wrỳ hãmri nẽ tanhmã mẽ hkrã hto nhũm mẽ te arĩgro hã ri mẽ pa xwỳnh kot amnhĩ nhĩpêx pyræk o amnhĩ nhĩpêx. Jao hamakêtkati nẽ axte kãm htyk pyma hkêt nẽ ri pa. Anẽ.

Nhũm pre ã Jakaris Tĩrtũm Karõ nhỹ hã hkrare mã kapêr anẽ.

⁸⁰ Tã nhũm Juãwja gaa nẽ aptàr. Nẽ Tĩrtũm kôt amnhĩ nhĩpêx o pa. Nom kormã kot Ijaew jahkre ho pa hkêt ri kapôt ã ri mẽ puhã pa.

Ã na pre Juãw kator nẽ amnhĩ nhĩpêx anhỳr o pa anẽ. Na pre kato nẽ hã mytwrỳ grêre hãmri nhũm Jejusja hkôt kato.

2

Jejus kator ã harênh

Matêwre 1.18-25

¹⁻² Na pre ã Jejus kator anẽ. Nhũm pre Rõm nhõ xwỳnhjê nhõ pahi Sesti Akusja õ pika piitã hkôt mẽ ho kôta kaxyw. Aa kot mẽ ho kôta hkêt tã ra kot mẽ ho kôta kaxyw. Kormã pahi Sirên haxwỳja kot pika pẽ Sir kamã mẽ ho amnhĩptàr ri nhũm pahi Sesti Akus kot mẽ ho kôta kaxyw. Jakamã kãm àpênh xwỳnhjê mã kapêr nẽ mẽ kãm:

—E kêt ka mẽ ho kôta kaxyw nẽ mẽ piitã mẽ hixi hã kagà hpa. Anẽ.

³ Hãmri nhũm mẽ piitã ã kot mẽ hipêx anhỳr ã amnhĩ tã harênh ma hãmri nẽ mẽ kot mẽ hixi hã kagà kaxyw piitã akupỳm papxà hwỳr ma hapêx. ⁴ Nhũm pre Marir mjên Juje haxwỳja ma krĩ pẽ Perěj wỳr mō. Garirej kamã õ krĩ pẽ Najare rùm kato nẽ ma hwỳr

mõ. Pika pê Jutej kamã na Perējja. Kamã na pre Juje nhîgêt Tawija kato. ⁵ Nhũm Juje kêp kanrêhã htãmnhwỳ jakamã na pre ma akupỹm hwỳr mẽ hkwyjê hkôt mõ. Nẽ ma amnhĩ kôt kot ho hprõ mã xwỳnh Marir o mõ. Arĩ htujarô rax rãhã nhũm ma amnhĩ kôt o mõ. ⁶ Nhũm wa mõõ hãmri nẽ hwỳr pøj. Nhũm Marir hpijagri xà hã mytwrỳ mã àr jakamã nhũm kamàt nhũm õhy xà. ⁷ Nom nhũm Perěj wỳr mẽ hpõx nyw xwỳnhjaja ra ixkre piitã ho nỳt pa nhũm wa tee ri hpijagri kaxyw amnhĩ to ukapi ho pa. Hãmri nẽ nhỹri moux nhõrkwỹ punajre hwỳr axà nhũm Marir kamã hpijagri. Nhũm hkra kato nẽ myre. Kra kot wa na pre. Hãmri nhũm kumỳ nẽ kupêxê ho hkupu hpa nẽ moux xàpkur xà hã kôsti kaprỳ kamã kuxi nhũm hamakêtkati nẽ gõr nẽ nõ.

ôwêhti jamãr xwỳnhjê jarênh

⁸ Rôm nhũm ôwêhti jamãr o mẽ pa xwỳnhjaja kapôt ã ri hkrit ôwêhti jamãr o pa. Nhũm ra kamàt nhũm mẽ hamãr o hkrĩ. ⁹ Pu nhũm kaxkwa rũm Tĩrtũm kapêr o wrỳk xwỳnhja wrỳ nẽ mẽ myri ajêt. Hãmri nẽ tanhmã amnhĩ to nẽ mẽ hpuhã ho hirã rax kumrêx. Nom nhũm Tĩrtũm tãm ã mẽ hipêx anê. Hãmri nhũm mẽ tee ri jawỳ Tĩrtũm kapêr o wrỳk xwỳnhja pumu nẽ kãm ma htỳx nẽ akryk omunh o hkrĩ. ¹⁰ Hãmri nhũm mẽ kãm:

—Pa? Kwa mẽ amã ixpyma hkêt nẽ. Ixte mẽ amã mẽmoj mex jarênh kaxyw na pa mẽ awỳr wrỳ. Kot kaj mẽ harênh ma nẽ akĩnh nẽ. Nom mẽ kapxipixjaja kaj mẽ akĩnh kêt nẽ. Koja mẽ piitã ja jarênh ma nẽ mẽ apyrà nẽ hkĩnh nẽ pa. ¹¹ Na ra ham mẽ akamã ukapri xwỳnhhta kato. Pahi Tawi nhõ krĩ mẽ mẽ anhõ krĩ pê Perěj kamã. Kêp mẽ apiitã mẽ anhõ pahihti na. Mẽ ate amnhĩ wỳr kamã ajamak o apa xwỳnh pê Kris na. Tãm na ham kato. ¹² E pa ixpri hã mẽ amã tanhmã harênh to ka mẽ inhma. Na kato nhũm katorxà kupêxê ho kupu hpa nẽ kôsti kamã kuxi nhũm nõ. Kwa mẽ tokyx ma hwỳr mra nẽ kêp mẽ anhõ pahihti hã omu. Anê.

¹³ Nhũm pre ã mẽ kãm ujarênh anê. Hãmri nhũm hkwyjaja wamta kôt ohtô nẽ mẽ hwỳr wrỳ nẽ puhã harir. Hãmri nẽ Tĩrtũm mã mex o mex ã grer o harir. ¹⁴ Nẽ hã grer o: Tĩrtũm maati na mex o mex.

Jakamã mẽ kãm hprãm xà kôt pix mã amnhĩ nhĩpêx o mẽ pa xwỳnhjaja koja amnhĩ tã mẽ omu nẽ tanhmã mẽ ho nhũm mẽ hamakêtkati nẽ àmnhĩx hkĩnh nẽ pa ho pa.

¹⁵ Anhỹr o grer o harir hãmri nẽ ma akupỹm kaxkwa hwỳr àpir pa nẽ akunok. Hãmri nhũm ôwêhti jamãr xwỳnhjaja mẽ kapêr ma nẽ ma akupỹm àpir ã mẽ omu nẽ axpên mã:

—E tokyx pu mẽ krĩm nẽ Tĩrtũm kot mẽ pamã ho amnhĩrit xwỳnhhta japêr nẽ tokyx nhỹri omu. Kwa ma pu mẽ tokyx hwỳr nẽ omu. Anê.

¹⁶ Hãmri nhũm mẽ ma hwỳr mra. Hãmri nẽ krĩm agjê nẽ moux nhõrkwỹ wỳr agjê nẽ mẽ hkrareta pumu. Nhũm kôsti kamã nõ nhũm mẽ omu nẽ kuri Marir mẽ Juje wa omu.

¹⁷ Hãmri nẽ akupỹm hapøj nẽ ma mẽ piitã mẽ hkôt ri mẽ kãm harênh o pa. Ra Tĩrtũm kapêr o wrỳk xwỳnh kot mẽ kãm harênh xàja kôt nhũm mẽ ma mẽ kãm harênh o ri mẽ hkôt pa. ¹⁸ Nhũm mẽ amnhĩ jaêr pê mẽ kot harênh ma nẽ tee ri hkukamã hamaxpêr. ¹⁹ Nom nhũm Marir mẽ kot kãm hkrax rũm tanhmã hkra jarênh to xàta kukamã pix mã hamaxpêr rãhã ho pa.

²⁰ Jakamã nhũm ôwêhti jamãr xwỳnhjaja ma akupỹm hkrit wỳr mra. Tĩrtũm kapêr o wrỳk xwỳnh ra kot mẽ kãm ujarênh xà hkôt nhũm mẽ kot Jesus pumunh jakamã ma akupỹm hkĩnh nẽ Tĩrtũm mã mex o mex ã harênh pê hã grer o akupỹm mra.

Mẽ kot Jesus ã hixi mẽnh ã harênh

Matêwre 1.21; Rukre 1.31

²¹ Tã nhũm wa hkrareta ra hã arĩgro pê 8 nhũm mẽ hwỳr akuprõ nẽ kãm my kwrỳt kà krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tĩrtũm mã õr ã mẽ omunh kaxyw. Jakamã nhũm mẽ kãm ho anê nẽ hpãnhã hã hixi mẽ. Marir kormã kot ho htujarô hkêt ri Tĩrtũm kapêr o wrỳk xwỳnh kot hkukamã kãm hixi jarênh xàja kôt nhũm mẽ hã hixi mẽ nhũm hixi kêp Jesus.

Mẽ kot Tĩrtũm mã Jesus nhõr pyræk o hipêx

²²⁻²⁴ Tã nhũm Marir hpijagri ho hapêx. Jakamã nhũm Juje ma krĩ pê Jerujarê hwÿr mẽ kot Tirtũm mã amnhĩ jarênh xà hã ixkre hwÿr amnhĩ kôt o mỗ. Na pre ra finat Mojes amnepêm Tirtũm nhỹ hã mẽ hkukamã mẽ hpãmjê mã ja hã karõ. Nẽ mẽ kãm hã karõ ho: Koja mẽ aprõ hpijagri. Hãmri nẽ hpijagri ho hapêx ka mẽ ma Tirtũm mã amnhĩ jarênh xà hã ixkre hwÿr o mra nẽ hpãnhã Tirtũm mã mẽmoj gõ. Kãm tutre ho gõ rỹ kãm tuuti hõ ho axkrut nẽ agõ kê patre hamỳ nẽ kãm kupa. Kot ja hã omunh nẽ hpijagri xwÿnhhta akupÿm mex ã harênh kaxyw.

Anhÿr o kot mẽ kãm ja hã karõ jakamã nhũm wa ma ã amnhĩ nhĩpêx anhÿr kaxyw hwÿr mỗ. Nẽ amnhĩ kôt Jejus mỳ nẽ o mỗ. Tirtũm kot mẽ kãm ja hã karõ nhũm mẽ kot hã kaga xà hkôt. Na pre ra finat Mojes mẽ kãm ja jarê nẽ mẽ kãm:

Kot kaj mẽ akra my kot wa hãmri nẽ te mẽ ate Tirtũm mã õr kaxyw hipêx pyrãk o hipêx.

Kê tãm amnhĩ nhĩpêx o pa nẽ ÿ hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarê hwÿr nojarêt nẽ amnhĩ kôt Jejus mỳ nẽ ma amnhĩ kôt o mỗ.

Simeãw kot Jejus kukamã harênh

²⁵⁻²⁶ Rõm nhũm Jerujarê kamã Simeãwja. Tirtũm Karõ nhỹ hã kot tanhmã amnhĩ to mex to ho pa xwÿnh na pre. Na pre hte Tirtũm kapêr kôt pix mã tãm amnhĩ nhĩpêx o pa. Jakamã nhũm pre ra Tirtũm Karõ ã kãm kapêr anẽ nẽ kãm:

—E inhma Simeãw. Kot kaj atĩr rãhã nhÿrmã Tirtũm kot mẽ akaxyw ãm mã xwÿnhja ka ano ho omu nẽ rĩ kormã ty.

Anhÿr o kãm kapêr jakamã nhũm kuma nẽ hkĩnh nẽ ãm pix kamã hamak o pa. Mẽ kêp Ijaew wÿr wrÿk nẽ mẽ ho mex mã xwÿnhhta pix kamã hamak rãhã ho pa. ²⁷ Jakamã nhũm Jejus katorxà mẽ hipêxà purota wa Tirtũm mã amnhĩ jarênh xà hã ixkreja wÿr Jejus o axà nẽ kormã o xa. Finat Mojes kot mẽ kãm hã karõ xà hkôt. Hãmri nhũm Tirtũm Karõ mẽ hwÿr Simeãwja mẽ nhũm ma mẽ hwÿr tẽ nẽ axà. ²⁸ Hãmri nẽ wa hkrata pumu nẽ hkĩnh tÿx nẽ. Hãmri nẽ wa kêp kumỳ nẽ o xa nẽ hã Tirtũm mã mex o mex ã harê nẽ kãm: ²⁹⁻³² Pa Pahi Maati. E ot pa ixte amã tanhmã amnhĩ nhĩpêx to ho ixpa xwÿnh ã amnhĩ jarê.

Nà ãm hãmri na ka pre ã inhmã jare hkukamã harênh anẽ. Tã ate inhmã harênh xà hkôt pa ra inhno ho omu. Kêp mẽ ixkamã ukaprĩ xwÿnh ã omu. Nẽ kêp ate mẽ ixwÿr mẽnh xwÿnh ã omu.

Nà koja te arĩgro hã myt hirã nẽ mẽmoj piitã ho amnhĩrit mex pyrãk o koja mẽ inhĩpêx o pa. Jakamã koja hprêk hãmri nẽ ma Ijaew kêt xwÿnhjê mã apê Tirtũm ã akapêr o amnhĩrit o pa nhũm mẽhprĩ hã ajarênh ma. Nẽ mẽ ixpê Ijaew kot paj mẽ ijaxwÿja kuma nẽ hã ixpijaam o ri ixpa.

Jakamã kot paj ixãmnhĩx ri tanhmã amnhĩ nhĩpêx to ho ri ixpa nẽ ixãmnhĩx ty. Ra ixte inhno ho ate inhmã harênh xwÿnhhta pumunh kênã. Anẽ.

³³ Nhũm pre ã Simeãw Jejus jarênh anẽ. Nhũm katorxà mẽ hipêxà purota wa amnhĩ jaêr pê kot ã harênh anhÿrja mar o xa. ³⁴⁻³⁵ Hãmri nhũm Simeãw wa ho Tirtũm wÿ nẽ kãm:

—E Tirtũm. Kêr ka ja wa ho mex nẽ. Wa ho mex o wa ho mex rãhã ho apa. Anẽ.

Hãmri nẽ Marir mã kapêr nẽ kãm:

—Nà ãm hãmri na pre Tirtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nẽ ma Tirtũm kapêr o mẽ piitã mẽ ahkre ho ri mẽ hkôt pa. Nhũm mẽ kuma hãmri nẽ ahpÿnhã tanhmã hamaxpêr to xà hkôt tanhmã hipêx to. Jakamã nhũm mẽ hkwyjaja kuma nẽ hkôt amnhĩ xunhwÿ nẽ hkôt amnhĩ nhĩpêx o pa. Jao tãm hipêx o pa. No nhũm mẽ hkwyjaja kuma nẽ axtem nẽ kãm hkĩnh kêt nẽ. Hãmri nẽ tanhmã hipêx to. Jakamã kot kaj tee ri ja hã mẽ omu nẽ akaprĩ htÿx nẽ. Te mẽ kot wapo ho akanhwÿr nẽ akamã ho kaxkep nhũm apê omnuj tÿx pyrãk o kot kaj amnhĩ kamã ama nẽ mẽ omu. Anẽ.

ãnti kot Jejus pumunh ã harênh
Wam Ximotre 5.5

³⁶⁻³⁸ Rôm nhũm mēhō ni pē āntija mē hwỳr axà nē Jejus pumu. Āntija Panuew kra na pre. Nē Ase hkwỳ na pre. Ni htā kēp Tĩrtũm nhỹ hā kapēr jarēnh o pa xwỳnh. Na pre ra mjēn no ām kormā mjēn nē pa hā amgrà pē 7 pix nhũm pre kēp ty. Hāmri nhũm axte mjēn kēt nē pa rāhā ra hpigēx tỳx nē. Ra hā amgrà pē 84. Na pre hte Tĩrtũm mā amnhĩ jarēnh xà hā ixkre hwỳr pa nē kām amnhĩ jarēnh rāhā ho pa. Nē kot kām amnhĩ jarēnh kaxyw nē apkur kēt rāhā kām amnhĩ jarē. Nē arĩgro hā hwỳr pa nē kamàt kām hwỳr pa. Ā na pre hte amnhĩ nhĩpēx anhỹr rāhā ho pa anē. Jakamā mē hwỳr axà nē Jejus pumu nē hkĩnh nē. Hāmri nē hā Tĩrtũm mā mex o mex ā harē nē kām:

—Hēxta gàa nē Tĩrtũm. Ām hāmri na ka mē ixwỳr Jejus mē. Ma amex o amex. Anē.

Hāmri nē Ijaew kot amnhĩ wỳr mē kamā ukapřĩ xwỳnh kamā hamak xwỳnhjē mā ra Jejus kator ā harēnh o ri mē hkōt pa.

Marir mē Juje wa kot akupỹm Najare hwỳr mōr ā wa harēnh

Matēwre 2.19-23

³⁹ Tā nhũm Marir mē Juje wa Tĩrtũm kapēr ā kagà htũm kōt Tĩrtũm mā amnhĩ jarēnh xà hā ixkre kamā tanhmā amnhĩ nhĩpēx to hpa hāmri nē kato nē ma akupỹm mō. Ma Garirej kamā ō krĩ pē Najare hwỳr wa ma akupỹm mō.

⁴⁰ Tā nhũm wa hkrata ra wa kām hprēkre ho mō. Nē mex nē àhpumunh tỳx nē. Tĩrtũm kot tãnopxar nē mēmoj to kutā nojarēt rāhā ho pa jakamā nhũm mex nē hkĩnh nē pa.

Marir mē Juje wa kot tee ri Jejus japēr ā wa harēnh

Rukre 4.22

⁴¹ Nhũm pre hte Marir mē Juje wa amgrà mē hkwỳjē hkōt ma Jerujarē hwỳr pa. Mē kot arĩgro pē Pas ā hkĩnh kaxyw. Pas ā na hte mē kēp Ijaew amnepēm Tĩrtũm kot pika pē Ejit rũm mē hpāmjē katorja mā hamaxpēr kaxyw axpēn wỳr akuprō nē hā hkĩnh. Jakamā nhũm wa ma mē hkōt hā hkĩnh kaxyw Jerujarē hwỳr hkwỳjē hkōt mō. ⁴² Nhũm ra Jejus hprēk o mō. Ra hā amgrà pē 12 jakamā nhũm wa ma amnhĩ kōt o mō. ⁴³⁻⁴⁴ Tā nhũm mē hkĩnh pa hāmri nē akupỹm nojarēt nhũm Marir mē Juje wa ma hkwỳjē hkōt akupỹm mō. Nhũm Jejus Jerujarē kamā ahte arĩk nē akupỹm wa hkōt mōr kēt nē. Nhũm wa htỳx wam ma hkwỳjē hkōt htēm ā hkamnhĩx jakamā wa hapēr kēt nē. Hāmri nē wa hapu hā hamakētkati nē mē hkōt mōr o mōr ā ra hā kamàt. Hāmri nē mē kot amnhĩm hikranh xàja wỳr mē hkōt pōj nē tee ri mē hkaēx ā hkra japēr o ri mra nom omunh kēt nē. ⁴⁵ Jakamā nhũm apkati nhũm wa awjanā nē ma akupỹm Jerujarē hwỳr mō nē kamā hapēr o ri pa. ⁴⁶ Nom tokyx kām kator kēt nē. Mē hkaēx ā tee ri hapēr o pa hā apkati axkrut. Nē nō nhũm apkati nhũm wa tā Tĩrtũm mā amnhĩ jarēnh xà hā ixkreja wỳr hapēr o mō nē hwỳr axà. Hāmri nē omunh kurē kumrēx. Nhũm arĩ mē kot Tĩrtũm kapēr tũm o mē ahkre xwỳnhjē mar o mē kutā nhỹ. Nē mēmoj tā ri mē hkukja nē tanhmā mē kām ujarēnh to. ⁴⁷ Nhũm mē kot mar xwỳnhjaja tee ri kapēr ā kuma nē àhpumunh tỳx ā omu hāmri nē akryk mar o hkrĩ. ⁴⁸ Hāmri nhũm Marir mē Juje mē hwỳr axà nē mē kuri wa hkraja pumunh kurē kumrēx. Hāmri nhũm katorxàja hwỳr tē nē kām:

—Xē Jejus. Mon ka axtem nē ā ri amnhĩ nhĩpēx anē nē akupỹm wa ixkōt amōr kēt nē? Na pa wa mō nē mē pahkwỳjē hkōt pōj nē tee ri mē hkaēx ā ajapēr nē tee ri akukamā ijamaxpēr. Anē.

⁴⁹ Hāmri nhũm amnhĩ tā wa kuma nē wa kām:

—Tỳ. Nom Inhĩpēxà nhōrkwỹ kamā ixarĩk kēnā na ka wa tee ri ixkukamā ajamaxpēr nē ijapēr o ri apa. Anē.

⁵⁰ Hāmri nhũm wa kuma nē ā kot amnhĩ jarēnh anhỹrja kukamā tee ri hamaxpēr.

⁵¹ Hāmri nē mē ma akupỹm mō nē Najare hwỳr pōj nē kamā pa. Nhũm pre Jejus wa kapēr kōt ri amnhĩ nhĩpēx rāhā ho pa. Hāmri nhũm katorxàja hkrax rũm mē kot kām tanhmā hkra kot amnhĩ nhĩpēx to hkukamā harēnhja pix kukamā hamaxpēr rāhā ho pa.

⁵² Gaa nhũm Jejus ra àptār o mō. Nē àhpumunh tỳx nē. Nhũm mē piitā ā kot amnhĩ nhĩpēx anhỹr ā omu nē kām hkĩnh nē. Nhũm Tĩrtũm haxwỳja kām hapē nē.

3

Juãw Paxis kot Tirtüm kapër jarënh o pa hã harënh

Matêwre 3.1-10; Makre 1.1-8; Juãw 1.19-28

¹⁻²Tã nhũm kormã pahшти Tipeja mẽ ho amnhĩptàr o pa. Na pre ra mẽ ho amnhĩptàr ã amgrà pẽ 15. Nhũm Põn Piratja pahшти Xipe mã pika pẽ Ijaew nhõ xwýnhjẽ ho amnhĩptà. Nhũm Eroxa kãm pika pẽ Garirej nhõ xwýnhjẽ ho amnhĩptà. Nhũm Erox tõ Firipja kãm pika pẽ Iturej nẽ hõ pẽ Takonit wa kamã mẽ pa xwýnhjẽ ho amnhĩptà. Nhũm Risãnja kãm pika pẽ Apirën kamã mẽ ho amnhĩptà. Nhũm Anas mẽ Kajpasja wa kęp Ijaew nhõ patre maati.

Rõm nhũm Jejus mẽ Jakaris kra Juãwja wa ra hamẽ anhĩpẽ àptàr. Jakamã nhũm Tirtüm tanhmã Juãw mã kapër to. Kormã kapõt ã ri pa ri nhũm kãm kapër nẽ kãm tanhmã kot amnhĩ nhĩpẽx to ho pa hã kãm karõ nẽ kãm:

—Pa Juãw. E inhma. Kêr ka ma mẽ kãm ixkapër jarënh rãhã ho ri apa. Anẽ.

³Hãmri nhũm kuma nẽ ma ri mẽ kãm kapër jarënh o pa. Pyhti pẽ Jotãw mýri mẽ piitã mẽ kãm harënh o ri pa nẽ hpãnhã ihkjẽ hã ri mẽ pa xwýnhjẽ mã harënh o ri pa. Nẽ mẽ kãm:

—E kwa mẽ tokyx amã amnhĩ tomnuj kaga hprãm xaj tãm ri amnhĩ nhĩpẽx. Kê Tirtüm ja hã mẽ apumu nẽ mẽ anẽ mẽ ate amnhĩ tomnuj o hapẽx pa. Pa mẽ piitã mẽ kot mẽ apê Tirtüm kra hã mẽ apumunh kaxyw mẽ akrã kumrã.

Anhýr o mẽ kãm kapër o ri pa. ⁴⁻⁵Na pre ra amnepêm mẽ hkukamã Tirtüm nhý hã kapër o pa xwýnh Ijais ra Juãw kukamã kot tanhmã amnhĩ nhĩpẽx to hã harẽ nẽ hã kagã. Nẽ hã kagã ho:

Koja nhýrmã mẽhõ mõn pøj. Kapõt ã mõn pøj nẽ mẽ kãm ujarënh o ri pa. Nẽ mẽ kãm ujarënh o: “E mẽ inhma. Koja Tirtüm tokyx mẽ pahwýr mẽ panhõ pahшти mẽ nhũm wry nhũm mẽ piitã omu. Jakamã kwa mẽ tokyx kutêp tãm amnhĩ nhĩpẽx o apa. Te ho mẽ kot mẽhõ kutêp pry ho mex pyrãk o amnhĩ nhĩpẽx. Jao tãm amnhĩ nhĩpẽx. Nẽ tãm axpën nhĩpẽx. Pahштита kutêp. Mẽ pahte amnhĩ nhĩpẽx te kot pry nhĩnur pyrãk nhũm mẽ tee ri kot kãm hã mrar mex prãm kaprý pyrãk. Hinur nẽ krã hakýx nẽ pry juk pyrãk o na mẽ pahte amnhĩ nhĩpẽxja. Jakamã kot kaj mẽ ate amnhĩ tomnuj kaga nẽ tãm amnhĩ nhĩpẽx. Nẽ tãm axpën nhĩpẽx. Hãmri nẽ te mẽ kot pry nhĩnur o mex nẽ ho katat nhũm katat muux nẽ nõr pyrãk o kot kaj mẽ amnhĩ nhĩpẽx. Pahшти nywta kutêp. Kwa kêr ka mẽ ã amnhĩ nhĩpẽx anẽ.

⁶Kot kaj mẽ anẽ nhũm mẽ ohtõ nẽ ja hã mẽ apumu hãmri nẽ mẽ apyrã Tirtüm kot mẽ ho hkra kaxyw amnhĩ to kuwý.” Anhýr o mẽ kãm ujarënh o pa. Anẽ.

Nhũm pre ã finat Ijaisja Juãw Paxis kukamã mẽ kãm ujarënh anhýr o pa. ⁷Jakamã nhũm àptàr nẽ Ijais kot ra hkukamã harënh xà hkõt ma Tirtüm kapër o mẽ ahkre ho pa. Nhũm prem kuma hãmri nẽ kot mẽ hkrã kumrãr kaxyw hwýr amnhĩ to mra. Nhũm mẽ omu nẽ tanhmã mẽ ahkre hto. Nẽ mẽ kãm kapër kãm hihtýx nẽ mẽ kãm:

—Tk. Kwa kormã. Mẽ ate amnhĩ tomnuj pix o ri apa xwýnh kênã. Xà kot paj mẽ ate amnhĩ tomnuj rãhã mẽ akrã kumrã nhũm Tirtüm ja hã mẽ apumu nhũm ja kãm mex nã? Nã koja ja kãm mex kêt nẽ. Koja ja mýrapê nhýrmã tanhmã mẽ anhĩpẽx to ka mẽ tee ri umaj apimxur prãm kaprý.

⁸—Na htem amnhĩ tomnuj kaga nẽ hpãnhã tãm amnhĩ nhĩpẽx. Nẽ tãm ri axpën nhĩpẽx. Jakamã e kwa mẽ ã amnhĩ nhĩpẽx anhýr o apa. No na ka htem atýx ri ajamaxpër o: “Mẽ ixpẽ finat Apraãw kanrẽhã htãmnhwý jakamã koja Tirtüm ja hã mẽ ixpumu hãmri nẽ mẽ ixte amnhĩ tomnuj mýrapê tanhmã mẽ ixto hkêt nẽ. Koja ãm mẽ ixto mex rãhã nẽ.” Anhýr o atýx ri amnhĩ kukamã ajamaxpër o apa. Nom ja kot anhýr kêt. Mẽ apê Apraãw kanrẽhã htãmnhwý htã urãk nẽ tãm amnhĩ nhĩpẽx o apare hã. Kot ka mẽ apê kanrẽhã htãmnhwý htã amnhĩ tomnuj o ri apa hãmri nẽ Tirtüm noo mã te mẽ apê pikap kênre nhĩkwý pix pyrãk.

⁹—Na ra Tirtüm kot mẽ ate amnhĩ tomnuj mýrapê tanhmã mẽ ato kaxyw. Koja mẽ anhĩpẽx o te mẽhõ nhõ mẽmoj pàr ô hkêt nhũm kot tee ri omunh hãmri nẽ krãhyr nẽ

kuwy kamã mēnh nē ho xēt par pyrāk o mē anhīpêx. Jao amnhī nē kuwy hwÿr mē arēnh pa ka mē kamã amnhī xà htÿx kamã ajamak rãhã ho ri apa. Anē.

Nhũm pre ã Juãw Paxisja mē kãm kapēr anē. ¹⁰ Hãmri nhũm mē kuma nē tee ri amnhī kukamã hamaxpēr nē kãm:

—Kwa xō wehe? Xà koja ã mē inhīpêx anē? Kwa tanhmã kot paj mē kot ã mē inhīpêx anhÿr pymaj amnhī nhīpêx to wehe? Anē.

¹¹ Hãmri nhũm mē kãm:

—Nà kêr ka mē axpēn kãm axukapri ho ri apa. Nē mē kêp amrakati xwÿnhjê mã amnhī kutã mēmoj nhõr o ri apa. Nē mē anhīnôhkà axkrut nē mēhõ hinôkà hkêt xwÿnhjê mã ho pyxi nē agõ nē pyxi nē ho arīk. Nē mē axàpkur xà ho anhõxÿ ho apa hkêt nē. ãm axãmnhix ri mē kêp amrakati xwÿnhjê mã amnhī kutã mē kãm mēmoj to hkryre nē agõ. E kêr ka mē ã axpēn nhīpêx anhÿr o ri apa. Anē.

¹² Hãmri nhũm Rõm kãm mē õ pahilti mã mē piitã mē kêp kàxpore hkwy jamÿnh xwÿnhjaja mē urāk nē hwÿr mra. Kot mē urāk nē mē hkrã kumrãr kaxyw hwÿr mra nē kãm:

—No we mē pajaja? Tanhmã kot paj wem amnhī nhīpêx to? Anē.

¹³ Hãmri nhũm mē kãm:

—Nà mē kajaja kêr ka mē Rõm nhõ pahi kot mē amã mē ate mē kêp kàxpore hkwy jamÿnh jarēnh xà hkôt pix mã hamÿnh o ri apa. No mē atÿx ri amnhī krã hkôt amnhīm hkwy jamÿnh prãm xàj mē kãm hkre kamã ho rÿnh nē mē kãm harēnh o ri apa hkêt nē. Anē.

¹⁴ Hãmri nhũm hpãnhã pôristi hkwyjaja hwÿr mra nē kãm:

—Kwa no we mē pajaja? Tanhmã kot paj wem ri amnhī nhīpêx to ho ixpa? Anē.

Hãmri nhũm mē kãm:

—Nà kêr ka mē anhõ pahilti kot mē axàpēnh pãnhã mē amã kàxpore nhõrta pix jamÿ nē ajamakêtkati nē axãmnhix ri ho amnhīm axujaprõr o ri apa. No mē akwyjaja kãm apyma nē mē amã kàxpore nhõr prãm xàj ri mē kãm tanhmã amnhī pyma hto ho ri apa hkêt nē. E kêr ka mē ã amnhī nhīpêx anhÿr o ri apa. Anē.

Juãw Paxis kot tanhmã Jejus jarēnh to hã harēnh

Matêwre 3.11-12; Makre 1.7-8; Juãw 1.19-28; mããnēn Atre 19.4

¹⁵ Nhũm pre ã Juãw Paxisja mē kãm kapēr anē. Nhũm mē kuma nē htÿx kêp Tirtũm kot mē pakaxyw ãm mã xwÿnhta ã hkamnhix. ¹⁶ Hãmri nhũm amnhī tã ã mē hamaxpēr anhÿr ã mē omu hãmri nē mē kãm amnhī tã aprã nē mē kãm:

—Nà pa hkêt. Na pa hte ãm Tirtũm mã gõ pix o mē hkrã kumrãr o ri ixpa. No koja tokyx ixpãnhã Tirtũm kot mē pakaxyw ãm xwÿnhta tãm mē pahwÿr põj. àhpumunh tÿx o kot ijakrenh jakamã na pa hte ãm kukwak ri ixpa nē hã xpijaam o ri ixpa. Tirtũm kot mē pakaxyw ãm xwÿnhta koja mē awÿr Karõ rē nhũm mē akaxwÿnh mã agjê ka mē ÿ hã tãm ri amnhī nhīpêx rãhã ho ri apa. Nom kormã mē kot tãm amnhī nhīpêx hkêt xwÿnhjaja koja ja hã mē omu hãmri nē mē hipêx o te kuwy kot mēmoj to kaxàr par pyrāk o mē hipêx.

¹⁷ —Na htem pur kãm harõj nhikē nē ho grã nē hpãnhã kahtwÿ. Nē kahuk pa hãmri nē hkapĩ nhũm kôk apē nē pryhkà ho htor nē ho hapêx pa. Nhũm mē hy ho pa nē ixkre kamã gõj kãm unhwÿ. Ja pyrã nē koja tokyx Tirtũm mē piitã mē kot tanhmã amnhī nhīpêx to ho pa hã mē omunh xà hkôt mē ho axkjê. Mē kot tãm amnhī nhīpêx o mē pa xwÿnhjaja koja ma amnhī wÿr mē ho api nhũm mē kuri mex nē hkĩnh rãhã nē pa ho pa. No mē kot amnhī tomnuj xwÿnhjaja koja mē hkĩnhã tanhmã mē hipêx to nhũm mē ma kuwy raxja wÿr pa nē kamã amnhī xà htÿx kamã hamak rãhã nē pa ho pa. Anē.

¹⁸ Nhũm pre ã Juãw Paxis Tirtũm kapēr o mē ahkre anhÿr o pa.

Juãw Paxis kot Jejus krã kumrãr ã harēnh

Matêwre 3.13-17; Makre 1.9-11

¹⁹ Tã nhũm Ijaew nhõ pahi Eroxo ra htõ hprõ pē Eroxis pytà nē ho hprõ nhũm Juãw Paxisja harēnh ma nē ma hwÿr tē nē hã kãm akir. No ãm ja pix ã kãm àkjêr kêt nē.

Määnēn tanhmā kot amnhĩ tomnuj tỳx to ho pa hã kãm akir. ²⁰ Nhũm amnhĩ tã kuma nē kamā gryk tỳx nē amnhĩ tã mē kãm hã amỹnē nhũm prem unē nē haxà. Jao amnhĩ tomnuj tỳx nē. ²¹ Nom kormã mē kot haxàr kêt ri nhũm Juãw Paxis Ijaew kwỳjê krã kumrãr o xa. Rôm nhũm Jejusja hãmri tãm nhỹhỹnh hwỳr tē nē kot hkrã kumrãr kaxyw kãm anē nhũm kuma nē hkrã kumrã. Hãmri nhũm Jejus gôj rùm api nē kormã gô mỳ ri Tĩrtũm mã amnhĩ jarēnh o xa. ²² Pu nhũm kaxkwa axkjê nhũm kurũm Tĩrtũm Karõ te tuuti pyrà nē hwỳr wrỳk o tē nē ĩkre hã xa. Hãmri nhũm kaxkwa rùm Tĩrtũm kãm kapēr nē kãm:

Pa? E apê Ixkra mex na ka. Ām hãmri na ka hte ixkanrēhã amnhĩ nhĩpêx o apa. Inhmã ajapê kamã na ka ri apa ho apa. Anē.

Jejus kukamã higêt nē hpãmjê nhĩxi hã harēnh

Matêwre 1.1-17

²³ Tã nhũm Jejus Tĩrtũm mã kapēr o mē ahkre ho pa hkrax. Na pre ra hã amgrà pê 30 hãmri nē kãm ho hkrax.

E kot paj hpãnhã amã Jejus kukamã hpãmjê nhĩxi jarē Teopre. Ijaewjaja na prem htỳx ho Juje kêp Jejus nhĩpêêxà kumrêx ã hkamnhĩx nom kêp hipêêxà kumrêx kêt ãm kêp hipêêxà puro na pre.

Jejus kêp Eri htãmnhwỳ na pre.

²⁴ Nē Eri kêp Matat kra na pre.

Nē Matat kêp Rewi hkra na pre.

Nē Rewi kêp Mewki hkra na pre.

Nē Mewki kêp Jãnaj kra na pre.

Nē Jãnaj kêp axtem Juje hõ hkra na pre.

²⁵ Nē Juje kêp Matatis kra na pre.

Nē Matatis kêp Amõs kra na pre.

Nē Amõs kêp Naũ hkra na pre.

Nē Naũ kêp Eri hkra na pre.

Nē Eri kêp Nakai hkra na pre.

²⁶ Nē Nakai kêp Mate hkra na pre.

Nē Mate kêp axtem Matatis õ hkra na pre.

Nē Matatis kêp Semeĩ hkra na pre.

Nē Semeĩ kêp Juje hõ hkra na pre.

Nē Juje kêp Jotre hkra na pre.

²⁷ Nē Jotre kêp Joanãn kra na pre.

Nē Joanãn kêp Rej kra na pre.

Nē Rej kêp Joropape hkra na pre.

Nē Joropape kêp Saraxi kra na pre.

Nē Saraxi kêp Neri hkra na pre.

²⁸ Nē Neri kêp axtem Mewki hõ hkra na pre.

Nē Mewki kêp Axi hkra na pre.

Nē Axi kêp Kojã hkra na pre.

Nē Kojã kêp Ematã hkra na pre.

Nē Ematã kêp Erti hkra na pre.

²⁹ Nē Erti kêp Jojue hkra na pre.

Nē Jojue kêp Eries kra na pre.

Nē Eries kêp Jorĩ hkra na pre.

Nē Jorĩ kêp Matat hkra na pre.

Nē Matat kêp axtem Rewi hõ hkra na pre.

³⁰ Nē Rewi kêp Simeãw kra na pre.

Nē Simeãw kêp Juta hkra na pre.

Nē Juta kêp axtem Juje hõ hkra na pre.

Nē Juje kêp Janã hkra na pre.

Ně Janā kēp Eriakī hkra na pre.

³¹ Ně Eriakī kēp Merea hkra na pre.

Ně Merea kēp Mena hkra na pre.

Ně Mena kēp Matata hkra na pre.

Ně Matata kēp Natā hkra na pre.

Ně Natā kēp Tawi hkra na pre.

³² Ně Tawi kēp Jese hkra na pre.

Ně Jese kēp Opex kra na pre.

Ně Opex kēp Poas kra na pre.

Ně Poas kēp Sarā hkra na pre.

Ně Sarā kēp Nasō hkra na pre.

³³ Ně Nasō kēp Amīnatap kra na pre.

Ně Amīnatap kēp Amī hkra na pre.

Ně Amī kēp Ari hkra na pre.

Ně Ari kēp Erō hkra na pre.

Ně Erō kēp Pere hkra na pre.

Ně Pere kēp Juta hkra na pre.

³⁴ Ně Juta kēp Jako hkra na pre.

Ně Jako kēp Ijak kra na pre.

Ně Ijak kēp Apraāw kra na pre.

Ně Apraāw kēp Tera hkra na pre.

Ně Tera kēp Nako hkra na pre.

³⁵ Ně Nako kēp Jeruk kra na pre.

Ně Jeruk kēp Rakau hkra na pre.

Ně Rakau kēp Parek kra na pre.

Ně Parek kēp Epti hkra na pre.

Ně Epti kēp axtem Sara hō hkra na pre.

³⁶ Ně Sara kēp Kajnā hkra na pre.

Ně Kajnā kēp Apaxat kra na pre.

Ně Apaxat kēp Sēre hkra na pre.

Ně Sēre kēp Noehti hkra na pre.

Ně Noehti kēp Ramek kra na pre.

³⁷ Ně Ramek kēp Metujarē hkra na pre.

Ně Metujarē kēp Enok kra na pre.

Ně Enok kēp Jarate hkra na pre.

Ně Jarate kēp Marerer kra na pre.

Ně Marerer kēp axtem Kajnā hō hkra na pre.

Ně Kajnā kēp Enos kra na pre.

³⁸ Ně Enos kēp Set kra na pre.

Ně Set kēp Atāw kra na pre.

Ně Atāw kēp Tirtūm kra na pre. Tirtūm kot wam my pê Atāwja pika ho hipêx jakamā te kēp hkra pyrāk.

Ā Jejus kukamā hpāmĵê nhīxi kot anhÿr.

4

Satanasti kot amnhī tā Jejus kamā hamak ā harēnh

Matēwre 4.1-11, 16.23; Makre 1.12-13, 8.33; määnēn Eprēw 2.18, 4.15

¹ Tā nhūm Jejus pyhti pê Jotāw rūm akupÿm ma mō. Hāmri ně Tirtūm Karō nhÿ hā mẽmoj kutā amnhī to htÿx ně. Jakamā nhūm nhÿhÿm ma kapôt wÿr o mō ² nhūm Satanasti omu ně ma hwÿr tē ně ri hkôt pa. Kapôt ā ri hkôt hēx rom tanhmā kām ně ho pa. Kot mar ně Tirtūm kapēr nhīrôp ām prām xaj ma hkôt tanhmā kām kapēr to ho pa.

Hāmri nē hkôt pa o hã arıgro pê 40 nhũm Jejus kormã apkur kêt o hã arıgro pê 40 nē hapêx nhũm ra kãm prãm tỳx nē. ³ Hāmri nhũm Satanasti kãm:

—Kwa măn ka ra amã prãm tỳx kumrêx nà? Nom xep apê Tirtũm Kra jakamã mēmoj tanhmã apê kute hkêt. Kwa kên nhĩkwỹ mũj mã anē kē amã pãwti hã amnhĩ jahkre ka aku nē tokyx ho amnhĩ xihtỳx. E kwa tokyx kãm anē. Anē.

⁴ Hāmri nhũm kuma nē kãm:

—Tk. Nà kot paj akapêr mar xà hkôt tanhmã amnhĩ nhĩpêx to hkêt nē. Koja Tirtũm kãm inhmã mēmoj nhõr prãm nē inhmã mēmoj gõ pa arĩ kormã kukrê. Kapêr ã kagã htũm kot ja jarênh kot:

Na htem mē apkur xà pix kukwak ri htĩr nē pa hkêt nē. Na htem mããnēn Tirtũm kapêr mar xà hkôt tanhmã ri amnhĩ nhĩpêx to ho pa ho htĩr nē mex nē pa. Anē.

Ã kapêr ã kagã kot ja jarênh kot anhỹr jakamã kot paj amar xà hkôt ã ri amnhĩ nhĩpêx anhỹr kêt nē. Am kwarĩ ho kwarĩ. Anē.

⁵ Nhũm pre ã Jejus Satanasti mã kapêr anē nhũm tee ri kuma hāmri nē hpãnhã ma nhỹhỹm o mō nē nhỹri kỳx pê mēmoj prêeti nhĩmõk ã o xa. Hāmri nē kãm pika piitã ahkre ho xa. Nē kãm mē hikukrêx piitã ahkre. Kàxpore nē mēmoj piitã nhũm kãm ahkre hpa nhũm anhĩpê omunh o xa. ⁶ Hāmri nhũm Satanasti kãm:

—E măn ka kam ri mēmoj mũj piitã omu. Piitã inhõ na. Inhmã na pre Tirtũm piitã õr pa. Kot paj inhmã mēhõ mã õr prãm nē kãm kugõ. ⁷ Tã amã kot paj kugõ. Jakamã e. Kwa tokyx ixkutã tēm nē inhmã inhmex o inhmex ã ijarê pa ama nē rĩ amã piitã õr pa. E tokyx. Anē.

⁸ Hāmri nhũm kuma nē kãm:

—Tk. Kot paj amã amex o amex ã ajarênh kêt kumrêx. Am kwarĩ ho kwarĩ. Amexiti hã. Tirtũm kapêr ã kagã htũm kot ja nê kapêr kãm hihtỳx kênã. Kapêr kot:

Kêr ka mē ixkapêr pix ma. Nē ixkutã pix mã măn akõnkrã ho akrĩ nē inhmã inhmex o inhmex ã ijarênh o ri apa. Kêr ka mē ã amnhĩ nhĩpêx anhỹr o ri apa.

Anhỹr o kot harênh jakamã kot paj ri amã amex o amex ã ajarênh kêt nē Satanasti. Anē.

⁹ Nhũm pre ã Jejus amnhĩ nē kãm kapêr anē. Hāmri nhũm tee ri kuma nē hpãnhã ma krĩ pê Jerujarê hwỳr o mō. Nē mē kot Tirtũm mã amnhĩ jarênh xà hã ixkre hprêk nhĩmõk wỳr ho api nē kỳxpê hatur xà hã ãm nhũm xa. Nhũm amnhĩ parpê kên rũnh nhĩkwỹ pumunh o xa. Hāmri nhũm Satanasti kãm:

—E apê Tirtũm Kra jakamã kwa ja rũm ahpar mã ajarĩ nē ma tē nē pikap tēm. Koja Anhĩpêxã apumunh mex nē ka tanhmã amnhĩ to hkêt nē. ¹⁰⁻¹¹ Kapêr ã kagã htũm kot ja jarênh kot:

Tirtũm koja kapêr o wrỳk xwỳnh mã ajarê ka ajarĩ nē ahpar mã tē nhũm mē kỳx pê amỳ nhũm mēmoj akã hyr kêt nē.

Ã kapêr ã kagã kamã ajarênh kot anhỹr jakamã e tokyx ajarĩ nē ma tēn pikap ahto. Anē.

¹² Hāmri nhũm kuma nē kē axte amnhĩ tã kãm kapêr nē kãm:

—Tk. Kwa nà. Kot pa ri amar xà hkôt ã amnhĩ nhĩpêx anhỹr kêt nē. Koja Tirtũm tãm inhmã ijarĩ hã karõ pa rĩ mar xà hkôt ijarĩ no kot pa ri amar xà hkôt ijarĩ hkêt nē. Tirtũm kapêr ã kagã htũm kot ja jarênh kot:

Kêr ka mē amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nē.

Ã ja nê kapêr kot anhỹr jakamã ãm kwarĩ ho kwarĩ. Kot paj ri amar xà hkôt ã amnhĩ nhĩpêx anhỹr kêt nē. Tãm kot inhmã ijarĩ hã karõre hã. Anē.

¹³ Nhũm pre ã Jejus Satanasti mã kapêr anē hāmri nhũm tee ri mēmoj piitã ho mar kaprỳ hāmri nē hkaga nē ma nhỹhỹm tē. Hāmri nē kot nhỹrmã axte hwỳr htēm nē kot mēmoj punuj o mar kaxyw kormã amnhĩm hamãr o ri pa.

Jejus kot Tirtũm kapêr o mē ahkre ho hkrax ã harênh

Matêwre 4.12-17; Makre 4.14-15

¹⁴ Tã nhũm Jejus ma akupỹm Garirej wỳr mō. Nē Tirtũm Karõ nhỹ hã àhpumunh tỳx nē hkwyjê mã kapêr jarênh o ri pa. Nhũm mē kuma nē piitã pikaja kamã axpên mã tanhmã

harēnh to. ¹⁵ Na pre hte mẽ kot Tirtũm kapēr o mẽ ahkre xà hã ixkre hwỳr agjê nẽ kamã mẽ ahkre ho hkrĩ. Nhũm mẽ piitã kuma nẽ kãm mar prãm nẽ. Hãmri nẽ axpẽn mã mex ã harēnh o ri pa.

Najare kamã mẽ kot Jejus kaga hã mẽ harēnh

Matêwre 13.53-58; Makre 6.1-6; Juãw 1.11

¹⁶ Tã nhũm Jejus ma akupỹm krĩ kamã àptàr xàja wỳr ma mỗ. Najare hwỳr. Hãmri nẽ kamã pỏj.

Nhũm Ijaew nhõ arĩgromnu pẻ sap kato nhũm Jejus ma mẽ hkỏt Tirtũm kapēr o mẽ ahkre xà hã ixkre hwỳr tẻ. Hãmri nẽ hwỳr axà nẽ mẽ kuri nhỹ. Hãmri nẽ kamã mẽ kãm Tirtũm kapēr ã kagà htũm kamã harēnh kaxyw kànhmã xa ¹⁷ nhũm mẽ omu nẽ kãm ja gỏ. Finat Ijais pẻ Tirtũm nhỹ hã kapēr xwỳnh kot Tirtũm kapēr kwỳ hã kagàja nhũm mẽ kãm kugỏ. Hãmri nhũm kupy nẽ kamã kormã Tirtũm kot tanhmã mẽmoj jarēnh to hỏ japẻr o xa. Nẻ kãm kato hãmri nẽ mẽ kãm kamã harẻ. Nom amnhĩ tã kamã mẽ kãm harēnh o xa nẻ mẽ kãm:

¹⁸ Na pre ra Tirtũm Karỏja ixto ixàhpumunh tỳx nẻ mẽ kẻp amrakati xwỳnhjẻ hwỳr inhmẻ pa ra mỗ. Ixte mẽ kãm mẽmoj mex jarēnh o ixpa kaxyw. Nẻ Satanasti kot amnhĩ kỏt mẽ unhwỳr xwỳnhjẻ hwỳr nhũm pre mãanẻn inhmẻ. Ixte mẽ nẻ Satanasti japỏx o ixpa kaxyw. Nẻ mẽ kot hprĩ hã Tirtũm kapẻr mar kẻt xwỳnhjẻ hwỳr nhũm pre mãanẻn inhmẻ. Ixprĩ hã ixte mẽ kãm kapẻr jarēnh o ri mẽ hkỏt ixpa kaxyw. Nẻ mẽ kot amnhĩ tomnuj o mẽ pa xwỳnhjẻ hwỳr nhũm pre mãanẻn inhmẻ. Ixte mẽ nẻ mẽ kot amnhĩ tomnuj rẻnh pa nhũm mẽ hamakẻtkati nẻ àmnhĩx ri pa kaxyw. ã na pre Tirtũm jajẻ piitã hwỳr inhmẻnh anẻ pa ra man mỏn pỏj.

¹⁹ Nẻ amgrà ja kẻp Tirtũm kot mẽ ato mex xà hã amgràja nhũm ixte mẽ amã harēnh o ixpa kaxyw na pre inhmẻ pa mỏn pỏj. Anẻ.

²⁰ Nhũm pre ã Jejus Tirtũm kapẻr ã kagà htũm kamã mẽ kãm amnhĩ jarēnh anẻ. Hãmri nẻ akupỹm mẽ kãm kagàja gỏ nẻ ho mẽ ahkre kaxyw akupỹm nhỹ nhũm mẽ piitã omunh pẻ mar o hkrĩ. ²¹ Hãmri nhũm mẽ kãm tanhmã amnhĩ jarēnh to nẻ mẽ kãm:

—E ra Ijais kot ã ixkukamã ijarẻnh anhỹr xà hkỏt na pa mẽ awỳr wrỳ nẻ mẽ anoo mã ã amnhĩ nhĩpẻx anhỹr o hkrax. Anẻ.

²² Hãmri nhũm mẽ amnhĩ jaẻr pẻ ã kot amnhĩ jarẻnh anhỹr ã kuma. Nẻ tee ri kuma nẻ axpẻn pumunh pẻ hamaxpẻr o hkrĩ. Jejus mẽ kurom àhpumunh tỳx nẻ kapẻr mex tã nhũm mẽ ãm kẻp amnhĩ kwỳ pix ã hkamnhĩx kãm hihtỳx nẻ. Hãmri nẻ axpẻn mã:

—Tk. Kwa kẻp Juje hkra pix kẻnã koja we ri ã amnhĩ jarẻnh anẻ. Anẻ.

²³ Hãmri nhũm amnhĩ tã mẽ kuma nẻ mẽ kãm:

—Nà na ka mẽ ixte amnhĩ jarẻnh ma nom ixkỏt ajamaxpẻr kẻt nẻ. Jakamã axpẻn mã ijarẻnh o: “Tk. Kẻp mẽ pahkaprĩ xwỳnh ro nhỹx jar mẽ panhỏ krĩ kamã aa mẽ pahte mẽmoj pumunh kẻt kwỳ tanhmã mẽ pamã hipẻx to pu mẽ hã omu. Te ra kot krĩ pẻ Kapanaũ kamã mẽ kãm mẽmoj kwỳ ho anhỹrta pyràk. Pu mẽ omu nẻ hkỏt pajamaxpẻr kurẻ kumrẻx.” Anhỹr o ri axpẻn mã ijarẻ. ²⁴ Koja nhãm krĩ hỏ kamã mẽhỏ kẻp Tirtũm kapẻr jarẻnh xwỳnh ã amnhĩ jarẻ ka mẽ harẻnh ma nẻ amã ma hwỳr amrar nẻ mar prãm nẻ. No kẻt jar mẽ panhỏ krĩ kamã ixpẻ mẽ anhỏ hã ã amnhĩ jarẻnh anẻ ka mẽ amã inhmar prãm kẻt nẻ.

²⁵ —Kwa mẽ inhma. Amnepẻm kormã finat Eris htửr ri na pre mẽ hã na wryk kẻt ry rax nẻ. Jao hã amgrà axkrunẻpxi nẻ hkỏt mytwrỳ pẻ 6. Nhũm mẽ ỏ hkẻt nẻ pa. Ra mẽ kẻp mẽmoj grà pa nẻ hapẻx nhũm mẽ kãm prãm tỳx kumrẻx nẻ pa. Nhũm mẽ kẻp mẽ mjẻn tyk xwỳnhjaja kãm prãm xàj hirot o pa. ²⁶ Tã nom Tirtũm mẽ ho mex kaxyw mẽ hwỳr Eris mẽnh kẻt nẻ. Erisja mẽ uràk nẻ kẻp Ijaew tã nhũm Tirtũm kot mẽ ho ajuta kaxyw mẽ hwỳr mẽnh kẻt nẻ. Mẻ kot amnhĩ kaxyw Tirtũm kỏt hamaxpẻr kẻt jakamã nhũm mẽ hwỳr mẽnh kẻt nẻ. Axtem Ijaew kẻt xwỳnhjẻ hỏ hwỳr na pre kumẻ. Nhãm Sitỏ kamã krĩ pẻ Sarep kamã mjẻn htyk xwỳnhhta wỳr. Tokyx kot tanhmã ho mex to kaxyw. Jakamã

nhũm ma hwỳr mō nē tanhmā kām kapēr to nhũm kuma nē amnhĩ kaxyw Tĩrtũm kōt hamaxpēr kurê kumrēx.

²⁷ —Nē finat Eriasti haxwỳja. Eris pyrà nē kēp Tĩrtũm nhỹ hã kapēr o pa xwỳnh tã amnhĩ kwỳ pē Ijaew tanhmā mẽ ho ajuta hto hkēt nē. Na prem ohtō nē hkà nhy nē hkro xàpēr o pa. Jao ra omnuj tỳx nē. Tã nhũm Tĩrtũm kot akupỹm mẽ ho mex kaxyw mẽ hwỳr Eriasti mẽnh kēt nē. Amnhĩ kaxyw mẽ kot hkōt hamaxpēere hã. Ām Sir nhõ xwỳnh Namāja pix na pre Tĩrtũm Eriasti mã anē nhũm akupỹm ho mex. Kēp Ijaew kēt tã nhũm akupỹm ho mex. Tã ja pyrà nē na pa Ām mẽ kot amnhĩ kaxyw ixkōt hamaxpēr pix xwỳnhjê mã tanhmā amnhĩ nhĩpêx to ho ri ixpa. No mẽ ate amnhĩ kaxyw ixkōt ajamaxpēr kēt xwỳnhjê mã tanhmā ri amnhĩ nhĩpêx to hkēt nē. Anē.

Nhũm pre ā Jejus mẽ kām amnhĩ jarēnh anē.

²⁸ Hāmri nhũm mẽ kuma nē kamā gryk tỳx nē axpēn mã hã amỳnê nē axpēn mã:

—Tk. Kwa pu mẽ ixkre nē kator nē ma o tē nē kupĩ ri. Anē.

²⁹ Hāmri nē kaxyw kànhmā kuhê hpa nē hwỳr hprōt nē unê. Mẽ kot ma o htēm nē hixēt prêk jatur xà hã hkujaek nhũm ahpar mã tēn htēm nē htyk kaxyw. Mẽ õ krija hixēt prêk nhĩmōk ā na pre. Jakamā nhũm prem unê nē hatur xàta wỳr o tē. ³⁰ Tã nom nhũm tanhmā amnhĩ nhĩpêx to nē mẽ kēp akunok nē hpānhã nhām ma tē nhũm mẽ tee ri hapēr nom nhỹri omunh kēt nē.

Jejus kot mēhõ nē mẽkarōmnuti kator ā harēnh

Makre 1.21-28

³¹ Tã nhũm Jejus ma akupỹm Garirej kamā krĩ pē Kapanau hwỳr mō. Nhũm mẽ õ arĩgromnu pē sap kato nhũm ma mẽ kot Tĩrtũm kapēr o mẽ ahkre xà hã ixkre hwỳr tē nē mẽ ahkre ho nhỹ. ³² Hāmri nhũm mẽ kot mar o hkrĩ xwỳnhjaja kuma nē kām mar prām nē. Nē axpēn mã:

—Hêxta waa nē. Ām hāmri na ā mẽ pamā kapēr anē. Āhpumunh tỳx xà hkōt na hte Ām hāmri mẽ pamā awjarē. Anē.

³³ Nhũm mēhõ myja mẽ iħkō hã haxwỳja mar o nhỹ. Mēkarōmnuti na pre ra hwỳr axà nhũm ỹ hã tanhmā amnhĩ tomnuj to ho pa. Hāmri nē mẽ iħkō hã Jejus mar o nhỹ nē ra àmra kamā tanhmā kām kapēr to. Nom nhũm tām kām kapēr kēt Ām kamā mẽkarōmnutija kām kapēr. ³⁴ Nē kām:

—Pa? Jejus pē Najare nhõ xwỳnh? Nà ate mẽ ixto ajapêx par kaxyw na ka mẽ ixwỳr mō. Ra ixte apumunh mex kēnã. Apē Tĩrtũm kot mẽ ixwỳr amēnh xwỳnh maatita na ka. Jakamā kwa tanhmā kot kaj mẽ ixto? Mo kaxyw na ka pre mẽ ixwỳr mō? Anē.

³⁵ Hāmri nhũm kuma nē mẽkarōmnuti kot kām ā kapēr anhỹr ā omunh kurê kumrēx. Jakamā kutã kām kapēr nē kām:

—Tk. Kwa anhĩkrê nē kēp akato. Anē.

Hāmri nhũm kuma nē myta o pika kura nē kēp kato nē ma tē. Ām ho pika kuranh pix nhũm nō. Hāmri nē akupỹm kànhmā nhỹ nē akupỹm mex. ³⁶ Hāmri nhũm mẽ piitã omu nē kamā no puma nē. Hāmri nē axpēn mã:

—Kokỹỹ. Na hte Jejus amnhĩ krã hkōt āhpumunh tỳx xà hkōt mẽkarōmnuti mã kapēr nē mẽ hano nhũm htem kuma nē mẽ kēp hapôx kurê kumrēx. Anē.

³⁷ Hāmri nhũm mẽ mẽõ pika kamā piitã ri axpēn mã harēnh o pa.

Jejus kot Simãw Pêtre xupānhgêx o mex ā harēnh

Matêwre 8.14-15; Makre 1.29-31

³⁸ Tã nhũm Jejus Tĩrtũm kapēr o mẽ ahkre xàja rũm kato nē ma Simãw Pêtre nhõrkwỳ hwỳr tē. Nē mẽ hwỳr axà nhũm Simãw Pêtre omu nē kām upānhgêx tanhmā kute hã harē nē kām:

—Kwa Pahihti. Tē nē inhmā ixupānhgêx pumu. Na hkà kagro htỳx nē amnhĩ to àpēr o nō. Kwa tēn inhmā omu. Anē.

Hāmri nhũm kām:

—Tôe. Nà kot paj amã omu. Anē.

³⁹ Hāmri nē hwỳr tēn kuri xa nē kām:

—Pa? E kwa akà hakry. Aně.

Hāmri nhūm kuma nē hkà hakry nē akupým hihtỳx kurê kumrēx. Hāmri nē kànhmā nhỹ nē mẽ kām mẽõ hã àpênh o ri mra.

Jejus kot mẽ ho ohtô nē mẽ ho mex ã harēnh

Matêwre 8.16-17; Makre 1.32-34

⁴⁰ Tã nhūm ra amỹkry htỳx mẽ nhūm mẽ Jejus wỳr ahpỹnhã ri mẽ à xwỳnhjê ho mra. Nhūm amnhĩ wỳr mẽ omu hāmri nē mẽ piitã ri mẽ hã ìhkra jaxwỳ nē akupým mẽ ho mex pa. ⁴¹ Nhūm ra mẽkarōmnuti mẽ hkwỳjê hwỳr agjê nhūm mẽ kurūm mẽ hano nhūm mẽ tee ri amnhĩ tã omu nē mẽ kêp hapôx kurê kumrēx. Hāmri nē mẽ kêp hapôx kaxyw nē àmra kamã kām kapêr nē kām:

—Kwa tanhmã kot pa wem amnhĩ nê ato? Hêxta waa nē. Apê Tĩrtūm Kra hã axàhpumunh tỳx kênã.

Anhỹr o kām kapêr. ãm hāmri na prem ã harēnh aně. Kêp Tĩrtūm kot mẽ pakaxyw ãm xwỳnh kênã. No nhūm Ijaew nhõ pahijaja kot mẽ kapêr mar nē kêp mẽkarōmnuti hkwy hã hkamnhĩx pymaj nhūm Jejus amnhĩ nê mẽ kām kapêr nē mẽ kām:

—Kwa mẽ ri ã ijarēnh anhỹr kêt nē.

Anhỹr o mẽ kām kapêr hāmri nē mẽ hano nhūm mẽ hapôj nē ma mra.

Mẽmo kaxyw Tĩrtūm kot mẽ pahwỳr Jejus mẽnh ã harēnh

Makre 1.35-39

⁴² Tã nhūm apkati nē myt kator grire nhūm Jejus kot Tĩrtūm mã amnhĩ jarēnh kaxyw kànhmã nhỹ nē kato nē ma nhỹhỹm kapôt mã tẽ. Hāmri nhūm krĩ nhõ xwỳnhjaja hkrã hapôj nē tee ri hapêr nē ma hkôt hpri jakop o mō. Nē nhỹri hwỳr kato nē omu hāmri nē ma nhỹhỹm mōr nē kurê nē kām:

—Kwa Jejus. Kêr ka tokyx ma nhỹhỹm amōr kêt nē. Kritpêm mẽ ixkôt axkamẽ măn. Aně.

⁴³ Hāmri nhūm mẽ kuma nē amnhĩ tã mẽ kām:

—Nà kot paj kritpêm mẽ akôt ixpikamēnh kêt nē. Kot paj ma krĩ piitã hkôt ri Tĩrtūm kapêr o mẽ ahkre ho ri mẽ hkôt ixpa. Tĩrtūm kot tanhmã mẽ ho hkra hto hã harēnhja kot paj mẽ hkôt ri mẽ kām harēnh o ri ixpa. Ja kaxyw na pre Tĩrtūm mẽ awỳr inhmẽ. Aně.

⁴⁴ Nhūm pre ã mẽ kām amnhĩ jarēnh aně. Hāmri nē mẽ kêp kato nē ma Ijaew nhõ pika piitã hkôt Tĩrtūm kapêr o mẽ ahkre ho ri pa. Ijaew nhõ Tĩrtūm kapêr o mẽ ahkre xà hã ixkre kamã mẽ piitã ho mẽ ahkre ho ri pa.

5

Jejus kot amnhĩ kôt mẽ hkwỳjê hwỳr ã harēnh

Matêwre 4.18-22; Makre 1.16-20

¹ Tã nhūm Jejus ma gô rax pê Jenějare hwỳr mō. Hāmri nē hwỳr pôj nē gô mỳri Tĩrtūm kapêr o mẽ ahkre ho xa nhūm mẽ ohtô nē pu hã mar o kuhê. Nē kot hpri hã mar nē hkôt omunh kaxyw hã axpên nhĩgãnh o kuhê. ² Hāmri nhūm tee ri amnhĩ tã mẽ omu nē amnhĩ pu hã hakêx nē rīt nē gôx kām pàr kaprỳ hamēxkrut nē jêtja wa omu. Nhūm õ dôn wa gôx kām kryhti kuhõnh o xa. Nhūm pàr hamẽ hkaprỳ nē ajêt nhūm Jejus omu. ³ Hāmri nē hwỳr tẽ nē hõm axà nē õ dôn pê Simãwja mã aně nhūm hkôt axà nē kii mẽ kêp pàrja amým kunhõ nhūm ajêt. Hāmri nhūm pàr kre rūm amým mẽ ahkre ho nhỹ nhūm mẽ piitã omu nē mar mex o kuhê.

⁴ Tã nhūm mẽ ahkre hpa nē Simãw mã kām:

—E gô xupým wỳr anhõ pàr o axkamẽ nē axte anhõ kryhti mẽ nē ho amnhĩm tep kwỳmnê. Aně.

⁵ Hāmri nhūm tee ri kuma nē kām:

—Kwa na pa mẽ ra kamàt kām tee rēnh o apkati nē ho hõmnēnh kêt tã ka ri inhmã aně. Nom kot paj amar xà hkôt kop kumẽ. Aně.

⁶ Hāmri nē upòm wỳr pàr o axkamē nē htō Andre mē wa axte kryhti mē. Nē ãm mēnh tipxi htã ho tep pynēnh rax kumrēx. Jakamã nhũm kryhtija ra pikaxônkh kaxyw. ⁷ Hāmri nhũm wa tee ri ho anē nē amnhĩ wỳr pàr ò ho mrrar xwỳnhhta wa kãm akir. Jepetew kra Juãw mē Xiakreja wa nhũm wa amnhĩ wỳr wa kãm akir nhũm wa hwỳr pàr ò ho tē hāmri nē mē kryhti hã hije nē pàr wỳr ho api. Hāmri nē pàrta hamē tep o ho nỳt pa nē hamē ho hipu mex nē. Jao nhỹx gônkh mã wa axà. ⁸⁻¹⁰ Hāmri nhũm mē amnhĩ jaēr pē tep xohtō raxta pumu nē kamã no puma nē. Hāmri nhũm Simãwja Jejus kutã hkôn krã ho tēm nē hipō nē nhỹ nē hã hpijaàm kamã kãm kapēr nē kãm:

—Kwa Pahihtì. Kii tamũ axkamē. Akĩnhã ixte amnhĩ tomnuj tỳx xwỳnh na pa. Anē.

Hāmri nhũm kuma nē ãm kuma nē kãm:

—Kwa nà tee ri amnhĩ kukamã ajamexpēr kêt nē. Kot kaj jarãhã hpãnhã tãm amnhĩ nhĩpêx o apa. Na ka ra tep pynēnh rũnh o apa. Tã kot kaj ja kaga nē hpãnhã ma ri mē hkôt Tĩrtũm kapēr o mē ahkre ho ri apa. Kojã mē ohtō nē ama nē Tĩrtũm kôt amnhĩ xunhwỳ nē hkôt amnhĩ nhĩpêx o pa. Jakamã kot kaj te ate tep pynēnh rũnh nē Tĩrtũm mã òr pyrãk o amnhĩ nhĩpêx o apa. Anē.

Nhũm pre ã Jejus Simãw mã kapēr anē. ¹¹ Hāmri nhũm mē gô jakàx ã pàr janhôr tỳx nē kamã hikukrêx piitã hkaga hpa nē ma Jejus kôt pa ho pa.

Jejus kot hkà nhy kro tỳx xwỳnh o mex ã harēnh

Matêwre 8.1-4; Makre 1.40-45

¹² Tã nhũm Jejus ma krĩ hõ hwỳr mō. Hāmri nhũm mēhō my hkà nhy hkro htỳx xwỳnhja omu nē hwỳr tē nē hã hpijaàm kaxyw kutã hkônkrã ho nhỹ nē kãm:

—Pa Pahihtì. E ot pa awỳr amnhĩ to tē. Kwa akupỳm ate mē ixto mex kaxyw axàhpumunh tỳx jakamã kot ka akupỳm amã ixto mex prãm nē mãmri akupỳm ixto mex. Anē.

¹³ Hāmri nhũm kuma nē hkà punuti hã ìhkra xi. Amnhĩ kamã kahak kêt nē hã ìhkra xi nē kãm:

—Nà kot paj ato mex. E akupỳm akà mex kurê kumrēx.

Anhỹrja kôt hāmri nhũm hkàja akupỳm mex pa. ¹⁴ Hāmri nhũm Jejus kãm:

—E kêr ka amnhĩ tã akwỳjê mã tanhmã ijarēnh to hkêt rãhã ma patre hwỳr tē kê akupỳm akà mex ã apumu. Hāmri ka amnepēm Mojes kot mē ate akupỳm amex ã Tĩrtũm mã tanhmã amnhĩ nhĩpêx to hã karōta ka kãm ho anē. Kê mē mē piitã akupỳm akà mex ã apumu. Anē.

Hāmri nhũm kuma nē kãm:

—Tōe. Nà kot paj anē. Anē.

Hāmri nē ma hwỳr htēm kurê kumrēx.

¹⁵ Hāmri nhũm mē piitã axpēn mã Jejus jarēnh o ri hprôt nhũm mē kot kapēr mar kaxyw ma hwỳr mra. Nē mē à xwỳnhjaja nhũm kot mē ho mex kaxyw nhũm mē hwỳr amnhĩ to mra. ¹⁶ Jakamã nhũm pre hte Jejus tōhã mē kêp hapôj nē ahte ma kapôt ã Tĩrtũm mã amnhĩ jarēnh kaxyw mra. Nē kãm amnhĩ jarēnh pa hāmri nē ma akupỳm mē hwỳr mra.

Jejus kot ì kamã htyk xwỳnh o mex ã harēnh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tĩrtũm kapēr o Ijaew jahkre ho pa. Jakamã nhỹri mēhō nhõrkwỹ kamã ho mē ahkre ho xa nhũm Parijew nhõ xwỳnhjê mē Tĩrtũm kapēr tũm o mē ahkre ho mē pa xwỳnhjaja kot mar kaxyw ma hwỳr mra. Na pre ra Garirej rũm mē hkwỳjaja ma hwỳr mra. Nē pika pē Jutej rũm mē hkwy haxwỳja ma hwỳr mra. Nē krĩ pē Jerujarē rũm. Á na prem ohtō nē krĩ piitã kurũm kot mar kaxyw hwỳr akuprō nhũm mē ahkre anē. Nē Tĩrtũm kot ho àhpumunh tỳx jakamã nhũm ÿ hã akupỳm mē à xwỳnhjê ho mex.

¹⁸ Hāmri nhũm hkwyjaja ì kamã htyk xwỳnh mỳ nē Jejus wỳr o tē. Nõr xà kamã nõr rãhã nhũm mē hã hije nē hwỳr o tē. Hāmri nē tee ri kot hwỳr ho àr kaxyw ri mē hkupu ho pa. ¹⁹ Nom nhũm mē ra ixkre ho nỳt rax jakamã nhũm mē tee ri amnhĩ kukamã ho ukapi ho ri pa. Hāmri nē ra hamaxpēr nē ixkre nhĩmõk po hwỳr ho api nē ixkre nhĩmõk

kwỳ grà nê hkôt ì kamā htyk xwỳnhhta jaxà. Nõr xà kamā nõr rāhã Jejus wỳr haxà nê mẽ hipòk ri ho wry nê kutã kuxi nhũm nõ. ²⁰ Hãmri nhũm Jejus amnhĩ tã mẽ kot kaxyw kãm hamaxpêr tỳx ã mẽ omunh mex nê. Hãmri nê ì kamā htyk xwỳnhhta mã kapêr nê kãm:

—Pa? E na pa ra anê tanhmã ate amnhĩ tomnuj to ho apaja o ijapêx pa. Kot paj axte kãm ijamaxpêr kêt nê. Anê.

²¹ Hãmri nhũm Parijew nhõ xwỳnhjê mẽ Tirtũm kapêr tũm o mẽ ahkre ho mẽ pa xwỳnhjaja tee ri kot ã kãm kapêr anhỳrja ã kuma nê axpên mã:

—Tk. Kwa kêp Tirtũm kêt tã te ri kot amnhĩ nhĩpêx pyrãk o ri mẽ nê mẽ kot amnhĩ tomnuj o hapêx ã amnhĩ jarênh o kuhê. Tirtũm pix na kot mẽ nê mẽ kot amnhĩ tomnuj o hapêx xwỳnh kênã. Anê.

²² Nhũm mẽ ã axpên mã Jejus jarênh anê nhũm amnhĩ tã mẽ kuma nê mẽ hamaxpêr kôt mẽ omunh mex nê. Jakamã mẽ kãm:

—Kwa mẽ ã ajamaxpêr anhỳr kêt nê. ²³ Ixte mẽ nê mẽ kot amnhĩ tomnuj o ijapêx par ã amnhĩ jarênh tã mẽ ate ja kôt ixpumunh kêt jakamã na ka mẽ ixkôt ajamaxpêr kêt nê. Nom kot paj mẽ anoo mã akupỹm ì kamā htyk xwỳnhhta o mex ka mẽ apiitã ja hã ixpumu hãmri nê ixkôt ajamaxpêr kurê kumrêx. ²⁴ Ixpê Tirtũm kot mẽ awỳr inhmênh xwỳnhhta na pa. Ixte mẽ anê mẽ ate amnhĩ tomnuj rênh kaxyw na pre mẽ awỳr inhmê pa mẽ awỳr wry. Tã mẽ ate ja kôt ixpumunh kaxyw kot paj mẽ anoo mã myja o mex. Anê.

Hãmri nê hpãnhã ì kamā htyk xwỳnhjaja mã kapêr nê kãm:

—E kãnhmã xa nê anõr xà py nê ma akupỹm anhõrkwỹ hwỳr tẽ. Anê.

²⁵ Nhũm kãnhmã ãm kurê kumrêx. Hãmri nê amnhĩ pumu nê hkĩnh tỳx nê nõr xà py nê mẽ noo mã kato nê akupỹm õrkwỹ hwỳr ma Tirtũm mã mex o mex ã harênh o tẽ.

²⁶ Hãmri nhũm mẽ amnhĩ jaêr pê omu. Nê no hapôx kaxyw hkôt omunh o kuhê nê kamã no puma nê. Nê tee ri omu hãmri nê axpên mã:

—Kokỹỹ. Aa mẽ pahte ã mēhõ kot amnhĩ nhĩpêx anhỳr ã omunh kêt tã na pu mẽ jarãhã ja pumu. Anê.

Hãmri nê Tirtũm mã mex o mex ã harênh o kuhê.

Jejus kot amnhĩ kôt Rewi hwỳr ã harênh

Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkôt mẽ pa ho mẽ pa xwỳnhjê mẽrohã ma nhỹhỹm mō. Hãmri nê nhỹri Rewi pumu. Rewi nhĩxi hõ pê na Matêwre. Rõm kãm mẽ õ pahilti mã amnhĩ kwỳjê pê kàxpore hkwy jamỳnh xwỳnh na pre. Jakamã nhũm ujamỳnh xà hã ixkre kamã mẽ kêp hkwy jamỳnh o nhỹ nhũm Jejus mẽ hkôt mẽ pa o mẽ pa xwỳnhjaja hãnh mra. Hãmri nhũm Jejus àpênh ã omu nê amnhĩ kôt kuwỳ nê kãm:

—Pa? E kwa axàpênhta kaga nê hpãnhã amnê mẽ ixkôt măn tẽ. Nê ixkôt măn ri apa ho apa. Anê.

²⁸ Hãmri nhũm kuma nê àpênh kaga hpa nê ma hkôt mō nê hkôt pa ho pa.

²⁹ Hãmri nhũm mẽmo arĩgro hã nhũm Rewi nhõ mẽ apkur xà hã mẽõ rax nê. Jakamã nhũm amnhĩ nhõrkwỹ hwỳr hkrãmnhwỳjaja nê Jejus mẽ hkôt mẽ pa ho mẽ pa xwỳnhjê hwỳ. Mẽ kot kutã apkur kaxyw nhũm amnhĩ kôt mẽ kuwỳ nhũm mẽ ma hkôt mra nê õrkwỹ hwỳr agjê nê apkur o hkrĩ. Nê mẽ kêp Rõm nhõ pahi mã mẽ kêp kàxpore hkwy jamỳnh xwỳnh kwỳjaja nê mẽ ohtô nê hwỳr akuprõ nê axpên kutã apkur o hkrĩ. ³⁰ Hãmri nhũm Parijew nhõ xwỳnhjê mẽ Tirtũm kapêr tũm o mẽ ahkre ho mẽ pa xwỳnh kwỳjaja mra nê mẽ apkur ã mẽ omu nê tee ri mẽ hkaêx ã Jejus pumu hãmri nê Jejus kôt mẽ pa ho mẽ pa xwỳnhjê hwỳr agjê nê hã mẽ kãm akir nê mẽ kãm:

—Kwa mẽ kot amnhĩ tomnuj ho mẽ pa xwỳnhjê kutã mẽ apkur kêt tã ka mẽ apytar xwỳnhjaja mẽ apimràatã axtem nê mẽ kutã axàpkur o akrĩ. Kwa mẽ ate amnhĩ to mex ronhỹx ka mẽ kutã axàpkur kêt nê. Anê.

³¹ Hãmri nhũm Jejus amnhĩ tã mẽ kapêr ã mẽ kuma nê mẽ kãm:

—Tk. Nà ixte tãm mẽ unhwỳr kaxyw na pa mẽ kutã ixàpkur o nhỹ. Xà na hte tõtôja mẽ mex xwỳnhjê hwỳr mra nê mẽ hkane? Nà ãm mẽ à xwỳnhjê pix wỳr na htem mra. Ra mẽ ate ja pumunh mex kênã. Ja pyrã nê na pa pre mẽ kot amnhĩ to mex xwỳnhjê

hwÿr ixwÿrk kêt nê. Mê kot amnhĩ tomnuj xwÿnhjê pix wÿr na pa pre wÿr. Ixte tãm mẽ unhwÿr kaxyw na pa pre mẽ hwÿr wÿr nê ã jajê kutã ixàpkur o inhÿr anê. ³² ãm mẽ kot amnhĩ tomnuj xwÿnhjê hwÿr na pa pre wÿr nê mẽ kamã ixukapÿri ho ri ixpa. Mê kot amnhĩ tomnuj mã urer nê hpãnhã tãm amnhĩ nhĩpêx o pa kaxyw na pa pre mẽ hwÿr wÿr. Tã ka mẽ atÿx ã ri mẽ ixto akapêr anê. Anê.

Mê hpãmjaja kot amnhĩ nhĩpêx gryk ã Jejus kaga hã mẽ harênh

Matêwre 9.14-17; Makre 2.18-22

³³ Tã nhũm Ijaew kwÿjaja Jejus wÿr mra nê kãm:

—Pa? E ot pa mẽ awÿr mra. Kwa apÿri hã mẽ inhmã mẽmoj jarê. Na hte Parijew nhõ xwÿnhjê mẽ Juãw kôt mẽ pa xwÿnhjaja tõiã Tĩrtũm mã amnhĩ jarênh kaxyw nê apkur kêt rãhã kãm amnhĩ jarê. No akôt mẽ pa ho mẽ pa xwÿnhjaja na htem àmnhĩx apkur o pa kamã kãm amnhĩ jarê. Kwa mo na htem mẽ urak nê tõiã apkur kêt ri kãm amnhĩ jarênh hkêt nê? Anê.

³⁴ Hãmri nhũm mẽ kuma nê mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarê? Mê hkapÿri hkêt kênã. Mê kot ixkôt pa ho pa hã amnhĩ pumunh jakamã hkĩnh nê pa. Kormã ixte mẽ kamã ixpa kênã kot kêt mẽ Tĩrtũm mã amnhĩ jarênh kaxyw nê apkur kêt rãhã kãm amnhĩ jarê. Xà na htem hkràmnhwÿ hã hkĩnh kaxyw hã akuprõ nê hkapÿri nê apkur kêt nê mÿr o hkrĩ? Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwÿnhjaja ixkôt kormã àmnhĩx ri hkĩnh nê apkati mẽ apkur o pa. ³⁵ Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ rĩ kormã ixtã hkapÿri htÿx kãm apkur kêt ri tanhmã amnhĩ nhĩpêx to. Anê.

³⁶ Nhũm pre ã Jejus mẽ kãm hkôt ri mẽ pa ho mẽ pa xwÿnhjê jarênh anê hãmri nê mẽ kãm:

—Nà mẽ kot amnhĩ tomnuj xwÿnhjaja mẽ kot amnhĩ nhĩpêx tũm o amnhĩ pyrak jakamã na htem mẽ kot amnhĩ nhĩpêx nyw kaga. ³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrak kêt jakamã ka htem inhma nê ãm inhma. Kwa mẽ ixkapêr ma nê mẽ ate amnhĩ nhĩpêx tũm gryk ã ixkaga hkêt nê. Anê.

6

Jejus kêp arĩgromnu hpãm ã harênh

Matêwre 12.1-8; Makre 2.23-28

¹ Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwÿnhjê mẽ ma mẽ hpur kôt ri nhÿhÿm ri pa. Hãmri nhũm hkôt mẽ pa ho mẽ pa xwÿnhjaja ra kãm prãm nê mra hãmri nê prãm xaj mẽmo hy te kot harõj pyrak xwÿnhhta kwÿ rê nê kugrà nê ma Jejus kôt hkanhar o mõ. Ijaew kot amnhĩ nhĩpêx xà hkôt. ² Hãmri nhũm Parijew nhõ xwÿnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhÿr ã mẽ omu nê mẽ hã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwÿnhjaja axtem nê mẽmo hyta kwÿ rê nê akôt hkanhar o mõ. Kwa mẽ kãm anê kê mẽ ã amnhĩ nhĩpêx anhÿr kêt nê. Na htem arĩgromnu hã ã amnhĩ nhĩpêx anhÿr kêt nê. Anê.

³⁻⁴ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xà na ka mẽ Tĩrtũm kapêr ã kagã htũm kamã pahi Tawi kot tanhmã amnhĩ nhĩpêx tota kamã harênh nê mar kêt nê? Na pre Tawija hkôt ri mẽ pa xwÿnhjê mẽ nhũm mẽ prãm xaj Tĩrtũm mã amnhĩ jarênh xà hã ixkre wÿr agjê nhũm patre maatija mẽ kãm prãm tÿx ã mẽ omu nê mẽ kãm mẽmoj gõ. Mê kot Tĩrtũm noo mã pãwti jaxwÿr xwÿnhhta nhũm mẽ kãm kugõ nhũm mẽ kuku. Tĩrtũm kapêr ã kagã htũm kot ja nê mẽ kurê htã nhũm mẽ kãm prãm tÿx ã mẽ omu nê mẽ kamã ukapÿri xaj mẽ kãm kugõ. Patre pix kot ja kur kaxyw tã nhũm mẽ kãm kugõ nhũm mẽ kuku. Tã nhũm Tĩrtũm ja hã mẽ omu nhũm ja kêp omnuj kêt nê. Kot mẽ kamã ukapÿri nê mẽ kãm õr nhũm mẽ hã omu nhũm ja kãm mex nê. ⁵ Tã pa na pre Tĩrtũm mẽ akaxyw ixãm nê mẽ awÿr inhmênh jakamã papxpix

na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anê.

Jejus kot ìhkra grà xwỳnh o mex ã harênh

Matêwre 12.9-14; Makre 3.1-6

⁶ Tã nhũm Ijaew nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwỳr tẽ nẽ axà nẽ Tĩrtũm kapêr o mẽ ahkre ho nhỹ. Nhũm mẽhõ myja upòk rũm ìhkra grà xwỳnhja mẽ ìhkõ hã mar o nhỹ. ⁷ Nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja mẽ kãm mẽ hkrãhtũmjê mã Jejus o kapêr prãm xàj htãnopxar o kuhê. Nẽ ìhkra grà xwỳnhhta pumu nẽ hã axpẽn mã:

—Kwa pu mẽ jar pakuhê nẽ Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt kãm ìhkra ho mex. Koja anê nẽ Tĩrtũm kapêr kwỳm ri amnhĩ nhĩpêx. E pu mẽ kop pakuhê nẽ hã omu. Anê.

⁸ Nhũm Jejus ra kot mẽ hamaxpêr kôt mẽ omunh mex jakamã amnhĩ wỳr myta mã hpa ho apê nẽ kãm:

—Pa? E kànhmã xa nẽ amnẽ ixwỳr tẽ. Anê.

Hãmri nhũm kuma nẽ kànhmã xa nẽ hwỳr tẽ. ⁹ Hãmri nhũm Jejus amnhĩ pu hã ri mẽ ho hakêx nẽ mẽ kot mar o hkrĩ xwỳnhjê pumu nẽ mẽ kãm:

—E mẽ inhmã mẽmoj jarẽ. Tanhmã na htem arĩgromnu hã axpẽn nhĩpêx to ho pa wehe? Xà kot ka arĩgromnu hã axà htỳx nẽ nõ hãmri nẽ amnhĩ mex prãm xàj ma mẽhõ hwỳr amnhĩ to tẽ. Hãmri nhũm ãm apumu nẽ apkatim arĩgro mex jamãr pê akane hkêt ka ty nhũm ja amã mex nẽ nà? Rỳ nhũm tanhmã atomnuj to nẽ akupỳm amnhĩ nẽ ajano nhũm ja amã mex nẽ nà? Nà koja ã anhĩpêx anê nhũm ja amã mex kêt nẽ. Na ka htem ã amnhĩ nhĩpêx anhỹr o apa hkêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã mẽ pamã arĩgromnu hã mẽ pahte axpẽn nhĩpêx ã karõ hto? Xà kot puj mẽ axpẽn kãm paxukapĩrĩ ho papa nà? Kot puj mẽ pamã axpẽn kurê ho papa? Xà kot puj mẽ hã mẽmoj punuj pê axpẽn pytà nà? Xà kot puj mẽ hã axpẽn pytàr pymaj arĩgro mex jamã? E mẽ atõ inhmã ja jarẽ. Anê.

Nhũm pre ã mẽ hkukjêr anê. ¹⁰ Mẽ hamaxpêr ã mẽ omunh mex pê ã mẽ hkukjêr anhỹr o xa. Nom nhũm arĩ mẽhõ tanhmã kutã kãm nẽ hkêt nẽ. ãm akryk mar pê omunh o hkrĩ. Mẽ kot tanhmã kãm nẽ nhũm ta pãnhã tanhmã kot mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. Hãmri nhũm Jejus tee ri mẽ omu hãmri nẽ myta mã kãm:

—Tk. Mẽ kot tanhmã inhmã kapêr tore hã. E anhĩhkra katàt. Anê.

Hãmri nhũm ìhkra katàt nẽ akupỳm mex kurê kumrêx. ¹¹ Hãmri nhũm mẽ kãm Jejus kurê xwỳnhjaja tee ri ja hã omu nẽ kamã gryk tỳx nẽ. Arĩgromnu hã kot ho mex jakamã nhũm mẽ kamã gryk tỳx nẽ. Nẽ hã axpẽn kukjêr o kuhê nẽ axpẽn mã:

—Kwa ã kot amnhĩ nhĩpêx anhỹr mỳrapê tanhmã kot puj wem ho? Na ã kapêr anhỹrja o tanhmã mẽ pahto kapêr punuj to. Te mẽ papamjaja mẽ pahte hkĩnhã pahkwỳjê kamã paxukapĩrĩ hkêt pyrãk ã mẽ pajarê. Koja mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nẽ mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêt prêk wỳr tẽ nẽ hã api. Hãmri nẽ kãm amnhĩ jarênh o apkati.

¹³ Tã nhũm kwỳhtã nhũm amnhĩ kôt kot ri mẽ o pa xwỳnhjê hwỳ nẽ amnhĩ kaxyw mẽ ho 12 nẽ mẽ kurê. Nẽ mẽ kãm:

—E mẽ kajaja kot paj ma mẽ pahkwỳjê hwỳr mẽ arê ka mẽ ma inhỹ hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhỹ hã mẽ ahkre ho apa xwỳnh. Anê.

¹⁴ Kot amnhĩ kaxyw mẽ rênh xwỳnhjê nhĩxi na jajaja:

Simãw kumrêx na pre kuta nẽ axte hã hixi mẽ nhũm kêp Pêtre.

Ně Simāw Pêtre hkôt htō Andreja ta.

Ně hkôt Xiakre hta.

Ně hkôt Juāw ta.

Ně hkôt Firiptija ta.

Ně hkôt Patoromew ta.

¹⁵ Ně hkôt Matêwreja ta.

Ně hkôt Tomasja ta.

Ně hkôt Apew kra axtem Xiakre hōja ta.

Ně hkôt Simāw Jeroxja ta.

¹⁶ Ně hkôt Xiakre hō hkra Jutja ta.

Ně hkôt Jut Kariot ta.

Jut Kariotja na pre kormā kot mẽ kām Jejus kurê xwỳnhjê nhĩhkram òr mã. Nhũm kot amnhĩ kukamā omunh mex tã mẽ hkôt amnhĩ kaxyw kuta. Æ mẽ kot Jejus nhỹ hã mẽ ahkre o pa kaxyw mẽ rênh xwỳnhjê nhĩxi kot anhỹr.

Jejus xàpênh ã harênh

Matêwre 4.23-25

¹⁷ Tã nhũm Jejus akupỹm ỹ hã mẽ ahkre ho pa xwỳnhjê mẽ hãmri hixêt prêeta kurũm wrỳ nẽ nhỹri hinur kãm kuhê. Hãmri nhũm nhỹhỹnh mẽ kot mar mã xwỳnhjaja hã akuprô. Kôt mẽ pa ho mẽ pa xwỳnh kwỳjaja nẽ nhỹhỹnh krĩ hkwỳ rũm mẽ hkwỳjaja. Pika pê Jutej kurũm mẽ hkwỳjaja. Nẽ krĩ pê Jerujarê kurũm mẽ hkwỳjaja. Nẽ gô mỳ ri Xir mẽ Sitôja wa kamã mẽ pa xwỳnh kwỳjaja. Æm ahpỹnhã ri nhỹhỹnh krĩ hkwỳ rũm mẽ kot mar mã xwỳnhjaja hã pikuprôn h rax nẽ. ¹⁸⁻¹⁹ Mẽ kot kapêr mar nhũm kot akupỹm mẽ ho mex kaxyw nhũm prem ma hwỳr amnhĩ to pa. Mẽ hkwỳjaja tanhmã ri à kute. Nhũm mẽ hkwỳjaja mẽkarômnuti kot mẽ hwỳr gjêx xwỳnhjaja nhũm mẽ piitã ma hwỳr amnhĩ to pa. Na prem ra amnhĩ kaxyw kãm hamaxpêr o:

—E pa ma hwỳr tẽ nẽ ãm hkupênh pix tã akupỹm inhmex japêr. Anẽ.

Hãmri nẽ ma hwỳr mra nhũm mẽ omu nẽ Tĩrtũm xàhpumunh tỳx o akupỹm mẽ ho mex pa.

Jejus kot hkôt mẽ pa ho mẽ pa xwỳnhjê jahkre hã harênh

Matêwre 5.1-12

²⁰ Tã nhũm Jejus hkôt mẽ pa ho mẽ pa xwỳnhjê jahkre nẽ mẽ kãm: E kot kaj mẽ atô amnhĩ kaxyw tanhmã inhmã ajamaxpêr to nẽ ajamaxpêr o: “Nà ixkukrêx rax kêt tã na hte Tĩrtũm ixkôt pa ho pa. Koja ixkôt pa hkêt pa ixtỳx ri tanhmã amnhĩ nhĩpêx to ho ri ixpa rãhã nẽ. Tĩrtũmja mex kumrêx o kot mẽ hikukrêx raxta jakrenh par.” Anhỹr o ajamaxpêr. Hãmri nhũm Tĩrtũm ã ajamaxpêr anhỹr ã apumu nhũm ja kãm mex nẽ. Hãmri nhũm apê hkra hã ato mex nẽ atãnopxar o akôt pa ka ajamakêtkati nẽ akĩnh nẽ axãmnhĩx ri apa.

²¹ Nẽ kot kaj mẽ atô amã Tĩrtũm kãm hprãm xà hkôt tanhmã amnhĩ nhĩpêx to ho ri apa hprãm tỳx nẽ. Nhũm amnhĩ tã apumu nhũm ja kãm mex nẽ nhũm ato mex nẽ. Nẽ tanhmã ato ka hkôt pix mã amnhĩ to mex o ri apa nẽ ajamakêtkati nẽ akĩnh nẽ axãmnhĩx ri apa.

Nẽ kot kaj mẽ tanhmã amnhĩ tomnuj to. Hãmri nẽ tee ri ja hã amnhĩ pumu nẽ ajamaxpêr. Nẽ apijaàm nẽ akaprĩ xàj amỳr o nhỹ. Amỳr rax nẽ. Hãmri nhũm Tĩrtũm ja hã apumu nhũm ja kãm mex nẽ. Jakamã nhũm anê akaprĩ hta nẽ ato mex nẽ. Ka ajamakêtkati nẽ akĩnh nẽ axãmnhĩx ri apa.

²²⁻²³ Nẽ kwār mẽ mãmri ixtã tanhmã mẽ ato kapêr punuj to nẽ tanhmã mẽ ato hêx to nẽ tanhmã ri mẽ atomnuj to ho pa. Kwār mẽ mãmri ã mẽ anhĩpêx anhỹr o pa. Ka mẽ ãm inhmã pix mã ajamaxpêr rãhã ho apa pê ajamakêtkati nẽ axãmnhĩx ri apa. Kwār mẽ mãmri ã mẽ anhĩpêx anẽ nẽ mẽ amex kêt ã mẽ ajarênh o pa. Amnepêm na pre Tĩrtũm nhỹ hã kapêr xwỳnhjaja nhũm prem ã mẽ hipêx anẽ. Jakamã koja mẽ urak nẽ ã mẽ anhĩpêx anhỹr o pa. Nhũm Tĩrtũm ja hã mẽ apumu nẽ amnhĩm mẽ amex ã mẽ ajarê. Hãmri nẽ nhỹrmã kaxkwa kamã wa inhô krĩ kamã mẽ ato

mex rax nê. Ka mẽ akĩnh nê ajamakêtkati nê axàmnhĩx ri apa. Jakamã kwãr mẽ mãmri pika jakamã ã ixtã mẽ anhĩpêx anê. Anê.

Jejus kot arĩ mẽ kot mar xwỳnhjê jahkre hã harênh

Xiakre 5.1-5

²⁴ Nhũm Jejus nhãm hkôt mẽ pa ho mẽ pa xwỳnhjê nhĩhkô hã mẽ kot Tĩrtũm kôt amnhĩ nhĩpêx o pa hkôt xwỳnhjê hwỳr apkjê. Nê mẽ omu nê tanhmã mẽ kãm kapêr to. Mẽ hikukrêx rũnh xwỳnhjê kumrêx mã kapêr nê mẽ kãm:

E kwa mẽ o kora mẽ akukrêx rũnh xwỳnhjaja. Na ka htem ãm akukrêx rũnh pix mã ajamaxpêr o ri apa nê gryk ã Tĩrtũm mã ajamaxpêr o apa hkôt nê. Jao mẽ amã kapêr mar prãm kêt nê. Nê ãm akukrêx rũnh mã ajamaxpêr pê akĩnh nê ri apikunhar o ri apa. Tã kot ka mẽ nhỹrmã ty hãmri nhũm akĩnh xàja apê hapêx.

²⁵ Nê mẽ amã Tĩrtũm kôt ri amnhĩ nhĩpêx prãm kêt xwỳnhjaja. Kot kaj mẽ nhỹrmã akapri htyx kãm tee ri amnhĩ to hwỳr kaprỹ kãm ga. Kojã mẽ amar kêt nê.

Nê mẽ atyx ri mẽ ate tanhmã amnhĩ tomnuj to hkukamã ajamaxpêr nê apikunhar pê amnhĩ tomnuj o apa xwỳnhjaja. Kot kaj mẽ nhỹrmã ã mẽ ate amnhĩ nhĩpêx anhỹrja mỳrapê mẽ kot amnhĩ xà htyx kamã hamak o pa htũm xà hwỳr ma apa. Hãmri nê kamã akapri xaj amỳr rãhã ho ri apa. Jakamã kwa mẽ o kora mẽ amã Tĩrtũm prãm kêt xwỳnhjaja. Kêr ka mẽ ixkapêr ma nê axkãm ajamak rom nê ri apa.

²⁶ Amnepêm mẽ pakukamã mẽ pa xwỳnhjaja na prem Tĩrtũm kapêr o hkwyjê jahkre ho pa. Nom axtem nê hkwym ri tanhmã mẽ kãm ho hêx to nhũm mẽ kuma nhũm ja mẽ kãm mex nê nhũm mẽ amnhĩm mẽ mex ã mẽ harê. No ãm mẽ mex kêt. Tã mẽ kajaja. Mẽ kot mẽ urak nê axpên mã mẽ amex ã mẽ ajarênh tã Tĩrtũm mã mẽ amex kêt. Jakamã kot kaj mẽ amex kêt nê. Anê.

Mẽ kãm mẽ pahkurê xwỳnhjê jarênh

*Matêwre 5.38-48; Rukre 23.34; mãăn*ên Atre 7.60; Rõmãn 12.14

²⁷ Hãmri nhũm Jejus hpãnhã mẽ piitã mẽ ahkre nê mẽ kãm:

—E mẽ ate inhmar xwỳnhjaja. Kêr ka mẽ kot mẽ atomnuj xwỳnhjaja amnhĩ tã tanhmã mẽ ho hkôt nê. ãm mẽ ho mex pix o ri apa hkukamã mãn ajamaxpêr.

²⁸ —Nê mẽ kot mẽ ato kapêr punuj xwỳnhjaja. Kêr ka mẽ amnhĩ xwar amnhĩ tã tanhmã mẽ ho akapêr punuj to hkôt nê. ãm tãm mẽ kãm akapêr pê mẽ kãm akapêr mex o ri apa. Nê mẽ kot tanhmã ri mẽ ato ho pa xwỳnhjaja ka mẽ ho mex pix o ri apa. Nê mẽ ho Tĩrtũm wỳr pix kukamã mãn ajamaxpêr.

²⁹ —Nê kojã mễhõ anhĩnep akura ka ãm omu nê tanhmã amnhĩ tã ho hkôt nê. Te ate kãm ihkjê pêr nhũm kot ihkjê kamã akuranh pyrak o amnhĩ nhĩpêx nhũm ja amã mex nê. No kêr ka mẽ amnhĩ tã tanhmã mẽ ho hkôt nê.

—Nê kojã mễhõ apê anhĩnôhkà py ka tanhmã hã kãm nê hkôt nê. Kwãr mãmri apê kupy. Ka mãănên te ate kry pê anhĩnôhkà hpakà ry jagiênh xwỳnhhta anhĩnôhkà hkôt kãm òr pyrak o hipêx. Nom kamã agryk kãm kãm òr kêt nê.

³⁰ —Nê kojã mễhõ kêp amrakati kumrêx nê awỳr tẽ nê mẽmoj tã awỳ. Ka anhõ mẽmoj japêr nê mãmri kãm mẽmoj gõ. Kêp anhõxy hkôt kamã kãm mẽmoj gõ. Rỳ kojã mễhõ apê mẽmoj to ahkĩ ka axàhkurê hkôt nê. Nê tanhmã hã ho hkôt nê. ³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axàmnhĩx ri anhõxy hkôt nê tãm mẽ hipêx o ri apa.

³² —Nom kot kaj mẽ amã mẽ piitã mẽ ho mex o apa hprãm kêt japêr. Nê ãm mẽ kot mẽ ato mex xwỳnhjê pix ka mẽ amã mẽ ho mex prãm. Xà kojã Tĩrtũm ja hã mẽ apumu nhũm ja kãm mex nê? Nà kojã kãm mex kêt nê. Kojã mễhõ mẽ ato mex kêt tã ka mẽ amnhĩ rom ho mex nê nhũm Tĩrtũm ja hã mẽ apumu hãmri nê mẽ amex ã mẽ ajarê. Mẽ kot amnhĩ tomnuj o mẽ pa xwỳnhjaja na htem ãm mẽ kot mẽ ho mex xwỳnhjê pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwỳnhjaja na htem

mē piitā mē ho mex o pa. Mē kot tām amnhī nhīpêx xwýnhjaja nē mē kot amnhī tomnuj xwýnhjaja nhūm mē ho hpimràatā mē ho mex o axpēn pyrāk o pa.

³³⁻³⁶ —Nē mē kot amnhī tomnuj xwýnhjaja na htem ām mē kot mē ho mex xwýnh pixjaja nhūm htem amnhī xwar mē ho mex o pa. No mē kajaja. Kêr ka mē māmri mē piitā mē kamā axukaprī pix nē. Jao axāmnhīx ri mē piitā mē kām mēmoj nhōr o ri apa. Nhūm Tirtūm ja hā mē apumu nē ja hā mē ato mex nē.

—Jakamā kêr ka mē amarī mē kām akurê xwýnhjê ho mex nē. Nē mē kamā axukaprī nē. Nē mē piitā mē kām mēmoj nhōr o ri apa. Kê nhýrmā Tirtūm maati mē hā mē amā mēmoj nhōr rax nē. Nē mē ate kot amnhī nhīpêx kôt amnhī nhīpêx xwýnh ā mē ajarē. Tirtūm na hte mē kot amnhī tomnuj xwýnhjê kamā ukaprī ho pa. Jakamā kêr ka mē urāk nē ā mē hipêx anhýr o ri apa. E kêr ka mē ā axpēn nhīpêx anhýr rāhā nē. Anē.

Mē pahte axpēn to pakapēr punuj kêt ā mē pamā karō

Matêwre 7.1-5; mǎānēn Rōmān 2.1-3, 14.1; Wam Korīt 4.5; Xiakre 4.11-12

³⁷ Nhūm Jejus arī mē ahkre nē mē kām:

—Nē kêr ka mē atýx ri amnhī krā hkôt tanhmā mē kot amnhī tomnuj to hā tanhmā axpēn jarēnh to ho ri apa hkêt nē. Kêr kê Tirtūm mē apyrā nē ā mē ajarēnh anhýr kêt nē.

—Nē kêr ka mē tanhmā mēhō kot ra atomnuj tota mā ajamaxpēr rāhā hkêt nē. Ām ho ajamakêtkati tokyx anē nē axte kām ajamaxpēr kêt nē. Kêr kê Tirtūm ja hā mē apumu nē mē apyrā nē axte tanhmā mē ate amnhī tomnuj to mā hamaxpēr kêt nē.

³⁸ —Nē kêr ka mē axpēn kamā axukaprī pē tanhmā axpēn to mex to ho ri apa. Kêr kê Tirtūm ja hā mē apumu nē mē apyrā nē mē akamā ukaprī pē tanhmā mē ato mex to ho pa. Na hte mē pahte axpēn kamā paxukaprī hā mē pahpumunh xà hkôt tanhmā mē pakamā ukaprī to.

³⁹ —Nom kêr ka mē atýx ri tanhmā axpēn to akapēr to hkêt nē. Mē ate aprī hā axpēn jamaxpēr kôt axpēn pumunhre hā. Jakamā kot kaj mē atýx ri mēhō ho akapēr punuj hāmri nē te mē nohkre xwýnhjê hō kot mēmoj pumunh kêt tǎā te kot no ho omunh nē tanhmā harēnh to pyrāk o amnhī nhīpêx. ⁴⁰ Tirtūmja tapxipix na kot mē pajamaxpēr kôt mē pahpumunh par. Mē axāhpumunh týx o mē pahte hakrenh kêt jakamā kwa kêr ka mē ām hkôt pix mā amnhī nhīpêx o ri apa. Kot kaj mē ā amnhī nhīpêx anē hāmri nē gaa nē urāk nē mē piitā mē kamā axukaprī pix o ri apa. ⁴¹⁻⁴² Jao mēhō kot tanhmā amnhī tomnuj to hā omu hāmri nē tanhmā hā kām nē tokyx anhýr kêt nē. Akumrêx ate tanhmā amnhī tomnuj to hā amnhī pumu nē hkaga hāmri nē rī kormā mēhōta hwýr tē nē kot tanhmā amnhī tomnuj to hā kām akapēr to. Anē.

Mē pajamaxpēr xà hkôt mē pakapēr ā mē pajarēnh

Matêwre 7.16-20, 12.33-37

⁴³⁻⁴⁵ Nhūm Jejus arī mē ahkre nē mē kām:

—Nē koja mēmo pī hpār mex nē ô mex nē. Nom koja pār punuj hāmri nē ômnuj nē.

—Nē na htem mēmo xō pumu nē hkôt tanhmā pār kute hā omu. No na htem rārāj pumu nē kēp akunī kamā mrōnhī xō hā hkamnhīx kêt nē. Na htem mēmo xý hpār pumu nē ô xānhre hā hkamnhīx kêt nē. Ja pyrā nē koja mēhō hamaxpēr punuj nē mǎānēn hakwa ho kapēr punuj pix nē. Nē htýx tanhmā amnhī tomnuj to ho ri pa. Nom koja hamaxpēr mex nē hāmri nē mǎānēn hakwa ho kapēr mex o pa. Na htem ahpýnhā amnhī jamaxpēr xà hkôt tanhmā hakwa ho kapēr to ho ri pa. Anē.

Ixkre pijakrut jarēnh

Matêwre 7.24-27; mǎānēn Xiakre 1.22-25; Wam Juāw 2.3-6

⁴⁶ Nhūm Jejus arī mē hkôt mē pa ho pa xwýnhjê jahkre ho nhý nē mē kām:

—Nē kot kaj mē ixpê mē anhō pahihtī hā ijarē hā kot kaj mē ixkapēr kôt amnhī nhīpêx rāhā ho ri apa.

⁴⁷ —E pa mē amā ixprī hā mē kot ixkôt amnhī nhīpêx xwýnhjê kot amnhī nhīpêx jarē ka mē aprī hā inhma. ⁴⁸ Mē kot amnhī nhīpêxja te mēhō hamaxpēr mex pē aptýx kām

amnhĩm òrkwỹ nhĩpêx pyræk. Kojã aptỳx kãm òrkwỹ nhĩpêx nhũm mẽmo arĩgro hã na wrỳk rax nẽ. Nẽ gò htàm rax nẽ hanhi nom nhũm arĩ ãm tỳx nẽ xa. Tã kot kaj mẽ ixkòt amnhĩ nhĩpêx ã kot kaj mẽ te ixkre jarẽnhja pyræk. Jao amex nẽ ajamakêtkati nẽ ri apa. Te gò htàm kot ixkre janhir tã nhũm ãm tỳxta pyræk. ⁴⁹ Nom kojã mẽhõ hamaxpêr mex kêt nẽ htỳx mỗ nẽ gò mỳri gyw rerek kãm amnhĩm òrkwỹ nhĩpêx. Hãmri nhũm mẽmo arĩgro hã na wrỳk rax nẽ. Nẽ hã gò htàm rax nẽ òrkwỹ janhi nẽ kêp grành pa. Tã kojã mẽhõ ixkòt amnhĩ nhĩpêx kêt nẽ te ho mẽhõ kot gò mỳri gyw rerek kãm ixkre nhĩpêxta pyræk. Jao mex kêt nẽ pa. Jakamã kwa mẽ ixkapêr mar tỳx nẽ te gò htàm kot ixkre janhir nẽ grành parta pyræk o amnhĩ nhĩpêx o apa hkêt nẽ. Anẽ.

7

Jejus kot mẽhõ mã àpênh xwỳnh o mex ã harênh

Matêwre 8.5-13

¹ Tã nhũm Jejus mẽ kãm ujarênh pa hãmri nẽ ma akupỳm Kapanaũ hwỳr mỗ. ² Nẽ mỗ nẽ ra hwỳr pỏj. Nhũm krĩ kamã pỏristi krãhtũm mã àpênh xwỳnhja à htỳx nẽ nỗ. Ra htyk kaxyw nẽ nỗ nhũm ò patrãw tee ri omu nẽ kãm hapê jakamã tee ri hkukamã hamaxpêr o hkaprĩ nẽ. ³ Hãmri nẽ Jejus pỏx ã harênh ma nẽ hwỳr Ijaew pigêt kwỳjê rẽ nẽ mẽ kãm:

—Kwa mẽ ma Jejus wỳr mra nẽ kãm ijarẽ kê tokyx man ixwỳr tẽ nẽ inhmã àpênh xwỳnhta o mex. Anẽ.

⁴⁻⁵ Hãmri nhũm mẽ kuma nẽ ma hwỳr mra nẽ omu nẽ kãm:

—Pa. Na pỏristi krãhtũm na awỳr mẽ inhmẽ pa mẽ mra. Mẽ pahkĩnhã kêp Ijaew kêt tã kãm mẽ pahkĩnh nẽ. Tãm na pre mẽ inhõ krĩ kamã mẽ inhmã Tĩrtũm kapêr o mẽ ahkre xà hã ixkreja nhĩpêx. Tã na kãm àpênh xwỳnhta kêp à htỳx nẽ nỗ nhũm apỏx hã ajarênh ma nẽ man awỳr mẽ inhmẽ. Kwa ma hwỳr tẽ nẽ kãm ho mex nà? Anẽ.

⁶ Hãmri nhũm mẽ kuma nẽ mẽ kãm:

—Tỏe. Ma pu mẽ hwỳr. Anẽ.

Hãmri nẽ ma mẽ hkỏt tẽ. Hãmri nẽ kormã òrkwỹ htêp o htẽm mẽ nhũm axte kutã hkrãmnhwỳ hwỳr rẽ nhũm mẽ ma kutã mra. Hãmri nẽ mra nẽ mẽ hkaxpa nẽ Jejus pumu nẽ kãm:

—Pa? Kwa na pỏristi krãhtũmta ã awỳr karỏ anẽ. Na mẽ inhmã: “E kêr ka mẽ mra nẽ nhỹri Jejus kaxpa nẽ kãm awjarẽ kê ãm ata rũm kapêr pix o inhmã à xwỳnhta o mex. Kĩnh ã ixpê Ijaew kêt jakamã ixte amnhĩ kuk ã ixpijaàm tỳx. Jakamã kot paj pam hwỳr ixtẽm kêt nẽ. Kwa kãm anẽ kê ata rũm kapêr pix o inhmã akupỳm ho mex. ⁷⁻⁸ Ixpê mẽ hkrãhtũm jakamã na pa hte inhõ pỏristi mã mẽmoj tã karỏ nhũm mẽ inhmar xà hkỏt inhmã mẽmoj tanhmã hipêx to. Na pa hte mẽ kãm: ‘E mẽ ma mra nẽ ã amnhĩ nhĩpêx anẽ.’ Anẽ nhũm mẽ inhma nẽ ma mrar kurê kumrêx. Rỳ pa mẽ kãm: ‘E mẽ amnẽ ixwỳr mra nẽ ã amnhĩ nhĩpêx anẽ.’ Anẽ nhũm mẽ inhma nẽ ixwỳr mra. No kêt Jejus na hte ixrom tanhmã mẽ à kuteja mã kapêr nhũm kuma nẽ mẽ kêp hapỏj nẽ ma mrar kurê kumrêx. Jakamã kojã ata rũm kapêr pix o inhmã ho mex.” Anhỹr o awỳr karỏ. Jakamã na pa mẽ akutã mra nẽ akaxpa nẽ ã amã kapêr jarênh anẽ. Anẽ.

⁹ Hãmri nhũm Jejus amnhĩ jaêr pỏ mẽ kapêr ma nẽ hkĩnh nẽ. Hãmri nẽ hkỏt mẽ kot mar o pa xwỳnhjê mã kãm:

—Kwa xà na ka mẽ ã kot ixwỳr karỏ xwỳnh jamaxpêr anhỹrta ã ama? Mẽ pahkĩnhã kêp Ijaew kêt tã mẽ arom amnhĩ kaxyw inhmã hamaxpêr tỳx nẽ. Aa mẽ atỏ uræk nẽ ate amnhĩ kaxyw ã inhmã ajamaxpêr tỳx anhỹr kêt tã nhũm mẽ arom kãm àpênh xwỳnh kaxyw inhmã hamaxpêr tỳx nẽ. Anẽ.

¹⁰ Nhũm pre ã mẽ kãm kapêr anẽ hãmri nhũm pỏristi krãhtũm krãmnhwỳjaja kuma nẽ awjanã nẽ ma akupỳm hkrãhtũm nhòrkwỳja wỳr mra. Nhũm ra Jejus kãm àpênh xwỳnhta akupỳm ho mex nhũm mex nẽ ri mra. Hãmri nhũm mẽ akupỳm pỏj nẽ akupỳm mex ã omu.

Jejus kot akupÿm mēhō hkra ho htīr ā harēnh
Juāw 11.1-46

¹¹ Tā nhūm Jejus ma krī pē Naī hwÿr hkôt mē pa ho mē pa xwÿnhjê mērohā mō nhūm mē ohtō nē mē hkôt mra. ¹² Nhūm mē ra Naī hwÿr hpôx o mō. Nē hwÿr agjê. Axpēr kām agjê nē mō nhūm kēp mjên htyk xwÿnhja mē kutā tē. Nhūm hkra myja ham kēp ty. Kra pyxi htā kēp ty nhūm mē kasāw kamā kuxà nē kumÿ nē kot haxàr kaxyw o mō nhūm katorxà mē hkôt mÿr o mō. Nhūm krī nhō xwÿnh kwÿjaja ma hkôt mō. Piitā hkaprī nē hkôt mÿr o mō. ¹³ Tā nhūm Jejus mē hkwÿja mē mō nē mē hkaxpa nē katorxà mÿr ā omu nhūm Jejus kām hkaprī nē. Hāmri nē xa nē kām:

—Pa? Kwa amÿr kēt nē. Anē.

¹⁴ Hāmri nē kasāwta wÿr tē nē hā ĩhkra xi nhūm mē kot mÿnh xwÿnhjaja omu nē amari kām o xa. Hāmri nhūm htyk xwÿnhhta mā kapēr nē kām:

—E kwa kànhmā nhÿ. Anē.

¹⁵ Pu nhūm kànhmā ÿr kurê kumrēx. Nē kapēr o nhÿ. Hāmri nhūm Jejus nita mā kām:
 —E ota akrata. Na akupÿm amā htīr. Anē.

Hāmri nhūm akupÿm htīr ā omu nē hkīnh tÿx kumrēx. ¹⁶ Hāmri nhūm mē kot omunh xwÿnhjaja amnhī jaēr pē akupÿm hkra htīr kām omu nē ÿ hā haxwÿja hkīnh nē. Nē Tīrtūm mā mex o mex ā harē nē axpēn mā:

—Kwa ām hāmri na Tīrtūm ā mē panhīpēx anē nē mē pahwÿr ÿ hā kapēr jarēnh xwÿnhhta mē nhūm mē pahwÿr mō. Tīrtūm mē pakamā ukaprī jakamā na ā mē panhīpēx anē. Nà ām hāmri na ā mē panhīpēx anē. Anē.

¹⁷ Hāmri nē piitā ma pikaja rūm mē kām harēnh o hprōt nhūm mē piitā harēnh ma.

Juāw Paxis tee ri Jejus kukamā hamaxpēr ā harēnh
Matêwre 11.2-6, 11.22; Rukre 4.16-21

¹⁸ Rōm nhūm Juāw Paxisja kēp prēs nē hkrī nhūm hte hkôt mē pa xwÿnhjaja hwÿr mra nē kām Jejus kot tanhmā amnhī nhīpēx to ho pa hā harē. Hāmri nhūm harēnh ma nē tee ri hkukamā hamaxpēr. Hāmri nē hkôt mē pa xwÿnh wa ho axkrut nē wa kuta ¹⁹ nē Jejus wÿr wa kumē nē wa kām:

—Kwa wa ma hwÿr tē nē hkukja. Nē kām: “Xà ka na pre Tīrtūm mē ixwÿr amē nà? Nà xà kormā axtem hō na pa mē kormā amnhī wÿr hamār o ri ixpa?” Anē. E wa ma hwÿr tē nē ā hkukjēr anē nē tanhmā kot amnhī jarēnh to hā ama hāmri nē man akupÿn tē nē inhmā harē. Anē.

²⁰⁻²¹ Hāmri nhūm wa kuma nē ma hwÿr tē. Nhūm Jejus kormā mē ho mex o xa. Mē nohkre xwÿnhjaja nhūm akupÿm mē no ho mex. Nē mēkarōmnuti kot mē hwÿr gjêx xwÿnhjaja nhūm mē nē mē hapôx o ām rāhā nhūm wa ra hwÿr tē nē kormā hā mē omunh o xa. Hāmri nē kām Juāw Paxis kapēr jarē. ²² Hāmri nhūm wa kuma nē wa kām:

—Tÿ. Nà ām hāmri na ja hā ijarē. Ixpê mē ate ixkamā ajamak o apa xwÿnhhta na pa. Jakamā e. Wa kam nē tanhmā ixte amnhī nhīpēx to hā ixpumu hāmri nē ma akupÿm hwÿr tē nē aprī hā kām ijarē. Mē nohkre xwÿnhjaja na pa akupÿm mē no ho mex. Nē mē hkānhÿ xwÿnhjaja pa akupÿm mē hkà ho mex. Nē mē hyk o mē pa xwÿnhjaja pa akupÿm mē ho mex. Nē mē htyk xwÿnhjaja pa akupÿm mē ho htīr. Nē mē kēp amrakati nē ri mē pa xwÿnhjê mā mēmoj mex jarēnh o ri ixpa. Na pa hte ā mē ho mex o ri mē hkôt ixpa anē. Jakamā e kwa wa ma akupÿm hwÿr tē nē ā kām ijarēnh anē. ²³ Kē ijarēnh ma nē arī amnhī kaxyw ixkôt hamaxpēr tÿx rāhā nē. Koja ā amnhī nhīpēx anē nē hamakêtkati nē ri pa. Nē tee ri ijarēnh kukamā hamaxpēr kēt nē. E wa tokyx ma akupÿm hwÿr tē nē ā kām ijarēnh anē. Anē.

Jejus kot Juāw Paxis mex ā harēnh
Matêwre 11.7-19

²⁴⁻²⁵ Nhūm pre ā Jejus wa kām amnhī jarēnh anē nhūm wa kuma nē ma akupÿm Juāw Paxis wÿr tē. Hāmri nhūm Jejus mē kot mar o kuhê xwÿnhjê mā tanhmā Juāw Paxis jarēnh to nē mē kām:

—Na ka prem kapôt ã mar kaxyw ma hwÿr mra. Nom ê mex ã omunh kaxyw rÿ hpijaàm kãm tanhmã kapër to hã mar kaxyw hwÿr amrar kêt nê. ²⁶ Kêp Tirtûm nhÿ hã kapër xwÿnh jakamã na ka prem mar kaxyw ma hwÿr mra. Tirtûm nhÿ hã kot ixkukamã ijarênh o pa xwÿnh na. Ixpê Tirtûm kot mẽ akaxyw ixãm xwÿnh ã na pre mẽ amã ijarênh o pa. Nê hprĩ hã tanhmã mẽ amã ijarênh to. Jakamã na kapër mex o kot wam Tirtûm nhÿ hã kapër jarênh o mẽ pa xwÿnhjê kapër jakrenh. ²⁷ Tirtûm kapër ã kagà htùm kot Juãw kukamã tanhmã harênh to nê harênh kot:

Kot paj Ixkra hkukamã ma mẽ hwÿr harênh o pa xwÿnh mẽ kê ma ri hkukamã mẽ kãm harênh o ri pa. Kê mẽ kuma nê kutêp tãm amnhĩ nhĩpêx.

Anhÿr o Tirtûm Juãw Paxis kukamã harê nhũm mẽ hã kagà. Tã nhũm mẽ awÿr kumê. ²⁸ Juãwja mex kumrêx. Na pre hprĩ hã ixkukamã tanhmã ijarênh to ho pa. Nom ixkôt mẽ pa ho mẽ pa xwÿnhjê hkĩnhã ixkôt pa ho pa hkêt ãm ixkukamã ijarênh o pa. Jakamã ixkôt mẽ pa ho mẽ pa xwÿnhjaja na mex o kot Juãw Paxisja jakrenh. Mẽ kot ixkôt hprĩ hã inhmar o pa jakamã mẽ mex o kot hakrenh. Anê.

²⁹ Nhũm pre ã Jesus mẽ kãm Juãw Paxis jarênh anê. Mẽ kot Juãw mar o kuhê xwÿnh kwÿjaja na pre htem tanhmã amnhĩ tomnuj to ho pa. Tã Juãw kot mẽ kãm Tirtûm kapër jarênh ma nê axpên mã Tirtûm mex ã harê. Nê axpên mã:

—Nà ãm hãmri. Tirtûm kapër na mex kumrêx. Anê.

Hãmri nê amnhĩ tomnuj kaga nê Tirtûm kôt amnhĩ xunhwÿ. Jakamã nhũm Juãw Paxis Tirtûm mã mẽ hkrã kumrã.

³⁰ No nhũm Parijew nhõ xwÿnhjê mẽ Tirtûm kapër tùm o mẽ ahkre ho mẽ pa xwÿnhjaja jajê hkĩnhã Juãw Paxis kaga kumrêx. Jakamã nhũm mẽ hkrã kumrãr kêt nê. Mẽ kot Tirtûm kapër kaga jakamã na pre htem Jesus kapër ma nê ãm kuma. ³¹ Hãmri nhũm Jesus mẽ kãm:

—E pa mẽ amã mẽ piitã htÿx ri hamaxpêr ã tanhmã mẽ harênh to ka mẽ kot amnhĩ nhĩpêx ã mẽ harênh ma. ³² Te mẽ kot mẽhprĩre kot amnhĩ nhĩpêx pyrãk. Mẽhprĩrejaja na htem òrkwÿ kapem hije nê mẽmoj to amnhĩkati ho hkrĩ. Nê tee ri hkwyjê kot amnhĩ nhĩpêx pumu nê mẽ kãm:

Kwa na pa mẽ amã gre htã ka mẽ ixkutã anhökrepôx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akapri nê amÿr kêt nê. Kwa mẽ ri ã amnhĩ nhĩpêx anhÿr kêt nê.

Anhÿr o axpên mã kapêr. Tã te mẽ ate mẽ uràk. Tirtûm kot mẽ awÿr ÿ hã kapêr xwÿnhjê rênh tã ka mẽ te mẽhprĩre kot amnhĩ nhĩpêxta pyrã nê mẽ ama ãm mẽ ama nê mẽ hkôt amnhĩ nhĩpêx kêt nê.

³³ —Juãw Paxis na pre mẽ awÿr mō nê ixpyrà nê apkur mex o ri pa hkêt nê. Nê ixpyrà nê wĩhti ho hkôm kêt nê pa. Tã ka mẽ ja hã omu nê hkaga nê atÿx ri Satanasti nhÿ hã kot tanhmã amnhĩ nhĩpêx to ho pa hã hkamnhĩx nê ri harênh o ri apa. Hãmri nê mẽhprĩre kot amnhĩ nhĩpêx pyrã nê hkôt amnhĩ nhĩpêx kêt nê. ³⁴ Tã pa Juãw pãnhã mẽ awÿr mō. Nê kurom apkati mẽ ixàpkur mex o ri ixpa. Nê kurom wĩhti hkwy ho ixkôm o ri ixpa. Ka mẽ ja hã ixpumu nê atÿx ri ixàpkur rũnh nê ixpipãnh o ri ixpa hã ixkamnhĩx nê ã axpên mã ixto akapêr anhÿr o ri apa. Nê mẽ kot amnhĩ tomnuj xwÿnhjê hkôt ri ixpa hã axpên mã ijarênh o ri apa. ã na ka htem axpên mã ijarênh anê. Jao te mẽ ate Juãw Paxis nhĩpêx pyrã nê ixkaga nê ixkôt amnhĩ nhĩpêx kêt nê. Na hte ã htÿx ri tanhmã mẽ hamaxpêr to ho mẽ pa xwÿnhjaja amnhĩ nhĩpêx anhÿr o ri pa.

³⁵ —No tãm ri mẽ hamaxpêr o mẽ pa xwÿnhjaja na htem ahpÿnhã Juãw mẽ wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpÿnhã wa kot amnhĩ nhĩpêx tã wa hamê ãm hãmri Tirtûm nhÿ hã kapêr jarênh mex o pa. E pu mẽ wa uràk nê Tirtûm kôt amnhĩ xunhwÿ.” Anhÿr o axpên mã wa ijarênh o pa. Anê.

Parijew nhõ xwÿnh pê Simãwre jarênh

Matêwre 26.6-13; Makre 14.3-9; Juãw 12.1-8

³⁶ Tã nhũm Parijew nhõ xwÿnh pê Simãwreja amnhĩ nhõrkwÿ hwÿr Jesus mẽ hkôt mẽ pa ho pa xwÿnhjê mẽ kuwÿ. Mẽ kot kutã apkur kaxyw amnhĩ wÿr mẽ kuwÿ nhũm mẽ

ōrkwỹ hwỳr mra nē mē hwỳr agjê nē apkur kaxyw hkrĩ. ³⁷ Hāmri nhũm mēhõ nija mē hwỳr axà. Na pre hte amnhĩ tomnuj pix o pa. Hāmri nē Jejus õ krĩ hwỳr hpôx nē Simāwre nhōrkwỹ kamã apkur ã harēnh ma nē ma hwỳr tē. Mē hkuxwaxà hã à py nē ma hwỳr o tē. ³⁸ Hāmri nē hwỳr axà nē Jejus pumu nē hwỳr tē nē pum xa. Nē tee ri tanhmã kot amnhĩ tomnuj to ho paja mã hamaxpēr nē hpijaàm nē hkaprĩ nē mỳr o xa. Hāmri nē Jejus kutã hkõn krã ho tēm nē nhỹ nē no kagô ho hpar go. Hāmri nē amnhĩ krã kĩ ho hpar grã nē kupã hāmri nē hpãnhã mē hkuxwa xà ho kuxwa. Kãm hkĩnh xàj ã hipêx anē. ³⁹ Hāmri nhũm Simāwre tee ri ja hã omu nē hamaxpēr o:

—Tk. Kwa jahti kot amnhĩ tomnuj pix o pa xwỳnh tã mē ixwỳr axà nē ã Jejus nhĩpêx anē nhũm amnhĩ nē hanor kêt nē. Kêp ãm hāmri Tĩrtũm nhỹ hã kapēr jarēnh o pa xwỳnh ronhỹx ja hã omu nē amnhĩ nē hanor kurê kumrêx. Anē.

⁴⁰ Hāmri nhũm Jejus amnhĩ tã hamaxpēr ã omu nē hêx rom kãm kapēr nē kãm:

—E Simāwre. Pa amã awjarē ka inhma. Anē.

Hāmri nhũm kãm:

—Tôe. Mex. Mãmri inhma awjarē pa ama. Anē.

⁴¹ Hāmri nhũm kãm:

—Nà koja mēhõ my wa hamēxkrut. Nhũm hõja mēhõ pê kàxpore ho rax kumrêx nē ho ìpresta. Nhũm hõja ãm kêp ho grire nē ho ìpresta. Hāmri nē wa hamē kàxpore ho hapêx pa. ⁴² Hāmri nē akupỹm kot kêp ho ìpresta xwỳnhhta mã hpãnhã òr kaxyw tee ri amnhĩ kukamã hamaxpēr. Ra kot ho hapêx par jakamã tee ri amnhĩ kukamã hamaxpēr. Tã nhũm kot wa kãm ho ìpresta xwỳnhhta wa hwỳr tē nē wa kãm: “Kwa wa tee ri amnhĩ kukamã ajamaxpēr kêt nē. Na pa ra war ate ixto tewēn ã kagàta kaxõnh pa nhũm ja hapêx. Kot paj axte kãm ijamaxpēr kêt nē. Jakamã wa mãmri ajamakêtkati nē axãmnhĩx ri apa.” Anhỹr o wa kãm kapēr. ã mē ujarēnh kot anhỹr. Anē.

Nhũm pre ã Jejus Simāwre mã ujarēnh anē. Hāmri nē hã hkukja nē kãm:

—E nhỹ myja koja we kãm ho tewēn xwỳnhhta kĩnh tỳx nē wehe? Anē.

⁴³ Hāmri nhũm kãm:

—Nà kot kêp ho rax nē ho ìpresta xwỳnhhta koja kãm hkĩnh tỳx o hõta jakre. Anē.

Hāmri nhũm kãm:

—Tỳ. Nà ãm hāmri na ka ã harēnh anē. ⁴⁴ Tã mãn ka ni kot ã inhĩpêx anhỹr xwỳnhhta pumu. Na ka amnhĩ nhōrkwỹ hwỳr ixwỳ pa axà nom ka inhma gô hkwy pa ho amnhĩ par kuhõnh kêt nē. Tã nhũm nija arom ã inhĩpêx anē nē no kagô ho ixpar kuhõ nē amnhĩ krã kĩ ho grã ho nhỹ.

⁴⁵ —Nē anhōrkwỹ hwỳr ixarta ã ka ixkahti hkõt inhmyñh nē ixpär kêt nē. Tã kêt nija arom xatã ixpar pãr o nhỹ. ⁴⁶ Nē ate orti ho ixkrã gregrer kêt tã nhũm arom mē hkuxwaxà ho ixpar kuxwa ho nhỹ. Mēhkukwaxà hã kàxpore xohtõ htã nhũm ãmnhĩx ho ixpar kuxwa ho nhỹ. ⁴⁷ ãm hāmri na pa amã ja jarē. Nija kot amnhĩ tomnuj tỳx tã pa ra nē kot amnhĩ tomnuj o ijapêx pa. Ra kot amnhĩ tomnuj tỳx xwỳnh ã amnhĩ pumunh jakamã na amnhĩ kaxyw inhma hamaxpēr pê kãm ixkĩnh nē ã inhĩpêx anē. No ka na ka hte uräk nē amnhĩ tomnuj tỳx o apa htã uräk nē tee ri ja hã amnhĩ pumunh kêt nē. Tã nita kĩnhã ate amnhĩ tomnuj kaga hkêt jakamã na ka ãm amã ixkĩnh grire. Anē.

Nhũm pre ã Jejus Simāwre mã kapēr anē. ⁴⁸⁻⁵⁰ Hāmri nē nija mã kapēr nē kãm:

—E kãnhmã xa. Ra ate amnhĩ kaxyw inhma ajamaxpēr jakamã na pa ra ate amnhĩ tomnuj piitã amnhĩ katut kõt rēnh pa. Kot paj axte kãm ijamaxpēr kêt nē. Jakamã mãmri ma ajamakêtkati nē axãmnhĩx anhōrkwỹ hwỳr tē. Anē.

Hāmri nhũm mē kot axpēn kutã apkur xwỳnhjaja tee ri kot kãm kapēr anhỹrja ã kuma nhũm ja mē kãm mex kêt nē. Jakamã nhũm mē ri axpēn mã harēnh o:

—Tk. Kwa mēhõ na hte ri kot Tĩrtũm kot amnhĩ nhĩpêx pyräk o amnhĩ nhĩpêx nē mē kot amnhĩ tomnuj o hapêx ã amnhĩ jarēnh o we ri pahti? Anē.

8

Mënijê hkwỳ kot Jejus kôt pa hã mẽ harênh

Makre 15.40-41, 16.9

¹ Tã nhũm Jejus ma mẽ piitã mẽ kãm Tirtũm kapêr o mẽ ahkre ho ri mẽ hkôt pa. Krĩ rũnh kamã nê krĩ hkryre kamã. Mẽ kot amnhĩ tomnuj kaga nê Tirtũm kôt amnhĩ xunhwỳr nhũm kot amnhĩ tã mẽ omunh nê mẽ ho hkra kaxyw nhũm ri mẽ hkôt mẽ kãm harênh o pa. Nhũm ÿ hã mẽ ahkre ho mẽ pa xwỳnh pê 12jaja ma hkôt ri pa. ² Nê mẽni hkwỳjaja. Na pre ra Jejus mẽ hkwỳjê nê mẽkarõmnuti japôj. Nê mẽ hkwỳjaja tanhmã mẽ à kute xwỳnhjaja nhũm akupỹm mẽ ho mex. Xwỳnhjaja nhũm prem haxwỳja ma hkôt ri pa. Hõ pê na pre Marir Matarênh nhũm pre ra Jejus nê mẽkarõmnuti ho 7 nê hapôj. ³ Nê Joanã. Joanã mjên Kujahiti na pre kêp pahihiti Eroxo mã mẽ àpênh xwỳnhjê krãhtũm. Nê Sujãnre. Nê kaxyw mẽnijê ohtô nê Jejus kôt tanhmã mẽ ho ajuta hto ho mẽ hkôt pa. Jao mẽ hikàxpore ho mẽmoj japrô nê ho mẽ kãm mẽ õ nhĩpêx o ri mẽ hkôt pa.

Mẽmo hy hkre xwỳnh

Matêwre 13.1-9; Makre 4.1-9

⁴ Tã nhũm mẽ ra krĩ piitã rũm Jejus wỳr akuprô. Jakamã nhũm mẽ ohtô rax kumrêx nhũm Jejus mẽ kãm ujarênh o nhỹ. No ãm hprĩ hã ujarênh kêt nê. Mẽ kot Tirtũm kapêr mar nê tanhmã hkôt amnhĩ nhĩpêx to nhũm hã kuxi nê mẽ kãm hã ujarênh o nhỹ. ⁵ Nê mẽ kãm:

—E mẽ inhma. Koja mẽhõ ma pur mã mõi nê pur kãm mẽmo hy ho ukapêr o ri pa. Nom nhũm piitã amex kãm rôrôk kêt nê. Kwỳ ahpỹnhã nhỹri rôrôk. Hãmri nhũm hkwỳ aptỳx kãm rôrôk nhũm kuwênhre omu nê hwỳr mra nê hkrêr pa.

⁶ —Nê kên kãm hy hkwỳ rôrôk nê higrôt kutã nojarêr nê higrôt pa. No nhũm kamã aptỳx nê kamã kêp pika hkryre jakamã nhũm higrôt nhũm hã myt ahpa nê arĩgro htỳx mẽ nhũm grã pa. Kamã kên nhũm amgo mex kêt jakamã nhũm grã pa.

⁷ —Nê mrõnhĩ kamã rôrôk xwỳnhja haxwỳja higrôt tã no nhũm utĩ kêp amỹtã nhũm ô hkêt nê.

⁸ —No hirã kamã pika mex kãm rôrôk xwỳnhja. Hãmri hirã kamã rôrôk nê higrôt mex nê piitã ô rax nê. Piitã kamã ô kêp 100. ã mẽ ujarênh kot anhỹr. E kwa mẽ ixujarênh ma nê kãm ajamaxpêr tỳx rãhã ho ri apa. Anê.

⁹ Nhũm pre ã Jejus mẽ kãm ujarênh anê. Hãmri nhũm hkôt mẽ pa ho mẽ pa xwỳnhjaja kuma nê tee ri hkukamã hamaxpêr nê kãm:

—Kwa na pa mẽ ixprĩ hã axujarênh kôt mẽmoj pumunh kêt nê. Aprĩ hã mẽ inhãmã tanhmã harênh to pa mẽ ixprĩ hã kuma nã? Anê.

¹⁰ Hãmri nhũm mẽ kãm:

—Tõe. Nã kot paj mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tirtũm kot ja hã mẽ omunh nê mẽ ho hkra. Ja na pa harê.

—No mũjjaja na mẽ akĩnhã kãm mar prãm nõkati. Jakamã na htem ixujarênh ma nê ãm kuma nê htỳx ri pa. Anê.

Jejus kot prĩ hã mẽmo hy jarênh

Matêwre 13.18-23; Makre 4.13-20

¹¹ Hãmri nhũm Jejus hkôt mẽ pa ho mẽ pa xwỳnhjê mã:

—E kot paj ixprĩ hã mẽ amã mẽmo hy ho ukapêr ã mẽ ujarênhhta jarê ka mẽ inhma.

—Nã mẽmo hyta te kêp Tirtũm kapêr pyrãk. Nê ahpỹnhã hy rôrôk ã pikata te kêp ahpỹnhã mẽ kot Tirtũm kapêr mar xwỳnhjê kot amnhĩ nhĩpêx pyrãk. ¹² Mẽ kot mar xwỳnh kwỳjaja te kot aptỳx kãm hy rôrôk nhũm kuwênh kot hwỳr mra nê hkrêr par xwỳnhhta pyrãk. Jao Tirtũm kapêr ma nhũm Satanasti te kuwênh kot hy hkrêr parta pyrã nê mẽ kot amnhĩ kaxyw Tirtũm kapêr kôt hamaxpêr nê hkôt amnhĩ xunhwỳr pymaj tanhmã nê mẽ hkrã hto. Jakamã nhũm mẽ kapêr ma nom ho hamakêtkati tokyx anê nê axte kãm hamaxpêr nê hkôt amnhĩ nhĩpêx kêt nê.

¹³—Nē mẽ kot mar xwýnh kwýjaja te kot kēnre kamā hkwý rôrôk nē higrôt nē grà par tokyx anhýr xwýnhhta pyræk. Jao Tirtùm kapēr ma nē hkīnh nē. Nē kām mar prām nē. Tã nhũm mēhõ tē nē Tirtùm nē tanhmã kām kapēr to nhũm mẽ kuma nē Tirtùm kaga. Te mẽmo hy higrôt nē grà par tokyx anhýrta pyræk.

¹⁴—Nē mẽ kot mar xwýnh kwýjaja te kot mrônhi kamā hkwý rôrôk nē higrôt nhũm mrônhi kot kēp àmnàr xwýnhhta pyræk. Jao kām Tirtùm kapēr mar prām nē. No ãm mãânēn kām hikukrêx rax nē hikàxpore rax prām xà ãm ja pix mã hamaxpēr o pa. Nē gaa nē ra gryk ã axte Tirtùm kapēr mã hamaxpēr nē hkôt amnhĩ nhĩpêx kêt nē.

¹⁵—Nē mẽ kot mar xwýnh kwýjaja te hirã kamã pika mex kām hy hkwý rôrôk nē higrôt nē ô raxta pyræk. Nē ixkapēr ma nē amnhĩ krã him hagjēnh týx nē ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyræk. E. ã ixujarēnh kot anhýr. Anē.

Kanê mẽ guhkrax wa harēnh

Makre 4.21-25

¹⁶ Nhũm Jejus arĩ mẽ kām ujarēnh o nhỹ nē mẽ kām:

—E mẽ inhma. Xà na htem kanê hpôk hãmri nē guhkrax o hpro rý par krak ri unhwý? Nà na htem ã hipêx anhýr kêt nē. Na htem hpôk nē kýxpê kuhê xà kamã unhwý nhũm hirã mex o kuhê. Nhũm htem ixkrem agjê nē hirã kamã mẽmoj pumunh mex nē. Ja pyrã nē na pa hte mẽ ate inhmar týx kaxyw ixprĩ hã mẽ amã awjarê. ¹⁷ Kormã mẽ ate mẽmoj pumunh nē aprĩ hã mar kêt tã kot kaj mẽ tokyx aprĩ hã omu nē ama. Te mẽmoj kot mẽ apê hpimxur pyræk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpôk kām aprĩ hã mẽmoj pumunh mexta pyræk. ¹⁸ Jakamã kēr ka mẽ ixkapēr mar týx nē hkôt ajamaxpēr rãhã ho ri apa. Jao ixkapēr piitã mar týx nē. Nom kot ka mẽ mar týx kêt nē hã ano hkêt pa nē axte kām ajamaxpēr o apa hkêt nē. Anē.

Jejus kot tanhmã katorxà mẽ htõjê jarēnh to hã harēnh

Matêwre 12.46-50; Makre 3.31-35; mãânēn Eprêw 2.11-12

¹⁹ Nhũm Jejus arĩ mẽ ahkre ho nhỹ. Rôm nhũm katorxà nē htõjaja nhỹhýnh hwýr mõn põj. No nhũm mẽ kot mẽ hã htu rax jakamã nhũm mẽ tee ri hwýr gjêx kaxyw nē kormã kapôt ã kuhê. ²⁰ Hãmri nhũm mēhõja mẽ omu nē Jejus mã mẽ harê nē kām:

—Kwa Pahihti. Ota ra akatorxà mẽ atõjaja awýr põj nē tee ri awýr gjêx mã. O mũj mẽ kormã kapôt ã kuhê. Anē.

²¹ Hãmri nhũm mẽ kuma nē mẽ kām:

—Tõe pa ixkato nē mẽ omu. Inhmã mẽ hapêê. Nom kot kaj mẽ atõ Tirtùm kapēr ma nē hkôt amnhĩ xãm nē hkôt amnhĩ nhĩpêx. Hã kot kaj te apê ixtõ rý ixkatorxà kot amnhĩ nhĩpêx pyræk o pu mẽ axpēn nhĩpêx. Pa te inhmã mẽ hapê pyrã nē inhmã mẽ ajapê nē. Anē.

Jejus kot kôk mã kapēr ã harēnh

Matêwre 8.23-27; Makre 4.35-41

²² Tã nhũm apkati hõ hã nhũm Jejus himô rax ã rēr kaxyw nojarêt nē hkôt mẽ pa ho mẽ pa xwýnhjê mã kām:

—E kot puj mẽ jarãhã ma xarmã mō. Anē.

Hãmri nē mẽ pàr mã gjêx pa nē ma xarmã mō. Garirej rũm kato nē ma xarmã pika hõ hwýr kormã mō. ²³ Nhũm ra Jejus õtxwa nē pàr kre kamã gõr nē nõ. Pu nhũm kôk apêr týx nē nhũm gô axpēn tak týx nē kànhmã harĩ. Nē pàr kre kamã pikapir rax nhũm pãrta mẽ kãm àr o mō nhũm mẽ tee ri amnhĩ nhĩpêx. No nhũm Jejus arĩ htýx gõr nē nõ.

²⁴ Hãmri nhũm mẽ tee ri amnhĩ kukamã hamaxpēr nē kumra nē kām:

—Kwa Pahihti kànhmã nhỹ. Kot puj mẽ jarãhã pahtyk pa. Anē.

Hãmri nhũm kànhmã nhỹ nē kôk mã kapēr nē kām:

—E. Kwa hãmri anhĩkrê. Anē.

Hãmri nhũm hpinhkrēnh par mẽ nhũm gô tãm nõr kurê kumrêx. ²⁵ Hãmri nhũm Jejus hkwýjê hwýr apkjê nē mẽ kām:

—Kwa kormã te mẽ ate amnhĩ kaxyw Tĩrtũm mẽ wa inhmã ajamaxpěr tỳx kêt pyrãk. Anẽ.

Hãmri nhũm mẽ amnhĩ jaer pê kot ã amnhĩ nhĩpêx anhỹr ã omu mẽ no hawênh rũnh mẽ tee ri axpẽn pumunh pê hamaxpěr o kuhê mẽ axpẽn mã:

—Kokỹỹ. Jejus kệp mẽ panhiõ hkêt. Mẽ pahtõ kot pu we te kot amnhĩ nhĩpêx pyrà mẽ we kòk mã pakapěr nhũm we pama anhĩkrê? Nà Jejus mẽ parom àhpumunh tỳx o àhpumunh tỳx. Jakamã na ã anẽ. Anẽ.

Jejus kot mēhõ nê mẽkarõmnuti kator ã harēnh

Matêwre 8.28-34; Makre 5.1-20

²⁶ Tã nhũm mẽ ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nẽ Garirej nhĩkjê hã na Gerasja. Jakamã nhũm mẽ ra hwỳr rê. ²⁷⁻²⁹ Hãmri mẽ pàr kre rũm hapôj mẽ api mẽ mra nhũm mẽhõ myja mẽ kutã tẽ. Na pre ra hwỳr mẽkarõmnuti hkwy agjê nhũm mẽ ỹ hã oprê htỳx mẽ hkênh mẽ ri mra. Nẽ òrkwỹ kamã hkrĩ hkêt mẽ. ãm ri kapôt ã pa ho pa. Mẽ htykjê hã pika kamã kên kre kaêx kôt ri pa. Na pre ra krĩ nhõ xwỳnhjaja xatã tee ri unê mẽ hkaxpre. Tee ri kàx o ri hkaxpre htã no nhũm amnhĩ nê rēnh pa. Nhũm mẽkarõmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pàr rũm hapôj mẽ api nhũm mẽ omu mẽ mẽ kutã tẽ mẽ Jejus kaxpa. Nhũm amnhĩ wỳr omu mẽ nê tanhmã mẽkarõmnuti mã kapěr to. Hãmri nhũm my xoprêja hwỳr tẽ mẽ kutã hkõn krã ho tēm mẽ nhỹ. Hãmri mẽ kàxpêê amnhĩ tã kãm kapěr. Nom tãm kapěr kêt mẽ. Mẽkarõmnuti nhỹ hã kãm kapěr mẽ kãm:

—Pa Tĩrtũm Kra Jejus? Kwa mo kaxyw na ka mẽ ixwỳr tẽ? Kwa tanhmã mẽ ixto hkêt mẽ. Anẽ.

³⁰ Hãmri nhũm mẽ kãm:

—Kwa tanhmã na mẽ anhĩxi kute? Anẽ.

Nhũm mẽ kãm:

—Nà mẽ ixpê Mẽohtõhti. Anẽ.

Mẽkarõmnuti ra kot hwỳr ohtõ mẽ gjêx jakamã na prem ã kãm amnhĩ nhĩxi jarēnh anẽ.

³¹⁻³² Hãmri mẽ Jejus mã:

—Kwa jahti mẽ mẽ ijapôj mẽ mẽ kot amnhĩ xà htỳx kamã hamak tũm xà hwỳr mẽ ixrēnh kêt mẽ. Hagrô hkwy mũj wỳr mãn mẽ ixrê pa mẽ hpãnhã hwỳr mãn hagjê nà? Anẽ.

Hagrôja kii mẽ kệp amỳm hixêt ã ri apkur o pa nhũm mẽ ã Jejus mã mẽ hwỳr amnhĩ to hwỳr anẽ. Hãmri nhũm mẽ kãm:

—Tõe. Tô mẽ tãm hwỳr mãn mra. Anẽ.

³³ Hãmri nhũm mẽ kuma mẽ myta pê hapôj mẽ ma hagrôja wỳr mrar kurê kumrēx mẽ mẽ kãm gjêx pa. Hãmri nhũm myja akupỹm tãm hkrã. No nhũm hagrôja mẽkarõmnuti pymaj amỹra mẽ axkahkũm mẽ hprõt mẽ himô hã krã hixêt ã axpum rôrôk mẽ gôx kãm mrõ mẽ pikaprãr pa. ³⁴ Hãmri nhũm hagrô jamãr xwỳnhjaja tee ri omu hãmri mẽ ma mẽ õ patrãw wỳr akupỹm mẽ piitã mẽ kãm harēnh o hprõt mẽ mra. ³⁵⁻³⁶ Nhũm mẽ tee ri mẽ kuma hãmri mẽ ma kot Jejus pumunh mã hwỳr mra mẽ hkaxpa. Nẽ kuri myta pumu nhũm ra akupỹm tãm hkrã mẽ tãm amnhĩ nhĩpêx mẽ ê kamã mex mẽ nhỹ. Nhũm mẽ kot hã omunh xwỳnhjaja mẽ kãm ujarēnh pa. Nhũm mẽ kuma mẽ tee ri amnhĩ kukamã hamaxpěr o ra kãm ma mẽ. ³⁷⁻³⁹ Hãmri mẽ amnhĩ nê Jejus mã kapěr mẽ kãm:

—E kwa mẽ tokyj ma akupỹm amrar kurê kumrēx. Anẽ.

Hãmri nhũm mẽ kuma mẽ awjanã mẽ ma akupỹm pàr wỳr mra mẽ agjê. Nhũm akupỹm mex xwỳnhhta mẽ hkôt hkrã nom nhũm Jejus kãm:

—Nà kot kaj mẽ ixkôt amõr kêt mẽ. Ma akupỹm anhõ krĩ hwỳr mãn tẽ mẽ Tĩrtũm kot tanhmã akupỹm ato mex to hã mẽ kãm amnhĩ jarēnh o ri mẽ hkôt apa. Anẽ.

Hãmri nhũm kuma mẽ ma akupỹm krĩm tẽ mẽ ri mẽ kãm Jejus kot tanhmã ho mex to hã harēnh ri mẽ hkôt pa.

Jejus kot wa ho axkrut nê wa ho mex ã harēnh

Matêwre 9.18-26; Makre 5.21-43

⁴⁰ Tã nhũm Jejus mẽ ma akupỹm xarmã mō nê rê nê mẽ kutêp mẽ pikuprõnh xwỳnhjê pumu. Nhũm mẽ ra amnhĩ wỳr mẽ omu nê mẽ kutêp gô jakàx ã pikuprõnh rax nê. Jakamã nhũm mẽ mẽ hwỳr pôj nhũm mẽ amnhĩ wỳr Jejus pumu nê hkĩnh nê. ⁴¹⁻⁴² Hãmri nhũm Jajti ma hwỳr tẽ. Ijaew nhõ Tirtũm kapêr o mẽ ahkre xà hã ixkre jamãr xwỳnh na pre. Nhũm pre hkra ni pyxire. Hã amgrà pê 12. Tã ra kêp à htỳx nê htyk kaxyw nê nō. Hãmri nhũm hipêêxàja tee ri omu hãmri nê Jejus wỳr tẽ nê kutã hkõnkrã ho tẽm nê nhỹ nê ho kuwỳ nê kãm:

—Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nê kaxyw amã ijamaxpêr nê awỳr tẽ. Kwa ma ixkôt inhõrkwỹ hwỳr tẽ nê inhmã omu nê tokyx inhmã ho mex nà? Anẽ.

Hãmri nhũm kuma nê ma hkôt tẽ. Nhũm mẽ ohtô nê wa hkôt pry hã mra nê axpên nhĩgã nê axpên kujahêk o hkôt mra. ⁴³ Hãmri nhũm mēhō nija haxwỳja wa hkôt tẽ. Na pre hte hkamrô hkryre rãhã ho pa hã ra amgrà kêp 12. Nhũm tõtô tee ri kot ho mex kaxyw hkane kaprỳ ho pa. ⁴⁴ Jakamã nhũm tee ri amnhĩ kukamã hamaxpêr hãmri nê Jejus jarēnh ma nê ma mẽ hkôt hwỳr htẽm kurê kumrêx. Nom nhũm mẽ ohtô rax nê hkôt mōr jakamã nhũm mẽ hkaêx kôt hwỳr tẽ nê hkatut kôt kêp ê nhĩrê kupê. Hãmri nê ãm kêp ê pix kupênh tã akupỹm mex. ⁴⁵ Hãmri nhũm Jejus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atō na ka ri amnhĩ kaxyw inhmã ajamaxpêr tỳx pê ixpê ixê kupê? Anẽ.

Hãmri nhũm mẽ piitã tee ri axpên pumu nê kãm amnhĩ tã aprã. Hãmri nhũm Simãw Pêtre kãm:

—Mê kot apê amnàr griã kot ka kêt ri mēhō kot apê hkupênh xwỳnh ã ri mẽ hkukja. Kwa măn ãm mēhō amarĩ apê hkupê. Anẽ.

⁴⁶ Hãmri nhũm kãm:

—Nà mēhōja amarĩ hkupênh kêt nê. Na amnhĩ kaxyw inhmã hamaxpêr tỳx pê ixpê hkupê. Tã ixàhpumunh tỳx xàja kôt na akupỹm mex. Nom ixte mēhō kot ixpê hkupênh xwỳnhja pumunh jakamã na pa ixêx rom ã amnhĩ tã ri mẽ hkukjêr anẽ. Kwa mẽ atō inhmã amnhĩ jarẽ. Anẽ.

⁴⁷ Hãmri nhũm mēhō nita kuma nê tee ri kêp kot amnhĩ to hpimxur prãm kaprỳ. Hãmri nê hpijaàm kãm hwỳr htertet o tẽ nê kutã hkõn krã ho tẽm nê nhỹ nê kãm amnhĩ jarẽ nê kãm:

—Ma pa na pa inhmã inhmex prãm xàj apê axê kupê. Tã na pa akupỹm inhmex. Anẽ.

⁴⁸ Hãmri nhũm Jejus kuma nê kãm:

—Tôe. Nà ra ate amnhĩ kaxyw inhmã ajamaxpêr tỳx kôt ate ã amnhĩ nhĩpêx anhỹr jakamã na ka akupỹm amex. E mãmri ajamakêtkati nê ma akupỹm tẽ. Anẽ.

Hãmri nhũm kuma nê hkĩnh nê ma akupỹm tẽ. ⁴⁹ Rôm nhũm Jajti mã àpênh xwỳnhjê hõ òrkwỹ rũm ma ò patrãw kutã tẽ nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kôt hwỳr Jejus o mō? Kwãr mãmri ma akupỹm tẽ. Anẽ.

⁵⁰ Hãmri nhũm Jejus kuma nê Jajti mã kãm:

—Kwa tee ri akra hkukamã ajamaxpêr kêt nê. Kaxyw inhmã măn ajamaxpêr tỳx nê. Koja te ra apê htyk tã koja akupỹm amã htĩr. Anẽ.

⁵¹⁻⁵³ Hãmri nhũm mẽ mō nê òrkwỹ hwỳr pôj nê hwỳr axà nê mẽ omu nhũm mẽ ra htyk xwỳnhhta ã htu rax nê. Nê omũj ri mur. Hãmri nhũm Jejus mẽ hwỳr axà nê mẽ mỳr ã mẽ omu nê mẽ kãm:

—Kwa mẽ hãmri amỳr kêt nê. Na nireta mẽ apê htyk kêt na ãm gõr nê nō. Anẽ.

Hãmri nhũm ra mẽ kot htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hãmri nhũm Jejus htyk xwỳnhhta wỳr hitom wỳr àr kaxyw nê amnhĩ kôt Juãw nê Xiakre nê Pêtre nê kaxyw htyk xwỳnh katorxà nê hipêêxàja. Jajê pix na pre amnhĩ kôt mẽ ho agjê. ⁵⁴ Hãmri nê htyk xwỳnhhta wỳr tẽ nê hpa hã kupy nê kãm:

—Pa? Kwa tokyx kànhmã nhỹ. Anẽ.

⁵⁵ Hãmri nhũm akupỹm htĩr nê kànhmã ãr kurê kumrêx. Hãmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Măn ra kãm prãm nê. Anẽ.

⁵⁶ Hāmri nhūm katorxà mẽ hipêêxà wa amnhĩ jaêr pê akupỹm htĩr kãm omu nẽ kamã no pyma ho hkĩnh tỳx nẽ. Hāmri nhūm Jejus wa kãm:

—E wa inhma. Kêr ka wa akupỹm ixte war amã ho htĩr ã ri mẽ kãm ijarênh o ri apa hkêt nẽ. ãm kwarĩ ho kwarĩ. Anẽ.

9

Jejus kot mẽ ho 12 nẽ ahpỹnhã mẽ rênh ã harênh

Matêwre 10.1, 10.5-15; Makre 6.7-13; Rukre 10.1-12; mãănẽn Atre 13.49-50, 18.6

¹⁻² Tã nhūm Jejus hkôt mẽ pa ho mẽ pa xwỳnh pê 12jê mã kapêr nẽ mẽ kãm:

—E mẽ amnẽ ixwỳr mra nẽ ixkapêr ma. Na pa ra mẽ amã ixàhpumunh tỳx xà hkwy gō. Jakamã kêr ka mẽ inhỹ hã ma ri akwỳjê hkôt tanhmã mẽ ho mex to ho ri mẽ hkôt apa. Mẽ à xwỳnhjê ho mex o ri mẽ hkôt apa. Nẽ mẽ hkwyjê nẽ mẽkarōmnuti japôj. Nẽ mẽ piitã mẽ kãm anẽ kê mẽ tokyx Tĩrtũm kôt amnhĩ xunhwỳ kê mẽ ho hkra. ³ Nom kêr ka mẽ amnhĩ kôt akukrêx ho ohtô nẽ ri ho apa hkêt nẽ. Nẽ amnhĩ kaxpar xà hã kô ho apa hkêt nẽ. Nẽ kawà htur nẽ ho apa hkêt nẽ. Nẽ amnhĩ kôt axàpkur xà hã anhō ho apa hkêt nẽ. Rỳ akàxpore rax nẽ ho apa hkêt nẽ. ãm mẽ anhō kamĩs ho pixi nẽ haxà nẽ ri hã apa. Nẽ anhỹ kamã ã ri mẽ hkôt apa anẽ. Kê mẽ kot mẽ akapêr mar xwỳnhjaja tãm mãn mẽ amã mẽ anhō ho pa.

⁴ —Nẽ kêr ka mẽ nhỹri krĩ hō hwỳr pōj nẽ apōx xà kamã mẽhō nhōrkwỹ kamã hkôt ri apikamênh tãmtã kurũm akupỹm ajapōj nẽ ma hpãnhã nhãm krĩ hō hwỳr apa. Nom atỳx ri nhãm mẽ hwỳr amrar nẽ nhãm mẽ hwỳr amrar kêt nẽ.

⁵ —Nẽ koja mẽ nhỹri mẽ akapêr kaga ka mẽ amnhĩ tã mẽ kamã ama nẽ tokyx mẽ kurũm ajapōj nẽ ma nhãm apa. Nẽ anojarêr nẽ mẽ noo mã akuhê nẽ amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhūm Tĩrtũm kot amnhĩ pyrà nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpêx anẽ. Hāmri nẽ ma hpãnhã krĩ hō hwỳr apa. Anẽ.

⁶ Nhūm pre ã Jejus mẽ kãm mẽ àpênh ã karō anẽ. Nhūm mẽ kuma hāmri nẽ hapōj nẽ ma mẽ hkôt pa. Ma krĩ piitã hkôt akupỹm mẽ à xwỳnhjê ho mex nẽ Tĩrtũm kapêr o tanhmã mẽ ahkre hto ho ri mẽ hkôt pa.

Pahi Erox tee ri kot Jejus kukamã hamaxpêr ã harênh

Matêwre 14.1-12; Makre 6.14-29

⁷⁻⁸ Hāmri nhūm pika pê Garirej kamã mẽ piitã Jejus jarênh ma nẽ ahpỹnhã ri tanhmã axpên mã harênh to. Mẽ hkwyjaja kêp finat Juãw Paxis akupỹm htĩr ã ri harê. Nhūm mẽ hkwyjaja amnepêm mẽ hkukamã Tĩrtũm nhỹ hã kapêr jarênh xwỳnhjê hō ra akupỹm htĩr ã harê. Nhūm mẽ hkwyjaja kêp finat Eris ã axpên mã harê. Jakamã nhūm pahĩhti Eroxja mẽ kot ahpỹnhã tanhmã ri harênh toja ma nẽ tee ri hkukamã hamaxpêr. ⁹ Nẽ hamaxpêr o:

—Kwa mẽhō na hte we ri ã amnhĩ nhĩpêx anhỹr o pa wehe? Nà finat Juãw Paxis kêt. Ra ixte amnepêm hã ixàmnênh nhūm mẽ kot inhmã mut krãhyr nẽ hpĩr kênã. Kwa mẽhō na hte we ri ã amnhĩ nhĩpêx anẽ?

Anhỹr o hamaxpêr hāmri nẽ kãm omunh prãm nẽ.

Jejus kot mẽ ho ohtô nẽ mẽ kãm mẽ õ hã harênh

Matêwre 14.13-21; Makre 6.30-44; Juãw 6.1-14

¹⁰ Tã nhūm Jejus nhỹ hã kapêr o mẽ pa xwỳnhjaja akupỹn hwỳr mran pōj nẽ mẽ kot ri tanhmã amnhĩ nhĩpêx to ho pa hã kãm amnhĩ jarê. Hāmri nhūm mẽ kuma nẽ ma krĩ pê Pesêj wỳr kormã mẽ o mō. ¹¹ Hāmri nhūm krĩ hkwy nhō xwỳnhjaja ra ma mẽ mōr ã mẽ harênh ma nẽ ohtô nẽ ma mẽ hkôt mra nẽ nhỹri mẽ hkôt pōj. Nhūm Jejus amnhĩ kôt mẽ omu hāmri nẽ tanhmã mẽ ho mex to ho xa. Kôt mẽ à nẽ mẽ pa xwỳnhjaja nhūm akupỹm mẽ ho mex. Hāmri nẽ Tĩrtũm kapêr o mẽ ahkre nẽ mẽ kãm:

—E kot kaj mẽ atō amã amnhĩ tomnuj kaga hprãm xàj Tĩrtũm kôt amnhĩ xãm nhūm amnhĩ tã apumu nẽ ato hkra. Hāmri ka ajamakêtkati nẽ amex nẽ axàmnhĩx ri apa.

Anhÿr o mẽ kãm kapêr pê mẽ ahkre ho xa.

¹² Tã nhũm myt àr kaxyw nhũm Jejus nhÿ hã mẽ ahkre ho mẽ pa xwÿnh pê 12jaja hwÿr mra nẽ kãm:

—Kwa na ra kamàt o mō. Mẽ hano kê mẽ amnhĩ to krĩ hō japêr nẽ tokyx amnhĩm mẽmoj japrô nẽ kuku nẽ hikwÿ nẽ gōr. Mo mẽ panhō? ãm jar kapôt pix kênã. Anẽ.

¹³⁻¹⁴ Hãmri nhũm mẽ kuma nẽ mẽ kãm:

—Kwa ka mẽ kamjaja mẽ kãm mẽmoj gō kê mẽ kuku. Anẽ.

Nhũm mẽ ohtô rax nẽ mẽ hkôt mra. Mẽmyjaja kêp 5.000 nẽ kaxyw mẽ hprô nẽ mẽ hkrajaja. Jakamã nhũm mẽ kêp 12jaja Jejus kot ã mẽ kãm kapêr anhÿrja ma nẽ tee ri mẽ hkukamã hamaxpêr nẽ kãm:

—Kwa nà mo mẽ panhō rax? Mẽ panhō pãwti kêp sĭk nẽ kaxyw tep grà axkruttre kênã kot kêt we mẽ piitã mẽ hipêx pa. Xà kot paj mẽ ma mra nẽ nhÿri mẽ kãm mẽ apkur xà japrô nhũm mẽ kuku? Anẽ.

Hãmri nhũm mẽ kãm:

—Nà pu mẽ kãm mẽmoj japrôr kêt nẽ. Mẽ panhōta kot puj mẽ kãm ho anhrà. E mẽ kãm anẽ kê mẽ ahpÿnhã ri hije nẽ hkrĩ nẽ apku. Anẽ.

¹⁵ Hãmri nhũm mẽ kuma nẽ mẽ kãm anẽ nhũm mẽ piitã hkrĩ pa. ¹⁶ Hãmri nhũm Jejus pãwti mẽ tepta jamÿ nẽ kànhmã kaxkwa hwÿr rĭt nẽ kànhmã kupẽ nẽ Tĭrtũm mã harẽ nẽ kãm:

—Pa Papaj? Apê mẽ inhmã mẽ inhō xwÿnh jakamã amex o amex. Anẽ.

Hãmri nẽ mẽ kãm ho hkry hpa nẽ hkôt mẽ pa ho mẽ pa xwÿnhjê mã kugō nhũm mẽ ô ri ho xa nẽ ho mẽ hipêx par kumrêx. ¹⁷ Nhũm mẽ piitã apkur mex o hkrĩ. Mẽōja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nẽ ho ôhy htu hpa. Nhũm arĭ mẽō jakrêx prä nhũm Jejus kôt mẽ pa ho mẽ pa xwÿnhjaja akupÿm hakrêx o pikuprōnh pa nẽ ho kawà ho 12 nẽ ho nÿt pa.

Jejus kot amnhĩ tã hkôt mẽ pa xwÿnhjê kukjêr ã harênh

Matêwre 16.13-19; Makre 8.27-29

¹⁸ Tã nhũm arĭgro hō hã nhũm Jejus nhÿri ahte Tĭrtũm mã amnhĩ jarênh o nhÿ nhũm hkôt ri mẽ pa ho mẽ pa xwÿnhjaja ma hwÿr mra. Hãmri nhũm amnhĩ wÿr mẽ omu nẽ amnhĩ tã tanhmã mẽ hkukjêr to nẽ mẽ kãm:

—Kwa mẽ inhmã mẽmoj jarẽ. Tanhmã na htem ahpÿnhã axpên mã ijarênh to wehe? Anẽ.

¹⁹ Hãmri nhũm mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ato finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ nhũm mẽ hkwyjaja tōhã apê Tĭrtũm nhÿ hã kapêr jarênh xwÿnhjê hō ra akupÿm htĭr ã ajarẽ. ã na htem ahpÿnhã ajarênh anẽ. Anẽ.

²⁰ Hãmri nhũm mẽ kuma nẽ mẽ kãm:

—No mẽ kajaja? Ixpê mẽhō hã na ka htem ixkamnhĭx? Anẽ.

Hãmri nhũm Simãw Pêtre kãm:

—Nà mẽ pajaja na pa htem apê Tĭrtũm kot mẽ ixkaxyw axãm nẽ mẽ ixwÿr amênh xwÿnh ã ajarẽ. Nẽ apê mẽ ixpiitã mẽ inhō Pahi Maati hã ajarẽ. ã na pa htem ajarênh anẽ. Anẽ.

²¹ Hãmri nhũm kuma nẽ mẽ kãm:

—Tÿ. Nà ãm hãmri na ka htem ã ijarênh anẽ. ã ixte anhÿr kênã. Nom kêr ka mẽ inhmar kumrêx. Kêr ka mẽ kormã ã akwÿjê mã ijarênh anhÿr o ri apa hkêt nẽ. Anẽ.

Jejus kot amnhĩ kukamã amnhĩ jarênh

Matêwre 16.21; Makre 8.31-33

²² Nhũm Jejus arĭ hkôt mẽ pa ho pa xwÿnhjê mã kapêr nẽ hprĭ hã tanhmã mẽ kãm amnhĩ jarênh to nẽ mẽ kãm:

—Nà ãm hãmri na Simãw Pêtre ijarẽ. Mẽ kajaja ra mẽ ate ja hã ixpumunh mex. No mẽ pahkwÿjaja na mẽ akĭnhã mẽ kãm ja hã ijarênh mar nẽ ja hã ixpumunh prãm kêt. Ijaew pigêtjaja nẽ Tĭrtũm kapêr tũm o mẽ ahkre o mẽ pa xwÿnhjaja nẽ patre krãhtũmjaja mẽ

kām ja hā ixpumunh prām kêt. Jakamā koja mẽ nhỹrmā ixpynê nê ixtak rax nê. Hāmri nê ixpĩ. Nom kot paj ixtyk ã apkati axkrunêpxi nhũm Tĩrtũm akupỹm ixto ixtĩr. Anê.

Jejus krajaja tanhmã kot amnhĩ nhĩpêx to hã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnên Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhũm pre ã Jejus amnhĩ kukamã hkôt mẽ pa ho mẽ pa xwỹnhjê mã amnhĩ jarênh anê hāmri nê hpānhã mẽ kot mar o kuhê xwỹnh piitã mẽ kām kapêr nê mẽ kām:

—E kot ka mẽ atō ate ixkôt amnhĩ xām ã amnhĩ jarê hāmri nê mããnên ã amnhĩ jarênh anê nê amnhĩ jarênh o: “Jejus kêp inhō Pahihti jakamã kot paj kapêr kôt pix mã amnhĩ nhĩpêx rāhã ho ri ixpa. Kwār ixkwỹjaja tanhmã hã inhĩpêx to.” Anhỹr o apkati mẽ ã amnhĩ jarênh anê.

²⁴ —Koja mẽ ixtã mẽ atōx pĩ rỹ tanhmã mẽ atō hto ka ty. Tã koja akaxwỹnh ma inhō krĩ mex wỹr àpir kurê kumrêx. Hāmri nê kamã atĩr tũm nê amex rāhã apa ho apa. Nom kot kaj mẽ jar atĩr prām xaj ixkaga hāmri nê hwỹr axàpir kêt nê.

²⁵ —Nê koja mẽhō hikukrêx rax gryk ã Tĩrtũm kaga. Hã koja nhỹrmã ty nê ÿ kamã kuwy hwỹr ma mō nê amnhĩ kôt hikukrêx õ hpyr nê o mōr kêt nê. Koja tee ri kuwy hwỹr mōr pymaj amnhĩ nê hikukrêx rax o amnhĩ pānhã amnhĩrer prām kaprỹ.

²⁶ —Nê koja mẽhō ixte mẽ ahkre hã inhma nhũm ja kêp omnuj nhũm ixkaga japêr. Hã kot paj nhỹrmã akupỹn mẽ ato amnhĩptār kaxyw akupỹn wrỹ nê amnhĩ xwar kot ixkaga xwỹnhhta kaga. Ām hāmri na pa ã mẽ amã amnhĩ jarênh anê. Kot paj nhỹrmã man akupỹn inhō Papaj nhỹ hã ixte mẽ ho amnhĩptār kaxyw akupỹn wrỹ. Nhũm kapêr o mẽ wrỹk xwỹnhjaja man ixkôt wrỹ. Pa mẽ wrỹ hāmri nê mẽ kot ixkaga xwỹnhjaja pa amnhĩ pyrã nê mẽ hkaga. ²⁷ Ām hāmri na pa ã mẽ amã amnhĩ jarênh anê. Kot paj nhỹrmã akupỹn ixte mẽ ato amnhĩptār kaxyw mẽ awỹr wrỹ. Tã kot kaj mẽ akwỹjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus kot kên prêk nhĩmōk ã hirã kamã ãm ã harênh

Matêwre 17.1-8; Makre 9.2-8; mããnên Sikũn Pêtre 1.16-18

²⁸ Tã nhũm semānja hapêx nhũm Jejus Simãw Pêtre nê Xiakre nê Juãw wa mẽ kām kapêr nê mẽ kām:

—E pu mẽ ma hixêt prêk mũj wỹr mō nê hwỹr api nê himōk ã Tĩrtũm mã amnhĩ jarê. Anê.

Hāmri nê ma amnhĩ kôt hwỹr mẽ o mō nê hwỹr mẽ ho api. ²⁹⁻³² Hāmri nhũm Jejus Tĩrtũm mã amnhĩ jarênh o xa. Nom nhũm hkôt hixêt wỹr mẽ mōr xwỹnhjaja õtxwa htỹx nê ra gōr nê hikwỹ. Pu nhũm Jejus axtem hkuk nê xa. Nê ê haka htỹx nê xa. Hāmri nhũm ja wa kaxkwa rũm wrỹ nê kuri kām kapêr o xa. Finat Mojes mẽ finat Erisja wa kuri kām kapêr o xa. Na pre ra amnepêm Tĩrtũm amnhĩ wỹr wa ho api. Tã nhũm wa ra akupỹn wrỹ nê Jejus mã kapêr o xa. Mẽ hpimràatã hirã htỹx kām axpên mã kapêr o kuhê. Jejus kormã krĩ pê Jerujarê kapem mẽ kot hpĩr kêt ri nhũm wa mẽ axpên mã htyk kukamã harênh o kuhê. Nhũm wa kām:

—Nà Tĩrtũm jamaxpêr xà hkôt kot kaj ã amnhĩ nhĩpêx anê.

Anhỹr o Jejus tyk kukamã kām hamaxpêr o hihtỹx o wa xa.

Rôm nhũm mẽ õt xwỹnhjaja hkrã hapôj nê tee ri Jejus pumu. Nhũm mex kumrêx nê hirã htỹx kām xa nhũm mẽ omu nê kuri wa ãm xwỹnhhta wa omu. ³³ Hāmri nhũm Mojes mẽ Eris wa ra akupỹm nojarêt nhũm Simãw Pêtre tee ri ja hã wa omu nê Jejus mã kām:

—Kwa Pahihti. Nà ãm hāmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hipêx. Amã hō nhĩpêx nê Mojes mã hō nhĩpêx nê Eris mã hō nhĩpêx ka mẽ kamã akrĩ. E kwa pa mẽ amã ho anê nã? Anê.

Nhũm amnhĩ krã hkôt ã kām kapêr anê. ³⁴ Hāmri nê kormã kām kapêr rôm nhũm kakrã jaka tỹxja wrỹ nê mẽ hkunor nhũm wa mẽ kamã kuhê. Hāmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nê kām ma nê. ³⁵ Hāmri nhũm kakrã kamã Tĩrtũm mẽ kām kapêr nê mẽ kām:

—E ota Ixkra xa. Mě ate kamã ajamak o apa xwÿnhhta na. Inhmã hapêê. Kêr ka mẽ ãm tapxipix kapêr mar tÿx o ri apa. Aně.

³⁶ Hãmri nhũm mẽ kuma nê kànhmã rít nê ãm Jejus pix pumu nhũm ahte xa. Nhũm kuri wa ãm xwÿnhhta wa ra ma akupÿm api nhũm mẽ Jejus pix pumu.

Mě tapxipixjaja na prem ã Jejus kot amnhĩ nhĩpêx anhÿr ã omu nom taxy kormã nhãm hkwyjê mã harěnh kêt nê. ãm axpěn pix mã harěnh pê hkukamã hamaxpêr o ri Jejus kôt pa.

Jejus kot mēhō nê mẽkarōmnuti janor ã harěnh

Matêwre 17.14-21; Makre 9.14-29

³⁷ Tã nhũm apkati nhũm mẽ ma akupÿm ahparmã hkwyjê hwÿr wrÿk o mō. Nê mẽ hwÿr hpôx o mō nhũm mẽ ra mẽ kutêp pikuprōnh rax nê kuhê. ³⁸ Hãmri nhũm mẽhō myja amnhĩ wÿr mẽ omu nê mẽ kutã tē nê mẽ hkaxpa nê Jejus pumu nê kãm:

—Pa Jejus. Kwa ixkamã axukaprĩ nê inhmã ixkra ho mex. ãm ixpê pyxire. ³⁹ Na hte mẽkarōmnuti xatã ixpê tanhmã ho nhũm ÿ hã amÿra nê mra nê rôrôk nê hakwa jamrô ho hikwÿ nhũm tokyx kãm urer kêt nê. Nhũm ra ixpê homnuj tÿx nê. ⁴⁰ Hãmri pa akôt mẽ pa ho mẽ pa xwÿnhjê hwÿr o tē nhũm mẽ kot inhmã ho mex kaxyw tee ri tanhmã ho hkaprÿ. Aně.

⁴¹ Hãmri nhũm kuma nê hkôt mẽ pa ho pa xwÿnhjê mã kãm:

—Hêxta waa nê. Na ka mẽ ra ixte Tirtũm nhÿ hã mẽ ho mex ãm ixpumunh o ixkôt apa ryy tã kormã ixpyrà nê ã mẽ hipêx anhÿr kêt nê. Mãn ka mẽ kormã mẽ kaxyw Tirtũm kôt ajamaxpêr tÿx kêt nê. Aně.

Hãmri nê myta mã kãm:

—E amnē ixwÿr akra ho tē pa inhno ho omu. Aně.

⁴² Hãmri nhũm hwÿr o tē nhũm mẽkarōmnuti axte kêp ho pika kura nhũm amÿra nê tēm nê nō. Hãmri nhũm Jejus omu nê nê mẽkarōmnuti kator nhũm akupÿm mex nê kànhmã nhÿ. Hãmri nhũm akupÿm hipêêxã mã kugō. ⁴³ Hãmri nhũm mẽ amnhĩ jaêr pē Jejus kot ã hipêx anhÿrja ã omu nê ri axpěn mã harěnh o:

—Kokÿÿ. Hêxta waa nê. Pêr ãm Tirtũmja ãm àhpumunh o àhpumunh. Aně.

Jejus kot htyk kukamã amnhĩ jarěnh

Matêwre 17.22-23; Makre 9.30-32

⁴⁴ Hãmri nhũm Jejus hkôt mẽ pa ho mẽ pa xwÿnhjê mã kãm:

—E kot paj mẽ amã tanhmã amnhĩ jarěnh to ka mẽ inhmar tÿx nê. Na pa pre mẽ ate aa mẽmoj pumunh kêt kwÿ ho anhÿr o ixpa pix kaxyw mẽ awÿr ixwrÿk kêt nê. Kojã mẽ tokyx mẽ kãm ixtã amÿnê nhũm mẽ ixpĩ. E kwa kêr ka mẽ ja ma nê hã anohtÿx nê ho apa. Aně.

⁴⁵ Hãmri nhũm mẽ tee ri kot ã amnhĩ jarěnh anhÿrja ma nê axpěn mã:

—Kwa mo na pêr ri ã amnhĩ jarěnh anê? Kêp mẽ panhō Pahi Maati hã kot amnhĩ jarěnh kênã kot kêt mẽhō kupĩ.

Anhÿr o axpěn mã ri harěnh o kuhê. Hãmri nê mẽ kãm ã kot amnhĩ jarěnh anhÿrja mar prãm kêt jakamã hprĩ hã tanhmã hã hkukjêr to hkêt nê. ãm akryk mar o kuhê.

Mě kot amnhĩ to rũnh xwÿnhjê jarěnh

Matêwre 18.1-5; Makre 9.33-37; Rukre 22.24-27; mããnēn Piripos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwÿnhjaja tanhmã amnhĩ kukamã hamaxpêr to hãmri nê axpěn mã:

—Kwa mẽ pahtō kot puj we nhÿrmã pahpê pahi nê mẽ ho amnhĩptàr rax o pahkwÿ jakre? Aně.

Hãmri nê ja hã axpěn kukjêr o Jejus kôt mō nê axpěn mã: “Nà pa.” Nhũm mẽ hkwyja: “Nà kêt pa.” Anhÿr o hkôt mō. ⁴⁷ Hãmri nhũm Jejus mẽ kuma nê mẽ hamaxpêr kôt mẽ omu. Hãmri nê xa nê amnhĩ wÿr mẽhprÿjê mã hpa ho apê nhũm hwÿr tē nê kuri xa.

⁴⁸ Hãmri nhũm Jejus hkôt mẽ pa ho pa xwÿnhjê mã tanhmã harěnh to nê mẽ kãm:

—E mẽ inhma. Kêr ka mẽ apê pahi pyrâk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyrâk o amnhĩ nhĩpêx o ri apa. Jao nhĩri mẽhprĩre hõ pumu nê kamã axukaprĩ ho kãm mẽmoj tanhmã ho rỳ kãm mẽmoj gõ. Hãmri nê te pa ate tanhmã ixto mex to pyrâk o amnhĩ nhĩpêx. Nê kot ka mẽ atõ pa tanhmã ixto mex to nê te ate Tĩrtũm tanhmã ho mex to pyrâk o amnhĩ nhĩpêx. Kot kaj mẽ ã amnhĩ nhĩpêx anhỹr o ri apa nhũm Tĩrtũm ja hã mẽ apumu nê mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarẽ. E kot kaj mẽ amã amnhĩ to rũnh prãm nê ã amnhĩ nhĩpêx anhỹr o ri apa. Anẽ.

Mẽhõ kot Jejus nhỹ hã tanhmã amnhĩ nhĩpêx to hã harênh

Makre 9.38-41

⁴⁹ Hãmri nhũm Jejus kôt mẽ pa ho pa xwỳnhjê hõ pê Juãwja nhỹhỹnh hwỳr hpõx o tẽ nê kãm:

—Kwa Pahihti. O mũj mẽhõ kêp mẽ pahkwỳ hkêt tã anhĩxi jarênh kôt mẽ nê mẽkarõmnuti janor o pa. Pa mẽ tee ri kot ã amnhĩ nhĩpêx anhỹr ã omu nê nê kãm ixkapêr. Kêp mẽ pahkwỳ hkêt kênã kot kêt ã mẽ hanor anhỹr o pa. Anẽ.

⁵⁰ Hãmri nhũm kuma nê kãm:

—Kwa nà ja nê tanhmã kãm nê hkêt nê. Kojã mẽhõ mẽ pahkwỳm ri tanhmã mẽ ahkre hto hkêt nê hãmri nê kêp mẽ panhĩõõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nê tanhmã kãm akapêr to hkêt nê. Kwãr mãmrĩ ã amnhĩ nhĩpêx anhỹr o ri pa. Ja mex kênã. Anẽ.

Samar nhõ xwỳnhjaja kot Jejus kaga hã mẽ harênh

Atre 8.14-15

⁵¹ Hãmri nhũm Jejus akupỹm kaxkwa hwỳr àpir kaxyw ra hwỳr apkati grêre ho mõi jakamã nhũm hamaxpêr o:

—E pa ma akupỹm Jerujarẽ hwỳr mõi. Nà kot paj anẽ. Mẽ kot kamã tanhmã ixto mã tã kot paj ma akupỹm mẽ hwỳr mõi. Anẽ.

⁵² Hãmri nê amnhĩ kukamã mẽ hkwỳjê rẽ nhũm mẽ ma mẽ hkukamã Samar nhõ krĩ kamã nhỹri mẽ kot amnhĩm hikranh xà japêr o mõi. ⁵³ Nom nhũm Samar nhõ xwỳnhjaja kêp Jerujarẽ nhõ xwỳnhjê hprãm nõkati jakamã Jerujarẽ hwỳr mõi ã mẽ harênh ma nê amnhĩ nê mẽ hkurê. ⁵⁴ Hãmri nhũm mẽ tee ri amnhĩ tã mẽ kuma nê awjanã nê akupỹm Jejus wỳr mra nê kãm mẽ harẽ. Hãmri nhũm Juãw mẽ Xiakre wa mẽ harênh ma nê mẽ kamã gryk nê nê Jejus mã:

—Kwa Pahihti. Nà na mẽ axtem nê amnhĩ nê mẽ pahkurê. Jakamã e kwa pu mẽ kaxkwa rũm mẽ hipy kuwy hpõk kwỳ rê kê mẽ hkaxàr pa nà? Anẽ.

⁵⁵ Hãmri nhũm wa kuma nê wa kãm:

—Tk. Kwa nà wa ajamaxpêrja mex kêt. Pu mẽ ã ri mẽ hipêx anhỹr kêt nê. Kojã Tĩrtũm kãm ja ho anhỹr prãm nê rĩ tãm tanhmã mẽ ho. No mẽ papajaja pu mẽ ri mẽ kamã pagryk xàj tanhmã mẽ hipêx to hkêt nê. Pu mẽ ã mẽ hipêx anẽ nê ra amnhĩ tomnuj tỳx nê. Kwa wa ri ã ajamaxpêr anhỹr kêt nê. Anẽ.

⁵⁶ Hãmri nê mẽ ma Samar rũm hapõj nê hpãnhã nhãm krĩ hõ hwỳr pa.

Mẽ hkwỳjaja kãm Jejus kôt pa hprãm ã mẽ harênh

Matêwre 8.18-22

⁵⁷ Tã nhũm Jejus mẽ kormã mõi ri nhũm mẽhõja hwỳr tẽ nê kãm:

—Pa Jejus? E kot paj ma akôt ixpa ho ixpa. Anẽ.

⁵⁸ Hãmri nhũm kuma nê kãm:

—Ko ka mã. Kam nê rĩ ma ixkôt ri apa ho apa. Nom kêr ka inhmar kumrêx nê rĩ kormã ixkôt apa. Na hte xore pika hkre kamã hikwỳ xà. Nê kuwênhre pĩ nhĩmõk ã hikwỳ xà. No pa na Tĩrtũm kot mẽ awỳr inhmênh xwỳnh tã jajê hkĩnhã inhõrkwỳ hkêt. Na pa hte ãm nhãm krĩ hõ hwỳr ixpa nê nhãm ixpa. Tã xà kot kaj ixpyrà nê ã amnhĩ nhĩpêx anhỹr o ri apa nà? Anẽ.

⁵⁹ Nhũm pre ã kãm kapêr anẽ hãmri nê nhãm mẽhõja wỳr apkjê nê kãm:

—Pa? No ka? Xà kot ka ma ixkôt apa ho apa nà? Anẽ.

Hāmri nhūm kām:

—Tỳ no ãm kormã. Koja nhỹrmã inhĩpêêxàja tanhmã amnhĩ to nê ty mãn. Pa haxà hāmri nê rĩ kormã ma akôt ixpa ho ixpa. Anê.

⁶⁰ Hāmri nhūm Jejus kuma nê kām:

—Kwa nà ri ã ajamaxpêr anhỹr kêt nê. Ma ixkôt apa ho apa kurê kumrêx. Kê mẽmoj ano kupyw rỳ inhnê apê amnàr kêt nê. Kwār mẽ htĩr tũm nê mẽ pa hkêt mã xwỹnhjaja mãn axwakre kamã amã anhĩpêêxà jamār o pa nhūm nhỹrmã ty kê mẽ amã haxà. Ka māmri ma Tĩrtũm kapêr o mẽ ahkre ho ri mẽ hkôt apa. Kê mẽ ama nê mẽ hkwỹjaja hkôt amnhĩ xunhwỳ nhūm mẽ ho hkra. Anê.

⁶¹ Nhūm pre ã kãm kapêr anê hāmri nhūm nhãm mẽhõ myja haxwỹja hwỳr tẽ nê kãm:

—E. Pa kot pa ma akôt ri ixpa ho ixpa. Nom kormã. Pa ma akupỹm tẽ nê ixkwỹjê mã amnhĩ jarẽ nê tanhmã amnhĩ to hpa mãn. Hāmri nê mẽmo arĩgro hã rĩ kormã ma akôt ixpa ho ixpa. Anê.

⁶² Hāmri nhūm tee ri kuma nê kām:

—Kwa nà. Kot kaj ã ajamaxpêr anê hāmri nê ixkôt apa htã te amnhĩ katut kôt arĩt rãhã ho ri apa pyræk o amnhĩ nhĩpêx. Kwa ã ajamaxpêr anhỹr kêt nê ma ixkôt apa kurê kumrêx. Anê.

10

Jejus kot mẽ hwỳr mẽ kêp 72 rênh ã harênh

Matêwre 10.1, 10.5-15; Makre 6.7-13; Rukre 9.1-6, 9.10-11; mãânên Atre 13.50-51, 18.6

¹ Tã nhūm Jejus axte amnhĩ kaxyw mẽ ho 72 nê mẽ kurê. Hāmri nê mẽ ho axkrut kapên nê ma nhỹhỹm krĩ hkwy hkôt amnhĩ kukamã mẽ kurê. Mẽ kot mẽ hkôt ri Tĩrtũm kapêr o mẽ ahkre ho pa kaxyw. ² Hāmri nê mẽ kãm:

—Na mẽ ohtô rax nê kormã Tĩrtũm kapêr mar kêt nê. No ãm kormã mẽ ate mẽ kãm harênh o apa kaxyw mẽ agrêre. Te pur kãm harôj kamrêk pa nê ãm tã no ãm kaxyw hikênh xwỹnh grêre pyræk. Jakamã kwa mẽ ho Tĩrtũm wỳ kê axte mẽ kaxyw mẽ hkwỹjê rê.

³ —E kot paj ma mẽ hwỳr mẽ arê. Ma mẽ hkôt mẽ ate Tĩrtũm kapêr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprê hwỳr amnhĩ to mrar nhūm kot hkwy hpar pyræk o amnhĩ nhĩpêx. Koja mẽ hkwỹjaja mẽ ate mẽ ahkre ma nhūm ja mẽ kêp omnuj nê nhūm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpêr nê amã mẽ uma hkêt nê.

⁴ —Nê kêr ka mẽ hwỳr anojarêt nê amnhĩ kôt amrykà rỳ akawà rỳ aparkà hõ ho apa hkêt nê. ãm anhỹ kamã ma mẽ hwỳr apa. Nê mẽ hwỳr mra nhūm mẽ nhỹri pry hã mẽ atõ kaxpa nê amã kapêr o xa ka wa axpên mã akapêr ry hkêt nê. Anojarêt kãm kãm akapêr krânre nê mẽ hakre nê ma krĩm apa.

⁵ —Nê kêr ka mẽ hwỳr pøj nê nhỹri mẽ ôrkwỹ hwỳr agjê nê mẽ kãm: “Xà kot paj mẽ ato Tĩrtũm wỳ kê mẽ ato mex nê ka mẽ ajamakêtkati nê ri apa?” Anê. ⁶ Hāmri nhūm mẽ ama nhūm ja mẽ kãm mex japêr nhūm mẽ hkĩnh nê amã: “ỳ kam nê māmri mẽ ixto awỳ.” Anê. Hāmri ka mẽ ama nê tanhmã mẽ ho Tĩrtũm wỳr to. No koja mẽ apê ja kaga ka mẽ ho hwỳr kêt nê.

⁷ —Nê kêr ka mẽ nhỹri mẽ ôrkwỹ kamã mẽ hwỳr pøj hāmri nê mẽ hkôt ri apikamênh tãmtã nê akupỹm mẽ kurũm ajapôj nê ma hpãnhã krĩ hõ hwỳr apa. Nê mẽ axãmnhĩx mẽ kuri axàpkur o ri apa. Mẽmoj to akôm o ri apa. Ra mẽ ate mẽ ho mex pê mẽ kãm Tĩrtũm kapêr o mẽ ahkre ho apa kênã. Jakamã kwār mẽ māmri amnhĩ pãnhã mẽ amã mẽ axàpkur xà gõ ka mẽ kuri mẽ apku.

⁸ —Nê kêr ka mẽ nhỹri mẽ hwỳr pøj nhūm mẽ ato mex nê. Nê mẽ amã mẽmo mẽ apkur xà gõ ka mẽ māmri axãmnhĩx aku. Aa kormã mẽ ate mẽmojta kur kêt tã māmri ajamakêtkati nê aku. No tee ri amnhĩ kukamã tanhmã ajamaxpêr to hkêt nê.

⁹ —Nê kêr ka mẽ ã mẽ kãm akapêr anê nê mẽ kãm: “Tĩrtũm kãm mẽ ato hkra hprãm. Na hte amnhĩ wỳr mẽ awỳ.” Anê hāmri nê akupỹm mẽ kãm mẽ à xwỹnhjê ho mex. ã kot kaj mẽ mẽ kãm amnhĩ nhĩpêx anhỹr o ri mẽ hkôt apa.

¹⁰—Nê kêr ka mẽ nhÿri mẽ hwÿr pôj nhÿm mẽ ãm mẽ apumu nê amnhÿ nhôrkwÿ hwÿr mẽ awÿr kêt japêr. Hãmri ka mẽ tee ri amnhÿ tã mẽ omu hãmri nê ra ma nhãm apa kaxyw. ¹¹Hãmri nê anojarêr nê mẽ kãm: “E mẽ inhma. Tÿrtÿm kot mẽ pahwÿr mênh xwÿnhhta na mẽ awÿr wa inhmê pa wa mẽ awÿr mō. Wa ixte Tÿrtÿm kapêr o mẽ ajahkre kaxyw. Kãm mẽ ato hkra hprãm nhÿm wa ixte mẽ amã harênh kaxyw na pa pre wa ã mẽ awÿr inhmōr anê. Tã ka mẽ harênh ma nê wa ixkaga. Jakamã kot paj wa jar mẽ anhō krÿ kamã amnhÿ par kã hã awjagrō kapÿ. Mẽ ate Tÿrtÿm kaga hã amnhÿ pumunh nhÿm Tÿrtÿm kot amnhÿ pyrã nê mẽ akaga hã mẽ ate omunh kaxyw kot paj wa mẽ anoo mã ã amnhÿ par kã hã awjagrō kapÿr anê. Kot kaj mẽ nhÿrmã tee ri ã amnhÿ nhÿpêx anhÿrja mã ajamaxpêr nê akapÿrÿ htÿx kumrêx kãm ga. ãm hãmri na pa wa mẽ amã ja jarê.” Anhÿr o mẽ kãm akapêr nê mẽ kêp ajapôj nê ma hpãnhã nhãm krÿ hō hwÿr apa kurê kumrêx.

¹²—Koja nhÿrmã Tÿrtÿm mẽ kot amnhÿ tomnuj mÿrapê tanhmã mẽ ho. Na pre ra ã krÿ pê Sotō nhō xwÿnhjê nhÿpêx anê. Na prem amnhÿ tomnuj tÿx o pa nhÿm Tÿrtÿm tanhmã mẽ kot amnhÿ tomnuj tÿx ã tanhmã mẽ ho. Tã jar mẽ kot kãm ixkapêr mar prãm kêt nê mẽ kot ixkaga xwÿnhjaja. Koja Tÿrtÿm ixtã mẽ omu nê kot Sotō nhō xwÿnhjê nhÿpêx pyrãk o mẽ hipêx nom tanhmã mẽ ho htÿx o mẽ hakre.

—E kêr ka mẽ ma krÿ hkwy hkôt apa nê ã mẽ kãm akapêr anhÿr o ri apa. Anê.

Mẽ kot Tÿrtÿm kôt hamaxpêr kêt xwÿnhjê jarênh

Matêwre 11.20-24

¹³⁻¹⁴Tã nhÿm Jejus krÿ hkwy nhō xwÿnhjê mã kapêr o xa nê mẽ kot amnhÿ tomnuj ã mẽ kãm akir. Krÿ pê Korajÿ mẽ Pesêj nhō xwÿnhjê kumrêx mã kapêr nê mẽ kãm:

—E mẽ inhma. Amnepêr krÿ pê Sitō mẽ Xir wa kamã mẽ pa xwÿnhjaja na prem tanhmã amnhÿ tomnuj tÿx to ho pa nhÿm Tÿrtÿm mẽ omu nê hã mẽ homnuj tÿx nê. Tã kwa mẽ o kora Korajÿ mẽ Pesêj wa kamã mẽ apa xwÿnhjaja. Ra ixte mẽ amã mẽ ate mẽmoj pumunh kêt o anhÿr rax o ixpa htã ka mẽ omu nê arÿ amnhÿ tomnuj o ri apa nê tokyx amnhÿ tomnuj kaga hkêt nê. Jakamã kot kaj mẽ amex kêt nê. Kop apu Sitō rÿ Xir kamã mãn ixte mẽ kãm aa mẽ kot mẽmoj pumunh kêt kwÿ ho anhÿr o ri ixpa ronhÿx mẽ omu nê mẽ arom amnhÿ kaxyw ixkôt hamaxpêr kurê kumrêx. Nê tee ri tanhmã amnhÿ tomnuj to ho pa hã amnhÿ pumu nê hkapÿrÿ nê ã amnhÿ nhÿpêx anhÿr kaga hpa. No mẽ kajaja na pa tee ri mẽ amã tanhmã amnhÿ nhÿpêx to ho ri ixpa kapÿrÿ. Ka mẽ ja hã ixpumu nê ãm ixpumu nê amnhÿ tomnuj kaga hkêt nê. Tã koja nhÿrmã Tÿrtÿm mẽ piitã mẽ kot amnhÿ tomnuj mÿrapê tanhmã mẽ hipêx to. Hãmri nê tanhmã Sitō mẽ Xir wa kamã mẽ pa xwÿnhjê jarênh to nhÿm mẽ kot amnhÿ tomnuj mÿrapê amnhÿ xã htÿx kamã hamak o ri pa. No mẽ kajaja mẽ ate amnhÿ tomnuj tÿx o mẽ hakrenh jakamã koja Tÿrtÿm mẽ hkÿnhã mẽ atomnuj tÿx o mẽ atomnuj tÿx. Ka mẽ amnhÿ xã htÿx kamã ajamak rãhã ho ri apa ho apa. Anê.

¹⁵Nhÿm pre ã Jejus mẽ kãm kapêr anê. Hãmri nê hpãnhã Kapanaũ nhō xwÿnhjê mã kapêr nê mẽ kãm:

—No mẽ apê Kapanaũ nhō xwÿnhjaja. Kot kaj mẽ ajaxwÿja mẽ amex kêt nê. Mẽ ate amnhÿ tomnuj kagare pyrã nê Tÿrtÿm nhō krÿ hwÿr akrã ho apa. Nom kot kaj mẽ atō hwÿr axàpir kêt nê. Kot kaj mẽ ma kuwy maati hwÿr ajapêx pa kãm ga.

¹⁶Anhÿr o mẽ kãm kapêr hãmri nê hpãnhã hkôt mẽ pa ho mẽ pa xwÿnhjê mã kapêr nê mẽ kãm:

—Kot kaj mẽ Tÿrtÿm kapêr o mẽ ahkre ho ri apa nhÿm mẽhō ama nê akapêr kôt amnhÿ nhÿpêx. Hã koja te pa kot ixkôt amnhÿ nhÿpêx pyrãk o amnhÿ nhÿpêx. No koja amar kêt nê akaga hãmri nê te pa kot inhmar kêt nê ixkaga pyrãk o amnhÿ nhÿpêx. Jao mãänênh Tÿrtÿm kaga.

Anê hãmri nhÿm mẽ kuma hãmri nê angrã nê axkrut kapêr nê ma ahpÿnhã krÿ hkôt angrã.

Mẽ hkÿnh nê ri mẽ pa xwÿnhjê jarênh

Apokarip 3.5

¹⁷ Tã nhũm mẽ kêp 72jaja krĩ hkwỹ rũm akupỹn Jejus wỳr pøj. Piitã hkĩnh nẽ hpôx pa. Hãmri nẽ kãm:

—Kwa Pahihti. Na pa prem anhỹ hã mẽ nẽ mẽkarõmnuti japôx rax nẽ. Na pa prem mẽ nẽ mẽ hano nhũm mẽ ãm mẽ kurũm hapôx kurê kumrẽx. Anẽ.

¹⁸ Hãmri nhũm mẽ kuma nẽ mẽ kãm:

—Tõe. Ixàhpumunh tỳx o ixte Satanasti jakrenh jakamã na ka htem inhỹ hã mẽ hano nhũm mẽ tee ri mẽ akutã hihtỳx prãm. Hãmri nẽ te na haxênh prêprêk pyrãk o amnhĩ nhĩpêx nẽ mẽ kurũm hapôx kurê kumrẽx pa ja hã mẽ omu. ¹⁹⁻²⁰ Mẽkarõmnuti te kot kagã xoprê rỳ te kot makre pyrãk. Tã ra ixte mẽ amã ixàhpumunh tỳx xà hkwỹ nhõr jakamã na ka prem mẽ kãm akapêr nhũm mẽ tee ri akutã tanhmã amnhĩ tỳx to hprãm. Tã koja Satanasti tee ri mẽ ate nhỹrmã Tĩrtũm mẽ wa ixri atĩr tũm nẽ apa pymaj tanhmã mẽ ano kupyw to kaprỳ. Ra Tĩrtũm kot õ kagã kamã mẽ atĩr tũm nẽ mẽ apa kaxyw mẽ anhĩxi hã kagã kênã. Jakamã kwa mẽ jam ajamaxpêr o akĩnh nẽ ajamakêtkati nẽ ri apa. No kêt mẽkarõmnuti kot mẽ akapêr mar nẽ mẽ kurũm hapôxta ã mẽ omunh xà hkõt pix mã akĩnh nẽ ri apa hkêt nẽ. Anẽ.

Jejus kĩnh kãm kot Hipêxà mã amnhĩ jarẽnh

Matêwre 11.25-27

²¹ Tã nhũm Tĩrtũm Karõ tanhmã Jejus to nhũm ÿ hã hkĩnh nẽ xa. Hãmri nẽ Tĩrtũm mã kapêr nẽ kãm:

—Pa Papaj? Nà apê mẽ ixpiitã mẽ inhõ Pahi Maati na ka. Pikap ri mẽ pa xwỳnhjaja nẽ kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ jarẽnh xwỳnhjê mã axàhpumunh tỳx o amnhĩrĩt kêt nẽ. ãm mẽ àhpumunh kêt ã mẽ kot amnhĩ jarẽnh xwỳnhjê pix mã na ka hte ja ho amnhĩrĩt nhũm mẽ tapxipixjaja ja hã apumu. ãm hãmri na ka hte amã hprãm xà hkõt ã mẽ piitã mẽ hipêx anhỹr o ri apa. Jakamã mẽ kot amnhĩ to hkryre xwỳnh pixjaja na htem ate amnhĩ nhĩpêx ã apumunh o pa.

²² —Na ka pre inhĩkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwỳnhjaja na mẽ kot ja hã ixpumunh kêt. Nẽ mããnẽn papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anẽ nẽ inhmã hprãm xà hkõt mẽ hkwỹjê mã ato amnhĩrĩt o ri ixpa nhũm mẽ ixpyrà nẽ ate tanhmã amnhĩ nhĩpêx to ho apa hkõt apumu. Anẽ.

Jejus kõt mẽ pa xwỳnhjaja kot hkõt omunh o pa hã mẽ harẽnh

Matêwre 13.16-17

²³⁻²⁴ Nhũm pre Jejus ã Tĩrtũm mã amnhĩ jarẽnh anẽ hãmri nẽ hpãnhã hkõt mẽ pa ho mẽ pa xwỳnhjê mã kapêr nẽ mẽ kãm:

—E na ka htem ixkõt mẽ ano ho ixte tanhmã amnhĩ nhĩpêx to hã ixpumunh o ri apa. Nẽ mẽ ajamak o ixkapêr mar o ri ixkõt apa. No amnepêem mẽ akukamã pahijaja nẽ Tĩrtũm nhỹ hã kapêr jarẽnh o ri mẽ pa xwỳnhjaja kãm ixpumunh prãm tỳx o pa htã mẽ akĩnhã ixpumunh kêt rãhã htyk pa. Kormã ixwryk nẽ jar ixkator kêt jakamã na prem ixpumunh kêt rãhã ty. Nẽ mẽ kãm ixkapêr mar prãm tã mẽ akĩnhã ixkapêr mar kêt nẽ. ãm mẽ kapxipixjaja na ka mẽ mỳr pê ixte amnhĩ nhĩpêx ã ixpumunh nẽ ixkapêr mar o ixkõt apa. Tã mẽ kurom mẽ ate ano ho ixpumunh nẽ ajamak o ixkapêr mar jakamã kwa mẽ ja hã amnhĩ pumu nẽ tãm amnhĩ nhĩpêx o akĩnh nẽ ri apa. Anẽ.

Samar nhõ xwỳnh jarẽnh

Matêwre 22.34-40; Makre 12.28-34; mããnẽn Wam Juãw 3.17-18

²⁵ Tã nhũm Tĩrtũm kapêr tũm o mẽ ahkre o mẽ pa xwỳnhja Jejus wỳr tẽ nẽ hêx rom kot kamã hamak kaxyw kãm:

—Pa? E kwa inhmã mẽmoj jarẽ. Tanhmã kot paj we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx to wehe? Anẽ.

²⁶ Hãmri nhũm kãm:

—Tanhmã na ka hte Tirtüm kapër ã kagà htüm kot mẽ htir tùm nẽ pa hã kagà kamã harẽnh nẽ mar to? Anẽ.

²⁷ Hãmri nhũm kãm:

—Nà harẽnh kot:

Kêr ka mẽ anhĩ piitã ho amã Tirtüm kĩnh o ri apa. Mẽ amã hkĩnh tỳx o mẽmoj piitã hakrenh par o ri apa.

Nẽ kêr ka mẽ amã mẽ piitã hã ma ho te ka amã amnhĩ tã ma pyræk o mẽ hipêx o ri apa. Jao tãm mẽ hipêx o ri apa. Anẽ.

Ã Tirtüm kapër ã kagà htüm kamã ja jarẽnh kot anhỹr. Anẽ.

²⁸ Hãmri nhũm Jejus kuma nẽ kãm:

—Tỳ. Nà ãm hãmri na ka harẽ. Kot kaj ã mẽ hipêx anhỹr o ri apa nẽ nhỹrmã Tirtüm mẽ wa ixri atir tùm nẽ apa ho apa. Anẽ.

²⁹ Hãmri nhũm kuma nom kãm mẽ piitã mẽ ho mex prãm kêt nẽ. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm:

—Kwa no mẽmojaja kot pa we ri ã mẽ hipêx anhỹr o ri ixpa? Xà mẽ pahkwỳ pẽ Ijaew pixjaja nà? Anẽ.

³⁰ Hãmri nhũm kuma nẽ tanhmã kãm ujarẽnh to. Nom hã kuxi nẽ kãm awjarẽ nẽ kãm:

—E pa amã awjarẽ ka inhma. Kojã Ijaew nhõ xwỳnhja ma Jerujarẽ rùm Jeriko hwỳr ahpar mã ma mõ. Mõõ nhũm ra mẽ ahkĩnh xwỳnhjaja kutã mra. Hãmri nẽ pry kahti ri hwỳr kato nẽ unê nẽ htak rax nẽ. Nẽ kêp ê hkwrỳnh pa nẽ ma kurùm hprõt nẽ mra nẽ akunok nhũm mẽ kot htak o hkà rênh rãhã ra htyk kaxyw nẽ nõ. ³¹ Hãmri nhũm patreja tẽ nẽ omu. No ãm omunh o hãnh tẽ nẽ hkupu nẽ ma tẽ. Uræk nẽ kêp Ijaew tã ãm omu nẽ tanhmã ho ajuta hto hkêt nẽ hãnh omunh o tẽ nẽ hkupu nẽ ma tẽ. ³² Hãmri nhũm patre ho ajuta xwỳnhja mããnen tẽ. Nẽ patre pyrã nẽ omu nẽ ãm omu nẽ hkupu nẽ ma tẽ. Uræk nẽ kêp Ijaew tã omu nẽ ãm omu nẽ hkupu nẽ ma tẽ.

³³ —Tã nhũm Samar nhõ xwỳnhja mããnen mõ. Samar nhõ xwỳnhjê mẽ Ijaew na prem kãm axpẽn kĩnh kêt tã nhũm mõ nẽ omu nẽ kamã ukapri nẽ. Kêp Ijaew ã omunh tã tee ri omu nẽ kamã ukapri nẽ. ³⁴ Hãmri nẽ hwỳr tẽ nẽ omu nẽ kãm mẽ kot htak o hkà rênh xà kane nẽ kãm hkupu pa. Hãmri nẽ kãnhmã ãm nẽ hkrit jumẽnre hã kumẽ nẽ ma nhỹri mẽ kot amnhĩm hikranh xà hã ixkre hwỳr o mõ nẽ hwỳr o pøj. Hãmri nẽ omunh mex o apkati. ³⁵ Hãmri nẽ akupỹm nojarêt nẽ kàxpore hkwy jamy nẽ o tẽ nẽ kot mẽ kãm õ xwỳnhja mã kugõ nẽ kãm: “E kot paj hãmri ma mõ. Ota ixkàxporeta. Kêr ka inhmã à xwỳnhta tãnopxar mex nẽ. Nẽ inhmã omunh mex kê akupỹm mex. Kojã kàxporeja apê grille hã kot paj nhỹrmã akupỹn mõ nẽ axte hkõt amã hkwy gõ.” Anhỹr o kãm kapër nẽ ma akupỹm mõ. ã mẽ ujarẽnh kot anhỹr. Anẽ.

³⁶ Nhũm pre ã Jejus kãm ujarẽnh anẽ. Hãmri nẽ kãm:

—E nhỹ na pre kãm mẽ kot htak xwỳnhta kapri ho te tãm kãm amnhĩ tã ma pyræk wehe? Anẽ.

Hãmri nhũm Tirtüm kapër tùm o mẽ ahkre xwỳnhta kãm:

—Nà kot kamã ukapri xwỳnhta na pre omu nẽ kamã ukapri nẽ ho mex o te tãm kãm amnhĩ tã ma pyræk o hipêx. Anẽ.

³⁷ Hãmri nhũm Jejus kãm:

—Tỳ. Nà ãm hãmri na ka harẽ. Uræk nẽ kêp Ijaew kêt tã kamã ukapri nẽ ho mex nẽ. Tã kêr ka uræk nẽ ã mẽ piitã mẽ hipêx anhỹr o ri apa. Uræk nẽ mẽ kêp akwy hkêt tã mẽ kamã axukapri ho ri apa. Anẽ.

Jejus kot Matre mẽ Marir wa hwỳr mõr ã harẽnh

Rukre 12.29-31

³⁸ Tã nhũm Jejus kri rùm kato hãmri nẽ hkõt mẽ pa ho mẽ pa xwỳnhjê mẽ mẽ ma nhãm kri hõ hwỳr mõ. Mõõ nẽ hwỳr pøj. Hãmri nhũm Matre mẽ omu nẽ amnhĩ nhõrkwy hwỳr mẽ kuwỳ nhũm mẽ ma hwỳr mõ nẽ õrkwy hwỳr pøj. ³⁹ Hãmri nhũm Jejus mẽ ahkre ho nhỹ nhũm Matre htõx Marirja arĩ hpar pẽ mar o nhỹ. ⁴⁰ Hãmri nhũm Matre mẽ hwỳr axà nẽ omu. Nẽ tee ri àpênh rax kukamã hamaxpër nẽ Jejus wỳr tẽ nẽ kãm:

—Xê ma Pahihti. Kormã ixàpênh rax tã nhũm Marir ixto ajuta hkêt nê. ãm akapêr pix mar gryk ã ixkôt htêm nê ixto ajuta hkêt nê. Pa ahte mẽ panhõ hã ixàpênh o xa. Xà amã ja mex? Xê kãm anê kê tokyx ixkôt tẽ pa wa hã axkrut nê mẽ panhõ hã ixàpênh tokyx anê. Anê.

⁴¹ Hãmri nhũm tee ri kuma nê kãm:

—Kwa Matre. Na ka ãm mẽ panhõ pix kukamã ri ajamaxpêr nê gryk ã tee ri amnhĩ nhĩpêx. ⁴² ãm hãmri na Marir kãm ixkapêr mar prãm nê. Jakamã kot paj ri amnhĩ nê akôt hanor kêt nê. Anê.

11

Mẽ pahte tanhmã Tĩrtũm mã amnhĩ jarênh to hã mẽ pamã karõ

Matêwre 6.9-13, 7.7-11

¹ Tã nhũm apkati hõ hã nhũm Jejus nhĩri Tĩrtũm mã amnhĩ jarênh o nhỹ. Nê kãm amnhĩ jarênh pa nhũm hkôt mẽ pa ho mẽ pa xwỳnhjaja kot kãm amnhĩ jarênh ã omu nê hwỳr mra nê kãm:

—Kwa Pahihti. Amnhĩ pyrà nê mẽ ixte Tĩrtũm mã amnhĩ jarênh kaxyw tanhmã mẽ ijahkre hto. Kêr pa mẽ apyrà nê tanhmã kãm amnhĩ jarênh to ho ri ixpa. Na pre finat Juãw Paxisja hkôt mẽ pa ho mẽ pa xwỳnhjê mã ja jahkre nhũm mẽ kuma nê tãm kãm amnhĩ jarê. E kwa mẽ inhmã tanhmã ja jahkre hto nà? Anê.

² Hãmri nhũm mẽ kãm:

—Tôe. Nà kêr ka mẽ kãm amnhĩ jarênh kaxyw nê mãmri amnhĩ krã hkôt tanhmã kãm amnhĩ jarênh to. Rỳ kãm amnhĩ jarênh o:

Pa Mẽinhĩpêxà maati? Nà amex o amex Tĩrtũm.

Apê mẽ ijamãr mex xwỳnh maati na ka.

³ Nê kwa kêr ka apkati mẽ mẽ inhmã mẽmo gõ pa mẽ akukwak ri ho ixàpkur o ri ixpa.

⁴ Nê na pa hte tõhã amnhĩ tomnuj nê Tĩrtũm. Nom mẽ kot tanhmã ixtomnuj to xwỳnhjaja na pa hte ãm mẽ omu nê amnhĩ tã tanhmã mẽ ho hkêt nê. Nê ja ho ijamakêtkati kurê kumrêx. ã na pa hte amnhĩ nhĩpêx anhỹr o ri ixpa.

Jakamã kwa kêr ka ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

Nê kot paj tanhmã amnhĩ tomnuj to kaxyw japêr ka ja hã ixpumu nê ixte ã amnhĩ nhĩpêx anhỹrja nê ixto htỳx nê pa ja ho anhỹr kêt nê.

E ãm ja pix na hapêx. Anê.

E kêr ka mẽ ã Tĩrtũm mã amnhĩ jarênh anhỹr o ri apa. Anê.

Mẽ pahte amnhĩ to Tĩrtũm wỳr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnên Rõmãn 12.12; Epes 6.18; Wam Tesarõn 5.17-18

⁵⁻⁶ Nhũm Jejus arĩ hkôt mẽ pa ho pa xwỳnhjê jahkre ho nhỹ nê mẽ kãm:

—Nê ja. Kojã mẽ akràmnhwỳjê hõ. Nhũm kôt ã kamàt nhũm nhỹhỹnh awỳr mõn pøj. Ka anhõ mẽmoj kêt hãmri nê anhĩjuk ri akràmnhwỳ hwỳr tẽ. Hãmri nhũm ra amnhĩ tã kahê nê nõ. Ka tee ri omu hãmri nê hakwa krem xa nê kãm akapêr nê kãm: “Pa ixkràmnhwỳ. Na ka mẽ ra gõr? Kwa kànhmã nhỹ nê inhmã anhõ mẽmoj japêr. Na ra ham ixkràmnhwỳta mõn pøj. Nê kãm prãm tỳx nê mõ nom kaxyw inhõ hkêt. Kwa kànhmã nhỹ nê inhmã anhõ mẽmoj japêr nê inhmã hkwy pa ma o tẽ kê kukrê. ãm inhõ hkêt kumrêx. ãm hãmri na pa amã amnhĩ jarê. Kwa tokyj kànhmã nhỹ nê inhmã mẽmoj japêr nà?” Anhỹr o kãm akapêr. ⁷ Hãmri nhũm ama nom kãm kànhmã ãr prãm kêt nê. Nê amã: “Tk. Nà ra mẽ ixte amnhĩ tã kahê hpar nê inhĩkwỳ kênã kot pa kêt kànhmã nhỹ nê amã mẽmoj japêr.” Anê. ⁸ Ka tee ri ama nê xatã kãm: “Kwa ã inhĩpêx anhỹr kêt nê ixkràmnhwỳ. Kwa tokyx.” Anhỹr o xa. Nê xatã kãm anojarêt o xa. Hãmri nhũm ra kãm amar kaga hãmri nê tã kànhmã nhỹ nê amã ate ho presija xwỳnhta gõ. No ãm

kêp akràmnhwỳ hã ate hã axàhwỳr tipxi hã amã òr kêt nê. Æm xatã ate ho presija htỳx xwỳnhja mã hamaxpêr nê tã kànhmã nhỹ nê amã kugõ. Æ mẽ ujarênh kot anhỹr.

⁹⁻¹⁰ —Tã kêr ka mẽ ja pyrã nê amnhĩ to Tĩrtũm wỳr rãhã ho ri apa nhũm ama nê ate mẽmoj tã hwỳrta amã kugõ. Æm xatã ate hã axàhwỳr o ri apa nhũm amã kugõ. Æm mẽmoj to hwỳr rãhã ho ri apa nhũm ama hãmri nê amã mẽmoj tanhmã hipêx to. Te ho mẽhõ kãm tep xành nê gôx kãm xatã tep rênh xà rênh o ãm pyrã nê xatã mẽmoj tã hwỳr o ri apa. Hãmri nhũm ama nê amã hprãm xwỳnhhta gõ. Te ho tep kanhêr xwỳnhhta tã kot tep ò kanhêr pyrãk o anhĩpêx nê amã mẽmoj prãm xwỳnhhta gõ. Anê.

Tĩrtũm kot hkrajê mã mẽmoj mex nhõr ã harênh

Makre 7.9-11

¹¹ Nhũm Jesus arĩ hkôt mẽ pa ho mẽ pa xwỳnhjê jahkre nê mẽ kãm:

—Nê xà koja akra kãm tep xành nê hã awỳ ka ama nê axtem nê kãm kagã xoprê hõ py nê agõ? ¹² Rỳ nhũm krãhyre gre hã awỳ ka axtem nê kãm makre hõ py nê agõ? Nà na ka htem ã akrajê nhĩpêx anhỹr kêt nê. Na ka htem mẽ kot mẽmoj tã àhwỳr xà hkôt kãm mẽmoj gõ. ¹³ Mẽ kamjaja mẽ ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mẽ pahto mex o mẽ ate mẽ akrajê ho mexta jakrenh. Kãm mẽ pajapê htỳx kôt na hte mẽ pamã mẽmoj mex nhõr o pa. Nê mãânênh amnhĩ Karõja na hte mẽ pamã kugõ. Jakamã kot kaj mẽ atõ Karõ hã awỳ nhũm ama nê awỳr kumẽ nhũm wry nê akarõ mã axà. Æ na hte Tĩrtũm kãm mẽ pajapê xaj mẽ pamã mẽmoj mex nhõr o pa anê. Anê.

Jesus mẽ Satanasti wa harênh

Matêwre 12.22-32; Makre 3.20-30

¹⁴ Tã nhũm Jesus nhỹri axte mẽhõ nê mẽkarõmnuti kator. Na pre ra mẽkarõmnuti tanhmã ho nhũm kapêr kêt nê pa. Hãmri nhũm Jesus omu nê nê kator nhũm akupỹm kapêr mex nê. Nhũm mẽ piitã amnhĩ jaêr pê omu nê no hawênh rũnh nê omunh o kuhê. ¹⁵ Nom nhũm mẽ hkwyjaja Jesus kot ã hipêx anhỹr ã omu nê htỳx ho kêp mẽkarõmnuti hkwy hã hkamnhĩx nê axpên mã harênh o:

—Tk pêr hinhu nhĩkôôti nhỹ hã na hte mẽ nê amnhĩ kwỳjê japôx o pa. Anê.

Hinhu nhĩkôôti nhĩxi hõ pê Satanasti nhũm prem Satanasti nhỹ hã Jesus kot ã amnhĩ nhĩpêx anhỹr o pa hã hkamnhĩx. ¹⁶ Jakamã nhũm mẽ hkwyjaja hwỳr mra nê kãm:

—Kwa mẽ inhmã aa mẽ ixte mẽmoj pumunh kêt ò ho anê. Pa mẽ omu nê ate Tĩrtũm nhỹ hã tanhmã amnhĩ nhĩpêx to ho apa hã apumunh kurê kumrêx. Anê.

Nom hêx rom mẽ kot kamã hamak kaxyw ã kãm kapêr anê. ¹⁷ Nhũm ra Jesus mẽ hamaxpêr kôt mẽ omunh mex jakamã mẽ kapêr ma nê mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwỳnhjaja. Koja pika nhõ xwỳnhjaja axpên kutã amnhĩ xunhwỳ nê axpu hãmri nê anhgrã nê ma ahpỹnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mẽ ò pahi mẽ hamãr o pa hkêt nê. Rỳ koja krĩ nhõ xwỳnhjaja. Mẽ kot axpên to hkwy xwỳnhjaja mẽmoj tã axpên kãm gryk nê axpên kutã amnhĩ xunhwỳ hãmri nê axpên pê anhgrã nê ahpỹnhã pa hãmri nhũm mẽ ò pahi tee ri kãm mẽ hamãr o pa hprãm. Mo ò krĩ kamã mẽ hkwy kot ri mẽ hamãr o pa? No na pre mẽ ò pahi tãm amnhĩ nê mẽ hanor kêt nê.

¹⁸ —Tã ja pyrã nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nê amnhĩ kwỳjê janor o ri ixpa hkêt nê. Nhỹx Satanasti ixte mẽ nê mẽ hanor kaxyw tanhmã inhmã nê hkêt nê.

¹⁹ —No kêt mẽ akwyjaja? Xà Satanasti nhỹ hã na htem mẽ nê mẽ hapôx o pa nà? Kêp apu pa ixte ÿ hã mẽ nê mẽ hapôx ronhỹx mẽ akwyjaja ixpyrã nê ÿ hã mẽ nê mẽ hapôx o pa. Nà Tĩrtũm nhỹ hã mẽ ixte mẽ nê mẽ hapôx o mẽ ixpa kênã. Jakamã ã mẽ ate ijarênh anhỹr o apaja mex kêt. ²⁰ Tĩrtũm Karõ nhỹ hã ixte mẽ nê mẽ hapôx o ri ixpa kênã. Jakamã kwa mẽ ja hã ixpumu nê Tĩrtũm kot ixte mẽ ato amnhĩptar kaxyw mẽ awỳr inhmênh kôt ixpumunh kurê kumrêx kêt wehe. Pa na ka htem ixkamã ajamak o apa.

²¹⁻²² —Satanastija àhpumunh tỳx jakamã na htem tee ri kêp mẽ kot hkôt amnhĩ xunhwỳr xwỳnhjê pytâr kaxyw nhũm mẽ nê mẽ omunh mex nê. Nom ixàhpumunh tỳx o ixte Satanasti jakrenh jakamã pa na pa hte kêp mẽ utà nhũm mẽ hpãnhã ixkôt ri amnhĩ nhĩpêx.

²³ —Mẽ amã ixkapêr mar prãm tã na ka mẽ kormã ixkôt amnhĩ xunhwỳr kêt nê. Kwa wem ma amnhĩ to amôr gri nê tokyx ixkôt amnhĩ xunhwỳ kêt wehe. Kot kaj mẽ anhỳr kêt nê hãmri nê te mẽ ate ixkutã amnhĩ xunhwỳr xwỳnh pyrãk o amnhĩ nhĩpêx. ²⁴ Mẽ ate ixkôt amnhĩ xunhwỳr kêt xwỳnhjaja te mẽ ate mễhõ nê mẽkarõmnuti japôx xwỳnh pyrãk. Nhũm te kêp kator nê ma mỗ nê nhỹri amgrà kamã ri pa. Nhũm ja kêp omnuj nhũm tee ri kamã nhỹri hkôkôt xà japêr o pa. Nom tee ri hapêr o pa nê hamaxpêr o: “E kot paj ma akupỳm mẽ kot nê ixkator xwỳnhhta wỳr tễ nê hwỳr axà nê hkôt mãn ixpa.” Anê. ²⁵ Hãmri nê ma akupỳm hwỳr tễ. Nom kormã akupỳm hwỳr àr kêt ri nhũm kamã amrakati nê pa. ²⁶ Jakamã nhũm ma akupỳm hwỳr tễn axà. Nom ahte àr kêt nê. Ra amnhĩ kôt amnhĩ kwỳjê ho 7 nê hwỳr mẽ ho agjê. Nê hwỳr gjêx pa. Mẽ kêp 7jaja nê wamta mẽ nhũm mẽ piitã hwỳr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwỳr gjêx xwỳnhhta mẽ ỹ hã amnhĩ tomnuj tỳx o pa. Oprê htỳx nê. Wam pyxire nê kot hwỳr àr nhỹ hã amnhĩ tomnuj o ri pa nom ãm kawax pê oprê. Tã axte hwỳr mẽ ohtô nê gjêxta nhỹ hã oprê htỳx kumrêx. Ja pyrã nê kot kaj mẽ tokyx ixkôt amnhĩ xunhwỳr kêt nê hãmri nê ãm amnhĩ tomnuj tỳx pix o ri apa. Anê.

Mẽ hkĩnh nê mẽ pa xwỳnhjê jarênh

Rukre 8.19-21

²⁷ Nhũm pre ã Jejus mẽ ahkre anê nhũm mễhõ nija kuma nê kãm:
—Hêxta gàa nê. Mãn akatorxà ã ate amnhĩ nhĩpêx anhỳr o apa hã apumu nê hkĩnh nê. Anê.

²⁸ Hãmri nhũm kãm:

—Tỳ. Nà kot anhỳr kênã. Nom kot ka mẽ atô Tĩrtũm kapêr ma nê hkôt amnhĩ nhĩpêx hãmri nê akĩnh rax o ixkatorxà kot ixpumunh nê hkĩnhhta jakre. Anê.

Jejus kot tanhmã Jõhti jarênh to

Matêwre 12.38-42; Makre 8.12

²⁹ Tã nhũm mẽ ohtô nê Jejus ã akuprõ nê mẽmoj tã kuwỳ nê kãm:

—Pa. Kwa mẽ inhmã aa mẽ ixte mẽmoj pumunh kêt õ ho anê pa mẽ omu. Anê.

Hãmri nhũm mẽ kuma nê mẽ kãm:

—Tk. Kwa mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awỳr inhmênh xwỳnh tã ka mẽ ja hã ixkôt ajamaxpêr kêt nê. Tã mẽ ate aa mẽmoj pumunh kêt kwỳ ixte mẽ amã ho anhỳr kaxyw hã inhmã karõ. Nà kot paj kormã mẽ amã ho anhỳr kêt nê. Kot paj nhỹrmã te amnepêm finat Jõhti kot amnhĩ nhĩpêx pyrãk o amnhĩ nhĩpêx ka mẽ hã ijarênh ma nê kormã ja hã ixpumu. ³⁰ Tĩrtũm nhỹ hã kapêr xwỳnh pê Jõhtija amnepêm na pre tep rax kukrê. Tã nom nhũm htĩr rãhã õxàhkre rũm kato nhũm mẽ omu nê Tĩrtũm kot mẽ hwỳr mênh ã omu. Tã kot paj nhỹrmã Jõhti pyrã nê tanhmã amnhĩ nhĩpêx to nhũm mẽ ja hã ixpumu nê Tĩrtũm kot mẽ awỳr inhmênh xwỳnh ã ixpumunh kurê kumrêx.

³¹ —Nê koja nhỹrmã Tĩrtũm akupỳm mẽ htyk nê mẽ hikwỳ xwỳnh piitã akupỳm mẽ ho htĩr hãmri nhũm mẽ piitã Inhĩpêxà mẽ wa ixkutã hkrĩ. Pa wa mẽ piitã tanhmã mẽ harênh to. Tĩrtũm mẽ wa ixkuri mẽ htĩr tũm nê mẽ pa ho mẽ pa mã xwỳnh ã mẽ hkwỳjê jarê. Nê wa ixkuri mẽ pa ho mẽ pa hkêt xwỳnhjê jarê. Mẽ piitã ã mẽ harênh anê. Amarĩ mẽ pa xwỳnhjaja nê mẽ õ pahijaja. Hãmri nhũm sur kãm mẽ õ pahi niti Tĩrtũm mã tanhmã amnhĩ jarênh to hãmri nê hpãnhã tanhmã mẽ ajarênh to nê kãm mẽ ajarênh o: “Na pa pre inhmã pahi Sarumãw kot anhỹ hã àhpumunh tỳx ã harênh ma hãmri nê inhmã mar prãm xàj ma awry hã õ pika hwỳr ixpa nê omu nê kapêr ma. Hãmri nê ma akupỳm inhõ pika hwỳr ixpa nê ixkwỳjê mã àhpumunh tỳx ã harênh o ixpa. Tã Akra Jejus na àhpumunh tỳx o pahi Sarumãw jakrenh tã or war akutã mẽ hkrĩ xwỳnh kwỳ mỳj na prem kapêr ma no ãm ixkĩnhã kãm mar prãm kêt nê. Na prem kuma nê ãm kuma.” Anhỳr

o wa inhmã mẽ ajarẽ. Hãmri nẽ ja hã mẽ amã akir ka mẽ tee ri mar o akrĩ nẽ amnhĩ kamã agryk o akrĩ.

³² —Hãmri nhũm hpãnhã Nĩnĩwe nhõ xwỳnhjaja wa inhmã tanhmã amnhĩ jarẽnh to. Jõhti kot mẽ hwỳr mõi nẽ mẽ kãm Tĩrtũm kapẽr jarẽnh o pa xwỳnhjaja nhũm mẽ tanhmã wa inhmã amnhĩ jarẽnh to. Hãmri nẽ pahi nita pyrã nẽ wa inhmã tanhmã mẽ ajarẽnh to nẽ wa inhmã: “Na pre Jõhti man mẽ inhõ krĩ hwỳr mõi nẽ mẽ inhmã akapẽr jarẽnh o ri mẽ ixkõt pa. Pa prem kuma nẽ mẽ ixte amnhĩ tomnuj kaga nẽ akõt amnhĩ xunhwỳr kurẽ kumrẽx Tĩrtũm. Nom or war akutã mẽ hkrĩ xwỳnh kwỳ mũj na pre Akra Jejus tãm mẽ hwỳr mõi nẽ mẽ kãm kapẽr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga nẽ hkõt amnhĩ xunhwỳr kêt nẽ. Mẽ kot Akra mar tã amnhĩ kaxyw kãm hamaxpẽr kêt nẽ.” Anhỳr o koja mẽ wa inhmã mẽ ajarẽ ka mẽ tee ri mẽ ama nẽ amnhĩ kamã agryk tỳx nẽ. Jakamã e kwa ixte mẽ amã ã ixkapẽr anhỳrja ma nẽ kãm ajamaxpẽr tỳx rãhã ho ri apa. Anẽ.

Mẽ pajamaxpẽr mex te kot kanê hpõk mex pyrãk ã harẽnh

Matêwre 5.15, 6.22-23

³³ Nhũm Jejus arĩ mẽ ahkre ho nhỹ nẽ mẽ kãm:

—Xà na htem kanê hpõk nẽ poti ho hpro? Nà na htem ho anhỳr kêt nẽ. Na htem hpõk nẽ kỳx pẽ mẽmoj nhĩmõk ã unhwỳ nhũm mẽ piitã mẽ kãm hirã mex nhũm htem ixkrem agjẽ nẽ hirã kamã mẽmoj pumunh mex o mra. ³⁴ Ja pyrã nẽ kot ka mẽ atõ ixkapẽr ma nẽ ixkõt amnhĩ nhĩpêx nẽ tãm amnhĩ nhĩpêx o ri apa. Nẽ tãm mẽ hipêx o ri apa. Jao te hirã kamã mẽ rĩt mex xwỳnhjaja kot amnhĩ nhĩpêx pyrãk. Nom koja mẽhõ inhma nẽ ãm inhma nẽ ixkwỳm ri tanhmã amnhĩ nhĩpêx to ho pa. Jao te kamãt kô kamã mẽ rĩt mex kêt xwỳnhjaja kot htỳx amnhĩ nhĩpêx o pa pyrãk o amnhĩ nhĩpêx.

³⁵ —E kër ka mẽ ã amnhĩ nhĩpêx anhỳr pymaj ixkapẽr ma nẽ kãm ajamaxpẽr tỳx rãhã ho ri apa. ³⁶ Kot kaj mẽ ixkapẽr ma nẽ ixkõt amnhĩ nhĩpêx. Hãmri nẽ te mẽ ate kanê hpõk mex nhĩrã kamã ri apa pyrãk o amnhĩ nhĩpêx. Jao aprĩ hã ixkapẽr ma nẽ aprĩ hã ixte tanhmã amnhĩ nhĩpêx to hã ixpumunh mex nẽ. Anẽ.

Jejus kot tanhmã Parijew nhõ xwỳnhjẽ jarẽnh to

Matêwre 23.25-26

³⁷ Tã nhũm Jejus ra mẽ ahkre pa. Hãmri nhũm Parijew nhõ xwỳnhja hwỳr tẽ nẽ kãm:

—Pa. E kwa ma ixkõt tẽ nẽ mẽ ixkutã apku. Anẽ.

Hãmri nhũm kuma nẽ kãm:

—Tõe. Nà kot paj ma akõt tẽ. Anẽ

Hãmri nẽ ma hkõt tẽ nẽ õrkwỹ hwỳr axà nẽ apkur kaxyw mẽ ãhkõ hã nhỹ. ³⁸ No ãm mẽ hkukamã mẽ hpãmjẽ pyrã nẽ amnhĩ nhĩhkra kuhõnh ryy hkêt nẽ. ãm amnhĩ nhĩhkra htyk pix kuhõnh tokyx anẽ nẽ nhỹ. Nẽ õ prat kuhõnh ryy hkêt rãhã apkur kaxyw nhỹ. Jakamã nhũm kot amnhĩ kõt hwỳr xwỳnhhta tee ri ja hã omu nẽ hamaxpẽr o:

—Tk. Kwa na hte mẽ ixte amnhĩ nhĩpêx kõt amnhĩ nhĩpêx mex kêt nẽ.

³⁹ Anẽ nhũm Jejus amnhĩ tã hamaxpẽr ã omu nẽ kãm:

—Nà mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tã mex ã harẽnh pyrãk o amnhĩ nhĩpêx. Nẽ ãm mẽ akrã hkã rũm pix mã na mẽ amex. Nẽ mẽ noo mã te mẽ amex pyrãk no ãm mẽ anhõxàhkre kaxwỳnh kãm mẽ ajamaxpẽr mex kêt. ãm mẽ akapẽr prãm. Nẽ mẽ axàhkurêê. Nẽ mẽ anhõxỳy. ⁴⁰ Mẽ ate atỳx ri amnhĩ nhĩpêx o ri mẽ apa xwỳnh kênã. Kwa kër ka mẽ ãm akrãhkã pix rũm amex nẽ ri apa hkêt nẽ. Mẽ mãänẽnh anhõxàhkre kaxwỳnh kãm ajamaxpẽr mex o ri apa. Nẽ tãm mẽ piitã mẽ hipêx o ri apa. ⁴¹ Kër ka mẽ tãm ajamaxpẽr o tãm mẽ hipêx o ri apa. Nẽ axãmnhix ri mẽ kệp amrakati xwỳnhjẽ mã mẽmoj nhõr o ri apa. Kot kaj mẽ ã amnhĩ nhĩpêx anẽ hãmri nhũm Tĩrtũm ja hã mẽ apumu nẽ amnhĩm mẽ amex ã mẽ ajarẽ. No na ka htem mẽ amã mẽ amnhĩ to mex prãm xaj tee ri amnhĩ kuhõnh japjẽ kaprỹ. Anẽ.

Jejus kot Parijew nhõ xwỳnhjaja mex kêt kukamã mẽ harẽnh

Matêwre 23.4, 23.7, 23.13-24, 23.27-38; Makre 12.38-39

⁴² Nhũm Jejus arĩ Parijew nhõ xwỳnhjê jahkre nẽ mẽ kãm:

—Kwa mẽ okora Parijew nhõ xwỳnhjaja. Kot kaj mẽ amex kêt nẽ. Na ka htem Tĩrtũm kapẽr piitã hkõt amnhĩ nhĩpêx o apa hkêt nẽ ãm hkwỳ kõt pix mã amnhĩ nhĩpêx o ri apa. Nẽ ãm kapẽr o hpỳnhre nẽ hkõt amnhĩ nhĩpêx hãmri nẽ hã amnhĩ pumu nẽ ate amnhĩ to mex xwỳnh ã amnhĩ to jarkrar o ri apa. Nom Tĩrtũm kãm hprãm xà piitã hkõt amnhĩ nhĩpêx hkêt nẽ. Mẽ ate tãm mẽ piitã mẽ hipêx o ri apa hã kot mẽ amã karõja. Nẽ mẽ amã Tĩrtũm kĩnh ã kapẽr kõt amnhĩ nhĩpêx o ri apa hã karõja mẽ ate mar mex tã hkõt amnhĩ nhĩpêx kêt nẽ. Mẽ ate kapẽr piitã hkõt amnhĩ nhĩpêx ronhỹx ja mẽ amã mex kumrêx.

⁴³ —Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwỳnh ã amnhĩm mẽ ajarênhja na mẽ amã hprãm. Nẽ mẽ piitã mẽ kot amnhĩm mẽ apê mẽ ahkre mex xwỳnh maati hã mẽ ajarênhja na mẽ amã hprãm.

⁴⁴ —Kwa mẽ o kora. Kot ka mẽ amex kêt nẽ. Mẽ kot mẽ akapẽr mar nẽ mẽ akõt amnhĩ nhĩpêx xwỳnhjaja te mẽ kot htỳx ri mẽ hã pika nhĩmõk ã ri mẽ pa xwỳnh kot amnhĩ nhĩpêx pyrãk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika mex ã hkamnhĩx nẽ htỳx ri mẽ hã pika nhĩmõk ã ri mẽ pata pyrãk o na htem amnhĩ nhĩpêx. Anẽ.

Nhũm pre ã Jejus Parijew nhõ xwỳnhjê mã mẽ kot amnhĩ nhĩpêx jarênh anẽ.

Jejus kot Tĩrtũm kapẽr tũm o mẽ ahkre xwỳnhjê mã kapẽr

Matêwre 23.1-4, 23.13, 23.29-36

⁴⁵ Hãmri nhũm Tĩrtũm kapẽr tũm o mẽ ahkre ho pa xwỳnhja kuma nẽ kànhmã xa nẽ kãm:

—Kwa na ka ã Parijew nhõ xwỳnhjê jarênh punuj anhỹr jao mãänẽn ã mẽ paja jarênh anẽ nà? Mẽ ixte amnhĩ nhĩpêxja ãm tipxi kênã. Anẽ.

⁴⁶ Hãmri nhũm kãm:

—Tỳ. Mãänẽn mẽ kajaja. Kwa o kora mẽ apê Tĩrtũm kapẽr tũm o mẽ ahkre xwỳnhjaja. Kot kaj mẽ uràk nẽ amex kêt nẽ. Na ka htem mẽ kãm mẽmoj tã karõ ho ri apa nẽ mẽ kãm: “E kêt ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr tã no ãm mẽ kajaja amnhĩ kapẽrja kõt amnhĩ nhĩpêx kêt nẽ. Te mẽ ate mẽhõ kot mẽ katut ã mẽ kãm mẽ jênh pytĩ janhõr tã mẽ ho ajuta nẽ hkwỳ htur kêeta pyrãk o na ka htem amnhĩ nhĩpêx o ri apa.

⁴⁷⁻⁴⁹ —Na pre Tĩrtũm amnepêm mẽ pahpãmjê hkukamã tanhmã mẽ harênh to. àhpumunh tỳx xà hkõt tanhmã mẽ hkukamã mẽ harênh to nẽ mẽ harênh o: “Kot paj ma mẽ hwỳr inhỹ hã ixkapẽr jarênh xwỳnhjê rẽ. Nom koja mẽ omu nẽ ãm mẽ omu nẽ kêt mẽ hprãm nõkati nẽ tanhmã mẽ hipêx to ho pa. Nẽ ixpê mẽ hkwỳjê hpar o pa. ã koja mẽ inhỹ hã ixkapẽr jarênh xwỳnhjê nhĩpêx anẽ.” Anhỹr o mẽ hkukamã mẽ harẽ. Tã ã mẽ harênh anhỹr xà hkõt nhũm prem ã mẽ hipêx anẽ nẽ mẽ hkwỳjê hpa nẽ mẽ hkwỳjê pynê nẽ mẽ hagjê.

—Amnepêm mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa. Te mẽ amã mẽ hapê nẽ mẽ ho ajamak pyrã nẽ mẽ hã pika ho mex o ri apa. Nom mẽ amã mẽ hapê hã ho mex hkêt nẽ. ãm ra mẽ htyk nẽ hapêx nẽ mẽ amã Tĩrtũm kapẽr jarênh o pa hkêtja ã na ka htem akĩnh nẽ ã axêx rom mẽ hã pika ho mex anhỹr o ri apa.

⁵⁰⁻⁵¹ —Na prem Tĩrtũm nhỹ hã kapẽr jarênh o mẽ pa xwỳnhjê nhĩmex rax nẽ. Amnepêm panhĩ kator krax rũm finat Atãw kra finat Apewja na pre Tĩrtũm nhỹ hã kapẽr o pa nhũm htõ kãm mar prãm kêt nẽ kupĩ. Tã nhũm Tĩrtũm axte mẽ hwỳr y hã kapẽr jarênh o mẽ pa xwỳnh kwỳjê rẽ nhũm prem mã mẽ ho anẽ nẽ mẽ hkwỳjê nhĩmex. Nhũm pre xatã mẽ hwỳr mẽ hkwỳjê rẽ nhũm mẽ xatã mẽ kupa. ã Apew rũm finat Jakaris wỳr na prem mẽ himex rax anẽ. Nẽ hpãnhã Jakarisja nhũm prem Tĩrtũm mã amnhĩ jarênh xà hã ixkre kamã kupĩ. Tã ka mẽ ajaxwỳja amã Tĩrtũm kapẽr mar prãm kêt nẽ mẽ uràk nẽ amã y hã kapẽr jarênh o mẽ pa xwỳnhjê nhĩmex prãm. Tã ã mẽ pahpãmjê mẽ ato hpimràatã mẽ ate mẽ hipêx anhỹrja mỳrapê koja Tĩrtũm ja hã mẽ apê mẽ hkanrêhã mẽ

htàmnhwỳjaja tanhmã mẽ ato htỳx to ka mẽ amnhĩ xà htỳx kamã ajamak o ri apa rãhã nẽ kãm ga.

⁵² —Jakamã kwa mẽ o kora mẽ apê Tirtũm kapêr tũm o mẽ ahkre xwỳnhjaja. Mẽ ajaxwỳja na ka htem Parijew nhõ xwỳnhjê pyrã nẽ Tirtũm kapêr o mẽ ahkre ho apa. Nẽ aprĩ hã mar mex tã no ãm amnhĩ kaxyw hkõt ajamxpêr nẽ hkõt amnhĩ nhĩpêx kêt nẽ. Hãmri nẽ mẽ kot mẽ amar o pa xwỳnhjê mã atỳx ri tanhmã mẽ ahkre hto nhũm htem mẽ ama nẽ mẽ apyrã nẽ amnhĩ kaxyw Tirtũm kõt hamxpêr nẽ hkõt amnhĩ nhĩpêx kêt nẽ. Mẽ kãm hprĩ hã kapêr mar mex prãm tã mẽ amar xà hkõt mẽ ate amnhĩ nhĩpêx pyrãk o amnhĩ nhĩpêx o pa. Nom mẽ kajaja na ka htem mẽ kãm mẽ hamxpêr mex nhõr kêtja mỳrapê nhũm htem ã amnhĩ nhĩpêx anhỳr o pa. Jakamã kwa mẽ o kora kot kaj mẽ amex kêt nẽ. Anẽ.

Nhũm pre ã Jejus mẽ kãm kapêr anẽ. ⁵³⁻⁵⁴ Hãmri nẽ kato nẽ ma tẽ. Nhũm Tirtũm kapêr tũm o mẽ ahkre ho mẽ pa xwỳnhjê mẽ Parijew nhõ xwỳnhjaja hãmri kot tanhmã mẽ kãm kapêr toja ma nẽ kamã gryk tỳx nẽ. Jakamã ma hkõt mra. Hêx rom mẽmoj tã hkukjêr o hkõt mra. Nẽ hã hkukjêr kãm hihtỳx o hkõt mra. Kot tanhmã mẽ kãm ujarênh to nhũm mẽ kot mar nẽ ra hã àmnênh kaxyw ma hkõt àhkukjêr o mra.

12

Mẽ pahte Tirtũm pê mẽ pajamxpêr punuj o pahpimxur kêt

Matêwre 10.26-33

¹⁻³ Tã nhũm mẽ Jejus ã htu rax kumrêx nẽ hã axpên nhĩgãnh o kuhê. No nhũm kormã mẽ kãm tanhmã kapêr to hkêt nẽ. ãm kormã hkõt mẽ pa ho mẽ pa xwỳnhjê kumrêx mã kapêr nẽ mẽ kãm:

—Mẽ piitã kãm amnhĩ kwỳjê pê hamxpêr punuj o hpimxur hprãm tã koja nhỹrmã mẽ hamxpêr piitã amnhĩrit pa. Nẽ mẽmoj piitã ra hpimxur mex tã koja nhỹrmã piitã amnhĩrit pa. Nẽ mẽ kot kamãt kô kamã hpimxur pê mẽmoj jarênh tã koja mẽ piitã nhỹrmã kot mẽmoj jarênh ta ma. Nẽ mẽ kot hitom kãm kawax pê axpên mã mẽmoj punuj jarênh tã koja nhỹrmã mẽ piitã mẽmoj jarênh ta ma. Jakamã kwa kêr ka mẽ tanhmã Parijew nhõ xwỳnhjaja kot amnhĩ nhĩpêx to ho pa hã mẽ omu nẽ ãm mẽ omu nẽ mẽ hkõt amnhĩ nhĩpêx kêt nẽ. Te mẽ kot tãm amnhĩ nhĩpêx pyrãk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htỳx ri tanhmã amnhĩ to hêx to ho pa. Tã kêr ka mẽ urãk nẽ ã amnhĩ nhĩpêx anhỳr kêt nẽ. Anẽ.

Mẽ pahte pahkwỳjê pumaj Tirtũm kaga hkêt ã mẽ pamã karõ

Matêwre 10.28-31

⁴ Nhũm Jejus arĩ hkõt mẽ pa ho mẽ pa xwỳnhjê mã kapêr nẽ mẽ kãm:

—E ixkràmnhwỳjaja. Kêr ka mẽ amã akwỳjê puma rỳ nhãm mẽ hkwỳjê puma ho ri apa hkêt nẽ. Koja mẽ apar tã ãm mẽ anhĩ pix pa nom tanhmã mẽ akarõ hto hkêt nẽ.

⁵ Tirtũmja tapxipix na hte mẽ ã nẽ mẽ hkarõ ho hpimràatã mẽ kot amnhĩ xà htỳx kamã hamak tũm xà hwỳr mẽ kurẽ. Tã kêr ka mẽ ja pumaj Tirtũm kapêr kwỳm tanhmã ri amnhĩ nhĩpêx to ho apa hkêt nẽ.

⁶⁻⁷ —Nẽ Tirtũm kot mẽ pahto hapêx par pumunh tã mãânên kot mẽ pajamãr pumunh mex. Mãn ka htem kuwênhre pumu. Na hte Tirtũm hamãr mex o pa. Mẽ piitã mẽ kot ãm kuwênhre pumunh o pa htã nhũm Tirtũm mẽ kurom hamãr mex o pa. Nẽ htãnopxar rãhã ho pa. Nom kãm mẽ pajapê htỳx o kuwênhre jakrenh jakamã kwa mẽ tee ri amnhĩ kukamã ajamxpêr o ri akaprĩ nẽ apa hkêt nẽ. Koja Tirtũm mẽ pahtãnopxar rãhã ho pa. Ra kot tanhmã mẽ pakute hã mẽ pahpumunh par. Nẽ ahpỳnhã tanhmã mẽ pahkrã hkĩ kute hkõt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽhõ puma ho ri apa?

⁸ —Jakamã kwa mẽ mãmri mẽ kãm mẽ apê ixkra hã amnhĩ jarênh o ri apa nẽ amã mẽ uma xàj tee ri amnhĩ nhĩpêx o ri apa hkêt nẽ. Kot ka mẽ kãm ra mẽ ate ixkõt amnhĩ xunhwỳr ã amnhĩ jarẽ. Pa ja hã mẽ apumu hãmri nẽ mẽ apyrã nẽ kaxkwa kamã Tirtũm kapêr o mẽ wryk xwỳnhjê mã ra mẽ ate ixkõt amnhĩ xunhwỳr ã mẽ ajarẽ. ⁹ Nom kot

ka mẽ kot ixtã tanhmã mẽ ato pymaj apê ixkwý hã amnhĩ jarênh kêt japêr. Pa ja hã mẽ apumu hãmri nê nhỹrmã amnhĩ xwar mẽ kãm mẽ apê ixkwý hkêt ã mẽ ajarê. Jakamã kwa mẽ mãmri mẽ kãm apê ixkwý hã amnhĩ jarênh o ri mẽ hkôt apa kê mẽ ama nê tanhmã inhmã hamaxpêr to. ¹⁰ Koja mẽ ama nê ãm ama nê kãm ixprãm kêt japêr. Hãmri nhũm Tĩrtũm ixtã mẽ omu nom tokyx ixtã tanhmã mẽ ho hkêt nê. Koja kormã amnhĩ tã mẽ hamãr o pa. Karõ kot axte mẽ kãm ijarênh o amnhĩrit nhũm mẽ hkwýjaja kot mar nê kãm ixprãm nê ixkôt amnhĩ xunhwýr kaxyw nhũm kormã amnhĩ tã mẽ hamãr o pa. Nom koja Karõ xatã mẽ kãm ixto amnhĩrit tã nhũm mẽ kuma nê ãm kuma nê te mẽ kot kêp amnhĩ jamak pro pyrãk o amnhĩ nhĩpêx o pa. Jao Karõ hã hpijaãm kêt mýrapê koja Tĩrtũm nhỹrmã amnhĩ xwar te kot mẽ kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprý. Hãmri nê amnhĩ xà htýx kamã hamak tũm xàta wýr ma pa nê kamã pa ho pa. Jakamã kwa mẽ mãmri mẽ kãm mẽ apê ixkra hã amnhĩ jarênh o ri mẽ hkôt apa nê tanhmã mẽ kãm ijarênh to ho ri apa. ¹¹ Koja mẽ ama nê kãm mẽ amar prãm kêt japêr hãmri nê ixtã mẽ apynê nê tanhmã mẽ anhĩpêx to kaxyw. Nê Ijaew nhõ Tĩrtũm kapêr o mẽ ahkre xà hã ixkre hwýr mẽ ato mrar japêr. Rý mẽ õ pahi hwýr mẽ ato mrar nê tanhmã kãm mẽ ato hêx to. Nom kêr ka mẽ mẽ kãm amnhĩ jarênh kaxyw nê tee ri amnhĩ kukamã ajamaxpêr o amã mẽ uma kêt nê. ¹² Koja Tĩrtũm Karõ ja kaxyw mẽ amã mẽ ajamaxpêr mex gõ hãmri ka mẽ ô ri mẽ kãm amnhĩ jarê. Jakamã kwa mẽ tee ri mẽ kãm amnhĩ jarênh kukamã ajamaxpêr o ri mẽ amã mẽ uma ho apa hkêt nê. Anê.

Mẽ hikukrêx rũnh pix kukamã hamaxpêr xwýnhjê jarênh

Wam Ximotre 6.9-10; Xiakre 4.13-17, 5.1-6

¹³ Nhũm Jesus arĩ mẽ ahkre o xa nhũm mẽ mar o kuhê. Rõm nhũm mēhõ myja hwýr tẽ nê kãm kapêr nê kãm:

—Pa? Kwa ot pa awýr amã mẽmoj jarênh mã tẽ. Na pre inhĩpêxà ty nhũm ixtõ ixrom amnhĩm õ mẽmoj piitã ho àrik pa. Õ pika nê hkrit nê hikukrêx nê ãm mẽmoj piitã ho àrik par kumrêx. Kwa ma ixkôt tẽ nê kãm anê pa wa amnhĩm ho axkjê nà? Anê.

¹⁴ Hãmri nhũm kuma nê kãm:

—Tk. Koký. Na pa pre mẽ amã mẽ mẽmoj to ixpikjêr kaxyw mẽ awýr ixwrýk kêt nê. Anê.

¹⁵ Hãmri nê mẽ kot mar o kuhê xwýnh piitã mẽ kãm kapêr nê mẽ kãm:

—Kwa kêr ka mẽ amã anhõ mẽmoj rũnh prãm o ri apa hkêt nê. Na htem mẽmoj rũnh kukwak ri Tĩrtũm wýr apir kêt nê. Mẽmojta kêp pika pix nhõ xwýnh na.

¹⁶ Anhýr o mẽ kãm kapêr hãmri nê mẽ kãm awjarê. Mẽ hikukrêx rax ã kuxi nê mẽ kãm awjarê nê mẽ kãm:

—Nà koja mēhõ õ mẽmoj rax nê. Nê hpur kãm õ rax nê. No ãm õ jaxwýr xà hã ixkre kêp grire. ¹⁷ Hãmri nhũm tee ri hpur kãm õ rax kukamã hamaxpêr nê hamaxpêr o: “Kwa tanhmã kot pa amnhĩ to nê ja piitã nhỹri haxwý wehe? Inhmã amarĩ mẽ kêp amrakati xwýnhjê mã hkwý nhõr prãm kêt. Kot paj ãm amnhĩm piitã ir pa nê kritpêm hkur o ixpa. Nom ixpê haxwýr xà hã ixkreja ixpê grire.” Anê.

¹⁸ —Hãmri nê hamaxpêr o: “Nà na pa ra ijamaxpêr. Kot paj ixkre gireta grã nê hpãnhã rax õ nhĩpêx. Hãmri nê ixpur kãm inhõta jamý nê kamã ir pa. Nê ixapênh xà hã ixkukrêx piitã kamã haxwýr pa. Nà kot paj ho anê.” Anê.

¹⁹ —Hãmri nê ra ixkreja grãnh pa nê hpãnhã rax õ nhĩpêx. Nê hipêx pa hãmri nê kamã hpur kãm õta xir pa. Nê apênh xà hã hikukrêx piitã kamã unhwý. Hãmri nê omu nê hkĩnh nê. Nê hamaxpêr o: “Nà hãmri. Kot paj tokyx axte mẽmoj tã ixapênh kêt nê. Ra inhõ rax kumrêx kênã. Kot paj kritpêm ho ixapkur mex o ixpa. Nà ãm hãmri na pa amnhĩ kukamã ijamaxpêr mex pê ixkre rax nhĩpêx.” Anê. ²⁰ Tã nhũm Tĩrtũm tee ri ã kot amnhĩ nhĩpêx anhýr ã omu nhũm ja kãm mex kêt nê. Hãmri nhũm hã kãm kapêr nê kãm: “Nà na ka atýx ri anhõ rax mẽ akukrêx rax o apikuprõnh kaprý. Na ka ãm amnhĩ pix kukamã ajamaxpêr o apa pê ã amnhĩ nhĩpêx anê. Nom kot kaj kamãt ja kamã ty nê anhý kamã ma mõ nê amnhĩ kôt anhõ mẽmoj rax õ ho amõr kêt nê. Koja hpãnhã mēhõ amýr pê ho

amnhĩptàr pa ka rĩ amnhĩ pumu.” Aně. Nhũm ã Tĩrtũm kãm kapěr aně. Ā mẽ ujarěnh kot anhỹr.

²¹—Mě kot amnhĩ nhõ ně amnhĩ kukamã pix mã hamaxpěr o mẽ pa xwỳnhjaja na htem myja pyrã ně Tĩrtũm mã hamaxpěr o pa hkêt ně. Jakamã koja mẽ nhỹrmã ty hãmri ně hkukrêx pix kukamã hamaxpěr ně amnhĩ mã pix mã hamaxpěr o paja mỳrapê Tĩrtũm mẽ wa ixri htĩr tũm ně mex ně pa ho pa hkêt ně. Mě kot amnhĩ nhõ pix kukamã hamaxpěr xwỳnhjaja ně amnhĩ kukamã pix mã mẽ hamaxpěr xwỳnhjaja ně mẽ kamã ukaprĩ hkêt xwỳnhjaja mẽ õ mẽmoj rũnh tã koja mẽ nhỹrmã ty hãmri ně amnhĩ kôt hõ ho pixi ně o mõi kêt ně. Koja mẽ mẽmoj piitã rer pa ně ma ý kamã ma mõi. Jakamã kwa kêr ka mẽ jajê pyrã ně anhõ mẽmoj to anhõxy ho ri apa hkêt ně. Aně.

Mě pahte tee ri amnhĩ kukamã pajamaxpěr kêt ã mẽ pamã karõ

*Matêwre 6.25-34; mããn*ẽn Wam Pêtre 1.3-9

²²Tã nhũm Jejus hpãnhã tanhmã hkôt mẽ pa ho mẽ pa xwỳnhjê jahkre hto ně mẽ kãm: —Kwa kêr ka mẽ tee ri amnhĩ kukamã ajamaxpěr o ri apa hkêt ně. Amnhĩ xàpkur xà rỳ axê ka mẽ tee ri hkukamã ajamaxpěr kêt ně. Ně mẽ ãm mẽmoj piitã hkukamã tee ri ajamaxpěr kêt ně. ²³Tĩrtũm àhpumunh tỳx o àhpumunh tỳx xwỳnh na. Na pre àhpumunh tỳx o mẽ anhĩpêx ka mẽ kukwak ri atĩr ně apa. Tã xà kot mẽ amã mẽ anhõ ho pa hkukamã àhpumunh kêt? Nà ja kukamã àhpumunh xihtỳx kênã. Kêp mẽ anhĩpêx xwỳnh jakamã mããnẽn kêp mẽ amã mẽ anhõ ho pa xwỳnh. Ně kêp mẽ amã mẽ axê nhõr o pa xwỳnh.

²⁴—Mãn ka htem kuwênhre pumu. Na hte tee ri amnhĩ xàpkur xà hkukamã hamaxpěr o hkaprĩ ně ri pa hkêt ně. Na hte Tĩrtũm tãm kot kãm õ ho pa. Tã kãm mẽ pajapê htỳx o kuwênhre jakrenh jakamã koja uràk ně mẽ pamã mẽ panhõ mex o pa rãhã ně. ²⁵⁻²⁶Jakamã kwa kêr ka mẽ mẽmo arĩgro hã axàpkur xà hkryre pumu ně ate amnhĩ pê hkrěr par ně amã prãm o akaprĩ ně apa hkukamã tee ri ajamaxpěr kêt ně. Ām Tĩrtũm kamnàr rom axàmnhĩx anhõ hkryreta ku ně akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu ně akaprĩre nhũm ra tanhmã amã amnhĩ to rax to? Na htem ãm tee ri mẽmo hkukamã hamaxpěr o hkaprĩ ně pa kaprỳ. Jakamã kêr ka mẽ ã ri ajamaxpěr anhỹr o akaprĩ ně apa hkêt ně.

²⁷—Mãn ka htem akunĩ kamã pixõrãre pumu. Na hte tee ri tanhmã amnhĩ kute hkukamã hamaxpěr o hkaprĩ ně harir kêt tã muxre ně harir ka mẽ omu. Te ho amnepêm finat pahihiti Sarumãw xê mex pyrãk nom ãm mex o kot hakrenh.

²⁸—Pixõrãreja arĩgro ja hã htĩr ně muxre ně harir tã koja mẽmo arĩgro hã grã pa ně hapêx. Kêp pixõrã pix ně hapêx tokyx anhỹr tã na hte Tĩrtũm ho mex ně nhũm mux ně harir. Nom mẽ pajaja na hte mẽ pahto mex o pixõrãre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamaxpěr o akaprĩ ně apa? Nà kot kaj mẽ aně ně amnhĩ kaxyw Tĩrtũm mã ajamaxpěr tỳx kêt ně.

²⁹—Kwa mẽ tee ri amnhĩ xàpkur xà hkukamã ajamaxpěr rãhã o ri akaprĩ ně apa hkêt ně. Ně mẽ tee ri amnhĩ kukamã tanhmã ajamaxpěr to ho ri akaprĩ ně apa hkêt ně. ³⁰Mě kot Tĩrtũm kôt amnhĩ xunhwỳr kêt xwỳnhjaja na htem ã ri hamaxpěr anhỹr o hkaprĩ ně pa. Tã kêr ka mẽ ho mẽ uràk kêt ně. Tĩrtũm kot mẽ panhõ mẽmoj kêt kôt mẽ pahpumunh mex kênã. ³¹Jakamã kêr ka mẽ ãm hkôt ri amnhĩ nhĩpêx rãhã ně. Ně amã ja pix kukamã ajamaxpěr o ri apa hprãm. Hãmri nhũm amnhĩ tã mẽ apumu hãmri ně apkati mẽ tãm mẽ amã mẽmoj nhõr o pa. Aně.

Kaxkwa kamã mẽ pakukrêx rax jarěnh

*Matêwre 6.19-21; mããn*ẽn Sikũn Ximotre 4.8; Eprêw 10.34; Wam Pêtre 1.4

³²Nhũm Jejus arĩ mẽ kãm kapěr ně mẽ kãm:

—E mẽ ate ixkôt amnhĩ xunhwỳr xwỳnhjaja. Ra Tĩrtũm kot mẽ ato hkra jakamã kwa mẽ axàmnhĩx hkamnàr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu ně hkĩnh ně. Koja nhỹrmã kaxkwa kamã õ krĩ hwỳr mẽ ato api ka mẽ kamã wa ixkuri amex ně atĩr tũm ně apa ho apa. Ja na mex o kot jar pika ja kôt mẽ õ mẽmoj rũnh ně

pa xwÿnhhta jakrenh. ³³ Jakamã kêr ka mẽ axàmnhĩx ri akukrêx kwÿ ho wênê nê hpãnhã kàxpore jamÿ nê mẽ kêp amrakati xwÿnhjê mã ho apigrànho o ri mẽ hkôt apa. Kot kaj mẽ ã amnhĩ nhĩpêx anê hãmri nê kaxkwa kamã akukrêx rax nê. Mo kaxkwa kamã mẽ àhkĩnh xwÿnh koja mẽ apê ho ahkĩ? Nê kamã mo amnhôre kot mẽ apê homnu? Kaxkwa kamã ja amrakati kumrêx. Jakamã Tĩrtũm kot mẽ amã mẽ akukrêx nhôr mã xwÿnhhta koja aa apê omnuj nê hapêx kêt kumrêx. ³⁴ Kot kaj mẽ jar pika ja kamã akukrêx rax hãmri nê tanhmã apê omnu hto pix kukamã ajamxpêr rãhã ho ri apa. Nom kot kaj mẽ apê Tĩrtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamxpêr rãhã ho ra akĩnh nê ri apa. Anê.

Mẽ pahte Jejus kutêp tanhmã amnhĩ nhĩpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mãanên Wam Tesarõn 5.4-8

³⁵ Nhũm pre Jejus arĩ mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwÿnhjê mã tanhmã amnhĩ kukamã amnhĩ jarênho to. Ixtyk nê akupÿm ixtĩr nê ma akupÿm ixàpir hãmri nê mẽmo arĩgro hã akupÿn mẽ awÿr ixwÿrkja na pa pre ra mẽ amã ja hã amnhĩ jarê. Tã kwa kêr ka mẽ ixwakre kamã ixte mẽ amã ã amnhĩ jarênho anhÿrja mã ajamxpêr tÿx pê ixkôt amnhĩ nhĩpêx rãhã ho ri apa.

³⁶⁻³⁸ —Te mẽ õ patrãw mã mẽ àpênho mex xwÿnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw ma mẽ kot xapên mã wa rer mã xwÿnh pumunh mã ma nhÿhÿm tê. Hãmri nhũm kãm mẽ àpênho xwÿnhjaja arĩ kutêp òrkwÿ kamã hkrĩ. Axkãm hamak rom nê kutêp hkrĩ. Akupÿn htêm nhũm mẽ kot amnhĩ wÿr mar nê kãm kahê xà mênho tokyx anhÿr kaxyw arĩ kutêp òt kêt nê hkrĩ. Kôt ã kamã nhũm akupÿn hpôx o htêm rÿ arĩgro hwÿr hpôx o htêm nhũm mẽ kot amnhĩ wÿr mar nê kãm kahê xà mênho tokyx anhÿr kaxyw kutêp òt kêt nê hkrĩ. Akupÿn hpôx ã omunh hãmri nê tokyx apkur kaxyw kãm õ nhĩpêx kaxyw. Kêr kê akupÿn pøj nê ã mẽ kot amnhĩ nhĩpêx anhÿr ã mẽ omu nê hkĩnh nê. Tã kêr ka mẽ àpênho xwÿnhhtajê pyrã nê ixwakre kamã inhmã ajamxpêr rãhã ho ri apa. Jao ixkamã ajamak o apa ho ixkôt amnhĩ nhĩpêx mex rãhã nê. No kot paj akupÿn mẽ awÿr wÿr hãmri ka mẽ àpênho xwÿnhjê pyrã nê inhmã mẽmoj nhôr kêt nê. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kêp àhkĩnh pymaj amnhĩ nhôrkwÿ jamãr rãhã ho pa. ⁴⁰ Ja pyrã nê mẽ ate akupÿn ixwÿrk xà hã arĩgro pumunh kêt jakamã kêr ka mẽ òrkwÿ nhõ dõnta pyrã nê ixkutêp axkãm ajamak rom rãhã nê ri apa. Jao tãm amnhĩ nhĩpêx rãhã nê. Anê.

Mẽ õ patrãw mã mẽ àpênho mex xwÿnhjê jarênho

Matêwre 24.45

⁴¹ Nhũm pre ã Jejus hkôt mẽ pa ho pa xwÿnhjê jahkre anê. Hãmri nhũm Simãw Pêtre kuma nê kãm:

—Kwa Pahĩti. Xàn ka mẽ piitã mẽ kãm ã akapêr anê nà? Xà ãm mẽ papxipixjê mã? Anê.

⁴² Hãmri nhũm kãm:

—Nà ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwÿnh piitã mẽ amã na pa ã ixkapêr anê. Koja mẽ àpênho xwÿnhjê hõ õ patrãw mã àpênho mex o pa nhũm amnhĩ tã omu nê ma nhÿhÿm mõi kaxyw nê ìhkram mẽmoj piitã haxàr pa. Hãmri nê kãm: “E kêr ka ixwakre kamã inhmã inhôrkwÿ htãnopxa. Nê mẽ àpênho xwÿnhjê mã õ mex kê mẽ apkur mex o pa.” Anê. Koja ã kãm mẽmoj tã karõ anê hãmri nê kato nê ma nhÿhÿm mõi. ⁴³ Hãmri nhũm kãm àpênho mex xwÿnhhta wakre kamã kãm àpênho mex o pa. Jakamã nhũm õ patrãw akupÿn hpôx o mõi nhũm amnhĩ wÿr harênho ma nê hkĩnh nê. Nê mẽmoj tã amnhĩ tã kamã kahak kêt nê. Rÿ tee ri wakre kamã kãm àpênho punuj ã amnhĩ pumu nê tee amnhĩ kukamã hamxpêr kêt nê. Kot wakre kamã kutêp àpênho mex jakamã akupÿn hpôx ã harênho ma nê hkĩnh nê.

⁴⁴ —Jakamã nhũm õ patrãwja akupÿn pøj nê kot kãm àpênho mex ã omu nê haxwÿja hkĩnh nê. Hãmri nê kot kãm hamãr o pa kaxyw kãm mẽmoj piitã ìhkram haxàr pa. ⁴⁵ Nom koja kãm àpênho xwÿnhhta axtem nê wakre kamã kãm àpênho mex kêt nê. Nê tokyx akupÿn

mõr kêt ã hkamnhĩx nẽ wakre kamã kãm mẽ àpênh xwỳnhjê htak nẽ pipãnh pix nẽ mẽ kãm gô xành xwỳnhjê kôt pix mã pa japêr. ⁴⁶ Hãmri nhũm õ patrãw haêr pê akupỳn pøj nẽ tee ri ã amnhĩ nhĩpêx anhỹr ã omu. Hãmri nẽ gryk tỳx nẽ tanhmã homnuj to. Hãmri nẽ kãm mẽ àpênh punuj xwỳnhjê mẽ mẽ ho pimràatã amnhĩ nẽ mẽ hanor pa. Tã kêr ka mẽ ixwakre kamã ho mẽ uràk kêt nẽ. Mẽ kurom ixkapêr kôt tãm amnhĩ nhĩpêx mex rãhã ho ri apa.

⁴⁷⁻⁴⁸ —Nẽ koja mễhõ kormã Tĩrtũm kapêr mar kêt nẽ htỳx ri tanhmã amnhĩ tomnuj to ho pa. Hã koja Tĩrtũm ja hã omu nẽ nhỹrmã kot amnhĩ tomnuj o pata mỳrapê tanhmã ho nhũm amnhĩ xà htỳx kamã hamak tũm xà kamã pa. Nom akrànhmã amnhĩ xà kamã hamak o pa. Aa kot Tĩrtũm kapêr mar kêt jakamã koja ãm akrànhmã amnhĩ xà kamã hamak o pa. Nom koja mễhõ kapêr mar mex tã ãm kuma nẽ hkôt amnhĩ nhĩpêx kêt nẽ. Nẽ xatã hirôp kuhê nẽ tanhmã amnhĩ tomnuj to. Hã koja Tĩrtũm tee ri ja hã omu nẽ nhỹrmã tanhmã homnuj tỳx to. Hãmri nhũm wamtajê pyrã nẽ amnhĩ xà htỳx kamã hamak tũm xàta kamã pa ho pa nom mẽ kĩnhã amnhĩ xà htỳx kamã hamak rãhã ho pa. Anẽ.

Jejus kot nhỹrmã mẽ kot amnhĩ tomnuj xà ho hapêx ã harênh

Matêwre 10.34-36

⁴⁹ Nhũm Jejus arĩ hkôt mẽ pa ho mẽ pa xwỳnhjê jahkre nẽ mẽ kãm:

—Nà ixte mẽ omnu xà piitã ho ijapêx par nẽ mẽ kot tanhmã amnhĩ tomnuj to piitã ho ijapêx par kaxyw na pa pre wrỳ. Tã ra ixte piitã ho ijapêx par o inhmõr ronhỹx ja inhmã mex kumrêx. Nom kormã. ⁵⁰ Kot paj amnhĩ xà htỳx kãm ijamak rax o mẽ kot amnhĩ tomnuj o ijapêx o hkrax. Hãmri nẽ nhỹrmã ho ijapêx pa. Na pa ra ixtyk kaxyw ixte amnhĩ kà xà kamã ijamak kukamã ijamaxpêr o ra amnhĩ kamã ixkahak nẽ ri ixpa. Tã kot paj ja ho ijapêx pa nẽ ixkĩnh tỳx kumrêx. Anẽ.

Mẽ kot Jejus ã axpên kutã amnhĩ xunhwỳr ã mẽ harênh

Matêwre 10.21, 10.34-35

⁵¹ Nhũm Jejus arĩ mẽ ahkre nẽ mẽ kãm:

—Nẽ ra mẽ awỳr ixwrỳk tã koja mẽ piitã ixkukwak ri hamakêtkati nẽ àmnhĩx ri pa hkêt nẽ. Kormã. Koja mẽ akwỳjaja ixkapêr ma nẽ mẽ apyrã nẽ amnhĩ kaxyw ixkôt hamaxpêr. No nhũm mẽ akwỳjaja mẽ akĩnhã kuma nẽ ãm kuma. Hãmri nẽ ixtã tanhmã mẽ anhĩpêx to ka mẽ ixpyrã nẽ amnhĩ xà htỳx kamã ajamak o ri apa.

⁵² —Nẽ koja tanhmãnh ixkre pyxi kamã mẽmojaja ohtôn pa. Nhũm war axkrut্রে nẽ ixkôt amnhĩ xunhwỳ nhũm mẽ axkrunêpxi nẽ ixkwỳm ri amnhĩ nhĩpêx nẽ ixkutã amnhĩ xunhwỳ. ⁵³ Nhũm mẽ hipêêxà hkra my mẽ wa ixtã axpên kutã amnhĩ xunhwỳ. Nhũm mẽ katorxà hkra ni mẽ wa ixtã axpên kutã amnhĩ xunhwỳ. Nhũm mẽ wỳj umregêx mẽ wa haxwỳja ixtã axpên kutã amnhĩ xunhwỳ. Koja mẽ ã ixtã axpên nhĩpêx anhỹr o pa. Anẽ.

Mẽ pahte amnhĩ tomnuj kaga nẽ Tĩrtũm kôt amnhĩ nhĩpêx ã mẽ pamã karõ

Matêwre 5.25-26, 16.2-4

⁵⁴ Nhũm Jejus hpãnhã mẽ kot hkôt amnhĩ xunhwỳr kêt xwỳnhjê mã kapêr nẽ mẽ kãm:

—Kwa mẽ inhma mẽ ate ixkôt amnhĩ xunhwỳr kêt xwỳnhjaja. Na htem kaxkwa kamã na htyk rax pumu nẽ na wrỳk mã hamaxpêr kurê kumrêx. Hãmri nhũm na wrỳ. ⁵⁵ Nẽ amgrã pê kôk krihkritja nhũm htem kuma nẽ arĩgro htỳx mã hamaxpêr kurê kumrêx. Hãmri nhũm arĩgro htỳx nẽ. ⁵⁶⁻⁵⁷ ã na ka htem aprĩ hã mẽmoj pumunh kôt mẽmoj kukamã ajamaxpêr mex o ri apa anẽ. Nom nhũm Tĩrtũmja mẽ ate tanhmã amnhĩ tomnuj to mỳrapê tanhmã mẽ ato kaxyw nhũm mẽ ate ja hã amnhĩ pumunh tã tokyx amnhĩ tomnuj kaga hkêt nẽ.

⁵⁸⁻⁵⁹ —Na htem tanhmã axpên tomnuj to. Hãmri nhũm kot tanhmã war axpên to xwỳnhhta pahi hwỳr htêm nẽ kãm tanhmã kot ho xwỳnhhta jarênh kaxyw. Hãmri nhũm kamã gryk xwỳnhhta kot pahi mã harênh kaxyw ã harênh ma nẽ hãmri tokyx hwỳr tẽ nẽ wa tãm akupỳm axpên xãm. Na htem ã amnhĩ nhĩpêx anẽ. Pahi kot ja mar nẽ tanhmã mẽ ho pymaj na htem ã amnhĩ nhĩpêx anẽ nẽ tokyx akupỳm tãm axpên xunhwỳ. No

koja mẽ ã amnhĩ nhĩpêx anhỹr kêt nê nhũm pahija mẽ harênh ma hãmri nê tanhmã kot hô ho xwỳnhhta pynê nê haxà nhũm tee kãm kator prãm o hkrĩ kaprỳ. Hãmri nê tanhmã amnhĩ to nê amnhĩ pãnhã kãm amnhĩ rer pa nhũm pahihtija kormã mẽ kãm anê nhũm mẽ kãm ure nhũm kato. Ja pyrà nê kêt ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê hkôt amnhĩ nhĩpêx rãhã ho ri apa. Anê.

13

¹ Tã nhũm axtem mẽ hkwỳjaja Jejus wỳr mra nê kãm:

—Pa? Kwa xàn ka ra Garirej nhõ xwỳnh kwỳjê jarênh ma nà? Na xep prem Jerujarê hwỳr mra nê ham mẽ kot Tĩrtũm mã amnhĩ jarênh xà hã ixkre kamã kãm amnhĩ jarênh kaxyw kormã kãm mry hpar o kuhê nhũm xep pahihtija mẽ harênh ma nê mẽ hã amỳnê nhũm mẽ ma mẽ hwỳr mra nê mẽ himex pa. Kwa mãn mẽ kot amnhĩ tomnuj tỳx o mẽ pajakrenh ã na prem mẽ himex nà? Anê.

²⁻³ Hãmri nhũm mẽ kãm:

—Nà mẽ kot amnhĩ tomnuj tỳx mỳrapê mẽ kot mẽ himex kêt. Mẽ apiitã mẽ ate amnhĩ tomnuj o axpên pyræk kênã. Tã kot ka mẽ amnhĩ tomnuj kaga nê Tĩrtũm kôt amnhĩ xunhwỳr kêt hã kot ka mẽ nhỹrmã ty hãmri nê ò krĩ hwỳr axàpir kêt nê. ⁴ No Jerujarê kamã ixkre prêkja mẽ kot kãm “Siroe” anhỹr xwỳnhhta mẽ ho 18 nê mẽ hipy htem nê mẽ himex par xwỳnhhaja. Xà mẽ kot amnhĩ tomnuj tỳx mỳrapê na prem ty? Xà mẽ kot amnhĩ tomnuj tỳx o Jerujarê kamã arĩ mẽ htĩr xwỳnhjê jakrenh? ⁵ Nà kot anhỹr kêt. Mẽ apiitã mẽ ate amnhĩ tomnuj o axpên pyræk. Jakamã kot kaj mẽ ã amnhĩ nhĩpêx anhỹr kaga nê Tĩrtũm kôt amnhĩ nhĩpêx kêt nê hãmri nê mẽ uræk nê nhỹrmã ty hãmri nê Tĩrtũm nhõ krĩ hwỳr axàpir kêt nê. Jakamã kwa mẽ ixkapêr ma nê kãm ajamxpêr tỳx rãhã ho ri apa. Anê.

Tĩrtũm kot mẽ pakamã gryk tokyx anhỹr kêt ã harênh

Rômãn 2.4; Sikũn Pêtre 3.8-9

⁶ Tã nhũm Jejus kê axte tanhmã mẽ ahkre hto. Nê Tĩrtũm kot tanhmã mẽ panhĩpêx to hã kuxi nê mẽ kãm awjarê nê mẽ kãm:

—Koja hpur nhõ dõn mẽmo pàr kre nhũm ra hprêk mex nê ô mã tãm nê. Tã aa ô hkêt ã ra hã amgrà axkrunêpxi. ⁷ Hãmri nhũm kot hkre xwỳnhhja tee ri omu nê kãm àpênh xwỳnh wỳr tẽ nê kãm: “E kwa ma tẽ nê mẽmo pàr mỳj krãhta nê amê. Mexti hã. Ra ô hkêt ã amgrà axkrunêpxi kênã. Koja pêr aa ô hkêt nê. Mo kaxyw kot kêt ô hkêt tã ô mex xwỳnh kaêx ã mẽ kêp àmnàr o kuhê? E hwỳr tẽ nê krãhta nê amê.” Anê. ⁸⁻⁹ Hãmri nhũm tee ri kot kãm hã karõja ma nê kãm: “Kwa nà kormã. Pa kop ixãmnhĩx pàr krax ã mẽmo japòk kwỳ kapĩ nê kop hamã mãn. Kê axte hã amgrà pyxi nê hapêx nê ô hkêt pa kormã krãhta nê kumê. Koja amgrà ja kamã amã ô japêr ka omu nê akĩnh nê.” Anê. ã mẽ ujarênh kot anhỹr. Anê.

Nhũm Jejus ã mẽ kãm ujarênh anê. Mẽ kot amnhĩ tomnuj tỳx o pa htã nhũm Tĩrtũm kot pur nhõ dõn mã àpênh xwỳnhhta pyrà nê mẽ kamã gryk tokyx anhỹr kêt ã nhũm ã hã kuxi nê mẽ kãm ujarênh anê.

Jejus kot arĩgromnu hã mẽhõ ho mex ã harênh

Rukre 14.1-6; Juãw 5.16-17

¹⁰ Tã nhũm mẽ ò arĩgromnu pê sap kato nhũm Jejus Ijaew pikuprõnh xà hã ixkre hwỳr axà nê kamã Tĩrtũm kapêr o mẽ ahkre ho nhỹ. ¹¹ Nhũm kamã mẽhõ ni hikôt rãhã nê pa xwỳnhhja nhỹ. Na pre ra amnepêm mẽkarõmnuti tanhmã ho nhũm katat nê ri mrrar kêt kumrêx. ãm hikôt rãhã nê ri pa hã ra hã amgrà pê 18. ¹²⁻¹³ Hãmri nhũm Jejus omu nê amnhĩ wỳr kãm hpa ho apê nhũm hwỳr tẽ nhũm hã ìhkra xi nê kãm:

—E na ka ra akupỹm amex.

Anê nhũm akupỹm katat nê mex kurê kumrêx. Hãmri nê amnhĩ pumu nê hkĩnh tỳx nê Tĩrtũm mã mex o mex ã harênh o xa. ¹⁴ Nom nhũm mẽ pikuprõnh xà hã ixkre jamãr xwỳnh maatija tee ri ja hã omu hãmri nê Jejus kamã gryk tỳx nê. Mẽ ò arĩgromnu hã

akupÿm kot ho mex jakamã nhũm kamã gryk tÿx nẽ. Hãmri nẽ mẽ pikuprõnh xwÿnhjê mã kãm:

—Tk. Kwa semãn ã mẽ àpênh xà hã arĩgro xohtôô. Kêp 6. Kot kaj mẽ mãmri tãmik nẽ sikũn nẽ tês nẽ kwata nẽ kĩa nẽ sêsta ja ã ka mẽ apê rÿ mãmri Jejus wÿr amnhĩ to mra kê akupÿm tanhmã mẽ ato mex to. No sap ã kwarĩ. Sap kêp mẽ pahpê Ijaew nhõ arĩgromnu kênã. Na pu htem hã paxàpênh kêt nẽ. Jakamã arĩgro ja hã kot akupÿm mẽ ato mexja mex kêt. Anẽ.

¹⁵ Hãmri nhũm Jejus kuma nẽ kãm:

—Kwa xà mẽ kajaja na ka htem sap ã axàpênh kêt nẽ apa? Nà mẽ ate hã axàpênh kênã. Xàn ka htem sap ã akrit kawar nẽ akrit môx ma mẽ ho apa nẽ mẽ hkõm kêt nẽ? Nà na ka htem ma mẽ ho apa nhũm htem ixkõ. Mot ka kêt mẽ ri axtem nẽ mẽ kot sap ã tanhmã amnhĩ toja nẽ mẽ kãm akapêr? ¹⁶ Ixte ni ho mex xwÿnhhta mẽ pahpyrà nẽ kêp finat Apraãw kagrõt nyw õ na. Nhũm pre Satanasti te kot kãm ê nẽ ri o pa pyrãk o hipêx jakamã nhũm ÿ hã hikõt nẽ ri paja ã ra hã amgrã kêp 18. Tã pa nẽ te ixte Satanasti ho ixkrihkrit nẽ ixte kêp utar pyrãk o hipêx nẽ akupÿm ho mex. Mo kot pa kêt ri omu nẽ ãm omu nẽ arĩgromnu hã ho mex kêt nẽ? Nà ixte arĩgro piitã hã akupÿm mẽ ho mex o ixa xwÿnh kênã. Anẽ.

¹⁷ Hãmri nhũm mẽ kot kãm kapêr mar prãm kêt xwÿnhjaja kuma nẽ kamã gryk nẽ. Te ho mẽhprijê mã mẽ hamaxpêr nhõr pyrãk o mẽ hipêx pyrãk jakamã nhũm mẽ amnhĩ tã kuma nẽ kamã gryk nẽ. No nhũm mẽ kot ra ã amnhĩ nhĩpêx anhÿr o pa hã omunh xwÿnhjaja ja hã omu nẽ kãm hkĩnh nẽ.

Jejus te kot mẽmo hy pyrãk ã harênh

Matêwre 13.31-33; Makre 4.30-32

¹⁸⁻¹⁹ Nhũm Jejus arĩ mẽ ahkre nẽ tanhmã mẽ kãm amnhĩ tã ujarênh to nẽ mẽ kãm:

—Nẽ Tĩrtũm kot mẽ awÿr ixte mẽ ato amnhĩptar kaxyw inhmênh ã ijarênhja. Te ixte mẽmo hy pixire pyrãk. Na htem hkre nhũm higrõt. Nẽ gaa nẽ rĩ hprêk. Hãmri nẽ pa anhrã nhũm kuwênhre hwÿr mra nẽ hô pytĩ kamã amnhĩm haê nhĩpêx. Tã kot paj nhÿrmã mẽmo hy jarênhhta pyrã nẽ ixpaxi htã kot paj pika piitã hkõt mẽ ho amnhĩptã nẽ mẽ omunh mex rãhã ho ri ixa. Anẽ.

Jejus te kot pãwti kaxkrit xà pyrãk ã harênh

Matêwre 13.33-35

²⁰⁻²¹ Nhũm Jejus arĩ mẽ ahkre ho xa. Nom hprĩ hã amnhĩ jarênh kêt nẽ. ãm amnhĩ tã kuxi nẽ mẽ kãm awjarê nẽ mẽ kãm:

—E kot pa hpãnhã tanhmã mẽ amã pãwti kaxkrit xà jarênh to. Koja mênijê hõ ãm hkwy ho grire nẽ kupy nẽ kaxyw mẽmo xõm kãm kumê nẽ ho pihkãr pa nẽ ho pãwti nhĩpêx. Nhũm kaxkrit xàja grire htã pãwti piitã ho kaxkrit mex nẽ. Ja pyrã nẽ kot paj ixpyxi htã koja mẽ nhÿrmã pika piitã hkõt ixkõt amnhĩ nhĩpêx mex o pa. Anẽ.

Nhũm pre ã Jejus mẽ kãm amnhĩ tã pãw kaxkrit xàja xi nẽ harênh anẽ.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pê Jerujarê hwÿr krĩ hkõt ri mẽ ahkre ho mẽ hkõt ri pa. ²³ Hãmri nhũm mẽhõ myja hwÿr tẽ nẽ mẽmoj tã hkukja nẽ kãm:

—Pa. Kwa inhmã mẽmoj jarê. Xà koja mẽ ohtô nẽ nhÿrmã Tĩrtũm ri htĩr tũm nẽ papa ho nà koja mẽ grêre? Anẽ.

²⁴ Hãmri nhũm kuma nẽ mẽ kot mar o kuhê xwÿnh piitã kãm:

—Nà mẽ kot Tĩrtũm kõt amnhĩ xunhwÿr xwÿnhjê pix koja mẽ õ krĩ hwÿr agjê. Wÿr mẽ gjêx xàja ãm pixii nom koja mẽ ohtô nẽ kãm hkõt wÿr gjêx prãm kêt nẽ. Na htem te hwÿr mẽ gjêx xà hõ japêr o pa pyrãk. Nom pa na te ixpê hwÿr mẽ gjêx xà pixita pyrãk. Jakamã kwa kêr ka mẽ tokyx ixkõt amnhĩ xunhwÿr tÿx nẽ ixkõt ri amnhĩ nhĩpêx o ri apa. Na htem ohtô nẽ kãm ixkõt amnhĩ xunhwÿr prãm kêt nẽ. Ixte amnhĩ nhĩpêxja mẽ kêp hihtÿx jakamã nhũm htem ixkaga.

²⁵ —Tã koja mẽ nhÿrmã ty nẽ tee ri kãm Tÿrtũm wÿr gjêx prãm kaprÿ. Kot paj te mẽ kêp kahê pyræk o mẽ hipêx nhũm mẽ kapôt ã kuhê nẽ tee ri amnhĩ tã ixpumu nẽ inhmã: “Kwa mẽ inhmã kahê xà mẽ pa mẽ awÿr agjê Pahihti.” Anẽ. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurẽ.” Anẽ.

²⁶ —Hãmri nhũm mẽ tee ri inhma nẽ inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nẽ mẽ ixkutã axàpkur o ri apa.” Anẽ. ²⁷ Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwÿre hã. Jakamã e mẽ ma mra. Mẽ ate amnhĩ tomnuj pix o mẽ apa xwÿnh jakamã kot kaj mẽ ixwÿr agjêx kêt nẽ.” Anẽ. Kot paj ã mẽ kãm ixkapêr anẽ.

²⁸ —Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nẽ ri mẽ inhmex nẽ ixpa hã amÿm mẽ ixpumunh o kuhê. Apraãw nẽ Ijak nẽ Jako nẽ Tÿrtũm kapêr jarênh o mẽ pa xwÿnh piitã nhũm mẽ amÿm mẽ ixkĩnh nẽ mẽ ixàpkur mex ã mẽ ixpumunh o kuhê. Hãmri nẽ tee ri mẽ ixwÿr kãm gjêx prãm kaprÿ nẽ hkaprĩ nẽ mur nẽ amnhĩ krã hkĩ jarê nẽ amnhĩ kà nhê nẽ amnhĩ kamã gryk tÿx nẽ. No ãm tee ri amnhĩ kamã gryk kaprÿ. Á koja mẽ amnhĩ nhĩpêx anẽ. ²⁹ Nom Tÿrtũm kôt mẽ kot amnhĩ xunhwÿr xwÿnhjaja koja mẽ kurom pika piitã kurũm axpên wÿr akuprõ nẽ Tÿrtũm wÿr agjê nẽ kuri hkĩnh nẽ apkur mex o hkrĩ. Mẽ akwÿjaja nẽ pika piitã kurũm hohtô rax nẽ axpên wÿr akuprõ nẽ hwÿr agjê nẽ kuri apkur mex nẽ hkĩnh nẽ pa ho pa.

³⁰ —Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwÿjaja mẽ akwÿjê rom Tÿrtũm ri axpên wÿr akuprõ nẽ hkĩnh nẽ axpên kutã apkur mex o hkrĩ. Jakamã kwa kot kaj mẽ uræk nẽ amã Tÿrtũm mẽ wa ixwÿr agjêx prãm hã kot kaj mẽ ixkôt amnhĩ xunhwÿ nẽ ixkapêr kôt amnhĩ nhĩpêx mex o ri apa. Anẽ.

Jejus kãm Jerujarẽ nhõ xwÿnhjê japê hã harênh

Matêwre 23,37-39

³¹ Hãmri nhũm Parijew nhõ xwÿnh kwÿjaja Jejus wÿr mra nẽ kãm:

—Pa. E ot pa mẽ awÿr mra. Kwa kêt ka ma Jerujarẽ hwÿr amõr kêt nẽ. Na ra mẽ hkĩnh wÿr pahi Eroxa pøj nẽ kot tanhmã ato kaxyw atã amnhĩ jarê pa mẽ kuma. Jakamã kwa mẽ hwÿr amõr kêt nẽ. Nhãm krĩ hõ hwÿr mãn mõi. Anẽ.

³² Hãmri nhũm mẽ kuma nẽ mẽ kãm:

—Tk. Nà kot pa umaj nhãm krĩ hõ hwÿr inhmõr kêt nẽ. Kot paj ma mẽ hkwÿjê nẽ mẽkarõmnuti japõx pê mẽ hkwÿjê ho mex o ma hwÿr mõi. Pahi Erox kãm mẽ hpar pix prãm. E mẽ mãmri ma akupÿm hwÿr mra nẽ ã kãm ixkapêr jarênh anẽ. No kot paj umaj nhÿhÿm ixprõt nẽ ixtêm nẽ kêp ixpimxur kêt nẽ. Ra ixte õ krĩ hwÿr inhnojarêt kênã. Anẽ.

³³ Hãmri nẽ mẽ kot mar xwÿnhjê mã amnhĩ jarê nẽ mẽ kãm:

—Kot paj tanhmã amnhĩ nhĩpêx to ho ri ixpa rãhã Jerujarẽ hwÿr mõi pøj nẽ kamã ty. Kamã na htem mẽ kot Tÿrtũm nhÿ hã kapêr jarênh xwÿnhjê nhĩmex. Tã hwÿr kot paj mõi. Anẽ.

Nhũm pre ã Jejus mẽ kãm amnhĩ jarênh anẽ. ³⁴ Hãmri nẽ te ra kot Jerujarẽ nhõ xwÿnhjê pumunh o ãm nẽ mẽ kãm kapêr pyræk o kapêr nẽ mẽ kãm:

—Hêxta waa nẽ mẽ apê Jerujarẽ nhõ xwÿnhjaja. Tÿrtũmja xatã mẽ awÿr ÿ hã kapêr jarênh o mẽ pa xwÿnhjê rênh tã ka mẽ kapêr mar kêt nẽ. Nẽ axtem nẽ kên o mẽ htao o mẽ himex o apa. Na ka htem ã amnhĩ tomnuj o apa anẽ. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwÿ pyræk o na pa inhmã mẽ anhĩpêx prãm tã ka mẽ apê ixprãm nõkati nẽ ixkaga. ³⁵ Mÿrapê koja Tÿrtũm mẽ anhõ krĩ jamãr kêt nẽ. Kot paj tokyx ty nẽ mẽ apiitã mẽ are nẽ ma akupÿm api ka mẽ axte ixpumunh kêt nẽ. ãm akupÿn ixwrÿk xà hã arĩgrota pix ã koja mẽ akwÿjaja mẽ amÿr pê krĩ ja hwÿr ixwrÿk kãm ixpumu. Hãmri nẽ mẽ akurom ixpumu nẽ hkĩnh tÿx nẽ. Nẽ tã ixkôt amnhĩ xunhwÿ nẽ axpên mã ijarênh o:

E ota Tÿrtũm kot mẽ pahwÿr mênh xwÿnhhta pøj. Nà ãm hãmri na mẽ pahwÿr wrÿ. Na mex kumrêx. Anẽ.

14

Jejus kot axte arıgromnu hã mēhō ho mex ã harēnh

Rukre 13.10-17

¹Tã nhūm sap nhūm Jejus ma Parijew nhō xwýnhjê krãhtūm kutã apkur kaxyw örkwȳ hwýr tē. Hãmri nhūm mē wa hã htu rax nē Jejus apkur ã tãnopxar o kuhê. Mē kot amnhĩ nhĩpêx kwým ri tanhmã amnhĩ nhĩpêx to nhūm mē kot hã omunh nē ra hã àmnēnh kaxyw nhūm mē kuri htãnopxar o kuhê. ²Nhūm ixkreja kamã mēhō my hte hikot xwýnh mē kuri xa. ³Hãmri nhūm Jejus omu nē hã Parijew nhō xwýnhjê mē Tĩrtūm kapēr tūm o mē ahkre xwýnhjê kukja nē mē kãm:

—Kwa mē inhmã mēmoj jarē. Jarãhã na mē panhō arıgromnu pē sap. Tanhmã na pre finat Mojesja Tĩrtūm nhỹ hã mē pahte sap ã tanhmã amnhĩ nhĩpêx to hã mē pamã karō hto? Xà kot puj mē akupým mē ho mex nã? Kot puj mē ãm mē omu nē akupým mē ho mex kêt nē? E mē atō inhmã ja jarē. Anē.

⁴Hãmri nhūm mē kuma nē tanhmã kutã kãm nē hkêt nē. ãm akryk mar o kuhê. Mē kot tanhmã kãm nē nhūm kot ta pãnhã mē kãm tanhmã nē pymaj nhūm mē akryk mar o kuhê nē tanhmã kutã kãm nē hkêt nē. Hãmri nhūm tee ri mē omu hãmri nē myja ã ãhkra xi nē akupým ho mex. Hãmri nē hano nhūm ma akupým mex nē hkĩnh nē ma tē.

⁵Hãmri nhūm Jejus mē kãm:

—E mē inhma. Xà koja mē akra sap ã mē apê ahkrehti xupým kãm tēm ka mē ãm omu nē arıgro mex jamãr pē tokyx ho axàpir kêt nē? Nà kot kaj mē ho axàpir kurê kumrêx. Rý koja akrit môx gyw mã axà xat ka mē omu nē ãm omu nē arıgro mex jamãr pē tokyx hkaxàr kêt nē? Nà kot kaj mē hkaxàr kurê kumrêx. Na htem sap ã tanhmã mē ho mex to ho pa. Mē panhō arıgromnu htã pu htem hã tanhmã mē ho mex to. Jakamã na pa ã hã myta ho mex kurê kumrêx anē nē ri arıgro mex jamãr kêt nē. Anē.

⁶Nhūm pre ã Jejus mē kãm amnhĩ jarēnh anē nhūm mē kuma nom kutã kãm mēmoj jarēnh kêt nē. Ra kot akupým ho mex jakamã nhūm mē tanhmã hã kãm nē hkêt nē kuhê.

Mē pahte amnhĩ to hkryre hã mē pajarēnh

Matêwre 23.6-14; Rukre 6.32-36; mãññēn Xiakre 4.10; Wam Pêtre 5.5-6

⁷Hãmri nhūm mē apkur kaxyw mē hkrĩ xà hã hkrĩ hpa. Nhūm mē hkwȳjaja hkwȳjê pē amnhĩ to wa nē mē hkrĩ xà mex kãm hkrĩ hpa. Hãmri nhūm Jejus ja hã mē omunh o xa nē axte mē kãm mēmoj jarē. No ãm mēmoj tã kuxi nē mē kãm awjarē nē mē kãm:

⁸—Nà koja mē axpēn mã mēhō rer kaxyw nē amnhĩ wýr mē atã karō. Mē ate kutã axàpkur kaxyw. Hãmri kêr ka mē hwýr mra nē axàpkur kaxyw nē kupĩp kãm akrĩ kurê kumrêx. No kot kaj mē kêp amnhĩ to wa nē mē hkrĩ xà mex pytã nē hã akrĩ nhūm ra kot amnhĩ to rax xwýnhjê hōja hapu hã mē akôt tēn axà. ⁹Hãmri nhūm ixkre nhō dōn kot amnhĩ wýr mē awýr xwýnhhta mē hkrĩ xà mexta ã mē awý nē mē amã: “Kwa mē atō kãnhmã xa nē kãm mē hkrĩ xà kaprã.” Anē. Hãmri ka nhãm xa nē kãm anhýr xàta gō. Hãmri nē apijaàm kãm hpãnhã kupĩp kãm nhỹ. ¹⁰Ja pymaj kêr ka mē kupĩp kãm akrĩ kurê kumrêx. Kê ixkre nhō dōnja tee ri ja hã mē apumu nē mē amã: “Tk. Kwa ixkrãmnhwýjaja. Mē kupĩp kãm akrĩ hkêt nē. Kwa mē mra nē jar mē hkrĩ xà mex ã mãn akrĩ.” Anē hãmri nhūm ja mē amã mex nē. Nhūm mē piitã kot mē ato mex ã mē atã omu ka mē ajaxwýja amnhĩ tã omu nē akĩnh nē ajamakêtkati nē akrĩ.

¹¹—Nē koja mēhō te amnhĩ to rax o hkwȳjê jakrenh pyrãk o amnhĩ nhĩpêx o ri pa hãmri nhūm Tĩrtūm ja hã omu nē tanhmã hã ho. Hãmri nhūm ra amnhĩ to grire hã amnhĩ pumunh o ri pa nē rĩ amnhĩ pumu. Nom koja mēhō amnhĩ to rax o hkwȳjê jakrenh pyrãk o amnhĩ nhĩpêx o ri pa hkêt nhūm Tĩrtūm ja hã omu hãmri nē tãm amnhĩm kot amnhĩ to rax xwýnh ã harē. Anē.

Mē pahte mē kêp amrakati xwýnhjê ho mex ã mē pamã karō

¹²Nhūm pre ã Jejus mē ahkre anē hãmri nē hpãnhã mē apkur xà hã ixkre nhō dōnja mã kapēr nē kãm:

—Nà na ka hte amnhĩ wỳr akwỳjê pix wỳ. Atōjê hwỳ nê akràmnhwỳjê hwỳ. Nê mẽ hikàxpore rũnh xwỳnhjê hwỳ. Nom nhỹrmã mẽ kot amnhĩ xwar amnhĩ nhõrkwỹ hwỳr awỳr pix kaxyw na ka hte ã amnhĩ wỳr mẽ hwỳr anê. ¹³ No kêt amnhĩ wỳr mẽ no kre xwỳnhjê măn wỳ. Nê mẽ hyk o mẽ pa xwỳnhjê măn wỳ. Nê mẽ hkrã pipãnh puro xwỳnhjê măn wỳ. Nê mẽ hpigêx tỳx xwỳnhjê măn wỳ. Nê mẽ hirot nê àpênh kêt xwỳnhjê măn wỳ. Kêr ka amnhĩ wỳr jajê măn wỳ kê mẽ awỳr mra nê akutã apku. ¹⁴ Mo mẽ kot amnhĩ xwar awỳr kaxyw mẽ õ mẽmoj? Mẽ kêp amrakati. Tã kot kaj mãmri amnhĩ wỳr mẽ awỳ nhũm Tĩrtũm mẽ hã apumu hãmri nê nhỹrmã kot akupỹm mẽ ho htĩr xà hã arĩgrota ã mẽ hã amã mẽmoj mex gõ nê ato mex nê. Hãmri ka akĩnh nê. Anê.

Tĩrtũm kutã mẽ paxàpkur xà maati jarênh

Matêwre 8.11, 25.1-10, 26.29; mããñen Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jejus nhĩhkô hã mẽ apkur o mẽ krĩ xwỳnhjê hõja tanhmã Jejus mã kapêr to nê kãm:

—Hêxta waa nê. Kot puj mẽ nhỹrmã Tĩrtũm nhõ krĩ hwỳr api nê kutã paxàpkur o pahkrĩ nê pahkĩnh tỳx kumrêx. Anê.

¹⁶ Hãmri nhũm kuma nê kê axte mẽ ahkre. Mẽ kot Tĩrtũm kutã apkur kaxyw kot amnhĩ wỳr mẽ hwỳrta ã nhũm mẽ ahkre. No ãm hã kuxi nê tanhmã mẽ kãm ujarênh to nê mẽ kãm:

—Koja mẽhõ amnhĩ wỳr mẽ ho ohtô nê mẽ kot kutã mẽ apkur mex kaxyw mẽ kuwỳ.

¹⁷ Hãmri nê mẽ hwỳr kãm àpênh xwỳnh mẽ nê kãm: “E ma tẽ nê mẽ kãm awjarê kê mẽ tokyx mra pa mẽ apku.” Anê. ¹⁸ Hãmri nhũm kuma nê ma mẽ hwỳr mẽ kãm ujarênh o tẽ. Hãmri nê wamta mã anê nhũm kuma hãmri nê hitõt nê kãm: “Nà kot paj hwỳr ixtêm kêt nê. Na pa ham amnhĩm pika hkwỳ japrô. Jakamã kot paj ma hwỳr tẽ nê ixprĩ hã omu măn. Kwa kêr ka kãm ijarê kê ixte tanhmã hã nê xà hkôt ã ixte amnhĩ nhĩpêx anhỹrja mã hamaxpêr kêt nê.” Anê.

¹⁹ —Hãmri nhũm kuma nê hpãnhã nhãm ja wỳr tẽ nê kãm awjarê nhũm kuma nê haxwỳja hitõt nê kãm: “Nà kot paj hwỳr ixtêm kêt nê. Na pa ham amnhĩm môx o 10 nê haprô. Jakamã kot paj ma hwỳr tẽ nê ixprĩ hã ri omu măn. Kwa kêr ka kãm ijarê kê tee ri tanhmã hamaxpêr to hkêt nê. Ixte tanhmã hã nê xà hkôt ã ixte amnhĩ nhĩpêx anhỹr kêt.” Anê.

²⁰ —Hãmri nhũm kuma nê hpãnhã ma ihõta wỳr tẽ nê kãm awjarê nhũm kuma nê haxwỳja hitõt nê kãm: “Nà kot pa hwỳr ixtêm kêt nê. Na pa kormã ham ixprô. Kormã ixprô nyw nê inhmã rer prãm kêt jakamã kot paj ma hwỳr ixtêm kêt nê.” Anê.

²¹ —Hãmri nhũm kãm àpênh xwỳnhhta tee ri mẽ kuma nê awjanã nê ma akupỹm tẽ. Kot ma mẽ hwỳr mênh xwỳnhhta wỳr ma akupỹm tẽ nê kãm mẽ harê. Hãmri nhũm tee ri mẽ harênh ma nê mẽ kamã gryk nê. Hãmri nê hpãnhã mẽ kêp amrakati xwỳnhjê hwỳr kãm àpênh xwỳnhhta mẽ. Mẽ hkrã pipãnh puro xwỳnhjê hwỳr kumê. Nê mẽ hpigêx tỳx xwỳnhjê hwỳr kumê. Nê mẽ hirot nê àpênh hkêt xwỳnhjê hwỳr kumê nhũm ma mẽ kãm ujarênh o tẽ. Hãmri nê amnhĩ kôt mẽ kuwỳ nhũm mẽ kuma nê wamtajê rom hkôt mrar kurê kumrêx. Hãmri nê agjê nê apkur kaxyw mẽ hkrĩ xà kamã hkrĩ hpa. ²² Hãmri nhũm kãm àpênh xwỳnhhta ã patrãw wỳr tẽ nê kãm mẽ harê nê kãm: “E ate mẽ hã karõ xàta kôt na mẽ ra hkrĩ hpa htã arĩ mẽ hkrĩ xà hkwỳ hkapyr.” Anê.

²³ —Hãmri nhũm kuma nê kãm: “Hêxta waa nê. Kêt ãm mẽ hkrĩ xàta hipu mex ronhỹx pa omu nê ixkĩnh nê. No ãm kormã piitã hipu hkêt. Kwa ma krĩ pu hã ri mẽ hapêr o mra. Nê nhỹri mẽ hkwỳjê pumu nê mẽ haprô nê man amnhĩ kôt mẽ o mra kê mẽ hkrĩxà ho hipu hpa. ²⁴ No kêt wam ixte amnhĩ wỳr mẽ hwỳr xwỳnhhtaja. Mẽ hitõt xwỳnhhtaja kot paj axte amnhĩ wỳr mẽ hwỳr kêt nê.” Anê. ã mẽ ujarênh kot anhỹr. Na hte ã Tĩrtũm amnhĩ wỳr mẽ piitã mẽ hwỳr anê. Anê.

Mẽ pamã Jejus kĩnh tỳx ã mẽ pamã karõ

Matêwre 10.37-38; Makre 8.34; Rukre 9.23-25; Juãw 12.26

²⁵ Tã nhũm Jejus mẽ òrkwỹ rũm kato nẽ kormã Jerujarẽ hwỳr mỗ nhũm mẽ hohtô rax nẽ hkôt mỗ. Hãmri nhũm Jejus xa nẽ mẽ ho hakẽx nẽ mẽ omu nẽ mẽ kãm:

²⁶ —E kot ka mẽ atõ amã ixkôt amnhĩ xãm prãm nẽ ã amnhĩ nhĩpêx anẽ. Nẽ amã atõ nẽ atõx nẽ anhĩpêxã nẽ akatorxã japê htỳx tã kêr ka amã ixkĩnh tỳx o wa mẽ hakrenh pa. Nẽ amã aprõ nẽ akrajê japê htỳx tã kêr ka amã ixkĩnh tỳx o wa mẽ piitã mẽ hakrenh pa. Nẽ amã ixkĩnh tỳx o amã amnhĩ japê jakre. Kêr ka mẽ atõ ixkôt amnhĩ xãm kaxyw nẽ ã amnhĩ nhĩpêx anẽ.

²⁷ —Koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o mẽ apa xwỳnhjaja. Koja mẽ ixtã mẽ apar mã tã kêr ka mẽ amã ixkĩnh tỳx o mẽ umaj ixkaga hkêt nẽ. Kwãr mẽ mãmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xã kamã ajamak kêt nẽ atĩr tũm nẽ amex rãhã apa ho apa. Nom kot kaj mẽ ixkĩnhã jar pika ja kamã amã amex nẽ apa hprãm xaj ixkaga hãmri nẽ nhỹrmã wa ixri atĩr tũm nẽ apa hkêt nẽ. Anẽ.

Mẽ pahte amnhĩ kukamã pajamxpêr mex ã mẽ pamã karõ

²⁸ Nhũm Jejus arĩ mẽ kãm kapêr nẽ mẽ kãm:

—Kwa kêr ka mẽ ixkôt amnhĩ xunhwỳr kaxyw nẽ amnhĩ kukamã ajamxpêr mex nẽ. Na htem amnhĩm òrkwỹ rũnh nhĩpêx kaxyw hãmri nẽ hkukamã hamxpêr mex nẽ. Nẽ kaxyw krax mã kuhê xã hkukamã hamxpêr. Nẽ kaxyw kỳx pê kãm hikwỹ xaja kukamã hamxpêr. Nẽ òkwaêja kukamã hamxpêr. Nẽ hã põja kukamã hamxpêr. Á na htem amnhĩm òrkwỹ rũnh nhĩpêx kaxyw hkukamã hamxpêr mex anẽ. ²⁹ Nom kot kaj mẽ hkukamã ajamxpêr mex kêt nẽ ãm kaxyw pĩ ho grêre nẽ hakã. Rỳ ra hã axapênh rax kurê ra amã ho anhỹr kaga nẽ hkaga hpa nẽ hatur xãm mênh kêt nẽ. Hãmri nhũm mẽ hkwỳjaja hãnh mra nẽ omu nẽ atã hpêr o axkẽ. ³⁰ Nẽ axpên mã ri ajarênh o: “E ga mẽ ixkre mũj pumu. Na pre hipêx xwỳnhja hkurê kãm kaga nẽ hipêx par kêt nẽ.” Anhỹr o axpên mã ajarê. Ja pyrã nẽ kêr ka mẽ ixkôt amnhĩ xunhwỳr kaxyw nẽ amnhĩ kukamã ajamxpêr mex nẽ. Nẽ ajamxpêr o: “Nã mẽ kot Jejus ã tanhmã ixto htỳx tã kot paj hkaga hkêt nẽ. Kot paj hkôt amnhĩ nhĩpêx rãhã ho ri ixpa.” Anhỹr o amnhĩ kukamã ajamxpêr. Hãmri nẽ rĩ kormã ixkôt amnhĩ xãm. No kot ka mẽ umaj ixkaga hkukamã ajamxpêr hãmri nẽ ixkôt amnhĩ xãm kêt kurê kumrêx.

³¹ —Nẽ koja krĩ hõ kamã pahĩti nhõ pòristi xohtô nẽ. Nẽ kutã nhãm krĩ hõ kamã pahĩti nhõ pòristija grêre. Tã nhũm wa hpijapu kaxyw nhũm krĩ hõ rũm pahĩti nhõ pòristi xohtõja mẽ grêreta wỳr mra. Hãmri nhũm kutã krĩ hõ kamã mẽ ò pòristi grêre nhõ pahi nhỹ nẽ tee ri mẽ amnhĩ kukamã hamxpêr nẽ hamxpêr o: “Kwa koja apu krĩ hõ rũm pòristi xohtô raxja nhũm inhõ pòristi grêreja mẽ axpên kutã kuhê nẽ axpu nhũm mẽ inhnê mẽ himex. Nã inhõ pòristi grêre kênã.” Anhỹr o hamxpêr.

³² —Hãmri nẽ pahi hõta wỳr ò kôwenatô mẽ. Kormã krĩ hõ rũm mẽ hohtõtaja mẽ htêp kêt nhũm mẽ kutã kumẽ nhũm ma mẽ kutã tẽ. Hãmri nẽ awry hã mẽ hkaxpa nẽ mẽ ò pahĩti mã kãm: “E na mẽ inhõ pahĩti akutã inhmẽ pa tẽ. Na inhmã: ‘Ma tẽ nẽ mẽ kãm awjarê. Kot puj pêr mẽ papijapu hkêt nẽ. Kwarĩ. Kot puj mẽ tãm axpên xunhwỳ.’ Anhỹr o kapêr nẽ mẽ akutã inhmẽ pa tẽ.” ã mẽ ujarênh kot anhỹr. Ja pyrã nẽ na htem mẽmoj kukamã hamxpêr mex nẽ rĩ kormã tanhmã amnhĩ nhĩpêx to.

³³ —Tã kêr ka mẽ atõ amã ixkôt amnhĩ xãm prãm hãmri nẽ pahita pyrã nẽ amnhĩ kukamã ajamxpêr tỳx nẽ rĩ kormã tanhmã amnhĩ nhĩpêx to. Kêr ka ate inhmã tanhmã amnhĩ nhĩpêx to ho apa kaxyw hãmri nẽ inhgryk ã te ate amã amnhĩ japê hkêt pyrãk o mẽmoj piitã mã anhĩhkra karo pyrãk o amnhĩ nhĩpêx. Hãmri nẽ rĩ kormã ixkôt amnhĩ xãm. ³⁴⁻³⁵ No kot kaj mẽ amnhĩ kukamã ajamxpêr kêt nẽ atỳx ri ixkôt amnhĩ xunhwỳr japêr. Hãmri nẽ mẽmo arĩgro hã mẽ kot ixtã tanhmã mẽ ato xwỳnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhĩpêx. Kaxwaja mẽ apkur xã kamã mex. Na htem amnhĩm ho ò xành nẽ kuku. Nom koja mẽhõ kamã pika hkwỳ mẽ nẽ ho ahkã hãmri tanhmã kot mẽ ho nẽ akupỹm ho mex? ãm mẽ kot hkapĩr pix kaxyw koja mex. Ja pyrã nẽ kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nẽ amã ixkôt amnhĩ nhĩpêx prãm nõkati. Hãmri nẽ ra te ate kaxwa punu

kapĩr mã tãmta pyræk. E kwa mẽ mẽmoj tã ixujarēnhja ma nẽ mẽ uræk nẽ amnhĩ kukamã ajamaxpēr mex nẽ. Anẽ.

15

ôwêhti pikunor jarēnh

Matêwre 18.12-14

¹ Tã nhũm mẽ kot pahihtĩ mã hkwyjê pê kàxpore hkwy jamynh xwynthjê mẽ mẽ kot amnhĩ tomnuj xwynthjaja Jejus kapēr mar kaxyw hwyr mra. ² Hãmri nhũm Parijew nhõ xwynthjê mẽ mẽ kot Tĩrtũm kapēr tũm o mẽ ahkre xwynthjaja mẽ mã Jejus pumu. Hãmri nẽ kê wem axte axpēn mã tanhmã ho kapēr punuj to nẽ axpēn mã:

—Tk. Kwa na hte mũjti axtem nẽ mẽ kot amnhĩ tomnuj xwynthjaja amnhĩ wyr mẽ kuwỳ nẽ tõhã mẽ kutã apku. Kwa mẽ kot amnhĩ tomnuj xwynth kēnã kot kêt mẽ kutã apkur o pa. Anẽ.

³ Hãmri nhũm Jejus amnhĩ tã mẽ kuma nẽ tanhmã mẽ kãm kapēr to. Nom hprĩ hã mẽ kãm kapēr kêt nẽ. Kê ãm amnhĩ tã kuxi nẽ mẽ kãm ôwêhti pikunor jarē nẽ mẽ kãm:

⁴ —Koja mẽhõ õ ôwêhti xohtõ nẽ. Nẽ ma nhỹri hamār o pa. Hãmri nhũm pyxire nẽ hkwy kaga nẽ ma nhỹhỹm ahte tẽ nẽ akunok. Hãmri nhũm õ dõnja ma kot akupỹm piitã o mõr kaxyw hkwy ho pikuprõnh pa hãmri nẽ tee ri hkwy kaêx ã pikunor xwynthja japêr. Hãmri nẽ ma hkwy ho mõ nẽ nhỹri kure. Kot nhỹri kutêp apkur o ri pa kaxyw kure hãmri nẽ ma akupỹm pikunor xwynthja japêr o tẽ. Hãmri nẽ hapêr ryy nẽ nhỹri hwyr kato. ⁵ Nẽ omu nẽ hkĩnh tỳx nẽ. Hãmri nẽ amnhĩ kre hã kumẽ nẽ ma akupỹm hkwy hwyr o tẽ. ⁶ Hãmri nẽ mẽ ãhkõ hã kumẽ nẽ hkĩnh nẽ hkrãmnhwỳjê ho akuprõ nẽ õrkwỹ htã mẽ õrkwỹ xwynthjê ho akuprõ nẽ mẽ kãm: “Kwa na pre ixpê ixkriita õ akunok. Pa pre hapêr kãm ixihitỳx nẽ kãm ixkato nẽ omu nẽ ixkĩnh nẽ. Jakamã kwa wem mããnēn inhỹ hã akĩnh.” Anẽ.

—Ã mẽ ujarēnh kot anhỹr. ⁷ Ja pyrã nẽ koja mẽ kot amnhĩ tomnuj tỳx xwynthjê hõ tee ri amnhĩ pumu nẽ kot amnhĩ tomnuj kaga nẽ Tĩrtũm kõt amnhĩ xãm. Hãmri nhũm kaxkwa kamã mẽ piitã ja hã omu nẽ hkĩnh tỳx nẽ. Te ho my kot ôwêhti hpikunor xwynth mã kator nẽ hkĩnh tỳxta pyræk. Na hte Tĩrtũm tãm mẽ kot amnhĩ nhĩpêx o mẽ pa xwynthjê pumu nẽ hkĩnh nẽ. Tã koja mẽhõ kot amnhĩ tomnuj tỳx tã ã amnhĩ nhĩpêx anhỹrja kaga nẽ Tĩrtũm kõt amnhĩ xãm hãmri nhũm amnhĩ tã omu nẽ hkĩnh tỳx nẽ. Jakamã na pa hte mẽ akurom ã mẽ kot amnhĩ tomnuj xwynthjê hkõt Tĩrtũm kapēr o mẽ ahkre rãhã ho ri ixpa. Anẽ.

Nhũm pre ã Jejus mẽ kot tanhmã ho kapēr punuj to xwynthjê mã amnhĩ jarēnh anẽ.

Kàxpore pikunor jarēnh

⁸ Nhũm Jejus arĩ mẽ kãm awjarē nẽ mẽ kãm:

—Nẽ ja. Koja mẽhõ ni hikàxpore kêp 10. àpēnh o arĩgro pê 10 pãnhã kàxpore kêp 10. Tã ho pyxi nẽ ho akunok. Hãmri nẽ tee ri hapêr nẽ hkaprĩ nẽ. Hãmri nẽ kanê hpõk nẽ hitom kapõnh pê hprĩ hã hapêr o ri pa nẽ kãm kato. ⁹ Hãmri nẽ kupy nẽ hkĩnh nẽ hkrãmnhwỳjê ho akuprõ nẽ õrkwỹ htã mẽ õrkwỹ xwynthjê ho akuprõ nẽ mẽ kãm amnhĩ jarē nẽ mẽ kãm: “Xê na pre ixpê ixkàxpore hõta akunok pa tee ri hapêr tã akupỹm kãm ixkato nẽ kupy nẽ ixkĩnh nẽ. Jakamã xê wem inhỹ hã mããnēn akĩnh.” ã mẽ ujarēnh kot anhỹr.

¹⁰ —Ja pyrã nẽ koja mẽ kot amnhĩ tomnuj xwynthjê hõ pyxire nẽ amnhĩ tomnuj kaga nẽ ixkõt amnhĩ xãm. Hãmri nhũm kaxkwa kamã mẽ piitã ja hã omu nẽ hkĩnh nẽ. Te mẽhõ ni kot kàxpore pikunor xwynth mã kator nẽ hkĩnhja pyræk. Anẽ.

Mẽ hkra pikunor jarēnh

¹¹ Nhũm Jejus arĩ mẽ ahkre ho xa. Tĩrtũm kãm mẽ piitã mẽ hapê htỳx ã mẽ ahkre ho xa. No kê ãm hã kuxi nẽ kê we tanhmã mẽ kãm ujarēnh to nẽ mẽ kãm:

—Nẽ koja mẽhõ hkra my wa axkrut. ¹² Hãmri nhũm kot hapu õ papaj wyr tẽ nẽ kãm: “E papaj. Ot pa awyr tẽ. Kot kaj nhỹrmã ty pa wa amyr pê akukrêx o ixãrĩk. Jakamã e kwa tokyx atĩr ri amnhĩ kamã wa inhã ho axkjê pa inhõ ho amnhĩptar kurê kumrêx nã?”

Anē. Hāmri nhūm kuma nē wa kām hikukrêx o axkjê. Kot wa mā hkwỳ gō nē kot hapu mā hkwỳ gō. ¹³ Hāmri nhūm kot haputa âm ri hipêêxà hkôt pa hkrânre hāmri nē kot kām hikukrêx nhõr jamýnh pa nē ma nhýhým o mō nē ho wênê hpa. Hāmri nē hpānhā kàxpore jamý nē ma nhýhým mō. Nhýhým awry hā pika hõ hwýr ma mō. Mõõ hāmri nē krī hõ kamā htýx ri tanhmā amnhī tomnuj to ho ri pa. Hāmri nē gaa nē ra mē hkuprýjê hā kàxpore ho hapêx pa. Nē kagôxyhti hā ho hapêx pa. Nē gaa hāmri nē hikàxpore hkêt nē ri pa.

¹⁴ —Rôm nhūm pikaja kamā mē hā na wryk kêt ry rax nē. Nē gaa nhūm mē hpur kām mē kêp mē apkur xà hā mẽõja hapêx pa. Jakamā nhūm mē hkra kot haputa kêp amrakati nē kām prām týx nē ri pa. Hāmri nē tee ri amnhī kukamā hamaxpêr. ¹⁵ Hāmri nē amnhī to krī nhõ xwýnhjê mar o ri pa. Kot mē kām tanhmā àpênh to nē hpānhā apkur kaxyw. Hāmri nhūm mẽhõ kot kām hkrit hagrô jamār kaxyw hā kumē nhūm ma hwýr tē nē kām hamār o pa. Nom kot kām hamār o pata pānhā âm kām mẽmoj nhõr kryre nhūm arī kām prām týx kumrêx.

¹⁶ Nē tee ri kot hagrô kutā òta kur prām nē tee ri omunh o pa. ¹⁷ —Nē gaa hāmri nē tanhmā hamaxpêr to. Nē tee ri kot tanhmā amnhī tomnuj toja ā amnhī pumu nē hamaxpêr o: “Hêxta waa nē. Mān mūtār inhõ krī kamā inhõ papaj mā mẽ àpênh xwýnhjaja ixrom apkur mex o pa. àpkur mex nē nhūm mẽõ jakrêx prār rûnh tā pa jar mẽ hkīnhā prām xàj ra ixtyk o mō. ¹⁸ Nà kot paj ma akupým mō. Hāmri nē inhõ papaj pumu nē ā kām amnhī jarênh anē nē kām: ‘Kwa Papaj. Na pa pre ixpê akra hā amnhī tomnuj týx kumrêx nhūm ja apê omnuj nē. Nhūm Tirtūm pê ja omnuj nē. ¹⁹ Jakamā na pa ixpê akra hā amā amnhī jarênh ā ixpijaàm nē. Ixte tām kêt kumrêx. Jakamā kwa xà kot pa amā mẽmoj tā ixàpênh o ri ixpa ka hpānhā inhmā inhõ pa apku nà?’ Anhýr o kot pa kām amnhī jarê. Nà kot paj anē.”

²⁰ —Anhýr o amnhī kukamā hamaxpêr hāmri nē ma akupým mō. Mõõ nē ra hpôx o mō. Nē kormā amým mör ri nhūm ò papaj hwýr rít nē omu nē amnhī kra hā omunh kurê kumrêx nē hkīnh nē ma kutā hprôt nē tē. Omu nē kām hkaprī nē. Nē hwýr hprôt nē hkaxpa nē kahti hkôt kumý. ²¹ Hāmri nhūm kām amnhī jarê nē kām: “Kwa papaj. Na pa pre amnhī tomnuj nē nhūm ja apê omnuj nē. Nē Tirtūm pê ja omnuj nē. Jakamā ixte ixpê akra hā amā amnhī jarênh ā ixpijaàm. Ixte tām kêt kumrêx.” Anē. ²² Nom kormā kām amnhī jarênh par kêt ri nhūm hipêêxà kām mẽ àpênh xwýnhjê mā akir nē mẽ kām: “E kwa mẽ atõ ma tē nē kām ê mex ò py nē akupýn ixkrata wýr ho aprôt nē kām haxà. Nē hpar kà nē ìhkra kamā kàx nē amnē kām hamý nē ho aprôt. ²³ Nē akupým aprôt nē môx kra htwým mexta ò pumu nē unê nē apī. Nē mẽ ho anē pu mẽ ixkra hā pahkīnh nē apku. E mẽ amnhī prêprêk nē tokyx ā amnhī nhípêx anē. ²⁴ Na pre ma ixpê mör o te ixpê htyk pyræk. Tā akupýn mō nē ixwýr pøj nē te akupým inhmā htír pyræk. Jakamā e mẽ tokyj.” Anhýr jakamā nhūm mẽ hā môx kra pī nē ho anē nē hkīnh nē hā apkur o hkrī.

²⁵ —Rôm nhūm hkra kot wata kormā pur kām htýx àpênh o xa. àpênh o âm tā akupýn hpôx o tē. Hāmri nē amnhī kukamā mẽ kot ri mẽmoj tatak nē mẽ grer ma. ²⁶ Hāmri nē tee ri hamaxpêr o tē nē òrkwý hwýr pøj nē kormā kapem xa nē mẽ hā mẽ àpênh xwýnhjê hõ kukja nē kām: “Kwa mẽmoj tā na ka wem ā akīnh rax anē?” ²⁷ Anē nhūm kām: “Nà mẽhõ hkêt. Atõ na akupýn pøj nhūm anhípêêxà omu nē hkīnh týx nē. Nē mẽ inhmā anē pa mẽ hā môx kra htwým mexja pī nē hā ho anē nē hā ixkīnh nē hkur o ixkrī.” Anē. ²⁸ Hāmri nhūm tee ri htõ jarênh ma nē gryk týx nē. Hāmri nē gryk xàj kapem hkuk punuj o mẽ omunh o xa nē mẽ hwýr àr kêt nē. Hāmri nhūm hipêêxàja tee ri omu nē hwýr kato nē tee ri kot mẽ hwýr ho àr kaxyw ho anhýr kaprý. ²⁹ Hāmri nhūm kām: “Tk. Kwa na pa hte amā ixàpênh rûnh rāhā ho ri ixpa hā ra ixtā amgrà xohtõ nē. Nē aa akapêr nhīrõp tanhmā ixām to hkêt. Tā ka hte ixpumunh nē akīnh nē ixtā mẽmoj tõx pír kêt nē. ³⁰ Tā nhūm akra kot haputa apê akukrêx kwý jamýnh pa nē ma o mō nē axtem nē mẽ hkuprýjê mā òr par tā akupýn mō nē pøj. Ka omu nē akīnh nē hā môx kra twýmta pī. Nà kot paj mẽ awýr ixàr kêt nē.” Anē.

—Hāmri nē gryk tỳx nē xa. ³¹ Hāmri nhūm ò papaj tee ri kuma nē kām: “Kwa nà ri ã akapēr anhỹr kêt nē. Inhmã ajapê kênã. Na ka hte ixkôt apa ho apa rãhã nē. Nē ixkukrêx piitã kêp anhõõ. ³² No atõja na pre te ixpê htyk pyrãk tã arĩ htĩr. Nē te pikunor pyrãk tã te ra akupỹm kator pyrãk jakamã na pa omu nē ixkĩnh nē. Nē inhmã hapê ho te määnên inhmã ajapê pyrãk.” Anē.

—Ã mē ujarēnh kot anhỹr. Ja pyrã nē koja mēhõ te kot amnhĩ tomnuj tỳx o ri pa htã amnhĩ kaxyw Tĩrtũm mã hamaxpēr nē amnhĩ to kuwỳ nē hkôt amnhĩ xãm. Hāmri nhūm amnhĩ tã omu nē hkĩnh nē. Nē kãm hprãm nē. No mē kajaja. Mē apê Parijew nhõ xwỳnhjê mē Tĩrtũm kapēr tũm o mē ahkre xwỳnhjaja. Na ka htem mē kot amnhĩ tomnuj xwỳnhjaja kot Tĩrtũm kapēr mar o kuhê hã mē omu nē Tĩrtũm kĩnhã akĩnh kêt nē. Nē te hkra kot wata jamaxpēr pyrãk o ajamaxpēr nē tee ri ja hã mē omu nē mē kamã agryk nē. Nē mē amã mē hprãm nõkati. Anē.

16

Mē panhõxỳ nē Jejus kot mē pamã karõ

¹ Tã nhūm kê Jejus axte hkôt ri mē pa ho mē pa xwỳnhjê jahkre. No ãm mēmoj tã kuxi nē mē kãm tanhmã ujarēnh to nē mē kãm:

—Nà koja mēhõ hikàxpore rax xwỳnhja kãm àpēnh xwỳnh mã mēmoj to wēnê ho pa kaxyw ãm. No nhūm kãm ho mex kêt nē. Axtem nē kêp amarĩ mē kãm mēmoj to fiat par o mõ. Hāmri nhūm ra mēhõ kot ã amnhĩ nhĩpêx anhỹr ã omu nē ma ò patrãw wỳr tē nē kãm harē. ² Hāmri nhūm tee ri harēnh ma nē amnhĩ wỳr hã karõ. Hāmri nhūm hwỳr tē nē axà nhūm kãm: “Pa. Kwa xà ãm hāmri na mē inhmã ajarē? Kwa nà mon ka ri axtem nē ã ixpê inhõ mēmoj nhĩpêx anē? E inhmã ate mē kãm ho fiat par xwỳnhjê nhĩxi hã kagà nē inhmã agõ hāmri nē ma tē. Kot ka axte inhmã axàpēnh kêt nē rĩ amnhĩ pumu.” Anē.

³ —Hāmri nhūm kuma nē tee ri amnhĩ kukamã hamaxpēr nē hamaxpēr o: “Hêxta waa nē. Tanhmã kot paj amnhĩ to? Ixihtỳxre hã kot pa mēhõ mã pur ã apê. Nom inhmã amarĩ ri ixàhwỳr o ri ixpa hprãm kêt. Ixte amnhĩ kuk ã ixpijaàm.” Anē. ⁴ Hāmri nē tanhmã amnhĩ kukamã hamaxpēr to nē hamaxpēr o: “Nà kot paj amnhĩ wỳr ixte mē kãm ho fiat xwỳnhjê hã karõ. Nē mē kãm mē ò kõõta ahpar mã hkamê kê mē ãm inhõ patrãw mã hkwy pix gõ. Kêr kê mē amnhĩ tã ixpumu nē kãm ixkĩnh nē. Hāmri nē inhõ patrãw kot ixkaga hã ixtã harēnh ma nē ixkamã ukapřĩ japêr. Hāmri nē amnhĩ wỳr ixwỳ pa ahpỹnhã mē kutã ixàpkur o ri ixpa nhūm prãm ixpĩr kêt nē. Nà kot paj anē.” Anē.

⁵ Hāmri nē amnhĩ wỳr mē hã karõ nhūm mē hwỳr mra. Nhūm mē omu nē ja mã kãm: “E tanhmã na ka pre inhõ patrãw pē mēmoj to fiat to? E inhmã harē.” Anē. ⁶ Hāmri nhūm kãm: “Na pa pre kêp orti hã à ho 100 nē ho fiat. Ota hã kagàta. Tã pa kormã kãm amnhĩrer kêt nē.” Anē nhūm kuma nē kãm: “Tõe ka inhma. Kot paj amã anhõ kõt o gri ka ãm kãm ho 50 pix nē agõ pa ixte anhõ kõt ho ijapêx par pyrãk o anhĩpêx.” Anē. ⁷ Hāmri nē hpãnhã nhãm ja mã kãm: “No ka. Tanhmã na ka pre kêp mēmoj to fiat to?” Anē nhūm kãm: “Na pa pre kêp pãy hã xak o 1.000 nē ho fiat. Tã pa kormã hpãnhã kãm amnhĩrer kêt nē.” Anē nhūm kãm: “Tõe. Kot paj hāmri amã anhõ kõt o gri ka ãm kãm ho 800 pix nē agõ pa ixte anhõ kõt ho ijapêx par pyrãk o anhĩpêx.” Anē. Nhūm ã mē hipêx anē. Hāmri nē hamaxpēr o: “E. Na pa mē kãm mē ò kõt o hkry pa. Koja mē amnhĩ tã kãm ixkĩnh japêr.” Anē.

⁸ —Hāmri nhūm ò patrãwja ã kot mē hipêx anhỹr ã harēnh ma nē kãm: “Tk. Kwa ate pa ixkukamã ajamaxpēr nē inhmã mēmoj to anhỹr mex kêt tã ka amnhĩ kukamã ajamaxpēr mex pē ã mē hipêx mex anē.” Anē. ã mē ujarēnh kot anhỹr. Anē.

Nhūm pre ã Jejus mē kãm ujarēnh anē. Hāmri nē mē kãm:

—Tã ja pyrã nē na hte mē kot Tĩrtũm kõt amnhĩ xunhwỳr kêt xwỳnhjaja ãm amnhĩ pix kukamã hamaxpēr mex o pa. Jao amnhĩ kaxyw pix mã mē piitã tanhmã mē ho mex to ho pa. Mē kot amnhĩ tã mē omunh nē mē kãm mē hkĩnh nē amnhĩ xwar tanhmã mē ho mex to kaxyw nhūm htem ã amnhĩ nhĩpêx anhỹr o pa. Tã mē ate ixkôt amnhĩ xunhwỳr

xwÿnhjaja. Tirtüm kot tanhmã mẽ ate amnhĩ kwÿjê ho mex to hã amnhĩm mẽ ajarênh kaxyw kêr ka mẽ amnhĩ mẽ mẽ piitã mẽ hkukamã ajamaxpêr mex nê. Pê tanhmã mẽ ho mex to ho ri apa. ã mẽ ate amnhĩ nhĩpêx anhÿrja na mex. Nom kormã mẽ ate ã amnhĩ nhĩpêx anhÿr kêt.

⁹—Hêxta waa nê. Mon ka htem mẽ urak nê ã axpên to mex anhÿr kêt nê? Kwa mẽ àpênh xwÿnhhta kot amnhĩ nhĩpêx pyrã nê tanhmã axpên to mex to o ri apa hkêt wehe. Jao akukrêx nê akàxpore ho anhõxÿ hkêt nê. Kêr ka nhÿrmã ty nê Tirtüm wÿr api nhũm ja hã mẽ ato mex rax nê. Te ho kot õ patrãw mã àpênh xwÿnhhta kot tanhmã mẽ ho mex to xwÿnhjê hwÿr mrar nhũm mẽ kot amnhĩ xwar tanhmã ho mex tota pyrãk.

¹⁰⁻¹¹—Na hte Tirtüm tanhmã mẽ pakute hã mẽ pahpumunh mex nê. Koja mẽ amã mẽmoj gõ ka mẽ kãm hprãm xà hkôt ho anhõxÿ hkêt nhũm ja hã mẽ apumu nê axte mẽ amã mẽmoj gõ. Nom hpãnhã mẽ amã õr rax o wamta jakre nê kugõ. Nom kot ka mẽ ri mẽmojta o anhõxÿ ho ri apa nhũm tee ri ja hã mẽ apumu nê axte mẽ amã mẽmoj nhõr kêt nê. Koja mẽ amã mẽmoj gõ ka mẽ ho anhõxÿ ho ri apa nhũm ja kêp homnuj nê.

¹²—Nê kot kaj mẽ jar Tirtüm kot mẽ amã mẽmoj nhõr xwÿnhja ho anhõxÿ ho ri apa. Hã koja nhÿrmã kaxkwa kamã mẽ amã mẽmoj mex nhõr kêt nê.

¹³—Nê kot kaj apyxi nê anhõ patrãw hamêxkrut nê arĩgro pyxi hã hamê wa kãm axàpênh o amÿkry hkêt nê. Kot kaj anê nê hõ gryk ã hõ kaga. Ja pyrã nê kot kaj mẽ jar pika ja kamã akàxpore nê akukrêx pix kukamã ajamaxpêr o ri apa hã kot kaj mẽ amã hapê htÿx nê mẽ kêp ho anhõxÿ ho ri apa. Nê akukrêx rax gryk ã Tirtüm kãm hprãm xà hkôt akukrêx o tanhmã axpên to ajuta hto ho ri apa hkêt nê. Ja pymaj kwa kêr ka mẽ ãm Tirtüm pix mã mãn ajamaxpêr rãhã ho ri apa. Jao te akukrêx nê akàxpore mã axãmnhix ri anhĩkra karo ho ri apa pyrãk. Anê.

Nhũm pre ã Jejus mẽ ahkre anê. ¹⁴Hãmri nhũm Parijew nhõ xwÿnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarênh anhÿrja ma nhũm ja mẽ kêp omnuj nê nhũm mẽ hã hpêr o pikênh o kuhê. ¹⁵Hãmri nhũm amnhĩ tã mẽ kuma nê mẽ kãm:

—Nà na ka htem te mẽ ate tãm mẽ kot amnhĩ nhĩpêx xwÿnh pyrãk o amnhĩ nhĩpêx nom ri mẽ kãm amnhĩ to axêx o ri apa. No nhũm Tirtümja kot tanhmã mẽ ate amnhĩ nhĩpêx to nê tanhmã mẽ ajamaxpêr to hkôt mẽ apumunh par. Nê hprĩ hã mẽ anhõxÿ hã mẽ apumu. Te mẽ ate tãm amnhĩ nhĩpêx pyrãk nom mẽ anhõxÿ kamã na ka htem apa. Mẽmoj te mex pyrãk nhũm htem omu nê mex ã hkamnhix. No nhũm Tirtüm àhpumunh tÿx xà hkôt hprĩ hã mẽmojta pumu nhũm kêp omnuj nê. Mẽ akurom omnuj ã omunh kurê kumrêx. Na hte hprĩ hã mẽ ate amnhĩ nhĩpêx ã mẽ apumu. Anê.

Tirtüm kapêr aa hapêx kêt ã harênh

Matêwre 5.17-18

¹⁶ Nhũm Jejus arĩ mẽ ahkre nê mẽ kãm:

—Nê na pre finat Mojesja kumrêx mẽ kãm Tirtüm kapêr kwÿ hã kagà. Tã nhũm hpãnhã Tirtüm nhÿ hã kapêr jarênh xwÿnh kwÿjaja mãânên mẽ kãm hkwy hã kagà. Nhũm prem kuma nê mẽ hkôt amnhĩ nhĩpêx o ri pa. Tã nhũm finat Juãw Paxisja mẽ hpãnhã kato nê Tirtüm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhũm mẽ ohtô nê ixkôt amnhĩ xunhwÿ nê kãm ixkapêr kôt pix mã amnhĩ nhĩpêx o ri pa hprãm nê.

¹⁷—Tirtüm kapêr tùmja mex o mex. Koja aa hapêx kêt nê. Koja nhÿrmã kaxkwa nê pika wa hapêx pa no nhũm Tirtüm kapêr tùmja aa hapêx kêt nê. Koja rãhã ho rãhã nê aa ihkjê ho mênh kêt nê. Anê.

Mẽ pahte axpên kaga hkêt ã mẽ pamã karõ

Matêwre 5.31-32, 19.9-12; Makre 10.2-12

¹⁸ Nhũm Jejus arĩ mẽ ahkre nê mẽ kãm:

—Nê kêr ka mẽ aprõ kaga hkêt nê apa. Kot kaj mẽ hkaga nê hpãnhã nhãm hõ ho aprõ nhũm Tirtüm noo mã te ate wam aprõ kamã nhãm ho amnhĩkati pyrãk. Nhũm ja kêp

omnuj nê. Rỳ ka ra mēhō kot hprō kaga xwỳnhhta ka hpānhā ho aprō. Nhūm Tirtūm noo mā te ate wam mjên pê ho amnhīkati pyrāk. Nhūm Tirtūm pê ja omnuj nê. Anê.

Hikàxpore rax xwỳnh mē kēp amrakati xwỳnh wa harēnh

Rukre 6.20-26

¹⁹ Nhūm Jejus arī mē ahkre kamā mē kām awjarē nê mē kām:

—Koja mēhō kàxpore rax xwỳnh ê mex pix kām ri pa. Nê apkati mē apkur mex o pa.

²⁰ Nhūm amrakati xwỳnh pê Rajareja hkà nhyre nê arī pry kamā àhwỳr o hkrī. Nhūm htem hamỳ nê ma o pa nê hikàxpore rax xwỳnh nhōrkwỳ jakwakrem haxwỳ. ²¹ Nhūm ò jakrêx kwỳ hkrēr prām xàj hakwa krem àhwỳr o hkrī. Nhūm rop hwỳr mra nê hkà nhy kunhnwỳnh o kuhê.

²² —Tā nhūm Rajare ty nhūm Tirtūm kapēr o mē wrỳk xwỳnhjaja hwỳr wrỳ nê ma akupỳm kaxkwa hwỳr hkarō ho mō nê ho api. Hāmri nhūm kaxkwa kamā mē pahpām Apraāw nhīhkō hā hkīnh nê apkur mex o hkrī.

—Tā nhūm hikàxpore rax xwỳnhhta määnēn hkôt ty. Nhūm hkwỳjaja hā akuprō nê hā mur nê ma o tē nê haxà. ²³ Hāmri nhūm hkarō ma mē kot amnhī xà htỳx kamā hamak tūm xà pê kuwy maatita wỳr ma mō. Nê kamā amnhī xà htỳx kām hamak rāhā ho pa. Hāmri nê amnhī xà hā maj kànhmā rīt nê kaxkwa kamā Apraāw pumu. Nhūm Rajare ra kuri mex nê nhỹ. ²⁴ Hāmri nhūm tee ri wa omu nê Apraāw mā akapēr nê kām: “Kwa Apraāw. Kwa we ixkamā axukaprī nê ixwỳr Rajare mē kē ixwỳr tē nê ihkrakrā ho gō htok nê ho inhōhto jakry. Na pa kuwy kamā amnhī xà htỳx kām ijamak tỳx kumrêx.” Anê. ²⁵ Hāmri nhūm kuma nê kām: “Tk. Nà kot pa awỳr mēnh kêt nê. Na ka pre atir ri amex nê akīnh nê ri apa. No nhūm Rajare akīnhā hkà nhy rax nê amnhī xà htỳx kām hamak rāhā ho ri pa. Tā ra jar inhīhkō hā hkīnh nê pa. Ka pre kurom amex nê apa htā kot kaj hpānhā amnhī xà htỳx kām ajamak rāhā ho ri apa. ²⁶ Nê pahkaêx kām ahkaprỳ griā. Jakamā nhỹhỹnh kot kêt awỳr rê? Ka ajaxwỳja nhỹhỹnh kot ka kêt mē ixwỳr rê?” Anê.

²⁷ —Nhūm ā kām kapēr anê nhūm tee ri kuma nê kām: “Kwa tô ma inhō krī hwỳr măn amē kē ma ixkwỳjê hwỳr wrỳ. ²⁸ O mūj arī inhō krī kamā ixtō kēp 5 nê arī htir nê pa. Kē wa mē kām awjarē kē mē amnē kuwy hwỳr pa pymaj tokyx amnhī tomnuj kaga nê Tirtūm kôt măn amnhī xunhwỳ nê hkôt ri amnhī nhīpêx o pa.” Anê.

²⁹ —Hāmri nhūm Apraāw kām: “Nà pa mē hwỳr mēnh kêt nê. Ra mē kuri Tirtūm kapēr jarēnh xwỳnhjê mē Mojes kot Tirtūm kapēr ā kagà kēnā. Kē mē kamā harē nê ja ma nê rī tām tanhmā amnhī nhīpêx to.” Anê. ³⁰ Hāmri nhūm tee ri kuma nê kām: “Kwa nà. Koja mē kagàja mar kêt nê. No kêt Rajare na pre ra htyk tā akupỳm htir jakamā koja mē hwỳr wrỳ nê mē kām awjarē nhūm mē akupỳm htir ā omu nê kapēr ma hāmri nê amnhī tomnuj kaga kurê kumrêx. Kwa nà ā ri anhỹr kêt nê mē hwỳr amē hēxta waa nê.” Anê.

³¹ —No nhūm kām: “Nà koja mē Tirtūm kapēr ā kagà mar kêt ā koja mē määnēn Rajare tyk nê akupỳm htir nê mē hwỳr wrỳk nê kot mē kām tanhmā ujarēnh to hā mar kêt nê. Jakamā kwarī pa mē hwỳr mēnh kêt nê. Kot paj ho anê nê am ixte mē hwỳr mēnh kaprỳ pyrāk o amnhī nhīpêx.” Anê. Ā mē ujarēnh kot anhỹr. Anê.

17

Mē kot Jejus nê mē no kupyri ā mē harēnh

Matêwre 18.6; Makre 9.42; määnēn Rōmān 1.32; Sikūn Pêtre 2.1, 2.18

¹⁻² Tā nhūm Jejus hkôt mē pa ho mē pa xwỳnhjê jahkre ho nhỹ nê mē kām:

—E kot paj mē kot ixkôt amnhī xunhwỳr tohtuj anhỹr xwỳnhjê jarē ka mē inhma. Nà koja mēhō mē hwỳr tē nê inhnê mē kām kapēr. Mē kot mē mar nê amnhī tomnuj prām xàj tanhmā mē kām kapēr to. Hāmri nhūm mē mar xà hkôt tanhmā amnhī tomnuj to. Hā koja Tirtūm ja hā omu nê kot inhnê tanhmā kām nê xwỳnhhta pumu nê ja hā homnuj tỳx nê. Te mē kot mēhō pynēnh nê mut ā kēn pytī hō nhōr nê ma o htem nê gō rax kām mēnh pyrāk o koja hipêx. Te ho ja pyrāk no am homnuj tỳx o ja jakre. Jakamā kwa mē ixkapēr ma nê kām ajamapēr tỳx rāhā ho ri apa. Anê.

Mě pahte amnhĩ tā tanhmā mēhō hto hkêt ā mẽ pamā karō
Matêwre 18.21; Makre 11.25-26; mãânên Epes 4.32; Korosē 3.13

³ Nhũm Jejus arĩ mẽ ahkre nẽ mẽ kām:

—Nẽ koja ixkôt atōjê hō tanhmā atomnuj to. Ka amnhĩ tā omu hāmri nẽ ma hwỳr tẽ nẽ ja hã kām akapēr nẽ kām: “Kwa mon ka axtem nẽ ri ā inhĩpêx anẽ ixtō? Kwa nà ri ā inhĩpêx anhỹr kêt nẽ.” Anẽ hāmri nhũm amnhĩ tā ama nẽ amā: “Nà na pa tee ri ixte tanhmā atota ā amnhĩ pumu nẽ ixkaprĩ nẽ. Nà kot paj axte ā ri anhĩpêx anhỹr kêt nẽ. Kwa kêr ka axte tanhmā ja mã ajamxpêr to hkêt nẽ. Te ate amnhĩ katut kôt mēnh pyrāk o hipêx pu akupỹm tām axpên nhĩpêx o papa.” Anẽ. Koja ā amā kapēr anẽ ka amnhĩ tā ama hāmri nẽ axte tanhmā kot atoja mã ajamxpêr kêt nẽ.

⁴—Koja arĩgro pyxi hã xatā tanhmā atomnuj to japêr. Hāmri nẽ xatā tee ri ja hã amnhĩ pumu nẽ awỳr mra nẽ xatā amnhĩ tā amā kapēr nẽ amā: “Pa ot pa awỳr tẽ. Na pa ra ixkaprĩ nẽ. Kwa ixte ā anhĩpêx anhỹrja pumu nẽ ãm omu. Kot paj axte hkêt nẽ.” Anhỹr o xatā amā kapēr. Nẽ ra axte tanhmā atomnuj to nẽ kê axte awỳr tẽ nẽ ā amnhĩ tā amā kapēr anẽ. Nom kêr ka ama nẽ kamā agryk kêt nẽ. ãm xatā kām: “Nà kot puj anẽ nẽ akupỹm tām axpên nhĩpêx. Kot paj axte tanhmā ate ixtota mã ijamxpêr kêt nẽ. Kot puj ja ho pajapêx nẽ tām axpên nhĩpêx o akupỹm papa.” Anhỹr o kêr ka mẽ xatā axpên nhĩpêx anhỹr rãhã ho ri apa nẽ aa jam anhũrer kêt nẽ. Anẽ.

Mě pahte mẽmoj tā Tĩrtũm wỳr hã mẽ pajarēnh
Matêwre 17.20-21, 21.21-22; Makre 11.23

⁵ Tã nhũm Jejus nhỹ hã mẽ ahkre ho mẽ pa xwỳnhjaja hāmri kām:

—Kwa Pahihti. Tanhmā mẽ ixto pa mẽ amnhĩ kaxyw Tĩrtũm kôt ijamxpêr tỳx rãhã ho ri ixpa. Anẽ.

⁶ Hāmri nhũm mẽ kām:

—Nà ra mẽ ate amnhĩ kaxyw hkôt ajamxpêr jakamā na ra amnhĩ tā mẽ apumu. Jakamā mẽ ate hkôt amnhĩ nhĩpêx kukwak ri na ka htem mẽmoj tā awỳ nhũm mẽ ate mẽmoj tā hwỳr xà hkôt mẽ amā tanhmā mẽmoj nhĩpêx to. Te mẽ ate pĩ hpàr mũj mã akapēr nẽ kām: “E amnhĩ jarê nẽ ma tẽ nẽ gô xujanār kām mãn mrō.” Anẽ nhũm kot amar nẽ amar xà hkôt ā kot amnhĩ nhĩpêx anhỹrta pyrāk. Ja pyrā nẽ kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tā awỳ nhũm mẽ ama nẽ mẽ amā mẽmoj tanhmā ho. Rỳ mẽ amā mẽmoj gō. Anẽ.

Te mẽ pahpê Tĩrtũm mã paxàpênh xwỳnh pyrāk

⁷ Nhũm Jejus arĩ mẽ ahkre nẽ mẽ kām:

—Nẽ ja. Kot kaj mẽ amā mẽ àpênh xwỳnh kwỳjaja nhũm hō amā mẽmoj tā àpênh o pa ě ho anhỹr pa. Hāmri tanhmā kot kaj kām akapêr to wehe? Xà kot kaj kām: “E hāmri axàpênhhta kaga nẽ tẽ nẽ nhỹ nẽ apku.” Anhỹr o kām akapêr? ⁸ Nà kot kaj kām anhỹr kêt nẽ. Kot kaj kām: “E kwa tokyx tẽ nẽ hpãnhã inhmā inhō hã apê. Kot pa ixàpkur pa ka ixpãnhã nhỹ nẽ apku.” Anhỹr kām akapêr. Kêp amā àpênh xwỳnh jakamā ka ā kām akapêr anẽ. ⁹ Ja pyrā nẽ kot puj mẽ Tĩrtũm kot mẽ pamā mẽmoj tā karō xà hkôt tanhmā kām amnhĩ nhĩpêx to ho ri papa. Mẽ õ patrãwta pyrā nẽ kot tanhmā mẽ pamā karō hto xà hkôt pu mẽ amnhĩ nhĩpêx.

—Xà na htem mẽ õ patrãw mã mẽmoj tā àpênh pa hāmri nẽ hkwỳjê mã amnhĩ to jarkrar o ri pa nẽ mẽ kām: “E ka mẽ ixpumu. Na pa hte inhō patrãw mã ixàpênh mex o mẽ hakre ka mẽ ja hã ixpumu. Hêxta waa nẽ. Mon pa hte ri axtem ā amnhĩ nhĩpêx anẽ?” Anhỹr o xà kot kaj mẽ kām amnhĩ to jarkrar o ri apa? Nà na ka htem ā amnhĩ nhĩpêx anhỹr kêt nẽ.

¹⁰—Tã pa hte mẽ õ patrãwta pyrā nẽ tanhmā mẽ amā mẽmoj tā karō hto ho ixpa. Jakamā kêr ka mẽ inhma nẽ ixte mẽ amā mẽmoj tā karō xà hkôt tanhmā inhmā amnhĩ nhĩpêx to ho ri apa. Hāmri nẽ hã amnhĩ to jarkrar pê amnhĩ jarēnh o: “ãm hāmri na pa ā Jejus mã amnhĩ nhĩpêx anẽ. Hêxta waa nẽ. Ixpê Jejus mã tanhmā ixte amnhĩ nhĩpêx to mex xwỳnh na pa.” Anhỹr o amnhĩ to jarkrar kêt nẽ. Kêt ãm amnhĩ jarēnh o: “Nà ixte

kām tanhmã amnhĩ nhĩpêx to ho ixpa xwỳnh pix na pa. Na hte mẽmoj tã inhmã karõ pa kuma nẽ ÿ hã tanhmã kãm amnhĩ nhĩpêx to.” Anhỹr o amnhĩ jarênh o ri apa. No ri amnhĩ krã hkõt atỳx tanhmã amnhĩ to jarkrar to ho ri apa hkêt nẽ. Anẽ.

Jejus kot mẽ ho 10 nẽ akupỹm mẽ ho mex ã harênh

Matêwre 8.1-4

¹¹ Tã nhũm Jejus arĩ Garirej rũm pika pê Samar hkàx ã Jerujarẽ hwỳr kormã mō. ¹² Nẽ nhỹri krĩ hõ htêp o mōr mẽ nhũm krĩ pu hã ri mẽ pa xwỳnhjaja kêp 10 nẽ kutã mra. Mẽ hkànhy hkro htỳx xwỳnhjaja kutã mra nẽ hkaxpa nẽ amỳm kuhê nẽ omu. ¹³ Hãmri nẽ kãm:

—Pa Pahihti. Kwa mẽ ixpumu nẽ mẽ ixkamã axukaprĩ nẽ tanhmã mẽ ixto mex to. Anẽ.

¹⁴ Hãmri nhũm mẽ kãm:

—Tõe. Nà kot paj mẽ ato mex. E mẽ mãmri awjanã nẽ ma akupỹm mẽ anhõ patrejê hwỳr mra kê mẽ akupỹm mẽ akà mex ã mẽ apumu. Anẽ.

Hãmri nhũm mẽ kuma nẽ kapêr mar xà hkõt awjanã. Kà nhy rãhã awjanã nẽ ma akupỹm patre hwỳr mra. Nẽ kormã akupỹm hwỳr pry hã mrar rãhã piitã hkà mex pa. ¹⁵ Hãmri nhũm ãm pyxi nẽ hkwỳjê rom awjanã nẽ akupỹm Jejus wỳr Tĩrtũm mã mex o mex ã harênh o hwỳr tẽ. ¹⁶ Hãmri nẽ Jejus kaxpa nẽ kutã hkõnkrã ho tẽm nẽ nhỹ nẽ amnhĩ tã kãm kot ho mex ã kãm amnhĩ jarẽ. Kwỳjê hkĩnhã kêp Ijaew kêt axtem kêp Samar nhõ xwỳnh tã mẽ kurom akupỹn hwỳr tẽ nẽ kãm mex o mex ã harẽ. ¹⁷⁻¹⁹ Hãmri nhũm amnhĩ tã kuma nẽ kãm:

—No mẽ akwỳjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupỹn ixwỳr tẽ. Akwỳjê hkĩnhã apê Ijaew kêt tã akupỹm amnhĩ mex ã amnhĩ pumu hãmri nẽ mẽ kurom awjanã nẽ Tĩrtũm mã mex o mex ã harênh o ixwỳr tẽ. Hêxta waa nẽ. Mo na hte ixkwỳjaja apyrã nẽ amnhĩ kaxyw ixkõt hamaxpêr kêt nẽ? E kànhmã xa nẽ mãmri ma ajamakêtkati nẽ akĩnh nẽ ma akupỹm tẽ. Anẽ.

Jejus akupỹn wrỳk xà hã arĩgro jarênh

Matêwre 24.23-24, 24.37-44; Makre 13.32-37; mããnên Wam Tesarõn 5.2-8; Sikũn Pêtre 3.3-10

²⁰⁻²¹ Tã nhũm Parijew nhõ xwỳnh kwỳjaja Jejus wỳr mra nẽ omu nẽ kãm:

—Kwa mẽ inhmã mẽmoj jarẽ. Xà koja apu Tĩrtũm tokyx kot mẽ pahwỳr mẽnh mã xwỳnhhta mẽ nhũm mẽ pahwỳr wrỳ nẽ mẽ pahto amnhĩptàr kurê kumrêx nà kormã? Anẽ.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarênh pyrã nẽ mẽ kãm:

—Nà ra kot mẽ ho amnhĩptàr o pa kênã. Nom nhỹri hkrĩ xà kamã mẽ ho amnhĩptàr o hkrĩ hkêt nẽ. Na htem amnhĩ kaxyw hkõt hamaxpêr nẽ hkõt amnhĩ xunhwỳ hãmri nhũm kêp mẽ õ pahihti hã mẽ ho amnhĩptàr o pa. Nẽ mẽ kãm mẽ hamaxpêr mex gõ nhũm htem hkõt ri hamaxpêr mex o pa. Anẽ.

²² Hãmri nẽ hpãnhã hkõt mẽ pa ho mẽ pa xwỳnhjê mã kapêr. Mẽ kot nhỹrmã tee ri kamã hamak o pa hã mẽ kãm kapêr nẽ mẽ kãm:

—Kot kaj mẽ nhỹrmã tee ri amã tokyx akupỹn ixwrỳk nẽ ixte mẽ ato amnhĩptàr prãm xàj tee ri inhmã anojarêt kaprỳ ho ri apa. Nẽ xepên mã ri ijarênh o: “Hêxta waa nẽ. Mo na we Pahihti tokyx akupỹn mẽ pahwỳr wrỳk kêt nẽ?” Anhỹr o inhmã anojarêt o ri apa pê ixkamã ajamak rãhã ho apa.

²³ —Nẽ koja mẽ ra akupỹn ixwrỳk ã tanhmã mẽ amã ixto hêx to ho pa. Nhỹri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama.

²⁴ Kot paj nhỹrmã akupỹn mẽ awỳr ixwrỳk kaxyw nhũm mẽ pika piitã hkõt akupỹn ixwrỳk kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu. ²⁵ Nom kormã jar pika ja kamã ixpa ri koja mẽ ohtô nẽ ixkaga pa amnhĩ xà htỳx kamã ijamak kãm ty. Hãmri nẽ mẽmo arĩgro hã ma akupỹm kaxkwa hwỳr api. Hãmri nẽ nhỹrmã akupỹn mẽ awỳr wrỳ.

²⁶—Nà kot paj nhÿrmã man akupÿn mẽ awÿr wrÿ. Akupÿn ixwrÿk xà hã arÿgrota ã koja jar pika ja kamã mẽ pa xwÿnhjaja htÿx ri tanhmã amnhÿ tomnuj to ho pa. Te amnepêm finat Noehti htÿr ri mẽ kot htÿx ri tanhmã amnhÿ tomnuj to ho pa pyræk o koja mẽ amnhÿ nhÿpêx o pa. ²⁷ Na prem amnhÿ kaxyw Tÿrtÿm mã hamaxpêr o pa hkêr nê. Nê ãm jar pika ja kamã mẽ kot amnhÿ nhÿpêx pix kukamã hamaxpêr o ri paja o ãm kôt pix mã tanhmã ri amnhÿ nhÿpêx to ho pa. Rôm nhÿm Noehti gô htàm pymaj pàr raxja nhÿpêx nê kãm axà. Nhÿm prem hã omu nê ãm omunh o pa nê tanhmã ri amnhÿ kukamã hamaxpêr to hkêr nê. Tã nhÿm nata mẽ haêr pê wrÿ. Hãmri nê wrÿk rax o ra pika piitã hanhi nhÿm mẽ piitã pikaprãr pa.

²⁸—Akupÿn ixwrÿk xà hã arÿgrota ã koja mẽ mãânên te amnepêm Sotô nhô xwÿnhjaja kot htÿx ri tanhmã amnhÿ tomnuj to pyræk o amnhÿ nhÿpêx. Finat Rohti kormã htÿr ri mẽ kot htÿx ri tanhmã amnhÿ tomnuj to ho pata pyræk o koja mẽ amnhÿ nhÿpêx. Na pre hte Sotô nhô xwÿnhjaja ãm pika ja kamã mẽ kot amnhÿ nhÿpêx pix kukamã hamaxpêr o ri pa. Nê ãm kôt pix mã ri amnhÿ nhÿpêx o pa. Nê htÿx ri amnhÿ xàpkur xà pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhÿ xujaprôr pix kukamã hamaxpêr nê axpên mã mẽmoj to wênê pix kukamã hamaxpêr. Nê amnhÿm ôrkwÿ nhÿpêx pix kukamã hamaxpêr. Á na prem pika ja kamã mẽ kot amnhÿ nhÿpêx pix kukamã hamaxpêr o ri pa anhÿrja o amnhÿ kaxyw Tÿrtÿm mã hamaxpêr o pa hkêr nê.

²⁹—Tã nhÿm Rohti mẽ ô krÿ rÿm kator mẽ nhÿm Tÿrtÿm krÿ nhô xwÿnhjaja kot amnhÿ tomnuj tÿx o paja mÿrapê mẽ himex pa. Jao kaxkwa rÿm mẽ hipy mẽmo hpôk kwÿ rê nhÿm mẽ hkaxàr pa. ³⁰ Tã akupÿn mẽ awÿr ixwrÿkja mẽ koja mẽ te Rohti nhô krÿ kamã mẽ kot amnhÿ nhÿpêx pyrã nê htÿx ri amnhÿ tomnuj pix o pa.

³¹—Nê akupÿn ixwrÿyta ã ka mẽ anhôrkwÿ nhÿmôk ã hkrãmnhên o akrÿ japêr nê akupÿn ixwrÿk kãm ixpumu. Hãmri nê akukrêx wÿr axàr nê hô hpyr mã ajamaxpêr kêt nê. Rÿ ka mẽ apur kãm axàpênh o akuhê japêr nê akupÿn ixwrÿk kãm ixpumu. Hãmri nê akupÿm anhôrkwÿ hwÿr atêm mã ajamaxpêr kêt nê. Mo kaxyw kot ka kêt hwÿr têt? Kêt ãm inhmã mẽ ajapê hã akupÿn mẽ awÿr ixwrÿk mã ajamaxpêr o akÿnh nê ixpumunh o akuhê.

³²—Nê kêr ka mẽ Rohti prô kot tanhmã amnhÿ nhÿpêx toja mã ajamaxpêr rãhã ho ri apa. Na pre Tÿrtÿm kapêr nhÿrôp xa nê amnhÿ katut kôt Sotôta wÿr rÿt hãmri nê ã amnhÿ nhÿpêx anhÿrja mÿrapê htyk kurê kumrêx. Tã kêr ka mẽ ho uræk nê amã akukrêx rax japê xàj ixkôt amôr kaxyw anhÿtôt kêt nê.

³³—Nê kwa kêr ka mẽ jar pika ja kamã tanhmã mẽ ate amnhÿ nhÿpêx to pix kukamã ajamaxpêr o ri apa hkêr nê. Nê mẽ akukrêx rax pix kukamã ajamaxpêr kêt nê. Koja nhÿrmã ja piitã mẽ apê hapêx pa. Mẽ ate kãm anhÿhkra karo hpar pyræk o piitã hipêx hãmri nhÿm Tÿrtÿm ja hã mẽ apumu nê hpãnhã nhÿrmã mẽ amã mẽmoj mex nhôr rax nê.

³⁴—Nê kot paj kamàt kãm akupÿn ixwrÿk japêr nhÿm nhÿri mẽhô ra ixkôt amnhÿ xàm xwÿnh mẽ mẽhô kot ixkôt amnhÿ xãm kêt xwÿnh wa par kãm nôr japêr. Hãmri pa amnhÿ wÿr ra ixkôt kot amnhÿ xãm xwÿnhhta o api nhÿm kot ixkôt amnhÿ xãm kêt xwÿnhhta arÿ gôr nê nô. ³⁵ Rÿ pa arÿgro hã akupÿn ixwrÿk japêr nhÿm mẽnijê hô wa hamêxkrut nê harôj kahuk o ãm japêr. Hãmri pa ra kot ixkôt amnhÿ xãm xwÿnhja ho api nhÿm kot ixkôt amnhÿ xãm kêt xwÿnhja ahte arÿ harôj kahuk o xa. Hãmri nê hamaxpêr mex kêt kumrêx o xa. ³⁶ Rÿ koja mẽmyjê hô wa axkrut nê hpur kãm àpênh o ãm japêr. Pu pa amnhÿ wÿr kot ixkôt amnhÿ xãm xwÿnhhta o api nhÿm kot ixkôt amnhÿ xãm kêt xwÿnhhta pur kãm ahte arÿ apênh o xa. Hãmri nê tee ri hkrãmnhwÿ hkukamã hamaxpêr o xa. Anê.

Nhÿm pre ã Jejus hkôt mẽ pa ho mẽ pa xwÿnhjê mã amnhÿ jarênh anê. ³⁷ Hãmri nhÿm mẽ kuma nê kãm:

—Kwa nhÿri koja mẽmoj ã amnhÿ nhÿpêx anê? Anê.

Hãmri nhÿm mẽ kãm:

—Nà koja nhÿri mēmojja ã amnhĩ nhĩpêx anê ka mē omunh kurê kumrêx. Te nhÿri mēmoj kro nê nōr nhũm nhônhti kot omunh nê hã htor nê hpinhĩpanh nhũm mē kot hã omunh kurê kumrêxta pyrək. Anê.

18

Mē pahte Tĩrtũm mã amnhĩ jarēnh rāhã ho papa hã mē pamã karō

Rukre 11.5-8; mãănēn Wam Tesarōn 5.17

¹ Tã nhũm Jejus hkôt mē pa ho mē pa xwÿnhjê mã mēmoj tã karō. Mē kot tanhmã Tĩrtũm mã amnhĩ jarēnh to hã mē kãm karō. Mē kot xatã kãm amnhĩ jarēnh o pa nê amnhĩ kaxyw kãm hamaxpēr rāhã ho pa kaxyw. No ãm hã kuxi nê tanhmã mē kãm hã ujarēnh to nê mē kãm:

² —Koja nhÿri krĩ hō kamã juistija kãm Tĩrtũm prãm nōkati. Nê mãănēn kãm amnhĩ kwÿjê hprãm nōkati htã kēp juisti nê tanhmã mē kãm kapēr to ho hkrĩ. ³ Jakamã nhũm mēhō ni pē mjên htyk xwÿnh. Nhũm hte mēhō xatã tanhmã kēp ò mēmoj to ho pa. Hãmri nhũm tee ri amnhĩ tã omu nê xatã juistita wÿr mra nê kãm harē nê kãm: “Xê gàa nê. Na hte pahkwÿjê hōja ixtomnuj rāhã ho pa. Xê ixtã tanhmã kãm akapēr to kē tãm inhĩpêx.” Anê. Nê xatã hwÿr mra nê amnhĩ to kuwÿ nê xatã hwÿr mra nê amnhĩ to kuwÿ. ⁴⁻⁵ No nhũm kuma nê ãm kuma. Kãm hkwyjê ho ajuta hprãm kêt jakamã ãm kuma. Tã nhũm xatã hwÿr mra. Gaa nhũm rĩ kãm mar kaga nê. Hãmri nê hamaxpēr o: “Tk. Hêxta waa nê. Jahti na hte xatã ixwÿr mra nê tanhmã inhmã amnhĩ jarēnh to. Nê ãm xatã ixwÿr mra. Nà na pa ra inhmã mar kagyk nê. E pa tokyx tanhmã nê kot tanhmã ho xwÿnhta mã ixkapēr to. Inhmã Tĩrtũm pyma kamã rÿ inhmã ixkwÿjê kaprĩ kamã pa tanhmã nê kãm nê hkêt tã kot pa anhÿr kêt nhũm amnhĩ tã inhmã harēnh pix nê pa ra mar kurê ixkrã tātək nê.” Anhÿr o hamaxpēr. ã mē ujarēnh kot anhÿr.

⁶ —Juisti tãm hamaxpēr kêt tã nhũm nija xatã hwÿr mrar nê amnhĩ to hwÿr jakamã nhũm jatã tanhmã ho ajuta hto. ⁷⁻⁸ No kêt Tĩrtũmja. Xàn ka htem mēmoj tã awÿ nhũm juisti punutita pyrã nê mē ama nê ãm mē ama? Nà koja ã amnhĩ nhĩpêx anhÿr kêt nê. Kot ka mēmoj tã kãm amnhĩ jarē nhũm ama nê tanhmã amã mēmoj to rÿ tanhmã amã amnhĩ nhĩpêx to. Juistita rom mē pakamã ukaprĩ xwÿnh na. Tã kot paj nhÿrmã akupÿn wrÿ nê mē apumu ka mē arĩ amnhĩ kaxyw hkôt ajamaxpēr mex pē kãm amnhĩ jarēnh rāhã ho ri apa pa ja hã mē apumu nê ixkĩnh tÿx nê. Ja na inhmã hprãm. Anê.

Tanhmã mē kot Tĩrtũm mã amnhĩ jarēnh to hã mē harēnh

Matêwre 6.5-8; mãănēn Wam Pêtre 5.5-6

⁹ Tã nhũm Jejus mē kot amnhĩ to mex o hkwyjê jakrenh ã amnhĩ to jarkrar o ri mē pa xwÿnhjê pumu nê tanhmã mē kãm kapēr to. Nom mē kot amnhĩ to jarkrarta ã kuxi nê mē kãm awjarē nê mē kãm:

¹⁰ —Koja mēhō wa hamēxkrut nê Tĩrtũm mã amnhĩ jarēnh kaxyw wa tē. Ja kēp Parijew nhō xwÿnh nhũm hōja kēp mē ò pahi mã hkwyjê pē kàxpore hkwy jamÿnh xwÿnh. Nhũm wa Tĩrtũm mã amnhĩ jarēnh xà hã ixkre hwÿr wa tēn axà. ¹¹⁻¹² Hãmri nhũm Parijew nhō xwÿnhta kumrêx tē nê nhÿri mē piitã mē noo mã Tĩrtũm mã amnhĩ jarē. Nê amnhĩ to jarkrar pē kãm amnhĩ jarēnh o: “Pa Tĩrtũm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kàxpore hkwy jamÿnh xwÿnh nēj rom tãm amnhĩ nhĩpêx. Nê semãn piitã hã ixàpkur kêt rāhã amã amnhĩ jarēnh rāhã ho ixtã apkati axkrut. Nom ja pix kêt. Na pa hte mãănēn ixàpēnh pãnhã kàxpore jamÿ nê mē kot amã tanhmã amnhĩ nhĩpêx to ho pa xwÿnhjê mã hkwy nhōr o ixpa. Nê na pa hte ri ixàhkĩnh o ri ixpa hkêt nê. Nê nhãm mē kēp mē hprō ho amnhĩkati ho ri ixpa hkêt nê. Na pa hte mē piitã mē kurom tãm amnhĩ nhĩpêx ã amnhĩ pumu nê ixkĩnh tÿx kumrêx. Hêxta waa nê. Mon pa hte ri ã amnhĩ to mex o ixpa anê?” Anhÿr o Tĩrtũm mã amnhĩ to jarkrar pē kãm amnhĩ jarēnh o xa.

¹³ —Hãmri nhũm hpãnhã mē kēp kàxpore hkwy jamÿnh xwÿnhta haxwÿja Tĩrtũm mã amnhĩ jarē. No ãm Parijew nhō xwÿnhta rom ki hkwyjê pē awry nê ahte hipô nê kãm amnhĩ jarē. Nê kãm amnhĩ jarēnh pē amnhĩ tak nê mur nê kãm: “Kwa Tĩrtũm. Na pa hte

amnhĩ tomnuj tỳx o ri ixpa. Nê ixtỳx ri amã prãm xà kuhpa hã tanhmã amnhĩ nhĩpêx to. Na pa tee ri ja hã amnhĩ pumu nê ixkaprĩ htỳx nê. ã inhmã amnhĩ nhĩpêx anhỹr o ri ixpa hprãm kêt tã pa hte ã amnhĩ nhĩpêx anhỹr o ri ixpa. Kwa xà kot ka ixkamã axukaprĩ nê amnhĩ katut kôt ixte amnhĩ tomnuj rênh pa Tĩrtũm?” Anhỹr o kãm amnhĩ jarê.

¹⁴—Hãmri nhũm Tĩrtũm hamê wa kot kãm amnhĩ jarênh ma no ãm wamta ma nê ãm kuma. No kêt hkôt hõja ma hãmri nê kot kãm amnhĩ tã àhwỳr xà hkôt amnhĩ katut kôt kot amnhĩ tomnuj rênh pa nê ho hkra. Jakamã nhũm mex nê hkĩnh nê pa. Ra tãm hkrã hãmri nê hkĩnh nê ma htêm kurê kumrêx. ã mẽ ujarênh kot anhỹr. ãm hãmri na pa mẽ amã ja jarê. Koja mẽhõ Parijew nhõ xwỳnhhta pyrã nê kot amnhĩ to mex xwỳnh ã amnhĩ kamnhĩx hãmri nê Tĩrtũm kot amnhĩ katut kôt kot amnhĩ tomnuj rênh kaxyw amnhĩ to hwỳr kêt nê. Koja ãm kãm amnhĩ to jarkrar pix nê. Jakamã koja Tĩrtũm te kot mar nê ãm mar pyrãk o hipêx. No koja mẽhõ kot kàxpore hkwy jamỳnh xwỳnhhta pyrã nê tee ri tanhmã amnhĩ tomnuj to hã amnhĩ pumu nê hkaprĩ nê. Hãmri nê amnhĩ to Tĩrtũm wỳ nhũm kuma nê tanhmã ho mex to. Anê.

Jejus kot amnhĩ wỳr mẽhprĩrejê hwỳr ã harênh

Matêwre 19.13-15; Makre 10.13-16

¹⁵ Tã nhũm Jejus mẽ hkôt mẽ pa ho mẽ pa xwỳnhjaja arĩ pry hã Jerujarê hwỳr mõ nhũm Ijaew kwỳjaja mẽ omu nê mẽ hkrare jamỳ nê Jejus wỳr mẽ o mra. Kot mẽ hã ìhkra jaxwỳr nê mẽ ho Tĩrtũm wỳr kaxyw. Hãmri nhũm hkôt mẽ pa ho mẽ pa xwỳnhjaja tee ri ja hã mẽ omu nê nê mẽ kãm kapêr nê mẽ kãm:

—Tk. Kwa mẽ ma akupỳm mẽ akrata o mra nà? Mo kaxyw na ka mẽ Jejus wỳr mẽ o mra? Kormã mẽ raxre kênã. Anê.

¹⁶ Hãmri nhũm amnhĩ tã mẽ kuma nê mẽ kãm:

—Tk. Kwa nà mẽ ri inhnê mẽhprĩjê kurê hkêt nê. Kwãr mẽ mãmri ixwỳr mẽ o mra. Anê.

Hãmri nê amnhĩ wỳr mẽ kãm hpa ho apê nhũm mẽ hwỳr mẽ o mra nhũm mẽ kuri kuhê. Hãmri nhũm hkôt mẽ pa ho mẽ pa xwỳnhjê mã kãm:

—E mẽ jareja mẽ omu. Na htem hamakêtkati nê hkĩnh nê ri pare. Nê kãm amnhĩ to rũnh prãm kêt nê ri pa. Tã Tĩrtũm kôt mẽ kot amnhĩ nhĩpêx xwỳnhjaja na htem mẽ uràk nê kãm amnhĩ to rũnh prãm kêt nê ri pa.

¹⁷—Jarejaja na htem hipêêxà nê katorxà wa kapêr ma nê wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awỳr inhmênh xwỳnh kot ka mẽ amã ixkôt amnhĩ xunhwỳr prãm. Hã kot kaj mẽ te ho jarejê kot amnhĩ nhĩpêx pyrãk o amnhĩ nhĩpêx. Jao ixkapêr ma nê ixkôt ri tanhmã amnhĩ nhĩpêx mex to ho ri apa. Anê.

Kàxpore rax xwỳnh jarênh

Matêwre 19.16-30; Makre 10.17-31; mããnên Wam Ximotre 6.6

¹⁸ Tã nhũm Ijaew nhõ pahihtĩ hõja Jejus wỳr tẽ nê kãm kapêr nê kãm:

—Pa? Mẽ ijahkre xwỳnh maati? Kwa inhmã mẽmoj jarê. Tanhmã kot pa we nhỹrmã Tĩrtũm ri ixtĩr tũm nê ixpa kaxyw amnhĩ nhĩpêx mex to ho ri ixpa wehe? Anê.

¹⁹ Hãmri nhũm kãm:

—Xà ate ixpê Tĩrtũm kwỳ hã ixpumunh kôt na ka ixte uràk nê amnhĩ to mex xwỳnh ã ijarê? Tĩrtũm pix na kot amnhĩ to mex rãhã xwỳnh jakamã kot kaj ã ijarênh anhỹr jao ixpê Kra hã ijarê. Nê uràk nê ixte amnhĩ to mex xwỳnh ã ijarê. Nà xàn ka ãm atỳx ri amnhĩ krã hkôt ã ijarênh anê?

²⁰—Tĩrtũmja mex o mex xwỳnh jakamã kot kaj amã nhỹrmã kuri atĩr tũm nê apa hprãm hãmri nê ra kot mẽmoj tã mẽ amã karõ xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpên pê axàhkĩnh hkêt nê.

Nê mẽ axpên par kêt nê.

Nê mẽ axpên to axêx o ri apa hkêt nê.

Nê mẽ axpên pê aprõ ho amnhĩkati hkêt nê.

Nê mẽ anhĩpêêxà mẽ akatorxà wa hã apijaàm pê wa kutã anojarêr pix o ri apa.

E kot kaj amã nhÿrmã Tÿrtÿm kuri atÿr tÿm nÿ apa hprãm hã kÿr ka ã amnhÿ nhÿpÿx anhÿr o ri apa. Anÿ.

²¹ Nhÿm pre ã Jejus kãm kapÿr anÿ nhÿm kuma nÿ kãm:

—Kwa ixprÿre ri ra ã ixte amnhÿ nhÿpÿx anhÿr o ri ixpa kÿnã. Nom ixte ixtÿr tÿm nÿ ixpa kaxyw kormã ixte tãm kÿt pyrãk. Anÿ.

²² Hãmri nhÿm Jejus kãm:

—Nã kormã mÿmoj pyxire nÿ arÿk. Na ka amã akukrÿx rax japÿ htÿx o Tÿrtÿm jakre. Jakamã kÿr ka ma akupÿm tÿ nÿ akukrÿx o wÿnÿ hpa nÿ hpãnhã kãxpore jamÿ hãmri nÿ ma mÿ kÿp amrakati xwÿnhjÿ mã òr pa. Hãmri nÿ rÿ akupÿn ixwÿr tÿ nÿ ixkòt apa ho apa. Anÿ.

²³ Hãmri nhÿm kuma nÿ tee ri amnhÿ kukamã hamaxpÿr. Kãm kukrÿx rax japÿ nÿ kãm ïhkra karo hprãm kÿt nÿ. Jakamã tee ri Jejus kot ã kãm hã karò anhÿrja ma nÿ awjanã nÿ ma akupÿm tÿ. ²⁴ Hãmri nhÿm tee ri ja hã omu nÿ hã mÿ kot mar xwÿnhjÿ mã kapÿr nÿ mÿ kãm:

—Hÿxta waa nÿ. Koja mÿ hikukrÿx rÿnh xwÿnhjaja ohtò nÿ kãm mÿ hikukrÿx japÿ xaj Tÿrtÿm mÿ wa ixri htÿr tÿm nÿ pa ho papa hkÿt nÿ. Wa ixte amnhÿ nhÿpÿxja mÿ kÿp hihtÿx. ²⁵ Na htem kãm hikukrÿx rax mã ïhkra karo hprãm kÿt rãhã tee ri kãm Tÿrtÿm kòt amnhÿ nhÿpÿx prãm kaprÿ. Te ho mÿhò kot menh kagò hã hkre nÿ kãm kagò katòk prãm kÿt rãhã kãm guhkrax kãm àr prãm kaprÿta pyrãk. Anÿ.

Nhÿm pre ã Jejus mÿ kãm kapÿr anÿ. ²⁶ Hãmri nhÿm mÿ kuma nÿ tee ri amnhÿ kukamã hamaxpÿr nÿ kãm:

—Kwa nom mÿ ixpiitã mÿ inhmã mÿ ixkukrÿx japÿ kÿnã. Jakamã xà kot paj mÿ ixpiitã nhÿrmã war ari ixtÿr tÿm nÿ ixpa ho ixpa hkÿt nÿ nã? Anÿ.

²⁷ Hãmri nhÿm mÿ kãm:

—Nã kot kaj mÿ amnhÿ krã hkòt mÿ amã mÿ akukrÿx japÿja mã anhÿrer kÿt nÿ. Tÿrtÿm pix na hte ã mÿ kot amnhÿ nhÿpÿx anhÿr kaxyw tanhmã mÿ hkrã hto nhÿm mÿ kãm mÿ hikukrÿx japÿ htÿx kÿt nÿ. Jao mÿ kÿp Tÿrtÿm mÿ wa ixri htÿr tÿm nÿ mÿ pa ho pa mã xwÿnh. Anÿ.

²⁸ Hãmri nhÿm Simãw Pÿtre kãm:

—Kwa Pahihti no mÿ pajaja? Na pa prem agryk ã mÿmoj piitã hkaga hpa nÿ akòt ixpa ho ixpa. Jakamã kot paj mÿ nhÿrmã war ari ixtÿr tÿm nÿ ixpa ho ixpa nã? Anÿ.

²⁹ Hãmri nhÿm kãm:

—Tÿ. Nã ka mÿ atò inhmã tanhmã amnhÿ nhÿpÿx to ho apa kaxyw akwÿjÿ re nÿ ma inhmã tanhmã amnhÿ nhÿpÿx to ho ri apa. Anhòrkwyÿ re rÿ atò rÿ atòx rÿ aprò nÿ akrajÿ re. Rÿ akatorxã nÿ anhÿpÿxã war are. Rÿ akukrÿx piitã rer pa hãmri nÿ ma ixkapÿr o mÿ piitã mÿ ahkre ho ri mÿ hkòt apa. ³⁰ Hã kot paj ja hã mÿ apumu nÿ mÿ ato mex rax nÿ. Hãmri ka mÿ ma nhÿhÿm apa nÿ nhÿri mÿ kãm ixkapÿr jarÿnh o ri mÿ hkòt apa nhÿm mÿ kot mÿ amar xwÿnh kwÿjaja mÿ ama nÿ ra kãm mÿ akÿnh nÿ. Nÿ ra mÿ ate akwÿjÿ rer par tã nhÿm mÿ tãmjaja te mÿ apÿ mÿ hkra rÿ mÿ htò rÿ mÿ htòx pyrãk o mÿ anhÿpÿx nÿ tanhmã mÿ ato mex to ho pa. Hãmri ka mÿ nhÿrmã ty nÿ ma Tÿrtÿm mÿ wa inhò krÿ hwÿr api hãmri nÿ wa ixkuri amex kumrÿx nÿ atÿr tÿm nÿ apa ho apa. Anÿ.

Nhÿm pre ã Jejus Simãw Pÿtre mÿ hkwyÿjÿ mã kapÿr anÿ.

Jejus kot axte htyk kukamã amnhÿ jarÿnh

Matêwre 20.17-19; Makre 10.32-34

³¹ Tã nhÿm Jejus mÿ kot ÿ hã kapÿr jarÿnh o mÿ pa xwÿnh pÿ 12jaja mÿ hkwyÿjÿ pÿ mÿ ho kato. Nÿ nhÿri mÿ hkàx ã mÿ o xa nÿ tanhmã mÿ kãm amnhÿ jarÿnh to nÿ mÿ kãm:

—Amnepÿm Tÿrtÿm nhÿ hã kapÿr jarÿnh xwÿnhjaja na prem ixkukamã tanhmã mÿ kot inhÿpÿx to hã ijarÿ nÿ ixtã kagà. Tã pu mÿ ra Jerujarÿ hwÿr mò. Kamã koja mÿ tanhmã ixto rax nÿ. Ra mÿ kot ixkukamã ijarÿnh nÿ ixtã kagà xà hkòt koja mÿ ixto anÿ. ³²⁻³³ Koja mÿ kãm ixkurÿ xwÿnhjaja ixpynÿ nÿ Ròm nhò xwÿnhjÿ nhò pòristi hwÿr ixto tÿ nÿ mÿ kãm ixto hÿx nhÿm mÿ kuma nÿ mÿ mar xà hkòt tanhmã inhÿpÿx to. Nÿ mÿ hkwyÿjaja ixtã hpÿr o axkÿ nÿ akunha. Nÿ mÿ hkwyÿjaja ixto kapÿr punuj nÿ ijarÿ nÿ ixtã argòx rÿ nÿ

ixtak. Hāmri nē ixpī. Ā koja mē inhīpêx anē. Nom kot paj ām ixtyk ā apkati axkrunêpxi nhūm Tirtūmjā akupŷm ixto ixtīr. Anē.

³⁴ Hāmri nhūm mē kuma nē tee ri htyk nē akupŷm htīrja kukamā hamaxpēr no ām hprī hā hkôt hamaxpēr kêt nē.

Jejus kot no hkre xwŷnh o mex ā harēnh

Matêwre 20.29-34; Makre 10.46-52

³⁵ Tā nhūm Jejus mē kormā Jerujarē hwŷr Jerikoja tēp o mō. Hāmri nhūm pry nhīhkjê hā no hkre xwŷnhja àhwŷr o nhŷ. ³⁶ Hāmri nē amnhī wŷr mē mrar ma. Mē ohtô nē Jejus kôt mē mrar xwŷnhjê mrar ma nē mē kām:

—Kwa mēmo ri? Mēmoj wŷr na ka mē axohtô nē mra? Anē.

³⁷ Hāmri nhūm mē kām:

—Nà Jejus pê Najare nhō xwŷnh kôt na pa mē mō. Anē.

³⁸ Hāmri nhūm mē kuma nē kàx pê Jejus mā kapēr nē kām:

—Pa Jejus? Apê mē inhō Pahihti mex na ka. Te apê amnepēm anhīgēt pahihti Tawi kot amnhī nhīpêx pyrāk. Jakamā kwa ixkamā axukaprī nē akupŷm ixto mex kêt wehe. Ixte amnhī kaxyw akôt ijamaxpēr xwŷnhjê hō na pa. Anē.

³⁹ Hāmri nhūm Jejus kukamā mē mrar xwŷnhjaja tee ri kuma nē kām:

—Tk. Kwa akapēr kêt nē nhŷ nà. Anē.

Tā no nhūm ām mē kuma nē xatā amnhī to hwŷr o nhŷ. Kàx pê kām kapēr o nhŷ.

⁴⁰ Hāmri nhūm Jejus kuma nē xa nē amnhī wŷr hā karō nhūm mē hpa hā kupy nē hwŷr o tē nhūm kām:

⁴¹ —Pa mo na? Tanhmā kot pa ato? Anē.

Nhūm kām:

—Nà akupŷm inhmā ixrīt mex prām. Anē.

⁴² Hāmri nhūm kām:

—Tôe. Nà ra ate amnhī kaxyw inhmā ajamaxpēr tŷx jakamā kot kaj akupŷm ri rīt. Anē.

⁴³ Hāmri nhūm akupŷm rīt mex kurê kumrêx nē ja hā amnhī pumu nē hkīnh tŷx nē. Hāmri nē ma Jejus kôt Tirtūm mā mex o mex ā harēnh o mē hkôt tē. Hāmri nhūm mē kot hā omunh xwŷnhjaja haxwŷja Tirtūm mā mex o mex ā harēnh o Jejus kôt mō.

19

Jakew kām Jejus pumunh prām ā harēnh

Rukre 3.8, 3.12-13

¹ Tā nhūm Jejus arī Jerujarē hwŷr mō nē Jeriko hwŷr pōj. Hāmri nē krī kahti hkôt pry hā mō. ² Nhūm mē ra hkôt htu rax nē hkôt omunh o mō. Jakamā nhūm Jakew pê Rōm nhō pahi mā kwŷjê pê kàxpore hkwy jamŷnh xwŷnhjê krāhtūm xwŷnhja. Na pre hikàxpore rax nē. ³ Tā haxwŷja kām Jejus pumunh prām nē. Nom ām hakooti nē hprīhti jakamā tee ri kot omunh kaxyw amnhī nhīpêx nhūm mē kēp àmnàr rax nē. ⁴ Hāmri nhūm ra hamaxpēr nē ma kukamā hprôt nē tē nē nhŷri pry mŷri pī xām pumu nē hā api nē kutêp ajêt. Hāmri nhūm Jejus mō nē hapa. ⁵ Nē kànhmā rīt nē omu nē kām:

—Pa Jakew. E kwa tokyx tēn wrŷ pa ma akôt anhōrkwy hwŷr tē nē ari amnhīm hikra. Anē.

⁶ Hāmri nhūm kuma nē hkīnh nē. Nē wrŷk kurê kumrêx nē ma amnhī kôt nē o tē.

⁷ Hāmri nhūm mē kot omunh o kuhê xwŷnhjaja tee ri ja hā omu nhūm ja mē kēp omnuy nē nhūm mē axpēn mā harēnh o:

—Tk. Kwa nà. Jakew kot amnhī tomnuj xwŷnh tā nhūm Jejus ma hkôt tē nē kuri pōj. Anē.

⁸ Hāmri nhūm wa ōrkwy hwŷr axà nē nhŷ nhūm Jakew Jejus mā amnhī jarēnh o:

—E. Nà ra ixte pahihti mā kàxpore jamŷnh xwŷnhhta na pa pre hte ho prês jakre nē amnhīm hamŷnh rax nē. Tā kot paj akupŷm mē kām ōr pa. Na pa pre hte mē hkwyjê pê ho 10 nē hamŷ. Tā kot paj hipy ho 40 nē kurê nē akupŷm mē kām ho ixpigrành pa. Ā kot paj mē hipêx anē. Nē ixkàxpore jakrêx kot paj ho axkjê nē mē kēp amrakati xwŷnhjê mā ho ixpigrành pa. Anē.

⁹ Hāmri nhūm kuma nhūm ja kām mex nē. Jakamā nhūm kām:

—Nà ām hāmri. Ate pahkukamā panhīgēt Apraāw pyrā nē jarāhā ate amnhī tomnuj kaga jakamā na ra jarāhā anhōrkwý hwýr mē mex xà axà. Koja Tirtūm jarāhā amnhī katut kôt ate amnhī tomnuj rēnh pa nē axte kām hamaxpēr kēt nē. ¹⁰⁻¹¹ Mē ate amnhī tomnuj xwýnhjē hwýr na pre Tirtūm inhmē pa wrý. Te nhýri mē apikunor nhūm ixte mē ajapēr o ixpa kaxyw Tirtūm kot mē awýr inhmēnh nhūm ixwryk nē nhýri ixte mē ajapēr o ixpa nē mē amā ixkator nē ixkīnh nē ma akupým hwýr mē ato inhmōrta pyrāk. Anē.

Mē pahte Tirtūm mā tanhmā amnhī nhīpēx to

Matêwre 25.14-30

Hāmri nhūm mē ohtô nē Jejus mar o hkôt Jerujarē hwýr mra. Na prem htýx tanhmā kot amnhī nhīpēx to hā hkamnhīx o hkôt mō nē axpēn mā:

—E ma pu mē hkôt. Koja Jerujarē hwýr pōj hāmri nē kēp mē pahpē Ijaew nhō pahi nē mē pahto amnhīptār kurē kumrēx. E kwa ma pu mē hkôt. Anē.

¹² Nhūm Jejus mē hamaxpēr kôt mē omunh mex nē. Jakamā kot mē piitā mē ho amnhīptār xà hā arīgro hā mē kām amnhī jarēnh kaxyw. Kormā Jerujarē hwýr ahtēp kēt ri mē kām amnhī jarēnh kaxyw. Nom hprī hā mē kām hā amnhī jarēnh kēt nē. Ām amnhī tā kuxi nē mē kām awjarē nē mē kām:

—Koja nhýri krī hō kamā mēhō myja. Kot amnhī to rax o hkwyjē jakrenh xwýnhja. Nē krī hō kamā krī piitā hkôt pahi nhō pahihtija hāmri harēnh ma nē amnhī wýr kuwý. Kot ma hwýr mōr nhūm o krī kamā nē määnēn krī hkwy kamā kēp mē o pahi kaxyw kot ām kaxyw nhūm hwýr nojarēt. ¹³ Hāmri nē amnhī wýr kām mē apēnh xwýnhjē ho 10 nē tanhmā mē hā karō hto. Nhūm mē hwýr mra nhūm mē kām amnhī jarē nē mē piitā mē kām kàxpore hkwy gō. Ahpýnhā mē kām hpýnh nē kugō nē mē kām: “E ota ixkàxpore hkwyta. Kot kaj mē ixkutēp tanhmā ri inhmā ho rax to. Kēr pa mēmo arīgro hā akupým mō kê ra ixahā inhmā ho ohtô nē pa hamý.” Anhýr o mē kām kapēr hāmri nē ma mō. ¹⁴ Hāmri nhūm o krī nhō xwýnhjaja ra kēp mē o pahi kaxyw harēnh ma nhūm ja mē kēp omnuj nē. Nē mē kām hkīnh kēt jakamā ma krī hō kamā kot mē kaxyw ām xwýnhhta wýr hkwy rē nhūm mē ma hwýr mra nē hwýr pōj. Hāmri nē kot mē kaxyw ām mā xwýnhhta pumu nē kām: “Pa. E ot pa mē awýr mra. Kwa na ka xep ra mē ixkaxyw mē inhōja xām kaxyw. Kwa nà mē inhmā jahti hkīnhhti hā. Kwa mē ixkaxyw ām kēt nē nà?” Anhýr o kām kapēr.

¹⁵ —Tā no nhūm ām mē kuma nē ām mē kuma nhūm mē awjanā nē mā akupým mra. Hāmri nhūm pahija mē kaxyw mē kām hkīnh kēt xwýnhhta xām nhūm ma akupým o krī hwýr mō. Mōō nē ra pōj hāmri nē amnhī wýr kām mē apēnh xwýnhjē hā karō nē mē kām: “E no ixte mē amā kàxpore nhōr xwýnhhta? Tanhmā na ka prem ixkutēp inhmā ho rax to? E mē inhmā agō pa omu.” Anē.

¹⁶ —Hāmri nhūm wanta kām: “Ota akàxpore ate inhmā ōr xwýnhhta. Na ka pre inhmā ho pyxi nē agō pa kupy nē ho mēmo hy hkwy japrō nē hkre. Nhūm o pa mē kām ho wēnē ho ri ixpa nē hpānhā kàxpore jamý nē hipy amā kurē nhūm ra kēp 10. Ota. E amý.” Anē.

¹⁷ —Hāmri nhūm kuma nē hkīnh nē. Hāmri nē kām: “Nà ām hāmri na ka ā inhmā ho rax anē. Ixte amā ho pyxi nē ōr tā ka pre inhmā hamār mex nē nhūm kànhmā axkamē nē ra kēp 10. Tā ra ixpē krī hkwy kamā mē o pahi jakamā kot ka inhmā krī ho 10 nē inhmā hamār o ri apa. Jakamā kwa māmri amnhīm kàxporeta o arīk.” Anē.

¹⁸ —Hāmri nhūm hpānhā hōja hwýr tē nē kām: “E ota akàxporeta. Na pa pre ho mēmo hy hkwy japrō nē hkre nhūm o pa mē kām ho wēnē nē hpānhā kàxpore jamý nē hipy amā kurē nhūm ra kēp 5. Tā ota. E amý.” Anē. ¹⁹ Hāmri nhūm kuma nē kām: “Nà ām hāmri. Hāmri na ka ā inhmā ho rax anē. Jakamā kot kaj hpānhā inhmā krī ho 5 nē ho amnhīptār o apa. E māmri amnhīm kàxporeta o arīk.” Anē.

²⁰⁻²¹ —Hāmri nhūm hpānhā hkôt hōta tē. Nom hkwyjē hkīnhā o patrāw mā tanhmā kàxpore ho rax to hkēt nē. Ām tanhmā hamaxpēr punuj to nē htýx ri kot kēp ho ōxy nē amnhīm piitā hamýnh par nē akupým kām hkwy nhōr kēt ā hkamnhīx. Jakamā

tanhmã kãm ho rax to hkêt nê. Âm hkupu nê o tẽ nê nhÿri kutêp kuxi. Hãmri nhũm ò patrãw amnhĩ wÿr hã karõ nhũm hwÿr tẽ nê amnhĩ nê kãm kapêr punuj nê kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhÿx ka amnhĩm piitã hamÿnh pa nê akupÿn inhmã hkwy nhõr kêt nê. Rÿ ixte tanhmã apê homnuj to ronhÿx ka hã inhmã akir. Jakamã na pa tanhmã amã ho rax to hkêt nê. Âm hkupu nê o tẽ nê ho amũxu nhũm arĩ akutêp hikwÿ. Tã ota.” Anhÿr o amnhĩ nê ò patrãw mã kapêr punuj nê. ²²⁻²³ Hãmri nhũm tee ri amnhĩ tã kuma. Kot amnhĩ to mex xwÿnh nê kãm mẽ àpênh xwÿnhjê ho mex o pa xwÿnh tã ã kãm àpênh xwÿnh kot kãm kapêr anhÿrja ma nê amnhĩ tã kamã gryk nê. Hãmri nê kãm: “Tk. Kwa xà ã ixte amnhĩ nhípêx anhÿr? Nà ixte ã amnhĩ nhípêx anhÿr kêt. ã ixte amnhĩ nhípêx anhÿr nhũm amã ixpuma ronhÿx ka pre amã ixpuma xaj ixkàxporeta py nê ixwakre kamã amnhĩ krã hkôt tanhmã inhmã ho rax to. Tã nhÿx pa pre ra akupÿn awÿr tẽ nê hamÿ. Nà na ka ã ijarênh anhÿr o axêx nê amnhĩ krã hkôt tanhmã inhmã ho rax to hkêt nê. Mÿrapê kot paj atomnuj tÿx nê ka rĩ amnhĩ pumu. Pêr âm ajamaxpêr punuj.”

²⁴ —Nhũm pre ã kãm kapêr anê hãmri nê mẽ kot mar o kuhê xwÿnhjê mã kãm: “E mẽ atõ kêp kàxpore py nê wam kot ho 10 nê hamÿnh xwÿnhhta mã agõ.” Anê. ²⁵ Hãmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nê òr kênã.” Anê. ²⁶ Hãmri nhũm mẽ kãm: “ÿÿ nom tãã. Mãmrĩ kãm agõ. Koja mẽhõ inhmã àpênh mex pa amnhĩ tã omu nê kot inhmã àpênh mexta pãnhã ho mex nê. No koja inhmã àpênh mex kêt nê pa tee ri ja hã omu nê ho mex kêt nê. E mãmrĩ kãm agõ.” Anê. ²⁷ Hãmri nê hpãnhã mẽ kãm: “E hpãnhã mẽ kãm ixprãm nõkati xwÿnhjaja. Ixte mẽ ho amnhĩptar mã tã mẽ kãm ixprãm nõkati xwÿnhjaja. Mẽ ma mẽ hwÿr mra nê mẽ ho akuprõ nê akupÿn amnê ixwÿr mẽ o mra nê inhnoo mã mẽ himex pa.” Anê. ã mẽ ujarênh kot anhÿr. Anê.

Nhũm pre Jejus ã mẽ kãm ujarênh anê. Te tãm kêp patrãwta pyrã nê ã amnhĩ jarênh anê. Mẽ kot tanhmã amnhĩ nhípêx to ho pa hã mẽ omunh xà hkôt tanhmã mẽ hipêx to hã amnhĩ jarê.

Jejus kot Jerujarê hwÿr àr ã harênh

Matêwre 12.1-11; Makre 11.1-11; Juãw 12.12-19

²⁸ Nhũm Jejus kormã Jerujarê hwÿr mõ. ²⁹ Hãmri nê ra Petake mẽ Petãn wa htêp o mõ. Hixêp pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwÿnh wa ho axkrut nê amnhĩ kukamã wa kumê. ³⁰ Nê wa kãm:

—E. Wa ma krĩ mÿj wÿr mẽ ixkukamã wa tẽ. Nê wa hwÿr pøj nê nhÿri jumênre nyw mã ê nê âm ata pumu. Kormã mẽ kot hã hkrĩ hkêt xwÿnhhta. Ka wa omu nê kãm ê xà hpôt nê man akupÿn ixwÿr o tẽ. ³¹ Nhũm mẽhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Mẽ panhõ Pahшти na hã karõ pa wa hwÿr tẽ.” Anhÿr o wa kãm ijarê. E wa ma hwÿr tẽ. Anê.

³² Hãmri nhũm wa kuma nê ma hwÿr htêm kurê kumrêx. Nê wa krĩm pøj nhũm Jejus kot wa kãm harênh xà hkôt jumênreta pumu. ³³ Hãmri nê kãm ê xà hpôt o xa nhũm ò dõnjaja mra nê hã wa omu nê wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa xa? Kwa xà kot kaj wa mẽ ixpê ho ahkĩ nà? Anê.

³⁴ Hãmri nhũm wa mẽ kãm:

—Nà mẽ panhõ Pahшти na wa inhmã anê pa wa tẽ. Wa ixte ma akupÿm kutã ho inhmõr kaxyw. Anê.

Hãmri nhũm mẽ wa kuma nê wa kãm:

—Tõe. Nà wa mãmrĩ ma kãm o tẽ. Anê.

³⁵ Hãmri nhũm wa ma akupÿm Jejus wÿr o tẽ. Hãmri nê kaxyw amnhĩ xê hkwy hopøj nê kãm ho hkô kahty nê kãm ho htÿx nê o xa nhũm hã nhÿ nê mõ. ³⁶ Kormã Jerujarê hwÿr hixêp ã àpir o mõ. Nhũm mẽ kot omunh o mrrar xwÿnhjaja hkĩnh nê ma hkukamã kot pry ho mex kaxyw amnhĩ xê hkwyptyr o mõ. ³⁷ Hãmri nhũm mẽ hixêp ã api nê kormã ahpar mã wryk o mõ. Hãmri nhũm Jejus kôt mẽ pa ho pa xwÿnhjaja kàx pê Tirtũm mex o

mex ã harēnh o hkôt mō. Ra mē kot hkôt pikamēnh ry nē kot mē kām aa mēmoj pumunh kêt kwỳ ho anhỳr rax ã omunh jakamã hkĩnh nē nē Tĩrtũm mex o mex ã harēnh o hkôt mō. ³⁸ Nē harēnh o:

E ota Tĩrtũm kot mē pahwỳr mēnh xwỳnhhta na ra pōj.

ãm hāmri na mē pahwỳr wrỳ. Na mex kumrēx.

Kêp mē panhō Pahihti mex na. ãm hāmri na pre Tĩrtũm mē pahwỳr kumē.

Tĩrtũmja mex kumrēx. Mex o mex. Kukwak ri pix mã na pu htem pajamakêtkati nē paxãmnhĩx ri papa rãhã ho papa.

Anhỳr o Jejus kôt harēnh o mō. Ra kot mē ho amnhĩptàr kurê kumrēx ã hkamnhĩx jakamã hkĩnh nē hkôt ã kapēr o mōr anē. ³⁹ Hāmri nhũm Parijew nhō xwỳnh kwỳjaja mē hkôt mra nē tee ri mē kuma hāmri nē Jejus mã kām:

—Kwa Jejus. Mē kām anē kê mē anhĩkrê nà? Anē.

⁴⁰ Hāmri nhũm mē kām:

—Tk. Nà kot paj mē kām anhỳr kêt nē. ã mē kapēr anhỳrja na inhmã mar hprãm. Kwãr mē mãmrĩ Tĩrtũm mã mex o mex ã harēnh o ixkôt mō. Kot mē anhỳr kêt nhũm ra pikap kēn nhĩkwỳ xwỳnhja tee ri ja hã mē omu hāmri nē tãm tanhmã amnhĩ nhĩpêx to nē mē hpãnhã tãm Tĩrtũm mã mex o mex ã harēnh o hikwỳ. Jakamã kwãr mē mãmrĩ kapēr anē. Anē.

Jejus tee ri kot Jerujarē hkukamã hamaxpēr ã harēnh

Rukre 23.27-31

⁴¹ Nhũm mē kormã Jerujarē hwỳr hpôx o mō. Kormã hixêt rũm ahpar mã hwỳr wrỳk o mō. Hāmri nhũm Jejus amỳm amnhĩ hkukamã Jerujarē nhō xwỳnhjê pumunh o mō nē mē hkukamã hamaxpēr o hkaprĩ nē. Hāmri nē hkaprĩ xàj mỳr o mō. ⁴² Hāmri nē te kot mē kuri mē omunh o ri pa pē mē kām kapēr pyrãk o mē kām kapēr nē mē kām:

—Hêxta waa nē Jerujarē nhō xwỳnhjaja. Kot kaj mē amex kêt nē. Mē ate amnhĩ kukamã axãhpumunh mex ronhỹx ka mē ra mē kām mē akurê xwỳnhjê pumaj ixkôt amnhĩ xunhwỳr kurê kumrēx nhũm mē tee ri tanhmã mē ato mã. Ka mē ra ixkukwak ri amex nē ajamakêtkati nē akĩnh nē ri apa ho apa. ⁴³⁻⁴⁴ Tĩrtũm tãm kot mē awỳr inhmēnh tã ka mē amã ixprãm kêt nē. Jakamã koja nhỹrmã mē kām mē akurê xwỳnhjaja mē awỳr mra nē mē anhō krĩm hipôk pa. Hāmri ka mē amnhĩ wỳr mē omu nē tee ri ajapôx kaxyw nhũm mē awỳr agjê nē mē anhĩmex pa nē mē anhō krĩja grãnh pa. Nē ahpyñhã ri mē anhõrkwỳ grãnh pa. ã koja mē mēmoj piitã grãnh par anē. Anē.

Jejus kot Tĩrtũm nhõrkwỳ hwỳr àr ã harēnh

Matêwre 21.12-17; Makre 11.15-19; Juãw 2.13-22

⁴⁵⁻⁴⁶ Tã nhũm Jejus Jerujarē hwỳr axà nē jumēnre rũm wrỳ hāmri nē ma Tĩrtũm mã amnhĩ jarēnh xà hã ixkreja wỳr tē. Hāmri nē hwỳr axà nē tee ri kamã mē pa xwỳnhjê pumunh o xa. Nhũm mē ra axtem nē môx nē ôwēhti nē tuuti ho wēnê ho kuhê. Mē kot haprôr nē Tĩrtũm mã hpar nē kãm ôr pē kãm amnhĩ jarēnh kaxyw mē kãm ho wēnê ho kuhê. Nē axtem nē mē kãm hã ohtô rax kãm mē kãm ho wēnê. Hāmri nhũm Jejus mē hwỳr axà nē tee ri mē omu mē kãm akir nē mē kãm:

—Tk. Kwa nà. Tĩrtũm kapēr ã kagà htũm kot ôrkwỳ jarēnh kot:

Inhõrkwỳja ãm mē ate inhmã amnhĩ jarēnh xà hã ixkre pix kaxyw na.

Anhỳr o kot harēnh tã ka mē axtem nē kamã ã amnhĩ nhĩpêx anhỳr o apa. E mē ajapôj nē ma ajapêx tokyx anē.

Anhỳr o mē kãm kapēr hāmri nē ixkre nē mē kator nhũm mē ma hapêx pa.

⁴⁷ Tã nhũm Jejus apkati mē Tĩrtũm mã amnhĩ jarēnh xà hã ixkreja wỳr mra nē kamã mē ahkre ho hkrĩ. Hāmri nhũm mē ô patre krãhtũm mē Tĩrtũm kapēr tũm o mē ahkre xwỳnhjê mē mē kot amnhĩ to rũnh xwỳnhjaja kot mē ahkre ma nhũm ja mē kêp omnuj nē nhũm mē kãm hpĩr prãm nē. ⁴⁸ Nom nhũm amarĩ mē pa xwỳnhjaja mē kurom kãm mar prãm nē akryk mar o kuhê. Jakamã nhũm mē tee ri ja hã mē omu nē tanhmã mē kot hpĩr to hkukamã hã axpēn ma.

20

Mêhõ nhỹ hã Jejus kot mẽ ahkre hã harênh

Matêwre 21.23-27; Makre 11.27-33

¹ Nhũm arĩgro hõ hã nhũm Jejus kê axte Tĩrtũm mã amnhĩ jarênh xà hã ixkreja wỳr axà nẽ mẽ ahkre ho nhỹ. Tanhmã mẽ kot amnhĩ nhĩpêx to nẽ nhỹrmã Tĩrtũm mẽ wa kuri htĩr tũm nẽ pa hã mẽ kãm kapêr o nhỹ. Hãmri nhũm Ijaew nhõ pahijê mẽ mẽ kot Tĩrtũm kapêr tũm o mẽ ahkre xwỳnhjê mẽ mẽ õ patre krãhtũmjaja hêx rom mar o kuhê.

² Hãmri nẽ kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỹr o ri apa? Na ka hte akupỹm mẽ ho mex o apa nẽ tanhmã mẽ ahkre hto ho apa. Xà amnhĩ krã hkõt na ka hte ã amnhĩ nhĩpêx anẽ nà? Anẽ.

³ Hãmri nhũm mẽ kãm:

—Nà ixkumrêx kot paj mẽmoj tã mẽ akukja. Ka mẽ inhma nẽ inhmã harê pa rĩ kormã tanhmã mẽ amã amnhĩ jarênh to. ⁴ Finat Juãw Paxisja ã kot paj mẽ akukja. Mêhõ nhỹ hã na pre mẽ hkrã kumrãr o pa? Xà amnhĩ krã hkõt nà xà Tĩrtũm nhỹ hã? E mẽ atõ inhmã harê. Anẽ.

⁵⁻⁶ Hãmri nhũm mẽ kuma nẽ tee ri kot tanhmã kutã kãm harênh to hkukamã hamaxpêr nẽ axpên mã:

—Kwa tanhmã kot puj mẽ kãm harênh to? Jar mẽ kot mar xwỳnhjaja na htem kêp Tĩrtũm nhỹ hã kapêr jarênh o pa xwỳnh ã harênh o pa. Tã kot puj mẽ kãm kot amnhĩ krã hkõt mẽ hkrã kumrãr o pa hã harê nhũm mẽ tee ri mẽ pama nẽ mẽ pakamã gryk tỳx nẽ. Nẽ mẽ paxêx rom mẽ pahte kãm pakapêr ã mẽ pahpumunh kurê kumrêx nẽ kên o mẽ pahtak o mẽ panhĩmex. Nom kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pamã kapêr o: “ã kot anhỹr kênã na ka prem kapêr ma nẽ ra ixkõt amnhĩ xunhwỳr kêt nẽ?” Anẽ. Nà kot puj mẽ kãm tanhmã harênh to hkêt nẽ. Kot puj mẽ ãm kãm aa te mẽ pahte ja jarênh mar kêt pyrãk o harê. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ ãm tee ri kãm tanhmã nẽ hprãm kaprỳ o kuhê.

⁷ Hãmri nẽ kãm:

—Konên. Mẽ ixte mẽhõ nhỹ hã kapêr o pa hã omunhre hã. Anẽ.

⁸ Hãmri nhũm mẽ kuma nẽ mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarênh to hkêt nẽ. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽ àpênh punuj xwỳnhjê jarênh

Matêwre 21.33-46; Makre 12.1-12

⁹ Nhũm Jejus arĩ Ijaew nhõ pahijê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nẽ mẽ kãm awjarê nẽ mẽ kãm:

—Koja mẽhõ hpur ã hkwyjê kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nhũm ra hpur nhõ dõnja nhỹhỹm nojarêt nẽ kãm mẽ àpênh xwỳnhjê mã tanhmã hpur jarênh to nẽ mẽ kãm: “E or ixpur nõ. Kê kamã mẽmoj hkà hpa ka mẽ mãmri kamã axujamỳnh pa nẽ ho axkjê. Nẽ ixkutêp inhõ jaxwỳ nẽ mãmri mẽ anhõ tanhmã ho hprãm xà hkõt tanhmã ho.” Anẽ.

—Nhũm ã mẽ kãm kapêr anẽ hãmri nẽ ma nhỹhỹm mỗ.

¹⁰ —Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwỳnhjê hõja nhũm akupỹm mẽ hwỳr kumê. Mẽ kot kãm kwỳ nhõr nhũm ma kot kãm o mõi kaxyw ma mẽ hwỳr kumê nhũm ma mẽ hwỳr mỗ. Mõi nẽ mẽ hwỳr pøj nhũm mẽ omu nẽ axtem nẽ unê nẽ htak nẽ akupỹm hano nhũm ma akupỹm ÿ kamã mỗ. ¹¹ Hãmri nẽ pøj nhũm õ patrãwja tee ri omu nẽ hpãnhã ja mẽ nhũm ma mẽ hwỳr mỗ. Mõi nẽ mẽ hwỳr pøj nhũm kê wem mã ho anẽ nẽ unê nẽ htak nẽ akupỹm hano nhũm wamta pyrã nẽ ma akupỹm ÿ kamã mỗ.

¹² —Hãmri nhũm kê axte hkõt ja mẽ nhũm ma mẽ hwỳr mããnên mỗ. Ma mẽ hwỳr mỗ nẽ pøj nhũm mẽ te ho wamta wa hipêx pyrãk o hipêx nẽ unê nẽ htak rax nẽ amnhĩ nẽ

hano nê pur nê kapôt ã kumê. Hãmri nhũm ma akupỹm mãânên ÿ kamã mō. ¹³ Nhũm mẽ ò patrãw tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj mẽ hwỳr ixkra mãn mẽ. Inhmã hapê htã kot paj mẽ hwỳr kumê kê ma mẽ hwỳr mō. Hãmri nhũm mẽ kêp ixkra hã omu nê tanhmã ixpê ho hkêt nê. Nê tã inhmã kãm inhōja kwỳ gō.” Anhỹr o hamaxpêr hãmri nê ma mẽ hwỳr kumê nhũm ma mẽ hwỳr mō.

¹⁴ —Tã ra mẽ hwỳr hpōx o mō nhũm mẽ amỹm amnhĩ wỳr omu nê kêp hkra hã omu nê hã axpên mã amỹnê nê axpên mã: “E onêj hpur nhō dōn krata tẽ. Kojã nhỹrmã ò papaj mỳr pê amnhĩm pur ã pyka pytà nê ho ò. Kwa pu mẽ hpĩr kurê kumrêx nê kêp hpurja o panhō. E tokyj pu mẽ kupĩ ri.” Anê.

¹⁵ —Hãmri nhũm tẽ nê mẽ hwỳr pōj nhũm mẽ unê nê pur nê ho kato nê ma o tẽ nê kupĩ. ã mẽ ujarênh kot anhỹr. Anê.

Nhũm pre ã Jejus mẽ kãm ujarênh anê nê hã tanhmã mẽ hkukjêr to nê mẽ kãm:

—E kojã hpur nhō dōnja hkra jarênh ma hãmri nê tãm mẽ hwỳr mō nê tanhmã mẽ hipêx to wehe? ¹⁶ Kojã ma mẽ hwỳr mō hãmri nê mẽ himex pa. Hãmri nê hpãnhã hpur ã nhãm mẽmojjê rê nhũm mẽ tã kãm hamãr mex o pa. Anê.

Nhũm pre ã Jejus mẽ kãm ujarênh anê hãmri nhũm mẽ kot mar xwỳnhhtaja ujarênh kamã amnhĩ jarênh mar kurê kumrêx. Mẽ kot Tĩrtũm kot mẽ hwỳr rênh xwỳnhjê kapêr mar kêt nhũm mỳrapê mẽ kãm mẽ hkurê xwỳnhhaja kot mẽ kêp mẽ ò pika pytãr nê mẽ himex par ã amnhĩ jarênh ma nhũm ja mẽ kêp omnuj tỳx nê. Hãmri nê hêx rom Jejus mã kãm:

—Tk. Kwa nà nhỹx pre kêt pur nhō dōnja ã mẽ hipêx anhỹr kêt nê. Anê.

¹⁷ Hãmri nhũm mẽ kuma nê mẽ omunh o xa. Nê mẽ omunh pê mẽ no kagàr mã mẽ kãm kapêr nê mẽ kãm:

—Nà ã mẽ hipêx anhỹr mã mẽ tãm kênã. Mãn ka prem ra Tĩrtũm kapêr ã kagà htũm kot ja jarênh ma. Harênh kot:

Mẽ kot kên o amnhĩm òrkwỹ nhĩpêx kaxyw nê kên maati pumu nê htỳx omnuj ã hkamnhĩx nê hkaga.

Mẽ kot hkaga htã Tĩrtũm mẽ kurom mex o kot kên piitã hakrenh par ã omunh kurê kumrêx. Anê.

ã Tĩrtũm kapêr ã kagà htũm kot mẽ ajarênh te mẽ kot kên maati punuj ã hkamnhĩx nê hkaga xwỳnhjê jarênh pyrãk o ã mẽ ajarênh kot anhỹr. Anê.

¹⁸ Nhũm pre ã Jejus mẽ kãm te kêp kên maati pyrãk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênhhta pyrã nê mẽ kãm:

—Nà kot kaj mẽ atō ixkaga hãmri nê te mēhō htỳx htēm nê kên pumunh kêt nê hã htêk nê tēm pyrãk o amnhĩ nhĩpêx. Jao ixkutã amnhĩ xãm. Rỳ ka tanhmã amnhĩ to nê ixkaga nhũm te kên maati hō htēm nê kot anhĩpy htēm nê axôm par pyrãk o anhĩpêx ka amex kêt nê. Anê.

¹⁹ Nhũm pre ã Jejus mẽ kãm ujarênh kãm mẽ harênh anê. Hãmri nhũm Tĩrtũm kapêr tũm o mẽ ahkre xwỳnhjê mẽ mẽ ò patre krãhtũmjaja kot mẽ kãm kên jarênh o te mẽ tãm harênh pyrãkja ma nhũm ja mẽ kêp omnuj tỳx nê. Jakamã nhũm mẽ kãm Jejus pynênh nê haxàr prãm nê. Nom amnhĩ tã kãm mẽ kot mar o kuhê xwỳnhjê puma nê.

Mẽ kot hêx rom Jejus kukjêr ã mẽ harênh

Matêwre 22.15-22; Makre 12.13-17; mãânên Rōmãn 12.1, 13.6-7

²⁰ Hãmri nhũm Tĩrtũm kapêr tũm o mẽ ahkre xwỳnhjê mẽ mẽ ò patre krãhtũmjaja Jejus tãnopxar o kuhê. Hãmri nê ra amnhĩ wỳr mẽmy hkwy hã karō nê mẽ kãm:

—E. Mẽ ma Jejus wỳr mra nê te mẽ ate hkôt amnhĩ xunhwỳr kaxyw pyrãk o amnhĩ nhĩpêx nê mẽmoj tã ri hkukja. Mẽmoj tã hkukjêr rax nê. Kêr kê Rōm nhō pahĩ Sesti kapêr kwỳm ri tanhmã mẽ amã kapêr to ka mẽ ama nê man akupỹn mra nê mẽ inhmã harênh kurê kumrêx. Pa mẽ ama nê ma hwỳr mra nê hã unê nê ma Sesti nhỹ hã mẽ pahto amnhĩptãr xwỳnhhta wỳr o tẽ nê ìhkram haxà. Anê.

²¹ Hãmri nhũm mẽ kuma nê mẽ kãm:

—Tôe. Nà kot paj mẽ aně. Aně.

Hămri nê ma hwỳr mra nê hêx rom kãm kapêr nê kãm:

—Pa Jejus? Nà âm hămri na ka hte Tirtüm kapêr o mẽ ahkre mex o ri apa. Na ka hte mẽ kamã akahak kêt nê. Nê mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa. ²² Kwa mẽ inhmã mẽmoj jarê. Rôm nhõ pahĩti kot mẽ pahte kãm kàxpore hkwy nhõr ã mẽ pahpê Ijaew mã karõta. Kwa xà we ja amã mex nà? Xà kot pu mẽ kãm kugõ nà xà kot pu mẽ kãm õr kêt nê? E kwa mẽ inhmã tanhmã harênh to. Aně.

²³ Nhũm prem ã hêx rom kãm kapêr anhỹr tã nhũm ra mẽ hamaxpêr ã mẽ omu nê mẽ kãm:

²⁴ —E mẽ atõ anhõ kàxpore htỳxre japêr nê inhmã hõ gõ pa omu. Aně.

Hămri nhũm mẽ kãm ja gõ nhũm kupy nê omu nê kãnhmã mẽ kãm kupê nê mẽ kãm:

—E mẽhõ nhĩxi nê mẽhõ karõ na ja hã? Aně.

Hămri nhũm mẽ kãm:

—Pahi Sesti karõ nê hixi na hã kênã. Aně.

²⁵ Hămri nhũm mẽ kuma nê mẽ kãm:

—Tỳ. Tô kêr ka mẽ mãmri kãm hkwy nhõr o apa. Hã hkarõ nê hã hixi. Tãm kot hipêx xwỳnh jakamã õ na. No mẽ kajaja na pre Tirtüm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Aně.

²⁶ Nhũm pre ã Jejus mẽ kãm kapêr aně nhũm mẽ piitã mar o kuhê. Nhũm mẽ kot hêx rom kãm kapêr mã xwỳnhjaja amnhĩ jaêr pê ã kot kàxpore jarênh anhỹrja ma. Hămri nê tee ri axte mẽmoj tã hkukjêr nhũm kot pahi Sesti kwỳm ri kot tanhmã harênh to kaxyw âm tee ri tanhmã hkukjêr to kaprỳ. Hămri nê axte tanhmã kãm nê hkêt nê âm akryk omunh pê mar o kuhê.

Akupỹm mẽ htĩr jarênh

Matêwre 22.23-33; Makre 12.18-27; Juãw 5.21, 6.39; mããnẽn Wam Korĩt 6.14, 15.12-28; Wam Tesarõn 4.13-18; Apokarip 20.4

²⁷ Tã nhũm Satusew nhõ xwỳnh kwỳjaja. Mẽ kot akupỹm mẽ htĩr mã hamaxpêr kêt jakamã mẽ htyk nê mẽ hapêx ã mẽ hkamnhĩx. Jakamã na prem tanhmã axpên mã Jejus jarênh to nê axpên mã:

—E kwa pu mẽ ma hwỳr mra nê mẽmoj xihtỳx ã hkukja kê mẽ pama nê tee ri tanhmã mẽ pamã harênh to hkukamã hamaxpêr. Hămri nhũm mẽ piitã ja hã omu nê àhpumunh tỳx kêt ã omunh kurê kumrêx. E ma pu mẽ hwỳr.

Aně nê ma hwỳr mra nê Parijew nhõ xwỳnhjê pyrã nê hêx rom ahkukja nê kãm:

²⁸ —Pa Jejus? Kwa mẽ inhmã mẽmoj jarê. Na pre finat Mojesja Tirtüm nhỹ hã mẽ panhĩgêt mã ã karõ aně. Mẽ hkra hkêt rãhã mẽ pa nê mẽ htyk xwỳnhjaja nhũm mẽ harênh o:

Koja mẽhõ hprõ nê kormã kamã hkra hkêt rãhã pa nê ty. Hã koja hkôt htõja hpãnhã hprõta o hprõ nê kamã hkra. Hămri nhũm kato nê te kêp htõ htyk xwỳnhhta hkra pyrãk. Aně.

Na pre ã Mojes mẽ kãm karõ aně. ²⁹ Jakamã kwa ga mẽ ixujarênh ma. Koja mẽ kot axpên to htõ xwỳnhjaja kêp 7. Nhũm kot waja mẽhõ ho hprõ nê wa pa nhũm kamã hkra hkêt rãhã ty. Nhũm hkôt htõ hõta hpãnhã hprõ ho hprõ ³⁰ nê wa axpên to pa. Nhũm mããnẽn ty. Kamã hkra hkêt rãhã ty.

³¹ —Nhũm htõ hõta. Haxwỳja hpãnhã tãm o hprõ nê wa axpên to pa grire nhũm haxwỳja kamã hkra hkêt rãhã ty. Hămri nhũm htõ hkwyjaja piitã nija pyxi nê axpên pãnhã ho hprõ hpa. No âm mẽhõ kamã hkra hkêt rãhã ra htyk pa. ³² Hămri nhũm mẽ hprõta mẽ hkôt amnhĩ to hapu nê ty. ³³ Tã Tirtüm kot akupỹm nhỹrmã mẽ ho htĩr ronhỹx nhỹ nhỹx kêp nija mjên kumrêx? Ra piitã kot ho hprõ kênã. E mẽ inhmã ja jarê. Aně.

³⁴ Hămri nhũm Jejus mẽ kãm:

—Nà kaxkwa kamã mẽ kot amnhĩ nhĩpêxja axtem na. Pika ja kamã na htem pa nê àptàr nhũm mẽ axpên mã mẽ kure. Ja mex. ³⁵ No mẽ kot Tirtüm kôt amnhĩ xunhwỳr xwỳnhjaja na htem ty hămri nê Tirtüm nhõ krĩ kamã kuri axte kãm hprõ hprãm kêt nê

ri pa. Rỳ ni japêr nê kãm mjên prãm kêt nê ri pa. ³⁶ Hãmri nê Tirtũm kapêr o mẽ wryk xwỳnhjê pyrà nê axte htyk kêt nê. ãm htĩr tũm rãhã nê pa ho pa. Tirtũm ra akupỹm kot mẽ ho htĩr jakamã koja mẽ kêp hkra nê kuri htĩr tũm nê mex nê pa ho pa nê axte kãm hprõ rỳ mjên prãm kêt nê ri pa.

³⁷ —Nom mẽ ate akupỹm mẽ htĩr mã ajamxpêr kêt ã harênhja kot paj mẽ amã harê. Amnepêm na pre Tirtũmja pĩ hpøk kamã Mojes mã kapêr nê kãm: Ixpê Apraãw nhõ Tirtũm na pa. Nê mããnên ixpê Apraãw kra Ijak mẽ htãmnhwỳ Jako wa õ Tirtũm na pa.

Anhỹr o Mojes mã amnhĩ jarê nhũm kuma nê hã kagà. ³⁸ Kêp apu arĩ mẽ htyk rãhã nhỹx pre ã mẽ harênh anhỹr kêt nê. Nhỹx pre mẽ harênh o: “Amnepêm Apraãw nê hkra nê htãmnhwỳ mẽ htĩr ri ixpê mẽ õ Tirtũm na pa pre.” Anhỹr o nhỹx pre mẽ harê. Nom na pre ã amnhĩ jarênh anhỹr kêt nê. Mẽ pamã te Apraãwja mẽ htyk nê mẽ hapêx pyræk. Nom nhũm prem ra Tirtũm ri akupỹm htĩr nê mex nê pa ho pa. Tã ka htem Tirtũm kapêr kwỳm ri akupỹm mẽ htĩr kêt ã mẽ harênh o apa. Anê.

³⁹ Nhũm pre ã Jejus mẽ kãm kapêr anê. Hãmri nhũm Tirtũm kapêr tũm o mẽ ahkre ho mẽ pa xwỳnh kwỳjaja kuma nê tee ri axte tanhmã kãm nê hprãm kaprỳ nê kãm:

—Tỳ. Nà ãm hãmri na ka ã ja jarênh anê. Anê.

⁴⁰ Hãmri nhũm mẽ axte mẽmoj tã hkukjêr kêt nê. Tanhmã kot wem amnhĩ to nê hamaxpêr o hakre? Na prem ãm tee ri kãm hamaxpêr o hakrenh prãm kaprỳ ho kuhê. Jejus kot mẽmoj piitã hkukamã àhpumunh tỳx o àhpumunh tỳx.

Jejus kêp pahi finat Tawi nhõ Pahihti hã kot amnhĩ jarênh

Matêwre 22.41-46; Makre 12.35-37; mããnên Rõmãn 1.3-4

⁴¹ Tã nhũm Jejus kãnhmã xa nê amnhĩ tã tanhmã mẽ kot mar o kuhê xwỳnhjê hkukjêr to. Nom te nhãm mẽhõ hã mẽ hkukjêr pyrà nê mẽ kãm:

—E kwa mẽ inhmã mẽmoj jarê. Tirtũm kot mẽ akaxyw ãm mã xwỳnhhta ã na pa mẽ akukja. Mo na htem axpên mã kêp finat pahi Tawi kanrêhã htãmnhwỳ pix ã harê nê mããnên kêp õ pahihti hã harênh kêt nê? ⁴² Na pre Tawi Tirtũm kapêr kwỳ hã kagà nê tanhmã harênh to. Tirtũm mex ã mẽ grex xàja kwỳ kamã harê nê hã kagà nê hã kagà ho: Na pre Tirtũm inhõ Pahihti mã ã kapêr anê nê kãm: “E amnê ixwỳr tẽ nê inhĩhkõ hã nhỹ nê inhmã mẽ ho amnhĩptàr o akrĩ.

⁴³ Kot paj mẽ kot kãm akurê xwỳnh piitã mẽ unênh pa nê awỳr mẽ o mra nê anhĩhkram mẽ haxàr pa.” Anhỹr o pre kãm kapêr. Anê.

⁴⁴ Na pre ã Tawija Tirtũm kot Kris mã kapêr jarênh anê. Mẽ kajaja na ka htem ãm kêp Tawi kanrêhã tãmnhwỳ pix ã ri axpên mã harênh o ri apa. No kêt Tawi na pre kêp õ Pahihti hã harênh o pa. Anê.

Jejus kot tanhmã Tirtũm kapêr tũm o mẽ ahkre xwỳnhjê jarênh to

Matêwre 23.1-12; Makre 12.38-40

⁴⁵ Nhũm pre ã Jejus mẽ kãm kapêr anê nhũm mẽ piitã mar o kuhê. Hãmri nhũm hpãnhã hkõt mẽ pa ho mẽ pa xwỳnhjê mã kapêr nê mẽ kãm:

—Kwa mẽ o kora. Kêr ka mẽ Tirtũm kapêr tũm o mẽ ahkre xwỳnhjê kot amnhĩ nhĩpêx o amnhĩ nhĩpêx kêt nê. ãm mẽ omu nê ãm mẽ omu nê mẽ kot amnhĩ nhĩpêx kõt amnhĩ nhĩpêx o ri apa hkêt nê. ⁴⁶ Na htem mẽ piitã mẽ kot mẽ hã hpijaãm kaxyw mẽ ê mex pix kãm ri pa. Nê mẽ kãm mẽ piitã mẽ kot amnhĩm mẽ rũnh xwỳnh ã mẽ harênh o mẽ paja na mẽ kãm hprãm. Nê mẽ panhõ Tirtũm kapêr o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix ã na mẽ kãm mẽ hkrĩ hprãm. Nê mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwỳr akuprõ nê mẽ kãm mẽ kot amnhĩ to rũnh xwỳnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhỹr o pa.

⁴⁷ —Nê mẽ kêp mẽ mjên htyk xwỳnhjê ho ajuta ho pa hã amnhĩ jarênh tã ãm amnhĩ to hêx nê axtem nê mẽ nokupyr pê mẽ kêp mẽ hikukrêx piitã ho hapêx par o pa. Nê mẽ kêp mẽ õrkwỳ pytà. Nê mẽ hêx rom te tãm mẽ kot amnhĩ nhĩpêx pyrà nê Tirtũm mã

amnhĩ jarēnh japjêê ho kuhê. Mýrapê koja mẽ mex kêt nê. Koja Tirtũm tanhmã ja hã mẽ hipêx to rax nê. Jakamã kwa kêr ka mẽ ã mẽ kot amnhĩ nhĩpêx anhỹr xwỳnhjê hkôt amnhĩ nhĩpêx o apa hkêt nê. ãm kwarĩ ho kwarĩ. Anê.

21

Kêp mjên htyk xwỳnh jarēnh

Makre 12.41-44

¹ Nhũm Jejus kormã Tirtũm mã amnhĩ jarēnh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwỳ nhõr o pa. Jakamã nhũm mẽ hikàxpore rũnh xwỳnhjaja hwỳr agjê nê kamã kàxpore gjēnh xà kamã hkwỳ gjê nê ma akupỹm mra. ² Jakamã nhũm mēhõ ni pê mjên htyk xwỳnh haxwỳja hwỳr axà. Kêp amrakati kumrêx nê hikàxpore tỳxre ãm axkrutre htã mẽ hpãnhã hwỳr axà. Nê kãm Tirtũm kĩnh xàj hamẽ kamã kuxà hãmri nê kato nê ma akupỹm tẽ. ³⁻⁴ Hãmri nhũm Jejus arĩ omunh o xa. Kot ã amnhĩ nhĩpêx anhỹr ã omunh o xa nhũm ja kãm mex nê. Hãmri nê hkôt mẽ pa ho pa xwỳnhjê mã harẽ nê mẽ kãm:

—E măn ka mēnire htēm mũj pumu. Kêp amrakati nê hikàxpore ãm kêp grire htã amnhĩ pê õr pa. Kwỳjê rom kãm Tirtũm kĩnh xàj amnhĩ pê õr par kumrêx. Apkur xà hã hikàxpore na. Mẽ hkwỳjaja na htem hikàxpore hkwỳ ho mra nê kugjê nom arĩ mẽ hikàxpore rax. No nhũm nire něj mẽ kurom kãm hikàxpore japê hkêt nê. Nê ho õxỳ hkêt nê àmnhĩx piitã Tirtũm mã õr pa. Anê.

Mẽ kot amnhĩ tomnuj xwỳnhjê hkukamã mẽ harēnh

Matêwre 24.1-2; Makre 13.1-2

⁵ Tã hãmri nhũm Jejus kôt mẽ pa ho mẽ pa xwỳnhjaja kormã Tirtũm mã amnhĩ jarēnh xà hã ixkre kaxwỳnh pumunh o kuhê nê axpẽn mã harẽ nê axpẽn mã harēnh o:

—Hêxta waa nê. Ixkreja mex kumrêx. Kẽn rũnh o mẽ kot hipêx jakamã mex o mex. Nê mẽ kot ri Tirtũm mã hkĩnh xà nhõr něj haxwỳja piitã mex. Anê.

Hãmri nhũm Jejus mẽ kuma nê mẽ kãm:

⁶ —Nà mex tã koja nhỹrmã mẽ kãm Tirtũm kurê xwỳnhjaja grành pa. Koja arĩ kẽn õ axkrutre nê axpẽn mỳnh nê nõr kêt nê. Koja piitã anhgrà nê ahpỹnhã ri hikwỳ. Anê.

⁷ Nhũm pre ã mẽ kot hipêx anhỹrja kukamã mẽ kãm mẽ harēnh anê nhũm mẽ tee ri hkukamã hamaxpēr nê kãm:

—Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grành parta jarẽ. Xà koja mẽ tokyx ho anê nà xà kormã? Kwa mẽmo koja wỳj ri tanhmã amnhĩ nhĩpêx to? Anê.

⁸ Hãmri nhũm mẽ kãm:

—Nà nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harẽ ka mẽ inhma. Koja mẽ ohtõ nê mẽ apê ixkrajê hwỳr mra nê hêx rom te pa ixte amnhĩ nhĩpêx pyræk o amnhĩ nhĩpêx o pa. Nê tanhmã mẽ amã amnhĩ jarēnh to nê amnhĩ jarēnh o: “E mẽ ixpumu. Pa na pre Tirtũm mẽ awỳr inhmẽ. Ixpê kaxkwa rũm ixwryk xwỳnh na pa.” Anhỹr o mẽ akôt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptar kaxyw mẽ awỳr wrỳ.” Anhỹr o amnhĩ jarēnh o mẽ akôt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã amnhĩ to hêx o pa kēnã. Kormã akupỹn ixpôx xà hã arĩgrota kormã.

⁹ —Nê koja mẽ nhỹri awry hã axpẽn par o pa. Nê mẽ atãã axpẽn par o pa. Nom kêr ka mẽ harēnh ma nê ri tee ri tokyx mẽmoj piitã hapêx kukamã ajamaxpēr kêt nê. Mẽmoj piitã hapêx xà hã arĩgrota kormã.

¹⁰ Koja mẽmoj piitã hapêx kaxyw nhũm ahpỹnhã ri pika piitã hkôt mẽ pa xwỳnhjaja axpẽn kutã amnhĩ xunhwỳ nê pijapu nê axpẽn pa.

¹¹ Nê koja pika piitã hkôt tanhmã ahpỹnhã mẽ à kute mẽ hamỳ nhũm mẽ amnhĩ xà htỳx kamã hamak o pa.

Nê koja pikaja tertet tỳx nê.

Nê koja mẽ nhỹri pika hkwỳ kamã prãm xàj hpikaprãr pa.

Ně koja kaxkwa kamā mẽmoj tanhmā amnhĩ anhĩpêx to nhũm pika nhõ xwỳnhjaja tee ri omu nẽ kām ma htỳx kumrêx nẽ htetot o kuhê.

Koja mẽmoj ã amnhĩ nhĩpêx anẽ pa rĩ kormā akupỳn mẽ awỳr wry nhũm mẽmoj piitã hapêx pa. Koja mẽmoj ã amnhĩ nhĩpêx anẽ.

¹² —E Tirtũm mã amnhĩ jarênh xà hã ixkre grành par xwỳj ri mẽmoj tanhmā hkukamā kot amnhĩ nhĩpêx to hã mẽ ate ixkukjêr xwỳnhhta kot paj hpãnhã mẽ amã harê ka mẽ inhma. Koja mẽ kām ixkurê xwỳnhjaja mẽ awỳr mra nẽ ixtã mẽ apynê nẽ tanhmā ixtã mẽ anhĩpêx to. Nẽ ma mẽ pikuprõnh xà hã ixkreja wỳr mẽ ato mra nẽ kamā mẽ kām tanhmā mẽ ato kapêr punuj to. Nhũm mẽ kuma hãmri nẽ ma mẽ ato mra nẽ mẽ ajagjê. Mẽ ate ixkõt apa ho apa jakamā koja mẽ ã mẽ anhĩpêx anẽ. Nẽ mẽ õ pahihiti hwỳr mẽ ato mra nẽ mẽ kām tanhmā mẽ ato kapêr punuj to. ¹³ Tã kêr ka mẽ kutã akrĩ nẽ axãmnhĩx mãmri tanhmā mẽ kām ijarênh to ho akrĩ.

¹⁴ —Nom kwa kêr ka mẽ kām tanhmā amnhĩ jarênh to hkukamā tee ri ajamxpêr o ri mẽ amã mẽ uma hkêt nẽ. Rỳ mẽ ajamxpêr o: “Hêxta waa nẽ. Tanhmā koja we mẽ kot ixkukjêr ã arĩgrota ã pa we ri mẽ kām ixkapêr to?” Anhỳr o tee ri amnhĩ kukamā ajamxpêr kêt nẽ. ãm amnhĩ kaxyw inhmã pix mã ajamxpêr tỳx rãhã nẽ. ¹⁵ Tanhmā mẽ kot mẽ anhĩpêx to hã arĩgrota ã kot paj tanhmā mẽ akrã hto ka mẽ inhỹ hã tanhmā mẽ kām amnhĩ jarênh to. Hãmri nhũm mẽ amnhĩ tã mẽ ama nẽ axte tanhmā mẽ ato kapêr to hkukamā tee ri hamxpêr o kuhê.

¹⁶ —Ně koja mẽ anhĩpêx nẽ mẽ akatorxà nẽ mẽ atõ nẽ mẽ akrãmnhwỳjaja. Nẽ kaxyw krĩ hkõt mẽ akwỳjaja ixtã mẽ atã amỳnê nẽ ma mẽ õ pahi hwỳr mẽ ato mra nhũm mẽ ajagjê nẽ mẽ akwỳjê pa. ¹⁷ Koja mẽ piitã ixtã mẽ akamã gryk nẽ kām mẽ akurê nẽ. ¹⁸⁻¹⁹ Nom mẽ kot ã mẽ anhĩpêx anhỳr mã tã kêr ka mẽ amnhĩ to htỳx nẽ ixkaga hkêt nẽ. Mẽ kot mẽ apar tã ka mẽ kaxkwa kamā akupỳm atĩr kurê kumrêx. Hãmri nẽ ã mẽ kot mẽ anhĩpêx anhỳr xwỳnhjê rom Tirtũm mẽ wa ixri atĩr tũm nẽ amex rãhã apa ho apa. Mẽ kot tanhmā mẽ ato htã mẽ ate kaxkwa kamā atĩr tũm nẽ apa mã xwỳnh jakamã kwa kêr ka mẽ tee ri amnhĩ kukamā ajamxpêr o ri apa hkêt nẽ.

²⁰ —Koja nhỹrmã nhỹhỹnh pōristi ohtõ nẽ mra nẽ Jerujarê hwỳr pōj hãmri nẽ mẽ kām hipòk pa nẽ kuhê. Ka mẽ ja hã mẽ omu nẽ mẽ kot krĩja grành par mã ajamxpêr kurê kumrêx. ²¹ Koja mẽ ã amnhĩ nhĩpêx anẽ ka mẽ amỳm amnhĩ wỳr mẽ omu hãmri nẽ ajapōj nẽ ma aprõt nẽ amrar kurê kumrêx. Mẽ apê jar pika pê Jutej kamā mẽ apa xwỳnhjaja ka mẽ omu nẽ mẽ kot mẽ apar pymaj ma aprõt nẽ amrar kurê kumrêx. Hixêt prêk wỳr ajapōj nẽ aprõt nẽ ma mra.

—Ně kê Jerujarê nhõ xwỳnhjaja mẽ umaj haxwỳja hapōj nẽ ma hprõt nẽ ma mrrar o mra.

—Ně jar kapõt ã ri mẽ pa xwỳnhjaja kê mẽ akupỳm krĩ hwỳr gjêx kêt nẽ. ãm ma mẽ umaj hprõt nẽ mrrar kurê kumrêx.

²² —Mẽ kot amnhĩ tomnuj mỳrapê koja Tirtũm ã mẽ hwỳr mẽ kām mẽ hkurê xwỳnhjê rênh anẽ. Kapêr ã kagà htũm ra kot mẽ hkukamã ja jarênh kot anhỳr. Jakamã koja mẽ nhỹrmã mẽ hkukamã mẽ harênh xàja kõt ã mẽ hipêx anẽ.

²³ —No mẽ htujarõ xwỳnhjaja nẽ mẽ hkra karàre xwỳnhjaja koja mẽ kêp mẽmoj omnuj tỳx nẽ. Tanhmā kot mẽ amnhĩ to nẽ hprõt tỳx? Nà pika ja kamã koja mẽ piitã mex kêt nẽ. Mẽ kot amnhĩ tomnuj mỳrapê koja Tirtũm ã mẽ hipêx anẽ. ²⁴ Koja mẽ nhỹhỹnh krĩ hõ rũm mẽ hwỳr mra nẽ mẽ unê nẽ mẽ hkamnhwỳr o mẽ kupa. Nẽ mẽ hkwỳjê pynê nẽ ma nhỹhỹm ahpỳnhã mẽ õ pika hwỳr amnhĩ kõt mẽ o pa nhũm mẽ kamã mẽ hkõt pa ho pa. Koja mẽ kêp Ijaew kêt xwỳnhjaja Jerujarê o amnhĩptã nẽ ã mẽ hipêx anẽ. Nẽ kamã pa ho pa rãhã nhũm Tirtũm nhỹrmã akupỳm nẽ mẽ kator pa. Tã koja mẽ nẽ mẽ kator parja o pa ra akupỳn mẽ awỳr inhnojarê. Anẽ.

Nhũm pre ã Jesus mẽ kām mẽ kot Jerujarê grành par xwỳnhjê hkukamã harênh anẽ.

Akupỳn Jesus wryk xwỳj ri mẽmoj kot tanhmā amnhĩ nhĩpêx to
Matêwre 24.29-35; Makre 13.24-31; mããnên Sikũn Pêtre 3.10; Apokarip 1.7

²⁵ Nhũm Jesus arĩ hkõt mẽ pa ho pa xwỳnhjê mã kapêr nẽ mẽ kām:

—Ně kot paj nhÿrmã akupÿn mẽ awÿr inhnojarêť nhÿm kaxkwa kamã kanhêti ně myyti ně mytwrÿre axtem tanhmã ri amnhÿ nhÿpêx to. Nhÿm gô xujanãr haxwÿja hkoko htÿx jao axpên tak tÿx ně. Hãmri nhÿm pika piitã hkôt mẽ pa xwÿnhjaja kuma ně omu ně mẽ kãm ma htÿx ně mur ně httertet ně tee ri amnhÿ kukamã hamaxpêr.

²⁶ —Ně koja Tÿrtÿm tanhmã kaxkwa ho àk to nhÿm kanhêti piitã pikarêť pa. Hãmri nhÿm pika hkôt ri mẽ pa xwÿnhjaja omu ně tee ri amnhÿ kukamã hamaxpêr o amnhÿ japrãr pa ně hikwÿ. ²⁷⁻²⁸ Kojã ã mẽmoj amnhÿ nhÿpêx anê ka mẽ ja hã omu ně akupÿn mẽ awÿr inhnojarêť mã ajamaxpêr kurê kumrêx. Hãmri ně mẽ kot ixkôt amnhÿ xunhwÿr kêt xwÿnhjê rom akÿnh kãm ijapêr arÿt o akuhê.

—Nã kot paj akupÿn mẽ awÿr wrÿ. Kakra kamã hirã htÿx kãm akupÿn ixihtÿx kãm mẽ awÿr wrÿ. Hãmri ka mẽ apiitã pika piitã hkôt ano ho ixpumu. Kot paj ã ixwrÿk anê hãmri ně mẽmoj punuj piitã pê mẽ apytãr pa. Jakamã ka mẽ ã mẽmoj kot amnhÿ nhÿpêx anhÿrja ã omu hãmri ně tokyx ixkôt axãpirta mã ajamaxpêr ně akÿnh tÿx ně. Anê.

²⁹ —E ga mẽ pÿ hpãr mũj pumu. ³⁰ Na hte mẽmo mytwrÿ hã rã nhÿm mẽ omu ně ô hkukamã hamaxpêr. ³¹ Ja pyrã ně koja ã mẽmoj amnhÿ nhÿpêx par anhÿr mẽ ka mẽ omu ně akupÿn mẽ awÿr ixwrÿkja mã ajamaxpêr kurê kumrêx. ³² Kojã akupÿn ixpôx kêt ri mẽ kot ã mẽmoj kot amnhÿ nhÿpêx anhÿr pumunh xwÿnhjaja kormã piitã htyk kêt ri pa ra akupÿn wrÿ.

³³ —Ně koja nhÿrmã pika ně kaxkwa wa hapêx pa. Tã no ãm ixkapêr koja wa urãk ně aa hapêx kêt ně. Kojã ãm rãhã ho rãhã. Kot paj aa ihkjê ho tanhmã mênh to hkêt ně.

³⁴⁻³⁵ —Ně kwa mẽ o kora. Mẽ axkãm ajamak rom. Mẽ kot ixkôt amnhÿ xunhwÿr kêt xwÿnhjaja na htem kãm tanhmã amnhÿ nhÿpêx to hprãm xà hkôt pix mã tanhmã amnhÿ nhÿpêx to ho ri pa. Jao ãm amnhÿ xàpkur xà ně amnhÿ to mex xà ně kàxpore pix kukamã hamaxpêr o pa. Ně htÿx ri tanhmã amnhÿ tomnuj to ho pa. Ně pipãnh kãm tanhmã amnhÿ to ho pa. Tã koja mẽ ã amnhÿ nhÿpêx anhÿr o pa rãhã pa ra mẽ haêr pê akupÿn wrÿ nhÿm mẽ tee ri ixpumu ně kãm ma htÿx kumrêx. Te tutre htÿx ri harôj kajyr o pa ně rapuuti hwÿr àr nhÿm kot haê ně unênh nhÿm tee kãm kator prãm pyrãk. Kojã mẽ ã amnhÿ nhÿpêx anê. Nom kêr ka mẽ ho mẽ urãk kêt ně. ãm pa inhmã hprãm xà hkôt pix mã tanhmã inhmã amnhÿ nhÿpêx to rãhã ho ri apa.

³⁶ —Tã kêr ka mẽ ã mẽ kot amnhÿ tomnuj o pa anhÿrja kêt amnhÿ nhÿpêx o apa pymaj amnhÿ to Tÿrtÿm wÿr rãhã ho apa. Kê tanhmã mẽ ato hihtÿx to ka mẽ ÿ hã ho mẽ urãk kêt ně. Kêr pa nhÿrmã akupÿn wrÿ ka mẽ ixpumu ně mẽ kurom amnhÿ kamã akahak kêt ně akÿnh tÿx ně man ixwÿr mra. Anê.

Nhÿm pre ã Jeju hkôt mẽ pa ho mẽ pa xwÿnhjê jahkre anê.

³⁷ Hãmri ně apkati mẽ Tÿrtÿm mã amnhÿ jarênh xà hã ixkre kamã mẽ pikuprõnh xwÿnhjê jahkre ho hkrÿ. Nhÿm kamãt nhÿm hkôt mẽ pa ho mẽ pa xwÿnhjê mẽ mẽ krÿ rÿm hapôj ně ma hixêť prêk pê Oriwêhti hwÿr mra ně kamã amnhÿm hikra ně hikwÿ.

³⁸ Nhÿm kwÿhtã nhÿm mẽ kãnhmã hkrÿ ně ma akupÿm krÿm mra ně ixkreja wÿr agjê. Hãmri nhÿm mẽ piitã hã akuprõ ně kot mẽ ahkre hã mar o hkrÿ.

22

Mẽ kot Jeju ã àmnênh ã mẽ harênh

Matêwre 26.14-16; Makre 14.1-2; Juãw 11.47-57

¹ Tã nhÿm Ijaew kÿnhã arÿgro pê Pasja àhtêp o mẽ. Pas ã na htem amnepêť Tÿrtÿm kot pika pê Ejit pê mẽ hpãmjê kator mã hamaxpêr kaxyw axpên wÿr akuprõ ně hã hkÿnh. Na htem arÿgroja jarênh o: “Pas” anhÿr ã harê. Ně mãânênh harênh o: “Mẽ pahte pãw kaxkrit kêt kur ã arÿgro.” Anhÿr o harê. ² Jakamã nhÿm mẽ ô patre krãhtÿmjê mẽ Tÿrtÿm kapêr tÿm o mẽ ahkre xwÿnhjaja ra kãm Jeju pÿr prãm ně. No mẽ kãm hkôt mẽ kot kapêr mar xwÿnhjê puma ně. Ně tee ri kot tanhmã ho hkukamã hamaxpêr ně axpên mã:

—Hêxta waa ně. Kwa tanhmã kot puj wem ho ně mẽ kêp kupÿ? Kot puj mẽ noo mã tanhmã ho nhÿm mẽ hã mẽ pakamã gryk tÿx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhũm Jut Kariotja. Jejus nhỹ hã mẽ ahkre ho pa xwýnh pê 12 hõ na pre. Tã axtem nẽ tanhmã hamaxpêr to nẽ Satanasti nhỹ hã ma mẽ õ patre krãhtũm mẽ Tĩrtũm mã amnhĩ jarênh xà hã ixkre jamãr xwýnh krãhtũmjê hwýr tẽ. Hãmri nẽ tanhmã Jejus o mẽ mar to nẽ mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhmã amnhĩre nà? Anẽ.

⁵ Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nẽ hkĩnh nẽ mẽ kãm:

—Tõe. Nà kot paj mẽ amã ho anẽ. Anẽ.

Hãmri nẽ ma tẽ nẽ kato. Nẽ Jejus pynênh kaxyw htãnopxar o ri hkõt pa. Mẽ kot mar o pa xwýnhjê hkàx ã nhỹri unênh nẽ ma mẽ hwýr o htẽm kaxyw.

Jejus kot ý hã mẽ ahkre xwýnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêm Ijaewjê nhĩgêjtjaja na prem ôwêhti hkrare hkwý hpar o pa. Tĩrtũm kot ja hã mẽ omunh nẽ Ejit kãm mẽ kãm mẽ hkurê xwýnhjê nhĩhkra nẽ mẽ kator kaxyw nhũm prem ã amnhĩ nhĩpêx anẽ. Jakamã na htem arĩ mẽ kêp mẽ hkanrêhã mẽ htãmnhwýjaja arĩgro pê Pas ã axpên wýr akuprõ nẽ mẽ kãm hamaxpêr pê mẽ uràk nẽ ôwêhti hkrare hkwý hpa. Hãmri nẽ pãwti kaxkrit kêt kãm kuku. ⁸ Jakamã nhũm Jejus ý hã mẽ ahkre ho mẽ pa xwýnhjê wa ho axkrut nẽ mẽ amnhĩ kukamã wa kumẽ. Simãw Pêtre mẽ Juãwja nhũm wa mẽ amnhĩ kukamã wa kumẽ nẽ wa kãm:

—E wa ma mẽ ixkukamã tẽ nẽ mẽ ixkutêp Pas ã mẽ panhõ hã apê. Anẽ.

⁹ Hãmri nhũm wa kuma hãmri nẽ kãm:

—Tõe. Nhỹri kot paj we wa tẽ nẽ mẽ akutêp hã apê? Anẽ.

¹⁰ Hãmri nhũm wa kãm:

—Nà wa mãmrĩ ma Jerujarẽ hwýr wa tẽ. Nẽ hwýr axà nẽ mẽhõ mytita pumunh kurê kumrêx. Nhũm amnhĩm gô ru nẽ amnhĩ kre hã poti xãm nẽ o tẽ. Ka wa omu nẽ hã ajêt nẽ ma hkõt òrkwý hwýr tẽ. ¹¹ Hãmri nẽ ixkre nhõ dõn pumu nẽ kãm: “E jar na pa wa awýr tẽ. Jejus na wa inhmẽ pa wa awýr tẽ. Na awýr pêr mênh o: ‘Nhỹri kot paj ixkõt ri mẽ pa ho mẽ pa xwýnhjê mẽ axpên kutã Pas ã apku?’ Anẽ. Na ã awýr hpêr mênh anẽ.” Anẽ.

¹² —E ã kãm akapêr anẽ kê war ama nẽ ra war amã òrkwý nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmrĩ mẽ ixkutêp kamã mẽmoj tã apê. Anẽ.

¹³ Hãmri nhũm wa kuma nẽ ma krĩm tẽ. Ma tẽ nẽ hwýr axà hãmri nẽ ra kot wa kãm mẽmoj jarênh xà hkõt mẽmoj piitã omu hãmri nẽ mẽ kutêp mẽõ hã àpênh o wa xa.

¹⁴ Tã nhũm myt axà nhũm mẽ wa hkõt mõi nẽ ixkreta wýr àpir pa. Hãmri nẽ apkur kaxyw hkrĩ hpa nhũm Jejus mẽ ìhkô hã nhỹ. ¹⁵ Hãmri nẽ mẽ kãm tanhmã amnhĩ jarênh to nẽ mẽ kãm:

—E na pa inhmã Pas ã mẽ anhĩhkô hã ixàpkur prãm nẽ. Kormã ixte amnhĩ xà htýx kãm ijamak xwýj ri. ¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nẽ. Nom koja nhỹrmã Tĩrtũm akupýn ixte mẽ ato amnhĩptar kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpên kutã paxàpkur rax nẽ. Anẽ.

¹⁷ Nhũm ã mẽ kãm amnhĩ jarênh anẽ nẽ hpãnhã wĩhti py nẽ o xa nẽ Tĩrtũm mã harẽ nẽ kãm:

—Pa Papaj. Nà ãm hãmri na ka hte mẽ inhnê mẽ kãm mẽ ixkurê xwýnhjê pumunh mex nẽ mẽ ìhkra pê mẽ ijapôj. Amex o amex. Anẽ.

Hãmri nẽ hpãnhã hkõt mẽ pa ho mẽ pa xwýnhjê hõ mã kugõ nẽ kãm:

—E mĩ. Apy nẽ mẽ axpên pãnhã hkwý ho ixkõ. ¹⁸ ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupýn mẽ awýr inhmẽ.

Hāmri pu mẽ rĩ kormã akupÿn ixpôx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anẽ.

¹⁹ Hāmri nẽ hpãnhã pãwti py nẽ mã ho anẽ nẽ Tĩrtũm mã harẽ. Hāmri nẽ ho hkry hpa nẽ mẽ piitã mẽ kãm òr pa nẽ mẽ kãm:

—E na pa ã pãwti ho hkry nẽ mẽ amã òr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htÿx kamã ijamak kãm ty. Nom mẽ anẽ kot paj ty. Jakamã kêr ka mẽ ixwakre kamã tõiã xepẽn wÿr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtykja mã ajamaxpêr pẽ akĩnh nẽ pãwti hkur o akrĩ. E mẽ mãmri axãmnhĩx aku. Anẽ.

Nhũm pre ã mẽ kãm amnhĩ jarẽnh anẽ nhũm mẽ mar pẽ pãwtita hkur o hkrĩ. ²⁰ Hāmri nẽ ra hkur pa. Hāmri nhũm Jejus axte kopta py nẽ mẽ kãm:

—Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêr nẽ. ãm paa. Pa kot paj mẽ anẽ mẽ ãhkram amnhĩ jaxã nhũm mẽ ã inhĩpêx anẽ. Koja ixkamrõ axkapĩ nhũm Tĩrtũm omu nẽ ixkukwak ri mẽ anẽ mẽ ate amnhĩ tomnuj piitã te amnhĩ katut kõt rẽnh par pyrãk o hipêx nẽ mẽ ato hkra. Amnepẽm kot ja hã amnhĩ jarẽnh xà hkõt. Jakamã e mẽ ixkamrõ pikapĩrta mã ajamaxpêr pẽ wĩhti hkwy ho ixkõ. Anẽ.

Jejus ã mẽ kãm àmnẽnh xwÿnh jarẽnh

Matêwre 26.21-25; Makre 14.18-21; Juãw 13.18-19

²¹ Nhũm Jejus arĩ mẽ kãm kapêr nẽ mẽ kãm:

—Nẽ kot mẽ kãm ixtã àmnẽnh mã xwÿnhhta na jar mẽ pahkaêx ã mẽ pakutã apkur o nhÿ. ²² Tĩrtũm kãm hprãm xà hkõt koja mẽ tanhmã ixto rax nẽ ixpĩ. Nom kot mẽ kãm ixtã àmnẽnh mã xwÿnhhta hẽxta waa nẽ. ã kot inhĩpêx anhÿrja mÿrapê koja amnhĩ xà htÿx kãm hamak rax kumrẽx. Anẽ.

²³ Nhũm pre ã Jejus mẽ kãm amnhĩ jarẽnh anẽ. Nhũm mẽ kuma nẽ tee ri axpẽn pumunh o hkrĩ. Hāmri nẽ ri axpẽn kukja nẽ axpẽn mã:

—Kwa nà mẽ pahõt kot pu we ã ri hipêx anẽ? Nà pa hkêt.

Anhÿr o tee ri axpẽn kukjêr o hkrĩ.

Mẽ pamã amnhĩ to rũnh prãm kêr ã mẽ pamã karõ

Matêwre 20.20-28; Makre 10.35-45; mããnẽn Rõmãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhÿ hã mẽ ahkre ho mẽ pa xwÿnhjaja axpẽn mã tanhmã kapêr to ho hkrĩ nẽ axpẽn mã:

—Kwa mẽ pahõt kot puj wem nhÿrmã pahpê pahi nẽ mẽ ho amnhĩptar rax o ri papa? Anẽ.

Hāmri nẽ mẽ axpẽn mã: “Nà pa.” Anẽ nẽ nhãnh axpẽn mã: “Nà kêr paa.” Anẽ. Hāmri nhũm mẽ nẽtãnh axpẽn mã: “Nà kêr pa kẽnã.” ²⁵ Anhÿr o axpẽn mã kapêr o hkrĩ. Hāmri nhũm Jejus tee ri axpẽn mã mẽ kuma nhũm mẽ ã hamaxpêr anhÿrja kêp omnuj nẽ nhũm mẽ kãm tanhmã hã kapêr to nẽ mẽ kãm:

—E mẽ inhma. Na hte Ijaew kêr xwÿnhjê nhõ pahijaja ã amnhĩ nhĩpêx anhÿr o ri pa nẽ amarĩ hkrĩ xà kamã hkrĩ ho hkrĩ. àhpumunh tÿx jakamã na htem amarĩ ixkre hkre jakry kamã kãm mẽ àpẽnh xwÿnhjê mã mẽmo mẽ àpẽnh ã karõ ho hkrĩ. Na htem ã amnhĩ nhĩpêx anhÿr o pa. Nẽ mẽ kot amnhĩm mex ã harẽnh kaxyw tanhmã mẽ ho mex to ho pa. ²⁶⁻²⁷ Tã kêr ka mẽ ho mẽ urãk kêr nẽ. Kêr ãm te amarĩ ri mẽ apa xwÿnh pyrãk o axpẽn nhĩpêx. Ixpyrà nẽ amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptar rax kukamã ajamaxpêr kêr nẽ. ²⁸ Na prem axpẽn mã ixto hẽx nẽ tanhmã ixto kapêr punuj to htã ka mẽ ama nẽ ãm mẽ ama nẽ arĩ ixkõt ri apa rãhã nẽ. ãm hãmri na ka htem arĩ ixkõt ri apa anẽ. ²⁹⁻³⁰ Kot paj amnhĩ mã mẽ ato mex rax nẽ. Na pre ra Tĩrtũm nhÿrmã ixte mẽ ato amnhĩptar o ixkrĩ kaxyw ixãm. Tã ot pa amnhĩ pyrã nẽ mẽ pahkwÿ Ijaew kaxyw mẽ axunhwÿ ka mẽ nhÿrmã mẽ piitã mẽ ho amnhĩptar o apa. Nẽ mẽ apê ixkrãmnhwÿ hã nhÿrmã ixkutã axãpkur o apa. Anẽ.

Jejus kot Simãw Pêtre mã kapêr ã harênh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapêr nê kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nê. Tanhmã kot mẽ akrã hto nhũm mẽ ate mẽ kãm ixkurê xwýnhjê pumaj ixkaga hã kãm mẽ akamã hamak prãm týx nê. Jakamã ã kot mẽ anhípêx anhÿr kaxyw na pre ra amnhĩ to Inhõ Papaj ma nhũm kãm: “Tõe. Kam nê mãmrĩ tanhmã mẽ kamã ajamak to.” Anê.

³² —Tã ate mẽ umaj ixkaga nê axte ate amnhĩ kaxyw inhmã ajamxpêr kêt pymaj na pa ra ato Inhõ Papaj wÿr kãm ixihýtýx nê Simãw Pêtre. Jakamã kêr ka mẽmo arĩgro hã tee ri ixkaga hã amnhĩ pumu hãmri nê tokyx tãm akupÿm ixkôt amnhĩ xãm týx nê. Kêr kê nhÿrmã akwÿjê hõ tanhmã amnhĩ tomnuj to nê tee ri amnhĩ kukamã hamaxpêr ka ja hã omu hãmri nê kãm ate tanhmã amnhĩ tomnuj tota jarê. Kê mẽ ã ate amnhĩ nhípêx anhÿr ã ajarênh ma nê apyrã nê tokyx akupÿm tãm ixkôt amnhĩ xãm týx kurê kumrêx. E kêr ka ã akupÿm ixkôt mẽ piitã mẽ hipêx anhÿr o ri apa Simãw Pêtre. Anê.

Nhũm pre ã Simãw Pêtre kot tanhmã amnhĩ nhípêx to hkukamã kãm ujarênh anê.

³³ Hãmri nhũm tee ri amnhĩ tã kuma nê kãm:

—Kwa nã Pahihti. Kot paj ri akwÿm tanhmã amnhĩ tomnuj to hkêt nê. Koja mẽ te ajaxã nê apĩ htã kot paj arĩ akôt ri ixpa ho ixpa nhũm mẽ pahto amÿrà nê tanhmã pahto. Anê.

³⁴ Hãmri nhũm kuma nê kãm:

—Nã koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axaprãr o axkrunêpxi kãm ga. Anê.

Jejus kot hkwÿjê mã mẽmoj tã karõ

Matêwre 10.5-15; Rukre 9.1-3

³⁵ Hãmri nhũm Jejus arĩ hkôt mẽ pa ho pa xwýnhjê mã kapêr nê mẽ kãm:

—E wam ixte mẽ hwÿr mẽ arênhã ã na ka prem amnhĩ kôt aparkã hkwy ho apa hkêt nê. Nê kawã jamãnh nê ho apa hkêt nê. Nê mrykã jamãnh nê amnhĩ kôt ho apa hkêt nê. ãm mẽ anhÿ kamã mẽ hwÿr apa hã na pa pre mẽ amã karõ. Tã xãn ka prem ã mẽ hwÿr apa anê nhũm mẽ amnhĩ wÿr awÿr kêt nê? Nã xã na prem amnhĩ wÿr mẽ awÿ? Anê.

Hãmri nhũm mẽ kãm:

—Tÿ na prem amnhĩ wÿr mẽ ixwÿ. Mẽ ixte amnhĩ kôt mẽmoj to ixpa hkêt tã na pa prem amarĩ mẽ kutã ixàpkur mex o ri mẽ hkôt ixpa. Anê.

³⁶⁻³⁷ Hãmri nhũm mẽ kãm:

—Tõe. Nã mẽ kot mẽ ato mex tã nom koja mẽ hpãnhã axtem hõ ho mẽ anhípêx. Jakamã kêr ka mẽ akupÿm mẽ kãm ijarênh o apa kaxyw anojarêr hãmri nê anhõ mrykã rÿ akawã htu nê ma amnhĩ kôt ho apa. Nê awapo. Kot kaj mẽ awapo hkêt japêr hãmri nê apipro xã ho wênê nê amnhĩm hõ japrõ nê ma amnhĩ kôt ho apa. E kêr ka mẽ ã amnhĩ nhípêx anê.

—Nê Tirtũm kapêr ã kagã htũm kot ra ixkukamã tanhmã ijarênh to nê kot ijarênh kot: Koja mẽ hipêx o te mẽ kot amnhĩ tomnuj týx xwýnh nhípêx pyrãk. Anê.

ã mẽ kot inhípêx anhÿr kukamã ijarênh kot anhÿr. Tã na mẽ ra ã inhípêx anhÿr kaxyw. Anê.

³⁸ Nhũm pre ã Jejus mẽ kãm kapêr anê nhũm mẽ kuma nê kãm:

—Ota mẽ panhõ wapohti hamêxkrut Pahihti. Anê.

Hãmri nhũm mẽ kãm:

—Tõe. Nã hãmri. Mẽ amnhĩm axi nê ho amnhĩm mẽmoj to anê. Anê.

Jejus kot Tirtũm mã amnhĩ jarênh

Matêwre 26.36-46; Makre 14.32-42

³⁹ Tã nhũm Jejus kê axte krĩja rũm kato nê hixêr pê Oriwêhti hwÿr tẽ nê api nhũm hkôt mẽ pa ho mẽ pa xwýnhjaja ma hkôt mra. ⁴⁰ Hãmri nê nhÿri hixêr kahti ri hkrĩ nhũm Jejus mẽ kãm:

—E kwa kêr ka mẽ ixkutêp amnhĩ to Inhõ Papaj wÿr o akrĩ. Kê mẽ ixkôt tanhmã mẽ ato htã ka mẽ amã mẽ uma xãj ixkaga hkêt nê. Arĩ mẽ kutã amnhĩ to htýx nê akuhê. Anê.

⁴¹ Hāmri nē mẽ kurūm htēm grire nē Tirtūm mã amnhĩ jarēnh kaxyw hkōn krā ho tēm nē nhỹ. ⁴² Hāmri nē kām:

—Kwa Papaj. Nà na pa ra amnhĩ xà htỳx kukamā ijamaxpēr nē amnhĩ kamā ixkahak tỳx kumrēx. Inhmā amnhĩ xà kamā ijamak prām kêt o ijamak prām kêt. Jakamā kot kaj amā inhnê ho ajapêx prām nē māmri inhnê ho ajapêx nhũm mẽ kām ixkurê xwỳnhjaja tanhmā ixto hkêt nē. Rỳ ko. Kot kaj amā mẽ kot tanhmā ixto hprām hã kê mẽ māmri tanhmā inhĩpêx to. Nom pam inhmā hprām xà hkôt kêt. Anē.

Nhũm pre ã Jejus amnhĩ to Hipêêxà Tirtūm wỳr anē. ⁴³ Hāmri nhũm kuma nē hwỳr kapēr o wrỳk xwỳnhja mẽ nhũm hwỳr wrỳ nē kuri xa. Hāmri nē õxàhkre kaxwỳnh kām tanhmā ho hihtỳx to. ⁴⁴ Nhũm kê axte amnhĩ to Hipêêxà hwỳr kām hihtỳx nē. Tee ri amnhĩ kukamā hamaxpēr pê amnhĩ kamā kahak tỳx kumrēx. Jao hã gô rax nē te hkamrô xàhàr pyrāk o pikap ahà. ⁴⁵ Hāmri nē kànhmā xa nē akupỳm hkôt mẽ pa ho mẽ pa xwỳnhjê hwỳr tẽ nē mẽ omu nhũm mẽ ra ôt pa nē hikwỹ. Mẽ kot tee ri Jejus kot mẽ kām amnhĩ jarēnhja kukamā hamaxpēr o hkaprĩ nē ôt pa nē hikwỹ. ⁴⁶ Hāmri nhũm Jejus tẽ nē tee ri mẽ omu nē mẽ kumra nē mẽ kām:

—Kwa nà. Mẽ ri ã amnhĩ nhĩpêx anhỳr kêt nē. Kwa mẽ kànhmā akrĩ nē amnhĩ to Inhõ Papaj wỳ kê mẽ ato mẽ axihtỳx. Hāmri nhũm mẽ tanhmā ixkôt mẽ ato ka mẽ inhỹ hã mẽ kutā amnhĩ to htỳx nē akuhê. Anē.

Mẽ kot Jejus pynênh ã mẽ harēnh

Matêwre 26.47-56; Makre 14.43-50; Juãw 18.1-11

⁴⁷ Nhũm pre ã Jejus mẽ kām kapēr anhỳr rôm nhũm hkôt pa ho pa xwỳnh pê Jut Kariotja amnhĩ kôt mẽ kot Jejus pynênh xwỳnhjê ho tẽ. Mẽ ho htēm rax nē. Hāmri nē kot Jejus kahti hkôt mỳnh kaxyw hwỳr tẽ ⁴⁸ nhũm amnhĩ tã omu nē kām:

—Kwa Jut. Xà mẽ kahti hkôt mẽ hamỳnh nē mẽ hpār o na htem mẽ kām mẽ hã amỳnê? Anē.

⁴⁹ Hāmri nhũm hkôt mẽ pa ho mẽ pa xwỳnhjê hõja tee ri mẽ kot amnhĩ nhĩpêx ã mẽ omu hāmri mẽ õ wapota mã hamaxpēr kurê kumrēx nē Jejus mã:

—Kwa Pahihti. Xà kot paj mẽ panhõ wapohti py nē ho mẽ panê mẽ hkwỳ hpa? Anē.

⁵⁰ Hāmri nhũm hõta kuma nē mẽ kaxyw ja kapa. Nhũm mẽ õ patre maati mã àpênh xwỳnhja mẽ hkôt tẽ nhũm omu nē kām wapo ho apê. Nẽ kot ho hkrā nhĩpônň mã tã kuhpaw nē ho upôk rũm hamak nhĩkê pix krãhta. ⁵¹ Hāmri nhũm Jejus omu nē nê kām kapēr nē kām:

—Kwa nà ri ã amnhĩ nhĩpêx anhỳr kêt nē. Amarĩ xa. Anē.

Hāmri nē hamakja py nē akupỳm kām hamak ã kuxi nē ho mex. ⁵²⁻⁵³ Hāmri nē mẽ kot unênh mã xwỳnhjê mã tanhmā kapēr to. Mẽ õ patre krãhtũmjê mẽ Tirtūm mã amnhĩ jarēnh xà hã ixkre jamār xwỳnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kām kapēr nē mẽ kām:

—Kwa na pa pre apkati mẽ Tirtūm nhõrkwỹ kamā mẽ kām ixkapēr o ixpa ka prem tokyx ixpynênh kêt tã jarãhã te ixte amnhĩ tomnuj xwỳnh pyrāk o inhĩpêx nē ixwỳr wapo nē kô hã akapên nē ixwỳr ã atēm rax anē. No ãm ra mẽ ate tanhmā ixto kaxyw arĩgro kator kênã. Jakamā kot kaj mẽ māmri tanhmā amã ixto hprām xà hkôt māmri tanhmā ixto. Satanasti nhỹ hã ã mẽ ate inhĩpêx anhỳr mã kênã. Anē.

Simãw Pêtre kot Jejus kôt pa hkêt ã kot amnhĩ jarēnh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mẽ Jejus pynê nē ma o tẽ. Ma mẽ õ patre maati nhõrkwỹ hwỳr o tẽ. Nhũm Simãw Pêtre ma hapu hã mẽ hkôt hã mẽ omunh o tẽ. ⁵⁵ Nhũm mẽ patre maati nhõrkwỹ hwỳr Jejus o axà nē hkôt gjêx pa hāmri nhũm Simãw Pêtre kítare hwỳr axà nē mẽ kuri xa. Nhũm mẽ kítare kamā amnhĩm kuto nē hã ànhunh o hkrĩ nhũm ⁵⁶ mẽ ìhkô hã ànhunh o nhỹ. Hāmri nhũm mẽ kām àpênh xwỳnh niti hirã kamā hprĩ hã omunh kurê kumrēx nē mẽ kām:

—Xê pēr myti ja kêp Jejus kôt mẽ pa ho mẽ pa xwỳnhjê hõ na. Anē.

⁵⁷ Hāmri nhūm tee ri amnhī tā kuma nē kām mẽ uma nē mẽ kām amnhī tā aprā nē kām:

—Tk. Kokỹ. Ixte mēhō my ata pumunhre hā. Anē.

⁵⁸ Tā nhūm hpānhā mēhō myja kām:

—Kwa nà. Ām hāmri na ajarē. Apē Jejus kōt ri mẽ pa xwỳnhjê hō na ka.

Anē nhūm kuma nē kê axte kām:

—Kwa mẽ ri ā amnhī krā hkōt ri ixto axêx anhỹr kêt nē. Ām ixte aa mēhōta pumunh kêt kumrēx. Anē.

⁵⁹ Tā nhūm ja haxwỳja axte omu nē kām:

—Kwa ām hāmri na mẽ ajarē. Apē Jejus kwỳ hō na ka. Urāk nē te apē Garirej nhō xwỳnh pyrāk kēnā. Anē.

⁶⁰ Hāmri nhūm tee ri kuma nē mẽ kām amnhī tā aprār kām hihtỳx nē mẽ kām:

—Tk. Ixpē Garirej nhō xwỳnh kêt. Ām ixte mēhō mỳj pumunh kêt kumrēx tā ka mẽ ām xatā hkōt ixpa ho ixpa xwỳnh ā ixkamnhīx o akuhê.

Anhỹrja o ra mẽ kām amnhī tā aprār o axkrunēpxi mẽ nhūm krāhyre kà. ⁶¹ Hāmri nhūm Jejus arī ixkre kamā ām tā Simāw Pêtre ho hakēx nē omu. Hāmri nhūm amnhī tā no pumu nē kot hkukamā kām ā amnhī nhīpêx anhỹr jarēnhja mā hamaxpēr kurê kumrēx. Krāhyre hkār kêt ri kot mẽ kām amnhī tā aprār o axkrunēpxi hā harēnhja mā hamaxpēr nē kànhmā hakry hpar o tē nē hkaprī htỳx nē. ⁶² Hāmri nē hkaprī xàj kītare pē kato nē tē nē awry hā xa nē mỳr rax kumrēx.

Mẽ kot Jejus tak ā mẽ harēnh

Matêwre 26.67-68; Makre 14.65

⁶³ Hāmri nhūm mẽ kot Jejus pumunh o kuhê xwỳnhjaja hā hpēr o axkē nē htak o kuhê. ⁶⁴ Nē no hpro nē htak nē kām:

—E atak xwỳnh nhīxi jarē. Apē Tirtūm Kra hā ate amnhī jarēnh jakamā măn urāk nē axàhpumunh tỳx. Jakamā e hixi jarē. Anē.

⁶⁵ Hāmri nē xatā haprỳ nē kām kapēr punuj nē.

Mẽ kot mẽ hkrāhtūm wỳr Jejus o htēm ā mẽ harēnh

Matêwre 26.57-68; Makre 14.53-65; Juāw 18.19-24

⁶⁶ Tā nhūm myt kator o mōr mẽ nhūm Ijaew nhō pahijê mẽ patre krāhtūmjê mẽ Tirtūm kapēr tūm o mẽ ahkre xwỳnhjaja axpēn wỳr pikuprōnh pa. Hāmri nhūm mẽ ma mẽ hwỳr Jejus o tē. ⁶⁷⁻⁶⁸ Nhūm mẽ omu nē tanhmā kot amnhī jarēnh to hā hkukja nē kām:

—Kwa mẽ inhmā amnhī jarē. Xà ka na apē Tirtūm kot mẽ ixkaxyw axām xwỳnhhta? Xà ka kot kaj Rōm nhō xwỳnhjê pē mẽ ixpytā nē mẽ ixto amnhīptār o apa? Anē.

Hāmri nhūm mẽ kām:

—Nà kot paj tanhmā mẽ amā amnhī jarēnh to ka mẽ ixkōt ajamaxpēr kêt nē. Ixte ām hāmri mẽ amā amnhī jarēnh tā ka mẽ inhma nē ām inhma. Nē kot pa amnhī xwar mẽmoj tā mẽ akukja ka mẽ amnhī xwar inhmā tanhmā harēnh to hkêt nē. Ām mẽ axêx rom mẽ ate ā ixkukjêr anhỹr kēnā. ⁶⁹ Tā nom kot paj tokyx ma akupỳm Inhīpêxà Tirtūm wỳr api. Hihtỳx o hihtỳx rāhā nē pa ho pa xwỳnh na. Jakamā kot paj hwỳr api nhūm amnhī nhīhkō hā inhỹr pa upōk rūm mẽ apiitā mẽ ato amnhīptār o ixkrī. Hāmri nē nhỹrmā paa tanhmā mẽ ajarēnh to. Anē.

⁷⁰ Hāmri nhūm mẽ tee ri kot ā amnhī jarēnh anhỹrja ma nē kām:

—Tk. Kwa akatāt kōt mẽ inhmā amnhī jarē nà. Xà apē Tirtūm Kra na ka? Anē.

Hāmri nhūm mẽ kām:

—Tỳ ixpē Kra na pa. Anē.

⁷¹ Hāmri nhūm mẽ tee ri ā amnhī jarēnh anhỹrja ā kuma nē axpēn mā:

—Kwa mo kaxyw kot puj mẽ axte mẽ hkwỳjê japêr nhūm mẽ tanhmā kot amnhī tomnuj to hā harē? Tām kēp Tirtūm Kra hā amnhī to hêx nhūm mẽ pahte pahpiitā mar kēnā. E kwa tokyx pu mẽ ma Rōm nhō pahihiti hwỳr o tē kê mẽ pamā hā amỳnê nē mẽ pamā kupī. Anē.

23

Mě kot pahi Pirat wỳr Jejus o htēm ã mẽ harēnh

Matêwre 27.1-2, 27.11-26; Makre 15.1-5; Juãw 18.28-38

¹ Tã nhũm mẽ Jejus o kato nẽ nhãm Pahihti Pirat wỳr o tẽ. ² Hãmri nẽ kutã ãm nẽ tanhmã kãm ho hêx to nẽ kãm:

—E ot pa mẽ awỳr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwỳm ri amnhĩ nhĩpêx prãm xàj tanhmã mẽ inhmã mẽmoj tã karõ hto ho pa. Nẽ axtem nẽ mẽ ixte Sesti mã kàxpore hkỳw nhõr kêt ã mẽ inhmã karõ. Nẽ Tĩrtũm kot mẽ pakaxyw kêp mẽ panhõ pahi hã ãm xwỳnh ã amnhĩ jarẽ. ã na hte mẽ inhmã amnhĩ to hêx anhỹr o pa. Anẽ.

³ Hãmri nhũm Pirat mẽ kuma nẽ Jejus pumu nẽ kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anẽ.

Hãmri nhũm kãm:

—Nà ãm hãmri na ka ã ijarēnh anẽ. Anẽ.

⁴ Hãmri nhũm Pirat tanhmã hkukjêr to nẽ tee ri kot amnhĩ jarēnh ã kuma hãmri nẽ patre krãhtũmjê mã kãm:

—Kwa mẽmo mỳrapê kot pa tanhmã mẽ amã hã ixàmnēnh to? Kot tanhmã amnhĩ tomnuj tore hã. Nà kot pa kãm inhũre. Anẽ.

⁵ Hãmri nhũm mẽ tee ri kuma nẽ kot mẽ kãm hã àmnēnh prãm xàj hã kãm kapêr kãm hihtỳx nẽ. Nẽ kãm:

—Kwa nà. Na pre hte pika pê Jutej kamã tanhmã mẽ kãm hêx to ho pa. Hãmri nhũm mẽ ra hã axpēn kutã amnhĩ xunhwỳ nẽ hã pijapu rũnh o pa. Tã mãănēn Garirej kamã ã amnhĩ nhĩpêx anhỹr o hkrax nẽ hpãnhã amnẽ mẽ pahwỳr ã amnhĩ nhĩpêx anhỹr kaxyw mõi anẽ. Anẽ.

Mě kot Erox wỳr Jejus o htēm ã mẽ harēnh

Rukre 9.7-9

⁶ Hãmri nhũm Pahi Pirat mẽ kuma nẽ mẽ kãm:

—Kwa xà kêp Garirej nhõ xwỳnh na? Anẽ.

Hãmri nhũm mẽ kãm:

—Tỳ. Kêp Garirej nhõ xwỳnh kēnã.

⁷ Anẽ nhũm mẽ kãm:

—Tõ mẽ ma pahihti Erox ãxipas wỳr mãn o tẽ. Kêp Garirej nhõ xwỳnhjê nhõ pahi na. Tã ra jar Jerujarẽ kamã ham põi. No axtem ixpê Jutej kamã mẽ pa xwỳnhjê nhõ pahi jakamã kwa mẽ ma õ pahita wỳr mãn o tẽ kê tãm tanhmã mẽ amã ho. Anẽ.

⁸ Hãmri nhũm mẽ kuma nẽ ma pahi Erox ãxipas wỳr o tẽ. Na pre ra Erox ãxipasja xatã Jejus jarēnh ma nẽ kãm omunh prãm nẽ. Kãm aa kot mẽmoj pumunh kêt õ ho anhỹr ã omunh prãm tỳx jakamã nhũm mẽ ma hwỳr o tẽ nhũm omu nẽ hkĩnh nẽ. ⁹ Hãmri nẽ tee ri mẽmoj tã hkukja no nhũm akryk xa nẽ tanhmã kãm nẽ hkêt nẽ. ¹⁰ Hãmri nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwỳnhjaja kãm ho kapêr punuj nẽ ho hêx kãm hihtỳx nẽ. ¹¹ Hãmri nhũm pahi Erox ãxipas mẽ kuma hãmri nẽ õ pōristi mẽ wa kãm kapêr punuj nẽ hã hpêr o axkê nẽ tanhmã ri haprỳ to. Hãmri nẽ hã hpêr o pikēnh kãm kêp pahi hã mẽ ê mexja py nẽ kãm haxà nẽ akupỳm pahi Pirat wỳr kumẽ.

¹² Na pre Pahi Pirat mẽ Pahi Erox ãxipasja wa kãm axpēn kĩnh kêt nẽ. Tã hãmri nhũm Erox ãxipasja tee ri Jejus kot kãm tanhmã amnhĩ jarēnh to hã mar prãm xàj tee ri hkukamã hamaxpêr hãmri nẽ Pirat ã hpijaam kaxyw akupỳm hwỳr kumẽ. Hãmri nhũm amnhĩ tã omu hãmri nẽ wa ra akupỳm kãm axpēn kĩnh nẽ. Nẽ akupỳm axpēn mã hpêr o axkê nẽ pikunhar o pa pê akupỳm axpēn to hkrãmnhwỳ.

Pirat kot Jejus pĩr ã àmnēnh

Matêwre 27.15-26; Makre 15.6-15; Juãw 18.39-19.16; mãănēn Atre 3.13-14

¹³ Tã nhũm Pirat akupÿm amnhĩ wÿr mẽ hã karõ. Ijaew kwÿjaja nẽ mẽ õ pahijaja nẽ mẽ õ patre krãhtũmjaja nhũm akupÿm amnhĩ wÿr mẽ piitã mẽ hã karõ. ¹⁴ Hãmri nhũm mẽ akupÿm hwÿr gjêx pa nẽ kuhê nhũm mẽ kãm:

—E na ka mẽ ixwÿr mytita o tẽ nẽ tanhmã inhmã harênh to. Kot mẽ akwÿjê mã tanhmã hêx to ho pa hã harê. Tã pa ra jar mẽ anoo mã tanhmã hkukjêr to nẽ tee ri kot inhmã tanhmã amnhĩ jarênh to hã kuma. Te kot amnhĩ to mex xwÿnh pyrãk. Mẽ ate tanhmã ho akapêr to htã nom kot anhÿr kêt. Kot amnhĩ to mex xwÿnh na. ¹⁵ Pahi Eroxa ra ixpyrà nẽ tee ri tanhmã hkukjêr to nom nhũm tanhmã kãm nẽ hkêt nẽ. Nhũm tee ri ja hã omu nẽ akupÿn ixwÿr kumẽ. Jakamã kwa mẽmo mÿrapê kot paj mẽ amã hã amÿnê nhũm mẽ amã kupĩ? Tanhmã kot amnhĩ tomnuj tore hã. ¹⁶ Kot paj ãm mẽ kãm anê kê mẽ htak nẽ kãm ure kê mãmrĩ ma tẽ. Anẽ.

¹⁷ Arĩgro pẽ Pas ã na pre hte mẽ õ pahi mẽ kot mẽ ho prês nhũm mẽ hkrĩ xwÿnhjaja nhũm pre htem mẽ ho hpÿnh nẽ mẽ kãm ure. Jakamã na pre ã mẽ kãm kapêr anê nẽ kot Jejus tak nẽ kãm urer mã. ¹⁸⁻¹⁹ Nom nhũm mẽ kuma nhũm ja mẽ kêp omnuj nẽ nhũm mẽ kãm:

—Kwa nã. Apĩ ri. Apĩ nẽ mẽ inhmã Parapas mã mãn anhũre. Anẽ.

Parapas na pre mẽ õ krĩ kamã õ pôristi mẽ pahi Piratja mẽ kutã amnhĩ xãm nẽ kêp õ pôristi hõxpĩ. Mÿrapê na prem ra haxã nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapêr anê. ²⁰ Nom nhũm kãm Jejus mã urer prãm jakamã axte hã mẽ hkukja nẽ mẽ kãm:

—Kwa nom mẽmoj mÿrapê kot paj mẽ kãm hã amÿnê nhũm mẽ amã kupĩ?

²¹ Anhÿr tã nhũm mẽ kuma nẽ ãm kuma. Nẽ xatã kãm:

—Kwa tokyx pĩ kahpa hã anhô kê ty. Anẽ.

²² Hãmri nhũm tee ri mẽ kuma nẽ mẽ kãm:

—Tk. Kwa nã. Tanhmã kot amnhĩ tomnuj tore hã kot pa kêt hã kunhõ nhũm ty. Nã kot paj ãm mẽ kãm anê kê mẽ htak nẽ kãm ure kê ma tẽ. Anẽ.

²³ Hãmri nhũm mẽ xatã hã kãm kapêr kãm hihtÿx nẽ kãm:

—Kwa nã. Pĩ kahpa hã mãn anhô kê ty.

Anhÿr o ãm xatã kax pẽ àmra kamã kãm hã amÿnê. ²⁴ Hãmri nhũm Pirat tee ri mẽ kuma hãmri nẽ tã mẽ kãm hprãm xã hkôt mẽ kãm ã amÿnê. ²⁵ Hãmri nẽ mẽ kãm Parapas mã ure. Ra kot pahi Pirat pẽ õ pôristi kutã amnhĩ xãm nẽ kêp hõx pĩr tã nhũm mẽ kãm hprãm xã hkôt akupÿm kãm ure. Hãmri nẽ mẽ ìhkram Jejus jaxã. Mẽ kãm hprãm xã hkôt ri mẽ kot tanhmã hipêx to kaxyw.

Mẽ kot pĩ kahpa hã Jejus nhõ ã mẽ harênh

Matêwre 27.31-43; Makre 15.21-32; Juãw 19.17-20, 19.27-31; mããnên Atre 7.59-8.1

²⁶ Tã nhũm pôristijaja Jejus o kato nẽ ma kapôt mã o tẽ. Nẽ kãm õ pĩ kahpa gõ nhũm amnhĩ kaxyw kumÿ nẽ o tẽ. Nom mẽ kot htak rax kurê nhũm hirot tÿx nẽ nhũm mẽ ja hã omu nẽ mẽhõ kot ho ajuta kaxyw mẽ hkapi ho xa. Hãmri nẽ Sirên nhõ xwÿnh Simãw hkà htyk pumu. Nhũm pre htÿx hamakêtkati nẽ mẽ kutã krĩm tẽ. Hãmri nhũm mẽ haêr pẽ unê nẽ kãm Jejus o ajuta kaxyw hã karõ nhũm kãm õ pĩ kahpaja mÿ nẽ mẽ hkôt o tẽ.

²⁷ Hãmri nhũm mẽ ohtõ nẽ Jerujarê rũm Jejus kôt mõi. Nhũm mẽni hkwyjaja omu nẽ kãm hkaprĩ xaj mÿr o hkôt mõi. ²⁸ Hãmri nhũm mẽ mÿr ã mẽ kuma nẽ mẽ ho hakêx nẽ mẽ omu nẽ mẽ kãm:

—Kwa nã Jerujarê nhõ xwÿnhjaja. Mẽ amã ixkaprĩ xaj amÿr kêt nẽ. Kêt mẽ kamjaja amã amnhĩ kaprĩ xaj mãn mur. Nẽ mẽ akrajê kamã axukaprĩ xaj mãn mur. ²⁹ Koja mẽ nhÿrmã mẽ apê mẽ anhõ krĩ grãnh pa ka mẽ apunuj nẽ amnhĩ xã htÿx kamã ajamak o ri apa. Nẽ tee ri mẽ akrajê hkukamã tanhmã ajamxpêr to nẽ ajamxpêr o: “Hêxta gãa nẽ. Na ixkrajaja ixpê amnhĩ xã htÿx kãm hamak o pa. Kêp apu mẽ hkra hkêt xwÿnhjê pyrã nẽ ixkra hkêt nẽ ixpa ro nhÿx inhmã mex nẽ. Nhÿx pa ixkĩnh nẽ.” Anhÿr o kot kaj mẽ nhÿrmã ajamxpêr nom ã ajamxpêr anhÿr kaprÿ.

³⁰ —Nẽ kot kaj mẽ apiitã mẽmo punujta pymaj tee ri amã tokyx atyk nẽ ajapêx par prãm kaprÿ nẽ axpên mã akapêr o: “Hêxta gãa nẽ. Kot kên prêk mÿj mẽ panhĩpy rôrõk

ně tokyx mẽ panhĩmex par ronhỹx mẽ pamã ja mex.” Anhỹr tã no ãm tee ri ã ajamaxpěr anhỹr kaprỹ. ³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpêx anẽ. Nom mẽ ate amnhĩ tomnuj mỳrapê koja mẽ nhỹrmã tanhmã mẽ ato rax o ã mẽ kot inhĩpêx anhỹrja jakrenh pa. Hêxta waa nẽ. Na pa mẽ akukamã ijamaxpěr nẽ ixkaprĩ htỹx nẽ. Anẽ.

³² Tã nhũm mẽ ja wa ho hamẽxkrut nẽ tanhmã wa kot amnhĩ tomnuj toja mỳrapê Jejus kôt wa hpĩr kaxyw hkôt mãănẽn wa o tẽ. ³³ Jakamã nhũm mẽ ra kẽn nhĩxêt te kot mẽ hkrã hi pyrãk xwỳnhhta wỳr mẽ o pøj. Mẽ kot kãm “mẽ hkrã hi xà” anhỹr jarẽnhja wỳr mẽ o pøj. Hãmri nẽ Jejus pẽ ê kapa nẽ pĩ kahpa hã kuxi nẽ prek o ãhkra nẽ hpar o htỹx pa. Hãmri nẽ kànhmã pĩ kahpa xãm nẽ ho htỹx nhũm xa. Hãmri nhũm mẽ hpãnhã wa kot amnhĩ tomnuj xwỳnhhta mã wa ho anẽ nẽ. Nẽ prek o wa ãhkra nẽ wa hpar o htỹx pa hãmri nẽ akutã ho Jejus nhĩjê nẽ wa ãm nhũm wa ajêt. ³⁴ Hãmri nhũm Jejus kỹx pẽ amnhĩ xà htỹx kumrêx kamã hamak o jêt rãhã mẽ ho Tĩrtũm wỳ nẽ kãm:

—Kwa Papaj. ãm ixtã jajê pumu. Mẽ kot mẽmoj mex pumunh kêt jakamã na mẽ ã inhĩpêx anẽ. Jakamã ãm ixtã mẽ omu nẽ mẽ kamã axukaprĩ nẽ. Anẽ.

Hãmri nhũm hparpê pōristi hkwyjaja axpẽn mã ê hkwy ho pigràn h kaxyw hã kẽnre ho jōka ho hkrĩ. ³⁵ Nhũm mẽ ohtô rax nẽ Jejus parpê omunh o kuhê. Nhũm mẽ õ pahijaja mẽ noo mã hã hpěr o axkẽ nẽ mẽ kãm:

—E jahti na pre te kệp mẽ pakaprĩ xwỳnh ã amnhĩ jarẽnh o ri pa. Nẽ Tĩrtũm kot mẽ pakaxyw ãm xwỳnh ã amnhĩ jarẽnh o ri pa. Jakamã e kwa pu mẽ xa nẽ kot amnhĩ kaxàr nẽ wrỹk kãm omu. Anẽ.

³⁶ Nhũm pōristi mãănẽn tanhmã hã hpěr o pikẽn h to. Nẽ hparpê kãm wĩhti punuti jahkre nẽ kãm:

—Kwa wrỹ nẽ mẽ ixkutã ja hkwy ho ixkõ nà. Anẽ.

³⁷ Hãmri nẽ kãm:

—E apẽ Ijaew nhõ pahi hã kot kaj amnhĩ kapa nẽ akupỹn wrỹ. Kwa tokyx pa mẽ ja hã apumu. Anẽ.

³⁸ Nhũm pōristija tapti hõ py nẽ tanhmã hã kagà hto. Nẽ hã kagà ho:

IJA EW NHÕ PAHI NA JA

Anhỹr o hã kagà hãmri nẽ Jejus wỳr api nẽ mỳ ri kunhõ.

Wa kot Jejus nhĩjê nẽ wa jêt xwỳnh wa harẽnh

Matêwre 27.44; Makre 15.32

³⁹ Hãmri nhũm wa kot ãhkõ hã jêt xwỳnhhta õ haxwỳja kãm kapěr punuj nẽ kãm:

—Kwa kot kaj apẽ Tĩrtũm kot mẽ ixkaxyw axãm xwỳnh hã kot kaj amnhĩ kapa nẽ wrỹ. Nẽ mãănẽn amnhĩ kôt wa ixto wrỹ. Anẽ.

⁴⁰⁻⁴¹ Hãmri nhũm ihõta kuma nẽ hã kãm akir nẽ kãm:

—Tk. Kwa amarĩ ajêt. Xà amã Tĩrtũm pyma hkêt ã na ka ã kệp Krata mã akapěr anẽ? Nà koja kãm wrỹk prãm nẽ kot wrỹ. No pajamẽ pahte amnhĩ tomnuj mỳrapê koja mẽ pahpĩ. No tãm kot tanhmã amnhĩ tomnuj to hkêt tã nhũm mẽ amarĩ ã hipêx anẽ.

⁴² Anhỹr o kãm kapěr hãmri nẽ Jejus mã kãm:

—Kwa Jejus. Kêr ka nhỹrmã mẽ ixto amnhĩptã hãmri nẽ inhmã ajamaxpěr nẽ ixkamã axukaprĩ nẽ ixto mex nẽ. Anẽ.

⁴³ Hãmri nhũm kãm:

—Nà kot kaj jarãhã ma ixkôt kaxkwa hwỳr api nẽ hpãnhã ixkuri amex nẽ atĩr tũm nẽ apa ho apa. ãm hãmri na pa ã amã ixkapěr anẽ. Anẽ.

Jejus tyk ã harẽnh

Matêwre 27.45-56; Makre 15.33-41; Juãw 19.28-30

⁴⁴ Tã nhũm kaxkwa nhĩpòk ri myt nhỹr mẽ nhũm te ra kamàt pyrãk nhũm kamàt kô rax kumrêx. Nẽ kamàt kô ho ra hã awry nẽ. Ja mẽ nhũm akupỹm myt katêr o mõ. ⁴⁵⁻⁴⁶ Nom nhũm kormã kamàt kôta ã nhũm Jejus ra htyk kaxyw nẽ ãmra kamã Tĩrtũm mã kapěr nẽ kãm:

—E Papaj. Mãmrĩ ixkarõ ho amnhĩptã.

Anhÿrja kôt hãmri ty. Pu nhũm Tĩrtũm mã amnhĩ jarẽnh xà hã ixkre kamã hakwakre hã kupẽxêja axkjê nẽ amnhĩ kahê xà mẽnũ kurê kumrẽx. Utĩ rax tã kôt ã axkjê nẽ amnhĩ kahê xà mẽ. Te Jejus htyk o kot mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mẽnũ pyrãk o ã amnhĩ nhĩpêx anẽ. ⁴⁷⁻⁴⁹ Hãmri nhũm mẽ piitã mẽmoj ã kot amnhĩ nhĩpêx anhÿr ã omunh o kuhê xwÿnhjaja. Nẽ kaxyw Jejus krãmnhwÿjaja nhũm mẽ amÿm omunh o kuhê. Nẽ Garirej rũm mẽni kot Jejus kôt mẽ pa ho mẽ pa xwÿnhjaja mããnẽn mẽ kuri amÿm hkaprĩ nẽ omunh o kuhê. Nhũm p̄risti krãhtũmjê hõja ã mẽmoj kot amnhĩ nhĩpêx anhÿr ã omu nẽ tee ri hamaxp̄er o:

—Hêxta waa nẽ. P̄er ãm hãmri na pre hte tãm amnhĩ nhĩpêx o pa. Tã pa mẽ amarĩ mẽ mar xà hkôt ixtÿx kupĩ. Anẽ.

Nhũm ã hamaxp̄er anhÿrja kôt Tĩrtũm mã mex o mex ã harẽnh o xa. Nhũm amarĩ mẽ kuhê xwÿnhjaja mããnẽn mẽmoj ã kot amnhĩ nhĩpêx anhÿrta pumu nẽ tee ri hkukamã hamaxp̄er o ra kãm ma htÿx nẽ. Hãmri nẽ awjanã nẽ ma akupÿm krĩm m̄rar kurê kumrẽx.

Mẽ kot Jejus jaxàr ã mẽ harẽnh

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhũm axtem Juje p̄e Arimatej nhõ xwÿnhja. Arimatejja pika p̄e Ijaew kamã na. Nhũm Jujeja kot amnhĩ to mex jakamã Tĩrtũm kôt amnhĩ nhĩpêx o pa. Jakamã na pre hkwyjê rom Tĩrtũm kot mẽ pahwÿr Jejus mẽnũ xwÿnh ã omu nẽ hkôt hamaxp̄er. Kêp Ijaew nhõ pahi hõ htã hkwyjê hkôt hamaxp̄er kêt nẽ. Jakamã nhũm prem kot Jejus p̄ir ã amÿnê nhũm tee ri harẽnh ma nhũm ja kêp omnuj nẽ. ⁵² Jakamã nhũm Jejus ty nhũm Juje ma pahi Pirat wÿr tẽ nẽ ĩ hã kuwÿ nẽ kãm:

—Pa? E ot pa awÿr tẽ. Kwa inhmã htyk xwÿnhhta gõ pa ma o tẽ nẽ haxà. Anẽ.

⁵³ Hãmri nhũm kuma nẽ kãm kugõ nhũm ma o tẽ nẽ haxà. Kaxyw kupẽxê hõ py nẽ ho hkupu nẽ ma o tẽ nẽ kẽn kre kaprÿ kamã haxà. Mẽ kot kormã kamã mẽnũ jaxàr kêt nhũm mẽ kamã Jejus jaxà. ⁵⁴ Arĩgro p̄e sêsta hã nhũm prem kupĩ nhũm myt xàr o m̄or mẽ nhũm Juje ma o tẽ nẽ haxà. Ijaew kôt xà hã arĩgromnuja wÿr haxà. ⁵⁵ Nhũm Garirej rũm mẽni hkwy kot Jejus kôt pa xwÿnhjaja ma hkôt mra nẽ kot haxàr kãm omu. Mẽ hkuxwaxà ho gregrer kêt rãhã haxàr kãm omu. ⁵⁶ Hãmri nẽ ma akupÿm krĩm mra nẽ kaxyw mẽ hkuxwaxà hkwy ho anẽ.

Tã nhũm apkati nhũm mẽ õ arĩgromnu p̄e sap kator jakamã nhũm mẽ kormã akupÿm hwÿr m̄rar kêt nẽ. Hãmri arĩgro mex jamãr p̄e arĩ hkõkôt o hkrĩ.

24

Jejus akupÿm htĩr jarẽnh

Matêwre 28.1-10; Makre 16.1-8; Juãw 20.1-10

¹ Tã nhũm apkati nhũm tãmĩk. Hãmri nhũm m̄enijaja kwÿhtã kãnhmã hkrĩ nẽ ma akupÿm kẽn kreta wÿr mẽ hkuxwaxà ho mra. ² Hãmri nẽ hwÿr àhtêp o mra nhũm ra hakwakre kahê xà raxta kahê xà hkàx ã xa nhũm mẽ tee ri omu. ³ Hãmri nẽ kẽn kre wÿr agjê nẽ kamã tee ri Jejus japêr no nhũm kamã amrakati. ⁴ Nhũm mẽ tee ri axp̄en pumunh p̄e hkukamã hamaxp̄er.

Hãmri nhũm Tĩrtũm kap̄er o wrÿk xwÿnh wa axkrut nẽ mẽ haêr p̄e mẽ hwÿr kato nẽ wa xa. Wa ê jaka nẽ hirã htÿx kãm wa xa. ⁵ Nhũm mẽ tee ri wa omu nẽ kãm wa uma htÿx nẽ. Nẽ wa umaj hkõn krã ho rôrõk nẽ hkrĩ hpa. Nhũm wa mẽ omu nẽ mẽ kãm:

—Kwa mon ka mẽ ri mẽ htykjê kamã ra akupÿm htĩr xwÿnhhta japêr o ri apa? ⁶ Jar amrakati. Na ra akupÿm htĩr. Kormã Garirej kamã pa ri kot mẽ amã amnhĩ jarẽnh xà hkôt na ra akupÿm htĩr. Mãn ka mẽ arĩ kot ã mẽ amã amnhĩ jarẽnh anhÿrja ã anohtÿx japêr. ⁷ Mẽ kot unẽnũ nẽ pĩ kahpa hã nhõr nhũm htyk nẽ htyk ã apkati axkrunêpxi hãmri nẽ akupÿm htĩr ã kot mẽ amã amnhĩ jarẽnhhta mãn ka mẽ arĩ hã anohtÿx japêr.

⁸ Anhÿr o mẽ kãm kap̄er nhũm mẽ kuma hãmri nẽ ra Jejus kot mẽ kãm ã amnhĩ jarẽnh anhÿrja mã hamaxp̄er kurê kumrẽx. ⁹ Hãmri nẽ awjanã nẽ ma akupÿm krĩm hkĩnh nẽ mra. Nẽ hwÿr p̄oj nẽ mẽ kot Jejus nhÿ hã mẽ ahkre ho mẽ pa xwÿnhjê mã awjarẽ. Mẽ

kêp 11 xwÿnhtajê mē kaxyw hkwyjê mā awjarê. ¹⁰ Mēni kot mē kām ujarēnh xwÿnhtajê nhīxi na pre Marir Matarēn nhūm ja kêp Joanā. Nē Xiakre katorxà Marir òta. Nē kaxyw mēni hōja. Jakamā nhūm mē ma akupÿm Jejus nhÿ hā mē ahkre ho mē pa xwÿnhjê hwÿr mra nē mē kām awjarê. ¹¹ Nom nhūm mē kuma nē ām mē kuma nē htÿx ho amnhī krā hkôt mē kot ri ā harēnh anhÿr ā mē hkamnhīx nē ām mē kuma. ¹² Nhūm Simāw Pêtre hamaxpēr hāmri nē kànhmā xa nē ma kēn kreta wÿr hprôt nē htēm kurê kumrēx. Hāmri nē tee ri kēn kre kaprÿ kamunh o xa nē kamā Jejus kupu xà pix pumu nē tee ri hkukamā hamaxpēr hāmri nē ma akupÿm tē.

Jejus kot Emau hwÿr wa mōr xwÿnh wa hwÿr kator ā harēnh

Makre 16.12-13

¹³ Tā nhūm ra amÿkry ho mō nhūm Jejus kwÿjê hō wa hamēxkrut nē Jerujarē rūm kato nē ma akupÿm wa ò krī pê Emau hwÿr wa mō. Jerujarē rūm Emau hwÿr ahkrānre. ¹⁴ Jakamā nhūm wa hwÿr pry hā axpēn mā tanhmā Jejus jarēnh to ho mō. Kēn kre kamā mē kot haxàr nhūm ra ī pikunorja nhūm wa axpēn mā harēnh o wa mō. Nē tee ri hkukamā hamaxpēr o wa mō. ¹⁵ Hāmri nhūm Jejus tām tē nē wa hā ajēt nē wa hkôt tē. ¹⁶ Nom nhūm wa hprī hā omunh kêt nē. Tÿx ho nhām mēhō hā hkamnhīx nē wa arī axpēn mā harēnh o wa mō. ¹⁷ Hāmri nhūm Jejus hēx rom wa kām:

—Kwa mēmon ka wa axpēn mā harēnh o wa mō? Anē.

Hāmri nhūm wa hkaprī kamā kām harē. ¹⁸ Ihō pê Kroptija kām:

—Kwa xà na ka Jerujarē kamā ri apa htā kamā mē kot tanhmā amnhī nhīpēx toja jarēnh mar kêt nē? Kurūm amōr kēnā na ka ri mēmoj mar kêt nē ri apa. Anē.

¹⁹ Hāmri nhūm wa kām:

—Nà amrakati ixte mēmoj maare hā. Kwa mo na wehe? Kwa war aprī hā inhmā harē pa kuma. Anē.

Hāmri nhūm wa kām:

—Nà mē kot mē ixpē tanhmā Jejus pê Najare nhō xwÿnhta to kēnā. Kêp Tirtūm nhÿ hā kapēr jarēnh o pa xwÿnh na pre. Nē Tirtūm nhÿ hā tanhmā amnhī nhīpēx to ho pa nhūm prem piitā amnhīm mex ā harē. ²⁰ Tā nhūm mē panhō patre krāhtūmjê mē mē panhō pahijaja axtem nē mē kām hā amÿnē. Mē kot pī kahpa hā nhôr nhūm htyk kaxyw mē kām hā amÿnē. ²¹ Pa prem ixtÿx ho kêp Tirtūm kot mē pahwÿr mēnh xwÿnh ā hkamnhīx nē kot Rōm nhō xwÿnhjê pê mē ixpytār ā hkamnhīx tā nhūm prem mē ixpē kupī. Jāā na prem ā hipēx anē nē kupī. Na ra htyk ā apkati axkrunēpxi.

²²⁻²³ —Nē jarāhā kwÿhtā mēni hkwyjaja ma haxàr xà hā kēn kre hwÿr mra nē xep tee kamā hapēr nē omunh kêt nē. Xep ām Tirtūm kapēr o wrÿk xwÿnhja wa ho axkrut nē wa omu nhūm wa xa. Nhūm mē kām ra akupÿm htir ā harē nhūm mē akupÿn mē ixwÿr mra nē mē ijaēr pê mē inhmā harē. ²⁴ Hāmri nhūm mē ixkwÿjaja ma mē hpānhā kēn kreta wÿr mra nhūm ra mē kot harēnh xà hkôt tee ri kamā hapēr nom nhūm kamā amrakati kumrēx. Anē.

²⁵ Hāmri nhūm Jejus amnhī tā wa kuma nē wa kām tanhmā amnhī jarēnh to nē wa kām:

—Hēxta waa nē. Pēr ām mē ate mēmoj mā ajamaxpēr tÿx mex kêt kumrēx. Na pre ra Tirtūm nhÿ hā kapēr jarēnh xwÿnhjaja Tirtūm kapēr ā kagà htūm kamā ā kot amnhī nhīpēx anhÿrja kukamā hprī hā harē nē hā kagà. Mē akukamā mē anhīgētjê mā harē nē hā kagà. Tā ka mē kormā aprī hā mar tÿx kêt nē. ²⁶ Kêt mē anē na Tirtūm kot ām xwÿnhta ty. Tā ra akupÿm htir nē akupÿm kaxkwa hwÿr àpir kaxyw. Kot mē ato amnhīptār kaxyw ra akupÿm hwÿr àpir mā. ²⁷ Amnepēm na pre finat Mojesja tanhmā hkukamā mē anhīgētjê mā harēnh to nē hā kagà. Nē hprī hā harēnh o pa. Nhūm hpānhā Tirtūm nhÿ hā kapēr jarēnh o mē pa xwÿnhjaja ma anē nē mē kām harēnh o pa. Anē.

Nhūm pre ā Jejus wa hkôt hprī hā wa kām amnhī jarēnh anhÿr o tē. Te ho nhām mēhō jarēnh pyrāk nom tām wa kām amnhī jarēnh o wa hkôt tē. No nhūm kormā wa hprī hā kêp Jejus ā omunh kêt nē.

²⁸⁻²⁹ Nhũm ã wa kãm amnhĩ jarēnh anhỹr o mōr rāhã nhũm mẽ ra wa ò krĩ hwỳr hpòx o mō. Nhũm ra kamàtre nhũm Jejus te kot wa rer nẽ nhỹhỹm ma htēm kaxyw pyrāk o amnhĩ nhĩpêx nhũm wa tee ri omu nẽ kãm:

—Kwa xà kot kaj wa ixre nẽ ma tẽ? Ra kamàt o mōr kēnã. Kwa ma wa ixkôt tẽ nẽ wa inhōrkwỹ kamã mãn wa ixri pōj. Anẽ.

Hãmri nhũm wa kuma nẽ ma wa hkôt tẽ. ³⁰ Nẽ mẽ wa òrkwỹ hwỳr pōj nẽ hwỳr agjê. Hãmri nẽ apkur kaxyw hkrĩ nhũm Jejus tãm pãwti py nẽ Tĩrtũm mã harẽ nẽ hpãnhã ho axkjê nẽ wa kãm kugõ. ³¹ Hãmri nhũm wa atã kēp Jejus ã omunh kurê kumrêx. Jao nhũm wa kēp akunok nhũm wa tee yr xà kamã hapêr nhũm hkaprỹ mex nẽ xa. ³² Hãmri nhũm wa tee ri axpēn pumu nẽ ri hkukamã hamaxpêr nẽ axpēn mã:

—Hêxta waa nẽ. Xep tãm na. Tãm na pahkôt mō nẽ pry hã hprĩ hã pamã Tĩrtũm kapêr ã kagà jarẽ pu hkôt pahkĩnh nẽ mar o mō. Hêxta waa nẽ. Xep tãm na. Anẽ.

³³⁻³⁵ Hãmri nẽ wa kànhmã xa nẽ kato nẽ ujanãr kurê kumrêx. Hãmri nẽ ma akupỹm Jerujarẽ hwỳr wa hkwỳjê hwỳr tẽ. Nẽ mẽ hwỳr pōj nẽ axà. Nhũm Jejus nhỹ hã mẽ ahkre ho mẽ pa xwýnh pẽ 11jaja ra axpēn wỳr akuprõ nẽ hkrĩ. Mẽ hkwỳjê mẽ axpēn wỳr akuprõ nẽ axpēn mã tanhmã Jejus jarēnh to ho hkrĩ. Hãmri nhũm wa mẽ hwỳr axà nhũm mẽ wa omu nẽ wa kãm:

—Kwa na xep ra Jejus akupỹm htĩr nẽ Simãw Pêtre hwỳr kato. Anẽ.

Hãmri nhũm wa mẽ kuma nẽ mẽ kãm:

—Tỳ na akupỹm htĩr kēnã. Na pa wa ijaxwỳja ham omu. Na pry hã wa ixtã ajêt nẽ ma wa ixkôt mō nẽ wa inhōrkwỹ kamã pōj. Hãmri pa mẽ ixàpkur kaxyw ixkrĩ nhũm pãwti py nẽ Tĩrtũm mã harẽ nẽ ho axkjê nẽ wa inhmã kugõ pa wa ixprĩ hã kēp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anẽ.

Jejus kot hkwỳjê piitã hwỳr kator ã harēnh

Matêwre 28.16-17; Makre 16.14; Juãw 20.19-23

³⁶ Nhũm mẽ kormã axpēn mã Jejus jarēnh o hkrĩ rôm nhũm tãm nhỹhỹnh mẽ hwỳr axà nẽ xa. Mẽ haêr pẽ mẽ hwỳr nhỹhỹnh axà nẽ mẽ kãm:

—Pa? Xàn ka mẽ arĩ akrĩ? Anẽ.

³⁷ Hãmri nhũm mẽ amnhĩ jaêr pẽ omunh jao kànhmã hakry hpar o mra. Jao hakryk kãm ma htỳx kãm omunh o hkrĩ. ³⁸ Hãmri nhũm mẽ kãm:

—Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhĩx nẽ amã ixpyma hkêt nẽ. ³⁹ Na pa akupỹn inhĩ ho mẽ awỳr ixkato nẽ xa. Ga mẽ inhĩkra kamã prek tatak xàja pumu. Nẽ ixpar kãm omu. Kwa mẽ amã ixpyma hkêt nẽ. E mẽ mãmri mra nẽ anhĩkra ho ixkupê. Kēp apu ixkarõ hpix ronhỹx ka mẽ inhĩ kupēnh kêt nẽ. Mo mẽhkarõja ĩ? Nà na pa akupỹm ixtĩr nẽ inhĩ ho mẽ awỳr ixkato. Anẽ.

⁴⁰ Hãmri nẽ mẽ kãm amnhĩ nhĩhkra hpê nẽ mẽ kãm amnhĩ par pẽ. ⁴¹ Tã nom nhũm mẽ arĩ akryk omunh o hkrĩ. Mẽ kot omunh nẽ hkĩnh tã tee ri omunh o hkrĩ. Hãmri nhũm tee ri ja hã mẽ omu nẽ mẽ kãm:

—E kwa mẽ inhmã mẽmoj japêr pa kukrê. Anẽ.

⁴² Hãmri nhũm mẽ kãm tep gôj kãm ãmta gõ ⁴³ nhũm kupy nẽ hkur o nhỹ nhũm mẽ arĩ hã omunh o hkrĩ. Jao ra akupỹm htĩr ã omunh kurê kumrêx.

Jejus akupỹm nojarêt nẽ hkwỳjê mã mẽmoj tã karõ

Matêwre 28.18-20; Makre 16.15-18; mãñnēn Atre 1.6-8

⁴⁴⁻⁴⁵ Hãmri nhũm Jejus hprĩ hã mẽ kãm Tĩrtũm kapêr ã kagà htũm kot hkukamã harēnh ã amnhĩ jarẽ nẽ mẽ kãm:

—Nà kormã ixyk kêt ri na pa pre ixprĩ hã mẽ amã amnhĩ kukamã amnhĩ jarẽ. Tĩrtũm kapêr ã kagà htũm kot tanhmã mẽ kot inhĩpêx to hkukamã ijarēnhja. Na pre finat Mojes Tĩrtũm nhỹ hã ixkukamã tanhmã ijarēnh to. Nẽ Tĩrtũm nhỹ hã kapêr jarēnh o mẽ pa xwýnhjaja Mojes mỳr pẽ haxwỳja ixkukamã tanhmã ijarēnh to. Nẽ Tĩrtũm mex o mex ã mẽ grer ã kagà xwýnhjaja haxwỳja ixkukamã tanhmã ijarēnh to. Jajê piitã na prem Tĩrtũm kapêr ã kagà htũm kamã ixkukamã ijarẽ. ⁴⁶ Nẽ ijarēnh o:

Tĩrtũm kot mẽ pakaxyw ãm xwỳnh pẽ Krisja koja nhỹrmã ty. Nẽ htyk o apkati axkrunẽpxi nẽ akupỹm htĩr.

Anhỹr o mẽ kot ijarẽnh. Tã pa ra mẽ kot ixkukamã ijarẽnh xà hkõt ã mẽ anẽ amnhĩ nhĩpẽx anẽ.

⁴⁷ —No ãm Tĩrtũm kapẽr ã kagà htũm kot papxpix ixkukamã ijarẽnh kêt. Kamã mããnẽn mẽ kajaja tanhmã mẽ akukamã mẽ ajarẽnh kute. Mẽ apẽ ixkõt amnhĩ xunhwỳr xwỳnhjaja ixwakre kamã tanhmã mẽ ate inhmã amnhĩ nhĩpẽx to ho apa hkukamã tanhmã mẽ ajarẽnh kute. Nẽ mẽ ajarẽnh kot:

E mẽ ate ixkõt amnhĩ xunhwỳr xwỳnhjaja. Kêr ka mẽ ma pika piitã hkõt mẽ kãm Tĩrtũm kot mẽ awỳr mẽnh xwỳnhhta jarẽnh o ri mẽ hkõt apa. Mẽ kot mẽ amar nẽ amnhĩ tomnuj kaga nẽ Tĩrtũm kõt amnhĩ xunhwỳr kaxyw. Kêr kê Tĩrtũm ja hã mẽ omu nẽ amnhĩ katut kõt mẽ kot amnhĩ tomnuj rẽnh pa. E kêr ka mẽ ma krĩ piitã hkõt mẽ kãm ã ja jarẽnh anhỹr o ri mẽ hkõt apa. Krĩ pẽ Jerujarẽ kumrẽx kãm hãmri nẽ rĩ kormã pu hã krĩ kuhẽ xwỳnh piitã hkõt ajapõj nẽ mẽ kãm harẽnh o ri apa. Anẽ.

Ã Tĩrtũm kapẽr ã kagà htũm kot mẽ akukamã mẽ ajarẽnh kot anhỹr. ⁴⁸ Tã kêr ka mẽ ã mẽ kãm tanhmã ijarẽnh to ho ri apa anẽ. ⁴⁹ No ãm kormã. Kêr paj ma akupỹm kaxkwa hwỳr api hãmri nẽ amnhĩ pãnhã mẽ awỳr Tĩrtũm Karõ rẽ mãn. Tĩrtũm kot ixte amnhĩ nhĩpẽx ã ijarẽnh xà hkõt kot paj amnhĩ pãnhã mẽ awỳr kurẽ. Tã kêr ka mẽ kormã krĩ ja kamã kutẽp apa. Kêr kê mẽ awỳr wrỳ nẽ mẽ amã agjẽ ka mẽ rĩ kormã anhrã nẽ ma ã hã mẽ kãm ijarẽnh o ri mẽ hkõt apa. Anẽ.

Jejus kot akupỹm kaxkwa hwỳr àpir ã harẽnh

Makre 16.19-20; mããnẽn Atre 1.9-11

⁵⁰ Tã nhũm Jejus Jerujarẽ rũm hkõt mẽ pa ho pa xwỳnhjẽ kator nẽ ma krĩ pẽ Petãn wỳr mẽ o mõi. Nẽ kormã hwỳr mẽ o mõi ri nhỹri mẽ o xa nẽ kãnhmã ãhkra pẽ nẽ mẽ ho Tĩrtũm wỳ. ⁵¹ ã mẽ ho hwỳr anhỹrja rôm nhũm Tĩrtũm amnhĩ wỳr ho àpir o mõi nhũm mẽ noo mã ma akupỹm tẽn api. ⁵² Hãmri nhũm mẽ kãm mex o mex ã harẽnh pẽ ma akupỹm àpir kãm omunh o kuhẽ. Nhũm ma tẽn mẽ mẽ kêp kakrãm axà nẽ mẽ kêp akunok. Hãmri nhũm mẽ awjanã nẽ ma akupỹm Jerujarẽ hwỳr hkĩnh nẽ pa. ⁵³ Hãmri nẽ apkati mẽ Tĩrtũm mã amnhĩ jarẽnh xà hã ixkre hwỳr agjẽ nẽ kamã Tĩrtũm mã mex o mex ã harẽnh o hkrĩ rãhã nẽ.

Tã ãm ja pix ixkrãmnhwỳ Teopre. Ixpẽ Rukre na pa awỳr kagàja nhĩpẽx nẽ kamã Jejus kot tanhmã amnhĩ nhĩpẽx to hã harẽ nẽ hã kagà nẽ awỳr kumẽ.

Juāw

Juāw kot tanhmā Jesus kot amnhĩ nhĩpêx to ho pa hã kagà

Juāw na pre kagàja nhĩpêx. Na pre mǎānēn Wam Juāw nē Sikūn Juāw nē Hapuhā Juāw nē Apokarip nhĩpêx. Juāw Paxis kêt axtem Juāw ō. Nē Jesus kôt mē pa ho mē pa xwỳnhjê hō na pre. Nē ŷ hã mē ahkre ho pa xwỳnhjê hō na pre. Nom kormā ā amnhĩ nhĩpêx anhỹr o pa hkêt ri na pre kêt tep kanhêr xwỳnh. Nē kêt Jesus kràmnhwỳ mex na pre. Jakamā na pre kagàja nhĩpêx nē kamā Jesus kot tanhmā amnhĩ nhĩpêx hã harē nē hã kagà. Nē tanhmā kapêr to hã kagà.

Na pre Jesus kêt Tĩrtūm Kra hã harē nē hã kagà. Nē ām pix kukwak ri Tĩrtūm wa kuri mē pahĩr tūm nē mē papa ho mē papa hã harē nē hã kagà. Ā na pre Juāwja mē pamā Jejus jarē nē hã kagà anē.

Jejus te kot Tĩrtūm pyrāk ā harēnh

Matêwre 1.23; Juāw 8.12, 8.58, 10.30, 20.28; mǎānēn Atre 10.36; Sikūn Korĩt 4.4; Piriapos 2.6-11; Korosē 1.13-17, 2.9; Xitre 2.13; Eprêw 1.1-4; Wam Juāw 1.1-4, 5.20; Apokarip 1.17-18

¹ Amnepê mǎ kormā mēmoj kêt ri nhūm kot Tĩrtūm kapêr o amnhĩrĩt xwỳnhja Tĩrtūm kôt pa ho pa. Te kêt urāk nē pa. Wa kot amnhĩ nhĩpêxja ām tipxi. Nē wa āhpumunh ām tipxi. Nē wa hkarō mǎānēn ām tipxi. Ām wa tipxi rāhā nē pa ho pa. ² Kormā mēmoj kêt ri na pre Tĩrtūm kapêr o amnhĩrĩt xwỳnhhta Tĩrtūm kôt ri pa ho pa. ³ Nē Tĩrtūm nhỹ hã na pre mēmoj piitā hã apê nē ho kato. Jao pyka ho kato nē kaxkwa ho kato nē gō xujanār o kato. Nē kamā mēmoj piitā Tĩrtūm nhỹ hã ho kator pa. Kop apu mēmoj to kator kêt ronhỹx mēmoj amrakati kumrêx.

⁴ Nē Tĩrtūm o amnhĩrĩt xwỳnhhta pix kukwak ri na hte mēmoj piitā htĩr nē pa. Nē ām pix kukwak ri na htem Tĩrtūm ri htĩr tūm nē pa ho pa. Nē te myyti kot mē pamā mēmoj piitā hirā ho pa pu mē kukwak ri mēmoj piitā omunh mexja pyrā nē na pre hte mē pahpiitā mē pamā mē pahte amnhĩ nhĩpêx nyw nē mē pajamaxpêr nyw o amnhĩrĩt pu mē pahprĩ hã mar mex nē. ⁵ Ja kaxyw na pre wrỳ nē ri mē kām Tĩrtūm kapêr jarēnh o ri mē hkôt pa. Jao mē kot amnhĩ nhĩpêx nyw jarē nhūm mē kot amnhĩ tomnuj xwỳnhjaja tee ri kuma nē kām mar prām kêt nē. Nē tee ri kām kapêr o hapêx prām kaprỳ.

Juāw Paxis kumrêx kot tanhmā Jesus jarēnh to hã harēnh

Matêwre 3.1-3; Makre 1.1-4; Rukre 3.2-6

⁶ Tā nhūm kormā Jejus mē kām kapêr o pa hkêt ri nhūm Juāw Paxis kumrêx mō nē hkukamā Tĩrtūm nhỹ hã mē kām tanhmā harēnh to ho pa. ⁷ Mē kām mē kot amnhĩ nhĩpêx nyw nhōr xwỳnh pê Jejus Kris kukamā mē kām harēnh o ri mē hkôt pa. Mē kot mar nē amnhĩ kaxyw Jejus kôt hamaxpêr kaxyw. ⁸ No Juāw Paxisja na pre hte mē kām mē kot amnhĩ nhĩpêx nyw nhōr o pa hkêt nē. Na pre ām kot mē kām ōr xwỳnhhta kukamā mē kām harēnh o pa. ⁹ Jakamā na pre hte mē kām harēnh o ri pa nē mē kām harēnh o:

—E ot pa mē amā mēhō jarēnh o ri ixpa. Kot mē pamā mē pahte amnhĩ nhĩpêx nyw nhōr xwỳnhhta. Koja tokyx mē pakamā pōj pu mē omu. Koja pōj nē mē piitā mē kām Tĩrtūm kapêr jarēnh o ri pa. Mē pahte pahprĩ hã mar mex kaxyw. Anē.

Tĩrtūm kot mē ho hkra hprām xwỳnhjê jarēnh

Rômān 8.14; Karatas 3.26; Epes 1.5

¹⁰ Tā nhūm Jejus man kot mēmoj piitā ho kator xwỳnhhta wỳr wrỳ nē mē hkôt ri pa. No nhūm mē kot kêt mēmoj piitā ho kator xwỳnh ā omunh kêt jakamā na prem kapêr ma nē ām kuma nē amnhĩ kaxyw hkôt hamaxpêr kêt nē. ¹¹ Na pre wrỳ nē mē pakamā ĩ ho kato. Kêt mē pahpiitā mē pahto kator xwỳnh tā nhūm mē ohtō nē omu nē ām omu nē hkôt amnhĩ nhĩpêx kêt nē. ¹² Na prem ām grêre nē kuma nē amnhĩ kaxyw hkôt hamaxpêr nē hkôt amnhĩ xunhwỳ. Hāmri nhūm amnhĩ tā mē omu nē mē kām:

—E nà ãm hãmri. Ra mẽ ate amnhĩ kaxyw ixkôt ajamxpêr nê ixkôt amnhĩ xunhwỳr jakamã na ka mẽ ixkukwak ri apê Tĩrtũm kraa. Anê.

¹³ Na htem ã kêp Tĩrtũm kra hprãm xaj Jejus kôt amnhĩ xunhwỳr anê. No na htem mẽ katorxà nhõxà hkre rũm hapõx kôt kêp Tĩrtũm kra hkêt nê. Rỳ amnhĩ krã hkôt tanhmã amnhĩ nhĩpêx to kukwak ri kêp hkra hkêt nê. ãm Tĩrtũm tãm kot mẽ ho hkra pix kukwak ri na htem kêp hkra.

Jejus wrỳk nê ã ho kator ã harênh

Matêwre 1.20; mããnên Rõmãn 1.2-4; Piripos 2.6-7; Eprêw 2.9, 4.15; Wam Juãw 4.2

¹⁴ Jakamã na pre Tĩrtũm o amnhĩrit xwỳnhta mẽ pahwỳr wrỳ nê mẽ pakamã ã ho kato nê mẽ pakamã pa. Kêp Tĩrtũm Kra hã pixi mex na pre. Nê kot amnhĩ nhĩpêxja te Tĩrtũm kot amnhĩ nhĩpêx pyræk. Uræk nê mex o mex. Nê uræk nê mẽ pakutã nojarêr xwỳnh. Na pre hte katat kôt Tĩrtũm kapêr jarênh o ri mẽ hkôt pa. Pa prem kuma nê mex o mex ã omu.

¹⁵ Nhũm Juãw Paxis na pre hkukamã mẽ kãm harênh o ri pa nê mẽ kãm:

—E ra ixte mẽ amã harênh o ri ixpa xwỳnhta na ra põi. Te pa ixte wa nê ixkator pyræk nom amnepê mã kormã ixkêt ri nhũm htĩr rãhã nê pa ho pa. Ham ã ho kator tã kêp Tĩrtũm Kra jakamã uræk nê rãhã ho rãhã hã pa xwỳnh na. Jakamã kot amnhĩ to rax o kot ijakrenh par. Anê.

¹⁶ Nê kêp mẽ pakutã nojarêr rãhã nê pa ho pa xwỳnh jakamã na hte mẽ pahto mex rãhã pu mẽ kukwak ri pamex nê ri papa ho papa.

¹⁷ Na pre finat Mojesja mẽ panhĩgêjtê mã Tĩrtũm kapêr jarênh o ri mẽ hkôt pa nê mẽ kãm:

—Na pre Tĩrtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xà hkôt ã amnhĩ nhĩpêx anhỳr o papa nê ra tãm amnhĩ nhĩpêx o papa. Anê.

Nhũm pre Mojesja ã mẽ kãm kapêr o pa anê. Hãmri nhũm mẽ kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprỳ. Jakamã nhũm hpãnhã Jejus Krisja wrỳ nê mẽ pamã kapêr õ ho kapêr o pa nê mẽ pamã:

—E mẽ ate Tĩrtũm kôt amnhĩ nhĩpêx o apa hkêt tã nhũm arĩ kãm mẽ ajapê nê. Nê kãm mẽ ato mex prãm. Jakamã kot kaj mẽ amnhĩ to awỳ nhũm tanhmã mẽ akrã hto ka mẽ ra tãm ri amnhĩ nhĩpêx o apa. ãm hãmri na pa ã mẽ amã ja jarênh anê.

Anhỳr o mẽ pamã Tĩrtũm kapêr jarênh o pa. Tĩrtũm kapêr na mex o mex.

¹⁸ Nê aa mẽ pahtõ mẽ pahte pano ho Tĩrtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nê te kot Hipêêxàja pyræk jakamã na pre wrỳ nê hprĩ hã tanhmã kute hã mẽ pamã harênh o pa. Jakamã na pu mẽ ra pahpiitã Tĩrtũm kot amnhĩ nhĩpêx ã omu nê mar mex nê.

Juãw Paxis kot mẽ kãm Jejus jarênh o pa hã harênh

Matêwre 3.1-12; Makre 1.1-8; Rukre 3.15-17; mããnên Atre 19.4

¹⁹⁻²⁸ Na pre Juãw Paxis ma hkwyjê hkôt mẽ kãm Jejus jarênh o pa nhũm mẽ hkwyjaja kuma nê amnhĩ kaxyw Jejus kôt hamxpêr nê hkôt amnhĩ xunhwỳ. Hãmri nhũm Juãw Paxis ja hã mẽ omu nê Tĩrtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harênh ma nê ma hwỳr hkwyjê rê. Mẽ kot tanhmã hkujêr to nhũm kot mẽ kãm tanhmã amnhĩ jarênh to kaxyw. Jakamã nhũm mẽõ patre hkwyjê mẽ Tĩrtũm mã amnhĩ jarênh xà hã ixkre kamã mẽ ho ajuta xwỳnh kwỳjê mẽ Parijew nhõ xwỳnh kwỳjê mẽ nhũm mẽ ma hwỳr mra. Juãw Paxis wỳr mra nê omu nê kãm:

—Pa. E ot pa mẽ awỳr mra. Kwa mẽ inhmã amnhĩ jarê. Apê mẽ atõ na ka we? Xà ka na apê Tĩrtũm kot mẽ ixkaxyw axãm mã xwỳnhta na ka nà? Xà ka na pa htem amnhĩ wỳr akamã ijamak o ixpa? Anê.

Hãmri nhũm mẽ kuma nê mẽ kãm: “Nà pa hkêt.” Anê hãmri nhũm mẽ kãm:

—Tõ mãn xep apê amnepê mã Tĩrtũm nhỹ hã kapêr jarênh xwỳnh pê finat Erisja. Hã na ka tanhmã amnhĩ to nê akupỳm atĩr nê mẽ ixkôt apa nà? Anê.

Hãmri nhũm mẽ kãm:

—Nà ixpê Eris kêt. Anê.

Hãmri nhũm mẽ kãm:

—Tô măn xep apê finat Mojes kot mẽ kãm harênh o pa xwỳnhhta na ka nà? Anê.

Hãmri nhũm mẽ kuma nê kê axte mẽ kãm:

—Nà ixpê tãm kêt. Anê.

Hãmri nhũm mẽ tee ri kot ã amnhĩ tã aprãr anhỹrja ma nê kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa nà akatàt kôt mẽ inhmã amnhĩ jarê. Pa mẽ ama nê ma akupỹm mra nê mẽ kot awỳr mẽ ixrênh xwỳnhjê mã tanhmã ajarênh to. Tanhmã na ka hte mẽ kãm amnhĩ jarênh to ho ri apa? E kwa mẽ inhmã amnhĩ jarê pa mẽ ama. Anê.

Hãmri nhũm tã hprĩ hã mẽ kãm amnhĩ jarê. Amnepê mã mẽ hkukamã Tĩrtũm nhỹ hã kapêr jarênh xwỳnh pê finat Ijais kot hkukamã tanhmã harênh to nê hã kagà xà hkôt nhũm mẽ kãm amnhĩ jarê nê mẽ kãm:

—Tôe. Nà kot paj ixprĩ hã mẽ amã amnhĩ jarê ka mẽ inhma. Amnepêm Tĩrtũm kapêr jarênh xwỳnhjê hõ pê finat Ijaisja na pre hte mẽ kãm mễhõ hkukamã harênh o ri pa. Mễhõ kot mẽ panhõ Pahihti hkukamã htêm nê kapôt ã kutêp mẽ kãm harênh o pa xwỳnhhta nhũm pre hkukamã harênh o ri pa. Nê mẽ kãm harênh o:

Koja nhỹrmã mễhõja kapôt ã mơn pøj nê mẽ kãm tanhmã ujarênh to ho ri pa. Nê mẽ kãm ujarênh o: “E mẽ inhma. Koja Tĩrtũm tokyx mẽ pahwỳr mẽ panhõ Pahihti mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho mẽ kot mễhõ kutêp pry ho mex pyrãk o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nê tãm axpên nhĩpêx o ri apa. Pahihtita kutêp.”

—Anhỹr o na pre hte finat Ijaisja kot Pahihti hkukamã harênh o ri pa xwỳnhhta kukamã harênh anê. Tã paa. Pa na pre Ijaisja ã ixkukamã ijarênh anhỹr o pa. Pa na pa hte ã Pahihti kutêp mẽ kãm harênh o ri ixpa anê. Tã ã ixte harênh anhỹr xwỳnhhta na ra mẽ pakamã pa ka mẽ kormã ja hã omunh kêt nê. Kukamã na pa hte mẽ piitã mẽ kot hkôt amnhĩ xunhwỳr ã mẽ omunh kaxyw gô pix o mẽ hkrã kumrãr o ri mẽ hkôt ixpa. Nom na pre ra mẽ pahwỳr Tĩrtũm kot mẽ pakaxyw ãm xwỳnhhta tãm mẽ pahwỳr wrỳ. Àhpumunh tỳx o kot ijakrenh jakamã na pa hte ãm kukwak ri ixpa nê amnhĩ tã hã ixpijaàm o ri ixpa. Anê.

Juãw Paxis kot mẽ kãm Jejus jahkre hã harênh

Matêwre 3.11; Makre 1.10; Rukre 3.22

²⁹ Tã nhũm apkati nhũm Juãw Paxis amnhĩ wỳr Jejus pumu nê mẽ kot mar o kuhê xwỳnhjê mã ihkra ho ahkre nê mẽ kãm:

—E. Oněj Tĩrtũm kot mẽ pakaxyw ãm xwỳnhhta tẽ. Mễ pahpê Ijaew na pu htem xatã pahte amnhĩ tomnuj pãnhã amnhĩrer kaxyw Tĩrtũm mã pahkrit ôwêhti hkra nyw kwỳ hpa nê ho amnhĩ pãnhã kãm amnhĩrer o papa. No kêt htêm něj koja nhỹrmã kãm mẽ pahpiitã mẽ pahte amnhĩ tomnuj pãnhã amnhĩrer pa. ³⁰ Na pa pre ra mẽ amã harênh o: “Te pa ixte wa nê ixkator nê ixtĩr nê ixpa pyrãk. Nom amnepêm kormã ixkêt ri na pre htĩr rãhã nê pa ho pa. Nê ã ho wrỳk nê jar kator tã kêp Tĩrtũm Kra jakamã urãk nê rãhã nê pa ho pa xwỳnh na. Jakamã kot amnhĩ to rax o kot ijakrenh par.” Anhỹr o pa pre mẽ amã harênh o ri ixpa ka prem inhma.

³¹ —Ixte mẽ amã ã harênh anhỹr tã ijaxwỳja kormã ixte kêp Tĩrtũm Kra hã omunh kêt nê ãm hkukamã Tĩrtũm nhỹ hã mẽ amã ã harênh anhỹr o ri ixpa. Nê hkukamã Tĩrtũm mã mẽ akrã kumrãr o ri ixpa. Tã na pa kêp Tĩrtũm Kra hã omu nê ã mẽ amã ahkre anê ka mẽ omu. Anê.

³²⁻³³ Nhũm pre ã Juãw Paxis mẽ kãm Jejus jahkre anê nê mẽ kãm:

—Nà Tĩrtũm na pre ixte mẽ akrã kumrãr o ixpa kaxyw inhmã hã karõ. Tã na inhmã kot mẽ pakaxyw ãm xwỳnhhta o amnhĩrit nê inhmã harênh o: “Koja nhỹrmã Ixkarõja mễhõ hwỳr wrỳ nê kuri arĩk. Ka ja hã omu nê kêp Ixkra hã omunh kurê kumrêx. Koja amnhĩ xô ri amnhĩ pyrã nê mẽ kãm Ixkarõ nhõr o pa nhũm mẽ hkarõ mã agjê.” Anhỹr o inhmã

harê. Tã na pa ra omu. Na pre Tirtũm Karõ kaxkwa rũm te tuuti pyrã nê hwÿr wrÿk o tẽ nê ìkre hã xa. ³⁴ Pa ã kot hipêx anhÿr ã omu nê kêp Tirtũm Kra hã omunh kurê kumrêx. Jakamã na pa ã mẽ amã ahkre nê mẽ amã harênh anê. Anê.

Juãw Paxis kôt pa xwÿnh wa kot Jejus kôt pa hã wa harênh

Atre 19.4

³⁵ Tã nhũm apkati nhũm Juãw Paxis axte Jejus pumu. Kot hkôt ri pa ho pa xwÿnh mẽ wa nhÿri xa nê omunh o xa. ³⁶ Nhũm ra mẽ hãnh tẽ nhũm Juãw Paxis omu nê hkôt ri pa xwÿnh wa kãm:

—E onêj Tirtũm kot mẽ pakaxyw ãm xwÿnh ta tẽ. Nêj koja mẽ pahte amnhĩ tomnuj pãnhã amnhĩre. Anê.

³⁷ Hãmri nhũm wa kuma nê omu nê ma hkôt tẽ nê hã ajêt. ³⁸ Nhũm wa omu nê wa kãm: “Pa mo na?” Anê nhũm wa kot kêp mẽ ahkre xwÿnh ã omunh jakamã kãm:

—Nà wa ixte ma akôt ixtẽm nê nhÿri anhõrkwÿ pumunh mã na pa wa akôt tẽ. Anê.

³⁹ Hãmri nhũm wa kãm:

—Tõe. Nà wa kam nê rĩ ma ixkôt tẽ. Anê.

Hãmri nhũm wa kuma nê ma hkôt wa tẽ nê õrkwÿ hwÿr pøj nhũm ra amÿkry nhũm wa hkôt axã nê kuri ÿr o kamãt hãmri nê kato nê ma akupÿm tẽ. ⁴⁰ Kôt htẽm xwÿnhjê hõta na pre kêp Andre. Simãw Pêtre htõ na pre. Nê kaxyw hõja. Wa kumã na pre Juãw Paxis Jejus jahkre nê harê nhũm wa ma hkôt tẽ. Tã wa ra akupÿm wa tẽ. ⁴¹ Hãmri nhũm Andreja htõ Simãw wÿr tẽ nê kãm:

—Kwa na pa wa jarãhã Tirtũm kot mẽ pakaxyw ãm xwÿnh ta pumu. Ma pu hwÿr ka wa ixwar ano ho omu nã. Anê.

Ijaew kapêr kãm “Tirtũm kot mẽ pakaxyw ãm xwÿnh” anhÿrja te kot Gres kapêr kãm “Kris” anhÿr jarênh pyrãk. Ijaew na prem ã Jejus jarênh anê nê harênh o: “Tirtũm kot mẽ pakaxyw ãm xwÿnh.” Anhÿr o harê. ⁴² Jakamã nhũm ã Andreja htõ mã harênh anê nê ma akupÿm hwÿr o tẽ. Nê wa hwÿr pøj nhũm wa omu. Wa kêp Juãw kra hã wa omu hãmri nê Simãw mã kapêr nê kãm:

—Pa Simãw. Nà apê Simãw tã kot paj axte atã anhixi hõ mẽ. Kot kaj mããnẽn apê Septi. Anê.

Mẽ pakapêr kãm Septija te kêp “kẽn” jarênh pyrãk. No Gres kapêr kãm te kêp “Pêtre” jarênh pyrãk. No Ijaew kapêr kãm kêp “Septi.” Jakamã nhũm pre Jejus ã Simãw Pêtre hã hixi mẽnh anê.

Jejus kot amnhĩ kôt Firipti mẽ Natãnaew wa hwÿr ã harênh

⁴³⁻⁴⁴ Tã nhũm apkati nhũm ra Jejus pyka pê Garirej wÿr nojarêt nê nhÿri Firipti pumu. Firiptija Andre mẽ Simãw Pêtre wa urãk nê krĩ pê Pesêj nhõ xwÿnh na pre. Jakamã nhũm Jejus nhÿri omu nê amnhĩ kôt kuwÿ nê kãm:

—E kwa ma ri ixkôt apa ho apa. Anê.

⁴⁵ Hãmri nhũm kuma nê ma tẽ nê nhÿri Natãnaew pumu nhũm nhÿri pĩ hpàr parpê nhÿ nhũm omu nê kãm:

—Kwa na pa jarãhã finat Mojes kot amnepêm mẽhõ hã kagã xwÿnh ta pumu. Tirtũm kot mẽ pakaxyw ãm xwÿnh ta na. Tirtũm nhÿ hã kapêr jarênh o mẽ pa xwÿnhjaja kot hkukamã harênh nê hã kagã xwÿnh ta. Kêp Najare nhõ xwÿnh nê mããnẽn kêp finat Juje hkra. E kwa tokyx pu hwÿr ka ixkuxwar ano ho omu. Anê.

⁴⁶ Hãmri nhũm tee ri kot tanhmã harênh toja ma nê kãm:

—Tk. Kokÿ. Najare nhõ xwÿnh piitã kot amnhĩ to mexti hã kot kêt we hõ kêp Tirtũm kot mẽ pakaxyw ãm xwÿnh. Anê.

Hãmri nhũm kãm:

—Kwa nã ã akapêr anhÿr kêt nê. Ma ixkôt tẽ nê ixpyrà nê ano ho omu mãn. Nê rĩ ã ri akapêr anê. Anê.

Hãmri nhũm kuma nê ma hkôt tẽ. ⁴⁷ Hãmri nhũm Jejus amnhĩ wÿr wa omu nê kuri mẽ kuhê xwÿnhjê mã Natãnaew jarênh kurê kumrêx nê harênh o:

—E oněj Ijaew òja mẽ pahwỳr hpòx o tẽ. ãm hãmri na hte tãm amnhĩ nhĩpêx o pa. Na hte higêt finat Jako kurom hêx rom ri tanhmã mẽ kãm amnhĩ to hêx to ho pa hkêt nẽ. Na hte ãm kapêr mex pix o ri kapêr o pa. Anẽ.

⁴⁸ Hãmri nhũm tee ri amnhĩ tã kuma nẽ kãm:

—Kwa mẽhõ na pre ã amã ijarênh anẽ? Aa ixte nhỹri apumunh kêt kumrêx tã ka ri ãm hãmri ã ijarênh anẽ. Anẽ.

Hãmri nhũm kãm:

—Nà mẽhõ kot tanhmã inhmã ajarênh to hkêt. ãm pa na pa hte inhno ho apumunh o ixpa. Kormã Firipti kot awỳr htẽm nẽ amã ijarênh kêt ri pa ra ixprĩ hã inhno ho apumu. Na ka kormã pĩta parpê nhỹ pa apumu. Anẽ.

⁴⁹ Hãmri nhũm tee ri kot hprĩ hã harênh ã amnhĩ tã kuma nẽ kãm:

—Kwa mẽ ijahkre xwỳnh. Pêr ãm hãmri apê Tĩrtũm Kra kumrêx jakamã na ka ã ijarênh anẽ. Xep ka na mẽ ixte amnhĩ wỳr akãm ijamak o ixpa xwỳnhhta na ka. Nà ka na apê mẽ ixpê Ijaew nhõ Pahшти. Anẽ.

⁵⁰ Hãmri nhũm Jejus kuma nẽ kãm:

—Nà ãm hãmri na ka ixte pĩ hpar pê apumunh ã ajarênhja ma nẽ hkôt pix mã ixpê Tĩrtũm Kra hã ixpumu. Tã kot kaj ja nhĩrõ pê axte mẽmoj mex o kot ja jakrenh pumu. ⁵¹ Koja nhỹrmã kaxkwa axkjê nhũm Tĩrtũm kapêr o mẽ wryk xwỳnhjaja kurũm axpên japa ka mẽ omu. Finat Jako pyrã nẽ mẽ omu. Ixte Tĩrtũm kot mẽ akaxyw ixãm xwỳnh wỳr koja mẽ ã wryk nẽ amnhĩ nhĩpêx anẽ ka ja hã mẽ omu. Kwa jam ajamaxpêr tỳx rãhã ho apa. Anẽ.

2

Jejus kot gô ho mẽ kãm wĩhti nhĩpêx ã harênh

¹ Tã nhũm apkati axkrut nẽ hapêx nhũm Jejus arĩ Garirej kamã pa. Nhũm krĩ pê Kanã kamã axpên mã wahõj wa rer kaxyw nhũm Jejus katorxà ma mẽ hwỳr mõ. ² Hãmri nhũm mẽ amnhĩ wỳr Jejus mẽ hkôt ri mẽ ixpa xwỳnhjê wỳ pa mẽ ijaxwỳja ma mẽ hwỳr mõ nẽ ra mẽ hwỳr põj. ³ Hãmri nẽ mẽ hkôt wa hã ixkĩnh nẽ apku nẽ wĩhti hkwy ho ixkõm o ixkrĩ. Tã nhũm ra wĩhti mẽ kêp hapêx nhũm Jejus katorxàja harênh ma nẽ Jejus mã harẽ nẽ kãm:

—Xê Jejus. Na xep ra mẽ kêp wĩhti hapêx pa. Xàt ka tanhmã mẽ ho ajuta hto mẽ? Anẽ.

⁴ Hãmri nhũm kãm:

—Tõe. Kwa tee ri ajamaxpêr kêt nẽ. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwỳnh ã pa kormã amnhĩ to amnhĩrit kêt nẽ. Anẽ.

⁵ Hãmri nhũm katorxà kuma nẽ mẽ kãm mẽ ãpênh xwỳnhjê hwỳr tẽ nẽ mẽ kãm:

—An koja Jejus mẽ awỳr tẽ nẽ tanhmã mẽ amã mẽmoj tã karõ hto ka mẽ ama nẽ kãm ho anhỹr kurê kumrêx. Anẽ.

⁶ Nhũm mẽ kuri kên o poti kêp 6 nẽ kuhê. Piitã umpỳm rũnh kumrêx. Koja hõ pyxi nẽ nỳt nẽ kamã gô kêp 80 rit nẽ hkwy kamã kêp 100 rit. Ijaew na htem apkur kaxyw nẽ amnhĩ nhĩhkra kuhõnh japjê rũnh nẽ kormã apku. Nẽ apkur pa nẽ axte amnhĩ nhĩhkra kuhõ. ã mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwỳ xunhwỳr anẽ. No nhũm ra hkapyr nẽ kuhê. ⁷ Hãmri nhũm Jejus tẽ nẽ omu mẽ ãpênh xwỳnhjê mã kãm:

—E mẽ ma mra nẽ gô ru nẽ ho poti kuhê mũj piitã ho nỳt pa. Anẽ.

Nhũm mẽ kuma nẽ ma mra nẽ ho nỳt pa. ⁸ Hãmri nhũm mẽ kãm:

—Nà hãmri. Pãnhã hõ kamã gô hkwy janhi nẽ o tẽ nẽ mẽ anhõ patrãw mã agõ kê hkwy ho ixkõ nẽ kamã ama. Anẽ.

Hãmri nhũm mẽ mar xà hkôt kãm hkwy janhi nẽ hwỳr o tẽ nẽ kãm kugõ. ⁹⁻¹⁰ Nom nhũm gôja arĩ kêp gô kumrêx kêt nẽ. Jejus kot tanhmã ho jakamã nhũm ra hpãnhã kêp wĩhti. Jakamã nhũm mẽõ patrãw wỳr hkwy ho tẽ nẽ kãm kugõ nhũm hkaki nẽ kamã ama. Nom Jejus kot gô ho hipêx ã omunh kêt nẽ. ãm htỳx ho wĩhti kumrêx ã hkamnhĩx nẽ

mex kumrêx ã hkaki. Hãmri nê amnhĩ wÿr mjên nyw xwÿnh mã hpa ho apê nhũm hwÿr tẽ nhũm kãm:

—Kwa na htem wĩhti mex o wa nê mẽ kãm kugõ hãmri nhũm mẽ hpenh pa nhũm mẽ rĩ kormã hkõt omnu ho hapu nê mẽ kãm kugõ. Tã ka pẽr mẽ axtem nê wam mẽ kãm omnu nhõr pa hãmri nê kormã mex kumrêxa o hapu nê mẽ kãm agõ. Kêt wĩhti ja na mex kumrêx. Æm mex o mex. Anẽ.

Jejus kot gõ ho hipêx ã omunh kêt jakamã nhũm ã kãm kapêr anẽ. Æm mẽ àpênh xwÿnh pixjaja na prem ja hã omu. ¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhÿr kêt tã krĩ pê Kanã kamã ã mẽ kãm amnhĩ nhĩpêx anhÿr o hkrax. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpê hkõt ri ixpa xwÿnhjaja ã kot amnhĩ nhĩpêx anhÿr ã omu hãmri nê kêp Tĩrtũm kot mẽ pakaxyw ãm xwÿnh ã omunh kurê kumrêx.

¹² Tã nhũm Jejus hpãnhã ma krĩ pê Kapanaũ hwÿr mõ. Pa mẽ hkõt ri ixpa xwÿnhjaja nê katorxà nê htõjaja pa mẽ ma ixpiitã hkõt mõ. Hãmri nê hwÿr pøj nê kamã mẽ hkõt ixpa hã ixtã apkati grêre nê ma hpãnhã krĩ hõ hwÿr ixpa.

Jejus kot Tĩrtũm nhõrkwÿ hwÿr àr ã harênh

Matêwre 21.12-13; Makre 11.15-19; Rukre 19.45-46

¹³ Tã nhũm ra arĩgro pê Pas ahtêp o mõ. Pasja ã mẽ ixpê Ijaew na pa htem amnepê m Tĩrtũm kot pika pê Ejit rũm mẽ inhĩgêjtê kator mã ijamaxpêr kaxyw axpên wÿr akuprõ nê hã ixkĩnh. Jakamã nhũm Jejus ma hkwyjê hkõt krĩ pê Jerujarê hwÿr mõ. Pa mẽ ixpê hkõt ri ixpa xwÿnhjaja pa mẽ ma hkõt ixpa. Hãmri nê hwÿr pøj ¹⁴ nê Tĩrtũm mã amnhĩ jarênh xà hã ixkre hwÿr mra nê ixkre puhã kahêja wÿr agjê. Nhũm mẽ kamã axtem nê mẽmoj to wênê ho kuhê. Mõx o wênê nê õwêhti ho wênê nê tutre ho wênê ho kuhê. Mẽ kot haprõr nê ho Tĩrtũm mã hkĩnh xà kaxyw mẽ kãm ho wênê. Nê kàxpore ho pinhpanh xwÿnhjaja haxwÿja mẽ kuri hkrĩ. ¹⁵ Hãmri pa mẽ Jejus kõt mẽ hwÿr agjê nê ja hã mẽ omu hãmri nhũm Jejus pê ja omnuj tÿx nê. Jakamã nhũm tee ri mẽ omu hãmri nê amnhĩm mry hkà ho mẽ htak xà nhĩpêx nê ho ixkreja nê mẽ piitã mẽ kator pa. Nê mõx nê õwêhti nê mẽmoj piitã kator pa. Nê kàxpore ho pinhĩpanh xwÿnhjaja nhũm mẽ kêp mẽ õ mêtĩ rênh pa nhũm mẽ hikàxpore pykap rôrõk pa nê anhgrà nê hikwÿ. ¹⁶ Hãmri nhũm Jejus tutre ho wênê xwÿnhjê mã kãm:

—Kwa mẽ anhõ tutre jamÿ nê tokyx ma mra. Na htem Inhĩpêêxà nhõrkwÿ kamã mẽmoj to wênê hkêt nê. Kêp mẽ ujaaprõr xà hã ixkre hkêt. E kwa mẽ tokyx ma mra. Anẽ.

Nhũm pre ã mẽ kãm kapêr anẽ nhũm mẽ tee ri kuma hãmri nê ma mrrar kurê kumrêx. ¹⁷ Pa mẽ hkõt mẽ ixpa ho ixpa xwÿnhjaja ã kot mẽ hipêx anhÿr ã omu hãmri nê ra Tĩrtũm kapêr ã kagà htũm kot ã amnhĩ nhĩpêx anhÿrja kukamã hã kagàta mã ijamaxpêr kurê kumrêx. Kagà kot amnepê m Jejus kukamã te ra ã kapêr anhÿr pyrãk o harênh. Nê harênh kot:

Na pa hte Tĩrtũm nhõrkwÿ ho mex rãhã ho ixpa. Nhũm mẽmoj punuj hwÿr axà pa omu nhũm ja inhmã mex kêt nê.

Anhÿr o kot hkukamã harênh jakamã na pa mẽ ã Jejus kot mẽ hipêx anhÿrja ã omu hãmri nê ra hkukamã hã kagàta mã ijamaxpêr kurê kumrêx.

Ijaew krãhtũmjaja kot Jejus kukjêr ã mẽ harênh

¹⁸ Tã nhũm Ijaew krãhtũmjaja tee ri Jejus kot ixkreja nê mẽ kator ã omu hãmri nê hwÿr mra nê kãm:

—Pa. Kwa mon ka ri ã Tĩrtũm mã amnhĩ jarênh xà hã ixkreja nê mẽ kator anẽ? Mẽhõ na we mẽ ixwÿr amẽ ka ÿ hã ã mẽ hipêx anêhti? Nà xà Tĩrtũm na mẽ ixwÿr amẽ? E mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu hãmri nê Tĩrtũm kot mẽ ixwÿr amênh xwÿnh ã apumunh kurê kumrêx. E kwa tokyx mẽ inhmã ho anẽ. Anẽ.

¹⁹ Hãmri nhũm mẽ kuma nê mẽ kãm amnhĩ jarê. Nom amnhĩ tã kuxi nê mẽ kãm awjarê nê mẽ kãm:

—Nà kot paj aa mẽ ate mẽmoj pumunh kêt ô ho pixi nẽ mẽ amã ho anẽ ka mẽ omu. Tĩrtũm nhõrkwỹ jaa. Kot kaj mẽ agrã pa ixtã apkati axkrunẽpxi nẽ akupỹm hipêx ka mẽ ja hã ixpumu.

²⁰⁻²² Anhỹr o mẽ kãm kapêr. No ãm ixkreja jarênh kêt nẽ. Na pre ãm amnhĩ tã kuxi nẽ ã mẽ kãm kapêr anẽ. Mẽ kot hpĩr nhũm htyk ã apkati axkrunẽpxi nẽ akupỹm htĩr ã mẽ kãm ã amnhĩ jarênh anẽ. Te mẽ kot Tĩrtũm mã amnhĩ jarênh xã hã ixkreta grãnh nhũm hã apkati axkrunẽpxi nẽ akupỹm kot hipêx parta pyrãk ã hã kuxi nẽ ã mẽ kãm amnhĩ jarênh anẽ. Jakamã nhũm mẽhprĩ hã mar mex kêt nẽ. ãm tee ri kuma nẽ kãm:

—Tk. Kwa ixkre ja na prem hipêx kaxyw nẽ hã amgrã xohtô rax nẽ hipêx. Hã amgrã pẽ 46 nẽ hipêx par kênã kot ka kêt atã apkati axkrunẽpxi pix nẽ akupỹm hipêx. Anẽ.

Mẽ kot hprĩ hã mar kêt jakamã na prem ã kãm kapêr anẽ. Pa mẽ hkôt mẽ ixpa ho ixpa xwỹnhjaja ã mẽ kãm kapêr anhỹrja ã kuma nẽ hã inhnohtỹx rãhã ho ri ixpa. Tã nhũm mẽ kot Jejus pĩr nhũm hã apkati axkrunẽpxi nẽ akupỹm htĩr nhõ arĩgrota ã pa mẽ kot ã amnhĩ jarênh anhỹrja mã ijamaxpêr kurẽ kumrẽx. Nẽ xpẽn mã:

—Hêxta waa nẽ. Xep ãm hãmri na pre Pahihti amnhĩ kukamã ã amnhĩ jarênh anẽ. Mẽ kot hpĩr nhũm htyk ã apkati axkrunẽpxi nẽ akupỹm htĩr ã amnhĩ kukamã amnhĩ jarênh mex nẽ. Te mẽ kot Tĩrtũm nhõrkwỹ grãnh par nhũm hã apkati axkrunẽpxi nẽ akupỹm hipêx ã amnhĩ jarênh pyrãk. ãm hãmri na pre amnhĩ kukamã ã amnhĩ jarênh anẽ. Anẽ.

Jejus kot mẽ pajamaxpêr kôt mẽ pahpumunh ã harênh

²³ Tã nhũm Jejus mẽ hkôt mẽ ixpa ho ixpa xwỹnhjaja arĩ Jerujarẽ kamã ri ixpa ho ixpa. Nhũm ra arĩgro pẽ Pasja kato nhũm mẽ piitã hkĩnh kaxyw xpẽn wỳr akuprõ. Nhũm Jejus mẽ kãm aa mẽ kot mẽmoj pumunh kêt kwỹ ho anhỹr o ri mẽ hkôt pa. Nhũm mẽ omu nhũm mẽ hkwỹjaja Tĩrtũm kot mẽ pakaxyw ãm xwỹnh ã hkôt hamaxpêr tã no ãm hkôt hamaxpêr tỹx kêt nẽ. ²⁴ Jakamã nhũm Jejus amnhĩ tã mẽ hamaxpêr ã mẽ omu nẽ hamaxpêr o:

—Nà mẽ kot ixkôt hamaxpêr kryre xwỹnhjaja koja mẽ hã apkati grêre nẽ ixto hamakêtkati nẽ htỹx ri pa. Anẽ.

²⁵ Jejus kot mẽ pahte pahtỹx ri amnhĩ tomnuj o papa hã mẽ pahpumunh par. Nẽ pahtỹx ri pajamaxpêr punuj o papa hã mẽ pahpumunh par. Jakamã na pre ã mẽ harênh anẽ.

3

Jejus mẽ Nĩkotẽ wa kot xpẽn mã kapêr ã wa harênh

Juãw 1.12-13; mããnẽn Wam Pêtre 1.23

¹ Tã nhũm Parijew nhõ xwỹnhjẽ ô pẽ Nĩkotẽ. Mããnẽn kệp Ijaew krãhtũmjẽ hõ. ² Jakamã na pre Jejus jarênh ma nẽ kãm omunh prãm nẽ. Hãmri nẽ hkwỹ pymaj kamàt kãm hwỳr tẽ nẽ omu nẽ kãm:

—Pa mẽ ijahkre xwỹnh. E ot pa awỳr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwỳr amẽ ka mẽ ixwỳr wrỹ. Mẽhõ koja apyrã nẽ aa mẽ inhmã mẽ kot mẽmoj pumunh kêt kwỹ ho anhỹr o pa? Nà amrakati kumrẽx. Kop apu Tĩrtũm kot mẽ ixwỳr amẽn kêt ronhỹx ka ã amnhĩ nhĩpêx anhỹr kêt nẽ. Anẽ.

³ Hãmri nhũm kuma nẽ tanhmã kãm kapêr to. No ãm amnhĩ tã kuxi nẽ kãm awjarẽ nẽ kãm:

—Na htem piitã mẽ katorxã nhõxã hkre rũm hapôj. Tã Tĩrtũm kãm mẽ piitã axte mẽ hapôx prãm. Jakamã kot kaj mẽ akator o axkrut kêt nẽ hãmri nẽ nhỹrmã Tĩrtũm ri atĩr tũm nẽ apa ho apa hkêt nẽ. ãm hkrajẽ pix na htem kuri htĩr tũm nẽ pa ho pa. Jakamã kwa jam ajamaxpêr tỹx nẽ ri ho apa. Anẽ.

⁴ Hãmri nhũm Nĩkotẽja kuma nẽ tee ri ã kot kãm kapêr anhỹrja kukamã hamaxpêr nẽ kãm:

—Kwa ra ixãptãr kênã kot pa kêt tanhmã amnhĩ to nẽ akupỹm ixkatorxã nhõxã hkre hwỳr axã nẽ axte kurũm ixkato. Anẽ.

⁵⁻⁷ Hãmri nhũm Jejus kãm:

—Nà na hte mẽ hkrarejaja mẽ katorxà nhõxà hkre rùm kagô hkôt hapôj hãmri nê kêp katorxà mẽ hipêêxà wa hkwyỳ. Jao wa kot amnhĩ nhĩpêx kôt amnhĩ nhĩpêx o pa. Ja pyrà nê ka mẽ atõ amã apê Tĩrtũm kra hprãm hã kot kaj amnhĩ to awỳ nhũm wa Ixkarõja akarõ mã axà hãmri ka ra apê hkraa. Te ra axte akator pyræk o amnhĩ nhĩpêx. Nê te mẽ hkra kot katorxà nê hipêêxà wa kot amnhĩ nhĩpêx kôt amnhĩ nhĩpêx o pata pyrà nê apãm Tĩrtũm kot amnhĩ nhĩpêx kôt amnhĩ nhĩpêx o ri apa. Nom koja Tĩrtũm mẽ wa Ixkarõja akarõ mã àr kêt nê ka apê hkra hkêt nê. Jao te axte akator kêt pyræk o amnhĩ nhĩpêx. Jakamã na pa amã te ate akator pijakrut o amnhĩ nhĩpêx pyræk o amã ã ja jarênh anê. Kwa jam ajamaxpêr tỳx rãhã ho ri apa. No ama nê tee ri amnhĩ kukamã ajamaxpêr kêt nê.

⁸—E pa ixprĩ hã amã ja jarê ka inhma. Na hte kôk kãm nhỹhỹm àpêr prãm xà hkôt àpêr o pa. Pu mẽ kamã ama no ãm pano ho nhỹhỹnh mör xà hkôt omunh kêt nê. Nê nhỹhỹm ma mör xà hkôt omunh kêt nê. Ja pyrà nê na hte Tĩrtũm mẽ wa Ixkarõja mẽ hkaxwỳnh mã agiê nê mẽ ho Tĩrtũm kra nom nhũm mẽhprĩ hã kot tanhmã mẽ ho hã amnhĩ tã omunh kêt nê. Anê.

⁹Hãmri nhũm Nĩkotê ã Jesus kot kãm kapêr anhỹr ã kuma nê tee ri hamaxpêr nê kãm:

—Kwa na pa ixprĩ hã amar kêt nê. Anê.

¹⁰Hãmri nhũm kãm:

—Kwa mon ka hte Tĩrtũm kapêr tũm o Ijaew jahkre ho apa tã aprĩ hã ixkapêr mar kêt nê? ¹¹Ixte mẽmoj pumunh xà hkôt ixte mẽ amã harênh o ixpa htã ka mẽ apê Ijaew krãhtũmjaja mẽ amã ixkapêr mar prãm kêt nê. ã mẽ ate anhỹr kumrêx. Kwa jam ajamaxpêr tỳx nê. ¹²Na pa ra Tĩrtũm kot jar tanhmã amnhĩ nhĩpêx to hã harênh o ixpa htã ka mẽ ãm ama nê ixkôt ajamaxpêr kêt nê. Jakamã xà kot pa hpãnã mẽ amã kaxkwa kamã tanhmã kot amnhĩ nhĩpêx to hã harê ka mẽ ama nê mar tỳx nê? Nà kot ka mẽ ama nê ãm ama nê hkôt ajamaxpêr kêt nê. ¹³Mêhõ na we ra ma kaxkwa hwỳr api nê kamã mẽmoj mex pumu nê man akupỳn mẽ awỳr wrỳ nê mẽ amã tanhmã harênh to? Nà amrakati kumrêx. ãm paxipix ixpê Tĩrtũm kot mẽ akaxyw ixãm xwỳnh na pa pre amnê kurũm mẽ awỳr wrỳ hãmri nê ixprĩ hã mẽ amã tanhmã harênh to ho ri ixpa.

¹⁴—Amnepêm finat Mojesja kormã kapôt ã mẽ o pa ri na pre mẽ kãm kàx o kagã karõja nhĩpêx nê kỳxpê mẽ kãm kunhõ. Kagã kot mẽ hkamnhar xwỳnhjaja kot hwỳr rĩt nê omunh nê akupỳm mex kaxyw mẽ kãm kunhõ. Tã ixpê Tĩrtũm kot mẽ akaxyw ixãm xwỳnh kot paj nhỹrmã kagã karõta pyrà nê kỳx pê pĩ kahpa hã ajêt. ¹⁵Ka mẽ te mẽ kot kagã karõ pumunh nê akupỳm mexta pyrà nê amnhĩ kaxyw inhmã ajamaxpêr nê ixkôt amnhĩ xunhwỳ hãmri nê nhỹrmã Tĩrtũm mẽ wa ixri atĩr tũm nê amex rãhã nê apa ho apa.

¹⁶—Tĩrtũm kãm pika piitã hkôt mẽ apiitã mẽ ajapê htỳx. Nê mẽ ajapê xàj na pre ixpê Kra hã ixpyxi hã mẽ awỳr inhmê. Ka mẽ atõ amnhĩ kaxyw ixkôt ajamaxpêr nê ixkôt amnhĩ xãm. Hãmri nê nhỹrmã atyk tã nhũm Tĩrtũm akupỳm ato atĩr ka wa ixkuri atĩr tũm nê amex rãhã nê apa ho apa. Hãmri nhũm Tĩrtũm aa amnhĩ nê nhỹhỹm amênh kêt kumrêx. ¹⁷No mẽ ate amnhĩ tomnuj mỳrapê tanhmã ixte mẽ anhĩpêx to kaxyw na pre mẽ awỳr inhmênh kêt nê. ãm ixkukwak ri mẽ atĩr tũm nê mẽ amex rãhã apa ho apa hprãm xàj na pre mẽ awỳr inhmê pa mẽ awỳr wrỳ. ¹⁸Jakamã kot ka mẽ atõ amnhĩ kaxyw ixpê Tĩrtũm Kra hã ixkôt ajamaxpêr nê ixkôt amnhĩ xãm nhũm Tĩrtũm ixtã apumu nê ate amnhĩ tomnuj mỳrapê tanhmã anhĩpêx to hkêt nê. No kêt mẽ kot ixkôt amnhĩ xunhwỳr kêt xwỳnhjaja na Tĩrtũm ma mẽ kot amnhĩ xà htỳx kamã hamak tũm xà hwỳr mẽ pa mã xwỳnhjê hã mẽ harê. Mẽ kot ixkôt amnhĩ xunhwỳr kêt mỳrapê. Anê.

Mẽ kot amnhĩ tomnuj o hpimxur prãm kaprỳ ã mẽ harênh

¹⁹Nhũm Jesus arĩ Nĩkotê mã kapêr nê kãm:

—Na pre Tĩrtũm amnê pika hwỳr mẽ awỳr inhmê. Mẽ ate amnhĩ tomnuj xwỳnh ã amnhĩ pumunh kaxyw mẽ awỳr inhmê. Tã nhũm mẽ ohtõ nê amnhĩ tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê. ²⁰Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapêr mar prãm kêt. Nê ixte mẽ kot tanhmã amnhĩ tomnuj to ho pa hã mẽ harênh pymaj ixkôt kãm

pa hprãm hkêt nê. ²¹ No kêt mẽ kot ixkôt amnhĩ xunhwỳr xwỳnhjaja na mẽ kot amnhĩ nhĩpêx o pa hã hpijaàm kêt. Na htem àmnhĩx ixkôt amnhĩ nhĩpêx o pa. Jakamã koja mẽ piitã ja hã mẽ omu nê Tĩrtũm kot tanhmã mẽ hkrã hto nhũm mẽ ra kãm hkôt pix mã amnhĩ nhĩpêx ho pa hprãm ã mẽ omunh kurê kumrêx. Anê.

Nhũm pre ã Jejus Nĩkotêja mã kapêr anê.

Juãw Paxis kot Jejus jarênh o pa hã harênh
Juãw 1.19-28

²² Tã pa mẽ ixpê Jejus kêt ri ixpa ho ixpa xwỳnhjaja Jejus kêt Jerujarê rũm ijapôj nê pika pê Jutej kwỳ kamã ixpa. Jejus nhỹ hã Tĩrtũm mã mẽ hkrã kumrãr o ri mẽ hkôt ixpa.

²³ Nhũm finat Juãw Paxis haxwỳja mẽ ixpyrà nê mẽ hkrã kumrãr o pa. Krĩ pê Sarĩ htã krĩ pê Enõ mỳri pyhti rax jakamã nhũm pre htem hwỳr mra nhũm kamã mẽ hkrã kumrã.

²⁴ Kormã mẽ kot haxàr kêt ri nhũm kamã mẽ hkrã kumrãr o pa.

²⁵ Rôm nhũm Ijaew hõja Juãw Paxis kêt mẽ pa ho mẽ pa xwỳnhjê hwỳr tẽ nê Juãw Paxis kot mẽ hkrã kumrãr ã tanhmã mẽ hkukjêr to nhũm mẽ kuma nê tee ri hã axpên kukjêr o kuhê. ²⁶ Hãmri nê akupỹm Juãw Paxis wỳr tẽ nê kãm:

—Kwa mẽ ijahkre xwỳnh. Pyhti pê Jotãw nhĩkjê hã ate mēhõ pumunh nê tanhmã mẽ inhmã harênh to xwỳnhhta kêt mẽ pa ho mẽ pa xwỳnhjaja na xep htem apyrã nê mẽ hkrã kumrãr o pa nhũm xep mẽ ra ohtô nê mẽ pahkaga nê mẽ hkôt pa. Kwa xà ja amã mex nã? Anê.

²⁷ Hãmri nhũm mẽ kuma nê mẽ kãm:

—Tỳ ja mex kênã. Tĩrtũm kãm hprãm xà hkôt na htem mẽ hwỳr mra nhũm mẽ ixpãnhã mẽ hkrã kumrã. Nà ja mex. ²⁸ Ixpê Tĩrtũm kot mẽ pakaxyw ãm xwỳnh kêt. Na pa pre ra mẽ amã ja hã amnhĩ jarê ka prem inhma. ãm hkukamã na pre Tĩrtũm amnê inhmẽ pa mō nê ã jar ri ixpa anê.

²⁹ —Te ixte mẽ umre kot amnhĩ nhĩpêx pyrãk. Na htem axpên mã mẽ rer kaxyw nhũm mẽ umreja myta wỳr tẽ nê hpa hã kupy nê ma ni hwỳr o tẽ nê axpên mã wa kure. Hãmri nhũm hpãnhã mēhõja axpên tã wa hakre. Nhũm umreja wa kuri hkĩnh nê mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwỳnhhta wỳr mra nê kapêr ma pa mẽ harênh ma nê ixkĩnh nê. ³⁰ Na htem mẽ umre hã hkĩnh kêt nê. Mjên nyw xwỳnhja ã na htem hkĩnh. Tã ja pyrã nê koja mẽ axte ixte mẽ kãm Jejus jarênh mar kaxyw ixwỳr mrar kêt nê. ãm hwỳr koja mẽ hpãnhã mra nê tãm mar o kuhê. Ja mex kumrêx. ³¹ Jejus kêt kaxkwa rũm amnê mẽ pahwỳr wryk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwỳnh jakamã Jejus kĩnhã mẽ pahte mẽmoj piitã omunh tohtuj anhỹr. Nê pika nhõ xwỳnhjê jamaxpêr pix o pajamaxpêr o ri papa.

³² —Na hte Jejus mẽ kãm kaxkwa kamã kot mẽmoj pumunh xwỳnh kwỳjê jarênh o pa. Nê kamã kot mẽmoj mar xwỳnh kwỳ jarênh tã nhũm mẽ ohtô nê kuma nê ãm kuma. ³³ No mẽ kot mar nê amnhĩ kaxyw hkôt hamaxpêr xwỳnhjaja na htem kuma nê axpên mã harênh o: “Nà ãm hãmri na ã Tĩrtũm kapêr jarênh anê. Nà Tĩrtũm kapêr mex kumrêx.” Anhỹr o axpên mã harê.

³⁴ —Tĩrtũm na pre mẽ pahwỳr Jejus mẽ nhũm amnê mẽ pahwỳr wry nê Tĩrtũm Karõ nhỹ hã mẽ pamã kapêr jarênh o ri mẽ pahkôt pa. ³⁵ Tĩrtũm kãm Krata japê htỳx kumrêx jakamã na pre ãhkram mẽmoj piitã haxàr pa nhũm uràk nê hihtỳx o hihtỳx nê mẽmoj piitã ho amnhĩptàr o pa. ³⁶ Jakamã mẽ kot amnhĩ kaxyw hkôt hamaxpêr nê hkôt amnhĩ xunhwỳr xwỳnhjaja koja mẽ nhỹrmã wa kuri htĩr tũm nê mex rãhã nê pa ho pa. No mẽ kot hkaga xwỳnhjaja koja mẽ ã amnhĩ nhĩpêx anhỹr kêt nê. Koja Tĩrtũm mẽ kot amnhĩ xà htỳx kamã hamak tũm xàta wỳr mẽ rênh pa. Anê.

4

¹ Tã nhũm Parijew nhõ xwỳnhjaja Jejus jarênh ma. Nê hkôt mẽ pa xwỳnhjaja ohtô rax o Juãw Paxis kêt mẽ pa xwỳnhjê jakrenh ã mẽ harênh ma. Nê Jejus kot mẽ hkrã kumrãr rax o Juãw Paxis jakrenh ã harênh ma. ² Nom Jejus na pre mẽ hkrã kumrãr kêt nê. ãm

mẽ ixte hkôt ri mẽ ixpa ho mẽ ixpa xwỳnhjaja na pa prem kãm mẽ hkrã kumrãr o ri ixpa.
³ Jakamã nhũm Jejus amnhĩ tã Parijew nhõ xwỳnhjê jarẽnh ma hãmri nẽ mẽ kêp kato nẽ hpãnhã ma akupỹm Garirej wỳr mỗ pa mẽ ma hkôt ixpa.

Mẽhõ ni kot amnhĩ nhĩpêx nyw o amnhĩ nhĩpêx ã harẽnh

*Juãw 7.37-39; mããn*ên Apokarip 22.1, 22.17

⁴ Tã pa mẽ mỗ nẽ kormã pyka pê Samar mã axà nẽ hkôt ixpa. ⁵ Hãmri nẽ krĩ pê Sika hwỳr ixpôx o mỗ. Amnepê m finat Jako kot hkra Juje mã pyka nhõr xwỳnh tã krĩja xa pa mẽ ra hwỳr ixpôx o mỗ. ⁶ Nẽ amnepê m Jako kot gôm kakwỳnhhta wỳr pøj. Nhũm ra kaxkwa nhĩpôk ri myt nhỹr mẽ nhũm Jejus ra mrar ryy kurê hkẽngrà nẽ. Hãmri nẽ gôm kakwỳnh mỳ ri tẽm nẽ hkôkôt o nhỹ. ⁷⁻⁸ Hãmri pa mẽ kure nẽ mẽ ixàpkur xà japrôr kaxyw ma krĩm ijpêx.

Rôm nhũm Samar nhõ xwỳnh nija amnhĩm gô runh mã tẽ nhũm Jejus omu nẽ kãm:

—Kwa inhmã anhõ gôta kwỳ pa ho ixkõ. Anẽ.

⁹ Nhũm amnhĩ jaêr pê amnhĩ tã kuma. Ijaew na pre htem Samar nhõ xwỳnhjê kutã apkur rỳ mẽ hkôt ri pa rỳ mẽ ho mjên kêt nẽ. Rỳ mẽ kutã hkôm kêt nẽ. Tã nhũm Jejus ã gô hã nija wỳr anẽ nhũm tee ri amnhĩ tã kuma nẽ kãm:

—Xê pêr apê Ijaew tã axtem nẽ ri gô hã ixwỳ. Xà ate ixpê Samar nhõ xwỳnh ã ixpumunh kêt? Hãn ka ri hã ixwỳ. Anẽ.

¹⁰ Hãmri nhũm kuma nẽ kãm amnhĩ jarẽ. No ãm amnhĩ tã kuxi nẽ kãm kapêr nẽ kãm:

—Nà aprĩ hã ate ixpumunh ro nhỹx ka kam gô hã ixwỳ pa amã hkwỳ. Inhõ gô na axte mã. Tĩrtũm kãm amarĩ mẽ amã òr prãm. Na htem ho ixkõ hãmri nẽ mex nẽ htĩr tũm nẽ pa ho pa. Anẽ.

¹¹ Hãmri nhũm tee ri kot ã ò gô jarẽnh anhỹrja ã kuma nẽ htỳx ho gôm kakwỳnh kamã gô hã hkamnhĩx nẽ tee ri hkukamã hamaxpêr nẽ kãm:

—Xê tanhmã kot ka kêt amnhĩ to nẽ inhmã gôta kwỳ janhi? Mo kaxyw anhõ gô janhir xà? Gôm kakwỳnhhta upỹm rax kênã kot ka kêt tanhmã amnhĩ to nẽ hkwỳ janhi. Nhỹhỹnh kot ka anhõ gô jarẽnh xwỳnhhta kwỳ janhi pa ho ixkõ hãmri nẽ ixtĩr tũm nẽ ixpa ho ixpa?

¹² Mẽ inhõ gôm kakwỳnhja amnepê mã mẽ panhĩgê m finat Jako nhõ gôm kakwỳnh na pre. Jako hkwỳjaja na prem hkakwỳ nhũm kamã gô kato nhũm pre htem hanhi nẽ ho hkôm o pa. Nẽ hkrajaja nẽ hkrit piitã ho hkôm o pa. Jakamã na pre mẽ ixpê hkanrêhã htãmnhwỳjê mã hkaga. Tã xep axtem anhõ gô. Mẽ kot ho hkôm nẽ htĩr tũm kaxyw na xep. Jakamã xê xà ate amnhĩ to rax o mẽ panhĩgê m Jako jakrenh mê? Anẽ.

¹³ Hãmri nhũm Jejus kãm:

—Nà mẽ anhõ gôta na htem ho ixkõ nẽ arĩ kãm kôr o pa. ¹⁴ No ixte amã gô jarẽnh xwỳnhhta kot ka hkwỳ ho ixkõ hãmri nẽ axte amã kôr kêt kumrêx nẽ apa. Nhũm te akaxwỳnh kãm hinore hprôt pyrãk o ka amnhĩ nhĩpêx. Hãmri nẽ te hinore kamã gôja aa grà hkêt pyrã nẽ aa ajapêx kêt kumrêx. Nhỹrmã atyk tã akupỹm atĩr nẽ atĩr tũm nẽ amex rãhã apa ho apa. Anẽ.

¹⁵ Nhũm nija kuma hãmri nẽ kãm:

—Xôwehe? Xê tô tokyx inhmã anhõ gôta kwỳ. Pa ho ixkõ nẽ axte inhmã kôr kêt nẽ ixpa. Nẽ axte amnẽ amnhĩm gô janhir mã inhmãr kêt nẽ. Xê tokyx inhmã hkwỳ mê? Anẽ.

Tỳx gô kumrêx ã hkamnhĩx nẽ ã hã àhwỳr anẽ. ¹⁶ Hãmri nhũm kãm:

—Tô ma akupỹm krĩm tẽ nẽ amjên japrô nẽ man akupỹn ixwỳr wa tẽ. Anẽ.

¹⁷ Hãmri nhũm tee ri kuma nẽ kãm:

—Ma mo inhmjên? Inhmjên kêt na pa hte ri ixpa. Anẽ.

Hãmri nhũm kãm:

—Tỳ. Nà ãm hãmri na ka ã amnhĩ jarẽnh anẽ. ¹⁸ Na ka pre ra amjên kêp 5. Nẽ my mẽ ri war apa xwỳnh ata te kêp amjên pyrãk nom kêp amjên kumrêx kêt. Anẽ.

¹⁹ Hãmri nhũm amnhĩ jaêr pê kot ã kãm kapêr anhỹrja ma hãmri nẽ kãm:

—Xê pêr aprĩ hã ate ixpumunh par pyrãk. Mãn apê Tĩrtũm nhỹ hã kapêr jarẽnh o mẽ pa xwỳnhjê hõ mãn ka mê? ²⁰ Xê inhmã mẽmoj jarẽ. Nhỹhỹm kot paj wem axpên kôt

mra nê Tirtũm mã mex o mex ã harê? Amnepê mã mẽ panhĩgêjtjaja na prem hixêť mũj nhĩmõk ã api nê hã kãm amnhĩ jarê nê kãm mex o mex ã harê. No mẽ apê Ijaew na ka htem krĩ pê Jerujarê pix kãm mẽ ixte axpên kôt mrrar nê ã amnhĩ nhĩpêx anhỹr ã mẽ inhmã karõ. Xà hixêť nhĩmõk ã mẽ ixte kãm amnhĩ jarênhja xà apê omnuj mẽ? Ma xà apê omnuj kêt? Anê.

²¹ Hãmri nhũm Jejus kãm:

—Nà kot kaj mẽ nhỹrmã ãm Jerujarê pix kãm rỹ hixêť mũj nhĩmõk pix ã axpên wỳr akuprõ nê Tirtũm mã amnhĩ jarênh kêt nê. ²² Mẽ apê Samar nhõ xwỳnhjaja mẽ ate Tirtũm mã mex o mex ã harênh o apa htã aprĩ hã kot amnhĩ nhĩpêx ã omunh kêt. Nê tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nê tanhmã hamaxpêr to hã omunh mex. Mẽ inhĩõ kukwak ri koja Tirtũm mẽ kot hkôt amnhĩ xunhwỳr xwỳnh piitã nê mẽ kot amnhĩ tomnuj rênh pa. ²³ Tã koja mẽ piitã Mẽpahpãm Tirtũm mã mex o mex ã harênh kaxyw nhỹhỹm pa hkêt nê. Koja mẽ nhỹri pa xà kamã mẽ õpinh xà kaxwỳnh kãm ã kãm amnhĩ jarênh anhỹr o pa. Ja na Tirtũm kãm hprãm. No nhỹhỹm mrrar nê nhỹri kuhê xà pix kamã kãm amnhĩ jarênhja nhũm kãm hprãm kêt nê.

²⁴ —Nê Tirtũmja mẽ pahpyrà nê ĩ hkêt jakamã na te kaxkwa nê pika piitã hkôt pa ho pa. Jakamã na htem nhỹri pa nê õpinh xà kaxwỳnh kãm amnhĩ kaxyw kãm hamaxpêr nê kãm mex o mex ã harê nhũm ra amnhĩ tã mẽ kuma. ã mẽ kot amnhĩ nhĩpêx anhỹrja na kãm hprãm. Anê.

²⁵ Nhũm pre ã Jejus nija mã kapêr anê nhũm kuma nê kãm:

—Ma koja xep nhỹrmã Tirtũm kot mẽ pakaxyw ãm mã xwỳnh pê Krisja mẽ pahwỳr wỳr hãmri nê hprĩ hã mẽ pamã mẽmoj piitã ho amnhĩrit pu mẽ kuma. Anê.

²⁶ Hãmri nhũm kãm:

—Kwa nhũm paa. Ixte amã ixkapêr xwỳnhja ixpê Kris na pa. Jakamã na pa ixprĩ hã amã ã ixkapêr anê. Anê.

²⁷ Nhũm pre ã kãm amnhĩ jarênh anhỹrja rôm pa mẽ ixte hkôt ri mẽ ixpa ho ixpa xwỳnhjaja ra ixujaprõr pa nê akupỹn hwỳr ixpõx o mra. Hãmri nê amnhĩ jaêr pê kot Samar nhõ xwỳnh nita mã kapêr ã omu nê tee ri hkukamã ijamaxpêr nom tanhmã hã hkukjêr to hkêt nê. Nija kêp Samar nhõ xwỳnh tã nhũm àmnhĩx kãm kapêr o nhỹ. Pa mẽ omu nê ãm omu nê tanhmã hã kãm nê hkêt nê. ²⁸ Hãmri nhũm nita gôm kakwỳnh mỳr ri õ poti re nê ma akupỹm krĩm tẽ nê hkwỳjê mã awjarê. ²⁹ Nê mẽ kãm:

—Xê mẽ tokyx ma ixkôt gôm kakwỳnh wỳr mra nê mỳ ri mẽhõ my mũj pumu. Tirtũm kot mẽ pahwỳr mẽnh mã xwỳnhhta na. Aa kot nhỹri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nê ixpyrà nê kapêr ã ama. Anê.

³⁰ Hãmri nhũm mẽ kuma nê ma hkôt Jejus wỳr mrrar kurê kumrêx.

³¹ Rôm pa mẽ ixte Jejus kôt ri ixpa ho ixpa xwỳnhjaja tee ri mẽ ixàpkur xà ho Jejus ma nê kãm:

—E ota mẽ panhõta. Kwa mẽmoj py nê aku mãn.

³² Anhỹr tã nhũm mẽ inhma nê tanhmã mẽ inhmã amnhĩ jarênh to. Nom amnhĩ tã kuxi nê amnhĩ jarê nê mẽ inhmã:

—Nà kormã. Inhõja axtem na. Mẽ ate inhõja pumunh kêt. Anê.

³³ Hãmri pa mẽ kuma nê tee ri hã axpên kukja nê axpên mã:

—Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anê.

³⁴ Hãmri nhũm mẽ inhma nê mẽ inhmã:

—Nà mẽhõ kot kêt ri inhmã mẽmoj to mra pa kuku? Kot paj kot mẽ awỳr inhmênh xwỳnhhta mã tanhmã amnhĩ nhĩpêx to hãmri nê te ra ixàpkur mex nê hã ixihtỳx mex pyræk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyræk.

³⁵ Anhÿr o mẽ inhmã amnhĩ jarẽ. Hãmri nẽ ra Samar nhõ xwÿnhjaja mẽ ixwÿr mrar ã mẽ omu nẽ mẽ inhmã tanhmã mẽ harẽnh to nom mẽ hã kuxi nẽ mẽ harẽ nẽ mẽ harẽnh o:

—Kot kaj mẽ axte mẽ atã mytwrÿ kęp 4 hãmri nhũm ra mẽ apur kãm mẽ anhõja hamÿnh mã tãm nẽ. Nom kormã. E ka mẽ pahwÿr mẽ mrar xwÿnh nẽj pumu. Ra mẽ kot amnhĩ kaxyw ixkõt hamaxpër nẽ ixkõt amnhĩ xunhwÿr mã tãm jakamã te mẽ apur kãm ra mẽ anhõ jamÿnh mã tãm pyrãk. Jakamã ka mẽ atõ ma mẽ hwÿr mõ nẽ mẽ kot amnhĩ kaxyw ixkõt hamaxpër nẽ ixkõt amnhĩ xunhwÿr kaxyw mẽ kãm ijarẽ. Hãmri nẽ te ate ixpur kãm inhmã inhõ jamÿnh xwÿnh pyrãk o amnhĩ nhĩpêx.

³⁶ —Jakamã koja mẽhõ kumrêx mẽ hwÿr tẽ nẽ mẽ kãm Tĩrtũm kapër jarẽ hãmri nẽ te kęp õ pahi mã hpur kãm ahkre ho pa pyrãk. Nhũm mẽ kot mar xwÿnhjaja kuma nom kormã hprĩ hã mar tÿx kêt nẽ. Tã kot kaj mẽ atõ wamta kõt mẽ hwÿr tẽ nẽ mẽ kot ixkõt amnhĩ xunhwÿr kaxyw aprĩ hã mẽ kãm ijarẽnh o mẽ hkõt apa hãmri nẽ te apê mẽ anhõ pahi mã hpur kãm axujamÿnh xwÿnh pyrãk. Hãmri nhũm mẽ hkwÿjaja mẽ ama nẽ ixkõt amnhĩ xunhwÿ nẽ ixkõt ri amnhĩ nhĩpêx o pa. Hã koja nhÿrmã mẽ apyrã nẽ Tĩrtũm mẽ wa ixri mex rãhã nẽ htĩr tũm nẽ pa ho pa. Ka mẽ amnhĩ tã mẽ omu nẽ akĩnh nẽ apa. Te mẽ kot mẽ hpur kãm ahkre xwÿnhjaja nẽ mẽ kot hamÿnh xwÿnhjaja mẽõ rũnh pumunh nẽ hkĩnhnta pyrãk.

³⁷ —Na htem tõhã ã mẽ pur kãm mẽ àpênh xwÿnhjê jarẽnh anẽ nẽ mẽ harẽnh o: “Axtem mẽ ahkre xwÿnhjaja nẽ axtem mẽ kot hamÿnh xwÿnhjaja.” Anẽ. Tã te mẽ ate mẽ ujarẽnh ja pyrãk. ³⁸ Na pa pre ra ma mẽ hwÿr mẽ arẽ. Mẽ ate aprĩ hã mẽ kãm ijarẽnh nhũm mẽ kot mẽ amar nẽ amnhĩ kaxyw ixkõt hamaxpër nẽ ixkõt amnhĩ xunhwÿr kaxyw. Nom mẽ kajaja na ka prem akumrêx mẽ hwÿr amrar nẽ mẽ kãm ijarẽnh kêt nẽ. Tĩrtũm kapër jarẽnh o mẽ pa xwÿnhjaja na prem kumrêx mẽ hwÿr mra nẽ ixkukamã mẽ kãm ijarẽnh o ri mẽ hkõt pa. Te mẽ kot hpur kãm ahkre ho pata pyrãk. Tã kot kaj mẽ hpãnhã mẽ kot amnhĩ kaxyw ixkõt amnhĩ xunhwÿr kaxyw aprĩ hã mẽ kãm ijarẽnh o apa. Jakamã te mẽ ate mẽ hpur kãm mẽõ jamÿnh xwÿnh kot amnhĩ nhĩpêxta pyrãk. Anẽ.

Mẽ hkwÿ kot amnhĩ nhĩpêx nyw o amnhĩ nhĩpêx ã mẽ harẽnh

Sikũn Korĩt 5.17; Wam Juãw 4.14

³⁹ Rõm nhũm Samar nhõ xwÿnh kwÿjaja nija kot mẽ kãm amnhĩ jarẽnh ma hãmri nẽ urãk nẽ amnhĩ kaxyw Jejus kõt hamaxpër. Na pre ra amnhĩ tã tanhmã mẽ kãm Jejus jarẽnh to nẽ mẽ kãm harẽnh o:

—Ma aa kot nhÿri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhÿr jakamã nhũm mẽ kuma nẽ urãk nẽ amnhĩ kaxyw hkõt hamaxpër kurẽ kumrêx.

⁴⁰ Hãmri nẽ man mẽ ixwÿr mra nẽ Jejus pumu nẽ amnhĩ wÿr kuwÿ nẽ kãm:

—Pa. E kwa mẽ tokyx anojarêt kêt nẽ. Mẽ ma mẽ ixkõt mẽ inhõ krĩ hwÿr mõ nẽ mẽ ixkõt ri apa grire nẽ arĩ ma mõ. Anẽ.

Hãmri nhũm mẽ kuma nẽ mẽ kãm:

—Tõe. Nà kot paj mẽ anẽ. Anẽ.

Hãmri pa mẽ ma mẽ hkõt mõ nẽ mẽ õ krĩ kamã mẽ hkõt ri ixpa hã apkati axkrut.

⁴¹ Nhũm Jejus mẽ kãm Tĩrtũm kapër jarẽnh o ri mẽ hkõt pa nhũm mẽ axte ohtõ nẽ kuma nẽ nita pyrã nẽ hkõt amnhĩ xunhwÿ. ⁴² Hãmri nẽ nita wÿr mra nẽ kãm:

—E nã ãm hãmri. Akumrêx na ka mẽ inhmã Jejus o amnhĩrit. Pa mẽ akõt ma hwÿr mra nẽ mẽ pam omu nẽ kapër ã kuma. Jao apyrã nẽ amnhĩ kaxyw hkõt ijamaxpër nẽ hkõt amnhĩ xunhwÿ. Për ãm hãmri kęp pyka piitã hkõt mẽ pahte amnhĩ tomnuj pãnhã amnhĩrer mã xwÿnhnta na. Anẽ.

Garirej nhõ xwÿnhjaja kot Jejus pumunh ã mẽ harẽnh

Matêwre 13.57

⁴³ Tã pa mẽ Jejus kõt Samar rũm ixkato nẽ ma pika pê Garirej wÿr mõ. Kamã Jejus nhõ krĩ pê Najare htã pa mẽ hwÿr inhmõr kêt nẽ. ⁴⁴ Na pre ra Jejus mẽ inhmã tanhmã õ krĩ nhõ xwÿnhjê jarẽnh to nẽ mẽ harẽnh o:

—Tirtüm nhỹ hã kapër jarënh o mẽ pa xwýnhjaja na htem amnhĩ nhõ krĩ kamã mẽ kãm Tirtüm kapër jarënh o pa nhũm mẽ kuma nẽ ãm kuma. Jakamã kot paj Najare hwýr inhmõr kêt nẽ. Mẽ kãm ixkapër mar prãmre hã.

⁴⁵ Anhýr jakamã na pa prem hwýr inhmõr kêt nẽ. Pãnhã nhãm krĩ hõ hwýr mõi nẽ hwýr pøj hãmri nhũm mẽ amnhĩ wýr Jejus pumu nẽ hkĩnh nẽ. Na prem ra krĩ pê Jerujarẽ kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wýr omu nẽ hkĩnh nẽ.

Jejus kot mẽhõ hkra ho mex ã harënh

⁴⁶ Tã pa mẽ kormã Garirej kamã ixpa nẽ akupým krĩ pê Kanã hwýr mõi. Kamã na pre Jejus mẽ kãm gõ ho wĩhti nhĩpêx. Jakamã pa mẽ akupým mẽ hwýr mõi. Nhũm mẽõ pahĩ nhõ kôwenatøjê hõ hkra myja kêp à htýx nẽ nõ. Nom Kanã kamã hkêt axtem krĩ hõ pê Kapanaũ kamã. ⁴⁷ Jakamã nhũm hipêêxàja tee ri hkra pumu hãmri nẽ ra Jejus kot Jutej rùm Kanã hwýr hpõx ã harënh ma nẽ hkra kaxyw kãm hamaxpër nẽ ma hwýr mõi kurê kumrêx. Hãmri nẽ nhỹri omu nẽ hwýr tẽ nẽ kãm kapër kãm hihtýx nẽ kãm:

—Pa. E ot pa awýr tẽ. Na ra ixkra ixpê htyk kaxyw. Kwa ixkamã axukapřĩ nẽ ma ixkõt mõi nẽ akupým inhmã ho mex. Anẽ.

⁴⁸ Hãmri nhũm kuma nẽ kãm:

—Kwa për ãm ixte mẽ amã aa mẽ ate mẽmoj pumunh kêt kwý ho anhýr ã ixpumunh kõt pix mã na ka htem amnhĩ kaxyw ixkõt ajamaxpër. Nom amarĩ amnhĩ kaxyw ixkõt ajamaxpër kêt nẽ. Anẽ.

⁴⁹ Hãmri nhũm tee ri kuma nẽ kãm:

—Kwa tokyx. Kot kaj tokyx ixkõt amõi kêt koja ixpê ty. Anẽ.

⁵⁰ Hãmri nhũm kãm:

—Nà koja apê htyk kêt nẽ. Ra ixte akupým amã ho mex kênã. Mãmrĩ ma akupým mõi nẽ tokyx omu. Na ra akupým amã mex. Anẽ.

Hãmri nhũm kuma nẽ kaxyw hkõt hamaxpër kurê kumrêx nẽ ma akupým hwýr mõi. Nẽ mõi o apkati. ⁵¹ Nẽ kormã õ krĩ hwýr hpõx o mõi ri nhũm ra kãm mẽ ãpênh xwýnhjaja kutã mra nẽ nhỹri pry hã hkaxpa nẽ kãm:

—Pa. Kwa na ra akra hkà hakry nẽ akupým amã mex. Anẽ.

⁵² Hãmri nhũm mẽ kuma nẽ hkĩnh týx nẽ. Nẽ mẽ kãm:

—Kwa xô wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nà jãã na pre kaxkwa nhĩpøk ri myt nhỹ nhũm hkà hakry nẽ akupým amã mex kurê kumrêx. Anẽ.

⁵³ Hãmri nhũm mẽ kuma nẽ mẽ kãm:

—Hêxta waa nẽ. Kwa për ãm hãmri Jejus kot inhmã akupým mex ã harënh xà hã ore kamã na pre akupým inhmã mex. Nà ãm hãmri. Anẽ.

Hãmri nẽ amnhĩ kaxyw Jejus kõt hamaxpër kurê kumrêx. Nhũm õrkwý kamã ri mẽ pa xwýnhjaja uræk nẽ amnhĩ kaxyw hkõt hamaxpër.

⁵⁴ Nhũm Jejus ã kãm hkra ho mex anẽ. Na pre ra pika pê Garirej kamã mẽ kot mẽmoj pumunh kêt õ ho anhýr o tipxi nẽ mẽ kãm gõ pix o wĩhti nhĩpêx. Tã ra pyka pê Jutej rùm akupým mẽ hwýr mõi nẽ ã akupým mẽ hkrata o mex anẽ.

5

Jejus kot himõ mý ri akupým mẽhõ ho mex ã harënh

Juãw 7.23, 10.30-33

¹ Tã mẽ ixpê Ijaew mẽ ixte Tirtüm ã ixkĩnh kaxyw Jerujarẽ hwýr akuprõ nhũm Jejus haxwýja ma hwýr mõi. Pa mẽ hkõt mẽ ixpa ho mẽ ixpa xwýnhjaja ma hkõt mõi. ² Jerujarẽ kamã na himõja hikwý. Nhỹhýnh mẽ kot krĩ hwýr õwêhti ho gjêx xà htã hikwý. Himõja nhĩxi pê na Petes. Nẽ pu hã mẽ à xwýnhjê nhĩkwý xà hã ixkre kêp 5. ³ Piitã kamã na pre hte tanhmã mẽ à kute xwýnhjaja hikwý. Mẽ nohkre xwýnhjaja nẽ mẽ hyk o mẽ pa xwýnhjaja nẽ mẽ ĩ kamã mẽ htyk xwýnhjaja. ãm ahpýnhã tanhmã mẽ à kute xwýnhjaja

ixkre hkwyja kamã akupÿm mex prãm xaj hikwÿ. ⁴ Na pre hte Tirtÿm kapër o mẽ wryk xwÿnhja tõhã himô hwÿr wry ñe gô xok. Hãmri nhÿm mẽ à xwÿnhjê hõ kot amnhÿ to wa ñe kumrêx hwÿr wryk ñe kamã mrõr xwÿnhja akupÿm mex. Kwÿjê rom akupÿm mex kurê kumrêx. Jakamã nhÿm pre hte mẽ à xwÿnhjaja akupÿm mex prãm xaj gô xok jamãr o hikwÿ. ⁵ Jakamã nhÿm mẽhõ myja ixkre hõ kamã hikwÿ. Te omnuj ñe arÿ hikwÿ hã amgrã xohtô rax ñe. Ra hã amgrã kêp 38. ⁶ Jakamã nhÿm Jejus mẽ hwÿr tẽ ñe omu. Nẽ hpri hã omu ñe hamaxpër o:

—Kwa mũj na hte omnuj ñe ri pa hkêt ã amgrã xohtô rax ñe. E pa akupÿm ho mex.

Anhÿr o hamaxpër hãmri ñe kãm:

—Pa. E kwa inhmã amnhÿ jarẽ. Xà amã akupÿm amex prãm? Anẽ.

⁷ Hãmri nhÿm kuma ñe kãm:

—Ku nhÿm. Inhmã tokyx akupÿm inhmex prãm tÿx kumrêx kênã. No mẽhõ kot tokyx inhmÿ ñe mẽ kêp ixto wa ñe ixkumrêx gô xok kamã inhmrõr? Na pa tee ri ixkumrêx hwÿr ixtẽm ñe inhmã inhmrõr prãm nhÿm mẽ xatã ixpê amnhÿ to wa ñe mra ñe kamã mrõ. Anẽ.

⁸ Hãmri nhÿm Jejus kãm:

—Tÿ? Tôe. E na ka akupÿm amex. E kãnhmã xa ñe akupÿr py ñe ma akupÿm anhõrkwÿ hwÿr tẽ. Anẽ.

⁹ Hãmri nhÿm kuma ñe ra akupÿm mex ñe kãnhmã xa ñe ri mra. Nẽ hkÿnh tÿx ñe hikupÿr py ñe ma akupÿm õrkwÿ hwÿr tẽ. Ijaew nhõ arÿgromnu pẽ sap ã nhÿm Jejus kot akupÿm ho mex ¹⁰ nhÿm ma akupÿm pry hã hikupÿr py ñe o tẽ. Nhÿm Ijaew nhõ pahi hkwyja nhÿhÿnh mra ñe tee ri kot sap ã hpÿr ñe o htẽm ã omu ñe kãm:

—Tk. Kwa mẽ pahpê Ijaew na pu htem mẽ panhõ arÿgromnu hã paxãpênh kêt ñe. Finat Mojes kot ja ñe mẽ pahkurê htã ka axtem ñe akupÿpta py ñe nhÿhÿm o tẽ. Anẽ.

¹¹ Hãmri nhÿm mẽ kuma ñe mẽ kãm:

—Tÿ. Kot anhÿr tã kot ixto mex xwÿnhta na ã inhmã kapër anẽ pa mar xà hkõt kupy ñe akupÿm inhõrkwÿ hwÿr tẽ. Anẽ.

¹² Hãmri nhÿm mẽ tee ri kuma ñe kãm:

—Kwa mẽhõ na we ã ri amã karõ anẽ? Anẽ.

¹³ Nhÿm kormã kot Jejus nhÿxi mar kêt jakamã kot mẽ kãm ahkre kaxyw hakêx ñe tee ri hkwyjê kaêx ã hapêr rÿt o xa. Nom nhÿm mẽ ohtô ñe pry hã mrar jakamã nhÿm tee ri hapêr nhÿm Jejus ra ma nhÿhÿm tẽ.

¹⁴ Tã nhÿm hã ahtÿmre nhÿm Jejus Tirtÿm mã amnhÿ jarênh xà hã ixkre hwÿr tẽ ñe axà ñe kot ho mex xwÿnhta pumu ñe kãm:

—Pa. E na ka ra akupÿm amex. Nom kwa kêr ka axte tanhmã amnhÿ tomnuj to ho ri apa hkêt ñe. Kot kaj axte ã amnhÿ nhÿpêx anẽ hãmri ñe apunuj tÿx o wam ate apunujta jakre kãm ga. Anẽ.

¹⁵ Hãmri nhÿm kuma ñe ma tẽ ñe kato. Nẽ ma mẽ õ pahijê hwÿr tẽ ñe mẽ kãm:

—E na pa ra kot ixto mex xwÿnhta nhÿxi ma. Xep kêp Jejus. Anẽ.

¹⁶ Hãmri nhÿm mẽ hixi ma ñe hã tanhmã axpên mã ho kapër punuj to. Mẽ õ arÿgromnu hã kot mẽ ho mex o pa jakamã nhÿm mẽ axpên jakwa kamã ri hixi ho rê ñe nhÿri omu ñe tanhmã hã kãm àkjêr to. ¹⁷ Hãmri nhÿm amnhÿ tã mẽ kuma ñe mẽ kãm:

—Ku nhÿm. Inhÿpêxã Tirtÿm na hte apkati mẽ tanhmã mẽ pahto mex to ho pa. Jakamã pa hte urak ñe ã mẽ ho mex rãhã ho ri ixpa anẽ ñe aa mẽmo arÿgro hã ja ho anhÿr kaga hkêt ñe.

¹⁸ Anhÿr o mẽ kãm amnhÿ jarẽ nhÿm mẽ kuma ñe kamã gryk tÿx ñe. Nom mẽ õ arÿgromnu hã kot mẽ ho mexja pix mÿrapê kamã gryk kêt. Mããnen Tirtÿm kêp hipêxã hã harênhja mÿrapê nhÿm prem kamã gryk tÿx kumrêx ñe axpên mã:

—Tk. Kwa na ã amnhÿ jarênh anhÿr jao te kêp Tirtÿm pyrak ã amnhÿ jarẽ. E kwa pu mẽ kupÿ ri. Anẽ.

*Tirtÿm Kra kot Hipêxã nhÿ hã amnhÿ nhÿpêx ã harênh
Juãw 14.10-13*

¹⁹ HãMRI nhũM JeJus axte mẽ kêP Ijaew nhõ pahijê mã kapêr nê mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nê. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nê mẽ ho mex o ri ixpa. Kwa mẽ amnhĩ krã him ja jaxà nê kãm ajamaxpêr tỳx nê ho apa.

²⁰ —Inhĩpêêxàja kãm iJapêê. Na hte inhmã kot tanhmã mẽ ho mex to piitã ho amnhĩrĩt. Ixte omunh nê uràk nê ý hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt nê. Kot paj mãânên mẽ kãm mẽmoj mex o ja jakrenh o anhỹr o ri ixpa ka mẽ hã ixpumu nê ixkamã ano puma ho apa.

²¹ —Nê Inhĩpêêxà kot akupỹm mẽ htyk xwỳnhjê ho htĩr jakamã kot paj uràk nê akupỹm mẽ htyk xwỳnhjê ho htĩr o ri ixpa. Anê.

Mẽ htĩr tũm nê mẽ pa mã xwỳnhjê jarênh

Juãw 3.16-17, 3.36, 6.27, 6.40, 6.60, 10.28, 17.2-3; Rõmãn 6.23; Karatas 6.8; Xitre 1.2; Wam Juãw 2.25, 5.11-13

²² NhũM JeJus arĩ mẽ kêP Ijaew nhõ pahijê mã kapêr nê mẽ kãm:

—Koja nhỹrmã Inhĩpêêxàja mẽ htĩr tũm nê mẽ pa ho mẽ pa mã xwỳnhjê jarênh kêt nê. Ja kaxyw na pre pa ixãm. ²³ Tã mẽ piitã mẽ kot ja hã ixpumunh nê ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrã nê pa ixtã hpijaàm o pa kaxyw. Jakamã koja mẽhõ ixtã hpijaàm kêt nê hãmri nê mãânên Inhĩpêêxà hã hpijaàm kêt ã amnhĩ to amnhĩrĩt. Tãm kot mẽ awỳr inhmênh kênã. ²⁴ Jakamã koja mẽhõ ixkapêr ma nê amnhĩ kaxyw kot mẽ awỳr inhmênh xwỳnhhta kôt hamaxpêr nê ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỳx kamã hamak o pa htũm xàta wỳr mõi kêt nê. Koja Inhĩpêêxà akupỹm ho htĩr nhũm wa ixri htĩr tũm nê mẽ ho pa. Jakamã koja mẽhõ ixkôt amnhĩ xãm hãmri nê ra kêP wa ixri htĩr tũm nê pa ho pa mã xwỳnh. Kwa mẽ jam ajamaxpêr tỳx rãhã ho apa.

²⁵ —No mẽ kãm ixkapêr mar prãm kêt xwỳnhjaja kêP Inhĩpêêxà mẽ wa ixri mẽ htĩr tũm nê mẽ pa mã xwỳnh kêt. Tã ixpê Tĩrtũm Kra jakamã koja mẽ ixkapêr ma nê ixkôt amnhĩ xunhwỳ. Hã kot paj amnhĩ tã mẽ omu nê mẽ htĩr tũm nê mẽ pa mã xwỳnh ã mẽ harê nhũm mẽ àmnhĩx ri hkĩnh nê pa ho pa. Kwa mẽ jam ajamaxpêr tỳx rãhã ho apa.

²⁶ —Nê Inhĩpêêxà tãm kêP mẽ ho mẽ htĩr xwỳnh. Tã ixpê Kra jakamã na pre amnhĩ pyrã nê ja kaxyw ixãm.

²⁷ —Ra kot mẽ akaxyw ixãm jakamã na pre mãânên ixte tanhmã mẽ ajarênh to kaxyw ixãm. Wa ixri mẽ atĩr tũm nê apa ho apa mã xwỳnhjê hã mẽ ajarênh rỳ wa ixri mẽ atĩr tũm nê apa hkêt mã xwỳnhjê hã mẽ ajarênh kaxyw. ²⁸⁻³⁰ Jakamã kot paj nhỹrmã ra mẽ htyk nê mẽ hikwỹ xwỳnh piitã mẽ kãm ixkapêr nhũm mẽ inhma. Koja mẽ ixkapêr ma hãmri nê akupỹm htĩr nê pika rũm hapôx pa. Hãmri nhũm mẽ kot kormã htĩr ri Tĩrtũm kapêr kôt amnhĩ nhĩpêx hkêt xwỳnhjaja mẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx pa. Nom nhũm mẽ kot amnhĩ to mex xwỳnhjaja. Ra mẽ kot Tĩrtũm kôt amnhĩ nhĩpêx jakamã koja mẽ ma Tĩrtũm mẽ wa ixwỳr api nê wa ixri mex nê hkĩnh rãhã htĩr tũm nê pa ho pa.

—Kot paj ja kaxyw tanhmã mẽ apiitã mẽ ajarênh to. Nom kot paj amnhĩ krã hkôt inhmã hprãm xà hkôt tanhmã mẽ ajarênh to hkêt nê. Kot paj Inhĩpêêxà kot mẽ awỳr inhmênh xwỳnhhta nhỹ hã àhpumunh tỳx xà hkôt tanhmã mẽ ajarênh to. Jao ãm hãmri mẽ ajarê. Kwa mẽ jam ajamaxpêr tỳx nê. No ã ixte mẽ amã amnhĩ jarênh anhỹrja ma nê tee ri ajamaxpêr kêt nê. Anê.

Mẽ kot JeJus kêP Tĩrtũm Kra hã harênh xwỳnhjê jarênh

Juãw 8.18; Wam Juãw 5.6-8

³¹ NhũM JeJus arĩ mẽ kêP Ijaew nhõ pahijê mã kapêr nê mẽ kãm:

—E na pa ra tanhmã mẽ amã amnhĩ jarênh to. Nom kop ãm papxipix ixte ã amnhĩ jarênh anhỹr ronhỹx ka mẽ inhma nê ajamaxpêr o: “Ko. Na apu ãm hãmri ã mẽ inhmã amnhĩ jarênh anê rỳ apu ãm amnhĩ to hêx.” Anhỹr o ajamaxpêr. ³² Nom papxipix na pa hte ã amnhĩ jarênh anhỹr kêt nê. Inhĩpêêxà haxwỳja na hte ã ijarênh anê. Nê ãm hãmri na hte tanhmã ijarênh to ho pa. Tĩrtũmja hêx kêt. ³³ No mẽ amã pika nhõ xwỳnhjê pix

kapër mar prãm jakamã na ka prem finat Juãw Paxisja wÿr akwÿjê rê nhùm mẽ ma hwÿr mra mẽ ixtã hkukja nhùm mẽ kãm tanhmã ijarënh to. Nẽ hprĩ hã mẽ kãm ijarë. ³⁴ No mẽ apê pika nhõ xwÿnhjaja mẽ ate axpën mã tanhmã ijarënh toja na ixpê tanhmã kute hkêt. Koja mẽhõ tanhmã ixto kapër punuj to rÿ tanhmã ijarënh mex to pa amnhĩ jarënh ma mẽ tee ri amnhĩ kukamã ijamaxpër o ixkaprĩ hkêt mẽ. Tã nom Juãw Paxis kapërja mẽ amã mex jakamã na pa ã mẽ amã harënh anẽ. Ka mẽ ra kot tanhmã ijarënh toja ma mẽ amnhĩ kaxyw ixkõt ajamaxpër mẽ ixkõt amnhĩ xunhwÿ mẽ nhÿrmã ty mẽ ma mẽ kot amnhĩ xà htÿx kamã hamak tùm xàta wÿr apa hkêt mẽ.

³⁵ —Juãw Paxis na pre te kanê hpòk mex mẽ mẽmoj to amnhĩrĩt mex pyrã mẽ mẽ amã Tĩrtùm kapër o amnhĩrĩt mex o pa. Ka prem te maripòtre kot kanê hã htu pyrã mẽ hwÿr akuprõ mẽ mar o akuhê. Nom hkõt ajamaxpër tÿx kêt mẽ. ³⁶ Na pre hprĩ hã mẽ amã ijarënh o ri pa.

—Tã pa pam mẽ awÿr wrÿ mẽ Inhĩpêêxã nhÿ hã mẽ akamã aa mẽ ate mẽmoj pumunh kêt kwÿ ho anhÿr o ri ixpa. Mẽ ate ja hã ixpumunh mẽ Inhĩpêêxã tãm kot mẽ awÿr inhmënh kõt ixpumunh kaxyw.

³⁷ —Nẽ Inhĩpêêxãja mãânën ixpê Kra hã mẽ amã ixto amnhĩrĩt. Ra mẽ anhõpinh xà kaxwÿnh kãm kot mẽ amã ixto amnhĩrĩt tã ka mẽ ama mẽ ãm ama mẽ ixkõt ajamaxpër kêt mẽ. ³⁸ Mẽ amã mẽ ate hkõt amnhĩ nhĩpêx o apa hprãm kêt. Mẽ ate kapër mar tÿx ronhÿx ka mẽ ixkapër ma mẽ amnhĩ kaxyw ixkõt ajamaxpër kurê kumrëx. Ixpê Tĩrtùm kot mẽ awÿr inhmënh xwÿnh kênã.

³⁹ —Nẽ Tĩrtùm kapër ã kagã htùm haxwÿja kot tanhmã ijarënh to. Ka htem wa ixri atĩr tùm mẽ apa ho apa hprãm xaj kamã harënh rãhã ho ri apa. Nẽ kot tanhmã pa ijarënh to htã ka mẽ ixkapër ma mẽ amnhĩ kaxyw ixkõt ajamaxpër kêt mẽ. Anẽ.

Ijaew nhõ pahijaja kot Jejus kaga hã mẽ harënh

⁴⁰ Nhùm Jejus arĩ mẽ kêp Ijaew nhõ pahijê mã kapër mẽ mẽ kãm:

—Nẽ pa na ixte Inhĩpêêxã mẽ wa ixri ixte mẽ ho mẽ htĩr tùm mẽ mẽ pa mã xwÿnh ã mẽ harënh tã ka mẽ amnhĩ kaxyw ixkõt ajamaxpër kêt mẽ. ⁴¹ Nom mẽ ate inhmex ã ijarënh kêt tã ja ixpê tanhmã kute hkêt. ãm Inhĩpêêxã pix kot inhmex ã ijarënhja na inhmã hprãm. ⁴² Ra ixte mẽ apumunh mex. Mẽ amã Tĩrtùm kĩnh kêt. ⁴³ Tãm kot mẽ awÿr inhmënh tã ka mẽ ixpumu mẽ ixkaga mẽ ixkõt amnhĩ nhĩpêx kêt mẽ. Nom koja mẽhõ amnhĩ krã hkõt mẽ awÿr tẽ mẽ tanhmã mẽ ajahkre hto ka mẽ ama mẽ hkõt amnhĩ nhĩpêx kurê kumrëx.

⁴⁴ —ãm pika nhõ xwÿnh pixjaja kot mẽ amex ã mẽ ajarënhja na mẽ amã hprãm. No Tĩrtùm kot amnhĩm mẽ amex ã mẽ ajarënhja mẽ amã hprãm ã mẽ ate amnhĩ jarënh tã mẽ amã ja prãm kêt. Jakamã na ka htem ixkaga kumrëx. ⁴⁵⁻⁴⁶ Tã nom kot paj pam nhÿrmã Tĩrtùm mã mẽ apê ixkwÿ hkêt ã mẽ ajarënh kêt mẽ. Mo kaxyw kot pa kêt ri ã kãm mẽ ajarënh anẽ? Finat Mojes tãm koja ja hã kãm mẽ ajarë. Na ka htem tanhmã ajamaxpër to mẽ ajamaxpër o: “Kot paj finat Mojes kot mẽ inhmã tanhmã kapër to hkõt amnhĩ nhĩpêx o ri ixpa hãmri mẽ nhÿrmã Tĩrtùm ri ixtĩr tùm mẽ inhmex mẽ ixpa ho ixpa.” Anhÿr o ajamaxpër nom hkõt amnhĩ nhĩpêx kêt mẽ. Mojes na pre hte pa ijarënh o pa. Tã mẽ ate kapër kõt amnhĩ nhĩpêx ronhÿx ka mẽ amnhĩ kaxyw ixkõt ajamaxpër mẽ ixkõt amnhĩ xunhwÿ. No mẽ ate ixkaga jakamã koja Mojes tãm Tĩrtùm mã mẽ apê ixkwÿ hkêt ã mẽ ajarë. ⁴⁷ Mẽ ate Mojes kapër kõt amnhĩ nhĩpêx kêt jakamã kot kaj mẽ mãânën ixkõt amnhĩ nhĩpêx hkêt mẽ. Anẽ.

Nhùm pre ã Jejus Ijaew nhõ pahijê mã kapër anẽ.

6

Jejus kot mẽ ho 5.000 mẽ mẽ kãm mẽ õ hã harënh

Matêwre 14.13-21; Makre 6.30-44; Rukre 9.10-17

¹⁻⁴ Tã nhùm ra arĩgro pê Pas ahtêp o mõ. Pasja ã mẽ ixpê Ijaewjaja na pa htem axpën wÿr akuprõ mẽ hã ôwêhti hkra nyw kwÿ pa mẽ ĩ hkur o ixkrĩ. Amnepêm Tĩrtùm kot pika

pê Ejit rûm mẽ inhîgêjtê kator kaxyw nhûm prem nojarêt nê ã hkwỳ hpar nê ã hkur anê. Tã arĩ mẽ ixpê mẽ hkanrêhã mẽ htàmnhwỳjaja jam ijamaxpêr pê ixkĩnh kaxyw ã amnhĩ nhĩpêx anê. Jakamã nhûm Jejus pàr krem axà nê ma himô pê Garirej ã rêr kaxyw ma xarmã mõ nê rê. Himôja nhĩxi hõ pê na Tipe nhûm hã xarmã mõ nê rê. Pa mẽ hkôt ixpa ho ixpa xwỳnhjaja ma hkôt ixpa.

Hãmri nhûm pika nhõ xwỳnh kwỳjaja Jejus ma mõi kãm omu hãmri nê ma gô kape hã pikap mẽ inhĩhkrep mra. Na pre ra Jejus mẽ kamã mẽ à xwỳnhjê ohtô nê akupỳm mẽ ho mex nhûm mẽ axte omu hãmri nê ma mẽ inhĩhkrep gô mỳ ri hpar o pa.

Tã pa mẽ xarmã rê nê pàr rûm ijabôj nê gô mỳ ri kỳxpê ixkrĩ hpa.

⁵ Hãmri nhûm mẽ inhĩhkrep mẽ mrar xwỳnhjaja mẽ ixwỳr hpôx o mra nhûm Jejus amnhĩ wỳr mẽ omu nê mẽ inhĩõ pê Firipti mã kapêr nê kãm:

—Kwa Firip. Mẽmoj kot puj mẽ pahwỳr mẽ mõi nêjjê mã ho anê nhûm mẽ kuku? Tanhmã kot puj mẽ amnhĩ to nê nhỹri mẽ kãm mẽmoj japrô nhûm mẽ kuku? Anê.

⁶ Ra tãm kot tanhmã mẽ kãm õ hto hã amnhĩ pumunh mex tã ã mẽ hã Firipti kamã hamak kaxyw mẽ hã hkukjêr anê. ⁷ Hãmri nhûm kuma nê tee ri mẽ hkukamã hamaxpêr nê kãm:

—Konên. Mẽ ohtô rax kumrêx kênã. Mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrô tã nhûm mẽ ãm ho hkryre nê kuku nê ho ôhy htu hkêt nê. Mẽ ohtô rax o mẽ ohtô rax kênã. Anê.

⁸⁻⁹ Hãmri nhûm mẽ inhĩõja kuma nê Jejus wỳr tẽ nê kãm kapêr. Simãw Pêtre htõ Andreja hwỳr tẽ nê kãm:

—E ota mẽhõ hkrata amnhĩ kôt õ hkwỳ ho mõ. No ãm grire. Na pãwti kêp 5 nê kaxyw õ tep axkrutre. No mẽ ohtô gri ã kot kêt mẽ hipêx pa. Anê.

¹⁰ Hãmri nhûm kuma nê hkôt mẽ ixpa ho mẽ ixpa xwỳnhjê mã kapêr nê mẽ inhmã:

—Tõe. Nà hãmri. E mẽ kãm anê kê mẽ hkrĩ pa. Anê.

Hãmri pa mẽ kãm anê nhûm mẽ põ kamã hkrĩ hpa. Na prem ohtô kumrêx. Mẽmyjê pixjaja kêp 5.000. Nê kaxyw mẽ hprô nê mẽ hkrajaja. Na prem ohtô ho ohtô. Tã piitã hkrĩ pa. ¹¹⁻¹² Hãmri nhûm Jejus mẽhõ hkrata pê õ pãwti jamỳ nê o xa nê Tĩrtũm mã harê nê kãm:

—Pa Papaj. Na ka hte mẽ inhmã mẽ inhõ ho apa. ãm kapxipix amex o amex. Anê.

Hãmri nê mẽ inhmã pãwtija gô pa mẽ ô ri mẽ hkrĩ xwỳnhjê mã ôr o mra nê ho mẽ piitã mẽ hipêx pa. Pãwtija ãm hkryre htã nhûm Jejus tanhmã ho nhûm ra ohtô rax kumrêx. Jakamã pa mẽ ô ri mẽ kãm ôr o mra nê ho mẽ piitã mẽ hipêx pa. Nhûm Jejus hpãnhã tep axkrutreta py nê mã ho anê nê Tĩrtũm mã harê hãmri nê amnhĩ xô ri mẽ inhmã kugô pa mẽ mã ho anê nê. Te ho pãwti nhĩpêx pyrã nê ho mẽ piitã mẽ hipêx. Hãmri pa mẽ ixpiitã apku nê inhõhy htu nhûm arĩ mẽõ jakrêx kwỳ hprã. Hãmri nhûm Jejus mẽ inhmã:

—E kwa mẽ hkôt mra nê mẽõ jakrêx o akuprô kê omnu hkêt nê. Anê.

¹³ Hãmri pa mẽ kuma nê ho akuprô nê kawà o 12 nê ho nỳt. Pãwti hkryreja ãm kêp 5 pix tã nhûm Jejus tanhmã ho nhûm rũnh kumrêx. Jakamã pa mẽ hakrêx prãr o kawà ho 12 nê ho nỳt pa. ¹⁴ Hãmri nhûm mẽ inhĩhkrep mẽ mõi xwỳnhjaja amnhĩ jaêr pê Jejus kot mẽ kãm mẽõ ho rax ã omu nê ri axpên mã harênh o:

—Kokỹỹ. Tãm mãn pre finat Mojesja amnepêm mẽ panhĩgêjtê mã harênh o ri pa. Tã ra mẽ pahwỳr wrỳ nà? ¹⁵ Kwa pu mẽ kãm pakapêr kãm paxihtỳx nê ma akupỳm amnhĩ kôt o mõ nê amnhĩ kaxyw ãm kê mẽ pahto amnhĩptàr o pa. Anê.

Hãmri nhûm Jejus amnhĩ tã mẽ kapêr ma nhûm ja kêp omnuj nê. Jakamã nhûm mẽ kêp kato nê ma hpãnhã ahte nhỹri hixêt õ hwỳr tẽ.

Jejus kot gô krãhkà hã htêm ã harênh

Matêwre 14.22-27; Makre 6.45-52

¹⁶ Tã nhûm ra kamãtre pa mẽ Jejus kôt ri ixpa ho ixpa xwỳnhjaja ma akupỳm himô hwỳr mra. ¹⁷ Nhûm kormã Jejus mẽ ixwỳr akupỳn htêm kêt jakamã pa mẽ tee ri kamã ama hãmri nê akupỳm pàr mã axà nê ma akupỳm Kapanaũ hwỳr xarmã ixrêr o mõ.

¹⁸ Pu nhũm ra kôk àpêr tỳx nhũm gô xatã kànhmã harĩ nê axpên wỳr mra nê axpên tak tỳx nê. ¹⁹ Pa mẽ kormã gô nhĩpôk ri mỗ. Nê tee ri rrēmti ho gô rēnh nhĩpêx kapry nom kormã ixrêr kêt nê. Nê kormã inhmôr o ixtã 5 kirôm pix nê. Hãmri nhũm ra Jejus gô krãhkã hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nê ixtỳx mẽkarô hã hkamnhĩx nê mẽ inhmã uma htỳx kumrêx. ²⁰ Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²¹ Hãmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijapôx pa.

Mẽ kot Jejus japêr mrrar ã mẽ harēnh

²² Tã nhũm apkati nhũm xarpê mẽ kot Jejus wỳr mrrar nhũm kot mẽ kãm ò xwỳnhjaja tee ri hapêr o pa nê axpên mã:

—Kwa nhỹhỹm măn pre we tẽẽ? Na pre hkôt ri mẽ pa xwỳnhjaja pix mẽ ò pàr kãm ma akupỹm xarmã mỗ nom nhũm Jejusja mẽ hkôt htēm kêt nê. Nà măn kormã jar nhỹhỹm ri mrrar jakamã pu mẽ kormã omunh kêt nê. Anê.

²³ Rôm nhũm Tipe rũm pàr kwỳja mẽ hwỳr pôj. Jejus kot mẽ apkur xà ho Tĩrtũm wỳr nê mẽ kãm ho rax xà hã pikata wỳr nhũm mỗn pôj. ²⁴ Hãmri nhũm mẽ amnhĩ wỳr omu nê tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hãmri nê axpên mã:

—E kwa pu mẽ ma mẽ hkôt xarmã mỗ nê Kapanaũ kamã mẽ hapêr. Anê.

Hãmri nê mẽ kãm amnhĩ jarê nê mẽ ò pàr kwỳ hwỳr agiê nê ma mẽ hkôt xarmã mỗn rê. ²⁵ Hãmri nê ra mẽ ixwỳr rê nê mẽ ixkôt pôj nê mẽ ixkaêx ã Jejus pumu nê hwỳr mra nê kãm:

—Pa mẽ ijahkre xwỳnh. Kwa na pa prem tee ri xarpê ajapêr hãmri nê man akôt mỗn rê. Kwa tanhmã na ka pre we amnhĩ to nê man tẽn rê? Anê.

²⁶ Hãmri nhũm mẽ kãm:

—Nà mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nê anhōhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nê ixpê Tĩrtũm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tỳx nê kêt wehe. Anê.

Jejus te kệp kaxkwa rũm mẽ paxàpkur xà maati pyrãk ã kot amnhĩ jarēnh

²⁷ Nhũm Jejus arĩ hwỳr mẽ mrrar xwỳnhjê mã kapêr nê mẽ kãm:

—Kwa kêt ka mẽ ri axàpkur xà pix kukamã ajamaxpêr o ri apa hkêt nê. Na htem mẽ apkur xà kukwak ri Tĩrtũm mẽ wa ixri htĩr tũm nê pa ho pa hkêt nê. No kot kaj mẽ amnhĩ kaxyw pa ixkôt ajamaxpêr nê ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nê wa ixri amex nê apa ho apa. Te ixpê mẽ kot mẽ apkur xà hkur nê ÿ hã htĩr tũm nê pa ho pa xwỳnh pyrãk. Ja kaxyw na pre Inhiêpêxà Tĩrtũm mẽ awỳr papxipix inhmẽ pa mẽ awỳr wrỳ. Anê.

²⁸ Hãmri nhũm mẽ kuma nê kãm:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nê mẽ ixto mex nê? Anê.

²⁹ Hãmri nhũm mẽ kuma nê axte mẽ kãm amnhĩ jarê nê mẽ kãm:

—Nà kot kaj mẽ amnhĩ kaxyw pa Tĩrtũm kot mẽ awỳr inhmēnh xwỳnh kôt ajamaxpêr hãmri nhũm ixtã mẽ apumu nê tanhmã mẽ akrã hto ka mẽ ajamakêtkati nê axamnhĩx akĩnh nê tanhmã amnhĩ nhĩpêx to ho ri apa. Anê.

³⁰ Hãmri nhũm mẽ kuma nê kãm:

—Tôe. Kwa axte mẽ inhmã aa mẽ ixte mẽmoj pumunh kêt ò ho anê. Pa mẽ ja hã apumu nê amnhĩ kaxyw akôt ijamaxpêr kurê kumrêx. E mẽmo kot ka mẽ inhmã ho anê? Kwa tokyx mẽ inhmã axte mẽmoj tanhmã ho pa mẽ omu. ³¹ Amnepêm finat Mojes pyrã kot kapôt ã mẽ panhĩgêjtê ho pa ri na pre hte apkati mẽ mẽ kãm mẽo mẽ kot kãm “manã” anhỹr xwỳnhhta gô nhũm pre htem hkur o pa. Tĩrtũm kapêr ã kagà htũm kot ja jarēnh kot:

Na pre kaxkwa rũm mẽ hwỳr mẽ apkur xà rē nhũm mẽ hkur o pa.

Anhÿr o kot harënh. Tã kot kaj Mojes nê apkati mē mē inhmã mē inhõ ho ri apa pa mē ja hã apumu nê rĩ kormã amnhĩ kaxyw akõt ijamaxpêr japêr. Anê.

³² Hãmri nhũm mē kãm:

—Xà Mojes na pre hte mē kãm kaxkwa rũm mē apkur xà rënh o pa? Nà tãm kêt. Inhĩpêxà na pre hte mē hwÿr kurê nhũm mē hkawrà nê kuku nê kukwak ri hihtÿx nê htĩr nê pa. Tã nhũm ra mē awÿr hpãnhã pa ixpê Kra hã inhmê. Kwa mē ixkapêr ma nê amnhĩ krãm haxàr tÿx nê. ³³ Na pre Tĩrtũm inhĩpêx o te amnepê m kot mē hwÿr kaxkwa rũm mē apkur xà rënh ta pyrã nê amnê pika hwÿr inhmê. Jakamã te ixpê kaxkwa rũm mē apkur xà maati wrÿk xwÿnh ta pyrãk. Mē ate amnhĩ kaxyw ixkõt ajamaxpêr nê ixkõt amnhĩ xunhwÿr hãmri nê ixkukwak ri wa ixri atĩr tũm nê apa ho apa kaxyw. Anê.

³⁴ Nhũm pre ã Jejus mē kãm amnhĩ jarënh anê nhũm mē kuma nom hprĩ hã mar mex kêt nê. ãm htÿx ho axtem mē apkur xà mex pix ã harënh ã hkamnhĩx nê kãm:

—Kwa tô mē inhmã mē apkur xà maata kwÿ gõ pa mē apkati mē hkur o ri ixpa. Anê.

³⁵ Hãmri nhũm mē kuma nê amnhĩ tã mē kãm:

—Nà mē apkur xà kumrêxja ãm paa. Te ixpê mē apkur xà maati pyrãk. Jakamã kot kaj mē atõ amnhĩ kaxyw ixkõt ajamaxpêr nê ixkõt amnhĩ nhĩpêx o apa hã kot kaj mē akĩnh nê apa. Te ra axãpkur nê anhõhy htu nê akĩnh o ri apa pyrãk. Jao amnhĩ tã ixpumu nê akĩnh nê ajamakêtkati nê ri apa.

³⁶ —Ra mē ate ixpumunh mex tã kormã amnhĩ kaxyw ixkõt ajamaxpêr kêt nê. Kwa mē ixkapêr ma nê amnhĩ krãm haxàr tÿx nê. ³⁷ Tĩrtũm kot inhmã mē õr mã xwÿnhjaja koja mē ixpumu nê amnhĩ kaxyw ixkõt hamaxpêr mex kurê kumrêx. ã mē kot amnhĩ nhĩpêx anhÿr xwÿnhjaja kot paj aa amnhĩ nê mē hanor kêt nê.

³⁸ —Nê ixte amnhĩ krã hkõt kaxkwa rũm ixwrÿk nê inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwrÿk kêt nê. Inhĩpêxà kot mē awÿr inhmênh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

³⁹ —Tã mo na hte Inhĩpêxà kãm hprãm? Nà kot inhmã mē õr mã xwÿnh piitã nhÿrmã wa ixkuri htĩr tũm nê mex nê pa ho paja na kãm hprãm. Jakamã nhÿrmã akupÿm mē htĩr ã arĩgrota ã ixte akupÿm mē ho htĩr nhũm ixte ãm pixire nê ho ixpikunor kêtja na kãm hprãm.

⁴⁰ —Tã kot ka mē atõ ixpê Tĩrtũm Kra hã ixpumu nê amnhĩ kaxyw ixkõt ajamaxpêr nê ixkõt amnhĩ xãm. Hã kot kaj nhÿrmã atyk tã pa akupÿm mē atĩr xà hã arĩgrota ã akupÿm ato atĩr ka wa ixkuri atĩr tũm nê amex nê apa ho apa. Ja na Inhĩpêxàja kãm hprãm. Anê.

Nhũm pre ã Jejus mē kãm amnhĩ jarënh anê. ⁴¹ Hãmri nhũm Ijaew nhõ pahijaja mē kuri mar o kuhê nê tee ri kêp kaxkwa rũm mē apkur xà maati pyrãk ã amnhĩ jarënh ma nhũm ja mē kãm mex kêt nhũm mē kamã gryk nê. ⁴² Jakamã axpên mã ri harënh o:

—Tk. Kwa mo na ri ã amnhĩ jarënh anê? Kêp mē panhĩõ kênã kot kêt ri kêp kaxkwa nhõ xwÿnh ã amnhĩ jarê. Kêp Juje mē Marir wa hkra na. Mē pahte katorxà mē hipêxà wa omunh mex kênã kot kêt axtem nê kêp kaxkwa nhõ xwÿnh ã amnhĩ jarê. Anê.

⁴³ Hãmri nhũm amnhĩ tã mē kuma nê mē kãm:

—Kwa mē ã ijarënh anhÿr kêt nê. ⁴⁴ Koja Inhĩpêxà kot mē awÿr inhmênh xwÿnh ta tanhmã mē hkrã hto nhũm mē rĩ kormã amnhĩ tã ja hã ixpumu nê amnhĩ kaxyw ixkõt hamaxpêr. Tã ã mē kot amnhĩ nhĩpêx anhÿr xwÿnhjaja koja mē nhÿrmã htyk tã pa akupÿm mē ho mē htĩr nhũm mē wa ixri htĩr tũm nê mex kumrêx nê pa ho pa.

⁴⁵ —Amnepê m Tĩrtũm kapêr jarënh o mē pa xwÿnhjaja na prem ã ja jarënh anhÿr o: Koja Tĩrtũm mē hkrã kaxwÿnh kãm tanhmã mē kãm kapêr o amnhĩrit to ho pa. Anhÿr o harënh. Jakamã mē kot Tĩrtũm kapêr mar nê hkõt amnhĩ nhĩpêx xwÿnhjaja koja mē mãânên amnhĩ kaxyw pa ixkõt hamaxpêr nê ixkõt ri amnhĩ nhĩpêx o pa.

⁴⁶ —Nê mē apê pika nhõ xwÿnhjê hõ aa mē ate ixkĩnhã ano ho Inhĩpêxà pumunh kêt. ãm papxipix na ixte omunh. Kurũm na pa pre mē awÿr wrÿ. ⁴⁷ Tã kot ka mē atõ amnhĩ kaxyw ixkõt ajamaxpêr. Hã kot kaj nhÿrmã wa ixkuri atĩr tũm nê amex nê apa ho apa. Kwa mē jam ajamaxpêr tÿx nê.

⁴⁸ —Ně ixpê mẽ axàpkurxà maati jakamã pa na ixpê akupÿm mẽ ho mẽ htír xwÿnh.
⁴⁹ Amnepêm mẽ panhîgêtjaja kormã kapôt ã mẽ pa ri mẽ kot “manã” anhÿr xwÿnhhta kur o ri pata ã na prem kukwak ri htír tÿm mẽ pa ho pa hkêt mẽ. Na prem ri pa mẽ gaa mẽ rî hpigêt mẽ htyk pa. ⁵⁰ Axtem kaxkwa rÿm mẽ apkur xà maati jarênh xwÿnhhta pix kukwak ri na htem nhÿrmã htyk tã akupÿm htír mẽ wa ixri htír tÿm mẽ mex mẽ pa ho pa. ⁵¹ ãm paa. Pa na htem inhî hkwÿ hkrê hãmri mẽ wa ixri htír tÿm mẽ mex mẽ pa ho pa. Na pa pre ra amnhî grôn timer mẽ awÿr wrÿ. Jakamã ka mẽ atõ inhî hkwÿ hkrê hãmri mẽ nhÿrmã atyk tã pa akupÿm ato atír ka Tirtÿm mẽ wa ixri atír tÿm mẽ amex mẽ apa ho apa. Anẽ.

⁵² Nhÿm pre ã Jejus Ijaew mã amnhî jarênh anẽ. No ãm mẽ kãm amnhî tã kuxi mẽ amnhî jarê. Jakamã nhÿm mẽ tee ri kuma hãmri mẽ tanhmã mã xapên mã kapêr to. Mẽ kot hprî mã mar kêt mẽ ãm mẽ kot ï hkwÿ hkrêrja pix jarênh mar jakamã tee ri hamaxpêr mẽ xapên mã:

—Kwa tanhmã kot kêt we amnhî to mẽ mẽ pamã amnhî nhî hkwÿ gõ pu mẽ kuku? Anẽ.

⁵³⁻⁵⁴ Hãmri nhÿm amnhî tã mẽ kuma mẽ mẽ kãm:

—Nà mẽ kot inhî hkwÿ hkrêr mẽ ixkamrô hkwÿ ho hkôm xwÿnh pixjaja koja mẽ nhÿrmã Tirtÿm mẽ wa ixri htír tÿm mẽ pa ho pa. Ixte akupÿm mẽ ho mẽ htír xà mã arîgrota ã kot paj mẽ ho mẽ htír nhÿm mẽ wa ixri htír tÿm mẽ mex mẽ pa ho pa. No kot kaj mẽ inhî hkwÿ hkrêr kêt mẽ ixkamrô hkwÿ ho akôm kêt hãmri mẽ wa ixri atír tÿm mẽ amex mẽ apa ho apa hkêt mẽ. Kwa mẽ jam ajamaxpêr tÿx rãhã mẽ. ⁵⁵ Kêt inhîja kêp mẽ apkur xà maati na. Nẽ ixkamrôja kêp mẽ hkôm xà maati na. Jakamã na htem inhî hkwÿ hkrê mẽ ixkamrô hkwÿ ho ixkõ mẽ ra kêp wa ixri mẽ htír tÿm mẽ mẽ pa ho mẽ pa mã xwÿnh. ⁵⁶ Jakamã kot ka mẽ atõ inhî hkwÿ hkrê mẽ ixkamrô hkwÿ ho ixkõ. Hãmri pa amnhî tã apumu mẽ akarõ mã axà ka te apê pa pyrãk o amnhî nhîpêx o apa. ⁵⁷ Inhîpêxã kot mẽ awÿr inhmênh xwÿnhhta kukwak ri na pa hte ixtír tÿm mẽ ixpa ho ixpa. Tã ja pyrã mẽ kot kaj mẽ inhî hkwÿ hkrê hãmri mẽ ixkukwak ri wa ixri atír tÿm mẽ apa ho apa mã xwÿnh.

⁵⁸ —Jakamã na pa ã mẽ amã ixpê kaxkwa rÿm mẽ axàpkur xà maati mã amnhî jarênh anẽ. Amnepêm mẽ panhîgêtjaja na pre htem kapôt ã mẽõta kur o pa hãmri mẽ gaa mẽ hpigêt mẽ htyk pa. No kêt pa koja mẽ inhî hkwÿ hkrê hãmri mẽ mẽ kurom wa ixri htír tÿm mẽ mex mẽ pa ho pa. Anẽ.

⁵⁹ Nhÿm pre ã Jejus mẽ kãm amnhî jarênh anẽ. Kormã Kapanau mã Tirtÿm kapêr o mẽ ahkre xà mã ixkre kamã ã mẽ ahkre anhÿr o xa.

Mẽ ohtô mẽ mẽ kot Jejus kaga mã mẽ harênh

Sikÿn Korî 3.6; Sikÿn Pêtre 3.16

⁶⁰ Hãmri nhÿm mẽ kot Jejus kôt mar o mẽ pa xwÿnhjaja ohtô mẽ ã kapêr anhÿrja ma mẽ tee ri amnhî kukamã hamaxpêr mẽ mã xapên mã:

—Tk. Kwa pêr kapêrja ãm ri katii. Mẽhõ koja we kuma mẽ hkôt hamaxpêr mẽ hkamrô mẽ ï kur o ri hkôt pa? Nà mẽ piitã mẽ kãm ja mexti mã. Anẽ.

⁶¹ Hãmri nhÿm amnhî tã mẽ kuma mẽ mẽ kãm:

—Kwa xà ixkapêrja mẽ apê omnuj? ⁶² Nà kot paj nhÿrmã ma akupÿm kaxkwa hwÿr api. Ixpê Tirtÿm kot mẽ akaxyw ixãm xwÿnh ã ma akupÿm hwÿr api. Hãmri ka mẽ ã ixte amnhî nhîpêx anhÿr ã ixpumu mẽ rî kormã ixkôt amnhî xunhwÿr japêr. ⁶³ Na htem mẽmoj kur kukwak ri kêp Tirtÿm mẽ wa ixri htír tÿm mẽ pa ho pa xwÿnh kêt mẽ. Rÿ amnhî krã hkôt tanhmã amnhî nhîpêx to ho kêp wa ixri htír tÿm mẽ pa ho pa mã xwÿnh kêt mẽ. Tirtÿm mẽ wa Ixkarõ tãm na hte mẽ hkarõ mã agjê mẽ mẽ ho Tirtÿm wa ixkuri mẽ htír tÿm mẽ mẽ pa ho mẽ pa mã xwÿnh. Tã ÿ mã na pa ã mẽ amã ixkapêr anẽ. Nom mẽ amã amnhî tã kuxi mẽ amnhî jarê. Tã kot kaj mẽ ixkapêr ma mẽ ixkôt amnhî nhîpêx. Mã kot kaj mẽ nhÿrmã wa ixri atír tÿm mẽ amex mẽ apa ho apa. ⁶⁴⁻⁶⁵ No mẽ akwÿjaja na ka mẽ ixkapêr ma mẽ ãm ama mẽ ixkôt ajamaxpêr kêt mẽ. Jakamã na pa ã mẽ amã ixkapêr anẽ mẽ mẽ amã: “Koja Inhîpêxãja tanhmã mẽ akrã hto ka mẽ rî kormã amnhî tã ixpumu mẽ amnhî kaxyw ixkôt ajamaxpêr.” Anhÿr o mẽ amã ixkapêr. Anẽ.

Nhũm ã Jejus mẽ kãm kapêr anê. Ra kot mẽ hkukamã mẽ omunh mex. Ra kot amnhĩ kaxyw mẽ kot hkôt hamaxpêr mã xwýnhjê pumunh nê mãânên mẽ kamã kot mẽõ pahi nhĩhkram haxàr mã xwýnhja nhũm mãânên ra kot amnhĩ kukamã omunh mex. Jakamã nhũm ã mẽ kãm kapêr anê. ⁶⁶Hãmri nhũm mẽ kot hkôt kapêr mar o mẽ pa xwýnh kwýjaja tee ri kuma hãmri nê hkaga nê axte hkôt pa hkêt nê. ⁶⁷Hãmri nhũm tee ri mẽ kot hkaga nê ma mẽ mrar ã mẽ omu nê mẽ ixpê hkôt ixpa ho ixpa xwýnh pê 12jê mã kapêr nê mẽ inhmã:

—Pa? No mẽ kajaja. Xà kot kaj mẽ uràk nê ixkaga nê ma akupým mra nà? Anê.

⁶⁸Hãmri nhũm Simãw Pêtre kãm:

—Nà kot paj mẽ akaga hkêt nê. Kapxipix na htem amnhĩ kaxyw akôt hamaxpêr jao kêp Tirtũm mẽ war akuri htĩr tũm nê pa ho pa mã xwýnh. ⁶⁹Ka na pre Tirtũm mẽ ixwýr amê. Jakamã na pa mẽ amnhĩ kaxyw akôt ijamaxpêr o ri ixpa. Nà kot paj mẽ aa akaga hkêt nê. Anê.

⁷⁰Hãmri nhũm kuma nê kãm:

—Nà ixte amnhĩ kaxyw mẽ apê 12jê rênh tã na ka mẽ atõ akwýjê hkĩnhã axtem nê Satanasti hkôt amnhĩ xãm. Anê.

⁷¹Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anê. Mẽ inhĩ õ na pre. Nê kêp Simãw Kariot kra na pre. Tã ra kot mẽ ihkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anê.

7

Jejus tøjaja kot mẽ hkĩnh wýr amnhĩ kôt hwýr ã mẽ harênh

Matêwre 10.36, 13.57-58

¹Tã nhũm Jejus arĩ Garirej kamã ri pa nê kormã akupým Jutej wýr mõi kêt nê. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwýr mõi kêt nê.

²Tã mẽ ixpê Ijaew mẽ ixte ixkre hkryre nhĩpêx nê hã ixkĩnh ã arĩgroja ra ahtêp o mõi. Mẽ ixkĩnhã ã na pa pre htem ixpiitã Jutej wýr axpên wýr akuprõ nê ahpýnhã ri amnhĩm ixkre hkryre nhĩpêx nê kamã ixkrĩ. ³Jakamã nhũm Jejus tøjaja hwýr mra nê kãm nojarêt nê amnhĩ kôt kuwý nê kãm:

—E kwa tokyx pu mẽ pahkwýjê hkôt. Ka mẽ kãm aa mẽ kot mẽmoj pumunh kêt kwý ho anhýr o ri mẽ hkôt apa kê mẽ kãm akapêr mar prãm xwýnhjaja ja hã apumu. ⁴Na ka hte jar te apimxur pyràk o amnhĩ nhĩpêx. E kwa tokyx ma pu mẽ hkôt. Anê.

⁵Katorxà hkôt mẽ kêp Jejus tõi htã kormã amnhĩ kaxyw hkôt hamaxpêr kêt jakamã na prem ã kãm kapêr anê. ⁶Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ hkôt amrar prãm nê mãmrĩ ma mẽ hkôt mra. ⁷Koja mẽ apumu nê kãm mẽ akurê hkêt nê. Nê mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwýr mõi nê mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nê ixkamã gryk nê. ⁸Jakamã mẽ mãmrĩ ma mẽ hkôt mõi. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

⁹Anê nhũm mẽ tee ri kuma hãmri nê kure nê ma mẽ hkwyjê hkôt Jutej wýr mõi. Nhũm Jejus kormã Garirej kamã ri pa hã apkati grêre. ¹⁰Hãmri nê kormã ma hapu hã mẽ hkôt mõi. Pa mẽ hkôt ri ixpa ho ixpa xwýnhjaja ma hkôt ixpa.

Mẽ kot ahpýnhã tanhmã Jejus jarênh to hã mẽ harênh

Juãw 7.37-44, 9.22, 10.19-21, 12.42-43

¹¹Rõm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwýnhjê kaêx ã Jejus japêr o ri mra. Nê hã axpên kukjêr o mra nê axpên mã:

—Kwa nok? Nhýri mãn we? Anê.

¹²Nhũm Ijaew piitã tanhmã axpên mã Jejus jarênh to ho pa. Nê kamã mẽ hkwyjaja harênh o:

—Nà kot amnhĩ to mex o pa xwýnh na.

Anhÿr o harënh o pa. Nê kamã mẽ hkwÿjaja axtem nê harê nê harënh o:

—Tk. Kot mẽ no kupyri o pa xwÿnh kênã. Anê.

¹³ Nom mẽ õ pahi pymaj mẽ piitã mẽ nom tanhmã harënh to hkêtnê. ãm axpën mã pix mã tanhmã harënh to ho pa.

Jejus kot mẽ hkÿnh xwÿnhjê jahkre hã harënh

Makre 3.22; Juãw 5.16

¹⁴ Tã pa mẽ mẽ hwÿr pøj. Jejus mẽ pa mẽ hkôt ixpa ho ixpa xwÿnhjaja mẽ hwÿr pøj. Kormã mẽ hkÿnhja hapêx kêt ri. Hãmri pa mẽ Jejus kôt Tÿrtüm mã amnhÿ jarënh xà hã ixkreja wÿr mra nê agjê nhüm Jejus mẽ ahkre ho nhÿ. ¹⁵ Hãmri nhüm mẽ inhõ pahijaja tee ri kot tanhmã mẽ ahkre hto hã kuma nê hã axpën kukja nê axpën mã:

—Kwa mẽ pahkÿnhã kot Tÿrtüm kapër o istuda hkêtnê tã ã mẽ ahkre anê. Anê.

¹⁶ Hãmri nhüm amnhÿ tã mẽ kuma nê mẽ kãm:

—Nà na pa hte amnhÿ krã hkôt tanhmã ri mẽ ajahkre hto hkêtnê. ãm kot mẽ awÿr inhmënh xwÿnhhta nhÿ hã na pa hte ã mẽ ajahkre anhÿr o ri mẽ akôt ixpa. ¹⁷ Tã kot kaj mẽ amã Tÿrtüm kãm hprãm xà hkôt amnhÿ nhÿpêx prãm hã kot kaj mẽ ixte ÿ hã ixkapër ã ixpumunh kurê kumrêx. ¹⁸ Amnhÿ krã hkôt mẽ kãm kapër o ri mẽ pa xwÿnhjaja na htem mẽ kot mẽ mar nê mẽ hã hpjaàm pix kaxyw tanhmã mẽ kãm kapër to ho ri pa. No kêt pa na mẽ ate ixkapër mar nê kot mẽ awÿr inhmënh xwÿnhhta ã apjaàm pix kaxyw na pa hte tanhmã mẽ amã ixkapër to ho ri ixpa. Jakamã ãm hãmri na pa hte mẽ amã ixkapër o ri ixpa.

¹⁹ —Finat Mojes na pre mẽ panhÿgêjtaja kot tanhmã amnhÿ nhÿpêx to ho pa nhüm Tÿrtüm kot mẽ kãm hã karõ jarënh o ri mẽ hkôt pa htã ka mẽ hkôt amnhÿ nhÿpêx kêt nê. Tã ixte hkôt amnhÿ nhÿpêx kêt ã ixto axêx nê mẽ ate ixpÿr kaxyw ixtã amnhÿ jarënh ri apa. Anê.

²⁰ Hãmri nhüm mẽ ã Jejus kot mẽ kãm kapër anhÿrja ma nê hêx rom kãm:

—Kwa mẽ ixtõ na pa apÿr mã ka ri ã mẽ ijarënh anê? Amrakati kênã. Kwa mãn ka akrã axpã nã? Hã na ka ã ri akapër anê. Anê.

²¹ Hãmri nhüm mẽ kãm:

—Nà ixte mẽ pahkôt xà hã arÿgro hã akupÿm mēhõ myta ho mex jakamã na ka prem ja hã ixpumu nhüm ja mẽ apê omnuj nê. Nê te ixte mẽ pahkôt xà hã arÿgro hã ixpijaàm kêt xwÿnh pyrãk ã ijarê. ²² Nom na ka htem ixpyrà nê mẽ panhõ arÿgromnu hã mẽmoj tã axapênh o ri apa. E pa mẽ amã mẽmoj jarê ka mẽ inhma. Na pre finat Mojes mẽ pamã mẽ pahte mẽ pahkra myre pè my kwÿrÿt kà jakàr ã mẽ pamã karõ. Kukamã higêjtaja kot kãm ja hã karõ xà hkôt. Jakamã na htem mẽ hkra myre hapøj nê hã semãn pyxi nê hapêx nhüm mẽ kêp mẽmy hkwrÿt kà jakà. ²³ Mẽ pahkôt xà hã arÿgro hã hõ kator tãã nhüm mẽ hã semãn pyxi nê mẽ panhõ arÿgromnu hõ hã kêp my kwÿrÿt kà hkwÿ krãhta. Mojes kot Tÿrtüm nhÿ hã ja hã mẽ pamã karõ xà hkôt. Jao mẽ panhõ arÿgromnu hã apê. Tã pa pre mẽ apyrã nê arÿgromnu hã ixapênh pè akupÿm mēhõ myta ho mex ka mẽ ja hã ixpumu nê axtem nê ixtÿx ri ixte amnhÿ nhÿpêx o ixpa xwÿnh ã ijarê nê mẽ ate ixpÿr kaxyw ã amnhÿ jarê. ²⁴ Kwa mẽ amnhÿ krã hkôt tanhmã mẽ harënh to ho ri apa hkêtnê. ãm mẽ kot tanhmã amnhÿ nhÿpêx to ho pa hã mẽ omu nê ajamaxpër o: “Kwa xà we Tÿrtüm kãm ja mex nã?” Anhÿr o mãn kêt mẽ ajamaxpër nê rÿ kormã tanhmã mẽ harënh to. Anê.

²⁵ Hãmri nhüm Jerujarê nhõ xwÿnh kwÿjaja ja hã kuma nê tee ri hkukamã hamaxpër. Hãmri nê hã axpën kukja nê axpën mã:

—Kwa xà tãm na mẽ panhõ pahijaja mẽ kot hpÿr kaxyw hã amÿnê? ²⁶ Ota jar mẽ pakamã ri pa htã nhüm mẽ ãm omu nê kãm tanhmã nê hkêtnê. Mãn mẽ ãm hãmri kêp Kris ã hkamnhÿx jakamã kapër ma nê ãm kuma nê kêp Kris ã tanhmã ho hkêtnê. Anê.

²⁷ Hãmri nhüm mẽhõja kuma nê kãm:

—Tk. Nà kêp Tÿrtüm kot mẽ pahwÿr mẽnh xwÿnhre hã. Kêp Najare nhõ xwÿnh kênã. Mẽ pahte hipêxà mẽ katorxà wa omunh mex. No kêt Tÿrtüm kot mẽ pahwÿr mẽnh mã xwÿnhhta koja xep mẽ pahwÿr kato pu mẽ nhÿhÿnh htēm xà hkôt omunh kêt nê. Anê.

²⁸ Rôm nhũm Jejus arĩ Tĩrtũm mã amnhĩ jarẽnh xà hã ixkreja kamã mẽ ahkre ho nhỹ. Jakamã mẽ kot axpẽn mã harẽnh ã amnhĩ tã mẽ kuma nẽ mẽ kãm:

—Xà mẽ ate aprĩ hã ixpumunh nẽ nhỹhỹnh ixtẽm xà hkõt ixpumunh? Nà mẽ ate ja hã ixpumunh kêt. Na pa pre amnhĩ hkrã hkõt mẽ awỳr inhmõr kêt nẽ. Na pre mẽhõ mẽ awỳr inhmẽ. Nom kot mẽ awỳr inhmẽnh xwỳnhja kormã mẽ ate omunh kêt. ²⁹ ãm papxipix na ixte omunh. Kurũm ixwỳk xwỳnh na pa. Kot mẽ awỳr inhmẽnh nhũm kurũm ixwỳk jakamã ixte ixprĩ hã omunh par. Anẽ.

³⁰ Hãmri nhũm mẽ hkwỳjaja tee ri ã kot amnhĩ jarẽnh anhỹrja ma nẽ ri axpẽn mã harẽnh o:

—Kwa Tĩrtũm kot mẽ pahwỳr mẽnh ã kot amnhĩ to hẽx kẽnã. E kwa pu mẽ ã kot amnhĩ to hẽx anhỹr ja ã unê nẽ haxà nà?

Anhỹr o axpẽn mã hã amỹnê. Nom kormã mẽ kot unênh nẽ haxàr xà hã arĩgroja kormã kator kêt jakamã nhũm Tĩrtũmja nẽ mẽ omunh mex nẽ nhũm mẽ ãm kãm unênh prãm kaprỹ. ³¹ No nhũm mẽ hkwỳja mẽ kurom kuma nẽ kệp Tĩrtũm kot mẽ pakaxyw ãm xwỳnh ã omunh kurê kumrẽx nẽ amnhĩ kaxyw hkõt hamaxpẽr. Hãmri nẽ axpẽn mã harẽnh o:

—Kwa mãn kệp Tĩrtũm kot mẽ pahwỳr mẽnh mã xwỳnhhta mãn nà? Mẽ pahtõ kot pu uràk nẽ aa mẽ kãm mẽ kot mẽmoj pumunh kêt o anhỹr rax o ri papa? Amrakati kumrẽx. Nà pẽr tãm kẽnã. Anẽ.

Pôristi hkwỳ kot Jejus pynênh kaxyw ã mẽ harẽnh

³² Nhũm prem ã axpẽn mã Jejus jarẽnh anhỹr o kuhê hãmri nhũm Parijew nhõ xwỳnhjaja hã mẽ kuma. Hãmri nẽ patre krãhtũmjê mẽ mẽ ma Jejus wỳr mẽõ pôristi hkwỳ rẽ nẽ mẽ kãm:

—E mẽ ma Jejus wỳr mra nẽ unê nẽ man akupỹn o tẽ. Anẽ.

³³ Hãmri nhũm mẽ kuma nẽ ma hwỳr mra nẽ omu nom tokyx unênh kêt nẽ. Kormã kapẽr ã mar o kuhê. Nhũm Jejus arĩ mẽ kãm kapẽr o xa nẽ mẽ kãm:

—Nà kot paj jar mẽ akõt ri ixpa hã mytwrỹ grêre hãmri nẽ ma akupỹm kot mẽ awỳr inhmẽnh xwỳnhhta wỳr api. ³⁴ Ka mẽ tee ri jar ijapêr o ri apa nom nhỹri ixpumunh kêt nẽ. Nẽ ma inhmõr xàta wỳr kot kaj mẽ atõ ma ixkõt amõr kêt nẽ. Anẽ.

³⁵ Hãmri nhũm mẽ tee ri ã kot amnhĩ jarẽnh anhỹrja ma nẽ axpẽn mã:

—Kwa nhỹhỹm koja we ma mõ pu mẽ hkõt papa hkêt nẽ? Mãn mẽ pahkwỳjaja kot Gresjê kamã mẽ pa xwỳnhjê hwỳr koja ma mõ nẽ hpãnhã mẽ hkõt mẽ ahkre ho pa nà? Hã na ã mẽ pamã amnhĩ jarẽnh anẽ? ³⁶ Mo na ri mẽ pahte tee ri hapêr o papa hã mẽ pajarẽ nẽ mẽ pahte hkõt pamrar kêt ã mẽ pajarẽ? Anẽ.

Tĩrtũm Karõ te kệp gô nyw pyrãk ã harẽnh

Juãw 4.13-14; Apokarip 22.1, 22.17

³⁷ Tã nhũm ra mẽ hkĩnhja hapêx kaxyw hitep xà hã arĩgro maatija kato. Jakamã nhũm Jejus kãnhmã xa nẽ kỳxpê mẽ hpikuprõnh xwỳnhjê mã kapẽr nẽ mẽ kãm:

—E te mẽ amã kôr o apa pyrãk xwỳnhjaja. Mẽ amnẽ ixwỳr akuprõ. Kot kaj mẽ amnhĩ kaxyw ixkõt ajamaxpẽr pa tanhmã mẽ ato ka mẽ apê Tĩrtũm mẽ wa ixri atĩr tũm nẽ apa ho apa mã xwỳnh.

³⁸ —Kot kaj mẽ ja hã amnhĩ pumu hãmri nẽ ma mẽ kãm ixkapẽr jarẽnh o ri mẽ hkõt apa. Te mẽ kãm kôr nhũm mẽ ate mẽ kãm gô hkwỳ nhũm mẽ kot ho hkõm pyrãk o mẽ hipêx o ri mẽ hkõt apa. Hãmri nhũm mẽ ama nẽ mẽ apyrã nẽ amnhĩ kaxyw ixkõt hamaxpẽr. Pa ixte tanhmã mẽ atoja pyrã nẽ tanhmã mẽ ho nhũm mẽ apyrã nẽ kệp wa ixri htĩr tũm nẽ pa ho pa mã xwỳnh. Anẽ.

³⁹ Nhũm pre ã Jejus mẽ kãm kapẽr anẽ. No ãm hã kuxi nẽ mẽ kãm kapẽr nẽ hprĩ hã harẽnh kêt nẽ. Tĩrtũm Karõ kot nhỹrmã mẽ kot amnhĩ kaxyw Jejus mã hamaxpẽr xwỳnhjê karõ mã gjêxja nhũm ã mẽ kãm hã kuxi nẽ harẽnh anẽ. No kormã akupỹm kaxkwa hwỳr àpir nẽ mex o mex nẽ hkrĩ hkêt jakamã kormã mẽ hwỳr Karõ rẽnh kêt nẽ.

Mẽ kot ahpỹnhã tanhmã Jejus jarẽnh to hã mẽ harẽnh

Juãw 7.11-13, 7.25, 10.19-21

⁴⁰ Hāmri nhūm mẽ kot Jejus mar o hkrī xwỳnhjaja ã kapěr anhỹrja ã kuma nẽ ahpỹnhã tanhmã harẽnh to nẽ harẽnh o:

—Kwa finat Mojes pyrã nẽ kệp Tĩrtũm nhỹ hã kapěr jarẽnh o pa xwỳnh na nà? Anẽ.

⁴¹ Nhūm kamã mẽ hkwỳjaja mẽ kãm:

—Nà Tĩrtũm kot mẽ pakaxyw ãm xwỳnhnta na. Anẽ.

Nhūm kamã mẽ hkwỳjaja ja hã mẽ kuma nẽ mẽ kãm:

—Tk. Nà kệp Garirej nhõ xwỳnh kênã kot kêt Tĩrtũm mẽ pakaxyw ãm. ⁴² Tĩrtũm kapěr ã kagã htũm kot kệp Garirej nhõ xwỳnh ã harẽnh kêt. Kệp Pahi Tawi hkanrẽhã hkagrõt nyw jakamã koja uràk nẽ Jutej kamã krĩ pê Perěj kamã kato. Jao koja uràk nẽ kệp Jutej nhõ xwỳnh.

Anhỹr o ri axpẽn mã harẽ. Mẽ kot htỳx Jejus pika pê Garirej kamã kator ã hkamnhĩx jakamã ã axpẽn mã harẽnh anẽ. Nom pika pê Jutej kamã na pre kato. Krĩ pê Perěj kamã. Tã no nhūm mẽ hkwỳjaja ja hã mar kêt jakamã kệp Tĩrtũm kot mẽ pahwỳr mẽnh xwỳnh kêt ã hkamnhĩx.

⁴³ Jakamã nhūm mẽ ã ahpỹnhã axpẽn mã harẽnh anẽ. ⁴⁴ Nhūm mẽ hkwỳjaja ra kot unênh kaxyw tã tokyx unênh kêt nẽ.

Pôristi kot Jejus pynênh kêt ã mẽ harẽnh

Matêwre 7.28-29

⁴⁵ Tã nhūm patre nhõ pôristijaja. Mẽ kot Jejus pynênh mã hwỳr mrrar tã hāmri ã kapěr anhỹrja ã kuma nẽ tee ri hamaxpěr nẽ unênh kêt nẽ. Nẽ awjanã nẽ ahte ỹ kamã ma akupỹm patre krãhtũmjê mẽ Parijew nhõ xwỳnhjê hwỳr mra. Hāmri nhūm mẽ omu nẽ mẽ kãm:

—Pa nok? Tanhmã na ka mẽ amnhĩ to nẽ unênh nẽ ho amõr kêt nẽ? Anẽ.

⁴⁶ Hāmri nhūm mẽ kãm:

—Nà na pa mẽ unênh kêt nẽ. Kapěr mex kênã. Te kot mẽ pakapěr pyrãk kêt jakamã pa mẽ tee ri kapěr ã kuma nẽ unênh kêt nẽ. Anẽ.

⁴⁷ Hāmri nhūm Parijew nhõ xwỳnhjaja mẽ kuma nẽ mẽ kãm:

—Tk. Kwa mãn ka mẽ ra mẽ uràk nẽ tanhmã kot amnhĩ to hêx toja ma nẽ hkõt ajamaxpěr nà? ⁴⁸ Mẽ ixpê Parijew nhõ xwỳnhjaja nẽ mẽ panhõ pahijaja na pa htem hkõt ijamaxpěr kêt nẽ. ⁴⁹ No kêt mẽ kot mar nẽ hkõt hamaxpěr xwỳnhntijaja na htem mẽ ixkĩnhã finat Mojes kapěr mar kêt nẽ. ãm Jejus kapěr pix na htem kuma nẽ hkõt hamaxpěr. Mỳrapê koja Tĩrtũm tanhmã mẽ homnuj tỳx to nhūm mẽ rĩ amnhĩ pumu. Anẽ.

Nĩkotẽ kot Jejus xyr pê kapěr ã harẽnh

Juāw 3.1-21

⁵⁰ Hāmri nhūm Nĩkotẽja mẽ mar o xa. Mẽ uràk nẽ kệp Parijew nhõ xwỳnh tã na pre ra kamàt õ hã Jejus wỳr tẽ nẽ kãm kapěr. Jakamã tee ri hã mẽ kapěr ma hāmri nẽ yr pê mẽ kãm kapěr nẽ mẽ kãm:

⁵¹ —Tk. Kwa kormã mẽ pahte pahprĩ hã kapěr mar nẽ tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtjê mã ja jarẽnh o:

Kêr ka mẽ aprĩ hã mẽ kapěr ã mẽ ama nẽ mẽ kot amnhĩ nhĩpêx ã mẽ omu nẽ rĩ kormã tanhmã mẽ harẽnh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harẽ. Anẽ.

⁵² Hāmri nhūm mẽ tee ri kuma nẽ kãm:

—Tk. Kwa xã we uràk nẽ apê Garirej nhõ xwỳnh hã na ka ã yr pê akapěr anẽ? Xà Tĩrtũm kapěr ã kagã htũm kot Garirej nhõ xwỳnhjê hõ kệp ỹ hã kapěr jarẽnh o pa xwỳnh ã harẽnh? Nà ã kot harẽnh anhỹr kêt. Anẽ.

⁵³ Nhūm mẽ ã Nĩkotẽ mã kapěr anẽ hāmri nẽ anhgrã nẽ Tĩrtũm nhõrkwỹ rũm hapôj nẽ ma akupỹm õrkwỹ hwỳr àhkurê ho mra.

8

Mêhõ ni kot nhãm mẽ mjên o amnhĩkati hã harênh

Xiakre 2.10-13

¹ Tã nhũm Jejus Tĩrtũm nhõrkwỹ kamã mẽ ahkre hpa hãmri nẽ kato nẽ ma hixêt prêk pê Oriwêhti hwỳr tẽ. Hãmri nẽ hã api nẽ nhỹri nõ nẽ ra gõr.

² Tã nhũm apkati nẽ myt kator o mõi mẽ nhũm kànhmã nhỹ nẽ akupỹm wrỳ nẽ Tĩrtũm mã amnhĩ jarênh xà hã ixkre hwỳr tẽ. No ãm kormã ixkre pu hã kahê hkre kamã nhỹ. Nhũm krĩ nhõ xwỳnhjaja omu nẽ hã hturax nẽ nhũm tanhmã mẽ ahkre hto ho nhỹ. ³ Hãmri nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja hwỳr mêhõ nija o tẽ. Na ra ham mêhõ pê mjên o amnhĩkati ho nõ nhũm mẽ ja hã omu nẽ unê nẽ hpa hã kupy nẽ ma Jejus wỳr hkjênh o mõi. Hãmri nẽ mẽ kot mar o kuhê xwỳnhjê kutã ãm nhũm xa. ⁴ Hãmri nhũm mẽ Jejus mã:

—E ot pa mẽ awỳr jahti ho tẽ ka omu. Na ham mêhõ pê mjên o amnhĩkati ho nõ. Pa mẽ ja hã omu nẽ unê nẽ man awỳr o tẽ. ⁵ E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtê mã ja jarênh o:

Koja mênijê hõ axtem nẽ nhãm mêhõ pê mjên o amnhĩkati ho nõ ka mẽ ja hã omu nẽ apiitã ahpỹnhã kên rũnh jamỳ nẽ ho htak o apĩ.

Anhỹr o kot harênh. No ka? Tanhmã kot kaj mẽ inhmã ja jarênh to? Tanhmã kot paj mẽ hipêx to nhũm amã mex nẽ? E mẽ inhmã tanhmã mẽ ixte hipêx to jarê. Anẽ.

⁶ Nhũm mẽ ã hêx rom nija ã Jejus kukjêr anẽ. Kot mẽ kot hpĩr nẽ mẽ kãm kapêr nhũm mẽ kot hã mar nẽ mẽ hkrãhtũmjê hwỳr mõi nẽ kãm kot Mojes kapêr kwỳm ri mẽ ahkre hã harênh kaxyw nhũm mẽ hêx rom ã hkukjêr anẽ. Hãmri nhũm mẽ kuma nẽ tanhmã hã mẽ kãm nẽ hkêt nẽ. ãm htỳx hikõt nẽ ãhkrakrã ho pyka kagà ho nhỹ. ⁷ Nhũm mẽ tee ri omu nẽ axte hã hkukja nhũm kànhmã xa nẽ mẽ kãm:

—Tõe. Nà kot ka mẽ atõ aa tanhmã amnhĩ tomnuj to hkêt kumrêx ã amnhĩ pumu hãmri nẽ kam nẽ rĩ kaxyw kên õ py nẽ akumrêx ho hkura. Kê akwỳjaja rĩ kormã akõt hkwỳ jamỳ nẽ ho htak. Anẽ.

⁸ Hãmri nẽ akupỹm hikõt nẽ pyka kagà ho nhỹ. ⁹ Hãmri nhũm mẽ tee ri kapêrja kõt kuma hãmri nẽ mẽ kot mar o kuhê xwỳnhjê rũm anhrã nẽ ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapêr anhỹrja ma nẽ anhrã nẽ ma akupỹm hpỹnh nẽ axpên kõt mrar o xa. Mêhpigêr kumrêx nẽ hpãnhã mẽ nywjaja nhũm mẽ hpỹnh nẽ ma axpên kõt mrar o ãm kãm hapêx. Nhũm Jejus mênija pix wa ahte mẽ kot mar xwỳnhjê kutã wa arĩk. ¹⁰ Hãmri nhũm Jejus kànhmã xa nẽ nita mã kapêr nẽ kãm:

—Pa? No mẽ kot ato kapêr xwỳnhhta mẽ? Xà na mêhõ kên o akuranh kêt nẽ? Anẽ.

¹¹ Nhũm kãm: “Ma amrakati.” Anẽ nhũm kãm:

—Tõe. Nà kot paj ijaxwỳja tanhmã ato hkêt nẽ. E mamrĩ ma akupỹm anhõrkwỹ hwỳr tẽ. No ãm kêr ka axte ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

Jejus kot hprĩ hã amnhĩ jarênh

Juãw 1.4; Rõmãn 13.12-14; Epes 5.8-14; Wam Tesarõn 5.5-8

¹² Tã nhũm arĩgro hõ hã nhũm Jejus axte Tĩrtũm nhõrkwỹ hwỳr tẽ nẽ kamã mẽ ahkre ho nhỹ nẽ mẽ kãm:

—Nà te ixpê mẽ piitã mẽ õ kanê pyrãk. Na hte kanêja mẽ kãm hirã mex nẽ nhũm mẽ kamã rĩt mex o pa. Jao kamãt kô kamã ri pa hkêt nẽ. Ja pyrã nẽ na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã ajamaxpêr nẽ ixkõt amnhĩ xãm hãmri nẽ tanhmã amnhĩ tomnuj to ho apa hkêt nẽ. ãm Tĩrtũm kãm hprãm xà kõt pix mã tanhmã ri amnhĩ nhĩpêx to ho ri apa. Jao te ate kanê hpõk nhĩrã kamã arĩt mex pyrã nẽ apê wa ixri atĩr tũm nẽ apa ho apa mã xwỳnh. Anẽ.

¹³ Hãmri nhũm Parijew nhõ xwỳnhjaja tee ri ã kapêr anhỹr ã kuma nẽ kãm:

—Tk. Kapxipix na ka ã amnhĩ jarênh anẽ. Mêhõ kot ã ate amnhĩ jarênh anhỹrja kõt kot mẽ inhmã ajarênhre hã. Jakamã kot paj mẽ ama nẽ ãm ama. Anẽ.

¹⁴ Hãmri nhũm mẽ kãm:

—Nà mẽhõ kot ã ijarẽnh anhÿr kêt tã no ãm hãmri na pa mẽ amã amnhĩ jarẽ. Ixêx kêt. Mẽ arom ixte nhÿhÿnh ixwryk xà hã amnhĩ pumunh mex. Nẽ mẽ arom ma akupÿm nhÿhÿm ixàpir xà hã amnhĩ pumunh mex. Jakamã ãm hãmri na pa ã mẽ amã amnhĩ jarẽnh anẽ. ¹⁵ Na ka htem amnhĩ krã hkôt tanhmã ri ijarẽnh to. No pa na pa kormã amnhĩ xwar tanhmã mẽ ajarẽnh to hkêt nẽ. ¹⁶ Ixte tanhmã mẽ ajarẽnh to ronhÿx pa ãm hãmri mẽ ajarẽ. Nhÿx pa ãm papxipix amnhĩ krã hkôt tanhmã mẽ ajarẽnh to hkêt nẽ. Nhÿx mãânẽn Inhĩpêêxà pẽ kot mẽ awÿr inhmẽn xwÿnhhta inhĩhkô hã pa wa ãm hãmri xpẽn kôt tanhmã mẽ ajarẽnh to. Mẽ ate amnhĩ to mex ã mẽ ajarẽ rÿ mẽ ate amnhĩ tomnuj ã mẽ ajarẽ. ¹⁷ Tĩrtũm kapẽr ã kagà htũm kot ja jarẽnh kot:

Koja mẽhõ wa hamẽxkrut nẽ tanhmã mẽmoj jarẽnh to nẽ ãm xpẽn kôt harẽnh o htipxi.

Hã kot kaj mẽ wa ama nẽ ãm hãmri wa kot harẽnh kôt ajamaxpẽr kurê kumrẽx.

¹⁸ Anhÿr o kot harẽnh. Tã pa ã amnhĩ jarẽnh anẽ nhũm Inhĩpêêxà kot mẽ awÿr inhmẽn xwÿnhhta mãânẽn ã ijarẽnh anẽ. Wa ixpijakrut tã ã wa ixte xpẽn kôt amnhĩ jarẽnh anhÿr jakamã kwa mẽ ixte tanhmã amnhĩ jarẽnh toja ma nẽ ixkôt ajamaxpẽr kêt wehe. Anẽ.

¹⁹ Nhũm pre ã Jejus mẽ kãm kapẽr anẽ. Hãmri nhũm mẽ kuma nẽ kãm:

—No nhÿri na we anhĩpêêxà ja? Anẽ.

Hãmri nhũm mẽ kãm:

—Nà mẽ ate Inhĩpêêxà pumunhre hã. Mẽ ate aprĩ hã ixpumunh ronhÿx ka mẽ mãânẽn aprĩ hã Inhĩpêêxà pumunh mex kurê kumrẽx. Nom mẽ ate ixpumunh mex kêt jakamã na ka mẽ mãânẽn omunh mex kêt nẽ. Anẽ.

²⁰ Nhũm pre ã Jejus mẽ kãm kapẽr anẽ. Arĩ Tĩrtũm mã amnhĩ jarẽnh xà hã ixkreja kamã mẽ ahkre ho xa. Mẽ kot kàxpore gÿnh xà kuri mẽ ahkre ho xa. Nhũm mẽ kãm hkurê xwÿnhjaja tee ri kot tanhmã mẽ ahkre htoja ma nẽ kãm unẽn nẽ haxàr prãm nẽ. Nom kormã mẽ kot ã hipêx anhÿr ã arĩgro kormã kator kêt jakamã nhũm Tĩrtũmja nẽ mẽ omunh mex nẽ nhũm mẽ ãm kãm unẽn prãm kaprÿ.

²¹ Hãmri nhũm Jejus arĩ mẽ kãm kapẽr o xa nẽ mẽ kãm:

—Nà kot paj nhÿrmã mẽ arũm ixkato nẽ ma akupÿm api. Ka mẽ tee ri ijapêr nom nhÿri ixpumunh kêt nẽ. Hãmri nẽ mẽ ate amnhĩ tomnuj o apa rãhã ty nẽ mẽ atõ ixwÿr axàpir kêt nẽ. Anẽ.

²² Hãmri nhũm Ijaew nhõ pahijaja tee ri ã kapẽr anhÿrja ã kuma nẽ xpẽn mã hã hpẽr o pikẽn o kuhê nẽ xpẽn mã:

—Kwa mãn ra kot amnhĩ pĩr kaxyw ã na ri hkôt mẽ paxàpir kêt ã mẽ pajarẽnh anẽ nà? Anẽ.

²³ Hãmri nhũm amnhĩ tã mẽ kuma nẽ mẽ kãm:

—Nà mẽ kajaja mẽ apê pyka nhõ xwÿnh na ka mẽ. No pa na mẽ arom ixpê kaxkwa nhõ xwÿnh jakamã mẽ pajamaxpẽr kot xpẽn pyrak kêt. ²⁴ Kot kaj mẽ ixpê kaxkwa rũm ixwryk xwÿnh ã ixpumu nẽ amnhĩ kaxyw inhmã ajamaxpẽr nẽ ixkôt amnhĩ xunhwÿr kêt hã kot kaj mẽ ate amnhĩ tomnuj o apa rãhã nhÿrmã atyk o mẽ kamjaja Tĩrtũm mã amnhĩ pãnhã amnhĩre. Anẽ.

²⁵ Nhũm Jejus ã mẽ inhõ pahijê hkukamã mẽ kot amnhĩ nhĩpêx jarẽnh anẽ nhũm mẽ tee ri amnhĩ tã kuma nẽ kãm:

—Kwa mẽ atõ na ka we ri ã mẽ inhmã akapẽr anẽ? Anẽ.

Hãmri nhũm mẽ kãm:

—Nà ra ixte mẽ amã amnhĩ jarẽnh kẽnã. Xàn ka mẽ kormã aprĩ hã inhmar kêt nẽ?

²⁶ Kot paj nhÿrmã mẽ amã mẽ ate amnhĩ tomnuj piitã ho amnhĩrit pa. Na pa kot mẽ awÿr inhmẽn xwÿnhhta pix xô ri tanhmã mẽ amã ixkapẽr to ho ri ixpa. ãm hãmri na hte tanhmã mẽmoj jarẽnh to. Na hte hêx kêt nẽ. Anẽ.

²⁷ Nhũm pre ã Jejus mẽ kãm Hipêêxà kot mẽ hwÿr mẽnã ã harẽnh anhÿr tã no nhũm mẽ Hipêêxà kêp Tĩrtũm ã hkôt hamaxpẽr kêt nẽ. ²⁸ Jakamã nhũm mẽ kãm:

—Nà koja mẽ nhÿrmã pĩ kahpa hã inhô ka mẽ rĩ kormã aprĩ hã ixpê Tĩrtũm rũm mẽ awÿr ixwryk xwÿnh ã ixpumu. Nẽ ixte amnhĩ krã hkôt ixkapẽr o ri ixpa hkêt ã ixpumu. Nẽ ãm Inhĩpêêxà xô ri ixprĩ hã ixkapẽr o ri ixpa hã ixpumu. ²⁹ Ixte kãm hprãm xà hkôt

pix mã tanhmã ri amnhĩ nhĩpêx to ho ri ixpa jakamã na hte ixtãnopxar mex o ixkôt pa ho pa. Koja aa ixkaga hkêt nê. Anê.

³⁰ Hãmri nhũm mẽ hkwyja kuma nê hkwyjê rom kapêr kôt hamaxpêr ³¹ nhũm amnhĩ tã mẽ omu nê mẽ kãm:

—Nà ãm hãmri na ka mẽ tã ixkôt ajamaxpêr. Tã kêr ka mẽ ixkôt amnhĩ xunhwý nê ixkapêr kôt pix mã ri amnhĩ nhĩpêx mex o ri apa. Hãmri pa ja hã mẽ apumu nê mẽ apê ixkwý kumrêx ã mẽ ajarê. ³² ãm hãmri na pa hte ã ixkapêr anhÿr o ri ixpa. Tã kot kaj mẽ ixkôt ri amnhĩ nhĩpêx o ri apa hãmri nê aprĩ hã inhmar tÿx nê. Nom na hte kormã mẽmoj kot amnhĩ tã mẽ ato htÿx pyrãk o mẽ anhĩpêx ka mẽ tee ri amnhĩ krã hkôt kãm anhũrer prãm kaprÿ. Tã kot kaj mẽ ixkôt amnhĩ xunhwý nê ixkôt ri amnhĩ nhĩpêx hãmri nê Tĩrtũm nhÿ hã tãm amnhĩ nhĩpêx. Jao ÿ hã ate amnhĩ tomnuj mã anhũre. Anê.

³³ Nhũm pre ã Jejus mẽ kãm kapêr anê hãmri nhũm mẽ tee ri kuma nê kãm:

—Kwa mẽ ixpê mẽ pahpàr krax finat Apraãw kanrêhã htãmnhwý kênã. Na pre mẽmoj te kot amnhĩ tã ho htÿx pyrãk o hipêx kêt nê. Jakamã mẽmo kot we mẽ ixpê hkanrêhã htãmnhwýjê ho htÿx ka we ri ã mẽ ijarênh anê? Nà amrakati kênã. Tã kwa mon ka ã mẽ ijarênh anê? Anê.

³⁴ Hãmri nhũm Jejus hprĩ hã mẽ kãm awjarê nê mẽ kãm:

—Kwa mẽ ixkapêr ma nê amnhĩ krãm haxàr tÿx nê. Nà mẽ kot amnhĩ tomnuj o mẽ pa xwÿnhjaja te mẽ kot amnhĩ tomnuj tãm ri kot amnhĩ tã mẽ ho htÿx pyrãk o mẽ hipêx. Jakamã nhũm mẽ urer kêt rãhã nê pa ho pa. Nê ã amnhĩ nhĩpêx anhÿr rãhã ho pa. ³⁵ Jakamã ixkĩnhã mẽ kêp Tĩrtũm kwý hkêt. No pa na ixpê Tĩrtũm Kra jakamã mãânên ixpê hkwy na pa. ³⁶ Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwý hã kot pa tanhmã mẽ ato ka mẽ ixpyrà nê apê wa ixkwýy. Hãmri nhũm mẽ ate amnhĩ tomnuj te kot mẽ amã urer pyrãk o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mẽ kêp Tĩrtũm kra hkêt xwÿnhjê jarênh

³⁷ Nhũm Jejus arĩ mẽ kãm kapêr nê mẽ kãm:

—Nà ãm hãmri na ka mẽ apê finat Apraãw kanrêhã htãmnhwý hã amnhĩ jarê. Nom mẽ apê hkanrêhã htãmnhwý htã uràk nê amnhĩ kaxyw Tĩrtũm kôt ajamaxpêr kêt nê. Jakamã na ka htem ixkapêr ma nê ãm ama nê ixkaga. Nê axtem nê ixpĩr mã. Kop apu Apraãw arĩ mẽ akamã pa ronhÿx ã inhĩpêx anhÿr kêt nê. ³⁸ Na pa hte Inhĩpêêxà hkôt pix mã ri amnhĩ nhĩpêx o ri ixpa. No mẽ kajaja axtem nê mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêêxà hkôt amnhĩ nhĩpêx kêt nê. Anê.

³⁹ Hãmri nhũm mẽ tee ri amnhĩ tã kuma nê kãm:

—Tk. Kwa mon ka ã mẽ ijarênh anê? Mẽ ixte Apraãw kôt amnhĩ nhĩpêx o ri ixpa kênã. Anê.

Hãmri nhũm mẽ kãm:

—Nà. Mẽ ate hkôt ri amnhĩ nhĩpêx o apa ronhÿx ka mẽ uràk nê Inhĩpêêxà kapêr kôt amnhĩ nhĩpêx. ⁴⁰ No na ka mẽ ra axtem nê ixpĩr mã. ãm hãmri na pre Tĩrtũm inhãm awjarê pa ô ri tanhmã mẽ amã mẽmoj jarênh to ho ri ixpa htã ka mẽ ra axtem nê ixpĩr mã. Kwa xà na pre Apraãwja ã mẽ hipêx anhÿr o pa? Nà na pre ã mẽ hipêx anhÿr kêt nê. ⁴¹ Mẽ ate hkôt amnhĩ nhĩpêx xwÿnhhta axtem na. Kêp Apraãw kêt. Nê mãânên kêp Tĩrtũm kêt. Anê.

Hãmri nhũm mẽ tee ri kuma nê kãm:

—Tk. Kwa nà ã mẽ ijarênh anhÿr kêt nê. Mẽ ixte Apraãw kôt amnhĩ nhĩpêx xwÿnh kênã. Tã ka ri axtem nê ã mẽ ijarênh anê. Mẽhõ hkôt kot pa kêt wem ri axtem amnhĩ nhĩpêx o ri ixpa? Anê.

⁴² Hãmri nhũm mẽ kãm:

—Nà mẽ ate Apraãw kôt amnhĩ nhĩpêx ronhÿx ka mẽ ixpumu nê uràk nê amã ixprãm nê. Apraãw kot hkôt amnhĩ nhĩpêx o pa xwÿnhhta tãm kot mẽ awÿr inhmênh nhũm mẽ awÿr ixwÿk kênã. Na pa pre amnhĩ krã hkôt man mẽ awÿr ixwÿk kêt nê. Tãm na pre mẽ awÿr inhmê pa wÿr. ⁴³ Kwa mon ka mẽ aprĩ hã ixkapêr mar mex kêt nê? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma nê aprĩ hã mar mex kêt

ně. ⁴⁴ Mě ate hkôt amnhĩ nhĩpêx xwỳnhhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwỳnhjê hpãm maati na. Nê kêp mẽ kãm hêx o pa xwỳnhjê pãm maati na. ã kot amnhĩ nhĩpêx kot anhỹr. Nê kãm mẽ kapêr mex mar prãm kêt o pa. Nê ãm hêx pix o pa jakamã kêp mẽ hêx xwỳnhjê pãm. ã kot amnhĩ nhĩpêx anhỹr xwỳnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mẽ kajaja mẽ apê hêx nhi xwỳnh maati ja hkra jakamã mẽ amã ixkapêr mar prãm kêt. ⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwỳnh na pa. Nê tãm ixkapêr o ri ixpa xwỳnh tã ka mẽ inhma nê ãm inhma nê ixkôt ajamaxpêr kêt nê. Kwa mon ka mẽ ja hã ixpumunh nê ixkôt ajamaxpêr nê ixkôt amnhĩ xunhwỳr kêt nê? ⁴⁷ Tĩrtũm krajaja na htem kapêr mar tỳx nê hkôt amnhĩ nhĩpêx o pa. No mẽ apê hkra hkêt jakamã mẽ amã kapêr mar prãm kêt. Anê.

Mě kot Jejus kêp Satanasti hkwỳ hã harênh

⁴⁸ Hãmri nhũm mẽ ã Jejus kot mẽ harênh anhỹrja ma nê kamã gryk tỳx kumrêx. Hãmri nê kãm:

—Tk. Kwa ate amnhĩ tomnuj o apa xwỳnhhti kênã. Ra Satanasti hkwỳ pê mẽkarõmnuti tanhmã kot akrã hto jakamã na ka ã mẽ inhmã akapêr anê. Anê.

⁴⁹ Hãmri nhũm mẽ kãm:

—Nà mẽkarõmnuti kot tanhmã ixto hkêt. Na pa hte Inhĩpêxã hã ixpijaàm pix o ri ixpa. Tã mẽ ate ixkĩnhã hã apijaàm kêt jakamã mãânên pa ixtã apijaàm kêt nê. ⁵⁰ Na pa hte amnhĩ krã hkôt mẽ piitã mẽ kot ixtã hpijaàm prãm xaj tanhmã mẽ kãm ixkapêr to hkêt nê. No mẽ piitã mẽ kot ixtã hpijaàm o paja na Inhĩpêxã kãm hprãm. Tã koja nhỹrmã amnhĩ nê ixtã mẽ hpijaàm kêt xwỳnhjaja mẽ kot amnhĩ xà htỳx kamã hamak tũm xata wỳr mẽ rênh pa.

⁵¹ —Nê kot ka mẽ atõ wa ixkapêr ma nê ixkôt amnhĩ nhĩpêx. Hã kot kaj wa ixri atĩr tũm nê apa ho apa. Kwa mẽ ixkapêr ma nê amnhĩ krãm haxàr tỳx nê. Anê.

Nhũm pre ã Jejus Ijaew nhõ pahijê mã kapêr anê. ⁵² Nhũm mẽ kuma nê kãm:

—Kwa pêr ãm hãmri na ka hte Satanasti nhỹ hã ã mẽ htĩr tũm nê mẽ pa ho pa hã mẽ harênh anhỹr o ri axêx o ri apa. Finat Apraãw na pre ri paa nê ty. Tã mẽ kot Tĩrtũm nhỹ hã kapêr jarênh o mẽ pa xwỳnhjaja na prem urak nê ri paa nê mãânên htyk pa. Tã ka axtem nê mẽ kot akapêr kôt amnhĩ nhĩpêx o mẽ pa xwỳnhjaja ari htĩr tũm nê pa ho pa hã mẽ harê. Nà na ka ãm mẽ inhmã mẽ ho axêx o xa. ⁵³ Na pre mẽ pahpãm Apraãwja kot amnhĩ to rax tã ty nê hapêx. Nhũm mẽ kot Tĩrtũm nhỹ hã kapêr jarênh xwỳnhjaja mãânên mẽ kot amnhĩ to rũnh tã htyk pa nê hapêx. Mẽ kot amnhĩ to rũnh tã htyk pa nê hapêx kênã kot kêt mẽ tanhmã amnhĩ to nê ari htĩr tũm nê pa. ãm mẽ ixte akapêr mar nê atã ixpijaàm pix prãm xaj na ka ã mẽ inhmã mẽ htĩr tũm nê pa hã mẽ harênh anê. Nom na ka ã mẽ harênh anhỹr kaprỳ. Kot paj mẽ ri akapêr mar kêt nê. Anê.

⁵⁴ Hãmri nhũm mẽ kuma nê mẽ kãm:

—Nà na pa hte amnhĩ krã hkôt mẽ ate ixtã apijaàm hprãm xaj tanhmã mẽ amã ixkapêr to hkêt nê. Kot paj anê nê ãm ixtỳx ã amnhĩ nhĩpêx anhỹr kaprỳ. No Inhĩpêxã tãm kãm mẽ apiitã mẽ ate ixtã apijaàm o apaja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwỳnhhta tãm na kãm mẽ ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nê. Na ka htem ixkuk pumu nê axtem nê ixte Satanasti nhỹ hã mẽ amã ixêx o ri ixpa hã ijarê. ⁵⁵ Mẽ ate Inhĩpêxã hkôt amnhĩ nhĩpêx ã amnhĩ jarênh tã ãm amnhĩ to axêx o ri apa. No pa na pa hte mẽ arom ãm hãmri hkôt amnhĩ nhĩpêx mex o ri ixpa. ⁵⁶ Amnepêm mẽ pahpàr krax Apraãwja na pre mẽ awỳr ixwỳk kukamã ijarênh ma nê mẽ arom inhỹ hã hkĩnh tỳx nê pa. Anê.

Nhũm pre ã Jejus mẽ kãm amnhĩ jarênh anê. ⁵⁷ Hãmri nhũm mẽ kuma nê tee ri kot mẽ kãm tanhmã Apraãw jarênh toja ma nê kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nê hapêx kênã kot ka kêt kot akukamã ajarênh mar nê hkĩnh tỳx ã harê. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr

kênã. Nà na ka ãm mẽ inhmã amnhĩ to axêx. Te amnepêem mẽ hkukamã apa nê ate mẽ omunh nê mẽ harênh pyrãk. Kwa akatàt kôt mẽ inhmã awjarê. Anê.

Jejus kêp rãhã ho rãhã xwýnh ã harênh

⁵⁸ Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarênh anê. Amnepêem kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwýnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nê amnhĩ krã him haxàr tỳx nê. Anê.

⁵⁹ Hãmri nhũm mẽ tee ri kot ã amnhĩ jarênh anhỹrja ã kuma nê kamã gryk tỳx nê. Nê axpên mã:

—Kwa tanhmã kot we amnhĩ to nê amnepêem rãhã nê pa ho pa xwýnh ã amnhĩ jarê? Tĩrtũm pix na rãhã ho rãhã pa xwýnh. Anê.

Hãmri nê kamã gryk xaj kên rũnh kwý kawrà ho ri hprôt nê kot ho htak o hpĩr kaxyw. Nom nhũm ra amnhĩ tã mẽ omu nê mẽ kêp akunok nê Tĩrtũm mã amnhĩ jarênh xà hã ixkreja rũm kato nê ma tẽ.

9

Jejus kot no hkre xwýnh o mex ã harênh

Makre 8.22-26

¹ Hãmri nhũm Jejus ma tẽ pa mẽ hkôt ri mẽ ixpa ho mẽ ixpa xwýnhjaja ma hkôt mra. Hãmri nê nhỹri no hkre xwýnh pumu. Katorxà nhõxà hkre rũm na pre no hkre nê kato. Hãmri nê ra hprêk nê hpri kamã àhwýr o hkrĩ. ² Tã hãmri pa mẽ mra nê omu nê hã Jejus kukja nê kãm:

—Kwa mẽmoj mýrapê na pre we myti nêj no hkre nê kato? Xà tãm kot tanhmã amnhĩ tomnuj to mýrapê nà? Xà katorxà rý hipêxà kot amnhĩ tomnuj mýrapê na pre ã no hkre nê kator anê? Anê.

³ Hãmri nhũm mẽ inhmã:

—Nà mẽhõ kot tanhmã amnhĩ tomnuj to mýrapê no hkre nê kator kêt. ãm Tĩrtũm kot ho mex nhũm mẽ kot ja hã omunh kaxyw na pre ã no hkren kator anê. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa. ⁴ Na htem arĩgro hã mẽmoj tã apê nhũm kamàt nhũm mẽ kãm ure nê àpênh kêt nê. Ja pyrã nê na pu htem kormã pahtĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nê axte jar ã amnhĩ nhĩpêx anhỹr kêt nê. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa. ⁵ Na pa hte ã kãm amnhĩ nhĩpêx anhỹr jao te kanê hirã mex pyrã nê ixprĩ hã mẽ kãm Tĩrtũm kot amnhĩ nhĩpêx o amnhĩrĩt mex o ri ixpa. Anê.

⁶ Nhũm pre ã Jejus mẽ inhmã amnhĩ jarênh anê. Hãmri nê kot nohkre xwýnhhta no o mex kaxyw hikôt nê argôx mẽ nê ho gyw kwý nhĩpêx nê kãnhmã xa nê ho no kukõ.

⁷ Hãmri nê kãm:

—E ma gô gjênh xà pê Siroe hwýr tẽ nê kamã amnhĩ no kuhõ. Anê.

Mẽ pakapêr kãm Siroeja mẽ kot kãm: “Nhỹhỹm mẽnh xwýnh” anhỹr jarênh pyrãk. Tã nhũm Jejus hwýr kumê nhũm ma hwýr tẽ. Hãmri nê kamã amnhĩ no hã gyw kuhõnh pa jao rĩt mex kurê kumrêx. Hãmri nê rĩt mex ã amnhĩ pumu nê hkĩnh tỳx nê ma akupỹm òrkwỹ hwýr tẽ. ⁸ Hãmri nhũm òrkwỹ kuri mẽ òrkwỹ xwýnhjaja nê mẽ kot pry kamã àhwýr o hkrĩ hã omunh xwýnhjaja amnhĩ jaêr pê ra rĩt mex ã omu nê tee ri hã axpên mã:

—Kwa pêr pry kamã àhwýr o hkrĩ xwýnhhta na nà? Anê.

⁹ Hãmri nhũm kamã mẽ hkwyjaja mẽ kãm:

—Tỳ. Tãm na. Anê.

Nhũm kamã mẽ hkwyjaja mẽ kãm:

—Nà tãm kêt. Axtem mẽhõ na. Te kot urãk nom tãm kêt. Anê.

Anh̄ȳr o ri axp̄n mā har̄ē. Tā nh̄um tām mē kām amnh̄i jar̄ē nē mē kām:

—Tỳ pa kēnā. Pa na pa pre hte inhno hkre nē ri ixpa htā ra ixrīt mex. Anē.

¹⁰ Hāmri nh̄um mē tee ri kuma nē kām:

—Kwa no tanhmā na ka we amnh̄i to nē ra arīt mex?

¹¹ Anē nh̄um mē kām:

—Nà mē kot kām “Jejus” anh̄ȳr xw̄ynhta na ixw̄ȳr tē nē ixkaxyw gyw kw̄y kagō nē ho inhno kukō. Hāmri nē mē kot gō mā: “Siroe” anh̄ȳr xw̄ynhta kamā ixte amnh̄i no kuhōnh kaxyw hw̄ȳr inh̄mā anē pa ma hw̄ȳr tē nē kamā amnh̄i no kuhō nē ixrīt mex kurē kumrēx. Anē.

¹² Hāmri nh̄um mē kuma nē kām:

—No nh̄yh̄ym na ato mex xw̄ynhja ma tē? Anē.

Hāmri nh̄um mē kām:

—Konēn. Ixte nh̄yh̄ym htēm xà hkôt omunhre hā. Anē.

¹³ Hāmri nh̄um mē kuma nē ma Parijew nhō xw̄ynhjē hw̄ȳr o mō nē mē kām har̄ē.

¹⁴ Nē mē kām:

—E ot pa mē aw̄ȳr jahti ho tē. Na xep Jejusja jarāhā akup̄ym kām no ho mex. Mē panhō arīgromnu htā nh̄um hā no ho mex. Anē.

¹⁵ Hāmri nh̄um mē tee ri mē kuma nē myta pumu nē kām:

—E mē inh̄mā amnh̄i jar̄ē. Tanhmā na ka pre we amnh̄i to nē anohkre nē akrī htā ra ano mex nē? Anē.

Hāmri nh̄um mē kām:

—Nà na pre Jejus gyw o inhno kukō nē inh̄mā anē pa gō ho amnh̄i no kuhō nē ixrīt kurē kumrēx. Anē.

¹⁶ Hāmri nh̄um mē kuma nē tee ri Jejus ā axp̄n kukjêr o kuhê nē axp̄n mā harēnh o:

—Kwa mē panhō arīgromnu hā kot ho mex jakamā kēp Tirtūm rūm mē pahw̄ȳr wr̄yk xw̄ynh kêt. Ām kot amnh̄i tomnuj xw̄ynh kēnā. Anē.

Nh̄um mē hkwȳjaja harēnh o:

—Kwa nà. Kot amnh̄i tomnuj xw̄ynh ronh̄yx àhpumunh t̄yx kôt no ho mex kêt nē. Anē.

¹⁷ Hāmri nē hpānhā no mex xw̄ynhta mā kām:

—No ka? Ate kot ano ho mex xw̄ynh ā amnh̄i tā harēnh jakamā mēhō hā na ka hkamnh̄ix? Mēhō na wehe? Anē.

Hāmri nh̄um mē kām:

—Konēn. Mān kēp Tirtūm kapēr jarēnh o ri mē pa xw̄ynh mǎn. Hā na ā inhno ho mex anē. Anē.

¹⁸ Hāmri nh̄um mē tee ri kuma nē axp̄n mā:

—Kwa pēr aa nohkre hkêt kēnā. Na pre ām amnh̄i to hēx o pa. E kwa pu mē amnh̄i w̄ȳr katorxà nē hipêxà wa hā karō kē wa man tē nē tanhmā mē pamā harēnh to. Anē.

Hāmri nē wa hā karō ¹⁹ nh̄um wa mē hw̄ȳr tēn axà nh̄um mē wa kām:

—Pa. E mē inh̄mā mēmoj jar̄ē. Xà we wa akrata na ām ja nà? Xà tām na ka hte wa nohkre nē kator ā harē? Kwa tanhmā na we amnh̄i to nē ra rīt mex? Anē.

²⁰ Hāmri nh̄um wa mē kām:

—Ȳȳ wa ixkra kēnā. Na pre wa ixpê nohkre nē kato. ²¹ Tā ra tanhmā amnh̄i to nē ra rīt mex. No wa ixte kot ho mex xw̄ynhta pumunh kêt. Kwa mē tām mān hkukja nē ama. Ra àptār kēnā. Kē tām mān mē amā tanhmā amnh̄i jarēnh to ka mē ama.

²² Anh̄ȳr o mē kām wa hkrata jar̄ē. No ām wa kām mē uma nē ā mē kām kapēr anē nē mē kām Jejus nh̄ixi jarēnh kêt nē. Na pre Parijew nhō xw̄ynhjaja ra Jejus nē mē kām kapēr nē mē kām:

—Ka mē atō Tirtūm kot mē pakaxyw Jejus xām ā harē hāmri nē axte Tirtūm kapēr o mē ahkre xà hā ixkreja w̄ȳr agjêx kêt kumrēx nē rī amnh̄i pumu.

²³ Anh̄ȳr o nē mē hkurē jakamā nh̄um wa mē umaj ā mē kām hkra jarēnh anē nē kot ho mex xw̄ynh nh̄ixi jarēnh kêt nē. ²⁴ Hāmri nh̄um mē axte amnh̄i w̄ȳr no mex xw̄ynhta ā karō nē kām:

—Kwa akatàt kôat mẽ inhmã amnhĩ jarẽ. Ate kot ano ho mex ã harẽnh xwỳnhhta na kot amnhĩ tomnuj pix o pa xwỳnh kênã kot kêt ano ho mex. Jakamã kwa Tĩrtũm noo mã akatàt kôat mẽ inhmã amnhĩ jarẽ nẽ axêx kêt nẽ. Anẽ.

²⁵ Hãmri nhũm mẽ kãm:

—Ko ixte ja hã omunh kêt. ãm ja pix na ixte omunh. Na pa pre inhno hkre nẽ ri ixpa htã ra ixrĩt mex nẽ. Anẽ.

²⁶ Hãmri nhũm mẽ tee ri kot amnhĩ jarẽnhja ã kuma nẽ kãm:

—No tanhmã na we mytita amnhĩ to nẽ amã ano ho mex? Anẽ.

²⁷ Hãmri nhũm tee ri axte mẽ kot hã hkukjêr ã mẽ kuma nẽ mẽ kãm:

—Kwa ra ixte mẽ amã ãm hãmri amnhĩ jarẽnh griã. Tã ka mẽ inhma nẽ ãm inhma nẽ arĩ hã ixkukja. Mãn ka mẽ amã hkôt amnhĩ xunhwỳr prãm hã na ka mẽ aprĩ hã ixkukja nã? Mẽ ate kot amnhĩ nhĩpêx ã aprĩ hã harẽnh mar nẽ hkôt amnhĩ xunhwỳr prãm xàj na ka mẽ aprĩ hã amã harẽnh prãm nẽ. Anẽ.

²⁸ Hãmri nhũm mẽ tee ri kuma nẽ kamã gryk nẽ. Nẽ hã kãm akir nẽ kãm:

—Tk. Ka na ka hte kapêr kôat amnhĩ nhĩpêx. No kêt mẽ pajaja na pa htem finat Mojes kapêr kôat pix mã amnhĩ nhĩpêx. ²⁹ Mojes mã na pre hte Tĩrtũm kapêr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harẽnh xwỳnhhta mẽ ixte omunh kêt. Nẽ mẽhõ nhỹ hã kot tanhmã amnhĩ nhĩpêx to ho pa xwỳnhja mẽ ixte omunh kêt. Anẽ.

³⁰ Hãmri nhũm tee ri mẽ kuma nẽ mẽ kãm:

—Kwa kot inhmã inhno ho mex nhũm ra ixrĩt mex tã ka mẽ tee ri hkukamã ajamaxpêr nẽ mẽhõ nhỹ hã kot ã amnhĩ nhĩpêx anhỹr o pa hã omunh kêt ã amnhĩ jarẽ. ³¹ Mẽ pahte Tĩrtũm kot amnhĩ nhĩpêx ã omunh mex. Kojã mẽhõ kot amnhĩ tomnuj xwỳnh mẽmoj tã kuwỳ nhũm kuma nẽ ãm kuma. No kêt mẽ kot hkôt ri amnhĩ nhĩpêx xwỳnhjaja. Nẽ mẽ kot kãm mex o mex ã harẽnh xwỳnhjaja na htem mẽmoj tã kuwỳ nhũm mẽ kuma nẽ mẽ kãm tanhmã mẽmoj nhĩpêx to rỳ mẽ kãm mẽmoj gõ. ³² Tã aa mẽ pahte mẽhõ kot mẽ no ho mex ã harẽnh mar kêt tã nhũm ã Jejus inhmã inhno ho mex anẽ. ³³ Kêp Tĩrtũm kwỳ hkêt ronhỹx pre inhno ho mex kêt nẽ. Anẽ.

³⁴ Hãmri nhũm mẽ kuma hãmri nẽ kãm:

—Tk. Kwa pêr ãm akator kôat ate amnhĩ tomnuj o ri apa htã na ka ã mẽ inhmã akapêr anẽ. Kwa ixkreja rũm akato nẽ ma atêm kurê kumrêx.

Anhỹr o kãm kapêr hãmri nẽ mẽ amnhĩ nê hano nhũm kato nẽ ma tẽ.

³⁵ Tã nhũm Jejus ra mẽ kot amnhĩ nê hanor ã harẽnh ma nẽ ma hapêr o tẽ nẽ nhỹri omu. Hãmri nẽ amnhĩ tã hkukja nom te nhãm mẽhõ hã hkukjêr pyrà nẽ kãm:

—Pa? Xàn ka ra Tĩrtũm kot mẽ awỳr mênh xwỳnhhta amnhĩ kaxyw hkôt ajamaxpêr nã? Anẽ.

³⁶ Hãmri nhũm kormã kot no ho omunh kêt jakamã kêp Jejus ã omunh kêt nẽ. Na pre kormã no hkre nẽ ãm kapêr pix ma. Tã ra akupỳm rĩt mex nom kormã no ho omunh kêt nẽ. Jakamã nhũm Jejus hwỳr tẽ nẽ ã kãm kapêr anẽ nhũm omu nẽ kormã kêp Jejus ã omunh kêt nẽ kãm:

—Tỳ kot kaj inhmã ahkre pa omu nẽ hkôt amnhĩ xãm kurê kumrêx. Anẽ.

³⁷ Hãmri nhũm kãm:

—Kwa paa. Ixte amã ixkapêr xwỳnhhta pa na pa. Anẽ.

³⁸ Hãmri nhũm kãm:

—Kwa xôwehe Pahihti? Nà kot paj amnhĩ kaxyw akôt pix mã ijamaxpêr nẽ akôt pix mã amnhĩ nhĩpêx o ri ixpa. Anẽ.

Hãmri nẽ kutã hkôn krã ho tẽm nẽ nhỹ nẽ kãm mex o mex ã harẽnh o nhỹ. ³⁹ Hãmri nhũm Jejus kãm:

—Nà ixte mẽ apiitã tanhmã mẽ ajarẽnh to kaxyw na pa pre kaxkwa rũm man mẽ awỳr wrỳ. Ahpỳnhã mẽ amã ixprãm xwỳnhjê jarẽnh nẽ ahpỳnhã mẽ kãm ixprãm kêt xwỳnhjê jarẽnh kaxyw. Mẽ kãm ixprãm kêt xwỳnhjaja kot hprĩ hã Tĩrtũm kapêr mar mex kêt tã na htem htỳx ri kot mar mex ã amnhĩ jarẽnh o pa. Jakamã te mẽ nohkre xwỳnhjaja kot amnhĩ nhĩpêx pyràk. Nom kojã mẽ Tĩrtũm kapêr ma nẽ ixkôt amnhĩ xunhwỳr japêr.

Hãmri nê te ra rît mex pyræk o amnhĩ nhĩpêx. Jao ra hprĩ hã Tĩrtũm kapêr mar mex o pa. Anê.

⁴⁰ Nhũm pre ã Jejus kãm kapêr anê. Nhũm Parijew nhõ xwỳnh kwỳjaja kot kuri mar o kuhê xwỳnhjaja ã kapêr anhỹr ã kuma nê amnhĩ tã kãm:

—Kwa nà. Xà we mẽ pajaja na ka ã mẽ inhnohkre hã mẽ ijarênh anê? Xà mẽ ixte ixprĩ hã Tĩrtũm kapêr mar mex kêt ã na ka mẽ ijarê nà? Anê.

⁴¹ Hãmri nhũm mẽ kãm:

—Yỹ kop apu mẽ ate aprĩ hã kapêr mar mex kêt ã amnhĩ jarênh ronhỹx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tỳx nê. Na hte Tĩrtũm ja hã mẽ apumu nê amnhĩm mẽ ate amnhĩ tomnuj xwỳnh ã mẽ ajarê. Anê.

10

ôwêhti jarênh

Matêwre 9.36, 12.11-12; Rukre 15.3-7

¹ Nhũm Jejus arĩ Ijaew mã kapêr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tỳx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwỳnhjaja ôwêhti apkur kaxyw mẽ o pa hãmri nhũm kamàt nhũm akupỹm kahê hwỳr mẽ o pa. Kahê jakwakreja ãm pixii. Tã koja mēhõ kahê xà hkôt hwỳr àr kêt nê axtem nê tẽ nê nhỹhỹnh kahê hã api nê ôwêhti hwỳr àr japêr nhũm mẽ omu nê kot hkwy ho àhkĩnh ã omunh kurê kumrêx.

² —No ôwêhti jamãr o pa xwỳnhja na hte mẽ kurom katàt kôt kahê jakwakre rũm ôwêhti hwỳr agjê. ³ Nhũm kahê xà jamãr xwỳnhja amnhĩ wỳr omu nê kãm kahê xà rēnh kurê kumrêx nhũm axà. Na hte apkati mẽ ma nhỹhỹm apkur kaxyw mẽ o pa. Nê nojarêt nê mẽ kãm akir. Ahpỹnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwỳr mra nê hã pikuprõnh pa nhũm mẽ ho hapôj nê ma nhỹhỹm ri mẽ apkur kaxyw mẽ o pa. ⁴ Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵ —Na hte hamãr o pa xwỳnh pix kapêr ma nê hkôt pa nê nhãm mēhõ hkôt ri pa hkêt nê. Kot kapêr mar kêt jakamã tee ri kuma nê umaj axkakhũm nê hprõt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyræk

⁶ Nhũm pre ã Jejus mẽ kãm ujarênh anê. Nê ujarênhja kamã amnhĩ kwỳjê jarê nê määnēn tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyræk nhũm mẽ tee ri kuma nê mar mex kêt nê. ⁷ Jakamã nhũm axte mẽ kãm awjarê nê mẽ kãm:

—E pa ixprĩ hã mẽ amã ixujarēnhhta jarê ka mẽ inhma. Te ixpê ôwêhti jagjênh xà hã hakwakre pyræk. Kwa mẽ ja ma nê amnhĩ krã him haxàr tỳx nê. ⁸ Na pre ra ixkukamã mẽ ohtô nê te ãm hãmri mẽ amã Tĩrtũm kapêr jarênh pyræk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhhta kot amnhĩ nhĩpêx pyræk. Nom na hte ôwêhtija ãm hamãr xwỳnh pix kapêr ma nê nhãm mēhõ kapêr mar kêt nê. Ja pyrã nê mẽ kot ixkôt amnhĩ xunhwỳr xwỳnhjaja na htem Tĩrtũm kapêr o hêx o mẽ pa xwỳnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkôt pix mã amnhĩ nhĩpêx o pa.

⁹⁻¹⁰ —Te ixpê ôwêhti gjênh xà hã hakwakre pyræk. Na hte ôwêhti mēmoj punuj pymaj kahê hwỳr agjê nê kamã mex nê kuhê. Nê kurũm hapôj nê ma apkur o pa. Ja pyrã nê mẽ kot ixkôt amnhĩ xunhwỳr xwỳnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhỹrmã Tĩrtũm mẽ wa ixri htĩr tũm nê pa ho pa. Ja kaxyw na pa pre man mẽ awỳr pika hwỳr wrỳ.

—No ôwêhti ho àhkĩnh xwỳnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tĩrtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyræk. Anê.

Jejus te kêp ôwêhti jamãr xwỳnh pyræk

Eprêw 13.20; Apokarip 7.17

¹¹ —Nê ôwêhti jamãr mex xwỳnhja koja nhỹri mêhõ kêp ôwêhti hõxpĩr kaxyw hwỳr htêm ã omu nê wa hã axpu. Nhũm ho àhkĩnh mã xwỳnhhta ôwêhti jamãr xwỳnh pĩ nhũm ôwêhti nê ty. Tã ixkwỳjaja hamakêtkati nê mex nê pa kaxyw na pa pre amnhĩ grõnh kôt mẽ hwỳr wrỳ. Jakamã kot paj te ôwêhti jamãr xwỳnh kot amnhĩ nhĩpêx pyræk o amnhĩ nhĩpêx.

¹²⁻¹³ —Nê na htem tõhã ôwêhti jamãr xwỳnh nhỹhỹm pa kaxyw nê mêhõ mã amnhĩre nhũm wakre kamã kãm hkrit jamãr o pa. Kàxpore pix prãm xaj kãm hamãr o pa. Jakamã koja nhỹhỹnh mry xoprê ra hwỳr kato nhũm amnhĩ wỳr omu nê umaj ôwêhti re nê ma hprõt nê tẽ. Kãm ôwêhti japê hkêt ãm kãm htĩr pix prãm xaj ôwêhti mã hamaxpêr kêt nê rer pa nê ma tẽ. Nhũm mry xoprêta ôwêhti hwỳr hprõt nê hkwy pynê nhũm hkwy umaj axkakhũm nê hprõt nê ma mra. No kêt pa na te ixte ôwêhti mã hamaxpêr kêt nê kot rer nê ma hprõt nê htêm xwỳnhhta pyræk kêt. Kot paj aa ixkwỳjê rer kêt nê. Kot paj mẽ hkôt ixpa ho ixpa rãhã nê.

¹⁴⁻¹⁵ —Te ixte ôwêhti jamãr xwỳnh mex pyræk jakamã na pa hte uræk nê ahpỹnhã mẽ kot ixkôt amnhĩ xunhwỳr xwỳnhjê pumunh mex o ri mẽ hkôt ixpa. Te mẽ kêp ixkrit ôwêhti pyræk nhũm te ixpê mẽ hamãr mex o ri mẽ hkôt ixpa nê aa mẽ rer kêt xwỳnhhta pyræk.

—Nê mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpên pumunh mex. Nê mẽ inhmã axpên japêê. Te Inhĩpêêxà mẽ wa inhmã axpên japê pyræk. Tã kot paj nhỹrmã mẽ nê tanhmã amnhĩ nhĩpêx to.

¹⁶ —Mê kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mãânên ixkapêr ma nê ixkôt amnhĩ xunhwỳ nê ixkôt amnhĩ nhĩpêx. Jao ra te kêp ixkrit ôwêhti pyræk. Tã kot paj mẽ ho ixpimràa tã mẽ ho tipxi nê mẽ hamãr o ri mẽ hkôt ixpa.

¹⁷ —Nê mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grõnh kôt mẽ hwỳr wrỳ. Jakamã kot paj nhỹrmã mẽ nê ty. Tã inhmã mẽ nê ixtyk puma hkêt jakamã na Inhĩpêêxà kãm ijapêê. Koja akupỹm ixto ixtĩr. ¹⁸ Kop apu inhmã mẽ nê ixtyk prãm kêt ronhỹx mẽ kãm ixkurê xwỳnhjaja tee ri kãm ixpĩr prãm kaprỳ. Nom ixte mẽ kot ixkôt amnhĩ nhĩpêx xwỳnhjê nê amnhĩ grõnh kôt mẽ hwỳr ixwryk kênã. Jakamã kot paj arĩ mẽ kãm amnhĩ grõnh kôt amnhĩ gõ nê arĩ mẽ kãm xa nhũm mẽ ixpĩ. Nom kot paj akupỹm ixtĩr. Mêhõ koja tanhmã ixto nê ixpĩr o ixpĩ? Nà koja mêhõ ixpĩr o ixpĩr kêt nê. Inhĩpêêxà nhỹ hã kot paj nhỹrmã ã amnhĩ nhĩpêx anê nê akupỹm ixtĩr. Anê.

Nhũm pre ã Jêjus mẽ kãm amnhĩ jarênh anê. ¹⁹ Hãmri nhũm Ijaew tee ri ã kot amnhĩ jarênh anhỹr ã kuma nê kê axte axpên kwỳm ri tanhmã harênh to ho kuhê. ²⁰ Nê kamã mẽ hkwyjaja harênh o:

—Tk. Kwa mẽ mar kêt nê. Satanasti nhỹ hã na hte htỳx ri ã mẽ pamã amnhĩ jarênh anhỹr o pa. Anê.

²¹ Hãmri nhũm mẽ hkwyjaja mẽ kuma nê mẽ kãm:

—Nà kot anhỹr kêt. Xà na htem Satanasti nhỹ hã ã kapêr mex anê nê ã mẽ no hkre xwỳnhjê ho mex anê? Nà kot anhỹr kêt. Satanastija ukapĩre hã. Anê.

Ijaew nhõ pahijaja kot Jêjus kaga hã mẽ harênh

Juãw 5.18, 8.59

²² Tã nhũm ra amgrà hapêx pa mẽ ixpê Ijaew akupỹm krĩ pê Jerujarê kamã axpên wỳr akuprõ. Axte mẽ ixte mẽ ixkĩnh kaxyw axpên wỳr akuprõ. Amnepêm mẽ inhĩgêjtjaja kot akupỹm Tĩrtũm mã amnhĩ jarênh xà hã ixkre ho mex pa nê ho Tĩrtũm wỳr mã hamaxpêr nê hã ixkĩnh ã arĩgroja ã pa mẽ hwỳr akuprõ. ²³ Hãmri nhũm Jêjus ma mẽ ixkôt Tĩrtũm

mã amnhĩ jarēnh xà hã ixkreta wỳr tẽ no ãm hwỳr àr kêt nẽ. ãm ixkre hpu hã kahê xà kape hã ri pa. Mẽ kot kãm: “Pahi finat Sarumãw pa xà” anhỳr xwỳnhhta kamã ri pa.

²⁴ Hãmri nhũm kê ra mẽ inhõ pahijaja omu nẽ hã akuprõ nẽ hêx rom kãm kapêr nẽ kãm:
—Kwa tokyx aprĩ hã mẽ inhmã amnhĩ jarẽ. Xà apê Tĩrtũm Kra na ka nà? Xà ka na pre Tĩrtũm mẽ ixkaxyw axãm? Kwa aprĩ hã mẽ inhmã amnhĩ jarẽ pa mẽ ama. Mon ka hte aprĩ hã mẽ inhmã amnhĩ jarēnh kêt nẽ? Na pa mẽ tee ri ate amnhĩ nhĩpêx ã apumu nẽ akukamã ijamxpêr rũnh kumrêx o ri ixpa. Xà ãm hãmri apê Tĩrtũm kot mẽ ixkaxyw axãm xwỳnhhta na ka? Anẽ.

²⁵ Hãmri nhũm mẽ kãm:

—Tk. Ra ixte mẽ amã amnhĩ jarēnh xohtô htã ka mẽ inhma nẽ ãm inhma. Na pa hte xatã Inhĩpêêxà nhỹ hã mẽ amã mẽ ate aa mẽmoj pumunh kêt kwỳ ho anhỳr o ri ixpa ka mẽ ja hã ixpumu nẽ ãm ixpumu nẽ ixkôt ajamxpêr kêt nẽ. ²⁶ Mẽ apê ixkwỳ hkêt jakamã na ka mẽ ixkôt ajamxpêr kêt nẽ. Te mẽ apê ixkrit ôwêhti pyrãk kêt. ²⁷ Ixkwỳjaja na te ho ôwêhti kot hamãr xwỳnh kapêr mar nẽ hkôt ri pata pyrã nẽ ixkapêr ma nẽ ixkôt amnhĩ nhĩpêx o pa. Ixpê mẽ õ pahihtĩ hã mẽ kot ixpumunh mex jakamã na htem ixkôt amnhĩ nhĩpêx mex o pa. Ixte ja hã mẽ omunh mex nẽ. ²⁸ Koja mẽ nhỹrmã htyk tã no ãm ixkukwak ri akupỹm htĩr hãmri nẽ Tĩrtũm mẽ wa ixri htĩr tũm nẽ pa ho pa nẽ aa hapêx kêt nhũm mēhõ ixpê mẽ utàr kêt nẽ. Te inhĩhkra hpo nhĩpôk ri mẽ hkrĩ nhũm te mẽ hã inhĩhkra pikamỳr pyrãk nhũm mẽmoj tee ri ixpê tanhmã mẽ ho hprãm kaprỳ. ²⁹⁻³⁰ Inhĩpêêxà tãm kot inhma mẽ õr kênã. Hihtỳx o kot mẽ piitã mẽ hakrenh par jakamã koja mẽ inhĩhkra po nhĩpôk ri hkrĩ nẽ määnēn Inhĩpêêxà nhĩhkra hpo nhĩpôk ri hkrĩ. Te ixpê Inhĩpêêxà Tĩrtũm pyrãk jakamã mēhõ kot wa ixpê wa inhĩhkra rũm mẽ utà? Nà amrakati kumrêx.

Anhỳr o mẽ kãm amnhĩ jarẽ. ³¹ Hãmri nhũm mẽ te kêp Tĩrtũm pyrãk ã amnhĩ jarēnh ã kuma nẽ kamã gryk tỳx nẽ. Hãmri nẽ kot kên o htak kaxyw ra kaxyw hkwy kawrà ho ri hprôt. ³² Hãmri nhũm amnhĩ tã mẽ omu nẽ mẽ kãm:

—Kwa ra ixte Inhĩpêêxà nhỹ hã mẽ amã aa mẽ ate mẽmoj pumunh kêt kwỳ ho anhỳr rax o ixpa. Jao tanhmã mẽ ho mex to pix o ri ixpa. Tã ka mẽ axtem nẽ ã inhĩpêx anhỳr kaxyw. Anẽ.

³³ Hãmri nhũm mẽ kãm:

—Nà ã ate amnhĩ nhĩpêx anhỳr ja mỳrapê hkêt. Kêt apê mẽ inhĩõ htã ri axtem nẽ te apê Tĩrtũm pyrãk ã amnhĩ jarēnhja mỳrapê na pa mẽ kên o atak kaxyw. Na pu htem ã amnhĩ jarēnh anhỳr o papa hkêt nẽ. Anẽ

³⁴ Hãmri nhũm mẽ kãm:

—No ãm hãmri ixte ã amnhĩ jarēnh anhỳr kênã. Tanhmã na Tĩrtũm kapêr ã kagà htũm kot ja jarēnh to wehe? Na pre Tĩrtũm Ijaew nhõ pahijê mã kapêr nẽ mẽ kãm:
E mẽ ate inhỹ hã mẽ ho amnhĩptàr jakamã te mẽ apê pa ixpê Tĩrtũm pyrãk.

Anhỳr o kot mẽ harēnh. ³⁵ ãm hãmri na Tĩrtũm kapêrja. Tãm kot ã mẽ harēnh kot anhỳr. Mẽ kot y hã mẽ kãm kapêr jakamã te mẽ kêp urak ã mẽ harēnh anhỳr kênã. ³⁶ Tã tãm kot ã mẽ harēnh anhỳr tã hpãnhã mẽ akaxyw pa ixpê Kra hã ixãm nẽ mẽ awỳr inhmēnh nhũm ixwryk nẽ ixpê Kra hã amnhĩ jarēnh tã ka mẽ ja hã inhma nẽ ãm inhma nẽ ixkôt ajamxpêr kêt nẽ. Kwa mon ka mẽ ja hã ixpumunh nẽ ixkôt ajamxpêr kêt nẽ? ³⁷ Kot paj Inhĩpêêxà mẽ wa ixàhpumunh kôt mẽ amã aa mẽ ate mẽmoj pumunh kêt kwỳ ho anhỳr kêt ka mẽ ja hã ixpumu nẽ mẽ rĩ kam nẽ mãmri ixkôt ajamxpêr kêt nẽ. ³⁸ Mẽ amã ixkapêr mar prãm kêt tã kwa ixte Tĩrtũm pyrã nẽ aa mẽ ate mẽmoj pumunh kêt kwỳ ho anhỳr ã ixpumu nẽ Inhĩpêêxà mẽ wa ixte amnhĩ nhĩpêx tipxi hkôt ajamxpêr. Anẽ.

³⁹ Hãmri nhũm mẽ kuma nhũm ja mẽ kêp omnuj tỳx nẽ. Te kot Tĩrtũm pyrãk ã amnhĩ jarēnhja nhũm mẽ kêp omnuj nẽ. Jakamã nhũm mẽ ra kot unēnh nẽ ixkre rũm ho kator nẽ kapôt ã mēnh nẽ kên ho htak kaxyw nhũm kê axte mẽ kêp akunok nẽ ma nhỹhỹm tẽ.

Jejus kot Jotãw nhĩhkjê hã ri pa hã harēnh

⁴⁰ Tã nhũm Jejus ma tẽ nẽ pyhti pê Jotãw ã rê. Pa mẽ hkôt ri ixpa ho ixpa xwỳnhjaja ma hkôt mō. Finat Juāw Paxis kot Tĩrtũm mã wam mẽ hkrã kumrãr o pa xàta wỳr. ⁴¹ Hãmri

nhũm mẽ ohtô nẽ mẽ ixwỳr mra nẽ Jejus kapër ma nẽ kot tanhmã amnhĩ nhĩpêx to hã omunh o kuhê. Hãmri nẽ hã tanhmã axpên mã kapër to nẽ axpên mã:

—Kwa ãm hãmri na pre finat Juãw Paxisja mẽ pamã Jejus jarênh o pa. Aa kot mẽ pamã mẽ pahte mẽmoj pumunh kêt kwỳ ho anhỳr kêt tã ãm xatã hkukamã mẽ pamã harênh o pa. Kêp Tĩrtũm Kra hã Juãw rom hihtỳx o hihtỳx ã harênh o pa. Nẽ Tĩrtũm kot mẽ pakaxyw ãm xwỳnh ã nhũm mẽ pamã harênh o pa. Nà ãm hãmri na pre ã mẽ pamã harênh anẽ. Anẽ.

⁴² Hãmri nhũm mẽ ohtô nẽ amnhĩ kaxyw Jejus kôt hamaxpër nẽ hkôt amnhĩ xunhwỳ.

11

Rajare htyk jarênh

Juãw 5.21-29, 6.40

¹ Rôm nhũm krĩ pê Petãn kamã mẽhõ my pê Rajareja ra à htỳx nẽ nõ. Na pre htõx wa hamẽxkrut. Hõ kêp Matre nhũm hõ kêp Marir. ² Marir na pre kormã arĩgro hõ hã kot Jejus o mex kaxyw mẽ hkuxwaxà ho hkuxwa nẽ amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kêp à htỳx nẽ nõ. ³ Hãmri nhũm wa tee ri hkukamã hamaxpër nẽ ma krĩ hõ hwỳr Jejus wỳr mẽhõ mẽ nhũm ma hwỳr tẽ. Nẽ hwỳr pøj nẽ omu nẽ kãm:

—Pa Pahihti. E ot pa awỳr tẽ. Na ra amã akràmnhwỳ japê htỳx xwỳnhnta à htỳx nẽ nõ nhũm htõx wa tee ri hkukamã hamaxpër nẽ awỳr inhmẽ pa tẽ. Kwa tokyx pu ma hwỳr tẽ ka akupỳm wa kãm ho mex nà? Anẽ.

⁴ Hãmri nhũm kuma nẽ kãm:

—Nà à htỳx nẽ nõr tã koja akupỳm mex. Mẽ kot akupỳm mex ã harênh mar hãmri nẽ Tĩrtũm mẽ wa ixtã hpijaàm nẽ wa ixihtỳx o wa ixihtỳx ã wa ixpumunh kaxyw na ã à htỳx nẽ nõr anẽ. Nẽ pa ixpê Tĩrtũm Kra hã akupỳm ho mex ã ixpumunh nẽ ixkôt hamaxpër kaxyw na ã à htỳx nẽ nõr anẽ. Anẽ.

⁵ Na pre Jejus kãm Rajare mẽ htõx wa mẽ hapê nẽ. ⁶ Tã à htỳx ã harênh ma nẽ hwỳr mõi tokyx anhỳr kêt nẽ. Pa mẽ arĩ amnhĩm hikranh xà kamã ri ixpaja o ixtã axte apkati axkrut. ⁷ Hãmri nhũm rĩ kormã hwỳr nojarêt nẽ mẽ inhmã:

—E ma pu mẽ jarãhã akupỳm Jutej kamã Rajare hwỳr mõi nẽ omu. Anẽ.

⁸ Hãmri pa mẽ tee ri ja hã kuma nẽ kãm:

—Kwa ham mẽ panhõ pahijaja kot kên o atak o apĩr mã tã ka ra akupỳm mẽ hwỳr akrà. Kwa pu mẽ hwỳr pamõi kêt nẽ nà? Anẽ.

⁹ Hãmri nhũm mẽ inhmã:

—Nà koja mẽ kormã tanhmã ixto hkêt nẽ. Kormã ixte Tĩrtũm mã tanhmã amnhĩ nhĩpêx to jatur xàm mẽnhre hã. Te ixte kormã arĩgro hã ixrĩt mex nẽ ixpa pyrà nẽ kormã Tĩrtũm kot mẽmoj tã inhmã karõ xà hkôt pix mã tanhmã amnhĩ nhĩpêx to ho ri ixpa. ¹⁰ Tã kot paj hatur xàm kumẽ nhũm te myt àr nhũm ra kamàt kô pyràk nhũm mẽ rĩ kormã tanhmã ixto nẽ ixpĩ. Jakamã e ma pu mẽ hwỳr. Koja mẽ tokyx tanhmã ixto hkêt nẽ. Anẽ.

¹¹ Hãmri nẽ mẽ inhmã Rajare jarênh o:

—Na mẽ pahkràmnhwỳ Rajareta ra gõi nẽ nõ. Tã kot puj mẽ ma hwỳr mõi pa kumra. Anẽ.

¹²⁻¹³ Ra htyk ã omunh tã ã mẽ inhmã harênh anẽ. Pa mẽ kuma nẽ ixtỳx ho ãm õt nẽ nõr ã hkamnhĩx nẽ kãm:

—Kwa mãn ra akupỳm amnhĩ kãm hamak o mõi jakamã na ra amnhĩ krit nẽ gõi nẽ nõ. Kwa pu mẽ awjanã nẽ hwỳr pamõi kêt nẽ nà? Anẽ.

¹⁴ Hãmri nhũm mẽ inhma nẽ hprĩ hã mẽ inhmã harẽ nẽ mẽ inhmã:

—Nà na pre ty. ¹⁵ Nom kormã à nẽ hikwỳta ã na pa hwỳr inhmõi kêt nẽ. Tã kot paj ma hwỳr mõi nẽ hã mẽ amã ixàhpumunh tỳx ã amnhĩ to amnhĩrĩt. Ka mẽ ja hã ixpumu nẽ amnhĩ kaxyw ixkôt ajamaxpër tỳx o ri apa. ã mẽ ate amnhĩ nhĩpêx anhỳr kaxyw na pa kormã à nẽ nõr ã hwỳr inhmõi kêt nẽ. E ma pu mẽ hwỳr. Anẽ.

¹⁶ HãMRI nhũm mẽ inhĩõ pê Tomas pihpohti tee ri ã kapêr anhÿrja ã kuma nê mẽ inhmã:

—Tõe ma pu mẽ hkõt. Kê mẽ mamrĩ hkõt mẽ pahto hpimràatã mẽ panhĩmex pa ri. Anê.

¹⁷ Tã pa mẽ ma hkõt mẽ hwÿr mō nê ra Rajare nhõ krĩ hwÿr ixpōx o mō hãMRI nê harēnh ma. Ra htyk nhũm mẽ kot haxàr ã arĩgro pê kwat ã harēnh ma. ¹⁸⁻¹⁹ Nhũm Matre mẽ Marir wa hkamy ho hamak xàj arĩ mÿr o hkrĩ. Jakamã nhũm Ijaew kwÿjaja Jerujarē rũm ma wa hwÿr mra. Mẽ kot wa kãm kapêr nhũm tokyx akupÿm tãm wa hkrã kaxyw nhũm mẽ wa hwÿr mra. Wa õ krĩ pê Petãnja Jerujarē hwÿr ãm 3 kirōm pix jakamã nhũm mẽ ma wa hwÿr mra nê wa kuri wa kãm kapêr o hkrĩ. ²⁰ Rôm nhũm Matre Jejus hpōx o mōr ã harēnh ma nê kànhmã xa nê man mẽ ixkutã tẽ. No nhũm Marir arĩ mÿr o nhÿ nê hkõt htēm kêt nê. ²¹ HãMRI nhũm Matre mẽ ixkutã tẽ nê mẽ ixkaxpa nê Jejus pumu nê mÿr kamã kãm kapêr nê kãm:

—Hêxta gàu nê Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhÿx pre htyk kêt nê. Xê mon ka pre we tokyx mẽ ixwÿr atēmre hkêt nê? ²² Tã na pa arĩ akõt ijamaxpêr tÿx nê. Kot kaj mẽmoj tã tanhmã Tĩrtũm wÿr to nhũm ama nê tanhmã amã mẽmoj to. Ra ixte ja hã apumunh mex kênã. Anê.

²³ HãMRI nhũm Jejus kuma nê kãm:

—Kwa tee ri ajamaxpêr nê akaprĩ hkêt nê. Koja akamy akupÿm war amã htĩr kãm ga. Anê.

²⁴ HãMRI nhũm kuma nê kãm:

—Ma koja anê. Nhÿrmã Tĩrtũm kot mẽ piitã akupÿm mẽ ho htĩr xà hã arĩgrota ã koja akupÿm htĩr. Anê.

Kamy akupÿm htĩr ã harēnh mar tã Jejus kot akupÿm ho htĩr tokyx anhÿr ã hkamnhĩx kêt nê ã kãm kapêr anê.

²⁵⁻²⁶ Jakamã nhũm kãm:

—Nà pa na ixpê akupÿm mẽ ho mẽ htĩr xwÿnh. Jakamã mẽ kot amnhĩ kaxyw ixkõt hamaxpêr nê ixkõt amnhĩ xunhwÿr xwÿnhjaja koja mẽ htyk tã koja mẽ hkarō Tĩrtũm mẽ wa ixri htĩr tũm nê mex nê pa ho pa. Xà ate ja kaxyw ixkõt ajamaxpêr tÿx nà? Anê.

²⁷ HãMRI nhũm Matre kuma nê kãm:

—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wÿr akãm ijamak o ixpa. Anê.

HãMRI nhũm Jejus kãm:

—Nà ãm hãMRI na ka ã ijarēnh anê. E ma akupÿm tẽ nê atōx mã anê kê tokyx man ixwÿr tẽ pa omu. Anê.

²⁸ HãMRI nhũm kuma nê ma akupÿm tẽ. HãMRI nê Marir wÿr axà nê kãm Jejus jarē. Kõt mẽ hkrĩ xwÿnhjê hkàx ã kãm harē nê kãm:

—An xê hãMRI amÿr kêt nê. Na ra mẽ pajahkre xwÿnhhta hpōx o mō nê mÿtar nhÿ nê atã karō. Anê.

²⁹ HãMRI nhũm kuma nê kànhmã xa nê ma mẽ ixwÿr htēm kurê kumrēx. ³⁰ HãMRI pa mẽ kormã krĩm ixpōx kêt nê. Arĩ Matreja Jejus wÿr htēm xà kamã arĩ ixkrĩ. ³¹ Jakamã nhũm Matre ma tẽ nê Marir mã Jejus jarē nhũm kato nê man mẽ ixwÿr tẽ. HãMRI nhũm Jerujarē rũm wa hwÿr mẽ mrar xwÿnhjaja omu nê htÿx kot hkamy hã pika pumunh nê mÿr kaxyw htēm ã hkamnhĩx nê man hkõt mra. ³² HãMRI nhũm Marir mẽ hkukamã mẽ ixwÿr tẽ nê Jejus pumu nê hpar pê tēm nê kãm kapêr pê hipō nê mÿr o nhÿ. Nê kãm:

—Hêxta gàu nê Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhÿx pre htyk kêt nê. Hô mon ka pre we tokyx man mẽ ixwÿr atēmre hkêt nê? Anê.

³³ HãMRI nhũm Jejus kuma nê mÿr ã omu. Nê hkõt mẽ mrar xwÿnhjaja mẽ mÿr ã mẽ omu nê kãm mẽ hkaprĩ nê. ³⁴ HãMRI nê mẽ kãm:

—Nhÿri na ka prem haxà? E mẽ hwÿr ixto tẽ pa omu. Anê.

HãMRI nhũm mẽ kuma nê ma hã pyka hwÿr mẽ ixto mō ³⁵ nhũm Jejus mẽ uràk nê hwÿr mÿr o tẽ ³⁶ nhũm mẽ ja hã omu nê axpên mã:

—Kwa mãn kãm hapê htÿx. Hã na ho ama nê hwÿr mÿr o tẽ. Anê.

³⁷ Nom nhũm mẽ hkwỳjaja axtem nẽ mẽ kãm:

—Tk. Ra kot no hkre xwỳnhta o mex tã mo na we tokyx man kormã htĩr ri hwỳr htẽm nẽ omunh nẽ akupỹm ho mex kêt nẽ? Anẽ.

Jejus kot akupỹm Rajare ho htĩr ã harẽnh

³⁸ Tã pa mẽ ra kẽn kre kamã mẽ kot Rajare jaxàr xàta wỳr ixpôx o mỗ nhũm Jejus hkaprĩ nẽ hwỳr tẽ nẽ omu. Nhũm prem ra kẽn rax o hitom ³⁹ nhũm omu nẽ mẽ kãm:

—E mẽ akwỳjaja nhãm inhmã nẽ kahê xà mẽ. Anẽ.

Hãmri nhũm Matre kuma nẽ tee ri hamaxpẽr nẽ kãm:

—Xê ma Jejus. Mẽ ri ã anhỹr kêt nẽ. Ra htyk ã arĩgro kệp 4 kênã. Mãn ra hkatôk nẽ hkro htỳx kumrẽx. Anẽ.

⁴⁰ Hãmri nhũm kuma nẽ kãm:

—Kwa ri ã ajamaxpẽr anhỹr kêt nẽ Matre. Na pa ra amã ixkapẽr nẽ amã ixkapẽr o: “Kot kaj amnhĩ kaxyw ixkôt ajamaxpẽr tỳx nẽ. Hã kot kaj Tĩrtũm mẽ wa ixihtỳx o wa ixihtỳx xàja pumu.” Anhỹr o amã ixkapẽr. Jakamã kwa ja kaxyw Tĩrtũm mẽ wa ixkôt mãn ajamaxpẽr tỳx nẽ hkêt wehe. Anẽ.

Hãmri nhũm kuma nẽ kãm:

—Ma ãm hãmri na ka inhmã akapẽr. Ma kot paj kaxyw war amã ijamaxpẽr tỳx nẽ. Anẽ.

⁴¹ Rôm nhũm mẽ kãm nhãm kẽn jakwa kre kahê xà mẽ. Hãmri nhũm Jejus Tĩrtũm mã amnhĩ jarẽnh kaxyw kànhmã kaxkwa hwỳr rĩt nẽ kãm:

—Pa Papaj. Nà na pa hte tanhmã mẽmoj tã awỳr to ka inhma nẽ tanhmã inhmã mẽmoj nhĩpêx to. Amex o amex Papaj. ⁴² Na ka hte ã inhmã amnhĩ nhĩpêx anẽ. Tã pa jajẽ noo mã ã amã ixkapẽr anẽ. Ate inhmar nẽ tanhmã Rajare hto nhũm mẽ kot ja hã ixpumunh nẽ ixte anhỹr hã pix mã tanhmã amnhĩ nhĩpêx to ho ri ixpa hã ixpumunh kaxyw. Nẽ ka ate mẽ hwỳr inhmẽnh ã apumunh kaxyw. Anẽ.

⁴³ Nhũm pre ã Tĩrtũm mã kapẽr anẽ. Hãmri nẽ kỳx pẽ Rajare mã kapẽr nẽ kãm:

—Pa Rajare. Kwa tokyx kànhmã nhỹ nẽ amnẽ mẽ ixwỳr tẽ nẽ akato. Anẽ.

⁴⁴ Puh nhũm akupỹm htĩr nẽ hkupu xà rãhã tẽ nẽ mẽ ixwỳr kato nẽ xa. Arĩ hkuk nẽ ãhkra nẽ hpar kupu rãhã mẽ ixwỳr kato nẽ xa. Hãmri nhũm Jejus mẽ kãm:

—Kwa mẽ atõ nẽ kupu xà hpôt kê ma akupỹm òrkwỹ hwỳr tẽ. Anẽ.

⁴⁵ Hãmri nhũm mẽ kot Marir mẽ Matre wa hwỳr mrrar xwỳnh kwỳjaja ã Jejus kot Rajare nhĩpêx anhỹr ã omu nẽ amnhĩ kaxyw hkôt hamaxpẽr nẽ hkôt amnhĩ xunhwỳr kurẽ kumrẽx. ⁴⁶ Nom nhũm mẽ hkwỳjaja axtem nẽ omu nhũm ja mẽ kệp omnuj nẽ. Jakamã nhũm mẽ ma Parijew nhõ xwỳnhjẽ hwỳr mra nẽ mẽ kãm harẽ.

Mẽ kot Jejus pĩr ã amnhĩ grõnh

Matêwre 26.1-5; Makre 14.1-2; Rukre 22.1-2

⁴⁷ Hãmri nhũm Parijew nhõ xwỳnhjaja tee ri Jejus kot akupỹm Rajare ho htĩr ã harẽnh ma hãmri nẽ patre krãhtũmjẽ mẽ amnhĩ wỳr mẽ inhõ juisti ho akuprõ nẽ axpẽn mã Jejus o kapẽr punuj pẽ hã axpẽn mar o hkrĩ. Hãmri nhũm mẽhõ mẽ kãm:

—Kwa tanhmã kot puj mẽ ho? Na ra mẽ kãm mẽmoj pumunh kêt kwỳ ho anhỹr rax o pa. ⁴⁸ Kot puj mẽ ãm omu nẽ tanhmã ho hkêt nhũm mẽ pahkwỳjaja kot ã amnhĩ nhĩpêx anhỹr ã omu nẽ htỳx ãm hãmri ã kot amnhĩ nhĩpêx anhỹr ã hkamnhĩx. Hãmri nẽ amnhĩ kaxyw hkôt hamaxpẽr nẽ hkôt amnhĩ xunhwỳ. Jao ra amnhĩ kaxyw kệp mẽ ò pahihtĩ hã ãm. Kojã mẽ ã amnhĩ nhĩpêx anẽ nhũm Rôm kamã pahihtija mẽ kot kator nẽ hpãnhã Jejus xãm ã harẽnh ma. Hãmri nẽ gryk xàj mẽ pahwỳr ò pòristi hkwỳ rẽ nhũm mẽ pahwỳr mra nẽ mẽ panhĩmex pa nẽ Tĩrtũm nhõrkwỹ grãnh pa. Kwa tanhmã kot puj wem tokyx amnhĩ nẽ ho? Anẽ.

⁴⁹ Hãmri nhũm Kajpas mẽ kãm kapẽr. Kajpasja na pre amgràja kamã kệp mẽõ patre nhõ pahi maati. Jakamã mẽ kãm:

—Nà na pa ra ijamaxpẽr. Kwa mẽ inhma. ⁵⁰ Nà kot puj mẽ hpĩr tokyx anẽ kê tapxipix ty pu mẽ arĩ mỳrpê pahpiitã pajamakêtkati nẽ ri papa. Anẽ.

⁵¹ Nhũm pre ã mẽ kãm kapẽr anẽ. Nom amnhĩ krã hkôt ã mẽ kãm kapẽr anhỹr kêt nẽ. Arĩ kệp mẽõ patre krãhtũmjẽ nhõ pahi maati jakamã Tĩrtũm nhỹ hã Jejus kot Ijaew

nê tykja kukamã ã harênh anê. Nom ja hã amnhĩ pumunh kêt nê. ⁵² Na pre Jejus mē ixpê Ijaew pix nê htyk kêt nê. Krĩ piitã hkôt Tĩrtũm krajê nê na pre ty. Mē piitã mē kot axpên to hkwỹ nê ri axpên to pa kaxyw na pre mē nê ty. ⁵³ Hãmri nhũm ã Kajpas mē kãm kapêr anê nhũm mē inhõ pahijaja kuma nhũm ja mē kãm mex nê. Jakamã nhũm mē kot tanhmã Jejus ã àmnênh to nhũm mē kot mē kãm tanhmã hpĩr to kaxyw ã axpên mar anhỹr o pa. ⁵⁴ Jakamã nhũm Jejus axte mē noo mã ri pa hkêt nê. Hãmri ma krĩ pê Epraĩ hwỳr ma mō. Pa mē hkôt ixpa ho ixpa xwỳnhjaja ma hkôt ixpa. Epraĩja kapôt ã krĩ na pre. Jakamã pa mē ma hwỳr mō hãmri nê kamã ri ixpa.

⁵⁵ Tã nhũm arĩgro pê Pasja ra ahtêp o mō. Amnepêm finat Mojes kot Ejit rũm mē panhĩgêjtjê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwỳr akuprō. Na pa pre htem hwỳr pōj nê kamã Tĩrtũm noo mã mē inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhũm ra Ijaew ohtô nê ma Jerujarê hwỳr pa. Nê kãm Jejus pumunh prãm xaj Tĩrtũm mã amnhĩ jarênh xà hã ixkre wỳr mra nê hwỳr agjê nê kamã hapêr nê axpên mã:

—Kwa nok? Xà koja mē hpakĩnh wỳr mōr kêt nê nà? Anê.

Nhũm Parijew nhõ xwỳnhjê mē mē inhõ patre krãhtũmjaja haxwỳja hapêr o kuhê. Nom mē kot axtem nê unê nê haxàr kaxyw. Jakamã mē kãm hã karō nê mē kãm:

—E kêr ka mē nhỹri Jejus pumu nê man mē ixwỳr mra nê mē inhmã harênh kurê kumrêx. Anê.

12

Marir kot Jejus kuxwa hã harênh

Matêwre 26.6-13; Makre 14.3-9; Rukre 7.36-50

¹ Tã nhũm ra Pas wỳr apkati grêre. Ra hwỳr apkati kêp 6. Jakamã pa mē ma akupỹm krĩ pê Petãn wỳr Jejus kôt mō. Jejus kot akupỹm Rajare ho htĩr xwỳnhhta mē õ krĩ hwỳr pa mē akupỹm mō nê Rajare nhõrkwỹ hwỳr pōj nê mē hwỳr agjê. ² Hãmri nhũm mē Jejus pumu nê hkĩnh nê. Nê mē inhmã mēmoj mex nhĩpêx pa mē ixàpkur o ixkrĩ. Nhũm Rajare haxwỳja mē ixkutã apkur o nhỹ. Nhũm htõx Matre mē inhmã mēõ ho pa nê mēsti hã unhwỳr o xa. ³ Hãmri nhũm wa htõx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mē kot mē ixpê hpĩr kukamã mē hkuxwaxà ho hkuxwa. Anê.

Hãmri nê kàx rax kãm mē hkuxwaxàja py nê o tẽ. Ra rit kahti hkôt hitep xà nhũm kupy nê hwỳr o tẽ. Mē kot mēmo htwỳm o mē hkuxwaxà mex nhĩpêxja na pre hã kàxpore xohtô rax kumrêx. Jakamã nhũm kupy nê Jejus wỳr o tẽ nê hpar ã hkapĩr pa nê amnhĩ krã hkĩ ho hpar grà ho nhỹ nhũm ra ixkre kuxwa htỳx kumrêx. ⁴ Hãmri nhũm mē inhõ pê Jut Kariotja. Kot kormã mē ìhkram Jejus nhõr mã xwỳnhhta tee ri ã kot amnhĩ nhĩpêx anhỹr ã omu nhũm ja kêp omnuj nê ⁵ nhũm mē inhmã:

—Tk. Kwa pêr mē hkuxwaxà hã kàxpore xohtô rax kumrêx tã nhũm ri axtem nê Jejus par ã hkapĩr pa. Mo na ma o htêm nê ho wênê nê hpãnhã kàxpore ho rax nê hpyr nê ho mē kêp amrakati xwỳnhjê nhĩpêx kêt nê? Kot ho wênê ronhỹx hpãnhã kàxpore ho rax kumrêx nê kupy nê ho mēmoj japrôr rax o rax. Tã axtem nê amarĩ Jejus par ã hkapĩr pa. Anê.

⁶ Te kãm mē kêp amrakati xwỳnhjê japê pyrãk tã kãm mē hapê hkêt. ãm hêx rom ã kapêr anê. Na pre hte mē inhmã mē ixkàxpore jamỳ nê mē ixkôt mē inhmã hamãr o pa. Nom tōhã axtem nê mē ixpê hkwỹ ho ahkĩ nê ho amnhĩm mēmoj japrô. Jakamã Marir kot mē hkuxwaxà ho hapêx par ã omu nê tee ri hpãnhã kàxpore rax mã hamaxpêr nê kamã gryk nê ã mē inhmã kapêr anê. ⁷ Hãmri nhũm Jejus amnhĩ tã hamaxpêr ã omu nê kãm:

—Tk. Kwa tanhmã kãm akapêr to hkêt nê. Ixtyk nhũm mē kot ixkuxwa hkukamã na ã inhĩpêx anê. ⁸ Na hte mē kêp amrakati xwỳnhjaja mē akôt pa rãhã nê. Ka mē amã mēmo arĩgro hã tanhmã mē ho ajuta hto hprãm nê rĩ mē ho ajuta nê mē kãm mēmoj gō. No kêt

pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. Jakamã ãm hãmri na ã inhîpêx anê. Anê.

Patre krãhtũmjaja kot Rajare hã àmnênh ã harênh

⁹ Rôm nhũm Jerujarê nhõ xwýnhjaja ra Jejus Petãn wýr hpôx ã harênh ma nê kot omunh mã ma hwýr mra. No ãm tapxipix pumunh mã hwýr mrrar kêt nê. Mãânên kot akupým ho htír xwýnhta pumunh mã nhũm mẽ ma hwýr mra. ¹⁰⁻¹¹ Na pre ra Ijaew ohtô nê Jejus kot akupým Rajare ho htír ã harênh ma hãmri nê mẽ inhõ patre kaga nê Jejus kôt amnhĩ xunhwý. Jakamã nhũm patre krãhtũmjaja tee ri ja hã mẽ omu nê axpên mã:

—Nà kot puj mẽ Jejus pix pír kêt nê. Kot puj mẽ mãânên hkôt Rajare pĩ hãmri nhũm wa hixi hamẽ mẽ kêp hapêx japêr. Anê.

Jejus kot Jerujarê hwýr àr ã harênh

Matêwre 21.1-11; Makre 11.1-11; Rukre 19.28-40

¹² Tã nhũm apkati nhũm Ijaew Jerujarê kamã mẽ hkĩnhja kryx nê Jejus ra mẽ hwýr àhtêp o mör ã harênh ma. ¹³ Hãmri nê axpên mã:

—Kwa ma pu mẽ mō nê pô hkwý jakà nê kutã ho mra. Anê.

Hãmri nê hkwý jakà nê hamý nê ma kutã ho mra. Hãmri nê ra hkaxpa nê omu nê hkĩnh nê. Nê kãm:

Pa. Nà ãm hãmri na ka mẽ ixwýr mō. Tĩrtũm na pre mẽ ixwýr amê ka ã amör anê.

Tĩrtũmja mex o mex. ãm hãmri na pre mẽ ixwýr amê.

Kot kaj mẽ inhõ pahi hpãnhã mẽ ixto amnhĩptàr o ri apa. Anê.

¹⁴ Hãmri nhũm Jejus nhýri jumênre pumu nê hwýr tẽ nê hã nhý nhũm mẽ pimràatã ma akupým Jerujarê hwýr mō. Tĩrtũm kapêr ã kagà htũm ra kot ja jarênh kot:

¹⁵ Pa Jerujarê nhõ xwýnhjaja. Kwa mẽ tee ri amnhĩ kukamã ajamaxpêr ho amã ma hkêt nê.

Ota mẽ anhõ pahi nyw ra mẽ awýr jumênre hã nhý nê hpôx o tẽ. Anê.

¹⁶ No Jejus kôt mẽ ixpa ho mẽ ixpa xwýnhjaja pa mẽ ã kot amnhĩ nhîpêx anhýrja ã omu nê tee ri hkukamã ijamaxpêr nê axpên mã:

—Kwa mo na ri ã amnhĩ nhîpêx anê nê jumênre hã nhý nê mẽ hkôt mō? Anê.

Tã nhũm arĩgro hõ hã ty nê akupým kaxkwa hwýr api pa prem hã omu hãmri nê kormã Tĩrtũm kapêr ã kagà htũm kot hkukamã ã harênh kot anhýrja mã ijamaxpêr kurê kumrêx. Hãmri nê axpên mã harênh o:

—Kwa ãm hãmri na Tĩrtũm kapêr ã kagà htũm kot ra ã Kraja jumênre hã ýr nê mẽ hkôt mör ã hkukamã kot harênh anhýrta. Anê.

¹⁷ Hãmri nhũm Jejus kot Rajare mã kapêr pê akupým ho htír ã omunh xwýnhjaja arĩ nhãm mẽ hkwýjê mã ujarênh o pa. ¹⁸ Nhũm mẽ kuma nê ma Jejus wýr omunh mã mra.

¹⁹ Hãmri nhũm Parijew nhõ xwýnhjaja tee ri ja hã mẽ omu nê axpên mã:

—Kwa na pu mẽ tee ri Jejus nê mẽ kãm pakapêr kaprý nhũm mẽ pamar kêt nê ra piitã hkôt amnhĩ nhîpêx o pa. Kwa nà. Anê.

Ijaew kêt xwýnhjê jarênh

²⁰ Tã nhũm ra Gres kwýjaja Ijaew kôt hkĩnh kaxyw ma Jerujarê hwýr mẽ hkôt mra nê mẽ ãhkô hã Tĩrtũm mã mex o mex ã harênh o hkôt mra. ²¹ Jakamã nhũm mẽ nhýri mẽ inhõ pê Firipti pumu nê hwýr mra. Firipti kêp pyka pê Garirej kamã krĩ pê Pesêj nhõ xwýnh nhũm Gres nhõ xwýnhjaja omu nê hwýr mra nê kãm:

—Pa. Kwa na pa mẽ inhmã Jejus pumunh prãm nê. Tanhmã kot pa wem amnhĩ to nê omu nê kãm ixkapêr? Anê.

²² Hãmri nhũm mẽ kuma nê ma Andre hwýr mẽ o mra nê kãm mẽ harê. Hãmri nê wa ma Jejus wýr mẽ o mra nê kãm mẽ harê nê kãm:

—Pa Pahihti. Ota Gres nhõ xwýnhjaja kãm apumunh prãm nê awýr mō. Mẽ pahkĩnhã mẽ kêp Ijaew kêt tã mẽ kãm apumunh prãm nê. Anê.

Jejus kot amnhĩ kukamã amnhĩ jarênh

Matêwre 16.24-28; mãânên Apokarip 2.10, 12.11

²³ Hāmri nhūm Jejus mẽ omu nẽ mẽ kām tanhmã amnhĩ jarēnh to. Kot mẽ ohtô nẽ mẽ nẽ htyk nhūm mẽ kukwak ri Tĩrtūm wa kuri htĩr tūm nẽ pa ho pa hã mẽ kām amnhĩ jarē nẽ mẽ kām:

—Nà na ra ixyk ã arĩgro hwỳr apkati grêre. Ixpê Tĩrtūm kot mẽ akaxyw ixãm xwỳnh jakamã kot paj mẽ apiitã mẽ anê ty hāmri nẽ akupỹm ixtĩr nẽ ma kaxkwa hwỳr akupỹm api. ²⁴ Mẽ axohtô nẽ nhỹrmã Tĩrtūm mẽ wa ixri atĩr tūm nẽ apa ho apa kaxyw kot paj ã amnhĩ nhĩpêx anê. Kwa mẽ ã ixte amnhĩ jarēnh anhỹrja ma nẽ mẽ amnhĩ krãm haxàr tỳx nẽ ri hã apa. Te ixte mẽmo hy kot amnhĩ nhĩpêx pyræk. Na htem pikap hagjê nhūm te htyk pyrã nẽ pika kaxwỳnh kãm hikwỹ. Tã gaa nẽ higrôt nẽ hprêk nẽ ô. Nẽ ô rax kumrêx. Hyja pyxire nẽ hikwỹ htã kamã ô rax kumrêx. Nom koja mẽ hkre hkêt nẽ nhūm ô hkêt nẽ. Na hte ã mẽmo hyja amnhĩ nhĩpêx anê. Ja pyrã nẽ kot paj mẽ anê ixyk kêt nẽ te mẽ kot mẽmo hy hkre hkêt nhūm hprêk nẽ ô hkêeta pyræk ka mẽ ixkukwak ri Tĩrtūm mẽ wa ixri atĩr tūm nẽ apa hkêt nẽ. Jakamã kot paj mẽ anê ty nhūm mẽ ijaxà. Hāmri pa akupỹm ixtĩr ka mẽ axohtô nẽ ixkukwak ri wa ixri atĩr tūm nẽ apa ho apa.

²⁵ —Nẽ koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixtã mẽ apar mã tã kwa kêr ka mẽ atyk pymaj ixkaga hkêt nẽ. Kwār mẽ māmri tanhmã ixtã mẽ ato ka mẽ nhỹrmã Tĩrtūm mẽ wa ixri axte amnhĩ xà kamã ajamak kêt kumrêx nẽ atĩr tūm nẽ amex nẽ apa ho apa. No kot kaj mẽ ixkĩnhã jar amã amex pix prãm hāmri nẽ nhỹrmã wa ixri atĩr tūm nẽ apa hkêt nẽ. ²⁶ Kot kaj mẽ ã ixkôt amnhĩ nhĩpêx anhỹr o ri apa hāmri nhūm mẽ kot inhĩpêx pyræk o mẽ anhĩpêx. Hāmri ka mẽ nhỹrmã ma ixkôt kaxkwa hwỳr api nẽ kamã ixri atĩr tūm nẽ apa ho apa. Hāmri nhūm Inhĩpêxà ixtã mẽ apumu nẽ mẽ ato mex kumrêx. Anê.

Tĩrtūm kot Jejus mã kapêr ã harēnh

Matêwre 3.17, 17.5

²⁷ Tã nhūm Jejus tee ri amnhĩ kukamã htyk mã hamaxpêr nẽ hkaprĩ htỳx nẽ. Nẽ hkôt mẽ ixpa ho mẽ ixpa xwỳnhjê mã amnhĩ jarē nẽ mẽ inhmã:

—Hêxta waa nẽ. Na pa tee ri amnhĩ kukamã ijamaxpêr. Nẽ tee ri amnhĩ xà htỳx kamã ijamak kukamã ijamaxpêr pê ra amnhĩ kamã ixkahak nẽ. Nom ixte pika piitã hkôt mẽ kot ixkôt amnhĩ xunhwỳr xwỳnhjê nẽ ixyk kaxyw ixwryk kênã. Jakamã kot paj Inhĩpêxà kot mẽ kêp ixpytãr kaxyw tanhmã amnhĩ to hwỳr to hkêt nẽ. Anê.

²⁸ Hāmri nẽ hpãnhã Hipêxà mã kapêr nẽ kãm:

—Pa Papaj. Ām mẽmoj pixi na inhmã hprãm. Kê mẽ piitã ixkukwak ri amex o amex ã apumu. Ja na kêt inhmã hprãm tỳx kumrêx.

Anhỹr o Tĩrtūm mã amnhĩ jarē. Hāmri nhūm kuma nẽ kaxkwa rūm kãm kapêr. Kỳxpê kãm kapêr nẽ kãm:

—Nà na pa pre ra ã mẽ kãm amnhĩ to amnhĩrit anê nhūm mẽ ja hã ixpumu. Tã kot paj axte akukwak ri amnhĩ to amnhĩrit nhūm mẽ piitã axte inhmex o inhmex ã ixpumu. Anê.

²⁹ Nhūm pre ã Tĩrtūm Jejus mã kapêr anê. Hāmri nhūm mẽ kot mẽ ixkuri mar o kuhê xwỳnhjaja kuma no ãm hprĩ hã kot kãm tanhmã kapêr toja mar mex kêt nẽ. Nẽ htỳx ho ãm mẽmoj tã hkamnhĩx. Jakamã nhūm mẽ hkwỳjaja axpên mã:

—Kwa mo na wehe? Na mãn katôtök nà? Anê.

Nhūm mẽ hkwỳjaja mẽ kãm:

—Nà na katôtök kêt. Tĩrtūm kapêr o wryk xwỳnh mãn tanhmã kãm kapêr to. Anê.

³⁰ Hāmri nhūm Jejus mẽ kãm:

—Nà Tĩrtūm tãm na inhmã kapêr. Nom pa ixte mar kaxyw inhmã kapêr kêt nẽ. Mẽ kajaja mẽ ate ixtã mar kaxyw na kỳx pê ã inhmã kapêr anê. Anê.

Hāmri nẽ mẽ kãm:

³¹ —E hāmri. Kot paj tokyx mẽ apiitã mẽ ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mãñnēn Satanasti pê hihtỳx xà ho ijapêx. ³² Koja mẽ pĩ kahpa hã inhô pa kỳxpê ajêt. Tĩrtūm kot mẽ awỳr inhmēnh tã nhūm mẽ ã inhĩpêx anê

pa ty. Jakamã koja pika piitã hkôt mẽ ohtô nê ixkôt amnhĩ xunhwỳ nê amnhĩ kaxyw inhmã hamaxpêr rãhã ho pa. Anê.

³³ Mẽ ixte tanhmã htyk to hã harênh mar kaxyw nhũm pre ã mẽ inhmã amnhĩ jarênh anê. ³⁴ Hãmri nhũm mẽ kot mẽ ixkuri mar o kuhê xwỳnhjaja tee ri kot htyk ã amnhĩ jarênhja ma nê kãm:

—Kwa mẽ ixte amnhĩ wỳr kamã ijamak o ixpa xwỳnhja htĩr tũm nê pa ho pa xwỳnh na. Tĩrtũm kapêr ã kagà htũm kot ã harênh kot anhỳr tã ka ã ri mẽ kot apĩr nhũm atyk ã amnhĩ jarênh anê. Ate Tĩrtũm kot mẽ ixwỳr amênh xwỳnh ã amnhĩ jarênh tã ã ri atyk ã amnhĩ jarênh anê. Kwa xà apê mẽ ixte amnhĩ wỳr kamã ijamak o ixpa xwỳnh kêt? Anê.

³⁵ Hãmri nhũm mẽ kuma nê amnhĩ tã mẽ kãm:

—Tỳ ixpê tãm kênã. Tã kot paj tokyx mẽ are. Jakamã kêr ka mẽ ixte arĩ mẽ akamã ixpa ri ixkôt amnhĩ xunhwỳ nê amnhĩ kaxyw ixkôt ajamaxpêr o ri apa. Te ixpê kanê hpòk pyrãk jakamã na pa hte mẽ kãm Tĩrtũm kapêr o mẽ ahkre o ri ixpa. Nom kot paj kritpê m mẽ akôt ixpa ry hkêt nê. Jakamã kwa kêr ka mẽ tokyx te mẽ kot kanê hpòk nhĩrã kamã ri mẽ pa xwỳnh kot amnhĩ nhĩpêx pyrã nê Tĩrtũm kôt amnhĩ nhĩpêx o ri apa. Kormã mẽ akôt ixpa ri. Kot paj tokyx ma mỗ nhũm te ra kamàt kô pyrãk. Na hte kamàt kô kamã mẽ pa xwỳnhjaja tee ri rĩt mex mã nom rĩt mex kêt nê. Nê mẽmoj pumunh mex kêt nê. ³⁶ Jakamã kwa mẽ tokyx ixte arĩ mẽ akamã ixpa ri amnhĩ kaxyw inhmã ajamaxpêr nê ixkôt amnhĩ xunhwỳ. Te ixpê kanê hpòk nhũm kamã mẽ arĩt mex pyrãk. Jao ixpyrà nê te mẽ apê kanê hpòk nhĩrã mex pyrãk o amnhĩ nhĩpêx. Nê ixpyrà nê tãm ri amnhĩ nhĩpêx o apa. Anê.

Nhũm pre ã mẽ kãm kapêr anê hãmri pa mẽ kêp ixkato nê ma nhãm mỗ.

Mẽ hkwỳjaja kot Jejus kôt hamaxpêr kêt ã mẽ harênh

³⁷ Na pre hte Jejus mẽ noo mã mẽ kot aa mẽmoj pumunh kêt kwỳ ho anhỳr rax o pa. Tã nom nhũm mẽ ohtô nê hã omu nê ãm hã omu nê kêp Tĩrtũm kot mẽ pahwỳr mẽnh xwỳnh ã hkôt hamaxpêr kêt nê. ³⁸ Nom ra mẽ hkukamã Tĩrtũm nhỹ hã kapêr jarênh o pa xwỳnh pê finat Ijaisja mẽ hkukamã ja hã mẽ harê nê hã kagà. Nê hã kagàja o: Pa Pahi Maati. Nà ra ixte mẽ kãm ajarênh o ixpa ryy htã no nhũm mẽ inhma nê ãm inhma.

Nê mẽ kot axihtỳx o axihtỳx ã ajarênh mar tã no ãm ajarênh ma nê amnhĩ kaxyw akôt hamaxpêr kêt nê. Anê.

³⁹ Mẽ kãm Tĩrtũm kapêr mar prãm kêt jakamã na prem mããnên Jejus kêp Tĩrtũm kot mẽ pahwỳr mẽnh xwỳnh hkôt hamaxpêr kêt nê. Nhũm pre finat Ijaisja axte mẽ hkukamã ja hã mẽ harê nê mẽ hã kagà. Nê hã kagà ho:

⁴⁰ Na pre Tĩrtũmja tanhmã amnhĩ nê mẽ hkrã hto nhũm mẽ hkôt hamaxpêr kêt nê.

Ra mẽ kot hihtỳx o hihtỳx ã omunh tã omu nê ãm omu.

Nê mẽ kot kapêr mar tã amnhĩ tomnuj kaga hkêt nê.

Nê Tĩrtũm kot mẽ nê mẽ kot amnhĩ tomnuj o hapêx prãm xàj hkôt amnhĩ xunhwỳr kêt nê. Anê.

⁴¹ Kormã Jejus mẽ hwỳr wrỳk kêt ri nhũm finat Ijaisja hpimtir kãm kot amnhĩ to rax kumrêx ã omu nê hkukamã ã harênh nê hã kagà anê.

⁴² Hãmri nhũm Ijaew krãhtũm kwỳjaja hkwỳjê rom amnhĩ kaxyw Jejus kôt hamaxpêr nê hkôt amnhĩ xunhwỳ. Tã Parijew nhõ xwỳnhjaja kot ã mẽ kot amnhĩ nhĩpêx anhỳr ã mẽ harênh mar pymaj ja hã amnhĩ to amnhĩrĩt kêt nê. Mẽ kot Tĩrtũm kapêr o mẽ ahkre xà hã ixkreja nê mẽ kator pymaj nhũm mẽ kãm amnhĩ to amnhĩrĩt kêt nê. ⁴³ Na prem hamaxpêr o:

—Nà kot paj ja hã amnhĩ to amnhĩrĩt nhũm mẽ amnhĩ nê ixtomnuj nê. Hãmri nê amnhĩ pyrã nê axpên mã inhmex ã ijarênh kêt nê.

Anhỳr o mẽ umaj amnhĩ kukamã hamaxpêr o pa. Nom Tĩrtũm tãm kot amnhĩm mẽ mex ã mẽ harênhja nhũm mẽ hkukamã hamaxpêr kêt nê.

Jejus kot Hipêxà nhỹ hã kapêr ã harênh

⁴⁴ Nhũm Jejus axte mẽ kãm kapêr nê kỳx pê kapêr nê mẽ kãm:

—Nà koja mēhō amnhī kaxyw ixkôt hamaxpēr hāmri nē ixkôt pix mā hamaxpēr kêt nē. Māānēn amnhī kaxyw kot mē awÿr inhmēnh xwÿnhja kôt hamaxpēr. ⁴⁵ Wa ixte amnhī nhīpēxja te tipxi pyrāk jakamā koja mē tanhmā ixte amnhī nhīpēx to hā ixpumu nē te kot Tirtūm kot amnhī nhīpēx ā omunh pyrāk.

⁴⁶ —Nē te ixpē kanē hpōk nhūm inhīrā kamā mē apa pyrāk kaxyw na pre Inhīpēxà mē awÿr inhmē pa mē awÿr wrÿ. Ixte kapēr o mē ajahkre ho ri mē akôt ixpa kaxyw. Jakamā koja mēhō amnhī kaxyw ixkôt hamaxpēr nē ixkôt amnhī xām hāmri nē te kanē hpōk nhīrā kamā rīt mex o pa pyrāk o amnhī nhīpēx. Jao amnhī nhīpēx nyw o amnhī nhīpēx o pa. ⁴⁷⁻⁴⁸ No mē kot ixkapēr mar nē ām mar xwÿnhjaja te māānēn Inhīpēxà kapēr mar nē ām mar pyrāk. Mÿrapē koja mē nhÿrmā ma kuwy hwÿr pa nē mē kot amnhī tomnuj mÿrapē kamā pa ho pa. Tā no ā mē ate amnhī nhīpēx anhÿr o ri mē apa kaxyw na pa pre mē awÿr ixwÿrk kêt nē. Ixte mē ate amnhī tomnuj pānhā amnhīrer par kaxyw na pa pre mē awÿr wrÿ.

⁴⁹ —Nē na pa hte amnhī krā hkôt tanhmā ri mē amā ixkapēr to ho ri ixpa hkêt nē. Ām kot mē awÿr inhmēnh xwÿnhja nhÿ hā na pa hte tanhmā mē amā ixkapēr to ho ri mē akôt ixpa. ⁵⁰ Tā mē kot Tirtūm kapēr mar nē amnhī kaxyw hkôt hamaxpēr xwÿnhjaja koja mē nhÿrmā wa ixri htīr tūm nē mex nē pa ho pa. Jakamā na pa hte tanhmā kot inhmā karō hto xà hkôt pix mā tanhmā mē amā ixkapēr to ho ri ixpa. Anē.

13

Jejus kot hkwÿjê hpar kuhōnh ā harēnh

Rukre 22.24-27

¹ Tā nhūm ra Pas ā mē ixkīnhta ahtēp. Pas ā na hte mē ixpē Ijaewjaja axpēn wÿr akuprō nē hā ôwēhti hkra nyw pa nē ho anē nē hkur o ixkrī. Amnepēm Tirtūm kot pika pē Ejit rūm mē inhīgēxjê kator kaxyw nhūm mē nojarēt nē ā hkwÿ hpar nē ho anhÿr nē hkwÿ hkurta pyrāk. Na prem nojarēt nē mē hkra my kot wa mē kēp htyk pumaj ôwēhti hkra nyw kwÿ hpa nē ho anē nē ĩ hku. Jakamā nhūm arī mē ixpē mē hkanrēhā mē htāmnhwÿjaja ā mē kot amnhī nhīpēx anhÿrja mā ijamaxpēr nē hā ixkīnh kaxyw mē urāk nē hkwÿ hpa nē kuku. Jakamā nhūm ra Pas ahtēp nhūm Jejus amnhī kukamā tanhmā hamaxpēr to kurē kumrēx. Ra ma akupÿm Hipēxà hwÿr àpir xà hā arīgro hwÿr apkati grēre. Jakamā nhūm akupÿm nojarēt ā amnhī pumu nē kām mē pahte hkôt amnhī xunhwÿr xwÿnhjê japē jakamā kām mē pajapē rāhā mē panē htyk mā. ² Tā nhūm myt axà pa mē Pas ā ixàpkur o ixkrī. Nhūm Simāw Kariot kra Jut Kariotja māānēn mē ixkutā apkur o nhÿ. Kēp mē ixkwÿ htā nhūm pre Satanasti tanhmā hkrā hto nhūm ra axtem nē kot mē kām Jejus kurē xwÿnhjê nhīhkram haxār kaxyw.

³⁻⁴ Tā pa mē kormā axpēn kutā ixàpkur kaxyw ixkrī hpa nhūm Jejus kànhmā xa nē hinōkà kapa nē toajti py nē ho amnhī krax pre. Kot amnhī to rax ā amnhī pumunh tā ja hā amnhī to jarkrar pē tanhmā ri mē inhnoo mā amnhī nhīpēx to ho pa hkêt. Kēp mē inhō pahi htā te kēp mē inhmā àpēnh xwÿnh pyrāk o amnhī nhīpēx o pa. ⁵ Jakamā toajti py nē ho amnhī krax pre nē pasiiti hō py nē kamā gō hkwÿ ru nē ho mē ixpar kuhō nē toajti o mē ixpar grà ho mō. ⁶ Ā mē inhīpēx anhÿr o mō. Pē ra hpānhā Simāw Pētre hpar kuhōnh kaxyw nhūm tee ri amnhī tā omu nē kām:

—Tk. Kwa apē inhmā axàpēnh xwÿnh kêt kēnā kot ka kêt ri axtem nē ixpar kuhō Pahihti. Apē mē inhō Pahi kēnā kot ka kêt ā mē inhīpēx anē. Anē.

⁷ Hāmri nhūm kām:

—Kwa nà. Kormā ate ja hā amnhī tā ixpumunh mex kêt. Nom kot kaj nhÿrmā aprī hā amnhī tā ixpumu. Anē.

⁸ Hāmri nhūm kām:

—Nà nom kot kaj ām ixpar kuhōnh kêt nē. Kwarī. Anē.

Hāmri nhūm Jejus kām:

—Tōe. Kot paj apar kuhōnh kêt nē ka te apē ixkwÿ hkêt pyrāk. Anē.

⁹ Hāmri nhūm tee ri kuma nē kām:

—Tôe mamrĩ i XPAR kuhõ. Nom XPAR PIX kuhõnh kêt nê. Mãânên inhĩhkra kuhõ nê ixkuk kuhõ. Inhmã ixte apyràk prãm tỳx kumrêx kênã. Anê.

¹⁰ Hãmri nhũm JeJus kãm:

—Nà amỹkry hkõt mẽ wỳr xwỳnhjaja na htem mex nê axte wỳr kêt rãhã hikwỹ. Na htem ãm amnhĩ par PIX kuhõ nê hikwỹ. Ja pyrã nê Tĩrtũm kot mẽ anê mẽ ate amnhĩ tomnuj ho hapêx par xwỳnhjaja te amỹkry hwỳr mẽ axwỳr nê amex pyrãk. Ka mẽ te mẽ kot amnhĩ par PIX kuhõnh ta pyrã nê axte tanhmã amnhĩ tomnuj to hãmri nê Tĩrtũm mã amnhĩ jarênh kurê kumrêx kê anê amnhĩ katut kõt ate amnhĩ tomnujta mẽ nê ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã hkêt. Ota arĩ mẽ anhĩõja pyxire nê arĩ amnhĩ tomnuj rãhã ri pa. Jakamã te wỳr kêt nê arĩ grã htyk rax kãm ri pa pyrãk. Anê.

¹¹ Nhũm pre ã JeJus mẽ inhmã kapêr anê. Ra kot hprĩ hã mẽ kot kãm hkurê xwỳnhjê mã õr mã xwỳnhja pumunh jakamã te wỳr kêt nê arĩ grã htyk rax kãm ri pa pyrãk ã ã harênh anê.

¹² Tã mẽ XPAR kuhõnh pa nê akupỹm hinõkà py nê haxà nê nhỹ hãmri nê mẽ inhmã:

—E mẽmo kaxyw na pa we ã mẽ apar kuhõnh anê? Kot paj ixprĩ hã mẽ amã amnhĩ jarê ka mẽ inhma. ¹³⁻¹⁴ Na ka htem ixto “mê ijahkre xwỳnh” nê ixto “pahihti” anhỹr o ijarênh o ri apa. ãm hãmri na ka htem ã axpên mã ijarênh anê. Ixpê mẽ ajahkre xwỳnh nê mãânên ixpê mẽ anhõ pahihiti htã inhmã mẽ ate tanhmã axpên nhĩpêx to ho apa hprãm xàj na pa ã mẽ apar kuhõnh anê. Tã kêr ka mẽ ixpyrã nê tanhmã axpên to mex to ho ri apa. ¹⁵ Jao amnhĩ kuxwar axpên to mex pê mẽmoj to axpên kutã anojarêr rãhã ho ri apa. ¹⁶ Kwa mẽ ixkapêr ma nê kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwỳnh pyrãk. Nê te ixte mẽmoj tã mẽ amã karõ nhũm mẽ ate inhmar nê inhmã tanhmã mẽmoj nhĩpêx to pyrãk. Tã te ixpê mẽ anhõ patrãw pyrãk tã pa ã mẽ apar kuhõnh anê. Ka mẽ amnhĩ tã ixpumu hãmri nê amnhĩ xwar tanhmã axpên to ajuta hto ho ri apa. No ri axpên pumu nê ajamaxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamaxpêr o ri apa hkêt nê.

¹⁷ —E na pa ã mẽ amã ixujarênh anê. Kot kaj mẽ inhma nê ixujarênh kõt ã axpên nhĩpêx anhỹr o ri apa. Hã kot kaj mẽ akĩnh nê ri apa. Anê.

JeJus kot amnhĩ tã hã ãmnênh xwỳnh o amnhĩrit ã harênh

Matêwre 26.20-25; Makre 14.17-21; Rukre 22.21-23

¹⁸ Nhũm JeJus arĩ mẽ inhmã kapêr nê mẽ inhmã:

—Kot kaj mẽ apiitã mẽ akĩnh nê apa hkêt nê. Ixte mẽ arênh xwỳnhjaja mẽ apiitã mẽ apumunh mex. Jakamã na pa Tĩrtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarê. Tĩrtũm kapêr ã kagã htũm kot harênh kot:

Ixkutã apkur o ỹr xwỳnhjê hõ koja axtem nê mẽ kot kãm ixkurê xwỳnhjê nhĩhkram ijaxã.

Kêp ixkõt pa ho pa xwỳnh tã koja axtem nê ã inhĩpêx anê.

Anhỹr o kot harênh. Tã koja tokyx ã inhĩpêx anê. ¹⁹ Nom kormã kot ã inhĩpêx anhỹr kêt ri na pa hkukamã mẽ amã harê. Jakamã koja ã inhĩpêx anê ka mẽ ja hã ixpumu nê ra ixte amnhĩ kukamã mẽ amã amnhĩ jarênh ta mã ajamaxpêr nê ixpê Tĩrtũm rũm mẽ awỳr ixwryk xwỳnh kõt ajamaxpêr tỳx kurê kumrêx.

²⁰ —Kwa mẽ ixkapêr ma nê amnhĩ krã kamã kãm ajamaxpêr tỳx o ri apa. Kojã mẽhõ ixte mẽ hwỳr mẽ arênh xwỳnhjê hã tanhmã mẽ ato mex to. Hãmri nê te pa kot tanhmã ixto mex to pyrãk. Nê kojã mẽhõ tanhmã pa ixto mex to nê mãânên te kot mẽ awỳr inhmênh xwỳnh ta tanhmã ho mex to pyrãk. Anê.

²¹ Nhũm pre ã JeJus mẽ inhmã kapêr anê. Hãmri nê tee ri amnhĩ kukamã hamaxpêr nê hkaprĩ nê mẽ inhmã:

—Hêxta waa nê. Nà kot kaj mẽ atõ mẽ kot kãm ixkurê xwỳnhjê nhĩhkram ijaxã. Kwa mẽ amnhĩ krã kamã ixkapêrja mã ajamaxpêr tỳx nê. Anê.

²² Hãmri pa mẽ amnhĩ tã kuma nẽ tee ri xepn pumunh o ixkrĩ. ²³ Ixpê Juãw na pa pre ixpê Jejus kràmnhwỳ mex ã ìhkô hã ixàpkur o inhỹr ²⁴ nhũm Simãw Pêtreja ixpumu nẽ inhmã nomgõr nẽ kawax pẽ inhmã:

—Kwa mẽ pahtõ nhĩxi hã hkukja nà? Anẽ.

²⁵ Hãmri pa kuma nẽ Jejus mã kãm:

—Kwa Pahihti. Mẽ ixtõ koja we ã anhĩpêx anẽ? Anẽ.

²⁶ Hãmri nhũm mẽ inhmã:

—Nà kot paj pãwti hõ py nẽ guhkrax kãm ho mry kagõ nhek nẽ kot mẽ ìhkram ijaxãr mã xwỳnhhta mã kugõ ka mẽ hkõt omu. Anẽ.

Hãmri nẽ kupy nẽ ho mry kagõ nhek nẽ Simãw Kariot kra Jut Kariotja mã kugõ nhũm kupy. ²⁷ Pyrja kõt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapêr nẽ kãm:

—E kwa tokyx nà. Anẽ.

²⁸⁻³⁰ Hãmri nhũm kuma nẽ kato nẽ ma kamãt kô kamã htẽm kurê kumrẽx. Hãmri pa mẽ ixàpkur o ixkrĩ xwỳnhjaja Jejus kot ã kãm kapêr anhỹrja ã kuma nẽ tee ri hkukamã ijamaxpêr. Hãmri nẽ kot ma mẽ hkĩnh ã mẽõ hkwỳ japrõr kaxyw ma htẽm ã hkamnhĩx. Nhũm mẽ ixkwỳjaja axtem Jejus kot mẽ kęp amrakati xwỳnhjê mã mẽmoj nhõr ã kãm karõ nhũm ma mẽ hwỳr htẽm ã hkamnhĩx. Kęp mẽ inhmã mẽ ixkàxpore jamãr o pa xwỳnh jakamã pa mẽ ã ixtỳx mẽmoj tã hkamnhĩx anẽ.

Jejus akupỹm nojarêt nẽ mẽ kãm mẽmoj tã karõ hã harẽnh

Matêwre 22.39-40; mããñen Wam Juãw 3.11-24

³¹⁻³² Hãmri nhũm Jejus mẽ inhmã:

—Nà kot kaj mẽ tokyx mẽmoj pumu nẽ Tĩrtũm mã mex o mex ã harẽ nẽ ijaxwỳja inhmã inhmex o inhmex ã ijarẽ. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akõt ixpa grire hãmri nẽ ma akupỹm api. Kot kaj mẽ tee ri jar ijapêr o ri apa nom nhỹri ixpumunh kêt nẽ. Nẽ kormã tokyx ma ixkõt apa hkêt nẽ.

³⁴ —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã xepn kĩnh o ri apa. Te pa inhmã mẽ ajapê pyrãk o xepn nhĩpêx rãhã ho ri apa.

³⁵ Kot kaj mẽ ã amnhĩ nhĩpêx anẽ nhũm mẽ akwỳjaja ja hã mẽ apumu nẽ mẽ apê ixkwỳ hã mẽ apumunh kurê kumrẽx. Anẽ.

Simãw Pêtre kot Jejus ã amnhĩ to hêx kukamã harẽnh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer nẽ ma nhỹhỹm mõr ã amnhĩ jarẽnh anẽ hãmri nhũm Simãw Pêtre tee ri kot amnhĩ jarẽnh ma nẽ kãm:

—Kwa Pahihti. Nhỹhỹm kot kaj kêt mõ pa mẽ akõt ixpa hkêt nẽ? Anẽ.

Hãmri nhũm kãm:

—Nà ma inhmõr xãta wỳr kot kaj mẽ kormã ma ixkõt apa hkêt nẽ. Nom kot kaj mẽ nhỹrmã ma ixkõt apa. Anẽ.

³⁷ Hãmri nhũm Simãw Pêtre kãm:

—Kwa mõ kot pa mẽ omu nẽ tokyx ma akõt inhmrrar kêt nẽ? Inhmã akõt ixtyk puma hkêt kênã. Kwãr mẽ mãmrĩ atã ixpĩ. Inhmã ajapê htỳx kumrẽx kênã. Anẽ.

³⁸ Hãmri nhũm Jejus kãm:

—Xà ãm hãmri na ka ã inhmã amnhĩ jarẽnh anẽ Simãw Pêtre? Xà amã ixkõt atyk puma hkêt? Kwa o kora. Kojã apkati hkõt krãhyre hkàr kêt ri ka ra mẽ umaj ate ixkõt apa hkêt ã amnhĩ tã axãprãr o axkrunẽpxi kãm ga. Kwa amnhĩ krã kamã ixkapêrja mã ajamaxpêr tỳx nẽ. Anẽ.

14

Jejus kot Tĩrtũm nhõ krĩ jarẽnh

Eprêw 11.16

¹ Nhũm Jejus arĩ mẽ inhmã kapêr nẽ mẽ inhmã:

—Kwa ã ixte mẽ amã amnhĩ jarēnh anhỹrja ma nẽ tee ri amnhĩ kukamã ajamaxpēr nẽ akaprĩ hkêt nẽ. Arĩ amnhĩ kaxyw Tĩrtũm mẽ wa inhmã ajamaxpēr tỳx rãhã ho ri apa. ² Inhĩpêêxà nhõ krĩ kamã ixkre xohtôô. ãm hãmri na pa ã mẽ amã harēnh anẽ. Tã kot paj ma akupỹm hwỳr api nẽ mẽ akutêp mã amã mẽ anhõrkwỹ ho mex. ³ Hãmri nẽ ho mex pa nẽ rĩ man akupỹn mẽ awỳr wrỹ. Hãmri nẽ ma akupỹm amnhĩ kôt mẽ ato ixàpir pa ka mẽ Tĩrtũm mẽ wa ixkôt apa rãhã apa ho apa. Jakamã kwa mẽ ri akaprĩ nẽ apa hkêt nẽ. Anẽ.

Jejus te kêp Tĩrtũm wỳr pry pyrãk
Epes 2.18

⁴ —Nẽ ma nhỹhỹm inhmõr xàta ra mẽ ate harēnh mar mex. Nẽ hwỳr pryja mããnẽn mẽ ate harēnh mar mex. Anẽ.

⁵ Hãmri nhũm Tomas tee ri kuma nẽ kãm:

—Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anẽ.

⁶ Hãmri nhũm kãm:

—Kwa paa. Te ixpê Inhĩpêêxà hwỳr pry pyrãk. Na htem amnhĩ kaxyw inhmã hamaxpēr nẽ ixkôt amnhĩ xunhwỳ hãmri nẽ nhỹrmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix mã na htem hprĩ hã Tĩrtũm kapēr ma. Nẽ ixkukwak ri pix mã na htem wa ixri htĩr tũm nẽ pa ho pa. ⁷ Kot kaj mẽ aprĩ hã ixpumu nẽ mããnẽn te aprĩ hã Inhĩpêêxà pumunh pyrãk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxà kot amnhĩ nhĩpêx ã omunh mex pyrãk. Anẽ.

Jejus mẽ Tĩrtũm wa kot amnhĩ nhĩpêx tipxi hã wa harēnh
Juāw 1.1, 10.30; Pĩrĩpos 2.6; Korosẽ 2.9

⁸ Nhũm Jejus ã mẽ inhmã kapēr anẽ nhũm Fĩrĩpti kuma nẽ kãm:

—Kwa nom mẽ inhmã inhno ho Anhĩpêêxà pumunh prãm. Kot pa mẽ omu nẽ ixkĩnh tỳx kumrẽx. Anẽ.

⁹ Hãmri nhũm Jejus kãm:

—Kwa na pa pre ra mẽ akôt ri ixpa ryy nẽ. Ka mẽ aprĩ hã ixpumunh mex nẽ. Kêt ra mẽ kot ixpumunh mex xwỳnhjaja te mẽ kot mããnẽn Inhĩpêêxàja no ho omunh mex pyrãk. ¹⁰ Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapēr jaxàr tỳx kêt? Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyrãk. Jakamã na pa hte amnhĩ krã hkôt ri tanhmã amnhĩ nhĩpêx to ho ri ixpa hkêt nẽ. ãm Inhĩpêêxà nhỹ hã na pa hte ri tanhmã mẽ amã ixkapēr to ho ri ixpa. Nẽ hihtỳx xà ho tanhmã amnhĩ nhĩpêx to ho ri ixpa. Ka mẽ ja hã ixpumu nẽ te ano ho Inhĩpêêxà pumunh pyrãk. ¹¹ Kwa mẽ ixkapēr ma nẽ hkôt ajamaxpēr tỳx nẽ. Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyrãk. Rỳ ka mẽ tee ri ja kukamã ajamaxpēr japêr hãmri nẽ ixte aa mẽ ate mẽmoj pumunh kêt kwỳ ho anhỹr ã mãn ixpumu nẽ ja hã wa ixte amnhĩ nhĩpêx tipxi kôt ajamaxpēr.

¹² —Kwa mẽ ixkapēr ma nẽ amnhĩ krã kamã amnhĩ krãm haxàr tỳx nẽ. Mẽ ate amnhĩ kaxyw ixkôt ajamaxpēr xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nẽ ixkôt ã amnhĩ nhĩpêx anhỹr o ri apa. Kot paj akupỹm Inhĩpêêxà hwỳr api nẽ kuri ixpa ho ixpa. Ka mẽ ixwakre kamã ixihtỳx xà ho tanhmã mẽ akwỳjê mã amnhĩ nhĩpêx to ho ri apa.

¹³ —Nẽ kot kaj mẽ apê ixkwỳ hã tanhmã mẽmoj tã ixwỳr to pa mẽ ama nẽ mẽ amã tanhmã mẽmoj nhĩpêx to. Mẽ kot omunh nẽ Inhĩpêêxà mex o mex ã omunh kurê kumrẽx kaxyw. ¹⁴ Nà kot kaj mẽ apê ixkwỳ hã mẽmoj tã ixwỳr to pa mẽ ama nẽ mẽ amã tanhmã mẽmoj to. Anẽ.

Jejus kot mẽ pahwỳr Tĩrtũm mẽ wa Karõ rēnh ã kot amnhĩ jarēnh
Juāw 7.37-39, 16.7-17; Atrẽ 2.1-4; mããnẽn Rõmãn 5.5; Wam Korĩt 12.7-11; Epes 3.16; Wam Juāw 2.27

¹⁵ Nhũm Jejus arĩ mẽ inhmã kapēr nẽ mẽ inhmã:

—Nà kot kaj mẽ amã ixkĩnh hã kot kaj mẽ ixkapër kôt pix mã ri amnhĩ nhĩpêx rãhã ho ri apa.

¹⁶ —Kot paj akupỹm kaxkwa hwỳr api hãmri nẽ mẽ ato Inhĩpêêxà wỳ nhũm inhma nẽ mẽ awỳr kot mẽ ato ajuta xwỳnh maatita rẽ nhũm man mẽ awỳr wrỳ nẽ mẽ akaxwỳnh mã agjê. Hãmri nẽ mẽ akôt tanhmã mẽ ato ajuta hto ho pa rãhã ho pa. ¹⁷ Wa Ixkarõ koja mẽ awỳr kurê nhũm mẽ amã agjê. Hãmri nẽ hprĩ hã mẽ amã Tĩrtũm kapër o amnhĩrĩt o mẽ akôt pa ka mẽ aprĩ hã mar mex nẽ. No mẽ kêp Tĩrtũm kra hkêp xwỳnhjaja koja hprĩ hã wa Ixkarõ jarẽnh mar kêt nẽ. Mẽ kot wa ixkôt amnhĩ xunhwỳr kêt jakamã koja mẽ hkarõ mã gjêx kêt nẽ. ãm mẽ ate ixkôt amnhĩ nhĩpêx o apa xwỳnhjê pix wỳr koja wrỳ nẽ mẽ awỳr agjê nẽ mẽ akamã pa ho pa.

¹⁸ —Nẽ ixte mẽ arer nẽ ma inhmõr mã tã kot kaj mẽ te mẽ hã awrãre pyrã nẽ ahte atỳx ri apa pyrãk kêt nẽ. Kot paj te pa akupỹn mẽ awỳr ixwrỳk pyrã nẽ mẽ awỳr wa Ixkarõ rẽ nhũm mẽ akãm agjê nẽ mẽ akamã pa ho pa.

¹⁹ —Nẽ koja tokyx mẽ kot amnhĩ kaxyw Tĩrtũm mã hamaxpër kêt xwỳnhjaja axte ixpumunh kêt nẽ. No mẽ papajaja kot puj mẽ tokyx axte nhỹri axpẽn pumu.

—Nẽ kot paj akupỹm ixtĩr hãmri nẽ ixtĩr tũm nẽ ixpa ho ixpa ka mẽ ixkukwak ri ajaxwỳja nhỹrmã Tĩrtũm mẽ wa ixri atĩr tũm nẽ apa ho apa.

²⁰ —Tã koja wa Ixkarõ mẽ awỳr wrỳ nẽ mẽ akarõ mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi pyrãk o ka mẽ hã wa ixpumu. Nẽ mããnẽn mẽ papajaja te ra mẽ pahtipxi nẽ ri mẽ papa pyrãk ka mẽ hã amnhĩ pumunh mex kurê kumrêx.

²¹ —Nẽ mẽ kãm ixkĩnh xwỳnhjaja na htem ixkapër ma nẽ hkôt amnhĩ nhĩpêx o pa. Jakamã nhũm Tĩrtũm ixtã mẽ omu nẽ kãm mẽ hapê htỳx nẽ. Pa mããnẽn amnhĩ tã mẽ omu nẽ inhmã mẽ hapê htỳx nẽ. Jakamã kot paj mẽ kãm amnhĩ to amnhĩrĩt nhũm te mẽ kot no ho ixpumunh pyrãk. Anẽ.

Nhũm pre ã Jesus hkôt mẽ ixpa ho mẽ ixpa xwỳnhjê mã amnhĩ jarẽnh anẽ. ²² Hãmri nhũm Jutre hõja. Jut Kariot kêt axtem Jutre hõja Jesus axte kot mẽ inhmã pix mã kot amnhĩ to amnhĩrĩt ã harẽnhja ma nẽ kãm:

—Kwa aprĩ hã mẽ inhmã mẽmoj jarẽ mẽ ijahkre xwỳnh. Mon ka mẽ kêp akwỳ hkêp xwỳnhjê mã axte amnhĩ to amnhĩrĩt kêt ã amnhĩ jarẽ? Nẽ ãm mẽ papxipix mã amnhĩ to amnhĩrĩt ã amnhĩ jarẽ? Anẽ.

²³ Hãmri nhũm kãm:

—Nà mẽ amã ixkĩnh xwỳnhjaja na ka htem ixkapër ma nẽ hkôt amnhĩ nhĩpêx. Nhũm Inhĩpêêxà ja hã mẽ apumu nẽ ixtã kãm mẽ ajapê htỳx nẽ. Hãmri pa wa mẽ akôt ixpa ho ixpa. Jao mẽ amã amnhĩ to amnhĩrĩt mex o ixpa. ²⁴ Na pa hte amnhĩ krã hkôt ri mẽ kãm ixkapër o ixpa hkêp nẽ. ãm Inhĩpêêxà nhỹ hã na pa hte mẽ kãm ixkapër o ri ixpa. Kot mẽ awỳr inhmẽnh xwỳnhhta nhỹ hã. Tã nhũm mẽ kãm inhmar prãm kêt jakamã na pa hte wa mẽ kãm mẽ apyrã nẽ amnhĩ to amnhĩrĩt o ixpa hkêp nẽ.

²⁵ —E na pa kormã ixte mẽ akôt ri ixpa ri ã mẽ amã amnhĩ jarẽnh anẽ. ²⁶ Tã koja Inhĩpêêxà ixpãnhã mẽ awỳr wa Ixkarõ rẽ. Ixte hã mẽ amã ixàhwỳr xà hkôt. Hãmri nhũm man mẽ awỳr wrỳ nẽ mẽ akaxwỳnh mã agjê nẽ mẽ akôt ri tanhmã mẽ ato ajuta hto ho pa. Nẽ ra ixte ã mẽ amã ixkapër anhỹrja koja hprĩ hã mẽ amã ho amnhĩrĩt mex nẽ. Ka mẽ amnhĩ krã kamã kãm ajamaxpër nẽ hã ano htỳx nẽ ho apa. Anẽ.

Jejus kêp mẽ pajamakêtkati nhõr xwỳnh

Rõmãn 5.1; Karatas 5.22; Piriopos 4.7; Korosẽ 3.15

²⁷ Nhũm Jesus arĩ mẽ inhmã kapër nẽ mẽ inhmã:

—Nẽ mẽ kêp ixkwỳ hkêp xwỳnhjaja na htem tee ri amnhĩ kukamã hamaxpër o ri pa. Jao hkaprĩ nẽ pa. No pa na pa hte mẽ kurom ijamakêtkati nẽ ixkĩnh nẽ ri ixpa ho ixpa. Tã kot paj tanhmã mẽ ato ka mẽ ixpyrã nẽ ajamakêtkati nẽ axamnhĩx akĩnh nẽ ri apa. Jakamã kwa mẽ ixte amnhĩ jarẽnh ma nẽ tee ri amnhĩ kukamã ajamaxpër o amã ma ho ri apa hkêp nẽ.

²⁸ —Na pa pre ra mẽ amã ma ixàpir nê nhÿrmã man akupÿn mẽ awÿr ixwrÿk ã mẽ amã amnhÿ jarê. Tã na pa ra ma akupÿm Inhÿpêêxà hwÿr ixàpir mã. Kot amnhÿ to rax o kot ijakrenh. Kot paj akupÿm hwÿr api nê kuri inhmex nê ixpa ho ixpa. Tã ka mẽ amã ixkÿnh hã kot kaj mẽ ma akupÿm hwÿr ixàpir ã ijarênh ma nê inhÿ hã akÿnh nê.

²⁹ —Kormã ma akupÿm ixàpir kêt ri na pa ã mẽ amã amnhÿ kukamã amnhÿ jarênh anê. Kêr pa mẽmo arÿgro hã ma akupÿm api ka mẽ ja hã ixpumu nê ajamaxpêr o: “Nà ãm hãmri na pre mẽ inhmã amnhÿ kukamã akupÿm Hipêêxà hwÿr àpir ã amnhÿ jarê.” Anhÿr o ajamaxpêr. Jao ixkôt ajamaxpêr tÿx rãhã ho ri apa.

³⁰ —Kot paj tokyx axte tanhmã mẽ amã ixkapêr to hkêt nê. Mẽ kêp ixkwÿ hkêt xwÿnhjê nhõ pahÿhti Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprÿ. Kurom ixihtÿx o ixihtÿx o ixte hakrenh par jakamã koja tanhmã ixto hkêt nê. ³¹ Kwãr kãm tanhmã ixto hprãm xà hkôt tanhmã ixto pa omu. Inhmã Inhÿpêêxà hkôt ixte amnhÿ nhÿpêx prãm jakamã kot paj jahti mã arÿ xa nhÿm te tanhmã kot ixto pyrãk o inhÿpêx nom tanhmã ixto hkêt nê. Mẽ ate inhmã Inhÿpêêxà japê htÿx ã ixpumunh kaxyw kot paj ã mẽ anoo mã amnhÿ nhÿpêx anê. Nê mẽ ate ixte kãm tanhmã amnhÿ nhÿpêx to ho ri ixpa rãhã mẽ kot ixpÿr ã ixpumunh kaxyw. E hãmri. Ma pu mẽ mẽ nê amnhÿ to Tÿrtÿm wÿ. Anê.

Nhÿm pre ã Jejus hkôt mẽ ixpa ho mẽ ixpa xwÿnhjê mã kapêr anê. Pa mẽ kuma nê kãnhmã ixkuhê nê inhnojarêt nhÿm axte mẽ inhmã awjarê.

15

*Jejus te kêp mẽmo krô pyrãk
Karatas 2.20; Wam Juãw 2.28*

¹ Nhÿm Jejus arÿ mẽ inhmã kapêr nê mẽ inhmã:

—Nà te ixpê mẽmo pÿ pê “uwa” anhÿr xwÿnhhta kahkô maati pyrãk. Nê Inhÿpêêxàja te kot uwa hkre nê hamãr o pa xwÿnhhta pyrãk. ² Nê mẽ kot ixkôt amnhÿ xunhwÿr xwÿnhjaja te mẽ kot uwa kahkô rÿm krô pyrãk. Na hte mẽ hkwyjaja htÿx ri kêp ixkwÿ hã amnhÿ jarênh ã amnhÿ to hêx. Jao te kot krôja rã htã ô hkêt pyrãk. Koja rã htã ô hkêt nê nhÿm kot hamãr xwÿnhja tee ri omu nê kahkô nê krãhta nê kumê. No koja ô mex nê nhÿm omu nê hkÿnh nê. Hãmri nê rã nê ô rax kaxyw tanhmã ho mex to. Tã na hte Tÿrtÿm uwa krô jamãr xwÿnhhta pyrã nê ã mẽ ate ixkôt amnhÿ xunhwÿr xwÿnhjê nhÿpêx anê. ³ No mẽ kajaja na ka prem mẽ kot ixkwÿ hã amnhÿ to hêx xwÿnhjê rom ixkapêr mar tÿx nê. Nê amnhÿ kaxyw inhmã ajamaxpêr nê ixkôt amnhÿ nhÿpêx mex o apa. Jao te mẽ ate krô rã nê ô rÿnh pyrãk o amnhÿ nhÿpêx.

⁴ —Na hte krôja amnhÿ krã hkôt ô hkêt nê. ãm kahkô pix kukwak ri na hte rã nê ô. Ja pyrã nê kot kaj mẽ ixkukwak ri pix mã inhmã hprãm xà hkôt ri tanhmã amnhÿ nhÿpêx to ho apa. Jakamã kwa kêr ka mẽ ixkapêr pix mãn mar o apa pa mẽ akôt ixpa ho ixpa. ⁵ Te ixpê kahkô nhÿm te mẽ apê krô pyrãk jakamã kot kaj mẽ inhmã hprãm xà hkôt tanhmã amnhÿ nhÿpêx to ho ri apa nê te krô rã nê ô rÿnh pyrãk o amnhÿ nhÿpêx. No kot kaj mẽ amnhÿ krã hkôt ri amnhÿ nhÿpêx o ri apa nê te krô grã nê ô hkêt pyrãk o amnhÿ nhÿpêx.

⁶ Na hte uwa krô nhõ dônja nhÿri hã krô grã pumu hãmri nê kahkô nê hakà nê ma o mra nê kuwy kamã kurê nê ho hxê pa. Ja pyrã nê mẽ kot htÿx ri ixkôt amnhÿ xunhwÿr ã amnhÿ jarênh xwÿnhjaja koja mẽ nhÿrmã amnhÿ xà htÿx kamã hamak rãhã ho pa.

⁷ —Tã no mẽ kajaja. Kêr ka mẽ ixkapêr kôt pix mã amnhÿ nhÿpêx rãhã ho ri apa. Te mẽ pahtixi nê ri papa pyrãk o amnhÿ nhÿpêx. Hãmri nê mãmrÿ amã hprãm xà hkôt mẽmoj tã Tÿrtÿm wÿ nhÿm ama nê amã mẽmoj tã ate hwÿr xàta kôt kugõ. ⁸ Kot kaj mẽ Inhÿpêêxà mẽ wa ixkapêr kôt amnhÿ nhÿpêx o ri apa nhÿm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tÿrtÿm kot amnhÿ nhÿpêx o amnhÿ nhÿpêx o pa. Mãn Tÿrtÿmja mex o mex.” Anhÿr o hamaxpêr.

⁹ —Nê na pa hte Inhÿpêêxà kãm ijapê pyrãk o inhmã mẽ ajapê nê. Tã kêr ka mẽ amarÿ inhmã mẽ ajapê hã ri ixkôt amnhÿ nhÿpêx mex o apa. ¹⁰ Na pa hte ãm Inhÿpêêxà kapêr kôt pix mã ri amnhÿ nhÿpêx o ri ixpa. Jakamã na pa hte kãm ijapê hã ixkÿnh nê ri ixpa.

Tã kêr ka mẽ ixpyrà nê ixkapêr kôt pix mã tanhmã amnhĩ nhĩpêx to ho ri apa. Nê ixpyrà nê inhmã mẽ ajapê hã amnhĩ pumu nê akĩnh nê ri apa.

¹¹—E na pa ã mẽ amã ixkapêr anê. Mẽ ate inhmar nê ixpyrà nê axãmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhỹr pyrãk. Anê.

Jejus kot mẽ pamã axpên kĩnh tỳx ã mẽ pamã karõ

¹² Nhũm Jejus arĩ mẽ inhmã kapêr nê mẽ inhmã:

—E kêr ka mẽ te inhmã mẽ ajapê pyrãk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa. ¹³ Koja mēhõ kãm hkrãmnhwỳ japê htỳx nê nhũm ra mēhõ mēmo mỳrapê kot kêp hpĩr mã nhũm tee ri hã omu nê nê kãm amnhĩ mẽ nhũm kupĩ. Hãmri nhũm mẽ ja hã omu nê kãm hkrãmnhwỳ japê htỳx ã nê htyk ã axpên mã harê.

¹⁴⁻¹⁵—E kot paj axte mẽ apê inhmã mẽ axapênh xwỳnh ã mẽ ajarênh kêt nê. Na hte mẽ õ patrãwjaja hprĩ hã kãm mẽ apênh xwỳnhjê mã amnhĩ jarênh kêt nê. Na htem ãm mẽ apênh pix ã mẽ kurê. Nom mẽ kajaja mẽ ate ixkapêr mar nê hkôt pix mã amnhĩ nhĩpêx jakamã kot paj hpãnhã mẽ apê ixkrãmnhwỳ hã mẽ ajarê. Na htem axpên to hkrãmnhwỳ nê ma nhỹhỹm pa kaxyw nê tanhmã amnhĩ kukamã hkrãmnhwỳ mã amnhĩ jarênh to. Tã mẽ apê ixkrãmnhwỳ jakamã na pa hte ã amnhĩ kukamã mẽ amã amnhĩ jarênh anê. Nom ja pix jarênh kêt nê. Na pa hte mãänen Inhĩpêxã xõ ri mẽ amã mēmoj piitã ho amnhĩrit o mẽ akôt ixpa.

¹⁶—Nê mẽ kajaja na ka prem ixpê mẽ akrãmnhwỳ kaxyw ixãm kêt nê. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhĩpêx to ho apa kaxyw. Te uwa krõ ô rũnh nê aa grã hkêta pyrãk. Jakamã kot kaj mẽ mēmoj tã Inhĩpêxã wỳ nhũm mẽ ama nê mẽ ate mēmoj tã hwỳr xã hkôt amã kugõ.

¹⁷—E. Kwa kêr ka mẽ amã axpên kĩnh nê tanhmã axpên to ajuta hto ho axpên mã mēmoj kutã anojarêt pix o mãn kêt ri apa. Nã ja na kêt inhmã hprãm. Anê.

Mẽ kot Jejus kwỳjê kamã gryk xwỳnhjê jarênh

Matêwre 10.22; mãänen Juãw 7.7, 17.14; Wam Juãw 3.13

¹⁸—Nê koja ixkwỳ hkêt xwỳnhjaja kãm mẽ aprãm nõkati. Tã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Ixkumrêx na prem kãm ixprãm nõkati. Tã koja mẽ mã ixtã mẽ ato anê nê kãm mẽ aprãm kêt nê. ¹⁹ Mẽ apê mẽ hkwy ronhỹx mẽ amnhĩ tã mẽ apumu nê kãm mẽ ajapê nê. Nom apê mẽ hkwy hkêt. Ra ixte amnhĩ kaxyw mẽ arênh jakamã na htem tee ixtã mẽ apumu nê kãm mẽ akĩnh kêt o kãm mẽ akurê nê. ²⁰ Koja mẽ ixtã hpijaàm kêt nê nê mãänen mẽ atã hpijaàm kêt nê. Nê mẽ anhĩpêx o te mẽ kot pa ixpê mẽ anhõ patrãw nhĩpêx pyrãk. Ka mẽ ixpyrà nê amnhĩ xã htỳx kãm ajamak o ri apa. Na pa pre ra mẽ amã ja jarê. Nom koja mẽ akwỳjaja jajê rom te ra mẽ kot ixkapêr mar nê hkôt amnhĩ nhĩpêxta pyrã nê mãänen mẽ akapêr ma nê hkôt amnhĩ nhĩpêx o pa. Kwa kêr ka mẽ ixkapêrja mã mãn ajamaxpêr tỳx rãhã ho ri apa.

²¹—Koja mẽ ixtã tanhmã mẽ anhĩpêx to. Mẽ kot Tĩrtũm kapêr kôt amnhĩ nhĩpêx kêt jakamã koja mẽ ã ixtã mẽ anhĩpêx anê. Tĩrtũm kot mẽ awỳr inhmênh kôt hamaxpêr kêt nê ã mẽ anhĩpêx anê. ²² Ixwryk nê mẽ kãm Tĩrtũm kapêr jarênh o ri ixpa htã nhũm mẽ inhma nê ãm inhma nê ixkôt amnhĩ nhĩpêx kêt nê. Jakamã koja mẽ kot amnhĩ tomnuj xwỳnh ã amnhĩ to hpimxur kêt nê.

²³—Nê koja mēhõ kêp ixprãm nõkati nê mãänen te kêp Inhĩpêxã prãm nõkati pyrãk. ²⁴ Na pa pre mẽ piitã mẽ hkôt aa mẽ kot mēmoj pumunh kêt kwỳ ho anhỹr o ri mẽ hkôt ixpa nhũm mẽ hã ixpumu. ãm papxipix na pa pre ã amnhĩ nhĩpêx anhỹr o ri mẽ hkôt ixpa nhũm mẽ hã ixpumu. Kêp ãm mẽ kot ja hã ixpumunh kêt ronhỹx prem axpên mã ijarênh o: “Tk. Mẽ pahte mēhõja nhỹhỹnh mẽ pahwỳr hpõx ã omunhre hã kot puj kêt mẽ ri hã pahpijaàm o ri papa.” Anhỹr o nhỹx prem axpên mã ijarê. Tã ra mẽ kot ja hã ixpumunh mex tã axtem nê Inhĩpêxã mẽ wa mẽ kãm wa ixkurê nê. Jao mẽ kot amnhĩ

tomnuj xwýnh ã amnhĩ to hpimxur kêt nê. ²⁵ No Tĩrtũm kapêr ã kagà htũm kot mẽ hkukamã mẽ harênh nê mẽ hã kagà nê kot mẽ hã kagà kot:

Mẽmo tanhmã kute mýrapê na htem kãm ixkurê? Nã ãm amarĩ na htem kãm ixkurê ho pa. Anê.

Tã ã ixtã kagà kot anhýr xà hkôt na htem ã kãm ixkurê anê. Jakamã koja mẽ mãânên ixtã kãm mẽ akurê nê. Nom kêr ka mẽ arĩ mẽ kãm ixkapêr jarênh o ri mẽ hkôt apa nê tee ri amnhĩ kukamã ajamxpêr kêt nê.

²⁶ —Nê tokyx ma akupým Inhĩpêêxà hwýr ixàpir mã tã kot paj hwýr pøj nê aa mẽ ato ijamakêtkati hkêt nê. Kot paj amnhĩ pãnhã mẽ awýr wa Ixkarõ rê. Mẽ kot kãm: “Mẽ kutã nojarêr xwýnh maati” anhýr xwýnhhta kot paj mẽ awýr kurê nhũm ixpãnhã mẽ awýr wrý nê mẽ amã agjê nê hprĩ hã mẽ amã Tĩrtũm mẽ wa ixto amnhĩrit o ri mẽ akôt pa. ²⁷ Kot kaj mẽ ama hãmri nê ma mẽ piitã mẽ hkôt ri mẽ kãm ixkapêr jarênh o ri apa. Na pa pre ra mẽ kãm Tĩrtũm kapêr jarênh ryy ho mẽ hkôt ri ixpa ka mẽ ixkôt ri inhmar o apa ry nê. Jakamã kêr ka mẽ ixwakre kamã arĩ mẽ kãm ixkapêr jarênh o ri mẽ hkôt ri apa. Anê.

16

¹ Nhũm Jejus arĩ mẽ inhmã kapêr nê mẽ inhmã:

—Nê mẽ kot nhýrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamxpêr nê mẽ umaj ixkaga pymaj na pa hte ã mẽ amã ixprĩ hã mẽmoj jarênh ry anê.

² Kot kaj mẽ kãm ixkapêr jarênh o ri apa nhũm mẽ hkwyjaja tee ri mẽ ama nhũm ja mẽ kêp omnuj nê. Nhũm mẽ Tĩrtũm kapêr o mẽ ahkre xà hã ixkreja rũm amnhĩ nê mẽ ajano nê mẽ akwýjê hpar o pa. Hãmri nê hamxpêr o: “E pu mẽ axte mẽ hkwyjê pynê nê mẽ kupa. Tĩrtũm kãm ja mex kênã.” Anhýr o htýx hamxpêr o pa. ³ Mẽ kot hprĩ hã Inhĩpêêxà mẽ wa ixkapêr mar mex kêt nê ã htýx wa inhmã ja mex ã wa ijarênh anê. ⁴ Nom mẽ ate ixkôt amnhĩ xunhwýrta krax kãm na pa pre ã mẽ amã mẽ harênh anhýr kêt nê. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nê. Tã pa ra akupým inhnojarêr nê ã mẽ amã mẽ harênh anê. Jakamã koja mẽ nhýrmã ã mẽ anhĩpêx anê ka mẽ amnhĩ tã mẽ omu nê ra ixte mẽ akukamã ã mẽ harênh anhýrja mã ajamxpêr kurê kumrêx nê tee ri amnhĩ kukamã ajamxpêr kêt nê. E kwa ixkapêrja mãn mẽ amnhĩ krã him haxàr týx nê ri hã apa. Anê.

Jejus mẽ Tĩrtũm wa hkarõ jarênh

⁵⁻⁶ Nhũm Jejus arĩ mẽ inhmã kapêr nê mẽ inhmã:

—E na pa ra kot mẽ awýr inhmênh xwýnhhta wýr ra akupým inhnojarêr ka mẽ ixte amnhĩ jarênh ã inhma nê akaprĩ nê. Nê tee ri amnhĩ kukamã ajamxpêr tã mẽ atõ aprĩ hã ma inhmõr xà ã ixkukjêr kêt nê. Rý inhmã: “Kwa mo kaxyw kot kaj kêt mẽ ixre nê ma akupým mõ? Xà we ja amã mex?” Anhýr o mẽ atõ ixkukjêr kêt nê. ⁷ Kêt ma akupým ixàpirja mẽ amã mex kumrêx. Kop ãm akupým ixàpir kêt ronhýx mẽ amã mẽmoj kutã nojarêr xwýnhhta ixpãnhã mẽ awýr wrýk kêt nê. Tã kot paj ma akupým api nê amnhĩ pãnhã mẽ awýr kurê. Jakamã kwa mẽ ja ma nê tãm ajamxpêr o ri apa. ⁸ Koja ixpãnhã mẽ awýr wrý hãmri nê mẽ kêp ixkwý hkêt xwýnhjê mã mẽmoj to axkrunêpxi nê ho amnhĩrit. Koja mẽ kãm mẽ kot tanhmã amnhĩ tomnuj to xà ho amnhĩrit. Nê mãânên mẽ kãm tanhmã mẽ kot amnhĩ to mex to xà ho amnhĩrit. Nê mãânên Tĩrtũm kot nhýrmã mẽ kot amnhĩ tomnuj mýrapê tanhmã mẽ homnuj to xàta nhũm mãânên mẽ kãm ho amnhĩrit. Koja mẽ kãm ja piitã ho amnhĩrit.

⁹ —Jakamã koja mẽ ja kukamã tanhmã hamxpêr to nê hamxpêr o: “Kwa kot paj xep amnhĩ tomnuj kaga nê amnhĩ kaxyw Tĩrtũm Kra Jejus mã ijamxpêr nê hkôt amnhĩ xãm kêt nhũm Tĩrtũm nhýrmã ixte amnhĩ tomnuj mýrapê tanhmã ixto. ¹⁰ Nã kot paj hkôt amnhĩ xãm hãmri nê ra uràk nê Tĩrtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tĩrtũm amnhĩ wýr ho api pa mẽ axte jar nhýri omunh kêt nê. ¹¹ Na xep Tĩrtũm nhýrmã kot ma kuwy hwýr mẽ kêp Jejus kwý hkêt xwýnhjê nhõ pahi maatija mẽnh ã ra amnhĩ kukamã hã amnhĩ jarê. Jakamã kwa arĩ ixpê hkwy jakamã kot paj tokyx Jejus kôt amnhĩ xãm kêt nhũm hkôt kuwy hwýr

inhmẽ.” Anhÿr o hamaxpër. Koja ã wa Ixkarõja mẽ kêp ixkwÿ hkêt xwÿnhjê mã mẽmoj to amnhÿrÿt mex anẽ.

¹² —Nẽ na pa kormã mẽ amã mẽmoj piitã ho amnhÿrÿt kêt nẽ. Kormã mẽ ate aprÿ hã mẽmoj pumunh nẽ mar mã tãm kêt. ¹³ Tã koja ixpãnhã wa Ixkarõ mẽ awÿr wrÿ nẽ mẽ akarõ mã agjê hãmri nẽ hprÿ hã mẽ amã Tÿrtũm kot amnhÿ nhÿpêx o amnhÿrÿt o mẽ akõt pa ho pa. Nom koja amnhÿ krã hkõt tanhmã mẽ amã ho amnhÿrÿt to hkêt nẽ. Koja ãm Tÿrtũm pix xõ ri mẽ amã ho amnhÿrÿt o mẽ akõt pa. Jao hprÿ hã mẽ amã ixkõt mẽ ate amnhÿ nhÿpêx nyw o mẽ amã amnhÿrÿt o mẽ akõt pa. ã koja hprÿ hã ra ixte mẽ amã ixujarẽnh xà hkõt axte mẽ amã mẽmoj to amnhÿrÿt mex o pa anẽ.

¹⁴ —Nẽ koja hprÿ hã mẽ amã pa ixto amnhÿrÿt o pa. Jao mẽ amã inhmex o inhmex ã ixto amnhÿrÿt o mẽ akõt pa. ¹⁵ Inhÿpêxà mẽ wa ixkapërja ãm htipxi. Tã koja wa Ixkarõ ixkapër xõ ri ã mẽ amã mẽmoj to amnhÿrÿt anẽ. Jao ra wa ijamẽ wa ixkapër o amnhÿrÿt mex o pa. Koja ã wa mẽ apê ixkwÿ hã mẽ ato mex o pa anẽ. Anẽ.

Mẽ kot akupÿm Jejus tÿr ã omunh ã mẽ harẽnh

¹⁶ Nhũm Jejus arÿ mẽ inhmã kapër nẽ mẽ inhmã:

—Nẽ kot paj tokyx mẽ ano pê akunok ka mẽ axte amnhÿ kaêx ã ixpumunh kêt nẽ. Nom kwa kêr ka mẽ tee ri ixkapërja kukamã ajamaxpër kêt nẽ. Kot paj ixtã apkati grêre ka mẽ axte ixpumu. Anẽ.

¹⁷⁻¹⁸ Nhũm pre ã Jejus hkõt mẽ ixpa ho mẽ ixpa xwÿnhjê mã kapër anẽ. Pa mẽ tee ri ã kapër anhÿr ã kuma nẽ xapẽn mã:

—Kwa mo na ri ã amnhÿ jarẽnh anẽ? Nẽ tokyx mẽ pano pê pikunor tã hã apkati grêre nhũm axte mẽ pahte omunh ã amnhÿ jarẽ nẽ akupÿm Hipêxà hwÿr àpir ã amnhÿ jarẽ. Për kapërja ãm ri katii. Anẽ.

¹⁹ Nhũm amnhÿ tã mẽ inhma nẽ mẽ inhmã:

—Kwa xà na ka mẽ kormã aprÿ hã ixkapër ã inhmar kêt nẽ? ²⁰ Kot paj ty nhũm mẽ kêp ixkwÿ hkêt xwÿnhjaja ijarẽnh ma nẽ hkÿnh nẽ. No mẽ kajaja kot kaj mẽ akapri nẽ amÿr o apa. Nẽ gaa nẽ akupÿm akÿnh nẽ. Kwa mẽ ixkapërja ma nẽ kãm ajamaxpër tÿx o apa. ²¹ Te mẽ ate mẽ hpijagri xwÿnh kot amnhÿ nhÿpêx pyræk. Na htem õhy xà nẽ gaa nẽ ra õhy xà htÿx nẽ. Nẽ hkÿnh kêt nẽ tee ri amnhÿ nhÿpêx o hikwÿ. Tã gaa nẽ hpijagri nhũm hkrare kato nhũm omu nẽ akupÿm hkÿnh nẽ axte õhy xà htÿx mã hamaxpër kêt nẽ. ²² Tã ã mẽ ate amnhÿ nhÿpêx anhÿr kaxyw. Kot kaj mẽ akÿnh kêt nẽ ri apa. Tã kot paj akupÿm tokyx ixtÿr nẽ axte mẽ awÿr ixkato ka mẽ ixpumu nẽ akÿnh nẽ. Hãmri nẽ akÿnh rãhã ri apa ho apa. Nhũm mẽhõ mẽ apumu nẽ tee ri tanhmã mẽ akÿnh nẽ mẽ ato kaprÿ ka mẽ arÿ akÿnh rãhã ri apa ho apa.

²³ —Nẽ ixte akupÿm kaxkwa hwÿr ixàpir nẽ amnhÿ pãnhã mẽ awÿr wa Ixkarõ rẽnh nhũm mẽ awÿr wrÿk nẽ hprÿ hã mẽ amã mẽmoj piitã ho amnhÿrÿt jakamã kot kaj mẽ axte amã mẽmoj tã ixkukjêr prãm kêt nẽ. Anẽ.

Jejus kwÿjaja kot àmnhÿx mẽmoj tã Tÿrtũm wÿr

Matêwre 18.19-20; Juãw 14.13-14

Nhũm Jejus arÿ mẽ inhmã kapër nẽ mẽ inhmã:

—E kwa mẽ ã ixkapër anhÿrja ma nẽ amnhÿ krã kamã kãm ajamaxpër tÿx nẽ ho apa. Kot kaj mẽ apê ixkwÿ hã mẽmoj tã Inhÿpêxà wÿ nhũm mẽ ama nẽ mẽ ate hã axàhwÿr xà hkõt mẽ amã mẽmoj tanhmã ho rÿ mẽ amã mẽmoj gõ. ²⁴ Na ka mẽ kormã apê ixkwÿ hã mẽmoj tã axàhwÿr kêt nẽ. Tã kêr ka mẽ amã mẽmoj tã hwÿr prãm nẽ mãmrÿ mẽmoj tã hwÿr o apa. Kê mẽ ama hãmri nẽ tanhmã mẽ amã mẽmoj nhÿpêx to ka mẽ amnhÿ tã omu nẽ akÿnh nẽ.

²⁵ —Nẽ na pa pre mẽ amã mẽmoj jarẽnh kaxyw nẽ mẽmoj tã haxwÿ nẽ mẽ amã ixujarẽnh rax nẽ. Nom kot paj axte ã mẽ amã ri ixujarẽnh anhÿr kêt nẽ. Kot paj tã ixprÿ hã mẽ amã tanhmã Inhÿpêxà jarẽnh to ka mẽ aprÿ hã mar mex kurê kumrêx. ²⁶ Hãmri nẽ mẽ kamjaja mẽ apê ixkwÿ hã tanhmã amnhÿ to hwÿr to ho apa. Jakamã mo kaxyw kot pa kêt axte tanhmã mẽ ato hwÿr to? Kot kaj mẽ kamjaja amnhÿ to hwÿr jakamã arÿ ixte mẽ ato hwÿr kaxyw ixto presija hkêt nẽ.

²⁷ —Na ka mẽ ra amã ijapê nê. Nê ixte Inhîpêêxà rûm mẽ awÿr ixwÿk ã ixpumu. Jakamã nhûm Inhîpêêxàja ixtã mãânên kãm mẽ ajapê nê. Tã kot kaj mẽ kamjaja mẽmoj tã amnhî to hwÿr o apa nhûm mẽ ama nê kãm mẽ ajapê htÿx kãm mẽ amã mẽmoj gõ.

²⁸ —Na pa pre Inhîpêêxà rûm amnê mẽ awÿr wrÿ. Hãmri nê kãm hprãm xà hkôt tanhmã amnhî nhîpêx to hpar o mõ nê ra akupÿm hwÿr inhnojarêk kaxyw. Anê.

Nhûm pre ã Jejus mẽ inhmã amnhî jarênh anê. ²⁹ Pa mẽ tã ixprî hã mar mex nê. Hãmri nê kãm:

—Tÿ. Nà na pa mẽ tã ixprî hã ate amnhî jarênh ma. Ka amnhî tã haxwÿr nê axujarênh kêt jakamã pa mẽ tã ixprî hã amar mex nê. ³⁰ Pêr ãm ate mẽmoj piitã omunh par xwÿnh na ka. Jakamã ate mẽ ijamaxpêr piitã hkôt aprî hã mẽ ixpumunh par kumrêx kênã kot ka tanhmã mẽ ijamaxpêr to hã mẽ ixkukja. ãm hãmri na ka Tirtûm rûm awÿk ã amnhî jarê. Anê.

³¹ Hãmri nhûm mẽ inhma nê mẽ inhmã:

—Xà ãm hãmri na ka mẽ ixkôt ajamaxpêr tÿx nê? ³² Kwa mẽ o kora. Kot kaj mẽ tokyx mẽ umaj ixre nê anhrà nê ma ahpÿnhã mẽ anhõ krî hwÿr mra. Mẽ kot ixkôt tanhmã mẽ anhîmex to pymaj kot kaj mẽ ã amnhî nhîpêx anê kãm ga. Kot paj ahte mẽ kãm ixãm pyrãk o amnhî nhîpêx nom ahte ixãm kêt nê. Inhîpêêxà aa kot ixrere hã.

³³ —E ixkukwak ri mẽ ajamakêtkati nê axãmnhîx mẽ apa kaxyw na pa ã mẽ amã ixkapêr anê. Nom mẽ kêp ixkwÿ hkêt xwÿnhjaja koja nhÿrmã ixtã mẽ atomnuj tÿx o pa. Tã kêr ka mẽ amã mẽ uma nê tee ri amnhî kukamã ajamaxpêr o ri apa hkêt nê. Nhÿrmã ixte mẽmoj punuj piitã ho ijapêx par ã arîgrota ã kot paj mẽ atã mẽ ho ijapêx par kumrêx. Anê.

17

Jejus kot amnhî to Tirtûm wÿr ã harênh

Rômãn 8.34; Eprêw 7.25

¹ Tã nhûm Jejus mẽ inhmã kapêr pa nê hpãnhã kaxkwa hwÿr rît nê Tirtûm mã amnhî jarê nê kãm:

“Pa Papaj. E na pa ra amã hprãm xà hkôt tanhmã amã amnhî nhîpêx to hpar o mõ nê akupÿm awÿr inhnojarêk kaxyw. Jakamã kot kaj ixpê Akra hã ma akupÿm amnhî wÿr ixto api. Mẽ kot ja hã ixpumunh nê amã amex o amex ã ajarênh o pa kaxyw. ² Na ra pyka piitã hkôt ri mẽ pa xwÿnh kwÿjaja amnhî kaxyw ixkôt hamaxpêr nê ixkôt amnhî xunhwÿ nom ka na ka pre inhmã mẽ agõ. Ixte mẽ htîr tûm nê mẽ pa mã xwÿnh ã mẽ harênh kaxyw. Jakamã koja mẽ nhÿrmã ixkukwak ri pakuri htîr tûm nê pa ho pa. ³ Na mẽ ra ixkapêr mar mex nê. Nê ixpê Jejus Kris pê ate mẽ hwÿr inhmênh xwÿnhja kôt hamaxpêr mex nê. Nê apê Tirtûm ã ãm apyxi mex ã mãânên akôt hamaxpêr mex nê. Nê amex o amex ã akôt hamaxpêr nê kãm akînh nê. Jakamã koja mẽ nhÿrmã pakuri htîr tûm nê pa ho pa. Nà koja mẽ anê.

⁴ Amnepêm amnê pyka ja hwÿr inhnojarêk nhûm ate tanhmã ixte amnhî nhîpêx to hã inhmã karõta na pa ra hatur xãm mênh kaxyw. Na pa xatã mẽ kãm akapêr jarênh o ri mẽ hkôt ixpa. Jao ra mẽ kãm apê Pahi Maati hã apixi mex ã ajarê nê amex o amex nê axàhpumunh o axàhpumunh ã mẽ kãm ajarênh o ri ixpa. ⁵ Jakamã e Papaj. Kêr ka tokyx ixpê akra hã ma akupÿm amnhî wÿr ixto api. Pa akupÿm awÿr pøj nê te amnepêm akuri ixpaja pyrã nê axte akuri ixpa ho ixpa.” Anê.

Jejus kot hkwÿjê ho Tirtûm wÿr ã harênh

Nhûm Jejus arî Tirtûm mã kapêr nê kãm:

⁶ “E Papaj. Nà ra ate pyka hkôt inhmã mẽ òr xwÿnhjaja na pa ra mẽ kãm akapêr jarênh rÿy ho ri mẽ hkôt ixpa nhûm mẽ akapêr kôt pix mã amnhî nhîpêx o pa. ⁷ Tã ixte anhÿ hã tanhmã amnhî nhîpêx to ho ri ixpaja ra mẽ kot ja hã ixpumunh mex. ⁸ Na pa pre hte axô ri mẽ ahkre ho ri ixpa nhûm mẽ amnhî kaxyw ixkôt hamaxpêr mex nê. Nê ate mẽ hwÿr inhmênh nhûm mẽ hwÿr ixwÿkja ã mẽ kot ixpumunh mex.

⁹⁻¹⁰ Tã ot pa mẽ ho awỳr o xa. Nom na pa mẽ kệp ixkwỳ hkết xwỳnhjê ho awỳr kêt nê. ãm ate inhmã mẽ õr xwỳnhjê pix o na pa awỳ. Mẽ kệp akra jakamã mãnên mẽ kệp ixkraa. Jakamã na htem pamã pamex o pamex ã pajarênh o ri pa.

¹¹ Axihtỳx o axihtỳx jakamã na ka pre amnhĩ xwar inhmã axihtỳx xà hkwỳ gõ pa te ixte axihtỳx pyràk. Tã na pa ra akupỳm awỳr inhnojarêk kaxyw. Kot paj jar pyka hkôt ri ixpa ry hkết nê. Nom ixkwỳjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nê kê mẽ inhỹ hã tãm ri amnhĩ nhĩpêx o pa. Nê pahpyrà nê te ixkre tipxi kamã mẽ htipxi nê mẽ pa pyràk o axpên kôt pa.

¹² Kormã mẽ kamã ixpata ã ate inhmã axihtỳx xà hkwỳ nhõrta o pa mẽ htãnopxar mex o ri mẽ hkôt ixpa. Jakamã nhũm mẽ ri ixkôt amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nê hapêx. No ãm ra akapêr ã kagà kot hkukamã ã kot amnhĩ nhĩpêx anhỹr ã harênh xàja kôt koja ã amnhĩ nhĩpêx anê nê hapêx.

¹³ Tã na pa ra akupỳm awỳr inhnojarêk kaxyw jakamã na pa ixte tokyx mẽ rer mã xwỳnhjê ho awỳr o xa. Kormã mẽ hkôt ri ixpa ri. Mẽ kot inhmar nê ixpyrà nê hkĩnh nê hamakêtkati nê ri pa kaxyw. ¹⁴ Na pa pre ra mẽ kãm akapêr jarênh ry nê nhũm mẽ ixpyrà nê akôt pix mã amnhĩ nhĩpêx o ri pa. Jakamã nhũm hte mẽ kệp ixkwỳ hkết xwỳnhjaja tee ri ja hã mẽ omu nê axtem nê kãm mẽ hkurê nê. Nom mẽ kệp mẽ hkwỳ hkết jakamã na htem ã mẽ kamã gryk anê.

¹⁵ Tã na pa ã mẽ ho awỳr anhỹr o xa. Nom mẽ kot amnhĩ tomnuj xwỳnhjê hkàx ã mẽ pa kaxyw na pa mẽ ho awỳr kêt nê. Koja mẽ arĩ mẽ hkôt ri pa. Nom mẽ uràk nê amnhĩ tomnuj o pa pumaj na pa ã mẽ ho awỳr anê. ¹⁶ Mẽ kệp mẽ hkwỳ hkết. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyràk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkết nê. ãm pahkôt pix mã amnhĩ nhĩpêx o pa. ¹⁷ Akapêr pix na mex o mex jakamã koja mẽ hkôt amnhĩ nhĩpêx o pa nê gaa nê te pahte amnhĩ nhĩpêx pyràk o amnhĩ nhĩpêx.

¹⁸ Na ka pre amnê mẽ hwỳr inhmẽ pa pre ixte mẽ kãm akapêr jarênh o ri ixpa kaxyw mẽ hwỳr wrỳ. Nê amnhĩ pyrã nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwỳr mẽ kurê. ¹⁹ Inhmã mẽ hapê jakamã kot paj amnhĩ grõnh kôt nhãm mẽ kot axpên mã ri inhgrõnh o pa xwỳnhjê mã amnhĩ gõ. Amã hprãm xà hkôt. Ixkwỳjaja kot ja hã ixpumunh nê ixpyrà nê amã hprãm xà hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tĩrtũm wỳr

²⁰ Nhũm Jejus arĩ Tĩrtũm mã amnhĩ jarê nê kãm:

“Tã na pa ã jajê ho awỳr anê Papaj. Nom ixkôt mẽ pa ho mẽ pa xwỳnhjê pix o na pa awỳr kêt nê. Mãnên mẽ ô ri nhỹrmã mẽ kot ixkôt amnhĩ xunhwỳr mã xwỳnhjaja na pa mẽ ho ixpimràa tã mẽ ho awỳ. ²¹ Kê mẽ pahpyrà nê te hamaxpêr tipxi pyrã nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mẽ ã amnhĩ nhĩpêx anhỹr o pa nhũm mẽ kệp pahkwỳ hkết xwỳnhjaja pahtã mẽ omu nê ate mẽ hwỳr inhmênã ã apumunh kurê kumrêx.

²² Nê koja mẽ ixkukwak ri panhỹ hã te pahpyrà nê hamaxpêr tipxi nê ri pa pyràk o amnhĩ nhĩpêx o pa. ²³ Na pa htem te ixkre tipxi kamã mẽ ixtipxi pyràk o axpên nhĩpêx o ri ixpa. Te pahte axpên nhĩpêxta pyràk. Tã koja mẽ ixwakre kamã ã axpên nhĩpêx anhỹr o pa nhũm mẽ kệp pahkwỳ hkết xwỳnhjaja ja hã mẽ omu nê hamaxpêr o: ‘Nà pêr ãm hãmri na pre Tĩrtũm tãm mẽ pahwỳr Jejus mẽ. Kãm hapê htỳx tã mẽ pahwỳr kumê nhũm wrỳ nê amnhĩ xwar kãm hkwỳjê japê nê.’ Anhỹr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awỳ. Ka na ka pre inhmã mẽ agõ. Tã ma awỳr inhmõr mã xàta wỳr na pa inhmã mẽ àpir prãm nê. Koja mẽ nhỹrmã ma pahwỳr api pu mẽ pahpiitã pahpimràatã pamã axpên japê hã ri papa ho papa.

²⁵ E Papaj. Amex o amex tã mẽ kêp ixkwỳ hkêt xwỳnhjaja na kormã ate mẽ hwỳr inhmênh xwỳnh ã ixkôt hamaxpêr kêt nê. Nom mẽ kot ixkôt amnhĩ xunhwỳr xwỳnhjaja na mẽ kurom ja hã ixkôt hamaxpêr mex nê.

²⁶ Na pa ra ixprĩ hã mẽ kãm akapêr o amnhĩrĩt o ri ixpa. Tã kot paj axte mẽ kãm akapêr kwỳ jarê. Amã ijapêta pyrã nê mẽ kãm axpên kĩnh ã axpên to pa kaxyw na pa mẽ kãm hã karô. Kot paj inhĩ hã mẽ hkôt ixpa hkêt tã koja Pahkarôja mẽ hwỳr wrỳ nê mẽ hkarô mã agjê nê te pa mẽ hkôt ixpa pyrãk o mẽ hipêx. Ja na pa inhmã hprãm. Tã koja anê. Jakamã na pa ã mẽ ho awỳr anê. Tã ãm ja pix Papaj.” Anê.
Nhũm pre ã Jejus ô Papaj mã mẽ inhnoo mã amnhĩ jarênh anê pa mẽ xpiitã hã kuma.

18

Mẽ kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-53

¹ Tã nhũm Jejus mẽ ixto Hipêêxà hwỳr pa. Hãmri nê ixkreja rũm ma tẽ nê Jerujarê rũm kato nê ma gô pê Kirô hwỳr tẽ pa mẽ hkôt ixpa ho ixpa xwỳnhjaja ma hkôt mra. Nê gô hã rê nê hikjê hã mẽ kot mẽmo pĩ hkô hkre xwỳnhja wỳr mra nê parpê ixkrĩ hpa. ² Na pre hte Jejus xatã hwỳr amnhĩ kôt mẽ ixto pa ho kuhê. Jakamã nhũm Jut Kariot kot mẽ kãm ôr mã xwỳnhhta ra kot hwỳr mẽ ixpa ho ixkuhê xàta pumunh mex. ³ Jakamã pa mẽ hwỳr pôj nê ixkrĩ hpa nhũm mẽ mẽ ixwỳr mra. Jut Kariot mẽ pôristijaja. Rôm nhõ xwỳnhjê nhõ pôristijê mẽ patre nhõ pôristijaja nhũm mẽ mẽ ixwỳr Jut Kariot kôt mra. Ijaew nhõ pahijê nhỹ hã mẽ ixwỳr mra. Piitã wapohti jamỳ nê pô hpôk nê kanê jamỳ nê mẽ ixwỳr hpôk o kato. ⁴⁻⁵ Hãmri nhũm Jejus amnhĩ wỳr mẽ omu nê kànhmã xa nê ma mẽ kutã tẽ. Jut Kariot kot mẽ kãm ôr kaxyw nhũm amnhĩ tã omunh mex jakamã amnhĩ wỳr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jejus mẽ omu nê mẽ kãm:

—Pa. Mẽmoj japêr na ka mẽ pô hpôk o ri apa? Anê.

Hãmri nhũm mẽ kãm:

—Nà Jejus pê Najare nhõ xwỳnh japêr o na pa mẽ ri ixpa. Anê.

Hãmri nhũm mẽ kãm:

—Tỳ ot pa xa. Pa na ixpê Jejus. Anê.

⁶ Hãmri nhũm mẽ kuma nê tee ri axpên pumu nê umaj katê ho axkamê nê kuhê. Nom katê ho pikamênh o ra rôrôk pa nê hikwỳ. ⁷ Hãmri nê kànhmã kuhê hpa nhũm Jejus axte mẽ kãm:

—Kwa mẽ inhmã amnhĩ jarê. Mẽhõ japêr o na ka mẽ apa? Anê.

Hãmri nhũm mẽ kãm:

—Jesús pê Najare nhõ xwỳnhhta japêr o na mẽ ri ixpa kênã. Anê.

⁸ Hãmri nhũm mẽ kãm:

—Kwa ra ixte mẽ amã amnhĩ jarênh kênã. Paa. Ijapêr o na ka mẽ ri apa. Jakamã kwa kêr ka mẽ ixkôt ri mẽ pa xwỳnhhtaja tanhmã mẽ ho hkêt nê. Kê mẽ mãmri anhgrã nê ma mra.

⁹ Anhỳr o mẽ inhnê mẽ kãm kapêr. Na pre ra ham Hipêêxà mã mẽ ixtã kãm amnhĩ jarê nê kãm:

—Kormã mẽ kamã ixpa ri ate inhmã ixihtỳx xà nhôrta o na pa mẽ htãnopxar mex o ri mẽ hkôt ixpa.

Anhỳr o mẽ ixtã kãm amnhĩ jarênh jakamã nhũm ã mẽ inhnê mẽ kot unênh mã xwỳnhjê mã kapêr anê.

Simãw Pêtre kot mẽhõ pê hamak krãhyr ã harênh

Matêwre 26.51-54; Makre 14.47; Rukre 22.49-51

¹⁰ Hãmri nhũm Simãw Pêtre tee ri Jejus ã mẽ omu hãmri nê ô wapo kapa nê jam ho apê nê ho hamak nhĩkjê krãhta. Mawti jamak krãhta. Mawtijaja mẽõ patre mã apênh xwỳnhjê hõ na pre nhũm Simãw Pêtre hamak krãhta. ¹¹ Hãmri nhũm Jejus ja hã omu nê nê kãm kapêr nê kãm:

—Tk. Kwa nà amarĩ xa nê akupỹm awapota hkàm haxà. Ixte mẽ anê amnhĩ xà htỳx kamã ijamak kaxyw na pa pre Inhĩpêêxà rùm amnê mẽ awỳr pika hwỳr wrỳ. Kêt inhmã kãm hprãm xà hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwār mẽ māmri tanhmã kãm ixto hprãm xà hkôt māmri tanhmã ixto. Anê.

Mẽ kot Anas wỳr Jejus o htêm ã mẽ harênh

Matêwre 26.57-58; Makre 14.53-54; Rukre 22.54

¹² Tã nhũm pōristi mẽ mẽ hkrãhtũm nê mẽõ patre nhõ pōristijaja Jejus pynê nê hpa hpre hpa ¹³ nê ma Anas wỳr o tẽ. Anasja Kajpas piinhõ na pre. Nhũm Kajpas kormã amgràja ã Anas pyrà nê kêp mẽõ patre maati. ¹⁴ Jakamã na pre ra Ijaew nhõ pahijê mã Jejus jarênh o:

—Nà kot puj mẽ Jejus pĩr tokyx anê. Kê tapxipix ty pu mẽ arĩ mỳrpê pahpiitã pajamakêtkati nê ri papa. Anê.

Jakamã nhũm mẽ Jejus pynê nê kormã ma patre maati hwỳr o tẽ.

Simāw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

¹⁵ Hāmri pa ixpê Juāw mẽ ixkràmnhwỳ Simāw Pêtre mẽ pa wa ma mẽ hkôt wa tẽ. Nhũm mẽ ra mẽ inhõ patre maati nhõrkwỹ hwỳr Jejus o axà. Nhũm patre maati kot ixpumunh jakamã nhũm kãm àpênh xwỳnhja ixpumu nê inhmã anê pa mẽ hkôt axà. ¹⁶ Nom nhũm Simāw Pêtre arĩ kapôt ã hakwa krem xa. Hāmri pa omu nê akupỹm hwỳr tẽ nê mẽhõ niti kot hakwa kre jamār o ãm xwỳnhja mã anê nhũm kãm kahê xà mẽ nhũm mẽ ixkôt axà.

¹⁷ Hāmri nhũm nita hprĩ hã omu nê kãm:

—Xêê. Pêr apê mẽ kot unênh nê o mōr mũj kôt ri mẽ pa xwỳnhjê hõ na ka mê? Anê.

Hāmri nhũm kuma nê kãm:

—Tk. Nà ixte mẽhõ myti ata pumunhre hã. Anê.

¹⁸ Hāmri nhũm ra kôt ã kamàt nê ra kryy nê nhũm mẽ àpênh xwỳnh kwỳ mẽ mẽõ patre nhõ pōristi hkwỳjaja amnhĩm kuto nê hã ànhunh o kuhê. Nhũm Simāw Pêtre mẽ omu nê mẽ hwỳr tẽ nê mẽ ìhkô hã ànhunh o xa.

Patre maati kot Jejus kukjêr ã harênh

Matêwre 26.59-66; Makre 14.55-64; Rukre 22.66-71

¹⁹ Rôm nhũm Anasja hêx rom tanhmã Jejus kukjêr to nê kãm:

—E kwa inhmã amnhĩ jarê. Tanhmã na ka hte we akôt mẽ pa ho mẽ pa xwỳnhjê jahkre hto ho apa wehe? Anê.

²⁰ Hāmri nhũm amnhĩ tã kãm:

—Nà na pa hte mẽ piitã mẽ noo mã ri mẽ kãm ixkapêr o ixpa. Tĩrtũm kapêr o mẽ ahkre xà hã ixkre kamã nê Tĩrtũm mã amnhĩ jarênh xà hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhỹri ixpimxur pê ri mẽ kãm tanhmã ixkapêr to ho ri ixpa hkêt nê. ²¹ Tã ka ixtã mẽ kot inhmar o kuhê xwỳnhjaja tanhmã ixtã mẽ hkukjêr to hkêt nê. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xà hkôt tanhmã amã ijarênh to nà? Anê.

²² Hāmri nhũm patre nhõ pōristi hõja kuma nê hwỳr tẽ nê kãm:

—Tk. Kwa na htem ã patre maati mã kapêr anhỹr kêt nê. Na htem hã hpjiaàm o kãm kapêr. Tã na ka axtem nê ri ã kãm akapêr anê. Anê.

Hāmri nê hinep hkura.

²³ Hāmri nhũm Jejus amnhĩ tã omu nê kãm:

—Kwa kot pa tanhmã mẽ amã amnhĩ to ixêx to ka mẽ hã inhma nê rĩ kormã tanhmã axpên mã ixto akapêr to rỳ hã ixtak. Nom ãm hāmri ixte mẽ amã amnhĩ jarênh tã ka axtem nê ri inhĩnep ixtak. Anê.

²⁴ Hāmri nhũm Anas tanhmã mar to hpa hāmri nê umre Kajpas wỳr kumê. Na pre Kajpasja kormã hitom kãm ri tanhmã amnhĩ nhĩpêx to ho nhỹ nhũm Anas mẽ kãm anê nhũm mẽ kuma nê hwỳr Jejus o tẽ nê ho axà. Arĩ hpa hpre rãhã hwỳr o tẽ nê ho axà nhũm xa nê kãm amnhĩ jarê.

Simãw Pêtre kot axte Jejus kôt pa hkêt ã amnhĩ tã aprãr ã harênh

Matêwre 26.71-75; Makre 14.69-72; Rukre 22.58-62

²⁵ Nhũm Simãw Pêtre arĩ mẽ ìhkô hã ànhunh o xa nhũm mẽhõja kãm kapêr nê kãm:
—Kwa pêr apê Jejus kôt ri mẽ pa xwýnhjê hõ na ka. Anê.

Hãmri nhũm kuma nê kãm:

—Tk. Kokỹ ixte mẽhõ nêj pumunhre hã. Anê.

²⁶ Hãmri nhũm hpãnhã mẽõ patre maati mã àpênh xwýnhja mãânênh omu. Simãw Pêtre kot kêp hamak krãhyr xwýnhhta kwý na pre. Jakamã nhũm hprĩ hã omunh mex kurê kumrêx nê kãm:

—Kwa nà ka na ka mũtar pĩ hkôta kamã mẽ ìhkô hã xa pa apumu. Anê.

²⁷ Hãmri nhũm tee ri kuma nê axte mẽ kãm amnhĩ tã aprãr kãm hihtýx nê. Jao ra mẽ kãm amnhĩ tã aprãr o axkrunêpxija mẽ nhũm krãhyre hkàr kurê kumrêx. Ra Jejus kot hkukamã harênh xà hkôt kêp hkwyê hkêt ã amnhĩ tã aprãr o axkrunêpxi.

Jejus kot Pirat mã amnhĩ jarênh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nê ma Pirat wýr o tẽ. Piratja na pre te Rômjê nhõ pahi pê Sesti mã mẽ ixpê Ijaew jamãr o pa nhũm mẽ ma hwýr o tẽ. Nhũm ra myt kator grire nhũm mẽ hwýr o tẽ nê òrkwý kapem o xa. Pirat kêp Ijaew kêt jakamã nhũm mẽ òrkwý hwýr gjêx kêt nê kapôt ã kuhê. Na hte Ijaew kormã Pas ã hkĩnh hãmri nê nhãm mẽ kêp Ijaew kêt xwýnhjê nhõrkwý hwýr gjêx kêt nê. Koja mẽ hwýr agjê nê amnhĩ tomnu nê Pas ã apkur kêt nê. Jakamã nhũm mẽ Pirat wýr Jejus o tẽ no ãm hwýr o àr kêt nê. ãm ixkre kapem o xa. ²⁹ Hãmri nhũm Pirat mẽ hwýr kato nê omu nê hã mẽ hkukja nê mẽ kãm:

—Kwa tanhmã na we amnhĩ tomnuj to ka mẽ ixwýr o tẽ? Anê.

³⁰ Hãmri nhũm mẽ kãm:

—Nà kot amnhĩ tomnuj o pa xwýnh kênã. Jakamã na pa mẽ awýr o tẽ. Ate tanhmã kot amnhĩ tomnuj to hã harênh mar nê myrapê tanhmã ho kaxyw. Anê.

³¹ Hãmri nhũm mẽ kuma nê mẽ kãm:

—Tk. Kwa mẽ kamjaja ma amnhĩ kôt o tẽ nê amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anê.

Hãmri nhũm mẽ tee ri kuma nê kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwýnhjê tak o mẽ kupa. Tã na ra Rôm nhõ pahihtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhmã tanhmã hã axàmnênh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anê.

³² Rôm nhõ xwýnhjaja na htem mẽ kot amnhĩ tomnuj xwýnhjê hpar kaxyw nê pĩ kahpa hã mẽ hanhõ nê mẽ kupa. Nhũm Jejus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harê. Jakamã nhũm pre ã Ijaew Pirat kot mẽ kãm hpĩr prãm xà ã kãm kapêr kãm xihtýx anê. ³³ Hãmri nhũm mẽ kuma nê akupým òrkwý hwýr axà nê amnhĩ wýr Jejus ã karõ nhũm hwýr axà nhũm kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wýr akãm hamak o pa? Anê.

³⁴⁻³⁶ Hãmri nhũm kãm:

—Tý ãm hãmri na ka ã ijarênh anê. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anê? Xà na pre mẽhõ ixte mẽ anhõ pahi Sesti kutã ixãm ã amã ijarê ka ama nê tee ri ixkukamã ajamxpêr? Nà xà ãm hãmri amã Tĩrtũm kot Ijaew wýr inhmênh ã ixpumunh prãm? Mo kaxyw na ka ã ixkukjêr anê? Anê.

Hãmri nhũm tee ri kuma nê kãm:

—Tk. Mo kot pa kêt ri axtem nê Tĩrtũm kot Ijaew wýr amênh ã akukja? Mẽ apyrà nê ixpê Ijaew kêt kênã. Mẽ kot ixwýr ato htêm xwýnhjaja na mẽ ã ate amnhĩ jarênh anhýr ã ajarênh anê. Nà mẽ akwýjê mẽ mẽ anhõ patre krãhtũmjaja na mẽ ã inhmã ajarênh anê.

Jakamā e aprī hā inhmā amnhī jarē. Tanhmā na ka we amnhī tomnuj to nhūm mē ixwỳr ato tē? Anē.

Hāmri nhūm kuma nē kē axte kām:

—Nà ixpê pyka ja kamā mē ò pahi hkêt. Kop ām ixpê pyka ja kôt mē ò pahi ronhỹx ra ixkôt ri mē pa xwỳnhjaja tanhmā ixtā mē ato. Nom jar ixpê mē ò pahi hkêt. Ām axtem ixpê mē ò pahi na pa. Ām hāmri na pa ā amā amnhī jarēnh anē. Anē.

³⁷ Nhūm ā kām amnhī jarēnh anē hāmri nhūm tee ri kuma nē kām:

—Xà apê mē ò pahi hō na ka? Anē.

Hāmri nhūm kām:

—Tỳ. Nà ām hāmri na ka ā ijarēnh anē. Na pa pre amnē pikaja wỳr wỳr nē jar mē akamā ixkato nē mē akamā ixaptàr. Ixte tanhmā mē kām ixkapēr to ho ri ixpa kaxyw na pa pre wỳr nē mē akamā ixpa nē ām hāmri mē kām ixkapēr o ri ixpa. Na pa hte tām ixkapēr o ri ixpa. Tā mē kot ixkapēr mar nē ixkôt ri amnhī nhĩpêx o mē pa xwỳnhjaja na htem ixpê mē ò pahihiti hā ijarēnh o pa. Anē.

³⁸ Hāmri nhūm Pirat kot tām kām kapēr ā amnhī jarēnhja ā kuma nē kām:

—Tk. Aa ixte pika ja kamā mēhō pumunh nhūm tām kapēr o pare hā. Anē.

Hāmri nē kapēr ā kuma nē tee ri hkukamā hamaxpēr. Hāmri nē akupỹm Ijaew wỳr ho kato nē mē kutā o xa nē mē kām:

—Kwa tanhmā kot amnhī tomnuj tore hā. ³⁹ E mē inhma. Na pa hte amgrà mē arĩgro pē Pas kām mē amā mē hagiēnh xà rūm mē akwỳjê ho hpỹnh nē mē hapôj nhūm mē hamakêtkati nē amnhĩx ri pa. Ka mē ja hā omu nē Pas ā akĩnh nē. Jakamā e. Pa mē amā mē anhō “pahihiti” jarēnhja mā inhũre. E na pa ra kām inhũre. Anē.

⁴⁰ Hāmri nhūm mē tee ri ā kapēr anhỹr ā kuma nhūm ja mē kēp omnuj tỳx nē. Nhūm mē hā kàx pē gryk kamā kām kapēr kām hihtỳx nē kām:

—Tk. Kwa nà kām anhũrer kêt nē. Kêt Parapas mā mǎn anhũre. Anē.

Parapasja na pre hte tanhmā amnhī tomnuj tỳx to ho ri pa nhūm prem mỳrapê unê nē haxà. Tā nhūm mē axtem nē Pirat kot kām urer prām xàj Jejus kaga.

19

Mē kot Jejus tak ā mē harēnh

Matêwre 27.27-31; Makre 15.16-21; Rukre 23.20-25

¹ Tā nhūm Pirat akupỹm òrkwỹ hwỳr Jejus o axà nē ò pōristijê mā hā amỹnê nhūm mē hwỳr mra nē htak o kuhê. ² Hāmri nē kēp pahi hā hpēr o pikēnh kaxyw kām pahi hā mē ahkà nhĩpêx nē hkrām haxà. Nom axtem mēmo mrōnhĩ te kot ronh kanêre pyrāk xwỳnhja nhūm mē hikāx nē hkrām haxà. Nē kēp pahi hā mē ê kamrêk py nē kām haxà.

³ Hāmri nē xatā hwỳr mra nē hinep htak nē hā hpēr o pikēnh o xa nē kām:

—E apê Ijaew nhō pahi punuti na ka. Anē.

⁴ Hāmri nhūm Piratja akupỹm Ijaew wỳr kato nē mē kām:

—E koja inhō pōristi akupỹm mē awỳr ho kato ka mē omu. Na pa tee ri kot tanhmā amnhī tomnuj to hā hkukja. Pēr tanhmā kot amnhī tomnuj to hkêt kēnā. Anē.

⁵ Hāmri nhūm Jejus kato nē arĩ pahi hā àhkà tu nē ê kamrêk jaxà nē o xa nhūm Pirat mē kām:

—E kwa mē omu nē kamā axukapřĩ hkêt wehe. Anē.

⁶ Hāmri nhūm patre krāhtũmjê mē mēō pōristijaja tee ri ja hā kuma nhūm ja mē kēp omnuj nē. Hāmri nē hā kām kapēr kām hihtỳx nē kām:

—Tk. Kwa nà pĩ kahpa hā mǎn anhō. Kê pĩ kahpa hā mǎn ajêt nē ty. Anē.

Hāmri nhūm tee ri hā mē kuma nē mē kām:

—Nà mē kam nē ma amnhĩm o tē nē mē kam amnhĩm ho anē. No pa kot paj ho anhỹr kêt nē. Mo mỳrapê kot pa kêt hā amỹnê nhūm mē kupĩ? Nà kwarĩ kot pa ho anhỹr kêt nē. Anē.

⁷ Hāmri nhūm mē tee ri kuma nē kām:

—Kwa kêp Tirtûm Kra hã amnhĩ jarênh kênã. Mẽ inhĩgêjtaja na prem ã mẽ ixte amnhĩ jarênh anhÿrja nê mẽ inhmã kapêr pa htem ã amnhĩ jarênh anhÿr kêt nê. Kojã mẽhõ ã ri amnhĩ jarênh anê nhũm mẽ ja mÿrapê kupĩ. Anê.

⁸ Hãmri nhũm Pirat tee ri Jejus kêp Tirtûm Kra hã amnhĩ jarênhja ma nê kãm uma nê kãm tanhmã ho hprãm kêt nê. ⁹ Hãmri nê akupÿm òrkwÿ hwÿr ho axà nê axte hkukja nê kãm:

—Kwa aprĩ hã inhmã amnhĩ jarê. Nhÿhÿnh na ka pre mẽ ixwÿr mõi? Anê.

Nom nhũm axte tanhmã kãm nê hkêt nê. ãm arĩ akryk mar o xa. ¹⁰ Nhũm tee ri omu hãmri nê kãm:

—Kwa xà ate ixpumunh kêt? Inhÿ hã na htem mẽ kupa nê inhÿ hã akupÿm mẽ hapøj. Tã ka pêr aprĩ hã inhmã tanhmã amnhĩ jarênh to hkêt nê ri akryk akuhê. Anê.

¹¹ Hãmri nhũm Jejus kãm:

—Nom Tirtûm nhÿ hã pix mã na ka hte ã amnhĩ nhĩpêx anê. Kêp ãm Tirtûm kãm ja prãm kêt ronhÿx ka tee ri tanhmã amã ixto hprãm hkapyrÿ. Tãm kot mẽ ixkaxyw axãm kênã. Tã mẽ kot awÿr inhmênh nê ri ixtyk ã ijarênh xwÿnh pê Ijaew nhõ pahijaja. Ra mẽ kot ixkaga jakamã na mẽ ã amã ijarênh anê. Jakamã mẽ kot amnhĩ tomnuj tÿx o ajakrenh. Anê.

¹² Hãmri nhũm Piratja tee ri ã kapêr anhÿr ã kuma nê kot kãm urer prãm nê. Hãmri nê akupÿm Ijaew wÿr kato nê hã mẽ kãm kapêr nhũm mẽ tee ri kot kãm urer kaxyw ã amnhĩ jarênhja ma nê kãm ja prãm kêt kumrêx. Jakamã kàxpê nê kãm kapêr nê kãm:

—Kwa nà ra kêp mẽ inhõ pahi hã kot amnhĩ to hêx kênã. Kot mẽhõ ã ri amnhĩ jarênh anê nhũm Rõm kamã mẽ panhõ pahi Sestija ja hã harênh ma nê kamã gryk tÿx nê. Tã kot kaj kãm anhũre nhũm ajarênh ma nê akamã gryk nê. Anê.

¹³ Hãmri nhũm tee ri mẽ kuma hãmri nê ma pahi kot tanhmã mẽ harênh to xà hã kên pota wÿr ma tẽ nê hã nhÿ. Mẽ ixpê Ijaew kapêr kãm mẽ ixte kãm: “Kapata” jarênh xwÿnhhta wÿr kot tanhmã Jejus jarênh to kaxyw ma hwÿr tẽ nê hã nhÿ nhũm mẽ hwÿr o tẽ.

¹⁴ Hãmri nhũm ra arĩgro pê sêsta. Mẽ ixpê Ijaewjaja mẽ ixte Pas ã amnhĩ tomnuj mÿrapê mry hkwy hpar nê Tirtûm kôt pix mã amnhĩ nhĩpêx ã amnhĩ jarênh xà hã arĩgroja kato. Jakamã nhũm kaxkwa nhĩpøk ri myt nhÿ nhũm Piratja mẽ kot Jejus kator ã harênh prãm xaj arĩ mẽ kãm ho mẽ õ pahi hã harê nê mẽ kãm:

—E ota mẽ anhõ Pahihitita. Anê.

¹⁵ Hãmri nhũm mẽ tee ri ã harênh anhÿrja ã kuma nê kãm:

—Kwa apĩ ri. Ma o tẽ nê pĩ kahpa hã anhõ kê tokyx ty.

Anê nhũm tee ri mẽ kuma nê mẽ kãm:

—Kwa nà. Kêp mẽ anhõ pahi kênã kot paj kêt ri axtem nê mẽ apê kupĩ. Anê.

Hãmri nhũm mẽ kãm:

—Nà kêp mẽ inhõ pahi hkêt. Pahi Sesti pix na kêp mẽ inhõ pahi. Anê.

Mẽ kãm Sesti hkĩnh kêt tã ã kãm Jejus htyk prãm xaj ri harênh anê. ¹⁶ Hãmri nhũm Pirat tee ri ja hã mẽ kuma nê tã Jejus ã pòristi mã karõ nê mẽ kãm:

—E mẽ mãmri ma o tẽ nê pĩ kahpa hã anhõ kê ty. Anê.

Hãmri nhũm mẽ kuma nê ma o tẽ.

Mẽ kot pĩ kahpa hã Jejus nhõ ã mẽ harênh

Matêwre 27.32-44; Makre 15.21-32; Rukre 23.26-43

¹⁷ Hãmri nhũm pòristija Jejus mã õ pĩ kahpa gõ nhũm kutu nê ma mẽ hkôt hkjênh o mõi. Nhũm mẽ krĩ rùm ho kato nê ma hixêt prêk wÿr o tẽ. Hixêt prêkja mẽ kot harênh o: “Korkot” anê. No mẽ ixpê Ijaewjê kapêr kãm na pa pre htem harênh o “Mẽ hkrã hi xà” anhÿr xwÿnhhta wÿr nhũm mẽ ma o tẽ nê hã ho api. ¹⁸ Hãmri nê pikap pĩ kahpa xi nê hã Jejus xi nhũm hã nõ nhũm mẽ prek o ìhkra ho htÿx nê hpar o htÿx. Hãmri nê kaxyw hkakwÿ nê hkakwÿnh pa nê kamã pĩ kahpata xãm nê hity hpa nhũm Jejus kÿx pê ajêt. Hãmri nhũm mẽ mãânên wa ho hamêxkrut nê pĩ kahpa hã wa kunhõ nhũm wa kuri ajêt. Wa kot tanhmã amnhĩ tomnuj to xwÿnhja wa ho akutã Jejus nhĩjê nhũm wa urak nê kÿxpê ajêt.

¹⁹ HãMRI nhũM Piratja õ pôristi mã anê nhũM mẽ tap õ py nê hã tanhmã kagà hto nê kagà ho:

IJAEW NHÕ PAHI JEJUS NA JA
KÊP NAJARE NHÕ XWÏNH

²⁰ Nom mẽ ixpê Ijaew kapêr pix kãm hã kagà hkêT nê. Mãânên Gresjê kapêr kãm nê Raxijê kapêr kãm nhũM mẽ mãânên hã kagà nê Jesus mÿri kunhõ. HãMRI nhũM Ijaew kwÿjaja Jerujarê rũM hwÿr mra nê mẽ kot ã hã kagà nhĩpêx anhÿrta pumu nê kamã harê. Jerujarêja hixêT prêêta wÿr jawÿ jakamã nhũM mẽ kurũM ohtõ nê hwÿr mra nê omunh o kuhê. ²¹ HãMRI nhũM patre hkrãhtũmjaja tee ri ã Jesus jarênh anhÿr ã kagàta pumu nhũM ja mẽ kêp omnuj nê. Jakamã nhũM mẽ ma Pirat wÿr mra nê kãm:

—Kwa mon ka ri hã mẽ kãm anê nhũM mẽ axtem nê ã ri kagà nhĩpêx anê? Kwa nà kêp mẽ inhõ pahi hkêT. Âm htÿx ri kot ã kot amnhĩ jarênh anhÿr o pa kênã. Kwa hã kagàja o anhĩpa nê hpãnhã hã kagà ho: “Kêp Ijaew nhõ pahi hã kot amnhĩ to hêx xwÿnh.” Anhÿr o hpãnhã hã hipêx nê anhõ nà? Anê.

²² HãMRI nhũM mẽ kuma nê mẽ kãm:

—Tk. Nà pa ho ixpinhpanh kêt nê. Ra ixte hã kagà hpar kênã. Anê.

Pôristijaja kot axpên mã Jesus xê ho pigrành

Matêwre 27.35-36, 27.55-56; Makre 15.24; Rukre 23.34

²³ HãMRI nhũM pôristijaja kot axpên mã Jesus xê o pigrành kaxyw amnhĩ tã haxwÿr o tẽ. Mẽ kêp 4 no nhũM Jesus xê kêp 5 jakamã nhũM mẽ amnhĩ kôt ho 4 nê haxwÿ nhũM pyxi nê hprã. ê rytita. Na pre hipêx muxre. Nhÿhÿnh hkayr xà pumunh kêt kumrêx.

²⁴ Jakamã nhũM mẽ omu nê kãm hkĩnh nê. HãMRI nhũM hõ kot amnhĩm hpyr nê ho arĩk kaxyw nhũM mẽ hã kênre ho jôka. Na pre ra TĩrtũM kapêr ã kagà htũM kot mẽ hkukamã ja hã mẽ harênh nê mẽ harênh kot:

Na prem axpên mã ixê o anhrã nê hã kênre ho jôka ho hkrĩ.

Anhÿr o kot mẽ hkukamã mẽ harênh. Tã nhũM mẽ ra hkôt ã amnhĩ nhĩpêx anhÿr o hkrĩ.

Jesus kot Juãw nhĩhkram katorxà jaxà ã harênh

²⁵ NhũM Jesus par pê katorxà xa. Nê htõx nê Kropti hprõ Marir nê Marir Matarên mẽ nhũM mẽ Jesus katorxà nhĩhkõ hã Jesus pumunh o kuhê. NhũM amnhĩ tã mẽ omu ²⁶ nê mẽ kuri pa ixpê Juãw pumu. HãMRI nê kêp ixkrãmnhwÿ mex ã ixtã katorxà mã kapêr nê kãm:

—E ota Juãwta. Kojã ixpãnhã te kêp akra pyrãk o anhĩpêx nê tanhmã ato ajuta hto ho pa. Anê.

²⁷ HãMRI nê hpãnhã pa inhmã kapêr nê inhmã:

—E Juãw. Kêr ka te kêp akatorxà pyrãk o inhmã hipêx mex o ri apa.

Anhÿr jakamã pa kuma nê kot inhmã hã karõ xà hkôt inhõrkwy hwÿr haxà nê amnhĩ kôt ri ho ixpa.

Jesus htyk ã harênh

Matêwre 27.45-56; Makre 15.33-41; Rukre 23.44-49

²⁸ Tã nhũM Jesus ra amnhĩ pumu hãMRI nê hamaxpêr o:

—Nà Inhĩpêxà kot mẽmoj tã inhmã karõta na pa ra kãm ho anhÿr o hitep xà xir kaxyw. Anê.

HãMRI nê kãm kôr ã amnhĩ jarê. Nom ra hkukamã TĩrtũM kapêr ã kagà htũM kot htyk kaxyw nê kãm kôr kukamã harênh jakamã nhũM ã amnhĩ jarênh anê nê kapêr o:

Nà na pa ra inhmã kôr nê. Anê.

²⁹ NhũM hpar pê guhkrax kãm wĩhti punureta âm jakamã nhũM mẽ ã kot amnhĩ jarênh anhÿrja ma nê kaxyw mẽmo rerek py nê o tẽ nê kaxyw pĩ ryti hõ py nê ho hkanhwÿ. Nê akupÿn o tẽ nê ho wĩhti mã haxà nê kãm kupê. ³⁰ NhũM hkaõ nê hkaõr pa hãMRI nê kapêr o:

E nã hãMRI na pa ra mẽ piitã mẽ kot amnhĩ tomnuj pãnhã amnhĩrer pa. Jao ra Inhĩpêxà kãm hprãm xà hkôt kãm tanhmã amnhĩ nhĩpêx to jatur xãm kumê.

Anhÿr o amnhÿ jarënhja kôt ahpar mã hkrã nÿ ty.

Mÿ kot kô xwa ho Jejus kamnhwÿr ã harënh
Wam Juãw 5.6-8

³¹ Nhÿm ra sêsta nhÿm apkati nhÿm mÿ inhõ arÿgromnu pê sap kaxyw. Sapja ã na hte mÿ ixpê Ijaew mÿ ixkÿnh pê Pas ã ixkÿnh rÿnh o ixpa. Nhÿm mÿ kãm sap ã arÿ mÿ htyk nÿ mÿ harir xwÿnhjê pumunh prãm kêt jakamã nhÿm Ijaew krãhtÿmjaja ma Pirat wÿr mra nÿ kãm:

—Kwa pôristi mã anÿ kÿ mÿ tokyx mÿ hte hi kukÿ kÿ mÿ htyk tokyx anÿ. Kÿ mÿ tokyx mÿ o wrÿ nÿ ma mÿ o mra nÿ mÿ hagjê. Kormã sap kêt ri. Anÿ.

³² Hãmri nhÿm mÿ kuma nÿ õ pôristijê mã anÿ nhÿm mÿ ma mÿ hwÿr mra nÿ akutã wa kot Jejus nhÿjê nÿ jêt xwÿnhhta wa kumrëx wa hte hi hkwÿr. ³³ Hãmri nÿ hpãnhã Jejus wÿr tÿ nÿ omu nhÿm ra htyk mex nÿ ajêt nhÿm mÿ ja hã omu nÿ kÿp hte hi hkwÿnh kêt nÿ.

³⁴ Nhÿm pôristi hõja kô xwa py nÿ ho ihkjê rÿm hkanhwÿ nhÿm hkamrô mÿ ï kagô ahkã nÿ hprôt nhÿm mÿ hkwÿja omunh o kuhê. ³⁵ Nÿ ixpê Juãw na pa pre ijaxwÿja mÿ ïhkô hã xa nÿ ja hã omunh jakamã pa ã mÿ amã hã kagã anÿ. ãm hãmri na pa mÿ amã harÿ nÿ hã kagã. Mÿ ate kamã harënh nÿ harënh mar nÿ hkôt ajamaxpÿr kaxyw. ³⁶ Na pre ra Tÿrtÿm kapÿr ã kagã htÿm kamã ra hkukamã tanhmã kot mÿ pahwÿr mÿnh xwÿnhhta jarënh to nÿ hã kagã. Nÿ hã kagã kot:

Koja mÿ nhÿhÿnh hi hkwÿnh kêt nÿ. Anÿ.

Tã nhÿm mÿ ra hã kagãja kôt ã hipêx anÿ nÿ kÿp hi hkwÿnh kêt nÿ. ³⁷ Nÿ Tÿrtÿm kapÿr ã kagã htÿmja mãänÿn ja hã harënh kot:

Mÿ kot hpÿr nÿ hkanhwÿr xwÿnhja koja mÿ hpar pê omunh o kuhê. Anÿ.

Tÿrtÿm kapÿr ã kagã htÿm kamã ã Jejus tyk kukamã harënh kot anhÿr.

Mÿ kot Jejus jaxàr ã mÿ harënh

Matêwre 27.57-61; Makre 15.42-47; Rukre 23.50-56

³⁸ Tã nhÿm Juje pê Arimatej nhõ xwÿnhhta Jejus ra htyk ã omu nÿ ma Pirat wÿr tÿ nÿ hã kãm kapÿr. Kot ma o mör nÿ tokyx haxàr kaxyw. Na pre ra Jejus kôt amnhÿ xãm nom Ijaew krãhtÿmjê pymaj mÿ kãm amnhÿ to amnhÿrÿt kêt nÿ. Jakamã nhÿm ma Pirat wÿr tÿ nÿ hã kãm kapÿr nÿ kãm:

—Pa e ot pa awÿr tÿ. Ixte mÿmoj tã amã ixkapÿr kaxyw. Kot kaj apu inhmã “ÿ” anhÿr japÿr. Kwa xà kot pa ma Jejus o mör nÿ haxà? Anÿ.

Hãmri nhÿm kuma nÿ kãm: “Nã mãmrÿ ho anÿ.” Anÿ hãmri nhÿm ma hwÿr tÿ nÿ ho wrÿ nÿ kumÿ nÿ ma haxàr mã o mör. ³⁹ Nhÿm Nÿkotÿja ma hkôt tÿ. Amnepê mã kot kamãt kãm Jejus wÿr htÿm nÿ wa axpÿn mã kapÿr o ÿr xwÿnhhta. Jakamã ma Juje hkôt tÿ. Nÿ amnhÿ kôt mÿ hkuxwa xà hkwÿ ho mör. ãm ho mör rax kumrëx. Ho 34 kir nÿ kutu nÿ o mör. Mÿ hkuxwa xãja na pre mÿ kot mÿmo kuxwa xà mã “mÿra” nÿ “aroe” anhÿr jarënhhta nhÿm kaxyw hkwÿ jakã nÿ ho ahkã nÿ ho mÿ hkuxwa xà nhÿpêx. Hãmri nÿ kutu nÿ ma Juje kot Jejus jaxàr nhÿm kot ho hkuxwa kaxyw hkôt o mör. ⁴⁰ Hãmri nhÿm wa ho kupêxê kukõnh pa nÿ ho Jejus kupu. Mÿ ixpê Ijaew mÿ ixte mÿ htykjê jagjênh kaxyw ã mÿ hipêx anhÿr xà hkôt nhÿm wa ã hipêx anÿ nÿ haxà. ⁴¹ Nhÿm ra mÿ kot pÿ kahpa hã nhõr xà tã mÿ kot mÿmo pÿ ho pa nÿ hkre xwÿnh kwÿ kuhê. Nÿ kamã kÿn kre nyw. Kormã mÿ kot kamã mÿ htykjê hõ jaxàr kêt xwÿnhhta. ⁴² Jakamã nhÿm wa omu nÿ axpÿn mã:

—E kwa pu hwÿr Jejus o tÿ nÿ kamã mãn tokyx haxà. Kÿr pu kormã sap kêt ri ra tanhmã amnhÿ to hpa. Anÿ.

Hãmri nÿ hwÿr kumÿ nÿ o tÿ nÿ kamã haxà nÿ hã hitom pa hãmri nÿ ma akupÿm krÿm wa tÿ.

20

Jejus akupÿm htÿr ã harënh

Matêwre 28.1-10; Makre 16.1-8; Rukre 24.1-12

¹ Tã nhÿm sap tÿ nÿ hapêx nÿ hpãnhã semãn nyw krax xà pê tømik. Hãmri nhÿm Marir Matarÿn kwÿhtã kãnhmã nhÿ. Kormã myt kator kêt ri kãnhmã nhÿ nÿ ma kÿn kreta wÿr

tē. Nē hwÿr pōj nē tee ri hitom xà hã kēn rax pumu. Nhũm ra nhãm hakwa kre kuhpa hã ri hikwÿ nhũm omu nē tee ri hkukamã hamaxpēr pē omunh o xa. ² Hãmri nē awjanã nē ma akupÿm hprôt nē nhÿri Simãw Pêtre nē pa ixpê Jejus kràmnhwÿ mex ã wa ixpumu nē hkaprĩ kamã wa inhmã harē nē wa inhmã:

—Xê na pēr mē pahpê mē panhō Pahihtĩ kapa nē nhÿhÿm ma o tē. Xê nhÿhÿm mǎn pre wem o tē? Anē.

³ Hãmri pa wa kuma nē hwÿr ixprôt kurê kumrêx. ⁴ Hãmri pa Simãw Pêtre mã wa nē ixkumrêx hwÿr pōj. ⁵ Nom kormã kēn kre hwÿr ixàr kêt ri kormã hakwa krem inhĩkôt nē kaxwÿnh kãm nōr xà kamã Jejus japêr ixrīt o xa. Nhũm kupêxê nhĩrê pix nō pa omu. ⁶ Hãmri nhũm Simãw Pêtre ixkôt tē nē ixrom krem àr kurê kumrêx nē kupêxê nhĩrêta pumu. ⁷ Nē hkrã kupu xà pumu nhũm axtem hkrã muxre nē ahte nō. ⁸ Hãmri pa hkôt axà nē nōr xà kaprÿ pumu nē ijamaxpēr o:

—Hêxta waa nē. Nà mǎn akupÿm htĩr. Hã na nōr xà hkaprÿ mex nē. Nà mǎn akupÿm htĩr kãm ga. Anē.

⁹ Ra Tĩrtũm kapêr ã kagà htũm kot ja kukamã akupÿm htĩr ã harēnh tã pa wa kormã ixprĩ hã ja hã omunh kêt nē. Tã kēn kre kaprÿ pumu nē kãm ijamaxpēr kurê kumrêx. ¹⁰ Hãmri nē wa ixkato nē awjanã nē ma akupÿm wa ixkwÿjê hwÿr wa tē.

Jejus kot Marir Matarēn wÿr kator ã harēnh

Makre 16.9-11

¹¹ No nhũm Marir Matarēnja arĩ kēn kre kapem hkaprĩ nē mÿr o xa. Nē mÿr pē hikôt nē kēn kre kamu ¹² nē kamã Tĩrtũm kapêr o wrÿk xwÿnh wa ho axkrut nē wa omu. Nhũm wa ê jakajre kamã wa nhÿ. Nhũm hōja hkrãm nhÿ nhũm hōja htem nhÿ. ¹³ Hãmri nē wa Marir Matarēn mã kapêr nē kãm:

—Kwa mon ka ri omu nē amÿr o xa? Anē.

Nhũm kãm:

—Xê nhũm. Na prem ma nhÿhÿm mē ixpê mē inhō Pahihtija mÿ nē ma o tē nē hpãnhã nhÿri kuxi. Anē.

¹⁴ Rôm nhũm Jejus tãm tē nē hkatut kôt xa nhũm Marir Matarēn ho hakêx nē omu nom hprĩ hã omunh kêt nē. Omu nē htÿx ho axtem mēhō hã hkamnhĩx. ¹⁵ Hãmri nhũm kãm:

—Kwa mon ka ri amÿr o xa? Mēhō na ka ri hapêr arīt pē amÿr o xa? Anē.

Hãmri nhũm kuma nē htÿx ho pĩ hkre jamãr xwÿnh ã hkamnhĩx nē kãm:

—Xê xà ka na ka mē ixpê mē inhō Pahihtĩ ho ahkĩ nē ma o tē nē nhÿri axi mē? Xê ka japêr nē akatàt kôt inhmã harē. Nhÿri inhmã nōr xà jarē pa ma hwÿr tē nē kumÿ nē man akupÿn o tē nē akupÿm kēn kre kamã kuxi. Anē.

¹⁶ Hãmri nhũm Jejus kãm hixi jarē nē kãm:

—Kwa Marir Matarēn. Amnē ixpumu nē arĩ ã akapêr anē nà. Anē.

Hãmri nhũm jatã hprĩ hã kuma nē ho hakêx nē amnhĩ jaêr pē hprĩ hã omu nē kãm:

—Xê Pahihtĩ. Xep ka na ka. Hêxta gàà nē. Anē.

Nom mē ixpê Ijaew kapêr kãm Pahita jarēnh o: “Raponĩ” anē. Nhũm ã kãm kapêr anē hãmri nē axte ma nhÿhÿm kēp htēm pymaj hpa hã kupy. ¹⁷ Hãmri nhũm kãm:

—Kwa inhmã anhũre. Na pa kormã ma akupÿm Inhĩpêêxà hwÿr ixàpir kêt nē. E tokyx ma akupÿm tē nē ixtō nē ixtōxjê mã ijarē. Na ka prem apê ixkràmnhwÿ pix tã ra mē apê ixtō nē ixtōx na ka mē. Jakamã ma akupÿm mē hwÿr tē nē mē kãm ijarē. Nē mē kãm: “Na Jejus mē awÿr pēr mēnh o: ‘Kot paj tokyx ma akupÿm Inhĩpêêxà Tĩrtũm wÿr api. Nom kēp pa Inhĩpêêxà pix kêt mãânēn kēp mē Anhĩpêêxà na. Nē mãânēn kēp mē anhō Tĩrtũm na.’ Anhÿr o mē awÿr pēr mē.” Anē. E ma akupÿm mē hwÿr tē nē tokyx ã mē kãm ijarēnh anē. Anē.

¹⁸ Hãmri nhũm kuma nē ma akupÿm mē ixwÿr tē nē mē inhmã awjarē nē mē inhmã:

—Xê na pa ham mē panhō Pahihtita pumu. Na akupÿm mē pamã htĩr. Anē.

Hãmri nē mē inhmã kot tanhmã kãm kapêr to hã harē pa mē kuma nē tee ri hkukamã ijamaxpēr.

Jejus kot hkwyjê hwÿr kator ã harênh

Rukre 24.36-43

¹⁹ Tã nhũm tòmik nê kamàt pa mẽ Jejus kôt ixpa ho ixpa xwÿnhjaja axpên wÿr akuprô hãmri nê Ijaew krãhtũmjê pymaj hakwakre kahê hpa nê axpên mã ixkapêr o ixkrĩ. Nhũm Jejus mẽ ijaêr pê nhÿhÿnh mẽ ixwÿr axà nê mẽ ixkuri xa nê mẽ inhmã:

—Pa. Xà kormã mẽ anhôt kêt? Anê.

²⁰ Hãmri nê mẽ inhmã amnhĩ nhĩhkra kamã prek tatak xà jahkre nê hakÿx kôt mẽ kot hkanhwÿr xàja nhũm mẽ inhmã hahkre. Pa mẽ akupÿm htĩr kãm omu nê ixkĩnh tÿx kumrêx. ²¹ Hãmri nhũm mẽ inhmã:

—E kwa kêr ka mẽ tee ri amnhĩ kukamã ajamexpêr o amã ma ho ri apa hkêt nê. Na pre Inhĩpêxàja mẽ awÿr inhmẽ pa pre wrÿ. Tã kot paj amnhĩ pyrã nê mẽ piitã mẽ hwÿr mẽ arê. Anê.

²² Hãmri nê mẽ ixkaxyw htyyxà mẽ nê mẽ inhmã Tĩrtũm mẽ wa Karô jarê nê mẽ inhmã:

—E koja Tĩrtũm mẽ wa Ixkarôja wrÿ nê mẽ akarô mã giêx pa. ²³ Ka mẽ ÿ hã ma mẽ piitã mẽ hwÿr apa nê mẽ kãm Tĩrtũm kapêr jarênh o ri mẽ hkôt apa. Nê nhÿri mēhō pumu nê inhÿ hã kãm: “Kot kaj Tĩrtũm kôt amnhĩ xãm nhũm amnhĩ tã apumu nê anê ate amnhĩ tomnuj rênh pa.” Anê. Ka mẽ ã kãm akapêr anê nhũm mẽ ama nê hkôt amnhĩ xãm nhũm Tĩrtũm amnhĩ tã omu nê nê kot amnhĩ tomnuj rênh pa. Nom koja mẽ ama nê ãm mẽ ama nê hkôt amnhĩ xãm kêt japêr ka mẽ inhÿ hã kãm: “Nà kot kaj Tĩrtũm kôt amnhĩ xãm kêt nê nhũm anê ate amnhĩ tomnuj rênh kêt nê.” Anhÿr o kãm akapêr nhũm Tĩrtũm ho anê nê nê rênh kêt nê. E kêr ka mẽ ã inhÿ hã amnhĩ nhĩpêx anhÿr o ri apa. Anê.

Nhũm pre ã Jejus mẽ inhmã kapêr anê hãmri nê kato nê ma nhÿhÿm tẽ.

Jejus kot Tomas mã kapêr ã harênh

Matêwre 28.17

²⁴ No nhũm mẽ inhĩo pê Tomas pihpohtita kormã mẽ ixkĩnhã akupÿm Jejus htĩr kãm omunh kêt nê. Na pre ma kape hã tẽ nhũm wakre kamã mẽ ixwÿr axà nê mẽ inhmã kapêr hãmri nê ma nhÿhÿm tẽ. Jakamã nhũm Tomas akupÿn mẽ ixwÿr tẽ nê axà pa mẽ kãm harê nhũm tee ri mẽ inhma nê mẽ ixkôt hamaxpêr kêt nê. ²⁵ Nê mẽ inhmã:

—Nà kot pa ìhkra kamã prek tatak xà pumu nê kamã inhĩhkra hkrã jaxà. Nê hakÿx kôt hkanhwÿr xàta pa mã ho anê nê omu nê kamã inhĩhkra hkrã jaxà nê rĩ kormã akupÿm htĩr kôt ijamexpêr. Anê.

²⁶ Tã nhũm semãn pyxi nê hapêx pa mẽ axte axpên wÿr akuprô nê axte Ijaew krãhtũmjê pymaj amnhĩ tã kahê htÿx nê ixkrĩ. Nhũm Tomas tã mẽ ixkuri nhÿ. Hãmri nhũm Jejus axte nhÿhÿnh mẽ ixwÿr axà nê mẽ inhmã:

—Pa. Na ka mẽ rĩ akrĩ. Anê.

²⁷ Hãmri nê Tomas pumu nê hwÿr tẽ nê kãm ìhkra pẽ nê kãm:

—E ota inhĩhkra kamã prek tatak xàta. Mãmri kamã anhĩhkra hkrã jaxà. Nê hpãnhã ijakÿx kôt mẽ kot ixkanhwÿr xà kamã mã ho anê nê haxà nê akupÿm ixtĩr kôt ixpumunh kurê kumrêx. Anê.

²⁸ Hãmri nhũm kuma nê kãm:

—Nà pêr ãm hãmri apê inhō Pahĩhti Tĩrtũm na ka. Anê.

²⁹ Hãmri nhũm kãm:

—Tÿ. ãm ano ho ixpumunh kôt pix mã na ka ixkôt ajamexpêr. Tã no ãm koja mẽ nhÿrmã mẽ amÿr pê mẽ pa xwÿnhjaja mẽ akĩnhã mẽ no ho ixpumunh kêt tã akupÿm ixtĩr ã ijarênh mar pix tã ixkôt hamaxpêr. Ja na mex kumrêx. Anê.

Juãw kot tanhmã amnhĩ jarênh to hã harênh

Rômãn 15.4; Wam Juãw 5.13

³⁰ Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax nê nom kot paj kagàja kamã piitã hã kagà hpar kêt nê. ³¹ ãm hkwy pix na pa mẽ amã hã kagà. Mẽ ate mẽ ixpyrà nê omunh nê kêp Tĩrtũm Kra hã kot mẽ pakaxyw ãm xwÿnh ã omunh nê hkôt amnhĩ xunhwÿr kaxyw na pa ã mẽ amã harênh nê hã kagà anê. Tã kot kaj mẽ amnhĩ kaxyw hkôt ajamexpêr nê hkôt amnhĩ xunhwÿ hãmri nê nhÿrmã atyk tã nhũm

akupÿm mẽ ato mẽ atĩr ka mẽ ixpyrà nẽ kuri amex nẽ atĩr tũm nẽ apa ho apa. Tã pa ã mẽ amã mẽmoj piitã harẽnh nẽ hã kagà anẽ.

21

Jejus kot hkwyjê hwÿr kator ã harẽnh

Matêwre 26.32, 28.7, 28.10

¹Tã nhũm Jejus axte hkõt mẽ ixpa ho mẽ ixpa xwÿnh kwÿjê hwÿr kato. Himô pê Tipeja mÿri. ²Pa mẽ ixpê 7 nẽ axpẽn wÿr akuprõ. Na pre Simãw Pêtre nẽ Tomas pihpohti nẽ Natãnaew. Natãnaewja Garirej kamã krĩ pê Kanã nhõ xwÿnh na pre. Nẽ wa pa wa ixpê Jepetew krata wa nẽ wa inhĩõ wa pijakruuta wa. Pa prem wa mẽ nhÿri axpẽn wÿr akuprõ.

³Hãmri nhũm Simãw Pêtre mẽ inhmã:

—E pa jarãhã ma tep wÿr tẽ nẽ hkwyÿmnê. Anẽ.

Pa mẽ kuma nẽ kãm:

—Tõe. Nà pa mẽ ijaxwÿja ma akõt mõ. Anẽ.

Hãmri nẽ mẽ ma himô rax pê Tipeja wÿr mõ nẽ kanõre mã agjê nẽ gõx kãm kryhti rẽnh o ixkuhê. Nom tee ri ho tep õmnẽn kaxyw rẽnh o ixkuhê nẽ hõmnẽn kêt nẽ ixtã apkati nhũm tep amrakati kumrêx.

⁴Tã nhũm myt kato nhũm Jejus gõ mÿri xa. Pa mẽ ixpiitã omu no ãm ixprĩ hã kêp Jejus ã omunh kêt nẽ. Tã no nhũm tãm xa. ⁵Hãmri nẽ mẽ inhmã kapêr nẽ mẽ inhmã:

—Pa. E mãn ka mẽ ra tep kwÿÿmnẽn rax nẽ nà? Anẽ.

Hãmri pa mẽ kãm:

—Tk. Nà mo tep? Amrakati kumrêx kênã. Anẽ.

⁶Hãmri nhũm mẽ inhmã;

—Xõ wehe? Tõe. Axte mẽ axupõk rũm kryhti mẽ nẽ omu. Anẽ.

Hãmri pa mẽ mar xà hkõt ho anẽ nẽ kumê. Hãmri nhũm kamã tep hipu rax kumrêx nhũm utĩ rax nẽ. Pa mẽ tee ri ixte ho ixàpir kaxyw ri hkukjê. ⁷Hãmri pa kêp Jejus ã omunh kurê kumrêx nẽ Simãw Pêtre mã kãm:

—Kwa pêr mẽ panhõ Pahihtita na. Anẽ.

Hãmri nhũm inhma nẽ hkĩnh tÿx nẽ akupÿm hinõkà jaxà nẽ gõx kãm mrõ nẽ ma hwÿr ho nana ho tẽ. ⁸Hãmri pa mẽ hkõt kanõre kamã kryhti kjẽn o mõ. Ra amgrà hwÿr amgreire. Wÿr 100 met pix jakamã pa mẽ hwÿr ixpõx tokyx anẽ. ⁹Nẽ pàr o hkre kura nẽ kuxi nẽ ijapõx pa nẽ Jejus wÿr ixprõt nẽ mra. Nhũm ra mẽ ixkutêp kuto nẽ par nhĩpêx nẽ nhÿhÿnh tep kwÿ par kãm haxwÿ nẽ ho àr o nhÿ. Nẽ kaxyw pãwti nẽ amnhĩ ri haxwÿ nẽ o nhÿ. ¹⁰Hãmri nẽ mẽ ixpumu nẽ mẽ inhmã:

—E mẽ amnê anhõ tep o mra pu mẽ hkuxõt nẽ kuku. Anẽ.

¹¹Hãmri nhũm Simãw Pêtre akupÿm pàr wÿr tẽ nẽ kryhti ho htÿx xà hpõt nẽ amgrà hwÿr hkjẽn o mõ. Kamã tep rũnh pix. Nẽ ohtõ nẽ. Kamã kêp 153 nẽ hikwÿ htã nhũm nhÿhÿnh kryhti hkwy pikaxõnh kêt nẽ. ¹²Hãmri nhũm Jejus mẽ inhmã:

—E kwa mẽ tokyx mra pu mẽ apku. Anẽ.

Hãmri pa mẽ kuma nẽ hwÿr mra nẽ ixkrĩ pa. Hãmri nẽ tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhÿr ã omu nẽ kêp mẽ inhõ Pahihti hkõt omunh kurê kumrêx jakamã hixi hã hkukjêr kêt nẽ. ãm akryk omunh o ixkrĩ. ¹³Hãmri nhũm mẽ inhmã pãwti ho hkry pa. Nẽ hpãnhã tep jamÿ nẽ mã ho anẽ nẽ ho hkry pa nẽ ho mẽ inhĩpêx pa pa mẽ ixàpkur o ixkrĩ.

¹⁴Nhũm Jejus akupÿm htĩr kãm ra ahpÿnhã mẽ ixwÿr hapõx o axkrunêpxi.

Jejus kot akupÿm tãm Simãw Pêtre xãm

Atre 20.28-31; Wam Pêtre 5.1-4

¹⁵Tã pa mẽ ra ixàpkur pa nẽ kãnhmã ixkuhê nẽ gõ mÿ ri mra. Hãmri nhũm Jejus Juãw hkra Simãw Pêtre mã tanhmã kapêr to. Nom ixpê Juãw nhũm kêp ixkra hkêt axtem Juãw õ hkra na pre. Jakamã nhũm Jejus kãm kapêr nẽ kãm:

—Kwa Simãw. Xà we amã ijapê ho ate pika hkõt mẽmoj piitã hakrenh par nà? Anẽ.

Hãmri nhũm kuma nẽ kãm:

—Tỳ inhmã ajapê htỳx kênã Pahihti. Ra ate ja hã amnhĩ tã ixpumunh mex. Inhmã ajapêê. Anẽ.

Hãmri nhũm kuma nẽ kãm:

—Tôe. Nà kêr ka inhmã mẽ kot ixkôt amnhĩ xunhwỳr xwỳnhjê jahkre mex o ri mẽ hkôt apa. Te ho ôwêhti hkrare jamãr xwỳnh kot hamãr mex o ri hkôt pata pyrãk. Anẽ.

Hãmri nhũm kãm:

—Tôe. Nà kot paj amã mẽ ho anẽ. Anẽ.

¹⁶ Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarẽ. Xà we amã ijapêê nà? Anẽ.

Hãmri nhũm kãm:

—Tỳ. Ra ate inhmã ajapê hã ixpumunh kênã. Anẽ.

Hãmri nhũm kê axte kãm:

—Tôe. Kêr ka inhmã mẽ kot ixkôt amnhĩ xunhwỳr mã xwỳnhjê jahkre mex o ri mẽ hkôt apa. Te ho ôwêhti jamãr xwỳnh kot ôwêhti jamãr mex o hkôt pa xwỳnh kot amnhĩ nhĩpêx pyrãk. Anẽ.

Hãmri nhũm kãm:

—Nà kot paj amã mẽ ahkre mex o ri mẽ hkôt ixpa. Anẽ.

¹⁷ Tã hãmri nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarẽ? Xà we amã ijapê htỳx kumrêx nà? Anẽ.

Hãmri nhũm tee ri amnhĩ tã kuma nẽ hkaprĩ nẽ. Ra kot amnhĩ tã hkukjêr o axkrunêpxi jakamã nhũm hkaprĩ nẽ tee ri hamaxpêr. Hãmri nẽ kãm:

—Kwa Pahihti. Ate mẽmoj piitã omunh par. Nẽ ate inhmã ajapê htỳx ã ixpumunh par kênã. Anẽ.

Hãmri nhũm kê axte kãm:

—Tôe. Kêr ka inhmã mẽ kot ixkôt amnhĩ xunhwỳr mã xwỳnhjê jahkre mex o ri mẽ hkôt apa. Te ho ôwêhti jamãr xwỳnh kot hamãr mex o ri pata pyrãk. Anẽ.

Hãmri nhũm kãm:

—Nà kot paj amã mẽ ho anẽ Pahihti. Anẽ.

Simãw Pêtre tanhmã htyk to hkukamã harênh

¹⁸ Nhũm Jejus arĩ Simãw Pêtre mã kapêr nẽ kãm tanhmã htyk to hkukamã harênh to nẽ kãm:

—Kwa ixkapêr ma nẽ amnhĩ krã him haxàr tỳx nẽ hã apa Simãw Pêtre. Nà kormã anyw ri na ka pre hte ma nhỹhỹm apa kaxyw nẽ anojarêr hãmri nẽ anhĩnôhkà mex jagjê nẽ ma nhỹhỹm amã apa hprãm xà hkôt ri apa. Tã kot kaj apigêr nhũm mẽ apynê nẽ akahti hpre nẽ apa hpre nẽ ma nhỹhỹm ato mỗ ka mẽ kãm amnhĩ gõ nẽ amnhĩ nê tanhmã mẽ kãm nẽ hkêt nẽ. Amã mẽ hkôt amôr prãm kêt tã mãmri mẽ kãm amnhĩ gõ kê mẽ ma nhỹhỹm ato mỗ. ¹⁹ Tã kêr ka arĩ ixkôt amnhĩ xãm tỳx nẽ atĩr prãm xaj mẽ umaj axte ixkaga hkêt nẽ. Hãmri nhũm mẽ apĩ nẽ tanhmã atyk to hã apumu nẽ amã Tĩrtũm kĩnh ã apumunh mex kurê kumrêx. Hãmri nẽ atã Pahi Maati Tĩrtũm mex o mex ã harẽ. Anẽ.

Nhũm pre ã Jejus Simãw Pêtre tyk kukamã kãm ujarênh anẽ. Hãmri nẽ kãm:

—E kêr ka ixte amnhĩ to htỳx nẽ amarĩ mẽ kãm ixãm nhũm mẽ kot ixpĩrja pyrã nẽ ã amnhĩ nhĩpêx anẽ. Anẽ.

Hãmri nhũm kuma nẽ kãm:

—Tôe. Nà kot paj hãmri tã ã amnhĩ nhĩpêx anẽ Pahihti. Anẽ.

Juãw tyk kukamã tanhmã harênh to hkêt ã harênh

²⁰ Nhũm pre ã Jejus Simãw Pêtre mã tanhmã htyk to hkukamã harênh anẽ. Hãmri nhũm kuma nẽ ixpê Juãw ã ixto hakêx nẽ ixpê Jejus krãmnhwỳ mex ã ixpumu. Kormã Jejus htyk kêt ri kamãt kãm mẽ ixàpkur o ixkrĩta ã na pa pre ãhkô hã ixàpkur o nhỹ nẽ kot mẽ kãm ôr mã xwỳnhnta nhĩxi hã hkukja. ²¹ Jakamã nhũm Simãw Pêtre ixto hakêx nẽ ixpumu nẽ ixtã Jejus kukja nẽ kãm:

—Kwa no pêr pahkôt mỗr mũj? Tanhmã koja we htyk to? Anẽ.

Hãmri nhũm kãm:

²²—Nà kot paj amã tanhmã htyk to hkukamã harënh hkêt nê. Kot pa inhmã arĩ kritpêm pa rãhã pa akupÿn ixwryk prãm nhũm arĩ pa nê htyk kêt rãhã pa akupÿn wry. Kêr ka ri htyk kukamã tee ri tanhmã ajamaxpêr to hkêt nê. ãm ixkôt pix mã ate amnhĩ nhĩpêx tÿx pix kukamã mãn ajamaxpêr o ri apa.

²³ Anhÿr o kãm ijarënh jakamã nhũm mẽ ixkwÿjaja kot ã ijarënh anhÿrja ã kuma ma nê htÿx nhÿrmã ixyk kêt ã ixkamnhĩx. Nê gaa nê rĩ piitã axpên mã ã ijarënh anhÿr o pa. Nom na pre ã ijarënh anhÿr kêt nê. Na kêt pre ijarënh o:

—Kot pa inhmã arĩ ri kritpêm pa rãhã pa akupÿn ixwryk prãm nhũm arĩ pa nê htyk kêt rãhã pa akupÿn wry.

Anhÿr o ijarê. Nom ãm hãmri ixyk kêt rãhã nhũm akupÿn wryk ã ijarënh kêt nê.

Juãw kot Jejus kot tanhmã amnhĩ to hã kagà hpar kêt ã kot amnhĩ jarënh

Juãw 20.30-31

²⁴ E na pa mẽ amã Jejus kot tanhmã amnhĩ nhĩpêx to ho pa hã harë nê hã kagà. Ixpê hkôt ri ixpa ho ixpa xwÿnhjê hõ na pa ãm hãmri ã hã kagà anê. Ka mẽ kamã harë nê ama nê ãm hãmri ixte kagà nhĩpêx kôt ixpumunh mex kurê kumrêx. ²⁵ No na pre Jejus ãm ja pix o anhÿr o pa hkêt nê. Na pa ãm mẽ amã hkwÿ pix jarê nê hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhÿx hã kagàja katutxô rax kumrêx. Jao te ra kaxkwa htêp o mõi pyræk.

Tã ãm ja pix. Na hapêx.

Atre

Jejus nhỹ hã mẽ ahkre ho mẽ pa xwýnhjaja kot tanhmã amnhĩ nhĩpêx to ho pa hã mẽ harênh

Rukre na pre kagàja nhĩpêx. Na pre kêp tôtô nê hkwỳjê kane ho pa. Nê Jejus nhỹ hã mẽ ahkre ho pa xwýnh pê Pawre kôt pa ho pa. Hãmri nê hamaxpêr nê hkràmnhwỳ Teopre mã kagàja nhĩpêx nê hwỳr kumê. Nê kagàja kamã Jejus nhỹ hã mẽ ahkre ho mẽ pa xwýnh maatijaja kot Jejus mỳr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwỳ pê Parijew nhõ xwýnhjaja nê mẽ hkwỳ pê Satusew nhõ xwýnhjaja kot Tirtũm kapêr ã kagà htũm kamã harênh nê mar nê hkôt amnhĩ nhĩpêx tã Tirtũm Kra Jejus kôt amnhĩ nhĩpêx kêt ã mẽ harê. Mẽ kot kêp Tirtũm Kra hkêt ã hkamnhĩx jakamã na prem kãm mẽ kot hkôt amnhĩ xunhwỳr xwýnhjê kurê nê. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwýnh kwỳjaja mẽ uràk nê kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tirtũm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhũm Rukre ã mẽ kot amnhĩ nhĩpêx anhỳrja piitã hã kagà nê Teopre hwỳr kumê. Nê kãm mẽ harênh o:

Tirtũm Karõ jarênh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awỳr kagà nhĩpêx nê kumê. Nà wam ixte awỳr kagà nhĩpêx nê mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rũm pa pre piitã hã kagà hpa nê awỳr kumê. ²⁻⁴ Kormã akupỳm kaxkwa hwỳr àpir xwỳj ri na pre ÿ hã mẽ ahkre ho pa kaxyw hkôt mẽ pa xwýnh kwỳjê rê. Tã nhũm mẽ kãm hkurê xwýnhjaja kupĩ nhũm amnhĩ xà htỳx kãm hamak rax kãm ty. Hãmri nhũm Tirtũm akupỳm ho htĩr. Nom nhũm ma akupỳm kaxkwa hwỳr àpir kurê kumrêx kêt nê. Na pre xatã mẽ kot ÿ hã mẽ ahkre ho mẽ pa xwýnh maatijê hwỳr hapôj nhũm mẽ akupỳm htĩr kãm omu. Na pre hte nhỹri mẽ hwỳr hapôj nê tanhmã mẽ ahkre hto nê mẽ kãm:

—Na pre Tirtũm mẽ ato hkra nê tãm mẽ ate amnhĩ nhĩpêx o apa kaxyw mẽ axunhwỳ.

Anhỳr o mẽ ahkre hã arĩgro ho 40. Hãmri nê kormã mẽ kamã pa ri axte tanhmã mẽ kãm kapêr to. Tirtũm Karõ nhỹ hã mẽ kãm kapêr nê mẽ kãm:

—E kêt ka mẽ krĩ ja kamã ri apa nê tokyx ma nhỹhỹm apa hkêt nê. Kê Inhĩpêxà Tirtũm mẽ awỳr amnhĩ Karõ rê mãn. Ra ixte mẽ amã harênh xà hkôt koja mẽ awỳr kurê nhũm mẽ awỳr wrỳ nê mẽ akarõ mã agjê ka mẽ rĩ kormã anhgrà nê ma nhỹhỹm krĩ hkôt ri mẽ kãm kapêr jarênh o ri mẽ hkôt apa.

⁵ —Juãw Paxis na pre hte Tirtũm mã gôx kãm mẽ hkrã kumrãr o pa. Tã koja Tirtũm tokyx mẽ awỳr amnhĩ Karõ rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awỳr kurê. Koja hã apkati grêre nhũm mẽ awỳr kurê nhũm ixpãnhã mẽ awỳr wrỳ nê mẽ amã agjê nê mẽ akamã mẽ akôt pa ho pa. Ka mẽ rĩ kormã Jerujarê rũm ajapôj nê ma mẽ kãm Tirtũm kapêr jarênh o ri mẽ hkôt apa. Anê.

Jejus akupỳm kaxkwa hwỳr àpir ã harênh

Makre 16.19; Rukre 24.50

⁶ Tã nhũm mẽ axte akuprõ. Jejus nê ÿ hã mẽ ahkre ho mẽ pa xwýnh maatijaja nhũm mẽ hixêt pê Oriwêhti nhĩmõk ã axte axpên wỳr akuprõ. Hãmri nhũm mẽ amnhĩ tã Jejus kukja nê kãm:

—Kwa Pahihiti mẽ inhmã mẽmoj jarê. Xà kot kaj tokyx apê Tirtũm kot mẽ ixwỳr amênh xwýnh ã amnhĩ jarê nê Rõm nhõ xwýnhjê nê mẽ pahpê Ijaew kator nà? Hãmri pa mẽ pamjaja amnhĩ to amnhĩptàr o ri ixpa. Anê.

⁷ Hāmri nhūm mẽ kām:

—Nà Inhĩpêxà pix na ã mẽmoj kot anhyrja kukamã àhpumunh. Tapxipix na kot mẽmoj tanhmã ho hã arĩgro nẽ mẽmoj tanhmã ho hã mytwrý pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarēnh ma? ⁸ Nà kot paj ãm mẽ amã mẽmoj to pyxire nẽ hkukamã harẽ. Koja Tĩrtũm tokyx mẽ awýr amnhĩ Karõ rē nhũm ixpãnhã kot mẽ ato amnhĩptãr kaxyw mẽ akarõ mã agjê. Hāmri ka mẽ ma pyka piitã hkõt anhrã nẽ ma mẽ kãm ixkapēr jarēnh o ri mẽ hkõt apa. Jar Jerujarẽ kamã nẽ pika pẽ Jutej kõt nẽ nhãm pika pẽ Samar kamã nẽ pika piitã hkõt mẽ kãm ijarēnh o ri mẽ hkõt apa. ã mẽ ate amnhĩ nhĩpêx anhyr pix kukamã kot paj mẽ amã harẽ. Anẽ.

⁹ Nhũm pre ã Jesus mẽ kãm kapēr anẽ hāmri nẽ mẽ kêp kãnhmã àpir o tẽ nẽ mẽ noo mã ma kaxkwa hwýr àpir o tẽ nẽ kakrãm axà nẽ mẽ kêp akunok. ¹⁰ Hāmri nhũm mẽ tee ri hapēr o kuhê rãhã nhũm mẽhõ myja wa axkrut nẽ mẽ hwýr wrý nẽ mẽ kutã wa xa. Wa ê hakaj nẽ wa xa. ¹¹ Hāmri nẽ mẽ kãm:

—Pa Garirej nhõ xwýnhjaja? Kwa mo kaxyw na ka mẽ tee ri kaxkwa pumunh o akuhê? Tĩrtũm na akupým amnhĩ wýr Kra Jesus o api ka mẽ àpir kãm omu. E mẽ tee ri hkukamã ajamaxpēr kêt nẽ. Koja nhýrmã man akupýn mẽ awýr wrý. Te mẽ arũm kaxkwa hwýr àpirja pyrã nẽ akupýn mẽ awýr wrý ka mẽ omu. Anẽ.

Akupým Jerujarẽ hwýr mẽ mrar ã mẽ harēnh

Rukre 24.52

¹² Tã nhũm Jesus nhỹ hã mẽ ahkre ho mẽ pa xwýnh maatijaja wa kuma nẽ awjanã nẽ ma akupým krĩm mra. Hixêt pẽ Oriwêhti rũm ma akupým Jerujarẽ hwýr mra. Wýr jawý nhũm mẽ akupým hpõx tokyx anẽ. ¹³ Hāmri nẽ akupým kýx pẽ ixkreja wýr api nẽ agjê. Na pre

Simãw Pêtre nẽ

Juãw nẽ

Xiakre nẽ

Andrehti nẽ

Firipti nẽ

Tomas nẽ

Patoromew nẽ

Matêwre nẽ

Xiakre hõ pẽ Apew kraja nẽ

Simãw Jerox nẽ

Jut pẽ Xiakre hkraja.

Mẽ piitã Jesus nhỹ hã mẽ ahkre ho mẽ pa xwýnh maatijaja na pre mẽ. ¹⁴ Nẽ mãänēn mẽ hkõt mẽ hkwyjaja. Jesus katorxà Marir nẽ Jesus tøjaja nẽ Jesus kot tanhmã mẽni ho mex to xwýnh kwýjaja nhũm prem kýx pẽ ixkreja wýr Jesus nhỹ hã mẽ ahkre ho mẽ pa xwýnh maatijê hkõt gjêx pa. Hāmri nẽ xatã axpēn wýr akuprõ nẽ Tĩrtũm mã amnhĩ jarēnh o hkrĩ.

Tĩrtũm kot Jut Kariot pãnhã mẽhõ xãm ã harēnh

Matêwre 27.3-10; Juãw 15.27

¹⁵⁻¹⁹ Tã nhũm mẽ kot Jesus kõt amnhĩ xunhwýr xwýnhjaja ra kêp 120. Jakamã nhũm mẽmo arĩgro hã axpēn wýr akuprõ nẽ hkrĩ. Nhũm Simãw Pêtre kãnhmã xa nẽ tanhmã mẽ kãm Jut Kariot jarēnh to nẽ mẽ kãm:

—E Jesus kõt ixtõ nẽ ixtõxjaja. Pa mẽ amã tanhmã finat Jut Kariot jarēnh to ka mẽ inhma. Na pre axtem nẽ mẽ pahkwýjê mã Jesus ã amýnê nẽ hpãnhã kãxpore hkwy jamý nẽ o tẽ nẽ ho amnhĩm pyka hkwy japrõ. Tã tanhmã amnhĩ to nẽ nhýri õ pyka kamã tēm nẽ amnhĩ tu katõk nẽ hkrêx kato nẽ ty nẽ hkamrõ ho õ pyka xy hpa. Jakamã nhũm Jerujarẽ nhõ xwýnhjaja harēnh ma nẽ pykaja ã hixi mẽ nhũm kêp “pyka kamrõhti.” No mẽ pahpê Ijaew kapēr kãm kêp “Ajetãm.” Amnepēm na pre Tĩrtũm Karõ finat Tawi mã Jut Kariot kukamã tanhmã harēnh to. Kormã kator nẽ kot tanhmã amnhĩ to hkêt tã nhũm ra hkukamã omu nẽ Tawi mã harẽ. Kot axtem nẽ mẽ kãm Jesus ã àmnēnhja nhũm hkukamã omu nẽ Tawi mã harẽ nhũm kuma nẽ ô ri hã kagà. Tã nhũm kot hkukamã hã kagà hkõt

nhũm ã Jejus nhĩpêx anê. Jut Kariotja mẽ panhĩõ na pre. Na pre Jejus mẽ pahpyrà nê amnhĩm kuta. Mẽ pahpyrà nê ÿ hã kapêr jarênh o pa kaxyw. Tã nhũm axtem nê ã hipêx anê.

²⁰ Nom na pre Tawi kot Tĩrtũm mex ã grer ã kagà kot ra hkukamã tanhmã harênh to. Kagà hkwyè pê Sam kamã kot harênh kot:

Kot amnhĩ tomnuj xwỳnhhta nhõrkwỹ koja hkaprỳn kuhê ho kuhê nhũm mẽhõj mỳr pê kamã pa hkêk kumrêx. Kojã ãm arĩ hkaprỳn kuhê ho kuhê.

Nom kot Jejus mã tanhmã amnhĩ nhĩpêx to ho paja kê mẽhõ mỳr pê ho amnhĩptà nê hpãnhã Jejus nhỹ hã mẽ ahkre ho pa. Anê.

Ã Tĩrtũm kapêr ã kagà htũm kot Jut Kariot kukamã harênh kot anhỹr. ²¹ Jakamã e ixkwỳjaja. Kot puj mẽ hpãnhã mẽ atõ xãm ka Jut mỳr pê mẽ pahpê Jejus nhỹ hã mẽ ahkre ho ixpa xwỳnhjê hkõt Jejus akupỹm htĩr ã harênh o apa. ²² E mẽ atõ na ka pre mẽ ixpyràn finat Juãw Paxis kot Jejus hkrã kumrãr ã omu? Nê Jejus kot ri tanhmã amnhĩ nhĩpêx to ho pa xà hkrax rũm ka mẽ ixkõt ri omunh o ri apa? Nê htyk kãm omu nê akupỹm htĩr kãm omu nê ma akupỹm kaxkwa hwỳr àpir kãm omu? E mẽ atõ na ka pre mẽ ixpyràn ã kot amnhĩ nhĩpêx anhỹr ã omunh par o ri hkõt apa? ã mẽ ate kot amnhĩ nhĩpêx anhỹr ã omunh o apa xwỳnhjê hõ kot paj mẽ ata ka Jut Kariot mỳr pê mẽ ixpyràn ma mẽ kãm Jejus akupỹm htĩr ã harênh o ri apa. Anê.

²³ Nhũm pre ã Simãw Pêtre mẽ kãm kapêr anê. Hãmri nhũm mẽ kuma nê axpên pumunh o hkrĩ hãmri nê Maxitre mẽ Jujere wa kãm hamaxpêr. Jujere na pre hixi axkrunêpxi. Na pre kêp Jujere nê kêp Pasapas nê kêp Justi. ²⁴⁻²⁵ Hãmri nhũm mẽ wa hã Tĩrtũm kukja nê kãm:

—Pa Tĩrtũm? Nà na pre finat Jut Kariotja Jejus kaga nê ty nê kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma mō. Tã ot pa mẽ ixte mẽhõ kot mỳr pê mẽ ixpyrà nê Jejus nhỹ hã mẽ ahkre ho pa kaxyw mẽhõ hã akukjêr kaxyw akuprō. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tĩrtũm. Ate mẽ ijamaxpêr kõt mẽ ixpumunh par nê mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kên pijakrutja ã wa hixi xi nê ho àk nê hõ py. Hãmri ka amã hprãm xwỳnhhta ta. Kêr pa mẽ kên pumunh kêt rãhã hõ py nê hã hixi pumu nê amã hprãm xwỳnh kõt omunh kurê kumrêx. Anê.

²⁶ Nhũm prem ã Tĩrtũm mã kapêr anê hãmri nê kênja o axkamur nê ho àk nê omunh kêt rãhã ja py nê omu nhũm hã Maxitre nhĩxi nō. Jakamã nhũm Jejus nhỹ hã mẽ ahkre ho mẽ pa xwỳnh maatijaja amnhĩ kõt kumẽ nhũm mẽ akupỹm kêp 12.

2

Tĩrtũm Karõ kot mẽ hwỳr wrỳk ã harênh

Rukre 24.49; Atre 4.31, 8.15, 10.44, 19.2

¹ Tã nhũm mẽ hkĩnh pê Pêtekos kato nhũm mẽ kot Jejus kõt amnhĩ xunhwỳr xwỳnhjaja nhỹri axpên wỳr akuprō nê hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpên wỳr akuprō nê hã hkĩnh. Jakamã nhũm mẽ kot Jejus kõt amnhĩ xunhwỳr xwỳnhjaja haxwỳja axpên wỳr akuprō. ² Hãmri nê kaxkwa kamã mẽmoj ma. Nhũm mẽmoj te kōk xàpêr tỳx krihkrit pyrak o mẽ hwỳr wrỳk o mō nê mẽ pikuprōnh xà hã ixkreja wỳr axà nhũm mẽ piitã kuma. ³ Hãmri nhũm mẽmoj te kuwy jakrax pyrakja ahpỳnhã mẽ hwỳr anhgrà nê mẽ hkrã nhĩmōk ã hikwỹ. ⁴⁻¹³ Tĩrtũm Karõ na pre. Tãm mẽ hwỳr wrỳk jakamã ã ri mẽ hipêx anê. Hãmri nê kot mẽ ho amnhĩptar kaxyw mẽ hkarōm gjêx pa nhũm mẽ ÿ hã tanhmã kapêr to ho kuhê. Nom mẽ kapêr o kapêr kêt nê. Axtem mẽ kapêr kwỳ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỳnhã mẽ kapêr kwỳ ho Tĩrtũm mã mex o mex ã harê. Na pre Ijaew kwỳjaja ahpỳnhã pyka hõ kamã ri mẽ hkõt pa nê mẽ kapêr ma nê ho kapêr o pa. Tã akupỹm Jerujarê hwỳr pan pōj nê kamã ri pa ho pa. Hãmri nê mẽmojta ma nê ma Jejus

kwỳjê hwỳr hprôt nê ahpÿnhã mẽ kapêr ã mẽ kuma nê tee ri mẽ omunh o kuhê. Amnhĩ jaêr pê mẽ kuma nê tanhmã axpên mã mẽ harênh to ho:

—Kokÿÿ. Garirej nhõ xwÿnhjaja kot mẽ pakapêr mar kêt tâ ra tanhmã amnhĩ to nê ahpÿnhã ri mẽ pakapêr o kapêr. Ahpÿnhã mẽ pakapêr nê ahpÿnhã mẽ panhõ pyka htã nhũm mẽ ã ri mẽ pakapêr o kapêr anê.

Na pika pê Pat

nê Met

nê Erãw

nê Mêsopotãm

nê Jutej

nê Kapatos

nê Põt

nê As

nê Prik

nê Pãpir

nê Ejit

nê Sirên wÿr Ripja

nê krĩ pê Rõm

nê gô hipôk pê Kret

nê Arap.

Nê mẽ pahkwÿjaja mẽ pahpê Ijaew kumrêx

nê mẽ pahkwÿjaja amarĩ ri amnhĩ to Ijaew.

Ăm ahpÿnhã mẽ panhõ pyka nê ahpÿnhã ri mẽ pakapêr.

—Tã pu mẽ ahpÿnhã mẽ pakapêr kãm mẽ kapêr ma. Tĩrtũm mex ã mẽ kot axpên mã harênhja pu mẽ hã mẽ mar mex nê. Anê.

Nhũm prem ã axpên mã mẽ harênh anê nê tee ri mẽ omunh o kuhê. Amnhĩ jaêr pê amnhĩ kapêr kãm mẽ kapêr ma nê tee ri hamaxpêr nê axpên mã:

—Kokÿÿ. Tanhmã mãn pre wem amnhĩ to nê ra mẽ pakapêr ma nê mẽ pakapêr o kapêr? Anê.

Nhũm mẽ hkwÿjaja axtem nê ri mẽ hã hpêr o axkê nê axpên mã:

—Tk. Ăm mẽ pipãnh ã ã ri mẽ kot amnhĩ nhĩpêx anhÿr kênã. Anê.

Simãw Pêtre kot mẽ kãm ujarênh

Atre 3.12-26

¹⁴ Hãmri nhũm Simãw Pêtre ã mẽ kapêr anhÿrja ma hãmri nê kÿx pê mẽ kãm kapêr nê mẽ kãm:

—E Jerujarê nhõ xwÿnhjaja nê mẽ apê ixkwÿ Ijaew. Pa mẽ amã mẽmoj jarê ka mẽ inhma nê inhmar tÿx nê. ¹⁵ Na ka mẽ atÿx ri mẽ ixpipãnh ã mẽ ixkamnhix. Mẽ ixkrã pipãnh kêt. Kormã myt kaxkwa nhĩpôk wÿr htêm kênã. Na hte Ijaew kwÿhtã kagôxÿhti ho hkôm kêt nê. ¹⁶ Ja na pre Tĩrtũm amnepê mã ã mẽ ixte amnhĩ nhĩpêx anhÿrja kukamã mẽ ijarê nhũm ÿ hã kapêr o pa xwÿnh finat Joew mẽ ixkukamã hã kagà. Nê hã kagà ho:

¹⁷ Koja nhÿrmã mẽmoj piitã hapêx kaxyw pa mẽ piitã mẽ hwÿr Ixkarõ rê nhũm ma mẽ hwÿr wrÿ nê mẽ hkarõ mã agjê. Hãmri nhũm mẽ hkanrêhã mẽ hkra xàptàr nywjaja ma mẽ kãm ixkapêr jarênh o ri mẽ hkôt pa. Koja mẽ hpimtir kãm amnhĩ kukamã mẽmoj pumu. Nê mẽhpigêjtaja haxwÿja. Kot paj mẽ hpimtir kãm tanhmã mẽ kãm ixkapêr to.

¹⁸ Nê kot paj mẽ kot ixkôt ri tanhmã amnhĩ nhĩpêx to ho mẽ pa xwÿnhjê hwÿr Ixkarõ rê nhũm mẽ ÿ hã ma mẽ kãm tanhmã ixkapêr jarênh to ho ri mẽ hkôt pa.

¹⁹ Kot paj kaxkwa kamã nê pyka kamã aa mẽ kot mẽmoj pumunh kêt kwÿ ho anê nhũm mẽ amnhĩ jaêr pê omu. Jao nhÿri mẽ hkamrô pumu nê kuwy pumu nê kuwy hkũm pumu hãmri nê tee ri amnhĩ kukamã hamaxpêr.

²⁰ Nê koja myyti ahtyk nhũm mytwrÿre haxwÿja te mry kamrô pyrãk. Pahihti Jejus akupÿn hpôx xà hã arĩgro xwÿj ri koja mẽmoj ã amnhĩ nhĩpêx anê. Akupÿn hpôx xà hã arĩgro koja mex kumrêx.

²¹ Tã koja mēhō mēmoj kot ã amnhĩ nhĩpêx anhÿr ã omu nē amnhĩ kaxyw inhmã hamaxpēr nē amnhĩ to ixwÿ pa kuma nē ho ixkra nē mēmoj punujta pē utà. Anē. Na pre ã Tirtūm kapēr anē nhūm finat Joewja mē pamã hã kagà. ²² E pa mē amã tanhmã Jejus jarēnh to ka mē inhma. Nà Najare nhō xwÿnh na pre. Mē pahte Tirtūm nhÿ hã kot tanhmã amnhĩ nhĩpêx to ho pa hã omunh kaxyw na pre Tirtūm mē pahwÿr kumē nhūm ÿ hã mē panoo mã tanhmã amnhĩ nhĩpêx to ho pa. Nē aa mē pahte mēmoj pumunh kêt kwÿ ho anhÿr o pa pu prem hã omu.

²³ —Tã ka prem tanhmã kaxyw ajamaxpēr punuj to nē apĩ. Tirtūm ra kot amnepê mã ja kukamã ja hã mē apumunh mex tã mē pahwÿr kumē ka mē axtem nē apĩ. Jao mē kot htÿx ri amnhĩ nhĩpêx o mē pa xwÿnhjê mã agō nhūm mē kupĩ. Pĩ kahpa hã kunhō nhūm ty. No ãm mē kajaja na ka prem mē kãm hã amÿnê nhūm mē ã mē amã hprãm xà hkôt hipêx anē nē mē amã kupĩ.

²⁴ —Tã nhūm Tirtūm akupÿm ho htĩr nhūm akupÿm htĩr o htĩr nhūm mē htykja tee ri kot amnhĩ kôt mēnh prãm kaprÿ. ²⁵ Amnepêm na pre finat Tawija Jejus akupÿm htĩr kukamã harē. Te Jejus tãm kapēr pyrãk o kapēr nē kapēr o:

Na hte Pahi Maati ixkôt pa ho pa rãhã nē. Kot inhĩhkô hã ixtãnopxar o pa jakamã kot paj inhmã ma hkêt nē ri ixãmnhix ijamakêtkati nē ri ixpa.

²⁶⁻²⁷ Pa Tirtūm? Nà kot paj nhÿrmã ixtÿk tã arĩ amnhĩ wÿr akãm ama. Kot kaj mē htykjê kamã ixkarō rer kêt nē. Ixte akapēr kôt amnhĩ nhĩpêx mex o ri ixpa jakamã koja inhĩ kormã omnu nē hkro hkêt ri ka akupÿm ixto ixtĩr. Jakamã na pa inhmã ixtÿk pÿma hkêt nē ixkĩnh nē ijamakêtkati nē ri ixpa. Nē amnhĩ kĩnh jarēnh rãhã ho ri ixpa.

²⁸ Na ka pre akupÿm ixto ixtĩr ã amnhĩ jarē pa ixtĩr tūm nē ixpa ho ixpa kaxyw. Tã ate ixkôt ri apa rãhã jakamã pa ixkĩnh nē ri ixpa. Anē.

²⁹ ã na pre mē panhĩgêt finat Pahi Tawija Jejus htyk nē akupÿm htĩr kukamã harēnh anē. No tãm amnhĩ jarēnh kêt nē. Tawija na pre ty nhūm mē haxà nhūm htem arĩ haxàr xà hã pika ho mex o pa. Tã tãm ã kot amnhĩ jarēnh anhÿr ro nhÿx akupÿm htĩr nhūm mē arĩ haxàr xà kaprÿ ho mex o pa hkêt nē. ³⁰ Pahi Tawi kēp Tirtūm nhÿ hã kapēr jarēnh o pa xwÿnh jakamã nhūm Tirtūm kãm hkanrēhã htãmnhwÿ Jejusja kukamã harē nē kãm: Koja nhÿrmã akanrēhã atãmnhwÿjê hō amÿr pē apÿrà nē mē ho amnhĩptar o pa. ãm hãmri na pa amã ja jarē. Anē.

³¹ Nhūm pre ã Tirtūm Tawi mã mē pakaxyw ãm mã xwÿnhhta jarēnh anē nhūm kuma. Nē mar tÿx jakamã hkukamã htyk nē akupÿm htĩr ã harē nē hã kagà. Nē hã kagà ho:

Koja Tirtūm mē htykjê kamã hkarō rer kêt nē nhūm aa ĩ omnu nē hkro kêt. Anē.

ã na pre finat Tawija Jejus Kris kukamã harē nē hã kagà anē. ³² Kot harēnh xwÿnh Jejusja tãm na pre Tirtūm akupÿm ho htĩr pa mē pamjaja akupÿm htĩr kãm omu. Hãmri nē mē ixte omunh xà hkôt ã mē amã harēnh anē. Anē.

Nhūm pre ã Simãw Pêtre mē kãm Jejus jarēnh anē. Hãmri nē mē kãm:

³³ —Na pre Tirtūm akupÿm amnhĩ wÿr Kra Jejus o api. Hãmri nē kãm anē nhūm ĩhkô hã mēmoj piitã ho amnhĩptar o hkrĩ. Hãmri nhūm Tirtūm kot kãm amnhĩ jarēnh xà hkôt kãm amnhĩ Karō gō. Tã nhūm ra amnhĩ pyrã nē mē ixwÿr kurē nhūm jarãhã mē ixwÿr te kuwy jakrax pyrã nē mē ixwÿr wrÿ nē mē ixkarō hwÿr gjêx pa. Hãmri pa mē ÿ hã ahpÿnhã mē akapēr o ixkapēr ka mē inhma. Tã mē akwÿjaja axtem nē mē xpipãnh ã mē ixkamnhix. ³⁴ No finat Tawija na pre tãm kaxkwa hwÿr àpir ã amnhĩ jarēnh kêt nē. Jejus kot ĩ ho kaxkwa hwÿr àpirja na pre harē nē harēnh o:

Na pre Tirtūm inhō Pahihti mã kapēr nē kãm:

³⁵ “E jar inhĩhkô hã nhÿ.

Pa amã mē kãm akurê xwÿnhjê gō ka mē ho amnhĩptar o akrĩ.” Anē.

ã na pre finat Tawija Tirtūm kapēr jarēnh anē. Nom tãm ĩ rãhã kaxkwa hwÿr àpir ã amnhĩ jarēnh kêt nē. Pahihti Jejus na pre ã hã harēnh anē. ³⁶ Jakamã kwa ixkwÿ Ijaew. Mē inhma nē inhmar tÿx nē. Mē ate Jejus ã axãmnhēnh nhūm mē kot mē amã pĩ kahpa

hã hpîr xwÿnhnta. Tãm na pre Tîrtûmja kêp mẽ panhõ Pahihti kaxyw ãm. Nẽ kêp mẽ papytâr xwÿnh kaxyw mẽ pakaxyw ãm. Anẽ.

³⁷ Nhũm pre ã Simãw Pêtre mẽ kãm ujarênh anhÿr o xa. Hãmri nhũm mẽ tee ri ujarênhja ma nẽ hkaprĩ nẽ. Nẽ tee ri amnhĩ kukamã hamaxpêr nẽ hamaxpêr o:

—Hêxta waa nẽ. Pêr ãm hãmri na pre Jejus mẽ pamã amnhĩ jarênh tã pu prem amnhĩ kaxyw hkôt pajamaxpêr kêt nẽ axtem nẽ kupĩ. Anẽ.

Hãmri nẽ amnhĩ tã mẽ hkukja nẽ Simãw Pêtre mã:

—Kwa ã kot anhÿr jakamã tanhmã kot paj mẽ amnhĩ nhĩpêx to? Anẽ.

³⁸ Hãmri nhũm mẽ kãm:

—Nà kêr ka mẽ tee ri ate amnhĩ tomnuj mã ajamaxpêr nẽ akaprĩ nẽ. Hãmri nẽ Jejus Kris kôt amnhĩ xunhwÿ. Pa mẽ ja hã mẽ apumu nẽ Jejus nhÿ hã mẽ akrã kumrã. Hãmri nhũm Tîrtûm ja hã mẽ apumu nẽ te amnhĩ katut kôt mẽ ate amnhĩ tomnuj piitã rênh par pyrã nẽ axte kãm hamaxpêr kêt nẽ. Hãmri nẽ mẽ ixkuxwar mẽ awÿr amnhĩ Karõ rẽ.

³⁹ Kãm mẽ awÿr rênh prãm. Mẽ amã nẽ mẽ akanrêhã mẽ akra nẽ mẽ atãmnhwÿjê mã nẽ mẽ kot kormã Tîrtûm kapêr mar kêt xwÿnhjê mã. ãm mẽ kot amnhĩ to hwÿr xwÿnh piitã nhũm kãm mẽ hwÿr rênh prãm. Anẽ.

⁴⁰ Nhũm pre ã Simãw Pêtre mẽ kãm ujarênh anẽ. Mẽ kãm kapêr xihtÿx o kapêr ry nẽ. Hãmri nẽ mẽ kãm:

—Koja nhÿrmã Tîrtûm mẽ kot tanhmã amnhĩ tomnuj to ho mẽ pa xwÿnhjaja tanhmã mẽ homnuj tÿx to. Jakamã kwa mẽ tokyx mẽ ate amnhĩ tomnuj kaga kê tanhmã mẽ ato hkêt nẽ. Anẽ.

⁴¹ Hãmri nhũm mẽ hkwyjaja kapêr mar tÿx nẽ amnhĩ kaxyw Jejus kôt hamaxpêr nẽ hkôt amnhĩ xunhwÿ. Mẽ ohtô rax nẽ hkôt amnhĩ xunhwÿ. Mẽ kêp 3.000 nẽ hkôt amnhĩ xunhwÿ. Hãmri nhũm mẽ kot Jejus nhÿ hã kapêr jarênh o mẽ pa xwÿnhjaja mẽ hkrã kumrãr pa. Mẽ kêp Jejus kwÿ hã amnhĩ to amnhĩrit kaxyw mẽ hkrã kumrãr pa. ⁴² Hãmri nhũm mẽ ra mẽ kot Jejus kôt amnhĩ nhĩpêx xwÿnhjê hkôt amnhĩ nhĩpêx o pa nhũm Jejus nhÿ hã mẽ ahkre xwÿnh maatijaja apkati mẽ Jejus kapêr o mẽ ahkre nhũm mẽ mar tÿx nẽ ra Jejus kôt amnhĩ nhĩpêx mex o mō. Nẽ gaa nẽ hkôt amnhĩ nhĩpêx mex o pa. Mẽ kãm kapêr mar prãm tÿx jakamã na pre htem axpên wÿr akuprõ nẽ axpên kutã apku nẽ Tîrtûm mã amnhĩ jarênh o hkrĩ. Nẽ mẽ kãm axpên to mex pix prãm o axpên kôt pa ho pa.

Jejus kwÿ kot tanhmã amnhĩ nhĩpêx to hã mẽ harênh

Atre 4.32-35

⁴³ Tã nhũm Jejus nhÿ hã mẽ ahkre ho mẽ pa xwÿnh maatijaja xatã Tîrtûm nhÿ hã aa mẽ kot mẽmoj pumunh kêt kwÿ ho anhÿr o ri krĩ nhõ xwÿnhjê hkôt pa nhũm mẽ piitã ja hã mẽ omu. Amnhĩ jaêr pê mẽ omu nẽ mẽ kamã no puma ho tee ri tanhmã Tîrtûm mã hamaxpêr to. ⁴⁴ Nhũm mẽ kot Jejus kôt amnhĩ xunhwÿr xwÿnh piitã mẽmoj to axpên kutã nojarêt o pa. Jao axpên pê ri mẽmoj to õxÿ hkêt nẽ pa. ⁴⁵ Jakamã nhũm mẽhõ kêp amrakati nhũm mẽ ja hã omu hãmri nẽ õ pyka hkwy ho wênê rÿ mẽ hikukrêx kwÿ ho wênê nẽ kàxpore jamÿ nẽ ma o mra nẽ mẽ kãm kugõ. Na pre hte ã mẽ kot Jejus kôt amnhĩ xunhwÿr xwÿnhjaja axpên nhĩpêx anhÿr o pa. ⁴⁶ Hãmri nẽ apkati mẽ Tîrtûm mã amnhĩ jarênh xà hã ixkre hwÿr mra nẽ kãm mex o mex ã harê. Nẽ hamakêtkati nẽ àmnhix ri hkĩnh kãm axpên nhõrkwy hkôt ri apkur o pa. ⁴⁷ Pê Tîrtûm mã mex o mex ã harênh o ri axpên kôt pa. ã mẽ kot amnhĩ nhĩpêx anhÿr o pa jakamã nhũm krĩ nhõ xwÿnh piitã kãm mẽ hkĩnh nẽ. Nẽ mẽ hkwyjaja apkati mẽ mẽ hwÿr mra nẽ mẽ hkôt axkamẽ nẽ mẽ urak nẽ Jejus kôt amnhĩ xunhwÿ nhũm Tîrtûm ja hã mẽ omu nẽ mẽ ho hkra. Jakamã nhũm mẽ ra ohtô rax kumrêx o mō.

3

Te grã xwÿnh jarênh

Juãw 14.12-14; Atre 14.8-10

¹ Tã nhũm apkati hõ hã nhũm Simãw Pêtre mẽ Juãw wa ma Tîrtûm mã amnhĩ jarênh xà hã ixkre hwÿr wa tẽ. Na pre hte myt àhpanh grire nhũm mẽ piitã kot Tîrtûm mã

amnhĩ jarēnh kaxyw hwỳr mra. Jakamã nhũm Simãw Pêtre mẽ Juãw wa haxwỳja ma hwỳr wa mra. ² Nhũm mēhōja hakwakrem hkrĩ. Katorxà nhōxà hkre rũm hte grà nē kator xwỳnhhta. Nē arĩ hkrĩ ho hkrĩ nē aa kànhmã ãm nē ri pa hkêt nē. Nhũm hte hkràmnhwỳjaja apkati mẽ hamỳ nē ma o pa nē Tĩrtũm mã amnhĩ jarēnh xà hã ixkre jakwakrem hkrĩ nhũm mẽ hwỳr o hkrĩ. Hakwakreja mẽ kot kãm: “Mē gjêx xà mex” anhỹr xwỳnhhta kapem hwỳr mẽ mrar xwỳnhjê hwỳr o hkrĩ. ³ Tã nhũm Simãw Pêtre mẽ Juãw wa tē nē ixkreja wỳr wa àr o tē nhũm hte grà xwỳnhhta wa omu nē kàxpore hã wa kuwỳ ⁴ nhũm Simãw Pêtre omu nē kãm:

—E amnē wa ixpumu. Anē.

⁵ Hãmri nhũm kuma nē htỳx ho wa kot kãm kàxpore hkwy nhōr ã wa hkamnhĩx nē wa omu ⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pē Najare nhō xwỳnhhta nhỹ hã amã ixkapêr jakamã tokyx kànhmã xa nē ri mra. Anē.

⁷ Hãmri nē upôk rũm hpa hã kupy nē kànhmã ãm nhũm hte mex nē kànhmã xa nē amnhĩ te karo ho ri mra. ⁸ Hãmri nē hte mex ã amnhĩ pumu nē hkĩnh tỳx nē. Nē hkĩnh xàj ma wa hkôt harĩ ho tē nē wa hkôt ixkrem axà. Tĩrtũm mã mex o mex ã harēnh pē harĩ ho wa hkôt tēn axà. ⁹ Hãmri nhũm mẽ piitã amnhĩ jaêr pē akupỹm mex ã omu nē kamã no puma nē. ¹⁰ Nē axpēn mã:

—Kokỹỹ mũjti na pre hte mẽ gjêx xà mex kamã mẽ hwỳr rãhã ho hkrĩ htã nhũm Tĩrtũm tanhmã ho nhũm kànhmã xa nē ri mrar mex kurê kumrêx. Hêxta waa nē. Anē.

Simãw Pêtre kot mẽ kãm ujarēnh

Rukre 24.46-47; Atre 2.14-36

¹¹ Hãmri nhũm hte mex xwỳnhja Simãw Pêtre mẽ Juãw wa hkôt ixkre hwỳr axà nē wa kuri xa. Nhũm mẽ piitã amnhĩ jaêr pē harēnh ma nē hwỳr hprôt nē agjê nē omu. Mē kot ixkre nhĩkjê jarēnh o: “Pahi Sarumãw nhō” anhỹr xwỳnh jarēnhja wỳr nhũm mẽ hprôt nē hte mex xwỳnhhta kamã no puma ho kuhê. Nē kuri Simãw Pêtre mẽ Juãw wa omu nē axpēn mã wa harēnh o:

—Hêxta waa nē. Tanhmã na we wa amnhĩ to nē akupỹm kãm hte ho mex nhũm ri mra?

Anē nē wa kamã no puma nē. ¹² Hãmri nhũm Simãw Pêtre mẽ kuma nē mẽ kãm:

—Pa ixkwỳjaja. Kwa mēmo na ka mẽ ri mẽ ixkamã ano puma ho akuhê? Xà wa ixàhpumunh tỳx xà ho na pa wa ho mex? Nà ja kot anhỹr kêt. Rỳ xà wa ixte Tĩrtũm kôt amnhĩ nhĩpêx mex o ixpaja o na pa wa ho mex? Nà mãânēn ja kot anhỹr kêt. ¹³⁻¹⁷ Mē ate omunh xwỳnhhta Jejus tãm kot ho mex kênã. Kot amnhĩ kaxyw kãm hamaxpêr tỳx jakamã nhũm akupỹm ho mex ka mẽ omu.

—Finat Apraãw nē Ijak nē Jako mẽ hkwyjaja kot hkôt amnhĩ nhĩpêx o pa xwỳnh pē Tĩrtũmja. Tãm na pre akupỹm Kra Jejus o htĩr nē mex o mex ã harē. Mē ate hã axàmnēnh nhũm mẽ kot hpĩr xwỳnhhta. Pahihti Pirat kot kãm urer kaxyw tã ka mẽ nē kãm akapêr kãm axihtỳx nē. Nom Jejus tãm kot amnhĩ nhĩpêx o pa xwỳnh na pre. Na pre hte amnhĩ nhĩpêx mex rãhã ho pa htã ka mẽ axtem nē hkaga. Nhũm pahihti Pirat mẽ ate kot kãm urer kêt ã axihtỳx nhũm kãm urer kêt nē õ pōristi mã kugō nhũm mẽ amã kupĩ. Mē kajaja mẽ amã hprãm xà hkôt mẽ amã kupĩ. Tĩrtũm kot mẽ pahwỳr mēnh tã ka mẽ axtem nē apĩ.

—Nom mẽ ate kēp Tĩrtũm Kra hã omunh kêt jakamã na ka prem ã hipêx anē. Mē kot mẽ ato amnhĩptar xwỳnhjê mẽ na ka prem amarĩ apĩ. Na prem mẽ axàmnēnh xà hkôt mẽ amã pĩ kahpa hã kunhō nē ã hpĩr anē. Kēp akupỹm mẽ pahto mẽ pahtĩr xwỳnh tã ka prem axtem nē apĩ. No nhũm Tĩrtũm akupỹm ho htĩr pa prem akupỹm htĩr kãm omu.

¹⁸ —Amnepēm Tĩrtũm nhỹ hã kapêr jarēnh o mẽ pa xwỳnhjaja na prem Tĩrtũm kot mẽ pakaxyw ãm xwỳnhja kukamã tanhmã harēnh to nē hã kagà nē mẽ kãm harēnh o pa. Kot amnhĩ xà htỳx kãm hamak kãm htykja kukamã nhũm pre htem harēnh o pa. Tã ã Tĩrtũm kot kukamã harēnh anhỹr xàja kôt ka mẽ ã hipêx anē nē apĩ.

¹⁹—Jakamã kwa mẽ tee ri mẽ ate amnhĩ tomnuj ã amnhĩ pumu nẽ tokyx hkaga. Hãmri nẽ amnhĩ to Tĩrtũm wỳ kê mẽ anẽ mẽ ate amnhĩ tomnuj piitã amnhĩ katut kôt rēnh pa.

²⁰Hãmri nẽ mẽ ato mex nẽ ka mẽ kukwak ri akĩnh nẽ ajamakêtkati nẽ axàmnhĩx ri apa. Koja nhỹrmã akupỹn mẽ pahwỳr Jejus mẽ. Ra kot mẽ pakaxyw ãm kēnã.

²¹—Nom koja tokyx akupỹn wrỳk kêt nẽ. Koja kormã kaxkwa kamã pa rãhã nhũm Tĩrtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwỳr wrỳ. Amnepēm Tĩrtũm nhỹ hã kapēr jarēnh o pa xwỳnhjaja kot ja kukamã harēnh nẽ hã kagà xà hkôt.

²²—Na pre finat Mojes haxwỳja Tĩrtũm nhỹ hã mẽ pahpãmjê mã tanhmã ja jarēnh to nẽ harēnh o:

Koja nhỹrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrã nẽ axte mẽ panhĩõ xãm. Mẽ panhĩõ koja. Koja nhỹrmã inhmỳr pē mōn pōj nẽ mẽ amã Tĩrtũm kapēr jarēnh o pa. Ka mẽ kapēr ma nẽ mar tỳx nẽ kapēr kôt amnhĩ nhĩpêx o ri apa.

²³Koja mẽhõ kuma nẽ ãm kuma nẽ hkôt amnhĩ nhĩpêx kêt nẽ nhũm Tĩrtũm tee ri ja hã omu nẽ kēp hkra hkêt ã harēnh kurê kumrēx. Anẽ.

²⁴ ã na pre finat Mojesja mẽ kãm Jejus kukamã ujarēnh anẽ. No ãm tapxipix na pre ã harēnh anhỹr kêt nẽ. Tĩrtũm nhỹ hã mẽ kapēr o mẽ pa xwỳnh piitã na prem ã mẽ kãm harēnh anhỹr o pa. Kot harēnh o pa xwỳnh kot wa finat Sãmuewja nẽ hkôt mẽ hkwyjê piitã ã Jejus kukamã hkwyjê mã harēnh anhỹr o pa.

²⁵—Tã mẽ pahpê mẽ hkamrô hkwy na pu mẽ. Mẽ pahpê mẽ hkanrēhã mẽ htãmnhwỳy. Mẽ pakaxyw na pre Tĩrtũm ã mẽ kãm kapēr anẽ. Nẽ Kraja kukamã finat Apraãw mã kãm: Koja nhỹrmã akanrēhã atãmnhwỳjê hõ pyka piitã hkôt mẽ piitã mẽ ho mex o pa nhũm mẽ kukwak ri mex kumrēx nẽ ri pa. Anẽ.

²⁶ ã kot Kra hkukamã harēnh anhỹr tã mẽ pakumrēxjê hwỳr na pre kumẽ. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpê Ijaew kumrēxjê hwỳr kumẽ. Anẽ.

Nhũm pre ã Simãw Pêtreja hte grã xwỳnh pumunh o mẽ kuhê xwỳnhjê mã ujarēnh anẽ.

4

Simãw Pêtre mẽ Juãw wa kot mẽ àptàr tũmjê mã kapēr ã wa harēnh

Rukre 21.12-13

¹⁻⁴Nhũm Simãw Pêtre mẽ Juãw wa arĩ mẽ kãm Tĩrtũm kapēr jarēnh o wa xa nẽ mẽ kãm:

—Nà na pre Jejus ty nhũm Tĩrtũm akupỹm ho htĩr. Tã kot akupỹm ho htĩr jakamã koja nhỹrmã uràk nẽ akupỹm mẽ htyk xwỳnh piitã mẽ ho htĩr pa. Anẽ.

Hãmri nhũm mẽ kot wa mar o kuhê xwỳnh kwỳjaja wa kuma nẽ wa hkôt hamaxpēr nẽ wa urà nẽ Jejus kôt amnhĩ xunhwỳ. Jakamã nhũm ra mẽ kot Jejus kôt amnhĩ xunhwỳr xwỳnhjaja ohtô rax kumrēx. Ra mẽ kēp 5.000.

Hãmri nhũm axtem mẽ hkwyjaja wa hwỳr mra nẽ wa mar o kuhê. Mẽ õ patre nhõ pōristi krãhtũm mẽ Satusew nhõ xwỳnh kwỳjê mẽ nhũm mẽ ma Simãw Pêtre mẽ Juãw wa hwỳr mra nẽ tee ri wa kot mẽ ahkre hã wa mar o kuhê. Nẽ mẽ kãm akupỹm mẽ htĩr jarēnhja ma nẽ wa kamã gryk nẽ. Satusew nhõ xwỳnhjaja na pre htem akupỹm mẽ htĩr kôt hamaxpēr kêt jakamã nhũm wa akupỹm mẽ htĩr jarē nhũm mẽ tee ri wa kuma nẽ hamaxpēr punuj nẽ wa kamã gryk kato. Hãmri nẽ wa hã amỳnê nhũm mẽ wa unê nẽ ma wa o tē nẽ mẽ hagjēnh xà kamã wa haxà. Ra myt grire nhũm mẽ wa haxà. Wa kot mẽ hagjēnh xà kamã hã apkati nhũm rĩ kormã mẽ kot ujarēnh ã tanhmã wa ho kaxyw.

⁵⁻⁶Tã nhũm apkati nhũm mẽ ohtô nẽ wa ujarēnh ã wa mar kaxyw Jerujarē kamã axpēn wỳr akuprõ. Ijaew pigêtjaja nẽ mẽ àptàr tũm kwỳjaja. Nẽ mẽ kot finat Mojes kapēr o mẽ ahkre ho mẽ pa xwỳnhjaja. Nẽ mẽ õ patre maati Anas mẽ hkwyja. Nẽ Ijaew nhõ juisti Kajpas mẽ Juãw õ mẽ Aresãnja. Nhũm mẽ kot Simãw Pêtre mẽ Juãw wa mar kaxyw axpēn wỳr akuprõ. ⁷Hãmri nẽ wa hã karõ nhũm pōristi wa hwỳr tē nẽ wa haprõ nẽ ma mẽ hwỳr

wa o tē nē wa ho axà nē mē kutā wa ȳr nhūm wa nhỹ. Hāmri nhūm mē wa omu nē wa kām:

—E mē inhmā amnhĩ jarē. Mēhō xàhpumunh xà ho na ka pre wa hte grà xwỳnhhta ho mex? Mēhō na pre hwỳr war amē ka wa ho mex? Anē.

⁸ Hāmri nhūm Simāw Pêtre mē kām awjarē. Tirtūm Karō kot kām hamaxpēr o hihtỳx jakamā nhūm ȳ hā Ijaew pigêtjê mē mē àptār tūmjê mā awjarē nē mē kām:

⁹ —Tôe mēhō kot ho mex xwỳnhja ā mē ate wa ixkukjêr ¹⁰ jakamā kot paj mē amā harē ka mē ixte harēnhja ma. Wa ixpyrà nē mē apê Ijaew kêr ka mē wa ixkapēr mar tỳx nē. Jejus Kris pê Najare nhō xwỳnhhta. Mē ate hpĩr nhūm Tirtūm kot akupỳm ho htĩr xwỳnhhta. Tām na pre àhpumunh tỳx o akupỳm hte grà xwỳnhhta o mex. ȳ hā ixte kaxyw kām ixkapēr nhūm tām akupỳm ho mex. ¹¹ Tirtūm kot mex o mex ā harēnh nē mē pakaxyw am tā ka prem axtem nē hkaga. Nom Tirtūm kapēr ā kagā htūm kot ra mē akukamā ā mē ate amnhĩ nhĩpêx anhỹr ā mē ajarēnh nē mē ajarēnh kot:

Mē kot kēn o amnhĩm ōrkwỹ nhĩpêx kaxyw nē nhỹri kēn maati pumu nē htỳx omnuj ā hkamnhĩx nē hkaga. Mē kot hkaga htā nhūm Tirtūm mē kurom mex o kot kēn piitā hakrenh par ā omunh kurē kumrēx.

Anhỹr o kot mē ajarēnh. Te mē ate kēn maati kaga xwỳnh ā mē ajarēnh pyrāk. Tā ka mē ā mē kot mē akukamā mē ajarēnh anhỹrja kôt te mē ate kēn maati kaga pyrā nē Jejus kaga nē apĩ. Tirtūm kot amnhĩm mex o mex ā omunh nē harēnh tā ka prem axtem nē hkaga.

¹² Tapxipix na hte mē panê mē pahte amnhĩ tomnuj rē. Mēhō koja urāk nē àhpumunh tỳx o mē panê kurē? Mēhō koja ahpỳnhā pyka piitā hkôt urāk nē ā mē panhĩpêx mex anē? Nà am amrakati kumrēx. Am Jejus pix. Tapxipix na pre Tirtūm ja kaxyw am jakamā tapxipix na kēp mē pahkaprĩ xwỳnh maati. Anē.

¹³ Nhūm pre ā Simāw Pêtreja mē kām kapēr anē. Hāmri nhūm mē amnhĩ jaêr pê kuma nē axpēn mā:

—Kwa wa kām mē pahpyma wa hā hkwy jêt kêt kumrēx. Te ri wa htỳx ri wa pa pyrāk tā wa hamaxpēr tỳx kumrēx. Mān wa kēp Jejus kôt mē pa ho mē pa xwỳnh kwỳ jakamā na wa ā kapēr anē nà? Anē.

¹⁴ Hāmri nē tee ri kot tanhmā mēmoj tā wa kām àkjêr to hkukamā hamaxpēr. No nhūm hte grà xwỳnh ra kot mē hwỳr àr nē Simāw Pêtre wa kuri mex nē am nhūm mē kot no ho omunh jakamā wa kām àkjêr kêt nē. ¹⁵ Hāmri nē wa kām anē nhūm wa mē kēp kato nē kapôt ā xa nhūm mē tanhmā wa kām nē kaxyw wa hā axpēn ma nē axpēn mā:

¹⁶ —Kwa tanhmā kot puj mē wa ho? Ra jar Jerujarē kamā mē piitā mē kot akupỳm hte grà xwỳnhhta mex ā wa omunh kēnā kot puj kêt mē kām wa kot ho mex hkêt ā wa harē.

¹⁷ Tā mē kot harēnh o hprôt pymaj kot puj mē axte Jejus jarēnh o pa nē wa hkurê. Kê hte grà xwỳnh jarēnhja am jar mē pakamā hapêx. Nà kot puj mē ā wa kām karō anē. Anē.

¹⁸ Nhūm mē wa hā axpēn mar pa hāmri nē akupỳn wa hā karō nhūm wa akupỳn mē hwỳr axà nhūm mē wa kām:

—E Simāw Pêtre mē Juāw wa. Wa māmri ma tē. Nom kêr ka wa mē ixkapēr mar kumrēx. Kêr ka wa axte ri tanhmā mē kām Jejus jarēnh to ho ri apa hkêt nē. Am kwarĩ ho kwarĩ. Anē.

¹⁹ Hāmri nhūm wa tee ri mē kuma nē mē kām:

—Nà Tirtūm tām kot ja hā wa inhmā karō kēnā kot pa kêt wa mē akapēr ma nē harēnh o ixpa hkêt nē. ²⁰ Na pa pre wa Jejus kôt ri ixpa nē xatā kot tanhmā amnhĩ nhĩpêx to hā omunh o hkôt ixpa. Nē xatā tanhmā mē ahkre hto hā mar o hkôt ixpa. Nē akupỳm htĩr kām omu. Jakamā tanhmā kot pa wa amnhĩ to nē mē kām ja jarēnh kêt nē? Nà kot pa wa mē akapēr mar xà hkôt ā amnhĩ nhĩpêx anhỹr hkêt nē. Anē.

²¹⁻²² Hāmri nhūm mē kuma nē tee ri mē kot tanhmā wa ho kaxyw. Te grà xwỳnhhta hte grà nē hkrĩ ho hā amgrà pê 40 tā ra akupỳm mex nhūm mē piitā ja hā omu nē hā axpēn mā Tirtūm mex o mex ā harēnh o ri pa. Jakamā nhūm mē utār xwỳnhjaja mē kuma nē kām mē uma nē. Hāmri nē mē umaj tanhmā Simāw Pêtre mē Juāw wa ho hkêt nē. Am axte wa kot Jejus jarēnh o pa nē wa kām kapēr kām hihtỳx nē wa hano nhūm wa ma tē.

Mě kot amnhĩ to Tirtũm wỳr ã mẽ harēnh

Matêwre 18.19-20

²³ Tã nhũm Simãw Pêtre mẽ Juãw wa ma akupỹm Jejus kôt htõ nẽ htõxjê hwỳr wa tẽ nẽ mẽ kãm amnhĩ jarẽ. Nẽ patre krãhtũmjê mẽ mẽ àptàr tũmjaja kot Jejus kapẽr jarēnh nẽ wa hkurê kamã hihtỳxja nhũm amnhĩ tã mẽ kãm mẽ harẽ. ²⁴ Hãmri nhũm mẽ wa kuma nẽ amnhĩ to Tirtũm wỳr kurê kumrẽx nẽ kãm:

—Pa Pahi Maati? Nà mẽmoj piitã ho akator xwỳnhhta na ka. Na ka pre kaxkwa ho akato nẽ pyka ho akato nẽ gô xujanãr o akato. Hãmri nẽ kamã mẽmoj piitã ho akator pa. ²⁵⁻²⁶ Amnepẽm na pre mẽ inhĩgêt Tawija amã tanhmã amnhĩ nhĩpêx to ho pa. Nẽ Akarõ nhỹ hã akapẽr kwỳ jarẽ nẽ hã kagà. Nẽ kagàja kamã mẽ kot Pahihti Jejus kutã amnhĩ xunhwỳr xwỳnhjê jarẽ nẽ mẽ hã kagà. Mẽ hkukamã mẽ hã kagà nẽ mẽ hã kagà ho:

Mẽmo mỳrapê na prem Ijaew kêt xwỳnhjaja Tirtũm kutã amnhĩ xunhwỳ?

Nẽ Ijaew haxwỳja. Mẽmo mỳrapê na prem htỳx ri hamaxpẽr o ri pa?

Nẽ pyka piitã hkôt pahijaja na prem Pahi Maati kutã amnhĩ xunhwỳr pa.

Nẽ kot mẽ pakaxyw ãm xwỳnh Jejus Krisja nhũm mẽ mããnẽn kutã amnhĩ xunhwỳr pa.

Nẽ mẽ kot hpĩr kaxyw mẽ kãm hã amỳnê.

Kwa mẽmo mỳrapê na prem axtem nẽ ã amnhĩ nhĩpêx anẽ? Anẽ.

Ã na pre finat Tawija Akarõ nhỹ hã mẽ harẽ nẽ hã kagà anẽ Tirtũm. ²⁷ ãm hãmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhỹr kênã. Krĩ ja kamã na prem ã amnhĩ nhĩpêx anhỹr kaxyw axpẽn wỳr akuprõ. Pahi Erox nẽ pahi Põn Pirat nẽ mẽ ixkwỳjaja nẽ mẽ kêp Ijaew kêt xwỳnhjaja axpẽn wỳr akuprõ nẽ Akra Jejus kutã amnhĩ xunhwỳ nẽ mẽ kot hpĩr kaxyw hã amỳnê. Kot tãm amnhĩ nhĩpêx o pa nhũm ate mẽ ixkaxyw ãm xwỳnhja nhũm mẽ axtem nẽ kutã amnhĩ xunhwỳ.

²⁸ —Nom amnepẽm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhỹr ã mẽ omu. Mẽ kot tanhmã apê Akra Jejus to nẽ hpĩrta kukamã ka pre hã mẽ omu. Tã mẽ ixwỳr amẽ nhũm prem kupĩ. No ãm ajamaxpẽr xà hkôt.

²⁹ —Tã ka mẽ omu. Na mẽ Jejus ã mẽ ixkamã gryk tỳx nẽ tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwỳnhjaja ka tanhmã mẽ ixkrã hto pa mẽ inhmã mẽ uma hkêt nẽ mẽ hkôt ixpa ho ixpa. Mẽ kot tanhmã mẽ ixto hã mẽ ixkagrõnh tã pa mẽ inhmã mẽ uma hkêt nẽ ixãmnhĩx ri ixkĩnh nẽ ri ixpa. Nẽ anhỹ hã mẽ kutã amnhĩ to htỳx nẽ arĩ mẽ kãm akapẽr jarēnh o ri mẽ hkôt ixpa. Mẽ kot Jejus ã tanhmã mẽ ixto htãã.

³⁰ —Akra Jejus mex o mex jakamã kot paj mẽ àhpumunh tỳx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwỳnhjaja akupỹm mẽ o mex. Nẽ mẽ kot aa mẽmoj pumunh kêt kwỳ ho anẽ. Kê mẽ omu nẽ axàhpumunh o axàhpumunh ã apumunh mex kurê kumrẽx. E ãm ja pix na ra hapêx. Anẽ.

³¹ Nhũm prem ã amnhĩ to Tirtũm wỳr anẽ. Puh nhũm ixkreja mẽ kãm htertet tỳx nẽ nhũm Tirtũm Karõ axte tanhmã mẽ hkrã hto nhũm mẽ y hã kãm mẽ uma hkêt nẽ. ãm amnhĩ to htỳx nẽ mẽ kãm Tirtũm kapẽr jarēnh rãhã ho ri mẽ hkôt pa.

Jejus kwỳjaja tanhmã kot axpẽn nhĩpêx to hã mẽ harēnh

Atre 2.42-47

³²⁻³³ Nhũm Jejus nhỹ hã mẽ ahkre ho mẽ pa xwỳnh maatijaja. Na pre Tirtũmja mẽ ho mẽ kãm ma hkêt jakamã nhũm pre htem akupỹm Jejus htĩr kôt mẽ kãm harēnh o ri mẽ hkôt pa. Nhũm Tirtũm mẽ kot Jejus kôt amnhĩ xunhwỳr xwỳnh piitã mẽ kutã nojarêt rãhã ho pa nhũm mẽ ra ohtô rax nẽ. Nẽ mẽ kãm axpẽn to mex pix prãm o ri axpẽn kôt pa. Mẽ ohtô htã te mẽ tipxi pyrãk. Nẽ axpẽn pẽ mẽmoj to õxỳ hkêt nẽ. Na pre htem axpẽn mã mẽ hikukrẽx nẽ mẽ apkur xà jarēnh o: “Inhõ pix kêt mẽ pahpiitã mẽ panhõ na.” Anhỹr o ri mẽmoj tã axpẽn kutã nojarêt o ri pa. No kêt axpẽn mã mẽmoj jarēnh o: “Tk. Nà ãm inhõ pix na.” Anhỹr o harēnh kêt nẽ. ³⁴⁻³⁵ Na pre htem tõhã õ ixkre hõ ho wẽnê. Rỳ õ pyka hkwy ho wẽnê nẽ kàxpore jamỳ nẽ ma o mra nẽ Jejus nhỹ hã mẽ ahkre ho mẽ pa xwỳnhjê mã kugõ nhũm mẽ hamỳ nẽ mẽ kêp amrakati xwỳnhjê mã ho angrã.

Hāmri nhūm mẽ amnhīm hamỳ nễ ho amnhīm awjaprô. Jakamã na pre hte mẽ hkwyjaja kãm prãm nễ ri pa rỳ ê hkêt nễ ri pa hkêt nễ.

³⁶⁻³⁷ Jujere na pre ã amnhĩ nhĩpêx anễ nễ mẽ kaxyw ò pika hkwy ho wênê. Hāmri nễ kàxpore py nễ o tễ nễ Jesus nhỹ hã mẽ ahkre xwỳnh maatiễ mẽ kugô. Jujereja Ijaew nhỗ patre ho ajuta xwỳnh na pre. Gô hipôk pê Sipre kamã na pre kato. Kêp Jujere htã no nhūm Jesus nhỹ hã mẽ ahkre ho mẽ pa xwỳnhjaja na prem kãm: “Panãpe” Anễ. Mễ kapêr kãm Panãpeja te kêp “mễ hamaxpêr o mẽ hihtỳx o pa xwỳnh” anhỹr pyrãk. Jakamã nhūm ò pika hkwy ho wênê nễ kàxpore py nễ o tễ nễ Jesus nhỹ hã mẽ ahkre xwỳnhjê mẽ kugô nhūm mẽ kupy nễ mẽ kêp amrakati xwỳnhjê mẽ ho anhrã.

5

*Ananĩs mẽ Sapire wa kot amnhĩ to hêx ã wa harênh
Karatas 6.7; Eprêw 10.26-31*

¹ Tã nhūm Ananĩs mẽ hprô Sapire wa Jujere jarênh ma nễ urãk nễ ò pyka hkwy ho wênê. ² Hāmri nễ kàxpore py. Nom na pre wa ra hã axpên ma. Jakamã nhūm Ananĩs Jujere kĩnhã kàxpore hkwy pix py nễ o tễ nễ Jesus nhỹ hã mẽ ahkre xwỳnh maatiễ mẽ kugô. Nom katàt kôt mẽ kãm òr ã amnhĩ jarênh kêt nễ. Kot kàxpore ho pikjêr nễ amnhīm hkwy ho àrik ã amnhĩ jarênh kêt nễ. Âm mẽ kãm amnhĩ jarênh o hêx. Te piitã òr par pyrãk o amnhĩ nhĩpêx nễ mẽ kãm:

—E ota ixkàxporeta. Na pa wa inhỗ pika hkwy ho wênê nễ kàxpore hpy nễ hpãnhã Jujere pyrã nễ man mẽ awỳr piitã o tễ. Anễ.

³ Hāmri nhūm Simãw Pêtre ra ã kot amnhĩ nhĩpêx anhỹr ã omu hāmri nễ kãm:

—Tk. Kwa mon ka axtem nễ Satanasti kapêr ma nễ hkôt amnhĩ nhĩpêx nễ te akàxpore piitã òr pyrãk ã amnhĩ to axêx anễ? Te ate piitã òr pyrãk tã no âm hkwy pix gô. Hêxta waa nễ. Na ka axtem nễ Tĩrtũm Karô mẽ akàxpore nhõr par o axêx. ⁴ Anhỗ pyka kênã. Nễ hpãnhã kàxporeja anhỗ kênã. Kot kaj amã tanhmã ho hprãm xà hkôt mãmri tanhmã ho. Amã piitã ho axàrik prãm nễ mãmri piitã ho arĩk. Rỳ amã hkwy hpix nhõr prãm nễ mãmri hkwy pix gô. No ri ate òr par pyrãk o amnhĩ to axêx kêt nễ. Te ate mẽ inhmã pix mã axêx pyrãk nom mẽ inhmã pix mã hkêt. Na ka määnên te Tĩrtũm mã axêx pyrãk. Anễ.

⁵⁻⁶ Nhūm pre ã Simãw Pêtre Ananĩs mã kapêr anễ nhūm kuma nễ pykap tễm nễ htyk kurê kumrêx. Hāmri nhūm mẽ àptàr nywjaja hwỳr tễ nễ kupêxê ho hkupu nễ kumỳ nễ ma o tễ nễ haxà. Hāmri nhūm mẽ kot ã kot amnhĩ nhĩpêx anhỹr ã harênh mar xwỳnhjaja tee ri harênh ma nễ kãm ma htỳx nễ.

⁷ Tã nhūm ra hã ahtũm nễ. Ra hã 3 ore nễ hapêx nhūm Ananĩs prô Sapireja htỳx hamakêtkati nễ mẽ hwỳr tễ nễ axà. Kormã mjên htyk ã harênh mar kêt nễ hamakêtkati nễ hkĩnh nễ mẽ hwỳr tễ nễ axà. ⁸ Hāmri nhūm Simãw Pêtre omu nễ hêx rom hkukja nễ kãm:

—Pa? E kwa inhmã mẽmoj jarê. Tanhmã na prem war anhỗ pykaja pãnhã war amã amnhĩrer to? Xà âm hāmri na amjên mẽ inhmã harê nà? Anễ.

Hāmri nhūm kuma nễ mjên pyrã nễ kãm ho hêx nễ kãm:

—Ỗỹ. Âm hāmri kot amã harênh kênã. Anễ.

⁹ Hāmri nhūm Simãw Pêtre tee ri kuma nễ kãm:

—Tk. Hêxta waa nễ. Kwa mon ka war ajamê war akàxpore ho te Tĩrtũm mã axêx pyrãk? Mãn ka wa ajamaxpêr o: “Koja Tĩrtũm ja hã wa ixpumu nễ âm hã wa ixpumu nễ tanhmã hã wa ixto hkêt nễ.” Anhỹr o mãn ka wa ajamaxpêr nà? Nom na ka wa âm kãm axêx kaprỳ. Oněj ra mẽ kot amjên jaxàr xwỳnhjaja akupỳn hpôx o mra. Koja mẽ anhĩpêx o te hipêx pyrã nễ määnên ato tễ nễ ajaxà ka rĩ amnhĩ pumu.

¹⁰ Anễ nhūm kuma nễ mjên pyrã nễ pykap tễm nễ htyk kurê kumrêx. Hāmri nhūm mẽ kot mjên jaxàr xwỳnhjaja mra nễ mẽ hwỳr agiê nễ omu nhūm ra htyk mex nễ nễ nhūm mẽ kumỳ nễ ma o tễ nễ mjên nhĩkhô hã haxà. ¹¹ Hāmri nhūm mẽ piitã wa harênh ma nễ

kām ma htỳx nē. Mē kot Jejus kôt amnhĩ xunhwỳr xwỳnhjê mē amarĩ ri mē pa xwỳnhjaja nhũm mē tee ri wa hkukamā hamaxpēr o kām ma htỳx kumrēx.

Mē kot aa mēmoj pumunh kêt kwỳ ho anhỳr ā mē harēnh

Makre 16.17-20; Atre 19.11-12

¹²⁻¹⁴ Na pre hte Jejus kôt mē kot amnhĩ xunhwỳr xwỳnhjaja xatā Tĩrtũm mā amnhĩ jarēnh xà hā ixkre hwỳr akuprō. Mē kot ixkre nhĩkjê mā: “Pahi Sarumāw nhō” anhỳr xwỳnh jarēnhja wỳr nhũm pre htem akuprō. Nhũm mē piitā kām mē hkĩnh nē mē ohtō nē mē hkôt akuprō nē mē urāk nē Jejus kôt amnhĩ xunhwỳ. Mēnijaja nē mēmyjaja. No nhũm mē hkwỳja Ananĩs mē Sapire wa kot amnhĩ nhĩpēxja mā hamaxpēr nē kām mē hkôt mrar pyma nē. Kām mē hkĩnh tā kām mē hkôt mrar pyma nē.

Nhũm pre hte Jejus nhỹ hā mē ahkre ho mē pa xwỳnhjaja aa mē kot mēmoj pumunh kêt kwỳ ho anhỳr o ri mē piitā mē hkôt pa. ¹⁵ Jakamā nhũm pre htem mē à xwỳnhjê jamỳ nē ma mē hwỳr mē o mra nē Simāw Pētre kutēp pry kamā mē haxwỳ nē mē kām:

—E mē jar anhĩkwỹ. Kē Simāw Pētre ja kôt mē ajānh tē nē mē akupēnh o akupỹm mē ato mex rỳ nhũm hkarō pix mē atā harir ka mē akupỹm amex japēr.

Anhỳr o mē kām kapēr hāmri nhũm mē kupĩp kām kutēp hikwỹ. ¹⁶ Nē Jerujarē pu hā krĩ hkwỳ kamā. Mē à xwỳnhjaja nē mēkarōmnuti kot tanhmā mē ho xwỳnhjaja nhũm pre htem mē hamỳ nē ma mē ĩhkrep mē o mra nhũm mē piitā akupỹm mex pa.

Mē kot Jejus kwỳjê jagjēnh ā mē harēnh

Rukre 21.12-15; Juāw 15.26-27; Atre 4.1-22

¹⁷ Tā nhũm mē ò patre maati mē hkrāmnhwỳ Satusew nhō xwỳnhjaja tee ri akupỹm mē mex ā mē harēnh ma nē axpēn mā:

—Tk. Kwa na mē ra ohtō nē Jejus gryk ā mē pahte mē ahkre kaga nē ām hkôt pix mā ri amnhĩ nhĩpēx o pa. Anē.

Hāmri nē Jejus nhỹ hā mē ahkre maati xwỳnhjê kamā gryk nē ra tanhmā mē ho kaxyw. ¹⁸ Hāmri mē unē nē mē hagjê nhũm mē hagjēnh xà kamā hkrĩ hpa.

¹⁹ Tā nhũm kamāt nhũm Tĩrtũm kapēr o mē wryk xwỳnhja ma mē hagjēnh xà hwỳr mē hwỳr wry nē mē hwỳr axà nē mē kām hakwakre kahē xà mē nē mē kator pa. Hāmri nē mē kām:

²⁰ —E mē ma akupỹm Tĩrtũm mā amnhĩ jarēnh xà hā ixkre hwỳr mra nē axte mē kām awjarē. Tanhmā mē kot amnhĩ nhĩpēx to nē Jejus kôt amnhĩ nhĩpēx nyw o amnhĩ nhĩpēx ā mē kām hā karō kē mē ama. Anē.

²¹ Hāmri nhũm mē kuma nē ma akupỹm hwỳr hapēx kurē kumrēx. Nhũm myt kator o mōr mē nhũm mē hwỳr agjê nē mē kām Tĩrtũm kapēr jarēnh o kuhê.

Tā nhũm mē ò patre maati mē hkôt ri mē pa xwỳnhjaja amnhĩ wỳr mē àptār tũm xwỳnhjê hwỳ nhũm mē piitā axpēn wỳr pikuprōnh pa. Hāmri nē htỳx arĩ Jejus kwỳjaja mē hagjēnh xà kamā mē hkrĩ hā mē hkamnhĩx nē amnhĩ wỳr mē hā karō. ²² Nhũm pōristijaja ma kot mē haprōr kaxyw mē hagjēnh xà hā ixkre hwỳr mra nē tee ri kamā mē hapēr nhũm mē kamā amrakati. Hāmri nhũm mē akupỹm mē pikuprōnh xwỳnhjê hwỳr hprōt nē mē kām:

²³ —Nà na pōristi hkwỳjaja arĩ hakwakrem ixkre jamār mex nhũm hakwakre arĩ kahē htỳx nē xa. Tā pa mē hwỳr agjê nē tee ri hkre kamā mē hapēr nhũm mē kamā amrakati kumrēx. Anē.

²⁴ Hāmri nhũm mē kuma nē tee ri hamaxpēr. ²⁵ Rôm nhũm ja mē hwỳr tēn axàn mē kām:

—Kwa jāā mē ate mē hagjēnh xwỳnhjaja na mē axte Tĩrtũm mā amnhĩ jarēnh xà hā ixkre kamā mē ahkre ho kuhê pa ham mē omu nē mē kurũm tē. Anē.

²⁶ Hāmri nhũm patre nhō pōristi krāhtũmja kuma nē mē hwỳr pōristi hkwỳ rē nhũm mē ma mē hwỳr mra nē mē hwỳr agjê nē kē axte mē unē nē akupỹm mē o mra. Nom tanhmā mē ho hkêt nē. Mē kot hkôt ri mē pikamēnh xwỳnhjê pymaj mē ho mex nē mē o mō. Nē mē hā axpēn mā:

—Nà kot puj mẽ tanhmã mẽ ho nhũm mẽ ja hã mẽ pahpumu nẽ kẽn o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷ Hãmri nẽ mẽ ho mex nẽ akupỹm mẽ o mõn mẽ hwỳr mẽ ho agjê nẽ mẽ pikuprõnh xwỳnhjê kutã mẽ hkrĩ. Hãmri nhũm mẽõ patre maatija mẽ kãm:

²⁸ —Kwa ra mẽ ixte Jejus kapêr jarênh nê mẽ akurê htã ka xep mẽ ãm mẽ inhma nẽ arĩ mẽ kãm harênh o ri apa. Nẽ jar Jerujarê kamã mẽ piitã mẽ kãm harê. Nẽ mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anẽ.

²⁹ Hãmri nhũm Simãw Pêtre mẽ kuma nẽ mẽ amnhĩ tã mẽ kãm kapêr nẽ mẽ kãm:

—Tỳ kot kaj mẽ Tĩrtũm kapêr kuhpa hã mẽ inhmã mẽmoj tã karõ pa mẽ ama nẽ ãm mẽ ama nẽ ãm Tĩrtũm kapêr pix ma nẽ hkõt ri amnhĩ nhĩpêx. ³⁰ Amnepêm mẽ panhĩgêjtjaja na prem Tĩrtũm kõt pix mã amnhĩ nhĩpêx o pa. Tã ka prem axtem nẽ kêp mẽ kãm Kra Jejus ã amỹnê nhũm mẽ pĩ kahpa hã kunhõ nẽ kupĩ. Nom nhũm Tĩrtũm akupỹm ho htĩr ³¹ nẽ kêp mẽ panhõ Pahihti hã harê. Nẽ kêp mẽ pahkaprĩ xwỳnh mex ã harê. Hãmri nẽ ra amnhĩ ri ỹr nhũm ãhkõ hã mẽmoj piitã ho amnhĩptãr o hkrĩ. Nhũm kãm: “Koja Ijaew mẽ kot amnhĩ tomnuj kaga nẽ akõt amnhĩ xunhwỳ pa ja hã mẽ omu nẽ amnhĩ katut kõt mẽ kot amnhĩ tomnuj rênh pa nẽ mẽ ho ixkra.” Anẽ. ³² Tã mẽ pajaja mẽ ixte Jejus htyk nẽ akupỹm htĩr ã omunh mex jakamã na pa hte Tĩrtũm Karõ nhỹ hã ã mẽ amã harênh anẽ. Karõja na pre Tĩrtũm mẽ ixte hkõt amnhĩ nhĩpêx xwỳnhjê hwỳr kurê nhũm mẽ ixwỳr wrỳ nẽ mẽ ixkarõ mã agjê. Tã ỹ hã na pa htem ri ã harênh anhỹr o ri mẽ akõt ixpa. Anẽ.

³³ Hãmri nhũm mẽ kuma nẽ mẽ kamã gryk tỳx nẽ. Nẽ mẽ kãm mẽ himex prãm nẽ mẽ kãm mẽ hã amỹnê. ³⁴ Hãmri nhũm Kamariewtija tee ri ja hã mẽ omu hãmri nẽ kànhmã xa nẽ Jejus nhỹ hã mẽ ahkre xwỳnh maatijê xyr pê hkwỳjê mã kapêr. Parijew nhõ xwỳnh na pre. Nẽ kêp Tĩrtũm kapêr ã kagã htũm o mẽ ahkre ho pa xwỳnhjê hõ na pre. Nhũm mẽ piitã kãm hkĩnh nẽ. Jakamã nhũm kànhmã xa nẽ pòristi mã anẽ nhũm mẽ amnhĩ nê Jejus nhỹ hã mẽ ahkre ho mẽ pa xwỳnhjê kator nhũm mẽ kapõt ã kuhê. ³⁵ Hãmri nhũm Kamariewtija mẽ nê tanhmã mẽ kãm kapêr to nẽ mẽ kãm:

—E ixkwỳjaja. Kwa kêt pu mẽ tanhmã mẽ ho hkukamã pajamaxpêr mex nẽ. ³⁶ Mãn arĩ mẽ ate finat Tetastija jarênh ã anohtỳx nẽ ho apa japêr. Mytwrỳ hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkõt ri mẽ pa xwỳnhjaja ohtõ nẽ. Mẽ kêp 400. Tã nhũm prem mẽ kêp Tetasti pĩ nhũm hkõt ri mẽ pa xwỳnhjaja axpên pê anhgrã nẽ ma hapêx.

³⁷ —Tã nhũm mẽ kot mẽ piitã mẽ ho kõta xà hã arĩgroja ã nhũm Garirej nhõ xwỳnh pê finat Jut haxwỳja hkõt mẽ pa xwỳnhjaja ohtõ nẽ. Tã nhũm mẽ mããnên mẽ kêp kupĩ nhũm hkõt ri mẽ pa xwỳnhjaja haxwỳja axpên pê anhgrã nẽ ma hapêx.

³⁸ —Jakamã kwa pu mẽ tanhmã jajê ho hkêt nẽ. Pu mẽ ãm mẽ omu. Koja mẽ amnhĩ krã hkõt ã ujarênh anhỹr o pa japêr hã koja Tetasti mẽ Jut wa hkõt pa xwỳnhjê pyrà nẽ tokyx axpên pê anhgrã nhũm Jejus jarênh o paja hapêx o hapêx. ³⁹ Nom koja mẽ ãm hãmri Tĩrtũm nhỹ hã ã mẽ ahkre ho pa anhỹr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nẽ te mẽ pahte Tĩrtũm kutã amnhĩ xunhwỳr pyrãk. Anẽ.

Nhũm pre ã Kamariewti Jejus nhỹ hã mẽ ahkre ho mẽ pa xwỳnh maatijê xyr pê hkwỳjê mã kapêr anẽ. ⁴⁰ Hãmri nhũm mẽ kuma nẽ kãm:

—Tỳ nã ãm hãmri na ka ã akapêr anẽ. Kot puj xep mẽ tanhmã mẽ ho hkêt nẽ. Anẽ.

Hãmri nẽ akupỹn mẽ hã karõ nhũm mẽ akupỹn mẽ hwỳr agjê. Hãmri nhũm mẽ pòristi mã mẽ hã amỹnê nhũm mẽ htak. Hãmri nhũm mẽ ãptãr tũmrejaja mẽ kãm:

—E mẽ mãmrĩ ma akupỹm mra. Nom kêt ka mẽ axte mẽ kãm Jejus kapêr jarênh o ri apa hkêt kumrêx. Anẽ.

⁴¹ Hãmri nhũm mẽ kãm ure nhũm mẽ ma mra. Kĩnh nẽ ma mra nẽ axpên mã:

—Nà kwãr mẽ Jejus ã mẽ pahpak nẽ tanhmã hã mẽ pahto. Kwãr mẽ mãmrĩ ã hã mẽ pahto anẽ. Kot pu mẽ hkaga hkêt nẽ. Ra Tĩrtũm kot ja hã mẽ pahpumunh mex kênã.

Anhỹr o axpên mã kapêr o axpên jamaxpêr o hihtỳx mex o pa.

⁴² Hāmri nē arī apkati mē hkwỳjê mã Jejus kapēr jarēnh o mē ahkre ho mē hkôt pa. Tirtūm mã amnhĩ jarēnh xà hã ixkre kamã nē nhām mē ōrkwỹ kamã ri mē ahkre ho pa. Tirtūm kot mē pakaxyw Jejus xãm ã mē kãm harēnh o ri mē hkôt pa.

6

Mē kêp mē mjên htyk xwỳnhjê jarēnh

Wam Ximotre 3.8-9

¹ Tã nhūm mē kot Jejus kôt amnhĩ xunhwỳr xwỳnhjaja ohtô rax kumrêx o mō. Mē piitã kêp Ijaew no nhūm mē hkwỳjaja axtem Gres kapēr o kapēr nhūm mē hkwỳjaja Ijaew kapēr o kapēr. Na pre hte Ijaew kapēr o kapēr xwỳnhjaja apkati mē mē kêp mē mjên htyk xwỳnhjê mã mēõ ho pa. No ãm mē piitã mē hipêx o axpên pyræk kêt jakamã nhūm Gres kapēr o mē kapēr xwỳnhjaja tee ri ã mē kot amnhĩ nhĩpêx anhỹr ã mē omu nē mē kamã gryk nē. Hāmri nē mē kãm:

—Kwa na ka htem amnhĩ kamã mē kêp mē mjên htyk xwỳnhjê mã mēõ ho rũnh nē agō. No mē ixkamã jajê mã na ka htem ãm ho hkryre nē agō. Kwa mē ri ã mē hipêx anhỹr kêt nē. Mē hipêx o axpên pyræk nà. Anē.

² Hāmri nhūm Jejus nhỹ hã mē ahkre xwỳnh maatijaja mē hã mē kapēr ma hāmri nē mē piitã mē ho akuprō nē mē kãm:

—Kwa kêr ka mē ja hã axpên mã axàkjêr kêt nē. E pu mē kot mē kêp mē mjên htyk xwỳnhjê mã õ ho pa kaxyw mē akwỳjê rê. No mē pajaja kot paj ja ho anhỹr o ri ixpa hkêt nē. Kot pa mē anē nē Jejus kapēr o ri mē ajahkre hkêt nē nhūm ja mex kêt nē. Jakamã mē atō kot kaj mē akatàt kôt mē kãm mē õ ho apa? ³ E mē amnhĩ kamã mē ho 7 nē mē arê pu mē kêp mē mjên tyk xwỳnhjê mã õ ho pa kaxyw mē unhwỳ.

Tãm mē hamaxpêr xwỳnhjaja.

Nē mē ate axpên mã mē mex ã mē harēnh xwỳnhjaja.

Nē Tirtūm Karō nhỹ hã mē kot amnhĩ nhĩpêx o mē pa xwỳnhjaja.

Ã mē kot amnhĩ nhĩpêx anhỹr xwỳnhjaja ka mē ho 7 nē arê pu mē kaxyw mē unhwỳ.

⁴ Nom mē pajaja kot paj mē akôt arī mē amã Tirtūm kapēr jarēnh o ri mē ajahkre pix tânopxar o ri ixpa. Anē.

⁵ Hāmri nhūm mē kuma nhūm ja mē kãm mex nē. Nhūm mē ma mra nē axpên mã hkwỳjê nhĩxi jarē hāmri nē mē ho 7 nē mē kurê. ã mē hixi kot anhỹr.

Estewāw. Estewāwja na pre Jejus kôt amnhĩ nhĩpêx mex o pa. Tirtūm Karō kaxwỳnh mã àr nē ho amnhĩptâr jakamã nhūm pre hte tãm ri amnhĩ nhĩpêx o pa.

Nē kaxyw Firipti

nē Prokot

nē Nĩkanō

nē Timã

nē Parmēnti

nē Nĩkoraw. Nĩkorawja krĩ pē ãxiok nhō xwỳnh na pre. Kêp Ijaew kêt tã kãm Tirtūm kĩnh o pa. Tã ra mãânēn Kra Jejus kôt amnhĩ xãm.

⁶ Jakamã nhūm mē mē kêp 7tajê rê nē Jejus nhỹ hã mē ahkre xwỳnh maatijê hwỳr mē o mra. Hāmri nhūm mē omu nē mē àpênh ã mē unhwỳr kaxyw mē hã ìhkra jaxwỳ nē mē ho Tirtūm wỳ. Hāmri nhūm mē kêp mē mjên htyk xwỳnhjê mã mē õ ho pa nē mē piitã mē hipêx o axpên pyræk.

⁷ Tã nhūm mē ra ohtô rax nē Tirtūm kapēr ma nē hkôt amnhĩ nhĩpêx o pa. Jakamã nhūm Jerujarê kamã mē kot Jejus kôt amnhĩ xunhwỳr xwỳnhjaja ra ohtô rax kumrêx. Nē mē õ patre hkwỳ haxwỳja ohtô nē mē uræk nē amnhĩ kaxyw hkôt hamaxpêr nē hkôt amnhĩ xunhwỳ.

Mē kot Estewāw pynênh ã mē harēnh

Rukre 21.14-15

⁸ Tã nhūm Estewāwja. Kot mē kêp mē mjên htyk xwỳnhjê mã mē õ ho pa xwỳnhjê hōja. Tirtūm kot kutã nojarêr mex jakamã na pre hte ÿ hã àhpumunh tỳx o aa mēmoj

pumunh kêt kwỳ ho anhỹr o ri mẽ hkôt pa. ⁹ Hãmri nhũm Ijaew kwỳjaja tee ri ja hã omu nhũm ja mẽ kệp omnuj tỳx nẽ nhũm mẽ hã kãm akir. Uràk nẽ mẽ kệp Ijaew nẽ Jerujarẽ kamã ri mẽ hkôt pa htã ahpỹnhã mẽ õ pyka. Mẽ kot kãm “Ripetat” xwỳnh kwỳ na pre mẽ. Nẽ ahpỹnhã mẽ õ krĩ.

Mẽ hkwỳjaja kệp Sirën nhõ xwỳnh.

Nẽ mẽ hkwỳjaja kệp Aresãn nhõ xwỳnh.

Nẽ mẽ hkwỳjaja kệp Siris nhõ xwỳnh.

Nẽ mẽ hkwỳjaja kệp As nhõ xwỳnh.

Ahpỹnhã mẽõ pika nẽ mẽ õ krĩ htã na prem Jerujarẽ kamã ri axpẽn kôt pa ho pa. Tã Estewãw kot ã amnhĩ nhĩpêx anhỹr o pa hã omu nhũm ja mẽ kệp omnuj tỳx nẽ nhũm mẽ hã kãm akir. ¹⁰ No nhũm Tĩrtũm Karõ nhỹ hã hamaxpêr tỳx o mẽ kãm kapêr nhũm mẽ kuma nẽ tee ri kutã tanhmã kãm nẽ hprãm kaprỳ. ¹¹ Hãmri nẽ ma mra nẽ tanhmã ho hêx to kaxyw amnhĩ kwỳjê rê nẽ mẽ kãm hã amỹnê nẽ mẽ kãm:

—E kêt ka mẽ krĩ nhõ xwỳnhjê mã Estewãw o axêx nẽ tanhmã mẽ kãm ho akapêr punuj to ho ri mẽ hkôt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anẽ pa mẽ hpãnhã mẽ amã amnhĩre. Anẽ.

Hãmri nhũm mẽ kuma nẽ ma mra nẽ hapôj nẽ ma krĩ nhõ xwỳnhjê mã tanhmã ho hêx to ho ri mẽ hkôt pa nẽ mẽ kãm:

—E mẽ amnê akuprõ nẽ mẽ inhma. Kwa kêt ka mẽ Estewãwti kapêr mar kêt nẽ. Na hte finat Mojes mẽ Tĩrtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anẽ.

¹² Hãmri nhũm mẽ kuma. Krĩ nhõ xwỳnhjê mẽ nẽ mẽ ãptàr tũmrejê mẽ Tĩrtũm kapêr tũm o mẽ ahkre ho mẽ pa xwỳnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwỳr mra nẽ unê nẽ ma mẽ õ juisti hwỳr o tẽ. ¹³ Hãmri nhũm mẽ kãm ho hêx xwỳnhjaja mẽ hkôt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tĩrtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tĩrtũm mã amnhĩ jarênh xà hã ixkreja nhũm tanhmã ho hêx to pa mẽ kuma. ¹⁴ Na hte mẽ kãm: “Koja nhỹrmã Jesus pê Najare nhõ xwỳnh Tĩrtũm mã amnhĩ jarênh xà hã ixkreja grành pa kãm ga.” Anhỹr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nê mẽ pahkurê pa prem kuma. Anẽ.

¹⁵ Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nẽ Estewãw wỳr rít nẽ hkuk pumu nhũm te kot Tĩrtũm kapêr o mẽ wrỳk xwỳnhjê kuk nhĩrã rax pyrã nẽ xa nhũm mẽ tee ri omu nẽ kamã no pyma nẽ.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nẽ kãm:

—E mẽ inhmã amnhĩ jarẽ. Xà ãm hãmri na mẽ ri ã ajarênh anẽ nà? Anẽ.

² Hãmri nhũm kuma nẽ mẽ piitã mẽ kãm kapêr. Mẽ kãm kapêr ryy nẽ mẽ kãm:

—Tõe kot paj mẽ amã mẽ panhĩgêt finat Apraãw tanhmã harênh to ka mẽ inhma. Amnepêm na pre Tĩrtũm maatija Apraãw wỳr kato. Kormã pyka pê Mêsopotãm kamã pa ri. Kormã kot ma krĩ pê Arã hwỳr mõi kêt ri nhũm hwỳr kato nẽ kãm: ³ “E kêt ka mẽ anhõ krĩ pê akato nẽ akwỳjê re nẽ ma mõi. Kot paj ma nhỹhỹm hpãnhã pyka hõ hwỳr mẽ ato mõi.” Anẽ.

⁴ —Hãmri nhũm kuma nẽ amnhĩ to akuprõ nẽ ma mõi. Õ pyka pê Katej pê kato nẽ ma krĩ pê Arã hwỳr mõi nẽ hpãnhã kamã pa. Tã nhũm hipêxà Terahti kệp ty nhũm Tĩrtũm amnê jar mẽ panhõ pyka hwỳr kumê. Jar mẽ papapxã hwỳr kumê.

⁵ —Nom nhũm kormã kãm pykaja nhõr kêt nẽ. Kormã kãm hkwỳ ho grire nẽ õr kêt nẽ. Na pre ãm kãm:

E kot paj nhỹrmã amã pykaja gõi. Amã nẽ akanrêhã akra nẽ atãmnhwỳjê mã kugõ ka mẽ kamã ri apa ho apa.

Anhÿr o kãm mẽ panhõ pika pê Kanaãja jarẽ. Apraãw kormã hkra hkêt ri nhũm ã kãm kapër anẽ. ⁶ Hãmri nẽ kãm:

Koja akanrẽhã atàmnhwÿjaja nhÿrmã ma nhÿhÿm pyka hõ hwÿr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwÿnhjẽ mã àpênh rũnh o pa nhũm pyka nhõ xwÿnhjaja mẽ hipêx kati rũnh o pa. Nẽ mẽ àpênh ã mẽ kãm amnhÿrer kêt nẽ. ãm mẽ homnuj o pa hã amgrà xohtõ rax kumrẽx. Nhũm mẽ hã amgrà pê 400.

⁷ Nom kot paj mẽ hã mẽ homnuj tÿx nẽ. Akanrẽhã atàmnhwÿjẽ hã mẽ homnuj tÿx nẽ nhũm mẽ rĩ kormã mẽ kurũm kato nẽ man akupÿn pa nẽ jar põj. Hãmri nẽ jar inhmã inhmex o inhmex ã ijarẽnh rãhã ho pa. Anẽ.

⁸ Hãmri nẽ kãm:

E pu axpên ma. Koja ka nẽ akanrẽhã akra nẽ atàmnhwÿjaja ka mẽ ixkõt ri amnhÿ nhÿpêx o apa hã kot paj mẽ ato ixkra. Tã koja ja amã mex japêr hã kêr ka mẽ amnhÿ my kwÿt kà hkwy jakà. Nẽ koja mẽ akrajaja hapõj nẽ my ka mẽ mã mẽ ho anẽ nẽ mẽ kêp mẽmy kwÿt kà hkwy jakà. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhÿ nhÿpêx anẽ.

Anhÿr o Apraãw mã kapër nhũm kuma nẽ mar xà hkõt hkra Ijak my kwÿt kà hkwy krãhta. Kormã hkarãre ri. Kormã hã arĩgro pê 8 pix ri nhũm kêp hkwy krãhta.

—Tã nhũm Ijak hprêk nẽ hprõ nẽ hkra. Hãmri nẽ mã hkra Jako ho anẽ nẽ. Nhũm Jako hprêk nẽ mã hkra pê 12jê ho anẽ nẽ mẽ piitã mẽmy kwÿt kà hkwy jakà pa. ã na pre mẽ pahpàr kraxjaja amnhÿ nhÿpêx anhÿr o pa.

⁹ —Jako hkrajê hõ na pre kêp Juje. Nhũm Juje htõjaja hipêxà hkõt kamã gryk nẽ axtem nẽ mẽ urojê mã ho wênê nhũm mẽ kêp haprõ nẽ ma pyka pê Ejit wÿr o mõ. Amarĩ Ejit nhõ xwÿnhjẽ mã àpênh o pa kaxyw. Tã no nhũm Tirtũm arĩ tãnopxar rãhã ho hkõt pa.

¹⁰ Hãmri nẽ Ejit kãm mẽ kot homnuj xwÿnhjẽ nhÿhkra rũm hkapa nẽ tanhmã hkrã hto nhũm àhpumunh tÿx nẽ hamaxpêr mex nẽ. Jakamã nhũm Ejit nhõ xwÿnhjẽ nhõ pahi Paraohtija omu nẽ kãm hkĩnh nẽ. Kot tãm amnhÿ nhÿpêx nẽ àhpumunh tÿx kõt omu nẽ kãm hkĩnh nẽ. Hãmri nẽ amnhÿ ri kumẽ nhũm ìhkõ hã àpênh o pa. Kãm òrkwÿ pumu nẽ Ejit nhõ xwÿnhjẽ ho amnhÿtãr o pa.

¹¹ —Rõm nhũm mẽ hpur kãm mẽmoj nhÿgrõt mex kêt nẽ nhũm mẽ kêp mẽ apkur xà hã mẽ õja ra ri mẽ kêp kryre. Ejit kamã nẽ jar Kanaã kamã nhũm mẽ apkur xà hã mẽ õja mẽ kêp hapêx par o mõ. Nhũm mẽ piitã prãm xàj ra hiire nẽ kãm prãm tÿx o pa nhũm mẽ panhÿgêtjaja hãmri prãm xàj tee ri amnhÿ xàpkur xà hã mẽmoj japêr.

¹² —Tã nhũm Jakoja Ejit kãm arĩ mẽ apkur xà hã mẽ õ rax ã harẽnh ma nẽ ma hwÿr hkra hkwyjê rẽ. Mẽ panhÿgêtjaja nhũm ma mẽ hwÿr mẽ kurẽ nhũm mẽ ma mẽ hwÿr mra. Hãmri nẽ mẽ hwÿr põj nẽ mẽ kêp mẽmo hy hkwy japrõ nẽ ma akupÿm o mra. Wam mẽ mörta ã mẽ kêp mẽmoj japrõ nẽ ma akupÿm o mra.

¹³ —Tã nhũm mẽ kêp mẽmo hy japrõr xwÿnhja hapêx nhũm mẽ axte akupÿm mẽ hwÿr mra. Hãmri nhũm mẽ htõ Juje mẽ kãm amnhÿ to amnhÿrĩt nẽ kêp mẽ htõ hã mẽ kãm amnhÿ jarẽ. Mẽ kot ra htyk ã hkamnhÿx tã nhũm mẽ kãm amnhÿ jarẽ. Hãmri nhũm Paraohti mẽ kêp Juje htõ hã mẽ harẽnh ma.

¹⁴ —Tã nhũm Juje amnhÿ wÿr hipêxà Jako mẽ htàmnhwÿjaja mẽ hã karõ nhũm mẽ piitã ma Ejit wÿr hapêx. Mẽ kêp 75 nẽ ma Ejit kamã Juje hwÿr hapêx hãmri nẽ kamã pa ho pa.

¹⁵ —ã kot anhÿr jakamã nhũm Jakoja ma Ejit wÿr mõ nẽ hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nẽ gaa nẽ htyk pa. ¹⁶ Hãmri nhũm mẽ hkanrẽhã mẽ hkrajaja mẽ hamÿ nẽ ma akupÿm Kanaã hwÿr krĩ pê Sikẽ hwÿr mẽ o pa nẽ kamã mẽ hagjê. Na pre mẽ hkukamã finat Apraãw kot Amõr krajê pê kênkre japrõ nẽ kamã hprõ jaxà. Jakamã nhũm prem mÿr pê ma hwÿr mẽ o pa nẽ kamã mẽ hagjê hãmri nẽ ma akupÿm Ejit wÿr pa.

¹⁷ —Tã gaa nẽ rĩ ohtõ rax kumrẽx o mõ. Mẽ panhÿgêtjaja ohtõ rax kumrẽx o mõ. Hãmri nhũm Tirtũm kot Apraãw mã mẽ õ pyka jarẽnh xwÿnhja nhũm kot mẽ kãm òr kaxyw.

¹⁸ No nhũm Ejit nhõ pahi kot Juje ho mex xwỳnhnta na pre ra ty nhũm axtem hpãnhã hõja mẽ ho amnhĩptàr o pa. Nẽ aa Juje jarẽnh mar kêt nẽ. Kormã pahi xàr nyw kêt ri htyk jakamã nhũm myr pê harẽnh mar kêt nẽ. ¹⁹ Hãmri nẽ hkwyjê homnuj o pa. Tanhmã mẽ panhĩgêjtjê nhĩpêx to ho pa. Nẽ mẽ kãm mẽ hkra my hapôx xwỳnhjê hã amỳnê. Mẽ hapôx nhũm mẽ kot pikap mẽ rẽnh nhũm mẽ htyk kaxyw nhũm mẽ kãm mẽ hã amỳnê.

²⁰ —Rôm nhũm finat Mojesja kato. Nẽ mexre. Hãmri nhũm katorxà Ejit nhõ xwỳnhjê kot kêp hpĩr pymaj òrkwỹ kamã ri mẽ kêp ho hpimxur o pa hã mytwrỹ axkrunẽpxi.

²¹ —Tã nhũm ra htỳxre nhũm katorxà mẽ hipêêxà wa tee ri hkukamã hamaxpêr hãmri nẽ mẽ kot wa kêp hpĩr pymaj kumỳ nẽ ma o tẽ nẽ kaxyw à nhĩpêx nẽ nhỹri gô nhĩpôk ri pô kamã ho amũxu. Tã nhũm Paraohti hkra nija ra gôx mã wỳr mã tẽ nẽ ra omu hãmri nẽ amnhĩm kumỳ nẽ ma o tẽ nẽ ho hkra. ²² Jakamã nhũm Mojes Ejit nhõ xwỳnhjê kamã hprêk. Hãmri nẽ mẽ àhpumunh xà hã kagà pumunh pa. Nẽ hihtỳx nẽ mẽ kãm kapêr kãm hihtỳx mex o pa.

²³ —Tã hãmri ra hã amgrà pê 40 nẽ hapêx nhũm Mojes hamaxpêr nẽ ra kãm amnhĩ kwỳ pê Ijaewjê pumunh prãm nẽ ma mẽ hwỳr tẽ. ²⁴⁻²⁵ Hãmri nẽ htêm kôt ja wa omu. Nhũm Ejit nhõ xwỳnhja Ijaewja homnuj o xa nhũm Mojes tẽn tee ri hã omu nẽ hamaxpêr o: “E pa ma wa hwỳr tẽ nẽ ixkwỳ mũj ã Ejit nhõ xwỳnhnta pĩ kê ixkwỳjaja ja hã ixpumu nẽ Tĩrtũm kot mẽ hwỳr inhmẽnh ã ixpumu. Ixte Ejit nhõ xwỳnhjê nẽ mẽ kator kaxyw mẽ ja hã ixpumunh kurê kumrêx.”

—Anhỹr o hamaxpêr hãmri nẽ wa hwỳr tẽ nẽ amnhĩõja nê Ejit nhõ xwỳnh pĩ. Tã no nhũm hkwyjaja kot hpĩr ã harẽnh mar tã tanhmã amnhĩ kaxyw kãm hamaxpêr to hkêt nẽ. ²⁶ Nhũm apkati nhũm mẽhõja war axkrut nẽ axte pijapu ho wa xa. Hamẽ wa kêp Ijaew. Jakamã nhũm Mojes akupỹm mẽ hwỳr tẽ nẽ tee ri axpẽn tã wa omu nhũm ja kêp omnuj nẽ. Hãmri nhũm wa hwỳr tẽ nẽ axpẽn nê wa kãm kapêr nẽ wa kãm: “Pa? Kwa war ajamẽ war apê Ijaew kênã na ka wa ri axtem nẽ ã axpẽn nhĩpêx anẽ.” Anẽ. ²⁷ Hãmri nhũm kot amnhĩ kaxyw hkryx xwỳnhja kuma nẽ nhãm amnhĩ nê hkujate nẽ kãm: “Tk. Kwa xà apê mẽ inhõ pahi hã na ka ã wa inhmã akapêr anẽ? Nà apê mẽ inhõ pahi hkêt kênã. ²⁸ Kot kaj inhĩpêx o te ate Ejit nhõ xwỳnhnta nhĩpêx pyrã nẽ wa ixtõ hpĩr kêt nẽ.” Anẽ.

²⁹ —Hãmri nhũm tee ri kuma nẽ ra kãm ma nẽ Ejit rũm kator kurê kumrêx nẽ ma pyka pê Mijiã hwỳr mỗ nẽ kamã hpãnhã pa. Kamã hprõ nẽ hkra. Nhũm hkra myja wa hamẽxkrut.

³⁰ —Tã nhũm Mijiã kamã pa hã axte hã amgrà pê 40. Hãmri nẽ mẽmo arĩgro hã kapôt ã krã hakỳx pê Sinai kape hã ri pa nhũm Tĩrtũm kãm kapêr. Nom nhũm Mojes omunh kêt nẽ. ãm utĩ kaòk kamã kuwy hpòk pix pumu. ³¹ Amnhĩ jaêr pê ã kot amnhĩ nhĩpêx anhỹr ã omu hãmri nẽ amnhĩ tã hprĩ hã omunh kaxyw hwỳr tẽ nhũm Tĩrtũm kãm:

³² Pa Mojes? E ixpê Tĩrtũm na pa. Ixpê akukamã anhĩgêjt Apraãw nhõ Tĩrtũm na pa. Nẽ ixpê Apraãw kra Ijak mẽ htãmnhwỳ Jako wa ò Tĩrtũm na pa. Anẽ.

Hãmri nhũm tee ri kuma nẽ kãm ma xàj htertet tỳx nẽ. Hãmri nẽ umaj axte pĩ hpòkja wỳr rĩt kêt nẽ. ãm nhãm hkrã nẽ rĩt o xa. ³³ Hãmri nhũm Tĩrtũm kãm:

E kwa ixpê Tĩrtũm maati hã ixtã apijaàm ã aparkà kapa nẽ apar kênh nẽ xa.

³⁴ Na pa ra ixkra Ijaewjaja Ejit kãm mẽ omu. Na ra Ejit nhõ xwỳnhjaja ixpê mẽ homnuj tỳx kumrêx rãhã ho pa nhũm mẽ amnhĩ xà hã maj tee ri amnhĩ nhĩpêx. Pa ja hã mẽ omu nẽ inhmã mẽ hkaprĩ nẽ. Jakamã kot paj Ejit nhõ xwỳnhjê nhĩhkra rũm mẽ kator pa. E ka kot paj mẽ hwỳr amẽ ka ma akupỹm mẽ hwỳr mỗ nẽ mẽ kurũm mẽ kator.

Anhỹr o kãm mẽ kaxyw karõ. ³⁵ Ra Ijaew kot Mojes hkaga tã nhũm mẽ kaxyw ãm nẽ ma akupỹm kot mẽ hwỳr mẽnh kaxyw. Na prem ra omu nẽ hkaga. Te mẽ ate Jejus kagaja pyrã nẽ hkaga. Jakamã nhũm pijapu xwỳnhnta tee ri amnhĩ tã omu nẽ kamã gryk nẽ amnhĩ nê kãm kapêr nẽ kãm: “Tk. Kwa xà apê mẽ inhõ pahi hã na ka ã wa inhmã akapêr anẽ? Nà apê mẽ inhõ pahi kêt.” Anhỹr tã nhũm Tĩrtũm mẽ kaxyw tãm xãm. Kot mẽ ho

amnhĩptàr nê Ejit nhõ xwýnhjê rûm mẽ kator kaxyw. Ja kaxyw na pre pĩ hpòk kamã kãm kapêr nê mẽ kaxyw ãm.

³⁶ —Jakamã nhũm Mojes ma akupỹm Ejit wýr mõi nê mẽ kurũm hkwyjê kator nê ma mẽ o pa. Na pre mẽ ho mex nê Tĩrtũm nhỹ hã mẽ kãm aa mẽ kot mẽmoj pumunh kêt kwý ho anhỹr o ri mẽ o pa. Ejit kamã nê mãânên mẽ kot gô xujanãr mã: “Gô kamrêk” anhỹr xwýnhhta kamã. Nê kapôt ã mẽ kãm ã amnhĩ nhĩpêx anhỹr o mẽ o pa. Nê kapôt ã ri mẽ o pa ho ra hã amgrà pê 40.

³⁷ —Tã tãm na pre mẽ panhĩgêjtê mã mẽhõ hkukamã mẽ kãm tanhmã harênh to nê mẽ kãm harênh o: “Koja Tĩrtũm nhỹrmã te ra mẽ akaxyw pa ixãm pyrã nê inhmýr pê mẽ panhĩõ xãm. ỹ hã mẽ amã kapêr jarênh o pa kaxyw nhũm nhỹrmã mẽ akaxyw ãm ka mẽ omu.”

—Anhỹr o ã Jejus kukamã harênh anê. ³⁸ Na pre Mojes kapôt ã mẽ panhĩgêjtê ho pa nhũm mẽ krã hakýx pê Sinaija wýr pa. Mẽ panhĩgêjtaja hãmri hwýr pa nhũm Tĩrtũm kapêr o mẽ wryk xwýnhja mẽ kaxyw Mojes mã kapêr nhũm ô ri mẽ kãm awjarê nê hã kagà. Mẽ kot mar nê hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tĩrtũm kapêr jarênh o pa. Nê mẽ pajaxwýja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagà. ³⁹ Tã no nhũm mẽ panhĩgêjtaja Mojes ma nê ãm kuma nê hkaga kumrêx nê akupỹm Ejit wýr hkrã. ⁴⁰ Jakamã nhũm Mojes kormã nhỹri mẽ kaxyw Tĩrtũm mã kapêr o ãm rôm nhũm mẽ wakre kamã htõ Arãw wýr mra nê kãm: “Kwa Mojes ra kot tanhmã amnhĩ to kênã. Kot Ejit rûm mẽ pakator nê mẽ pahto mõi tã ra nhỹri arĩk nê tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupỹm Ejit wýr mẽ pahto pa.” Anê.

⁴¹ —Hãmri nhũm mẽ kuma nê mẽ kãm kax o mõi krare karõ ho sãnti nhĩpêx nê mẽ kãm ãm. Hãmri nhũm mẽ axtem nê te ho Tĩrtũm nhĩpêx pyrãk o hipêx nê kãm ôwêhti hkwy pa nê kãm haxwý nê hã apku. Hãmri nê ã amnhĩ nhĩpêx anhỹr ã amnhĩ pumu nê hkĩnh nê. ⁴² Hãmri nhũm Tĩrtũm tee ri ja hã mẽ omu nhũm ja kêp omnuj týx nê nhũm mẽ hkaga hpa. Jakamã nhũm prem amnhĩ krã hkôt ri myyti nê mytwryre nê kanhêti karõ nhĩpêx nê te mẽ kot Tĩrtũm nhĩpêx pyrãk o hipêx o pa. Hãmri nê amnhĩ kaxyw kumã pix mã hamaxpêr o pa hã amgrã xohtõ nê. Tã nhũm Tĩrtũm nhỹ hã kapêr jarênh o mẽ pa xwýnhjaja tanhmã mẽ kãm kapêr to nê mẽ hã kagà. Te Tĩrtũm tãm mẽ kãm kapêr pyrãk o mẽ kãm kapêr nê hã kagà kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrã pê 40ta ã. Xã we inhmã na ka prem akrit kwý hpar o apa?

⁴³ Nã inhmã hkêt. Na ka prem axtem nê ri amnhĩ krã hkôt amnhĩm mẽmo karõ nhĩpêx nê hipêx o te mẽ ate pa inhĩpêx pyrãk. Pê kãm akrit kwý hpar nê õr o ri apa.

Mẽ anhõ mẽmo karõ nhĩpêxta mẽ ate amnhĩm hã hixi pê Mõrok mênh xwýnhja ka pre htem à kamã amnhĩ kôt ho apa.

Nê amnhĩm kanhêti karõ nhĩpêx nê hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhĩ nhĩpêx anhỹrja mýrapê kot paj pãnhã nhỹhým mẽ arê.

Koja mẽ akutã amnhĩ xunhwýr xwýnhjaja mẽ apynê nê ma pyka pê Papirõn rûm hamũ mẽ ato hapêx ka mẽ amarĩ mẽ kãm axapênh rûnh o ri apa kãm ga. Anê.

Ã na pre Tĩrtũm mẽ panhĩgêjtê mã kapêr anê nhũm ỹ hã kapêr jarênh o pa xwýnhja mẽ kãm hã kagà.

⁴⁴ —Tã nhũm mẽ panhĩgêjtaja kormã kapôt ã ri pa ri amnhĩ kôt mry kà ho ixkre ho pa. Tĩrtũm mã kapêr xã hã ixkreja nhũm prem amnhĩ kôt ri o pa. Mẽ kot kãm “Tĩrtũm nhõrkwý kaakre” anhỹr xwýnhja. Tĩrtũm kot mẽ kãm hã karõ xã hkôt nhũm mẽ hipêx nê amnhĩ kôt ri o pa. Na pre Tĩrtũm hprĩ hã Mojes mã tanhmã kot hipêx to hã karõ nhũm mẽ hkôt hipêx nê amnhĩ kôt ri o pa.

⁴⁵ —Tã nhũm Mojes ty nhũm hpãnhã Jojueja amnhĩ kôt mẽ o pa. Ma Tĩrtũm kot mẽ kãm pyka mex nhõrta wýr Mojes mýr pê mẽ o pa. Hãmri nê hwýr mẽ o pøj nhũm Tĩrtũm mẽ nê mẽ kot ra kamã mẽ pa ho mẽ pa xwýnhjê japøj nhũm mẽ pãnhã kamã pa ho pa.

Ně amnhĩ kôt Tĩrtũm nhõrkwỹ kaàkreta o pa. Rãhã nhũm finat Tawija mẽ hpãnhã mẽ ho amnhĩptà. ⁴⁶ Na pre Tĩrtũm Tawi kot tanhmã amnhĩ nhĩpêx to ho pa hã omu mẽ kãm hapê mẽ. Jakamã nhũm Tawi kãm kapêr mẽ kãm: “Pa Tĩrtũm? Kwa xà kot paj amã ixkre mex õ nhĩpêx nà? Mẽ ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xà kot paj amã hipêx?” Anhỹr tã no nhũm Tĩrtũm kormã kãm ja prãm kêt mẽ. ⁴⁷ Jakamã nhũm Tawi hkra Sarumãwja hipêêxà mỳr pê hpãnhã kêp mẽ õ pahi mẽ kãm hipêx. ⁴⁸ Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwỳnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhỹ hã kapêr jarênh o pa xwỳnhja Tĩrtũm kot tanhmã mẽ pajamãr to ho pa hã kagà mẽ hã kagà ho:

⁴⁹ Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhĩ to mẽ mẽ ihkra ho mẽ kot inhmã ixkre nhĩpêxta wỳr axà mẽ kamã ixpa ho ixpa?

⁵⁰ Nà ixte mẽmõ pyka ho ixkator xwỳnh kênã kot pa kêt ã amnhĩ nhĩpêx anẽ. Anẽ.

Nhũm pre ã Tĩrtũm amnhĩ tã mẽ kãm kapêr anẽ nhũm ÿ hã kapêr jarênh xwỳnhja ô ri mẽ pamã hã kagà.

⁵¹ —E kwa mẽ inhma ixkwỳjaja. Mẽ akrã hihtỳx kumrêx jakamã mẽ amã Tĩrtũm kapêr mar prãm kêt. Na ka htem mẽ panhĩgêjtjê pyrã mẽ amnhĩ nê Tĩrtũm Karõ kaga mẽ kapêr mar kêt mẽ. ⁵² Na pre hte Tĩrtũm nhỹ hã kapêr o mẽ pa xwỳnhjaja mẽ panhĩgêjtjê hwỳr mra mẽ mẽ kãm kapêr jarênh o ri mẽ hkôt pa. Tã nhũm mẽ hkaga mẽ mẽ hipêx kati ho pa. Na pre htem Jejus wryk kukamã mẽ kãm: “E koja nhỹrmã kot Tĩrtũm kapêr mar mẽ hkôt amnhĩ nhĩpêx mex rãhã xwỳnh maatija mẽ pahwỳr wry.” Anhỹr o mẽ kãm harênh o pa. Tã no nhũm mẽ kãm ja mar prãm kêt jakamã axtem mẽ hã mẽ hpar o pa. Mẽ kot mẽ kãm Jejus jarênh o mẽ pa xwỳnhjê hpar o pa. Tã nhũm tãm mẽ pahwỳr wry ka mẽ omu mẽ mẽ kot amnhĩ nhĩpêxta pyrã mẽ hã amỹnê nhũm prem mẽ amã kupĩ.

⁵³ —Tĩrtũm kapêr o mẽ wryk xwỳnhjaja kot Tĩrtũm nhỹ hã tanhmã mẽ pahte amnhĩ nhĩpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nẽ ama mẽ ãm ama mẽ hkôt amnhĩ nhĩpêx o ri apa hkôt mẽ. Anẽ.

Mẽ kot Estewãw pĩr ã mẽ harênh

Rukre 21.16-19, 23.34; Atre 22.20

⁵⁴ Hãmri nhũm juistijaja tee ri Estewãw xujarênh ma mẽ kamã gryk tỳx mẽ kãm kapêr punuj mẽ. ⁵⁵ Nom nhũm Tĩrtũm Karõja tanhmã hkrã hto nhũm kãm mẽ uma hkêt mẽ. Hãmri mẽ kãnhmã rĩt mẽ kaxkwa pumunh o xa mẽ kamã Tĩrtũm rũm hirã rax pumu. Nhũm Jejus Tĩrtũm nhĩhkô hã xa nhũm omu mẽ hkĩnh mẽ mẽ kãm:

⁵⁶ —Kokỹỹ. Na kaxkwa axkjê nhũm kamã Tĩrtũm nhỹ pa omu. Nhũm kuri kot mẽ pahwỳr mẽnh xwỳnh Jejusja xa. Hêxta waa mẽ. Nà na pa jarãhã wa omu mẽ ixkĩnh tỳx kumrêx. Anẽ.

⁵⁷ Hãmri nhũm mẽ kuma mẽ kamã gryk tỳx mẽ. Hãmri mẽ kãm mar prãm kêt mẽ kêp amnhĩ jamak pro. Hãmri mẽ gryk xaj àmra htỳx mẽ hwỳr hprõt ⁵⁸ mẽ unê mẽ krĩ pê ho kato mẽ ma o tẽ mẽ nhỹri o xa. Hãmri mẽ kên o htak o hpĩr kaxyw amnhĩ nhĩnõkà hkwrỹ mẽ mẽhõ my pê Sawti mã kugõ nhũm mẽ kãm hamỳ. Hãmri nhũm mẽ kên rũnh kwỳ jamỳ mẽ o mra mẽ Estewãw wỳr rênh prêprêk o kuhê. Nẽ ho ï kamã htak mẽ hkrãx pê htak.

⁵⁹ Hãmri nhũm ra htyk kaxyw mẽ Jejus mã amnhĩ jarẽ mẽ kãm:

—Pa Pahihti Jejus? E koja ixkarõ awỳr api ka ixto amnhĩptà. Anẽ.

⁶⁰ Hãmri mẽ hkõn krã ho tẽm mẽ nhỹ mẽ axte kãm amnhĩ jarẽ mẽ mẽ kot hpĩr xwỳnhjê mẽ kãm kapêr mẽ kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt mẽ.

Anhỹr o mẽ nê Jejus mã kapêrja kôt ra ty.

8

Mẽ kot Estewãw jaxàr ã mẽ harênh

Atre 22.4, 26.9-11

¹⁻² Hāmri nhūm mẽ kot Jejus kôt amnhĩ nhĩpêx xwỳnhjaja Estewāw wỳr mra nẽ htyk kām omu nẽ hkaprĩ nẽ. Nẽ mur nẽ kumỳ nẽ ma o mō nẽ haxà. Nom nhūm Sawtija mẽ kot hpĩr ã omu nhūm ja kām mex nẽ.

Sawti kot Jejus kwỳjê nhĩpêx kati ho pa hã harēnh

Atre 1.8

Tã nhūm Jerujarē kamã Ijaewjaja mẽ kot Jejus kôt amnhĩ xunhwỳr xwỳnhjê homnuj tỳx o pa. Hāmri nhūm mẽ tee ri amnhĩ kukamã hamaxpēr nẽ mẽ hkwỳjaja mẽ umaj hapôj nẽ ma pika hkwỳ hkôt hpigrành pa. Mẽ hkwỳjaja Jutej wỳr ma pa nhūm mẽ hkwỳjaja Samar hwỳr ma pa. ã na prem mẽ umaj nhỹhỹm hpigrành par anẽ. ãm Jejus nhỹ hã mẽ ahkre xwỳnh maati pixjaja na prem Jerujarē kamã arĩk nẽ nhỹhỹm mōr kêt nẽ. Simāw Pêtre nẽ Juāw nẽ Xiakre nẽ Andre nẽ Firipti nẽ Patoromew nẽ Matêwre nẽ Makre nẽ Tomas nẽ Xiakre hōja nẽ Simāw ò nẽ Maxitreja. ãm jajaja pix na prem arĩk.

³ Nhūm Sawti haxwỳja Jejus kôt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprãm xaj tanhmã mẽ hipêx to ho pa. Na pre hte mẽ òrkwỳ hwỳr agjê nẽ mẽ unê. Měmyjê pynê nẽ mēnijê pynê nẽ ma mẽ o mra nẽ mẽ haghênh xà kamã mẽ haghê. Mẽ uràk nẽ kêp Ijaew tã ã mẽ hipêx anhỹr o pa.

⁴ Tã nhūm mẽ umaj Jerujarē rùm pika hō hwỳr mẽ hpigrành xwỳnhhtaja amarĩ pika hkwỳ hkôt ri pa hkêt nẽ. Na prem ma mẽ piitã mẽ kām Jejus kapēr jarēnh o ri mẽ hkôt pa. Kêp Tĩrtũm kot mẽ pakaxyw ãm xwỳnh ã harēnh rãhã ho ri mẽ hkôt pa.

Wajaga kot amnhĩ tã Firipti mar ã harēnh

Juāw 2.23-24

⁵⁻¹² Tã nhūm Firipti haxwỳja ma mō. Ma krĩ pê Samar hwỳr mō nẽ kamã mẽ kām Tĩrtũm kot mẽ pakaxyw ãm xwỳnhhta jarēnh o pa. Samar kamã na pre wajaga Simāwti ri Samar nhō xwỳnhjê hkôt mẽ no kupyw rãhã ho ri mẽ hkôt pa. Nẽ àhpumunh tỳx ã amnhĩ to jarkrar o ri pa. Jakamã nhūm mẽ kot amnhĩ nhĩpêx ã omu nẽ kamã no pyma nẽ. Nẽ htỳx ho ãm hāmri kot amnhĩ jarēnh ã hkamnhĩx. Jakamã nhūm pre mẽ kām tanhmã ri amnhĩ to hêx to ho pa pê mẽ no kupyw rãhã ho ri pa nhūm mẽ amnhĩ jaêr pê omu. Mẽ kot amnhĩ to hkryre xwỳnhjaja nẽ mẽ kot amnhĩ to rũnh xwỳnhjaja nhūm mẽ amnhĩ jaêr pê kot tanhmã amnhĩ nhĩpêx to hã omunh o hkôt pa. Nẽ ri axpēn mã harēnh o:

–Kokỹỹ. Wajagaja àhpumunh tỳx kumrêx. Tĩrtũm nhỹ hã măn te ã amnhĩ nhĩpêx anhỹr o pa nà? Măn pre Tĩrtũm kām àhpumunh xà hkwỳ gō nhūm ỹ hã ã amnhĩ nhĩpêx anhỹr o pa. Anẽ.

Hāmri nẽ hkôt hamaxpēr o ri hkôt amnhĩ nhĩpêx o pa.

Tã nhūm Firipti mẽ ò krĩ hwỳr mō nẽ mẽ kām Jejus Kris jarēnh o ri mẽ hkôt pa nẽ mẽ kām:

–Jes kêp Tĩrtũm kot mẽ pahwỳr mēnh xwỳnh jakamã kot kaj mẽ amnhĩ kaxyw hkôt ajamaxpēr nẽ hkôt amnhĩ xunhwỳ nhūm Tĩrtũm hã mẽ apumu nẽ mẽ ato hkra. Anẽ.

Hāmri nẽ Tĩrtũm nhỹ hã akupỹm tanhmã mẽ kute xwỳnhjê ho mex to ho pa. Mẽ ì kamã mẽ htyk xwỳnhjaja nẽ mẽ hyk o mẽ pa xwỳnhjaja nhūm mẽ ohtô nẽ akupỹm mẽ ho mex o pa. Nẽ mẽ hkwỳjê nẽ mẽkarōmnuti hkwỳ jano nhūm mẽ àmra htỳx o mẽ hkaga nẽ ma mẽ kurũm hapôx nẽ mra. ã Firiptija Jejus nhỹ hã mẽ ho mex o pa anẽ nhūm mẽ piitã ja hã omu nẽ kapēr ma nẽ hkĩnh nẽ. Nẽ kapēr mar tỳx nẽ hkôt hamaxpēr. Jao wajaga Simāwti kaga nẽ hpãnhã amnhĩ kaxyw Jejus kôt pix mã hamaxpēr nẽ hkôt amnhĩ xunhwỳ. Hāmri nhūm Firipti ja hã mẽ omu nẽ mẽ hkrã kumrã. Měmyjaja nẽ mēnijaja nẽ mẽ piitã mẽ hkrã kumrã. Ra mẽ kot Jejus kôt amnhĩ xunhwỳr ã mẽ piitã mẽ kām amnhĩ to amnhĩrit kaxyw nhūm mẽ hkrã kumrãr pa.

¹³ Hāmri nhūm wajaga Simāwti haxwỳja Jejus kapēr ma nẽ mẽ uràk nẽ amnhĩ kaxyw hkôt hamaxpēr nẽ hkôt amnhĩ xãm nhūm Firipti hkrã kumrã. Hāmri nhūm hkĩnh nẽ Firipti hkôt ri pa. Nẽ aa mẽ kot mẽmoj pumunh kêt kwỳ ho anhỹr o ri pa hã omu nẽ kamã no pyma ho hkôt ri pa. Nẽ kot Tĩrtũm nhỹ hã akupỹm mẽ ho mex ã omu nẽ tee ri hamaxpēr.

¹⁴ Tã hãmri nhũm Jerujarẽ kamã Jejus nhỹ hã mẽ ahkre xwỳnh maatijsa Samar nhõ xwỳnhjẽ jarẽnh ma. Ra mẽ kot Tĩrtũm kapẽr kõt amnhĩ nhĩpêx ã mẽ harẽnh ma nẽ hkĩnh nẽ. Hãmri nẽ ma mẽ hwỳr Simãw Pẽtre mẽ Juãw wa kumẽ. ¹⁵⁻¹⁷ Hãmri nhũm wa ma mẽ hwỳr wa mỗ nẽ pøj. Hãmri nhũm Firipti wa omu nẽ wa kãm krĩ nhõ xwỳnhjẽ jarẽ nẽ wa kãm:

—Nà na pa pre mẽ kãm Jejus kapẽr jarẽ nhũm mẽ inhma nẽ hkõt amnhĩ xunhwỳ. Jakamã pa pre mẽ hkrã kumrã. Nom na kormã Tĩrtũm Karõja mẽ hkarõ mã gjêx kêt nẽ. Anẽ.

Hãmri nhũm wa mẽ harẽnh ma nẽ mẽ himõk ã wa ìhkra jaxwỳr o ri mẽ hkõt mra. Ja kõt nhũm Tĩrtũm Karõ mẽ hwỳr wrỳ nẽ mẽ hkarõ mã gjêx pa. ¹⁸⁻¹⁹ Hãmri nhũm wajaga Simãwja mẽ amnhĩ tã wa omunh o xa nẽ hamaxpẽr o:

—Kokỹỹ. Kwa wa kot mẽ hã ìhkra jaxwỳrja kõt na hte Tĩrtũm Karõ mẽ hkarõ mã agjê. Hêxta waa nẽ. Inhmã ã mẽ hipêx anhỹr o ri ixpa hprãm tỳx. E pa ixkàxpore hkwỳ jamỳ nẽ o tẽ nẽ wa kãm kugõ kê wa tanhmã ixto pa wa uràk nẽ ã mẽ hipêx anhỹr o ri ixpa. Nà kot paj anẽ. Anẽ.

Hãmri nẽ wa hwỳr tẽ nẽ wa kãm:

—E ota ixkàxporeta. Kwa amnhĩm apy nẽ hpãnhã tanhmã ixto pa war apyrã nẽ mẽ hã inhĩhkra jaxwỳr o ri mẽ hkõt ixpa kê Tĩrtũm Karõja mẽ hkarõ mã agjê. Inhmã ja ho anhỹr prãm tỳx. Anẽ.

²⁰⁻²³ Hãmri nhũm wa tee ri ã kapẽr anhỹrja ã omu nhũm Pẽtre kãm:

—Tk. Kwa ajamaxpẽrja mex kêt. Xà na htem kàxpore ho Tĩrtũm mã amnhĩrer pê y hã mẽ ho hwỳr o pa nhũm Karõ mẽ hwỳr agjê? Nà na htem kàxpore ho Tĩrtũm Karõ japrõr kêt nẽ. Kot kaj wa ixpyrã nẽ ã mẽ hipêx anhỹr kêt nẽ. Ajamaxpẽrja mexre hã. Kormã ate Tĩrtũm kõt amnhĩ xãm tỳx kêt jakamã na ka atỳx ã ri ajamaxpẽr anẽ.

—Na ka ã wa ixte Tĩrtũm nhỹ hã mẽ hipêx anhỹr ã wa ixpumu nẽ amã wa ixpyrã nẽ ã mẽ hipêx anhỹr o ri apa hprãm xaj ajamaxpẽr punuj nẽ. Nhũm ajamaxpẽr punuj te kot apa hã apyr ka tee ate kệp amnhĩ kjênh pyràk. Kwa tokyx ajamaxpẽr punuj ã amnhĩ pumu nẽ akapri nẽ tokyx hkaga. Hãmri nẽ amnhĩ to Tĩrtũm wỳ kê amnhĩ katut kõt ajamaxpẽr punujja mẽ ka axte ã ajamaxpẽr anhỹr kêt nẽ. ã mẽ hamaxpẽr punuj anhỹr xwỳnhjaja koja mẽ nhỹrmã ma kuwy hwỳr pa. Anẽ.

²⁴ Hãmri nhũm tee ri amnhĩ tã kuma nẽ hkapri nẽ wa kãm:

—Kwa xà wehe? Tô tokyx ixto Tĩrtũm wỳ kê ã ijamaxpẽr anhỹrja mỳrapê hwỳr inhmẽnh kêt nẽ. Anẽ.

²⁵ Tã nhũm Simãw Pẽtre mẽ Juãw wa Samar nhõ xwỳnhjẽ mã Pahilti Jejus kapẽr jarẽnh pê ho mẽ ahkre hãmri nẽ ma akupỹm Jerujarẽ hwỳr mỗ. Ma pyka pê Samar hkõt mẽ kãm Jejus kapẽr jarẽnh o ma akupỹm mỗ.

Firipti mẽ Exiop nhõ xwỳnh wa harẽnh

Ijais 53.7-8

²⁶ Hãmri nhũm Firipti arĩ Samar kamã arĩk. Hãmri nhũm Tĩrtũm kapẽr o mẽ wrỳk xwỳnhja hwỳr wrỳ nẽ kãm:

—Pa? E ot pa awỳr wrỳ nẽ tẽ. Nà kêr ka tokyx akato nẽ ma mỗ nẽ Jerujarẽ rũm kànhmã Kas wỳr pry kahpêr ta nẽ hã juk nẽ ma hã mỗ. Kapõt ã pry nõrta kahpêr ta nẽ hã mỗ. E kwa tokyj.

Anhỹr o kãm kapẽr hãmri nẽ ma akupỹm tẽ nẽ kaxkwa hwỳr api. ²⁷ Hãmri nhũm Firipti kuma nẽ kato nẽ ma hwỳr mỗr kurê kumrêx. Mỗõ hãmri nẽ pryja kahpêr ta nẽ hã mỗ.

Hãmri nhũm ra mẽhõ myja mỗ. Exiop nhõ xwỳnh na pre. Exiop kamã mẽõ pahi na pre niti. Hixi pê na pre Kãtatre. Nhũm pry hã mỗr xwỳnhja kệp kãm kàxpore jamãr o pa xwỳnh. Exiop kamã te kệp mẽ õ kôwenatõ pyràk. Tã kot Tĩrtũm mã mex o mex ã harẽnh kaxyw ma Jerujarẽ hwỳr mỗ. ²⁸ Hãmri nẽ akupỹm Exiop wỳr kormã mỗ. Õ pàr kãm nhỹ nẽ Tĩrtũm kapẽr ã kagà htũm kamã kapẽr o mỗ. Tĩrtũm nhỹ hã kapẽr o pa xwỳnh pê Ijais kot Tĩrtũm kapẽr ã kagà htũmja nhũm kamã kapẽr o mỗ. ²⁹ Hãmri nhũm Tĩrtũm Karõ Firipti mã harẽ nẽ kãm:

—E mēhō mŭj wŷr aprōt nē tē nē hā ajēt nē ma hkôt tē. Anē.

³⁰ Hāmri nhŭm kuma nē ma hwŷr hprōt nē hā ajēt nē kot kagà kamā kapēr ã kuma. Ijais kot Tirtŭm kapēr ã kagà htŭm kamā kapēr ã kuma nē kām:

—Pa? Mān ka aprī hā ate kamā akapēr xwŷnhhta ma nà? Anē.

³¹ Hāmri nhŭm kām:

—Nà ixte maare hā. Mēhō kot hprī hā inhmā harē pa ixprī hā kuma? Xàt ka ixwŷr api nē ixri nhŷ nē aprī hā inhmā harēnh o ixkôt mō nà? Anē.

Hāmri nhŭm kuma nē hwŷr api nē ihkô hā nhŷ nē kagàta pumunh o nhŷ. ³² Nhŭm hā kagà kot:

Na htem ôwēhti par kaxyw nhŭm amarī mē kām akryk kuhê.

Nē mē kot kēp hkī jakàr kaxyw nhŭm ma anē nē amarī mē kām akryk kuhê.

Tā na pre mēhōja ôwēhti kot amnhī nhīpêx pyrāk o amnhī nhīpêx.

Jakamā nhŭm mē kot tanhmā hipêx to htā no nhŭm arī mē kām akryk xa. Amnhī nē tanhmā mē kām kapēr punuj to hkêt nē. Ām arī mē kām xa.

³³ Na prem homnuj tŷx nē ri hipêx kati rax nē.

Aa kot tanhmā amnhī tomnuj to hkêt kumrêx tā nhŭm mē ã hipêx anē nhŭm mēhō yr pē tanhmā nē mē kām kapēr to hkêt nhŭm prem kupī.

Nhŭm amnhī kanrēhā hkra hkêt rāhā ty. Jakamā kot puj mē hkrajê nhīxi mar kêt nē. Kra hkêt rāhā htyk kēnā. Anē.

³⁴ Nhŭm pre ã Exiop nhō xwŷnh Tirtŭm kapēr ã kagà htŭm kamā harēnh anē. Hāmri nē tee ri ã kot mēhō jarēnh anhŷrja kukamā hamaxpēr nē hā Firipti kukja nē kām:

—Kwa aprī hā inhmā mēhōja jarē. Mēhō na prem ã hipêx rax anē? Xà kot kagà xwŷnhhta na prem ã hipêx anē nà xà nhām mēhō na prem ã hipêx anē? E kwa aprī hā inhmā harē pa ã mē kot hipêx anhŷr xwŷnh kôt omu. Anē.

³⁵ Hāmri nhŭm kām:

—Tôe kot paj amā harē. Nà Jesus na prem ã hipêx anē nhŭm prem hā kagà. Anē.

Hāmri nē hprī hā kām kot kamā harēnh xwŷnhhta jarē. Jesus kot tanhmā mē panē amnhī nhīpêx toja nhŭm hprī hā kām harēnh o hkôt mō.

³⁶ Hāmri nhŭm wa kormā mō nē pry htā himô hānh mō nhŭm Exiop nhō xwŷnh omu nē Firipti mā kām:

—E mŭj gô mŭj nō. Xà kot kaj kamā ixkrā kumrā nà? Anē.

³⁷ Nhŭm kām:

—Nà kot kaj amnhī kaxyw Jesus Kris kôt ajamaxpēr nē hkôt amnhī xām hā kot paj akrā kumrār kurê kumrêx. Anē.

Hāmri nhŭm kām:

—Tŷ. Kēp Tirtŭm Kra kēnā kot paj kêt amnhī kaxyw hkôt ijamaxpēr kêt. Anē.

³⁸ Hāmri nē pàr o mrrar xwŷnh mã anē nhŭm pàr o nō nhŭm wa kato nē himô hwŷr wrŷ nhŭm Firipti hkrā kumrā. Kot Jesus kôt amnhī xām ã hkrā kumrā. ³⁹ Hāmri nē wa akupŷm api nhŭm Tirtŭm Karō Firipti mŷ nē ma nhŷhŷm o mō nhŭm Exiop nhō xwŷnhja axte omunh kêt nē. Hāmri nē ma akupŷm papxà hwŷr mō. Ra kot Jesus kôt amnhī xām jakamā hkīnh nē ma akupŷm mō.

⁴⁰ Rôm nhŭm Firipti krī pē Ajôt kamā pôj. Tirtŭm Karō kot Exiop nhō xwŷnh pē kator nē tanhmā ho nē Ajôt wŷr o mō hāmri nē kamā kumē. Hāmri nhŭm mē kām Jesus kot tanhmā mē panē amnhī nhīpêx to hā harēnh pē ma krī hō hwŷr mē kām ujarēnh anhŷr o pa rāhā krī pē Sejarej wŷr mō nē pôj.

9

Sawti kot Jesus kôt amnhī xām ã harēnh

Atre 22.6-11, 26.12-18

¹ Rôm nhŭm Sawtija xatā Jerujarē kamā Pahilti Jesus kôt mē kot amnhī xunhwŷr xwŷnhjaja tanhmā mē homnuj tŷx to ho ri mē hkôt pa. Kām mē himex par prām jakamā na pre hte ã amnhī nhīpêx anhŷr pix o pa. Tā ra hamaxpēr nē ma patre maati hwŷr tē nē mē hā amnhī jarē nē kām:

²—E ot pa awÿr tē. Kwa inhmā kagà nhīpêx pa kupy nē ma krī pē Tamas kām mē pahpê Ijaew xàptàr tūmrejê hwÿr o mō nē mē kām kugō. Kê mē kamā harē nē omu hāmri nē hkôt inhīhkra kamā Jejus kôt mē kot amnhī nhīpêx xwÿnhjê jagjê. Mēnijaja nē mēmyjaja. Hāmri pa mē unē nē man akupÿn awÿr mē o mō ka mē omu nē kam tanhmā mē hipêx to. Anē.

Hāmri nhūm kuma nhūm ja kām mex nē. Hāmri nhūm kām kagà nhīpêx nē kugō nhūm kupy nē hkôt mē pa xwÿnhjê mē ro hā ma Tamas wÿr mē hwÿr mōr kurê kumrêx.

³ Mōō mē ra hpôx o mōr mē nhūm puh kaxkwa rūm hirā rax kumrêx wrÿ nē hā ajêt nhūm hipôk ri xa. ⁴ Hāmri nē tee ri omu nē kām ma xaj pykap tēm nē akryk nō. Hāmri nhūm kaxkwa rūm mēhō kām kapêr nē kām:

—Pa Sawti? Hêxta waa nē. Kwa mon ka hte ixtomnuj tÿx o ri apa? Anē.

⁵ Hāmri nhūm amnhī jaêr pē kuma nē kām:

—Kwa mē atō na ka ā inhmā akapêr anē pahihtī? Anē.

Hāmri nhūm kām:

—Kwa nhūm ixpê Jejus ixte amā ixkapêr kênā. Pa na ka hte ixpê ixkôt mē kot amnhī xunhwÿr xwÿnhjê nhīpêx kati ho apa. Jao te pa ate ixtomnuj tÿx pyrāk. ⁶ Nom kot kaj axte ā amnhī nhīpêx anhÿr kêt kumrêx. E kànhmā xa nē māmri ma krī hwÿr tē. Kot kaj hwÿr pōj nhūm mēhō awÿr tē nē mēmoj tā amā karō ka ama nē hkôt amnhī nhīpêx. Anē.

⁷ Nhūm pre ā Jejus Sawti mā kapêr anē. Nhūm hkôt mē pa xwÿnhjaja mēmoja ma no ām hprī mar nē mēmoj pumunh kêt nē. Hāmri nē tee ri hamaxpêr nē kām ma xaj akryk kapêr kêt kumrêx nē kuhê. ⁸ Hāmri nhūm Sawti kànhmā xa nom rīt kêt nē tee ri rīt mā nhūm mē hpa hā kupy nē ma krīm o mō. ⁹ Nē Tamas wÿr o pōj nē nhÿri mēhō nhōrkwÿ hwÿr ho axà nhūm kamā nohkre nē arī hkrī. Tee ri amnhī kukamā hamaxpêr o hkrī. Nē apkur kêt nē hkōm kêt o ra hā apkati axkrunēpxi.

¹⁰ Tamas kamā na pre mēhō my pē Ananīsja pa. Kot Jejus kôt amnhī xunhwÿr xwÿnhjê hō na pre. Jakamā nhūm Jejus hwÿr kato nē kām kapêr. Te hpimtir kām hwÿr kator nē kām kapêr pyrā nē kām:

—Pa Ananīs? Anē.

Nhūm kām:

—ÿ? Ot pa xa. Mo na Pahihtī? Anē.

¹¹ Nhūm Jejus kām:

—E kêr ka akato nē ma mē kot kām: “Pry katàt” anhÿr xwÿnhhta wÿr tē. Hāmri nē kamā Jut nhōrkwÿ japêr. Kamā na Tas nhō xwÿnh pē Sawtija hkrī. Na no hkre nē inhmā amnhī jarēnh o hkrī. Ka hwÿr axà nē omu. ¹² Ate hwÿr atēm nē inhÿ hā hā anhīhkra xir nhūm akupÿm rīt mex kaxyw na ato amÿti. Jakamā e ma hwÿr tē nē ā hipêx anē. Anē.

¹³ Hāmri nhūm Ananīs tee ri kuma nē kām Sawti puma ho amnhī kamā kahak nē. Hāmri nē kām:

—Kwa nà Pahihtī. Tām na xep hte Jerujarē kamā mē kot amnhī kaxyw akôt mē hamaxpêr xwÿnhjê nhīpêx kati ho pa. Pa ra mē hā harēnh ma. ¹⁴ Tā na xep ra jar Tamas wÿr pōj. Patre krāhtūm kapêr nhÿ hā kot mē ixpê akôt amnhī xunhwÿr xwÿnhjê pynēnh nē ma akupÿm hwÿr mē ixto mōr kaxyw. Tān ka ri hwÿr ijano. Kwa nà ri ixto anhÿr kêt nē Pahihtī. Anē.

¹⁵ Nhūm Jejus kām:

—Nà māmri ma hwÿr tē. Ra ixte amnhī kaxyw ām kênā. Jakamā koja ā mē anhīpêx anhÿrta hpānhā ma mē piitā mē kām ixkapêr jarēnh o pa. Mē apê Ijaew mā nē mē anhō pahi hkwyjê mā nē mē kêp Ijaew kêt xwÿnhjê mā. Koja mē piitā mē kām ixkapêr jarēnh mex o ri mē hkôt pa. ¹⁶ Koja mē ixtā homnuj tÿx nē nhūm amnhī xà htÿx kamā hamak o pa. Nom kot paj ixprī hā mē kot tanhmā ixtā hipêx to hkukamā kām ixujarēnh pa nhūm amnhī kukamā amnhī jarēnh ma. E tokyx māmri ma axāmnhix hwÿr tē. Anē.

¹⁷ Hāmri nhūm kuma nē kato nē ma Sawti hwÿr htēm kurê kumrêx. Hāmri nē ixkre hwÿr axà nē omu nē hkrā hā ihkra xi nē kām:

—Pa Jejus kôt ixtō Sawti? E na Pahihti Jejus awÿr inhmē pa awÿr tē. Pry kahti ri kot awÿr kator xwÿnhnta. Tã akupÿm arÿt nhÿm Tÿrtÿm Karō kot akarō mã àr kaxyw na awÿr inhmē pa tē. Anē.

¹⁸ HãMRI nhÿm mẽmoj te tep kà pyrækja Sawti no rÿm hapôj nē rôrôk nhÿm akupÿm rÿt mex kurê kumrêx. HãMRI nē kãnhmã xa nhÿm Ananÿs hkrã kumrã. Ra amnhÿ kaxyw Jejus kôt hamaxpêr ã hkrã kumrã. ¹⁹ HãMRI nhÿm nhÿ nē apku nē akupÿm hihtÿx.

Sawti kot Tamas kamã Jejus kapêr jarênh
Sikÿn Korÿt 11.22-23

Nhÿm Sawti Tamas kãm mẽ kot Jejus kôt amnhÿ xunhwÿr xwÿnhjê hkôt amnhÿ xãm nē mẽ hkôt ri pa nē tokyx ma akupÿm mör kêt nē. ²⁰ Kormã mẽ hkôt ri pa nē Ijaew nhô Tÿrtÿm kapêr o mẽ ahkre xà hã ixkre hwÿr mra nē kamã mẽ kãm Jejus kapêr jarê. Kêp Tÿrtÿm Kra hã harênh o kuhê. ²¹ HãMRI nhÿm mẽ amnhÿ jaêr pê ã harênh anhÿrja ma nē tee ri hamaxpêr nē axpên mã:

—Kokÿÿ. Kwa tãm na xep pre Jerujarê kamã amnhÿ kaxyw Jejus kôt mẽ kot amnhÿ xunhwÿr xwÿnhjê homnuj tÿx o pa. Tã xep jar kot mẽ hkwÿjê pynênh nē ma mẽ o mör nē Jerujarê kamã patre krãhtÿmjê mã mẽ ôr kaxyw na pre man mẽ pahwÿr mō. Tã ra tanhmã hamaxpêr to nē axtem nē mẽ pamã Jejus kapêr jarênh o mẽ pajahkre ho pa. Anē.

²² HãMRI nhÿm Sawti arÿ Tamas kãm Ijaew mã tanhmã Jejus jarênh to kamã hihtÿx o mẽ hkôt pa nē mẽ kãm:

—Nà Jejus Krisja na pre Tÿrtÿm mẽ pakaxyw ãm nē mẽ pahwÿr kumê. ãm hãMRI na pa mẽ amã ja jarê. Anē.

HãMRI nhÿm mẽ kuma nē tee ri kutã tanhmã kapêr to hkukamã hamaxpêr.

²³ Tã ra hã apkati xohtô nē nhÿm Tamas kãm Ijaew kwÿjaja kot Sawti pÿr kaxyw hã axpên ma. ²⁴ HãMRI nhÿm mẽhōja hã ama nē Sawti hwÿr tē nē kãm mẽ harê nē kãm:

—Kwa Sawti kêr ka axkãm ajamak rom. Na mẽ pahkwÿjaja atã amÿnê. Na mẽ ra krÿ puhã kahê xà hã hakwakre piitã hamãr ho kuhê. Kot kaj nhÿhÿm akato nhÿm mẽ apumu nē apynê nē apÿ. Anē.

²⁵ Jakamã nhÿm kamãt nhÿm Sawti hkôt ri mẽ pa xwÿnhjaja kawà rax ô mÿ nē hwÿr o tē nē kãm ãm nhÿm hwÿr axà nē nhÿ. HãMRI nhÿm mẽ hkagrÿ nē kên o krÿ puhã kahêja nhÿrô pê ho wrÿ nhÿm mẽ kêp kato nē ma mō.

Sawti kot Jejus kwÿjê hkôt pikamênh ã harênh
Karatas 1.15-24

²⁶ Tã nhÿm Sawti krÿ pê Tamas rÿm kato nē ma akupÿm Jerujarê hwÿr mō hãMRI nē hwÿr pôj. HãMRI nē mẽ kot Jejus kôt amnhÿ xunhwÿr xwÿnhjê hkôt amnhÿ jarênh kaxyw mẽ hwÿr tē. HãMRI nhÿm mẽ tee ri amnhÿ wÿr omu nē kot Jejus kôt amnhÿ xãm ã amnhÿ to hêx ã hkamnhÿx hãMRI nē amnhÿ kamã kahak o amnhÿ nê hkurê nē mẽ piitã kãm uma nē. ²⁷ ãm Panãpe pix ãm hãMRI kot Jejus kôt amnhÿ xãm kôt hamaxpêr. HãMRI nē ma hwÿr tē nē haprô nē ma Jejus nhÿ hã mẽ ahkre xwÿnh maatijê hwÿr o tē nē yr pê mẽ kãm kapêr nē mẽ kãm:

—Kwa ãm hãMRI na Sawti amnhÿ jarê. Na ra mẽ pahpyrà nē Jejus kôt amnhÿ xãm. Na xep pre Tamas wÿr pry hã kormã mō nhÿm xep Pahihti Jejus hwÿr kato nē kaxkwa rÿm kãm kapêr nhÿm kuma nē hkôt amnhÿ xãm. Jakamã nhÿm xep ra axtem kot amnhÿ nhÿpêx nyw o Tamas nhô xwÿnhjê mã Jejus kapêr jarênh o ri mẽ hkôt pa. Ra amnhÿ kamã kãm mẽ uma hkêt nē àmnhÿx ri mẽ kãm harênh o ri mẽ hkôt pa. Anē.

²⁸ HãMRI nhÿm mẽ kuma nē amnhÿ kôt Sawti mẽ nhÿm mẽ hkôt ri pa. HãMRI nē Jerujarê kamã mẽ piitã mẽ kãm Jejus kapêr jarênh o pa. Kãm Jejus kôt amnhÿ xunhwÿr kêt xwÿnhjê puma hkêt nē àmnhÿx ri mẽ kãm kapêr jarênh o ri mẽ hkôt pa. ²⁹ Nê Ijaew kwÿ pê Gresjê kapêr o mẽ kapêr xwÿnhjê mã nhÿm xatã mẽ kãm Jejus jarênh o ri mẽ hkôt pa. Kêp Tÿrtÿm kot mẽ pakaxyw ãm xwÿnh ã harênh rãhã ho ri mẽ hkôt pa. No nhÿm mẽ kãm mar prãm kêt nē ra kot Jejus ã hpÿr mã. ³⁰ HãMRI nhÿm mẽ kot Jejus kôt amnhÿ xunhwÿr xwÿnh kwÿjaja mẽ harênh ma nē mẽ kêp ho kato nē ma krÿ pê Sejarej wÿr o mō. HãMRI nē kurÿm ma akupÿm ô krÿ pê Tas wÿr kumê nhÿm ma akupÿm mō.

³¹ Tã ra Sawti kot Jejus kôt amnhĩ xãm jakamã nhũm mẽ kãm mẽ hkurê xwỳnhjaja axte Jejus ã tanhmã hkwỳjê hto hkêth nhũm mẽ piitã hamakêtkati nê àmnhĩx ri pa. Pika pê Jutej kamã nê Garirej kamã nê Samar kamã nhũm mẽ piitã hamakêtkati nê àmnhĩx ri pa. Hãmri nê Tirtũm mã mex o mex ã harênh o ri pa. Nhũm Tirtũm Karõ tanhmã mẽ hkrã hto nhũm mẽ ra kapêr kôt amnhĩ nhĩpêx mex o mō. Hãmri nhũm mẽ ohtô rax nê mẽ urak nê Jejus kôt amnhĩ xunhwỳ nê hkwỳjê hkôt axkamê.

Enejti akupỹm mex ã harênh
Atre 3.1-10

³² Tã nhũm Simãw Pêtreja ma mẽ kot Jejus kôt amnhĩ xunhwỳr xwỳnhjê mã Tirtũm kapêr jarênh o mẽ ahkre kaxyw ma krĩ piitã hkôt pa. Jakamã krĩ pê Rit wỳr mō ³³ nê hwỳr pōj nê kamã Enejti pumu. Nhũm ĩ kamã htyk pa nê kupĩp kãm hikwỹ rãhã hã amgrà pê 8. ³⁴ Hãmri nhũm Simãw Pêtre omu nê Jejus nhỹ hã kãm kapêr nê kãm:

—Pa Enejti? E na Jejus Kris akupỹm ato mex. Jakamã e kãnhmã xa nê akupĩpta py. Anê.

Hãmri nhũm akupỹm mex nê kãnhmã xa nê amnhĩ pumu nê hkĩnh o hkĩnh. ³⁵ Hãmri nhũm krĩja kamã nê krĩ hō pê Sarõ kamã mẽ piitã harênh ma nê mẽ kot amnhĩ tomnuj kaga hpa nê hpãnhã Jejus kôt amnhĩ xunhwỳ nê hkôt amnhĩ nhĩpêx o pa.

Tapitre akupỹm htĩr ã harênh
Rukre 8.49-56; Atre 20.7-12

³⁶ Nhũm Tapitreja krĩ pê Jope kamã na pre pa. Gres kapêr kãm hixi pê Nokre. Mẽ kapêr kãm Nokreja te kêp “karà” anhỹr jarênh pyrak. Na pre ra Tapitre pê Nokreja Jejus kôt amnhĩ xãm nê mẽ piitã mẽ ho mex o ri mẽ hkôt pa. Nê mẽ kêp amrakati xwỳnhjê kamã ukapĩrĩ ho ri mẽmoj to mẽ kutã nojarêth o ri mẽ hkôt pa. ³⁷ Tã ra à htỳx nê hãmri ty. Hãmri nhũm mẽ tee ri omu nê hkapĩrĩ nê mỳr rax nê. Nê kumỳ nê kuhō hãmri nê kormã haxàr kêt ri kỳx pê ixkre kamã kuxi nê kuri mỳr o hkrĩ.

³⁸ Nhũm Simãw Pêtre kormã krĩ hō pê Rit kamã ri pa. Rit rũm Jope hwỳr jawỳ jakamã nhũm Jope kamã mẽ kot Jejus kôt amnhĩ xunhwỳr xwỳnhjaja Simãw Pêtre jarênh ma hãmri nê hwỳr ja wa ho hamêxkrut nê wa kumê. Nhũm wa ma hwỳr tẽ nê hwỳr pōj nê omu nê kãm:

—Pa? E jar na pa wa awỳr tẽ. Na Jejus kôt mẽ pahtōx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwỳr tẽn omu nà? Anê.

³⁹ Hãmri nhũm wa kuma nê ma wa hkôt htêm kurê kumrêx. Hãmri nê Jope hwỳr pōj nê mẽ hwỳr tẽ nhũm mẽ kỳx pê htyk nê nōr xwỳnhja wỳr ho api nhũm hwỳr axà. Nhũm kuri mẽ kêp mẽ mjên htyk xwỳnhjaja hkapĩrĩ nê mỳr o hkrĩ. Hãmri nhũm Simãw Pêtre mẽ hwỳr axà nhũm mẽ omu nê kãm Tapitre kormã htĩr ri kot tanhmã mẽ ho mex to hã harê. Nê mẽ ê hkwỳ jamỳ nê kãm kupêr nê kãm:

—Ga ja pumu. Tyk xwỳnhhta na pre mẽ inhmã hkay nê kugō. Na pre hte mẽ ixto mex o pa. Tã mẽ ixpê ty. Hêxta gàu nê. Na pa mẽ ixkapĩrĩ htỳx kumrêx. Anê.

⁴⁰ Hãmri nhũm mẽ kuma nê mẽ kator pa hãmri nê htyk xwỳnhhta ri hkõn krã ho nhỹ nê ho Tirtũm wỳ. Hãmri nê htyk xwỳnhhta mã kapêr nê kãm:

—Pa Tapitre? E kwa kãnhmã nhỹ. Anê.

Pu nhũm no amra nê Simãw Pêtre pumu nê kãnhmã nhỹ. ⁴¹ Hãmri nhũm hpa hã kupy nê kãnhmã ãm nê kapôt ã mẽ kuhê xwỳnhjê mã anê nhũm mẽ akupỹm wa hwỳr agjê nhũm mẽ kãm:

—E ota. Na Tirtũm akupỹm mẽ amã ho htĩr. Anê.

Hãmri nhũm mẽ amnhĩ jaêr pê omu nê hkĩnh tỳx nê. ⁴² Hãmri nhũm Jope kamã mẽ piitã harênh ma nê mẽ ohtô nê amnhĩ kaxyw Jejus kôt hamaxpêr nê hkôt amnhĩ xunhwỳ.

⁴³ Hãmri nhũm Simãw Pêtre Jope kamã ri pa hã apkati xohtô nê tokyx mẽ kurũm kato nê ma krĩ hō hwỳr mōr kêt nê. Na pre mry kà ho mẽmoj nhĩpêx o pa xwỳnh pê Simãw ri pōj nê kuri pa hã apkati xohtô nê.

10

Konëre kot Simāw Pêtre hã karõ hã harënh

Rukre 7.1-10

¹Tã nhũm Ijaew kêt xwýnh Konëre. Kêp Rômjê nhõ pôristi krãhtũm na pre. Õ pôristija pika pê Itar nhõ xwýnh na pre mẽ nhũm Konëre kêp mẽ hkrãhtũm. Krĩ pê Sejarej kamã. ²Konëreja kot amnhĩ to mex o pa xwýnh na pre. Kêp Ijaew kêt tã na pre hte òrkwỹ kamã hkwyjê mẽ Tĩrtũm ã hpijaàm nẽ kãm mex o mex ã harënh o pa. Apkati mẽ kãm amnhĩ jarẽ. Nẽ mẽ kêp amrakati xwýnhjê mã kàxpore hkwy nhõr o pa. ³Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrã nẽ kaxkwa kamã Tĩrtũm kapêr o wrýk xwýnh pumu. Nhũm hwýr wrý nẽ tanhmã kãm kapêr to nẽ kãm:

—Pa Konëre? Anẽ.

⁴Nhũm tee ri omu nẽ kãm ma htýx kumrêx. Hãmri nẽ kãm:

—Mo na? Anẽ.

Hãmri nhũm kãm:

—Nà ate amnhĩ to Tĩrtũm wýr o apaja nhũm ra amnhĩ tã ama nhũm ja kãm mex nẽ. Nẽ ate mẽ kêp amrakati xwýnhjê mã kàxpore hkwy nhõr o apaja nhũm ja mãänën kãm mex nẽ.

⁵—Jakamã e inhma. Kêr ka ma Jope hwýr amã mẽ àpênh xwýnh kwý rẽ kê mẽ ma hwýr mra nẽ kamã mẽhõ pê Simāw Pêtre japrõ nẽ man akupýn awýr o mõ. ⁶Simāw kot mry kà ho mẽmoj nhĩpêx o pa xwýnhnta nhõrkwỹ kamã na hte pa. Òrkwỹja gô mý ri na. E hwýr mẽ arẽ kê mẽ ma hwýr mõ nẽ haprõ nẽ man awýr o mõ kê amã mẽmoj mex jarẽ ka ama. Anẽ.

⁷Nhũm pre ã Tĩrtũm kapêr o wrýk xwýnhja Konëre mã kapêr anẽ hãmri nẽ kato nẽ ma akupým api. Hãmri nhũm kot mar xà hkôt jajê rê nẽ Simāw Pêtre hwýr mẽ kurẽ. Kãm àpênh xwýnhjê ho hamêxkrut nẽ kaxyw õ pôristi hõ. Pôristija na pre hte Konëre pyrã nẽ Tĩrtũm ã hpijaàm o pa. ⁸Jakamã nhũm mẽ kurê nẽ mẽ kãm kapêr hãmri nẽ ma Jope hwýr Simāw Pêtre hwýr mẽ kurẽ nhũm mẽ kato nẽ ma hwýr mõ. ⁹Hãmri nhũm apkati nhũm kaxkwa nhĩpõk ri myt nhỹ nhũm mẽ hwýr hpõx o mõ.

Simāw Pêtre tanhmã hpimtir to hã harënh

Atre 11.5; Karatas 2.11-21

Rôm nhũm Simāw Pêtre kot Tĩrtũm mã amnhĩ jarënh kaxyw ixkre nhĩmõk ã api nẽ himõk po hã kãm amnhĩ jarënh o nhỹ. ¹⁰Hãmri nẽ ra kãm prãm nẽ nom nhũm mẽ kormã kãm õ hã àpênh jakamã nhũm arĩ ixkre nhĩmõk ã Tĩrtũm mã amnhĩ jarẽ.

Hãmri nẽ Konëre pyrã nẽ te hpimtir kãm kot mẽmoj pumunh pyrã nẽ mẽmoj pumu nhũm Tĩrtũm Konëre hkukamã tanhmã kãm mẽmoj to amnhĩrit to. No ãm hã kuxi nẽ kãm harënh jakamã nhũm Simāw Pêtre te hpimtir kãm kot mẽmoj pumunh pyrã nẽ mẽmoj pumu. ¹¹Nhũm kaxkwa katêr nhũm kurũm mẽmoj te kot mẽ hpiipro xà pyrãk xwýnhja pyka hwýr wrýk o mõ. Nẽ hatur xà piitã axpên tã akuprõ nẽ ajêt nẽ wrýk o mõ nhũm omu. ¹²Mẽ hpiipro xàta kamã mẽmo mry piitã hikwỹ. Mẽmo mry hpar o ri pa xwýnhjaja nẽ htu mýr pê ri pa xwýnhjaja nẽ mẽmo àk kýx pê htor o ri mrar xwýnh piitã mẽ hpiipro xàja kamã hikwỹ nhũm omu. ¹³Hãmri nhũm Tĩrtũm kãm:

—Pa Simāw Pêtre? Mãn ka ra amã prãm nẽ nà? E kànhmã xa nẽ axãmnhĩx mãmri mryta õ kapi nẽ apĩ nẽ ho anẽ nẽ aku. Piitã mẽ ate hkur mã mex. Anẽ.

¹⁴Hãmri nhũm tee ri kuma nẽ kãm:

—Kwa nà Pahi Maati. Mẽ ixpê Ijaew mẽ ixte mry piitã hkur kêt. ãm hkwy pix na pa htem kuku. No mry jaja aa mẽ ixte hõ hkwy hkrêr kêt. Anẽ.

¹⁵Hãmri nhũm Tĩrtũm kãm:

—Nà kot anhýr tã kot paj pam amã mẽmoj jarẽ ka kamã anhõkre kahak kêt nẽ. Mãmri amnhĩm hõ kapi nẽ apĩ nẽ ho anẽ nẽ axãmnhĩx hkwy hkre. Anẽ.

¹⁶Nhũm pre ã kãm mry hã karõ anhýr o axkrunêpxi. Simāw Pêtre kot mãmri Ijaew kêt xwýnhjê hkôt pa nẽ àmnhĩx ri mẽ kutã apkur nhũm Tĩrtũm kãm ja mex nhũm kot hã amnhĩ pumunh kaxyw nhũm ã kãm harënh anhýr o axkrunêpxi. Hãmri nhũm mẽ hpiipro

xàja ma akupÿm kaxkwa hwÿr àpir o mō nē akunok. ¹⁷ Hāmri nhūm Pêtre te hkrākator pyrāk jao tee ri hpimtir kukamā hamaxpêr o nhÿ nē hamaxpêr o:

—Kwa mo kaxyw na Tirtūm ā inhmā ja hā karō anē? Anē.

Rôm nhūm Konēre kot hwÿr mē rēnh xwÿnhjaja ra hwÿr hpôx o mō. Ijaew kêt xwÿnhtaja Simāw nhōrkwÿ hā mē hkukjêr o mō nē hwÿr pōj nē hakwakrem kuhê. ¹⁸ Hāmri nē ôrkwÿ nhō xwÿnhjê mǎ kām:

—Pa na ka mē arī akrī? E Simāw Pêtre hwÿr na pa mē mō. Xà jar na hte pa nà? Anē.

Hāmri nhūm mē kām: —Tÿ. Omūj kÿx pē ixkre nhīmōk ā na nhÿ. Anē.

¹⁹ Nhūm Simāw Pêtre arī kot mēmoj pumunhta kukamā hamaxpêr o nhÿ nhūm Tirtūm Karō kām mē hpôx xwÿnhjê jarē nē kām:

—E Simāw Pêtre. Ota Ijaew kêt xwÿnhjaja axkrunēpxi nē ajapêr o mō nē ra anhōrkwÿ hwÿr pōj. ²⁰ Mē hwÿr wrÿ nē mē kot amā mēmoj jarēnh ma nē māmri axàmnhix ma mē hkôt mō. Tanhmā ajamaxpêr to hkêt nē. Pa na pa awÿr mē kumē nhūm mē mō. Anē.

²¹ Hāmri nhūm kuma nē mē hwÿr wrÿ nē mē omu nē mē kām:

—Pa? Xà pa na ka mē ijapêr o mō? E ot pa xa. Kam nē mē inhmā mēmoj jarē pa mē ama. Mēmo kaxyw na ka mē ixwÿr mō? Anē.

²² Hāmri nhūm mē kām:

—Nà mē inhō patrāw Konēre na awÿr mē inhmē pa mē mō. Na hte tām amnhī nhīpêx o pa. Nē Tirtūm ā hpijaàm nē kām mex o mex ā harēnh o pa. Nhūm mē inhō krī kamā Ijaew kām hkīnh nē. Tā na Tirtūm kapêr o wrÿk xwÿnhja ham hwÿr wrÿ nē kām ajarē. Kot amnhī wÿr atā karō nhūm ate hwÿr amōr nē kām axujarēnh kaxyw kām ajarēnh jakamā nhūm mē ixte ajaprōr kaxyw awÿr mē inhmē pa mē man awÿr mō. Anē.

²³ Hāmri nhūm mē kuma nē mē kām:

—Tōe nà na pa mē ama. E mē agjê nē akrī nē jar mē ixri nō kê apkati pu mē rī ma akupÿm mō. Anē.

Hāmri nhūm mē kuma nē mē hwÿr agjê.

Tā nhūm apkati nhūm mē akupÿm nojarêr nhūm Simāw Pêtre ma mē hkôt mō. Nhūm Jope kamā mē kot Jejus kôt amnhī xunhwÿr xwÿnh kwÿjaja ma mē hkôt mō. Nhūm mē mōr o kamāt.

²⁴ Hāmri nhūm apkati nhūm mē Sejarej wÿr hpôx o mō. Nhūm ra Konēre mē kutêp amnhī wÿr hkwyjê ho akuprō nhūm mē Simāw Pêtre kutêp ôrkwÿ kamā akuprō nē hkrī.

²⁵ Hāmri nhūm mē hwÿr pōj nē mē hwÿr àr kaxyw nhūm Konēre amnhī wÿr omu nē kànhmā xa nē kutā tē nē hpar pē hkōnkrā ho tēm nē nhÿ. ²⁶ Hāmri nhūm tee ri ja hā omu nē pa hā kupy nē kànhmā ãm nē kām:

—Kwa kànhmā xa. Ixpê Tirtūm kêt tā ka ri ā inhīpêx anē. Anē.

²⁷ Hāmri nē hkôt ôrkwÿ hwÿr axà nē kutêp mē pikuprōnh xwÿnhjê pumu nē mē kām:

²⁸ —Pa na ka mē arī akrī? E mǎn ra mē ate mē ixpê Ijaew kot amnhī nhīpêx ā mē ixpumunh mex. Na pa htem mē apê axtem nhō xwÿnhjê hkôt ri ixpa hkêt nē. Nē mē anhōrkwÿ hwÿr inhgijêx kêt nē. Tā ham Tirtūm inhmā mē ixte ā amnhī nhīpêx anhÿr o ixpaja nē ixkurê nē inhmā: “Kot paj pam mē hkwyjaja mex ā mē harē ka mē kamā anhōkre kahak kêt nē.”

²⁹ —Anhÿr jakamā ka xep pre ixtā karō pa inhītōt kêt nē man mē awÿr inhmōr kurê kumrêx. E mē inhmā mēmoj jarē pa mē ama. Mēmo kaxyw na ka mē ixtā karō? Anē.

³⁰ Hāmri nhūm Konēre kām:

—Nà jǎa na pa pre jar inhōrkwÿ kamā Tirtūm mǎ amnhī jarēnh o nhÿ. Ra myt xàpanh grire pa kām amnhī jarē. Hāmri nhūm Tirtūm kapêr o wrÿk xwÿnh ixwÿr wrÿ nē hirā rax kām xa. ³¹ Hāmri nē inhmā: “Pa Konēre? E na hte Tirtūm ate kām amnhī jarēnhhta mar o hkrī. Nē ate mē kēp amrakati xwÿnhjê ho mex o apaja nhūm hā apumu.

³² Jakamā e ma Jope hwÿr amā mē àpēnh xwÿnh kwÿ rē kê mē ma hwÿr mō nē kamā Simāw Pêtre japrō nē man akupÿn awÿr o mō. Mry kà ho mēmoj nhīpêx o pa xwÿnh Simāw nhōrkwÿ kamā na hte pa. Ôrkwÿja gō mÿ ri na.” Anē.

³³—Ā kot inhmā kapēr anhÿr jakamā na pa kuma hāmri nē awÿr jajê rēnh kurê kumrēx. Tā ka mē hkôt man mē ixwÿr mō nē ā apôx anē. Ām hāmri na ka mē hkôt mō. Mē apê Ijaew kot amnhî nhîpêx kuhpa hā amnhî nhîpêx nē axàmnhîx man mē ixwÿr mō. Tā ot pa mē Tirtûm noo mā ixkrî. Kam nē māmri ÿ hā mē inhmā mēmoj jarē pa mē ama. Anē.

Simāw Pêtre kot Konēre mā ujarēnh

³⁴Hāmri nhûm Simāw Pêtre Konēre kot kām amnhî jarēnhja ma nē mē kām awjarē nē mē kām:

—Nā ām hāmri na Tirtûm mē akukamā tanhmā inhmā kapēr to. Xep kām mē ixpê Ijaew pix japê hkêt. Kām mē pahpiitā mē pajapê nē mē panhîpêx o xpên pyrāk. ³⁵Koja ahpÿnhā pyka piitā hkôt mēhō mē ixpyrà nē kêp Ijaew kêt tāā hkôt amnhî xām nē hā hpijaàm pē kām mex o mex ā harē nē tām amnhî nhîpêx. Hāmri nhûm Tirtûm ja hā omu nhûm ja kām mex nē.

³⁶—Na pre ra mē ixpê Ijaew mā tanhmā Kra Jejus Kris jarēnh to. Jejus kot mē panê htyk kukwak ri na hte mē ixte hkôt amnhî xunhwÿr xwÿnhjê ho hkra. Tā ra määnēn ā mē apê Ijaew kêt xwÿnhjê mā ā amnhî jarēnh anē nē Jejus htyk kukwak ri mē ate mē ixpyrà nē hkôt amnhî xunhwÿr xwÿnhjê ho hkra. Jakamā Jejus Krisja kêp mē pahpiitā mē panhō Pahihti.

³⁷⁻³⁸—Mān ka prem ra harēnh ma. Mē ixpê Ijaew nhō pika pē Jutej kumrēx kām na pre Juāw Paxisja Jejus kukamā mē kām harē nē mē hkrā kumrār o pa. Mē piitā mē kot amnhî tomnuj kaga nē Tirtûm kôt amnhî xunhwÿr ā mē omunh xà hkôt mē hkrā kumrā. Jejusja krî pē Najare kamā na pre hprêk. Tā hwÿr na pre Tirtûm amnhî Karō mē nhûm wrÿ nē hkarō mā axà nē hkôt pa ho pa. Jakamā nhûm àhpumunh o àhpumunh nē ma krî piitā hkôt tanhmā mē ho mex to ho ri mē hkôt pa. Pika pē Garirej kumrēx kamā mē piitā ri mē kām Tirtûm kapēr jarēnh o pa. Nē mēkarōmnuti kot Satanasti nhÿ hā tanhmā mē ho xwÿnhjaja nhûm mē nē mēkarōmnuti japôx o pa. Ā na pre Tirtûm nhÿ hā amnhî nhîpêx anhÿr o pa.

³⁹—Tā Jejus nhÿ hā hkrajê jahkre ho mē ixpa xwÿnhjaja na pa prem kot ri tanhmā amnhî to ho pa hā omunh par o ri hkôt ixpa. Mē ixpê Ijaew nhō pyka kamā nē mē inhō krî pē Jerujarē kamā kot ri tanhmā amnhî nhîpêx to ho paja pa prem piitā omunh o hkôt ri ixpa. Tā nhûm prem axtem nē mē ixpê pî kahpa hā kunhō nē kupî. ⁴⁰Hāmri nhûm htyk o apkati axkrunêpxi nhûm Tirtûm akupÿm ho htîr nē akupÿm mē ixwÿr kumē pa prem akupÿm htîr kām omu. ⁴¹No nhûm mē piitā akupÿm htîr kām omunh kêt nē. Ām mē ixwÿr pix na pre kato nē mē ixkutā apku pa mē papxipixjaja akupÿm htîr ā omu. Hāmri nhûm Tirtûm mē ixte ma mē piitā mē kām akupÿm htîr ā harēnh o ri ixpa kaxyw mē ixrê. ⁴²⁻⁴³Amnepêm Tirtûm nhÿ hā kapēr jarēnh o mē pa xwÿnhjaja na prem Jejus kukamā tanhmā hā kagà hto nē mē kām harēnh o pa. Nē mē kām:

Koja nhÿrmā mēhōja man mē pahwÿr wrÿ nē mē panê tanhmā amnhî nhîpêx to. Ka mē atō amnhî kaxyw hkôt ajamaxpēr nē hkôt amnhî xām hā koja Tirtûm ja hā apumu nē mēhō kot tanhmā mē panê amnhî nhîpêx to xwÿnhta kukwak ri amnhî katut kôt ate amnhî tomnuj rēnh pa nē axte kām hamaxpēr kêt nē. Anē.

Na pre Tirtûm nhÿ hā kapēr jarēnh o mē pa xwÿnhjaja Jejus kukamā ā harēnh nē hā kagà anē. Tā koja Jejus nhÿrmā akupÿn wrÿ hāmri nē mē htyk xwÿnhjê nē arî mē htîr xwÿnhjê mē pahto pimràatā tanhmā mē pajarēnh to. Mē pahte tanhmā amnhî nhîpêx to ho papa hā mē pahpumunh kôt tanhmā mē pajarēnh to. Hāmri nē Tirtûm mē wa kuri mē pahpîr tûm nē mē papa ho papa mā xwÿnhjê jarē nē määnēn wa kuri mē htîr tûm kêt xwÿnhjê jarē. Mē pahpiitā tanhmā mē pajarēnh to kaxyw na pre Tirtûm mē pakaxyw Jejus xām. Tā ā kot mē pajarēnh anhÿrja kukamā na pre mē ixte mē amā tanhmā harēnh to ho ixpa kaxyw mē awÿr mē ixrê. Mē ate kapēr mar nē tokyx Jejus kôt amnhî xunhwÿr kaxyw. Anē.

⁴⁴Nhûm Simāw Pêtre ā mē kām ujarēnh anhÿr rôm nhûm Tirtûm mē kot mar o hkrî xwÿnhjê hwÿr amnhî Karō rē nhûm mē hwÿr wrÿ nē mē hkarō mā gjêx pa. ⁴⁵⁻⁴⁶Hāmri

nhũm mẽ Tĩrtũm mã mex o mex ã harēnh o hkrĩ. No ãm mẽ kapēr kãm harēnh kêt nē. Mẽ kapēr kwỳ hõ ho kãm mex o mex ã harē. Aa mẽ kot mẽ kapēr mar kêt tã ra ho kapēr mex nē. Jakamã nhũm Jope rũm mẽ kot Simãw Pêtre hkôt mẽ mõi xwỳnhjaja. Ijaew kwỳ kot ra Jejus kôt amnhĩ xunhwỳr xwỳnhjaja amnhĩ jaēr pē ja hã mẽ omu nē axpēn mã:

—Hêxta waa nē. Mẽ kēp Ijaew kêt tã nhũm Tĩrtũm kot mẽ panhĩpēx pahpyrà nē mẽ hwỳr amnhĩ Karõ rē nhũm mẽ hwỳr wrỳ nē mẽ kãm agiê. Nà ãm hãmri na mẽ pahpyrà nē ã mẽ hipēx anē. Anē.

Hãmri nhũm Simãw Pêtre mẽ kuma nē mẽ kãm:

⁴⁷—Kwa pu mẽ hkrã kumrãr kurê kumrēx. Ra Tĩrtũm Karõ kot mẽ pahpyrà nē mẽ hkarõ mã giêx kēnã kot kêt mēhõ mẽ nē tanhmã mẽ pahpē àmnàr to. Ra mẽ kot mẽ pahpyrà nē Jejus kôt amnhĩ xunhwỳr kēnã. Anē.

⁴⁸Hãmri nē Konēre mẽ hkwỳjê mã kãm:

—E kot paj mẽ ate Jejus Kris kôt amnhĩ xunhwỳr ã mẽ akrã kumrã. Anē.

Hãmri nē mẽ hkrã kumrãr pa nhũm mẽ Simãw Pêtre mã kãm:

—Kwa kormã anojarēt kêt nē. Kritpēm ri mẽ ixkôt ri apa hã atã apkati grēre nē kormã ma akupỹm mõi. Anē.

Hãmri nhũm mẽ kuma nē mẽ hkôt ri pa hã apkati grēre hãmri nē nojarēt nē ma akupỹm mõi.

11

Simãw Pêtre kot hkwỳjê mã Konēre jarēnh

Atre 10.1-48

¹⁻²Hãmri nhũm Simãw Pêtre ma akupỹm mõi. Jutej kamã krĩ pē Jerujarē wỳr ma akupỹm mõi hãmri nē pøj. Hãmri nhũm Jutej kamã Jejus nhỹ hã mẽ ahkre xwỳnh maati jê mẽ mẽ kot Jejus kôt amnhĩ xunhwỳr xwỳnhjaja Ijaew kêt xwỳnhjê jarēnh ma. Konēre mẽ hkwỳ kot mẽ uràk nē Jejus kôt amnhĩ xunhwỳr ã mẽ harēnh ma. Jakamã nhũm Simãw Pêtre akupỹm mẽ hwỳr pøj nhũm mẽ omu nē mẽ hã àhkukjêr kurê kumrēx. Hãmri nhũm mẽ hkwỳjaja mẽ hã kãm akir nē kãm:

³—Kwa mẽ pahpē Ijaew pyrã nē mẽ kot amnhĩ my kwỳt kà jakàr kêt tã ka mẽmo hwỳr mẽ hwỳr mõi mẽ kuri pøj nē mẽ kutã apku. Anē.

⁴Hãmri nhũm Pêtre tee ri mẽ kuma hãmri nē hprĩ hã mẽ kãm amnhĩ jarē. Nē tanhmã Tĩrtũm kot kãm Ijaew kêt xwỳnhjê jarēnh to hã mẽ kãm harē nē mẽ kãm:

⁵—Kwa mẽ ã ri ajamaxpēr anhỹr kêt nē. E pa mẽ amã amnhĩ jarē ka mẽ inhma mãn. Nà na pa pre jãã Jope kamã Tĩrtũm mã amnhĩ jarēnh o nhỹ nē te ixpimtir kãm mẽmoj pumunh pyrãk. Nhũm mẽmojja te mẽ hpiro xà pyrã nē kaxkwa rũm ixwỳr wrỳk o mõi pa ixprĩ hã omu. ⁶Nhũm kamã mry piitãã. Mry xoprê nē mry xuwapô nē mry hpar o ri pa xwỳnhjaja nē mry htu mỳr pē ri pa xwỳnhjaja nē àk. Nē mẽ pahte hkur xwỳnhjaja nē mẽ pahte hkur kêt xwỳnhjaja. ⁷Kamã mry piitã pa omu. Hãmri nhũm Tĩrtũm inhmã: “Pa Simãw Pêtre? Mãn ka ra amã prãm nē nà? E kànhmã xa nē axàmnhĩx mãmri mryta õ kapi nē apĩ nē ho anē nē aku. Piitã mẽ ate hkur mã mex.” Anē.

⁸—Pa tee ri kuma nē kãm: “Kwa Pahi Maati. Mẽ ixpê Ijaewjaja mẽ ixte mryja piitã hkur kêt. ãm hkwỳ hpix na pa htem kuku. No ja hkwỳ aa mẽ ixte hõ hkwỳ hkrēr kêt.” Anē.

⁹Nhũm inhmã: “Nà nom kot anhỹr tãã. Kot paj pam amã mẽmoj jarē ka kamã anhõkre kahak kêt nē. Jakamã e mãmri amnhĩm hõ kapi nē apĩ nē ho anē nē axàmnhĩx hkwỳ hkrē.” Anē.

¹⁰—Na pre ã Ijaew kêt xwỳnhjê hwỳr inhmõi kukamã inhmã karõ ho axkrunēpxi anē. Nom hã kuxi nē inhmã mẽ pahte mry kur kēta jarē. Hãmri nhũm mẽ hpiro xàja ma akupỹm kaxkwa hwỳr api nē kakrãm axà nē akunok. ¹¹Hãmri nhũm Ijaew kêt xwỳnhjaja mẽ ixwỳr axkrunēpxi nē mra nē pøj. Konēreja Sejarej rũm ixwỳr mẽ rēnh xwỳnhjaja nhũm mẽ mra nē ixwỳr pøj. ¹²Hãmri nhũm Tĩrtũm Karõ ma mẽ hkôt inhmē. Mẽ kēp Ijaew kêt tã nhũm ixàmnhĩx ma mẽ hkôt ixpa kaxyw mẽ hkôt inhmē pa ma mẽ hkôt mõi. Nhũm Jope kamã mẽ kot Jejus kôt amnhĩ xunhwỳr xwỳnh kwỳjaja kēp 6ja ma mẽ

ixkôt mô. Pa mẽ mô nê Sejarej kamã Konëreja wÿr pøj. ¹³ Hãmri nhũm mẽ ixpumu nê mẽ inhmã amnhĩ jarê. Tĩrtũm kapêr o wÿk xwÿnh kot hwÿr wÿk nê òrkwÿ hwÿr àr nê tanhmã kãm kapêr toja nhũm inhmã harê. Na xep pre kãm: “E kêr ka ma Jope hwÿr amã mẽ àpênh xwÿnh kwÿjê rê kê mẽ ma hwÿr mô. Hãmri nê kamã Simãw Pêtre japrô nê man akupÿn awÿr o mô kê tanhmã mẽ amã ujarênh to. ¹⁴ Kojã mẽ amã tanhmã mẽ apê Tĩrtũm kra hprãm xaj tanhmã mẽ ate amnhĩ nhĩpêx to hã mẽ amã karô ka mẽ ama nê mar tÿx nê hkôt amnhĩ nhĩpêx. Ka mẽ anhörkwÿ kamã akwÿjê mẽ apimràatã ama nê mar tÿx nê. Hãmri nê kot mẽ amã hã karô xà hkôt amnhĩ nhĩpêx nhũm Jesus mẽ ate amnhĩ tomnuj pê mẽ apytàr pa.” Anê.

—Na xep pre ã Tĩrtũm kapêr o wÿk xwÿnhja kãm ijarênh anê. Jakamã nhũm ixwÿr jajê rê pa ma mẽ hkôt mô. ¹⁵ Hãmri nê kormã mẽ kãm tanhmã Jesus jarênh to. Tanhmã kot mẽ panê amnhĩ nhĩpêx to hã harê. Nê kormã mẽ kãm ixujarênh o ixãm rôm nhũm Tĩrtũm Karô te wam kot mẽ panhĩpêxta pyrã nê mẽ hwÿr wÿr nê mẽ hkarô mã gjêx pa. ¹⁶ Pa ja hã mẽ omu nê Pahihti Jesus kot akupÿm kaxkwa hwÿr nojarêr nê tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã kojã Tĩrtũm ta hpãnhã mẽ awÿr amnhĩ Karô rê nhũm mẽ akarô mã agjê.” Anê.

—Ã na pre Pahihti Jesus akupÿm nojarêr nê mẽ pamã kapêr anê. Jakamã pa ã kot mẽ hipêx anhÿr ã mẽ omu nê ã kapêr anhÿrja mã ijamaxpêr kurê kumrêx. ¹⁷ Na pu prem Pahihti Jesus Kris kôt amnhĩ xunhwÿ nhũm Tĩrtũm ja hã mẽ pahpumu nê mẽ pahwÿr amnhĩ Karô rê. Tã te kot mẽ panhĩpêxta pyrã nê mããnên Ijaew kêt xwÿnh tajê hwÿr kurê nhũm mẽ hkarô mã agjê. Mẽ kêp Ijaew kêt tã nhũm mẽ pahpyrã nê mẽ hwÿr kurê nhũm mẽ hkarô mã agjê. Tĩrtũm tãm kot amnhĩ krã hkôt mẽ hwÿr rênh kênã kot pa kêt mẽ nê tanhmã kêp ixãmnrã to. Anê.

¹⁸ Nhũm pre ã Simãw Pêtre mẽ kãm amnhĩ jarênh anê nhũm mẽ kuma nê tãm hamaxpêr nê hkĩnh nê. Nê axte mẽ hã tanhmã kãm nê hkêt nê. ãm mẽ hã Tĩrtũm mã mex o mex ã harê. Hãmri nê axpên mã:

—Nà ãm hãmri. Mẽ kêp Ijaew kêt tã na prem Jesus kôt amnhĩ xunhwÿ nhũm Tĩrtũm kot mẽ panhĩpêxta pyrã nê amnhĩ katut kôt mẽ kot amnhĩ tomnuj rênh pa. Nhÿrmã wa hkuri mẽ pahpyrã nê htĩr tũm nê pa ho pa kaxyw nhũm ã mẽ hipêx anê. Nà ãm hãmri na ã kot mẽ panhĩpêx pyrã nê mẽ hipêx anê. Anê.

ãxiok kamã Jesus kwÿ jarênh

Atre 4.36-37

¹⁹ Tã ra mẽ kot kên o Estewãw kapêr o hpĩr xwÿj ri mẽ kot ã hipêx anhÿrta pyrã nê mẽ kot Jesus kôt amnhĩ xunhwÿr xwÿnhjaja omnuj tÿx o pa. Jakamã nhũm mẽ hkwyjaja mẽ umaj ma ahpÿnhã krĩ hkwy hkôt pigrãnh pa. Wênĩs wÿr nê Sipre hwÿr nê ãxiok hwÿr nhũm mẽ ma ahpÿnhã krĩ hkwy hkôt anhgrã nê kamã pa ho pa. Nê mẽ kãm tanhmã Pahihti Jesus kot mẽ panê amnhĩ nhĩpêx to hã harênh o ri mẽ hkôt pa. No ãm kormã Ijaew pix mã harênh o pa.

²⁰ Tã hãmri nhũm mẽ hkwyjaja Sipre mẽ Sirên rũm ãxiok hwÿr pan pøj. Hãmri nê kamã mẽ kêp Ijaew kêt xwÿnhjê mã Pahihti Jesus kot amnhĩ nhĩpêx jarênh o pa. ã mẽ kot amnhĩ nhĩpêx anhÿr jakamã na mẽ ra ahpÿnhã ri mẽ kãm harênh o ri pa. Ijaew mã nê mããnên Ijaew kêt xwÿnhjê mã ²¹ nhũm mẽ ma mẽ hkôt ri Pahihti Jesus nhÿ hã mẽ kãm kapêr jarênh o ri mẽ hkôt pa. Hãmri nhũm mẽ ohtô nê amnhĩ nhĩpêx tũm kaga hpa nê hpãnhã amnhĩ kaxyw Jesus kôt hamaxpêr nê hkôt amnhĩ xunhwÿ.

²² Hãmri nhũm Jerujarê kamã Jesus kwÿjaja mẽ harênh ma nê mẽ hwÿr Panãpe mẽ. ãxiok hwÿr mẽ hwÿr kumê. Ma mẽ hwÿr mör nê Jesus kôt mẽ hamaxpêr o hihtÿx kaxyw. ²³ Hãmri nhũm ma mẽ hwÿr mô nê mẽ hwÿr pøj nê mẽ omu. Tĩrtũm kot mẽ ho mex ã mẽ omu hãmri nê mẽ ÿ hã hkĩnh nê. Nê mẽ kãm:

—Nà ãm hãmri na ka mẽ ra Jesus kôt amnhĩ xunhwÿ nê hkôt amnhĩ nhĩpêx mex o ri apa. Tã kêr ka mẽ ãm kapêr kôt pix mã ri amnhĩ nhĩpêx rãhã ho ri apa nê aa hkaga hkêt nê. Anê.

²⁴ Panāpeja na pre tām amnhĩ nhĩpêx o pa. Nê amnhĩ kaxyw Jejus kôt pix mã hamaxpêr mex o pa. Nê Tirtũm Karõ hkôt amnhĩ nhĩpêx rãhã jakamã na pre hte ý hã mẽ kãm Pahihti Jejus kot mẽ panê tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nê ohtô nê Jejus kôt amnhĩ xunhwỳ.

²⁵ Tã nhũm Panāpe āxiok rũm kato nê kot Sawti japrôr kaxyw ma krĩ pê Tas hwỳr mō. ²⁶ Hãmri nê hwỳr pøj nê Sawti pumu nê haprô nê ma akupỹm amnhĩ kôt āxiok hwỳr o mō. Hãmri nê kamã mẽ kot Jejus kôt amnhĩ xunhwỳr xwỳnhjê hkôt wa ri pa hã amgrà pyxi nê hapêx. Nê mẽ ho ohtô nê ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwỳnhjaja mẽ kot Jejus kôt amnhĩ nhĩpêx xwỳnhjê pumu nê mẽ hã mẽ hixi rē nê mẽ harênh o: “Kris tō nê htõxjaja” anhỹr o mẽ harê. Āxiok kumrêx kãm na prem ã mẽ kot Jejus kôt amnhĩ xunhwỳr xwỳnhjê jarênh anê. Jakamã nhũm mẽ piitã ã mẽ harênh anhỹr o pa.

²⁷ Tã nhũm Panāpe mẽ Sawti wa kormã āxiok kamã paja rôm nhũm Tirtũm nhỹ hã kapêr jarênh xwỳnh kwỳjaja mẽ hwỳr mran pøj. Jerujarê rũm mẽ hwỳr mran pøj. ²⁸ Hãmri nhũm mẽ piitã mẽ kot mẽ kapêr mar kaxyw mẽ hwỳr akuprô. Jakamã nhũm hõ pê Akapôja kãnhmã xa nê tanhmã mẽ kãm ujarênh to. Tirtũm Karõ nhỹ hã mẽmoj kukamã mẽ kãm awjarê nê mẽ kãm:

—Kwa okora kêr ka mẽ axkãm ajamak rom. Koja tokyx pika piitã hkôt mẽ apkur xà hã mẽõja mẽ kêp hkryre nê mẽ piitã mẽ hipêx kêt nê. Anê.

Tã nhũm gaa nê ujarênh xàja kôt mẽmoj ã amnhĩ nhĩpêx anê. Kormã Pahihti Krawti kot mẽ ho amnhĩptâr ri nhũm mẽmoj ã amnhĩ nhĩpêx anê. No nhũm kormã ã amnhĩ nhĩpêx anhỹr kêt ri nhũm Akapôja kukamã ã mẽ kãm ujarênh anê. ²⁹ Hãmri nhũm mẽ kuma nê tee ri Jutej kamã Jejus kôt mẽ hkwỳjê hkukamã hamaxpêr nê axpên mã:

—E kwa pu mẽ Jutej kamã Jejus kôt mẽ pahtõ nê pahtõxjê mã pahkàxpore hkwy gō kê mẽ ho amnhĩm awjaprô nê hkur o pa. Anê.

Hãmri nê mẽ kaxyw kàxpore hkwy ho akuprô. Nhũm mẽ hikàxpore hkryre xwỳnhjaja ãm mẽ kãm ho hkryre nê kugõ nhũm mẽ hikàxpore rũnh xwỳnhja mẽ kãm ho rũnh nê kugõ. ³⁰ Jakamã nhũm mẽ ho hpikuprõnh pa nê Panāpe mẽ Sawti wa kot mẽ hwỳr o mōr nê mẽ kãm òr kaxyw wa kãm kugõ. Hãmri nhũm wa hamỳ nê ma Jutej kamã Jerujarê hwỳr mẽ hwỳr o mō. Hãmri nê hwỳr pøj nê mẽ kot Jejus kapêr o mẽ ahkre xwỳnhjê mã kugõ. Hãmri nhũm mẽ kãm Jejus kôt mẽ htõ nê htõxjê mã o anhgrà nhũm mẽ hamỳ nê hkĩnh nê ho amnhĩm awjaprô.

12

Mẽ kot Simāw Pêtre pynênh nê haxàr ã mẽ harênh

Matêwre 18.19-20

¹ Tã nhũm mẽ ò pahi Eroxa ò pōristi mã Kris kwỳjê hã amỹnê nhũm mẽ mẽ hipêx kati nê nhũm mẽ amnhĩ xà htỳx kamã hamak o pa. ² Juãw tō Xiakreja nhũm mẽ pahi Erox nhỹ hã unê nê hkanhwỳr o kupĩ. ³ Hãmri nhũm Ijaew kãm ja mex jakamã nhũm pahi Erox hpãnhã mẽ kãm Simāw Pêtre hã amỹnê nhũm unê nê haxà. Mẽ kot pãwti kaxkrit kêt kur ã mẽ hkĩnh xà hã arĩgro pê Pasja ã nhũm prem unê. ⁴ Na pre Erox Simāw Pêtre hkukamã hamaxpêr o:

—Nà koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anê.

Hãmri nhũm pōristi kot Simāw Pêtre jamãr xwỳnhjaja kêp 16. Nhũm mẽ axpên pãnhã kêp 4 kapên nê hamãr rãhã ho kuhê. ⁵ Nhũm arĩ mẽ hagjênh xà kamã hkrĩ ho hkrĩ. Hãmri nhũm Kris kôt htõ nê htõxjaja harênh ma nê tee ri hkukamã hamaxpêr hãmri nê axpên wỳr akuprô nê ho Tirtũm wỳr rãhã ho hkrĩ.

Tirtũm kapêr o wrỳk xwỳnh kot Simāw Pêtre kator ã harênh

⁶ Tã nhũm ra mẽ hkĩnh hapêx nhũm kamàt. Hãmri nhũm pahi Erox kot tanhmã Simāw Pêtre ho xà hã arĩgroja wỳr nhũm kamàt nhũm pōristijaja arĩ mẽ hagjênh xà kamã hamãr mex o kuhê. Nhũm kuri wa hamêxkrut nê akutã hijê nê hamãr o nõ. Kàx o akutã kãm

ê nê wa ho nõ nhũm wa hkaêx kãm htỳx gôr nê nõ. Nhũm ja wa hakwa krem mãânên hamâr o xa. ⁷ Puh nhũm Tĩrtũm kapêr o wryk xwỳnhjê hõja mẽ hwỳr axà nê wryhtak rax kãm xa. Hãmri nê Simãw Pêtre grêk nê kumra nê kãm:

—Pa Simãw Pêtre? E kwa tokyj kànhmã xa pu mỗ. Anê.

Hãmri nhũm hkrākato nê omu nê kànhmã ãm kurê kumrêx nhũm kaxprexà hã kàxja axrê nê pykap rôrôk nê hikwỳ. No nhũm kuri pôristi wa nõr xwỳnhta wa mar kêt nê. Wa arĩ òt tỳx nê nõ. ⁸ Hãmri nhũm Tĩrtũm kapêr o wryk xwỳnhja Simãw Pêtre mã:

—E tokyx anhõ kamĩs jaxà nê amnê ixkôt tẽ pu pakato nê ma tẽ. Anê.

⁹ Hãmri nhũm kamĩs nê hparkà jaxà nê ma hkôt tẽ. No ãm kormã amnhĩ pumunh mex kêt nê. Te hpimtir kãm ã kot amnhĩ nhĩpêx anhỹr pyrāk ã amnhĩ kamnhĩx. ¹⁰ Hãmri nhũm wa hakwakrem pôristi wa kot hamâr o wa ãm xwỳnhja hãnh wa tẽ nê wa hakre nê hpãnhã ihõja wa hãnh wa tẽ no nhũm mẽ òt tỳx nê hkrĩ nê wa omunh kêt nê. Nhũm wa hakwakre nhĩtep xà hkôt wa tẽn kato nê hpãnhã krĩ nê kahê xà hã hakwakreja wỳr wa tẽ. Hãmri nhũm tãm wa kãm amnhĩ kahê xà mẽ nhũm wa kato nê pry hã tẽ. Ja kôt nhũm Tĩrtũm kapêr o wryk xwỳnhja akunok nhũm Simãw Pêtre axte omunh kêt nê. ¹¹ Hãmri nê hprĩ hã amnhĩ pumunh kurê kumrêx nê hamaxpêr o:

—Kwa te ixpimtir kãm ã ixte amnhĩ nhĩpêx anhỹr pyrāk tã xep ixpimtir kêt. Tĩrtũm na ixwỳr kapêr o wryk xwỳnhja mẽ nhũm ixwỳr wry nê mẽ kêp ixkator. Pahi Erox ra kot ixpĩr nhũm ixkwỳ Ijaew kãm ja prãm tã nhũm mẽ kêp ixkator. Nà ãm hãmri na Tĩrtũm ã mẽ kêp ixkator anê. Anê.

¹² Hãmri nê Marir nhõrkwỳ hwỳr htêm kurê kumrêx. Juãw Makre katorxà Marirja nhũm òrkwỳ hwỳr tẽ nhũm mẽ ra kamã hpikuprõnh rax nê ho Tĩrtũm wỳr o hkrĩ nhũm tãm mẽ hwỳr tẽ. ¹³ Hãmri nê kormã kapôt ã hakwa krem mẽ kãm kahê xà tatak o xa nhũm ixkre kamã mẽ kãm ãpênh xwỳnh Rotreja kuma nê hwỳr tẽ. ¹⁴ Hãmri nhũm kãm kapêr nhũm amnhĩ jaêr pê kuma nê hkĩnh nê. Nê kormã kãm kahê xà mênh kêt ri ma akupỹm tẽ nê mẽ kot ho Tĩrtũm wỳr xwỳnhjê hwỳr axà nê mẽ kãm:

—Xê pêr Simãw Pêtre na tẽ nê kapôt ã hakwakrem xa nê inhmã kapêr.

¹⁵ Hãmri nhũm mẽ tee ri kuma nê kãm:

—Kwa arĩ mẽ hagiênh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atỳx ã akapêr anê. Anê.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harê. Mẽ kam nê mra nê omu. Anê.

Nom nhũm mẽ kuma nê ãm kuma nê kãm:

—Nà tãm kêt. Kaxkwa rùm Tĩrtũm mã hamâr o pa xwỳnh mãn amã kapêr nom tãm kêt. Anê.

¹⁶ Rôm nhũm Simãw Pêtre arĩ hakwakre tatak o xa. Hãmri nhũm mẽ jatã hwỳr mra nê kãm kahê xà mẽ nê amnhĩ jaêr pê omu nê hkĩnh nê. ¹⁷ Hãmri nhũm kànhmã mẽ kãm ãhkra hpê nê mẽ ho hpinhkrênh pa nê mẽ kãm:

—Nà Tĩrtũm na ixwỳr kapêr o wryk xwỳnhja mẽ nhũm ixwỳr wry nê pôristi pê ixkator. Anê.

Hãmri nê mẽ kãm:

—E kêr ka mẽ Xiakre nê Jejus kôt mẽ pahtõ nê pahtõxjê mã ijarê kê mẽ ijarênh mar kurê kumrêx. Nom kot paj ixkato nê ma krĩ hõ hwỳr mỗ. Anê.

Hãmri nê mẽ kêp kato nê ma mỗ.

¹⁸ Tã nhũm apkati nhũm pôristi kot hamâr o hkrĩ xwỳnhjaja hkrã hapôj nê tee hapêr nê nhỹri omunh kêt nê. Hãmri nê tee ri amnhĩ kukamã hamaxpêr o kãm ma htỳx kumrêx nê axpên mã:

—Kwa tanhmã na pre we amnhĩ to nê mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Anê.

¹⁹ Hãmri nhũm pahi Erox hpikunor ã harênh ma nê axtem pôristi hkwyjê mã anê nhũm mẽ mra nê tee ri mẽ hagiênh xà kamã hapêr nom nhỹri omunh kêt nê. Hãmri nhũm Erox mẽ kot hamâr xwỳnhjê kamã gryk tỳx kumrêx nê amnhĩ wỳr mẽ hã karõ nê mẽ kãm:

—Kwa nok? Mě ate hamār rāhā ho akuhê hā ixte mẽ amā karō htā nhũm tanhmā amnhĩ to nē akunok. Nà kot paj mẽ anhĩmex ka mẽ rĩ amnhĩ pumu. Aně.

Hāmri nhũm mẽ tee ri kām amnhĩ tã àprār kaprỳ nhũm mẽ hā amỳnê nhũm mẽ ho kator nē ma mẽ o mra nē mẽ himex. Hāmri nhũm pahi Erox Jutej rũm kato nē ma Sejarej wỳr mō nē hpānhā kamā pa ho pa.

Pahi Erox tanhmā htyk to hā harēnh

Wam Pêtre 1.24-25

²⁰ Krĩ pē Xir mẽ Sito wa kamā mẽ pa xwỳnhjaja na pre htem pahi Erox nhõ pyka hwỳr pa nē mẽ kēp amnhĩm apkur xà hā mẽõ japrôr o pa. Tã nhũm Erox kot mẽmoj mỳrapê mẽ kamā gryk jakamā nhũm mẽ tee ri mẽ kēp ujaprôr kaxyw mẽ hwỳr mra nom nhũm mẽ kām mẽmoj kwỳ ho wēnê hkêt nē. Hāmri nhũm mẽ tee ri amnhĩ kukamā hamaxpēr nē pahi Erox nhõ kōwenatô Pratôja wỳr mra nē kām:

—E awỳr na pa mẽ mra. Kwa mẽ ixyr pē pahi Erox mã tanhmā akapēr to kê ama nē mẽ ixkamā gryk kêt nē. Pa mẽ axte mẽ awỳr mra nē mẽ apê mẽmoj kwỳ japrôr o ri ixpa. Aně.

²¹ Hāmri nhũm mẽ kuma nē hwỳr tē nē mẽ yr pē tanhmā kām kapēr to nhũm kuma hāmri nē kot tanhmā mẽ kām kapēr to kaxyw mẽ kām arĩgro hta.

Tã nhũm ra kot arĩgro hyr xwỳnhta kato nhũm Erox kēp pahi hā ê mex jaxà nē tē nē kēp pahi hā mẽ hkrĩ xà kamā nhỹ nē tanhmā mẽ kām kapēr to. ²² Mě kām kapēr ryy nē. Hāmri nhũm mẽ kuma nē hēx rom kām mex o mex ã harē. Nē kỳx pēê axpēn mã harē nē harēnh o:

—Kwa pahi Erox kēp mẽ panhĩõ hkêt. Pēr kaxkwa rũm Mēpahpām na pre mẽ pahwỳr wrỳ nē ã mẽ pamā kapēr mex aně. Aně.

Hāmri nē te kēp Tĩrtũm pyrāk o hipêx nē kām mex o mex ã harē. Nom hēx rom ã harēnh aně. Kot mẽ mar nē kām mẽ hkĩnh nē akupỳm mẽ kām mẽmoj to wēnê hprām xàj nhũm mẽ hēx rom ã axpēn mã mex ã harēnh aně. ²³ Hāmri nhũm mẽ kuma nhũm ja kām mex nē nhũm hkĩnh nē mẽ mar o nhỹ nē kēp Tĩrtũm pyrāk ã harēnhja nē tanhmā mẽ kām nē hkêt nē. Jakamā nhũm tee ri amnhĩ tã omu nē hwỳr kapēr o wrỳk xwỳnhjê hõ mẽ nhũm hwỳr wrỳ nē tanhmā ho nhũm õhy kamā kutōj rax nē htyk tokyx aně.

Panāpe mẽ Sawti wa akupỳm ãxiok hwỳr mōr ã wa harēnh

Atre 11.27-30

²⁴ Tã nhũm mẽ ra ohtô nē Tĩrtũm Kra Jejus kot tanhmā mẽ panê amnhĩ nhĩpêx to hā harēnh ma nē hkôt amnhĩ xunhwỳ.

²⁵ Hāmri nhũm Panāpe mẽ Sawti wa ra Kris kôt htõ nē htõxjê mã kàxporeta jamỳ nē ma Jerujarē hwỳr o mō nē mẽ kām kugõ. Hāmri nē ma akupỳm ãxiok hwỳr nojarēt nē war amnhĩ kôt Juāw Makre o mō. Hāmri nē mẽ ma mō nē akupỳm mẽ hwỳr pōj.

13

Tĩrtũm kot Panāpe mẽ Sawti wa hyr

Atre 9.15-16; Rômān 1.1

¹ ãxiok kamā Kris kôt mẽ kot axpēn to htõjaja kot Tĩrtũm nhỹ hā kapēr o mẽ ahkre ho pa xwỳnhjê nhĩxi ã kot anhỹr. Na pre Panāpe nē Sawti nē Simeāw kà htykre nē Rusti pē Sirēn nhõ xwỳnh nē pahi Erox kràmnhwỳ Mānahēja. ² Jakamā nhũm prem mẽmo arĩgro hā axpēn wỳr akuprõ nē Tĩrtũm mã mex o mex ã harēnh kaxyw apkur kêt rāhā kām amnhĩ jarēnh o hkrĩ. Hāmri nhũm Tĩrtũm Karō mẽ kām tanhmā kapēr o amnhĩrit to nē mẽ kām:

—E kêr ka mẽ Panāpe mẽ Sawti war ata nē wa kot inhmā tanhmā amnhĩ nhĩpêx to ho pa kaxyw wa ãm. Aně.

³ Hāmri nhũm mẽ kuma nē wa hyr kurê kumrēx nē wa himõk ã mẽ ìhkra jaxwỳ nē wa ho Tĩrtũm wỳ. Hāmri nē wa kot Tĩrtũm mã tanhmā amnhĩ nhĩpêx to ho pa kaxyw wa kumē nhũm wa ma mō.

Wajaga kot Jejus nê hkràmnhwỳ kurê hã harênh
Atre 8.9-24

⁴⁻⁵ Tã nhũm Tĩrtũm Karõ krĩ pê Serêw wỳr Panãpe mễ Sawti wa kumê nhũm wa ma hwỳr mỗ. Nê amnhĩ kôt Juãw Makre ho mỗ. Kot tanhmã wa ho ajuta hto ho wa hkôt pa kaxyw. Hãmri nê wa mễ mỗ nê Serêw wỳr pỏj nê pàr krem axà nê ma gô hipỏk pê Sipre hwỳr mỗ. Hãmri nê gô hipỏk ã krĩ pê Saramĩn wỳr pỏj nê Ijaew nhỗ Tĩrtũm kapêr o mễ ahkre xà hã ixkre hwỳr tễ nê kamã Jejus kot mễ panê tanhmã amnhĩ nhĩpêx to hã mễ kãm harênh o wa xa.

⁶⁻⁸ Tã nhũm mễ krĩja rũm kato nê hpãnã gô hipỏk kôt mỗ nê hatur xà kamã krĩ pê Papos wỳr pỏj. Hãmri nê kamã wajaga Pajejus pumu. Gresjê kapêr kãm hixi pê Erĩm. Erĩm haxwỳja kêp Ijaew. Na pre hte hêx rom te kêp Tĩrtũm nhỹ hã kapêr jarênh o pa xwỳnh pyrak o amnhĩ nhĩpêx nê ma mễ kãm ujarênh o ri mễ hkôt pa. No ãm mễ kãm amnhĩ to hêx o pa. Gô hipỏkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panãpe mễ Sawti wa harênh ma nê kãm wa kapêr mar prãm nê wa kot kãm Tĩrtũm kapêr jarênh kaxyw amnhĩ wỳr wa kuwỳ. Nom nhũm hkràmnhwỳ wajaga Erĩmja kãm wa hkĩnh kêt nê wa nê kãm kapêr kãm hihtỳx nê kãm:

—Kwa nà wa kapêr mar kêt nê. Kot kaj war ama nê wa urak nê amnhĩ kaxyw Jejus kôt ajamxpêr nê hkôt amnhĩ xãm. Kwarĩ wa kapêr mar kêt nê. Anê.

⁹ Hãmri nhũm Sawti ra axtem pãnã hixi. Ra hpãnã kêp Pawre. Nhũm Tĩrtũm Karõ ra hkarõ mã àr jakamã nhũm ỹ hã wajagata pumu nê wa nê hkràmnhwỳ mã kapêr ã kãm akir nê kãm:

¹⁰ —Tk. Kwa pêr apê Satanasti hkwy hã na ka ã wa inhnê kãm akapêr anê. Na ka hte mễmoj punuj pix kukamã ajamxpêr nê mễmoj mex nê mễ no kupy o apa. Tĩrtũm kapêr mex kumrêx tã ka axtem nê nê mễ hkurê ho ri apa. ¹¹ ã ate amnhĩ nhĩpêx anhỹrja mỳrapê koja Tĩrtũm tanhmã ato ka ano hkre nê arit kêt o atã apkati xohtô nê kãm ga. Anê.

Hãmri nhũm no hkre kurê kumrêx nê tee ri rĩt kaxyw no pikrar pỳnh o xa nom mễmoj pumunh kêt nê. Hãmri nê mễhỗ kot hpa hã hpyr nê ỏrkwỹ hwỳr ho mỗr kaxyw ri amnhĩ pu hã mễ hapêr pênh o xa. ¹² Hãmri nhũm hkràmnhwỳ pahĩhtija tee ri ja hã omu nê amnhĩ kaxyw Jejus kôt hamxpêr nê hkôt amnhĩ xãm kurê kumrêx. Hãmri nê Pawre mễ Panãpe wa kot tanhmã Tĩrtũm kapêr jarênh to hã wa kuma nê hamxpêr o:

—Hêxta waa nê. Aa ixte ã mễhỗ kapêr kot anhỹr mar kêt tã pa jarãhã kuma. Nà ãm hãmri na Jejus jarênhja. Anê.

Pawre mễ Panãpe ãxiok ỏ hwỳr wa mỗr ã wa harênh
Atre 15.38

¹³ Tã nhũm Pawre mễ Panãpe mễ Juãw Makre wa mễ krĩ pê Papos rũm kato nê hpãnã ma pyka hỡ hwỳr mỗ. Pàr kãm ma pyka pê Pãpir wỳr mỗ nê kamã krĩ pê Perke hwỳr pỏj. Hãmri nhũm Juãw Makre tanhmã hamxpêr to nê tee ri axte wa hkôt mỗr kukamã hamxpêr hãmri nê wa hkaga nê awjanã nê ma akupỹm Jerujarê hwỳr ahte mỗ. ¹⁴ Jakamã nhũm Pawre mễ Panãpe wa ahte Perke rũm kato nê hamũ pika pê Pisit kãm krĩ pê ãxiok wỳr mỗ nê hwỳr pỏj. Nhũm Ijaew nhỗ arĩgromnu pê sap kato nhũm wa Tĩrtũm kapêr o mễ ahkre xà hã ixkre hwỳr wa tễ nê hwỳr axà nê nhỹ. ¹⁵ Hãmri nhũm mễhỗ mễ kãm Tĩrtũm kapêr ã kagà htũm kwỳ kamã harênh o xa. Mojes mễ Tĩrtũm nhỹ hã kapêr o mễ pa xwỳnh kot kapêr ã kagà hkwy kamã nhũm mễ kãm kamã harênh o xa. Hãmri nê kamã harênh pa nhũm mễ ahkre xwỳnhjaja Pawreja wa omu nê wa hwỳr mễhỗ mễ nhũm wa hwỳr tễ nê wa kãm:

—E na mễ ijahkre xwỳnhjaja war ate mễ inhmã axujarênh prãm nê mãmri mễ inhmã mễmoj jarênh kaxyw nhũm mễ war atã anê. Anê.

¹⁶ Hãmri nhũm wa kuma nhũm Pawre kãnãhmã xa nê mễ hpĩnhkrênh kaxyw mễ kãm kãnãhmã ãhkra nhũm mễ omu nê hpĩnhkrênh pa nhũm mễ kãm awjarê. Amnhĩ kwỳ pê Ijaewjê mễ mễ kêp Ijaew kêt xwỳnhjê kãm Tĩrtũm kĩnh xwỳnhjê mã nhũm mễ kãm awjarê. Nê mễ kãm kapêr ryy nê. Tĩrtũm kot tanhmã mễ hkukamã Ijaew nhĩgêt nê pãmjê nhĩpêx to hã mễ kãm awjarê nê mễ kãm:

—E kot paj mẽ amã awjarẽ ka mẽ inhma. ¹⁷ Nà mẽ ixpê Ijaew nhõ Tirtũmja amnepêm na pre mẽ ixpê Ijaew pãmjê rê. Kormã Ejit kãm mẽ pa ri nhũm amnhĩ kaxyw mẽ kurẽ nẽ mẽ ho ohtô rax kumrẽx. Hãmri nẽ mẽ kaxyw hihtỳx jakamã Ejit rũm mẽ kator pa. ¹⁸ Hãmri nẽ mẽ ho mex ryy ho mẽ hkôt pa. Mẽ kot kapôt ã ri pa hã amgrà pê 40 kamã mẽ kot htỳx ri tanhmã amnhĩ nhípêx to ho pa htã nhũm mẽ kamã ukaprĩ ryy ho mẽ hkôt pa. ¹⁹⁻²⁰ Na pre mẽ kãm pyka pê Kanaã kamã mẽ pa xwỳnhjê nhĩmex pa. Kanaã kamã mẽ pa xwỳnhjaja ahpyñhã axpên kaxyw mẽõ krĩ pê 7ja nhũm mẽ kãm mẽ ho hapêx pa. Hãmri nẽ hpãnhã mẽ inhĩgêjtê mã pykaja o hpigrành pa. Mẽ ixpê Ijaew nhĩgêjtê mã ho hpigrành pa nhũm mẽ kamã pa hã amgrà xohtô nẽ. Hã amgrà pê 450. Tã nhũm Tirtũm hpãnhã mẽ kãm juisti hkwy rê nẽ mẽ kaxyw mẽ unhwỳ nhũm mẽ ho pa. Tã nhũm hpãnhã Sãmuew mẽ ho amnhĩptà nẽ mẽ o pa. Kêp Tirtũm nhỹ hã kapêr jarênh o pa xwỳnhjê hõ nhũm Tirtũm mẽ kaxyw ãm.

²¹ —Tã nhũm mẽ ixpãmjaja axpên ma nẽ ra te krĩ hkwy kamã mẽ uràk nẽ mẽõ pahi kot Sãmuew pãnhã mẽ ho amnhĩptàr o pa hprãm xàj amnhĩ to Tirtũm wỳ nẽ kãm: “Pa Tirtũm. Kwa mẽ ixkaxyw pahi hõ xãm kê mẽ ixto amnhĩptàr o pa nà. Ja na mẽ inhmã hprãm tỳx kumrẽx.”

—Anhỹr o amnhĩ to hwỳr jakamã nhũm mẽ kuma nẽ mẽ kaxyw Sawti xãm. Kisti hkra na pre. Nẽ mẽ inhĩgêjtê Pêjamĩ kanrêhã htãmnhwỳ na pre. Hãmri nhũm Tirtũm mẽ kaxyw ãm nhũm kêp mẽõ pahi nẽ mẽ ho amnhĩptàr o pa hã amgrà pê 40. ²² Tã nhũm Tirtũm kator nẽ hpãnhã mẽ kaxyw Tawi xãm. Hãmri nẽ harênh o: “Nà Jese hkra Tawija na hte inhmã hprãm xà hkôt amnhĩ nhípêx mex o pa.” Anẽ.

²³ —Tã Jejus kêp Tawi hkanrêhã htãmnhwỳ na pre. Kukamã na pre Tirtũm mẽ ixpê Ijaew nhĩgêjtê mã harẽ nẽ harênh o: “Koja nhỹrmã Tawi hkanrêhã htãmnhwỳjê hõ mẽ ate amnhĩ tomnuj pê mẽ apytã.” Anhỹr o hkukamã mẽ kãm harẽ. ²⁴ No nhũm kormã Jejus kot mẽ ixpê Ijaewjê mã amnhĩ to amnhĩrit kêt ri nhũm Juãw Paxis kumrẽx hkukamã mẽ ixwỳr mỗ nẽ mẽ inhmã Tirtũm kapêr jarênh o ri mẽ ixkôt pa. Nẽ mẽ ixte amnhĩ tomnuj kaga nẽ hpãnhã tãm amnhĩ nhípêx o ixpa hã mẽ ixpumunh kôt mẽ ixkrã kumrãr ã mẽ inhmã karõ ho pa.

²⁵ —Tã mẽ kãm kapêr o pa ryy nẽ ra hatur xàm mênh kaxyw nẽ amnhĩ tã tanhmã mẽ inhmã kapêr to nẽ mẽ inhmã: “Na ka mẽ ixpumu nẽ atỳx Tirtũm kot mẽ akaxyw pa ixãm ã ixkamnhĩx nom pa hkêt. Kot mẽ pakaxyw ãm mã xwỳnhhta kukamã na pa pre mỗ. Tãm kot amnhĩ to rax o ijakrenh. Nẽ kot amnhĩ to mex o kot ijakrenh. Jakamã na pa hte ãm kukwak ri ixpa nẽ amnhĩ tã hã xpijaàm o ixpa.” Anẽ.

—Na pre ã Juãw Paxisja mẽ inhmã Jejus jarênh anhỹr o pa.

²⁶ —Tã kwa mẽ inhma mẽ apê Apraãw kanrêhã htãmnhwỳjaja nẽ mẽ apê Ijaew kêt xwỳnh kãm Tirtũm kĩnh xwỳnhjaja. E mẽ apiitã ixkapêr ma nẽ kãm ajamaxpêr tỳx rãhã ho ri apa. Nà mẽ pahpiitã mẽ pakaxyw na Tirtũm kapêrja. Kot mẽ pahte amnhĩ tomnuj pê mẽ papytãr ã amnhĩ jarênhja mẽ ixpê Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nẽ hkôt amnhĩ nhípêxja na Tirtũm kãm hprãm. ²⁷ Nom Jerujarẽ nhõ xwỳnhjê mẽ mẽ ãptàr tũmrejaja na prem Jejus kêp Tirtũm kot mẽ pakaxyw ãm xwỳnh ã harênh mar tã hkôt hamaxpêr kêt nẽ. Na pre htem mẽ inhõ arĩgromnu pê sap ã akuprõ nẽ axpên mã Tirtũm kapêr ã kagà htũm kamã ujarênh o hkrĩ. Kagàja kamã Tirtũm nhỹ hã mẽ kapêr o mẽ pa xwỳnhjaja kot hprĩ hã Jejus jarênh nẽ hã kagà nhũm mẽ kot mar tã hprĩ hã mar tỳx kêt nẽ. Jakamã na prem axtem nẽ mẽ kãm hã amỳnê. Tirtũm nhỹ hã kapêr jarênh xwỳnhjaja kot mẽ hkukamã mẽ harênh xàja kôt nhũm mẽ kot hpĩr kaxyw mẽ kãm hã amỳnê.

²⁸⁻²⁹ Kot tanhmã amnhĩ tomnuj to hkêt tã nhũm mẽ amarĩ hã pahi Pirat wỳ. Kot mẽ kãm hã àmnênh nhũm õ pòristijaja kot hpĩr kaxyw nhũm mẽ hã kuwỳ nhũm mẽ kãm kupĩ. Ra Tirtũm kapêr ã kagà htũm kot mẽ hkukamã mẽ harênh xà hkôt. Hãmri nhũm mẽ kot hkôt pa ho pa xwỳnhjaja pĩ kahpa nẽ ho wrỳ nẽ ma o tẽ nẽ kên kre kamã haxã. ³⁰ Tã nhũm Tirtũm akupỹm ho htĩr ³¹ nhũm xatã hkôt mẽ pa ho pa xwỳnhjê hwỳr hapøj. Kormã htyk kêt ri ra Garirej rũm Jerujarẽ hwỳr hkôt mẽ pa ho mẽ pa xwỳnhjê hwỳr xatã

mê hwÿr hapôx o pa. Jao hã arĩgro xohtô nê nhũm prem piitã omu. Tã mê tãmjaja na htem mê ixpê Ijaew mã harênh o pa.

³²⁻³³ —Amnepê m Tĩrtũm na pre mê ixpê Ijaew nhĩgêjtê mã tanhmã Kra Jejus jarênh to. Kormã mê pahwÿr wrÿk kêt ri tanhmã mê kãm harênh to. Jakamã ra kot hkukamã harênh xà hkôt nhũm pre mê pahwÿr wrÿ nê tanhmã mê panê amnhĩ nhĩpêx to. Tã mê ate harênh mar kaxyw na pa wa man mê awÿr mō. Amnepê m finat Tawi na pre Tĩrtũm kapêr kwÿ hã kagà. Tĩrtũm mex ã mê grer xà pê Sam 2ja kamã hã kagà. Te Tĩrtũm tãm Jejus mã kapêr pyræk o hã kagà nê hã kagà ho:

Apê Ixkra na ka.

Tã mê piitã mê kot apê Ixkra hã apumunh kurê kumrêx kaxyw na pa jarãhã mê kãm ato amnhĩrĩt. Anê.

Nhũm pre ã Tĩrtũm Jejus mã kapêr anê nhũm Tawi ô ri mê pamã hã kagà.

³⁴ —Amnepê m na pre Tĩrtũm tanhmã Kra Jejus kukamã harênh to. Mê kot hpĩr nhũm kot akupÿm ho htĩr kukamã hã amnhĩ jarê. ĩ hkro pymaj kot mê htykjê pê hkaxàr nê akupÿm ho htĩr ã nhũm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xà hkôt.

Anhÿr o hkukamã harênh xà hkôt akupÿm ho htĩr nhũm axte htyk kêt ã harê.

³⁵ —Nê kagàja nhãm hô hō kot tanhmã Jejus jarênh kute. Te Jejus tãm Tĩrtũm mã kapêr pyrã nê harênh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nê. Anê.

Tĩrtũm kapêr ã kagà htũm kot ã Jejus jarênh kot anhÿr. ³⁶ Nom ã Tawi jarênh anhÿr kêt nê. Tawi na pre Tĩrtũm kapêr kôt amnhĩ nhĩpêx mex o pa hãmri nê ty nhũm prem mê panhĩgêjtê nhĩhkô hã haxà hãmri nhũm ĩ hkro nê hapêx.

³⁷ —Tã no Jejusja Tĩrtũm kot akupÿm ho htĩr jakamã nhũm Tawi pyràn ĩ hkro nê hapêx kêt nê.

³⁸ —E mê inhmar tÿx nê ixkwÿjaja. Kra Jejus pix kukwak na hte Tĩrtũm amnhĩ katut kôt mê pahte amnhĩ tomnuj rē. ³⁹ Jakamã kot kaj mê ãm Mojes kapêr kôt pix mã ri amnhĩ nhĩpêx nhũm Tĩrtũm tee ri ja hã mê apumu nê amnhĩ katut kôt mê ate amnhĩ tomnuj rēnh kêt nê. Jejusja tapxipix na pre htyk o Tĩrtũm mã mê pahte amnhĩ tomnuj piitã hpãnhã amnhĩrer pa. ⁴⁰⁻⁴¹ Amnepê m na pre Tĩrtũm kapêr nhÿ hã kapêr xwÿnhjê hōja mê kãm Tĩrtũm kapêr jarê nê hã kagà. Te Tĩrtũm tãm mê kot kapêr ã hpêr o pikênh xwÿnhjê mã kapêr pyrã nê mê kãm:

E kot paj aa mê ate mēmoj pumunh kêt õ ho anê.

Nhũm mēhō mê amã harê ka mê harênh ma nê ãm ama.

Nhũm mê kot omunh mex xwÿnhjê hō kot hpri hã mê amã harênh tã ka mê ãm ama nê hkôt ajamaxpêr kêt nê.

Hãmri nê tee ri tanhmã kãm ajamaxpêr to ho ri apa. Anê.

Ã Tĩrtũm mê kãm kapêr anhÿr jakamã kwa mê o kora. Apu mê kajaja na pre ã mê ajarênh anê rÿ ko. Anê.

⁴² Nhũm pre ã Pawre mê kãm ujarênh rÿy anê. Hãmri nê Panãpe mê wa ixkreta rũm kator kaxyw nhũm mê kot mar o hkrĩ xwÿnhjaja tee ri ma wa mōr ã wa omu nê ma wa hkôt mra nê wa kãm:

—Kwa war axujarênhja na mex kumrêx. Mê inhmã axte mar prãm. Xà koja axte sap kato ka wa akupÿn mê ixwÿr wa tē nê axte mê inhmã awjarê? Anê.

Hãmri nhũm wa mê kãm:

—Tōe. Nà kot paj war anê. Anê.

⁴³ Hãmri nê wa ma tē nhũm mê hkwÿja ma wa hkôt mra. Ijaew kwÿjaja nê Ijaew kêt xwÿnh kãm Tĩrtũm kĩnh xwÿnhjaja nhũm mê ma wa hkôt mra. Hãmri nhũm wa pry hã mê kãm kapêr o mō. Tĩrtũm kot mê kutã nojarêr rãhã ho pa nhũm mê kot amnhĩ tã omunh nê hkôt amnhĩ nhĩpêx tÿx rãhã ho pa nê hkaga hkêt ã mê kãm kapêr o mō.

⁴⁴ Tã nhũm axte sap nhũm krĩ nhõ xwỳnh piitã axte Tĩrtũm kapẽr mar kaxyw ixkre wỳr akuprõ. Ijaewjaja nẽ Ijaew kêt xwỳnhjaja. ⁴⁵ Hãmri nhũm Ijaew kwỳjaja tee ri mẽ amnhĩ wỳr Ijaew kêt xwỳnhjê pumu nẽ mẽ hã Pawre mẽ Panãpe wa kamã gryk nẽ. Mẽ kãm Ijaew kêt xwỳnhjaja kot Tĩrtũm kapẽr mar prãm kêt jakamã mẽ hã wa kamã gryk nẽ. Hãmri nẽ Pawre kapẽr ma nẽ xatã kãm kapẽr punuj nẽ kãm:

—Tk. Kwa na ka Tĩrtũm kapẽr jarẽnh o axêx. Ja kot anhỳr kêt. Anẽ.

⁴⁶ Nom nhũm wa kãm mẽ uma hkêt nẽ. Wa ãm Tĩrtũm Karõ nhỹ hã amnhĩ to htỳx nẽ wa mẽ kãm kapẽr. Nẽ amnhĩ tã tanhmã mẽ kãm kapẽr to nẽ mẽ kãm:

—Nà wa ixpyrà nẽ mẽ apê Ijaew jakamã na pa mẽ akumrêxjê mã Tĩrtũm kot mẽ pakaxyw Jejus xãm ã harẽ. Tã ka mẽ ama nẽ ãm ama nẽ te mẽ ate hkaga pyrà nẽ ã wa inhmã akapẽr anẽ nẽ wa ixte kapẽr o ixêx ã wa ijarẽ. Pẽr ãm mẽ ate mẽ amã Tĩrtũm mẽ Kra wa kuri mẽ atĩr tũm nẽ mẽ apa hprãm kêt. Jakamã kot paj wa mẽ apê ixkato nẽ hpãnhã ma Ijaew kêt xwỳnhjê mã Jejus kapẽr jarẽnh o ri mẽ hkôt ixpa. ⁴⁷ Tĩrtũm kapẽr ã kagà htũm ã kot mẽ ixte amnhĩ nhĩpêx anhỳrja kukamã mẽ ijarẽ nẽ mẽ ijarẽnh o: Mẽ ate Ijaew kêt xwỳnhjê mã ixkapẽr jarẽnh o ri apa kaxyw na pa pre mẽ kaxyw mẽ arê. Jakamã koja pyka piitã hkôt mẽ pa xwỳnhjaja ohtô nẽ mẽ akapẽr ma nẽ ixkra hkôt amnhĩ xunhwỳ.

Koja mẽ ã amnhĩ nhĩpêx anẽ pa ja hã mẽ omu nẽ mẽ ho ixkra. Anẽ.

Tĩrtũm kot ã ja kukamã mẽ ijarẽnh anhỳr jakamã kot paj wa mẽ apê ixkato nẽ mẽ apãnhã ma Ijaew kêt xwỳnhjê mã Tĩrtũm kapẽr jarẽnh o ri mẽ hkôt ixpa. Anẽ.

⁴⁸ Hãmri nhũm Ijaew kêt xwỳnhjaja amnhĩ tã wa kapẽrja ma nẽ hkĩnh nẽ Tĩrtũm kapẽr mex o mex ã harẽ. Hãmri nhũm ra Tĩrtũm kot nhỹrmã amnhĩ ri mẽ htĩr tũm nẽ mẽ pa ho mẽ pa kaxyw mẽ rênh xwỳnhjaja amnhĩ kaxyw Pahihti Jejus kôt hamaxpẽr nẽ hkôt amnhĩ xunhwỳ.

⁴⁹ Tã nhũm pika pê ãxiok kamã mẽ piitã Tĩrtũm kapẽr jarẽnh ma. ⁵⁰ Nom nhũm Ijaew xàptàr tũmrejaja kãm Pawre mẽ Panãpe wa hkĩnh kêt jakamã na prem krĩ hkôt mẽ kot amnhĩ to rũnh xwỳnhjê mã wa ho kapẽr punuj o pa. Mẽ õ pahi mẽ mēni kot amnhĩ to rũnh xwỳnhjaja nhũm mẽ kãm tanhmã wa ho kapẽr to nhũm mẽ kuma nẽ mẽ hkôt hamaxpẽr. Mēnijaja kãm Tĩrtũm prãm tã amnhĩ kaxyw Jejus kôt hamaxpẽr kêt jakamã tanhmã mẽ kot Pawre mẽ Panãpe wa ho hêx toja ma nẽ hkôt hamaxpẽr nẽ wa kamã gryk nẽ. Jakamã nhũm mẽ ohtô nẽ tanhmã wa hipêx to nẽ amnhĩ nẽ wa hano. ⁵¹ Hãmri nhũm wa mẽ kêp kato nẽ xa nẽ mẽ kot Tĩrtũm kapẽr kaga hã amnhĩ pumunh kaxyw mẽ noo mã wa hparkà kapa nẽ nẽ awjagrô kapĩ nẽ ma wa tẽ. Hãmri nẽ ma krĩ pê Ikõn wỳr hpãnhã wa mō. ⁵² Hãmri nhũm ãxiok kamã mẽ kot Jejus kôt amnhĩ xunhwỳr xwỳnhjaja hkĩnh nẽ ri pa. Tĩrtũm Karõ kot mẽ hkarõ mã gjêx jakamã nhũm mẽ hkĩnh nẽ ri pa ho pa.

14

Pawre mẽ Panãpe wa kot Ikõn wỳr mōr ã wa harẽnh

Matêwre 10.34-35

¹ Hãmri nhũm Pawre mẽ Panãpeja wa ãxiok rũm kato nẽ hpãnhã ma krĩ pê Ikõn wỳr wa mō. Hãmri nẽ hwỳr pōj nẽ Ijaew nhõ Tĩrtũm kapẽr o mẽ ahkre xà hã ixkre hwỳr wa tẽ nẽ kamã mẽ kãm Jejus jarẽnh o nhỹ. Mẽ kãm harẽnh kãm hihtỳx jakamã nhũm mẽ hkwỳjaja wa kuma nẽ amnhĩ kaxyw hkôt hamaxpẽr nẽ hkôt amnhĩ xunhwỳ. Ijaew kwỳjaja nẽ mẽ kêp Ijaew kêt xwỳnh kwỳjaja nhũm mẽ ohtô nẽ Jejus kôt amnhĩ xunhwỳ.

² Tã nhũm mẽ hkwỳjaja kãm Jejus jarẽnh mar prãm kêt nẽ. Hãmri nẽ kato nẽ ma Ijaew kêt xwỳnh kwỳjê hwỳr mra nẽ tanhmã mẽ kãm Pawre mẽ Panãpe wa ho hêx to nẽ wa ho kapẽr punuj nẽ nhũm mẽ mar xà hkôt wa kamã gryk nẽ. ³ Nom nhũm wa tokyx kator nẽ ma mōr kêt nẽ arĩ Tĩrtũm Karõ nhỹ hã amnhĩ to htỳx nẽ mẽ kãm Tĩrtũm kapẽr jarẽnh o ri mẽ hkôt pa. Nẽ kêp mẽ kutã nojarêt xwỳnh ã harẽnh o pa. Nẽ ÿ hã mẽ kãm aa mẽ kot mēmoj pumunh kêt kwỳ ho anhỳr o ri mẽ hkôt pa. Jakamã nhũm mẽ hkwỳjaja ja hã wa omu nẽ wa kapẽr ma nẽ hamaxpẽr o:

—Kwa ãm hãmri na wa Tirtùm kêp mẽ pakamã ukaprĩ xwýnh ã harẽ. Pêr ÿ hã wa kot ã amnhĩ nhĩpêx anhÿr o pa kênã. Anẽ.

⁴Hãmri nhũm Ijaew kêt xwýnh kwýjaja wa hkôt hamaxpêr nê wa hkôt amnhĩ xunhwý. No nhũm mẽ hkwýjaja wa hkôt hamaxpêr kêt nê. Ra mẽ kot Ijaew kwý kot tanhmã wa ho kapêr punuj toja ma nê mẽ hkôt hamaxpêr jakamã nhũm krĩ nhõ xwýnhjaja axpên kwým ri tanhmã wa hkôt hamaxpêr to ho pa. Jao axpên kwým ri wa hkôt hamaxpêr o pa.

⁵Tã nhũm wa hkôt hamaxpêr kêt xwýnhjaja axpên wýr akuprõ nê wa hã amýnê. Ijaew kwýjaja nê Ijaew kêt xwýnh kwýjaja nê mẽ õ pahijaja nhũm mẽ kot kên o wa htak o wa hpĩr kaxyw wa hã amýnê. ⁶Hãmri nhũm wa amnhĩ tã ama nê mẽ kêt kato nê hpãnhã ma pika hõ hwýr mõ. Ma Rikõn kãm krĩ hkwy hwýr hpãnhã mõ. Risti wýr nê Tepe wýr nê pu hã krĩ hkwy hwýr wa mõ. ⁷Wa mõ nê pøj nê ma mẽ kãm Jesus kot tanhmã mẽ panê amnhĩ nhĩpêx to hã harênh o ri mẽ hkôt pa.

Te grã xwýnh jarênh
Atre 3.1-10

⁸Nhũm Risti kamã mēhõ my hte grã nê hkrĩ xwýnhja. Katorxã nhõxã kre rũm hte grã nê kator jakamã ri pa hkêt nê arĩ hkrĩ xã kamã hkrĩ ho hkrĩ. ⁹Jakamã nhũm Pawre mẽ kãm ujarênh o xa nhũm kuri mar o nhÿ. Hãmri nê hamaxpêr o:

—Nã pêr Tirtùm àhpumunh o àhpumunh. Mãn kot ixto mex kaxyw àhpumunh tÿx. Nã koja ixto mex. Anẽ.

Hãmri nhũm Pawre ã hamaxpêr anhÿr ã omu ¹⁰nê kàx pê kãm kapêr nê kãm:

—E kwa kànhmã xa. Anẽ.

Hãmri nhũm kuma nê kànhmã ãm kurê kumrêx nê ri mra. Nê amnhĩ te kamã hamak o ri mra nê hkĩnh tÿx kumrêx. ¹¹Hãmri nhũm kuri mẽ kuhê xwýnhjaja Pawre kot ã hipêx anhÿrja ã omu nê htÿx wa kêt kaxkwa kamã mēhpãm ã wa hkamnhĩx nê hkĩnh nê axpên mã:

—Kwa pêr mēpahpãm na wa. Mēpahpãm Jupti mẽ Mēkurtija na wa panhĩ hã amnhĩ jahkre nê mẽ pahwýr wrý. Nã ãm hãmri na wa mẽ pahwýr wrý. Anẽ.

Nom mẽ kapêr pê Rikaôn o axpên mã kapêr jakamã nhũm Pawre mẽ Panãpe wa mẽ mar kêt nê. Wa kot mẽ kapêr mar kêt jakamã ã mẽ kot wa harênh anhÿrja mar kêt nê htÿx wa xa. ¹²Nhũm mẽ ã wa kêt mēhpãm ã wa harênh anê nê hkĩnh tÿx nê. Panãpeja nhũm prem kêt mẽ hpãm Jupti hã hkamnhĩx no Pawreja nhũm prem kêt mẽhpãm Mēkurti hã hkamnhĩx. Pawreja Mēkurti pyrã nê kapêr japjê rũnh jakamã nhũm mẽ kêt hã hkamnhĩx. ¹³Na prem krĩ htã mēhpãm Juptija mã amnhĩ jarênh xã hã ixkre nhĩpêx nê hkarõ nhĩpêx. Hãmri nê hwýr akuprõ nê kãm mex o mex ã harẽ nê amnhĩ to hwýr o pa. Jakamã nhũm Jupti nhõ patrejaja Pawre mẽ Panãpe wa kêt mẽhpãm ã wa harênh ma hãmri nê wa hã hkwyjê mã kãm:

—Kwa pu mẽ wa kãm mõx kwý hpa nê pixõrã hkwy rê. Hãmri nê wa kãm wa mex o wa mex ã wa harẽ nê wa kêt mẽpahpãm ã amnhĩ to wa kuwý. Wa kêt mẽpahpãm kênã. Anẽ.

Hãmri nê ra ã wa hipêx anhÿr kaxyw ¹⁴nhũm wa tee ri mẽ kot amnhĩ nhĩpêx ã mẽ omu nhũm ja wa kêt omnuj tÿx nê. Jakamã nhũm wa amnhĩ pê hinõkã kaxõnh pa nê mẽ kutã hprõt nê ã mẽ kot wa hipêx anhÿrja nê mẽ kãm kapêr kãm hihtÿx nê. ¹⁵Nê mẽ kãm:

—Kwa mẽ ri ã wa inhĩpêx anhÿr kêt nê. Wa ixpê mēapãm kêt kênã kot ka kêt mẽ ã wa inhĩpêx anê. Nom mēapãmja na ka htem ãm amnhĩ to hwýr kaprý nê kãm mex o mex ã harênh kaprý o ri apa. Tã mẽ ate ã amnhĩ nhĩpêx anhÿr kaga nê hpãnhã Tirtùm kôt amnhĩ xunhwýr nê amnhĩ to pix wýr o apa kaxyw na pa pre wa mẽ awýr mõ nê pøj. Tirtùmja mẽ ate mẽ apãm jarênhta rom htĩr o htĩr. Na pre mēmoj piitã ho kato. Kaxkwa ho kato nê pyka ho kato nê gõ xujanãr o kato. Nê kamã ri mēmoj piitã ho kator pa.

¹⁶—Amnepêm mẽ pa xwýnhjaja na pre htem amnhĩ krã hkôt pix mã tanhmã ri amnhĩ nhĩpêx to ho pa nhũm Tirtùm ja hã mẽ omu nê ãm mẽ omu nê tanhmã mẽ ho hkêt nê.

¹⁷Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwýr na rē nhũm mẽ pahpur go mex nê. Nhũm mẽ pamã tanhmã mẽ pahpur

kām mẽmo hyja to nhũm ra mẽ pamã ô rũnh nẽ. Pu htem hamỳ nẽ ho paxàpkur mex nẽ pahkĩnh nẽ ri papa. Tĩrtũm pix kukwak ri na pu htem ã amnhĩ nhĩpêx anhỹr o ri papa. Anẽ.

¹⁸ Nhũm pre ã Pawre mẽ kot wa kãm moux parja nẽ mẽ kãm kapêr kãm hihtỳx anẽ. No nhũm mẽ kuma nẽ ãm kuma nẽ wa kãm mry hkwy hpar kaxyw wa hã hihtỳx nẽ. Jakamã kritpêm nhỹx prem wa kãm hkwy pa. Tã tanhmã hamaxpêr to nẽ hkaga nẽ wa kãm hpar kêt nẽ.

Mẽ kot Pawre pĩr ã àmnênh ã mẽ harênh

Sikũn Ximotre 3.10-11

¹⁹ Tã nhũm Ijaew kwỳjaja mẽ hwỳr mran pøj. Krĩ pẽ ãxiok mẽ Ikõn rũm ma mẽ hwỳr mran pøj nẽ mẽ kãm Pawre ho hêx o mẽ hkõt pa nhũm mẽ kuma nẽ axtem nẽ Pawre kamã gryk kato. Hãmri nẽ mẽ kot hpĩr kaxyw kên runh kwỳ jamỳ nẽ ho htak prêprêk o kuhê. Hãmri nhũm amnhĩ xà htỳx kamã ama nẽ tẽm nẽ akryk nõ nhũm mẽ omu nẽ htỳx ho ra htyk ã hkamnhĩx. Hãmri nẽ hwỳr tẽ nẽ hpa hã kupy nẽ ma hkjênh o mỗ nẽ krĩ pum kumẽ nẽ ma akupỹm mra. ²⁰ Hãmri nhũm Jesus kõt mẽ kot axpên to htõjaja tee ri ã mẽ kot hipêx anhỹr ã omu nẽ hkaprĩ htỳx nẽ hwỳr hprõt nẽ omu nẽ mỳr o kuhê. Hãmri nhũm te htyk pyrà nẽ nõr tã Jesus nhỹ hã akupỹm hihtỳx mex nẽ kànhmã nhỹ hãmri nẽ ma akupỹm mẽ hkõt krĩm tẽ.

Tã nhũm apkati nhũm Panãpe mẽ wa krĩja rũm kato nẽ ma wa mỗ. Pãnhã ma krĩ pẽ Tepe hwỳr wa mỗ.

Pawre mẽ Panãpe akupỹm ãxiok wỳr wa mỗr ã wa harênh

²¹⁻²² Tã nhũm wa ma Tepe hwỳr mỗ nẽ pøj. Hãmri nẽ kamã mẽ kãm Jesus tanhmã kot mẽ panê amnhĩ nhĩpêx to hã harênh o ri mẽ hkõt wa pa nhũm mẽ wa kuma nẽ ohtô nẽ Jesus kõt amnhĩ xunhwỳ.

Tã nhũm wa kato nẽ awjanã nẽ ma akupỹm pika pẽ Pisit wỳr wa mỗ. Nẽ kamã krĩ hkwy hkõt ri ra mẽ kot Jesus kõt amnhĩ xunhwỳr xwỳnhjê jahkre ho ri mẽ hkõt pa. Krĩ pẽ Risti nẽ Ikõn nẽ ãxiokja kõt. Nẽ mẽ ahkre kamã Jesus kõt mẽ ho mẽ hihtỳx o wa pa nẽ mẽ kãm:

—E ra mẽ ate Jesus kõt amnhĩ xunhwỳr jakamã koja mẽ kãm Jesus kurê xwỳnhjaja tee ri ja hã mẽ apumu nẽ hã tanhmã mẽ anhĩpêx to. Tã kêr ka mẽ ãm amnhĩ tã mẽ omu nẽ ãm mẽ omu nẽ Jesus kaga hkêt nẽ. Nẽ arĩ hkõt amnhĩ nhĩpêx mex o ri apa rãhã nhỹrmã ma õ krĩ hwỳr api nẽ Tĩrtũm wa kuri amex kumrêx nẽ atĩr tũm nẽ apa ho apa. Anẽ.

²³ Hãmri nẽ ahpỹnhã krĩ piitã hkõt ri mẽ kot pastô nhỹ hã mẽ ahkre kaxyw mẽ hkwyjê rê nẽ mẽ kaxyw mẽ unhwỳ nẽ mẽ ho Tĩrtũm wỳ. àpkur kêt rãhã mẽ ho kuwỳ nẽ kãm:

—Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwỳ. Jakamã e kêr ka mẽ kutã anojarêt rãhã ho ri mẽ hkõt apa. Anẽ.

Hãmri nẽ wa mẽ kệp kato nẽ ma hpãnhã nhỹhỹm wa mỗ. ²⁴ Pyka pẽ Pisit kamã mỗ nẽ hpãnhã nhãm pyka pẽ Pãpir kõt mỗ. Wa ma mẽ kãm tanhmã Jesus kapêr jarênh to ho mẽ hkõt mỗ. ²⁵ Hãmri nẽ krĩ pẽ Perke hwỳr wa pøj nẽ kamã mẽ kãm Jesus kot tanhmã amnhĩ nhĩpêx to hã harẽ hãmri nẽ mẽ kurũm kato nẽ axte mỗ. Pãnhã ma krĩ pẽ Atari hwỳr wa mỗ. ²⁶ Hãmri nẽ hwỳr pøj nẽ hpãnhã kurũm akupỹm ãxiok wỳr wa mỗ. Pàr rax kãm ma akupỹm mỗ. ãxiokja kamã na pre wa nojarêt nhũm Jesus kõt wa htõ nẽ wa htõxjaja wa ho Tĩrtũm wỳ nẽ ma krĩ hkwy hwỳr wa kumẽ. Wa kot ma mẽ hkõt tanhmã Jesus kot mẽ panê amnhĩ nhĩpêx to hã harênh o wa pa kaxyw wa kumẽ. Jakamã nhũm wa ra ja ho anhỹr pa nẽ akupỹm mẽ hwỳr wa mỗ. ²⁷ Hãmri nẽ wa akupỹm pøj nẽ Jesus kõt mẽ kot axpên to htõ nẽ htõxjê ho akuprõ nẽ mẽ kãm amnhĩ jarẽ nẽ mẽ kãm:

—Nà ãm hãmri na pa wa ra ixkãhkĩnh pẽ akupỹn mẽ awỳr pøj. Na pre Tĩrtũm wa ixkutã nojarêt rãhã ho wa inhĩhkô hã pa. Jakamã pa pre wa ma ã hã Ijaew kêt xwỳnhjê mã Jesus jarênh o ixpa nhũm mẽ hkwyjaja wa inhma nẽ hkõt amnhĩ xunhwỳ.

²⁸ Anhỹr o wa mẽ kãm kapêr hãmri nẽ wa tokyx ma nhỹhỹm krĩ hõ hwỳr axte mỗr kêt nẽ. War arĩ ãxiok kamã Jesus kõt wa htõ nẽ htõxjê hkõt ri pa.

15

Jerujarē kamā Jejus kwỳ hpikuprõnh ã mẽ harēnh

Matêwre 23.1-4; Karatas 2.1-5, 5.1-16

¹ Tã hãmri nhũm Ijaew kwỳjaja ãxiok wỳr Jejus kwỳ pē Ijaew kêt xwỳnhjê hwỳr mõn pøj. Pika pē Jutej rùm mẽ hwỳr pøj nē tanhmã mẽ ahkre hto ho pa. Nom axtem nē Tĩrtũm kapēr kuhpa hã mẽ ahkre nē mẽ kãm:

—Kot ka mẽ amã Jejus kôt amnhĩ xunhwỳr prãm hãmri nē mẽ ixpyrà nē finat Mojes kot mẽ pamã karõ xà hkôt amnhĩ my kwỳt kà kwỳ jakà nē rĩ kormã hkôt amnhĩ xunhwỳ. Kot kaj mẽ ã amnhĩ nhĩpêx anhỳr kêt nē nhũm Tĩrtũm tee ri ja hã mẽ apumu nē amnhĩ katut kôt mẽ ate amnhĩ tomnuj rēnh nē mẽ ato hkra hkêt nē. Anē.

² Hãmri nhũm Pawre mẽ Panãpe tee ri mẽ kapēr anhỳrja ma nhũm wa kēp ja omnuj tỳx nē. Hãmri nhũm wa mẽ kãm:

—Tk. Kwa kot anhỳr kêt. Na hte Tĩrtũm mẽ pahte amnhĩ my kwỳt kà jakà ã mẽ pahpumunh kôt mẽ pahto hkra hkêt nē. Anē.

Hãmri nē tee ri mẽ kapērja nē mẽ kãm kapēr no nhũm mẽ ãm wa kuma nē wa hkôt hamaxpēr kêt nē. Nē arĩ ã mẽ ahkre anhỳr o mẽ hkôt pa. Jakamã nhũm mẽ ja hã axpēn mã kapēr rax nē. Hãmri nhũm Jejus kwỳ pē Ijaew kêt xwỳnhjaja amnhĩ tã Pawre mẽ Panãpe wa hkukja nē wa kãm:

—Kwa xà kot paj mẽ apyrà nē amnhĩ my kwỳt kà jakà nhũm Tĩrtũm kãm ja mex nē nà? Kwa wa ma akupỹm *Jerujarē* hwỳr mō nē ja hã Jejus nhỹ hã mẽ ahkre xwỳnh maatijê mẽ mẽ kot Jejus kwỳ jahkre xwỳnhjê kukja nē hã mẽ ama. Nē ota mẽ ixkwỳjaja koja ma war akôt mra. Kê mẽ tanhmã mẽ amã ja jarēnh to ka mẽ ama nē man akupỹn mẽ ixwỳr mra nē tanhmã mẽ inhmã mẽ kapēr jarēnh to. Anē.

Hãmri nhũm wa mẽ kãm: “Tõe. Nà kot paj mẽ anē.” Anē. ³ Hãmri nē wa mẽ ma *Jerujarē* hwỳr mō. Ma pyka pē Wēnĩs mẽ Samar hkôt ma hwỳr mō. Hãmri nē nhỹri Jejus kôt mẽ htō nē htõxjê pumu nē mẽ kãm Ijaew kêt xwỳnhjê jarē. Mẽ hkwỳjaja mẽ urak nē Jejus kôt amnhĩ xunhwỳr ã mẽ harēnh o mō. Hãmri nhũm mẽ harēnh ma nē mẽ y hã hkĩnh nē. ⁴ Hãmri nhũm mẽ ra *Jerujarē* hwỳr Jejus kôt mẽ htõjê hwỳr mõn pøj. Hãmri nē mẽ ahkre xwỳnhjê mẽ Jejus nhỹ hã mẽ ahkre xwỳnh maatijê pumu nhũm mẽ haxwỳja amnhĩ wỳr mẽ omu nē hkĩnh nē. Nē tanhmã mẽ ho mex to nē mẽ kãm kapēr mex nē. Hãmri nhũm Pawre mẽ Panãpe wa mẽ kãm amnhĩ jarē. Tĩrtũm kot wa iħkō hã wa hkôt pa nhũm wa y hã kot Ijaew kêt xwỳnhjê mã kapēr o pa nhũm mẽ hkwỳja kot wa mar nē Jejus kôt amnhĩ xunhwỳr ã nhũm wa mẽ kãm amnhĩ jarē. ⁵ Nhũm Jejus kwỳjê kamã mẽ kēp Parijew nhõ xwỳnh kwỳjaja. Mẽ kēp Parijew tã hkwỳjê rom Jejus kôt amnhĩ xunhwỳ. Jakamã nhũm mẽ tee ri Pawre mẽ Panãpe wa kot Ijaew kêt xwỳnhjê jarēnh ma nē kãnhmã kuhê nē wa kãm:

—Kwa kê mẽ pahpyrà nē amnhĩ my kwỳt kà jakà nē finat Mojes kot Tĩrtũm nhỹ hã mẽ pamã mẽmoj tã karõ hkôt amnhĩ nhĩpêx o pa. No kot mẽ ã amnhĩ nhĩpêx anhỳr kêt nhũm ja mẽ pahpê omnuj nē. Anē.

⁶ Hãmri nhũm Jejus nhỹ hã mẽ ahkre xwỳnh maatijê mẽ mẽ hkwỳjê jahkre xwỳnhjaja mẽ kuma nē hapøj nē nhỹri akuprõ. Ijaew kêt xwỳnh kot Jejus kôt amnhĩ xunhwỳr xwỳnhjaja kot tanhmã amnhĩ nhĩpêx to hã axpēn mar kaxyw nhỹri akuprõ. ⁷ Hãmri nē mẽ hã axpēn mar ryy nē. Hãmri nhũm Simãw Pêtre tã kãnhmã xa nē mẽ kãm:

—Nà na pre Tĩrtũm mẽ pahkapi nē Ijaew kêt xwỳnhjê kaxyw pa ixta. Ixte mẽ kãm Jejus kot tanhmã mẽ panê amnhĩ nhĩpêx to hã harēnh o ri mẽ hkôt ixpa nhũm mẽ kot inhmar nē hkôt amnhĩ xunhwỳr kaxyw nhũm mẽ kaxyw ixta. Ra mẽ ate ja hã ixpumunh mex. ⁸⁻⁹ Tĩrtũm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrà nē mãânēn Ijaew kêt xwỳnhjê nhĩpêx. Mẽ kot mẽ pahpyrà nē amnhĩ kaxyw Jejus kôt hamaxpēr jakamã nhũm Tĩrtũm te ra mẽ panhĩpêx pyrà nē amnhĩ katut kôt mẽ kot amnhĩ tomnuj rē nē mẽ ho hkra. Hãmri nē mẽ hwỳr amnhĩ Karõ rē nhũm mẽ hkarõ mã agjê. Tĩrtũm tãm kot amnhĩm mẽ rēnh kēnã.

¹⁰—Tã xà mẽ pahpê Ijaew na pu htem wam Tirtũm kot finat Mojes mã kapêr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nê. Nê mẽ panhĩgêjtjaja na xep prem haxwỳja hkôt amnhĩ nhĩpêx mex o pa hkêt nê. Mẽ pahpiitã mẽ pahpê hihtỳx kênã. Tã Ijaew kêt xwỳnhjaja kot hkôt amnhĩ nhĩpêx o pa hã ka mẽ ra mẽ kãm karõ kaxyw. Kwa kot kaj mẽ anê nhũm Tirtũm tee ri ja hã mẽ apumu nhũm ja kêp omnuj nê. Kãm ja prãm kêt. ¹¹ Kwa mẽ ã mẽ kãm hã karõ anhỹr kêt nê. Mẽ panhõ pahihti Jejus na hte mẽ pahpiitã mẽ pakutã nojarêr o axpên pyræk. Jakamã Ijaew kêt xwỳnhjaja nê mẽ pahpê Ijaewjaja kot puj mẽ amnhĩ kaxyw hkôt pajamaxpêr nê hkôt amnhĩ xunhwỳ. Hãmri nhũm Tirtũm ja hã mẽ pahpumu nê mẽ panhĩpêx o axpên pyrã nê Jejus kukwak ri amnhĩ katut kôt mẽ pahte amnhĩ tomnuj rê nê mẽ pahto hkra. No na hte mẽ pahte amnhĩ my kwỳt kà jakàr rỳ finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nê. Anê.

¹² Nhũm pre ã Simãw Pêtre mẽ kãm kapêr anê. Hãmri nhũm hpãnhã Panãpe mẽ Pawreja mẽ kãm amnhĩ jarê. Tirtũm kot tanhmã wa ho nhũm wa kot Ijaew kêt xwỳnhjê hwỳr wa mõi ã amnhĩ jarê. Nê Tirtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt pa hã mẽ kãm amnhĩ jarê nhũm mẽ piitã akryk wa mar o hkrĩ nê wa ujarênhta hkukamã hamaxpêr. ¹³ Hãmri nhũm Simãw Pêtre mẽ Panãpe wa mẽ kãm ujarênh pa hãmri nhũm Xiakre wa hpãnhã kànhmã xa nê mẽ kãm kànhmã ìhkra pê nê mẽ kãm:

¹⁴—E pa ijaxwỳja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tirtũm kot wam amnhĩ kaxyw Ijaew kêt xwỳnh kwỳjê rênh ã mẽ harênhja pu mẽ ra kuma. ¹⁵ ãm hãmri na ã mẽ harênh anê. Amnepêm Tirtũm kapêr nhỹ hã mẽ kapêr o mẽ pa xwỳnhjaja na prem ra ja kukamã Tirtũm kot tanhmã mẽ hipêx to hã amnhĩ jarênh kukamã hã kagà. Te ho tãm kot kãm kapêr pyrã nê hã kagà ho:

¹⁶ Amnepêm finat Tawija na pre hte inhmã amnhĩ kwỳjê ho amnhĩptàr o pa.

Mẽ kêp Ijaewjaja nhũm pre inhmã mẽ ho amnhĩptàr o pa.

Hãmri nhũm mẽ gaa nê axpên pê anhgrà nê ahpỳnhã ri pa.

Tã ixpê Tirtũm kot paj nhỹrmã ma mẽ hwỳr wry nê axte mẽ ho akuprõ nê tãm mẽ unhwỳr pa.

¹⁷ Jakamã Ijaewjê kukwak ri koja Ijaew kêt xwỳnh kwỳjaja mãânên ixkôt amnhĩ xunhwỳ. Pa te ixte Ijaewjê nhĩpêx pyrã nê mẽ ho ixkra.

¹⁸ ã mẽ hkukamã ijamaxpêr anhỹr xà hkôt.

¹⁹ Anhỹr o mẽ harênh jakamã nhũm ra mẽ hkwỳjaja mẽ higêt kot amnhĩ nhĩpêx kaga hpa nê hpãnhã Tirtũm kôt amnhĩ xunhwỳ. Jakamã kwa kêt pu mẽ axte ja nhĩjuk ri mẽ kãm mẽmoj tã karõ hkêt nê. Ja pix na mex. ²⁰ ãm ja pix kot puj mẽ kãm hã karõ nê hã kagà nê mẽ hwỳr kumê:

Mẽ kot sãnti hã mẽ õ hkur nê kot puj mẽ hkurê.

Nê mẽ kot mẽmo mry hpar nê hkamrô runh kêt rãhã hkur nê mẽ hkurê.

Nê mẽ kot mẽmo mry kamrô kur nê mãânên mẽ hkurê.

Nê mẽmyjaja kot amnhĩ prõ pix tãnopxar ã mẽ kãm karõ.

Nê mẽnijaja haxwỳja kot amnhĩ mjên pix tãnopxar ã mẽ kãm karõ.

—ãm ja pix kot puj mẽ kãm hã kagà nê mẽ kãm hã karõ. ²¹ Mẽ panhĩgêjtjê mã finat Mojes kot ã mẽ kãm karõ anhỹrja na htem arĩ krĩ piitã hkôt ã mẽ kãm hã karõ anê. Mẽ panhõ arĩgromnu pê sap ã na htem arĩ ri Tirtũm kapêr o mẽ ahkre xà hã ixkre kamã ã mẽ kãm hã karõ anê. Anê.

Mẽ kot Ijaew kêt xwỳnhjê hwỳr kagà mênh ã mẽ harênh

Karatas 5.1

²² Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwỳnh maatijaja nê mẽ kot hkwỳjê jahkre xwỳnhjaja nê Kris kwỳjê piitã Xiakre kapêr ma nhũm ja mẽ kãm mex nê. Jakamã nhũm mẽ axpên mã:

—Tõe. Nà ãm hãmri na Xiakre ã Ijaew kêt xwỳnhjê jarênh anê. Nà ja mex. Pu mẽ ã ãxiok nhõ xwỳnhjê mã ja hã kagà anê hãmri nê mẽ hwỳr kumê. Koja Pawre mẽ Panãpeja

wa kupy nê ma akupÿm mē hwÿr o mō nê mē kām kugō. E mē pahtō kot puj mē ma wa hkôt mē hwÿr mō? Anē.

Hāmri nhūm mē kuma nê Siras mē Jut Pasapas wa kuta. Jejus kôt mē kot axpēn to htō nê htōxjaja kot axpēn mā hamē wa kot amnhī to mex xwÿnh ã wa harēnh jakamā nhūm mē ma Pawre mē Panāpe wa hkôt mōr kaxyw wa kuta. ²³ Hāmri nê ãxiok kamā Kris kwÿ pē Ijaew kêt xwÿnhjê kaxyw kagà nhīpêx nê kamā ã mē kām kapēr anē nê mē kām:

Pa? ãxiok mē Sir mē Siris kamā Ijaew kêt xwÿnhjaja? Xà mē amex? Mē ixpê Jejus kôt mē atōjaja na pa mē awÿr kagàja nhīpêx nê mē awÿr kumē. Mē ixpê Jejus kôt mē kot amnhī xunhwÿr xwÿnhjê jahkre ho ixpa xwÿnhjaja nê Jejus nhÿ hā mē ahkre ho mē pa xwÿnh maatijaja pa mē awÿr kumē.

²⁴ Na xep ra ja rūm mē ixkwÿjaja ma mē awÿr mō nê mēmoj tā tanhmā mē amā karō hto. Mē ate amnhī my kwÿrèt kà jakàr nê amnepēm mē inhīgēt Mojes kapēr kôt amnhī nhīpêx o apa hā mē amā karō. Ka xep mē tee ri ja kukamā ajamaxpēr. No mē pajaja na pa prem mē awÿr mē rēnh kêt nê. Ām amnhī krā hkôt na prem mē awÿr mō nê ã mē amā ja hā karō anē.

²⁵ Tā pa tee ri mē harēnh ma nhūm ja mē ixpê omnuj tÿx nê. Jakamā na pa mē jar akuprō nê mē akaxyw mē inhīōja wa kuta. Wa kot ma Panāpe mē Pawre wa hkôt mē awÿr wa mōr nê mē amā mē ixkapēr jarēnh kaxyw. Panāpe mē Pawreja mē inhmā wa hapê htÿx. ²⁶ Na hte mē amā Pahihti Jejus Kris kapēr jarēnh o pa kaxyw wa amnhī grōnh kôt mē amā harēnh o pa.

²⁷ Tā pa mē akupÿm mē awÿr wa kumē nê wa hkôt mē pahtō Jut mē Siras wa kumē. Mē ixte mē amā kagà kamā mē ixkapērja nhūm wa kot hprī hā mē amā harēnh kaxyw pa mē wa hkôt mē awÿr wa kumē.

²⁸⁻²⁹ E ja pix nê kot paj mē akurê:

Kêr ka mē sānti hā mē ō hkur kêt nê.

Nê mēmo mry kamrō kur kêt nê. Jao mēmo mry pa nê hkamrō runh kêt rāhā hkur kêt nê. Kamrō runh pa nê rī kormā tanhmā ho nê aku.

Nê kêr ka mē amyjaja amnhī prō pix tănopxar o apa.

Nê mē anijaja ajaxwÿja amnhī mjên pix tănopxar o apa.

E ãm ja pix kot paj mē amā hā karō. Tīrtūm Karō kām ja mex. Nê mē inhmā määnēn ja mex. Kot kaj mē ã amnhī nhīpêx anhÿr o ri apa nê amex nê apa.

Tā ãm ja pix. Mē ixpê Jejus kwÿjê jahkre xwÿnhjê mē Jejus nhÿ hā mē ahkre xwÿnh maatijê mē pa mē mē awÿr kagàja nhīpêx nê kumē. E kêr ka mē amex nê akīnh nê ri axpēn kôt apa. Ām ja pix na hapêx. Anē.

Nhūm prem ã kagà kamā mē kām mēmoj tā karō anē. ³⁰ Hāmri nê Jut wa mē kām kugō nê ma ãxiok wÿr wa mē kumē nhūm wa mē ma akupÿm hwÿr o mō. Jut nê Siras nê Pawre nê Panāpeja nhūm wa mē ma akupÿm mē hwÿr o mē mō. Mōō hāmri nê mē hwÿr pōj. Hāmri nê Jejus kwÿjê ho akuprō nê mē kām kagàja gō ³¹ nhūm mē kupy nê kamā harē nê kuma. Kamā mē kot mē kām mēmoj tā karō kamā harē nê kuma nê ÿ hā hkīnh nê akupÿm tām hamaxpēr.

³² Jut mē Siras wa kēp Tīrtūm nhÿ hā kapēr o pa xwÿnh na pre wa. Jakamā na prem mē hwÿr mōn pōj hāmri mē kām tanhmā ujarēnh to ho pa. Mē kot Jejus kôt pix mā hamaxpēr o pa kaxyw mē kām ujarēnh o pa nê mē kām:

—E kêr ka mē māmri Jejus kôt amnhī nhīpêx mex rāhā ho ri apa nê aa hkaga hkêt nê. Anē.

³³ Hāmri nê mē hkôt ri pa hā apkati xohtō nê. Hāmri nê wa akupÿm Jerujarē hwÿr nojarêt nê mē kām amnhī jarē nhūm mē wa kuma nê wa kām:

—Tōe. Nà wa māmri ma akupÿm mō. Koja Tīrtūm war apumunh mex nê ka wa ma akupÿm amex nê akà hkīnh pē akwÿjê hwÿr akato. Anē.

³⁴ Hāmri nhūm wa nojarêt tā nhūm Siras tanhmā hamaxpēr to nê hitōt nê mē kuri arīk nhūm Jut Pasapas pix ma akupÿm hkwÿjê kot mē hwÿr wa mēnh xwÿnhjê hwÿr mō.

³⁵ Hāmri nhūm Pawre mẽ Panāpe wa Siras pyrà nē kormā āxiok kamā pa. Hāmri nē Jejus kôt mẽ htō hkwyjê mẽ pimrààtā mẽ ahkre ho pa. Tirtūm kapēr o mẽ hkôt mẽ ahkre ho pa.

Pawre mẽ Panāpe wa kot axpën pē pikjêr ā wa harēnh

Atre 13.13; Korosē 4.10

³⁶ Hāmri nhūm Pawre mẽ Panāpe war arī mẽ hkôt ri pa hā apkati xohtō nē. Tā nhūm Pawre hamaxpēr nē Panāpe mã:

—Kwa ma pu ma akupỹm ra pahte krī hkwy hkôt mẽ kām Jejus jarēnh o papa xwỹnhjê hkôt akupỹm mō. Pu ma mẽ hwyr mō nē Jejus kôt pahtō nē pahtōxjê kot tanhmā ri amnhī nhīpêx to hā mẽ omu. Anē.

³⁷ Hāmri nhūm kuma nē kām:

—Tōe. Nà pu ma mō. Nom kêr pu ma amnhī kôt Juāw Makre ho mō kê axte pahto ajuta ho pahkôt mō. Anē.

³⁸ Hāmri nhūm Pawre tee ri kuma nhūm ja kêp omnuj nē nhūm kām:

—Tk. Kwa na pre pahkôt pa htā Pāpir kamā tanhmā hamaxpēr to nē pahkaga nē ma akupỹm Jerujarē hwyr mō. Jakamā kwarī koja axte pahkôt mōr kêt nē. Anē.

³⁹ Hāmri nhūm Panāpe tee ri hā hihtyx no nhūm kêp hkaga kumrêx. Jakamā nhūm wa ja hā axpën pē axkjê nē ma ahpỹnhā mō. Nhūm Panāpe amnhī kôt Juāw Makre ho mō nē wa ma pàr kām gô hipôk pē Sipre hwyr wa mō. ⁴⁰ Nhūm Pawre axtem amnhī kôt Siras wỳ nē ma wa mō. Hāmri nē wa nojarêt nhūm Jejus kôt wa htōjaja wa ho Tirtūm wỳ nē kām:

—Pa Tirtūm. E koja Pawre mẽ Siras wa ma krī hkwy hkôt mẽ kām akapēr jarēnh o ri wa pa. Jakamā kêr ka wa htānopxar o ri wa hkôt apa. Anē.

Hāmri nhūm wa kato nē ma krī hkôt ri Jejus kapēr o mẽ ahkre ho wa pa. ⁴¹ Wa ma pyka pē Sir mẽ Siris kôt Jejus kôt mẽ htō nē mẽ htōxjê pumunh nē Jejus kôt mẽ ho mẽ hihtyx o wa pa kaxyw.

16

Ximotre kot Pawre mẽ Siras wa hkôt ri pa hā harēnh

Wam Ximotre 1.1-2; Sikūn Ximotre 1.5; Piripos 2.19-22

¹⁻³ Tā nhūm Pawre mẽ Siras wa ma akupỹm krī pē Tepe hwyr wa mō nē hwyr pōj nē hpānhā kurūm ma Risti hwyr mō. Hāmri nē wa hwyr pōj nē kamā Ximotre pumu. Ximotre na pre ra katorxà pyrà nē Jejus kôt amnhī xām nhūm mẽ kot Jejus kôt axpën to htō xwỹnhjaja kām hapê nē. Nē kot Jejus kapēr kôt amnhī nhīpêx mex o pa hā axpën mã harē.

Krī pē Risti mẽ Ikōn kamā nhūm prem ā axpën mã Ximotre jarēnh anhỹr o pa. Jakamā nhūm Pawre mẽ Siras wa mō nē mẽ hwyr pōj nē Ximotre kot amnhī nhīpêx ā omu nhūm Pawre kām war amnhī kôt o mōr prām nē. Nom Ximotre hkamrô pihkàr na pre. Katorxà kêp Ijaew nhūm hipêxà kêp Gres jakamā nhūm ā Ximotre hkamrô pihkàr anē. Nhūm Ijaew kot katorxà hkôt kêp Ijaew ā omunh jakamā nhūm Pawre hamaxpēr nē mẽ kaxyw kêp my kwryt kà krāhta nē arī kormā mẽ hwyr amnhī kôt o mō. ⁴ Hāmri nē mẽ ma krī hkwy hkôt mō. Mōō nē Ijaew kêt xwỹnhjaja ra kot amnhī kaxyw Jejus kôt hamaxpēr xwỹnhjê jahkre ho mẽ hkôt pa. Ra Jerujarē kām mẽ kot Jejus kwjê jahkre ho pa xwỹnhjê mẽ Jejus nhỹ hā mẽ ahkre xwỹnh maatijaja mẽ kot mẽ kām mẽmoj tā karōta nhūm mẽ ma mẽ kām harēnh o ri mẽ hkôt pa. ⁵ Hāmri nhūm mẽ kuma nē ra Jejus kôt amnhī nhīpêx mex o mō. Hāmri nhūm apkati mẽ krī nhō xwỹnh kwjyja mẽ urak nē Jejus kôt amnhī xunhwỳ. Jakamā nhūm mẽ ra ohtō rax o mō.

Pawre tanhmā hpimtir to hā harēnh

Rômān 15.18-21

⁶ Tā nhūm Pawre mẽ Siras mẽ Ximotre mẽ ma pyka pē As wyr nojarêt. Mẽ kot mẽ kām tanhmā Jejus jarēnh to ho pa kaxyw mẽ hwyr nojarêt tā nhūm Tirtūm Karō kormā mẽ nē mẽ hkurê. Jakamā nhūm mẽ hpānhā ma pyka hkwy pē Prik mẽ Karatas wa hkôt pa. Ixpê

Rukre na pa pre mẽ hã ajêt nê ma mẽ hkôt ixpa ho ixpa. ⁷ Hãmri nê mẽ pyka pê Mís ã mỗ nê hpãnhã ma Pitĩn wỳr inhmõr mã tã no nhũm Tĩrtũm Karõ axte kê mẽ nê mẽ ixkurê. ⁸ Jakamã pa mẽ arĩ Mís jakàr ã mỗ nê gô xujanãr mỳ ri krĩ pê Tôx wỳr pỏj.

⁹ Tã nhũm kamàt pa mẽ ixpiitã gờr nê inhĩkwỹ nhũm Pawre tanhmã hpimtir to. Nhũm xep pika pê Masetõn nhõ xwỳnhja mẽ amnhĩ wỳr hwỳr kãm hihtỳx o xa nhũm hprĩ hã omu nê kapêr ma. Nhũm xep pre kãm:

—Pa Pawre? Kwa amnẽ Masetõn wỳr mẽ ixwỳr mỗ nê tanhmã mẽ ijahkre hto. Anẽ.

¹⁰ Hãmri nhũm Pawre hkrãkato nê mẽ inhmã hpimtir jarẽ. Pa mẽ kuma nê axpẽn mã: —Tô kwa tokyx pu mẽ hwỳr. Tĩrtũm kot mẽ hwỳr mẽ parẽnh kênã. E pu mẽ ma mẽ hwỳr mỗ nê mẽ kãm Jejus jarẽnh o mẽ ahkre. Anẽ.

Hãmri nê amnhĩ to akuprõ nê mẽ hwỳr inhnojarêt kurê kumrẽx.

Ritre kot Jejus kôt amnhĩ xãm ã harẽnh
Piripos 1.1

¹¹ Hãmri pa mẽ ma Masetõn wỳr mỗ. Tôx rũm ma pàr kãm hwỳr mỗ. Hãmri nê gô nhĩpỏk pê Samõtas wỳr pỏj nhũm mẽ hã pàr nhõ. Hãmri nhũm apkati pa mẽ axte mỗ nê Masetõn kamã krĩ pê Nẽap wỳr pỏj. ¹² Hãmri nê pàr rũm ijapỏj nê hpãnhã kurũm hamũ krĩ pê Piripos wỳr ixpar o mỗ. Piriposja Masetõn kamã krĩ maati na. Rõm nhõ xwỳnhjaja na prem ho kato. Jakamã pa prem ma hwỳr mỗ nê pỏj nê tokyx axte kurũm nhỹhỹm inhmõr kêt nê. ¹³ Hãmri nhũm sap kato pa mẽ axpẽn mã:

—Kwa pyhti mỳri mãn hte Ijaewjaja axpẽn wỳr akuprõ nê Tĩrtũm mã amnhĩ jarẽnh o hkrĩ nã. E kwa pu mẽ hwỳr nê gô mỳri mẽ hapêr o ri papa. Anẽ.

Hãmri nê ma hwỳr mra nê mẽ hapêr o ri ixpa nhũm ãm mẽni pixjaja axpẽn wỳr akuprõ. Pa mẽ omu nê mẽ kuri ixkrĩ nê mẽ kãm Jejus kapêr jarẽnh o mẽ ahkre o ixkrĩ. ¹⁴ Nhũm mẽ kot mẽ inhmar o hkrĩ xwỳnhjê hõ pê Ritreja. Krĩ pê Xijaxir nhõ xwỳnh na pre. Nê kêp kupêxê mex o wẽnê xwỳnh. Na pre hte kãm Tĩrtũm prãm o pa. Jakamã nhũm Pawre kot mẽ ahkre ho ỳrja rôm nhũm Pahihti Jejus tanhmã Ritre hkrã hto nhũm hprĩ hã Pawre kapêr mar tỳx nê. ¹⁵ Hãmri nê amnhĩ kaxyw Jejus kôt hamaxpêr nê hkôt amnhĩ xãm kurê kumrẽx. Ờkwỹ kamã hkwyjê mẽ nhũm mẽ hkôt amnhĩ xunhwỳr pa. Jakamã pa mẽ kêp Jejus kwỳ hã mẽ hkrã kumrã. Mẽ piitã mẽ kot mẽ kêp Tĩrtũm kra hã mẽ omunh kaxyw. Hãmri nhũm Ritre amnhĩ kôt mẽ ixwỳ nê mẽ inhmã:

—An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mỗ nê hpãnhã inhõrkwỹ kamã pỏj nê apa. Anẽ.

Pa mẽ kuma nê ma hkôt mỗ.

Mẽ kot Pawre mẽ Siras wa haxàr ã mẽ harẽnh
Makre 1.23-26, 1.34

¹⁶ Tã nhũm arĩgro hõ hã pa mẽ Tĩrtũm mã amnhĩ jarẽnh kaxyw axte pyhti mỳri mẽ pikuprõnh xàja wỳr mỗ. Hãmri nê pry kamã mẽ kãm àpênh xwỳnh nija pumu. Ra mẽkarõmnuti kot tanhmã hkrã hto nhũm ỳ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarẽnh to ho pa. Jakamã nhũm õ patrãwjaja kukwak ri ujamỳnh rũnh pê hkĩnh nê pa. ¹⁷ Jakamã pa mẽ mỗ nhũm nija mẽ ixpumu nê mẽ ixtã ajêt nê ma mẽ ixkôt mỗ. Hãmri nê mẽ kãm mẽ ijarẽnh o mẽ ixkôt mỗ nê mẽ kãm:

—Xê mẽ mran jajê pumu. Na htem Tĩrtũm maati mã tanhmã amnhĩ nhĩpêx mex to ho pa. Tĩrtũm kot mẽ ate amnhĩ tomnuj pê tanhmã mẽ apytàr to hã mẽ amã ujarẽnh kaxyw na mẽ awỳr mra. Anẽ.

¹⁸ Nê ãm xatã mẽ kãm mẽ ijarẽnh o mẽ ixkôt paja o ra hã apkati xohtõ nê. Tã nhũm Pawre ra kãm mar kaga nê nê mẽkarõmnuti mã kapêr nê kãm:

—Tk. Kwa kêp akato nê ma tẽ. Pa Jejus Kris nhỹ hã amã ixkapêr ka inhma nê kêp akato nê ma atẽm kurê kumrẽx. Anẽ.

Hãmri nhũm kuma nê kêp kato nhũm akupỹm tãm hkrã. ¹⁹ Jakamã nhũm õ patrãwjaja tee ri ja hã omu nê gryk tỳx nê axpẽn mã:

—Kwa ra mẽkarõmnutijaja kęp kator jakamã koja axte mẽmoj kukamã tanhmã ujarënh to hkêt nê. Pu mẽ kukwak ri axte paxujamýnh kêt nê. Anê.

Hãmri nê Pawre mẽ Siras wa kamã gryk týx nê. Hãmri nê wa unê nê ma mẽ kot axpën mar xà hã ixkre hwýr wa hkjênh o tẽ ²⁰ nê mẽ kot mẽ ho amnhĩptàr xwýnhjê mã tanhmã wa ho hêx to nê mẽ kãm:

—Kwa mẽ amnê Ijaewja wa omu. Na hte wa mẽ panhõ krĩ kamã hêx pix o pa nhũm mẽ tee ri wa kapër ma nê wa kamã gryk týx nê. ²¹ Mẽ ixte amnhĩ nhĩpêx te kot axpën pyræk kêt tã nhũm wa mẽ kot amnhĩ nhĩpêx o mẽ pajahkre kaxyw nhỹhýnh mẽ pahwýr mō. Nom mẽ pahpê Rõm nhõ xwýnhjaja axtem mẽ pahte amnhĩ nhĩpêx kênã kot pu kêt wa kuma nê wa kapër kôt amnhĩ nhĩpêx. Anê.

²² Hãmri nhũm mẽ kuma nê piitã wa kamã gryk týx nê. Hãmri nhũm mẽ ho amnhĩptàr xwýnhjaja wa kęp wa ê kaxõnh o hkapa nê wa hã mẽ õ pòristi mã amýnê nê mẽ kãm:

—E mẽ ma wa o tẽ nê mẽ htak xà ho wa htak. Anê.

²³ Hãmri nhũm mẽ kuma nê ma wa o tẽ nê wa htak rax nê. Hãmri nê wa haxà nê mẽ hagjênh xà jamãr xwýnh mã kãm:

—E kër ka ja wa omunh mex nê kê wa kator kêt nê. Anê.

²⁴ Hãmri nhũm mẽ kuma nê wa o tẽ nê ixkre jatur xà kamã wa haxà nê wa kator pymaj hamê wa htem pĩ jaxà nê ho htýx nhũm wa arĩ hte týx nê nhỹ.

²⁵ Tã nhũm kamàt. Nê kôt ã kamàt nhũm wa Tirtũm mã amnhĩ jarê nê mex o mex ã wa grer o wa nhỹ nhũm wa uræk nê mẽ hagjênh xwýnhjaja wa mar o hkrĩ. ²⁶ Puh nhũm pyka mẽ kãm htertet týx nê nhũm mẽ hã ixkreja amnhĩ to àpêr týx nê amnhĩ kahê xà rënh pa. Nhũm mẽ hagjênh xwýnhjê kaxpre xà piitã mẽ nê pirênh pa. ²⁷ Hãmri nhũm mẽ hamãr o kuhê xwýnhja pika tertet kamã ama nê hkrækato. Hãmri nê mẽ hã ixkre jakwakre kahê xà rënh parja pumu nê mẽ hagjênh xwýnhjaja hapôx par ã mẽ hkamnhĩx nê tee ri amnhĩ kukamã hamaxpër. Hãmri nê pahi kot mẽ hã hpĩr pymaj õ wapo kapa nê ra tãm kot ho amnhĩ pĩr kaxyw. ²⁸ Hãmri nhũm Pawre tee ri ja hã omu nê kàx pê kãm amýra nê kãm:

—Kwa amnhĩ pĩr kêt nê. Ot pa mẽ arĩ ixpiitã ixkuhê. Na pa mẽ ixtõ ixkator nê ixprõt kêt nê. Anê.

²⁹ Hãmri nhũm kuma nê kanê hã ahwý nê kuwy nê mẽ hwýr axà nê mẽ piitã mẽ omu. Hãmri nê Pawre mẽ Sirasja wa omu nê wa hwýr kãm ma ho htertet o tẽ. Hãmri nê wa hã hpijaàm kaxyw wa kutã tẽm nê hkõnkrã ho nhỹ. ³⁰ Hãmri nê kànhmã xa nê wa ho kato nê ixkre kapem wa o xa nê wa kãm:

—Kwa tanhmã kot pa amnhĩ nhĩpêx to kê Tirtũm war apyrà nê ixte amnhĩ tomnuj pê ixpytã? Anê.

³¹ Hãmri nhũm wa kãm:

—Nà kot kaj amnhĩ kaxyw Jejus Kris kôt ajamaxpër nê hkôt amnhĩ xãm nhũm Tirtũm ja hã apumu nê amnhĩ katut kôt ate amnhĩ tomnuj piitã rënh pa. Nhũm anhõrkwỹ kamã akwýjaja apyrà nê Jejus kôt amnhĩ xunhwý nhũm ã mẽ hipêx anê. Anê.

³² Hãmri nê wa ma hkôt õrkwỹ hwýr tẽ nê hprĩ hã mẽ kãm Tirtũm kapër jarê nhũm mẽ wa mar o hkrĩ. ³³ Hãmri nhũm mẽ hagjênh xà jamãr xwýnhja wa kãm wa htak xà kuhõ. Kormã kamàt kô hkwý kamã wa kãm kuhõ nê hkane. Hãmri nhũm wa mẽ kot Jejus kôt amnhĩ xunhwýr par ã mẽ omu nê mẽ hkrã kumrã. Mẽ hamãr xwýnh mẽ hkwýjê mẽ hkrã kumrãr pa. ³⁴ Hãmri nhũm mẽ kot amnhĩ kaxyw Tirtũm kôt hamaxpër jakamã piitã hkĩnh nê. Hãmri nhũm mẽ hamãr xwýnhja õrkwỹ hwýr Pawre mẽ Siras wa o tẽ nê wa kãm õ nhũm wa apku nhũm ma akupým mẽ hagjênh xà hwýr wa o tẽ nê akupým wa haxà.

Mẽ kot Pawre mẽ Siras wa kãm urer ã mẽ harënh

Atre 22.25-29

³⁵ Hãmri nhũm apkati nhũm krĩ pytãr xwýnhjaja mẽ õ pòristi mã anê nhũm mẽ hagjênh jamãr xwýnh wýr tẽ nê kãm:

—E na mẽ papytãr xwýnhjaja ate Pawre mẽ Siras wa kãm anhũrer nhũm wa mãmrĩ ma akupým htẽm kaxyw hã karõ. Anê.

³⁶ Hãmri nhũm mẽ kuma nê wa hwýr axà nê wa kãm:

—E na krī pytār xwỳnhjaja ixte war akator kaxyw war atā inhmā karō. Jakamā e wa māmri axàmnhix ma mō. Anē.

³⁷ Hāmri nhūm Pawre kām:

—Nà wa ixte tanhmā amnhī tomnuj to hkêt tā nhūm mẽ kot wa ixpynênh nê wa ixtak. Wa ijaxwỳja wa ixpê Rôm nhō xwỳnh tā nhūm prem axtem nê mẽ piitā mẽ noo mã wa ixtak nê wa ijaxà. Mẽ kot amarī Rôm nhō xwỳnh tak nê mẽ haghênh kêt tā nhūm mẽ ã mẽ noo mã ã wa inhīpêx anê. Kormā wa ixte tanhmā amnhī tā ixàprār to hkêt tā nhūm mẽ ã wa inhīpêx anê. Jakamā kwarī kot kaj mẽ no hkàx ã wa ixkator kêt nê. Kê mẽ kot wa ijaxàr xwỳnhjaja tām man mra nê wa ixkator pa war arī ma mō. Anē.

³⁸ Hāmri nhūm pōristija kuma nê ma akupým mẽ hwỳr mra nê mẽ kām wa kapêr jarê. Hāmri nhūm mẽ tee ri mẽ uràn wa kêp Rôm nhō xwỳnh ã wa harênh ma nê kām ma htỳx nê. ³⁹ Hāmri nê ma wa hwỳr tẽ nê wa hwỳr axà nê wa kām:

—Pa? E māmri war akato nê axàmnhix ma mō. Na pa prem war anhīpêx kati rax nê. Tã kêr ka wa axte ja mã ajamaxpêr hkêt nê. Kê ja ãm jar mẽ pakamā hapêx. Anē.

Hāmri nê wa kator nê wa kām:

—E kwa wa mẽ inhō krī pê akato nê ma nhỹhỹm mō. Anē.

⁴⁰ Hāmri nhūm wa kuma nê kato nê ma akupým Ritre nhōrkwỹ hwỳr wa tẽ. Hāmri nê Jejus kôt wa mẽ htōjê pumu nê wa mẽ kām amnhī jarê nê mẽ kām:

—E kot paj hāmri wa mã mō. Nom kêr ka mẽ arī Jejus Kris kôt amnhī nhīpêx mex rãhã ho ri apa nê aa hkaga hkêt nê. Anē.

Hāmri nê wa mẽ kurūm kato nê ma krī hō hwỳr wa mō.

17

Tesarôn kamã mẽ kot wa kamã gryk ã mẽ harênh

Wam Tesarôn 1.1, 2.13-14

¹⁻² Tã nhūm Pawre mẽ Sirasja wa ma krī hkwȳ hkôt pa. Piripos rūm ma Apiporip mẽ Apôrôn kôt wa mō hāmri nê ra Tesarôn wỳr wa pōj. Na pre hte Pawre nhỹri pōj nê Ijaew nhō Tirtūm kapêr o mẽ ahkre xà hã ixkre hwỳr agjê nê kamã mẽ kām Jejus kapêr jarênh o kuhê. Jakamā nhūm wa mō nê Tesarôn wỳr pōj nê ixkre hwỳr mẽ hwỳr tẽ nê mẽ kām ujarênh o xa. Nê mẽ kām ujarênh o hã arīgromnu pê sap o axkrunêpxi. ³ Nê hprī hã mẽ kām tanhmā Tirtūm kapêr jarênh to nê mẽ kām:

—Nà Tirtūm kapêr ã kagà htūm kot mẽ pakaxyw ãm xwỳnh jarênh. Amnhī xà htỳx kamã hamak kām htyk hāmri nê akupým htir ã nhūm kot hkukamã harênh. Tã na pre Jejusja ã amnhī nhīpêx anê. Tãm kêp Krisja. Tirtūm kot mẽ pakaxyw ãm xwỳnhhta na. Anē.

⁴ Hāmri nhūm mẽ hkwȳja kuma nê wa hkôt hamaxpêr nê wa uràk nê Jejus kôt amnhī xunhwỳ. Ijaew kwỳjê nê Ijaew kêt xwỳnh kwỳjaja nê mẽni kot amnhī to rūnh xwỳnh kwỳjaja nhūm mẽ ohtô nê amnhī kaxyw Jejus kôt hamaxpêr nê hkôt amnhī xunhwỳ.

⁵ Tã nhūm Ijaew kwỳjaja tee ri hkwȳ kot wa hkôt amnhī xunhwỳr ã mẽ omu nê mẽ hã Pawre mẽ Siras wa kamã gryk tỳx nê. Hāmri nê ma mra nê wa kaxyw mẽ kot amnhī tomnuj tỳx xwỳnh kwỳjê ho akuprō nê mẽ kām wa hã amỹnê. Jakamā nhūm mẽ ma kapêr punuj pê wa hapêr o ri mra nhūm mẽ piitā mẽ omu nê mẽ kuma. Hāmri nhūm mẽ wa hapêr o ra Jasāw nhōrkwỹ hwỳr mra. Nê mẽ kot Pawre mẽ Siras pynênh nê ma mẽ utār xwỳnhjê hwỳr wa o htēm kaxyw mẽ kêp kahê xà mẽ nê mẽ hwỳr agjê. ⁶ Hāmri nê tee ri òrkwỹ kamã wa hapêr nhūm wa kamã amrakati. Jakamā nhūm mẽ Jasāw mẽ kot Jejus kôt axpên to htō xwỳnh kwỳjê pynê nê ma mẽ kot mẽ ho amnhīptār xwỳnhjê hwỳr mẽ o mra. Hāmri nê mẽ kām tanhmā Pawre mẽ Siras wa ho hêx to. ãm kapêr punuj kām kàx pê mẽ kām wa harê nê mẽ kām:

—Kwa na hte Pawre mẽ Siras wa pyka piitā hkôt mẽ kām ri mẽmoj to hêx o pa. Tã wa ra mẽ panhō krī hwỳr pōj nê jar mẽ pamã ri tanhmā hêx to ho ri mẽ pahkôt pa. ⁷ Jasāw nhōrkwỹ kamã na pre wa pōj nhūm amnhī wỳr wa kuwỳ. Na hte wa hkôt mẽ hamaxpêr xwỳnhjaja pahihiti Sesti kapêr kwỳm ri kuhpa hã kapêr o pa nê axtem nê mẽõ pahī pê “Jesús” anhỹr xwỳnhja kapêr kôt amnhī nhīpêx o pa. Anē.

⁸ Hāmri nhūm mẽ kot mẽ ho amnhĩptār xwỳnhjê mẽ krĩ nhõ xwỳnhjaja mẽ kuma nẽ gryk tỳx kumrẽx. ⁹ Hāmri nẽ Jasāw mã kām:

—E kot paj mẽ apê mẽ akàxpore hkwy jamy. Ka mẽ ajapôj nẽ ma mẽ panê Pawre mẽ Siras wa hano nhūm wa kato nẽ ma mō pa rĩ akupỹm mẽ amã kugō. Anẽ.

Hāmri nẽ mẽ kêp mẽ hikàxpore hkwy jamy.

Pawre mẽ Siras kot Perej wỳr mōr ã wa harẽnh

¹⁰ Tã nhūm ra kamàt nhūm mẽ kot Jejus kôt axpẽn to htōjaja hāmri Pawre mẽ Sirasja wa ma krĩ pê Perej wỳr wa kumẽ. Hāmri nhūm wa kato nẽ ma hwỳr mō nẽ hwỳr pōj. Hāmri nẽ Ijaew nhõ Tĩrtũm kapẽr o mẽ ahkre xà hã ixkre hwỳr htẽm kurê kumrẽx nẽ wa axà. ¹¹ Perej kamã Ijaew na pre te mẽ kot Tesarõn kamã Ijaew pyræk kêt nẽ. Mẽ kurom mẽ kãm Tĩrtũm kapẽr mar prãm nẽ. Jakamã nhūm pre Pawre mẽ Siras Tĩrtũm kapẽr o mẽ ahkre ho pa. Apkati mẽ mẽ ahkre mex o pa nhūm mẽ wa kuma nẽ hkĩnh nẽ. Nẽ Tĩrtũm kapẽr ã kagã htũm kamã wa kot mẽ ahkreta japêr nẽ kamã omu nẽ axpẽn mã wa harẽnh o:

—Nà ãm hāmri na wa ã Tĩrtũm kapẽr o mẽ pajahkre anẽ. Tĩrtũm kapẽr ã kagã htũm hkõt na hte wa mẽ pajahkre. Anẽ.

¹² Hāmri nẽ ohtô nẽ Jejus kôt amnhĩ xunhwỳ. Ijaew kwỳ nẽ Ijaew kêt xwỳnh kwỳ nẽ mẽni kot amnhĩ to rũnh xwỳnhjaja nhūm mẽ ohtô nẽ Jejus kôt amnhĩ xunhwỳ.

¹³ Tã nhūm Tesarõn kãm Ijaewjaja Pawre jarẽnh ma. Kot Perej nhõ xwỳnhjê mã Tĩrtũm kapẽr jarẽnh o pa hã harẽnh ma. Hāmri nẽ ma mẽ hwỳr mra nẽ mẽ kãm tanhmã ho hẽx to nhūm krĩ nhõ xwỳnhjaja mẽ kuma nẽ ra Pawre kamã gryk tỳx nẽ. ¹⁴ Jakamã nhūm Jejus kôt mẽ htōjaja mẽ harẽnh ma nẽ mẽ umaj Pawre kator nẽ ma gō xujanãr wỳr o mō. No nhūm Siras mẽ Ximotre wa Perej kamã mẽ kuri arĩk. ¹⁵ Hāmri nhūm mẽ hkwyjaja ma Pawre o mō. Ma krĩ pê Atenas wỳr o mō. Hāmri nẽ hwỳr o pōj nẽ kamã kure. Hāmri nẽ ra akupỹm Perej wỳr nojarêt nhūm Pawre mẽ kãm:

—E kêr ka mẽ ma akupỹm mō nẽ Siras mẽ Ximotre wa kãm ijarẽ kê war amnhĩm nojarêt nẽ tokyx man ixkõt wa mō. Anẽ.

Pawre kot Atenas nhõ xwỳnhjê mã kapẽr ã harẽnh

Rômãn 1.18-20

¹⁶ Tã nhūm Pawreja kormã Atenas kamã pa. Siras mẽ Ximotre wa kamã hamak o ri kormã kamã mẽ kot amnhĩ nhĩpêx ã mẽ omunh o pa. Na pre Atenas nhõ xwỳnhjaja sãnti ho ohtô rax nẽ mẽ õ krĩ kamã unhwỳ nhūm Pawre ri omunh o ri kuhê ho pa. Na pre htem ahpỹnhã mẽmo karõ nhĩpêxja o te Tĩrtũm nhĩpêx pyrã nẽ kutã hkõn krã ho rôrõk nẽ hkrĩ nẽ kãm mex o mex ã harẽnh o pa. Hāmri nhūm Pawre tee ri ja hã mẽ omunh o ri mẽ hkõt pa nẽ hkaprĩ nẽ. ¹⁷ Hāmri nẽ ma amnhĩ kwỳjê nhõ Tĩrtũm kapẽr o mẽ ahkre xà hã ixkre hwỳr pa nẽ kamã mẽ ahkre ho kuhê. Ijaewjê mẽ Ijaew kêt xwỳnh kot Tĩrtũm ã hpijaàm xwỳnhjê mã nhūm Tĩrtũm kapẽr jarẽnh o kuhê. Nẽ apkati mẽ mẽ kot mẽmoj to wẽnê xà hwỳr mra nẽ mẽ ujaarprõr xwỳnhjê mã Tĩrtũm kapẽr jarẽnh o kuhê. ¹⁸ Hāmri nhūm mẽ mar o pa. Atenas nhõ xwỳnhjaja na prem axpẽn kôt amnhĩ nhĩpêx o pa hkêt nẽ. Mẽ hkwyjaja kêp Epikure hkõt amnhĩ nhĩpêx xwỳnh. Nẽ mẽ hkwyjaja axtem kêp Etok kôt amnhĩ nhĩpêx xwỳnh. Hāmri nhūm Pawre mẽ kãm Jejus kot tanhmã mẽ panê amnhĩ nhĩpêx to hã harẽnh o pa nẽ akupỹm htĩr ã harẽnh o pa. Hāmri nhūm mẽ tee ri kuma nẽ hã axpẽn kukjêr o kuhê nẽ axpẽn mã:

—Tk. Kwa mo na hte myti ata harẽnh o pa? Anẽ.

Nhūm mẽ hkwyjaja mẽ kãm:

—Ko. Axtem mẽpahpãm õ na hte tanhmã harẽnh to. Anẽ.

¹⁹⁻²¹ Atenas nhõ xwỳnhjê mẽ axtem krĩ hõ nhõ xwỳnhjaja na prem kãm mẽ ujarẽnh nyw mar prãm nẽ. Jakamã nhūm prem mẽmoj jarẽnh nyw ma hāmri nẽ ãm axpẽn mã harẽnh pix o ri pa. Tã ra Pawre xujarẽnh nyw ma nẽ ma amnhĩ kôt mẽ kot axpẽn mar xà hã ixkre hwỳr o tẽ. Ixkre pê Areopja wỳr nhūm prem amnhĩ kôt o tẽ nẽ kãm:

—E kwa aprĩ hã mẽ inhmã ate mẽmo jarẽnh nywta jarẽ pa mẽ ama. Mẽ inhmã mar prãm. Anẽ.

²² Hāmri nhūm mẽ kuma nẽ mẽ kām ujarēnh o xa. Mẽ kot axpēn mar xà hã ixkre kamã Atenas nhõ xwỳnhjê mã awjarẽ nẽ mẽ kām:

—E nà na ka htem anhõ mẽmo karõ nhĩpêx xohtôta ã apijaàm pẽ kãm amnhĩ jagrer o ri apa. Pa hte ja hã mẽ apumunh o mẽ akôt ixpa. ²³ Na pa ra mẽ anhõ sãnti piitã hkôt omunh o ri ixpa nẽ o mũj hõ kuhê xà kaprýja wỳr ixkato. Nhūm himõk ã mẽmo karõ nhĩpêx amrakati nom à hã kagà kot:

MĚPAHPĀM PUMUNH KĚT KUHĚ XÀ NA JA

Ā mẽ ate hã kagà kot anhỳr. Mẽ ate omunh kêt tã ka htem arĩ hã apijaàm o ri apa. No pa na ixte mẽhõja jarēnh mar mex. Tã kot paj mẽ amã harẽ ka mẽ inhma.

²⁴ —Mẽpahpãm mẽ ate omunh kêt ã amnhĩ jarēnhhta Tĩrtũm na. Tãm na pre pyka ho kato nẽ kamã mẽmoj piitã ho kator pa. Gõ ho kato nẽ mry ho kato nẽ panhĩ ho kato. Ām mẽmoj piitã ho kator par kumrẽx. Na hte pika kamã nẽ kaxkwa kamã mẽmoj piitã ho amnhĩptar mex rãhã ho pa. Jakamã mẽmo kaxyw kot puj mẽ jar kãm õrkwỳ nhĩpêx? Tãm kęp mẽmoj piitã ho kator xwỳnh jakamã kot mẽmoj to presija hkêt. ²⁵ Kęp mẽmoj piitã hpãm jakamã mẽmoj piitã õ na. Jakamã tanhmã kot pu wem amnhĩ to nẽ kãm mẽmoj gõ? Tãm kot mẽmoj piitã ho kator nẽ ho htĩr nẽ kot mẽmoj piitã õr kẽnã kot puj kêt mẽ amnhĩ pyrã nẽ kãm mẽmoj gõ. ²⁶ Na pre mẽ pahkukamã ahpỳnhã mẽ pahpiitã mẽ papapxà jarẽ nẽ mẽ pakator hã arĩgro jarẽ. Na pre mẽ pahpãm kot wa Atãwja nhĩpêx. Jakamã nhūm Atãw kęp mẽ pahpiitã mẽ pahpàr krax.

²⁷ —Tã mẽmo kaxyw na pre ã Tĩrtũm mẽ panhĩpêx mex anẽ? Nà ãm mẽ pahte amnhĩ kaxyw hkôt pajamxpēr nẽ hkôt amnhĩ xunhwỳr kaxyw na pre mẽ panhĩpêx. Ja mẽ pahpê hihtỳx kêt. Kojã mẽhõ kãm Tĩrtũm prãm nhūm amnhĩ tã omunh kurẽ kumrẽx.

²⁸ —Nẽ Tĩrtũm pix kukwak ri na pu htem pahtĩr nẽ tanhmã amnhĩ nhĩpêx to ho ri papa. Mẽ akwỳ kot kagà jahkre xwỳnhja na pre ja hã kagà nẽ hã kagà ho: “Mẽ pahpê mẽpahpãm kra na pu htem papa.” Anẽ. Ā hã kagà kot anhỳr.

²⁹ —Tã ka prem amnhĩm mẽmo karõ nhĩpêx. õr o hkwy nhĩpêx nẽ prat o hkwy nhĩpêx nẽ kẽn o hkwy nhĩpêx. Hāmri nẽ hipêx pa nẽ ho mẽpahpãm ã harẽ nẽ ri hã apijaàm o apa. No mẽ ãm amnhĩ krã hkôt mẽ ate hipêx. Tĩrtũm te kot ja pyrãk kêt.

³⁰ —Amnepēm mẽ pa xwỳnhjaja na prem mẽ apyrã nẽ ã mẽmoj nhĩpêx anhỳr o pa nhūm Tĩrtũm ja hã mẽ omu nẽ ãm mẽ omu nẽ hã tanhmã mẽ hipêx to hkêt nẽ. Kormã mẽ kot kapēr mar kêt jakamã nhūm pre ja hã mẽ omu nẽ ãm mẽ omu. Tã na ra mẽ pahte mẽmo karõ nhĩpêx o mẽpahpãm nẽ mẽ pamã kapēr. Mẽ pahte hpãnhã amnhĩ kaxyw ãm kôt pix mã pajamxpēr o papaja na kãm hprãm. ³¹ Kojã nhỹrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarēnh to. Nẽ amnhĩ ri mẽ htĩr tũm nẽ mẽ pa ho pa xwỳnhjê jarẽ nẽ amnhĩ ri mẽ pa hkêt xwỳnhjê jarẽ. Na pre ra ã mẽ harēnh anhỳr kaxyw arĩgro hta. Arĩgrota ã kot hprĩ hã kãm tanhmã mẽ pajarēnh to kaxyw na pre ra Jejusja xãm. Kaxyw na pre akupỹm ho htĩr. Nẽ akupỹm ho htĩr jao kot nhỹrmã kãm tanhmã mẽ pajarēnh to xwỳnh ã ho amnhĩrĩt. Anẽ.

³² Nhūm pre ã Pawre mẽ kãm Tĩrtũm kapēr jarēnh anẽ nhūm mẽ mar o kuhê. Kot mẽ kãm Jejus tyk nẽ akupỹm htĩr ã harẽ nhūm mẽ mar o kuhê. Nhūm mẽ hkwyjaja kuma nẽ ãm kuma nẽ axtem nẽ ri hã akunha. Nom nhūm mẽ hkwyjaja mẽ kurom mar tỳx nẽ Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarẽ pa mẽ ixprĩ hã mar mex nẽ. Anẽ.

³³ Hāmri nhūm Pawre akupỹm nhỹri hpõx xà hã ixkre hwỳr ma tẽ. ³⁴ Hāmri nhūm Xiõnĩs pẽ Areop kãm mẽ kãm kapēr xwỳnh nẽ mẽhõ ni pẽ Tãmaris nẽ mẽ hkwyjaja kapēr mar tỳx nẽ amnhĩ kaxyw Jejus kôt hamxpēr nẽ hkôt amnhĩ xunhwỳ. Hāmri nẽ Pawre kôt pa.

¹ Tã nhũm Pawre krĩ pê Atenas rũm kato nẽ ma krĩ pê Korĩt wỳr mỗ nẽ pøj. ² Hãmri nẽ nhỹri Akirti pumu. Haxwỳja kệp Ijaew. Krĩ pê Pốt kamã na pre kato. Tã ma pyka pê Itar wỳr mỗ nẽ Itar kamã krĩ pê Ròm kamã hpãnhã pa. Pa ho pa htã nhũm mẽ õ pahihiti Krawti tanhmã hamaxpěr to hãmri nẽ mẽ amnhĩ nẽ Ijaew piitã mẽ hanor pa. Jakamã nhũm Akirti kato nẽ hprõ Prisire mẽ wa ma Korĩt wỳr mỗ. Hãmri nẽ hwỳr pøj nẽ kamã pa ho pa. Jakamã nhũm Pawre Korĩt wỳr pøj nẽ wa omu ³ nẽ wa kuri pøj nẽ wa hkõt ri pa. Nẽ Siras mẽ Ximotre wa kamã hamak pê wa ìhkõ hã àpênh o pa. Wa urak nẽ kupêxê pytĩ ho ixkre nhĩpêx nẽ ho wẽnê ho ri wa hkõt pa. ⁴ Hãmri nhũm sap kato nhũm ma Tĩrtũm kapěr o mẽ ahkre xà hã ixkre hwỳr pa nẽ kamã mẽ kãm Tĩrtũm kapěr jarênh o hkrĩ. Ijaew mẽ Ijaew kêt xwỳnhjê mã nhũm mẽ kãm ujarênh o hkrĩ. Nẽ mẽ kãm Jejus kot mẽ panê tanhmã amnhĩ nhĩpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wỳr mõn pøj. Jakamã nhũm Pawre axte ixkre nhĩpêx ã àpênh kêt nẽ. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkõt pa. Kệp Tĩrtũm kot mẽ pakaxyw ãm xwỳnh ã harênh o ri mẽ hkõt pa. Xatã mẽ kãm ujarênh o pa. ⁶ Nom nhũm mẽ kãm mar prãm kêt nẽ kamã gryk kato nẽ kãm kapěr punuj nẽ. Nhũm Pawre tee ri amnhĩ tã mẽ kuma nẽ mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nẽ. Nà mẽ kam nẽ mẽ mãmri ate amnhĩ tomnuj kãm ty nẽ arĩ kam amnhĩ pumu no ãm amnhĩ tã tanhmã inhmã nẽ hkêt nẽ. Ra mẽ ate Tĩrtũm kapěr kaga kênã. Nà kot paj mẽ akaga nẽ ma hpãnhã Ijaew kêt xwỳnhjê hkõt ri mẽ kãm ja jarênh o ri ixpa. Anê.

Hãmri nẽ kànhmã xa nẽ hinõkà kapa nẽ ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê. ⁷ Hãmri nẽ ixkre rũm kato nẽ hijuk ri Ijaew kêt xwỳnh pê Xijutre nhõrkwỳ hwỳr tẽ nẽ hpãnhã Xijutre hkõt pa ho pa. Xijutre kệp Ijaew kêt tã amnhĩ kaxyw Tĩrtũm mã hamaxpěr rãhã ho pa.

⁸ Tã nhũm Ijaew õ pê Kriptija hkwỳjê rom amnhĩ kaxyw Pahihti Jejus kôt hamaxpěr nẽ hkõt amnhĩ xãm. Kệp Ijaew nhõ Tĩrtũm kapěr o mẽ ahkre xà hã ixkre kamã mẽ ahkre xwỳnh na pre. Jakamã òrkwỳ kamã hkwỳjê mẽ mẽ hpimràatã Pahihti Jejus kôt amnhĩ xunhwỳr pa. Nẽ krĩja kamã ra Ijaew kêt xwỳnh ohtõ nẽ Kripti pyrã nẽ amnhĩ kaxyw Jejus kôt hamaxpěr nẽ hkõt amnhĩ xunhwỳ. Jakamã nhũm Pawre mẽ kệp Jejus kwỳ hã mẽ piitã mẽ hkrã kumrã.

⁹ Tã nhũm kamãt nhũm Pawre gõr nẽ nõ nẽ amỹti nhũm kewe Pahihti Jejus axte hwỳr kato nẽ kãm kapěr nẽ kãm:

—Pa Pawre? E kwa kêt ka mãmri axãmnhĩx ri atar mẽ kãm ijarênh rãhã ho ri apa nẽ amnhĩ kamã akahak o ri mẽ hkõt apa hkêt nẽ. ¹⁰ Kot paj atãnopxa nhũm mẽhõ tanhmã ato hkêt nẽ. Krĩ ja kamã koja mẽ ohtõ nẽ ixkõt amnhĩ xunhwỳ. Anê.

¹¹ Nhũm pre ã Pahihti Jejus Pawre hpimtir kãm kãm kapěr anê. Jakamã nhũm Korĩt kãm arĩ ri mẽ hkõt pa ryy nẽ. Arĩ mẽ hkõt pa hã amgrã pyxi nẽ hkõt mytwrỳ kệp 6. Jao Tĩrtũm kapěr o mẽ ahkre ho ri mẽ hkõt pa.

¹² Tã nhũm Korĩt nhõ xwỳnhjê nhõ pika pê Gres kamã mẽ ho amnhĩptar xwỳnh nyw Gartija. Korĩt kãm pa jakamã nhũm Ijaew xaptar tũmrejaja Pawre pynê nẽ ma hwỳr o tẽ nẽ kãm tanhmã ho hêx to. ¹³ Jakamã nhũm Ijaew pikuprõnh xà hã ixkre kamã mẽ kãm kapěr xwỳnh Sostenesja Garti mã Pawre o hêx nẽ kãm:

—Kwa jahti na hte mẽ ixpê Ijaew kot amnhĩ nhĩpêx kwỳm ri mẽ ahkre ho pa. Jao mẽ ixte axtem nẽ tanhmã Tĩrtũm kôt ri amnhĩ nhĩpêx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anê.

¹⁴ Hãmri nhũm ra Pawre kot Garti mã amnhĩ jarênh mã tã nhũm Garti amnhĩ to wa nẽ hã mẽ kãm kapěr nẽ mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhỹx pa arĩ mẽ ama nẽ tanhmã mẽ amã hipêx to. ¹⁵ No xep ãm kot mẽ axaptar tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã.

Ně mẽ ate mẽ ahkre kuhpa hã kot ri mẽ ahkreja pix mỳrapê na ka mẽ kamã agryk nẽ ã inhmã ho akapêr anẽ. Nà kot paj ja hã tanhmã ho hkêt nẽ. Ka mẽ kam nẽ amnhĩ krã hkôt tanhmã ho hprãm xà hkôt tanhmã ho. Anẽ.

¹⁶ Hãmri nẽ amnhĩ nẽ mẽ hano. ¹⁷ Hãmri nhũm mẽ tee ri kuma nẽ ra Sostenes kamã gryk nẽ. Kot Garti mã tanhmã Pawre jarênh to htã nhũm kuma nẽ ãm mar jakamã nhũm mẽ hã Sostenes kamã gryk. Hãmri nẽ unê nẽ Garti noo mã htak o xa. Nẽ htak rax nẽ. Nom nhũm hã mẽ omu nẽ ãm mẽ omu nẽ nẽ tanhmã mẽ kãm nẽ hkêt nẽ.

Pawre kot akupỹm ãxiok wỳr mõi ã harênh

¹⁸ Tã nhũm Pawre arĩ Korĩt kamã mẽ hkôt pa nẽ gaa nẽ nojarêr nẽ Jejus kôt htõjê mã amnhĩ jarẽ nẽ mẽ kãm:

—E kot paj ma akupỹm pika pê Sir wỳr mõi. Anẽ.

Hãmri nẽ mẽ kêp kato nẽ ma hwỳr mõi. Nẽ ma amnhĩ kôt Akirti mẽ hprõ Prisire wa o mõi. Mõi nẽ krĩ pê Sênkrej wỳr põi. Nhũm Pawre amnhĩ kukamã mẽmoj tã tanhmã Tĩrtũm mã amnhĩ jarênh to nẽ amnhĩ jarênh xà hkôt amnhĩ krã hkênh pa. Ijaew kot amnhĩ nhĩpêx xà hkôt ã amnhĩ nhĩpêx anẽ. Hãmri nẽ mẽ pàr wỳr agjê nẽ Sênkrej rũm kato nẽ ma Sir wỳr mõi. ¹⁹⁻²¹ Mõi nẽ krĩ pê Epes wỳr põi. Hãmri nhũm Pawre mẽ hkwỳjaja pàr rũm hapõi nẽ krĩ hwỳr agjê nẽ Ijaew nhõ Tĩrtũm kapêr o mẽ ahkre xà hã ixkre hwỳr mra nẽ hwỳr agjê nhũm Pawre mẽ kãm Tĩrtũm kapêr jarênh o nhỹ. Hãmri nhũm mẽ kuma nẽ kãm mar prãm nẽ. Nẽ kãm:

—Kwa anojarêr kêt nẽ. Kritpêm mẽ ixkôt ri apa ryre nẽ Tĩrtũm kapêr o mẽ ijahkre. Mẽ inhmã ja mar prãm.

Anhỹr tã no nhũm mẽ kãm:

—Nà kot paj ma mõi. Nom koja Tĩrtũm nhỹrmã akupỹn mẽ awỳr inhmẽ pa man akupỹn mẽ awỳr mõi nẽ axte kapêr o mẽ ajahkre. Anẽ.

Hãmri nẽ ma mõi. Ma Epes rũm pàr kãm mõi. Nom nhũm Akirti mẽ Prisireja wa Epes kamã arĩk nẽ hpãnhã kamã pa ho pa.

²² Tã nhũm Pawre krĩ pê Sejarej wỳr põi. Hãmri nẽ hpãnhã kurũm ma akupỹm Jerujarẽ hwỳr mõi. Kot Jejus kôt htõjê pumunh mã ma mẽ hwỳr mõi. Hãmri nẽ mẽ hwỳr põi nẽ mẽ omu nẽ tanhmã mẽ kãm amnhĩ jarênh to nẽ mẽ kêp kato nẽ ma akupỹm ãxiok wỳr mõi. ²³ Hãmri nẽ hwỳr põi nẽ kamã mẽ hkôt ri pa ryy nẽ mẽ kurũm kato nẽ hpãnhã ma akupỹm pyka pê Prik mẽ Karatas wa hwỳr mõi. Nẽ kamã mẽ kot Jejus kôt amnhĩ xunhwỳr xwỳnhjê jahkre ho pa. Mẽ kot Jejus kôt amnhĩ nhĩpêx tỳx rãhã ho pa kaxyw mẽ hkôt mẽ ahkre mex o ri mẽ hkôt pa.

Apor kot Epes kãm Tĩrtũm kapêr jarênh
Epes 1.1-2; Wam Korĩt 3.6-9

²⁴ Tã nhũm Epes wỳr Ijaew õ pê Aporja mõi nẽ hwỳr põi. Krĩ pê Aresãn kamã na pre kato. Na pre hte amnhĩ kaxyw Tĩrtũm kôt pix mã hamaxpêr nẽ kapêr ã kagã htũm mar tỳx nẽ. Jakamã mẽ kãm harênh mex o pa nhũm mẽ piitã kãm mar prãm nẽ. ²⁵ Nom kormã Jejus jarênh jatur xà mar kêt jakamã ãm mẽ kãm hkrax pix jarênh o pa. Juãw Paxis kot tanhmã mẽ ahkre htoja nhũm mar tỳx nẽ. Nẽ tanhmã kot mẽ hkrã kumrãr to ho paja nhũm mããnên mar tỳx nẽ. Jakamã na pre hte mẽ kãm ja pix jarênh o pa. No Jejus kêp Tĩrtũm kot mẽ pahwỳr mênh xwỳnh ã harênhja nhũm kormã mar kêt nẽ. Tã Epes wỳr mõi nẽ põi. ²⁶ Hãmri nẽ Ijaew nhõ Tĩrtũm kapêr o mẽ ahkre xà hã ixkre hwỳr axã nẽ kamã mẽ kãm ujarênh o nhỹ. Amnhĩ kamã kahak kêt nẽ ãmnhĩx ri mẽ kãm ujarênh mex nẽ. Hãmri nhũm Prisire mẽ Akirti wa kot mẽ kãm ujarênh ã kuma nẽ war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhõrkwỹ hwỳr o tẽ nẽ pahprĩ hã kãm harênh jatur xãm kumẽ kê hprĩ hã mar pa. Anẽ.

Hãmri nẽ war amnhĩ kôt kuwỳ nẽ hprĩ hã kãm ujarênh jatur xãm kumẽ nhũm hprĩ hã harênh piitã mar tỳx nẽ.

²⁷ Tã ra pyka pê Gres wỳr nojarêr nẽ Jejus kôt htõjê mã amnhĩ jarẽ nhũm mẽ kuma nhũm ja mẽ kãm mex nẽ. Hãmri nẽ Gres kamã Jejus kôt mẽ htõjê mã kagã nhĩpêx. Apor

kot mẽ hwỳr amnhĩ kôt o mõi nẽ mẽ kãm õr nhũm mẽ kot omunh nẽ kamã harẽnh nẽ ho mex kaxyw mẽ kãm hipêx. Hãmri nẽ hipêx pa nẽ kãm kugõ nhũm kupy nẽ mẽ kurũm kato nẽ ma mẽ hwỳr mõi. Hãmri nẽ mẽ hwỳr pøj. Gres nhõ xwỳnh kwỳjaja na prem ra Jejus kôt amnhĩ xunhwỳ. Tĩrtũm kot mẽ kutã nojarêt jakamã nhũm mẽ ra hkôt amnhĩ xunhwỳ. Jakamã nhũm Apor mẽ hwỳr pøj hãmri nẽ mẽ ìhkõ hã tanhmã mẽ ho ajuta hto ho pa. ²⁸Nẽ xatã Ijaew mã tanhmã Jejus jarẽnh to kamã hihtỳx o mẽ hkôt pa nẽ mẽ kãm: –Nà Jejusja tãm na pre Tĩrtũm mẽ pakaxyw ãm. Tĩrtũm kapër ã kagã htũm kamã ã harẽnh kot anhỳr. Anẽ.

19

Pawre akupỹm Epes wỳr mõi ã harẽnh

Rukre 3.15-16

¹Tã nhũm Apor kormã Korĩt kãm pa ri nhũm Pawre ma akupỹm Epes wỳr mõi. Ma krãhakỳx kôt akupỹm hwỳr mõi. Hãmri nẽ hwỳr pøj nẽ mẽ kot Jejus kôt amnhĩ nhĩpêx o mẽ pa xwỳnhjê pumu. Nhũm mẽ kormã Jejus jarẽnh jatur xà mar kêt nẽ. ²Jakamã nhũm Pawre mẽ hwỳr mõi nẽ mẽ omu nẽ Tĩrtũm Karõ hã mẽ hkukja nẽ mẽ kãm:

–Kwa mẽ ate Jejus kôt amnhĩ xunhwỳr xà hã arĩgrota ã xà na pre Tĩrtũm Karõ mẽ akarõ mã agjê? Anẽ.

Hãmri nhũm mẽ kuma nẽ kãm:

–Nà mẽ ixte Tĩrtũm Karõ jarẽnh mar kêt. Anẽ.

³Hãmri nhũm mẽ kãm:

–No mẽmoj kôt na prem mẽ akrã kumrã? Anẽ.

Nhũm mẽ kãm:

–Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anẽ.

⁴Hãmri nhũm Pawre mẽ kãm:

–Nà Juãw Paxis na pre Ijaew mã kapër o: “Kot kaj mẽ mẽ ate amnhĩ tomnuj kaga nẽ hpãnhã tãm amnhĩ nhĩpêx pa hã mẽ akrã kumrã.” Anhỳr o mẽ kãm kapër o pa. Nẽ mẽ kãm Jejus jarẽnh o: “Koja tokyx mẽhõ ixkôt hapu hã mẽ pahwỳr kato nẽ tanhmã amnhĩ nhĩpêx to ho pa. Ka mẽ omu nẽ amnhĩ kaxyw hkôt ajamexpër nẽ hkôt amnhĩ xunhwỳ.” Anẽ. Tã Jejusja na pre ã mẽ kãm harẽnh anhỳr o pa. Anẽ.

⁵Nhũm pre ã Pawre mẽ kãm Juãw Paxis mẽ Jejus wa harẽnh anẽ nẽ hpãnhã Jejus nhỹ hã mẽ hkrã kumrã. ⁶Hãmri nẽ hpãnhã mẽ hã ìhkra jaxwỳ nhũm Tĩrtũm Karõ mẽ hwỳr wry nẽ mẽ hkarõ mã gjêx pa. Hãmri nhũm mẽ ÿ hã ahpỹnhã axtem mẽ kapër kwỳ ho kapër nẽ ÿ hã Tĩrtũm mex o mex ã harẽnh o kuhê. ⁷ ã mẽ kot amnhĩ nhĩpêx anhỳr xwỳnhjaja kệp 12.

⁸Tã nhũm Pawre Epes kãm Ijaew nhõ Tĩrtũm kapër o mẽ ahkre xà hã ixkre hwỳr mrar ã mytwrỳ axkrunẽpxi. Amnhĩ kamã kahak kêt nẽ hprĩ hã Ijaew mã hprĩ hã Jejus jarẽ nẽ mẽ kãm:

–E pa mẽ amã Jejus jarẽ ka mẽ inhma. Nà Tĩrtũm kot mẽ pahwỳr mẽn h xwỳnhhta na. Nẽ mẽ pahte kamã pajamak o papa xwỳnhhta na. Jakamã kot ka mẽ amnhĩ kaxyw hkôt ajamexpër nẽ hkôt amnhĩ xunhwỳ nhũm Tĩrtũm ja hã mẽ apumu nẽ mẽ ato hkra. Anẽ.

Hãmri nhũm mẽ hkwỳjaja kuma nẽ hkôt hamexpër kurê kumrêx. ⁹Nom nhũm mẽ hkwỳjaja kuma nẽ ãm kuma nẽ Jejus o kapër punuj nẽ. Mẽ piitã mẽ noo mã kuhê nẽ ho kapër punuj tỳx nẽ. Nhũm Pawre tee ri ja mẽ omu hãmri nẽ mẽ kurũm kato. Mẽ pikuprõnh xà hã ixkreta rũm kato nẽ hpãnhã nhãm mẽ kot kãm “Xirãn kot mẽ ahkre xà hã ixkre” anhỳr xwỳnhja wỳr hpãnhã mõi. Nẽ amnhĩ kôt mẽ kot Jejus kôt amnhĩ xunhwỳr xwỳnhjê ho pa nẽ hpãnhã ixkreta kamã mẽ ahkre ho pa. Apkati mẽ hwỳr mra nẽ mẽ ahkre. ¹⁰Jao hã amgrã axkrut. Jakamã nhũm pyka pẽ As kamã mẽ piitã Pahihti Jejus jarẽnh ma. Ijaew nẽ Ijaew kêt xwỳnhjaja nhũm mẽ piitã harẽnh ma.

Wajaga hkwy jarẽnh

¹¹Tã nhũm Pawre Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt pa. ¹²Jakamã nhũm pre htem hwỳr mra nẽ kệp ê hkwy jamỳ nẽ

ma mẽ à xwỳnhjê hwỳr o mra nê mẽ hã haxwỳ nhũm mẽ akupỳm mex. Nê mẽkarõmnuti kot tanhmã mẽ ho ho pa xwỳnhjê hã nhũm prem mãănēn mẽ hã ê kwỳ jaxwỳ nhũm mẽkarõmnutija mẽ kurũm hapôj nê ma mrrar kurê kumrêx nhũm mẽ akupỳm tãm hkrã.

¹³⁻¹⁴ Tã nhũm mẽõ patre maati Sewahtija hkra my kêp 7 nê piitã kêp wajaga. Hãmri nê mẽ kãm Pawre pyrã nê mẽ nê mẽkarõmnuti japôx o pa hprãm nê. Jakamã kormã Jejus kôt amnhĩ xunhwỳr kêt tã mẽ kot ÿ hã Pawre pyrã nê mẽhõ nê hkwy janor kaxyw nê kãm:

—E Pawre kot Jejus jarênh o ri pa xwỳnhhta nhỹ hã kot paj amã ixkapêr. Jakamã e kwa tokyx myta rũm akato nê ma tẽ. Anẽ.

¹⁵ Hãmri nhũm mẽkarõmnutija mẽ kuma nê ãm mẽ kuma nê mẽ kãm:

—Tk. Mẽ apê Jejus mẽ Pawre wa hkwy hkêt tã mẽ nê ã mẽ inhmã akapêr anhỹr o apa. Nã Jejus mẽ hkwy pixjaja na htem Tirtũm nhỹ hã mẽ kêp mẽ ijapôx o pa. Mẽ apê mẽ hkwy hkêt kênã. Nã pa ixkatoore kaxyw ã. Anẽ.

¹⁶ Hãmri nhũm mẽkarõmnuti kot tanhmã ho xwỳnhhta mẽkarõmnuti nhỹ hã wajagajê pynê nê mẽ htaç rax o kêp mẽ ê kaxõnh pa nhũm mẽ tee ri amnhĩ nhĩpêx. Hãmri nê hkênh nê õrkwy rũm hapôj nê ma umaj hprõt nê mra. ¹⁷ Hãmri nhũm Epes kamã mẽ piitã ã kot mẽ hipêx anhỹr ã mẽ harênh ma nê tee ri hamaxpêr nê kãm ma nê. Ijaew nê Ijaew kêt xwỳnhjaja nhũm mẽ piitã tee ri kãm hamaxpêr o pa. Nê Pahihti Jejus mã mex o mex ã harê. ¹⁸ Jakamã nhũm mẽ kot Jejus kôt amnhĩ xunhwỳr nyw xwỳnhjaja piitã tanhmã amnhĩ jarênh to. Nê mẽ hkwyjaja amnhĩ jarênh o:

—Nã kormã ixte Jejus kôt amnhĩ xãm kêt ri na pa pre ã amnhĩ tomnuj anhỹr o ri ixpa. Tã Jejus kôt amnhĩ xãm hãmri nê axte ã amnhĩ nhĩpêx anhỹr kêt nê. Anẽ.

Nhũm mẽ hkwyjaja kêp wajaga htã mẽ urak nê Jejus kôt amnhĩ xunhwỳ hãmri nê amnhĩ jarênh o:

—Nã ijaxwỳja kormã Jejus kôt amnhĩ xãm kêt ri na pa pre hte nê mẽ no kupyw nê mẽ y pix o ri mẽ hkôt ixpa. Tã Jejus kôt amnhĩ xãm hãmri nê axte ã amnhĩ nhĩpêx anhỹr kêt nê. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anẽ.

¹⁹ Hãmri mẽ õ wajaga xàhpumunh xà hã kagã jamy nê ma o mra nê kaxyw kuto nê kamã rênh pa nê mẽ piitã mẽ noo mã ho xêt pa. Wajaga xàhpumunh xà hã kagãja ã kaxpore xohtõ rax kumrêx tã nhũm mẽ Jejus gryk ã hamy nê o mra nê ho hxêt pa nhũm hapêx. ²⁰ Hãmri nhũm krĩ nhõ xwỳnhjaja ã mẽ kot amnhĩ nhĩpêx anhỹr ã mẽ omu nê ohtõ rax nê mẽ urak nê Jejus kôt amnhĩ xunhwỳ.

Pawre kot Rõm wỳr hkrã hã harênh

Rõmãn 1.13-15, 15.22-29

²¹ Tã nhũm Pawre ra akupỳm Jerujarê hwỳr nojarêç nê hamaxpêr o:

—E kot paj ixkato nê hpãnhã ma Masetõn mẽ Gres wa hkôt ma akupỳm Jerujarê hwỳr mõ. Ma mẽ kot Jejus kôt amnhĩ xunhwỳr xwỳnhjê pumunh o mẽ hkôt mõ. Hãmri nê Jerujarê hwỳr pøj nê kamã tanhmã amnhĩ to hpa hãmri nê hpãnhã ma Rõm wỳr mõ. Anẽ.

²² Hãmri nê hkôt ho ajuta ho wa pa xwỳnh Ximotre mẽ Eras wa kãm amnhĩ jarê nê wa kãm:

—E kêt ka wa ma ixkukamã Masetõn wỳr wa mõ. Kot paj kormã jar As kamã ixpa grire hãmri nê ma war akôt mõ pu mẽ hamũ ma Jerujarê hwỳr mõ. Anẽ.

Hãmri nhũm wa kuma nê kato nê ma hkukamã Masetõn wỳr mõ.

Mẽ kot sãnti hã Pawre mã àkjêr ã mẽ harênh

Sikũn Korõt 1.8-9

²³ Rõm nhũm Epes nhõ xwỳnhjaja tee ri Pawre kot tanhmã Pahihti Jejus jarênh to hã kuma nhũm ja mẽ kêp omnuj nê. Nhũm mẽ Jejus ã kamã gryk tỳx nê. ²⁴ Na prem amnhĩ kaxyw Tirtũm kêt hamaxpêr kêt nê. Na prem axtem sãnti ho mẽ hpãm nê amnhĩ to hwỳr pê hã hpjaàm nê kãm mex o mex ã harênh o pa. Mẽ õ sãntija ni Xiãre na pre. Nhũm mẽ kãm ixkre nhĩpêx nê kamã hkarõ nhĩpêx xãm. Hãmri nê hwỳr akuprõ nê hã hkĩnh nê hkarõ hã hpjaàm nê kãm mex o mex ã harê. Nhũm pre hte Temêtja Xiãre nhõrkwy

karō hkryre hkwy nhīpêx nê mē kām ho wēnê ho pa. Prat o hipêx nê ho wēnê ho pa. Jao ra hā mē àpēnh xwýnhjê mē nhūm mē kot haprōr xwýnhjê kukwak ri kàxpore jamýnh rūnh o pa.

²⁵ —Jakamā nhūm Pawre mē hwýr mō nê pōj nê mē kām Mēpahpām Tirtūm jarēnh o ri mē hkōt pa nhūm Temēt tee ri kuma nhūm ja kēp omnuj nê. Hāmri nhūm hamaxpēr nê mē kot urāk nê Xiānre nhōrkwy karō hkryre nhīpêx nê ho wēnê ho pa xwýnhjê ho akuprō nê mē kām:

—E kwa mē inhma. Na pu htem mēpanā Xiānre nhōrkwy karō hkryre pānhā kàxpore jamýnh rūnh o papa. ²⁶ Tā mǎn ka mē ra ham hpōx xwýnh Pawreja pumu nê kapēr ma. Na hte jar mē panhō krī kamā nê As piitā hkōt mē kām mēpanā Xiānre karō nê mē kām kapēr o pa. Xep mē pahte mē hkarō nhīpêxja kēp mēpanā kumrēx kêt ā mē kām harēnh o pa nhūm xep mē ohtō nê kuma nê ra hkōt hamaxpēr.

²⁷ —Kwa ja mex kêt. Koja mē kapēr ma nê hkōt amnhī nhīpêx hāmri nê axte mē pahte ixkre karō hkryre nhīpêx xwýnhja japrōr kêt nê. Hāmri nê mē paxàpēnh o kapēr punuj nê. No ām ja pix omnuj kêt. Koja mēpanā Xiānre mā amnhī jarēnh xà hā ixkreja kaga hpa. Nê haxwýja karōja kaga. Mē piitā kām hapê kēnā. As kamā nê pyka piitā hkōt mē piitā kām hapê nê hwýr mra nê amnhī to hwýr o pa. Kēp mēpanā mex kumrēx tā koja mē Pawre kapēr gryk ā hkaga hpa nê axte kām hamaxpēr kêt nê. Hāmri pu mē axte mē kukwak ri pakàxpore rax nê papa hkēt nê. Kwa tanhmā kot puj mē amnhī nhīpêx to? Anē.

²⁸ Hāmri nhūm mē tee ri ā kapēr anhýr ā kuma nê Pawre kamā gryk tỳx kumrēx. Nê gryk xàj kàx pē kapēr nê xatā kapēr tỳx kām kapēr punuj nê. Nê kapēr o:

—Xiānre na mex kumrēx. Kēp mē pahpê Epes nhō xwýnhjê nā maati na.

Anhýr o kàxpē kapēr o kuhê. ²⁹ Hāmri nhūm krī nhō xwýnh piitā mē kuma nê mē hwýr hprōt nê haxwýja gryk nê kàxpē mē hkōt ā harēnh anhýr o kuhê. Hāmri nê gryk xàj Pawre hkōt ri wa pa xwýnhja wa unê nê ma mē kot axpēn mar xà hā ixkre hwýr wa hkjēnh o tē. Masetōn nhō xwýnh wa kēp Gajore mē Aristakja nhūm mē wa unê. ³⁰ Hāmri nhūm Pawre mē kot wa unēnh ā mē omu nê tee ri wa hkukamā hamaxpēr nê mē hkōt hprōt nê mē kām tanhmā kapēr to kaxyw nom nhūm mē kot Jesus kōt amnhī xunhwýr xwýnhjaja ja nê kām kapēr kām hihtỳx nê. ³¹ Hāmri nhūm As kamā mē kot mē ho amnhīptār xwýnh kwýjaja ā mē kot amnhī nhīpêx anhýr ā mē omu nê Pawre hwýr hpēr mē. Mē kām hkīnh jakamā kot mē hkōt htēm nhūm mē kot hpīr pymaj hwýr hpēr mē nê mē hkōt htēm nê hkurê kamā hihtỳx nê.

³² Rōm nhūm mē piitā mē kot axpēn mar xà hā ixkre hwýr pikuprōnh pa nê kàx pē kapēr punuj o kuhê. Nom axpēn kōt kapēr kêt nê. Ām axpēn kwým ri kàx pē tanhmā kapēr punuj to ho. Nhūm mē hkwyjaja hprī hā mē mar kêt tā amarī amnhī krā hkōt kàx pē kapēr punuj nê. ³³ Nhūm Ijaew kwýjaja tee ri ja hā mē omu nê axpēn mā:

—Tk. Kwa okora. Koja mē nā Xiānre hā gryk hāmri nê tanhmā mē pahpê Ijaew to nà? Anē.

Hāmri nê hamaxpēr nê mē hwýr amnhīō pē Aresānja mē nê kām:

—Kwa ma mē hwýr tē nê mē kām tanhmā mē pahtā axàprār to. Pawre kēp mē pahkwý htā tām na mē kām mē gryk jaxà. No mē papajaja na pu mē kām mē gryk jaxàr kêt nê. Anē.

Hāmri nhūm mē kuma nê mē hwýr tē nê xa nê tee ri kot mē ho hpinhkrēnh kaxyw kànhmā mē kām ĩhkra pēr kaprý. ³⁴ Nhūm mē omu nom hpinhkrēnh kêt nê arī kàx pē kapēr punuj ā 2 or. Nê kàx pē kapēr o:

—Mēpanā Xiānreja mex o mex. Kēp mē pahpê Epes nhō xwýnhjê nā mex na. Anē.

³⁵ Tā nhūm mē ō pahi nhō kōwenatō jatā tanhmā Epes nhō xwýnhjê ho hpinhkrēnh to hāmri nê ja nê mē kām kapēr nê mē kām:

—Kwa mē anhīkrê. Mē piitā kot Xiānre mex o mex ā omunh kēnā. Nê mē pahpê kām amnhī jarēnh xà hā ixkre jamār xwýnh ā mē kot mē pahpumunh mex. Nê kaxkwa rūm karō kot mē pahwýr tēm nhūm mē pahpê hamār o papa xwýnh ā nhūm mē kot mē

pahpumunh mex. ³⁶ Jakamã mēhō kot kêt we mē pahpê hamār xwỳnh kêt ã mē pajarē? Ra mē piitã mē kot ja hã mē pahpumunh jakamã kwa mē anhīkrê nē ri ã akapēr anhỹr kêt nē. ³⁷ No mē ate wa unēnh nē amnhĩ kôt wa ho atēm xwỳnh ta wa. Wa kot tanhmã mēpanã Xiãnre ho kapēr punuj to rỳ kêp ò ixkre kamã àhkĩnh kêt tã ka mē amarĩ wa unē nē amnē amnhĩ kôt wa o tē.

³⁸ —Kwa kê Temêt mē hkwỳjaja kãm tanhmã wa ho kapēr to hprãm nē ma pahĩhti hwỳr wa o tē nē kumã mãn tanhmã wa ho kapēr to. Mēmoj tã axpēn mã mē kapēr xà hã arĩgrota ãã. ³⁹ Rỳ ka mē amã mēmoj jarēnh prãm nē arĩgroja ã mãn rĩ kormã mēmoj jarē. ⁴⁰ No jarãhã mē ate amnhĩ nhĩpêxja te mē ate pahĩhti kutã amnhĩ xunhwỳr nē ho akapēr punuj pyrãk. Kojã Rôm nhō xwỳnhjê nhō pahĩ mē ajarēnh ma hãmri nē mē ate kamã agryk ã amnhĩ kamnhĩx. Hãmri nē mē atã ixkukja pa tanhmã kãm mē ajarēnh to? Mēhō nhỹ hã na ka mē ã apikuprõnh nē amnhĩ nhĩpêx anē? Nà amnhĩ krã hkôt na ka mē akuprõ nē ã amnhĩ nhĩpêx anē. Anē.

⁴¹ Hãmri nē mē kãm kapēr pa nē mē hano nhũm mē anhgrà nē ma akupỹm òrkwỳ hwỳr hapêx.

20

Pawre ma Masetõn mē Gres wa hwỳr mõi ã harēnh

¹ Hãmri nhũm Pawre ra nojarêt. Jerujarē hwỳr mõi mã nom kormã pika pē Masetõn kumrêx wỳr mõi nē kurũm ma akupỹm Jerujarē hwỳr mõi mã. Hãmri nē nojarêt nē mē kot Jejus kôt amnhĩ xunhwỳr xwỳnhjê ho akuprõ nē mē kãm amnhĩ jarē nē mē kãm:

—E kot paj ma mõi. Nom kêr ka mē arĩ ixwakre kamã Tirtũm kapēr kôt amnhĩ nhĩpêx mex rãhã ho ri apa nē aa hkaga hkêt nē. Anē.

Hãmri nē mē kãm:

—E mē mãmri ixwa kre kamã axãmnhĩx ajamakêtkati nē ri apa. Anē.

Hãmri nē kato nē ma Masetõn wỳr mõi. ² Nē hwỳr pøj nē kamã krĩ hkwỳ hkôt mõi nē nhỹri mē kot Jejus kôt amnhĩ xunhwỳr xwỳnhjê pumu nē Tirtũm kapēr o mē ahkre. Mē kot hkôt amnhĩ nhĩpêx mex nē kãm hprãm xà hkôt pix mã amnhĩ nhĩpêx kaxyw mē kãm kapēr o ri mē hkôt pa. Hãmri nē kato nē ma mõi nē pyka pē Gres wỳr pøj. ³ Nē kamã mē hkôt pa hã mytwrỳ axkrunêpxi hãmri nē akupỹm pyka pē Sir wỳr nojarêt. Nē ma pàr kãm hwỳr mõi kaxyw nē amnhĩ tã Sir kamã Ijaew kwỳ kot tanhmã harēnh to hã amnhĩ jarēnh ma. Na prem ra hã axpēn mã amỹnê nē axpēn mã:

—E kojã amnē mē pahwỳr mõi pu mē nhỹri omu nē hpĩr kurê kumrêx. Anē.

Hãmri nhũm Pawre amnhĩ tã mē kapēr ma nē pàr kaga nē mē hwỳr mõi kêt nē. Hãmri nē awjanã nē Jerujarē hwỳr Masetõn kamã pa. ⁴ Nhũm Jejus kôt htõ hkwỳjaja ma hkôt mõi. Æ mē hixi kot anhỹr.

Perej nhō xwỳnh Sopatõja. Piro hkra na pre.

Nē Tesarõn nhō xwỳnh Aristak mē Sikũn wa.

Nē Tepe nhō xwỳnh Gajoreja.

Nē As nhō xwỳnh Xikitre mē Torow wa.

Nē Ximotreja.

Jajaja na prem ma Pawre hkôt Jerujarē hwỳr mõi. ⁵ Nē pa ixpê Rukre ixte mē amã ja jarēnh nē hã kagã xwỳnhja na pa axte Pawre hã ajêt nē hkôt mõi. Jakamã nhũm jajaja piitã ma wa ixkukamã Tôx wỳr mõi nē kamã wa ixkãm hamak o pa.

⁶ Tã pa wa ma krĩ pē Piripos rũm ixkato nē pàr kãm ma mē hkôt mõi. Arĩgro pē Pas jakành mē ma mē hkôt mõi.

Tã wa ixtã arĩgro pē 5 nē mē hkôt Tôx wỳr pøj nē kamã mē omu nē mē hkôt ixpa hã ixtã ù semãn.

Pawre kot akupỹm Exik o htĩr ã harēnh

Juãw 5.21; Atre 9.36-43

⁷ Tã nhũm sap nē kamàt pa mē kot Jejus kôt amnhĩ xunhwỳr xwỳnhjê hkôt akuprõ nē axpēn kutã apku nhũm Pawre mē kãm kapēr. Ra apkati hkôt mē inhnojarêt kaxyw

jakamã nhũm mẽ kãm Tĩrtũm kapẽr jarẽnh ryy nẽ. Ra kôt ã kamàt nhũm arĩ mẽ kãm harẽnh o nhỹ. ⁸⁻⁹ Ixkre hprẽk axpẽn nhĩpy axkrunẽpxi nhĩtep xà kamã na pa prem akuprõ nẽ mar o ixkrĩ. Ixkreja kamã kanẽ ohtõ nẽ hpõk o harir. Jakamã nhũm Pawre arĩ mẽ kãm ujarẽnh o nhỹ nhũm mẽhõ xàptàr nyw Exikja ra õtxwa htỹx nẽ mẽ ixkuri õt o nhỹ. Janere hã õt o nhỹ. Tã ra gõr nẽ janere pẽ kato nẽ ahparmã tẽ nẽ pykap tẽm. Pa mẽ tee ri omu nẽ ahparmã hwỳr ixprõt nẽ wrỹ nẽ omu nhũm htyk mex nẽ nõ. Kỳj rũm ahpar mã htẽm ryy jakamã htyk mex nẽ nõ. Hãmri nhũm hkwỳjaja tee ri omu nẽ hkaprĩ htỹx nẽ kumỳ nẽ mỳr o hkrĩ. ¹⁰ Hãmri nhũm Pawre mẽ ixkõt wrỹ nẽ hwỳr tẽ nẽ htyk ã omu nẽ kumỳ nẽ mẽ kãm:

—E mẽ amỳr kêt nẽ. Ra htyk tã koja Tĩrtũm akupỹm mẽ pamã ho htĩr.

Anhỹrja kõt nhũm akupỹm htĩr. ¹¹⁻¹² Hãmri nhũm mẽ akupỹm htĩr ã omu nẽ hkĩnh tỹx kumrẽx. Hãmri pa mẽ akupỹm kỳx pẽ ixkre hwỳr api nhũm Pawre mẽ inhmã pãwti hkwỳ nhĩrẽ nẽ mẽ inhmã kugõ pa mẽ Jesus kot mẽ panẽ htyk mã ijamaxpẽr pẽ kuku. Hãmri nhũm Pawre axte mẽ kãm kapẽr o ỹr rãhã nhũm myt kato pa mẽ kẽp anhgrã nẽ ma ixa.

Pawre Mĩrêt wỳr mõi ã harẽnh

¹³ Hãmri pa mẽ inhnojarêt nhũm Pawre mẽ ixte hkõt mẽ inhmõi xwỳnhjẽ mã:

—E kêt ka mẽ ma pàr kãm ixkukamã mõi. Kot paj ahte ma kỳx pẽ mẽ akõt ixpar o Asõt wỳr mõi. Hãmri nẽ hwỳr põi nẽ mẽ anhõ pàr mã axà pu mẽ ma pahpimràatã ma hamũ mõi. Anẽ.

¹⁴ Hãmri pa mẽ kuma nẽ ma mõi nẽ mẽmo arĩgro hã Asõt kamã axpẽn wỳr põi. Hãmri nhũm Pawre mẽ ixkõt pàr wỳr axà pa mẽ ma krĩ pẽ Mĩtirẽn wỳr mõi. ¹⁵ Nẽ hwỳr põi nẽ kurũm kormã mõi nhũm apkati pa mẽ gõ hipõk pẽ Kiw jakrenh o mõi. Nẽ hakre nẽ mõi nhũm apkati pa mẽ gõ hipõk pẽ Sãm wỳr põi nẽ hã pàr nhõ. Hãmri nhũm apkati pa mẽ axte mõi nẽ Mĩrêt wỳr põi. ¹⁶ Nom nhũm ra Pawre nojarêt nẽ. Kãm tokyx As rũm kator nẽ Jerujarẽ hwỳr mõi nẽ tokyx hpõx prãm nẽ. Kãm mẽ hkĩnh pẽ Pẽtekos xwỳj ri hwỳr hpõx prãm jakamã nojarêt tỹx pa mẽ Epes wỳr inhmõi kêt nẽ.

Pawre kot Epes kamã Kris kwỳjẽ mã amnhĩ jarẽnh

¹⁷ Tã pa mẽ Mĩrêt wỳr põi nhũm Pawre amnhĩ wỳr Epes wỳr Jesus kwỳ jahkre ho mẽ pa xwỳnhjẽ hã karõ. ¹⁸ Hãmri nhũm mẽ man mẽ ixwỳr mõi nhũm Pawre mẽ omu nẽ mẽ kãm amnhĩ jarẽ nẽ mẽ kãm:

—Nà ixte mẽ amã amnhĩ jarẽnh kaxyw na pa mẽ atã karõ. Ra mẽ ate tanhmã ixte amnhĩ nhĩpẽx to hã ixpumunh mex. Wam mẽ awỳr As wỳr ixpõxta ã ka prem aprĩ hã ixpumunh mex nẽ. ¹⁹ Na pa pre mẽ akõt ri mẽ amã tanhmã amnhĩ nhĩpẽx to ho ri ixa. Te ixpẽ mẽ amã ixàpẽn h xwỳnh pyrãk. Nẽ Pahihti Jesus mã tanhmã amnhĩ nhĩpẽx to ho ri mẽ akõt ixa. Nẽ ixkwỳ Ijaew kwỳ kot Jesus kapẽr kaga hã mẽ omu nẽ ixkaprĩ nẽ inhmỳr o ixa. Nhũm prem Jesus ã ixtomnuj pa amnhĩ xà htỹx kamã ijamak o ri mẽ hkõt ixa. ²⁰ Nom arĩ ri Tĩrtũm kapẽr o mẽ ajahkre ho ri mẽ akõt ixa rãhã nẽ aa hkaga hkêt nẽ. Mẽ anhõrkwỹ kamã nẽ mẽ ahkre xà hã ixkre kamã. Mẽ ate tãm amnhĩ nhĩpẽx prãm xàj pa pre ã mẽ ajahkre mex anhỹr rãhã ho ri mẽ akõt ixa.

²¹ —Nẽ mẽ ixpẽ Ijaewjẽ mẽ mẽ apẽ Ijaew kêt xwỳnhjẽ mẽ pa pre mẽ ajahkre ho axpẽn pyrãk. Mẽ apiitã mẽ ate amnhĩ tomnuj kaga nẽ hpãnhã Tĩrtũm kõt amnhĩ nhĩpẽx kaxyw. Nẽ amnhĩ kaxyw mẽ panhõ Pahihti Jesus Kris kõt ajamaxpẽr kaxyw na pa pre mẽ akõt ri mẽ ajahkre rãhã ho ri ixa.

²² —Tã ra Tĩrtũm Karõ kot akupỹm Jerujarẽ hwỳr inhmẽn h jakamã pa kormã hwỳr mõi. Kot paj hwỳr põi nhũm krĩ nhõ xwỳnhjaja Jesus ã ixtomnuj nẽ nom tanhmã mẽ kot ixtoja kukamã ixte ixprĩ hã ixàhpumunh kêt. ²³ Ja pix na ixte omunh. Na pa hte nhỹri põi nhũm htem Jesus ã ixpynẽ nẽ mẽ hagiẽn h xà kamã ijagjẽ nẽ tanhmã inhĩpẽx to. Tĩrtũm Karõ na pre ra ã mẽ kot inhĩpẽx anhỹrja kukamã inhmã mẽ harẽ. Jakamã ixte amnhĩ kukamã amnhĩ tã ixàhpumunh mex. Kot paj xep akupỹm Jerujarẽ hwỳr põi nhũm mẽ ixpumu nẽ Jesus ã tanhmã inhĩpẽx to. ²⁴ Tã no pa amnhĩ kamã ixkahak kêt o inhmã mẽ uma hkêt

ně. Koja mě kām ixpīr prām ně māmří ixpī. Inhmā ixtyk pyma hkêt. Ām měmoj pixi na inhmā hprām. Ra Pahihti Jejus kot měmoj tā inhmā karō xàja na inhmā kormā ixtīr ri hatur xàm mēnh prām. Tīrtūm kām mě pajapê hā kot mě pahto mex prām xàj mě pahwỳr Kra Jejus mēnh nhūm mě panê tanhmā amnhī nhīpêx to hā harēnhja na inhmā mě piitā mě kām harēnh jatur xàm mēnh prām.

²⁵ —Tā e ixkràmnhwỳjaja. Na pa pre mě akôt mě ajahkre rāhā ho ri ixpa. Mě ate Jejus kôt amnhī nhīpêx mex rāhā ho ri apa kaxyw. Tā kot puj pēr mě axte axpēn pumunh kêt ně.

²⁶⁻²⁷ —Na pa pre ra mě amā Tīrtūm kapēr piitā harēnh pa. Mě ate mar tỳx ně hkôt pix mā amnhī nhīpêx o apa kaxyw. Jakamā koja mě anhō krī nhō xwỳnhjê hō amnhī kaxyw Jejus kôt hamaxpēr prām kêt ně rī tām. Kwār māmří kot amnhī tomnuj kamā ty ně arī tām amnhī pumu no ām kê amnhī tā tanhmā inhmā ně hkêt ně.

²⁸ —E mě ate Kris kwỳ jahkre ho apa xwỳnhjaja. Kêr ka mě amnhī pumunh mex o ri apa. Ně mě kot Jejus kôt amnhī xunhwỳr xwỳnhjê jamār mex o ri apa. Ja kaxyw na pre Tīrtūm Karō mě kaxyw mě axunhwỳ. Tīrtūm Kra Jejus kot htyk o Tīrtūm mā mě pahte amnhī tomnuj piitā hpānhā amnhīrer pa jakamā kêr ka mě kām mě omunh mex o ri mě hkôt apa. Te ôwēhti jamār xwỳnh kot ôwēhti jamār mex o ri pata pyrāk.

²⁹ —Kot paj ma mō nhūm měmojjaja ixpānhā mě awỳr pōj ně mě ate Jejus kaga hprām xàj tanhmā mě amā hêx to ho ri mě akôt pa. ³⁰ Ně mě akwỳjaja mě urà ně tanhmā hamaxpēr punuj to ně mě ate Jejus kaga hprām xàj hêx rom tanhmā mě amā kapēr to ho ri mě akôt pa. ³¹ Jakamā kwa mě o kora. Kêr ka mě axkām ajamak rom ně ri apa. Kê jajaja nhỹrmā ā mě amā kapēr anê ka mě ama ně mě hkôt ajamaxpēr kêt ně. Mě ate mě mar ně mě hkôt ajamaxpēr pymaj na pa pre mě akôt ri mě ajahkre ho ri ixpa hā ixtā amgrā axkrunēpxi. Arīgro hā ně kamāt kām mě ajahkre rūnh o ri ixpa. Ně mě ate mě amā mě hêx xwỳnhjê hkôt amnhī xunhwỳr pymaj mě ajahkre pê te inhmỳr pyrāk o ri mě akôt ixpa.

³² —E kot paj Tīrtūm nhīhkram mě ajagjēnh pa. Koja mě atānopxar o ri mě akôt pa ně mě akutā nojarêt rāhā ho pa. Hāmri ka mě ām hkôt pix mā amnhī nhīpêx. Jao Jejus kaga hkêt ně. Hāmri nhūm nhỹrmā Tīrtūm mě pahpê hkrajê piitā tanhmā mě pahto mex to.

³³ —Na pa pre mě akôt ixpa ry htā no ām aa měmoj tā mě awỳr kêt ně. Mě axê hkwy hā mě awỳ rỳ mě akàxpore hā mě awỳr o ri ixpa hkêt ně. ³⁴ Na pa pre amnhī pa kukwak ri amnhīm ixujaprôr pê ixàpkur o ri mě akôt ixpa. Ně ixkôt mě pa xwỳnhjê mā ixujaprôr o ri ixpa. Ra mě ate ja hā ixpumunh mex.

³⁵ —Tā měmo kaxyw na pa pre ā mě akôt amnhī nhīpêx anhỹr o ri ixpa? Nà mě ate ja hā ixpumunh ně ixpyrà ně ā amnhī nhīpêx anhỹr o ri apa kaxyw. Ně ixpyrà ně tanhmā mě kute xwỳnhjê ho ajuta hto ho ri mě apa kaxyw. Na pre Pahihti Jejus ja jarēnh o: “Koja mēhō amā měmoj gō ka amnhīm apy ně akīnh ně. Nom kot kaj kam nhām mēhō mā měmoj gō hāmri ně akīnh tỳx o ate mēhō mā měmoj nhōrta jakre.” Anê.

³⁶ Na pre ā Pawre mě kām ujarēnh anhỹr pa hāmri pa mě ra inhnojarêt. Hāmri nhūm mě piitā hkōnkrā ho hkrī pa nhūm Pawre mě ho Tīrtūm wỳ. ³⁷⁻³⁸ Hāmri nhūm mě piitā kām Pawre hkīnh tỳx jakamā mỳr rax o kuhê. Tee ri kot axte mě kot axpēn pumunh kêt ā mě kām amnhī jarēnhja ma ně hkaprī htỳx ně. Ně hkaprī xàj kahti hkôt hamỳ ně mur. Hāmri ně ma Jerujarē hwỳr hkujaêk kaxyw mě ixkôt pàr wỳr hkaprī ně mě ixkôt mỳr o mō.

21

Pawre kot Jerujarē hwỳr hpôx ā harēnh

¹ Tā pa mě gō mỳri Jejus kôt mě ixtōjê re ně pàr krem agjê ně axte mō. Ma gō hipôk pê Kosti hwỳr ixkatāt kôt mō ně hā ajêt. Hāmri nhūm apkati pa mě axte hamū mō ně hpānhā gō hipôk pê Roxti hwỳr mō ně hwỳr pōj ně hā pàr xi. Hāmri ně hpānhā axte krī pê Patar wỳr mō. ² Hāmri ně hwỳr pōj ně pàr rūm ijàpōj ně pàr ò pumu. Nhūm ra pyka pê Wēnīs wỳr nojarêt pa mě hwỳr agjê ně ma kamā axte mō. ³ Mōō ně amỳm amnhī kukamā

gô hipôk pê Sipre pumu. Hāmri nē upôk rŭm hakrenh mā mō nē pyka pê Sir wŷr mō nē kamā Xir hwŷr pōj nē hā pàr nhô. Pàr pām kot krī kamā pàr kukrêx rer kaxyw pa mē kormā hā ajêt nē tokyx axte nhām inhmôr kêt nē. ⁴Hāmri pa mē kutêp api nē krī kamā mē kot Jejus kôt axpên to htō nē htōx xwŷnhjê japêr o mō. Hāmri nē nhŷri mē omu nē mē hkôt ri ixpa ho ixtā ũ semān. Nhŷm prem Tirtŷm Karō nhŷ hā Pawre mā kapêr nē kām:

—Kwa Pawre mē inhma. Kot ka Jerujarê hwŷr pōj nhŷm xep mē kām akurê xwŷnhjaja tanhmā anhîpêx to. Tirtŷm Karō na ā akukamā mē inhmā ajarênh anê. Jakamā kwa hwŷr amôr kêt nē. Na pa mē tee ri akukamā ijamaxpêr. Anê.

⁵Hāmri nhŷm amnhî tã mē kuma nē ãm mē kuma nē Jerujarê wŷr hkrà kamā hihtŷx nē. Jakamā nhŷm semān hapêx pa mē axte inhnojarêt. Axte Jerujarê hwŷr kormā inhmôr kaxyw inhnojarêt. Nhŷm Jejus kôt mē ixtōjaja mē kot mē ixkujaêk kaxyw piitã pàr wŷr mē ixkôt mō. Mē hprô nē mē hkrajê mē nhŷm mē pimràatã mē ixkôt mō. Hāmri pa mē pàr wŷr pōj nē gô mŷ ri ixpiitã ixkônkrã ho ixkrī hpa nē amnhî to Tirtŷm wŷ. ⁶Hāmri nē mē kām amnhî jarênh pa nē mē noo mā pàr krem agjê nē ma axte mō nhŷm mē awjanã nē ma akupŷm ôrkwŷ hwŷr hapêx. Hāmri pa mē kurŷm kormā ma Jerujarê hwŷr mō. ⁷Mōō nē krī pê Poremax wŷr pōj nē hā ajêt. Hāmri nē pàr rŷm ijapôj nē axte krī kamā Jejus kôt mē ixtō nē mē ixtōxjê japêr o mō nē nhŷri mē omu nē mē kuri amnhîm hikra.

⁸Tã nhŷm apkati pa mē axte mō. Pãnhã ma krī pê Sejarej wŷr mō. Hāmri nē hwŷr pōj nē Firipti kuri pōj. Firiptija kormā nyw ri mē kot Jerujarê kamā mē mjên htyk xwŷnhjê mā mē apkur xà nhôr ho pa kaxyw mē ho ⁷nē mē unhwŷr xwŷnhjtajê hō na pre. Tã hpãnhã kêp Tirtŷm kapêr jarênh o pa xwŷnh. ⁹Nhŷm hkra nijaja kêp kwat. Piitã mjên kêt nē hkukrit rãhã pa. Mē kêp Tirtŷm nhŷ hā kapêr o mē pa xwŷnh na pre mē. Jakamā pa mē mē kuri pōj. ¹⁰Hāmri nē mē hkôt ri ixpa hā ixtã apkati grêre nhŷm Akapô Jutej rŷm man mē ixwŷr mōn pōj. Kêp Tirtŷm nhŷ hā kapêr jarênh o pa xwŷnh na pre. ¹¹Hāmri nē mē ixwŷr pōj nē Pawre pumu nē hkukamā kot tanhmā harênh to kaxyw hwŷr tēn kêp hprexà kapa nē ho amnhî te hpre nē ho amnhî pa hpre nē xa. Hāmri nē mē inhnoo mā Tirtŷm Karō nhŷ hā mē kot tanhmā hipêx to hkukamā kām awjarê nē kām:

—E kot kaj Jerujarê hwŷr pōj nhŷm Ijaew xàptàr tŷmjaja apumu nē ã anhîpêx anê nē apa hpre nē ate hpre hāmri nē Ijaew kêt xwŷnhjê nhîhkram ajaxà. Koja mē ã anhîpêx anê. Anê.

¹²Hāmri pa mē tee ri ã ujarênh anhŷrja ma nē Pawre kamā ixkahak tŷx nē ixkaprī nē inhmŷr o ixkrī. Nē xatã kot mē hwŷr môr nê kām ixkapêr kām ixihtŷx nē kām:

—Kwa mē ixkapêr ma Pawre. Mē hwŷr amôr kêt o mē hwŷr amôr kêt. Anê.

¹³Hāmri nhŷm mē inhmã:

—Tk. Kwa mē amŷr kêt nē. Na pa mē apumu nē ixkaprī nē. Nà kot paj ma mē hwŷr mō. Kwãr mē mãmri Pahihti Jejus ã tanhmã ixto rŷ hā xpi. Ixte amnhî kamā ixkahak kêt. Anê.

¹⁴Hāmri pa mē tee ri mē hwŷr môr nê hkurê kaprŷ nē kām:

—Tôe. Nà kam nē Tirtŷm kām hprãm xà hkôt mãmri mē hwŷr mō rŷ mē hwŷr amôr kêt nē. Anê.

¹⁵Tã pa mē ra inhnojarêt nē amnhî to ixpikuprônŷ pa nē ma Pawre hkôt Jerujarê hwŷr tã ma mō. ¹⁶Hāmri nhŷm Sejarej kamā Jejus kôt mē ixtō hkwyjaja ma mē ixkôt mō. Pa mē mōō nē Jerujarê hwŷr pōj. Hāmri nhŷm mē ixkôt mē môr xwŷnhjaja mē ixto mō nē Mēnasô nhôrkwŷ hwŷr mē ixto pōj. Mēnasôja Sipre kamā na pre kato. Tã hpãnhã Jerujarê hwŷr apha nē kamā ri pa ho pa. Na pre ra Jejus kôt amnhî xãm ã hā amgrã xohtô nē. Tã pa mē kuri pōj.

Pawre mē Xiakre wa harênh

Atre 15.3-21; Wam Korî 9.19-22, 10.32-33

¹⁷Tã pa mē Jerujarê hwŷr pōj nhŷm Jejus kôt mē ixtōjaja mē ixpumu nē hkînh nē.

¹⁸Hāmri nhŷm apkati pa mē ma Pawre hkôt Xiakre hwŷr mō. Nhŷm mē kot Tirtŷm

kapêr o mẽ ahkre xwÿnh piitã ra kuri akuprô nê mẽ ixkutêp hkrĩ. ¹⁹ Jakamã nhũm Pawre mẽ hwÿr axà nê mẽ kãm tanhmã amnhĩ nhĩpêx to ho pa hã amnhĩ jarê nê mẽ kãm:

—Pa na ka mẽ rĩ akrĩ. E ot pa axte mẽ apumunh mã mō. Ixte mẽ amã amnhĩ jarênh ã amnhĩ jarênh kaxyw. Nà na pa pre ma Ijaew kêt xwÿnhjê hkôt ixpa nê mẽ kãm Jejus kot mẽ panê tanhmã amnhĩ nhĩpêx to jarênh o ri mẽ hkôt ixpa. Nhũm Tirtũm inhĩhkô hã ixkutã nojarêt mex jakamã nhũm prem inhma nê ohtô rax nê mẽ pahpyrà nê Jejus kôt amnhĩ xunhwÿ. Anê.

²⁰⁻²⁵ Hãmri nhũm mẽ Ijaew kêt xwÿnh kwÿjaja kot Jejus kôt amnhĩ xunhwÿr ã mẽ harênh ma nê mẽ ÿ hã hkĩnh nê mẽ hã Tirtũm mã mex o mex ã harê. Hãmri nê Pawre mã kãm:

—Nà na pa prem ra mẽ harênh ma. Hãmri nê mẽ kãm kagà nhĩpêx nê mẽmoj tã mẽ kãm karô nê mẽ hwÿr kumê. Mẽ kot omunh nê kamã harênh nê hkôt amnhĩ nhĩpêx o pa kaxyw.

Na pa prem kagàja kamã mẽ kot sãnti nhõ hkur nê mẽ hkurê.

Nê mry kamrô hkur nê mẽ hkurê.

Nê mẽmo mry hpar nê hkamrô runh kêt rãhã hkur nê mẽ hkurê.

Nê mẽ kot amnhĩ prô pix tãnopxar kaxyw mẽ kãm hã karô.

Nê mẽnijaja kot amnhĩ mjên pix tãnopxar kaxyw mẽ kãm hã karô.

Nê nhãm mẽ kot axpên to amnhĩkati nê mẽ hkurê.

Ã na pa prem ja hã kagà nê mẽ hwÿr mẽnh anê. Jakamã e mẽ inhma. Na ra mẽ pahpê Ijaew kwÿjaja ohtô rax kumrêx nê mẽ pahpyrà nê Jejus kôt amnhĩ xunhwÿ. Mãn ka pre mẽ harênh ma. Na htem Jejus kôt amnhĩ nhĩpêx o pa jao mãânên Tirtũm nhÿ hã Mojes kapêr kôt amnhĩ nhĩpêx mex o pa. Tã nhÿri mẽ kot tanhmã ato hêx to hã ajarênh ma. Na ka xep hte Ijaew kêt xwÿnhjê nhõ krĩ kamã pøj hãmri nê mẽ õ krĩ kamã Ijaew kwÿjê pumu nê mẽmoj nê tanhmã mẽ kãm akapêr to ho ri apa. Nom Ijaew kêt xwÿnhjê mã ka xep hte ã mẽmoj nê akapêr anhÿr kêt nê. Âm Ijaew mã pix mã ka xep hte mẽ kot finat Mojes kapêr kôt amnhĩ nhĩpêx nê mẽ hkurê ho ri apa. Nê mẽ panhĩgêt kot amnhĩ nhĩpêx kuhpa hã mẽ kot mẽ hkra my kwÿrýt kà jakàr nê ka xep hte mẽ hkurê ho ri apa. Nê mẽ kot mẽ panhĩgêt kôt amnhĩ nhĩpêx nê ka xep hte mãânên mẽ hkurê ho ri apa. Mẽ kêp Ijaew tã ka xep pre hte ã mẽmoj nê mẽ hkurê anhÿr ho ri apa. Na prem jar ã Ijaewjê mã ato hêx o pa anê nhũm mẽ kuma nê mẽ hkôt hamaxpêr kurê kumrêx. Jao ra ate mẽ pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mẽ kot apôx ã ajarênh mar jakamã tanhmã kot kaj we mẽ kãm amnhĩ tã axaprãr to? Nê tanhmã kot kaj we mẽ noo mã amnhĩ nhĩpêx to kê mẽ arĩ mẽ pahte amnhĩ nhĩpêx kôt ate amnhĩ nhĩpêx o apa hã apumu? E na pa mẽ ra ijamaxpêr. Kot ka ã amnhĩ nhĩpêx anê. Na ra jar mẽ pahkwÿjaja kêp kwat nê Tirtũm mã tanhmã amnhĩ jarênh to jatur xãm mẽnh kaxyw amnhĩ krã hkênh mã. Jakamã e kêr ka ma mẽ hkôt tẽ nê mẽ urak nê amnhĩ krã hkênh nê kam nê mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anê hãmri nhũm mẽ pahkwÿjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nê mẽ kot ato hêx ã apumunh kurê kumrêx. Nê arĩ ate finat Mojes kapêr kôt amnhĩ nhĩpêx o ri apa hã apumu. Anê.

²⁶ Hãmri nhũm Pawre mẽ kuma nê mẽ kãm:

—Tôe. Nà âm hãmri na ka mẽ inhã awjarê. Nà kot paj ã amnhĩ nhĩpêx anê. Anê.

Jakamã nhũm apkati nhũm ma mẽ kêp 4tajê o mō nê mẽ mex kaxyw tanhmã amnhĩ nhĩpêx to. Hãmri nê Tirtũm mã amnhĩ jarênh xà hã ixkre hwÿr mra nê agjê nê mẽ õ patre mã mẽ amnhĩ jarê nê kãm:

—E ot pa mẽ awÿr mra. Na pa prem ra mẽmoj tã tanhmã Tirtũm mã amnhĩ jarênh to. Tã kot paj mẽ axte ixtã ù semãh hãmri nê hatur xãm mẽnh kaxyw akupÿn awÿr mra nê amã mẽmoj gō ka mẽ inhã Tirtũm mã agō nê hkôt kãm mẽ ijarê. Nê pa kot paj mẽ ixpiitã hpãnhã amã amnhĩre. Anê.

Mẽ kot Pawre pynênh ã mẽ harênh
Atre 24.12

²⁷ Tã nhũm semãnja hapêx kaxyw nhũm pika pê As rũm Ijaew kwỳjaja ma mra nê Tĩrtũm mã amnhĩ jarênh xà hã ixkre hwỳr agjê. Hãmri nê kamã Pawre pumu nê kamã gryk tỳx nê hwỳr hprõt nê unê nê tanhmã hkwỳjê mã ho hêx to nê ho kapêr punuj nê. Nê mẽ kãm:

²⁸ —E mẽ amnê mra nê jahti pumu. Na hte krĩ piitã hkõt ri mẽ pahkwỳjê mã tanhmã ri hêx to ho pa. Tĩrtũm nhỹ hã finat Mojes kapêr nhũm mẽ kãm ho kapêr punuj o pa. Nê mẽ pahte Tĩrtũm mã amnhĩ jarênh xà hã ixkreja nhũm hte mããnên tanhmã mẽ kãm ho kapêr punuj to. Mẽ pahpyrà nê kêp Ijaew tã mẽ pahpê hkwỳ ho kapêr o pa. Tã ra axtem nê amnhĩ kôt Tĩrtũm nhõ ixkre hwỳr Ijaew kêt xwỳnh kwỳjê ho agjê. Mẽ kot hwỳr gjêx kêt kumrêx tã nhũm axtem nê amnhĩ kôt mẽ ho agjê. Anê.

²⁹ Na pre krĩa kamã Ijaew kêt xwỳnh Topĩa Pawre hkõt pa nhũm mẽ omu. Kêp Epes nhõ xwỳnh nhũm mẽ kot pry ã Pawre hkõt pa hã omu. Tã hã ahtũm nê Tĩrtũm mã amnhĩ jarênh xà hã ixkre kamã Pawre pumu nê htỳx amnhĩ kôt Topi ho ãr ã hkamnhĩx nê ã mẽ kãm harênh anê. ³⁰ Hãmri nhũm mẽ kuma nê Pawre kamã gryk tỳx nê. Nê hwỳr hprõt nê unê nê ixkre rũm ho kato nê kêp hakwa kre kahê. ³¹⁻³² Hãmri nê ma o tẽ nê htak rax nê. Ra mẽ kot htak o hpĩr mã tã nhũm mēhõja pōristi krãhtũm wỳr hprõt nê kãm awjarê nê kãm:

—Kwa o mũj mẽ ra kot axpên nhĩmex kaxyw pijapu ho kuhê. Anê.

Hãmri nhũm tee ri kuma nê pōristi hkwỳjê mã anê nê mẽ ma mẽ hwỳr hprõt kurê kumrêx. Nhũm mẽ arĩ Pawre htak tã amnhĩ wỳr mẽ omu nê mẽ umaj kãm ure. ³³ Hãmri nhũm pōristi krãhtũm Pawre hã amỹnê nhũm pōristijaja unê nê kàx o mẽ hkaxprexà ho axkrut nê ho hkaxpre pa. Hãmri nhũm mẽ hkrãhtũm Pawre hã mẽ hkukja nê mẽ kãm:

—Kwa mẽ atõ inhũa jahti jarê. Tanhmã na hixi te? Tanhmã na we amnhĩ tomnuj to hã na ka mẽ ã hipêx anê? Anê.

³⁴ Hãmri nhũm mẽ kuma nê piitã anhĩpê kàxpê kãm tanhmã harênh to. Nom axpên kwỳm tanhmã ri kãm harênh to. Hãmri nhũm tee ri hprĩ hã kot mẽ mar kaxyw hãmri nê pōristi mã anê nhũm mẽ kêp Pawre ho kato nê ma mẽ ãpênh xà hã ixkre hwỳr o tẽ. ³⁵⁻³⁶ Hãmri nhũm Ijaew kwỳ ohtô nê pry hã axpên nhĩgãnh o hkõt mra. Nê gryk xàj kapêr punuj tỳx o mẽ hkõt mō nê kàx pê pōristi mã kapêr nê mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anê.

Jakamã nhũm pōristija tee ri mẽ kuma hãmri nê mẽ kot tanhmã ho pymaj kumỳ nê kỳx pê mẽ kêp kupê nê o mō. Jao ixkreja wỳr mẽ ãpir xà hã ho ãpir o mō. ³⁷ Nê kot ho ãr kaxyw tã nhũm Pawre mẽ hkrãhtũm mã kãm:

—E pa amã mẽmoj jarê ka inhũa. Anê.

Mẽ kapêr o kãm kapêr hãmri nhũm amnhĩ jaêr pê kuma nê kãm:

—Kwa xà na ka mẽ ixpyrà nê Gresjê kapêr o akapêr? ³⁸ Na pa ixtỳx apê Ejit nhõ xwỳnh pê mẽ hpar o apa xwỳnhhta ã akamnhĩx. Ham na pre mẽ inhõ pahĩhti kutã amnhĩ xãm nê kot hkurê kaxàr kaxyw mẽ ho ajuta xwỳnhjê ho 4.000 nê mẽ hkurê nê ma kapôt ã mẽ o pa. Nom tãm na xep Gresjê kapêr o kapêr kêt nê. Anê.

³⁹ Hãmri nhũm Pawre kãm:

—Nà ixpê Ejit nhõ xwỳnhhta kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mōr xwỳnh nêj mã ixkapêr nà? Anê.

⁴⁰ Hãmri nhũm kãm:

—Tôe. Kam nê mãmrĩ tanhmã mẽ kãm akapêr to. Anê.

Hãmri nhũm mẽ ãpir xàta ã kỳx pê mẽ mỳri xa nê kãnhũa mẽ kãm ãhkra pẽ nhũm mẽ omu nê hpĩnhkrênh pa nhũm mẽ kãm amnhĩ jarê.

22

Pawre kot kãm hkurê xwỳnhjê mã amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapêr o mẽ kãm kapêr nê mẽ kãm:

—E ixkwỳjaja. Pa mẽ amã amnhĩ jarê ka mẽ inhũa. Anê.

Hāmri nhūm kot mẽ kapēr o kapēr ma nē hpinkrênh pa nē akryk mar o kuhê nhūm mẽ kām:

³—Nà ixpê mẽ anhĩõ na pa. Ijaxwỳja ixpê Ijaew. Pyka pê Siris kamā krī pê Tas kamā na pa pre ixkato no ãm jar Jerujarê kamā na pa pre ixaptàr. Kamariew na pre hte ijahkre ho pa. Finat Mojes kot Tirtūm nhỹ hã mẽ panhĩgêjtjê mã kapērja nhūm pre hprĩ hã ho ijahkre ho pa. Na pa pre mẽ apyrà nē inhmã Tirtūm kôt amnhĩ nhĩpêx prãm nē.

⁴—Jakamā na pa pre mẽ pahkwỳ kot Jesus kôt amnhĩ xunhwỳr xwỳnhjê japêr o ixpa nē nhỹri mẽ kām ixkato nē mẽ unê. Měmyjê pynê nē mēnijê pynê. Hāmri nē mẽ kot mẽ hpar kaxyw mẽ hagjênh o ri ixpa. ⁵ Na pa pre ã mẽ hipêx o ri ixpa anê. Mẽ panhõ patre maati nē mẽ aptàr tūmrejaja ra mẽ kot ja hã ixpumunh mex. Mẽ tãmjaja na prem krī pê Tamas kām mẽ pahkwỳjê kaxyw kagà nhĩpêx nē inhmã kugõ pa kupy nē ma mẽ hwỳr o mō. Ixte mẽ õ krī kamā Jesus kwỳjê pynênh par nē man akupỳn Jerujarê hwỳr mẽ ho inhmōr nhūm mẽ kot tanhmã mẽ ho kaxyw.

⁶—Tã ra myt ahpa pa mẽ hwỳr ixàhtêp o mō. Puh nhūm kaxkwa rūm hirã rax kumrêxja ixwỳr wrỳ nē ixtã ajêt pa hipòk ri xa. ⁷ Hāmri nē umaj pykap tēm nhūm mēhõ kapēr nē inhmã: “Pa Sawti? Hêxta waa nē. Kwa mon ka hte axtem nē ixtomnuj tỳx o ri apa?” Anê. ⁸ Hāmri pa kām: “Kwa mẽ atõ na ka ri ã inhmã akapêr anê pahihtĩ?” Anê nhūm inhmã: “Ixpê Najare nhõ xwỳnh Jesus. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyrāk.”

⁹—Anhỹr o inhmã kapêr nhūm ixkôt mẽ pa xwỳnhjaja kuma no ãm hprĩ hã mar mex kêt nē. ãm hirã raxta pix pumu. ¹⁰ Tã pa kām: “No tanhmã kot pa we amnhĩ to Pahihtĩ?” Anê nhūm inhmã: “E kànhmã xa nē māmri ma Tamas wỳr mō. Kot kaj hwỳr pøj nhūm mēhõ awỳr tē nē mẽmoj tã amã karõ ka ama nē hkôt amnhĩ nhĩpêx.” Anê.

¹¹—Nhūm pre ã inhmã kapêr anê. Hāmri pa hirã rax pumunh o ixãm kurê ra inhno hkre nē ixrit kêt nhūm ixkôt mẽ pa xwỳnhjaja ixpa hã ixpy nē ma Tamas wỳr ixto mō nē ixto pøj.

¹²—Tã nhūm Tamas nhõ xwỳnh pê ãnãnistĩ ixwỳr tē. Na pre hte Tirtūm kapêr ã kagà htūm kôt amnhĩ nhĩpêx mex nhūm Tamas kamā Ijaew piitã kām hkĩnh nē axpên mã mex ã harê. ¹³ Jakamā nhūm ixwỳr tē nē inhmã: “Pa Jesus kôt ixtõ Sawti? E akupỳm rit.” Anhỹrja kôt pa akupỳm ixrit mex kurê kumrêx nē omu. ¹⁴ Hāmri nhūm inhmã: “Nà mẽ panhĩgêjtjê nhõ Tirtūm na amnhĩ kaxyw ata. Ate kapêr mar nē hkôt tanhmã amnhĩ nhĩpêx to ho apa kaxyw. Nē ate kaxkwa kamā Kra mex pumunh nē kapêr mar kaxyw. Tã ka xep ham hirã rax kamã omu nē kapêr ma. ¹⁵ Jakamã kêr ka ma mẽ piitã mẽ kām ate omunh xwỳnhja jarênh o ari mẽ hkôt apa. Nē mẽ kām kapêr jarênh o mẽ ahkre ho ri apa. ¹⁶ E tokyx kànhmã xa nē Jesus mã amnhĩ jarê nē hkôt amnhĩ xãm kê anê ate amnhĩ tomnuj rênh pa. Hāmri pa apê hkwỳ hã akrã kumrã ka ma mẽ kām kapêr jarênh o ri apa.” Anê.

—Nhūm pre ã ãnãnistĩ inhmã kapêr anê.

¹⁷—Tã pa man akupỳn jar Jerujarê hwỳr mẽ awỳr mō. Hāmri nē jar Tirtūm mã amnhĩ jarênh xà hã ixkre kamã kām amnhĩ jarênh o ixãm rôm axte mẽmoj pumu. ¹⁸ Nhūm Jesus axte ixwỳr kato nē xa nē inhmã kapêr nē inhmã: “E inhma. Jerujarê nhõ xwỳnhjaja kām ixkapêr mar prãm kêt jakamã kot kaj mẽ kām ixkapêr jarê nhūm mẽ amar kêt nē. Jakamã kwa tokyx akato nē hpãnhã ma nhỹhỹm mō.” Anê.

—Hāmri pa tee ri ã kapêr anhỹrja ã kuma nē kām: ¹⁹ “Kwa nà koja mẽ inhma Pahihtĩ. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tūmta kôt mẽ kot ixpumunh mex. Na pa pre hte krī piitã hkôt mra nē Tirtūm kapêr o mẽ ahkre xà hã ixkre kamã mẽ kot akôt amnhĩ kaxyw hamaxpêr xwỳnhjê pynê nē mẽ htak nē mẽ hagjênh xà kamã mẽ hagiê nhūm mẽ kot ja hã ixpumunh mex. ²⁰ Nhūm mẽ kot akapêr jarênh o pa xwỳnh Estewãw pĩrta pa pre hã mẽ omu nhūm ja inhmã mex pa mẽ kām mẽ hinòkà jamỳnh o hã mẽ omunh o xa. Na pa pre ã amnhĩ nhĩpêx anhỹr o ri ixpa. Tã hpãnhã akôt amnhĩ xãm hāmri nē akôt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarênh ma nē kām ixkapêr mar prãm nē.” Anê.

²¹ —Pa pre ã Jejus mã amnhĩ jarēnh anē nhūm inhmā: “Nà. Kêr ka mãmrĩ krĩja rūm akato nē ma nhỹhỹm mō. Kot paj hpānhã ma Ijaew kêt xwỳnhjê hwỳr amē ka hpānhã ma mẽ hwỳr mō nē mẽ hkôt mẽ kãm ixkapēr jarēnh o ri apa.” Anē.

²² Nhūm pre Pawre ã amnhĩ hkwỳjê mã amnhĩ jarēnh anē nhūm mẽ arĩ mar o kuhê rāhã Ijaew kêt xwỳnhjê jarēnh ma nē kamã gryk tỳx nē. Ijaew kêt xwỳnhjaja kot mẽ uràk nē Tirtūm kapēr marja nhūm mẽ kãm hprām kêt jakamã nhūm Pawre ã mẽ harēnh anē nhūm mẽ kuma nē kamã gryk tỳx kumrēx. Nē gryk xàj kapēr punuj nē kapēr o:

—Kwa mẽ mãmrĩ apĩhti ri. Ām hpĩr mã htāmti kēnã. Anē.

²³ Hāmri nē gryk xàj amnhĩ nhĩnôkà hkwrỳ nē ho apê nē pyka jamỳ nē kànhmã ri ho ahkapê.

Pawre kot pôristi krāhtūm mã amnhĩ jarēnh

Atre 16.35-39

²⁴ Hāmri nhūm pôristi krāhtūmja tee ri ã mẽ kot amnhĩ nhĩpêx anhỹr ã mẽ omu nē mẽ kapēr ma nē pôristijê mã kapēr nē mẽ kãm:

—Kwa tanhmã na we jahti amnhĩ tomnuj to nhūm mẽ ã kamã gryk tỳx anē? E mẽ tokyx ixkre hwỳr ho axà nē mẽ htak xà ho htak kê mẽ pamã tanhmã amnhĩ jarēnh to. Anē.

²⁵ Hāmri nhūm mẽ kuma nē ho axà nē htak kaxyw kormã hpre ho xa. Hāmri nhūm pôristi krāhtūm nhõ kōwenatôja mẽ hkôt axà nē hã mẽ omunh o xa nhūm Pawre omu nē amnhĩ tã kãm kapēr nē kãm:

—Kwa kormã ixte tanhmã mẽ amã amnhĩ jarēnh to hkêt tã ka mẽ ixtak kaxyw. Ixpê Ijaew tã mãănēn ixpê Rôm nhõ xwỳnh kēnã. Xà na htem ã Rôm nhõ xwỳnhjê nhĩpêx anē? Anē.

²⁶ Hāmri nhūm tee ri ã amnhĩ jarēnh anhỹrja ã kuma nē pôristi krāhtūmja wỳr hprôt nē kãm:

—Kwa taxy pu mẽ tanhmã ho hkêt nē. Xep kệp Rôm nhõ xwỳnh kēnã. Anē.

²⁷ Hāmri nhūm tee ri kuma nē Pawre hwỳr axà nē kãm:

—Kwa xà ãm hāmri na ka amnhĩ jarē? Xà apê Rôm nhõ xwỳnh na ka? Anē.

Hāmri nhūm kãm:

—Tỳ. Ām hāmri ixte mẽ amã amnhĩ jarēnh kēnã. Ixpê Rôm nhõ xwỳnh na pa. Anē.

²⁸ Hāmri nhūm kãm:

—Kwa pa na pa pre amnhĩ to Rôm nhõ xwỳnh prām xàj amnhĩ pānhã mẽ kãm amnhĩrer rax nē. Anē.

Nhūm Pawre kãm:

—Tỳ nom pa na pa pre amnhĩ pānhã mẽ kãm amnhĩrer kêt nē. Inhĩpêêxà hkôt ixpê Rôm nhõ xwỳnh na pa. Anē.

²⁹ Hāmri nhūm mẽ kuma nē tee ri hamaxpēr o kãm ma nē. Nē kãm ma ho hkaga kurê kumrēx. Nhūm mẽ hkrāhtūm nhõ pahija mãănēn kãm ma nē. Kệp Rôm nhõ xwỳnh tã nhūm mẽ axtem nē kot unēnh nē kàx o hkaxpreja mã hamaxpēr nē kãm ma nē. Na htem ã Rôm nhõ xwỳnhjê nhĩpêx anhỹr kêt nē. Na htem tanhmã mẽ hkukjêr to nē hprĩ hã mẽ kuma nē rĩ kormã tanhmã mẽ hipêx to.

Pawre kot Ijaew xàptàr tūmrejê mã amnhĩ jarēnh

Matêwre 23.27-28

³⁰ Tã nhūm apkati nhūm pôristi krāhtūmja Ijaew kwỳ ho akuprō. Mēō patre maati nē patre krāhtūmjaja nē mẽ àptàr tūmrejaja nhūm kot mẽ kãm tanhmã Pawre jarēnh to kaxyw mẽ ho hpikuprōnh pa. Hāmri nē Pawre pê hkaxpre xà rê nē ma mẽ hwỳr o tē nē mẽ kutã ãr.

23

¹ Hāmri nhūm mẽ omu nē mẽ kãm amnhĩ jarē nē mẽ kãm:

—E ixkwỳjaja. Pa mẽ amã amnhĩ jarē ka mẽ inhma. Na pa hte Tirtūm nom tãm amnhĩ nhĩpêx o ixpa nē mẽ pahpê Ijaew mẽ pahte amnhĩ nhĩpêx kwỳm ri tanhmã amnhĩ nhĩpêx to hkêt nē. Anē.

² Hāmri nhūm mẽ õ patre maati ānānīsti kuma nē kamā gryk nē. Axtem ānānīsti hō na pre. Hāmri nē ā Pawre kot amnhī jarēnh anhỹrja ā kuma nē kamā gryk nē. Hāmri nē mẽ kot mar o kuhê xwỳnhjê mã kām:

—Kwa mẽ atō hakwap hkurahti ri. Tām kot amnhī nhīpēxti hā. Na ām mẽ pamā amnhī to hêx o xa. Anē.

³ Hāmri nhūm Pawre kuma nē hwỳr rīt nē omu nē kām:

—Nà ka koja Tīrtūm akura kām ga. Te ate finat Mojes kot ỹ hā kapēr kôt amnhī nhīpêx pyrāk tā ri axtem nē ri mẽ kot ijakwap ixkuranh kaxyw ri mẽ kām ixtā amỳnê. Anē.

⁴ Hāmri nhūm kuri mẽ kuhê xwỳnhja tee ri ā kām kapēr anhỹrja ā kuma nē kām:

—Kwa kêp patre maati kēnā kot ka kêt ri ā kām akapēr anē. Anē.

⁵ Hāmri nhūm amnhī jaêr pê ja hā kuma nē kām:

—Kwa ixte ja hā omunh kêt jakamā na pa ā ixtỳx kām ixkapēr anē. Ixte kêp patre maati hā omunh ronhỹx pa ā kām ixkapēr anhỹr kêt nē. Tīrtūm kapēr ā kagà htūm kot ja nê mẽ pamā kapēr kēnā. Mẽ pahte tanhmā mẽ panhō pahi ho pakapēr punuj to nê mẽ pamā kapēr. Tā pa ām ixtỳx ā kām ixkapēr anē. Anē.

⁶⁻⁸ Hāmri nē hprī hā mẽ kot mar o hkrī xwỳnhjê pumu. Nhūm mẽ kamā Satusew nhō xwỳnh kwỳ nē Parijew nhō xwỳnh kwỳ. Satusew mẽ Parijew nhō xwỳnhjaja na htem axpēn kwỳm ri tanhmā mẽ htykjê jarēnh to. Satusew nhō xwỳnhjaja na htem mẽ htyk nē mẽ hkarō mẽ ro hā mẽ hapêx o mẽ hapêx ā mẽ hkamnhīx. Nē Tīrtūm kapēr o mẽ wryk xwỳnh kêt ā mẽ harēnh o pa. No Parijewjaja na hte mẽ kurom mẽ htyk nē akupỳm mẽ htīr ā mẽ hkamnhīx nē Tīrtūm kapēr o mẽ wryk xwỳnh ā mẽ hkamnhīx. Nhūm Pawre kot ja hā mẽ omunh jakamā tanhmā hamaxpēr to hāmri nē mẽ kām kapēr. Na pre Parijew nhō xwỳnhjê pyrā nē mẽ htyk nē akupỳm mẽ htīr kôt hamaxpēr nē Tīrtūm kapēr o mẽ wryk xwỳnh kôt hamaxpēr. Jakamā mẽ omu nē kàx pê mẽ kām kapēr nē mẽ kām:

—Nà ijaxwỳja ixpê Parijew nhō xwỳnh. Nhūm inhīpêxà haxwỳja kêp Parijew nhō xwỳnh. Jakamā na pa hte mẽ apê Parijew nhō xwỳnhjê pyrā nē mẽ htyk nē akupỳm mẽ htīr kôt ijamaxpēr. Tā ām ja pix mỳrapê na ka mẽ ixpynê nē ā inhīpêx anē. Anē.

Hāmri nhūm Parijew mẽ Satusew nhō xwỳnhjaja kuma nē ja hā axpēn kām gryk nē. Nē hā axpēn mã akir. ⁹ Hāmri nē ra axpēn mã àkjêr rax nē. Hāmri nhūm Parijew kwỳ pê Mojes kapēr o mẽ ahkre ho mẽ pa xwỳnhjaja kànhmā kuhê nē mẽ kām Pawre hā àprār kām hihtỳx nē mẽ kām:

—Kwa pēr tanhmā kot amnhī tomnuj tore hā. Mãn ām hpimtir kām na pre ā ri kaxkwa kamā mẽmoj mar anē. Rỳ apu Tīrtūm kapēr o wryk xwỳnh kām tanhmā kapēr to nhūm pre Tamas wỳr pry kamā mar o xa rỳ ko. Anē.

¹⁰ Hāmri nhūm Satusew nhō xwỳnhjaja tee ri Tīrtūm kapēr o mẽ wryk xwỳnh kot kām kapēr ā harēnhja ma nē hā axpēn mã àkjêr rax nē. Hāmri nhūm pōristi krāhtūmjaja tee ri mẽ kot axpēn mã àkjêr ā mẽ omu hāmri nē pōristi mã kām:

—Kwa mẽ Pawre hwỳr tē nē mẽ kêp utà nē ma akupỳm o tē nē haxà. Kot ka mẽ ho anhỹr kêt nhūm mẽ tanhmā hamaxpēr to nē gryk xàj axpēn nhīhkra kamā hkaxôn pa. Anē.

Hāmri nhūm mẽ kuma nē hwỳr tē nē mẽ kêp utà nē akupỳm o tē nē ixkre hwỳr ho axà.

Jejus kot Pawre jamaxpēr o hihtỳx ā harēnh
Atre 18.9-10

¹¹ Tā nhūm kamàt nhūm Jejus tām Pawre hwỳr kato nē kām:

—Pa Pawre? Kwa tee ri amnhī kukamā ajamaxpēr o amnhī kamā akahak kêt nē. Kot kaj te ra ate jar Jerujarē kamā mẽ kām ijarēnhta pyrā nē ma krī pê Rōm wỳr mō nē krī nhō xwỳnhjê mã ijarē. Anē.

Mẽ kot Pawre hā àmnēnh ā mẽ harēnh
Sikūn Ximotre 4.18

¹²⁻¹³ Tã nhũm apkati nhũm Ijaew kwỳjaja axpẽn wỳr akuprõ. Měmyjaja kệp 40 nẽ axte hkõt mẽ hkwỳjaja axpẽn wỳr akuprõ. Mẽ kot Pawre pĩr kaxyw hã axpẽn mar kaxyw hã akuprõ nẽ hã axpẽn mã amỳnẽ nẽ axpẽn mã:

—Tõe. Nà kot puj mẽ hpĩr kaxyw amnhĩ jagri htỳx o paxàpkur kêt rãhã kupĩ nẽ rĩ kormã apku nẽ ixkõ. Nà kot puj mẽ ho anẽ. Ra Tĩrtũm noo mã mẽ pahte ja hã amnhĩ jarẽn h kẽnã. Anẽ.

¹⁴ Hãmri nẽ mẽ ma mẽ õ patre krãhtũmjẽ mẽ mẽ àptàr tũmrejẽ hwỳr mra nẽ mẽ kãm hã amnhĩ jarẽ nẽ mẽ kãm:

—Ot pa mẽ amã amnhĩ jarẽn mã mra. Nà kot paj mẽ tã Pawre pĩ. Kot paj mẽ kormã hpĩr kêt ri ixàpkur kêt rãhã kupĩ. Ra mẽ ixte Tĩrtũm noo mã ja hã amnhĩ jarẽn xà hkõt.

¹⁵ Jakamã e mẽ inhma. Kêr ka mẽ axêx rom pôristi krãhtũm mã anẽ kê apkati kê man mẽ awỳr Pawre ho tẽ. Te mẽ ate aprĩ hã hkukjêr kaxyw pyrãk o kãm axêx. Kojã mẽ kormã mẽ awỳr ho hpõx kêt ri pa mẽ unên kupĩ. Anẽ.

¹⁶ Hãmri nhũm Pawre tãmnhwỳ mẽ kot ã hã amnhĩ jarẽn anhỳrja ma hãmri nẽ ma pôristi xàpẽn h xà hã ixkrej wỳr Pawre hwỳr hprõt nẽ kãm mẽ harẽ. ¹⁷ Hãmri nhũm kuma nẽ amnhĩ wỳr pôristi krãhtũm nhỹ hã mẽ hamãr xwỳnh ã karõ nẽ kãm:

—Kwa ma mẽ akrãhtũm wỳr ixtãmnhwỳta o tẽ kê kãm mẽmoj jarẽ nà? Anẽ.

¹⁸ Hãmri nhũm kuma nẽ ma hwỳr o tẽ nẽ kãm:

—E Pawre na inh mã anẽ pa awỳr htãmnhwỳ ho tẽ. Kot tanhmã amã ujarẽn to kaxyw. Anẽ.

¹⁹ Hãmri nhũm omu nẽ hpa hã kupy nẽ o tẽ nẽ ahte mẽ hkàx ã o xa nẽ kãm:

—E mãmri inh mã mẽmoj jarẽ pa ama. Mẽmo na ka te inh mã harẽn h kaxyw? Anẽ.

²⁰⁻²¹ Hãmri nhũm kãm:

—Nà Ijaew xàptàr tũmrejaja na mẽ kot inhĩgêt Pawre pĩr kaxyw hã amnhĩ jarẽ pa amã harẽn h o tẽ. Kojã xep mẽ hã awỳ. Xep apkati nhũm ate ma mẽ hwỳr mẽ hkukjêr xà hã ixkre hwỳr ho amõr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom kojã mẽ ãm amã amnhĩ to hêx. Kojã xep mẽ kệp 40 nẽ pry kamã kutêp amũxu nẽ kuhê. Na mẽ ra hã axpẽn mar pa nẽ axpẽn mã: “Kot puj mẽ paxàpkur kêt rãhã Pawre pĩ nẽ rĩ kormã apku nẽ ixkõ.” Anhỳr o amnhĩ jarẽ pa mẽ kuma. Jakamã na mẽ kormã ate mẽ hwỳr mẽn h kaxyw akãm ama. Kwa mẽ hwỳr ho amõr kêt nẽ. Anẽ.

²² Hãmri nhũm kuma nẽ kãm:

—Tõe. Nà na pa ra ama. Mãmri ma akupỳm tẽ. Nom kêr ka inhmar kumrêx. Kêr ka nhãm mẽhõ mã ja jarẽn h kêt kumrêx. ãm kwarĩ ho kwarĩ. Anẽ.

Hãmri nhũm kuma nẽ kato nẽ ma akupỳm tẽ.

Mẽ kot Ijaew pymaj nhỹhỹm Pawre mẽn h ã mẽ harẽn h

²³⁻²⁴ Tã nhũm pôristi krãhtũmja amnhĩ wỳr ÿ hã pôristi jamãr o mẽ pa xwỳnh wa ho hamêxkrut nẽ wa hã karõ nẽ wa kãm:

—E wa inhma. Kojã kõt ã kamàt ka wa ma krĩ pê Sejarej wỳr Pawre ho mõi kê hkà hkĩnh pê pahĩhti Peris wỳr pøj.

Nẽ amnhĩ kõt pôristi ho 200 nẽ o mõi.

Nẽ kê mẽ kệp 70 nẽ kawar ã hkrĩ nẽ mẽ akõt mõi.

Nẽ kê mẽ kệp 200 nẽ wapo jamỳ nẽ mẽ akõt o mõi.

Kê mẽ ã ohtõ rax anẽ.

Nẽ Pawre kot kawar ã ÿr nẽ mõi kaxyw ka mẽ kãm hõ ho mõi.

E kêr ka mẽ ã axohtõ nẽ hkõt amõr anẽ kê hkà hkĩnh pê pahĩhti Peris wỳr pøj. Anẽ.

²⁵ Hãmri nẽ pahĩhti Peris mã kagà nhĩpêx nẽ kamã kãm Pawre jarẽ nẽ kãm:

²⁶ Pa pahĩhti Peris? Xà amex? Ixpê Kraw Risas na pa awỳr kagà mẽ.

²⁷ E ot pa awỳr Ijaew pê Pawre mẽ. Na pre hkwỳja kot hpĩr kaxyw unên h tã pa mããnên kệp Rõm nhõ xwỳnh ã harẽn h ma hãmri nẽ hwỳr inhõ pôristi rẽ nhũm mẽ hwỳr hprõt nẽ mẽ kệp utà. ²⁸ Hãmri nẽ Ijaew xàptàr tũmrejẽ hwỳr o tẽ. Mẽ kot inh mã tanhmã kot amnhĩ tomnuj to hã harẽn h kaxyw. ²⁹ Tanhmã kot amnhĩ tomnuj to nhũm

mě kot haxàr rỳ hpĩr ronhỹx ja mex nẽ. No xep ãm kot mẽ higêtjê kot amnhĩ nhĩpêx kôt amnhĩ nhĩpêx kêt pix mỳrapê na mẽ kamã gryk.

³⁰ Tã pa mẽ kot hpĩr kaxyw hã mẽ harênh ma nẽ mẽ umaj awỳr kumẽ. Hãmri nẽ kamã mẽ gryk xwỳnhjê mã ajarẽ. Jakamã koja mẽ mẽmo arĩgro hã awỳr pỳj nẽ tanhmã kot amnhĩ nhĩpêx to hã amã harẽ ka kam ja hã mẽ ama nẽ tanhmã ho.

Tã ãm ja pix na pa amã harẽ. Ixpê Kraw Risas na pa awỳr kagàja mẽ. Tã mãn ka arĩ ixte amã harênhja ma. Anẽ.

³¹ Tã nhũm kamàt nhũm mẽ hkrãhtũm kot mẽ kãm karõ xà hkôt nhũm pờristijaja ma Pawre o mỗ. Hãmri nẽ krĩ pê ãxipat wỳr pỳj nẽ kamã amnhĩm hikra.

³² Nhũm apkati nhũm mẽ kot mẽ hkôt pykap mỗr xwỳnhjaja mẽ õ pahi kot mẽ kãm hã karõ xà hkôt awjanã nẽ ma akupỹm mỗ nhũm kawar ã mẽ mỗr xwỳnh pixjaja ma Pawre ho mỗ. ³³ Hãmri nẽ mỗ nẽ Sejarej wỳr pỳj nẽ pahĩhti Peris nhĩhkram Pawre jaxà nẽ kãm kagàja gõ nẽ awjanã nẽ ma akupỹm hapêx. ³⁴ Hãmri nhũm Perisa kagàja py nẽ omu. Nẽ omunh pa nẽ Pawre mã kãm:

—E inhmã amnhĩ jarẽ. Tanhmã na anhõ pyka hixi te? Anẽ.

Nhũm kãm:

—Kêp Siris. Anẽ.

³⁵ Nhũm kãm:

—Tõe. Kê mẽ kot ato kapêr xwỳnhjaja pỳj pa kormã ixprĩ hã mẽ kot tanhmã ajarênh to ma mãn. Anẽ.

Hãmri nẽ õ pờristi mã anẽ nhũm mẽ ma Pawre o tẽ. Ma pahi Erox htyk xwỳnh nhõrkwỳ hwỳr o tẽ nẽ kamã haxà nhũm hkrĩ ho hkrĩ.

24

Ijaew kot tanhmã Pawre ho kapêr punuj to hã mẽ harênh

Rukre 21.12-13; Atre 25.7

¹ Tã nhũm arĩgro kêp 5 nẽ hapêx nhũm Ijaew kwỳjaja Sejarej wỳr pỳj. Mẽ õ patre maati ãnãniĩsti nẽ Tetur nẽ kaxyw mẽ àptàr tũmrejaja nhũm mẽ ma hwỳr mỗ nẽ pỳj. Tetur kêp axiwôkat ã mẽ yr pê kapêr xwỳnh jakamã nhũm mẽ kot tanhmã Pawre o kapêr punuj to kaxyw pahi Peris wỳr amnhĩ kôt o mỗ. ² Hãmri nhũm mẽ amnhĩ wỳr Pawre hã karõ nhũm pờristi haprô nẽ mẽ hwỳr o tẽn ho axà. Hãmri nhũm Teturja pahĩhti Peris mã Pawre kot tanhmã amnhĩ tomnuj to hã harẽ nẽ kãm:

—E pahĩhti inhma. Nà na ka hte tãm mẽ inhĩpêx nẽ mẽ ixto mex o apa. Jakamã nhũm hte nhãm pika hkwỳ nhõ xwỳnhjaja mẽ ixkurê kaxàr kaxyw mẽ ixwỳr hprôt kêt nẽ. Pa htem ixpiitã akukwak ri ijamakêtkati nẽ ixàmnhĩx inhmex nẽ ixpa. ³ Nẽ mẽ ixkĩnh rãhã ho ixpa. Hêxta waa nẽ. Mẽ ixpiitã inhmã akĩnh. ⁴ E kot paj amã awjarẽ ka inhma. Kot paj ixujarênh o hakotre ka inhma nẽ tokyx ma akupỹm tẽ. ⁵ Nà Pawre na hte amnhĩ tomnuj pix o pa. Kêp Jejus pê Najare nhõ xwỳnhhta kôt amnhĩ nhĩpêx o mẽ pa xwỳnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpên kaxyw mẽ ixkryx to ho pa. ⁶ Jãã na pre Tĩrtũm mã amnhĩ jarênh xà hã ixkre hwỳr amnhĩ kôt mẽ kêp Ijaew kêt xwỳnh kwỳjê ho agiê nẽ mẽ ixpê ixkreja omnu kaxyw mã tã pa mẽ omu nẽ unê. ⁷ Tã nhũm pờristi krãhtũm Risasja mẽ ixpê utà ⁸ nẽ awỳr mẽ ixte tanhmã amã harênh to xwỳnhjê rẽ. Tã ot pa mẽ ixkrĩ. Nẽ ota Pawre nhỹ. Kam kot amnhĩ nhĩpêx ã hkukja kê tanhmã amã amnhĩ jarênh to ka ama nẽ ixte amã harênh xà hkôt tanhmã mar to. Anẽ.

⁹ Hãmri nhũm Ijaew hkwỳ haxwỳja kãm:

—Nà ãm hãmri na ã amã harênh anẽ pahĩhti. Anẽ.

Pawre kot pahĩhti mã amnhĩ jarênh

Rukre 21.14-19

¹⁰ Hãmri nhũm pahĩhti Peris Pawre mã anẽ nhũm kot kãm amnhĩ tã àprãr kaxyw kãnhmã xa nẽ kãm:

—Nà na ka ra inhõ pyka kamã mẽ ixto amnhĩptàr mex o atã amgrà xohtô nẽ pahĩhti. Jakamã na pa pre ate ixkapêr mar kaxyw ã ajarênh ma nẽ ixkĩnh nẽ.

¹¹ —E kot paj amã amnhĩ jarẽ ka inhma. Ham na pa pre Jerujarẽ hwÿr mō nẽ pōj. Na pa hwÿr ixpōx ã ixtã arĩgro pẽ 12 pix. Kam nẽ ixtã ixkwÿjẽ kukja nẽ mẽ ama. Ixte Tĩrtũm mã amnhĩ jarẽnh xà hã ixkre kamã Tĩrtũm mã mex o mex ã harẽnh kaxyw na pa pre hwÿr mō. ¹² No na pa pre nhÿri axpẽn kaxyw tanhmã ri mẽ hkryx to hkêt nẽ. Nẽ mẽ ixte Tĩrtũm mã amnhĩ jarẽnh xà hã ixkre kamã rÿ kapër o mẽ ahkre xà hã ixkre kamã rÿ nhÿri pry kamã tanhmã axpẽn kaxyw ri mẽ hkryx to hkêt nẽ. Æm amrakati ho amrakati. ¹³ Mẽ kot ã ri ijarẽnh anhÿrja amrakati kumrẽx. Mẽhõ kot ã ixte amnhĩ nhĩpêx anhÿr ã ixpumunh kêt tã na htem amnhĩ krã hkôt amã ijarẽnh o hêx. ¹⁴ Na htem mẽ ixte Jesus kôt amnhĩ nhĩpêx xwÿnhjaja mẽ ixte amnhĩ nhĩpêx mex kêt ã mẽ ijarẽ nom kot anhÿr kêt. Æm mẽ inhĩgêtjẽ nhõ Tĩrtũm kapër nywja kôt na pa hte amnhĩ nhĩpêx mex o ri ixpa rãhã nẽ. Nhũm ixkwÿjaja htÿx axtem kapër õ hkôt ixte amnhĩ nhĩpêx o ixpa hã ixkamnhĩx no ãm kapër õ hkêt. Ijaxwÿja na pa hte mẽ uràk nẽ finat Mojes kapër ã kagà mar o ixpa. Nẽ Tĩrtũm nhÿ hã mẽ kapër o mẽ pa xwÿnh kot kapër ã kagàja pa hte mẽ uràk nẽ hkôt amnhĩ nhĩpêx mex o ri ixpa. ¹⁵ Nẽ mẽ uràk nẽ Tĩrtũm kot nhÿrmã akupÿm mẽ ho htĩr kôt pa hte ijaxwÿja ijamaxpër tÿx nẽ. Mẽ htyk xwÿnh piitãã. Mẽ kot amnhĩ to mex xwÿnhjẽ mẽ mẽ kot amnhĩ tomnuj xwÿnhjẽ mẽ mẽ ho hpimràatã akupÿm mẽ ho htĩrja kôt pa hte mẽ uràk nẽ ijamaxpër tÿx o ri ixpa. ¹⁶ Jakamã na pa hte tãm amnhĩ nhĩpêx rãhã nẽ. Tĩrtũm noo mã nẽ mẽ piitã mẽ noo mã tãm ri amnhĩ nhĩpêx mex rãhã nẽ.

¹⁷ —Tã na pa pre pyka hkwỳ hkôt ri ixpa hã ixtã amgrã xohtõ nẽ. Hãmri nẽ ma akupÿm Jerujarẽ hwÿr ixkwÿjẽ hwÿr mō. Amarĩ ixte mẽ kãm kàxpore hkwỳ nhõr kaxyw pa akupÿm mẽ hwÿr mō. Nẽ mããnen Tĩrtũm mã mẽmoj nhõr kaxyw. ¹⁸ Hãmri nẽ mẽ ixte amnhĩ nhĩpêx xà hkôt pa mẽ amnhĩ to mex pa nẽ ma tẽn Tĩrtũm mã amnhĩ jarẽnh xà hã ixkre hwÿr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nẽ. Rÿ tanhmã ixkapër punuj to hkêt nẽ. Na pa prem ãm inhgrẽre nẽ akryk ixkuhẽ nhũm mẽ ixpumu. ¹⁹ Pika pẽ As rũm Ijaew kwÿjaja na prem ixkre kamã ixpumu. Nar mẽ tãmjaja mãn awÿr mra nẽ tanhmã amã ijarẽnh to.

²⁰ —Nẽ jar mẽ kot ixto kapër xwÿnhjaja. Na pa pre mẽ àptàr tũmrejẽ mã amnhĩ jarẽnh pa nhũm mẽ inhma nẽ tanhmã inhã nẽ hkêt nẽ. Kam nẽ ja hã mẽ hkukja nẽ mẽ ama. ²¹ Rÿ ko. Koja apu mẽ amã ãm ja pix ã ijarẽnh japêr. Na pa pre mẽ kãm ixkapër nẽ mẽ kãm: “Na pa hte mẽ htyk nẽ akupÿm mẽ htĩr kôt ijamaxpër tÿx nẽ. Tã ja pix mÿrapẽ na ka prem ixpynẽ nẽ ã inhĩpêx anẽ.” Anhÿr o mẽ kãm ixujarẽnh jakamã nhũm apu mẽ hkwỳjaja kęp ja omnuj nẽ. Jakamã koja apu mẽ amã ja hã ijarẽnh japêr. Nom ja pix jarẽ. Anẽ.

Æ na pre Pawreja pahi Peris mã amnhĩ jarẽnh anẽ.

Peris mẽ hprõ wa kot Pawre mar ã wa harẽnh

²² Tã nhũm pahĩti Peris kot mẽ kot Jesus kôt amnhĩ xunhwÿr xwÿnhjẽ kot amnhĩ nhĩpêx ã mẽ omunh mex jakamã hãmri Pawre mar pa nẽ ho kapër xwÿnhjẽ mã kãm:

—Nà hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mō nẽ pōj pa wa ixprĩ hã mẽ ate tanhmã harẽnh toja ma nẽ rĩ kormã tanhmã Pawre jarẽnh to. Anẽ.

²³ Hãmri nẽ hpãnhã pôristi pytãr xwÿnh mã Pawre jarẽ nẽ kãm:

—E mẽ ma akupÿm ixkre hwÿr o tẽ nẽ kamã hamãr o apa. No ãm kwãr mãmrĩ ãmnhĩx ri ixkre kamã tanhmã amnhĩ to ho ri pa. Nẽ kê hkrãmnhwÿjaja mãmrĩ hwÿr mẽmoj to mra kê kuku. Anẽ.

Hãmri nhũm mẽ kuma nẽ ma o tẽ nẽ akupÿm ixkre hwÿr ho axà nhũm kamã pa ho pa.

²⁴ Tã ra hã apkati grẽre nhũm Peris mẽ hprõ wa ma Pawre hwÿr tẽ. Prõ haxwÿja kęp Ijaew. Hixi pẽ na pre Turujire. Jakamã nhũm wa ma Pawre nhõrkwÿ hwÿr wa tẽ. Nhũm Peris Pawre hã karõ nhũm kato nẽ wa hwÿr tẽ nẽ wa kãm awjarẽ. Tanhmã wa kot amnhĩ to nẽ amnhĩ kaxyw Jesus Kris kôt hamaxpër nẽ hkôt amnhĩ xãm prãm xaj hprĩ hã wa kãm harẽ. ²⁵ Nẽ wa kãm:

—Nà na htem Jesus Kris kôt amnhĩ nhĩpêx nẽ tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhÿr kêt nẽ. Nẽ arĩ Jesus kot amnhĩ nhĩpêx kôt amnhĩ

nhĩpêx o pa. Koja Tĩrtũm nhĩrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarênh to. Mẽ pahte tãm amnhĩ nhĩpêx xwỳnh ã mẽ pajarê rỳ mẽ pahte amnhĩ tomnuj xwỳnh ã mẽ pajarê. Anẽ.

Nhũm pre ã Pawre Peris mẽ Turujire wa kãm kapêr anẽ. Hãmri nhũm Peris tee ri ujarênhja ma nẽ kãm ma nẽ. Kot amnhĩ tomnuj o pa xwỳnh ã amnhĩ pumu nẽ ã kãm kapêr anhỹrja mar puma nẽ. Hãmri nẽ Pawre mã kãm:

—E hãmri. Nà na pa wa ra ama. Mamrĩ ma akupỹm tẽn axà. Kot paj mẽmo arĩgro hã mẽmoj to anhỹr kêt nẽ axte amnhĩ wỳr atã karõ ka axte tanhmã wa inhmã axujarênh to. Anẽ.

²⁶ Nẽ htỳx hamaxpêr o:

—Nà kot paj mẽmo arĩgro hã axte amnhĩ wỳr hã karõ kê ixwỳr tẽn nẽ ixte kator prãm xàj inhmã amnhĩrer japêr. Anẽ.

Hãmri nẽ xatã amnhĩ wỳr hã karõ htã no nhũm aa kot kator kaxyw tanhmã kãm nẽ hkêt nẽ.

²⁷ Tã nhũm amgrà axkrut nẽ hapêx nhũm Pos Pesti pahi Peristi hpãnhã kêp mẽ õ pahi nẽ mẽ ho amnhĩptã. Jakamã nhũm Peris akupỹm õ krĩ hwỳr nojarêt nẽ Pawre mã ãhkra karo hkêt rãhã ma mỗ. Na pre hamaxpêr o:

—Nà kot paj Pawre kator nhũm Ijaew ja hã ijarênh ma nẽ ixkamã gryk nẽ. Nà kwār mẽ hajênh xà hã ixkre kamã hkrĩ ho hkrĩ. Kot paj kator kêt nẽ. Anẽ.

Hãmri nẽ kãm ãhkra karo hkêt rãhã ma akupỹm õ krĩ hwỳr mỗ. Jakamã nhũm Pawre arĩ ixkre kamã kêp prês nẽ hkrĩ ho hkrĩ.

25

Pawre Rôm wỳr hkrã ã harênh

¹ Tã nhũm pahi nyw Pos Pesti krĩ pẽ Sejarej wỳr mỗn pỏj. Hãmri nẽ kamã ri pa hã apkati axkrunêpxi pix nẽ ma Jerujarê hwỳr mỗ. ² Hãmri nẽ hwỳr pỏj nhũm Ijaew kwỳjaja omu nẽ hwỳr mra nẽ kãm Pawre ho kapêr nẽ hã hwỳr kurê kumrêx. Mẽõ patre krãhtũmjê mẽ Ijaew xaptàr tũmrejaja nhũm mẽ hwỳr mra nẽ kãm:

³ —Pa pahihti? E ot pa mẽ awỳr mra. Kwa xà kot ka Pawre hã karõ kê man awỳr mỗ ka jar kot tanhmã amnhĩ tomnuj to hã hkukja nẽ ama? Anẽ.

No ãm hêx rom ã hã kãm kapêr anẽ. Kot hã karõ nhũm mẽ kot pry hã hpĩr kaxyw nhũm mẽ hêx rom ã kãm kapêr anẽ. ⁴ Hãmri nhũm mẽ kuma nẽ mẽ kãm:

—Tk. Kwa ra Sejarej kamã kêp prês nẽ hkrĩ kênã kot pa kêt amnhĩ wỳr hã karõ. Kot pa tokyx ma akupỹm hwỳr mỗ. ⁵ Jakamã kê ka mẽ axaptàr tũmjaja ma ixkôt mra. Hãmri nẽ Sejarej kamã inhmã tanhmã kot amnhĩ tomnuj to hã harênh to pa mẽ ama nẽ rĩ kormã tanhmã harênh to. Anẽ.

⁶ Hãmri nẽ mẽ kamã pa hã apkati grêre nẽ ma akupỹm Sejarej wỳr mỗ. Hãmri nẽ hwỳr pỏj nhũm apkati nhũm mẽ hkukjêr xà hã ixkre hwỳr tẽn nẽ mẽ kot mẽ mar xà hã mẽ hkrĩ xà kamã nhỹ nẽ amnhĩ wỳr Pawre hã karõ. ⁷ Nhũm mẽ hwỳr o tẽn nẽ ỹr nhũm hkwy kot Jerujarê rũm mẽ mỗr xwỳnhjaja kãm hipôk nẽ pahi Pos Pesti mã tanhmã ho kapêr to nẽ ho kapêr punuj tỳx nẽ. Kot tanhmã amnhĩ tomnuj to ho pa hã ho kapêr o kuhê. Nom mẽ kot ã kot amnhĩ nhĩpêx anhỹr ã omunh kêt tã ãm amnhĩ hkrã hkôt ri tanhmã ho hêx to. ⁸ Jakamã nhũm Pawre tee ri amnhĩ tã mẽ kot ho hêxja ma nẽ kãnhmã xa nẽ Pos Pesti mã amnhĩ tã aprã nẽ mẽ kãm:

—Nà aa ixte ã amnhĩ nhĩpêx anhỹr kêt. Na pa finat Mojes kot Tĩrtũm nhỹ hã kapêr nhĩrỏp ixãm nẽ hkwyri ri tanhmã amnhĩ nhĩpêx to hkêt nẽ. Nẽ mẽ ixte Tĩrtũm mã amnhĩ jarênh xà hã ixkre kamã ri tanhmã ixtỳx ri amnhĩ nhĩpêx to hkêt. Nẽ pahihti Sesti kapêrja pa pre hirỏp ixãm nẽ tanhmã amnhĩ tomnuj to hkêt nẽ. Aa ixte ã amnhĩ nhĩpêx anhỹr kêt kumrêx. Anẽ.

⁹ Hãmri nhũm Pos Pesti kuma nẽ tanhmã hkukamã hamaxpêr to nẽ hamaxpêr o:

—Kwa nhỹ krĩ kamã kot pa we Pawre kot inhmã tanhmã amnhĩ jarênh toja ma nhũm Ijaew ja hã kãm ixkĩnh japêr? Nà mẽõ krĩ pẽ Jerujarê hwỳr kot paj akupỹm mẽ hwỳr o mỗ nẽ kamã mãn hkukja nẽ kuma. Nà ja na mex. Nà kot paj anẽ. Anẽ.

Hāmri nē Pawre mā kām:

—E xà kot puj ma akupÿm Jerujarē hwÿr mō pa kamā axte mē kot ajarēnh ma nē tanhmā ajarēnh to nà? Anē.

¹⁰ Hāmri nhūm kām:

—Nà jar ixte pahihti Sesti nhÿ hā mē kot mē hkukjêr xà hā ixkre kamā inhÿr nē amnhÿ jarēnh kênā. Jar na htem mē hkukja nē tanhmā ri mē mar to. Na pa pre tanhmā ixkwÿjê ho hkêt nē. Mēmo kaxyw kot pa akupÿm mē hwÿr mō nē axte mē kām amnhÿ jarē? ¹¹ Kop apu pa tanhmā ixte amnhÿ tomnuj to ronhÿx mē māmri ja hā ixpÿ pa mē kêp tanhmā ri amnhÿ to hkêt nē. Nom mē kot ixto hêx pix o ã ijarēnh anhÿr kênā. Jakamā mēmo myrapê kot kaj mē ïhkram ijaxà? E Rôm kām pahi maati Sesti hwÿr mǎn inhmē pa kumā mǎn amnhÿ jarē. Anē.

Pahi Sesti kêp pyka piitā hkôt mē ho amnhÿptār xwÿnh maati jakamā nhūm Pawre kot mar kaxyw hwÿr hkrà. ¹² Hāmri nhūm Pos Pesti kuma nē ma tē nē hā ò kōwenatôjê ma. Hāmri nē hā axpēn mar pa nē akupÿm hwÿr tē nē kām:

—Tôe. Nà kot paj pahi maati Sesti wÿr amē. Ra hwÿr akrà kênā. Anē.

Pos Pesti kot Akrip mā Pawre jarēnh

¹³ Tā nhūm apkati grêre nē hapêx nhūm pahi hō pê Akripja ma Pos Pesti hwÿr mō. Tōx Perênis mē wa mō. ¹⁴ Hāmri nē wa hwÿr pōj nē kuri wa pa hā apkati grêre nhūm Pos Pesti wa kām Pawre jarē nē wa kām:

—E pa war amā mēhō jarē. Na pre pahi Perisja mē hagiēnh xà kamā mēhō jaxà nē kormā kator kêt ri nhūm mē àpēnh nē kator pa hpānhā àpēnh o amnhÿptā. ¹⁵ Tā ra ma Jerujarē hwÿr mō nhūm Ijaew nhō patre krāhtūmjê mē mē àptār tūmrejaja inhmā ho kapêr punuj rax nē. Nē ixte mē kām hpÿr kaxyw inhmā hā àmnēnh kām hihtÿx nē. ¹⁶ Nom pa mē kêp ja kaga nē mē kām: “Nà mē ixpê Rôm nhō xwÿnhjaja na pa htem ã mē hipêx anhÿr kêt nē. Na pa htem mē kot ho kapêr xwÿnh noo mā tanhmā hkukjêr to nhūm tanhmā amnhÿ tã àprār to pa htem kuma nē rÿ kormā tanhmā mē ho. No na pa htem kormā mē kot tanhmā amnhÿ jarēnh to hkêt ri tanhmā mē ho hkêt nē.” Anē.

¹⁷ —Jakamā nhūm prem kaxyw Sejarej wÿr pōj nhūm apkati pa hā mē hkukjêr kurê kumrêx. Nē mē kot mē hkukjêr xà hā mē hkrÿ xà kamā nhÿ nē ixte hkukjêr kaxyw amnhÿ wÿr Pawre hā karō. ¹⁸ Na pa pre ijamaxpêr o: “Mǎn pre tanhmā amnhÿ tomnuj tÿx to hā na mē inhmā harēnh kaxyw.” ¹⁹ Anhÿr ã hkamnhÿx tã te kot amnhÿ to mex xwÿnh pyrāk. ãm kot mē hkôt amnhÿ nhÿpêx kêt pix ã nhūm mē inhmā harē. Nē kaxyw mēhō htyk xwÿnh jarē. Mē kot kām “Jesus” anhÿr xwÿnhja na xep hte mē kām akupÿm htÿr ã harēnh o pa. ãm ja pix na prem inhmā harē. ²⁰ Pa tee ri ixte nhÿri ixprÿ hā tanhmā mē kot harēnh to hā mē mar kaxyw hkukamā ijamaxpêr. Hāmri nē hā Pawre kukja nē kām: “Xà kot puj ma akupÿm Jerujarē hwÿr mō pa axte akwÿ kot tanhmā ajarēnh to ma nē rÿ kormā tanhmā ajarēnh to nà?” ²¹ Anhÿr tã no nhūm akupÿm Jerujarē hwÿr mōr kaga kumrêx nē amnhÿm Rôm kām pahi maati Sesti jarē. Ixte ma hwÿr mēnh nhūm kot kām amnhÿ jarēnh nhūm kot mar nē tām tanhmā harēnh to kaxyw. Jakamā pa kormā ixte hwÿr mēnh kaxyw amnhÿ xa hā akupÿm mē hagiēnh xà kamā haxà nhūm arÿ hkrÿ ho hkrÿ. Anē.

²² Hāmri nhūm Akrip kuma nē kām:

—Xôwehe? Kwa na pa inhmā tanhmā kapêr to mar prām nē. Anē.

Hāmri nhūm kām:

—Tôe. Nà kê apkati pa hā karō ka tanhmā kapêr mar to. Anē.

²³ Jakamā nhūm apkati nhūm Akrip mē htōx Perênis wa pahi hā mē ê mex jagjê nē ma mē hkukjêr xà hā ixkre hwÿr wa tē. Pôristi krāhtūm kwÿjê mē Sejarej kamā mē kot amnhÿ to rÿnh xwÿnh kwÿjê mē nhūm mē hwÿr akuprō. Nhūm mē piitā Akrip mē htōx wa kêp pahi hā wa ê mex ã wa omu nē wa kamā no puma nē. Hāmri nhūm Pos Pesti Pawre hā karō nhūm mē haprō nē ma mē hwÿr o tē. ²⁴ Hāmri nhūm Pos Pesti omu nē Akrip mē htōx mē mē kot mar o hkrÿ xwÿnhjê mā kām:

—E pahihti Akrip mẽ mẽ apikuprõnh xwỳnhjaja. Ota Pawre xa. Jerujarẽ kamã nẽ jar Sejurej kamã na pre hkwyjaja inhmã ho kapẽr rax nẽ. Hãmri nẽ ixte hpĩr kaxyw inhmã hã àmnênh kãm hihtyx nẽ. ²⁵ Nom mẽmoj mỳrapê kot pa kêt kupĩ? Tã nhũm amnhĩm pahi maati Sesti jarẽ pa ma hwỳr mẽnh kaxyw. ²⁶⁻²⁷ Nom na htem amarĩ pahi maati Sesti hwỳr mẽ rênh kêt nẽ. Na htem kãm mẽ kot tanhmã amnhĩ tomnuj to hã kagà nẽ hwỳr kagà mẽ ro hã mẽ kurẽ. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyræk. Jakamã na pa mẽ awỳr o tẽ. Mẽ ate kapẽr mar nẽ kot tanhmã amnhĩ tomnuj to hã inhmã harênh nhũm ixte hã kagà nẽ pahi Sesti hwỳr mẽnh kaxyw. Jakamã e mẽ kam nẽ hkukja nẽ ama nẽ tanhmã mar to. Anẽ.

26

Pawre kot pahihti Akrip mã amnhĩ jarênh
Atre 8.3, 9.1-19, 22.1-21

¹ Hãmri nhũm Akrip Pos Pesti kot tanhmã Pawre jarênh toja ma nẽ Pawre mã kãm:
—E mãmri mẽ inhmã amnhĩ jarẽ pa mẽ ama. Anẽ.

Hãmri nhũm kuma nẽ kãm amnhĩ jarênh kaxyw kànhmã kãm ìhkra pẽ nẽ kãm:

²⁻³ —Hêxta waa nẽ. Nà na pa amã amnhĩ jarênh kaxyw nẽ ixkĩnh nẽ pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nẽ mẽ ixte tanhmã amnhĩ nhĩpêx to hã mẽ ixte axpên kukjêrta ate hã mẽ ixpumunh mex. Jakamã na pa amã amnhĩ jarênh kaxyw nẽ ixkĩnh nẽ. E tokyx anojarêt kêt nẽ inhma. Pa amã ixujarênh jatur xàm kumẽ ka aprĩ hã inhma. ⁴ Nà ixkwỳjaja ra mẽ kot ixte amnhĩ nhĩpêx ã ixpumunh mex. Ixpĩre rũm ixpapxà kamã nẽ määnên Jerujarẽ kamã ixte tanhmã amnhĩ nhĩpêx to ho ixpaja mẽ kot hã ixpumunh mex. ⁵ Ixpê mẽ hkwy pẽ Parijew nhõ xwỳnh kwỳjê hã mẽ kot ixpumunh. Koja mẽ apu ja hã amã ijarênh japêr rỳ ko. Mẽ ixpê Parijew nhõ xwỳnhjaja na pa htem amnepêm finat Mojes kot Tirtũm nhỹ hã mẽ inhĩgêjtjê mã mẽmoj tã karõ xà hkôt amnhĩ nhĩpêx mex o ixkwỳjê jakre.

⁶ —Amnepêm na pre Tirtũm mẽ inhĩgêjtjê mã tanhmã amnhĩ jarênh to. Kot nhỹrmã mẽ piitã akupỹm mẽ ho htĩr ã amnhĩ jarẽ. Tã ixte ja kôt ijamaxpêr pix mỳrapê na prem kot hã amã ixto kapêr kaxyw awỳr ixto mō. ⁷ Mẽ ixpê Ijaew nhĩgêjtjê piitã na prem Tirtũm kapêr kôt hamaxpêr o ri pa. Kot nhỹrmã akupỹm mẽ ho htĩr ã amnhĩ jarênh kôt hamaxpêr tỳx o pa. Amnepêm finat Jako mẽ hkra pẽ 12jaja na prem hkôt hamaxpêr. Nẽ ixpê mẽ hkanrêhã mẽ htãmnhwỳ na pa hte ijaxwỳja ja kôt ijamaxpêr tỳx rãhã ho ri ixpa. Tã ãm mẽmoj pixi mỳrapê na ixkwỳjaja ã amã ixto kapêr punuj anẽ. ⁸ Mẽ kot ixpyrà nẽ ja kôt hamaxpêr ã amnhĩ jarênh tã nhũm pre Tirtũm akupỹm Kra Jejus o htĩr nom nhũm mẽ ixkĩnhã ja kôt hamaxpêr kêt. Nom Tirtũm kêp akupỹm mẽ pahto pahtĩr xwỳnh kênã.

⁹ —Amnepêm kormã Jejus kôt ijamaxpêr kêt ri na pa pre ijaxwỳja mẽ uræk nẽ akupỹm htĩr kôt ijamaxpêr kêt nẽ. Nẽ ixtỳx ijamaxpêr o: “Kot paj Jejus pẽ Najare nhõ xwỳnh kôt mẽ kot amnhĩ xunhwỳr xwỳnhjê nhĩpêx kati ho ixpa nhũm Tirtũm ja hã ixpumu nhũm ja kãm mex nẽ.”

¹⁰ —Anhỹr jakamã pa pre hte tanhmã mẽ homnuj tỳx to ho ri ixpa. Jao Jerujarẽ kamã mẽ inhõ patre krãhtũmjê nhỹ hã mẽ unê nẽ mẽ hagjênh xà kamã mẽ hagjênh o ixpa nhũm mẽ kot mẽ himex kaxyw mẽ hã inhmã amnhĩ jarẽ nhũm ja inhmã mex nẽ. Pa mẽ harênh ma nẽ ixkĩnh nẽ. ¹¹ Pa pre hte xatã tanhmã mẽ hipêx to nẽ mẽ kot Jejus kaga hprãm xàj mẽ hipêx kati rũnh nẽ. Tirtũm kapêr o mẽ ahkre xà hã ixkre piitã kamã pa pre hte ã mẽ hipêx anẽ. Nẽ mẽ kamã inhgryk tỳx jakamã ma krĩ hkwy hkôt mẽ hapêr o ri ixpa. ã na pa pre mẽ hipêx anhỹr o ri ixpa.

¹² —Tã axte ixte mẽ hkwyjê pynênh nẽ mẽ hagjênh kaxyw ma Tamas wỳr mō. Mẽ inhõ patre krãhtũmjê nhỹ hã ma mẽ hwỳr mō. ¹³ Hãmri nhũm ra kaxkwa nhĩpôk ri myt nhỹ pa kormã pry hã inhmõr ri kaxkwa rũm mẽmo nhĩrãja pumu. Nhũm hirã htỳx o myt jakre nẽ ixtã ajêt pa ixkôt ri mẽ pa xwỳnhjê mẽ hipôk ri ixkuhê. ¹⁴ Hãmri nẽ mẽ inhmã ma xàj pykap ixrôrok pa nhũm kaxkwa rũm mẽhõj inhmã kapêr. Mẽ ixpê Ijaew kapêr o kapêr nẽ inhmã: “Pa Sawti? Hêxta waa nẽ. Kwa mon ka hte axtem nẽ ixtomnuj tỳx o ri

apa? Nom na ka tee ri ã amnhĩ nhĩpêx anhÿr kaprÿ.” Anê. ¹⁵ Hãmri pa tee ri kuma nê kãm: “Kwa mẽ atõ na ka ã inhmã akapêr anê?” Anê.

—Hãmri nhũm inhmã: “Ixpê Jejus na pa amã ixkapêr. Pa na ka hte ixpê ixkõt mẽ kot amnhĩ xunhwÿr xwÿnhjê homnuj tÿx o apa ho te pa ixtomnuj tÿx pyræk. ¹⁶ E kãnhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩrĩt. Jarãhã ate ixpumunh xà hkõt ate mẽ kãm ma ijarênh nê mẽ kãm ixkapêr jarênh o mẽ ahkre ho ri mẽ hkõt apa kaxyw na pa amnhĩ kaxyw ata. Kot paj nhÿrmã axte awÿr ixkato nê tanhmã amã ixkapêr to ka inhma nê ma mẽ kãm ixkapêr jarênh o ri mẽ hkõt apa. Ja kaxyw na pa amnhĩm ata.” Anhÿr o inhmã kapêr. ¹⁷ Hãmri nê inhmã: “E kot paj Ijaew mẽ Ijaew kêt xwÿnhjê hwÿr amê nê anê mẽ omunh mex nê nhũm mēhõ apĩr kêt nê. ¹⁸ Kêr ka ma mẽ hkõt mẽ kãm ixkapêr jarênh o ri apa kê mēhprĩ hã kuma. Mẽ kot amnhĩ tomnuj kaga nê amnhĩ kaxyw ixkõt hamaxpêr nê ixkõt amnhĩ xunhwÿr kaxyw. Hãmri nhũm Tĩrtũm ja hã mẽ omu nê ixkukwak ri amnhĩ katut kõt mẽ kot amnhĩ tomnuj piitã rēnh pa nê axte kãm hamaxpêr kêt nê. Hãmri nê mẽ ho hkra. Kojã mẽ ã amnhĩ nhĩpêx anê hãmri nê axte Satanasti nhÿ hã tanhmã amnhĩ nhĩpêx to hkêt nê. Pãnhã Tĩrtũm kõt pix mã amnhĩ nhĩpêx o pa.” Anê.

¹⁹ —Ã na pre Pahihti Jejus inhmã kapêr anê. Tã kot kaxkwa rũm inhmã ixapênh jarênh ã karõja pa pre mar tÿx nê hkõt amnhĩ nhĩpêx rãhã ho ri ixpa pahi Akrip. ²⁰ Jakamã na pa pre ma mẽ hkõt mẽ kãm kapêr jarênh o ri ixpa. Tamas kumrêx hwÿr nê hpãnhã Jerujarê hwÿr nê hpãnhã pika pē Jutej piitã hkõt Ijaew mã kapêr jarênh o ri ixpa. Tã hpãnhã Ijaew kêt xwÿnhjê mã harê. Na pa hte mẽ kãm ixkapêr o: “Kwa mẽ ate amnhĩ tomnuj kaga nê hpãnhã Tĩrtũm kõt amnhĩ xunhwÿ. Hãmri nê hkõt pix mã amnhĩ nhĩpêx o ri apa. Mẽ piitã mẽ kot apê hkwy hã mẽ apumunh kaxyw.” Anê.

²¹ —Ãm ja pix mÿrapê na pre ixkwÿjaja ixpynê. Tĩrtũm mã amnhĩ jarênh xà hã ixkre kamã ixpynê nê ra mẽ kot ixpĩr kaxyw. ²²⁻²³ Nom na hte Tĩrtũm ixtãnopxa nê ixto ixihtÿx mex rãhã ho pa pa arĩ mẽ kãm harênh o ri ixpa. Mẽ kot amnhĩ to rũnh xwÿnhjê mã nê mẽ kēp amrakati xwÿnhjê mã nê mẽ piitã mẽ kãm harênh o ri ixpa. Finat Mojes mẽ Tĩrtũm nhÿ hã kapêr jarênh o mẽ pa xwÿnhjaja kot ra hkukamã tanhmã harênh to xà hkõt pa hte mẽ kãm harênh o ri ixpa. Nê mẽ kãm: “Tĩrtũm kot mẽ pakaxyw ãm xwÿnhhta na pre amnhĩ xà htÿx kamã hamak kãm ty. Tã nhũm Tĩrtũm akupÿm ho htĩr. Kumrêx na pre akupÿm ho htĩr jakamã kumrêx na pre tanhmã mẽ kãm kapêr to ho ri mẽ hkõt pa. Mẽ kot amnhĩ kaxyw hkõt hamaxpêr nê hkõt amnhĩ xunhwÿr xwÿnh piitã uræk nê nhÿrmã Tĩrtũm mẽ wa õ krĩ kamã htĩr tũm nê pa ho pa hprãm xaj mẽ harênh o pa. Mẽ ixpê Ijaew nê mããnēn mẽ apê Ijaew kêt xwÿnhjaja nhũm pre ã mẽ pajarênh anê.” Anhÿr o pa hte mẽ kãm harênh o ri mẽ hkõt ixpa pahi Akrip. Anê.

²⁴ Nhũm Pawre kormã kot mẽ kãm amnhĩ jarênh par kêt ri nhũm Pos Pesti tee ri tanhmã Jejus jarênh to hã kuma nê kàx pē kãm kapêr nê kãm:

—Kwa na ka akrã axpã nà? Pêr ate kagà pumunh tÿx kurê akrã pipãnh pyræk o ri atÿx ã ri mẽ inhmã axujarênh anê. Anê.

²⁵ Hãmri nhũm kãm:

—Nà ixkrã pipãnh kêt. ãm hãmri na pa mẽ amã awjarê. ²⁶ Jerujarê kamã na prem Jejus pĩ nhũm mẽ piitã omu. Tã nhũm akupÿm htĩr hãmri nê hpimxur pē ri pa hkêt nê. Na pre mẽ ohtõ nê akupÿm htĩr kãm omu. Pahi Akrip ra kot ja mar mex jakamã na pa ixãmnhĩx ã mẽ amã harênh anê.

²⁷ Anhÿr o kãm kapêr hãmri nê pahi Akrip wÿr rĩt nê kãm:

—Kwa pahi Akrip. Xà Tĩrtũm nhÿ hã kapêr jarênh o mẽ pa xwÿnhjaja kot Jejus kukamã tanhmã harênh toja kõt na ka hte ajamaxpêr? Nà ra hkõt ajamaxpêr kēnã. Ra ixte ajamaxpêr kõt apumunh mex. Anê.

²⁸ Hãmri nhũm tee ri kuma nê kãm:

—Tk. Kwa xà kot kaj ã inhmã akapêr anê pa ama nê apyrà nê amnhĩ kaxyw Jejus kõt ijamaxpêr? Nà na ka ixte ã ate Jejus jarênh anhÿrja kõt ijamaxpêr ã ixkamnhĩx kaprÿ. Anê.

²⁹ Hāmri nhūm Pawre kām:

—Ko. Kot kaj ixpyrà nē amnhī kaxyw hkôt ajamxpēr pa ixkīnh nē. Nom kaxipix kêt. Mē apiitā mē ate inhmar o akrī xwýnhjaja mǎānēn. Mē ate mē ixpyrà nē Jejus kôt amnhī xunhwýr na inhmā hprām. Ām ixpyrà nē mē apê prês pix na inhmā hprām kêt. Anē.

³⁰ Hāmri nhūm pahi Akrip nē htōx Perēnīs nē pahi Pox Pesti nē mē hkôt mē mōr xwýnhjaja kànhmā kuhē nē ma mrrar kaxyw. ³¹ Nē nojarêt nē Pawre hā axpēn mā:

—Kwa tanhmā kot amnhī tomnuj to hkêt kēnā kot kêt mē haxà rý kupī. Anē.

³² Hāmri nhūm Akripja Pos Pesti mā kām:

—Kwa kop apu kot amnhī kaxyw pahi maati Sesti hwýr hkrà hkêt ronhýx pu mē ra kator. Anē.

27

Mē kot Rōm wýr Pawre mēnh ā mē harēnh

Atre 23.11, 25.12

¹ Tā nhūm mē pyka pē Itar wýr pahi maati Sesti hwýr Pawre mēnh kaxyw. Itar kamā mē ō krī maati na pre kēp Rōm. Jakamā nhūm Pawre mē mē kot mē hagjēnh xà kamā mē hkrī xwýnh mē ho hpimràatā ma mē o mra nē pôristi krāhtūm Jurti nhīhkram mē haxār pa. Kot ma Rōm wýr mē o mōr kaxyw. Jurtija kēp Itar kamā mē ō pahi maati hā pôristi krāhtūm nhūm prem ma mē kām mē o mōr kaxyw ihkram mē hagjēnh pa. Ixpē Rukre na pa pre inhmā Pawre hkôt inhmōr prām nē mē hā ajēt nē mē hkôt mō.

² Tā pa mē ra inhnojarêt nhūm Aristak haxwýja ma mē ixkôt mō. Pyka pē Masetōn nhō xwýnh na pre. Ō krī pē na pre Tesarōn. Jakamā nhūm ma wa ixkôt mō. Hāmri nhūm pàrja nojarêt. Atamīx rūm pàr nhūm ra As wýr nojarêt pa mē hwýr inhgjēx pa nē ma kamā mō. ³ Hāmri nhūm apkati pa mē krī pē Sito hwýr pōj nē hā pàr xi. Nhūm pôristi krāhtūm Jurtija Pawre ho mex jakamā pa mē Sito hwýr pōj nhūm Pawre mā anē pa mē ixkato nē ma ixkrāmnhwýjē hwýr mra nē mē kutā apku nē ma akupým pàr wýr mra.

⁴ Tā pa mē axte mō. Nom nhūm kôk mē ixkutā àpêr tỳx jakamā pa mē umaj juk nē gô hipôk kupu ho mō. Gô hipôk pē Sipreja pa mē upôk rūm ma hkupu ho mō nhūm mē inhnē kôk pē àmnār mex nē. ⁵ Hāmri pa mē mōō nē pyka pē Siris mē Pāpir wa hakrenh o mō nē pyka pē Ris kamā Mira hwýr pōj nē hā pàr xi nē ijapôx pa. ⁶ Hāmri nhūm pôristi krāhtūmja Aresānrir rūm pàr pumu nhūm ra Itar wýr nojarêt. Pa mē hwýr inhgjēx kurē kumrēx hāmri nē ma kamā axte mō. ⁷ Hāmri nhūm pàrja kôk kutā tee ri mōr prēprēk kaxyw nē ām amnhīm hprī nē mōr ā apkati xohtō nē pa mē tokyx ixpôx kêt nē. Tā Sito hwýr ixàhtēp o mō nom nhūm kôk mē ixkutā hihtỳx rax kumrēx. Jakamā pa mē juk nē gô hipôk pē Kret jatur xà jahpa nē ma kape hā mō nhūm mē inhnē kôk pē àmnār mex nē. Hāmri pa mē ma Sarmōn jakrenh o mō ⁸ nhūm pàr kôk kutā amnhīm hprī nē kape hā mō. Pa mē mō nē jatā Rasej tā pàr nhīkwý xà mex wýr pōj nē kamā pàr xi. ⁹ Nom pàr kot amnhīm hprī nē mōr jakamā nhūm ra kôk xàpêr tỳx nē kamā kry htỳx ā mytwrý mē ixtā kato. Mytwrýja ā mē kot kôk xàpêr tỳx pymaj nhýhým pàr kām mrrar kêt. Jakamā nhūm Pawre tokyx mē inhmōr nē pàr nhō xwýnhjē mā kapēr kām hihtỳx nē mē kām:

¹⁰ —Kwa pu mē jar kôk xàpêr tỳx jamār o ri papa nà. Kê kôk mē kry htỳxja hapêx pu mē rī kormā axte mō. Kot puj mē anhýr kêt nē kôk xàpêr tỳx kām mō nhūm nhýri pàrja mē pahpê axà nhūm gô mē apê mē akukrēx o hapêx pa. Pu mē pajaxwýja axkaprā.

¹¹ Anhýr o mē kām kapēr tā no nhūm mē kuma nē ām kuma. Pàr pām mē pàr o mrrar xwýnh wa nojarêt tỳx nē kapēr ma nē ām kuma. Nhūm pôristi krāhtūm wa nojarêt ā wa kuma nē haxwýja Pawre mar kêt nē. ¹² Nhūm mē kot pàr nhīkwý xà mex jarēnhja mē kot mex ā harēnh tā mē kēp omnuj nē. Hā na wrýk nē kôk xàpêr tỳx nhūm mē kēp omnuj tỳx nē. Jakamā nhūm mē piitā Pawre rom ra nojarêt nē. Mē kām tokyx krī pē Wēnīs wýr hpôx prām jakamā nojarêt tỳx nē. Gô hipôk pē Kret kamā na Wēnīsja. Nē kamā kôk xàpêr tỳx kêt jakamā nhūm mē hwýr nojarêt nē axpēn mā:

—E kwa pu mē tokyx Wēnīs wýr mō nē kamā mǎn kôk xàpêr tỳx japêx jamār o papa. Anē.

Hāmri nē piitā hwýr nojarêt.

Kôk kot pâr o àpêr tỳx ã harênh

¹³ Tã nhũm kahpa hkôt kôk xàpêrja katàt kôt kawax pê apê nhũm mẽ kamã ama nê xypên mã:

—E hãmri. Tokyx pu mẽ mỗ. Anê.

Jakamã pa mẽ pâr o htỳx xà ho api nê axte mỗ. Ma gô hipôk pê Kret jakàr ã mỗ. ¹⁴ Puh nhũm na wrỳ nê kôk àpêr tỳx kumrêx. Mẽ kot kãm “kôk xàpêr tỳx maati” anhỹr xwỳnhja gô hipôk rùm mẽ ixto àpêr tỳx kumrêx o mỗ. ¹⁵ Hãmri nê mẽ ixkutã àpêr tỳx nhũm pâr tee ri kutã hkarôt. Pa mẽ kormã Wênĩs wỳr ixpôx kêt ri ra ho awjanã nhũm amnhĩ krã hkôt kôk kôt mỗ. ¹⁶⁻¹⁷ Hãmri nê mẽ gô hipôk pê Krawti jahpa nê hakàr ã mỗ nhũm mẽ inhnê kôk pê amýtã nhũm amnhĩm hprĩ nê kawax pê apê. Hãmri pa mẽ pâr krare kot mẽ ixkôt mỗr xwỳnhja pa mẽ kumỳ nê pâr rax kãm kumê. Ra kamã gô rax tã pa mẽ ixkarôt tỳx nê nê hkapir pa nê ho api nê pâr rax kãm kumê nê ho htỳx. Hãmri nê hpãnhã kôk xàpêr tỳx pymaj pâr rax kaxpre hpa. Hãmri nê kôk kot pykahti grã maati pê Sirteja wỳr pâr mẽnh nhũm kot amnhĩ to pykahti xãm o htêm pymaj nhũm mẽ kot ho mrrar xà hã kupêxê rax o wrỳ nhũm pâr amnhĩ krã hkôt ma kôk kôt mỗ.

¹⁸ Tã nhũm apkati nhũm kôk arĩ mẽ ixpê pâr o àpêr tỳx nê arĩ na wrỳk rax rãhã nê. Jakamã pa mẽ pâr àr pymaj nê mẽ hikukrêx kwỳ gôx kãm rênh pa. Kaxkritre nê àr kêt kaxyw.

¹⁹ Tã nhũm apkati pa mẽ hpãnhã pâr kre kamã ri nê hikukrêx kwỳ rê nê gôx kãm kurê. ²⁰ Nhũm kôk arĩ àpêr tỳx kumrêx ã apkati xohtô nê. Nê na wrỳk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtô rax kumrêx. Hãmri nê tee ri ahkapi nê tee ri amnhĩ kukamã ijamaxpêr. Nê ixtyk par pix kukamã ijamaxpêr o ixkaprĩ nê ixkrĩ.

²¹ Hãmri nê mẽ inhmã ma xàj ixàpkur kêt ryy nê. Hãmri nhũm Pawre tee ri ja hã mẽ ixpumu nê pâr nhõ xwỳnh wa kãm kapêr nê wa kãm:

—Kwa na pa pre tee ri Kret kãm man mẽ pamôr nê war amã ixkapêr. Kop apu mũtar măn mẽ kuri arĩ ri mẽ hkôt mẽ papa ronhỹx pu mẽ pajamakêtkati nê paxàmnhĩx ri papa. Tã nhỹx pu mẽ ri mẽ hikukrêxja gôx kãm rênh par kêt nê. ²² Nom kwa kêr ka mẽ tee ri amnhĩ kukamã ajamaxpêr kêt nê. Kot puj mẽ pahtô pahtyk kêt nê. ãm pârja pix koja axà nê hapêx. ²³ Ixpê Tirtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapêr o wrỳk xwỳnhjê hõ mẽ nhũm ixwỳr wrỳ nê inhmã awjarê ²⁴ nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akà hkĩnh pê ma Itar kamã Rõm wỳr mỗ nê pôj nê pahi maati Sesti pumu nê kãm amnhĩ jarê. Jakamã koja Tirtũm akôt mẽ mỗr xwỳnh piitã omunh mex nê ka mẽ atõ tanhmã amnhĩ to hkêt nê.” Anê.

²⁵ —Ã kot inhmã kapêr anhỹr jakamã kwa mẽ amnhĩ to htỳx nê tee ri amnhĩ kukamã ajamaxpêr kêt nê. Tirtũm kapêr o wrỳk xwỳnh kot inhmã ujarênh xà hkôt koja Tirtũm ã mẽ panhĩpêx anê. Ixte ja hã omunh mex kênã. ²⁶ Koja xep kôkja nhỹri gô hipôk ã pâr krakrak pa. Nom mẽ papajaja kot puj mẽ pahkà hkĩnh pê hwỳr pahpôx pa. Anê.

²⁷ Tã pa mẽ mỗ nê ã inhmôr anhỹrja ã ixtã semãn axkrut nê ra gô rax pê Ariax kôt axà. Kamàt kãm hkôt axà nhũm kôkja arĩ pâr o apêr tỳx rãhã ho mỗ. Hãmri nhũm kôt ã kamàt nhũm pâr o mrrar xwỳnhja ra pâr kot pykahti grã htêp ã hkamnhĩx. ²⁸ Jakamã nhũm mẽ gô xupỳm pumunh xà ho gô pumu nhũm upỳm kêp 36 met. Hãmri nhũm hã ahtũmre nê axte omu nhũm ra hpãnhã kêp 27 met pix. Jao ra pâr kot gô kokwe htêp o mỗr ã omu. ²⁹ Hãmri nê kot kên kuranh nê hã pikrakrak pymaj katê rùm ho htỳx xà ho 4 nê gôx kãm kurê nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ. ³⁰ Hãmri nhũm pâr kãm mẽ àpênh xwỳnhjaja tanhmã hamaxpêr to nê hêx rom pâr krare ho wrỳk o tẽ. Mẽ kot mẽ ixrer nê ahte xarmã mỗr nê rêr nê tokyx gô hipôk wỳr hpôx kaxyw. No ãm hêx rom te mẽ kot axte pâr krã rùm ho htỳx xà hõ mẽnh kaxyw pyrãk o amnhĩ nhĩpêx nê kaxyw ho wrỳk o tẽ. ³¹ Nom nhũm Pawre mẽ hamaxpêr ã mẽ omu hãmri nê pôristi mẽ mẽ hkrãhtũm mã mẽ harê nê mẽ kãm:

—Kwa koja mǔjjaja mẽ pare nẽ ahte pàr krare kamã xarmã mǒn rê ka mẽ apikaprãr pa kãm ga. Anẽ.

³² Hãmri nhũm mẽ tee ri kuma nẽ mẽ hwỳr hprõt nẽ mẽ kệp pàr krare pẽ hkaxpre xà jakà nhũm gôx kãm tẽm nẽ ma gô hkôt hkapyrñ mǒ.

³³ Tã hãmri nhũm ra myt kator o mǒ nhũm Pawre akupým mẽ piitã mẽ ho mẽ hamaxpẽr o hihtýx kaxyw mẽ kãm:

—Kwa na ka mẽ tee ri amnhĩ kukamã ajamaxpẽr o akaprĩ nẽ axàpkur kêt o atã semãn axkrut. ³⁴ E pu mẽ mẽmoj krẽ nẽ ho amnhĩ xihtýx. Kot puj mẽ pahtõ pahtyk kêt nẽ. ãm hãmri na pa mẽ amã ixkapẽr. Anẽ.

³⁵ Hãmri nẽ mẽmoj py nẽ mẽ noo mã Tirtũm mã harẽ nẽ hkur o xa ³⁶ nhũm mẽ ja hã omunh xà hkôt akupým tãm hamaxpẽr o mǒ. Hãmri nẽ amnhĩm mẽõ hkwy jamý nẽ kumẽ kuku. ³⁷ Pàr kãm mẽ inhmǒr xwýnhjaja na pa prem ixpẽ 276. ³⁸ Tã pa mẽ ra ixàpkur pa. Hãmri nẽ pàr kaxkrit kaxyw mẽ apkur xà hã mẽmoj y jakrêxja gôx kãm hkapyr pa.

Pàr mẽ kệp pikrakrak ã harẽnh

³⁹ Tã nhũm ra myt kator mex nẽ nhũm mẽ amnhĩ kukamã gô hipòk pumu nẽ axpẽn mã:

—Kwa nhỹ pika na mǔj wehe? Anẽ.

Hãmri nẽ nhỹri hakàx ã amnhĩm nǒr xà mex pumu nẽ hwỳr pàr o mǒr kaxyw hã axpẽn ma. ⁴⁰ Hãmri nẽ kaxyw pàr o htýx xà jakà nhũm axrẽ nẽ gôx kãm rôròk pa. Nẽ pĩ ho pàr o juk xà nhõ xê xàja nhũm mẽ mãânèn krãhta. Hãmri nẽ akupým mrar xà hã kupêxê nhõ nhũm kòk ho hikot nẽ ma gô jakàx wỳr o mǒ. ⁴¹ Nom nhũm pàr kormã hakàx pẽ awry hã mǒr ri amnhĩ to kokwe kura nẽ pyka nhĩmòk ã nõ nhũm mẽ tee ri kot hkaxàr nẽ akupým gô xupým mã mẽnh kaxyw. Nom nhũm gô kot pàr nhĩxô htak týx kurẽ nhũm mẽ ixpẽ pikrakrak par o mǒ. ⁴² Jakamã nhũm pôristijaja tee ri omu hãmri nẽ ra mẽ kệp prêsjê nhĩmex kaxyw. Mẽ kot gôx kãm rôròk nẽ gô hipòk wỳr hpa ho nana nẽ mẽ kệp pikunor pymaj kot mẽ himex kaxyw. ⁴³ Nom nhũm mẽ hkrãhtũmja kãm Pawre pĩr prãm kêt jakamã ja nẽ mẽ hkurẽ nẽ mẽ inhmã:

—E mẽ ate apa ho gô rẽnh mex xwýnhjaja. Akumrẽx mra nẽ mrõ nẽ ho nana ho mra nẽ rê. ⁴⁴ No mẽ ate apa ho nana punuj xwýnhjaja kêt ka mẽ tapti rý pàr kukrêx õ mý nẽ hã ajêt nẽ hã ma mǒn rê. Anẽ.

Hãmri pa mẽ ã amnhĩ nhĩpêx anẽ nẽ ixpiitã ixkà hkĩnh pẽ ixrêr pa.

28

Gô hipòk pẽ Maw kamã mẽ pa hã mẽ harẽnh

Makre 16.17-18

¹ Tã pa mẽ ixpiitã ixkà hkĩnh pẽ ixrêr pa. Nhũm gô hipòk ã mẽ pa xwýnhjaja mẽ inhmã gô hipòk nhĩxi jarẽ nhũm xep kệp Maw. ² Nhũm Maw nhõ xwýnhjaja mẽ ixto mex nẽ. Nhũm axte na wryk rax nẽ nhũm kry htýx kumrẽx nhũm mẽ ixkamã ukaprĩ nẽ mẽ inhmã kuto nẽ mẽ inhmã kapẽr mex nẽ. ³ Hãmri nhũm Pawre kuwy kaxyw ri pĩ kawrà ho mra nẽ kuwy hwỳr o tẽ nẽ hã haxwỳr o xa. Hãmri nhũm kagã xoprẽ õ wẽnèn xihtýxja kuwy kagro pymaj pĩ rùm kato nẽ ìhkra hã kunha nẽ hã àpêr o ajêt. ⁴⁻⁵ Hãmri nhũm Pawre omu nẽ amnhĩ nẽ ho apê nẽ kuwy kamã kumẽ nhũm kamã tẽm nẽ xêt pa. Hãmri nhũm gô hipòk nhõ xwýnhjaja tee ri ja hã omu nẽ axpẽn mã:

—Kwa ga mẽmyti mǔj pumu. Mãn kệp mẽ hpar o pa xwýnh na. Hã na kagã õ wẽnèn xihtýxta kunha. Nà koja ty nẽ rĩ amnhĩ pumu. Ra hkà hkĩnh pẽ gô rùm mẽ pahwỳr rêr tã koja tã ty kãm ga. Anẽ.

⁶ Hãmri nhũm mẽ tee ri kot tanhmã amnhĩ to hã hkamnhĩx nẽ hamãr o kuhê. à htýx nẽ ìhkra hikot rý htyk kurẽ kumrẽx ã hkamnhĩx tã nhũm tanhmã amnhĩ kamã hamak to hkêt nẽ. ãm htýx ri hkĩnh nẽ kapẽr nẽ hpikunhar o ri mra. Hãmri nhũm mẽ tee ri omu nẽ axpẽn mã:

—Kwa tanhmã kot amnhĩ tore hã. Kệp mẽ hpar o pa xwýnh kêt. Mãn kệp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nẽ. Anẽ.

⁷ Nhũm gô hipôk ã mẽ õ pahihiti pê Puptija. Ōrkwỹ hã jawỳ jakamã nhũm amnhĩ kôt mẽ ixwỳ pa mẽ ma hkôt mō nẽ kuri hkôt ixpa ho ixtã apkati axkrunẽpxi nhũm mẽ ixto mex nẽ. ⁸ Nhũm ra Pupti nhĩpêxã kêp à nẽ nō. Kà kagro htỳx nẽ haôk. Hãmri nhũm Pawre hwỳr tẽ nẽ omu nẽ hã ìhkra xi nẽ ho Tirtũm wỳ nhũm akupỹm ho mex kurê kumrêx. ⁹ Hãmri nhũm gô hipôk nhõ xwỳnhja harênh ma nẽ Pawre hwỳr mẽ à xwỳnh piitã o mra nhũm mẽ omu nẽ Tirtũm nhỹ hã akupỹm mẽ ho mex pa. ¹⁰⁻¹¹ Hãmri nhũm gô hipôk nhõ xwỳnhjaja mẽ ixto mex rax nẽ.

Pawre axte Rôm wỳr nojarêt ã harênh
Rômãn 1.10-12, 15.30-32

Tã pa mẽ gô hipôôta kamã ixpa hã mytwrỹ axkrunẽpxi. Hãmri nhũm kôk xàpêr tỳxta hapêx pa mẽ axte inhnojarêt nẽ ma mō. Pàr õ kamã hpãnhã mō. Aresãnrir rũm pàrja pa mẽ hpãnhã kamã mō. Mẽ kot kãm “sãnti pihpo” anhỹr xwỳnhhta kamã. Na pre gô hipôk kamã haxwỳja kôk xàpêr tỳx hapêx jamãr xa hã hikwỹ htã ra axte nojarêt. Hãmri nhũm gô hipôk nhõ xwỳnhja ma mẽ inhmōr xà hã mẽ inhmã mẽ ixàpkur xà hkwy nhōr rax nẽ. Hãmri pa mẽ pàr wỳr inhgjêx pa nẽ ma kamã mō. ¹² Mōõ nẽ Sirakus wỳr pōj nẽ hã pàr xi. Hãmri nẽ krĩa kamã mẽ ixtã apkati axkrunẽpxi nẽ axte mō. ¹³ Mōõ hãmri nẽ Rekre hwỳr pōj nẽ hã pàr xi. Hãmri nẽ kamã mẽ ixtã apkati. Nhũm ra kahpa hkôt kôkja kawax pê àpêr mex jakamã pa mẽ ma hkôt mō. Nẽ mẽ ixtã apkati axkrut nẽ Potew wỳr pōj nẽ hã pàr xi. ¹⁴ Hãmri nẽ pàr rũm ijarōj nẽ krĩa kamã Jesus kôt mẽ ixtō nẽ htōx kwỳjê pumu nhũm mẽ amnhĩ wỳr mẽ ixwỳ. Pa mẽ ma mẽ hkôt mra nẽ mẽ hkôt ri ixpa hã ixtã ù semãn. Hãmri nẽ ma Rôm wỳr hpãnhã ixpar o mō. ¹⁵ Hãmri nẽ kormã amỹm inhmōr ri nhũm Rôm kãm Jesus kôt mẽ ixtō nẽ ixtōxjaja mẽ ijarênh ma nẽ man mẽ ixkutã mra. Ma krĩa pê Prasxi Apja mẽ “Wên Pijakrunẽpxi” anhỹr xwỳnh jarênhja wa hwỳr mẽ ixkutã mra. Hãmri pa mẽ axpên kaxpa nhũm Pawre mẽ omu nẽ hkĩnh nẽ. Nẽ mẽ hã Tirtũm mã amnhĩ jarê nẽ kãm:

—Pa Tirtũm? Nà ãm hãmri na ka mẽ ixkutã jajê rẽ. Na pa mẽ omu nẽ ixkĩnh nẽ. Nà amex o amex Tirtũm. Anẽ.

¹⁶ Hãmri pa mẽ ma mẽ hkôt Rôm wỳr mō nẽ pōj. Jatã Itar kãm Rôm wỳr pōj. Hãmri nhũm pōristi krãhtũm Pawre mã:

—E kot paj mẽ hagiênh xà kamã ajaxàr kêt nẽ. Kot kaj amã nhỹri ixkre kamã apa hprãm nẽ mamrĩ kamã apa. Nom koja pōristi hõ akôt pa ho pa.

Anhỹr jakamã nhũm nhỹri ixkre kamã pahihiti Sesti kot mar kaxyw kamã hamak o pa.

Pawre kot Rôm kamã tanhmã amnhĩ nhĩpêx to hã harênh
Atre 17.5-6

¹⁷ Tã nhũm Pawre Rôm kamã hã apkati axkrunẽpxi nẽ amnhĩ wỳr Ijaew xàptàr tũmrejê hwỳ nhũm mẽ hã akuprō nhũm mẽ kãm amnhĩ jarê nẽ mẽ kãm:

—E ixkwỳjaja. Pa mẽ amã amnhĩ jarê ka mẽ inhma. Nà na pa pre mẽ panhĩgêjtê kapêr nhĩrōp tanhmã ixãm to hkêt nẽ rỳ ixte tanhmã mẽ pahkwỳjê hõ hto hkêt tã nhũm mẽ pahkwỳjaja amarĩ xpynê. Jerujarê kamã xpynê nẽ Rôm nhõ xwỳnhjê nhĩhkram ijaxà. ¹⁸ Hãmri nhũm mẽ ixte amnhĩ nhĩpêx ã ixkukja nẽ tee ri mẽ kot mẽmoj mỳrapê xpĩr kaxyw tanhmã ixkukjêr to kaprỹ. Jakamã nhũm mẽ kãm ixkator prãm nẽ. ¹⁹ Nom nhũm mẽ pahkwỳjaja kãm ja mex kêt jakamã pa pre jar pahi maati Sesti kot ixte kãm amnhĩ jarênh ã inhmar kaxyw amnhĩm harê nẽ man hwỳr mō. Kot paj tanhmã kãm mẽ pahkwỳjê ho ixkapêr punuj to hkêt nẽ. ãm ixte amnhĩ tã tanhmã mar to hpix kaxyw na pa hwỳr mō.

²⁰ —Tã pa amnhĩ wỳr mẽ awỳ. Ixte mẽ amã amnhĩ jarênh kaxyw. Mẽ pahkaprĩ xwỳnhhta. Mẽ pahte kormã kamã pajamak o papa xwỳnh Jejusta. ãm ixte amnhĩ kaxyw hkôt ijamaxpêr pix mỳrapê na prem ã kàx o ixkaxpre anẽ. Anẽ.

²¹ Hãmri nhũm mẽ kuma nẽ kãm:

—Nà jar tanhmã ajarênh kute hkêt. Na pre Jutej kamã mẽ pahkwỳjaja tanhmã ajarênh to hã kagà nẽ mẽ ixwỳr mênh kêt nẽ. Nẽ ham mẽ kurũm mẽ hpôx xwỳnhjaja na prem tanhmã mẽ inhmã ajarênh to hkêt nẽ. ²² No na xep hte pyka piitã hkôt mẽ kãm mẽ

ate Jesus kôt amnhĩ xunhwỳr xwỳnhjê kurê nê. Na pa pre mẽ ajarênh ma nê mẽ inhmã axujarênh mar prãm nê. Anê.

²³ Hãmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhõrkwỹ hwỳr pikuprõnh rax nê nhũm mẽ kãm awjarê. Mẽ kãm ujarênh ry nê. Nê ho kamàt. Nê mẽ kãm:

—Nà mẽ pahte amnhĩ wỳr kamã pajamak o papa xwỳnh Jejusja. Kot kaj mẽ atõ amnhĩ kaxyw hkôt ajamxpêr nê hkôt amnhĩ xãm nhũm Tĩrtũm ja hã apumu nê ato hkra. Anê.

Nhũm pre ã mẽ kãm kapêr anê. Nê finat Mojes kot Tĩrtũm nhỹ hã Jejus kukamã tanhmã hã kagà htoja nhũm mẽ kãm harê. Nê Tĩrtũm nhỹ hã kapêr jarênh o mẽ pa xwỳnhjaja kot tanhmã hã kagà htoja nhũm mẽ kãm harê. ²⁴ Hãmri nhũm mẽ hkwỳjaja kuma nê hkôt hamxpêr nê amnhĩ kaxyw Jejus kôt hamxpêr nê hkôt amnhĩ xunhwỳ. No nhũm mẽ hkwỳjaja kuma nê ãm kuma nê kãm axte mar prãm kêt nê.

²⁵⁻²⁹ Jakamã kànhmã kuhê nê nojarêt nhũm Pawre mẽ kãm:

—Nà amnepêm na pre Tĩrtũm finat Ijaisti mã tanhmã kapêr to. ỹ hã kot mẽ panhĩgêjtê mã tanhmã kapêr jarênh to kaxyw. Tĩrtũm Karõ nhỹ hã kot mẽ kãm kapêr nê tanhmã mẽ harênh to kaxyw. Te Tĩrtũm tãm mẽ kãm kapêr pyræk mẽ kãm kapêr. Nê ãm hãmri tanhmã mẽ pahkwỳjê jarênh to. Na pre mẽ kãm:

E Ijaisti. Kêr ka ma akwỳjê hkôt ri mẽ kãm tanhmã ixkapêr jarênh to ho ri apa.

Nê mẽ kãm: “Kot kaj mẽ ajamak o axumar tỳx tã aprĩ hã ixkapêr mar kêt nê.

Nê mẽ ano ho arit tỳx tã aprĩ hã ixte amnhĩ nhĩpêx ã ixpumunh kêt nê.

Mẽ amã ixkapêr mar prãm kêt jakamã te mẽ ate mar pymaj amnhĩ jamak pro pyræk o amnhĩ nhĩpêx o ri apa.

Nê mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhõt pyræk o amnhĩ nhĩpêx o ri apa.

Ja o amnhĩ kaxyw ixkôt ajamxpêr kêt nê.

Kop mẽ amã ixkapêr mar prãm ronhỹx ka mẽ aprĩ hã inhmar tỳx nê.

Nê aprĩ hã ixte amnhĩ nhĩpêx ã ixpumunh mex nê.

Ja o amnhĩ tomnuj kaga hpa nê ixkôt amnhĩ xunhwỳ.

Pa ja hã mẽ apumu nê mẽ ato mex nê.

Tã ka mẽ ã amnhĩ nhĩpêx anhỹr kêt nê.” Anhỹr o kêr ka mẽ kãm ixkapêr jarênh o ri mẽ hkôt apa Ijaisti. Anê.

Na pre ã Tĩrtũm mẽ panhĩgêjtê kaxyw Ijaisti mã kapêr anê nhũm ô ri mẽ kãm ujarênh o pa nê mẽ pamã hã kagà. Jakamã kwa mẽ okora. Kêr ka mẽ jajê pyrà nê ã amnhĩ nhĩpêx anhỹr hkêt nê. Kwa mẽ inhma nê inhmar tỳx nê. Ijaew kêt xwỳnhjaja kot kapêr marja na ra Tĩrtũm kãm hprãm nê. Jakamã koja mẽ hwỳr mẽ kot kapêr jarênh o mẽ pa xwỳnh kwỳjê rê nhũm mẽ hkôt mẽ kãm ujarênh o pa nhũm mẽ kuma nê mẽ akurom kãm mar prãm nê. Anê.

Hãmri nhũm mẽ kuma nê hapôx pa nê ma akupỹm xpên mã tanhmã kapêr jarênh to ho mra. ³⁰ Hãmri nhũm pahi maati Sesti tokyx amnhĩ wỳr Pawre hwỳ nê tanhmã mar to hkêt nhũm õrkwỹ kamã kêp prês nê pa ho hã amgrà axkrut. Nê tãm õrkwỹ pãnhã mẽ kãm amnhĩre. Nhũm pre krĩ nhõ xwỳnhjaja ohtô nê hwỳr mra nhũm amnhĩ wỳr mẽ omu nê hkĩnh nê. ³¹ Na pre hte amnhĩ wỳr mẽ kuwỳ nê mẽ kãm Tĩrtũm kapêr jarênh o hkrĩ. Mẽ kot Tĩrtũm Kra Pahihti Jejus Kris kôt amnhĩ xunhwỳr nhũm Tĩrtũm kot ja hã mẽ omunh nê amnhĩ katut kôt mẽ kot amnhĩ tomnuj rênh par nê mẽ ho hkra hã mẽ kãm ujarênh o hkrĩ. Nê mẽ kot hkôt amnhĩ xunhwỳr xwỳnhjê jahkre. Tanhmã mẽ kot Jejus kôt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mēhõ ja nê tanhmã kãm kapêr to hkêt nê.

Tã ãm ja pix Teopre. Ixpê Rukre na pa awỳr kagàja nhĩpêx nê kumê. Nê kamã amã tanhmã mẽ pahkwỳjê jarênh to. Tã ãm ja pix na hapêx.

Rõmãn

Pawre kot Rõm kãm Jejus kõt hkwyjê hwyr kagà nê mênh

Kagà ja na pre Pawre hipêx. Kêp Jejus nhỹ hã mẽ ahkre ho pa xwýnh na pre. Na pre hte mry kà ho ixkre nhĩpêx nê mẽ kãm ho wênê ho mẽ hkõt pa pê mẽ piitã mẽ kãm Tĩrtũm kapêr jarênh o pa. Tã krĩ pê Rõm kamã mẽ kot Jejus kõt amnhĩ xunhwyr xwýnhjê hwyr kagàja nhĩpêx nê mẽ hwyr kumê. Kormã ma mẽ hwyr mör nê mẽ omunh kêt ri.

Nê Jejus kêp Tĩrtũm mã tanhmã mẽ pajarênh to xwýnh ã nhũm pre mẽ kãm harê nê hã kagà. Jejus kot mẽ pahte amnhĩ tomnuj pãnhã mẽ panê htyk jakamã na hte Tĩrtũm mẽ pahte hkõt amnhĩ xunhwyr ã mẽ pahpumu nê Jejus kukwak ri mẽ pahte amnhĩ to mex xwýnh ã mẽ pajarê.

Nê Tĩrtũm Karõ nhỹ hã mẽ kot amnhĩ nhĩpêx nyw nê hamaxpêr nyw o pa hã nhũm Pawre mẽ kãm karõ nê hã kagà. Æ na pre mẽ kãm mẽmoj jarê nê hã kagà anê. Nê hã kagà ho:

¹ Pa Rõm nhõ xwýnhjaja? Xà mẽ amex? E ot pa mẽ awyr kagà nhĩpêx nê kumê. Tĩrtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhĩpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mẽ awyr kagà nhĩpêx nê mênh anê. Ixte Jejus nhỹ hã mẽ ahkre ho ri ixpa xwýnh na pa. Na pa hte kãm tanhmã amnhĩ nhĩpêx to ho ri ixpa. Tã ã mẽ awyr kagà nhĩpêx nê mênh anê.

² Amnepêm na pre Tĩrtũm nhỹ hã kapêr jarênh o ri mẽ pa xwýnhjaja mẽ pakukamã mẽ panhĩgêjtjê mã Jejus kukamã tanhmã harênh to ho ri pa. Nê mẽ kãm kapêr jarênh o mẽ hkõt pa nê mẽ kãm:

—Koja nhỹrmã Tĩrtũm mẽ pahpiitã mẽ panê tanhmã kot amnhĩ nhĩpêx to mã xwýnh mẽ nhũm mẽ hpiitã hprĩ hã harênh ma nê omu. Anê.

Nhũm prem ã Jejus kukamã mẽ kãm harênh anhỹr o ri mẽ hkõt pa. Tĩrtũm kapêr ã kagà htũm kamã harênh xà hkõt tanhmã mẽ kãm harênh to. ³ Tĩrtũm Kra Jejus Krisja na pre mẽ kãm harênh o ri mẽ hkõt pa. Mẽ panhõ Pahihti na. Kêp Tĩrtũm Kra htã na pre mẽ pahpyrà nê ĩ ho amnhĩ nhĩpêx nê wrý nê katorxà nhõxà hkre rũm kato. Jakamã kêp Tĩrtũm Kra pix kêt mãânên katorxà hkõt kêp higêt Tawi hkanrêhã htãmnhwý.

⁴ Kêp Tĩrtũm Kra htã nhũm prem axtem nê tanhmã hamaxpêr to nê kupĩ. Nom nhũm Tĩrtũm kêp amnhĩ Kra hã akupỹm ho htĩr. Jakamã na pu htem harênh ma nê kãm pajamaxpêr o:

—Jesús kêp Tĩrtũm Kraa. Mẽ kot kêp hpĩr tã nhũm akupỹm ho htĩr. Jakamã nhũm Tĩrtũm pyrà nê hihtýx o hihtýx. Anê.

⁵ Tã ã Tĩrtũm kot Kra nhĩpêx anhỹrja ri na mãânên pa ixto mex nê mẽ akaxyw ixãm. Jakamã na pa hte ma krĩ piitã hkõt mẽ kãm tanhmã Jejus Kris jarênh to ho ri mẽ hkõt ixpa. Ijaew mã nê Ijaew kêt xwýnhjê mã. Mẽ kot harênh mar nê amnhĩ kaxyw kãm hamaxpêr nê kapêr kõt pix mã amnhĩ nhĩpêx mex kaxyw. ⁶⁻⁷ Nê mẽ apê Rõm nhõ xwýnhjaja. Na ka prem Jejus kõt amnhĩ xunhwý nhũm Tĩrtũm ja hã mẽ apumu nê mẽ ato hkra nê mẽ apê Jejus mẽ wa hkwy hã mẽ ajarê. Mẽ ate hkõt amnhĩ nhĩpêx kaxyw nhũm pre ã mẽ ajarênh anê.

Tã ot pa kagà nhĩpêx nê mẽ awyr mênh kaxyw. Tĩrtũm kot mẽ ato hkra xwýnhjê hwyr. Tĩrtũm kãm mẽ ajapêê.

Na pa hte mẽ ato mẽ panhĩpêêxà maati Tĩrtũm mẽ Pahihti Jejus Kris wa hwyr rãhã ri ixpa. Nê mẽ ato wa hwyr o:

—Kwa kêr ka wa Rõm kamã war akrajê pumunh mex nê mẽ kutã anojarêr rãhã nê. Kê mẽ hamakêtkati nê àmnhĩx ri tanhmã amnhĩ nhĩpêx to ho ri pa. Anê.

*Pawre kot Rõm nhõ xwýnhjê pumunh prãm ã amnhĩ jarênh
Atre 28.15-16; Rõmãn 15.22-29*

⁸ Nẽ na ka prem amnhĩ kaxyw Jejus Kris mã ajamaxpẽr nẽ hkõt amnhĩ xunhwỳ nhũm krĩ piitã hkõt mẽ pa xwỳnhjaja mẽ ajarẽnh ma. Nẽ mẽ ate amnhĩ nhĩpêx nyw ã mẽ ajarẽnh ma nẽ axpẽn mã tanhmã mẽ ajarẽnh to ho pa. Nẽ mẽ ajarẽnh o:

—Kwa na xep Rõm kãm mẽ hkwỳjaja amnhĩ kaxyw Jejus mã hamaxpẽr tỳx nẽ. Nẽ hkõt amnhĩ nhĩpêx mex rãhã ho ri pa. Anẽ.

Pa ã mẽ kot mẽ ajarẽnh anhyrja ma nẽ ixkĩnh tỳx nẽ. Nẽ Tĩrtũm mã mẽ anhyr hã ixkĩnh ã amnhĩ jarẽnh o ri ixpa. ⁹ Na pa hte mẽ ato hwỳr rãhã ho ri ixpa. Nẽ nhỹri mẽ kãm Tĩrtũm Kra Jejus kapẽr jarẽnh o ri ixpa nẽ mẽ amã ijamaxpẽr nẽ mẽ ato kuwỳ. Nẽ tanhmã Tĩrtũm mã amnhĩ nhĩpêx to ho ixpa pẽ mẽ amã ijamaxpẽr nẽ mẽ ato kuwỳ. Tĩrtũm kot ja hã ixpumunh mex. ¹⁰ Na pa hte tanhmã kãm amnhĩ jarẽnh to kaxyw nẽ mẽ akaxyw amnhĩ to kuma nẽ kãm:

—Pa Tĩrtũm? Na pa ra inhmã ma Rõm wỳr inhmõr nẽ kamã akõt ixkwỳjê pumunh prãm tỳx kumrẽx. Xà kot ka tokyx mẽ hwỳr inhmẽ nà? Anẽ.

¹¹ Na pa ra inhmã mẽ awỳr inhmõr prãm tỳx nẽ. Na pre Tĩrtũm Karõ tanhmã ixkrã hto pa ã hã kapẽr ã kagã mar tỳx nẽ. Nẽ hkõt mẽmoj mex pumunh rax nẽ. Tã ra inhmã ma mẽ awỳr inhmõr nẽ amnhĩ xõ ri mẽ amã harẽnh prãm nẽ. Mẽ ate inhmar nẽ aprĩ hã Jejus Kris kõt amnhĩ xunhwỳr tỳx nẽ hkõt amnhĩ nhĩpêx mex rãhã ho ri apa kaxyw. ¹² Kot paj nhỹrmã ma mẽ awỳr mõ. Nẽ mẽ awỳr pøj pu mẽ axpẽn pumu nẽ pahkĩnh nẽ. Mẽ pahte amnhĩ kaxyw Jejus Kris mã pajamaxpẽr mex o papa hã axpẽn pumu nẽ pahkĩnh nẽ. Nẽ mẽ pahpiitã hkõt amnhĩ nhĩpêx mex o ri papa.

¹³ E ixkwỳjaja. Xatã ixte mẽ awỳr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhỹrmã ma mẽ awỳr mõ. Mẽ ate ja hã inhmar kaxyw na pa ã Tĩrtũm noo mã mẽ amã amnhĩ jarẽnh anẽ. Na pa pre krĩ hkwỳ kamã mẽ apê Ijaew kêt xwỳnh kwỳjê hwỳr ixpa. Nẽ mẽ kãm Jejus kot mẽ panê tanhmã amnhĩ nhĩpêx to hã harẽnh o ri mẽ hkõt ixpa. Nhũm mẽ hkwỳjaja inhma nẽ hkõt amnhĩ xunhwỳ. Ja kaxyw na pa inhmã ma mẽ anhõ krĩ hwỳr inhmõr prãm nẽ. Mẽ akwỳjaja kot ixkapẽr mar nẽ mẽ apyrã nẽ Jejus kõt amnhĩ xunhwỳr kaxyw. ¹⁴ Na pre ra Tĩrtũm ixte kapẽr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwỳnhjê kaxyw. Mẽ kãm ma ho mẽ pa xwỳnhjê mẽ mẽ kãm ma hkêt o mẽ pa xwỳnhjê mã. Nẽ mẽ kot kagã pumunh xwỳnhjê mẽ mẽ kot kagã pumunh kêt xwỳnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harẽnh o ri mẽ hkõt ixpa kaxyw. ¹⁵ Jakamã na pa ra inhmã mẽ apê Rõm nhõ xwỳnhjê hwỳr inhmõr prãm nẽ. Ixte mẽ anhõ krĩ kamã mẽ piitã mẽ kãm ja jarẽnh o ri ixpa nhũm mẽ kot inhmar nẽ mẽ pahpyrã nẽ Jejus kõt amnhĩ xunhwỳr kaxyw.

Jejus kot mẽ panê htyk ã harẽnh

Sikũn Ximotre 1.6-12

¹⁶ Nẽ Jejus kot mẽ panê htyk ã harẽnhja ãm hãmri na. Harẽnhja mex o mex. Na htem kuma nẽ kãm hamaxpẽr nẽ amnhĩ kaxyw hkõt hamaxpẽr nẽ hkõt amnhĩ xunhwỳ. Hãmri nhũm Tĩrtũm ja hã mẽ omu nẽ mẽ nẽ mẽ kot amnhĩ tomnuj o hapêx pa nẽ mẽ ho hkra. Nom mẽ ixpê Ijaew nhõ xwỳnhjê pix kêt. Mãänen mẽ apê Ijaew kêt xwỳnhjaja nhũm kãm mẽ pajapê ho axpẽn pyrãk. Jakamã na pu htem Jejus kõt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra. Ja kaxyw àhpumunh tỳx o àhpumunh tỳx. ¹⁷ ãm mẽ kot amnhĩ kaxyw Jejus mã hamaxpẽr xwỳnh pixjaja na hte mẽ ho hkra. Kapẽr ã kagã htũm kot tanhmã ja jarẽnh to nẽ harẽnh kot:

Na hte Tĩrtũm mẽ kot amnhĩ kaxyw Kra mã hamaxpẽr ã mẽ omunh xà hkõt mẽ ho hkra nhũm mẽ amnhĩ kaxyw kãm hamaxpẽr rãhã ho pa. Jao ra ô ri tãm amnhĩ nhĩpêx o pa. Anẽ.

Mẽ pahpiitã mẽ pahte amnhĩ tomnuj xwỳnh ã mẽ pajarẽnh

Atre 14.15, 17.22-29; Apokarip 9.20-21

¹⁸ Nẽ mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harẽnh to. Na htem Tĩrtũm kapẽr ma nom amnhĩ tomnuj gryk ã ãm kuma. Nẽ mẽ

hkwỳjaja kot kapêr mar pymaj kapêr ò ho mẽ kêp àmnàr rãhã ho ri pa nhũm Tĩrtũm ja hã mẽ omu nhũm ja kêp omnuj nê. ¹⁹⁻²⁰ Te mẽ kot Tĩrtũm kot amnhĩ nhĩpêx ã omunh kêt pyrãk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kêp Tĩrtũm ã omunh mex nê. Nê kêp mẽmoj piitã ho kator xwỳnh ã omunh mex nê. Nê mex o mex ã omu nê hihtỳx o hihtỳx hã omu. Tĩrtũm kot amnhĩ nhĩpêx kot amnhĩrit mex nhũm mẽ kot omunh mex tã hkôt amnhĩ xunhwỳr kêt nê. Nê axtem nê hamaxpêr o:

—Tk. Tĩrtũm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japêr. Anê.

Ra mẽ kot amnhĩ nhĩpêx ã omunh mex tã ri ã hamaxpêr anê. Jakamã nhũm Tĩrtũm tee ri ja hã mẽ omu nhũm ja kêp omnuj tỳx nê. ²¹ Mẽ kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rỳ arĩ hamaxpêr japêr nê kãm:

—Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhỳr o amnhĩ kaxyw kãm kapêr kêt nê. Nê ãm htỳx tanhmã hamaxpêr punuj to pix o ri pa. Te kamàt kô kamã ri mẽ pa xwỳnhjê kot amnhĩ nhĩpêx pyrã nê mẽmoj mex pumunh kêt nê.

²² Mẽ kot àhpumunh tỳx ã amnhĩ to jarkrar o ri pa htã no ãm te mẽ hkrã kanhĩn kêt nê mẽ hamaxpêr kêt pyrãk o amnhĩ nhĩpêx. ²³ Jakamã na htem amnhĩm mẽmo karõ nhĩpêx. Mẽmo htyk mã xwỳnhjê hõ karõ nhĩpêx. Tanhmãn panhĩ karõ rỳ mẽmo mry karõ rỳ mẽmo kuwênh karõ. Rỳ mẽmo kagã karõ nhĩpêx. Hãmri nê ho ò sãnti nê te ri ho Tĩrtũm nhĩpêx pyrãk o hipêx. Jao hpar pê hkõn krã ho rôrôk nê amnhĩ to kuwỳ nê kãm amnhĩ jagrer pê kãm mex o mex ã harê. Tĩrtũmja sãnti rom htĩr o htĩr tã nhũm mẽ axtem nê sãnti gryk ã hkaga nê ã amnhĩ nhĩpêx o pa anê. ²⁴ Jakamã nhũm tee ri ã mẽ kot amnhĩ nhĩpêx anhỳr ã mẽ omu nê amnhĩ pyrã nê mẽ hkaga nê ãm mẽ omu. Jakamã nhũm mẽ ãm amnhĩ krã hkôt tanhmã ri amnhĩ tomnuj to ho pa. Nê axpên kãm ri tanhmã hpijaam kêt to. ã na htem htỳx ri amnhĩ tomnuj anhỳr o pa.

²⁵ Tĩrtũm kapêrja ãm hãmri htã nhũm mẽ axtem nê te amnhĩ pum rênh pyrãk o hipêx nê kãm hamaxpêr kêt nê. Nê hpãnã ri mẽ hêx xwỳnhjê kapêr pix ma nhũm ja te mẽ kãm mex pyrãk. Na htem ã amnhĩ nhĩpêx anê hãmri nê axtem nê Tĩrtũm kot mẽmoj nhĩpêx pix parpê rôrôk nê amnhĩm mex o mex ã harê. Nom kot hipêx xwỳnh Tĩrtũm parpê mã ã amnhĩ nhĩpêx anhỳr kêt nê. Nom kot mẽmoj nhĩpêx xwỳnhhta mex o mex jakamã koja mẽ kot hkôt amnhĩ nhĩpêx xwỳnhjaja jajê rom kãm mex o mex ã harênh tũm rãhã ho ri pa. ²⁶ No mẽ kot amnhĩ tomnuj xwỳnhjaja na hte Tĩrtũm amnhĩ pyrã nê mẽ hkaga nhũm mẽ htỳx amnhĩ krã hkôt ri tanhmã amnhĩ tomnuj to ho ri pa. Jao mẽni hkwỳjaja axtem nê axpên gryk ã mjên kaga nê axpên nhĩõ ho mjên. ²⁷ Nhũm mẽmy hkwỳjaja mãânên axtem nê amnhĩ kwỳjê my gryk ã hprõ kaga nê axpên nhĩõ ho hprõ. Na htem ã axpên kamã hpijaam kêt o pa anê. Mỳrapê koja mẽ à pix kãm amnhĩ xà htỳx kamã hamak o pa. ²⁸ Na htem amnhĩ tomnuj gryk ã Tĩrtũm mã hamaxpêr kêt nhũm tee ri amnhĩ tã mẽ omu nê hamaxpêr o:

—Mẽ kãm amnhĩ tomnuj pix prãm jakamã kwãr mẽ mãmrĩ ã amnhĩ nhĩpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nê.

²⁹ Hãmri nê mẽmoj punuj pix mã hamaxpêr.

Nê kãm amnhĩ mex pix prãm mã hamaxpêr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Ně kãm axpẽn kaxyw tanhmã hamaxpěr punuj to pix prãm.

Ně kãm tanhmã axpẽn to kapěr punuj to pix prãm.

³⁰ Ně kãm mẽmoj tã axpẽn to hêx pix prãm.

Ně kãm Tirtũm prãm kêt o ri pa.

Ně mẽmoj tã axpẽn mã àkjêr o ri pa.

Ně mẽmoj tã amnhĩ to jarkrar rãhã ho ri pa.

Ně tanhmã amnhĩ tomnuj to pix kukamã hamaxpěr. Nhũm mẽ katorxà ně mẽ hipêxà tee ri ja nê tanhmã mẽ kãm kapěr to no nhũm mẽ mar kêt kumrêx.

³¹ ã mẽ kot amnhĩ nhĩpêx anhỹr o ri mẽ pa xwỳnhjaja na hte Tirtũm kãm mẽmoj mex nhũm mẽ kêp omnuj ně nhũm Tirtũm kêp mẽmoj omnuj nhũm mẽ kãm mex ně. Ně axpẽn mã mẽmoj tanhmã ho hã amnhĩ jarênh tã ho anhỹr kêt ně. Ně axpẽn kãm ukapřĩ ho ri pa hkêt ně. ³² Tirtũm kapěr ã kagà htũm kot tanhmã mẽ hkukamã mẽ harênh to ně mẽ harênh kot:

ã mẽ kot amnhĩ nhĩpêx anhỹr o ri mẽ pa xwỳnhjaja koja mẽ nhỹrmã ty hãmri ně amnhĩ xà htỳx kamã hamak rãhã ho ri pa ho pa. Aně.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt ně. Arĩ ã amnhĩ nhĩpêx anhỹr o pa rãhã ně. Nhũm mẽ hkwỳjaja mẽ kot amnhĩ tomnuj ã mẽ omu ně mẽ uràk ně ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà ně mẽ omu ně hkĩnh ně. Na htem ã amnhĩ nhĩpêx anhỹrja gryk ã Tirtũm kaga nhũm tee ri amnhĩ tã mẽ omu ně amnhĩ pyrà ně mẽ hkaga ně ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

2

Mě kot amnhĩ tomnuj xwỳnhjê hkukamã mẽ harênh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Ně kot ka mẽ atõ ã mẽ kot amnhĩ tomnuj anhỹr xwỳnhjê kot amnhĩ nhĩpêx ã mẽ harênh ma ně ã ajamaxpěr aně ně ajamaxpěr o:

—Tk. Mě kot amnhĩ tomnuj pix o ri pa xwỳnh kênã. No pa na ã ixte amnhĩ nhĩpêx anhỹr o ri ixpa hkêt. Mě kurom ixte tãm amnhĩ nhĩpêx o ri ixpa xwỳnh na pa.

Anhỹr o amnhĩ jarê. Kwa nà mẽ ã ajamaxpěr anhỹr kêt ně. Mě pajaxwỳja na pu htem tõhã mẽ uràk ně tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh aně ně te ka ate amnhĩ jarênh pyràk. ² Tirtũm kapěr ã kagà htũm kot mẽ kot amnhĩ tomnuj o ri mẽ pa xwỳnhjê jarênh kot:

Mě kot amnhĩ tomnuj mỳrapê koja mẽ nhỹrmã amnhĩ xà htỳx kamã hamak rãhã ho ri pa. Aně.

ãm hãmri ã mẽ harênh kot anhỹr. ³ Mãn ka mẽ atõ tanhmã amnhĩ kukamã ajamaxpěr to ně ajamaxpěr o:

—Nà koja Tirtũm nhỹrmã amnhĩ nê kuwy hwỳr mẽ kot amnhĩ tomnuj xwỳnhjê rě. No pa koja hwỳr inhmênh kêt ně. Aně.

Kwa mẽ ã ajamaxpěr anhỹr kêt ně. Kot ka mẽ ã amnhĩ kukamã ajamaxpěr anhỹr tã tõhã mẽ uràk ně tanhmã amnhĩ tomnuj to. Jakamã koja Tirtũm mẽ uràk ně hã tanhmã mẽ ato. ⁴ Kot kaj mẽ atõ tanhmã amnhĩ tomnuj to hãmri ně ãm ja hã amnhĩ pumu ně ajamaxpěr o:

—Ixte amnhĩ tomnuj xwỳnh tã na hte Tirtũm ja hã ixpumu ně ãm ixpumu ně hã tanhmã ixto hkêt ně. Kêp mẽ ixkamã ukapřĩ xwỳnh jakamã na hte gryk tokyx anhỹr kêt ně. Jakamã kot paj arĩ tanhmã amnhĩ tomnuj to ho ri ixpa ně aa jam inhũrer kêt ně. Tirtũm kot ja hã tanhmã ixtore kaxyw hã.

Anhỹr o ajamaxpěr. No ãm ja kot anhỹr kêt. Na hte Tirtũm kormã amnhĩ tã mẽ pajamã. Mě pahte amnhĩ tomnuj kaga ně hpãnhã hkôt amnhĩ xunhwỳr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt ně.

⁵ Mě akrã hihtỳx jakamã mẽ amã hkôt amnhĩ xunhwỳr prãm kêt. Na ka htem tanhmã amnhĩ tomnuj to pix kukamã ajamaxpěr o ri apa. Ně gaa ně ra anhỳr kumrěx. Nhũm Tĩrtũm tee ri ja hã mẽ apumu nhũm ja kệp omnuj tỳx o mỗ. Jakamã koja nhỹrmã tanhmã mẽ ajarěnh to ně gryk tỳx kãm tanhmã mẽ atomnuj tỳx to. Ầm hãmri na hte mẽ pahte amnhĩ nhĩpêx ã mẽ pahpumunh xà hkôt ahpỳnhã tanhmã mẽ panhĩpêx to.

⁶ Koja nhỹrmã mẽ pahpiitã kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mě kot amnhĩ to mex o ri mẽ pa xwỳnhjaja nhũm mẽ ho mex nẽ. Ně mẽ kot amnhĩ tomnuj o ri mẽ pa xwỳnhjaja nhũm mẽ homnuj nẽ. Koja nhỹrmã mẽ pahpiitã mẽ pahto hpimrãatã ã mẽ panhĩpêx anẽ. ⁷ Mě kot hkôt tãm ri amnhĩ nhĩpêx o pa pê kãm Tĩrtũm kot amnhĩm mẽ mex ã mẽ harěnh prãm xwỳnhjaja koja nhỹrmã amnhĩm mẽ mex ã mẽ harẽ. Hãmri nhũm mẽ kuri htĩr tũm nẽ hkĩnh nẽ mex kumrěx nẽ pa ho pa. ⁸ Nom mẽ kot amnhĩ mã pix mã ri hamaxpěr o ri mẽ pa xwỳnhjaja. Ně mẽ kot tanhmã amnhĩ tomnuj to gryk ã Tĩrtũm kapěr kaga xwỳnhjaja koja kãm mẽ hkĩnh kêt nẽ tanhmã mẽ homnuj tỳx to. ⁹ Mě kot amnhĩ tomnuj xwỳnh piitã koja mẽ nhỹrmã amnhĩ xà htỳx kamã hamak rãhã nẽ pa ho pa. Ijaew kumrěxjaja nẽ hpãnhã Ijaew kêt xwỳnhjaja nhũm mẽ amnhĩ xà htỳx kamã hamak rãhã nẽ pa ho pa. Mě kot amnhĩ tomnuj tỳx o paja mỳrapê.

¹⁰ No kêt tãm mẽ kot amnhĩ nhĩpêx xwỳnhjaja koja Tĩrtũm mẽ ho mex rax rãhã ho pa ho pa. Nẽ amnhĩm mẽ kot amnhĩ to mex xwỳnhjê hã mẽ harẽ. Nẽ tanhmã mẽ ho mex to nhũm mẽ kamã amnhĩ krit nẽ pa ho pa. Hamakêtkati nẽ hkĩnh nẽ àmnhĩx ri pa ho pa. Ijaew kwỳ kumrěxjaja nẽ mãănẽn Ijaew kêt xwỳnh kwỳjaja nhũm mẽ mex nẽ hamakêtkati nẽ hkĩnh nẽ àmnhĩx ri pa ho pa. ¹¹ Koja Tĩrtũm nhỹrmã ahpỳnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarěnh to pê tanhmã mẽ panhĩpêx to. Mě ixpê Ijaewjaja nẽ mẽ apê Ijaew kêt xwỳnhjaja nhũm ã mẽ pahpiitã mẽ panhĩpêx anẽ.

¹² Amnepêm na pre finat Mojes mã tanhmã kapěr to nhũm kuma nẽ ô ri hã kagà hpa. Mě ixpê Ijaew ri na kapěr ã kagàja. Ra mẽ ixte mar tỳx jakamã koja mẽ ixtõ ra kapěr mar tỳx tã hkôt amnhĩ nhĩpêx kêt hãmri nhũm Tĩrtũm tee ri amnhĩ tã omu nẽ ã amnhĩ nhĩpêx anhỳrja mỳrapê nhỹrmã ma mẽ kot amnhĩ xà htỳx kamã hamak tũm xàta wỳr kumẽ. Kot kapěr mar tỳx tã hkôt amnhĩ nhĩpêx kêt mỳrapê nhũm ã hipêx anẽ. No kêt mẽ apê Ijaew kêt xwỳnhjaja mẽ ixkĩnhã mẽ ari Tĩrtũm kapěr ã kagà hkêt jakamã koja mẽ ate kapěr nhĩrôp mẽ akuhê hã mẽ apumunh kôt tanhmã mẽ anhĩpêx to hkêt nẽ. Koja hpãnhã mẽ ate tanhmã amnhĩ tomnuj to ho apa mỳrapê mẽ kot amnhĩ xà htỳx kamã hamak o pa tũm xàta wỳr mẽ arẽ.

¹³ Na hte mẽ kot kapěr mar ã mẽ omunh xà hkôt amnhĩm mẽ kot amnhĩ to mex xwỳnh ã mẽ harěnh kêt nẽ. Ầm mẽ kot kapěr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwỳnh ã mẽ harẽ. ¹⁴ No mẽ hkwỳjaja kormã kot kapěr mar kêt tã te ra mẽ kot mar mex pyrãk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrěx. Te kot Ijaew pyrã nẽ Tĩrtũm kapěr mar tỳx nẽ hkôt amnhĩ nhĩpêx o ri pata pyrãk. ¹⁵ Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapěr kot mẽ hkrãm gjêx pyrãk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nẽ hkaprĩ nẽ. Nẽ tãm amnhĩ nhĩpêx ã amnhĩ pumu nẽ hkĩnh nẽ.

¹⁶ Tã koja nhỹrmã Tĩrtũm Jejus Kris mã anẽ nhũm kuma hãmri nẽ mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harěnh to. Nẽ mẽ hamaxpěr kôt mẽ omunh mex xà hkôt tanhmã mẽ harěnh to. Mě papajaja mẽ pahte axpẽn jamaxpěr kôt axpẽn pumunh kêt tã Jejus kot mẽ pajamaxpěr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harěnh o ixpa pê ã mẽ kãm ixjarěnh anhỳr o ri ixpa.

¹⁷ Nê ixpyrà nê mẽ apê Ijaew kwỳjaja na ka mẽ axtem nê Ijaew kêt xwỳnhjê mã tanhmã amnhĩ to jarkrar o ri apa nê mẽ kãm:

—Nà mẽ ixpê Ijaew ri Tĩrtũm kapêr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra. ¹⁸ Nê mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par nê mẽ kot amnhĩ to mex xà pumunh par nê mẽ kot amnhĩ tomnuj xà pumunh par. Mẽ apê Ijaew kêt xwỳnhjê rom mẽ ixte mẽmoj piitã omunh par kumrêx. Anê.

¹⁹⁻²⁰ Nê amnhĩ jarênh o:

—Nà te mẽ ixpê mẽ nohkre xwỳnhjê pa hã mẽ hamỳnh nê ri mẽ ho ixpa xwỳnh pyràk. Jakamã Ijaew kêt xwỳnh pê htỳx ri mẽ pa xwỳnhjaja na pa htem mẽ kãm Tĩrtũm kapêr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

²¹ Anhỹr ã amnhĩ jarênh nê mẽ ate kapêr o mẽ ahkre ho apa htã hkôt amnhĩ nhĩpêx kêt nê.

Nê mẽ ate mẽ kot axpên pê àhkĩnh nê mẽ hkurê htã no ãm mẽ kamjaja axpên pê axàhkĩnh o ri apa.

²² Nê mẽ amã sãnti hkĩnh kêt ã amnhĩ jarênh tã axtem nê hwỳr agjê nê hpar pê kàxpore nhĩkwỳ xwỳnh o axàhkĩnh o ri apa.

Nê mẽ kot axpên prõ ho amnhĩkati nê mẽ hkurê ho apa htã mẽ kamjaja ã ri amnhĩ nhĩpêx anhỹr o ri apa.

²³ Nê mẽ ate Tĩrtũm kapêr ã kagà mex o mex ã harênh tã hkôt amnhĩ nhĩpêx hkêt nê. Jakamã nhũm mẽ akwỳjaja ja hã mẽ apumu nê mẽ apyrà nê Tĩrtũm ã hpijaam kêt o pa.

²⁴ Tĩrtũm kapêr ã kagà htũm kot tanhmã mẽ ate amnhĩ nhĩpêx ã mẽ ajarênh to nê mẽ ajarênh kot:

Mẽ kêp Ijaew kêt xwỳnhjaja na htem Ijaew kot htỳx ri amnhĩ nhĩpêx o ri mẽ pa hã mẽ omu nê mẽ ã hã tanhmã Tĩrtũm o kapêr punuj to ho ri pa. Anê.

²⁵ Mẽ pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kêp mẽmy kwỳt kà jakà. Finat Mojes kot Tĩrtũm nhỹ hã mẽ panhĩgêjtê mã hã karõ xà hkôt na pu htem ã mẽ hipêx anê. Mẽ pahte Tĩrtũm mã mẽ pahkrajê nhõr ã amnhĩ to amnhĩrit kaxyw. Jakamã na pu htem arĩ Mojes kapêr kôt ã mẽ hipêx anê nhũm Tĩrtũm kãm ja mex nê. Nom kot pu mẽ kapêr kwỳm ri tanhmã amnhĩ nhĩpêx to ho papa nhũm ja kêp omnuj tỳx nê hãmri pu mẽ tee ri mẽ pahkrajê my kwỳt kà jakàr kaprỳ. Na hte Tĩrtũm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pê mẽmy kwỳt kà jakàrja nhũm kãm mex nê. ²⁶ Ijaew kêt xwỳnhjaja kot ã mẽ hkrajê nhĩpêx anhỹr kêt tã ra mẽ hkwỳjaja Tĩrtũm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwỳt kà jakàr pyràk o amnhĩ nhĩpêx. Jakamã nhũm Tĩrtũm ja hã mẽ omu nê mẽ kãm:

—Nà ãm hãmri. Mẽ ate amnhĩ my kwỳt kà jakàr kêt tã mẽ apê ixkra na ka mẽ. Anê.

²⁷ Mẽ kot amnhĩ jakàr kêt tã Tĩrtũm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwỳnh ã mẽ harê. Mẽ kot amnhĩ jakàr kêt tãã.

No mẽ kajaja mẽ ate Tĩrtũm nhỹ hã Mojes kapêr ã kagà mar tỳx tã hkôt amnhĩ nhĩpêx kêt nê. Ja mỳrapê koja ja hã mẽ apumu nê Ijaew kêt xwỳnhjê kĩnhã mẽ ate amnhĩ tomnuj xwỳnh ã mẽ ajarê. Ra mẽ ate amnhĩ jakàr tã mẽ ate amnhĩ tomnuj xwỳnh ã mẽ ajarê.

²⁸ Nê kot ka mẽ atõ tanhmã amnhĩ to jarkrar to nê amnhĩ jarênh o:

—Nà ixpê Ijaew jakamã na hte Tĩrtũm mẽ kot inhmey kwỳt kà krãhyr kôt ixto kraa. Anê.

Nom xà na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Na htem ãm htỳx ã amnhĩ to jarkrar anhỹr kaprỳ ho pa.

²⁹ Nê Tĩrtũm Karõ kot mẽ hkarõ mã gjêx xwỳnhjaja kêp Tĩrtũm kra jakamã na htem Tĩrtũm kãm hprãm xà hkôt amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nê. Rỳ htỳx hamaxpêr o:

—Nà kot paj Mojes kapër ã kagà hkôt amnhĩ nhĩpêx nhũm Tĩrtũm ja hã ixpumu nẽ amnhĩm inhmex ã ijarẽ nẽ ixto hkra.

Anhỹr o hamaxpër kêt nẽ. Na htem hamaxpër o:

—Nà ra Tĩrtũm Karõ kot ixkarõm àr jakamã ixpê hkra nhũm amnhĩm inhmex ã ijarẽ. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmrĩ ixkwỳjaja amnhĩm inhmex kêt ã ijarẽ. Anẽ.

Kêr ka mẽ ã ajamaxpër anhỹr o ri pa. ã mẽ hamaxpër anhỹr na mex o mex.

3

¹ Nẽ mãn ka mẽ ra tee ri tanhmã amnhĩ kukamã ajamaxpër to nẽ ajamaxpër o:

—Kwa mo kaxyw na pa ixpê Ijaew? Mon pa pre we ixpê Ijaew kêtrenh kêt nẽ? Mẽ kêt Ijaew kêt xwỳnhjaja kot amnhĩ jakàr kêt tã nhũm Tĩrtũm mẽ pahpyrà nẽ mẽ ho hkra. Anẽ.

Kwa mẽ ã ri ajamaxpër anhỹr kêt nẽ. ² Mẽ pahpê Ijaew na pre Tĩrtũm Ijaew kêt xwỳnhjê rom mẽ pahto mex rax nẽ. Na pre amnepê mã mẽ panhĩgêt mã tanhmã kapër to. Mẽ pahpiitã mẽ pahte mar nẽ hkôt amnhĩ nhĩpêx kaxyw. Nom Ijaew kêt xwỳnhjê nhĩgêt mã ã kapër anhỹr kêt nẽ. ãm mẽ pahpê Ijaew nhĩgêt pix mã kapër. Jakamã mẽ pahpê Ijaew mã ja mex kumrêx. ³ Nom kot kaj mẽ atõ ja ma nẽ ajamaxpër o:

—Nà Tĩrtũm kot mẽ ixto mex mã mẽ ixtã amnhĩ jarênh tã no nhũm xep mẽ inhĩgêt kwỳjaja hkôt amnhĩ nhĩpêx kêt nẽ. Na xep prem kapër kwỳm ri amnhĩ tomnuj o pa. Jakamã ko. Koja Tĩrtũm mẽ ixpê mẽ hkanrêhã mẽ htãmnhwỳjaja tanhmã mẽ ixto mex to japêr ko. Anẽ.

⁴ Kwa mẽ ri ã ajamaxpër anhỹr kêt nẽ. Tĩrtũm na hte mẽ pahpiitã mẽ pakurom mẽmoj tã amnhĩ jarênh o hêx kêt nẽ. Tã ra kot tanhmã mẽ pahtã amnhĩ jarênh to xà hkôt koja ã mẽ pahto mex anẽ. Kapër ã kagà htũm kot mẽhõ tanhmã Tĩrtũm mã kapër to nẽ harênh kot:

Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhĩpêx o ri apa.

Jakamã na htem ãm axpên mã axêx ã akapêr ã ajarênh kaprỳ. Anhỹr o harê.

⁵ No kot ka mẽ atõ atỳx ajamaxpër nẽ ajamaxpër o:

—Xà koja Tĩrtũm tanhmã mẽ ixte amnhĩ tomnuj to hã mẽ ixpumu nẽ gryk? Nà koja gryk kêt nẽ. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nẽ ixrom Tĩrtũm tapxipix kot amnhĩ to mex o pa xwỳnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix mã mãn kot tãm amnhĩ nhĩpêx xwỳnh ã harê. Hãmri nhũm Tĩrtũm amnhĩ tã ixpumu nẽ tanhmã ixto hkêt nẽ. Koja tanhmã ixto japêr hãmri nẽ ixpyrà nẽ amnhĩ tomnuj nẽ. Anẽ.

Kot kaj mẽ ã ajamaxpër anẽ nẽ ãm amnhĩ krã hkôt ã ajamaxpër anhỹr kaprỳ. Nom ã ajamaxpër anhỹrja Tĩrtũm jamaxpêr kôt kêt. ⁶ Kwa mẽ ri ã ajamaxpêr punuj anhỹr kêt nẽ. Tĩrtũm kot mẽ pahpyrà nẽ aa kot amnhĩ tomnujre hã. Kop ãm mẽ pahpyrà nẽ tanhmã kot amnhĩ tomnuj to ronhỹx tanhmã kot we amnhĩ to nẽ mẽ pahte amnhĩ tomnuj xwỳnh ã mẽ pajarê? Nhỹx mẽ pahpyrà nẽ ã amnhĩ jarênh anẽ. Nà ã mẽ ajamaxpêr anhỹrja mex kêt.

⁷⁻⁸ E pa ixprĩ hã mẽ amã ja jarê ka mẽ inhma. Kot kaj mẽ atõ amnhĩ kukamã ajamaxpêr o:

—E kot paj mãmrĩ ri mẽmoj tã ixêx o ri ixpa kê mẽ ixêx nhi hã ixpumu nẽ ixrom Tĩrtũm pix mã mãn kot amnhĩ to mex ã harê. Nẽ ãm pix mã mãn hêx kêt xwỳnh ã harê. Hãmri nhũm Tĩrtũm amnhĩ tã ixpumu nẽ mẽ ã mẽ kot harênh anhỹrja ma nhũm ja kãm mex nẽ nhũm hkĩnh nẽ. Jakamã ixêx o ri ixpaja ã tanhmã ixto hkêt nẽ. Ra mẽ kot ixrom tãm kot amnhĩ nhĩpêx o pa xwỳnh ã harênh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nẽ. Kêr kê mẽ ja hã ixpumu nẽ ixrom Tĩrtũm tapxipix kot amnhĩ to mex xwỳnh ã harê.

Anhÿr o ajamaxpër nom mẽ ajamaxpërja kot anhÿr kêt. Na hte akwÿjaja pa ixpê Pawre ixêx o ixpa hã ri axpën mã ijarê no na pa hte ixêx o ri ixpa hkêt nê. ã mẽ ajamaxpër anhÿr o ri apa xwÿnhjaja koja Tirtũm mẽ atomnuj tÿx nê kãm ga.

Mẽ mẽ pahte amnhĩ tomnuj xwÿnh ã mẽ pajarênh

Wam Korit 6.9; Karatas 3.22; Xitre 3.3

⁹ Tã tanhmã kot puj mẽ pahpê Ijaew amnhĩ jarênh to? Xà kot pu mẽ pahte amnhĩ to mex o Ijaew kêt xwÿnhjê jakrenh ã amnhĩ jarê? Nà mẽ pahte ã amnhĩ nhĩpêx anhÿÿre hã. Mẽ pahpê Ijaew nê Ijaew kêt xwÿnhjaja. Mẽ pahpiitã mẽ pahte amnhĩ tomnuj o axpën pyrãk. Na pa pre ra mẽ amã ja jarê. ¹⁰ Tirtũm kapër ã kagà htũm kot ja jarênh kot: Mẽhõ na we aa kot amnhĩ tomnuj kêt kumrêx nê pa?

¹¹ Nê mẽhõ na we kot mẽmoj mex piitã omunh par?

Nê mẽhõ na kãm Tirtũm prãm?

¹² Nà amrakati kumrêx. Na mẽ ra piitã hkaga hpa.

Nê kapër kwÿm ri tanhmã amnhĩ tomnuj to ho pa.

ãm mẽhõ pyxire nê amnhĩ to mex o ri pa hkêt kumrêx.

¹³ Na htem kapër punuj pix o ri pa.

Jakamã Tirtũm noo mã mẽ kot amnhĩ nhĩpêxja te kot mẽmoj tyk nê hkro punuj pyrãk.

Na htem ãm ri hêx pix kukamã ri hamaxpër o pa. Tanhmã mẽ hêx to xàja te kêp kagã xoprê nhõ wenên xihtÿx pyrãk.

¹⁴ Nê na htem mẽ piitã mẽmoj nhĩxi ho ri axpën mã mẽ hixi jarênh o pa. Nê ri tanhmã axpën japrÿ hto ho pa.

¹⁵ Nê tanhmã kapër mã gêt kãm mẽ kãm kapër to.

¹⁶ Nê tanhmã mẽ hkwÿjê homnuj to. Jakamã nhũm mẽ piitã ri hkaprĩ nê mex kêt nê pa.

¹⁷ Nhũm htem ãm axpën mã mẽ gryk xà pix o kapër o pa.

¹⁸ Nê Tirtũm ã hpijaãm kêt o pa. Na htem kapër ma nê ãm kuma nê kãm hkĩnh kêt o pa. ã na htem amnhĩ nhĩpêx anhÿr rãhã ho pa. Anê.

ã Tirtũm kapër ã kagà htũm kot mẽ pajarênh anhÿr. ¹⁹ Mẽ pahpê Ijaew ra mẽ pahte ja jarênh mar tÿx. Tirtũm kapër ã kagà htũm kwÿ na. Na hte ã mẽ kot amnhĩ tomnuj xwÿnhjê jarênh anê. Nê mãânên mẽ papajaja. Mẽ pahpê Ijaew na hte ã mẽ pajarênh anê. No ãm mẽ papaxipix hkêt. Krĩ piitã hkôt ri mẽ pa xwÿnhjaja nhũm ã mẽ harênh kot anhÿr. Ijaew kêt xwÿnhjaja nê mẽ pahpê Ijaew. Mẽ pahpiitã mẽ pahte amnhĩ tomnuj xwÿnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarênh anhÿr kaprÿ. Jakamã koja Tirtũm mẽ pahpiitã mẽ pahte amnhĩ tomnuj mÿrapê tanhmã mẽ panhĩpêx to. ²⁰ Mẽ pahtõ koja mẽ pahte kapër kôt pix mã amnhĩ nhĩpêx o papa hã mẽ pajarê? Nê mẽ pahtõ mã koja mẽ pamã kapër nê mẽ pamã:

—Nà na ka hte akatàt kôt ixkapër kôt pix mã amnhĩ nhĩpêx mex nê. ãm hãmri na ka hte ã amnhĩ nhĩpêx anhÿr o apa.

Anhÿr o mẽ pahtõ mã kot we ã kapër anê? Nà aa kot mẽ pahtõ mã kapër anhÿr kêt. Na pu htem ãm kapër ma nê tee ri amnhĩ kukamã pajamaxpër. Mẽ pahte amnhĩ tomnuj ã amnhĩ pumunh kaxyw na pre mẽ pamã kapër ã kagà htũmja gõ. Mẽ pahtõ mẽ pahte kapër ã kagà hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwÿnh ã mẽ pajarê.

Tanhmã Tirtũm kot mẽ pahto hkra to hã harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nê na hte Tirtũm mẽ pahte kapër kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarênh kêt nê. Jakamã mẽhõ kukwak ri koja we ã mẽ pajarênh anê? Nà nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anê. Tã mẽhõ kukwak ri kot ã mẽ pajarênh anhÿr xwÿnhhta na pre ra mẽ pamã ho amnhĩrĩt. Amnepêm Tirtũm kapër ã kagà htũm kamã na pre mẽhõ hkukamã tanhmã harênh to. Nê Tirtũm nhÿ hã mẽ kapër jarênh o pa xwÿnhjaja

haxwýja kukamã tanhmã harênh to ho pa. ²² Jejus Krisja na prem hkukamã harênh o pa. Tãm na pu htem hkôt amnhĩ xunhwý nê amnhĩ kaxyw kãm pajamaxpêr rãhã ho papa nhũm Tĩrtũm ja pix ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarê. Mẽ kot Jejus kôt amnhĩ xunhwýr xwýnh piitãã. Mẽ ixpê Ijaew nê mẽ apê Ijaew kêt xwýnhjaja. Mẽ pahpiitã mẽ pahte axpên pyrãk jakamã kot puj mẽ pahtõ Jejus kôt amnhĩ xãm nhũm Tĩrtũm Kra Jejus kot amnhĩ to mex pix o pa kukwak ri mẽ pahpumu nê amnhĩm pajarênh o:

—Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nê amnhĩ to mex o pa. Anê.

²³ No mẽ pahtõ na mẽ pahte Tĩrtũm mẽ Jejus wa urãk nê amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwýnh kênã. ²⁴ Tã Tĩrtũm kot mẽmoj tã mẽ pakutã nojarêr rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwýnh ã mẽ pajarênh o pa. Mẽ pahte Jejus kôt amnhĩ xunhwýr xwýnh piitãã nhũm ã mẽ pajarênh anê. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhĩ to mex xwýnhjê hã mẽ pajarê. Te mẽ pahte amnhĩ tomnuj kêt kumrêx pyrãk mẽ pajarê. ²⁵⁻²⁶ Na pre mẽ pahwýr Jejus mẽ nhũm mẽ pahwýr wrý nê mẽ panê ty nê htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkôt pajamaxpêr nhũm Tĩrtũm ja hã mẽ pahpumu nê Kra kukwak ri amnhĩ katut kôt mẽ pahte amnhĩ tomnuj piitã rênh pa. Jao te aa mẽ pahte amnhĩ tomnuj kêt kumrêx pyrãk ã mẽ pahpumu.

No kêt amnepêm kormã Jejus wrýk nê mẽ panê htyk kêt ri mẽ pa xwýnhjaja. Tanhmã na pre Tĩrtũm mẽ kot hkôt amnhĩ xunhwýr xwýnhjê nhĩpêx to? Kormã Jejus mẽ panê htyk kêt ri mẽ pa xwýnhjaja tanhmã na pre mẽ hipêx to? Nà na pre mẽ hkwyjaja amnhĩ kaxyw Tĩrtũm kôt hamaxpêr nê hkôt amnhĩ xunhwý nhũm amnhĩ tã mẽ omu nê amnhĩm mẽ harênh o:

—Nà ãm hãmri. Koja nhýrmã Ixkra ma mẽ hwýr wrý nê mẽ nê ty nê htyk o mẽ kot amnhĩ tomnuj pãnhã amnhĩrer pa. Jakamã koja mẽ tãmjaja amnhĩ tomnuj pãnhã amnhĩrer kêt nê. Anê.

Tã nhũm Jejus tãm mẽ pahwýr wrý nê mẽ pahpiitã mẽ panê ty. Jakamã nhũm Tĩrtũm ra mẽ pahte hkôt amnhĩ xunhwýr xwýnhjaja Kra kukwak ri amnhĩ katut kôt mẽ pahte amnhĩ tomnuj piitã rênh pa. No na hte amarĩ ã mẽ panhĩpêx anhýr kêt nê. ãm Jejus tyk pix kukwak ri na hte ã mẽ panhĩpêx anê. ãm hãmri na hte ã mẽ panhĩpêx mex anê. Na hte tãm mẽ panhĩpêx rãhã ho pa. ²⁷ Jakamã kot puj mẽ ã pajamaxpêr anê nê pajamaxpêr o:

—Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa.

Anhýr o pajamaxpêr kêt nê. Koja mēhõ ã hamaxpêr anê nê ãm amnhĩ jarênh o hêx. Na hte Tĩrtũm mẽ pahte amnhĩ to mex ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nê. Mẽ pahte amnhĩ to mex rãhãre hã. Nom na pu htem amnhĩ kaxyw Jejus mã pajamaxpêr nê hkôt amnhĩ xunhwý nhũm ja hã mẽ pahpumu nê rĩ kormã amnhĩm mẽ pamex ã mẽ pajarê.

²⁸ E pa axte tanhmã mẽ amã ja jarênh to ka mẽ aprĩ hã inhma. Mẽmoj pumunh kôt na hte Tĩrtũm mẽ pahte amnhĩ to mex xwýnh ã mẽ pajarênh wehe? Xà mẽ pahte kapêr tũm kôt amnhĩ nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarênh anhýr kêt nê. Mẽ pahte hkôt amnhĩ nhĩpêx rãhã ho papare hã. ãm mẽ pahte amnhĩ kaxyw Kra Jejus kôt pajamaxpêr nê hkôt amnhĩ xunhwýr ã mẽ pahpumunh kôt pix mã na hte mẽ pahte amnhĩ to mex xwýnh ã mẽ pajarê. Ja pix ã mẽ pahpumunh kôt na hte ã mẽ pajarênh anê.

²⁹ Nê xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpix nhõ Tĩrtũm kêt. Kêp mẽ ixpê Ijaew nhõ Tĩrtũm nê mããnên kêp mẽ apê Ijaew kêt xwýnhjê nhõ Tĩrtũm.

³⁰ Nê Tĩrtũm ãm pyxi mex. Axtem hõ kêt. Na hte mẽ pahpiitã mẽ panhĩpêx o axpên pyrãk. Jakamã na hte mẽ kot amnhĩ kaxyw Jejus kôt hamaxpêr o mẽ pa xwýnhjê pumu

ně mẽ kot amnhĩ to mex xwỳnh ã mẽ harẽ. Mẽ ixpê Ijaew nẽ mãnẽn mẽ apê Ijaew kêt xwỳnhjaja.

³¹ Tã koja mẽhõ htỳx hamaxpêr o:

—Nà ixte amnhĩ kaxyw Jejus kôt ijamaxpêr mex o ixpa nhũm Tĩrtũm kot amnhĩm inhmex ã ijarẽnh jakamã kot paj axte kapêr kôt amnhĩ nhĩpêx kêt nẽ. Kot paj ãm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kẽnã.

Anhỹr o ajamaxpêr japêr. Kwa mẽ ã ri ajamaxpêr anhỹr kêt nẽ. Na htem amnhĩ kaxyw Jejus kôt hamaxpêr hãmri nẽ kãm hkôt amnhĩ nhĩpêx prãm rãhã nẽ pa ho pa.

4

Apraãw kot amnhĩ kaxyw Tĩrtũm kôt hamaxpêr

Karatas 3.6-18; Xiakre 2.23

¹ Nẽ mẽ panhĩgêt finat Apraãwja kêp mẽ pahpê Ijaew pàr krax. Tã mẽmoj tã na pre Tĩrtũm omu nẽ kot amnhĩ to mex xwỳnh ã harẽ? ² Xà kot kãm tanhmã amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harẽnh anẽ? Nà ja kôt kêt. Kop apu ja kôt ã kot harẽnh anhỹr ronhỹx Apraãw amnhĩ tã omu nẽ Tĩrtũm mã amnhĩ to jarkrar nẽ kãm:

—Pa Tĩrtũm? E mãn ka ixpumu. Na pa hte akapêr kôt amnhĩ nhĩpêx mex o ri ixpa.

Anhỹr o nhỹx pre kãm amnhĩ to jarkrar. No na pre tanhmã kãm amnhĩ to jarkrar to hkêt nẽ. ³ Tã mẽmoj tã omunh xà hkôt na pre Tĩrtũm amnhĩm mex ã harẽ? Nà Tĩrtũm kapêr ã kagà htũm kot tanhmã Apraãw jarẽnh to kot:

Na pre Apraãw amnhĩ kaxyw Tĩrtũm kôt hamaxpêr nẽ hkôt amnhĩ xãm nhũm amnhĩ tã omu nẽ amnhĩm mex ã harẽ. Anẽ.

⁴ Mẽ õ patrãwjaja na htem kãm mẽ àpênh xwỳnhjaja àpênh mex ã mẽ omunh xà hkôt mẽ kãm amnhĩre. ⁵ No Tĩrtũm na hte ã mẽ panhĩpêx anhỹr kêt nẽ. Na hte mẽ pahte tãm amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarẽnh kêt nẽ. ãm mẽ pahte amnhĩ kaxyw Kra Jejus kôt pajamaxpêr nẽ hkôt amnhĩ xunhwỳr ã mẽ pahpumunh kôt pix mã na hte amnhĩm ã mẽ pajarẽnh anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kôt pajamaxpêr xwỳnh pixjaja na hte ã mẽ pajarẽnh anẽ.

⁶ Jakamã na hte mẽ pamã amnhĩ jarẽnh o:

—Ixte mẽ amex ã mẽ ajarẽnh tã no ãm mẽ ate amnhĩ to mex kôt mẽ apumunh kôt na pa ã mẽ ajarẽnh anhỹr kêt nẽ. ãm mẽ ate amnhĩ kaxyw Ixkra mẽ wa ixkôt ajamaxpêr nẽ wa ixkôt amnhĩ xunhwỳr ã mẽ apumunh kôt na pa hte ã mẽ ajarẽnh anẽ. Anẽ.

Pu mẽ ã kot pamã kapêr anhỹr ã amnhĩ tã kuma nẽ pahkĩnh nẽ. Pahi finat Tawi na pre haxwỳja ja jarẽnh o:

⁷ Na hte Tĩrtũm amnhĩ katut kôt mẽ pahte amnhĩ tomnuj piitã rẽnh pa nẽ axte kãm hamaxpêr kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

⁸ Nẽ amnhĩ kukamã pajamaxpêr o: “Hêxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkaprĩ nẽ.

Hãmri nẽ amnhĩ to Tĩrtũm wỳ nhũm inhma nẽ ixte amnhĩ tomnuj o hapêx pa nẽ axte kãm hamaxpêr kêt nẽ.

Nà ãm hãmri. Ja mex kumrêx.” Anẽ.

⁹ Tã mẽ kot ja hã amnhĩ pumunh nẽ hkĩnh xwỳnhjaja mẽmojaja na mẽ? Xà mẽ kot amnhĩ my kwỳt kà jakàr xwỳnh pix kwỳjaja na pre pahi Tawija ã mẽ harẽnh anẽ nà? Nà mẽ tapxipixjaja kêt. Mãnẽn mẽ kot amnhĩ jakàr kêt xwỳnh kwỳjaja. Tanhmã na pre ra Tĩrtũm kapêr ã kagà htũm kot finat Apraãw jarẽnh to? Na pre harẽnh o:

Na pre Apraãw amnhĩ kaxyw Tĩrtũm kôt hamaxpêr nẽ hkôt amnhĩ xãm nhũm amnhĩ tã omu nẽ amnhĩm mex ã harẽ. Anẽ.

¹⁰ Xà Apraãw ra kot amnhĩ my kwryt kà krãhyr nhĩrô pê na pre Tĩrtũm amnhĩm mex ã harẽ? Nà kormã kot amnhĩ krãhyr kêt ri na pre ã harẽnh anẽ. ¹¹ Kormã kot amnhĩ krãhyr kêt ri kãm kapër nẽ kãm:

—E ate amnhĩ kaxyw inhmã ajamaxpër nẽ ixkõt amnhĩ xãm ã ixte apumunh kõt na pa amnhĩm amex ã ajarẽ.

Anhỹr o kãm kapër hãmri nẽ rĩ kormã kãm tanhmã amnhĩ krãhyr to hã kãm karõ nhũm kuma nẽ mar xà hkõt amnhĩ my kwryt kà hkwy krãhta. Kot Tĩrtũm mã amnhĩ nhõr ã amnhĩ to amnhĩrit kaxyw ã amnhĩ nhĩpêx anẽ.

Nom kormã amnhĩ krãhyr kêt ri na pre Tĩrtũm amnhĩm mex ã harẽ. Tã Ijaew kêt xwýnhjaja kot amnhĩ jakàr kêt tã mẽ hkwyjaja Apraãw pyrã nẽ amnhĩ kaxyw Tĩrtũm mã hamaxpër nẽ kãm amnhĩ nhõr jakamã Apraãw te kêt mẽ hpàr krax maati pyrãk. ¹² Nẽ mããnen mẽ pahpê Ijaew. Kot puj mẽ pahpõ amnhĩ kaxyw Tĩrtũm kõt pajamaxpër nhũm amnhĩ tã mẽ pahpumu nẽ mẽ pamex ã mẽ pajarẽ. No ãm mẽ pahte amnhĩ jakàr ã mẽ pahpumunh kõt ã mẽ pajarẽnh anhỹr kêt nẽ. ãm Apraãw pyrã nẽ amnhĩ kaxyw Tĩrtũm kõt pajamaxpër pix ã mẽ pahpumunh kõt na hte mẽ pamex ã mẽ pajarẽ. Kormã Apraãw kot amnhĩ my kwryt kà krãhyr kêt ri ra kot amnhĩ kaxyw Tĩrtũm mã hamaxpër jakamã kêt mẽ pahpê Ijaew mẽ pahte urak nẽ amnhĩ kaxyw Tĩrtũm mã pajamaxpër xwýnhjê hpàr krax maati. Ijaew kêt xwýnhjê pyrã nẽ kêt mẽ pahpàr krax maati.

*Tĩrtũm kot Apraãw mã mẽmoj mex jarẽnh
Karatas 3.22*

¹³ Amnepêm na pre Tĩrtũm Apraãw mã tanhmã kapër to nẽ kãm:

—E koja nhỹrmã akanrẽhã akra nẽ atãmnhwýjaja amýrpê apyrã nẽ krĩ piitã hkõt mẽ kêt mẽ õ pahi. Anẽ.

Tã tanhmã Apraãw kot amnhĩ nhĩpêx to hã omunh xà hkõt na pre ã kãm kapër anẽ? Xà kot kãm tanhmã amnhĩ nhĩpêx to hã karõ nhũm kot hkõt amnhĩ nhĩpêx mex ã omunh xà hkõt na pre hkĩnh nẽ ã kãm kapër anẽ? Nà kot anhỹr kêt. Mẽ pahpõ kot pu we Tĩrtũm kapër xà hkõt pix mã amnhĩ nhĩpêx mex rãhã ho ri papa? Mẽ pahpê hihtýx kênã. ãm kot amnhĩ kaxyw Tĩrtũm kõt hamaxpër nhũm kot amnhĩ tã omunh nẽ amnhĩm mex ã harẽnh kõt pix mã na pre ã kãm kapër anẽ. ¹⁴ Kop apu kot kãm tanhmã kapër to nẽ kãm:

—E Apraãw. Kot kaj ixkapër piitã ama nẽ hkõt amnhĩ nhĩpêx mex rãhã ho ri apa. Hã koja nhỹrmã akanrẽhã akra nẽ atãmnhwýjaja kêt krĩ piitã hkõt mẽõ pahihti.

Anhỹr o kãm kapër ronhýx ãm kãm ã kapër anhỹr kapry. Apraãw aa kot kapër piitã hkõt amnhĩ nhĩpêx mex o pare hã. Kop apu ã kãm kapër anhỹr ronhýx pre kuma nẽ tee ri amnhĩ kukamã hamaxpër nẽ hamaxpër o:

—Kwa nã. Ra ixte Tĩrtũm kõt amnhĩ xãm tã tanhmã kot pa amnhĩ to nẽ kapër piitã hkõt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhỹr o ixpa hprãm kapry. Jakamã koja nhỹrmã ixkanrẽhã ixkra nẽ ixtãmnhwýjaja kêt mẽ õ pahi hkêt nẽ pa. Hêxta waa nẽ. ¹⁵ Koja Tĩrtũm ixte kapër kwým ri tanhmã ixte amnhĩ tomnuj to hã ixpumu nẽ tanhmã ixtomnuj to. No mẽhõ kot we kapër piitã hkõt amnhĩ nhĩpêx mex rãhã ho pa? Nà amrakati kumrêx.

Anhỹr o nhỹx pre hamaxpër. ¹⁶ No na pre Tĩrtũm ã kãm kapër anhỹr kêt nẽ. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkõt ajamaxpër nẽ ixkõt amnhĩ xãm jakamã kot paj amarĩ ato mex nẽ. Anẽ.

Tĩrtũm na hte mẽmoj tã amnhĩ jarẽnh o amnhĩ to hêx kêt nẽ. Na hte mẽmoj tã amnhĩ jarẽnh xà hkõt tanhmã mẽmoj nhĩpêx to ho ri pa. Jakamã koja mẽ pahte Apraãw pyrã nẽ amnhĩ kaxyw hkõt pajamaxpër xwýnh piitã mẽ pahpõ mex nẽ.

Nẽ xà na pre ã mẽ pamã kapër anẽ nẽ mẽ pamã:

—E kot kaj mẽ ixkapër kõt pix mã ri amnhĩ nhĩpêx o ri apa hã kot paj mẽ ato mex rax nẽ.

Anhỹr o mẽ pamã kapër? Nà na pre ã mẽ pamã kapër anhỹr kêt nẽ. Na pre mẽ pamã:

—Kot kaj mẽ finat Apraãw pyrà nẽ amnhĩ kaxyw ixkõt ajamaxpẽr nẽ ixkõt amnhĩ xunhwỳ hã kot paj mẽ ato mex nẽ.

Anhỹr o mẽ pamã kapẽr. Tã Apraãw kumrẽx kot mẽ pakukamã amnhĩ kaxyw hkõt hamaxpẽr jakamã te kęp mẽ pahpiitã mẽ pahte uràk nẽ ã amnhĩ nhĩpẽx anhỹr xwỳnhjê pàr krax maati pyràk.

¹⁷ Amnepêm na pre Tĩrtũm tanhmã Apraãw mã kapẽr to. Kot tanhmã kãm kapẽr toja Tĩrtũm kapẽr ã kagà htũm kamã na. Na pre kãm:

Kot kaj apê ahpỳnhã ri mẽ urojê hpàr krax. Anẽ.

Kormã Apraãw kra hkõt tã nhũm hkra hkukamã ã kãm kapẽr anẽ. Hãmri nhũm kuma nẽ hkõt hamaxpẽr kurê kumrẽx nẽ hamaxpẽr o:

—Hêxta waa nẽ. Ra ixprõ mẽ wa ijamê wa ixpigêt tỳx nẽ wa ixkra hkõt kumrẽx. Kot paj wa tanhmã amnhĩ to nẽ tokyx ty. Tã ra Tĩrtũm kot ixkra nẽ ixtãmnhwỳjê hkukamã ã inhmã mẽ harẽnh anhỹr kênã. Jakamã kot pa xep wa ixpigêt tỳx tã tanhmã amnhĩ to nẽ ixkra. Nà kot pa xep wa anẽ. Nẽ koja ixkraja tanhmã amnhĩ to nẽ ixpê htyk japêr tã koja Tĩrtũm akupỳm inhmã ho htĩr. Nà koja inhmã ho anẽ. Ra kot inhmã ixkra nẽ ixkanrêhã ixtãmnhwỳ xohtô jarẽnh kênã. Anẽ.

¹⁸⁻¹⁹ Na pre ra hpigêt tỳx nẽ. Ra hã amgrà pê 100 nẽ hkurê kêt nẽ pa. Nhũm hprõ mãânên hpigêx tỳx nẽ. Nẽ õhy kamã hkra hkõt kumrẽx. Kormã wa hkra hkõt tã nhũm Tĩrtũm Apraãw mã hkra nẽ htãmnhwỳ xohtô hã harẽ. Nẽ kęp mẽ urojê xohtôjê pàr krax ã kãm harẽ. Hãmri nhũm kuma nẽ amnhĩ kaxyw hkõt hamaxpẽr tỳx kurê kumrẽx. ²⁰ Nẽ ã amnhĩ nhĩpẽx anhỹr rãhã ho pa. Na pre war amnhĩ kra hã amnhĩ jarẽnh ma nẽ tee ri amnhĩ kukamã hamaxpẽr kêt nẽ. ãm Tĩrtũm tãm kot wa kãm wa hkra jarẽnh pix mã hamaxpẽr pê amnhĩ kaxyw kãm hamaxpẽr tỳx o ri wa pa. Nẽ hamaxpẽr o:

—Nà ra wa ixpigêt tỳx kumrẽx tã koja xep Tĩrtũm wa inhmã wa ixkra hõ gõ. Nà koja wa inhmã kugõ. Hêxta waa nẽ. ãm hãmri Tĩrtũmja mex o mex. ²¹ Nà kot wa inhmã wa ixkra jarẽnh xà hkõt koja wa inhmã kugõ. Ja kaxyw àhpumunh o àhpumunh. Tĩrtũmja hêx kêt. Anẽ.

²² Hãmri nhũm Tĩrtũm ã hamaxpẽr anhỹr ã omu nẽ amnhĩm mex ã harẽ. Nẽ kot kãm amnhĩ jarẽnh xà hkõt wa kãm wa hkraja gõ.

²³ Nom na pre amnhĩm Apraãwja pix mex ã harẽnh kêt nẽ. ²⁴ Kot puj mẽ pahtõ uràk nẽ amnhĩ kaxyw hkõt pajamaxpẽr nhũm amnhĩ tã mẽ pahpumu nẽ ra kot Apraãw jarẽnh ta pyrà nẽ amnhĩm mẽ pamex ã mẽ pajarẽ. Na pre mẽ panhõ Pahihti Jejus ty nhũm Tĩrtũm akupỳm ho htĩr. Tã mẽ papajaja na pu prem amnhĩ kaxyw Jejus kõt pajamaxpẽr nhũm Tĩrtũm ja hã mẽ pahpumunh kõt mẽ pahte amnhĩ to mex xwỳnh ã mẽ pajarẽ. ²⁵ Na pre mẽ pahwỳr Kra Jejus mẽ nhũm mẽ pahwỳr wrỳ. Tã nhũm mẽ axtem nẽ kupĩ nom nhũm amarĩ htyk kêt nẽ. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tĩrtũm mẽ pahwỳr kumẽ. Jakamã nhũm prem kupĩ nhũm akupỳm ho htĩr. Tã mẽmo kaxyw na pre Tĩrtũm ã mẽ pahwỳr Kraja mẽnh nhũm mẽ panê htyk anẽ nhũm akupỳm ho htĩr? ãm kot kukwak ri amnhĩm mẽ pahte amnhĩ kaxyw hkõt pajamaxpẽr xwỳnhjaja mẽ pahte amnhĩ to mex xwỳnh ã mẽ pajarẽnh pix kaxyw.

5

Tĩrtũm kot mẽ pahto hkwy hã harẽnh

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

¹ Nẽ na pu prem amnhĩ tomnuj o ri papa nhũm Tĩrtũm ja hã mẽ pahpumu nhũm ja kęp omnuj nẽ. Jakamã nhũm Jejus amnhĩ grõnh kõt wrỳ nẽ mẽ panê ty. Nhũm Tĩrtũm htykja kukwak ri mẽ pahto hkwy. Mẽ pahte amnhĩ kaxyw hkõt pajamaxpẽr nẽ hkõt amnhĩ xunhwỳr ã mẽ pahpumu hãmri nẽ ã mẽ panhĩpẽx anẽ pu mẽ ra pahpê hkwy hã papa.

² Na pre Jejus Tĩrtũm mã mẽ pajarẽnh o:

—E jajê pumu. Na mẽ ra amnhĩ kaxyw pamã hamaxpẽr nẽ pahkõt amnhĩ xunhwỳ. Anẽ.

Hãmri nhũm kuma nẽ mẽ pahto mex nẽ mẽ pakutã nojarêr rãhã ho pa. Tã kot puj mẽ pahpê hkrajaja nhỹrmã pano ho Tĩrtũm mex o mex xwỳnhja pumu. Jakamã na pu htem amnhĩ kukamã ã pajamaxpêr anhỹr o pahkĩnh nẽ papa nẽ pajamaxpêr o:

—Hêxta waa nẽ. Kot paj nhỹrmã inhno ho Tĩrtũm mex o mex ã omu nẽ kuri ixpa ho ixpa. Nà ãm hãmri. Inhmã omunh prãm tỳx kumrêx. Anẽ.

³⁻⁴ Nẽ na htem Jejus ã mẽ pahtomnuj nẽ pu mẽ pahpunuj nẽ ri papa. Pamex kêt nẽ tã tee ri amnhĩ kukamã pajamaxpêr o ri pahkaprĩ nẽ papa hkêt nẽ. Kwãr mẽ mãmri ã mẽ panhĩpêx anẽ. Pu mẽ pahpunuj kurê Jejus kôt amnhĩ xunhwỳr tỳx o kormã mỗ. Nẽ mẽ umaj hkaga hkêt nẽ. Arĩ amnhĩ wỳr kamã pajamak o papa. Jao amnhĩ kaxyw kumã pix mã kãm pajamaxpêr tỳx rãhã pahkĩnh nẽ ri papa.

Kot puj mẽ ã amnhĩ nhĩpêx anhỹr o ri papa nhũm Tĩrtũm ja hã mẽ pahpumu nhũm ja kãm mex nẽ. Hãmri nhũm ja kaxyw tanhmã mẽ pahto paxihtỳx to pu mẽ pahpunuj tã hkôt pajamaxpêr tỳx rãhã nẽ.

⁵ Nẽ ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêr kaprỳ hkêt nẽ. Ra kot mẽ pamã amnhĩ Karõ nhõr nhũm kot mẽ pahkarõ mã gjêx kênã kot pu kêt mẽ ri tee ri amnhĩ kaxyw kãm pajamaxpêr kaprỳ. Na hte Karõja mẽ pahkarõ kamã mẽ pamã Tĩrtũm kapêr jarênh o amnhĩrĩt nẽ kãm mẽ pajapê htỳx ã harênh o amnhĩrĩt rãhã nẽ.

⁶ Amnepê mã na pre mẽ piitã amnhĩ tomnuj o ri pa nẽ tee ri kãm amnhĩ to mex rãhã hprãm kaprỳ. Mẽhõ kot we ja kaxyw tanhmã mẽ hkrã hto? Jakamã nhũm Tĩrtũm ja hã mẽ omu hãmri nẽ mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwỳr wrỳ. Ixte mẽ nê atyk kaxyw agrõnh kôt mẽ hwỳr amênh jakamã kot kaj wrỳ nẽ mẽ kãm ixkapêr jarênh o ri mẽ hkôt apa. Rãhã nhũm mẽ hkwyjaja apĩ ka mẽ piitã mẽ nê ty. Anẽ.

Hãmri nhũm kuma nẽ kãm:

—Tõe. Nà kot paj amã hprãm xà hkôt ã amnhĩ nhĩpêx anẽ. Anẽ.

Hãmri nẽ man amnhĩ grõnh kôt mẽ pahwỳr wrỳ. ⁷⁻⁸ Xà koja mẽhõ kãm axpên japê xàj axpên nê ty nà? Xà kot mẽhõ tãm kot amnhĩ nhĩpêx xwỳnh tã nhũm mẽ kot hpĩr kaxyw nhũm hkrãmnhwỳja kãm hapê nẽ. Nẽ nê amnhĩ grõnh kôt mẽ kãm xa nhũm mẽ kupĩ nhũm nê ty? Nà kot apu nê htyk japêr ko. No mẽ papajaja. Na pu htem mẽhõ hkrãmnhwỳta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapê nẽ. Nẽ kãm mẽ pajapê xàj mẽ pahwỳr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapê hã ã mẽ pahwỳr mênh anẽ. ⁹ Na pre ty nhũm hkamrõ hkwy axkapĩ nhũm Tĩrtũm ja hã omunh xà hkôt tãm amnhĩm mẽ paxunhwỳ. Tã Jejus kukwak ri koja ma mẽ kot amnhĩ xà htỳx kamã hamak tũm xàta wỳr mẽ parênh kêt nẽ. Mẽ pahpê hkwy kênã kot kêt hwỳr mẽ parê.

¹⁰ Nom kormã mẽ pahpê hkwy hkêt ri na pu prem te ra kutã amnhĩ xunhwỳr pyrãk o amnhĩ nhĩpêx. Tã nhũm Kra mẽ panê ty pu mẽ hkôt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwy. Nẽ ra akupỹm Kra ho htĩr jakamã kot puj mẽ pahte hkôt amnhĩ xunhwỳr xwỳnhjaja nhỹrmã wa urãk nẽ wa kuri pahtĩr tũm nẽ pamex kumrêx nẽ papa ho papa.

¹¹ Nẽ mẽ pahpê kuwy rax wỳr mẽ papa mã xwỳnh kêt jakamã na pu htem pahkĩnh nẽ pajamakêtkati nẽ ri papa. Nom ja pix ã na pu htem ã amnhĩ nhĩpêx anhỹr kêt nẽ. Mẽ pahpê Tĩrtũm krãmnhwỳ jakamã na pu htem mããnên pahkĩnh nẽ ri papa. Pahihti Jejus Kris kot mẽ panê htyk ã omunh xà hkôt na pre Tĩrtũm mẽ pahte hkôt amnhĩ xunhwỳr xwỳnhjê ho hkwy jakamã na pu htem pahkĩnh nẽ pajamakêtkati nẽ ri papa.

Atãw mẽ Kris wa harênh

Wam Korĩt 15.20-22, 45-49

¹²⁻¹³ Nẽ amnepêm na pre Tĩrtũm finat Mojes mã tanhmã kapêr to. Hãmri nhũm kuma nẽ Ijaew kot tanhmã amnhĩ nhĩpêx to ho pa kaxyw mẽ kãm mẽmojta ã karõ nẽ mẽ kãm hã hkagà. Mẽ kot kamã harênh nẽ mar nẽ Tĩrtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karõja ma nẽ tanhmã axpên mã kapêr to nẽ axpên mã:

—Kwa na pu htem ã amnhĩ nhĩpêx anhÿr kêt nê. Na pu htem ãm amnhĩ tomnuj tÿx kumrêx o ri papa nê amnhĩ to mex kêt kumrêx. Anê.

Ãm hãmri na prem ã amnhĩ jarênh anê. Mê pahpiitã mê pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã mê pahte amnhĩ tomnuj to ho hkrax. Mÿrapê na pre htír tũm nê ri pa ho pa hkêt nê. Na pre ri pa nê gaa nê rĩ hpigêt tÿx nê ty. Tã mÿr pê ri mê papa xwÿnhjaja na pu htem urak nê tanhmã amnhĩ tomnuj to ho ri papa. Mÿrapê na pu htem ri papa nê gaa nê Atãw pyrã nê pahtyk pa. Tĩrtũm kot mê pahtã Atãw mã kapêr xà hkôt. ¹⁴⁻¹⁹ Jakamã na prem kormã Mojes kator xwÿj ri pika piitã hkôt ri pa nê gaa nê haxwÿja htyk pa. Mê kot amnhĩ tomnuj mÿrapê ty. Atãw pyrã nê Tĩrtũm kot mêmõ xõ nê hkurê xwÿnhhta krêr kêt tã urak nê tanhmã amnhĩ tomnuj to ho ri pa. Hãmri nê mÿrapê ty.

Na pre ã Atãwja mê pahpiitã mê pamã Tĩrtũm kapêr nhĩrõp ãm nê amnhĩ tomnuj o hkrax anê nê mêmõ xõta krê. Jao te mê pahpiitã mê pahte urak nê kumê hkur pyrak o mê panhĩpêx. Mÿrapê nhũm htem arĩ pika piitã hkôt hapõj nê kormã hprĩre htã ra Atãw pyrã nê tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkôt mê pakukamã hamaxpêr o:

—Nà koja mê Atãw pyrã nê amnhĩ tomnuj o ri pa. Mÿrapê kot paj ma mê kot amnhĩ xà htÿx kamã hamak tũm xãta wÿr mê rênh pa. Anê.

Tã Jejus Kris mê Atãw wa harênhja kot axpên pyrak jakamã na hte Atãw kanrêhã hkra nê htãmnhwÿjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urak nê amnhĩ tomnuj rãhã ho ri pa. Nhũm axtem Jejus kôt mê kot amnhĩ xunhwÿr xwÿnhjaja Jejus kôt amnhĩ nhĩpêx rãhã ho ri pa. Te mê kêp hkanrêhã hkra nê htãmnhwÿjê pyrã nê urak nê tãm amnhĩ nhĩpêx. Na htem ã ahpÿnhã amnhĩ nhĩpêx anhÿr o ri pa. Na pre Jejus mê pahte amnhĩ tomnuj pãnhã amnhĩrer par kaxyw mê panê ty. Jakamã mê pahte hkôt amnhĩ xunhwÿr xwÿnhjaja na hte Tĩrtũm ja hã mê pahpumunh kôt mê pahto hkra. Kot puj mê nhÿrmã pahtyk tã nhũm akupÿm mê pahto mê pahtír pu mê wa kuri pahtír tũm nê papa ho papa.

Atãw kot Tĩrtũm kapêr nhĩrõp ãm jakamã na hte Tĩrtũm mê pahpiitã mê pahte amnhĩ tomnuj xwÿnh ã mê pajarê. Nom nhũm Jejus Atãw rom kot Tĩrtũm kapêr mar nê hkôt amnhĩ nhĩpêx rãhã jakamã na hte Tĩrtũm mê pahte hkôt amnhĩ xunhwÿr xwÿnhjaja amnhĩm mê pahte amnhĩ to mex xwÿnh ã mê pajarê.

Nhũm Atãw kot Jejus kĩnhã Tĩrtũm kapêr nhĩrõp ãm mÿrapê na hte mÿr pê mê pa xwÿnhjaja ohtõ nê pa nê gaa nê Atãw pyrã nê htyk pa. Hãmri nê kormã htír ri amnhĩ to mex o pa hkêt mÿrapê ma mê kot amnhĩ xà htÿx kamã hamak tũm xãta wÿr ma hapêx. Tã nhũm Tĩrtũmja mex o mex jakamã na hte Jejus Kris mê wa mê pakamã ukaprĩ nê. Jakamã na pre mê pahwÿr Jejus mê nhũm mê pahwÿr wrÿ hãmri nê htyk o mê pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhÿr kukwak ri mê pahte hkôt amnhĩ xunhwÿr xwÿnhjaja amarĩ tanhmã mê pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mê pahpiitã mê pahte amnhĩ tomnuj xwÿnh ã mê pajarê. Tã nhũm Jejus mê pakamã ukaprĩ nê mê panê ty nhũm Tĩrtũm ja hã omunh xà hkôt ra mê pahte amnhĩ kaxyw hkôt pajamaxpêr xwÿnhjaja te mê pahte aa tanhmã amnhĩ tomnuj to hkêt pyrak o mê panhĩpêx. Na hte amarĩ ã mê panhĩpêx anê.

Nê Atãw kot amnhĩ tomnuj mÿrapê na htem piitã ri pa nê tanhmã amnhĩ to nê ty rÿ ri pa nê gaa nê wejre nê ty. No na pre Jejus Krisja aa kot amnhĩ tomnuj kêt kumrêx tã amarĩ mê panê ty. Jakamã nhũm Tĩrtũm ra kukwak ri mê pahte hkôt amnhĩ xunhwÿr xwÿnhjê kutã nojarêt rãhã nê mê pakukamã hamaxpêr o:

—Nà mê kot Ixkra hkôt amnhĩ xunhwÿr xwÿnhjaja na pa mê omunh pa. Tã kot paj Ixkrata kukwak ri tãm mê unhwÿ nhũm mê nhÿrmã wa ixri mex nê htír tũm nê pa ho pa. Anê.

²⁰⁻²¹ Nê na pre Tĩrtũm tanhmã finat Mojes mã kapêr to. Mê piitã mê kot amnhĩ tomnuj o ri mê pa hã amnhĩ pumunh kaxyw. Hãmri nê mê kot kapêr mar nê hkôt amnhĩ nhĩpêx o pa kaxyw tanhmã mê kaxyw Mojes mã kapêr to. Nhũm kuma nê amnhĩ xõ ri mê kãm hã

kagà nê mẽ kãm harênh o ri mẽ hkôt pa. No nhũm prem kapêr ma nê ãm kuma nê hkwym pix mã ri tanhmã amnhĩ tomnuj to ho pa. Nê pika piitã hkôt ja arĩ rãhãã. Ja mýrapê koja mẽ nhýrmã ty nê ma mẽ kot amnhĩ xà htýx kamã hamak tũm xàta wýr ma pa. Nom Tirtũm arĩ kãm pika piitã hkôt mẽ papa xwýnhjê japê nê. Mẽ pahte amnhĩ tomnuj o papa tã nhũm kãm mẽ pahto mex prãm nê. Jakamã na pre mẽ pahwýr Kra Jejus Kris mẽ nhũm mẽ pahwýr wrý. Mẽ panê htyk o kot mẽ pahte amnhĩ tomnuj pãnhã amnhírer kaxyw. Tã kukwak ri kot puj mẽ pahte amnhĩ kaxyw hkôt pajamaxpêr xwýnhjaja nhýrmã Tirtũm mẽ wa kuri pahtír tũm nê pa mex nê papa ho papa.

6

Mẽ kot mẽ pahkrã kumrãr ã mẽ harênh

Sikũn Korĩt 5.17; Karatas 2.19-20, 5.24, 6.14; Epes 4.17-24; Korosẽ 3.1-11; Wam Pêtre 4.1-6

¹ Nê mẽ pahte arĩ tõhã tanhmã amnhĩ tomnuj to htã nhũm Tirtũm arĩ kãm mẽ pajapê nê. Nê arĩ mẽ pakutã nojarêt rãhã nê. Jakamã xà kot kaj mẽ atõ ã harênh anhýrja ma nê atýx ri ã ajamaxpêr anê nê ajamaxpêr o:

—Nà Tirtũm kãm ijapê nê kot ixkutã nojarêt rãhã ho ri pa jakamã mo kaxyw kot pa Jejus kôt amnhĩ nhípêx o ri ixpa? Nà kot paj ho anhýr kêt nê. Anê.

Ka ã mẽ atõ atýx ri ajamaxpêr anhýr japêr. Kwa xà ajamaxpêrja mex? Nà mex kêt. ² ã ajamaxpêr anhýrja mẽ hamaxpêr mex xà hkôt kêt. Ra mẽ pahte Jejus kôt amnhĩ xunhwýr nê mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyræk. Jakamã kot puj mẽ arĩ tanhmã amnhĩ tomnuj to ho ri papa hkêt nê. ³ Mẽmo kaxyw na htem Tirtũm mã mẽ pahkrã kumrã? Nà mẽ pahte ra Jejus kôt amnhĩ xunhwýr ã amnhĩ to amnhírit kaxyw. Te Jejus htyk nhũm mẽ pahte amnhĩ tomnujja haxwýja hkôt htyk nê hapêx par pyræk o amnhírit kaxyw. Jakamã na pu htem pajamaxpêr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

⁴ Na htem Tirtũm mã gôx kãm mẽ pahkrã kumrã nhũm mẽ pahte amnhĩ nhípêx tũmja te mẽ kot Jejus kôt haxwýja haxàr pyræk. Hãmri nhũm mẽ akupým mẽ pahto api. Te Tirtũm hihtýx o hihtýx o kot akupým Kra Jejus ho htír pyræk. Te mẽ pahtyk tã nhũm akupým kot mẽ pahto mẽ pahtír pyræk. Pãnhã mẽ pahte amnhĩ nhípêx nyw o amnhĩ nhípêx kaxyw. ⁵ Nhũm mẽ pahte amnhĩ nhípêx tũmja te Jejus kôt htyk nê hapêx par pyræk. Nê mẽ pahte amnhĩ nhípêx nywja te Jejus akupým htír pyræk o amnhĩ nhípêx.

⁶ Amnepêm na pu pre htem amnhĩ tomnuj rãhã ho ri papa. Te mẽ kãm mẽ àpênh xwýnhjaja kot mẽ õ patrãw mã àpênh rãhãta pyræk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhírer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamaxpêr punujja te pĩ kahpa hã Jejus kôt harir nê htyk nê hapêx par pyræk. Pãnhã mẽ pahte amnhĩ nhípêx nyw pix o amnhĩ nhípêx kaxyw. Nê mẽ pajamaxpêr nyw pix o pajamaxpêr papa kaxyw. ⁷ Na hte mẽ htyk xwýnhjaja axte tanhmã amnhĩ tomnuj to hkêt nê. Tã kêr pu mẽ uræk nê axte ã amnhĩ nhípêx anhýr kêt nê. ⁸ Na pu prem Jejus kot mẽ panê htyk ã harênh ma nê pajamaxpêr o:

—Nà ra Jejus kot mẽ panê htyk jakamã kot paj ixte amnhĩ nhípêx tũm kaga hpa nê hpãnhã kot amnhĩ nhípêx kôt pix mã ri amnhĩ nhípêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhípêx nyw pix o amnhĩ nhípêx o ri ixpa. Anê.

⁹ Nê Jejus htyk nhũm Tirtũm akupým ho htír jakamã koja axte htyk kêt nê. Ra mẽ pahte ja mar mex. ¹⁰ Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhíre. Tã ra akupým htír o htír nê kaxkwa kamã Tirtũm mã tanhmã amnhĩ nhípêx to ho ri pa. ¹¹ Tã mẽ papajaja kot puj mẽ ã kot amnhĩ nhípêx anhýrja ma nê ã pajamaxpêr anê nê pajamaxpêr o:

—Nà ãm hãmri. Te ixte Jejus pyrà nê ra ixtyk pyræk jakamã kot paj axte amnhĩ tomnuj o ri ixpa hkêt nê. Te ixte Jejus pyrà nê akupÿm ixtĩr nê ãm Tĩrtũm kôt pix mã amnhĩ nhĩpêx o ri ixpata pyræk o kot paj hpãnhã amnhĩ nhĩpêx o ri ixpa. Anê.

¹² Jakamã kot ka mẽ atõ nhÿrmã tanhmã amnhĩ kukamã ajamaxpêr punuj to japêr hãmri nê ajamaxpêr o:

—Nà inhmã ã amnhĩ tomnuj anhÿr prãm nê. Omnuij tã kot paj ho anê. Nà ixte ho anhÿr mã kênã.

Anhÿr o ajamaxpêr japêr tã kwa mẽ ã ajamaxpêr anhÿr kêt nê.

¹³ Kêt Tĩrtũm mã mãn amnhĩ gõ nê hkôt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamaxpêr nê tãm akapêr. Nê mẽ kot amnhĩ to mex xwÿnhjê kôt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê mẽ kot amnhĩ tomnuj o mẽ pa xwÿnhjê hkôt ri apa.

Nê kagôxÿhti japrô nê ho akôm o ri mẽ hkôt apa.

Tã ra hpãnhã Tĩrtũm mã amnhĩ gõ nê axte ã amnhĩ nhĩpêx anhÿr kêt nê.

¹⁴ Amnepêm na pu prem tanhmã mẽ pahte amnhĩ nhĩpêx to ho papa hkukamã pajamaxpêr nê pajamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nê amnhĩ to mex o ri ixpa nhũm Tĩrtũm ja hã ixpumu nê amnhĩm inhmex ã ijarê. Nà kot paj anê.

Anhÿr tã no ãm tee ri mẽ pamã hkôt amnhĩ nhĩpêx o ri papa hprãm kaprÿ nê arĩ ri kapêr kwÿm tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tĩrtũm kot ixkutã nojarêr rãhã ho pa xwÿnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anê.

Anhÿr jakamã ra amnhĩ kaxyw kãm pajamaxpêr tÿx o mẽmoj punuj kutã amnhĩ to htÿx nê.

Mê pahte Tĩrtũm mã tanhmã amnhĩ nhĩpêx to hã mẽ pajarênh

Juãw 8.34

¹⁵ Tã ã kot anhÿr jakamã tanhmã kot puj wem pajamaxpêr to? Xà kot pu mẽ ã pajamaxpêr anê nê pajamaxpêr o:

—Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nê. ãm kêp ixkutã nojarêr rãhã nê amarĩ amnhĩm inhmex ã ijarênh xwÿnh jakamã kot paj arĩ amnhĩ tomnuj rãhã nê aa ja kaga hkêt nê.

Anhÿr o kot puj mẽ pajamaxpêr? Nà kot puj mẽ ã pajamaxpêr anhÿr kêt nê. ã mẽ pajamaxpêr anhÿrja mex kêt. ¹⁶ Koja mẽhõ nhÿri kot amnhĩ tomnuj tÿx xwÿnhjê hõ pumu nê kãm amnhĩ jarênh japêr nê kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixpa. Jakamã e inhmã mẽmoj tã karõ pa ama nê amã tanhmã ho ho ri ixpa.

Anhÿr o kãm kapêr japêr. Hãmri nê ã amnhĩ nhĩpêx anhÿr tã amnhĩ tomnuj pix o ri pa. Tã ã mẽ kot amnhĩ nhĩpêx anhÿr o mẽ pa xwÿnhjaja koja nhÿrmã ty hãmri mẽ kot amnhĩ xà htÿx kamã hamak tũm xàta wÿr ma hapêx.

No koja mẽhõ Tĩrtũm mã amnhĩ jarênh nê kãm:

—Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixpa.

Anhÿr o kãm amnhĩ jarê nê hkôt amnhĩ nhĩpêx mex o pa. Nê tãm amnhĩ nhĩpêx o ri pa. Hãmri nê nhÿrmã ty nê ma õ krĩ hwÿr api nê Jejus mẽ Tĩrtũm wa kuri htĩr tũm nê mex rãhã nê pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhÿrer prãm tã nhũm te tãm kot amnhĩ tã mẽ ato htÿx pyræk o mẽ anhĩpêx ka mẽ tee ri kãm anhÿrer prãm kaprÿ. Tã nhũm Tĩrtũm tanhmã mẽ akrã hto ka mẽ kapêr ma nê amnhĩ kaxyw hkôt ajamaxpêr tÿx nê ãm hkôt pix mã amnhĩ nhĩpêx. Pa ja hã mẽ ajarênh ma nê mẽ anhÿ hã ixkĩnh nê. Nê Tĩrtũm mã ixte mẽ ajarênh mar nê mẽ anhÿ hã ixkĩnh ã amnhĩ jarê. ¹⁸ Na

pre Tirtũm tanhmã mẽ akrã hto ka mẽ amnhĩ tomnuj mã anhũrer pa mẽ hpãnhã hkõt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyrãk o kot paj mẽ amã awjarê. Nã amnepêm na ka prem ajamaxpêr punuj kõt amnhĩ tomnuj o ri apa. Nê gaa nê ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhỹr kêt nê. Pãnhã tãm ri ajamaxpêr o ri apa. Jao gaa nê ra Tirtũm kãm hprãm xã hkõt tãm amnhĩ nhĩpêx mex nê. ²⁰ Na ka prem tee ri amã amnhĩ tomnuj mã anhũrer prãm kaprỹ. Te tãm kot amnhĩ tã mẽ ato htỹx nê amnhĩ kõt mẽ ato pa pyrãk o mẽ anhĩpêx. ²¹ Xãn ka prem ã amnhĩ tomnuj anhỹr o apa nê akĩnh nê ajamakêtkati nê ri apa? Nã na ka prem akĩnh nê apa hkêt nê. Tã na ka prem Jejus kõt amnhĩ xunhwỹ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaãm nê. ã mẽ kot amnhĩ tomnuj anhỹr o pa xwỹnhjaja na htem ja mỹrapê ty nê ma mẽ kot amnhĩ xã htỹx kamã hamak tũm xãta wỹr pa. ²² No na pre ra Tirtũm tanhmã mẽ akrã hto ka mẽ amnhĩ tomnuj kaga hpa. Te Tirtũm tãm kot hpãnhã amnhĩ tã mẽ ato htỹx nê amnhĩ kõt mẽ ato pa pyrãk ka mẽ ra ãm hkõt pix mã amnhĩ nhĩpêx mex o ri apa. Nê hpãnhã amã kapêr kõt pix mã amnhĩ nhĩpêx mex prãm. Nê hkõt pix mã amnhĩ nhĩpêx hprãm. Jakamã kot kaj mẽ nhỹrmã kuri amex kumrêx nê atĩr tũm nê ri apa ho apa.

²³ Na hte mẽ kãm àpênh o ri mẽ pa xwỹnhjaja mẽ kãm mẽmoj tã apê nê àpênh pa nê hpãnhã amnhĩrer xã jamỹ. Ja pyrã nê koja mẽ kot amnhĩ tomnuj xwỹnhjaja nhỹrmã ty hãmri nê ma mẽ kot amnhĩ xã htỹx kamã hamak tũm xãta wỹr ma pa.

No mẽ pahte amnhĩ kaxyw Jejus Kris kõt pajamaxpêr xwỹnhjaja na hte Tirtũm ja hã mẽ pahpumu nê mẽ pajarênh o:

—Nã ãm hãmri. Jajaja koja nhỹrmã Ixkra mẽ wa Ixkuri mex kumrêx nê htĩr tũm nê pa ho pa. Hêxta waa nê. Nã ãm hãmri koja mẽ anê. Anê.

Xã tãm mẽ pahte amnhĩ nhĩpêx ã mẽ pahpumunh kõt na hte ã mẽ pajarênh anê? Nã ãm mẽ pahte Kra Jejus Kris kõt amnhĩ xunhwỹr ã mẽ pahpumunh kõt pix mã na hte ã mẽ pajarênh anê.

7

Mẽ pahte amnhĩ tomnuj kot axte amnhĩ tã mẽ pahto htỹx kêt ã harênh

Rõmãn 8.2, 10.4; Karatas 4.1; Epes 2.2; Korosê 3.7

¹ E Jejus kõt ixkwỹjaja. Nã Tirtũm kot mẽ pakaxyw tanhmã Mojes mã kapêr tota na ka mẽ ra mar tỹx nê. Na pu htem kormã pahtĩr ri hkõt amnhĩ nhĩpêx o ri papa. Tã ty hãmri nê axte hkõt amnhĩ nhĩpêx kêt nê. Ra mẽ ate ja mar tỹx. E pa mẽ amã ja hã ejêp jarê ka mẽ inhma. ² Nã finat Mojes kot Tirtũm nhỹ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mẽhõ ho mjên hãmri nê ãm kõt pix mã ri pa ho pa nê aa hkaga hkêt nê. No koja nhỹrmã mjên kêp ty nhũm ahte ri pa. Hãmri nê kãm axte mẽhõ ho mjên prãm nê mãmri axte mẽhõ ho mjên. Ja tanhmã kute hkêt. ³ Nom koja wam mjên arĩ htĩr japêr nhũm hprõ tanhmã hamaxpêr to nê hkaga nê hpãnhã nhãm mẽhõ ho mjên. Hã koja Tirtũm pê ja homnuj nê. Nom koja mjên ra kêp ty nhũm mỹrpê axte kãm mẽhõ ho mjên prãm nê mãmri ho mjên. Ja na Tirtũm pê homnuj kêt. Ra wam mjênja htyk kênã. ã Tirtũm kot Mojes mã mẽ pakaxyw mẽmoj tã karõ kot anhỹr.

⁴ Tã ja pyrã nê na pu prem amnepêm pajamaxpêr o:

—Ixte Tirtũm kapêr kõt pix mã amnhĩ nhĩpêx o ri ixpa jakamã nhũm Tirtũm ja hã ixpumu nê amnhĩm inhmex ã ijarê. Anê.

Tã pu mẽ ra tanhmã pajamaxpêr to nê hpãnhã pajamaxpêr õ ho pajamaxpêr o:

—Nã na xep hte Tirtũm mẽ ixte kapêr kõt amnhĩ nhĩpêx ã mẽ ixpumunh kõt amnhĩm mẽ inhmex xwỹnh ã mẽ ijarênh kêt nê. Mẽ ixte hkõt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkõt ijamaxpêr nê hkõt amnhĩ xunhwỹr pix ã mẽ ixpumunh kõt na hte mẽ inhmex ã mẽ ijarê. ãm ja pix ã mẽ ixpumunh kõt na hte mẽ ixto hkra nê mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhỹr o pa. Anê.

Ã mẽ pajamaxpêr nyw kot anhÿr. Jakamã te mẽ pahte mēhō kot mjên nyw xwÿnh gryk ã axte mjên htyk xwÿnh mã hamaxpêr kêeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nê Tĩrtũm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamaxpêr to hkêt nê.

⁵ Nê amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tĩrtũm kapêr mar tÿx tã kuma nê ãm kuma nê ri papa nê ri hkôt amnhĩ nhĩpêx kêt nê. Mÿrapê nhũm Tĩrtũm tee ri ja hã mẽ pahpumu nê mẽ pahtyk nê ma mẽ kot amnhĩ xà htÿx kamã hamak tũm xà hwÿr papa mã xwÿnhjê hã mẽ pajarê.

⁶ Nê amnepêm na pu pre htem ã pajamaxpêr anhÿr o:

—Nà kot paj Tĩrtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwÿnh ã ijarê.

Anhÿr o pajamaxpêr no ãm tee ri ã pajamaxpêr anhÿr kaprÿ. Nê arĩ tanhmã amnhĩ tomnuj to ho ri papa. Tã hpãnhã te Jesus Kris kôt pahtyk pyrãk o amnhĩ nhĩpêx nê hpãnhã Karō nhÿ hã tãm amnhĩ nhĩpêx. Jao ra tee ri mẽ pamã Tĩrtũm kapêr kôt amnhĩ nhĩpêx prãm kaprÿ hkêt nê. Ra Tĩrtũm Karō nhÿ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapêr ã kagà htũm kot tanhmã mẽ pajarênh to Rômãn 3.20, 5.20; Karatas 3.23-24

⁷ Tã Tĩrtũm mẽ pahte kapêr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarênh kêt jakamã mẽmo kaxyw na kapêr ã kagà htũmja? Nà mẽ pahte mar nê pahprĩ hã Tĩrtũm noo mã mẽ kot amnhĩ tomnuj xà jarênh mar nê omunh mex kaxyw na. Na hte mẽ pahkwÿjê kukrêx kĩnh o pamã ho panhō hprãm nê mẽ pamã karō. Æ kot mẽmoj punuj piitã nê mẽ pamã karō kot anhÿr. Tã mẽ pahte ja mar kêt ronhÿx pu mẽ Tĩrtũm kêp ja homnuj ã harênh mar kêt nê. ⁸ Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kĩnh o ho pamã panhō hprãmja mãânên kêp ja homnuj ã harênh mar tã nom aa hkaga hkêt nê arĩ pamã axpên kukrêx kĩnh o pamã ho panhō hprãm tÿx rãhã ho ri papa. Kop ãm Tĩrtũm kapêr kêt ronhÿx pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyrãk. ⁹ Amnepê mã ixte Tĩrtũm kapêr mar kêt ri na pa pre ixtÿx ri amnhĩ kukamã ijamaxpêr o ri ixpa nê ijamaxpêr o:

—E kot paj nhÿrmã Tĩrtũm ri ixtĩr tũm nê inhmex nê ixpa ho ixpa.

Anhÿr tã hpãnhã pamã axpên kukrêx kĩnh o ho pamã panhō hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nà ã ixte amnhĩ nhĩpêx anhÿr o ixpa jakamã kot paj nhÿrmã ty nhũm Tĩrtũm akupÿm ixto ixtĩr pa kuri ixtĩr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwÿnh na pa. Kot paj nhÿrmã ty nhũm Tĩrtũm ma mẽ kot amnhĩ xà htÿx kamã hamak tũm xàta wÿr amnhĩ nê inhmê. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa. ¹⁰ Tã hpãnhã axtem ijamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhÿrmã ixtÿk tã hwÿr api nê kuri ixtĩr tũm nê inhmex nê ixpa ho ixpa. Nà kot paj anê.

Anhÿr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprÿ. Na pa pre xatã kapêr nhĩrōp ixkuhê nê tee ri ja hã amnhĩ pumu nê ijamaxpêr o:

—Kwa tanhmã kot pa amnhĩ nhĩpêx to nê ãm Tĩrtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhÿr prãm tÿx kaprÿ. Æm ixte amnhĩ tomnuj pix o ri ixpa xwÿnh jakamã ãm hãmri koja amnhĩ nê kuwÿta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mẽhō koja Tĩrtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhÿr prãm kaprÿ. Mẽ pahpê hiltÿx kumrêx jakamã na pa pre ixtÿx ixte Tĩrtũm kuri ixtĩr tũm nê ri ixpa hã amnhĩ kukamã amnhĩ jarênh kaprÿ. Æm xatã kapêr

nhĩrõp ixkuhê nê amnhĩ tomnuj pix o ri ixpaja mýrapê koja mẽ kot amnhĩ xà htýx kamã hamak tũm xàta wýr amnhĩ nê inhmẽ. ¹² Kot anhýr tã tanhmã kot puj mẽ Tĩrtũm kapêr ã kagà htũmta jarênh to? Nà kot mẽ pamã mẽ pahte amnhĩ nhĩpêx ã karõta mex kumrêx. Mex o mex. ¹³ Mex kumrêx tã na htem kuma nê tee ri kãm hkõt amnhĩ nhĩpêx hprãm kaprý. Jao nhýrmã ty nê ma kuwy hwýr pa. Kêr pa na pa pre ra mar nê omunh mex tã hkõt amnhĩ nhĩpêx mex kêr nê. Jao ra ixte amnhĩ tomnuj xwýnh ã amnhĩ pumu. Na pa pre tee ri inhmã hkõt amnhĩ nhĩpêx o ri ixpa hprãm tã no ãm xatã kapêr nhĩrõp ixkuhê nê hkwým ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nê amnhĩ kukamã ijamaxpêr o:

—Nà na pa hte ãm tee ri inhmã Tĩrtũm kõt amnhĩ nhĩpêx prãm kaprý no ãm ho anhýr kêr nê. ãm ixte amnhĩ tomnuj pix o ixpa xwýnh na pa. Ja mýrapê koja Tĩrtũm amnhĩ nê ma kuwy hwýr inhmẽ. Nà koja ixto anê. Anê.

Mẽ pahte mẽ pamã amnhĩ tomnuj kaga hprãm kaprý hã mẽ pajarênh

Karatas 5.17

¹⁴ Nê Tĩrtũm kapêr ã kagà htũmta Tĩrtũm kapêr na. Nê Tĩrtũm kĩnhã ãm inhĩ pix na pa ri ixpa jakamã tanhmã kot pa amnhĩ to nê kapêr kõt ri amnhĩ nhĩpêx mex o ri ixpa? ¹⁵ Inhmã tãm ixte amnhĩ nhĩpêx prãm tã no ãm amnhĩ tomnuj pix o ri ixpa. Mẽmoj ixpê omnuj tã pa hte ra hkõt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhýr o ri ixpa? Mẽmoj ixpê omnuj nhũm inhmã ho anhýr prãm kêr tã ra ho anê. Nhũm mẽmoj mex nhũm inhmã ho anhýr prãm tã ho anhýr kêr nê. Mon pa hte axtem nê ã amnhĩ nhĩpêx anhýr o ri ixpa? Anê.

¹⁶ ã ixte amnhĩ nhĩpêx anhýr o ri ixpa htã ra Tĩrtũm kapêr mexta ma hãmri nê ra ijamaxpêr o:

—Nà Tĩrtũm kapêrja mex kumrêx tã pa tee ri inhmã hkõt amnhĩ nhĩpêx mex hprãm kaprý ho ri ixpa. Hêxta waa nê. Anê.

¹⁷ Inhmã amnhĩ tomnuj prãm kêr tã arĩ ixkaxwýnh kãm ijamaxpêr punuj nhý hã ã amnhĩ nhĩpêx anhýr o ri ixpa. ¹⁸ Nê inhmã tãm amnhĩ nhĩpêx prãm tã no ãm tee ri ã inhmã amnhĩ nhĩpêx anhýr prãm kaprý. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhýr prãm kaprý. Ixte amnhĩ tomnuj xwýnh na pa. Nê aa ixte amnhĩ to mex kêr kumrêx xwýnh. ¹⁹ Inhmã mẽmoj mex kõt pix mã amnhĩ nhĩpêx prãm tã no ãm ã amnhĩ nhĩpêx anhýr kêr nê. Nê ãm hkwým ri tanhmã amnhĩ tomnuj to ho ri ixpa. Mẽmoj ixpê omnuj tã pa hkõt amnhĩ nhĩpêx o ri ixpa. ²⁰ Ixte Tĩrtũm kapêr kõt amnhĩ nhĩpêx kêr jakamã na pa hte ã amnhĩ tomnuj anhýr o ri ixpa. Mẽmoj ixpê omnuj pa inhmã ho anhýr prãm kêr tã ra hkõt amnhĩ nhĩpêx. Ixte Tĩrtũm kapêr kõt amnhĩ nhĩpêx kêr jakamã ã amnhĩ nhĩpêx anhýr o ri ixpa. ²¹ Nê mẽmoj mex nhũm inhmã hkõt amnhĩ nhĩpêx prãm tã ra hkwým ri amnhĩ nhĩpêx. ã ixte amnhĩ nhĩpêx anhýr xwýnh na pa. ²² Nê inhmã Tĩrtũm kapêr mar nê hkõt ri amnhĩ nhĩpêx prãm tã ²³ nom ixte amnhĩ tomnuj xwýnh jakamã hkõt amnhĩ nhĩpêx kêr nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêr nê. Kot paj ãm amnhĩ to mex pix kukamã ijamaxpêr o ri ixpa.

Anhýr tã no ãm arĩ amnhĩ tomnuj o ri ixpa nê amnhĩ to mex kêr. Ixte amnhĩ tomnuj xwýnh jakamã na pa hte ã amnhĩ nhĩpêx anhýr rãhã ho ri ixpa nê tee ri inhmã amnhĩ tomnuj kaga hprãm kaprý. ²⁴ Hêxta waa nê. Na pa ixkaprĩ htýx nê ri ixpa. ã ixte amnhĩ nhĩpêx anhýr o ri ixpaja mýrapê kot paj nhýrmã ty nê ma mẽ kot amnhĩ xà htýx kamã hamak tũm xàta wýr ma mō. Mẽhō kot tanhmã ixkrã hto pa ã amnhĩ nhĩpêx anhýrja kaga? ²⁵ Nà mẽ panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtýx to. Jakamã na pa axte tee ri amnhĩ kukamã ijamaxpêr kêr nê. Pãnhã ixkĩnh nê ri ixpa nê Tĩrtũm mã kãm:

—Pa Tĩrtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtỳx to pa rĩ kormã Tĩrtũm kapẽr kôt amnhĩ nhĩpẽx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte anhỹr xwỳnh na pa.

8

Tĩrtũm Karõ kot mẽ pahto tãm mẽ pahte amnhĩ nhĩpẽx xwỳnh ã harẽnh
Karatas 5.16-26

¹ Nẽ Jejus Kris kẽp mẽmoj punuj kutã mẽ pahto mẽ paxihtỳx xwỳnh jakamã mẽ pahte hkôt amnhĩ xunhwỳr xwỳnhjaja na pu htem ỹ hã amnhĩ tomnuj o ri papa hkêt nẽ. Jao mẽ pahte kuwy hwỳr papa mã xwỳnh kêt. ² Te ra mẽ pahtyk nhũm Tĩrtũm kot akupỹm mẽ pahto mẽ pahtĩr pyrãk jakamã nhũm Karõja mẽ pahkarõ mã agiẽ pu mẽ ỹ hã tãm amnhĩ nhĩpẽx o ri papa. Te tãm kot amnhĩ nhĩpẽx pyrãk o amnhĩ nhĩpẽx nhũm Karõ mẽmoj punuj piitã kutã mẽ pahto mẽ paxihtỳx. Kẽp mẽ pajamxpẽr punuj kutã mẽ pahto mẽ paxihtỳx xwỳnh jakamã kot puj mẽ nhỹrmã mẽ kot amnhĩ xà htỳx kamã hamak tũm xàta wỳr papa hkêt nẽ.

³ Nom kormã mẽ pahte Jejus kôt amnhĩ xunhwỳr kêt ri na pu prem tee ri pamã Tĩrtũm kapẽr piitã hkôt amnhĩ nhĩpẽx prãm kaprỳ nhũm mẽ pahpẽ hihtỳx kumrẽx. Jakamã tanhmã koja Tĩrtũm amnhĩ to nẽ amnhĩ mã mẽ pamex xwỳnh ã mẽ pajarẽ? Na pre tee ri amnhĩ tã mẽ pajamã hãmri nẽ mẽ pahwỳr Kraja mẽ nhũm man mẽ pahwỳr wrỳ nẽ mẽ pahpyrà nẽ ỹ ho mẽ pakamã kato. Nom mẽ parom aa tanhmã amnhĩ tomnuj to hkêt kumrẽx nẽ ri pa. Tã mẽ kot hpĩr tã nhũm amarĩ htyk kêt nẽ. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kẽp mẽ pajamxpẽr punuj kutã mẽ pahto paxihtỳx xwỳnh. Na pu htem hkôt amnhĩ xunhwỳ hãmri nẽ kukwak ri amnhĩ tomnuj o ri papa hkêt nẽ. ⁴ Pãnhã Tĩrtũm kot amnhĩ nhĩpẽx kôt amnhĩ nhĩpẽx o ri papa nẽ axte mẽ pahte amnhĩ nhĩpẽx tũm kôt amnhĩ nhĩpẽx kêt nẽ. Hãmri hpãnhã Tĩrtũm Karõ kot amnhĩ nhĩpẽx kôt pix mã amnhĩ nhĩpẽx. Nẽ hamaxpẽr kôt pix mã pajamxpẽr. Ja kaxyw na pre Tĩrtũm mẽ pahwỳr Kraja mẽ nhũm wrỳ nẽ mẽ pahpiitã mẽ panẽ ty.

⁵ Nẽ mẽ kot amnhĩ krã hkôt tanhmã amnhĩ nhĩpẽx to ho ri mẽ pa xwỳnhjaja na htem htỳx ri tanhmã hamaxpẽr to xà hkôt amnhĩ nhĩpẽx o ri pa. No kêt Tĩrtũm Karõ kot mẽ pahkarõ mã gĩx xwỳnhjaja na pu htem mẽ kurom te Jejus jamaxpẽr pyrãk o pajamxpẽr o papa.

⁶ Nẽ mẽ kot amnhĩ krã hkôt amnhĩ nhĩpẽx xwỳnhjaja koja mẽ nhỹrmã ty nẽ ma kuwy hwỳr pa nẽ kamã pa ho pa. No mẽ pahte Tĩrtũm Karõ hkôt amnhĩ nhĩpẽx xwỳnhjaja kot puj mẽ pajamxpẽr nyw o pajamxpẽr nẽ amnhĩ nhĩpẽx nyw o amnhĩ nhĩpẽx. Jao paxãmnhĩx ri pajamakẽtkati nẽ ri papa. Nẽ nhỹrmã ty hãmri nẽ Tĩrtũm mẽ Jejus wa kuri akupỹm pahtĩr tũm nẽ pamex kumrẽx nẽ papa ho papa.

⁷ Nẽ mẽ kot amnhĩ krã hkôt ri amnhĩ nhĩpẽx xwỳnhjaja kãm Tĩrtũm kĩnh kêt. Nẽ kãm kapẽr mar prãm kêt jakamã tanhmã kot mẽ amnhĩ to nẽ hkôt amnhĩ nhĩpẽx? ⁸ Koja mẽhõ amnhĩ krã hkôt kãm hprãm xà hkôt pix mã amnhĩ nhĩpẽx hãmri nhũm Tĩrtũm tee ri ja hã omu nẽ hkĩnh kêt nẽ. ⁹ No mẽ papajaja na pu htem mẽ urak nẽ ã amnhĩ nhĩpẽx anhỹr kêt nẽ. Ra Tĩrtũm Karõ kot mẽ pahkarõ mã gĩx jakamã na pu htem hkôt pix mã amnhĩ nhĩpẽx hprãm. No koja Tĩrtũm Karõ mẽhõ kaxwỳnh mã àr kêt nẽ nhũm kẽp hkra hkêt nẽ.

¹⁰⁻¹¹ Tã mẽ papajaja. Mẽ pahte amnhĩ tomnuj mỳrapẽ koja mẽ pakrãhkàja nhỹrmã ty. No nhũm Tĩrtũm ra kot amnhĩm mẽ pahte amnhĩ to mex xwỳnh ã mẽ pajarẽnh nhũm Kris Karõ kot mẽ pahkarõ mã gĩx jakamã koja mẽ pahkarõja htyk kêt nẽ. Mẽ pakrãhkà pix koja ty nhũm mẽ pahkarõja ma kaxkwa hwỳr àpir kurẽ kumrẽx. Tã nhũm nhỹrmã Tĩrtũm akupỹm mẽ pakrãhkà ho htĩr nẽ akupỹm mẽ pahkarõja mẽ pakrãhkàm hagiẽ pu mẽ wa kuri pahtĩr tũm nẽ papa ho papa. ¹² Jakamã e kwa ixkwỳjaja. Kẽr pu mẽ axte ri mẽ pajamxpẽr tũm kôt amnhĩ nhĩpẽx o ri papa hkêt nẽ. ¹³ Kot puj mẽ arĩ ã amnhĩ nhĩpẽx anhỹr o ri papa hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xàta

wýr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm hãmri nẽ amnhĩ kukamã pajamaxpêr o:

—Nà inhmã ã amnhĩ nhĩpêx anhýr prãm tã kot paj Tĩrtũm Karõ nhỹ hã ja kutã amnhĩ to htýx nẽ ho anhýr kêt nẽ. Anẽ.

Kot puj mẽ ã pajamaxpêr anẽ hãmri nẽ nhỹrmã kuwy wýr papa hkêt nẽ. Pãnhã Tĩrtũm mẽ Jesus wa kuri pamex nẽ pahtĩr tũm nẽ ri papa ho papa. ¹⁴ Mẽ kot Tĩrtũm Karõ hkôt amnhĩ nhĩpêx xwýnhjaja kêp Tĩrtũm kraa.

¹⁵ Nom amnepêr kormã mẽ pahte hkôt amnhĩ xunhwýr kêt ri. Nẽ kormã mẽ pamã kapêr mar prãm kêt ri nhũm kot amnhĩ tã mẽ pahpumunh nẽ tanhmã mẽ pahto pumaj na pu prem pamã uma ho ri papa. Tã hkôt amnhĩ xunhwý nhũm Karõja mẽ pahkarõ mã gjêx jakamã na pu htem ra pamã uma hkêt nẽ ri papa. Karõ kot mẽ pahpê Tĩrtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nẽ ri papa. Nẽ paxãmnhĩx pajamakêtkati nẽ kãm amnhĩ jarẽ nẽ kãm amnhĩ jarênh o:

—Pa Inhĩpêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anẽ.

Jao ra mẽ pamã uma hkêt nẽ ri papa. ¹⁶ Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o:

—Nà Tĩrtũm Karõ kot ixkarõ mã àr jakamã ixpê hkra na pa. Anẽ.

Nhỹrmã mẽmoj piitã akupým mex par ã harênh

Sikũn Korõt 4.16-18; Korosẽ 3.4; Wam Pêtre 4.13

¹⁷ Nẽ mẽ kãm Tĩrtũm prãm kêt xwýnhjaja na htem te mẽ kot Tĩrtũm Kra Jesus nhĩpêx pyrãk o mẽ panhĩpêx pu mẽ pahpunuj nẽ ri papa. Nom kot puj mẽ nhỹrmã Tĩrtũm mex o mex xwýnhja kuri pamex kumrêx nẽ papa. Mẽ pahpê hkra jakamã kot puj mẽ Kra Jesus pyrã nẽ õ krĩ kamã kuri pamex kumrêx nẽ ri papa ho papa. ¹⁸ Jar Jesus ã mẽ pahpunuj nẽ ri papa htã kot puj mẽ nhỹrmã kuri pamex kumrêx nẽ papa ho papa. Hãmri nẽ mẽ pamex o pamex ã amnhĩ pumu nẽ jar pika ja kamã tanhmã mẽ pahpunuj toja mã axte pajamaxpêr kêt kumrêx.

¹⁹ Nẽ pika hkôt Tĩrtũm kot mẽmoj ho kator xwýnhjaja na htem Tĩrtũm kot mẽ pahto mex par jatur xãm mẽnh ã arĩgro jamãr rãhã ho pa. àk nẽ mry nẽ pĩ nẽ gô nẽ mẽmoj piitã mẽ pajamãr o pa. Te kot mẽ pakukamã hamaxpêr o:

—Kwa mẽmo arĩgro hã koja Tĩrtũm hkrajê piitã ho amnhĩrit nẽ mẽ ho mex par jatur xãm kumẽ pu mẽ ja hã mẽ omu? Hêxta waa nẽ. Inhmã tokyx ja hã mẽ omunh prãm týx. Koja tokyx ã mẽ hipêx anẽ pa ixkĩnh týx kumrêx.

Anhýr o hamaxpêr pyrãk. ²⁰ Mẽmo kaxyw na hte mryja ã mẽ pakukamã hamaxpêr anẽ? Nà amnepê mã Tĩrtũm kot mẽmoj piitã ho katorta ã nhũm pre piitã mex o mex. Pĩ nẽ mry nẽ gô. Mẽmoj piitã mex kumrêx rãhã nẽ. Aa grã nẽ htyk kêt kumrêx. Tã Atãw kot amnhĩ tomnuj mýrapê nhũm ra ý hã mẽmoj piitã homnu par jakamã na hte mẽmoj htĩr nẽ pa nẽ gaa nẽ ty nẽ hapêx. Nẽ mẽ pahpur kãm ahkagrõt punuj hapôj. Atãw kot amnhĩ tomnuj mýrapê nhũm Tĩrtũm kapêr xã hkôt ã mẽmoj omnu hpar anẽ. ²¹ Nom koja arĩ rãhã ho rãhã hkêt nẽ. Koja nhỹrmã Tĩrtũm akupým mẽmoj piitã ho mex pa nhũm mex o mex nẽ axte grã rý axte htyk nẽ hapêx kêt nẽ. Nẽ axte omnu nẽ hikwý hkêt nẽ. Koja mẽ pahpyrã nẽ mex o mex. Jakamã na htem Tĩrtũm kot mẽ pahto mex par jatur xãm mẽnh xã hã arĩgro jamãr rãhã ho pa. ²² Te mẽhõ ni hpjagri kaxyw õhy xã htýx nẽ tokyx kãm hpjagri hprãm xã àmra ho nõr pyrãk o amnhĩ nhĩpêx pẽ mẽ pahto mex jatur xãm mẽnh ã arĩgrota jamãr o pa.

²³ Nẽ mẽ papajaja na pu htem tanhmã pahpunuj to nẽ jajê pyrã nẽ te amnhĩ kamnhêr o ri papa pyrãk. Rý tanhmã paxà kute nẽ ri papa. Rý pamã prãm nẽ paxàà nẽ ri papa. Nẽ tanhmã mẽ pahpunuj to nẽ ri papa. Jao te pĩ nẽ gô nẽ mryja pyrã nẽ amnhĩ tã Tĩrtũm kot mẽ pahto mex par jatur xãm mẽnh ã arĩgro jamãr rãhã ho ri papa.

Na pre Tĩrtũm mẽ pahwýr Karõ rẽ nhũm mẽ pahkarõ mã agjê nẽ mẽ pakukamã Tĩrtũm tanhmã kot mẽ pahto mex to hã mẽ pamã ho amnhĩrit nẽ mẽ pamã ho amnhĩrit o:

—Koja nhÿrmã Tÿrtÿm mẽ ato mex par jatur xàm kumẽ nẽ mẽ piitã mẽ kãm mẽ apê hkra hã mẽ ato amnhÿrÿt. Hãmri nẽ mẽ amã mẽ anhÿ nyw gõ ka mẽ axte axà nẽ ri apa nẽ atyk kêt nẽ. Hãmri nẽ Tÿrtÿm ri amex kumrẽx nẽ ri apa ho apa. Nà kot kaj mẽ nhÿrmã ã amnhÿ nhÿpêx anẽ. Anẽ.

Ã Tÿrtÿm Karõ kot mẽ pakukamã mẽ pajarẽnh anhÿr jakamã na pu htem amnhÿ tã kot mẽ pahto mex jatur xàm mẽnh pix jamãr o ri papa. ²⁴ Nom na kormã ã mẽ pahto mex anhÿr kêt nẽ. Kormã mẽ pamã mẽ panhÿ nyw nhõr kêt nẽ. Nom ra kot mẽ pahto hkra jakamã pu mẽ ja hã amnhÿ pumu nẽ pajamexpêr o:

—Nà ra Tÿrtÿm kot ixto hkra jakamã koja nhÿrmã mãänën inhmã inhÿ nyw gõ. Nà koja inhmã kugõ.

²⁵ Anhÿr o pajamexpêr tã kormã. Na pu htem kormã amnhÿ tã hamãr rãhã ho ri papa nẽ aa hkaga hkêt nẽ papa.

Mẽ pahte Tÿrtÿm Karõ nhÿ hã Tÿrtÿm mã amnhÿ jarẽnh

²⁶ Nẽ na pu htem Tÿrtÿm mã amnhÿ jarẽnh kaxyw nhÿm hte Karõja mẽ pahto ajuta pu mẽ ÿ hã pakatàt kôt kãm tanhmã amnhÿ jarẽnh to. No kot puj mẽ amnhÿ krã hkôt kãm amnhÿ jarẽnh mex kêt nẽ. Na pu htem ja kaxyw tee ri amnhÿ kukamã pajamexpêr o:

—Kwa tanhmã kot pa Tÿrtÿm mã amnhÿ jarẽnh to? Tanhmã kot pa mẽmoj tã ixàhwÿr to rÿ amnhÿ to hwÿr to? Nà kot paj amnhÿ krã hkôt ja ho anhÿr mex kêt nẽ. Hêxta waa nẽ. Anẽ.

No nhÿm Tÿrtÿm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ÿ hã kãm amnhÿ jarẽnh mex nẽ pakatàt kôt mẽmoj tã kuwÿ. Te Karõja tanhmã mẽ pakute hã mẽ pahpumunh nẽ mẽ pakamã ukapri xaj tãm mẽ pahto hwÿr pyrãk.

²⁷ Jakamã pu mẽ ÿ hã tanhmã Tÿrtÿm mã amnhÿ jarẽnh to nhÿm mẽ pamar kurê kumrẽx. Ra kot mẽ pajamexpêr kôt mẽ pahpumunh par kênã. Nhÿm ra Karõ kot mẽ pahkarõ mã gjêx jakamã na pu htem kãm hprãm xà hkôt kãm amnhÿ jarẽ nẽ tanhmã amnhÿ to paxàhwÿr to.

Tÿrtÿm kot mẽ pamã mẽmoj piitã ho mex ã harẽnh

Rômãn 8.37; Piripos 1.12; Wam Pêtre 5.10

²⁸ Nẽ mẽ pamã Tÿrtÿm kÿnh xwÿnhjaja. Tÿrtÿm kot mẽ pahto hkra xwÿnhjaja. Koja mẽmoj mẽ pakamã tanhmã amnhÿ to htã kêr pu mẽ ãm ja hã amnhÿ pumu nẽ tee ri amnhÿ kukamã pajamexpêr kêt nẽ. Koja te mẽ pahpê omnuj pyrãk tã koja nhÿrmã hpãnhã mẽ pamã mex nẽ. Koja Tÿrtÿm nhÿrmã tanhmã mẽ pamã mẽmojta o mex to. ²⁹ Amnepê mã mẽmoj piitã hkêt ri na pre Tÿrtÿm mẽ pakukamã tanhmã mẽ pajarẽnh to nẽ mẽ pajarẽnh o:

—E kot paj nhÿrmã mẽ kot Ixkra Jejus kôt amnhÿ xunhwÿr xwÿnhjê ho ixkra jakamã nhÿm mẽ Jejus pyrã nẽ kêp ixkraa. Nẽ urãk nẽ ixkapêr kôt amnhÿ nhÿpêx o pa. Jao pa ra ixkra xohtõ nẽ. Nà ja na inhmã hprãm. Anẽ.

³⁰ Tã pu htem pajapõj nẽ ri papa. Hãmri nẽ kapêr ma nẽ amnhÿ kaxyw Kra Jejus kôt pajamexpêr nẽ hkôt amnhÿ xunhwÿ. Hãmri nhÿm Tÿrtÿm ja hã mẽ pahpumu nẽ pahto hkra nẽ amnhÿm mẽ pamex xwÿnh ã mẽ pajarẽ nẽ mẽ pahto mex nẽ. Nẽ te ho Kra Jejus nhÿpêx pyrãk o mẽ panhÿpêx. Jao nhÿrmã wa kuri mẽ pahpêr tÿm nẽ papa ho papa mã xwÿnh ã mẽ pajarẽ.

Mêhõ kot Tÿrtÿm pê aa mẽ papytãr kêt ã harẽnh

Rômãn 5.1

³¹ Tã ã Tÿrtÿm kãm mẽ pajapê nẽ mẽ pahto mex kot anhÿr. ã kot mẽ panhÿpêx mex anhÿr jakamã ra mẽ pahkôt pa ho pa rãhãã. Jakamã mêhõ koja ÿhkra pê mẽ pahpÿtã? Nẽ mêhõ koja tanhmã ri kêp mẽ pahto? Nà koja kêp mẽ papytãr rÿ tanhmã kêp mẽ pahto hkêt nẽ. ³² Tÿrtÿm kãm Kra Jejus japê htÿx tã na pre mẽ pahpê nẽ hkêt nẽ mẽ pahwÿr kumẽ. Te kot mẽ pamã õr pyrãk o hipêx nhÿm mẽ pahwÿr wrÿ nẽ mẽ panê ty. Tã ra Tÿrtÿm kot mẽ pamã õr jakamã koja mãänën kãm mẽ pahte Kra hkôt amnhÿ xunhwÿr xwÿnhjê japê nẽ mẽ pahto mex rãhã ho ri pa. Nà koja ã mẽ pahto mex anẽ.

³³ Jakamã mēhō koja kām mē pahte amnhī tomnuj xwỳnh ã mē pajarē? Ra tām kot mē pahto hkra nē mē pahte amnhī to mex xwỳnh ã mē pajarēnh kēnã kot kêt mēhō kām tanhmã mē pahto kapēr punuj to nhũm mē kuma. Koja mē tee ri kām tanhmã mē pahto kapēr to kaprỳ. ³⁴ Na pre ra Jejus Kris mē pahte amnhī tomnuj pãnhã amnhīrer kaxyw mē panê ty nhũm Tirtũm akupỹm ho htĩr. Hãmri nhũm ma akupỹm kaxkwa hwỳr api nē Pahi Maati krĩ xà kamã Tirtũm nhĩhkô hã hkrĩ ho hkrĩ. Nē Tirtũm mã mē pakutã nojarêt rãhã ho kuri hkrĩ ho hkrĩ. Jakamã mēhō koja kēp mē kot amnhī xà htỳx kamã hamak tũm xàta wỳr mē pajano? Nà amrakati kumrēx.

³⁵ Nē Krisja kaxkwa kamã Tirtũm nhĩhkô hã hkrĩ ho hkrĩ htã mãnẽn jar mē pahkôt pa ho pa. Kām mē pajapê htỳx jakamã kot puj mē tanhmã pahpunuj to htã nhũm arĩ kām mē pajapê nē mē pahkôt pa ho pa.

Rỳ nhũm mē kot hkôt amnhī xunhwỳr kêt xwỳnhjaja tanhmã hã mē pahto htã nhũm arĩ kām mē pajapê kamã mē pahkôt pa ho pa.

Rỳ mē pamã prãm nē ri papa. Rỳ mē paxê hkêt nē pamã kry nē ri papa htã nhũm arĩ kām mē pajapê kamã mē pahkôt pa ho pa.

Rỳ ra mē kot hã mē panhĩmex kaxyw rỳ hã mē pahpar kumrēx. Tã nhũm arĩ kām mē pajapê kamã mē pahkôt pa ho pa rãhã nē.

Kām mē pajapê kamã mē pahkôt pa ho pa rãhã jakamã pu mē tee ri amnhī kukamã pajamaxpēr kêt nē. ãm hkôt paxãmnhĩx ri pajamakêtkati nē ri papa ho papa. ³⁶ Tirtũm kapēr ã kagã htũm te mē papajaja mē pahte kām tanhmã amnhī jarēnh to pyrã nē mē pajarēnh kot:

Pa Tirtũm. Na htem atã mē ixtomnuj tỳx o pa.

Nē ra mē kot mē inhĩmex kaxyw.

Nē mē inhĩpêx o te mē kot ôwêhti ho mōr nē hpar kaxyw tanhmã hipêx to pyrãk.

Jakamã na pa mē ra ixtyk kaxyw.

Anhỹr o kot mē pajarēnh. ³⁷ Tã kwãr mē ã mē panhĩpêx anē. Arĩ Kris kām mē pajapê kamã mē pahkôt pa ho pa rãhã jakamã mē kot tanhmã mē pahto htã pu mē arĩ amnhī kaxyw kām pajamaxpēr tỳx rãhã ho ri papa. Nhũm arĩ mē kutã mē pahto paxihtỳx pu mē arĩ mē kãm pakuhê.

³⁸ Mēmoj koja tanhmã mē pahto nhũm Tirtũm tee ri ja hã mē pahpumu nē kãm mē pajapê hkêt nē? Nà amrakati kumrēx. Koja mēhō rỳ mēmoj mē pahpê àmnàr kêt nē. Na hte jar pika ja kamã Kris kãm mē pajapê kamã mē pahkôt pa ho pa. Nē kot puj mē nhỹrmã ty nhũm arĩ kãm mē pajapê kamã mē pahkôt pa ho pa rãhã nē. Jakamã koja mēkarō rỳ mēkarōmnuti rỳ jar pika ja kamã mē kãm Tirtũm prãm kêt xwỳnhjaja mē pahpê àmnàr kêt nē. Rỳ mēmoj tanhmã kute. Rỳ kormã hapu hã mēmoj tanhmã kute. Koja mēmoj piitã tee ri tanhmã kēp mē pahto htã nhũm Kris arĩ kãm mē pajapê kamã mē pahkôt pa ho pa rãhã nē nhũm mēmoj tee ri mē pahpê àmnàr kaprỳ. ³⁹ Nē koja kỳj rũm mēmoj wry nē tanhmã kēp mē pahto japêr. Rỳ pyka rũm mēmoj kato nē tanhmã kēp mē pahto japêr. Rỳ kuwy rỳ kôk xápêr tỳx tanhmã kēp mē pahto. Tã nhũm mē panhō Pahihti Jejus Kris arĩ kãm mē pajapê kamã mē pahkôt pa ho pa rãhã nē. Te Tirtũm kãm mē pajapê pyrãk o kãm mē pajapê htỳx kãm mē pahkôt pa ho pa rãhã jakamã nhũm mēmoj tee ri mē pahpê àmnàr kaprỳ.

9

Ijaew jarēnh

Àtre 3.25; Rômãn 3.1-2

¹⁻² Nē na pa tee ri ixkwỳ Ijaew kot tanhmã amnhī nhĩpêx to ho pa hã mē omu nē ixkaprĩ nē. Ixpyrà nē mē kēp Ijaew tã ixkĩnhã amnhī kaxyw Kris kôt hamaxpēr kêt jakamã nhũm Kris tee ri kãm mē hamakêtkati nē àmnhĩx ri mē pa hprãm kaprỳ. Pa tee ri mē hkukamã ijamaxpēr nē ixkaprĩ nē ri ixpa. Nē aa ixkaprĩ ixpê kator kêt kumrēx. Mē kot inhmã mē hkĩnh kêt ã amnhī tã ijarēnh tã inhmã mē hkĩnh kēnã. ãm hãmri na pa ã amnhī jarēnh anē. Tirtũm Karō kot ja hã ixpumunh mex nē inhmã:

—Nà ãm hãmri na ka amã mẽ hkĩnh ã amnhĩ jarẽ. Anẽ.

³ Mẽ kệp ixkwỳ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhĩ kaxyw Kris kôt hamaxpěr kêt jakamã kop ãm Tĩrtũm kot mẽ nê kuwy hwỳr pa inhmẽnh ronhỹx ja inhmã mex. Nhỹx pa kãm:

—Kwa Tĩrtũm. Amnhĩ nê kuwy hwỳr ixkwỳjê rẽn h kêt nê. Inhmã mẽ hapê htỳx kumrẽx. Mẽ hpãnhã pa mãn mẽ nê hwỳr inhmẽ nà.

Anhỹr o nhỹx pa kãm ixkapěr. Nom kot paj amnhĩ to ã ixàhwỳr anhỹr kaprỳ. Tĩrtũm kot mẽ kamã ukapri htã no nhũm mẽ amnhĩ kaxyw Kris mã hamaxpěr kêt jakamã tanhmã koja amnhĩ to nê mẽ hpãnhã pa mẽ nê kuwy wỳr inhmẽ nhũm mẽ ixrom kuri htĩr tũm nê pa ho pa? Mẽ kot hkôt amnhĩ xunhwỳyre hã. ⁴ Mẽ ixpê Ijaew nhĩgêjtjaja na pre Tĩrtũm amnepê mã mẽ ho mex rax nê. Nê kãm mẽ ho hkra hprãm nê. Nhũm prem tanhmã kot amnhĩ nhĩpêx mex to hã no ho omunh o pa. Nê hirã htỳx kãm ri pa hã omu nhũm mẽ kãm:

—E kot kaj mẽ ixkapěr ma nê ixkôt amnhĩ nhĩpêx o ri apa. Hã kot paj mẽ akôt ixpa ho ixpa nê mẽ ato mex nê ka mẽ axpẽn kanrêhã axàmnr rax nê. Hãmri pa mẽ amã pika mex gõ ka mẽ kamã ajamakêtkati nê axàmnhĩx ri apa ho apa.

Anhỹr o mẽ kãm kapěr. Hãmri nê mẽ kaxyw Mojes mã tanhmã kapěr to nê mẽ kaxyw kãm mẽmoj piitã hã karõ. Mẽ kot tanhmã amnhĩ tomnuj to hãmri nê tee ri ja hã amnhĩ pumunh nê tanhmã amnhĩ to Tĩrtũm wỳr to nhũm kot mẽ mar nê mẽ nê ja ho hapêx par kaxyw. Finat Mojes kot amnhĩ xô ri mẽ kãm ujarẽn nhũm mẽ kot mar nê hkôt amnhĩ nhĩpêx mex o ri pa kaxyw. ⁵ Mẽ ixkukamã mẽ ixpãmjaja. Apraãw nê Ijak nê Jako kanrêhã mẽ hkra nê mẽ htàmnhwỳjaja na pre mẽ. Mẽ hwỳr na pre Tĩrtũmja Kra Jesus Kris mẽ nhũm mẽ hwỳr wrỳ nê mẽ kamã ì ho ì ho kator jakamã haxwỳja kệp Ijaew na pre. Kệp Mẽpahpãm nê mex o mex nê hihtỳx o hihtỳx tã Ijaew wỳr wrỳ nê mẽ kamã kato. Hãmri nhũm Ijaew kêt xwỳnhjaja harẽn h ma nê tee ri hamaxpěr nê hamaxpěr o:

—Hêxta waa nê. Kệp ãm Jesus mẽ papa kamã mãn kator ronhỹx mẽ pamã mex kumrẽx. Anẽ.

⁶ No nhũm kormã Ijaew hwỳr wrỳk kêt ri nhũm Tĩrtũm ra kot mẽ ho hkra kaxyw mẽ hã amnhĩ jarẽ nhũm mẽ hkwỳja kãm ja prãm kêt nê hkaga. Tã xà na pre Tĩrtũm kot mẽ ho hkra hã amnhĩ jarẽn h ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarẽ nê hã amnhĩ to hêx. Jakamã na pre mẽ hkwỳjaja hkwỳjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwỳjaja kot hkaga jakamã nhũm ãm mẽ hkwỳjê pix o hkra.

⁷ Nê finat Apraãwja na pre hkanrêhã hkra nê htàmnhwỳ xohtõ nê. Tã xà na pre Tĩrtũm htàmnhwỳ piitã mẽ ho hkra hã amnhĩ jarẽ? Nà mẽ piitã ã mẽ harẽn anhỹr kêt nê. ãm mẽ hkwỳjê pix na pre mẽ ho hkra hã mẽ harẽ. Apraãw kra Ijak kôt hkanrêhã htàmnhwỳ pixjaja nhũm kot mẽ ho hkra hã mẽ harẽ.

⁸⁻⁹ Nê Apraãw kormã hprõ kamã hkra hkêt ri na pre kãm àpên h xwỳnh kamã hkra nhũm kato nê myre nê hixi pê Ismael. Nom kệp Apraãw prõ kumrẽx kamã hkra hkêt. Prõ kuprỳ kamã hkra na pre. Tã nhũm Tĩrtũm kãm hkra kumrẽx kukamã harẽ nê kãm:

—E kot paj ma tẽ hãmri nê mẽmo arĩgro hã akupỳn awỳr tẽ nhũm ra aprõ hpijagri nhũm war akra myre. Anẽ.

Tã nhũm hprõ Saraja htujarõ. Nê gaa nê hpijagri nhũm hkraja myre. Hixi pê Ijak. Kệp Apraãw prõ kamã hkra jakamã Tĩrtũm nom kệp Apraãw kra kumrẽx. Jakamã hkra Ijak kanrêhã htàmnhwỳjaja na pre Tĩrtũm kot mẽ ho hkra hã mẽ harẽ. Ra kot Apraãw mã ja hã amnhĩ jarẽn h xà hkôt.

¹⁰ Tã nhũm Ijakja hprêk nê Repek o hprõ. Nê gaa nê ra haxwỳja wa hkra nhũm hkraja wa ahpo nê kato nê wa hamẽ my. Kot wa pê Ejau nhũm kot hapu pê Jako. ¹¹⁻¹² Nom nhũm kormã wa kator kêt ri nhũm Tĩrtũm wa hkukamã tanhmã wa harẽn h to. àhpumunh xà hkôt wa katorxà mã wa harẽ nê kãm:

—E kot paj amã war akra wa hkukamã tanhmã wa harẽn h to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anẽ.

Kot wata koja kot hapu kĩnhã amnhĩ to grire nẽ ri pa nhũm ã wa hkukamã wa harẽnh anẽ. Kãm wa kot tanhmã amnhĩ nhĩpêx to hprãm xà hkõt ã wa harẽnh anẽ. Kormã wa kot tanhmã amnhĩ tomnuj to rỳ tanhmã amnhĩ to mex to hã kot wa omunh kêt tã kãm hprãm xà hkõt ã wa hkukamã wa harẽnh anẽ. ¹³ Tĩrtũm kapêr ã kagà htũm kot wa harẽnh nẽ wa hã kagà kot:

Ejau rom Jako kanrêhã hkra nẽ htãmnhwỳ pixjaja na pre Tĩrtũm amnhĩm mẽ ho hkra. Anẽ.

¹⁴ Mãn ka mẽ Tĩrtũm kot ã wa harẽnh anhỹrja ma nẽ ajamaxpêr o:

—Tk. Kwa ja mexti hã. Mo na pre hamẽ wa hkanrêhã wa hkra nẽ wa htãmnhwỳ piitã ho hkra hkêt nẽ? Anẽ.

Kwa mẽ ã ajamaxpêr anhỹr kêt nẽ. Tĩrtũm na hte kãm hprãm xà hkõt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nẽ ãm omu nẽ amnhĩ tã tanhmã kãm nẽ hkêt nẽ. ¹⁵ Na pre finat Mojes mã amnhĩ jarẽnh o:

Inhmã hprãm xà hkõt na pa hte mẽ omu nẽ tanhmã mẽ kamã ixukapri hto ho ri ixpa.

Nẽ inhmã hprãm xà hkõt na pa hte ahpỹnhã tanhmã mẽ hipêx to ho ri ixpa.

Anhỹr o kãm amnhĩ jarẽ. ¹⁶ Nom tanhmã mẽ pahte amnhĩ nhĩpêx to hã mẽ pahpumunh kõt na hte mẽ pakamã ukapri hkêt nẽ. ãm tãm kãm hprãm xà hkõt na hte tanhmã mẽ pakamã ukapri hto ho pa. ¹⁷ Amnepê mã Ejit kãm mẽ õ pahihti Paraohti hwỳr na pre Mojes mẽ nhũm ma hwỳr mỗ nẽ kãm tanhmã Tĩrtũm kapêr jarẽnh to nẽ kãm:

—E Tĩrtũm na awỳr inhmẽ pa mỗ. Tãm na pre apê Ejit nhõ xwỳnhjê nhõ pahi kaxyw axãm. Akrã hihtỳx tã nhũm mẽ kaxyw axãm. Tã ra xatã àhpumunh tỳx o tanhmã anhĩpêx to. Kri piitã hkõt ri mẽ pa xwỳnhjaja kot atã harẽnh mar nẽ àhpumunh o àhpumunh ã omunh kaxyw. Tã ixte amã ja jarẽnh kaxyw na pre awỳr inhmẽ pa man awỳr mỗ. Anẽ.

¹⁸ ã na hte Tĩrtũm kãm hprãm xà hkõt tanhmã mẽ panhĩpêx anhỹr to ho pa. Jao mẽ hkwyjê kamã ukapri ho pa. No mẽ hkwyjaja nhũm tee ri mẽ hkrã hihtỳx ã mẽ omu nẽ ãm mẽ omu nhũm mẽ amnhĩ krã hkõt ri tanhmã amnhĩ tomnuj to ho ri pa.

Tĩrtũm kệp mẽ pakamã ukapri xwỳnh ã harẽnh

¹⁹ Nẽ kot kaj mẽ atõ Tĩrtũm kot ã mẽ hipêx anhỹrja ã harẽnh ma nẽ tanhmã hã ixkukjêr to nẽ inhmã:

—Kwa na xep hte Tĩrtũm ahpỹnhã tanhmã mẽ hipêx to. Nẽ mẽ hkwyjê kamã ukapri ho pa nẽ mẽ hkwyjaja mẽ hkrã hihtỳx ã mẽ omu nẽ ãm mẽ omu nẽ mẽ kamã ukapri hkêt nẽ. Jakamã kwa mo na hte mẽ kot amnhĩ tomnuj xwỳnh ã mẽ harẽ? Tãm kot ã mẽ hipêx anhỹr kênã kot kêt mẽ kot amnhĩ tomnuj xwỳnh ã mẽ harẽ.

Anhỹr o ajamaxpêr japêr. ²⁰ Kwa mẽ ri ã atỳx Tĩrtũm jarẽnh anhỹr kêt nẽ. E pa mẽ amã ejêp jarẽ ka mẽ inhma. Xà kot mễhõ gyw kwỳ ho amnhĩm poti nhĩpêx nhũm tee ri amnhĩ tã omu nẽ amnhĩ tã tanhmã kãm kapêr to nẽ kãm: “Tk. Kwa mon ka ri ã inhĩpêx anẽ?” Anhỹr o amnhĩ tã kãm kapêr? Nà koja kãm tanhmã nẽ hkêt nẽ. ²¹ Hipêx xwỳnh kãm hprãm xà hkõt kot ã hipêx anhỹr kênã kot kêt amnhĩ tã kãm akir. Kojã amnhĩm gyw kwỳ kakwỳ nẽ ho poti ho axkrut nẽ hipêx. Nẽ hõ ho muxre. Ho mex kumrêx nhũm xa. Nhũm ihõja mã ho anẽ nẽ hipêx no ãm wanta kĩnhã ho hanhãjti nhũm omnajti nẽ xa. No ãm tãm kot hamẽ wa hipêx prãm xà hkõt wa hipêx kênã.

²² Tã na hte ã Tĩrtũm mẽ panhĩpêx anẽ. Te poti pynajre pyrã nẽ mẽ pahkwỳjê nhĩpêx nhũm mẽ kãm kapêr mar prãm kêt nẽ htỳx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nẽ te amnhĩ nẽ mẽ rẽnh kaxyw pyrãk o mẽ hipêx no ãm kormã hamaxpêr o:

—Nà kot paj nhỹrmã mẽ kot amnhĩ tomnuj mỳrapê mẽ ho ijapêx pa nhũm mẽ piitã ja hã ixpumu nẽ inhmã ixàhpumunh o ixàhpumunh ã ijarẽ. Nẽ inhmã mẽmoj punuj piitã hkĩnh kêt kumrêx ã axpên mã ijarẽ. Anẽ.

²³ Nom na hte jajê rom mẽ pahkwỳjê nhĩpêx o te poti mexta nhĩpêx pyrã nẽ amnhĩ kaxyw mẽ paxunhwỳ nẽ mẽ pahto hkra kaxyw. Nẽ mẽ pajarẽnh o:

—Nà koja mẽ amnhĩ kaxyw Ixkra Jejus mã hamaxpêr nê hkôt amnhĩ xunhwỳ pa ja hã mẽ omu nê mẽ kamã ixukaprĩ ho ri ixpa. Nê mẽ ho mex pê mẽ kutã inhnojarêr rãhã ho ri ixpa. Hãmri nhũm mẽ nhỹrmã Ixkra mẽ wa ixri htĩr tũm nê mex nê pa ho pa. Kot paj ã mẽ ho mex anê nhũm mẽ amnhĩ tã ixpumu nê inhmã inhmex o inhmex ã ijarênh o pa. Anê.

Ã na hte Tĩrtũm ahpỹnhã mẽ pahpiitã mẽ panhĩpêx anê.

²⁴Nê na hte mẽ ixpê Ijaew pix o hkra hkêr nê. Na hte mããnênh mẽ apê Ijaew kêt xwỳnhjê ho hkra. ²⁵Amnepê mã mẽ kãm kapêr jarênh o ri mẽ pa xwỳnhjê hõ pê finat Ojejjã na pre te Tĩrtũm tãm kot Ijaew kêt xwỳnhjê jarênh pyrã nê mẽ harênh o:

Amnepê na pa pre mẽ ho ixkra hkêr tã kot paj mẽ hkwỳjê ho ixkra.

Na pa pre mẽ kamã ixukaprĩ hkêr tã pa ra inhmã mẽ hapê nê.

²⁶Nê ixte mẽ kêp ixkra hkêr ã mẽ harênh tã kot paj ra mẽ kêp ixkra hã mẽ harê.

Ixpê mẽõ Tĩrtũm kot paj ã mẽ harênh anê. Anê.

²⁷Hãmri nhũm finat Ijais Ojejjã pãnhã tanhmã Ijaew jarênh to. Ijaisjã Tĩrtũm nhỹ hã kapêr jarênh o ri pa xwỳnhjê hõ na pre. Jakamã nhũm Tĩrtũm kãm tanhmã mẽ ijarênh to nhũm kuma nê ô ri mẽ ixkukamã mẽ inhĩgêxjê mã ujarênh o pa nê hã kagã. Nê hã kagã ho:

Ijaew na mẽ ohtô rax kumrêx.

Te gô xujanãr mỳri pykahti grã hkryre xohtô pyrãk.

Tã koja mẽ piitã ixkôt amnhĩ xunhwỳr kêt nê.

Koja mẽ ãm grêre nê amnhĩ kaxyw inhmã hamaxpêr nê ixkôt amnhĩ xunhwỳ.

Jakamã mẽ tapxipixjaja koja hkwỳjê rom nhỹrmã inhõ krĩ hwỳr api.

²⁸No mẽ kot amnhĩ kaxyw inhmã mẽ hamaxpêr kêt xwỳnhjaja kot paj tokyx tanhmã mẽ harênh to.

Mẽ kot amnhĩ tomnuj mỳrapê tanhmã mẽ harênh to nhũm mẽ ma mẽ kot amnhĩ xã htỳx kamã hamak tũm xãta wỳr ma pa.

Nà kot paj tokyx ã mẽ hipêx anê.

Anhỹr o mẽ harê. ²⁹Nom nhũm kormã ã mẽ harênh anhỹr kêt ri nhũm ra wam tanhmã mẽ harênh to nê mẽ harênh o:

Amnepêm Sotô mẽ Komo kamã mẽ pa xwỳnhjaja na prem amnhĩ tomnuj tỳx rãhã ho ri pa.

Mỳrapê nhũm Tĩrtũm xãhpumunh o ãhpumunh xwỳnhjã tee ri ja hã mẽ omu hãmri nê kaxkwa rũm mẽ ô krĩ wa hipy mẽmoj pôôta rê.

Nhũm mẽ hã rôrôk nê mẽ ho hkaxãr pa nhũm mẽ hapêx.

Tã na pu htem mẽ urãk nê amnhĩ tomnuj o ri papa.

Jakamã kop ãm Tĩrtũm kot mẽ pahkwỳjê kamã ukaprĩ kêt ronhỹx pu mẽ ra mẽ urãk nê pahpiitã pajapêx pa. Anê.

Ijaew kwỳ kot Jejus kôt amnhĩ xunhwỳr kêt ã mẽ harênh
Rõmãn 10.1-4

³⁰Nê Ijaew kêt xwỳnhjaja na prem Ijaew pyrã nê kãm Tĩrtũm prãm kêt tã Jejus jarênh ma nê Ijaew rom amnhĩ kaxyw hkôt hamaxpêr nê hkôt amnhĩ xunhwỳ. Hãmri nhũm Tĩrtũm ja hã mẽ omu nê mẽ ho hkra nê mẽ kot amnhĩ to mex xwỳnhjê hã mẽ harê. ³¹⁻³²Hãmri nhũm Ijaew tee ri mẽ kot Jejus kôt amnhĩ xunhwỳr ã mẽ omu nhũm ja mẽ kãm mex kêt nê. Hãmri nhũm mẽ hamaxpêr o:

—Tk. Kwa ra mẽ ixte finat Mojes kapêr kôt amnhĩ nhĩpêx mex o ri mẽ ixpa xwỳnh jakamã koja Tĩrtũm ja hã mẽ ixpumu nê mẽ ixte amnhĩ to mex xwỳnhjê hã mẽ ijarê nê mẽ inhnê mẽ ixte amnhĩ tomnuj rên pa. No kot paj mẽ Ijaew kêt xwỳnhjê pyrã nê Jejus kôt amnhĩ xunhwỳr kêt nê. ãm kwarĩ ho kwarĩ.

Anhỹr ã amnhĩ jarê. No ãm ã mẽ hamaxpêr anhỹrja mex kêt. Na prem htỳx Tĩrtũm noo mã kot amnhĩ to mex ã amnhĩ jarênh kaprỳ nê arĩ ri tanhmã amnhĩ tomnuj to ho ri pa. Te pry kamã kên nôr nhũm mẽ kot nhãm nê mẽnh kaxyw hkamãr nê ho amnhĩ par krã hi kukênh pyrãk o na htem amnhĩ nhĩpêx. Jao amnhĩ krã hkôt tanhmã amnhĩ

nhĩpêx to ho pa hprãm xàj te Jesus kapêrja nhãm amnhĩ nê rênh pyræk o hipêx. Jakamã koja mẽ Tĩrtũm nhõ krĩ hwỳr àpir kêt nê. ³³ Tĩrtũm kapêr ã kagà htũm kot ja jarênh kot: E mẽ inhma. Kot paj nhỹrmã Ijaewjê hwỳr mēhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nør nhũm mẽ kot nhãm pry nê mēnh kaxyw hkamnār nê ho amnhĩ par krã hi kukēnh pyræk o koja mẽ amnhĩ nhĩpêx.

No te mẽ kot nhãm pry nê mēnh kaxyw hkamnār kêt pyræk xwỳnhjaja koja mẽ kurom nhỹrmã ma Tĩrtũm nhõ krĩ hwỳr api.

Hãmri nê hkĩnh nê pa ho pa. Anê.

Nom kên kumrêx jarênh kêt nê. Na prem Jesus ã kuxi nê ã harênh anê. Ijaew te mẽ kot kên nhĩpêx pyræk o Jesus nhĩpêx nê amnhĩ kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhũm mẽ harê. No mẽ kot amnhĩ kaxyw hkôt hamaxpêr ronhỹx Jesus te kên kot mẽ kêp àmnār pyræk kêt nê. Jakamã ã mẽ harênh kot anhỹr.

10

¹ Hêxta waa nê. Ijaxwỳja ixpê Ijaew. Mẽ kêp ixkwỳ jakamã kêp apu mẽ kot amnhĩ kaxyw Jesus mã hamaxpêr nê hkôt amnhĩ xunhwỳr ronhỹx pa ixkĩnh tỳx kumrêx. Inhmã mẽ kêp Tĩrtũm kra hprãm tỳx kumrêx kênã. Inhmã ja prãm xàj na pa hte mẽ ho Tĩrtũm wỳr rãhã ho ri ixpa. ² Ra ixte mẽ omunh mex. Mẽ kãm Tĩrtũm mã tanhmã amnhĩ nhĩpêx to hprãm tã no ãm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprỳ. ³ Nhũm pre Tĩrtũm tee ri amnhĩ tã mẽ omu nê hamaxpêr o:

—Koja mēhõ amnhĩ kaxyw Ixkra Kris kôt hamaxpêr nê hkôt amnhĩ xãm pa ja hã omu nê kot amnhĩ to mex xwỳnh ã harê nê ho ixkra kurê kumrêx. Nom na hte Ijaew ohtô nê ã amnhĩ nhĩpêx anhỹr kêt nê.

Anhỹr o mẽ harê. ãm hãmri na ã mẽ harênh anê. Na htem ãm axtem nê hamaxpêr o:

—Tk. Kot paj amnhĩ kaxyw Kris kôt ijamaxpêr nê hkôt amnhĩ xãm kêt nê. Kot paj ãm pam amnhĩ krã hkôt tãm ri amnhĩ nhĩpêx o ri ixpa. Mẽ ixpê Ijaewjê mẽ ixte amnhĩ nhĩpêx xà hkôt. Hãmri nhũm Tĩrtũm ja hã ixpumu nê amnhĩm inhmex ã ijarê. Nom kot paj Kris kôt amnhĩ xãm kêt nê. ãm kwarĩ ho kwarĩ.

Anhỹr ã amnhĩ jarê. ⁴ Nom na htem ãm htỳx ri amnhĩ krã hkôt amnhĩ to mex o pa hã amnhĩ kamnhĩx kaprỳ. Koja mẽ tee ri kãm finat Mojes kapêr kôt amnhĩ nhĩpêx o ri pa hprãm kaprỳ. Jesus tapxipix na pre tãm amnhĩ nhĩpêx mex rãhã ho pa. Na pre Tĩrtũm kapêr kôt amnhĩ nhĩpêx mex o ri pa nê aa kapêr õ nhĩrôp ãm nê hkwỳm ri tanhmã amnhĩ tomnuj to hkêt nê. Kot amnhĩ tomnuj kêt xwỳnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwỳnh ã mẽ pajarê.

Tĩrtũm kãm mẽ pahpiitã mẽ pahto hkra hprãm ã harênh

⁵ Nê amnepêm na pre finat Mojes Tĩrtũm nhỹ hã Ijaew mã tanhmã ujarênh to nê hã kagà. Nê mẽ kãm ujarênh o:

—E kot kaj mẽ atõ Tĩrtũm nhỹ hã ixujarênh ma nê hkôt amnhĩ nhĩpêx mex o ri apa nê hkwỳm ri tanhmã amnhĩ nhĩpêx to hkêt nê. Hã koja Tĩrtũm hã apumu nê amnhĩm ate amnhĩ to mex xwỳnh ã ajarê ka nhỹrmã kuri atĩr tũm nê amex nê apa ho apa. Anê.

⁶ ã mẽ kãm kapêr anhỹr tã mẽ pahte Mojes kapêr xà hkôt amnhĩ nhĩpêx o papaja na mẽ pahpê hihtỳx kumrêx. Tĩrtũm kapêr tũm na. Kapêr ã kagà kamã kot mẽ pamã mẽ pahte tanhmã amnhĩ nhĩpêx to hã karõja ohtô rax kumrêx jakamã pu mẽ tee ri pamã piitã hkôt amnhĩ nhĩpêx prãm kaprỳ. Nhũm Tĩrtũm tee ri amnhĩ tã mẽ pajamã hãmri nê mẽ pahwỳr Kra Jesus mẽ. Jakamã na pu htem amnhĩ kaxyw hkôt pajamaxpêr nê hkôt amnhĩ xunhwỳ nhũm Tĩrtũm hã mẽ pahpumu nê kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwỳr mēnh nhũm mẽ kot hpĩr nhũm akupỳm ho htĩr jakamã na pu htem harênhja ma nê pajamaxpêr o:

—Nà na xep pre Jesus ixto ixpê Tĩrtũm kra. Anê.

Nom xà na hte Tĩrtũmja ã mẽ pamã kapêr anê nê mẽ pamã:

—E kot kaj mẽ ma kaxkwa hwỳr api nẽ Kris japrõ nẽ man amnhĩ kõt akupỳn o wrỳ pa ja hã mẽ apumu nẽ mẽ ato ixkra.

Anhỳr o mẽ pamã kapěr? Nà na hte ã mẽ pamã kapěr anhỳr kêt nẽ. Tanhmã kot puj mẽ amnhĩ to nẽ ã amnhĩ nhĩpêx anẽ? ⁷ Rỳ xà na hte ã mẽ pamã kapěr anẽ nẽ mẽ pamã:

—E na pre Krisja ty. Jakamã mẽ kam nẽ ma hwỳr mra nẽ akupỳm amnhĩm ho htĩr. Hãmri pa ja hã mẽ apumu nẽ mẽ ato ixkra.

Anhỳr o mẽ pamã kapěr? Nà na hte ã mẽ pamã kapěr anhỳr kêt nẽ. Tanhmã kot pu mẽ amnhĩ to nẽ akupỳm ho htĩr? Ja pyrã nẽ na hte Tĩrtũm mẽ pamã mẽmoj tã karõ pu mẽ kãm ho anhỳr nhũm ja hã mẽ pahpumunh kõt mẽ pahto hkra hkêt nẽ. ⁸ ãm mẽ pahte amnhĩ kaxyw Jejus kõt pajamaxpěr nẽ hkõt amnhĩ xunhwỳr ã mẽ pahpumunh kõt pix mã na hte mẽ pahto hkra. Hãmri nẽ mẽ pahwỳr Karõ rẽ nhũm mẽ pahkarõ mã gjêx jakamã mẽ pahte Tĩrtũm kãm hprãm xà hkõt amnhĩ nhĩpêx o papaja na mẽ pahpê hihtỳx kêt. Te kapěr ra mẽ pahkrã hi kaxwỳnh kãm hikwỳ pyrãk o pu mẽ piitã mẽ kãm harẽnh o ri mẽ hkõt papa. Jakamã na pa hte mẽ piitã mẽ kot amnhĩ kaxyw Jejus kõt hamaxpěr kaxyw tanhmã mẽ kãm harẽnh to ho ri mẽ hkõt ixpa nẽ mẽ kãm:

⁹ —Kot ka mẽ atõ Jejus kệp anhõ Pahihti hã harẽ nẽ Tĩrtũm kot akupỳm ho htĩr kõt ajamaxpěr. Hã koja Tĩrtũm ja hã apumu nẽ anẽ ate amnhĩ tomnuj o hapêx nẽ ato hkra. ãm ja pix ã mẽ pahpumunh kõt na hte mẽ pahto hkra. Anẽ.

¹⁰ Nẽ na pu htem mẽ pahkrãhi kaxwỳnh kãm amnhĩ kaxyw Jejus mã pajamaxpěr. Nẽ mẽ pajakwa ho kệp mẽ panhõ Pahihti hã harẽ. Hãmri nhũm Tĩrtũm ja hã mẽ pahpumu nẽ amnhĩm mẽ pahte amnhĩ to mex xwỳnh ã mẽ pajarẽ nẽ mẽ pahto hkra. ¹¹⁻¹³ Tã mẽ pahte amnhĩ kaxyw Jejus kõt pajamaxpěr nẽ hkõt amnhĩ xunhwỳr xwỳnhjaja kot puj mẽ pahkĩnh nẽ papa ho papa. Mẽ pahpiitã. Ijaew nẽ Ijaew kêt xwỳnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rỳ Ijaew kêt xwỳnhjê hõ amnhĩ to kuwỳ nhũm kuma nẽ ho hkra. Kapěr ã kagà htũm kot ja jarẽnh kot:

Mẽ kãm kệp Tĩrtũm kra hprãm xwỳnhjaja koja mẽ amnhĩ to Tĩrtũm wỳ nhũm mẽ kuma nẽ Jejus kot mẽ nẽ htyk kukwak ri mẽ nẽ mẽ kot amnhĩ tomnuj o hapêx nẽ mẽ ho hkra nhũm mẽ hkĩnh nẽ pa. Anẽ.

¹⁴⁻¹⁵ Xà na htem kormã amnhĩ kaxyw Kris mã hamaxpěr kêt rãhã amnhĩ to Tĩrtũm wỳ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpěr kêt rãhã amnhĩ to kuwỳ? Na hte Tĩrtũm ma mẽ hwỳr mẽ hkwyjê rẽ nhũm mẽ ma mẽ hwỳr mra nẽ Tĩrtũm kapěr o mẽ ahkre ho ri mẽ hkõt pa. Nhũm mẽ hkwyjaja mẽ kuma nẽ amnhĩ kaxyw Jejus kõt hamaxpěr nẽ amnhĩ to Tĩrtũm wỳ. Kapěr ã kagà htũm kot ja jarẽnh kot:

Koja mẽmoj mex jarẽnh xwỳnhjaja ma mẽ hwỳr mra.

Nẽ mẽ hwỳr hpõx o mõ nhũm mẽ amỳm amnhĩ wỳr mẽ omu nẽ hkĩnh nẽ. Anẽ.

¹⁶ Tã ra mẽ piitã kot kapěr mar tã piitã amnhĩ kaxyw hkõt hamaxpěr kêt nẽ. Jakamã nhũm finat Ijais tee ri ja hã mẽ omu nẽ Tĩrtũm mã mẽ harẽnh o:

Pa Pahi Maati. Kwa ra mẽ kot akapěr mar tỳx tã akõt amnhĩ nhĩpêx kêt nẽ. Mẽ kãm akapěr kõt amnhĩ nhĩpêx o pa hprãm kêt. Na htem ãm grêre nẽ akõt amnhĩ xunhwỳ nẽ akõt amnhĩ nhĩpêx o ri pa. Anẽ.

¹⁷ Kot anhỳr tã ãm mẽ kot Kris kapěr jarẽnh mar kõt pix mã na htem amnhĩ kaxyw hkõt hamaxpěr. Koja mẽ harẽnh mar kêt tã tanhmã koja wem amnhĩ to nẽ amnhĩ kaxyw hkõt hamaxpěr nẽ hkõt amnhĩ xunhwỳ? ¹⁸ Mãn ka mẽ atõ atỳx ã ajamaxpěr anhỳr o:

—Ko mãn Ijaew kormã Jejus kot mẽ panẽ tanhmã amnhĩ nhĩpêx to hã harẽnh mar kêt jakamã na mẽ kormã hkõt amnhĩ xunhwỳr kêt nẽ.

Anhỳr o ajamaxpěr. Nom ja kot anhỳr kêt. Ijaew piitã ra mẽ kot harẽnh mar kẽnã. Tĩrtũm kapěr ã kagà htũm kot ja hã mẽ harẽnh kot:

Na prem ma mẽ piitã mẽ kãm ja jarẽnh o ri mẽ hkõt pa nhũm mẽ piitã kuma. Anẽ.

¹⁹ Tã mãn ka prem ra ja ma nẽ atỳx ajamaxpěr o:

—Kot anhỳr tã no mãn kormã hprĩ hã Jejus jarẽnh mar kêt jakamã mẽ hkõt amnhĩ xunhwỳr kêt nẽ. Anẽ.

Nom ja haxwýja kot anhýr kêt. Ra mẽ kot hprĩ hã harẽnh mar mex tã kuma nẽ ãm kuma nẽ amnhĩ kaxyw kãm hamaxpêr kêt nẽ. No mẽ apê Ijaew kêt xwýnh kwýjaja na ka mẽ kurom harẽnh ma nẽ amnhĩ kaxyw hkôt ajamxpêr nẽ hkôt amnhĩ xunhwýr kurê kumrêx. Hãmri nhũm Ijaew tee ri ja hã mẽ apumu nẽ mẽ akamã gryk tỳx nẽ. Nom ra Tirtũm kot ã mẽ hkukamã mẽ kot amnhĩ nhĩpêx anhýr ã mẽ omunh nẽ mẽ harẽnh kot anhýr kênã. Na pre finat Mojes mẽ kãm tanhmã hã kagà hto. Te Tirtũm tãm kot mẽ hã kagà pyrã nẽ kapêr ã kagà htũm kamã kot mẽ harẽnh kot:

Mẽ ate mẽ kamã mẽ akahak o apa xwýnhjaja.

Mẽ kot htỳx ri amnhĩ nhĩpêx o mẽ pa hã mẽ ate mẽ harẽnh tã no kot paj mẽ arom amnhĩm mẽ kot amnhĩ to mex xwýnhjê hã mẽ harẽ.

Kot kaj mẽ tee ri ja hã mẽ omu nẽ mẽ kamã agryk tỳx kumrêx.

Nẽ mãânẽn pa ixte mẽ ho mex ã ixpumu nẽ mẽ hã ixkamã agryk nẽ. Anẽ.

²⁰ Nẽ finat Ijais na pre haxwýja ã mẽ harẽnh anẽ. Na pre kãm amnhĩ kwý pê Ijaew puma hkêt nẽ xatã Tirtũm nhỹ hã tanhmã mẽ kãm Ijaew kêt xwýnhjê jarẽnh to ho pa. Te Tirtũm tãm kot mẽ harẽnh pyrãk o mẽ kãm:

Nã Ijaew kêt xwýnhjaja kot Tirtũm japêr kêt tã koja tãm mẽ kãm amnhĩ to amnhĩrit nhũm mẽ hkôt amnhĩ xunhwý.

Mẽ kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrit. Anẽ.

²¹ ã Ijaew kêt xwýnhjê jarẽnh kot anhýr. Nẽ axte mã tanhmã Ijaewjê jarẽnh to kot:

Te mẽ katorxà kot tanhmã hkrajê ho mex to kaxyw tee ri amnhĩ wýr mẽ kãm ãkjêr pyrãk o na hte Tirtũm Ijaewjê nhĩpêx o pa.

Jaoo tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nẽ ãm kuma nẽ hkôt amnhĩ nhĩpêx kêt nẽ. Anẽ.

11

Tirtũm kot Ijaew kamã ukapri hã harẽnh

Matêwre 13.10-17

¹ Tã ra Ijaew kot Tirtũm kaga jakamã mãn ka mẽ atõ mẽ harẽnh ma nẽ ajamxpêr o: —Mãn pre Tirtũm tee ri amnhĩ tã mẽ omu nẽ amnhĩ pyrã nẽ mẽ hkaga.

Anhýr o ajamxpêr. Nom na pre mẽ hkaga hkêt nẽ. Ijaxwýja ixpê Ijaew na pa. Mẽ urak nẽ ixpê Ijaew pãr krax pê finat Apraãw kanrêhã htãmnhwý Pêjamĩ kanrêhã hõ na pa. Tã xà na pre Tirtũm ixkaga? Nã kot ixkaga hkêt. ² Amnepêr kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarẽ. Tã nhũm amgrã xohtõ nẽ hapêx nhũm mẽ hapôj hãmri nẽ Tirtũm kôt amnhĩ nhĩpêx o pa hkêt nẽ. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nẽ Tirtũm mã tanhmã mẽ harẽnh to nẽ mẽ hã kagà. Nẽ hã kagà ho:

³ Kwa Tirtũm. Mẽ ixte amã amnhĩ jarẽnh xà hã mēsti hkwy na prem ra hkrakrak pa. Nẽ anhỹ hã akapêr jarẽnh o ri mẽ pa xwýnh kwý nhĩmex rax nẽ. ãm papxipix na pa arĩ ixtĩr nẽ ri ixpa nom nhũm mẽ ra kot ixpĩr kaxyw ixtã amnhĩ jarẽ. Anẽ.

⁴ Tã tanhmã na Tirtũm kutã kãm kapêr to? Na pre kãm:

Nã kapxipix na ka arĩ atĩr kêt nẽ. Arĩ mẽ ohtõ nẽ apyrã nẽ amnhĩ kaxyw ixkôt hamaxpêr. Mẽ ohtõ. Arĩ mẽ kêp 7.000 nẽ akwýjê rom ri sãnti Paaw kutã hkõnkrã ho hkrĩ nẽ kãm mex ã harẽnh kêt nẽ. Anẽ.

⁵ Tã arĩ ã jarãhã mẽ kot ã amnhĩ nhĩpêx anhýr kênã. Tirtũm kãm Ijaew japê jakamã mẽ kamã ukapriĩ. Jakamã nhũm ra mẽ hkwyjaja mẽ pahpyrã nẽ amnhĩ kaxyw Kris kôt hamaxpêr nhũm Tirtũm mẽ ho hkra. ⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nẽ. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho hkra hkêt nẽ. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tirtũm kot amnhĩm mẽ mex ã mẽ harẽnh prãm tã no ãm mẽ grêre nẽ hamaxpêr xà hkôt Jesus kôt amnhĩ xunhwý. Na htem ohtõ rax nẽ kapêr ma nẽ ãm kuma

ně tee ri kot amnhĩ mẽ mex ã mẽ harēnh prãm xàj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprỳ. Mẽ kot hkaga jakamã te ri mẽ hamak kro ně Tĩrtũm kapēr mar kêt pyrã ně pa. ⁸ Tĩrtũm kapēr ã kagã htũm kot mẽ harēnh kot:

Tĩrtũm na hte mẽ kãm kapēr mar prãm kêt xwỳnhjê pumu ně ãm mẽ omu nhũm htem htỳx ri pa ho pa. Nẽ Tĩrtũm mã hamaxpēr kêt o ri pa. Mẽ kot kapēr mar tã hprĩ hã mar tỳx kêt ně. Nẽ mẽ kot kapēr ã kagã kamã harēnh tã hprĩ hã mar tỳx kêt ně. Jakamã na htem amnhĩ kaxyw hkôt hamaxpēr kêt o pa.

Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre ně mẽ hamak kro xwỳnh kot amnhĩ nhĩpêx pyrãk. Anẽ.

⁹ Nẽ amnepēm na pre pahi finat Tawija amnhĩ kwỳ Ijaew jarēnh o:

Na htem htỳx ri hkĩnh kãm apkur o pa.

Te tutre kãm prãm ně kot rapuuti hwỳr àr ně tee ri kãm kator prãm kaprỳ pyrãk.

Ja pyrã ně mẽ kot Tĩrtũm kapēr mar kêt mỳrapê koja Tĩrtũm tanhmã mẽ ho nhũm mẽ tee ri kãm mex prãm kaprỳ.

¹⁰ Te mẽ nohkre xwỳnhjaja tee ri mẽ hpa nhĩpêx o pa pyrãk.

Nẽ omnuj ně ã ně ho gĩx o ri pa pyrãk o amnhĩ nhĩpêx o ri pa.

Anhỹr o mẽ harē. ¹¹ Tã arĩ Ijaew Jejus kaga ně kãm kapēr mar prãm kêt jakamã xã na Tĩrtũm tee ri ja hã mẽ omu ně mẽ hkaga kumrēx? Nã kot mẽ hkaga hkêt. ãm mẽ tãmjaja kêp Jejus prãm nõkati jakamã nhũm tee ri ja hã mẽ omu ně mẽ hpãnhã Ijaew kêt xwỳnhjê mã amnhĩ to amnhĩrit ně mẽ hkwỳjê ho hkra. Jakamã koja Ijaew kwỳjaja ja hã mẽ omu ně tee ri hamaxpēr ně hamaxpēr o:

—Kwa na xep Ijaew kêt xwỳnh kwỳjaja Jejus kôt amnhĩ xunhwỳ nhũm Tĩrtũm ja hã mẽ omu ně mẽ ho hkra. Kwa mon pu prem axtem ně ri Jejus kaga? E pu mẽ kuxwar amnhĩ kaxyw hkôt mãn pajamaxpēr ně hkôt amnhĩ xunhwỳ kê Tĩrtũm ja hã mẽ pahpumu ně Ijaew kêt xwỳnhjê pyrã ně mẽ pahto hkra. Hãmri ně amnhĩ mã mẽ pahte amnhĩ to mex xwỳnh ã mẽ pajarē. Anẽ.

Ã Ijaewjaja hamaxpēr anhỹr kaxyw na pre Tĩrtũm Ijaew kêt xwỳnhjê mã amnhĩ to amnhĩrit. ¹² Hãmri nhũm mẽ amnhĩ tã omu ně hkĩnh ně pa. No nhũm Ijaew kwỳjaja. Mẽ kãm Jejus prãm nõkati ho mẽ pa xwỳnhjaja mẽ hkĩnhã hkaprĩ ně pa. Tã koja mẽ nhỹrmã amnhĩ kaprĩ hã amnhĩ pumu ně amnhĩ kĩnh kêt ã amnhĩ pumu hãmri ně Tĩrtũm kôt amnhĩ xunhwỳr ně amnhĩ kaxyw Kra Jejus Kris mã hamaxpēr japêr. Koja mẽ ã amnhĩ nhĩpêx anẽ hãmri ně Ijaew kêt xwỳnhjê pyrã ně hkĩnh ně ri pa. Hãmri nhũm Tĩrtũm ja hã mẽ omu ně Ijaew kêt xwỳnhjê mẽ mẽ ho hpimràatã mẽ ho mex rax ně nhũm mẽ hkĩnh ně hamakêtkati ně pa ho pa.

Tĩrtũm kot Ijaew kêt xwỳnhjê ho hkra hã harēnh

¹³ E kot paj hpãnhã mẽ apê Ijaew kêt xwỳnhjê mã ixkapēr ně mẽ atã kagã. Na pre Jejus ma mẽ awỳr inhmẽ. ỹ hã ixte mẽ ajahkre ho ri mẽ akôt ixpa kaxyw. Pa pre ma krĩ hkwỳ kamã mẽ akwỳjê hwỳr mō ně ixkĩnh kãm mẽ kãm kapēr jarēnh o ri mẽ hkôt ixpa. Nhũm mẽ hkwỳjaja inhma ně amnhĩ kaxyw Jejus kôt hamaxpēr ně hkôt amnhĩ xunhwỳ. ¹⁴ Tã koja apu ixkwỳjaja mẽ harēnh mar japêr. Ijaew tee ri mẽ apê Ijaew kêt xwỳnhjê jarēnhja ma hãmri ně ra amnhĩ kamã gryk japêr. Jao mẽ apyrã ně Jejus kôt amnhĩ xunhwỳ ně nhỹrmã kuri htĩr tũm ně mex ně pa ho pa. ¹⁵ Kormã mẽ kot amnhĩ kaxyw kãm hamaxpēr kêt jakamã na pre Tĩrtũm hpãnhã mẽ apê Ijaew kêt xwỳnhjê mã amnhĩ to amnhĩrit. Ka mẽ ra krĩ piitã hkôt axohtô ně hkôt amnhĩ xunhwỳ ně hkôt amnhĩ nhĩpêx mex o ri apa. Tã koja Ijaewjaja nhỹrmã amnhĩ kaxyw Tĩrtũm mã hamaxpēr ně mẽ apyrã ně Jejus kôt amnhĩ xunhwỳr japêr. Hãmri ně te mēhō hkra kêp htyk nhũm hkaprĩ htã nhũm hkraja tanhmã amnhĩ to ně akupỹm kãm htĩr nhũm kot omunh ně hkĩnh tỳx kumrēxta pyrãk o amnhĩ nhĩpêx. Jao Tĩrtũm mẽ kot hkôt amnhĩ xunhwỳr ã mẽ omu ně hkĩnh ně. Pu mẽ pahpimràatã urãk ně pahkĩnh ně ri papa.

¹⁶ E pa mẽ amã mẽ ujarēnhja ã ejēp kwỳ jarē. Koja mẽmo pĩ hpàr jarê mex nē hã koja pàr mex nē xa. Ja pyrà nē Ijaew pàr krax finat Apraãwja kumrēx na pre amnhĩ kaxyw Tĩrtũm mã hamaxpēr nhũm ho hkra. Jakamã koja nhỹrmã hkanrēhã htãmnhwỳjaja uràk nē amnhĩ kaxyw kãm hamaxpēr nhũm mã mẽ ho anē nē mãänēn mẽ ho hkra nhũm mẽ mex nē pa. Te kot mẽmo pĩ hpàr jarē mexja nhỹ hã pàr mexta pyràk.

¹⁷ Nē na htem akunĩ kamã mẽmo pĩ hpa jakà nē hamỳ nē ma amnhĩ kôt o mra. Nē ixkre kapem ra mẽ kot mẽmo pĩ hkreja hpa jakàr nē rēnh xwỳnh xwakre kamã wam pĩ hpa jakàr xwỳnhhta nhô nē axpēn tã hkaxpre nē gaa nē axpēn jamỳnh mex nē grà hkêt nē. Nē arĩ htĩr mex nē. Te kēp hpa kumrēx pyràk. Tã Ijaew kwỳ kot amnhĩ kaxyw Jejus kôt hamaxpēr xwỳnhjaja te mẽ kēp ixkre kapem pĩ hpàrta pyràk. No mẽ hkwyjaja mẽ kot Jejus kaga xwỳnhjaja te mẽ kēp mẽ kot kēp hpa jakàr nē rēnhhta pyràk. Jakamã nhũm Tĩrtũm te mẽ kot pàr pē hpa jakàr nē rēnhhta pyràk o mẽ hipêx nē mẽ hkaga. Nē axtem te mẽ kot mẽmoj pàr pa jakàr nē hpãnhã kamã axtem pĩ hpa janhôr nē hã hkaxpreta pyràk o mẽ apē Ijaew kêt xwỳnhjê nhĩpêx nē mẽ amã amnhĩ to amnhĩrĩt. Ka mẽ ra amnhĩ kaxyw Jejus mã ajamaxpēr nē hkôt amnhĩ xunhwỳ nhũm Tĩrtũm mẽ ato mex nē.

¹⁸ Tã kēr ka mẽ arĩ Ijaew o mex o ri apa. Tanhmã ri mẽ hipêx to mã ajamaxpēr to hkêt nē. Rỳ ajamaxpēr o:

—Nà ãm hãmri na Tĩrtũm mẽ hkaga nē ãm kãm mẽ papxipixjê japê.

Anhỹr o ajamaxpēr kêt nē. Ijaew te ixkre kapem pĩ hpàr mexta pyràk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nē hã harirta pyràk. Kêt akunĩ rũm pĩ hpa jakàr kukwak ri na hte ixkre kapem pàrta htĩr nē kuhê hkêt nē. Kop apu pàrta mex kêt ronhỹx ra akunĩ rũm hpaja grà pa. Ja pyrà nē Ijaew kukwak ri kot kaj mẽ nhỹrmã Tĩrtũm ri atĩr tũm nē apa ho apa. Jakamã kwa kēr ka mẽ ate amnhĩ to rũnh o mẽ hakrenh ã amnhĩ to jarkrar kêt nē. ¹⁹ Mãn ka mẽ atô ajamaxpēr o:

—Ra Tĩrtũm kot Ijaew kaga nē hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kēnã. Anē.

²⁰ Nà ãm hãmri na pre Tĩrtũm Ijaew kwỳ kaga. Mẽ kot Jejus kôt amnhĩ xunhwỳr kêt mỳrapê na pre te mẽmo pĩ hpa jakàr nē rēnhhta pyràk o mẽ hipêx. Ka mẽ ra mẽ kurom amnhĩ kaxyw hkôt ajamaxpēr jakamã nhũm Tĩrtũm te kot akunĩ kamã pĩ hpa jakàr nē ho htēm nē ixkre kapem pĩ hpàr mex ã hanhôr nē hã hkaxpre pyràk o mẽ anhĩpêx. Nom kwa kēr ka mẽ ja hã amnhĩ pumu nē ri hã Ijaewjê mã amnhĩ to jarkrar kêt nē. ãm amnhĩ to mex nē Tĩrtũm kapēr kôt amnhĩ nhĩpêx mex o ri apa. No kot kaj mẽ ã amnhĩ nhĩpêx anhỹr kêt nhũm amnhĩ tã mẽ apumu nē ra kot Ijaew kwỳ nhĩpêxta pyrà nē tanhmã mẽ ato nē mẽ akaga.

²¹ ã Ijaew jarēnh kot anhỹr. Te mẽ kēp pàr mex pyràk. Tã nhũm mẽ kot Jejus kôt amnhĩ xunhwỳr kêt jakamã nhũm Tĩrtũm te kot pĩ hpa jakàr nē rēnhhta pyràk o mẽ hipêx nē mẽ homnuj nē. Kot kaj mẽ uràk nē ã amnhĩ nhĩpêx anē nhũm mã mẽ ato anē nē. ²² Ijaew kot Jejus kôt amnhĩ xunhwỳr kêt jakamã nhũm Tĩrtũm mẽ hpãnhã mẽ apē Ijaew kêt xwỳnhjê mã amnhĩ to amnhĩrĩt. Tã ka mẽ Ijaew rom amã Jejus prãm nhũm Tĩrtũm ja hã mẽ apumu nē amnhĩ pyrà nē kãm mẽ aprãm nē mẽ akamã ukapri rãhã nē pa ho pa. Tã kwa mẽ okora. Kēr ka mẽ hkôt pix mã amnhĩ nhĩpêx o ri apa rãhã ty. Kot kaj mẽ hkaga nhũm amnhĩ tã mẽ apumu nē te Ijaew kot hkaga xwỳnhjê nhĩpêx pyràk o mẽ anhĩpêx nē mẽ akaga.

²³ Koja Ijaew nhỹrmã Jejus kôt amnhĩ xunhwỳr japēr nhũm Tĩrtũm ja hã mẽ omu nē mẽ ho hkra. Te mẽ kot pàr pa jakàr nē rēnh nhũm grà par xwỳnh nhũm kot akupỹm amnhĩm hamỳnh nē ixkre kapem pàr wỳr o htēm nē akupỹm hã hanhôr nē hã hkaxpre ho htỳx nhũm kukwak ri akupỹm htĩrta pyràk. Ja kēp tanhmã kute hkêt. Kot ã hipêx anhỹr kaxyw àhpumunh tỳx. ²⁴ Mẽ apē Ijaew kêt xwỳnhjaja te mẽ ate akunĩ kamã pĩ hpa jakàr nē ixkre kapem pàr ã hanhôr nē hã kaxpreta pyràk. Jao Jejus kôt amnhĩ xunhwỳ nhũm mẽ ato hkra kurê kumrēx. No Ijaew te mẽ kēp ixkre kapem pàrta pyràk jakamã Tĩrtũm kot akupỹm hanhôrta tanhmã kēp kute hkêt. Kēp Tĩrtũm kēnã kot tanhmã kēp

kute. Jakamã koja mẽ hkõt amnhĩ xunhwỳ nhũm amnhĩ tã mẽ omu nẽ mẽ ho hkra kurẽ kumrẽx.

Tĩrtũm kot mẽ piitã mẽ kamã ukapřĩ hã harẽnh

Matẽwre 23.37-39; Rukre 21.24; Juãw 10.16

²⁵ E kot paj mẽ amã mẽmoj to amnhĩrit ka mẽ inhma. Nà na pa ra mẽ amã Ijaew krã xihtỳx xwỳnhjẽ jarẽ ka mẽ harẽnh ma. Ra mẽ kot Jejus kaga hã mẽ harẽnhja. Tã koja mẽ ã amnhĩ nhĩpẽx anhỳr o pa rãhã hkõt nẽ. Na hte Tĩrtũm kormã amnhĩ tã mẽ apẽ Ijaew kêt xwỳnhjẽ jamãr o pa. Amnepẽm na pre amnhĩ kaxyw mẽ akukamã tanhmã mẽ akwỳjẽ jarẽnh to. Tã kot kaj mẽ kot tanhmã mẽ ajarẽnh to xwỳnh piitã Jejus kõt amnhĩ xunhwỳr pa nhũm rĩ Ijaew amnhĩ to hapu nẽ kormã hkõt amnhĩ xunhwỳ. ã mẽ kot amnhĩ nhĩpẽx anhỳr kaxyw. Jakamã kwa kêt ka mẽ ri ja hã amnhĩ to jarkrar o ri mẽ hkõt apa hkõt nẽ. Mẽ pahpyrà nẽ mẽ kot Jejus kõt amnhĩ xunhwỳr mã xwỳnh kẽnã. ²⁶ Koja Tĩrtũm nhỹrmã Ijaew piitã ho hkra. Kapẽr ã kagã htũm kot mẽ harẽnh kot:

Nhỹrmã kot mẽ ate amnhĩ tomnuj pẽ mẽ apytãr mã xwỳnhja Ijaew õ koja.

Jako hkanrẽhã htãmnhwỳjẽ hõ koja.

Koja nhỹrmã wrỳ nẽ mẽ ate amnhĩ tomnuj pẽ mẽ apytã nẽ mẽ ate amnhĩ tomnuj o hapẽx pa. Anẽ.

Anhỳr o kot harẽnh. ²⁷ Nẽ mããnẽn ja:

Kot paj mẽ nẽ mẽ kot amnhĩ tomnuj o ijapẽx pa.

Amnepẽ mã ixte mẽ hkukamã mẽ hã amnhĩ jarẽnh xà hkõt. Anẽ.

²⁸ Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwỳr pyrãk o amnhĩ nhĩpẽx. Tã ã mẽ kot amnhĩ nhĩpẽx anhỳrja ri ka mẽ kamjaja mẽ hpãnhã mẽ apẽ Tĩrtũm kra. Nom nhũm Tĩrtũm arĩ kãm mẽ hapẽẽ. Na pre amnepẽ mã kot tanhmã mẽ ho mex to hkukamã tanhmã mẽ hã amnhĩ jarẽnh to. Mẽ hpàr kraxjẽ mã tanhmã mẽ hã amnhĩ jarẽnh to. Finat Apraãw mẽ Ijak mẽ Jakoja mã mẽ hkanrẽhã mẽ htãmnhwỳjẽ hã tanhmã amnhĩ jarẽnh to.

²⁹ Na hte Tĩrtũm mẽmoj tã tanhmã amnhĩ jarẽnh to nẽ ãm hãmri hã amnhĩ jarẽ nẽ amnhĩ jarẽnh xà hkõt tanhmã hipẽx to. No na hte mẽmoj tã amnhĩ jarẽnh tã gaa nẽ ho hamakẽtkati hkõt nẽ. Rỳ hpãnhã axtem tanhmã hipẽx to hkõt nẽ. Na hte mẽmoj tã amnhĩ jarẽnh xà hkõt tanhmã hipẽx to. Tã ra amnepẽ mã kot Ijaew o mex ã amnhĩ jarẽnh jakamã koja nhỹrmã mẽ ho mex rax nẽ ã mẽ hipẽx anhỳrja o hamakẽtkati hkõt nẽ.

³⁰ No mẽ kajaja mẽ apẽ Ijaew kêt xwỳnhjaja. Amnepẽm na ka prem ajaxwỳja Tĩrtũm kõt amnhĩ nhĩpẽx kêt nẽ. Tã nhũm mẽ akamã ukapřĩ nẽ kãm mẽ ajapẽ nẽ. Ka mẽ ra harẽnh ma nẽ hkõt amnhĩ xunhwỳ nẽ hkõt amnhĩ nhĩpẽx mex nẽ. No ãm Ijaew kukwak ri. Mẽ kot kapẽr kõt amnhĩ nhĩpẽx o pa hkõt jakamã nhũm Tĩrtũm mẽ hpãnhã nhãm mẽ amã amnhĩ to amnhĩrit nẽ mẽ ato mex rax nẽ. Jakamã te Ijaew kukwak ri mẽ amex nẽ ri mẽ apa pyrãk. ³¹ Tã koja nhỹrmã kot mẽ anhĩpẽxta pyrã nẽ Ijaew ho hkra. Nẽ mẽ apyrà nẽ mẽ kamã ukapřĩ nẽ. Mẽ kot mẽ apyrà nẽ amnhĩ kaxyw Kra hkõt hamaxpẽr xwỳnhjaja nhũm mẽ apyrà nẽ mẽ ho hkra nẽ mẽ ho mex nẽ. ³² Mẽ apẽ Ijaew kêt xwỳnhjaja nẽ mẽ ixpẽ Ijaew mẽ pahte axpẽn pyrãk. Na pu htem pahpiitã Tĩrtũm kapẽr piitã hkõt amnhĩ nhĩpẽx rãhã ho ri papa hkõt nẽ. Tã kot puj mẽ tee ri ja hã amnhĩ pumu nẽ amnhĩ to kuwỳ nhũm mẽ pama nẽ amarĩ mẽ pakamã ukapřĩ nẽ mẽ pahto mex nẽ.

Pawre kot Tĩrtũm mex o mex ã harẽnh

Epes 3.20; Korosẽ 1.16; Wam Korĩt 2.9, 2.16

³³ Tĩrtũmja àhpumunh tỳx o àhpumunh tỳx. Nẽ ukapřĩ ho ukapřĩ nẽ mex o mex. Mẽ pahtõ na pu urãk nẽ ã amnhĩ nhĩpẽx anhỳr o papa? Nã amrakati kumrẽx. Nẽ mẽ pahtõ na pahte Tĩrtũm jamaxpẽr kõt omunh? Nã mẽ pahte hamaxpẽr kõt omunh kêt. ³⁴ Kapẽr ã kagã htũm kot ja jarẽnh kot:

Mẽ pahte Tĩrtũm jamaxpẽr kõt omunh kêt.

Nẽ kot pu mẽ pahtõ mẽmoj tã hakre hkõt nẽ.

Mẽ parom àhpumunh o àhpumunh xwỳnh kẽnã.

³⁵ Nē mẽ pahtõ kot puj we kãm pakapēr nē kãm: “Kwa Tirtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gã.” Anẽ.

Nà mẽmoj piitã õ kẽnã kot puj kêt ri ã kãm mẽmoj nhõr ã amnhĩ jarẽnh anẽ. Anẽ.

³⁶ Tãm na pre amnhĩ kaxyw mẽmoj piitã ho kator pa. Nẽ ãm pix kukwak ri na mẽmoj piitã htĩr nẽ pa. Jakamã kwa pu mẽ kãm mex o mex ã mãn harẽnh rãhã ho ri papa.

12

Mẽ pahte Tirtũm mã amnhĩ nhõr ã mẽ pajarẽnh

Wam Korõt 6.20; Epes 4.1; Piripos 4.8-9; Korosẽ 1.10; Wam Tesarõn 4.1-3; Wam Pêtre 2.11

¹ Kwa Jejus kõt ixkwỳjaja. Tirtũm na hte mẽ pahto mex nẽ mẽ pakamã ukapřĩ rãhã jakamã na pa ã mẽ amã ixkapēr anẽ. Kwa mẽ tokyx kãm amnhĩ jarẽ nẽ kãm amnhĩ gã. Te mẽ ate kãm hkĩnh xà nhõr pyræk o amnhĩ nhĩpêx nẽ kãm amnhĩ gã. Jao mẽ amã kapēr kõt pix mã amnhĩ nhĩpêx o ri apa hprãm ã kãm amnhĩ jarẽ. Nẽ kãm hprãm xà hkõt pix mã tanhmã amã amnhĩ nhĩpêx to ho ri apa hprãm ã kãm amnhĩ jarẽ. Kot kaj mẽ ã kãm amnhĩ jarẽnh anẽ nhũm amnhĩ tã mẽ ama nẽ hkĩnh nẽ. ã mẽ pahte kãm amnhĩ jarẽnh anhỹrja na kãm mar prãm.

² Nẽ kêt ka mẽ kãm Tirtũm prãm kêt xwỳnhjaja kot amnhĩ nhĩpêx o ri amnhĩ nhĩpêx o ri apa hkêt nẽ. Nẽ mẽ amnhĩ to Tirtũm mãn wỳ kêt mẽ amã mẽ ajamxpēr mex jagjẽ. Koja mẽ ama nẽ mẽ amã hagjẽ ka mẽ ra aprĩ hã hamxpēr xà hkõt mẽ pahte amnhĩ to mex xà pumunh mex nẽ. Na pu htem hkõt amnhĩ nhĩpêx o ri papa nhũm amnhĩ tã mẽ pahpumu nẽ hkĩnh nẽ. Pu mẽ pajaxwỳja ã hã pahkĩnh nẽ ri papa.

Kris kwỳjaja kot tanhmã axpẽn nhĩpêx to hã mẽ kãm karõ

Rõmãn 12.1-11; Epes 4.11-16; Wam Pêtre 4.10-11

³ Nẽ na pre Tirtũm ixto mex nẽ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panẽ amnhĩ nhĩpêx to hã harẽnh o ri mẽ akõt ixpa kaxyw. Tã na pa ã kagaja kamã mẽ amã harẽnh anẽ.

Jakamã kwa kêt ka mẽ amnhĩ to jarkrar o ri mẽ kãm apa hkêt nẽ. ãm kwarĩ ho kwarĩ. Rỳ atỳx ri ajamxpēr o:

—Nà pa na ixte amnhĩ to mex o ixte ixkwỳjẽ piitã mẽ hakrenh par.

Anhỹr ã amnhĩ to jarkrar o ri mẽ hkõt apa hkêt nẽ. Kêt mẽ ãm amnhĩ jarẽnh o:

—Na pa pre amnhĩ kaxyw Jejus kõt ijamxpēr nhũm Tirtũm ixpumu nẽ ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkõt ã amnhĩ nhĩpêx anhỹr kêt nẽ. Anẽ.

⁴ E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohtõ. Na kamã mẽ pano nẽ mẽ pajakwa. Nẽ kamã mẽ pajamak nẽ mẽ pahte. Na pu htem mẽ pano ho rĩt nẽ mẽ pajakwa ho pakapēr. Nẽ mẽ pajamak o ri ama nẽ mẽ pahte ho ri mra.

⁵ Ja pyrã nẽ Kris kõt mẽ pahte amnhĩ xunhwỳr xwỳnhja ãm pyxi tã hkõt mẽ pahte amnhĩ xunhwỳr xwỳnhjaja mẽ paxohtõ. Jakamã na pu htem ahpỳnhã tanhmã axpẽn to mex to ho ri papa. Jao Kris kõt axpẽn to pahtõ nẽ pahtõx o papa.

⁶ Tirtũm na hte mẽ pahpê hkwỳ hã ahpỳnhã mẽ pamã tanhmã mẽmoj tã karõ to nẽ kaxyw mẽ pahto mẽ paxihtỳx. Tã kêt pu mẽ ra kot mẽ pamã mẽmoj tã karõ xà hkõt kãm amnhĩ nhĩpêx rãhã ho ri papa. Jakamã koja mẽhõ ate Tirtũm kapēr jarẽnh o ri apa kaxyw axãm nẽ amã anẽ ka Tirtũm kamnàr rom mẽ kãm kapēr jarẽnh mex o ri mẽ hkõt apa.

⁷ Rỳ ate akwỳjẽ mã tanhmã axapẽn to ho ri apa kaxyw axãm ka mẽ kãm axapẽn mex o ri mẽ hkõt apa.

Rỳ ate Tirtũm kapēr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rỳ ate Tirtũm kapēr o ri Jejus kõt mẽ akwỳjẽ jamxpēr o hihtỳx o ri apa kaxyw axãm ka mẽ kãm kapēr jarẽnh pẽ mẽ ho mẽ hihtỳx mex o ri mẽ hkõt apa.

Rỳ ka mẽ atõ akukrêx rax japêr nẽ ate mẽ kêt amrakati xwỳnhjẽ mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkõt apa.

Rỳ ate akwỳjẽ ho amnhĩptàr kaxyw axãm ka mẽ ho amnhĩptàr mex o ri apa.

Rỳ ate tanhmã mẽ akwỳjê ho mex to nê mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhỹr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkôt apa hkêt nê.

⁹ Nê kêr ka mẽ apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa.

¹⁰ Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkôt apa. No mẽ ri atỳx ajamaxpêr o:

—Nà koja mẽhõ ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê. ¹² Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mẽhõ tanhmã mẽ ato ka mẽ akaprĩ nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa. ¹³ Nê koja Kris kôt atõjê hõ kêp amrakati ka mẽ ja hã omu nê anhõ mẽmoj japêr nê mãmri kãm hkwy gõ. Nê amnhĩ wỳr awỳ nê tanhmã ho mex to.

¹⁴ Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atêm nê kãm tanhmã hã axàmnhênh to hkêt nê. Kêt ãm ho Tĩrtũm pix wỳ nê kãm:

—Pa mẽ ijamãr mex xwỳnh maati. Nà na ixkwỳjê hõja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhỹr o mãn mẽ ho awỳ.

¹⁵ Nê koja akwỳjê hõ mẽmoj tã hkĩnh nê. Ka omu nê urak nê ã hã akĩnh nê. No koja mẽmoj tã hkaprĩ nê mỳr o nhỹ ka omu nê ra urak nê ã hã akaprĩ nê.

¹⁶ Nê kêr ka mẽ piitã mẽ hipêx o axpên pyrak o ri apa. Te mẽ ate amnhĩ to rax o akwỳjê jakrenh o te mẽmoj kamã akahak o amnhĩ nhĩpêx pyrak kêt nê. Nê axàhpumunh tỳx o ate mẽ piitã mẽ hakrenh par pyrak o ri amnhĩ nhĩpêx o ri apa hkêt nê.

¹⁷ Nê koja mẽhõ tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nê kêr ka mẽ tãm ri axpên mã akapêr rãhã ho ri apa.

Nê kot kaj akràmnhwỳ mẽ wa tanhmã axpên nhĩpêx to. Hãmri ka wa akupỳm tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Koja Tĩrtũm tãm tanhmã atã ho. Kapêr ã kagã htũm kot ja jarênh kot:

Kêr ka mẽ amnhĩ tã tanhmã kot ato xwỳnh to hkêt nê. Pa kot paj mẽ atã tanhmã ho. Anê. Nê harênh kot:

²⁰ Kêr ka mẽ amã mẽ kãm mẽ akurê xwỳnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukaprĩ nê mẽ kãm mẽmoj kwỳ gõ kê mẽ kuku.

Rỳ nhũm mẽ kãm kôr ka mẽ kãm gõ hkwy kê mẽ ho ixkõ.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu nê amnhĩ kamã hpijaam jao mẽ atã amnhĩ kamã gryk nê. Anê.

²¹ Nom kot kaj mẽ amnhĩ tã tanhmã mẽ homnuj to hãmri nê ajaxwỳja urak nê amnhĩ tomnuj nê. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nê mẽ apyrã nê tãm mẽ anhĩpêx japêr.

E kêr ka mẽ ã axpên nhĩpêx o ri apa anê.

13

Mẽ pahto amnhĩptàr xwỳnhjê jarênh

Matêwre 22.21; Xitre 3.1; Wam Pêtre 2.13-17

¹Nê kêr ka mẽ kot mẽ ato amnhĩptàr xwỳnhjê kapêr ma nê kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwỳr kênã. Mẽ kot mẽ pahto amnhĩptàr o pa kaxyw na hte mẽ unhwỳ. ²Jakamã koja mẽhõ mẽ kapêr ma nê ãm kuma nê hkôt amnhĩ nhĩpêx kêt nê hãmri nê te kot Tĩrtũm kapêr mar nê ãm mar pyrãk o amnhĩ nhĩpêx. Hãmri nhũm Tĩrtũm tee ri ja hã omu nê nhỹrmã tanhmã hã ho.

³Xà na hte tãm mẽ kot amnhĩ nhĩpêx xwỳnhjaja kãm mẽ kot mẽ ho amnhĩptàr xwỳnhjê pyna ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwỳnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptàr xwỳnhjê pyna hprãm kêt xwỳnhjaja kêr ka mẽ kapêr ma nê hkôt amnhĩ nhĩpêx kê amnhĩ tã mẽ apumu nê hkĩnh nê. Nê amnhĩm mẽ ate amnhĩ to mex xwỳnh ã mẽ ajarê. ⁴Tĩrtũm nhỹ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptàr xwỳnhjaja mẽ panhĩpêx anê. Tĩrtũm kãm hprãm xà hkôt. ⁵Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnên ã amnhĩ kukamã ajamxpêr anê nê ajamxpêr o:

—Nà Tĩrtũm kot mẽ ixkaxyw unhwỳr jakamã na pa hte kapêr ma nê hkôt amnhĩ nhĩpêx mex o ri ixpa.

Anhỹr o ajamxpêr.

⁶Nê mẽ pahto amnhĩptàr xwỳnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw. ⁷Jakamã kêr ka mẽ hã apijaàm o ri apa kamã mãmri mẽ kãm kàxpore hkwỳ ho hkryre nê òr o ri apa. Mẽ kot hã àhwỳr xà hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸Nê kêr ka mẽhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhĩpêx anê nê Tĩrtũm kapêr piitã hkôt amnhĩ nhĩpêx mex o ri apa.

⁹Amnepê mã na pre finat Mojesja Tĩrtũm nhỹ hã Ijaew mã mẽmoj tã karõ nê mẽ kãm: Kêr ka mẽ aprõ pix tãnopxa nê nhãm mênijê hõ kamã ri akurê ho apijaàm kêt o apa hkêt nê.

Nê mẽ anijaja mẽ amjên pix tãnopxa nê nhãm ri mẽmyjê hõ kamã akurê ho apijaàm kêt o ri apa hkêt nê.

Nê mẽ ri axpên par kêt nê.

Nê mẽ ri axpên pê axàhkĩnh o ri apa hkêt nê.

Nê mẽ amã ri axpên kukrêx kĩnh o ri amã ho anhõ hprãm o ri apa hkêt nê. Anê.

Nê mããnên ja:

Kêr ka mẽ nhãm mẽ axpên nhĩpêx o te ka amã amnhĩ tã ma pyrãk. Jao tãm axpên nhĩpêx o ri apa. Anê.

Ã kot mẽ kãm hã karõ kot anhỹr. Kot puj mẽ ã pamã pahkwỳjê kĩnh anê nê mããnên wam finat Mojes kot mẽmoj tã mẽ panhĩgêjtjê mã karõ hkôt amnhĩ nhĩpêx o ri papa rãhã nê. Jao axpên par kêt nê. Nê axpên pê paxàhkĩnh kêt nê. Nê axpên kutã panojarêt rãhã nê.

¹⁰Koja mẽhõ kãm amnhĩ tã ma pyrãk o hkwỳjê nhĩpêx nê mẽ ho mex pix o pa. Jakamã kot kaj mẽ amã ri axpên kĩnh nê mẽmoj to axpên kutã anojarêt pix nê. Jao Tĩrtũm kapêr piitã hkôt amnhĩ nhĩpêx mex o ri apa.

¹¹Amnepê mã mẽ pahte amnhĩ kaxyw Jejus kôt pajamxpêr xà hã arĩgrota ã na pre kormã akupỹn mẽ pahwỳr hpôx xà hã arĩgro kormã hwỳr awry rax nê. Tã ra hwỳr ahtêp

o mõ. Koja tokyx akupÿn mẽ pahwÿr wrÿ nẽ ma akupÿm kaxkwa hwÿr mẽ pahto api. Jakamã kwa kêr pu mẽ arÿ hamãr rãhã ho ri apa. Jao tanhmã amnhÿ tomnuj to kaxyw nẽ pajamaxpẽr o:

—Kwa koja Jejus tanhmã amnhÿ to nẽ jarãhã akupÿn wryk japêr. Tã kot pa ri ã amnhÿ nhÿpêx anẽ nhÿm wrÿ nẽ tee ri ja hã ixpumu pa amnhÿ kamã ixpijaam tÿx nẽ. Nã kot paj ã amnhÿ tomnuj anhÿr kêt nẽ. Anẽ.

Hãmri nẽ Jejus kamã ajamak pẽ kutêp Tÿrtÿm kapêr kôt pix mã ri amnhÿ nhÿpêx mex rãhã ho ri papa.

¹² Na pu htem kamãt kãm gõr nẽ arÿgro jamãr pẽ kamã pajamak o panhÿkwÿ. Arÿgro te kêp Jejus akupÿn wryk pyrãk. Jakamã kwa pu mẽ kamã pajamak pẽ kãm panojarêt rãhã ho ri papa nẽ amnhÿ nẽ tanhmã mẽ omnu xà kute pumunh mex o ri papa. Te ho põristi kot amnhÿ nẽ mẽ kot kãm mẽ hkurê xwÿnhjê pumunh mex pyrãk o Jejus kutêp tãm amnhÿ nhÿpêx o ri papa. Na pre tanhmã mẽ pahkrã hto pu mẽ ÿ hã tãm ri amnhÿ nhÿpêx. Tã kêr pu mẽ arÿ ã amnhÿ nhÿpêx anhÿr o ri papa nẽ te mẽ pahte arÿgro hã mẽ pa xwÿnhjê kot amnhÿ nhÿpêx pyrãk o amnhÿ nhÿpêx. ¹³ Kot puj mẽ ã amnhÿ nhÿpêx anẽ nẽ mẽ piitã mẽ noo mã tee ri tanhmã mẽ pahte amnhÿ tomnuj to mã pajamaxpẽr kêt nẽ. Jao amnhÿ kamã pahpijaam nẽ ri papa hkêt nẽ. Nẽ pajamakêtkati nẽ paxãmnhÿx ri papa. Te ho hirã kamã ri mẽ pa xwÿnhjê kot amnhÿ nhÿpêx pyrã nẽ ãm ri paxãmnhÿx tãm amnhÿ nhÿpêx o ri papa.

Nẽ mẽ pahprõ pix tânopxar o ri papa.

Nẽ mẽ pahpipãnh nẽ ri papijapu ho ri papa hkêt nẽ.

Nẽ mẽmoj tã axpẽn mã paxãkjêr hkêt nẽ.

Nẽ mẽmoj tã axpẽn kãm pagryk kêt nẽ.

¹⁴ Nom kot puj mẽ axtem nẽ ã amnhÿ tomnuj anẽ nẽ mẽ pahte amnhÿ nhÿpêx tÿm kôt pix mã amnhÿ nhÿpêx. Tã kêr pu mẽ ã amnhÿ nhÿpêx anhÿr pumaj hpãnhã amnhÿ to Pahшти Jejus Kris wÿ nẽ kãm:

—Pa Jejus. Nã kormã jar apa ri na ka pre mẽ kot tanhmã amnhÿ tomnuj to kutã axihtÿx o axihtÿx nẽ aa tanhmã amnhÿ tomnuj to hkêt nẽ. Tã inhmã apyrã nẽ ixte amnhÿ tomnuj kutã ixihtÿx o ixihtÿx o ixpa hprãm. Anẽ.

Jao mẽ pajamaxpẽr tÿmja te ra kot amnhÿ tã mẽ pahto htÿx kêt pyrãk o pu mẽ amnhÿ nhÿpêx o ri papa.

14

Mẽ pahte Kris kôt pahkwÿjê mã paxãkjêr kêt ã mẽ pamã karõ

Matêwre 7.1-5; Rõmãn 2.1; Wam Korÿt 10.23-33; Xiakre 4.11

¹ Nẽ koja mẽhõ kormã Jejus kôt amnhÿ xãm nyw ri kormã hkôt hamaxpẽr tohtuj anẽ. Hãmri nẽ htÿx tanhmã hamaxpẽr to nẽ mẽmoj mex kaga. Ka mẽ ja hã omu nẽ ãm omu nẽ hã tanhmã kãm nẽ hkêt nẽ. Kwãr mãmrÿ ã amnhÿ nhÿpêx anẽ. Koja gaa nẽ rÿ hprÿ hã Tÿrtÿm kapêr mar tÿx nẽ hãmri nẽ hkôt mẽmojta pumunh mex nẽ. ² Jakamã koja Jejus kôt akwÿjê hõ mẽ apkur xà piitã hkur pymaj tanhmã hõ kute hã harẽ nẽ hkaga nẽ hamaxpẽr o:

—Nã kot pa ja hkur kêt nẽ. Kot pa apu kuku nẽ hkur o amnhÿ tomnuj nẽ. Anẽ.

Kwãr mãmrÿ ã hamaxpẽr anẽ nẽ hkur kêt nẽ. Nom mẽ pahte Jejus kôt amnhÿ xunhwÿr tÿx xwÿnhjaja na pu htem paxãmnhÿx Jejus kamnàr rom mẽmoj piitã kuku. Nom mẽ pahkÿnhã ham mẽ kot hkôt amnhÿ xunhwÿr xwÿnhjaja kormã kapêr piitã mar kêt jakamã kwãr mẽ mãmrÿ anẽ nẽ mẽmoj kur kêt nẽ. ³ Nom kêr ka mẽ ri tanhmã hã mẽ kãm akapêr to hkêt nẽ. Rÿ mẽ kãm:

—Kwa mẽ ixpyrà nẽ mẽmoj piitã aku.

Anhÿr o mẽ kãm akapêr kêt nẽ. Ano ho ãm hã mẽ omu.

Nẽ mẽ ate mẽmoj piitã hkur kêt xwÿnhjaja kêr ka mẽ ajaxwÿja mẽ ixte mẽmoj piitã hkur ã tanhmã mẽ inhmã axãkjêr to hkêt nẽ. Mẽ ixte mẽmoj piitã hkur o ixpa hã mẽ

ixpumu nẽ ãm hã mẽ ixpumu nẽ hã tanhmã mẽ inhmã axàkjêr to hkêt nẽ. Rỳ hã mẽ inhmã:

—Kwa na kot kaj mẽ ja kur o amnhĩ tomnuj nẽ.

Anhỹr o hã mẽ inhmã akapêr kêt nẽ. Ano ho ãm ja hã mẽ ixpumu. Mẽ pahte ahpỹnhã tanhmã paxàpkur to htã Tirtũm kot mẽ pahte Kra Jejus kôt amnhĩ xunhwỳr xwỳnh piitã mẽ pahto hkra kênã. ⁴ Jakamã kwa mẽmoj tã tanhmã axpẽn mã axàkjêr to ho ri apa hkêt nẽ. Koja Kris kôt atõjê hõ axtem tanhmã hamaxpêr to ka mẽ tee ri ja hã omu nẽ tanhmã hã kãm nẽ hkêt nẽ. Rỳ ajamaxpêr o:

—Tk. Na hte ã ri amnhĩ nhĩpêx anhỹr o pa. Ja omnuj. Pa na pa hte ã amnhĩ nhĩpêx anhỹr kêt nẽ.

Anhỹr o ri axpẽn kukamã ajamaxpêr hkêt nẽ. Mẽ pahpê Tirtũm kêt kênã kot pu kêt mẽ ã ri axpẽn kukamã pajamaxpêr anẽ. Tirtũm pix na hte tanhmã mẽ pajarênh to xwỳnh. àhpumunh o àhpumunh xwỳnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê àmnhĩx ri tanhmã amnhĩ nhĩpêx to ho pa.

⁵ Nẽ koja Jejus kôt atõjê hõ mẽmo arĩgromnu jarẽ nẽ hã àpênh kêt nẽ. Ka mẽ apê hkwỳjaja tee ri ja hã omu nẽ ajamaxpêr o:

—Nà arĩgro piitã mẽ pamã mex kênã. Kot paj mãmri arĩgro piitã hã apê.

Anhỹr o ajamaxpêr japêr. Nom kêr ka mẽ ja hã axpẽn mã tanhmã axàkjêr to hkêt nẽ. Na pu htem ahpỹnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpẽn mã paxàkjêr to ho ri papa hkêt nẽ. ⁶ Kêt mẽ kot arĩgromnu jarênh xwỳnhjê mẽ mẽ pahte arĩgro piitã mex ã harênh xwỳnhjaja mẽ pahpiitã mẽ pahpê Tirtũm kraa. Jakamã mẽ pahpiitã na pu htem pajamaxpêr o:

—Na pa hte Tirtũm kãm hprãm xà hkôt ã amnhĩ nhĩpêx anhỹr o ri ixpa. Anẽ.

Nẽ mẽ pahte mẽmoj piitã hkur xwỳnhjaja nẽ mẽ kot mẽmoj kwỳ hkur kêt xwỳnh piitã mẽ pahpê Tirtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nẽ Tirtũm mã amnhĩ jarẽ nẽ kãm:

—Pa mẽ ijamãr mex xwỳnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tirtũm.

Anhỹr o kãm amnhĩ jarẽ. Hãmri nẽ kormã hkamnàr rom paxàmnhĩx ri tanhmã mẽõ kuteta ku. ⁷⁻⁸ Mẽ pahpê Tirtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarẽ nẽ mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt. ⁹ Jakamã na pre Kris ja hã mẽ pahpumu nẽ tãm mẽ pakaxyw amnhĩ to kêp mẽ panhõ Pahihti nẽ mẽ panê ty. Hãmri nẽ akupỹm htĩr. Kêp mẽ panhõ Pahihti hã akupỹm htĩr. Kêp mẽ pahte hkôt amnhĩ xunhwỳr xwỳnhjê nhõ Pahihti kaxyw. Jakamã kêp ra mẽ pahkwỳ htyk xwỳnhjê nhõ Pahihti nẽ määnên kêp arĩ mẽ pahtĩr xwỳnhjê nhõ Pahihti. ¹⁰ No mẽ papajaja mẽ pahpê Kris kôt mẽ pahkwỳjê nhõ pahi hkêt jakamã kêr mẽ Kris kôt akwỳjê hõ tanhmã amnhĩ nhĩpêx to hã omu hãmri nẽ tanhmã ho akapêr to hkêt nẽ. Rỳ ajamaxpêr o:

—Kwa na ã amnhĩ nhĩpêx anẽ. Inhmã ja mex kêt.

Anhỹr o ajamaxpêr kêt nẽ. Koja nhỹrmã Tirtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpẽn jarênh anhỹr kêt nẽ. ¹¹⁻¹² Kot puj mẽ nhỹrmã pahpiitã Tirtũm kutã pahkrĩ nẽ kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarẽ. Kê mẽ pama nẽ tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot:

Koja nhỹrmã mẽ piitã ixpê mẽ õ pahi hã ixkutã hkõn krã ho rôròk nẽ hkrĩ nẽ inhmã inhmex o inhmex ã ijarẽ.

Nẽ mẽ piitã ixpê Tirtũm ã ixpyxi mex ã ijarẽ. ãm hãmri na pa ã mẽ hkukamã mẽ harênh anẽ. Anẽ.

Mẽ pahte Kris kôt pahkwỳjê ho mex ã mẽ pamã karõ
Wam Korit 8.9-13

¹³ Nē kwa kêr ka mē akwỳ kot Jejus kôt amnhĩ xunhwỳr tohtuj anhỳr xwỳnhjaja tanhmā mē kot amnhĩ nhĩpêx to ho pa hã mē omu nē ja nē tanhmā mē kām akapêr to hkêt nē. Ām mē noo mā tām ri amnhĩ nhĩpêx rāhã ho ri apa. Mē kot ja hã mē apumunh nē mē akôt amnhĩ nhĩpêx kaxyw. No kot ka mē kot tanhmā amnhĩ nhĩpêx toja ā kām akapêr nhũm ama nē tee ri amnhĩ kukamā hamaxpêr nē hkaprĩ nē.

¹⁴ E kot pa hpānhã mē paxàpkur xà hã tanhmā mē panhō jarēnh to. Ixte Pahihti Jejus jamaxpêr xà hkôt tanhmā ijamaxpêr to ho ri ixpa jakamā kot paj ixkatāt kôt mē amā tanhmā mē panhō jarēnh to nē ām hāmri harē. Nà mē paxàpkur xàja ām pixi nē omnu hkêt. Piitā mex o mex. Nom koja mēhō tee ri mēmo mē apkur xà hō pumu nē hamaxpêr o:

—Nà kot paj ja hkur kêt nē. Kot paj apu kuku nē ho amnhĩ tomnuj nē. Anē.

Hāmri nē hkur kêt nē. Tã kwār māmri ā hamaxpêr anē nē hkur kêt nē. Nom na ām amnhĩ krā hkôt Tirtūm kêp ja omnuj ā hkamnhĩx. Kêp omnuj kêt. Ra kot mēmo mē paxàpkur xà piitā mex ā harēnh. ¹⁵ Tã kot kaj mē kot mēmoj kur kêt xwỳnhhta py nē o tē nē kot hkaga xwỳnh noo mā hkur o xa nhũm apumu nē tee ri hamaxpêr nē hkaprĩ nē. Jakamā kot ka mē ā noo mā amnhĩ nhĩpêx anhỳrja o ho mex kêt nē. Kwa mē ā ri axpên nhĩpêx anhỳr hkêt nē. Kot ka mē ā axpên nhĩpêx anē nē te amnhĩ pix kukamā ajamaxpêr pyrāk o amnhĩ nhĩpêx. Jao akwỳjê ho mex kukamā ajamaxpêr kêt nē. Kris kām mē hapê htỳx kôt mē kot amnhĩ tomnuj pānhã amnhĩrer kaxyw ra nē htyk kēnã kot ka kêt mē axtem nē ri ā mē noo mā mē kot mēmoj kur kēeta kur anē. Rỳ koja apu tee ri kot mēmoj kur kēeta kur ā mē apumu nē tanhmā amnhĩ tomnuj to. Jao Kris kaga japêr. Jakamā kwa mē ā mē noo mā mēmojta kur kêt nē. ¹⁶ Mēmo mē apkur xàja mex tã nhũm mē akwỳjê hō kām mex kêt japêr ka mē noo mā hkur kêt nē. Nē tanhmā hã kām nē hkêt nē. Kot kaj mē anē nhũm Kris kra hkêt xwỳnhjaja tee ri ja hã mē apumu nē tanhmā axpên mā mē apê Kris kwỳjê ho kapêr punuj to. ¹⁷ Mē pahpê Tirtūm krajaja na pu htem paxàpkur xà nē pahkôm xà pix kukamā pajamaxpêr o ri papa hkêt nē. Na pu htem amnhĩ mē pahkwỳjê mex kukamā pajamaxpêr. Nē mē pahte tām amnhĩ nhĩpêx kukamā pajamaxpêr. Nē tām axpên nhĩpêx kukamā pajamaxpêr. Kot puj mē ā amnhĩ nhĩpêx anē nhũm Tirtūm Karō ja hã mē pahpumu nē mē pahto mē pahkĩnh nē. Pu mē pahkĩnh nē pajamakêtkati nē ri axpên kôt papa. ¹⁸ Tã kot puj mē ā Kris mā tanhmā amnhĩ nhĩpêx to ho ri papa anē nhũm Tirtūm ja hã mē pahpumu nhũm ja kām mex nē. Nē Kris kôt mē pahkwỳjê mā haxwỳja ja mex nē.

¹⁹ Jakamā kêr pu mē tām axpên mā pakapêr o ri papa. Nē pajamakêtkati nē axpên kôt ri pajapôj. Nē Kris kôt tanhmā axpên to paxihtỳx to ho ri papa. ²⁰ No kot ka mē axàpkur xà gryk ā akwỳ hkukamā ajamaxpêr kêt nē atỳx ri mēhō noo mā mēmoj kur japêr. Kêp omnuj tã ka mē ām amnhĩ pix kukamā ajamaxpêr nē noo mā hkur japêr. Hāmri nhũm ja hã mē apumu nē ra kot Tirtūm kaga mā. Ra kêp hkra jakamā kwa mē noo mā mē kot mēmoj punuj ā harēnh xwỳnhhta kur kêt nē. Nom mē paxàpkur xàja piitā mex. Tirtūm kot mē pamā ôr jakamā piitā mē panhō. Tã koja akwỳjê hō Tirtūm kêp mēmoj omnuj ā hkamnhĩx tã ka mē noo mā aku nē ho amnhĩ tomnuj nē. ²¹ Kêr pu mē pahkwỳjaja tanhmā kot amnhĩ tomnuj to pymaj pu mē pahte amnhĩ nhĩpêx kukamā pajamaxpêr mex o papa. Mēmo mēō nē mēmo kagô pē wĩhtija. Tirtūm kot mē pamā mēmoj piitā ôr tã no nhũm mē pahkwỳjaja kêp ja omnuj nē pu mē noo mā hkur rỳ ho pahkôm kêt nē. Mēmo mry nē mēmo wĩhti pu mē noo mā hkur rỳ ho pahkôm kêt nē.

²² Nē kêr ka mē atō mēmoj krêr kaxyw nē hkukamā ajamaxpêr o:

—Nà kot paj ja krê. Tirtūm kām ja mex kēnã. Anē.

Hāmri nē māmri Tirtūm kamnār rom axàamnhĩx akrê. Kām ja mex kēnã kot ka kêt ri tee ri hkrêr kaxyw hkukamā ajamaxpêr nē hkaga. ²³ No kot kaj mē atō mēmoj to anhỳr kaxyw nē tee ri amnhĩ kukamā ajamaxpêr nē ajamaxpêr o:

—Ko kot paj apu ja ho anē nhũm Tirtūm hã ixpumu nhũm ja kêp omnuj nē rỳ ko. Anē.

Hāmri nē tee ri amnhĩ kukamā ajamaxpêr. Tã ra ā amnhĩ nhĩpêx anē nē akrê rỳ mēmoj to anē. Hāmri nhũm Tirtūm tee ri ā ate amnhĩ nhĩpêx anhỳr ā apumu nhũm ja kêp omnuj

nẽ. Ate hkamnàr rom mẽmoj to anhÿr kêt nẽ amarĩ amnhĩ krã hkôt ho anhÿr jakamã ho amnhĩ tomnuj nẽ.

15

Mẽ pahte amnhĩ pix kukamã pajamaxpẽr kêt ã mẽ pamã karõ

Makre 10.45; Wam Korit 10.24; Piripos 2.3-5

¹ Nẽ kêt pu mẽ pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã mẽ kot Jejus kôt amnhĩ xunhwÿr totuj janhÿr xwÿnhjê jamãr mex nẽ. Jao mẽ kamã pagryk tokyx anhÿr kêt nẽ. Æm mẽ kutã panojarêt pix o papa. Jao ra amnhĩ pix kukamã pajamaxpẽr kêt nẽ. ² Määnẽn amnhĩ mẽ Kris kôt mẽ pahkwÿjê hkukamã mãn mẽ pajamaxpẽr. Jao mẽ kot tãm amnhĩ nhĩpêx kaxyw mẽ ho mex o ri papa. ³ Kris na pre jar pa ri amnhĩ pix kukamã hamaxpẽr kêt nẽ. Na pre määnẽn õ Papaj kukamã hamaxpẽr. Jakamã Tirtũm kapẽr ã kagà htũm kot kãm kapẽr jarẽnh kot:

Pa Papaj. Na hte mẽ pahkurê xwÿnhjaja ixto kapẽr punuj nẽ. Nom määnẽn ã ato kapẽr o pa anẽ. Anẽ.

⁴ Mẽ pakaxyw na Tirtũm kapẽr ã kagàja. Mẽ pahte kamã harẽnh nẽ mar nẽ amnhĩ kaxyw hkôt pajamaxpẽr tÿx o ri papa kaxyw. Jakamã na pu htem tanhmã pahpunuj to htã kapẽr kwÿ ma nẽ pahkĩnh nẽ. Jao tee ri amnhĩ kukamã pajamaxpẽr o ri pahkaprĩ hkêt nẽ. Æm nhÿrmã Tirtũm kot mẽ pahto mex kukamã pajamaxpẽr o akupÿm paxihtÿx nẽ pahkĩnh nẽ ri papa. Mẽ pahkĩnh nẽ ri papa kaxyw na Tirtũm kapẽr ã kagàja. ⁵⁻⁶ Na pu htem Tirtũm kamnàr rom pahkĩnh nẽ. Nẽ axpẽn kamã paxukaprĩ ho ri papa. Jakamã na pa hte tanhmã mẽ ato Tirtũm wÿr to nẽ kãm:

—Pa Tirtũm. Apê mẽ ijamãr xwÿnh maati na ka. Nẽ apê mẽ inhõ Pahihti Jejus Kris nhõ Papaj na ka. Nà xep ra Rõm nhõ xwÿnh kwÿjaja kãm akapẽr kôt amnhĩ nhĩpêx prãm jakamã kwa tanhmã mẽ hkrã ho mex to kê mẽ hamakêtkati nẽ ajamaxpẽr kôt hamaxpẽr rãhã ho ri akôt pa. Hãmri nhũm mẽ amnhĩ tã apumu nẽ piitã amex o amex ã ajarẽ.

Anhÿr o pa hte mẽ ato kuwÿ.

Ijaew kêt xwÿnhjê jarẽnh

Atre 10.34; Rõmãn 9.24; Karatas 3.28

⁷ Nẽ kwa kêt ka mẽ amã axpẽn tã ma ho ri apa. Te ho Kris kãm mẽ pahtã mata pyrãk. Jao axpẽn to mex pix o apa. Kot kaj mẽ ã axpẽn nhĩpêx anẽ nhũm mẽ piitã axpẽn tã mẽ apumu nẽ mẽ anhÿr hã Tirtũm mã mex o mex ã harẽ.

⁸ Amnepêm Tirtũm Ijaew mã tanhmã Kris jarẽnh to. Kormã pika hwÿr wrÿk kêt ri nhũm hkukamã nhÿrmã mẽ hwÿr wrÿk nẽ mẽ kamã kator ã harẽ.

Tã nhũm mẽ hwÿr wrÿ nẽ mẽ kamã kato. Ijaew hkanrêhã htãmnhwÿjê kamã kato nẽ mẽ ho mex o ri mẽ hkôt pa. Mẽ kot amnhĩ tã omunh nẽ ã hamaxpẽr anhÿr kaxyw. Nẽ hamaxpẽr o:

—Amnepêm Tirtũm kot mẽ panhĩgêt mã hkukamã harẽnh xà hkôt na mẽ ixwÿr Kraja mẽ nhũm wrÿ nẽ mẽ ixto mex o ri pa. Nà ãm hãmri na pre mẽ ixwÿr kumẽ.

Anhÿr o hamaxpẽr kaxyw. ⁹ Nẽ mẽ apê Ijaew kêt xwÿnhjaja mẽ ajaxwÿja mẽ ate tanhmã kot amnhĩ nhĩpêx to hã harẽnh mar nẽ Tirtũm mã mex o mex ã harẽnh kaxyw. Nẽ Tirtũm kot mẽ akamã ukaprĩ hã mẽ ate amnhĩ tã omunh nẽ mex o mex ã harẽnh kaxyw na pre wrÿ. Tirtũm kapẽr ã kagà htũm kot tanhmã mẽ ixpê Ijaew jarẽnh to nẽ määnẽn tanhmã mẽ apê Ijaew kêt xwÿnhjê jarẽnh to nẽ mẽ pajarẽnh kot:

Kot paj Ijaew kêt xwÿnhjê jamak mã amã amex ã ajarẽnh o ri mẽ hkôt ixpa.

Nẽ amex ã inhgrer o ri mẽ hkôt ixpa. Anẽ.

¹⁰ Nẽ ja:

Kwa mẽ apê Ijaew kêt xwÿnh mẽ mẽ apê Ijaew. Kêt ka mẽ apiitã Tirtũm nhÿ hã akĩnh nẽ ri apa. Anẽ.

¹¹ Nẽ määnẽn ja:

E kêt ka mẽ apê Ijaew kêt xwÿnhjaja nẽ krĩ piitã hkôt mẽ apa xwÿnhjaja mẽ apiitã Tirtũm mã mex o mex ã harẽnh o ri apa.

Anhÿr o kot harënh. ¹² Nê Tirtüm nhÿ hä kapër o pa xwÿnh finat Ijais haxwÿja Ijaew mã Jejus jarënh o:

Koja nhÿrmã Jese kanrêhã htàmnhwÿjê hõja mẽ pahwÿr kato.

Hãmri nê mẽ pahpê Ijaew mẽ Ijaew kêt xwÿnhjê ho amnhÿptàr o pa.

Jakamã nhùm mẽ amnhÿ kaxyw hkôt hamaxpër o pa. Anê.

¹³ Nê na pa hte tanhmã mẽ ato Tirtüm wÿr to ho ri ixpa nê kãm:

—Pa Tirtüm. Kwa kêr ka Rôm nhõ xwÿnhjê ho mex kê mẽ amnhÿ kaxyw Akra hkôt hamaxpër mex o ri pa. Jao hkôt hkÿnh nê hamakêtkati nê ri axpën to pa. Nê kê Akarõ mẽ ho mẽ hihtÿx o pa kê mẽ amnhÿ kaxyw amã mãn hamaxpër tÿx rãhã ho ri pa. Anê.

Pawre kot hprÿ hä amnhÿ jarënh

Sikün Pêtre 1.12-13

¹⁴ E Kris kôt ixkwÿjaja. Nà ra ixte mẽ ajarënh mar mex. Na ka xep htem amnhÿ to mex o ri apa. Nê mẽmoj to axpën kutã anojarêt rãhã ho ri apa. Nê mẽ kot tanhmã Tirtüm kapër kôt amnhÿ nhÿpêx to xàja ka mẽ omunh mex nê ho axpën jahkre ho ri apa. ¹⁵ Tã ot pa kagã ja kamã mẽ amã ixujarënh kãm ixihtÿx nê. Tirtüm nhÿ hä. Ra mẽ ate mẽmoj mar mex tã pa axte mẽ amã harê. Mẽ ate mar tÿx nê hä anohtÿx kaxyw. Nã ã ixte amnhÿ nhÿpêx anhÿr kaxyw na pre Tirtüm mẽ akaxyw ixãm. ¹⁶ Ixte Jejus Kris mã mẽ apê Ijaew kêt xwÿnhjê mã kapër jarënh o ri mẽ akôt ixpa kaxyw. Nê mẽ ato hwÿr o ri ixpa kaxyw. Tã pa hte krÿ hkwy kamã ã mẽ akwÿjê mã harënh anhÿr o ri mẽ hkôt ixpa. Nê Jejus jarënhja pa hte mẽ hkôt mẽ kãm harënh o ri ixpa. Mẽ kot mar nê hkÿnh kãm hkôt amnhÿ nhÿpêx mex kaxyw. Hãmri nhùm Tirtüm Karõ mẽ kãm mẽ hamaxpër nyw jagjê nhùm Tirtüm hä mẽ omu nhùm ja kãm mex nê nhùm hkÿnh nê hamaxpër o:

—Nã ãm hãmri. Koja mẽ nhÿrmã wa ixri htÿr tùm nê mex nê pa ho pa. Anê.

¹⁷ Tã na pa ixte Jejus Kris nhÿ hä Tirtüm mã tanhmã amnhÿ nhÿpêx to ho ixpa hä amnhÿ pumu nê ixkÿnh nê. ¹⁸⁻¹⁹ Na pa hte ÿ hä mẽ apê Ijaew kêt xwÿnhjê mã Tirtüm kapër jarënh o ri mẽ akôt ixpa. Nê mẽ anoo mã tanhmã ri Kris kot mẽ amã amnhÿ nhÿpêx to hä harê. Nê mẽ amã aa mẽ kot mẽmoj pumunh kêt kwÿ ho anhÿr o ri mẽ akôt ixpa. Tirtüm Karõ nhÿ hä. Nhùm hte mẽ akwÿjaja amnhÿ jaêr pê omu nê kamã no puma nê. Hãmri nê mẽ pahpyrà nê Jejus kôt amnhÿ xunhwÿ. Nom pa hte ã amnhÿ nhÿpêx anhÿr ã amnhÿ pumu nê ri hä amnhÿ to jarkrar kêt nê. ãm ixte Kris pix nhÿ hä mẽ kãm ixkapër ã mẽ kãm amnhÿ jarënh o ri mẽ hkôt ixpa. Tã pa ra Jerujarê rùm Irir wÿr krÿ piitã hkôt mẽ kãm Kris kapër jarê. Tirtüm Karõ kot tanhmã ixto hihtÿx to jakamã pa mẽ piitã mẽ kãm harënh mex nê. ²⁰ Na pa hte mẽ hwÿr inhnojarêt nê ã ijamaxpër anê nê ijamaxpër o:

—Kormã mẽ kot Kris jarënh mar kêt xwÿnhjê hwÿr kot paj mō. Nom ra mẽ kot harënh mar xwÿnhjê nhõ krÿ hwÿr inhmōrja inhmã prãm kêt. Anê.

²¹ Tirtüm kapër ã kagã htüm kot kapër mar kêt xwÿnhjê jarënh kot:

Kormã mẽ kot Tirtüm kapër mar kêt xwÿnhjaja koja mẽ kuma nê hprÿ hä mar tÿx nê. Anê.

Pawre kot Rôm wÿr hkrã hä amnhÿ jarënh

Rômãn 1.8-15

²² Hêxta waa nê. Inhmã mẽ apumunh prãm tÿx nê Rôm kãm Jejus kôt ixkwÿjaja. Na pa hte xatã mẽ awÿr ixkrã nom kormã mẽ awÿr inhmōr kêt nê. Kormã ixte krÿ hkwy kamã mẽ kãm Kris jarënh o ri ixpa jakamã kormã mẽ awÿr inhmōr kêt nê. ²³ Na pa ra xatã mẽ awÿr ixkrã hä ixtã amgrã xohtō nê. Tã ra jar mẽ kãm Kris kot mẽ panê tanhmã amnhÿ nhÿpêx toja jarënh pa. ²⁴ Jakamã kot paj tokyx ma mẽ awÿr mō. Hãmri nê mẽ awÿr pōj pu mẽ axpën pumu nê pahkÿnh nê axpën mã pakapër o papa. Pa mẽ akôt ri ixpa tãmtã hamū pyka pê Espãnhã wÿr ma mō. Nê kot paj inhnojarêt ka mẽ ixto Tirtüm wÿ nê inhmã ixàpkur xà hkwy gō pa ma mẽ hwÿr pry hä hkur o mō.

²⁵⁻²⁶ No na pa kormã mẽ awÿr inhnojarêt kêt nê. Kot paj ja rùm awjanã nê akupÿm Jerujarê hwÿr mō. Kamã Kris kôt mẽ pahkwÿjaja kêp amrakati nê ri pa nhùm pika pê Gres mẽ Masetōn kamã Kris kôt mẽ pahkwÿjaja mẽ harënh ma nê mẽ kãm kàxpore hkwy ho akuprō nê mẽ kaxyw inhmã kugō. Tã kot paj ma mẽ hwÿr o mō nê mẽ kãm kure nê

rĩ kormã ma mẽ awỳr mỗ. ²⁷ Jerujarẽ kamã Kris kôt mẽ pahkwỳjaja Ijaew na mẽ. Mẽ kumrẽx na prem Kris kôt amnhĩ xunhwỳ. Hãmri nhũm mẽ hkwỳjaja ma mẽ apê Ijaew kêt xwỳnhjê mã kapêr jarẽnh o ri mẽ akwỳ hkôt pa. Hãmri nhũm pika pê Gres kamã mẽ pa xwỳnhjaja mẽ kapêr ma mẽ urak mẽ Kris kôt amnhĩ xunhwỳr kurê kumrẽx. Jakamã amnhĩ xwar kãm nhãm krĩ hõ kamã Kris kôt mẽ pahkwỳjê ho mex prãm nẽ. Hãmri mẽ kãm kàxpore hkwỳ ho akuprõ nẽ mẽ kaxyw inhmã kugõ.

²⁸⁻²⁹ Tã kot paj ma Jerujarẽ hwỳr mẽ kãm o mỗ nẽ mẽ kãm kure hãmri nẽ awjanã nẽ rĩ kormã ma Rõm wỳr mẽ awỳr mỗ. Hãmri nẽ mẽ awỳr pøj pu mẽ axpẽn pumu nẽ pahkĩnh nẽ. Nẽ axpẽn mã Jesus Kris mex o mex ã harẽ nẽ kãm tanhmã amnhĩ jarẽnh to ho papa. Jao pahkĩnh nẽ papa. Tã pa hpãnhã hamũ ma Espãnhã wỳr mỗ.

³⁰ Nẽ na pu prem Jesus Kris o panhõ Pahihti. Jao te mẽ pahpê hkôt axpẽn to pahtõ nẽ pahtõx pyrak o axpẽn nhĩpêx. Nẽ Karõ nhỹ hã pamã axpẽn kĩnh nẽ. Jakamã kwa Jesus kôt ixkwỳjaja. Kêr ka mẽ ixpê mẽ atõ hã ixto Tĩrtũm wỳr kãm axihtỳx nẽ. ³¹ Kêr pa ma pyka pê Jutej kamã Jerujarẽ kamã Kris kôt mẽ pahkwỳjê hwỳr mỗ nẽ mẽ kãm kàxporeta gõ nhũm mẽ omu nẽ Ijaew kêt xwỳnhjê kot mẽ kãm õr ã mẽ omunh tã tee ri hamaxpêr kêt nẽ. ãm hkĩnh kãm mãmri ãmnhĩx hamỳ nẽ ho amnhĩm awjaprõ.

Nẽ kêr ka mẽ ixto awỳ kê inhnê mẽ kêp mẽ pahkwỳ hkêt xwỳnhjê pumunh mex nẽ.

³² E kêr ka mẽ ã ixto Tĩrtũm wỳr anê. Kê ixte ma Jerujarẽ rũm ma Rõm wỳr pàr kãm inhmõrta ã kê ixpumunh mex nẽ. Pa inhmex pê mẽ kurũm ma mẽ awỳr mõn pøj pu mẽ tokyx axpẽn pumu nẽ pahkĩnh nẽ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akõt ri ixpa nẽ ixkĩnh nẽ. ³³ Tã ãm ja pix. Kê Tĩrtũm mẽ akõt pa ho pa. Tãm na hte tanhmã mẽ pahto pu mẽ ã hã pajamakêtkati paxãmnhĩx ri pahkĩnh nẽ ri papa.

16

Pawre kot ahpỹnhã hkrãmnhwỳjê mã kapêr

¹ Ku nẽ mããnẽn ja. Ot pa mẽ awỳr Kris kôt pahtõx Pepreja mẽ awỳr kumẽ. Na hte krĩ pê Sãnkrej kamã Kris kôt mẽ pahkwỳjê tanhmã mẽ ho mex to ho ri mẽ hkôt pa. ² Nẽ mããnẽn pa na hte tanhmã ixto mex to. Tã kê mẽmo arĩgro hã mẽ awỳr pøj ka mẽ kêp Kris kôt mẽ pahtõx ã omu nẽ ho mex nẽ tanhmã ho ajuta hto.

³ Nẽ kêr ka mẽ atar Kris kôt ixkrãmnhwỳjê mã ijarẽ. Na pa hte mẽ kãm ijamaxpêr rãhã ho ri ixpa. Nẽ Akirti mẽ hprõ Prisireta ka mẽ wa kãm ijarẽ. Na pre hte wa inhĩhkõ hã Jesus Kris mã tanhmã amnhĩ nhĩpêx mex to ho wa pa. ⁴ Jao wa amnhĩ grõnh kôt mẽ kãm ixkurê xwỳnhjê pê ixpytã. Pa amnhĩ tã wa omu nẽ inhmã wa hkĩnh nẽ. No ãm papxipix inhmã wa hkĩnh kêt nẽ. Na pre Ijaew kêt xwỳnh kwỳ pê Kris kwỳjaja ixtã wa harẽnh ma nẽ haxwỳja kãm wa hkĩnh nẽ.

⁵ Nẽ na hte Kris kwỳjaja wa õrkwỹ kamã axpẽn wỳr akuprõ. Mẽ kot Tĩrtũm mã amnhĩ jarẽnh nẽ kapêr ã kagã hkwỳ mar kaxyw axpẽn wỳr akuprõ. Tã kêr ka mẽ mẽ kãm ijarẽ.

Nẽ Kris kôt mẽ pahtõ Epẽnre mã ijarẽ. Kêp ixkrãmnhwỳ mex na. Inhmã hkĩnh. Kumrẽx na pre jar pika pê As kamã amnhĩ kaxyw Kris kôt hamaxpêr nẽ hkôt amnhĩ xãm.

⁶ Nẽ Kris kôt mẽ pahtõx Marir ka mẽ kãm ijarẽ. Na xep hte tanhmã mẽ ato mex to rũnh o pa.

⁷ Nẽ Kris kôt mẽ pahtõ ãrõhti mẽ Jũhti wa kãm ijarẽ. Ixpyrà nẽ wa kêp Ijaew na wa. Kormã ixte Kris kôt amnhĩ xãm kêt ri na pre wa kumrẽx hkôt amnhĩ xãm. Na hte Jesus nhỹ hã mẽ ahkre ho mẽ pa xwỳnhjaja wa kot Kris kapêr jarẽnh mex ã wa harẽ. Tã ã amnhĩ nhĩpêx anhỹrja mỳrapê na pre mẽ hkwỳjaja wa unê nẽ wa haxà pa prem ixpimràatã ixpê prês nẽ mẽ hagjênh xà kamã ixkrĩ.

⁸ Nẽ Kris kôt mẽ pahtõ ãpritre mã ka mẽ ijarẽ. Kêp Kris kôt ixkrãmnhwỳ mex na.

⁹ Nẽ Kris kôt mẽ pahtõ Upãnre mã ijarẽ. Na hte ixpyrà nẽ Kris mã tanhmã amnhĩ nhĩpêx to ho ri pa.

Nẽ Kris kôt mẽ pahtõ Etaki mẽ ijarẽ. Kêp ixkrãmnhwỳ mex na.

¹⁰ Nẽ Kris kõt mẽ pahtõ Apes ka mẽ kãm ijarẽ. Na prem ra Kris ã hipêx punuj nẽ no nhũm mẽ kutã amnhĩ to htỳx nẽ Kris kaga hkết nẽ.

Nẽ Aristopti nhõrkwỹ kamã hkwỳjê mã ijarẽ.

¹¹ Nẽ Kris kõt mẽ pahtõ Erojãwti mã ijarẽ. Ixpyrà nẽ kệp Ijaew na.

Nẽ Nasisti nhõrkwỹ kamã Kris kwỳjaja ka mẽ kãm ijarẽ.

¹² Nẽ Kris kõt mẽ pahtõx Xiripẽre mẽ Xiripos wa kãm ijarẽ. Wa kệp Pahihti Jejus mã tanhmã amnhĩ nhĩpêx mex to xwỳnh na wa.

Nẽ Kris kõt mẽ pahtõx Pesixti mã ijarẽ. Haxwỳja kệp ixkràmnhwỳ na. Na hte Pahihti Jejus mã tanhmã amnhĩ nhĩpêx mex to ho ri pa.

¹³ Nẽ Kris kõt mẽ pahtõ Rupti mã ijarẽ. Na hte Kris kõt amnhĩ nhĩpêx mex o ri pa. Nẽ katorxã mã ijarẽ. Na pre te ixpê hkra nhĩpêx pyrãk o inhĩpêx.

¹⁴ Nẽ Kris kõt mẽ pahtõ Asĩnre mã nẽ Prekõxti nẽ Emes nẽ Patopas nẽ Emas mẽ. Jajê piitã mẽ pahkwỳ kot mẽ hwỳr pikuprõnh xwỳnhjê mẽ mẽ ho apimràatã mẽ kãm ijarẽ.

¹⁵ Nẽ Kris kõt mẽ pahtõ Pirorti mã nẽ mẽ pahtõx Juure mẽ Nẽrew wa nẽ htõxja nẽ mẽ pahtõ Orĩpti wa mẽ kãm ijarẽ. Nẽ mẽ pahkwỳ kot mẽ hwỳr pikuprõnh xwỳnhjê mẽ mẽ ho apimràatã mẽ kãm ijarẽ.

E kêr ka mẽ jajê piitã mẽ kãm ijarẽ. Na pa hte mẽ kãm ijamaxpêr rãhã ho ri ixpa.

¹⁶ Nom mẽ tapxipixjaja kêt. Æ mẽ apiitã mã na pa hte ijamaxpêr rãhã ho ixpa.

Nẽ ota jar Kris kwỳjaja mẽ awỳr hpêr mẽ.

¹⁷ Kwa ixkràmnhwỳjaja. Na ka mẽ ra aprĩ hã Tĩrtũm kapêr mar tỳx nẽ. Tã kêr ka mẽ amnhĩ nẽ mẽ kot Tĩrtũm kapêr o hêx xwỳnhjê pumunh mex o apa. Mẽ kãm axpên nẽ mẽ ato hpigranh par prãm. Nẽ mẽ ate Kris kaga nẽ hpãnhã mẽ kot amnhĩ nhĩpêx o amnhĩ nhĩpêxja mẽ kãm hprãm jakamã kwa mẽ amnhĩ nẽ mẽ omunh mex nẽ axkãm ajamak rom. ¹⁸ Na htem ã amnhĩ nhĩpêx anhỹr o Pahihti Kris mã tanhmã amnhĩ nhĩpêx to ho pa hkết nẽ. Æm amnhĩ hkrã hkết tanhmã ri hkwỳjê jahkre hto ho pa. Kot mẽ no kupyur kaxyw tanhmã mẽ kãm hêx to ho ri mẽ hkết pa. Te mẽ ahkre mex pyrãk tã mẽ ahkre mex kêt nẽ. Jakamã nhũm htỳx ri mẽ pa xwỳnhjaja mẽ kot mẽ ahkreja ma nhũm te mẽ kãm mex pyrãk. Jakamã kwa mẽ okora mẽ amnhĩ nẽ mẽ omunh mex nẽ. ¹⁹ Na ka htem mẽ kurom Kris kõt amnhĩ nhĩpêx mex nẽ nhũm xep mẽ piitã mẽ apumu nẽ axpên mã ja hã mẽ ajarênh o ri pa. Pa mẽ ajarênh ma nẽ ixkĩnh nẽ. Tã kêr ka mẽ arĩ ajamaxpêr mex rãhã ho ri ajamaxpêr o apa. Nẽ amnhĩ nhĩpêx mex rãhã nẽ. No tanhmã ajamaxpêr punuj to ho ri amnhĩ tomnuj o ri apa hkết nẽ. Æ mẽ ate amnhĩ nhĩpêx anhỹrja na inhmã hprãm.

²⁰ Nẽ na hte Satanasti mẽ hkwỳjaja mẽ ate Jejus kaga hprãm xàj mẽ akết tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nẽ hpĩr pyrãk o mẽ hipêx. Jakamã ã mẽ kot mẽ anhĩpêx anhỹr tã koja Tĩrtũm mẽ amã mẽ ajamakêtkati xàja gõ. Tapxipix na kot mẽ pajamakêtkati xà nhõr kaxyw àhpumunh tỳx.

Nẽ na pa hte mẽ ato Pahihti Jejus wỳ nẽ kãm:

—Pa Pahihti. Kwa kêr ka Rõm kãm akwỳjê pumu nẽ mẽ ho mex nẽ mẽmoj to mẽ kutã anojarêt rãhã ho ri apa. Anẽ.

²¹ Nẽ ota mẽ pahtõ Ximotreja mẽ awỳr hpêr mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nẽ ixtõ Rusti mẽ Jasãwti mẽ Sosipa wa mẽ haxwỳja mẽ awỳr hpêr mẽ.

²² Nẽ kot inhmã ixkapêr ã kagã xwỳnh Testi haxwỳja mẽ awỳr hpêr mẽ. Kệp Kris kõt mẽ pahtõ na. ²³ Nẽ Kris kõt mẽ pahtõ Gajre haxwỳja mẽ awỳr hpêr mẽ. Õrkwỹ kamã na hte Kris kwỳjaja axpên wỳr akuprõ nẽ kamã Tĩrtũm mã amnhĩ jarẽ nẽ kapêr ã kagã kamã harẽ nẽ mar o hkrĩ. Õrkwỹ kamã na pa pre pøj.

Nẽ mẽ pahtõ Eras haxwỳja mẽ awỳr pêr mẽ. Na hte jar krĩ ja kamã Rõm nhõ pahihti mã õ kàxpore jamãr pê ho mẽmoj to anhỹr o pa.

Nẽ Kris kõt pahtõ Kwatre haxwỳja mẽ awỳr hpêr mẽ. E jajaja piitã na mẽ awỳr hpêr rẽ.

²⁴ E kê Pahihti Jejus Krisja mẽ akutã nojarêt rãhã ho pa.

Pawre kot Tirtũm mex o mex ã harẽnh

Epes 1.3, 3.20-21; Wam Ximotre 1.17; Eprẽw 13.20; Jutre 24-25

²⁵ Nẽ kwa kêr pu mẽ Tirtũm mã mex ã harẽnh rãhã ho ri papa.

Nẽ ixte mẽ amã Jejus Kris jarẽnhã ã ka prem ama mẽ hkõt amnhĩ xunhwỳ. Tã koja mẽ ato mẽ axihtỳx ka mẽ hkõt axihtỳx kãm hkõt ri amnhĩ nhĩpêx mex o ri apa. Amnepêm na pre Tirtũm mẽ apê Ijaew kêt xwỳnhjê ho hkra kaxyw hã amnhĩ jarẽnh kêt mẽ. Kormã ja ho hpimxur ryy mẽ. ²⁶ Tã ã mẽ anhiẽpêx anhyrja o amnhĩrit mẽ y hã mẽ kapêr jarẽnh o ri pa xwỳnhjê mã kapêr mẽ mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkõt kamã harẽ mẽ kuma. Nom kê Ijaew pixjaja mar kêt mẽ. Kê pika piitã hkõt kamã harẽ mẽ kuma. Panhi mẽ kupê mẽ kupê hkà htykre mẽ mẽ hkà haka mẽ mẽ hkà kamrêkjaja. Kê mẽ piitã Jejus jarẽnh ma mẽ amnhĩ kaxyw hkõt hamaxpêr mẽ hkõt amnhĩ xunhwỳ. Hãmri mẽ hkõt amnhĩ nhĩpêx mex o ri pa. Anẽ.

Nhũm pre ã mẽ pakaxyw mẽ kãm kapêr anẽ nhũm prem kuma mẽ hã kagà.

²⁷ Nã Tirtũmja tapxipix na àhpumunh tỳx xwỳnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xà hkõt Tirtũm pix mã mex o mex ã mãn harẽnh rãhã ho papa.

Tã ãm ja pix. Ixpê Pawre na pa ã mẽ awỳr ixpêr mẽnh anẽ. Na hapêx.

Wam Korît

Pawre kot Korît kãm Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã kapêr jarênh o pa xwÿnhjê hõ na pre. Na pre hipêx nê ma krî pê Korît kãm Jejus krajê hwÿr kumê. Nê kagàja kamã mē kãm tanhmã mēmoj tã karõ hto. Na pre mē kot àhpumunh tÿx ã amnhî to jarkrar o pa nê mē kãm kapêr. Nê tanhmã amnhî tomnuj to nê mē kãm kapêr. Nê mē hprõ nê mē mjên xwÿnhjaja tanhmã wa kot axpên nhîpêx to hã mē kãm karõ. Nê mē kot Tirtûm mã mex o mex ã harênh kaxyw axpên wÿr mē pikuprõnh nê tanhmã amnhî nhîpêx to hã nhûm mē kãm karõ. Æ na pre Pawre mē kãm mēmoj tã karõ nê hã kagà anê. Nê mē kãm:

¹ Pa Korît kãm Jejus kôt ixkwÿjaja. Xà mē amex? Ot pa mē awÿr kagàja nhîpêx nê kumê. Ixpê Pawre na pa Kris kôt mē pahtõ Sostenes mē wa awÿr ixpêr mē. Tã kagàja nhîpêx nê mē awÿr kumê. Tirtûm na pre ixte Jejus Kris nhÿ hã mē ajahkre ho ri ixpa kaxyw ixãm. ² Tã ot pa mē awÿr kagà nhîpêx nê mênh mã. Korît kãm ixpyrà nê mē apê Tirtûm krajê hwÿr.

Tirtûm kot amnhî kaxyw mē axunhwÿr jakamã na ka prem amnhî tomnuj kaga nê Kris kôt amnhî xunhwÿ nê hkôt amnhî nhîpêx mex o ri apa. Krî piitã hkôt mē kot amnhî to Jejus Kris wÿr o mē pa xwÿnhjê pyrà nê. Mē panhõ Pahihti Jejus Krisja ãm pixi mex na.

³ Nê Tirtûm kêp Mëpahpãm maati nê Jejus Kris kêp mē panhõ Pahihti jakamã na pa hte mē ato wa hwÿr rãhã o ri ixpa nê mē ato wa hwÿr o:

—Kwa Tirtûm mē Jejus wa. Kêr ka wa Korît nhõ xwÿnhjê kutã anojarêt rãhã ho wa ri apa. Nê mē ho mex rãhã nê. Kê mē amnhî tã war apumunh kôt ri hamakêtkati nê hkînh nê àmnhîx tanhmã ri amnhî nhîpêx to ho ri pa. Anê.

Tirtûm kot Jejus Kris kukwak ri mē pahto mex ã harênh

Sikûn Pêtre 1.2; Wam Tesarôn 5.23-24

⁴ Nê mē ate amnhî kaxyw Jejus Kris kôt ajamaxpêr o ri apa jakamã na hte Tirtûm mē ato mex nê. Tã pa hte kãm amnhî jarênh kaxyw nê kãm mē ajarênh o:

—Pa Tirtûm. Æm hãmri na ka pre Korît nhõ xwÿnh kwÿjê ho akra. Nà ja mex o mex. Anê.

⁵ Nê ra mē ate Kris kôt amnhî xunhwÿr jakamã na ka mē ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwÿjê mã harênh o ri mē hkôt apa. ⁶ Na pa pre mē awÿr mō nê mē amã Kris kot amnhî nhîpêx ã harênh o ri mē akôt ixpa. Ka prem inhma nê hkôt amnhî xunhwÿr tÿx kurê kumrêx. ⁷ Jakamã nhûm Tirtûm mē ate kãm tanhmã amnhî nhîpêx to ho apa kaxyw mē ato mē axihtÿx. Nê kaxyw mē amã mē ate axpên to mex xà piitã mē amã kugõ. Mē ate Jejus kot akupÿn mē pahwÿr wÿrÿk jamãr pê hapêr arît o apa pê tanhmã kãm axpên nhîpêx to ho apa kaxyw. ⁸ Koja Tirtûm tanhmã mē akra hto ka mē hkôt pix mã ri amnhî nhîpêx rãhã nhûm Pahihti Jejus Krisja akupÿn mē pahwÿr wÿrÿ. Hãmri nê mē ate amnhî nhîpêx ã mē apumu nê mē ajarênh o:

—Nà ãm hãmri na hte jajaja amnhî to mex pix o ri pa. Anê.

⁹ Nê koja Tirtûm ra kot amnhî jarênh xà hkôt mē ato mex nê. Ra kot mē ate Pahihti Jejus Kris kôt apa kaxyw amnhîm mē axunhwÿr jakamã koja ra kot amnhî jarênh xà hkôt mē ato mex rãhã nê.

Mē pahte mēmoj tã axpên pê pahpigràn h kêt ã mē pamã karõ

Rômãn 15.5-6; Sikûn Korît 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹ E Kris kôt ixkwÿjaja. Na ka xep htem mēmoj tã axpên mã axàkjêr pix o ri apa nhûm pre Krojre hkwyjaja amnê ixwÿr pøj nê inhma mē ajarê. Kwa nà mē ã amnhî nhîpêx anhÿr kêt nê. Kêr ka mē axpên kôt ri amnhî nhîpêx rãhã ho ri apa. Nê axpên kôt ri ajamaxpêr rãhã nê. Te ixkre tipxi kamã mē ri apa pyràk o mãn kêt mē axpên nhîpêx o ri axpên kôt apa. Nê mē axpên kutã anojarêt rãhã ho ri apa. No mēmoj tã axpên mã axàkjêr pê axpên pê apigràn h kêt nê. Na pa Pahihti Jejus Kris nhÿ hã mē amã ã ja hã karõ anê.

¹² Nē na ka xep htem ahpÿnhã ri mẽ apê mẽ ixkwỳ hã amnhĩ jarēnh o ri apa. Jao mẽ akwỳjaja pa ixkôt ri amnhĩ nhĩpêx xwỳnh ã amnhĩ jarē. Nē mẽ akwỳjaja axtem Apor kôt ri amnhĩ nhĩpêx xwỳnh ã amnhĩ jarē. Nē mẽ akwỳjaja axtem Simāw Pêtre hkôt amnhĩ nhĩpêx xwỳnh ã amnhĩ jarē. Nē mẽ akwỳjaja axtem Kris kôt amnhĩ nhĩpêx o ri apa xwỳnh ã amnhĩ jarē. Æ na ka xep htem ahpÿnhã amnhĩ jarēnh anhÿr o ri pa.

¹³ Kwa nà ka mẽ ã ahpÿnhã amnhĩ jarēnh anē nē te mẽ ate Kris o apigrànħ pyràk o hipêx. Kwa mon ka hte mẽ akwỳjaja apê ixkwỳ hã amnhĩ jarē? Xà pa na pa pre pĩ kahpa hã ajêt nē mẽ anē ty? Nà Kris pix na pre mẽ panê hã ajêt nē ty. Xà mẽ apê pa ixkwỳ hã amnhĩ jarēnh kaxyw na prem mẽ akrã kumrã? Nà mẽ apê Kris kwỳ hã amnhĩ jarēnh kaxyw na prem ã mẽ anhĩpêx anē. Mẽ kot ja hã mẽ apumunh xwỳnhjaja kot mẽ apê Kris kwỳ hã mẽ apumunh kaxyw. Tã na ka xep htem axtem nē ã ri ahpÿnhã mẽ kãm amnhĩ jarēnh anhÿr o ri apa.

¹⁴⁻¹⁵ Kop ãm ixte amnhĩ kôt mẽ axunhwÿr prãm ronhÿx pa mẽ ato mẽ axohtô nē mẽ akrã kumrã nē mẽ amã: “E ra mẽ apê ixkwỳ na ka mẽ.” Anē. Nom na pa pre ã mẽ amã ixkapêr anhÿr kêt nē. Æm hãmri na pa pre ãm mẽ ato grêre nē mẽ akrã kumrã. Æm Kripti mẽ Gajre wa pix. ¹⁶ Ku nē xep mãânēn Estepti nē kaxyw mẽ hkwỳjaja. Æm jajê pixjaja. Nom ko apu axte mẽ hkwy ko. Ixte mẽ hkrã kumrãr xwỳnhjê mã ijamaxpêr tÿx kêt. ¹⁷ Na pre Kris ixte mẽ hkrã kumrãr o ri ixpa kaxyw ixãm kêt nē. Æm ixte mẽ kãm kapêr jarēnh o ri mẽ hkôt ixpa pix kaxyw na pre ixãm.

Nē na pa hte amnhĩ krã hkôt ri ixujarēnh o ri mẽ akôt ixpa hkêt nē. Kot pa ã amnhĩ nhĩpêx anē nhũm mẽ ixkapêr mex ã inhma nē pa ixkôt amnhĩ xunhwÿ. Ja pymaj na pa hte amnhĩ krã hkôt ri tanhmã ixujarēnh to ho ri ixpa hkêt nē. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harēnh o ri mẽ hkôt ixpa. Mẽ pahpiitã mẽ panê htyk ã harēnhja pa hte mẽ kãm harē. Mẽ kot hprĩ hã mar nē hkôt amnhĩ xunhwÿr kaxyw. Jao amnhĩ krãm mẽ ujarēnh mexta jagjēnh nē hã no htÿx kaxyw. Pa ja hã mẽ omu nē ixkĩnh nē ijamaxpêr o:

—Na htem ixkapêr ma nē Jejus kôt amnhĩ xunhwÿr kurê kumrēx. Nà ãm hãmri na pa hte mẽ kãm ixkapêr kaprÿ ho ri ixpa hkêt nē. Anē.

¹⁸ No kêt mẽ pahte Tĩrtũm kot mẽ pahto hkra xwỳnhjaja ra mẽ pahte Kris pĩ kahpa hã mẽ panê htyk ã harēnh mar nē pahkĩnh nē papa xwỳnh na pu mẽ. Jakamã na pu htem pajamaxpêr o:

—Nà ãm hãmri na Tĩrtũm Kraja htyk kukwak ri mẽ ixto mex nē mẽ ixto hkra. Mẽ ujarēnhja mex kumrēx. Anē.

No kêt mẽ kêp hkra hkêt xwỳnhjaja na htem tee ri Kris tyk ã harēnh ma nē hamaxpêr o:

—Tk. Tanhmã kot kêt we amnhĩ to nē mẽ panê ty? ãm amarĩ mẽ kot amnhĩ krã hkôt pĩ kahpa hã nhôr nē hpĩr kēnã. Anē.

Tĩrtũm kra hkêt xwỳnhjê jarēnh

Matêwre 11.25-26; Wam Korīt 3.19

¹⁹ Nē Tĩrtũm kapêr ã kagà htũm kot mẽ kêp hkra hkêt xwỳnhjê jarēnh kot: Mẽ kot htÿx ri àhpumunh tÿx ã amnhĩ to jarkrar o pa htã kot paj mẽ kêp ja ho ijapêx pa nhũm mẽ ã amnhĩ jarēnh anhÿr kaprÿ. Anē.

²⁰ Jakamã mẽ àhpumunh tÿx ã mẽ kot amnhĩ to jarkrar xwỳnhjaja nē mẽ kot Mojes kapêr o mẽ ahkre ho ri mẽ pa xwỳnhjaja nē mẽ kapêr rũnh xwỳnhjaja. Mẽ kot Tĩrtũm Kra hkôt amnhĩ xunhwÿr kêt jakamã te mẽ àhpumunh kêt pyràk. Tĩrtũm kra hkêt xwỳnhjaja kot mẽ àhpumunh tÿx ã mẽ harēnh tã no ãm Tĩrtũm noo mã te mẽ àhpumunh kêt pyràk. Nē te htÿx ri mẽ kot amnhĩ nhĩpêx o pa pyràk. ²¹ Tĩrtũm àhpumunh o àhpumunh jakamã na pre ra mẽ hkukamã hamaxpêr o:

—Nà kot paj mẽ àhpumunh tÿx ã mẽ omunh xà hkôt mẽ ho ixkra hkêt nē. Æm mẽ kot ixkra Jejus kot mẽ nē htyk ã harēnh mar nē amnhĩ kaxyw hkôt hamaxpêr pix ã mẽ omunh xà hkôt kot paj mẽ ho ixkra. Anē.

²²⁻²⁴ No Ijaewjaja kām amnhī krā hkôt pix mā amnhī nhīpêx prām jakamā na pa hte mẽ ixpê Jejus kwỳjaja mẽ hwỳr mra nê mẽ kām Kris kapêr jarênh o ri ixpa nhũm mẽ inhma nê ãm mẽ inhma. Nê te mẽ kot mẽ inhmar kêt pyrà nê mẽ inhmā:

—Tk. Nà kot paj mẽ tokyx axujarênh kôt amnhī nhīpêx kêt nê. Kot kaj mẽ inhmā mẽ ixte aa mẽmoj pumunh kêt ò ho anê pa mẽ ja hã apumu nê axihtỳx ã apumu nê rĩ kormã hkôt amnhī nhīpêx.

Anhỳr o inhmā kapêr. Tã no pa mẽ kām ã amnhī nhīpêx anhỳr kêt nê. ãm Kris kot mẽ panê pĩ kahpa hã htykja pix pa htem mẽ kām harênh o ri ixpa. Ja kamā nhũm mẽ hkwỳjaja mẽ inhma nê ãm mẽ inhma nê Kris xihtỳx kêt ã ãm amarĩ htyk ã harê. No mẽ hkwỳjaja. Tĩrtũm kot amnhī kaxyw mẽ unhwỳr xwỳnhjaja na htem mẽ kurom mẽ inhma nê ra mẽ inhmar tỳx kurê kumrêx. Nê mẽ inhmā kapêr o:

—Nà ãm hãmri na Krisja Tĩrtũm pyrà nê hihtỳx o hihtỳx. ãm hãmri na ka ã harênh anê. Anê.

No Ijaew kêt xwỳnhjaja na Ijaew pyrà nê kām amnhī krā hkôt amnhī nhīpêx o pa hprãm kêt nê. Nê mẽ kām mẽ àhpumunh tỳx pix prãm o pa. Jakamā na pa htem mẽ kām Kris kapêr jarênh o ri mẽ hkôt ixpa nhũm mẽ hkwỳjaja mẽ inhma nê Ijaew kwỳjê pyrà nê ãm mẽ inhma nê mẽ inhmā:

—Tk. Nà na ka htem ãm ri axêx o ri apa. Kot pa mẽ akapêr mar kêt nê. Kot paj mẽ axàhpumunh tỳx ã mẽ apumu nê rĩ kormã mẽ ama nê mẽ akôt amnhī nhīpêx.

Anhỳr tã pa mẽ ãm arĩ Kris kot mẽ panê htykja pix pa mẽ kām harênh o ri mẽ hkôt ixpa. Nhũm mẽ hkwỳjaja mẽ inhma nê mẽ inhmā:

—Nà mẽ axàhpumunh kêt jakamā na ka htem atỳx ri ã ja jarênh anê.

Anhỳr tã no nhũm mẽ hkwỳjaja. Tĩrtũm kot amnhī kaxyw mẽ unhwỳr xwỳnhjaja na htem mẽ inhma nê mẽ inhmā kapêr o:

—Nà ãm hãmri na ka mẽ ã Krisja jarênh anê. Tĩrtũm pyrà nê àhpumunh o àhpumunh kênã. Anê.

²⁵ Tĩrtũm mẽ Jejus wa mẽ pakurom àhpumunh o àhpumunh nê hihtỳx o hihtỳx.

Tĩrtũm mẽ parom hihtỳx o hihtỳx ã harênh

Matêwre 11.25; Sikũn Korīt 12.7-10; Xiakre 2.5

²⁶ E Kris kôt ixtõ nê ixtõxjaja. Amnepê mã Tĩrtũm kot amnhĩm mẽ axunhwỳrta ã tanhmã na ka prem amnhī nhīpêx to ho ri apa? Nà na ka prem axohtõ nê jar mẽ noo mã axàhpumunh kêt nê ri apa. Nê mẽ apê pahĩ hkêt nê ri apa. Mẽ axohtõ nê amnhī to hkryre nê ri apa. ²⁷ Tã nhũm Tĩrtũm amnhī kôt mẽ ate amnhī to hkryre xwỳnhjê xunhwỳ. Koja nhỹrmã kot tanhmã mẽ pahpiitã mẽ pajarênh to xà hã arĩgrota kato hãmri nhũm mẽ àhpumunh tỳx ã amnhī to jarkrar xwỳnhjaja Tĩrtũm kot mẽ kurom mẽ pahto hkra hã mẽ pahpumu hãmri nê tee ri amnhī kukamã hamaxpêr nê amnhī kamã hpijaàm tỳx nê. Nê mẽ hihtỳx ã amnhī to jarkrar xwỳnhjaja haxwỳja. Nhũm Tĩrtũm kot mẽ kurom mẽ pahto hkra hã mẽ pahpumu nê tee ri amnhī kukamã hamaxpêr nê amnhī kamã hpijaàm tỳx nê.

²⁸ Na hte Tĩrtũm amnhī kaxyw mẽ kot amnhī to hkryre xwỳnhjê xunhwỳ. Nê mẽ kot mẽ kamã kahak o pa xwỳnhjê xunhwỳ. Jar pyka ja kamã mẽ hkwỳ kot mẽ hkaga htã nhũm Tĩrtũm amnhī mã mẽ unhwỳ. Mẽmo kaxyw na hte ã amnhĩm mẽ unhwỳr anê? Nà mẽ kot nhỹrmã tee ri mẽ àhpumunh tỳx ã amnhī jarênh xwỳnhjê pumunh nê xepên mã mẽ harênh o:

—Kwa mẽ pahte mẽ àhpumunh tỳx ã mẽ harênh tã nhũm Tĩrtũm mẽ pahpyrà nê amnhī kaxyw mẽ unhwỳr kêt nê. Nà te mẽ àhpumunh kêt pyræk.

Anhỳr o xepên mã mẽ harênh kaxyw na pre Tĩrtũm amnhĩm mẽ kot amnhī to hkryre xwỳnhjê xunhwỳ. ²⁹ Jakamã kot puj mẽ nhỹrmã Tĩrtũm mã amnhī to jarkrar pê tanhmã kām amnhī jarênh to hkêt nê. Rỳ kãm:

—Kwa ga ixpumu Tĩrtũm. Na pa hte ã amnhī nhīpêx anê nê ã amnhī nhīpêx anê. Kwa ja hã ixpumu nê ixto akra nà?

Anh̄yr o amnh̄i to hw̄yr kêt nê. ³⁰ Ām Jejus pix kukwak ri na hte Tirtūm mẽ pahto hkra. Tām na pre Tirtūm noo mã amnh̄im mẽ paxunhw̄y. Mẽ pahte uràk nê pahpê hkra kaxyw. Jakamã na pu htem ãm pix kukwak ri amnh̄i nh̄ipêx mex o ri papa. Nh̄um mẽ pamã àhpumunh t̄yx xà hkwȳ gō. Tã ra kot mẽ pahte amnh̄i tomnuj pê mẽ papyt̄ar jakamã kot puj mẽ nh̄ymã pahtyk tã no ãm akup̄ym paht̄ir nê Tirtūm mẽ wa kuri paht̄ir t̄um nê pamex kumrêx nê papa ho papa. ³¹ Tã ã Jejus kot mẽ panh̄ipêx kot anh̄yr jakamã Tirtūm kapêr ã kagà ht̄um kot ja jarênh kot:

Kot ka mẽ amã mẽmoj tã jarkrar prãm nom kêr ka mẽ kamjaja amnh̄i to jarkrar kêt nê. Mẽ panh̄o Pahihti ra kot mẽ panê tanhmã amnh̄i nh̄ipêx toja pix ã tanhmã ho jarkrar to ho ri apa. Anê.

2

Pawre kot tanhmã Kris jarênh to hã harênh

Sik̄un Korīt 4.1-7; Wam Pêtre 3.15

¹⁻² E Kris kôt ixtō nê ixtōxjaja. Amnepê mã ixte mẽ aw̄yr inhm̄orta ã na pa pre inhnojarêr nê ijamaxpêr o:

—Kot paj ma mẽ hw̄yr mō nê mẽ kãm Kris kapêr jarê. Kot amnh̄i grōnh kôt mẽ inhnê htykja pa mẽ kãm harê. Ām ja pix jarênh o ri mẽ hkôt ixpa. Nom kot paj mẽ kapêr japjê xw̄ynh̄jê pyrã nê mẽ kãm ixkapêr japjê hkêt nê. R̄y mẽ uràk nê te ixàhpumunh t̄yx o ri ixkapêr japjê pyrãk o ri mẽ kãm ixkapêr japjê hkêt nê. Kot paj ãm ixkatat kôt ri mẽ kãm tanhmã Jejus jarênh to pix o ri mẽ hkôt ixpa.

Anh̄yr o mẽ akukamã ijamaxpêr. Hãmri nê ma mẽ aw̄yr mō nê mẽ aw̄yr pōj nê mẽ amã Jejus kot mẽ panê htyk nê akup̄ym ht̄irja pix jarênh rãhã ho ri ixpa. ³ Na pa pre tee ri amnh̄i kukamã ijamaxpêr nê ijamaxpêr o:

—Hêxta waa nê. Tanhmã kot pa we mẽ kãm Tirtūm kapêr jarênh to nh̄um mẽ inhmar t̄yx nê hkôt amnh̄i xunhw̄yr kurê kumrêx wehe? Kot paj amnh̄i krã hkôt mẽ kãm harênh kêt nê. Ja kaxyw ijamaxpêr t̄yx kêt kênã. Kot paj amnh̄i krã hkôt mẽ kãm harê nh̄um mẽ ãm inhma nê hkôt amnh̄i xunhw̄yr kêt nê. Nà kot paj Tirtūm nh̄y hã mẽ kãm tanhmã ixkapêr to kê tãm tanhmã mẽ hkrã hto kê mẽ inhma nê hkôt amnh̄i xunhw̄yr japêr.

Anh̄yr o ijamaxpêr. ⁴ Nê mẽ ate inhmar kaxyw na pa pre ixêx rom tanhmã mẽ ano kupyr to ho ri ixpa hkêt nê. R̄y mẽ pajaja mẽ ixàhpumunh xà hkôt tanhmã mẽ amã ixkapêr to hkêt nê. Na pa pre ãm Tirtūm Karō nh̄y hã mẽ amã awjarê. Mẽ ate mar nê hiht̄yx o hiht̄yx ã omunh kaxyw. ⁵ Jakamã na ka prem Tirtūm xiht̄yx ã omu nê amnh̄i kaxyw hkôt ajamaxpêr kurê kumrêx. No pa ixàhpumunh t̄yx ã ixpumunh kôt ixkôt ajamaxpêr kêt nê. Na ka prem ixkapêr ma nê ajamaxpêr o:

—Nà Tirtūm na mẽ parom àhpumunh o àhpumunh nê hiht̄yx o hiht̄yx.

Anh̄yr o ajamaxpêr kôt ajamaxpêr kurê kumrêx.

Tirtūm Karō kot mẽ pamã àhpumunh xà nh̄or ã harênh

Matêwre 7.6; Juãw 14.22, 16.13-15; Xiakre 3.13-18

⁶ Nê na hte Tirtūm kra hkwȳjaja Tirtūm kot amnh̄i nh̄ipêx ã omunh mex. Nê hamaxpêr ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpêr t̄yx xà ho mẽ ahkre hkêt nê. R̄y pika piitã hkôt mẽ ut̄ar xw̄ynh̄jê jamaxpêr t̄yx xà ho ri mẽ ahkre ho ri ixpa hkêt nê. Kojã nh̄ymã mẽ àhpumunh xàja mẽ kêp hapêx pa. ⁷ Jakamã na pa hte ãm Tirtūm xàhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tirtūm amnh̄i kukamã amnh̄i jarênh o:

—Mẽ kot amnh̄i kaxyw Ixkra hkôt mẽ hamaxpêr o mẽ pa xw̄ynh̄jaja kot paj mẽ ho ixkra nh̄um mẽ mex kumrêx nê pa ho pa.

Anh̄yr o mẽ harê. Nom mẽ kot hkôt amnh̄i xunhw̄yr kêt xw̄ynh̄jaja nh̄um kormã mẽ kãm ja ho amnh̄ir̄it kêt nê. Tã ja na pa hte ra mẽ kãm harênh rãhã ho ri mẽ hkôt ixpa nh̄um mẽ Tirtūm kãm mẽ pahto hkra hprãm hã harênh ma. ⁸ Nom pika piitã hkôt mẽ ho amnh̄ipt̄ar xw̄ynh̄jaja na mẽ kormã ja mar kêt nê. Kêp apu mẽ kot mar ronh̄yx prem p̄i kahpa hã mẽ panh̄o Pahihti nh̄or nê hp̄ir kêt nê. Mex o mex tã nh̄um prem axtem nê

ã hipêx anê. ⁹ Mě kot mẽmoj mex pumunh kêt tâ Tirtũm kapêr ã kagà htũm kot mẽmoj mex jarênh kot:

Na pre Tirtũm mẽ kãm hkĩnh xwỳnhjê kutêp mẽmoj mex kwỳ jaxwỳ nhũm mex o mẽ mẽ ahã hikwỳ.

Aa mẽhõ kot mẽmoj mex o mẽja pumunh kêt.

Ně aa mẽhõ kot ã mẽmoj kot anhỹr pumunh kêt.

Ně aa ã mẽmoj mex kot anhỹr kukamã hamaxpêr kêt.

Tã nhũm Tirtũm mẽ kutêp hkwỳ jaxwỳ.

Anhỹr o kot harênh tâ no nhũm mẽ kot hkôt amnhĩ xunhwỳr kêt xwỳnhjaja ã kapêr anhỹrja mar kêt nê. ¹⁰ Mě pamã na pre Tirtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrĩt mex nê. Tirtũm Karõja àhpumunh tỳx o àhpumunh tỳx. Ně kot hprĩ hã Tirtũm jamaxpêr pumunh par. ¹¹ No mẽ papajaja na pu htem axpên jamaxpêr kôt axpên pumunh kêt nê. Na pu htem papam amnhĩ jamaxpêr ã amnhĩ pumu. Ja pyrã nê Tirtũm Karõ pix na hte Tirtũm jamaxpêr pumunh. ¹² No mẽ pahpê hkrajaja na hte mẽ pahkarõja pix mẽ pakamã pa hkêt nê. Na hte määnên Tirtũm Karõja mẽ pakamã pa nê mẽ pamã tanhmã mẽmoj to amnhĩrĩt to ho mẽ pahkôt pa. Nê Tirtũm kot mẽ pakutêp mẽmoj mex jaxwỳrja nhũm ja kukamã mẽ pamã harênh o amnhĩrĩt.

¹³ Jakamã na pa htem amnhĩ krã hkôt ri mẽ kãm ixujarênh kêt nê. ãm Tirtũm Karõ nhỹ hã na pa hte ixprĩ hã mẽ kãm kapêr jarênh o ri mẽ hkôt ixpa. Ra Tirtũm Karõ kot mẽ amã gjêx xwỳnhjê mã pa ã hã ixkapêr. ¹⁴ No mẽ kãm Tirtũm Karõ kapêr mar prãm kêt xwỳnhjaja na htem Tirtũm kot amnhĩ nhĩpêx pumu nê hprĩ hã omunh kêt nê. Mě kãm kapêr mar prãm kêt jakamã na htem ri kot tanhmã mẽ pahto mex to hã harênh ma nê hamaxpêr o:

–Tk. Kwa mo kaxyw na htem ri ã Tirtũm jarênh anê? Tanhmã kot we amnhĩ to nê mẽ pahto mex? Nà kot anhỹr kêt. Anê.

¹⁵ Nom mẽ pahpê Tirtũm kra hkwỳ hã mẽ pahte Karõ kapêr mar mex xwỳnhjaja na pu hte mẽ kurom Tirtũm kot amnhĩ nhĩpêx ã omunh mex nê. Nê Karõ xô ri mar mex nê nhũm mẽ kot Karõ kapêr mar kêt xwỳnhjaja tee ri ã mẽ pahte amnhĩ nhĩpêx anhỹr ã mẽ pahpumu. Nom hprĩ hã mẽ pahte Tirtũm kôt amnhĩ nhĩpêx pumunh kêt nê. ¹⁶ Tirtũm kapêr ã kagà htũm kot ja jarênh kot:

Měhõ na kot Tirtũm jamaxpêr pumunh?

Ně mẽhõ na pre we kãm hamaxpêr gõ?

Nà amrakati kumrêx. Tapxipix na àhpumunh tỳx o àhpumunh tỳx. Anê.

Tã mẽ papajaja mẽ pahte Tirtũm Karõ kapêr mar tỳx xwỳnhjaja na pu htem Kris xô ri pahprĩ hã hamaxpêr kôt omunh mex nê.

3

Mě kot Tirtũm mã tanhmã amnhĩ nhĩpêx to xwỳnhjê jarênh

Wam Korîť 14.20; Karatas 5.16-21; Epes 4.14; Eprêw 5.11

¹ E Kris kôt ixtõ nê ixtõxjaja. Pa mẽ amã mẽmoj jarê ka mẽ inhma nê kãm ajamaxpêr. Nà amnepê mã kormã mẽ ate Kris kôt amnhĩ nhĩpêx tohtuj anhỹrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpêr tũm kôt pix mã amnhĩ nhĩpêx. Kormã mẽ ate Tirtũm Karõ hkôt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyrãk o amnhĩ nhĩpêx. Ně mẽ urãk nê kormã mẽmoj piitã omunh kêt nê. Jakamã na pa pre mẽ amã ixujarênh kaxyw nê te mẽ ate kormã Tirtũm kapêr mar kêt xwỳnhjê pyrãk o mẽ anhĩpêx nê mẽ amã tanhmã ixujarênh to. ² Mě hkaràre na htem mẽ hkà kagõ pix kaõ nê kormã mẽ apkur xà mex kur kêt nê. Ja pyrã nê na pa pre te ixte mẽ ato hpjaõr pyrã nê mẽ amã Tirtũm kapêr piitã harênh par kurê kumrêx kêt nê. ãm mẽ amã hkwỳ pix jarê ka prem ama nê Jejus kôt amnhĩ xunhwỳ. Tã na pa hte arĩ mẽ amã hkwỳ pix jarênh o ri ixpa nê kormã piitã ho mẽ ajahkre jatur xàm mênh kêt nê. ³ Na ka htem arĩ te mẽ apê Kris kwỳ hkêt pyrãk o amnhĩ nhĩpêx o apa. Nê

měmoj kôt axpěň kām agryk axpěň mǎ axàkjêr o apa. Ā amnhĩ nhĩpêx anhỹr jao arĩ mẽ ate amnhĩ nhĩpêx tũm kôt amnhĩ nhĩpêx rǎhǎ nê.

⁴ Na hte mẽ akwỳjaja amnhĩ jarěnh o: “Ixpê Pawre hkwỳ na pa.” Anê. Nê mẽ akwỳjaja amnhĩ jarěnh o: “Pa na ixpê Apor kwỳ na pa.” Anê. Kwa na ka htem ā amnhĩ jarěnh anhỹr o te mẽ apê Kris kwỳ hkêť pyrǎk. ⁵ Apor mẽ pa ām wa ixte Tĩrtũm kapêr o mẽ ajahkre xwỳnh pix na pa wa. Wa ixpê mẽ anhõ pahĩhti hkêť kênǎ kot ka kêt mẽ axtem nê mẽ apê ahpỳnhǎ wa ixkwỳ hǎ amnhĩ jarê. Na pa pre wa mẽ amǎ Tĩrtũm kapêr jarěnh o ri mẽ akôt ixpa ka prem wa inhma nê amnhĩ kaxyw hkôt ajamaxpêr tỳx nê. Nê hkôt amnhĩ xunhwỳ nom wa pa wa ixkôt amnhĩ xunhwỳr kêt nê. Na pa wa ām Tĩrtũm kapêr o mẽ ajahkre nom amnhĩ kôt mẽ axunhwỳr kêt nê.

⁶⁻⁹ E pa ixprĩ hǎ mẽ amǎ war amnhĩ jarê ka mẽ inhma. Te wa ixpê Tĩrtũm pur kām wa ixàpěnh xwỳnh pyrǎk no mẽ kajaja te mẽ apê hpur pyrǎk. Na htem hpur karê nhũm hirǎ nhũm mẽ kamǎ ahkre ho pa. Ja pyrǎ nê na pa pre ixkumrêx mẽ awỳr ixpa nê mẽ amǎ Tĩrtũm kapêr jarěnh o ri mẽ akôt ixpa. Te mẽ kot pur kām ahkre ho ri pata pyrǎk. Tǎ nhũm Apor ixpǎnhǎ ma mẽ awỳr pa nê te mẽ kot pur karêta pyrǎk o mẽ anhĩpêx nê mẽ amǎ Tĩrtũm kapêr o mẽ ajahkre mex o ri pa. Xà na hte pur karêr xwỳnhja rỳ kamǎ ahkre xwỳnhja tǎm tanhmǎ mẽmo hy hto nhũm ra higrôt nê hprêk nê ô? Nà na htem ām ahkre hpa nhũm arĩ hikwỳ. Nhũm Tĩrtũm tǎm tanhmǎ hyta to nhũm higrôt nê hprêk nê ô. Ja pyrǎ nê na hte Tĩrtũm mẽ ho hkra nê tanhmǎ mẽ ho nhũm mẽ amnhĩ kaxyw hkôt hamaxpêr tỳx nê hkôt amnhĩ nhĩpêx mex o pa. Nom mẽ kām harěnh o pa xwỳnhhta kôt amnhĩ xunhwỳr kêt nê.

Nê na hte pur karêr xwỳnh rỳ kamǎ ahkre xwỳnhja tǎm tanhmǎ hyta to nê ho htĩr kêt nê. Tĩrtũm pix na hte tanhmǎ ho nhũm higrôt. Ja pyrǎ nê na pa hte Tĩrtũm kapêr o mẽ ajahkre o ri mẽ akôt ixpa nom pa tanhmǎ mẽ ato ka mẽ apê Tĩrtũm kra nê ri apa hkêť nê. Tanhmǎ kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nê tapxipix na hte tanhmǎ mẽ pahkrǎ hto pu mẽ kām hprǎm xà hkôt amnhĩ nhĩpêx mex o ri papa.

Nê pur karêr xwỳnh mẽ pur kām ahkre xwỳnhja wa. Hamê wa àpěnh mex jakamǎ koja hamê wa kot pur kām àpěnh pǎnhǎ amnhĩm ujamỳnh rax nê. Ja pyrǎ nê kot paj mẽ ixte Tĩrtũm kapêr o mẽ ajahkre ho ri mẽ akôt ixpa xwỳnhjaja nhũm Tĩrtũm nhỹrmǎ mẽ ixàpěnh pǎnhǎ mẽ inhmǎ amnhĩrer mex nê.

Nê te mẽ ate Tĩrtũm nhõ ixkre pyrǎk. ¹⁰ Nê pa te ixpê Tĩrtũm mǎ ixkre hǎ ixàpěnh xwỳnh pyrǎk jakamǎ na pre Tĩrtũm mẽ akaxyw tanhmǎ ixto pa mẽ amǎ tanhmǎ kot amnhĩ nhĩpêx to hǎ harěnh o ri mẽ akôt ixpa. Te ixte õ ixkre kaxyw ām xà maati xām pyrǎk o mẽ anhĩpêx. Jao mẽ amǎ kapêr jarěnh o ri mẽ akôt ixpa. Mẽ ate amnhĩ kaxyw hkôt ajamaxpêr nê hkôt amnhĩ xunhwỳr kaxyw. Tǎ na ka prem hkôt amnhĩ xunhwỳ nhũm ixpǎnhǎ Tĩrtũm kapêr o mẽ ahkre ho mẽ pa xwỳnh kwỳjaja mẽ awỳr mra nê mẽ amǎ kapêr jarěnh jatur xām kurê. Nê hprĩ hǎ ho mẽ ajahkre ho ri mẽ akôt pa. Te ho mẽ kot ixkre krax nhĩpêx pyrǎk o mẽ anhĩpêx.

Nê kwa mẽ ate mẽ ahkre o mẽ apa xwỳnhjaja kêr ka mẽ akatàť kôt mẽ ahkre mex rǎhǎ ho ri mẽ hkôt apa.

¹¹ Nê Jejus Kris tapxipix na pu htem hkôt amnhĩ xunhwỳ nhũm mẽ panê mẽ pahte amnhĩ tomnuj o hapêx. Jakamǎ te kêp kỳxpê ixkre nhĩmõk ā nõr xà maatita pyrǎk.

¹² Nê na htem tõhǎ ixkre nhĩpêx kaxyw nê pĩ htỳx jakà nê ho hipêx nhũm kritpêp mẽ kām mex ry nê kuhê. No na htem tõhǎ nojarêť kām ixkre hǎ apê nê pĩ rerek o hipêx nhũm mẽ kām mex ry hkêť nê. Koja rôr nhyre hwỳr mra nê mẽ kêp hapôk nê homnu. Ja pyrǎ nê na hte Tĩrtũm kapêr o mẽ ahkre ho ri mẽ pa xwỳnh kwỳjaja te mẽ kot katàť kôt pĩ htỳx o ixkre nhĩpêxta pyrǎ nê katàť kôt mẽ ahkre ho ri mẽ hkôt pa. No nhũm mẽ hkwỳjaja axtem nê te mẽ kot pĩ rerek o ixkre nhĩpêxta pyrǎk o amnhĩ nhĩpêx nê htỳx ri Tĩrtũm kapêr kwỳm ri tanhmǎ mẽ ahkre hto ho pa. Jao hkwỳm ri amnhĩ nhĩpêx rǎhǎ ho ri pa.

¹³ Nê koja mēhō pī htỳx pix o amnhĩm òrkwỹ nhĩpēx hāmri nhũm mēmo arĩgro hā tanhmā amnhĩ to nē kēp pōr. No ām hā pōja pix xēt pa nhũm kām hikwỹ xà nē òkwa êja arĩ piitā mex nhũm ixkre hpām axte hā pō janhōr o nyw. No koja pī rerek o hipēx nhũm mēmo arĩgro hā kēp pōr hāmri nē piitā kēp kaxàr pa. Ja pyrā nē koja nhỹrmā Krisja akupỹn mē pahwỹr wrỹ hāmri nē mē pahte kām tanhmā amnhĩ nhĩpēx to ho papaja piitā hā mē pahpumunh kōt tanhmā mē pajarēnh to. Koja mē pahkwỹjaja mē pahte mē kot pī htỳx o ixkre nhĩpēxta pyrā nē Tĩrtũm mā mē pahte amnhĩ nhĩpēx mex o mē papa xwỹnhjē xàpēnh pumu nē mē pahte amnhĩ to mex xwỹnh ā mē pajarē. Hāmri nē hpānhā mē kot pī rerek o ixkre nhĩpēxta pyrā nē mē kot kām amnhĩ nhĩpēx mex kēt xwỹnhjē pumu nē mē kot amnhĩ to mex kēt xwỹnh hā mē harē.

¹⁴ Nē pī htỳxja na hte tanhmā amnhĩ to nē hpōr no ām arĩ mex nē kuhē nhũm mē piitā arĩ mex ā omu. Ja pyrā nē koja Krisja mē kot kām tanhmā amnhĩ nhĩpēx mex to ho mē pa xwỹnhjē pumu nē mē kot tanhmā kām amnhĩ nhĩpēx to hpānhā mē kām amnhĩre nhũm mē piitā mē kot amnhĩ to mex ā mē omu. ¹⁵ No pī rerekja na hte pōr nē kaxàr pa. Ja pyrā nē mē kot Kris mā amnhĩ nhĩpēx mex hkēt xwỹnhjaja koja Tĩrtũm mē kām amnhĩrer kēt nē. Nom arĩ mē kēp hkra jakamā koja mē arĩ kuri htĩr tũm nē pa. No ām mē kot Tĩrtũm mā amnhĩ nhĩpēx mex kēt jakamā koja mē hkwyjē hkĩnh ā amnhĩm mēmoj mex kwỹ jamỹnh kēt nē. Te mēhō nhōrkwỹ kēp hpōr nhũm mē hkukrēx kwỹ jamỹnh kēt nē y kamā kurũm hapōx pyrāk.

¹⁶⁻¹⁷ E pa mē amā mēmoj jarē. Ra mē ate mar tā mǎn ka mē ra tanhmā amnhĩ to nē hā ano hkēt rỳ ko. Nà te mē pahpē Tĩrtũm nhōrkwỹ pyrāk. Tĩrtũm nhōrkwỹja ò na. Tā mē pahpē hkra nhũm Karō kot mē pakaxwỹnh mā gjēx jakamā te mē pahpē òrkwỹ pyrāk. Jakamā mē kot kapēr kwỹm ri mē ajahkre o ri mē pa xwỹnhjaja te mē kot Tĩrtũm nhōrkwỹ grānh xwỹnh pyrāk. Koja mē nhỹrmā amnhĩ xà htỳx kamā hamak o pa.

Mē pahte amnhĩ to jarkrar kēt ā mē pamā karō

Wam Korît 1.10-25

¹⁸ Nē kot kaj mē atō axàhpumunh tỳx o amnhĩ to jarkrar o ri apa japēr. Kwa mē jam anhũre nē axte ri ā amnhĩ nhĩpēx anhỹr kēt nē. Nē te mē ate amnhĩ nē axàhpumunh tỳx xàja nhām rēnh par pyrāk o amnhĩ nhĩpēx. Mē paxàhpumunh xàja pika kamā mē àhpumunh pix jakamā kēr ka mē te amnhĩ nē nhām rēnh pyrā nē hpānhā Tĩrtũm xàhpumunh xà hkōt pix mā amnhĩ nhĩpēx o ri apa. ¹⁹ No pika kamā mē àhpumunh xwỹnhjaja Tĩrtũm noo mā te mē hkrā pipānh nē htỳx ri pata pyrāk. Tĩrtũm kapēr ā kagà htũm kot mē harēnh kot:

Pika ja kamā mē àhpumunh tỳx ā mē kot amnhĩ to jarkrar xwỹnhjaja Tĩrtũm noo mā te mē kot amnhĩ to hēx o pa pyrāk. Anē.

²⁰ Nē mǎānēn mē harēnh kot:

Mē kot amnhĩ xàhpumunh tỳx ā amnhĩ to jarkrar o ri mē pa xwỹnhjaja na hte Tĩrtũm mē omu nē mē kot ā amnhĩ jarēnh anhỹr kaprỳ hā mē harē. Anē.

²¹⁻²² Jakamā kwa kēr ka mē axte mē apē ixkwỹ rỳ mē apē Apor kwỹ hā amnhĩ jarēnh o ri apa hkēt nē. Mē apē wa ixkwỹ hkēt kēnā. Nē mē apē nhām mēhō hkwy hkēt. Mē pahpiitā mē pahpē Kris kwỹ na pu mē.

Nē kot puj mē nhỹrmā pahtyk tā akupỹm pahtĩr nē Tĩrtũm mē Jejus wa kuri pamex nē pahtĩr tũm nē ri papa. Jakamā kwa mē tee ri amnhĩ kukamā ajamaxpēr kēt nē.

Nē jarāhā mēmoj piitā mē panhōō. Nē kormā mēmoj kot amnhĩrīt kēt xwỹnhjaja haxwỹja mē panhō na. Ām mēmoj piitā mē panhō jakamā te mē pahpē mēmoj piitā mēō pahi pyrāk. ²³ No mē papajaja axtem Kris kēp mē panhō Pahihti. Nē Tĩrtũm kēp Kris nhō Pahihti.

¹ Nê mẽ pajaja mẽ ixpê mẽ anhõ pahi hkêt. Ām mẽ ixte Kris mã tanhmã amnhĩ nhĩpêx to ho ixpa xwýnh pix jakamã Tĩrtũm kormã kapêr kwý ho amnhĩrĩť kêtja na pa htem mẽ amã ho amnhĩrĩť o ri mẽ akôt ixpa. Ja kaxyw na pre mẽ ixunhwý. ² Na pre Kris tanhmã mẽ inhmã kapêr to nê mẽ inhmã:

—E kêt ka mẽ ixkapêr pix o mãn mẽ ahkre ho ri mẽ hkôt apa. Anê.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rý ixte kãm amnhĩ nhĩpêx mex kêt ã ijarê. Ām tapxipix koja tanhmã ijarênh to. No koja nhãm mēhõ rý mẽ atõ ã ijarênh anê pa ama nê ãm ama. Rý papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nê ãm ixtýx kãm ã amnhĩ nhĩpêx anhýr ã amnhĩ jarênh kaprý. Pahiťti Kris pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêt ka mẽ ri mẽ kot Tĩrtũm mã tanhmã amnhĩ nhĩpêx to hã mẽ omunh xà hkôt tanhmã mẽ harênh to hkêt nê. Koja nhýrmã Pahiťti Krisja akupýn mẽ pahwýr wrý nê rĩ tãm tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nê mẽ kot hpimxur pē tanhmã amnhĩ tomnuj to ho mẽ pa xwýnhjaja nhũm mẽ piitã mẽ noo mã mẽ kãm ja ho amnhĩrĩť nhũm mẽ ja hã mẽ omu. Nê mẽ pahpiitã mẽ pajamxpêr xà ho amnhĩrĩť nhũm mẽ piitã hprĩ hã ja hã xpēn pumu. Hãmri nhũm Tĩrtũm rĩ kormã mẽ pahte kãm tanhmã amnhĩ nhĩpêx mex to ho pa xwýnhjê jarê.

⁶ E Jejus kôt ixkwýjaja. Nà na pa ã mẽ amã Apor mẽ wa amnhĩ jarênh anê. Mẽ ate inhmar nê Tĩrtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anê hãmri nê ahpýnhã tanhmã mẽ ixte Kris kapêr jarênh xwýnhjê jarênh to hkêt nê. Nê xpēn mã mẽ ijarênh o:

—Nà tãm kot Kris kapêr jarênh mex o kot hkwyjê jakrenh jakamã kot paj hkôt pix mã mãn ri ixpa.

Anhýr o xpēn mã mẽ ixtõ jarênh kêt nê. Kot kaj mẽ ã mẽ ixtõ jarênh anê nê te mẽ ixto jarkrar pyrãk o amnhĩ nhĩpêx. ⁷ Kwa mēhõ na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anê? Nê mẽ ixkapêr mex ã mẽ ixkwýjê jarê nê mẽ ixkapêr mex kêt ã mẽ ixkwýjê jarê. Nà na ka mẽ ãm amnhĩ krã hkôt ã mẽ ijarênh anê nom Kris xàhpumunh xà ho ã mẽ ijarênh anhýr kêt nê. Ām mẽ ixte Tĩrtũm kapêr o mẽ ajahkre xwýnhjaja na pa prem mẽ amã mẽmoj jarê ka mẽ ama nê mẽ inhý hã hkôt axàhpumunh mex nê. No amnhĩ krã hkôt mẽ axàhpumunh kêt kēnã kot ka kêt mẽ ã ahpýnhã tanhmã mẽ ixto jarkrar anhýr to ho ri apa.

⁸ Te mẽ ate Apor mẽ wa ixrom Tĩrtũm kapêr mar par nê hkôt amnhĩ nhĩpêx mex pyrãk. Te wa ixrom mẽ ate Jejus nhĩhkô hã mẽ ho amnhĩptàr pyrãk. Hêxta waa nê. Kop apu ãm hãmri mẽ ate ĩhkô hã mẽ ho amnhĩptàr ronhýx pa ijaxwýja mẽ apyrã nê ã amnhĩ nhĩpêx anê. Hãmri nê ixkĩnh týx kumrêx. ⁹ Nom ja kot anhýr kêt.

Jejus nhý hã mẽ ahkre xwýnhjê jarênh

Sikũn Korĩť 4.8-10; Eprêw 12.1

Nê mẽ ixpê Jejus nhý hã mẽ ajahkre ho mẽ ixpa xwýnhjaja te Tĩrtũmja axtem tanhmã mẽ inhĩpêx to pyrãk pa mẽ inhmex kêt nê ixpa. Te mẽ ixte gyw kãm amnhĩ rēnh nhũm mẽ kot mẽ ixkamã òkre kahak pyrãk o na htem mẽ inhĩpêx. Jakamã na hte mẽ hkwyjaja mẽ ixpumu nê mẽ ixkapêr ma nê ãm mẽ inhma nê xpēn mã mẽ ijarênh o:

—Tk. Kot mẽ ahkreja mexťi hã. Kwa pu mẽ himex ri.

Anhýr jakamã te ra mẽ ixtýk nê mẽ inhĩkwý nhũm mẽ piitã mẽ ixtã htu nê mẽ ixpumunh nê ma pa pyrãk o amnhĩ nhĩpêx. Jakamã na htem mẽ ixte mẽ ahkre ma nê ãm kuma nê ma pa. Nom Tĩrtũm kapêr o mẽ wrýk xwýnhjaja na htem ja hã mẽ pahpumu nê xpēn mã mẽ pajarênh o:

—Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nê aa hkaga hkêt nê. Hêxta waa nê. Nà ãm hãmri na htem ã amnhĩ nhĩpêx anhýr o pa. Anê.

¹⁰ Na hte mẽ kot mẽ ixkapēr mar xwỳnh kwỳjaja kām mẽ ixkĩnh kêt nẽ tanhmã mẽ ixto kapēr punuj to. No mẽ kajaja nhũm mẽ ã mẽ ato kapēr anhỹr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhỹ hã mẽ axàhpumunh tỳx ã mẽ ajarẽ. Nẽ mẽ ixte Tĩrtũm kapēr kôt amnhĩ nhĩpêx mex kêt ã mẽ ijarẽ no mẽ kajaja na htem Tĩrtũm kôt mẽ ate amnhĩ nhĩpêx mex ã mẽ ajarẽ. Nẽ mẽ kot mẽ ixkamã ôkre kahak tỳx tã mẽ akamã ôkre kahak kêt nẽ mẽ kãm mẽ akapēr mar prãm nẽ. ¹¹ Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôr nẽ ri ixpa. Nẽ mẽ ixê pikaxônhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwỹ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhỹr o ri ixpa. ¹²⁻¹³ Nẽ ixàpkur xà kaxyw ixàpênh rũnh o ri ixpa. Nhũm hte mẽ kãm Jejus prãm kêt xwỳnhjaja mẽ ijapry ho pa htã pa mẽ amnhĩ kurom mẽ kãm ixkapēr mex nẽ mẽ kãm:

—E kê Tĩrtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpêx kati htã pa htem mẽ kutã amnhĩ to htỳx nẽ arĩ mẽ hkôt ixpa. Na htem te mẽ kot ahpunuj nhĩpêx pyrãk o mẽ inhĩpêx nẽ mẽ ixwỳr mrar kêt nẽ. ã na htem mẽ ixte Jejus nhỹ hã mẽ ahkre o mẽ ixpa xwỳnhjê nhĩpêx anẽ.

Pawre te kệp mẽ hpãm pyrãk ã kot amnhĩ jarẽnh

Wam Tesarõn 2.11-12

¹⁴⁻¹⁵ E Kris kôt ixkwỳjaja. Na pa ã mẽ amã kagã nẽ mẽnh anẽ. Nom mẽ ate inhmar nẽ amnhĩ kamã apijaam kaxyw kêt. Inhmã mẽ ajapê jakamã na pa ã mẽ amã ixkapēr nẽ hã kagã nẽ mẽnh anẽ. Na mẽ ra ohtô nẽ ixpãnhã mẽ awỳr pa nẽ mẽ amã Tĩrtũm kapēr o mẽ ajahkre. Nom ixkumrêx na pa pre mẽ amã kapēr jarẽ ka prem inhma nẽ Kris hkôt amnhĩ xunhwỳ nẽ amnhĩ kaxyw hkôt ajamaxpêr tỳx nẽ. Jakamã paxipix te ixpê mẽ apãm nhũm te mẽ apê ixkra pyrãk. ¹⁶ Jakamã kwa mẽ ixte amnhĩ nhĩpêx kôt ixpumu nẽ ixkôt mãn kêt mẽ amnhĩ nhĩpêx o ri apa. ¹⁷ ã mẽ ate amnhĩ nhĩpêx anhỹr kaxyw na pa pre ijamaxpêr nẽ ma mẽ awỳr Ximotre mẽ. Haxwỳja Kris kôt te kệp ixkra pyrãk. Nẽ inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awỳr kumẽ. Kojã mã mẽ awỳr mỗ nẽ pøj nẽ mẽ amã Kris kapēr jarẽnh o ri mẽ akôt pa. Nẽ mẽ amã tanhmã ijarẽnh to nẽ mẽ amã:

—Nà Pawre na hte Jejus Kris jamaxpêr kôt hamaxpêr o pa. Nẽ kot amnhĩ nhĩpêx kôt amnhĩ nhĩpêx o pa. Nẽ krĩ piitã hkôt mẽ kot urãk nẽ ã amnhĩ nhĩpêx o pa anhỹr kaxyw mẽ ahkre mex o pa. Anẽ.

¹⁸ Nẽ na xep mẽ akwỳjaja te ra àhpumunh tỳx pyrã nẽ tanhmã ijarẽnh to nẽ ijarẽnh o:

—Pawreja akupỹn mẽ pahwỳr mõr ã amnhĩ jarẽnh tã kojã akupỹn mõr kêt nẽ kãm ga. ãm kapēr kati xwỳnh na.

¹⁹ Anhỹr ã ijarẽnh tã kojã Tĩrtũm kãm tokyx ma mẽ awỳr inhmõr prãm hã kot pa ma mẽ awỳr inhmõr kurê kumrêx. Hãmri nẽ pøj nẽ ixprĩ hã ã mẽ kot ixto kapēr anhỹr xwỳnhhtajê pumu. Nẽ mẽhõ kot ã mẽ kãm ijarẽnh anhỹr xwỳnhhta ã ahkukja. ²⁰ Tĩrtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu nẽ rĩ kormã kệp hkra hã mẽ harẽ. Tã kot paj nhỹrmã mẽ awỳr pøj nẽ ã ixto kapēr anhỹr xwỳnhjê pumu nẽ ixprĩ hã mẽ kot amnhĩ nhĩpêx ã mẽ omu nẽ rĩ kormã tanhmã mẽ harẽnh to. Jao Tĩrtũm nhỹ hã mẽ kot mẽ ajahkre hã mẽ omu rỳ amnhĩ krã hkôt mẽ kot mẽ ajahkre hã mẽ omu nẽ rĩ kormã tanhmã mẽ harẽnh to. ²¹ Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mỗ nẽ mẽ awỳr pøj nẽ mẽ ate tãm amnhĩ nhĩpêx ã mẽ apumu nẽ ixkĩnh nẽ. Nẽ mẽmoj tã mẽ amã ixàkjêr kêt nẽ. Nẽ mẽ amã ixkapēr mex pix o ri mẽ amã ixkapēr. Te mẽ hipêêxã kot hkrajê mã kapēr mex pyrãk o mẽ amã ixkapēr mex nẽ. Hãmri pu mẽ axpên pumu nẽ pahkĩnh nẽ.

5

Mẽhõ kot tanhmã amnhĩ tomnuj to hã harẽnh

Sikũn Korīt 2.5-11

¹ Nẽ kwa na pa pre tee ri mẽ anhĩõja jarẽnh ma nẽ ixkaprĩ htỳx nẽ. Na xep hte amnhĩ tomnuj tỳx pẽ nã puro hã hpijaam kêt o pa. Kwa mẽ pahpê Kris kwỳjaja mẽ pahte ã

amnhĩ nhĩpêx anhỹr kêt nhũm mẽ kot Kris kêt amnhĩ xunhwỳr kêt xwỳnhjaja haxwỳja ã amnhĩ nhĩpêx anhỹr kêt tã nhũm ra mẽ anhĩõja kot Kris kêt amnhĩ xãm tã ã amnhĩ nhĩpêx anê. Kwa ja omnuy tỳx kumrêx. ² Na xep ri ã amnhĩ nhĩpêx anhỹr o pa ka mẽ ja hã omu nê ãm omu nê nê tanhmã kãm nê hkêt nê. Amarĩ hã omunh o ri hkôt apa. Mẽ ate Tĩrtũm kêt axàhpumunh tỳx ã amnhĩ jarênh tã no ãm ja hã omu nê ãm hã omu nê nê tanhmã kãm nê hkêt nê. Kwa nà. Mẽ tee ri kot ã amnhĩ nhĩpêx anhỹrja ã omu nê akapĩ nê hkêt wehe. Nê mẽ tokyx amnhĩ nê hano kê mẽ akôt Tĩrtũm mã amnhĩ jarênh xà hã ixkre hwỳr axte mrrar kêt nê.

³⁻⁵ Ixte mẽ apê awry htã ã kot amnhĩ nhĩpêx anhỹr ã harênh ma nê hkukamã tanhmã ijamaxpêr to. Nà ra ixte mẽ awỳr ixpôx ronhỹx pa mẽ ato akuprô. Pahihti Jejus nhỹ hã mẽ ato akuprô nê mẽ amã kot amnhĩ tomnuj xwỳnhhta jarê nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhõ Pahihti Jejus nhỹ hã amnhĩ nê hano nê te Satanasti mã rer pyrãk kê tee ri ja hã amnhĩ pumu nê tokyx kãm urer japêr. Hãmri nê akupỹm tãm amnhĩ nhĩpêx. Kê nhỹrmã Pahihti akupỹn mẽ pahwỳr wry nhũm ma mẽ pahkôt ô krĩ hwỳr api.

⁶ Mẽ ate Tĩrtũm kapêr jarênh mar mex ã amnhĩ jarênh tã kormã amnhĩ nê ã kot amnhĩ nhĩpêx anhỹr xwỳnhhta janor kêt nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xà ho hkryre nê kamã kurê nê gaa nê rĩ ho piitã hikot pa. Ja pyrã nê kot ka mẽ amnhĩ nê kot amnhĩ tomnuj xwỳnhhta janor kêt nê hãmri nê gaa nê ra urãk nê apiitã ã amnhĩ nhĩpêx anhỹr o ri apa.

⁷ Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kêt apa nê tãm ri amnhĩ nhĩpêx o ri axpên kêt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty. ⁸ Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

⁹ Nê wam ixte mẽ awỳr kagã nê mênhta kamã na pa pre mẽ amã:

—Kêr ka mẽ nhãm mẽ kot mênijê kamã hpijaãm kêt o mẽ pa xwỳnhjê hkôt ri apa hkêt nê. ãm ri mẽ hkàx ã apa.

Anhỹr o mẽ amã hã karõ. ¹⁰⁻¹¹ Nom na pa pre mẽ piitã ã mẽ nê mẽ akurê anhỹr kêt nê. ãm mẽ kêp Kris kwỳ hã amnhĩ jarênh tã ã ri amnhĩ tomnuj anhỹr xwỳnh pixjaja na pa pre mẽ nê mẽ akurê. Koja mênhõ kêp Kris kêt mẽ pahtõ rỳ mẽ pahtõx ã amnhĩ jarênh tã mẽ kamã hpijaãm kêt o ri pa ka mẽ ja hã omu nê hkôt ri apa hkêt kurê kumrêx.

Nê mẽ kãm nhãm mẽ hkukrêx kĩnh o kãm ho ò hprãm o ri mẽ pa xwỳnhjaja.

Nê sãnti kutã hkõn krã ho rôrôk nê hkrĩ nê kãm mex ã harênh o ri mẽ pa xwỳnhjaja.

Nê mẽ kot axpên to kapêr punuj o ri mẽ pa xwỳnhjaja.

Nê mẽ pipãnh o ri mẽ pa xwỳnhjaja.

Nê axpên pê ri mẽ àhkĩnh o mẽ pa xwỳnhjaja.

Koja mênhõ kêp Kris kwỳ hã amnhĩ jarênh tã ã amnhĩ nhĩpêx anhỹr o ri pa ka mẽ ja hã mẽ omu nê hkôt ri apa hkêt kumrêx. Nê mẽ kutã axàpkur kêt nê. ãm mẽ hkàx ã ri mra.

No mẽ kêp Kris kwỳ hkêt xwỳnhjê nê na pa pre ã mẽ akurê anhỹr kêt nê. Mẽ piitã ã mẽ kot amnhĩ nhĩpêx anhỹr o pa kênã. Na htem axpên kãm hpijaãm kêt o ri pa.

Nê mẽ kãm axpên kukrêx kĩnh o kãm ho ò hprãm o ri pa.

Nê sãnti kutã hkõn krã ho rôrôk nê hkrĩ nê kãm amnhĩ jagrer pê amnhĩ to hwỳr o pa.

Nê mẽ axpên pê àhkĩnh pix o pa.

Kris kwỳ hkêt xwỳnhjaja na htem ã amnhĩ nhĩpêx anhỹr o pa. Tã tanhmã kot ka wem amnhĩ to nê mẽ hkàx ã ri apa? Mẽ piitã ã mẽ kot amnhĩ nhĩpêx anhỹr kênã. Kot puj mẽ nhỹrmã Tĩrtũm nhõ krĩ mex wỳr api nê rĩ kormã mẽ hkàx ã ri papa.

¹²⁻¹³ Nê mẽ kêp Kris kwỳ hkêt xwỳnhjaja na pa hte mẽ kot amnhĩ tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tĩrtũm tãm koja nhỹrmã ja hã tanhmã mẽ hipêx to. No koja Kris kêt mẽ pahtõ rỳ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tĩrtũm kapêr ã kagã htũm kot ja jarênh kot:

Kêr ka mẽ amnhĩ nê Kris kôt akwỳjê hõ kot tanhmã amnhĩ tomnuj to ho pa xwỳnhjê jano.
 Ẫ harênh kot anhỹr.

6

Mẽ pahte Kris kwỳjê ho pakapêr kêt

Matêwre 5.38-40

¹ Nê na ka xep htem Kris kôt atõ rỳ atõxjê hõ mẽ ka wa tanhmã axpên tomnuj to nê axtem nê juisti hwỳr axpên to mra. Mẽ apyrà nê kêp Kris kwỳ hkêt tã ka htem ma hwỳr amnhĩ to mra nhũm war axpên tã war ama nê tanhmã war ajarênh to. Kwa mon ka htem axtem nê ẵ Kris kwỳ hkêt xwỳnhjê hwỳr mẽ amnhĩ to amrar anê? Kêt mẽ Kris kôt anhĩõ hwỳr măn kêt mẽ amnhĩ to mra nê kumã măn amnhĩ jarê kê axpên tã war ama nê axpên tã tanhmã war amã kapêr to.

² Ra mẽ ate ja mar tỳx tã hkôt amnhĩ nhĩpêx kêt nê. Mẽmoj ẵm grire htã ka wa tokyx akupỹm hã tãm axpên xãm kêt nê. Rỳ Kris kôt war atõjê hõ hwỳr wa amnhĩ to atẽm nhũm akupỹm tãm axpên tã war axãm kêt nê. ẵm axtem nê mẽ kêp Kris kôt mẽ atõ hkêt xwỳnhjê hwỳr amnhĩ to mra. Kwa mẽ ẵ amnhĩ nhĩpêx anhỹr kêt nê. Mẽ pahpê Kris kwỳjaja kot puj mẽ nhỹrmã Kris nhĩhkô hã mẽ kêp hkwy hkêt xwỳnhjê tanhmã mẽ harênh to. ³ Nê Tĩrtũm kapêr o mẽ wryk xwỳnhjaja kot puj mẽ mẵnên nhỹrmã tanhmã mẽ harênh to ho pahkrĩ. Jakamã kwa mẵmrĩ ẵ mẽ pahte amnhĩ nhĩpêx anhỹrja kukamã akupỹm tanhmã axpên xunhwỳr to ho apa. Mẽmoj tã mẽ atõjê hõ wa kot tanhmã axpên to hã wa omu nê tokyx akupỹm axpên tã wa kãm akapêr kê wa tokyx akupỹm tãm axpên nhĩpêx. ẵ mẽ kot axpên nhĩpêx anhỹr o paja na kêt mex. ⁴ No na ka xep htem arĩ Kris kôt mẽ akwỳ hkêt xwỳnhjê hwỳr axpên to mra nê mẽ kãm amnhĩ jarê. Kwa mẽ ri ẵ amnhĩ nhĩpêx anhỹr kêt nê. ⁵ Mẽ tokyx tee ri ja hã amnhĩ pumu nê amnhĩ kamã apijaàm kêt wehe. Xà mẽ akamã Kris kôt mẽ atõjê hõ pixire nê kot tãm akupỹm mẽ axunhwỳr kaxyw amrakati kumrêx? ⁶ Na ka xep htem mẽmoj tã axpu. Kris kôt mẽ atõjê hõ mẽ mẽmoj tã axpu nê ra mẽ kêp Kris kwỳ hkêt xwỳnhjê hwỳr amnhĩ to mra. Kot tãm akupỹm mẽ unhwỳr xwỳnhjê hwỳr amnhĩ to mra.

⁷ Mẽ apijapu ho apa jakamã na ka mẽ amnhĩ tomnuj tỳx nê. Hãmri nê te mẽ apê Kris kwỳ hkêt xwỳnh pyrà nê mẽ hwỳr amnhĩ to mra. Kwa kwãr Kris kôt anhĩõ mẵmrĩ apê ahkĩ rỳ tanhmã anhĩpêx to. Ka mẽ ẵm amnhĩ tã omu kê tapxipix tanhmã amnhĩ tomnuj to. ⁸ Ja mex tã mẽ ate ẵ amnhĩ nhĩpêx anhỹr kêt. Na ka htem axpên pê ahkĩ. Mẽ ate Kris kôt axpên to atõ nê atõx tã axtem nê ẵ axpên nhĩpêx anê. Te mẽ apijaàm kêt pyrak o amnhĩ nhĩpêx o ri apa. ⁹⁻¹⁰ Mẽ kot tanhmã amnhĩ tomnuj to xwỳnhjaja koja mẽ nhỹrmã ma Tĩrtũm nhõ krĩ mex wỳr àpir kêt nê. Ra mẽ ate ja jarênh mar tỳx.

Mẽmyjê hõ kot nhãm mẽnijê hõ ho amnhĩ kati xwỳnhjaja.

Nê mẽnijê hõ kot nhãm mẽmyjê hõ ho amnhĩ kati xwỳnhjaja.

Nê mẽnijaja axtem nê mẽ kot amnhĩõ ho mjên o ri mẽ pa xwỳnhjaja.

Nê mẽmyjaja haxwỳja axtem nê amnhĩõ ho hprõ ho ri mẽ pa xwỳnhjaja.

Nê mẽ àhkĩnh o ri mẽ pa xwỳnhjaja.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nê ri mẽ pipãnh o mẽ pa xwỳnhjaja.

Nê ri axpên to kapêr punuj o mẽ pa xwỳnhjaja.

Nê mẽ kot amnhĩ to sãnti hwỳr o mẽ pa xwỳnhjaja.

ẵ mẽ kot amnhĩ nhĩpêx anhỹr xwỳnh piitã koja mẽ Tĩrtũm nhõ krĩ hwỳr àpir kêt nê.

¹¹ Kormã mẽ ate Kris kôt amnhĩ xunhwỳr kêt ri na ka pre mẽ akwỳjaja ẵ amnhĩ nhĩpêx anhỹr o ri apa. Tã amnhĩ kaxyw Jesus kôt ajamaxpêr nê hkôt amnhĩ xunhwỳ. Hãmri nhũm Tĩrtũm Karõ mẽ Pahihti Jesus Krisja wa mẽ anê mẽ ate amnhĩ tomnuj piitã rênh pa nê mẽ apê Tĩrtũm kra hã mẽ axunhwỳ nê amnhĩm mẽ ate amnhĩ to mex xwỳnh ẵ mẽ ajarê.

Mē pahte tām amnhī nhīpêx o papa hã mē pamã karõ
Matêwre 5.27; Rômãn 12.1-2; Epes 5.3; Korosê 3.5; Wam Tesarõn 4.1-8

¹² Nē na ka hte mē akwỳjaja amnhī jarēnh o:

—Nà na pa hte pa inhmã tanhmã amnhī nhīpêx to hprãm xà hkôt amnhī krã hkôt amnhī nhīpêx o ri ixpa. Anē.

Mē ate ã amnhī jarēnh anhÿr tã no ãm mē ate amnhī jarēnhja mex kêt. Mēmoj piitã mē pamã mex kêt. Na pu htem pamã hprãm xà hkôt mēmoj to anē nē gaa nē ra ho amnhī pyrã nē ho anhÿr pix o papa. Nē gaa nē kãm panhürer kêt kumrêx. Jao ra pahpipãnh pix o ri papa. Rỳ paxêx pix o ri papa. Rỳ paxàhkĩnh pix o ri papa. Jakamã kêr pu mē pamã tanhmã amnhī nhīpêx to hprãm xà hkôt tanhmã amnhī nhīpêx to ho papa hkêt nē. ãm amnhī mē amnhī kaxyw Jejus mã pajamxpêr pix nē.

¹³ Nē na htem amnhī jarēnh o:

—Nà kot paj inhmã prãm nē mãmri mēmoj ku. Nē inhmã nhãm mēhõ kamã ixpijaam kêt prãm nē mãmri ã amnhī nhīpêx anē. Ja tanhmã inhmã kute hkêt. Anē.

Tã koja nhÿrmã Tĩrtũm mē panhĩja o hapêx pa. Na pre mē pahte nhãm mē kamã pahpijaam kêt o papa kaxyw mē panhĩpêx kêt nē. ãm mē pahte mē panhĩpêx xwỳnh maatija mã tanhmã amnhī nhīpêx mex to ho papa pix kaxyw na pre mē panhĩpêx.

¹⁴ Nē na pre Pahihtija ty nhũm Tĩrtũm akupÿm ho htĩr. Ja pyrã nē kot puj mē nhÿrmã mē pajaxwỳja ty nhũm akupÿm mē pahto mē pahtĩr. Ja kaxyw tapxipix pix na àhpumunh tÿx o àhpumunh tÿx. ¹⁵ Na pu htem Kris kôt amnhī xunhwÿr kôt pahpê hkwy nē te pahpê ĩ pyrãk. Jakamã kwa mē ja hã anohtÿx nē axte nhãm mē hkuprÿjê hwÿr amrar nē mē ho amnhĩkati hkêt nē. Tĩrtũm kêp ja omnuj. Te mē pahte Kris nhĩ pyrãk jakamã kot kaj mē ã amnhī nhīpêx anhÿr jao te Kris tãm kot ã amnhī nhīpêx anhÿr o pa pyrãk. Kwa ja mex kêt. Xà kot we Krisja ã amnhī nhīpêx anē? Nà koja ã amnhī nhīpêx anhÿr kêt nē.

¹⁶ Tĩrtũm kapêr ã kagà htũm kot ja jarēnh kot:

Kot ka mē atõ mēnijê hõ ho aprõ nhũm kêp aprõ kumrêx. Hãmri nē te ra war atipxi pyrãk o xpên nhīpêx. Anē.

ã kot aprõ mē wa ajarēnh anhÿr jakamã kwa kêr ka mē atÿx ri nhãm mē hkuprÿjê hwÿr apa hkêt nē. Kot kaj mē ã amnhī nhīpêx anē nē Tĩrtũm noo mã te ate aprõ kuhpa hã hkuprÿta o aprõ pyrãk. Te wam aprõta kuhpa hã war atipxi pyrãk. ¹⁷ Na pu htem Pahihti Jejus Kris kôt amnhī xunhwÿ nhũm amnhī tã mē pahpumu nē mē pamã Karõ gõ nhũm mē pamã agjê. Pu mē ra Karõja kôt te ra Jejus mē wa pahtipxi nē ri papa pyrãk o xpên nhīpêx. Jao Kris jamaxpêr mē mē pajamaxpêrja te wa kot xpên pyrãk. Nē Kris kot amnhī nhīpêx mē mē pahte amnhī nhīpêxja te kot xpên pyrãk.

¹⁸ Jakamã kwa kêr ka mē amnhī prõ pix tãnopxar o ri apa. Nē mē anijaja amjên pix tãnopxar o ri apa. No mē nhãm mēmyjê ho amnhĩkati ho ri apa hkêt nē. Nē mē amyjaja nhãm mēnijê ho amnhĩkati ho ri apa hkêt nē. Kot ka mē nhãm mēmoj tanhmã omnuj kute ho anē no ãm amnhī nhĩ homnu hkêt nē. Nom kot kaj mē nhãm mēnijê ho amnhĩkati rỳ nhãm mēmyjê ho amnhĩkati hãmri nē ra amnhī nhĩ homnu hpa. ¹⁹ Mē panhĩ kamã na hte Tĩrtũm Karõ agjê nē kamã hkrĩ. Tĩrtũm na pre mē pahwÿr kurê nhũm mē pahkarõ mã agjê pu mē te mē pahpê òrkwÿ pyrãk. Jakamã na pu htem amnhī krã hkôt pahtÿx ri mēmoj tanhmã ho ho papa hkêt nē. ãm Tĩrtũm jamaxpêr xà hkôt pix mã na pu htem tanhmã mēmoj nhīpêx to ho papa. ²⁰ Na pre ra Jejus mē pahte amnhī tomnuj pãnhã amnhürer kaxyw mē pahpiitã mē panê ty. Te htyk o amnhĩm mē pajaprõr pyrãk o mē panhĩpêx. Jakamã kwa kêr pu mē ãm hkôt pix mã mãn ri amnhī nhīpêx rãhã ho ri papa. Kê mē pahkwỳjaja ja hã mē pahpumunh kôt Tĩrtũm mã mex o mex ã harēnh o ri pa.

7

Mē mjên mē mē hprõ wa kot xpên to mex ã mē pamã karõ
Epes 5.22; Korosê 3.18; Eprêw 13.4

¹ Nē ota mẽ ate ixwỳr kagà nē mēnh̄ta na pre ixwỳr pōj pa omu. Nē kamã mẽ ate mẽ aprō hã ixkukjêr xwỳnh̄ta pa kamã harẽ nē omu. Tã kot paj mẽ amã tanhmã harēnh to ka mẽ inh̄ma.

Nà kot ka mẽ amyjê hō amã aprō hkêt nē ahte ri apa hprãm nē kam nē aprō hkêt apa. Ja tanhmã kute hkêt. Nom kêr ka mẽ hkuprỳjê ho presija ho ri apa hkêt nē. ² Na htem tōhã kãm hprō hprãm kêt nē ri pa nē gaa nē mẽ hkuprỳjê hō pumu rỳ mẽ kêp mẽ hprōjê hō pumu nē kamã hpijaàm kêt o ri pa. Ja pymaj kêr ka mẽ amyjaja mãmri aprō nē mẽ anijaja mãmri amjên.

³ Nē mẽ anijaja. Kojã mẽ amjên akamã hkurẽ ka mẽ mãmri kãm amnhĩ gō kê mẽ anĩ. Nē mẽ amyjaja mãänēn. Kojã mẽ aprō mẽ akamã hkurẽ ka mẽ mãmri mẽ anĩ. ⁴ ãm ka amã tanhmã amnhĩ nhĩpêx to hprãm xà hkôt pix mã amnhĩ nhĩpêx kêt nē. Mãänēn amã aprō kot kãm tanhmã amnhĩ nhĩpêx to hprãm xà hkôt mãänēn hkôt kãm amnhĩ nhĩpêx.

⁵ Nē kot kaj mẽ mẽmo arĩgro hã amã Tĩrtũm mã amnhĩ jarēnh ryy hprãm japêr. Hãmri nē aprō mã:

—E kot puj jarãhã axpēn to amnhĩkati hkêt nē. Kot puj ãm Tĩrtũm pix mã amnhĩ jarēnh o amỹkry. Anẽ.

Hãmri nē mãmri ã amnhĩ nhĩpêx anẽ. No kwa kêr ka mẽ ãm ja ho anhỹr o apkati pixi nē kãm anhũre. Nhũm jãã ka mẽ amã axpēn to amnhĩkati hprãm nē mãmri tanhmã axpēn nhĩpêx to. No kot kaj mẽ ã amnhĩ nhĩpêx anhỹr kêt o hã atã apkati xohtō nē gaa nē ra akurẽ xàj axtem nē Satanasti jamaxpêr o ajamaxpêr. Jao nhãm mēhō ni hwỳr mra nē aprō kuhpa hã kamã akurẽ ho kamã apijaàm kêt. Rỳ nhũm mēnijaja nhãm mēmyjê hō hwỳr mra nē mjên kuhpa hã kamã hkurẽ ho war axpēn kamã hpijaàm kêt.

⁶ E mẽ ate ja hã ixkukjêr jakamã na pa ã ixprĩ hã mẽ amã ja jarēnh anẽ. Ka mẽ akwỳjaja amã aprō hprãm nē mãmri aprō nē ri apa. Nē mẽ akwỳjaja amã aprō hprãm kêt nē mãmri aprō hkêt nē ri apa. Nom kot pa paa mẽ amã mẽ aprō hã ixàmnēnh kêt nē. Ka mẽ kam amnhĩ krã hkôt ajamaxpêr xà hkôt tanhmã amnhĩ nhĩpêx to. ⁷ Na pa hte ixprō hkêt nē ri ixpa nom inh̄mã ja mex pa hte ahte ixpa.

Mẽ mjên kêt nē mẽ hprō kêt xwỳnhjê jarēnh

Nē kormã mẽ aprō hkêt xwỳnhjaja. Ka mẽ ixpyrà nē aprō hkêt nē ri apa ronhỹx inh̄mã ja mex nē. Na hte mẽmy hwỳjaja hprō kêt nē ri pa nhũm Tĩrtũm ja hã mẽ omu nē tanhmã mẽ ho nhũm mẽ mex nē ri pa nē mēnijê kamã hkurẽ ho mẽ kamã hpijaàm kêt o ri pa hkêt nē. No na hte mẽ hwỳjaja hprō hkêt nē ri pa nē gaa nē ra hkurẽ xàj mēnijê kamã hpijaàm kêt. ã mẽ ate amnhĩ nhĩpêx anhỹr pymaj kêr ka mẽ amã aprō hprãm nē mãmri aprō. Tĩrtũm mã ja mex kēnã.

⁸ E mẽ aprō hkêt nē mẽ amjên kêt xwỳnhjaja. Nē ra mẽ apê mẽ aprō htyk rỳ mẽ amjên htyk xwỳnhjaja. Pa mẽ amã mẽmoj jarẽ. Nà kot kaj mẽ ixpyrà nē mẽ aprō hkêt nē ri apa rỳ mẽ amjên kêt nē ri apa nhũm ja inh̄mã mex nē. ⁹ No kot ka mẽ atō ra akurẽ japêr nē mãmri aprō rỳ mẽ amjên. Ja mãänēn tanhmã kute hkêt.

Mẽ pahte axpēn kaga hkêt ã mẽ pamã karō

Matêwre 5.31, 19.3-9; Makre 10.2

¹⁰ E kot paj hpãnhã ra mẽ ate axpēn to amjên nē axpēn to aprō xwỳnhjê mã ixkapêr. Nom kot paj amnhĩ krã hkôt tanhmã ixkapêr to hkêt nē. Pahihti Jejus Kris kapêr xà hkôt kot paj mẽ amã ixkapêr. Jakamã e kêr ka mẽ anijaja mẽ amjên kaga hkêt nē. ¹¹ Nom kot kaj mẽ tanhmã ajamaxpêr to nē hkaga japêr hãmri nē ahte ri apa nē axte nhãm mēhō ho amjên kêt nē. Rỳ tee ri amnhĩ kukamã ajamaxpêr nē mãmri akupỹm amjênta wỳr tẽ nē akupỹm hkôt ri apa. No kêr ka mẽ axte nhãm mēhō ho amjên kêt nē.

Nē ra mẽ amyjaja kêr ka mẽ ajaxwỳja ã amnhĩ nhĩpêx anẽ nē mẽ aprō kaga hkêt nē. E kêr ka mẽ ã amnhĩ nhĩpêx anhỹr o ri apa.

¹² Nē mẽ ate ixwỳr kagà mēnh̄ kamã axpēn tã ixkukjêrta kot paj hpãnhã mẽ amã harẽ. Na Pahihti Jejusja ja hã tanhmã inh̄mã nē hkêt nē. ãm amnhĩ krã hkôt kot paj mẽ amã tanhmã harēnh to ka mẽ inh̄ma.

Ka mẽ amyjê hõ ra Kris kôt amnhĩ xãm nom nhũm aprõ kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nê. Kê arĩ ri akôt pa. ¹³ Nê mẽ anijaja. Ka mẽ ajaxwỳja ra apê Kris kwỳ hã ri apa nhũm amjên kêp hkwȳ hkêt tã arĩ ri akôt pa hprãm nê arĩ ri akôt pa ka hkaga hkêt nê. ¹⁴ Kêp Kris kwỳ hkêt tã koja akôt Kris kwỳjê hkôt ri pa. Rỳ mẽ aprõ kêp Kris kwỳ hkêt tã koja akôt Kris kwỳjê hkôt ri pa. Jao Tĩrtũm kapêr mar o pa nê gaa nê apyrà nê hkôt amnhĩ xãm japêr. Nê mẽ akra kêp Kris kwỳ hkêt xwỳnhjaja haxwỳja mẽ akôt Kris kwỳjê hkôt ri pa nê Tĩrtũm kapêr mar o pa nê gaa nê akôt Jejus kôt amnhĩ xunhwỳr japêr.

¹⁵ Nom koja aprõ kêp Kris kwỳ hkêt ã kãm akaga hprãm nê rĩ tãm mãmri akaga. Rỳ amjên kêp Kris kwỳ hkêt ã kãm akaga hprãm nê rĩ tãm mãmri akaga. Kêr ka mẽ kot akaga nê tee ri kãm tanhmã akapêr to hkêt nê. Kwâr mãmri akaga ka ahte ajamakêtkati nê axãmnhĩx ri apa. Mẽ pajamakêtkati nê mẽ pamex nê ri papaja na Tĩrtũm kãm hprãm.

¹⁶ No koja amjên kêp Kris kwỳ hkêt tã kãm mẽ akaga hprãm kêt nê ka mẽ hkaga hkêt nê. Rỳ aprõ kêp Kris kwỳ hkêt tã ka mẽ kam hkaga hkêt nê. Koja arĩ ate amnhĩ nhĩpêx ã apumunh o ri akôt pa nê gaa nê rĩ apyrà nê Kris kôt amnhĩ xãm japêr. ¹⁷ Jakamã kot ka mẽ aprõ rỳ amjên ra Kris kôt ahte amnhĩ xãm. Hãmri nê wa arĩ ri axpên kôt ri apa ho apa. Na pa hte krĩ piitã hkôt Jejus kôt mẽ pahkwỳjê mã ã ixujarênh anhỹr o ri ixpa. Tã kêr ka mẽ ã amnhĩ nhĩpêx anhỹr o ri apa.

Kris kôt amnhĩ xunhwỳr kêt ri tanhmã mẽ pakute hã mẽ pajarênh

¹⁸ Ja pyrà nê kot kaj mẽ ra amy kwỳt kà jakàr japêr. Tã ra Kris kôt amnhĩ xãm nê arĩ arãhã ri apa. Rỳ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà? ¹⁹ Tĩrtũm na hte mẽ pahte amnhĩ my kwỳt kà jakàr ã mẽ pahpumunh kôt tanhmã mẽ pajarênh to hkêt nê. Rỳ mẽ pahte amnhĩ jakàr kêt ã mẽ pahpumunh kôt mããnên tanhmã mẽ pajarênh to hkêt nê. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to. ²⁰ Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteja arĩ rãhã ri papa. ²¹ Ka mẽ akwỳjaja ate nhãm mẽ kãm mẽ axàpênh o apa htã Jejus kôt amnhĩ xunhwỳ. Tã kêr ka mẽ mãmri mẽ kãm axàpênh o ri apa. Nom koja anhõ patrãwja amnhĩ nê mẽ ajano ka mẽ mãmri ma mra nê amnhĩ mã tanhmã axàpênh to ho ri apa.

²² Nê koja mẽhõ Kris kôt amnhĩ xãm. Tanhmãn kêp mẽ õ patrãw rỳ kot mẽ kãm mẽ àpênh xwỳnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tũm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhĩ nhĩpêx pix o pa pyrãk.

²³ Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nê. Mẽ mããnên Tĩrtũm kapêr kôt amnhĩ nhĩpêx o ri apa. ²⁴ Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rỳ mẽ pahte amnhĩ jakàr kêt.

Rỳ ra mẽ pahte nhãm mẽhõ mã paxàpênh o papa rỳ amnhĩ mã paxàpênh o papa.

Rỳ ra mẽ pahprõ nê ri papa rỳ mẽ pahprõ hkêt nê ri papa.

Pu mẽ pahte Kris kôt amnhĩ xunhwỳr kêt ri tanhmã mẽ pakuteta ãm arĩ rãhã hã ri papa. Jao Tĩrtũm kãm hprãm xà kôt pix mã amnhĩ nhĩpêx o ri papa.

Mẽ hprõ nê mẽ mjên kêt xwỳnhjê jarênh

Matêwre 19.10-12

²⁵ Nê mẽ ate ixwỳr kagà mênhta kamã na ka mẽ mããnên kormã mẽ hprõ hkêt xwỳnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhã nê hkêt nê. ãm pa kot paj ãm amnhĩ krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ÿ hã tanhmã mẽ amã mẽmoj tã karõ hto ho ri ixpa. Jakamã e mẽ inhã nê inhmar tỳx nê.

²⁶⁻²⁷ Nà ra mẽ kãm mẽ pahkurê xwỳnhjaja Kris ã mẽ pahtomnuj o pa jakamã koja ixpyrà nẽ mẽ hprõ hkêt rãhã mẽ pa xwỳnhjaja ahte ri pa nhũm ja mex nẽ. Nhũm mẽ umaj amnhĩ pix tãnopxar o ri pa. Nẽ mẽ aprõ xwỳnhjaja kêt ka mẽ kãm mẽ pahkurê xwỳnhjê pymaj mẽ aprõ kaga hkêt nẽ. ãm pix tãnopxar o ri apa.

²⁸ Tã kot ka mẽ atõ amã aprõ hprãm nẽ mãmri aprõ. Ja mãânẽn tanhmã ixpê kute hkêt. Nẽ mẽ anijaja mẽ amã amjên prãm nẽ mãmri amjên. Ja tanhmã ixpê kute hkêt. Nom kot ka mẽ akwỳjê pyrã nẽ aprõ rỳ amjên. Nẽ gaa nẽ akra. Hãmri nẽ tanhmã mẽmoj kute kamã ka tee ri wa mẽ amnhĩ kukamã ri ajamaxpêr o ri apa. Ja pymaj na pa hte mẽ amjên kêt nẽ mẽ aprõ hkêt ã mẽ amã awjarẽ.

²⁹ Nẽ Kris tokyx akupỳn mẽ pahwỳr wryk kaxyw jakamã kwa ra mẽ aprõ nẽ apa xwỳnhjaja. Kêt ka mẽ amnhĩ prõ nẽ amnhĩ kra pix kukamã ajamaxpêr o ri apa hkêt nẽ. Te ho mẽ hprõ hkêt nẽ mẽ pa xwỳnhjaja kot amnhĩ nhĩpêx pyrã nẽ Kris kutêp kumrêx mã ajamaxpêr pê tanhmã amnhĩ nhĩpêx to ho apa nẽ arĩ kormã aprõ nẽ akrajê ho hapu nẽ tanhmã mẽ kutã anojarêt to ho apa.

³⁰ Kris kot tokyx akupỳn mẽ pahwỳr wryk jakamã kwa mẽ ri amỳr o ri mẽ apa xwỳnhjaja. Kêt ka mẽ kutêp tee ri amnhĩ kaprĩ pix mã ajamaxpêr o akaprĩ nẽ ri apa hkêt nẽ. Nẽ mẽ akĩnh nẽ ri apikunhar o ri mẽ apa xwỳnhjaja kêt ka mẽ Kris kutêp amnhĩ kĩnh xà pix mã ajamaxpêr o ri apa hkêt nẽ. Nẽ ri mẽ axujaprõr o ri mẽ apa xwỳnhjaja kêt ka mẽ Kris kutêp tanhmã axujaprõr to pix kukamã ri ajamaxpêr kêt nẽ. ³¹ Nẽ mẽ apê mẽ ate mẽmoj to wênê ho ri mẽ apa xwỳnhjaja Kris kutêp ãm ri mẽ akukrêx pix kukamã ajamaxpêr kêt nẽ. Koja mẽ panhõ pika piitã hkôt mẽ pakukrêxja nẽ mẽmoj piitã arĩ rãhã hkêt nẽ. ³² Jakamã kot kaj mẽ akukrêx pix kukamã ajamaxpêr nẽ amnhĩ pix kukamã ajamaxpêr nhũm ja apê omnuj nẽ. Kris kwỳ pê mẽ hprõ hkêt xwỳnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa. ³³ No kêt ra mẽ hprõ nẽ mẽ pa xwỳnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. ³⁴ Mẽ kãm Tirtũm kapêr kôt amnhĩ nhĩpêx prãm tã no ãm mãânẽn kãm hprõ kapêr mar nẽ hkôt kãm tanhmã amnhĩ nhĩpêx to ho ri pa hprãm.

Nẽ mẽnijaja kot Jejus kôt amnhĩ nhĩpêx nẽ kormã mẽ mjên kêt xwỳnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nẽ ãm pix mã hamaxpêr o pa. Nẽ ãm hkôt pix mã amnhĩ nhĩpêx o pa. No ra mẽ mjên nẽ mẽ pa xwỳnhjaja na htem arĩ ri mẽ hikukrêx tãnopxar o pa. Nẽ mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nẽ Jejus kãm prãm xà hkôt pix mã amnhĩ nhĩpêx o pa?

³⁵ E ixte mẽ ato ajuta kaxyw na pa ã mẽ amã ixkapêr anẽ. Jakamã na pa mẽ ate mẽhõ ho aprõ nẽ mẽ akurê hkêt nẽ. ãm mẽ ate Tirtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nẽ kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwỳnhjê jarênh

³⁶ E kot paj hpãnhã mẽ ate mẽhõ ho aprõ mã xwỳnhjê mã ixkapêr ka mẽ ixkapêr ma. Nà kot kaj mẽ atõ ate ho aprõ mã xwỳnhta kukamã ajamaxpêr o:

—Nà kot paj ho ixprõ hkêt nẽ. Inhmã hkĩnh tỳx tã kot paj ho ixprõ hkêt nẽ. Kot paj ãm ixprõ hkêt nẽ ahte ri ixpa. Anẽ.

Hãmri nẽ ahte ri apa. Tã ra tee amnhĩ kurê kamã ama nẽ ajamaxpêr o:

—Hêxta waa nẽ. Mon pa pre ho ixprõ hkêt nẽ ahte ri ixpa? Anẽ.

Hãmri nẽ mãmri ma hwỳr tẽ nẽ kãm amnhĩ jarê nẽ ho aprõ. Ra ate aprõ hkêt nẽ ahte ri apa hã amnhĩ jarênh tã no ãm mãmri ho aprõ. Ja tanhmã kute hkêt kênã. ³⁷ Nom kot kaj ho aprõ hkêt ã amnhĩ jarê nẽ mãânẽn akurê hkêt nẽ ri apa. Hãmri nẽ mãmri ho aprõ hkêt nẽ ri ahte ri apa. Ja mãânẽn tanhmã kute hkêt. ³⁸ Kot ka ho aprõ nẽ war amex nẽ apa. Rỳ kot ka ho aprõ kêt nẽ mãânẽn amex kumrêx nẽ ri apa. Ja na mex o ate mẽhõ ho aprõ nẽ ho apata jakrenh.

Mē kēp mē mjên tyk xwỳnhjê jarēnh

³⁹ E kot paj hpānhā mē apē mē amjên tyk xwỳnhjê mā ixkapēr. Nà koja amjên arī htīr ri ka ām hkôt pix mā axkamē nē hkaga hkêt nē. No koja nhỹrmā apē ty hāmri ka tee ri amnhī kukamā ajamexpēr hāmri nē amā axte amjên prām nē māmri axte amjên. Nom kwa kêr ka mē amnhī pyrā nē Kris kôt akwỳjê hō pix o amjên. No mamri nhām mēhō ho amjên kêt nē. ⁴⁰ No kot ka mē axte amjên kêt nē ahte ri apa hāmri nē axāmnhīx ri ajamakêtkati nē apa. No na pa ām amnhī krā hkôt mē amā ā ja jarēnh anē. Mān Tīrtūm Karō mā määnēn ja mex nē.

8

Sānti hā mē apkur xà jarēnh

Rômān 14.13-23; Wam Korīt 10.14-22, 13.2; Karatas 5.13; Wam Pêtre 4.8; Wam Juāw 3.18

¹ Nē mē ate ixwỳr kagà mēnhata kamā na ka prem määnēn sānti hā mē apkur xà hā ixkukja. Tā kot paj mē amā tanhmā ja jarēnh to ka mē inhma.

Nà na hte Kris kôt pahkwỳ hkêt xwỳnhjaja mēmo karō ho sānti nhīpêx mā mēō hkwy nhīpêx nē hwỳr o mra. Hāmri nē hpar pē haxwỳ nē kutā hkōn krā ho rōrōk nē hkrī nē kām mex o mex ā harē nē kām amnhī jagrer pē amnhī to kuwỳ. Hāmri nē kām amnhī jagrer pa nē akupỳm amnhīm mēōta jamỳ nē ma o mra nē hkwyjê mā ho wēnê. Na htem ā amnhī nhīpêx anhỹr o pa. Tā na ka prem kagàta kamā mē ate mē kēp mēō japrōr nē hkur ā ixkukja. Nà ra mē ate sānti pumunh mex. Ām mē kot ihkra pix o hipêx ā omunh mex jakamā na pu htem hā pamā mē apkur xàta hkur prām nē māmri paxāmnhīx ri kuku. Ja tanhmā Tīrtūm pē kute hkêt. Ra mē pahte ja pumunh mex. Tā nom kwa kêr pu mē ja hā Kris kôt mē pahkwỳjê mā amnhī to jarkrar o ri papa hkêt nē. Nē ja hā mē kurom paxāhpumunh tỳx ā mē kām amnhī to jarkrar hkêt nē. Kot pu mē ā amnhī nhīpêx anhỹr o mē hamaxpēr o hihtỳx hkêt nē. Kêr pu mē ām mē kamā paxukapri pē tanhmā mē ho mex to ho papa. Nē Kris kôt mē hamaxpēr o hihtỳx o papa. Ā mē pa hte amnhī nhīpêxja na Tīrtūm kām hprām. ² No koja mēhō mēmoj pumunh tỳx ā amnhī to jarkrar o ri pa nē ām tee ri ā amnhī jarēnh anhỹr kaprỳ. ³ No koja mēhō āhpumunh tỳx kêt tā kām Tīrtūm kīnh nhūm amnhī tā omu nē kām hapê nē ho hkra. Kêt ja na mex o mex.

⁴ E kot paj ixpri hā mē amā tanhmā sānti hā mē apkur xàta jarēnh to ka mē inhma. Nà Mēpahpāmja pixii. Axtem hō hkêt. Nom mē kot sānti nhīpêxta ām mē kot ihkra o hipêx jakamā htīr kêt. Ra mē pahte ja jarēnh mar tỳx nē omunh mex. ⁵ Na htem ohtō nē ri sānti kēp Mēpahpām ā hkamnhīx o pa. Kaxkwa kamā mēmo karō nhīpêxja nē pika kamā mēmo karō nhīpêxja nhūm htem kēp Mēpahpām ā harēnh ho pa. Nom ja kot anhỹr kêt. ⁶ Mēpahpāmja ām pixi ho pixi mex. Mē panhō Tīrtūmja. Tām na pre mēmoj piitā ho kator pa. Jakamā na pu htem kapēr kôt pix mā amnhī nhīpêx o ri papa.

Nē mē panhō Pahihti haxwỳja pixii. Pahihti Jejus Krisja. Na pre Tīrtūm nhīhkō hā mēmoj piitā ho kator pa. Na pu htem ja hā omunh xà hkôt ri pamex nē ri papa. Ra mē pahte ja jarēnh mar tỳx nē omunh mex. Jakamā na pu htem paxāmnhīx ri mēmoj piitā hkur o papa. Tīrtūm kot mēmoj piitā ho kator par kēnā. ⁷ Tā no ām ham mē kot Kris kôt amnhī xunhwỳr xwỳnhjaja na htem mē pahkīnhā kām sānti hā mē apkur xà hkur puma nē. Ham mē kot sānti kaga nē amnhī kaxyw Kris kôt amnhī xunhwỳr jakamā kormā Tīrtūm kôt amnhī nhīpêx tohtuj anē. Jakamā na htem tee ri sānti hā mē apkur xàja pumu nē hamaxpēr o:

—Nà kot paj ja kur kêt nē. Kot paj anē nhūm apu Tīrtūmja pē ja omnuj nē. Anē.

⁸ Nom na kêt hte Tīrtūm mē paxāpkur xà hā mē pahpumunh kôt mē pahte amnhī to mex xwỳnh ā mē pajarēnh kêt nē. Kot puj mē mēmoj ku rỳ mēmoj kur kêt nē nhūm ja hā mē pahpumunh kôt tanhmā mē pamex ā pajarēnh to hkêt nē. Jakamā na pu htem māmri paxāmnhīx ri mēmoj tā mē apkur xà hkur o papa nē tanhmā amnhī to hkêt nē. ⁹⁻¹⁰ Nom kwa mē okora. Kêr ka mē sānti mā amnhī jarēnh xà hā ixkre hwỳr agiêx nē kamā axāpkur hkêt nē. Kot kaj mē atō ā amnhī nhīpêx anē nhūm mēhō kormā kot Kris kôt amnhī xām tohtuj anhỹr xwỳnhja ja hā mē apumu nē tee ri hamaxpēr. Axāhpumunh

tÿx ã ate amnhĩ jarënh tã sãnti nhõrkwÿ kamã axàpkur o nhÿ nhũm ja hã apumu nê tanhmã amnhĩ nhĩpêx to wehe? Koja ja kêp omnuj tã apyrà nê tẽ nê axà nê mẽ kutã apku. Hãmri nê apkur pa nê tee ri amnhĩ kukamã hamaxpêr o:

—Hêxta waa nê. Kwa mon pa axtem nê ri ã mẽmoija kur anê? Nà na pa anê nê ra amnhĩ tomnuj tÿx nê. Anê.

Hãmri nê hkaprĩ nê pa. ¹¹ Ate axàhpumunh tÿx ã amnhĩ jarënh tã amnhĩ kôt atõja mex kukamã ajamaxpêr kêt nê. Kris ra mÿrapê htyk tã nhũm ã ate sãnti hã mẽõ hkur ã apumu nê tee ri hamaxpêr o Jejus hkôt amnhĩ nhĩpêx mex kêt nê. ¹² Kormã kot Kris kôt amnhĩ xãm tÿx kêt tã tee ri ja hã mẽ apumu nê hamaxpêr mex kêt nê. Jakamã ka Kris noo mã amnhĩ tomnuj nê. ¹³ Tã ã ixte Kris kôt ixkwÿjê nhĩpêx anhÿr pymaj koja ixtõjê hõ kãm mẽmoij kur pyma nê. Nê htÿx ho Tirtũm kêp omnuj ã hkamnhĩx. Pa ja hã omu nê ijaxwÿja axte hkur kêt nê. Ixte mex ã omunh tã no ãm kot tee ri ja hã ixpumunh nê hamaxpêr o:

—Kwa Tirtũm kêp ja mex kêt tã nhũm Pawreja ri kuku. Jakamã kot paj ijaxwÿja uràk nê kuku. Omnuj tãã.

Anhÿr o hamaxpêr pymaj kot paj uràk nê mẽmota kur kêt nê. Na pa hte ã Kris kôt ixtõjê mex kukamã ri ijamaxpêr anhÿr o ixpa.

9

Pawre kot amarĩ Tirtũm kapêr o mẽ ahkre hã amnhĩ jarënh

Atre 9.1-18, 20.33-35; Sikũn Korît 11.7-9

¹ Nê ixte Jejus nhÿ hã mẽ ahkre ho mẽ pa xwÿnhjê hõ jakamã na pa hte Tirtũm kapêr o mẽ ajahkre ho ri ixpa. Na pa pre inhno ho mẽ panhõ Pahihti Jejus pumu nê mẽ amã harënh o ri mẽ akôt ixpa ka prem inhma nê hkôt amnhĩ xunhwÿ. ² Mẽ hkwyjaja kot axpên mã ixpê Jejus nhÿ hã mẽ ahkre xwÿnh kêt ã ijarënh tã mẽ kajaja mẽ ate ja hã ixpumunh mex. Ixte mẽ amã mẽ ujarënh mexja jarënh nhũm mẽ ate mar nê hkôt amnhĩ xunhwÿrja kukwak ri na ka mẽ apê Jejus kwÿÿ. ³ Jakamã koja mẽ atã ixto kapêr japêr kot paj ã mẽ kãm mẽ ajarënh anê. ⁴ Nê ixte Jejus nhÿ hã kapêr jahkre o ixpa xwÿnh jakamã kot paj inhmã Kris kwÿjê kutã amarĩ ixàpkur prãm nê mãmrĩ mẽ kutã apku. Ja tanhmã kute hkêt tã kot paj ã amnhĩ nhĩpêx anhÿr kêt nê. Kot paj ixàpkur kaxyw nê amnhĩ pãnhã amnhĩre nê rĩ kormã apku. Na pa hte ã amnhĩ nhĩpêx anhÿr o ri mẽ akôt ixpa. ⁵ Rÿ kot pa ixkwÿjê pyrã nê inhmã Kris kôt ixkwÿjê hõ ho ixprõ hprãm nê mãmrĩ ho ixprõ. Nê wa ma krĩ piitã hkôt Kris kwÿjê kukwak ri ixàpkur o ixpa hprãm nê wa mãmrĩ ã amnhĩ nhĩpêx anhÿr o ixpa. Ja mex kênã. Na hte ã Simãw Pêtre mẽ Jejus tõ kot hapujaja amnhĩ nhĩpêx anhÿr o pa nhũm ja tanhmã kêp kute hkêt. No ãm mẽ hkĩnhã ixprõ hkêt na pa hte ri ixpa.

⁶ Nê ixkwÿjaja na htem apkur xà hpãnhã àpênh o pa hkêt nê. Na htem Jejus nhÿ hã kapêr jarënh o ri pa nhũm hte Jejus kwÿjaja mẽ kãm mẽ apkur xà gõ nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhÿr kêt nê. Na pa hte wa mry kà ho ixkre nhĩpêx nê mẽ kãm ho wênê nê hpãnhã amnhĩm awjaprõ. Na pa hte wa ã amnhĩ pa kukwak ri ixujaprõr nê ho ixàpkur o ri ixpa anê.

⁷ Mẽ kãm pur kãm harõj jamÿnh o mẽ pa xwÿnhjaja na htem amarĩ hkwyj jamÿ nê ho apkur o pa. Nê motre jamãr o mẽ pa xwÿnhjaja haxwÿja amarĩ hkà kagõ janê nê ho hkõm o pa. Nê pôristijaja na hte mẽ õ pahija mẽ àpênh pãnhã mẽ kãm amnhĩrer o pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrã nê te ixpê mẽ amã ixàpênh o ixpa xwÿnh pyrãk jakamã ixte mẽ ajahkreta pãnhã kot ka mẽ inhmã inhõ ho apa nhũm ja mãänën mex nê. ⁸ No ãm papxipix na pa hte ja mex ã harënh kêt nê. Tirtũm kapêr ã kagà htũm haxwÿja kot ja mex ã harënh. ⁹ Kamã na pre finat Mojesja Tirtũm nhÿ hã harënh kot:

Koja akrit amã àpênh o pa ka omu nê ho mex nê. Kãm õ mex nê.

Anhÿr o kot harënh. Xà na pre Tirtũmja ãm mẽ pahkrit pix kukamã ukaprĩ nê ã harënh anê nà? Nà kot anhÿr kêt. ¹⁰ Mãänën mẽ pahpê panhĩ kaxyw na pre ã ja jarënh anê.

Mē pahte mē hpur kām paxàhkre xwỳnhjaja nē mē pahte kamā paxujamỳnh o papa xwỳnhjaja. Jajē kaxyw mē pahte pur kukwak ri amarī paxàpkur o ri papa kaxyw ã pre ã ja jarēnh anē. ¹¹ Tã ja pyrà nē na pa hte mē awỳr mō nē mē amā Tĩrtũm kapēr jarēnh o ri mē akõt ixpa. Nē mē akõt ho mē ajahkre ho ri ixpa ka htem inhmā ixàpēnh ta pãnhã amnhĩrer kēt nē. Ixkwỳjaja kot Tĩrtũm kapēr o mē ajahkre hpãnhã mē ate mē kãm amnhĩrer tã pa inhmā amnhĩrer kēt nē. Na pa pre mē ajahkreta pãnhã mēmoj tã mē awỳr kēt nē. ãm nhãm ixàpēnh òta kukwak ri na pa hte ixàpkur o ri ixpa.

¹² Nē na hte mē ixkwỳjaja mē awỳr mra nē Tĩrtũm kapēr o mē ajahkre o ri mē akõt pa. Hãmri nē hpãnhã mē apkur xà hã mē awỳ ka mē kãm mēmoj gō. No kēt pa na pa hte mē uràk nē ixàpkur xà hã mē awỳr kēt nē. Kot pa apu hã mē awỳ ka mē tanhmã ixto akapēr to nē axpēn mã ijarēnh o:

—Pēr ãm mē pahte kãm amnhĩrer pix kaxyw na hte Pawre mē pahwỳr mra nē mē pamã Jejus Kris kot tanhmã mē panē amnhĩ nhĩpēx to hã harēnh o pa. Pēr ãm apkur xà pix prãm xàj ã kot mē pamã ujarēnh anhỳr o pa. Jakamã kot puj mē kuma nē ãm kuma.

Anhỳr o axpēn mã ijarēnh pymaj na pa hte mē ajahkre hpãnhã mēmoj tã mē awỳr kēt nē. Na pa hte ãm mry kà ho ixkre nhĩpēx nē ho wēnē nē ja pix kukwak ri ixàpkur o ri ixpa. Nē amarī ri mē ajahkre ho ri mē akõt ixpa.

¹³ Nē Tĩrtũm mã amnhĩ jarēnh xà hã ixkre kamã mē àpēnh xwỳnhjaja na htem hwỳr mē mrrar xwỳnhjaja mē àpēnh pãnhã mē kãm amnhĩre. Nē mē kot mē kãm Tĩrtũm mã mēmoj nhōr o kuhē xwỳnhjaja na htem mãānēn mē àpēnh pãnhã mē kãm amnhĩre. ¹⁴ Nē Pahihti Krisja na pre ja hã mē pakukamã pahtã karō kot:

—Kēr ka mē kot tanhmã mē amā ijarēnh to ho ri mē pa xwỳnhjē mã amnhĩrer o ri apa. Anē.

¹⁵ Tã no na pa hte aa mēmoj tã ixàhwỳr kēt nē. Nē mē ate inhmā amnhĩrer kaxyw pa mē amā ja jarēnh kēt nē. Aa ixte mēmoj tã mē awỳr kēt. Kot paj apu anē nē ixpijaam nē. Rỳ kot pa apu anē nē mē akukwak ri ixàpkur o ri ixpa hãmri nhũm mē akwỳjaja ja hã ixpumu nē hã ijarēnh o:

—Tk. Na hte amarī mē pajahkre o ri pa hkēt nē. ãm mē apkur xà pix prãm xàj na hte ã mē pajahkre ho pa anē. Anē.

Jakamã na pa hte mēmoj tã mē awỳr kēt nē. ¹⁶ Ixte mē amā mē ujarēnh mexja jarēnh o ri ixpa htã na pa hte ja hã amnhĩ to jarkrar o ri ixpa hkēt nē. Pahihti Jejus na pre ja hã inhmã karō pa hte kãm ho anhỳr o ri ixpa. Kot paj kãm ho anhỳr kēt nē ixpunuj nē ri ixpa. ¹⁷ Kēp ãm amnhĩ krã hkõt mãn tanhmã mē amā ixujarēnh to ho mē akõt ri ixpa ronhỳx pa hpãnhã ixàmnhĩx kàxpore hã mē awỳ. No ãm ã ixte amnhĩ nhĩpēx anhỳr kēt. Tĩrtũm tãm kot inhmã ja hã karō jakamã na pa hte amarī ixàmnhĩx ri mē amā kapēr jarēnh o mē ajahkre ho ri mē akõt ixpa nē mēmoj tã ixàhwỳr o ri ixpa hkēt nē. ¹⁸ Ixte amarī ri mē amā mē ujarēnh mexta jarēnh o ri ixpaja na inhmã hprãm. Ja na inhmã mex. Na pa hte ã amnhĩ nhĩpēx anhỳr o ri ixpa nhũm ja inhmã mex pa ixkĩnh nē ri ixpa. Jakamã na pa hte hpãnhã ixàhwỳr kēt nē. Nē inhmã mēmoj prãm o ri ixpa hkēt nē. ¹⁹ Nē nhãm mē kãm tanhmã ixàpēnh to ho ixpa hkēt tã pa hte mē piitã tanhmã mē kãm amnhĩ nhĩpēx to ho ri ixpa. Pē mē kãm Jejus kapēr jarēnh o ri ixpa. Jakamã na mē ra ohtō nē ixujarēnh ma nē amnhĩ kaxyw Jejus kōt hamaxpēr nē hkõt amnhĩ xunhwỳ.

Pawre kot tãm mē piitã mē hipēx o pa hã amnhĩ jarēnh

Wam Korīt 10.33

²⁰ Nē na pa hte Ijaewjē hwỳr ixpa nē mē kot amnhĩ nhĩpēx kōt amnhĩ nhĩpēx o ri mē hkõt ixpa. Ixte mē kurom Tĩrtũm kot finat Mojes mã mēmoj tã karō hkõt amnhĩ nhĩpēx o ri ixpa hkēt tã mē hkõt ri ixpa nē mē uràk nē hkõt amnhĩ nhĩpēx o ri ixpa. Mē kot ja hã ixpumunh nē ixte mē kãm Jejus jarēnh mar nē ixpyrà nē amnhĩ kaxyw hkõt hamaxpēr kaxyw.

²¹ Tã pa hpãnhã mē kēp Ijaew kēt xwỳnhjē hwỳr ixpa nē mē kot amnhĩ nhĩpēx kōt amnhĩ nhĩpēx o ri mē hkõt ixpa. Mē kot ja hã ixpumunh nē ixkapēr mar nē ixpyrà nē amnhĩ kaxyw Jejus kōt hamaxpēr kaxyw. Tĩrtũm mē Kris wa hamaxpēr xà hkõt na pa

hte ahpÿnhã mẽ kot amnhĩ nhĩpêx xwÿnhjê hwÿr mra nê ã amnhĩ nhĩpêx anhÿr o ri mẽ hkôt ixpa.

²² Nê na pa hte kormã mẽ kot Kris kôt amnhĩ xunhwÿr tohtuj anhÿr xwÿnhjê hkôt ri ixpa nê te ixte ho mẽ uràk nê kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nê ixkapêr mar nê hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nê mẽ hkôt amnhĩ nhĩpêx o ri ixpa anê. Mẽ kot ja hã ixpumunh nê inhmar nê ixpyrà nê Kris kôt amnhĩ nhĩpêx tÿx kaxyw. ²³ Mẽ kot mẽ ujarênh mex mar kaxyw na pa hte mẽ piitã mẽ hkôt ã amnhĩ nhĩpêx anhÿr o ri ixpa. Tĩrtũm kot mẽ ho hkra nê mẽ ho mex kaxyw. Nê määnên pa kot mẽ hã ixto mex kaxyw.

*Pawre kot htÿx ri amnhĩ nhĩpêx kêt ã kot amnhĩ jarênh
Sikũn Ximotre 4.7; Eprêw 12.1-3*

²⁴ Mẽ hprôt xwÿnhjaja na htem hprôt tÿx no nhũm mēhō pixi nê wam hkwÿjê re nê wam tēn pōj nhũm htem ja hã omu nê kãm mẽ hkĩnhxà gō. Ja pyrà nê kēr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nê nhÿrmã ja pãnhã mẽ amã mẽmoj mex gō.

²⁵ Nê mẽ hprôt xwÿnhjaja na htem mẽ hkĩnhxà hpyr prãm xàj mẽ hprôt xà hã arĩgro hwÿr apkati mẽ hprôt o kuhê. Prôt tÿx prãm xàj. Tã mẽ hprôt xà hã arĩgrota ã nhũm hkwÿjê pē amnhĩ to wa nê amnhĩm hkĩnhxà py. Nom koja hkĩnhxàja kritpēm kãm mex ry hkêt nê. Kojã gaa nê hapêx tokyx anê. Tã nom kot puj mẽ Tĩrtũm kapêr kôt amnhĩ nhĩpêx mex o ri papa. Nê mẽ hprôt xwÿnhjê kot hkĩnhxà hpyr prãm xàj apkati mẽ hprôt o kuhêta pyrà nê apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nê nhÿrmã mẽ pamã hkĩnhxà mex õ gō. No ãm jar hkĩnhxà kurom koja aa mẽ pahpê hapêx kêt nê. Kojã mẽ pamã mex rãhã ho rãhã.

²⁶ Nê na hte mẽ hprôt xwÿnhjaja htÿx ri tanhmã hprôt to ho pa hkêt nê. Na htem hkwÿjê pē amnhĩ to wa kaxyw hprôt nê nhÿri mẽ àhuk xàta pix pumunh pē hwÿr hprôt nê mra hãmri nê kamã ahtwÿ. Nê kamã àhuk pix kukamã hamaxpêr o hprôt tÿx nê mra. Ja pyrà nê na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhÿrmã kot inhmã mẽmoj mex nhōr kaxyw.

Nê mẽ pijapu mex xwÿnhjaja na htem htÿx ri nhÿhÿnh axpēn tak kêt nê. Na htem nhÿhÿnh kot mẽ htak o mẽ rēnh xà pix kamã mẽ htak o mẽ rēnh kukamã hamaxpêr pē kamã mẽ htak. Ja pyrà nê na pa hte ixtÿx ri tanhmã amnhĩ nhĩpêx to ho ri ixpa hkêt nê. Na pa hte Tĩrtũm mã ijamaxpêr pē tanhmã amnhĩ nhĩpêx to rãhã ho ixpa. Kot nhÿrmã inhmã mẽmoj mex nhōr kaxyw. ²⁷ No na pa hte ixtÿx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nê. Kot pa ã amnhĩ nhĩpêx anê nê ixte mẽ kãm Jejus kapêr jarênh o ri ixpa htã ãm ri ixtÿx ri ã amnhĩ nhĩpêx anhÿr kaprÿ nhũm Tĩrtũmja tee ri ja hã ixpumu nê inhmã mẽmoj mex nhōr kêt nê.

10

*Ijaew kot amnhĩ nhĩpêx
Rômãn 15.4; Eprêw 3.8-11; Jutre 5*

¹ E Kris kôt ixkwÿjaja. Kot paj mẽ amã amnepê mã mẽ ixpê Ijaew hkukamã mẽ inhĩgêtjaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwÿnhjaja kot paj mẽ amã harê. Mẽ pahte mẽ uràk nê pahtÿx ri amnhĩ nhĩpêx pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtÿx japêr. Na prem piitã pika pē Ejit kamã pa htã kurũm kator pa. Hãmri nê ma kapôt ã kakrã pumunh o hkôt pa ho pa. Pry hkêt jakamã nhũm pre Tĩrtũm tanhmã kakrã hto nhũm ma mẽ hkukamã pa nhũm mẽ omu nê hkôt pa. Hãmri nê ra gō xujanār mẽ kot kãm: “Gō kamrêk” anhÿr xwÿnhja wÿr pōj nê tee ri rêr prãm xàj amnhĩ kukamã hamaxpêr. Hãmri nhũm Tĩrtũm mẽ kãm hkôt ã ho amgrà nhũm mẽ hkôt mex pē rêr pa nê axte kakrã hkôt pa ho pa. ² Finat Mojes kot mẽ o pa jakamã nhũm prem kēp hkwÿ hã amnhĩ jarê nê kãm amnhĩ jarênh o:

—Nà kot paj mẽ akapêr ma nê akôt ri amnhĩ nhĩpêx o ixpa. Anê.

Te mẽ pahpê Kris kwỳ hã amnhĩ jarênh kaxyw mẽ kot gôx kãm mẽ pahkrã kumrêx nhũm mẽ pahte Kris mã amnhĩ jarênhhta pyrãk. ³ Na prem kapôt ã ri pa nhũm Tĩrtũm tãm kaxkwa rũm mẽ hwỳr mẽ apkur xà rê nhũm mẽ hkawrà nê ho apkur o pa. ⁴ Tã ra kôr xaj hirot nhũm Tĩrtũm tanhmã mẽ kãm kên prêkja to nhũm kurũm mẽ kãm gô axkapĩ nhũm mẽ ho ixkô nê akupỹm hihtỳx. ã Krisja mẽ hkôt mẽ ho mẽ hihtỳx o pa anê. Mẽ kot no ho omunh kêt tã nhũm mẽ hkôt mẽ ho mẽ hihtỳx o pa.

⁵ Tã no nhũm mẽ ohtô nê Tĩrtũm kôt amnhĩ nhĩpêx kêt nê. Kot mẽ ho mex kumrêx tã nhũm mẽ ãm amnhĩ tã omu nê ãm omu nê kapêr kôt amnhĩ nhĩpêx kêt nê. ãm kapêr kwỳm ri tanhmã amnhĩ tomnuj to ho pa nhũm tee ri amnhĩ tã mẽ omu nê tanhmã mẽ ho nhũm mẽ hkwỳja hpikaprãr pa. Hãmri nhũm arĩ mẽ htĩr xwỳnhjaja kapôt ã mẽ hagjênh pa nê axte ma pa.

⁶ Jakamã kwa kêr pu mẽ kot ã amnhĩ nhĩpêx anhỳr ã mẽ harênh ma nê hã pano htỳx nê ho papa hãmri nê ho mẽ uràk kêt nê. Mẽ uràk nê pahtỳx ri tanhmã amnhĩ nhĩpêx to ho ri papa hkêt nê.

⁷ Nê na pre mẽ hkwỳjaja sãnti kutã hkôn krã ho rôrôk nê hkrĩ nê kãm amnhĩ jagrer pê amnhĩ to kuwỳ. Tĩrtũm kapêr ã kagã htũm kot mẽ kot amnhĩ nhĩpêx anhỳr ã mẽ harênh kot:

Na prem sãnti kutã apkur o hkrĩ nê kãm amnhĩ jagrer o hkrĩ nê gaa nê pipãnh pix o pa.

Jao xepên kamã hpijaàm kêt o pa.

Anhỳr jakamã kwa kêr pu mẽ ã mẽ kot amnhĩ nhĩpêx anhỳrja ã pano htỳx nê ho mẽ uràk hkêt nê.

⁸ Nê na pre mẽ hkwỳjaja htỳx ri mjên nê hprô kuhpa hã nhãm ri mẽ kamã hpijaàm kêt o pa. Mỳrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tĩrtũm kot mẽ panhĩpêx anhỳr pymaj kêr pu mẽ ja hã pano htỳx nê ho mẽ uràk kêt nê. ãm kwarĩ ho kwarĩ.

⁹ Nê na pre mẽ hkwỳjaja axtem nê htỳx ri tanhmã axpên mã Tĩrtũm jarênh to nê harênh o:

—Nà Tĩrtũmja gryk tokyx anhỳr kêt jakamã kwa pu mẽ ã amnhĩ tomnuj anhỳr o papa. Koja mẽ pahpumu nê tanhmã mẽ pahto hkêt nê.

Anhỳr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwỳr kagã xoprê nhõ wenên xihtỳx kwỳ rê nhũm mẽ hwỳr mra nê mẽ hkamnhar o mẽ hkwỳjê pa. Tã ã kot mẽ panhĩpêx anhỳr pymaj kwa kêr pu mẽ ja hã pano htỳx nê mẽ uràk nê amnhĩ tã Tĩrtũm kamã pajamak o papa hkêt nê. Kwarĩ ho kwarĩ.

¹⁰ Nê na pre mẽ hkwỳjaja axtem nê Tĩrtũm o kapêr punuj nê nhũm tee ri amnhĩ tã mẽ kuma nê mẽ hwỳr kapêr o wrỳk xwỳnh mẽ nhũm ma mẽ hwỳr wrỳ nê ã hã mẽ hkwỳjê nhĩmex. Tã ã kot mẽ panhĩpêx anhỳr pymaj kwa kêr pu mẽ ja hã pano htỳx nê ho mẽ uràk nê Tĩrtũm o pakapêr punuj kêt nê.

¹¹ Na pre mẽ ixpê Ijaew nhĩgêjtaja ã htỳx ri amnhĩ nhĩpêx o pa anê. Tĩrtũm kapêr ã kagã htũm kot ã mẽ kot amnhĩ nhĩpêx anhỳr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh mar tỳx nê mẽ uràk nê ã amnhĩ nhĩpêx anhỳr kêt kaxyw. Ra Jejus akupỹn mẽ pahwỳr wrỳk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nê amnhĩ to htỳx ã mẽ pamã karõ

Matêwre 4.1, 6.9-13; Wam Korîť 1.8; Sikũn Pêtre 2.9; Jutre 24

¹² Tã kêr ka mẽ ã Ijaew kot amnhĩ nhĩpêx anhỳr ã mẽ harênhja ma nê ã ajamaxpêr anhỳr kêt nê. Rỳ mẽ ajamaxpêr o:

—Nà mẽmoj piitã kutã ixihtỳx kênã kot pa hkêt mẽ uràk nê ã amnhĩ nhĩpêx anhỳr o ri ixpa.

Anhỳr o mẽ ajamaxpêr kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

¹³ Nê na prem kapôt ã pare ri omnuj nê ri pa. Nhũm mēkarōmnuti tanhmã mē hkrã hto nhũm mē tanhmã amnhĩ tomnuj to ho pa. Ja pyrã nê na hte arĩ mē pahte amnhĩ tomnuj hprãm xàj tanhmã mē pahkrã hto ho pa. Mē pahpiitã ã mē pahto anhÿr o ri mē pahkôt pa. Nom nhũm Tirtũm ra kot mē pamã amnhĩ jarēnh xà hkôt mē panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamexpēr nhũm ja hã mē pahpumu nê mē panê mēkarōmnuti mã kapēr. Nê kutã mē pahto paxihtÿx nê pu mē ÿ hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mē kot sãnti mã mēmoj nhõr xwÿnhjê jarēnh

Wam Korit 8.1-13; Karatas 4.8; Apokarip 9.20

¹⁴ Jakamã e Kris kôt ixkwÿjaja. Kêr ka mē amnhĩ kaxyw sãnti hkôt ajamexpēr o ri apa hkêt nê. Nê amnhĩ to hwÿr kêt nê. ãm kwarĩ ho kwarĩ.

¹⁵ E mē axàhpumunh tÿx ã amnhĩ jarēnh jakamã kot paj mē amã mēmoj jarē ka mē aprĩ hã inhmar tÿx japēr. ¹⁶ Nã na pu htem tōhã Jesus kot mē panê htyk mã pajamexpēr kaxyw axpēn wÿr akuprō. Hãmri nê mēmo kagô hkwÿ ru nê Tirtũm mã mex ã harē nê mēmoj o pahkôm pē Jesus kot mē panê hkamrō pikapĩr mã pajamexpēr. Nê hpãnhã pãwti hõ py nê axpēn mã ho hkry nê mē kot Kris pĩr nê ĩ kamã hkamnhwÿr nhũm mē panê htykja mã pajamexpēr pē kuku. ¹⁷ Pãwtita ãm pixire htã pu htem axpēn mã ho hkry nê pahpiitã kuku. Mē pahpē Kris kwÿ hã mē pahte amnhĩ jarēnh nhũm mē pahkwÿ kot ja hã mē pahpumunh kaxyw. Te mē pahtipxi nê ri mē papa pyrãk nê pãwti pixire htã pu mē pahpiitã kuku.

¹⁸ E kot paj hpãnhã mē amã amnepê mã Ijaew kot tanhmã amnhĩ nhĩpêx to jarē ka mē inhma. Na pre htem Tirtũm mã mex ã harēnh nê kãm amnhĩ nhõr ã kot amnhĩ tã mē omunh kaxyw nhũm prem tanhmã amnhĩ nhĩpêx to. Jao kãm mē apkur xà hkwÿ gō nê kãm mex o mex ã harē. Hãmri nê amnhĩ mã mēmojta kwÿ xà nê hkur o hkrĩ. Jao ra Tirtũm mã mex o mex ã harē nê kãm kēp hkra hã amnhĩ jarē.

¹⁹ Nom mē kot sãnti mã mēmoj nhõr xwÿnhjaja na htem kãm mēmo mē apkur xà hkwÿ gō nom ãm kãm òr kaprÿ. Tanhmã kot we amnhĩ to nê amnhĩ tã mē omu? Mo rĩt kaxyw no? ãm mē ĩhkra ho mē kot amnhĩm hipêx kēnã. Jakamã na htem ãm kãm mē apkur xà hkwÿ nhõr kaprÿ. ²⁰ Mē kot sãnti mã mēmoj nhõr xwÿnhjaja na htem Tirtũm mã òr kêt nê. Mēkarōmnuti mã na htem kugō. Jakamã kot kaj mē urãk nê sãnti mã mēmoj gō nê apē mēkarōmnuti hkwÿ hã amnhĩ to amnhĩrĩt nê apē hkwÿ hã ri apa. Jakamã mē ate sãnti mã mēmoj nhõrta na inhmã hprãm kêt kumrēx. ²¹ Kot kaj mē panhō Pahihti Jesus kot mē panê htyk ã mēmoj kagô hkwÿ ho ixkō hãmri nê ma mra nê hpãnhã sãnti pē mēkarōmnuti hã mēmoj to ixkō. Hãmri nhũm Tirtũmja tee ri ja hã mē apumu nhũm ja kēp omnuj tÿx nê. Rÿ ka mē Pahihti Jesus kot mē panê htyk ã pãwti hkwÿ hku nê hpãnhã ma mra nê sãnti pē mēkarōmnuti hã mēmoj hku. Hãmri nhũm Tirtũm kēp ja omnuj tÿx nê. Mē pahte ã amnhĩ nhĩpêx anhÿrja na axpēn kuhpa hã. ²² Jakamã kot ka mē ã amnhĩ nhĩpêx anē nê te ra mē amã mēkarōmnuti hkĩnh nê mããnēn amã Tirtũm kĩnh pyrãk o amnhĩ nhĩpêx. Nê te Tirtũm kurom mē kajaja mē axàhpumunh tÿx pyrãk o amnhĩ nhĩpêx. Nhũm tee ri amnhĩ tã mē apumu nê mē akamã gryk tÿx nê. Kwa mē okora. Koa Tirtũm akamã gryk ka amex kêt kumrēx.

Mē pamã Kris kôt mē pahkwÿjê hkĩnh pē mē ho mex ã mē pamã karō

Matêwre 20.28; Rõmãn 14.1-15.7; Piripos 2.1-4

²³ Nê na htem tōhã amnhĩ jarēnh o:

—Nã kot pa inhmã mēmoj to anhÿr prãm nê ixãmnhĩx ã amnhĩ nhĩpêx anhÿr o ri ixpa. Anē.

Tã no ãm mēmoj piitã mē pamã mex kêt. Na htem kãm mēmoj to anhÿr prãm xà hkôt mēmoj piitã tanhmã ho ho ri pa nê tanhmã amnhĩ tomnuj to. Hãmri nhũm mē hkwÿjaja ja hã mē omu nê mē urãk nê tanhmã ri amnhĩ tomnuj to. Jao Kris kôt amnhĩ xunhwÿr tÿx kêt nê. ²⁴ Jakamã kwa kêr pu mē amnhĩ pix kukamã pajamexpēr pē tanhmã amnhĩ

nhīpêx to ho papa hkêt nê. Määnên amnhī kwỳjê hkukamā pajamxpêr pê tanhmā mẽ ho mex to ho ri papa pê tām ri amnhī nhīpêx o papa.

²⁵ Nê kot kaj mẽ amnhī xàpkur xà japrôr kaxyw ma nhỹhỹm mra nê māmri axàmnhix ri amā mẽmoj prām xà hkôt mẽmoj japrô. Nom kêr ka mẽ axujaprôrja kêp sânti xàpkur xà hã mẽ hkukjêr kêt nê. Ām axàmnhix ri mẽ kêp mẽmoj japrôr o ri apa. ²⁶ Tirtũm kapêr ā kagà htũm kot ja jarênh kot:

Pika piitā hkôt mẽmoj piitā kêp Tirtũm nhõ na. Anê.

Jakamā mẽ māmri axàmnhix ri mẽmoj piitā haprô nê mẽmoj piitā hkur o apa.

²⁷ Tã koja mẽ kêp Kris kwỳ hkêt xwỳnhjê hõ ate kutā axàpkur kaxyw amnhī wỳr awỳ ka amā hwỳr amõr prām nê māmri ma hwỳr mõ. Nhũm mẽmoj to amā anhõ ka axàmnhix ri māmri aku. No ri tee ri amnhī kukamā ajamxpêr nê tanhmā hã hkukjêr to hkêt nê. Rỳ kām:

—Kwa xà we mryja sânti hã mẽ apkur xà na nà?

Anhỹr o hã mẽ hkukjêr kêt nê. Ām māmri axàmnhix hkur o akrĩ. ²⁸⁻²⁹ Nom koja Kris kôt mẽ kot amnhī xām tohtuj anhỹr xwỳnhjê hõ mẽ awỳr axà nê tee ri ja hã apumu nê amā:

—Kwa sânti hã mẽ apkur xà na ka ri mẽ kutā hkur o akrĩ.

Anhỹr o amā kapêr ka ama nê hkaga kurê kumrêx nê hkur kêt nê. Amā mex tã Kris kôt atõja kêp omnuj jakamā ka hkaga nê hkur kêt nê. No kot ka ām ama nê arĩ hkur o anhỹr japêr. Kot amā harênh xwỳnhhta kêp omnuj tã ka arĩ noo mã hkur japêr. Nhũm ja hã apumu nê tee ri Tirtũm kapêr kukamā tanhmā hamxpêr to. Hāmri nê apyrà nê kuku nê gaa nê tee ri amnhī kukamā hamxpêr nê amnhī mã:

—Hêxta waa nê. Sânti nhõja mex kêt tã pa ri kuku. Kwa na pa pêr hkurja o amnhī tomnuj nê. Hêxta waa nê. Anê.

Hāmri nê tee ri amnhī kukamā hamxpêr o hkapri nê. Ā kot amnhī nhīpêx anhỹr pymaj koja mẽhõ ā mẽmo mẽ apkur xà nê amā kapêr anê ka ama nê hkaga kurê kumrêx. Jao amnhī pix kukamā ajamxpêr kêt nê. Määnên Kris kôt atõ nê atõxjê mex kukamā ajamxpêr. Nom koja amā kêp sânti hã mẽ apkur xà hã harê ka ama nê ā ajamxpêr anhỹr japêr nê ajamxpêr o:

—Nà kêp omnuj tã kot paj mamri kuku. Ja inhmā mex kênā. ³⁰ Ra ixte Tirtũm mã harênh nê ixàmnhix hkur o inhỹr kênā kot kêt ā nê inhmā kapêr anê. Anê.

Kwa mẽ ā ajamxpêr anhỹr kêt. Kot kaj mẽ ā ajamxpêr anê hāmri nê Kris kôt atõ rỳ atõx mex kukamā ajamxpêr kêt nê.

³¹ Jakamā kêr ka mẽ tām tanhmā amnhī nhīpêx to ho ri apa. Nê axàpênh mex nê. Kêr kê mẽ piitā ja hã mẽ apumu nê mẽ apumunh kôt amnhim Tirtũm mex ā harê. ³² Nê kêr ka mẽ piitā mẽ noo mã tām ri amnhī nhīpêx o apa. Ijaew noo mã nê Ijaew kêt xwỳnhjê noo mã. Nê Jesus kwỳjê noo mã. Mẽ piitā mẽ noo mã tām ri amnhī nhīpêx rãhã ho ri apa. Mẽ kot tee ri mẽmoj tã mẽ apumunh nê hpijaàm pymaj ka mẽ tām ri mẽ piitā mẽ noo mã tanhmā amnhī nhīpêx mex to ho ri apa. ³³ Na pa hte ā amnhī nhīpêx anhỹr o ri ixpa. No na pa hte pa amnhī pix kukamā ijamxpêr kêt nê. Mẽ piitā mẽ mex kukamā na pa hte ijamxpêr o ri ixpa. Pê tanhmā amnhī nhīpêx to ho ri ixpa. Mẽ kot ja hã ixpumunh nê ixpyrà nê Jesus kôt amnhī xunhwỳr nê ām kôt pix mã ri amnhī nhīpêx o pa kaxyw.

11

¹ Na pre hte Kris ā ā amnhī nhīpêx anê nê mẽ piitā mẽ mex kukamā hamxpêr rãhã ho ri pa. Tã na pa hte urak nê ā amnhī nhīpêx anê. Jakamā kwa kêr ka mẽ ixpyrà nê ā amnhī nhīpêx anhỹr o măn ri apa.

Mēnijaja mẽ mjên ā hpijaàm ā mẽ kām karõ

Ep̄es 5.22; Wam Pêtre 3.1-6

² Nê na ka xep htem arĩ ra ixte tanhmā mẽ amā ixkapêr toja mã ajamxpêr tỳx o ri apa. Na pa pre Kris kôt mẽ pahtõ nê mẽ pahtõxjaja xpên wỳr pikuprõnh nê tanhmā amnhī

nhīpêx to hã mẽ amã karõ ka prem inhma nẽ mẽ uràk nẽ ã amnhĩ nhīpêx anẽ. Æm hãmri na ka htem ã amnhĩ nhīpêx anhỹr o apa. Ja na inhmã mex.

³ Na pa pre krī hõ kamã mēnijaja kot amnhĩ krã hpro hã mẽ amã mẽ harẽ. Ka prem inhma nhũm mẽ akwỳjaja kãm ja mex nẽ nhũm mẽ akwỳjaja tee ri ja kukamã ajamxpēr. No mẽmo kaxyw na hte mēnijaja amnhĩ krã hpro? E kot paj ixprĩ hã mẽ amã ja jarẽ ka mẽ inhma. Nà Tirtũm kēp Kris jamār xwỳnh nhũm Kris kēp Tirtũm mã mẽ inhmyjẽ jamār xwỳnh. No mẽ anijaja mẽ amjẽn kēp Kris mã mẽ ajamār xwỳnh. Na hte mēnijaja ohtõ nẽ ra mẽ mjẽn ã amnhĩ to amnhĩrit kaxyw amnhĩ krã hpro nẽ ri pa. No mẽ inhmyjaja na pa htem ã amnhĩ nhīpêx anhỹr kêt nẽ. Na pa htem amarĩ ixkrã hkênh nẽ ixpa. ⁴ Jakamã na pa htem Tirtũm kapēr mar xà hã ixkre hwỳr axpẽn wỳr akuprõ nẽ Tirtũm nhỹ hã mẽ anijẽ mã kapēr jarẽnh o ixkuhẽ. Rỳ Tirtũm mã tanhmã mẽ pajarẽnh to. No ãm amnhĩ krã hpro hkêt rãhã kãm mẽ ajahkre rỳ kãm mẽ pajarẽ. Kot pa mẽ amnhĩ krã hpro nẽ te mẽ apê ixprõjaja mẽ apê mẽ ijamār xwỳnh ã mẽ ajarẽnh pyrãk. Jao te mẽ ixte mẽ ijamār xwỳnh Kris ã xpijaàm kêt pyrãk o amnhĩ nhīpêx. ⁵ No mẽ anijaja mẽ ixte Kris mã mẽ ajamār xwỳnh jakamã na ka htem Tirtũm nhỹ hã mẽ inhmã kapēr jarẽnh rỳ kãm mẽ pajarẽnh kaxyw nẽ amnhĩ krã hpro. Mẽ ixte Kris mã mẽ ajamār xwỳnhjẽ hã apijaàm kaxyw ã amnhĩ nhīpêx anẽ nẽ mẽ amnhĩ krã hpro. Kot ka mẽ ã amnhĩ nhīpêx anhỹr kêt nẽ te mẽ ate mẽ ixtã apijaàm kêt pyrãk o amnhĩ nhīpêx nhũm mẽ amjẽn tee ri ja hã apumu nẽ hpijaàm nẽ. Te ate amnhĩ krã hkênh nẽ ri apa nhũm tee ri apumunh nẽ hpijaàm pyrãk. ⁶ Kot kaj mẽ amnhĩ krã hkênh nẽ ri apa nẽ amnhĩ kamã apijaàm nẽ ri apa. Mẽ anijaja na ka htem akrã hkĩ japjẽ nẽ kamã amex nẽ ri apa. No kot ka mẽ amnhĩm akrã hkênh nẽ apunuj nẽ amnhĩ kamã apijaàm nẽ ri apa. Jakamã kēr ka mẽ Tirtũm mã amnhĩ jarẽnh kaxyw nẽ amnhĩ krã hpro. Nom kot ka mẽ amjẽn ã apijaàm kêt nẽ ri apa hprãm japēr nẽ mamrĩ amnhĩm akrã hkênh nẽ ri amnhĩ kuk ã apijaàm kêt nẽ ri apa.

⁷ No mẽ inhmyjaja na pa htem amnhĩ krã hpro hkêt nẽ. Te mẽ ixpê Tirtũm pyrãk nhũm mẽ anijaja te mẽ apê Tirtũm kra pyrãk o na pu htem axpẽn nhīpêx. Tirtũm krajaja na htem mẽmoj tã Tirtũm mã karõ hkêt nẽ. Ja pyrã nẽ mẽ anijaja na ka htem mẽ inhmyjẽ mã mẽmoj tã karõ kamã axihtỳx o apa hkêt nẽ. Na ka htem mẽ ixtã apijaàm kãm mẽmoj tã mẽ ixwỳ.

⁸ Amnepê mã Tirtũm kot mẽmoj to kator krax rũm na pre myja kumrẽx nhīpêx hãmri nẽ kēp õkwa i hõ kapa nẽ ho kãm hprõ nhīpêx. No na pre nija kumrẽx nhīpêx nẽ õkwa i ho kãm mjẽn nhīpêx kêt nẽ. ⁹ Myja mã na pre hprõ nhīpêx. No nija mã mjẽn nhīpêx kêt nẽ. ¹⁰ Jakamã kēr ka mẽ anijaja amjẽn ã apijaàm ã amnhĩ to amnhĩrit kaxyw hãmri nẽ mẽ inhmã Tirtũm nhỹ hã tanhmã akapēr jarẽnh to kaxyw rỳ kãm amnhĩ jarẽnh kaxyw hãmri nẽ amnhĩ krã hpro nẽ akuhẽ. Hãmri nhũm Tirtũm kapēr o mẽ wrỳk xwỳnhjaja ja hã mẽ apumu nẽ hkĩnh nẽ tee ri mẽ akukamã hamaxpēr kêt nẽ.

¹¹⁻¹² Nẽ wam ni kator xwỳnhta na pre myja rũm kato. Tã na pa htem jarãhã mẽ inhmyjaja hpãnhã mẽ anijẽ rũm ijapõj. Tirtũm jamaxpēr xà hkõt. Tãm na pre ã mẽ pahte amnhĩ nhīpêx anhỹr kaxyw ã mẽ panhīpêx anẽ. Tã mẽ ixpê Pahihti Kris kwỳ hã mẽ inhmyjaja nẽ mẽ anijaja na pu htem ri ahte papa hkêt nẽ. Na pu htem axpẽn kutã pamã axpẽn hkĩnh o papa nẽ mẽmoj to axpẽn kutã panojarêt o ri papa. Nẽ axpẽn to presija ho papa. Na hte mẽ anijaja mẽ amjẽn o presija ho apa. Nẽ mẽ amyjaja na ka htem mẽ aprõ ho presija ho apa. Tã kēr ka mẽ anijaja mẽ amjẽn ã apijaàm o ri hkõt apa. ¹³ Jakamã kwa mẽ kot amnhĩ krã hproja kukamã ajamaxpēr tỳx nẽ. Xà mẽ anhõ krī kamã mēnijaja mẽ mjẽn ã hpijaàm ã amnhĩ to amnhĩrit kaxyw amnhĩ krã hpro nà? Kojã mẽ ja kaxyw ã amnhĩ nhīpêx anhỹr japēr kẽ mẽ rĩ mẽ anoo mã Tirtũm mã amnhĩ jarẽnh kaxyw nẽ kupẽ xẽ hkwỳ ho amnhĩ krã hprõ nẽ rĩ kãm amnhĩ jarẽ. Nom kojã mẽ ã amnhĩ nhīpêx anhỹr kêt nhũm mẽmyjaja tee ri ja hã mẽ omunh nẽ ho kapēr hkêt japēr hãmri kẽ mẽ rĩ amnhĩ krã hpro hkêt nẽ ri pa.

¹⁴ Mẽ kot mẽ pahte amnhĩ nhīpêx ã mẽ pahpumunh nẽ hkĩnh kaxyw na pu htem tanhmã amnhĩ nhīpêx to ho ri papa. Na htem mẽ pahkrã hkĩ jarẽnh o: “Kojã mẽmyjaja hkrã hkĩ japjẽ nẽ ri pa nẽ ra kamã omnajti.” Anhỹr jakamã na pa htem amnhĩ krã hkênh

nê ri ixpa. ¹⁵ No mê anijaja na htem mê ajarênh o: “Mênijaja na htem hkrã hkĩ japjê nê ri pa nê kamã muxti.” Anhÿr jakamã na ka htem akrã hkĩ japjê nê ri apa. Mê akĩ te kêp mê akrã hpro xà pyrãk. Na ka htem ã amnhĩ nhĩpêx anhÿr o apa.

¹⁶ E na pa ra mê amã krĩ hkwÿ kamã Kris kwÿ nijaja kot mjên ã hpijaàm ã amnhĩ to amnhĩrĩt kaxyw tanhmã amnhĩ nhĩpêx to hã mê harê. Tã koja mēhō nija tee ri ja ma nhũm ja kêp omnuj japêr. Nhũm amnhĩ jarênh o:

—Kêt. Kot paj tanhmã inhmã amnhĩ nhĩpêx to hprãm xà hkôt tanhmã ri amnhĩ nhĩpêx to ho ri ixpa. Koja inhmjên ja hã ixpumu nê hpijaàm nê rĩ tãm.

Anhÿr ã amnhĩ jarê ka mê tee ri ã kot amnhĩ jarênh anhÿrja ã ama nê kãm:

—Kwa nà ã ri ajamaxpêr anhÿr kêt nê. Na hte Kris kwÿjaja ã hamaxpêr anhÿr kêt nê. Anê.

Jejus tyk mã mê pajamaxpêr pê tanhmã mê pahte amnhĩ to hã mê pajarênh

Matêwre 26.26-30; Makre 14.22-26; Rukre 22.19-20

¹⁷ Nê na ka xep htem Tĩrtũm mã amnhĩ jarênh xà hã ixkre hwÿr axpên wÿr akuprõ nê kamã amnhĩ to mex kêt nê. Na ka htem tanhmã amnhĩ tomnuj to pa tee ri mê ajarênh ma nê ixkaprĩ nê. Nê amnhĩm mê amex ã mê ajarênh kêt nê. ¹⁸ Na ka xep htem axpên wÿr akuprõ nê mēmoj tã axpên mã akir nê axpên pê angrã. Nê ahpÿnhã mēmoj mã ajamaxpêr jao ra mê amã axpên kĩnh kêt nê. Na pa tee ri ã mê ajarênh anhÿrja ma nê ixkaprĩ htÿx nê. ¹⁹ Xà na hte Tĩrtũm ahpÿnhã tanhmã mê pahte amnhĩ anhĩpêx to hã mê pahpumunh kôt kãm mê pajapê hkêt ã amnhĩ jarê? Nà na hte ã amnhĩ nhĩpêx anhÿr kêt nê. Kãm mê pajapê ho axpên pyrãk kênã.

²⁰ Nê na hte Kris kwÿjê piitã tōhã axpên wÿr akuprõ nê Jejus tyk mã hamaxpêr kaxyw pãwti hkwÿ hku. Tã mê kajaja na ka xep htem ja kaxyw axpên wÿr akuprõ nom axtem nê Jejus tyk mã ajamaxpêr pê axàpkur kêt nê. ãm mê axàpkur pix kukamã ajamaxpêr nê axtem nê axàpkur rũnh o akrĩ. ²¹ Jao amnhĩ pix kukamã ajamaxpêr. Mê akwÿjaja wam mrrar nê hpôx nê mê apkur xà hã mê hkrĩ xwÿnhjaja na xep htem hkwÿjê rom mēōta pinh pa. Nê wĩhtija nhũm mê mãânên hpenh pa nê axtem nê ho axpã. Jakamã nhũm mê akwÿjaja kot amnhĩ to hapu nê hpôx xwÿnhjaja mēmojta ã hprãr pa. ²² Kwa mon ka mê amã hprãm nê anhōrkwÿ kamã axàpkur kêt nê? Mê kot Tĩrtũm mã amnhĩ jarênh xà hã ixkre kamã na htem apkur rũnh hkêt nê. Ka mê ã amnhĩ nhĩpêx anê nhũm mēō hkêt xwÿnhjaja amnhĩ to hapu nê mra nê mēō hã prã nê amnhĩ kamã hpijaàm nê. Kwa xà kot pa ã mê ate amnhĩ nhĩpêx anhÿr ã mê ajarênh ma nê ixkĩnh nê mê ate amnhĩ nhĩpêx mex ã mê ajarê? Nà kot paj ã mê ajarênh anhÿr kêt nê.

²³ Pahihti Jejus na pre ja hã tanhmã inhmã kapêr to nê inhmã:

—Kêr ka mê tōhã axpên wÿr akuprõ nê axàpkur pê ixtyk mã mãn mê ajamaxpêr pê ã amnhĩ nhĩpêx anê nê ã amnhĩ nhĩpêx anê. Anê.

Jakamã kot paj ixprĩ hã amnhĩ xō ri mê amã kot tanhmã inhmã kapêr tota jarê ka mê inhma. Nà Jejus kormã htyk kêt ri Jut Kariot ra kot pôristi mã hã àmnênh kaxyw nhũm kamàt nhũm Jejus mê ÿ hã mê ahkre xwÿnhjê mê apkur kaxyw hkrĩ hpa. Hãmri nhũm Jejus pãwti hō py nê o xa ²⁴ nê Tĩrtũm mã harê nê kãm:

—Pa Papaj. Nà ãm hãmri na ka hte mê inhmã mê inhō mex o apa. Anê.

Nê hpãnhã pãwja o hkry pa nê ho mê kot ÿ hã mê ahkre ho mê pa xwÿnhjê nhĩpêx pa nê mê kãm:

—E na pa ã pãwti ho hkry nê mê amã òr anê. Koja mê ã inhĩpêx anê nê te mê kot ixto hkry hpar pyrãk o inhĩpêx pa amnhĩ xà htÿx kamã ijamak kãm ty. Nom mê anê kot paj ty. Jakamã e kêr ka mê ixwakre kamã tōhã axpên wÿr akuprõ nê ixte mê ate amnhĩ tomnuj pãnhã amnhĩrer kaxyw mê anê ixtyk mã ajamaxpêr pê akĩnh nê pãwta kur o akrĩ. E mê mãmri axàmnhix aku. Anê.

²⁵ Hãmri nê hpãnhã kop kãm wĩhtita py nê o xa nê mê kãm:

—E kop kãm wĩhtija te kêp Tĩrtũm kot mê atã amnhĩ jarênh nyw xà jarênh pyrãk. Ixtyk kukwak ri koja mê ato hkra. Kot paj ty nhũm ixkamrō mê anê axkapĩ. Jakamã e. Mê kopja

kamã wĩhti ho akõm o axpën nhĩpêx. Nê ho akõm pê ixte mẽ anê ixtyk mã ajamaxpêr. Anê.

²⁶ Tã ã kot amnhĩ jarênh anhỹr jakamã na pu htem axpën wỳr akuprõ nê pãwti hkwỳ hku nê mẽmo kagõ hkwỳ o ixkõ. Nê ho pahkõm pê axpën mã Jejus tyk jarênh o pahkrĩ. Tã kêr pu mẽ arĩ ã amnhĩ nhĩpêx anhỹr o ri papa rãhã nhũm Jejus akupỳn mẽ pahwỳr wrỳ. ²⁷ Jakamã kot kaj mẽ tõhã mẽmo arĩgro hã kot mẽ panê htykja mã ajamaxpêr kaxyw axpën wỳr akuprõ. Hãmri nhũm mẽ anhĩõ mẽ awỳr axà nê nhỹ. Nom axtem nê Jejus tyk mã hamaxpêr kêt japêr. Nê htỳx pãwti kur o nhỹ. Nê hkõt amarĩ mẽmo kagõ ho hkõm o nhỹ. Koja ã htyk mã hamaxpêr kêt rãhã amnhĩ nhĩpêx anê nê te Jejus o kapêr pyrãk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrõ amarĩ hpikapĩr kênã. Na pre mẽ panê htyk kêt nê.

Anhỹr o ho kapêr pyrãk. ²⁸ Jakamã kwa kêr ka mẽ ate pãwta kur kaxyw nê taxy kormã tanhmã ate amnhĩ nhĩpêx to mã ajamaxpêr nê ajamaxpêr o:

—Kwa mãn pa Tĩrtũm kapêr kõt amnhĩ nhĩpêx mex rãhã ho ri ixpa nà?

Anhỹr o mãn ajamaxpêr. Hãmri nê ate hkõt amnhĩ nhĩpêx mex ã amnhĩ pumu nê amarĩ axãmnhĩx aku. No kot ka mẽ kormã mẽmoj punuj kaga hkêt nê arĩ ri ho anhỹr o pa hãmri nê kãm ajamaxpêr nê hkur kêt nê. Rỳ tanhmãn tee ri tanhmã ate amnhĩ tomnuj tota mã ajamaxpêr nê akaprĩ nê. Hãmri nê tokyx Tĩrtũm mã amnhĩ jarê nê amnhĩ to mex prãm xaj amnhĩ to awỳ hãmri nê arĩ kormã axãmnhĩx pãwtita ku. ²⁹ Koja mẽhõ mẽ akõt axà nê mẽmoj kukamã hamaxpêr pê htỳx pãwti nhĩrênhta õ py hkur o nhỹ. Hãmri nhũm Tĩrtũm tee ri ja hã omu nê hã tanhmã ho. ³⁰ Na ka mẽ ra axohtõ nê ã amnhĩ nhĩpêx anê nê atỳx ri mẽmoj kukamã ajamaxpêr pê pãwta ku. Jejus kot mẽ panê htykja mã ajamaxpêr kêt pê atỳx tanhmã ajamaxpêr to pê hkwỳ hkur o akrĩ. Mỳrapê na ka mẽ ra ja hã axà nê ri apa. Nê mẽ akwỳjaja ra htyk rax nê. ³¹ Nom kot ka mẽ axpën wỳr akuprõ hãmri nê akupỳm tãm axpën kõt ajamaxpêr nê axpën kõt amnhĩ nhĩpêx nê rĩ kormã pãwtita ku. Hãmri nhũm Tĩrtũm ja hã mẽ apumu nê tanhmã mẽ ato hkêt nê. ³² Na hte mẽ pahte tanhmã amnhĩ tomnuj to hã mẽ pahpumu nê hã tanhmã mẽ pahto. Mẽ pahte ja hã amnhĩ pumunh nê axte ã amnhĩ nhĩpêx anhỹr kêt kaxyw na hte ã mẽ pahpê hkrajê nhĩpêx anê. Jakamã kot puj mẽ nhỹrmã mẽ kêp hkra hkêt xwỳnhjê hkõt kuwyta wỳr ma papa hkêt nê. ³³ Jakamã e Kris kõt ixtõ nê ixtõxjaja. Kêr ka mẽ axte Pahihti Jejus tyk mã ajamaxpêr kaxyw axpën wỳr akuprõ. Hãmri nê ra axpën wỳr apikuprõnh pa hã axpën pumu nê rĩ kormã pãwti hkwỳ hku nê hkur pê Jejus kot mẽ panê htyk mã ajamaxpêr o akrĩ. ³⁴ Nê ka mẽ atõ ra amã prãm japêr nê anhõrkwỳ kamã apku nê rĩ kormã mẽ hkõt tẽ. Jao ra anhõhy htu nê ajamakêtkati nê akwỳjê jamãr o nhỹ. Kê mẽ hpõx pa ka mẽ atipxi nê Pahihti Jejus tyk mã ajamaxpêr pê hkur o akrĩ. Hãmri nhũm Tĩrtũm ja hã mẽ apumu nê hkĩnh nê tanhmã mẽ ato hkêt nê.

Na ka prem mẽ ate inhãmã kagà nê mẽnhta kamã mẽmoj tã ixkukjêr rax nê. Tã na pa ra kagà ja kamã mẽ amã hkwỳ jarênh rax nê. Nom kot paj piitã harênh par kêt nê. Kot paj ãm mẽ amã hkwỳ pix jarê. Hãmri nê nhỹrmã ma mẽ awỳr mõ nê mẽ apumu nê kormã axte mẽ amã harênh jatur xãm kumẽ.

12

Mẽ kot Tĩrtũm kapêr o hêx xwỳnhjê jarênh

Rõmãn 12.6-8; Wam Korîť 14.29; Wam Pêtre 4.10-11; Wam Juãw 4.1-2

¹ Nê kot paj hpãnhã mẽ amã tanhmã Tĩrtũm Karõ jarênh to ka mẽ inhma. Tanhmã kot mẽ pahkrã hto nhũm mẽ pahte ahpỳnhã tanhmã kãm amnhĩ nhĩpêx to ho papaja kot paj mẽ amã harê. ² Amnepê mã kormã mẽ ate Kris kõt amnhĩ xunhwỳr kêt ri na ka prem sãnti hkõt ri amnhĩ nhĩpêx o ri apa. Kapêr kêt tã ka prem hkõt ri amnhĩ nhĩpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwỳr o ri apa. ã na ka prem amnhĩ nhĩpêx anhỹr o ri apa. ³ Tã ra hpãnhã Tĩrtũm kõt amnhĩ xunhwỳ.

Na htem ohtô nê Tirtûm nhÿ hã kapêr jarênh o pa hã amnhÿ jarênh tâ no ãm mẽ hkwÿjaja ja hã amnhÿ to hêx. Tã kot paj ixprÿ hã mẽ amã tanhmã mẽ harênh to. Koja mẽhõ mẽ kãm Tirtûm nhÿ hã kapêr jarênh o pa hã amnhÿ jarê hã koja Jejus o kapêr punuj o pa hkêť nê. Koja harênh o:

—Jejus kêp mẽ panhõ Pahihti jakamã kwa pu mẽ hkôt amnhÿ xunhwÿ nê hkôt amnhÿ nhÿpêx o ri papa.

Anhÿr o harê. Koja mẽhõ ã mẽ amã kapêr anê ka mẽ ama nê mẽ kot Tirtûm nhÿ hã kapêr jarênh o pa xwÿnh ã omunh kurê kumrêx. No koja mẽ amã ã kapêr anhÿr kêt nê ka mẽ ama nê Tirtûm kapêr o hêx o pa hã omunh kurê kumrêx.

Tirtûm Karõ kãm mẽ pahte axpên to mex prãm ã harênh

Rômãn 12.6; Epes 4.7; Wam Pêtre 4.10

⁴ Nê ahpÿnhã kot tanhmã mẽ panhÿpêx to xwÿnhja ãm pixii. Kêp Tirtûm Karõ. Na hte mẽ pahkarõ mã agjê nê ahpÿnhã tanhmã mẽ pahte axpên to mex kaxyw tanhmã mẽ panhÿpêx to. Kot tanhmã mẽ panhÿpêx to xàja ohtô. Mẽ pahte ahpÿnhã ri tanhmã kãm amnhÿ nhÿpêx to nê tanhmã axpên to mex to ho ri papa kaxyw na. Tirtûm Karõ na hte ja kaxyw tanhmã mẽ pahkrã hto.

⁵ Nê mẽ pahte kãm tanhmã amnhÿ nhÿpêx to ho papa xwÿnhja haxwÿja ãm pixii. Kêp Pahihti Jejus. Tã na pu htem ahpÿnhã kãm tanhmã amnhÿ nhÿpêx to ho ri papa.

⁶ Nê kot mẽ pahto ajuta nhÿm mẽ pahte ahpÿnhã tanhmã axpên to mex to ho papa xwÿnhja haxwÿja ãm pyxii. Kêp Tirtûm. Na pu htem ahpÿnhã tanhmã hkôt axpên xunhwÿr tÿx to kaxyw tanhmã axpên to mex to ho papa.

⁷ Nê Karõja na hte ahpÿnhã tanhmã axpên kaxyw mẽ panhÿpêx to pu mẽ axpên to ajuta mex o ri papa.

⁸ Jakamã na pu hte mẽ pahkwÿjaja Tirtûm Karõ nhÿ hã ma mẽ pahkwÿjê mã Tirtûm kapêr jarênh o ri mẽ hkôt papa.

Nê mẽ pahkwÿjaja ma ÿ hã paxàhpumunh mex pê ma ri kapêr o mẽ ahkre ho mẽ hkôt papa.

⁹ Nê mẽ pahkwÿjaja Karõ nhÿ hã Tirtûm kot tanhmã mẽ pahto ajuta hto kaxyw hkôt pajamaxpêr tÿx nê.

Nê mẽ pahkwÿjaja akupÿm mẽ à xwÿnhjê ho mex o papa nhÿm mẽ akupÿm mex nê pa.

¹⁰ Nê mẽ pahkwÿjaja aa mẽ kot mẽmoj pumunh kêt kwÿ ho anhÿr o ri mẽ hkôt papa.

Nê mẽ pahkwÿjaja Tirtûm kapêr mar tÿx nê ô ri mẽ kãm harênh o mẽ hkôt ri papa.

Nê mẽ pahkwÿjaja Tirtûm Karõ nhÿ hã tanhmã mẽ kot amnhÿ nhÿpêx to hã mẽ omunh o papa. Rÿ pahprÿ hã mẽkarõmnuti nhÿ hã mẽ kot amnhÿ nhÿpêx ã mẽ omunh o papa.

Nê mẽ pahkwÿjaja nhãm mẽ kapêr mar kêt tâ ra mẽ kapêr o pakapêr.

Nê mẽ pahkwÿjaja mẽ kapêr o pakapêrja ma nê mẽ kot mar kêt xwÿnhjê mã harê.

Kormã aa pahte mar kêt tâ ra pahprÿ hã mar mex nê mẽ kãm harê.

¹¹ ã na hte Tirtûm Karõ kãm hprãm xà hkôt tanhmã mẽ panhÿpêx to pu mẽ ahpÿnhã ÿ hã ã axpên nhÿpêx anhÿr o ri axpên kôt papa.

Te mẽ pahpê Kris nhÿ pyræk ã mẽ pajarênh

Rômãn 12.3-8; Epes 1.22-23, 4.11-16; Korosê 3.15

¹² E pa hpãnhã mẽ amã mẽ panhÿ kamã tanhmã mẽmoj jarênh to ka mẽ inhma nê hã anohtÿx nê. Mẽ panhÿja ãm pixi htã no ãm kamã mẽmoj xohtô. Kamã mẽ pahte nê kamã mẽ pahpa nê kamã mẽ pajakwa. Nê mẽ panhÿnhu nê mẽ pano. ã mẽ panhÿ kamã mẽmoj xohtô kot anhÿr. Ja pyrã nê Kris nhÿja ãm pixi htã te mẽ pahpê ï kamã mẽmoj xohtôta pyræk. Mẽ pahkwÿjaja te mẽ pahpê hte pyræk. Nê mẽ pahkwÿjaja te mẽ pahpê ïhkra pyræk. Nê mẽ pahkwÿjaja te mẽ pahpê no pyræk.

¹³ Mẽ pahpê Kris kwÿjaja axpên kaxyw mẽ paxohtô. Mẽ ixpê Ijaewjaja nê mẽ apê Ijaew kêt xwÿnhjaja. Nê amarÿ ri mẽ kãm mẽ axàpênh o mẽ apa xwÿnhjaja nê amnhÿ mã ri mẽ axàpênh o mẽ apa xwÿnhjaja. ã ahpÿnhã mẽ paxohtô kot anhÿr tâ nhÿm Tirtûm

Karō te mẽ pahpê Kris nhĩ pixi pyrək o mẽ panhĩpêx. Nhũm Krisja mẽ pahpiitã mẽ pamã Karō gō nhũm mẽ pahkarō mã agjê. Pixi htã mẽ pahpiitã mẽ pahkarō mã agjê.

¹⁴ Nẽ mẽ panhĩja pixi tã kamã tanhmã mẽ pakute xàja ohtô. Tã Kris nhĩja te kot mẽ panhĩja pyrək. Urək nẽ kamã mẽ paxohtô. Jakamã na pu htem ahpÿnhã tanhmã kãm amnhĩ nhĩpêx to ho ri papa. Karō kot tanhmã amnhĩ kaxyw mẽ panhĩpêx to xà hkôt.

¹⁵ Nẽ kop ãm mẽ pahparja kapêr ronhÿx tee ri mẽ panhĩhkra pumu nẽ amnhĩ mã:

—Hêxta waa nẽ. Kêp ãm ixpê mẽ ãhkra ronhÿx pa inhmex nẽ ijarir. No ãm ixpê mẽ hpar pix jakamã pêr ãm mẽ hkĩnhã ixpê mẽ hkwÿ hkêt ãm ixpê mẽ hatur xà pix na pa.

Anhÿr o amnhĩ jarênh japêr. Nom ja kot anhÿr kêt. Axtem nhÿhÿm kot mẽ pahto pa kaxyw na mẽ pahparja. Nẽ axtem mẽmoj tã mẽ paxapênh rÿ mẽmoj jamÿnh kaxyw na mẽ panhĩhkraja. Na pu htem hamẽ wa ho presija rãhã ho papa. Ja pyrã nẽ kot puj mẽ pahkwÿjê hõ mẽ parom Tirtũm Karō nhÿ hã mẽmoj tã àpênh tÿx ã omu nẽ hkĩnhã mẽ pahte amnhĩ to warê hkêt ã amnhĩ jarênh o papa hkêt nẽ.

¹⁶ Nẽ mẽ pajamakja kapêr ronhÿx kapêr o:

—Hêxta waa nẽ. Kêp apu ixpê mẽ no ronhÿx pa inhmex nẽ ijarir. No ãm ixpê mẽ umar xà pix jakamã pêr ãm ixte ho warê hkêt kumrêx.

Anhÿr o amnhĩ jarênh japêr. Nom ja kot anhÿr kêt. Hamẽ wa mex kênã. Axtem ho mẽ paxumar kaxyw na mẽ pajamakja. Nẽ axtem ho mẽ parit kaxyw na mẽ panoja. ¹⁷ Kêp ãm mẽ pano pix ronhÿx pu mẽ parit pix nẽ paxumar kêt nẽ ri papa. Rÿ kêp ãm pajamak pix ronhÿx pu mẽ paxumar pix nẽ parit kêt nẽ mẽ paxupãr kêt nẽ ri papa. ¹⁸ Mẽ panhĩja pixi htã kamã hikukrêx xohtô. Na pre Tirtũm amnhĩ krã hkôt kamã mẽmoj piitã hipêx nẽ hanhõ. ¹⁹ Kêp ãm mẽ panhĩja kamã ãm mẽmoj pixi ronhÿx pu mẽ pamex kêt nẽ papa. ²⁰ Tã no ãm kot anhÿr kêt. Mẽ panhĩja ãm pixi htã kamã hikukrêx xohtô. ²¹ Jakamã na hte mẽ panoja amnhĩ nẽ mẽ panhĩhkra mã kãm:

—Tk kwa ma tẽ. Ixte ato presijare hã.

Anhÿr o kãm kapêr kêt nẽ. Rÿ mẽ pahkrãja amnhĩ nẽ mẽ pahpar mã kãm:

—Tk kwa ma tẽ. Na pa ato presija hkêt nẽ.

Anhÿr o kãm kapêr kêt nẽ. Ja pyrã nẽ kot puj mẽ nhÿri Kris kôt panhĩõ pumu nẽ pamex o pahte hakrenh ã amnhĩ jarênh kêt nẽ. ²² Nẽ mẽ panhĩ kamã mẽmoj kwÿ te hirerek pyrək tã no pu mẽ arĩ pamã hapê nẽ. Ja pyrã nẽ kêr pu mẽ kormã mẽ kot Kris kôt amnhĩ xunhwÿr tohtuj anhÿr xwÿnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

²³⁻²⁴ Nẽ na pu htem mẽ panhĩ kamã mẽ pakukrêx kwÿ hã pahpijaam nẽ hpro nẽ ri ho papa. Nẽ hkwÿ hã pahpijaam kêt nẽ hpro hkêt nẽ ho ri papa. Nẽ hkwÿ mẽ pahpê omnajti htã pu mẽ ho mex nẽ ri ho papa. Tirtũm kot ã mẽ panhĩpêx anhÿr jakamã na pu htem mẽ pakamã mẽ pakukrêx kwÿ mẽ pahpê omnajti htã pu mẽ ho mex nẽ ri ho papa. Ja pyrã nẽ kêr pu mẽ Tirtũm kôt mẽ pahtõ nẽ mẽ pahtõx piitã ho mex o ri papa. Nẽ tãm mẽ hipêx. Mẽ pahkwÿjaja muxre nẽ mẽ pahkwÿjaja omnajti htã. Tanhmã mẽ kute htã pu mẽ kêp mẽ Jejus kôt mẽ pahtõ nẽ mẽ pahtõx ã mẽ ho mex o ri apa.

²⁵ Nẽ na hte mẽ panhĩ kamã mẽ pahpar nẽ mẽ panhĩhkra nẽ piitã axpên kôt àpênh mex o pa. No na hte mẽ pahparja nhÿhÿm ma mra nhũm ihõja hkwÿm nhÿhÿm ma mrar kêt nẽ. Na hte wa axpên kôt àpênh mex o pa. Ja pyrã nẽ kêr pu mẽ pahpê Tirtũm kraja axpên kôt amnhĩ nhĩpêx rãhã ho ri papa. Nẽ axpên to mex rãhã ho ri papa. No ri axpên kwÿm ri tanhmã amnhĩ nhĩpêx to ho ri papa hkêt nẽ.

²⁶ Na pu htem tõhã nhÿhÿnh panhĩ kamã paxà nẽ ri papa. Pahkrã tãtãk rÿ pakatut gêk. Jao te mẽ panhĩ piitã kamã mẽ paxà pyrək. Nẽ nhÿhÿnh akupÿm pamex nẽ te panhĩ piitã hkôt akupÿm pamex pyrək. Ja pyrã nẽ koja Kris kôt panhĩõ nhÿhÿnh ã nẽ ri pa. Rÿ tanhmã amnhĩ to nẽ ra hkaprĩ nẽ ri pa pu mẽ ja hã omu nẽ ÿ hã pahkaprĩ nẽ papa. No koja mẽmoj tã hkĩnh nẽ pa pu mẽ ja hã omu nẽ ÿ hã pahkĩnh nẽ papa.

Te mẽ pahpê Kris nhĩ pixi pyrək ã mẽ pa jarênh

²⁷ Nē mẽ pahpê Kris kwỳjaja te mẽ pahpê Kris nhĩ pixi pyràk. Ahpỳnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ĩ pixi pyràk.

²⁸ Nē mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỳnhã tanhmã mẽ paxunhwỳr to.

Mẽ pahkwỳjaja mẽ pahte ỹ hã nhãm mẽ kãm kapêr jarênh o papa kaxyw mẽ paxunhwỳ.

Nē mẽ pahkwỳjaja mẽ pahte ỹ hã tanhmã kapêr jarênh to ho ri papa kaxyw mẽ paxunhwỳ.

Nē mẽ pahkwỳjaja Tĩrtũm kapêr jarênh o mẽ ahkre ho ri mẽ papa kaxyw mẽ paxunhwỳ.

Nē mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỳr o ri papa kaxyw mẽ pa xunhwỳ.

Nē mẽ pahkwỳjaja akupỹm mẽ à xwỳnhjê ho mex o mẽ papa kaxyw mẽ pa xunhwỳ.

Nē mẽ pahkwỳjaja mẽ kapêr o mẽ hihtỳx o mẽ papa kaxyw mẽ pa xunhwỳ.

Nē mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Nē mẽ pahkwỳjaja nhãm mẽ kapêr õ ho mẽ pakapêr o mẽ papa kaxyw mẽ pa xunhwỳ.

Ã na pre ahpỳnhã mẽ pahpê hkỳjê piitã mẽ paxunhwỳr anê. ²⁹ No na pu htem pahpiitã axpên kôt Tĩrtũm kapêr o mẽ ahkre ho ri papa hkêt nê.

Nē mẽ pahpiitã ỹ hã tanhmã pakapêr to ho ri papa hkêt nê.

Nē mẽ pahpiitã kapêr jarênh o ri papa hkêt nê.

Nē mẽ pahpiitã aa mẽ kot mẽmoj pumunh kêt kwỳ ho anhỳr o ri papa hkêt nê.

³⁰ Nē mẽ pahpiitã akupỹm mẽ à xwỳnhjê ho mex o ri papa hkêt nê.

Nē mẽ pahpiitã mẽ kapêr õ ho ri pakapêr o ri papa hkêt nê.

Nē mẽ pahpiitã ri mẽ kapêrja ma nê pakapêr kãm pahkwỳjê mã harênh o ri papa hkêt nê.

Na pu htem ahpỳnhã tanhmã Kris kôt mẽ pahkwỳjê ho ajuta hto ho ri papa. ³¹ Tã kêr pu mẽ pahpiitã pamã axpên kĩnh pê tanhmã axpên to mex to ho ri papa. Ja na mex o kot mẽmoj piitã hakrenh par. E kot paj ixprĩ hã tanhmã mẽ amã ja jarênh to ka mẽ inhma.

13

Mẽ pahte axpên kamã paxukaprĩ ho papa hã mẽ pamã karõ

Juãw 13.31-35; Karatas 5.13-15; Korosê 3.12-14

¹ Kot pa ma mẽ piitã ahpỳnhã mẽ kapêr kãm mẽ kãm Tĩrtũm kapêr jarênh o ri ixpa japêr. Am mẽ piitã mẽ kapêr o ixkapêr mex o mẽ kãm harênh o ri ixpa japêr. Nê Tĩrtũm kapêr o mẽ wryk xwỳnhjê kapêr o mẽ ahkre ho ri ixkwỳjê hkôt ixpa japêr. Tã inhã mẽ hkĩnh kêt kãm ixte mẽ ahkre ho ri ixpa ronhỳx mẽ inhma nê am inhma. Nhũm ixkapêrja te ixte rat tatak pyràk o pa tee ri Tĩrtũm kapêr o mẽ ahkre kaprỳ ho ri mẽ hkôt ixpa nhũm Tĩrtũm tee ri inhã mẽ hkĩnh kêt ã ixpumu nê inhã:

—Nà amã mẽ hkĩnh kêt jakamã na ka tee ri ixkapêr o mẽ ahkre kaprỳ. Anê.

² Rỳ kot paj Tĩrtũm xàhpumunh tỳx o mẽ kãm kapêr pimxur kwỳ jarênh o ri ixpa japêr. Rỳ Tĩrtũm mẽ kurom inhã mẽmoj to amnhĩrit pa omu nê mẽ kãm harênh o ri ixpa japêr. Rỳ pa Tĩrtũm kot amnhĩ nhĩpêx piitã omunh par japêr. Rỳ ixte amnhĩ kaxyw hkôt ijamaxpêr tỳx kôt ỹ hã kên krã hprêk õ mã ixkapêr nhũm kot inhmar nê inhmar xà hkôt nhãm pikamênh japêr. Tã inhã ixkwỳjê hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhã:

—Nà amã mẽ hkĩnh kêt jakamã te axàhpumunh tỳx kêt kumrêx pyràk. Na ka tee ri ã mẽ kãm ixkapêr jarênh anhỳr o ri apa kaprỳ. Anê.

³ Rỳ pa mẽ kêp amrakati xwỳnhjê mã ixkukrêx nhõr par japêr. Rỳ Kris ã mẽ kãm amnhĩ grõnh kôt mẽ kãm xa nhũm mẽ hã ixpĩr japêr. Tã inhã mẽ hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhã:

—Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhỹr kaprỳ. Anẽ.

⁴ Kot puj mẽ pamã axpên kĩnh hã kot puj mẽ kritpêm mẽ piitã mẽ kãm pahprĩ ho papa. Jao axpên kãm pagryk tokyx anhỹr kêt nẽ.

Nẽ pamã axpên to mex pix prãm.

Nẽ mẽmoj tã axpên kamã pagryk kurê kumrêx kêt nẽ.

Nẽ mẽmoj tã amnhĩ to jarkrar o ri papa hkêt nẽ.

Kot puj mẽ pamã axpên kĩnh hã kot puj mẽ ã amnhĩ nhĩpêx anhỹr o ri papa hkêt nẽ.

⁵ Nẽ kot puj mẽ axpên kamã paxukaprĩ ho papa hã kot puj mẽ tãm axpên nhĩpêx rãhã ho papa. Jao amnhĩ pix kukamã pajamaxpêr o ri papa hkêt nẽ. Nẽ mẽ pagryk tokyx anhỹr kêt nẽ. Rỳ axpên kãm pagryk tokyx anhỹr hkêt nẽ. Rỳ koja mẽhõ tanhmã mẽ panhĩpêx kati hto pu mẽ ãm amnhĩ tã omu nẽ axte kot tanhmã mẽ panhĩpêx tota mã pajamaxpêr kêt nẽ.

⁶ Nẽ kot puj mẽ pamã axpên kĩnh o papa hã kot puj mẽ tee ri mẽhõ kot tanhmã amnhĩ tomnuj to hã omu nẽ pahkaprĩ nẽ. Rỳ tanhmã kot amnhĩ to mex to hã omu nẽ pahkĩnh nẽ.

⁷ Nẽ kot puj mẽ pamã axpên kĩnh o papa hã kot puj mẽ arĩ Tĩrtũm kot mẽ pahto mex par jatur xà mẽnh xà hã arĩgro jamãr rãhã ho ri papa. Nẽ mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpêr to hkêt nẽ. ãm mẽ kutã amnhĩ to htỳx nẽ mẽ kãm pakuhê nẽ arĩ amnhĩ kaxyw Tĩrtũm mã pajamaxpêr tỳx rãhã nẽ.

⁸ Nẽ kot puj mẽ pamã axpên kĩnh o papa hãmri nẽ aa mẽ pahte ã amnhĩ nhĩpêx anhỹrja mã panhũrer kêt nẽ. Nẽ arĩ mẽ pamã axpên kĩnh rãhã ho papa ho papa. Jar pika ja kamã mẽ pahte Tĩrtũm nhỹ hã mẽ kãm kapêr jarênh o ri papa htã kot puj mẽ nhỹrmã ma õ krĩ hwỳr api hãmri nẽ kuri axte ã kãm amnhĩ nhĩpêx anhỹr kêt nẽ. Mo kaxyw kot puj mẽ axte ri mẽhõ mã kapêr jarê? Kot puj mẽ õ krĩ hwỳr api nẽ ra mẽ pahpiitã paxàhpumunh o axpên pyrãk.

Nẽ na pu htem tũhã mẽ kapêr õ ho pakapêr o ri papa. Nom kot puj mẽ nhỹrmã Tĩrtũm nhõ krĩ hwỳr api hãmri nẽ kuri axte nhãm ri mẽ kapêr o pakapêr kêt nẽ.

Nẽ na pu htem jar mẽ pahkwỳjaja mẽ paxàhpumunh mex kôt Tĩrtũm kapêr jarênh o ri papa. Tã kot puj mẽ nhỹrmã õ krĩ hwỳr api hãmri nẽ axte ã amnhĩ nhĩpêx anhỹr kêt nẽ. ãm mẽ pamã axpên kĩnh pixja kot puj mẽ arĩ õ krĩ kamã mẽ pamã axpên kĩnh tũm rãhã papa ho papa. ⁹ Jar mẽ pahpiitã mẽ paxàhpumunh tohtuj anhỹr o pakapêr jakamã na pu htem kormã Tĩrtũm kapêr jarênh tohtuj anhỹr o ri papa. ¹⁰ Tã kot puj mẽ nhỹrmã õ krĩ hwỳr api nẽ kuri paxàhpumunh jatur xàm mẽnh pa. Jakamã nhũm jar mẽ paxàhpumunh tohtuj anhỹr xwỳnhta mẽ pahpê hapêx.

¹¹ E pa mẽ amã ja hã ejêp jarê ka mẽ inhma. Nà amnepê mã ixprĩre ri na pa pre ixtỳx ri mẽhprĩjê kot amnhĩ nhĩpêx o amnhĩ nhĩpêx nẽ mẽ hamaxpêr o ijamaxpêr. Nẽ mẽ kapêr mex kêt o ixkapêr o ri ixpa. Tã ra ixaptàr hãmri nẽ mẽ àptàrjê jamaxpêr o ijamaxpêr o ri ixpa. Te ra mẽ pahte kaxkwa kamã mẽ paxàhpumunh jatur xàm mẽnh parta pyrãk mẽ aptàrjê jamaxpêr o ijamaxpêr o ri ixpa.

¹² Ja pyrã nẽ na pu htem kormã Tĩrtũm kot amnhĩ nhĩpêx ã omunh tohtuj anhỹr. Te mẽ pahte amnhĩ pumunh xà pynajre kamã pahprĩ hã amnhĩ pumunh mex kêeta pyrãk. Nom kot puj mẽ nhỹrmã õ krĩ hwỳr api hãmri nẽ pahprĩ hã paxàhpumunh jatur xàm kumẽ. Te Tĩrtũm kot hprĩ hã tanhmã mẽ pakute hã mẽ pahpumunh parja pyrãk.

¹³ E arĩ mẽ pahte Tĩrtũm kôt amnhĩ nhĩpêx o papa xàja na axkrunêpxi. Mẽ pahte hkôt amnhĩ nhĩpêx o papa rãhã ho papa kaxyw. Wamta na ja: Kêr pu mẽ arĩ amnhĩ kaxyw Tĩrtũm mã pajamaxpêr mex rãhã ho ri papa. Nẽ hkôt ja: Kêr pu mẽ arĩ Tĩrtũm kot mẽ pahto mex par jatur xà mẽnh xà hã arĩgro jamãr rãhã ho papa. Nẽ hkôt ja: Kêr pu mẽ arĩ pamã axpên kĩnh pẽ tanhmã axpên to mex to rãhã ho papa. Ja na mex o kot wamta wa hakrenh. E kêr pu mẽ ã amnhĩ nhĩpêx anhỹr rãhã ho ri papa.

14

Tirtûm Karô kot mẽ pahto mẽ paxihtỳx ã harênh
Wam Korît 12.7-11, 12.27-31

¹ E kêr ka mẽ arĩ amã axpên kĩnh pê axpên to mex rãhã ho ri apa nẽ aa jam anhũrer nẽ ho ajamakêtkati hkêt nẽ. Nẽ amnhĩ to Tirtûm Karô mãn amnhĩ to awỳ kê mẽ amã tanhmã mẽ ajamxpêr to ka mẽ ahpỳnhã tanhmã axpên to mex to ho ri axpên kôt apa. Nẽ kêr ka mẽ ã ajamxpêr anẽ nẽ ajamxpêr o:

—Inhmã mẽ hkĩnh o ri ixpa hprãm tỳx. Nẽ Tirtûm Karô kot tanhmã ixto nhũm ixte ahpỳnhã tanhmã mẽ ho ajuta hto ho ixpaja pa mãănên inhmã ho anhỳr prãm. Nẽ kot tanhmã ijakwa hto nhũm ixte ahpỳnhã mẽ kapêr õ ho ixkapêrja pa mãănên inhmã ho anhỳr hprãm. No kêt ixte Tirtûm nhỹ hã mẽ kãm kapêr jarênhja na inhmã ho anhỳr prãm tỳx kumrêx. Anẽ.

²⁻⁴ Mẽ pakamã mẽ kapêr õ ho Tirtûm mã kapêr xwỳnhjaja na htem Tirtûm Karô nhỹ hã ãm kumã pix mã kapêr õta o kãm kapêr nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẽ. ãm kapêr xwỳnhhta pix koja mẽ pakurom amnhĩ ma. Nom koja mẽ pakapêr kãm Tirtûm mã amnhĩ jarẽ pu mẽ mar mex nẽ. Nhũm mẽ pakapêr kãm Tirtûm nhỹ hã mẽ pamã kapêr jarẽ pu mẽ pahprĩ hã kuma. Jao mẽ pamã kapêr kôt amnhĩ nhĩpêx prãm nẽ. Nẽ mẽmoj tã pahkaprĩ nẽ ri papa htã mẽ kuma nẽ amnhĩ kaxwỳnh kãm amnhĩ to paxihtỳx.

⁵ Mẽ apiitã mẽ ate nhãm mẽ kapêr õ ho Tirtûm mã amnhĩ jarênhja na mex. Nom mẽ ate mẽ akapêr o mẽ akwỳjê mã Tirtûm kapêr jarênh o ri mẽ apaja na mex o wamta jakre. Kot ka mẽ nhãm mẽ kapêr õ ho Tirtûm mã amnhĩ jarẽ nhũm mẽ akwỳjaja mẽ amar kêt jakamã ka mẽ ã akapêr anhỳrja o Kris kôt mẽ ho mẽ hamaxpêr o hihitỳx kêt nẽ. ãm kapxipix amnhĩ ma. Rỳ koja kapêr õja mar mex xwỳnhjê hõ amar japêr nẽ mẽ akapêr kãm akwỳjê mã harẽ. Hã koja ja mex nẽ. Nom kot kaj mẽ apiitã ma mẽ kapêr kãm mẽ kãm Tirtûm kapêr jarênh o ri apa nhũm mẽ piitã hprĩ hã amar mex nẽ. Nẽ amar xà hkôt Tirtûm kapêr kôt amnhĩ nhĩpêx mex nẽ. ⁶ Jakamã e Kris kôt ixtõ nẽ ixtõxjaja. Kot paj apu nhỹrmã ma mẽ awỳr mõ hãmri nẽ nhãm mẽ kapêr õ ho mẽ amã ixkapêr japêr ka mẽ inhmar kêt nẽ. Nom kot paj mẽ akapêr o mẽ amã ixkapêr ka mẽ apiitã aprĩ hã inhmar mex nẽ. Pa Tirtûm nhỹ hã mẽ amã mẽmoj jarẽ rỳ tanhmã kot amnhĩ nhĩpêx toja pa mẽ amã harẽ. Rỳ Karô nhỹ hã mẽ amã mẽmoj jarênh o ã mẽ amã Tirtûm kapêr jarênh anẽ ka mẽ aprĩ hã inhmar mex nẽ. ⁷ Nom mẽ kapêr õ ho mẽ kapêr o mẽ akôt ri mẽ pa xwỳnhjaja te mẽhõ kot htỳx ri wiorãwti kakrênh xwỳnh pyrãk. Koja htỳx ri hkakrênh o xa nhũm mẽ tee ri kot grer mar mã. Rỳ nhũm mẽhõ htỳx ri pifti kakôr o xa nhũm mẽ tee ri mẽmo mẽ grer mar mã.

⁸ Pôristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmja mẽ kãm pifti kakô nhũm mẽ kuma nẽ mẽ pijapu mã hamaxpêr kurê kumrêx nẽ hwỳr hprõt. Nom koja kawax pê hkakô rỳ htỳx ri tanhmã hkakôr to nhũm mẽ kuma nẽ ãm kuma. ⁹ Ja pyrã nẽ kot kaj mẽ kapêr õ ho akwỳjê mã akapêr nhũm mẽ ama nẽ ãm mẽ ama. Ka te ãm mẽ kãm ajakwa momok pyrãk o axãm o amnhĩ nhĩpêx.

¹⁰ Nẽ ahpỳnhã mẽ pakapêr xohtô. Na htem ahpỳnhã mẽ kapêr o amnhĩ kwỳjê mã kapêr nẽ axpên mar mex nẽ. ¹¹ Nom koja mẽhõ nhỹhỹnh pika hõ rũm ixwỳr mõ nẽ mẽ kapêr o inhmã kapêr pa mar kêt nẽ. Nẽ amnhĩ xwar kutã ixkapêr o kãm ixkapêr nhũm ixpyrã nẽ inhmar kêt nẽ. ¹² Jakamã kot kaj mẽ amã Tirtûm Karô xihtỳx xà ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awỳ nẽ kãm:

—Kwa amnhĩ kôt ijamxpêr o axihtỳx Tirtûm. Pa anhỹ hã ixkapêr o ma Kris kôt ixkwỳjê ho mẽ hamaxpêr o ixihtỳx o ri mẽ hkôt ixpa. Kê mẽ akapêr ma nẽ Kris kôt amnhĩ xunhwỳr tỳx nẽ. Nẽ hkôt amnhĩ nhĩpêx mex o ri pa. Anẽ.

¹³ Nẽ kêr ka mẽ nhãm mẽ kapêr õ ho Tirtûm mã amnhĩ jarênh xwỳnhjaja amnhĩ to Tirtûm Karô wỳ nẽ kãm:

—Ixte mẽ kapêr õ ho ixkapêr tă ixte amnhĩ mar kêt. Jakamã kwa tanhmã ixto ijamaxpêr mex to pa amnhĩ mar mex nê ixkapêr kãm ixprĩ hã Kris kôt ixkwỳjê mã ja jarê kê mẽ inhmar tỳx nê. Anê.

¹⁴ Nom kot paj nhãm mẽ kapêr õ ho Tĩrtũm mã mex ã harênh tă amnhĩ mar kêt nê. Te ixpintir kãm ixkarõ pix kapêr pyrãk. No kot paj pam amnhĩ krã hkôt ixkapêr o kãm mex ã harê hãmri nê ra amnhĩ mar mex nê. ¹⁵ Nà ja na inhmã mex jakamã kot paj nhãm mẽ kapêr õ ho Tĩrtũm mã mex ã harê nê kãm gre. Nê mããnên ijamaxpêr xà hkôt ixkapêr o mããnên kãm mex ã harê nê kãm gre. Nà ja na inhmã mex. ¹⁶ Nom kot puj mẽ ma mẽ kot Tĩrtũm kapêr mar xà hã ixkre hwỳr mra nê kamã Tĩrtũm mã mex ã harê. Tã pa nhãm mẽ kapêr õ ho kãm ixkapêr japêr. Ka mẽ ate inhmar o akrĩ xwỳnhjaja tee ri inhma. Jakamã tee ri inhma nê ixkôt Tĩrtũm mã akapêr kêt nê. Rỳ kãm:

—Nà ãm hãmri na ã amex ã ajarênh anê Tĩrtũm.

Anhỳr o kãm akapêr kêt nê. Mẽ ate inhmaare hã kot ka mẽ ã kãm akapêr anê. Jakamã kot paj ri mẽ akamã mẽ kapêr õ ho ixkapêr kêt nê. ãm mẽ akapêr pix o mẽ anom Tĩrtũm mã mex ã harê. ¹⁷ Kot paj mẽ kapêr õ ho Tĩrtũm mã mex o mex ã harênh mex tă ka mẽ mẽmo mẽ kapêrja aprĩ hã mar kêt jakamã inhmar pê Tĩrtũm kôt amnhĩ xunhwỳr tỳx kêt nê.

¹⁸ Na pa hte tõhã mẽ arom nhãm mẽ kapêr õ ho Tĩrtũm mã amnhĩ jarê. Nom nhỹri ahte nhỹ nê ã kãm amnhĩ jarênh anê. ãm hãmri na pre Tĩrtũm ja kaxyw tanhmã ixto pa hte ã amnhĩ nhĩpêx anhỳr o ri ixpa.

¹⁹ Tã na pu htem Tĩrtũm mã mex o mex ã harênh kaxyw nê ma mẽ kot kãm amnhĩ jarênh xà hã ixkreta wỳr axpên wỳr mra pa mẽ pikuprõnh xwỳnhjê kapêr o mẽ kãm ixkapêr. Nom kot paj nhãm mẽ kapêr õ ho mẽ kãm ixkapêr ry rax kumrêx tă no nhũm mẽ inhmar kêt nê. Nom kot paj mẽ kapêr o ãm ixkapêr krãnre htã no nhũm mẽ inhmar mex kurê kumrêx. Ja na inhmã mex. ²⁰ Kwa mẽ ixkapêr ma nê mar tỳx nê. Nê mẽhprĩrêjê jamaxpêr o ajamaxpêr kêt nê. ãm Kris kôt mẽ àptàr tũmjê jamaxpêr o mãn kêt mẽ ajamaxpêr o ri apa. ãm mẽmoj pixire hkôt kot kaj mẽ ãm hãmri te mẽhprĩjê jamaxpêr pyrãk o ajamaxpêr. Mẽhprĩjaja na htem mẽmoj punuj kukamã hamaxpêr kêt nê. Na htem ãm htỳx pa. Tã kêr ka mẽ uràk nê mẽmoj punuj kukamã ajamaxpêr o ri apa hkôt nê.

²¹ Amnepêm na pre Tĩrtũm tanhmã Ijaewjê mã kapêr to. Mẽ kapêr o mẽ kãm kapêr tă no nhũm mẽ kuma nê ãm kuma. Jakamã nhũm tee ri ja hã mẽ omu nê amnhĩ tă tanhmã mẽ harênh to. Tanhmã mẽ harênh toja Tĩrtũm kapêr ã kagà htũm kamã na. Kot mẽ harênh kot:

E kot paj ma mẽ hwỳr axtem pika hõ rũm pòristi hkwy rê kê mẽ ma mẽ hwỳr mra nê mẽ unê. Hãmri nê amnhĩ kapêr o mẽ kãm kapêr nhũm mẽ tee ri mẽ kuma no ãm hkôt mẽmoj pumunh kêt nê.

Koja mẽ ã mẽ hipêx anhỳr tă nhũm mẽ arĩ kãm ixkapêr mar nê amnhĩ kaxyw ixkôt hamaxpêr prãm kêt nê. Anê.

Tĩrtũm kapêr ã kagà htũm kot ã mẽ harênh kot anhỳr. ²² Jakamã kot kaj mẽ Tĩrtũm mã amnhĩ jarênh xà hã ixkre hwỳr akuprõ nê mẽ kapêr õ ho Tĩrtũm mã amnhĩ jarênh japêr. Nhũm Kris kôt amnhĩ xunhwỳr kêt xwỳnhjaja mẽ akôt agjê nê hkrĩ nê tee ri mẽ akapêr ma nê Kris kôt amnhĩ xunhwỳr kêt nê. Tanhmã kot mẽ amnhĩ to nê hkôt amnhĩ xunhwỳ? Mẽ kot akapêrta maare hã. No kot ka mẽ akapêr o Tĩrtũm nhỹ hã mẽ kãm akapêr nhũm mẽhprĩ hã amar mex nê. Jao tanhmã hamaxpêr to nê mẽ apyrã nê Kris kôt amnhĩ xunhwỳr japêr. ²³ Nom kot ka mẽ apiitã nhãm mẽ kapêr õ ho Tĩrtũm mã mex ã harê nhũm amarĩ ri mẽ pa xwỳnhjaja mẽ awỳr agjê nê mẽ akapêr ã mẽ ama nê hã mẽ apumu. Hãmri nê tee ri hamaxpêr nê mẽ akrã pipãnh ã axpên mã mẽ ajarê. ²⁴ Nom koja mẽ awỳr agjê ka mẽ akatàt kôt mẽ amnhĩ kapêr o Tĩrtũm kapêr jarênh o akuhê nhũm mẽhprĩ hã mẽ amar mex nê. Hãmri nê amnhĩ kapêr o akapêr ma nê hamaxpêr o:

—Hêxta waa nê. Xep ixte amnhĩ tomnuj xwỳnh na pa. Nà ãm hãmri na mẽ Tĩrtũm kapêr jarê. Nà ãm hãmri na kêt ja. Anê.

²⁵ Hāmri nē mẽ amā tanhmā kot amnhĩ tomnuj to hā amnhĩ jarēnh pa hāmri nē hkaga nē Jejus kōt amnhĩ xunhwỳ. Nē hkōnkrā ho htēm nē hkrĩ nē Tĩrtũm mã mex o mex ā harē. Hāmri nē mẽ amā:

—Nà ãm hāmri na hte Tĩrtũm mẽ akamā pa ho pa. Anē.

Tĩrtũm nhōrkwỳ kamā mẽ pahte tanhmā amnhĩ nhĩpêx to hā mẽ pamā karō
Atre 2.42, 5.12-13; Eprêw 10.25

²⁶ E Jejus kōt ixkwỳjaja. Kot paj hpānhā axtem mẽ amā mẽmoj tã karō. Mẽ kot Tĩrtũm mã amnhĩ jarēnh xà hā ixkre kamā tanhmā mẽ ate amnhĩ nhĩpêx to hā karō ka mẽ inhma.

Nà kêr ka mẽ axpēn wỳr akuprō nē akrĩ ka mẽ atō amā Tĩrtũm mã mex ā harēnh ā mẽ grer o agrer prām hāmri nē māmri kām ho gre. Hāmri nē agrer pa kê apānhā mẽhō kànhmā xa nē Tĩrtũm kapēr kwỳ ho mẽ ajahkre. Nē ho anhỳr pa nhũm hpānhā mẽhō kànhmā xa nē Tĩrtũm kot tanhmā ho mex to hā mẽ amā amnhĩ jarē. Nē amnhĩ jarēnh pa hāmri nhũm mẽhō nhām mẽ kapēr ò ho mẽ amā ujarēnh japêr. Hāmri nē ujarēnh pa kê mẽhō hpānhā mẽ akapēr o hprĩ hā mẽ amā kapêrta jarē.

E kêr ka mẽ axpēn wỳr akuprō nē Kris kōt axpēn to axihtỳx kaxyw ā axpēn pānhā amnhĩ nhĩpêx anē.

²⁷ Nē ka mẽ atō amā nhām mẽ kapēr ò ho mẽ kām akapēr prām japêr. Nom kêr ka mẽ axohtō nē ã mẽ kām amnhĩ nhĩpêx anhỳr kêt nē. ãm mẽ atō wa axkrut্রে rỳ axkrunêpxire nē mẽ kapēr ò ho mẽ kām akapēr. Hāmri nē axpēn pānhā akapēr pa kê mẽhō kot hprĩ hā mẽ kapēr òta mar japêr nē mẽ apānhā xa nē mẽ akapēr o mẽ kām harē kê mẽhprĩ hā mar mex nē. ²⁸ Nom koja ja kaxyw mẽhō amrakati japêr ka mẽ kapēr ò ho akapēr kêt nē. ãm kapxipix nhỹri ahte Tĩrtũm mã akapēr.

²⁹ Nē kê Tĩrtũm nhỹ hā kapēr jarēnh xwỳnhjê hō wa axkrut rỳ axkrunêpxi nē mẽ ajahkre ka mẽ aprĩ hā mar o akrĩ. Hāmri nē mar pa nē tanhmā mẽ harēnh to. ãm hāmri Tĩrtũm nhỹ hā kapēr ã mẽ harē rỳ ho hêx ã mẽ harē.

³⁰ Nē koja mẽhō Tĩrtũm nhỹ hā mẽmoj jarēnh o xa. Rôm nhũm Tĩrtũm mẽ kaxyw mẽ atō mã ajamaxpēr kwỳ gō. Ka kapēr o ãm xwỳnhta mã kànhmā anhĩhkra pē kê apumu nē anhĩkrê. Hāmri ka hpānhā xa nē mẽ kām tanhmā ajamaxpēr tota jarē. ³¹ Nom kêr ka mẽ anhĩpê mẽ kām akapēr hkêt nē. ãm axpēn pānhā Tĩrtũm kapēr o axpēn jahkre nē ho axpēn jamaxpēr o axihtỳx. Ja mex. ³²⁻³⁴ Nom kêr ka mẽ axpēn wỳr akuprō nē apiitã anhĩpê atỳx ri akapēr kêt nē. Ja na Tĩrtũm kêp hprām nōkati. Mẽ ate axpēn pānhā axpēn mã akapêrja na kām hprām. Jakamā kê mẽ kot Tĩrtũm nhỹ hā mẽ kapēr jarēnh o pa xwỳnhjaja taxy axpēn jahkre hā axpēn jamã. Nhũm mẽhō kumrêx kapēr pa hāmri ka hpānhā mẽ kām akapēr.

Nē kê mēnijaja amarĩ mẽ ahkreja mar o hkrĩ. Ijaew kot amnhĩ nhĩpêx xà hkōt. Jakamā kwa mẽ anijaja. Kêr ka mẽ amarĩ akryk mẽ mar o akrĩ nē axpēn mã akapēr o akrĩ hkêt nē. ³⁵ No kot kaj mẽ tee ri mẽmoj ma nē mar mex kêt japêr tã hā axpēn kukjêr kêt nē. ãm akryk arĩ mar o akrĩ. Hāmri nē akupỳm anhōrkwỳ hwỳr tē nē rĩ kormã hā amjên kukja. Nom kot ka mẽ apikuprōnh xà hā ixkre kamā axpēn mã akapēr o akrĩ nhũm mẽ amjênjaja tee ri ja hā mẽ apumu nē hpijaàm nē.

³⁶ E na pa ã Tĩrtũm mã amnhĩ jarēnh xà hā ixkre kamā tanhmā mẽ pahte amnhĩ nhĩpêx to hā mẽ amā karō anē. Tã te mẽ apê ja mex kêt pyræk. Kwa mon ka wem ja ma nhũm mẽ apê omnuj nē? Xà mẽ ate Tĩrtũm kapēr mar mex o ijakrenh kōt na ka mẽ ã ajamaxpēr anē? Xà na pre Tĩrtũm mẽ akumrêx mã kapêr? Hā na ka mẽ ã ajamaxpēr anē? Rỳ xà mẽ kapxipix mã na pre kapêr? Hā na ka mẽ ixkapêr ma nhũm mẽ apê omnuj nē? Nà ixkumrêx na pa pre mẽ awỳr inhmōr nē mẽ amā Tĩrtũm kapēr jarēnh kēnã kot ka kêt mẽ axtem nē ã ajamaxpēr anē. ³⁷ Kot kaj mẽ atō ã ajamaxpēr anhỳr japêr nē ajamaxpēr o:

—Nà na pre Tĩrtũm tanhmā inhmā kapêr to pa ô ri mẽ kām ixujarēnh mex o ri ixpa.

Anhỳr o ajamaxpêr. Rỳ ajamaxpêr o:

—Nà na pre Tĩrtũm Karō mẽ kaxyw tanhmā ixto pa ÿ hā tanhmā mẽ ho mex to ho ri ixpa.

Anhÿr o ajamaxpêr. Kot kaj mẽ ã ajamaxpêr anê hãmri nê mãânên pa ã ixte amnhĩ nhĩpêx anhÿr ã ixpumunh mex kurê kumrêx. Amnhĩ pyrà nê ixte Tĩrtũm nhĩ hã mẽ kãm ixkapêr xwÿnh ã ixpumunh nê hã ijarênh kurê kumrêx. ³⁸ Nom koja ja hã ijarênh kêt ka mẽ ja hã omu hãmri nê tanhmã kot mẽ amã kapêr toja ma nê ãm ama.

³⁹ E Kris kôt ixtõ nê ixtõxjaja. Kêr ka mẽ amnhĩ to Tĩrtũm Karõ wÿ kê ma mẽ ate mẽ kãm Tĩrtũm kapêr jarênh o ri apa kaxyw mẽ ato mẽ axihtÿx.

Nê koja mẽhõ kãm nhãm mẽ kapêr õ ho kapêr prãm ka mẽ ja nê kãm akapêr kêt nê. Kwãr mãmrĩ ã amnhĩ nhĩpêx anê. ⁴⁰ Nom kêr ka mẽ ate Tĩrtũm mã amnhĩ jarênh xà hã ixkre kamã axpên pãnhã axpên mã akapêr nom anhĩpê kãm akapêr hkêt nê.

15

*Kris akupÿm htĩr kumrêx ã harênh
Atre 2.23-36, 10.39-41; Wam Korît 6.14*

¹ E Kris kôt ixkwÿjaja. Kot paj axte mẽ amã Jejus kot mẽ panê tanhmã amnhĩ nhĩpêx to hã harê ka mẽ inhma. Na pa pre ra mẽ amã ja jarê ka mẽ ama nê hkôt amnhĩ xunhwÿ. Nê hkôt amnhĩ nhĩpêx mex o ri apa. ² Na pa pre mẽ amã harê ka mẽ amnhĩ kaxyw kãm ajamaxpêr tÿx nê nhũm Tĩrtũm mẽ ato hkra. Tã ka htem arĩ kapêr kôt amnhĩ nhĩpêx mex o ri apa. Koja mẽhõ kot Tĩrtũm kapêr mar tã amnhĩ kaxyw hkôt hamaxpêr kêt nê nhũm Tĩrtũm tee ri amnhĩ tã omu nê ho hkra hkêt nê.

³ Na pa pre amnhĩ krã hkôt mẽ amã tanhmã Kris jarênh to hkêt nê. Ixte kapêr mar xà hkôt na pa hte amnhĩ xõ ri mẽ amã tanhmã harênh to ho ri ixpa. Jejus jarênhja na mex o kot mẽ ujarênh piitã hakrenh par kumrêx. Tã tãm kot paj mẽ amã harê. Na pre Krisja mẽ pahte amnhĩ tomnuj pãnhã amnhĩrer kaxyw mẽ panê ty. Tĩrtũm kapêr ã kagà htũm kot hkukamã harênh xà hkôt. ⁴ Hãmri nhũm mẽ kên kre kamã haxà nhũm kamã nõr o apkati. Nê axte hã apkati. Hãmri nhũm Tĩrtũm akupÿm ho htĩr. Kapêr ã kagà htũm kot hkukamã harênh xà hkôt. ⁵ Tã nhũm Simãw Pêtre kumrêx akupÿm htĩr ã omu nhũm hpãnhã Jejus nhĩ hã mẽ ahkre ho mẽ pa xwÿnh maatijaja haxwÿja omu. ⁶ Hãmri nhũm mẽ kot hkôt mẽ pa xwÿnh pê 500 jakrenh xwÿnh piitã anhĩpê haxwÿja akupÿm htĩr kãm omu. Na pre ra mẽ hkwÿjaja ty nhũm mẽ hkwÿjaja arĩ htĩr nê pa. ⁷ Jakamã nhũm prem ra akupÿm htĩr kãm omu. Hãmri nhũm hpãnhã Xiakreja omu. Nhũm hpãnhã ÿ hã mẽ ahkre o mẽ pa xwÿnh piitã omu. Akupÿm htĩr kãm omu. ⁸ Tã pa na pa pre ijaxwÿja amnhĩ to hapu nê akupÿm htĩr kãm omu. Te ixpê mẽ hkra kot hapu pyrà nê amnhĩ to hapu nê omu. Na pre kaxkwa kamã inhmã kapêr o xa pa ixprĩ hã omu. ⁹ No mẽ kot ixpyrà nê Kris nhĩ hã mẽ ahkre ho mẽ pa xwÿnh maati hkwÿjaja na mẽ mex o kot ijakrenh. Na pa pre hte mẽ hkĩnhã amnhĩ tomnuj tÿx nê. Jao Kris pê hkrajê homnuj tÿx o ri ixpa. Tã hkôt amnhĩ xãm hãmri nê tee ri ã amnhĩ nhĩpêx anhÿr ã amnhĩ pumu nê amnhĩ kamã ixpijaàm tÿx nê. Jakamã na pa hte Kris nhĩ hã kapêr jarênh o ixpa hã amnhĩ pumu nê ixte hkôt amnhĩ xãm kêt ri tanhmã ixte amnhĩ nhĩpêx toja mã ijamaxpêr nê ixpijaàm nê. ¹⁰ Na pa pre amnhĩ tomnuj tÿx o ixpa htã nhũm Tĩrtũm arĩ kãm ijapê nê. Nê ixkamã ukapri nê. Pa pre hkôt amnhĩ xãm nhũm ixto hkra pa ra kãm tanhmã amnhĩ nhĩpêx to mex rãhã ho ixpa. Jakamã na hte tee ri amnhĩ tã ixpumu nê tanhmã hamaxpêr to hkêt nê. Rÿ hamaxpêr o:

—Hêxta waa nê. Inhmã Pawre japê nê ixte ho mex tã nhũm ixkôt amnhĩ nhĩpêx kêt kumrêx.

Anhÿr o tee ri hamaxpêr kêt nê. Na pa hte kãm tanhmã amnhĩ nhĩpêx to ho ixpa rũnh o ÿ hã mẽ kapêr o pa xwÿnh kwÿjê jakre ho ixpa. Nom amnhĩ krã hkôt mẽ ahkre hkêt nê. Ja kaxyw na pre Tĩrtũmja ixto ixihtÿx pa ÿ hã kãm tanhmã amnhĩ nhĩpêx to ho ri ixpa nhũm ja hã ixpumu nê hkĩnh nê.

¹¹ Nê Jejus jarênhja ãm pixii. Axtem hõ hkêt. Nê ÿ hã mẽ ahkre ho mẽ pa xwÿnhjê kapêrja nê pa ixte mẽ amã harênhja kot axpên pyræk. Harênh tipxi. Kris kot mẽ pahte amnhĩ tomnuj mÿrapê mẽ panê htyk nhũm Tĩrtũm kot akupÿm ho htĩr ã wa harênhja na pa hte pix jarênh o ri mẽ akôt ixpa. Ka prem inhma nê amnhĩ kaxyw hkôt ajamaxpêr tÿx nê.

Tirtũm kot akupỹm mē pahto mē pahtĩr ā harēnh
Rukre 20.37

¹² Nē kwa ra ixte mē amā Kris htyk nē akupỹm htĩr ā harēnh tā ka xep mē akwỹjaja axtem nē mē htyk nē akupỹm mē htĩr kēt ā mē hkamnhĩx o ri apa. ¹³ Kwa mē ajamaxpēřja mex kēt. Kēp apu ām hāmri mē ate ā mē harēnh anhỹr ronhỹx pre Kris haxwỹja akupỹm htĩr kēt nē. Nhỹx pre htyk o ty.

¹⁴ Nē kēp apu Kris akupỹm htĩr kēt ronhỹx pa mē ām mē amā kapēř jarēnh o ixpa kaprỹ. Ka mē ajaxwỹja amnhĩ kaxyw hkōt ajamaxpēř kaprỹ.

¹⁵ Nē kēp ām akupỹm mē htĩr kēt ronhỹx pa mē ixte mē amā Tirtũm kapēř jarēnh o ri ixpa xwỹnhjaja mē amā ho ixēx o ri ixpa. Na pa htem mē amā Tirtũm ra kot akupỹm Jejus o htĩr ā harēnh o mē akōt ixpa. Tā kēp apu akupỹm mē htĩr kēt ronhỹx pa mē ām mē amā harēnh o ixēx.

¹⁶ Nē kēp apu akupỹm mē htĩr kēt ronhỹx pre Kris haxwỹja akupỹm htĩr kēt nē. Nhỹx pre ām amarĩ tyn hapēx.

¹⁷ Nē Kris amarĩ htyk nē hapēx ronhỹx kot pu mē ri amnhĩ kaxyw hkōt pajamaxpēř nē hkōt amnhĩ xunhwỹr kaprỹ.

Nē Kris amarĩ htyk nē hapēx ronhỹx pre Tirtũm Jejus kukwak ri mē panē mē pahte amnhĩ tomnuj o hapēx kēt nē. Nhỹx pu mē pahpiitā nhỹrmā ma kuwy hwỹr pajapēx pa.

¹⁸ Nē kēp apu Kris htyk nē hapēx ronhỹx ra mē kot amnhĩ kaxyw hkōt hamaxpēř tā ra htyk xwỹnhjaja ma mē kot amnhĩ tomnuj mỹrapē kuwyta wỹr hapēx.

¹⁹ Nē kēp apu Kris htyk kumrēx nē hapēx ronhỹx pu mē kormā pahtyk kēt xwỹnhjaja tee ri amnhĩ wỹr kamā pajamak o ri papa kaprỹ. Nē pahpē hkra hā amnhĩ jarēnh kaprỹ. Jao pahkaprĩ htỹx o mēmoj piitā hakrenh par kumrēx nē ri papa.

Kris kumrēx akupỹm htĩr ā harēnh

Atre 26.23; Sikũn Korĩť 4.14; Piripos 3.10-11; Wam Tesarõn 4.15-18; Apokariř 20.1-15

²⁰ Nā mē htyk nē nhỹrmā akupỹm mē htĩr kēt ā mē harēnhja kot anhỹr kēt. Ra Tirtũm kot akupỹm Kris o htĩr jakamā koja määnēn hkra htyk xwỹnhjaja nhũm mē piitā Jejus pyrā nē nhỹrmā akupỹm mē ho htĩr pa. Jakamā na pu htem Kris akupỹm htĩrja mā pajamaxpēř nē amnhĩ kukamā pajamaxpēř o:

—Nā ra Tirtũm kot akupỹm Jejus o htĩr jakamā koja urāk nē nhỹrmā akupỹm mē pahte hkōt amnhĩ xunhwỹr xwỹnh piitā mē pahto mē pahtĩr. Nā koja ā mē panhĩpēx anē. Ja kaxyw āhpumunh tỹx kumrēx xwỹnh kēnā. Anē.

²¹ Nē amnepēm na pre Tirtũm my kot waja nhĩpēx. Hāmri nhũm kot tanhmā amnhĩ tomnuj to ho ra mē htykja o hkra. Tā nhũm wamta kōt my hōta wamta rom amnhĩ to mex o mē htyk tā akupỹm mē ho htĩr o hkra. ²²⁻²³ Tā mē pahpē wam my pē Atāw kanrēhā tāmnhwỹ jakamā kot puj mē urāk nē nhỹrmā ty. No ām määnēn mē pahpē Kris kraa. Kris kumrēx na pre akupỹm htĩr. Tā koja nhỹrmā akupỹn mē pahwỹr wry hāmri nhũm Tirtũmja kot hipēx pyrā nē akupỹm mē pahto mē pahtĩr. Mē pahte hkōt amnhĩ xunhwỹr ā mē pahpumunh kōt akupỹm mē pahto mē pahtĩr pa. No ām kormā.

Kris nhỹrmā kot mē htyk o hapēx ā harēnh

Juāw 11.25; Rõmān 6.23; Wam Korĩť 15.54; Sikũn Ximotre 1.10; Eprēw 2.14; Apokariř 20.14

²⁴⁻²⁸ Nē koja Kris arĩ mē ho amnhĩptār rāhā nhũm Tirtũm mē kot kutā amnhĩ xunhwỹr xwỹnhjē pē mē hihtỹx xā ho hapēx pa. Kapēř ā kagā htũm kot ja jarēnh kot:

Koja nhỹrmā Tirtũm Kris kot kām mē ho amnhĩptār kaxyw ām. Anē.

Jakamā Jejus tapxipix koja mē ho amnhĩptār o pa. Koja Tirtũm pix mē ho amnhĩptār kēt nē. Nom koja pahi hkwyjē hō axte nhām mē ho amnhĩptār kēt kumrēx.

Tā mē kot mēkarõmnuti hkōt kām tanhmā amnhĩ to ho mē pa xwỹnhjaja koja Tirtũm ma amnhĩ nē kuwy hwỹr mē rēnh pa. Nē mēhtykja o hapēx nhũm mēhō axte htyk kēt kumrēx. Jakamā koja Jejus Kris mēmoj punuj piitā ho hapēx nē Mēpahpām Tirtũm nhĩhkram akupỹm mēmoj piitā haxār pa. Tirtũm jamaxpēř xā hkōt ā mēmoj to anhỹr

par anē hāmri nē ĩhkram mēmoj jaxàr pa. Nē määnēn tām kām amnhĩ gō. Jakamā nhũm Tĩrtũm tapxipix mēmoj piitā ho amnhĩptàr pa.

Mē htyk xwỳnhjê jarēnh

²⁹ Nē na hte mē pahkwỳjaja kormā kēp Tĩrtũm kra hkêt tā Jejus kôt mē kot amnhĩ xunhwỳr nē mē htyk xwỳnhjê mā hamaxpēr o pa. Hāmri nē mē kām nhỹrmā axte mē omunh prām xaj mē uràk nē Jejus kôt amnhĩ xunhwỳ nhũm mē hkrā kumrà. Tā akupỹm mē htĩr kêt ronhỹx mē am ā pajamaxpēr anhỹr kaprỳ. ³⁰ Nē paa. Na pa hte ma mē kām Tĩrtũm kapēr jarēnh o ri mē hkôt ixpa. Nhũm mē hkwỳjaja ja hā inhma nē ixkamā gryk nē ixtā amỳnē pa mē mỳrapê ixpunuj nē ri ixpa. No am amnhĩ to htỳx nē arĩ ri mē kām Kris kapēr jarēnh o ri mē hkôt ixpa. Tā kēp am nhỹrmā akupỹm ixtĩr mā kêt ronhỹx pa tee ri ā amnhĩ nhĩpêx anhỹr o ri ixpa kaprỳ. ³¹ Na htem apkati mē ixtā tanhmā àmnēnh to ho ri pa. Am hāmri na pa mē amā ā mē harēnh anē. Nom na pa hte tee ri amnhĩ kukamā ijamaxpēr o ri ixkaprĩ nē ixpa hkêt nē. Mē kot ixpĩr mā tā pa hte mē ate Pahihti Jejus Kris kôt amnhĩ nhĩpêx mex ā mē apumunh kôt ixkĩnh nē ri ixpa. Nhũm te ixkamā mēmoj kêt pyràk pa hte ri ixpa. ³² Na pa hte jar Epes kamā mē oprê xwỳnhjê kutā amnhĩ to htỳx pē mē kām Jejus kapēr jarēnh o ri mē hkôt ixpa nhũm mē kām mar prām kêt jakamā hā ixtomnuj tỳx nē. No nhỹrmā ixyk nē akupỹm ixtĩr mā kêt ronhỹx pa mē kēp Kris kwỳ hkêt xwỳnhjê jamaxpēr o ijamaxpēr nē mē uràk nē ijamaxpēr o:

Ixte ixyk ā arĩgro pumunh kêt jakamā kot paj māmri mēmoj piitā hkur o ri ixpa.

Nē māmri mēmoj piitā ho ixkōm o ri ixpa.

Nē māmri mēmoj piitā ri tanhmā ho ho ri ixpa.

Ixyk nē axte ixte ā amnhĩ nhĩpêx anhỹr o ixpare kaxyw ā.

Anhỹr o nhỹx pa ijamaxpēr o ixpa. Kēp am Tĩrtũm kot akupỹm mē pahto mē pahtĩr mā kêt ronhỹx pu mē ā mē kēp Kris kwỳ hkêt xwỳnhjê jamaxpēr anhỹrja kôt pajamaxpēr pix o ri papa. No am ja kot anhỹr kêt.

³³ Na htem mēmoj jarēnh o:

—Mē kot htỳx ri amnhĩ tomnuj xwỳnhjê hkôt ri mē pa xwỳnhjaja koja mē gaa nē mē kot amnhĩ nhĩpêx kôt amnhĩ nhĩpêx o ri pa. Anē.

Am hāmri na ā mē harēnh anhỹrja. Jakamā kwa mē okora. Kêr ka mē ā amnhĩ nē mē kot amnhĩ nhĩpêx anhỹr o mē pa xwỳnhjê pumunh mex o ri apa. ³⁴ Kwa mē tokyx mē ate tanhmā amnhĩ tomnuj to hā amnhĩ pumu nē axte ā amnhĩ nhĩpêx anhỹr kêt nē. Nē mē ate Tĩrtũm kot akupỹm mē ho htĩr kêt ā harēnh xwỳnhjaja. Te mē ate Tĩrtũm kot amnhĩ nhĩpêx ā omunh kêt pyràk. Tā mē ate tokyx ja hā amnhĩ pumunh nē amnhĩ kamā apijaam kaxyw na pa ā mē amā ixkapēr anē.

Mē panhĩ nyw jarēnh

Rukre 20.34-36; Rōmān 8.10-11; Sikũn Korīt 5.1; Piripos 3.20-21

³⁵ Nē mǎn ka mē atō akupỹm mē htĩr ā mē harēnh ma nē tee ri mē hkukamā ajamaxpēr nē hā ri tanhmā axpēn kukjêr to nē axpēn mā:

—Kwa tanhmā koja we Tĩrtũm akupỹm hkra htyk xwỳnhjê ho htĩr to? Ra mē htyk nē mē ĩ katōk nē hapêx par mā kēnā. Tanhmā kot wem amnhĩ to nē akupỹm htĩr? Nē tanhmā koja we mē ĩ nywja kute wehe? Anē.

³⁶ Nà na ka mē atỳx ri ā ajamaxpēr anē nē tee ri mē hkukamā ajamaxpēr. E kot paj ixprĩ hā ja hā ejēp jarē ka mē inhma. Nà na htem mēmo y hkre. Te mē kot mē htyk jaxàr pyràk o hipêx nē hkre nhũm hikwỳ nē gaa nē higrōt hapôj. Nom te kēp mēmo yta pyràk kêt. ³⁷ Am hy pix na htem hkre. No higrōt kre hkêt nē. Rỳ tanhmān pàr nywja kre hkêt nē. Am hy pix na htem hkre. Tā nhũm higrōt hapôj nē hprêk nē gaa nē ô. ³⁸ Tĩrtũm na hte hamaxpēr xà hkôt tanhmā ho nhũm higrōt hapôj nē hprêk nē ô. Tā ja pyrà nē kot puj mē Tĩrtũm jamaxpēr xà hkôt pahtyk tā koja akupỹm mē pahto mē pahtĩr nē mē pamā mē panhĩ nyw gō.

³⁹ Nê mẽmo hy piitã te kot axpên pyrãk kêt. Ahpÿnhã na. Ja pyrã nê ahpÿnhã ri mẽmoj piitã ĩ. Na axtem mẽ panhĩ nê axtem mry nhĩ nê axtem àk nhĩ nê axtem tep nhĩ. Mẽmoj piitã ahpÿnhã ri ĩ.

⁴⁰⁻⁴¹ Nê kaxkwa kamã haxwÿja mẽmoj piitã ahpÿnhã no ãm muxre. Myytija mex. Nê mytwrÿreja axte mã no ãm haxwÿja mex. Nê kanhêti haxwÿja mex. Haxwÿja axte mã. Kamã hkwy hpòk kryre nê kamã hkwy hpòk rÿnhti no ãm piitã mex.

Nê jar pika ja kamã haxwÿja mẽmoj piitã mex. No ãm te kot kaxkwa kamã mẽmoj jarir xwÿnhja mex pyrãk kêt. Axtem na raa.

⁴² Tã koja mẽ panhĩ nywja haxwÿja axte mã. Te kot panhĩ htũm pyrãk kêt. Na htem ty nhũm mẽ ma mẽ o mra nê mẽ hagiê. Nhũm mẽ hikwÿ nê gaa nê ĩ rerek nê hapêx. Tã koja Tirtũm akupÿm tanhmã mẽ pahto mẽ pahtĩr to pu mẽ hpãnhã pamex kumrêx. Hãmri nê axte mã mẽ panhĩ nyw mex o mex jakamã koja axte htyk nê ĩ rerek kêt nê.

⁴³ Na htem ty nhũm mẽ hagiê nhũm htyk xwÿnhja tanhmã amnhĩ to hkêt nê amarĩ hikwÿ. Omnuj nê ĩ nhenhek nê hikwÿ. Tã koja Tirtũm akupÿm mẽ ho mẽ htĩr nê mẽ kãm mẽ ĩ nyw gõ nhũm mẽ hpãnhã mex kumrêx nê hihtÿx nê Tirtũm nhõ krĩ kamã pa ho pa.

⁴⁴ Mẽ htyk nhũm mẽ kot mẽ hagiênh xwÿnhjaja na htem arĩ ĩ htũm ã hikwÿ. ãm jar pika ja pix kãm ri mẽ papa kaxyw na mẽ panhĩ htũmja. No mẽ panhĩ nywja axtem Tirtũm nhõ krĩ kamã ri mẽ papa kaxyw jakamã koja mẽ panhĩ nywja axte mã. Tirtũm Karõ koja mẽ pamã kugõ.

Mẽ panhĩ nyw te kot Kris nhĩ pyrãk ã harênh

Rukre 20.34-36

⁴⁵⁻⁴⁶ Nê Tirtũm kapêr ã kagã htũm kot Atãw jarênh kot:

Na pre Tirtũm my kot wa Atãwja nhĩpêx. Jakamã Atãw kêp pika nhõ xwÿnh na pre. Anê. ã Atãw jarênh kot anhÿr. Ja pyrã nê na pu htem pakatorxã nhõhy rũm pajapôj nê Atãw pyrã nê pahpê pika nhõ xwÿnh. Tã nhũm Atãwja pa nê gaa nê hpigêt nê ty. Jakamã kot puj mẽ urãk nê papa nê gaa nê ty. Nom nhũm Krisja Atãw kurom kêp akupÿm mẽ ho mẽ htĩr xwÿnh jakamã kot puj mẽ pahpê hkwyjaja Atãw pyrã nê nhÿrmã mẽ pahtyk tã nhũm Kris akupÿm mẽ pahto mẽ pahtĩr. Hãmri nhũm Tirtũm Karõ mẽ pamã mẽ panhĩ nyw gõ pu mẽ axte pahtyk kêt nê. Pãnhã axte mã mẽ pahpê kaxkwa nhõ xwÿnh.

⁴⁷ Nê Atãw na pre Tirtũm pika ho hipêx nê ho htĩr nhũm ri pa. Nom Kris na pre Atãw rom kaxkwa rũm mẽ pahwÿr wrÿ. ⁴⁸ Tã mẽ pahpê pika nhõ xwÿnhjaja te mẽ pahpê Tirtũm kot wam my nhĩpêx xwÿnhja pyrãk. No mẽ pahte kaxkwa hwÿr ma papa mã xwÿnhjaja te mẽ pahte kaxkwa rũm my kot mẽ pahwÿr wrÿk xwÿnh Krista pyrãk. ⁴⁹ Tã kormã mẽ pahpê pika nhõ xwÿnh jakamã te mẽ pahpê my pika ho hipêx xwÿnhja nhĩ pyrãk. Nom kot puj mẽ nhÿrmã ty hãmri nê hpãnhã te pahpê kaxkwa rũm my kot mẽ pahwÿr wrÿk xwÿnhja nhĩ pyrãk.

Axte mẽ pahtyk kêt kumrêx ã mẽ pajarênh

Juãw 11.25; Sikũn Korĩť 5.4; Wam Tesarõn 4.13-18

⁵⁰ Nê kot puj mẽ panhĩ htũm rãhã Tirtũm nhõ krĩ hwÿr paxãpir kêt nê. Panhĩ htũm na hte ty nê rerek nê hapêx. Jakamã koja Tirtũm Karõ mẽ pamã mẽ panhĩ nyw gõ pu mẽ rĩ kormã ma õ krĩ hwÿr pajapêx pa nê kamã papa ho papa.

⁵¹⁻⁵² E mẽ inhma. Na pre kormã Tirtũm mẽ amã mẽmoj to amnhĩrĩť kêt tã ra inhma ho amnhĩrĩť. Jakamã kot paj ÿ hã mẽ amã harê ka mẽ inhma. Nã kot puj mẽ pahpiitã mẽ pahtyk kêt nê. Koja nhÿrmã Tirtũm kapêr o mẽ wrÿk xwÿnhjê hõja mẽ pamã pifti kakõ. Mẽ pajaêr pê hkakõ. Hãmri nhũm Tirtũm kra ra mẽ htyk nê mẽ hikwÿ xwÿnhjaja akupÿm ĩ nyw o htĩr kurê kumrêx. Nê kormã mẽ pahtyk kêt xwÿnhjaja kot pu mẽ mẽ pahtyk kêt ri mẽ urãk nê panhĩ nyw kurê kumrêx. Hãmri pu mẽ pahpiitã pahtĩr o pahtĩr tũm nê papa. ⁵³ Koja Tirtũm mẽ panhĩpêx o te mẽ pahte paxê htũm o papinhĩpanh nê hpãnhã paxê nyw jagjênh pyrãk. Jao mẽ panhĩ htũm o hapêx nê hpãnhã mẽ pamã mẽ panhĩ nyw gõ pu mẽ axte pahtyk kêt kumrêx nê ri papa ho papa. ⁵⁴ Tirtũm kapêr ã kagã htũm kot ja jarênh kot:

Na ra Tirtũmja mēhtyk ho hapêx pa. Anē.

Te ra kot ho hapêx par pyrək o ā harēnh kot anhÿr. No ām kormā. Jakamā kot puj mē nhÿrmā panhĩ nyw nē ri papa nē mē pahtō axte pahtyk kêt kumrēx. ⁵⁵ Mē pahtykja te mē kot makre par nhũm axte kot mē hkamnhwÿr kêtja pyrək. Urà nē koja Tirtũm akupÿm mē pahto mē pahtÿr pu mē axte pahtyk kêt nē. Nē axte ri pamā ma hkêt nē papa. Nē axte paxà hkêt nē. ⁵⁶ Tirtũm kapēr ā kagà htũmja ā mē pakukamā mē pajarēnh kot anhÿr. Mē pahte amnhĩ tomnuj xwÿnh jakamā kot puj mē nhÿrmā ty. ⁵⁷ Nom nhũm Tirtũm àhpumunh tÿx o àhpumunh tÿx jakamā na hte Pahihti Jejus Kris kukwak ri mē pahte hkôt amnhĩ xunhwÿr xwÿnhjê nē mē pahte amnhĩ tomnuj rēnh pa. Pu mē nhÿrmā mē pahtyk tā nhũm akupÿm mē pahto pahtÿr.

Mē pahte Jejus mā tanhmā amnhĩ nhĩpêx mex to hā mē pamā karō

Karatas 6.9; Korosē 1.10

⁵⁸ Jakamā e kwa Jejus kôt ixkwÿjaja. Kêr ka mē arĩ Pahihti Jejus kôt mǎn amnhĩ xunhwÿr tÿx rāhā ho ri apa. Nē kapēr kôt pix mā ri amnhĩ nhĩpêx rāhā nē kām tanhmā amnhĩ nhĩpêx mex to ho ri apa. Kot kaj mē ā amnhĩ nhĩpêx anē hāmri nē kām tanhmā amnhĩ nhĩpêx to kaprÿ ho ri apa hkêt nē. Ām hāmri kām mēmoj to anhÿr mex rāhā ho ri apa.

16

Mē kēp amrakati xwÿnhjê jarēnh

Atre 11.27-30; Rōmǎn 15.25-27; Sikũn Korîť 8.1-24, 9.1-5; Wam Ximotre 6.18

¹ Nē na pa pre krĩ pē Karatas kamā tanhmā Jerujarē kamā Kris kwÿjê jarēnh to. Ijaew kwÿ kot mē pahpyrà nē Jejus kôt amnhĩ xunhwÿr ā mē harē nē mē kēp amrakati hā mē harē hāmri nē mē kām:

—E. Kwa kêr ka mē kām mē akàxpore hkwÿ ho akuprō nē ma mē hwÿr amē.

Anhÿr o mē kām ixkapēr. Jakamā kwa kêr ka mē urək nē mē kaxyw mē kām kàxpore hkwÿ ho akuprō. ² Mē panhō arĩgromnu pē sap ā hkwÿ ho akuprō. Kot kaj mē akàxpore rax japêr nē mē kaxyw hkwÿ ho rax nē axi. Nom kot kaj akàxpore grire japêr nē mē kaxyw mē kām ho grire nē agō. Kêr pa mēmo arĩgro hā ma mē awÿr mō ka mē ra mē kaxyw ho apikuprōnh rax nē.

³ Nē ma mē kot mē kām ho mōr mā xwÿnhjaja ka mē ixkutêp mē akwÿjê rē. Kêr pa pōj nē mē omu hāmri nē mē kaxyw kagà nhĩpêx nē kamā mē harē. Nē mē kām kugō nhũm mē ma Jerujarē hwÿr kàxpore mē ro hā amnhĩ kôt o mō nē mē kām kugō. Mē kot kamā harēnh nē mar hāmri nē mē kamjaja mē ate mē kaxyw mē rēnh ā mē ajarēnh ma. ⁴ Rÿ kot ka mē amā mē hkôt inhmēnh prām nē māmri mē hkôt inhmē pa ma mē hkôt mō.

Pawre kot amnhĩ kukamā amnhĩ jarēnh

Atre 19.21-22

⁵ Nom kot paj tokyx mē awÿr inhmōr kêt nē. Kot paj ja rũm ixkato nē hpānhā ma pika pē Masetōn wÿr mō. Hāmri nē mē hkôt ixpa grire nē ma kormā mē awÿr Korîť wÿr mō.

⁶ Hāmri nē pōj nē mē akôt ri ixpa ryy nē. Nē ixtā amgrà pixi nē hapêx nē rĩ kormā ma axte nhām krĩ hō hwÿr mō. Nē inhnojarêt ka mē ixto Tirtũm wÿ nē inhmā ixàpkur xà hkwÿ gō pa ma mē hwÿr pry hā hkur o mō. ⁷ No ixte mē awÿr ixpōx nē tokyx mē akurũm ixkator nē hpānhā ma nhām krĩ hō hwÿr inhmōrja na inhmā hprām kêt. Jakamā koja Tirtũm kām ja mex pa arĩ ri mē akôt ri ixpa hā ixtā mytwrÿ xohtō nē tokyx ma nhām inhmōr kêt nē. ⁸ Kot paj kormā jar Epes kamā ri ixpa rāhā nhũm mē hkĩnh pē Pētekos kato nē hapêx pa rĩ kormā ma Masetōn wÿr mō. ⁹ Na pa hte jar kormā mē kām Jejus kapēr jarēnh o ri mē hkôt ixpa nhũm mē ohtō nē inhmar o pa. Mē kām mar prām. Tā no nhũm mē hkwÿjaja ohtō nē mē kēp ja omnuj nē nhũm mē hā ixkamā gryk nē ixtomnu o pa.

Mē kot Ximotre ho mex ā mē harēnh

Hapuhā Juāw 5

¹⁰ Nê kwa koja Ximotre mẽmo arĩgro hã mẽ awỳr pøj ka mẽ omu nê ho mex nê. Nê mẽ amnhĩ nhõrkwỳ hwỳr awỳ kê mẽ akutã apkur o pa. Na hte ixpyrà nê Pahihti Jejus mã tanhmã amnhĩ nhĩpêx to mex o pa. ¹¹ Kormã mẽ pahkĩnhã nyw tã kêr ka mẽ tee ri ja hã omu nê ri axpên mã tanhmã harênh to hkêť nê. Mẽ ãm akapêr mex pix o kãm akapêr. Nê koja akupỳn nojarêť ka mẽ pry hã kãm apkur xà hkwỳ gõ kê mex pê man akupỳn ixwỳr mō pa tokyx omu. Kot paj jar mẽ pahkwỳjê mẽ akupỳn hpōx kamã ijamak o ixpa.

¹² Nê na pa hte xatã jar mẽ pahtō Aporja ma mẽ awỳr mōr kaxyw mẽ awỳr hano. Kot jar mẽ pahtō hkwỳjê mẽ ma mẽ awỳr mōr kaxyw. Nom kormã. Koja xep mẽ jar tanhmã amnhĩ to hpa nê rĩ kormã ma mẽ awỳr mō.

Kagà jatur xà kamã Pawre kot mẽmoj tã karō

Epes 6.10-12; Sikũn Ximotre 1.7; Wam Pêtre 5.8-9

¹³ E kwa kêr ka mẽ arĩ amnhĩ wỳr Jejus kamã ajamak rãhã ho ri apa. Nê hamãr pê kutêp tãm amnhĩ nhĩpêx o ri apa. Nê amnhĩ kaxyw hkôt ajamaxpêr tỳx rãhã nê.

¹⁴ Nê mẽ amã axpên kĩnh pê tanhmã axpên to mex to.

¹⁵ Mãn ka mẽ ra Estepti mẽ hkwỳjê jarênh ma. Mẽ hkumrêxjaja na prem pika pê Gres kamã Kris kôt amnhĩ xunhwỳ. Tã xep mẽ ra Kris kôt hkwỳjê ho mex o ri mẽ hkôt pa.

¹⁶ Kêr ka mẽ ã mẽ kot amnhĩ nhĩpêx anhỳr xwỳnhjê kapêr ma nê hkôt ri amnhĩ nhĩpêx o ri apa. Mẽ kot Kris mã mẽ ajamãr xwỳnh piitã kêr ka mẽ kapêr ma nê mẽ hkôt ri amnhĩ nhĩpêx mex nê.

¹⁷ Nê ota Estepti nê Akajkre nê Putunatreťa na mẽ ra jar pøj. Pa mẽ Sostenes mẽ wa mẽ omu nê wa ixkĩnh nê. Te ixte mẽ apumunh nê ixkĩnh tỳxta pyrãk. ¹⁸ Na xep prem ma mẽ awỳr mō nê tanhmã mẽ amã kapêr to ka prem mẽ ama nê akĩnh nê. Tã mẽ ra amnê ixwỳr mō nê tanhmã inhmã kapêr mex to pa mẽ kuma nê ijaxwỳja ixkĩnh nê. Kwa kêr pu mẽ ã mẽ kot mẽ panhĩpêx anhỳr xwỳnhjê ho mex o papa.

¹⁹⁻²⁰ Nê ota jar pika pê As kamã Kris kôt mẽ pahkwỳjaja piitã mẽ awỳr hpêr mẽ. Nê Akir mẽ hprō Prisireja wa. Nê wa õrkwỳ kamã mẽ kot Tĩrtũm mã amnhĩ jarênh kaxyw mẽ pikuprõnh xwỳnh piitã mẽ awỳr hpêr mẽ.

Nê kêr ka mẽ nhỳri axpên pumu nê mẽ apê Kris kôt mẽ ate axpên to atō nê atōx ã axpên mã akapêr mex nê akĩnh nê.

²¹ E kot paj kagà jatur xà kamã inhĩhkra ho mẽ amã amnhĩ nhĩxi nhĩpêx ka mẽ omu. Koja inhmã ixkapêr ã kagà xwỳnhhta ja hã kagà hkêť nê. Pa kot paj hipêx. Ixpê Pawre na pa ã amnhĩ nhĩxi nhĩpêx anê ka mẽ omu.

²² Nê kwa kêr ka mẽ arĩ amã Pahihti Jejus kĩnh o ri apa. Koja mẽhō kãm hkĩnh kêť hã koja Tĩrtũm ja hã homnuj tỳx kumrêx.

E “maranat.” Mẽ pakapêr kãm na htem maranat jarênh o: “Kwa tokyx akupỳn mẽ ixwỳr wrỳ Pahihti.” Anê.

²³ E kê Pahihti Jejus Krisja mẽ ato mex nê mẽ akutã nojarêť rãhã ho pa. ²⁴ Ixpyrà nê mẽ apê Jejus Kris kwỳ jakamã na pa hte inhmã mẽ akĩnh nê.

Tã ãm ja pix. Ixpê Pawre na pa ã mẽ awỳr kagà nhĩpêx nê mẽnh anê.

Sikũn Korĩt

Pawre wam Korĩt kãm Jejus kõt hkwyjê hwyr kagà nê mênh kõt kagà hõ mênh

Pawre na pre kagàja nhĩpêx. Kêp mry hkà ho ixkre nhĩpêx nê ho wênê ho pa xwýnh na pre. Tã hpãnhã kêp Jejus nhỹ hã hkrajê jahkre ho pa xwýnh. Jakamã na pre kagàja nhĩpêx nê Korĩt kãm mē kot Jejus kõt amnhĩ xunhwyr xwýnhjê hwyr kumê. Na pre ra mē hwyr wamta nhĩpêx nê kumê. Wam kagà nhĩxi pē Wam Korĩt. Tã axte hkõt ja nhĩpêx nê mē hwyr mênh jakamã kagà nhĩxi pē Sikũn Korĩt.

Na pre Korĩt kãm Jejus kõt mē htõjê hõ axtem nê nã puro kamã hpijaam kêt o pa nhũm Pawre tee ri harênh ma nê mē hwyr wam kagàta mē nê kamã tanhmã mē kot hipêx to hã mē kãm karõ. Tã kagà ja kamã axte tanhmã hã mē kãm karõ hto.

Na pre ra Korĩt wyr mē kêp Kris nhỹ hã mē ahkre hã amnhĩ to hêx xwýnhjaja mē hwyr pøj nê tanhmã mē kãm kapêr jarênh to ho mē hkõt pa. Nê tanhmã mē kãm Pawre ho hêx to. Jakamã nhũm kagàja kamã tanhmã mē kãm amnhĩ tã àprãr to nê kãm mē hkĩnh tỳx ã amnhĩ jarê. ã na pre Pawre mē kãm mēmoj jarênh nê hã kagà anê. Nê mē kãm hã kagà ho:

¹ Pa Korĩt kãm Tĩrtũm krajaja. Xà mē apiitã mē amex na ka mē apa? E ot pa mē awyr kagà nhĩpêx nê kumê. Mē amã nê mē anhõ pika pē Gres kamã Tĩrtũm krajê mē mē ato ixpimràatã mē awyr hipêx nê kumê. Ixpê Pawre na pa hte Tĩrtũm jamaxpêr xà hkõt ma Jejus Kris nhỹ hã krĩ piitã hkõt hkrajê jahkre ho ri ixpa. Tã Kris kõt mē pahtõ Ximotre mē wa mē awyr hipêx nê kumê.

² E kê Mēpahpãm Tĩrtũm mē Pahihti Jejus Kris wa mē ato mex rãhã ho pa. Nê mēmoj to mē akutã nojarêt rãhã ho pa. Ka mē wa kukwak ri ajamakêtkati nê amex nê ri akĩnh nê apa ho apa.

Pawre kãm amnhĩ xà htỳx kamã hamak pyma hkêt ã harênh

Rõmãn 1.11-12; Korosê 1.11; Sikũn Tesarõn 2.16

³⁻⁴ Nã Tĩrtũm kêp mē panhõ Pahihti Jejus Kris nhĩpêxã na. Nê kêp Mēpahpãm maati jakamã na hte mē pakamã ukaprĩ nê tanhmã mē pahto mex to ho pa. Kot puj mē mēmoj tã tanhmã amnhĩ to nê pahkaprĩ nê ri papa nhũm ja hã mē pahpumu hãmri nê hamaxpêr pix o akupým mē pahto mē paxihtỳx. Mēmo kaxyw na hte ã mē pahto mex anê? Nã mē pahte amnhĩ tã omunh nê amnhĩ pyrãk mē hkaprĩ nê ri mē pa xwýnhjê jamaxpêr o hihtỳx o mē hkõt papa kaxyw. Ja kaxyw na hte mē pajamaxpêr o hihtỳx. Jakamã kwa pu mē kãm mex o mex ã mãn harênh rãhã ho papa.

⁵ Na htem tõhã ixto Kris nhĩpêx pyrã nê tanhmã ixto pa amnhĩ xà htỳx kamã ijamak o ri ixpa. Tã nhũm Tĩrtũm inhĩpêx o te Kris nhĩpêx pyrã nê hamaxpêr pix o tanhmã ixkrã hto pa mē kutã amnhĩ to htỳx nê arĩ mē hkõt ixpa. ⁶⁻⁷ Na pa hte mē amã Kris kapêr jarênh o ixpa. Mē ate inhmar nê hkõt amnhĩ nhĩpêx kaxyw. Jakamã na hte mē kãm Tĩrtũm kapêr mar prãm kêt xwýnhjaja tõhã mē atã ixtomnuj nê pa amnhĩ xà htỳx kamã ijamak o ri ixpa. Tã kwãr mē mãmri ã inhĩpêx anê. Mē ate Jejus kõt amnhĩ xunhwyr tỳxja na inhmã hprãm. Na htem tanhmã Kris ã inhĩpêx to nhũm Tĩrtũm mē hã ixpumu nê tanhmã ixkrã hto pa inhmã amnhĩ xà htỳx kamã ijamak pyma hkêt nê ixpa. Nê arĩ mē hkõt mē kãm kapêr jarênh rãhã ho ri ixpa. Na hte Tĩrtũm amarĩ ã inhĩpêx anhỹr kêt nê. Mē ate ã kot inhĩpêx anhỹr ã ixpumunh nê ixpyrà nê amnhĩ kaxyw kãm ajamaxpêr tỳx kaxyw na hte ã inhĩpêx anê. Mē ate ja hã ixpumunh nê ã ajamaxpêr anhỹr kaxyw nê mē ajamaxpêr o:

—Nã kot pa nhỹrmã Pawre pyrã nê tõhã mē mýrapê amnhĩ xà htỳx kamã ijamak o ixpa. Hãmri nhũm Tĩrtũm ja hã ixpumu nê te ho Pawre nhĩpêx pyrã nê tanhmã ixto pa inhmã amnhĩ xà htỳx kamã ijamak pyma hkêt nê ixpa. Nã koja ã inhĩpêx anê.

Anh̄yr o mẽ ajamaxp̄er kaxyw na hte Tirtūm mẽ kutā ixto ixiht̄yx. Mẽ ate ja hã ixpumunh nẽ akup̄ym tãm ajamaxp̄er p̄e Karō nh̄y hã amnh̄i to axiht̄yx kaxyw. Jakamã na pa tee ri mẽ akukamã ijamaxp̄er k̄et nẽ.

Tirtūm k̄ep mẽ papytār xw̄ynh ā harēnh

⁸ E Kris k̄ot ixkw̄yjaja. Kot paj ixpr̄i hã mẽ amã tanhmã amnh̄i jarēnh to ka mẽ inhma. Na pa pre ma pika p̄e As w̄yr mō nẽ mẽ kãm Jejus kap̄er jarēnh o ri mẽ hk̄ot ixpa. Hāmri nh̄um mẽ hk̄w̄yjaja ja hã ixtomnuj t̄yx nẽ pa amnh̄i xà ht̄yx kamã ijamak p̄e mẽ hk̄ot ixpa. Kironh̄yx pa pre mẽ kamã ty. ⁹ Na pa pre tee ri amnh̄i kukamã ijamaxp̄er o:

—Koja p̄er mẽ ixp̄i. Tanhmã kot pa we amnh̄i to nẽ tokyx mẽ k̄ep amnh̄i pytã? Kot paj tee ri inh̄mã mẽ k̄ep amnh̄iptār prām. Tirtūm pix na ja kaxyw mẽ kutā àhpumunh t̄yx. R̄y nh̄um mẽ kot ixp̄ir tã nh̄um kot akup̄ym ixto ixt̄ir kaxyw tapxipix na àhpumunh t̄yx. Nà kot paj amnh̄i kaxyw tapxipix mã mãn ijamaxp̄er o ri ixpa nh̄um amnh̄i tã ixpumu nẽ hk̄inh nẽ. Ā ixte amnh̄i nh̄ip̄ex anh̄yr o ixpaja na kãm hprām. Anẽ.

¹⁰ Tã nh̄um pre ā inh̄ip̄ex anẽ nẽ xatã mẽ k̄ep ixpytār o ixk̄ot pa. Koja ā mẽ k̄ep inh̄ip̄ex anh̄yr rāhã ho pa. Nà ā kot inh̄ip̄ex anh̄yr mã k̄enã.

¹¹ Nom kwa k̄er ka mẽ apiitã ar̄i ixto Tirtūm w̄yr rāhã ho ri apa k̄e mẽ ama nẽ mẽ kãm ixkur̄e xw̄ynh̄jẽ kutā ixto ixiht̄yx rāhã ho pa. Nẽ ixto mex rāhã nẽ. Hāmri nh̄um mẽ ohtō nẽ kot mẽ k̄ep tanhmã ixpytār to hã ixtã omu nẽ ixtã kãm mex o mex ā harẽ.

Pawre kot mẽ kãm amnh̄i tã aprār ā harēnh

Wam Korīt 2.1-5

¹² Nẽ na xep pre atar Kris k̄ot mẽ pahkw̄yjaja tanhmã ixto kap̄er punuj to nẽ Jejus kot mẽ aw̄yr inh̄mēnh k̄et ā mẽ amã ixto h̄ex. Nẽ ijakwa nh̄ik̄jẽ ho inh̄mã mẽ ak̄inh nẽ ijakwa nh̄ik̄jẽ ho mẽ ato ixkap̄er punuj ā ijarēnh o ri pa. Nom ixte ā amnh̄i nh̄ip̄ex anh̄yr k̄et. Aa ixte tanhmã mẽ ano kupyri to hk̄et. Ām hāmri na pa mẽ amã amnh̄i jar̄e nẽ tãm mẽ amã ixkap̄er o ri ixpa nẽ tãm ri mẽ anh̄ip̄ex o ri ixpa. No ijamaxp̄er tūm k̄ot tanhmã mẽ anh̄ip̄ex to hk̄et nẽ. Ām Tirtūm kot mẽmoj to mẽ pakutã nojar̄et ā omunh xà hk̄ot pix mã na pa hte ỹ hã mẽ ato mex o ri ixpa. Ijamaxp̄er nyw o. Na pa hte Tirtūm pyrã nẽ mẽ piitã mẽ ho mex nẽ. No mẽ kajaja ixpyràn mẽ ap̄e hkra jakamã na pa hte mẽ ato mex kumr̄ex o ri ixpa. ¹³ Na pa hte mẽ amã kagã hk̄w̄y nh̄ip̄ex nẽ ixpr̄i hã mẽ amã tanhmã mẽmoj jarēnh to. Mẽ ate kamã harēnh nẽ mar mex kur̄e kumr̄ex kaxyw. No na pa hte mẽ amã tanhmã ix̄ex to r̄y tanhmã mẽ ano kupyri to hk̄et nẽ. ¹⁴ Ā ixte amnh̄i nh̄ip̄ex anh̄yr o ri ixpa htã kormã mẽ apiitã ja hã ixpumunh mex k̄et nẽ. Nẽ Jejus kot mẽ aw̄yr inh̄mēnh ā ixpumunh mex k̄et nẽ. Jakamã na hte mẽ akw̄yjaja ixto akap̄er punuj o pa. Tã kot kaj mẽ nh̄yrmã ām hāmri Jejus kot mẽ aw̄yr inh̄mēnh ā axp̄en mã ijar̄e pa mẽ ama nẽ ixk̄inh nẽ. Hāmri nh̄um nh̄yrmã mẽ panhō Pahihti Jejus mẽ pahw̄yr akup̄yn wr̄y pa kãm mẽ ajar̄e nẽ kãm:

—E Pahihti. Jaj̄e mã na pa pre akap̄er jarēnh o ixpa nh̄um mẽ inhma nẽ ak̄ot amnh̄i xunhw̄yr kur̄e kumr̄ex nẽ tãm amnh̄i nh̄ip̄ex mex o pa.

Anh̄yr o kãm mẽ ajar̄e. Hāmri nẽ ā mẽ ate amnh̄i nh̄ip̄ex anh̄yr ā mẽ apumunh k̄ot ixk̄inh nẽ. Ka mẽ ajaxw̄yja ak̄inh p̄e tanhmã kãm ijarēnh to ho akuh̄e.

Pawre h̄ex k̄et ā kot amnh̄i jarēnh

Wam Korīt 16.5-6

¹⁵⁻¹⁶ Nẽ na pa pre ra mẽ aw̄yr ixkrã. Ixte ma mẽ aw̄yr inh̄mōr nh̄um mẽ ate ixpumunh nẽ ak̄inh ā mẽ akamnh̄ix nẽ mẽ aw̄yr ixkrã nẽ ijamaxp̄er o:

—Nà ma Masetōn w̄yr inh̄mōr xw̄yj ri kot paj ma Korīt kumr̄ex w̄yr mō. Hāmri nẽ Kris k̄ot ixkw̄yjẽ pumu nẽ r̄i kormã hamū Masetōn w̄yr mō. Nẽ mẽ kamã ri ixpa tãmtã awjanã nẽ akup̄yn Korīt w̄yr mō nẽ axte mẽ omu. Jao Tirtūm kap̄er o mẽ ahkre ho axkrut nh̄um mẽ amnh̄i tã ixpumu nẽ hk̄inh nẽ. Hāmri pa akup̄ym Jutej w̄yr inh̄nojar̄et nh̄um mẽ pry hã ixàpkur xà hã inh̄mã mẽmoj kw̄y nh̄or jap̄er.

Anh̄yr o ijamaxp̄er. ¹⁷ Tã kormã jar tanhmã amnh̄i nh̄ip̄ex to ho ixpa ka xep mẽ tee ri amnh̄i w̄yr ixkãm ama nẽ axp̄en mã ijarēnh o:

—Kwa Pawre kot ra mẽ pahwỳr nojarêt ã amnhĩ jarēnh tã amnhĩm nojarêt kêt kumrēx. Mãn pre ãm mẽ pamã amnhĩ to hēx nà? Ra kot mẽ pamã amnhĩ jarēnh tã tokyx hpòx kētre hã. Anē.

¹⁸ Kwa mẽ ri ã inhmã ajamxpēr anhỳr kêt nē. Na pa pre mẽ amã ixēx kêt nē. Na pa hte Tĩrtũm noo mã ãm hãmri mẽmoj jarēnh o ri ixpa nē mẽ amã mẽmoj jarēnh o ixēx kêt nē. Nà ãm hãmri na pa pre ma mẽ awỳr inhmōr ã amnhĩ jarē.

¹⁹ Na pa pre ra Ximotre mẽ Siras mẽ wa mẽ amã Jejus Kris jarēnh o ri mẽ akôt ixpa. Jejus kēp Tĩrtũm Kra hã harē nē kot amnhĩ nhĩpēx te kot Tĩrtũm kot amnhĩ nhĩpēx pyrāk ã harēnh o ri ixpa. Jejus haxwỳja amnhĩ to hēx kêt. Kot mẽmoj tã amnhĩ jarēnh xà hkôt na hte ãm hãmri tanhmã amnhĩ nhĩpēx to. Tã ã kot amnhĩ nhĩpēx anhỳrja kôt na pa inhmã ixte amnhĩ nhĩpēx o ixpa hprãm nē. ²⁰ Ra Tĩrtũm Jejus Kris kukwak ri kot mẽ pahto mex ã amnhĩ jarēnh jakamã na pu htem axpēn mã harēnh o:

—Koja Tĩrtũm Jejus kukwak ri mẽ pahto mex rax nē. Ra kot mẽ pahtã amnhĩ jarēnh xà hkôt. Nà Tĩrtũm mex o mex. Anē.

Tĩrtũm kot mẽ pa hwỳr Karō rēnh ã harēnh
Rōmãn 8.14; Epes 1.13

²¹ Nà Tĩrtũmja mex o mex. Kot mẽ pahpê hkra kaxyw amnhĩm mẽ paxunhwỳr jakamã na hte tanhmã mẽ pahkrã hto pu mẽ Kris kôt amnhĩ nhĩpēx mex o papa.

²² Na pu htem Kris kôt amnhĩ xunhwỳ nhũm Tĩrtũm ja hã mẽ pahpumu nē mẽ pahwỳr Karō rē nhũm mẽ pahwỳr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrēx kagà hto nhũm mẽ kot kēp ò dōn ã omunhta pyrāk. Tã koja Tĩrtũm Karō mẽ pakamã hkrĩ pu mẽ ja hã amnhĩ pumunh kôt Tĩrtũm kot nhỹrmã mẽ pahto mex rax ã amnhĩ tã omunh kurê kumrēx. Ra kot mẽ pahto mex tã koja nhỹrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjēr prãm kêt ã kot amnhĩ jarēnh
Wam Korīt 4.21; Sikūn Korīt 10.1-2

²³ E Kris kôt ixtō nē ixtōxjaja. Kot paj kormã ma mẽ awỳr inhmōr kêt ri ixprĩ hã mẽ amã tanhmã amnhĩ jarēnh to ka mẽ ixte amnhĩ jarēnh ma. Tĩrtũm tãm mẽ arom kot ijamxpēr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarēnh to ka mẽ inhma.

Na pa pre ra mẽ awỳr inhnojarêt tã no ãm tee ri amnhĩ kukamã ijamxpēr nē ijamxpēr o:

—Nà kot paj taxy kormã ma mẽ hwỳr inhmōr kêt nē. Kot paj tokyx mẽ hwỳr mōn pōj nē kot amnhĩ tomnuj xwỳnhta ã mẽ kãm akir nē nē tanhmã mẽ kãm ixkapēr to. Hãmri nhũm mẽ amnhĩ tã inhma nē hkaprĩ nē tee ri amnhĩ kukamã hamaxpēr. ã mẽ kot amnhĩ nhĩpēx anhỳr pymaj kot paj kormã mẽ hwỳr inhmōr kêt nē.

Anhỳr o ijamxpēr. ²⁴ Inhmã ma mẽ awỳr inhmōr nē tanhmã mẽ ate amnhĩ nhĩpēx to hã axte mẽ amã karō kamã ixihytỳx prãm kêt. Mẽ akwỳjê rom ra mẽ ate Kris hkôt amnhĩ xunhwỳr tỳx kēnã. Tã mẽ ate hkôt amnhĩ nhĩpēx mex o akĩnh nē apaja na inhmã hprãm.

2

¹ Na pa pre ma mẽ awỳr mō nē mẽmoj tã mẽ amã akir nē nē tanhmã mẽ amã ixkapēr to ka prem inhma nē akaprĩ nē ri apa. Tã inhmã akupỳm mẽ awỳr inhmōr nē axte mẽ amã ixàkjēr prãm kêt jakamã na pa kormã mẽ awỳr inhmōr kêt nē. ² Kot kaj mẽ akĩnh nē apa pa ijaxwỳja ixkĩnh nē ixpa. No kot paj ma mẽ awỳr mō nē mẽmoj tã mẽ amã akir ka mẽ tee ri inhma nē akaprĩ nē. Pa mẽ apumu nē ijaxwỳja ixkaprĩ nē.

³ Ja pymaj na pa pre wam ixte mẽ awỳr kagà mēnhhta kamã mẽmoj nē tanhmã mẽ amã ixàkjēr to. Mẽ ate kamã harēnh nē mar nē tokyx kormã mẽ awỳr inhmōr xwỳj ri tanhmã mẽ ate amnhĩ tomnuj tota kaga nē tãm amnhĩ nhĩpēx kaxyw. Kēr pa mẽmo arĩgro hã ma mẽ awỳr mōn pōj nē mẽ ate tãm amnhĩ nhĩpēx o apa hã mẽ apumu nē ixkaprĩ hkêt nē ixkĩnh nē. Ka mẽ ajaxwỳja ixpumu nē akĩnh nē. ⁴ Jakamã na pa pre ã mẽ amã kagàta nhĩpēx nē mẽ awỳr mēnh anē. Nē kamã mẽmojta nē tanhmã mẽ amã ixàkjēr to. Na pa

pre ixkaprĩ htỳx nẽ tee ri mẽ akukamã ijamaxpẽr o inhmỳr rax pẽ mẽ amã mẽmojta ã kagà. No ãm mẽ akaprĩ kaxyw na pa pre mẽ amã hipêx kêt nẽ. ãm mẽ ate kamã harẽnh nẽ inhmar nẽ ajamaxpẽr o:

—Hêxta waa nẽ. Nà Pawre na kãm mẽ pahkĩnh tỳx kumrẽx. Hã na pre mẽ pahte tanhmã amnhĩ tomnuj to hã mẽ pajarẽnh ma nẽ tee ri mẽ pakukamã hamaxpẽr pẽ kagàja kamã hã mẽ pamã akir nẽ mẽ pahwỳr kumẽ. Nà kãm mẽ pahkĩnh tỳx kãm na ã mẽ pamã kapẽr kãm hihtỳx anẽ.

Anhỳr o ajamaxpẽr kaxyw na pa pre hipêx nẽ mẽ awỳr kumẽ.

Mẽ kot axte amnhĩ tomnuj mã hamaxpẽr kêt ã mẽ kãm karõ

Rukre 17.3-4; Wam Korĩt 5.1-13; Karatas 6.1-2

⁵⁻⁹ Nẽ wam kagàta kamã na pa pre mẽ amã mẽ akwỳjê hõ kot nã kaàkre kamã hpijaàm kêeta pa mẽ amã tanhmã hã karõ hto. Ra mẽ ate harẽnh mar tã nẽ kãm akapẽr kêt nẽ. Tã mẽ ate inhmar nẽ nẽ tanhmã kãm akapẽr to nẽ amnhĩ nẽ hanor kaxyw na pa pre mẽ awỳr kagàja mẽ. Hãmri nẽ ijamaxpẽr o:

—Ko. Kojã mẽ ixkapẽr mar xà hkõt amnhĩ nẽ hanor japêr. Anẽ.

Tã ka xep prem kamã harẽ nẽ ama nẽ tee ri ja hã amnhĩ pumu nẽ akaprĩ nẽ. Nẽ ixpyrà nẽ apijaàm nẽ. Hãmri nẽ ijamaxpẽr xà hkõt amnhĩ nẽ hanor kãm axihtỳx nẽ. ãm hãmri na ka prem ã hipêx anẽ. Nhũm xep tee ri ja hã amnhĩ pumu nẽ hkaprĩ nẽ hkaprĩ xaj ri mỳr o pa. Jao ra ã amnhĩ nhĩpêx anhỳrta kaga nẽ akupỳm tãm amnhĩ nhĩpêx. Tã ra ã kot amnhĩ nhĩpêx anhỳr jakamã kwa mẽ tokyx akupỳm amnhĩ wỳr awỳ kê axte mẽ awỳr mra nẽ mẽ akõt pa. Ra kot amnhĩ tomnujta kaga jakamã kêr ka mẽ axte kãm ajamaxpẽr kêt nẽ. Akupỳm tãm kãm akapẽr kê tokyx akupỳm tãm hamaxpẽr nẽ hkĩnh nẽ pa. Kot kaj mẽ tokyx ã hipêx anhỳr kêt nẽ nhũm tee ri amnhĩ kukamã hamaxpẽr nẽ hkaprĩ nẽ pa. Ja pymaj kwa mẽ amã hkĩnh ã kãm amnhĩ jarẽ nẽ akupỳm tãm kãm akapẽr pẽ tãm hipêx o ri apa. Kê amnhĩ tã mẽ apumu nẽ akupỳm hkĩnh nẽ tãm hamaxpẽr. ¹⁰ E kêr ka mẽ axte kot tanhmã amnhĩ tomnuj tota mã ajamaxpẽr kêt nẽ. Kwarĩ ho kwarĩ. Kot kaj mẽ ã hipêx anẽ pa ijaxwỳja ma hipêx anẽ. No pa na pre tanhmã ixtomnuj to hkêt nẽ. ãm Jejus kapẽr kwỳm na pre ri ã amnhĩ nhĩpêx anẽ. Tã ra kot amnhĩ tomnujta kaga jakamã kot paj Jejus nhỹ hã akupỳm tãm hipêx nẽ kot amnhĩ tomnujta o ijamakêtkati tokyx anẽ nẽ axte kãm ijamaxpẽr kêt nẽ. Mẽ apiitã mẽ amex nẽ ri mẽ apa kaxyw. Jakamã kêr ka mẽ ajaxwỳja mẽ amex nẽ apa kaxyw ã amnhĩ nhĩpêx anẽ nẽ axte kãm ajamaxpẽr kêt nẽ. ¹¹ Kwa mẽ tokyx ja ho ajamakêtkati. Kê Satanasti tee ri ja hã mẽ apumu nẽ mẽ amã mẽ ate tanhmã amnhĩ tomnuj to hprãm xaj tee ri tanhmã ri mẽ ato ho pa kaprỳ. Kêr pu mẽ Satanasti kot amnhĩ nhĩpêx kêt amnhĩ nhĩpêx o ri papa hkêt nẽ. Ra mẽ pahte Tĩrtũm kapẽr kuhpa hã tanhmã kot amnhĩ nhĩpêx to ho pa hã omunh mex kênã.

Pawre kot Xitre japêr o pa hã harẽnh

¹² Nẽ na pa pre ja rũm ixkato nẽ ma Tôx wỳr mõ. Ixte mẽ kãm Kris jarẽnh o mẽ hkõt ixpa kaxyw ma mẽ hwỳr mõ. Nhũm Pahihti Kris ixkukamã tanhmã mẽ hkrã hto jakamã pa pre mẽ hwỳr pøj nhũm mẽ piitã kãm ixujarẽnh mar prãm nẽ. Pa pre mẽ kãm Tĩrtũm kapẽr jarẽnh ryy ho mẽ hkõt ixpa. ¹³ Na pa pre Xitre ra mẽ hwỳr ixkukamã hpõx ã hkamnhĩx tã nhỹri omunh kêt nẽ. Hãmri nẽ ijamaxpẽr o:

—Hêxta waa nẽ. Inhmã Korĩt kãm Jejus kwỳjê jarẽnh mar prãm. Na pa tee ri mẽ hkukamã ijamaxpẽr o ixpa. Nom kormã Xitre mẽ kurũm akupỳn hpõx kêt. Mãn kormã Masetõn kamã pa.

Anhỳr o ijamaxpẽr hãmri nẽ mẽ kãm amnhĩ jarẽ nẽ ixkato nẽ ma Masetõn wỳr krĩ hkwỳ hkõt hapêr o mõ. Tã ra hwỳr ixkato nẽ omu.

Te mẽ pahpê mẽhkuxwa xà pyræk ã mẽ pajarẽnh

Epes 5.2; Piriapos 4.18

¹⁴⁻¹⁶ Nà Tĩrtũmja mex o mex. Na hte mẽ pahto mex rãhã ho pa. Nẽ mẽ kot mẽ panẽ àmnar xwỳnhjaja nhũm hte tanhmã mẽ ho pu mẽ ma paxàmnhĩx ri mẽ hkõt mẽ kãm Kris kapẽr jarẽnh o ri papa. Te mẽ pahte mẽ hkuxwa xà ho ri mẽ hkuxwa ho papa pyræk.

Mē pahte Kris kôt amnhī nhīpêx jakamā Tīrtūm mā te mē pahkuxware nē ri mē papa pyrāk. Nē te mē kām Kris jarēnh o ri papa pē te mē hkuxwa xà ho mē hkuxwa ho ri mē hkôt papa pyrāk. Nhūm hte mē hkwỳjaja mē pama nē kām mar prām nē. Nē mē paxujarēnhja haxwỳja te kot mē hkuxwa xà kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kôt amnhī xunhwỳ. No nhūm mē hkwỳjaja axtem nē mē kēp mē pamar prām nōkati. Mē kumā Tīrtūm kapērja te kēp wenēn kuxỳ htỳx nhūm mē kot hpār nē htyk pymaj amỳm kuhê pyrāk. Jao kapēr kaga nē kēp amỳm amnhī xunhwỳ.

Nē na pu htem amnhī krā hkôt mē kām Kris kapēr jarēnh o ri papa hkêt nē. Ām Tīrtūm nhỹ hā pix mā tanhmā harēnh to ho papa.

Pawre kot katàt kôt Tīrtūm kapēr o mē ahkre hā harēnh

¹⁷ Na hte mē kot mē kēp Kris nhỹ hā mē ahkre hā amnhī to hēx xwỳnhjaja te Tīrtūm kapēr o wēnē pyrāk o mē hkôt pa. Jao kàxpore hprām xàj amnhī krā hkôt tanhmā mē kām harēnh to nhūm htem mē kuma nē hpānhā tanhmā mē kām amnhīrer to. Nom pa na pa hte ā amnhī nhīpêx anhỹr kêt nē. Nē mē urāk nē amnhī krā hkôt Tīrtūm kapēr jahkre ho ixpa hkêt nē. Tīrtūm kot mē akaxyw ixām jakamā na pa hte ixkatàt kôt Kris nhỹ hā amarī mē amā kapēr jarēnh o ri mē akôt ixpa. No mē urāk nē kàxpore prām xàj mē amā harēnh kêt nē. Tīrtūm kot ja hā ixpumunh mex.

3

¹ Mē kēp Kris nhỹ hā mē ahkre hā amnhī to hēx xwỳnhjaja na htem nhỹhỹm nojarêt nē mē kot mar xwỳnhjê mā:

—E kot paj ma nhām krī hō hwỳr mō nē Tīrtūm kapēr o mē ahkre. Jakamā kwa mē kaxyw inhmā kagà nhīpêx nē kamā ixte Tīrtūm kapēr o mē ajahkre mex xwỳnh ā ijarē nē hā kagà. Hāmri nē inhmā agō pa ma amnhī kôt o mō nē mē kot inhmar mā xwỳnhjê mā kugō kē mē kamā harē nē ijarēnh ma nē kām ixkapēr mar prām nē.

Anhỹr o na htem amnhī to mē hwỳr o pa. No pa na inhmā ā amnhī nhīpêx anhỹr prām kêt. Inhmā nhām mē kām amnhī to jarkrar prām kêt. Mē ate ja hā ixpumunh mex. Ra mē piitā mē kot ixkatàt kôt ixte Tīrtūm kapēr jarēnh mex ā ixpumunh mex jakamā mo kaxyw kot pa ri amnhī kôt kagà jamỳ nē ho ixpa? Nà kot pa amnhī kôt hō ho inhmōr kaxyw hā ixàhwỳr kêt nē. ²⁻³ Mē kajaja te mē apē inhō kagà pyrāk. Na ka prem ixte mē ajahkre ma nē Jesus kôt amnhī xunhwỳr kurê kumrēx. Hāmri nhūm Tīrtūm mē amā amnhī Karō rē nhūm mē amā agjê ka mē y hā amnhī nhīpêx nyw o amnhī nhīpêx o apa. Hāmri nhūm mē akwỳjaja amnhī jaēr pē mē ate amnhī nhīpêx nyw ā mē apumu nē mē atā axpēn mā ijarēnh o:

—Hêxta waa nē. Pēr ām hāmri na pre Kris mē hwỳr Pawre mē. Na pre ma mē hwỳr mō nē mē kām Tīrtūm kapēr o mē ahkre nhūm mē kuma nē amnhī tomnuj kaga hpa nē hpānhā Tīrtūm kapēr kôt amnhī nhīpêx nē tām ri amnhī nhīpêx o pa. Ām hāmri na hte Pawre mē ahkre mex o pa. Hêxta waa nē.

Anhỹr o mē atā ijarēnh jakamā mo kaxyw kot pa kagà hkwỳ jamỳ nē amnhī kôt ho ixpa? Nà mē kajaja te mē apē inhō kagà pyrāk.

⁴ Na pa pre Jesus kôt amnhī xām nhūm Tīrtūm ja hā ixpumu nē tanhmā inhmā kapēr o amnhīrīt to nē inhmā:

—E Pawre. Kēr ka ma mē kām ixkapēr jarēnh o ri mē hkôt apa.

Anhỹr jakamā na pa hte Tīrtūm kamnār rom ā amnhī nhīpêx anhỹr o ri mē hkôt ixpa. ⁵ Nom amnhī krā hkôt mē ahkre hkêt nē. Tanhmā kot pa we amnhī to nē amnhī krā hkôt mē kām kapēr o mē ahkre mex nē? Nà Tīrtūm pix na hte ja kaxyw tanhmā ixkrā hto pa ô ri mē ahkre ho ri ixpa.

Tīrtūm kapēr nyw jarēnh

⁶ Nē Tīrtūm na hte tanhmā ixkrā hto pa Karō nhỹ hā mē piitā mē kām kapēr nyw jarēnh o ri ixpa. Amnepēm Tīrtūm kot Ijaew mā mēmoj tā karō xwỳnhhta. Mojes kot kapēr tūm

jarēnh o pa xwỳnh ta mex tã no nhũm mẽ tee ri hkôt kãm amnhĩ nhĩpêx prãm o pa. Nẽ xatã kamã harẽ nõ omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mỳrapê na prem pikaprãr pan hapêx. No kêt Tĩrtũm kapêr nywja. Jejus jarēnhja. Na hte Tĩrtũm Karõ tanhmã mẽ pahkrã hto pu mẽ Jejus kôt amnhĩ nhĩpêx o ri papa. Jao mẽ pahpê pahtĩr tũm nõ papa mã xwỳnh. No na hte nhãm mẽ hkwỳjaja kãm harēnhja mar prãm kêt nõ amnhĩ jarēnh o:

—Nà kot paj amnhĩ krã hkôt ã amnhĩ nhĩpêx anẽ nõ ã amnhĩ nhĩpêx anẽ nhũm Tĩrtũm ja hã ixpumu nõ ixtĩr tũm nõ ixpa mã xwỳnh ã ijarẽ.

Anhỹr tã no ãm ã amnhĩ jarēnh anhỹr kaprỳ. Tĩrtũm Karõ nhỹ hã mẽ kot amnhĩ to mex o mẽ pa xwỳnh pixjaja koja mẽ htĩr tũm nõ pa ho pa.

⁷ Nẽ Tĩrtũm kapêr tũmta na pre Mojes mẽ kãm harēnh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nõ haxênh nõ kamã kamàt kô htyk. Hãmri nhũm Tĩrtũm mẽ kot hkôt amnhĩ nhĩpêx kaxyw kên po hã mẽ kãm mẽmoj tã karõ nhũm Mojes kumỳ nõ mẽ hwỳr o wrỳ nõ mẽ kãm kamã harẽ. Tĩrtũm kot hirã htỳx kamã kãm kapêr nhũm kuri mar o ãm jakamã uràk nõ ÿ hã hkuk nhĩrã htỳx kumrêx nõ mẽ kãm kapêr jarēnh o xa. Jakamã nhũm mẽ tee ri kot hprĩ hã omunh mex kaxyw no ãm nom gêk tỳx nõ. Tã gaa nhũm hkuk kãm hirãja amnhĩm hprĩ nõ hapêx o mỗ. Na pre ã Tĩrtũm Ijaewjê mã kapêr tũm nhõr anẽ. Hãmri nhũm Mojesja ô ri mẽ kãm kamã harẽ nõ harēnh pa hãmri nõ mẽ kãm:

—E kêt ka mẽ Tĩrtũm kapêr mar tỳx nõ hkôt amnhĩ nhĩpêx mex rãhã ho ri apa. Kêt ka mẽ nhỹrmã atyk tã kê akupỳm mẽ ato mẽ atĩr ka mẽ ô krĩ kamã kuri atĩr tũm nõ amex nõ apa ho apa. Anẽ.

Hãmri nhũm mẽ kuma nõ kãm:

—Tõe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhỹr ã amnhĩ jarēnh tã no ãm hkôt amnhĩ nhĩpêx kêt nõ nhũm Mojes tee ri mẽ kot amnhĩ nhĩpêx ã mẽ omu nõ mẽ kãm:

—Nà mẽ ate Tĩrtũm kapêr kôt amnhĩ nhĩpêx kêt jakamã kot kaj mẽ nhỹrmã ty nõ Tĩrtũm pê awry rax kumrêx nõ ri apa. Anẽ.

⁸ Tã na hte Tĩrtũm jarãhã axtem tanhmã mẽ pamã kapêr to. Pãnhã kapêr nyw o kapêr nõ mẽ pamã:

—Kot kaj mẽ Ixkra Jejus kôt amnhĩ xunhwỳ pa hã mẽ apumu nõ mẽ ato ixkra. Hãmri nhũm Ixkarõ mẽ amã agjê. Anẽ.

Kapêr ja na mex kumrêx o kot kapêr tũm jakrenh. ⁹ Kapêr tũmja mex tã nhũm htem hkôt amnhĩ nhĩpêx kêt nõ. Jakamã na htem ty nõ Tĩrtũm pê awry rax ã ri pa. No kapêr nywja na tũmta rom mex o mex. Na hte Tĩrtũm mẽ pamã kapêr nywja jarēnh o:

—Kot paj tanhmã mẽ akrã hto ka mẽ amnhĩ to mex pix o ri apa. Jao ixkôt ri amnhĩ nhĩpêx mex o ri apa. Anẽ.

¹⁰ Nẽ kapêr tũmja te kot kanê hpôk kryre pyràk. No kapêr nywja mex o kot tũm jakrenh jakamã te kot mẽmo hpôk rũnh o kanê hpôk kryre jakrenh pyràk. Jakamã nhũm mẽ kot hirã rax kãm ri mrrar gryk ã hpôk grire nhĩrã kamã mrrar kêt pyràk. ¹¹ Tĩrtũm kapêr tũm te kot Mojes kuk pyràk. Na pre kamã hirã rax tã gaa nõ amnhĩm hprĩ nõ kamã hirã hapêx o mỗ. Nẽ gaa nõ hapêx. No kêt Tĩrtũm kapêr nywja te kot Tĩrtũm nhĩrã htỳx rãhã ho rãhãta pyràk. Koja uràk nõ aa hapêx kêt kumrêx.

Ijaewjê jarēnh
Rômãn 11.7-10

¹² Nẽ Tĩrtũm kapêr nywja mex o mex jakamã na pa hte ixãmnhĩx mẽ kãm harēnh o ri ixpa. ¹³ Te ixte Mojes kot amnhĩ nhĩpêx pyràk kêt. Na pre hte Mojes ixkĩnhã ãmnhĩx Ijaewjê mã Tĩrtũm kapêr jarēnh o ri pa hkêt nõ. Mẽ kot hkuk kãm hirãta ra hapêx o mỗr ã omunh nhũm hpijaàm pymaj na pre kupêxê puroore ho amnhĩ kuk pro nõ ri mẽ hkôt pa. ¹⁴ Jakamã nhũm prem hprĩ hã hkuk kãm hirã pumunh mex kêt nõ. Nẽ Tĩrtũm kapêr ã kagà htũmja nhũm prem mããnên hprĩ hã mar mex kêt nõ. Mẽ hkrã hihtỳx jakamã te mẽ kot amnhĩ jamak pro nõ mẽmoj mar mex kêt pyràk jakamã mẽ kot mar tã hprĩ hã

mar kêt nê. Nê hkôt ri amnhĩ nhĩpêx mex kêt nê. No mẽ kot Kris kôt amnhĩ xunhwỳr xwỳnhjaja na hte Tĩrtũm amnhĩ tã mẽ omu nê te mẽ nê mẽ hamak hpro xàta rênh par nê rênh pyrək o mẽ hipêx nhũm mẽhprĩ hã kapêr mar tỳx nê.

¹⁵ Tã na hte Ijaewjaja arĩ jarāhã Mojes kot Tĩrtũm kapêr ā kagà htũm kamā harênh o pa. Nom arĩ mẽ hkrā hihtỳx jakamā te mẽ kot amnhĩ jamak pro nê kamā harênh o pa pyrək o amnhĩ nhĩpêx jakamā kormā hprĩ hã mar kêt nê. ¹⁶ Tã koja mẽ hkwỳjaja Pahihti Jejus Kris kôt amnhĩ xunhwỳr nhũm amnhĩ tã omu nê te kot mẽ hamak nê hpro xà hpyr nê mẽnh pyrək o mẽ hipêx nhũm mẽhprĩ hã kapêr nyw mar tỳx nê. ¹⁷ Pahihti mẽ Karōja wa htipxi jakamā na hte mẽ pakamā agjê nê hprĩ hã mẽ pamā kapêr o amnhĩrit o pa. ¹⁸ Ra mẽ pahte Pahihti Kris kôt amnhĩ xunhwỳr jakamā te mẽ pahte mẽ kot amnhĩ jamak pro xwỳnh kot amnhĩ nhĩpêx pyrək kêt. Nhũm Pahihti Karōja tanhmā mẽ panhĩpêx to pu mẽ ra hkôt amnhĩ nhĩpêx mex o mō. Jakamā na htem mẽ pahte amnhĩ nhĩpêx nyw pumunh kôt Tĩrtũm kot tãm amnhĩ nhĩpêx ā omunh kurê kumrêx. Kormā mẽ pahte hkôt amnhĩ nhĩpêx mex kumrêx kêt tã ra hkôt amnhĩ nhĩpêx mex o mō. Jao te tãm kot amnhĩ nhĩpêx pyrək o amnhĩ nhĩpêx o mō.

4

Jejus kapêr te kêp kanê pyrək ā harênh

Wam Korīt 2.1-5; Sikūn Korīt 1.12; Wam Tesarôn 2.1

¹ Nê na pre Tĩrtũm ixto mex nê tanhmā kãm ixàpênh to hã inhmā karō. Ixte ma mẽ kãm kapêr jarênh o ri mẽ hkôt ixpa kaxyw. Jakamā na pa hte ixàmnhĩx mẽ hkôt mẽ kãm harênh o ri ixpa. ² Nhũm mẽ hkwỳjaja axtem nê ixêx o ri ixpa hã ijarênh tã ixte ā amnhĩ nhĩpêx anhỳr kêt. Na pa hte amnhĩ tomnuj o ri ixpa hkêt nê. Mẽ hkwỳjaja kot mẽ no kupyw kaxyw mẽ kãm Tĩrtũm kapêr o hêx o pa htã pa na pa hte ā amnhĩ nhĩpêx anhỳr kêt nê. Ixprĩ hã mẽ kãm harênh o ixpaja na inhmā hprām jakamā na pa hte ixkatat kôt harênh o ri mẽ hkôt ixpa. Mẽ piitã mẽ kot ixêx kêt kêt kêt ixpumunh mex kaxyw. Tĩrtũm kot ixêx kêt kêt kêt ixpumunh mex. ³ No nhỹrmā mẽ htyk nê ma kuwy hwỳr mẽ pa mã xwỳnh pixjaja na htem hprĩ hã ixkapêr mar mex kêt nê. ⁴⁻⁶ Satanasti tãm kêp mẽ hpām. Kêp mẽ kãm Tĩrtũm kapêr mar prām kêt xwỳnh piitã mẽ hpām. Jakamā na pa hte mẽ kãm tanhmā Jejus jarênh to. Kêp Tĩrtũm Kra hã harê nê te kot Tĩrtũm kot amnhĩ nhĩpêx pyrək ā harênh o ri ixpa. Hãmri nhũm Satanasti tee ri ja hã ixpumu nhũm ja kêp omnuj nê. Jakamā nhũm tanhmā Tĩrtũm nê mẽ hkrā hto nê te mẽ hamak pro pyrək o mẽ hipêx. Mẽ kot hprĩ hã Jejus jarênh mar nê hkôt amnhĩ xunhwỳr pymaj nhũm ā nê mẽ hipêx anê. Jejus jarênh te kêp kanê hpôk mex pyrək jakamā mẽ kot mar kêt xwỳnhjaja te kamat kô kamā ri mẽ pa pyrək. No nhũm Satanasti tãm kot nê mẽ no kupyw jakamā nhũm htem ā ri kamat kô kamā mẽ pa pyrək o amnhĩ nhĩpêx anê.

Amnepê mã kormā mẽmoj kêt ri nhũm kamat kô pix. Tã nhũm Tĩrtũm tanhmā kapêr to nê kapêr o:

—E kê hirã kato. Anê.

Hãmri nhũm ra kapêr xà hkôt hirã kator kurê kumrêx. Tã ja pyrã nê na pa pre kamat kô kamā ixtỳx ri ixpa pyrək nhũm Tĩrtũm te kot inhmā kanê hpôk nhũm hirã pyrək o inhĩpêx pa mex o mex ā omunh kurê kumrêx. Hãmri nê Jejus Kris kot amnhĩ nhĩpêx ā omu nê te Tĩrtũm kot amnhĩ nhĩpêx ā omunh pyrək. Wa kot amnhĩ nhĩpêx te kot axpên pyrək.

Nê na pa hte pam tanhmā amnhĩ jarênh to ho ri ixpa hkêt nê. Ām Jejus Krisja pix na pa hte harê. Tapxipix na kêp mẽ panhō Pahihti. Jakamā hkĩnhã te ixpê mẽ amã ixàpênh xwỳnh pyrək o na pa hte mẽ amã kapêr jarênh o ri mẽ akôt ixpa.

Pawre te kêp poti gràre nhĩpêx pyrək ā harênh

Wam Korīt 2.4-5; Sikūn Korīt 11.23, 12.9

⁷ Nê Tĩrtũm ixrom hihtỳx o hihtỳx. No pa na hkĩnhã ixihhtỳx kêt. Te ixpê poti gràre nhĩpêx pyrək jakamā na pa hte Tĩrtũm xihtỳx xwỳnh pix nhỹ hã mẽ kãm kapêr jarênh

o ri mē hkôt ixpa. Nhūm htem inhma nē ām hāmri ixte ŷ hā ixkapēr ā xipumunh kurē kumrēx. No pa ixte amnhī krā hkôt ixkapēr ā ijarēnh kēt nē.

⁸ Na pa hte mē hkôt mē kām Jejus jarēnh o ri ixpa nhūm mē hkwyja tōhā inhma nē ja hā inhīpēx kati nē pa amnhī xà htýx kamā ama. Nom nhūm Tirtūm mē kutā tanhmā ixkrā hto pa inhma amnhī xà kamā ijamak puma hkēt nē arī mē kām kapēr jarēnh o ri mē hkôt ixpa. Nē amnhī kaxyw Jejus kôt pix mā ijamaxpēr týx rāhā pē tee ri amnhī kukamā ijamaxpēr o ri ixpa hkēt nē.

⁹ Nē mē kām ixkurē xwýnhjaja ohtôô. Na htem xatā Jejus ā tanhmā ixtomnuj to htā pa kormā ixtyk kēt nē. Na pa hte Tirtūm kamnār rom arī mē hkôt ixpa nhūm Tirtūm ixkôt pa ho pa. ¹⁰ Na htem Jejus pyrā nē xipīr kaxyw tanhmā inhīpēx to. No ām ko. Kojā mē nhýrmā xipī rý ko. Ixte amnhī kukamā ixāhpumunh kēt. Kot paj ām arī ixtīr ri mē kām Jejus jarēnh o ri mē hkôt ixpa. Kēr kē mē hkwyjaja ixkapēr ma nē axpēn mā tanhmā Jejus jarēnh to nē harēnh o:

—Nà pēr ām hāmri na pre Jejus akupým htīr nē tanhmā hkwyjē ho mex to. Ām hāmri na hte Pawre ja hā harē. Anē.

¹¹ Mē kot Jejus ā xipīr mā tā pa arī mē kām akupým htīr ā harē. Tirtūm na hte ja kaxyw tanhmā ixkrā hto pa arī mē kām harēnh o ri mē hkôt ixpa. ¹² Na pa pre ra mē amā harē ka prem inhma nē Jejus kôt amnhī xunhwýr kurē kumrēx nē amnhī nhīpēx nyw o amnhī nhīpēx o ri apa. Jakamā xipyrā nē mē apē atīr tūm nē apa mā xwýnh. Nhūm htem piitā mē ate Jejus kôt amnhī xunhwýr ā mē apumu. Tā nhūm mē kot Jejus ā xipīr kaxyw. Nom kwār mē māmri xipī. Ja inhma tanhmā kute hkēt. Mē kot xipīr mā tā kot paj arī Jejus kapēr jarēnh o ri ixpa rāhā ty. Ra mē kot ixkapēr mar nē Jejus kôt amnhī xunhwýr xwýnhjaja mē pahpyrā nē kēp htīr tūm nē pa ho pa mā xwýnh kēnā. ¹³ Jakamā kwār mē māmri xipī. Na pa hte arī amnhī kaxyw Tirtūm kôt ijamaxpēr mex rāhā nē. Amnepē mā na pre Pahi finat Tawija tanhmā Tirtūm kapēr jarēnh to nē harēnh o:

Ām hāmri na Tirtūm kapērja. Hēx kēt jakamā na pa hte mē kām harēnh rāhā ho ri ixpa. Anē.

Tā pa hte Tawi pyrā nē mē piitā mē kām Tirtūm kapēr jarēnh o ri ixpa. Tirtūm kot mē pamā tanhmā mēmoj to hēx to hkēt. ¹⁴ Ra kot amnhī jarēnh xà hkôt akupým Pahihti Jejus o htīr jakamā kot puj mē nhýrmā urāk nē ty nhūm akupým mē pahto mē pahtīr nē ma war amnhī wýr mē pahto api.

¹⁵ Amnepēm na pa pre ma mē awýr mō nē mē akôt mē amā Tirtūm kapēr jarēnh o ri ixpa. Ka prem inhma nē Jejus kôt amnhī xunhwý nē xipyrā nē Tirtūm mā mex o mex ā harē. Jakamā kwār mē māmri Jejus ā tanhmā inhīpēx to. Kojā mē gaa nē rī mē hkwyjaja mē pahpyrā nē Jejus kôt amnhī xunhwý nē Tirtūm mā mex o mex ā harē.

Pawre tee ri amnhī kukamā hamaxpēr kēt ā kot amnhī jarēnh

Rōmān 8.17; Sikūn Korīt 1.7; Wam Pêtre 1.3-9, 4.12-16, 5.10

¹⁶ Jakamā na pa tee ri amnhī kukamā ijamaxpēr o ixkaprī nē ixpa hkēt nē. Mē kot Jejus ā tanhmā ixtomnuj to htāā pa hte ixāmnhix kapēr jarēnh o ri ixpa. Ra xipigēt nē ixirerek o inhmōr tā inhōpinh xà kaxwýnh kām ijamaxpēr o Jejus kôt amnhī nhīpēx mex o mō.

¹⁷ Mē kām ixkurē xwýnhjaja na htem Jejus ā inhīpēx kati htā ā inhīpēx anhýr japjē hkēt nē. Nom kot paj nhýrmā ty nhūm Jejus akupým ixto ixtīr pa Tirtūm mē wa kuri inhmex kumrēx nē ixpa ho ixpa. Mē kot ixtomnujja na mē ho apkati grēre no kot paj nhýrmā Tirtūm mē Krata wa kuri inhmex kumrēx nē ixtīr tūm nē ri ixpa ho ixpa. Jao rāhā ho rāhā.

¹⁸ Jakamā na pa tee ri mē kot tanhmā ixtomnuj tota kukamā ijamaxpēr o ri ixpa hkēt nē. Ja koja tokyx hapēx. Na pa hte ām nhýrmā Tirtūm nhō krī kamā inhmex nē ixkīnh rāhā ri ixpaja pix kukamā ijamaxpēr o ri ixpa.

¹ Nē mē panhīja te kot tyrti hô ho ixkre pyrāk. Na htem tyrti hô ho ixkre nhīpêx nhūm gaa nē hapêx. Tā mē panhīja na hte urāk nē hapêx tokyx anē. Na pu htem ri papa nē gaa nē pawej nē ty. Tā nhūm Tirtūm hpānhā mē pahpê hkrajê mā mē panhī nyw gō pu mē kuri ō krī kamā pamex kumrēx nē pahtīr tūm nē papa ho papa. ²⁻³ Na pu htem jar pahpunuj nē papa. Nē mē paxà nhi nē mē pahkaprī nē. Mē panhī htūmja te kot mē paxê htūm pyrāk jakamā na pu htem ty nē te paxê htūm kwrynh nē hpānhā nyw jagjēnh pyrāk o amnhī nhīpêx. Tā na pu htem amnhī kukamā panhī nywja mā pajamaxpēr o ri papa. Kot pu mē kaxkwa kamā pahkarō pix nē ri papa hkêt nē. Mē panhī nyw ā kot puj mē ri papa ho papa.

⁴ Nē na pu htem jar pahpunuj nē pamex kêt nē ri papa. Nē tokyx mē pahtyk nē panhī htūm o pajapêx nē hpānhā panhī nyw ā mē papa hprām. Tā koja Jejus tokyx akupŷn wrŷk japēr pu mē pahtyk kêt rāhā tokyx panhī nywta o panhī nyw. Nom koja tokyx akupŷn wrŷk kêt japēr pu mē nhŷrmā ty nhūm Tirtūm akupŷm mē pahto mē pahtīr nē mē pamā mē panhī nyw gō pu mē ho panhī nyw. ⁵⁻⁶ Na pre ra Tirtūm mē panhī nyw kukamā hamaxpēr nē mē pahtā tanhmā amnhī jarēnh to. Nē mē pahwŷr Karō rē nhūm mē pahkarō mā agjê pu mē ja hā amnhī pumu nē pahkīnh nē pajamaxpēr o:

—Nà ra Tirtūm kot ixwŷr amnhī Karō mēnh nhūm ixkarō mā àr jakamā koja määnēn nhŷrmā inhmā inhī nyw gō. Kormā inhī htūm kamā ixpa nē Pahihti Jejus mē wa ō krī kamā ixpa hkêt tā koja nhŷrmā inhmā inhī nywja gō pa inhī nyw o wa kuri ixpa ho ixpa. Nà koja ā inhīpêx anē.

Anhŷr o pajamaxpēr pē pahkīnh nē papa.

⁷ Nē mē pahte jar pano ho nhŷri Jejus pumunh kêt tā no ām panhōpinh xà kaxwŷnh kām kām pajamaxpēr mex nē. ⁸ Jakamā na pu mē tee ri amnhī kukamā pajamaxpēr o papa hkêt nē. Na pu htem ām tokyx mē pahtyk nē ma Pahihti Jejus nhō krī hwŷr paxàpir jamār o papa. Ō krīja kēp mē papaxà kumrēx jakamā na pu htem ma hwŷr paxàpir pix kukamā pajamaxpēr rāhā nē. ⁹ No ām mē pamā ja pix prām kêt. Na pu htem määnēn pamā Jejus mā hprām xà hkôt nhŷri tanhmā kām amnhī nhīpêx to ho ri papa hprām o papa. Jar mē panhī htūm rāhā rŷ mŷtar kuri ō krī mex kām mē panhī nyw ā tanhmā kām amnhī nhīpêx to ho ri papaja na mē pamā hprām.

¹⁰ Nē na hte Krisja jar mē pahte tanhmā amnhī nhīpêx to hā mē pahpumunh o hkrī. Mē pahte tām amnhī nhīpêxja nē mē pahte amnhī tomnuja nhūm hte hā mē pahpumunh rāhā ho hkrī. Tā koja nhŷrmā kot mē pahte tanhmā amnhī nhīpêx to hā mē pahpumunh kôt tanhmā mē panhīpêx to. Mē pahte tām amnhī nhīpêx o ri papa xwŷnhjaja koja ra mē panê htyk kukwak ri mē pahto mex nē. No mē kot amnhī tomnuj o mē pa xwŷnhjaja koja mē homnuj tŷx nē. Jakamā na pa inhmā kām hprām xà hkôt pix mā amnhī nhīpêx o ixpa hprām nē.

Mē pajamaxpēr nyw jarēnh

Rōmān 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tirtūm kot hprī hā mē pahpumunh rāhā ho hkrī jakamā inhmā kām hprām xà hkôt pix mā amnhī nhīpêx o ri ixpa hprām. Mān ka mē ra ja hā ixpumunh mex nē rŷ ko. Mē piitā mē kot hkôt amnhī xunhwŷr prām xàj na pa hte mē kām kapēr jarēnh o ri ixpa. ¹² Nom ixte ja hā amnhī to jarkrar o ri ixpa hkêt. Ām mē ate inhmar nē mē kēp Kris nhŷ hā mē ahkre hā amnhī to hēx xwŷnhjê mā tanhmā ijarēnh to kaxyw na pa ā mē amā amnhī jarēnh anē. Mē kot Tirtūm kapēr jahkre mex kumrēx ā amnhī to jarkrar tā na htem hkôt amnhī nhīpêx kêt nē. Tā mē ate aprī hā ixte Tirtūm kapēr kôt amnhī nhīpêx mex ā ixpumunh nē tanhmā mē kām ijarēnh to kaxyw na pa ā te ixte amnhī to jarkrar pyrāk o mē amā amnhī jarēnh anē. ¹³⁻¹⁴ Mē kot ixkrā pipānh ā ijarēnh tā Tirtūm na mē akaxyw ixām pa hte mē amā kapēr jarēnh o ri mē akôt ixpa. Ixkrā pipānh kêt. Ixte Tirtūm kām hprām xà hkôt tanhmā amnhī nhīpêx to xwŷnh na pa. Tā mēmo kaxyw na pa hte ā kapēr jarēnh rŷnh anhŷr o ri mē akôt ixpa? Nà inhmā mē akīnh kēnā. Mē ate Tirtūm kôt tām amnhī nhīpêx prām xàj na pa hte ā mē amā kapēr jarēnh anhŷr rāhā

nē. Kris na pre tanhmā ixto pa inhmā mẽ akīnh nē. Te tām kām mẽ ajapê pyrāk. Na pre Kris amnhī grōnh kôt mẽ pahpiitā mẽ nē ty. Tīrtūm kot mẽ pahte amnhī tomnuj mỳrapê tanhmā mẽ pahto pymaj nhūm mẽ pahpiitā mẽ panê ty. Jakamā te mẽ pahpiitā Jejus kôt mẽ pahtyk pyrāk o na pu htem amnhī nhīpêx. Jao te mẽ pahte amnhī nhīpêx tūmja mẽ pahpê hapêx par pyrāk o pu mẽ amnhī nhīpêx nyw o amnhī nhīpêx o ri papa. ¹⁵ Mẽ pajamxpêr nyw o tām mẽ pahte amnhī nhīpêx o papa kaxyw na pre Jejus mẽ panê ty. Jakamā na pu htem axte amnhī pix kukamā ri pamā mẽmoj prām o ri papa hkêt nē. Na pu htem määnēn Tīrtūm kām hprām xà hkôt tanhmā kām amnhī nhīpêx to ho ri papa. Ja kaxyw na pre Tīrtūm akupým Kris o htir pu mẽ kukwak ri pajamxpêr nyw o amnhī nhīpêx o papa. ¹⁶ Jao mẽ piitā mẽ hkrā hkà hā mẽ omunh xà hkôt pix mã tanhmā mẽ harēnh to hkêt nē. Mẽ kot amnhī tomnuj ā mẽ harēnh rỳ mẽ kot amnhī to mex ā mẽ harēnh kêt nē. Amnepê mã na pa pre ā Kris jarēnh anē nē harēnh o:

—Nà Krisja na hte mẽ pahte amnhī nhīpêx kôt amnhī nhīpêx kêt nē. Ām ri kot mẽ pahte amnhī nhīpêx kwým ri amnhī nhīpêx jakamā kot amnhī tomnuj tỳx xwýnh na.

Anhỹr ā harēnh o ixpa. Tā axte ā harēnh anhỹr hkêt nē. Kot amnhī tomnuj xwýnh kêt jakamā na pa hte hpānhā hkôt pix mã tanhmā kām amnhī nhīpêx to ho ri ixpa.

Mẽ pahpê Tīrtūm kràmnhwỳ hā mẽ pajarēnh

Rômān 5.1, 5.10; Epes 6.20; Korosē 1.20

¹⁷ Nē koja mẽhō Kris kôt amnhī xām nhūm kot amnhī nhīpêx tūmja kêp hapêx nhūm hpānhā kot amnhī nhīpêx nyw pix o amnhī nhīpêx nē hamaxpêr nyw pix o hamaxpêr.

¹⁸ Tīrtūm na hte tanhmā mẽ pahto pu mẽ ā amnhī nhīpêx anhỹr o ri papa. Na pu prem pamā hkurê htā nhūm Kris kukwak ri mẽ pahte hkôt amnhī nhīpêx xwýnhjê ho hkràmnhwỳ. Hāmri nē tanhmā mẽ pahte amnhī nhīpêx to hā mẽ pamā karō nē mẽ pamā:

—E kêr ka mẽ ma krī piitā hkôt ri mẽ kām ixkapêr jarēnh o ri apa kê mẽ ama nē mẽ apyrà nē Kris kôt amnhī xunhwỳ. Pa ja hā mẽ omu nē ixte mẽ anhīpêx pyrā nē mẽ ho ixkràmnhwỳ. Anē.

¹⁹ Jakamā na pa hte ma mẽ kām kapêr jarēnh o ri mẽ hkôt ixpa nē mẽ kām:

—E pa mẽ amā mẽmoj mex jarē ka mẽ inhma. Nà na pre Krisja mẽ pahte amnhī tomnuj mỳrapê mẽ panê ty. Nē htyk o Tīrtūm mã mẽ pahpānhā amnhīrer par kumrêx. Jakamā na ra Tīrtūmja Kris kukwak ri kām mẽ pahpiitā mẽ pahto hkràmnhwỳ prām. Koja kukwak ri mẽ pahte amnhī tomnuj piitā ho hamakêtkati nē axte kām hamaxpêr kêt kumrêx. Kām mẽ pahto hkràmnhwỳ hprām jakamā koja ā mẽ panhīpêx anē. Jakamā e kwa mẽ tokyx Kris kôt amnhī xunhwỳ kê Tīrtūm kot inhīpêx pyrā nē mẽ ato hkra nē mẽ ato hkràmnhwỳ.

Anhỹr o mẽ kām harēnh o ri mẽ hkôt ixpa. ²⁰ Kris kot mẽ apiitā mẽ awỳr inhmēnh jakamā na pa hte y hā mẽ amā kapêr jarēnh o ri mẽ akôt ixpa nē mẽ amā:

—E Tīrtūm kām mẽ ajapê jakamā na mẽ awỳr inhmē pa mō. Jakamā kwa mẽ tokyx amnhī tomnuj kaga nē hkôt amnhī xunhwỳ. Kê amnhī tā mẽ apumu nē mẽ ato hkràmnhwỳ. Anē.

²¹ Krisja aa kot tanhmā amnhī tomnuj to hkêt kumrêx tā nhūm pre Tīrtūmja te mẽ kot amnhī tomnuj tỳx kumrêx xwýnh pyrāk o hipêx. Tā mẽmo kaxyw na pre ā hipêx anē? Nà mẽ panê kēnā. Mẽ pahte hkôt amnhī xunhwỳr nhūm kot mẽ panhīpêx o te aa mẽ pahte amnhī tomnuj kêt kumrêx xwýnh pyrāk o mẽ panhīpêx kaxyw na pre ā mẽ panê Krata nhīpêx anē.

6

¹ Tā kot ā Kra nhīpêx anhỹr jakamā kwa mẽ ixkapêr ma nē mar tỳx nē. No mẽ ama nē ām mar kêt nē. Tīrtūm kām mẽ pajapê htỳx jakamā mẽ pakutā nojarêr rāhā ho pa. Kumā na pa hte ā mẽ amā kapêr jarēnh anhỹr o ri mẽ akôt ixpa. ² Amnepê mã na pre Ijaew mã kapêr nē mẽ kām:

Na ka prem amex kêt nē ri apa nē amnhī to ixwỳ pa pre mẽ ama nē mẽmojta pē mẽ apytà nē mẽ ato mex nē. Anē.

Jakamā kwa mẽ inhma. Tirtūm kām mẽ ate amnhĩ tomnuj pē mẽ apytàr prām tỳx jakamā kwa mẽ tokyx amnhĩ to awỳ kē ã kēp mẽ apytàr anē.

Mẽ kot Kris ã tanhmã Pawre nhĩpêx to hã mẽ harēnh

Sikūn Korīt 4.7, 11.23-33; Korosē 1.10

³⁻⁴ Nē mẽ kot Tirtūm kapēr mar nē hã ixtomnuj tā pa hte amnhĩ katut kôt mẽ kot tanhmã ixtomnuj toja rē nē ho ijamakêtkati tokyx anē. Nē arĩ mẽ kām kapēr jarēnh rāhã ho ri mẽ hkôt ixpa. Mẽ kot mar nē ãm mar nē hkaga pymaj na pa hte ã amnhĩ nhĩpêx anhỹr rāhã nē. Mẽ kot ja hã inhĩpêx punuj tā pa arĩ mẽ kām harēnh o ri mẽ hkôt ixpa. ⁵ Mẽ kot Kris ã ixtak nē ijagjēnh nē tanhmã ixto kaxyw ixtã htu htã pa hte mẽ kutã amnhĩ to htỳx nē ixkuhê. Na pa pre hte Tirtūm mã mẽ kām kapēr jarēnh rax nē. Jao tōhã inhôt kêt nē inhôtswa ho ri mẽ hkôt ixpa. Nē tōhã inhmã prām tỳx nē ri ixpa. Tã no ãm arĩ mẽ kām kapēr jarēnh rāhã nē. ⁶ Inhmã tanhmã ixte amnhĩ tomnuj to hprām kêt. Inhmã Tirtūm kot amnhĩ nhĩpêx kôt pix mã amnhĩ nhĩpêx prām. Nē inhmã inhgryk tokyx anhỹr prām kêt. ãm inhmã mẽ piitã mẽ hkĩnh kām mẽ ho mex pix prām. ã na pa hte Tirtūm Karō nhỹ hã amnhĩ nhĩpêx anhỹr o ri mẽ hkôt ixpa. Mẽ kot ja hã ixpumunh nē ra Tirtūm kapēr ma nē hkôt amnhĩ xunhwỳr kaxyw. ⁷ Na pa hte ixkatat kôt mẽ kām ixkapēr mex pix nē. Tirtūm xihtỳx xwỳnhja nhỹ hã ri mẽ kām kapēr jarēnh jao tãm amnhĩ nhĩpêx nē tãm ri ijamaxpēr o ri mẽ hkôt ixpa. Jakamã na htem ja hã ixpumu nē ixte Tirtūm kapēr jarēnh ma nē hkôt amnhĩ xunhwỳ. ⁸ Na hte mẽ hkwỳjaja kām ixkĩnh nē nhũm mẽ hkwỳjaja axtem kām ixkurê nē. Nē mẽ hkwỳjaja amnhĩm inhmex ã ijarē nhũm mẽ hkwỳjaja axtem axpēn mã tanhmã ixto kapēr punuj to. Mẽ kot ixêx nhi hã ijarēnh tā pa hte ixkatat kôt mẽ kām ixkapēr o ri ixpa. Nom kwār mẽ māmri tanhmã ri ixto kapēr to. Ja tanhmã inhmã kute hkêt. ⁹ Na hte mẽ hkwỳjaja ixkamã òkre kahak nē pika piitã hkôt axpēn mã tanhmã ijarēnh to ho pa. Mẽ kām ixpĩr prām tā no pa arĩ ixtĩr nē ixpa. Mẽ kot Jesus ã ixtomnuj tỳx tã kormã ixpĩr kêt nē pa ri ixtĩr nē ixpa. ¹⁰ Ixte Kris ã amnhĩ xà htỳx kamã ijamak o ri ixpa htã arĩ ixkĩnh nē ixpa. Nē ixkàxpore hkêt tã nhũm mẽ ohtô nē ixte mẽ kām Jesus kapēr jarēnh kukwak ri mex nē pa. Nē ixkukrêx rax kêt tã nhũm Tirtūm ixto mex nē pa inhmex nē ixpa. Tã kot paj nhỹrmã ò krĩ kamã kuri inhmex kumrêx nē ixtĩr tũm nē ixpa ho ixpa. Jakamã na pa hte arĩ mẽ kām Jesus kapēr jarēnh o ri mẽ hkôt ixpa. ¹¹ E Korīt kām ixkràmnhwỳjaja. Na pa ixprĩ hã mẽ amã amnhĩ nhĩpêx jarēnh par kumrêx. ¹² Inhmã mẽ akĩnh tỳx tã te mẽ amã ixkĩnh kêt pyràk. ¹³ Kwa te mẽ ate ixto mẽ akatut nē akuhê pyràk o inhĩpêx kêt nē. Amnhĩ pyrã nē amã ixkĩnh nē hkêt wehe. Te mẽ apê ixkra pyràk o na pa ã mẽ amã ixkapēr anē.

Te mẽ pahpê Tirtūm nhõrkwỳ pyràk ã mẽ pajarēnh

Wam Korīt 10.20-22, 15.33; Epes 5.3-14; Sikūn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nē kēp ka mẽ kot Kris kôt amnhĩ xunhwỳr kêt xwỳnhjê mẽ mẽ mẽmoj tã tanhmã axpēn mar to hkêt nē. Rỳ mẽhõ ho amjēn rỳ mẽhõ ho aprõ hkêt nē. Ahpỳnhã mẽ pajamxpēr kēnã. Tanhmã kot we mẽ hamaxpēr nyw xwỳnhjaja nē mẽ hamaxpēr tũm xwỳnhjaja amnhĩ to nē axpēn kôt hamaxpēr nē ri axpēn kôt pa? Nà koja mẽ ã amnhĩ nhĩpêx anhỹr kêt nē. Ahpỳnhã mẽ pajamxpēr. Na hte hirã htỳxja kamãt kô mẽ pihkàr kêt nē. ¹⁵ Xà na hte Kris mẽ Satanasti wa axpēn kôt hamaxpēr? Nà wa kot axpēn kôt hamaxpēr kêt. Ahpỳnhã wa hamaxpēr nē ahpỳnhã wa kot amnhĩ nhĩpêx. Nē ahpỳnhã hirã nē ahpỳnhã kamãt kô. Nē mẽ pahpê Kris kwỳjaja nē mẽ kēp hkwỳ hkêt xwỳnhjaja ahpỳnhã mẽ pajamxpēr nē ahpỳnhã mẽ pahte amnhĩ nhĩpêx. ¹⁶ Na pu htem Tirtūm mã amnhĩ jarēnh xà hã ixkre kamã sãnti xunhwỳr nē amnhĩ to hwỳr pē kām mex o mex ã harēnh kêt nē. Axtem na sãntija. Mẽ panhõ Tirtūmja sãnti rom htĩr tũm rāhã nē pa ho pa xwỳnh. Nē mẽ papajaja te mẽ pahpê Tirtūm nhõrkwỳ pyràk. Kapēr ã kagã htũm kot ja jarēnh kot:

Ixkrajaja te kēp inhõrkwỳ nhũm ixpê ò dõn pyràk. Te ixpê inhõrkwỳ kamã ixpa xwỳnh pyràk jakamã kot paj ixkrajê kamã ri ixpa ho ixpa. Ixpê Mēhpãm na pa. Anē.

17-18 ã Tĩrtũm xihtỳx xwỳnhja kot amnhĩ jarēnh anhỹr jakamã na hte mẽ kot amnhĩ tomnuj xwỳnhjê nê mẽ pahkurê ho:

Kêr ka mẽ hkôt ri apa hkêt nê. Kwarĩ ho kwarĩ.

Nê mẽ hkôt ri amnhĩ nhĩpêx o apa hkêt nê.

Kot kaj mẽ ixkapêr ma nê ixkôt amnhĩ nhĩpêx hã kot paj amnhĩ wỳr mẽ awỳ nê mẽ ato ixkra.

Nê pa kot paj ixpê Mēapãm maati. Anê.

7

¹ Tã ã Tĩrtũm kot mẽ pahto hkra nê mẽ pahkôt pa ho pa hã amnhĩ jarēnh kot anhỹr jakamã kwa ixkrãmnhwỳjaja. Kêr pu mẽ kapêr ma nê tanhmã amnhĩ tomnuj to hkêt nê. Nê mẽmoj punuj kukamã pajamxpêr kêt nê. Nê ãm kapêr kôt pix mã amnhĩ nhĩpêx mex rãhã nê.

Pawre kot Korĩt nhõ xwỳnhjê nhỹ hã hkĩnh ã harēnh

² Nê kwa Kris kôt ixtõ nê ixtõxjaja. Kêr ka mẽ tee ri amnhĩ tã tanhmã inhmã ajamxpêr to hkêt nê. Na pa pre tanhmã mẽ atõ hto hkêt nê. Rỳ tanhmã mẽ atõ hto ka mẽ ja hã ixpumu nê ixkôt tanhmã amnhĩ tomnuj to hkêt nê. Rỳ pa pre ixêx rom tanhmã mẽ anokupyr to ho ri ixpa hkêt nê. Kwa mẽ amã ixkĩnh nê tokyx ixkôt ajamxpêr kêt wehe.

³ Mẽ ate inhmã nê amnhĩ tã apijaãm kaxyw na pa ã mẽ amã ixkapêr anhỹr kêt nê. Inhmã mẽ akĩnh kênã. Na pa pre inhmã mẽ akĩnh ã amnhĩ jarēnh rax nê. Inhmã ri mẽ akôt ixpa rãhã ho ixpa hprãm. Rỳ ka mẽ nhỹrmã apiitã apikaprãr par japêr pa inhmã mẽ akôt ixtyk prãm nê. ⁴ Na pa hte ra mẽ amã ijamxpêr pê ixkĩnh nê ixpa. Nà kot kaj mẽ ixkapêr ma nê Jejus kôt amnhĩ nhĩpêx mex nê. Tã kêr ka mẽ ã amnhĩ nhĩpêx anhỹr rãhã nê. Na pa hte jar ra amnhĩ xà htỳx kamã ijamak o ri ixpa htã no ãm mẽ amã ijamxpêr nê ixkĩnh nê.

⁵ Nê na pa pre amnê Masetõn wỳr kormã Xitre japêr o mõ. Hãmri nê Masetõnja wỳr pøj nê hapêr pê mẽ kãm Jejus kapêr jarēnh o ri mẽ hkôt ixpa. Hãmri nhũm mẽ kãm ixkurê xwỳnhjaja Kris ã inhĩpêx punuj nê hã inhmã àkjêr pix o pa. Hãmri nê ma Masetõn kamã krĩ piitã hkôt ri mẽ kãm ixto kapêr punuj nê pa amnhĩ tã mẽ mar o ri mẽ hkôt ixpa. Nê mẽ kajaja mẽ ate Kris kaga nê nhãm mẽ hamxpêr kôt amnhĩ nhĩpêx pymaj na pa pre tee ri mẽ akukamã ijamxpêr o ri mẽ hkôt ixkaprĩ nê ixpa. ⁶ Tã Tĩrtũm kêp mẽ hkaprĩ xwỳnhjê pumunh nê akupỹm mẽ ho mẽ hkĩnh xwỳnh jakamã na pre ixkaprĩ hã ixpumu nê ixwỳr Xitre mẽ. Pa pre omu nê akupỹm ixkĩnh nê tãm ijamxpêr. ⁷ No ãm Xitre pumunh kôt pix mã ixkĩnh kêt. Na pre ixwỳr pøj nê tanhmã inhmã mẽ ajarēnh to nê mẽ ate tanhmã ho mex to hã mẽ ajarê. Nê mẽ amã ixpumunh prãm tỳx ã mẽ ajarê. Nê Kris kôt mẽ atõta hpijaãm kêt o pa nhũm ixte kagà kamã hã mẽ amã ixàkjêr nhũm mẽ ate ja hã omunh nê ra amnhĩ kamã apijaãm o akaprĩ htỳx ã mẽ ajarê. Nhũm Tĩrtũm kot inhnê mẽ kãm ixkurê xwỳnhjê pumunh mex kaxyw mẽ ate ixto hwỳr ã mẽ ajarê. Na pre ã inhmã mẽ ajarēnh anê pa kuma nê mẽ anhỹ hã ixkĩnh tỳx kumrêx.

⁸⁻⁹ Nê wam ixte mẽ amã kagàta nhĩpêx kêt ri na pa pre tee ri mẽ ate amnhĩ nhĩpêx ã mẽ ajarēnh ma nê mẽ akaxyw hipêx. Nê kamã mẽ ate hpijaãm kêt xwỳnhhta kot tanhmã amnhĩ nhĩpêx to hã omunh nê ãm omunh o arĩ hkôt apa hã kagàta kamã mẽ amã akir hãmri nê Xitre mã kugõ nhũm kupy nê ma mẽ awỳr o mõ. Tã ka xep prem kamã harê nê ama nê amnhĩ kamã apijaãm nê. Nê akaprĩ nê ajamxpêr o:

—Hêxta waa nê. ãm hãmri na Pawre ã mẽ ijarēnh anê. Na pa mẽ ã amnhĩ nhĩpêx anê nê amnhĩ tomnuj tỳx nê. Anê.

Tã nhũm Xitre akupỹn ixwỳr pøj nê inhmã mẽ ajarê. Pa mẽ ajarēnh ma nê tee ri ijamxpêr nê ijamxpêr o:

—Hêxta waa nê. Mon pa pre axtem nê ã ri mẽ kãm ixàkjêr anê? Nà na xep prem kagàta kamã harê nê kuma nê hkaprĩ htỳx nê. Anê.

Tã ãm hãmri na pa pre ã mẽ akaxyw hipêx nê mẽmojta ã mẽ amã ixàkjêr anê. Na ka xep prem kamã harê nê ama nê tee ri ajamxpêr o ra akaprĩ nê. Nom Tĩrtũm kãm hprãm xà

hkôt na ka prem ja hã amnhĩ pumu nẽ ã akapřĩ anẽ. Tã xep ra akupỹm tãm amnhĩ nhĩpêx nẽ akupỹm Tĩrtũm kôt amnhĩ nhĩpêx mex nẽ. Jao akupỹm akĩnh nẽ ri apa. Jakamã ãm hãmri na pa pre mẽ awỳr wam kagàta mẽn̄h nẽ mẽmoj tã ã mẽ amã ixàkjêr anẽ.

¹⁰ Koja Tĩrtũm krajê hõ tanhmã amnhĩ tomnuj to. Hãmri nẽ tee ri ja hã amnhĩ pumu nẽ amnhĩ kamã hpijaàm nẽ akupỹm Tĩrtũm kôt tãm amnhĩ nhĩpêx. Hãmri nẽ akupỹm mex nẽ tãm hamaxpêr pê hkĩnh nẽ ri pa. Nẽ axte tee ri amnhĩ kukamã hamaxpêr hkêt nẽ. Ja na Tĩrtũm kãm hprãm. Tã koja mẽ kêp hkra hkêt xwỳnhjê pyrã nẽ tanhmã amnhĩ tomnuj to nẽ ra hpijaàm japêr. Nom hkwỳjaja kot ja hã omunh pix mỳrapê hpijaàm nẽ arĩ Tĩrtũm kôt amnhĩ nhĩpêx kêt japêr. Hã koja nhỹrmã ty nẽ Tĩrtũm kra kot akupỹm hkôt tãm amnhĩ nhĩpêx xwỳnhjê kĩnhã Tĩrtũm pê awry rax kumrêx nẽ ri pa.

¹¹ Mẽ pahte Tĩrtũm kapêr kwỳm ri tanhmã amnhĩ nhĩpêx to hã tee ri amnhĩ pumunh nẽ amnhĩ kamã hpijaàm nẽ akupỹm tãm amnhĩ nhĩpêxja na Tĩrtũm kãm hprãm. Tã na ka xep ã amnhĩ nhĩpêx anẽ. Wam ixte mẽ awỳr kagà mẽn̄hta na ka xep prem kamã tanhmã ixte nã puro kamã hpijaàm kêt xwỳnhhta ã mẽ amã ixàkjêr tota kamã akapêr nẽ ama. Hãmri nẽ tee ri mẽ ate kormã kot amnhĩ tomnuj ã kãm axàkjêr kêt ã amnhĩ kukamã ajamaxpêr nẽ amnhĩ kamã apijaàm nẽ. Nom Tĩrtũm kãm hprãm xà hkôt. Mẽ ate jam ajamaxpêr pê amnhĩ kamã apijaàmja na kãm hprãm. Tã ka mẽ hpijaàm xwỳnhhta kamã agryk nẽ kãm akapêr o:

—Kwa mẽ pahpê Jejus kwỳjaja mẽ pahte ã amnhĩ nhĩpêx anhỹr kêt tã ka ã amnhĩ nhĩpêx anẽ. Nà na ka amnhĩ tomnuj tỳx kumrêx. Kot kaj ã amnhĩ nhĩpêx anẽ pa mẽ hã apumu nẽ gaa nẽ apyrã nẽ ã amnhĩ tomnuj anẽ. Kwa ja kaga nẽ axte ã amnhĩ nhĩpêx anhỹr kêt nẽ. Nẽ akupỹm Tĩrtũm kôt amnhĩ xãm tỳx nẽ hkôt amnhĩ nhĩpêx rãhã ho ri apa. Anẽ.

Hãmri nhũm krĩ nhõ xwỳnhjaja ja hã mẽ ajarênh ma nẽ mẽ apê jamnuj ã mẽ apumunh kurê kumrêx. ãm hãmri na ka prem ã kãm akapêr anẽ.

¹² Nẽ ixte mẽ awỳr kagà nẽ mẽn̄hta kamã na pa pre nã puro kamã hpijaàm kêt xwỳnhhta mã tanhmã ixàkjêr to hkêt nẽ. Rỳ nã purota mã tanhmã ixàkjêr to hkêt nẽ. Na pa pre mẽ apê Kris kwỳjê hwỳr kagà nhĩpêx nẽ kamã tanhmã mẽ amã hpijaàm xwỳnhhta ã karõ hto. Mẽ ate kamã harênh hãmri nẽ inhỹ hã amnhĩ nẽ hanor nhũm Korĩt nhõ xwỳnh piitã kot ã mẽ ate amnhĩ nhĩpêx anhỹr ã mẽ apumunh kaxyw. Nẽ mẽ ate Tĩrtũm nom ã hipêx anhỹr jao mẽ amã ixkĩnh pê ixkapêr kôt ã hipêx anhỹr ã amnhĩ pumunh kaxyw.

¹³ Tã nhũm Xitre ixwỳr pøj nẽ tanhmã inhmã mẽ ajarênh to. Na xep pre mẽ awỳr nojarêr nẽ tee ri amnhĩ kukamã hamaxpêr. Mẽ ate kagàta kamã harênh nẽ ijarênh mar nẽ kamã agryk pymaj tee ri amnhĩ kukamã hamaxpêr. Tã ma mẽ awỳr mõn pøj nẽ mã amã kugõ. Ka xep prem kamã harê nẽ ama nẽ hkôt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nẽ hkĩnh nẽ. Hãmri nẽ tãm hamaxpêr. Tã ra akupỹn ixwỳr mõ nẽ inhmã mẽ ajarê pa mẽ ajarênh ma nẽ ijaxwỳja ixkĩnh nẽ. ¹⁴ Na pre kormã mẽ awỳr nojarêr pa kãm tanhmã mẽ amex ã mẽ ajarênh to. Tã nhũm xep ma mẽ awỳr mõn pøj nẽ mẽ apumu nẽ hamaxpêr o:

—Nà pêr ãm hãmri na pre Pawre inhmã mẽ mex ã harê. Mẽ mex kênã. Anẽ.

¹⁵ Tã nhũm pre mẽ arũm kato nẽ ra man akupỹn ixwỳr mõn pøj nẽ inhmã mẽ ajarênh o:

—Na pa pre ma mẽ hwỳr mõ nẽ mẽ kãm ixkapêr o ri mẽ hkôt ixpa nhũm mẽ ixkapêr ma nẽ ixkôt amnhĩ nhĩpêx kurê kumrêx nẽ ixto mex nẽ. Kormã ixte mẽ hwỳr inhmõr kêt tã mẽ harênh ma nẽ inhmã mẽ hkĩnh nẽ. Tã pa ma mẽ hwỳr mõ nhũm mẽ ixto mex rax nẽ pa ra inhmã mẽ hkĩnh tỳx kumrêx. Anẽ.

¹⁶ ã inhmã mẽ ajarênh anẽ pa mẽ ajarênh ma nẽ ixkĩnh tỳx nẽ. ãm hãmri na ka htem mẽmoj tã amnhĩ jarênh xà hkôt tanhmã amnhĩ nhĩpêx to ho apa.

8

Mẽ kot Kris kôt mẽ hkwỳjê pê õxỳ hkêt ã mẽ kãm karõ
Atre 11.27-30; Rõmãn 15.25-27; Wam Korĩt 16.1-4

¹ E Kris kôt ixkwỳjaja. Kot paj hpānhā mẽ amā jar Masetōn kamā tanhmā Jejus kwỳjaja kot amnhĩ nhĩpêx to hā mẽ harẽ ka mẽ harēnh ma. Na hte Tirtūm mẽ kutā nojarêt nhūm mẽ mex nẽ pa. ² Mẽ hkwỳjaja kot Kris ã mẽ hipêx kati nhūm mẽ kot amnhĩ xà htỳx kām hamak o pa htā hkĩnh nẽ hamakêtkati nẽ ri pa. Nẽ mẽ hkàxpore hkryre htā ho õxy hkêt nẽ pa. Na htem àmnhĩx ri mẽ kêp amrakati xwỳnhjê mã hkwỳ nhõr o pa.

³⁻⁴ Tã na prem Jerujarẽ kamā Kris kôt mẽ pahkwỳjê jarēnh ma. Mẽ kêp amrakati hā mẽ harēnh ma nẽ kām mẽ hkaprĩ nẽ. Nẽ mẽ kām mẽ hwỳr mẽmoj rēnh nẽ mẽ ho ajuta hprām nẽ. No ãm pa ixte mẽ kām hā karõ xà hkôt kêt. Mẽ tāmjaja mẽ hamaxpēr xà hkôt na prem ã hamaxpēr anẽ nẽ mẽ kaxyw kàxpore ho pikuprõnh rax nẽ. Hāmri nẽ inhmā kugõ nẽ inhmā:

—Kwa na pa prem Jerujarẽ kamā Kris kôt mẽ pahkwỳjê jarēnh ma nẽ mẽ inhmā mẽ hkaprĩ nẽ mẽ kām mẽ ixkàxpore hkwỳ ho akuprõ. Jakamā e amỳ nẽ ma mẽ hwỳr o mō nẽ mẽ kām agõ kê mẽ tokyx ho amnhĩm awjaprõ nẽ kuku. Anẽ.

⁵ Pa mẽ kuma nẽ ixtỳx ho ãm kàxpore grire hā hkamnhĩx nẽ ijamaxpēr o:

—Kwa mo mẽ hikàxpore rax koja mẽ ri ho akuprõ nẽ mẽ kām kugõ? ãm mẽ hikàxpore hkryre kēnā.

Anhỹr o ijamaxpēr tã no nhūm mẽ kaxyw ho rax nẽ ho akuprõ. Mẽ hikàxpore hkryre htā mẽ kām õr rax nẽ. Hāmri nẽ inhmā amnhĩ jarēnh o:

—Na pa mẽ ra Pahihti Jejus Kris mã amnhĩ gõ. Mẽ ixte tanhmā kām amnhĩ nhĩpêx to ho ri ixpa kaxyw. Jakamā e tanhmā mẽ inhmā mẽmoj tã karõ hto. Kot pa mẽ ama nẽ akapēr kôt amnhĩ nhĩpêx. Ja na pa mẽ inhmā hprām nhūm Tirtūm haxwỳja kām ja prām. Anẽ.

⁶ Na pa pre ã mẽ kot amnhĩ nhĩpêx anhỹr ã mẽ omu nẽ mẽ apê Korīt nhõ xwỳnhjê mã ijamaxpēr kurê kumrêx. Hāmri nẽ Xitre mã mẽ ajarẽ. Na pre mẽ awỳr mō nẽ mẽ amā Jerujarẽ nhõ xwỳnhjê jarẽ. Mẽ ate mẽ kām kàxpore hkwỳ ho apikuprõnh kaxyw. Tã pa pre jam ijamaxpēr nẽ ra akupỳm mẽ awỳr mēnh mã nẽ kām:

—Kwa ma akupỳm Korīt wỳr mō nẽ mẽ kām anẽ kê mẽ ra kot amnhĩ jarēnh xà hkôt Jerujarẽ nhõ xwỳnhjê kaxyw kàxpore hkwỳ ho akuprõ nẽ tokyx mẽ hwỳr kumẽ. Ra mẽ kām Kris kôt mẽ hkwỳjê hkĩnh ã amnhĩ jarēnh kēnā. E kwa tokyj. Anẽ.

⁷ Na ka htem amnhĩ to mex o ri apa. Nẽ amnhĩ kaxyw Kris hkôt ajamaxpēr tỳx nẽ. Nẽ ma mẽ kām Tirtūm kapēr jarēnh mex o ri mẽ hkôt apa. Nẽ mẽ ajamaxpēr mex nẽ. Nẽ mẽ piitã mẽ ho mex o ri apa. Nẽ mẽ amā ixkĩnh o ri apa. Jakamā kwa kêr ka mẽ axàmnhĩx mẽ kêp amrakati xwỳnhjê mã mẽ akàxpore hkwỳ nhõr o apa. Jao mẽ amā Tirtūm kĩnh tỳx ã amnhĩ to amnhĩrit. ⁸ Ixte ã mẽ amā ja hā karõ anhỹr tã hā mẽ atã ixihtỳx kêt nẽ. ãm mẽ kamā axukaprĩ hkôt mẽ ate mẽ kām axàmnhõr o apa kaxyw na pa ã mẽ amā ixkapēr anẽ. Masetōn kamā mẽ pahkwỳjaja kot amnhĩ nhĩpêxta pyrã nẽ. ⁹ Ra mẽ ate Jejus Kris kām mẽ pajapê hā kot tanhmā amnhĩ nhĩpêx to hā mar mex. Amnepêm na pre kaxkwa kamā mex kumrêx nẽ ri pa ho pa nhūm mẽmoj piitã kêp õ htā nhūm rer pa nẽ mẽ pahwỳr wry nẽ mẽ pakamā kêp amrakati nẽ ri pa. Hikàxpore hkêt nẽ ri pa. Tã mẽmo kaxyw na pre ã mẽmoj mex piitã rer par nẽ mẽ pahwỳr wryk anẽ? ãm kot mẽ pahto mex pix kaxyw. Kot mẽ pahto mex nhūm mẽ pahte kukwak ri mẽ paxàmnhĩx ri mẽ pajamakêtkati nẽ mẽ papa kaxyw na pre ã amnhĩ nhĩpêx anẽ. Mẽ pahte nhỹrmã urak nẽ kaxkwa kamā pamex kumrêx nẽ ri papa ho papa kaxyw.

¹⁰ E kwa kêr ka mẽ tokyx kàxpore hkwỳ ho apikuprõnh pa nẽ Jerujarẽ nhõ xwỳnhjê hwỳr amẽ. Mẽ akumrêxjaja na ka prem ham amgrà hapêxta kamā ra mẽ kaxyw ho apikuprõnhja krax. Mẽ amā mẽ ho mex prām xaj ham ho hkrax tã no ãm kormã hatur xàm mēnh nẽ mẽ hwỳr mēnh kêt nẽ. ¹¹ Kwa mẽ tokyx ja ho ajapêx nà. Na ka prem ate ho anhỹr krax ã akĩnh pê kàxpore hkwỳ ho apikuprõnh o apa. Tã kêr ka mẽ arĩ akĩnh rãhã ho apikuprõnh par jatur xàm amẽ. No mẽ ri atỳx tanhmā ajamaxpēr to hkêt nẽ. Rỳ mẽ ajamaxpēr o:

—Nà kormã. Kot paj nhỹrmã ixkàxpore rax nẽ rĩ kormã mẽ hwỳr hkwỳ mẽ.

Anh̄yr o mē ri ajamaxpēr hkēt nē. Mē ate tanhmā akàxpore hkre kamā kute hā omunh xà hkôt mē kām hkwȳ pix gō. ¹² Kēr ka mē axàmnh̄ix akīnh kām mē kām ho akuprō. Ate amnh̄i kàxpore pumunh xà hkôt. Ka mē akàxpore rax nē mē kām ho rax nē agō. Rỳ mē akàxpore grire nē mē kām ho grire nē agō. Ja na kēt mex. ¹³ No mē ate mē kām ōr par nh̄um mē arom mē hikàxpore rax nē ri paja mex kēt. ¹⁴ Nom ra mē akàxpore rūnh jakamā kwa mē amnh̄i kutā mē kām hkwȳ ho hkryre nē ho akuprō kē mē apyrā nē hikàxpore nē ri pa. Kēr ka mē nh̄ymā tanhmā amnh̄i to nē axà nē nh̄um akàxpore apē hapēx nh̄um mē ajarēnh ma nē amnh̄i kuxwar mē ato ajuta nē mē amā hkwȳ ho akuprō nē mē awyr kumē. Ka mē akàxpore ho axpēn pyrā nē ri apa. ¹⁵ Amnepēm Tirtūm kot kaxkwa rūm Ijaewjē hwyr mēō rēnh nh̄um mē kot apkati mē amnh̄im hkawrà nē ho apkur o pata ā na pre Tirtūm kapēr ā kagā htūmja ā mē harēnh anē nē mē harēnh kot:

Na pre mē hkra xohtō xw̄ynhjaja mē apkur xà hkawrà rūnh nē. Nē gōj kām unhw̄y nē kuku nē piitā ho ōhy htu. Nh̄um mē hkra grēre xw̄ynhjaja haxw̄yja hkwȳ kawrà no ām ho hkryre nē hkawrà. Nē gōj kām unhw̄y nē kuku nē haxw̄yja ho ōhy htu hpa. Na pre htem apkati mē ā amnh̄i nh̄ipēx anh̄yr o pa. Anē. Ja pyrā nē kēr ka mē akàxpore ho axpēn pyrāk o ri ho apa.

Xitre mē hkràmnhw̄yē jarēnh

¹⁶ Nē Xitre na pre ixpyrā nē kām mē ato ajuta hprām nē. Na pre inhmā mē atā amnh̄i jarē pa pre kuma nh̄um ja inhmā mex nē pa ixkīnh nē. Nē ijamaxpēr o:

—Nà ām hāmri na Tirtūm tanhmā Xitre hkrā hto nh̄um ā hamaxpēr mex anē. Anē.

¹⁷ Tā pa ma akup̄ym mē awyr mōr ā hkukja nh̄um inhma nē hkīnh nē mē awyr nojarēt kurē kumrēx. Nom kormā ixte kām mē ajarēnh kēt ri nh̄um tām amnh̄i kukamā hamaxpēr nē mē awyr hkrā. ¹⁸ Tā na ra nojarēt kaxyw. Kot paj ma hkôt Kris kôt mē pahtōjē hō mē kē ma hkôt mō. Kôt ixte mēnh xw̄ynhta na hte mē kām Tirtūm kapēr jarēnh mex nē nh̄um htem amnh̄im mex ā harē. ¹⁹ Na pre jar Jejus kw̄yjaja kot ma ixkôt Jerujarē hwyr kàxpore hkwȳ ho mōr kaxyw nh̄um prem amnh̄im mē kurē. Tā koja Xitre mē wa mē awyr mōn pōj ka mē kām kàxporeta gō nh̄um man akup̄yn o mō pa wa rī kormā ma Jerujarē hwyr mē kām o mō. Mē kot ham̄ynh nē mē pamā mē hkīnh ā kot amnh̄i tā mē pahpumunh kaxyw. Nē Tirtūm mā mex o mex ā harēnh kaxyw. ²⁰⁻²¹ Nom kàxpore rax nh̄um ixte mē hwyr o inhmōr nh̄um mē kot hā ixkamnh̄ix pymaj kot paj ma amnh̄i kôt Kris kôt mē pahtōta o mō. Ixte Xitre hkôt mē awyr mēnh xw̄ynhta pa ma amnh̄i kôt o mō. Nom ixàhkīnh o ixpare hā. Tirtūm kot ja kôt ixpumunh mex tā kot paj ma amnh̄i kôt o mō.

²² Nē ot pa ma Xitreta wa hkôt axte mē awyr ja mē. Kēr kē mē axkrunēpxi nē ma ixkukamā mē awyr mō. Ixte wa hkôt mēnh xw̄ynhta ixte kot amnh̄i nh̄ipēx ā omunh mex. Na hte kām mē piitā mē ho ajuta ho pa hprām nē. Tā mē ajarēnh ma nē inhmā mē ajarēnh o:

—Nà koja mē Jerujarē nhō xw̄ynhjē mā kàxpore nhōr rax nē kām ga. Mē kot amnh̄i to mex kēnā. Anē.

Jakamā ra mē awyr hkrā. Tā koja ma Xitre wa hkôt mō nē mē ato ajuta ka mē tokyx kàxpore ho apikuprōnh pa.

²³ Nē koja mēhō tanhmā Xitre hā mē akukjēr to ka mē kēp ixkràmnhw̄y mex ā harē. Nē kot inh̄ihkō hā mē ho ajuta mex o pa hā harē. Na pre ra jar Kris kw̄yjaja mē akaxyw kuta nē ma mē awyr kumē. Jakamā koja ma mē awyr mō nh̄um Kris kôt mē pahtōjē hō wa pijakrutja wa ma hkôt mō. Na hte wa haxw̄yja Kris kôt amnh̄i nh̄ipēx mex o pa. ²⁴ Koja mē awyr pōj ka mē omu nē mē ho mex nē. Nē mē amā mē hkīnh nē. Kē krī piitā hkôt Kris kôt mē pahkw̄yē piitā mē hā mē ajarēnh ma nē axpēn mā mē amex ā mē ajarē. Nē mē ajarēnh o:

—Pēr ām hāmri na pre Pawreja mē pamā Korīt kām mē pahkw̄yē jarē. Na xep pre Xitre mē hkwȳta ma mē hwyr mō nh̄um mē ho mex rax nē. Ra Pawre kot mē pamā mē harēnh xà hkôt. Anē.

9

Mē kot kàxpore ho pikuprōnh ā mē harēnh

¹⁻² Kwa ixkràmnhwỳjaja. Kot paj Jerujarē nhō xwỳnhjē kaxyw mē atā ixihỳx kêt nē. Ra mē amā mē ho ajuta hprām jakamā na pa pre Masetōn kamā Kris kôt mē pahkwỳjē mā mē ajarēnh o:

—Pika pē Gres kamā Kris kôt mē pahkwỳjaja na prem ham amgrà hapēxta kamā Jerujarē kamā mē pahkwỳjē jarēnh ma nē kām mē ho ajuta hprām. Anē.

Hāmri nhūm mē ajarēnh ma nē mē apyrà nē kām tanhmā mē ho ajuta hto hprām. ³⁻⁴ Tā ot pa mē awỳr Xitre mē hōta wa mē ho ixpimràatā wa mē kumē. Mē kot kàxpore hā mē akukjēr kaxyw. Kêr pa mytwrỳ hō hā ma Masetōn nhō xwỳnh kwỳjē mē mē awỳr mō nē ra ixte mē kām kàxpore hkwy ho mē apikuprōnh ā mē ajarēnh kôt mē ate ho apikuprōnh rax ā mē apumu nē ixkīnh nē. Nom kot pa mō nē tee ri hapêr nē te ixte Masetōn nhō xwỳnhjē mā mē ato ixêx pyrà nē ixpijaàm nē. Ka mē ajaxwỳja amnhī kamā apijaàm nē. ⁵ Ā mē pahte amnhī nhīpêx anhỳr pymaj na pa ā mē amā kagàja nhīpêx nē Xitre mā òr nē ma amnhī kukamā mē awỳr mēnh anē. Nē hkôt wa mōr mā xwỳnhhta mē ho ixpimràatā amnhī kukamā wa mē kumē. Tā kê mē awỳr pōj nē mē amā kagàja gō ka mē kamā harē nē ama nē tokyx kàxpore ho apikuprōnh jatur xàm amē. Kêr pa mē hapu hā mē awỳr mō ka mē ra mē ixkutêp ho apikuprōnh pa nē mē kām agō nē ajamakêtkati nē apa. No pa ixte mē amā mē ate ho apikuprōnh kaxyw mē atā ixihỳx kêt. ⁶ Na htem piitā ā hamaxpêr anhỳr o pa nē hamaxpêr o:

—Kot ka apur rax nē kamā anhō rax nē. Nom kot ka apur grire nē kamā anhō grire.

Anhỳr o hamaxpêr jakamā kêr ka mē apiitā ajamakêtkati nē Jerujarē nhō xwỳnhjē mā kàxpore nhōr mex nē. Kêr ka mē ho apikuprōnh pa nhūm rax nē. Te mēhō ihpur rax nē kamā ò raxta pyrāk. Kê Tirtūm ā mē ate amnhī nhīpêx anhỳr ā mē apumu nē nhỹrmā mē ato mex nē. ⁷ Nom kêr ka mē anhōxỳ kamā mē kām òr kêt nē. Mē pahte pahkīnh kām panhōxỳ hkêt kām mē kêp amrakati xwỳnhjē mā mēmoj nhōr o papaja na Tirtūm kām hprām. ⁸⁻⁹ Koja mē hā mē apumu hāmri nē amnhīm mē amex ā mē ajarēnh rāhā ho pa. Mē kām Tirtūm kīnh xwỳnhjaja na htem àmnhīx ri mē kêp amrakati xwỳnhjē mā mēmoj nhōr o pa. Te Tirtūm kot amnhī nhīpêx pyrāk. Na hte àmnhīx ri mē pamā mēmoj nhōr o pa. Mē pahwỳr na rē nhūm wrỳ. Nhūm mē pamā mē paxàpkur xà nhōr o pa. Nē tanhmā mē pahto pu mē paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamā kwa pu mē urāk nē paxàmnhīx ri mē kêp amrakati xwỳnhjē mā mēmoj nhōr o papa.

¹⁰ E pa ixprī hā mē amā ja jarē ka mē inhma. Nà na hte ā Tirtūm mē pamā mē paxàpkur xà nhōr o pa anē. Kot kaj apur kām ahkre nhūm tanhmā amā mēmo hyta nhīpêx to nhūm amā hapôx mex nē amā ô rūnh nē ka anhō rax nē. Nē hkwy ho axàpkur o apa nē axte hkwy hkre. Tā kêr ka mē ā Tirtūm kot mē ato mex anhỳr ā amnhī pumu hāmri nē urāk nē axàmnhīx ri mē kêp amrakati xwỳnhjē mā axàmnhōr pē mē ho mex o ri apa. Nhūm Tirtūm mē hā mē apumu nē mē amā mēmoj nhōr rāhā nē. Ka mē amnhī pyrà nē mē kêp amrakati xwỳnhjē mā hkwy nhōr o apa. ¹¹ Koja Tirtūm mē ato mex rax nē ka mē anhō mēmoj rax nē. Ja o amnhī xwar mē kêp amrakati xwỳnhjē kaxyw kàxpore hkwy jaxwỳ. Kêr pa mē amā hkwy jamỳ nē ma Tirtūm kôt mē pahkwỳjē mā o mō nē mē kām kugō kê mē omu nē hkīnh nē. Nē mē atā Tirtūm mā mex o mex ā harē. ¹² Hāmri nē mē akukwak ri mex nē ri pa. Nē axpēn mā Tirtūm mex o mex ā harēnh o ri pa. ¹³ Koja mē amnhī tā mē apumu nē hkīnh nē. Hāmri nē Tirtūm mā amnhī tā tanhmā mē ajarēnh to nē kām:

—Pa Tirtūm. Nà am hāmri na pre Korīt kām akôt mē ixkwỳjaja amnhī jarē. Na htem akôt pix mā amnhī nhīpêx mex o ri pa. Jao mē ixpê òxỳ hkêt nē mē inhma kàxpore hkwy nhōr rax nē. àmnhīx ri hamakêtkati nē mē inhma hkwy nhōr rax nē. No am mē papxipix na htem ā mē inhīpêx anhỳr kêt nē. Na htem mē kêp amrakati xwỳnh piitā ā mē hipêx anhỳr o pa. Am hāmri na ka pre tanhmā mē hkrā hto nhūm mē anhỹ hā ā amnhī nhīpêx anhỳr o pa. Amex o amex Tirtūm. Anē.

¹⁴ Hāmri nē mē ato hwỳr o:

—Pa Tirtūm. Ām hāmri na hte Korīt nhō xwỳnhjaja amnhĩ pyrà nē mẽmoj to mẽ ixkutā nojarēt o pa. Jakamā aa mẽ ixte amnhĩ tã mẽ inhno ho mẽ omunh kêt tã mẽ inhmã mẽ hkĩnh nē. Kwa kêr ka mẽ ixtã mẽmoj to mẽ kutã anojarēt rãhã ho apa Tirtūm.

Anhỹr o mẽ ato kuwỳ. ¹⁵ Tirtūmja mex o mex. Nom na hte mẽ pahto mex pē mẽ pamã kàxpore nhōr kêt nē. Kra Jejusja na pre mẽ pamã kugō. Kãm mẽ pajapê ho mẽ pahwỳr kumē nhūm mẽ pahwỳr wrỳ nē mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Ja na mex o kot mẽ pamã kàxpore nhōr jakrenh. Mēhō koja uràk nē ã mẽ panê htyk anē? Nà amrakati ho amrakati. Ām Jejus pix na pre ã amnhĩ nhĩpêx anē.

10

*Pawre kêp Tirtūm Karō nhỹ hã kapêr xwỳnh ã harēnh
Epes 6.10-20; Wam Tesarōn 5.8*

¹ E Kris kôt ixkwỳjaja. Nà ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarē ka mẽ apiitã inhma. Nà na hte Kris mẽ pakamã gryk tokyx anhỹr kêt nē. Na hte mẽ pahto mex japjê nē. Tã inhmã uràk nē ã mẽ anhĩpêx anhỹr prãm nē. No na hte mẽ akwỳjaja axpēn mã tanhmã ixto kapêr punuj to nē ri axpēn mã:

—Pawre na hte nhỹri krĩ kamã pa nē mẽ pamã kagà nhĩpêx nē mẽ pahwỳr kurē nē kamã mẽmoj tã mẽ pamã kapêr kãm hihtỳx nē hã mẽ pamã akir. Tã amnē mẽ pahwỳr mō hāmri nē te kãm mẽ pahpyma pyràk o mẽ pamã kapêr o pa.

Anhỹr o ijarē. ² Nom inhmã mẽ awỳr inhmōr nē mẽmoj tã mẽ amã ixàkjêr prãm kêt tã kot paj nhỹrmã mẽ awỳr mō ka mẽ tanhmã amnhĩ tomnuj to ho apa japêr. Pa ja hã mẽ apumu nē hã mẽ amã akir kãm ga. ³ Na pa htem jar pika ja kamã Tirtūm kwỳ hkêt xwỳnhjê kaêx ã ri ixpa nom mẽ uràk nē amnhĩ krã hkôt tanhmã amnhĩ nhĩpêx to ho ixpa hkêt nē. Nē mẽ uràk nē amnhĩ krã hkôt tanhmã ijamaxpêr to ho ixpa hkêt nē. Na pa htem Tirtūm Karō nhỹ hã àhpumunh xà ho amnhĩ nhĩpêx o ri ixpa. ⁴ Nē Tirtūm xàhpumunh tỳx xà ho mẽ kãm kapêr jarēnh o ri ixpa. Mē kot mar nē hkôt amnhĩ nhĩpêx kaxyw. Nē àhpumunh tỳx o na pa htem mẽ kot Tirtūm kôt amnhĩ xunhwỳr pymaj mẽ kêp àmnàr xwỳnhjaja tanhmã mẽ nē mẽ ho. ⁵ Na htem htỳx ri tanhmã Tirtūm nē hkwỳjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nē mẽ kãm kapêr to. Na pa htem ja hã mẽ omu nē Tirtūm xàhpumunh tỳx xà ho tanhmã mẽ kãm ixkapêr to nhūm mẽ tee ri inhma nē axte mẽ kêp àmnàr kêt nē. Pa mẽ kãm Tirtūm kapêr jarē nhūm mẽ ohtō nē kuma nē Kris kôt amnhĩ xunhwỳ nē hkôt amnhĩ nhĩpêx o pa. ⁶ Tã mẽ kajaja kot kaj mẽ Tirtūm kôt amnhĩ nhĩpêx mex tã mẽ atō ra kapêr nhĩrôp xa nē tanhmã amnhĩ tomnuj to. Pa ja hã apumu rỳ hã ajarēnh ma nē hã amã akir. ⁷ Mē ate Tirtūm kot mẽ awỳr inhmēnh kêt ã axpēn mã ijarēnh tã kot kaj mẽ atō ãm hāmri apê Kris kwỳ hã amnhĩ pumu nē ra määnēn pa ixpê hkwỳ hã ixpumunh kurē kumrēx. Mē apyrà nē ixpê hkwỳ kênã. ⁸ Na pa pre ma mẽ awỳr mō nē tanhmã mẽ amã amnhĩ jarēnh to nē mẽ amã:

—Tirtūm na pre mẽ awỳr inhmē pa mō. Ixte ÿ hã mẽ amã kapêr jarēnh o ri mẽ akôt ixpa kaxyw. Anē.

Tã pa hte arĩ ã amnhĩ jarēnh anhỹr o ri ixpa. Ām hāmri na pre Tirtūm mẽ awỳr inhmē pa hte ãm hāmri mẽ amã kapêr jarēnh o ri mẽ akôt ixpa. Na pa hte Tirtūm nhỹ hã mẽ amã ixkapêr nē kapêr o ixêx o amnhĩ to jarkrar kêt nē. Ixte tanhmã mẽ atomnuj to ho ri ixpa kaxyw na pre Tirtūm mẽ awỳr inhmēnh kêt. Mē amã ixkapêr mex nhūm mẽ ate inhmar nē Kris kapêr kôt amnhĩ nhĩpêx mex o apa kaxyw na pre mẽ awỳr inhmē. ⁹ E kwa Kris kôt ixkwỳjaja. Na pa hte mẽ amã ixpuma kaxyw mẽ awỳr kagà rēnh kêt nē. Mē ate kamã harēnh nē tee ri amnhĩ kukamã ajamaxpêr o amnhĩ kamã amã ma kaxyw kêt. ¹⁰ Mē akamã mẽ kãm ixkĩnh kêt xwỳnhjaja na htem ijarēnh o:

—Pawre na hte awry hã pa nē mẽ pahwỳr kagà rēnh nē kamã te kêp pahi ho amnhĩ nhĩpêx pyrà nē mẽmoj tã mẽ pamã kapêr kãm hihtỳx nē. Tã mẽ pahwỳr pōj hāmri nē kapêr kaxyw nom kapêr kãm hihtỳx o kapêr kêt nē. Jakamã mo kaxyw kot puj mẽ hwỳr mra nē kapêr ma?

Anh̄yr o ijarē. ¹¹ Nom ā ixte anh̄yr kêt. Kwa mẽ inh̄ma. Kot paj nh̄ymã ma mẽ aw̄yr mō hãmri nē te kagà ja kamã mẽ amã ixkapēr pyrək o mẽ amã ixkapēr nē ixkapēr xiht̄yx o mẽ amã ixkapēr kãm ga.

¹² Na hte mẽ akw̄yjaja kot amnh̄i to mex o mẽ ajakrenh ā amnh̄i to jarkrar o ri pa. No ãm amnh̄i krã hkôt pix mã na htem ā ri amnh̄i jarēnh anē. Na hte Tirtūm ā mẽ harēnh anh̄yr kêt nē. ¹³ Tã inh̄mã mẽ urək nē ā amnh̄i jarēnh anh̄yr prãm kêt. ãm ixte Tirtūm kot tanhmã inh̄mã karō hto xà hkôt amnh̄i nh̄ipēx o ixpaja na inh̄mã hprãm. Tã mẽ kajaja mẽ aw̄yr na pre inh̄mē. ¹⁴ Ra kot mẽ aw̄yr inh̄mēnh jakamã ixkumrēx na pa pre mẽ aw̄yr mō nē mẽ akôt ri mẽ amã tanhmã Kris jarēnh to ho ri ixpa. Tirtūm kãm nh̄yh̄ym ixpa hprãm xà pix w̄yr na inh̄mã ixpa hprãm.

¹⁵ No kêt mẽ kot amnh̄i krã hkôt ht̄yx ri Tirtūm kapēr jahkre o mẽ pa xw̄ynh̄jaja na htem nh̄yri kr̄i kamã mẽ kot Kris kôt amnh̄i xunhw̄yr ā mẽ harēnh ma nē mẽ hã amnh̄i to jarkrar o ri pa. Te tãm kot mẽ hw̄yr mōr nē mẽ kãm ujarēnh nh̄um mẽ kot mẽ mar xà hkôt Kris kôt amnh̄i xunhw̄yr pyrək. Nē mẽ hã amnh̄i to jarkrar o:

—E na pa pre ma mẽ hw̄yr mō nē mẽ kãm Tirtūm kapēr jarē nh̄um mẽ inh̄ma nē hkôt amnh̄i xunhw̄yr kurē kumrēx. Ixkukwak ri na prem ā amnh̄i nh̄ipēx anē. Anē.

Nom ā amnh̄i nh̄ipēx anh̄yrja ā amnh̄i to hēx. No pa na pa hte ho mẽ urək kêt nē. Kojã Tirtūm ma nh̄yri kr̄i hw̄yr ixkw̄yjê hō mẽ nh̄um ma hw̄yr mō nē mẽ kãm Kris kapēr jarē. Hãmri nh̄um mẽ kuma nē Kris kôt amnh̄i xunhw̄y. Pa mẽ harēnh ma nē mẽ ȳ hã ixk̄inh nē nom pa ixkukwak ri mẽ kot hkôt amnh̄i xunhw̄yr ā amnh̄i to jarkrar kêt nē. Ixte mẽ hw̄yr ixpa nē mẽ kãm ixujarēnhre hã kot pa hkôt mẽ hã amnh̄i to jarkrar. ãm Tirtūm kãm nh̄yh̄ym ixpa hprãm xà pix w̄yr na pa hte ixpa nē mẽ kãm kapēr jarē. Jakamã kot kaj mẽ nh̄ymã Kris kôt amnh̄i nh̄ipēx mex o ri apa pa ja hã mẽ apumu nē mẽ are nē hpãnhã ma kr̄i hō hw̄yr Kris kot mẽ hw̄yr inh̄mēnh xà hō hw̄yr mō. Ka mẽ ja hã ixto Tirtūm w̄yr o apa. ¹⁶ Kot paj mẽ anhō kr̄i kamã mẽ piitã mẽ kãm Jejus kapēr jarēnh pa hãmri nē hpãnhã ma kr̄i hk̄w̄y hkôt ijapōx o ri ixpa nē kamã mẽ kãm harēnh o ri mẽ hkôt ixpa. Kormã aa mẽ kot mar kêt kumrēx xw̄ynh̄jê mã harēnh o ri mẽ hkôt ixpa. Na pa hte ā mẽ hw̄yr ixpa nē mẽ kãm ixujarēnh anē. Jakamã nh̄um mẽ ja hã ixpumu nē mẽ kot Tirtūm kapēr mar xw̄ynh̄jê pix w̄yr ixpa hã ijarēnh kêt nē.

¹⁷ Nē Tirtūm kapēr ā kagà ht̄um kot mẽmoj tã mẽ kot amnh̄i to jarkrar ā harēnh kot: Kēr ka mẽ kamjaja amnh̄i mex ā amnh̄i to jarkrar kêt nē. ãm Tirtūm pix mã mãn mex o mex ā harēnh o ri ho jarkrar o ri apa. Anē.

¹⁸ Kot pu mẽ Tirtūm noo mã amnh̄i to mex ā amnh̄i to jarkrar nē ãm amnh̄i to jarkrar kapr̄y. Nom kojã Tirtūm tãm ja hã mẽ pahto jarkrar nē ãm hãmri mẽ pahte amnh̄i to mex xw̄ynh̄ ā pahto jarkrar.

11

Jejus kot mẽ hw̄yr mẽ rēnh ā amnh̄i to hēx xw̄ynh̄jê jarēnh

Matēwre 7.15; Rômãn 16.17; Karatas 1.6-9; Korosē 2.8; Sikūn Pētre 2.1

¹ E kot paj te mẽ hkrã pipãnh xw̄ynh̄ kot ht̄yx ri amnh̄i jarēnh pyrək o tanhmã mẽ amã amnh̄i to jarkrar to. Kwa mẽ inh̄ma nē ixkamã agryk kêt nē. No mẽ ixkapēr kumrēx mãn ma. ² Inh̄mã mẽ ak̄inh. Te ho Mēpahpãm Tirtūm kãm mẽ ak̄inh̄ta pyrək. Te mẽ apē mẽhō kukrit kãm my hk̄inh nē kot ho mjên prãm xw̄ynh̄ta pyrək. Kãm mẽmyjê piitã mẽ hk̄inh kêt ãm kãm pix k̄inh. Ja pyrã nē kēr ka mẽ amã Kris k̄inh o nhãm amã mẽ hk̄inh xw̄ynh̄jê jakre. Te ho mẽhō ni kot kãm myta pix k̄inh nē kãm ho mjên prãm xw̄ynh̄ta pyrək. Ja na pa inh̄mã hprãm. ³ Ra mẽ amã Kris k̄inh t̄yx o apa nē hkôt amnh̄i nh̄ipēx mex o ri apa htã nh̄um mẽ kot amnh̄i krã hkôt ht̄yx ri Tirtūm kapēr jahkre ho mẽ pa xw̄ynh̄jaja tee ri ja hã mẽ ajarēnh ma nē axpēn mã mẽ ajarēnh o:

—Kwa nà ja mex kêt. Kojã mẽ Pawre kapēr ma nē ãm kuma nh̄um ja mex nē. No mẽ pahkôt mẽ kot amnh̄i nh̄ipēxja na mẽ pamã mex. Ja na kêt mẽ pamã mex o mex. Anē.

Hãmri nē ra kot Kris nē tanhmã mẽ amã hēx to kaxyw. Te amnepē mã kagã kot mẽ panã kot wa pē Ewa mã hēx nh̄um kot mar nē hkôt amnh̄i nh̄ipēxta pyrək. ⁴ Na pa pre ra

mē awỳr mō nē mē amā tanhmā Jejus jarēnh to. Nē tanhmā mē amā Tirtūm Karō jarēnh to. Nē tanhmā wa kot mē pahto hkra hto hā mē amā wa harē ka prem inhma nē mar tỳx nē. Tā nhūm ra mē kot htỳx ri Tirtūm kapēr jahkre xwỳnhjaja ixpānhā mē awỳr mō nē Jejus kapēr kwỳm ri tanhmā mē amā ujarēnh to nē mē amā harēnh o hēx rāhā ho pa. Nē Tirtūm Karōja nhūm mē amā tanhmā ho hēx to. Nē ixte mē amā Tirtūm kapēr jarēnh kwỳm ri ixpānhā tanhmā mē amā harēnh to ho pa. Na ka prem mē ama nē ām hāmri harēnh ā hkamnhīx. Kwa kêr ka mē ri mē ujarēnh piitā mar nē hkôt amnhī nhīpêx kêt nē. Mē kot Jejus jarēnh tā no ām katāt kôt harēnh kêt nē. Ām ri ho hēx o pa. Ka htem ama nē ām hāmri harēnh ā hkamnhīx nē mē amā mē mar prām nē. Mē kot mē amā harēnh o hēx o pa htā ka mē ama nē ra mē hkôt amnhī nhīpêx kaxyw. Kwa mē ri ā amnhī nhīpêx anhỳr hkêt nē. ⁵ Kris kot mē awỳr mē rēnh ā mē kot amnhī jarēnh tā amnhī to hēx. Ka prem ama nē ām hāmri mē kot mē amā harēnh ā mē hkamnhīx. Nom na pre Krisja mē awỳr mē rēnh kêt nē. Kêt pa na pre mē awỳr inhmē. ⁶ Mē hkīnhā ixkapēr krór pyrāk tā no ām ixte Tirtūm kapēr mar tỳx. Nē kot amnhī nhīpêxja na ixte omunh par. Ra mē ate ja hā ixpumunh mex.

⁷ Na pa pre mē akôt ri mē amā Jejus jarēnh o ri ixpa no ām hpānhā mēmoj tā mē awỳr o ri ixpa hkêt nē. Xà amarī ixte mē amā harēnh nē hpānhā mēmoj tā mē awỳr kêtja mē apê omnuj? ⁸⁻⁹ Kormā ixte mē amā Tirtūm kapēr jarēnh o ri ixpata ā na pa pre hte tōhā kàxpore ho presija no ām aa hā mē awỳr kêt nē. Jar Masetōn kamā Kris kôt mē pahkwỳjaja na prem ixwỳr hkwy rēnh o pa pa ho ixàpkur xà japrôr o ri mē akôt ixpa. Mē kumā ixte Tirtūm kapēr jarēnh o ri ixpa hkêt tā pa hte mē kukwak ri mē akôt ho ixàpkur o ri ixpa. Tā kot paj arī ā mē akôt ixpa nē ā amnhī nhīpêx anē nē mēmoj tā mē awỳr o ri ixpa hkêt nē. ¹⁰ Ja inhmā mex. Jakamā kot paj amarī mē anhō pika pē Gres kām ā mē amā Tirtūm kapēr jarēnh o ixpa anē nē mēmoj tā mē awỳr kêt nē. Ām hāmri na pa ā mē amā amnhī jarēnh anē. Kris pyrā nē ixêx kêt kēnā. ¹¹ Xà we inhmā mē akīnh kêt kôt na pa hte ā mē amā Tirtūm kapēr jarēnh pānhā mē awỳr kêt anē? Nà inhmā mē akīnh jakamā na pa hte kapēr jarēnh pānhā mē awỳr o ri ixpa hkêt nē. Inhmā mē akīnh tỳx kēnā. Tirtūm kot ja hā ixpumunh mex. ¹² No mē kot amnhī krā hkôt htỳx ri Tirtūm kapēr jahkre xwỳnhjaja na htem mē ajahkre hpānhā kàxpore hā mē awỳr pix o pa. Nē mē amā tanhmā amnhī to hēx to nē mē amā:

—Nà mē ixte Pawre kot amnhī nhīpêx pyrāk. Mē ixte amnhī nhīpêxja kot axpēn pyrāk.

Anhỳr o mē amā amnhī to hēx. Nom ixte ho mē urāk kêt kumrēx. Mē ixte amnhī nhīpêx kot axpēn pyrāk ronhỳx pa mē urāk nē kàxpore hā mē awỳr o ri ixpa. Nom ixte ā amnhī nhīpêx anhỳr kêt. Kot paj aa ā amnhī nhīpêx anhỳr o ixpa hkêt nē. ¹³ Ā mē kot amnhī nhīpêx anhỳr xwỳnhjaja na pre Tirtūm mē awỳr mē rēnh kêt nē. Mē kot Kris nhỹ hā mē ahkre xwỳnh ā amnhī jarēnh tā ām amnhī to hēx. ¹⁴ Mē õ pahi Satanastija te mēmoj mex jarēnh pyrāk tā no ām na hte mē pano kupy r pē mē pamā tanhmā hēx to ho mē pahkôt pa. Te kot mēmoj mex ā ām hāmri kot harēnh pyrāk tā no ām ho hēx. ¹⁵ Tā hkôt mē kot amnhī nhīpêx xwỳnhjaja na htem urāk nē te tām mē kot amnhī nhīpêx xwỳnhjê pyrā nē mē pahwỳr mra nē tanhmā mē pamā hēx to. Satanasti pyrā nē mē pano kupy r kaxyw tanhmā mē pamā hēx to. Nom koja Tirtūm nhỹrmā mē pahtā mē homnuj tỳx kumrēx nhūm mē rī amnhī pumu.

Tanhmā mē kot Kris ā Pawre nhīpêx to ā mē harēnh
Atre 9.23-25

¹⁶ E kot paj axte te ixtỳx ri amnhī to jarkrar pyrāk o mē amā tanhmā amnhī jarēnh to ka mē inhma nē ixkamā agryk kêt nē. ¹⁷ Pahihti Kris nhỹ hā kot paj mē amā amnhī jarēnh kêt ām amnhī krā hkôt kot paj mē amā amnhī jarē. ¹⁸ Na htem ohtō nē mē ate mē hā apijaam kaxyw tanhmā mē amā amnhī to jarkrar to ho pa. Tā kot paj mē urāk nē amnhī krā hkôt mē amā amnhī to jarkrar ka mē inhma. ¹⁹ Mē ate amnhī xàhpumunh tỳx ā amnhī jarēnh tā ka htem htỳx ri mē kot amnhī to jarkrar o ri mē pa xwỳnhjê kapēr ma nē mē hkôt ajamxpēr nē mē hkôt amnhī nhīpêx kurê kumrēx. ²⁰ Mē kot Kris nhỹ hā

mē ahkre hā amnhī to hēx xwỳnhjaja mē pakuirom mē kot amnhī to rax xwỳnh ã amnhī jarēnh jakamā na htem mēmoj tā mē amā karō ho pa.

Nē mē kām hprām xà hkôt nhỹhỹm mē arē nē nhỹhỹm mē arē.

Nē mē apa pix kukwak ri apkur o pa.

Nē mēmoj tā mē ajakwap mē atak o pa.

Ã mē kot mē anhīpēx anhỹr tā ka te mē ate atũm kêt pyrà nē atỳx ri mē kapēr ma nē mē hkôt amnhī nhīpēx o ri apa. ²¹ Tã ixte mē uràk nē ã mē anhīpēx anhỹr kêt tā kot paj mē uràk nē mē amā tanhmā amnhī to jarkrar to ka mē inhmar japēr. Te ixtỳx ri amnhī jarēnh pyràk o kot paj mē amā amnhī jarē nom ãm hāmri mē amā amnhī jarē. ²² Mē kot Jejus nhỹ hā mē ahkre hā amnhī to mē hēx xwỳnhjaja na htem mē amā tanhmā amnhī to jarkrar to nē mē amā:

—E mē inhma. Mē ixpē Ijaew na pa mē. Mē arom mē ixpē finat Apraãw kanrēhã htàmnhwỳ jakamā kwa mē ixkapēr ma nē mē ixkôt amnhī nhīpēx. Anē.

Nom ijaxwỳja ixpē Ijaew tā pa hte mē uràk nē ja hā amnhī to jarkrar hkêt nē. ²³ Nē mē kot Kris kapēr jarēnh mex o pa hā amnhī jarēnh tā pa na pa hte harēnh mex o mē hakre. Te ixkrã pipãnh pyràk o ã mē amā amnhī jarēnh anhỹr tãã.

E pa mē amā tanhmā amnhī jarēnh to ka mē inhma. Nà na pre Kris ã mē kām ixkurē xwỳnhjaja mē kot amnhī to jarkrar xwỳnhjē hkĩnhã Kris ã ixpynēnh nē ijagjēnh xohtō nē. Nē mē hkĩnhã tōhã ixtak rũnh kumrēx. Pa mē hkĩnhã xatã mē kot tanhmā ixto hã kritpēm ronhỹx pa pre ty. ²⁴ Na pre Ijaew krãhtũmjaja Kris ã ixkatut kām ixtak rũnh nē. Nē ixtak xàja pĩ hã mry kà janhōr o ixtak. Nē ixtak kaxyw nē ixtak xà jatur xà kamã kàx xwa gixre janhō nē ho ixtak rũnh o ixkatut kà rē. Ixtak o 39 hāmri nē rĩ kormã mē kot ixpĩr pymaj inhmã ure. Na pre htem nhỹri ixpynē nē ã inhīpēx anē. Na prem ã inhīpēx anhỹr o 5 wēs.

²⁵ Nē na prem ra mē kot ixpĩr kaxyw nē kēn rũnh kwỳ jamỳ nē ho ixtak o kuhê. Nē Rõm nhõ xwỳnhjaja haxwỳja pĩ ho ixtak rax kumrēx. ã inhīpēx anhỹr o axkrunēpxi.

Nē na pa pre hte gō xujanãr kãm nhỹhỹm Jejus jarēnh o ri ixpa kaxyw pàr kãm mē hwỳr ixpa nhũm pàrja tanhmā amnhī to nē agjē. Kritpēm nhỹx pre hte gōja ixpĩ. Pa pre ã amnhī nhīpēx anhỹr o axkrut. Tã arĩgro hō hã kê axte pàr ò mã axà nē ma axte krĩ hō hwỳr mō. Nhũm kê pàrta axte mē ixpē axà nhũm gōja nhỹx kê axte ixpĩ. Pa pàr jakà hã kumỳ nē hã ijēt o amỹkry. Nē ho apkati. Tã nhũm nhỹhỹnh pàr òja mō nhũm kamã mē mōr xwỳnhjaja ixpumu nē ixwỳr pàr o mō nē amnhī wỳr ixto api nē ma amnhī kôt ixto mō.

²⁶ Na pa pre amnhī xà htỳx kamã ijamak o ri ã mē kãm Kris kapēr jarēnh o ri ixpa anē. Kironhỹx pre gō tãmja ixpĩ. Nhũm mē àhkĩnh nhi xwỳnhjaja kironhỹx prem mãânēn ixpĩ. Nē Ijaew nē Ijaew kêt xwỳnhjaja tōhã tanhmā ixtomnuj to ho pa. Pa pre krĩ hkwy hwỳr ixpa rỳ kapôt ã ixpa nhũm mē ixtã amỹnē. Pa pre gō xujanãr kãm pàr kãm ri ixpa nē nhỹx kamã ty. Nhũm mē kēp Kris kwỳ hã amnhī to hēx xwỳnhjaja haxwỳja tanhmā ixtomnuj to pa mē ÿ hã amnhī xà htỳx kamã ijamak o ri ixpa. ã na prem Kris ã inhīpēx anhỹr o pa.

²⁷ Nē na pa Jejus kapēr jarēnh o ri ixpa kurê ixkēngrà nē ri ixpa. Nē tōhã inhōt kêt ã ixtã apkati. Nē tōhã inhmã prãm nē inhmã kōr nē ri ixpa. Nē tōhã ixê mex kêt nē inhmã kry nē ri ixpa. ²⁸ Na pa hte Kris kapēr jarēnh o ri ixpa pē ã amnhī nhīpēx anē. Nom ja pix kêt. Na pa hte krĩ piitã hkôt Kris kwỳjē hkukamã tee ri ijamaxpēr nē ijamaxpēr o:

—Hēxta waa nē. Mãn mē arĩ Kris kôt amnhī nhīpēx mex japēr rỳ ko. Mãn mē ra kapēr kwỳm ri tanhmā amnhī tomnuj to rỳ ra hkaga.

Anhỹr o ijamaxpēr o ixpa.

²⁹ Nē na hte mēhõ Tĩrtũm kapēr nhĩrōp xa nē tanhmā amnhī tomnuj to pa tee ri omu nē ixkaprĩ htỳx kumrēx. Kojã mēhõ tanhmã Tĩrtũm nē mēhõ mã kapēr to nhũm kumã nē Tĩrtũm kôt amnhī nhīpēx kêt pa tee ri ja hã omu nē nē kēp àmnàr xwỳnhhta kamã inhgryk tỳx kumrēx.

³⁰ E Kris kôt ixkwýjaja. Na pa ã mẽ amã amnhĩ jarēnh anē. Te ixte amnhĩ to jarkrar pyrāk no ãm mẽ ate ixirerek xwýnh ã ixpumunh pix kaxyw. ³¹ ãm hãmri na pa ã mẽ amã amnhĩ jarēnh anē. Ixêx kêt. Pahihti Jejus nhĩpêxà Tirtūm kot ja hã ixpumunh mex. Tirtūmja mex o mex. Koja mex o mex tūm nē pa rāhā ho pa. Tām kot ixirerek ã ixpumunh mex. ³² Kormã krĩ pē Tamas kām ixpare ri na pre mẽ õ pahi Arêtja mẽ kām ixtã amýnê nhūm pōristijaja krĩ hpu hã kahê xà nhõ hakwakre piitã kām hipôk pa nē ixkām hamak o kuhê. Pa tee inhmã nhỹhỹnh ixkator nē ma mẽ umaj ixprôt nē ixtēm prām nē ixirerek xwýnh ã amnhĩ pumunh kurê kumrêx. ³³ Tã nhūm Kris kôt mẽ pahkwýjaja hamaxpēr nē kawà rax mý nē o tē nē inhmã ãm pa hwýr axà nē kamã nhỹ. Hãmri nhūm mẽ pàr nhõr o kahê nhĩrõ pē ixto wrý pa ixkato nē mẽ kēp amūxu nē amnhĩm ixprĩ nē ma tē nē mẽ kēp akunok. Æ na pre Tirtūm ixirerek xwýnh ã inhmã ixto amnhĩrīt anē.

12

Tirtūm kot Pawre mã mẽmoj to amnhĩrīt ã harēnh

¹ E Kris kôt ixkwýjaja. Nà inhmã amnhĩ to jarkrar hprām kêt tã kot paj tanhmã mẽ amã amnhĩ jarēnh to ka mẽ inhma nē hã ixtã apijaam japēr. Na hte Tirtūm tōhã inhõt kām ixkarõ mã tanhmã kapēr to. ²⁻³ Amnepê mã amgrà hõ hã na pre tanhmã ixkrã hto nē õ krĩ hwýr amnhĩ wýr ixto api. Na pre ra hã amgrà pē 14 ãn. Apu inhĩ rāhã ixto api rý apu ãm ixkarõ pix o api rý ko. Ixte ja hã amnhĩ pumunh mex kêt. Tirtūm pix kot ja hã ixpumunh. ⁴ Na pre ixto api pa pōj nē õ krĩ kamã axtem tanhmã mẽ kapēr to hã mẽ kuma. Na prem mẽmoj mex kumrêx jarē pa kuma nē ixkĩnh nē. Nē inhmã mar prām nē. Hãmri nē ijamaxpēr o:

—Hêxta waa nē. Mẽmoj jarēnhja mex kumrêx. Nà kot paj akupým wrý nē ixkwýjê mã harē kē mẽ ixpyrà nē kuma. Nà kot paj anē.

Anhýr tã nhūm Tirtūm Karõ ja nē ixkurê nē inhmã:

—Nà kēr ka mẽ kām ja jarēnh kêt nē. Æm kapxipix kot kaj ama nē ri hã apa.

⁵ Anhýr jakamã pa pre paxipix mẽ arom mẽmojja pumu nē kuma nom kot paj ri hã amnhĩ to jarkrar kêt nē. Kot paj ãm Jejus pix tanhmã harēnh to ho ri ixpa. Jao ixrom mex o mex ã harē. Nē ixrom hihtýx o hihtýx nē àhpumunh o àhpumunh ã harēnh o ri ixpa.

⁶ Nē ixte Tirtūm nhõ krĩ hwýr ixàpirja ãm hãmri ixte hã amnhĩ jarēnh tã kot paj ja hã amnhĩ to jarkrar o ri ixpa hkêt nē. Mẽ ate ja hã inhmar kôt inhmex ã ijarēnhja na inhmã hprām kêt. Nom kot ka mẽ ixte tām amnhĩ nhĩpêx ã ixpumu nē tām ixkapēr ã inhma hãmri nē rĩ kormã inhmã inhmex ã ijarē. Æ mẽ ate amnhĩ nhĩpêx anhýrja na inhmã hprām. ⁷ Na pre Tirtūm inhõt kām inhmã mẽmoj mex kwý jarēnh rax nē. Hãmri nē hpānhã inhmã:

—E na ka akwýjê rom inhõ krĩ hwýr api nē mẽ kurom mẽmoj mex pumunh rax nē. Tã ate ja hã amnhĩ pumunh nē ma mẽ kām hã amnhĩ to jarkrar o ri apa pymaj kot paj Satanasti mã anē nhūm inhma nē tanhmã atomnuj to ho pa. Nom ijamaxpēr xà hkôt koja ã anhĩpêx anē.

Anhýr jakamã nhūm tanhmã inhĩpêx to pa inhmex kêt nē ixpa. Te mrõnhĩ rax nhỹhỹnh kot ixkamnhwýr nhūm inhmã tee ri hkaxàr prām kaprý nē ý hã ho inhgêx rāhã nē ixpaja pyrāk. ⁸ Tã pa tee ri ja hã amnhĩ pumu nē amnhĩ to Jejus wý nē kām:

—Kwa Pahihti. Na pa ra mẽmojta nhỹ hã ixpunuj nē ixirerek nē ixpa. Kwa inhñe ata pa akupým ixihtýx nē ijamakêtkati nē ri ixpa nà?

Anhýr o amnhĩ to hwýr o axkrunēpxi. ⁹ Hãmri nhūm inhmã:

—Nà kot paj anē hyr kêt nē. Kot paj ãm akutã inhnojarêt rāhã ho ri akôt ixpa. Ka axirerek nē apa htã ixihtýx xwýnh ã ixpumunh kôt ixkamnàr rom tanhmã inhỹ hã amnhĩ nhĩpêx to ho ri apa. Anē.

Æ inhmã kapēr anhýr jakamã na pa ixpunuj nē ri inhĩrot nē ixpa htã ixrom hihtýx xwýnhhta nhỹ hã ixkĩnh nē ixpa. Nē kurom ixirerek xwýnh pix ã amnhĩ to jarkrar o ri ixpa. ¹⁰ Jakamã kot paj Kris ã ixpunuj nē ri ixpa htã ixkĩnh nē ijamakêtkati nē ri ixpa.

Kwār mẽ māmri hã tanhmã ixto kapēr to nẽ tanhmã hã inhĩpêx to pa amnhĩ xà htỳx kamã ijamak o ri ixpa. Nẽ ixpê amrakati nẽ inhĩrot nẽ ri ixpa htã Kris nhỹ hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpēr ã harēnh

¹¹ Tã mẽmo kaxyw na pa ã mẽ amã amnhĩ jarēnh anẽ? Nà mẽ ate ixtã apijaàm kêt jakamã na pa ã mẽ amã amnhĩ jarēnh anẽ. Mẽ kệp Kris nhỹ hã mẽ ajahkre xwỳnh ã amnhĩ to hêx xwỳnhjaja na ka htem ixrom kot amnhĩ to rũnh xwỳnh ã mẽ harẽ nẽ mẽ hã apijaàm o ri apa. Nom ixte amnhĩ to grire xwỳnh tã mẽ kot amnhĩ to rũnh o ijakrenh kêt. ¹² Na pa pre mẽ akamã ri ixpa nẽ Tĩrtũm nhỹ hã aa mẽ ate mẽmoj pumunh kêt kwỳ ho anhỹr rax o ri mẽ akôt ixpa. Nẽ y hã akupỹm mẽ à xwỳnhjê ho mex. Nẽ mẽ nohkre xwỳnhjê no ho mex. Na pa pre hte ã mẽ amã mẽmoj nhĩpêx anhỹr o ri mẽ akôt ixpa. Amnhĩ xà htỳx kamã ijamak o ri ixpa htã Tĩrtũm xihtỳx xà ho amnhĩ to htỳx nẽ ã mẽ amã mẽmoj to anhỹr o ri mẽ akôt ixpa. Mẽ ate omunh nẽ Tĩrtũm àhpumunh tỳx ã omunh kurê kumrêx kaxyw. Nẽ ixpê Kris nhỹ hã mẽ ajahkre hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa. ¹³ Xàn pa pre nhãm krĩ hkwy kamã Kris kôt mẽ pahkwỳjê ho mex tã mẽ kajaja tanhmã mẽ ato mex to hkêt nẽ? Nà na pa pre hte mẽ anhĩpêx o axpēn pyrāk. ãm mẽmoj pixire na pa pre mẽ urāk nẽ mẽ awỳr kêt nẽ. Nhãm krĩ hkwy kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mō nẽ mẽ akôt ixpa nẽ mẽmoj to presija htã hã mẽ awỳr kêt nẽ. Kwa mẽ ã ixte amnhĩ jarēnh anhỹrja ma nẽ ixkamã agryk kêt nẽ.

¹⁴ Tã ot pa ra akupỹm mẽ awỳr inhnojarêt kaxyw. Na pa pre ra mẽ awỳr inhmōr o axkrut. Tã ra axte mẽ awỳr inhnojarêt kaxyw. Kot paj mẽ awỳr mō nẽ mẽ akôt ixpa nom te wam ixtēmta pyrã nẽ mẽmoj tã ri mẽ awỳr kêt nẽ. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyrāk. Na hte mẽ hkrarejaja mẽ katorxà nẽ mẽ hipêêxà mã ujaaprōr o pa hkêt nẽ. Mẽ hipêêxà nẽ mẽ katorxà na hte hkrare mã kot mẽmoj to presija xà hkôt kãm haprōr o pa nom mẽmoj tã hwỳr kêt nẽ. Ja pyrã nẽ kot paj mẽ apê ixkra pyrāk ã mẽmoj tã mẽ awỳr kêt nẽ. ¹⁵ Kot kaj mẽ mẽmoj to presija japêr nẽ inhmã harẽ pa ixamnhĩx ixkĩnh kãm mẽ amã ixkàxpore piitã òr par pyrāk o amnhĩ nhĩpêx. Nẽ mẽ amã tanhmã amnhĩ nhĩpêx to ho ixpa rãhã ixtykja na inhmã hprãm. Inhmã mẽ akĩnh tỳx kumrêx tã mẽ kajaja mẽ amã ixkĩnhja mẽ atã hkwy jêt kêt kumrêx. ¹⁶ Ixte amnhĩ mã mẽmoj tã mẽ awỳr kêt tã na hte mẽ akwỳjaja ixêx rom ixte nhãm mẽ kệp amrakati xwỳnhjê mã kàxpore hã mẽ awỳr o ixpa hã ixkamnhĩx.

¹⁷ Kwa tanhmã na pa pre ri mẽ ano kupyw to? Xà ja kaxyw na pa pre mẽ awỳr ixkrãmnhwỳta wa kumẽ? ¹⁸ Na pa pre Xitre hã ixihtỳx nẽ mẽ awỳr kumẽ. Nẽ Kris kôt mẽ pahtōja pa Xitre hkôt kumẽ nhũm wa ma mẽ awỳr mō. Tã xà na pre Xitre tanhmã mẽ ano kupyw to? Nà na pre ã mẽ anhĩpêx anhỹr kêt nẽ. Tã wa ixte amnhĩ nhĩpêx nẽ wa ijamaxpērja kot axpēn pyrāk. Nà na pa hte urāk nẽ mẽ ano kupyw o ri ixpa hkêt nẽ. ¹⁹ Mãn ka mẽ axpēn mã mẽ ijarēnh o:

—Nà Pawre mẽ hkwyjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprār anẽ.

Anhỹr o mẽ ijarēnh japêr nom mẽ inhmã amnhĩ tã tanhmã ixàprār to hprãm kêt. ãm mẽ inhmã mẽ akĩnh nẽ mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tĩrtũm noo mã Kris nhỹ hã ã mẽ amã mẽ amnhĩ jarēnh anẽ.

²⁰ Tã kot paj jatã ma mẽ awỳr mō ka mẽ akwỳjaja tanhmã amnhĩ tomnuj to japêr.

Mẽmoj tã axpēn mã axàkjêr o apa.

Rỳ mẽmoj tã axpēn kãm agryk.

Rỳ axpēn kãm agryk tokyx anhỹr o apa.

Rỳ axpēn pê anhōxỳ.

Rỳ axpēn to akapêr punuj o apa.

Rỳ mẽ ajakwa kamã nhãm mẽ hixi ho rêr o ri apa.

Rỳ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỹr o ri apa pa ja hã mẽ apumu nẽ ixkaprĩ htỳx kumrêx ka mẽ tee ri amnhĩ tã ixpumu. ²¹ Xà kot paj mẽ awỳr mỗ nẽ mẽ apumu ka mẽ akwỳjaja arĩ mẽ aprõ kuhpa hã nhãm mẽnijê ho amnhĩkati ho ri apa? Rỳ arĩ tanhmã ajamxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anẽ pa ja hã mẽ apumu nẽ ixkaprĩ xàj inhmỳr rax nẽ. Nẽ mẽ anhỹ hã Tirtũm noo mã ixpijaàm tỳx kumrêx.

13

Pawre kot tanhmã amnhĩ kukamã mẽ kãm karõ hto

¹ Tirtũm kapêr ã kagã htũm tanhmã mẽ kot amnhĩ tomnuj to xwỳnhjê jarênh kot: Koja mễhõ tanhmã amnhĩ tomnuj to nhũm mễhõ pyxi nẽ ã amnhĩ nhĩpêx anhỹr ã omu nẽ awỳr tẽ nẽ amã harẽ ka mẽ ama nẽ ãm ama nẽ hkôt ajamxpêr kêt nẽ. No koja mễmojaja axkrut rỳ axkrunêpxi nẽ hã omu nẽ awỳr mra nẽ xypên kôt amã harẽ ka mẽ ama nẽ mẽ hkôt ajamxpêr kurê kumrêx. Anẽ.

Tã ra mẽ awỳr inhmõr o axkrut tã kot paj akupỳm mẽ awỳr mỗ nẽ mẽ apumu. ² Hapu hã mẽ awỳr inhmõrta ã na pa pre mẽ akwỳ kot tanhmã amnhĩ tomnuj to hã mẽ omu nẽ hã mẽ kãm akir nẽ mẽ kãm:

—Kot kaj mẽ amnhĩ tomnuj kaga nẽ tãm amnhĩ nhĩpêx kêt kot paj nhỹrmã akupỳn mẽ awỳr mỗ nẽ ã mẽ ate amnhĩ nhĩpêx anhỹr ã mẽ apumu nẽ hã mẽ atomnuj tỳx kumrêx kãm ga. Anẽ.

Jakamã kot paj mẽ ma mẽ awỳr mỗ nhũm mẽ akwỳjaja arĩ mẽ ate amnhĩ tomnuj o apa hã inhmã mẽ ajarẽ pa mẽ atã mẽ kuma nẽ tanhmã mẽ ato htỳx nẽ. ³ Kot kaj mẽ ja hã ixpumu nẽ aprĩ hã ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mẽ ate amnhĩ tomnuj o apata mỳrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỹrja kaga hkêt hã koja tee ri ja hã mẽ apumu nẽ mẽ anhĩpêx kati nẽ. ⁴ Amnepêm na pre Krisja te hihtỳx kêt pyrã nẽ ãm arĩ mẽ kãm xa nhũm mẽ unê nẽ pĩ kahpa ã kunhõ nẽ kupĩ. Tã nhũm Tirtũmja ãhpumunh tỳx o akupỳm ho htĩr nhũm akupỳm htĩr o htĩr nẽ Tirtũm nhỹ hã hihtỳx o hihtỳx ã amnhĩ to amnhĩrit. Ja pyrã nẽ wam mẽ awỳr inhmõrta ã na pa pre hte mẽ akamã te Kris kormã htyk kêt ri hihtỳx kêeta pyrã nẽ mẽ akõt ixpa. Tã kot paj ma akupỳm mẽ awỳr mỗ hãmri nẽ te Kris ra akupỳm htĩr nẽ hihtỳx o hihtỳxta pyrã nẽ Tirtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu nẽ Tirtũm nhỹ hã ijamxpêr tỳx ã ixpumunh kurê kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamxpêr o ri apa nà? Kot kaj mẽ apê hkwy hã koja mẽ akaxwỳnh kãm mẽ akamã hkrĩ rãhã nẽ. Nom koja mẽ akaxwỳnh kãm mẽ akamã hkrĩ hkêt ka mẽ ãm apê hkwy hã amnhĩ jarênh kaprỳ. ⁶ No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nẽ ixkõt pa ho pa jakamã ixpê hkwy na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarênh kaprỳ hkêt nẽ.

⁷ Nẽ na pa hte mẽ ato tanhmã Tirtũm wỳr to ho ri ixpa nẽ mẽ ato hwỳr o:

—Pa Tirtũm. Kwa tanhmã Korīt nhõ xwỳnhjê hkrã hto kê mẽ tanhmã amnhĩ tomnuj to ho pa hkêt nẽ.

Anhỹr o mẽ ato kuwỳ. Mễmo kaxyw na pa hte ã mẽ ato hwỳr anẽ? Ixte mẽ ajahkre mex ã amnhĩ to amnhĩrit kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỹr o ri apa hãmri nhũm axtem mễhõ mẽ awỳr mỗn pỏj nẽ tanhmã mẽ amã mẽ ijarênh to nẽ mẽ ijarênh o:

—Kwa Pawre mẽ hkwyjaja na htem Tirtũm kapêr kwỳm ri Korīt nhõ xwỳnhjê jahkre ho pa.

Anhỹr tã pa amnhĩ tã mẽ kuma nẽ ãm mẽ kuma. ⁸ Na pa hte Tirtũm kapêr kutã amnhĩ xunhwỳr kêt nẽ. Na pa hte ãm mẽ ate hkôt amnhĩ nhĩpêx o ri apa hã mẽ amã karõ kamã ixihtỳx rãhã ho ri mẽ akõt ixpa. ⁹ Jakamã kot kaj mẽ hkôt amnhĩ nhĩpêx mex o apa pa

ja hã mẽ apumu nẽ ixkĩnh nẽ. Mẽ kot axpẽn mã ixirerek ã ijarẽnh o pa htãã. ã mẽ ate amnhĩ nhĩpêx anhỹr o apa kaxyw na pa hte mẽ ato Tĩrtũm wỳr o ri ixpa nẽ kãm:

—Pa Tĩrtũm. Kwa tanhmã Korĩt nhõ xwỳnhjê hkrã hto kê mẽ kot amnhĩ tomnuj kaga hpa nẽ hpãnhã akapêr kôt pix mã mãn amnhĩ nhĩpêx rãhã nẽ. Anẽ.

¹⁰ Tã pa kormã mẽ awỳr inhmõr xwỳj ri ã amnhĩ kukamã kagà nhĩpêx nẽ mẽnh anẽ. Mẽ ate kamã harẽnh nẽ mar nẽ tokyx akupỹm tãm amnhĩ nhĩpêx kaxyw. Kot pa mẽ awỳr mõ nẽ Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhỹr prãm kêt. ãm ÿ hã kapêr o mẽ ajahkre mex nhũm mẽ ate inhmar nẽ hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwỳjaja. ãm ja pix. Kwa kêr ka mẽ ixkapêr mar tỳx nẽ hkôt amnhĩ nhĩpêx mex nẽ. Nẽ Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpẽn kôt ajamakêtkati nẽ akĩnh nẽ axàmnhĩx ri apa. Kot kaj mẽ ã amnhĩ nhĩpêx anhỹr o apa nhũm Tĩrtũm mẽ akôt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nẽ mẽ pajamakêtkati jagiênh xwỳnh.

¹²⁻¹⁴ Nẽ ota jar Kris kôt mẽ pahkwỳjaja pa mẽ ixpimràatã mẽ awỳr ixpêr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpêr mẽ.

Nẽ kê Pahihti Jejus Kris mẽmoj to mẽ akutã nojarêt rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpẽn to mex pix kukamã mãn ajamaxpêr o apa.

Tã e ixkwỳjaja. ãm ja pix. Ixpê Pawre na pa mẽ awỳr kagàja nhĩpêx nẽ ã mẽnh anẽ.

Karatas

Pawre kot Karatas kamã Jejus kôt hkwỳjê hwỳr kagà nê mênh

Pawre na pre kagàja nhípêx nê pika pê Karatas kamã Kris kwỳjê hwỳr kumê. Na pre ra Ijaew kwỳjaja mê hwỳr mra nê Tirtùm kapêr kwỳm ri mê ahkre ho pa nê mê kãm:

—Kot kaj mê amnhĩ kaxyw Jejus Kris kôt ajamxpêr hãmri nê mãânên mê ixpê Ijaew nhĩgêt kot amnhĩ nhípêx kôt amnhĩ nhípêx. Kê Tirtùm ja hã mê apumu nê mê ato hkra. Anê.

Nom ã mê kapêr anhỳrja kot anhỳr kêt. Mê pahte amnhĩ kaxyw Jejus Kris kôt pajamxpêr nê hkôt amnhĩ xunhwỳr pix ã mê pahpumunh kôt na hte Tirtùm mê pahto hkra. Tã nhũm prem ã mê kãm ho hêx anhỳr o pa nhũm Pawre tee ri ã mê kapêr anhỳrja ã mê harênh ma nhũm ja kêp omnuj nê. Jakamã nhũm Karatas nhõ xwỳnhjê mã kagàja nhípêx nê mê hwỳr kumê. Nê kamã hprĩ hã Tirtùm kot mê ho hkra kaxyw tanhmã amnhĩ nhípêx to hã mê kãm harê nê hã kagà. Nê mê kãm:

¹⁻² Pa Karatas nhõ xwỳnhjaja? Xà mê amex? Ixpê Pawre na pa mê awỳr ixpêr mê nê mêmoj tã mê amã karõ.

Mêpahpãm Tirtùm mê Jejus Kris na pre wa mê akaxyw ixãm. Ixte wa ÿ hã ma ri mê akôt mê ajahkre o ri ixpa kaxyw. Na pre Jejus ty nhũm Tirtùm akupỳm ho htĩr. Hãmri nhũm wa mê akaxyw ixãm. Pyka ja kamã na pre mēhõ mê akaxyw ixãm kêt nê. Tirtùm mê Jejus Kris na pre wa ixãm. Jakamã na pa ã mê awỳr kagà nhípêx nê mênh anê. Mê apê Tirtùm krajê hwỳr.

Nê ota jar krĩ ja kamã ixpyrà nê Kris kôt mê pahkwỳjaja mê awỳr hpêr mê.

³ E kê Mêpahpãm Tirtùm mê Pahihti Jejus Kris wa mêmoj to mê akutã nojarêr rãhã ho pa. Nê mê ato mex rãhã nê. Ka mê wa ÿ hã akĩnh nê ajamakêtkati nê axãmnhĩx ri apa.

⁴ Nà na pre Krisja amnhĩ grõnh kôt mê pahwỳr wrỳ nê mê panê ty. Mê pahte amnhĩ tomnuj pãnhã amnhĩrer kaxyw mê panê ty. Mêpahpãm Tirtùm kãm hprãm xà hkôt. Tã mēmo kaxyw na pre ã mê panê amnhĩ nhípêx anê? Nà pika ja kamã mê kot amnhĩ nhípêxja omnuj tỳx jakamã nhũm amnhĩ grõnh kôt te mê kot amnhĩ tomnuj pê mê papytãr pyrãk o mê panhípêx nê ã mê panê htyk anê. ⁵ Jakamã kwa kêr pu mê Tirtùm mã mex o mex ã mãn harênh o ri papa. Nà kot puj mê ã amnhĩ nhípêx anhỳr rãhã ho ri papa.

Mê ujarênh pixi ãm hãmri hã harênh

Rõmãn 16.17; Sikũn Korĩt 11.3-4; Epes 4.14; Korosẽ 2.8; Sikũn Pêtre 2.1-3

⁶ Kwa ixkrãmnhwỳjaja. Na pa pre mê ate tanhmã amnhĩ nhípêx to hã mê ajarênh ma nê ixkaprĩ nê tee ri mê akukamã ijamxpêr. Na pre Tirtùmja Kris kukwak ri mê ato mex nê. Nê mê ate hkôt amnhĩ nhípêx o apa hprãm xàj te kot amnhĩ wỳr mê awỳr pyrãk o mê anhípêx ka mê hkôt amnhĩ xunhwỳ. Tã xep tanhmã mê ajamxpêr to nê ra hkaga kaxyw. Ra axtem mê ujarênh õja ma nê gryk ã Tirtùm kaga kaxyw. Pa tee ri mê ajarênh ma nê ixkaprĩ nê. Kwa mon ka mê axtem nê ri ã amnhĩ nhípêx anhỳr mã? ⁷ Jejus jarênh pix na ãm hãmri. Mo mê ujarênh mex õ kot ka kêt mê ama nê hkôt amnhĩ nhípêx? Nà amrakati kumrêx. ã mê amã ujarênh anhỳr xwỳnhjaja na htem Kris kapêr o pihkãr rũnh kumrêx o pa nê katãt kôt harênh kêt nê. Ka xep mê ama nê ajamxpêr kati rũnh nê.

⁸ Na pa pre ma mê awỳr mō nê ãm hãmri mê amã Jejus kot tanhmã mê panê amnhĩ nhípêx to hã harê ka prem inhma. Tã koja mēhõ mê awỳr mō nê mê amã nhãm mê ujarênh õ jarê nhũm Tirtùm ja hã omu nê nhỹrmã ma mê kot amnhĩ xà htỳx kamã hamak tũm xà hwỳr kumê nhũm ma hwỳr mō nê aa kator kêt nê. Mê pahtõ rỳ Tirtùm kapêr o wrỳk xwỳnhjê hõ koja ã amnhĩ nhípêx anê nhũm ja hã omu nê ma kuwy pê himõta wỳr amnhĩ nê kumê. ⁹ E kot paj axte mê amã ja jarê ka mê aprĩ hã inhma. Koja mēhõ mê awỳr mō nê mê ate hkôt amnhĩ xunhwỳr xwỳnhhta kwỳm ri tanhmã mê amã ujarênh to. Hã

koja Tirtüm omu nê nhÿrmã ma mẽ kot amnhĩ xà htÿx kamã hamak tÿm xà hwÿr kumẽ nhÿm ma hwÿr mō nê kamã pa ho pa nê aa kator kêt kumrẽx.

*Tirtüm pix kãm Pawre hkĩnh hprãm ã kot jarẽnh
Juãw 5.44; Atrẽ 26.9-20; Karatas 2.6*

¹⁰ Nê koja mẽmojaja ixkapẽr ma nê kãm mar prãm kêt o kãm ixkĩnh kêt japêr nê mãmri kãm ixkĩnh kêt. Tirtüm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhÿx pa Kris nhÿ hã kapẽr jarẽnh o ri ixpa hkêt nê.

*Tirtüm kot Pawre mã Kra Jejus o amnhĩrit ã harẽnh
Sikũn Korĩt 1.12; Wam Tesarõn 2.4*

¹¹⁻¹² E Jejus kôt ixkrãmnhwÿjaja. Nà ixte mẽ ujarẽnh mex jarẽnh o ixpaja na pre jar pika ja kamã mẽhõ amnhĩ krã hkôt inhmã harẽnh rÿ inhmã ahkre hkêt nê. Jejus Kris tãm na pre ixwÿr kato nê inhmã ho amnhĩrit. Jakamã mex o kot pika jakamã mẽ ujarẽnh piitã hakrenh par. ¹³⁻¹⁵ E kot paj ixprĩ hã mẽ amã tanhmã amnhĩ jarẽnh to ka mẽ inhma. Tanhmã Tirtüm kot amnhĩ kaxyw ixãm to hã pa mẽ amã amnhĩ jarẽ. Nà na pre kormã ixkêt ri ixkukamã hamaxpẽr nê amnhĩm ixta nê amnhĩ kaxyw ixãm nê kot ixto mex ã ixtã amnhĩ jarẽ. Tã pa pre ixkato nê gaa nê ixaptar nom kormã Jejus Kris kôt amnhĩ xãm kêt nê. Na pa pre axtem nê inhmã mẽ ixpê Ijaew kot amnhĩ nhĩpêx kôt pix mã amnhĩ nhĩpêx o ri ixpa hprãm nê. Nhÿm pre ixpyrà nê arĩ mẽ nywjaja haxwÿja kãm mẽ hkôt pix mã ri amnhĩ nhĩpêx o pa hprãm nê. No inhmã mẽ hkôt amnhĩ nhĩpêx mex o mẽ hakrenh par prãm jakamã na pa pre mẽ inhĩgêt kôt amnhĩ nhĩpêx mex kumrẽx o ri ixpa. Mẽ kapẽr piitã hkôt amnhĩ nhĩpêx mex nê. Tã ã amnhĩ nhĩpêx anhÿr o ixpa kaprÿ. Na pa pre axtem nê mẽ kot Tirtüm Kra Jejus Kris kôt amnhĩ xunhwÿr xwÿnhjê nhĩpêx kati ho ri mẽ hkôt ixpa nê inhmã mẽ himex prãm tÿx kumrẽx. ã na pa pre amnhĩ nhĩpêx anhÿr o ri ixpa. Ra mẽ ate ja hã ixpumunh mex.

¹⁶⁻¹⁷ Tã pa pre ma Tamas wÿr mō. Kamã tanhmã Kris kwÿjê nhĩpêx to kaxyw ma mẽ hwÿr mō. Hãmri nê kormã mẽ hwÿr ixàhtêp o inhmõr mẽ nhÿm Tirtüm tanhmã ixto nê inhmã Kra Jejus o amnhĩrit pa jatã omu. Kêp Tirtüm Kra hã pa ixprĩ hã omu. Nhÿm inhmã kapẽr nê ixte kãm tanhmã amnhĩ nhĩpêx to ho ri ixpa kaxyw ixapênh ã inhmã karõ nê Ijaew kêt xwÿnhjê hwÿr inhmẽ. Ixkwÿ Ijaew wÿr inhmẽnh kêt nê. Na pre inhmã:

—E kêr ka ma Ijaew kêt xwÿnhjê hkôt ri mẽ kãm ixkapẽr jarẽnh o ri apa.

Anhÿr jakamã pa pre kuma nê hkôt amnhĩ xãm kurê kumrẽx nê ã amnhĩ nhĩpêx anhÿr o ri ixpa. Jao tanhmã ixte kêp hkwyjê nhĩpêx tota kaga nê ma pyka pê Arap wÿr mō. Nom tanhmã amnhĩ tã Jejus kwÿjê kukjêr to hkêt nê. Nê Jerujarẽ hwÿr inhmõr nê Jejus nhÿ hã mẽ ahkre xwÿnh maati jaja tanhmã amnhĩ tã mẽ kukjêr to hkêt nê. ãm Tirtüm kot inhmã hã karõ xà hkôt ma Arap wÿr mō nê kamã kapôt ã ri ixpa. Kamã na pre Tirtümja inhmã Jejus Kris kot tanhmã amnhĩ nhĩpêx to ho amnhĩrit o pa. Hãmri nê inhmã kapẽr pa amnhĩ tã kuma hãmri nê ma akupÿm Tamas wÿr mō.

¹⁸ Tã nhÿm ra amgrã axkrunêpxi nê hapêx pa Tamas rÿm ixkato nê ma Jerujarẽ hwÿr Simãw Pêtre hwÿr mō. Hãmri nê kuri pøj nê hkôt ixpikamẽnh ã ixtã semãn axkrut. ¹⁹ Nom mẽ kot Jejus nhÿ hã hkwyjê jahkre ho mẽ pa xwÿnh maati hkwyjê hõ pumunh kêt kumrẽx. ãm Simãw Pêtre mẽ Pahihti Jejus tō Xiakreja pix wa omu. ²⁰ ãm hãmri na pa ã amnhĩ jarẽnh anê. Tirtüm kot ja hã ixpumunh mex. ²¹ Tã pa pre mẽ kurÿm ixkato nê hpãnhã ma pika hkwyjê hkôt ijapôx o mẽ hkôt ixpa. Ma pika pê Sir mẽ Sirisja wa hwÿr mō.

Mẽ kot amnhĩ jaêr pê Pawre kot amnhĩ nhĩpêx nyw ã omunh ã mẽ harẽnh

²² Nom Jutej kamã Kris kwÿjaja na prem kormã ixpumunh kêt nê. ãm Simãw Pêtre mẽ Xiakreja pix na pre wa ixpumu. ²³ Na pre ra mẽ hkwyjaja tanhmã hkwyjê kot axpên mã ijarẽnh toja ma. Na prem ijarẽnh o:

—Kwa Jejus ã mẽ panhĩpêx kati htÿx o pa xwÿnhhta na pre tanhmã hamaxpẽr to nê hpãnhã mẽ kãm Jejus kapẽr jarẽnh o ri mẽ hkôt pa. Mẽ kot amnhĩ kaxyw hkôt hamaxpẽr

kaxyw. Ra kot Jejus nê mē pahkurê htã hpãnhã mē kãm kapêr jarênh o ri mē hkôt pa. Anê.

²⁴ Hãmri nhũm Kris kwỳjaja amnhĩ jaêr pê ijarênh ma nê inhỹ hã hkĩnh nê. Nê ixtã Tĩrtũm mã mex o mex ã harê.

2

Pawre kot Kris kwỳ hkrãhtũmjê mã amnhĩ jarênh

Atre 15.1-11

¹⁻² Tã nhũm amgrã pê 14 nê hapêx nhũm Tĩrtũm akupỹm Jerujarê hwỳr inhmê pa ma akupỹm mō. Panãpe nê Xitre mē pa mē mō nê mē hwỳr pōj. Hãmri nê Kris kwỳ hkrãhtũmjê hwỳr mra nê mē kãm amnhĩ jarê. Mē tapxipixjê mã amnhĩ jarê nê ixte Ijaew kêt xwỳnhjê mã Jejus kapêr jarênh o ixpa hã amnhĩ jarê. Na pa pre ra amnhĩ kukamã ijamaxpêr o:

—Koonên. Kot pa apu mē kãm amnhĩ jarê nhũm mē inhma nê ixte Tĩrtũm kapêr kwỳm ri mē ahkre ho ixpa hã ixkamnhĩx rỹ hã inhmã akir. Na pa hte Ijaew kêt xwỳnhjê mã Kris jarênh o ixpa no ãm mē ixpê Ijaew pyrã nê finat Mojes kapêr kôt mē kot amnhĩ my kwỳt kã jakàr ã mē kãm karō hkêt nê. ãm mē kot Kris kôt amnhĩ xunhwỳr pix kaxyw na pa hte mē kãm hã karō ho ixpa. Tã kot paj Kris kôt mē ixkrãhtũmjê mã ja hã amnhĩ jarê nhũm mē inhma nê tanhmã hamaxpêr to nhũm ja mē kêp omnuj japêr nhũm mē tanhmã amnhĩ to nê ixte Kris kapêr jarênh o ixpaja nê ixkurê. Jakamã nhũm ra ixte mē kãm Kris kapêr jarênh o ixpa nhũm mē kot inhmar xwỳnhjaja ijarênh ma nê tee amnhĩ kukamã hamaxpêr o ra hkaprĩ nê pa.

Anhỹr o ijamaxpêr. ³ Tã na prem ixte amnhĩ jarênhja ma nê ja nê tanhmã inhmã nê hkêt nê. Pa mē kãm amnhĩ jarênh pa nhũm mē inhma nhũm Ijaew kêt xwỳnhjaja kot amnhĩ jakàr kêtja nhũm mē kãm mex nê. Mē kêp tanhmã kute hkêt nê. Nhũm Ijaew kêt xwỳnh Xitre ixkôt pa nhũm mē kot omunh tã kot mē ixpyrã nê amnhĩ my kwỳt kã krãhyr ã kãm karō hkêt nê.

⁴ Tã nhũm mē kêp Jejus kwỳ hã amnhĩ jarênh o hêx xwỳnhjaja mē ixtã akuprō. Nom hêx rom mē ixte Kris kôt amnhĩ nhĩpêx ã mē ixpumunh pix kaxyw. Hãmri nê ixkapêr ma nê Xitre hã inhmã akir nê inhmã:

—Kwa na pre Xitre Jejus kôt pix mã amnhĩ xãm nom finat Mojes kot mē pahpê Ijaew kot amnhĩ nhĩpêx ã karō hkôt amnhĩ nhĩpêx kêt nê. Kwa ja mex kêt. Na htem Jejus kôt amnhĩ xunhwỳ nê mããnên finat Mojes kapêr kôt amnhĩ nhĩpêx. Jakamã kwa kãm anê kê amnhĩ my kwỳt kã krãhta. Finat Mojes kot mē panhĩgêjtê mã hã karō xà hkôt.

⁵ Anhỹr tã pa prem mē kuma nê ãm mē kuma. Kot pa ri mē kãm ja hã karō hkêt nê. ãm Jejus kapêr kôt pix mã kot puj mē amnhĩ nhĩpêx o papa nê finat Mojes kapêr mē Jejus kapêr o papihkàr kêt nê. Kot puj mē anhỹr o Jejus kapêr o ahkã nhũm ja mex kêt nê. Jejus kapêr kãm mo mē kot mēmy kwỳt kã jakàr ã mē kãm karō? Amrakati. Jakamã na pa pre ãm mē pano kupyw o mē pa xwỳnhtajê kapêr ma nê ãm mē kuma.

⁶ Tã pa pre ra Ijaew kwỳ pê Jejus kôt ixkwỳ hkrãhtũmjê mã amnhĩ jarênh pa. Tanhmã ixte Ijaew kêt xwỳnhjê mã Jejus kapêr jarênh to hã mē kãm amnhĩ jarê nhũm mē inhma nhũm ja mē kãm mex nê. Jakamã Ijaew kêt xwỳnhjaja kot mē ixpê Ijaew pyrã nê finat Mojes kapêr kôt amnhĩ nhĩpêxja nhũm mē tanhmã mē kaxyw inhmã hã karō hto hkêt nê. Tĩrtũm na hte mē kêp mē hkrãhtũm ã mē omunh xà hkôt mē hkwỳjê rom tanhmã mē ho mex to hkêt nê. Na hte mē pahpiitã mē panhĩpêx o xypên pyrãk. Jakamã na pa hte ijaxwỳja Jejus kôt mē ixkrãhtũmjaja kot amnhĩ to rax o ijakrenh ã tanhmã ijamaxpêr to hkêt nê. ⁷ Na pa pre mē kãm amnhĩ jarênh pa nhũm mē inhma nê xypên mã:

—Nà ãm hãmri na pre Tĩrtũm ahpỹnhã Pawre mē Simãw Pêtre wa kãm wa àpênh ã karō nê Ijaewjê hwỳr Simãw Pêtre mē nê axtem Ijaew kêt xwỳnhjê hwỳr Pawre mē. Wa kot ahpỹnhã mē hkôt mē kãm Jejus kapêr jarênh o ri pa kaxyw. Nà ãm hãmri na hte wa ã amnhĩ nhĩpêx anhỹr o pa. Nà ja mex. Anê.

⁸ Ra Tĩrtũm kot Ijaew wỳr Simãw Pêtre mênh tã hpãnhã Ijaew kêt xwỳnhjê kaxyw pa ixãm. ỹ hã wa ixte mē kãm Jejus kapêr jarênh o ri mē hkôt wa ixpa kaxyw. ⁹ Jakamã

nhūm mē ixkrāhtūm Xiakre mē Simāw Pêtre mē Juāwja ixte mē kām amnhī jarēnh ma nē hkīnh nē. Tīrtūm kot ixto mex nē Ijaew kêt xwýnhjê hwýr inhmēnh ã ixte amnhī jarēnhja ma nē hkīnh nē. Hāmri nē Panāpe mē wa inhmā kapēr nē wa inhmā:

—Nà ãm hāmri. Kot puj xep mē anē. Ka mē Panāpe wa kot kaj wa ma Ijaew kêt xwýnhjê hkôt mē kām Jejus kapēr jarēnh o ri apa. No mē pajaja kot paj mē axtem mē pahkwý Ijaew kôt harēnh o ri ixpa. Ā kot puj mē ahpýnhā mē hwýr papa anē. ¹⁰ Nom kêr ka wa inhmar kumrēx. Kêr ka wa mē ixpyrà nē Kris kôt mē pahkwýjê pê amrakati xwýnhjê ho mex o ri apa. Měmoj to mē kutā anojarêt rāhā ho ri apa.

Anhýr o wa inhmā kapēr pa wa mē kuma nē mē kām:

—Tôe. Nà kot paj wa anē. Ra ã wa ixte amnhī nhīpêx anhýr kaxyw kênā. Anē.

*Pawre kot Simāw Pêtre mā àkjêr ã harēnh
Atre 10; Rômān 3.21-31, 6.1-14*

¹¹⁻¹⁴ Tā nhūm Simāw Pêtreja man mē ixwýr krī pê āxiok wýr mō. Nē jar mē ixkôt ri pa. Ixpyrà nē kēp Ijaew tā Kris kôt Ijaew kêt xwýnhjê hkôt pa nē mē kutā apkur o pa. Ixpyrà nē àmnhīx ri mē kutā apkur o ri mē hkôt pa. Ijaew kêt xwýnhjaja kot amnhī my kwýrýt kà jakàr kêt jakamā na pa htem mē kutā ixàpkur kêt nē. Tā ra mē ixte Kris kôt amnhī xunhwýr jakamā ja mē ixpê tanhmā kute hkêt. Na pa htem ixàmnhīx mē hkôt ixpa nē mē kutā apku. Ra mē ixte Kris kôt amnhī xunhwýr kênā kot pa hkêt ri mē hkôt ixpa hkêt. Na pa htem ixàmnhīx mē hkôt tanhmā amnhī nhīpêx to ho ri ixpa.

Tā nhūm Xiakre kot mē ixwýr mē rēnh xwýnhjaja haxwýja mē ixwýr mō. Mē ixpyrà nē mē kēp Ijaew tā mē ixpyrà nē Kris kôt amnhī xunhwý. Jakamā ra mō nē mē ixwýr pōj. Hāmri nhūm Simāw Pêtre mē omu nē mē umaj axte Ijaew kêt xwýnhjê kutā apkur kêt nē. Axtem nē ōja py nē o tē nē mē hkà ã ahte apkur o nhý. Hāmri nhūm ra mē ixri Ijaew kwý pê Kris kôt mē pahkwýjaja ja hā omu nē piitā uràk nē ã amnhī nhīpêx anē nē Simāw Pêtre ri Ijaew kêt xwýnhjê hkà ã apkur o hkrī. Nhūm ixkôt pa xwýnh Panāpeja haxwýja ja hā mē omu nē mē uràk nē ã amnhī nhīpêx anē nē mē hkà ã apku. Hāmri pa tee ri ja hā mē omu nhūm ja inhmā mex kêt nē. Na prem ã amnhī nhīpêx anhýr o Tīrtūm kapēr ã kagà htūm kamā mē ujarēnh mex kwým ri amnhī nhīpêx. Jakamā pa ã mē kot amnhī nhīpêx anhýrja nē Simāw Pêtre mā ixkapēr. Mē piitā mē noo mā xa nē ã kot amnhī nhīpêx anhýrja nē kām ixkapēr nē kām:

—Tk. Kwa nà Simāw Pêtre. Ri ã amnhī nhīpêx anhýr kêt nē. Pahpê Ijaew tā kormā pahkwýjaja hpôx kêt ri ka hte ixpyrà nē axàmnhīx Ijaew kêt xwýnhjê kutā axàpkur o ri apa. Tā amnhī wýr mē pahkwýjê pumu nē axtem nē mē hkà ã axàpkur o akrī. Kwa nà na ka ã amnhī nhīpêx anē nē ra axtem amnhī nhīpêx. Te ate mē kām akapēr nē mē kām: “Kot kaj mē ixpyrà nē amnhī my kwýrýt kà jakà pa rī mē akôt ri ixpa nē mē akutā ixàpkur o ixpa.” Anhýr pyràk. Kwa ja mex kêt.

¹⁵ —Mē pahpê Ijaew na pu htem mē kēp Ijaew kêt xwýnhjê jarēnh o: “Mē kot mē pahte amnhī nhīpêx kôt amnhī nhīpêx kêt xwýnhjaja.” Anē. ¹⁶ Tā mē pahpê Ijaew tā na hte Tīrtūmja mē pahte mē panhīgêt kot amnhī nhīpêx kôt mē pahte amnhī nhīpêx ã mē pahpumunh kôt mē pahto hkra hkêt nē. Ra mē pahte ja pumunh mex. Ām mē pahte amnhī kaxyw Jejus Kris kôt pajamxpēr ã mē pahpumunh kôt pix mā na hte mē pahto hkra. Kot pu mē amnhī kaxyw hkôt pajamxpēr nhūm ja hā mē pahpumunh kôt pix mā mē pahto hkra.

¹⁷ —Mē pahpê Kris kwý jakamā na hte Tīrtūm amnhīm mē pamex ã mē pajarē nē mē pahte amnhī tomnuj xwýnh kêt ã mē pajarē. Jakamā na pu htem paxàmnhīx ri Ijaew kêt xwýnhjê kot Kris kôt amnhī xunhwýr xwýnhjê hkôt ri papa ho papa. Ra Tīrtūm kot mē pahpyrà nē amnhīm mē mex ã mē harēnh kênā. Tā koja mēhō kormā ja mar kêt nē tanhmā hā mē pajarēnh to nē mē pajarēnh o: “Tk. Ra mē kot amnhī kaxyw Kris kôt hamxpēr tā axtem nē Ijaew kêt xwýnhjê hkôt ri pa. Jakamā arī mē kot amnhī tomnuj xwýnh kênā.” Anhýr o mē pajarēnh japêr. Nom ãm mē pahte amnhī tomnuj xwýnh ã mē pajarēnh kaprý. Na pu htem Kris kôt amnhī nhīpêx nē ra tām amnhī nhīpêx mex o

papa. ¹⁸ No kot pu mẽ hkôt ri amnhĩ nhĩpêx o papa htã tanhmã pajamxpêr to nê pahte amnhĩ nhĩpêx tũm o awjanã hãmri nê amnhĩ tomnuj tỳx kumrêx.

¹⁹ —Tã tanhmã kot puj wem amnhĩ to nê mẽ panhĩgêr kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamxpêr o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tĩrtũm ja hã ixpumu nê amnhĩm inhmex ã ijarê.” Anhỹr o pajamxpêr. Hãmri nê finat Mojes kot mẽ panhĩgêrjê mã kapêr piitã hkôt ri mnhĩ nhĩpêx o papa nom tũhã hkwỹm ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Kapêr ã kagã htũm kot ã ja jarênh kot anhỹr. Nom kot puj mẽ amnhĩ kaxyw Kris kôt pajamxpêr nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tĩrtũm kôt amnhĩ nhĩpêx o ri papa nê axte mẽ pahpê Ijaew nhĩgêrjê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrã nê pãnhã Tĩrtũm kapêr kôt pix mã ri amnhĩ nhĩpêx o ri papa.

²⁰ —Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwỳja htyk pyrãk. Jakamã na pu htem amnhĩ tomnuj kaga nê Kris kôt amnhĩ xunhwỳ nhũm Karô mẽ pahkarôm agjê pu mẽ te Jesus Kris kot amnhĩ nhĩpêx pyrãk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xã hkôt pix mã tanhmã ri amnhĩ nhĩpêx to ho papa. Kris kêp Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamxpêr rãhã ho papa.

²¹ —ãm hãmri na pre Tĩrtũm mẽ pahto mex kumrêx nê mẽ pahwỳr Krisja mẽ nhũm mẽ pahwỳr wrỳ nê mẽ panê ty. Tã na pa pre kapêrja ma nê mar tỳx nê hã ri ixpa nê ho ijamakêtkati hkêt nê. Tã kop apu Tĩrtũm kot mẽ pahte mẽ panhĩgêrjê kot amnhĩ nhĩpêx o amnhĩ nhĩpêx ã mẽ pahpumunh kôt mẽ pamex ã mẽ pajarênh ronhỹx pre Krisja ãm mẽ panê htyk kaprỳ. Mo kaxyw nhỹx pre mẽ panê ty? Anê.

Ã na pa Simãw Pêtre mã ixkapêr anê nhũm mẽ piitã apkur pê hã inhmar o hkrĩ.

3

Mẽ pahte amnhĩ krã hkôt pahpê Tĩrtũm kra hkêt ã mẽ pajarênh

Karatas 5.16-23; Epes 2.8; Piripos 3.9; Sikũn Ximotre 1.9; Xitre 3.4-7

¹ Kwa Karatas nhô xwỳnhjaja. Te ri mẽ ajamxpêr kêt kumrêx pyrãk. Amnepê mã mẽ awỳr inhmôrta ã na pa pre mẽ amã tanhmã Kris htykja jarênh to. Pĩ kahpa hã mẽ panê htyk ã harê ka mẽ aprĩ hã inhma. Tã nhũm Tĩrtũm kapêr jarênh o mẽ hêx xwỳnhjaja ixpãnhã mẽ awỳr mra nê tanhmã mẽ amã ujarênh to ka mẽ ama nê mẽ ajamxpêr o apihkãr rax nê. Jao axte Kris tyk mã ajamxpêr kêt nê. ² E mẽ inhmã mẽmoj jarê. Mẽmoj tã mẽ apumunh kôt na pre Tĩrtũm mẽ awỳr amnhĩ Karô rê nhũm mẽ awỳr agjê? Xã mẽ anhĩgêr kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt? Nã na pre ja hã mẽ apumunh kôt mẽ awỳr rênh kêt nê. Na ka prem Kris jarênh ma nê amnhĩ kaxyw hkôt ajamxpêr nhũm ja hã mẽ apumunh kôt mẽ awỳr kurê nhũm mẽ awỳr agjê.

³ Na pu htem amnhĩ krã hkôt tanhmã amnhĩ nhĩpêx to ho pahpê Tĩrtũm kra hkêt nê. Tĩrtũm Karô pix kukwak ri na pu htem pahpê hkra. Tã ka mẽ axtem nê ajamxpêr o:

—Nã Tĩrtũm ra kot ixto hkra jakamã kot paj arĩ ri mẽ inhĩgêr kot amnhĩ nhĩpêx kôt amnhĩ nhĩpêx o ixpa rãhã nê inhmex kumrêx nê ri ixpa. Anê.

Kwa ã mẽ ajamxpêr anhỹrja mex kêt. ⁴ Mẽ akwỳ kot Kris ã mẽ atomnuj tã ka mẽ amnhĩ xã htỳx kamã ajamak o ri apa htã Kris kaga hkêt nê. Tã ra axtem nê mẽ kapêr o mẽ hêx xwỳnhjê jamxpêr kôt ajamxpêr o te Kris ã amnhĩ xã kamã ajamak kaprỳ pyrãk. Kwa nã mẽ ri mẽ hkôt ajamxpêr kêt nê. ⁵ Na pre Tĩrtũm mẽ awỳr amnhĩ Karô rê nhũm mẽ awỳr agjê nê mẽ amã aa mẽ ate mẽmoj pumunh kêt kwỳ ho anhỹr o ri mẽ akamã pa ho pa. Xã mẽ anhĩgêr kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anê? Nã ja kôt kêt. ãm mẽ ate Kris kapêr mar nê amnhĩ kaxyw hkôt ajamxpêr ã mẽ apumunh kôt pix mã na pre ã mẽ amã amnhĩ nhĩpêx anê.

Tirtüm kot amnhĩ tã finat Apraãw pumunh kôt mex ã harënh

Rômãn 4.1-25; Xiakre 2.23

⁶ Nê mẽ ixpê Ijaew pàr krax finat Apraãw na pre amnhĩ kaxyw Tirtüm kôt hamaxpêr nhũm amnhĩ tã omu nê kãm:

Nà ate amnhĩ kaxyw inhmã ajamaxpêr tỳx jakamã na pa amnhĩm amex ã ajarê. Amex kumrêx Apraãw.

⁷ Anhÿr o kãm kapêr jakamã mẽ pahte uràk nê amnhĩ kaxyw hkôt pajamaxpêr xwỳnhjaja te mẽ pahpê Apraãw tàmnhwỳ pyràk. ⁸ Nê mẽ apê Ijaew kêt xwỳnhjaja. Na hte Tirtüm mẽ pahto hpimràk tã mẽ pahte amnhĩ kaxyw kãm pajamaxpêr ã mẽ pahpumunh kôt amnhĩm mẽ pamex ã mẽ pajarê nê mẽ pahto hkra. Amnepêr na pre Apraãw mã kapêr nê kãm:

E ate amnhĩ kaxyw ixkôt ajamaxpêr jakamã kot paj akukwak ri pyka piitã hkôt mẽ piitã mẽ ho mex nê.

Anhÿr o kãm kapêr jao mãănên mẽ apê Ijaew kêt xwỳnhjê jarê. ⁹ Jakamã mẽ pahte Apraãw pyrã nê amnhĩ kaxyw Tirtüm kôt pajamaxpêr xwỳnhjaja kot puj mẽ pahpiitã uràk nê pamex kumrêx nê papa ho papa.

Tanhmã Tirtüm kot mẽ panê pĩ kahpa hã jêt xwỳnh nhĩpêx to hã harënh

Rômãn 4.14, 7.10; Wam Korit 15.56

¹⁰ Nê koja mễhõ hamaxpêr o:

—E kot paj finat Mojes kapêr kôt ri amnhĩ nhĩpêx o ri ixpa nhũm Tirtüm ja hã ixpumu nê amnhĩm inhmex ã ijarê nê ixto hkra. Anê.

No ãm ja kot anhÿr kêt. Tirtüm kapêr ã kagà htũm kot ja jarënh kot:

Ixte amnhĩm mẽ mex ã mẽ harënh kaxyw mẽ kot Mojes kapêr kôt amnhĩ nhĩpêx xwỳnhjaja koja mẽ ãm mẽmoj pixire nê hirôp kuhê. Rỳ mẽmoj pixire nê hkôt amnhĩ nhĩpêx kêt pa ja hã mẽ omu nê hã mẽ homnuj tỳx kumrêx.

Anhÿr jakamã tanhmã kot pu mẽ amnhĩ to nê Mojes kapêr piitã hkôt amnhĩ nhĩpêx nê aa ho pixi nê hirôp pakuhê hkêt? Nà kot puj mẽ ho anhÿr kêt nê. Kot puj mẽ tee ri pamã ja ho anhÿr prãm kaprỳ. Jakamã Tirtüm kot amnhĩm mẽ mex ã mẽ harënh kaxyw mẽ kot ã amnhĩ nhĩpêx anhÿr mã xwỳnhjaja koja mẽ mex kêt nê.

¹¹ Na hte Tirtüm mẽ kot finat Mojes kapêr kôt amnhĩ nhĩpêx o mẽ pa hã mẽ omunh xà hkôt mẽ mex ã mẽ harënh kêt nê. ãm mẽ kot amnhĩ kaxyw hkôt hamaxpêr xwỳnhjaja na hte ã mẽ harënh anê. Kapêr ã kagà htũm kot mẽ harënh kot:

Mẽ kot amnhĩ kaxyw ixkôt hamaxpêr xwỳnhjaja na pa hte mẽ mex ã mẽ harënh o ixpa. Mễ tapxipixjaja koja mẽ nhÿrmã Ixkra mẽ wa ixri mex kumrêx nê htĩr tũm nê pa ho pa. Anê.

¹² Nom na htem amnhĩ kaxyw Tirtüm mã hamaxpêr pê finat Mojes kapêr kôt amnhĩ nhĩpêx o pa hkêt nê. Mojes kapêr ã kagà kot ja jarënh kot:

Mẽ kot ixkapêr piitã hkôt amnhĩ nhĩpêx mex o mẽ pa xwỳnhjaja koja mẽ htĩr tũm nê pa ho pa. Anê.

¹³ Tã kot pu mẽ ãm kapêr o pixire nê hirôp pakuhê hãmri nê mỳrapê pahtĩr tũm nê papa hkêt nê. Nê hpãnhã mẽ kot amnhĩ xà htỳx kamã hamak tũm xàta hwỳr ma papa. Ja pymaj na pre Krisja ĩ ho mẽ pahwỳr wrỳ nê mẽ pahte amnhĩ tomnuj mỳrapê mẽ panê ty. Tirtüm kot mẽ pahte amnhĩ tomnuj mỳrapê tanhmã mẽ pahto pymaj ã mẽ panê htyk anê. Jakamã nhũm Tirtüm mẽ pahte amnhĩ tomnuj ã mẽ pahpumunh kôt mẽ pakuhpa hã Kraja homnuj nê. Kapêr ã kagà htũm kot ja jarënh kot:

Pĩ kahpa hã jêt xwỳnhhta na pre Tirtüm homnuj tỳx kumrêx. Anê.

Mẽ kot amnhĩ kaxyw Kris kôt mẽ hamaxpêr xwỳnhjê jarënh

¹⁴ Tã ã Jeus Kris kot mẽ panê amnhĩ nhĩpêx anhÿr kukwak ri na pre Tirtüm kot Apraãw nhĩpêx pyrã nê mẽ ixpê Ijaew pix o mex kêt nê. Mãănên mẽ apê Ijaew kêt xwỳnhjê ho mex nê. Jakamã koja mễhõ. Ijaew õ rỳ Ijaew kêt xwỳnhjê hõ amnhĩ kaxyw Kris kôt hamaxpêr nhũm Tirtüm hã omu nê ho hkra nê hwỳr Karõ mẽ nhũm kãm axà.

Tirtūm kot finat Mojes kukamā mē pahto mex ā harēnh
Rômân 3.19-20, 5.20-21, 11.32; Eprêw 6.13-18

¹⁵ E ixkrâmnhwýjaja. Kot paj ixprî hã mē amã ja jarē ka mē inhma. Nà koja mēhõ wa hamēxkrut nē mēmoj tã axpēn ma. Pika hã war axpēn ma rý mēmoj tã war axpēn ma. Hãmri nē wa hã axpēn mar pa nhũm ja âm hãmri nē âm rãhãã. Koja nhãm mēhõ tē nē axtem tanhmã harēnh to hkêt nē. ¹⁶ Ja pyrã nē na hte ā Tirtūm mēmoj tã amnhî jarēnh anē. Na hte mēmoj jarē nhũm arî rãhãã. Na hte jarãhã mēmoj jarē nhũm jãã nhũm axtem hijuk ri mēmoj jarēnh kêt nē. Na hte âm kapēr pýnh nē. Tã na pre Apraãw mã hkanrêhã htàmnhwýjê hõ kukwak ri Apraãw o mex ā amnhî jarē. Tàmnhwý piitã kukwak ri ho mex ā amnhî jarēnh kêt nē. Âm kanrêhã htàmnhwý Krisja pix kukwak ri ā Apraãw o mex ā kãm amnhî jarēnh anē.

¹⁷ E kot paj hpãnhã axtem tanhmã mē amã harēnh to. Na hte Tirtūm kot mēmoj tã amnhî jarēnh xà hkôt tanhmã mēmoj to ho pa rãhã nē. Ā na pre finat Apraãw mã kot ho mex ā amnhî jarēnh anē. Tã ra hã amgrã pê 430 nē hapêx nhũm hpãnhã finat Mojes mã kapēr. Kot mar nē amnhî xô ri Ijaew mã harēnh o ri mē hkôt pa kaxyw. Tã no nhũm ra kot Apraãw mã mēmoj jarēnh ta arî hã no htýx rãhã nē aa ho hamakêtkati hkêt nē. Nē kot Mojes mã tanhmã kapēr toja nē Apraãw mã tanhmã kapēr toja nhũm hamē wa ho hamakêtkati hkêt nē. Nhũm wa hamē arî rãhã ho rãhã. ¹⁸ Tã mē ano kupyr o ri mē pa xwýnhjaja na htem htýx tanhmã mē amã harēnh to nē mē amã harēnh o:

—Kwa kot puj mē Mojes kapēr kôt amnhî nhîpêx o papa hkêt nē nhũm Tirtūm tee ri ja hã mē pahpumu nē mē pahto mex kêt nē. Anē.

Nom ja kot anhýr kêt. Kop apu ā kot anhýr ronhýx Tirtūm ra wam kot tanhmã Apraãw mã kapēr tota ra ho hamakêtkati. Nom na hte arî kãm hamaxpēr rãhã nē ho pigrãnh nē ho hapêx kêt nē. Na pre Apraãw mã kãm:

Kot kaj amnhî kaxyw ixkôt ajamaxpēr hã kot paj ato mex kumrêx. Anē.

Tã kot ho mex ā amnhî jarēnhja arî rãhãã. Na hte arî mē kot amnhî kaxyw hkôt hamaxpēr xwýnhjê ho mex nē. Nom mē kot Mojes kapēr kôt amnhî nhîpêx o pa hã mē omunh xà hkôt mē ho mex kêt nē. Âm mē kot amnhî kaxyw hkôt hamaxpēr xwýnh pixjaja na hte mē ho mex.

Mo kaxyw na Mojes kapēr ā kagà?

Rômân 3.20, 5.20, 7.7

¹⁹⁻²⁰ Tã mo kaxyw na Mojes kapēr ā kagàja? Nà mē pahte tanhmã amnhî tomnuj to ho papa hã amnhî pumunh nhũm Tirtūm kot ā mē pahte amnhî nhîpêx anhýrja nē mē pahkurê kaxyw. Na pre Mojes Tirtūm nhý hã mēmoj nē mē pahkurê. Mē pahte axpēn pê paxãhkính nē mē pahkurê. Nē mē pahte axpēn mã paxêx o ri papa nē mē pahkurê. Ā mēmoj nē mē pahkurê anē. Mē pahprî hã kapēr mar nē tãm amnhî nhîpêx o papa kaxyw. Ja kaxyw na pre Tirtūm Ijaew kaxyw Mojes mã kapēr gõ. Na pre kaxkwa rũm kapēr o wrýk xwýnhjaja kumrêx kãm harē nhũm kuma nē Ijaew mã hã kagà. Jakamã na htem harēnh o: “Mojes kapēr” anhýr o harē.

Tã Apraãw kanrêhã htàmnhwý Krisja kormã kator kêt ri nhũm Ijaew Mojes kapēr ma nē hkôt ri amnhî nhîpêx o pa. Tã nhũm Krisja kator o Mojes kapēr o hapêx. Ra Tirtūm kot Kris kukamã ho mex ā amnhî jarēnh xà hã arîgrota kator mē nhũm Mojes kapēr hapêx.

No na pre Tirtūm Ijaew mã ujarēnh kaxyw tãm mē kãm ujarēnh kêt nē. Kapēr o wrýk xwýnhjê mã na pre harē nhũm mē amnhî xô ri Mojes mã mē kaxyw kãm awjarē. Kot mē ô ri mē kãm harēnh kaxyw. No Apraãw mã na pre Tirtūm tãm kapēr. Na pre hwýr kapēr o wrýk xwýnhjê hõ mēnh kêt nē. Tãm kot kãm kapēr jakamã kapērja na mex o Ijaew kaxyw Mojes mã kapēr jakrenh.

²¹ Nē na pre Tirtūm tanhmã mē pamã kapēr o amnhîrît to nē mē pamã:

—E kot paj amnhî kaxyw ixkôt mē ajamaxpēr ā mē apumunh kôt pix mã mē amex ā mē ajarē.

Anhýr o mē pamã kapēr. Tã xà na pre kapērja nhîjuk ri axte amnhî jarē nē amnhî jarēnh o:

—E kot paj mẽ ate Mojes kapër kôt amnhĩ nhĩpêx mex o apa hã mẽ apumunh kôt mẽ amex ã mẽ ajarẽ.

Anhỹr o mẽ pamã kapër? Xà na hte mẽmoj jarẽ nhũm jãã nhũm ra hijuk ri axtem mẽmoj jarẽ? Nà Tĩrtũm kapër ãm hpỹnh kênã. Kop ãm mẽ pahte Mojes kapër kôt amnhĩ nhĩpêx o papa hã mẽ pahpumunh kôt mẽ pamex ã mẽ pajarẽnh ronhỹx mẽ pamã:

—Ãm ja pix ã mẽ apumunh kôt kot paj mẽ amex ã mẽ ajarẽ. Anẽ.

²² Nom na pre ã kapër anhỹr kêt nẽ. Kapër ã kagà htũm kot ja jarẽnh o: Mẽ apiitã mẽ ate amnhĩ tomnuj o mẽ apa xwỹnh na ka mẽ.

Anhỹr jakamã tanhmã kot puj mẽ amnhĩ to nẽ Mojes kapër kôt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwỹnh kênã. Mẽ pahte kapër piitã hkôt amnhĩ nhĩpêx kêt jakamã koja Tĩrtũm ja hã mẽ pahpumunh kôt mẽ pamex ã mẽ pajarẽnh kêt nẽ. Koja ãm mẽ pamã kapër o:

—Kot kaj mẽ amnhĩ kaxyw Jejus Kris mã ajamaxpër pa ja hã mẽ apumunh kôt mẽ amex ã mẽ ajarẽ nẽ mẽ ato ixkra nẽ mẽ ato mex o ri ixpa. Anẽ.

Mojes kapër te kêp Kris xwỹj ri mẽ hamãr xwỹnh pyrãk ã harẽnh

Rõmãn 10.4; Karatas 4.1

²³ Nẽ kormã Kris kot mẽ pahwỹr wrỹk nẽ mẽ panẽ htyk xwỹj ri na pre Ijaew Mojes kapër ma nẽ hkôt amnhĩ nhĩpêx o ri pa. Nhũm kapërja te kot amnhĩm mẽ unẽnũm nhũm mẽ kot hkôt pix mã amnhĩ nhĩpêx o ri pa pyrãk. Na prem Tĩrtũm kot mẽ mex ã mẽ harẽnh prãm xaj ãm pix ma nẽ hkôt amnhĩ nhĩpêx o pa. Nom kapër piitã hkôt amnhĩ nhĩpêx mex kêt nẽ. ²⁴ Te mẽhprĩre nhũm Mojes kapër te kêp mẽ hamãr xwỹnh pyrãk. Mẽhprĩ jamãr xwỹnhjaja na htem mẽhprĩjẽ pumu nẽ tãm mẽ kot amnhĩ nhĩpêx kaxyw tanhmã mẽ ahkre hto ho mẽ hkôt pa. Ja pyrã nẽ na pre Ijaew tãm amnhĩ nhĩpêx o pa kaxyw Mojes kapër ma nẽ hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhỹr o ri pa. Tã nhũm Jejus tãm kaxkwa rũm wrỹ pa mẽ ixkwỹ pixjaja mẽ ixkwỹjẽ rom amnhĩ kaxyw hkôt ijamaxpër. Hãmri nhũm Tĩrtũm ja hã mẽ ixpumunh kôt mẽ inhmex ã mẽ ijarẽnh kurê kumrẽx.

Jejus kukwak ri mẽ pahpê Tĩrtũm kra ã mẽ pajarẽnh

Juãw 1.12; Rõmãn 8.14; Epes 1.5

²⁵⁻²⁶ Tã ra mẽ ixte amnhĩ kaxyw Kris kôt ijamaxpër jakamã na pre Tĩrtũm mẽ ixto hkra pa mẽ ra te ixpê hkra xaptãr pyrãk o amnhĩ nhĩpêx nẽ kapër kôt amnhĩ nhĩpêx mex o ri ixpa. Jao Mojes kapër kaga. Te mẽhprĩre ra mẽ ahkre kamã mẽ aptãr nẽ kot mẽ ahkre xwỹnh kaga pyrãk. Hãmri pa mẽ ixpê Tĩrtũm kra xaptãrjaja hãmri axte Mojes kapër kôt amnhĩ nhĩpêx hkêt nẽ.

²⁷ Tã mẽ kajaja na ka pre mẽ ixpyrã nẽ amnhĩ kaxyw Kris kôt ajamaxpër nhũm mẽ akwỹ kot mẽ apê Jejus kwỹ hã mẽ apumunh kaxyw nhũm mẽ akrã kumrã. Hãmri ka mẽ Jejus kot amnhĩ nhĩpêx kôt pix mã amnhĩ nhĩpêx o ri apa. ²⁸ Tã ra mẽ pahpê Jejus Kris kôt amnhĩ xunhwỹr xwỹnh jakamã na hte Tĩrtũm ahpỹnhã ri tanhmã mẽ pakute hkôt mẽ pahpumunh kêt nẽ. Mẽ pahpê Ijaew rỹ mẽ pahpê Ijaew kêt xwỹnhjaja. Rỹ mẽ pahpê nhãm mẽ kãm paxapênh xwỹnh rỹ amnhĩ mã mẽ paxapênh xwỹnh nhũm hte ja hã mẽ pahpumunh kôt tanhmã mẽ pajarẽnh to hkêt nẽ. Rỹ mẽ anijê hkôt rỹ mẽ inhmyjê hkôt mẽ pahpumunh kôt tanhmã mẽ pajarẽnh to kêt nẽ. ãm mẽ pahte Jejus Kris kôt amnhĩ xunhwỹr ã mẽ pahpumunh kôt pix mã na hte ã mẽ pahpumunh o pa anẽ.

²⁹ Nẽ na pre Tĩrtũm Apraãw mã hkanrêhã htãmnhwỹ Jejus Kris o mex ã amnhĩ jarẽ. Tã Kris kêp mẽ panhõ Pahihti jakamã pu mẽ Tĩrtũm noo mã urãk nẽ te mẽ pahpê Apraãw tãmnhwỹ pyrãk. Jakamã koja Apraãw nhĩpêxta pyrã nẽ mẽ pahto mex rax nẽ.

4

Mojes kapër te axte mẽ pahpynênh kêt pyrãk ã harẽnh

Rõmãn 7.1, 8.14-17; Karatas 3.23

¹ E kot paj axte mẽ amã tanhmã mẽhprĩjẽ jarẽnh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nẽ õ pika. Õ mẽmoj piitã õr kaxyw. No nhũm

hkraja kormã hprĩre nẽ hamaxpẽr mex kêt jakamã nhũm kormã hprêk jamãr o pa. Nhũm hkraja arĩ te kãm àpênh o pa xwýnh kot amnhĩ nhĩpêx pyrã nẽ amnhĩ krã hkôt ri amnhĩ nhĩpêx o pa hkêt nẽ. Kormã hipêêxà kapẽr kôt ri amnhĩ nhĩpêx o pa. Nhũm hipêêxàja kot kãm õ mẽmoj piitã òr kaxyw no ãm kormã hprêk jamã. ² Tã kormã hkraja hprĩre ri nhũm hipêêxà tanhmã amnhĩ to nẽ ty. Nom nhũm hkraja mýr pẽ kormã õ mẽmoj o amnhĩptãr kêt nẽ. Kormã hprĩre jakamã nhũm hipêêxà mýr pẽ kot kãm hamãr o pa xwýnhja kormã kãm hamãr o pa. Tã nhũm hipêêxà kot kãm amgrã jarênh xwýnhhta kato nhũm tãm mẽmoj piitã ho amnhĩptã. Ra àptãr mex nẽ hamaxpẽr mex nẽ amnhĩm ho amnhĩptãr pa. ³ Tã Ijaew na prem ã amnhĩ nhĩpêx anẽ. Amnepêem kormã mẽ kot Mojes kapẽr kôt ri amnhĩ nhĩpêx o pata ã na prem te mẽhprĩre hamaxpẽr kêeta pyrãk. Te kormã mẽ àptãr kêt pyrã nẽ jar pika ja kamã mẽ kot amnhĩ nhĩpêx tũm kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unênh nẽ mẽ kãm ê pyrãk o mẽ hipêx nhũm mẽ hkôt pix mã amnhĩ nhĩpêx o ri pa. ⁴ Tã nhũm Tĩrtũm kot Kra hkukamã mẽ pahwýr mẽnh xà hã arĩgrota kato hãmri nhũm mẽ pahwýr kumẽ nhũm mẽ pahwýr wrý nẽ mẽ pahpyrã nẽ mẽhõ nhõhy rũm kato. Nẽ mẽ pahpyrã nẽ gaa nẽ hprêk nẽ mẽ ixpê Ijaew rom Mojes kapẽr piitã hkôt amnhĩ nhĩpêx mex kumrêx o ri pa. ⁵ Jao te kot Mojes kapẽr pẽ mẽ papytãr pyrãk o mẽ panhĩpêx pu mẽ hpãnhã pahpê Tĩrtũm kra kaxyw. ⁶ Tã mẽ ixpê Ijaew kwýjaja nẽ mẽ apê Ijaew kêt xwýnh kwýjaja ra mẽ pahpê Tĩrtũm kra jakamã na pre mẽ pahwýr Kra Jejus Karõja rẽ nhũm mẽ pamã agiê. Hãmri nẽ mẽ pamã kapẽr o:

—Ra mẽ apê Tĩrtũm kra jakamã kêr ka mẽ kãm amnhĩ jarênh kaxyw nẽ kãm: “Pa Papaj” anẽ. Kêr ka mẽ ã kãm akapẽr anẽ. Anẽ.

⁷ Jakamã na pu mẽ ra te pahpê mẽ kãm paxàpênh xwýnh pyrãk kêt nẽ. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrã nẽ mẽ pahto mex nẽ.

Mojes kapẽr kôt mẽ kot amnhĩ nhĩpêx xwýnhjê jarênh

Sikũn Korĩt 11.3-4; Korosẽ 2.16-19; Eprêw 6.1; Wam Pêtre 1.14

⁸ Nẽ amnepê mã kormã mẽ ate amnhĩ kaxyw Jejus kôt ajamaxpẽr kêt ri na ka prem Tĩrtũm jarênh mar kêt nẽ. ãm atýx ri sãnti mã mex ã harẽ nẽ kãm amnhĩ jagrer o ri apa. Nẽ amã mẽmoj kĩnh nẽ amã hprãm xaj tanhmã amnhĩ to hwýr to ho ri apa. Te mẽ kãm mẽ àpênh o mẽ pa xwýnhjaja kot amnhĩ nhĩpêx pyrã nẽ sãnti mã tanhmã amnhĩ nhĩpêx to ho ri apa. Nom sãntija kêp Tĩrtũm kêt.

⁹ Tã ka prem Tĩrtũm jarênh ma nẽ hkôt amnhĩ xunhwý nhũm amnhĩ tã mẽ apumu. Tã tãm kot amnhĩ kaxyw mẽ paxunhwýr jakamã kwa mon ka mẽ ra axtem nẽ akupým sãnti hkôt amnhĩ nhĩpêx kaxyw? Nã mẽ ajamaxpẽrja mex kêt. Sãnti nhĩpêxta tanhmã koja amnhĩ to nẽ mẽ ato ajuta? ãm mẽ kot ãhkra ho hipêx pix jakamã hihtýxti hã. Amarĩ kuhê xà kamã kuhê ho kuhê xwýnh kênã. Tã te kot akupým amnhĩ kôt mẽ arênh kaxyw pyrãk o mẽ anhĩpêx ka mẽ ra axtem nẽ akupým hkôt amnhĩ nhĩpêx kaxyw. Kwa nã mẽ ã ri amnhĩ nhĩpêx anhýr kêt nẽ.

¹⁰ Nẽ na ka htem amnhĩ kukamã ajamaxpẽr o:

—Na pre hte Ijaewjaja Mojes kapẽr xà hkôt arĩgro hkwy hã axtem tanhmã amnhĩ nhĩpêx to nẽ mẽmo mytwrý hã tanhmã amnhĩ nhĩpêx to nẽ mẽmo amgrã hã tanhmã amnhĩ nhĩpêx to. Tã kot paj mẽ urãk nẽ ã amnhĩ nhĩpêx anhýr o ixpa. Kê Tĩrtũm ja hã ixpumu nẽ inhmex ã ijarẽ. Anẽ.

Kwa mẽ ã ajamaxpẽr anhýr kêt nẽ. Mon ka htem axtem nẽ ri ã ajamaxpẽr anẽ? Na hte Tĩrtũm ã mẽ pahte amnhĩ nhĩpêx anhýr ã mẽ pahpumunh kôt mẽ pamex ã mẽ pajarênh kêt nẽ. ¹¹ Na pa ja hã mẽ ajarênh ma nẽ tee ri mẽ akukamã ijamaxpẽr. Te ixte Tĩrtũm kapẽr o mẽ ajahkre kaprý ho ri ixpa pyrãk.

Karatas nhõ xwýnhjaja kot Pawre ho mex ã mẽ harênh

Wam Korĩt 9.21-23

¹² Kwa ixkrãmhwyjaja. Ixpê Ijaew tã te ixpê Ijaew kêt pyrãk o amnhĩ nhĩpêx o ri mẽ apê Ijaew kêt xwýnhjê hkôt ri ixpa. Jao Kris kapẽr gryk ã mẽ inhĩgêjtaja kot amnhĩ

nhĩpêx kaga nê axte hkôt amnhĩ nhĩpêx kêt nê. Tã kwa mẽ ixpyrà nê ã amnhĩ nhĩpêx anê. Wem ma amnhĩ to amõr gri kêt wehe. Wam ixte mẽ awȳr inhmõrta ã na pa pre mẽ amã Tĩrtũm kapêr jarênh o ri mẽ akôt ixpa ka prem inhma nhũm ja mẽ amã mex nê ka mẽ ja hã tanhmã ixto hkêt nê. ¹³ Na pa pre ixàà nê mẽ awȳr mõ nhũm ixàja ixto htỳx nê pa tokyx ixkator nê ma akupỹm mẽ arũm inhmõr kêt nê arĩ mẽ amã Tĩrtũm kapêr jarênh o ixpa. ¹⁴ Kormã ixà nê tanhmã ixkute htã ka prem ja hã ixpumu nê ixto mex nê ixkamã anhõkre kahak kêt nê. Na ka prem te ixto Jejus Kris nhĩpêx pyræk o inhĩpêx. Nê te ixto Tĩrtũm kapêr o wryk xwỳnh nhĩpêx pyræk o inhĩpêx. ¹⁵ Jao mẽ amã ixkĩnh nê ã inhĩpêx anê nê mẽ amã ixto mex pix prãm. Nê nhỹri ixpumu nê ixkamã axukapĩ nê inhmã akapêr o:

—Hêxta waa nê. Anopxàà. Inhmã amnhĩ no kaxàr nê amã õr prãm nom tanhmã kot pa mẽ amnhĩ to nê hkapa nê amã kugõ? Anê.

Nê mẽ amã inhmã mẽmoj mex pix nhõr prãm. Tã ra tanhmã ajamaxpêr to nê axtem nê te mẽ amã ixkĩnh kêt pyræk o inhĩpêx.

Mẽ no kupyx xwỳnhjaja kot mẽ hamaxpêr o pihkàr ã mẽ harênh

¹⁶ Nê na pa pre ãm hãmri mẽ amã Tĩrtũm kapêr jarênh o ri mẽ akôt ixpa. Nom ra mẽ amã mar prãm kêt jakamã na ka mẽ axtem nê inhĩpêx o te ixte mẽ akutã amnhĩ xãm pyræk. ¹⁷ Mẽ amã Tĩrtũm kapêr o mẽ hêx xwỳnhjaja te mẽ kãm mẽ akĩnh pyræk o mẽ anhĩpêx no ãm mẽ kãm akĩnh kêt. Na htem mẽ amex kaxyw tanhmã mẽ amã kapêr to hkêt nê. ãm mẽ ate mẽ mar nê mẽ gryk ã ixkaga nê mẽ hkôt ri amnhĩ nhĩpêx o apa pix prãm xàj na htem mẽ akôt tanhmã mẽ amã hêx to ho pa. ¹⁸ Pa mẽ harênh ma hãmri nê mẽ kamã inhgryk o ã mẽ amã mẽ harênh anhỹr kêt nê. Koja mẽhõ mẽ awȳr mra nê ixwakre kamã rỹ inhnoo mã mẽ amã mẽmoj mex jarê nhũm ja inhmã mex nê. No nhũm mẽ amã mẽ hêx xwỳnhjaja axtem nê mẽ ajamaxpêr o pihkàr pix kaxyw na htem mẽ awȳr mrrar nê mẽ amã ã ujarênh o pa anê.

Pawre kot tee ri mẽ hkukamã hamaxpêr ã harênh

¹⁹ Te mẽ apê ixkra pyræk jakamã na pa hte mẽ ate amnhĩ nhĩpêx ã mẽ apumu nê tee ri ijamaxpêr nê ixkapĩ htỳx nê. Te nhỹhỹnh ixà htỳx nê ixte amnhĩ xà htỳx kamã ijamak o ri ixpaja pyræk. Rỹ te mẽ hpjagri ho mẽ hikwỹ xwỳnh õhy xà htỳxta pyræk. Mẽ ate Kris kôt amnhĩ nhĩpêx mex o apa hprãm xàj na pa hte ã amnhĩ nhĩpêx anhỹr o ri ixpa. ²⁰ Hêxta waa nê. Kop apu ra mẽ awȳr ixpõx nê mẽ akôt ixpa ronhỹx pa ixkĩnh tỳx kumrêx. Nhỹx pa ra ixprĩ hã mẽ amã ixkapêr ka mẽ inhma. Nê amnhĩ tã inhmã mẽ akĩnh tỳx ã mẽ akamã inhgryk kêt ã ixpumunh kurê kumrêx. No kagà pix kãm ixkapêrja ka mẽ kamã harê nom aprĩ hã inhmar mex kêt nê. Na pa tee ri mẽ akukamã ijamaxpêr o ixkapĩ htỳx nê ixpa.

Mojes kapêr kôt mẽ kot amnhĩ nhĩpêx xwỳnhjê jarênh

Eprêw 12.18-29

²¹ Kwa mẽ amã arĩ Mojes kapêr kôt amnhĩ nhĩpêx o ri mẽ apa hprãm xwỳnhjaja. Mãn ka mẽ kormã aprĩ hã Mojes kapêr piitã mar par kêt jakamã na ka mẽ amã hkôt amnhĩ nhĩpêx prãm. E pa ixprĩ hã mẽ amã tanhmã harênh to ka mẽ inhma. ²² Nà Tĩrtũm kapêr ã kagà htũm kot finat Apraãw jarênhja. Na pre hkra myja wa hamêxkrut. Prõ Sara kamã ja nê kot amnhĩm haprõr nhũm ri kãm àpênh o pa xwỳnh Aga kamã ja. ²³ Kãm àpênh xwỳnh kamã ja na pre mẽ pahpiitã mẽ pahpyrà nê amarĩ kato. No hprõ Sara kamã ja. Sara na pre ra hpigêx tỳx nê. Ra hkamrõ hkêt ryy nê pa htã nhũm Tĩrtũm kot wa hkra hkukamã wa kãm ujarênh xà hkôt nhũm Apraãwja htu nhũm wa hkrata kato. Tĩrtũm kot hkukamã wa kãm harênh xà hkôt nhũm kamã hkra nhũm kato.

²⁴⁻²⁵ Tã wa nita ã wa harênh kot anhỹr. Na pre Tĩrtũm mẽmoj jarê. Te ho wa uræk o wa harê no ãm hã kuxi nê ã wa harênh anê. Jakamã ni wa harênhja te kot Tĩrtũm kapêr pijakruuta pyræk. Wam ni Agata te kot hixêt prêk pê Sinai nhĩmõk ã Tĩrtũm kot Mojes mã kapêrta pyræk. Hixêtja pika pê Arap kamã na pre. Jakamã nhũm Tĩrtũm Ijaew kaxyw

Mojes mā kapēr nhūm kuma nē amnhī xō ri mē kām hā kagà. Tā na hte arī jarāhā mē hkwỳjaja hamaxpēr o:

—E kot paj mē panhīgēt finat Mojes kapēr kōt amnhī nhīpêx o ri ixpa nhūm Tīrtūm ja hā ixpumu nē amnhīm inhmex ā ijarē nē ixto hkra.

Anhūr o hamaxpēr no ām ā hamaxpēr anhūr kaprỳ. Ā mē hamaxpēr anhūr xwỳnhjaja te mē kēp Apraāw mā àpēnh xwỳnh Aga hkrata pyrāk. Nē krī pē Jerujarē kēp Ijaew nhō krī jakamā haxwỳja te kēp Agata pyrāk. Nhūm krī nhō xwỳnhjaja haxwỳja te mē kēp Aga hkrata pyrāk. Na htem htỳx Tīrtūm kot mē omunh nē mē ho hkra hprām xàj Mojes kapēr kōt amnhī nhīpêx o pa hā amnhī jarēnh kaprỳ. Jakamā haxwỳja te mē kēp mē kām mē àpēnh o pa xwỳnh pyrāk.

Jejus kōt mē kot amnhī kaxyw hamaxpēr xwỳnhjê jarēnh

²⁶ Nē hapu hā Tīrtūm kapērta. Apraāw prō kumrēx Saraja te kēp kaxkwa kamā Jerujarē oja pyrāk. Krī ja kamā mē pa mā xwỳnhjaja te mē kēp mē kām mē àpēnh xwỳnhjê pyrāk kēt. Ra mē kot amnhī kaxyw Kris mā hamaxpēr nē hkōt amnhī xunhwỳr jakamā na htem hamaxpēr o:

—Ixe amnhī kaxyw Kris mā ijamaxpēr nē hkōt amnhī xām jakamā na Tīrtūm ixpumu nē amnhīm inhmex ā ijarē nē ixto hkra. Anē.

Ām hāmri na mē ā wamtajê rom hamaxpēr anē. Tā ā mē hamaxpēr anhūr xwỳnhjaja te mē kēp Sara hkra pyrāk.

²⁷ Tīrtūm kapēr ā kagà htūm kot ja jarēnh kot:

E kormā akra hkēt nē apa htā kēr ka māmri akīnh nē ri apa.

Nē kormā apijagri hkēt tā kēr ka akīnh tỳx nē ri apa.

Kormā amjēn kot akamā hkra hkēt nē te kot akaga pyrāk tā kot kaj akra nē akanrēhā atāmnhwỳ xohtō rax nē.

Mē ohtō rax o ra amjēn kot nhām hprō hō kamā hkrata jakre. Anē.

Ā kapēr kot anhūr o mē kot amnhī kaxyw Kris kōt hamaxpēr xwỳnhjê hkukamā mē ohtō hā mē harē.

²⁸ E ixkrāmnhwỳjaja. Te mē apē Ijak kanrēhā htāmnhwỳ pyrāk. Koja mēhō amnhī kaxyw Kris kōt hamaxpēr hāmri nē te kēp Apraāw mē hprō Sara wa hkra Ijak kanrēhā htāmnhwỳ pyrāk. Na pre Tīrtūm amnepē mā kormā Ijak kator kēt ri ra hkukamā hamaxpēr nē Apraāw mā harē. Nē mē papajaja nhūm Tīrtūm Ijak pyrā nē mē pakukamā mē pamā hamaxpēr nē amnhīm mē paxunhwỳr ā amnhī jarē. Tā ra mē ate amnhī kaxyw Kris kōt ajamaxpēr jakamā te mē apē Ijak kanrēhā htāmnhwỳ pyrāk.

²⁹ Nhūm Apraāw kot Aga kamā hkra Ismaewja na pre hprō kumrēx kamā hkrata pumu nē kām hkīnh kēt nē kamā gryk pix o pa. Nē tanhmā hipêx to pē ri haprỳ ho ri hkōt pa. Tā mē kot amnhī krā hkōt amnhī to Tīrtūm kra hprām xwỳnhjaja na htem ā mē pahte Kris kōt amnhī xunhwỳr xwỳnhjê nhīpêx anhūr o pa. Na htem Tīrtūm kot mē pahto hkra hā mē pahpumu nē Ismaew kot Ijak nhīpêx pyrā nē mē pakamā gryk pix o pa. Nē tanhmā mē pahptomnuj to pē mē pahto kapēr o ri pa. ³⁰ Tā no ām kwār mē māmri ā mē panhīpêx anē. Koja mē pahpyrà nē nhỹrmā Tīrtūm nhō krī hwỳr àpir kēt nē. Tīrtūm kapēr ā kagà htūm kot mē harēnh kot:

Na pre Tīrtūm Apraāw mā kapēr nē kām: “E kēr ka amnhī nē ate haprōr nhūm kot amā àpēnh o ri pa xwỳnh mē hkrata wa hano. Koja hkrata amỳr pē amnhīm mēmoj to àrik kēt nē.

Ate aprō kumrēx kamā akrata pix koja hōja rom amỳr pē mēmoj piitā ho amnhīptār pa.”
Anē.

³¹ Tā te mē pahpē àpēnh xwỳnh kamā hkrata pyrāk kēt. Te mē pahpē Apraāw prō kumrēx kamā hkrata pyrāk. Te Tīrtūm kot Ijak kukamā hamaxpēr pyrāk o na pre mē pakukamā hamaxpēr.

5

¹ Nê Kris kot mē pahte amnhī nhīpêx tūm pē mē papytār jakamā kwa ixkràmnhwỳjaja. Kêr ka mē arī ate amnhī nhīpêx tūm kôt amnhī nhīpêx kêt nê. Ra Kris kot ja pē mē papytār nhūm mē paxàmnhīx ri papa kênā.

Mē pahpê Tīrtūm kra hprām xàj tanhmā mē pahte amnhī nhīpêx to
Juāw 8.32, 8.36; Korosê 2.20

² E mē inhma. Kot kaj mē atō Tīrtūm kot ato hkra hprām xàj amnhī my kwryt kà krāhta hā kot kaj mē am amari ā amnhī nhīpêx anhỹr kapry. Na hte Tīrtūm ja hā mē omu nê am hā mē omu. Kot kaj ā amnhī nhīpêx anê nhūm Krisja am ate amnhī tomnuj myrapê anê htyk kapry pyrāk o amnhī nhīpêx. ³ Hāmri nhūm Tīrtūm tee ri ja hā mē apumu nê te kot ā mē amā kapēr anhỹr pyrā nê mē amā kapēr o:

—E ra amā apê Kris kwỳ hprām xàj amnhī my kwryt kà krāhyr jakamā kot kaj määnēn Mojes kapēr piitā hkôt amnhī nhīpêx o ri apa.

Anhỹr o mē amā kapēr pyrāk.

⁴ Nom kot kaj mē atō amnhī kukamā ajamxpēr o:

—Nà kot paj Mojes kapēr piitā hkôt amnhī nhīpêx o ri ixpa nhūm Tīrtūm ja hā ixpumu nê inhmex ā ijarē nê ixto hkra kām ga. Anê.

No am ja kot anhỹr kêt. Na hte Tīrtūm ā mē pahte amnhī nhīpêx anhỹr ā mē pahpumunh kôt mē pahto hkra hkêt nê. Jakamā kot kaj mē ā amnhī nhīpêx anê nê te ate Kris kutā amnhī xām pyrāk nhūm Tīrtūm ato mex kêt nê. ⁵ Nom kot ka mē axtem ajamxpēr o:

—Ra ixte amnhī kaxyw Kris kôt ijamxpēr nê hkôt amnhī xām jakamā koja Tīrtūm hā ixpumu nê inhmex ā ijarē. Karō ra kot ā inhmā ja ho amnhīrit anhỹr kênā.

Anhỹr o ajamxpēr. Am hāmri ā mē ajamxpēr anhỹrja. ⁶ Jakamā mē pahpê Kris kôt amnhī xunhwỳr xwỳnhjê kamā ra mē kot amnhī my kwryt kà jakār xwỳnhjaja nhūm mē pahkwỳjaja ā amnhī nhīpêx anhỹr kêt nê. Tā nhūm Tīrtūm ja hā mē pahpumu nhūm ja tanhmā kêp kute hkêt. Na hte mē pahte amnhī my kwryt kà jakār ā mē pahpumu nê am hā mē pahpumu. No kot pu mē Jejus Kris kôt amnhī nhīpêx mex o ri papa. Nê amnhī kaxyw hkôt pajamxpēr tỳx o ri papa. Nê mē pamā axpên kīnh pē tām ri axpên nhīpêx o ri papa. Ja na kêt Tīrtūm kām hprām.

⁷ Ra mē ate Kris kôt amnhī nhīpêx mex o ri apa htā nhūm mē hêx xwỳnhjaja mē awỳr mra nê tee ri ā mē ate amnhī nhīpêx anhỹr ā mē apumu nê tanhmā mē amā Tīrtūm kapēr o hêx to. Ka mē ama nê axte Tīrtūm kôt amnhī nhīpêx mex hkêt nê. ⁸ No am ā mē kot mē amā mē ujarēnh anhỹr xwỳnhjaja na pre Tīrtūm mē awỳr mē rēnh kêt nê. Tīrtūm kot amnhī wỳr mē awỳr xwỳnh kênā kot kêt axtem nê mē awỳr kapēr o mē amā hêx o mē pa xwỳnhjê rē.

⁹ Nê koja mēhō pixi nê tanhmā amnhī tomnuj to nhūm mē piitā ja hā omu nê urāk nê kām tanhmā amnhī tomnuj to hprām. ¹⁰ No kêt mē apê Kris kwỳ na ka mē. Ixte ja hā mē apumunh mex. Kot kaj mē axte ixkapēr ma nê akupỳm Kris kôt amnhī nhīpêx mex o ri apa. Nà kot kaj mē ā amnhī nhīpêx anê nê axte mē kot mē apê àmnār xwỳnhjê kapēr mar nê mē hkôt amnhī nhīpêx kêt nê. Koja Kris mē atā mē homnuj tỳx kumrêx nhūm mē rī amnhī pumu.

Pawre kot mē kot amnhī jakār ā mē kām karō hkêt ā harēnh

¹¹ Nê na hte Tīrtūm kapēr o mē hêx xwỳnhjaja tanhmā mē amā ixto hêx to ho pa. Ixte mē kām Tīrtūm kot mē ho hkra kaxyw mē kot amnhī my kwryt kà jakār ā mē kām karō hā ixto ri hêx o pa. Nom ixte anhỹr kêt ixkràmnhwỳjaja. Kop apu ixte mē kām ja hā karō ho ixpa ronhỹx Ijaew krāhtūmjaja ja hā ijarēnh ma nhūm ja mē kām mex nê nhūm mē axte Kris ā tanhmā inhīpêx to hkêt nê. Nom ixte ja hā mē kām karō hkêt. Am ixte mē kām Kris kot mē panê pī kahpa hā htyk jarēnh pix myrapê na htem ixkamā gryk nê.

¹² Hêxta waa nê. Mē kot mē amā hêx o pa pē mē ajamxpēr o pihkār xwỳnhjaja kop mē am mē anhō krī rūm hapôx nê ma nhỹhỹm hapêx ronhỹx pa ixkīnh tỳx kumrêx.

Mē pahte axpēn to mex o papa hã mē pamã karō

Wam Korît 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkràmnhwýjaja. Nà na pre Kris amnhĩ kaxyw mē parê. Axte mē pahte amnhĩ nhĩpêx tùm kôt amnhĩ nhĩpêx kêt kaxyw. Ra kot ã mē pahte amnhĩ nhĩpêx anhÿr pē mē papytâr jakamã kêr ka mē amnhĩ tã ja ma nē axte atÿx ri amã hprãm xà hkôt tanhmã amnhĩ nhĩpêx to ho ri apa hkêt nē. Mē ãm amã axpēn kĩnh pix o ri axpēn kôt apa. Nē nhãm mē hipêx o te ka amã amnhĩ tã ma pyræk o mē hipêx. Jao mē piitã tãm mē hipêx o ri apa. Kot kaj mē ã amnhĩ nhĩpêx anē nē te mē ate wam Tirtũm kapêr piitã hkôt amnhĩ nhĩpêx pyræk. ¹⁵ No kot kaj mē axtem nē axpēn kãm axoprê ho ri apa hãmri nē te ra mē ate axpēn to ajapêx par o amõr pyræk o amnhĩ nhĩpêx. Te mry xoprê kot axpēn par o pata pyræk. Kwa mē ã amnhĩ nhĩpêx anhÿr hkêt nē. Mē ãm axpēn to mex pix nē mē axpēn kãm axukaprĩ ho ri axpēn kôt apa.

Mē pahte amnhĩ nhĩpêx nyw jarēnh

Matêwre 26.41; Rõmãn 8.1-11

¹⁶ Nē kwa kêr ka mē amnhĩ to Tirtũm Karō wý kê mē amã mē ate amnhĩ nhĩpêx nyw jagiê ka mē axte ate amnhĩ nhĩpêx tùm kôt amnhĩ nhĩpêx hkêt nē. ãm mē ate amnhĩ nhĩpêx nyw kôt pix mã mãn amnhĩ nhĩpêx o ri apa. ¹⁷ Tirtũm Karō kot amnhĩ nhĩpêxja nē mē pahte amnhĩ nhĩpêx tũmja wa kot axpēn pyræk kêt. Te wa kot axpēn kutã amnhĩ xãm nē wa pijapu pyræk. Jakamã kot puj mē pahte amnhĩ nhĩpêx tùm o amnhĩ nhĩpêx nē Tirtũm Karō mã hprãm xà hkôt amnhĩ nhĩpêx hkêt nē. ¹⁸ No kot puj mē Tirtũm Karō hkôt amnhĩ nhĩpêx nē ra jar pika ja kamã mē kot amnhĩ nhĩpêx kôt ri amnhĩ nhĩpêx kêt nē. Ra axtem mē pahte amnhĩ nhĩpêx nyw o amnhĩ nhĩpêx. ¹⁹ Jar mē kot amnhĩ nhĩpêx tũmta mex kêt. Ra mē piitã mē kot ja pumunh mex.

Na htem htÿx ri hkwýjê kamã hpijaãm kêt o pa.

Jao mēmyjaja hprõ kuhpa hã nhãm mēnijê ho amnhĩkati.

Nhũm mē hprõjaja mē mjên kuhpa hã nhãm mēmyjê ho amnhĩkati.

Nē mēmy hkwýjaja axtem nē mēmyjê hkwý ho amnhĩkati.

Nē mēni hkwý haxwýja axtem nē mēnijê hkwý ho amnhĩkati.

²⁰ Nē mē kãm mēmoj mē hikukrêx japê htÿx o kãm Tirtũm kĩnh jakre.

Nē mēmoj kaxyw ma wajaga hwýr amnhĩ to pa.

Nē hkwýjê kamã oprê ho ri pa.

Nē mēmoj tã axpēn kãm gryk pix nē.

Nē mēmoj to axpēn pē õxý nē.

Nē mēmo myrapê axpēn pē anhgrà nē amÿm ahpÿnhã ri pa.

²¹ Nē mēmoj tã axpēn kamnhĩx rãhã ho ri pa.

Nē axpã nē mē grer kãm ri axpēn kãm hpijaãm kêt o ri pa.

ã na htem mē kot amnhĩ nhĩpêx tùm kôt amnhĩ nhĩpêx o ri mē pa xwýnhjaja amnhĩ nhĩpêx anē. ã mē kot amnhĩ nhĩpêx anhÿr xwýnhjaja koja mē Tirtũm nhõ krĩ hwýr gjêx kêt nē. Ra ixte mē amã ja jarēnh tã pa axte mē amã harê. Mē ate hã ano htÿx rãhã ho ri apa kaxyw. ²² No mē kot amnhĩ nhĩpêx nywja axtem na.

Tirtũm Karō hkôt mē kot amnhĩ nhĩpêx nyw o amnhĩ nhĩpêx xwýnhjaja na htem axtem kãm axpēn kĩnh nē.

Nē hkĩnh nē ri hamakêtkati nē àmnhĩx ri axpēn kôt pa.

Nē gryk tokyx anhÿr hkêt nē. ãm axpēn to mex pix o ri axpēn kôt pa.

Nē tãm axpēn nhĩpêx.

Nē kot mēmoj tã amnhĩ jarēnh xà hkôt tanhmã mēmoj to.

²³ Nē axpēn mã kapêr mã hprĩ ho ri axpēn mã kapêr.

Nē mēmoj punuj piitã nē amnhĩ to htÿx o ri pa.

ã na hte mē kot Tirtũm Karō hkôt amnhĩ nhĩpêx o mē pa xwýnhjaja Karō nhÿ hã amnhĩ nhĩpêx nyw o amnhĩ nhĩpêx anhÿr o pa. Jao mããnhēn Mojes kapêr kwÿm ri amnhĩ nhĩpêx hkêt nē. Jakamã koja mēhõ mē pahte amnhĩ nhĩpêx nyw nē tanhmã mē pahkurê hto hkêt

ně. ²⁴ Tã mẽ pahpê Jejus Kris kwỳ jakamã na pu mẽ pahte amnhĩ nhĩpêx tũmja nhĩpêx o te mẽ pahte amnhĩ nê hpĩr pyrà nê axte hkôt amnhĩ nhĩpêx kêt nê.

Tĩrtũm Karõ hkôt mẽ pahte amnhĩ nhĩpêx ã mẽ pamã karõ
Epes 4.23-24; Korosẽ 3.10

²⁵ Tã ra Tĩrtũm Karõ kot mẽ pahto hkra jakamã kwa kêr pu mẽ ãm kôt pix mã amnhĩ nhĩpêx nyw o amnhĩ nhĩpêx o ri papa. ²⁶ Kot puj mẽ ã amnhĩ nhĩpêx anê hãmri nê mẽmoj tã mẽ pahkwỳjê mã amnhĩ to jarkrar o ri papa hkêt nê. Kot puj mẽ ã amnhĩ nhĩpêx anê nhũm mẽ pakamã gryk nê. Jakamã kêr pu mẽ ã amnhĩ nhĩpêx anhỹr o ri papa hkêt nê.

6

Mẽ pahte tanhmã axpên to ajuta hto hã mẽ pamã karõ
Matêwre 18.15-17; Rukre 17.3-4; Sikũn Tesarõn 3.14-15; Xiakre 5.19-20

¹⁻³ Kwa ixkrãmnhwỳjaja. Mẽ apê Tĩrtũm Karõ hkôt amnhĩ nhĩpêx o ri mẽ apa xwỳnhjaja. Koja Kris kôt akwỳjê hõ tanhmã amnhĩ tomnuj to ka mẽ ja hã omu nê ã amnhĩ nhĩpêx anhỹrja nê kãm akapêr. Nom kêr ka mẽ kamã agryk kamã kãm tanhmã nê hkêt nê. ãm kãm akapêr mã aprĩ ho kãm akapêr nê akupỹm tãm ãm. Nom kwa kêr ka mẽ amnhĩ pumunh mex nê uràk nê ã amnhĩ tomnuj anhỹr kêt nê.

Kot ka mẽ atõ ã kot amnhĩ nhĩpêx anhỹr ã omu nê ãm omu nê nê tanhmã kãm akapêr to hkêt nê. Nê ajamaxpêr o:

—Tk. Kwãr mãmrĩ ã amnhĩ nhĩpêx anê. Pa ja nê tanhmã kãm ixkapêr to hkêt nê. Kurom ixte amnhĩ nhĩpêx mex o ri ixpa kênã.

Anhỹr o ajamaxpêr japêr. Kwa mẽ ã ajamaxpêr anhỹr kêt nê. Kot kaj mẽ ã ajamaxpêr anê nê nê kãm akapêr kêt nê hãmri nê te ate amnhĩ to mex ã amnhĩ jarênh kaprỳ pyràk.

Nê kêr ka mẽ axpên to ajuta mex o ri axpên kôt apa. Jao Kris kôt amnhĩ nhĩpêx mex nê.

⁴⁻⁵ Nê na htem piitã amnhĩm àpênh pix tãnopxar o pa. Jakamã kêr ka mẽ amnhĩ tãnopxar pê tãm amnhĩ nhĩpêx rãhã ho ri apa. Hãmri nê ja hã amnhĩ pumu nê akĩnh nê. Nom kwa kêr ka mẽ ate amnhĩ nhĩpêx mex o akwỳjê jakrenh ã mẽ kãm amnhĩ to jarkrar o ri apa hkêt nê.

⁶ Nê kêr ka mẽ kot Tĩrtũm kapêr o mẽ ajahkre xwỳnhjê ho mex nê mẽ kãm mẽmoj nhõr o ri apa.

⁷ Koja Tĩrtũm nhỹrmã mẽ pahtĩr ri mẽ pahte amnhĩ nhĩpêx ã mẽ pahpumunh kôt tanhmã mẽ pajarênh to. Hãmri pu mẽ tee ri amnhĩ kukamã pajamaxpêr nom amnhĩ nê tanhmã kãm paxêx to hkêt nê. Koja mēhõ kãm amnhĩ to hêx nê te tãm kot amnhĩ mã hêx pyràk nom kot puj mẽ Tĩrtũm mã amnhĩ nê tanhmã paxêx to hkêt nê. ⁸ Jakamã kot kaj mẽ amnhĩ krã hkôt tanhmã ri amnhĩ nhĩpêx to rãhã ho apa hãmri nê nhỹrmã ty nê Tĩrtũm pê awry rax ã ri apa. Nom kot kaj mẽ Tĩrtũm Karõ mã hprãm xà hkôt pix mã amnhĩ nhĩpêx nê nhỹrmã ty nhũm Tĩrtũm akupỹm ato atĩr ka kuri amex nê ajamakêtkati atĩr tũm nê ri apa ho apa.

Mẽ pahte axpên to mex rãhã hã mẽ pamã karõ
Atre 20.35; Wam Korĩt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêr ka mẽ arĩ tãm ri amnhĩ nhĩpêx nê tãm axpên nhĩpêx o ri axpên kôt apa nê jam anhũrer kêt nê. Mẽ ã amnhĩ nhĩpêx o ri apa anhỹr rãhã ty nhũm Tĩrtũm nhỹrmã ja hã mẽ ato mex rax nê. ¹⁰ Tã kêr pu mẽ arĩ Kris kôt pahtõjê ho mex rãhã ho ri papa. Nom mẽ tapxipixjê ho mex kêt nê. Pu mẽ mẽ piitã mẽ ho mex o axpên pyràk.

¹¹ E ixte mẽ amã kagà nhĩpêx nê mẽnh nhũm mẽ ate ja hã ixpumunh kaxyw kot paj pam kagà jatur xà hã inhĩkra ho inhĩxi nhĩpêx ka mẽ ixte inhĩxi hã kagà rũnhtita pumu.

Jejus kot mẽ panê htyk ã Pawre kãm harênh prãm ã harênh
Wam Korĩt 1.22-24, 2.1-2

¹² Nê mẽ amã Tĩrtũm kapêr o mẽ hêx xwỳnhjaja na htem hamaxpêr o:

—Nà kot paj Karatas nhõ xwỳnhjê mã Kris pĩ kahpa hã htyk ã harēnh o ri ixpa hkêt nē. Kot pa anē nhũm mẽ ixpê Ijaew kwỳjaja ja hã inhma nē hã tanhmã inhĩpêx to. Ja pymaj kot paj mẽ kãm tanhmã harēnh to hkêt nē. Kot paj ãm mẽ kot amnhĩ my kwỳt kà jakàr pix ã mẽ kãm karõ kê mẽ ixkapēr xà hkôt ã amnhĩ nhĩpêx anē. Pa hã mẽ omu nē ma ixkwỳjê mã mẽ hã amnhĩ to jarkrar o ri ixpa. Anē.

¹³ Te mẽ kot finat Mojes kapēr kôt ri amnhĩ nhĩpêx pyræk tã no na htem ã amnhĩ nhĩpêx anhỹr kêt nē. Ra mẽ kot amnhĩ jakàr tã no ãm Mojes kapēr piitã hkôt amnhĩ nhĩpêx hkêt nē. ãm hkwỳ hkôt pix mã amnhĩ nhĩpêx o pa. Nom kot kaj mẽ ama nē mẽ uræk nē amnhĩ jakà nhũm mẽ ja hã mẽ apumu nē hkĩnh nē. Nē ma ri mẽ hkwỳjê mã mẽ atã amnhĩ to jarkrar o ri pa nē mẽ kãm:

—E Karatas nhõ xwỳnhjaja na pa prem mẽ kot amnhĩ my kwỳt kà jakàr ã mẽ kãm karõ nhũm mẽ inhma nē mẽ pahpyrà nē ã amnhĩ nhĩpêx anē. Anē.

¹⁴ No pa na pa hte ã mẽ kãm mẽmoj tã karõ anhỹr o ri ixpa hkêt nē. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nē htykja pix na pa hte mẽ kãm harē. Ra kot inhnē htyk jakamã te pa ixte kuri ijêt nē ixyk pyræk. Jakamã ra jar pika ja kamã mẽ kot amnhĩ nhĩpêxja te ixpê htyk nē hapêx pyræk pa axte hkôt amnhĩ nhĩpêx kêt pyræk.

¹⁵ No mẽ kot amnhĩ my kwỳt kà jakàr xwỳnhjaja nē mẽ kot amnhĩ jakàr kêt xwỳnhjaja na hte Tĩrtũm ja hã mẽ omu nē ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm. ¹⁶ Kot kaj mẽ ã amnhĩ nhĩpêx anhỹr o ri apa nē apê Tĩrtũm kra mex nhũm mẽ ato mex rax nē. Nē mẽmoj to mẽ akutã nojarêt rãhã nē. Ka mẽ axãmnhĩx ajamakêtkati nē ri apa ho apa.

¹⁷ Nē na prem Kris ã ixtak rax nē nhũm ixkatut ã ixtak xà arĩ rãhã nē pa hte hã ixpa. Ixte Jejus Kris mã tanhmã amnhĩ nhĩpêx to xwỳnh ã ixto amnhĩrĩt xà na. Jakamã kê mẽhõ axte Jejus kot mẽ awỳr inhmēnh ã tee ri ixpumu nē tanhmã hã ixkukjêr to hkêt nē.

¹⁸ E ixkrãmnhwỳjaja. Kê Pahihti Jejus Kris mẽmoj to mẽ akutã nojarêt nē mẽ ato mex rãhã ho pa. Nà koja mẽ ato anē.

ãm ja pix na hapêx. Ixpê Pawre na pa ã mẽ amã kagà nhĩpêx nē mẽ awỳr mẽnh anē.

Epes

Pawre kot Epes kām Jejus kôt hkwỳjê hwỳr kagà nê mēnh

Pawre na pre kagàja nhípêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pê Epes kām Kris kwỳjê hwỳr hipêx nê kumê. Epes nhõ xwỳnhjaja Ijaew kêt xwỳnh na pre mē. Nhũm pre ra Pawre ma mē hwỳr mō nê mē kām Tĩrtũm kapêr jarēnh o ri mē hkôt pa nhũm mē hkwỳjaja kuma nê Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarēnh o ri mē hkôt pa. Hãmri nhũm mē hkwỳjaja Jejus ã unê nê krĩ pê Rõm wỳr kumê nê kamã haxà nhũm arĩ hkrĩ ho hkrĩ. Nom amarĩ hkrĩ hkêt nê. Na pre hte mē kot hwỳr mrar xwỳnhjê mã Tĩrtũm kapêr jarê. Nê krĩ hkwỳ hkôt Jejus kôt hkwỳjê mã kagà nhípêx nê mē hwỳr kurê. Jakamã na pre Epes kamã hkwỳjê hwỳr kagàja nhípêx nê mē hwỳr kumê.

Nê kagàja kamã hprĩ hã mē kot Jejus kôt amnhĩ xunhwỳr xwỳnhjê kot tanhmã amnhĩ nhípêx to ho pa hã mē kām karõ. Ra mē kot hkôt amnhĩ xunhwỳr jakamã te mē htipxi nê ri mē pa xwỳnh kot amnhĩ nhípêx pyrãk o amnhĩ nhípêx o pa hã mē kām hã karõ. Nê jar pika hkôt te mē kêp Kris nhĩ pyrã nê pa hã mē harê. ã na pre Pawre mē kām mēmoj jarê nê hã kagà anê nê mē kām:

¹ Pa Epes kām Kris kôt ixkwỳjaja. Xà mē amex na ka mē apa? E ot pa mē awỳr kagà nhípêx nê kumê. Ixpê Pawre na pa hipêx nê mē awỳr kumê. Ixpê Jejus Kris nhỹ hã mē ahkre ho mē ixpa xwỳnh na pa. Tĩrtũm kām hprãm xà hkôt. Tã pa ã mē awỳr kagà nhípêx nê mē awỳr mēnh anê. Mē apê Tĩrtũm krajê hwỳr. Na ka xep htem Jejus Kris kôt amnhĩ nhípêx mex o ri apa. ãm hãmri na ka htem ã amnhĩ nhípêx anê.

² E kê Mēpahpãm Tĩrtũm mē Pahihti Jejus Kris wa mē ato mex nê mēmoj to mē akutã nojarêt rãhã ho pa. Ka mē wa ÿ hã axãmnhĩx ajamakêtkati nê akĩnh pê tanhmã amnhĩ nhípêx to ho ri apa.

Tĩrtũm kot mē pakukamã amnhĩm mē parēnh ã harēnh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mē panhõ Pahihti Jejus Kris nhípêxà Tĩrtũmja mē pahto mex rãhã ho pa. Mē pahpê Kra Kris kwỳ hã mē pahpumunh kôt tanhmã mē pahto mex to ho pa. Ra wa Karõja mē pahkarõ mã gjêx jakamã te ra mē pahte kaxkwa kamã wa kuri mē pamex nê mē papa pyrãk. Tã ra mē pahte jar pika ja kamã paxãmnhĩx pajamakêtkati mē pamex nê ri papa jakamã kwa kêr pu mē amnhĩm ãm mex o mex ã harēnh rãhã nê.

⁴⁻⁵ Amnepê mã kormã mēmoj kêt ri na pre Tĩrtũm mē pakukamã amnhĩm mē parê. Kris kukwak ri amnhĩm mē parê. Tã mēmo kaxyw na pre ã mē pakukamã mē parēnh anê? ãm mē pahte kapêr kôt pix mã amnhĩ nhípêx o ri papa kaxyw. Jao tãm kot amnhĩ nhípêx pyrã nê noo mã tãm amnhĩ nhípêx o ri papa. Kãm mē pajapê jakamã na pre mē pakukamã tanhmã hamaxpêr to nê hamaxpêr o:

—Nà Ixkra Jejus Kris koja nhỹrmã ma mē hwỳr wrỳ nê mē nê ty. Tã mē kot mē nê htyk ã harēnh mar nê amnhĩ kaxyw hkôt hamaxpêr xwỳnhjaja kot paj mē ho ixkra. Nà kot paj ã mē hipêx anê. Anê.

⁶ No mē papajaja tanhmã mē pahte amnhĩ nhípêx mex to hã mē pahpumunh kôt na pre ã mē pahto hkra hã mē pajarēnh anhỹr kêt nê. ãm Kra Kris pix kukwak ri na pre ã mē pajarēnh anê. Kãm Kra japê jakamã na hte mēmoj to mē pahpê hkwỳ hã mē pakutã nojarêt rãhã ho pa. Jakamã na pu htem amnhĩ tã kãm mex o mex ã harēnh o papa.

⁷⁻⁸ Na pre Krisja mē panê htyk o Tĩrtũm mã mē pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhípêx anhỹr ã omunh xà hkôt mē pahte hkôt amnhĩ xunhwỳr xwỳnhjê nê mē pahte amnhĩ tomnuj rēnh pa. Koja aa tanhmã hã mē pahto hkêt nê. Pu mē axte amnhĩ amnhĩ tomnuj o papa hkêt nê. Hêxta waa nê. Kãm mē pajapê

htỳx kumrêx jakamã na pre ã mẽ pahto mex rax anê. ãm mex o mex nê àhpumunh o àhpumunh.

⁹⁻¹⁰ Amnepêm na pre hamaxpêr o:

—Nà na pa ra kaxkwa ho ixkato nê kamã mẽmoj piitã ho ixkato. Nê pika ho ixkato nê kamã mẽmoj piitã ho ixkato. Tã koja nhỹrmã Ixkra Kris mẽmoj piitã ho amnhĩptàr o pa. Kaxkwa kamã nê pika piitã hkôt mẽmoj piitã ho amnhĩptà nê tapxipix inhỹ hã kêp mẽõ Pahihti. Koja ã amnhĩ nhĩpêx anhỹr xà hã arĩgro kato nhũm ã amnhĩ nhĩpêx o pa anê. Nà ja na inhmã hprãm. Anê.

Ã Tĩrtũm amnhĩ kukamã hamaxpêr anhỹrja kôt na pre Kris kêp mẽ panhõ Pahihti hã harê. Tã nhỹrmã mẽ pahto amnhĩptàr kaxyw koja mẽ pakaxyw ãm. Amnepêm ri mẽ pa xwỳnhjê mã kot kormã ja ho amnhĩrĩt kêt tã ra jarãhã mẽ pamã ho amnhĩrĩt.

¹¹ Kris kukwak ri na pre amnhĩm mẽ parê. Ra kot mẽ pakukamã mẽ pahtã amnhĩ jarênh xà hkôt. ¹² Tã mẽ ixpê Ijaew kwỳ kumrêx mẽ ixte Kris kôt amnhĩ xunhwỳr jakamã koja mẽ piitã mẽ inhỹ hã Tĩrtũm mã mex o mex ã harênh o ri pa.

¹³ Nê mẽ kajaja na ka prem mẽ ixpyrà nê Tĩrtũm kapêr ma nê ajaxwỳja hkôt amnhĩ xunhwỳ. ãm hãmri na Tĩrtũm kapêrja. Tã ka prem ama nê hkôt amnhĩ xunhwỳ. Hãmri nhũm amnhĩ tã mẽ apumu nê kot inhĩpêx pyrà nê mẽ anê mẽ ate amnhĩ tomnuj piitã rênh pa nê mẽ ato hkra. Hãmri nê mẽ awỳr Karõ rê nhũm mẽ awỳr wrỳ nê mẽ akarõ mã agjê nê mẽ akamã pa ho pa. Kris kukwak ri na pre mẽ awỳr kurê. Amnepê mã na pre mẽ pakukamã hamaxpêr o:

—Koja mẽ Ixkra hkôt amnhĩ xunhwỳ pa ja hã mẽ omu nê mẽ ho ixkra nê mẽ hwỳr Ixkarõ rê. Hãmri nhũm mẽ hkarõ mã agjê nê mẽ kamã hkrĩ ho hkrĩ.

¹⁴ Anhỹr jakamã na pre mẽ pahwỳr kurê nhũm mẽ pahwỳr wrỳ nê mẽ pahwỳr agjê nê mẽ pakamã hkrĩ ho hkrĩ. Pu mẽ ja hã amnhĩ pumu nê pajamaxpêr o:

—Nà ra Tĩrtũm kot ixwỳr Karõ mênh jakamã na ixkarõ hwỳr axà nê kamã hkrĩ ho hkrĩ. Tã koja ra kot mẽ ixtã amnhĩ jarênh xà hkôt ja hã ixto mex nê. Ra kot ixto hkra kênã. Jakamã koja nhỹrmã ma amnhĩ wỳr ixto api pa kuri inhmex kumrêx nê ixpa ho ixpa. Hãmri nê kukwak ri axte tanhmã amnhĩ tomnuj to ho ri ixpa hkêt nê. Anê.

Jakamã koja mẽ piitã ã kot mẽ ho mex anhỹr ã amnhĩ tã kamã ama nê amnhĩ tã omu nê kãm mex o mex ã harênh rãhã ho pa.

Pawre kot Epes nhõ xwỳnhjê ho Tĩrtũm wỳr ã harênh

Piripos 1.9; Korosẽ 1.9-12; Wam Tesarõn 5.23; Sikũn Tesarõn 1.11, 2.16; Eprêw 13.20

¹⁵ Nê na ka xep htem amnhĩ kaxyw Kris kôt ajamaxpêr tỳx pê amã Tĩrtũm krajê piitã mẽ hkĩnh o mẽ ho mex o apa. Na pa pre mẽ ajarênh ma nê ixkĩnh tỳx nê. ¹⁶⁻¹⁸ Nê xatã mẽ ato Tĩrtũm wỳr o ri ixpa nê mẽ ato hwỳr o:

—Pa Mẽinhĩpêêxà maati Tĩrtũm. Nà amex o amex. Ka na ka pre mẽ ixwỳr mẽ inhõ Pahihti Jejus Krisja mẽ nhũm mẽ ixwỳr wrỳ nê hprĩ hã mẽ inhmã ate tanhmã amnhĩ nhĩpêx to ho apa hã ato amnhĩrĩt. Tã Epes kãm akrajaja na xep htem akôt pix mã ri amnhĩ nhĩpêx rãhã ho ri pa. ãm hãmri na htem ã amnhĩ nhĩpêx anê.

—Nê kwa Tĩrtũm. Kê Akarõ tanhmã mẽ hkrã hto kê mẽhprĩ hã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarênhja kê mẽ kãm hamaxpêr tỳx rãhã ho pa. Nê ate nhỹrmã mẽ ixpê akrajaja mẽ ixpiitã tanhmã mẽ ixto mex to jarênhja kê mẽ kãm hamaxpêr tỳx pê hkĩnh rãhã ho pa ho pa.

¹⁹⁻²⁰ —Nê kê mẽ axàhpumunh o axàhpumunh ã ate akupỹm Akra Kris o htĩr ã apumunh mex nê Tĩrtũm. Na ka pre axàhpumunh xà ho akupỹm ho htĩr nê ma akupỹm anhõ krĩ hwỳr ho api nê amnhĩ nhĩhkõ hã ỹr nhũm arĩ hkrĩ ho hkrĩ. Apyrà nê kot mẽ ixto amnhĩptàr kaxyw. ã axàhpumunh xà htỳx kot anhỹr. Tã kê akrajê piitã ja hã apumu nê axàhpumunh tỳx o ate tanhmã mẽ ixto ajuta hto ho apa hã apumu.

Anhỹr o na pa hte mẽ ato hwỳr o ri ixpa.

²¹ Nê Krisja àhpumunh tỳx o mẽkarõmnuti piitã hakrenh. Nê hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyràk o na htem htỳx ri amnhĩ

nhîpêx o pa pyrâk. Nê Krisja hihtÿx o pika piitã hkôt pahi piitã mē hakrenh par kumrêx. Nê hihtÿx o kot pika piitã hkôt mēmoj piitã mē hakrenh par. Jakamã mēhõ koja we tanhmã kot amnhî nhîpêx to hã kãm karõ rÿ kãm hamaxpêr gõ? Nà amrakati kumrêx. Ra kot ã amnhî nhîpêx anhÿr rãhã nê pa ho pa xwÿnh kênã. Nê hihtÿx o hihtÿx rãhã nê pa ho pa xwÿnh. Nê àhpumunh o àhpumunh rãhã nê pa ho pa xwÿnh. Nê hihtÿx o kot jar pika ja kôt mē pajakrenh par nê hihtÿx o Tirtûm nhõ krî kamã mē mēmoj piitã hakrenh par. Tã koja mēmoj piitã ho amnhîptâr rãhã htîr tûm nê pa ho pa.

Kris te kêp mē pahkrã pyrâk ã harênh

Rômãn 12.4; Wam Korît 12.12; Epes 4.16; Korosê 3.25

²² Na pre Tirtûmja Kra Kris nhîhkram mēmoj piitã haxâr pa. ÿ hã kot nhÿrmã ho amnhîptâr o pa kaxyw. Jakamã kot mē pahto amnhîptâr xwÿnh ã kêp mē panhõ Pahihti. Nê te kêp mē pahkrã pyrâk. Nê mē papajaja te mē pahpê ÿ pyrâk jakamã na pu htem hkôt ri amnhî nhîpêx o papa. ²³ Na hte mē panhîja mē pahkrã kamã mē pajamaxpêr xà hkôt tanhmã amnhî nhîpêx to. Ja pyrã nê na pu htem mē pahkrã pyrâk xwÿnh Krisja kapêr ma nê hkôt tanhmã ri amnhî nhîpêx to ho ri papa.

Koja mēhõ ãm hkrã pix nê ÿ hkêt nê pa hãmri nê mex kêt nê. Na htem hkrã nê mãânên ÿ nê pa nê mex nê. Ja pyrã nê na hte Kris mē pahte hkôt amnhî nhîpêx o papa hã mē pahpumu nê hkînh nê mex nê pa. Pu mē pajaxwÿja hkôt ri amnhî nhîpêx ã amnhî pumu nê pahkînh nê pamex nê papa ho papa.

2

Tanhmã Tirtûm kot mē pahto hkra hto ã harênh

Wam Korît 6.11; Xitre 2.11-3.7

¹ Nê amnepê mã na pu pre htem Tirtûm kàx ã tanhmã amnhî tomnuj to ho ri papa. ² Nê jar mē kot amnhî nhîpêx o amnhî nhîpêx. Jao amnhî tomnuj pix o ri papa. Nê mēkarõmnuti nhõ pahi Satanasti kapêr kôt pix mã ri amnhî nhîpêx rãhã nê. Na pre hte tanhmã mē pahkôt mē pahto ho pa. Mē pahte tanhmã amnhî tomnuj to kaxyw mē pamã mē pajamaxpêr punuj jagjê. Pu mē amnhî tã omunh kêt tã ÿ hã amnhî tomnuj o papa. Satanastija kêp mē kot Tirtûm kapêr kwÿm ri amnhî nhîpêx o mē pa xwÿnhjê nhõ pahihti na. Tã pu pre htem pahtÿx ri hkôt amnhî nhîpêx pix o ri papa. ³ Mē pahpiitã tanhmã amnhî tomnuj to hprãm xà hkôt pix mã tanhmã amnhî nhîpêx to. Nê mēmoj punuj kukamã pajamaxpêr nê ra hkôt ã amnhî tomnuj anê. ã na pu prem mnhi nhîpêx anê nhûm Tirtûm ja hã mē pahpumu nhûm ja kãm mex kêt nê. Jakamã nhûm tee ri mē pakukamã hamaxpêr nê hamaxpêr o:

—Hêxta waa nê. Na htem ixkapêr kwÿm ri tanhmã amnhî tomnuj to rãhã ho pa. ã mē kot amnhî nhîpêx anhÿr o mē pa xwÿnhjaja koja mē nhÿrmã ixri htîr tûm nê mex nê pa ho pa hkêt nê. Ixkînhã mē kot amnhî tomnuj xwÿnh jakamã tanhmã kot mē amnhî to nê ixri htîr tûm nê pa ho pa? Nà mē kot amnhî tomnuj mÿrapê koja mē nhÿrmã ma amnhî xà htÿx kamã hamak tûm xàta wÿr ma hapêx pa. Nà koja mē anê. Hêxta waa nê. Inhmã ma hwÿr mē pa prãm kêt tã ra ma hwÿr mē pa kaxyw.

Anhÿr o hamaxpêr. ⁴⁻⁵ Nê amnepê m kormã mē pahte amnhî tomnuj o papata ã te mē pahte amnhî xà htÿx kamã pajamak tûm xà hwÿr pryta ã mē papa pyrâk. Nom Tirtûm kãm mē pajapê nê mē pakamã ukapri jakamã na pre mē pahto mex rax nê. Nê akupÿm Kris o htîrja ri te ra mē pahte amnhî xà htÿx kamã pajamak tûm xà hwÿr pryta nê mē pahto ujanâr pyrâk o mē panhîpêx. Mē pakamã ukapri nê kãm mē pajapê ho ã mē panhîpêx anê. Amarî ã mē panhîpêx anê nê mē panê mē pahte amnhî tomnuj rênh pa. Jakamã kot puj mē pahte Kra hkôt amnhî xunhwÿr xwÿnhjaja nhÿrmã amnhî xà htÿx kamã mē hamak tûm xàta wÿr papa hkêt nê. ⁶ Ra Tirtûm akupÿm Jesus Kris o htîr jakamã te ra Jesus kôt akupÿm mē pahpê hkwyjê ho mē pahtîr pyrâk. Jakamã te ra õ krî kamã îhkô hã mē pamex kumrêx nê pahkrî pyrâk. ⁷ Mēmo kaxyw na pre Tirtûm kãm mē pajapê hkôt ã mē pahwÿr Jesus Kris mēnh nhûm mē panê htyk anê? Nà kãm mē pajapê

htÿx ã mẽ pahte pahprĩ hã amnhĩ tã omunh kaxyw na pre ã mẽ pahwÿr mēnh anē. Tã kot puj mẽ nhÿrmã kaxkwa kamã hwÿr pōj nhūm mẽ pamã amnhĩ jarēnh o:

—E mẽ amnē ixpumu. Inhmã mẽ ajapē htÿx jakamã na pa pre mẽ akamã ixukaprĩ xāj ma mẽ awÿr Ixkra Jejus Krisja mẽ nhūm amnhĩ grōnh kōt mẽ awÿr wrÿ nē mẽ anē ty. Inhmã mẽ ajapē htÿx jakamã na pa pre ã mẽ awÿr mēnh nhūm mẽ anē htyk anē. Inhmã mẽ apē ixkrajē japē xāj na pa pre ã mẽ ato mex rax anē.

Anhÿr o mẽ pamã kapēr hāmri nē mẽ pahto mex rãhã ho pa. ⁸⁻⁹ Xà na pu prem pahpē hkra hprãm xāj amnhĩ krã hkōt mẽ papamjaja kãm tanhmã amnhĩ to mex to nē kãm:

—E kwa Tĩrtūm. Na pa ã amnhĩ to mex anē nē ã amnhĩ to mex anē. Jakamã kwa ja hã ixpumu nē ixto akra nã?

Anhÿr o na pu prem amnhĩ to kuwÿ? Nà na pu prem ã amnhĩ to hwÿr anhÿr kēt nē. Na pu prem amnhĩ kaxyw hkōt pajamaxpēr nē hkōt amnhĩ xunhwÿ nhūm ja pix ã mẽ pahpumunh kōt mẽ panē mẽ pahte amnhĩ tomnuj rē nē mẽ pahto hkra. Kãm mẽ pajapē nē mẽmoj to mẽ pakutã nojarēt rãhã ho pa jakamã na hte ã mẽ panhĩpēx mex anē. Jakamã na pu htem amnhĩ tã omu nē pajamaxpēr o:

—Nà na xep hte Tĩrtūmja mẽ pahte tanhmã amnhĩ nhĩpēx to ho papa hã mẽ pahpumunh kōt mẽ pahto hkra hkēt nē. ãm mẽ pahte amnhĩ kaxyw kãm pajamaxpēr ã mẽ pahpumunh kōt pix mã na hte mẽ pahto hkra. Anē.

¹⁰ Nē Tĩrtūm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkēt ri na pu prem ã amnhĩ nhĩpēx anhÿr kēt nē. Tã Jejus Kris kōt amnhĩ xunhwÿ nhūm Tĩrtūm ja hã mẽ pahpumu nē mẽ pamã mẽ pahte amnhĩ nhĩpēx nyw jagjē pu mẽ ÿ hã tãm amnhĩ nhĩpēx o ri papa. Amnepēm tanhmã kot mẽ pakukamã hamaxpēr to xà hkōt. No na hte tanhmã mẽ pahte amnhĩ krã hkōt amnhĩ nhĩpēx to hã mẽ pahpumunh kōt mẽ pahto hkra hkēt nē.

Tĩrtūm krajaja te kot axpēn to htō nē htōx pyrāk

Karatas 3.28; Korosē 1.21-23

¹¹ E mẽ apē Ijaew kēt xwÿnhjaja. Na ka htem mẽ akatorxà nhōhy rūm ajapōj hāmri nē mẽ ixpē Ijaew pyrã nē amnhĩ my kwÿrÿt kà jakàr kēt nē. Jakamã na pre ixkwÿjaja mẽ akurom amnhĩ jakàr ã amnhĩ to jarkrar o ri pa nē amnhĩ jarēnh o:

—Ra mẽ ixte amnhĩ my kwÿrÿt kà jakàr ã mẽ ixpumunh kōt na hte Tĩrtūm mẽ ixto hkra. Tã Ijaew kēt xwÿnhjaja kot mẽ ixkĩnhã amnhĩ jakàr kēt jakamã mẽ kēp hkra hkēt. Nē mãānēn mẽ kēp mẽ pahkwÿ hkēt.

Anhÿr o mẽ ajarēnh o pa. ¹² ãm hāmri na prem mẽ apē mẽ ixkwÿ hkēt ã mẽ ajarē. Na pa prem mẽ akurom amnhĩ my kwÿrÿt kà jakà nē mẽ akurom Kris kamã ijamak o ri ixpa. Jakamã nhūm Tĩrtūm kot mẽ ixto mex ã amnhĩ jarē pa mẽ mẽ apyrã nē tee ri amnhĩ kukamã ijamaxpēr o ri ixpa hkēt nē. Nē mẽ akurom amnhĩ kaxyw Tĩrtūm mã ijamaxpēr. Nà ãm hāmri na prem mẽ apē mẽ ixkwÿ hkēt ã mẽ ajarē. ¹³ Te Tĩrtūm kàx ã ri mẽ apa pyrāk tã ka mẽ arĩ ã amnhĩ nhĩpēx anhÿr kēt nē. Jejus Kris kot mẽ panē htyk nhūm mẽ ate hkōt amnhĩ xunhwÿr jakamã ra mẽ apē hkwyÿ. Jao arĩ hkàx ã ri apa hkēt nē. Te mẽ ixpē Ijaew kwÿ pyrã nē hpãnhã kuri ra ri apa pyrāk. ¹⁴ Jakamã na pu htem Kris kukwak ri ra axpēn nhĩpēx nyw o axpēn nhĩpēx o ri papa. Mē ixpē Ijaewjaja nē mẽ apē Ijaew kēt xwÿnhjaja na pu htem te ra ixkre tipxi kamã ri papa pyrāk. Nom amnepēm na pu prem ã axpēn nhĩpēx anhÿr kēt nē. Mē pahte amnhĩ nhĩpēx tūmja ahpÿnhã na pre. Na pu prem pamã axpēn kurē nē axpēn kàx ã ri papa. Nē nhÿri axpēn pumu nē te pahte axpēn pumunh kēt pyrã nē nhām parĩt o ri mra. Tã nhūm Kris mẽ panē htyk o mẽ pahte amnhĩ tomnuj piitã hpãnhã amnhĩrer pa. Mē ixpē Ijaew nē mẽ apē Ijaew kēt xwÿnhjaja. Nē htyk o te ra kot mẽ pahte axpēn nhōrkwyÿ hwÿr axpēn wÿr o papa pyrāk. Jao mẽ pamã axpēn kurē ho hapēx nē hpãnhã tãm axpēn kaxyw mẽ paxunhwÿ pu mẽ hpãnhã axpēn to mex rãhã ho ri papa. ¹⁵ Amnepēm Mojes kot Tĩrtūm nhÿ hã mẽ ixpē Ijaew mẽ ixte tanhmã amnhĩ nhĩpēx to ho ixpa hã karōja. Na pa prem mẽ apē Ijaew kēt xwÿnhjaja mẽ ate Tĩrtūm kōt amnhĩ nhĩpēx kēt ã mẽ apumu nē mẽ akamã inhgryk nē. Nē axpēn mã mẽ ajarēnh o:

—Nà mẽ pahkĩnhã mẽ kot Mojės kapěr kôt amnhĩ nhĩpêx kêt jakamã koja Tĩrtũm mẽ ho hkra hkêt nẽ.

Anhỹr tã nhũm Kris mẽ pahwỳr wrỳ nẽ mẽ pahpiitã mẽ panê htyk o mẽ pahte hkôt amnhĩ xunhwỳr ã mẽ pahpumunh kôt pix mã mẽ pahto Tĩrtũm kra. Jakamã pa mẽ axte mẽ ate Mojės kapěr kôt amnhĩ nhĩpêx kêt ã mẽ apumunh kôt mẽ apê Tĩrtũm kra hkêt ã mẽ ajarênh kêt nẽ. Hãmri nẽ mẽ ixpê Ijaew nẽ mẽ apê Ijaew kêt xwỳnhjaja pu mẽ axte axpẽn kãm pagryk o ri papa hkêt nẽ. Ra te ixkre tipxi kamã mẽ pahte axpẽn kôt ri papa pyræk.

¹⁶ Kris na pre pĩ kahpa hã mẽ panê htyk o ã mẽ panhĩpêx anẽ nẽ mẽ pahte axpẽn kôt amnhĩ nhĩpêx o papa kaxyw mẽ paxunhwỳ. Nom Tĩrtũm jamaxpěr xà hkôt ã mẽ panhĩpêx anẽ. Jakamã na pu htem arĩ pamã axpẽn kurê ho papa hkêt nẽ. ¹⁷ Na pre Kris mẽ pahwỳr wrỳ nẽ ã mẽ panhĩpêx anẽ. Mẽ apê Ijaew kêt xwỳnhjaja mẽ ate kormã Tĩrtũm kapěr mar kêt xwỳnhjaja nẽ mãânẽn mẽ ixpê Ijaew mẽ ixte kapěr mar mex xwỳnhjaja nhũm pre akupỹm tãm mẽ pahte axpẽn kôt amnhĩ nhĩpêx o papa kaxyw mẽ paxunhwỳ. ¹⁸ Hãmri nhũm Tĩrtũm mẽ pahwỳr amnhĩ Karõ rẽ nhũm mẽ pahkarõ mã agjê. Kris kukwak ri pix mã mẽ pahwỳr kurê pu mẽ ÿ hã paxàmnhĩx ri kãm tanhmã amnhĩ jarênh to ho ri papa. ¹⁹ Hãmri nẽ te mẽ pahpê nhãm axpẽn kaxyw mẽ urojê pyrà nẽ axpẽn kàx ã ri papa hkêt nẽ.

Te mẽ pahpê Tĩrtũm nhõrkwỹ pyræk ã mẽ pajarênh

Wam Korĩt 3.16; Sikũn Korĩt 6.16; Wam Pêtre 2.5

²⁰ Nẽ mẽ pahpê Jejus kwỳ jakamã te mẽ pahte ixkre tipxikamã ri papa pyræk. Nẽ te mẽ pahpê ixkre nhĩpêx mex pyræk. Nẽ Kris te kệp ixkre hkrax mã kuhê xà nẽ kỳxpê kãm nõr xà maatija pyræk. Nẽ mẽ kot Jejus nhỹ hã mẽ ahkre xwỳnhjaja nẽ mẽ kot Tĩrtũm nhỹ hã kapěr o ri mẽ pa xwỳnhjaja te mẽ kệp ixkre nhõkwa êja pyræk. Nẽ mẽ papajaja te mẽ pahpê ixkre nhĩmõk ã põja pyræk. ²¹ Ixkre mã kuhê xà nẽ kỳxpê kãm nõr xà maati kukwak ri pix mã na hte õkwa ê nẽ hã põja kỳxpê mex nẽ axpẽn tã harir. Ja pyrà nẽ ãm Kris kukwak ri pix mã na pu htem te ixkre tipxi kamã ri papa pyræk o axpẽn nhĩpêx mex o ri papa. Te mẽ pahpê mẽ kot ixkre rax kumrêx nhĩpêx o mõi nhũm muxre nẽ ãm xwỳnhta pyræk.

²² Na htem amnhĩm õrkwỹ nhĩpêx nẽ hipêx pa nẽ hwỳr agjê nẽ kamã pa ho pa. Ja pyrà nẽ na hte Tĩrtũm Karõja mẽ pahpê hkrajê karõ mã agjê nẽ mẽ pakamã pa ho pa. Te mẽ pahpê Tĩrtũm nhõrkwỹ pyræk. Mẽ ixpê Ijaew nẽ mẽ apê Ijaew kêt xwỳnhjaja Tĩrtũm mã te mẽ pahpê õrkwỹ pyræk.

3

Pawre kot Ijaew kêt xwỳnhjê mã mẽmoj to amnhĩrĩt ã harênh

Rõmãn 15.14-21; Korosê 1.24-29

¹ Tã te mẽ pahpê Tĩrtũm nhõrkwỹ pyræk jakamã na pa hte jar mẽ hagjênh xà kamã mẽ ato hwỳr rãhã ho ixkrĩ. Na pa pre hte ma mẽ apê Ijaew kêt xwỳnhjê hwỳr ixpa nẽ ixprĩ hã mẽ amã Jejus kapěr jarênh o ri mẽ akôt ixpa. Mỳrapê na prem ixpynê nẽ ijaxà pa arĩ jar ixkrĩ ho ixkrĩ. Nom arĩ amnhĩ kaxyw Tĩrtũm mã ijamaxpěr tỳx pê mẽ ato hwỳr rãhã ho ixkrĩ. ² Na pre kãm ijapê hã mẽ apê Ijaew kêt xwỳnhjê kaxyw ixãm. Ma ixte ri mẽ akôt ixpa nẽ mẽ amã kapěr jarênh o ri mẽ akôt ixpa kaxyw. Ra mẽ ate ja hã ijarênh mar mex. ³ Na pre mẽ pahto hpimràatã tanhmã mẽ pahto mex to hã inhmã amnhĩ to amnhĩrĩt pa pre omu. Mẽ kajaja nẽ mẽ pajaja. Pika piitã hkôt mẽ piitã tanhmã mẽ ho mex to. Na pre kormã kot mẽhõ mã ja jarênh kêt tã inhmã ho amnhĩrĩt pa pre omu. Tã kagà ja kamã kot paj mẽ amã hkwy ho grêre nẽ ho amnhĩrĩt nẽ mẽ amã hã kagà ka mẽ ixpyrà nẽ kamã harê nẽ ama. ⁴ Jao aprĩ hã mar mex nẽ. ⁵ Amnepêm mẽ pahkêt ri mẽ pa xwỳnhjê mã Tĩrtũm kot ja ho amnhĩrĩt kêt tã nhũm Karõ mẽ ixkwỳjê kumrêx mã ho amnhĩrĩt. ÿ hã kapěr o ri mẽ pa xwỳnh mẽ mẽ ixpê Jejus nhỹ hã mẽ ajahkre o mẽ ixpa xwỳnhjê kumrêx mã ho amnhĩrĩt. Mẽ ixte kãm tanhmã amnhĩ nhĩpêx to ho ixpa xwỳnhjê mã ho amnhĩrĩt

pa prem omu. ⁶ Na pre mẽ inhmã tanhmã mẽ ato amnhĩrĩt to pa prem ja hã mẽ apumu nẽ mẽ akukamã ijamaxpẽr o:

—Nà ãm hãmri koja xep Ijaew kêt xwỳnhjaja mẽ ixpê Ijaew pyrã nẽ Tĩrtũm kapẽr ma nẽ Jejus Kris kôt amnhĩ xunhwỳ nhũm Tĩrtũm ã mẽ kot amnhĩ nhĩpêx anhỹr ã mẽ omu nẽ mẽ ixpyrã nẽ mẽ ho hkra nẽ mẽ ho mex o pa. Anẽ.

⁷ Tã nhũm Tĩrtũmja mẽ awỳr inhmẽ. Ixte mẽ amã ja jarẽnh o ri mẽ akôt ixpa nhũm tokyx mẽ ate mar kaxyw. Na pre ixto mex nẽ kãm hprãm xà hkôt mẽ akaxyw ixãm nẽ ixte ã hã kãm tanhmã amnhĩ nhĩpêx to ho ixpa kaxyw ixto ixihitỹx nẽ mẽ awỳr inhmẽ.

⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyrãk. Ixkwỳjaja ja kaxyw mex o kot ijakrenh tã nhũm pre ixpumu nẽ tanhmã hamaxpẽr to nẽ mẽ akaxyw ixãm nẽ mẽ awỳr inhmẽ. Ixte mẽ amã mẽmoj mex kumrẽx jarẽnh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwỳnhjê hwỳr mỗ nẽ mẽ kãm Jejus Kris kapẽr jarẽnh o ri mẽ hkôt apa. Nẽ mẽ kãm: “Kot kaj mẽ Jejus Kris kôt amnhĩ xunhwỳ hãmri nẽ kukwak ri amex nẽ apa.” Anẽ. ⁹ Kojã mẽ apê Ijaew kwỳjê pyrã nẽ amnhĩ kaxyw Ixkra Kris kôt hamaxpẽr nẽ hkôt amnhĩ xunhwỳ pa hã mẽ omu nẽ mẽ ho ixkra. Kormã aa ixte mẽ kãm ja hã amnhĩ to amnhĩrĩt kêt tã pa akumrẽx mã harẽ. E ma mẽ hkôt ri mẽ kãm ã ijarẽnh anhỹr o ri apa kê mẽ ijarẽnh ma.

Anhỹr o mẽ pahto kator xwỳnh maatija inhmã kapẽr. ¹⁰ Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapẽr o mẽ wryk xwỳnh pytãr xwỳnhjaja nẽ mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpẽn mã tanhmã Tĩrtũm jarẽnh to kaxyw. Nẽ harẽnh o:

—Kokỹỹ. Tĩrtũm àhpumunh tỳx o àhpumunh tỳx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nà Tĩrtũm àhpumunh o àhpumunh nẽ hihtỹx o hihtỹx. Anẽ.

Koja mẽ ate amnhĩ to mex o apa hã mẽ apumu nẽ ã axpẽn mã Tĩrtũm jarẽnh anẽ.

¹¹ Amnepêm kormã mẽmoj kêt ri na pre Tĩrtũm mẽ pakukamã mẽ pahtã tanhmã amnhĩ jarẽnh to hãmri nẽ Jejus kukwak ri ã mẽ panhĩpêx anẽ. Jao mẽ piitã mẽ kãm àhpumunh o àhpumunh ã amnhĩ to amnhĩrĩt. ¹² Tã pu mẽ ra Jejus kukwak ri amnhĩ kamã pamã Tĩrtũm puma hkêt nẽ. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhĩx ri kãm amnhĩ jarẽnh rãhã ho ri papa. Te ra pahte hwỳr paxãpir nẽ pano ho omunh nẽ kãm pakapẽr o pakuhê pyrãk. ¹³ Jakamã kwa kêr ka mẽ kot mẽ atã tanhmã ixtomnuj to hã ijarẽnhja ma nẽ tee ri ixkukamã ajamaxpẽr hkêt nẽ. Kwãr mẽ mãmri tanhmã inhĩpêx to. ãm ixte mẽ amã amnhĩ jarẽnh ma nẽ axpẽn mã ijarẽnh o:

—Hêxta waa nẽ. Mãn Pawre kãm mẽ pajapê hã na pre amnhĩ grõnh kôt mẽ pamex kaxyw mẽ pahwỳr mra nẽ mẽ pamã Tĩrtũm kapẽr jarẽnh o pa. Mẽ kot ja hã tanhmã hipêx kati hto htã nhũm jam urer kêt nẽ. Anẽ.

*Kris kãm mẽ pajapê kamã tanhmã mẽ panê amnhĩ nhĩpêx to
Juãw 3.16; Wam Juãw 3.1*

¹⁴ Nẽ na pa hte mẽ ato Mẽpanhĩpêxã maati hwỳr kãm ixihitỹx o ixpa. ¹⁵ Kêp mẽ pahte hkôt amnhĩ xunhwỳr xwỳnhjê nhõ Pahi Maati mex kumrẽx na. Kra hkwyjaja ra kaxkwa kamã kuri htĩr tũm nẽ pa ho pa nẽ arĩ pyka ja kamã mẽ pahpê hkwyjaja kormã jar papa. Nom te mẽ pahpiitã mẽ pahte ixkre tipxi kamã Tĩrtũm kôt ri papa pyrãk. ¹⁶ Jakamã na pa hte mẽ ato hwỳr o:

—Pa Tĩrtũm. Nà amex o amex. E ot pa Epes nhõ xwỳnhjê ho awỳr o ixkrĩ. Kwa kê Akarõ mẽ kãm axàhpumunh xà hkwy gõ kê mẽ akôt ri amnhĩ nhĩpêx rãhã ho pa.

¹⁷ —Nẽ kê mẽ amnhĩ kaxyw Kris kôt hamaxpẽr tỳx o pa. Te mẽmo pĩ hpãr jarê kot pika kaxwỳnh kãm pimànẽ nẽ pika jamỳnh tỳxta pyrãk. Nhũm kôk xapêr tỳx tã tee kot kãm mẽnẽ prãmta pyrãk. Kê mẽ pĩ hpãr jarê kot pika jamỳnh pyrã nẽ kãm axpẽn kĩnh o pa. Jao mẽmoj to axpẽn kutã nojarêr rãhã ho pa.

18-19 —Ně kê krī piitā hkôt mẽ akrajê pyrà nê amnhĩ tã Kris kãm mẽ hapê htỳx o mẽ hapê htỳx ã amnhĩ pumu. Jao uràk nê mẽ kãm axpên kĩnh tỳx o pa. Nê kê mẽ ate amnhĩ nhĩpêx pix o amnhĩ nhĩpêx rãhã ho pa. Nê ajamaxpêr pix o hamaxpêr rãhã ho pa. Jao te mẽmo pĩ hpàrta pyrà nê akôt hihtỳx nê. Anê.

²⁰ Kot puj mẽ ã amnhĩ to Tĩrtũm wỳr anê nhũm mẽ pama nê ra àhpumunh tỳx xà ho ã mẽ panhĩpêx anê. Ra kot mẽ pakamã pa ho pa kênã. ²¹ ã Tĩrtũm Jejus Kris kukwak ri mẽ pahpê hkrajê nhĩpêx anhỳr jakamã kwa pu mẽ pahpê hkra xwỳnhjaja kêr pu mẽ kãm mex o mex ã harênh rãhã ho papa. Nà kot puj mẽ ã kãm anhỳr o papa.

4

Te ixkre tipxi kamã axpên kôt ri mẽ papa pyràk

Rômãn 15.5; Piripos 2.1-4; Korosê 3.12-17; Wam Pêtre 3.8

¹ Nê ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ amã ixkapêr nê hã kagà anhỳr o ixkrĩ. Kwa kêr ka mẽ Tĩrtũm kot amnhĩ nhĩpêx kôt amnhĩ nhĩpêx mex rãhã ho ri apa. Ja kaxyw na pre amnhĩ kôt mẽ awỳ ka prem hkôt amnhĩ xunhwỳ.

² Nê kêr ka mẽ amã amnhĩ to rax o akwỳjê jakrenh prãm o ri apa hkêt nê. Nê mẽ agryk tokyx anhỳr kêt nê. ãm axpên kãm axukaprĩ pix o mãn ri axpên kôt apa. Kê mẽhõ tee tanhmã ri mẽ ato htã ka mẽ kamã agryk tokyx anhỳr kêt nê. ãm mẽ amã ri axpên hkĩnh pix o mãn ri axpên kôt apa. ³ Ra Tĩrtũm Karõ kot mẽ pahkarõ mã giêx par jakamã te mẽ pahte ixkre tipxi kamã axpên kôt ri mẽ papa pyràk. Jakamã kêr ka mẽ axpên to mex pix kukamã mãn kêt ajamaxpêr o ri axpên kôt apa. Nê tãm axpên nhĩpêx. Jao ajamakêtkati nê axàmnhĩx ri axpên kôt ri apa ho apa. ⁴ Te mẽ pahte ixkre tipxi kamã ri axpên kôt papa pyràk jakamã mẽ pahpiitã mẽ pahkarõ kamã Tĩrtũm Karõja hkrĩ ho hkrĩ. Jakamã kot puj mẽ nhỹrmã ma õ krĩ hwỳr api nê kamã mẽ pamex rãhã papa ho papa.

⁵ Nê mẽ panhõ Pahihtija ãm pixii. Na pu prem pahpiitã amnhĩ kaxyw hkôt pajamaxpêr jao ra mẽ pahpê hkraa. Tã mẽ pahpê Kris kwỳ hã amnhĩ to amnhĩrĩt kaxyw na prem Tĩrtũm mã mẽ pahkrã kumrã. ã mẽ panhĩpêx anhỳr o axpên pyràk o mẽ panhĩpêx o pa anê.

⁶ Nê Tĩrtũm haxwỳja ãm pixii. Kêp mẽ pahpiitã mẽ panhĩpêxà maati na. Na hte mẽ pahpê hkrajê mã àhpumunh xà hkwỳ gõ pu mẽ ã hã kãm tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpên kôt papa pyràk.

Kris kot ahpỳnhã tanhmã mẽ pahto mex to hã harênh

Rômãn 12.3-8; Wam Korĩt 12.1-12; Wam Pêtre 4.10-11

⁷⁻⁸ Nê Tĩrtũm kapêr ã kagà htũm kot Kris jarênh kot:

Na pre mẽ kot kutã amnhĩ xunhwỳr xwỳnhjê pytàr pa nê ma akupỳm kaxkwa hwỳr api. Tã arĩ jar pika hkôt mẽ pahpê hkwỳjê mã tanhmã mẽ pahto paxihtỳx to ho pa.

Na hte Krisja tanhmã mẽ pahte ahpỳnhã kãm amnhĩ nhĩpêx to ho papa kaxyw tanhmã mẽ pahto paxàhpumunh to. Kãm hprãm xà hkôt. ⁹ Tĩrtũm kapêr ã kagà htũm kot akupỳm kaxkwa hwỳr àpir ã harênh. ãm tapxipix na pre ã pika hwỳr wrỳk nê akupỳm kaxkwa hwỳr àpir anê. Na pre ty nhũm mẽ haxà. Hãmri nhũm akupỳm htĩr nê kato nê ma akupỳm api. Tapxipix na pre ã amnhĩ nhĩpêx anê. ¹⁰ Tã akupỳm kaxkwa hwỳr àpir xwỳnhta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ.

¹¹ Na pre ahpỳnhã tanhmã mẽ pahto mex to. Ahpỳnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwỳ.

Nê mẽ pahkwỳjaja mẽ pahte krĩ piitã hwỳr pamrar nê ã hã hkrajê mã kapêr jarênh o papa kaxyw mẽ paxunhwỳ.

Nê mẽ pahkwỳjaja mẽ pahte krĩ pixi kamã Tĩrtũm nhỹ hã hkrajê jahkre ho ri mẽ hkôt papa kaxyw mẽ paxunhwỳ.

Nê mẽ pahkwỳjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nê Jejus kôt amnhĩ xunhwỳr ã mẽ kãm harênh o papa kaxyw mẽ paxunhwỳ.

Nê mẽ pahkwỳjaja mẽ pahpê pastô kaxyw mẽ paxunhwỳ.

Ně mẽ pahkwỳjaja mẽ pahte mẽ kãm Tĩrtũm kapěr ã kagà jarēnh o mẽ ahkre ho papa kaxyw mẽ paxunhwỳ.

¹² ã kot puj mẽ pahpiitã ahpỳnhã Kris mã tanhmã amnhĩ nhĩpêx to ho ri papa aně. Kot puj mẽ ã mẽ hipêx anhỳr o ri papa nhũm mẽ pamar tỳx nẽ. Nẽ gaa nẽ mẽ pahpyrà nẽ Tĩrtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa. ¹³ Nẽ gaa nẽ mẽ pahpiitã mẽ pahpê Tĩrtũm kra hã Jejus kot amnhĩ nhĩpêx kôt omunh mex nẽ. Nẽ amnhĩ kaxyw hkôt pajamxpěr tỳx nẽ. Jao te ra hkôt mẽ paxaptàr mex pyràk. Nẽ te kot amnhĩ nhĩpêx pyràk o amnhĩ nhĩpêx.

¹⁴ Měhprĩrejaja na htem nhãm hamaxpěr nẽ nhãm hamaxpěr o pa. Te kòk xàpêr nẽ nhãm mẽmoj to mrar nẽ nhãm mẽmoj to mrar pyràk. Nom kêr pu mẽ ho mẽ uràk kêt nẽ. Æm Kris kôt pix mã pajamxpěr tỳx o papa. Jakamã nhũm mẽ tee ri mẽ pahte hkwym ri tanhmã amnhĩ tomnuj to hprãm xàj tanhmã mẽ pahto kaprỳ. Nom kêr pu mẽ mẽ mar kêt nẽ. Æm pakatàt kôt mẽ àptàr kot amnhĩ nhĩpêx o amnhĩ nhĩpêx o papa. Jao Kris kôt axpẽn to paxihtỳx o papa. ¹⁵ Tãm axpẽn mã pakapěr nẽ pamã axpẽn kĩnh o axpẽn mã paxêx kêt nẽ. Kwa kêr pu mẽ ã amnhĩ nhĩpêx anhỳr o mãn papa. Jao te mẽ pahkrã Kris kot amnhĩ nhĩpêx pyràk o amnhĩ nhĩpêx mex o mỗ.

¹⁶ Nẽ mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamxpěr xà hkôt axpẽn kôt ahpỳnhã tanhmã axpẽn to ajuta hto. Te ixkre pixi kamã mẽ pahte axpẽn kôt tanhmã axpẽn to ajuta hto ho ri papa pyràk.

Kris kôt mẽ pahte amnhĩ nhĩpêx nyw ã mẽ pamã karõ

Korosẽ 3.5-11; Wam Pêtre 4.7

¹⁷ E kot paj Pahihti nhỹ hã mẽ amã mẽmoj jarẽ nẽ nẽ mẽ amã ixkapěr kãm ixihtỳx nẽ ka mẽ inhma. Nà kêr ka mẽ axte mẽ kêp Tĩrtũm kra hkêt xwỳnhjê kot amnhĩ nhĩpêx o amnhĩ nhĩpêx o ri apa hkêt nẽ. Na htem htỳx ri tanhmã hamaxpěr punuj to ho ri amnhĩ tomnuj o pa. ¹⁸ Jao Tĩrtũm mã hamaxpěr kêt nẽ pa. Kãm hamaxpěr prãm kêt kumrêx nẽ pa. Te mẽ kot omunh nẽ nhãm hkrã pyràk o amnhĩ nhĩpêx. Rỳ te mẽhõ wa kot axpẽn kãm gryk kãm axpẽn nhĩpêx pyràk o hipêx. Jao te kamàt kô kamã ri pa pyrà nẽ Tĩrtũm kot amnhĩ nhĩpêx pumunh kêt nẽ pa. Jakamã koja mẽ nhỹrmã kuri htĩr tũm nẽ pa hkêt nẽ. ¹⁹ Na htem tanhmã amnhĩ tomnuj to htã amnhĩ kamã hpijaàm kêt nẽ pa. Nẽ axpẽn kamã hpijaàm kêt rãhã ho pa. Æm amnhĩ pix kukamã hamaxpěr nẽ tanhmã amnhĩ tomnuj to ho ri pa. ²⁰⁻²¹ Nom Jejus Krisja ã kot amnhĩ nhĩpêx anhỳr kêt. Mẽ kurom tãm kot amnhĩ nhĩpêx mex o pa xwỳnh nẽ tãm kapěr o pa xwỳnh na. Na pa pre ma mẽ awỳr mỗ nẽ ixprĩ hã mẽ amã ja hã harẽ ka prem inhma nẽ inhmar tỳx nẽ. ²² Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nẽ. Ja na omnuj tỳx. Na ka prem ã amnhĩ nhĩpêx aně nẽ ajamxpěr punuj pix o ri apa. Jao amnhĩ tomnuj rãhã nẽ. Tã kêr ka mẽ amnhĩ nẽ awry hã mēnh pyrà nẽ axte ã amnhĩ tomnuj anhỳr o ri apa hkêt nẽ.

²³ —Nẽ kêr ka mẽ axte mẽ ajamxpěr tũm nẽ mẽ ate amnhĩ nhĩpêx tũm kôt ri amnhĩ nhĩpêx kêt nẽ. Nẽ mẽ ajamxpěr nyw nẽ mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrynh nẽ rēnh nẽ hpãnhã nyw jagjêx nẽ ri hã pata pyrà nẽ ãm amnhĩ nhĩpêx nyw kôt pix mã amnhĩ nhĩpêx o ri apa. ²⁴ Mẽ ajamxpěr nyw nẽ mẽ ate amnhĩ nhĩpêx nywja axtem na. Te Tĩrtũm jamaxpěr nẽ kot amnhĩ nhĩpêxta pyràk. Jakamã kwa kêr ka mẽ kãm hprãm xà hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nẽ kapěr kôt ri amnhĩ nhĩpêx. Aně.

Na pa pre ã mẽ amã ixkapěr aně. Tã kêr ka mẽ arĩ ixkapěr kôt pix mã amnhĩ nhĩpêx. ²⁵ Mẽ pahpê Kris nhĩ jakamã te pahte ixkre htipxi kamã axpẽn kôt amnhĩ nhĩpêx pyràk jakamã kwa mẽ axte axpẽn mã mẽmoj to axêx kêt nẽ. Nẽ amarĩ axpẽn xỏ ri axpẽn mã mẽmoj to axêx kêt nẽ. Æm tãm axpẽn mã mẽmoj jarēnh o ri apa.

²⁶ Nẽ kot kaj mẽ mẽmoj tã agryk japêr. Rỳ mẽhõ kamã agryk rỳ amarĩ agryk japêr. Tã kêr ka ho ajapêx tokyx aně agryk japjê hkêt nẽ. Kêr kê kormã kamàt kêt ri ka akupỳm tãm akrã nhũm ja amã mex nẽ. ²⁷ Nom kot ka mẽ arĩ kamã agryk o ri apa nhũm mẽkarõmnuti

nhô pahi Satanastija ja hã mẽ apumu nê te mẽ ate amnhĩ tomnujta ã mẽ apynênh pyræk o mẽ anhĩpêx. Ka mẽ ra hkôt tanhmã amnhĩ tomnuj to. Ja pymaj kêr ka mẽ agryk japjê hkêt nê. Satanasti kãm hprãm xà hkôt ã amnhĩ nhĩpêx anhỹr kêt nê.

²⁸ Nê mẽ axàhkĩnh o mẽ apa xwỳnhjaja kêr ka mẽ axte mẽ kêp axàhkĩnh hkêt nê. Mẽmoj tã apê nê hpãnhã kàxpore jamỳ nê ho amnhĩm awjaprô. Nê mẽ kêp amrakati xwỳnhjê mã mẽmoj japrô o ri apa. Kêr ka mẽ ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhỹr o ri apa.

²⁹ Nê kêr ka mẽ amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mẽ amã axpên kĩnh nê mẽ amã axpên to mex pix prãm xà tãm axpên mã ri akapêr o ri apa.

³⁰ Tĩrtũm na pre mẽ pahwỳr amnhĩ Karô rê nhũm mẽ pahpê hkra hã mẽ pahkarô mã agjê nê mẽ pakamã hkrĩ ho hkrĩ. Kojã mẽ pakamã hkrĩ ho hkrĩ rãhã nhũm nhỹrmã Tĩrtũm amnhĩ wỳr mẽ pahto api pu mẽ kuri pahtĩr tũm nê papa ho papa. Jakamã kwa kêr ka mẽ tanhmã amnhĩ tomnuj to ho amnhĩ kamã Tĩrtũm Karô mã hkaprĩ jagiênh kêt nê. Nê kãm hpijaàm jagiênh kêt nê. Kojã mẽ pahte amnhĩ tomnuj ã mẽ pahpumu nê mẽ pahkaga hkêt tã tee ri ja hã mẽ pahpumu nê hkaprĩ nê. Jakamã kêr pu mẽ ãm kãm hprãm xà hkôt pix mã tanhmã ri amnhĩ nhĩpêx to ho ri papa.

³¹ Nê kêr ka mẽ axte ri axàhkurê ho ri apa hkêt nê. Nê agryk kãm axpên mã tanhmã akapêr punuj to hkêt nê. Rỳ axpên japyr ho ri apa hkêt nê. Nê atỳx ri axpên tã apêr o apikênh kêt nê. Nê ri axpên tã mẽ kãm axàmnhênh kêt nê. ³² Kêt mẽ ãm axpên to mex pix nê axpên kãm axukaprĩ ho ri apa. Nhũm mẽhõ tanhmã mẽ ato ka mẽ ãm amnhĩ tã omu nê tanhmã ho hkêt nê tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mẽ pahte amnhĩ tomnuj grãnh pa nê axte kãm hamaxpêr kêt nê. Tã kêr ka mẽ uræk nê mẽhõ kot tanhmã atomnuj tota tokyx ho ajamakêtkati nê axte kãm ajamaxpêr kêt nê.

5

¹ Nê kojã mẽhõ kãm hkra japê nhũm amnhĩ tã omu nê hkĩnh nê. Hãmri nê nhỹrmã hkra nê amnhĩ pyrã nê kãm hapê nê. Ja pyrã nê Tĩrtũm kãm mẽ pahpê hkwyjê japê jakamã kêr pu mẽ amnhĩ pyrã nê pamã pahkwỳjê hkĩnh tỳx o papa. ² Kris haxwỳja kãm mẽ pajapê jakamã na pre htyk o mẽ panê mẽ pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpêr kêt nê ã mẽ panê amnhĩ nhĩpêx anê. Tã ã kãm mẽ pajapê anhỹr jakamã nhũm Tĩrtũm ja hã omu nhũm ja kãm mex nê. Te ho mẽ hkuxwa xà mex kuxwa pyræk. Jakamã kêr pu mẽ amnhĩ tã omu nê uræk nê pamã axpên kĩnh o axpên to mex o mãn ri papa.

Mẽ pahte amnhĩ tomnuj kaga hã kot mẽ pamã karô

Sikũn Korĩt 6.14-7.1; Korosẽ 3.16-17; Wam Juãw 1.5-10, 2.15

³ Nê mẽ pahpê Tĩrtũm kra jakamã kêr pu mẽ pahprô pix tãnopxar o ri papa nê nhãm mẽnijê hõ kamã pahpijaàm kêt o ri papa hkêt nê.

Nê kêr pu mẽ amnhĩ pix kukamã pajamaxpêr kêt nê. ãm ja ho anhỹr hkêt kumrêx. Mẽ pahpê Tĩrtũm kra kênã kot pu kêt axtem nê ã amnhĩ nhĩpêx anhỹr o ri papa. Tĩrtũm krajaja na htem ã amnhĩ nhĩpêx anhỹr kêt nê.

⁴ Nê mããnhênh mẽ pakapêrja. Kêr pu mẽ ri tanhmã axpên mã pakapêr punuj to hkêt nê. Nê ri axpên japyr hkêt nê. Nê amnhĩ krã hkôt pahtỳx ri tanhmã pakapêr to hkêt nê. ãm tãm axpên mã pakapêr mex nê axpên mã Tĩrtũm mex o mex ã harênh o ri papa.

⁵ Nê Tĩrtũm kapêr kôt amnhĩ nhĩpêx kêt xwỳnhjaja nê axpên kãm mẽ hpijaàm kêt xwỳnhjaja nê amnhĩ pix kukamã mẽ hamaxpêr o pa xwỳnhjaja. ã mẽ kot amnhĩ nhĩpêx anhỹr xwỳnhjaja kêp Tĩrtũm mẽ Kris wa hkra hkêt. Na htem ã amnhĩ nhĩpêx anhỹrja gryk ã wa kãm hamaxpêr kêt nê.

⁶ Nê kojã nhỹrmã mẽhõ mẽ awỳr mỗ nê mẽ ate tanhmã amnhĩ tomnuj to prãm xà hêx rom amã kapêr nê mẽ amã:

—Kwa mon ka hte mẽ ixpyrà nê ã amnhĩ nhĩpêx anhÿr kêt nê? Ja mex kênã. Anê.

Koja ã mẽ amã kapêr anê ka mẽ ama nê ãm ama. ã mẽ kot amnhĩ nhĩpêx anhÿr xwÿnhjaja koja Tĩrtũm nhÿrmã ja hã mẽ homnuj tÿx kumrêx. ⁷ Jakamã kwa kêr ka mẽ ate ho mẽ kot amnhĩ nhĩpêx pyrãk pymaj mẽ hkôt ri apa hkêt nê. Kwarĩ ho kwarĩ.

Mẽ pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mẽ ate Tĩrtũm kôt amnhĩ xunhwÿr kêt ri na ka prem te kamãt kô kamã ri apa pyrã nê atÿx ri tanhmã amnhĩ tomnuj to ho ri apa. Tã ra Jesus kôt amnhĩ xunhwÿ hãmri nê te hirã kamã mẽ apa xwÿnh pyrãk. Jakamã kwa kêr ka mẽ hpãnhã Tĩrtũm kãm hprãm xã hkôt pix mã mãn ri amnhĩ nhĩpêx o apa. Ra mẽ apê hirã kamã mẽ apa xwÿnh kênã. ⁹ Kot kaj mẽ ã amnhĩ nhĩpêx anê nê tãm amnhĩ nhĩpêx mex nê tãm akapêr o apa. ¹⁰ Jao Tĩrtũm kãm hprãm xã hkôt pix mã amnhĩ nhĩpêx o ri apa ¹¹⁻¹² nê te kamãt kô kamã ri mẽ pa xwÿnhjaja kot amnhĩ nhĩpêx pyrãk o amnhĩ nhĩpêx kêt nê. ã mẽ kot amnhĩ nhĩpêx anhÿr xwÿnhjaja na htem hpimxur pê tanhmã amnhĩ tomnuj tÿx to ho pa. Nom kot paj ixprĩ hã mẽ amã tanhmã mẽ kot amnhĩ tomnuj to hã mẽ harênh kêt nê. Kot pa mẽ amã harê nê ixpijaãm tÿx nê. Ixte harênh mã xwÿnhja omnuju. Tã kêr ka mẽ urãk nê ã amnhĩ nhĩpêx anhÿr kêt nê. ãm mẽ noo mã tãm ri amnhĩ nhĩpêx o ri apa. ¹³ Mẽ kot ja hã mẽ apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr. ¹⁴ Te mẽ kot kanê hpôk rax kãm mẽmoj piitã omunh mexta pyrãk. Tĩrtũm kapêr ã kagã htũm kot ja jarênh kot:

Mẽ amã Tĩrtũm prãm kêt xwÿnhjaja te ra mẽ atyk nê mẽ anhĩkwÿ pyrãk.

Nê te kamãt kô kamã mẽ anhôt nê mẽ anhĩkwÿ pyrãk.

Jakamã kwa te mẽ akrã hapôx nê kãnhmã mẽ akrĩ pyrãk o amnhĩ nhĩpêx nê Tĩrtũm kôt amnhĩ xunhwÿ.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyrãk o amnhĩ nhĩpêx. Anê.

Tĩrtũm krajaja kot tanhmã amnhĩ nhĩpêx to hã mẽ kãm karõ

Korosê 4.5; Sikũn Ximotre 4.2

¹⁵ Nê kwa kêr ka mẽ amnhĩ pumunh mex o ri apa. Nê mẽ ri htÿx ri mẽ kot amnhĩ nhĩpêx xwÿnhjê hkôt amnhĩ nhĩpêx kêt nê. Nê ãm amnhĩ to mex pix o ri apa. ¹⁶ Na htem ra Kris ã mẽ pahtomnuj o pa pu mẽ pamex kêt nê ri papa. Tã nom kêr pu mẽ apkati mẽ arĩ Tĩrtũm mã tanhmã amnhĩ nhĩpêx to ho papa mã panhũrer kêt nê.

¹⁷ Nê ãm Tĩrtũm pix mã amnhĩ jarênh o ri papa nê kãm:

—Pa Tĩrtũm. Inhmã akôt pix mã amnhĩ nhĩpêx prãm jakamã kwa ixte amã mẽmoj to anhÿr kaxyw ixkrãm ijamaxpêr mex jagjê nê ho amnhĩrit mex pa tanhmã amã amnhĩ nhĩpêx to ho ri ixpa.

Anhÿr o amnhĩ to kuwÿ. Nom kêr pu mẽ pahtÿx ri pajamaxpêr kôt tanhmã kãm amnhĩ nhĩpêx to hkêt nê.

¹⁸ Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagõxyhti kot amnhĩ tã mẽ pahkaxpre pyrãk o mẽ panhĩpêx pu mẽ tee ri pamã hkaga hprãm kaprÿ. Te kot amnhĩm mẽ pahto àrik pyrãk o mẽ panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htÿx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhÿr hkêt nê ãm Tĩrtũm Karõ pix hkôt mãn ri amnhĩ nhĩpêx o ri papa.

¹⁹ Nê kêr pu mẽ axpên wÿr akuprõ nê pahkĩnh kãm Tĩrtũm mã mex o mex ã harênh pê ho pagrer o pahkrĩ. ²⁰ Nê mẽ pamex nê ri papa rÿ pahpunuj nê ri papa htã arĩ kãm mex o mex ã harênh rãhã ho ri papa. Kêp Mẽpanhĩpêxã maati jakamã mẽ pahpê Pahihti Jesus Kris kwÿ hã pu mẽ kãm mex ã harênh rãhã ho papa nê aa ho pajamakêtkati hkêt nê.

²¹ Nê kêr ka mẽ Kris ã apijaãm rãhã o ri apa. Jao axpên kôt ajamaxpêr nê axpên kôt ri amnhĩ nhĩpêx mex o ri apa.

Tanhmã mẽ hprõ nẽ mẽ mjên kot axpẽn nhĩpêx to hã mẽ kãm karõ

Wam Korõt 11.3; Korosẽ 3.18-19; Wam Pêtre 3.1-7

²² Nẽ kêr ka mẽ anijaja mẽ amjên ã apijaãm o ri apa. Nẽ mẽ hamaxpêr mex ã mẽ omu nẽ mẽ hkõt ri amnhĩ nhĩpêx o ri apa. Te mẽ ate Pahihti Kris kapêr kõt amnhĩ nhĩpêx o ri apata pyræk. ²³ Kris kêp mẽ pakamã ukapĩ xwýnh nẽ kêp mẽ papytâr xwýnh jakamã te kêp mẽ pahpiitã mẽ pahkrã pyræk. Nẽ mẽ papajaja te mẽ pahpê ĩ pyræk. Jakamã na pu htem pahpê ĩja te mẽ pahkrã kot tanhmã hamaxpêr to xà hkõt amnhĩ nhĩpêx o papaja pyræk. Ja pyrã nẽ kêr ka mẽ anijaja mẽ amjên jamaxpêr mex ã mẽ omu nẽ mẽ hkõt amnhĩ nhĩpêx mex nẽ. ²⁴ Mẽ pahpê Kris kwý jakamã na pu htem hkõt amnhĩ nhĩpêx mex o ri papa. Ja pyrã nẽ kêr ka mẽ amjên kõt amnhĩ nhĩpêx mex o ri apa.

²⁵ Nẽ mẽ amyjaja. Kêr ka mẽ amã aprõ hã ma ho ri apa. Te ho Kris kot mẽ pahtã ma ho pata pyræk. Na pre kãm mẽ pajapê xaj amnhĩ grõnh kõt mẽ pahwýr wrý nẽ mẽ panê ty. Tã kêr ka mẽ uræk nẽ ã amã aprõ hã ma ho apa anẽ. ²⁶ Na pre Kris kãm mẽ pajapê xaj mẽ pahte amnhĩ tomnuj pẽ mẽ pahpytã. Te mẽhõ my kãm mẽhõ ni hkĩnh nẽ mẽmoj punuj pẽ utâr nẽ ho hprõta pyræk. Nhũm te mẽ kot axpẽn mã wa rer kaxyw nhũm nija ma gõx mã htẽm nẽ wýr nẽ amnhĩ to mex nhũm mẽ kot axpẽn kaxyw wa ho mexta pyræk. Hãmri nẽ te ra axpẽn mã wa rer nhũm wa kot axpẽn kõt pa ho pata pyræk.

Ja pyrã nẽ na pre Jejus kãm mẽ pajapê nẽ kãm amnhĩ kuri mẽ papa ho mẽ papa hprãm xaj mẽ pahwýr wrý nẽ mẽ pahte amnhĩ tomnuj pẽ mẽ pahpytã nẽ mẽ pamã Tĩrtũm kapêr jarẽnh o pa. Tã mẽ pahpê hkrajaja na pu htem kapêr ma nẽ hkõt amnhĩ nhĩpêx o papa ho amnhĩ tomnuj kaga. Te gõx kãm mẽ paxwýr nẽ mẽ pahte amnhĩ nẽ amnhĩ grã htyk kuhõnh par pyræk. Jao Tĩrtũm kapêr kõt pix mã amnhĩ nhĩpêx o ri papa. Te ra paxwýr nẽ amnhĩ nẽ tanhmã mẽ pahte amnhĩ tomnuj to grãnh par pyræk. Nẽ te mjên mã xwýnh wýr nẽ amnhĩ to mex pyræk.

²⁷ ã mẽ pahte amnhĩ nhĩpêx anhýr jakamã te mẽ pamex nẽ ri papa pyræk. Hãmri nhũm Krisja ja hã mẽ pahpumu nẽ kãm mẽ pajapê htýx nẽ. Jakamã koja nhýrmã akupýn wrý nẽ ma akupým amnhĩ kõt mẽ pahto api pu mẽ kuri pa htĩr tũm nẽ papa ho papa.

²⁸ Nẽ xà mẽ amyjaja mẽ amã amnhĩ japêê? Nã mẽ amã amnhĩ japê ho na ka htem amã amnhĩ tã ma ho apa. Tã kêr ka mẽ aprõ nhĩpêx o te ka amã amnhĩ tã mata pyræk. Jao tãm mẽ hipêx o ri apa. Te war apixire nẽ war apa pyræk o wa axpẽn nhĩpêx. Kot kaj mẽ tanhmã hipêx to nẽ te ate amnhĩ nhĩ tanhmã hipêx to pyræk. ²⁹⁻³⁰ Na htem amnhĩ nhĩ ho mex pix o pa nẽ kamã gryk kêt nẽ. Nẽ kãm prãm nẽ apku. Nẽ kãm kôr nẽ ixkõ. Nẽ nhýhýnh à nẽ amnhĩ kane. Na pu htem ã amnhĩ to mex o ri papa anẽ. Ja pyrã nẽ te mẽ pahpê Kris nhĩ pyræk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyræk. ³¹ Tĩrtũm kapêr ã kagã htũm kot ja jarẽnh kot:

Koja mẽmyjê hõ hprõ kaxyw hãmri nẽ hipêêxã nẽ katorxã wa õrkwý kaga nẽ ãm hprõ kõt pix mã hpãnhã ri pa ho pa. Te wa tipxi nẽ ri pa pyræk o wa axpẽn nhĩpêx o pa. Anẽ.

³² Na pre Tĩrtũm ã ja jarẽnh anẽ. Kapêrja mex tã amnepê mã mẽ pa xwýnhjaja na prem hprĩ hã mar týx kêt nẽ. Na prem htýx mẽ mjên kot tanhmã mẽ hprõ nhĩpêx to pix ã hkamnhĩx no ãm ja pix kêt. Mããnẽn te mẽ pahpê Kris nhĩ pyrã nẽ tãm mẽ pahte amnhĩ nhĩpêx nẽ axpẽn nhĩpêx o papa hã ã mẽ pajarẽnh kot anhýr. Te ixkre tipxi kamã mẽ pahte Kris kõt mẽ papa pyræk o ã mẽ pajarẽnh anẽ.

³³ Jakamã kwa kêr ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyræk o mẽ hipêx. Jao tãm mẽ hipêx. Nẽ mẽ anijaja kêr ka mẽ ajaxwýja mẽ amjên ã apijaãm o ri apa.

6

Mẽ hkrajaja kot tanhmã hipêêxã nẽ katorxã nhĩpêx to hã mẽ kãm karõ

Korosẽ 3.20-21

¹ Nẽ mẽ apê mẽ hkrajaja kêr ka mẽ anhĩpêêxã nẽ mẽ akatorxã wa kapêr ma nẽ hã ano htýx nẽ wa hkõt ri amnhĩ nhĩpêx rãhã ho ri apa. Mẽ amã Pahihti Kris kõt amnhĩ nhĩpêx

prām xàj ã amnhĩ nhĩpêx anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa. ²⁻³ Tĩrtũm kapêr ã kagà htũm kot ja jarênh kot:

Kêr ka mẽ anhĩpêxà nê mẽ akatorxà wa kapêr ma nê wa hkôt ri amnhĩ nhĩpêx. Kot kaj mẽ ã amnhĩ nhĩpêx anê nê amex nê kritpê m atĩr nê ri apa ry nê.

Anhÿr jakamã kot kaj mẽ amã kritpê m atĩr nê ri apa hprãm hã kêr ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anê. E kêr ka mẽ ã mẽ anhĩpêxà nê mẽ akatorxà nhĩpêx anhÿr o ri apa.

⁴ Nê mẽ apê mẽ hipêxà nê mẽ katorxà kêr ka mẽ akrajê gryk kaxyw mẽ kãm apêr o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêr ka mẽ ã akrajê nhĩpêx anhÿr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosê 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêr ka mẽ anhõ patrãw kapêr ma nê hkôt amnhĩ nhĩpêx mex o ri apa. Te mẽ ate Kris kapêr mar nê hkôt amnhĩ nhĩpêx pyrãk. Jao mẽ hã apijaam rãhã nê. ⁶ Nom kêr ka mẽ ãm mẽ noo mã pix mã ri mẽ kãm axapênh mex kêt nê. Mãänên mẽ wa kre kamã mẽ kãm axapênh mex rãhã nê. Ja na Tĩrtũm kãm hprãm. Mẽ apê Tĩrtũm Kra Kris mã tanhmã amnhĩ nhĩpêx to ho apa xwÿnh jakamã kêr ka mẽ anhõ patrãw mã axapênh mex o ri apa. ⁷ Nê mẽ akĩnh kãm mẽ kãm axapênh mex nê. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nê mẽ kãm tãm amnhĩ nhĩpêx pê axapênh mex o ri apa. ⁸ Kot puj mẽ amnhĩ kaxyw Tĩrtũm mã pajamaxpêr pê pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxapênh xwÿnhjaja nê amnhĩ mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhĩ nhĩpêx xwÿnhjê ho mex rax nê.

Mẽõ patrãwjaja kot tanhmã kãm mẽ àpênh xwÿnhjê nhĩpêx to

Korosê 4.1

⁹ Nê mẽ apê mẽ õ patrãwjaja kêr ka mẽ amã mẽ àpênh xwÿnhjê ho mex nê mẽ àpênh ã mẽ kãm axakjêr o ri apa hkêt nê. Tãm mẽ hipêx. Kaxkwa kamã mẽ panhõ Pahi Maatija mãänên kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrãk. E kêr ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhĩ to htÿx to hã mẽ pamã karõ

Rõmãn 16.20; Sikũn Korõt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htÿx to jarê ka mẽ inhma. Kêr ka mẽ Pahihti nhÿ hã kutã amnhĩ to htÿx rãhã nê apa. Ate tanhmã amnhĩ tomnuj to hprãm xàj tanhmã kot ato htã ka Tĩrtũm xihtÿx o anhõpinh xà kaxwÿnh kãm kutã amnhĩ to htÿx nê. Rÿ koja ate mẽmoj mex o anhÿr nê tanhmã ato ka mẽ amnhĩ tã hamaxpêr ã omu nê ãm omu nê arĩ Tĩrtũm xihtÿx nhÿ hã tãm ajamaxpêr mex rãhã ho ri apa. ¹¹ Na hte pôristijaja pijapu kaxyw hãmri nê amnhĩ nê kàx o mẽ ê jagjê nhũm mẽ tee ri kãm mẽ hkamnhwÿr prãm hkapyrÿ. Tã ja pyrã nê koja Satanasti mẽ ate kapêr kôt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpêr ã omu hãmri nê Tĩrtũm xihtÿx nhÿ hã kutã amnhĩ to htÿx nê. Jao mẽ ate amnhĩ nhĩpêx nyw pix o amnhĩ nhĩpêx nê mẽ ajamaxpêr nyw pix o ajamaxpêr. Kot kaj mẽ ã amnhĩ nhĩpêx anê nhũm Satanasti tee ri tanhmã kãm mẽ ato hprãm hkapyrÿ.

¹² Mẽ pahpê Tĩrtũm kra jakamã mẽ kot mẽ pakutã amnhĩ xunhwÿr xwÿnh maatijaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kòk kôt tanhmã amnhĩ tomnuj tÿx to ho pa. Nê mẽ hihtÿx. Na htem arĩ jar pika ja kamã mẽ kêp Tĩrtũm kra hkêt xwÿnhjê ho amnhĩptã nhũm htem mẽ hkôt ri htÿx tanhmã ri amnhĩ tomnuj tÿx to ho pa. Nom amnhĩ tã mẽ omunh kêt nê. ¹³ Jakamã kwa kêr ka mẽ Tĩrtũm kot mẽ akarõ mã amnhĩ Karõ jagjênh xwÿnhhta kôt pix mã amnhĩ nhĩpêx o apa. Jao mẽ ate amnhĩ nhĩpêx nyw kôt pix mã mãn ri mẽ amnhĩ nhĩpêx. Kêr

kê mēkarōmnuti tee ri kām tanhmā mẽ ato hprām kaprỳ ka mẽ arĩ Tĩrtũm Karō xihtỳx nhỹ hã kutã amnhĩ to htỳx rãhã ho apa.

¹⁴ Jakamã kwa kêr ka mẽ axkãm ajamak rom nẽ te ho sōdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nê môx kã ho mẽ ê jagjê nẽ mẽ hpre xã ho amnhĩ pre hpa. Nẽ hipy kãx o mẽ hinô kã jagjê. Hãmri nẽ rĩ kormã ma mẽ kãm mẽ hkurê xwỳnhjê kutã mra nẽ axpu. No mẽ kajaja kêr ka mẽ kurom amnhĩ krãm Tĩrtũm kapêr jaxàr tỳx nẽ hkôt pix mã ri ajamaxpêr rãhã ho ri apa. Nẽ hkôt ri amnhĩ nhĩpêx mex nẽ. Jao te sōdat pijapu kaxyw kot amnhĩ nhĩpêxta pyrãk.

¹⁵ Na hte sōdatjaja hpar kã jagjê nẽ aa hopôx kêt nẽ. ãm rãhã gōr nẽ hikwỹ. Jao ra mẽ kutã pijapu kaxyw amnhĩ grōnh rãhã gōr nẽ hikwỹ. Tã kêr ka mẽ ma mẽ kãm Jesus kot tanhmã mẽ panê amnhĩ nhĩpêx to hã harênh o apa kaxyw nẽ sōdat pyrã nẽ amnhĩ grōnh kôt ma mẽ hwỳr apa nẽ amnhĩ kamã akahak kêt nẽ.

¹⁶ Nẽ sōdatjaja na htem amnhĩ nê amnãr xã hã kãx po jamỳ nẽ ho kuhê nhũm mẽ tee ri kãm mẽ hkamnhwỳr prãm kaprỳ. Ja pyrã nẽ koja Satanasti tanhmã mẽ ato ka mẽ Tĩrtũm kêp mẽ anhō pahi hã hihtỳx o kot Satanasti jakrenhja mã ajamaxpêr kurê kumrêx nẽ ãm hkôt pix mã amnhĩ nhĩpêx. Na hte Satanasti te kot mẽ pahwỳr krur rênh pyrãk o mẽ panhĩpêx. Jao xatã mẽ pahte Tĩrtũm kaga hprãm xaj tanhmã mẽ pahto. Nẽ mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprỳ. Pu mẽ amnhĩ tã omu hãmri nẽ Tĩrtũm Karō xihtỳx nhỹ hã Tĩrtũm kôt pix mã amnhĩ nhĩpêx.

¹⁷ Nẽ na hte sōdatjaja kãx o mẽ hkrãjapap jagjê nẽ pijapu kaxyw mẽ kutã mra nhũm mẽ tee ri mẽ hkrã jayr prãm kaprỳ. Ja pyrã nẽ kêr ka mẽ amnhĩ kaxyw Tĩrtũm kôt pix mã ajamaxpêr rãhã ho ri apa. Nẽ ra kot mẽ ato hkra mã ajamaxpêr rãhã nẽ. Kê Satanasti tee ri kãm mẽ akrã kamã mẽ amã mẽ ajamaxpêr punuj jagjênh prãm hkaprỳ.

Nẽ sōdatjaja na htem mẽ kutã wapo jamỳ nẽ ho kuhê. Nom mẽ papajaja mẽ panhō wapoja na axtem kêp Tĩrtũm kapêr. Na hte Tĩrtũm Karō mẽ pahkrã kamã kapêr o amnhĩrit pu htem pix mã pajamaxpêr o papa nhũm Satanasti tee ri kãm mẽ pahkrãm mẽ pajamaxpêr punuj jagjênh prãm kaprỳ. Te mẽ papijapu nhũm mẽ pahte amnhĩ nê ho pakrihkrit pyrãk o hipêx.

¹⁸ ã Satanasti pẽ mẽ pahte amnhĩ nê amnhĩ nhĩpêx kot anhỹr. Jakamã kêr pu mẽ amnhĩ to Tĩrtũm pix wỳr o ri papa kê Satanasti kutã mẽ pahto paxihtỳx pu mẽ hkôt tanhmã amnhĩ tomnuj to hkêt nẽ.

Nẽ kêr pu mẽ mẽmoj to anhỹr kaxyw nẽ ra Tĩrtũm Karō nhỹ hã amnhĩ to Tĩrtũm wỳ. Nẽ kãm amnhĩ jarênh rãhã ho papa nẽ aa ja ho pajamakêtkati hkêt nẽ. Nẽ Tĩrtũm krajê piitã mẽ ho hwỳr rãhã ho ri papa.

¹⁹ Nẽ kwa kêr ka mẽ mããnên ixto Tĩrtũm wỳr rãhã nẽ. Kot tanhmã ixto nhũm ixãmnhĩx ixte mẽ kãm kapêr jarênh mex o ri mẽ hkôt ixpa kaxyw. Mẽ kot ja hã tanhmã ixto htã pa arĩ ixãmnhĩx mẽ kãm harênh mex o ri mẽ hkôt ixpa. Nẽ ixprĩ hã mẽ kãm Jesus kot tanhmã mẽ panê amnhĩ nhĩpêx to hã harê. Kormã mẽ kot hprĩ hã ja mar mex kêt. ²⁰ Tã ixte mẽ kãm ja jarênh kaxyw na pre Tĩrtũm mẽ hwỳr inhmê nhũm prem hã ijaxà pa arĩ mẽ hãgjênh xã kamã ixkrĩ ho ixkrĩ. Jakamã kwa mẽ ixto Tĩrtũm wỳ kê tanhmã ixto ixihtỳx to pa arĩ mẽ kãm kapêr jarênh o ixkrĩ. Ja na Tĩrtũm kãm hprãm nẽ ijaxwỳja inhmã ja prãm.

Kagà jatur xã

Korosê 4.7-8

²¹ Nẽ ot pa mẽ awỳr Xikitre mẽ. Kot paj mẽ amã kagàja nhĩpêx pa nẽ kãm kugō nhũm kupy nẽ ma mẽ awỳr o mō. Hãmri nẽ mẽ awỳr o pōj nẽ mẽ amã kugō nẽ mẽ amã tanhmã ijarênh to ka mẽ ijarênh ma nẽ akĩnh nẽ. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahtō na. Nẽ inhmã hapêê. ²² Tã ot pa mẽ awỳr kumê. Kê mẽ awỳr pōj nẽ mẽ amã ijarê ka mẽ kam ama nẽ akupỹm tãm akrã nẽ tee ri ixkukamã ajamaxpêr kêt nẽ. ²³ E ixkrãmnhwỳjaja. Kê Mẽpahpãm Tĩrtũm mẽ Pahihti Jesus Krisja wa tanhmã mẽ akrã hto ka mẽ ajamakêtkati nẽ axãmnhĩx ri apa. Nẽ mẽ amã axpên kĩnh o ri axpên kôt apa. Nẽ mẽ apiitã wa hkôt ajamaxpêr mex o ri apa. ²⁴ E mẽ amã mẽ panhō

Pahihti Jejus Kris kĩnh rãhã ho apa xwỳnhjaja. Kê Tĩrtũm mẽ ato mex nẽ mẽmoj to mẽ akutã nojarêr rãhã ho pa.

Tã ãm ja pix na hapêx. Ixpê Pawre na pa mẽ awỳr kagàja nhĩpêx nẽ kumẽ.

Piripos

Pawre kot Piripos kamã Jesus kôt hkwỳjê hwỳr kagà nê mênh

Pawre na pre kagàja nhípêx. Jesus nhỹ hã mē ahkre o mē pa xwỳnhjê hō na pre. Na pre Jesus ã mē kãm hkurê xwỳnhjaja unê nē ma krĩ pē Rōm wỳr kumē nē kamã haxà nhũm mē hagjênh xà kamã hkrĩ ho hkrĩ. Tã nhũm arĩ hkrĩ rãhã Piripos kamã Jesus kôt hkwỳjê hwỳr kagàja nhípêx nē kumē. Na prem Pawre jarênh ma nē kãm ukaprĩ nē. Jakamã axpên kaxyw kàxpore hkwỳ ho akuprō nē hwỳr kumē. Hãmri nhũm omu nē hkĩnh nē amnhĩ tã kagàja nhípêx nē kamã mē kãm amnhĩ jarê nē mē hwỳr kumē. Kot amnhĩ xà htỳx kamã hamak o hkrĩ htã arĩ hwỳr mē mrar xwỳnhjê mã Tĩrtũm kapêr jarênh rãhã ho hkrĩ hã amnhĩ jarê. Nē kãm Jesus kot amnhĩ nhípêx kôt pix mã amnhĩ nhípêx o pa hprãm ã amnhĩ jarê. Nē kãm Jesus jamaxpêr kôt pix mã hamaxpêr prãm ã amnhĩ jarê. ã na pre Pawre kagàja kamã mē kãm amnhĩ jarênh anê. Nē mē kãm:

¹ Pa Piripos kamã Jesus Kris kôt ixkwỳjaja. Xà mē amex na ka mē apa? E ixpê Pawre na pa mē amã kagàja nhípêx nē kamã mē amã amnhĩ jarê nē mē awỳr kumē. Nhũm Ximotre haxwỳja kãm ja mex nē. Wa ixpê Jesus mã tanhmã amnhĩ nhípêx to ho wa ixpa xwỳnh jakamã na pa wa mē awỳr hipêx nē kumē. Mē ate Tĩrtũm kapêr o mē ajahkre xwỳnhjê hwỳr nē mē kãm mē ate tanhmã amnhĩ to xwỳnhjê hwỳr nē mē ate mē mar o akrĩ xwỳnhjê hwỳr. Mē apê Kris kôt wa ixtō nē wa ixtōxjê ho ixpimràatã mē awỳr hipêx nē kumē. ² E kê Mēpanhípêxà maati Tĩrtũm mē Pahihti Jesus Kris wa mēmoj to mē akutã nojarêr rãhã nē ka mē axãmnhĩx ri ajamakêtkati nē ri apa ho apa.

Pawre kot Piripos nhõ xwỳnhjê ho Tĩrtũm wỳr ã harênh
Epes 1.15-19; Korosê 1.9-12

³ Na pa hte xatã mē amã ijamaxpêr o ixkrĩ nē mē panhō Tĩrtũm kot tanhmã mē ato mex toja pa kãm ijamaxpêr nē ixkĩnh nē ixkrĩ. ⁴ Nē Tĩrtũm mã mē ajarênh nē mē ato kuwỳ. Ixkĩnh kãm mē ato kuwỳ.

⁵ Wam ixte mē awỳr inhmōrta ã na pa pre mē amã Jesus kot mē panê tanhmã amnhĩ nhípêx to hã harênh o ri mē akôt ixpa. Ka prem inhma nē hkôt amnhĩ xunhwỳr tỳx nē hkôt amnhĩ nhípêx o ri apa. Jakamã inhmã axpên kaxyw ri kàxpore hkwỳ nhōr o apa. Te ham mē ate ixwỳr mênhta pyrãk pa pre mē akukwak ri amnhĩm ho ixujaprōr o ri ixpa pē nhãm ri mē kãm Jesus jarênh o ri mē hkôt ixpa. Na pa hte arĩ jam ijamaxpêr rãhã ho ixkĩnh nē ixkrĩ. Nē Tĩrtũm mã mē ate ixto mex ã kãm mē ajarênh o ixkrĩ.

⁶ Nē na pa pre ma mē awỳr mō nē mē amã Jesus jarê ka prem inhma nē hkôt amnhĩ xunhwỳ nhũm Tĩrtũm ja hã mē apumunh mex nē. Hãmri nē mē ate hkôt amnhĩ to htỳx kaxyw tanhmã mē ato mē axihtỳx to. Tã koja arĩ mē ato mē axihtỳx rãhã nhũm Jesus Kris nhỹrmã akupỹn mē pahwỳr wrỳ. Koja ã mē ato mex anê. ⁷ Na hte tanhmã ixto mex tota pyrã nē tanhmã mē ato mex to ho pa nē mē akutã nojarêr rãhã ho pa.

Nē kormã mē kot ijaxàr kêt ri pa pre ma mē piitã mē kãm Jesus jarênh o ri ixpa. Nē ãm hãmri mē kãm harê. Mē kot mar nē hkôt amnhĩ xunhwỳr tỳx kaxyw pa pre mē hkôt harênh rãhã ho ri ixpa. Ka prem ja kaxyw inhmã kàxpore hkwỳ gō pa pre ho amnhĩm ixujaprōr pē mē hkôt ri mē kãm harênh o ri ixpa. Tã nhũm prem jar Rōm kamã ijaxà pa arĩ ixkrĩ htã ka mē axte ixwỳr hkwỳ mē. Jakamã na pa hte mē amã ijamaxpêr rãhã ho ixkrĩ nē inhmã mē akĩnh tỳx nē. ⁸ Te Jesus Kris kãm mē ajapê htỳx pyrãk. Tĩrtũm kot ja hã ixpumunh mex.

⁹⁻¹⁰ Na pa hte mē ato kuwỳ nē kãm:

—Pa Tĩrtũm. E Piripos nhõ xwỳnhjê pumu. Na mē ra kãm axpên kĩnh o axpên kôt pa. Kwa tanhmã mē hipêx to kê mē arĩ kãm axpên kĩnh tỳx pix nē. Jao axpên to mex rãhã ho pa. Nē tanhmã mē hkrã hto kê mē amnhĩ krãm akapêr jaxàr tỳx nē. Jao tãm amnhĩ

nhîpêx mex nê hamaxpêr mex o ri pa. Nom kormã mẽ kot ja pumunh tohtuj anhÿr. Tã kêr ka tanhmã mẽ ho kê mẽ ã amnhî nhîpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa. ¹¹ Nà koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pê tãm ri amnhî nhîpêx nê tãm axpên nhîpêx o ri axpên kôt apa. Nhũm mẽ piitã ja hã mẽ apumu nê axpên mã Tirtũm mex o mex ã harê.

*Pawre kãm Kris kôt amnhî nhîpêx prãm ã harênh
Atre 28.30-31; Epes 6.19-20; Sikũn Ximotre 2.9*

¹² E Kris kôt ixtõ nê ixtõxjaja. Kot paj mẽ amã tanhmã amnhî jarênh to ka mẽ inhma. Na prem ra Jejus ã ixtomnuj tÿx nê hã ijaxà pa amnhî xà htÿx kamã ijamak o ixkrî. Nom mẽ kot ã inhîpêx anhÿr tã pa hte arî ixkrî xà kamã mẽ kãm Jejus jarênh o ixkrî. Jakamã na mẽ ra ohtõ nê tanhmã kot mẽ panê amnhî nhîpêx to hã harênh ma. ¹³ Pôristi kot inhîhkô hã ixtãnopxar xwÿnhjê mẽ ixwÿr mẽ mrar xwÿnh piitã ixte Kris kapêr jahkre ho ixpa pix ã mẽ kot ijaxàr ã ijarênh ma. ¹⁴ Nê jar Kris kôt mẽ pahtõ nê mẽ pahtõxjaja haxwÿja ijarênh ma nê ohtõ nê ixpyrà nê Kris nhÿ hã amnhî to htÿx nê arî hkwyjê mã kapêr jarênh rãhã ho pa. Ixpyrà nê kãm mẽ uma hkêr nê mẽ kutã amnhî to htÿx pê mẽ kãm harênh rãhã ho pa.

¹⁵⁻¹⁸ Nê na pre mẽ hkwyjaja ixte mẽ amã Kris jarênh o ixpa hã ijarênh ma nê hã ixkamã gryk nê axtem hamaxpêr nê ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

—E kot paj ma Pawre kot ra mẽ hwÿr mör xwÿnhjê hwÿr mō nê kot ra mẽ kãm Jejus kapêr jarênh nhîpy axte mẽ kãm harênh o ri mẽ hkôt ixpa. Hãmri nhũm mẽ inhma nê inhgryk ã Pawre kaga. Hãmri nhũm mẽ hagiênh xà kamã arî hkrî tã tee ri mẽ hã ijarênh ma nê hkaprî nê rî amnhî pumu. Nà kot paj anê.

Anhÿr o hamaxpêr tã pa mẽ harênh ma nê ixkaprî hkêr nê. Mẽ kot mẽ amã hprî hã Kris kapêr jarênh kênã kot pa kêt tee ri mẽ harênh ma nê ixkaprî. Kwãr mẽ mãmri ri ixkamã gryk kãm kapêr jarênh o ri pa. Pa mẽ harênh ma nê ixkînh nê. Nom na hte mẽ hkwyjaja jajê rom kãm ixkînh kãm mẽ kãm Kris kapêr jarênh o pa. Nê tãm hamaxpêr pê mẽ kãm harênh o pa. Ra mẽ kot ixpumunh mex jakamã nhũm Tirtũm kot jar mẽ hwÿr inhmeñh nhũm ixte ãm hãmri mẽ kãm kapêr mex jarênh o ri ixkrî hã ixpumunh mex. Jakamã kwãr mẽ mãmri tanhmã inhmã hamaxpêr to xà hkôt mẽ ujarênh mexja jarênh o pa. Mẽ kãm ixkînh kãm harê rÿ ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nê ixkînh nê.

¹⁹ Nê ra mẽ ate ixto Tirtũm wÿr o apa jakamã koja Karõja ixkaxyw tanhmã jar Rõm kamã pahhti nhîpêx to nhũm tokyx ixkator japêr. Pa ixãmnhix ijamakêtkati nê ri ma mẽ akôt ixpa. ²⁰ Nom inhmã Jejus kãm hprãm xà hkôt pix mã tanhmã amnhî nhîpêx to ho ixpa hprãm. Jakamã koja mẽ ixkator pa ixkînh nê arî kãm tanhmã amnhî nhîpêx to ho ri ixpa. Nom koja mẽ tanhmã hamaxpêr to nê ixpî pa mẽ kutã mẽ kãm amnhî to htÿx nê ixãm rãhã nhũm mẽ ixpî pa ijamakêtkati nê ty. Kê mẽ ja hã ixpumu nê ixtã Kris mex o mex ã harê. ãm Jejus kãm hprãm xà hkôt pix mã na inhmã amnhî nhîpêx prãm. ²¹ Tã kot paj tanhmã amnhî to nê arî ixtîr japêr hã kot paj ãm kôt pix mã amnhî nhîpêx rãhã ho ixpa. Nom koja mẽ tanhmã hamaxpêr to nê hã ixpî pa ty nhũm Tirtũm ma kaxkwa hwÿr ixkarõ ho àpir kurê kumrêx. Pa Tirtũm mẽ Krata wa kuri inhmex o inhmex nê wa kuri ixpa ho ixpa. ²²⁻²³ Tã nhÿ na we inhmã mex o hõ jakrenh wehe? Na pa tee ri amnhî kukamã ijamaxpêr. Inhmã tokyx ixtyk nê Kris kuri ixpa hprãm. Ja na inhmã hprãm o inhmã hprãm. Nom ko. Kot pa arî ixtîr nê arî mẽ kãm Jejus kot tanhmã mẽ panê amnhî nhîpêx to hã harênh rãhã ho ri ixpa. Ko. Ja mãânên inhmã mex. ²⁴ No mẽ amã na arî ixtîr nê ixpaja mẽ amã hprãm ²⁵ jakamã kot paj pêr tokyx ixtyk kêt nê. Kot paj arî ri mẽ amã Kris kôt mẽ ato mẽ axihtÿx o ri mẽ akôt ixpa. Jao ãm ho hkrãnre ka mẽ ra amnhî kaxyw kãm ajamaxpêr nê hkôt amnhî xunhwÿr tÿx nê. Jao akînh nê apa. ²⁶ Tã kot paj nhÿrmã akupÿm ixtîr rãhã mẽ awÿr mō ka mẽ ixpumu nê akînh nê. Jejus Kris kot akupÿm ixkator ã akînh nê. Hãmri nê ixtã Jejus mã mex o mex ã harê.

Mē pahte Jejus ā pahpunuj tā mē pahte amnhī to htỳx ā mē pamā karō
Rukre 6.22; Sikūn Korīt 2.14-16; Xiakre 1.12; Jutre 3

²⁷ Jakamā e kêr ka mē Jejus Kris kapēr kôt pix mā amnhī nhīpêx. Nē axpên kôt axpên to axihtỳx pē mē kām Jejus kot tanhmā mē panê amnhī nhīpêx to hā harēnh o ri apa kê mē ama nē mē pahpyrà nē hkôt amnhī xunhwỳ. E kêr ka mē ā amnhī nhīpêx anhỳr o ri apa. Kêr pa nhỹrmā mē hagjēnh xàja rŭm ixkator japêr nē nhỹri ja hā mē ajarēnh ma rỳ ma mē anhō krī hwỳr mō nē ja hā mē apumu nē ixkīnh nē. ²⁸ Nom kwa kêr ka mē amā mē kot Kris ā tanhmā mē ato xwỳnhjê puma hkêt nē. Mē kot tanhmā mē anhīpêx kati hto htā kêr ka mē kutā amnhī to htỳx nē mē hkôt apa. Kêr kê mē amnhī tā mē apumu nē tee ri hamaxpêr hāmri nē axpên mā:

—Kwa mē pahte Kris ā tanhmā mē hipêx to htā na htem amnhī to htỳx nē arī mē pamā harēnh o ri pa. Pêr mē kām mē pahpuma hkêt. Mān hte Tirtŭm tanhmā mē ho nhŭm mē ỹ hā kām mē pahpuma hkêt nà? Kwa tanhmā kot puj mē ho nhŭm mē Jejus kapêr jarēnh o pata kaga? Nà kot puj mē ām tee ri hā tanhmā mē ho kaprỳ. Mān ām hāmri na htem nhỹrmā Tirtŭm kuri htīr tŭm nē pa ho pa hā amnhī jarēnh o pa nà? Anē.

Koja mē ā mē ajarēnh anē. Tirtŭm kot mē ato mē axihtỳx ā mē apumunh kôt. ²⁹ Na pre tanhmā mē ato ka mē Kris kôt amnhī xunhwỳ. Tā mē kot tanhmā hā mē anhīpêx to htā na hte Tirtŭm mē kutā tanhmā mē ato ka mē ỹ hā amnhī to htỳx nē apa. ³⁰ Ijaxwỳja na pa hte amnhī xà htỳx kamā ijamak o ixkrī. Na pre htem Jejus ā ixtomnuj o pa ka prem ja hā ijarēnh ma nē hā ixpumu. Tā ota kê mē ra axte tanhmā hā inhīpêx to. Pa kê amnhī xà htỳx kām ijamak o ixkrī ka mē ijarēnh ma. Tā xep mē ixpyrà nē Kris ā amnhī xà htỳx kamā ajamak o apa. Nom kwa kêr ka mē tee ri amnhī kukamā ajamaxpêr o akaprī nē apa hkêt nē.

2

Jejus kām mē pajapê xàj tanhmā kot amnhī nhīpêx to hā harēnh
Rômān 15.5-6; Epes 4.1-6; Piripos 2.18

¹ Nē ra mē pahte Jejus kôt amnhī xunhwỳr jakamā pu mē tee ri amnhī kukamā pajamaxpêr o pahkaprī nē ri papa hkêt nē. Ām kām mē pajapêja mā pajamaxpêr rāhā ho pahkīnh nē pajamakêtkati nē ri papa. Nhŭm Karō mē pahkarō mā agjê nē mē pahto mex nē mēmoj to mē pakutā nojarêt o ri mē pakamā pa. ² Tā kêr ka mē axpên mar mex nē mēmoj tā axpên mā axàkjêr o ri apa hkêt nē. Te ri ixkre pixi kamā mē atipxi nē axpên kôt amnhī nhīpêx pyrāk. Nē Tirtŭm kām hprām xà hkôt pix mā ajamaxpêr o ri apa. Nē mē amā axpên kīnh o ri apa. Kot kaj mē ā amnhī nhīpêx anē pa ja hā mē apumu rỳ hā mē ajarēnh ma nē ixkīnh tỳx kumrêx.

³ Nē kwa kêr ka mē axpên pumu nē ā ajamaxpêr anhỳr kêt nē. Mē ajamaxpêr o:

—Tk. Kot pa ri tanhmā jahti ho ajuta hto ho ixpa hkêt nē. Ixte amnhī to rax o hakrenh kēnā kot pa hkêt ri ho ajuta. Kê tām mān tanhmā ixto ajuta hto.

Anhỳr o ajamaxpêr kêt nē. Kêt nhỹri mēhō pumu nhŭm tanhmā kute ka hā omu nē ajamaxpêr o:

—Hêxta waa nē. Kwa tanhmā kot pa we ho ajuta htoo?

Anhỳr o ajamaxpêr hāmri nē ajamaxpêr xà hkôt tanhmā ho ajuta hto.

⁴ Jao Jejus pyrā nē mēmoj to axpên kutā anojarêt o ri apa. No ri amnhī pix kukamā ajamaxpêr o apa hkêt nē. ⁵ Kêr pu mē te Jejus tanhmā hamaxpêr toja pyrāk o pajamaxpêr o ri papa.

⁶ Kêp Tirtŭm Kra kumrêx jakamā te urāk tā xà na pre ja hā amnhī pumu nē amnhī pix kukamā ā hamaxpêr anē nē hamaxpêr o:

Te ixte Tirtŭm pyrāk jakamā mēmoj piitā inhō na. Jakamā kot paj jar kaxkwa kamā inhmex nē ixkīnh nē ixpa ho ixpa nē aa rer nē nhỹhỹm inhmōr kêt kumrêx. Anhỳr o na pre hamaxpêr? Nà na pre ā hamaxpêr anhỳr kêt nē.

⁷⁻⁸ Kām mē pajapê xàj na pre kaxkwa kamā mēmoj mex piitā rer pa nē man mē pahwỳr wrỳ nē mē pahpyrà nē ĩ ho katorxà nhōhy rŭm kato.

Kêp mē panhō Pahihti htā te kêp mē panhō nē te kot amnhī to grire pyrāk o amnhī nhīpêx o ri pa.

Nē Tirtūm kām hprām xà hkôt pix mā amnhī nhīpêx o pa.

Nē ãm kôt pix mā amnhī nhīpêx o pa rāhā nhūm prem kupī nhūm arī mē kām xa nē tanhmā amnhī tā mēhō hto hkêt nē.

Na prem hipêx kati nē. Te kêp mē kot amnhī tomnuj tỳx xwỳnhjê nhīpêx pyrāk o hipêx nē pī kahpa hā kunhō nē kupī.

Tā no nhūm mē kêp tanhmā amnhīmnuj to hkêt nē arī mē kām xa. Mē panê na pre ã amnhī nhīpêx anē.

⁹ Hāmri nhūm Tirtūm ã kot amnhī nhīpêx anhỹr ã omu nē akupỹm ho htĩr nē akupỹm amnhī wỳr ho api.

Nē mex o mex ã harē.

Nē kot nhỹrmā mē pahpiitā mē pahto amnhīptār kaxyw mē pakaxyw ãm.

¹⁰ Jakamā kot puj mē nhỹrmā pahpiitā Jesus kutā pahkōnkrā ho rōrōk nē pahkrī hpa nē kàx pēê kām mex o mex ã harē.

Mē pahpiitā. Kaxkwa kamā mē pa xwỳnhjaja nē pika piitā hkôt mē papa xwỳnhjaja.

Nē mē htyk xwỳnh piitā koja mē akupỹn htĩr pu mē pahpimràatā Jesus kutā pahkōnkrā ho parōrōk nē pahkrī hpa nē kām mex o mex ã harē.

¹¹ Nē kām:

Pa Pahihti Jejus. Nà ãm hāmri na apê mē inhō Pahi Maati hā apyxi mex na ka.

Jakamā mē ixtō kot paj mēmoj tā tanhmā amā karō hto? Nà kot paj mē ixtō ã amnhī nhīpêx anhỹr kêt nē. Anē.

Kot puj mē nhỹrmā ã Jesus mā pakapēr anē.

Jao määnēn Tirtūm hihtỳx o hihtỳx nē àhpumunh o àhpumunh ã omu. Nē mex o mex ã omu.

Te mē pahpê kanhêti pyrāk ã mē pajarēnh

Matêwre 5.14-16

¹²⁻¹³ Tā kwa ixkràmnhwỳjaja. Inhmā mē akĩnh. Kwa kêr ka mē arī Tirtūm kôt amnhī nhīpêx mex rāhā nē. Te ixte mē akamā ixpare ri mē ate amnhī nhīpêx mexta pyrāk o ixwakre kamā amnhī nhīpêx mex o ri apa. Na pre ra Tirtūm mē panê mē pahte amnhī tomnuj rē nē tanhmā mē pahto pu mē ý hā kapēr kôt amnhī nhīpêx o ri papa. Jakamā kwa kêr pu mē axte tanhmā amnhī tomnuj to ho papa hkêt nē. Nē mē pahte Tirtūm kapēr kwỳm ri amnhī nhīpêx pymaj ãm hkôt pix mā amnhī nhīpêx o ri papa.

¹⁴ Nē kêr ka mē mēmoj to anhỹr kaxyw nē agryk kām tanhmā ri ho hkêt nē. Nē mēmoj tā axàpēnh kaxyw nē ri hā axpēn mā akapēr kati kamā ho anhỹr kêt nē. ¹⁵⁻¹⁶ Mē kot amnhī tomnuj xwỳnhjaja na htem ã amnhī nhīpêx anhỹr o pa. No kêt mē kajaja. Mē ate mē hkôt apa htā kêr ka mē hkôt amnhī nhīpêx kêt nē. Mē kurom mē apê Tirtūm kra jakamā kêr ka mē hkôt pix mā amnhī nhīpêx o ri apa. Nē tanhmā amnhī tomnuj to rỳ tanhmā ajamaxpēr punuj to hkêt nē. Mē kot amnhī tomnuj xwỳnhjaja te ri kamàt kô kamā ri mē kêp àhkĩnh o ri mē pa xwỳnhjê kot amnhī nhīpêx pyrāk. Tā kot kaj mē hkôt tām ri amnhī nhīpêx o apa nē te ate kanhêtija kamàt kô kamā hirā ho harir pyrāk o amnhī nhīpêx. Jao mē kām Tirtūm kapēr jarēnh o ri mē hkôt apa. Mē kot amar nē apyrà nē nhỹrmā kuri htĩr tūm nē pa ho pa kaxyw. Kot kaj mē ã amnhī nhīpêx anē nhūm nhỹrmā Jesus Kris akupỹn mē pahwỳr wrỳk ã arĩgrota ã pa mē apumu nē ixkĩnh nē. Nē ixkĩnh kām Jesus mā mē ajarē nē kām mē ajarēnh o:

—Kwa Pahihti. E jajê pumu. Na pa pre mē kām akapēr jarēnh o ri mē hkôt ixpa nhūm mē inhmar tỳx nē nē akapēr kôt amnhī nhīpêx o ri pa. Jakamā na pa pre mē kām akapēr jarēnh kaprỳ hkêt nē.

Anhỹr o kām mē ajarē. ¹⁷ Na pa pre mē akôt mē amā Tirtūm kapēr jarēnh o ri ixpa ka prem inhma nē hkôt amnhī xunhwỳ. Jakamā te ixte Tirtūm mā mē ato ixkĩnh xà nē kām mē anhōr pyrāk.

Ně koja jar Rõm nhõ pahihtija tanhmã ixto hkêt japêr. Rỳ tanhmã ixto. Nom kwãr mẽ mãmri tanhmã kãm ixto hprãm xà hkôt tanhmã ixto rỳ ixpĩ. Koja mẽ ã ixte mẽ anhĩpêx anhỹr ã ixpĩ pa ixkĩnh nẽ. Nẽ tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhỹrja kukamã mẽ amã amnhĩ kĩnh ã amnhĩ jarẽ ka mẽ inhma. ¹⁸ Tã kêr ka mẽ ixpyrà nẽ ajaxwỳja ixtã akĩnh nẽ apa.

Ximotre mẽ Eparoxit wa harênh

¹⁹ Nẽ koja Pahihti Jejus kãm ja prãm hã kot paj ma mẽ awỳr Ximotre mẽ nhũm ma mẽ awỳr mỗ nẽ ri mẽ akôt pa nẽ tanhmã mẽ ate amnhĩ nhĩpêx to hã mẽ apumu. Hãmri nẽ man akupỹn ixwỳr mỗ nẽ inhmã mẽ ajarẽ pa mẽ ajarênh ma nẽ ixkĩnh nẽ tee ri mẽ akukamã ijamaxpêr o ixkrĩ hkêt nẽ. ãm tãm mẽ akukamã ijamaxpêr o ixkrĩ. ²⁰ Ximotre tapxipix na ixpyrà nẽ kãm mẽ akĩnh nẽ kãm mẽ ato ajuta hprãm. Na hte mẽ ajarênh rãhã ho pa. ²¹ Nom jar mẽ piitã Ximotre kĩnhã amnhĩ mex pix kukamã hamaxpêr o pa nẽ kãm Jejus Kris kôt tanhmã amnhĩ nhĩpêx to ho pa hprãm kêt nẽ.

²² Ximotre te kêp ixkra pyrãk. Na hte ixkôt pa nẽ ixpyrà nẽ Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarênh mex jarênh o wa ri mẽ hkôt ixpa. ²³ Tã koja mẽ tanhmã ixtã axpên mar to. Apu mẽ kot ixpĩr ã amnhĩ jarẽ rỳ ixkator ã amnhĩ jarẽ. Pa tanhmã amnhĩ tã mẽ mar to nẽ rĩ kormã ma mẽ awỳr Ximotre mẽ kê ma mẽ awỳr mỗ nẽ mẽ amã tanhmã ijarênh to.

²⁴ Nẽ koja Pahihti Jejus kãm ja mex pa ijaxwỳja ma mẽ awỳr mỗ pu mẽ axte axpên pumu.

²⁵ Nẽ kot paj tokyx ma akupỹm mẽ awỳr Kris kôt mẽ pahtõ Eparoxit mẽ. Na ka prem kãm kàxpore gõ nhũm man ixwỳr o mỗ nẽ inhmã kugõ. Hãmri nẽ jar inhmã àpênh rax nẽ ixpyrà nẽ mẽ ujarênh mexja jarênh o pa. ²⁶⁻²⁷ Tã ra à htỳx nẽ. Kironhỹx pre mẽ pahpê ty. Tã nhũm Tĩrtũm omu nẽ kamã ukapri nẽ. Nẽ mãănên pa ixkamã ukapri nẽ. Nẽ tee ri ixte à htỳx ã omunh nẽ ixkapri htỳx pymaj akupỹm inhmã ho mex nhũm ra akupỹm mex nẽ ri pa. Hãmri nẽ kãm mẽ apumunh prãm nẽ. Mẽ ate à htỳx ã harênh mar nẽ akapri hã mẽ ajarênh ma nẽ tee ri mẽ akukamã hamaxpêr. ²⁸ Jakamã inhmã akupỹm tokyx mẽ awỳr mênh prãm. Tã koja mẽmo arĩgro hã mẽ awỳr pøj ka mẽ omu nẽ akĩnh nẽ tãm ajamaxpêr. Pa ijaxwỳja jar ixkĩnh nẽ tãm ijamaxpêr. ²⁹⁻³⁰ Na ka prem ixwỳr amẽ nhũm man ixwỳr mỗ nẽ jar ixri mẽ kãm Kris kapêr jarênh o ri mẽ hkôt pa rãhã nhỹx hã ty nom kot amnhĩ kamã kahak kêt. Jakamã kê akupỹm mẽ awỳr pøj ka mẽ omu nẽ akĩnh nẽ. Nẽ kahti hkôt amỳ nẽ ho mex nẽ. Kêp Kris kôt mẽ pahtõ mex kênã. ã na htem Kris mã mẽ kot tanhmã amnhĩ nhĩpêx to ho mẽ pa xwỳnhjê nhĩpêx mex anhỹr o pa.

3

Mẽmoj tã mẽ pahpumunh kôt Tĩrtũm kot tãm mẽ paxunhwỳr ã harênh
Piripos 2.18, 4.4

¹ E Kris kôt ixtõ nẽ ixtõxjaja. Kris kêp mẽ panhõ Pahihti jakamã kwa mẽ jam ajamaxpêr nẽ akĩnh rãhã ho ri apa.

Na pa ra mẽ amã mẽmoj jarênh rax nẽ. Nẽ hã kagà rax tã kormã inhmã ja ho anhỹr kaga hkêt nẽ. Kot paj axte mẽ amã hkwy hã kagà. Mẽ ate hã ano htỳx nẽ ho apa kaxyw. ² Jakamã e kwa mẽ okora. Kêr ka mẽ amnhĩ nẽ mẽ kot Tĩrtũm kapêr o hêx xwỳnhjê pumunh mex o ri apa. Na htem tanhmã mẽ amã kapêr ho pa nẽ mẽ amã:

—Kot kaj mẽ ixpê Ijaewjê pyrã nẽ amnhĩ my kwryt kà jakà hãmri nẽ apê Tĩrtũm kra. Anẽ.

³ Nom ja kot anhỹr kêt. Mẽ pahte amnhĩ jakàr kôt mẽ pahpê Tĩrtũm kra hkêt. ã kot anhỹr ronhỹx pu mẽ amnhĩ krã hkôt tanhmã amnhĩ nhĩpêx to ho pahpê hkra. Nom ja kot anhỹr kêt. Mẽ ate amnhĩ jakàr kêt tã mẽ ixpyrà nẽ amnhĩ kaxyw Jejus Kris mã ajamaxpêr jakamã mẽ ixpyrà nẽ mẽ apê Tĩrtũm kra na ka mẽ. Na ka htem mẽ ixpyrà nẽ Karõ nhỹ hã kãm mex o mex ã harênh o ri apa nẽ mẽ ixpyrà nẽ Jejus kukwak ri akĩnh nẽ ri apa. Nom na pu htem pahpê hkra kaxyw amnhĩ jakàr kêt nẽ. ⁴ Kop ãm amnhĩ krã hkôt mẽ pahte amnhĩ to Tĩrtũm kra ronhỹx pa ra amnepêm amnhĩ to hkra nẽ ri ixpa. Na pa pre

ixpê hkra hprãm xàj amnhĩ krã hkôt tanhmã ri amnhĩ nhĩpêx to rax o ixpa nom ã amnhĩ nhĩpêx anhÿr kaprÿ. E pa ja hã mẽ amã amnhĩ jarẽ ka mẽ ijarẽnh ma.

⁵ Na pa pre ixkato nẽ kormã ixtã semãn pixire nhũm mẽ ixpê Ijaew ã inhmy kwryt kã krãhta. Nom pa ã mẽ kot inhĩpêx anhÿr kôt ixpê Tĩrtũm kra hkêt nẽ. Nẽ inhĩpêxã hkôt ixpê finat Pẽjamĩ kanrẽhã htãmnhwÿ jakamã ixpê Ijaew mex na pa. Nẽ Ijaew kapẽr o ixkapẽr o ri ixpa. Nom ja kôt ixpê Tĩrtũm kra hkêt. Nẽ mããnẽn ixpê Parijew nhõ xwÿnh jakamã na pa pre Tĩrtũm kot finat Mojes mã mẽ pakaxyw mẽmoj tã karõ kôt pix mã amnhĩ nhĩpêx o ixpa hprãm. ⁶ Jao tee ri mẽ kot Jejus kôt amnhĩ nhĩpêx xwÿnhjẽ pumu nẽ mẽ homnuj tÿx o ri ixpa. Na pa pre ijamaxpẽr o: “Nà mÿjjaja na htem mẽ ixkwÿm ri amnhĩ nhĩpêx o pa.” Anẽ nẽ mẽ hipêx kati ho ri ixpa. Nẽ ijamaxpẽr o: “Ra ixte finat Mojes kot Tĩrtũm nhÿ hã kapẽr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nẽ.” Anẽ.

⁷ ã na pa pre ixpê Tĩrtũm kra hprãm xàj amnhĩ nhĩpêx anhÿr o ixpa. Tã nom ãm ã amnhĩ nhĩpêx anhÿr hkaprÿ. Na htem ã ri amnhĩ nhĩpêx anhÿr kôt kêp Tĩrtũm kra hkêt nẽ. Tã pa hpãnhã amnhĩ kaxyw Kris kôt ijamaxpẽr nhũm ixto hkra kurẽ kumrẽx.

⁸ Ra ixte Jejus Kris kôt amnhĩ xãm jakamã Jejus kêp inhõ Pahihti pa inhmã kapẽr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mẽmoj punuj pyr nẽ amnhĩ katut kôt mẽnh nẽ axte kãm ijamaxpẽr kêt pyrãk. Jao amnhĩ kaxyw Jejus kôt pix mã ijamaxpẽr o ri ixpa. ⁹ Nom kormã ã ijamaxpẽr anhÿr kêt ri na pa pre ixtÿx ri ijamaxpẽr o:

—Nà ixte Mojes kot Tĩrtũm nhÿ hã kapẽr kôt amnhĩ nhĩpêx o ixpa jakamã koja Tĩrtũm ja hã ixpumu nẽ ixto hkra.

Anhÿr tã nom ja kot anhÿr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tĩrtũm ãm ja hã mẽ omu nẽ ãm hã mẽ omu nẽ mẽ ho hkra hkêt nẽ. Nom koja mẽ Kris kôt amnhĩ xunhwÿ nhũm ja hã mẽ omu nẽ mẽ ho hkra kurẽ kumrẽx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nẽ inhmex ã ijarẽ. ¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupÿm htĩr nẽ hihtÿx nẽ àhpumunh tÿx o tanhmã amnhĩ nhĩpêx to ho pa. Tã ijaxwÿja inhmã uràn ã amnhĩ nhĩpêx anhÿr prãm. Nẽ inhmã urãk nẽ amnhĩ xà htÿx kutã amnhĩ to htÿx nẽ ixpa hprãm. Mẽ kot hã ixpĩr mã tã pa urãk nẽ Tĩrtũm kapẽr kaga hkêt nẽ ãm kôt pix mã amnhĩ nhĩpêx o ri ixpa rãhã urãk nẽ hã ty. Ja na inhmã ho anhÿr prãm. ¹¹ Kê Tĩrtũm kot hipêxta pyrã nẽ akupÿm ixto ixtĩr pa wa kuri ixtĩr tũm nẽ ixpa ho ixpa. ¹² Inhmã Kris kôt pix mã amnhĩ nhĩpêx o ixpa hprãm tÿx kumrẽx. Kormã ixte hkôt amnhĩ nhĩpêx o inhmõr nẽ kormã hatur xãm mẽnh kêt tã inhmã tokyx hatur xãm mẽnh prãm. Na pa ã inhmã amnhĩ nhĩpêx anhÿr prãm tÿx kumrẽx.

Nẽ na pa hte ixte amnhĩ tomnuj kêt ã amnhĩ to jarkrar o ri ixpa hkêt nẽ. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhÿr prãm kêt. Nẽ na pa kormã ixprĩ hã Kris kot amnhĩ nhĩpêx mar o inhmõr nẽ hatur xãm mẽnh kêt tã inhmã hkôt amnhĩ nhĩpêx o inhmõr nẽ tokyx hatur xãm mẽnh prãm. Ja kaxyw na pre Jejus Kris amnhĩ kaxyw ixta. ¹³ Na pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nẽ. Nom ra ixte tanhmã amnhĩ tomnuj to ho ixpata pa axte kãm ijamaxpẽr kêt nẽ. Te amnhĩ katut kôt ixte rẽn par pyrãk o hipêx nẽ axte kãm ijamaxpẽr kêt nẽ. Nẽ Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpẽr o ri ixpa.

¹⁴ Koja nhÿrmã Tĩrtũm ixpê Kris kwÿ hã amnhĩ wÿr ixwÿ nẽ inhmã:

—E amnẽ ixwÿr api Pawre. Kot kaj jarãhã amnẽ mẽ ixwÿr api.

Anhÿr o nhÿrmã inhmã kapẽr jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mõi. Nà kot paj gaa nẽ hkôt pix mã amnhĩ nhĩpêx mex o ri ixpa. ¹⁵ Kwa kêr pu mẽ pahpiitã ã pajamaxpẽr anẽ. Jao amnhĩ wÿr hamãr pê hkôt pix mã amnhĩ nhĩpêx o ri papa. Mẽ pahpiitã mẽ pahpê Kris kwÿ kênã. Nom kot ka mẽ atõ ja kaxyw tee ri amnhĩ kukamã ajamaxpẽr nẽ ajamaxpẽr o:

—Nà tanhmã kot paj we amnhĩ to nẽ Jejus kôt amnhĩ nhĩpêx mex rãhã o ri ixpa? Ja kaxyw ixãhpumunh tỳxre hã. Anẽ.

Hãmri nẽ ã ajamaxpêr anhỹr o apaja apê hihtỳx japêr. Hã koja Tĩrtũm hprĩ hã tanhmã amã ja kukamã harẽnh to nẽ kaxyw ato axihtỳx ka ixpyrà nẽ hkôt pix mã ri amnhĩ nhĩpêx o apa. ¹⁶ Jakamã kêr pu mẽ ãm Tĩrtũm kãm hprãm xà hkôt pix mã tanhmã kãm amnhĩ nhĩpêx to ho papa. Ra mẽ pahte hkôt amnhĩ nhĩpêx o papa xàja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtõ nẽ ixtõxjaja. Na pa ra mẽ anoo mã Jejus kôt tãm ri amnhĩ nhĩpêx o ri ixpa. Tã kêr ka mẽ ja hã ixpumu nẽ ixpyrà nẽ hkôt amnhĩ nhĩpêx o ri apa. Hãmri nẽ nhỹri mẽ kot ixpyrà nẽ ã amnhĩ nhĩpêx anhỹr xwỳnhjê hõ pumu nẽ uràk nẽ ã amnhĩ nhĩpêx anẽ. ¹⁸⁻¹⁹ Jejus kot mẽ pamã mẽ pahte amnhĩ tomnuj mỳrapê pĩ kahpa hã mẽ panê htykja nhũm mẽ ra ohtõ nẽ hprĩ hã mar tã hkôt amnhĩ xunhwỳr kêt nẽ. Mẽ kãm ã kot amnhĩ nhĩpêx anhỹrja ã mar prãm nõkati. Jakamã te mẽ kãm Jejus kurê xwỳnh pyràk. Na htem hã hpijaàm kêt kãm tanhmã ri amnhĩ tomnuj to ho pa. Nẽ kãm amnhĩ mex pix prãm. Nẽ tanhmã amnhĩ tomnuj to nẽ ja hã amnhĩ pumu nẽ hkĩnh nẽ. Nom tee ri ja hã amnhĩ pumu nẽ hkaprĩ nẽ ri pa hkêt nẽ. Tã ã mẽ kot amnhĩ nhĩpêx anhỹr jakamã koja mẽ nhỹrmã ma mẽ kot amnhĩ xà htỳx kamã hamak o pa tũm xàta wỳr hapêx. Nà koja mẽ ã amnhĩ nhĩpêx anẽ. Ra ixte mẽ amã ja hã mẽ harẽnh rax tã pa axte mẽ amã mẽ harẽ. Inhmã mẽ hkaprĩ hkôt na pa hte xatã mẽ amã ja hã mẽ harẽ. ²⁰ Kêt mẽ papajaja mẽ kurom mẽ pahpê kaxkwa nhõ xwỳnh nom kormã. Koja nhỹrmã Jejus Kris akupỳn mẽ pahwỳr kaxkwa rũm wrỳ. Mẽ papytãr xwỳnh maati Pahihtija akupỳn wrỳ hãmri nẽ ma akupỳm amnhĩ kôt mẽ pahto api. Jakamã na pu htem arĩ pahkĩnh pê amnhĩ wỳr kamã pajamak rãhã ho ri papa. ²¹ Na pu htem jar pyka ja kamã Jejus kĩnhã paxirerek nẽ pahpunuj nẽ ri papa. Nom koja nhỹrmã akupỳn mẽ pahwỳr wrỳ hãmri nẽ amnhĩ pyrà nẽ mẽ pamã mẽ panhĩ nyw gõ pu mẽ uràk nẽ paxihtỳx kãm pahtĩr tũm nẽ papa ho papa. ã kot mẽ panhĩpêx anhỹr kaxyw ãhpumunh o ãhpumunh. Tã koja ãhpumunh tỳx kãm mẽmoj piitã ho amnhĩptãr pa. Pu mẽ pahpiitã hkôt amnhĩ nhĩpêx mex rãhã ho ri papa.

4

Pawre kot mẽmoj tã mẽ kãm karõ

Epes 4.3; Piripos 2.2; Korosẽ 3.15

¹ E Kris kôt ixtõ nẽ ixtõxjaja. Inhmã mẽ ajapêê. Na pa hte mẽ ato ijamak o ixkrĩ nẽ mẽ amã ijamaxpêr nẽ ixkĩnh nẽ. Nẽ jar mẽ pahkwỳjê mã mẽ ajarẽnh o ri ixkrĩ. E kwa kêr ka mẽ arĩ Pahihti kapêr kôt pix mã mãn amnhĩ nhĩpêx mex rãhã ho ri apa.

² Nẽ wa ka Ewox mẽ Sĩxika wa. Na ka xep hte wa mẽmoj tã axpên kamã agryk rãhã ho ri apa. Kwa wa ã amnhĩ nhĩpêx anhỹrja mã anhũre nẽ tãm axpên nhĩpêx. Pahihti Kris kôt war ate axpên to war atõx kênã kot ka kêt wa axtem nẽ mẽmoj tã axpên kamã agryk o ri apa.

³ Nẽ ka Xikitre. Apê ixkrãmnhwỳ mex jakamã kêr ka axpên tã wa nita wa kãm akapêr kãm axihtỳx nẽ kê war ama nẽ akupỳm tãm axpên nhĩpêx. Na pre wa ra Kremẽn mẽ hkwỳjê mẽ hpimràatã ixpyrà nẽ Jejus kot tanhmã mẽ panê amnhĩ nhĩpêx to hã harẽnh o ri pa. Tĩrtũm nhõ kagã kamã mẽ hixi piitã hikwỳ. Mẽ pahtĩr tũm nẽ mẽ papa mã xwỳnhjaja ra Tĩrtũm nhõ kagã kamã mẽ panhĩxi jaxwỳr par.

⁴ Nẽ kêr ka mẽ apê Pahihti hkwỳ hã akĩnh nẽ ri apa. Mẽ ate ã amnhĩ nhĩpêx anhỹr o apaja na pa inhmã hprãm tỳx jakamã kot paj axte mẽ amã harẽ. Kwa kêr ka mẽ akĩnh nẽ ri axpên kôt apa.

⁵ Pahihti Jejus ra akupỳn mẽ pahwỳr nojarêr jakamã kêr ka mẽ kutêp mẽ piitã ri mẽ ho mex o ri mẽ hkôt apa.

⁶ Nẽ kêr ka mẽ tee ri amnhĩ kukamã ajamaxpêr o ri apa hkêt nẽ. Arĩ amnhĩ to Tĩrtũm wỳr rãhã nẽ. Kot ka mẽ mẽmo arĩgro hã apê amrakati japêr nẽ tee ri ja hã amnhĩ pumu nẽ amnhĩ to awỳ kê mẽ ama nẽ mẽ amã mẽmoj gõ. Rỳ mẽ ate mẽmoj tã hwỳr xwỳnhnta tanhmã mẽ amã hipêx to ka mẽ amnhĩ tã omu nẽ kãm:

—Nà ãm hãmri na ka ã inhîpêx anê nê inhmã ja gô Tîrtûm. Amex o amex.

Anhÿr o kãm amnhî jarê. ⁷ Kot kaj mê ã amnhî to hwÿr anhÿr o ri apa nhÿm tanhmã mê akrã hto ka mê mê apê Jejus Kris kwÿ hã ajamakêtkati nê axàmnhîx ri apa. Hãmri nê mêmoy tã tee ri amnhî kukamã ajamexpêr o ri akapri nê apa hkêr nê. ãm akînh rãhã ri apa. Tîrtûm kot tanhmã mê pahto nhÿm mê pajamakêtkati nê ri mê papaja mê pahte amnhî tã omunh kêt. ãm tapxipix kot ã mê panhîpêx anhÿr kukamã àhpumunh tÿx.

⁸ E Kris kôt ixtô nê ixtôxjaja. Nà ixkapêr ã kagà jatur xà na ja. Kwa kêr ka mê ixujarênh mar tÿx nê hkôt amnhî nhîpêx o apa.

Nê kêr ka mê axapênh mex pix kukamã ri ajamexpêr o apa.

Nê mêmoy mex pix kukamã ri ajamexpêr.

Nê axpên mã akapêr mex pix kukamã ri ajamexpêr.

Nê akatât kôt akapêr xàptâr pix o axpên mã akapêr hkukamã ri ajamexpêr o ri apa.

Nê tãm ri amnhî nhîpêx hkukamã mân ajamexpêr o ri apa.

Nê mê piitã ri mê ho mex o apa hkukamã ajamexpêr.

Nê mê akapêr mex pix kukamã mân ajamexpêr o ri apa.

E kêr ka mê ã amnhî nhîpêx anhÿrja kukamã ajamexpêr rãhã ho ri apa.

⁹ Nê mê akôt ixpare ri na pa pre Kris kôt amnhî to mex pix nê tãm ixkapêr o ri ixpa. Tã kêr ka mê ixpyrà nê ã amnhî nhîpêx anê. Koja Tîrtûm ja hã mê apumu nê mê akôt ri pa ho pa. Kêp mê pamã mê paxàmnhîx pajamakêtkati xà nhôr xwÿnh na.

Mê kot Pawre hwÿr mêmoy mênh nhÿm kot omunh nê hkînh ã harênh

Sikûn Korîr 11.7-9; Piripos 1.5

¹⁰ Nê amnepêm na ka prem xatã tanhmã ixto mex to ho ri apa. Tã axte ã inhîpêx anhÿr prãm nom mê apê awry nê ixpa jakamã ka xep prem tee ri tanhmã ixto mex to hkukamã ajamexpêr kaprÿ. Tã jar mê kot ijaxâr ã ijarênh ma nê ixwÿr Eparoxit mê nhÿm man ixwÿr mô nê inhmã kàxporeta gô. Mê amã ijapê hã ixwÿr amê pa omu nê ixkînh tÿx nê. Nê ixkînh kãm Tîrtûm mã mê ajarê. ãm hãmri na ka prem ixwÿr amê.

¹¹⁻¹² Nê na pa hte tanhmã ixkute htã arî ixkînh nê ijamakêtkati nê ri ixpa. Jakamã kot pa mêmoy arîgro hã ixpê amrakati nê inhmã prãm japêr tã no ãm tee ri amnhî kukamã ijamexpêr o ri ixkapri hkêr nê. Arî ixkînh rãhã ixàmnhîx ri ixpa. Rÿ pa inhô mêmoy rax japêr nê mãânên ixkînh nê ixàmnhîx ri ixpa. Na pa pre tãhã inhô rax nê ixpa. Nê tãhã inhô hkêr nê ixpa. Tã arî ixkînh rãhã nê ixpa ho ixpa. ¹³ Na hte Kris mêmoy piitã hkukamã ixto ixihtÿx pa ÿ hã mêmoy kutã ixihtÿx nê ixpa. Jao mêmoy arîgro hã inhmã prãm tÿx nê ri ixpa htã ÿ hã kutã ixihtÿx nê ixàmnhîx ri ixpa. ¹⁴ Tã jar ixpunuj nê ixkrî ka mê ijarênh ma nê ixwÿr kàxpore hkwÿ rê. ãm hãmri na ka prem ixwÿr arê. ¹⁵ Amnepêm na pa pre mê anhô pika pê Masetôn rÿm ixkato nê mê piitã mê kãm Jejus kot tanhmã mê panê amnhî nhîpêx to hã harênh o ri ixpa ka mê xatã ixwÿr kàxpore hkwÿ rê pa ho amnhîm ixujaprôr o ri mê hkôt ixpa. Mê apê Piripos kamã Kris kôt ixtô nê ixtôx pixjaja na ka prem ã inhîpêx anê. Krî hkwÿ kamã Kris kôt mê pahkwÿjaja na mê akînhã ã inhîpêx anhÿr kêt nê. ãm mê kapxipix na ka pre ã ixto mex anê. ¹⁶ Tesarôn kamã ixpare ri na pa pre ixpê amrakati kumrêx nê ri mê hkôt ixpa ka mê xatã ixwÿr kàxpore hkwÿ rê pa pre ho amnhîm ixujaprôr rãhã ho ri mê hkôt ixpa. ¹⁷ Nom mê ate ixwÿr hkwÿ rênh kaxyw mê akamã ijamak o ri ixpa hkêr nê. Rÿ ijamexpêr o:

—Ko. Koja Piripos nhô xwÿnhjaja ijarênh ma nê kãm ixkapri nê ixwÿr kàxpore hkwÿ rênh japêr.

Anhÿr o mê akukamã ijamexpêr kêt nê. Nom ra mê ate ixwÿr hkwÿ rênh jakamã koja Tîrtûm ja hã mê apumu nê mê ato mex nê. ã mê pahte axpên kutã panojarêr anhÿrja na kãm hprãm.

¹⁸ Tã nhÿm Eparoxitja ham mê arÿm kato nê man ixwÿr mô nê inhmã kàxporeta gô. Kwa na ka mê inhmã ôr rax nê. Koja tokyx ixpê hapêx kêt pa kritpêm ho ixàpkur o ixkrî. Tã ot pa ho kôta nê tanhmã hkre kamã kute pumunh xà hkôt hã kagà nê mê awÿr kumê. Nà mê ate ixwÿr axàmnhôrta na Tîrtûm omu nê ixtã mê apumu nhÿm ja kãm mex

kumrêx. Te mẽ kot mẽ hkuxwaxà hpār nhũm mẽ kãm mexta pyræk nhũm ja kãm mex nẽ. ¹⁹ Nà koja Tĩrtũm mẽ apê Jejus Kris kwỳ hã mẽ amã mẽ ate mẽmoj to presija xà nhõr rãhã ho pa. Mẽmoj piitã kêp õ kênã.

²⁰ E kêr pu mẽ Mẽpanhĩpêêxà maati Tĩrtũm mã mex o mex ã harẽnh rãhã o papa. Ja na inhmã hprãm.

²¹⁻²² Nẽ ot pa mẽ jar ixpiitã mẽ apê Jejus Kris kôt mẽ ixkwỳjê hwỳr kagàja kamã mẽ ixpêr mẽ. Mẽ ixpyrà nẽ mẽ apê Tĩrtũm kra hã. Pa nẽ Kris kôt mẽ pahtõ nẽ mẽ pahtõxjaja. Nẽ Rõm nhõ pahi mã mẽ àpênh xwỳnh kot Kris kôt amnhĩ xunhwỳr xwỳnhjaja mããnẽ. ãm jar mẽ ixpê Tĩrtũm krajê piitã pa mẽ awỳr ixpêr mẽ.

²³ E kê Pahihti Jejus Kris mẽmoj to mẽ akutã nojarêt rãhã nẽ. Jao mẽ ato mex o pa. Tã ãm ja pix. Ixpê Pawre na pa mẽ awỳr kagàja nhĩpêx nẽ kumẽ.

Korosẽ

Pawre kot Koros kamã Jejus kôt hkwỳjê hwỳr kagà nẽ mẽn

Pawre na pre kagàja nhípêx. Jejus nhỹ hã hkrajê jahkre o mẽ pa xwỳnhjê hõ na pre. Tã nhũm mẽ kêp Jejus kra hkêk xwỳnh kwỳjaja Jejus ã unê nẽ haxà nhũm arĩ hkrĩ ho hkrĩ. Hãmri nẽ krĩ pẽ Koros kamã Jejus krajê mã kagà nhípêx nẽ mẽ hwỳr kumẽ. Koros kamã Jejus kwỳjê kamã Ijaew kwỳ nẽ kamã Ijaew kêt xwỳnh kwỳ nhũm Pawre mẽ ho hpimràatã mẽ hwỳr kumẽ. Kormã mẽ hwỳr mõi nẽ mẽ omunh kêt tãã. Nẽ kagàja kamã mẽ kot tanhmã Jejus o hêx to ho pa xwỳnhjê jarênh to. Jejus kêp Tĩrtũm Kra hkêk ã mẽ kot ho hêx xwỳnhjê jarê nẽ mẽ nê mẽ kãm kapêr. Mẽ kot mẽ hkôt amnhĩ nhípêx kêt kaxyw mẽ kãm kapêr nẽ hã kagà nẽ mẽ hwỳr kumẽ nẽ mẽ kãm:

¹ Pa Koros kamã Kris kôt ixkwỳjaja. Xà mẽ amex na ka mẽ apa? Ixpê Pawre na pa mẽ awỳr kagàja nhípêx nẽ mẽ awỳr kumẽ. Kris kôt mẽ pahtõ Ximotre mẽ wa kumẽ. Ixte Jejus Kris nhỹ hã mẽ ahkre ho mẽ ixpa xwỳnhjê hõ na pa. Tĩrtũm kãm hprãm xà hkôt.
² Tã pa mẽ awỳr kagà nhípêx nẽ kumẽ. Mẽ apê Kris kôt mẽ ixtõ nẽ ixtõx na ka mẽ. Na ka xep htem Kris kapêr kôt amnhĩ nhípêx mex o ri apa. E kê Tĩrtũm mẽ apê hkra hã mẽ akutã nojarêt rãhã nẽ. Ka mẽ amex nẽ ajamakêtkati nẽ axãmnhĩx ri tanhmã amnhĩ nhípêx ho ri apa.

Koros nhõ xwỳnh kwỳjaja kot Jejus kôt amnhĩ xunhwỳr ã mẽ harênh
Wam Tesarõn 1.2-5

³⁻⁴ Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamaxpêr tỳx nẽ hkôt amnhĩ nhípêx mex o apa hã mẽ ajarênhja ma. Nẽ mẽ kot Tĩrtũm kôt amnhĩ xunhwỳr xwỳnh piitã mẽ amã mẽ hkĩnh ã mẽ ho mex o apa hã mẽ ajarênhja ma nẽ wa ixkĩnh nẽ. Jakamã na pa wa Pahihti Jejus Nhípêxà Tĩrtũm mã amnhĩ jarênh kaxyw nẽ kãm mẽ anhy hã wa ixkĩnh ã amnhĩ jarê. ⁵ Na pre Epas ma mẽ awỳr mõi nẽ mẽ amã Jejus kot tanhmã mẽ panê amnhĩ nhípêx to hã harênh o mẽ akôt pa. ãm hãmri kot mẽ amã harênhja. Tã ka xep prem ama nẽ amnhĩ kaxyw hkôt ajamaxpêr nẽ hkôt amnhĩ xunhwỳ. Hãmri nẽ amnhĩ wỳr Jejus jamãr o ri apa. Kojã nhỹrmã akupỳn mẽ pahwỳr wry nẽ amnhĩ pyrã nẽ ma akupỳm kaxkwa hwỳr mẽ pahto api nẽ mẽ pahto mex kumrêx o mẽ pahkôt pa ho pa. Tã ka xep htem amnhĩ kaxyw hkôt ajamaxpêr tỳx nẽ ã kot amnhĩ nhípêx anhyr kutêp amnhĩ wỳr kamã ajamak rãhã nẽ. Nẽ mẽ amã mẽ kot Tĩrtũm kôt amnhĩ xunhwỳr xwỳnhjê hkĩnh tỳx nẽ.

⁶ Na hte Tĩrtũm ãm hãmri mẽ pahto mex pix rãhã ho pa. Nẽ mẽmoj to mẽ pakutã nojarêt rãhã nẽ. Tã wam mẽ ate harênh marta ã ka mẽ hkôt amnhĩ xunhwỳr kurê kumrêx nẽ ri kapêr kôt axpên kôt amnhĩ nhípêx mex pix o ri apa. Jao hkôt pix mã amnhĩ nhípêx mex nẽ. Tã na hte pika piitã hkôt ri mẽ pa xwỳnh kwỳjaja mẽ apyrã nẽ Jejus jarênh ma nẽ hkôt amnhĩ xunhwỳ. Nẽ mẽ apyrã nẽ axtem hkôt pix mã amnhĩ nhípêx nẽ kapêr kôt amnhĩ nhípêx mex o ri pa.

⁷ Nẽ mẽ awỳr mõi rta ã na pre Epasja mẽ amã Tĩrtũm kapêr jarênh o ri mẽ akôt pa ka prem ama nẽ amnhĩ kaxyw hkôt ajamaxpêr nẽ hkôt amnhĩ xunhwỳ. Epasja wa ixpyrã nẽ kot Kris mã tanhmã amnhĩ nhípêx to ho pa xwỳnh. Nẽ wa inhmã hapêê. Na pre katãt kôt mẽ amã Tĩrtũm kapêr jarênh pa. Kot mẽmoj to mẽ pakutã nojarêt rãhã hã harênh o ri mẽ akôt pa. ⁸ Tã man akupỳn wa ixwỳr mõi põi nẽ wa inhmã tanhmã mẽ ajarênh to. Tĩrtũm Karõ nhỹ hã mẽ amã Kris kôt atõ nẽ atõx piitã mẽ hkĩnh o ri apa hã mẽ ajarê. Pa wa mẽ ajarênh ma nẽ wa ixkĩnh tỳx kumrêx.

Pawre mẽ Ximotre wa kot Koros kãm hkwỳjê ho Tĩrtũm wỳr ã wa harênh
Epas 1.15-23, 3.14-21; Piripos 1.9; Wam Tesarõn 5.23-24; Sikũn Tesarõn 1.11, 2.16

⁹ Nẽ na pre Epas akupỳn wa ixwỳr põi nẽ wa inhmã tanhmã mẽ ajarênh to. Mẽ ate amnhĩ kaxyw Jejus kôt ajamaxpêr o apa nẽ mẽ amã Kris kôt akwỳjê piitã mẽ hkĩnh o ri

apaja nhūm wa inhmā mẽ ajarē. Pa wa mẽ ajarēnh ma nē mẽ ato Tirtūm wỳr rāhā o jar mẽ hagjēnh xà kamā ixkrī. Nē arī mẽ ato hwỳr rāhā ho ixkrī. Nē mẽ ato hwỳr o:

—Pa Tirtūm. Ot pa Ximotre mẽ wa Korosē nhō xwỳnhjê ho awỳr kaxyw amā mẽ harē. Kwa tanhmā mẽ hamaxpēr to kê mẽ amā hprām xà hkôt pix mā amā tanhmā amnhī nhīpêx to ho pa. Nē Akarō nhỹ hā hprī hā akapēr ma nē am hkôt pix mā tanhmā amnhī nhīpêx to ho pa. Anē.

¹⁰ Na pa hte wa ã mẽ ato Tirtūm wỳr anhỳr rāhā ho ixkrī. Kot kaj mẽ ã amnhī nhīpêx anhỳr o ri apa nē Jejus kot amnhī nhīpêx o amnhī nhīpêx mex o ri apa. Nē aprī hā Tirtūm kot amnhī nhīpêx ã omunh mex o mō. Jao mẽmoj to axpēn kutā anojarēt pix o ri apa hprām. Hāmri nhūm Tirtūm ja hā mẽ apumu nē hkīnh nē. ¹¹ Tirtūmja mẽ pakurom mẽmoj piitā kaxyw àhpumunh o àhpumunh. Nē mẽmoj piitā kaxyw hihtỳx o hihtỳx. Jakamā na pa hte wa mẽ ato hwỳr o:

—Pa Tirtūm. Kwa tanhmā Koros nhō xwỳnhjê ho kê mẽ axihtỳx nhỹ hā mẽmoj punuj kutā amnhī to htỳx nē. Mẽ kot Jejus ã tanhmā mẽ ho nhūm mẽ kot amnhī xà kamā hamak tā kê mẽ tee ri amnhī kukamā hamaxpēr o hkaprī nē ri pa hkêt nē. Am anhỹ hā mẽ hkurê xwỳnhjê kutā amnhī to htỳx nē hkīnh kām ri pa ho pa. Anē.

Na pa hte wa ã mẽ ato hwỳr anē.

¹² Na pre ra Tirtūm amnhī ri mẽ pakutêp mẽmoj mex kwỳ jaxwỳ. Mẽ pahpê hkrajê mã haxwỳ. Tā ka mẽ ã hā tām amnhī nhīpêx o apa jao mẽ ate mẽmoj mex jamỳnh mã tām. Ō krī nhīrā rax kumrêx kamāã. Jakamā kwa mẽ kot Jejus ã tanhmā mẽ pahto htā kêr pu mẽ arī Tirtūm mã mex o mex ã harēnh rāhā ho ri papa.

¹³ Nē Satanasti kêp kamāt kô kamā mẽ kot amnhī tomnuj ho mẽ pa xwỳnhjê pām. Tām na hte mẽ ho amnhīptār o pa nē hkôt na pu prem amnhī nhīpêx o papa rāhā nhūm Tirtūm tee ri ja hā mẽ pahpumu. Hāmri nē kām kêp mẽ papytār prām xaj mẽ pahwỳr Kra japê htỳx kumrêx xwỳnhja mẽ. Nhūm mẽ pahwỳr wrỳ nē mẽ panê htyk o mẽ pahte amnhī tomnuj pānhā kām amnhīre. Tā pu prem hkôt amnhī xunhwỳ nhūm Tirtūm hā mẽ pahpumu nē mẽ panê mẽ pahte amnhī tomnuj o hapêx pa. Te kot amnhī katut kôt rēnh par pyrāk. Jao Satanasti pē mẽ pahpytā nhūm hpānhā Jejusja tām kêp mẽ pahto amnhīptār o pa xwỳnh.

¹⁴ Ra htyk o mẽ pahte amnhī tomnuj piitā hpānhā amnhīrer jakamā na pu htem hkôt amnhī xunhwỳ nhūm mẽ pahte amnhī tomnuj o hapêx pu mẽ axte Satanasti hkôt ri amnhī nhīpêx kêt nē. Am Jejus kôt pix mã amnhī nhīpêx o ri papa.

Kris mẽ Tirtūm wa kot amnhī nhīpêx te wa kot axpēn pyrāk ã harēnh

Juāw 1.1-5; Korosē 2.9; Eprêw 1.1-14

¹⁵ Nē Krisja te kot Tirtūm pyrāk. Mẽ pahte pano ho Tirtūm pumunh kêt tā Kra Kris kot amnhī nhīpêx ã harēnh mar kôt määnēn Tirtūm kot amnhī nhīpêx ã omunh mex nē. Amnepê mã kormā mẽmoj kêt ri nhūm Jejus pa ho pa rāhā nē. Jakamā kot amnhī to rax o Tirtūm kot mẽmoj to katorja piitā hakrenh par kumrêx. ¹⁶ Na pre hipêxà Tirtūm nhỹ hā mẽmoj piitā ho kator pa. Kaxkwa kamā nē pika hkôt mẽmoj piitā ho kator pa. Nē kaxkwa kamā mẽ pahte pano ho mẽmoj pumunh par xwỳnhjaja nhūm pre ho kato. Nē kamā mẽ pahte pano ho mẽmoj pumunh kêt xwỳnhjaja nhūm pre määnēn ho kato. Nē kapēr o wrỳk xwỳnhjaja nē mẽ hkrāhtūmjaja nhūm pre mẽ ho kato. Nē pika kamā mẽ ho amnhīptār xwỳnhjaja nhūm pre mẽ piitā mẽ ho kator pa. Kām hprām xà hkôt Tirtūm nhỹ hā mẽmoj piitā ho kator pa.

¹⁷ Tā na hte arī kaxkwa kamā nē pika hkôt mẽmoj piitā hamār rāhā ho pa. Kêp apu kot hamār kêt ronhỳx mẽmoj piitā akupỳm hapêx pa.

¹⁸ Nē tām na hte mẽ pahpê hkrajê ho amnhīptār o pa. Te kêp mẽ pahkrā nhūm te mẽ pahpê ã pyrāk jakamā na pu htem kapēr kôt pix mã amnhī nhīpêx o papa. Kumrêx na pre akupỳm htīr o htīr jakamā kot amnhī to rax o mẽmoj piitā hakrenh par.

¹⁹ Nē na pre Tirtūm ã hamaxpēr anē nē hamaxpēr o: “Nà Ixkra mẽ wa ixte amnhī nhīpêxja te kot axpēn pyrāk. Nē wa ixihtỳx määnēn te kot axpēn pyrāk. Nē wa inhmex

xà mẽ wa ixàhpumunhja te kot axpën pyræk. Æ wa ixte amnhĩ nhĩpêx kot anhÿr. Wa ixte amnhĩ nhĩpêxja na mex kumrêx.” Anê.

²⁰ Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tĩrtũm mẽ kot hkôt amnhĩ xunhwÿr xwÿnh piitã mẽ ho hkra nhũm mẽ hamakêtkati nê àmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhĩ xunhwÿr xwÿnhjaja na htem ã amnhĩ nhĩpêx mex anhÿr o pa. Æ Jejus kot mẽ panê htyk anhÿr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwÿr xwÿnh ã harênh

²¹ Nê mẽ papajaja na pu prem pamã Tĩrtũm prãm kêt o ri papa. Te hkàx ã ri papa pyrã nê kutã amnhĩ xunhwÿ nê pajamaxpêr punuj nê tanhmã amnhĩ tomnuj to pix o ri papa.

²² Tã Jejus kôt amnhĩ xunhwÿ nhũm amnhĩ tã mẽ pahpumu. Hãmri nê ra mẽ panê htyk jakamã amnhĩ tã mẽ pahpumu nê Tĩrtũm noo mã tãm mẽ paxunhwÿ. Te aa mẽ pahte tanhmã amnhĩ tomnuj to hkêt pyræk o mẽ panhĩpêx nê tãm mẽ paxunhwÿ. Pu mẽ arĩ pahpê Tĩrtũm kutã amnhĩ xunhwÿr xwÿnh kêt nê hpãnhã pahpê hkràmnhwÿy. ²³ Na pre Tĩrtũm mẽ pahte amnhĩ kaxyw Kra Kris kôt pajamaxpêr nê hkôt amnhĩ xunhwÿr ã mẽ pahpumunh kôt ã mẽ pahto mex anê. Tã kêt pu mẽ arĩ hkôt amnhĩ nhĩpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxar kêt ri na pa pre hte mẽ kãm ã harênh anhÿr o ri mẽ hkôt ixpa. Tã ka prem Jejus jarênh ma nê hkôt amnhĩ xunhwÿr kurê kumrêx. Nhũm krĩ piitã hkôt ri mẽ pa xwÿnh kwÿjaja mẽ apyrã nê harênh ma nê hkôt amnhĩ xunhwÿ nê hkôt amnhĩ nhĩpêx o pa.

Pawre kêp Ijaew kêt xwÿnhjê mã Jejus jarênh xwÿnh ã harênh
Epes 3.1-13

²⁴ Nê ixte mẽ amã Kris kot tanhmã mẽ panê amnhĩ nhĩpêx to hã harênh o ixpaja ã na prem tanhmã ixto htÿx nê pa amnhĩ xà htÿx kãm ijamak o ri ixpa. Tã arĩ Tĩrtũm kãm hprãm xà hkôt ã amnhĩ nhĩpêx anhÿr jakamã na pa ixkĩnh nê jar ixkrĩ. Ixte Kris kwÿjê kaxyw amnhĩ xà kamã ijamak tÿx o ixkrĩ. Te mẽ apê Kris nhĩ pyræk xwÿnhjê mãã. Tã pa te ixpê Kris kot amnhĩ nhĩpêx pyræk o mẽ akaxyw amnhĩ xà htÿx kãm ijamak o ixkrĩ.

²⁵ Na pre Tĩrtũm mẽ apê Ijaew kêt xwÿnhjê kaxyw ixãm. Ixte mẽ amã kapêr piitã harênh par nhũm mẽ ate mar nê hkôt amnhĩ nhĩpêx mex o ri apa kaxyw. ²⁶ Na pre kormã mẽhõ mẽ awÿr mör nê mẽ amã harênh kêt nê. Tã ra Tĩrtũm kãm mẽ ate mar prãm nê. Kãm mẽ apê Ijaew kêt xwÿnhjê mẽ mẽ pahpê Ijaew xwÿnhjê japê o axpën pyræk. Nom na pre amnepêm ri mẽ pa xwÿnhjê mã kormã ja hã amnhĩ to amnhĩrĩt kêt nê. Tã ra jarãhã mẽ pahpê Kris kwÿjê mã ja ho amnhĩrĩt. Mããnen kãm mẽ apê Ijaew kêt xwÿnhjê japê hã amnhĩ to amnhĩrĩt. ²⁷ Mẽ apê Ijaew kêt tã na ka prem Kris kôt amnhĩ xunhwÿr nhũm Tĩrtũm Karõ mẽ akarõ mã agiê nê mẽ akamã pa ho pa. Ka mẽ ra hkôt amnhĩ nhĩpêx jakamã kot kaj mẽ ixpyrà nê nhÿrmã kuri atĩr tũm nê amex rãhã ho apa ho apa. Ja na mex kumrêx. Tã ja na Tĩrtũm kãm mẽ ate mar prãm nê mẽ akaxyw ixãm. ²⁸ Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhĩ nhĩpêx to hã harênh kãm ixihitÿx o ri mẽ akôt ixpa. Nê kapêr o mẽ ajahkre ho ri mẽ akôt wa ixpa. Nê jar mẽ hagiênh xà kamã krĩ piitã hwÿr kagà nhĩpêx nê mẽ hwÿr kurê. Mẽ kot kamã harênh nê mar nê amnhĩ tomnuj kaga nê hpãnhã Kris kôt amnhĩ xunhwÿr nê ãm kôt pix mã amnhĩ nhĩpêx o pa kaxyw. Kêt pa nhÿrmã kãm mẽ ate inhmar nê hkôt amnhĩ xunhwÿr xwÿnhjê jahkre nê kãm:

—E Pahihti. Ota akwÿjaja. Na htem akôt amnhĩ nhĩpêx mex rãhã ho ri pa. Anê.

²⁹ Æ ixte kãm mẽ piitã mẽ harênh anhÿrja na inhmã hprãm. Ja kaxyw na pre Jejus ixto ixihitÿx. Jakamã na pa hte Tĩrtũm nhÿ hã tanhmã kapêr o mẽ ahkre hto ho ri mẽ hkôt ixpa. Jao mẽ ho Tĩrtũm wÿr o ri ixpa nê mẽ kãm kagà nhĩpêx nê mẽ hwÿr kurê nê kamã kapêr o mẽ ahkre o ri ixpa.

2

*Pawre kot Jejus kapēr o Koros nhō xwýnhjê o hihtýx ã harēnh
Epes 3.14-19; Piripos 1.9*

¹ E kot paj mẽ amã tanhmã amnhĩ jarēnh to ka mẽ inhma. Na pa hte mẽ ato Tĩrtũm wýr rãhã ho ixkrĩ. Mẽ kajaja nẽ krĩ pê Ratisej kamã Jejus kôt mẽ pahkwýjaja. Kormã ixte mẽ apumunh kêt tâ pa hte mẽ ato Tĩrtũm wýr kãm ixihtýx ãhã ho ixkrĩ. ² Mẽmo kaxyw na pa hte ã mẽ ato hwýr anẽ? Nẽ mẽmo kaxyw na pa hte mẽ amã kagã nhĩpêx nẽ mẽ awýr kurẽ? Nã ãm mẽ ate kamã harēnh nẽ mar nẽ Jejus kapēr kôt axpẽn to axihtýx o ri apa kaxyw. Nẽ mẽ amã axpẽn kĩnh o ri apa kaxyw. Pê te mẽ ate ixkre tipxi kamã axpẽn kôt amnhĩ nhĩpêx o ri apa pyrãk. Jao aprĩ hã Tĩrtũm kot amnhĩ nhĩpêx pumunh mex nẽ amnhĩ kaxyw hkôt ajamxpěr týx nẽ. Kot kaj mẽ ã amnhĩ nhĩpêx anẽ nẽ Kris kot amnhĩ nhĩpêxta pumunh pa. Na pre Tĩrtũm tokyx mẽ kãm Kris o amnhĩrĩt kêt tâ ra mẽ pamã ho amnhĩrĩt. ³ Tĩrtũm kot amnhĩ nhĩpêx nẽ kapērja na pu htem Kris nhỹ hã pahprĩ hã omunh nẽ mar mex nẽ. ⁴ Jakamã koja mẽmojaja mẽ awýr mra hãmri nẽ hêx rom Tĩrtũm kapēr kwým ri tanhmã mẽ amã mẽmoj jarēnh to. Te mẽ àhpumunh týx pyrãk o mẽ amã harẽ no ãm mẽ àhpumunh kêt. Ka mẽ ama nẽ ãm mẽ ama nẽ Kris kaga hkêt nẽ.

⁵ Nẽ kormã arĩ Jejus ã ijaxàr nẽ ixkrĩ nẽ kormã mẽ akôt ixpa hkêt tâ ot pa hte mẽ amã ijamxpěr rãhã ho ixkrĩ. Nẽ ra tanhmã mẽ ajarēnh mar to. Na ka xep htem Kris kôt amnhĩ nhĩpêx týx o ri apa. Te ahkrô pê kukryt mut kuxêeti kot pĩ kupu htýxta pyrãk. Nẽ ka xep htem arĩ amnhĩ kaxyw Kris mã ajamxpěr týx o ri apa. Pa mẽ ajarēnh ma nẽ ixkĩnh týx nẽ.

⁶ Na ka prem Pahihti Jejus Kris kôt amnhĩ xunhwýr pa. Tã kêr ka mẽ arĩ hkôt amnhĩ nhĩpêx mex rãhã ho apa. Kêp mẽ panhō Pahihti kênã. ⁷ Jakamã mẽ ãm kôt pix mã amnhĩ xunhwýr týx nẽ aa hkaga hkêt nẽ. Te mẽmo pĩ hpàr jarêja pika kaxwýnh kãm pimành nẽ kot pika jamýnh týxta pyrãk. Nhũm kôk xàpêr týx tã tee kot mēnh kaxyw pyrãk. Tã kêr ka mẽ pĩ hpàrta pyrã nẽ hkôt amnhĩ xunhwýr týx nẽ hkôt amnhĩ nhĩpêx mex o ri apa. Ra Epas kot mẽ ajahkre ho pa xà hkôt. Nẽ amnhĩ krãm Kris kapēr jaxàr týx nẽ aa ho ajamakêtkati hkêt nẽ. Pê akĩnh kãm Tĩrtũm mã mex o mex ã harēnh rãhã ho ri apa.

⁸ Nẽ kwa kêr ka mẽ kot hêx rom mẽ amã tanhmã kapēr to ho mẽ pa xwýnhjaja ka mẽ amnhĩ nẽ mẽ omunh mex nẽ. Nẽ mẽ kapēr mar hkêt nẽ. Mẽ ate Kris kaga hprãm xaj na htem tanhmã mẽ amã hêx to ho ri mẽ akôt pa. Te amnepêm mẽ kot Tĩrtũm kapēr kwým ri tanhmã mẽ ahkre hto xwýnhjê pyrãk. Hinhu hikôoti kapēr kôt na htem tanhmã mẽ amã hêx to nom Kris nhỹ hã mẽ amã kapēr kêt nẽ. Jakamã kwa mẽ amnhĩ nẽ mẽ omunh mex nẽ.

⁹ Nẽ Kris mẽ Tĩrtũm wa kot amnhĩ nhĩpêx kot axpẽn pyrãk. Nẽ wa hamaxpěr kot axpẽn pyrãk. ¹⁰ Tã kêr pu mẽ pajaxwýja wa hamaxpěr o pajamxpěr nẽ wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapēr kwým ri tanhmã mẽ kapēr to xwýnhjê kot amnhĩ nhĩpêx o amnhĩ nhĩpêx kêt nẽ. Nẽ mẽ kapēr ma nẽ ãm mẽ ama. Kris na hihtýx o hihtýx o kot mẽkarõmnuti nhō pahi piitã mẽ hakrenh par. Nẽ hihtýx o hihtýx o kot Tĩrtũm kapēr o mẽ wrýk xwýnhjê piitã mẽ hakrenh par. Nẽ àhpumunh o àhpumunh o kot mẽmoj piitã hakrenh par jakamã kêr ka mẽ kapēr kôt pix ma nẽ hkôt pix mã ri amnhĩ nhĩpêx o ri apa.

*Mẽ pahte amnhĩ nhĩpêx nyw jarēnh
Rômãn 6.3; Karatas 5.24*

¹¹ Nẽ na hte ixkwý Ijaewjaja mẽ hkra nhỹrmã hprêk nẽ Tĩrtũm kôt amnhĩ nhĩpêx ã mẽ harēnh kaxyw mẽ kêp mẽmy kwýr kà jakà. Tã mẽ kajaja. Mẽ apê Ijaew kêt xwýnhjaja na pre Kris mẽ anhĩpêx o te mẽ kot amnhĩ jakarta pyrãk. Jao te kot mẽ anẽ mẽ ate amnhĩ nhĩpêx tũm jakàr par pyrãk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nẽ mẽ ate Jejus kapēr kôt amnhĩ nhĩpêx ã mẽ apumunh kurẽ kumrêx. ¹² Tã na pu htem jarãhã mẽ pahte Tĩrtũm kôt amnhĩ nhĩpêx o papa hã amnhĩ jarēnh kaxyw amnhĩ jakàr kêt nẽ. Na pu htem hpãnhã amnhĩ kaxyw Tĩrtũm xihtýx o hihtýx xwýnhja kôt pajamxpěr. Kot mẽ panê pahte amnhĩ

tomnuj rēnh par kôt pajamxpēr hāmri nhūm mẽ gôx kām mẽ pahkrā kumrā. Te mẽ pahte gôx kām mẽ pahte amnhĩ nhĩpêx tūm rer par pyrāk o amnhĩ nhĩpêx. Te Jejus htyk nhūm mẽ kot haxār nhūm nōr nhūm mẽ pahte amnhĩ tomnujja iħkô hā nōr nē hapêx par pyrāk. Tā pu htem ra gôj rūm pahkrā hapôj. Te Tirtūm kot akupým Kris o htir pyrāk. Jao ra mẽ pahte Kris kôt amnhĩ nhĩpêx nyw o amnhĩ nhĩpêx o papa hkrax ā amnhĩ to amnhĩrit. ¹³ Amnepēm kormā mẽ pahte Jejus kôt amnhĩ xunhwýr kêt ri na pu prem ri amnhĩ tomnuj to nē tanhmā pajamxpēr punuj to ho ri papa. Tirtūm noo mã te ra mẽ pahtyk pyrāk. Tā Tirtūm te akupým Kris kôt mẽ pahto pahtir pyrāk o mẽ panhĩpêx nē mẽ panē mẽ pahte amnhĩ tomnuj piitā ho hapêx nē axte kām hamaxpēr kêt kumrêx. ¹⁴ Te mẽ pahte tanhmā amnhĩ tomnuj to ho papa nhūm Tirtūm kot ja hā mẽ pahpumunh nē mẽ pahte amnhĩ tomnuj piitā hā kagà hpar pyrāk. Nē kot kagàja pyr nē Kris nhĩhkô hā pĩ kahpa hā nhōr pyrāk. Jao te kot mẽ pahte amnhĩ tomnuj ā kagàta hkaxōnh nē rēnh par pyrāk o hipêx. ¹⁵ Hāmri nhūm Krisja pĩ kahpa hā htykja o mẽkarōmnuti mẽ mẽ õ pahi Satanasti wa mẽ ho hirerek pa. Jao hihtýx o kot mẽ hakrenh par ā amnhĩ to amnhĩrit. Te mẽ kot kutā amnhĩ xunhwýr xwýnh piitā mẽ noo mã mẽ ho krihkrit par nē ma akupým õ krĩ hwýr hkĩnh nē grer o mōrta pyrāk.

¹⁶ Nē koja mẽmojaja mẽ awýr mra nē tee ri mẽ ate mẽmoj kur o akrĩ hā mẽ apumu nē mẽ amā:

—Kwa na hte Tirtūm kôt mẽ kot amnhĩ xunhwýr xwýnhjaja ja kur kêt nē. Nē ja ho hkōm kêt nē. Nē mẽ panhō arĩgromnu pē sap ā ri mẽmoj tā àpēnh kêt nē. Nē mytwrý nyw ā mẽmoj tā àpēnh kêt nē. Na htem ā Tirtūm ā hkĩnh o pa anē. Tā ā mẽ ate mẽ ixkôt amnhĩ nhĩpêx anhýr kêt jakamā mǎn mẽ apē Tirtūm kra hkêt nà. Anē.

Tā nom kêt ka mẽ kapēr ma nē ãm ama. ¹⁷ Amnepēm kormā mẽ pahte Kris kôt amnhĩ xunhwýr kêt ri na pu prem ā amnhĩ nhĩpêx anhýr o papa. Tā Jejus kôt amnhĩ xunhwý hāmri nē axte ā amnhĩ nhĩpêx anhýr kêt nē. Pānhā kapēr pix ma nē hkôt pix mã amnhĩ nhĩpêx o ri papa.

Mẽ pahte mẽ kot Tirtūm kapēr o mẽ hêx xwýnhjê mar kêt ā mẽ pamā karō

¹⁸ Nē koja mẽmojaja mẽ awýr mra nē hêx rom tanhmā mẽ amā amnhĩ jarēnh to nē mẽ amā:

—Na pre Tirtūm ãm mẽ papxipix mẽ inhmā amnhĩ to amnhĩrit. Jakamā kwa mẽ ixkapēr ma. Kot kaj mẽ inhmar kêt nē hāmri nē mẽ amex kêt nē apa.

Anhýr o mẽ amā kapēr japēr ka mẽ ama nē ãm mẽ ma. Rý nhūm mẽ amā:

—Tirtūm mẽ parom kot amnhĩ to rax o kot mẽ pahpiitā mẽ pajakrenh par jakamā kwa mẽ tanhmā amnhĩ to hwýr to hkêt nē. Kot ka mẽ anē nhūm mẽ ama nē mẽ akamā gryk nē. No kêt mẽ amnhĩ to kapēr o wryk xwýnhjê mǎn wý. Koja mẽ ama nē mẽ akamā gryk kêt nē tanhmā mẽ amā mẽmoj nhĩpêx to. Anē.

Koja mẽ ã mẽ amā kapēr anē ka mẽ ama nē ãm mẽ ama. Te ho mẽ àhpumunh týx kām mẽ kot ã mẽ amā kapēr anhýr pyrāk no ãm mẽ kapērja mex kêt. Na htem amnhĩ krā hkôt te amnhĩ to rax pyrāk o ã mẽ amā kapēr jao mẽ hamaxpēr tūm o hamaxpēr o ri pa. No mẽ apyrà nē mẽ hamaxpēr nyw o hamaxpēr kêt nē. ¹⁹ ãm mẽ kot Tirtūm kapēr kwým ri mẽ ahkre jakamā mẽ kêp Jejus kwý hkêt. No mẽ papajaja mẽ pahpê Jejus kwý na pu mẽ. Nhūm Jejus kêp mẽ panhō Pahĩti jakamā na hte tanhmā mẽ pahto paxihtýx to pu htem kukwak ri tanhmā xpēn to ajuta hto ho ri papa. Nē hkôt xpēn to paxihtýx o ri papa. Mẽ pahpiitā mẽ pahte hkôt amnhĩ nhĩpêx mex o ri papa kaxyw. Tirtūm kām hprām xā hkôt.

Mẽ pahte amnhĩ krā hkôt tām amnhĩ nhĩpêx kêt ã mẽ pajarēnh

Karatas 3.1-5, 5.1-9; Epes 2.8; Piripos 3.9

²⁰⁻²¹ Nē wam mẽ pahte amnhĩ nhĩpêx tūm nē mẽ pajamxpēr tūmta te kot Kris kôt htyk nē mẽ pahpê hapêx par pyrāk jakamā na pu htem arĩ hkôt amnhĩ nhĩpêx kêt nē. Nē mẽkarōmnuti hkôt amnhĩ nhĩpêx kêt nē. Tā no nhūm xep ra mẽhōja mẽ awýr mō nē hêx rom mẽmoj nē tanhmā mẽ amā kapēr to nē mẽ amā:

—Kwa mẽ ja jamýnh kêt nē. Nē ja hkur kêt nē. Nē ja kupēnh kêt nē.

Anhÿr o mêmoy nê mē akurê ho pa. Xep mē ã mêmoy nê mē akurê anê ka xep mē ama nē mē hkôt amnhî nhîpêx. Kwa nà mon ka mē ri axtem nē mē hkôt amnhî nhîpêx? ²² Tirtûm kot mêmoyja nê tanhmã mē pahkurê htore hã. ãm mē kot amnhî krã hkôt mêmoy nê mē akurê ka mē ama nē mē hkôt amnhî nhîpêx. Mêmoy kur nê mē akurê xwÿnhnta na htem kuku nhûm hapêx kurê kumrêx. Mo koja we Tirtûm omu nhûm kêp omnuj? Nà ja kot anhÿr kêt kênã. Mē ãm amnhî krã hkôt mē kot ja nê mē akurê. ²³ Tã ã mêmoy nê mē akurê anhÿr xwÿnhjaja na ka htem nhÿri mē omu nē mē kapêr ma nē atÿx ajamaxpêr o:

—Nà te Tirtûm kôt amnhî nhîpêx mex o pa pyrãk. Te mē àhpumunh tÿx pyrãk o ã mē inhmã mêmoy jarênh anê. Anê.

No ãm mē kot mêmoy jarênhja kot anhÿr kêt. ã mē kot amnhî nhîpêx anhÿr xwÿnhjaja kêp Tirtûm kra hkêt. Na htem ãm amnhî krã hkôt mêmoy nê mē akurê ho pa. Nê hã amnhî to jarkrar o ri pa. Mē ate ja hã mē mar nē mē kot amnhî to rÿnh ã mē hkamnhîx kaxyw. Na htem kot amnhî tomnuj pymaj tanhmã amnhî nhî hto ho pa. No ãm ri ã amnhî nhîpêx anhÿr kaprÿ. Nê ãm htÿx Tirtûm kapêr o mē wrÿk xwÿnhjê hwÿr kaprÿ ho pa.

3

Mē pajamaxpêr nyw nê mē pahte amnhî nhîpêx nyw jarênh

Rômãn 6.4-11

¹ Nê na pre Tirtûm akupÿm Kris o htir nhûm mē pahte hkôt amnhî xunhwÿr jakamã te Tirtûm kot Kris nhîpêx pyrã nê akupÿm mē pahto mē pahtir pyrãk o mē panhîpêx. Jakamã kwa kêr pu mē axte pahte amnhî nhîpêx tûm kôt amnhî nhîpêx kêt nê. Te Kris pyrã nê ra kaxkwa hwÿr paxãpir nê kamã ri papa pyrãk o amnhî nhîpêx. Jao pajamaxpêr nyw pix o pajamaxpêr nê pahte amnhî nhîpêx nyw pix o amnhî nhîpêx o ri papa. Te Kris kot amnhî nhîpêx pyrãk. Na pre akupÿm kaxkwa hwÿr api nê Tirtûm nhîhkô hã mē ho amnhîptãr xã kamã hkrî ho hkrî.

²⁻³ Nê ra mē pahte Kris kôt amnhî xunhwÿr jakamã te jar pika hkôt pajapêx par nê Tirtûm wa kuri kaxkwa kamã pamex nê papa ho papa pyrãk. Jakamã kwa kêr pu mē pahte amnhî nhîpêx nyw mã mãn pajamaxpêr rãhã ho papa. Nê axte mē pahte amnhî nhîpêx tûm mã pajamaxpêr kêt nê.

⁴ Kris kêp akupÿm mē pahto mē pahtir xwÿnh. Koja nhÿrmã akupÿn mē pahwÿr wrÿ hãmri nhûm Tirtûm te ho mex raxta pyrãk o mē panhîpêx nê mē pahto mex rax kumrêx.

Mē pahte akupÿm amnhî nhîpêx tûm o paxujanãr kêt ã mē pamã karô

Epes 4.17-5.2

⁵ Jakamã kwa kêr ka mē axte ate amnhî nhîpêx tûm kôt amnhî nhîpêx kêt nê. Te ra mē apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rÿ axpên prô ho amnhîkati hkêt nê.

Nê nhãm ri mêmÿjê hõ rÿ mênijê hõ ho amnhîkati hkêt nê.

Nê mē amã tanhmã amnhî tomnuj to hprãm kêt nê.

Nê mē amã akukrêx rax prãm kêt nê. Kot ka mē ã amnhî nhîpêx anê nê gaa nê akukrêx rax gryk ã axte Tirtûm mã ajamaxpêr kêt nê.

⁶ ã mē kot amnhî nhîpêx anhÿr xwÿnhjaja Tirtûm kãm mē hprãm kêt. Koja nhÿrmã tanhmã ja hã mē homnuj tÿx to. ⁷ Amnepêm kormã mē ate Kris kôt amnhî xunhwÿr kêt ri na ka prem ã amnhî nhîpêx anhÿr o ri apa. ⁸⁻⁹ Tã kêr ka mē axte ã amnhî nhîpêx anhÿr kêt nê.

Nê mē ri axpên kãm agryk o ano hkà karôt o axpên pumunh kêt nê.

Nê mē axpên kamã axãhkurê hkêt nê. Ri tanhmã axpên tomnuj to ho apa hkêt nê.

Rÿ axpên jakwa kamã mêmoy ma nê ri axpên xô ri tanhmã ri axpên mã ho axêx to ho ri apa hkêt nê.

Nê mē akapêr mã agêt o ri mē kãm akapêr kêt nê.

Nê mē ri mêmoy to axpên mã axêx hkêt nê.

ã mē ate amnhî nhîpêx anhÿr tûmta ra mē apê hapêx par kênã.

Mē pahte amnhī nhīpêx nyw kôt amnhī nhīpêx ā mē pamā karō

Rōmān 12.2; Epes 4.23; Wam Pêtre 2.11

¹⁰ Nē na ka mē ra mē ate amnhī nhīpêx nyw o amnhī nhīpêx o ri apa. Jao ra mē pahto kator xwýnh maatija kôt amnhī nhīpêx mex o mō. Kot kaj mē gaa nē rī hkôt amnhī nhīpêx mex kumrêx o ri apa. Kām hprām xà hkôt.

¹¹ Nē mē pahpê Kris kwýjaja ahpýnhā na pu mē. Na mē pakamā Ijaew nē Ijaew kêt xwýnhjaja. Nē mē pakamā panhī nē kupē. Nē mē kām àpênh xwýnhjaja nē mē kot amnhī mā ri àpênh xwýnhjaja. Ām ahpýnhā mē pahpê Kris kwýjaja mē pahte anhýr tā na hte Tirtūm tanhmā mē pakute hkôt mē pahpumunh kêt nē. Na hte mē panhīpêx o axpên pyrā nē mē pahpiitā mē pakamā pa ho pa pu htem pahpimràatā hkôt ri amnhī nhīpêx o papa.

¹² Nē Tirtūm kām mē pajapê nē kām mē pajapê xàj mē pakukamā amnhīm mē parê. Mē pahte kām tanhmā amnhī nhīpêx to ho ri papa kaxyw mē pakukamā mē parê.

Jakamā kêr ka mē axpên kamā axukaprī ho ri axpên kôt apa.

Nē axpên to mex pix o ri axpên kôt apa.

Nē mē amā amnhī to rax o axpên jakrenh prām kêt nē.

Nē mē ām amnhī pix kukamā ri ajamaxpêr kêt nē. Amnhī mē nhām mē hkukamā ajamaxpêr o ri apa.

Nē mē ri agryk tokyx anhýr kêt nē.

¹³ Nē koja mēhō tanhmā mē ato ka mē amnhī tā omu nē tanhmā amnhī tā ho hkêt nē.

Ām ja ho ajamakêtkati kurê kumrêx nē axte kām ajamaxpêr o ri apa hkêt nē. Ra Jejus kot mē panê mē pahte amnhī tomnuj piitā rênh par kênā kot pu kêt mē amnhī tā tanhmā mēhō hto. Tā kêr ka mē axpên to mex o ri apa nē amnhī tā tanhmā axpên to ho ri apa hkêt nē.

¹⁴ E kêr ka mē ā axpên nhīpêx anhýr o ri apa. No ām ja pix kêt. Nē mē määnên amā axpên kīnh pē axpên kutā anojarêt rāhā nē. Kot kaj mē ā amnhī nhīpêx anē nē määnên ra ixte mēmoj tā mē amā karōta ka mē ho anhýr mex kurê kumrêx. Mē pamā axpên kīnhja na mex kumrêx o kot mēmoj piitā hakrenh par.

¹⁵ Nē kêr ka mē Kris kukwak ri anhōxàhkre kaxwýnh kām akīnh nē ajamakêtkati nē tām ri axpên nhīpêx o ri axpên kôt apa. Te ixkre tipxi kamā mē ate axpên kôt ri amnhī nhīpêx pyrāk. Ā mē pahte amnhī nhīpêx anhýr o papa kaxyw na pre Tirtūm amnhī wýr mē pahwý. Mē pahte hkôt amnhī xunhwýr kaxyw.

Nē kêr ka mē Tirtūm mā amnhī jarēnh kaxyw nē kām Kra Jejus ā akīnh ā amnhī jarēnh o ri apa.

Mē pahte Tirtūm mā mex ā pagrer ā mē pamā karō

Epes 5.19

¹⁶ Nē kêr ka mē Kris kapêr piitā hkôt amnhī nhīpêx mex nē. Nē kapêr o axpên jahkre mex o ri axpên kôt apa. Tirtūm kot amnhī nhīpêx o axpên jahkre ho ri axpên kôt apa. Nē kām agrer o ri apa. Kām mex o mex ā agrer o ri axpên kôt apa. Nē kām kukwak ri akīnh ā amnhī jarēnh o kām gre.

¹⁷ Nē kêr ka mē Mēpahpām Tirtūm mā amnhī jarēnh o:

—Pa Tirtūm. Nà ām hāmri na ka pre mē ixwýr Akra Jejus mē nhūm mē ixwýr wryè nē mē inhnē ty.

Anhýr o kām amnhī jarē. Hāmri nē ām Pahihti Jejus kot amnhī nhīpêx kôt pix mā tanhmā ri amnhī nhīpêx to rý ām kôt pix mā tanhmā akapêr to ho ri apa.

Tanhmā mē pahte axpên nhīpêx to hā mē pamā karō

Epes 5.22-6.9

¹⁸ Nē mē anijaja. Tirtūm kot myja kumrêx nhīpêx nē hkôt kām hprō nhīpêx jakamā kêr ka mē amjên ā apijaàm o apa. Nē mē hamaxpêr mex ā mē omu nē mē hkôt ri amnhī nhīpêx mex nē. Ā mē ate amnhī nhīpêxja na Tirtūm kām hprām.

¹⁹ Nē mē amyjaja kêr ka mē amā mē aprō japê nē. Te amā amnhī tā ma pyrāk o mē hipêx o ri apa. Jao tanhmā mē homnuj to hkêt nē.

²⁰ Nẽ mẽ apê mẽ hkrajaja kêr ka mẽ anhîpêxà nẽ akatorxà wa hã apijaàm nẽ wa kapêr ma nẽ wa hkôt ri amnhî nhîpêx. ã mẽ ate amnhî nhîpêx anhÿrja na Tîrtûm kãm hprãm. Koja ã mẽ ate amnhî nhîpêx anhÿr ã mẽ apumu nẽ hkînh nẽ.

²¹ Nẽ kêr ka mẽ apê mẽ hipêxà nẽ mẽ katorxà mẽ akra gryk kaxyw mẽ kãm apêr o apikênh kêr nẽ. Kot kaj mẽ ã mẽ hipêx anê nhũm mẽ tee ri amnhî tã mẽ ama nẽ hkaprî nẽ.

²² Nẽ mẽ ate mẽ kãm tanhmã amnhî nhîpêx to ho ri mẽ apa xwÿnhjaja kêr ka mẽ anhõ patrãw kapêr ma nẽ hkôt amnhî nhîpêx. Nẽ mẽ noo mã mẽ kãm tanhmã amnhî nhîpêx mex to nẽ mãânên mẽ wa kre kamã mẽ kãm tanhmã amnhî nhîpêx mex to. Nom mẽ kot axàpênh ã apumunh nẽ hã kãm akînh pix kaxyw axàpênh mex kêr nẽ. Mãânên mẽ amã Pahihti Kris kînh ã akatât kôt mẽ kãm mẽmoj tã axàpênh mex nẽ. Mẽ noo mã nẽ mãânên mẽ wakre kamã. ²³ Nẽ mẽ akînh kãm mẽ kãm axàpênh mex o ri apa. Te mẽ ate Pahihti mã akînh kãm tanhmã kãm amnhî nhîpêx to pyrã nẽ tãm amnhî nhîpêx o tãm mẽ kãm axàpênh mex o ri apa. ²⁴ Te mẽ anhõ patrãw pix mã axàpênh pyrãk nom kumã pix mã hkêt. Mãânên mẽ panhõ Pahihti Krisja mã. Jakamã kot kaj mẽ ã amnhî kaxyw Tîrtûm mã ajamaxpêr pê akînh kãm anhõ patrãw mã mẽmoj tã apê nhũm Pahihtija ja hã mẽ apumu nẽ nhÿrmã mẽ ato mex rax nẽ. ²⁵ E kêr ka mẽ ã mẽ anhõ patrãw mã axàpênh mex o ri apa anê. No kot kaj mẽ kapêr kwÿm amnhî krã hkôt ri tanhmã amnhî nhîpêx to nhũm Tîrtûm tee ri ja hã mẽ apumu hãmri nẽ nhÿrmã tanhmã hã mẽ anhîpêx to. Na hte ã mẽ kot amnhî tomnuj xwÿnhjê piitã mẽ hipêx anê nẽ mẽ hipêx o axpên pyrãk. Jakamã kwa kêr ka mẽ anhõ patrãw mã axàpênh mex rãhã ho ri apa.

4

¹ Nẽ mẽ apê mẽ õ patrãw kêr ka mẽ kot mẽ amã mẽ àpênh xwÿnhjê ho mex nẽ tanhmã mẽ homnuj to hkêt nẽ. Mẽ uràk nẽ kaxkwa kamã mẽ anhõ Patrãw maatija hkrî. Kot mẽ pahte tanhmã amnhî nhîpêx to nẽ tanhmã mẽ pajamaxpêr to hã mẽ pahpumunh rãhã jakamã kêr ka mẽ noo mã mẽ ho mex rãhã ho ri apa.

E kêr ka mẽ apiitã ã axpên to mex anhÿr o ri apa.

Mẽ pahte Tîrtûm mã amnhî jarênh rãhã hã mẽ pamã karõ
Matêwre 7.7; Rukre 11.1-8; Atre 1.14; Epes 6.18

² Nẽ kêr ka mẽ xatã Tîrtûm mã amnhî jarênh rãhã ho ri apa. Nẽ tanhmã mẽhõ kot amnhî nhîpêx to hã harênh ma nẽ ho Tîrtûm wÿ. Nẽ mẽ ate kãm amnhî jarênh kamã kãm mex o mex ã harê. ³⁻⁴ Nẽ mãânên ixto awÿ kê mẽ tokyx ixkator japêr. Pa ixamnhîx mẽ kot kormã Kris jarênh mar kêr xwÿnhjê mã harênh o ri mẽ hkôt ixpa. ã ixte amnhî nhîpêx anhÿrta ã na prem ixpynê nẽ ijaxà pa kormã jar ixkrî. Jakamã kwa mẽ mãmri ja hã ixto Tîrtûm wÿr o apa.

Mẽ pahte apkati mẽ mẽ pahkwÿjê mã Jesus jarênh ã mẽ pamã karõ
Epes 5.16

⁵ Nẽ kêr ka mẽ kêp Kris kwÿ hkêt xwÿnhjê hkôt nhÿhÿm ri apa nẽ tãm ri Tîrtûm kapêr kôt amnhî nhîpêx o mẽ hkôt ri apa.

⁶ Nẽ kê mẽhõ awÿr tẽ nẽ tanhmã Jesus ã akukjêr to ka amã hkînh ã aprî hã kãm awjarê. Ahpÿnhã tanhmã mẽ kot hã akukjêr to xà hkôt tanhmã mẽ kãm harênh to kê mẽhprî hã mar mex nẽ.

Pawre kot Koros wÿr Xikitre mẽ Ones wa mênh ã harênh
Epes 6.21-22

⁷⁻⁸ Nẽ ot pa mẽ awÿr mẽ pahtõ Xikitre mênh mã. Kot ma mẽ awÿr ixte mẽ amã ixkapêr ã kagã nhîpêx o mör kaxyw. Na hte ixkôt Tîrtûm mã amnhî nhîpêx o ri pa. Inhmã hapêê. Tã kot paj mẽ awÿr kumê kê ma mẽ awÿr mō nẽ hprî hã mẽ amã ijarê. Mẽ ate ijarênh mar nẽ tãm ajamaxpêr nẽ akînh kaxyw. ⁹ Mẽ akwÿ Onesti hkôt koja ma mẽ awÿr mō. Mãânên Kris kôt kêp mẽ pahtõ hã mẽ pamã hapê xwÿnh na. Na hte Tîrtûm kapêr kôt amnhî nhîpêx mex rãhã ho ri pa. Tã Xikitre mẽ koja wa ma mẽ awÿr mō. Hãmri nẽ mẽ awÿr pøj nẽ jar tanhmã mẽ ixte amnhî nhîpêx to hã mẽ ijarê ka mẽ ama.

Kris kôt mẽ hkwỳ kot mẽ hwỳr hpěr mēnh ã mẽ harēnh

¹⁰ Nẽ ota Aristakja ixpyrà nẽ kệp prēs nẽ hkrĩ. Tã mẽ awỳr hpěr mẽ. Nẽ Panãpe htõ Juãw Makreja mããnēn mẽ awỳr hpěr mẽ. Na pa pre ra mẽ amã Juãw Makre jarẽ. Tã koja mẽmo arĩgro hã akupỳn mẽ awỳr mõi japêr ka mẽ omu nẽ ho mex nẽ.

¹¹ Nẽ Jejus Justija mããnēn mẽ awỳr hpěr mẽ. Jajaja mẽ ixpyrà nẽ kệp Ijaew. Tã mẽ tapxipixjaja na htem ixpyrà nẽ mẽ ixpê Ijaew kwỳjê rom mẽ kãm Tĩrtũm kapěr nyw o mẽ ahkre ho ri mẽ hkõt pa. Tĩrtũm kot Kra Kris kôt mẽ kot amnhĩ xunhwỳr xwỳnhjê ho hkra hã harēnh nywja na htem mẽ kãm harēnh o ri mẽ hkõt pa. Pa ja hã mẽ omu nẽ ixkĩnh nẽ. ¹² Nẽ mẽ anhĩõ Epasja mããnēn mẽ awỳr hpěr mẽ. Na hte Jejus Kris mã tanhmã amnhĩ nhĩpêx mex to ho pa. Nẽ mẽ ato Tĩrtũm wỳr rãhã ho pa nẽ mẽ ato hwỳr o:

—Pa Tĩrtũm. E kwa tanhmã Koros kamã akrajê ho kê mẽ akõt amnhĩ xunhwỳr tỳx nẽ. Nẽ amã hprãm xà hkõt pix mã amnhĩ nhĩpêx o ri pa. Nẽ amnhĩ kaxyw Kris kôt pix mã hamaxpěr tỳx rãhã nẽ. Anẽ.

¹³ ãm hãmri na hte mẽ ato hwỳr o pa. Nom mẽ kapxipix o hwỳr kêt nẽ. Mããnēn krĩ pê Ratisej kamã nẽ krĩ pê Jerop kamã Kris kôt mẽ pahtõjê ho hwỳr o ri pa. Mẽ ate Tĩrtũm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nẽ jar mẽ pahtõ tõtô Rukre mẽ Tẽmtija wa mããnēn mẽ awỳr hpěr mẽ. Tõtô Rukreja kệp ixkrãmnhwỳ mex na.

¹⁵ Nẽ kêr ka mẽ krĩ pê Ratisej kamã Kris kôt mẽ pahkwỳjê mã ijarẽ. Nẽ Nĩpare mã nẽ õrkwỳ hwỳr mẽ pikuprõnh nẽ Tĩrtũm mã mex o mex ã harēnh o mẽ hkrĩ xwỳnhjê mã mããnēn ijarẽ.

¹⁶ Nẽ e kêr ka mẽ ixte mẽ awỳr kagà mēnhja kamã harēnh pa nẽ hpãnhã krĩ pê Ratisej kamã Kris kôt mẽ pahkwỳjê hwỳr amẽ kê mẽ apyrà nẽ kamã harẽ nẽ piitã kuma. Nẽ mẽ kãm anẽ kê ra ixte mẽ hwỳr kagà mēnh xwỳnhhta kê mẽ amã kugõ ka mẽ kuxwar kamã harẽ nẽ ama.

¹⁷ Nẽ kêr ka mẽ Akip mã ijarẽ kê ra Tĩrtũm kot kãm mẽmoj tã karõ xwỳnhhta kê ho anhỳr jatur xàm kumẽ. Kệp hkra hã kê tãm kãm àpēnh jatur xàm kumẽ.

¹⁸ Tã ãm ja pix. E paj pam amnhĩ nhĩhkra ho hatur xà hã kagà. Mẽ ate ixte mẽmoj tã kagà pumunh nẽ hkõt inhmã ajamaxpěr kaxyw. Nẽ ixte mẽ awỳr mēnh ã ijarēnh mar kaxyw. Kwa kêr ka mẽ arĩ ixpê prēs ã ixto Tĩrtũm wỳr rãhã ho ri apa.

E kê Tĩrtũmja mẽmoj to mẽ akutã nojarêt nẽ mẽ ato mex nẽ ka mẽ amex nẽ ajamakêtkati nẽ apa ho apa. Tã ãm ja pix. Ixpê Pawre na pa mẽ awỳr kagàja nhĩpêx nẽ ã mẽ awỳr mēnh anẽ.

Wam Tesarõn

Pawre kot Tesarõn kamã Jejus kôt hkwýjê hwýr kagà nê mênh

Pawre na pre kagàja nhípêx. Kêp Jejus nhỹ hã mē ahkre ho pa xwýnhjê hõ na pre. Jakamã na pre kagàja nhípêx nê ma krĩ pê Tesarõn kamã Jejus kôt hkwýjê hwýr kumê. Tesarõn kamã Jejus ã kãm mē hkurê xwýnhjaja na prem Jejus ã mē homnuj o pa nhũm mē amnhĩ xà htýx kamã hamak o pa. Hãmri nhũm Pawre mē harênh ma nê kagàja nhípêx nê mē hwýr kumê. Kot mē kãm mē hamaxpêr o hihtýx kaxyw mē kot arĩ Jejus kôt amnhĩ nhípêx mex o pa nê aa hkaga hkêť ã mē kãm karõ. Nê nhỹrmã Jejus akupýn kaxkwa rũm mē pahpê hkwýjê hwýr wrýk nê ma akupým amnhĩ kôt mē pahťo àpirja nhũm mē kãm harê. ã na pre mē kãm mēmoj jarê nê hã kagà anê nê mē kãm:

¹ Pa mē apê Tesarõn kamã Jejus kwý hã axpên wýr mē apikuprõnh xwýnhjaja? Xà mē amex na ka mē apa? Ixpê Pawre na pa mē awýr kagàja nhípêx nê mē awýr kumê. Siras mē Ximotre mē pa mē awýr kumê. Mē pahpê Mēpanhípêxà maati Tirtũm mē Pahihti Jejus Kris wa hkwý jakamã na pa htem mē ato Tirtũm wýr rãhã ho ri ixpa. Kot mē akutã nojarêť rãhã nhũm mē ajamakêťkati nê axãmnhix mē apa kaxyw.

²⁻³ Nã mēmoj kêt. Na pa htem mē amã ijamaxpêr nê mē anhỹ hã ixkĩnh nê ixpa hãmri nê mē awýr kagàja mē. Na pa htem mē ato Tirtũm wýr rãhã ho ri ixpa nê kãm mē ajarênh o:

—Pa Tirtũm. E mãn ka Tesarõn kamã akrajê pumu. ãm hãmri na ka pre tanhmã mē hkrã hto nhũm mē akôt amnhĩ nhípêx mex o pa. Na htem amnhĩ kaxyw akôt hamaxpêr týx nê. Jao mē piitã mē kamã ukapri kamã tanhmã mē ho ajuta hto ho pa. Nhũm mē kãm mē ixkurê xwýnhjaja Pahihti Jejus Kris ã tanhmã mē ho ho pa htã nhũm mē tee ri amnhĩ kukamã hamaxpêr o hkapri nê Jejus mē war akaga hkêť nê. Arĩ war anhỹ hã amnhĩ to htýx nê Pahihti Jejus kutêp tanhmã kãm amnhĩ nhípêx to ho pa. ãm hãmri na htem ã amnhĩ nhípêx anê Tirtũm. Na pa htem mē kot ã amnhĩ nhípêx anhýrja mã ijamaxpêr nê ixkĩnh nê.

Anhýr o pa htem mē ato kuwý. ⁴ E Kris kôt ixkwýjaja. Nã Tirtũm kãm mē ajapê jakamã na pre amnhĩm mē arê. Kot mē ato hkra nhũm nhỹrmã kuri mē amex nê atĩr tũm nê apa ho apa kaxyw. Ra mē ixte ja hã mē ajarênh mar mex.

Mē piitã mē kot Tesarõn nhõ xwýnhjê jarênh mar ã mē harênh

⁵ Nê na pa prem ma mē awýr mõ nê mē amã Jejus jarênh o mē akôt ixpa. Kot mē panê tanhmã amnhĩ nhípêx to hã harênh o ri mē akôt ixpa. Nom pa mē amnhĩ krã hkôt mē amã ixujarênh kêt nê. ãm Tirtũm Karõ nhỹ hã na pa prem hihtýx xà ho tanhmã mē amã ixkapêr to ka prem mē inhma nê mē ixkôt ajamaxpêr kurê kumrêx. Na pa prem tãm amnhĩ nhípêx o ri ixpa ka mē ja hã mē ixpumunh o ri mē ixkôt apa. ⁶ Tã Jejus kôt amnhĩ xunhwý nê hkôt amnhĩ nhípêx mex nê. Nê mē ixkôt amnhĩ nhípêx mex nê. Mē kot Jejus ã tanhmã mē ato htã ka htem Tirtũm Karõ nhỹ hã akĩnh nê hkôt amnhĩ nhípêx mex rãhã ho ri apa. ⁷ Tã nhũm pika pê Masetõn mē Gres wa kamã Jejus kôt mē pahkwýjaja ã mē ate amnhĩ nhípêx anhýr ã mē ajarênh ma nê mē apyrã nê ã amnhĩ nhípêx anhýr o pa. ⁸ Na ka prem tanhmã Jejus kot mē panê amnhĩ nhípêx to hã harênh o ri mē hkôt apa nhũm mē piitã mē akapêr ma. Nom mē tapxipixjaja mar kêt nê. Na mē ra ohtõ nê mē ajarênh ma nê mē apyrã nê ma mē kãm Jejus jarênh o pa. Ra mē ate Jejus kôt amnhĩ xunhwýr ã amnhĩ jarênh o ri apa nhũm mē piitã kot mē amar jakamã mē pajaja na pa htem mē kãm ã mē ajarênh anhýr kêt nê. Mo kaxyw? Ra mē kot mē ajarênh mar mex kênã. ⁹ Na pa htem nhýri krĩ hõ hwýr pøj nhũm mē ixpumu nê ra mē tãmjaja mē inhmã mē ajarênh kurê kumrêx. Nê mē ajarênh o:

—Kwa Tesarõn kamã Kris kôt mē pahkwýjaja na xep kãm mē akĩnh nê. Amnepêm na pre htem amnhĩm sãnti nhípêx nê kêp mēhpãm ã harê nê amnhĩ to hwýr o pa. Tã ka xep prem ma mē hwýr mõ nê mē kãm Tirtũm kapêr jarê nhũm mē ama nê Tirtũmja sãnti

rom ãm hãmri hã omunh kurê kumrêx. Hãmri nê gryk ã sãnti kaga hpa nê Tirtũm kõt amnhĩ xunhwỳ nê hkõt pix mã amnhĩ nhĩpêx mex o pa. ¹⁰ Nê amnhĩ wỳr Tirtũm Kra kamã hamak rãhã ho ri pa. Anê.

Ãm hãmri na ka htem amnhĩ wỳr kamã hamak rãhã ho apa. Na pre ty nhũm Hipêêxà Tirtũm akupỳm ho htĩr. Tã koja nhỹrmã akupỳn mẽ pahwỳr kumê nhũm akupỳn mẽ pahwỳr wrỳ. Hãmri pu mẽ ãm pix kukwak ri mẽ kot amnhĩ xà htỳx kãm hamak o pa htũm xàta wỳr papa hkêt nê.

2

Pawre kot amnhĩ jarênh

Sikũn Korĩt 1.12, 4.1-6

¹⁻² Nê kormã mẽ awỳr mẽ inhmõr kêt ri na pa prem kormã Piripos nhõ xwỳnhjê mã Tirtũm kapêr jarênh o ri mẽ hkõt ixpa. Nom nhũm mẽ hkwỳjaja kãm mẽ inhmar prãm kêt nê. Na prem Jesus ã mẽ inhmã kapêr punuj nê mẽ inhĩpêx kati pa prem amnhĩ xà htỳx kamã ijamak o mẽ hkõt ixpa. Na ka prem ja hã mẽ ijarênh ma. ã mẽ kot mẽ inhĩpêx anhỹr tã pa mẽ tee ri amnhĩ kukamã ijamaxpêr pê Tirtũm kapêr jarênh kaga hkêt nê. Na pa prem arĩ mẽ kãm Jesus kot tanhmã mẽ panê amnhĩ nhĩpêx to hã harênh o ri mẽ hkõt ixpa. Tã mẽ awỳr inhnojarêr nê Tirtũm nhỹ hã amnhĩ to htỳx nê ma mẽ awỳr mõi. Hãmri nê mẽ amã tanhmã Jesus jarênh to ho ri ixpa. Ka prem mẽ inhma hãmri nê axohtõ nê hkõt amnhĩ xunhwỳ. ³ Nom pa prem ixêx rom tanhmã mẽ amã ixkapêr to hkêt nê. Rỳ mẽ inhmã mẽmoj prãm xaj mẽ ano kupyrr pê mẽ amã ixkapêr kêt nê. ⁴ Rỳ mẽ ate mẽ ixkapêr mar nê mẽ inhmex ã mẽ ijarênh kaxyw pa tanhmã mẽ amã ixkapêr to hkêt nê. ãm Tirtũm kot mẽ inhmar nê tapxipix mẽ inhmex ã mẽ ijarênh pix prãm xaj na pa prem mẽ amã kapêr jarênh o ri mẽ akõt ixpa. Tirtũm tapxipix na hte tanhmã mẽ pakute hkõt mẽ pahpumunh rãhã ho pa. Tãm na pre mẽ ixte kapêr jarênh o ri ixpa kaxyw mẽ ixunhwỳ.

⁵ Xàn pa prem mẽ ijakwa nhĩkjê ho mẽ ate tãm amnhĩ nhĩpêx ã mẽ ajarê hãmri nê mẽ ijakwa nhĩkjê ho mẽ ato ixkapêr punuj nê? Nà na pa prem ã amnhĩ nhĩpêx anhỹr kêt nê. Na pa prem ixkatat kõt mẽ ate amnhĩ nhĩpêx ã mẽ apumunh kõt tanhmã mẽ ajarênh to ho ri ixpa.

Nê xà mẽ ate mẽ ixkapêr mar nê akĩnh nê hpãnhã mẽ inhmã amnhĩrer kaxyw na pa prem mẽ awỳr mõi nê mẽ amã Jesus kapêr o mẽ ajahkre? Nà na pa prem kàxpore prãm xaj mẽ amã ixkapêr kêt nê. Tirtũm kot ja kõt mẽ ixpumunh mex.

⁶ Rỳ xà mẽ ate mẽ inhmex ã mẽ ixto jarkrar kaxyw na pa prem mẽ awỳr mõi? Nà mãanên ja kaxyw kêt. ã mẽ ate mẽ ijarênh anhỹr prãm xaj na pa htem Tirtũm kapêr o mẽ ajahkre ho ri ixpa hkêt nê.

⁷ Rỳ xàn pa pre mẽ awỳr mõi nê mẽ amã amnhĩ jarênh o:

—E mẽ ixte Jesus nhỹ hã ixkapêr o ixpa xwỳnh jakamã kot paj mẽ amã tanhmã ixkapêr to ka mẽ inhma nê hpãnhã mẽ inhmã amnhĩre.

Anhỹr o mẽ amã ixkapêr? Nà na pa pre ã mẽ amã ixkapêr anhỹr kêt nê. Na pa prem te mẽ katorxà kot hkrajê nhĩpêx pyræk o mẽ anhĩpêx nê amarĩ mẽ ajahkre ho ixpa nê mẽmoj tã mẽ awỳr kêt nê.

⁸ Mẽ inhmã mẽ akĩnh jakamã na pa prem mẽ amã ixprĩ hã Tirtũm kapêr piitã harênh par o mẽ akõt ixpa nê mẽ kot ja hã tanhmã mẽ ixto pymaj tee ri amnhĩ kukamã ijamaxpêr o ri ixkaprĩ hkêt nê. ãm ixãmnhĩx ri tanhmã Jesus kot mẽ panê amnhĩ nhĩpêx to hã harênh o mẽ akõt ixpa. ⁹ Mẽ apê mẽ ixkwỳ jakamã na pa prem tanhmã mẽ amã ixkapêr to hpãnhã mẽ ixàpkur xà rỳ mẽmoj tã mẽ awỳr kêt nê. Na pa prem mẽ pamjaja mẽmoj tã ixàpênh pê mẽ amã ixkapêr o ri ixpa. Nê ixàpênh rũnh kumrêx. Arĩgro hã nê kamãt kãm. Mãn arĩ mẽ ate ã mẽ ixte amnhĩ nhĩpêx anhỹrja ã anohtỳx japêr ko. ¹⁰ Na pa prem tãm amnhĩ nhĩpêx o mẽ akõt ixpa. Tirtũm kãm hprãm xà hkõt. Jao tanhmã amnhĩ to mex to rãhã ho ri ixpa ka prem amnhĩ tã mẽ ixpumu. Nhũm Tirtũm haxwỳja ja hã mẽ ixpumu. ¹¹ Na pa pre mẽ apê mẽ ixkra pyræk mẽ anhĩpêx o ri mẽ akõt ixpa. ¹² Jao mẽ

amã ixkapër mex nẽ. Nẽ mẽ akaprĩ nẽ apa xwỳnhjaja pa prem akupỳm mẽ ajamaxpër o mẽ axihtỳx hãmri nẽ mẽ apiitã mẽ amã ixkapër nẽ mẽ amã:

—Kwa kêt ka mẽ Tirtũm kôt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

Tirtũm tãm na pre amnhĩ wỳr mẽ pahwỳ pu prem hkôt amnhĩ xunhwỳ. Tã koja nhỹrmã amnhĩ mẽ pahto api pu mẽ Kra Jejus kukwak ri wa kuri pamex kumrêx nẽ ri papa ho papa. Jakamã kwa kêt ka mẽ hkôt amnhĩ nhĩpêx mex rãhã ho ri apa.

Jejus kwỳjaja kãm Jejus kôt amnhĩ xunhwỳr hkêt xwỳnhjê pyma hkêt
Atre 17.1-9

¹³ Nẽ ma mẽ awỳr mẽ inhmõrta ã na pa prem mẽ amã Tirtũm kapër jarênh o ri mẽ akôt ixpa ka prem mẽ inhma nẽ mẽ ixte amnhĩ krã hkôt mẽ ixkapër ã mẽ ixkamnhĩx kêt nẽ. Na ka prem ãm hãmri mẽ ixte Tirtũm kapër jarênh ã mẽ ixpumunh kurê kumrêx nẽ amnhĩ kaxyw hkôt ajamaxpër nẽ Jejus mẽ Hipêêxà wa hkôt amnhĩ xunhwỳ. Jakamã na pa hte mẽ amã ijamaxpër nẽ mẽ anhỹ hã ixkĩnh nẽ. Hãmri nẽ Tirtũm mã mẽ anhỹ hã ixkĩnh jarênh o ri ixpa. Nà na ka htem arĩ Tirtũm kapër kôt amnhĩ nhĩpêx mex nẽ.

¹⁴ Nhũm hte mẽ akwỳjaja tee ri ja hã mẽ apumu nẽ Jejus ã mẽ atomnuj nẽ. Nom mẽ kapxipixjaja ã mẽ anhĩpêx anhỹr kêt nẽ. Jutej kamã Ijaew kwỳjaja na prem mẽ apyrà nẽ Jejus kôt amnhĩ xunhwỳ nhũm mẽ hkwỳjaja tee ri ja hã mẽ omu nẽ hã mẽ hipêx kati ho pa.

¹⁵ Amnepêm Ijaew na prem Tirtũm nhỹ hã mẽ kãm kapër o mẽ pa xwỳnhjê homnuj nẽ mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ urak nẽ Pahihti Jejusja pĩ. Tã jarãhã mããnên ã Jejus ã mẽ panhĩpêx anẽ nhũm Tirtũm tee ri mẽ pahtã mẽ omu nhũm ja kêp omnuj tỳx kumrêx nhũm mẽ pahtã mẽ kamã gryk nẽ.

Na hte mẽ apê Ijaew kêt xwỳnhjê ho hkra nhũm Ijaew kãm ja prãm kêt ¹⁶ jakamã na htem mẽ akwỳ kot Tirtũm kôt amnhĩ xunhwỳr pymaj mẽ anê mẽ ixkurê nẽ mẽ inhmã:

—Kwa Ijaew kêt xwỳnhjê mã Tirtũm kapër jarênh kêt nẽ. Ja mex kêt. Anẽ.

Mẽ ate Jejus kôt amnhĩ xunhwỳr nẽ nhỹrmã Tirtũm wa kuri atĩr tũm nẽ apaja mẽ kãm hprãm kêt jakamã na htem ã mẽ anê àmnàr o pa anhỹrja o amnhĩ tomnuj nẽ. Mẽ kot amnhĩ tomnuj tỳx o mẽ pa xwỳnh jakamã na Tirtũm mẽ kamã gryk nẽ. Koja nhỹrmã mẽ kot amnhĩ xà htỳx kamã hamak tũm xà hwỳr mẽ rênh pa.

Pawre akupỳm Tesarõn nhõ xwỳnhjê hwỳr hkrà hã harênh
Atre 17.10-13

¹⁷ Nẽ ma mẽ awỳr mẽ inhmõr tã mẽ anhõ krĩ kamã mẽ kêp Kris kwỳ hkêt xwỳnhjaja na pre mẽ ixpumu nẽ mẽ anê mẽ ijano pa prem ijapôj nẽ hpãnhã ma nhỹhỹm krĩ hõ hwỳr ixpa. Nom arĩ mẽ amã ijamaxpër rãhã nẽ mẽ ato ijamak o ri ixpa nẽ xatã akupỳm mẽ awỳr ixkrã. ¹⁸ Na pa prem inhmã akupỳm mẽ awỳr inhmõr prãm tỳx nẽ. Ixpê Pawre na pa pre xatã mẽ awỳr ixkrã htã nhũm Satanasti tanhmã mẽ anê ixpê amnàr to pa kormã mẽ awỳr inhmõr kêt nẽ. ãm tee ri inhmõr prãm kaprỳ. ¹⁹⁻²⁰ Mẽ inhmã mẽ akĩnh tỳx. Mẽ ate Tirtũm kôt amnhĩ nhĩpêx mex jakamã koja nhỹrmã Pahihti Jejus akupỳn mẽ pahwỳr wrỳ pa mẽ akuri xa nẽ kãm mẽ ajarênh o:

—Pa Pahihti. E Tesarõn nhõ xwỳnhjê pumu. Na ka pre mẽ hwỳr inhmẽ pa mẽ hwỳr mõ nẽ mẽ kãm ajarê nhũm prem inhma nẽ amnhĩ kaxyw akôt hamaxpër tỳx nẽ akôt amnhĩ xunhwỳ. Tã na htem akôt tãm amnhĩ nhĩpêx rãhã ho pa.

Anhỹr o kãm mẽ ajarê nẽ mẽ anhỹ hã ixkĩnh tỳx kumrêx.

3

Pawre kot Tesarõn wỳr Ximotre mênh ã harênh
Atre 17.14-15, 18.5

¹⁻⁵ Nẽ kormã mẽ akôt ixpa ri na pa pre Kris kwỳ hkêt xwỳnhjaja kot Kris ã tanhmã mẽ atomnuj to hkukamã mẽ amã mẽ harê ka prem mẽ inhma. Na htem ã Kris ã mẽ pahkurê xwỳnhjaja mẽ panhĩpêx anhỹr o pa. Tã nhũm prem ã mẽ anhĩpêx anẽ pa mẽ ajarênh ma nẽ tee ri mẽ akukamã ijamaxpër nẽ axpên mã mẽ ajarênh o:

—Hêxta waa nê. Kwa mẽ kot Jejus ã tanhmã mẽ homnuj toja mỳrapê măn mẽ tee ri amnhĩ kukamã hamaxpêr nê Jejus kaga rỳ ko. Măn ra Satanasti tanhmã mẽ kãm Jejus o hêx to nhũm mẽ kuma nê tanhmã hamaxpêr to nê hkaga. Kwa măn pu prem ãm mẽ kãm Tĩrtũm kapêr jarênh kaprỳ nà? Anê.

Hãmri nê tee ri mẽ akukamã ijamaxpêr nê mẽ awỳr Ximotre mẽnh kaxyw nê kãm:

—Măn ra Tesarõn nhõ xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o ra tee ri amnhĩ kukamã hamaxpêr. Kwa ma mẽ hwỳr mỗ nê ja hã mẽ omu. Hãmri nê mẽ kot Kris kôt amnhĩ xunhwỳr tỳx kaxyw mẽ hamaxpêr o axihtỳx. Hãmri nê akupỳn wa ixwỳr mỗ nê wa inhmã tanhmã mẽ harênh to. Kot paj Siras mẽ wa akutêp jar Atenas kamã wa arĩk. Anê.

Hãmri nê mẽ awỳr kumê. Ximotre na hte Siras mẽ wa inhĩhkô hã mẽ kãm Tĩrtũm kapêr jarênh o pa. Nê Kris kot tanhmã mẽ panê amnhĩ nhĩpêx toja nhũm wa inhĩhkô hã mẽ kãm harênh o pa. Tã pa pre mẽ awỳr kumê nhũm ma mẽ awỳr mỗ pa Siras mẽ wa Atenas kamã kutêp arĩk.

Ximotre akupỳn mỗr nê Pawre mã mẽ harênh

⁶ Tã nhũm ra ham akupỳn mẽ arũm wa ixwỳr mỗ nê wa inhmã tanhmã mẽ ajarênh to pa wa mẽ ajarênh ma nê ixkĩnh nê. Na ka xep htem arĩ amnhĩ kaxyw Kris kôt ajamaxpêr tỳx rãhã nê. Jao mẽ amã mẽ piitã mẽ hkĩnh nê tanhmã mẽ ho mex to ho ri apa. Nê arĩ mẽ inhmã ajamaxpêr nê ixpyrà nê mẽ amã mẽ ixpumunh prãm o ri apa. ⁷ Nà ãm hãmri na ka htem ã amnhĩ nhĩpêx anê. Na pa wa ra jar ixpunuj nê ixpa nê Kris ã amnhĩ xà htỳx kamã ijamak tã mẽ ajarênh ma nê tãm ijamaxpêr. ⁸ Tesarõn nhõ xwỳnhjaja kot Kris ã tanhmã mẽ anhĩpêx to htã ka mẽ arĩ hkôt amnhĩ xunhwỳr tỳx rãhã nê. Pa wa mẽ ajarênh ma nê mẽ anhỹ hã ixkĩnh pê tanhmã Pahihti Jejus mã amnhĩ nhĩpêx to ho ri ixpa. ⁹ Nà na pa hte wa mẽ anhỹ hã ixkĩnh nê. Nê xatã Tĩrtũm mã mẽ ajarê nê kãm:

—Pa Tĩrtũm. Nà ãm hãmri na ka pre amnhĩ kôt Tesarõn kãm akwỳjê xunhwỳr tỳx nê nhũm htem akôt amnhĩ nhĩpêx mex rãhã ho pa. ãm hãmri na ka hte ã mẽ hipêx anê. Na pa hte mẽ kot amnhĩ nhĩpêx mã ijamaxpêr o ri ixpa nê ixkĩnh nê.

Anhỹr o kãm mẽ ajarê. ¹⁰⁻¹¹ Nom kãm ja pix jarênh kêt nê. Na pa hte wa mãănên arĩgro hã nê kamàt kãm amnhĩ to Měpanhĩpêxà Tĩrtũm mẽ Pahihti Jejus Kris wa hwỳr kãm ixihtỳx rãhã ho ixpa nê wa kãm:

—Kwa Tĩrtũm mẽ Jejus wa. Na pa wa ra inhmã Tesarõn wỳr inhmõr nê mẽ pahkwỳjê pumunh prãm tỳx nê. Kormã mẽ kot akapêr jatur xà mar kêt. Tã wa inhmã akupỳm mẽ hwỳr wa inhmõr nê mẽ kãm akapêr jatur xàm mẽnh prãm. Mẽ kot mar nê akôt amnhĩ nhĩpêx mex o pa kaxyw. Kwa xat ka wa akupỳm mẽ hwỳr wa inhmẽ nà? Anê.

Na pa hte wa ã amnhĩ to wa hwỳr rãhã ho ixpa anê. Tã koja wa akupỳm mẽ awỳr wa inhmẽ pa wa ma mẽ awỳr inhmõr kurê kumrêx. ¹² Koja Tĩrtũm tanhmã mẽ akrã hto ka mẽ amã axpên kĩnh pê tanhmã axpên to ajuta hto ho ri apa. Nê mẽ amã akwỳjê hã ma ho te mẽ kam amã amnhĩ tã ma pyrãk o ri apa. ã kot kaj mẽ apiitã axpên nhĩpêx anê. Te wa inhmã mẽ akĩnh pê tanhmã mẽ ato mex to pyrãk. ¹³ Koja Tĩrtũm ja kaxyw tanhmã mẽ akrã hto ka mẽ tãm ajamaxpêr mex nê. Kêr kê Jejus nhỹrmã akupỳn wrỳ. Mẽ kot hkôt amnhĩ xunhwỳr xwỳnhjê mẽ ro hã akupỳn wrỳ. Hãmri ka mẽ Měpanhĩpêxà Tĩrtũm kutã amnhĩ kukamã ajamaxpêr nê tãm mẽ ate amnhĩ nhĩpêx ã amnhĩ pumunh kôt akĩnh nê apikunhar o kuri akuhê. No ri tee ri amnhĩ kamã ajamaxpêr nê ajakwamnajre nê akuhê hkêt nê.

4

Tĩrtũm kãm mẽmoj prãm ã harênh
Rõmãn 13.11-14; Epes 5.3-14

¹ E Jejus kôt ixkwỳjaja. Na pa prem ma mẽ awỳr mỗ nê Tĩrtũm kapêr o mẽ ajahkre ho ri mẽ akôt ixpa. Mẽ ate mar nê Tĩrtũm kãm hprãm xà hkôt tanhmã amnhĩ nhĩpêx to kaxyw. Ka prem mẽ inhma nê hkôt amnhĩ nhĩpêx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mẽmoj tã mẽ amã karõ. Jakamã kwa

kêr ka mẽ arĩ Tĩrtũm kapêr kôt pix mã ri amnhĩ nhĩpêx mex nê ÿ hã amnhĩ to htỳx pê ã amnhĩ nhĩpêx anhỳr o ri apa. ² Na pa prem ra Jejus nhỹ hã mẽ amã mẽmoj tã karõ. Mẽ ate hkôt amnhĩ nhĩpêx prãm xàj mẽ amã hã karõ ka prem mẽ inhma. ³ Nà mẽ pahte tãm amnhĩ nhĩpêx o papaja na Tĩrtũm kãm hprãm. No kêt mẽ pahtỳx ri nhãm mẽnijê ho amnhĩkati o papaja na kãm hprãm kêt. ⁴ Jakamã kwa kêr ka mẽ amyjaja aprõ pix tãnopxar o ri apa. No mẽ ri nhãm mẽnijê ho amnhĩkati ho ri apa hkêt nê. Nê mẽ anijaja kêr ka mẽ amjên pix tãnopxar o ri apa. No mẽ ri nhãm mẽmyjê ho amnhĩkati ho ri apa hkêt nê. ⁵ Jejus kwỳ hkêt xwỳnhjaja kot htỳx ri kãm hprãm xà hkôt mẽnijê hwỳr mrar nê mẽ ho amnhĩkati htã kêr ka mẽ ho mẽ uràk kêt nê. Kwarĩ ho kwarĩ. ⁶ ã mẽ kot amnhĩ nhĩpêx anhỳr xwỳnhjaja koja Tĩrtũm nhỹrmã mẽ homnuj tỳx kumrêx. Na pa prem ra mẽ amã ja jarê ka prem mẽ inhma. Jakamã kwa kêr ka mẽ ã amnhĩ nhĩpêx anhỳr o ri apa hkêt nê. ⁷ Xà na pre Tĩrtũm ã mẽ pahte amnhĩ nhĩpêx anhỳr kaxyw amnhĩ wỳr mẽ pahwỳ nê mẽ pahto hkra? Nà ja kaxyw na pre mẽ pahto hkra hkêt nê. ãm mẽ pahte tãm amnhĩ nhĩpêx o ri papa kaxyw nê tãm ri axpên nhĩpêx o ri papa kaxyw na pre mẽ pahto hkra. ⁸ Jakamã kot kaj mẽ atõ ja hã mẽ inhma nê ãm mẽ inhma nê arĩ ã amnhĩ nhĩpêx anê. Hãmri nê mẽ pajaja mẽ ixkapêr nhĩrõp axãm kêt nê. Tĩrtũm kapêr nhĩrõp kot kaj xa. Nê mãânên kot mẽ pahwỳr Karõ mênh xwỳnhja kapêr nhĩrõp kot kaj xa.

⁹ Nê mẽ amã axpên kĩnh pê axpên to mex o apa hprãm xàj na pre Tĩrtũm tanhmã mẽ amã kapêr o amnhĩrit to ka htem ã axpên nhĩpêx anhỳr o ri apa. Jakamã kot paj mẽ axte ja hã tanhmã mẽ amã nê hkêt nê. ¹⁰ Na ka mẽ ra amã axpên kĩnh pê te mẽ kam amã amnhĩ tã ma pyràk o axpên nhĩpêx o ri apa. Nê pika pê Masetõn kamã Kris kôt mẽ akwỳjaja ka mẽ mãânên amã mẽ hkĩnh pê ã mẽ hipêx anê. Tã kêr ka mẽ arĩ ã amnhĩ nhĩpêx anhỳr rãhã nê. ¹¹ Kot kaj mẽ ã amnhĩ nhĩpêx anê hãmri nê ajamakêtkati nê axãmnhĩx axàpênh pix tãnopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêt nê. Nê ãm amnhĩ pix tãnopxar o ri apa. Nê amnhĩ pa kukwak ri axàpkur kaxyw amnhĩm axàpênh mex o ri apa. Na pa prem ra ã ja hã mẽ amã karõ anê. ¹² Kot kaj mẽ ã amnhĩ nhĩpêx anê hãmri nê amã prãm xàj axàhwỳr o ri apa hkêt nê. Nhũm Kris kwỳ hkêt xwỳnhjaja mẽ ate amnhĩ nhĩpêx ã mẽ apumu nê axpên mã mẽ ate tãm amnhĩ nhĩpêx xwỳnhjê hã mẽ ajarênh kurê kumrêx.

Kris kwỳ htyk xwỳnhjê jarênh

Matêwre 24.29-31; Wam Korĩt 15.51-58

¹³ E Kris kôt ixkwỳjaja. Na ka xep mẽ tee ri Kris kôt akwỳ htyk xwỳnhjê hkukamã ajamaxpêr. Jakamã kot paj ixprĩ hã tanhmã mẽ amã mẽ harênh to ka mẽ inhma. Nà Kris kwỳ hkêt xwỳnhjaja na htem ty nhũm mẽ hkwỳjaja tee ri mẽ hkukamã hamaxpêr o hkaprĩ nê. Mẽ htyk nê ma Jejus wỳr àpir kêt jakamã na htem mẽ mỳr pê hkaprĩ htỳx nê pa. No mẽ papajaja na pu htem ho mẽ uràk kêt nê. ¹⁴ Jejus na pre ty nhũm Tĩrtũm akupỳm ho htĩr. Tã ra ã kot hipêx anhỳr jakamã koja nhỹrmã Jejus akupỳn wrỳ nê mẽ kot hkôt amnhĩ xunhwỳr nê htyk xwỳnhjê karõ nhũm man amnhĩ kôt kaxkwa rũm mẽ o wrỳ. Na pu htem ã ja kôt pajamaxpêr anê. ¹⁵⁻¹⁶ Na pre Pahihti Jejus inhmã hkôt mẽ pahkwỳ htyk xwỳnhjê jarênh o:

—Kot paj nhỹrmã akupỳn mẽ awỳr wrỳ ka mẽ ate ixkôt amnhĩ nhĩpêx xwỳnh piitã ma ixkutã axàpir o mō. Nom kot kaj mẽ arĩ atĩr nê apa xwỳnhjaja akumrêx axàpir kêt nê. Kormã. Koja Tĩrtũm kapêr o mẽ wrỳk xwỳnh krãhtũmja Tĩrtũm mã pifti kakô. Kakô tỳx pa ixkwỳ htyk nê hikwỳ xwỳnhjê mã ixkapêr nê ixãmra kamã mẽ kumra. Nhũm mẽ hkarõ akupỳn mẽ hwỳr wrỳ nê mẽ kãm gjêx pa. Hãmri nhũm mẽ akupỳm htĩr nê kãnhmã hkrĩ hpa nê ma kumrêx ixkutã àpir o mō. ¹⁷ Hãmri ka mẽ ate ixkôt amnhĩ xunhwỳr xwỳnh arĩ mẽ atĩr nê apa xwỳnhjaja ka mẽ hã ajêt nê mẽ atipxi nê ma ixkutã axàpir o mō pu mẽ kakrã kamã axpên kaxpa. Hãmri nê mẽ pahpimràatã ma kaxkwam api nê inhõ krĩ hwỳr pōj. Kaj mẽ Tĩrtũm mẽ wa ixkuri amex kumrêx nê atĩr tũm nê apa ho apa. Anê.

¹⁸ ã Pahihti Jejus inhmã mẽ pakukamã mẽ pajarênh anê. Jakamã kwa kêr ka mẽ tee ri mẽ pahkwỳ htyk xwỳnhjê hkukamã ajamaxpêr hkêt nê. ã ixujarênh anhỳrta ã anohtỳx pê axpên jamaxpêr o axihtỳx o ri axpên kôt apa.

5

Mẽ pahte akupÿn Jejus wrÿk xà hã arÿgro pumunh kêt ã harënh

Matêwre 24.32-25.13; Wam Pêtre 3.8-13

¹⁻² Nẽ mẽ pahte Jejus akupÿm wrÿk xà hã arÿgro pumunh kêt jakamã kot paj mẽ amã tanhmã hã kagà hto hkêt nẽ. Koja nhÿrmã akupÿn mẽ pahwÿr nojarêt hãmri nẽ te kot mẽ ahkÿnh xwÿnh kot amnhÿ nhÿpêx pyrã nẽ mẽ pajaêr pê mẽ pahwÿr wrÿ. ³ Jakamã koja kormã wrÿk kêt ri nhÿm Kris kwÿ hkêt xwÿnh kot amnhÿ wÿr kamã hamak kêt xwÿnhjaja hãmri mex nẽ pa hã amnhÿ pumu nẽ hkÿnh nẽ pa. Nẽ axpën mã kapêr o:

—Nà koja Tÿrtÿm tanhmã mẽ pahto hkêt nẽ. Arÿ mẽ pamex nẽ ri mẽ papa kênã. Nà kot puj mẽ paxãmnhÿx ri pajamakêtkati nẽ ri papa ho papa.

Anhÿr o axpën mã kapêr rôm nhÿm puh Jejus mẽ haêr pê akupÿn wrÿ. Hãmri nẽ ma mẽ kot amnhÿ xà htÿx kamã hamak o pa htÿm xà hwÿr mẽ rënh pa nhÿm mẽ tee ri kêp hpimxur prãm kaprÿ. Te mẽ htujarô xwÿnh kot amnhÿ nhÿpêx pyrãk. Na htem mex nẽ pa htã hpijagri kaxyw ôhy xà htÿx kumrêx nẽ tee ri kãm ôhy xà hkêt prãm kaprÿ ho hikwÿ. ⁴ Nom mẽ kajaja kot kaj mẽ urã nẽ amnhÿ jaêr pê akupÿm wrÿk kãm omu nẽ tee ri amnhÿ kukamã ajamaxpêr o akaprÿ hkêt nẽ. ⁵ Mẽ pahpê Jejus kwÿ jakamã na pu htem kapêr kôt ri tãm amnhÿ nhÿpêx o ri papa. Jao te mẽ pahte mẽ kêp Jejus kwÿ hkêt xwÿnhjê kot amnhÿ nhÿpêx pyrãk kêt. ⁶ Na htem mẽ pahkÿnhã akupÿn wrÿk kukamã hamaxpêr kêt nẽ. Te htÿx ri mẽ ôt rãhã ho hikwÿ pyrãk. Nom mẽ papajaja na pu htem akupÿn wrÿk kamã pajamak o papa pê kãm tanhmã amnhÿ nhÿpêx mex to rãhã ho ri papa. ⁷ Te kot ja pyrãk. Na htem kamãt kãm gôr nẽ mẽmoj mã hamaxpêr kêt nẽ htÿx hikwÿ. Nẽ mẽ hkwÿjaja kamãt kãm axpã nẽ htÿx ri tanhmã amnhÿ tomnuj to ho pa. Jao hamaxpêr mex kêt nẽ. Tã mẽ kêp Jejus kwÿ hkêt xwÿnhjaja hte mẽ urãk nẽ htÿx ri tanhmã amnhÿ tomnuj to ho pa nẽ akupÿn Jejus wrÿk mã hamaxpêr kêt nẽ. ⁸ No kêt mẽ papajaja. Mẽ pahte hkôt amnhÿ xunhwÿr xwÿnhjaja. Kêr pu mẽ ho mẽ urãk kêt nẽ. Satanasti kãm mẽ pahte amnhÿ tomnuj prãm tã mẽ pahte kãm hprãm xà hkôt amnhÿ nhÿpêx pymaj kêr pu mẽ mẽmoj punuj pê amnhÿ to htÿx rãhã ho ri papa.

Nẽ amnhÿ kaxyw Jejus kôt pajamaxpêr tÿx rãhã nẽ.

Nẽ mẽ pamã mẽ piitã mẽ hkÿnh pê mẽ kutã panojarêt rãhã ho ri papa.

Nẽ nhÿrmã Tÿrtÿm mẽ hkra Jejus wa kuri pahÿr tÿm nẽ papa ho papa hkukamã mãn pajamaxpêr rãhã o ri papa.

Kot puj mẽ ã amnhÿ nhÿpêx anẽ hãmri nhÿm Satanasti tee ri mẽ pahte amnhÿ tomnuj prãm xaj mẽ pahkrãm pajamaxpêr punuj jagÿênh kaprÿ.

⁹ Xà na pre Tÿrtÿm mẽ pakamã gryk kãm mẽ kot amnhÿ xà htÿx kamã hamak tÿm xà hwÿr mẽ pajanor kaxyw mẽ parê? Nà na pre ja kaxyw mẽ parënh kêt nẽ. ãm Pahihti Jejus Kris kukwak ri kot amnhÿ katut kôt mẽ pahte amnhÿ tomnuj rënh par nẽ mẽ pahto hkra kaxyw na pre mẽ parê.

¹⁰ Tã mẽmo kaxyw na pre Krisja mẽ panê ty? Nà nhÿrmã Tÿrtÿm mẽ wa kuri mẽ pamex kumrêx nẽ pahÿr tÿm nẽ papa ho papa hprãm xaj na pre mẽ panê ty. Jakamã koja nhÿrmã akupÿm amnhÿ kôt ma mẽ pahto àpir kaxyw akupÿn mẽ pahwÿr wrÿ pu mẽ amnhÿ kaxyw hkôt pajamaxpêr xwÿnh piitã ma hkôt kaxkwa hwÿr api hãmri nẽ Tÿrtÿm wa kuri pamex nẽ pahÿr tÿm nẽ papa ho papa. Kormã mẽ pahÿr ri mẽ papa xwÿnhjaja nẽ ra mẽ htyk nẽ hikwÿ xwÿnhjaja nhÿm akupÿm mẽ ho htÿr. Hãmri nẽ mẽ pahto hpimràatã amnhÿ kôt mẽ pahto àpir pa. Mẽ pahte hkôt amnhÿ xunhwÿr xwÿnh piitã koja Jejus nhÿrmã akupÿn wrÿ nẽ ã mẽ panhÿpêx mex anẽ.

¹¹ Tã ã kot anhÿr jakamã kwa kêr ka mẽ jam ajamaxpêr o apa pê axpën jamaxpêr o hihtÿx o ri axpën kôt apa. Nẽ Jejus kôt axpën jamaxpêr o hihtÿx o ri axpën kôt apa. Ra ã mẽ ate axpën nhÿpêx anhÿr tã kêr ka mẽ arÿ ho anhÿr rãhã ho ri apa nẽ aa hkaga hkêt nẽ.

*Tÿrtÿm kapêr o mẽ pajahkre xwÿnhjê jarënh
Karatas 6.6; Wam Ximotre 5.17-19*

¹² Nê kwa Kris kôt ixkwỳjaja. Na hte mẽ kot Tirtũm kapẽr o mẽ ajahkre xwỳnhjaja mẽ ajahkre mex pẽ Tirtũm mã mẽ ajamãr mex o pa. Na htem ã mẽ anhĩpẽx mex anhỹr rãhã ho ri mẽ akõt pa. Tã kwa kêr ka mẽ amnhĩ tã mẽ omu nẽ mẽ kapẽr mar tỳx nẽ. ¹³ Nẽ mẽ hã apijaàm pẽ tanhmã mẽ ho mex to ho apa.

Nẽ kwa kêr ka mẽ tãm axpẽn nhĩpẽx nẽ axãmnhĩx ri ajamakêtkati nẽ axpẽn kôt ri apa ho apa.

Mẽ pahte tanhmã Kris kôt mẽ pahkwỳjê nhĩpẽx to hã mẽ pamã karõ
Epes 4.1-6

¹⁴ Nẽ koja Kris kôt mẽ anhĩõ kãm kaga nẽ pa ka mẽ ja hã omu nẽ kãm anẽ kê ã amnhĩ nhĩpẽx anhỹr kêt nẽ. Kê hpãnhã amnhĩ xàpkur xà kaxyw àpẽn h o pa.

Nẽ mẽ kãm ma ho mẽ pa xwỳnhjaja ka mẽ kãm mẽ hamaxpẽr o axihtỳx o ri mẽ hkõt apa.

Nẽ kormã amnhĩ kaxyw Jesus kôt mẽ hamaxpẽr tohtuj anhỹr xwỳnhjaja ka mẽ tanhmã Jesus kôt mẽ ho mẽ axihtỳx to kê mẽ hkõt amnhĩ nhĩpẽx mex o pa.

E kêr ka mẽ ã mẽ axpẽn nhĩpẽx anhỹr o ri apa nẽ axpẽn kamã agryk tokyx anhỹr kêt nẽ.

¹⁵ Nẽ koja mẽhõ tanhmã atomnuj to ka mẽ ãm omu nẽ amnhĩ tã tanhmã ho hkêt nẽ. ãm ho mex o ri apa. Nẽ mẽ piitã tanhmã mẽ ho mex to hpix kukamã ajamaxpẽr rãhã nẽ.

¹⁶ ã mẽ pahte amnhĩ nhĩpẽx anhỹr o papaja na Tirtũm kãm hprãm.

Mẽ pahpê hkra hã pahkĩnh rãhã papaja na kãm hprãm.

¹⁷ Nẽ mẽ pahte Tirtũm mã amnhĩ jarẽn h rãhã ho papaja na mããnẽn kãm hprãm.

¹⁸ Nẽ tanhmã mẽ pakute htã arĩ Tirtũm mã mex o mex ã harẽn h o papaja na mããnẽn kãm hprãm. Mẽ pahkĩnh nẽ papa kamã kãm mex o mex ã harẽ. Rỳ mẽ pahpunuj nẽ papa htã arĩ kãm mex o mex ã harẽ. Rỳ nhũm mẽhõ tanhmã mẽ panhĩpẽx to htã pu mẽ arĩ kãm mex o mex ã harẽ.

ã mẽ pahte amnhĩ nhĩpẽx anhỹr o papaja na Tirtũm kãm hprãm.

Mẽ pahte tanhmã Tirtũm Karõ nhĩpẽx to hã mẽ pamã karõ

¹⁹ Nẽ koja Tirtũm Karõ mẽ amã mẽmoj tã tanhmã kapẽr o amnhĩrit to ka mẽ ama nẽ hkõt amnhĩ nhĩpẽx kurẽ kumrẽx. Rỳ mẽhõ mã tanhmã akapẽr to kurẽ kumrẽx. No kêr ka mẽ ama nẽ ãm ama nẽ atỳx ri hã apa hkêt nẽ. ²⁰ Rỳ nhũm mẽhõ Tirtũm Karõ nhỹ hã tanhmã mẽ amã kapẽr to ka mẽ ama nẽ agryk nẽ tanhmã ho akapẽr punuj to hkêt nẽ. ²¹ Koja Tirtũm kapẽr kôt tanhmã mẽ amã mẽmoj jarẽn h to nẽ ãm hãmri Tirtũm Karõ nhỹ hã harẽn h ã amnhĩ jarẽ. Ka mẽ ama nẽ hkõt amnhĩ nhĩpẽx. ²² No koja Tirtũm kapẽr kwỳm ri tanhmã mẽmoj jarẽn h to hãmri nẽ Tirtũm Karõ nhỹ hã ja jarẽn h kêt nẽ. ãm amnhĩ krã hkõt harẽ. Ka mẽ tee ri ama nẽ amnhĩ krã kamã kapẽr xir tỳx kêt nẽ. Jao hkõt amnhĩ nhĩpẽx kêt nẽ.

Tanhmã Pawre kot mẽ ho Tirtũm wỳr to hã harẽn h
Wam Tesarõn 3.3, 16

²³ Nẽ na pa hte mẽ ato Tirtũm wỳr o ri ixpa nẽ kãm:

—Pa Tirtũm. Nà ate mẽ inhmã mẽ ijamakêtkati xà nhõr jakamã na pa htem anhỹr hã ixãmnhĩx ijamakêtkati nẽ ri ixpa. Jakamã kwa kêr ka tanhmã Tesarõn kamã akwỳjê ho kê mẽ amnhĩ to mex rãhã ri pa. Jao tãm amnhĩ nhĩpẽx nẽ tãm ri hamaxpẽr rãhã nhũm Pahihti Jesus Kris akupỳn mẽ ixwỳr wrỳ.

Anhỹr o mẽ ato kuwỳ. ²⁴ Tã koja ã mẽ anhĩpẽx anẽ. Ra kot amnhĩ jarẽn h xà hkõt. ã mẽ anhĩpẽx anhỹr kaxyw na pre amnhĩm mẽ arẽ.

Kagà jatur xà

²⁵ E Kris kôt ixkwỳjaja. Kwa kêr ka mẽ amnhĩ xwar ixto Tirtũm wỳr o apa.

²⁶ Nẽ kêr ka mẽ atar Kris kôt mẽ pahkwỳjê piitã mẽ kãm mẽ ijarẽ.

²⁷⁻²⁸ Nẽ kê Pahihti Jesus Kris mẽ akutã nojarêt rãhã ho pa. Ixte Pahihti nhỹ hã ã mẽ amã ixkapẽr nẽ hã kagà anhỹr jakamã kêr ka mẽ atar Kris kwỳjê piitã mẽ kãm kamã harẽ kê mẽ piitã ixkapẽr ma.

Tã ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awỳr mẽnh anẽ.

Sikũn Tesarõn

Pawre kot Tesarõn kamã Jejus kõt kwỳjê hwỳr wam kagà nê mênh kõt hõ
kagà nê mênh

Pawre na pre kagàja nhípêx nê ma Tesarõn kamã Jejus kõt hkwỳjê hwỳr kumê. Na pre hte Tesarõn kamã mẽ kãm Jejus ã mẽ hkurê xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o pa. Hãmri nhũm Pawre mẽ harênh ma nê kagàja nhípêx nê mẽ hwỳr kumê. Nê kamã mẽ kãm mẽ hamaxpêr o hihtỳx. Nê mẽ kot arĩ Tĩrtũm kõt amnhĩ nhípêx mex o pa nê hamaxpêr kõt hamaxpêr o pa hã mẽ kãm karõ. Nê nhỹrmã Jejus akupỳn kaxkwa rũm mẽ pahpê hkrajê hwỳr wrỳk nê pika ho hapêx par ã mẽ kãm harê. ã na pre Pawre mẽ kãm kagàja kamã mẽ kãm ujarênh anê. Nê mẽ kãm:

¹ Pa Tesarõn nhõ xwỳnh kot Tĩrtũm kapêr mar kaxyw axpên wỳr mẽ apikuprõnh xwỳnhjaja? Xà mẽ amex na ka mẽ apa? Ixpê Pawre na pa axte mẽ awỳr kagà nhípêx nê kumê. Siras mẽ Ximotre mẽ pa mẽ awỳr kumê. Nà mẽ pahpê Mẽpanhĩpêxà maati Tĩrtũm mẽ Kra Jejus Kris kwỳ na pu mẽ. ² Jakamã na pa htem mẽ ato wa hwỳr rãhã ho ri ixpa. Wa kot mẽ akutã nojarêr rãhã ka mẽ ajamakêtkati nê apa kaxyw. Nê mẽmoj to mẽ akutã wa nojarêr rãhã ho pa kaxyw.

Tĩrtũm kot nhỹrmã hkrajê nhípêx kati xwỳnhjê homnuj tỳx ã harênh

Wam Pêtre 4.12-19

³ Nê na ka htem amnhĩ kaxyw Tĩrtũm mã ajamaxpêr tỳx mex o ri apa. Nê axpên kutã anojarêr rãhã nê. Na pa htem ã mẽ ate amnhĩ nhípêx anhỹrja mã ijamaxpêr nê mẽ anhỹ hã ixkĩnh nê Tĩrtũm mã mẽ anhỹ hã ixkĩnh ã amnhĩ jarê. ⁴ Nê nhỹhỹm ixpa nê nhỹri krim agjê nê kamã Tĩrtũm kõt mẽ pahkwỳjê mã mẽ ato amỹra nê mẽ kãm:

—E pa mẽ amã Tesarõn kamã Kris kwỳjê jarê ka mẽ inhma. Nà mẽ õ krĩ kamã mẽ hkwỳjaja na htem Kris ã mẽ hipêx kati ho pa nhũm htem amnhĩ xà htỳx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkõt amnhĩ nhípêx mex rãhã ho pa. Anê.

⁵ ã mẽ ate mẽ kutã amnhĩ nhípêx anhỹr o apaja na hte Tĩrtũm hã mẽ apumu nê hkĩnh nê pa. Nê mẽ akukamã hamaxpêr o:

—Mê kot Ixkra Jejus ã tanhmã mẽ hipêx to ho pa htã ãm hãmri na htem mẽ kutã amnhĩ to htỳx o pa nê mẽ umaj wa ixkaga hkêt nê. Na htem ã amnhĩ nhípêx anê nê mẽ kêp ixkra hã amnhĩ to amnhĩrit mex nê. Nà koja mẽ nhỹrmã wa ixri mex kumrêx nê htĩr tũm nê pa ho pa.

Anhỹr o hamaxpêr. ⁶ Nê mẽ kot Kris ã mẽ anhĩpêx punuj xwỳnhjaja koja Tĩrtũm nhỹrmã mẽ atã mẽ homnuj tỳx nê nhũm mẽ amnhĩ xà htỳx kamã hamak rãhã ho pa. ãm hãmri koja ã mẽ atã mẽ hipêx anê. ⁷⁻¹⁰ Koja Pahihti Jejusja nhỹrmã man akupỳn pika hwỳr hirã htỳx kãm wrỳ nhũm Tĩrtũm kapêr o mẽ wrỳk xwỳnh xihtỳx xwỳnhjaja man hkõt wrỳ. Koja mẽ wrỳ hãmri nê mẽ kot amnhĩ tomnuj xwỳnhjê homnuj tỳx kumrêx. Jao ma mẽ kot amnhĩ xà htỳx kamã hamak tũm xata wỳr mẽ rênh pa nhũm mẽ kamã htĩr tũm nê amnhĩ xà htỳx kamã hamak rãhã ho pa ho pa. Koja ã Pahihtija amnhĩ nê mẽ kot hkõt amnhĩ xunhwỳr kêt xwỳnhjê rênh anê nhũm mẽ pahkĩnhã Tĩrtũm mẽ Krata wa kuri mex nê pa hkêt nê. Nê mẽ pahkĩnh ã wa mex o wa mex nê wa hihtỳx o wa hihtỳx ã wa omunh kêt nê. Koja Pahihti Jejus nhỹrmã akupỳn wrỳ nê ã mẽ panê mẽ hipêx anê. Koja wrỳ pu mẽ amnhĩ kaxyw hkõt pajamaxpêr xwỳnhjaja amnhĩ wỳr omu nê pahkĩnh nê. Hãmri nê amnhĩ nhĩ nyw ã amnhĩ pumu nê kãm:

—Hêxta waa nê. Amex o amex Pahihti. Na ka pre mẽ inhnê ty hãmri nê mẽ inhmã mẽ inhĩ nyw gõ. Kot paj mẽ Tĩrtũm mẽ war ari inhmex kumrêx nê ixtĩr tũm nê ixpa ho ixpa. ãm hãmri na ka ã mẽ ixto mex anê. Nà amex kumrêx o amex kumrêx Pahihti. Anê.

Ã kot puj mẽ pahpê hkwyjaja amnhĩ tã kãm mex o mex ã harênh anê. Ra mẽ ate mẽ ixkapêr mar nê hkõt amnhĩ xunhwyr jakamã kot kaj mẽ ixpyrà nê ã kãm mex o mex ã harênh anê.

Pawre kot Tesarõn nhõ xwýnhjê ho Tirtũm wýr ã harênh

¹¹⁻¹² Nê na pa htem mẽ ato Tirtũm wýr rãhã ho ixpa nê kãm:

—Pa Tirtũm? E Tesarõn kãm akrajaja na pa mẽ ho awý. Na ka hte Akra Pahihti Jejus Kris mẽ wa mẽ ho mex rax o apa. Jao amnhĩm mẽ arê nhũm mẽ ra kãm amnhĩ to mex prãm nê. Na htem amnhĩ kaxyw Jejus mã hamaxpêr rãhã pê mẽmoj to axpên kutã nojarêto o pa. Jakamã kwa tanhmã mẽ hkrã hto kê mẽ akõt ã amnhĩ nhĩpêx anhýr rãhã ho pa. Kêr ka mẽ kot akõt amnhĩ nhĩpêx o pa hã mẽ omu nê akĩnh nê mẽ kãm mẽ mex ã mẽ harê. Nhũm mẽ ate tanhmã mẽ ho mex to hã amnhĩ tã apumu hãmri nê mẽ amnhĩ pyrà nê amã amex o amex ã ajarênh rãhã ho pa. Anê.

2

Kot amnhĩ tomnuj tỳx kumrêx xwýnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhýrmã mẽ panhõ Pahihti Jejus Kris akupýn wrý pu mẽ ma kutã api nê kakrã kamã hkaxpa. Jakamã kwa Jejus kõt ixkwýjaja. ² Koja mẽhõ mẽ awýr mō nê mẽ amã Jejus ra akupýn wrýk ã harênh japêr. Rý tanhmã mẽ amã Jejus hpõx xã hã arĩgro jarênh o hêx to nê mẽ amã:

—Kwa na ra Jejus akupýn nojarêto. Koja tokyx akupýn mẽ pahwýr wrý. Semã ja kamã rý ko. Apu hõ hã koja apu wrý rý ko.

Anhýr o harê. Nê Tirtũm Karõ nhý hã ã kot mẽ amã harênh anhýr ã amnhĩ jarê rý nhãm mẽhõ kot ã kãm harênh anhýr ã harê. Rý pa ixte harênh nê hã kagã hã ijarê. Nom kwa kêr ka mẽ kapêr ma nê ãm ama nê hkõt ajamaxpêr kêt nê. Rý ama nê tee ri amnhĩ kukamã ajamaxpêr kêt nê. Koja mẽhõ ã mẽ amã Jejus tokyx wrýk ã harênh anê nê ãm amnhĩ krã hkõt ã harênh anhýr o hêx. Nom Tirtũm Karõ nhý hã rý pa inhý hã rý nhãm Kris kõt mẽ panhõ nhý hã ã harênh anhýr kêt nê. ³⁻⁴ Jakamã kêr ka mẽ ãm mẽ kot harênh o hêxja ma nê hkõt ajamaxpêr kêt nê. Kormã Pahihti Jejusja akupýn nojarêto kêt. E kot paj ixprĩ hã mẽ amã ja jarê ka mẽ inhma. Nã kormã Pahihti akupýn nojarêto kêt ri koja mẽ ohtõ rax kumrêx nê Tirtũm kutã amnhĩ xunhwý nê kãm hkurê ho pa. Nê amnhĩ tomnuj tỳx o pa. Hãmri nhũm ra kot amnhĩ tomnuj tỳx kumrêx xwýnh maati jarênh amnhĩ to amnhĩrit. Nom na pre ra Tirtũm tanhmã kot hipêx to hkukamã hã amnhĩ jarê. Koja xep gaa nê ma mẽ kot amnhĩ xã htýx kamã hamak tũm xãta wýr kumê nhũm kamã amnhĩ xã htýx kamã hamak o pa rãhã nê pa ho pa.

Tã nom kormã Pahihtija akupýn wrýk nê ma hwýr mênh kêt ri koja mẽ piitã omu nê kêt Mèhpãm maati pixi hã harênh kaxyw mẽ kêt mẽ õ sãnti piitã hkrakrak pa. Nê mẽ kot mẽmo karõ ho amnhĩ pãm ã harênh xwýnhja nhũm piitã hkrakrak pa. Hãmri nê axtem nê Tirtũm mã amnhĩ jarênh xã hã ixkre jatur xã kamã hitom wýr axã nê kamã nhý nê hêx rom mẽ piitã mẽ kãm kêt Tirtũm ã amnhĩ to hêx nê mẽ kãm:

—E mẽ amnê ixpumu. Ixpê mẽ anhõ Tirtũm na pa. Pa kot kaj mẽ inhmã inhmex o inhmex ã ijarê. No kêr ka mẽ anhõ sãnti ho apãm o apa hkêt nê. Kwarĩ ho kwarĩ. ãm paxipix ixpê Mèapãm maati nê paxipix ixpê mẽ anhõ Tirtũm.

Anhýr o amnhĩ to hêx. ⁵ Na pa pre arĩ mẽ akõt ixpa ri ã mẽ amã harênh anê. Mãn arĩ mẽ ate ja hã anohtýx rý ko. ⁶ Nom kormã ã kot amnhĩ nhĩpêx anhýr xã hã arĩgrota kormã kator kêt. Mèhõ kormã kot kêt àmnar jakamã nhũm kormã kator kêt nê. Ra mẽ ate kêt àmnar xwýnhja jarênh mar. Tã koja hpõx xã hã arĩgro kato nhũm kêt àmnar xwýnhja kãm pry kaprã nhũm rĩ kormã mō. ⁷ Nom na hte ra hpimxur pê Tirtũm nê mẽ piitã mẽ hkurê ho pa. Mẽ kot Tirtũm kõt amnhĩ xunhwýr pymaj tanhmã nê mẽ ho ho pa. Nom kormã kêt àmnar xwýnhja kêt àmnar jakamã nhũm hte mẽ noo mã tanhmã mẽ ho hkêt nê. Tã koja Tirtũm nhýrmã kêt àmnar xwýnhja mã anê nhũm kuma nê kãm ure nhũm rĩ kormã amnhĩ to amnhĩrit nê mẽ piitã mẽ noo mã mō nê Tirtũm nê tanhmã mẽ kãm

hêx to ho pa. ⁸⁻¹² Koja kato nê Satanasti mē wa mē piitā tanhmā mē nokupyr to ho ri mē hkôt pa. Nê hêx rom mē kām aa mē kot mēmoj pumunh kêt kwỳ ho anhỹr o ri pa. Koja wa hêx rom te Tirtûm kot amnhĩ nhĩpêx pyrāk o ã amnhĩ nhĩpêx anê. Hāmri nhũm mē kot Jejus kôt amnhĩ xunhwỳr kêt xwỳnhjaja ja hã wa omu nê wa hkôt hamaxpêr kurê kumrêx. Nê ãm hāmri wa kapêr ã wa hkamnhĩx. Kop apu ra mē kot Tirtûm kapêr mar nê hkôt amnhĩ xunhwỳr ronhỹx ra Tirtûm amnhĩ tã mē omu nê mē ho hkra. Nom koja mē kām kapêr mar prãm kêt nê. ãm wa kot amnhĩ to hêx o wa pa xwỳnhhta kôt pix mã koja mē kām amnhĩ nhĩpêx prãm.

Ja mỳrapê koja Tirtûm tee ri ja hã mē omu hāmri nê mē nê wa kot amnhĩ tomnuj tỳx xwỳnhhta wa omunh kêt nhũm wa tanhmā mē kām amnhĩ nhĩpêx to nhũm mē wa omu nê wa hkôt hamaxpêr kurê kumrêx. Hāmri nê wa gryk ã Tirtûm kaga jakamã nhũm nhỹrmã mē kot amnhĩ xà htỳx kamã hamak tũm xaja wỳr mē rênh pa.

Koja Satanasti mē kot amnhĩ tomnuj tỳx kumrêx xwỳnh maatita ã hêx rom tanhmã mē no kupyr to anhỹr o pa rãhã nhũm Pahihti Jejusja hirã rax kãm akupỳn mē pahwỳr wrỳ. Hāmri nê kot amnhĩ tomnuj tỳx kumrêx xwỳnh maatita ã amỳnê nhũm mē kãm hpĩr kurê kumrêx nhũm hapêx. Koja ã amnhĩ nhĩpêx anê.

Tirtûm kot tanhmã mē pahto mex to hã harênh
Rômãn 8.28-30; Wam Tesarôn 2.13, 5.23-24

¹³ Nê amnepêm kormã mēmoj kêt ri na pre Tirtûm amnhĩm mē arê. Mē ate kapêr mar nê hkôt amnhĩ xunhwỳr nhũm kot mē ato hkra kaxyw mē arê. Kãm mē ajapêê. Na pre mē awỳr amnhĩ Karō rê nhũm mē akarō mã agjê nê tanhmã mē ajamaxpêr to ka mē ý hã tãm amnhĩ nhĩpêx rãhã ho ri apa. Na pa htem ja hã mē amã ijamaxpêr nê mē anhỹ hã ixkĩnh kãm Tirtûm mã mē ajarênh o ri ixpa. ¹⁴ Na pre mē awỳr mē ixrê. Mē ixte mē awỳr ixpa nê mē amã tanhmã Jejus kot mē panê amnhĩ nhĩpêx to hã harênh o ixpa kaxyw. Mē ate mē inhmar nê Jejus kôt amnhĩ xunhwỳr nhũm Tirtûm kot Pahihti Jejus Kris o mex pyrã nê tanhmã mē ato mex to kaxyw. ¹⁵ Jakamã kwa kêr ka mē ra mē ixte wam mē awỳr kagã mênhta kamã harê nê mar tỳx nê. Nê mē akôt mē ixpa ri tanhmã mē ixte mē ajahkre htoja mã ajamaxpêr mex nê hã ano htỳx nê hkôt amnhĩ nhĩpêx rãhã ho ri apa. Jao Jejus kôt amnhĩ nhĩpêx mex o ri apa Kris kôt ixkwỳjaja.

¹⁶ Mēpanhĩpêêxã maati mē Pahihti Jejus Kris wa kãm mē pajapê htỳx kumrêx. Na hte wa tanhmã mē pajamaxpêr o hihtỳx to ho pa pu mē wa ý hã tãm pajamaxpêr o ri papa. Nê wa ý hã nhỹrmã wa kuri pamex nê pahtĩr tũm nê papa hkukamã pajamaxpêr kaprỳ ho papa hkêt nê. ¹⁷ Na pa htem mē ato wa hwỳr o ixpa nê wa kãm:

—Pa Tirtûm mē Jejus wa? Kwa kêr ka wa tanhmã Tesarôn kamã akrãjê mã mē hamaxpêr o hihtỳx to kê mē war anhỹ hã tãm amnhĩ nhĩpêx nê tãm hamaxpêr. Jao kapêr mex rãhã nê pa ho pa. Anê.

3

Tanhmã mē pahte axpên to Tirtûm wỳr to hã kot mē pamã karō
Korosê 4.2-4

¹ Nê kwa Kris kôt mē ixtō nê ixtōxjaja. Kêr ka mē amnhĩ xwar mē ixto Tirtûm wỳr rãhã ho ri apa. Mē ixte krĩ piitã hkôt mē kãm Jejus jarênh o ri mē hkôt ixpa nhũm mē kot mē inhmar nê amnhĩ kaxyw Jejus kôt hamaxpêr kaxyw. Jao mē apyrã nê hkôt amnhĩ nhĩpêx mex o pa kaxyw. ² Nom koja mē piitã ã amnhĩ nhĩpêx anhỹr kêt nê. Mē hkwỳjaja kãm Jejus jarênh mar prãm kêt jakamã kwa mē ixto Tirtûm wỳr kê mē inhnê mē omunh mex nê nhũm mē Jejus ã tanhmã mē ixto hkêt nê.

³ Nê koja Pahihti tanhmã mē akrã hto ka mē ajamaxpêr mex nê ý hã hkôt amnhĩ xunhwỳr tỳx o ri apa. Jakamã nhũm Satanasti mē ate amnhĩ tomnuj hprãm xaj tee ri tanhmã mē anhĩpêx to kaprỳ nhũm Pahihti mē anê omunh mex nê. Ra kot mē atã amnhĩ jarênh xà hkôt. ⁴ Koja ã mē anê hipêx anê ka mē ý hã tanhmã mē ixte mēmoj tã mē amã karō xà hkôt amnhĩ nhĩpêx mex o ri apa. ⁵ Tã kê Pahihti tanhmã mē akrã hto ka mē

Tirtūm pyrà nē mē piitā mē kamā axukaprī ho ri apa. Nē Pahihti Kris pyrà nē mēmoj punuj kutā amnhī to htỳx nē. Jao hkôt amnhī nhīpêx mex rāhā ho ri apa.

Mē kām kaga xwỳnhjê jarēnh

Wam Korīt 4.12; Epēs 4.28; Wam Tesarōn 4.9-12

⁶ E kot paj hpānhā Kris kôt mē pahkwỳ kām kaga xwỳnhjê jarē ka mē inhma. Pahihti Jejus nhỹ hā kot paj mē amā tanhmā mē harēnh to. Nà koja mē akwỳjaja kām kaga nē amnhīm mēmoj tā àpēnh kêt japêr. Nē mē ixte mē axàpēnh mex o apa hā mē amā karōja kuhpa hā amnhīm mēmoj tā àpēnh kêt japêr. Koja mē ā amnhī nhīpêx anē ka mē ja hā mē omu hāmri nē mē hkôt ri apa hkêt nē. ⁷⁻⁸ Xà mē pajaja na pa prem ma mē awỳr mō nē mē akôt inhmā kaga nē mēmoj tā ixàpēnh kêt nē ri ixpa? Nà na pa prem mē apa kukwak ri ixàpkur pymaj ixàpēnh rūnh nē amnhī pa pix kukwak ri ixàpkur o ri ixpa. Na ka prem mē inhmā mēmo mē apkur xà ho mra pa prem amarī amnhīm hamỳnh nē hkur kêt nē. Na pa prem hpānhā mē amā amnhīre nē kormā kuku. Tā kêr ka mē ā amnhī nhīpêx anhỳr o ri axpēn kôt apa nē amnhī pa pix kukwak ri apku. Nē mē amā kaga hā nhām akwỳjê hpa kukwak ri axàpkur o ri apa kêt nē. ⁹ Na pa prem amnhī pa pix kukwak ri ixàpkur o ri mē akôt ixpa. Mē ate ja hā mē ixpumunh nē mē ixpyrà nē ā amnhī nhīpêx anhỳr kaxyw. Nom mē ixte Jejus mā tanhmā mē ajahkre hto nhūm mē ate mē inhmar nē hpānhā mē inhmā mē ixàpkur xà nhōrja Jejus mā tanhmā kute hkêt tā pa prem ā amnhī nhīpêx anhỳr kêt nē. Mē ate ja hā mē ixpumunh nē mē ixpyrà nē ā amnhī nhīpêx anhỳr kaxyw na pa prem amnhī pa pix kukwak ri ixàpkur o ri mē akôt ixpa. ¹⁰ Na pa prem mē amā ja hā karō ho:

—Koja mēhō kām kaga nē àpēnh kêt nē ka mē ja hā omu nē kām ō hkêt nē. Kwār māmri apkur kêt nē kām prām nē ri pa nē amnhī pumu. Anē.

¹¹ Tā xep ra mē akwỳjaja ā amnhī nhīpêx anē nē kām kaga nē àpēnh kêt nē amarī ri pa. Nē xep htỳx ri axpēn jakwa kamā nhām mē hixi ho rēr o ri pa. ¹² Kwa mē inhma Jejus kôt ixkwỳjaja. Kot paj Pahihti Jejus nhỹ hā mē amā mē kot ā amnhī nhīpêx xwỳnhjê jarē ka mē inhma nē mē inhmar tỳx nē. Kêr ka mē kām kaga xwỳnhjê mā anē kê mē jam ure nē hpānhā àpēnh mex o pa. Jao mē apyrà nē amnhī pa kukwak ri apkur o pa. Kêr ka mē ā mē kām ixkapêr jarēnh anē.

¹³ Nē kwa kêr ka mē axpēn to mex o apata kaga hkêt nē.

¹⁴ E na pa mē ā Tirtūm nhỹ hā mēmoj tā mē amā karō nē hā kagà anē. Tā koja mēhō kamā harē nē kuma nē ām kuma nē hkôt amnhī nhīpêx kêt ka mē ja hā omu nē hkôt ri apa hkêt nē. Tokyx kot ja hā amnhī pumunh nē amnhī tā hpijaàm kaxyw. ¹⁵ Nom arī Kris kôt kêt mē akwỳ jakamā kêr ka mē arī kêt mē atō rỳ atōx ā tām hipêx nē kām akapêr mex o ri apa. Nom te ho kêt mē akwỳ hkêt pyrāk o kām akapêr kêt nē.

Tanhmā Pawre kot mē ho Jejus wỳr to hā harēnh

¹⁶⁻¹⁸ Nē na pa hte mē atō Pahihti Jejus wỳr rāhā ho ixpa. Kot mē pamā mē pajamakêtkati xà nhōr jakamā na pa htem mē atō kuwỳ nē kām:

—Pa Pahihti? Kwa kêr ka Tesarōn kamā akwỳjê pumu nē mēmoj to mē kutā anojarêt rāhā ho ri mē hkôt apa. Kê mē hamakêtkati nē àmnhīx pa ho pa. Anē.

Tā ām ja pix. Ixpê Pawre na pa kagà jatur xà kamā inhīhkra ho amnhī nhīxi nhīpêx. Na hte kagà nhīpêx xwỳnh inhmā ixkapêr ā kagà. Nē hā kagà hpa pa hpānhā hatur xà kamā pam inhīxi nhīpêx. Tā na hapêx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hà hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tîrtûm kapêr o Jejus kôt hkwyjê jahkre ho pa. Hãmri nhûm Pawre krî hõ kamã pa nê kagàja nhîpêx nê hwÿr kumê. Nê kamã kãm mêmôj tã karõ. Na pre ra Epes kamã mê hkwyjaja Tîrtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tîrtûm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tîrtûm kãm hprãm xà hkôt pix mã mê ahkre ho pa hà kãm karõ nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hà mê ahkre ho ixpa kaxyw na pre Mëpapytâr xwÿnh Tîrtûm mê Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyræk Ximotre. Jakamã na pa hte ato Mëpanhîpêxà maati Tîrtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tîrtûm mê Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêt rãhã ho wa ri apa. Kot kaj wa ã ho mex anê nhûm war anhÿ hà hamakêtkati nê àmnhîx pa ho pa.

Anhÿr o na pa hte war ato kuwÿ

Tîrtûm kapêr o mê ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetõn wÿr panojarêt nê tee ri Epes kamã Tîrtûm kapêr ho hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetõn wÿr ixkôt amõr kêt nê. ãm jar Epes kamã arîk nê ixwakre kamã Tîrtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harê hãmri nê Epes kamã are nê ma Masetõn wÿr ahte mõ. ⁴ Mê hêx xwÿnhjaja amnepêm panhîgêjtaja kot tanhmã amnhî nhîpêx to nê tanhmã ujarênh toja nhûm htem mê kãm harênh pix o pa. Nê mê hixi piitã harênh o pa. Na htem ã amnhî krã hkôt hkwyjê mã ujarênh anhÿr o pa. Jao axpên kwÿm ri mê ahkre nê mê hà axpên mã àkjêr o pa. ã mê kot amnhî nhîpêx anhÿr jao Tîrtûm nhÿ hà kãm hprãm xà hkôt mê ahkre hkêt nê. Koja mêmõ Tîrtûm nhÿ hà kapêr o mê ahkre hãmri nê amnhî kaxyw kãm hamaxpêr tÿx pê tanhmã mê ahkre hto. Nom ixte amã mê harênh xwÿnhjaja Tîrtûm nhÿ hà mê ahkre hkêt jakamã na pa pre inhnojarêt nê ã amã mê harênh anê nê mê kuri Epes kamã are.

⁵ Tã kêr ka arî mê ahkre ho ri mê hkôt apa Ximotre. Nê Kris kôt mê pahkwÿjê mã anê kê mê amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mê kãm anê kê mê te kãm amnhî tã ma pyræk o nhãm kãm mê hà ma ho pa. ⁶ Ixte amã mê hêx xwÿnh jarênh xwÿnhjaja na htem ã mê ahkre anhÿr kêt nê. Na htem htÿx ri amnhî krã hkôt tanhmã mê ahkre hto. ⁷ Tîrtûm kot finat Mojes mã mêmôj tã karõja mê kot mar tÿx ã amnhî kamnhîx nê ho mê ahkre hprãm tã no ãm hprî hà mar kêt nê htÿx ri ho mê ahkre ho pa. ⁸ Tîrtûm kot Mojes mã mêmôj tã karõja mex. Mê kot mar nê hkôt amnhî nhîpêx o pa kaxyw na pre. ⁹ No na pre mê kot tãm amnhî nhîpêx xwÿnhjê mã ã hà karõ anhÿr kêt nê. ãm mê kot amnhî tomnuj xwÿnhjê mã na pre hà karõ.

Mê kot mê õ pahi kapêr mar kêt xwÿnhjê mã.

Nê mê kot Tîrtûm kapêr nhîrôp kuhê ho mê pa xwÿnhjê mã.

Nê Tîrtûm ã mê hpijaàm kêt xwÿnhjê mã.

Ně mẽ kot mẽ hipêêxà ně mẽ katorxà hpar xwỳnhjê mã.

¹⁰ Ně mẽ hprō kuhpa hã nhãm mēnijê ho amnhĩkati xwỳnhjê mã.

Ně mẽ mjên kuhpa hã nhãm mēmyjê ho amnhĩkati xwỳnhjê mã.

Ně mēmyjaja kot mēnijê kuhpa hã kãm amnhĩ kwỳ myjê hkĩnh ně mẽ ho amnhĩkati xwỳnhjê mã.

Ně mēnijaja kot mēmyjê kuhpa hã kãm amnhĩ kwỳ nijê hkĩnh ně mẽ ho amnhĩkati xwỳnhjê mã.

Ně mẽ kot mẽmoj to àhkĩnh ně nhãm mẽ kãm ho wēnê o mẽ pa xwỳnhjê mã.

Ně ri mẽ hêx o mẽ pa xwỳnhjê mã.

Ă mẽ kot Tĩrtũm kapêr kwỳm ri amnhĩ nhĩpêx anhỹr o mẽ pa xwỳnh piitã mẽ kaxyw na pre Mojes mã mẽmojta ã karō. Mẽ kãm Jejus prãm kêt xwỳnhjê mã. Mẽ kot mar ně tãm amnhĩ nhĩpêx kaxyw. ¹¹ Tã pa na pa hte Pahihti kot tanhmã mẽ panê amnhĩ nhĩpêx to hã harênh o ri mẽ hkôt ixpa. Ja kaxyw na pre Tĩrtũm ixãm. Tĩrtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harênh

Atre 26.9-18

¹² Ně Pahihti Jejus Kris na hte ixto mex rãhã ho pa. Na hte tanhmã ixto pa ã hã mẽ piitã mẽ kãm tanhmã kot mẽ panê amnhĩ nhĩpêx to hã harênh o ri mẽ hkôt ixpa. Na pre ixte ã amnhĩ nhĩpêx anhỹrja kukamã inhmã ixàpênh ã karō ně inhmã:

—E ate amnhĩ kaxyw ixkôt ajamaxpêr mex jakamã kêr ka ma mẽ piitã mẽ hkôt ri mẽ kãm ixkapêr jarênh o ri apa. Anê.

¹³ Nom amnepê m na pa pre hkôt ijamaxpêr kêt nê. Ăm axtem ně haprỳ rũnh ně ho ixkapêr punuj o ri ixpa. Ně hkwỳjê ho ixkrihkrit ně mẽ haprỳ ně mẽ hta k. Nom kormã amnhĩ kaxyw Kris kôt ijamaxpêr kêt jakamã ixtỳx ã mẽ hipêx anhỹr o ixpa nhũm Pahihti ja hã ixpumu ně ixkamã ukaprĩ ně mẽ hã tanhmã ixto hkêt nê. ¹⁴ Ně kãm ijapê xàj mẽmoj to ixkutã nojarêt rãhã ho pa ně tanhmã ixkrã hto pa ra amnhĩ kaxyw hkôt ijamaxpêr ně hkôt amnhĩ xãm. Hãmri ně kukwak ri ra inhmã hkwỳjê hkĩnh ně hpãnhã mẽ ho mex o ri mẽ hkôt ixpa.

¹⁵ Ně Jejus Kris ra wrỳk ně mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harênhja na pa hte harênh o ri ixpa. Ă kot amnhĩ nhĩpêx anhỹrja na mex o mex. Kê mẽ piitã kuma ně hã nohtỳx rãhã ho pa.

Kormã ixte hkôt amnhĩ xãm kêt ri na pa pre amnhĩ tomnuj tỳx kumrêx o mẽ piitã mẽ hakrenh ¹⁶ nhũm Tĩrtũm ixpumu ně ixkamã ukaprĩ nê. Hãmri ně amnhĩ kaxyw ixãm. Mẽ piitã mẽ kot ja hã ixpumunh ně xapê m ã ã ijarênh anhỹr kaxyw. Ně ijarênh o:

—Kwa Pawre na pre amnhĩ tomnuj tỳx kumrêx o pa nhũm Jejus Kris ja hã omu ně kamã gryk tokyx anhỹr kêt nê. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ uràk ně amnhĩ kaxyw Jejus kôt pajamaxpêr ně hkôt amnhĩ xunhwỳ. Kêr pu mẽ Pawre pyrã ně nhỹrmã Tĩrtũm mẽ Kraja wa kuri pamex ně pahtĩr tũm ně papa ho papa.

Anhỹr o xapê m ã ijarênh ně ixpyrà ně Jejus kôt amnhĩ xunhwỳr kaxyw na pre Tĩrtũm ã ixto mex anê. ¹⁷ Jakamã na pa hte kãm amnhĩ jarênh kaxyw ně kãm:

—Pa Tĩrtũm? Nà kapxipix apê Pahi Maati. Ně arãhã ho arãhã ně amex o amex. Mẽ ixte inhno ho aa apumunh kêt tã kapxipix apê Měinhĩpêêxà maati. Tã koja nhỹrmã mẽ piitã ã amã amex o amex ã ajarênh anhỹr o pa. Anê.

Ximotre kot tanhmã Epes nhõ xwỳnhjê jahkre hto hã kãm karō

Wam Korĩt 5.1-5

¹⁸ Ně te apê ixkra pyrãk Ximotre. Tã kot paj mẽmoj tã amã karō ka inhma ně inhmar tỳx nê. Nà Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhỹ hã kapêr o mẽ pa xwỳnhjaja axàpênh kukamã amã kapêr ně amã:

—E ate ma mẽ kãm Pahihti Jejus jarênh o apa kaxyw Tĩrtũm kot axãm jakamã kêr ka ã amnhĩ nhĩpêx anhỹr o ri mẽ hkôt apa. Anê.

Tã kot paj ijaxwÿja kagàja kamã amã ixkapër nê mëmoj tã amã karõ. Ka mar tÿx nê hkõt amnhĩ nhĩpêx mex pê Tirtũm mã amnhĩ nhĩpêx mex o ri apa. Jao aprĩ hã mẽ kãm tanhmã Jejus jarênh to ho ri mẽ hkõt apa. ¹⁹ Nê amnhĩ kaxyw Jejus mã ajamxpër mex nê. Nê mëmoj punuj pumu nê amã ho anhÿr prãm tã Jejus nhÿ hã nê amnhĩ to htÿx nê ho anhÿr kêt nê. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja nê amnhĩ to htÿx kêt nê tanhmã amnhĩ tomnuj to hãmri nê te ate Pahihti Jejus kaga pyrãk. Na pre pahkwÿjaja ã amnhĩ nhĩpêx anhÿr o hkaga nê axte kãm hamxpër kêt nê. ²⁰ Imënew mẽ Aresãnja na pre wa ã amnhĩ nhĩpêx anê nê tanhmã Tirtũm o kapër punuj to. Mÿrapê na pa pre Satanasti nhĩhkram wa haxà. Kot tanhmã wa ho nhũm wa kot tee ri amnhĩ tomnujta ã amnhĩ pumunh nê tokyx tãm amnhĩ nhĩpêx nê axte ã amnhĩ nhĩpêx anhÿr kêt kaxyw.

2

Tanhmã mẽ pahte Tirtũm mã amnhĩ jarênh to hã mẽ pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mẽ pahte Tirtũm mã amnhĩ jarênh to hã amã karõ Ximotre. Ka inhma nê ixô ri ho mẽ pahkwÿjê jahkre ho ri mẽ hkõt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tirtũm wÿr ho ri pa. Nê kãm mẽ harê nê mẽ kaxyw mëmoj tã axàhwÿr o ri apa. Kêr kê ama nê tanhmã mẽ ho mex to. Kê mẽ amnhĩ tã omu nê ã kãm kapër anê nê kãm:

—Pa Tirtũm? Nà ãm hãmri na ka ã mẽ ixto mex anê. Amex o amex. Anê.

² Nê mẽ kãm anê kê mẽ õ pahi nê mẽ ho amnhĩptar xwÿnh piitã mẽ ho ahwÿr o pa ho:

—Pa Tirtũm? Kwa kêr ka mẽ inhõ pahi mẽ mẽ kot mẽ ixto amnhĩptar xwÿnh piitã tanhmã mẽ ho kê mẽ ixto mex o pa. Kêr pa mẽ ijamakêtkati nê ixãmnhix ixpa pê amã tanhmã amnhĩ nhĩpêx to ho ri ixpa. Nê ixãmnhix mẽ hkõt tãm amnhĩ nhĩpêx. Anê.

³ Kot puj mẽ ã mẽ ho mẽ papytar xwÿnh Tirtũmja wÿr o papa anê nhũm mẽ pama nhũm ja kãm mex nê.

E kêr ka ã mẽ kãm ja hã karõ anê Ximotre.

Tirtũm kãm mëmoj prãm ã harênh

Sikũn Pêtre 3.9

⁴ Nê mẽ piitã mẽ kot kapër mar nê amnhĩ kaxyw Jejus kôt hamxpër nê hkõt amnhĩ xunhwÿrja na Tirtũm kãm hprãm.

⁵ Ja kaxyw na pre mẽ pahwÿr Kra Jejus mẽ nhũm man mẽ pahwÿr wrÿ. Tirtũmja tapxipix na kêp Mëpahpãm. Nê Kra Jejusja tapxipix na kot Tirtũm mã tãm mẽ paxunhwÿr mã xwÿnh. Ja kaxyw na pre amnhĩ grõnh kôt wrÿ mẽ pahpyrà nê ï ho ï nê kato.

⁶ Hãmri nê gaa nê àptar hãmri nê mẽ pahpiitã mẽ panê ty. Jao Tirtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhÿr ã harênh mar nê tokyx hkõt amnhĩ xunhwÿrja na Tirtũm kãm hprãm.

⁷ Ja kaxyw na pre ixãm. Ixte Ijaew kêt xwÿnhjê mã Tirtũm kapër jarênh o ri mẽ hkõt ixpa kaxyw. Nê Jejus nhÿ hã tanhmã mẽ kãm ixkapër to ho ri ixpa kaxyw. Nê tanhmã kot mẽ panê amnhĩ nhĩpêx to hã harênh kaxyw. ãm hãmri na pa ã amnhĩ jarênh anê. Ixêx kêt. Na pa hte Ijaew kêt xwÿnhjê hkõt ixpa nê ã mẽ kãm ixkapër anê nê mẽ kãm:

—E mẽ ate Tirtũm Kra Jejus kôt amnhĩ xunhwÿrja na Tirtũm kãm hprãm. Jakamã kwa mẽ tokyx amnhĩ kaxyw hkõt ajamxpër nê hkõt amnhĩ xunhwÿ. Anê.

Ikrësti kamã tanhmã mẽ pahte amnhĩ nhĩpêx to hã mẽ pamã karõ

⁸ Nê kot kaj mẽ tõhã Tirtũm kapër mar kaxyw axpën wÿr akuprõ. Hãmri nê Tirtũm mã amnhĩ jarê nom kêr ka mẽ mëmoj tã axpën kamã agryk kamã kãm amnhĩ jarênh kêt nê. Rÿ mëmoj tã axpën mã axàkjêr kamã kãm amnhĩ jarênh kêt nê. ãm tãm mẽ ajamxpër pix o kãm amnhĩ jarê. Nê tãm amnhĩ nhĩpêx kamã kãm amnhĩ jarê. Ja na inhã hprãm. Tã kêr ka ã Epes nhõ xwÿnhjê mã ja hã akarõ anê Ximotre.

*Mēnijaja kot tanhmā amnhī nhīpêx to kaxyw mē hā kām karō
Wam Korīt 14.34; Epes 5.22; Xitre 2.3; Wam Pêtre 3.1-7*

⁹ Nē kot paj hpānhā Kris kôt mē pahtōxjaja tanhmā kot amnhī nhīpêx to hā mē kaxyw amā karō ka inhma. Nà mēmyjaja kot mē omunh nē kām mē hkīnh prām xāj kê mē htỳx ri mē noo mā tanhmā amnhī nhīpêx to hkêt nē. Nē ja prām xāj tanhmā ê jagjênh to hkêt nē rỳ tanhmā ri mrar to hkêt nē. Rỳ mē kām mē hkīnh prām xāj ôkrexê mex jagjênh rỳ mē ìhkra kamā kàx mex jagjênh nē ri hā mē hkôt pa kêt nē. Rỳ ja kaxyw tanhmā ri amnhī kījaxwỳr to nē ri hā mē hkôt pa kêt nē. Rỳ mē ê mex jagjê nē mē noo mā htỳx ri hpijaàm kêt o pa hkêt nē. Kê mēmyjaja kām mē hkīnh prām xāj ã htỳx ri amnhī nhīpêx anhỳr o pa hkêt nē. ¹⁰ Mē kām anē kê mē kām Tirtùm măn kīnh xāj mē piitā mē kutā mēmoj to nojarêt o pa.

¹¹ Nē mē kām anē kê mē Tirtùm kapêr mar kaxyw mē pikuprōnh xà hwỳr agjê nē akryk Tirtùm kapêr mar o hkrī nē htỳx ri axpên mā kapêr o hkrī kêt nē.

¹² Nē kê mē ikrêsti kamā Tirtùm kapêr o mēmyjê jahkre hkêt nē. Rỳ kamā mēmoj tā tanhmā mē kām karō hto hkêt nē. ãm akryk Tirtùm kapêr mar o hkrī. ¹³ Mēmo myrapê koja mē ã amnhī nhīpêx anē? Nà na pre Tirtùm my kot wa finat Atāwja kumrêx nhīpêx nē kormā hprō Ewa o hapu nē hipêx. ¹⁴ Nē Atāwja na pre kagā kapêr mar nē hkôt amnhī nhīpêx kêt nē. Prō na pre mar xà hkôt Tirtùm kapêr nhīrōp xa nē tanhmā amnhī tomnuj to. ¹⁵ Myrapê na htem mēnijaja hpijagri ho hikwỳ nhūm mē hkrajaja à htỳx kām hapôj. Tā nom koja mē Jesus kôt amnhī xunhwỳ nē ã ixte mē kaxyw amā mēmoj tā karō xà hkôt amnhī nhīpêx hāmri nē nhỹrmā mex kumrêx nē htīr tūm nē pa ho pa. E kêr ka ã mēnijê mā mēmoj tā karō anē Ximotre.

3

*Pastô kot tanhmā amnhī nhīpêx to kaxyw mē hā kām karō
Xitre 1.5-9*

¹ E kot paj hpānhā tanhmā pastô jarênh to. Koja mēhō kām kêp Kris kwỳjê nhō pastô nē Tirtùm kapêr o mē ahkre hprām nē ãm hāmri ã hamaxpêr anē. Ja mex. ² Jakamā koja mēhō kām kêp pastô hprām hāmri nē ã amnhī nhīpêx anhỳr o apa.

Koja mē piitā mē noo mā tām ri amnhī nhīpêx.

Nē hprō pix tănopxar o pa.

Nē mēmoj punuj kutā amnhī to htỳx nē.

Nē tām hamaxpêr.

Nē àmnhix amnhī wỳr mē piitā mē kuwỳ.

Nē Tirtùm kapêr o mē ahkre mex nē.

³ No kê mē kagôxỳhti japrōr nē ho pipānh o pa hkêt nē.

Nē àhkurê ho pa hkêt nē.

Nē mē piitā mē kamā ukaprī ho ri mē hkôt pa. Jao mē kutā nojarêt rāhā ho pa.

Nē amnhīm kàxpore rax o pikuprōnh prām xāj tanhmā amnhī nhīpêx to hkêt nē.

⁴⁻⁵ Nē hkrajê jahkre mex o pa nhūm mē kapêr ma nē hkôt amnhī nhīpêx. Nē hā hpijaàm kām tām amnhī nhīpêx.

Koja mē hkrajê jahkre mex kêt nē hāmri nē määnēn Kris kwỳjê jahkre mex kêt nē.

Jakamā nhūm hkrajê mē Kris kwỳjaja tām amnhī nhīpêx kêt nē.

⁶⁻⁷ Nē kê mē kot Jesus kôt amnhī xunhwỳr kêt xwỳnhjê noo mā tām amnhī nhīpêx rāhā ho pa.

Mē kot ja hā mē omunh nē mē hā hpijaàm o pa kaxyw. Nom koja mē tanhmā amnhī tomnuj to nhūm mē tee ri ja hā mē omu nē mē ho kapêr punuj nē. Satanasti kām hprām xà hkôt.

Nē kê mē kot Kris kôt amnhī xunhwỳr nyw xwỳnhjaja kêp pastô hkêt nē.

Koja mē kêp pastô hāmri nē mēmo arigro hā tanhmā hamaxpêr to nē amnhī to rax prām xāj tanhmā amnhī to jarkrar to ho pa. Hāmri nhūm Tirtùm tee ri ja hā omu

ně te kot Satanasti nhĩpêx pyrək o hipêx ně tanhmã homnuj to. Ja pymaj kê mẽ kot Kris kôt amnhĩ xunhwỳr nyw xwỳnhjaja kêp pastô hkêt ně. E pastô na hte ã amnhĩ nhĩpêx anhỳr o pa kamã Jejus kwỳjê jahkre ně tanhmã mẽ ho ajuta hto ho mẽ hkôt pa Ximotre.

Mẽ kot Kris kôt hkwỳjê ho ajuta xwỳnhjê kaxyw mẽ hã kãm karõ

Atre 6.1

⁸ Nễ kot paj hpãnhã amã mẽ kot Kris kôt hkwỳjê ho ajuta xwỳnhjê jarẽ ka inhma Ximotre. Nà koja mễhõ kãm Kris kôt hkwỳjê ho ajuta hprãm hã koja ã amnhĩ nhĩpêx anhỳr o pa.

Koja mẽ htỳx ri mẽmoj tã mẽ kãm hpêr o pikênh o pa hkêt ně.

Nễ tanhmã mẽmoj to hêx to ho pa hkêt ně.

Nễ kagôxyhti japrôr ně ho pipãnh o pa hkêt ně.

Nễ amnhĩm kàxpore ho pikuprõnh ně ho rax prãm xàj tanhmã amnhĩ nhĩpêx to hkêt ně.

⁹ Nễ kê Tĩrtũm kapêr piitã hkôt hamaxpêr o pa. Ra Tĩrtũm kot mẽ pamã kapêr piitã ho amnhĩrit jakamã koja Kris kôt hkwỳjê ho ajuta xwỳnhjaja kapêr piitã hkôt hamaxpêr pê hkôt amnhĩ nhĩpêx mex rãhã ho pa.

¹⁰⁻¹³ Nễ kê mẽ amnhĩ prõ pix tãnopxar o pa.

Nễ pastô pyrã ně mẽ hkrajê jahkre mex nhũm mẽ hkôt ri amnhĩ nhĩpêx mex o pa.

Nễ kê mẽ hprõjaja mjên pyrã ně mẽ piitã mẽ noo mã tãm ri amnhĩ nhĩpêx.

Nễ hkwỳjê ho kapêr rỳ mẽ axpên jakwa kamã ri axpên mã mẽ hixi ho rêr o pa hkêt ně.

Nễ mjên pyrã ně mẽmoj punuj kutã amnhĩ to htỳx o ri pa. Nễ amnhĩ to mex rãhã ně.

E koja mễhõ kãm Kris kwỳjê ho ajuta ho pa hprãm hã koja ã amnhĩ nhĩpêx anhỳr o pa. Nom kêr ka mẽ kot mẽ ho ajuta kaxyw mẽ unhwỳr tokyx anhỳr kêt ně Ximotre. Taxy mẽ kamã ama ně aprĩ hã mẽ kot ri tanhmã amnhĩ nhĩpêx to hã mẽ omu mãn. Hãmri nhũm mẽ piitã mẽ mex ã mẽ harẽ ka mẽ hã mẽ ama ně rĩ kormã mẽ kot mẽ ho ajuta ho pa kaxyw mẽ unhwỳ. Hãmri nhũm mẽ amnhĩ tã omu ně axpên mã mex ã harẽ. Nễ amnhĩ kaxyw Jejus Kris mã hamaxpêr mex o pa hã mẽ omu ně mẽ hã hpijaam o pa.

Pawre kot Ximotre mã amnhĩ jarênh

¹⁴ Nễ inhmã awỳr inhmõr ně apumunh prãm Ximotre. Nom kot pa amnhĩ kukamã ã mẽmoj tã amã karõ ně hã kagà anẽ. ¹⁵ Kêr pa tokyx awỳr inhmõr kêt japêr ka ixte amã mẽmoj ã kagàta kamã harẽ ně ixkutêp ho mẽ ahkre ho ri apa. Mễ kot mar ně hprĩ hã mẽ õ pastô ně mẽ kot mẽ ho ajuta ho mẽ pa xwỳnhjaja kot tanhmã amnhĩ nhĩpêx to hã mẽ harênh mar kaxyw.

Mễ pahpê Kris kwỳjaja mẽ pahpê Tĩrtũm kra jakamã na pu htem kapêr kôt ri amnhĩ nhĩpêx ně pakatàt kôt mẽ piitã mẽ kãm pakapêr o papa. Jao tanhmã mẽ kãm Jejus Kris jarênh to ho ri papa.

Pawre kot Jejus mex o mex ã mẽ grer jarênh

¹⁶ Nễ Jejusja mex o mex. Amnepêm kormã mẽ pahte harênh mar kêt tã pu prem harênh ma hãmri ně mex o mex ã pagrer o papa. Nễ pagrer o:

Kris kêp Mễpahpãm tã na pre mẽ pahwỳr wrỳ ně mẽ pahpyrà ně ĩ ho ĩ ně kato.

Nhũm pre Tĩrtũm Karõja mex o mex ã harẽ.

Nhũm Tĩrtũm kapêr o mẽ wrỳk xwỳnhjaja omunh o pa.

Nhũm ahpỳnhã pika piitã hwỳr tanhmã kot mẽ panê amnhĩ nhĩpêx to hã harênhja anhgrà.

Nhũm hte mẽ hkwỳjaja harênh ma ně amnhĩ kaxyw hkôt hamaxpêr ně hkôt amnhĩ xunhwỳ.

Tã nhũm pika kamã àpênh jatur xàm kumẽ nhũm Tĩrtũm akupỹm amnhĩ wỳr ho api. Na pu htem ã Jejus mex o mex ã pagrer anẽ.

4

Mě kot Tirtüm kapër kwým ri tanhmã Kris kwýjê jahkre hto xwýnhjê jarënh
Matêwre 24.4-13; Korosê 2.16-19; Sikün Ximotre 3.1-9; Sikün Pêtre 2.1-3; Jutre 3-16

¹ Nê nhÿrmã Jejus akupÿn mẽ pahwÿr wrÿk kaxyw koja pika nhõ xwýnh kwýjaja ma hkwyjê mã tanhmã Tirtüm kapër o hêx to ho pa. Na pre Tirtüm Karõ hprÿ hã mẽ hkukamã tanhmã mẽ harënh to. Koja xep Satanasti hkwyjaja Jejus kwýjê hwÿr mra nê hêx rom tanhmã mẽ kãm kapër to. Satanasti nhÿ hã mẽ kãm hêx o pa nhùm mẽ hkwyjaja mẽ kuma nê mẽ hkõt hamaxpër nê Jejus kaga. ã koja mẽ Jejus akupÿn mẽ pahwÿr wrÿk kukamã amnhÿ nhÿpêx anê.

² Nê Satanasti nhÿ hã mẽ kãm mẽmoj to hêx xwýnhjaja ãm Satanasti pix mar o pa jakamã koja mẽ hamaxpër mex kêt nê. Koja mẽ mẽmoj punuj pumu nê htÿx mex ã hkamnhÿx. ³ Tã koja mẽ Tirtüm kapër kwým ri ã Jejus kwýjê mã hêx ho pa anê nê mẽ kãm:

—Kwa kêr ka mẽ axpën mã ri mẽ rer o apa hkêt nê. Tirtüm kãm ja prãm kêt. ãm ahte ri mẽ papaja na kãm hprãm. Anê.

Nê mẽ kot mẽmoj mex kur ã mẽ omu nê nê mẽ kãm kapër nê mẽ kãm:

—Kwa na htem ata hkur kêt nê. Tirtüm pê omnuj kênã kot ka kêt ri aku.

Anhÿr o koja mẽ kãm kapër o pa. ⁴ Nom Tirtüm na pre mẽ pamã mẽ apkur xà piitã ho kato. Mẽ paxàmnhÿx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtüm mã harê hãmri nê paxàmnhÿx kuku. ⁵ Tirtüm kot mẽ paxàpkur xà piitã mex ã harënh jakamã na pu htem kãm harënh pê paxàmnhÿx piitã hkur o papa.

Pawre kot mẽmoj tã Ximotre mã karõ
Sikün Ximotre 1.6-14; Xitre 2.1-8

⁶ E Ximotre. Ixte mẽmoj tã amã karõta kêr ka ho Kris kõt pahkwýjê jahkre mex o ri mẽ hkõt apa. Kot kaj ã mẽ ahkre anhÿr jao ra Jejus Kris mã axapënh mex nê. Na ka pre harënh ma nê hkõt amnhÿ xãm hãmri nê hkõt amnhÿ nhÿpêx mex nê. Tã kêr ka arÿ hkõt amnhÿ nhÿpêx mex rãhã kê mẽ piitã ja hã apumu.

⁷ Nê mẽ ujarënhja kot paj tanhmã amã hã karõ hto. Mẽ panhÿgêt xujarënh kamã mo Tirtüm jarënh? Amrakati kumrêx. Jakamã kêr ka mẽ hkõt ajamaxpër o ri apa hkêt nê. ãm Tirtüm kapër kõt pix mã ajamaxpër tÿx rãhã ho ri apa. Tirtüm kapërja ãm hãmri na.

⁸ Nê na htem amnhÿ karo hprãm xaj tanhmã amnhÿ karo hto ho pa. Ja mex. Tanhmã kute hkêt. Na htem tanhmã amnhÿ karo hto nê gaa nê ra hkarore nê pa. No kêt mẽ kot Tirtüm kapër kõt ri amnhÿ nhÿpêx o paja na mex o mẽ hkarota jakre. Na htem Tirtüm kapër kõt ri amnhÿ nhÿpêx hãmri nê mex nê hkÿnh nê pa ho pa. Hãmri nê nhÿrmã kaxkwa kamã Tirtüm mẽ Kra Jejus wa kuri mex nê htÿr tùm nê pa ho pa. Ja na mex o mex. ⁹ ãm hãmri ixte amã ja jarënh jakamã kwa kêr ka ja hã anohtÿx nê ri ho apa Ximotre.

¹⁰ Nê Tirtümja rãhã ho rãhã. Tã na pu pre amnhÿ kaxyw Kra Jejus kõt pajamaxpër nê hkõt amnhÿ xãm nhùm Tirtüm pahto hkra. Kãm mẽ piitã mẽ ho hkra hprãm jakamã na htem pahpyrà nê amnhÿ kaxyw Kra hkõt hamaxpër nê hkõt amnhÿ xunhwÿ nhùm amnhÿ tã mẽ omunh xà hkõt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhÿ nhÿpêx to hã harënh rãhã o ri mẽ hkõt papa. Jao Tirtüm mã paxapënh mex nê.

¹¹ E kêr ka ã ja ho pahkwýjê jahkre anhÿr ho ri mẽ hkõt apa. Mẽ kot amar nê akapër kõt amnhÿ nhÿpêx mex ho pa kaxyw.

¹² Nê kormã anyw tã kêr ka mẽ piitã mẽ noo mã tãm ri akapër nê tãm amnhÿ nhÿpêx o apa. Mẽ kot Jejus ã tanhmã ato htã arÿ amnhÿ kaxyw kãm ajamaxpër tÿx nê. Nê mẽ piitã mẽ kutã anojarêt nê ajamaxpër mex pix o ri apa. Kot kaj kormã anyw tã ã mẽ noo mã amnhÿ nhÿpêx anê nhùm mẽ hã apumu nê kãm akapër mar prãm nê. Anyw ã apumunh tã kãm akapër mar prãm nê.

¹³ Nê kêr ka mē ate Tirtūm kapēr mar kaxyw axpēn wūr akuprō ka arī ixkutēp mē kām Tirtūm kapēr tūm ã kagà kamā akapēr rāhā ho apa. Nē aprī hā tanhmā ho mē ahkre hto nē ho mē ahkre mex nē Ximotre.

¹⁴⁻¹⁵ E kêr ka ã amnhī nhīpêx anhūr o ri mē hkôt apa nē amā ho anhūr kaga hkêt nē. Mē piitā mē kot ate Jejus mā amnhī nhīpêx mex o amōr ã apumunh kaxyw. Kormā ate mē kām Jejus jarēnh o apa hkêt ri na pre pastō nhỹ hā mē kapēr xwýnhjaja ate Jejus mā tanhmā amnhī nhīpêx to ho apa kaxyw axām. Hāmri nē anhīmōk ã mē ìhkra jaxwý nē axàpēnh kukamā tanhmā ajarēnh to nē ato Tirtūm wý. Hāmri nhūm ate mē kām kapēr jarēnh o ri apa kaxyw amā ajamaxpēr o hihtýx. Tā kêr ka ý hā ã kām amnhī nhīpêx anhūr rāhā ho ri apa.

¹⁶ Nē kwa kêr ka amnhī pumunh mex nē Ximotre. Jao tām ri amnhī nhīpêx nē akatāt kôt Tirtūm kapēr o mē ahkre ho ri mē hkôt apa. Kot kaj ã amnhī nhīpêx anē hāmri nhūm mē ama nē apyrà nē Jejus kôt amnhī xunhwý. Hāmri nē pahpyrà nē nhýrmā Tirtūm wa kuri htír tūm nē pa ho pa.

5

Tanhmā mē pahte Kris kôt mē pahkwýjê nhīpêx to kaxyw mē pamā karō

Sikūn Ximotre 2.24-25

¹⁻² E kot paj hpānhā Kris kôt pahkwýjê hō kot tanhmā amnhī tomnuj to nhūm ate tanhmā ja nē kām akapēr to hā amā karō.

Nà koja mēhō tanhmā ri amnhī tomnuj to ka harēnh ma hāmri nē ma hwýr tē nē ja nē tanhmā kām akapēr to. Nom kêr ka kām akapēr mā agêt kêt nē.

Koja mēwejjê ò tanhmā amnhī tomnuj to ka te kēp anhīpêxà rý akatorxà pyrāk o kām akapēr. Jao hā apijaàm o tanhmā kām akapēr to.

Rý koja apyrà nē mē nywýjê hō tanhmā amnhī tomnuj to ka te kēp atō pyrāk o kām akapēr. Rý mēnijê nyw ò amnhī tomnuj japêr ka te kēp atōx pyrāk o kām akapēr. Jao hā apijaàm o kot amnhī tomnujja nē tanhmā kām akapēr to.

E kêr ka mē kot amnhī tomnuj nē ã mē pahkwýjê mā akapēr anhūr o apa Ximotre.

Mē kēp mē mjên htyk xwýnhjê jarēnh

Xiakre 1.27

³ Nē kot paj hpānhā Kris kôt pahkwý pē mē mjên htyk xwýnhjê jarē. Nà koja mēhō nija hkra hkêt nē htàmnhwý hkêt nē pa nhūm mjên kēp ty ka mē apê Kris kôt hkwyjaja ja hā omu nē mēmoj to kutā anojarêt rāhā ho ri apa. ⁴ Nom koja ra hkra rý ra htàmnhwý japêr kê mē tāmjaja tanhmā ho ajuta hto ho pa. Kām ò nē kām mēmoj nhōr o pa. Kormā mēhprīre ri na pre mē ò wōwō nē mē katorxà nē mē hipêxà mē hamār mex pē mē kām ò ho pa. Tā ra mē àptār jakamā kê mē amnhī pyrà nē mē hamār mex pē mēmoj to mē kutā nojarêt rāhā ho pa. Ja na Tirtūm kām hprām. ã mē kot hkwyjê kamā ukapri ho pa jakamā te mē kot Tirtūm mā àpēnh pyrāk.

⁵ No koja mēhō ni ra wejre nē ahte ri pa. Nē hkra nē htàmnhwý hkêt nē ri pa. Tā kê ja hā amnhī pumu nē Tirtūm kamnār rom amnhī to hwýr o pa. Nē mē piitā mē ho hwýr o pa. Jao tām hamaxpēr. Ka mē apê Kris kôt hkwyjaja ja hā omu hāmri nē mē kam nē tanhmā kutā anojarêt to ho ri apa. ⁶ No koja mē ã amnhī nhīpêx anhūr kêt nē. Nē htýx ri mē grer wūr mra nē hpijaàm kêt o ri mra ka mē ja hā mē omu nē mē ho ajuta hkêt nē. Na htem ã amnhī nhīpêx anhūr o pa nē arī htír tā te ra htyk nē hikwý pyrāk.

⁷ E kêr ka ã ja hā Kris kôt pahkwýjê mā karō anē. Kê mē ama nē ã mē mjên htyk xwýnhjê nhīpêx anhūr o pa. ⁸ Nom koja mēhō amnhī kwýjê ho mex kêt japêr. Nē òrkwy kamā hprō nē hkrajaja nē hipêxà nē katorxà nhūm mē kām mē apkur xà nhōr kêt japêr. Koja mē ã amnhī nhīpêx anhūr jao Jejus kaga nē te mē kot hkôt amnhī xunhwýr kêt xwýnhjaja kot amnhī nhīpêx pyrāk o amnhī nhīpêx nom amnhī tomnuj týx o mē hakre.

⁹ Nē mē mjên htyk nē mē hkra nē mē htàmnhwý hkêt xwýnhjaja kêr ka mē tanhmā mē ho ajuta hto kaxyw hāmri nē mē hixi piitā hā kagà. Nom kwa kêr ka aprī hā tanhmā mē amnhī nhīpêx to hā mē omu nē rī kormā mē hixi hā kagà.

Koja mēhō kormā mjên htír ri tām hipêx nē nhām mēmyjê ho amnhikati hkêt nē.
Nē ra hã amgrà pê 60 rý ra hã 60 jakre.

¹⁰⁻¹¹ Nē tām mē piitã mē hipêx o pa.

Nē hkrajaja kormã htír ri nhũm mē hamãr mex nē mē ahkre mex o pa.

Nē nhām krī hō nhō xwýnhjaja õ krī hwýr pøj nhũm mē omu nē amnhĩ nhõrkwý hwýr mē kuwý.

Nē mē kēp amrakati xwýnhjê ho mex o pa.

Koja mē ã amnhĩ nhĩpêx anê ka ja hã mē omu nē rĩ kormã mē ho ajuta kaxyw mē hixi hã kagà. Nom mē hixi hã kagà kaxyw nē mēmoj tã mē hkukja nē mē kãm:

—E kot kaj ã amnhĩ nhĩpêx anhýr o apa hã inhmã amnhĩ jarê pa ama nē rĩ kormã anhixi hã kagà.

Kot kaj axte amjên kêt nē.

Nē tanhmã Kris kôt akwýjê ho mex to ho ri apa.

Nhũm mēhō mēmo myrapê hkaprĩ nē pa ka ja hã omu nē tanhmã ho ajuta hto.

E kot kaj ã amnhĩ nhĩpêx anhýr o apa hã amnhĩ jarê pa ama nē anhixi hã kagà. Hãmri nhũm Kris kôt akwýjaja amã axàpkur xà nhõr o pa. Anê.

Ã mē kãm akapêr anê nhũm mē ama nē amã:

—ÿ. Ma kot paj ã amnhĩ nhĩpêx anê.

Anhýr ã amnhĩ jarê ka mē ama nē mē hixi hã kagà. No kormã mē hã amgrà pê 60 kêt xwýnhjaja kêr ka kormã mē hixi hã kagà hkêt nē. Koja mē tanhmã mē kot amnhĩ nhĩpêx to ho pa hã mē kãm karõja ma nē wam tajê pyrã nē amã:

—ÿ. Ma kot paj ã amnhĩ nhĩpêx anê. Na pa Jejus Kris noo mã ã amnhĩ jarênh anê.

Anhýr ã amnhĩ jarênh tã gaa nē ra hkurê hapøj nē ra kot amnhĩ jarênhhta kwým ri tanhmã amnhĩ nhĩpêx to nē axte mjên. ¹² Ra amnhĩ jarênh o:

—Ma kot paj ãm Jejus mã pix mã tanhmã amnhĩ nhĩpêx to ho ri ixpa nē axte inhmjên kêt nē.

Anhýr tã tanhmã hamaxpêr to nē kot amnhĩ jarênh kwým ri axte mjên. Jao te Jejus mã amnhĩ to hêx pyrãk nhũm Tirtũm pê jamnuj. Ja pymaj kêr ka mē kormã mē hã amgrà pê 60 kêt xwýnhjê nhixi hã kagà hkêt nē. Kormã mē hã amgrà pê 60 kêt xwýnhjaja arĩ mē hkĩnh tỳx ¹³ jakamã kot kaj mē kãm mē apkur xà nhõr o apa nhũm mē ja hã amnhĩ tã mē apumu nē axte amnhĩm àpênh kêt nē. ãm kãm kaga nē htỳx ri nhãm mē hwýr mra nē nhãm mē hwýr mra. Nē amnhĩ pumunh mex kêt nē htỳx ri axpên jakwa kamã ri mē hixi ho rêr o pa. Nē nhýri mēmoj pumu rý tanhmã mēmoj jarênh mar to hãmri nē ma htỳx ri hkwyjê mã harênh o mra. Koja mē ã amnhĩ nhĩpêx anhýr o pa hãmri nhũm mē kēp Kris kwý hkêt xwýnhjaja ja hã mē omu nē mē hkôt mē pahpê Kris kôt pahkwýjê ho kapêr punuj nē. ¹⁴ ã mē kot amnhĩ nhĩpêx anhýr o pa pymaj kêr ka kormã mē nyw xwýnhjê mã anê kê mē mãmrĩ axte mjên nē o pa. Hãmri nē hkra nē hkrajê jamãr o pa. Ja na inhmã hprãm. Koja mē ã amnhĩ nhĩpêx anê hãmri nhũm mē kēp Kris kôt pahkwý hkêt xwýnhjaja mē hkôt tanhmã mē pahto kapêr punuj to hkêt nē. ¹⁵ Mã ka ra Kris kôt pahkwýjê nyw pê mē mjên htyk xwýnh kwýjaja tanhmã amnhĩ tomnuj to hã mē harênh ma. Na prem Jejus kaga nē Satanasti hkôt amnhĩ nhĩpêx o pa.

¹⁶ E kêr ka mē ã Kris kwý pê mjên htyk xwýnhjê nhĩpêx o apa anê Ximotre. Nom koja mē akwý kamã mēhō nhõ wôwô mjên rý katorxà mjên kēp ty kê tãm kãm õ ho pa. Kêr kê Kris kôt pahkwýjaja ãm mē kēp mē mjên htyk xwýnh pê mē hkra nē mē htãmnhwý hkêt nē ahte ri mē pa xwýnh pixjaja tanhmã mē ho ajuta hto ho pa.

Mē pahpê Kris kôt pahkwýjê hkrãhtũm kaxyw mē pahtã kãm karõ

Atre 14.23; Wam Korĩt 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷⁻¹⁸ Nē kot paj hpãnhã amã Kris kôt mē pahkrãhtũmjê jarê. Tirtũm kapêr ã kagà htũm kot mē harênh kot:

Kêr ka Tirtũm kapêr o mē ajahkre xwýnhjaja mē ahkre pãnhã mē kãm amnhĩre. Anê.

Nē mããnen mē harênh ã kuxi nē mē harênh o:

Koja akrit amã àpênh o pa ka ho mex nē kãm õ mex o apa. Anê.

Ã ja jarēnh kot anhyr jakamã koja Kris kôt mẽ akrãhtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tĩrtũm kapēr o mẽ ajahkre mex jakamã ka mẽ amnhĩ tã kãm amnhĩrer mex nẽ.

¹⁹ Nẽ koja mēhõ pixi nẽ mẽ awyr tẽ nẽ amã Kris kôt mẽ akrãhtũm kot tanhmã amnhĩ tomnuj to hã harēnh to ka ama nẽ ãm ama. Nom koja wa hamēxkrut rỳ mẽ axkrunēpxi nẽ mẽ awyr mra nẽ axpēn kôt tanhmã harēnh to ka mẽ ama nẽ ãm hãmri mẽ kot tanhmã kot amnhĩ tomnuj tota kôt ajamaxpēr. ²⁰ Hãmri nẽ Kris kwỳjê piitã mẽ noo mã kot amnhĩ tomnuj xwỳnhhta mã tanhmã kot amnhĩ tomnuj to nẽ kãm akapēr kê axte ã amnhĩ nhĩpêx anhyr kêt nẽ. Mẽ piitã mẽ kot hã amar nẽ nhỹrmã tanhmã amnhĩ tomnuj to nhũm ate urak nẽ hã tanhmã mẽ kãm axàkjêr to pymaj tanhmã amnhĩ tomnuj to hkêt nẽ.

²¹ E Tĩrtũm noo mã na pa ã amã mẽ kaxyw mẽmoj tã karõ anẽ Ximotre. Nẽ Jejus Kris mẽ Tĩrtũm kapēr o mẽ wryk xwỳnhjê noo mã pa ã amã karõ anẽ. Jakamã kêr ka inhmar tỳx nẽ hkôt amnhĩ nhĩpêx o ri apa. Jao mẽ piitã mẽ hipêx o axpēn pyrak. Nom kêr ka akrãmnhwỳ kot tanhmã amnhĩ tomnuj to hã omu nẽ axtem nẽ ãm omu nẽ ajamaxpēr o: —Nà kêp ixkrãmnhwỳ kênã kot paj kêt ja nẽ tanhmã kãm ixkapēr to. Pa ho anhyr kêt nẽ.

Anhyr o ajamaxpēr kêt nẽ. Mẽ piitã mẽ hipêx o axpēn pyrak.

²² Nẽ kêr ka anojarêt kãm mẽ kot Tĩrtũm mã tanhmã amnhĩ nhĩpêx to ho mẽ pa kaxyw mẽ unhwyr kêt nẽ. Aprĩ hã tanhmã mẽ kot amnhĩ nhĩpêx ã hã mẽ omu nẽ mẽ hkapi nẽ rĩ kormã mẽ unhwyr rỳ tee ri mẽmoj tã mẽ omu nẽ mẽ hkaga.

Nẽ koja mēhõ tanhmã amnhĩ tomnuj to ka ja hã omu rỳ harēnh ma hãmri nẽ urak nẽ ã amnhĩ nhĩpêx anhyr kêt nẽ. Arĩ Tĩrtũm kôt amnhĩ nhĩpêx pẽ tãm ri amnhĩ nhĩpêx pix o apa. ²³⁻²⁵ Na htem tōhã tanhmã amnhĩ tomnuj to nhũm mēhõ ja hã mẽ omu nẽ mẽ harēnh kurê kumrêx. Kris kôt mẽ hkrãhtũm kormã kot tanhmã hã kãm nẽ hkêt ri nhũm mẽ ja hã mẽ omu nẽ tanhmã mẽ harēnh to. Nom na htem tōhã hpimxur pẽ tanhmã amnhĩ tomnuj to nhũm Tĩrtũm pix ja hã mẽ omu. Tã koja nhỹrmã mẽ piitã mẽ kãm ja ho amnhĩrit nhũm mẽ piitã harēnh ma nẽ hkôt omu.

Nẽ mẽ kot amnhĩ to mex xwỳnhjaja haxwỳja. Na htem tōhã mẽ noo mã tanhmã mēhõ ho mex to nhũm hkwỳjaja ja hã omu nẽ axpēn mã mex ã mẽ harẽ. Nẽ tōhã hpimxur pẽ tanhmã mēhõ ho mex to nhũm mēhõ ja hã omunh kêt nẽ. ãm Tĩrtũm pix ã kot amnhĩ nhĩpêx anhyr ã omu. Tã koja nhỹrmã mẽ piitã mẽ kãm ja ho amnhĩrit nhũm mẽ piitã harēnh ma nẽ hkôt omu.

Nẽ kwa Ximotre. Axà nẽ anhõhymnuj nẽ ri apa jakamã kwa kêr ka gõ pix o akõm o apa hkêt nẽ. Mããnēn wĩhti hkwy ho ixkõ kêr ka anhõhy mex japêr.

6

Mẽ kãm mẽ àpēnh xwỳnhjê kaxyw mẽ hã kãm karõ

Epes 6.5-9; Korosẽ 3.22-4.1; Xitre 2.9-10; Wam Pêtre 2.18-25

¹ E kot paj mẽ akwỳjaja mẽ kãm mẽ àpēnh o mẽ pa xwỳnhjê kaxyw mẽmoj tã amã karõ. Mẽ kãm anẽ kê mẽ õ patrãw ã hpijaam o ri pa. Jao mẽ kapēr ma nẽ hkôt kãm àpēnh mex nẽ. Koja mẽ ã amnhĩ nhĩpêx anẽ nhũm amnhĩ tã mẽ omu nẽ hamaxpēr o:

—Kwa pēr Tĩrtũm kapēr na mex kumrêx. Inhmã àpēnh xwỳnhja na hte hkôt amnhĩ nhĩpêx pẽ amnhĩ to mex o pa. Pēr ãm hãmri na hte Pawre ho mẽ ahkre ho pa.

Anhyr o hamaxpēr. ² Nẽ koja mẽ õ patrãw ra Kris kôt amnhĩ xãm japêr ka kãm mẽ àpēnh xwỳnhjê mã anẽ kê Kris kôt mẽ kêp mẽ htõ hã mẽ kãm àpēnh mex o ri pa. Nom kê mẽ urak nẽ kêp Kris kôt hkwy hã mẽ omu nẽ hamaxpēr o:

—Nà Kris kôt ixtõ kênã kot paj kêt ri kapēr kôt amnhĩ nhĩpêx nẽ kãm ixàpēnh mex o ri ixa.

Anhyr o hamaxpēr kêt nẽ. Kê kêp Kris kôt htõ hã kãm ho mex prãm xaj kãm àpēnh mex o pa.

E kêr ka mẽ kãm mẽ àpēnh o mẽ pa xwỳnhjê mã ã tanhmã mẽ àpēnh to ho pa hã karõ anẽ Ximotre.

Tirtüm kapër kwým ri mẽ ahkre xwýnhjê jarênh

Rukre 12.13-21; Xiakre 5.1-6

³ Nê na hte Kris kwý hkêt xwýnh kwýjaja Kris kwýjê mã Tirtüm kapër o hêx o pa. Nê htýx ri Jejus kapër kwým ri tanhmã harênh to ho pa. ãm hãmri na Tirtüm mẽ Pahihti Jejus Kris wa kapër tã nhũm htem htýx ri tanhmã ho hêx to ho ri mẽ hkôt pa. ⁴ Mẽ kot amnhĩ to rũnh xwýnh ã amnhĩ to jarkrar tã mẽ àhpumunh týx kêt. Na htem tanhmã Tirtüm kapër kute hã axpên mã akir nê mẽmoj tã axpên kãm gryk o pa. Nê axpên mã kapër punuj nê mẽmoj tã axpên kamnhĩx o pa. ⁵ Nê hamaxpër mex kêt jakamã mẽmoj tã axpên mã àkjêr pix o pa. Na htem ã amnhĩ nhĩpêx anhýr o Tirtüm kapër mar týx kêt nê. Hãmri nê htýx ri hamaxpër nê hamaxpër o:

—Kot paj Tirtüm kapër o mẽ ahkre ho ixpa nhũm mẽ inhma nê inhmã amnhĩrer mex nê pa ixkàxpore rax nê ri ixpa. Nà kot paj ã amnhĩ nhĩpêx anhýr o ri ixpa. Ja inhmã mex. Anhýrja o kãm hikàxpore rũnh prãm o amnhĩ to amnhĩrit o pa.

Kàxpore jarênh

⁶⁻⁸ E kot paj hpãnhã amã tanhmã kàxpore jarênh to ka inhma Ximotre. Xà na pu htem pakatorxã nhõhy rũm pajapôj nê amnhĩ kôt kàxpore hkwy jamý nê ho pajapôj? Nà na pu htem pahkênh nê panhý kamã pajapôj. Tã kot puj mẽ ja pyrã nê nhýrmã ty nê mã ho anê nê panhý kamã ma papa. Jakamã kêr pu mẽ kormã pika ja kamã pahťir nê papa ri paxàpkur xà nê mẽ paxê pix tãnopxar pê pahkĩnh nê ri papa. Pakàxpore rũnh kêt tã na pu htem Tirtüm kamnàr rom pahkĩnh nê pajamakêtkati nê papa. Jao pajamaxpër o:

—Nà ixkàxpore rax kêt nê ixkukrêx rax kêt tã na hte Jejus ixkôt pa ho pa nê mẽmoj to ixkutã nojarêr rãhã ho pa. Jakamã ixkàxpore rax kêt tã ixkĩnh nê ijamakêtkati nê ixamnhĩx ixpa.

Anhýr o pajamaxpër o papa.

⁹⁻¹⁰ Mẽ kot amnhĩm kàxpore o pikuprõnh rũnh xwýnhjaja na htem kàxpore pix kukamã hamaxpër o pa nê gaa nê kàxpore rũnh gryk ã amnhĩ tomnuj o pa. Na pre mẽ pahkwýjaja kàxpore rũnh prãm xàj Jejus kaga. Tã ra mẽ hikàxpore rũnh tã hkĩnh nê hamakêtkati nê pa hkêt nê. Na htem omnuj nê hkaprĩ nê pa. ã na htem mẽ hikàxpore rũnh xwýnh kwýjaja amnhĩ nhĩpêx anhýr o pa. Jao kàxpore pix kukamã hamaxpër nê gaa nê ra gryk ã mẽ kot amnhĩ to mex xà kaga hpa nê htýx ri tanhmã amnhĩ tomnuj to ho pa. Nê tanhmã hkwyjê nhĩpêx punuj to. Te tutre kot harôj xành ã htýx rapuuti hwýr gjêx nê tee ri kãm kator prãm kaprý pyrãk. ã mẽ kot amnhĩ nhĩpêx anhýr o pa jakamã koja nhýrmã Tirtüm ma mẽ kot amnhĩ xà htýx kamã hamak tũm xà hwýr mẽ kurê.

Pawre kot Ximotre mã mẽmoj tã karõ

Korosê 4.17; Wam Ximotre 4.14; Sikũn Ximotre 2.1-7

¹¹ Nê kwa Ximotre kêr ka mẽ urak nê kàxpore rax prãm xàj amnhĩ tomnuj o apa hkêt nê. Ate Tirtüm mã tanhmã amnhĩ nhĩpêx to ho apa xwýnh jakamã kêr ka kãm hprãm xà hkôt pix mã amnhĩ nhĩpêx o ri apa. Jao Tirtüm pyrã nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwyjê hkĩnh pê mẽmoj to mẽ kutã anojarêr o ri apa. Nê Kris kôt mẽ hkwy hkêt xwýnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex o ri mẽ hkôt apa. ¹² Na ka pre Kris kôt mẽ pahkwýjê noo mã tanhmã amnhĩ jarênh to. Tirtüm kot amnhĩ wýr awýr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêr ka arĩ Jejus kôt amnhĩ nhĩpêx mex rãhã ho ri apa. Hãmri nê nhýrmã Tirtüm mẽ Kra wa kuri amex kumrêx nê atĩr tũm nê apa ho apa.

¹³⁻¹⁴ E na pa mẽmoj tã amã karõ rax ka piitã kamã harê nê mar pa. Tã kêr ka inhmã ja hã tanhmã amnhĩ jarênh to. Mẽmoj piitã ho htĩr xwýnh Tirtüm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwýnhhta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupýn mẽ pahwýr wrý. ãm hãmri na pa ã amã amnhĩ jarênh anê Pawre.

Anhÿr o inhmã amnhĩ jarẽ.

Tĩrtũm mex o mex ã mẽ grer

¹⁵ Nẽ koja Tĩrtũm akupÿn mẽ pahwÿr Jejus mẽnh xà hã arĩgro jarẽ hãmri nhũm kot harẽnh xàta wÿr pøj nhũm akupÿn mẽ pahwÿr kumẽ. Tĩrtũmja mex o mex. Tapxipix kęp mẽmoj piitã ho amnhĩptàr xwÿnh maati. Nẽ kęp jar mẽ ho amnhĩptàr xwÿnh piitã mẽ õ Pahi Maati.

¹⁶ Nẽ tapxipix na rãhã ho rãhã nẽ mex o mex jakamã puhã hirã rax kumrẽx. Tã hkĩnhã mẽ pahte amnhĩ tomnuj xwÿnh jakamã kot puj mẽ puhã hirã raxja kutã hkêt nẽ. Jao hwÿr mẽ pamrar kêt nẽ.

Nẽ aa mẽhõ kot no ho Tĩrtũm pumunh kêt tã kwa kęp pu mẽ pahpiitã kãm mex o mex nẽ hihtÿx o hihtÿx ã harẽnh rãhã ho papa.

Axe mẽ hikàxpore rũnh xwÿnhjê jarẽnh

Rukre 16.9

¹⁷ Nẽ kęp ka Kris kwÿjê kamã mẽ hikàxpore rũnh xwÿnhjê mã anẽ kęp mẽ kot amnhĩ to rũnh kôt amnhĩ to àmra ho pa hkêt nẽ. Nẽ amnhĩ kaxyw mẽ hikàxpore rũnh kôt hamaxpër o pa hkêt nẽ. Kàxpore na hte hapêx tokyx anẽ. Mẽ kãm anẽ kęp mẽ hpãnhã amnhĩ kaxyw Tĩrtũm kôt mãn hamaxpër tÿx rãhã ho pa. Na hte àmnhĩx tanhmã mẽ pahto mex to ho pa nẽ mẽ pahpê õxÿ hkêt nẽ. Jao mẽ pahwÿr na rẽ nhũm mẽ pahpur go mex nẽ pu mẽ kamã panhõ rũnh o papa. Nẽ mẽ pamã myyti ho hirã pu mẽ kukwak ri parĩt mex pẽ mẽmoj tã paxàpênh o papa. ã Tĩrtũm kot mẽ pahto mex kot anhÿr pu mẽ kukwak ri pahkĩnh nẽ pajamakêtkati nẽ ri papa. Tã kęp ka mẽ hikàxpore rũnh xwÿnhjê mã anẽ kęp mẽ amnhĩ kaxyw kumã pix mã mãn hamaxpër rãhã ho pa. ¹⁸ Nẽ mẽ kãm anẽ kęp mẽ hikàxpore ho hkwÿjê pẽ õxÿ hkêt nẽ ho tanhmã mẽ ho mex to ho pa. Nẽ àmnhĩx ho tanhmã mẽ kęp amrakati xwÿnhjê ho ajuta hto ho pa. ¹⁹ Koja mẽ ã amnhĩ nhĩpêx anẽ nhũm Tĩrtũm ja hã mẽ omu nẽ hkĩnh nẽ õ krĩ kamã mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nẽ pa ri mex nẽ pa nẽ mããnen nhÿrmã kaxkwa kamã mex kumrẽx o jar pika ja kamã mex nẽ pata jakre. E kęp ka ã mẽ hikàxpore rũnh xwÿnhjê mã ja hã karõ anẽ Ximotre.

Pawre kot Ximotre mã mẽmoj tã karõ jatur xà

Korosẽ 4.17; Wam Ximotre 6.14; Sikũn Ximotre 1.13, 4.5

²⁰ Nẽ ra Tĩrtũm kot ate kapër o mẽ ahkre ho apa kaxyw axãm jakamã kęp ka tãm amnhĩ nhĩpêx pẽ mẽ ahkre mex rãhã ho ri apa. Jao Tĩrtũm kapër o hêx o ri mẽ ahkre xwÿnhjê hkôt apa hkêt nẽ. Na htem mẽ kuma nẽ mẽ kapër mex ã mẽ hkamnhĩx nom mẽ kapër mex kêt. Jakamã kwa kęp ka mẽ kot tanhmã mẽ ahkre hto hã mẽ ama nẽ ãm mẽ ama. ²¹ Na pre ra mẽ pahkwÿjaja mẽ kuma nẽ mẽ kapër gryk ã Jejus kaga.

E ãm ja pix. Kęp Tĩrtũm mẽ apiitã mẽ akutã nojarêt rãhã ho pa. Ixpê Pawre na pa ã amã ixkapër ã kagà anẽ.

Sikũn Ximotre

Pawre kot Ximotre hwyr wam kagà nẽ mẽn̄h kõt hõ mẽn̄h

Pawre na pre kagàja nhĩpêx. Na pre Jejus kwỳ hkêt xwỳnhjaja Jejus ã unê nẽ krĩ pẽ Rõm kamã haxà nhũm arĩ hkrĩ ho hkrĩ. Tã ra mẽ kot hpĩr kaxyw nhũm Ximotre mã kagàja nhĩpêx nẽ hwyr kumẽ. Na pre Ximotre Pawre hkõt pa ho pa hã mytwrỳ xohtô nẽ. Tã hpãnhã krĩ pẽ Epes kamã arĩk nẽ Tĩrtũm kapẽr o Jejus kõt hkwỳjê jahkre ho ri mẽ hkõt pa. Jakamã nhũm Pawre kagàja nhĩpêx nẽ kamã kãm mẽmoj tã karõ nẽ hwyr kumẽ. Nẽ nhỹrmã mẽ kot Pawre pyrã nẽ Jejus ã hpĩr mã htã tee ri amnhĩ kukamã hamaxpẽr kêt ã kãm karõ.

Nẽ mẽ hkwỳjaja kęp Tĩrtũm kra hã amnhĩ jarẽn̄h tã nhũm Pawre Tĩrtũm kãm hprãm xà kuhpa hã mẽ kot tanhmã amnhĩ nhĩpêx to ho pa hã Ximotre mã mẽ harẽ. Kot mẽ harẽn̄h mar nẽ Jejus kwỳjê nẽ mẽ omunh mex o pa kaxyw. Nẽ Ximotre kot Tĩrtũm kãm hprãm xà kot pix mã amnhĩ nhĩpêx o pa hã kãm karõ. ã na pre Pawreja Ximotre mã mẽmoj tã karõ kamã hihtỳx nẽ hã kagà nẽ hwyr mẽn̄h anẽ. Nẽ kãm:

¹ Pa Ximotre? Xà amex? Ixpê Pawre na pa amã ixkapẽr nẽ hã kagà nẽ awyr kumẽ. Ixpê Jejus nhỹ hã hkwỳjê jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mẽ pahpê hkwỳjaja nhỹrmã kukwak ri pamex kumrẽx nẽ pahĩr tũm nẽ ri papa ho papa.

Pawre kot Ximotre ho Tĩrtũm mẽ Jejus wa hwyr ã harẽn̄h

Atre 16.1-2

²⁻³ Te apê ixkra pyrãk Ximotre. Jakamã na pa hte ato Mẽpanhĩpêxã maati Tĩrtũm mẽ Pahihti Jejus Kris wa hwyr rãhã ho ri ixpa. Na pa hte mẽ pakukamã mẽ panhĩgêt pyrã nẽ tãm ijamaxpẽr o ixpa pẽ Tĩrtũm mã tanhmã amnhĩ nhĩpêx to ho ri ixpa. Jakamã na pa hte ato Kra Jejus mẽ wa hwyr rãhã ho ri ixpa. Arĩgro hã nẽ kamãt kãm amã ijamaxpẽr nẽ ato wa kuwỳ nẽ wa kãm:

—Pa Tĩrtũm mẽ Pahihti wa. E ixte ixkra puro Ximotre ho war awyr kaxyw war amã ijamaxpẽr. Na ka hte wa ho mex nhũm war akõt amnhĩ nhĩpêx mex o pa. Te õ wõwõ mẽ katorxã wa kot amnhĩ nhĩpêx pyrãk. Na pa hte kot amnhĩ nhĩpêx o paja mã ijamaxpẽr nẽ ÿ hã ixkĩnh nẽ. War ate kamã axukapĩrĩ ho ri apa kaxyw na pa ho war awỳ. War ate kutã war anojarêt rãhã ho ri war apa nhũm hamakêtkati nẽ àmnhĩx ri pa ho pa kaxyw. Anẽ.

Pawre kot Ximotre nhỹ hã hkĩnh ã harẽn̄h

⁴ Nẽ na ka pre hte ixkõt ixto ajuta ho ri ixkõt apa htã pa pre nhỹhỹm inhnojarêt nẽ axtem axapên̄h õ hã amã karõ hãmri nẽ Epes kamã are nẽ ma mõ. Ka amã ijapê xaj tee ri ma inhmõr ã ixpumu nẽ amỳr rax nẽ. Na pa hte arĩ ja hã inhnohtỳx nẽ ri ho ixpa Ximotre. Jao ra ato ama nẽ. Tã kot puj nhỹrmã axte axpên̄ pumu nẽ pahkĩnh tỳx nẽ.

⁵ Nẽ na pa hte akatorxã Enĩtre mẽ anhõ wõwõre Rojti wa kãm ijamaxpẽr rãhã ho ri ixpa. Na pre wa kumrẽx amnhĩ kaxyw Jejus kõt hamaxpẽr nẽ hkõt amnhĩ xãm. Tã ka wa hkanrẽhã wa urak nẽ ã amnhĩ nhĩpêx anẽ. Ixte ja hã apumunh mex. ⁶ Na pa pre ate tanhmã Jejus mã amnhĩ nhĩpêx to ho ri apa kaxyw axãm kaxyw anhĩmõk ã inhĩhkra xi nẽ ato Tĩrtũm wỳ. Kot tanhmã akrã hto nhũm ate Karõ nhỹ hã tanhmã amnhĩ nhĩpêx to ho apa kaxyw. Tã kêt ka arĩ ã kãm amnhĩ nhĩpêx anhỹr rãhã ho ri apa. ⁷ Na pu htem Tĩrtũm Karõ nhỹ hã pamã ma ho papa hkêt nẽ. Na pu htem ÿ hã pamã mẽ piitã mẽ hkĩnh pẽ paxãmnhĩx tanhmã mẽ ho ajuta hto ho papa. Nẽ ÿ hã kapẽr o mẽ ahkre htỳx o ri mẽ hkõt papa. Nẽ mẽmoj punuj kutã amnhĩ to htỳx rãhã nẽ. Jao amnhĩ to mex pix nẽ.

⁸ Jakamã kwa kêt ka amã mẽ kãm Jejus jarẽn̄h o apa pymaj tee ri amnhĩ kukamã ajamaxpẽr kêt nẽ. Nẽ mẽ kot Jejus ã ijaxar nhũm arĩ ixkrĩ hã ijarẽn̄h ma nẽ mẽ kot ixkuxwar ajaxar pymaj mẽ kãm Tĩrtũm kapẽr o mẽ ahkre hkukamã tee ri ajamaxpẽr kêt nẽ. Mẽ kot ã anhĩpêx anhỹr mã tã kêt ka amnhĩ kamã akahak kêt nẽ. ãm Tĩrtũm nhỹ hã

hihtyx xà ho amnhĩ to htỳx nẽ ixpyrà nẽ ma mẽ kãm Jejus kot mẽ panê tanhmã amnhĩ nhĩpêx to hã harênh to rãhã ho ri mẽ hkôt apa. Mẽ kot tanhmã hã anhiĩpêx to htãã. ⁹ Na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nẽ Jejus kukwak ri amnhĩ katut kôt mẽ pahte amnhĩ tomnuj piitã rênh pa nẽ mẽ pahto hkra. Hãmri nẽ mẽ pahte hkôt pix mã amnhĩ nhĩpêx o papa kaxyw mẽ paxunhwỳ. Âm Jejus pix kukwak ri na hte mẽ pahto hkra nẽ ã mẽmoj to mẽ pakutã nojarêr rãhã ho pa anẽ. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nẽ. Amnepêm kormã mẽmoj piitã hkêt ri na pre mẽ pakukamã hamaxpêr o:

—Koja mẽ nhỹrmã Ixkra Jejus Kris kôt amnhĩ xunhwỳ pa ja hã mẽ omu nẽ Ixkra kukwak ri mẽ ho mex nẽ. Anẽ.

¹⁰ Tã kormã mẽ pahte amnhĩ tã ã kot mẽ pajarênh anhỹrja mar kêt jakamã na pre Jejus mẽ pahwỳr wrỳ nẽ tanhmã mẽ pahto mex to. Na pre ty nhũm Tĩrtũm akupỹm ho htĩr. Jakamã na pu htem ra amnhĩ kaxyw hkôt pajamaxpêr nẽ hkôt amnhĩ xunhwỳ hãmri nẽ nhỹrmã mẽ pahtyk tã nhũm Tĩrtũm kot Kra Jejus nhĩpêx pyrà nẽ akupỹm mẽ pahto mẽ pahtĩr pu mẽ Jejus kukwak ri wa kuri pamex nẽ pahtĩr tũm nẽ papa ho papa. Jakamã na pu htem mẽ pamã pahtyk pyma ho papa hkêt nẽ.

¹¹ Amnepêm na pre Tĩrtũm ixãm nẽ tanhmã inhmã ixapênh ã karõ hto nẽ inhmã:

—E Pawre kêt ka Jejus nhỹ hã ma hkwyjê jahkre ho ri mẽ hkôt apa. Nẽ ixkapêr o mẽ ahkre mex nẽ. Kêt ka ã amnhĩ nhĩpêx anhỹr rãhã ho ri mẽ hkôt apa. Anẽ.

¹² Tã ã kot inhmã kapêr anhỹr nhũm ixte kapêr kôt amnhĩ nhĩpêx o ixpaja mỳrapê na htem Jejus ã tanhmã inhĩpêx kati hto ho pa. Pa hte ixpunuj nẽ amnhĩ xà htỳx kamã ijamak o ri Jejus mã tanhmã amnhĩ nhĩpêx to ho ri mẽ hkôt ixpa. Tã nom tee ri ja hã amnhĩ pumu nẽ amnhĩ kamã xpijaãm nẽ ixkaprĩ hkêt nẽ. Ixte amnhĩ kaxyw hkôt ijamaxpêr xwỳnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mẽ arĩ inhmỳr pê Tĩrtũm kapêr mar o pa. Mẽ kot ja hã ixpĩr tã koja mẽ apê Kris kôt ixkwỳjaja inhmỳr pê arĩ mẽ kãm harênh o apa. Koja mẽ ã axpên mỳr pê amnhĩ nhĩpêx anhỹr o pa rãhã nhũm Pahihti Jejus akupỹn mẽ pahwỳr wrỳ.

¹³ Kwa Ximotre. Ra ixte amã mẽmoj tã karõ rax jakamã kêt ka mar tỳx nẽ hkôt amnhĩ nhĩpêx rãhã o ri apa. Jao Jejus Kris nhỹ hã mẽ piitã mẽ noo mã amnhĩ kaxyw kãm ajamaxpêr tỳx rãhã nẽ. Nẽ mẽ piitã mẽ ho mex o ri apa. ¹⁴ Ate mẽ kãm tanhmã Jejus jarênh to ho ri apaja âm hãmri na. Tã koja mẽhõ htỳx ri tanhmã ho kapêr punuj to rỳ axtem nẽ tanhmã harênh to ka ja hã ama nẽ nẽ kãm akapêr kãm axihtỳx nẽ. Tĩrtũm Karõ ra kot akarõ hwỳr àr jakamã kêt ka ÿ hã ã Jejus jarênhja jamãr mex o ri apa anẽ.

Pawre kot tanhmã amnhĩ jarênh to

Sikũn Ximotre 4.16-18

¹⁵ Nẽ mãn ka pre ra pika pê As kamã Kris kwỳ kot ixkaga hã mẽ harênh ma. Na pre Pijerti mẽ Emosti mẽ mẽ ohtõ nẽ tanhmã hamaxpêr to nẽ ixto ajuta hkêt nẽ. ¹⁶⁻¹⁸ âm Onësipti pix na pre mẽ kurom ijarênh ma nẽ man ixwỳr Rõm wỳr mõ nẽ ijapêr o ri mẽ hkôt mra nẽ ixwỳr kato. Hãmri nẽ xatã ixwỳr mra nẽ tanhmã ixto mex to. Jao akupỹm ijamaxpêr o hihtỳx. Ixpê prês nẽ ixkrĩ htã kêp ixkrãmnhwỳ hã amnhĩ jarênh ã hpijaãm kêt nẽ. Nẽ amnepêm kormã krĩ pê Epes kamã ixpa ri na pre määnên tanhmã ixto mex to ho pa. Tã ã kot inhĩpêx mex anhỹr o pa jakamã na pa hte ho Pahihti Jejus wỳ nẽ kãm:

—Pa Pahihti? Onësipti o na pa awỳ. Kot ixto mex rãhã ho pa jakamã kwa kêt ka ixtã omu nẽ kutã anojarêr rãhã ho apa. Nẽ õrkwỳ kamã hkwyjaja määnên tanhmã mẽ ho mex to. Hãmri nẽ nhỹrmã akupỹn mẽ ixwỳr wrỳ nẽ ixtã kamã axukaprĩ hã tanhmã ho mex to. Anẽ.

2

Mẽ pahte Jejus kôt amnhĩ nhĩpêx pix prãm ã mẽ pamã karõ

Wam Ximotre 6.11-16

¹ E Ximotre. Jejus Kris kot mẽmoj to mẽ pakutã nojarêr rãhã jakamã kwa kêt ka ÿ hã amnhĩ to htỳx nẽ kãm tanhmã amnhĩ nhĩpêx to ho apa hã amnhĩ kamã akahak o ri apa

hkêt nê. ² Ra ate pa tanhmã Tirtûm kapêr o mē ahkre htoja mar jakamã kêr ka amnhĩ xô ri ã Jejus kôt mē pahkwỳjê jahkre ho apa anê. Mē kot amar nê pahpyràn axpên xô ri ho axpên jahkre ho pa kaxyw.

³⁻⁴ Sôrdat na htem mē hkrãhtûm kãm prãm xà hkôt tanhmã amnhĩ nhĩpêx to. Jao tanhmã kute htã kapêr ma nê hkôt amnhĩ nhĩpêx. Tanhmãn à rỳ kãm prãm rỳ tanhmã omnuj to htã kutã amnhĩ to htỳx nê mē hkrãhtûm kôt amnhĩ nhĩpêx. Na htem amnhĩ xàpênh kukamã tee ri hamaxpêr o pa hkêt nê. ãm mē hkrãhtûm kapêr kôt pix mã amnhĩ nhĩpêx o pa hprãm. Tã kêr ka mē urak nê Pahihti Jejus kôt amnhĩ nhĩpêx rãhã ho ri apa hprãm. Mē kot hã tanhmã atomnuj to htãã.

⁵ Nê mē hprôt tỳx xwỳnhjaja na htem hkwyjê pê amnhĩ to wa hprãm xàj ãm ja pix kukamã hamaxpêr. Hãmri nê hprôt tỳx prãm xàj mēmoj kot mē ho hirerek kêt nê amnhĩ jagri htỳx nê. Hãmri nê hprôt tỳx o hkwyjê jakre nê amnhĩ to wa nê pøj nê kot amnhĩ to wa hã mēmoj to kãnja. Tã kêr ka mē urak nê amã Pahihti Jejus kot amnhĩ nhĩpêx kôt pix mã amã amnhĩ nhĩpêx prãm.

⁶ Nê pur kãm mē àpênh xwỳnhjaja na htem mē hpur kãm àpênh pix tãnopxar o pa nê àpênh rũnh nê. Kãm kaga hkêt kãm àpênh o pa. Tã àpênh rũnhja kukwak ri ihpur kãm õ rũnh nê ho apkur mex o pa. Nom koja mē kãm kaga nê àpênh mex kêt nê hãmri nê õ grire nê apkur mex kêt nê. Tã kêr ka pur kãm mē àpênh rũnh xwỳnhjê pyrà nê Pahihti Jejus mã amnhĩ nhĩpêx mex o apa. Nê mē urak nê amã kaga hkêt kãm axàpênh pix tãnopxar o ri apa.

⁷ E na pa ã ajahkre anê Ximotre. Tã kêr ka ixte ajahkreja ma nê kãm ajamaxpêr rãhã nê. Koja Pahihti tanhmã akrã hto ka aprĩ hã mar tỳx nê.

⁸ Nê kêr ka Pahihti Jejus Kris mã ajamaxpêr rãhã ho ri apa. Na pre katorxà hkôt kêp Pahi finat Tawi kanrêhã htãmnhwỳ hã mē pahpyrà nê ã ho ã nê kato nê panhõ pika kamã pa ho pa. Tã nhũm prem kupĩ nhũm amnhĩ xà htỳx kamã hamak kãm ty. Hãmri nhũm Tirtûm akupỳm ho htĩr nhũm akupỳm htĩr o htĩr. ã na pre hte harênh anhỹr rãhã ho ri mē hkôt ixpa. ⁹ Mỳrapê na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwỳnh pyràk o inhĩpêx nê axte ixte Jejus kapêr jarênh o ixpa pymaj ijaxà. Tã ã mē kot inhĩpêx anhỹr tã na hte Kris kôt pahtõjaja arĩ ixpãnhã mē kãm harênh o ri pa. Koja mē tee ri kãm Jejus jarênh o hapêx prãm kaprỳ. ¹⁰ Jakamã kwãr mē mãmri ã inhĩpêx anê. Koja mē arĩ Jejus kot tanhmã mē panê amnhĩ nhĩpêx toja mar o pa nhũm mē hkwyjaja hkôt amnhĩ xunhwỳ nê nhỹrmã pahpyrà nê kêp Jejus Kris kwỳ hã Tirtûm mē wa kuri mex nê htĩr tũm nê pa ho pa.

Kris kwỳ kot tanhmã amnhĩ tã grer to hã mē harênh

¹¹ Na pu htem mē pahpê Kris kwỳ hã ã amnhĩ tã pagrer anê:

Mē kot Kris ã mē panhĩmex tã kot puj mē akupỳm pahtĩr nê kuri pamex nê pahtĩr tũm nê papa ho papa.

¹² Mē kot tanhmã Kris ã mē pahtomnuj to htã kot puj mē arĩ hkôt amnhĩ nhĩpêx o papa rãhã ty nê nhỹrmã ãhkô hã mē ho amnhĩptar o papa.

Nom kot puj mē amnhĩ kamã pakahak pê mē pahpê Jejus kwỳ hkêt ã amnhĩ jarê hã koja Jejus amnhĩ xwar mē pahpê hkwyjê hkêt ã mē pajarê.

¹³ Nê mē pahte amnhĩ kaxyw Jejus kôt pajamaxpêr kêê tã tanhmã amnhĩ jarênh to xà hkôt tanhmã amnhĩ nhĩpêx to.

Aa kot mēmoj tã amnhĩ jarênh kuhpa hã ri tanhmã amnhĩ nhĩpêx to hkêt. Anê.

Mē kot Tirtûm kapêr o mē ahkre mex xwỳnhjê jarênh

Wam Pêtre 3.15-16

¹⁴ E Ximotre. Ixte ã mēmoj tã amã karõ anhỹrja kêr ka ho mē ahkre rãhã ho ri mē hkôt apa. Kê mē ama nê kãm hamaxpêr rãhã nê.

Nê mē kãm anê kê mē Tirtûm kapêr o mē ahkre mex o ri pa nê kapêr ã tanhmã axpên mã àkjêr to hkêt nê. Koja mē hã axpên mã akir hãmri nê amnhĩ to mex kêt nê. Hãmri

nhūm mẽ kot mẽ kapēr mar xwỳnhjaja ja hã mẽ omu nẽ tee ri Tĩrtũm kapēr kukamã hamaxpēr nẽ hkõt amnhĩ nhĩpêx mex kêt nẽ.

¹⁵ Nẽ na htem mẽ kãm mẽ àpênh mex xwỳnhjaja mẽ õ patrãw kapēr ma nẽ hkõt mẽmoj tã àpênh mex nẽ. Nhūm õ patrãwja hwỳr mra nẽ àpênh ã omu. Hãmri nhūm amnhĩ wỳr omu nẽ àmnhĩx noo mã apê. Kãm àpênh mex jakamã amnhĩ kamã kãm uma hkêt nẽ. Ja pyrã nẽ kêr ka Tĩrtũm noo mã kãm amnhĩ nhĩpêx mex rãhã nẽ aprĩ hã kapēr o mẽ ahkre mex o ri mẽ hkõt apa. Kê ã ate amnhĩ nhĩpêx anhỹr ã apumu nẽ anhỹ hã hkĩnh nẽ. Ka àpênh xwỳnhhta pyrã nẽ amnhĩ kamã amã uma hkêt nẽ noo mã kãm amnhĩ nhĩpêx mex o ri apa.

¹⁶ No mẽ kot Tĩrtũm kapēr o hêx o mẽ pa xwỳnhjaja kêr ka mẽ hkõt ri apa hkêt nẽ. Nẽ mẽ kapēr mar nẽ ri mẽ hkõt axãm hkêt nẽ. Na htem mẽ kapēr ma nẽ mẽ hkõt amnhĩ nhĩpêx o pa nẽ kãm Tĩrtũm kapēr mar prãm kêt nẽ. Nẽ gaa nẽ te kêp mar pumaj amnhĩ jamak pro pyrãk o amnhĩ nhĩpêx. ¹⁷ Tỳx ri tanhmã mẽ ahkre hto xaja te kot mẽ hkànhy aa mex kêt nẽ ra omnuj tỳx o mōrja pyrãk. Jao mẽ kot mẽ kapēr mar o mẽ pa xwỳnhjaja mẽ mar pê ra mẽ hkõt amnhĩ tomnuj tỳx o mō. Na hte ra Imēnew mẽ Pijertija wa ã htỳx ri amnhĩ krã hkõt mẽ ahkre anhỹr o pa. ¹⁸ Nẽ Tĩrtũm o hêx o mẽ hkõt pa nẽ nhỹrmã akupỳm mẽ pahto mẽ pahtĩr kêt ã harēnh o pa. Hãmri nhūm mẽ amnhĩ tã wa kuma nẽ tee ri amnhĩ kukamã hamaxpēr pê Jejus kaga nẽ axte amnhĩ kaxyw hkõt hamaxpēr kêt nẽ. Nom wa kapērja kot anhỹr kêt. ¹⁹ Kêt Tĩrtũm kapērja ãm hãmri na. Kot mẽmoj to hêx kêt jakamã na pu htem amnhĩ kaxyw hkõt pajamaxpēr kaprỳ hkêt nẽ. Kapēr ã kaga htũm kot tanhmã mẽ pahpê hkrajê jarēnh to nẽ harēnh kot:

Tĩrtũm na kot hkrajê piitã omunh mex rãhã ho pa xwỳnh.

Anhỹr o mẽ pajarēnh. Nẽ mẽ pamã mẽmoj tã karō kot:

Kê mẽ kot Jejus kõt amnhĩ xunhwỳr xwỳnhjaja amnhĩ tomnuj o pa hkêt nẽ. Anẽ.

Tĩrtũm krajaja te kêp prat mex pyrãk ã mẽ harēnh

²⁰ Nẽ mẽ hikàxpore rũnh xwỳnhjaja mẽ õ xijere nẽ mẽ õ prat xohtô. Prat kwỳ muxre nẽ hkwy omnajre. Prat pynajre na htem mãmri kamã apku no prat muxreja ãm mẽmoj mex pix kaxyw na htem mẽsti hã haxwỳ nẽ kamã apku. Kasamêt ã rỳ mẽ hkra krã hkēnh ã mẽ hkĩnh nhūm htem mẽsti hã haxwỳ nẽ kamã apku. ²¹ Tã mẽ kot Tĩrtũm kapēr o hêx o mẽ pa xwỳnhjê hkõt hamaxpēr kêt nẽ mẽ hkõt amnhĩ tomnuj kêt xwỳnhjaja te mẽ kot prat muxre pyrãk. Na htem tãm amnhĩ nhĩpêx nẽ tanhmã hamaxpēr punuj to ho pa hkêt nẽ. Hãmri nhūm Tĩrtũm ja hã mẽ omu nẽ mẽ y hã hkĩnh nẽ. Hãmri nẽ te mẽ kot prat muxre jaxwỳr nẽ kamã apkur pyrã nẽ mẽ kot kãm tanhmã amnhĩ nhĩpêx to ho pa kaxyw mẽ unhwỳ.

Mẽ pahte tãm amnhĩ nhĩpêx ã mẽ pamã karō

²² Nẽ mẽ àptàr nyw jamaxpēr punujja kêr ka te ate hamỳnh nẽ amnhĩ katut kõt rēnh par pyrãk o hipêx Ximotre. Jao axte ho ajamaxpēr o ri apa hkêt nẽ. Nom mẽ hamaxpēr mexja kêr ka hamỳ nẽ amnhĩ krã him hagjê nẽ ho ajamaxpēr rãhã ho ri apa. Jao tãm amnhĩ nhĩpêx nẽ amnhĩ kaxyw Tĩrtũm kõt ajamaxpēr rãhã nẽ. Nẽ amã mẽ kêp Kris kõt akwỳjê hkĩnh pê tanhmã mẽ ho ajuta hto ho ri mẽ hkõt apa. Jao mẽmoj to mẽ kutã anojarêt rãhã nẽ. Na hte ã Pahihti Jejus kõt amnhĩ nhĩpêx xwỳnhjaja amnhĩ nhĩpêx anhỹr o pa.

²³ Nẽ kêr ka mẽ kot htỳx ri amnhĩ krã hkõt mẽ ahkre ho mẽ pa xwỳnhjê hkõt apa hkêt nẽ. Te ate mẽ kêp awry hã ri apa pyrã nẽ mẽ kapēr ma nẽ ãm ama. Na htem mẽ kapēr mar o pa nẽ ra hã axpēn mã tanhmã àkjêr to ho pa. Jakamã kwarĩ mẽ hkõt ri apa hkêt nẽ. ²⁴ Mẽ pahte Tĩrtũm mã amnhĩ nhĩpêx o papa xwỳnhjaja na pu htem mẽ kurom mẽmoj tã axpēn mã paxàkjêr o ri papa hkêt nẽ. Na pu htem ãm mẽ piitã mẽ kamã paxukapri pê mẽ ho mex nẽ mẽ kamã pagryk tokyx anhỹr kêt nẽ. Nẽ Tĩrtũm kapēr o mẽ ahkre mex nẽ. Na hte ã mẽ pahte Tĩrtũm mã tanhmã amnhĩ nhĩpêx to xwỳnhjaja amnhĩ nhĩpêx o papa anẽ.

²⁵⁻²⁶ Jakamā koja mēhō ate Tirtūm kapēr o mē ahkreja ma nē tanhmā ho amā kapēr to ka ama nē amnhī tā tanhmā kām akapēr punuj to hkēt nē. Ām kamā axukaprī ho tanhmā hā kām akapēr mex to. Na hte Satanasti te kot amnhīm mē unēnh pyrāk o mē hipēx nē tanhmā mē kām Tirtūm kapēr o hēx to nhūm mē kuma nē hkôt hamaxpēr nē kapēr kôt amnhī nhīpēx. Tā kot kaj mē kamā axukaprī ho mē kām akapēr mex nē nhūm Tirtūm tanhmā mē hkrā hto nhūm mē ama nē hkôt amnhī xunhwūr japēr. Te Tirtūm kot Satanasti pē amnhīm mē utār pyrāk. Jakamā nhūm mē hpānhā Tirtūm kapēr mex ā harē nē harēnh o:

—Nà pēr ām hāmri na Tirtūm kapērja. Ām mex o mex. Anē.

3

Jejus akupŷn wrŷk kukamā mē kot amnhī tomnuj xwŷnhjē jarēnh

Matēwre 24.4-13; Korosē 2.16-19; Wam Ximotre 4.1-5; Sikūn Pētre 2.1-3; Jutre 3-16

¹ Nē Jejus akupŷn mē pahwūr wrŷk xwŷj ri mē kot tanhmā amnhī nhīpēx toja kot paj hpānhā ixprī hā amā harē ka inhmar tŷx nē Ximotre. Koja Jejus akupŷn mē pahwūr nojarēt pu mē pahpē hkŷjaja pahpunuj nē papa. ² Nē Kris kwŷ hkēt xwŷnhjaja koja mē amnhī pix kukamā hamaxpēr o pa.

Jao hikāxpore rax o pikuprōnh pix kukamā hamaxpēr pē hkŷjē pē ōxŷ htŷx o pa.

Nē mēmoj tā amnhī to jarkrar o pa.

Nē tanhmā hkŷjē japrŷ hto ho pa.

Nē mē hipēxà nē mē katorxà hā hpijaàm kēt o pa.

Nē Tirtūm ā hpijaàm kēt o pa.

Nhūm mēhō tanhmā mē ho mex to nhūm mē amnhī tā mē omu nē ām mē omu nē amnhī tā tanhmā mē kām nē hkēt nē. Rŷ mē kām: “Nà ām hāmri na ka ā ixto mex anē. Nà ja mex.” Anhŷr o mē kām kapēr kēt nē.

³ Mē ukaprī hkēt jakamā koja mēhō tanhmā mē homnuj to nhūm amnhī tā mē omu nē kamā gryk kurē kumrēx nē aa gryk o hapēx kēt nē.

Nē amnhī tā tanhmā hkŷjē ho hēx to ho pa.

Nē htŷx ri kām hprām xà hkôt tanhmā amnhī tomnuj to.

Nē oprē ho pijapu pix kukamā hamaxpēr.

Nē axtem nē kām mēmoj mex pumunh prām rŷ mēmoj mex mar prām kēt nē.

⁴ Nē mēhō ho hkrāmnhwŷ htā axtem nē mē kām mē hkurē xwŷnhjē nhīhkram haxà.

Nē hamaxpēr mex kēt o tanhmā amnhī tomnuj to rāhā ho ri pa.

Nē amnhī to rūnh o mē piitā mē hakrenh par ā amnhī to jarkrar o ri pa.

Nē amnhī krā hkôt kām amnhī nhīpēx prām xà hkôt amnhī nhīpēx o pa nē kām Tirtūm kām prām xà hkôt amnhī nhīpēx prām kēt nē.

⁵ Hāmri nē mē kēp hkra hā amnhī jarēnh o pa htā aa hkôt amnhī nhīpēx kēt. Ā Tirtūm kra hkēt xwŷnhjaja amnhī nhīpēx kot anhŷr jakamā kwa kēr ka ā mē hkôt apa hkēt nē Ximotre.

⁶⁻⁷ Na htem hēx rom hkŷjē nhōrkŷ hwŷr agjē nē kamā tanhmā mēnijē mā hēx to. Mē kot mē mar nē tanhmā amnhī tomnuj to hāmri nē ja hā amnhī pumu nē tee ri amnhī kukamā hamaxpēr kaxyw. Nē mē kām mē kapēr nyw mar prām tā nhām mē kapēr ma nē nhām mē kapēr mar nē aa Tirtūm kapēr mar nē amnhī kaxyw hkôt hamaxpēr kēt nē. Jakamā nhūm mē kot amnhī tomnuj xwŷnhjaja hēx rom mē hwŷr mra nē mē ōrkŷ hwŷr agjē nē tanhmā mē kām mēmoj to hēx to. ⁸ Te kot annepēm finat Jānre mē finat Jāmtija wa kot amnhī nhīpēxta pyrāk. Na pre finat Mojestija Tirtūm nhŷ hā tanhmā mē ahkre hto ho pa nhūm Jānre mē Jāmti wa kām mar prām kēt nē. Nē tanhmā ja nē hkŷjē mā kapēr to ho pa. Tā ā mē kot amnhī tomnuj anhŷr o mē pa xwŷnhjaja na htem wa urāk nē kām Tirtūm kapēr mar prām kēt nē kapēr nē tanhmā hkŷjē mā kapēr to ho pa. Nhūm mē hamaxpēr mex kēt jakamā ām mēmoj punuj pix kukamā hamaxpēr nē mē kuma nē amnhī kaxyw Jejus kôt hamaxpēr kēt nē. ⁹ Tā nom koja mē hkŷjaja tokŷx hprī hā mē kot mēmoj to hēx ā mē omu hāmri nē axte mē hkôt hamaxpēr kēt nē nhūm mē rī amnhī

pumu. Te amnepê mē kot hprĩ hã Jãnre mē Jãm̃ti wa kot tanhmã amnhĩ tomnuj to hã wa omunhta pyrãk.

*Mē pahte Jejus ã pahpunuj tã hkaga hkêt ã mē pamã karõ
Atrẽ 13.50-14.7, 14.19-22*

¹⁰ E Ximotre. Ate ixkõt apa ryy jakamã ra ate tanhmã ixte amnhĩ nhĩpêx ho ixpa hã ixpumunh mex.

Ixte tanhmã Tĩrtũm kapêr o mē ahkre hto ho ixpaja.

Nē inhmã mēmoj to anhỹr prãm xwỹnhja.

Nē ixte amnhĩ kaxyw Kris kõt ijamaxpêrja.

Nē inhgryk tokyx anhỹr kêtja.

Nē ixte tanhmã Kris kõt ixkwỹjê ho mex to ho ri ixpaja.

Nē ixpunuj nē ixpa htã arĩ Kris kõt amnhĩ nhĩpêx mex o ixpaja.

Ã ixte amnhĩ nhĩpêx anhỹr o ixpaja ate ixpumunh mex.

¹¹ Na pa pre krĩ pē ãxiok nē lkõn nē Ristija kamã mē kãm Jejus jarênh o ixpa nhũm mē hkwyjaja Jejus ã tanhmã inhĩpêx to pa amnhĩ xã htỹx kamã ijamak o ri mē hkõt ixpa. Tã nhũm Pahĩti Kris xatã mē kêp ixpytã pa ixtĩr pē mē ãhkra rũm ijapõx o ixpa. ¹² Na hte Kris kwỹ hkêt xwỹnhjaja mē pahte Kris kõt amnhĩ nhĩpêx o papa hã mē pahtomnuj o pa.

¹³ Nē mē kot Tĩrtũm kapêr o hêx o mē pa xwỹnhjaja koja arĩ mē kêp Kris kwỹ hã amnhĩ to hêx pē mē nokupyr. Nē mē kãm Tĩrtũm kapêr o hêx o pa. Jao ra mē tãmjaja amnhĩ nokupyr o pa nē amnhĩ tomnuj tỹx kumrêx.

*Pawre kot tanhmã Tĩrtũm kapêr ã kagã jarênh to
Rõmãn 15.4; Sikũn Pêtre 1.19-21*

¹⁴⁻¹⁵ No ka Ximotre. Amnepê mē aprĩre rũm na pa pre mē ixohtõ nē Tĩrtũm kapêr o ajahkre ho ixpa. Akatorxã nē anhõ wõwõre nē pa nē Kris kwỹjaja pa prem ho ajahkre rãhã ho akõt ixpa ka mē inhmar tỹx nē amnhĩ kaxyw Jejus kõt ajamaxpêr. Jakamã kwa kêr ka arĩ hkõt ajamaxpêr mex rãhã ho ri apa. Tĩrtũm kapêrja na htem mar pē amnhĩ kaxyw Jejus Kris kõt hamaxpêr nē hkõt amnhĩ xunhwỹ nhũm Tĩrtũm ja hã mē omunh xã hkõt mē ho hkra. ¹⁶ Tĩrtũm kapêr ã kagãja Tĩrtũm kapêr na. Na htem ho mē ahkre ho pa. Koja mēhõ hkwy m ri tanhmã amnhĩ tomnuj to nē kapêr ma nē tee ri amnhĩ tomnujja kukamã hamaxpêr o ra hkaprĩ nē. Rỹ tanhmã amnhĩ tomnuj to htã kapêr ã kagã kamã kapêr nē Tĩrtũm kot ã kot amnhĩ tomnuj anhỹrja nē mē pamã kapêr ã harênh ma nē amnhĩ tomnujta kaga kurê kumrêx. Rỹ kamã kapêr nē Tĩrtũm kot tanhmã mē pahte amnhĩ to mex to hã mē pamã karõ kamã harê nē kuma. Hãmri nē ã hã hkõt amnhĩ nhĩpêx mex rãhã nē. ã na hte Tĩrtũm kapêr kagãja mē kot mar nē hkõt amnhĩ nhĩpêx xwỹnhjê ho mex anê. ¹⁷ Na hte mē kot Tĩrtũm mã amnhĩ nhĩpêx o mē pa xwỹnhjaja kamã harê nē hkõt amnhĩ nhĩpêx mex pē mē piitã mē ho mex nē ho mē ahkre mex rãhã ho pa.

4

*Pawre kot mēmoj tã Ximotre mã karõ
Korosẽ 4.5-6*

¹ Nē koja nhỹrmã Jejus Krisja akupỹn mē pahwỹr wrỹ hãmri nē mē pahpiitã tanhmã mē pajarênh to. Ra mē htyk xwỹnhjaja nē arĩ mē pahtĩr xwỹnhjaja nhũm tanhmã mē pahte amnhĩ nhĩpêx to ho papa hã mē pahpumunh kõt tanhmã mē pajarênh to. Jao Tĩrtũm mē wa kuri mē pahtĩr tũm nē papa ho papa hã mē pajarê rỹ wa kuri pahtĩr tũm nē papa hkêt ã mē pajarê. Jakamã kwa Ximotre kot paj Tĩrtũm mē Jejus Krisja wa noo mã mēmoj tã amã karõ ka inhmar tỹx nē. ²⁻⁴ Koja nhỹrmã mē kêp Tĩrtũm kra hkêt xwỹnhjaja axte kãm Tĩrtũm kapêr mar prãm kêt nē nhãm mē kapêr pix mar prãm o ri pa. Jao amnhĩ kukamã hamaxpêr o:

—Nã inhmã Tĩrtũm kapêr mar prãm kêt. Kot mēmoj piitã nē mē hkurê kênã. Kot paj hpãnhã mēhõ kot mēmoj nē mē hkurê hkêt xwỹnhjê kapêr pix mar o ri ixpa. Nã kot paj anê. Ja na inhmã hprãm. Nom kot paj axte Tĩrtũm kapêr mar kêt nē.

Anh̄yr jao kap̄er kaga n̄e hp̄anh̄a ht̄yx ri nh̄am m̄e ujar̄enh pix ma n̄e hk̄ot hamaxp̄er. Koja m̄e ̄a amnh̄i nh̄ip̄ex anh̄yr o pa. Jakam̄a kwa k̄er ka ar̄i m̄e k̄am Jejus kot tanhm̄a m̄e pan̄e amnh̄i nh̄ip̄ex to h̄a har̄enh r̄ah̄a ho ri m̄e hk̄ot apa Ximotre. M̄e k̄am mar pr̄am k̄et t̄a m̄amr̄i ri m̄e k̄am har̄e. N̄e nh̄yri m̄eh̄o pumu n̄e k̄am har̄e. M̄e k̄am mar pr̄am xw̄ynh̄j̄e m̄a har̄e n̄e m̄e k̄am mar pr̄am k̄et xw̄ynh̄jaja ka m̄aan̄en m̄e k̄am har̄e. Nh̄um m̄eh̄o tanhm̄a amnh̄i tomnuj to ka h̄a omu n̄e tanhm̄a n̄e k̄am akap̄er to k̄e hk̄aga tokyx an̄e n̄e akup̄ym t̄am amnh̄i nh̄ip̄ex. R̄y nh̄um m̄eh̄o t̄am amnh̄i nh̄ip̄ex o pa ka ja h̄a omu n̄e h̄a k̄am akap̄er n̄e k̄am:

— ̄Am h̄amri na ka hte T̄irtũm k̄ot amnh̄i nh̄ip̄ex mex n̄e. An̄e.

H̄amri n̄e anojar̄et k̄et k̄am m̄e k̄am T̄irtũm kap̄er o m̄e ahkre r̄ah̄a ho ri apa. ⁵ N̄e t̄am ri amnh̄i nh̄ip̄ex r̄ah̄a n̄e. M̄e kot Jejus ̄a tanhm̄a anh̄ip̄ex to ht̄a k̄er ka ỹ h̄a amnh̄i to ht̄yx n̄e ar̄i m̄e k̄am kap̄er jar̄enh o ri m̄e hk̄ot apa. Jao T̄irtũm m̄a amnh̄i nh̄ip̄ex mex r̄ah̄a n̄e. K̄er ka ̄a m̄e hk̄ot amnh̄i nh̄ip̄ex anh̄yr o ri apa Ximotre.

Pawre kot ra htyk kaxyw ̄a amnh̄i jar̄enh

Atre 20.17-35

⁶ N̄e m̄e kot ixp̄ir x̄a h̄a ar̄igroja ra hw̄yr aht̄ep o m̄o. Kot paj p̄er tokyx ty. Amnep̄em na prem T̄irtũm m̄a m̄emoj nh̄or kaxyw n̄e m̄e hk̄om x̄a kam̄a m̄emo kaḡoja py n̄e m̄e kot T̄irtũm m̄a m̄emoj nh̄or x̄a h̄a m̄estija ̄a hk̄ap̄ir pa nh̄um hap̄ex. T̄a te ixp̄e m̄e hk̄om x̄a kam̄a m̄emo kaḡo pikap̄irta pyr̄ak. Kot paj tokyx ty n̄e jar ijap̄ex. ⁷ Na pa ra Pahihti Jejus m̄a amnh̄i nh̄ip̄ex mex o ri ixpa. M̄e kot tanhm̄a h̄a ixtomnuj to ht̄a pa hk̄aga hk̄et n̄e ar̄i hk̄ot amnh̄i nh̄ip̄ex mex r̄ah̄a ra ixtyk kaxyw. ⁸ Ixte Pahihti k̄am hpr̄am x̄a hk̄ot amnh̄i nh̄ip̄ex mex o ri ixpa jakam̄a koja amnh̄i t̄a tanhm̄a ixto mex to. Nom papxipix ixto mex k̄et n̄e. Na hte ̄am h̄amri t̄am m̄e pahpiit̄a m̄e panh̄ip̄ex. Jakam̄a nh̄ym̄a kot m̄e piit̄a tanhm̄a m̄e har̄enh to x̄a h̄a ar̄igrota ̄a koja m̄e pahk̄inh p̄e m̄e pahte amnh̄i w̄yr kam̄a pajamak o papa xw̄ynh piit̄a m̄e pam̄a m̄a m̄emoj mex ḡo.

Pawre kot amnh̄i w̄yr Ximotre hw̄yr

⁹ Kwa na pa ra ato ijamak t̄yx n̄e Ximotre. Kwa k̄er ka amnh̄im anojar̄et n̄e tokyx tanhm̄a amnh̄i to hpa n̄e man ixw̄yr m̄o.

¹⁰ Na pre ra Kres̄ex ma Karatas w̄yr m̄o nh̄um Xitre ma pika p̄e Tawmas w̄yr m̄o. Nh̄um T̄emti ra tanhm̄a hamaxp̄er to n̄e ̄ap̄enh gryk ̄a ixkaga n̄e ma akup̄ym Tesar̄on w̄yr m̄o. ¹¹ ̄am Rukre pix na ar̄i ixk̄ot pa jakam̄a k̄er ka anojar̄et h̄amri n̄e ahte am̄or k̄et n̄e. Makre m̄a an̄e k̄e man ak̄ot ixw̄yr m̄o n̄e tanhm̄a ixto ajuta hto ho pa.

¹² N̄e Xikitre na pa pre ra Epes w̄yr kum̄e.

¹³ N̄e Tor̄ot k̄am Kapti nh̄orkw̄y kam̄a ixte kry p̄e inh̄o kam̄s pa hk̄a ryti rer jakam̄a k̄er ka anojar̄et n̄e inh̄m̄a apy n̄e man inh̄m̄a o m̄o. N̄e inh̄o kaḡata ka m̄aan̄en inh̄m̄a am̄y n̄e o m̄o. N̄e m̄emo mry k̄a h̄a ixte m̄emoj t̄a kaḡata ka m̄aan̄en apy n̄e m̄an inh̄m̄a o m̄o. E k̄er ka anojar̄et n̄e ixkukr̄exja jam̄y n̄e ixw̄yr ho m̄o.

Tanhm̄a Ares̄anti kot Pawre nh̄ip̄ex to h̄a har̄enh

¹⁴⁻¹⁵ N̄e na pre k̄ax o m̄emoj nh̄ip̄ex xw̄ynh Ares̄antija ixtomnuj n̄e. Pa pre m̄e k̄am T̄irtũm kap̄er o m̄e ahkre ho ri m̄e hk̄ot ixpa nh̄um tee ri inh̄ma n̄e k̄am mar pr̄am k̄et n̄e. H̄amri n̄e ixkut̄a amnh̄i x̄am n̄e inh̄ip̄ex kati n̄e. Nom koja Pahihti Jejus ixt̄a tanhm̄a ho. Kwa k̄er ka amnh̄i n̄e omunh mex n̄e Ximotre.

Pahihti Jejus kot Pawre m̄a hamaxp̄er o hiht̄yx ̄a har̄enh

¹⁶ N̄e pahi kot m̄e mar x̄a h̄a ixkre kam̄a wam ixte m̄e k̄am amnh̄i jar̄enh̄ta ̄a na pre m̄eh̄o ixyr p̄e m̄e k̄am tanhm̄a ijar̄enh to hk̄et n̄e. Na prem piit̄a m̄e umaj ixkaga hpa. Nom kw̄ar m̄e m̄amr̄i ̄a amnh̄i nh̄ip̄ex an̄e. T̄irtũm kot ixt̄a tanhm̄a m̄e hoja na inh̄m̄a hpr̄am k̄et. ¹⁷ ̄am Pahihti Jejusja pix na pre m̄e kurom ixkaga hk̄et n̄e. Na pre ixto ixiht̄yx n̄e pa ỹ h̄a m̄e k̄am tanhm̄a m̄e pan̄e kot amnh̄i nh̄ip̄ex to h̄a har̄enh pa. Nh̄um Ijaew k̄et xw̄ynh kot inh̄mar o hkr̄i xw̄ynh̄jaja ixujar̄enh mar o hkr̄i nh̄um T̄irtũm inh̄n̄e tanhm̄a m̄e ho nh̄um m̄e ixp̄ir k̄et n̄e. ¹⁸ Koja Pahihti m̄e kut̄a ixto ixiht̄yx r̄ah̄a n̄e m̄emo ar̄igro h̄a amnh̄i w̄yr ixto api. Pa T̄irtũm m̄e wa kuri inh̄mex kumr̄ex n̄e ixt̄ir t̄um n̄e ixpa ho

ixpa. Pahihti mex o mex jakamã kêr pu mẽ kãm mex o mex ã harẽnh rãhã ho papa nẽ aa jam panhũrer kêr nẽ.

Pawre kot tanhmã hkrãmnhwỳjê jarẽnh to

¹⁹ Nẽ kêr ka Prisire mẽ mjên Akir wa kãm ijarẽ. Nẽ Onẽsipti hprõ nẽ hkrajaja ka mããnẽn mẽ kãm ijarẽ. ²⁰ No Eras kormã Korĩt kãm pa. Nẽ Toropti na pre à nẽ pa Mĩrêt kãm kure nhũm ixkõt mõi kêr nẽ.

²¹ Kwa kêr ka amnhĩm anojarêt nẽ amgrà pê man tokyx ixwỳr mõi Ximotre.

Nẽ ota Epti mẽ Prutẽhti mẽ Rĩnre mẽ Krawreja awỳr hpẽr mẽ. Nẽ jar Kris kõt pahkwỳjê piitã awỳr hpẽr mẽ.

²² E kê Pahihti Jejus ato mex rãhã nẽ mẽ apiitã mẽ akutã nojarêt rãhã ho pa.

Tã ãm ja pix. Ixpê Pawre na pa awỳr kagàja nhĩpêx nẽ kumẽ.

Xitre

Pawre kot Xitre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhÿm pre Xitre Pawre hkôt pa hã mytwrÿ xohtô nê. Tã kêp Jejus kôt hkwÿjê nhõ pastô kaxyw gô hipôk pê Kret ã arîk nê Tîrtÿm kapêr o mē ahkre ho mē hkôt pa. Jakamã nhÿm Pawre kãm kagàja nhîpêx nê kamã kãm mēmoj tã karõ. Tîrtÿm kapêr o mē hêx xwÿnhjaja tanhmã kot ja nê mē hkurê to hã kãm karõ. Nê mē kot Tîrtÿm kapêr o mē ahkre mex pix xwÿnhjaja Jejus kwÿjê kaxyw kot mē rênh ã kãm karõ. Nê Jejus kwÿjaja kot xpên to mex o pa hã kot mē kãm karõ kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karõ nê hã kagà nê hwÿr mênh anê. Nê kãm:

¹ Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tîrtÿm mã tanhmã amnhî nhîpêx to ho ixpa. Nê ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nê mē kot hprî hã mar kaxyw Tîrtÿm kapêr o mē ahkre mex nê. ² Mē kot inhmar nê nhÿrmã htyk nê ma Tîrtÿm mē Jejus wa hwÿr àpir nê wa kuri htîr tÿm nê pa ho pa hã amnhî kukamã hamaxpêr kaxyw. Amnepêm na pre Tîrtÿm ã mē pahpê hkrajê hkukamã mē pajarênh anê. Nê ãm hãmri ã mē pajarênh anê. Na hte mēmoj tã amnhî to hêx kêt nê. ³ Tã ra mē pakukamã mē pamã mēmoj to amnhîrît nê inhmã kapêr o:

—E Pawre kêr ka ma mē hpiitã mē hkôt ri apa nê mē kãm ixkapêr jarê nê mē kãm: “Kot kaj mē amnhî kaxyw Tîrtÿm Kra hkôt ajamaxpêr nê hkôt amnhî xunhwÿ nhÿm Tîrtÿm ja hã mē apumu nê mē ato hkra. Ka mē nhÿrmã atyk tã nhÿm amnhî wÿr mē ato api ka mē wa kuri amex kumrêx nê atîr tÿm nê apa ho apa.” Anhÿr o mē kãm ixkapêr jarênh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jejus kôt pajamaxpêr nê hkôt amnhî xãm jakamã te apê ixkra pyrâk. Jakamã na pa hte ato Mēpanhîpêêxà maati Tîrtÿm mē mē papytâr xwÿnh Jejus Krisja wa hwÿr rãhã ho ri ixpa nê wa kãm:

—Pa Tîrtÿm mē Pahihti wa. Nà Xitre ho na pa wa awÿ. Kwa kêr ka wa kutã anojarêr rãhã ho ri apa. Kê wa akukwak ri hamakêtkati nê àmnhîx pa ho pa. Anê.

*Kris kwÿ hkrãhtÿmjaja kot tanhmã amnhî nhîpêx to kaxyw mē hã kãm karõ
Wam Xîmotre 3.1-13*

⁵ Nê na pa pre Kret rÿm inhnojarêr hãmri nê amã axàpênh ã karõ nê Kret kãm are nê man mõ. Na pa pre amã:

—E kêr ka jar arîk nê mē kãm ixkapêr jarênh jatur xàm mênh o mē hkôt apa. Nê Kris kôt pahkwÿjê mã mē hkrãhtÿmjê xunhwÿ. Kret kãm krî piitã hkôt. Na pa pre ixprî hã tanhmã amã mē harênh to. Tã kêr ka ate inhmar xà hkôt mē hkwÿjê kapi nê mē unhwÿ. Koja mē ã amnhî nhîpêx anhÿr o pa ka ja hã mē omu nê mē unhwÿ.

⁶ Koja mē tãm amnhî nhîpêx o pa nhÿm mē piitã xpên mã mē mex ã mē harê.

Nê mē hprõ pix tânopxar o pa nê kuhpa hã nhãm mênijê ho amnhîkati hkêt nê.

Nê kê mē hkrajaja hipêêxà pyrã nê amnhî kaxyw Jejus kôt hamaxpêr o pa. Jao hipêêxà nê katorxà wa kapêr ma nê wa hkôt amnhî nhîpêx. No ri htÿx ri amnhî tomnuj o pa hkêt nê.

Anhÿr o na pa pre mē hã amã karõ. ⁷ Jejus kôt pahkwÿjê hkrãhtÿmjaja kot Tîrtÿm nhÿ hã hkrajê mã kapêr mex o pa jakamã na htem tãm amnhî nhîpêx o pa.

Nê amnhî pix kukamã hamaxpêr o pa hkêt nê.

Nê gryk tokyx anhÿr kêt nê.

Nê kagôxÿhti japrôr nê ho pipãnh o pa hkêt nê.

Nê oprê ho pa hkêt nê.

Ně kàxpore rŭnh prām xàj hêx rom tanhmã amnhĩ nhĩpêx to hkêt nê.
Na htem ã amnhĩ nhĩpêx anhÿr hkêt nê.

⁸ ãm àmnhĩx amnhĩ nhõrkwȳ hwÿr mẽ hwÿr o pa.

Ně mẽ piitã mẽ kutã nojarêt rãhã nê.

Ně tãm hamaxpêr nê tãm mẽ piitã mẽ hipêx o pa.

Ně amnhĩ tomnuj pymaj amnhĩ to htÿx pê Tĩrtũm kôt amnhĩ nhĩpêx mex rãhã ho pa.

⁹ Ně mẽ kot Tĩrtũm kapêr mar tÿx jakamã kê mẽ arĩ hã nohtÿx nê mar tÿx xà hkôt amnhĩ xô ri ho hkwÿjê jahkre mex o pa.

Ně ho mẽ piitã mẽ hamaxpêr o hihtÿx o pa.

Nhũm mẽhõ Tĩrtũm kapêr kwÿm ri tanhmã ujarênh to nhũm hã kuma nê hprĩ hã kãm tanhmã harênh to kê mar mex nê.

E Xitre. Na hte ã Jejus kwÿjê hkrãhtũmjaja amnhĩ nhĩpêx anhÿr o pa. Jakamã kêr ka aprĩ hã Kret kãm Jejus kôt pahkwÿjê kapi nê mẽ kot tanhmã amnhĩ nhĩpêx to ho pa hã mẽ omu. Nhũm mẽhõ ã amnhĩ nhĩpêx anê ka ja hã omu hãmri nê kêp Jejus kwÿjê hkrãhtũm kaxyw ãm.

Kret nhõ xwÿnhjaja kot tanhmã amnhĩ tomnuj to hã mẽ harênh

Xitre 3.9-11

¹⁰ Nê atar Kret kãm na hte mẽ ohtô nê kãm mẽ õ pahi kapêr mar prãm kêt nê htÿx ri tanhmã Kris kwÿjê mã kapêr to ho pa. Na hte Ijaew kwÿjaja ã amnhĩ nhĩpêx anhÿr o pa. Jao Ijaew kêt xwÿnh kot Jejus kôt amnhĩ xunhwÿr xwÿnhjê mã kãm:

—Kwa mẽ ixpyrà nê mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹ Anhÿr o mẽ kãm kapêr jakamã kwa kêr ka ã mẽ kapêr anhÿrja nê mẽ kãm akapêr kãm axihtÿx nê. Na htem hpijaam kêt o hikàxpore hprãm xàj ã mẽ kãm kapêr anhÿr o pa. Jao mẽ hamaxpêr o ahkã nhũm mẽ kuma nê tee ri hamaxpêr. ¹² Na pre ra mẽ hkwÿjê hõ tanhmã mẽ harênh to. Mẽ ahkre xwÿnhjê hõja mẽ harênh o:

—Kret nhõ xwÿnhjaja na htem hêx pix o pa. Nê oprê nê kãm kaga nê apkur xà pix kukamã hamaxpêr o pa. Anê.

¹³ ãm hãmri ã mẽ harênh kot anhÿr. ã mẽ kot amnhĩ nhĩpêx anhÿr jakamã kwa mẽ kot amnhĩ nhĩpêxja nê mẽ kãm akapêr kãm axihtÿx o ri mẽ hkôt apa Xitre. Kê mẽ ã amnhĩ nhĩpêx anhÿr kêt nê. Nê mẽ kãm anê kê mẽ amnhĩ kaxyw Tĩrtũm kôt mãn hamaxpêr tÿx nê. ¹⁴ Nê kê mẽ axte Ijaewjê xujarênh nê mẽ kot amnhĩ nhĩpêx kôt amnhĩ nhĩpêx kêt nê. ã mẽ kot amnhĩ nhĩpêx o pa hã mẽ kãm karõ xwÿnhjaja na prem Tĩrtũm kapêr kaga hpa.

¹⁵ Mẽ kot Jejus kôt amnhĩ xunhwÿr xwÿnhjaja tãm mẽ hamaxpêr o pa jakamã na htem Tĩrtũm kot mẽmoj piitã ho kator xwÿnh pumu nê piitã mex ã harê. No mẽ kêp Jejus kwÿ hkêt xwÿnhjaja na htem hamaxpêr punuj pix o pa. Nê mẽmoj mex pumu nê mex kêt ã harê. Mex tã nhũm mex kêt ã harênh o pa. ¹⁶ Nê mẽ kêp Tĩrtũm kra hã amnhĩ jarênh tã amnhĩ tomnuj pix o pa. Jao kêp hkra hã amnhĩ jarênh o hêx nê kapêr kwÿm ri amnhĩ nhĩpêx pix o pa. Nhũm Tĩrtũm tee ri ja hã mẽ omu nê kãm mẽ hkĩnh kêt nê. Tĩrtũm mã mẽ kot amnhĩ to mex kwÿ mẽ hã jêt kêt kumrêx.

2

¹ E Xitre kot paj tanhmã ate mẽ ahkre hto hã amã karõ ka inhma nê amnhĩ xô ri mẽ kãm hã karõ ho ri apa.

Měmy wejjaja kot tanhmã amnhĩ nhĩpêx to kaxyw mẽ hã kãm karõ

² Nê kêr ka mẽmy wejjê mã anê kê mẽ amnhĩ to àptàr mex nê pa.

Ně pipãnh nê ri pa hkêt nê.

Ně mẽ gryk kaxyw htÿx ri hkwÿjê hã hpêr o pikênh kêt nê.

Kê mẽ tãm hamaxpêr nê tãm amnhĩ nhĩpêx o pa.

Ně amnhĩ kaxyw Jejus kôt hamaxpêr tÿx rãhã nê.

Nhũm mẽ hkwÿjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa nê amnhĩ tã tanhmã mẽ ho hkêt nê.

E kêr ka ã mēmy wejjê mã ja hã akarõ anê.

Mēni wejjaja kot tanhmã amnhĩ nhĩpêx to kaxyw mē hã kãm karõ

Wam Korit 14.34-35; Wam Ximotre 2.9-15, 3.11; Wam Pêtre 3.1-6

³⁻⁴ Nê mēni wejjê mã anê kê mē kãm Jejus kĩnh xàj tãm ri amnhĩ nhĩpêx o pa.

Jaο axpēn jakwa kamã nhãm mē hixi ho rêr o pa hkêt nê.

Nê kagôxyhti ho pipãnh o pa hkêt nê.

Nê mē kãm anê kê mēni xaptâr nywjê jahkre mex o pa. Mē kot mē mar nê mē uràk nê tãm amnhĩ nhĩpêx kaxyw. Jaο mē kãm mē mjên nê mē hkrajê japê hã mē kãm mēmoj to anhÿr o mē kutã nojarêr rãhã ho pa.

Kêr ka ã mēni wejjê mã akapêr anê.

Mēni xaptâr nywjaja kot tanhmã amnhĩ nhĩpêx to kaxyw mē hã kãm karõ

⁵ Nê mēni xaptâr nywjê mã anê kê mē tãm hamaxpêr pê tãm amnhĩ nhĩpêx o pa.

Nê mē òrkwÿ kamã àpênh mex o pa.

Nê mē mjên kapêr ma nê hkôt amnhĩ nhĩpêx.

E. ã mēni xaptâr nywjê mã karõ anê. Kojã mē ã amnhĩ nhĩpêx anhÿr o pa hãmri nhũm mē piitã mē kot amnhĩ nhĩpêx ã mē omu nê mē harênh o:

—Tirtũm kapêrja mex kumrêx. Mē kot hkôt amnhĩ nhĩpêx o mē pa xwÿnhjaja na htem tãm amnhĩ nhĩpêx mex o pa. Anê.

Mēmy xaptâr nywjaja kot tanhmã amnhĩ nhĩpêx to kaxyw mē hã kãm karõ

Wam Ximotre 4.12; Sikũn Ximotre 2.22; Wam Pêtre 5.5

⁶ Nê kêr ka mēmy xaptâr nywjê mã anê kê mē mēmoj punuj pê amnhĩ to htÿx o pa. Mē hamaxpêr punuj nê mē kot tanhmã amnhĩ tomnuj to pê amnhĩ to htÿx o pa.

⁷ Nê kêr ka ajaxwÿja tãm amnhĩ nhĩpêx rãhã ho ri mē hkôt apa Xitre. Mē kot ja hã apumunh nê akôt amnhĩ nhĩpêx o pa kaxyw. Nom kêr ka tanhmã mē ahkre hto hkwÿm ri tanhmã amnhĩ nhĩpêx to hkêt nê. ãm Tirtũm ã apijaam o akatãt kôt mē kãm kapêr o mē ahkre pê tãm amnhĩ nhĩpêx o ri apa.

⁸ Nê kêr ka tãm akapêr rãhã ho ri apa. Kêr kê mē kãm mē pahkurê xwÿnhjaja ja hã ama nê amnhĩ kamã hpijaam hãmri nê apê Kris kwÿ hã tanhmã ato kapêr punuj to hkêt japêr.

Mē kãm mē àpênh xwÿnhjaja kot tanhmã amnhĩ nhĩpêx to kaxyw mē hã kãm karõ

Epes 6.5-8; Korosê 3.22-25; Wam Ximotre 6.1-2; Wam Pêtre 2.18-25

⁹ Nê kêr ka mē kãm mē àpênh o mē pa xwÿnhjê mã anê kê mē ò patrãw kãm hprãm xà hkôt amnhĩ nhĩpêx o pa.

Jaο mē kapêr ma nê hkôt amnhĩ nhĩpêx mex nê.

Nê amnhĩ tã tanhmã mē kãm kapêr punuj to hkêt nê.

¹⁰ Nê kê mē kêp mēmoj to àhkĩnh kêt nê.

Nê tãm mē hipêx rãhã nê.

Nê kãm hkukrêx jamãr mex o pa.

Kojã mē ã amnhĩ nhĩpêx anhÿr o pa nhũm mē ò patrãw amnhĩ tã mē omu nê mē ÿ hã hkĩnh nê pa. Hãmri nê hamaxpêr o:

—Hêxtã waa nê. Inhmã àpênh xwÿnhhta na hte inhmã àpênh mex o pa. Na hte ixkukrêx nê ixkrit jamãr mex nê ixpê mēmoj to àhkĩnh kêt nê. Nã mē kot Tirtũm kapêr kôt amnhĩ nhĩpêx o mē pa xwÿnhjaja na htem tãm amnhĩ nhĩpêx o pa. Pêr Tirtũm kapêr ãm hãmri na. ãm mex o mex. Anê.

E Xitre kêr ka mē kãm mē àpênh xwÿnhjê mã ã mē kot amnhĩ nhĩpêx anhÿr ã karõ.

Tanhmã Jejus kãm mē pajapê xàj amnhĩ nhĩpêx to hã harênh

Epes 2.8-10; Wam Tesarõn 1.9-10

¹¹ Nê Tirtũm kot mēmoj to mē pakutã nojarêr rãhã ho pa jakamã na hte mē pahte Kra hkôt amnhĩ xunhwÿr xwÿnhjê ho hkra pu mē nhÿrmã wa kuri pahtir tũm nê papa ho papa. ¹² Na hte ã mē pamã kapêr o amnhirĩt anê nê mē pamã:

—E kêr ka mẽ apê ixkra hã tãm amnhĩ nhĩpêx rãhã ho ri apa nẽ axte tanhmã amnhĩ tomnuj to nẽ tanhmã ajamaxpêr punuj to hkêt nẽ. Mẽ ate amnhĩ tomnuj pẽ amnhĩ to htỳx nẽ ixkapêr kôt pix mã ri amnhĩ nhĩpêx rãhã nẽ. Anẽ.

¹³ Na pu htem ã amnhĩ nhĩpêx anhỹr o papa jao pahkĩnh nẽ mẽ papytãr xwỳnh Jejus Kris jamãr o papa. Kojã nhỹrmã mẽ panhõ Tĩrtũm xihtỳx xwỳnhja akupỳn mẽ pahwỳr kumẽ pu mẽ mex o mex ã omu.

¹⁴ Na pre Jejus amnhĩ grõnh kôt mẽ pahwỳr wrỳ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panê amnhĩ nhĩpêx anẽ? Nà mẽ pahpê hkwỳja na kãm hprãm. Nẽ mẽ pahte tãm ri Tĩrtũm kapêr kôt amnhĩ nhĩpêx o papaja na kãm hprãm. Nẽ mẽ pahte uràk nẽ mẽ piitã mẽ kutã panojarêt rãhã ho papaja na kãm hprãm. Jakamã na pre ã mẽ panê amnhĩ nhĩpêx anẽ.

¹⁵ E Xitre. Ixte mẽmoj tã amã karõja kêr ka ho Kris kwỳjê jahkre mex o apa kê mẽ ama nẽ kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nẽ Tĩrtũm nhỹ hã tanhmã nẽ kãm akapêr to kê axte hkêt nẽ. Tã mãn ka inhma. Kêr ka ã Kris kwỳjê jahkre mex o apa anẽ.

3

*Tanhmã Kris kwỳ kot amnhĩ nhĩpêx to hã mẽ kãm karõ
Rômãn 13.1-10; Epes 2.1-10*

¹ Nẽ kêr ka Kris kôt akwỳjê mã anẽ kê mẽ ho amnhĩptãr xwỳnhjê kapêr ma nẽ mẽ hkôt amnhĩ nhĩpêx o pa. Nẽ mẽmoj to mẽ kutã nojarêt rãhã ho pa.

² Nẽ mẽ kãm anẽ kê mẽ tanhmã hkwỳjê mã kapêr punuj to ho pa hkêt nẽ. Rỳ mẽmoj tã mẽ kãm àkjêr kêt nẽ. Kê mẽ tãm mẽ hipêx nẽ mẽ kamã ukapĩrĩ pẽ mẽ ho mex rãhã ho pa. Na hte ã Kris kwỳjaja axpên nhĩpêx o pa anẽ. ³ Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỹr kêt nẽ. Na pu prem Tĩrtũm mã pajamaxpêr kêt nẽ kapêr kôt ri amnhĩ nhĩpêx hkêt nẽ. Nẽ amnhĩ tomnuj pix kukamã pajamaxpêr o ri papa. Nẽ amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nẽ axpên tomnuj nẽ. Nẽ axpên kãm pagryk rãhã ho papa. ã mẽ pahte amnhĩ nhĩpêx anhỹr ho papa jakamã nhũm pre mẽ piitã kãm mẽ pahkĩnh kêt nẽ. Pu mẽ pajaxwỳja pamã mẽ hkĩnh kêt nẽ.

*Tanhmã Tĩrtũm kot mẽ pahto mex to hã harẽnh
Rômãn 5.6-8; Epes 2.4-10*

⁴ Tã pu prem Tĩrtũm kệp mẽ papytãr xwỳnh ã harẽnh ma. Kot tanhmã mẽ panê amnhĩ nhĩpêx to hã harẽnh ma nẽ mex o mex nẽ mẽ pakamã ukapĩrĩ hã harẽnh ma. ⁵⁻⁶ Hãmri nẽ amnhĩ kaxyw hkôt pajamaxpêr nẽ hkôt amnhĩ xunhwỳ nhũm amnhĩ tã mẽ pahpumu nẽ mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nẽ. Mẽ pahte tanhmã amnhĩ to mex tore hã. Na pre mẽ pakamã ukapĩrĩ nẽ ã mẽ papytãr anẽ. Tã tanhmã na pre mẽ papytãr to wehe? Nà na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyràk o mẽ panhĩpêx. Hãmri nẽ mẽ pahwỳr amnhĩ Karõ rẽ nhũm mẽ pahwỳr agjê nẽ mẽ pamã mẽ pahte amnhĩ nhĩpêx nyw gõ. Á na pre Tĩrtũm Jejus Kris kot mẽ panê htyk kukwak ri mẽ pahto mex rax anẽ hãmri nẽ mẽ pahwỳr amnhĩ Karõ rẽnh anẽ. ⁷ Tã mẽmo kaxyw na pre ã mẽ pahto mex anẽ? Nà kãm mẽ pajapê jakamã na pre ã mẽ panhĩpêx anẽ. Mẽ pahte amnhĩ tomnuj xwỳnh tã kãm mẽ pajapê htỳx nẽ kãm tanhmã mẽ pahto hprãm kêt nẽ. Nẽ mẽ pahwỳr Kra Jejus mẽ nhũm wrỳ nẽ mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nẽ hkôt amnhĩ xunhwỳr xwỳnhjaja Jejus kukwak ri mẽ pahpê Tĩrtũm kraa. Á na pre Jejus mẽ pahto mex anẽ. Jakamã kot puj mẽ nhỹrmã Tĩrtũm mẽ wa kuri pahtĩr tũm nẽ pamex nẽ papa ho papa. Kojã wa nhỹrmã ã mẽ pahto mex anẽ.

⁸ ãm hãmri na pa amã ã ja jarẽnh anẽ Xitre. Jakamã kwa kêr ka inhma nẽ inhmar tỳx nẽ. Nẽ ho amnhĩ kaxyw Tĩrtũm kôt mẽ hamaxpêr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nē mẽ kot htỳx ri mẽmoj tã axpẽn mã àkjêr o mẽ pa xwỳnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rỳ finat Mojes kot Tĩrtũm nhỹ hã kapêr ã axpẽn mã mẽ àkjêr xwỳnhjê hkôt apa hkêt nê. Na htem ã ri axpẽn mã àkjêr anhỹr o pa nê tãm amnhĩ nhĩpêx kêt nê.

¹⁰ Nê koja mẽ akwỳjê hõ amnhĩ krã hkôt tanhmã hkwỳjê mã kapêr to nhũm mẽ kuma nê hã axpẽn mã akir nê axpẽn pê pikjêr kaxyw. Ka ja hã omu nê ã kapêr anhỹrja nê kãm akapêr kê axte hkêt nê. Hãmri nhũm ama nê ãm ama nê arĩ ã mẽ kãm kapêr anhỹr japêr ka axte nê kãm akapêr. Tã ra ate nê kãm akapêr o axkrut tã nhũm arĩ ã kapêr anhỹr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwỳjê hkôt ri pa hkêt nê. ¹¹ ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jesus wỳr pry kaga nê htỳx ri tanhmã amnhĩ tomnuj to ho pa. Nê ã amnhĩ nhĩpêx anhỹr o pa jao kêp Kris kwỳ hkêt ã amnhĩ to amnhĩrit.

Pawre kot kagà jatur xà kamã tanhmã Xitre mã kapêr to

¹² Nê kot paj tokyx ma Nĩkop wỳr mỗ. Kêr pa tokyx hwỳr pỏj nê amgrà pê krĩ nhõ xwỳnhjê hkôt ixpa. Jakamã kot paj tokyx ma awỳr Atẽmti rỳ Xikitre mẽ. Kê mỗ nê awỳr pỏj ka tokyx tanhmã amnhĩ to hpa nê man ixwỳr mỗ pu mẽ Nĩkop kamã axpẽn pumu.

¹³ Nê ota mẽ akuri Apor mẽ axiwỏkat Jẽntija. Koja wa mẽmo arĩgro hã ma krĩ hõ hwỳr nojarêr ka wa kãm mẽ apkur xà hkwỳ gỏ kê wa ma ỹ kamã mỏr kêt nê.

¹⁴ Nê kêr ka Kris kwỳjê mã anê kê mẽ arĩ ỏrkwỹ pix kãm hkrĩ ho hkrĩ hkêt nê. Kê mẽ tanhmã axpẽn to mex to ho axpẽn kôt pa. Nhũm mẽhõ kêp amrakati kê mẽ tanhmã ho ajuta hto. Mẽ kãm anê kê mẽ ã axpẽn nhĩpêx anhỹr o pa.

¹⁵ Nê ota jar Kris kôt pahkwỳjê piitã awỳr hpêr mẽ Xitre. Nê kêr ka atar Kris kôt mẽ pahkràmnhwỳjê mã mẽ ijarẽ.

E ãm ja pix. Kê Pahihti Jesus mẽ akutã nojarêr rãhã ho pa. Ixpê Pawre na pa amã ã ixkapêr nê hã kagà nê awỳr mẽnh anê.

Piremõ

Pawre kot Piremõ hwÿr kagà nê mênh

Pawre na pre kagàja nhîpêx nê hkràmnhwÿ Piremõ hwÿr kumê. Na pre Piremõja amnhîm kãm àpênh xwÿnh Onesti japrô. Kàxpore ho haprô nhùm amarî kãm àpênh o pa. Tã tanhmã hamaxpêr to nê hkaga nê ma umaj krî hõ hwÿr hprôt nê tèn amÿxu nê kamã pa ho pa. Hãmri nê Pawre pumu nê kãm amnhî jarê. Pawre arî kêp prês nê hkrî ho hkrî nhùm Onesti omu nê kãm amnhî jarê. Hãmri nhùm Pawre kãm Jejus jarê nhùm kuma nê hkôt amnhî xãm kurê kumrêx. Hãmri nhùm Pawre ja hã omu nê hkràmnhwÿ Piremõ mã kagà nhîpêx nê kamã Onesti xyr pê kãm kapêr. Hãmri nê hipêx pa nê Onesti mã kugõ nê ma akupÿm õ patrãw Piremõ wÿr kumê nhùm ma mõi. Nhùm Pawre kagàja kamã kãm kapêr nê kãm:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhîpêx nê kumê. Apê Kris kôt ixtõ hã inhmã akînh. Na ka hte ixpyrà nê Kris mã tanhmã amnhî nhîpêx to ho apa. Ta ot pa awÿr kagàja kamã ixpêr mê. ² Amã nê anhörkwÿ kamã Tirtüm kapêr mar kaxyw mê kêp Jejus kwÿ hã mê pikuprõnh xwÿnhjê hwÿr. Nê Kris kôt pahtõx Apti mê Akip wa hwÿr kumê. Akipja na hte mê pahpyrà nê Pahihti Jejus mã tanhmã amnhî nhîpêx to ho pa.

³ Na pa hte mê ato Mëpanhîpêxà maati Tirtüm mê Pahihti Jejus Kris wa hwÿr rãhã ho ri ixpa. Kot mëmoj to mê akutã nojarêr rãhã nhùm wa ÿ hã mê ajamakêtkati nê axãmnhîx apa ho apa kaxyw.

Pawre kot Piremõ nhÿ hã hkînh ã harênh

⁴⁻⁵ Na pa pre ajarênh ma Piremõ. Na htem xatã tanhmã inhmã ajarênh to nê ajarênh o:

—Hêxta waa nê. Piremõ na hte amnhî kaxyw Pahihti Jejus Kris kôt hamaxpêr tÿx nê kãm mê ixpê Kris kôt hkwyjê piitã hkînh pê tanhmã mê ixto mex to ho ri mê ixkôt pa.

Anhÿr o inhmã ajarê pa mê kuma nê anhÿ hã ixkînh nê ato Tirtüm wÿr rãhã ho ixpa nê ato hwÿr o:

—Pa Tirtüm. Na xep hte Piremõ kãm akînh tÿx nê akwyjê ho mex rãhã ho pa. ãm hãmri na hte ã mê hipêx anhÿr o pa. ⁶ Na xep mê piitã mê kãm tanhmã Jejus kot mê inhnê amnhî nhîpêx to hã harênh o ri mê hkôt pa. Jakamã kêr ka tanhmã mê kot mar xwÿnhjê hkrã hto kê mēhprî hã mar tÿx nê Kris kot tanhmã mê ho mex to hã amnhî tã omu.

Anhÿr o ato kuwÿ. ⁷ Ate Kris kwÿjê ho mex o apa jakamã te ate pa ixto mex pyràk Piremõ. Na htem anhÿ hã hkînh nê pa. Pa ijaxwÿja ajarênh ma nê anhÿ hã ixkînh tÿx nê jar mê hagjênh xà kamã ixkrî.

*Piremõ kot Onesti kamã ukaprî hã Pawre kot kãm karõ
Rômân 15.7; Epes 4.31*

⁸ Nã ixte amã mëmoj jarênhja tanhmã kute hkêr. Kot paj ãm amã mëmoj jarê nê hã awÿ. Nom kot paj Kris nhÿ hã amã tanhmã hã karõ hto hkêr nê. ⁹ Kot paj ãm pahte xpên to pahkràmnhwÿ hã hã awÿ. Ra ixwej tÿx nê Kris ã arî mê hagjênh xà kamã ixkrî htã mëmoj tã awÿ ka inhma nê inhmã ho anhÿr japêr ko.

¹⁰ E amã àpênh xwÿnh Onestija na ixte amã harênh kaxyw. Na pre man ixwÿr mõi. Ixpê prês nê ixkrî nhùm ixwÿr mõi. Pa omu nê kãm Jejus jarê nhùm inhma nê pahpyrà nê amnhî kaxyw hkôt hamaxpêr nê hkôt amnhî xãm. Jakamã te kêp ixkra pyràk. Hãmri nê ixto ajuta mex o pa. ¹¹ Xep kormã Jejus kôt amnhî xãm kêr ri na pre amã àpênh mex kêr nê. Nê kãm kaga nê htÿx ri tanhmã àpênh to ho pa. Tã ra Jejus kôt amnhî xãm hãmri nê katãt kôt inhmã àpênh mex o pa. Nê ixto ajuta mex nê. Kojã akupÿm amã apê hãmri nê amã àpênh mex nê.

¹² Jakamã ot pa akupÿm awÿr kumẽ ixkràmnhwÿ. Nom inhmã hapê jakamã koja ma akupÿm mõi pa ho ama nẽ. Tã kot paj akupÿm awÿr kumẽ. ¹³ Kot jar ixri arĩk nẽ apãnhã tanhmã ixto ajuta hto ho paja na inhmã hprãm. ¹⁴ Jakamã kot kaj amã akupÿn ixwÿr mẽn h prãm nẽ mãmrĩ ixwÿr amẽ. Nom ixte ja pumunh kêt. Kam nẽ amã hprãm xà hkõt tanhmã kãm akapêr to. Kãm anẽ kê akuri arĩk nẽ amã àpênh o pa rÿ akupÿn ixwÿr amẽ. ¹⁵ Nom konên. Mãn akupÿm awÿr mõi nẽ kêp Kris kôt akwÿ hã amã àpênh mex kaxyw na pre Tĩrtũm ixwÿr kumẽ nhũm ixwÿr mõi nẽ ixri Jejus kôt amnhĩ xãm nẽ ixri pa hã mytwrÿ hkwy hapêx pa akupÿm awÿr kumẽ. ¹⁶ Nom ra kêp amã àpênh xwÿnh pix kêt mãânên kêp Kris kôt atõõ. Jakamã kot kaj wa atar axpên kôt Pahihti Jejus kôt tãm amnhĩ nhĩpêx o ri apa. Nom mãânên kêp ixkràmnhwÿ mex ã inhmã hapêê. ¹⁷ Jakamã kot kaj ixpê Kris kôt akràmnhwÿ hã ijarê hã kot kaj mãânên inhmã ho mex o apa.

¹⁸ Nẽ wam amã àpênh o pata ã mãn pre apê mêmõj to ahkĩ rÿ akàxpore hkwy ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarên h to pa amã amnhĩre. ¹⁹ Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarên h ã kagà anẽ. Nom ajaxwÿja na ka tanhmã ixto tewên to Piremõ. Na pa pre amã Jejus kot mẽ panê htyk ã harê ka pre inhmar xà hkõt hkõt amnhĩ xãm. Jao ixpyrà nẽ atĩr tũm nẽ apa ho apa mã xwÿnhhta pãnhã te ate ixto tewên pyràk.

²⁰ E kwa ixkràmnhwÿ. Ixpyrà nẽ apê Kris kwÿ jakamã kêr ka ixkamã axukapĩ hã inhmã Onesti ho mex nẽ. Kêr pa ja hã ajarên h ma nẽ ixkĩnh nẽ tãm ijamaxpêr. ²¹ Nà ra ixte apumunh mex kênã. Kot kaj ixte hã awÿrta kôt hipêx. Ja kaxyw na pa amã kagàja nhĩpêx nẽ awÿr kumẽ. Nom kot kaj ãm ja pix ho anhÿr kêt nẽ. Kot kaj ixte hã awÿrja kôt amnhĩ krã hkõt tanhmã ho mex to. Nà kot kaj ho anẽ.

Pawre kãm Piremõ hwÿr mõi nẽ omunh prãm ã harên h

²² Nẽ Tĩrtũm kot mẽ awÿr inhmên h kaxyw mẽ ate ixto hwÿr o apa jakamã koja apu tokyx ma mẽ awÿr inhmẽ. Jakamã kwa kêr ka ixkutêp tanhmã mêmõj to mex to. Kêr pa mêmõ arĩgro hã mõi awÿr põi ka ra ixkutêp tanhmã amnhĩ to hpa nẽ ãm ixpix kãm ajamak o apa.

²³ Nẽ ota Epasja awÿr hpêr mẽ. Na hte ixpyrà nẽ Jejus Kris ã mẽ hagjên h xà kamã kêp prês nẽ hkrĩ ho hkrĩ. ²⁴ Nẽ Makre nẽ Aristak nẽ Têmte nẽ Rukre mẽ awÿr hpêr mẽ. Na htem ixpyrà nẽ Kris mã tanhmã amnhĩ nhĩpêx to ho pa nom ixrom mẽ kêp prês kêt.

²⁵ E kê Pahihti Jejus Krisja akutã nojarêr rãhã ho pa. Ta ãm ja pix. Ixpê Pawre na pa amã kagà nẽ awÿr kumẽ.

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mẽhõja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hõ pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanãr prãm xaj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhõrkwÿ kaàkre hã kagà hto. Nê kaxkwa kamã õrkwÿ mexja nhũm tanhmã hã kagà hto nê mex o õrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mẽhõja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tĩrtũm na pre mẽ panhĩgêjtê hwÿr ÿ hã kapêr jarênh o ri mẽ pa xwÿnhjê rê nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrit o mẽ hkôt pa. Nhũm Tĩrtũm xatã mẽ hkanrêhã mẽ hkra nê mẽ htãmnhwÿjê hwÿr mẽ hkwÿjê rê nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nê. Na prem ãm hkwy pix jarê. Tã nhũm hpãnhã mẽ hkwyjaja wamtajê mÿr pê mẽ hwÿr mra nê axte mẽ kãm hkwy jarênh o ri pa. Jao ra mẽ kãm harênh jatur xãm mẽnh o mõ. ²⁻³ Tã nhũm Tĩrtũm Kraja mẽ pahwÿr wrÿ nê mẽ pamã kapêr jarênh jatur xãm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xaja tipxi. Nê wa àhpumunh tÿxja mããnen tipxi. Jakamã mẽ pahte pano ho Tĩrtũm pumunh kêt tã Jejus pumunh pê te mẽ pahte Tĩrtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepêm kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhÿrmã kãm mẽmoj piitã õr pa. Kaxkwa kamã mẽmoj piitã nê jar pika piitã hkôt nhũm kãm piitã õr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ò krĩ kamã upôk rũm pahi maati hkrĩ xà hã kuri hkrĩ ho hkrĩ. Nê ìhkô hã mẽ pahto amnhĩptar rãhã ho hkrĩ.

Jejus mẽ Tĩrtũm kapêr o mẽ wrÿk xwÿnhjê jarênh

⁴⁻⁵ Nê Jejus kot amnhĩ to rax o Tĩrtũm kapêr o mẽ wrÿk xwÿnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wrÿk xwÿnhjê jakre.

Mẽ kot inhmã tanhmã amnhĩ nhĩpêx to ho mẽ pa xwÿnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nê apê pika nhõ xwÿnhjê hwÿr ixte amênh mã xwÿnh na ka. Nà apê Ixkra kumrêx.

Kot paj jarãhã ixpê anhĩpêxã hã mẽ piitã mẽ kãm amnhĩ to amnhĩrit. Pa na ixpê anhĩpêxã.

Anhÿr o Kra Jejus mã kapêr. Na pre kapêr o mẽ wrÿk xwÿnhjê mã ã kapêr anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mẽ pahwÿr Kra mẽnh kaxyw hãmri nê kapêr o mẽ wrÿk xwÿnhjê mã kãm:

E ota Ixkrata. Ixkra kumrêx na. Kot amnhÿ to rax o mẽ piitã mẽ hakrenh par.

Jakamã kêr ka mẽ apiitã kutã arôrôk nê kãm mex o mex ã harê.

Anhÿr o mẽ kãm kapêr. ⁷ Nê kapêr o mẽ wrÿk xwÿnhjê na pre axtem tanhmã mẽ harênh to nê mẽ harênh o:

Ixkapêr o mẽ wrÿk xwÿnhjaja na pa hte nhÿhÿm mẽ kurê nhũm htem inhmar xà hkôt ma nhÿhÿm mra nê inhmã tanhmã amnhÿ nhÿpêx to.

Te ixte ma nhÿhÿm kôk nê kuwyja mẽnh nhũm ixkapêr kôt nhÿhÿm môrja pyrãk.

Anhÿr o mẽ harê. ⁸ No ã Krata jarênh anhÿr kêt nê. Na pre tanhmã kãm kapêr to nê amnhÿ pyrã nê kêp Tÿrtũm ã harê nê kãm:

Pa Tÿrtũm? E ka kot kaj mẽ ho amnhÿptãr rãhã ho akrÿ. Nê akatãt kôt mẽ ho amnhÿptã.

⁹ Koja mẽ tãm amnhÿ nhÿpêx ka ja hã mẽ omu nhũm ja amã mex nê.

No koja mẽ tanhmã amnhÿ tomnuj to ka ja hã mẽ omu nhũm ja apê omnuj nê. Mẽ kot tanhmã amnhÿ tomnuj to ho paja na omnuj tÿx.

Tã ate inhmã hprãm xà hkôt amnhÿ nhÿpêx jakamã na pa mẽ kaxyw axãm ka akÿnh kãm mẽ ho amnhÿptã.

Ixpê anhô Tÿrtũm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nã amnepêm kormã mẽmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhÿ nhÿpêx anê.

¹¹ Tã nom koja nhÿrmã hamê wa hapêx pa. ãm kaxipix kot kaj kurom arÿ arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htũm kot amnhÿ nhÿpêx pyrãk.

¹² Kot kaj wa hipêx o te mẽ kot ixkre nê pô htũm mã hikranh par nê hpãnhã hã nyw janhôr pyrãk.

Ja o pika nê kaxkwa htũm o ajapêx pa nê hpãnhã nyw nhÿpêx. Kaxkwa nyw nhÿpêx nê pika nyw nhÿpêx.

Nom kot kaj pika nê kaxkwa tũmta pyrã nê aa awej nê axirerek kêt nê.

Kot kaj arÿ anyw nê axihtÿx rãhã apa ho apa nê aa ajapêx kêt nê. Arãhã atÿr tũm nê apa ho apa xwÿnh na ka.

¹³ E jar inhÿkô hã nhÿ nê inhmã mẽ ho amnhÿptãr o akrÿ.

Kot paj mẽ kãm akurê xwÿnhjê pynênh pa nê man awÿr mẽ o mra nê anhÿhkram mẽ haxãr pa. Anê.

ã na pre Tÿrtũmja Kra Jejus mã kapêr anê. No kapêr o mẽ wrÿk xwÿnhjê mã ã kapêr anhÿr kêt nê.

¹⁴ E kot paj hpãnhã ixprÿ hã mẽ amã Tÿrtũm kapêr o mẽ wrÿk xwÿnhjê jarê ka mẽ inhma. Tÿrtũm mã na htem tanhmã amnhÿ nhÿpêx to ho pa. Na hte nhÿrmã kuri mẽ htÿr tũm nê mẽ pa mã xwÿnhjê hwÿr mẽ kurê nhũm mẽ ma mẽ hwÿr wrÿ nê tanhmã mẽ ho ajuta hto ho pa. Na htem ã amnhÿ nhÿpêx anhÿr o pa.

2

Mẽ pahte Jejus kaga hkêt ã mẽ pamã karô

¹ Tã ã Tÿrtũmja Kra kot amnhÿ to rax o kapêr o mẽ wrÿk xwÿnhjê jakrenh ã harênh kot anhÿr jakamã kwa kêr pu mẽ kapêr mar tÿx rãhã nê hkôt pix mã amnhÿ nhÿpêx o papa. Kot pu mẽ ho anhÿr kêt hãmri nê gaa nê hkaga. ² Na pre Tÿrtũm kapêr o mẽ wrÿk xwÿnhjaja amnepê mã mẽ panhÿgêjtê hwÿr wrÿ nê Tÿrtũm nhÿ hã mẽ kot tanhmã amnhÿ nhÿpêx to ho pa hã mẽ kãm karô nê ma akupÿm api. Nê katãt kôt ri mẽ kãm Tÿrtũm kapêr jarênh o pa. Hãmri nhũm mẽ kot hkôt amnhÿ nhÿpêx nê mar mex xwÿnhjaja nhũm mẽmoj mẽ kãm mex nê. No nhũm mẽ kot mar nê ãm mar xwÿnhjaja koja mẽmoj mẽ kêp omnuj nê. ³ Koja nhÿrmã mẽmoj mẽ kêp omnuj tÿx kumrêx nhũm mẽ tee ri amnhÿ tã omu nê tee ri kêp amnhÿptãr prãm kaprÿ nê mex kêt nê pa. Nom mẽ kot Tÿrtũm kapêr

mar tÿx xwÿnhjaja koja mêmôj mē kām mex o mex. Koja Tirtūm amnhī katut kôt mē kot amnhī tomnuj rēnh pa nē axte kām hamaxpēr kêt nhūm mē kuri htīr tūm nē mex rāhā nē pa ho pa. Na pre Pahihti Jejus mē kot kapēr mar o kuhê xwÿnhjê kumrēx mā ā ja jarēnh anē nē mē kām:

—Nà kot kaj mē amnhī kaxyw inhmā ajamaxpēr nhūm Tirtūm ixtā mē apumu nē mē anē mē ate amnhī tomnuj piitā ho hapêx pa nē axte kām hamaxpēr kêt nē. Anē.

Hāmri nhūm mē kot kapēr mar nē hkôt mē pa ho mē pa nē xwÿnhjaja mar tÿx nē amnhī xō ri mē pamā harēnh o ri pa. Nē mē pamā:

—Nà ām hāmri. Nà ā ja jarēnh kot anhÿr. Anē.

⁴ Hāmri nē mē pamā aa mē pahte mêmôj pumunh kêt kwÿ ho anhÿr o ri mē pahkôt pa. Tirtūm Karō kot ja kaxyw mē ho mē àhpumunh tÿx jakamā nhūm mē ŷ hā ahpÿnhā tanhmā mē pamā amnhī nhīpêx to ho pa. Mē pahte ja hā mē omunh nē kamā pano puma kaxyw. Nē ā mē pajamaxpēr anē nē pajamaxpēr o:

—Nà ām hāmri na mē pamā ā Jejus jarēnh anē nē ŷ hā ā amnhī nhīpêx anhÿr o pa.

Anhÿr o pajamaxpēr kaxyw na prem ā mē pahkôt amnhī nhīpêx anhÿr o pa.

Mē pahpê Jejus tō nē htōx ā mē pajarēnh

Juāw 1.14; Rōmān 8.3-4; Piripos 2.5-11; Korosē 2.9; Wam Juāw 4.2

⁵ Nē na pre Tirtūm amnhī kukamā tanhmā amnhī jarēnh to nē nhÿrmā kot akupÿm mêmôj piitā ho nyw nē tām mêmôj piitā ho amnhīptār o pa hā amnhī jarē. No na pre kapēr o mē wrÿk xwÿnhjê mā ā mē kot amnhī nhīpêx anhÿr ā mē kām karō hkêt nē. Koja jajaja mē pahto amnhīptār o pa hkêt nē. ⁶ Tirtūm kapēr ā kagà htūm kot ja jarēnh kot: Kwa Tirtūm. Nà ām hāmri na ka hte pika ja kamā ri mē ixpa xwÿnhjê jamār mex rāhā ho apa.

Akīnhā amarī ri mē ixpa xwÿnh tā amā mē ijapêê.

Nē mē ixkutā anojarêt rāhā ho apa.

⁷ Na ka hte tanhmā mē inhīpêx to pa mē te mē ixpê akapēr o mē wrÿk xwÿnhjê pyrāk.

Jao mē urāk nē akukwak ri mē inhmex nē ixpa ho ixpa.

Mē urān mē ixāhpumunh nē ixihtÿx kêt tā mē inhmex nē ixpa.

⁸ Na ka pre ra ate mêmôj to akator xwÿnh piitā mē inhīhkram haxà.

Nà ām hāmri na ka pre ā mē inhīpêx anē Tirtūm. Amex o amex. Anē.

Na pre ra mêmôj piitāā mē panhīhkram haxà. Pika nē kaxkwa nē kapēr o mē wrÿk xwÿnhjaja nē mēkarōmnuti nē kot mêmôj piitāā hipêxja nhūm mē panhīhkram haxār pa. Mē pahte ihkō hā ho amnhīptār o papa kaxyw. No na pu mē kormā piitā ho amnhīptār kêt nē. ⁹ No kêt Jejusja na Tirtūm mē pakurom ihkram mêmôj piitā haxār par kumrēx. Kormā pika ja kamā ri pare ri na pre tanhmā amnhī nhīpêx to nē Tirtūm kapēr o mē wrÿk xwÿnhjê hkīnhā te amnhī to grire pyrā nē amnhī xà htÿx kamā hamak kām ty. Tirtūm kām mē pahto mex prām xāj ā mē pahpiitā mē panē htyk anē. Tā nhūm Tirtūm akupÿm ho htīr nē akupÿm amnhī wÿr ho api nē kēp Pahi Maati mex o mex ā harē. Na pre ā Jejusja mē panē amnhī nhīpêx anē nhūm Tirtūm ja hā omu nē kukwak ri mē pahto mex nē.

¹⁰ Nē Tirtūm kot mêmôj piitā ho kator jakamā mêmôj piitā ō na. Na pre mē pakukamā hamaxpēr o:

—Inhmā ixkra xohtō hprām. Kot paj nhÿrmā man amnhī wÿr mē ho api kē mē ixri mex rāhā nē pa ho pa. Nà kot paj ā mē hipêx anē. Nē Ixkra Jejus koja kēp mē ō Pahihti. Koja mē urāk nē mêmôj punuj pumunh o pa hāmri nē à htÿx kamā hamak o kēp mē ō Pahihti mā tām. Anē.

¹¹ Na hte Jejus mē panē mē pahte amnhī tomnuj rē nē hpānhā mē pamā mē pahte amnhī nhīpêx nyw jagjê nhūm Tirtūm ja hā mē pahpumunh kôt mē pahto hkra. Kēp Jejus Nhīpêêxà nē kēp Mēpanhīpêêxà maati jakamā nhūm Jejusja mē pahpê htō nē mē pahpê htōx ā mē pajarē nē mē panhÿ hā hkīnh nē.

¹² Tirtūm kapēr ā kagà htūm ā mē pajarēnh kot anhÿr. Kamā Jejusja Mēpanhīpêêxà maati mā mē pajarēnh kot:

Koja ixtõ nê ixtõxjaja akapêr mar kaxyw axpên wÿr akuprõ pa ma mẽ hkõt mra nê mẽ kãm akapêr jarê nê mẽ ïhkô hã amex ã gre. Anê.

¹³ Hãmri nê kãm:

Kot paj amnhĩ kaxyw akõt pix mã ijamaxpêr mex o ri ixpa. Anê.

Hãmri nê hpãnhã kãm:

Ot pa akrajê hkõt ri ixpa ho ixpa.

Ka na ka pre mẽ kêp ixtõ nê ixtõx kaxyw inhmã mẽ agõ.

Koja mẽ ixpyrà nê amnhĩ kaxyw amã hamaxpêr rãhã ho pa Tĩrtũm. Anê.

¹⁴ Nê mẽ pahpê pika nhõ xwÿnhjaja na pu htem ãm ri panhĩ pix ã papa. Nê panhĩ kamã pahkamrõ hã ri papa. Jakamã na pre Jesus kot mẽ panê htyk kaxyw mẽ pahwÿr wÿr nê mẽ pahpyrà nê ï ho mẽ pakamã kato. Tã mẽmo kaxyw na pre ï ho ï nê mẽ pahkõt pa? Nã ï ho htyk o Satanasti pê hihtÿx xà ho hapêx par kaxyw na pre ã amnhĩ nhĩpêx anê. Satanasti kêp mẽ kot amnhĩ tomnuj xwÿnhjê hpãm nê kêp mẽ htyk xwÿnhjê hpãm. ¹⁵ Jakamã na hte kot mẽ pahtã ïhkra pikamÿr pyrãk o mẽ panhĩpêx pu mẽ ÿ hã pamã pahtyk pyma nê ri papa. Tã ra Jesus kot mẽ pahwÿr wÿr nê te kêp mẽ papytãr pyrãk o mẽ panhĩpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nê.

¹⁶ Nê Tĩrtũm kapêr o mẽ wÿr xwÿnhjê ho mex kaxyw na pre Jesus pika hwÿr wÿr kêt nê. Mẽ panhĩgêt finat Apraãw pyrã nê mẽ panhĩ ho panhĩ xwÿnhjê ho mex kaxyw na pre wÿr. ¹⁷ Ijaew nhõ patrejaja na pre htem mẽ kot amnhĩ tomnuj mÿrapê mẽ hpãnhã Tĩrtũm mã mry hwÿ pa nê hkamrõ kapĩ nê mẽ ho Tĩrtũm wÿ. Kot hã mẽ omunh nê mẽ mex ã mẽ harênh kaxyw. Tã nhũm Jesus wÿr nê mẽmo mryta pyrã nê ã mẽ panê hkamrõ pikapĩr anê. Kaxyw na pre mẽ pahtõ maatija mẽ pahwÿr ï ho ï nê wÿr nê mẽ pahpyrà nê ni nhõhy rũm kato. Jao kêp mẽ pahto Tĩrtũm wÿr xwÿnh maati. Na pre Tĩrtũm kãm hprãm xà hkõt mẽ panê mẽ pahte amnhĩ tomnuj pãnhã amnhĩrer pa. Tã kot mẽ pahpyrà nê mẽmoj punuj pumunh nê amnhĩ xà htÿx kamã hamak o pa jakamã kêp mẽ pakamã ukapĩr xwÿnh ã pixi mex na. ¹⁸ Kormã htyk kêt ri na pre mẽ pahpyrà nê omnuj nê ri pa. Nhũm mẽkarõmnuti nhõ pahi kot tanhmã amnhĩ tomnuj to hprãm xà tee ri hkõt kãm ahkrox o pa hkapyrõ nhũm hkõt amnhĩ nhĩpêx kêt nê amnhĩ nê ho axtem nê. Jakamã koja Satanastija urãk nê tanhmã mẽ panhĩpêx to nhũm Jesus mẽ pahtã omu nê amnhĩ pyrã nê tanhmã kêp mẽ panhĩpêx to pu mẽ ÿ hã kutã amnhĩ to htÿx nê papa.

3

Jejus kot amnhĩ to rax o Mojes jakrenh ã harênh

Juãw 1.17-18

¹ E ixkrãmnhwÿjaja. Ra Tĩrtũm kot mẽ pahte kapêr mar nê tãm amnhĩ nhĩpêx o ri papa kaxyw mẽ pahto hkra jakamã kwa kêt ka mẽ Jesus kot tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwÿr kumê nhũm mẽ pahwÿr wÿr nê Tĩrtũm kapêr o mẽ pajahkre ho ri mẽ pahkõt pa. Nê te kêp mẽ panhõ patre pyrã nê mẽ pahto Tĩrtũm wÿr o pa. ² Na pre Tĩrtũm finat Mojes kwÿ kaxyw Mojesja xãm nhũm kãm hprãm xà hkõt tanhmã mẽ hipêx to ho pa. Tã nhũm hpãnhã mẽ pakaxyw Kra Jesusja xãm nhũm Mojes pyrã nê Tĩrtũm kãm hprãm xà hkõt pix mã tanhmã mẽ panhĩpêx to ho pa. Hamê na pre wa Tĩrtũm jamaxpêr xà hkõt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nê hipêx pa nhũm hkwÿjaja hwÿr mra nê omu nê mex kumrêx ã harê. Nom kot hipêx xwÿnhhta àhpumunh xà hkõt hipêx jakamã tãm na mex o kot ixkreta jakrenh. Ja pyrã nê finat Mojes kot amnhĩ to rax tã nhũm Jesus kot amnhĩ to rax o kot hakrenh. Mojes te kêp ixkre nhĩpêxta pyrãk no Jesus te kêp ixkre nhĩpêx xwÿnhhta pyrãk jakamã kot amnhĩ to rax o kot Mojes jakrenh.

⁴ Nê mẽ kot ahpÿnhã amnhĩ krã hkõt tanhmã ixkre nhĩpêx to jakamã kot hipêx xwÿnhhta na mex o ixkreja jakrenh. Tã ja pyrã nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwÿnh jakrenh par.

⁵ Nê finat Mojes na pre hte Tĩrtũm kãm hprãm xà hkõt tanhmã amnhĩ nhĩpêx to ho pa. Nê ma kãm hkwÿjê piitã hkõt mẽ kãm kapêr jarênh o ri pa. Tĩrtũm tanhmã kot mẽ

kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh pix na pre.

⁶ Nê Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihtĩ kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ y hã mẽ kutã amnhĩ to htỳx nê papa nê pajamxpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Koja nhỹrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nà ja inhmã hprãm tỳx kumrêx.

Anhỹr o amnhĩ kukamã pajamxpêr o papa.

Mẽ pahte Tĩrtũm kaga hkêt ã mẽ pamã karõ
Wam Korĩt 10.1-11; Jutre 5

⁷⁻⁸ Amnepêm na pre mễhõja tanhmã Tĩrtũm Karõ nhỹ hã kapêr to nê kapêr o: E kêr ka mẽ Tĩrtũm kapêr mar tỳx o apa.

No ama nê ãm ama nê ri hã apa hkêt nê. Rỳ kapêr pê akra hihtỳx o apa hkêt nê.

Mẽ akukamã mẽ anhĩgêjtaja na prem ã amnhĩ nhĩpêx anê nê Tĩrtũm kapêr pê hkrã hihtỳx o pa. Kapôt ã Mojes kôt mẽ pata ã na prem kãm Tĩrtũm kapêr mar prãm kêt nê. Nê tee ri amnhĩ kukamã hamaxpêr nê akupỹm Ejit wỳr hkrã nê axpên mã: “Kwa na pu mẽ ra pahpunuj tỳx nê papa nhũm Tĩrtũm ãm ja hã mẽ pahpumu nê tanhmã mẽ pahto mex to hkêt nê. Mãn ra mẽ pahkaga nã? E kwa pu mẽ awjanã nê ma akupỹm Ejit wỳr mãn papa.” Anê.

⁹⁻¹⁰ Na prem ã axpên mã kapêr anhỹr o ri pa hã amgrà pê 40.

Tĩrtũm xatã kot tanhmã mẽ ho mex to nhũm mẽ kot amnhĩ tã omunh tã ãm omu nê htỳx ri amnhĩ hkrã hkôt pa.

Nhũm tee ri amnhĩ tã mẽ omu nê mẽ kamã gryk nê.

Hãmri nê hamaxpêr o: “Nà pêr mẽ hamaxpêr kot mẽ hã hkwỳ jêt kêt kumrêx. Te mẽ hamak kre hkêt pyrã nê ixkapêr mar kêt nê.” Anhỹr o hamaxpêr.

¹¹ Hãmri nê mẽ kãm: “E mẽ inhma. ã mẽ ate amnhĩ nhĩpêx anhỹrja mỳrapê kot kaj mẽ ma ixte mẽ amã pika mex nhõr mã xwỳnhhta wỳr apa hkêt nê.” Anhỹr o mẽ kãm kapêr. Anê.

ã mễhõja Tĩrtũm Karõ nhỹ hã te Tĩrtũm tãm kot mẽ kãm kapêr pyrãk o mẽ harênh anê.

¹² Jakamã kwa mẽ okora ixkrãmnhwỳjaja. Kêr ka mẽ amnhĩ to mex o apa. Tĩrtũm kêp Mễpahpãm ã pixi mex tã kot kaj mẽ tanhmã ajamaxpêr punuj to rỳ amnhĩ kaxyw hkôt ajamaxpêr kêt hãmri nê te ate amnhĩ katut kôt ãm pyrãk o hipêx nê hkaga. Kwa mẽ ã amnhĩ nhĩpêx anhỹr kêt nê. ¹³ Kêt mẽ Kris kôt axpên to axihtỳx o ri apa. Nê apkati mẽ ã axpên nhĩpêx anhỹr rãhã nê. Kot kaj mẽ anhỹr kêt hãmri nê mẽ amã Tĩrtũm kapêr mar prãm kêt ã amnhĩ to amnhĩrĩt. Jao tanhmã amnhĩ tomnuj to ho ri apa nê atỳx ajamaxpêr o: —Nà ixte ã amnhĩ tomnuj anhỹr tã nhũm Tĩrtũm ja hã ixpumu nê ãm hã ixpumu.

Anhỹr o ajamaxpêr japêr. Rỳ mẽ ajamaxpêr o:

—Nà na pa hte ã amnhĩ tomnuj anê nhũm Tĩrtũm ja hã ixpumu nhũm ja kãm mex nê.

Anhỹr o ajamaxpêr japêr. ¹⁴ Kwa mẽ ri ã ajamaxpêr anhỹr kêt nê. Amnepê mã mẽ pahte Kris kôt amnhĩ xunhwỳr nhũm kot mẽ pahto hkrata ã na pu prem amnhĩ kaxyw hkôt pajamxpêr o papa. Tã kêr pu mẽ arĩ ã amnhĩ nhĩpêx anhỹr tỳx o papa rãhã ty.

¹⁵ Tĩrtũm kapêr ã kagà htũm kot ja jarênh kot:

E kêr ka mẽ Tĩrtũm kapêr ma nê mar tỳx nê.

No ama nê ãm mar nê ri hã apa hkêt nê.

Rỳ mẽ kot hkaga xwỳnhjê pyrã nê kêp akra hihtỳx kêt nê. Anê.

¹⁶ Mễ panhĩgêjtaja na prem Mojes kôt pika pê Ejit rũm kato nê hkĩnh nê ma kapôt ã kormã pika mex wỳr pa. Nom Tĩrtũm kapêr mar nê hkôt amnhĩ nhĩpêx rãhã hkêt nê. Na prem kuma nê hkôt amnhĩ nhĩpêx o hã apkati grêre htã ra mễmoj nhỹ hã omnuj nê pa hã amnhĩ pumu nê tee ri amnhĩ kukamã hamaxpêr. ¹⁷ Jao xatã kapêr nhĩrõp kuhê nê amnhĩ

hkrã hkôt pix mã amnhĩ nhĩpêx o pa ho ra hã amgrà pê 40. Hãmri nhũm tee ri amnhĩ tã mẽ omu nhũm ja kêp omnuj nê. Jakamã nhũm mẽ piitã kapôt ã ri pa nê gaa nê pikaprãr pa. ¹⁸ Mẽ kot kapêr mar kêt jakamã nhũm mẽ kãm:

—Nà ã mẽ ate amnhĩ nhĩpêx anhÿr o ri apaja mÿrapê kot kaj mẽ ixte mẽ amã mẽ amex nhõr mã xwÿnhhta wÿr apa hkêt nê. Anê.

¹⁹ Tã mẽ kot amnhĩ kaxyw Tĩrtũm kôt hamaxpêr o pa hkêt jakamã na prem pika mexta wÿr hpõx kêt rãhã pikaprãr pa. Nhũm mẽ hkra nê mẽ htãmnhwÿjê pixjaja na prem mẽ mÿr pê hwÿr pøj nê kamã pa.

4

Mẽ pahte Tĩrtũm kukwak ri pajamakêtkati nê ri papa hã mẽ pajarênh

¹ Mẽ pahte Tĩrtũm kukwak ri pajamakêtkati nê ri papa ho papaja Tĩrtũm kãm hprãm jakamã kwa kêr pu mẽ amnhĩ pumunh mex o papa. Nê wam mẽ panhĩgêt rom Tĩrtũm kapêr mar tÿx nê hkôt mãn kêt ri amnhĩ nhĩpêx mex rãhã nê. Kêr pu mẽ kurom mẽ pajamak kãm amnhĩ krit xã hã pika mexta wÿr pøj. ² Mẽ kot mẽ pahpyrà nê Tĩrtũm kapêr mar mex tã na htem amnhĩ kaxyw hkôt hamaxpêr kêt nê. Te mẽ kot mar kêt pyrãk. ³ ãm mẽ kot amnhĩ kaxyw Kris mã hamaxpêr xwÿnh pixjaja na htem kukwak ri hamakêtkati nê ri pa ho pa. Amnepê mã mẽmoj piitã hkêt ri na pre Tĩrtũm mẽmoj piitã ho kator pa hãmri nhũm apkati nhũm axte mẽmoj tã àpênh kêt nê. ãm õ krĩ kamã arĩ hamakêtkati nê hkòkôt o hkrĩ. Tã mẽ pahte uràk nê pajamakêtkati nê papa ho papaja na kãm hprãm. No wam ri mẽ pa xwÿnhjaja mẽ kot amnhĩ tomnuj mÿrapê na pre Tĩrtũm mẽ kot urà nê hamakêtkati nê paja nê mẽ hkurê. Kapêr ã kagà htũm kot harênh kot:

Na pre Tĩrtũm tee ri amnhĩ tã mẽ kot hipêx ã mẽ omu nhũm ja kêp omnuj nê. Hãmri nhũm mẽ kãm: “Nà kot kaj mẽ ixkukwak ri axãmnhĩx ajamakêtkati nê apa hkêt nê.” Anê.

⁴ Nê kot harênh kot:

Na pre Tĩrtũm àpênh ã arĩgro kêp 6 hãmri nhũm arĩgro pê 7ta ã nhũm axte mẽmoj tã àpênh kêt nê. Na pre arĩ hkòkôt o nhÿ.

Arĩgro pê 7 ã arĩ hamakêtkati nê hkòkôt o nhÿ. Anê.

⁵ Nê mẽ kot kapêr mar nê ãm mar xwÿnhjê jarênh kot:

Kot kaj mẽ aa ixkukwak ri axãmnhĩx nê ajamakêtkati nê apa hkêt nê. Anê.

⁶ Mẽ panhĩgêjtjaja kot amnhĩ kaxyw Tĩrtũm kôt hamaxpêr kêt jakamã na prem hamakêtkati nê ri pa hkêt nê. Tã mẽ papajaja na Tĩrtũm arĩ kãm mẽ paxãmnhĩx nê pajamakêtkati nê papa hprãm. ⁷ Amnepêm Ijaew Tĩrtũm kôt hamaxpêr kêt jakamã na prem kapôt ã pikaprãr pa. Hãmri nhũm amgrà xohtô nê hapêx nhũm Tĩrtũm mẽ hkanrêhã mẽ htãmnhwÿjê hõ pê finat Tawija mã kapêr nhũm kuma nê mẽ pamã tanhmã kapêr tota ã kagà nê hã kagà kot:

Kwa kêr ka ixkapêr ma nê mar tÿx nê.

No mẽ anhĩgêjtjê pyrã nê akrã hiltÿx ho inhma nê ãm inhmar kêt nê. Anê.

Na pa pre ra mẽ amã ã ja jarênh anê. ⁸ Na pre finat Jojueja finat Mojes mÿr pê ma pika pê Kanaã hwÿr mẽ hkanrêhã mẽ hkrajê o pa nê hwÿr mẽ o pøj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhĩ nhĩpêx anhÿr ronhÿx Tĩrtũm axte mẽ kãm mẽ hamakêtkati nê mẽ hamak kãm amnhĩ krit nê mẽ pata hkukamã harênh kêt nê. ⁹ Nom mẽ pahte kukwak ri pajamakêtkati nê pajamak kãm amnhĩ krit nê ri papa ho papaja na Tĩrtũm arĩ kãm hprãm. ¹⁰ Na pre arĩgro pê 6ja ã mẽmoj piitã ho kator pa nhũm apkati nhũm hamakêtkati nê hkòkôt o nhÿ. Tã kot puj mẽ pahpê hkrajaja amnhĩ to kuwÿ nhũm tanhmã mẽ pahkrã hto pu mẽ kukwak ri uràk nê paxãmnhĩx nê pajamakêtkati nê papa ho papa. Te Tĩrtũm àpênh pa nhũm apkati nhũm hamakêtkati nê hkòkôt o ÿrta pyrãk. ¹¹ Jakamã kwa kêr pu mẽ amnhĩ to kuwÿ kê ã mẽ panhĩpêx anê pu mẽ uràk nê ã amnhĩ nhĩpêx anhÿr rãhã ho papa. Nom kot pu mẽ pahkwÿ Ijaewjê pyrã nê kapêr kwÿm amnhĩ nhĩpêx o papa hãmri nê mẽ urà nê paxãmnhĩx pajamakêtkati nê papa hkêt nê.

Tirtûm kapër te kot wapo xwa gix pyræk ã harênh

¹² Nê Tirtûm kapêrja te ï ho tanhmã kot mëmoj to kaxyw hihtÿx pyræk. Nê te wapo xwa gix pyræk. Koja mëhõ õ wapo xwa mex nê ho mëmoj jakàr mex nê. Ho mry hi jakàr mex pê kaxwÿnh kãm hi kanhÿn o amnhÿrÿt. Ja pyrà nê na hte Tirtûm kapër më pajamaxpêr o amnhÿrÿt nê mex ã harê rÿ omnuj ã harê.

¹³ Nê na htem Tirtûm pê mëmoj to pimxur kêt nê. Na hte hprÿ hã mëmoj piitã omunh pa. Nê më pajamaxpêr kôt më pahpumunh pa. Na pu htem ã kot mëmoj piitã omunh par anhÿr xwÿnhja noo mã tanhmã amnhÿ nhÿpêx to rãhã ho papa.

Jejus kêp më panhõ patre maati hã harênh

Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tirtûm mã amnhÿ jarênh xà hã ixkre hwÿr agjê nê kamã më ho Tirtûm wÿr o pa. Ja pyrà nê na pre ra Jesus Tirtûm nhõ krÿ hwÿr api nê kamã më pahto hwÿr o hkrÿ. Kêp Kra kumrêx jakamã kêp më pahto Tirtûm wÿr xwÿnh maati. Jakamã kwa kêr pu më amnhÿ kaxyw hkôt pajamaxpêr tÿx rãhã ho papa.

¹⁵ Satanasti na pre te kot më panhÿpêx pyræk o Jesus nhÿpêx. Nê tee ri kot tanhmã kãm kapêr to nhÿm kot mar nê tanhmã amnhÿ tomnuj to hprãm xà ãm ri kãm ahkrox kaprÿ nhÿm kutã amnhÿ to htÿx nê hkôt amnhÿ nhÿpêx kêt nê. Tã kot Satanasti kot amnhÿ nhÿpêx ã omunh mex jakamã na hte kêp më pahtãnopxar mex o pa. Kot më paxirerek kôt më pahpumunh mex. ¹⁶ Jakamã kwa kêr pu më amnhÿ tã kamã pahpijaàm kêt kãm paxãmnhÿx ri amnhÿ to hwÿr o papa. Kêp më pakutã nojarêt xwÿnh nê kêp më pakamã ukaprÿ xwÿnh jakamã kêr pu më tee ri mëmoj tã amnhÿ pumu nê amnhÿ to hwÿr kurê kumrêx. Hãmri nê ÿ hã paxãmnhÿx nê pajamakêtkati nê ri papa.

5

¹ Nê më panhõ patre maati Jesusja Tirtûm na pre më pakaxyw ãm. Kêp më pahkwÿ hã më pakaxyw ãm nhÿm hte më pahto Tirtûm wÿr o pa. Nê kãm më pahkÿnh xà nhõr o pa. Kot ja hã më pahpumunh nê më pahte kapêr kwÿm tanhmã amnhÿ nhÿpêx to ho papa hã më pakamã gryk o hapêx tokyx anhÿr kaxyw.

² Më panhÿgêtjaja na pre htem më õ patre maati hwÿr mra nê kãm tanhmã amnhÿ tomnuj to hã amnhÿ jarê nhÿm më kuma nê më kamã ukaprÿ nê. Më urã nê kormã kot Tirtûm kôt amnhÿ nhÿpêx totuj anhÿr jakamã na pre më kot tanhmã amnhÿ jarênh toja ma nê më kamã ukaprÿ nê. ³ Hãmri nê më hpãnhã Tirtûm mã mëmoj gõ nê mãânên amnhÿ pãnhã kãm mëmoj gõ. Më uræk nê kot amnhÿ tomnuj o paja mÿrapê amnhÿ pãnhã kãm mëmoj gõ. ⁴ No na pre hte patrejaja amnhÿ krã hkôt kêp patre maati kaxyw amnhÿ xunhwÿr kêt nê. Tirtûm kot më kaxyw më unhwÿr jakamã na pre më kaxyw finat Arãwja xãm nhÿm kêp më õ patre maati hã më ho Tirtûm wÿr o pa.

⁵ Nê Kris haxwÿja kêp më panhõ pahi maati hã tãm kot amnhÿ xãm kêt. Tirtûm na pre më pakaxyw ãm nê tanhmã kãm kapêr to nê kãm:

Nà apê Ixkra na ka.

Kot paj jarãhã ixpê Anhÿpêxã hã më kãm amnhÿ jarê. Anê.

⁶ Nê hpãnhã kãm:

Kot kaj Mekijetek pyrã nê apê patre maati hã më ho ixwÿr rãhã ho ri apa. Anê.

⁷ Jesus kormã pika ja kamã pa ri na pre amnhÿ to Tirtûm wÿr rãhã ho pa. Tõhã hkaprÿ nê tee ri mëmoj tã amnhÿ pumu nê amnhÿ to kuwÿ. Nê tee ri më kot hpÿrta kukamã hamaxpêr nê mÿr kãm amnhÿ to kuwÿ. Kop apu Tirtûm kãm më kot kêp hpÿr prãm kêt ronhÿx pre tanhmã nê më kãm hkurê xwÿnhjê ho nhÿm më hpÿr kêt nê. Jakamã nhÿm pre ã amnhÿ to hwÿr anê. No ãm Tirtûm kãm prãm xà hkôt kãm amnhÿ nhÿpêx prãm jakamã nhÿm kuma no ãm tanhmã nê më ho hkêt nhÿm prem kupÿ. ⁸ Kêp Tirtûm Kra kumrêx tã amnhÿ xà htÿx kãm hamak kãm ty. Jao Tirtûm kãm hprãm xà hkôt amnhÿ nhÿpêx ã amnhÿ pumunh mex nê. ⁹ Na pre amnhÿ xà htÿx kãm hamak o amnhÿ mex o amnhÿ mex ã më kãm amnhÿ to amnhÿrÿt. Jakamã na hte më kot kapêr kôt ri amnhÿ nhÿpêx o më pa xwÿnhjê mã më kot amnhÿ nhÿpêx nyw jagjê nê nhÿrmã Tirtûm më wa

kuri mē htīr tūm nē mē pa mā xwýnhjê hã mē harê. ¹⁰ Jakamã na pre Tīrtūm Mekijetek pyrã nē kêp patre maati kaxyw ãm.

*Mē pahte Kris kaga nē mē pahkurê
Wam Korīt 3.1-2, 13.11, 14.20; Epes 4.11-16*

¹¹ Nē Jejus kêp mē pahto Tīrtūm wýr xwýnh maati hã harēnhja inhmã ixprī hã mē amã harēnh par prãm tã ka mē kormã inhmar tỳx kêt nē. Pa tee ri ixprī hã mē amã harēnh kaprý. Te mē amã mar prãm kêt o amör pyrãk. ¹² Amnepê mã mē ate Kris kôt amnhī xunhwýr nē kapër mar tỳx tã kormã nhãm amnhī xô ri ho amnhī kwýjê jahkre ho ri apa hkêt nē. Te mē ate hã ano hkêt pyrãk jakamã na pa hte arī mē amã kapër kot amnhīrīt mex xwýnh kwý ho mē ajahkre ho pa. No kot amnhīrīt mex kêt xwýnh o mē ajahkre hkêt nē. Te mē hkaràre kot amnhī nhīpêx pyrãk o na ka htem amnhī nhīpêx o apa. Na hte mē hkaràre mēo mex kur kêt nē. ãm kormã katorxà hkà pix kaô. Ja pyrã nē ãm Tīrtūm kapër kot amnhīrīt mex xwýnhhta pix na ka mē mar tỳx o apa nom kapër kot amnhīrīt mex kêt xwýnhja ka mē mar mex kêt nē.

¹³ Nē mē hkaràre kormã Tīrtūm kapër mar kêt jakamã na htem kormã mēmoj mex nē mēmoj punuj pumunh kêt nē. Tã te mē ate mē kot amnhī nhīpêx pyrãk.

¹⁴ Mē kot Tīrtūm kapër mar mex xwýnhjaja na htem hprī hã kapër piitã mar tỳx nē. Kot amnhīrīt mex xwýnhhta mar tỳx nē mãänēn kot amnhīrīt mex kêt xwýnhja nhūm mēhprī hã piitã mar tỳx nē. Te ho mē aptàr kot mēo mex kur o pata pyrãk. Jao ra mē aptàr jamaxpër o hamaxpër o ri pa nē hamaxpër o:

—Kot paj tãm amnhī nhīpêx o ri ixpa nhūm ja inhmã mex nē. Nom kot paj axtem tanhmã amnhī tomnuj to nhūm ja ixpê omnuj nē. Jakamã kot paj tãm amnhī nhīpêx pix o ri ixpa nhūm Tīrtūm mã ja mex nē. Anē.

6

¹⁻² Na pu prem ra Tīrtūm kapër kot amnhīrīt mex xwýnhhta kwý ma. Tãm na ja: Kris kot mē panê tanhmã amnhī nhīpêx to hã harēnhja.

Nē mē pahte amnhī tomnuj kaga hã kot mē pamã karōja.

Nē amnhī kaxyw Tīrtūm kôt mē pajamaxpër ã mē pamã karōja.

Nē mē pahpê Tīrtūm kra hã amnhī to amnhīrīt kaxyw mē kot mē pahkrã kumrãr ã pamã karōja.

Nē mē pahte Tīrtūm mã tanhmã amnhī nhīpêx to ho papa hkukamã mē kot mē pahkrã hã ìhkra jaxwýr nē mē pahto Tīrtūm wýr ã mē pamã karōja.

Nē mē pahtyk nē akupým mē pahtīr ã mē pajarēnhja.

Nē Tīrtūm kot nhýrmã mē kot amnhī xà htỳx kãm hamak tūm xà hwýr mē kêp hkra hkêt xwýnhjê janorja.

Mēmojja piitã pu mē ra harēnh mar tỳx nē. Prī hã kot amnhīrīt mex. Tã kwa kêr pu mē hpãnhã hijuk ri kot amnhīrīt mex kêt xwýnh kwý ma. Jao mē pahpê Tīrtūm kra xàptàr mex nē ri papa. ³ Jakamã kwa kêr pu mē kot amnhīrīt mex xwýnh kumrêx kwý ma nē hpãnhã hijuk ri kot amnhīrīt mex kêt xwýnh kwý ma. Nē axpēn mã harēnh rãhã ho ri papa. Nà koja Tīrtūm kãm ja prãm pu mē ã amnhī nhīpêx anhýr rãhã o ri papa.

⁴⁻⁶ Na pre ra mē pahkwýjjaja Kris kaga nē htỳx ri amnhī nhīpêx o pa. Mē kot kapër mar tỳx tã axtem nē hkaga jakamã koja mē axte kapër mar kêt nē. Ra mē kãm mar prãm kêt. Kot puj mē tee ri axte mē kãm harēnh o papa kaprý. Na prem hprī hã kuma. Tīrtūm kãm mē ho hkra hprãm ã harēnhja nhūm prem hprī hã kuma nē kãm mar prãm nē hkôt amnhī xunhwý. Hãmri nhūm Tīrtūm Karō te mē panhīpêx pyrã nē mē hkarō mã agjê nē mē kot amnhī to mex o pa kaxyw tanhmã mē hkrã hto nhūm prem ý hã tanhmã kãm amnhī nhīpêx to ho pa. Nē kãm Tīrtūm kapër mar prãm nē. Nē axpēn mã mex o mex ã harēnh o pa. Nē aa mē kot mēmoj pumunh kêt kwý pumu nē axpēn mã harēnh o:

—Nà Krisja ãm hãmri àhpumunh tỳx o àhpumunh tỳx. Koja nhýrmã akupým mē pahwýr wrý nē axte mē pamã àhpumunh tỳx o amnhīrīt pu mē omu.

Anhÿr o kapêr tâ tanhmã hamaxpêr to nê hkaga. Jakamã te mē kot axte Tirtûm pê Krata pĩ hã nhôr nê hpĩr pyrãk. Nê te mē piitã mē noo mã tanhmã haprÿ hto nê tanhmã kãm kapêr punuj to pyrãk. Jakamã kot pu mē tee ri akupÿm tãm mē unhwÿr prãm kaprÿ.

⁷Na hte Tirtûm mē pahto mex rãhã ho pa. Jao mē pamã mē pahpur ã na rê pu mē kamã panhõ rûnh nê. Jakamã mē kot amnhĩ kaxyw Kris kôt hamaxpêr nê hkôt amnhĩ xunhwÿr prãm xwÿnhjaja te mē hpur mex nê kamã mēmoj ô rûnh pyrãk. Nê urãk nê amnhĩ to mex o pa. ⁸Nom koja mē hpur kãm mēmoj nhĩgrôt mex kêt japêr. Kamã mrônhi nê kahpare nê mēmoj punuj pix hapôj nhũm mē tee ri omu nê hkaga kurê kumrêx. Tã mē kot Kris kaga xwÿnhjaja te pur punuj kot amnhĩ nhĩpêxta pyrãk nhũm Tirtûm te kêp pur nhõ dôn pyrãk. Jao tee ri amnhĩ tâ mē kot amnhĩ nhĩpêx ã mē omu nê mē hkaga kurê kumrêx nê ma mē kot amnhĩ xã htÿx kãm hamak tũm xã pê kuwyta wÿr mē rênha pa.

⁹E ixkrãmnhwÿjaja. Inhmã mē akĩnh jakamã na pa ã mē amã mē kot Kris kaga xwÿnhjê jarênh anê. Nom te mē ate mē urãk kêt. Kris kôt mē ate amnhĩ xunhwÿr xwÿnh mex na ka mē. Ra mē ate hkôt amnhĩ xunhwÿr tÿx jakamã te mē apê pur mexta pyrãk. ¹⁰Na ka htem Kris kôt mē akwÿjê ho mex o ri apa. Te mē amã amnhĩ tâ ma pyrãk o axpên nhĩpêx o ri apa nhũm Tirtûm ja hã mē apumu. Tã koja tanhmã ja hã mē ato mex to. Kot tãm mē panhĩpêx o pa jakamã koja tanhmã mē ate axpên nhĩpêx mex tota ã tanhmã mē ato mex to.

¹¹Tã kêr ka mē arĩ ã axpên nhĩpêx anhÿr o ri apa rãhã ty kê nhÿrmã ja hã mē ato mex nê. ã mē ate amnhĩ nhĩpêx anhÿr o apaja na inhmã hprãm tÿx kumrêx. ¹²Kot kaj mē ã amnhĩ nhĩpêx anê hãmri nê amã kaga nê apa hkêt nê. Nê amnhĩ nhĩpêx o te Tirtûm kra hkwy htyk xwÿnhjaja kormã htĩr ri kot amnhĩ nhĩpêxta pyrãk. Na prem amnhĩ kaxyw Tirtûm mã hamaxpêr tÿx rãhã ho pa. Kot mē ho mex ã mē hã amnhĩ jarênhja nhũm prem amnhĩ tâ kamã hamak rãhã ho pa. Tã amnhĩ tâ kamã hamak o pa ry rax rãhã ty nhũm Tirtûm ra kot mē hã amnhĩ jarênh xã hkôt mē ho mex nê. Tã kêr ka mē urãk nê ã amnhĩ nhĩpêx anhÿr o ri apa rãhã ty. ¹³⁻¹⁵ã na pre finat Apraãwja amnhĩ nhĩpêx anê. Kormã hkra hkêt tâ nhũm Tirtûm kãm hkra nê kanrêhã htãmnhwÿjê hkukamã tanhmã mē harênh to nê kãm:

—Pa Apraãw. E inhma. Kot paj aprõ mē war ato mex nê. Kot kaj war akra hãmri nê gaa nhũm akanrêhã war atãmnhwÿjaja ohtô rax kumrêx. ãm hãmri na pa ã mē hkukamã amã mē harênh anê. Kot paj amã amnhĩ jarênh xã hkôt ã anhĩpêx anê. Ixpê mē anhĩpêx xwÿnh na pa ã amã amnhĩ jarênh anê. Anê.

Tã ã kãm wa hkra jarênh anhÿr tâ nhũm wa tokyx hkra hkêt nê. Nom tee ri ja hã amnhĩ pumu nê Tirtûm kot wa kãm hêx ã hkamnhix kêt nê. ãm hkamnàr rom ã hamaxpêr anê nê hamaxpêr o:

—Nà kot paj wa nhÿrmã ixkra. Tirtûm tãm kot wa inhmã wa ixkra jarênh kênã. Anê.

Tã nhũm amgrã xohtô rax kumrêx nê hapêx nhũm wa hkra. Nhũm axte amgrã hkwy hapêx nhũm wa hkanrêhã htãmnhwÿ hkwy. Ra Tirtûm kot mē hkukamã Apraãw mã mē harênh xã hkôt. Tirtûmja hihtÿx o hihtÿx nê àhpumunh o àhpumunh jakamã na pre amnhĩ jarênh xã hkôt ã wa kãm wa hkra nê wa htãmnhwÿjê nhõr anê. Kot ra wa kãm hã amnhĩ jarênh xã hkôt. No ri nhãm mēhõ nhĩxi jarênh kôt wa kãm wa hkra jarênh kêt nê. Mēhõ kot we hihtÿx o hihtÿx o Tirtûm jakre nhũm we ri hixi jarênh kôt ã wa kãm mē harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xã hkôt na pa ã war amã war akra jarênh anê. Anê.

¹⁶No pika ja kamã na htem ã amnhĩ jarênh anhÿr kêt nê. Na htem mēhõ mã tanhmã mēmoj tâ amnhĩ jarênh to kaxyw nê mēhõ hihtÿx o kot hakrenh xwÿnh nhĩxi jarênh kôt amnhĩ jarê. Nê amnhĩ jarênh o:

—Nà ixte jahti noo mã ã amã amnhĩ jarênh anhÿr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtÿx o kot hakrenh xwÿnhhta kot hã harênh mar nê hã tanhmã homnuj to pymaj na htem ã mē hixi jarênh kôt mēmoj tâ amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xã hkôt tanhmã mēmoj nhĩpêx

to. ¹⁷ Nom Tirtûm na hte urak nê nhâm mēhō nhīxi jarēnh kôt ri mēmoj tā amnhī jarēnh kêt nê. Na hte tām amnhī jarēnh xà hkôt mēmoj to anê nê aa hā amnhī to hêx kêt nê. Na pre mē pahpê hkrajê mā kām:

—Kot paj nhÿrmā mē ato mex rax nê. Ām hāmri na pa mē amā amnhī jarē. Ixte amnhī pumunh xà hkôt na pa ā mē amā amnhī jarēnh anê. Anê.

Mē pahte ām hāmri kot amnhī jarēnhja mar nê amnhī to hêx kêt ā omunh kurê kumrêx kaxyw. Koja Tirtûm mēmoj tā ā amnhī jarēnh anê hāmri nê hijuk ri axtem hpānhā tanhmā amnhī jarēnh to hkêt nê. ¹⁸ Jakamā koja nhÿrmā ma amnhī wÿr mē pahto āpir ā amnhī jarē hāmri nê ām hāmri amnhī jarē nê amnhī jarēnh o:

—Nā ām hāmri ixte amnhī pumunh xà hkôt na pa mē amā ja hā amnhī jarē. Anê.

Koja ā amnhī jarēnh anê hāmri nê hijuk ri axte hpānhā tanhmā mēmoj jarēnh to hkêt nê. Ra kot ā amnhī jarēnh anhÿrja koja arī rāhā nê. Jakamā e kwa kêr ka mē tee ri amnhī kukamā ajamaxpêr o ri apa hkêt nê. Ra mē pamex nê ri papa kaxyw Tirtûm kôt amnhī xunhwÿr jakamā kêr pu mē arī kot mē pahto mex rax xà hā arīgrota jamār rāhā ho ri papa.

¹⁹ Na hte kanôre ho htÿx xāja kanôre ho htÿx nhūm ma gô hkôt pa hkêt nê. Ja pyrā nê kot puj mē Tirtûm kot mē pahto mex xà kamā pajamak o papa hāmri nê hkaga hkêt nê.

Amnepê mā na pre hte mē panhō patre maatija Tirtûm mā amnhī jarēnh xà hā ixkre hwÿr agjê nê hkôt ā kupêxê ho hitom maati hwÿr agjê nê kamā mē ho Tirtûm wÿr o kuhê. Tā nhūm Jejus akupÿm kaxkwa hwÿr api nê Tirtûm ri hkrī hāmri nê patre maatita pānhā tām mē pahto hwÿr o hkrī. ²⁰ Na pre ra mē pakukamā kaxkwa hwÿr api nê kamā pa ho pa nê finat Mekijetekja pyrā nê kêp mē panhō patre maati. Tā koja mē pahto Tirtûm wÿr rāhā nê pa ho pa.

7

Patre Mekijetek jarēnh

¹⁻³ E kot paj ixprī hā mē amā tanhmā finat Mekijetekja jarēnh to ka mē inhma. Krī pē Sarē kamā na pre kêp mē ō pahi nê määnēn kêp mēō patre. Sarēja mē pakapêr kām kêp: “Mē hamakêtkati nê ri mē pa xwÿnhjê nhō krī.” Jakamā Mekijetekja mē pakapêr kām kêp: “Mē hamakêtkati nê ri mē pa xwÿnhjê nhō pahi.” Nê määnēn kêp: “Pahi kot tām amnhī nhīpêx o pa xwÿnh.” Nê Mekijetek nhīpêxà nê katorxà nê higêt nhīxija mē pahte harēnh mar kêt. Nê kator ā arīgro nê htyk ā arīgroja määnēn mē pahte harēnh mar kêt. Tirtûm kapêr ā kagā htūm kot tanhmā ja jarēnh to hkêt. Ām Jejus pyrā nê kêp patre hā mē ho Tirtûm wÿr rāhā ho pa xwÿnh pix ā kot harēnh. Ām ja pix na mē pahte harēnh mar. Nê kot amnhī to rax xwÿnh jakamā na pre Apraāw nhÿri omu nê hā hpijaām kaxyw kām hikukrêx kwÿ gō. Na pre hkwyjê mē ra mē urojê kutā amnhī xunhwÿ nê pijapu nê mē kêp mē ō pahi ho 4 nê mē himex. Nê mē kêp mē hikukrêx kwÿptā nê hamÿ nê ma ō krī hwÿr o mō. Nê kormā pry hā mōr ri Mekijetek kaxpa nhūm amnhī wÿr omu nê kām:

—Pa Apraāw? E kê Tirtûm ato mex nê ka amex nê apa. Anê.

Nhūm amnhī tā kuma nê hkīnh nê. Hāmri nê kām mē hikukrêx kwÿptār xwÿnhhta hkwy gō nhūm hamÿ nê ma amnhīm o mō. ⁴ Na pre Apraāw kot amnhī to rax ā omu nê kām mēmojta kwÿ gō. Kêp mē pahpê Ijaew pār krax jakamā määnēn kot amnhī to rax tā Mekijetekja urak nê kot amnhī to rax ā omu nê kām mēmota kwÿ gō. ⁵ Finat Mojes kot Ijaew mā Tirtûm kapêr jarēnh xà hkôt kām kugō. Na pre mē kām:

—Mē akwÿ pē finat Rewi hkanrēhā htāmnhwÿjaja kêp mē anhō patre jakamā kêr ka mē kām mē akukrêx kwÿ nhōr o ri apa. Kot kaj mē akrit kêp 10 nê kām ho pixi nê agō. Nê mē akāxpore kêp 10 nê kām hō gō. Kêr ka mē ā mē kām mē akukrêx nê mē akrit kwÿ nhōr o apa anê. Nê kêr ka mē kām mēmoj mex pix gō. Mē kêp mē akwÿ na mē. Mē apiitā mē apê Apraāw kanrēhā htāmnhwÿ jakamā kêr ka mē ā mē hipêx anhÿr o apa. Anê.

⁶ Tā Mekijetekja kêp Rewi hkwy hkêt tā nhūm Apraāw amarī ā hipêx anê nê kām pahi htyk xwÿnhjê kukrêxta kwÿ gō. Jao hikukrêxta kamā mēmoj kêp 10 nhūm omu nê kamā

kām ho hpÿnh nê kugō. Na pre ã kām mēmoj nhōr anē. Hāmri nhūm amnhīm hamy nê kām:

—Nà ãm hāmri koja Tirtūm ato mex rax nê. Anē.

Ra Tirtūm kot Apraāw kanrēhā kām htàmnhwÿ ho ohtō nê mē hkukamā mē harēnh jakamā nhūm Mekijetekja ã kām Tirtūm kot ho mex ã harēnh anē. ⁷ Mē kot amnhī to rūnh o mē hakrenh xwÿnh pixjaja Tirtūm kot mē ho mex kaxyw mē ho àhwÿr o pa jakamā na pre Apraāw o Tirtūm wÿ. Jao kot amnhī to rax o kot hakrenh ã amnhī to amnhīrīt. ⁸ Hāmri nê Rewi hkanrēhā htàmnhwÿ kot amnhī nhīpêx pyrā nê Apraāw o Tirtūm wÿ nê kêp mēmojta jamy. Mē urāk nê mēmoj kamā kêp 10ja rūm ho hpÿnh nê amnhīm hamy. Nom kot amnhī to rax o Rewi hkanrēhā htàmnhwÿjê jakrenh. Tirtūm kapêr ã kagā htūm kot Rewi hkanrēhā htàmnhwÿjê htyk par ã mē harēnh tā tanhmā Mekijetek htyk ã harēnh to hkêt jakamā kot amnhī to rax o kot Rewi hkwyjê jakrenh.

⁹⁻¹⁰ Nê kot pry kamā Apraāw kaxparta ã kormā Rewi kator kêt tā kêp Apraāw kanrēhā htàmnhwÿ mā xwÿnh. Jakamā nhūm Apraāwja Mekijetek mā mē hikukrêxta kwÿ nhōr jao te Rewi mā ōr pyrāk. Tā nhūm amgrā xohtō nê hapêx nhūm Rewi hkanrēhā htàmnhwÿjaja hapōj nê kêp mē ō patre nê ri pa. Jao Mekijetek pyrā nê mē kêp mē hikukrêx kwÿ jamÿnh o ri pa.

¹¹ Nê finat Mojes na pre Ijaewjê mā tanhmā Rewi hkanrēhā htàmnhwÿjê jarēnh to. Kormā mē hapōx kêt ri nhūm hkwyjê mā tanhmā mē harēnh to. Mē kêp patre hā mē harē. Tā nhūm mē hapōj nê hprêk nê mē ho Tirtūm wÿr o ri mē hkôt pa. Nom mē kot tām amnhī nhīpêx o pa kaxyw na prem tanhmā mē hkrā hto hkêt nê. Tanhmā kot mē amnhī to nê ã mē hipêx anē? Jakamā nhūm Tirtūm mē hpānhā mē pahwÿr kyj rūm mēhōja mē nhūm mē pahwÿr wrÿ. Nom kêp Rewi hkanrēhā htàmnhwÿ hkêt. Nê määnēn kêp Rewi hpām Arāw kanrēhā htàmnhwÿ hkêt. Axtem te Mekijetek kot amnhī nhīpêx pyrāk xwÿnh na pre. Jejus Krisja. Tām na pre mē pahwÿr wrÿ hāmri nê tanhmā mē pahkrā hto pu mē ÿ hā tām amnhī nhīpêx o papa. ¹² No Mojes kapêr kot Rewi hkanrēhā htàmnhwÿ pixjaja kêp mē ho Tirtūm wÿr xwÿnh ã mē harēnh. Tā nhūm Krisja mē pahwÿr wrÿ nê mē hpānhā kêp mē pahto àhwÿr o pa xwÿnh. Jakamā na pu htem axte Mojes kapêr kôt amnhī nhīpêx kêt nê. Pānhā Jejus kapêr kôt pix mā amnhī nhīpêx o papa.

¹³⁻¹⁴ Nê Jejus kêp Rewi hkanrēhā htàmnhwÿ hkêt. Katorxā hkôt kêp Apraāw tàmnhwÿ Juta hkanrēhā htàmnhwÿ na pre. Ra mē pahte ja mar mex. Aa Juta hkanrēhā htàmnhwÿjaja kêp patre hkêt. Na pre Tirtūm jajê mā mē kot mēmoj nhōr xā hā mēsti kunīhtita ã kām mēmoj nhōr nê hkwyjê ho hwÿr ã mē kām karō hkêt nê. ãm Apraāw tàmnhwÿ Rewi hkanrēhā htàmnhwÿjê mā pix mā na pre ã mē kām ja hā karō anē. Tā nhūm Jejus wrÿ nê mē hpānhā mē pahto hwÿr o pa. Mē urāk nê kêp Rewi hkanrēhā htàmnhwÿ hkêt axtem kêp Juta hkanrēhā htàmnhwÿ htā Rewi hkwyjê hpānhā mē pahto Tirtūm wÿr o pa.

Mekijetek pyrā nê mē pahto Tirtūm wÿr xwÿnh jarēnh

¹⁵⁻¹⁹ Nê Ijaewja na prem Mojes kapêr mar tÿx nê hkôt amnhī nhīpêx tā aa amnhī to mex kêt nhūm Tirtūm tee ri ja hā mē omu nê hamaxpêr o:

—Nà Rewi hkanrēhā htàmnhwÿjaja kêp mē ō patre nê mē ho ixwÿr o pa htā nhūm mē arī htÿx ri amnhī tomnuj pix o pa. Jakamā koja mē axte ri mē ho ixwÿr o pa hkêt nê. Anē.

Hāmri nê mē pakaxyw mē pahto àhwÿr xwÿnhja ta nê ãm. Kra Jejusja nhūm kuta nê ãm. Tām na hte Rewi hkwyjê rom tanhmā mē pahkrā hto pu mē kukwak ri tām amnhī nhīpêx nê Tirtūm kôt amnhī nhīpêx mex nê. Jao nhÿrmā ma mē pahte Tirtūm nhō krī hwÿr paxāpirja jamār o papa.

Jesus na hte Mekijetek pyrā nê kêp mē panhō patre maati nê mē pahto Tirtūm wÿr rāhā ho pa. Kêp Rewi hkanrēhā htàmnhwÿ hkêt tā Tirtūm pyrā nê kêp htir tūm nê pa ho pa xwÿnh jakamā na pre Tirtūmja mē pakaxyw kuta nê mē pahwÿr kumē. Kapêr ã kagā htūm kot harēnh kot:

Kot kaj Mekijetek pyrā nê mē ho ixwÿr rāhā ho ri apa. Anē.

20-21 No Rewi hkwyjê mã na pre ã kapêr anhÿr kêt nê. ãm Jesus pix mã ã kapêr anê nê kãm:

E kot kaj apê mẽ ho ixwÿr rãhã o apa xwÿnh. Kot paj nhÿrmã apãnhã axtem mẽhõ xãm kêt nê. ãm kapxipix kot kaj mẽ ho ixwÿr o apa rãhã ho rãhã. ãm hãmri na pa amã ã ixkapêr anê. Ixpê Pahi Maati hã ã ajarênh anê.

22 Anhÿr jao Jesus kot amnhĩ to rax o Rewi hkwyjê jakrenh par ã ho amnhĩrit. Mẽ kot Ijaew mã Tĩrtũm kapêr jarênh nhũm mẽ kot mar nom hkõt amnhĩ nhĩpêx kêt jakamã nhũm Tĩrtũm mẽ hpãnhã Jesus xãm. Tapxipix na hte tanhmã mẽ pahkrã hto pu mẽ tãm amnhĩ nhĩpêx mex o ri papa. 23 Rewi hkwyjaja na prem axpên mÿr pê kêp mẽõ patre nê ri pa htã htyk pa nê hapêx. 24 Nom Jesusja htĩr tũm nê pa ho pa xwÿnh jakamã koja mẽ urak nê aa hapêx kêt. Koja mẽ pahto Tĩrtũm wÿr rãhã ho pa nê aa jam urer kêt nê. 25 ã Jesus kot amnhĩ nhĩpêx anhÿr jakamã te kêp Tĩrtũm wÿr mẽ panhõ pry pyrak. Na pu htem hkõt amnhĩ xunhwÿ nhũm mẽ panê mẽ pahte amnhĩ tomnuj piitã rênh pa nê mẽ pahpê Tĩrtũm kra hã mẽ pajarê.

26 Nê ãm hãmri kêp mẽ pahto Tĩrtũm wÿr xwÿnh maati mex na. Mẽ pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tĩrtũm kot amnhĩ wÿr ho àpir jakamã nhũm ra kuri mẽ pahto hwÿr rãhã ho pa. 27 Nê kot amnhĩ to rax o wam mẽõ patre maati jê jakrenh. Wamtaja na prem hkwyjê pyrã nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarê nê amnhĩ to kuwÿ. Hãmri nê rĩ kormã kot nhãm mẽ hwÿr mẽ mrrar xwÿnhjê mã mẽ ho anê nê mẽ hpãnhã Tĩrtũm mã mẽmoj nhõr pê mẽ ho kuwÿ. No kêt Jesusja wam patre maati rom aa kot amnhĩ tomnuj kêt jakamã na pre hte mẽ urak nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhÿr kêt nê. Mo kaxyw kot kêt axte mẽ panê ty?

28 Mojes kapêr kõt na pre Ijaew amnhĩm Rewi hkwyjê xunhwÿ nhũm mẽ kêp mẽ õ patre nê ri pa. Tã no nhũm mẽ urak nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

—Nà kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho ixwÿr o apa rãhã ho rãhã. Anê.

8

Jesus kêp mẽ pahto Tĩrtũm wÿr xwÿnh maati hã harênh

Rukre 22.20; Sikũn Korĩt 3.6-11

1 E kot paj axtem tanhmã mẽ amã mẽ pahto Tĩrtũm wÿr xwÿnh maatita jarênh to ka mẽ inhma. Na hte kaxkwa kamã Tĩrtũm nhĩhkõ hã hkrĩ. ĩhkõ hã kêp Pahi Maati hã hkrĩ xã hã upõk rũm hkrĩ ho hkrĩ. 2 Wam patre maati jaja na prem Tĩrtũm nhõrkwÿ kaàkre wÿr mra nê kamã hitom maati kamã mẽ ho Tĩrtũm wÿr o pa. Nom nhũm Jesus na hte mẽ kurom kaxkwa kamã Tĩrtũm nhõrkwÿ mex kãm mẽ pahto àhwÿr o hkrĩ. Õrkwÿ kaàkreja na prem ĩhkra ho hipêx nom kaxkwa kamã õrkwÿ mexja na pre mẽhõ ĩhkra ho hipêx kêt nê. Tĩrtũm na pre tanhmã hipêx to nhũm kamã Jesusja mẽ pahto hwÿr o hkrĩ.

3 Nê mẽ pahpê Ijaew nhõ patre maati jaja na prem mẽ ho hwÿr kaxyw nê mẽ kot amnhĩ tomnuj pãnhã Tĩrtũm mã mẽmoj nhõr kõt mẽ ho kuwÿ. No Kris na hte ã amnhĩ nhĩpêx anhÿr kêt nê. Ra htyk o kot kãm amnhĩ nhĩ nhõr jakamã na hte wam patre maati pyrã nê xatã kãm mẽmoj nhõr kêt nê.

4 Tã na hte arĩ Ijaew Mojes kapêr kõt amnhĩm Rewi hkwy kêp mẽ õ patre kaxyw mẽ unhwÿ nhũm mẽ ho Tĩrtũm wÿr o pa. No Jesus kêp Rewi hkanrêhã htãmnhwÿ hkêt. Katorxã hkõt kêp Juta hkanrêhã htãmnhwÿ jakamã kop apu arĩ jar pika ja kamã htĩr nê pa ronhÿx Ijaew nhõ patre pyrã nê kêp mẽ ho Tĩrtũm wÿr o pa xwÿnh kêt. ãm Rewi hkanrêhã htãmnhwÿ pixjaja na htem mẽ kaxyw kãm mẽmoj gõ nê hkõt mẽ ho kuwÿ. 5 Jar na htem arĩ ã amnhĩ nhĩpêx anhÿr o pa nom kaxkwa kamã na htem ã amnhĩ nhĩpêx anhÿr hkêt nê.

Nê jar Tirtûm nhörkwÿ kaàkreja te kot kaxkwa kamã örkwÿ mexta pyrãk. Na pre Mojes örkwÿ kaàkre nhîpêx kaxyw nhûm Tirtûm tanhmã kãm hã karõ hto nê kãm:

—E jãã hixêt prêk nhîmök ã axãmta ã na pa pre amã ixkreta kukamã ixprî hã tanhmã mē ate hipêx to hã amã karõ. Tã kêr ka ã hipêx anê. Anê.

Hãmri nhûm kuma nê kot kãm hã karõ xã hkôt hipêx. Hãmri nhûm mē õ patre maati ixkreja kamã mē ho Tirtûm wÿr o pa. Na prem ã amnhî nhîpêx anhÿr o pa.

⁶ Tã nhûm ra Tirtûm axtem mē hpãnhã mē pakaxyw Kris xãm nhûm hte mē pahto hwÿr mex o wantajê jakre. Na hte kaxkwa kamã mē pahpiitã mē pahpumunh mex rãhã ho hkrî nê wantajê rom tanhmã mē pahkrã hto pu mē tãm amnhî nhîpêx o ri papa. Tirtûm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mē pahtyk tã akupÿm pahtîr nê nhÿrmã Tirtûm mē Jesus wa kuri pamex nê pahtîr tûm nê papa ho papa nê axte pahtyk kêt nê.

⁷ Kêp apu Tirtûm kot Mojes mã kapêr kôt mē kot tãm amnhî nhîpêx o pa ronhÿx pre Tirtûm axte kapêr nyw ã kagã hkêt nê. ⁸ Nom wam kapêr tûmta na pre mē mar tÿx htã arî amnhî tomnuj rãhã ho pa nhûm tee ri ja hã mē omu nê mē kãm:

Nà kot paj axte nhÿrmã mē apê Ijaew mã axtem tanhmã ixkapêr to.

⁹ Amnepê mē anhîgêjtê mã na pa pre ixkapêr.

Na pa pre Ejit pê mē kator nê mē kot tanhmã amnhî nhîpêx to ho pa kaxyw tanhmã hã

mē kãm karõ hto.

Nom na prem ixkapêr ma nê ãm kuma nê ixkôt amnhî nhîpêx kêt nê. Pa tee ri ja hã mē

omu hãmri nê mē hkaga.

¹⁰ Tã kot paj mē apê mē hkanrêhã mē htãmnhwÿ nywjê mã axtem ixkapêr ka mē ixkapêr nywja ma.

Kot paj nhÿrmã tanhmã mē akrã hto ka mē ixkapêr nyw mar tÿx nê hã ano htÿx nê ho

apa.

Nê akînh nê apa.

Nê ixkôt ri amnhî nhîpêx mex o apa.

Nê axpên mã ijarênh o: “Nà ãm hãmri Tirtûm kêp mē panhõ Tirtûm na.” Anhÿr o ri

axpên mã ijarênh o apa.

Pa amnhî tã mē ama nê mē apumu nê amnhî xwar mē apê ixkra hã amnhîm mē ajarê.

¹¹ Kot kaj mē apiitã ixte amnhî nhîpêx kôt ixpumunh mex o ri apa. Mē akàxpore rûnh

xwÿnhjaja nê mē akàxpore hkryre xwÿnhjaja mē apiitã ixpumunh mex jakamã

kot kaj mē ri axte ixtã tanhmã axpên kukjêr to ho ri apa hkêt nê.

¹² Nê kot paj mē ato mex rax o ixpa.

Nê axte tanhmã mē ate amnhî tomnu hto ho apaja mã ijamaxpêr kêt nê. Anê.

¹³ Nê koja mêmoj ra htûm hãmri nê hapêx tokyx anê. Ja pyrã nê na pre Tirtûm mē pamã

kapêr tûmta jarênh o:

—E kêr ka mē axte ixkapêr tûm mar kêt nê. Pãnhã ixkapêr nyw pix mãn mar o apa nê

ãm kôt pix mã mãn amnhî nhîpêx rãhã ho ri apa. Anê.

9

Tirtûm nhörkwÿ kaàkre jarênh

¹ Nê amnepê mē na pre finat Mojesja mē panhîgêr nê mē pahpãmjê mã tanhmã Tirtûm nhörkwÿ kaàkre jarênh to. Tanhmã mē kot hipêx to nê kamã tanhmã amnhî nhîpêx to hã mē kãm karõ. Nê kamã tanhmã mē kot amnhî to Tirtûm wÿr to hã mē kãm karõ. Nê tanhmã mē hkwyjê ho hwÿr toja nhûm pre mããnen mē kãm hã karõ. No Tirtûm nhörkwÿ kaàkreja kêp örkwÿ kumrêx kêt. ãm mē kot omunh nê kaxkwa kamã örkwÿ kumrêx mã hamaxpêr kaxyw na pre. ² Jakamã nhûm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêeti xãm nê kutã mêsti xãm. Nê mêsti nhîmök ã Tirtûm mã õ pãwti jaxwÿ. Mē panhõ patre na pre htem Tirtûm mã kugõ nê mêsti ã kãm haxwÿ hãmri nê hkwyjê ho kuwÿ. Tã hitom ja na prem kêp Tirtûm nhõ hitom mex ã harê.

³⁻⁴ Nê hitom wa hkaêx kãm na pre kupêxê ho hakwakre kahê xàja ajêt. Haturxà kamã hitomja na prem Tirtùm nhõ hitom maati hã harê. Tirtùm na pre te hirã htÿx kãm hwÿr wrÿ nê te kamã hkrÿ pyrãk. Nê kamã na pre Tirtùm mã mēhkuxwa xà ho xêt xà hã mēs kunÿhtija kuhê. Na prem ôr o hipêx nê kamã âm nhÿm kuhê. Nhÿm pre hte mēõ patre hwÿr agjê nê kutã kuhê nê mē ho Tirtùm wÿ. Nê mēs kunÿhti haxwÿja hitom maati kamã kuhê. Na prem pÿ ho hipêx nê ôr o hpro nê kamã âm. Mēstija kaxwÿnh kãm na pre htem mēmoj jagjê.

Tirtùm kot Ijaew mã tanhmã mē kot amnhÿ nhÿpêx to ho pa hã karõ nê kên po hã mē kãm hã kagaja nhÿm prem kamã kuxà nhÿm hikwÿ.

Nê mãânên ôr o xijereja xà nhÿm hikwÿ. Nê xijere kamã amnepê mã Tirtùm kot kaxkwa rÿm mē hwÿr mēõ rēnh kwÿ hikwÿ. Mēõja mē kot kãm: “Manã” anhÿr xwÿnhja na prem hkwÿ hkawrà nê xijere kamã kugjê hãmri nê mēsti kamã kuxà.

Nê finat Arãw nhõ kô kot ho amnhÿ kaxpar xà htÿmta nhÿm prem kamã kuxà. Tirtùm kot tanhmã ho nhÿm kurÿm pixôrà muxre hapôx xwÿnhnta nhÿm prem mãânên mēs kunÿhti kamã kuxà nhÿm hikwÿ.

⁵ Nê himõk ã Tirtùm kapêr o wrÿk xwÿnh wa hkarõ nhÿpêxja wa hamêxkrut nê axpên kutã wa hkõn krã ho hkrÿ. Axpên wÿr hara koror nê wa hkrÿ. Patre maati kot omunh nê Tirtùm kot mē hkôt pa ho paja mã hamaxpêr kaxyw. Nê wa hkaêx kãm ahkaprÿja Tirtùm kot mē nê mē kot amnhÿ tomnuj rēnh mã hamaxpêr xà na pre.

Ã Tirtùm nhõrkwÿ kaakre kot anhÿr. No kot paj ixprÿ hã mē amã piitã harēnh par kêt nê. ⁶ Na pre hte mēõ patre apkati mē wam hitom wÿr agjê nê kamã Ijaew ho Tirtùm wÿr o pa. ⁷ No hitom maatija âm mē õ patre maati pix na pre hwÿr agjê. Nom apkati mē hwÿr pa nê gjêx kêt âm amgrã pÿnh kãm hwÿr gjêx pÿnh nê. Nê hwÿr gjêx kaxyw nê mēmo mry pa nê hkamrô ru nê o pa nê hitom maati hwÿr ho agjê. Hãmri nê ho mēs kunÿhti nhÿmõk kamÿ nê Tirtùm mã kãm:

—Pa Tirtùm. E ota mry kamrôta. Mē ixpê akwÿjaja mē ixte amnhÿ tomnuj jakamã na pa mē amnhÿ pãnhã mēmo mry nhõkre jakã nê kupÿ nê hkamrô ru nê man awÿr o mra. Te kot mē ixte amnhÿ tomnuj mÿrapê htyk pyrãk. Jakamã kwa ã mē ixte amnhÿ nhÿpêx anhÿrja ã mē ixpumunh hkôt mē inhnê mē ixte amnhÿ tomnuj rê.

Anhÿr o mē amnhÿ to kuwÿ. ⁸ Nê patre maati pix na pre hitom maatija wÿr agjê nê mē ho Tirtùm wÿ. Ijaew na prem ixkre kapem hamãr o kuhê nê hwÿr gjêx kêt nê. Tirtùm Karõ kot hã mē kãm karõ xà hkôt. Te Tirtùm pê amÿm kuhê pyrãk. Tã na htem jarãhã arÿ Ijaew kanrêhã mē hkra nê mē htãmnhwÿjaja ã amnhÿ nhÿpêx anhÿr o pa. Jao mē higêtjê pyrã nê Tirtùm pê amÿm kuhê.

⁹ Mē kot arÿ Tirtùm mã mry hpar nê hkamrô ho mēmoj kamÿr nê amnhÿ to hwÿr o pa htã na htem arÿ hamaxpêr punuj pix o pa.

¹⁰ Tirtùm kapêr tÿm kot tanhmã mēmoj tã mē kãm karõ hto.

Na pre tanhmã mē apkur xà hã mē kãm karõ hto nhÿm htem pix kur o pa.

Nê tanhmã mē hkõm xà hã mē kãm karõ hto nhÿm htem pix o hkõm o pa.

Nê tanhmã amnhÿmnuj to hã tanhmã mē kot amnhÿ kuhõnh to hã karõja nhÿm htem hkôt pix mã tanhmã amnhÿ kuhõnh to ho pa.

Nê tanhmã mē kot ri mē hikukrêx kuhõnh to hã mē kãm karõja nhÿm htem kôt pix mã tanhmã kuhõnh to ho pa.

Ã na pre Tirtùm Kris kukamã mē kãm mēmoj tã karõ rax anê. Kris kutêp pix mã ã mē kot amnhÿ nhÿpêx anhÿr kaxyw. No mē pahte arÿ ã amnhÿ nhÿpêx anhÿr kaxyw kêt. Na pre ra Kris mē pahwÿr wrÿ nê Tirtùm kapêr tÿm o hapêx nê hpãnhã mē pamã kapêr nyw jarê pu mē hpãnhã nywta kôt pix mã amnhÿ nhÿpêx o papa. Kapêr nywja mex o mex. Nê mex o wamta jakrenh.

Kris htyk o mē pahte amnhÿ tomnuj pãnhã amnhÿrer ã harēnh

¹¹ Tã na pre Krisja tãm mē pahwÿr wrÿ nê kêt mē pahto Tirtùm wÿr xwÿnh maati nê patre hpãnhã mē pahto hwÿr o pa. Nom jar pika ja kamã mē kot mē ïhkra ho Tirtùm

nhörkwÿ kaàkre nhîpêxta wÿr àr nê kamã mẽ pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamã örkwÿ mex wÿr axà nê kamã tanhmã mẽ pahto mex to nê tanhmã mẽ pahto Tirtüm wÿr to rãhã ho hkrî. ¹² ã kaxkwa kamã Tirtüm nhô hitom maatija wÿr àr tipxi htã mẽ pahpiitã mẽ pahte amnhî tomnuj pãnhã amnhîrer pa. Nom mẽmo mry kamrô ho mẽ pahpãnhã amnhîrer kêt nê. Môx kamrô rÿ motre kamrô ho mẽ pahpãnhã amnhîrer kêt nê. Amnhî kamrô ho na pre mẽ pahpãnhã amnhîre. Tyk nê hkamrô pikapîrta o mẽ pahpiitã mẽ pahpãnhã amnhîrer pa.

¹³ Nê amnepêm Ijaew kot Tirtüm kapêr tùm kôt amnhî nhîpêx mex o pa hkêt jakamã nhùm tee ri mẽ omu nê mẽ kot amnhî tomnuj o mẽ pa xwÿnh ã mẽ harê. Jakamã na pre mẽo patre xatã mry kamrô ho mẽ hkamî. Môx kamrô nê motre kamrô ho mẽ hkamî. Na pre môx krare hkwÿ hpa nê ho hxêt nê hprã ho hkwÿjê kamî. ã na prem xatã mẽ hipêx anhÿr o pa. Tirtüm kot ja hã mẽ omunh nê mẽ mex ã mẽ harênh kaxyw. Nom te mẽ krãhkã pix mex pyrã nê mẽ hkrã kaxwÿnh kãm arî hamaxpêr punuj o pa. ¹⁴ ã na prem amnhî nhîpêx anhÿr o pa. Nom Krisja mẽ kurom aa tanhmã amnhî tomnuj to hkêt jakamã na pre mẽ pahte amnhî tomnuj xwÿnhjê nê ty. Te mẽ kot amnhî nê môx rÿ motre hpar nê hkamrô runhta pyrãk o amnhî nhîpêx nê mẽ panê Tirtüm mã amnhî gô nhùm pre mẽ kãm hkurê xwÿnhjaja kupî. Na pre Tirtüm Karôja ã kot mẽ panê htyk anhÿr kaxyw tanhmã ho hihtÿx to. Karôja aa hapêx kêt kumrêx rãhã nê pa ho pa xwÿnh jakamã na pre Kris tykja kukamã tanhmã ho hihtÿx to nhùm mẽ panê ty. Tapxipix na mẽ pahte tãm amnhî nhîpêx o papa kaxyw kêp tanhmã mẽ pahkrã hto xwÿnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhî krã hkôt tãm amnhî nhîpêx o ixpa hprãm kaprÿ nê ãm amnhî tomnuj pix o ri ixpa. Tã Kris kot inhnê htyk o hkamrô pikapîr ã harênh ma nê amnhî kaxyw hkôt ijamaxpêr tÿx nê nhùm amnhî tã ixpumu nê ixte tãm amnhî nhîpêx o ixpa kaxyw ixãm. Jakamã kot paj ãm Tirtüm pix mã kãm tanhmã amnhî nhîpêx to ho ri ixpa. Tîr rãhã nê pa ho pa xwÿnh jakamã kot paj nhÿrmã kuri urãk nê ixtîr tùm nê ixpa ho ixpa. Anê.

¹⁵ Nê amnepê mã na prem piitã Tirtüm kapêr tùm kôt amnhî nhîpêx mex o pa hkêt nê. Mẽ kot xatã hkôt amnhî nhîpêx o pa hã amnhî jarênh tã hkôt amnhî nhîpêx kêt nê. Jakamã na pre Kris wrÿ nê mẽ pahte hkôt amnhî xunhwÿr mã xwÿnhjê mã Tirtüm kapêr nyw jarê nê mẽ pamã:

—Kot paj mẽ anê ty nhùm Tirtüm ã ixte amnhî nhîpêx anhÿrja kukwak ri mẽ ato mex rãhã ho pa. Anê.

Hãmri nê amnhî jarênh xà hkôt mẽ pahte amnhî tomnuj piitã hpãnhã amnhîrer kaxyw mẽ panê ty. ¹⁶⁻¹⁷ Te jar pika ja kamã mēhō htyk kukamã hkrajê mã tanhmã amnhî jarênh to pyrãk. Na htem htyk kaxyw nê hkrajê mã:

—Nà kot paj mẽmo arîgro hã ty ka mẽ inhmÿr pê ixpê ixkukrêx kwÿ o arîk.

Anhÿr o na htem amnhî jarê. Hãmri nê ty nhùm hkrajaja amnhîm ò mẽmoj to àrîk pa. Mẽ hipêxà kukwak ri mẽ hikukrêx mex nê mÿr pê o pa. No kormã htîr ri nhùm mẽ kormã kêp hamÿnh kêt nê. Ja pyrã nê na pre Tirtümja Jesus htyk kukwak ri tanhmã mẽ pahto mex to pu mẽ kukwak ri mẽ pamex nê pahkînh nê ri papa.

¹⁸ Nê Tirtüm kapêr tùm kôt na pre hte mẽ ò patre mry pa nê ãm hkamrô runh kôt pix mã mẽ ho Tirtüm wÿr o pa nhùm amnhî tã mẽ omunh xà hkôt mẽ kuma nê tanhmã mẽ ho mex to.

¹⁹ Na pre finat Mojesja Ijaew mã Tirtüm kapêr tùm piitã harê nê harênh pa hãmri nê môx ôxpî nê kaxyw motre hōxpî. Hãmri nê xijere kamã hamê wa hkamrô runh pa nê kamã gô hkwÿ ru. Hãmri nê kaxyw mẽmo pî hpa hkryre pê “isop” jarênhja kwÿ kukê. Nê kaxyw ôwêhti hkî kamrêkre hkwÿ hpy nê isop mẽ ho pihkàr pa nê mry kamrô o go. Hãmri nê ho hkwÿjê kamî. Nê ho Tirtüm kapêr ã kagã tũmta kamî. ²⁰⁻²² Hãmri nê ho anhÿr pa nê mẽ kãm:

—Nà na Tirtümja ixte mry kamrô ho mẽ akamîr pumunh kôt mẽ pamã kapêr o: “E kot kaj mẽ ixkapêr kôt amnhî nhîpêx o ri apa hã kot paj tanhmã mẽ ato mex to rãhã ho

ri ixpa ka mē amex nē akīnh nē ajamakêtkati nē ri apa. Jakamā kêr ka mē mry kamrô ho mēmoj piitā hkamīr pa. Nē ho amnhī kamī. Kêr pa ja hā mē apumu hāmri nē axte tanhmā mē ate amnhī tomnuj tota mā ijamaxpêr kêt nē.” Anē. Ā na Tīrtūm mē pamā kapêr anē. Anē.

Hāmri nē hpānhā mry kamrôta o ôrkwỹ kaàkre kamī. Nē hkre kamā mēmoj kuhê xwýnh piitā nhūm ho hkamīr pa. Ā na pre mē ô patre mē mex kaxyw mē hipêx anhỹr o pa. Mē kot tōhā mēmoj to hpýnhre nē ho hkamīr kêt jakamā kironhỹx pre mēmoj piitā ā hipêx anhỹr o pa. Kop apu mē kot mry hpar nē hkamrô runh kêt ronhỹx pre Tīrtūm arī mē kot amnhī tomnuj mā hamaxpêr rāhā ho pa.

²³ Na prem ā Tīrtūm nhôrkwỹ kaàkre kamā mēmoj kuhê xwýnh piitā mex kaxyw hipêx anē. Te Tīrtūm kot mē pahto mex nhūm mē pahte nhỹrmā ma kaxkwa hwýr ô krī hwýr paxàpirta pyrā nē. Nom mē kot mry hpar nē hkamrô runhta kukwak ri mē pamex nē papa hkêt. Ām mēhō kamrô kukwak ri mē pamex xwýnhhta pix kukwak ri na mē pahpê pahtīr tūm nē papa mā xwýnh. Ja na mex o mry kamrô piitā hakrenh pa. ²⁴ Jeus Krisja pix kukwak ri. Tām na pre patre pyrā nē mē pahto Tīrtūm wýr kaxyw mē ihkra ho Tīrtūm nhôrkwỹ kaàkre nhīpêxta wýr gjêx kêt nē. Ām ixkre kaàkre pix na pre. Na pre kaxkwa kamā Tīrtūm nhô krī hwýr axà. Tā arī kamā Tīrtūm nhīhkô hā mē pahto hwýr rāhā ho hkrī.

²⁵ Nē Ijaew nhô patre maati na hte amgrā mē ôrkwỹ kaàkre kamā hitom maati hwýr gjêx tipxi. Nē amnhī kôt mry kamrô ru nē ho agjê. Tīrtūm kot hā omunh nē axte mē kot amnhī tomnuj mā hamaxpêr hkêt kaxyw. Nom Kris na pre mē urāk nē mēmo mry pa nē Tīrtūm mā hkamrô kapīr kêt nē. Kamrô na pre mē panê axkapī. Nom patre pyrā nē amgrā mē ā amnhī nhīpêx anhỹr kêt nē. Na pre htyk o Tīrtūm mā amnhī nhôr tipxi.

²⁶ Kêp apu patre pyrā nē amgrā mē mē panê htyk o pa ronhỹx ra mē panê htyk xohtô rax kumrêx. Nhỹx pre amnepê mā Tīrtūm kot mēmoj piitā ho katorta rūm amgrā mē mē panê htyk o pa ho hkra. Jao xatā htyk o amgrā xohtô rax kumrêx. Nom ja kot anhỹr kêt. Na pre mē pahwýr wrý nē mē panê htyk tipxi htā htykja o mē pahte amnhī tomnuj piitā hpānhā amnhīrer par kumrêx. Jakamā mo kaxyw koja axte ty?

²⁷ Ām pahtyk tipxi htā koja Tīrtūm nhỹrmā akupým mē pahpiitā mē pahto pahtīr nē ahpýnhā tanhmā mē pajarēnh to nē ahpýnhā tanhmā mē panhīpêx to. Kormā mē pahtīr ri mē pahte amnhī nhīpêx ā mē pahpumunh xà hkôt tanhmā mē panhīpêx to. ²⁸ Ja pyrā nē na pre Krisja ām mē panê htyk tipxi htā mē pahto ohtô nē mē panê mē pahte amnhī tomnuj piitā rēnh pa. Hāmri nhūm Tīrtūm akupým ho htīr nē akupým amnhī wýr ho api. Tā koja nhỹrmā akupýn mē pahwýr wrý. Nom axte mē pahte amnhī tomnuj pānhā amnhī rer kaxyw mē panê htyk kaxyw wrýk kêt nē. Ra kot mē pahte amnhī tomnuj pānhā amnhīrer kēnā. Koja akupýn wrý nē mē pahte amnhī wýr kamā pajamak o papa xwýnhjaja ma akupým amnhī kôt kaxkwa hwýr mē pahto àpir pa. Ra mē pahtyk tā nhūm akupým mē pahto mē pahtīr nē ma amnhī kôt mē pahto àpir pa pu mē kuri pamex nē pahtīr tūm nē papa ho papa.

10

Kris kot mē panê htyk tipxi hā harēnh

¹ Nē arī mē kot Tīrtūm kapêr tūm kôt amnhī nhīpêx o mē pa xwýnhjaja kormā hprī hā Tīrtūm kot tanhmā mē pahto mex to hā harēnh mar tỳx kêt. Na prem kormā hkwȳ pix ma. Na hte mē ô patreja amgrā mē kànhmā kaxkwa hwýr mry kamrôta pē nē mē amnhī to Tīrtūm wý. Kot ja hā mē omunh nē axte mē kot amnhī tomnuj mā hamaxpêr hkêt kaxyw. Tā ā mē kot amnhī nhīpêx anhỹr tā arī Tīrtūm kapêr kwým amnhī nhīpêx rāhā ² jakamā na prem xatā kām mēmo mry kamrô runh o pa. Kêp apu tām amnhī nhīpêx nē tām ri hamaxpêr ronhỹx arī ā amnhī nhīpêx anhỹr o pa hkêt nē. Nē xatā amnhī pānhā mry hpar nē hkamrô ho Tīrtūm nhôrkwỹ kaàkre kamā mēmoj kamīr kêt nē. ³ Nom na prem tām amnhī nhīpêx o pa hkêt nē. Mē kot amgrā mē Tīrtūm kot mē nē mē kot amnhī tomnuj rēnh kaxyw mē kot kām mēmo mry hpar o pa htā no ām hkôt amnhī nhīpêx xwýnh ā

amnhî jarênh kêt nê. Arî mẽ kot amnhî tomnuj o pa jakamã na prem mry hparta ã amnhî pumu nê tee ri amnhî kukamã hamaxpêr o hkaprî nê pa. ⁴ Nom na hte môx kamrô ry motre kamrôja mẽ panê mẽ pahte amnhî tomnuj rênh kêt nê. ⁵⁻⁸ Jakamã na pre Krisja mẽ pahwÿr nojarêt nê Tirtûm mã amnhî jarênh o:

Pa Tirtûm? E kot paj ma mẽ hwÿr wrÿ.

Mẽ kot amnhî pãnhã amã mry hparta apê hprãm nõkati nê amã hkînh kêt.

Ate mẽ nê mẽ kot amnhî tomnuj rênh kaxyw mẽ kot amã mẽmo mry hparta amã hprãm kêt. ãm ixkukamã na ka pre ã mẽ kot amnhî nhîpêx anhÿr kaxyw mẽ kãm ja hã karô.

Mẽ kot mry nhîpêx o te pa ixte mẽ nê ixtyk nê ixkamrô pikapîr pyrãk o na prem ixkukamã ã amnhî nhîpêx anê.

Jakamã na ka ra mẽ kaxyw inhmã inhî gô pa mẽ urãk nê inhî ho inhî.

Tã kot paj ma mẽ hwÿr wrÿ. Ixte amã hprãm xà hkôt pix mã ixte tanhmã amã mnhî nhîpêx to ho ixpa kaxyw. Akapêr ã kagà htûm kot tanhmã ixkukamã ijarênh to xà hkôt kot wrÿ nê ã amã amnhî nhîpêx anê. Anê.

Hãmri nê man mẽ pahwÿr wrÿ. ⁹ Kot Tirtûm kapêr tûm o hapêx par nê hpãnhã tãm mẽ panê htyk kaxyw wrÿ. Jakamã na pre nojarêt nê Tirtûm mã amnhî jarênh o:

—E ixte amã hprãm xà hkôt amnhî nhîpêx kaxyw kot paj ma mẽ hwÿr wrÿ.

¹⁰ Anhÿr jakamã wrÿ nê Tirtûm kãm hprãm xà hkôt mẽ panê ty. Na pre nhãm mẽhõ mẽ kãm hkurê xwÿnhjê mã ôr nhûm mẽ kot hpîr nhûm amarî htyk kêt nê. Na pre amnhî grônh kôt mẽ kãm amnhî gô nhûm prem kupî. Hãmri nhûm htyk o mẽ pahte hkôt amnhî xunhwÿr xwÿnhjê o Tirtûm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhî tomnuj pãnhã amnhîrer pa.

¹¹ Nê mẽ ô patrejaja na htem apkati mẽ Tirtûm nhõrkwÿ kaàkre kamã kãm tanhmã amnhî nhîpêx to. Nê apkati mẽ hkwÿjê hpãnhã mry hkwÿ hpa nê hkamrô ru nê mẽ ho Tirtûm wÿ. Tã nom ja hã mẽ omunh xà hkôt mẽ nê mẽ kot amnhî tomnuj rênh kêt nê.

¹² No kêt Kris na pre mẽ kot xatã mry hpar xwÿnhhta rom ãm htyk tipxi htã mẽ pahte amnhî tomnuj piitã hpãnhã amnhîre. Hãmri nê ma akupÿm kaxkwa hwÿr api nê Tirtûm nhîhkô hã Pahi Maati hkrî xà kamã upôk rûm hkrî ho hkrî. ¹³ Koja kuri hkrî rãhã nhûm Tirtûmja îhkram mẽ kot kutã amnhî xunhwÿr xwÿnhjê jaxàr pa. Ja kaxyw na kormã kuri hamãr o hkrî. ¹⁴ ãm htyk tipxi htã htykja o mẽ pahte hkôt amnhî xunhwÿr xwÿnhjê ho Tirtûm kra pu mẽ ra hpãnhã tãm amnhî nhîpêx rãhã ho papa. Nê pajamexpêr mex o ri papa. Tirtûm kãm hprãm xà hkôt.

¹⁵ Amnepêr mẽ kot Tirtûm nhÿ hã kapêr jarênh o mẽ pa xwÿnhjaja na prem mẽ panhîgêjtê mã kapêr o pa. Tirtûm Karô nhÿ hã mẽ kãm kapêr nê mẽ kãm:

¹⁶ —E na Tirtûm mẽ pamã amnhî jarê nê amnhî jarênh o:

Kot paj nhÿrmã axtem ixkapêr nyw o mẽ amã ixkapêr.

Nê mẽ akrãm hagiê ka mẽ mar tÿx pê hã ano htÿx nê ho apa.

Ixkapêr tûm na pa pre mẽ amã kên pota ã hã kagà.

Nom ixkapêr nyw kot paj axtem mẽ akrãm hagiê.

¹⁷ Nê kot paj axte mẽ ate amnhî tomnuj mã ijamaxpêr kêt nê.

Anhÿr o mẽ pamã amnhî jarênh. Anê.

¹⁸ Tã ra axte mẽ pahte amnhî tomnuj mã hamaxpêr kêt ã kot amnhî jarênh jakamã mo kaxyw kot pu mẽ arî amnhî pãnhã kãm mẽmo mry hpar nê hkamrô runh o papa? Tã mẽ pahkwÿjaja na hte arî kãm ja ho anhÿr prãm o pa. E kwa mẽ axte ã amnhî nhîpêx anhÿr kêt nê ixkwÿjaja.

Akupÿm mẽ pahte amnhî nhîpêx tûm o paxujanãr kêt ã mẽ pamã karô

Matêwre 27.51; Rukre 23.45; Rômãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwÿjaja. Ra Jesus kot mẽ panê htyk o hkamrô pikapîr jakamã na pu htem arî tee ri amnhî kukamã pajamaxpêr hkôt nê. Tirtûm axte kot mẽ pahte amnhî tomnuj mã hamaxpêr kêt jakamã na pu htem paxãmnhîx amnhî to hwÿr o papa. Te paxãmnhîx

ōrkwý kaàkre kamā hitom maati hwýr pagjêx nê kamā amnhî to hwýrta pyrāk. Jao ra mē papamjaja amnhî to hwýr o papa nhūm patre axte mē pahto hwýr kêt nê. Jejus na pre htyk o mē pamā hitom maati wýr hakwakre kahêxà hā kupêxêja kôt ā ho axkjê. Jao mē paxàmnhîx hwýr mē pagjêx kaxyw mē pamā kahê xà mē. ²¹ Tā ra kêp Tîrtūm nhō krî kamā mē pahto hwýr xwýnh maati na. Nê mex kumrêx o jar pika ja kamā patre kot mē ho hwýr o pa xwýnh ta jakrenh. ²² Jakamā e kwa kêr pu mē māmri paxàmnhîx amnhî to Tîrtūm wýr o papa. Ra Jejus kot mē panê htyk nhūm mē pahte amnhî kaxyw hkôt pajamexpêr rāhā ho papa jakamā kêr pu mē axte mē pahpê amnhî tomnuj xwýnh ā amnhî jarênh kêt nê. Kêr pu mē nhýrmā tanhmā pajamexpêr punuj to rý tanhmā amnhî tomnuj to hāmri nê tee ri ja hā amnhî pumu nê pahkapri kamā amnhî to Tîrtūm wýr kurê kumrêx. Jejus ra kot mē pahte amnhî tomnuj pānhā amnhîrer par jakamā kot puj mē Tîrtūm mā tanhmā mē pahte amnhî tomnuj to hā amnhî jarê nhūm mē pama nê axte kām hamexpêr kêt nê. Pu mē te paxwýr nê pahte amnhî nê pagrā htyk kuhōnh par nê akupým pamex pyrāk. Nê axte paxàmnhîx amnhî to Tîrtūm wýr o papa.

²³ Nê mē kot Kris ā tanhmā mē pahto htā kwa kêr pu mē tee ri amnhî kukamā pajamexpêr kêt nê. Rý pajamexpêr o:

—Konên. Koja mē tanhmā hamexpêr to nê Kris ā ixpî rý ko. Pa apu mē kot ixpîr pymaj akupým ixte amnhî nhîpêx tūm o awjanā nê akupým hkôt amnhî nhîpêx japêr rý ko. Anê.

Kwa pu mē tee ri ā pajamexpêr anhýr hkêt nê. Pu kêt mē pajamexpêr o:

—Nà mē kot Kris ā tanhmā ixto htā kot paj aa hkaga hkêt nê. Mē kot hā ixpîr mā tā kot paj hkaga hkêt kumrêx.

Anhýr ā amnhî jarê. ²⁴ Nê kêr ka mē akwýjê mā anê kê mē mēmoj to axpên kutā nojarêt rāhā ho ri axpên kôt pa. Jao tanhmā axpên to mex to o ri axpên kôt pa.

²⁵ Na pre ra mē pahkwýjaja tanhmā hamexpêr to nê axte mē pahkôt pikuprōnh nê Tîrtūm kapêr mar o hkrî hkêt nê. No kêr pu mē ho mē urāk kêt nê. Kêr pu mē arî xatā axpên wýr akuprō nê mē pahte tee ri amnhî kukamā pajamexpêr nê axpên mā pakapêr o papa. Kêt mē panhō Pahihtija ra akupýn mē pahwýr wrýk kaxyw jakamā kwa kêr pu mē kutêp arî axpên mā pajamexpêr mex nhōr pê tām axpên nhîpêx mex rāhā ho i papa.

²⁶ Mē pahkwýjaja kot Tîrtūm kapêr mar mex tā na htem kuma nê ām kuma. Kwa kêr ka mē ho mē urāk kêt nê. Kris kot mē panê htyk ā harênhja mē kot mar mex tā na htem kuma nê ām kuma nê hkaga kumrêx. Jakamā mēhō koja Kris pyrā nê htyk o mē kot amnhî tomnuj pānhā amnhîre? Nà amrakati kumrêx. Ām Jejus pix na pre Tîrtūm ja kaxyw ām. Tapxipix na pre ā mē panê amnhî nhîpêx anê. Tā nhūm mē kot hkagaja mýrapê koja mē nhýrmā mē tāmjaja mē kot amnhî tomnuj pānhā amnhîre. ²⁷ Mē kot Tîrtūm kutā amnhî xunhwýr xwýnh na mē. Amnepêm na pre Tîrtūm mē kot kutā amnhî xunhwýr xwýnhjê kaxyw mē kot amnhî xà htýx kamā hamak tūm xàta nhîpêx. Tā ra mē kot Jejus kaga jakamā koja nhýrmā ma hwýr mē rēnh pa nhūm mē tee ri kām hwýr pa hprām kêt kaprý. ²⁸ Amnepêm finat Mojesja kormā htír ri na pre hte mēhō pixi nê kapêr kaga nê akupým kot amnhî nhîpêx tūm o awjanā nê tanhmā amnhî tomnuj to nhūm hkwýjaja ja hā omu. Tanhmān axkrut rý axkrunêpxi nê ja hā omu. Hāmri nê ma Mojes wýr mra nê axpên kôt kām tanhmā kot amnhî tomnuj to hā harê. Hāmri nhūm harênh ma nê mē kām hā amýnê nhūm tee ri kām htír prām kaprý. Mē kot akupým amnhî nhîpêx tūm o ujanār nê amnhî tomnuj o paja mýrapê na prem mē kupa. Ā na pre htem mē hipêx anhýr o pa.

²⁹ Nê koja mēhō tanhmā Tîrtūm Kra Jejus o kapêr punuj to. Tîrtūm kapêr ā kaga htūm kot ra mē kot kêp Tîrtūm Kra hā harênh mar mex tā axtem nê tanhmā ho kapêr punuj to ho pa. Kot mē panê htyk nê hkamrô pikapîr kôt kot mē pahte amnhî tomnuj pānhā amnhîrer ā harênh mar tā kuma nê ām kuma nê harênh o:

—Nà mē pahpyrà nê kot amnhî tomnuj xwýnh nhūm mē kot hā hpîr kênā. Na pre mē panê htyk kêt nê.

Anhÿr ã harê. Nê Tirtûm Karôja nhûm mãânên tanhmã ho kapêr punuj to. Kêp mẽ pakutã nojarêt xwÿnh tã nhûm axtem nê tanhmã ho kapêr punuj to. Mÿrapê koja nhÿrmã Tirtûm tanhmã homnuj tÿx to. Homnuj tÿx o mẽ kot Mojes kapêr kaga nhûm mÿrapê kot mẽ hparta jakre. Jakamã kwa kêr ka mẽ ã amnhĩ nhÿpêx anhÿr hkêt nê.
³⁰ Tirtûm kapêr ã kagã htûm kot ja jarênh kot:

Ixpê Tirtûm kot paj mẽ kot amnhĩ tomnuj xwÿnhjê homnuj tÿx nê. Anê.

Nê mẽ kot tãm amnhĩ nhÿpêx xwÿnhjê jarênh kot:

Mẽ kot amnhĩ to mex o mẽ pa xwÿnhjaja kot paj nhÿrmã mẽ ho mex rax nê. No mẽ kot amnhĩ tomnuj o mẽ pa xwÿnhjaja kot paj nhÿrmã mẽ homnuj tÿx nê. Anê.

Ra mẽ pahte ã kapêr anhÿr xwÿnhja kot amnhĩ nhÿpêx ã omunh mex. ³¹ Jakamã kwa mẽ okora. Kêr ka mẽ amnhĩ to mex rãhã ho ri apa. Tirtûm rãhã ho rãhã nê hihtÿx o hihtÿx jakamã koja mẽmoj tã akamã gryk ka amex kêt o amex kêt.

³² Nê amnepêm mẽ ate Jejus kôt amnhĩ xunhwÿr krax kãm na prem Jejus ã mẽ atomnuj tÿx tã ka prem mẽ umaj hkaga hkêt nê. Tã kêr ka mẽ arĩ ã amnhĩ nhÿpêx anhÿrja kukamã mãn ajamxpêr nê hã anohtÿx rãhã ho apa. Jao arĩ ã amnhĩ nhÿpêx anê nê mẽ umaj Jejus kaga hkêt nê. ³³ Na prem mẽ piitã mẽ noo mã tanhmã mẽ amã kapêr punuj to nê tanhmã mẽ anhÿpêx to. Nê tãhã tanhmã mẽ akwÿjê homnuj tÿx to ka mẽ tee ri ja hã mẽ omu nê mẽ kamã axukapĩ nê. Nê mẽ hkôt axkamê nhûm prem mã mẽ ato anê nê. ³⁴ Na prem mẽ akwÿjê jagjê ka prem ja hã mẽ omu nê ma mẽ hagjênh xã hã ixkre hwÿr mẽ hwÿr mra nê tanhmã mẽ ho mex to. Nhûm prem mẽ apê mẽ akukrêx kwÿptã nê ma amnhĩm o pa ka mẽ ãm amnhĩ tã mẽ omu nê ajamxpêr o:

—Kwãr mẽ mãmrĩ ma amnhĩm hamÿn o pa. Koja nhÿrmã Tirtûm inhmã ixkukrêx mex o kot ja jakrenhta kwÿ nhôr rax nê pa amnhĩm hamÿ nhûm aa ixpê hapêx kêt nê. Hãmri nhûm axte mẽhõ aa ixpê utàr kêt nê. Jar mẽ ixkukrêxta mexti hã. Anê.

Jao mẽ kot mẽ apê utàr tã ka mẽ akapĩ nã apa hkêt nê. ã amnhĩ kukamã ajamxpêr anhÿr pê akĩnh nê apa. ãm hãmri na ka prem ã amnhĩ kukamã ajamxpêr anê. ³⁵ Na ka prem mẽ kutã amnhĩ to htÿx kãm ã apa anê. Tã kwa kêr ka mẽ arĩ ã amnhĩ nhÿpêx anhÿr o ri apa. Kêr kê nhÿrmã Tirtûm ja hã mẽ ato mex rax nê.

³⁶ Nê kêr ka mẽ arĩ amnhĩ kaxyw Tirtûm mã ajamxpêr rãhã ho ri apa. Mẽ kot Jejus ã tanhmã mẽ ato htã ka mẽ hkaga hkêt nê. Kot kaj mẽ ã amnhĩ nhÿpêx anhÿr o apa nhûm Tirtûm ja hã mẽ apumu nhûm ja kãm mex nê. Hãmri nhûm ra kot amnhĩ jarênh xã hkôt nhÿrmã amã mẽmoj mex nhôr rax nê. Jakamã kwa mẽ kot tanhmã mẽ anhÿpêx to hã amnhĩ pumu nê tee ri amnhĩ kukamã ajamxpêr o ri akapĩ hkêt nê. Kot kaj mẽ Kris ã apunuj rãhã apa hkêt nê. ³⁷ Tirtûm kapêr ã kagã htûm kot Jejus jarênh kot:

Koja mẽ pahwÿr wrÿk mã xwÿnhhta tokyx wrÿ. Na ra wrÿk kaxyw nojarêt. Anê.

³⁸ Nê harênh kot:

Ixkôt mẽ kot amnhĩ nhÿpêx mex o mẽ pa xwÿnhjaja koja mẽ amnhĩ kaxyw ixkôt hamaxpêr tÿx rãhã nê. Jao nhÿrmã ixri htÿr tûm nê mex rãhã nê pa ho pa.

Nê koja mẽhõ ixkaga pa tee ri kãm ixkĩnh kêt ã omu. Anê.

³⁹ No mẽ papajaja te mẽ pahte mẽ kot Jejus kaga nhûm kot amnhĩ tã mẽ homnuj mã xwÿnhjê pyrãk kêt. Arĩ mẽ pahte amnhĩ kaxyw hkôt pajamxpêr rãhã jakamã koja nhÿrmã amnhĩ wÿr mẽ pahto api.

11

Amnhĩ kaxyw Tirtûm kôt mẽ hamaxpêr mex xwÿnhjê jarênh

Sikûn Pêtre 3.5-7

¹ Nê na htem Kris ã mẽ panhÿpêx kati ho pa pu mẽ pahpunuj rãhã nê ri papa. Te Kris kot mẽ pahto mex kêt pyrãk pu htem mẽmoj punuj pix kãm ri papa nê kormã Tirtûm kot mẽ pahto mex ã amnhĩ tã omunh kêt nê. Tã ã mẽ pahte anhÿr tã kwa kêr pu mẽ arĩ kapêr kôt amnhĩ nhÿpêx rãhã ho papa. Mẽ pahte pano ho Tirtûm pumunh kêt tã kot mẽ pahkôt pa ho pa hã amnhĩ kaxyw kãm pajamxpêr tÿx rãhã ho papa. Jakamã na pu htem ãm kapêr kôt pix mã amnhĩ nhÿpêx o papa. ² Amnepê mã mẽ pakukamã mẽ panhÿgêjtaja

na prem no ho Tirtûm pumunh kêt tâ amnhî kaxyw kãm hamaxpêr nê kapêr kôt amnhî nhîpêx o pa nhûm amnhî tâ mẽ omu nhûm ja kãm mex nê.

³ Nê mẽ papajaja na pu htem pajaxwýja mẽ pano ho omunh kêt tâ amnhîm harênh o:

—Nà amnepêm kormã mẽmoj piitã amrakati ri nhûm Tirtûm âm kapêr pix o mẽmoj piitã ho kato. Ixte inhno ho ja hã omunh kêt tâ kot ã amnhî nhîpêx anhÿr ã amnhî jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhîpêx nê kaxyw hprô Ewa nhîpêx. Hãmri nhûm wa hkra Apewja htô Kaï rom amnhî kaxyw Tirtûm kôt hamaxpêr tÿx o pa. Jakamã nhûm wa Tirtûm mã mẽmoj gô. Nhûm Apew kot Kaï rom Tirtûm kãm hprãm xà hkôt kãm mẽmoj nhôr jakamã nhûm amnhî tâ omu nê kot amnhî to mex xwÿnh ã harê nê kot kãm ôr xwÿnhhta nhûm mex ã harê. Tã Apew amnepêm htyk tâ pu htem arï harênh mar rãhã ho papa nê kãm pajamaxpêr o:

—Apew na pre hte amnhî kaxyw Tirtûm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwÿ Enokja na pre haxwÿja amnhî kaxyw Tirtûm mã hamaxpêr tÿx o pa. Jao hkamnàr rom kãm hprãm xà hkôt pix mã tanhmã kãm amnhî nhîpêx to ho pa nhûm amnhî tâ omu nê amnhîm mex ã harê. Jakamã na pre htyk kêt nê. Na pre Tirtûm htîr rãhã ma amnhî wÿr ho api nhûm hkwyjaja tee ri hapêr o pa. Jakamã na pu htem arï axpên mã Enok kot amnhî kaxyw Tirtûm kôt hamaxpêr mex o pa hã harênh o papa. ⁶ Mẽ kot amnhî kaxyw Tirtûm mã mẽ hamaxpêr kêt xwÿnhjaja na hte Tirtûm mẽ mex ã mẽ harênh kêt nê. Tã mẽ papajaja kêr pu mẽ Enok pyrã nê amnhî kaxyw kãm pajamaxpêr tÿx rãhã ho papa. Nê pajamaxpêr o:

—Tirtûmja htîr rãhã ho rãhã. Koja nhÿrmã mẽ ixte amnhî kaxyw hkôt ijamaxpêr xwÿnhjê ho mex rax nê. Nà koja mẽ ixto anê.

Anhÿr o mẽ pajamaxpêr nhûm Tirtûm amnhî tâ mẽ pajamaxpêr ã mẽ pahpumu nê mẽ pahte amnhî to mex ã mẽ pajarê. No mẽ kot amnhî kaxyw kãm hamaxpêr kêt xwÿnhjaja na hte ã mẽ harênh anhÿr kêt nê.

⁷ Nê Enok kanrêhã htãmnhwÿ Noehtija na pre haxwÿja amnhî kaxyw Tirtûm mã hamaxpêr tÿx o pa. Jao hkamnàr rom amnhîm pàr raxja nhîpêx. Na pre ra Tirtûm na rax kukamã tanhmã kãm ujarênh to. Kormã aa na wrÿk nhûm Noehti kot omunh kêt tâ Tirtûm kapêr ma nê mar xà hkôt amnhîm pàr rax kumrêxta nhîpêx. Ôrkwÿ kamã hkwyjê mẽ mẽ amnhîm hipêx. No mẽ kot Tirtûm kapêr mar nê âm mar xwÿnhjaja na pre Tirtûm gô tàm o mẽ hanhi nê mẽ himex pa. Nom Noehtija nhûm kot amnhî to mex xwÿnh ã harê. Kot amnhî kaxyw hkôt hamaxpêr rãhã ho pa jakamã nhûm pre ã mex ã harênh anê.

⁸ Nê Noehti kanrêhã htãmnhwÿ Apraãwja na pre haxwÿja amnhî kaxyw Tirtûm mã hamaxpêr tÿx o pa. Na pre Tirtûm kot kãm pika nhôr ã kãm amnhî jarê nê ra kot ma hwÿr mênh kaxyw. Hãmri nhûm Apraãw kuma nê hkamnàr rom ô pika kaga nê ma pika hõja wÿr pa. Aa kot ma hwÿr môr nê omunh kêt tâ Tirtûm kapêr mar xà hkôt ô pika kaga nê ma hwÿr pa ho pa. ⁹ Hãmri nê hwÿr pôj nê omu nhûm Tirtûm kãm:

—E pika ja kot paj nhÿrmã akanrêhã akra nê atãmnhwÿjê mã kugô. Anê.

Hãmri nhûm kuma nê pikaja kamã pa ho pa. Ra kamã axtem mẽ uro hkwyjaja ri pa nhûm Tirtûm kormã mẽ kator kêt ri nhûm mẽ ô pika hwÿr pôj nê mẽ kamã pa ho pa. Nom amnhîm ôrkwÿ mex nhîpêx kêt nê. Kormã kêp ô pika kumrêx kêt ã hkamnhîx jakamã âm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kôt o pa. Amnhî kaxyw Tirtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra ljak nê htãmnhwÿ Jakoja wa Apraãw pyrã nê mry kà ho ôrkwÿ nê ma amnhî kôt o pa. Nhûm Tirtûm kot Apraãw mã kapêr pyrã nê wa kãm wa hkanrêhã wa hkra nê wa htãmnhwÿjê mã pika nhôr ã amnhî kukamã wa kãm amnhî jarê. ¹⁰ Jakamã nhûm Apraãw kormã Tirtûm nhô krï hwÿr àpir xa hã amnhî tâ hamãr pê kot ho ô pika mã xwÿnhjê kamã pa ho pa. Kaxkwa hwÿr àpir mã xwÿnhhta mex kumrêx. Tirtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhûm Apraãw

mê pahpyrà nê ma kot hwÿr àpir xa hã amnhĩ tã Tĩrtũm jamãr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhũm hprõ Sara haxwÿja hpigêx tÿx nê. Kamrõ hkêt ã amgrã xohtõ rax kumrêx. Nhũm wa aa hkra hkêt nê pa htã nhũm Tĩrtũm nhÿrmã wa hkra hã wa kãm awjarê nhũm wa kuma nê amnhĩ kaxyw hkõt hamaxpêr kurê kumrêx. Nom amnhĩ tã kuma nê tee ri amnhĩ kukamã hamaxpêr hkêt nê. Na pre wa kuma nê axpên mã:

—Nà kot puj xep hãmri tã pahkra. Tĩrtũm kot hã ã pajarênh anhÿr kênã. Anê.

Tã ã wa kot hkra kaxyw Tĩrtũm mã hamaxpêr anhÿr jakamã na pre Apraãwja hprõ htũ. Ra wa hamê hpigêt tÿx kumrêx tã nhũm htũ. Nhũm wa hkra Ijakja gaa nê wa kãm kato. Jakamã nhũm wa gaa nê rĩ wa hkanrêhã wa htãmnhwÿ xohtõ rax o ohtõ rax. Ohtõ ho kaxkwa kamã kanhêti xohtõ jakre. Nê ohtõ ho gõ xujanãr mÿri pikahti grã hkryre jakre. Jakamã nhũm mē tee ri mē ho kōta hpar mã. Nhũm Apraãw kēp mē hpār krax. ¹³ Tã nhũm Apraãw nê Ijak nê Jakoja mē ri pa tãmtã nê htyk pa nê hapêx. Tĩrtũm kormã kot mē kãm pika jarênhã nhõr xwÿj ri ra htyk pa. Nom kormã mē htĩr ri tanhmã kãm hamaxpêr to nê hamaxpêr o:

—Nà kormã Tĩrtũm kot mē inhmã pika jarênhja nhõr kêt tã koja nhÿrmã inhmÿr pē ixkanrêhã ixkra nê ixtãmnhwÿjê mã kugõ. Nà koja mē kãm kugõ. Ra kot hã inhmã amnhĩ jarênh kênã kot kêt mē kãm õr kêt.

Anhÿr o kaxyw kãm hamaxpêr rãhã ho pa. Jao hkĩnh nê hamaxpêr o:

—Nà inhõ krĩja axtem na. Na pa hte jar pika ja kamã ri mē hkõt ri ixpa. Te ixpê mē uro pyrã nê ri mē hkõt ixpa nom jar inhõ krĩ hkêt. Inhõ krĩ na kêt axte mã. Anê.

¹⁴⁻¹⁵ Na prem ã õ krĩ hõ hkukamã hamaxpêr anhÿr o pa. No õ krĩ htũmta mē kot hkaga nê pika hõ hwÿr mõr xwÿnhãta na prem ã harênh anhÿr kêt nê. Kop apu mē kot amnhĩm tãm mãn jarênh ronhÿx prem awjanã nê ma akupÿm hwÿr pa. Na prem axtem krĩ hõ jarê nê kormã hwÿr mõr kêt ã amnhĩ jarênh o pa. ¹⁶ Tã nhÿ krĩ na prem ã harênh anê? Nà kaxkwa kamã Tĩrtũm nhõ krĩja. Tãm na mex kumrêx jakamã nhũm prem kormã hwÿr ma àpir xa hã mē pahpyrà nê amnhĩ tã Tĩrtũm jamãr rãhã ho pa nhũm amnhĩ tã mē omu nê hkĩnh nê. Nê mē kot tãm amnhĩ nhĩpêx ã mē omu nê mē kēp hkra hã mē harênh ã hpijaãm kêt nê. Hãmri nê mē kutêp tanhmã õ krĩ ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htãmnhwÿjaja koja mē kēp ixkra. Anê.

Tã ra kot amnhĩ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tÿx kumrêx nê kãm ixkõt amnhĩ nhĩpêx rãhã ho pa hprãm nã? Xà we kãm ixkĩnh tÿx o hkrata jakrenh? E pa kop we ja hã amnhĩ tã kamã ama nê omu mãn. Anê.

Hãmri nê kot hkra hpĩr nê kãm õr ã kãm karõ. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnãr rom kot kãm hpĩr kaxyw. ¹⁹ Nê hamaxpêr o:

—Nà Tĩrtũm akupÿm kot mē ho htĩr xwÿnh kênã.

Anhÿr jakamã kãm hkra hpĩr puma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupÿm õrkwÿ hwÿr mõ. Tã ã kot hkra nhĩpêx anhÿr jakamã Apraãw mã te Ijak htyk nê akupÿm htĩr pyrãk.

²⁰ Nê Ijakja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnãr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mē Ejauta wa kãm harê nê wa kãm:

—E koja nhÿrmã Tĩrtũm inhmÿr pē war ato mex rãhã ho pa. Anê.

²¹ Nê Jakoja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnãr rom hkra Juje mã Tĩrtũm kot mē ho mex kukamã harê. Na pre Jakoja hkra nê htãmnhwÿ mē hpimràãtã hprãm xaj ma Ejit wÿr pa nê kamã pa ho pa. Tã nhũm Jako hpigêt tÿx nê ra htyk kaxyw. Hãmri nê hkra Juje mē hkra wa mē kãm kapêr nê mē kãm:

—E na pa tee amnhĩ kamã ama. Na pa ra ixyk kaxyw. Nom koja Tĩrtũm nhÿrmã inhmÿr pē mē ato mex rax nê. Anê.

Hāmri nê amnhĩ kaxpar xà hã pĩ hã amnhĩ kaxpa nê kànhmã xa nê Tirtüm mã mex o mex ã harê. Hāmri nê akupÿm nõr xà kamã nõn ty.

²² Nê Jujeja na pre haxwÿja amnhĩ kaxyw Tirtüm mã hamaxpêr tÿx o pa. Jao htyk kaxyw nê hkamnàr rom hkwyjê mã tanhmã amnhĩ jarênh to. Ra hpigêt nê htyk kaxyw nê hkwyjê mã tanhmã amnhĩ tã karõ hto nê mẽ kãm:

—E na pa ra ixyk kaxyw. Tã koja Tirtüm inhmÿr pê nhÿrmã Ejit rüm mẽ akator nê ma akupÿm mẽ panhõ pika hwÿr mẽ ato pa. Ra kot mẽ panhigêt Apraãw mã amnhĩ jarênh xà hkôt. Jakamã kwa mẽ inhma. Kêr ka mẽ akupÿm anojarêt nê ma amnhĩ kôt ixtã kasãwja mÿ nê amnhĩ kôt ixto mõ. Hāmri nê mütar mẽ panhõ pika kamã mẽ anhõ krĩ htã ijaxã pa jawÿ mẽ akuri ixtã pyka. Anê.

²³ Nê Mojes katorxà mẽ hipêêxàja na pre wa haxwÿja jajê pyrã nê amnhĩ kaxyw Tirtüm mã hamaxpêr tÿx o pa. Juje hkanrêhã htãmnhwÿ na pre wa. Jakamã nhüm Ejit nhõ pahija tee ri Ijaew xohtõ rax kumrêx ã mẽ omu nhüm ja kêp omnuj nê. Hāmri nhüm mẽ hkra myjaja mẽ hapôx kôt mẽ hamÿnh xwÿnhjaja kot mẽ hpar ã mẽ kãm karõ. Tã nhüm Mojes kato nhüm hipêêxà mẽ katorxàja wa omu nhüm muxre nhüm wa tee ri hkukamã hamaxpêr. Hāmri nê pahi Paraohti mã mẽ hkra jamÿnh xwÿnh kot wa kêp hpĩr pymaj ho pimxur o hã mytwrÿ axkrunêpxi. Tirtüm kamnàr rom wa amnhĩ tã kãm uma hkêt nê ã kêp hkra ho hpimxur anê.

²⁴ Nê Mojes na pre haxwÿja amnhĩ kaxyw Tirtüm mã hamaxpêr tÿx o pa. Kormã karàre ri na pre Paraohti hkra nija omu nê amnhĩm kumÿ nê ho hkra nê amnhĩ kôt o pa. Rãhã nhüm àptàr nhüm Ejit nhõ xwÿnhjaja kêp pahi Paraohti htãmnhwÿ hã axpên mã harê. Hāmri nhüm tee ri amnhĩ tã mẽ kuma nê amnhĩ tã mẽ kãm aprã nê mẽ kãm:

—Kwa mẽ ã ijarênh anhÿr kêt nê. Ixpê mẽ akwÿ hkêt. Anê.

²⁵ ãm kãm Tirtüm kwÿjê kôt pix mã ri pa ho pa hprãm. Nê kãm Ejit nhõ pahi hkôt amnhĩ tomnuj prãm kêt nê. ãm mẽ kot amnhĩ tomnuj pix o paja na mẽ kãm hprãm nhüm ja hã mẽ omu nê tee ri mẽ hkukamã hamaxpêr nê hamaxpêr o:

—Nà kot paj mẽ hkôt ri ixpa hkêt kumrêx. Mẽ hkĩnh nê pa htã koja mẽ gaa nê ty nhüm mẽ hkĩnhja mẽ kêp hapêx. Nà kot paj Tirtüm kwÿjê hkôt măn ri ixpa ho ixpa. Mẽ kot Tirtüm ã mẽ inhĩpêx kati htã pa arĩ mẽ hkôt ixpa ho ixpa. ²⁶ Inhmã Ejit nhõ xwÿnhjê hkôt ixkukrêx rax nê ri ixpa hprãm kêt. Kwãr mẽ mãmri Tirtüm ã tanhmã inhĩpêx to. Koja mẽ ã inhĩpêx anê pa ixpunuj nê ri ixpa htã koja Tirtüm nhÿrmã ixto mex rax nê. Nà kot paj Ejit nhõ pahihti hkôt ri ixpa hkêt nê.

Anhÿr jao ra mẽ pahpyrà nê Kris gryk ã mẽ hkaga. ²⁷ Tã akupÿm mẽõ pika hwÿr Ijaewjê ho mör kaxyw nhüm Ejit nhõ pahihtija tee ri ja hã omu nê kamã gryk tÿx nê. No nhüm Mojesja amnhĩ kaxyw Tirtüm kôt hamaxpêr tÿx o hkamnàr rom kãm mẽ uma hkêt nê. Nê mẽ kêp hkwyjê kator pa nê ma akupÿm mẽõ pika hwÿr amnhĩ kôt mẽ o pa. Tirtüm kamnàr rom ã mẽ kêp mẽ ho kator anê. Aa kot no ho omunh kêt tã amnhĩ kaxyw kãm hamaxpêr tÿx nê hkamnàr rom mẽ kator nê hamakêtkati nê mẽ o pa. ²⁸ Nê hkamnàr rom mẽ hkĩnh ã arĩgro mẽ kot kãm “Pas” anhÿr xwÿnhhta ho hkrax. Kormã Ejit rüm kator kêt ri. Nê kaxyw amnhĩ kwÿjê mã hã karõ nê mẽ kãm:

—E pa mẽ amã Tirtüm kapêr jarê ka mẽ inhma. Nà kot puj xep mẽ jarãhã ôwêhti hkwy pã nê hkamrô ru. Nê hkamrô ho panhõrkwÿ jakwakre hã pĩ kukõ. Hāmri nê ã kuxôt nê kuku. Koja kamàt nhüm mẽ kot amnhĩ tomnuj xwÿnhjê pê mẽ hkra my kot wa piitã mẽ hpar mã xwÿnhja mõ. Hāmri nê mẽ pamÿ ri mõ nê ã mẽ pahte mẽ panhõrkwÿ nhĩpêx anhÿrja ã omu nê tanhmã mẽ pahkrajê ho hkêt nê. Tirtümja ã mẽ pahte amnhĩ nhĩpêx anhÿr kaxyw ã inhmã karõ anê. Jakamã e pu mẽ hkamnàr rom ã amnhĩ nhĩpêx anê kê mẽ pahkrajaja mẽ pahpê htyk kêt nê. Anê.

Hāmri nê ã mẽ kot Ejit rüm kator xà hã arĩgrota ã mẽ hkĩnh o kator krax anê. Mẽ hkĩnhja na htem kãm “Pas” anê.

²⁹ Nê Ijaewjaja na prem haxwÿja Ejit rüm kormã Mojes kôt mẽ pa ri uràk nê amnhĩ kaxyw Tirtüm mã hamaxpêr. Jakamã na prem ra gô xujanãr pê “Gô Kamrêk” anhÿr xwÿnhja mÿ ri kuhê nhüm Tirtüm mẽ kãm ho axkjê. Nê mẽ kãm hkôt ã ho amgrã nhüm

mê hã hkamnàr rom mex nê rêr pa. No nhũm mê hkôt mê kot mê himex kaxyw mê mrar xwỳnhjaja. Ejit nhõ pòristijaja nhũm gôja akupỹm mê hã axkamur nê mê himex pa.

³⁰⁻³¹ Nê Ijaew kot Mojes mỳr pê Jojue hkôt pa ri mê uràk nê amnhĩ kaxyw Tĩrtũm kôt hamaxpêr o pa. Na prem ra Tĩrtũm kot mê kãm pika nhõr xwỳnhhta wỳr pøj nhũm Tĩrtũm krĩ pê Jeriko hwỳr mê kurê. Mê kot kamã mê pa xwỳnh pê utàr kaxyw mê hwỳr mê kurê. Mẽõ krĩ pu hã kahêja kên tỳx pix o na pre. Nê hprêk rax kumrêx. Nê krĩ nhõ xwỳnhjaja kãm Tĩrtũm kapêr mar prãm kêt. Hãmri nhũm Tĩrtũm mê hã Ijaewjê mã amỳnê nê mê kãm:

—E mẽõ krĩja kot paj mê amã kugõ nom kêr ka mê inhmar kumrêx. Kêr ka mê apkati mê mẽ õ krĩ hwỳr mra nê kupu hpỳnh o atã apkati kêp 7 nê rĩ ma akupỹm mra. Anê.

Hãmri nhũm mê kuma nê mar xà hkôt ma Jeriko hwỳr mra. Hãmri nê hwỳr pøj nê Tĩrtũm kamnàr rom krĩ puhã kahêja kupu hpỳnh o hã apkati kêp 7. Hãmri nhũm apkati pê 7ta ã nhũm kên tỳx o kahêja mê kêp amnhĩ krakrak nê rôrôk pa. Nhũm mê mra nê hkôt krĩ hwỳr agjê nê krĩ nhõ xwỳnhjê nhĩmex pa. Nom krĩ kamã kuprỳ pê Raapja Ijaew pyrã nê amnhĩ kaxyw Tĩrtũm mã hamaxpêr o pa jakamã nhũm mê kormã mê himex kaxyw mê hwỳr mõi kêt ri amnhĩ kukamã mê hkwỳjaja kot mê hã ukapi ho pa kaxyw mê hwỳr mê kurê. Hãmri nhũm Raapja mê kêp amnhĩ pyrã nê Tĩrtũm kôt hamaxpêr ã mê omu nê hkwy kot mê himex pymaj amnhĩ nhõrkwỹ kamã mê kêp mê ho amũxu nhũm mẽ hkà hkĩnh pê ma akupỹm hkwyjê wỳr mõi. Jakamã nhũm mê kot mê himex kaxyw mê hwỳr mra hãmri nê amnhĩ pyrã nê tanhmã Raap mẽ õ fãmii ho hkêt nhũm mẽ arĩ htĩr nê pa. Mê uràk nê amnhĩ kaxyw Tĩrtũm kôt hamaxpêr o pa hã omunh xà hkôt tanhmã mẽ ho hkêt nê.

³² ã na pre mê kot amnhĩ kaxyw Tĩrtũm kôt mê hamaxpêr xwỳnhjaja Tĩrtũm kamnàr rom amnhĩ nhĩpêx anhỳr o pa. Nom jajê pixjaja na prem ã amnhĩ nhĩpêx anhỳr hkêt nê. Mãânên Giteaw nê Parak nê Sãsõ nê Jepte nê Tawi nê Sãmuew nê Tĩrtũm nhỹ hã mẽ kapêr o pa xwỳnhjaja. Jajê piitã na prem wamtajê pyrã nê amnhĩ kaxyw Tĩrtũm kôt hamaxpêr tỳx rãhã ho pa. Nom kot paj ixprĩ hã tanhmã mẽ kot hkamnàr rom amnhĩ nhĩpêx to hã mẽ harênh kêt nê. Kot pa anê nê tokyx harênh par kêt nê. Mê ohtõ rax kumrêx jakamã na pa ãm hkwy pix jarê nê hã kaga.

³³ Na prem hkwyjaja Tĩrtũm kamnàr rom ma mẽ kot amnhĩ tomnuj xwỳnhjê nhõ krĩ hwỳr mra nê mẽ kêp mẽ õ pika pytà. Nê mẽ hkwyjaja Tĩrtũm kamnàr rom mẽ ho amnhĩptar mex o pa. Nhũm prem kãm Tĩrtũm kurê xwỳnhjaja mẽ hkwyjê pynê nê ahkrehti kamã mry xoprê hkwy nhĩpy mẽ kurê. Nhũm prem amnhĩ tã mẽ omu nê amnhĩ kaxyw Tĩrtũm mã hamaxpêr kurê kumrêx nhũm amnhĩ tã mẽ omu mẽ nê te mry jakwa ho pikamỳr tỳx pyrãk o mẽ hipêx nhũm ãm mẽ omunh o kuhê nê tanhmã mẽ ho hkêt nê. ã na prem Tĩrtũm kamnàr rom amnhĩ nhĩpêx anhỳr o pa.

³⁴ Nhũm mẽ kot kuwy rax kãm mẽ hkwyjê rênh tã nhũm mẽ kot amnhĩ kaxyw Tĩrtũm mã hamaxpêr tỳx nhũm amnhĩ tã mẽ omu nê mẽ nê tanhmã kuwy ho nhũm mẽ hxêt kêt nê. Nhũm pre mẽ hkwyjaja wapo ho mẽ hkamnhwỳr o mẽ hkwyjê hpar kaxyw nhũm mẽ amnhĩ kaxyw Tĩrtũm mã hamaxpêr nhũm amnhĩ tã mẽ omu nê mẽ nê tanhmã mẽ ho nhũm mẽ amnhĩ rê nê mẽ umaj hprõt nê ma mra. Mê hihtỳx kêt tã Tĩrtũm kamnàr rom y hã hihtỳx nê mẽ kãm mẽ hkurê xwỳnhjê ho krihkrit pa nhũm mẽ ma akupỹm hapêx.

³⁵ Nê mẽni hkwyjaja na prem haxwỳja amnhĩ kaxyw Tĩrtũm mã hamaxpêr tỳx o pa. Jao mẽ hkrajaja mẽ kêp htyk tã nhũm prem Tĩrtũm kamnàr rom mẽ ho kuwy nhũm mẽ kuma nê akupỹm mẽ kãm mẽ ho htĩr.

ã na prem amnhĩ kaxyw Tĩrtũm mã hamaxpêr pê mex nê pa anê. No na pre mẽ hkwyjaja mẽ uràk nê amnhĩ kaxyw kãm hamaxpêr tỳx tã nhũm Tĩrtũm tokyx mẽ ho mex kêt nê. Na pre mẽ kãm mẽ hkurê xwỳnhjaja Tĩrtũm ã mẽ par kaxyw. Nê mẽ hkwyjaja Tĩrtũm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nê mẽ kãm:

—Kwa mẽ Tĩrtũm kaga. Kot kaj mẽ hkaga pa mẽ amã inhũre nê mẽ anhimex kêt nê. Anê.

No nhũm mē kuma nē ãm mē kuma nē amnhĩ kaxyw kãm hamaxpēr tỳx pē mē kãm:
 –Nà mē kam nē māmri xipĩ. Inhmã ixtyk pyma hkêt. Kot paj ty nhũm Tĩrtũm akupỹm
 ixtu ixtĩr pa kuri inhmex kumrēx nē ri ixtĩr tũm nē ixpa ho ixpa.

Anhỹr o mē kãm amnhĩ jarēnh jakamã hãmri Tĩrtũm kaga hkêt rãhã nhũm mē himex.

³⁶ Nē mē kãm mē hkurê xwỳnhjaja na prem Kris ã mē hkwỳjê mã hpēr o pikēnh pē mē
 htak xà ho mē htak rũnh o pa. Nē kàx o mē hkwỳjê hpa hpre nē mē hte hpre nhũm mē
 kēp prēs nē hkrĩ ho hkrĩ.

³⁷⁻³⁸ Nhũm prem kēn rũnh o mē hkwỳjê htak o mē kupa. Nē mē hayr o mē hkwỳjê pa.
 Nē mē hkamnhwỳr o mē hkwỳjê pa. ã na prem Kris kôt mē hamaxpēr ã mē omunh xà
 hkôt mē hipêx anhỹr o pa. Jakamã na pre mē hkwỳjaja mē umaj mẽõ krĩ rũm hapôj nē
 ma hprôt nē mra. Nē te mē õ krĩ hkêt pyrã nē kapôt ã kēp amrakati nē ri pa. Mē ê hkêt
 nē ôwēhti hkà ho ê nē ri hã pa. Nē motre kà ho amnhĩ pre nē ri hã pa. Nē kēn prêk ã api
 nē kre kamã hpimxur o pa. Nē pika hkre kamã hpimxur o pa. Nhũm mē kãm mē hkurê
 xwỳnhjaja te mē kēp ahpunu nē mē kēp ahkro pyrãk o mē hipêx nē axpēn mã mē harēnh
 o:

–Nà mē mexti hã. Kwa pu mē piitã mē himex paa ri.

Anhỹr o mē harēnh tã nhũm Tĩrtũm mē uràk nē ã mē harēnh anhỹr kêt nē. Na pre mē
 mex kumrēx ã mē harē. Nē nhỹrmã kuri mē mex nē pa ho pa hkukamã mē harē.

³⁹ ã na prem Tĩrtũm kamnàr rom mē kãm mē hkurê xwỳnhjê kutã amnhĩ to htỳx kãm
 htyk o pa anē. Nhũm Tĩrtũm ja hã mē omu nē hkĩnh nē kãm mē hapê htỳx nē. No nhũm
 mē kormã htĩr ri amnhĩm Tĩrtũm kot mē ho mex xà jamỳnh kêt rãhã ty. ⁴⁰ Tã mo na
 pre Tĩrtũm kormã mē htĩr ri hkwỳjê pyrã nē mē ho mex kêt nē? Nà na pre kormã mē
 hkukamã hamaxpēr o:

–Nà kot paj kormã mē ho mex kêt nē. Kot pa mē mỳr pē mē kot ixkôt amnhĩ xunhwỳr
 mã xwỳnhjê jamãr grire mãn. Kêr pa inhõ krĩ kamã mē ho ixpimràatã mē ho mex rax
 kumrēx. Nà kot paj ã mē ho mex anē. Ja na kêt inhmã mex o kormã mē htĩr ri ixte mē
 ho mexta jakrenh. Anē.

Ja o ra ã mē papajaja mē pakukamã hamaxpēr anē.

12

*Mē pahte Jejus pyrã nē mẽmoj kutã amnhĩ to htỳx ã mē pamã karõ
 Piripos 3.12-21*

¹ Na pre mē pakukamã mē panhĩgêt kwỳjjaja amnhĩ kaxyw Tĩrtũm mã hamaxpēr pē
 ã amnhĩ xà htỳx kamã hamak o pa anē. Tã te ra mē kot kỳj rũm kaxkwa rũm mē
 pahpumunh nē tanhmã mē pamã kapēr to pyrã nē mē pamã kapēr o:

–E mē inhma mē ixkanrēhã mē ixtãmnhwỳjjaja. Na pa prem ã Tĩrtũm kamnàr rom
 amnhĩ nhĩpêx o ixpa anē. Mē kot ja hã mē inhĩpêx kati htã pa prem Jejus kaga hkêt nē.
 Tã kêr ka mē ixpyrà nē ã mē kãm mē akurê xwỳnhjê kutã amnhĩ to htỳx anē. Nē mē
 ixpyrà nē amnhĩ kaxyw Tĩrtũm kôt pix mã ajamaxpēr tỳx rãhã ho ri apa. Anē.

Jakamã kwa kêr pu mē uràk nē ã amnhĩ nhĩpêx anhỹr rãhã ho mãn ri papa. Te mē
 hprôt xwỳnhjaja kot amnhĩ nhĩpêx pyrãk o amnhĩ nhĩpêx. Na htem hprôt tỳx kaxyw
 mẽmoj pytĩ jamỳnh nē ho hprôt hkêt nē. Na htem ÿ kamã hprôt o hprôt tỳx nē wam
 hkwỳjê mã wa nē mra. Ja pyrã nē kêr pu mē pahte Tĩrtũm kapēr kôt amnhĩ nhĩpêx mex
 o papa kaxyw tanhmã mē pahte amnhĩ tomnuj to hã amnhĩ pumu nē hkaga kurê kumrēx.
 Mē pahte amnhĩ tomnuj o papa xàja te mex pyrãk no ãm mex kêt. Te ho mē hprôt xwỳnh
 kot axtem nē mẽmoj pytĩ mỳnh nē tee ri ho hprôt tỳxta pyrãk. Kot puj mē tanhmã amnhĩ
 tomnuj to ho papa nē Tĩrtũm kapēr kôt amnhĩ nhĩpêx mex kêt nē. Jakamã kwa kêr pu
 mē Tĩrtũm kapēr gryk ã amnhĩ tomnuj nē amnhĩ to htỳx rãhã ho papa. Te ho mē hprôt
 nē nhỹri mē àhuk xà pix kukamã hamaxpēr rãhã hprôt tỳx xwỳnhhta pyrã nē ãm Jejus
 mã pajamaxpēr tỳx rãhã ho papa.

² E kot paj mē amã Jejus kot tanhmã mē panê amnhĩ nhĩpêx toja jarē ka mē inhma. Nà
 kot mē panê mē pahte amnhĩ tomnuj pãnhã amnhĩrer kaxyw htyk nhũm mē pahte hkôt

amnhĩ xunhwÿr jakamã na hte mẽ pamã pajamaxpêr nyw gō pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwÿnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htÿx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nê. Na pre hamaxpêr o:

—Nà kwār mẽ māmri xpi. Kot paj ty nhũm Inhĩpêêxà akupÿm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tĩrtũm xupôk rũm mex nê hkrĩ ho hkrĩ. ³ Jakamã kwa kêr pu mẽ kot ã mẽ panê amnhĩ nhĩpêx anhÿrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htÿx nê xa. Tã kêr pu mẽ urak nê mẽ kãm mẽ pahkurê xwÿnhjê kutã amnhĩ to htÿx rãhã ri papa. Jao tee ri amnhĩ kukamã pajamaxpêr o mẽ umaj Tĩrtũm kaga hkêt nê.

⁴ Na ka htem ma mẽ kot amnhĩ tomnuj xwÿnhjê hwÿr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwÿjê nhĩpêxta pyrà nê kormã mẽ atōxpĩr kêt nê.

Tĩrtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

⁵ Nê mãn ka mẽ arĩ Tĩrtũm kapêr ã kagà htũm kwÿ hã ano htÿx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar tÿx nê mẽmojta kaga kurê kumrêx. No mẽ ama nê tee ri kot nê akurê xwÿnhhta kukamã ajamaxpêr o ri akapri o axtem nê Tĩrtũm kaga hkêt nê. Ama nê kot amã mẽmoj nê kapêr xwÿnhhta kaga kurê kumrêx.

⁶ Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mÿrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêt nê. Kêt mẽ ãm ajamaxpêr o:

—Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xaj ã inhĩpêx anê.

Anhÿr o mãn kêt ajamaxpêr. Na hte mẽ hipêêxà mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ urak nê ã mẽ panhĩpêx anê. ⁸ No koja mẽhō hkra kot tanhmã amnhĩ tomnuj to hã omu nê ãm omu nê hã tanhmã ho hkêt nê. Hã koja hkraja te hipêêxà hkêt nê hã awrãre nê ri pa pyràk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêt xwÿnhjaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkêt nê.

⁹ Nê na hte mẽ panhĩpêêxà mẽmoj tã mẽ pamã karō pu htem kuma nê hkôt amnhĩ nhĩpêx. Ja mex. Nom kaxkwa kamã Mēpahpãm maatija mẽ pahte mar nê hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anê nê nhÿrmã kuri pamex nê pahĩr tũm nê papa ho papa.

¹⁰ Nê mẽhprĩre na htem hamaakro nhũm mẽ hipêêxà tanhmã hã mẽ ho. Hã mẽ hkaprêprêk rÿ hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nê axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tōhã tanhmã amnhĩ tomnuj to nhũm mẽ pahpumu nê tanhmã hã mẽ pahto. Mẽ pahte amnhĩ pumunh nê axte hkêt kaxyw. Urak nê amnhĩ to mex pix o papa kaxyw. ¹¹ Na hte mẽmoj tã tanhmã mẽ panhĩpêx to pu mẽ tee ri amnhĩ pumu nê pahkapri nê pahkĩnh kêt nê ri papa. Nom kot puj mẽ tokyx tanhmã amnhĩ tomnuj tota kaga nê akupÿm Tĩrtũm kôt tãm amnhĩ nhĩpêx o papa nê akupÿm pahkĩnh nê pajamakêtkati nê ri papa.

Mẽ pahte Tĩrtũm kaga hkêt ã mẽ pamã karō

¹² Jakamã e kwa kêr ka mẽ amnhĩ to htỳx nẽ apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pẽ akĩnh nẽ apa. ¹³ Kêr kê Kris kôt atôjê hõ tee ri mẽmoj tã amnhĩ pumunh kôt ra Tĩrtũm kaga kaxyw tã ã mẽ ate amnhĩ nhĩpêx anhỹr ã mẽ apumu nẽ mẽ apyrã nẽ akupỹm hkôt amnhĩ xãm tỳx nẽ hkaga hkêt nẽ.

¹⁴ Nẽ kêr ka mẽ tãm ri axpẽn nhĩpêx o ri apa. Jao axpẽn kôt ajamakêtkati nẽ ri apa nẽ amnhĩ to mex pix kukamã ajamaxpêr. No kot kaj mẽ anhỹr kêt nẽ nhỹrmã mẽ panhõ Pahi Maati hwỳr axãpir nẽ kuri amex nẽ apa hkêt nẽ.

¹⁵ Na hte Tĩrtũm mẽ pahto mex nẽ mẽmoj to mẽ pakutã nojarêt rãhã o pa. Jakamã kwa kêr ka mẽ hkaga hkêt nẽ. Nẽ tanhmã ri ajamaxpêr punuj to ho ri apa hkêt nẽ. Kot ka mẽ ã amnhĩ nhĩpêx anẽ nhũm Kris kôt mẽ pahkwỳjaja ja hã mẽ apumu nẽ mẽ apyrã nẽ tanhmã amnhĩ tomnuj.

¹⁶ Nẽ kêr ka mẽ axpẽn kãm apijaãm kêt o ri apa hkêt nẽ. Nẽ te finat Ejau kot amnhĩ nhĩpêx pyrãk o ri apa hkêt nẽ. Na pre Tĩrtũm ã hpijaãm kêt nẽ hkwỳjê kamã hpijaãm kêt o pa. Nẽ Tĩrtũm mã hamaxpêr kêt kumrêx. Kêp Ijak kra kot wa jakamã koja nhỹrmã hipêxã mỳr pẽ kêp hikukrêx nẽ õ pika piitã ho àrik pa. Hãmri nhũm hipêxã kot ho Tĩrtũm wỳr nhũm kot ho mex kaxyw mã tã nhũm axtem nẽ mẽmo arĩgro hã kãm prãm xàj kot kêp mẽmoj to àrik mã xwỳnhhta htõ Jako mã hkaga hpa. Mankwỳrtre gôj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrã nẽ mỳr pẽ õ mẽmoj piitã ho àrik mã. ¹⁷ Gaa nhũm Ejau tee ri ã amnhĩ nhĩpêx anhỹrja mã hamaxpêr o hkaprĩ nẽ. Nẽ tee ri kãm Jako kot akupỹm kãm mẽmojta nhõr prãm kaprỹ. Nẽ mur nẽ hã hipêxã wỳ no nhũm axte kãm mẽmoj nhõr kêt nẽ. Nhũm kot ho Tĩrtũm wỳr kaxyw tee ri amnhĩ to kuwỳ no nhũm kuma nẽ ãm kuma nẽ kãm ho anhỹr kêt nẽ.

¹⁸ Nẽ amnepê mã Tĩrtũm kot mẽ panhĩgêxjê mã kapêr kaxyw na prem hixêt prêk pẽ Sinai jarênhja wỳr akuprõ nẽ hparpê kuhê. Hãmri nhũm hixêt nhĩmõk ã kuwy hpõk rax kumrêx. Nẽ kuwy mỳr ri kakrã htyk ajêt. Nẽ kòk àpêr tỳx nẽ. Nhũm Ijaewjaja hixêt krax ã omu nẽ kãm maa ho htertet o kuhê. ¹⁹⁻²¹ Hãmri nhũm mẽhõ pifti kakõ nhũm Tĩrtũm hixêt nẽ mẽ kãm kapêr nẽ mẽ kãm:

—E mẽ inhma. Kêr ka mẽ hixêt ã axãpir kêt nẽ. Kot kaj mẽ atõ hã api rỳ mẽ akrit õ hã api ka mẽ ja hã omu nẽ kaxyw kẽn rũnh kwỳ jamỳ nẽ ho htak o apĩ. Anẽ.

Hãmri nhũm mẽ piitã tee ri kuma nẽ kãm ma htỳx kumrêx nẽ amnhĩ nẽ kãm:

—Kwa hãmri Tĩrtũm. Axte mẽ inhmã mẽmoj jarênh kêt nẽ. Mojes pix mã mãn mẽ ixkaxyw tanhmã kãm akapêr to. Anẽ.

Jakamã nhũm Mojes Tĩrtũm mã amnhĩ jarênh nẽ kapêr mar kaxyw hixêtja ã api. Kãm ma nẽ htertet rãhã mõ nẽ hã api. ²² Nom mẽ kãm ma ho Tĩrtũm mã amnhĩ jarênh tã mẽ papajaja na pu htem mẽ kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nẽ hixêt prêk ã paxãpir kêt nẽ. Te ra mẽ pahte ma kaxkwa hwỳr õ krĩ hwỳr paxãpir nẽ pano ho omunh pẽ kãm amnhĩ jarênh pyrãk. Õ krĩja mex o mex. Kamã kapêr o mẽ wrỳk xwỳnhjaja ohtõ o ohtõ. Na htem kamã hkĩnh rãhã ho pa ho pa.

²³ Nẽ õ krĩ hwỳr na hte hkra xãpir xwỳnhjaja ri pa. Nẽ mẽ papajaja na pu htem kãm amnhĩ jarênh kaxyw nẽ te kaxkwa kamã kuri pakuhê nẽ kãm amnhĩ jarênh pyrãk o amnhĩ nhĩpêx. Te mẽ pahpê hkra kot wa pyrãk jakamã mẽ pamã uma hkêt. Nhũm pre Tĩrtũm ra õ kagã kamã mẽ pakutêp amnhĩm mẽ panhĩxi hã kagã hpa. Na hte mẽmoj piitã hamãr o hkrĩ. Nẽ krĩja kamã amnepêr kormã Kris kot mẽ pahwỳr wrỳk kêt ri nhũm ra amnhĩ kaxyw Tĩrtũm kôt hamaxpêr mex xwỳnhjaja haxwỳja ra kamã ri pa. Ra Tĩrtũm kot mẽ ho hkra jakamã nhũm mẽ kuri ri pa ho pa. ²⁴ Nẽ Jejus haxwỳja kamã pa ho pa. Na pre mẽ panê htyk nẽ hkamrõ pikapĩrja o mẽ pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwỳ nhũm mẽ pahto hkra pu mẽ paxãmnhĩx ri Tĩrtũm mã amnhĩ jarênh nẽ amnhĩ to hwỳr o papa.

Amnepêr na pre Tĩrtũm tee ri Kãĩ kot htõ Apew pĩr nẽ hkamrõ pikapĩrja ã omu nẽ hamaxpêr o:

—Nã ã kot amnhĩ nhĩpêx anhỹr jakamã kot paj hã homnuj tỳx nẽ. Anẽ.

Tã ra hpãnhã Jejus kot mẽ panê htyk nê hkamrô pikapĩrja ã omu nê ra axtem hamaxpêr o:

—Nà ãm hãmri na Ixkraja mẽ nê ty. Jakamã mẽ kot hkôt amnhĩ xunhwyr xwỳnhjaja kot pa Ixkra kukwak ri mẽ kot amnhĩ tomnuj mỳrapê tanhmã mẽ ho hkêt nê.

Anhỹr o mẽ pakukamã hamaxpêr. ã hamaxpêr anhỹrja mex o mex.

²⁵ Na pre Mojes Tĩrtũm nhỹ hã mẽ panhĩgêxjê mã xatã mẽ kãm Tĩrtũm kapêr jarênh o ri pa nhũm mẽ kuma nê hkôt amnhĩ nhĩpêx o pa. Tã gaa nê ra hã nohkêt pa nê akupỹm mẽ kot amnhĩ nhĩpêx tũm o awjanã nhũm Tĩrtũm tee ri ja hã mẽ omu nê mỳrapê tanhmã mẽ hipêx to. Tã nhũm Kraja kaxkwa rũm mẽ pahwyr wrỳ nê mẽ pamã kapêr. Jakamã kwa mẽ okora kêr pu mẽ panhĩgêjtjê pyrã nê mẽ pahte amnhĩ nhĩpêx tũm o paxujanãr kêt nê. Kot puj mẽ anê nhũm Tĩrtũm ja hã mẽ pahpumu nê mẽ urãk nê ja hã tanhmã mẽ panhĩpêx to.

²⁶ Amnepêm Tĩrtũm kot hixêt prêk pê Sinai kamã mẽ kãm kapêrja. Na pre kapêr tỳx o pika ho àk nhũm htertet tỳx nê. Tã koja nhỹrmã axte pika ho àk nê kaxkwa ho àk nhũm wa hamê htertet tỳx kumrêx. Koja axte ho anhỹr ho pixi nê axte ho anhỹr kêt nê. ²⁷ Tã nhỹrmã axte mẽmoj to àk ã amnhĩ jarênh jakamã koja mẽmoj to kator xwỳnhhta piitã ho àk. Nê mẽ pahte panhĩkra ho mẽmoj nhĩpêx xwỳnhja nhũm ho àk nhũm htertet tỳx kãm hpigrãnh pa nê hapêx. Nhũm mẽmoj htertet nê hpigrãnh kêt xwỳnh pixjaja arĩ rãhã ho rãhã. ²⁸ No Tĩrtũm nhõ krĩ koja htertet nê hapêx kêt nê. Nê mẽ papajaja mẽ pahpê hkra jakamã te ra kuri õ krĩ kamã ri mẽ papa pyrãk. Jakamã kot puj mẽ mẽ urãk nê papapêx kêt nê. Jakamã e kwa kêr pu mẽ amnhĩ tã Tĩrtũm mã mex o mex ã harênh nê hã pahpijaam rãhã ho papa. Nê tanhmã amnhĩ tomnuj to hã amnhĩ pumu nê Tĩrtũm pumaj mẽmojta kaga kurê kumrêx. ã mẽ pahte amnhĩ nhĩpêx anhỹr o papaja na Tĩrtũm kãm hprãm. ²⁹ Hihtỳx o hihtỳx jakamã koja mẽmoj tã akamã gryk kot kaj amex kêt o amex kêt.

13

Mẽ pahte Tĩrtũm kãm hprãm xà hkôt amnhĩ nhĩpêx ã mẽ pamã karõ

Rõmãn 12.1-2; Epes 4.1-3; Korosẽ 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kêr pu mẽ arĩ Kris kôt pahkwỳjê ho mex o mãn axpên kôt ri papa. Nê kêr pu mẽ tanhmã pahpunuj to hã amnhĩ pumunh tã axpên to mex mã panhũrer kêt nê. ã axpên nhĩpêx anhỹr rãhã ho papa.

² Nê amnepê mã na pre mẽmojaja nhỹhỹnh mra nê mẽ panhĩgêjtjê hõ hwyr pøj. Hãmri nhũm mẽ omu nê htỳx axtem krĩ hõ nhõ xwỳnh ã mẽ hkamnhix tã no nhũm mẽ kêp Tĩrtũm kapêr o mẽ wrỳk xwỳnh kwỳ na prem. Hãmri nhũm amnhĩ nhõrkwy hwyr mẽ kuwỳ nhũm mẽ ma hkôt mra nê kuri pøj nê kutã apku. Jakamã kwa koja nhỹhỹnh krĩ hõ rũm mẽmojaja ma mẽ awyr mõ ka mẽ omu nê axãmnhix amnhĩ nhõrkwy hwyr mẽ hwyr kurê kumrêx kê mẽ ari pøj. ã mẽ hipêx anhỹr o apa hãmri nê nhỹrmã mẽ panhĩgêjtja pyrã nê amnhĩ wyr Tĩrtũm kapêr o mẽ wrỳk xwỳnhjê hõ hwyr japêr. Mẽ urãk nê ja hã mẽ omunh kêt tã atỳx amnhĩ wyr mẽ awy nhũm ja mẽ amã mex o mex.

³ Nê kêr ka mẽ ra mẽ kot Jejus ã mẽ akwỳjê pynênh nê mẽ hagjênh xwỳnhjê mã ajamaxpêr rãhã ho ri apa nê mẽ ho ajamakêtkati hkêt nê. Te mẽ kajaja mẽ ãhkõ hã mẽ hagjênh xà kamã apunuj nê akrĩ pyrãk o mẽ kãm ajamaxpêr o ri apa. Jao mẽ kamã axukapri ho mẽ hwyr mra nê mẽ kãm mẽmoj nhõr o ri apa.

⁴ Nê mẽ kot axpên to hprõja na mex. Nom kêr ka mẽ amyjaja ãm aprõ pix tãnopxar o ri apa. Nê mẽ anijaja mẽ ajaxwỳja amjên pix tãnopxar o ri apa. No mẽ hkuprỳjê hwyr mẽ mrar xwỳnhjaja nê nhãm mẽ kêp mẽ hprõ ho amnhĩkati xwỳnhjaja nê nhãm mẽ kêp mẽ mjên o amnhĩkati xwỳnhjaja koja Tĩrtũm ja hã mẽ omu nê mẽ homnuj tỳx kumrêx.

⁵⁻⁶ Nê kêr ka mẽ akàxpore rũnh kêt ã amnhĩ pumu nê tee ri amnhĩ kukamã ajamaxpêr o akapri hkêt nê. Na pre Tĩrtũm mẽ pamã kapêr o:

Kot paj akôt ri ixpa rãhã ho ixpa nê aa arer rỳ akaga hkêt kumrêx.

Anhÿr jakamã kot kaj mẽ akàxpore grire htã akaprĩ nẽ apa hkêt nẽ. Aa Tĩrtũm kot mẽ pahkaga hkêt ã amnhĩ jarẽnh jakamã mẽmoj kot pu wem omu nẽ pamã nhãm ri mẽ uma ho papa? Tĩrtũm kot mẽ pahkõt pa ho pa kẽnã. Jakamã na pu htem pajamaxpẽr o:

Nà Pahi Maatija ra kot ixkõt pa ho pa xwÿnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kęp ixto?

Anhÿr o pajamaxpẽr o papa. ⁷ Nẽ mẽ kot Kris mã mẽ ajamãr o mẽ pa xwÿnh ra mẽ htyk xwÿnhjaja ka mẽ arĩ mẽ kot tanhmã amnhĩ nhĩpêx to ho paja mã ajamaxpẽr rãhã ho ri apa. Na prem Tĩrtũm kapẽr o mẽ ajahkre mex nẽ. Nẽ tãm ri amnhĩ nhĩpêx o ri mẽ akõt pa. Nẽ amnhĩ kaxyw Tĩrtũm kõt pix mã hamaxpẽr rãhã ty. Tã kêr ka mẽ urak nẽ ã amnhĩ nhĩpêx anhÿr o ri apa rãhã ty.

⁸ Nẽ Jejus Krisja arĩ rãhãã. Nẽ amnepê mã kot amnhĩ nhĩpêxja mããnẽn arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nẽ kwa kêr ka mẽ Tĩrtũm kõt amnhĩ nhĩpêx rãhã ho ri apa. Na hte kapẽr o hêx xwÿnhjaja mẽ awÿr mra nẽ mẽ amã:

—Amnepêm mẽ ate Tĩrtũm kot mẽ amex ã mẽ ajarẽnh kaxyw mẽ ate kãm mẽmo mry nhõr nẽ akupÿm hamÿnh nẽ hkur o apa htã ra ja ho anhÿr kaga. Kwa mẽ ja ho awjanã nẽ axte ã amnhĩ nhĩpêx anhÿr o ri apa. Kê Tĩrtũm ja hã mẽ apumunh kõt mẽ amex ã mẽ ajarẽ.

Anhÿr o mẽ amã kapẽr. Nom xà na hte Tĩrtũm ã mẽ pahte amnhĩ nhĩpêx anhÿr ã mẽ pahpumunh kõt mẽ pamex ã mẽ pajarẽ? Xà na htem mẽmo mẽ apkur xà hkur pẽ amnhĩ kaxyw Jejus kõt hamaxpẽr tÿx o pa? Nà na htem anhÿr kêt nẽ. Na pu htem mẽmoj kur kõt pamã Tĩrtũm kĩnh kêt nẽ. Kêt mẽ paxàpkur xàja mẽ panhĩ pix o hihtÿx kaxyw na. Na hte Jejus kõt mẽ pahto paxihtÿx kêt nẽ. ãm Tĩrtũm kot amarĩ kãm mẽ pajapê nẽ mẽmoj to mẽ pakutã nojarêt jakamã na pu htem ja hã amnhĩ pumu nẽ amnhĩ kaxyw hkõt pajamaxpẽr tÿx o papa.

¹⁰ Tĩrtũmja Jejus kot mẽ panê htyk ã omunh xà hkõt ra kot mẽ pamex ã mẽ pajarẽnh jakamã mo kaxyw kot pu mẽ axte kot mẽ pamex ã mẽ pajarẽnh kaxyw kãm mẽmo mry gõ nẽ hkwÿ hku? Koja mẽhõ akupÿm Tĩrtũm kapẽr tũm o ujanãr jao Jejus kot nẽ htyk nẽ hkamrõ pikapĩrja kaga. ¹¹ Amnepêm na pre patre maatijaja tõhã mẽ kãm mẽmo mry hpar xwÿnh hkamrõ ru nẽ guhkrax kãm kuru nẽ hamÿ nẽ ma o mra nẽ Tĩrtũm nhõrkwÿ kaàkre hwÿr hitom maati hwÿr ho agjê. Tĩrtũm kot mẽ omunh nẽ axte mẽ kot amnhĩ tomnuj mã hamaxpẽr kêt kaxyw. Hãmri nhũm hpãnhã ĩ mÿ nẽ krĩ pẽ ho kato nẽ ma o mra nẽ nhÿri amÿm hkwÿjê hkàx ã ho hxêt pa. Tĩrtũm kapẽr tũm kõt na prem ã amnhĩ nhĩpêx anhÿr o pa. ¹² Tã ja pyrã nẽ na prem ma krĩ pẽ amÿm Jejus o tẽ nẽ kupĩ nhũm hkamrõ axkapĩ. Kot mẽ pahte amnhĩ tomnuj pãnhã amnhĩrer nẽ mẽ pahto mẽ pahpê Tĩrtũm kra kaxyw ã htyk nẽ hkamrõ pikapĩr anê. ¹³ Na prem Tĩrtũm kapẽr tũm gryk ã Jejus kaga nẽ pòristijê mã anê nhũm mẽ ma krĩ pẽ ho kato nẽ o tẽ nẽ kupĩ. Tã kêr pu mẽ jajê rom Jejus gryk ã mãn Tĩrtũm kapẽr tũm kaga. Kwãr mẽ mãmrĩ Jejus pyrã nẽ Tĩrtũm ã tanhmã mẽ pahto nẽ amnhĩ nẽ nhÿhÿm mẽ pajano. ¹⁴ Kêt jar mẽ papapxàja kęp mẽ papapxà kumrêx kêt. Nẽ jar mẽ panhõ krĩja kęp mẽ panhõ krĩ kumrêx kêt. Mẽ pamã te kot pò nhĩrõnh o ixkre pix pyrãk. No kêt mẽ panhõ krĩ kumrêx koja jar mẽ panhõ krĩ rom aa hapêx kêt nẽ. Tã tãm na pu mẽ kormã ma hwÿr papa kaxyw arĩ amnhĩ tã Tĩrtũm jamãr o papa.

¹⁵ Nẽ na htem Ijaew arĩ ohtõ nẽ amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêt nẽ. Kot puj mẽ ãm Jejus kukwak ri Tĩrtũm mã mex o mex ã harẽnh rãhã ho mãn papa. Jao te mẽ pahte kãm hkĩnh xà nhõr pyrãk o amnhĩ nhĩpêx.

¹⁶ Nẽ kêr pu mẽ arĩ axpẽn to mex o ri axpẽn kõt papa. Nẽ kê mẽhõ kęp amrakati japêr ka ja hã omu nẽ amnhĩ kutã kãm anhõ mẽmoj kwÿ. ã kot puj mẽ axpẽn nhĩpêx anhÿr rãhã ho ri axpẽn kõt papa. Kot puj mẽ anê nẽ te mẽ pahte Tĩrtũm mã hkĩnh xà nhõr pyrãk o amnhĩ nhĩpêx. ã mẽ pahte amnhĩ nhĩpêx anhÿrja na mex o mex.

¹⁷ Nê kêr ka mẽ Kris kôt mẽ akrãhtũmjê kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamãr o ri mẽ akôt pa. Kojã mẽ nhĩrmã mẽ kot tanhmã mẽ anhiĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêr ka mẽ kapêr ma nê mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

¹⁸ Nê kwa kêr ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêt. ãm inhmã amnhĩ to mex pix o ri ixpa hprãm.

¹⁹ Nê kêr ka mẽ ixto awỳ kê tokyx akupỳm mẽ awỳr inhmẽ. Na pa ra inhmã mẽ apumunh prãm tỳx nê.

Kagà nhĩpêx xwỳnh kot tanhmã mẽ ho Tĩrtũm wỳr to hã harênh

Epes 3.14-19; Pirĩpos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

²⁰ Nê mẽ panhõ Pahihti Jejus Krisja na hte mẽ panhiĩpêx o te õwêhti jamãr xwỳnh kot hkrit jamãr pyrãk o pa. Jakamã kêp mẽ pajamãr xwỳnh maati mex na. Na pre mẽ panê ty nhũm Tĩrtũm akupỳm mẽ pamã ho htĩr nê mẽ pamã harênh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhĩrmã ty pa akupỳm mẽ ato mẽ atĩr ka mẽ ixri atĩr tũm nê apa ho apa. Anê.

Tĩrtũm kêp mẽ pahto mẽ pajamakêtkati nê ri mẽ papa xwỳnh na. ²¹ Tã na pa hte tanhmã mẽ ato hwỳr to ho ixpa nê mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anê.

E kêr pu mẽ arĩ Jejus Kris mã mẽ mex o mex ã harênh rãhã ho papa.

Kagà jatur xà kamã mẽmoj jarênh

²² E Kris kôt ixkrãmnhwỳjaja. Nã na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

²³ Nê mãn ka mẽ ra Ximotre jarênh mar japêr. Na pre Kris ã mẽ hagjênh xà kamã hkrĩ hã apkati xohtõ nê. Tã nhũm xep mẽ ra kator. Tã kojã kormã mẽ awỳr inhmõr xwỳj ri man ixwỳr mõ nê hpõx japêr kot paj ma amnhĩ kôt mẽ awỳr o mõ ka mẽ omu.

²⁴ Nê kêr ka mẽ kot Kris mã mẽ ajamãr xwỳnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwỳja piitã mẽ awỳr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre

Xiakre kot Jejus kôt hkwỳjê piitã hwỳr kagà nê mênh

Xiakre na pre kagàja nhípêx. Kêp Jejus tō nê kêp Jerujarê kamã mẽ kot Jejus kôt amnhĩ xunhwỳr xwỳnhjê nhõ pastô na pre. Nê kêp Ijaew. Jakamã na pre hkwỳjê mã kagàja nhípêx nê krĩ piitã hkôt urak nê Jejus kôt mẽ kot amnhĩ xunhwỳr xwỳnhjê hwỳr kurê. Jejus ã mẽ kãm mẽ hkurê xwỳnhjaja na prem mẽ hipêx kati nhũm mẽ amnhĩ xà htỳx kamã hamak o pa. Jakamã nhũm Xiakre kot mẽ hamaxpêr o mẽ hihtỳx kaxyw kagàja nhípêx nê mẽ hwỳr kurê nê mẽ kãm:

¹ Pa ixkwỳjaja. Xà mẽ amex? E ixpê Xiakre na pa. Ixte Tĩrtũm mẽ Pahihti Jejus Kris wa kãm tanhmã amnhĩ nhípêx to xwỳnh na pa. Jakamã kot paj kagàja nhípêx nê pika piitã hkôt mẽ apiitã mẽ awỳr kurê. Mẽ apê Tĩrtũm krajê hwỳr.

Mẽ pahpunuj tã mẽ pahte amnhĩ kaxyw Tĩrtũm kôt pajamaxpêr

Rukre 6.20-23; Rõmãn 5.3-5; Korosê 1.11; Wam Pêtre 4.12-19

²⁻³ E ixkwỳjaja. Kêr ka mẽ atõ tanhmã amnhĩ to rỳ tanhmã apunuj to. Rỳ mẽhõ tanhmã Jejus ã mẽ anhípêx to. Tã kêr ka mẽ ja hã amnhĩ pumu nê tee ri amnhĩ kukamã ajamaxpêr o ri akaprĩ hkêt nê. Arĩ akĩnh kãm amnhĩ kaxyw Tĩrtũm kôt ajamaxpêr tỳx rãhã ho ri apa. Kot kaj mẽ ã amnhĩ nhípêx anê nê gaa nê rĩ mẽmoj punuj pê Jejus kôt amnhĩ xunhwỳr tỳx nê. Jakamã kwa kêr ka mẽ tanhmã apunuj to hã amnhĩ pumu nê ã mẽ ate amnhĩ nhípêx anhỳrja kukamã ajamaxpêr pê akĩnh nê ri apa. ⁴ Nom kêr ka mẽ tee ri tanhmã apunuj to hã amnhĩ pumu nê akaprĩ xaj Tĩrtũm kaga hkêt nê. ãm amnhĩ kaxyw hkôt ajamaxpêr tỳx rãhã ho ri apa. Kot kaj mẽ ã amnhĩ nhípêx anê nê gaa nê Tĩrtũm noo mã tãm amnhĩ nhípêx mex o ri apa. Nê kãm hprãm xà hkôt pix mã amnhĩ nhípêx o apa.

Mẽ pahte tanhmã amnhĩ kute hã amnhĩ pumunh kôt amnhĩ to Tĩrtũm wỳr ã mẽ pamã karõ

Matêwre 21.18-22

⁵ Nê kêr ka mẽ mẽmoj mỳrapê tanhmã apunuj to hãmri nê tee ri ja hã amã Tĩrtũm mã ajamaxpêr tỳx prãm nhũm apê ja hihtỳx japêr. Rỳ mẽmoj tanhmã apê amnhĩ nhípêx to ka tee ri hkukamã ajamaxpêr japêr. Kêr ka mẽ ã ajamaxpêr anhỳr japêr hãmri nê amnhĩ to Tĩrtũm wỳr kurê kumrêx. Kot amã ajamaxpêr mex nhõr nhũm ate ÿ hã tãm ajamaxpêr kaxyw amnhĩ to awỳ. Kot kaj mẽ ã amnhĩ to hwỳr anê nhũm amnhĩ tã mẽ ama nê mẽmojta kutã tanhmã ato axihtỳx to kurê kumrêx ka ÿ hã hkôt ajamaxpêr tỳx mex o ri apa. Jao tanhmã akute htã akĩnh nê ajamakêtkati nê ri apa. Koja Tĩrtũm tee ri amã mẽmoj kôt ajamaxpêr tỳx prãm kaprỳ hã apumu nê hã amã àkjêr kêt nê. Koja ate amnhĩ to hwỳrta ma nê tanhmã ato mex to. ⁶ Nom kêr ka mẽ amnhĩ to hwỳr kãm tee ri amnhĩ kukamã ajamaxpêr kati hkêt nê. Rỳ ajamaxpêr o:

—Koonên. Koja apu Tĩrtũm inhmã ja ho anhỳr japêr.

Anhỳr o tee ri amnhĩ kukamã ajamaxpêr kati hkêt nê. ãm akĩnh kãm tanhmã ate amnhĩ to hwỳr toja kukamã ajamaxpêr o:

—Nã koja inhmã ho anê. Ixte amnhĩ kaxyw kãm ijamaxpêr nê amnhĩ to hwỳr xà hkôt koja inhmã tanhmã amnhĩ nhípêx to.

Anhỳr o hkamnàr rom ã amnhĩ kukamã ajamaxpêr anê.

Nom kot kaj mẽ tanhmã amnhĩ to hwỳr to nê tee ri amnhĩ kukamã ajamaxpêr kati nê hkôt ajamaxpêr tỳx kêt nê. Nê te kòk nhãm àpêr nê nhãm àpêrta pyrã nê nhãm ri ajamaxpêr nê nhãm ri ajamaxpêrja o hkôt ajamaxpêr kêt nê. Kot kaj mẽ ã amnhĩ nhípêx anê nhũm Tĩrtũm tee ri ja hã mẽ apumu nhũm ja kãm mex kêt nê. ⁷⁻⁸ ã mẽ hamaxpêr anhỳr xwỳnhjaja na htem nhãm hamaxpêr nê nhãm hamaxpêr jao hamaxpêr mex kêt nê. Jakamã kot kaj mẽ ã ajamaxpêr anhỳr o amnhĩ to Tĩrtũm wỳ hãmri nê ãm amnhĩ to hwỳr kaprỳ. Koja ama nê ãm ama. Nom kot kaj mẽ tanhmã akute hã amnhĩ kaxyw hkôt ajamaxpêr tỳx pê amnhĩ to awỳ. Nê tee ri amnhĩ kukamã ajamaxpêr kati hkêt kãm

tanhmã amnhĩ to hwÿr to nhũm amnhĩ tã ama nẽ hkĩnh nẽ tanhmã amã mẽmoj nhĩpêx to. Mẽ ate hã axàhwÿr xà hkôt tanhmã mẽ amã mẽmoj nhĩpêx to.

Mẽ kêp amrakati xwÿnh mẽ mẽ kot amnhĩ to rũnh xwÿnhjê jarênh

Eprêw 13.5-6; Wam Pêtre 1.24-25

⁹ Nẽ kwa mẽ akàxpore hkêh xwÿnhjaja. Jar mẽ apê amrakati htã mẽ apê Tirtũm kra na ka mẽ. Jakamã kêr ka mẽ akàxpore rũnh kêt tã mẽ apê Tirtũm kra hã amnhĩ pumunh kôt ajamakêtkati nẽ nẽ akĩnh nẽ apa.

¹⁰⁻¹¹ Nẽ mẽ akàxpore rũnh xwÿnhjaja. Mẽ akàxpore rũnh nẽ mẽ akukrêx rũnh tã kot kaj mẽ nhÿrmã ty nẽ piitã rer pa nẽ mẽ kêp amrakati xwÿnhjê pyrã nẽ anhy kamã Tirtũm kuri akrĩ nhũm tanhmã mẽ ajarênh to. Te mẽ apê mẽmo pixôrà kot amnhĩ nhĩpêx pyrãk. Na hte kwÿhtã axpên pê axpôt nẽ muxre nẽ mex nẽ harir. Tã gaa nẽ rĩ hã myt xàhpanh mẽ nhũm ra nhôdre. Nẽ gaa nẽ ra grã pa nẽ rôrôk nẽ hapêx. Tã kot kaj mẽ nhÿrmã uràk nẽ ty nẽ akukrêx rer pa. Jakamã kwa kêr ka mẽ akàxpore rũnh pumunh kôt akĩnh nẽ ri apa hkêh nẽ. Kêt ãm mẽ apê Tirtũm kra hã mãn amnhĩ pumunh kôt akĩnh nẽ apa.

Mẽ pahpunuj kôt pagryk nê mẽ pahkurê

¹² Nẽ kot kaj mẽ atõ tanhmã apunuj to htã arĩ amnhĩ kaxyw Tirtũm mã ajamaxpêr tÿx rãhã ho ri apa. No tanhmã apunuj to hã amnhĩ pumu nẽ hkaga hkêh nẽ. Rÿ kot tanhmã ato xwÿnhnta kêr ka mẽ amnhĩ tã kamã agryk nẽ tanhmã ho hkêh nẽ. ãm Jejus kôt pix mã amnhĩ nhĩpêx rãhã ho ri apa. Kêr kê Tirtũm amã hkĩnh ã amnhĩ tã apumu nẽ amex ã ajarê. Ka nhÿrmã kuri amex kumrêx nẽ atĩr tũm nẽ apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhyr pê akĩnh nẽ apa.

¹³ Nẽ Tirtũm aa kãm tanhmã amnhĩ tomnuj to hprãm kêt. Nẽ mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rÿ mẽ pamã mẽ pajamaxpêr punuj jagjênh kêt nẽ. Jakamã kot ka mẽ atõ amã tanhmã amnhĩ tomnuj to hprãm tã kwa kêr ka Tirtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhix kêt nẽ. ¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tirtũm Karõ na hte mẽ pamã mẽ pajamaxpêr punuj jagjênh kêt nẽ. Mẽ papamjaja na pu htem pajamaxpêr punuj nẽ gaa nẽ ra hkôt tanhmã amnhĩ tomnuj to. Hãmri nẽ gaa nẽ ã amnhĩ nhĩpêx anhyr rãhã ho ri papa. Mẽ kot amnhĩ tomnuj o mẽ pa xwÿnhjaja koja mẽ nhÿrmã ty hãmri nẽ Tirtũm mẽ Kra wa kuri htĩr tũm nẽ pa ho pa hkêh nẽ.

Tirtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nẽ e ixkwÿjaja. Tirtũm kot mẽ pahte amnhĩ tomnuj prãm xaj mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhyr kêt nẽ. ¹⁷ Na hte mẽ pahto mex pix o pa. Na pre myyti ho kato. Kapêr pix o ho kato. Nẽ mytwrÿre ho kato. Nẽ kanhêti ho kato. Ja piitã ho kato nhũm mẽ pamã hirã mex o harir. Na hte mytwrÿre tãhã hirã mex o pa. Nẽ gaa nẽ nyw kaxyw nẽ kamàt kô. Nẽ gaa nẽ nyw mẽ nhũm akupÿm hirã. ã na hte amnhĩ nhĩpêx anhyr o pa. No Tirtũmja ã kot anhyr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tãhã tanhmã mẽ pahto mex to nhũm jãã nhũm tanhmã mẽ pahtomnuj to hkêh nẽ. ¹⁸ Tã kapêr pix o kot ã mẽmoj to kator kot anhyr. Nẽ mẽ pamã kapêr o amnhĩrĩt. Kãm mẽ pahto hkra hprãm xaj mẽ pamã Jejus kot tanhmã mẽ panê amnhĩ nhĩpêx toja nhũm pre mẽ pamã ho amnhĩrĩt. Na pu prem kuma nẽ hkôt amnhĩ xunhwÿ nhũm amnhĩ tã mẽ pahpumu nẽ mẽ pahto hkra. Mẽ pahpê Ijaew kumrêxjaja na pre mẽ pahto hkra.

Mẽ pagryk o papa nê mẽ pahkurê

Rômãn 12.17-21; Epes 4.25-5.2

¹⁹ E ixkwÿjaja. Kwa mẽ ixkapêr ma nẽ hã anohtÿx nẽ ho apa. Koja mẽhõ Tirtũm kapêr o mẽ ajahkre kaxyw mẽ awÿr mō nẽ mẽ amã kapêr jarê ka mẽ mar tÿx nẽ. Koja mẽ ate tanhmã amnhĩ tomnuj to nê mẽ amã kapêr ka mẽ amnhĩ tã ama nẽ kamã agryk kêt

ně. ²⁰ Mě gryk o mẽ pa xwỳnhjaja na htem Tirtũm kapěr kôt ri amnhĩ nhĩpêx kêt nẽ. ²¹ Jakamã kwa kêr ka mẽ axte amnhĩ tomnuj rỳ ajamaxpěr punuj o ri apa hkêt nẽ. Na htem ohtô nẽ ã amnhĩ nhĩpêx anhỹr o pa nom kêr ka mẽ kurom Tirtũm kapěr mãn amnhĩ krã him haxàr tỳx nẽ. Kapěr o mẽ ajahkre xwỳnhjaja na htem ho mẽ ajahkre mex o pa. Tã kêr ka mẽ ama nẽ amã hkôt amnhĩ nhĩpêx prãm rãhã ho ri apa. Na pu htem Tirtũm kapěr ma nẽ hkôt amnhĩ nhĩpêx o papa hãmri nẽ nhỹrmã Tirtũm mẽ Kra wa kuri pahtĩr tũm nẽ pa mex nẽ papa ho papa.

Mẽ pahte Tirtũm kapěr kôt amnhĩ nhĩpêx ã mẽ pamã karõ

Matêwre 7.24-27; Wam Juãw 2.3-6

²² Nẽ kwa mẽ okora. Kêr ka mẽ ãm Tirtũm kapěr ma nẽ ãm mar kêt nẽ. Mããnẽn hkôt amnhĩ nhĩpêx rãhã ho ri apa. Kot kaj mẽ ama nẽ ãm ama nẽ hkôt amnhĩ nhĩpêx kêt nẽ hãmri nẽ apê Tirtũm kra hã amnhĩ jarẽn h kaprỳ. Jao nhỹrmã Tirtũm mẽ Kra wa kuri atĩr tũm nẽ apa hkêt nẽ. ²³⁻²⁴ Te ho mẽhõ kot amnhĩ pumunh xà hpyr nẽ kamã amnhĩ pumunh nẽ amnhĩ krã hkĩ jaê rỳ amnhĩ kuk tyk pumunh pyrãk. Tã te kot ãm ja hã amnhĩ pumunh nẽ kot amnhĩ to mex kêt rãhã akupỹm amnhĩ pumunh xà xir nẽ ma htẽm nẽ axte amnhĩ kuk tyk rỳ amnhĩ krã kĩ jaerta mã hamaxpěr kêt pyrãk. Mẽ kot Tirtũm kapěr mar nẽ ãm mar nẽ hkôt amnhĩ nhĩpêx kêt xwỳnhjaja te kot ja jarẽn h pyrãk. ²⁵ Tã kêr ka mẽ ã amnhĩ nhĩpêx anhỹr kêt nẽ. Mẽ ate Tirtũm kapěr kôt amnhĩ nhĩpêx o apa kaxyw xatã kamã harẽ nẽ mar tỳx o apa. Jao hkôt amnhĩ nhĩpêx mex o apa. Tirtũm kot mẽ pahte tanhmã amnhĩ nhĩpêx to ho papa hã mẽ pamã karõ xaja ãm hãmri na. Na htem hkôt amnhĩ nhĩpêx nhũm Tirtũm ja hã mẽ omu nẽ mẽ ho mex nẽ nhũm mẽ àmnhĩx hamakêtkati nẽ hkôt amnhĩ nhĩpêx o pa. ²⁶ Nom koja mẽhõ kêp Tirtũm kra hã amnhĩ jarẽn h tã htỳx ri kapěr punuj o ri pa hãmri nẽ ãm kêp hkra hã amnhĩ jarẽn h kaprỳ. Mẽ pahpê Tirtũm krajaja na pu htem ã pakapěr anhỹr kêt nẽ. ²⁷ Axtẽm mẽ pahte amnhĩ nhĩpêx. Na pu htem mẽ hã awrã rỳ mẽ kêp mẽ mjẽn tyk xwỳnhjê ho mex nẽ mẽ hã pahpêr o pahpikẽn h o papa hkêt nẽ. Nẽ tanhmã mẽ kute hã mẽ omu nẽ mẽ ho ajuta ho papa. ã na pu htem pahpê Tirtũm krajaja amnhĩ nhĩpêx anhỹr o papa nhũm Mẽpanhĩpêxã Maati Tirtũm ja hã mẽ pahpumu nẽ hkĩnh nẽ. No na pu htem mẽ kot amnhĩ tomnuj o mẽ pa xwỳnhjê hkôt ri amnhĩ nhĩpêx kêt nẽ ãm Tirtũm kapěr xà kôt pix mã amnhĩ nhĩpêx nhũm amnhĩ tã mẽ pahpumu nẽ hkĩnh nẽ.

2

Mẽ pahte mẽ piitã mẽ hipêx o axpẽn pyrãk ã mẽ pamã karõ

Rõmãn 2.11; Korosẽ 3.25

¹ E ixkwỳjaja. Pahihti Jejus Krisja mex o mex. Tã ra mẽ ate hkôt amnhĩ xunhwỳr jakamã kwa kêr ka mẽ apê hkwy hã mẽ piitã tãm mẽ hipêx o apa. Nẽ mẽ hipêx o axpẽn pyrãk. ² Jakamã kot kaj mẽ nhỹrmã Tirtũm kapěr mar kaxyw axpẽn wỳr akuprõ nhũm hikàxpore rax xwỳnhhta mẽ akôt axà. ê mex nẽ ôr o ãhkra kamã kàx hãmri nẽ mẽ akôt axà. Nhũm hkôt mẽhõ pẽ amrakati xwỳnhja tẽ nẽ axà. Nom wamta kĩnhã kêp amrakati nẽ ê omnajti nẽ pikaxõnhti. Hãmri nẽ hikàxpore rax xwỳnhhta hkôt mẽ awỳr tẽn axà. ³ Tã tanhmã kot kaj wem ri wa hipêx to? Xà kot kaj mẽ wa hipêx o axpẽn pyrãk nã? Nà xà kot kaj mẽ ã wa hipêx anẽ nẽ wam àr xwỳnhhta ê mex ã omunh xà hkôt kãm kadêre hõ gõ nẽ kãm:

—E ota kadêre. Mãmri hã nhỹ. Anẽ.

Hãmri nẽ ê pynajti xwỳnhhta pumu nẽ axtẽm nẽ kãm:

—E atar pikap nhỹ.

Anhỹr o ahpỳnhã wa kãm akapêr? ⁴ Kot kaj mẽ ahpỳnhã ã wa hipêx anẽ nẽ amnhĩ tomnuj nẽ. Wam àr xwỳnhhta ka kãm akapêr mex nẽ tanhmã ho mex to. No hkôt hõta omnajti hã omunh xà hkôt te kamã anhõkre kahak pyrãk o hipêx. Kot kaj mẽ ã ahpỳnhã wa hipêx anẽ nhũm Tirtũm tee ri ja hã mẽ apumu nhũm ja kêp omnuj nẽ. ⁵ Kwa mẽ inhma ixkwỳjaja. Mẽ kêp amrakati xwỳnhjaja mẽ hikàxpore hkêt tã na hte mẽ hkwyjaja amnhĩ kaxyw Tirtũm kôt hamaxpěr nẽ hkôt amnhĩ xunhwỳr nhũm amnhĩ tã mẽ omu nẽ

kot mẽ panhípêx pyrà nê mẽ ho hkra. Jakamã jar mẽ kêp amrakati htã na htem amnhĩ kaxyw Tĩrtũm kôt hamaxpêr tỳx rãhã ho pa. Jakamã koja mẽ nhỹrmã kuri htĩr tũm nê mex kumrêx nê pa ho pa. Mẽ kãm Tĩrtũm kĩnh o mẽ pa xwỳnh piitã koja mẽ nhỹrmã ã mex nê ri pa anê. ⁶ Nom kot kaj mẽ ahpỹnhã mẽ hipêx nê amnhĩ tomnuj nê. E pa mẽmoj tã mẽ akukja. Mẽmojaja na htem tanhmã mẽ ato hêx to? Nê mẽmojaja na htem juisti mã tanhmã mẽ ato kapêr punuj to? Xà mẽ kêp amrakati xwỳnhjaja? Nà mẽ tãm kêt. Mẽ hikàxpore rũnh xwỳnhjaja na htem ã mẽ anhípêx anhỹr o pa. ⁷ Nê ra mẽ ate hkôt amnhĩ xunhwỳr xwỳnhja nhũm mẽ axtem nê tanhmã mẽ apê ho kapêr to ho pa. Tã ka htem mẽ kêp amrakati xwỳnhjê rom mẽ kãm akapêr mex nê mẽ kãm kadêre mex gõ nhũm mẽ hã hkrĩ. ⁸ Tĩrtũm kapêr ã kagã htũm kot ja jarênh kot:

Kêr ka mẽ piitã mẽ hipêx o te ka amã amnhĩ tã ma pyrãk. Anê.

Ã kot mẽ pamã karõ kot anhỹr. Kapêrja mex kumrêx. Kot puj mẽ ã axpên nhípêx anhỹr jao Tĩrtũm kãm hprãm xà hkôt amnhĩ nhípêx mex nê. ⁹ Nom kot puj mẽ ã amnhĩ nhípêx anhỹr kêt nê ahpỹnhã tanhmã mẽ hikàxpore rũnh xwỳnhjê ho mex to nê ahpỹnhã tanhmã mẽ kêp amrakati xwỳnhjê nhípêx to japêr. Hã kot puj mẽ Tĩrtũm kapêr htũmta nhĩrõp pakuhê nê amnhĩ tomnuj nê. ¹⁰ Kot pu mẽ kapêr tũm piitã hkôt ri amnhĩ nhípêx mex o ri papa htã ãm pixire nê hirõp pakuhê. Jao te pahte kapêr piitã hirõp pakuhê pyrãk. ¹¹ Na pre Tĩrtũm mẽ pahte mẽ pahprõ pix tãnopxar o papa hã mẽ pamã karõ. Nê mẽ pamjên pix tãnopxar o papa hã mẽ pamã karõ. Nê mẽ pahte axpên par nê mẽ pahkurê. Jakamã kot puj mẽ pahprõ pix tãnopxar mex o ri papa japêr. Nê mẽ pamjên pix tãnopxar mex o ri papa japêr tã tanhmã pajamaxpêr to nê pahkwỳjê hõxpĩ. Jao te Tĩrtũm kapêr tũm piitã hirõp pakuhê hpar pyrãk o amnhĩ nhípêx.

¹²⁻¹³ Koja nhỹrmã Tĩrtũm mẽ pahtĩr ri tanhmã axpên nhípêx to ho papa hã mẽ pahpumunh kôt tanhmã mẽ pajarênh to. Mẽ pamã axpên kĩnh ã axpên to mex o papa hã mẽ pahpumunh kôt mẽ pajarê rỳ mẽ pamã axpên kĩnh kêt ã axpên nhípêx o papa hã mẽ pahpumunh kôt mẽ pajarê. Jakamã mẽ kamã mẽ ukaprĩ kêt xwỳnhjaja koja nhỹrmã ja hã mẽ omu nê mẽ urãk nê mẽ kamã ukaprĩ hkêt nê. Nom mẽ kamã mẽ ukaprĩ ho mẽ pa xwỳnhjaja koja ja hã mẽ omu nê mẽ urãk nê mẽ kamã ukaprĩ nê mẽ nê mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex nê tãm axpên nhípêx o ri axpên kôt apa. Nê axpên mã akapêr mex nê axpên kamã axukaprĩ pix kukamã ajamaxpêr o apa.

Amnhĩ kaxyw Tĩrtũm kôt mẽ hamaxpêr xwỳnhjê jarênh

Rukre 3.8-14

¹⁴ Nê kwa ixkwỳjaja. Koja mẽhõ kot amnhĩ kaxyw Jejus kôt hamaxpêr nê hkôt amnhĩ xãm ã amnhĩ jarênh tã hkôt ri amnhĩ nhípêx kêt nê. Hã koja nhỹrmã ty hãmri nê tanhmã kot we amnhĩ to nê Tĩrtũm mẽ Jejus wa kuri htĩr tũm nê pa ho pa? Nà koja anhỹr kêt nê. Kêp hkra hã amnhĩ jarênh tã hkôt amnhĩ nhípêx kêt jakamã koja nhỹrmã wa hwỳr àpir kêt nê.

¹⁵ Nê xà koja mẽhõ kêp amrakati nê ri pa. Nê ê pynajre pix jagjê nê ri hã pa. Nê õ hkêt nê ri kãm prãm nê pa. ¹⁶ Ka mẽ ja hã omu nê tanhmã kãm akapêr to nê kãm:

—Kwa ã amnhĩ nhípêx anhỹr kêt nê. Anhõrkwỳ hwỳr tẽn axê mex japêr nê axà nê amnhĩm mẽmoj japêr nê aku. Koja Tĩrtũm ato mex rax nê.

Anhỹr o kãm akapêr tã kãm mẽmoj nhõr kêt nê. Tã xà koja we ama nê amar xà hkôt ê mex jagjê nê apkur mex o ri pa? Nà kot ka mẽ ã kãm akapêr anê nê ho ajuta hkêt nê nhũm arĩ kãm prãm nê ê hkêt nê omnuj nê ri pa. Na htem mẽ kapêr pix o mẽ ho mex kêt nê. Kot kaj mẽ ã kãm akapêr anê nê ãm kãm mẽmoj tã karõ kaprỳ. ¹⁷ Ja pyrà nê koja mẽhõ ra amnhĩ kaxyw Jejus kôt hamaxpêr nê hkôt amnhĩ xãm ã amnhĩ jarênh tã kapêr kôt ri amnhĩ nhípêx kêt japêr. Hã koja ãm kêp hkra hã amnhĩ jarênh kaprỳ.

¹⁸ Nê kot kaj mẽ atõ ã ajamaxpêr anê nê ajamaxpêr o:

—Nà Jejus kwỳjaja na htem ahpỹnhã tanhmã amnhĩ nhípêx to ho pa. Na hte mẽ hkwỳjaja amnhĩ kaxyw Jejus kôt hamaxpêr tỳx pix o ri pa. Nê mẽ hkwỳjaja tanhmã

hkwỳjê ho mex to ho ri pa. ã na htem ahpÿnhã tanhmã amnhĩ nhĩpêx anhÿr to ho pa. Anê.

Kwa mẽ ri ã ajamaxpêr anhÿr kêt nê. Mẽ hkwỳjê ho mex o mẽ pa xwÿnhjaja na htem Tirtũm hkôt hamaxpêr pê mãänên hkôt amnhĩ nhĩpêx nê hkwỳjê ho mex o pa. Kojã mẽhõ amnhĩ kaxyw Jejus kôt hamaxpêr hã kojã mãänên hkôt amnhĩ nhĩpêx pê tanhmã hkwỳjê ho mex to ho pa. Na htem amnhĩ kaxyw hkôt hamaxpêr pix o pa hkêt nê. Na htem mãänên hkôt mẽ piitã mẽ ho mex o ri pa.

¹⁹ Na ka hte mẽ akwỳjaja ã ajamaxpêr anê nê ajamaxpêr o:

—Nà Tirtũmja pyxi mex o pyxi mex. Tã kot paj jam ijamaxpêr rãhã ho ri ixpa nê ra ixpê hkra hã ri ixpa. Nom kot paj kapêr kôt amnhĩ nhĩpêx o ri ixpa hkêt nê.

Anhÿr o ajamaxpêr nê ã ajamaxpêr anhÿr kaprÿ.

Nê ãm hãmri na ka htem Tirtũm pyxi mex o pyxi mex ã harê. Nom na htem jam hamaxpêr kôt pix mã kêp hkra hkêt nê. Mëkarõmnutijaja na htem haxwỳja Tirtũm pyxi mex o pyxi mex kôt hamaxpêr tã mẽ kêp hkra hkêt. Na htem ã hamaxpêr anhÿr pê kãm uma ho pa. ²⁰ ã mẽ ajamaxpêr anhÿrja mex kêt. Kojã mẽhõ amnhĩ kaxyw Tirtũm kôt hamaxpêr ã amnhĩ jarênh tã hkôt amnhĩ nhĩpêx o pa hkêt japêr. Hãmri nê ãm amnhĩ kaxyw hkôt hamaxpêr ã amnhĩ jarênh hkaprÿ. E kot paj ixprĩ hã mẽ amã ja jarê ka mẽ inhma. ²¹ Mẽ panhĩgêt finat Apraãw na pre amnhĩ kaxyw Tirtũm mã hamaxpêr nê hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwỳ nhũm kuma nê ra kot kãm hpĩr nê òr kaxyw nhũm Tirtũm amnhĩ tã omu nê amnhĩm mex ã harê. Hãmri nê kot hkra hpĩr nê kãm kapêr. ²² Ra kot amnhĩ kaxyw hkôt hamaxpêr nê hkôt amnhĩ xãm jakamã mãänên hkôt amnhĩ nhĩpêx nê ra kot kãm hkra nhõr kaxyw Tirtũm amnhĩ tã omu nê amnhĩm mex ã harê. Na pre ã finat Apraãw Tirtũm kapêr kôt amnhĩ nhĩpêx mex anhÿr o pa. Jao amnhĩ kaxyw hkôt hamaxpêr mex ã amnhĩ to amnhĩrĩt.

²³ Nê kormã Apraãw wa hkra hkêt ri nhũm Tirtũm wa kãm hkra jarê nhũm kuma nê hkra hkukamã amnhĩ kaxyw Tirtũm kôt hamaxpêr tÿx o pa nhũm amnhĩ tã omu nê mex ã harê. Nê kêp hkrãmnhwỳ hã harê. Kapêr ã kagã htũm kot ja jarênh kot:

Na pre Apraãw hkra hkukamã amnhĩ kaxyw Tirtũm kôt hamaxpêr tÿx nhũm amnhĩ tã omu nê amnhĩm mex ã harê. Anê.

²⁴ ã na pre finat Apraãwja hkra kaxyw Tirtũm kôt hamaxpêr anhÿrja o ra hkôt amnhĩ nhĩpêx nê ra kot kãm hpĩr kaxyw. Nom kop apu amnhĩ kaxyw hkôt hamaxpêr pix nê hkôt amnhĩ nhĩpêx kêt ronhÿx pre Tirtũm tee ri amnhĩ tã omu nê amnhĩm mex ã harênh kêt nê. Na htem amnhĩ kaxyw Tirtũm mã hamaxpêr nê mãänên hkôt ri amnhĩ nhĩpêx mex o pa nhũm amnhĩ tã mẽ omu nê amnhĩm mẽ mex ã mẽ harê. ²⁵ Mẽhõ ni kuprÿ finat Raapja na pre ã amnhĩ nhĩpêx anê nê amnhĩ kaxyw Tirtũm kôt hamaxpêr pê tanhmã hkôt amnhĩ nhĩpêx to ho pa. Na pre Ijaew myja wa hamëxkrut nê ma Raap nhõ krĩ hwÿr wa tẽ. Mẽ hã ukapi nê kot mẽ hkurê kaxàr kaxyw mẽ hwÿr wa tẽ. Hãmri nhũm Raap Tirtũm kot wa mẽnh ã wa omunh kurê kumrêx nê pôristi kot tanhmã wa ho pymaj amnhĩ nhõrkwÿ kamã mẽ kêp wa ho amũxu nê wa nê mẽ kãm tanhmã hêx to. Nê hpãnhã nhãm pry hõ hkôt akupÿm wa kumê nhũm wa hkà hkĩnh pê ma akupÿm mex nê tẽ. Hãmri nhũm Tirtũm wa hã Raap pumu nê amnhĩm mex ã harê.

²⁶ Tã kot kaj mẽ atõ amnhĩ kaxyw Tirtũm kôt ajamaxpêr ã amnhĩ jarênh tã hkôt amnhĩ nhĩpêx kêt japêr. Hãmri nê apê hkra hã amnhĩ jarênh kaprÿ. Te ra mẽhõ htyk nê nõr tã nhũm mẽ kot arĩ htĩr ã harênh kaprÿta pyrãk.

3

Mẽ kot Tirtũm kapêr o mẽ ahkre xwÿnhjê jarênh

¹ Nê kwa Kris kôt ixkwỳjaja. Mẽ axohtõ nê mẽ amã Tirtũm kapêr o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tirtũm kapêr o mẽ ajahkre xwÿnhjaja kot paj mẽ tanhmã amnhĩ tomnuj to japêr nhũm Tirtũm ja hã mẽ ixpumu nhũm ja kêp omnuj nê. Mẽ ixte kapêr o mẽ ajahkre ho mẽ ixpa kênã kot pa hkêt mẽ ri tanhmã amnhĩ

tomnuj to ho ri ixpa. Jakamã kot kaj mẽ Tĩrtũm kapẽr piitã hkõt ri amnhĩ nhĩpêx mex nẽ rĩ kormã ho akwỳjê jahkre ho ri apa.

² Nẽ mẽ pahpiitã na pu htem tũhã mẽ pajakwa ho tanhmã amnhĩ tomnuj to. Mẽmoj tã axpẽn kãm pagryk nẽ tanhmã mẽ kãm pakapẽr punuj to. Nom koja mẽhũ tanhmã kapẽr punuj toja nẽ amnhĩ to htỳx nẽ hãmri nẽ tãm amnhĩ nhĩpêx o pa.

Mẽ pajakwa jarẽnh

Epes 4.29

³ Na htem nhỹhỹm kawar o juk kaxyw hakwam kàx jagjê nẽ kãm nhỹhỹm o htẽm prãm xà hkõt ma nhỹhỹm ho juk o tẽ. Kàxja hkryre nhũm kawar rũnh tã no nhũm kãm ma nhỹhỹm ho mrar prãm xà hkõt ho juk o mra.

⁴ Nẽ gũ xujanãr kãm pàr rũnh ta rũnh tã na hte kũk àpêr tỳx nẽ ma nhỹhỹm o pa. Nẽ pĩ ho pàr o juk xàta hkryre htã ma nhỹhỹm ho juk o mũ. Nhỹhỹm pàr o mrar xwỳnh kãm o mũr prãm xà hkõt o mũ.

⁵ Ja pyrã nẽ mẽ pajakwaja hkryre htã na htem ho kapẽr o tanhmã mẽ hipêx to ho pa. Tũhã ho kapẽr mex nẽ nhũm mẽ kuma nẽ hkĩnh nẽ. Nẽ tũhã ho kapẽr punuj nẽ nhũm mẽ tee ri mẽ kapẽr ã mẽ kuma nẽ hkaprĩ nẽ rỳ kapẽr xwỳnh ta kamã gryk nẽ. Mẽ pajakwa hkryreja te kot kuwy jakrax kryre pyrãk. Kot ka kuwy jakrax grire ho tẽ nẽ nhỹri pũti kamã amẽ nhũm kũk ho apê nhũm hpũk rax tokyx anẽ. Hãmri nẽ ma pà ho hkaxàr par o mũ nẽ ho hkaxàr pa. ⁶ Mẽ pajakwaja mã kot anhỹr. Kot kaj atỳx ri tanhmã ho akapẽr punuj to nhũm mẽ ama nẽ axpẽn mã anhĩxi ho krĩ nhĩpêx ka amex kêt nẽ apa. Rỳ ka atỳx ri ajakwa ho tanhmã akwỳjê ho akapẽr to nhũm mẽ tee ri amnhĩ tã ama nẽ hkaprĩ nẽ rỳ akamã gryk nẽ. Satanasti nhỹ hã na htem ã mẽ hakwa ho kapẽr punuj anẽ.

⁷ Na htem tũhã mẽmo mry xoprê pynê nẽ tanhmã ho nẽ ra ho kãm ma hkêt. Kagã rỳ hagrũre rỳ àati rỳ gũx kãm mẽmo mryja nhũm htem unê nẽ tanhmã ho nhũm kãm ma hkêt nẽ mẽ hkõt pa ho pa. Nom na htem mry piitã ã hipêx anhỹr kêt nẽ. ⁸ Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnh ta pyrãk. Na pu htem amnhĩ krã hkõt pajakwa ho pakapẽr mex pix kêt nẽ. Tanhmã kot puj mẽ pakapẽr punuj kêt kaxyw amnhĩ jakwa hto? Mẽ pakapẽr punuj te kot kagã xoprê kot mẽ hkamnhar nẽ õ wenẽn o mẽ hparta pyrãk. ⁹⁻¹⁰ Na pu htem tũhã pajakwa ho tãm pakapẽr nẽ tũhã pakapẽr punuj nẽ. Nẽ tũhã Pahi Maati Tĩrtũm mã mex o mex ã harẽnh tã ra axtem nẽ tanhmã mẽhũ japrỳ hto. Tĩrtũm kot mẽ pahto amnhĩ pyrã nẽ mẽ panhĩpêx tã pu htem axtem nẽ tanhmã axpẽn japrỳ hto ho ri papa. Jao te pahte Tĩrtũm japrỳ pyrãk. Kwa ixkwỳjaja. Kêr pu mẽ pahpê Tĩrtũm krajaja ã pakapẽr punuj anhỹr hkêt nẽ. ãm mẽ pajakwa ho mẽmoj mex pix jarẽnh o ri papa.

¹¹⁻¹² Xà koja pà kamã hinore pyxi htã kamã gũ xành nẽ mããnẽn kamã gũ xenh nõkati? Nà koja anhỹr kêt nẽ. Na hte kamã gũ mex pix nẽ rỳ kamã gũ xenh nõkati pix nẽ.

Nẽ xà koja jãaxõ hpàr ã rãrãj harir? Rỳ ahkrũ xũ hã mánkwrỹtre harir? Nà na hte ahpỹnhã hpàr ã harir. Ja pyrã nẽ kêr pu mẽ pahpê Tĩrtũm krajaja pajakwa ho pakapẽr punuj pê ho papikamỳr tỳx nẽ. Nẽ te hinore kamã gũ mex pixta pyrã nẽ ãmoj mex pix jarẽnh o ri papa. No mẽ pajakwa nhĩkjê ho tãm pakapẽr nẽ hikjê ho pakapẽr punuj kêt nẽ. ãm pakapẽr mex pix o pakapẽr o ri papa. Kwa kêr pu mẽ ã amnhĩ nhĩpêx anhỹr rãhã ho papa.

Tĩrtũm kũt mẽ àhpumunh xwỳnhjê jarẽnh

Wam Korĩt 2.6-16

¹³ Nẽ kwa mẽ axàhpumunh tỳx xwỳnhjaja kêr ka mẽ amnhĩ to mex o ri apa. Nẽ mẽ piitã tãm mẽ hipêx mex nẽ mẽ amã axpẽn japê hã axpẽn to ajuta mex o ri apa. Tĩrtũm kapẽr xà hkõt. Kot kaj mẽ ã amnhĩ nhĩpêx anẽ nẽ axàhpumunh mex ã amnhĩ to amnhĩrĩt.

¹⁴ Nom kot ka mẽ mẽmoj tã axpẽn kamã agryk o ri apa. Rỳ amnhĩ pix kukamã ajamaxpêr o ri apa hãmri nẽ ãm ate Tĩrtũm kapẽr kũt amnhĩ nhĩpêx ã amnhĩ jarẽnh kaprỳ. ¹⁵ ã mẽ kot amnhĩ nhĩpêx anhỹr xwỳnhjaja na htem Tĩrtũm kũt amnhĩ nhĩpêx kêt nẽ. Mẽ kêp Tĩrtũm kra hkêt xwỳnh pixjaja na htem ã amnhĩ nhĩpêx anhỹr o pa. Jao mẽkarõmnuti kot

amnhĩ nhĩpêx kôt pix mã amnhĩ nhĩpêx o pa. ¹⁶ Axpên kamã mẽ gryk o mẽ pa xwỳnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nê amnhĩ tã mẽ kamã mẽ gryk xwỳnhjê homnuj o pa. Tã ã mẽ pahte amnhĩ nhĩpêx anhỹr pumaj kwa kêr pu mẽ mẽmoj tã axpên kamã pagryk o ri papa hkêt nê. ¹⁷ Mẽ kot Tĩrtũm kôt amnhĩ nhĩpêx xwỳnhjaja na htem jajê rom tãm axpên nhĩpêx rãhã o pa.

Nê axpên kamã ukapĩrĩ pix o ri axpên kôt pa.

Nê tãm hamaxpêr o pa.

Nê mẽ piitã mẽ hipêx o axpên pyræk.

Nê axpên tã hpijaàm o ri pa.

Nê tanhmã ri axpên no kupyri to hkêt nê.

Nê ri oprê ho pa hkêt nê.

Nê mẽ axpên kamã ôkre kahak kêt nê.

Nê mẽ piitã mẽ ho mex o axpên pyræk.

Nê tãm mẽ piitã mẽ hipêx rãhã nê.

Ã na htem Tĩrtũm kôt mẽ kot amnhĩ nhĩpêx xwỳnhjaja amnhĩ nhĩpêx anhỹr o pa. ¹⁸ Kot puj mẽ ã amnhĩ nhĩpêx anê nê pajamakêtkati nê paxàmnhĩx pahkĩnh nê ri papa. Nhũm nhỹri mẽhõ wa axpên kãm gryk pu mẽ wa omu rỳ wa harênh ma hãmri nê mẽ pahtõ ma wa hwỳr tẽ nê wa kãm pakapêr nê tãm akupỹm wa ãm. Hãmri nhũm wa ra mẽ pahpyrà nê tãm amnhĩ nhĩpêx pê hamakêtkati nê wa ri pa. àmnhĩx ri hkĩnh nê wa ri pa.

4

Mẽ kot amnhĩ pix kukamã mẽ hamaxpêr xwỳnhjê jarênh

Matêwre 20.20-28; Juãw 16.24

¹ Nê kwa mon ka hte mẽ akwỳjaja axpên mã akapêr mã agêt o axpên kãm agryk pix o apa? Na ka htem ã amnhĩ nhĩpêx anhỹr o amnhĩ pix kukamã ajamaxpêr. Nê mẽ amã amnhĩ jamaxpêr kôt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nê. ² Na ka htem nhỹri mẽmoj pumu nê tee ri ho amã anhõ hprãm kaprỳ. Nê amã ho anhõ hprãm xaj õ xwỳnhhta pĩr nê kêp utar mã.

Nê na ka htem tanhmã axpên kukrêx kute hã omu nê amã ho anhõ hprãm nê hã õ xwỳnhhta mẽ wa axpu. No mẽ amã hprãm xwỳnhhta mẽ ate hõ hã Tĩrtũm wỳr ronhỹx ra mẽ ama nê mẽ amã hõ gõ. Tã mẽ ate hã axàhwỳr kêt jakamã nhũm mẽ amã õr kêt nê.

³ Rỳ ka mẽ tõhã mẽmoj tã awỳ nhũm kot mẽ amar tã mẽ amã õr kêt nê. Kot mẽ amã õr nhũm mẽ ate ho anhõxỳ ho apa pymaj na hte tõhã mẽ amã mẽ ate hã axàhwỳr xwỳnhhta nhõr kêt nê.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nê mẽ kãm hprãm kêt xwỳnhjê hkôt amnhĩ nhĩpêx o ri apa nê mẽ uræk nê tanhmã amnhĩ tomnuj to ho ri apa. Nê mẽ ate amnhĩ tomnuj gryk ã mẽ amã Tĩrtũm prãm kêt ã amnhĩ to amnhĩrĩt.

⁵ Tĩrtũm kapêr ã kagà htũm kot tanhmã Karõ jarênh to nê harênh kot:

Na pre Tĩrtũm mẽ pahwỳr amnhĩ Karõ rê nhũm mẽ pahwỳr wrỳ nê mẽ pakamã agjê nê mẽ pahkôt pa ho pa. Mẽ pahte hkôt pix mã amnhĩ nhĩpêx o papaja na kãm hprãm. Anê.

Ãm hãmri ã harênh kot anhỹr jakamã kwa kêr ka mẽ harênh ma nê kãm ajamaxpêr tỳx rãhã ho ri apa.

⁶ Na hte Tĩrtũm mẽmoj to mẽ pakutã nojarêt rãhã pu mẽ y hã tãm amnhĩ nhĩpêx o ri papa. Kapêr ã kagà kot ja jarênh kot:

Mẽ kãm Tĩrtũm kôt amnhĩ nhĩpêx prãm kêt xwỳnhjaja na hte Tĩrtũm amnhĩ tã mẽ omu nê mẽ kutã amnhĩ xunhwỳ.

No mẽ kãm hkôt ri amnhĩ nhĩpêx prãm xwỳnhjaja na hte amnhĩ tã mẽ omu nê mẽ ho mex o pa nhũm htem hihtỳx xà nhỹ hã mẽ kãm hprãm kêt xwỳnhjê hkôt ri amnhĩ nhĩpêx kêt nê. Anê.

⁷ Jakamã kwa kêr ka mẽ Tĩrtũm kapêr kôt pix mã mãn ri amnhĩ nhĩpêx o ri apa. Kêr kê Satanasti tanhmã mẽ ate amnhĩ tomnuj to hprãm xàj tanhmã mẽ ato ka mẽ Tĩrtũm Karõ nhỹ hã ãm ama mẽ hkôt amnhĩ nhĩpêx kêt nê. Nhũm tee ri amã àhkrox kaprỹ mẽ akaga mẽ ma tẽ.

⁸ Nê kot kaj mẽ Tĩrtũm kapêr kôt pix mã ri amnhĩ nhĩpêx o apa nhũm amnhĩ tã mẽ apumu mẽ te kot mẽ apa hã mẽ ajamýnh mẽ mẽ ato pa pyræk o mẽ anhĩpêx. Jao mẽ ato mex o ri mẽ akôt pa ho pa. Nê mẽ atãnopxar rãhã ka mẽ ajamakêtkati mẽ akĩnh mẽ ri apa.

Nê kêr ka mẽ tanhmã amnhĩ tomnuj to hãmri mẽ tee ri ja hã amnhĩ pumu mẽ hkaga kurê kumrêx mẽ axte ã amnhĩ nhĩpêx anhỹr kêt nê. Rỳ ka mẽ tanhmã ajamaxpêr punuj to hãmri mẽ ja hã amnhĩ pumu mẽ hkaga mẽ hpãnhã tãm ajamaxpêr pix o ri apa. Mẽ apê Tĩrtũm kra hã kêr ka mẽ ãm hkôt pix mã ri tãm amnhĩ nhĩpêx o ri apa.

*Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karõ
Wam Juãw 1.5-10*

⁹ Nê kêr ka mẽ tee ri ate tanhmã amnhĩ tomnuj to hã amnhĩ pumu mẽ akaprĩ xàj mur mẽ akĩnh kêt nê. Nê akaprĩ xàj amýr rax mẽ. ¹⁰ Hãmri mẽ Tĩrtũm mã amnhĩ jarênh o:

—Pa Tĩrtũm. Na pa ã amnhĩ tomnuj anê. Nom kot paj axte hkêt nê. ãm inhmã akapêr kôt pix mã ri amnhĩ nhĩpêx prãm.

Anhỹr o kãm akapêr kê mẽ ama mẽ mẽ ate amnhĩ tomnujta ã tanhmã mẽ ato hkêt nê. ãm mẽ ato mex mẽ ka mẽ akupým ajamakêtkati mẽ axãmnhĩx akĩnh mẽ ri apa.

*Mẽ pahte axpên to pakapêr nê mẽ pahkurê
Matêwre 7.1-5; Rômãn 2.1-3, 14.10-13; Wam Korĩt 4.5*

¹¹ E ixkwýjaja. Kwa kêr ka mẽ anhĩõ kot tanhmã amnhĩ tomnuj to hã omu mẽ tanhmã ho akapêr punuj to hkêt nê. Tĩrtũm kapêr ã kagà htũm kot ja nê mẽ pahkurê kamã hihtýx jakamã kot ka mẽ ri ã amnhĩ nhĩpêx anê mẽ te ate Tĩrtũm kapêr tũm kwý omnuj ã harênh pyræk. Rỳ te axàhpumunh týx o ate Tĩrtũm jakrenh ã amnhĩ to jarkrar pyræk. Jao kapêr kôt amnhĩ nhĩpêx kêt nê. Na htem Tĩrtũm kapêr ã kagà htũm kwý mex ã harê mẽ hkwy omnuj ã harênh kêt nê. Piitã mex kênã.

¹² Nê Tĩrtũmja tapxipix na kêp mẽ pahto amnhĩptar xwýnh maati. Nê tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwýnh ã mẽ pajarê rỳ mẽ pahte amnhĩ tomnuj xwýnh ã mẽ pajarê. ãm tapxipix kot ã mẽ pajarênh kot anhỹr xwýnh. Tã ka mẽ axtem mẽ kapêr kwým ri tanhmã akwýjê ho akapêr punuj to ho ri apa.

*Mẽ pahte Tĩrtũm mã pajamaxpêr pê kãm amnhĩ jarênh ã mẽ pamã karõ
Rukre 12.13-21*

¹³ E kwa mẽ inhma ixkwýjaja. Na ka hte mẽ akwýjaja tanhmã amnhĩ kukamã ajamaxpêr to mẽ akwýjê mã amnhĩ jarênh o:

—Koja apkati pa ma krĩ hõ hwýr mō mẽ kamã mẽ kãm ixapênh o ixpa hã ixtã amgrà pyxi mẽ hpãnhã kàxpore jamýnh rax mẽ man akupýn mō.

Anhỹr o amnhĩ jarê. ¹⁴ Kwa mẽ ã amnhĩ kukamã amnhĩ jarênh anhỹr kêt nê. Mẽ pahtō mẽ pahte amnhĩ kukamã paxàhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhỹr tã kormã ã amnhĩ nhĩpêx anhỹr kêt ri tanhmã amnhĩ to mẽ ty. Rỳ tanhmã amnhĩ to mẽ axà hãmri mẽ nhỹhým amōr kêt nê. Te mẽ pahpê namê pyræk na pu htem ri papa mẽ tanhmã amnhĩ to mẽ ty mẽ pajapêx tokyx anê. ¹⁵ Jakamã mẽ ã amnhĩ kukamã amnhĩ jarênh anhỹr kêt nê. Kêt amnhĩ jarênh o:

—Koja Tĩrtũm kãm ja prãm koja apkati pa ã amnhĩ nhĩpêx anê mẽ ã amnhĩ nhĩpêx anê.

Anhỹr o Tĩrtũm kamnàr o tanhmã amnhĩ kukamã amnhĩ jarênh to. ¹⁶ No mẽ ate amnhĩ krã hkôt amnhĩ kukamã amnhĩ jarênhta Tĩrtũm jamaxpêr xà hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhỹrja mex kêt.

¹⁷ Nê mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri mẽ amnhĩ tomnuj o apa.

5

Mě hikàxpore rŭnh xwŷnhjê jarēnh

Rukre 12.13-21; Wam Ximotre 6.9-10; Apokarip 18.14

¹ Nē kwa mẽ akàxpore rŭnh xwŷnhjaja. Mě inhma nē inhmar tŷx nē. Nhŷrmã mẽ amex kêt jakamã kwa mẽ tee ri amnhĩ kukamã ajamaxpēr o ra akaprĩ nē amŷr o apa kurê kumrēx. ² Tĩrtŭm noo mã mẽ akàxpore te ra mẽ apê hapêx par pyrāk. Te ra mẽ anhŷ kamã mẽ ate amnhĩ tomnuj xwŷnh ã kutã akrĩ pyrāk. ³ Mě ate mẽ akukrēx nē mẽ akàxpore ho apikuprōnh rŭnh tã ka htem mẽ akwŷjê pê ho anhōxŷ ho ri apa. Mŷrapê koja nhŷrmã tanhmã mẽ apê amnhĩ to nē omnu pa ka mẽ ho apikuprōnh rax kaprŷ. Hãmri nē mẽ ate amnhĩ tomnuj mŷrapê Tĩrtŭm mẽ Kra wa kuri atĩr tŭm nē apa ho apa hkêt nē. Ām kuwy kamã mẽ amnhĩ xà htŷx kamã ajamak rãhã ho ri apa. ⁴ Na ka htem apur kãm mẽ àpēnh xwŷnhjê mã amnhĩrer kêt nē. Nhŷm mẽ tee ri amnhĩ tã mẽ ajamã hãmri nē mẽ atã amnhĩ to Pahi Maati Tĩrtŭm xihtŷx xwŷnhhta wŷr o pa nhŷm mẽ atã mẽ kuma. ⁵ Mě akĩnhã mẽ kêp amrakati htã ka htem ãm ja hã mẽ omu nē mẽ àpēnh pãnhã mẽ kãm amnhĩrer kêt nē amnhĩ pix kukamã ajamaxpēr. Nē amã prãm xà hpix kukamã amnhĩm mẽmoj japrōr pê akĩnh o ri apa. Jao te mẽ apê mōx htwŷm nhŷm mẽ kot hpĩr nē hkrēr mã mex ã harēnh xwŷnhhta pyrāk. Mŷrapê kot kaj mẽ mōxta pyrã nē nhŷrmã ty hãmri nē Tĩrtŭm mẽ Kra wa kuri atĩr tŭm nē apa ho apa hkêt nē. ⁶ Nom ja pix kêt. Na ka htem mẽ anhō krĩ kamã mẽ anhō pahi mã tanhmã akwŷjê ho axêx to ho ri apa. Mě kot tanhmã atomnuj to hkêt tã ka mẽ kãm mẽ ho axêx rŭnh nē. Tã koja nhŷrmã Tĩrtŭm mẽ hã tanhmã mẽ ato rax kumrēx ka mẽ rĩ amnhĩ pumu.

Mě pahte Jejus kutêp amnhĩ kaxyw kãm pajamaxpēr o papa hã mẽ pamã karō

Sikŭn Pêtre 3.1-13

⁷ E ixkwŷjaja. Koja mēhō tanhmã mẽ atomnuj to htã ka mẽ arĩ amnhĩ kaxyw Jejus mã ajamaxpēr rãhã ho ri apa. Pê akupŷn hpōx xà hã arĩgro jamãr rãhã nē. Te pur nhō dōn kot amnhĩ nhĩpêx pyrāk. Koja hpur kãm ahkre nē ahkre hpa hãmri nē arĩ hamãr o pa nē kãm nojarêt kêt nē hã na wrŷk jamãr o pa. Jao hamakêtkati nē ô jamãr rãhã ho pa. ⁸ Tã kêr ka mẽ urāk nē arĩ Pahihti akupŷn hpōx xà hã arĩgro jamãr rãhã ho ri apa. Koja tokyx akupŷn mẽ pahwŷr wrŷ. Jakamã kêr ka mẽ kutêp mẽ kot mẽ atomnuj xwŷnhjê kutã amnhĩ to htŷx nē ri apa. Nom tee ri amnhĩ kukamã ajamaxpēr o Jejus kaga hkêt nē. Arĩ hamãr pê akĩnh nē ajamakêtkati nē ri apa. Koja akupŷn mẽ pahwŷr wrŷ nē mẽ pahto mex rax kumrēx.

⁹ Nē kêr ka mẽ axpēn to akapēr o ri apa hkêt nē. Kot ka mẽ ã amnhĩ nhĩpêx anē nhŷm Tĩrtŭm mẽ ama nē tanhmã mẽ ajarēnh to. Kot mẽ pahpumunh xà hkôt tanhmã mẽ pajarēnh to xwŷnh na. Tã ra tanhmã kot mẽ pahpiitã mẽ pajarēnh to xà hã arĩgroja ra ahtêp o mō.

¹⁰ E ixkwŷjaja. Kêr ka mẽ wam mẽ kot Tĩrtŭm nhŷ hã kapēr jarēnh xwŷnhjaja kot amnhĩ nhĩpêx mã ajamaxpēr rãhã nē. Na prem Tĩrtŭm nhŷ hã mẽ kãm kapēr o ri mẽ hkôt pa nhŷm mẽ hkŷwŷjaja ja hã tanhmã mẽ hipêx to nhŷm mẽ amnhĩ xà htŷx kamã hamak rãhã ho pa. Tã tee ri amnhĩ kukamã hamaxpēr pê Tĩrtŭm kaga hkêt nē. Na prem arĩ ŷ hã kapēr jarēnh rãhã ho ri mẽ hkôt pa. Tã kêr ka mẽ kot amnhĩ nhĩpêx pyrāk o amnhĩ nhĩpêx nē Tĩrtŭm kaga hkêt nē. ¹¹ Na prem amnhĩ xà htŷx kamã hamak o pa rãhã ty hãmri nē Tĩrtŭm kuri mex nē hkĩnh nē pa ho pa. Ra mẽ ate finat Johti jarēnh mar mex. Na pre omnuj tŷx nē pa htã amnhĩ tã Pahi Maati Tĩrtŭm kamã gryk nē hkaga hkêt nē. Hãmri nhŷm amnhĩ tã omu nē gaa nē ho mex rax nē nhŷm akupŷm mex kumrēx nē pa. Pahi Maati ja ukaprĩ ho ukaprĩ nē mex o mex jakamã na pre ã Johti ho mex anē. Tã koja ho mexta pyrã nē ã mẽ pahto mex anē.

Mě pahte tanhmã amnhĩ nhĩpêx to hã mẽ pamã karō

Matêwre 5.33-37, 18.15; Rômãn 12.15; Karatas 6.1-2; Jutre 22-23

¹² E ixkwŷjaja. Pa mẽ amã mẽmoj jarē ka mẽ inhma nē inhmar tŷx nē. Kêr ka mẽ mẽmoj tã amnhĩ jarēnh kaxyw hãmri nē akatãt kôt amnhĩ jarēnh kurê kumrēx. Nē amnhĩ jarēnh

o: “Nà kot paj ja ho anē.” Anē. Rỳ amnhĩ jarēnh o: “Nà kwarĩ pa ja ho anhỹr kêt nē.” Anhỹr o amnhĩ jarēnh kurê kumrēx. Kê mẽ akwỳjaja ãm hãmri mẽ ate amnhĩ jarēnh ã mẽ apumunh kurê kumrēx nē axêx ã mẽ akamnhĩx kêt nē. Mẽ apê Tĩrtũm kra kênã kot ka kêt mẽ ri axtem nē amnhĩ jarēnh o axêx.

¹³ Nē koja mẽ anhĩõ mẽmoj tã tanhmã amnhĩ to nē omnuj nē. Ka mẽ ja hã omu nē kãm anē kê amnhĩ kaxyw Tĩrtũm mã hamaxpêr pê amnhĩ to hwỳr rãhã ho pa. Rỳ koja hkĩnh nē ri pa ka mẽ ja hã omu nē kãm anē kê hkĩnh kãm mex o mex ã grer o pa. ¹⁴ Rỳ koja ã nē nõ ka mẽ ja hã omu nē kãm anē kê amnhĩ wỳr pastô nhỹ hã mẽ kapêr xwỳnh kwỳjê hã karõ. Kê mẽ hwỳr mra nē Jesus nhỹ hã mẽmo twỳm kwỳ ho hkukõ nē ho Tĩrtũm wỳ. ¹⁵ Kê mẽ ã mẽ ã xwỳnhjê hwỳr mrrar nē mẽ ho Tĩrtũm wỳr o pa anē. Koja mẽ ho kuwỳ nhũm mẽ kuma nē akupỹm mẽ ho mex. Nhũm mẽ tanhmã amnhĩ tomnuj to japêr kê mẽ ja hã amnhĩ jarê kê Tĩrtũm mẽ kuma nē ja hã tanhmã mẽ ho hkêt nē. ¹⁶ Jakamã kêr ka mẽ atõ tanhmã amnhĩ tomnuj to nē tee ri ja hã amnhĩ pumu hãmri nē tokyx akwỳjê mã amnhĩ jarê kê mẽ tokyx ato Tĩrtũm wỳ. Kê atã mẽ kuma nē tanhmã akrã hto ka axte ã amnhĩ nhĩpêx anhỹr kêt nē. Nē ra amex nē apa.

Nē koja mẽhõ Tĩrtũm kôt pix mã amnhĩ nhĩpêx mex rãhã ho pa. Hãmri nē mẽmoj tã kuwỳ nhũm kuma nē kãm tanhmã mẽmoj to. ¹⁷ Te finat Eris kot mẽmoj tã hwỳr nhũm kot mar nē kãm ho anhỹrta pyrãk. Erisja kêp mẽ panhĩõ na pre. Tã na pre hkwỳjaja amnhĩ tomnuj pix o pa nhũm tee ri mẽ omu nē mẽ hã na wrỳk kêt kaxyw ho Tĩrtũm wỳr kãm hihtỳx nē. Hãmri nhũm kuma nē kãm ho anē nhũm na wrỳk kêt ry rax kumrēx. Hã amgrã axkrunêpxi nē hkôt mytwrỳ kêp 6. Mẽ kot amnhĩ tomnuj tỳx o paja mỳrapê. ¹⁸ Tã nhũm Eris axte mẽ ho kuwỳ nhũm axte mẽ hwỳr na rē nhũm akupỹm katat kôt wrỳk mex nē. Nhũm akupỹm mẽ hpur kãm mẽ õja mẽ kãm mex nē akupỹm mẽ kãm ô rũnh nē. Tã ã Tĩrtũm kot Eris mar nē kãm mẽmoj nhĩpêx anhỹrja pyrã nē koja mẽ pama nē mẽ pamã mẽmoj tanhmã ho.

¹⁹ Nē e mẽ inhma ixkwỳjaja. Koja mẽhõ Tĩrtũm kapêr mar tỳx nē te kêp hkra pyrãk o amnhĩ nhĩpêx. Tã tanhmã hamaxpêr to nē kapêr kaga nē htỳx ri amnhĩ tomnuj pix o pa. Ka mẽ ja hã omu nē hwỳr mra nē kot amnhĩ tomnuj nē kãm akapêr kãm axihtỳx kê tokyx hkaga nē akupỹm Tĩrtũm kôt amnhĩ xãm tỳx nē ãm hkôt pix mã amnhĩ nhĩpêx. ²⁰ Koja amnhĩ tã mẽ ama nē Tĩrtũm kôt amnhĩ xãm tỳx nhũm amnhĩ tã omu nē kot tanhmã amnhĩ tomnuj tota ho hamakêtkati nē amnhĩ katut kôt kurê nhũm nhỹrmã kuri htĩr tũm nē mex nē pa ho pa. Koja amnhĩ tomnuj tỳx o pa htã hkaga hpa nhũm Tĩrtũm ja hã omu nē hã tanhmã ho hkêt nē axte tanhmã kot amnhĩ tomnuj tota mã hamaxpêr kêt nē.

Tã ãm ja pix. Ixpê Xiakre na pa ã mẽ awỳr kaga nhĩpêx nē mẽnh anē.

Wam Pêtre Simãw Pêtre kot Jejus kôt hkwýjê hwýr kagà nê mênh

Simãw Pêtre na pre kagàja nhîpêx. Kêp tep pynênh o pa xwýnh tâ hpãnhã kêp Jejus nhý hã hkrajê jahkre ho pa xwýnh. Nê krî pê Jerujarê kamã kêp Jejus krajê nhô pastô. Na pre krî piitã hkôt Jejus ã mē kãm mē hkurê xwýnhjaja tanhmã hã mē hipêx to nhũm Pêtre mē harênh ma nê mē hamaxpêr o hihtýx kaxyw mē kãm kagàja nhîpêx nê krî piitã hkôt mē hwýr kurê. Mē kot kamã harênh nê mar nê amnhî kamã kahak kêt nê arî Tirtũm kôt amnhî nhîpêx mex o pa kaxyw. Nê Jejus ã mē kot amnhî xà htýx kamã hamak tâ nhýrmã kaxkwa kamã mex nê pa ho pa hã mē kãm awjarê. ã mē kãm mēmoj jarê nê hã kagà anê. Nê mē kãm:

¹ Pa mē ate Jejus kôt amnhî xunhwýr nhũm Tirtũm kot mē ato hkra xwýnhjaja. Xà mē amex? Ot pa mē awýr kagà nhîpêx nê kumê. Ixpê Simãw Pêtre na pa. Ixte Jejus nhý hã hkrajê jahkre ho mē ixpa xwýnhjê hõ na pa mē awýr kagà nê kumê.

Na xep pre Kris ã mē kãm mē pahkurê xwýnhjaja tanhmã mē anhîpêx to ka mē panhõ pika rũm mē umaj anhrã nê ma ahpýnhã krî hkôt ri apa.

Jaο mē akwýjaja ma pika pê Põt kamã krî hkwý hkôt apa.

Nê mē akwýjaja pika pê Karatas wýr apa.

Nê mē akwýjaja pika pê Kapatos wýr apa.

Nê mē akwýjaja pika pê As wýr apa.

Nê mē akwýjaja Pitĩn wýr apa.

ã ahpýnhã pika hkôt mē apigrãnh par anê. Tã ot pa mē awýr kagà nhîpêx nê mē apiitã mē awýr kurê. Mē apýnh nê mē ate kamã harênh nê ixkapêr mar kaxyw. ² Na pre Mēpahpãm Tirtũmja amnhĩm mē pahte amnhî kaxyw kãm pajamaxpêr xwýnhjê rê nê mē pahã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mē nê ty nê htyk o hkamrõ axkapĩ nhũm mē harênh ma nê hkôt amnhî xunhwý. Tã nhũm Ixkarõ mē hkarõ mã agjê nhũm mē ra inhmã hprãm xà kôt pix mã ri inhmã tanhmã amnhî nhîpêx to ho pa.

Anhýr o mē pahã amnhî jarênh. Tã kê mē akutã nojarêr rãhã ho ri mē akôt pa ka mē ý hã axãmnhix ajamakêtkati nê akĩnh nê ri apa.

Mē pahte amnhî kukamã pajamaxpêr pê pahkĩnh o papa hã mē pamã karõ

Rukre 12.32-34; Rõmãn 8.18-25; Sikũn Korĩt 4.16-18

³ Nê na pre mē panhõ Pahĩti Jejus Krisja ty nhũm Hipêêxã Tirtũm akupým ho htĩr. Tã kot mē pakutã nojarêr rãhã ho pa jakamã na pre mē pahpê hkrajê mã mē pajamaxpêr nyw jagjê pu mē ý hã pahte amnhî nhîpêx nyw o amnhî nhîpêx o papa. Hãmri nê Jejus akupým htĩrja mã pajamaxpêr nê amnhî kukamã pajamaxpêr o:

—Kot paj nhýrmã ty nhũm Tirtũm kot Jejus nhîpêx pyrã nê akupým ixto ixtĩr pa wa kuri ixtĩr tũm nê inhmex kumrêx rãhã ixpa ho ixpa. Nã koja ã inhîpêx anê.

Anhýr o pajamaxpêr jakamã kwa kêr pu mē Tirtũm mã mex o mex ã mãn harênh rãhã ho papa. ⁴ Na ra mē pakutêp õ krî kamã mēmoj piitã ho mex nê. Õ krî kamã mēmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mē kot Kris ã mē atomnuj myrapê na ka mē amnhî xà htýx kamã ajamak o ri apa nom arî amnhî kaxyw Tirtũm mã ajamaxpêr rãhã ho ri apa. Hihtýx o hihtýx jakamã koja mē pahkôt pa ho pa nê mē pamã pajamaxpêr o hihtýx rãhã nhũm nhýrmã Jejus akupým mē pahwýr wrý. Hãmri pu mē hkôt ri amnhî nhîpêx mex rãhã ho ri papa. Ra Tirtũm kot mē pakukamã mē pajarênh xà hkôt. ⁶ Jar mē pahte arî amnhî xà htýx kãm pajamak o papa htã na pu htem Tirtũm nhýrmã kot mē pahto mexta kukamã pajamaxpêr hãmri nê tee ri amnhî kukamã pajamaxpêr kêt nê. Mē pahpê mē pahpunuj tũm nê ri papa ho papa mã xwýnh kêt. ⁷ Na hte Tirtũm mē panhîpêx o te mē kot õr nhîpêx pyrãk. Na htem

hprî hã tanhmã ôr kute hã omu. Kêp ôr kumrêx ã omu rý mêmoy mẽ ho pihkàr ã omunh kaxyw kuwy kamã kurê. Nhũm piitã ôr nê pigãnh pa japêr nhũm mẽ omu nê harênh o:

—Nà ãm hãmri. Kêp ôr kumrêx nê mêmoy mẽ ho pihkàr kêt. Anê.

Na hte Tirtũm ã mẽ panhípêx anê. Jakamã mẽ pahpê Jejus kôt amnhĩ nhípêx o mẽ papa xwýnhjaja mẽ pahte tũhã tanhmã pahpunuj to htã no nhũm mẽ panê ja rênh kêt nê. Na hte amnhĩ tã mẽ pahpumu nê hamaxpêr o:

—Kot paj kormã ja hã mẽ hamã nê tokyx akupým mẽ ho mex kêt nê. Koja mẽ omnuj nê pa htã tee ri amnhĩ kukamã hamaxpêr nê ixkaga hkêt nê arĩ amnhĩ kaxyw ixkôt hamaxpêr rãhã ho pa. Hãmri nhũm mẽ hkwyjaja ja hã mẽ omu nê mẽ kêp ixkra hã mẽ omunh kurê kumrêx. Te mẽ kot hprî hã ôr pumunh nê kêp ôr kumrêx ã omunhta pyrãk. Anê.

Jakamã kêr pu mẽ arĩ amnhĩ kaxyw hkôt pajamaxpêr rãhã ho papa. Mêmio myrapê mẽ pahpunuj nê ri papa htã arĩ hkôt pajamaxpêr rãhã nhũm Jejus nhýrmã akupým mẽ pahwýr wrý. Hãmri nhũm Tirtũm mẽ pahpumu nê mẽ pamã:

—Nà ãm hãmri na ka prem amnhĩ kaxyw ixpix mã ajamaxpêr rãhã ho ri apa. Mẽ kot ixtã tanhmã mẽ atomnuj to nhũm mẽ ate amnhĩ xà htýx kamã ajamak o apa htã aa ixkaga hkêt nê arĩ amnhĩ kaxyw inhmã ajamaxpêr rãhã ho ri apa. Nà ãm hãmri mẽ ate amnhĩ to mex kumrêx xwýnh na ka mẽ. Kot paj mẽ piitã mẽ kãm ja hã mẽ ajarê.

Anhýr o mẽ pamã kapêr.

Nê ôr o mẽ hikukrêxja mex tã koja arĩ mex rãhã hkêt nê. Koja mẽhõ kãm tanhmã homnu hto hprãm nê homnu hpa. No mẽ papajaja kot puj mẽ arĩ amnhĩ kaxyw Tirtũm mã pajamaxpêr rãhã ho papa hãmri nê ôrta pyrã nê pajapêx kêt nê. Kurom mẽ pamex tũm nê aa pajapêx kêt nê papa ho papa.

⁸⁻⁹ Nê Jejusja aa mẽ ate ano ho omunh kêt tã na ka htem kãm mẽ ajapê htýx nê kot mẽ panê tanhmã amnhĩ nhípêx to hã harênh ma nê mẽ amã hkĩnh nê. Nê amnhĩ kaxyw hkôt ajamaxpêr mex rãhã ho ri apa. Jakamã na pre Tirtũm ja hã mẽ apumu nê mẽ ato hkra nê mẽ apê õ krĩ kamã wa kuri amex nê apa mã xwýnh ã mẽ ajarê. Ja kaxyw na pu prem amnhĩ kaxyw hkôt pajamaxpêr rãhã jao pahkĩnh nê ri papa. Nê tee ri tanhmã amnhĩ kĩnh týx ã amnhĩ jarênh to hkukamã pajamaxpêr. Kormã aa ã mẽ pahkĩnh anhýr kêt tã mẽ pahkĩnh týx nê ri papa.

¹⁰ Nê Tirtũm kot mẽ pahto mex pê mẽ panê mẽ pahte amnhĩ tomnuj rênh par nhũm kuri mẽ pahpũm nê mẽ papa hã mẽ pajarênhja. Amnepê mã Tirtũm nhý hã kapêr jarênh o ri mẽ pa xwýnhjaja na pre mẽ pakukamã ã mẽ pajarênh anhýrja ma nê tee ri hamaxpêr nê tee ri hã axpên kukjêr o ri axpên kôt pa. Nom hprî hã mar mex kêt nê. Tã arĩ ri mẽ pakukamã hkwyjê mã ja hã mẽ pajarênh o ri pa.

¹¹ Na pre Tirtũm Karõja Kris tyk kukamã mẽ kãm ã mẽ pajarênh anhýr o amnhĩrĩt. Kormã Kris kaxkwa kamã pa ri. Kormã wrýk nê katorxã nhõxãhkre rũm kator kêt ri nhũm pre hkukamã mẽ kãm tanhmã ho amnhĩrĩt to. Mẽ kot hpĩr nhũm kot amnhĩ xà htýx kãm hamak kãm mẽ panê htykja ã hkukamã mẽ kãm harênh o amnhĩrĩt. Nhũm Tirtũm kot akupým ho htĩr nê kãm mex o mex ã harênhja nhũm hkukamã mẽ kãm harênh o amnhĩrĩt. No ãm hprî hã mẽ kãm mẽhõ nhĩxi hkôt harênh kêt jakamã nhũm prem harênh ma nê tee ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mẽhõ koja we ã amnhĩ nhípêx anê? Xà koja tokyx ã amnhĩ nhípêx anê nà kormã?

Anhýr o hã axpên kukjêr o ri pa. ¹² Hãmri nhũm Tirtũm axte mẽ kãm Jejus jarênh kwý ho amnhĩrĩt nê mẽ kãm:

—Nà mẽ anoo mã koja ã amnhĩ nhípêx anhýr hkêt nê. Mẽ amýr pê mẽ akanrêhã mẽ akra nê mẽ atãmnhwýjê noo mã koja kato nê mẽ hkôt ã amnhĩ nhípêx anhýr o pa. Anê.

Mẽ papamjaja mẽ panoo mã kator nê ã kot amnhĩ nhípêx anhýr o paja o ã mẽ kãm ho amnhĩrĩt anê.

Amnepêm Tirtũm nhý hã kapêr o ri mẽ pa xwýnhjaja nê jarãhã mẽ ixte Jejus nhý hã mẽ ahkre ho ri ixpa xwýnhjaja mẽ ixkapêr ãm pixii. Na pa htem wantajê pyrã nê Tirtũm

Karō nhỹ hã àhpumunh tỳx xà ho mẽ amã tanhmã Jejus jarēnh to ho ri mẽ akôt ixpa. Nhũm hte Tirtũm kapēr o mẽ wryk xwỳnhjaja mẽ ixkapēr ma nẽ tee ri hamaxpēr o mẽ pahpyrà nẽ kãm hprĩ hã harēnh mar par prãm nẽ.

Mẽ pahte Tirtũm pyrà nẽ tãm amnhĩ nhĩpêx ã mẽ pamã karō
Epes 4.1-3; Korosẽ 1.10-12; Sikũn Pêtre 3.10-13; Wam Juãw 3.1-6

¹³ E kwa Kris kôt ixtõ nẽ ixtõxjaja. Kêr ka mẽ Jejus kutêp mẽmoj punuj kutã amnhĩ to htỳx rãhã ho ri apa. Nẽ Tirtũm mã amnhĩ nhĩpêx mex rãhã nẽ. Pê tãm ajamaxpēr nẽ tãm amnhĩ nhĩpêx o apa. Nẽ mẽ ã ajamaxpēr anhỹr o:

—Nà koja nhỹrmã Jejus akupỹn mẽ ixwỳr wry hãmri nhũm Tirtũm ixto mex rax nẽ. Nà koja ã inhĩpêx anẽ. Anẽ.

¹⁴ Nẽ kêr ka mẽ Tirtũm kapēr kôt pix mã mãn ri amnhĩ nhĩpêx mex rãhã ho ri apa. Te mẽhprĩre kot mẽ hipêxà kapēr mar nẽ hkôt amnhĩ nhĩpêx pyràk. Kormã mẽ ate Kris kôt amnhĩ xunhwỳr kêr ri na ka prem ate amnhĩ nhĩpêx tũm kôt ri tanhmã amnhĩ tomnuj to ho ri apa. ¹⁵ Tã kêr ka mẽ hpãnhã amnhĩ to mex o mãn ajamaxpēr o apa nẽ Tirtũm pyrà nẽ amnhĩ tomnuj o apa hkêt nẽ. Tirtũmja kot amnhĩ to mex pix o pa xwỳnh na. ¹⁶ Kapēr ã kagà htũm kot ja jarēnh kot:

Kêr ka mẽ ixpyrà nẽ amnhĩ to mex pix o ri apa. Anẽ.

¹⁷ Tã koja nhỹrmã kêp Mẽpahpãm maati hã hprĩ hã mẽ pahte amnhĩ nhĩpêx ã mẽ pahpumunh hkôt tanhmã mẽ pajarēnh to. Tãm mẽ pahte amnhĩ nhĩpêx kôt mẽ pajarē rỳ mẽ pahte amnhĩ tomnuj kôt mẽ pajarē. Hãmri nẽ ahpỹnhã mẽ panhĩpêx. Mẽ pahto mex nẽ rỳ mẽ pahtomnuj nẽ. Jakamã kwa pu mẽ nhỹrmã kot tanhmã mẽ pahtomnuj to pymaj hkôt pix mã amnhĩ nhĩpêx o ri papa rãhã nẽ.

¹⁸ Nẽ kormã mẽ pahte Jejus kôt amnhĩ xunhwỳr kêr ri na pu prem mẽ panhĩgêt pyrà nẽ pahtỳx ri amnhĩ tomnuj o ri papa. Tã nhũm Krisja te amnhĩm mẽ pajaprôr pyràk o mẽ panhĩpêx. Mẽ pahte hpãnhã kapēr kôt pix mã amnhĩ nhĩpêx o papa kaxyw. No mẽmoj to na pre mẽ pahpãnhã amnhĩre? Nà ra mẽ pahte ja jarēnh mar tỳx. Na pre kàxpore ho mẽ pahpãnhã amnhĩrer kêr nẽ. Rỳ ôr o mẽ hikukrêx ã ohtô ho mẽ pahpãnhã amnhĩrer kêr nẽ. Rỳ prat o mẽ hikukrêx ã ohtô ho mẽ pahpãnhã amnhĩrer kêr nẽ. Jajaja hapêx tokyx anhỹr mã xwỳnh na. ¹⁹ Na pre ã mẽ hpãnhã amnhĩrer anẽ nẽ tãm mẽ panê ty nẽ htyk o amnhĩ nhĩ ho mẽ pahpãnhã amnhĩrer pa. Nhũm hkamrô axkapĩ. Te amnepê mã mẽ panhĩgêt kot amnhĩ pãnhã Tirtũm mã ôwêhti hkrare hpar nhũm hkamrô pikapĩrta pyràk. ôwêhti krare mexre pix na prem kãm kupa. Mex nẽ tanhmã kute hkêt xwỳnh pix. Tã Krisja aa tanhmã amnhĩ tomnuj to hkêt kumrêx nẽ mẽ panê ty nẽ htyk o Tirtũm mã mẽ pahte amnhĩ tomnuj piitã hpãnhã amnhĩrer pa. ²⁰ Amnepê mã kormã mẽmoj kêr ri na pre Tirtũm kot ã mẽ pahpãnhã amnhĩrer anhỹr kaxyw mẽ pakukamã kuta nẽ ãm. Tã nhũm amgrà ohtô nẽ hapêx nhũm mẽ pahwỳr kumẽ nhũm man mẽ pahwỳr wry. Kot ã mẽ pahpãnhã amnhĩ nhĩpêx anhỹr kaxyw. ²¹ Tã nhũm prem kupĩ nhũm Tirtũm akupỹm ho htĩr nẽ mex o mex ã harẽ. Mẽ pahte ja hã harēnh mar kôt amnhĩ kaxyw Tirtũm pix mã pajamaxpēr o ri papa kaxyw. Nẽ mẽ pahte amnhĩ wry Jejus jamãr rãhã ho ri papa kaxyw.

²² Tã pu prem ra kot ã mẽ panê amnhĩ nhĩpêx anhỹr ã harēnh ma nẽ mẽ pahte amnhĩ tomnuj kaga nẽ hkôt amnhĩ xunhwỳ. Jao amnhĩ to mex pix o ri papa. Nẽ mẽ pamã Kris kôt mẽ pahkwỳjê hkĩnh o papa. Tã kwa kêr pu mẽ arĩ pamã axpên kĩnh tỳx rãhã ho papa.

*Te mẽ pakatorxà rũm mẽ pajapôx pyràk o axte mẽ pajapôx ã mẽ pajarēnh
 Juãw 3.1-21*

²³ Nẽ na pu prem mẽ pakatorxà nhõxàhkre rũm mẽ pajapôx pyrà nẽ axte mẽ pajapôx pyràk o amnhĩ nhĩpêx. Jao ra mẽ pahpê Tirtũm kra nẽ ri papa. Na hte mẽ pakatorxà nẽ mẽ panhĩpêxajaja wa ri pa nẽ gaa nẽ mẽ pahpê ty. No kêr Mẽpanhĩpêxà maati Tirtũmja wa kurom rãhã ho rãhã. Tã ra mẽ pahte amnhĩ kaxyw kapēr kôt pajamaxpēr o pahpê hkra jakamã kot puj mẽ uràk nẽ nhỹrmã pahtĩr tũm nẽ papa rãhã ho papa.

Ně Tirtūm kapērja Tirtūm pyrà ně rāhāā. Koja aa hapêx kêt ně. ²⁴ Kapēr ā kagà htūm kot ja jarēnh kot:

Pika piitā hkôt mẽ pa xwýnhjaja te mẽ kot pōti grà pyrāk.

Ně mẽ kot amnhī to mex xàja te kot kapôt ā pixôrà pyrāk.

Na hte pōti tokyx grà ně hapêx.

Ně pixôràja haxwýja arīgro htýx mẽ nhūm grà tokyx anē ně rarak pa ně hapêx.

²⁵ No Tirtūm kapēr koja pōti mẽ pixôràta wa kurom aa hapêx kêt ně. Koja arī rāhā ho rāhā. Aně.

Tā kapērja tām na htem mẽ pamā kamā harē pu mẽ pahpiitā mar o papa.

2

Mě pahte Tirtūm kot amnhī nhīpêx kôt amnhī nhīpêx ā mẽ pamā karō
Rômān 12.2; Wam Korīt 3.16-17; Epes 2.19-22

¹ Ně kwa kēr pu mẽ axte tanhmā amnhī tomnuj to ho ri papa hkêt ně.

Rý tanhmā axpēn mā paxêx to hkêt ně.

Ně paxêx rom tanhmā ri axpēn nokupyr to hkêt ně.

Ně mēmoj tā axpēn kām pagryk kêt ně.

Ně tanhmā axpēn japry hto hkêt ně.

Kēr pu mẽ ā amnhī nhīpêx anhýr o papa hkêt kumrēx.

² Mě hkaràre na htem ām kām pijaôr pix prām. Ně gaa ně htýxre ně ra hprêk o mō. Tā kēr ka mẽ pijaôr pix prām xwýnhjê pyrà ně amā Tirtūm kapēr mar ně hkôt pix mā amnhī nhīpêx o apa hprām. Jao mar týx pê ra hkôt amnhī nhīpêx mex o mō ně gaa ně hkôt amnhī nhīpêx mex o apa. Te mẽ karàre pijaôr ně gaa ně ra hprêk o mōrta pyrāk.

³ Ra mẽ ate Jesus kot mẽ pahto mex ā omunh mex kēnā.

⁴ Ně na htem kēn o ixkre nhīpêx kaxyw hāmri ně hkwý kawrà ně ri hkapi. Nhūm hō mex kêt nhūm mẽ tee ri omu ně nhām kumě. Tā ja pyrà ně na pre mẽ pahkwýjaja tee ri Kris pumu ně htýx mex kêt ā hkamnhīx ně te mẽ kot kēn mēnhhta pyrāk o hipêx ně hkaga. No nhūm Tirtūmja amnhīm Kris mex o mex ā harē. Te ho mēhō kot kēn mex kêt ā hkamnhīx ně mēnh nhūm mēhō kot mex ā omunh ně amnhīm mýnhhta pyrāk. Nom Krisja kēn rom kēp htír tūm ně pa xwýnh jakamā nhūm pre Tirtūm mẽ pakaxyw ām pu prem hkôt amnhī xunhwý.

⁵ Ně Tirtūm na hte nhýrmā mẽ pahtr tūm ně wa kuri mẽ papa mā xwýnh ā mẽ pajarē. Te mẽ pahpê kēn nhūm Tirtūm te kot amnhī Karō mā mẽ pahto ixkre nhīpêx pyrāk. Jakamā na hte Jesus Kris tanhmā mẽ pahkrā hto pu mẽ Tirtūm kôt amnhī nhīpêx mex rāhā ho ri papa. Ně tanhmā kām amnhī nhīpêx mex to nhūm ja hā mẽ pahpumu ně hkīnh ně.

⁶ Tirtūm kapēr ā kagà htūm kot tanhmā Kris jarēnh to. Ně hā kuxi ně tanhmā harēnh to. Te kēp kēn pyrāk ā harē ně harēnh kot:

Kot paj nhýrmā Ijaew wýr mēhō mẽ nhūm mẽ hkôt pa ho pa.

Koja te kēp kēn o inhōrkwý nhīpêx kaxyw kēn maati mex kumrēxta pyrāk.

Koja amnhī kaxyw hkôt mẽ hamaxpēr xwýnhjaja nhýrmā ma inhō krī hwýr api ně hkīnh ně mex rāhā ně pa ho pa. Aně.

⁷ Tā ra amnhī kaxyw hkôt mẽ pajamxpēr xwýnhjaja. Kēn pyrāk xwýnh pê Jesusja na mẽ pamā mex o mex. No mẽ kot hkaga xwýnhjaja na htem hamaxpēr punuj xwýnh ā hkamnhīx ně hkaga ně kām hkīnh kêt ně. Tirtūm kapēr ā kagà htūm kot mẽ harēnh kot: Na prem kēn o amnhīm ōrkwý nhīpêx kaxyw hkawrà ho pa ně kēn maatiija pumu ně htýx omnuj ā hkamnhīx ně hkaga.

Mě kot hkaga htā nhūm Tirtūm mẽ kurom mex o kot kēn piitā hakrenh par ā omunh kuré kumrēx. Aně.

⁸ Ně määnēn harēnh kot:

Koja mẽ kapēr mar kêt kumrēx.

Te pry kamā kēn nōr nhūm mẽ kot nhām pry nē mēnh kaxyw hkamnār o amnhī par krā hi kukēnh pyrāk o koja mẽ amnhī nhīpêx. Aně.

Mê kot Kris kapêr mar tâ hkôt amnhî xunhwÿr kêt jakamã te ho mê kot amnhî nê kên kamnãr o amnhî par krã hi kukênh pyrãk o koja mê amnhî nhîpêx. Jakamã koja nhÿrmã Tirtûmja ja hã tanhmã mê ho htÿx kumrêx. Ra kot amnhî kukamã mê kãm amnhî jarênh xà hkôt. ⁹ No mê papajaja na pre Tirtûm jajê rom amnhî kôt mê paxunhwÿ. Nhÿrmã ô krî kamã mê papa ho papa kaxyw. Nê mê pahte mex o mex ã harênh kaxyw. Na pu htem Ijaew nhô patre pyrã nê Pahi Maati Tirtûm mã tanhmã amnhî nhîpêx to ho papa. Nom kormã mê pahte Kris kôt amnhî xunhwÿr kêt ri te mê pahpê kamãt kô kamã mê pahtÿx ri mê papa xwÿnh pyrãk. Tã Jejus kôt amnhî xunhwÿ nê hpãnhã te mê pahpê hirã mex kãm ri mê papa xwÿnh pyrã nê tãm amnhî nhîpêx rãhã ho papa. Ra mê pahpê Tirtûm kra jakamã na pu htem amnhî to mex rãhã ho ri papa. Nê Mëpahpãm maati Tirtûm mã tanhmã amnhî nhîpêx to ho ri papa. Te mê kot mê ho àhwÿr xwÿnhjaja kot kãm amnhî nhîpêx o pata pyrãk. ã na pre Tirtûm mê pahte amnhî nhîpêx anhÿr o papa kaxyw mê panhîpêx.

¹⁰ Amnepêm kormã mê pahpê hkra hkêt ri na pre mēhō mê pakamã ukapri hkêt kumrêx pu htem pahpunuj nê ri papa. Tã Jejus kôt amnhî xunhwÿ nhÿm Tirtûm mê pahto hkra pu mê pahpê hkra hã ri papa nhÿm mê pakamã ukapri rãhã ho mê pahkôt pa.

Mê pahpê Tirtûm mã tanhmã amnhî nhîpêx to xwÿnh ã mê pajarênh Rômãn 13.1-7; Xitre 3.1

¹¹ E ixkrãmnhwÿjaja. Ra mê pahpê Tirtûm kra jakamã mê pahpê ô krî nhô xwÿnh. Te mê pahpê jar pika nhô xwÿnh kêt pyrãk jakamã kwa kêr pu mê arî mê pahte amnhî nhîpêx tûm o amnhî nhîpêx kêt nê. Nê mê pajamaxpêr tûm o pajamaxpêr kêt nê. Ra axtem mê pajamaxpêr nyw nê axtem mê pahte amnhî nhîpêx nyw kênã. Mê pahte amnhî nhîpêx tûmja te kãm akupÿm mê pahte hkôt amnhî to paxujanãr prãm pyrãk. Mê pahte axte hkôt amnhî nhîpêx o ri papa kaxyw. Tã nom kêr pu mê anhÿr kêt nê. ¹² E kwa kêr ka mê anhô krî kamã akwÿ kot Kris kôt amnhî xunhwÿr kêt xwÿnhjê noo mã tãm ri amnhî nhîpêx o ri apa. Mê kot Kris ã tanhmã mê anhîpêx to rÿ tanhmã hã mê ato kapêr punuj to htãã. Kot kaj mê ã mê hkôt amnhî nhîpêx anhÿr o ri apa hãmri nhÿm mê tee ri mê apumu nê hamaxpêr o:

—Kwa mê ixte mê kot amnhî tomnuj xwÿnh ã mê harênh tâ mê kot amnhî to mex pix xwÿnh na mê. Anê.

Hãmri nê nhÿrmã mê pahpyrà nê Tirtûm kôt amnhî xunhwÿ nê kãm mex o mex ã harê nê kãm:

—Kwa Tirtûm. Na pre hte akrajaja anhÿ hã amnhî to mex rãhã nê pa ho pa pa ja hã mê omu. Nà xep amex o amex Tirtûm. Anê.

¹³ Nê mê apê Pahihti Jejus Kris kôt amnhî nhîpêx xwÿnh jakamã kêr ka mê anhô krî kamã mê anhô pahihti kapêr ma nê kapêr kôt mân amnhî nhîpêx mex o ri apa. Nê mê anhô pika kamã mê anhô prêjitênja ka mê kapêr ma nê hkôt amnhî nhîpêx. Mê kot mê ato amnhîptâr xwÿnhjaja ka mê piitã mê kapêr ma nê mê kapêr kôt pix mã amnhî nhîpêx rãhã ho ri apa. ¹⁴ Nê mê anhô pahi nhÿ hã mê kapêr o mê pa xwÿnhjaja na htem mê akaxyw mê unhwÿ. Mê kot amnhî tomnuj xwÿnhjaja nhÿm tanhmã mê kot mê ho kaxyw. Nê tãm mê kot amnhî nhîpêx o ri mê pa xwÿnhjaja nhÿm mê kot mê ô pahi mã mex ã mê harênh kaxyw. ¹⁵ Tã kêr ka mê kapêr ma nê mê hkôt tãm amnhî nhîpêx rãhã ho ri apa. Hãmri nhÿm mê ato kapêr punuj xwÿnhjaja ja hã mê apumu nê axte tanhmã mê ato kapêr to hkêt nê. ã mê ate amnhî nhîpêx anhÿr o apaja na Tirtûm kãm hprãm.

¹⁶ Nê mê pahpê Tirtûm kra jakamã na pu htem paxãmnhîx kãm tanhmã amnhî nhîpêx to ho ri papa. Nom kêr pu mê pahpê hkra hã pahtÿx ri amnhî nhîpêx kêt nê.

¹⁷ Nê kêr ka mê piitã mê ho mex o ri apa.

Nê mê ato amnhîptâr xwÿnhjê ho mex nê mê hã apijaàm rãhã ho ri apa.

Nê mê apê Kris kôt mê ate xpen to mê atō nê mê atōxjê hã amã xpen kînh pê xpen to mex nê.

Nê Tirtûm ã apijaàm rãhã nê.

Mê kãm mê apênh xwÿnhjaja kot tanhmã amnhĩ nhĩpêx to hã mê kãm karõ
Epes 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nê mê apê mê kãm mê axapênh xwÿnhjaja kêr ka mê anhõ patrãw kapêr ma nê hkôt ri amnhĩ nhĩpêx. Kot mê ato mex o pa rÿ mê atomnuj o pa htã ka mê arĩ mê hã apijaam pê hkôt ri amnhĩ nhĩpêx. ¹⁹ Tanhmã kot mê anhĩpêx punuj to htã ka mê arĩ kãm axapênh mex rãhã nê. Kêr kê Tirtũm ja hã mê apumu nê mê ato mex nê ka mê ajamakêtkati nê axãmnhĩx ri kãm axapênh o apa. ²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nê hã atak ka amnhĩ xà htÿx kamã ama nê rĩ amnhĩ pumu. No kot kaj akatãt kôt kãm axapênh mex tã nhũm amarĩ atak japêr tã kêr ka amnhĩ tã kamã agryk kêt nê. Arĩ kãm amnhĩ to htÿx kamã kãm xa nê amnhĩ tã tanhmã ho hkêt nê. Hãmri nhũm Tirtũm ja hã apumu nê ato mex nê. ²¹ Amnepêm na pre mê pahte hkôt amnhĩ xunhwÿr xwÿnhjaja Kris pyrã nê mê paxà htÿx kamã pajamak o papa hkukamã ja hã mê pahpumunh mex. Na pre Kris mê pakaxyw amnhĩ xà htÿx kãm hamak tÿx tã amnhĩ to htÿx nê mê kãm xa. Tã kêr pu amnhĩ xà htÿx kamã pajamak tã ÿ hã urãk nê amnhĩ to htÿx nê papa. ²² Krisja aa tanhmã amnhĩ tomnuj to hkêt nê pa ho pa. Nê aa mêmoj tã amnhĩ to hêx o pa hkêt. ²³ Mê kot kãm kapêr punuj tã nhũm amnhĩ tã tanhmã mê kãm nê hkêt nê. Nê mê kãm kapêr punuj kêt nê. Nhũm prem homnuj tÿx kumrêx nhũm amnhĩ xà htÿx kamã hamak tã amnhĩ tã mê kãm àkjêr nê tanhmã mê haprÿ hto hkêt nê. Na pre ãm hamaxpêr o: “Nà Tirtũm kot ixtã mê omunh mex kênã. Koja nhÿrmã mê piitã tanhmã mê kot amnhĩ nhĩpêx to hã mê omunh xà hkôt tanhmã mê hipêx to. Tãm koja àhpumunh tÿx xà hkôt tanhmã ixtã mê harênh to. Mê kurom àhpumunh tÿx o àhpumunh tÿx xwÿnh kênã.” Anê.

²⁴ Kris na pre te kawã kamã mê pahte amnhĩ tomnuj piitã gjênh nê ho nÿt nê htur rãhã pĩ kahpa hã mê panê htyk pyrãk o amnhĩ nhĩpêx. Mê pahte axte tanhmã amnhĩ tomnuj to hkêt prãm xaj. Pãnhã mê pahte amnhĩ to mex pix o ri papa kaxyw. Tã ã kot amnhĩ xà htÿx kãm hamak anhÿr o jêt jakamã kot puj mê pahte hkôt amnhĩ xunhwÿr xwÿnhjaja aa mê pahte amnhĩ tomnuj pãnhã amnhĩrer kêt nê. Ra Jejus htyk o kot mê panê amnhĩrer par kênã.

²⁵ Na pu pre te mê pahpê ôwêhti pikunor pyrã nê pahpêx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwÿnh kot ôwêhti pikunor mã katorta pyrãk o mê panhĩpêx. Pu mê hkôt amnhĩ xunhwÿ nê hkôt amnhĩ nhĩpêx mex o ri papa. Jao hkôt papa ho papa.

3

Mê mjên mê mê hprõ kot tanhmã axpên nhĩpêx to hã mê kãm karõ
Wam Korit 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mê anijaja mê amjên kapêr ma nê hkôt amnhĩ nhĩpêx. Akĩnhã kormã kot Tirtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mê ate amnhĩ nhĩpêx ã mê apumu nê mê apyrã nê Kris kôt amnhĩ xunhwÿr japêr. Mê kãm Tirtũm kapêr mar prãm kêt tã koja mê ã mê ate amnhĩ nhĩpêx anhÿr ã mê apumunh kôt mê apyrã nê amnhĩ kaxyw hkôt hamaxpêr japêr. ² Na htem mê ate Tirtũm kapêr kôt tãm ri amnhĩ nhĩpêx o apa hã mê apumunh o ri mê akôt pa.

³ Jakamã kêr ka mê anijaja amnhĩ mex pix kukamã ajamaxpêr o ri apa hkêt nê. Rÿ ajamaxpêr o:

—Ma kot paj mê hkuxwaxà ho amnhĩ krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwÿ japrõ nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mê piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhÿr o ri amnhĩ kukamã ajamaxpêr kêt nê. ⁴ Tirtũm na hte ã mê pahte amnhĩ nhĩpêx anhÿr ã mê pahpumu nê ãm hã mê pahpumu. Mê ôkrexê nê mê ê mex na hte hapêx tokyx anê. No mê panhõpinhxà kaxwÿnh kãm tãm ri mê pajamaxpêr nê pakamã amnhĩkrit nê papaja. Kot kaj mê ã amnhĩ nhĩpêx anhÿr o ri apa hãmri nhũm Tirtũm ja hã mê apumu

nhũm ja kãm mex nẽ. ⁵ Amnepê mã mẽ pakukamã mẽ panhõ wôwô nẽ mẽ panãjaja. Mẽ hkwy kot Tirtũm kôt amnhĩ nhĩpêx xwýnhjaja na prem ã amnhĩ nhĩpêx anhỹr o pa. Mẽ kot mjên kôt amnhĩ nhĩpêx o pa jakamã na prem amnhĩ tã mẽ omu nẽ mẽ ho mex nẽ kãm mẽ hapê nẽ. ⁶ Mẽ panhõ wôwô finat Saraja na pre ã amnhĩ nhĩpêx anhỹr o pa. Jao mjên Apraãw kapêr ma nẽ hkôt amnhĩ nhĩpêx. Nẽ kêp õ pahi hã harẽ nẽ hkôt pix mã amnhĩ nhĩpêx o ri pa. Tã kot kaj mẽ urak nẽ amnhĩ to htýx nẽ ã amnhĩ nhĩpêx anhỹr o pa. Hãmri nẽ amnhĩ tã amã amjên puma hkêt nẽ apa nẽ te apê Sara hkra pyrak.

⁷ Nẽ mẽ amyjaja kêr ka mẽ tãm mẽ aprõ nhĩpêx o ri mẽ hkôt apa. Mẽ akĩnhã mẽ hihtýx kêt jakamã mẽ kamã axukaprĩ rãhã ho ri mẽ hkôt apa. War ajamẽ war apê Jejus kukwak ri war atĩr tũm nẽ apa mã xwýnh jakamã kêr ka mẽ ho mex rãhã ho ri mẽ hkôt apa. Tirtũm kãm war ajamẽ war ajapê jakamã kot kaj mẽ ã mẽ hipêx anhỹr o ri apa hãmri nẽ ra axamnhĩx mẽmoj tã amnhĩ to Tirtũm wý nhũm mẽ amar kurê kumrẽx.

Tirtũm krajaja kot amnhĩ xà htýx kamã hamak ã mẽ harẽnh

Rõmãñ 12.9-21; Korosẽ 1.10; Wam Tesarõn 5.14-15

⁸ E Kris kôt ixkrãmnhwýjaja. Nã ixkapêr jatur xà na ja. Kêr ka mẽ ri axpên kôt ajamaxpêr mex pê axpên to mex rãhã ho ri apa. Nẽ mẽ ate Kris kôt axpên to atõ nẽ atõx ã amã axpên kĩnh o ri apa. Jao axpên kamã axukaprĩ nẽ mẽmoj to axpên kutã anojarêt rãhã nẽ. ⁹ Na pu prem Jejus kôt amnhĩ xunhwý nhũm Tirtũm mẽ pahto hkra nẽ mẽ pahto mex ã amnhĩ jarẽ. Tã koja mẽhõ tanhmã mẽ anhĩpêx to rý tanhmã mẽ ato kapêr punuj to. Nom kêr ka mẽ ama nẽ amnhĩ tã tanhmã ho rý tanhmã ho akapêr punuj to hkêt nẽ. ãm te Tirtũm kot mẽ panhĩpêx pyrak o mẽ hipêx nẽ mẽ ho mex pix o ri mẽ hkôt apa. Ja na Tirtũm kãm hprãm. ¹⁰ Kapêr ã kagà htũm kot ja jarẽnh kot:

Kot kaj mẽ amã amex nẽ akĩnh nẽ ri apa hprãm hã kot kaj mẽ ã amnhĩ nhĩpêx anẽ:

Kot kaj mẽ ri akapêr punuj o ri apa hkêt nẽ.

Nẽ mẽmoj tã amnhĩ to axêx o ri apa hkêt nẽ.

¹¹ Nẽ te mẽ ate amnhĩ katut kôt ate amnhĩ tomnuj rẽnh o apa pyrã nẽ hpãnhã amnhĩ to mex pix o ri apa.

Nẽ mẽ amã tãm axpên nhĩpêx pix prãm o ri axpên kôt apa.

Nẽ mẽ amã ajamakêtkati nẽ axpên kôt apa hprãm rãhã ho ri apa.

¹² Na hte Tirtũmja ã mẽ kot amnhĩ nhĩpêx anhỹr o pa xwýnhjê jamãr mex rãhã ho pa.

Nhũm mẽ tanhmã amnhĩ to hwýr to nhũm mẽ mar kurê kumrẽx.

No mẽ kot amnhĩ tomnuj o mẽ pa xwýnhjaja na hte mẽ kutã amnhĩ xãm nẽ ãm mẽ omu nẽ mẽ ho mex kêt nẽ. Anẽ.

Tirtũm kapêr ã kagà htũm kot ã mẽ harẽnh kot anhỹr.

¹³ Nẽ kot kaj mẽ amã amnhĩ to mex pix o apa hprãm nhũm mẽhõ ja hã tanhmã mẽ atomnuj to hkêt nẽ. ¹⁴ No kot kaj mẽ amnhĩ to mex pix o apa htã nhũm mẽhõ ja hã apumu nẽ tanhmã hamaxpêr to nẽ atomnuj ka amnhĩ xà htýx kamã ajamak japêr. Tã koja Tirtũm nhỹrmã ja hã tanhmã mẽ ato mex to. Jakamã kwa kêr ka mẽ tee ri mẽhõ kot tanhmã mẽ atomnuj to hkukamã ajamaxpêr pê amã mẽ uma ho ri apa hkêt nẽ. Nẽ tee ri amnhĩ kukamã ajamaxpêr o akaprĩ nẽ ri apa hkêt nẽ. ¹⁵ ãm amnhĩ kaxyw Kris mã mãn ajamaxpêr týx rãhã nẽ mẽ panhõ Pahihti hã apijaãm rãhã ho ri apa. Nhũm mẽhõ ja hã mẽ apumu nẽ tanhmã hã mẽ akukjêr to nẽ mẽ amã:

—Kwa mẽmo kaxyw na ka pre Kris kôt amnhĩ xãm nẽ hkôt ri amnhĩ nhĩpêx o apa? Anẽ.

Ka mẽ ama hãmri nẽ aprĩ hã kãm amnhĩ jarẽnh kurê kumrẽx. ¹⁶ Nom kêr ka mẽ akapêr mã aprĩ kamã kãm amnhĩ jarẽ. Tirtũm kapêr kôt amnhĩ nhĩpêx o apa hã mẽ kãm amnhĩ jarẽ. Koja mẽ Kris ã mẽ ato kapêr punuj rý hã mẽ atã hpêr o axkê nẽ pikunhar japêr ka mẽ ãm amnhĩ tã mẽ ama nẽ ãm mẽ ama. Kwãr mẽ mãmrĩ ã mẽ anhĩpêx anẽ. Kêr ka mẽ amnhĩ tã mẽ omu nẽ arĩ amnhĩ to mex rãhã ho ri apa. Kêr kê mẽ tee ri amnhĩ tã mẽ apumu nẽ hpijaãm nẽ.

¹⁷ Nẽ koja mẽ akwýjaja mẽ ate Tirtũm kapêr kôt amnhĩ nhĩpêx mex o apa hã mẽ apumu nẽ hã tanhmã mẽ anhĩpêx to htã kêr ka mẽ arĩ Tirtũm kôt amnhĩ nhĩpêx o ri apa. Ja na

kām hprām. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nẽ pahihti mã mẽ ajarẽ nhũm kuma nẽ ja hã tanhmã mẽ amã àkjêr to ka mẽ ra apijaàm nẽ.

¹⁸ Nẽ Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwÿr nẽ nhÿrmã ma Tĩrtũm nhõ krĩ hwÿr paxàpir nẽ kamã pahtĩr tũm nẽ papa ho papa kaxyw. Mẽ kot hpĩr tã nhũm Tĩrtũm akupÿm ho htĩr nhũm htĩr o htĩr. ¹⁹⁻²⁰ Nom kormã akupÿm htĩr kêt ri na pre hkarõ pix o mẽ htyk xwÿnhjê hwÿr mō. Ahpunu kamã mẽ hkarõ kêp prês nẽ hkrĩ xwÿnhjê hwÿr mō nẽ mẽ kot Noehti kapêr mar nẽ hkôt amnhĩ nhĩpêx kêt nhũm gô htàm kot mẽ hanhir par xwÿnhjê mã kapêr. Tĩrtũm kot nhÿrmã mẽ kot amnhĩ tomnuj mÿrapê kuwy maati wÿr mẽ rênh ã mẽ hkukamã mẽ kãm awjarê. Amnepêm kormã Noehti kot pàr raxta nhĩpêx o kuhê ri na prem kãm Tĩrtũm kapêr mar prãm kêt nẽ. Nhũm amnhĩ tã mẽ omu nẽ mẽ kamã gryk tokyx anhÿr kêt nẽ. Arĩ amnhĩ tã mẽ hamãr o pa. Mẽ kot hkôt amnhĩ xunhwÿr nẽ hkôt amnhĩ nhĩpêx prãm xàj arĩ mẽ hamãr ry ho pa. No ãm tee ri mẽ hamãr kaprÿ nhũm mẽ amnhĩ kaxyw hkôt hamaxpêr kêt nẽ htÿx ri amnhĩ tomnuj o pa. Mẽ ãm grêre nẽ Noehti kapêr ma nẽ gô htàm pymaj hkôt pàr raxta wÿr agjê. ãm mẽ kêp 8 pix nẽ hwÿr agjê nhũm gô htàm mẽ hanhir kêt nẽ. Tĩrtũm na pre mẽ nẽ omunh mex nẽ. No mẽ kot amnhĩ tomnuj xwÿnhjaja nhũm gô htàmja mẽ hanhir o mẽ himex pa. Nhũm mẽ kêp 8ja pix arĩ htĩr nẽ mex nẽ pàr raxta kamã gô krãhkã hã mex rãhã pa.

²¹ Gô tàmja kêp hpri hã mẽ pahte Jejus kôt amnhĩ xunhwÿr ã mẽ pahto amnhĩrit xà na. Mẽ pahte amnhĩ nhĩpêx tũm kaga nẽ hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrit xà. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw kêt ra mẽ pahte Jejus kôt amnhĩ xunhwÿr ã amnhĩ to amnhĩrit kaxyw na htem mẽ pahkrã kumrã. Ra mẽ pahte Tĩrtũm kapêr kôt amnhĩ nhĩpêx o papa hã amnhĩ to amnhĩrit kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to amnhĩrit. Te mẽ pahte gôx kãm mẽ pahte amnhĩ tomnuj rer par pyrã nẽ hpãnhã amnhĩ nhĩpêx nyw o amnhĩ nhĩpêx o papa.

²² Nẽ na pre Jejus akupÿm htĩr nẽ ma akupÿm Tĩrtũm nhõ krĩ hwÿr api nẽ Tĩrtũm nhĩhkô hã pahihti hã mẽ hkrĩ xà kamã hkrĩ ho hkrĩ. Hãmri nẽ ra Tĩrtũm kapêr o mẽ wrÿk xwÿnh nẽ pahi piitã mẽ ho amnhĩptar o hkrĩ.

4

Mẽ pahte amnhĩ nhĩpêx nyw o amnhĩ nhĩpêx ã mẽ pamã karõ

Epes 4.17-24; Korosê 3.1-11

¹ Nẽ na prem Kris pĩ nhũm amnhĩ xà htÿx kãm hamak kãm htyk kaxyw tã arĩ mẽ kãm xa. Ra kot amnhĩ xà hkukamã amnhĩ tã mẽ omunh tã tee ri amnhĩ kukamã hamaxpêr o amnhĩ tã tanhmã ri mẽ kot hpĩr mã xwÿnhjê homnuj to hkêt nẽ. Arĩ mẽ kãm xa nhũm prem kupi. Tã kêt pu mẽ uràk nẽ ã amnhĩ nhĩpêx anhÿr o ri papa. Mẽ kot hã tanhmã mẽ panhĩpêx to htã pu mẽ uràk nẽ amnhĩ xà htÿx kãm pajamak tã tanhmã amnhĩ tã mẽ ho hkêt nẽ. Na hte ra mẽ htyk nẽ mẽ hikwÿ xwÿnhjaja axte amnhĩ tomnuj kêt nẽ. Tã kêt pu mẽ uràk nẽ axte tanhmã amnhĩ tomnuj to ho ri papa hkêt nẽ. ² Jakamã kêt pu mẽ axte mẽ pahte amnhĩ nhĩpêx tũm kôt amnhĩ nhĩpêx o papa hkêt nẽ. Nẽ mẽ pajamxpêr tũm kôt axte pajamxpêr o papa hkêt nẽ. ãm Tĩrtũm kãm hprãm xà hkôt pix mã tanhmã amnhĩ nhĩpêx to ho papa rãhã ty.

³ Amnepêm kormã mẽ pahte Jejus kôt amnhĩ xunhwÿr kêt ri na pu prem mẽ kêp Tĩrtũm kra hkêt xwÿnhjê hkôt amnhĩ nhĩpêx.

Jaο nhãm mēnijê pumu nẽ mẽ kamã pahpijaàm kêt hprãm.

Nẽ pahpipãnh o ri papa.

Nẽ mẽ pahpipãnh kaxyw axpēn wÿr akuprõ nẽ mēnijê kamã pahpijaàm kêt.

Nẽ sãnti hwÿr pahkõnkrã ho pahkrĩ nẽ kãm amnhĩ jagrer.

⁴ Tã Kris kôt amnhĩ xunhwÿ hãmri nẽ mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwÿnhjaja tee ri ja hã

mê pahpumu nê hêx rom amnhî kôt mê pamã tanhmã ri àhkrox to ho pa. Pu mê axte mê hkôt amnhî nhîpêx kêt nhũm mê tee ri ja hã mê pahpumu nê mê pakamã gryk kato nê tanhmã mê pahto kapêr punuj to. ⁵ Tã koja Tirtũm nhỹrmã amnhî wỳr mê hã karõ nhũm mê ma hwỳr mra nê kutã hkrĩ. Nê kormã mê htĩr ri tanhmã mê kot amnhî nhîpêx to ho pa hã kãm amnhî jarênh pa. Hãmri nhũm mê kot amnhî nhîpêx ã tanhmã mê hipêx to. Koja mê pahpiitã tanhmã mê pajarênh to. Mê htyk xwỳnhjaja nê kormã mê pahpũr nê mê papa xwỳnhjaja nhũm mê pahpiitã tanhmã mê pajarênh to.

⁶ Na pre Jejus ty hãmri nê kormã akupỹm htĩr kêt rãhã hkarõ pix o ma amex wỳr tẽ nê kamã mê htĩr ri amnhî kaxyw Tirtũm mã hamaxpêr xwỳnhjê mã awjarẽ. Na prem mê kot amnhî tomnuj mỳrapê ra wej nê ty nê arĩ amex kãm ri pa. Jakamã nhũm Jejusja hkarõ ho ma mê hwỳr tẽ nê mê kãm:

—E na pa ra mê ate amnhî tomnuj pãnhã amnhĩrer pa. Tã kormã mê atĩr ri mê ate amnhî kaxyw Tirtũm kôt ajamaxpêr jakamã kot kaj mê ma hwỳr api nê wa ixkuri wa ixpyrà nê atĩr tũm nê amex nê apa ho apa. Anẽ.

Mê pahpê Kris kwỳ hã tanhmã mê pahte axpên nhîpêx to hã mê pamã karõ Rômãn 12.6-8; Wam Korĩt 12.1-11

⁷ Nê koja tokyx mê panhõ pikaja mê pahpê hapêx nê kamã mẽmoj piitã hapêx pa. Jakamã kwa kêr ka mê ate amnhî nhîpêx ã amnhî pumunh mex o apa.

Nê mê atỳx ri ajamaxpêr ri apa hkêt nê.

Nê mẽmoj punuj nê amnhî to htỳx o ri apa ho ajamaxpêr nyw pix o amnhî to Tirtũm wỳr rãhã ho ri apa.

⁸ Nê kwa kêr ka mê amã axpên kĩnh o ri axpên kôt apa. Ja na mex o mex. Kot kaj mê ã axpên nhîpêx anê nhũm Kris kôt atõ rỳ atõxjê hõ tanhmã atomnuj to japêr ka amnhî tã omu nê ãm omu. Amã hkĩnh o ãm amnhî tã omu. Jao axte kot tanhmã atoja mã ajamaxpêr kêt nê.

⁹ Nê kêr ka mê axãmnhĩx ajamakêtkati nê amnhî nhõrkwy hwy r axpên wỳ nê axpên to mex o ri apa. Nom kêr ka mê agryk kãm amnhî wỳr mê hwỳr kêt nê. ¹⁰ Na pre ra Tirtũm mê pahpê hkra hã ahpỹnhã tanhmã mê pamã mẽmoj tã karõ hto nê ã mê pahte amnhî nhîpêx anhỹr o papa kaxyw mê pahto mê paxihtỳx. Mê pahte ahpỹnhã tanhmã axpên to mex to ho ri axpên kôt papa kaxyw. Tã kêr ka mê ra kot mẽmoj tã mê amã karõ hkôt axpên nhîpêx o ri axpên kôt apa. ¹¹ Koja ma mê ate akwỳjê mã kapêr jarênh o ri apa kaxyw mê amã karõ ka mê ama nê akatãt kôt ỹ hã mê kãm harênh mex o ri mê hkôt apa. Rỳ tanhmã axpên to ajuta hto ho ri apa kaxyw mê axunhwỳr japêr ka mê amnhî tã omu nê hkamnãr rom mê ho ajuta mex rãhã ho ri apa. Mê apiitã Jejus nhỹ hã ã amnhî nhîpêx anhỹr o ri apa. Kêr kê Jejus kôt mê akwỳjaja amnhî tã mê apumu nê mê anhỹ hã Tirtũm mã mex o mex ã harẽ.

Jejus kwỳjaja kot amnhî xã htỳx kamã hamak o pa hã mê harênh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

¹² E Kris kôt ixkrãmnhwỳjaja. Koja Kris kwỳ kêt xwỳnhjaja Kris ã tanhmã mê anhîpêx to nom kwa kêr ka mê tee ri amnhî kukamã ajamaxpêr o akaprĩ nê apa hkêt nê. Kêt mê akĩnh rãhã axpên kôt ri apa. Na htem ã mê pahpê Kris kwỳjê nhîpêx anhỹr o pa. Jakamã kwa mê amnhî tã mê omu nê tee ri amnhî kukamã ajamaxpêr kêt nê. ¹³ Mê arĩ akĩnh nê ri apa. Mê kot Kris pyrã nê mê panhîpêx punuj tãã. Kêr kê Jejus nhỹrmã akupỹn mê pahwỳr wrỳ pu mê omu nê pahkĩnh tỳx o pahkĩnh tỳx. ¹⁴ Kwãr mê mãmri mẽ pahpê Kris kwỳ hã tanhmã mê panhîpêx to. Na htem ã Tirtũm Karõ kot mê pahkarõ mã gjêx xwỳnhjê nhîpêx o pa anẽ.

¹⁵ Nê mê apê Kris kwỳ jakamã kwa kêr ka mê amnhî to mex rãhã o ri apa.

Jao mê hpar o ri apa hkêt nê.

Nê ri axãhkĩnh o ri apa hkêt nê.

Nê nhãm mê hkaêx mã agjêx o ri apa hkêt nê.

Nê tanhmã mê homnuj to ho ri apa hkêt nê.

Kot kaj mẽ ã amnhĩ nhĩpêx anhỹr o ri apa nhũm mẽ anhõ pahihiti ja hã tanhmã mẽ ato ka mẽ amnhĩ kamã apijaàm tỳx nẽ. ¹⁶ Nom koja mẽ apê Kris kwỳ hã tanhmã mẽ anhĩpêx to ka mẽ ja hã amnhĩ tã mẽ omu nẽ amnhĩ kamã apijaàm kêt nẽ. ãm Tĩrtũm pix mã amnhĩ jarẽ nẽ kãm:

—Pa Tĩrtũm. Ixpê akra Kris kwỳ hã na mẽ ã ixtomnuj anẽ. Nom ixpê akra jakamã kwār mẽ mãmri tanhmã inhĩpêx to. Amex o amex o ate ixto akra jakamã kwār mẽ mãmri ã inhĩpêx anhỹr o pa. Anẽ.

¹⁷ Nẽ koja Tĩrtũm tokyx mẽ pahpiitã tanhmã mẽ pahte amnhĩ nhĩpêx to hã mẽ pahpumu nẽ tanhmã mẽ panhĩpêx to. Mẽ pahpê hkrajaja koja tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nẽ hpãnhã mẽ kêp hkra hkêt xwỳnhjê ho hapu nẽ tanhmã mẽ hipêx to. Mẽ kot amnhĩ kaxyw hkôt hamaxpêr kêt jakamã nhũm mẽ pahkĩnhã tanhmã mẽ homnuj tỳx to. ¹⁸ Kapêr ã kagà htũm kot ja hã mẽ pajarênh kot: Mẽ kot Tĩrtũm kapêr kôt amnhĩ to mex xwỳnhjaja na htem àmnhix amnhĩ xà htỳx kamã hamak o pa kamã ty nhũm Tĩrtũm ma õ krĩ hwỳr amnhĩ wỳr mẽ ho àpir kurê kumrêx.

Nom mẽ kot amnhĩ tomnuj xwỳnhjaja koja mẽ hkĩnhã amnhĩ xà htỳx kamã hamak rãhã nẽ pa ho pa nẽ aa mex kêt nẽ. Anẽ.

¹⁹ Tã koja Tĩrtũm kãm ja prãm japêr kwār mẽ mãmri Kris ã tanhmã mẽ pahtomnuj to. Nom kêr pu mẽ Tĩrtũm kamnàr rom amnhĩ to mex pix o ri papa. Kêp mẽ panhĩpêx xwỳnh maati jakamã ra kot amnhĩ jarênh xà hkôt koja tanhmã ri mẽ pamã amnhĩ nhĩpêx to ho pa.

5

Tĩrtũm krajaja kot tanhmã amnhĩ nhĩpêx to hã mẽ kãm karõ *Atre 20.28-31*

¹ E kot paj hpãnhã mẽ apê Kris kwỳ hkrãhtũmjê mã ixkapêr ka mẽ inhma. Ijaxwỳja ixpê mẽ akrãhtũmjê hõ na pa. Na pa pre mẽ akurom Kris htyk kãm omu. Nom kot puj mẽ nhỹrmã pahpimràatã mex o mex ã omu nẽ urak nẽ mẽ pamex nẽ ri papa ho papa. ²⁻³ Jakamã e Kris kôt mẽ hkrãhtũmjaja kêr ka mẽ atar Kris kôt pahkwỳjê jamãr mex nẽ. Ra Tĩrtũm kot mẽ ate kãm hkwỳjê jamãr kaxyw mẽ axunhwỳr jakamã kêr ka mẽ omunh mex rãhã ho mẽ hkôt ri apa. Te ho ôwêhti jamãr xwỳnh kot ôwêhti jamãr mexta pyrãk. Te mẽ kêp Tĩrtũm krit ôwêhti nhũm mẽ ate kãm mẽ hamãr o apa xwỳnh pyrã nẽ kãm mẽ omunh mex rãhã ho ri mẽ hkôt apa. Nẽ akĩnh pê tanhmã ri mẽ ho ajuta hto ho ri mẽ hkôt apa. Ja na Tĩrtũm kãm hprãm. Nom kêr ka mẽ ano hkà karôt kãm mẽ ho ajuta hkêt nẽ. Rỳ kàxpore hprãm xaj mẽ kãm tanhmã amnhĩ nhĩpêx to hkêt nẽ. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nẽ kêr ka mẽ kãm mẽmoj tã karõ kamã axihtỳx kêt nẽ. Mẽ akapêr mã aprĩ kamã mẽ kãm mẽmoj jarẽ kê mẽ amnhĩ tã mẽ apumu nẽ mẽ apyrã nẽ ã axpên nhĩpêx anhỹr o pa.

⁴ E kêr ka mẽ ã Kris kôt mẽ akwỳjê jamãr mex pê mẽ hipêx o apa anẽ. Hãmri nhũm mẽ pajamãr xwỳnh maatija ja hã mẽ apumu nẽ nhỹrmã akupỳn mẽ pahwỳr wry nẽ mẽ ato mex rax nẽ.

⁵ Nẽ e mẽ amy xaptàr nywjaja. Kêr ka mẽ Kris kôt mẽ akrãhtũmjê kapêr ma nẽ mẽ hkôt ri amnhĩ nhĩpêx mex o ri apa.

Nẽ kwa kêr ka mẽ apiitã axpên nhĩpêx o te anhĩõ kot amnhĩ to rax o ajakrenh pyrãk. Tĩrtũm kapêr ã kagà htũm kot ja jarênh kot:

Mẽ kot amnhĩ to jarkrar o ri mẽ pa xwỳnhjaja na hte Tĩrtũm mẽ kutã amnhĩ xunhwỳ.

No mẽ kot amnhĩ to hkryre nẽ axpên tã hpijaàm o mẽ pa xwỳnhjaja na hte mẽ ho mex o pa.

⁶ Anhỹr ã mẽ harênh jakamã kwa kêr ka mẽ Tĩrtũm ã apijaàm rãhã ho ri apa ixkwỳjaja. Nẽ axpên mã ri amnhĩ to jarkrar o ri apa hkêt nẽ. Kêr kê Tĩrtũm xihitỳx xwỳnhja ja hã mẽ apumu hãmri nẽ nhỹrmã kot mẽ pahto mex xà hã arĩgroja kato nhũm mẽ ate amnhĩ to mex xwỳnh ã mẽ ajarẽ nẽ mẽ ato mex rax nẽ.

⁷ Nê kêr ka mẽ tee ri amnhĩ kukamã ajamaxpêr pê akaprĩ ho ri apa hkêt nê. ãm te mẽ ate Tĩrtũm mã akaprĩ nhõr pyræk o amnhĩ nhĩpêx nê axàmnhĩx akĩnh nê akaprĩ hkêt nê apa. Tĩrtũm kêp mẽ pajamãr xwýnh maati kênã kot ka kêt mẽ ri akaprĩ nê ri apa.

⁸ Nê kwa mẽ okora. Kêr ka mẽ amnhĩ nê kot mẽ pakutã amnhĩ xunhwýr xwýnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrar pyræk o mẽ panhĩpêx. Jao mẽ pahte Kris kaga hprãm xàj apkati mẽ tanhmã nê mẽ pahto ho ri mẽ pahkõt pa. ⁹ Na hte ã pika piitã hkõt Kris kõt mẽ pahtõ nê mẽ pahtõxjê nhĩpêx anhýr o pa nhũm mẽ pahpyrà nê amnhĩ xà htýx kamã hamak o pa pê omnuj nê pa. Jakamã kwa kêr ka mẽ Kris kõt amnhĩ xunhwýr týx nê kutã amnhĩ to htýx rãhã ho ri apa. ¹⁰ Tĩrtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nê nhýrmã mẽ pahte kuri tãm amnhĩ nhĩpêx o papa mã xwýnh ã mẽ pajarê. Kris kukwak ri ã mẽ pajarênh anhýr jakamã mẽ ate jar Kris ã apunuj nê ri apa htã kot kaj mẽ kritpêm ã amnhĩ nhĩpêx anhýr ry hkêt nê. Kojã Tĩrtũm mẽ akrã kamã mẽ ajamaxpêr xihtýx jagjê ka mẽ akupým amex nê axihtýx pê ate amnhĩ nhĩpêx nyw o amnhĩ nhĩpêx rãhã ho ri apa.

¹¹ Tĩrtũmja hihtýx o hihtýx nê àhpumunh o àhpumunh. Nê hihtýx xà nê àhpumunh xà kojã aa kêp hirerek nê hapêx kêt kumrêx. ãm hãmri na mẽ kot harênh kot anhýrja.

Pêtre kapêr jatur xà

¹² Nê ota Kris kõt mẽ pahtõ Sirastija na inhmã mẽ akaxyw kagàja nhĩpêx pa mẽ awýr mẽnh kaxyw. Na pa hte kãm ixkapêr nhũm inhma nê inhmã hã kagà. Na hte Kris kapêr kõt amnhĩ nhĩpêx rãhã ho ri pa. Tã inhmã kagàja nhĩpêx. Mẽ ate kamã harênh nê mar nê tãm ajamaxpêr kaxyw. Nê Tĩrtũm kãm mẽ ajapê nê kot mẽmoj to mẽ akutã nojarêt ã mẽ ate kamã harênh kaxyw. Tã kêr ka mẽ kãm mẽ ajapê hã amnhĩ tã harênh ma nê kapêr kõt pix mã amnhĩ nhĩpêx mex rãhã ho ri apa. Mẽ akwýjaja kot tanhmã hã mẽ ato htãã.

¹³ Nê ota jar Papirõn kamã Kris kõt mẽ pahtõ nê mẽ pahtõxjaja mẽ awýr hpêr mẽ. Tĩrtũm kot mẽ pahpyrà nê mẽ ho hkra jakamã mẽ kêp mẽ atõ nê mẽ atõx ã mẽ awýr hpêr mẽ. Nê Xiakre mããnên mẽ awýr hpêr mẽ. Te kêp ixkra pyræk.

¹⁴ Nê kêr ka mẽ nhýri apê Kris kwý hã axpên pumu nê mẽ axpên to atõ nê atõx ã axpên mã akapêr mex kurê kumrêx.

E kê Tĩrtũm mẽ apê Kris kwý hã mẽ amã mẽ ajamakêtkati nê mẽ apa xà gõ ka mẽ axàmnhĩx ajamakêtkati nê amex nê ri apa ho apa.

Tã ãm ja pix. Ixpê Simãw Pêtre na pa ã mẽ awýr kagà nê mẽnh anê.

Sikūn Pêtre

Simāw Pêtre kot Jejus kôt hkwyjê hwÿr wam kagà nê mēnh kôt hō mēnh

Simāw Pêtre na pre kagàja nhîpêx. Jejus nhÿ hā hkrajê jahkre ho mē pa xwÿnhjê hō na pre. Mē kēp Jejus kra hkêt xwÿnhjaja ra kot Jejus ā hpîr kaxyw nhūm pre kagàja nhîpêx nê krî piitā hkôt Jejus kwÿjê hwÿr kurē nê kamā hprî hā mē kām mēmoj tā karō. Mē kot arî Tîrtūm kot amnhî nhîpêx kôt amnhî nhîpêx rāhā ho pa hā mē kām karō. Nê hamaxpēr o mē hamaxpēr rāhā ho pa hā mē kām karō.

Nê mē hkwy kot Tîrtūm kôt amnhî nhîpêx ā amnhî jarēnh tā hkôt amnhî nhîpêx kêt xwÿnhjaja nhūm pre tanhmā mē harēnh to. Ā na pre mē kām mēmoj jarēnh nê hā kagà nê krî piitā hkôt mē hwÿr rēnh anē. Nê mē kām:

¹ Pa Kris kôt ixtō nê ixtōxjaja. Xà mē amex? Ot pa mē awÿr kagà nhîpêx nê krî piitā hkôt mē awÿr kurē. Ixpê Simāw Pêtre na pa wam ixte kagà nhîpêx nê mē awÿr mēnh tā axte hō nhîpêx. Ixte Jejus Kris nhÿ hā mē ajahkre ho ixpa xwÿnh ā mē amā hipêx nê kumē. Na pa hte Jejus mā amnhî nhîpêx mex o ri ixpa.

Nê mē papytār xwÿnh Jejus Krisja Tîrtūm pyrā nê mex o mex. Nê wa kot amnhî nhîpêxja mex o mex. Jakamā na pre wa tanhmā mē pahkrā hto pu mē amnhî kaxyw wa hkôt pajamaxpēr tÿx rāhā ho ri papa. Na ka htem ixpyrā nê ā amnhî nhîpêx anē. Tā pa mē amā kagàja nhîpêx.

² Nà Tîrtūm mē mē panhō Pahihti Jejus wa kot amnhî nhîpêxja na ka mē ra harēnh mar tÿx nê. Wa kot tanhmā amnhî nhîpêx to nê tanhmā wa hamaxpēr toja ka mē mar tÿx nê wa hkôt pix mā amnhî nhîpêx. Tā kêt ka mē arî ā amnhî nhîpêx anhÿr rāhā ho ri apa. Jao axamnhîx ajamakêtkati nê akînh nê apa ho apa. Na pa hte ā mē ato Tîrtūm mē Pahihti Jejus Kris wa hwÿr o ri ixpa anē. Na hte Tîrtūm mē ato mex nê mē akutā nojarêt rāhā ho pa.

Tîrtūm kot mē pahto mex o pa hā harēnh

Epes 2.12-13; Wam Tesarôn 1.2-4; Sikūn Pêtre 3.18

³ Nê Tîrtūmja àhpumunh tÿx o àhpumunh tÿx jakamā na pu htem hkôt amnhî xunhwÿ nhūm amnhî tā mē pahpumu nê mē pamā àhpumunh tÿx xà hkwy gō. Hāmri pu mē ra urāk nê amnhî to mex nê tām amnhî nhîpêx o ri papa. Tā kot puj mē nhÿrmā ma ō krî hwÿr api. ⁴ Na pre mē pakukamā amnhî jarēnh o:

—Kot paj nhÿrmā ixkrajê mā ixte amnhî nhîpêx mex kwÿ gō nhūm mē inhÿ hā ho tām ri amnhî nhîpêx mex o pa. Nê ixpyrā nê hamaxpēr mex o pa.

Anhÿr jao te ra mē pamā hkînh xà mex kwÿ nhōr pyrāk o mē panhîpêx. Nê te ra kot mē pahkrām hamaxpēr mex jagjēnh nê mē pamā kot amnhî nhîpêx mex jagjēnh pyrāk. Mēmo kaxyw na pre ā mē panhîpêx mex anē? Nà urāk nê tām mē pahte amnhî nhîpêx mex rāhā o ri papa kaxyw. Jao mē pahte mē kēp hkwy hkêt xwÿnhjê hkôt amnhî nhîpêx kêt nê. Nê mē hamaxpēr punuj o pajamaxpēr kêt nê. Nê hpānhā mē pahte Tîrtūm kôt pix mā amnhî nhîpêx rāhā ho papa. Ā mē pahte amnhî nhîpêx anhÿrja na mex o mex.

⁵ Tā ā Tîrtūm kot mē panhîpêx mex anhÿr jakamā kwa kêt ka mē kapēr mar tÿx nê hkôt pix mā amnhî nhîpêx mex o ri apa. Jao amnhî kaxyw hkôt ajamaxpēr rāhā nê. Kot kaj mē ā amā amnhî nhîpêx anhÿr o apa hprām hā kot kaj mē määnēn amā tām amnhî nhîpêx o apa hprām. Nê mē amā Tîrtūm kapēr piitā mar prām o ri apa. ⁶ Hāmri nê piitā mar pa nê mēmoj punuj piitā nê amnhî to htÿx nê. Nhūm mē kēp Kris kwÿ hkêt xwÿnhjaja Kris ā tanhmā mē anhîpêx to htā ka mē ām amnhî tā mē omu nê mē umaj mē amā Kris kaga hprām kêt nê.

Nê mē amā Tîrtūm mā amnhî jarēnh rāhā ho apa hprām.

Nê mē amā kapēr mar rāhā ho apa hprām.

⁷ Nê mẽ amã Kris kôt mẽ atõ nê mẽ atõxjê ho mex pix o ri apa hprãm. Jao te mẽ amã amnhĩ tã ma pyræk o mẽ piitã mẽ hipêx o ri mẽ hkôt apa.

⁸ E kêr ka mẽ ã amnhĩ nhĩpêx anhÿr o ri apa. Kot ka mẽ ã amnhĩ nhĩpêx anê nê mẽ panhõ Pahihti Jejus Kris kôt amnhĩ nhĩpêx mex o mõ. Hãmri nhũm mẽ akwÿjaja mẽ apumu nê mẽ apê Kris kwÿ hã mẽ ajarênh kurê kumrêx. ⁹ No kot ka mẽ atõ ixkapêr mar tã hkôt amnhĩ nhĩpêx kêt nê hãmri te Tĩrtũm kot anê ate amnhĩ tomnuj rênh par mã ajamxpêr kêt pyræk. ¹⁰⁻¹¹ No na ka htem ã amnhĩ nhĩpêx anhÿr kêt nê. Ra mẽ ate Pahihti Jejus Kris kôt amnhĩ nhĩpêx mex jakamã na htem ja hã mẽ apumu nê Tĩrtũm kot mẽ ato hkra hã mẽ ajarênh kurê kumrêx. Kot kaj mẽ ã hkôt amnhĩ nhĩpêx anhÿr o apa nê mẽmo arĩgro hã apunuj nê apa htã Jejus kaga hkêt nê. Hãmri nê nhÿrmã ma Tĩrtũm nhõ krĩ hwÿr api nhũm mẽ apumu nê mẽ ato mex rax nê. Hãmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nê amex nê apa ho apa.

¹² Nê na ka mẽ ra Tĩrtũm kot amnhĩ nhĩpêx mar tÿx nê amnhĩ krã kamã kot amnhĩ nhĩpêx mã ajamxpêr tÿx o ri apa. Tã nom kot paj arĩ mẽ amã ja jarênh rãhã ho ri ixpa. ¹³ Kormã ixtĩr ri kot paj xatã mẽ amã harênh o amnhĩrĩt. Ja na kêt inhmã hprãm. Mẽ ate nhÿrmã tanhmã ri ajamxpêr to nê hkaga pumaj. ¹⁴ Na pre mẽ panhõ Pahihti Jejus Krisja inhmã tokyx ixtyk ã ijarê. Kot paj xep kritpêr ri ixtĩr nê ixpa hkêt nê. ¹⁵ Jakamã na pa kormã ixtĩr ri ã mẽ amã kagã nhĩpêx anê. Mẽ ate inhmÿr pê arĩ omunh nê kamã harênh nê Tĩrtũm kot amnhĩ nhĩpêx mã ajamxpêr tÿx rãhã ho ri apa kaxyw.

Pêtre kot no ho Jejus pumunh ã amnhĩ jarênh

Matêwre 17.1-5; Makre 9.1-8; Sikūn Ximotre 3.16-17

¹⁶ Nê na pa pre ra tanhmã mẽ amã mẽ panhõ Pahihti Jejus Krisja jarênh to. Hihtÿx o hihtÿx ã harê nê àhpumunh tÿx o àhpumunh tÿx ã harê. Nê nhÿrmã akupÿn mẽ pahwÿr wrÿk ã harê. No na pa pre amnhĩ krã hkôt ã harênh anhÿr kêt nê. Na pa pre inhno ho Jejus hihtÿx o hihtÿx ã omunh o hkôt ixpa nê ixte omunh xà hkôt ã mẽ amã harênh anê. ¹⁷⁻¹⁸ Amnepê mã kormã ixkwÿjê mẽ mẽ ixte arĩ hkôt ixpa ri pa prem hkôt hixêt prêk nhĩmõk wÿr api. Pa nê kaxyw Xiakre nê Juãw mẽ pa mẽ hkôt ixpimràatã hixêt ã api nê himõk ã ixkuhê. Hãmri nhũm Tĩrtũm tanhmã Jejus to nhũm hirã htÿx kãm xa. Hãmri nhũm Měpahpãm Tĩrtũmja mẽ inhmã kapêr. Kaxkwa kamã hirã htÿx rax rũm mẽ inhmã kapêr o:

—E ota Ixkrata xa. Inhmã hapê ho inhmã hapê. Anê.

Tã ra ixte mar xà hkôt pa amnhĩ xõ ri mẽ amã harê nê hã kagã. ¹⁹ Na pa prem ã hixêt prêk nhĩmõk ã Jejus pumunh nê Tĩrtũm kot tanhmã harênh to hã mar anê. Hãmri nê ijamxpêr o:

—Nà ãm hãmri na pre amnepêr Tĩrtũm nhÿ hã kapêr jarênh o mẽ pa xwÿnhjaja Jejus kukamã ã harênh anhÿr o pa. Anê.

Mẽ kot tanhmã Jejus kukamã harênh toja te kot kamàt kô kamã kanê hpòk nhĩrã hkryre pyræk. Tã koja nhÿrmã akupÿn wrÿ hãmri nê te myt kator nê hirã mex nhũm mẽ pahte mẽmoj pumunh mex pyræk. Jakamã kwa kêr pu mẽ kot tanhmã Jejus kukamã harênh toja mar tÿx rãhã nhũm nhÿrmã te myt kator pyrã nê akupÿn mẽ pahwÿr wrÿ. ²⁰ Tĩrtũm kapêr ã kagã htũm kot tanhmã ÿ hã kapêr jarênh xwÿnhjê jarênh to. Mẽ kot mẽmoj kukamã ujarênh ã mẽ harê. Nê Jejus kukamã tanhmã ujarênh to hã mẽ harê. ã mẽ kot mẽmoj kukamã harênh kot anhÿr. Nom na pu htem amnhĩ krã hkôt ã mẽ ujarênh anhÿrja mar tÿx kêt nê. Koja Tĩrtũm Karõ hprĩ hã mẽ pamã ho amnhĩrĩt pu mẽ rĩ kormã pahprĩ hã mar tÿx nê. ²¹ Na pre ÿ hã kapêr jarênh o mẽ pa xwÿnhjaja amnhĩ krã hkôt hkwÿjê mã ujarênh o pa hkêt nê. Tĩrtũm Karõ na pre tanhmã mẽ hkrã hto nhũm mẽ ÿ hã hkwÿjê mã tanhmã harênh to ho pa nê ÿ hã mẽ pamã hã kagã.

2

Tĩrtũm kapêr jarênh o hêx xwÿnhjê jarênh

Korosẽ 2.16-17; Wam Ximotre 4.1-5; Sikūn Ximotre 3.1-9; Jutre 3-16

¹ Nê amnepê m na pre Ijaew kwỳjaja te mễ kêp Tĩrtũm nhỹ hã kapêr jarênh xwỳnh pyràk. Nom Tĩrtũm kapêr kwỳm ri hkwỳjê mả tanhmã ho hêx to ho pa. Tã koja nhỹrmã mễmojaja mễ uràk nê mễ awỳr mra nê ã mễ amã Tĩrtũm kapêr o hêx o pa anê. Nê kapêr kwỳm ri tanhmã mễ ajahkre hto ho mễ amã hêx o mễ akôt pa. Mễ ate mễ mar nê amnhĩ nhĩpêx nyw kaga nê hpãnhã mễ kot amnhĩ tomnuj kôt apa hprãm xàj nhũm mễ hêx rom tanhmã mễ ajahkre hto ho pa. Pahihti Jejus kot mễ nê htyk tã nhũm mễ hkôt amnhĩ nhĩpêx kêt nê axtem nê ri kapêr o hêx o pa. Mỳrapê koja Tĩrtũm tokyx mễ kot amnhĩ xà htyx kamã hamak tũm xà hwỳr mễ rênh pa.

² Koja mễ ohtô nê mễ kapêr ma nê kãm mễ mar prãm nê. Nê mễ hkôt hamaxpêr nê mễ hkôt amnhĩ nhĩpêx o pa. Jao ra hpijaàm kêt nê mễ hkôt htyx ri tanhmã amnhĩ tomnuj to ho ri pa. Tã ã mễ kot Tĩrtũm kapêr o mễ hêx xwỳnhjê mar nê mễ hkôt amnhĩ nhĩpêx anhỹr jakamã koja mễ kãm Tĩrtũm kapêr mar prãm xwỳnhjaja mễ kot amnhĩ nhĩpêx ã mễ omu nê Tĩrtũm kapêrja mex kêt ã harênh japêr. ³ Tĩrtũm kapêr o mễ hêx o mễ pa xwỳnhjaja na htem kàxpore pix prãm xàj mễ awỳr mra nê tanhmã mễ amã kapêr jarênh o hêx to ho pa nhũm Tĩrtũm ja hã mễ omunh rãhã ho hkrĩ. Na hte nhỹhỹm mrrar kêt nê rỳ htyx ôt o hikwỹ hkêt nê. Na hte arĩ mễ kot amnhĩ nhĩpêx ã mễ omunh rãhã ho hkrĩ. Tã koja nhỹrmã ma mễ kot amnhĩ xà htyx kamã hamak tũm xàta hwỳr mễ kurê nhũm mễ ma hwỳr hapêx pa.

⁴ Nê amnepê mả kaxkwa kamã Tĩrtũm kapêr o mễ wryk xwỳnh kwỳjaja na prem axtem nê Tĩrtũm kapêr nhĩrôp kuhê nhũm tee ri amnhĩ tã mễ omu hãmri nê amnhĩ nê mễ kator pa. Mễ kamã ukaprĩ hkêt nê amnhĩ nê mễ kator pa hãmri nê mễ kot amnhĩ xà htyx kamã hamak tũm xàta wỳr mễ hano. Nhũm prem ma hwỳr pa nê ahkre xupỳm kãm kamàt kô kamã arĩ hkrĩ ho hkrĩ. Tĩrtũm kot mễ piitã tanhmã mễ harênh to xà hã arĩgroja jamãr o hkrĩ. Nê tee ri kãm hapôx prãm kaprỳ ho hkrĩ.

⁵ Nê amnepê m pika kamã ri mễ pa xwỳnhjaja na prem haxwỳja piitã amnhĩ tomnuj pix o ri pa. Jakamã nhũm Tĩrtũm ja hã mễ omu nê mễ kamã ukaprĩ hkêt nê. Nê mễ hwỳr na rax mễ. Mễ kãm kapêr mar prãm kêt jakamã nhũm mễ hwỳr kumê nhũm wryk rax kumrêx nê mễ hanhir pa nê mễ himex. ãm Noehti mễ hkwỳ pê 7 pixjaja nhũm mễ kurom htĩr nê hkà hkĩnh nê mex nê pa. Noehti kormã na xwỳj ri kot mễ kãm Tĩrtũm kapêr jarênh o ri mễ hkôt pa htã nhũm mễ kuma nê ãm kuma. Mỳrapê na prem piitã pikaprãr pa.

⁶ Nê Sotô mễ Gomo wa kamã mễ pa xwỳnhjaja haxwỳja na prem amnhĩ tomnuj tỳx kumrêx o pa nhũm Tĩrtũm wamtajê pyrà nê mễ kamã ukaprĩ hkêt nê. Na pre kaxkwa rũm mễ hipy mễmo hpôk kwỳ rê nê ho mễ ho hapêx pa. Tã mễmo kaxyw na pre ã mễ hipêx anê? Nà mễ piitã mễ kot mễ harênh mar nê hamaxpêr o:

—Na hte ã Tĩrtũm mễ kot amnhĩ tomnuj xwỳnhjê nhĩpêx anê.

Anhỹr o hamaxpêr kaxyw na pre ã mễ hipêx anê. ⁷⁻⁸ Nom Rohtija na pre Tĩrtũm Sotô nê kator jakamã nhũm htyk kêt nê. Na pre hkwỳjê rom tãm amnhĩ nhĩpêx tã mễ kot amnhĩ tomnuj tỳx xwỳnhjê nhõ krĩ kamã ôrkwỹ nê ri pa. Nê apkati mễ tee ri mễ kot amnhĩ nhĩpêx ã mễ omu nê mễ ÿ hã hkaprĩ nê tee ri mễ hkukamã hamaxpêr o pa. No nhũm mễ amnhĩ tomnuj ã amnhĩ pumunh nê tokyx tãm amnhĩ nhĩpêx kêt nê. Nê apkati mễ tanhmã amnhĩ tomnuj to nê kapêr punuj o pa nhũm Rohti tee ri mễ omu nê hkaprĩ htyx nê pa. ⁹ Tã nhũm Tĩrtũm mễ himex kaxyw nê mễ nê kator nê mễ himex pa. Na hte ã Tĩrtũm mễmoj punuj pê mễ kot amnhĩ kaxyw kãm hamaxpêr nê hkôt amnhĩ nhĩpêx xwỳnhjê pytàr anê. No mễ kot amnhĩ tomnuj xwỳnhjaja na hte axtem mễ hipêx. Tã koja nhỹrmã mễ pahpiitã tanhmã mễ pajarênh to xà hã arĩgro kato nhũm ma mễ kot amnhĩ xà htyx kamã hamak tũm xà wỳr mễ rênh pa. ãm tapxipix kot ã mễ hipêx anhỹr kaxyw àhpumunh tỳx. ¹⁰ Tã mễ hpijaàm kêt kãm amnhĩ tomnuj o mễ pa xwỳnhjaja nê mễ kot Tĩrtũm kapêr mar nê ãm mar xwỳnhjaja koja nhỹrmã mễ homnuj tỳx nê.

Nê Tĩrtũm kapêr o hêx o ri mễ pa xwỳnhjaja na htem amnhĩ to jarkrar pix o pa. Nê Tĩrtũm kapêr o mễ wryk xwỳnhjê hã hpijaàm kêt nê. Nê axtem nê mễ ho kapêr punuj pê

tanhmã mẽ haprý hto ho pa. ¹¹ Tã nhũm htem amnhĩ tã mẽ kuma nẽ ãm mẽ kuma. Mẽ kurom mẽ hihtýx kumrêx tã no ãm amnhĩ tã Tĩrtũm mã tanhmã mẽ ho kapêr to hkêt nẽ.

¹² Nẽ mry xoprê na hte htýx ri pa ho pa. Tã Tĩrtũm kapêr o mẽ hêx o mẽ pa xwýnhjaja htem mry xoprêta pyrã nẽ htýx ri hamaxpêr mex kêt o pa. Jao hprĩ hã mẽmoj mar kêt tã htýx ri hijuk ri tanhmã mẽmoj jarênh to.

Nẽ mry xoprêja htýx pa nhũm mẽ kot hparja pyrã nẽ mẽ kot Tĩrtũm kapêr o hêx o mẽ pa xwýnhjaja koja Tĩrtũm nhýrmã kuwy hwýr mẽ ho hapêx nẽ kamã mẽ rênh pa.

¹³ Nẽ koja nhýrmã Tĩrtũm mẽ kot tanhmã mẽ ama hêx to ho pa hã mẽ omunh xã hkôt mẽ homnuj týx nẽ. Na htem hpijaàm kêt nẽ mẽ piitã mẽ noo mã tanhmã amnhĩ tomnuj to ho pa. Kamãt kãm nẽ arĩgro hã. Nẽ mẽ kãm tanhmã amnhĩ nhĩpêx to hprãm xã hkôt pix mã amnhĩ tomnuj o pa.

Na htem te mẽ kêp Kris kôt mẽ atôjê pyrã nẽ mẽ akôt Tĩrtũm kapêr mar xã hã ixkre hwýr agjê nẽ mẽ anhĩhkô hã mẽ kot Jejus tyk mã hamaxpêr kaxyw pãwti hkwý hku. Nom htýx hkur o hkrĩ nẽ htyk mã hamaxpêr kêt nẽ. Kãm Jejus kĩnh kêt tã hêx rom hpijaàm kêt kãm mẽ anhĩhkô hã htýx ri hkur o hkrĩ.

¹⁴ Nẽ nhýri krĩ hwýr pøj nẽ mênijê pumu nẽ kãm mẽ hkĩnh nẽ. Ra mẽ mjên ri pa htã nhũm mẽ kãm mẽ ho amnhĩkati hprãm nẽ mẽ kamã hpijaàm kêt o ri pa.

Nẽ kormã mẽ kot Kris kôt amnhĩ xunhwýr tohtuj anhýr xwýnhjê hwýr mra nẽ hêx rom tanhmã mẽ kãm kapêr to pê mẽ no kupyw o ri mẽ hkôt pa. Mẽ kot mẽ mar nẽ Kris kaga nẽ mẽ hkôt ri amnhĩ nhĩpêx prãm xaj ã mẽ hipêx anhýr o pa.

Na htem hikàxpore rũnh o pikuprõnh pix kukamã hamaxpêr o ra ho õxy nẽ.

Ã na htem amnhĩ nhĩpêx anhýr o pa. Tã ra Tĩrtũm kot mẽ homnuj týx kaxyw mẽ hã amnhĩ jarê. ¹⁵⁻¹⁶ Te mẽ kot kamãt kô kamã pry juk ã hpikunor nẽ htýx ri pa pyrãk o na htem amnhĩ nhĩpêx nẽ kãm Tĩrtũm kapêr mar prãm kêt nẽ amnhĩ tomnuj pix o pa.

Amnepêm Peo hkra Paraãwta kêp Tĩrtũm nhý hã kapêr jarênh o pa xwýnh tã axtem nẽ kàxpore rax prãm xaj tanhmã amnhĩ tomnuj to kaxyw. Nhũm Tĩrtũm tee ri ja hã omu nẽ Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nẽ tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nẽ ã amnhĩ nhĩpêx anhýr kêt nẽ. Tã mẽ kot Tĩrtũm kapêr o mẽ hêx ho mẽ pa xwýnhjaja na htem Paraãw pyrã nẽ kàxpore rax prãm xaj tanhmã amnhĩ tomnuj to pix prãm. ¹⁷ Te hino ra grã nhũm mẽ tee ri kamã gô japêr pyrãk o na htem amnhĩ nhĩpêx. Rý te kakrã hapôx nhũm mẽ kot omunh nẽ na wryk ã hkamnhĩx kaprý pyrãk. Tã ra Tĩrtũm mẽ kaxyw kamãt kô htýx pê mẽ kot amnhĩ xã htýx kamã hamak tũm xãta o mẽ nẽ. ¹⁸ Na htem htýx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mēhõ ra amnhĩ tomnuj kaga kaxyw nhũm mẽ tee ri ja hã omu nẽ kot ã amnhĩ nhĩpêx anhýr pymaj tanhmã nẽ kãm kapêr to nẽ mẽ kãm:

—Kwa ixte amnhĩ tomnuj o ixpa htã nhũm Tĩrtũm ja hã ixpumu nẽ ãm ixpumu nẽ arĩ inhmex ã ijarê. Na pa hte mẽ hkuprýjê hwýr mra nhũm ja hã ixpumu nẽ ãm ixpumu nẽ hã tanhmã ixto hkêt nẽ. Jakamã kwa mẽ ixpyrà nẽ arĩ ã amnhĩ nhĩpêx anhýr o ri apa. Koja Tĩrtũm tanhmã hã ato hkêt nẽ. Anẽ.

Hãmri nhũm mẽ tee ri kuma nẽ ra hamaxpêr kati nẽ. ¹⁹ Na htem mẽ kãm kapêr o:

—Kwa mẽ ixpyrà nẽ mãmri amã tanhmã amnhĩ tomnuj to hprãm xã hkôt amnhĩ nhĩpêx o ri apa. Mēhõ kot kêt ja nẽ tanhmã amã kapêr to? Anẽ.

Mẽ kot amnhĩ tomnuj xaja te kêp mẽ õ patrãw pyrãk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nẽ gaa nẽ axte. Nẽ gaa nẽ ra ho amnhĩ pyrãk. Hãmri nẽ tee ri pamã hkaga hprãm kaprý nhũm te kêp mẽ panhõ patrãw pyrãk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

²⁰ Nẽ koja mēhõ ra Tĩrtũm kapêr ma. Nẽ mẽ panhõ Pahihti Jejus Kris jarênhja nhũm hprĩ hã kuma. Kêp mẽ pahte amnhĩ tomnuj pê mẽ papytãr xwýnh ã harênh ma. Tã nhũm mẽ kot Tĩrtũm kapêr o mẽ hêx xwýnhjaja hwýr mra nẽ tanhmã kãm ho hêx to nhũm mẽ kuma nẽ kot amnhĩ nhĩpêx tũm o awjanã. Jao amnhĩ tomnuj týx o kormã kot Tĩrtũm

kapêr mar kêt ri kot amnhî tomnujta jakre. ²¹ Kêp ãm aa kot Tirtûm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mê kot ã mê kot amnhî nhîpêx anhÿr ã mê harênh kot:

Rop na hte ôjaîr nê akupÿm ôjaîrta ku.

Nê hagrô na htem unê nê hkumrã nhûm muxre. Tã nhûm mê kãm ure nhûm akupÿm hprôt nê mra nê akupÿm gyw o amnhî tomnu pa. Anê.

Tã mê kot Tirtûm kapêr o mê hêx xwÿnhjê mar nê mê hkôt amnhî nhîpêx xwÿnhjaja te mê kot rop mê hagrô wa kot amnhî nhîpêxta pyrã nê Tirtûm kapêr kaga nê akupÿm mê kot amnhî nhîpêx tûm o awjanã nê htÿx ri amnhî nhîpêx o pa.

3

*Tirtûm kot pika ho hapêx kaxyw kormã amnhî tã mê pajamãr ã harênh
Matêwre 24.29-31; Xiakre 5.7-11; Apokarip 19.11-16, 21.1-8*

¹ E Kris kôt ixkrãmnhwÿjaja. Na pa pre ra wam kagãta nhîpêx nê mê awÿr kurê. Tã ra axte hkôt ja nhîpêx. Hamê wa kamã na pa mê amã Tirtûm kot tanhmã amnhî nhîpêx to hã harê. Nê Jesus Kris nhÿrmã akupÿn mê pahwÿr wrÿk ã harê. Mê ate mar nê tãm amnhî nhîpêx nê tãm ajamxpêr o kutêp mê apa kaxyw.

² Amnepê mã Tirtûm nhÿ hã kapêr jarênh o ri mê pa xwÿnhjaja na prem Tirtûm kot nhÿrmã mê pahwÿr mēhō mēnh mã xwÿnhhta jarênh o pa. Kot nhÿrmã mê pahwÿr wrÿk nê mê pahto amnhîptar o pa hã harênh o pa. Tã kêr ka mê kapêr ma nê hã ano htÿx nê hkôt ajamxpêr tÿx rãhã ho ri apa. Nê Jesus kot mê awÿr mê rēnh xwÿnhjaja ka mê kapêr ma. Mê kot mê amã mēmoj jarênh o mê pa xwÿnhjaja na htem tanhmã mê amã Pahihti Kris jarênh to ho ri mê akôt pa. Nê tanhmã kot mê panê amnhî nhîpêx to hã harê. Tã kêr ka mê kapêr ma nê hã ano htÿx nê kãm ajamxpêr tÿx rãhã ho ri apa.

³ Nê kwa mê inhma. Nhÿrmã Kris akupÿn mê pahwÿr wrÿk xwÿj ri koja mê kot amnhî tomnuj tÿx xwÿnhjaja mê awÿr mra. Mê hpijaam kêt o pa xwÿnh jakamã koja mê tanhmã mê akamã amnhî tomnuj to ho pa. Nê mê apê Kris kwÿ hã mê apumu nê mê atã hpêr o pikênh o pa. ⁴ Nê htÿx ri Kris ã mê akukja nê mê amã:

—Kwa no Krisja? Amnepêm akupÿn wrÿk nê mēmoj piitã tanhmã hipêx to hã amnhî jarênh tã arî Tirtûm kot mēmoj to kator krax rûm mēmoj amarî rãhãã. Ra mê panhîgêtjaja pikaprãr par tã nhûm kormã akupÿn wrÿk kêt nê. Kot mê pamã amnhî to hêx kēnã. Mo kaxyw koja kêt akupÿn mê pahwÿr wrÿ? Kot mê pamã amnhî to hêx kēnã. Anê.

⁵⁻⁶ Nom ã mê kot harênh anhÿrja kot anhÿr kêt. Tirtûm kot mēmoj to kator krax rûm mēmoj amarî rãhã hã mê kot harênhja kot anhÿr kêt. Na pre Tirtûm kapêr pix o kaxkwa nê pika ho kato. Nhûm gô hkwÿja kapêr mar xã hkôt pika hã amnhî jahkre. Nhûm hpãnhã panhî nhîpêx. Tã no nhûm mê kapêr mar kêt kumrêx. Nê mê kot amnhî tomnuj tÿx mÿrapê na pre Tirtûm gô ho mê himex pa. Jao mê hwÿr na rax mê nhûm mê hanhir o mê ho hapêx. No nhûm mê kot Jesus wrÿk ã hpêr o pikênh xwÿnhhtaja kãm ã mê harênh anhÿrja mar prãm kêt. Ra mê kot mar tã kãm mar prãm kêt nê arî mēmoj piitã rãhã hã ri harênh o pa. ⁷ Pika nê kaxkwaja arî rãhã htã koja Tirtûm nhÿrmã mê pahpiitã mê pahte tanhmã amnhî nhîpêx to hã mê pahpumunh kôt tanhmã mê pajarênh to. Nê mê kot amnhî xã htÿx kamã hamak tûm xã hwÿr mê kot amnhî tomnuj xwÿnhjê rēnh pa. Hãmri nhûm rî kormã kaxkwa nê pikaja wa pôr nhûm himôk ã mēmoj piitã hkaxãr pa nê hapêx.

⁸ Nê amgrã pê 1.000ja mê pamã amgrã xohtô rax kumrêx no Tirtûm mã te arîgro pixire pyrãk. ⁹ Tã ra kot mê pamã tokyx Jesus akupÿn wrÿk ã harênh tã nhûm kormã wrÿk kêt jakamã nhûm htem tōhã tee ri hamãr o pa nê hamaxpêr o:

—Hêxta waa nê. Tirtûm kot tokyx akupÿn mê pahwÿr Jesus mēnh ã amnhî jarênh tã tokyx mēnh kêt nê.

Anhÿr o harênh tã no ãm kot anhÿr kêt. Na kormã amnhî tã mê kot amnhî tomnuj xwÿnhjê jamãr o pa. Mê kot amnhî tomnuj kaga nê hkôt amnhî xunhwÿr prãm xaj kormã

amnhĩ tã mẽ hamã. Kãm mẽ kot amnhĩ xà htỳx kamã hamak tũm xàta wỳr mẽhõ ho pixire nẽ mõi prãm kêt jakamã na kormã amnhĩ tã mẽ hamã. ¹⁰ Tã koja nhỹrmã mẽ panhõ Pahihtija akupỳn mẽ pahwỳr wrỳ. Te mẽ àhkĩnh xwỳnh kot amnhĩ nhĩpêx pyræk o mẽ pajaêr pẽ akupỳn wrỳ. Pu mẽ pahtỳx ri tanhmã paxàpênh to ho ri papa nẽ akupỳn wrỳk ã hkamnhĩx kêt rãhã nhũm mẽ pajaêr pẽ akupỳn wrỳ. Hãmri nẽ ma akupỳm amnhĩ kôt mẽ pahte hkôt amnhĩ xunhwỳr xwỳnhjê ho àpir par kurê kumrêx. Hãmri nhũm rĩ kormã kaxkwa kaxàr o hkrihkrit tỳx kãm hapêx pa. Nẽ kanhêti mẽ myt nẽ mytwrỳre kaxàr pa. Nẽ pikaja nẽ mãănẽn kamã mẽmoj piitã kaxàr pa. ¹¹⁻¹² Koja nhỹrmã ã mẽmoj hapêx par anẽ. Jakamã kwa kêr pu mẽ Jesus kutêp tãm ri amnhĩ nhĩpêx rãhã ho ri papa. Nẽ Tĩrtũm kapêr kôt pix mã amnhĩ nhĩpêx rãhã nẽ. Nẽ kãm hprãm xà hkôt tanhmã kãm amnhĩ nhĩpêx to ho ri papa. Kêr kêr Jesus akupỳn wrỳ nẽ ã mẽ pahte amnhĩ nhĩpêx anhỹr ã mẽ pahpumu. Koja wrỳ nhũm rĩ kormã kaxkwa nẽ pikaja wa kaxàr pa. Nhũm kuwy mỳri kaxkwa kamã mẽmoj harir xwỳnhja xêr nẽ ôr pa nẽ hapêx. ¹³ Tã kwãr mãmrĩ mẽmoj ã amnhĩ nhĩpêx anẽ. Koja Tĩrtũm axte mẽmoj mex nhĩpêx. Na pre amnhĩ kukamã ja jarênh o:

Kot paj axte pika nẽ kaxkwa hõ nhĩpêx nhũm mex o mex. Nhũm mẽ kot amnhĩ kaxyw Jesus mã hamaxpêr nẽ hkôt amnhĩ xunhwỳr nhũm ixte mẽ mex ã mẽ harênh xwỳnh pixjaja koja mẽ pika nywja kamã mex nẽ pa ho pa. Anẽ.

¹⁴ Jakamã kwa ixkrãmnhwỳjaja. Kêr ka mẽ Kris kutêp kapêr kôt amnhĩ nhĩpêx mex rãhã ho ri apa. Jao kutêp ajamakêtkati nẽ axãmnhĩx axpên kôt apa. Kêr ka mẽ nhỹrmã amnhĩ wỳr omu nẽ tee ri amnhĩ kukamã ajamaxpêr kêt nẽ. Ate tãm amnhĩ nhĩpêx o apa hã amnhĩ pumu nẽ akĩnh nẽ amnhĩ wỳr omunh o akuhê.

¹⁵ Nom arĩ Jesus kãm mẽ pahkwỳjê ho hkra hprãm jakamã na kormã amnhĩ tã mẽ hamã nẽ tokyx akupỳn wrỳk kêt nẽ. Na pre Jesus kôt mẽ pahtõ Pawre Tĩrtũm nhỹ hã ã mẽ pamã ja hã kagà anẽ. Pawreja ixkrãmnhwỳ mex na. ¹⁶ Na hte mẽ pakaxyw kagà nhĩpêx nẽ kamã mẽ pahte Jesus kutêp tãm amnhĩ nhĩpêx o papa hã mẽ pamã karõ. Na hte tõiã mẽmoj tã kagà pu mẽ kamã harẽ nẽ tee ri pahprĩ hã mar mã no ãm mar mex kêt nẽ. Hãmri nhũm Tĩrtũm kapêr o mẽ hêx o mẽ pa xwỳnhhtaja haxwỳja kuma hãmri nẽ amnhĩ krã hkôt hijuk ri tanhmã ho hêx to. Te mẽ kot hprĩ hã mar nẽ harênh pyræk nom hprĩ hã mar kêt nẽ. ã na htem Tĩrtũm kapêr ã kagà piitã ho hêx o pa anẽ. Mỳrapê koja mẽ nhỹrmã amnhĩ xà kamã hamak tỳx kumrêx.

¹⁷ Tã e Kris kôt ixkrãmnhwỳjaja. Ra mẽ ate mẽ harênh mar jakamã kwa mẽ okora. Mẽ amnhĩ nẽ mẽ omunh mex nẽ mẽ hkôt amnhĩ nhĩpêx kêt nẽ. Kot kaj mẽ anẽ nẽ Tĩrtũm kôt amnhĩ nhĩpêx mex kêt nẽ. ¹⁸ Na ka htem mẽ papytãr xwỳnh Pahihti Jesus Kris kôt ri amnhĩ nhĩpêx o apa. Tã kêr ka mẽ arĩ hkôt amnhĩ nhĩpêx mex rãhã ho ri apa. Nẽ hkôt amnhĩ xunhwỳr tỳx nẽ. Kêr kêr amnhĩ tã mẽ apumu nẽ mẽmoj to mẽ akutã nojarêr nẽ. Krisja mex o mex nẽ hihtỳx o hihtỳx. Tã kêr pu mẽ kãm mex o mex ã mãn harênh rãhã ho ri papa.

Tã ãm ja pix. Ixpê Simãw Pêtre na pa ã mẽ amã ja hã kagà nẽ mẽ awỳr mẽnh anẽ.

Wam Juãw

Juãw kot Jejus kôt hkwýjê hwýr kagà nê mênh

Juãw na pre kagàja nhîpêx. Na pre kagà hkwý nhîpêx rax nê. Na pre mãânên Juãw kot tanhmã Jejus kot amnhî nhîpêx to ho pa ã kagà nê Apokarip nê Sikün Juãw nê Hapuhã Juãw nhũm pre ja piitã Tirtüm nhỹ hã hã kagà.

Juãwja Jejus nhỹ hã hkrajê jahkre ho mē pa xwýnhjê hõ na pre. Nê kēp Xiakre htõ na pre. Tã ra hpigēt tỳx nê kagàja nhîpêx. Uràk nê mē kot Tirtüm kôt amnhî xunhwýr xwýnhjê mã hipêx. Mē kot kamã harēnh nê mar nê kãm axpēn kīnh o pa kaxyw. Nê mē kot amnhî tomnuj ã amnhî pumunh kôt tanhmã amnhî nhîpêx to hã mē kãm karõ nê hã kagà. ã na pre Juãw mē kãm mēmoj jarēnh nê hã kagà anê nê mē hwýr kumē. Nê mē kãm:

*Jejus kēp Tirtüm kapēr o amnhîrīt xwýnh ã harēnh
Juãw 1.1-4; Eprêw 1.1-4*

¹ Pa ixpyrà nê mē ate Jejus kôt amnhî xunhwýr xwýnhjaja? Xà mē amex? E ot pa mē amã kagàja nhîpêx nê mē awýr kumē. Ixte mē amã Tirtüm kapēr o amnhîrīt xwýnh jarēnh kaxyw. Amnepê mã kormã mēmoj amrakati ri nhũm pre ra rãhã ri pa ho pa. ãm kukwak ri pix mã na pu htem Tirtüm mē wa kuri pahtír tũm nê papa ho papa mã xwýnh. Tã ÿ hã mē ixte kapēr o mē ajahkre ho ri mē ixpa xwýnhjaja na pa prem ixpiitã kormã akupým kaxkwa hwýr àpir kēt ri inhno ho omunh o ri hkôt ixpa. Nê mē ijamak o kapēr mar o ri hkôt ixpa. Nê mē inhîhkra ho hkupēnh o ri hkôt ixpa. ² Na pre kaxkwa kamã Hipêêxà hkôt ri pa ho pa htã amnê pika hwýr mē pahwýr wrý. Hãmri nê jar mē pakamã kato pa pre mē ixkwýjaja omu. Tã mē ixte omunh xà hkôt na pa htem amnhî xõ ri tanhmã mē amã harēnh to. Kojã nhỹrmã akupým mē pahto mē pahtír pu mē kuri pahtír tũm nê pamex nê papa ho papa. ³ Na pa prem tanhmã kapēr to hã mar o ri hkôt ixpa. Nê kot tanhmã mē kãm amnhî nhîpêx to hã omunh o ri hkôt ixpa. Ta kagàja kamã amnhî xõ ri ixprĩ hã mē amã harē nê hã kagà. Mē ate ixpyrà nê aprĩ hã kot tanhmã amnhî nhîpêx to ho pa hã harēnh mar kaxyw. Jao mē pahpiitã te ixkre tipxi kamã mē papa pyràk o amnhî nhîpêx o papa nê axpēn kôt pajamaxpēr o ri papa. Jao Mēpanhîpêêxà Maati mē Kra Jejus Kris wa hkôt amnhî nhîpêx mex o ri papa. ⁴ Tã pa mē amã kagàja nhîpêx nê mē awýr kumē. Mē ate kamã harēnh nê mar hãmri nê mē ixpyrà nê ajamakêtkati nê akīnh nê ri apa kaxyw.

*Tirtüm mex o mex ã harēnh
Juãw 8.12; Epes 5.3-21; Wam Tesarõn 5.5; Eprêw 4.14-16, 9.11-14*

⁵ Nê Jejus kot tanhmã mē inhmã Tirtüm jarēnh toja kot paj amnhî xõ ri mē amã hã kagà. Nã Tirtüm kot amnhî nhîpêxja mex o mex. Aa kot tanhmã amnhî tomnuj to hkēt. Mex o mex jakamã na hte tanhmã mē kot amnhî tomnuj to mã amnhî jagiēnh kēt. ãm kot amnhî to mex o kot amnhî to mex rãhã nê pa ho pa xwýnh na. ⁶ Kot mē pahte amnhî tomnuj kēt ã mē pamã karõ jakamã kot puj mē pahpê hkra hã amnhî jarēnh tã amnhî tomnuj pix o ri papa nê ãm pahpê hkra hã amnhî jarēnh kaprý nê amnhî to paxêx. Tirtüm krajaja na htem amnhî tomnuj o pa hkēt nê. ⁷ Nom kot puj mē hkôt amnhî nhîpêx nê uràk nê tãm ri amnhî nhîpêx o papa. Nê kapēr kôt ri amnhî nhîpêx. Hãmri nê te ixkre tipxi kamã ri Tirtüm mē Kra Jejus Kris wa hkôt axpēn to papa pyràk o amnhî nhîpêx. Na pre Jejus mē panê ty nê hkamrô axkapĩ. Jao mē pahte hkôt amnhî xunhwýr xwýnhjaja mē panê mē pahte amnhî tomnuj piitã hpãnhã amnhîrer pa. Jakamã ãm kukwak ri pix mã na pu htem tãm amnhî nhîpêx o ri papa.

Mē pahpiitã mē pahte amnhî tomnuj xwýnh ã mē pajarēnh

⁸ Nê mẽ pahte tōhã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarê hãmri nê ã amnhĩ jarênh anhÿr o paxêx. Tĩrtũm kot mẽ pahpiitã mẽ pahte amnhĩ tomnuj ã mẽ pahpumunh xwÿnh kênã.

Mẽ pahte amnhĩ tomnuj nê tanhmã amnhĩ nhĩpêx to hã mẽ pamã karõ

Xiakre 4.9-10

⁹ Nê mẽ pahpê Tĩrtũm krajaja na pu htem tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ nê. Nê tokyx amnhĩ to Tĩrtũm wÿ. Hãmri nhũm mẽ pama nê Jejus kukwak ri tanhmã hã mẽ pahto hkêt nê. ãm amnhĩ katut kôt tanhmã mẽ pahte amnhĩ tomnuj tota rê nê axte kãm hamaxpêr kêt nê. Ra kot mẽ pahtã amnhĩ jarênh xà hkôt. Na hte Tĩrtũm amnhĩ jarênh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rênh par ã amnhĩ jarênh jakamã na pre ã mẽ panhĩpêx anê. Na hte mẽmoj tã tanhmã amnhĩ jarênh to hãmri nhũm apkati nhũm ihkjê ho kumê nê axtem tanhmã mẽmoj jarênh to hkêt nê. ¹⁰ Ra kot mẽ pahpiitã mẽ pahte amnhĩ tomnuj xwÿnh ã mẽ pajarênh jakamã kot puj mẽ pahtõ ã mẽ pajarênh anhÿrja ma nê hkôt pajamaxpêr kêt japêr. Rÿ kuma nê ãm kuma nê pajamaxpêr o:

—Nà ixte tanhmã amnhĩ tomnuj tore hã.

Anhÿr o amnhĩ jarê. Hãmri nê te ate Tĩrtũm hêx xwÿnh ã harênh pyræk. Jao amã kapêr mar prãm kêt ã amnhĩ to amnhĩrit.

2

Jejus kêp mẽ paxyr pê Tĩrtũm mã kapêr xwÿnh ã harênh

Wam Ximotre 2.5; Eprêw 9.11-14

¹⁻² E mẽ ate amnhĩ tomnuj o apa hkêt kaxyw na pa ã mẽ amã ixkapêr nê hã kagà anê. Mẽ ate kamã harênh nê mar hãmri nê tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nê te kêp mẽ paxyr pê Tĩrtũm mã kapêr xwÿnh pyræk o amnhĩ nhĩpêx. Mẽ pakurom aa kot amnhĩ tomnuj kêt jakamã na hte mẽ paxyr pê Tĩrtũm mã kapêr nhũm kuma. Hãmri nê kukwak ri pix mã mẽ pahte tanhmã amnhĩ tomnuj to piitã amnhĩ katut kôt rênh pa nê axte kãm hamaxpêr kêt nê.

Tĩrtũm krajaja kot Tĩrtũm kôt amnhĩ nhĩpêx ã mẽ kãm karõ

³ Nê na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nê. ⁴ Nom koja mẽhõ kêp hkra hã amnhĩ jarênh tã hkôt amnhĩ nhĩpêx kêt nê ãm kêp hkra hã amnhĩ to hêx. ⁵ Na htem Tĩrtũm kapêr kôt amnhĩ nhĩpêx o pa pê kãm hkĩnh tÿx ã amnhĩ to amnhĩrit. Nê kêp hkra hã amnhĩ to amnhĩrit mex o pa. ⁶ Jakamã kêr ka mẽ apê Jejus Kris kwÿ hã amnhĩ jarênh xwÿnhjaja hkôt pix mã amnhĩ nhĩpêx mex o ri apa.

Mẽ pamã axpên kĩnh ã mẽ pamã karõ

Juãw 13.34-35; Wam Juãw 3.14-18

⁷ E Kris kôt ixkrãmnhwÿjaja. Inhmã mẽ akĩnh jakamã na pa ã mẽ amã mẽmoj jarênh nê hã kagà anê. Kot paj mẽ amã mẽmoj nyw jarênh kêt nê. Ra mẽ ate mẽmoj mar xwÿnhhta kot paj axte mẽ amã harê. Mẽ pamã axpên kĩnh nê tãm axpên nhĩpêx o papa hã Tĩrtũm kot mẽ pamã karõta. Ra mẽ ate mar tã kot paj axte mẽ amã harê nê hã kagà. ⁸ Wam Tĩrtũm kot mẽ pamã axpên kĩnh ã mẽ pamã karõja kormã Jejus kot mẽ panê htyk hkêt ri kot mẽ pamã hã karõta na. Tã ra Jejus kãm mẽ pajapê xaj mẽ panê htyk jakamã na pa axte ã mẽ ate axpên nhĩpêx anhÿr o apa hã mẽ amã karõ nê hã kagà. Mẽ ate Kris pyrã nê amã axpên kĩnh xaj tanhmã axpên kutã anojarêt to ho ri apa kaxyw. Nom kormã mẽ pahte Jejus kôt amnhĩ xunhwÿr kêt ri na pu prem ã axpên nhĩpêx anhÿr kêt nê. Tã hkôt amnhĩ xunhwÿ hãmri nê ã axpên to mex o papa anê. ⁹⁻¹¹ Tã koja mẽhõ kot Jejus kôt amnhĩ nhĩpêx ã amnhĩ jarênh tã kãm hkwÿjê hkĩnh kãm àmnhix ri mẽ kutã nojarêt o pa hkêt nê. Hãmri nê kot Jejus kôt amnhĩ nhĩpêx ã amnhĩ jarênh ã amnhĩ to hêx. Jao te

htyx ri kamàt kô kamã pa pyræk. No koja mēhō kām hkwýjê hkīnh kām mē kutã nojarêt o pa nē mãânēn Jejus kôt amnhĩ nhĩpêx mex o pa. Jao te hirã kamã ri pa pyræk. Jakamã tanhmã hkwýjê homnuj to ho pa hkêt nē mē piitã mē ho mex o axpēn pyræk o pa.

Juãw kot mē piitã ahpýnhã tanhmã mē kām kapēr to

¹²⁻¹⁴ E kot pa ahpýnhã tanhmã mē amã ixkapēr to nē hã kagà. Mē apiitã te mē apê ixkra pyræk. Na ka prem Jejus kôt amnhĩ xunhwý nhũm Tĩrtũm ja hã mē apumu nē Kra kukwak ri mē ate amnhĩ tomnuj piitã amnhĩ katut kôt rēnh pa nē axte kām hamaxpēr kêt nē. Jakamã ra mē ate Tĩrtũm kēp Mēpanhĩpêxà Maati hã omunh mex.

Nē mē ate Jejus kôt amnhĩ xunhwýr ã amgrã xohtô xwýnhjaja. Amnepēm amrakati ri Jejus ra rãhã ri pa ho pa xwýnhjaja kôt mē ate amnhĩ xunhwýr xwýnhjaja kot paj mē amã tanhmã ixkapēr to nē hã kagà.

Nē mē akwýjaja ham Jejus kôt mē ate amnhĩ xunhwýr xwýnhjaja ra mē ate Tĩrtũm kapēr mã ajamxpēr rãhã ho ri apa. Jakamã na hte Satanasti mē ate amnhĩ tomnuj prãm xàj tee ri tanhmã mē akrã hto ka mē Jejus nhỹ hã kutã amnhĩ to htyx pē hkôt amnhĩ nhĩpêx kêt nē.

Mē kot amnhĩ tomnuj xwýnhjaja tanhmã kot amnhĩ nhĩpêx to

Matêwre 6.24; Eprêw 11.24-26; Xiakre 4.4

¹⁵ Nē kēr ka mē amã Tĩrtũm kôt amnhĩ nhĩpêx prãm xàj mē kot amnhĩ tomnuj xwýnhjê hkôt amnhĩ nhĩpêx kêt nē. Nē mē hamaxpēr punuj xwýnhjê hkôt ri amnhĩ nhĩpêx kêt nē. Kot kaj mē hkôt amnhĩ nhĩpêx hãmri nē amã Tĩrtũm kīnh kêt ã amnhĩ to amnhĩrit.

¹⁶ Mē kot amnhĩ tomnuj xwýnhjaja na htem mēmoj punuj mã hamaxpēr nē hkôt tanhmã amnhĩ tomnuj to. Nē mēmoj pumu nē ra kām ho ô hprãm nom Tĩrtũm pē ja omnuj ã hkamnhix kêt nē. Rý tanhmã mēhō kot amnhĩ tomnuj to hã omu nē hkôt kām amnhĩ nhĩpêx prãm. Nē tanhmã amnhĩ to jarkrar to ho ri pa. ã na hte mē kot amnhĩ tomnuj xwýnhjaja amnhĩ nhĩpêx anhỹr o pa. Mē kot amnhĩ nhĩpêxja Mēpanhĩpêxà Tĩrtũm kām hprãm kêt. ¹⁷ Koja nhỹrmã mē kot tanhmã amnhĩ tomnuj toja piitã hapêx pa. Nē mē hamaxpēr punujja mãânēn nhỹrmã hapêx pa. Nē mē kot amnhĩ tomnuj o mē pa xwýnhjaja koja mē amnhĩ xà htyx kamã hamak rãhã ho pa ho pa. No Tĩrtũm kôt mē kot amnhĩ nhĩpêx o mē pa xwýnhjaja koja mē kurom kuri htĩr tũm nē mex nē hkīnh nē pa ho pa.

Kām Kris kurê xwýnh maati jarēnh

Wam Juãw 4.1-6; Sikũn Juãw 7-11

¹⁸ E Kris kôt ixkwýjaja. Kris akupýn mē pahwýr wrýk kukamã koja mēmoj tanhmã amnhĩ nhĩpêx to. Na pre ra Kris kôt mē panhĩõja mē pamã ã harēnh anē nē harēnh o:

—Koja mē panhõ Pahihti Kris akupýn mē pahwýr wrýk kaxyw hãmri nhũm kēp Kris ã amnhĩ to hêx xwýnh maati kumrêx nhỹhỹnh kato. Hãmri nē hêx rom te Kris pyrã nē tanhmã mē kām kapēr to nē tanhmã mē hipêx to ho pa nhũm rĩ kormã Kris akupýn mē pahwýr wrý. Anē.

Na pre hkukamã ã harēnh anē ka mē harēnh ma. Tã ra mē kēp Kris ã amnhĩ to hêx xwýnhjaja ohtô nē mra nē kām hkurê xwýnh maatita kukamã tanhmã amnhĩ nhĩpêx to pē mē kām amnhĩ to hêx o pa. Jakamã na pa ixprĩ hã mē amã tanhmã mē harēnh to. Koja tokyx kēp Kris ã amnhĩ to hêx xwýnh maatita nhỹhỹnh mē pahwýr kato. ¹⁹ Na pre hkwýjaja mē pahpê Kris kwýjê hkôt ri pa htã mē pahkīnhã kēp Kris kwý hkêt. Kēp hkwý ronhỹx arĩ mē pahkôt Kris kôt amnhĩ nhĩpêx o pa. Nom axtem nē àhpumunh tỹx pyrã nē mē pahkaga nē htyx tanhmã amnhĩ tomnuj to ho pa. Jao kēp Jejus kwý hkêt ã amnhĩ to amnhĩrit.

²⁰ No kêt mē pahpê Tĩrtũm krajaja na pre Jejus mē pahwýr Karõ rē nhũm mē pahkarõ mã agjê nē mē pahkrãm kapēr mex jagjê. Jakamã na pu mē mē kēp Kris kwý hkêt xwýnhjê rom Tĩrtũm kapēr mar mex nē.

²¹ Xà mē ate Tĩrtũm kapēr ã kagà pumunh kêt kôt na pa ã mē amã ixkapēr nē hã kagà anē? Nà ra mē ate omunh nē mar mex kēnã. Tã mē ate mē kot tanhmã Jejus o hêx to

xw̄ynh̄jê pumunh mex nê mẽ harēnh mar mex kaxyw na pa ã mẽ aw̄yr kagà nh̄ip̄êx nê mēnh anê. Kêr kê mẽ mẽmo ar̄igro hã mẽ aw̄yr agjê nê tanhmã mẽ amã Jejus o hêx to ka mẽ apr̄i hã mẽ omunh mex kurê kumrêx. ²² Tanhmã na htem Jejus o hêx to? E kot paj ixpr̄i hã mẽ amã tanhmã mẽ harēnh to ka mẽ inhma. Nà koja mēhō mẽ amã tanhmã harēnh to nê harēnh o:

—Nà Jejus kêp Tirtūm Kra hkêt. Tirtūm kot mẽ pahw̄yr mēnh kêt tã ka htem at̄yx kapêr kôt ri amnh̄i nh̄ip̄êx o ri apa. Kwa kêt mẽ ixkapêr kôt m̄an ri amnh̄i nh̄ip̄êx o ri apa.

Anh̄yr o mẽ amã kapêr ka mẽ ama nê kãm Kris mẽ Tirtūm wa hk̄inh kêt xw̄ynh ã omunh kurê kumrêx. ²³ Koja mēhō Tirtūm Kra Jejus kaga nê m̄ānēn Hipêêxà kaga. No koja mēhō Tirtūm Kra hkôt amnh̄i x̄am nê m̄ānēn Hipêêxà hkôt amnh̄i x̄am.

Mẽ pahte Kris kaga pymaj tanhmã amnh̄i nh̄ip̄êx to hã mẽ pamã karō

²⁴ Amnepēm mẽ ate Jejus kôt amnh̄i xunhw̄yrta ã na ka prem kêp Tirtūm Kra hã Tirtūm kot mẽ pahw̄yr mēnh xw̄ynh ã harēnh ma. Tã kêr ka mẽ ar̄i amnh̄i kaxyw hkôt ajamaxpêr nê hkôt pix m̄a amnh̄i nh̄ip̄êx o ri apa. Kot kaj mẽ anê nê Mēpanh̄ipêêxà Maati mẽ Kra wa hkôt amnh̄i nh̄ip̄êx mex o apa r̄ahã ty. ²⁵ Hāmri nê wa kuri at̄ir tūm nê amex kumrêx nê apa ho apa. Ra Jejus kot ja jarēnh x̄a hkôt.

²⁶ Na pa ã mẽ amã ixkapêr nê hã kagà anê. Mẽ apr̄i hã mẽ amã Jejus o hêx xw̄ynh̄jê kapêr mar nê mẽ kot mẽ amã hêx kôt mẽ omunh mex kaxyw. ²⁷ Tirtūm Karō na pre mẽ akarō m̄a gjêx pa nê mẽ amã Tirtūm kapêr piitã o amnh̄ir̄it mex o mẽ akôt pa. Jakamã mẽmo kaxyw kot kaj mẽ Tirtūm kapêr o hêx xw̄ynh̄jaja kot tanhmã harēnh toja ma? Ra Tirtūm Karō kot mẽ amã ho amnh̄ir̄it o mẽ ajahkre mex o pa kēnã kot ka kêt mẽ nh̄am mẽ kapêr ma. Na hte Tirtūm Karōja mẽ ur̄a nê Tirtūm kapêr ho hêx kêt nê. ãm katat̄ kôt kot ho amnh̄ir̄it mex jakamã kwa kêr ka mẽ mar t̄yx nê hkôt ri amnh̄i nh̄ip̄êx mex r̄ahã ho ri apa.

Mẽ pahte t̄am ri amnh̄i nh̄ip̄êx ã mẽ pamã karō

Juāw 14.25-26, 15.1-8

²⁸ E Jejus kôt ixkrajaja. Kêr ka mẽ ar̄i Kris kôt amnh̄i nh̄ip̄êx mex r̄ahã ho ri apa. Kê nh̄yrmã akup̄yn mẽ pahw̄yr wr̄yk o tē ka mẽ amnh̄i w̄yr omu nê ak̄inh nê. Nê ak̄inh kãm ax̄amnh̄ix kutã mra nê hkaxpa nê amnh̄i kamã amã uma hkêt nê. R̄y mẽmoj tã amnh̄i tã apijaam̄ kêt nê. ãm ax̄amnh̄ix ak̄inh nê ma kutã mra. ²⁹ Krisja mex o mex jakamã na pu htem ur̄ak nê amnh̄i to mex o ri papa. Mẽ pahte amnh̄i to mex o papa xw̄ynh̄jaja ur̄ak nê mẽ pahpê Tirtūm kra na pu mẽ.

3

Tirtūm krajê hkukamã tanhmã mẽ harēnh to

Rôm̄an 8.18; Sikūn Kor̄it 3.18; Sikūn Pêtre 3.11-14

¹ Nê Mēpanh̄ipêêxà Maati kãm mẽ pajapê ht̄yx kumrêx jakamã na pre mẽ pahte hkôt amnh̄i xunhw̄yr ã mẽ pahpumunh kôt mẽ pahpê hkra hã mẽ pajarē pu mẽ pahpê hkra nê ri papa. Ja na mẽ pamã mex o mex. Nom mẽ kot hkôt amnh̄i xunhw̄yr kêt xw̄ynh̄jaja kot hpr̄i hã ja hã mẽ pahpumunh kêt jakamã na htem mẽ pahte t̄am amnh̄i nh̄ip̄êx ã mẽ pahpumu nê tee ri hamaxpêr.

² E Kris kôt ixkw̄yjaja. Ra mẽ pahpê Tirtūm kra htã kormã mẽ pahte amnh̄i kukamã mẽ pahpr̄i hã ja hã amnh̄i pumunh mex kêt. Koja nh̄yrmã Jejus akup̄yn mẽ pahw̄yr wr̄y pu mẽ pano ho tanhmã kute hã omunh mex nê. Hāmri nê tã te kot amnh̄i nh̄ip̄êx pyr̄ak o amnh̄i nh̄ip̄êx mex o papa. Ra mẽ pahte ja mar mex. ³ ã mẽ pahte amnh̄i kukamã pajamaxpêr anh̄yr o papa xw̄ynh̄jaja na pu htem kormã amnh̄i w̄yr Jejus kamã pajamak o papa. Pê ur̄ak nê mẽmoj punuj m̄a pajamaxpêr kêt o papa. Nê ur̄ak nê tanhmã amnh̄i tomnuj to hkêt nê.

Tirtūm krajaja kot amnh̄i tomnuj o pa hkêt ã mẽ kãm karō

⁴ Nê mẽ kot amnhĩ tomnuj o mẽ pa xwỳnhjaja na htem Tĩrtũm kapẽr kwỳm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nê mẽ uràk nê kapẽr kwỳm ri amnhĩ nhĩpêx. ⁵ No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwỳr wrỳ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarẽnh mar mex. ⁶ Jakamã mẽ pahpê hkwỳjaja na pu htem ri pahtỳx tanhmã amnhĩ tomnuj to ho papa hkêt nê. ã mẽ kot amnhĩ nhĩpêx anhỳr xwỳnhjaja kêp hkwỳ hkêt. ⁷ Nom koja mễhõ Kris pyrà nê tãm amnhĩ nhĩpêx o pa hãmri nê kêp Tĩrtũm kraa. Jakamã kwa koja mễhõ Tĩrtũm kapẽr kwỳm ri tanhmã mẽ amã kapẽr to ka mẽ ama nê ãm ama. ⁸ Mễ kot amnhĩ tomnuj o mẽ pa xwỳnhjaja na htem Satanasti hkôt ã amnhĩ nhĩpêx anhỳr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhỳr o pa xwỳnh na. Tã ã kot amnhĩ nhĩpêx anhỳr o paja o hapêx par kaxyw na pre Tĩrtũm Kra Jejusja amnẽ pika hwỳr wrỳ.

⁹ Nom mẽ papajaja mẽ pahpê Tĩrtũm kra na pu mẽ. Na pre mẽ pahwỳr amnhĩ Karõ rẽ nhũm mẽ pahkarõ mã gjêx pa nê mẽ pahkôt pa ho pa. Jakamã tanhmã kot puj wem amnhĩ to nê Satanasti pyrà nê pahtỳx ri amnhĩ tomnuj o papa? Nà kot puj mẽ ã amnhĩ nhĩpêx anhỳr kêt nê. ¹⁰ Koja mễhõ tãm amnhĩ nhĩpêx kêt nê hãmri nê mẫnẽn hkwỳjê kamã ukaprĩ hkêt nê. Hãmri nê ã amnhĩ nhĩpêx anhỳr o kêp Tĩrtũm kra hkêt ã amnhĩ to amnhĩrĩt. ãm kêp Satanasti hkra hã amnhĩ to amnhĩrĩt kurê kumrêx.

Mễ pamã axpẽn kĩnh o te Jejus kãm mẽ pahkĩnh pyràk ã mẽ pamã karõ

Matêwre 22.39; Rukre 10.25-37; Juãw 13.31-35

¹¹ Nê kêt ka mẽ arĩ amã axpẽn kĩnh pê tãm axpẽn nhĩpêx o ri apa rãhã nê. Te amnepê mã mẽ ate Jejus kôt amnhĩ xunhwỳr ã arĩgrota ã mẽ kot mẽ amã ja hã karõ pyrà nê. ¹² No mẽ ri finat Kaĩ kot amnhĩ nhĩpêx pyràk o amnhĩ nhĩpêx kêt nê. Kêp Satanasti hkra jakamã na pre htõja pĩ. Kurom kot tãm amnhĩ nhĩpêx ã omu nê kamã gryk nê kupĩ. ¹³ Tã koja mẽ kêp Tĩrtũm kra hkêt xwỳnhjaja Kaĩ pyrà nê kêp mẽ aprãm nõkati nom kêt ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. ¹⁴ Kormã mẽ pahte Jejus kôt amnhĩ xunhwỳr kêt ri na pu prem mẽ uràk nê amnhĩ tomnuj o papa. Jao mẽ pahpê kuwy hwỳr papa mã xwỳnh. Tã mẽ pahte Jejus kôt amnhĩ xunhwỳr jakamã ra pahpê Tĩrtũm mẽ Kra wa kuri pahtĩr tũm nê papa mã xwỳnh. Jakamã na pu htem mẽ kêp hkra hkêt xwỳnhjê kurom pamã mẽ piitã mẽ hkĩnh o tanhmã mẽ ho mex to ho papa. Mễ kãm amnhĩ kwỳjê hkĩnh kêt xwỳnhjaja arĩ mẽ kêp kuwy hwỳr mẽ pa mã xwỳnh na mẽ. Ra mẽ pahte ja jarẽnh mar mex. ¹⁵ Mễ kãm mẽ hpar prãm o mẽ pa xwỳnhjaja koja nhỹrmã Tĩrtũm mẽ Kra wa kuri htĩr tũm nê pa ho pa hkêt nê. Ra mẽ pahte mẫnẽn ja mar mex. Jakamã kwa mẽ amã akwỳjê hprãm nõkati ho ri mẽ apa xwỳnhjaja. Tĩrtũm noo mã te ra mẽ ate mẽ hpar pyràk jakamã kot kaj mẽ arĩ ã amnhĩ nhĩpêx anhỳr o ri apa hãmri nê nhỹrmã Tĩrtũm nhõ krĩ hwỳr axàpir kêt nê.

¹⁶⁻¹⁸ E ixkwỳjaja. Kwa kêt pu mẽ pajakwa pix o pamã axpẽn kĩnh ã amnhĩ jarẽnh kêt nê. Mẫnẽn axpẽn kutã panojarêt o ri papa. Nê tanhmã axpẽn to mex to. Tanhmã na pre Jejus kãm mẽ pajapê hã amnhĩ nhĩpêx to? Nà na pre kãm mẽ pamex prãm xàj mẽ panê ty. Kãm amnhĩ tã ma hkêt kãm mẽ pakamã ukaprĩ xàj mẽ panê ty. Tã kêt pu mẽ uràk nê pahkwỳjê kamã paxukaprĩ ho mẽ kutã panojarêt rãhã ho papa. Jao mẽ paxàpkur xà hã panhõ pumu nê nhỹri pahkwỳjê hõ pumu nhũm kêp amrakati. Pu mẽ tee ri ja hã omu hãmri nê kãm mẽ panhõta kwỳ gõ. Kot pu mẽ ã amnhĩ nhĩpêx anhỳr kêt nê hãmri nê pamã Tĩrtũm kĩnh ã amnhĩ jarẽnh kaprỳ. ¹⁹ Nê kot puj mẽ ã axpẽn to mex o papa anê nê ra pahte Tĩrtũm kôt amnhĩ nhĩpêx mex ã amnhĩ to amnhĩrĩt. Hãmri nê ra paxàmnhĩx kãm tanhmã amnhĩ jarẽnh to ho papa. Amnhĩ kamã pamã uma hkêt nê paxàmnhĩx pajamakêtkati nê kãm tanhmã amnhĩ jarẽnh to.

Mễ paxàmnhĩx amnhĩ to Tĩrtũm wỳr ã mẽ pamã karõ

²⁰ Nê kot puj mẽ mẽmo arĩgro hã tanhmã amnhĩ tomnuj to hãmri nê tee ri ja hã amnhĩ pumu nê amnhĩ kamã pagryk nê. Na hte Tĩrtũm tanhmã mẽ pahte amnhĩ tomnuj to hã mẽ pahpumu nom arĩ kãm mẽ pajapêê. Mễ parom àhpumunh o àhpumunh jakamã

kot mẽ pahte amnhĩ tomnuj prãm kêt ã mẽ pahpumunh mex. ²¹ Jakamã puj mẽ ã kãm pajamaxpêr anê nê amnhĩ kamã pamã uma hkêt kãm paxàmnhĩx tanhmã ri amnhĩ to hwỳr to ho ri papa. ²² Kot puj mẽ hkôt amnhĩ nhĩpêx o papa rãhã nê mẽmoj tã kuwỳ. Nê kãm hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwỳ. Hãmri nhũm mẽ pama nê tanhmã mẽ pamã mẽmoj to rỳ mẽ pamã mẽmoj gô.

Te ixkre pixi kamã mẽ pahtipxi pyræk ã mẽ pamã karô

²³ Nê tanhmã mẽ pahte amnhĩ nhĩpêx to ho papa hã na hte Tĩrtũm mẽ pamã karô? Nà mẽ pahte amnhĩ kaxyw Kra Jejus Kris kôt pajamaxpêr nê hkôt amnhĩ nhĩpêx o papa hã na hte mẽ pamã karô. Nê kapêr xà hkôt pamã axpên kĩnh o mẽmoj to axpên kutã panojarêt o papa hã na hte mẽ pamã karô. Na hte ã mẽ pahte amnhĩ nhĩpêx anhỹr ã mẽ pamã karô anê. ²⁴ Jakamã kot puj mẽ kapêr xà hkôt axpên nhĩpêx o papa nê te ixkre tipxi kamã mẽ pahte axpên kôt Tĩrtũm kôt ri papa pyræk. Ra kot mẽ pahwỳr Karô rênh nhũm kot mẽ pahkarô mã giêx jakamã na hte mẽ pahkôt pa ho pa hã amnhĩ to amnhĩrit.

4

Mẽ kot Kris kapêr jarênh ã amnhĩ to hêx xwỳnhjê jarênh

Wam Korĩt 12.1-3; Wam Juãw 2.18-26; Sikũn Juãw 7-11

¹⁻³ Nê koja mẽhõ Tĩrtũm kapêr o mẽ ajahkre kaxyw mẽ amã tanhmã Jejus Kris jarênh to nê ãm hãmri harê nê harênh o:

—Na pre Tĩrtũm Kra Jejus mẽ pahwỳr wrỳ nê ĩ ho ĩ ho mẽ pakamã kato. Tĩrtũm tãm na pre mẽ pahwỳr kumê nhũm wrỳ.

Anhỹr o mẽ amã harê ka mẽ ama nê kapêr kôt ajamaxpêr kurê kumrêx. ãm hãmri na hte Tĩrtũm Karô nhỹ ã harênh anê. No koja Jejus kêp Tĩrtũm Kra hkêt ã harê ka mẽ ama nê ãm ama nê hkôt ajamaxpêr kêt nê. Kãm Kris kurê xwỳnh maati nhỹ hã kapêr xwỳnhjaja na hte ã harênh anhỹr o pa. Na ka prem ra kãm Kris kurê xwỳnh maati tokyx hpôx ã harênh ma. Tã na ra y hã kapêr xwỳnhjaja ohtô nê pika piitã hkôt mẽ hkôt pa nê te Tĩrtũm Karô nhỹ hã mẽ kãm kapêr pyræk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwỳjaja. Koja mẽhõ mẽ awỳr mra nê tanhmã mẽ amã Tĩrtũm kapêr jarênh to ka mẽ aprĩ hã ama nê rĩ kormã kêp Tĩrtũm nhỹ hã kapêr jarênh xwỳnh ã harê rỳ kot amnhĩ to hêx xwỳnh ã harê.

⁴ Kêt mẽ papajaja jajê rom mẽ pahpê Tĩrtũm kra na pu mẽ. Nê Tĩrtũm Karô kot ra mẽ pahkarô mã giêx xwỳnhhta hihtỳx o jajê piitã mẽ hakrenh. Jakamã na pu htem y hã mẽ kutã amnhĩ to htỳx o papa nhũm mẽ tee ri tanhmã mẽ pamã Jejus o hêx to kaprỳ. Pu mẽ kuma nê ãm mẽ kuma. ⁵ Mẽ kêp Tĩrtũm kra hkêt jakamã na htem hkôt amnhĩ nhĩpêx kêt nê. Mẽ kot amnhĩ nhĩpêxja axtem na. Jakamã na htem Tĩrtũm kapêr kwỳm ri tanhmã hkra hkêt xwỳnhjê mã kapêr to ho pa nhũm mẽ kuma nê kãm mẽ mar prãm nê. ⁶ Nom mẽ ixte Tĩrtũm kapêr o mẽ ajahkre xwỳnhjaja na pa htem mẽ kurom Tĩrtũm nhỹ hã ixkatat kôt ãm hãmri mẽ amã kapêr jarênh o ri ixpa. Jakamã ka mẽ apê hkra hã mẽ amã mẽ inhmar prãm nê. No mẽ kêp hkra hkêt xwỳnhjaja kãm mẽ inhmar prãm kêt.

Na pu htem pahprĩ hã mẽ kapêr ã mẽ kuma nê rĩ kormã tanhmã mẽ harênh to. Tĩrtũm nhỹ hã kapêr ã mẽ harê rỳ kãm hkurê xwỳnh maati nhỹ hã kapêr ã mẽ harê.

Tĩrtũm kãm mẽ pajapê hã tanhmã amnhĩ nhĩpêx to hã harênh

Juãw 3.16-21; Rômãn 5.5-9, 8.35-37

⁷ E ixkwỳjaja. Na hte Tĩrtũm tanhmã mẽ pahpê hkrajê ho pu mẽ pamã axpên kĩnh nê. Jakamã kêr pu mẽ ã axpên nhĩpêx anhỹr jao axpên to mex pix nê. ã Tĩrtũm kot mẽ panhĩpêx anhỹr jakamã kêr pu mẽ pahpê hkrajaja y hã ã axpên nhĩpêx anhỹr o ri papa.

⁸ Koja mẽhõ Tĩrtũm kĩnhã kãm mẽ hkwỳjê hkĩnh kêt hãmri nê mẽ kamã ukapri hkêt o pa. Hãmri nê kêp Tĩrtũm kra hkêt ã amnhĩ to amnhĩrit mex nê.

⁹⁻¹⁰ Tĩrtũm kãm mẽ pajapê htỳx kumrêx. Kormã mẽ pamã hkĩnh kêt ri nhũm kumrêx amnhĩ rom kãm mẽ pajapê ho pa. Nê kãm mẽ pajapê xàj mẽ pahwỳr Kra pyxita mẽ. Mẽ pahte amnhĩ tomnuj pãnhã kot mẽ panê htyk kaxyw. Mẽ pahte kukwak ri amnhĩ nhĩpêx

nyw o amnhĩ nhĩpêx nê nhỹrmã wa kuri pahtĩr tũm nê pamex nê papa ho papa kaxyw. Æ na pre Tĩrtũm mẽ pahwỳr Kra mẽnh anhỹr o kãm mẽ pajapê hã amnhĩ to amnhĩrĩt.

¹¹ E ixkwỳjaja. Tĩrtũm kãm mẽ pajapê htỳx jakamã kwa kêr pu mẽ uràk nê pamã axpẽn kĩnh o papa. Nê axpẽn kamã paxukapĩrĩ nê. ¹² Aa mẽ pahtõ pahte pano ho Tĩrtũm pumunh kêt tã na hte mẽ pakamã pa ho pa. Pu mẽ kãm mẽ pajapêta pyrã nê ÿ hã pamã axpẽn kĩnh o papa. ¹³ Na pre mẽ pahwỳr Karõ rê nhũm mẽ pahkarõ mã agjê pu mẽ ÿ hã kot amnhĩ nhĩpêx o amnhĩ nhĩpêx o papa.

¹⁴ Nê mẽ ixpê Jejus nhỹ hã mẽ ajahkre xwỳnhjaja. Mẽ ixte kot amnhĩ nhĩpêx nê kot mẽmoj tanhmã ho hã omunh o ri hkõt ixpa jakamã na pa htem ma mẽ piitã mẽ kãm harênh o ri mẽ hkõt ixpa. Nê mẽ kãm harênh o:

–Tĩrtũm na pre mẽ pahwỳr Kraja mẽ. Kot mẽ pahpiitã mẽ panê htyk kaxyw mẽ pahwỳr kumẽ. Anẽ.

¹⁵ Mẽ kot Jejus kêp Tĩrtũm Kra hã harênh o pa xwỳnhjaja na hte Tĩrtũm mẽ kamã pa ho pa nhũm htem ÿ hã Æ Kra jarênh anhỹr o pa.

¹⁶ Na pu mẽ ra pahprĩ hã Tĩrtũm kãm mẽ pajapê hã amnhĩ tã omu. Kãm mẽ pajapê htỳx kumrêx ã amnhĩ tã omu. Jakamã kot puj mẽ uràk nê ÿ hã pamã mẽ piitã mẽ hkĩnh o papa. Tĩrtũm mẽ mẽ pahtipxi nê ri papa kênã.

Mẽ kãm axpẽn kĩnh xwỳnhjaja kãm Tĩrtũm puma hkêt ã mẽ harênh

¹⁷ Nê kot puj mẽ pamã axpẽn kĩnh o papa nê mãänên Kris kõt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩr tũm nê mẽ pa ho mẽ pa mã xwỳnhjê nhĩxi jarênh kaxyw pu mẽ tee ri amnhĩ kukamã pajamaxpêr kêt nê. Ra amnhĩ nhĩxi jarênh ma nê pahkĩnh nê.

¹⁸ Nê koja mẽhõ kãm hkwyjê hkĩnh kêt nê tanhmã hõ homnuj to. Hãmri nê kot amnhĩ tã tanhmã ho pymaj kãm uma ho hwỳr mrrar kêt nê. No koja kãm hkwyjê hkĩnh nê tanhmã mẽ ho mex to ho pa nê kãm mẽ uma hkêt nê. ¹⁹ Tĩrtũm kumrêx na pre kãm mẽ pajapê nê mẽ pakukamã tanhmã mẽ pahto mex to. Tã pu mẽ ra amnhĩ pyrã nê pamã hkĩnh o papa. Nê pamã mẽ piitã mẽ hkĩnh o papa.

²⁰ Nê koja mẽhõ kãm Tĩrtũm kĩnh ã amnhĩ jarênh tã kãm hkwyjê hõ hprãm nõkati hãmri nê ra kãm Tĩrtũm prãm kêt ã amnhĩ to amnhĩrĩt. Kot kaj mẽ ano ho akwyjê pumunh o apa xwỳnhta amã hkĩnh kêê tã tanhmã kot ka we amnhĩ to nê ate ano ho Tĩrtũm pumunh kêeta amã hkĩnh ã amnhĩ jarê? Nà ka ã amnhĩ jarênh anhỹr o amnhĩ to axêx. ²¹ Na pre Tĩrtũm mẽ pamã kapêr o amnhĩrĩt o:

Kot kaj mẽ amã ixkĩnh hã kot kaj mẽ mãänên amã akwyjê hkĩnh o mẽ ho mex o ri apa. Anẽ.

5

Tĩrtũm nhỹ hã mẽ pamã axpẽn kĩnh ã mẽ pamã karõ

¹ Nê Tĩrtũm kot mẽ pahwỳr Jejus mẽnh ã harênhja. Koja mẽhõ kuma nê amnhĩ kaxyw hkõt hamaxpêr nê Jejus kõt amnhĩ xãm hã koja Tĩrtũm ja hã omu nê ho hkra.

Nê koja mẽhõ kãm Tĩrtũm kĩnh hã koja mãänên kãm hkwyjê hkĩnh o pa. ² Ja pyrã nê kot puj mẽ pamã Tĩrtũm kĩnh nê kapêr kõt amnhĩ nhĩpêx. Hãmri nê mãänên pamã krajê piitã mẽ hkĩnh ho papa.

³ Nê kot puj mẽ pamã Tĩrtũm kĩnh nê nhũm kapêrja mẽ pahpê hihtỳx kêt nê. Pu mẽ pamã Tĩrtũm kĩnh ã kapêr kõt amnhĩ nhĩpêx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kõt pajamaxpêr nê hkõt amnhĩ xunhwỳ nhũm Tĩrtũm ja hã mẽ pahpumu nê mẽ pahto hkra pu mẽ ÿ hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nê.

Mẽmoj axkrunêpxi nê kot Jejus kêp Tĩrtũm Kra hã ho amnhĩrĩt

Juãw 1.32-34, 3.36, 5.31, 15.26

⁶ Nê Jejus pix na pre Tĩrtũm mẽ pakaxyw ãm nhũm kêp Kra hã mẽ pahwỳr wrỳ. Hãmri nhũm Juãw Paxisja pyhti kamã hkrã kumrã. Kêp Tĩrtũm Kra hã hkrã kumrã. Tã nhũm

Tĩrtũm kapẽr kõt ma tanhmã amnhĩ nhĩpêx to ho pa. Nẽ ri hkwyjê mã kapẽr jarẽnh o ri mẽ hkõt pa. Tã nhũm mẽ kupĩ nhũm kêp Tĩrtũm Kra hã pĩ kahpa hã ajêt nõ ty nõ hkamrõ axkapĩ. ã mẽ panê amnhĩ nhĩpêx anê nhũm Tĩrtũm Karõja kêp Kra hã mẽ pamã ho amnhĩrĩt. ãm hãmri na hte ã tanhmã mẽmoj to amnhĩrĩt to anê. Mẽmoj to hêx kêt jakamã na pre Jejus kêp Tĩrtũm Kra hã mẽ pamã ho amnhĩrĩt.

⁷ Nẽ kêp Tĩrtũm Kra hã mẽ pamã mẽmoj to axkrunẽpxi nõ ho amnhĩrĩt. ⁸ Tĩrtũm Karõ na pre kêp Kra hã mẽ pamã ho amnhĩrĩt pu prem kêp Kra hã omu. Nẽ Juãw Paxis kot hkrã kumrãrta ã pu mẽ mããnẽn kêp Tĩrtũm Kra hã kot ho amnhĩrĩtja ã omu. Nẽ mããnẽn kêp Tĩrtũm Kra hã pĩ kahpa hã jêt nõ htyk nõ hkamrõ pikapĩrta ã mẽ pamã ho amnhĩrĩt pu mẽ kêp Kra hã omu. E mẽ pamã mẽmoj to axkrunẽpxi nõ Jejus kêp Tĩrtũm Kra hã kot ho amnhĩrĩt xwýnh na jajaja.

⁹ Nẽ na pu htem jar pahkwýjaja kot axpẽn mar xà hã ixkre kamã mẽ kapẽr ma mẽ mẽ hkõt pajamaxpẽr. Tã koja Tĩrtũm tanhmã mẽ pamã mẽmoj to amnhĩrĩt to pu mẽ hkõt pajamaxpẽr kurê kumrẽx. Kêp Tĩrtũm kẽnã kot pu kêt mẽ kapẽr prã nõ hkõt pajamaxpẽr kêt. Tãm na pre mẽ pamã Jejus kêp Kra hã ã ho amnhĩrĩt anê. ¹⁰ Jakamã mẽ pahte Tĩrtũm Kra hkõt amnhĩ xunhwýr xwýnhjaja na pu prem Jejus kêp Kra hã harẽnh ma mẽ hkõt pajamaxpẽr kurê kumrẽx. No mẽ kêp hkra hkêt xwýnhjaja na htem Tĩrtũm kot kêp Kra hã harẽnh ma mẽ ãm kuma mẽ amnhĩ kaxyw hkõt hamaxpẽr kêt nõ. Jao te Tĩrtũm kêp Hípêxà hã amnhĩ to hêx pyrãk ã harẽ.

¹¹ E kot paj ixprĩ hã mẽ amã tanhmã ja jarẽnh to ka mẽ inhma. Nã na pre Tĩrtũm Krata mẽ pahpiitã panê ty. Jakamã kot puj mẽ pahte hkõt amnhĩ xunhwýr xwýnhjaja nhýrmã ty nhũm Tĩrtũm akupým mẽ pahto mẽ pahtĩr. Pu mẽ wa kuri pamex nõ pahtĩr tũm nõ papa ho papa. ¹² Mẽ pahpê Jejus kwýjaja kot puj mẽ ã pahtĩr tũm nõ papa anê. No mẽ kêp hkwyjê hkêt xwýnhjaja koja mẽ nhýrmã ty nõ mẽ pahpyrã nõ wa hwýr àpir kêt nõ.

¹³ Na ka prem ixpyrã nõ amnhĩ kaxyw Tĩrtũm Kra hkõt ajamaxpẽr nõ hkõt amnhĩ xunhwý. Tã pa ã mẽ amã kagãja nhĩpêx anê. Mẽ ate kamã harẽnh nõ mẽ pahte nhýrmã Tĩrtũm mẽ Kra wa hwýr mẽ paxàpir ã mẽ pajarẽnhja mar nõ amnhĩ kaxyw hkõt ajamaxpẽr o ri apa kaxyw nõ kapẽr prãr o ri apa hkêt nõ.

*Mẽ pahte paxãmnhĩx mẽmoj tã Tĩrtũm wýr ã mẽ pajarẽnh
Juãw 14.13-14*

¹⁴ Nẽ mẽ pahpê Tĩrtũm krajaja na pu htem paxãmnhĩx pajamakêtkati nõ mẽmoj tã tanhmã hwýr to ho papa. Kot puj mẽ kãm hprãm xà hkõt mẽmoj tã kuwý nhũm mẽ pama. ¹⁵ Na pu htem mẽmoj tã kuwý nhũm mẽ pamar mex nõ mẽ pahte mẽmoj tã hwýr xà hkõt tanhmã mẽ pamã mẽmoj nhõr to rý tanhmã mẽmoj to. Ra mẽ pahte ja mar mex.

*Tĩrtũm kot tanhmã hkra hkêt xwýnhjê nhĩpêx to hã harẽnh
Rukre 22.31-32*

¹⁶⁻¹⁷ Nẽ koja Kris kõt mẽ anhiõ tanhmã amnhĩ tomnuj to ka mẽ atõ tee ri ja hã omu nõ ho Tĩrtũm wý. Ho awý kê nõ tanhmã kot amnhĩ tomnuj tota o hapêx nõ ja nõ ho htýx kê axte ã amnhĩ nhĩpêx anhýr kêt nõ. Kot puj mẽ pahtõ tanhmã amnhĩ tomnuj to nhũm Tĩrtũm tee ri ja hã mẽ pahpumu nhũm ja kêp omnuj nõ. Tã kot puj mẽ amnhĩ tomnujta kaga nhũm ja hã mẽ pahpumunh kõt tanhmã hã mẽ pahto hkêt nõ. ãm mẽ kot amnhĩ nhĩpêx pixi koja ho hamakêtkati hkêt nõ. Kojã mẽhõ Tĩrtũm kaga ho hkaga nõ aa hkõt amnhĩ xãm kêt nõ. Hãmri nhũm tee ri amnhĩ tã omu nhũm ja kêp omnuj týx kumrẽx. Jakamã koja aa ho hkra hkêt nõ. Nẽ aa kot hkaga ho hamakêtkati hkêt nõ pa ho pa. Jakamã koja hkaga xwýnhhta nhýrmã ty nõ kuri htĩr tũm nõ pa ho pa hkêt nõ.

¹⁸ Nẽ mẽ pahpê Tĩrtũm krajaja na pu htem amnhĩ tomnuj o papa hkêt nõ. Tĩrtũm Kra Jejus kot ja pymaj mẽ panê Satanasti pumunh mex jakamã nhũm tee ri mẽ pahte tanhmã amnhĩ tomnuj to hprãm xàj mẽ pano kupyr kaprý ho ri pa. Ra mẽ pahte ja mar mex. ¹⁹ Mẽ pahpê Tĩrtũm kra na pu mẽ. No mẽ kêp hkra hkêt xwýnhjaja Satanasti kot amnhĩ tã mẽ ho htýx pyrãk o mẽ hipêx jakamã nhũm htem tanhmã amnhĩ tomnuj to ho pa. Mẽ pahte ja mar mex.

²⁰ Nê mãânên ja mẽ pahte mar mex. Na pre Tĩrtũm Kra mẽ pahwỳr wrỳ nê mẽ pamã tanhmã Tĩrtũm o amnhĩrĩt to ho pa. Tapxipix kệp Mẽpahpãm ã mẽ pamã ho amnhĩrĩt. Tã Jejus kukwak ri mẽ pahpê Tĩrtũm kra jakamã kot puj mẽ nhỹrmã wa kuri pahtĩr tũm nê pa mex nê papa ho papa.

²¹ E Kris kôt ixkwỳjaja. Kêr ka mẽ Tĩrtũm kapêr kôt pix mã mãn ri amnhĩ nhĩpêx o ri apa rãhã nê. No nhãm mẽ kot Tĩrtũm kapêr kwỳm ri mẽ amã kapêr o hêx xwỳnhjê kapêr ma nê ãm mẽ ama nê mẽ hkôt amnhĩ nhĩpêx hkêt nê.

Tã ãm ja pix. Ixpê Juãw na pa krĩ piitã hkôt mẽ amã kagà nhĩpêx nê kurê.

Sikũn Juãw

Juãw kot Jejus kôt hkwýjê hwýr wam kagà nê mênh kôt hõ mênh

Juãw na pre kagàja nhípêx. Jejus nhỹ hã hkrajê jahkre ho ri pa xwýnhjê hõ na pre. Jakamã na pre hkrĩ hõ kamã Kris kôt htõx mẽ õ fãmii mã kagàja nhípêx nê mẽ hwýr kumê. Na pre hte Tĩrtũm kapêr o mẽ hêx o pa xwýnhjê hõ mẽ õ krĩ hwýr mra nhũm Juãw kràmnhwý nita omu nê htýx kot mẽ ahkre mex ã hkamnhĩx. Hãmri nê kot Tĩrtũm kapêr o hkwýjê jahkre kaxyw amnhĩ nhõrkwý hwýr kuwý. Hãmri nhũm Juãw tee ri harênh ma nê kãm kagàja nhípêx nê kamã kot amnhĩ wýr hwýr nê kãm kapêr nê hprĩ hã kãm tanhmã mẽ kot Tĩrtũm o hêx to ho pa hã tanhmã mẽ harênh to. Kot kamã harênh nê mẽ harênh mar hãmri nê mẽ axkãm hamak rom nê ri pa kaxyw. ã na pre Juãwja hkràmnhwý ni mẽ hkwýjê mã mẽmoj jarênh nê hã kagà nê mẽ hwýr mênh anê. Nê mẽ kãm:

¹ Pa Jejus kôt ixtõx. Xà mẽ amex? E ot pa mẽ amã kagà nhípêx nê mẽ awýr kumê. Akrajaja nê apê mẽ hkatorxà mẽ mẽ ato ixpimràatã mẽ awýr kumê. Ixpê Juãw pigêtre na pa. Inhmã mẽ akĩnh nom papxipix inhmã mẽ akĩnh kêt. Mẽ pahpyrà nê mẽ kot Tĩrtũm kôt amnhĩ xunhwýr xwýnhjaja haxwýja kãm mẽ akĩnh. ² Mẽ pahte Tĩrtũm kapêr kôt ri amnhĩ nhípêx rãhã ho ri papa jakamã na pu htem pamã axpên kĩnh o ri papa.

³ Na pa hte mẽ pahto Mẽpanhĩpêxã maati Tĩrtũm wýr o ixpa nê kãm:

—Pa Tĩrtũm. Ot pa mẽ amnhĩ to awý. Akra Jejus Kris mẽ mẽ amnhĩ to war awý. Kêr ka wa mẽ ixkamã axukapri nê mẽ ixkutã war anojarêr rãhã ho ri apa. Nê tanhmã mẽ ixkrã hto pa mẽ ixàmnhĩx ijamakêtkati nê ixkĩnh nê mẽ inhmã axpên kĩnh nê axpên to mex o ri axpên kôt ixpa. Nê tãm ri amnhĩ nhípêx. Anê.

Mẽ pamã axpên kĩnh kãm axpên to mex ã mẽ pamã karõ

Juãw 13.34-35; Wam Juãw 2.7-9, 3.14-18

⁴ Nê na pa pre akra hkwýjê pumu nhũm mẽ inhmã amnhĩ jarê pa mẽ kuma nê mẽ ý hã ixkĩnh nê. Na xep prem Tĩrtũm kôt amnhĩ xunhwý nê hkôt ri amnhĩ nhípêx mex o pa. Mẽ kot Mẽpanhĩpêxã Maati Tĩrtũm kapêr ã kagà hkôt amnhĩ nhípêx ã inhmã amnhĩ jarê pa mẽ kuma nê ixkĩnh nê. ⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtõx. Kêr pu mẽ pamã axpên kĩnh o ri papa hã mẽmoj to axpên kutã panojarêr rãhã ho ri papa. ã ixujarênh anhýrja nyw kêt. Amnepê mã mẽ ate Jejus kôt amnhĩ xunhwýr ã arĩgrota ã na prem ã mẽ amã karõ anê. Tã kêr pu mẽ arĩ pamã axpên kĩnh pê Tĩrtũm kapêr piitã hkôt amnhĩ nhípêx mex o ri papa. Kapêr ã kagà kot ã mẽ pahte amnhĩ nhípêx anhýr ã mẽ pamã karõ.

Tĩrtũm kapêr o mẽ hêx xwýnhjê jarênh

Rõmãn 16.17-18; Wam Ximotre 5.22; Wam Juãw 2.18-26, 4.1

⁷ Nê mẽ kot Tĩrtũm kapêr o hêx o ri mẽ pa xwýnhjaja na mẽ ra ma krĩ piitã hkôt mẽ kãm tanhmã ho hêx to ho pa nê mẽ kãm:

—Jesús kêp Tĩrtũm Kra hkêt ãm mẽ panhĩõ na pre. Na pre Tĩrtũm mẽ pahwýr mênh kêt nê. ãm mẽ panhĩõ rũm na pre kato.

Anhýr o mẽ kãm ho hêx o pa. Kãm Kris kurê xwýnh maatija nhỹ hã na htem ã ri ho hêx o pa anê. ⁸ Jakamã kwa mẽ amnhĩ nê mẽ omunh mex nê mẽ ama nê ãm mẽ ama. Kot kaj mẽ kapêr ma nê mẽ hkôt ajamaxpêr hãmri nê mẽ ixte Tĩrtũm kapêr o mẽ ajahkreta kaga. Kwa mẽ arĩ mẽ ate amnhĩ nhípêx nyw pix o mãn amnhĩ nhípêx rãhã o ri apa. Nê arĩ mẽ amã axpên kĩnh kãm tanhmã axpên to ajuta hto rãhã ho ri apa. Kêr kê Tĩrtũm ja hã mẽ apumu nê nhýrmã mẽ ato mex nê. ⁹ Nom kot kaj mẽ nhãm mẽ kapêr punujja kôt amnhĩ nhípêx nê Kris kôt amnhĩ nhípêx kêt nê nhũm Tĩrtũm mẽ akôt pa hkêt nê. Nom kot ka mẽ arĩ Kris kôt amnhĩ nhípêx mex nê hãmri nhũm Tĩrtũm mẽ Kra Jejusja wa mẽ akôt ri pa ho pa rãhã nê. ¹⁰ Jakamã koja ã Tĩrtũm kapêr ã kagà kuhpa hã Jejus o hêx xwýnhjaja mẽmo arĩgro hã mẽ anhõ krĩ hwýr pøj ka mẽ omu nê amnhĩ nhõrkwý hwýr

mě hwỳr kêt nẽ. Nẽ tanhmã mẽ kãm akapěr to hkêt nẽ. ãm ri mẽ hkàx ã ri mra. ¹¹ No kot kaj mẽ ã mẽ hipêx anhỳr kêt nẽ mẽ hwỳr mra nẽ mẽ mar o akuhê hãmri nẽ te mẽ ate mẽ hkôt amnhĩ nhĩpêx o amnhĩ nhĩpêx pyræk. Ja pumaj kêr ka mẽ nhỹri mẽ omu nẽ mẽ htêp kêt kumrêx.

Kagà jatur xà

Hapuhã Juãw 13-15

¹² E Kris kôt ixtõx. Ixkapěr jatur xà na ja. Ixkapěr ã kagàja ãm hakotre nom inhmã mẽ amã ixkapěr ry hprãm. Jakamã kot paj mẽmo arĩgro hã ma mẽ awỳr mō pu mẽ axpẽn pumu nẽ pahkĩnh nẽ. Pa rĩ kormã mẽ amã ixkapěr jatur xàm kumẽ ka mẽ aprĩ hã inhma.

¹³ Nẽ ota jar Kris kôt atõx krajaja awỳr hpěr mẽ.

E ixpê Juãw pigêtre na pa ã awỳr kagàja nhĩpêx nẽ mẽnh anẽ.

Hapuhã Juãw

Juãw kot Jejus kôt hkwýjê hwýr kagà nê mênh o axkrut kôt hõ mênh

*Juãw na pre mãân*ên kagàja nhípêx. Jejus nhý hã hkrajê jahkre ho mẽ pa xwýnhjê hõ na pre. Tã hkràmnhwý Gajore mã kagàja nhípêx nê hwýr kumê. Na pre Jejus kwýjaja ma krí piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krí hwýr pøj nhũm Gajore mẽ hpôx ã mẽ harênh ma nê amnhĩ nhõrkwý hwýr mẽ kuwý. Jakamã nhũm pre htem ma õ krí hwýr pa hãmri nê kuri pøj. Nhũm Juãw ã Gajore kot amnhĩ nhípêx anhýr ã harênh ma nê hkĩnh nê hwýr kagàja nhípêx nê kumê. Nê kamã kãm mēhõ pē Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hã kagà nê hwýr mênh anê. Nê kãm:

¹ Pa ixkràmnhwý Gajore? Xà amex? E ot pa awýr kagàja nhípêx nê kumê. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tirtũm kôt amnhĩ nhípêx mex rãhã ho ri apa. Pa ajarênh ma nê anhý hã ixkĩnh nê. Nê ato Tirtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêr nê amex nê ri apa kaxyw.

⁴ Ixte Tirtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwýjê nhípêx to ho apa hã ajarênh ma nê ixkĩnh nê.

Gajore kot tanhmã Jejus kôt hkwýjê ho mex to hã harênh
Wam Korit 16.10-11

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krí hwýr pa ka mẽ omu nê apê Jejus kôt mẽ htõ hã mẽ ho mex nê. ãm hãmri na ka hte ã mẽ hipêx anhýr o ri apa Gajore. ⁶ Na pre ra mẽ hkwýjaja akupýn ixwýr pøj nê mẽ ixpê Kris kwýjê mã amnhĩ tã ajarê. Amã mẽ hkĩnh nê ate tanhmã mẽ ho mex to hã ajarê. Nhũm prem nojarêr ka xep pre mẽ kãm pry hã mẽ apkur xà hã mẽmoj gõ nhũm mẽ inhmã ajarê. Nã ãm hãmri na ka hte ã mẽ ho mex o apa anê. ã ate mẽ hipêx anhýr o apata ã na hte Tirtũm apumu nê hkĩnh nê. ⁷ Na htem krí piitã hkôt mẽ kãm Kris kot tanhmã mẽ panê amnhĩ nhípêx to hã harênh kaxyw ma mẽ hwýr pa. Nom mẽ apkur xà hprãm xaj mẽ kot Kris kôt amnhĩ xunhwýr kêt xwýnhjê hwýr pa hkêr nê. ⁸ Jakamã kwa kêr pu mẽ papajaja mẽ pahpê Jejus kôt mẽ htõ hã mẽ kãm mẽõ hkwý nhõr o papa. Kot puj mẽ ã mẽ ho ajuta anê nê te mẽ pajaxwýja mẽ ihkõ hã ri mẽ kãm Kris jarênh o ri papa pyrãk.

Xotre kãm Juãw kapêr mar prãm kêt ã harênh
Matêwre 20.25-28, 23.1-12

⁹ Nê ra ixte anhõ krí kamã mẽ apê Kris kwýjê mã kagà nê mênh nhũm mẽ ate kamã harênhhta. Na xep pre Xotreja kuma nê ãm kuma. Kêp mẽ akrãhtũm prãm xaj kãm ixkapêr mar prãm kêt nê. ¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânên Kris kôt mẽ pahtõjaja nhýhýnh krí hõ rũm mẽ awýr pan pøj nhũm xep tanhmã mẽ amã mẽ ho hêx to. Nê mẽ hpôx ã mẽ omu nom amnhĩ nhõrkwý hwýr mẽ hwýr kêt nê. Tã ka mẽ kurom amnhĩ nhõrkwý hwýr mẽ awý nhũm xep tee ri ja hã mẽ apumu nê mẽ akamã gryk nê mẽ hã mẽ amã akir nê Tirtũm mã amnhĩ jarênh xà hã ixkre nê mẽ ajano. Na xep hte ã amnhĩ nhípêx anhýr o pa. Jakamã kot paj nhýrmã ma mẽ awýr mō hãmri nê mẽ apiitã mẽ anoo mã hã kãm akir. Tanhmã kot mẽ ixto hêx to nê tanhmã kot amnhĩ tomnuj to hã kãm akir ka mẽ apiitã hã inhma.

Mẽ pahte mẽ kot amnhĩ tomnuj xwýnhjê hkôt amnhĩ nhípêx kêt ã mẽ pamã karõ
Rukre 6.45; Rõmãn 12.9

¹¹ E kwa ixkràmnhwý. Kêr ka ã Xotre kot amnhĩ tomnuj o pa anhýrja kôt amnhĩ nhípêx kêt nê. Mẽ kot amnhĩ tomnuj o mẽ pa xwýnhjaja na htem Tirtũm kôt amnhĩ nhípêx kêt

ně. No kêť mẽ kot amnhĩ to mex o ri mẽ pa xwỳnhjaja na mẽ kêť Tĩrtũm kra jakamã kêť ka mẽ ã mẽ kot amnhĩ nhĩpêx anhỹr xwỳnhjê kôt pix mã amnhĩ nhĩpêx.

Temêtre jarênh

¹² Nễ Temêtre na hte tãm ri amnhĩ nhĩpêx nễ ãm hãmri Tĩrtũm kapêr o mẽ ahkre mex nễ nhũm mẽ piitã axpên mã mex ã harê. Pa hte ijaxwỳja mẽ kãm mex ã harênh o ri mẽ hkôt ixpa ka htem inhma. ãm hãmri na pa hte tanhmã harênh to ho ri ixpa.

Kagà jatur xà

Sikũn Juãw 12-13

¹³ E kagàja kamã na pa ãm ja pix jarê nễ hã kagà nễ awỳr kumê Gajore. Na pa kormã harênh jatur xà mẽnh kêť nễ. ¹⁴ Nom kot paj tokyx ma awỳr mỗ hãmri nễ rĩ kormã amã hatur xàm kumê.

E kê Tĩrtũm akutã nojarêť rãhã ho pa.

Nễ ota jar Kris kôt akràmnhwỳjaja awỳr hpêr mẽ. Nễ kêť ka atar Kris kôt ixkràmnhwỳjê mã ijarê.

Tã ãm ja pix. Ixpê Juãw pigêtre na pa ã awỳr kagà nhĩpêx nễ mẽnh anễ.

Jutre

Jutre kot Jejus kôt hkwỳjê piitã hwỳr kagà nê mênh

Jutre na pre kagàja nhípêx. Xiakre pyrã nê kêp Jejus tō na pre. Tã kagàja nhípêx nê krĩ piitã hkôt Jejus kôt hkwỳjê hwỳr kurê. Na pre mẽ hkwỳjaja kêp Jejus kwỳ hã amnhĩ jarênh tã axtem nê tanhmã amnhĩ tomnuj to ho pa. Jakamã nhũm Jutre kagàja kamã Jejus kwỳjê mã hprĩ hã tanhmã mẽ harênh to nê mẽ kot mẽ hkôt amnhĩ nhípêx nê mẽ kãm kapêr kãm hihtỳx nê. Nê mẽ kãm:

¹ Pa Jejus kôt ixtō nê ixtōxjaja. Xà mẽ amex? E ot pa mẽ amã kagà nhípêx nê mẽ awỳr kurê. Tĩrtũm kot ixpyrã nê amnhĩ kaxyw mẽ axunhwỳr xwỳnhjê hwỳr. Mẽpanhĩpêxã Maati Tĩrtũm kãm mẽ pahpiitã mẽ pajapê jakamã na hte Kra Jejus Kris mẽ wa mẽ pahãnopxar mex rãhã ho pa.

Ixpê Jutre na pa hte Jejus Kris mã tanhmã amnhĩ nhípêx to ho ri ixpa. Nê ixpê Xiakre htō na pa.

² Na pa hte mẽ ato Tĩrtũm wỳr ho ixpa nê kãm:

—Pa Tĩrtũm. Kwa mẽ kot Akra Jejus kôt amnhĩ xunhwỳr xwỳnhjê pumu nê amã mẽ hapê hã mẽ kamã axukaprĩ rãhã ho apa. Kê mẽ kamã amnhĩ krit nê àmnhĩx hamakêtkati nê ri tanhmã amnhĩ nhípêx to ho pa. Nê mẽ kãm axpên kĩnh o ri axpên kôt pa. Anê.

Mẽ kot Tĩrtũm kapêr o hêx xwỳnhjê jarênh

Wam Ximotre 1.18-20, 6.12

³ E ixkrãmnhwỳjaja. Nà inhmã mẽ akĩnh. Na pa pre jãã mẽ amã kagà hkwỳ nhípêx kaxyw. Mẽ pahte Jejus Kris kukwak ri amnhĩ nhípêx nyw ã tanhmã mẽ pajarênh to nê hã kagà kaxyw tã kormã harênh kêt nê. Kot paj axtem mẽmoj jarê. Na pre Tĩrtũm mẽ pamã kot amnhĩ nhípêx o amnhĩrit pa. Nê kapêr o amnhĩrit pa. Mẽ pahte mar nê hkôt amnhĩ nhípêx kaxyw. Jakamã kêr pu mẽ kapêr mar tỳx nê amnhĩ krã hi kamã haxàr tỳx nê hã papa. Nom koja mẽhō kapêr kuhpa hã tanhmã mẽ amã kapêr o hêx to ka mẽ ama nê ãm ama.

⁴ Na xep ra kapêr o mẽ hêx xwỳnhjaja mẽ akôt pa nê mẽ apyrã nê Jejus kôt amnhĩ xunhwỳr ã amnhĩ jarê nom amnhĩ to hêx. Ka xep mẽ aprĩ hã mẽ hêx ã mẽ omunh kêt nê mẽ kêp Jejus kôt mẽ atō hã mẽ hkamnhĩx nê atỳx amnhĩ nhōrkwy hwỳr mẽ awỳ. Nom mẽ kot Tĩrtũm kapêr o hêx pix kaxyw na htem mẽ akôt pa nê mẽ amã kapêr o:

—Tĩrtũm kãm mẽ pajapê htỳx kumrêx nê mẽ pakutã nojarêt ho pa jakamã kwa kêr pu mẽ mãmri nhãm mênijê ho amnhĩkati ho papa. Koja ja hã mẽ pahpumu nê tanhmã hã mẽ pahto hkêt nê. Kãm mẽ pajapê kênã kot kêt hã tanhmã mẽ pahto. No kêt Jejus Krisja mẽ ate kêp mẽ panhō Pahihiti hã harê nom kêp mẽ panhō patrãw rỳ kêp mẽ panhō Pahihiti hkêt. Anê.

Ã Tĩrtũm kapêr kuhpa hã mẽ amã harênh anhỳr o pa. Tĩrtũm kapêr ã kagà htũm kot amnepêm mẽ hkukamã tanhmã mẽ harênh to nê mẽ harênh kot:

Ã mẽ kapêr anhỳr o paja mỳrapê koja mẽ mex kêt nê pa. Koja Tĩrtũm mẽ homnuj tỳx kumrêx.

Anhỳr o kot mẽ harênh. Tã pa mẽ amã ixprĩ hã mẽ harê nê hã kagà. Mẽ ate inhmar nê amnhĩ nê mẽ omunh mex kaxyw.

Tĩrtũm kot tanhmã mẽ kot amnhĩ tomnuj xwỳnhjê nhípêx to hã harênh

Sikũn Pêtre 2.1-17; Sikũn Ximotre 3.1-9

⁵ Nê amnepê mã mẽ panhĩgêjtaja kormã Ejit kamã mẽ pa ri nhũm Tĩrtũm Ejit nhō xwỳnhjê rũm mẽ kator pa. Hãmri nhũm mẽ hkwỳjaja tanhmã hamaxpêr to nê axtem nê amnhĩ kaxyw hkôt hamaxpêr kêt nê. Nhũm tee ri amnhĩ tã mẽ omu nê ã mẽ kot amnhĩ nhípêx anhỳr xwỳnhjê nhĩmex pa. Ra mẽ ate mẽ harênh mar mex tã pa axte mẽ amã mẽ harê.

⁶ Nê Tirtûm kapêr o mē wryk xwÿnh kwÿjaja. Na prem Tirtûm nhÿ hã kapêr o pa htã tanhmã hamaxpêr punuj to nê ra kãm ja ho anhÿr prãm nôkati nê Tirtûm kaga. Jakamã nhÿm mē hã amÿnê nhÿm mē unê nê kàx o mē hkaxpre pa. Nê nhÿri pika kaxwÿnh kãm kamàt kô htyk kãm mē kurê nhÿm mē arĩ kamã hkrĩ ho hkrĩ. Nom koja nhÿrmã Tirtûm kot tanhmã mē pahpiitã mē pajarênh to xà hã arĩgro kato nhÿm mē rĩ kormã hapôx pa. Hãmri nê kot amnhĩ tomnuj mÿrapê ma mē kot amnhĩ xà htÿx kamã hamak tûm xàta wÿr ma hapêx.

⁷ Nê krĩ pê Sotô nê Komo nhõ xwÿnhjaja na prem haxwÿja kãm Tirtûm kapêr kôt amnhĩ nhĩpêx prãm kêt nê. Nê krĩja wa hpuhã krĩ hkwy kamã ri mē pa xwÿnhjaja haxwÿja mē urak nê nê kãm kapêr mar prãm kêt nê. Na prem amnhĩ tomnuj tÿx rãhã ho pa. Nê axtem nê axpên pê ri mē hprô ho amnhĩkati ho pa. Nê mēmy hkwyjaja ri axtem nê axpên to amnhĩkati ho pa. Hãmri nhÿm Tirtûm tee ri mē kot amnhĩ nhĩpêxja ã omu nê mē hipy kuwy hpôk kwÿ rē nhÿm mē amnhĩ wÿr omu nê kãm ma xàj tee ri hprôt kaprÿ. Nê hprôt kaxyw ôrkwy rûm hapôj nê hxêt pa nê hapêx. Na hte ã Tirtûm mē kot amnhĩ tomnuj o mē pa xwÿnhjê nhĩpêx anê. Jakamã koja nhÿrmã kuwy hpôk rãhã xwÿnhhta wÿr mē piitã mē rēnh pa nhÿm mē kamã amnhĩ xà htÿx kamã hamak rãhã ho pa ho pa nê aa à hapêx kêt nê. Nê à htÿx rãhã papa ho pa. Tã mē pahte Sotô mē Komo nhõ xwÿnhjê jarênh mar nê mē pahte amnhĩ tomnuj kaga kurê kumrêx kaxyw na pre Tirtûm ã mē pamã mē harênh o amnhĩrit anê.

Mē hpijaàm kêt xwÿnhjê jarênh

Sikûn Pêtre 2.10

⁸ Nê mē kot Tirtûm kapêr o pihkàr xwÿnhjaja na htem ã mē kot amnhĩ nhĩpêx anhÿr xwÿnhjê pyrã nê amnhĩ tomnuj tÿx pix o ri pa. Jakamã na htem tanhmã hpimtir punuj to hãmri nê hkrã hapôj nê hpimtir xà hkôt tanhmã amnhĩ tomnuj to. Jao hkwyjê kamã hpijaàm kêt o pa. Rÿ mēnijê hõ rÿ mēmyjê hõ nhÿm mē axpên kãm hpijaàm kêt o pa. Rÿ Tirtûm kapêr o mē wryk xwÿnhjê ho kapêr punuj nê. Kapêr mã gêt o tanhmã mē ho kapêr punuj to. ã na htem hpimtir punuj xà hkôt amnhĩ tomnuj o pa anê. ⁹ Tirtûm kapêr o mē wryk xwÿnh krãhtûm Mikewja. Kêp mē hkrãhtûm tã aa mē kãm kapêr mã gêt kêt nê. Na pre Mojes ty nhÿm Mikew ra ma hwÿr tēn wÿr. Nê kuri Satanasti pumu hãmri nê Mojes nhĩ nê tanhmã kãm kapêr to. Nom kapêr mã gêt o kãm kapêr kêt nê. ãm kapêr mã hprĩ ho kãm kapêr nê kãm:

—Kwa ãm omu kê nõ. Kot kaj tanhmã ho nhÿm Tirtûm apumu nê hã tanhmã hã ato. Anê.

¹⁰⁻¹¹ Nom ixte mē amã mē hpimtir punuj jarênh xwÿnhjaja. Mē kot Tirtûm kapêr o pihkàr xwÿnhjaja kot hprĩ hã Tirtûm kot amnhĩ nhĩpêx ã harênh mar kêt jakamã na htem htÿx ri ho kapêr o haprÿ ho pa. Te ho mry xoprêja hamaxpêr kêt nê htÿx ri amnhĩ nhĩpêx o pa pyrãk. Nom koja nhÿrmã Tirtûm mē homnuj tÿx nê.

Te mē kot finat Kaĩ kot amnhĩ tō hpĩr xwÿnh kot amnhĩ nhĩpêxta pyrãk. Nê te mē kot finat Paraãw kot amnhĩ nhĩpêx pyrã nê kàxpore rûnh prãm xàj Tirtûm kapêr kuhpa hã tanhmã amnhĩ nhĩpêx to ho pa. Nê te mē kot finat Kore kot amnhĩ nhĩpêx pyrã nê Tirtûm kot mē kaxyw mē õ pahi xãm xwÿnhhta kutã amnhĩ xunhwÿ. Mÿrapê koja mē jajê pyrã nê kuwy hpôk rãhã xwÿnhhta wÿr ma hapêx pa.

¹² Na ka htem apê Jesus kwÿ hã axpên wÿr akuprô. Nê tōhã mē apê hkwy hã amã axpên kĩnh ã axàpkur kaxyw axpên wÿr akuprô. Nhÿm ixte mē amã mē harênh xwÿnhjaja mē akôt agjê nê mē akutã apku. Jakamã kwa mē o kora mē amnhĩ nê mē omunh mex nê. Mē hipêx o te mē ate mē axàpkur xà hã mē anhõ kamã kēnre pumunh nê hanhir nê rēnh pyrã nê amnhĩ nhĩhkô hã mē pumu nê amnhĩ nê hanor kurê kumrêx. Na htem hpijaàm kêt kãm amnhĩ pix kukamã hamaxpêr pê apkur rûnh o pa.

Te na wryk kaxyw htyk rax nê mōr nhÿm mē kot omunh nê wryk ã hkamnhix tã nhÿm kôk kot nhãm mēnh nhÿm wryk kêeta pyrãk o na htem amnhĩ nhĩpêx. Jao te mē kot ãm hãmri mē amã Tirtûm kapêr jarênh mex pyrãk tã mē amã ho hêx.

Ně te mě kệp mēmo pī hpàr ra ô mã tām tã ãm htỳx rã nẽ aa ô hkêt nhũm mẽ kot krãhyr nẽ mēnh nhũm grà parta pyræk.

¹³ Nẽ te mẽ kệp gô xujanār kot amnhĩ nhĩpêx pyræk. Na hte gô xujanārja hakàx wỳr kapê nẽ mra nhũm hamrô kỳxpê amgrà kamã arĩk nhũm gô awjanã nẽ ma akupỳm hipôk wỳr mra. Ja pyræk na htem ma nhỹhỹm mra nẽ mẽ kãm mēmojarẽ nẽ nhãm mra nẽ mẽ kãm mēmojarẽ nẽ ma akupỳm mẽ kurũm mra. Nhũm mẽ mar xà hkôt amnhĩ tomnuj rãhã ho pa.

Nẽ te mẽ kot kaxkwa hã kanhêre nhỹhỹm htēm nhũm mẽ kot nhỹhỹm htēm xà hkôt omunh kēeta pyræk. Jakamã koja Tĩrtũm nhỹrmã kamàt kô kamã mẽ rēnh pa nhũm mẽ aa hapôx kêt nẽ.

Mẽ kot amnhĩ tomnuj xwỳnhjê hkukamã mẽ harēnh

Apokarip 20.11-15

¹⁴ Nẽ na pre finat Enokja amnepê mã ã mẽ kot amnhĩ tomnuj anhỹr xwỳnhjê hkukamã tanhmã mẽ harēnh to. Mẽ kot Tĩrtũm kapêr o pihkàr o ri mẽ pa xwỳnhjaja nhũm mẽ hkukamã mẽ harẽ. Enokja finat Atãw kanrēhã htãmnhwỳ na pre. Tã ã mẽ kot amnhĩ tomnuj anhỹr xwỳnhjê hkukamã mẽ harēnh o:

Koja nhỹrmã Pahihtija man pika hwỳr akupỳn wrỳ. Kapêr o mẽ wrỳk xwỳnh xohtô rax mẽ mẽ hpimràatã akupỳn wrỳ.

¹⁵ Hãmri nẽ mẽ pahpiitã kormã mẽ pahtĩr ri mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarēnh to. Hãmri nẽ mẽ kot Tĩrtũm kapêr o hêx o pa xwỳnhjê pumu nẽ tanhmã mẽ harēnh to nẽ mẽ harēnh o: “Jajaja na pre mẽ kãm Inhĩpêxã Tĩrtũm prãm kêt nẽ ri kapêr kwỳm pix mã amnhĩ nhĩpêx o pa. Nẽ kapêr punuj o pa. ã na prem amnhĩ nhĩpêx anhỹr rãhã ho pa.” Anhỹr o mẽ harẽ nẽ amnhĩ nẽ kuwy hwỳr mẽ kurẽ nhũm mẽ amnhĩ xà htỳx kãm hamak o pa rãhã nẽ pa ho pa. Anẽ.

ã na pre finat Enokja mẽ hkukamã mẽ harēnh anẽ. ¹⁶ ãm hãmri na mẽ harẽ. Tã na hte arĩ mẽ hkwỳjaja ã amnhĩ nhĩpêx anẽ. Nẽ hamaxpêr mex kêt nẽ. Na htem nhãm tanhmã mẽ ho kapêr punuj to pix kukamã hamaxpêr. Nẽ amnhĩ krã hkôt htỳx ri tanhmã amnhĩ tomnuj to ho pa. Nẽ amnhĩ to jarkrar rãhã nẽ. Nẽ hêx rom mẽ kệp mēmojarẽ jamỳnh kaxyw tanhmã mẽ kãm hêx to.

¹⁷ E Kris kôt ixkrãmnhwỳjaja. Koja mẽ ã mẽ amã Tĩrtũm kapêr o hêx anhỹr o mẽ akôt pa ka mẽ ama nẽ ãm mẽ ama nẽ mẽ kapêr mar kêt nẽ. ãm mẽ panhō Pahihti Jejus Kris nhỹ hã mẽ ajahkre o mẽ pa xwỳnhjaja kot tanhmã mẽ amã mẽ harēnh toja mã măn kêt ajamaxpêr tỳx rãhã o ri apa. ¹⁸ Na prem mẽ amã mẽ harēnh o:

—Jesup akupỳn wrỳk xwỳj ri koja mēmojarẽ mẽ awỳr mran pōj. Nom mẽ kot Jejus kapêr kwỳm amnhĩ krã hkôt tanhmã amnhĩ nhĩpêx to xwỳnhjaja koja mẽ. Hãmri nẽ mẽ apê Jejus kwỳ hã mẽ apumu nẽ mẽ atã akunha nẽ mẽ atã hpêr o axkẽ nẽ Tĩrtũm ã hpêr o axkẽ nẽ kapêr ã kagã hã hpêr o axkẽ. Anẽ.

¹⁹ ã mẽ kot amnhĩ nhĩpêx anhỹr xwỳnhjaja mẽ pahpê Jejus kwỳjaja mẽ pahte axpēn kutã amnhĩ xunhwỳrja na mẽ kãm hprãm. Mẽ kamã Tĩrtũm Karō gjêx kêt jakamã mẽ kãm amnhĩ krã hkôt pix mã tanhmã amnhĩ tomnuj to ho pa hprãm.

Mẽ pahte Kris akupỳn wrỳk jamār pê tanhmã amnhĩ nhĩpêx to hã mẽ pamã karō

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikũn Pêtre 3.12-15

²⁰ Kwa mẽ apê Jejus kôt ixtō nẽ ixtōxjaja kêt ka mẽ ã mẽ kot amnhĩ nhĩpêx anhỹr o mẽ pa xwỳnhjê rom apkati mẽ amnhĩ kaxyw Jejus pix mã măn ajamaxpêr rãhã ho ri apa. Te mẽ kot mẽ hakre hã ra àptàr nẽ amnhĩ krãm mẽ hakre xà jagjēnh tỳxta pyræk.

Jaio Tĩrtũm kapêr mar tỳx nẽ hkôt amnhĩ nhĩpêx mex o ri apa.

Nẽ Karō nhỹ hã amnhĩ to hwỳr rãhã nẽ.

²¹ Nẽ Tĩrtũm kãm mẽ pajapê hã kãm ajamaxpêr rãhã ho ri apa.

Nẽ Pahihti Jejus Kris kãm mẽ pajapê hã kãm ajamaxpêr tỳx rãhã ho apa.

Koja nhÿrmã kãm mẽ pajapê hã akupÿn mẽ pahwÿr wrÿ nẽ tanhmã mẽ pahto mex to pu mẽ kuri pahtÿr tÿm nẽ pahkÿnh nẽ papa ho papa. Tã kêr pu mẽ arÿ akupÿn mẽ pahwÿr wrÿk xà hã arÿgro jamãr rãhã ho papa.

²² Nẽ mẽ pahkwÿjaja kormã mẽ kot Jejus kôt amnhÿ xunhwÿr tÿx kêt xwÿnhjaja kêr ka mẽ kamã axukaprÿ nẽ aprÿ hã mẽ kãm Tÿrtÿm kapêr jarênh o ri mẽ hkôt apa. ²³ Na pre ra mẽ hkwÿjaja mẽ kot Tÿrtÿm kapêr o pihkàr xwÿnhjê kapêr ma nẽ mẽ hkôt amnhÿ nhÿpêx. Jakamã kêr ka mẽ ja hã mẽ omu nẽ te mẽ ate kuwy hpôk rÿnh nẽ mẽ hpa hã mẽ hamÿnh nẽ nhãm mẽ rênh pyrak o mẽ hipêx. Jao mẽ kot nhÿrmã Tÿrtÿm kapêr o pihkàr xwÿnhjê hkôt kuwy hpôk rÿnhhta wÿr pa pymaj mẽ nẽ mẽ kãm akapêr kãm axihtÿx o ri mẽ hkôt apa. Kê mẽ ama nẽ mẽ hkaga nẽ mẽ hkôt ri amnhÿ nhÿpêx kêt nẽ.

Nẽ htÿx ri mẽ kot amnhÿ tomnuj o mẽ pa xwÿnhjaja kêr ka mẽ kamã axukaprÿ ho ri apa nẽ mẽ kamã agryk tokyx anhÿr kêt nẽ. Xatã mẽ kãm Tÿrtÿm kapêr jarênh rãhã ho ri mẽ hkôt apa. Nom kwa mẽ okora kêr ka mẽ kot amnhÿ nhÿpêx o amnhÿ nhÿpêx o ri apa hkêt nẽ. Kwarÿ ho kwarÿ.

Jutre kot Tÿrtÿm mã mex o mex ã harênh

Wam Pêtre 1.5-7

²⁴ Nẽ kêr pu mẽ Tÿrtÿm mã amnhÿ jarênh kaxyw nẽ ã kãm amnhÿ jarênh anẽ nẽ kãm: —Pa Tÿrtÿm. Nã ãm hãmri na ka hte amnhÿ kôt mẽ ixunhwÿr tÿx nẽ pa mẽ akaga hkêt nẽ akôt amnhÿ nhÿpêx rãhã ho ri ixpa. Kot kaj nhÿrmã amnhÿ wÿr mẽ ixto api pa mẽ Akra mẽ war akuri axte tanhmã amnhÿ tomnuj to hkêt nẽ. Nẽ amnhÿ to mex pê anhÿrã htÿx rax kãm ixpa. Jao ixkÿnh tÿx nẽ ixpa ho ixpa.

²⁵ —Apê mẽ inhô Tÿrtÿm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhÿ tomnuj pê mẽ ixpytà. Nẽ na ka hte anhÿrã htÿx rax rãhã ri apa. Nẽ amex o amex nẽ axihtÿx o axihtÿx nẽ axàhpumunh o axàhpumunh. Nẽ apê mẽ inhô Pahi Maati hã apyxi mex na ka. Amnepê mã kormã mẽmoj kêt ri ka pre ã amnhÿ nhÿpêx anhÿr o apa rãhã nẽ. Tã arÿ ã ate amnhÿ nhÿpêx anhÿr ho apa ho rãhãã. Nẽ kot kaj apkati mẽ ã ate amnhÿ nhÿpêx anhÿr ho rãhãã. ã ate amnhÿ nhÿpêx anhÿr o apa ho rãhã ho rãhã. Tã ãm ja pix na hapêx. Anẽ.

E kêr pu mẽ ã Tÿrtÿm mã mex o mex ã harênh anhÿr o papa.

Ãm ja pix. Ixpê Jutre na pa mẽ awÿr kagàja nhÿpêx nẽ kumẽ.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pê Juãw na pre hipêx. Na pre Jejus ã mẽ kãm hkurê xwýnhjaja unê nẽ ma gô hipôk pê Patos wýr kumẽ nhũm kêp prês nẽ gô hipôk kãm pa ho pa nẽ aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipôkja wýr wrý nẽ kãm mẽmoj kukamã awjarẽ nhũm kuma nẽ hkôt mẽmoj pumu. Te hpimtir kãm mẽmoj pumunh pyrãk. Hãmri nẽ omu nẽ kuma nẽ amnhĩ xô ri mẽ pamã hã kagà. Na pre mẽmoj to axkrunêpxi nẽ hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nẽ Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rẽnh par ã kagà. Nẽ Tĩrtũm kot nhỹrmã hkrajê ho mex kumrêx ã nhũm mãânẽn hã kagà. Hãmri nẽ mẽ pamã hã kagà o:

¹⁻² E kot paj mẽ amã awjarẽ nẽ hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarẽ nẽ hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harẽnh kaxyw. Hãmri nhũm kuma nẽ kot amnhĩ xô ri inhmã ujarẽnh kaxyw man ixwýr kapêr o wrýk xwýnh mẽ nhũm man ixwýr wrý nẽ ô ri inhmã mẽmoj to amnhĩrĩt pa. ãm hãmri ã inhmã mẽmoj to amnhĩrĩt anẽ. Tã kot paj amnhĩ xwar mẽ apê Jejus kôt ri mẽ apa xwýnhjê mã harẽ nẽ hã kagà. Mẽ ate mar nẽ axkãm ajamak rom nẽ ri apa kaxyw. Nà ixte hã kagà mã xwýnhja koja tanhmã amnhĩ to nẽ tokyx mẽ pahwýr wrý. ³ Jakamã kwa kêr ka mẽ aprĩ hã kagàja kamã harẽ nẽ ama nẽ hkôt pix mã amnhĩ nhĩpêx nẽ mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ ato mex ka mẽ akĩnh nẽ apa ho apa. Nẽ mẽ kot mẽ axujarẽnh mar nẽ hkôt amnhĩ nhĩpêx xwýnhjaja koja Tĩrtũm ja hã mẽ omu nẽ mẽ ho mex nẽ nhũm mẽ apyrã nẽ hkĩnh nẽ pa ho pa.

Juãw kot krĩ pê 7 kôt Jejus kwýjê hwýr kagà rẽnh

⁴ E ixpê Juãw kot paj atar pika pê As kamã krĩ pê 7 piitã hkôt mẽ apê Jejus kwý hã axpẽn wýr mẽ apikuprõnh xwýnhjê hwýr kagà nẽ kurẽ ka mẽ kamã harẽ nẽ ama.

Na pa hte mẽ ato Tĩrtũm wýr rãhã ho ri ixpa. Nẽ mẽ ato hwýr o:

—Pa Tĩrtũm. Kwa kêr ka pika pê As kamã akrajê ho mex nẽ mẽmoj to mẽ kutã anojarêt rãhã ho apa. Kê mẽ hamakêtkati nẽ àmnhĩx ri pa ho pa. Ja na inhmã hprãm. Anẽ.

Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nẽ koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptar ã hkrĩ xà kamã mẽ papytar rãhã ho hkrĩ.

Nẽ Tĩrtũm Karõ te kot Tĩrtũm kot mẽ pahto amnhĩptar xà hã hkrĩ xà kapem kanê maati pixi kamã kwýr pê 7 xãm xwýnhhta pyrãk. Na hte Tĩrtũm nhĩhkô hã hkrĩ ho hkrĩ. Tã kẽ mẽ ato mex rãhã ho pa.

⁵ Nẽ Jejusja na pre hte Tĩrtũm kapêr o mẽ ahkre mex o pa nẽ aa hkaga hkêt nẽ. Tã nhũm prem axtem nẽ kupĩ. Hãmri nhũm Tĩrtũm akupým ho htĩr. Jejus kumrêx ho htĩr nhũm htĩr o htĩr. Nẽ kêp pika piitã hkôt pahi piitã nhõ Pahihti. Kãm mẽ pajapê htýx jakamã na pre mẽ panê ty nẽ hkamrõja te mẽ panê hpikapĩr pyrãk o amnhĩ nhĩpêx. Nẽ htyk o mẽ pahte amnhĩ tomnuj pãnhã amnhĩre. Jao te mẽ pahte amnhĩ tomnuj pê mẽ papytar par pyrãk o mẽ panhĩpêx. ⁶ Nẽ na pre mẽ pahpê patre nẽ mẽ piitã mẽ ho Hipêxà Tĩrtũm wýr o papa kaxyw mẽ paxunhwý. Nẽ kêp mẽ panhõ Pahi Maati hã kãm hprãm

xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwỳ. Jakamã kwa kêr pu mẽ kãm mex o mex nẽ hihtỳx o hihtỳx ã mãn harênh rãhã ho papa.

⁷ Nẽ koja tokyx akupỹn mẽ pahwỳr kakrã kamã wrỳ pu mẽ pahpiitã wrỳk kãm omu. Nhũm mẽ kot hpĩr xwỳnhjaja tee ri amnhĩ wỳr omu. Nẽ pika piitã hkôt ri mẽ pa xwỳnhjaja omu nẽ mẽ kot amnhĩ tomnuj jakamã tee ri amnhĩ kukamã hamaxpêr o kãm ma htỳx kumrêx. Hãmri nẽ kãm ma xàj mur nẽ htertet o kuhê. Koja nhỹrmã Jejus akupỹn wrỳ nhũm mẽ amnhĩ wỳr omu nẽ ã amnhĩ nhĩpêx anẽ.

⁸ Nẽ Tĩrtũm na hihtỳx o hihtỳx nẽ àhpumunh o àhpumunh. Nẽ aa kot mễhõ ni rũm kator kêt. Na hte amnhĩ jarênh o:

—Ixrãhã ixpa xwỳnh na pa. Amnepê mã kormã mẽmoj piitã hkêt ri pa pre ra ixrãhã ri ixpa ho ixpa. Nẽ koja nhỹrmã mẽmoj akupỹm hapêx tã pa arĩ ixrãhãã. Anẽ.

Juãw kot Jejus akupỹm htĩr ã omunh

⁹ Nẽ ixpê Jejus kôt mẽ atõ Juãw na pa hte mẽ apyrã nẽ Jejus kôt amnhĩ nhĩpêx nhũm hte mẽ kãm Jejus kurê xwỳnhjaja mẽ apyrã nẽ hã inhĩpêx kati ho pa. Mẽ pahte hkôt ri amnhĩ nhĩpêx o papa jakamã na htem hã mẽ pahtomnuj tỳx rãhã ho pa. Tã pu htem ỹ hã mẽ kutã amnhĩ to htỳx nẽ arĩ hkôt amnhĩ nhĩpêx. Jakamã na pa pre Tĩrtũm kapêr o mẽ ajahkre rãhã ho ri mẽ akôt ixpa. Nẽ Jejus kêp mẽ panhõ Pahihti hã mẽ amã harê. Mỳrapê na prem hã ixpynê nẽ man amnẽ ixto tẽ nẽ jar gô hipôk pê Patos kãm inhmẽ pa kamã ixpê prês nẽ ixpa ho ixpa.

¹⁰ Tã nhũm tômik pa Tĩrtũm mã amnhĩ jarênh o nhỹ. Hãmri nhũm Karõ tanhmã ixkrã hto pa te ixpimtir kãm mẽmoj pumunh pyrã nẽ amnhĩ katut kôt mễhõ kapêr ma. Te kot pifti kakôt tỳx pyrãk pa kuma. ¹¹ Hãmri nhũm inhmã kapêr nẽ inhmã:

—Pa Juãw? E kot paj amã mẽmoj to amnhĩrit ka omu nẽ akwỳjê mã hã kagã. Nẽ hã kagã hpa hãmri nẽ ahpỹnhã krĩ hkwỳ hkôt mẽ kêp ixkwỳ hã axpên wỳr mẽ pikuprõnh xwỳnhjê hwỳr arê. Mẽ kot kamã harênh nẽ mar nẽ axkãm hamak rom nẽ ri pa kaxyw. Epes wỳr nẽ Emĩnã hwỳr nẽ Pekamõ hwỳr nẽ Xijaxir wỳr nẽ Satre hwỳr nẽ Pirate hwỳr nẽ Raxisej wỳr. Krĩ pê 7ja piitã hwỳr ixkapêr ã kagã nẽ mẽ hwỳr arê kê mẽ apyrã nẽ mẽmoj jarênhja ma. Anẽ.

¹² Hãmri pa ixte mễhõja pumunh kaxyw ho ijakêx nẽ kanê hkwỳ pumu. Kanê kêp 7 nẽ piitã ôr o.

¹³ Nẽ kanê nhĩpôk ri mễhõja te panhĩ pyrã nẽ pahi hã ê mex kãm xa. êja hpar kôn kôt hitep nhũm xa. Nẽ pahi hã mẽ hinô hpre xà ho amnhĩ nhĩnô hpre nẽ xa. Hinô pre xàja ôr pix o. ¹⁴ Nẽ hkrã hkĩ te kaxàt nhĩ jaka pyrã nẽ hakaajre. Nẽ no te kuwy hpôk pyrã nẽ hkarỳr tỳx nẽ. ¹⁵ Nẽ hpar te mẽmo kax karỳr tỳx pyrãk. Nẽ kapêr te gô hprôt tỳx koko pyrãk. ¹⁶ Na pre upôk rũm kanhêti ho 7 nẽ hamỳ nẽ o xa. Nẽ hakwa rũm wapo pôm kato nẽ akutã wa gixre nẽ ajêt. Nẽ hkuk kamã hirã htỳx kumrêx. Te myt kot mẽ pano hã harir nhũm gêk tỳx pyrãk. ã mễhõja kot anhỹr.

¹⁷ Pa tee ri tanhmã kute hã omu nẽ inhmã ma htỳx kumrêx nẽ umaj tẽm nẽ hpar pê te ixtyk pyrã nẽ nõ. Hãmri nhũm ixtã upôk rũm ìhkraja xi nẽ inhmã kapêr nẽ inhmã:

—Kwa amã ixpuma hkêt nẽ. Pa na pa. Amnepê mã kormã mẽmoj kator kêt ri pa pre raa. Nẽ ixrãhãã. Koja nhỹrmã mẽmoj akupỹm hapêx pa arĩ ixrãhã ixpa ho ixpa.

¹⁸ —Na pa pre ty tã akupỹm ixtĩr. Nẽ ixtĩr o ixtĩr. Kam ixpumu. Kot paj axte ixtyk kêt nẽ. Ixpê mẽhtykjê hpãm jakamã papxipix na pa hte mẽ htyk ã arĩgro jarê nhũm mẽ hã ty nẽ ma mẽhtykjê papxà hwỳr ma pa.

¹⁹ —E kêr ka ate mẽmoj pumunh xwỳnhta pumunh tỳx nẽ akwỳjê mã hã kagã. Nẽ mẽmoj kormã kot amnhĩ nhĩpêx kêt nhũm ate omunh mã xwỳnhta ka inhỹ hã mẽ kãm hã kagã. Mẽ kot kamã harênh nẽ mar tỳx kaxyw.

²⁰ —Nẽ kot paj axte ixprĩ hã ate mẽmoj pumunh xwỳnhta jarê ka inhma. Nã kanê pê 7ta te mẽ kot krĩ hkwỳ pê 7 kamã mẽ kêp ixkwỳ hã axpên wỳr mẽ pikuprõnh xwỳnhjê pyrãk. Nẽ inhĩkra kamã kanhêti pê 7ta te kêp inhmã mẽ kot mẽ hamãr xwỳnhjê pyrãk. Anẽ.

2

Epes kamã Jesus kwỳjê hwỳr kagà

¹Nhũm Jesus arĩ inhmã kapêr nê inhmã:

—E kêr ka krĩ pê Epes kamã ixkwỳjê jamãr xwỳnh wỳr kagà nê amê. Nê kagàja kamã mē kãm ixkapêr jarê nê mē kãm:

Pa Epes kamã ixkapêr mar kaxyw axpên wỳr apikuprõnh xwỳnhjaja. Ot pa mē awỳr ixpêr mē. Ixpê ixupôk o kanhêti ho 7 nê hamỳnh nê ho ixãm xwỳnhhta na pa. Nê ixpê ôr o kanê pê 7 nhĩpôk ri ixpa xwỳnhhta na pa ã mē awỳr ixpêr mēnh anê.

²Na pa hte tanhmã mē ate amnhĩ nhĩpêx to ho apa hã mē apumunh mex o ixpa. Na ka htem inhmã amnhĩ nhĩpêx mex nê pa ja hã mē apumu. Mē kot ixtã mē anhĩpêx kati htã ka mē kutã amnhĩ to htỳx nê ixkaga hkêr nê. Nê mē kot amnhĩ tomnuj xwỳnhjê hkôt amnhĩ nhĩpêx o ri apa hkêr nê. Nhũm ixte mē awỳr mē rēnh ã amnhĩ to hêx xwỳnhjaja mē awỳr pan pôj ka mē aprĩ hã mē kot amnhĩ to hêx ã mē omu. Hãmri nê tee ri mē kot amnhĩ nhĩpêx ã mē omu nê amnhĩ nê mē hanor kurê kumrêx. ãm hãmri na ka htem ã mē hipêx anê.

³Nê mē kãm ixkurê xwỳnhjaja kot tanhmã ixtã mē atomnuj tỳx to htã ka mē kutã amnhĩ to htỳx nê aa ixkaga hkêr nê. Nê ixkôt amnhĩ nhĩpêx mex rãhã ho ri apa. ãm hãmri na ka htem ã amnhĩ nhĩpêx anhỳr o ri apa.

⁴ãm mēmoj pixi na ixpê omnuj. Amnepê mã kormã mē ate ixkôt amnhĩ xunhwỳr nyw ri na ka prem amã axpên kĩnh nê axpên to mex o ri apa. Nê mē amã axpên tã ma ho te mē amã amnhĩ tã ma pyrãk o axpên nhĩpêx. Tã tanhmã ajamaxpêr to nê axte ã axpên nhĩpêx anhỳr kêt nê. Jao te mē amã ixkĩnh kêt pyrãk o amnhĩ nhĩpêx. Pa tee ri ja hã mē apumu nhũm ja inhmã mex kêt nê.

⁵Kwa mē tokyx ja hã amnhĩ pumu nê akupỳm mē ate ixkôt amnhĩ xunhwỳr nyw ri mē ate axpên nhĩpêxta o akupỳm axpên nhĩpêx o apa. Kot kaj mē anhỳr kêt kot paj te mē apê mē anhõ kanê hpyr nê kapôt ã mēnh pyrãk o mē anhĩpêx ka mē ri apa nê gaa nê apikaprãr pa. Tã mēhõ koja mē amỳr pê mē anhõ krĩ kamã mē kãm ijarēnh o pa?

⁶Nê mē kêp Nikoraw nhõ xwỳnhjaja na ka htem mē kot tanhmã amnhĩ tomnuj to hã mē omu nê ixpyrà nê apê ja hprãm nõkati nê mē hkôt ri amnhĩ nhĩpêx kêt nê. Pa ja hã mē apumu nê ixkĩnh nê.

⁷Tã ixte mē amã ixkapêr jatur xà na ja. Kot kaj mē amã ixkapêr mar prãm hã kot kaj mē ã Tĩrtũm mē wa Ixkarõ nhỹ hã ixte mē amã ixkapêr anhỳrja ma nê kãm ajamaxpêr tỳx rãhã ho ri apa.

Tĩrtũm nhõ krĩ kamã mēmo pĩ hpàr kuhê xwỳnh. Mē kot ô hkur nê axte htyk kêt nê pa ho pa mã xwỳnhhta. Kot kaj mē ate amnhĩ tomnuj nê amnhĩ to htỳx nê arĩ inhmã hprãm xà hkôt amnhĩ nhĩpêx rãhã ty pa akupỳm mē ato mē atĩr nê ma pĩ hpàrta wỳr mē arê. Ka mē ma hwỳr mra nê ô hõ hta nê akrê nê axte atyk kêt kumrêx nê apa ho apa.

E ãm ja pix na hapêx. Anê.

—E Juãw. Kêr ka Epes kamã ixkwỳjê jamãr o pa xwỳnhhta wỳr ã ixkapêr ã kagà anê nê mē hwỳr amê. Anê.

Hãmri pa kuma nê ô ri mē kãm hã kagà hpa.

Emĩnã kamã Jesus kwỳjê hwỳr kagà

⁸Hãmri nhũm hpãnhã Emĩnã nhõ xwỳnhjê kaxyw inhmã kapêr nê inhmã:

—Nê hpãnhã Emĩnã kamã ixkwỳjê jamãr xwỳnh wỳr kagà nê mē hwỳr amê. Nê mē kãm ixkapêr jarê nê nê mē kãm:

Pa Emĩnã kamã ixkapêr mar kaxyw axpên wỳr mē apikuprõnh xwỳnhjaja. Ot pa mē awỳr ixpêr mē. Ixrãhã ho ixrãhã ixpa xwỳnhhta na pa. Amnepêm kormã mēmoj piitã hkêr ri na pa pre ixrãhã nê ri ixpa. Kojã nhỹrmã mēmoj akupỳm hapêx pa arĩ ixrãhã ho ixrãhã nê ri ixpa. Na pa pre ty no ãm akupỳm ixtĩr o ixtĩr. Tã pa ã mē awỳr ixpêr mēnh anê.

⁹ Nà na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Na hte mẽ kãm ixkurê xwỳnhjaja ixtã mẽ atomnuj to ka mẽ apê amrakati nê ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwỳnhjê kot amnhĩ nhĩpêx pyrã nê ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwỳnhjaja mẽ ato kapêr punuj rũnh o pa. Mẽ kot Tirtũm kôt amnhĩ nhĩpêx ã amnhĩ jarênh tã no ãm hkôt amnhĩ nhĩpêx kêt nê. ãm Satanasti kôt pix mã na htem amnhĩ nhĩpêx o pa.

¹⁰ Tã mẽ kãm ixkurê xwỳnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu nê tee ri amnhĩ kukamã ajamxpêr kêt nê. Nê arĩ mẽ kutã amnhĩ to htỳx nê. Kojã Satanasti mẽ akwỳjê pynê nê mẽ ajagjê. Hãmri nê mẽ ate ixkaga hprãm xàj tanhmã mẽ anhĩpêx kati hto ka mẽ hãgjenh xã kamã amnhĩ xã htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nê ixkaga hkêt nê. Mẽ kot mẽ apar mã tã ka mẽ kutã amnhĩ to htỳx nê. Kot kaj mẽ aa ixkaga hkêt nê ixkôt ri amnhĩ nhĩpêx rãhã ty pa akupỹm mẽ ato mẽ atĩr nê ma amnhĩ wỳr mẽ ato api. Hãmri ka mẽ Tirtũm mẽ wa ixri amex nê atĩr tũm nê apa ho apa nê axte atyk kêt nê apa.

¹¹ E ixkrajaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapêrja anhỹr ma nê kãm ajamxpêr tỳx rãhã ho ri apa. Kot kaj mẽ ate amnhĩ tomnuj nê amnhĩ to htỳx nê inhmã hprãm xã hkôt pix mã amnhĩ nhĩpêx rãhã ty. Hã kot paj akupỹm mẽ ato mẽ atĩr ka mẽ ma kuwyta wỳr apa hkêt nê.

E. ãm ja pix. Na hapêx. Anê.

—E Juãw. Kêr ka Emĩnã kamã ã ixkrajê mã ixkapêr ã kagã anê. Anê.

Hãmri pa kuma nê ô ri mẽ kãm hã kagã.

Pekamõ kamã Jesus kwỳjê hwỳr kagã

Sikũn Korĩt 6.14–7.1

¹² Nhũm Jesus arĩ inhmã kapêr nê hpãnã inhmã:

—E hpãnã Pekamõ kamã ixkrajê jamãr o pa xwỳnhja wỳr kagã nê mẽ hwỳr amê. Nê mẽ kãm ixkapêr jarê nê mẽ kãm:

Pa Pekamõ kamã ixkapêr mar kaxyw axpên wỳr mẽ apikuprõnh xwỳnhjaja. Ot pa mẽ awỳr ixpêr mẽ. Ixpê ijakwa rũm pôm wapo akutã wa gix nê kator nê ãm xwỳnhta na pa mẽ awỳr ixpêr mẽ.

¹³ Na pa hte mẽ anhõ krĩ nhõ xwỳnhjaja kot tanhmã amnhĩ tomnuj to ho pa hã mẽ omunh mex nê. Mẽ kot Satanasti kôt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyrãk. ãxipas kot mẽ hkôt mẽ kãm ixkapêr o mẽ ahkre ho pa nê aa hkaga hkêt tã nhũm prem axtem nê ixtã kupĩ. Ka mẽ ja hã mẽ omunh tã mẽ umaj ixkaga hkêt nê arĩ ixkôt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anê.

¹⁴ Mẽmoj pixi na ixpê omnuj. Na hte mẽ akwỳjaja axtem nê Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nê amnhĩ xõ ri tanhmã mẽ anhĩgêr mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nê mẽ kãm: “Mẽ mãmrĩ ma sãnti hã mẽ hkĩnh mã xwỳnhjê hkôt mra nê sãnti hã apku nê hã akĩnh. Nê mẽ urãk nê axpên pê axpên prõ ho amnhĩkati nê axpên pê ri axpên mjên o amnhĩkati nê mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêr mã kapêr o pa nhũm mẽ kuma nê mẽ hkôt amnhĩ nhĩpêx. Tã ka mẽ akwỳjaja mẽ urãk nê ã amnhĩ nhĩpêx anhỹr o pa. Kwa ja mex kêt.

¹⁵ Na hte mẽ akwỳjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mããnên mex kêt. ¹⁶ Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nê ãm mẽ omu nê nê tanhmã mẽ kãm akapêr to hkêt nê. Kwa mẽ ate ã amnhĩ nhĩpêx anhỹr xwỳnhjaja. Kêr ka mẽ tokyx ja kaga nê akupỹm ixkôt ri amnhĩ nhĩpêx mex nê. Kot kaj mẽ anhỹr kêt kot paj tokyx mẽ awỳr wrỳ nê te ijakwa rũm pôm wapo kator xwỳnhta o mẽ hkanhwỳr pyrãk o mẽ anhĩpêx. Nom ixkapêr xihtỳx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Nẽ kot kaj mẽ ate amnhĩ tomnuj nê amnhĩ to htỳx nẽ inhmã hprãm xà hkõt amnhĩ nhĩpêx rãhã ty. Hã kot paj akupỹm mẽ ato mẽ atĩr hãmri nẽ ra pam mẽ amã mẽ anhõ ka mẽ hkur o apa. Te amnepêm Ijaew kapõt ã pa nhũm ixte mẽ hwỳr “manã” anhỹr xwỳnhhta rẽnh nhũm mẽ kot hkur o pata pyrãk. Nom ixte mẽ amã mẽ anhõja na hpimxur. ãm papxipix na pa hte mẽ kãm õr o ixpa.

Nẽ kot paj mẽ atã mẽ anhĩxi nyw rẽ. Jao kẽn jakare hkwy hã ahpỹnhã mẽ anhĩxi nyw jaxwỳ nẽ mẽ amã kugõ. Ka mẽ hamỳ nẽ kapxipix amnhĩ nhĩxi nyw pumunh o apa.

E ãm ja pix. Na hapêx. Anẽ.

—E Juãw. Kêr ka Pekamõ kamã ixkrajê hwỳr ã ixkapêr anhỹr ã kagà nẽ mẽ hwỳr amẽ. Anẽ.

Hãmri pa kuma nẽ ô ri mẽ kãm hã kagà.

Xijaxir kamã Jesus kwỳjê hwỳr kagà
Jutre 3-23

¹⁸ Nhũm Jesus arĩ inhmã kapêr nẽ inhmã:

—E hpãnhã Xijaxir kamã ixkwỳjê jamãr xwỳnh wỳr kagà nẽ amẽ nẽ mẽ kãm ixkapêr jarẽ nẽ mẽ kãm:

Pa Xijaxir kamã ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Ixpê Tĩrtũm Kra na pa. Ixpê inhno te kot kuwy hpõk karỳr tỳx pyrãk xwỳnhhta na pa. Nẽ ixpê ixpar te kot kàx karỳr tỳx pyrãk xwỳnhhta na pa mẽ awỳr ixpêr mẽ.

¹⁹ Na pa hte mẽ ate amnhĩ nhĩpêx kõt mẽ apumunh mex o ri ixpa. Na ka htem amnhĩ kaxyw inhmã ajamaxpêr pẽ inhmã amnhĩ to mex o ri apa. Mẽ akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tỳx kãm tanhmã amnhĩ nhĩpêx to ho ri apa. Nẽ axpẽn to mex nẽ ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mẽ ate ixkõt amnhĩ nhĩpêxta jakre. Nà ja inhmã mex kumrêx.

²⁰ ãm mẽmoj pixi na ixpê omnuj. Mẽ akõt niti ri pa xwỳnh Jejapewtita. Kêp Tĩrtũm nhỹ hã kapêr jarẽnh o pa xwỳnh ã amnhĩ to hêx xwỳnhhtita. Na hte ixkapêr kupa hã tanhmã mẽ ajahkre hto ka htem ama nẽ nê tanhmã kãm nẽ hkêt nẽ. Na hte mẽ amã: “Xê mẽ mãmri ri mẽ hkuprỳjê hwỳr mra nẽ mẽ ho amnhĩkati. Nẽ axpẽn pẽ mẽ aprõ nẽ mẽ amjên o amnhĩkati. Nẽ mẽ kot sãnti hã mẽ hkĩnh nẽ hã apkur xwỳnhjê hkõt mra nẽ mẽ hkõt amnhĩ nhĩpêx. Tĩrtũm kãm ja mex kênã.” Anhỹr o mẽ amã kapêr o pa. Nẽ inhmã ja mex ã ijarẽ nom inhmã ja mex kêt. Tã ra mẽ akwỳjaja kapêr ma nẽ hkõt amnhĩ nhĩpêx ka mẽ ja hã mẽ omunh tã amnhĩ nê nitita janor kêt nẽ nhũm arĩ ri mẽ amã hêx o ri mẽ akõt pa. ²¹ Ra kot ã amnhĩ nhĩpêx anhỹr o mẽ akõt pa ry rax kumrêx tã pa kormã ja hã tanhmã ho hkêt nẽ kormã amnhĩ tã hamã. Kot ã amnhĩ nhĩpêx anhỹr kaga kaxyw na pa kormã hamãr o ri ixpa. No nhũm aa hkaga hkêt nẽ.

²² Mỳrapê kot paj tokyx tanhmã ho nhũm amnhĩ xà htỳx kamã hamak o hikwỳ. Tã mẽ kot kapêr mar nẽ hkõt amnhĩ nhĩpêx xwỳnhjaja kot amnhĩ tomnuj ã amnhĩ pumu nẽ hkaga hkêt hã kot paj mã mẽ ho anẽ nẽ. Mããnẽn tanhmã mẽ homnuj to nhũm mẽ nitita pyrã nẽ amnhĩ xà htỳx kamã hamak o hikwỳ.

²³ Nẽ nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nẽ ixte mẽ apiitã ahpỹnhã tanhmã mẽ ajamaxpêr to hkõt mẽ apumunh ã ixpumu. Nẽ ixte ahpỹnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xà hkõt tanhmã mẽ anhĩpêx to hã ixpumu.

²⁴ Na hte mẽ akwỳjaja akwỳjê rom nita kapêr ma nẽ ãm kuma nẽ hkõt amnhĩ nhĩpêx kêt nẽ. Nẽ mẽ kapêrja mẽ kot kãm: “Satanasti kapêr pimxur” anhỹr xwỳnhhta kõt nhũm mẽ amnhĩ nhĩpêx kêt nẽ. Na htem ixkõt pix mã amnhĩ nhĩpêx mex o ri pa. Tã ã mẽ ate ixkõt amnhĩ nhĩpêx anhỹr o apa xwỳnhjaja kot paj mẽ amã ja pix ã karõ ka mẽ

inhma. ²⁵ Kêr ka mẽ arĩ ixkôt pix mã amnhĩ nhĩpêx o ri apa rãhã pa akupÿn mẽ awÿr wrÿ. ãm ja pix ã kot paj mẽ amã karõ.

²⁶ Nê kot kaj mẽ ate amnhĩ tomnuj nê amnhĩ to htÿx nê arĩ inhmã hprãm xà hkôt amnhĩ nhĩpêx rãhã ty. Hãmri pa ja hã mẽ apumu nê nhÿrmã mẽ ate krĩ hkwÿ hkôt mẽ pa xwÿnhjê ho amnhĩptàr o apa kaxyw mẽ axunhwÿ. Ka mẽ apê mẽ õ pahшти nê inhmã mẽ ho amnhĩptàr o ri apa.

²⁷ Na pre Inhĩpêxà ixte pika piitã hkôt ri mẽ pa xwÿnhjê ho amnhĩptàr kaxyw ixãm. Tã kot paj nhÿrmã amnhĩ pyrã nê mẽ kaxyw mẽ axunhwÿ ka mẽ inhmã mẽ hamãr o apa.

Nhũm mẽhõ ixkapêr kwÿm ri tanhmã amnhĩ nhĩpêx to ka mẽ ja hã omu nê hã tanhmã ho. Te mẽ kot poti punuj mÿnh nê mẽnh nê hkrakrak pyrãk.

²⁸ Kot paj ã mẽ ate mẽ hipêx anhÿr o apa kaxyw mẽ axunhwÿ. No ãm ja pix kêt. Kot paj te ixte mẽ amã kanhêti hõ nhõr pyrãk o mẽ anhĩpêx. Arĩgro hkôt kanhêti no hpõk rax japõx xwÿnhta kot paj te ixte mẽ amã õr pyrãk ka mẽ ixri atĩr tũm nê apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa. Anê.

—E Juãw. Kêr ka ã Xijaxir kamã ixkrajê kaxyw ixkapêr ã kagà nê mẽ hwÿr mẽnh anê. Anê.

Hãmri pa kuma nê õ ri mẽ kãm hipêx nê mẽ hwÿr kumê.

3

Satre kamã Jejus kwÿjê hwÿr kagà

Rukre 12.35-40

¹ Nhũm Jejus arĩ inhmã kapêr nê inhmã:

—E hpãnhã Satre kamã ixkwÿjê jamãr xwÿnh wÿr kagà nê mẽ kãm ixkapêr jarê nê mẽ kãm:

Pa Satre kamã ixkrajaja. E ot pa mẽ awÿr ixpêr mẽ. Ixpê inhĩhkra ho kanhêti pê 7 jamÿnh nê xãm xwÿnhta na pa. Nê ixpê inhĩhkra ho Tĩrtũm Karõ ãm pyxi htã te kamã kêp 7 jamÿnh nê ho ixãm xwÿnhta na pa mẽ amã ixkapêr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot xepên mã mẽ ate ixkôt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhÿr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nê mẽ anhĩkwÿ pyrãk.

² Na ka htem ãm akrãnh mã ixkôt ri amnhĩ nhĩpêx nom Tĩrtũm mẽ wa ixkôt amnhĩ nhĩpêx mex kêt nê. Ra Tĩrtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nê ate amnhĩ tomnuj mã anhÿre nê wa ixkôt amnhĩ xunhwÿr tÿx nê.

³ Kêr ka mẽ amnepê mã kormã mẽ ate ixkôt amnhĩ nhĩpêx nyw ri mẽ kot ixkapêr o tanhmã mẽ ajahkre htoja mã ajamaxpêr nê amnhĩ tomnuj mã anhÿre. Nê ixkapêr kôt pix mã mãn amnhĩ nhĩpêx o ri apa. Kot kaj mẽ anhÿr kêt kot paj nhÿrmã mẽ ajaêr pê akupÿn mẽ awÿr wrÿ nê ja hã tanhmã mẽ ato.

⁴ ãm mẽ agrêre nê amã ixkôt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwÿnhjê hkôt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyrãk. Tã kot kaj mẽ nhÿrmã ixri mẽ axê jakare kamã apa ho apa. Ra mẽ ate ja ho anhÿr mã tãm kênã. Ja na Tĩrtũm kãm hprãm.

⁵ Nê krĩ piitã hkôt mẽ ate amnhĩ tomnuj nê amnhĩ to htÿx nê inhmã hprãm xà hkôt amnhĩ nhĩpêx rãhã atyk xwÿnh piitã kot ka mẽ nhÿrmã Tĩrtũm mẽ wa ixri amex nê atĩr tũm nê apa ho apa. Ra mẽ hixija Mëpahpãm Maati nhõ kagàja kamã na. Kamã mẽ atĩr o mẽ atĩr mã xwÿnhjê nhĩxi piitã hã kagà. Kot paj kagàta kamã aa mẽ anhĩxi grãnh kêt nê. Hãmri nê Inhĩpêxà mẽ kapêr o mẽ wÿyk xwÿnhjê mã mẽ ajarênh o: “E mẽ jajê pumu. Ixkwÿ na mẽ.” Anhÿr o mẽ kãm mẽ ajarê.

⁶ E ixkwỳjaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Tã ãm ja pix. Na hapêx. Anẽ.

—E Juãw. Kêr ka ã Satrejê mã ixkapêr ã kagà nẽ mẽ hwỳr mẽnh anẽ. Anẽ.

Hãmri pa kuma nẽ ô ri mẽ kãm hã kagà.

Pirate kamã Jesus kwỳjê hwỳr kagà
Wam Tesarõn 2.13-16

⁷ Nhũm Jesus arĩ inhmã kapêr nẽ inhmã:

—E hpãnhã Pirate kamã ixkwỳjê jamãr xwỳnh hwỳr kagà nhĩpêx nẽ amẽ nẽ mẽ kãm ixkapêr jarẽ nẽ mẽ kãm kãm:

Pa Pirate kamã mẽ ate ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Inhmex o inhmex xwỳnh na pa. Aa ixêx kêt nẽ ixpa xwỳnh. Amnepê mã na pre mẽhõja pahi Tawi mã õrkwỹ mex ã saf jamãr o pa. Tã pa hte urak nẽ Inhĩpêxã Tirtũm nhõ krĩ hwỳr mẽ gjêx xà hã saf jamỹ nẽ ho ixpa. ãm papxipix inhõ saf jakamã papxipix na pa hte mẽ ate ixkõt amnhĩ xunhwỳr xwỳnhjaja mẽ agjêx kaxyw mẽ amã kahê xà rẽ nẽ ixkra hkêt xwỳnhjê pê kahê. Kot paj mẽ apê ixkrajê mã kahê xà rẽ ka mẽ hwỳr agjê. Hãmri pa mẽ atã kahê nhũm ixkra hkêt xwỳnhjaja tee ri kãm mẽ akõt gjêx prãm kaprỹ.

⁸ Na pa hte tanhmã mẽ ate amnhĩ nhĩpêx to ho apa hã mẽ apumunh mex o ri ixpa. Mẽ agrêre htã na ka htem ixkapêr kõt amnhĩ nhĩpêx mex nẽ aa ixkaga hkêt nẽ. Jakamã kot paj te ixte mẽ amã Tirtũm nhõ hakwakre kahê xà mẽnh pyrak o mẽ anhĩpêx ka mẽ axãmnhĩx ajamakêtkati nẽ ma mẽ kãm Tirtũm kapêr o mẽ ahkre ho ri mẽ hkõt apa. Nhũm mẽ hkwỳjaja tee ri ã mẽ ate amnhĩ nhĩpêx anhỹrja nẽ mẽ amã kapêr kaprỹ ka mẽ arĩ ho mẽ ahkre ho ri mẽ hkõt apa.

⁹ Nẽ mẽ anhõ krĩ kamã mẽ akwỳjaja na prem ra Satanasti hkõt amnhĩ xunhwỳ nẽ hêx rom mẽ amã amnhĩ to hêx nẽ mẽ amã: “E mẽ ixpê Ijaew mex jakamã kwa mẽ ixkapêr ma nẽ mẽ ixkõt amnhĩ nhĩpêx.” Anhỹr o mẽ amã karõ htã no ãm mẽ kot Satanasti hkõt amnhĩ nhĩpêx xwỳnh na mẽ. Tã kot paj nhỹrmã tanhmã mẽ homnuj to nhũm mẽ tee ri amnhĩ pumu nẽ akupỹm mẽ awỳr mra nẽ mẽ akutã hkõnkrã ho rôrõk nẽ hkrĩ nẽ mẽ amã: “Nà mẽ kajaja na ka pêr mẽ ixrom Jesus kõt amnhĩ nhĩpêx. Mãn kãm mẽ ajapêê.” Anẽ.

¹⁰ Mẽ kot ixtã mẽ atomnuj tỳx nhũm mẽ ate amnhĩ xà htỳx kamã ajamak tã aa mẽ umaj ixkaga hkêt nẽ. Nẽ arĩ ixte mẽ amã mẽmoj tã karõ xà hkõt mẽ kutã amnhĩ to htỳx rãhã arĩ ixkõt ri amnhĩ nhĩpêx o apa. Jakamã mẽ kot nhỹrmã mẽ kãm ixkurê xwỳnhjaja pika piitã hkõt tanhmã mẽ homnuj tỳx to nhũm mẽ amnhĩ xà htỳx kamã ama. Tã kot paj mẽ anê mẽ omunh mex nẽ nhũm mẽ tanhmã mẽ ato hkêt nẽ ka mẽ amex nẽ ri apa ho apa.

¹¹ E kot paj tokyx akupỹn mẽ awỳr wrỹ nẽ mẽ ate ixkõt pix mã amnhĩ nhĩpêx ã mẽ ato mex rax kumrêx. Jakamã kwa mẽ mãmri ã amnhĩ nhĩpêx anhỹr o inhmã hprãm xà hkõt pix mã amnhĩ nhĩpêx rãhã ty. Kot ka mẽ anhỹr kêt kot pa mẽ amã mẽmoj mex nhõr kêt nẽ.

¹² Nẽ kot kaj mẽ kot amnhĩ tomnuj xwỳnhjê kutã amnhĩ to htỳx nẽ inhmã hprãm xà hkõt pix mã amnhĩ nhĩpêx rãhã ty. Hã kot paj amnhĩ kõt mẽ ato mẽ axihtỳx nẽ ka mẽ aa ixkaga hkêt nẽ. Nẽ kot paj nhỹhỹnh mẽ atã mẽ inhĩxi ho axkrunêpxi nẽ haxwỳ. Inhĩpêxã nhĩxi nẽ inhĩxi nyw nẽ Inhĩpêxã nhõ krĩ nhĩxija kot paj nhỹhỹnh mẽ atã haxwỳ. Tirtũm nhõ krĩ mẽ kot kãm: “Jerujarê nyw” anhỹr xwỳnhhta koja nhỹrmã tanhmã amnhĩ to nẽ ra kaxkwa rũm pika wỳr wrỹ.

¹³ E ixkwỳjaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Tã ãm ja pix. Na ra hapêx. Anẽ.

—E Juãw. Kêr ka ã Pirate kamã ixkrajê mã ixkapêr ã kagà anẽ. Anẽ.

Hãmri pa kuma nẽ ô ri mẽ kãm hã kagà.

Raxisej kamã Jesus kwỳjê hwỳr kagà

¹⁴ Nhũm pre Jesus arĩ inhmã kapêr nê inhmã:

—E hpãnhã krĩ pê Raxisej kamã ixkrajê jamãr xwỳnh wỳr kagà nhĩpêx nê amê. Nê mê kãm ixkapêr jarênh o:

Pa Raxisej kamã ixkrajaja. Ot pa mê awỳr ixpêr mê. Âm hãmri ixkapêr o ixpa nê aa ixêx kêt xwỳnhhta na pa. Jakamã âm hãmri na pa hte Tĩrtũm kapêr o mê ajahkre o ixpa nê aa ja kaga hkêt nê. Pa na ixpê mẽmoj piitã hpàr krax.

¹⁵⁻¹⁶ Na pa hte mê ate tanhmã amnhĩ nhĩpêx to ho apa hã mê apumunh rãhã ho ixpa. Kop apu mê ate ixkôt amnhĩ nhĩpêx mex ronhỹx pa ja hã mê apumu nê ixkĩnh nê. Nom mê ate ã amnhĩ nhĩpêx anhỹr kêt. No mãânên aa ixkaga hkêt nê. Na ka htem ri atỳx amnhĩ krã hkôt pix mã tanhmã amnhĩ nhĩpêx to ho apa nhũm ja ixpê omnuj nê. Kot kaj mê arĩ ã amnhĩ nhĩpêx anhỹr o apa pa hpãnhã amnhĩ nê mê akurê. Te mê kot gô xenh nōkati janhir nê tee hkakinh nê akupỳm hkapĩr pyrãk.

¹⁷ Mê ate inhmã hprãm xà hkôt amnhĩ nhĩpêx ã amnhĩ jarênh tã ã amnhĩ nhĩpêx anhỹr kêt nê. Nê ixkapêr mar tỳx nê amnhĩ kaxyw inhmã ajamaxpêr mex kêt nê.

¹⁸ Kwa mê tokyx ja hã amnhĩ pumu nê akupỳm ixkôt amnhĩ xunhwỳr tỳx nê. Kêr pa ja hã mê apumu nê amnhĩ katut kôt mê ate amnhĩ tomnuj rê nê tanhmã mê akrã hto ka mê inhnoo mã tãm amnhĩ nhĩpêx mex o ri apa. Hãmri pa mê amã tanhmã amnhĩ to amnhĩrit to ka mê aprĩ hã ixte amnhĩ nhĩpêx ã ixpumunh mex nê ixkôt amnhĩ nhĩpêx mex rãhã o ri apa.

¹⁹ Xà inhmã mê ajapê hkêt ã na pa ã mê amã ixkapêr anê? Nà inhmã mê apiitã mê ajapê htỳx kênã. Nom inhmã mê ajapê htã ka htem ixkôt amnhĩ nhĩpêx kêt nê. Na pa tee ri amnhĩ tã mê apumu nê ja hã tanhmã mê atomnuj tỳx to. Tokyx mê ate amnhĩ tomnuj mã anhũrer nê hpãnhã tãm amnhĩ nhĩpêx kaxyw. Jakamã kwa mê tokyx ate amnhĩ tomnuj kaga nê akupỳm amnhĩ kaxyw inhmã ajamaxpêr ho ri apa.

²⁰ Na htem hkwyjê nhōrkwy hwỳr gjêx kaxyw hakwa krem kãm àkjêr o kuhê nhũm mê kuma nê mê kãm anê nhũm mê hwỳr agjê. Nê mê ixkre hkre kamã axpên mã kapêr o hkrĩ rỳ axpên mã kapêr pê mẽmoj to hkôm o hkrĩ. Ja pyrã nê ot pa mê ajamãr o ixpa. Mê ate inhmã anhỹr nhũm ixte mê akôt ixpa ho ixpa nhũm mê pahte axpên to mex o papa kaxyw.

²¹ Kormã mê kot ixpĩr kêt ri na pa pre mê kot amnhĩ tomnuj xwỳnhjê kutã amnhĩ to htỳx o ixpa. Amnhĩ to htỳx nê ri ixpa kamã ixyk jakamã nhũm Inhĩpêxà akupỳm ixto ixtĩr nê akupỳm amnhĩ wỳr ixto api. Hãmri nê amnhĩ nhĩhkô hã mê ho amnhĩptàr ã hkrĩ xà kamã inhỹr pa ixkrĩ ho ixkrĩ nê ãhkô hã mê piitã mê ho amnhĩptàr o ixkrĩ. Tã kot kaj mê atō ixpyrà nê ate amnhĩ tomnuj nê amnhĩ to htỳx nê. Nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrã nê wa ixte mê ato amnhĩptàr ã ixkrĩ xàja kamã amnhĩ nhĩhkô hã mê akrĩ ka mê wa inhĩhkô hã wa inhmã mê ho amnhĩptàr o akrĩ.

²² E ixkwỳjaja. Kot kaj mê amã ixkapêr mar prãm hã kot kaj mê ã Tĩrtũm mê wa Ixkarō nhỹ hã ixte mê amã ixkapêr anhỹrja ma nê kãm ajamaxpêr tỳx rãhã ho ri apa.

Tã âm ja pix. Na hapêx. Anê.

—E Juãw. Kêr ka Raxisej kamã ixkrajê mã ixkapêr ã kagà nê mê hwỳr amê. Nê kagàja piitã krĩ hkwy kamã ahpỳnhã ixkwỳjê hwỳr arê kê mê kamã harê nê ixkapêr ma. Anê.

Nhũm pre ã Jesus inhmã kapêr anê. Pa kuma nê ô ri mê piitã mê kãm hã kagà hpa.

4

Tĩrtũm kot mê ho amnhĩptàr ã hkrĩ xà jarênh

¹ Tã pa axte mẽmoj pumu nhũm kaxkwa hwỳr mê gjêx xà hã hakwakreja amnhĩ kahê xà mê pa omu. Hãmri nhũm axte mēhō kapêr tỳx xwỳnhhta. Te kot pifti kakōr tỳx pyrãk xwỳnhhta axte inhmã kapêr nê inhmã:

—E amnê ixwỳr api pa mẽmoj nhỹrmã kot tanhmã amnhĩ nhĩpêx to hkukamã amã ho amnhĩrit ka omu. Anê.

² Hāmri nhūm Tīrtūm Karō tanhmā ixto nē ixto api pa kaxkwa kamā mēmoj pumunh o xa. Tīrtūm kot mē ho amnhīptār ā hkrī xà maatita pa pre omu. Nhūm kamā mēhōja nhỹ. ³ Kuk kamā hirā htỳx kumrēx. Te mēmo kēn kamrēk karỳr jaxēnh tỳx pyrāk. Nē kot mē ho amnhīptār ā hkrī xà puhā màxwỳxti grāgrāreja kām hipôk nē harir pa omunh o xa.

⁴ Nhūm hkrī xà maati puhā mē ho amnhīptār o hkrī xà kēp 24. Kamā mē àptār tūmjaja hkrī. Mē piitā ôr o mē ahkà htu nē ê jakare nē hkrī.

⁵ Nē Tīrtūm hkrī xà maatija rūm na katōtōk nē hkrakrak nē haxēnh japà nē hikwỹ. Nē hkrī xà kapem kanē maati pixi kamā kwrỳt pē 7ja pōk rāhā ho kuhê. Kanēja te Tīrtūm Karō pyrāk.

⁶ Nē hkrī xà kapem mēmo te gô rax pyrākja hkarỳr jaxēnh tỳx kumrēx nē nō. Te ho kàx karỳr jaxēnh tỳx pyrā nē hkarỳȳre. Nē hkrī xà puhā mēmoj tīr nē kuhê pē kwat kuhê. Nē ôkwa nē katut piitā hkôt no. Am no xohtô rax kumrēx. Na pre ā mēmoj kēp kwatja no xohtô anē pa omu.

⁷ Wamta te kot mry pē rēawti pyrāk. Nē hkôt ja te kot môx myti pyrāk. Nē hapu hā hkuk te panhī hkuk pyrāk. No hapu hā ja te kot ààn Hàhti htor kaxyw hara koror pyrāk.

⁸ Nē piitā hara kēp 6. Nē ĩ piitā kamā no. Nhūm prem Tīrtūm mā mex o mex ā grer rāhā ho kuhê nē aa pinhkrēnh kêt nē. Nē kām grer o:

Amex o amex Tīrtūm.

Nē axihtỳx o axihtỳx.

Nē aa ate amnhī tomnuj kêt kumrēx.

Amnepê mā kormā mēmoj kêt ri ka ra arāhā ri apa. Tā arī arāhā ri apa xwỳnh na ka.

Kot kaj aa ajapêx kêt nē.

ām hāmri na ka hte mē ixto mex rāhā ho apa.

Nē amex o amex Tīrtūm. Anē.

⁹⁻¹⁰ Nhūm prem xatā mē ho amnhīptār hkrī xà kamā hkrī xwỳnhja mē kot kām “Rāhā pa xwỳnh” anhỹr xwỳnhhta mā ā grer anhỹr o kuhê. Kām mex o mex ā grer pē tanhmā kot mē ho mex to hā harē. Hāmri nhūm mē àptār tūm pē 24jaja määnēn kutā hkôn krā ho rôrôk nē hipô hpa nē hkrī. Nē amnhī krā rūm ôr o mē ahkàja kwrỳ nē hpar pē haxwỳ. Kēp mē ô Pahi Maati hā hā hpijaàm kaxyw wamtajê pyrā nē mex o mex ā harēnh o hkrī nē kām:

¹¹ ām hāmri na pa htem amex o amex ā ajarē Tīrtūm

Apê mē inhō Pahi Maati na ka.

Nē apê mē inhō Tīrtūm na ka.

Na ka pre mēmoj piitā ho akato. Axàhpumunh tỳx nē ajamaxpēr tỳx o mēmoj piitā amā hprām xà hkôt ho akator pa.

Jakamā na pa htem ā amex o amex ā ajarēnh anē. Mē ixrom axihtỳx mex kumrēx na ka hte apa Tīrtūm. Anē.

5

Mē pahte amnhī tomnuj pānhā amnhīrer xwỳnh jarēnh

Juāw 1.29; Piripos 2.5-11

¹ Tā pa pre arī te kaxkwa kamā mēmoj pumu. Mē ho amnhīptār ā hkrī xà maatita kamā hkrī xwỳnh nhīhkra kamā kagà pa omunh o xa. Upôk rūm omu. No am axtem kagà kaxkep na pre. Nē akutā hā kagà nē menh ê ho ho htỳx xàja kēp 7.

² Hāmri nhūm Tīrtūm kapēr o wrỳk xwỳnh xihtỳx xwỳnhja kapēr tỳx kām kapēr o: —E mē atō na ate kagà mũj pyr nē ho htỳx xà hpôt mā tām? Anē.

³ Hāmri nē tee ri mē piitā mē hkapi nom nhūm ja kaxyw mēhō amrakati kumrēx. Kaxkwa kamā amrakati nē pika kamā määnēn amrakati nē pika hkrak ri amrakati. Nhỹri mēhō kot kagà kaxkepta pyr nē hpôt nē omunh mā tām xwỳnhja amrakati ho amrakati.

⁴ Nhūm tee ri mēhō japēr nom mēhō pumunh kêt nē. Pa tee ri ja hā omu nē ixkaprī htỳx nē inhmỳr o xa.

⁵ Hāmri nhūm pahi hōja ixpumu nē inhmā:

—Kwa amÿr kêt nê. E mēhō mÿj pumu. Juta kanrēhā htāmnhwÿ xihtÿx xwÿnhhta. Pahi Tawi kanrēhā htāmnhwÿ te kēp mry pē rēāw xihtÿx pyrāk o hihtÿx xwÿnh mÿj pumu. Kot mē kām hkurē xwÿnhjē kutā amnhī to htÿx nē mēmoj punuj piitā ho hapēx kaxyw mā xwÿnh jakamā tapxipix na kot kagāta hpyr nē ho htÿx xā hpôt par mā tām. E ka omu. Anē.

⁶ Hāmri pa kuma nē hwÿr rīt nē Jejusja pumu. Kot mē pahte amnhī tomnuj pānhā amnhīrer xwÿnhhta mē ho amnhīptār o hkrī xā maati kapem xa. Mēmoj htīr pē kwat mē àptār tūm pē 24jē nhīpōk ri xa. Mē kām hkurē xwÿnhjaja kot hpīr nhūm ra akupÿm htīr nē xa. Nom ra axtem nē xa. àhpumunh tÿxja te kot pahi xāhpumunh pyrāk. Nē hpar kēp 7. Nē no määnēn kēp 7. Noja te Tīrtūm Karō pyrā nē kēp pika piitā hkôt pa xwÿnh. Ā Jejusja axtem nē ām anē pa omu.

⁷ Hāmri nhūm mē pahto amnhīptār o hkrī xwÿnhhta wÿr tē nē īhkra kamā kēp kagā kaxkepta py.

⁸ Hāmri nhūm mē htīr pē kwat mē mē àptār tūmjaja hpar pē hkōn krā ho rôrōk nē hkrī hpa nē hipō nē hkrī. Piitā wiorāwti jamÿ nē ôr o xijere kamā mēhkuxwa xā jamÿ nē o hkrī. Nhūm Tīrtūm krajaja Tīrtūm mā tanhmā amnhī jarēnh to nhūm mē mar o hkrī. Te xijere kamā mēhkuxwa xā hpār o hkrī pyrā nē mē kuma.

⁹⁻¹⁰ Jakamā nhūm mē hkōn krā ho hkrī xwÿnhjaja mē pahte amnhī tomnuj pānhā amnhīrer xwÿnhhta kutā kām grer o hkrī. Mē grer nyw o kām gre nē kām: Na prem apī ka atyk o mē piitā mē kot amnhī tomnuj pānhā amnhīrer pa. Ahpÿnhā pika piitā hkôt mē urojē piitā hpānhā amnhīrer pa. Nē ahpÿnhā ri mē kapēr xwÿnh kwÿjē piitā mē hpānhā amnhīrer pa. Atyk o mē kot amnhī tomnuj piitā hpānhā amnhīrer pa.

Jakamā nhūm mē kot akôt amnhī xunhwÿr xwÿnhjaja kēp Tīrtūm kra nē ri pa. Ka ra mē panhō Tīrtūm mā mē kēp patre kaxyw mē unhwÿ nhūm htem pika piitā hkôt mē ho amnhīptār o pa.

Tā atyk o ate pika piitā hkôt mē hpānhā amnhīrer jakamā kapxipix na ate kagāta pyr nē ho htÿx xā hpôt mā tām. Anē.

¹¹ Hāmri nhūm Tīrtūm kapēr o mē wÿrk xwÿnhjaja nhÿhÿnh hapōj nē kuhê. Mē ohtō rax o ohtō rax. Ohtō rax o mē pajamaxpēr jakrenh. Hāmri nē Tīrtūm kot mē ho amnhīptār ā hkrī xā maatija wÿr mra nē kām hipōk pa. Nē mēmoj tīr nē kuhê xwÿnhjē mē mē àptār tūmjē mā hipōk pa nē mē pahte amnhī tomnuj pānhā amnhīrer xwÿnhhta mā kapēr.

¹² Kax pē kām kapēr nē kām:

Ām hāmri na pa htem amex o amex ā inhgrer o ixkuhê.

Mē ixrom axihtÿx o axihtÿx.

Nē mēmoj piitā anhōō.

Nē ate mēmoj piitā hkukamā axāhpumunh par.

Nē amex o amex jakamā na pa htem amā amex pix ā inhgrer o ri ixpa. Anē.

¹³ Tā nhūm mēmoj piitā Tīrtūm mē Jejus wa kām wa mex o wa mex ā harē. Pika hkôt panhī nē mry nē àk nē mēmoj piitāā. Nē pika hkrak ri nē gō hkrak ri mēmoj piitāā. Nē mē htykjaja. Nhūm mē piitā wa kām wa mex o wa mex ā wa harē nē wa kām:

E ate mē ixto amnhīptār ā akrī xā kamā akrī xwÿnh mē kot mē ixte amnhī tomnuj pānhā amnhīrer xwÿnh mē war amex o wa amex.

Nē war axihtÿx o war axihtÿx.

Nē war axāhpumunh o war axāhpumunh.

Na pa htem ā war ajarēnh anhÿr rāhā ixpa ho ixpa. Anē.

¹⁴ Hāmri nhūm mēmoj tīr pē kwatjaja mē kuma nē mē kām:

—Nā ām hāmri na ka mē ā wa harēnh anē.

Wa mex o wa mex kumrēx. Anē.

Hāmri nhūm mē àptār tūmjaja Tīrtūm mē Jejus wa hpar pē hkōn krā ho rôrōk nē hkrī hpa nē haxwÿja wa kām wa mex o wa mex ā wa harē.

6

Kagà ho htỳx xà pè 7 jarēnh

Matēwre 24.3-14; Sikūn Tesarōn 2.3; Wam Juāw 2.18

¹ Tã pa arī kaxkwa kamã mẽ pahte amnhĩ tomnuj pãnhã amnhĩrer xwỳnh kot tanhmã amnhĩ nhĩpêx to hã omunh o xa. Nhũm kagà kaxkepta py nẽ wam ho htỳx xà pôt. Hãmri nhũm mẽmo tĩr pè kwatjê hõja kapěr tỳx kumrēx. Te na katõtök tỳx pyræk o mēhõj mã kapěr nẽ kãm:

—E amnẽ mẽ ixwỳr tẽ. Anẽ.

² Hãmri nhũm kawar jakajre nhỹhỹnh hwỳr hpôx o tẽ. Nhũm mēhõja õ kuxê mỳ nẽ hã nhỹ nẽ tẽ. Hãmri nhũm nhãm mēhõja hwỳr tẽ nẽ kãm pahi hã mẽ ahkà htu. Hãmri nẽ kãm tanhmã kapěr to nhũm kuma nẽ mẽ kot kãm Tĩrtũm mẽ Jesus wa kurê xwỳnhjê nhĩmex par kaxyw hakēx nẽ ma pika hwỳr tẽn wrỳ.

³ Hãmri nhũm mẽ pahte amnhĩ tomnuj pãnhã amnhĩrer xwỳnhja wam kagà ho htỳx xàta kôt axte ja pôt. Hãmri nhũm mẽmoj tĩr pè kwatjê hõja axtem mēhõj mã kapěr nẽ kãm:

—E amnẽ mẽ ixwỳr tẽ. Anẽ.

⁴ Hãmri nhũm kawar kamrêk mẽ hwỳr hpôx o tẽ. Nhũm mēhõ hã nhỹ nẽ tẽ. Nhũm nhãm mēhõja kãm wapo gõ nẽ ma pika hwỳr htēm nẽ wrỳk kaxyw hano. Kot hwỳr wrỳk nẽ pikap mẽ pa xwỳnhjê kurê huk kaxyw. Mẽ kot axpẽn par kaxyw ma mẽ hwỳr kumẽ. Hãmri nhũm kuma nẽ wapota py nẽ hakēx nẽ ma mẽ hwỳr tẽn wrỳ.

⁵ Hãmri nhũm mẽ pahte amnhĩ tomnuj pãnhã amnhĩrer xwỳnhja kagà ho htỳx xà hõ pôt. Na pre ra ho axkrut nẽ hpôt tã hpãnhã axte hkôt ja pôt. Hãmri nhũm mẽmoj tĩr pè 4jê hõta mēhõj mã kapěr nẽ kãm:

—E amnẽ mẽ ixwỳr tẽ. Anẽ

Hãmri nhũm kawar tykre mẽ hwỳr hpôx o tẽ. Nhũm hã ỹr xwỳnhja mẽmoj to peja xà hã parãs mỳ nẽ o tẽ.

⁶ Hãmri nhũm mẽ htĩr pè kwatjê rũm mēhõja kãm kapěr nẽ kãm:

—E kêr ka ma pika hwỳr mẽ hwỳr tẽn wrỳ nẽ mẽ kãm myt pyxi kamã mẽ àpēnh pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm õr o apa. Nom mẽ apkur xà hã orti nẽ wĩhti ka mẽ kêp tanhmã ho hkêt nẽ. Anẽ.

Hãmri nhũm kuma nẽ hakēx nẽ ma tẽn mẽ hwỳr wrỳ.

⁷ Tã nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho axkrunēpxi nẽ hpôt tã hpãnhã axte hkôt ja pôt. Hãmri nhũm mẽmoj tĩr pè kwat kot hitep xwỳnhja mēhõj mã kãm:

—E amnẽ mẽ ixwỳr tẽ. Anẽ.

⁸ Hãmri nhũm kawar rãrãare mẽ hwỳr hpôx o tẽ. Nhũm mēhõ hã nhỹ nẽ tẽ. Hã ỹr xwỳnh nhĩxi na pre kêp “Mēhtyk” anẽ. Hãmri nhũm mēhõja kãm kapěr nẽ kãm:

—E ma pika hwỳr wrỳ nẽ tanhmã mẽ ho kê mẽ ohtô nẽ tanhmã amnhĩ to nẽ axkaprã. Kê mẽ hkwyjaja pijapu kamã axpẽn pa nẽ mẽ hkwyjaja prãm xàj ty nẽ mẽ hkwyjaja tanhmã à htỳx kute kamã ty. Nẽ mẽmo mry xoprēja mẽ hkwyjê pa. E ma mẽ hwỳr wrỳ nẽ tanhmã mẽ ho ho apa. Anẽ.

Hãmri nhũm kuma nẽ hakēx nẽ ma pika hwỳr tẽn wrỳ. Hãmri nhũm mẽ htykjê papxàja tanhmã amnhĩ to nẽ te kot hã jêt nẽ ma hkôt mör nẽ pika hwỳr wrỳk pyræk pa pre arī omunh o xa.

⁹ Hãmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho kwat nẽ hpôt tã hpãnhã axte ja pôt. Hãmri nẽ hpôtja kôt pa ra mẽ kot Tĩrtũm mã mẽmoj nhõr xà hã mēsti pumu. Nẽ hkrak ri mẽ hkarõjê pumu. Mẽ kot hkwyjê hkôt ri mẽ kãm Tĩrtũm kapěr jarēnh nẽ Jesus kêp mẽ õ Pahihti hã harēnh o pa nhũm mẽ kot hã mẽ hpar xwỳnhjê karõja pa pre mẽ omu. Nhũm mẽ mēsti hkrak ri amnhĩ to Tĩrtũm wỳr o hkrĩ. ¹⁰ Kỳx pè kãm kapěr nẽ kãm:

—Ăm hămri amex o amex Pahi Maati. Aa ate mêmôj tă tanhmă amnhî to axêx to hkêt kumrêx. Kwa xà kot kaj tokyx pika hkôt mẽ kot mẽ inhîmex xwÿnhjaja tanhmă mẽ ixtă mẽ ho nà? Anê.

¹¹ Hămri nhũm mēhōja mẽ hwÿr tē nē mẽ kām mẽ ê jakajre gō nhũm mẽ hagjê. Hămri nhũm mẽ kām:

—E mẽ mamrî atar akôkôt o akrî. Koja Tirtũm kormă tanhmă mẽ kot mẽ atomnuj xwÿnhjê ho hkêt nē. Kê mẽ axte mẽ apyrà nē mẽ akwÿjê nhîmex măn. Koja mẽ Tirtũm jamaxpêr xà hkôt axte mẽ akwÿjê pa nhũm rî kormă mẽ ato hpimràată tanhmă mẽ ată mẽ hipêx to. Jakamă e mẽ atar kutêp mămri akôkôt o akrî. Anê.

¹² Hămri nhũm mẽ pahte amnhî tomnuj pănă amnhîrer xwÿnhata axte kagà ho htÿx xà hō hpôt pa omu. Na pre ra ho 5 nē hpôt tă hpănă hkôt axte ja pôt. Hămri nhũm pika htertet tÿx kumrêx. Nē myyti ahtyk nē mytwÿre te kêp mẽ hkamrô kamrêk tÿx pyră nē ajê.

¹³ Nē kanhêti tanhmă amnhî to nē axrê nē pikap rôrôk pa. Te kôk xapêr tÿx nē kot pàrerekre kormă ràx tă kot kām hikranh par pyră nē piită rênă pa nhũm rôrôk.

¹⁴ Hămri nhũm kaxkwaja te kagà kaxkep pyră nē amnhî to kaxkep o tē. Nē pika piită hkôt kên prêk nē hixêt prêk maati piită te hkrî xà rûm hapôx nē mrar nē nhăm hkrî pyrăk. Nhũm gô hipôk piită haxwÿja te hikwÿ xà rûm hapôx nē mrar nē nhăm hikwÿ pyrăk. Pika htertet tÿx nhÿ hă ã mêmôj amnhî nhîpêx anê. ¹⁵ Hămri nhũm pika hkôt mẽ piită tee ri mêmôj ã amnhî nhîpêx anhÿr ã omu nē kām ma nē htertet tÿx kumrêx. Mē ho amnhîptâr xwÿnhjaja nē pôristi krăhtũmjaja nē mẽ kot amnhî to rûnh xwÿnhjaja nē mẽ hihtÿx xwÿnhjaja nē mẽ kām mẽ àpênă xwÿnhjaja nē amnhî mã mẽ àpênă xwÿnhjaja. Ăm piită mêmôj ã kot amnhî nhîpêx anhÿr ã omu nē tee ri amnhî kukamă hamaxpêr nē kām ma ho kām ma. Hămri nē hpimxur kaxyw ma kên prêk kre japêr o hprôt nē mra. ¹⁶⁻¹⁷ Hămri nē amnhî to kên prêk wÿ nē kām:

—Kwa na ra mẽ ixto amnhîptâr ã hkrî xà maati kamă hkrî xwÿnh mẽ kot mẽ ixte amnhî tomnuj pănă amnhîrer xwÿnhata wa mẽ ixkamă gryk tÿx kumrêx. Ra wa kot tanhmă mẽ ixtomnuj to xà hă arîgrota kato. Koja wa mẽ ixtomnuj tÿx nē pa mẽ kută hkêt nē. Kwa tokyx mẽ inhîpy arôrôk nē wa kêp mẽ ixto amũxu. Anê.

7

Mê kot Tirtũm mã hkrajê kagà

Apokarip 9.4

¹ Tă pa arî kaxkwa kamă mêmôj pumu. Nhũm Tirtũm kapêr o mẽ wrÿk xwÿnh pē kwatja piită ahpÿnhă pika nhîtep xà hkôt kôk jatur xà hă hamÿ nē ho kuhê. Pika piită hkôt kôk hpinkrênă par nē àpêr kêt nē gô xujanâr kôt àpêr kêt kaxyw hatur xà hă hamÿ nē ho kuhê. Nē pà piită hkôt àpêr nē tanhmă pî hkwy ho pymaj nhũm mẽ ã amnhî nhîpêx anê nē nê hatur xà hă hamÿ nē ho kuhê. ² Na pre ra Tirtũm ja hă mẽ kām karō nē mẽ kām:

—E kêr ka mẽ ma pika hwÿr wrÿ nē pika nē gô xujanârja tanhmă wa homnu hto. Anê.

Hămri nhũm mẽ kuma nē hwÿr wrÿ nē kormă nē kôk ho htÿx. Hămri nhũm Tirtũm kapêr o wrÿk xwÿnhjê hōja myt japôx xà rûm mẽ hwÿr hpôx o tē. Nē îhkra kamă mẽ kot Tirtũm kra hă mẽ hixi jarênă xà hă kagata py nē o tē. Hămri nē kax pē mẽ kot pika mẽ gô xujanâr homnu mã xwÿnhjê mã kapêr nē mẽ kām:

³ —Kwa taxy pa Tirtũm krajê nhôkră kagà hpa măn. Kêr ka mẽ omu nē mẽ tapxipixjaja tanhmă mẽ ho hkêt nē. Anê.

⁴⁻⁸ Hămri nē mẽ hkagà pa. Ahpÿnhă Ijaew pigranh xwÿnhjaja mẽ ho ohtô rax kumrêx nē tanhmă mẽ hkagà hto. Pa tanhmă mẽ kute hă mẽ harênă ma nhũm xep mẽ ohtô rax kumrêx.

Juta kamă mẽ kêp 12.000.

Nê Rupê kamă mẽ kêp 12.000.

Nê Gax kamă mẽ kêp 12.000.

Nê As kamă mẽ kêp 12.000.

Ně Natari kamã mẽ kêp 12.000.
 Ně Manase kamã mẽ kêp 12.000.
 Ně Simeãw kamã mẽ kêp 12.000.
 Ně Rewi kamã mẽ kêp 12.000.
 Ně Isaka kamã mẽ kêp 12.000.
 Ně Jepurõ kamã mẽ kêp 12.000.
 Ně Juje kamã mẽ kêp 12.000.
 Ně Pějãmĩ kamã mẽ kêp 12.000.

Ã mẽ ohtõ rax kot anhÿr. Hãmri nẽ mẽ piitã mẽ pikamÿr par kãm mẽ kêp 144.000. Piitã kêp Apraãw kanrêhã htãmnhwÿ na pre mẽ. Tã ã axpên kaxyw mẽ ohtõ rax kumrêx kot anhÿr tã nhũm mẽ hkagà pa.

Tĩrtũm kra hkwyjê jarênh
Apokarip 14.1-5

⁹ Tã pa axtem mẽmoj pumu. Nhũm mẽ ohtõ rax nẽ Tĩrtũm nhõ krĩ kamã kuhê. Ahpÿnhã ri pika piitã hkõt mẽ urojaja. Nẽ ahpÿnhã ri mẽ kapêr xwÿnhjaja nhũm prem pika piitã kurũm kot mẽ ho amnhĩptàr ã hkrĩ xà maati ja kamã hkrĩ xwÿnh pê Tĩrtũm mẽ mẽ pahte amnhĩ tomnuj pãnhã amnhĩrer xwÿnhja wa kutã kuhê. Mẽ ohtõ rax kumrêx jakamã pa tee ri mẽ piitã mẽ ho kõtã hpar prãm kaprÿ. Nẽ piitã ê jakare kamã kuhê. Nẽ hkĩnh nẽ hkĩnh xaj pô hkwy jamÿ nẽ ho àpêr o kuhê. ¹⁰ Hãmri nẽ kÿx pêê Tĩrtũm mẽ Jesus wa kãm kapêr nẽ wa kãm:

Hêxta waa nẽ. War amex o war amex Pahi Maati.
 Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nẽ.
 War ajamẽ mẽ ixkamã axukapri rãhã ho apa xwÿnh na ka wa.
 Jakamã pa mẽ inhmex nẽ war awÿr api nẽ war akuri inhmex nẽ ijamakêtkati nẽ ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anẽ.

¹¹ Hãmri nhũm Tĩrtũm kapêr o mẽ wrÿk xwÿnhjaja Tĩrtũm krĩ xà mã hipòk nẽ hkõn krã ho rôròk nẽ hkrĩ hpa. Nẽ mẽ àptàr tũmjê mẽ mẽ htir nẽ kuhê xwÿnhjaja mẽ ìhkô hã kãm hipòk nẽ wam tajê pyrãk nẽ hkõn krã ho rôròk nẽ hkrĩ. Hãmri nẽ mẽ ohtõ kot Tĩrtũm mẽ Jesus wa kãm kapêr ã mẽ kuma hãmri nẽ Tĩrtũm ã hpijaam kaxyw hpar pê htũ mÿr pê hikwÿ hpa nẽ kãm mex o mex ã harê nẽ kãm:

¹² “Ãm hãmri na mẽ ã ajarênh anẽ Tĩrtũm. Amex o amex.

Na ka hte mẽ ixto mex o apa.
 Mẽ ixrom axàhpumunh o axàhpumunh.
 Nẽ mẽ ixrom axihtÿx o axihtÿx.
 Jakamã na ka hte mẽ xpiitã mẽ ixto mex kumrêx rãhã ho apa.
 ã ate anhÿr rãhã o rãhã jakamã na pa htem amã amex o amex ã ajarênh rãhã ho ixpa.”
 Anẽ.

¹³ Hãmri pa mẽ omunh o ixãm rôm nhũm mẽ àptàr tũmjê hõja ixwÿr tẽ nẽ mẽ ê jaka kamã mẽ hkĩnh xaj pô jamÿnh nẽ ho kuhê xwÿnhjê hã ixkukja nẽ inhmã:

—E mãn ate mẽ ê jakare kamã mẽ kuhê xwÿnh mũjjê pumunh nà? Tanhmã na prem amnhĩ nhĩpêx to nẽ amnẽ api? Xà ate mẽ omunh? Anẽ.

¹⁴ Hãmri pa kuma nẽ kãm:

—Nà ixte mẽ omunh kêt. Kêt ka na ixrom ate mẽ omunh. Anẽ.

Hãmri nhũm inhmã mẽ harênh o:

—Nà na pre mẽ hkwyjaja Jesus ã mẽ homnuj tÿx kumrêx nẽ mẽ kupa. Tã mẽ kêp Jesus kwÿ jakamã na pre mẽ nẽ mẽ kot amnhĩ tomnuj o hapêx nẽ te amnhĩ kamrõ ho mẽ nẽ mẽ kot amnhĩ tomnuj piitã kuhõnh par pyrãk o mẽ hipêx. Jakamã nhũm mẽ ê jaka kamã mex nẽ hkĩnh tÿx nẽ pa.

¹⁵ Nẽ Tĩrtũm kot mẽ pahto amnhĩptàr ã hkrĩ xà maati kutã kãm mex o mex ã harênh rãhã ho kuhê.

Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kêp mẽ ho hkêt nẽ.

¹⁶⁻¹⁷ Nẽ mẽ pahte amnhĩ tomnuj pãnhã amnhĩrer xwỳnh kot Tĩrtũm krĩ xà maati kamã ãm xwỳnhhta na hte mẽ hamãr mex rãhã ho mẽ hkôt pa.

Te mẽ kot mẽ hkrit jamãr mex pyrãk.

Nẽ te mẽ kot mẽ hkrit kôm o pa nhũm htĩr nẽ pa pyrãk.

Koja mẽ kuri htĩr tũm nẽ hkôt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htỳxja axte mẽ hkà ho hxêt kêt nẽ.

Koja Tĩrtũm te mẽ kot mẽ hkra no kagô nhĩnhĩnh par pyrãk o mẽ hipêx nhũm mẽ axte hkaprĩ nẽ mỳr o pa hkêt nẽ.

Pãnhã hkĩnh nẽ mex rãhã kuri pa ho pa. Anẽ.

8

Kagà kaxkep o htỳx xà kot hitep jarẽnh

¹ Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwỳnhja kagà kaxkep o htỳx xà kot hitepta pôt. Hãmri nhũm kaxkwa kamã mẽmoj piitã hpinhkrênh pa nhũm mẽhõ kapêr kêt kumrêx. Nẽ hpinhkrênh par o ra hã ahtũm ry mex nẽ.

² Hãmri nhũm Tĩrtũm kutã kapêr o wryk xwỳnh pê 7 nẽ mẽ kuhê xwỳnhjaja. Nhũm kapêr o wryk xwỳnhjê hõja mẽ hwỳr tẽ nẽ mẽ piitã mẽ kãm pifti gõ.

³⁻⁴ Hãmri nhũm kapêr o wryk xwỳnhjê hõja ôr o xijere py nẽ Tĩrtũm mã mẽhkuxwa xà ho xêt xà hã mês kunĩhti hwỳr o tẽ. Mẽ ho amnhĩptar ã hkrĩ xà maati kutã ôr o mêtija wỳr o tẽ nẽ kuri o xa. Hãmri nhũm mẽ kãm kamã mẽhkuxwa xà hkwy runh rax nẽ nhũm mêtija hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarẽnh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarẽnh xàja mẽ nhũm ahkà nẽ Tĩrtũm kapêr o wryk xwỳnh nhĩhkra kamã xijere rũm Tĩrtũm kutã kax mã àpir o pa.

⁵ Hãmri nhũm kapêr o wryk xwỳnhja xijere kamã kuwy hpôk kwỳ ho nỳt nẽ ahpar mã pika hwỳr kumẽ nhũm ma tẽ nẽ pikap tẽm nhũm pika htertet tỳx nẽ kamã na katõtök nẽ haxênh nẽ hkrakrak.

Mẽ kot pifti kakôr ã mẽ harẽnh

⁶ Hãmri nhũm Tĩrtũm kapêr o wryk xwỳnh pê 7 kot pifti jamỳnh xwỳnhjaja ra kot pafti kakôr mã.

⁷ Jakamã nhũm wamta ô pifti kakô nhũm na mê te kot jêr krã jakot pyrãk xwỳnh mẽ kuwy te kot mẽmo kamrô kamrêk pyrãk xwỳnhhta pikap rôrôk pa. Nẽ nhỹhỹnh pika hkwy ho rax nẽ ho kaxàr pa. Nẽ pôtĩ nẽ akunĩ hkwy ho rax kumrêx nẽ ho kaxàr pa. ⁸ Hãmri nhũm wam ãm xwỳnh nhĩjuk ri ãm xwỳnhja ô pifti kakô nhũm mẽmoj te kên krã hprêk pôt pyrã nẽ kaxkwa rũm ahpar mã tẽ nẽ gô xujanãr nhĩkjê kamã hpôk rãhã tẽn mrô. Hãmri nhũm gô nhĩkjê kamã gôja mẽmo hkamrô hã amnhĩ jahkre hpa. ⁹ Jakamã nhũm gôx kãm mẽmoj htĩr nẽ ri mrar xwỳnhjaja pikaprãr pa. Nẽ gôx kãm pàr gô krãhkà hã pa xwỳnhja haxwỳja gjêx pa. Nẽ pàr kãm mẽ pa xwỳnhjaja haxwỳja hagjê nẽ pikaprãr pa. No nhũm gô mex kãm pàr kãm mẽ pa xwỳnhjaja mẽ kurom arĩ htĩr nẽ.

¹⁰ Tã nhũm wam ãm xwỳnhhta wa hijuk ri ãm xwỳnhja ô pifti kakô. Hãmri nhũm kanhêti rax kumrêxja axta nẽ hpôk o ma ahpar mã tẽn pikap tẽm nẽ pyhti nẽ hino hkwy ho ohtô nẽ homnu hpa. ¹¹ Kanhêti nhĩxi pê na pre “mẽmoj xỳ xà” anhỹr jakamã nhũm tẽm nẽ pyhti nẽ hino hkwy ho ohtô nẽ homnu pa. Nhũm prem hwỳr mra nẽ hkwy janhi nẽ ho ixkô nhũm y nẽ nhũm mẽ ohtô nẽ ho ixkô nẽ axkaprã.

¹² Hãmri nhũm hpãnhã Tĩrtũm kapêr o wryk xwỳnhjê hõja ô pifti kakô. Na pre ra ho axkrunêpxi nẽ hkakôr tã hpãnhã ra axte hõ ja kakô. Hãmri nhũm mẽhõja tẽ nẽ myyti kura nhũm hkwy ahtyk nẽ hirã hkêt nẽ. Nhũm mytwrỳre nẽ kanhêti mã ho anẽ nẽ myyti

pyrà nê hkwỳ ahtyk nê hirã hkêt nê harir. Jakamã nhũm kamàt kãm hirã mex kêt nê. Nê arĩgro hã myytija haxwỳja hirã mex kêt nê.

¹³ Hãmri pa kaxkwa kamã àanhàhti pumu nhũm kỳx pê ri htor o pa pê tanhmã kapêr to nê kapêr o:

—Hêxta waa nê. Kormã kot pifti kakôr xwỳnhjaja axkrunêpxi nê kormã hkakôr kêt nê. Koja mẽ tokyx hkakô nhũm pika hkôt ri mẽ pa xwỳnhjaja amnhĩ xà htỳx kamã hamak tỳx o pa. Na pa tee ri mẽ hkukamã ijamaxpêr nê inhmã mẽ hkaprĩ htỳx nê. Hêxta waa nê. Koja mẽ omnuj tỳx kumrêx. Anê.

9

¹ Tã pa axte mẽmoj pumu. Nhũm Tĩrtũm kapêr o wryk xwỳnhjê hõ õ pifti kakô. Na prem ra ho kwat nê hkakôr tã hpãnhã axte hõja ja kakô. Hãmri nhũm kanhêti hõ axta nê pikap tẽm kurê kumrêx nhũm mẽhõja omu nê hwỳr tẽ nê kãm mẽmoj tã saf gõ. Satanasti jagiênh xà hã ahkre xupỳm o htỳx xà hã safja nhũm kanhêti mã kugõ.

² Hãmri nhũm kupy nê ahkrehtita wỳr o tẽ nê kahê xà mẽ nhũm kurũm kuwy hkũm hapôx rax nê. Nê ma kàx mã àpir o pa nê myyti hpro hpa nhũm kamàt kô rax kumrêx.

³⁻¹¹ Nê kuwy hkũmja rũm mẽmoj te krit pyrãk xwỳnh kwỳjaja pikap rôrôk nê kuhê. Te kot krit pyrãk tã mẽ hkuk te panhĩ hkuk pyrãk. Nê mẽ hkrã hkĩ te mênijê hkrã hkĩ japjê pyrãk. Nê ôr o mẽ ahkà jagjê. Nê mẽ wa japjê htỳx kumrêx. Te rêawti xwa japjê pyrãk. Nê kàx o mẽ hinô hkà. Nhũm mẽ htor o hara hkoko htỳx o mra. Te ho kawar xohtô pijapu kaxyw kot mẽ hkjênh xà kamã mẽ htur nê mẽ hkjênh o hprôt nhũm hkoko htỳx pyrãk. Nê mẽ hkamnhwỳr o pa kaxyw mẽ hanhyja te kot makre janhy pyrãk. ã kriitija kot anhỳr. Nê te nhỹhỹm oprê kaxyw nojarêr nê mẽ hkrit kawar hã hikukrêx mex rênh pyrãk. Mẽo pahija ahkre xupỳmta kamã kêp mẽ hkrãhtũm. Ijaew kapêr kãm hixi pê “Apatõ.” No Gres kapêr kãm kêp “Aporiãw.” No mẽ pakapêr kãm kêp “mê hpar o pa xwỳnh.” Hãmri nhũm Tĩrtũm kriiti mã kapêr nê mẽ kãm:

—E kêr ka mẽ ma pika piitã hkôt te makre kot amnhĩ nhĩpêx pyrà nê ri mẽ hkôt mẽ hkamnhwỳr o apa. ã amnhĩ nhĩpêx anhỳr o mẽ atã mytwrỳ pê sĩk. No ãm kêr ka mẽ hpar kumrêx kêt nê. ãm mẽ kot amnhĩ xà htỳx kãm hamak pix kaxyw tanhmã mẽ ho ho apa. Te makre kot mẽ hkamnhwỳr nhũm à htỳx kumrêxta pyrãk. No mẽ ate mẽ hkamnhwỳr nhũm mẽ hkamnhwỳr xàja koja à htỳx o makre kot mẽ hkamnhwỳr jakre. Nom ra mẽ kot Tĩrtũm kra hã mẽ hkagà xwỳnhjaja kêr ka mẽ omu nê ãm mẽ omu nê tanhmã mẽ ho hkêt nê. Mẽ kêp ixkwỳ na mẽ. Nê põ nê prãt ka mẽ ãm omu nê tanhmã ho hkêt nê. ãm mẽ kot panhĩ nhõkrã kagà hkêt xwỳnh pixjaja ka ã mẽ hipêx anhỳr o ri mẽ hkôt apa. Nom kêr ka mẽ hpar kêt nê. Kê mẽ tee ri amnhĩ xà hã maj kãm tokyx htyk nê hapêx prãm hkaprỳ ho pa. E ma mẽ hwỳr mra nê ã mẽ hipêx anhỳr o ri apa. Anê.

Hãmri nhũm mẽ kuma nê ma mẽ hwỳr mra.

¹² Na ra pika hkôt wam mẽ homnu xà pyxi nê hapêx. No ãm arĩ hamêxkrut.

¹³ Jakamã nhũm Tĩrtũm kapêr o wryk xwỳnhjê hõja axte õ pifti kakô. Na prem ra ho sĩk nê hkakôr tã axte hkôt hõja hkakô. Nhũm Tĩrtũm kutã ôr o mẽsti rũm mẽhõja tanhmã kapêr to. Mẽsti janhã rũm kapêr. ¹⁴ Pifti kakôr xwỳnhhta mã kapêr nê kãm:

—E na ra mẽ kot mẽ hkwỳjê nhĩmex ã arĩgrota kato. Jakamã kêr ka ma pyhti pê Erax wỳr wry nê gô mỳ ri Satanasti mã mẽ àpênh xwỳnh pê kwatja pumu. Na prem ra mẽ hpa hpre nhũm mẽ gô mỳr ri arĩ hkrĩ ho hkrĩ. Ka mẽ omu nê mẽ kãm mẽ hpa hpre xà hpôt pa kê mẽ ma mẽ hkôt ri mẽ hpar o pa. Anê.

¹⁵ Na pre ra Tĩrtũm mẽ kot mẽ hkwỳjê nhĩmex o pa kaxyw mẽ kurê nê gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwỳnhhta mã mẽ harênh anê nhũm kuma nê ma tẽ nê mẽ hwỳr wry nê mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nê mẽ ho ohtô rax kumrêx nê mẽ himex. ¹⁶ Nê ma amnhĩ kôt pôristi ho ohtô rax nê o pa. Piitã kawar ã hkrĩ nê mẽ hkôt hprôt nê hkoko ho mra. Mẽ kêp 200.000.000 hã mẽ harê pa mẽ harênh ma. Mẽ ohtô rax o mẽ ohtô rax.

¹⁷ Na pa pre arĩ te xipimtir kãm mẽ omunh pyræk. Nhũm kawar ã mẽ hkrĩ xwỳnhjaja. Mẽ hinô kàja axtem kàx o. Nẽ hkamrêkja te kuwy hpòk kamrêk pyræk. Nẽ råràrja te mẽ hkuròt kane xà pẽ ãsòf råràr pyræk. Nẽ kakrà htyk. ã kàx o mẽ hinô hkà kot anhỹr. Nẽ mẽ hkrit kawarti hkràja te rãawti krã pyræk. Nẽ mẽ hakwa rũm kuwy hpòk mẽ ãsòfti mẽ kuwy hkũm axpẽn kòt hapòx o pa. ¹⁸⁻¹⁹ Nẽ kawarti jamy axtem te kęp kagã xoprẽ hkrã pyræk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpòk mẽ ãsòfti hapòx xwỳnhhta mã mẽ ho anẽ nẽ. Jakamã nhũm kawartijaja mẽ hkòt ri hamy mẽ hakwa ho mẽ hpar o pa nẽ mẽ ohtò rax kumrẽx nẽ mẽ himex.

²⁰⁻²¹ Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwyjẽ hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprò nẽ mjên o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xy hto ho pa. ã htỳx ri amnhĩ nhĩpêx anhỹr o pa nẽ kãm urer kêt nẽ. ãm Satanasti hkòt pix mã ri amnhĩ nhĩpêx o pa. Nẽ amnhĩm sãnti hkwy nhĩpêx. Pĩ ho hipêx nẽ kàx o hipêx nẽ kẽn o hipêx. Nẽ hipêx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrar nẽ mẽ ho utàr kaxyw mo hte? Na htem arĩ ã amnhĩ to hwỳr kaprỹ anhỹr o pa.

10

Kagà kaxkep grire jarẽnh

¹ Tã pa arĩ mẽmoj pumu. Nhũm axte Tĩrtũm kapẽr o wrỳk xwỳnh xihtỳxjẽ hõja pika hwỳr wrỳk o tẽ. Nẽ ãja kakrà ho na pre. Nẽ hkrã mỳ ri màxwỳxti ajêt. Nẽ hkuk te myt no kamã hirã htỳx pyræk. Nẽ akutã hte kamã te kuwy hpòk pyræk. ² Nẽ ãhkra kamã kagã kaxkep grire ra pipòt nhũm ma o tẽ nẽ o wrỳ nẽ o xa. Nẽ gò xujanãr kãm upòk rũm hte xãm nẽ kỳx pẽ amgrã kamã apke rũm hte xãm nẽ o xa pa ixprĩ hã omu.

³ Hãmri nhũm kàx pẽ amỹra. Te rãaw hkrã tỳx pyræk. Nhũm hpãnhã kaxkwa kamã mẽhõja kãm kapẽr. Te na katòtòk o 7 wês pyræk pa ixprĩ hã tanhmã kapẽr to hã kuma.

⁴ Hãmri nẽ ra mẽ amã ã kagã kaxyw nhũm mẽ ja nẽ inhmã kapẽr nẽ inhmã:

—Kwa nà kwarĩ ja kot kaj hã kagã hkêt nẽ. ãm ja pix kot kaj akwỳjẽ mã hã kagã hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagã hkêt nẽ. ãm papxipix kuma nẽ ri hã ixa.

⁵ Tã nhũm Tĩrtũm kapẽr o wrỳk xwỳnh kot gò xujanãr kãm upòk rũm hte xãm nẽ apke amgrã kamã ãm xwỳnhhta hãmri Tĩrtũm nhỹ hã kapẽr kaxyw nẽ kãnhmã ãhkra pẽ.

⁶⁻⁷ Tĩrtũm pẽ kaxkwa nẽ pika nẽ gò xujanãr o kator nẽ kamã kot mẽmoj piitã ho kator xwỳnhja. Nẽ htĩr rãhã nẽ pa ho pa xwỳnhja. Nhũm ã hã kapẽr nẽ kapẽr o:

—E hãmri. Amnepẽ mã na pre Tĩrtũm ã hã mẽ kãm kapẽr o ri mẽ pa xwỳnhjẽ mã tanhmã amnhĩ kukamã amnhĩ jarẽnh to. Tanhmã kot pika piitã hkòt mẽ pa xwỳnhjẽ nhĩpêx to hã amnhĩ jarẽ. Nẽ mẽmo arĩgro hã mẽ kot amnhĩ tomnuj mỳrapẽ tanhmã kot mẽ hipêx to hã mẽ hkukamã mẽ hã amnhĩ jarẽ. Tã ra ã mẽ hipêx anhỹr xà hã arĩgro kato. Jakamã koja kapẽr o wrỳk xwỳnh kot hitepta ò pifti kakò hãmri nhũm mẽmojja ã amnhĩ nhĩpêx anhỹr kurẽ kumrẽx. ãm hãmri na pa mẽ amã ja jarẽ. Anẽ.

⁸ Pa mar o ixãm rôm nhũm wam inhmã kapẽr xwỳnhhta axte inhmã kapẽr nẽ inhmã:

—E ma pika hwỳr wrỳ nẽ gò xujanãr kãm upòk rũm hte xãm nẽ amgrã kamã apke rũm hte xãm xwỳnhhta wỳr tẽ nẽ kęp kagã kaxkep grire pipòt xwỳnhhta py. Anẽ.

⁹ Hãmri pa kuma nẽ ma hwỳr wrỳ nẽ hã kuwỳ nhũm inhmã kugò nẽ inhmã:

—E mĩ. Apy nẽ akrẽ. ànhre. Te kot menh xành pyræk. Nom kot kaj akrẽ nẽ anhõhy xà. Nom mãmrĩ apy nẽ akrẽ. E mĩ. Anẽ.

¹⁰ Hãmri pa kęp kupy nẽ hkaki nhũm ànhre. Pa hkrẽr pa hãmri nẽ inhõhy xà kurẽ kumrẽx.

¹¹ Hãmri nhũm kot inhmã òr xwỳnhhta inhmã:

—Nà ãm hãmri na ka apy nẽ akrẽ. Jakamã kêt ka ano ho ate mẽmoj piitã omunh xwỳnhja nẽ ajamak o ate mẽmoj mar xwỳnhja nẽ ate tanhmã Tĩrtũm kapẽr mar toja ka piitã hã kagã hpa. Hãmri nẽ ate omunh xà hkòt akwỳjẽ mã piitã harẽnh o apa. Mẽ

kot nhÿrmã Tÿrtÿm kot tanhmã mẽ piitã mẽ hipêx to hã harênh mar kaxyw. Ahpÿnhã ri pika piitã hkôt mẽ urojê piitã koja nhÿrmã ã mẽ hipêx anê. Ahpÿnhã ri mẽ kapêr xwÿnh piitã. Nê mẽ õ pahijaja. Âm mẽ piitã koja nhÿrmã ã mẽ hipêx anê. Anê.

11

Tÿrtÿm nhÿ hã kapêr xwÿnh pijakrut wa harênh

¹ Tã nhÿm mēhōj inhmã mẽmoj to mīdi xà hã pī ryre gō nē inhmã:

—E ja py nē Jerujarē hwÿr wrÿ nē kamã Tÿrtÿm mã amnhĩ jarênh xà hã ixkreja o mīdi. Nē ixkre kamã amnepēm mẽ kot amnhĩ tomnuj pãnhã Tÿrtÿm mã ôwēhti nhōr xà hã mēstita mã ho anē nē ho mīdi. Nē ixkre kamã mẽ kot Tÿrtÿm mã amnhĩ jarênh o mẽ hkrĩ xwÿnhjaja ka aprĩ hã mẽ ho kōta.

² —No ixkre kapem pikaja ka ho mīdi hkêt nē. Ra Tÿrtÿm kot mẽ kot amnhĩ tomnuj xwÿnhjê mã hkaga jakamã koja mẽ htÿx ri kãm hprãm xà hkôt tanhmã homnu hto ho pa. Nē Jerujarē piitã hkôt ri homnu ho paja ã hã amgrà axkrunēpxi nē hkôt mytwrÿ kēp 6.

³ —Koja Tÿrtÿm ma ÿ hã kapêr xwÿnh ho hamēxkrut nē mẽ hwÿr wa kumē nhÿm wa ma mẽ hwÿr wrÿ nē mẽ kãm Tÿrtÿm kapêr jarênh o ri mẽ hkôt pa. Hãmri nē tee ri mẽ kot tanhmã amnhĩ tomnuj to hã mẽ omu nē hkaprĩ nē. Hãmri nē wa hkaprĩ xaj xak punure kaxô nē haxà nē mẽ kãm Tÿrtÿm kapêr jarênh o ri wa pa hã amgrà axkrunēpxi nē hkôt mytwrÿ kēp 6. Jakamã e. Pija py nē ma mẽ hwÿr wrÿ nē ixkreta o mīdi. Anê.

⁴ Wa pijakrut wa kot Tÿrtÿm nhÿ hã kapêr jarênh o wa pa xwÿnhhta wa. Na htem wa kot amnhĩ nhĩpêx ã wa harênh ma nē mẽmo pī hpàr pē oriwēhti kot tanhmã amnhĩ nhĩpêx toja mã hamaxpêr kurê kumrêx. Nē amnepēm Tÿrtÿm nhÿ hã kapêr o pa xwÿnh pē Jakaris kot kanê hpôk xãmta mã mãänēn hamaxpêr. Oriwēhti xōja htwÿm rax kumrêx nhÿm htem htwÿm opôj nē ho kanê ho nÿt nē hpôk nē kÿx pē unhwÿ nhÿm mẽ piitã hirã kamã rīt mex o ri mra. Nē kanê hpôk mexja te kot Tÿrtÿm kapêr pyræk. Nē kanê xãm xàja te kot Tÿrtÿm nhÿ hã kapêr jarênh o wa pa xwÿnhhta wa uræk. Nē oriwēhtija haxwÿja te kot wa uræk. Ra Tÿrtÿm Karō kot wa hkarō mã àr jakamã na hte wa hprĩ hã mẽ kãm Tÿrtÿm kapêr jarênh o pa nhÿm mẽ kot mar xwÿnhjaja te kanê nhĩrã kamã ri rīt mex nē ri pa pyrã nē hprĩ hã mar tÿx nē.

⁵ Tã koja mēhō tanhmã wa hipêx to kaxyw wa hwÿr tē nhÿm wa hakwa rÿm kuwy hpôk kato nē kot tanhmã wa ho mã xwÿnhhta o hxêt o kupĩ.

⁶ Nē koja wa Tÿrtÿm xàhpumunh tÿx xà ho tanhmã ri mẽ hã mẽmoj nhĩpêx to pē mẽ kãm kapêr jarênh o ri mẽ hkôt pa. Jao tanhmã na hto nhÿm mẽ hã wrÿk kêt ry nē. Rÿ tanhmã mẽ kēp gō hto nhÿm mẽ hkamrô hã mẽ kēp amnhĩ jahkre. Koja wa ã Tÿrtÿm nhÿ hã mẽ kēp mẽmoj nhĩpêx anhÿr ho wa pa. Nē xatã wa kãm hprãm xà hkôt tanhmã mẽmoj tomnu hto. ⁷ Nē mẽ kãm kapêr o pa pē ã mẽ hipêx anhÿr o wa hã amgrà axkrunēpxi nē hkôt mytwrÿ kēp 6 nē rĩ kormã ho hapêx. Hãmri nhÿm ahkre xupÿm rÿm Satanasti nhō kôwenatôja kato nē ma wa hwÿr tē nē nhÿri pry kahti ri wa unê nē wa kupĩ nhÿm wa pry kamã ty nē nō. ⁸ Hãmri nhÿm mẽ wa haxàr kêt nē nhÿm wa arĩ pry kamã nō. Krĩ kapem na prem pī kahpa hã Jejus nhō nē kupĩ. Krĩ nhō xwÿnhjaja mẽ kot amnhĩ tomnuj tÿx xwÿnh na mẽ. Te ho amnepēm krĩ pē Sotō mẽ pika pē Ejit kamã mẽ kot amnhĩ tomnuj xwÿnhjê kot amnhĩ nhĩpêx pyræk. ⁹ Jakamã nhÿm mẽ kot wa haxàr nē xpēn kurê nhÿm wa pry kamã arĩ ty nē nō nhÿm mẽ piitã wa hwÿr mra nē wa omu. Nē ahpÿnhã krĩ piitã hkôt mẽ pa xwÿnhjaja tanhmã amnhĩ to nē ja hã wa omu. Ahpÿnhã ri pika piitã hkôt mẽ urojaja. Nē ahpÿnhã ri mẽ kapêr xwÿnh piitã. Hãmri arĩ ahpÿnhã mẽ õ krĩ kamã pa htã tanhmã amnhĩ to nē wa htyk ã wa omunh ã hã apkati axkrunēpxi nē hkôt hã myt apha. ¹⁰ Koja mẽ wa htyk ã wa omu hãmri nē hkĩnh nē. Nē hkĩnh xaj xpēn mã hkĩnh xà nhōr o pa. Wa kot kormã htĩr ri tanhmã mẽ homnuj to ho ri mẽ hkôt paja mã hamaxpêr nē wa htyk ã wa omu nē hkĩnh tÿx nē.

¹¹ Tã koja wa htyk ã apkati axkrunēpxi nē hkôt hã myt apha hãmri nhÿm Tÿrtÿm wa kamã htyxà rē nē akupÿm wa ho wa htĩr nhÿm wa kànhmã xa nē ri mra. Hãmri nhÿm

mẽ kot wa omunh xwỳnhjaja tee ri hã wa omu nẽ kãm wa uma htỳx kumrẽx. Ấm kãm wa uma ho kãm wa uma.

¹² Hãmri nhũm kaxkwa kamã mễhõja wa kãm kapẽr nẽ wa kãm:

—E war amnẽ mễ ixwỳr war api. Anẽ.

Hãmri nhũm wa kuma nẽ ma kakrã kamã àpir o mỗ. Nhũm mễ kãm wa hkurẽ xwỳnhjaja tee ri wa àpir ã wa omu.

¹³ Hãmri nhũm pika htertet tỳx nẽ. Nẽ krĩ kamã ixkre ohtô nẽ grành pa nẽ mễ hkwy nhĩmex rax nẽ nhũm mễ ohtô rax kumrẽx nẽ axkaprã. Mễ kệp 7.000 nẽ pikaprãr pa. Hãmri nhũm arĩ mễ htĩr nẽ ri mễ pa xwỳnhjaja tee ri mễ omu nẽ kãm ma xàj htertet tỳx nẽ axpẽn mã:

—Kwa Tĩrtũm mãn ã mễ panhĩpêx anẽ. Hihtỳx o hihtỳx jakamã kaxkwa rũm ã mễ panhĩpêx anẽ pu mễ pahpiitã pano ho ixkre pigrành ã omu. Anẽ.

¹⁴ E na ra amnhĩ xà htỳx kamã hamak xàja hamẽxkrut nẽ hapêx. Tã no ãm arĩ mễ kaxyw pyxi nẽ arĩk.

Mễ kot pifti kot hitep kakôr ã harẽnh

Apokarip 4.8, 5.9-14, 7.9-12, 14.2-5, 15.3-4, 19.1-2

¹⁵ Tã nhũm Tĩrtũm kapẽr o wryk xwỳnh kot hitepja ô pifti kakô nhũm kaxkwa kamã mễ pa xwỳnhjaja kàx pẽ kapẽr o:

E ãm hãmri. Na ra Mễpahpãm Maati mễ Jesus Krisja wa kệp krĩ piitã hkôt mễ piitã mễ ô Pahihti na wa.

Koja Mễpahpãm Maatija kệp Pahi Maati rãhã nẽ pa ho pa xwỳnh. Anẽ.

¹⁶ Hãmri nhũm mễ àptàr tũm pẽ 24jaja. Tĩrtũm kot mễ pahto amnhĩptàr o hkrĩ xà mã hipôk nẽ mễ hkrĩ xwỳnhjaja. Hãmri ã mễ kapẽr anhỹrja ma nẽ Tĩrtũm ã hpijaàm kaxyw hpar pẽ rôrôk pa nẽ htu myr pẽ hikwỹ. Hãmri nẽ kãm mex o mex ã harẽ nẽ kãm:

¹⁷ Pa Pahi Maati Tĩrtũm. Nà ãm hãmri mễ ixrom axàhpumunh o axàhpumunh nẽ axihtỳx o axihtỳx.

Amnepê mã kormã mễmoj kêt ri na ka pre arãhã apa ho apa.

Tã arĩ arãhã apa ho apa.

Ấm hãmri apẽ mễ ixpiitã mễ ixto amnhĩptàr xwỳnh. Nà ãm hãmri amex o amex.

¹⁸ Kot kaj tokyx mễ piitã tanhmã mễ kot amnhĩ nhĩpêx to ho pa hã mễ omunh xà hkôt tanhmã mễ harẽnh to.

Nẽ ra mễ htyk xwỳnhjaja kot kaj mễ piitã akupỹm mễ ho mễ htĩr pa nhũm mễ pika rũm hapôx pa nẽ ma mra nẽ arĩ mễ htĩr xwỳnhjẽ nhĩhkô hã akutã hkrĩ pa.

Ka mễ piitã mễ omu nẽ tanhmã mễ kot amnhĩ nhĩpêx to ho pa hã mễ omunh hkôt tanhmã mễ harẽnh to.

Mễ kot amnhĩ tomnuj xwỳnhjaja kot kaj ma mễ kot amnhĩ xà htỳx kamã hamak o pa htũm xà hwỳr amnhĩ nẽ mễ arẽ nhũm mễ ma hwỳr hapêx. Hãmri nẽ tee ri amnhĩ kukamã hamaxpẽr nẽ gryk tỳx kumrẽx.

Ka hpãnhã mễ kot akôt amnhĩ xunhwỳr nẽ akapẽr kôt amnhĩ nhĩpêx o mễ pa xwỳnh piitã mễ omu nẽ tanhmã mễ ho mex to.

Mễ kot amnhĩ to rũnh xwỳnhjaja nẽ mễ kot amnhĩ to hkryre xwỳnhjaja.

Nẽ amnepêm mễ kot anhỹ hã mễ kapẽr o mễ pa xwỳnhjaja.

Akrajê piitã kot atã hpijaàm xwỳnhjaja kot kaj kormã mễ htĩr ri tanhmã amnhĩ to mex hã mễ omunh xà hkôt tanhmã mễ ho mex to.

Ấ kot kaj tokyx mễ piitã ahpỹnhã mễ omunh xà hkôt mễ hipêx anẽ. Anẽ.

¹⁹ Hãmri nhũm kaxkwa kamã Tĩrtũm nhõrkwy hã hakwakre kahê xà amnhĩ mễ pa kamã ôr o mễs kunĩhtita pumu. Pu nhũm na hkatôtôk nẽ haxênh nẽ hkrakrak nẽ na mễ te kot jêr krã hakotre pyrãk xwỳnhja pikap rôrôk rax nẽ. Nẽ pika htertet tỳx o htertet tỳx pa arĩ omunh o xa.

¹ Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwỳnhja pa omu. Nhũm mẽhõ nija xê te myt no mã hirã htỳx pyrãk. Nễ hpar nhõkwa kamã mytwrỳre ajêt. Nễ kanhêti ho 12 o mẽ ahkà tu nễ o xa. ² Na ra htujarô nễ hpìjagri kaxyw õhy xà nễ amnhĩ kamnhêr o xa.

³ Tã pa axte mẽmoj pumu. Aa mẽ pahte mẽmoj ã kot anhỹr pumunh kêt xwỳnh õja pa omu. Kagãmnuti nom ãm axtem hkà kamrêk tỳx kumrêx. Nễ rax kumrêx. Nễ hkrã kêp 7. Nễ hkrã piitã kamã ôr o pahi hã mẽ ahkà htu nễ o nõ. Nễ hkrã kamã pàr kêp 10.

⁴ Tã nhũm hamy ho apêr o kaxkwa kamã kanhêti ho ohtô nễ pikap kurê. Hãmri nễ õhy xà nễ amnhĩ kamnhêr o ãm xwỳnhhta wỳr tễ nễ hkra kator nhũm kot kêp krêr kaxyw kutã hamãr o nõ.

⁵ Hãmri nhũm hkra kato nễ myre. Hihtỳx o hihtỳx ã kot pika piitã hkôt mẽ piitã mẽ ho amnhĩptàr mã xwỳnh na pre. Nhũm kagãmnutija kot kêp utàr nễ hkrêr mã tã nhũm Tĩrtũm kapêr o wrỳk xwỳnhjê hõja hwỳr wrỳ nễ kêp kumỳ nễ ma Tĩrtũm wỳr kaxkwa kamã kot mẽ pahto amnhĩptàr ã hkrĩ xà maatija wỳr ho api.

⁶ Hãmri nhũm kagãmnuti tee ri ma kot kêp o mõi ã omu nễ hpãnhã nita o apkjê nễ kot tanhmã ho kaxyw nhũm amnhĩ tã omu nễ umaj hprõt nễ ma tễ nễ nhỹri kapõt ã amũxu. Ra Tĩrtũm kot hkukamã kãm hpimxur xà nhĩpêx xà hwỳr hprõt nễ ma tễ nễ kamã kêp amũxu. Nhũm Tĩrtũmja nễ kagã pumunh mex nhũm kêp hpimxur mex ã amgrã axkrunêpxi nễ hkôt hã mytwrỳ kêp 6.

Mễ kot kaxkwa kamã mẽkarõmnuti kurê kaxàr ã mẽ harênh

⁷ Tã nhũm mẽ ra kaxkwa kamã kurê kaxàr kaxyw. Kagãmnuti mẽ hkwỳjjaja nhũm mẽ ra Tĩrtũm kurê kaxàr kaxyw kutã amnhĩ xunhwỳ. Jakamã nhũm Tĩrtũm kapêr o mẽ wrỳk xwỳnhjê hkrãhtũm Mikewja ma mẽ hwỳr amnhĩ kôt hkwỳjê o mra nễ mẽ pijapu ho kuhê.

⁸ Hãmri nhũm kagãmnuti tee mẽ kutã amnhĩ to htỳx kaprỳ nhũm Tĩrtũm kapêr o mẽ wrỳk xwỳnhjaja amnhĩ nễ mẽ ho axtem nễ kaxkwa rũm mẽ kator o mẽ kator.

⁹ Satanasti pê kagãmnutita kagã kot ni kator ewa mã hêx xwỳnh na pre. Nễ hêx rom tanhmã hêx to ho pa xwỳnh. Jakamã nhũm Mikew mẽ hkwỳjjaja hkwỳjê mẽ mẽ ho hpimràatã amnhĩ nễ pikap mẽ rênh pa.

¹⁰ Hãmri nhũm kaxkwa kamã mẽhõja axte kàxpê kapêr nễ kapêr o: E ãm hãmri. Na ra Tĩrtũm hihtỳx o hihtỳx o mẽ panê mẽmoj punuj piitã ho hapêx par kumrêx.

Na pre hte Satanasti pê mẽkarõmnutija xatã hwỳr mra nễ kãm tanhmã Jesus kwỳjê ho kapêr punuj to ho pa.

Tã koja axte mẽ ho kapêr kêt kumrêx. Ra Tĩrtũm kot amnhĩ nễ kator o kator nhũm ra ma mõi o mõi kênã.

Koja Tĩrtũm pika piitã hkôt mẽ ho amnhĩptàr xwỳnhjê japôx pa nễ hpãnhã mẽ kaxyw Kra Krisja xãm nhũm pika piitã hkôt mẽ ho amnhĩptàr rãhã ho pa.

Nà ãm hãmri. Ja mex o mex.

¹¹ Na pre Jesus kôt mẽ pahtõ nễ mẽ pahtõxjaja mẽkarõmnuti kutã amnhĩ to htỳx nễ pa. No ãm amnhĩ nhỹ hã ã kutã amnhĩ nhĩpêx anhỹr kêt.

Mễ pahte amnhĩ tomnuj pãnhã amnhĩrer xwỳnhhta na pre ty nễ hkamrô ho mẽ kuhõ nễ mẽ nễ mẽ kot amnhĩ tomnuj o hapêx.

Jakamã nhũm prem kukwak ri Satanasti kutã amnhĩ to htỳx rãhã pa.

Nhũm mẽ kot Jesus ã mẽ himex par kaxyw tã nhũm mẽ kãm htyk pyma hkêt nễ. ãm Jesus kôt arĩ amnhĩ to htỳx nễ mẽ hkôt pa rãhã nễ.

Jao arĩ mẽ kãm Jesus kot mẽ panê tanhmã amnhĩ nhĩpêx to hã harênh o ri mẽ hkôt pa.

¹² Tã Tĩrtũm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwỳnhjaja kêr ka mẽ akĩnh nễ apa.

Nom gô xujanãr kãm nễ pika kamã mẽ pa xwỳnhjaja hêxta waa nễ. Koja mẽ mex kêt nễ. Nễ ra Mikew mẽ hkwỳjjaja kot amnhĩ nễ kaxkwa rũm mẽkarõmnuti mẽ hkwỳjê kator nễ pikap mẽ rênh par jakamã nhũm Satanastija gryk tỳx kumrêx.

Tirtüm kot ma mẽ kot amnhĩ xà htỳx kamā hamak o pa tũm xàta wỳr mēnh xà hā arĩgro hwỳr amgrà grēre nhũm tee ri amnhĩ kukamā hamaxpēr nē gryk tỳx o gryk tỳx. Anē.

¹³ Hāmri nhũm kagāmnutija mẽ kot amnhĩ nē kaxkwa rũm kator ã amnhĩ pumu nē gryk tỳx nē. Nē gryk xàj ma akupỳm ni kot hkra myre ho pijagri xwỳnhnta wỳr tē nē tanhmā ho kaxyw hkôt ho krihkrit.

¹⁴⁻¹⁶ Hāmri nhũm Tirtüm kapēr o mẽ wryk xwỳnhjê hōja omu nē nija mã àanhàhti jara gô. Kot kagāmnuti pē ho htor nē ma nhỹri hpimxur xà wỳr htēm kaxyw. Nē kormā htor kaxyw nhũm kagāmnuti omu nē kot gô ho hanhir kaxyw hkôt hakwa rũm gô kapĩ nhũm hpikapĩr rax kumrēx. Te pyhti hprôt tỳx pyrāk. Hāmri nhũm Tirtüm omu nē nija nē tanhmā pika hto nhũm kām axkjê nhũm gô hprôt nē kamā pikapĩr pa. Jakamā nhũm mex pē àanhàhti jara ho to nē ma kapôt ã pimxur xà hwỳr ma tē. Nē kamā pa hā amgrà axkrunēpxi nē hkôt mytwrỳ kēp 6 nhũm prem hamār mex rāhā ho pa.

¹⁷ Hāmri nhũm kagāmnuti tee ri kām hpĩr prām kaprỳ nē gryk tỳx kumrēx. Hāmri nē ma ni hkwyjê hwỳr mō. Mē kot Tirtüm mẽ Jesus wa hkôt amnhĩ nhĩpêx o mẽ pa xwỳnhjê hwỳr tanhmā mẽ homnuj to kaxyw ma mẽ hwỳr mō. Hāmri nē tanhmā kot mẽ ho kaxyw gô xujanār mỳ ri nō.

13

Satanasti nhõ kôwenatô wa kot gô xujanār rũm kator ã wa harēnh

Sikũn Tesarôn 2.3-5

¹ Tã pa axte mẽmoj pumu. Nhũm gô xujanār rũm Satanasti nhõ kôwenatôjê hōja te mrymnuti pyrà nē àpir o mō. Kagāmnuti pyrà nē hkrã kēp 7. Nē urāk nē hpār kēp 10. Nē hpār piitã kamā pahi hā mẽ ahkà. Nē ahkà piitã hā axtem tanhmā Tirtüm o kapēr punuj to nē tanhmā haprỳ hto hā kagaja hikwỳ.

² Nē hkà te kēp ropkrorti kà pyrāk. Nē hakwa te kot rēãwti jakwa pyrāk. Nē ãhkra te kot pàati nhĩhkra pyrāk. Jakamā na pre kagāmnuti nhỹ hā hihtỳx o kēp pahi hā pika nhõ xwỳnhjê ho amnhĩptār o pa.

³ Nē hkrã hō te mẽ kot hayr o hpĩr nhũm ra akupỳm htĩr nē arĩ hayr xà wakre rã nyw pyrāk. Jakamā nhũm pika kamā mẽ pa xwỳnhjaja amnhĩ jaêr pē omu nē kamā no pyma nē. Hāmri nē hkôt amnhĩ nhĩpêx o pa.

⁴ Hāmri nē kagāmnuti kot tanhmā mrymnuti ho nhũm ã hā mẽ ho amnhĩptār jakamā nhũm mẽ piitã hamē wa hā hpijaam kaxyw wa kām wa mex o wa mex ã wa harēnh o pa. Nē mrymnuti hā axpēn mã:

—Hêxta waa nē. Mē pahtō na mẽ pahte mrymnutita pyrà nē ã mẽ pahte amnhĩ nhĩpêx kot anhỹr? Mē pahtō kot pu kutã xa nē paxihtỳx o hkurê kapa? Nà amrakati kumrēx. Anē.

⁵⁻⁶ Hāmri nhũm Satanasti tanhmā mrymnuti ho nhũm kapēr o ri mẽ hkôt pa nē mẽ ho amnhĩptār o hā amgrà axkrunēpxi nē hkôt mytwrỳ kēp 6. No ãm axtem nē Tirtüm o kapēr punuj o ri mẽ hkôt pa. Nē ri tanhmā haprỳ hto nē ò krija mex kêt ã harēnh o ri mẽ hkôt pa.

⁷ Hāmri nhũm Satanasti ra kot mẽ hkurê kaxàr kaxyw kām anē nhũm axtem nē Tirtüm pē hkrajê kutã amnhĩ xãm nē mẽ hwỳr hprôt nē tanhmā hpijapu hto ho pa nē mẽ ho axtem nē mẽ ho krihkrit pa nē ahpỳnhã ri pika piitã hkôt mẽ uro hkwyjê ho amnhĩptār o pa. Nē ahpỳnhã mẽ kapēr xwỳnh piitã mẽ ho amnhĩptã.

⁸ Jakamā nhũm mẽ ohtô rax kumrēx nē mrymnuti hkôt amnhĩ nhĩpêx. Nē kutã hkõn krã ho rōrôk nē hkrĩ nē kām mex o mex ã harē. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwỳnh kôt ra mẽ kot amnhĩ xunhwỳr xwỳnhjaja tapxipixjaja na prem hkôt amnhĩ xunhwỳr kêt nē. Amnepê mã kormã amrakati ri Tirtüm mẽ Jesus wa ò kagà kamā mẽ htĩr tũm nē mẽ pa mã xwỳnh nhĩxi xwỳnh pixjaja na prem mrymnuti pumu nē hkwyjê rom hpri hā kot amnhĩ nhĩpêx ã omunh kurê kumrēx nē hkôt amnhĩ nhĩpêx kêt nē.

⁹ E ka mẽ atõ axumar kaxyw ajamak kre hã kot kaj ixujarênh piitã ama nẽ kãm ajamaxpêr tỳx rãhã ho apa.

¹⁰ Jakamã kwa Tĩrtũm kõt ixkwỳjaja. Kwãr mẽ mãmri mẽ apynê nẽ mẽ ajagjê.

Nẽ kwãr mẽ mãmri wapo ho mẽ ajayr o mẽ apa.

Nom kêr ka mẽ umaj ixkaga hkêt nẽ. Ixkaga hkêt o ixkaga hkêt.

Mẽ ãm ixkõt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹ Tã pa mrymnuti hõ pumu. Nom wamta pyrã nẽ gõ xujanãr rũm kator kêt axtem pika rũm kato. Nẽ ôwêhti hkrare pyrã nẽ hpãr pijakrutre. Nẽ te ho kagãmnuti kapêr tỳx pyrã nẽ kapêr tỳx kumrêx o pa.

¹² Gõ xujanãr rũm mrymnuti xàpir xwỳnhta nhỹ hã pika nhõ xwỳnhjê mã kapêr tỳx nẽ mẽ kãm:

—E pika piitã hkõt mẽ apa xwỳnhjaja mẽ inhma. Kêr ka mẽ kot hkrã hõ jayr o hpĩr nhũm akupỹm htĩr xwỳnhta kõt pix mã amnhĩ nhĩpêx rãhã ho ri apa. Nẽ kãm mex o mex ã harênh rãhã nẽ.

Anhỹr o mẽ kãm kapêr. ¹³ Hãmri nẽ Satanasti nhỹ hã mẽ kãm aa mẽ kot mẽmoj pumunh kêt kwỳ ho anhỹr o pa. Jao kaxkwa rũm tanhmã mẽ kãm kuwy ho wrỳk to nhũm pikap rôrôk nhũm mẽ amnhĩ jaêr pê omu nẽ kamã no puma nẽ. ¹⁴ ã ri mẽ noo mã mẽ kãm amnhĩ nhĩpêx anhỹr o ri mẽ hkõt pa. Gõ xujanãr rũm mrymnutija noo mã ã hêx rom amnhĩ nhĩpêx anhỹr o mẽ no kupyw o pa nhũm mẽ omu nẽ hkõt amnhĩ nhĩpêx. Hãmri nhũm mẽ kãm mẽmoj tã karõ nẽ mẽ kãm:

—E wam mrymnutita. Mẽ kot hkrã hõ jayr o hpĩr nhũm akupỹm htĩr xwỳnhta kêr ka mẽ kãm hkarõ nhĩpêx nẽ ho mẽ anhõ sãnti. Kê mẽ piitã hwỳr mra nẽ kutã hkõn krã ho rôrôk nẽ hkrĩ nẽ amnhĩ to kuwy nẽ kãm mex o mex ã harê.

Anhỹr o mẽ kãm hã karõ. ¹⁵ Hãmri nhũm mẽ kuma nẽ mar xà hkõt hipêx nẽ ãm nhũm xa. Hãmri nhũm mrymnuti kot hitepta omu nẽ hwỳr tẽ nẽ tanhmã ho nhũm ra kapêr nẽ mẽ kãm:

—E kêr ka mẽ kot inhmex ã ijarênh kêt xwỳnhjê pynê nẽ mẽ himex pa. Anẽ.

¹⁶ Hãmri nhũm pika rũm mrymnuti kator xwỳnhta haxwỳja mẽ kãm kapêr nẽ mẽ kãm:

—E koja ixkwỳjaja inhỹ hã mẽ apiitã mẽ apê ixkwỳ hã mẽ akagã. Mẽ ate amnhĩ to rũnh xwỳnhjaja nẽ mẽ ate amnhĩ to hkryre xwỳnhjaja. Nẽ amarĩ mẽ kãm mẽ axapênh xwỳnhjaja nẽ amnhĩ mã mẽ axapênh xwỳnhjaja. Nẽ mẽ akàxpore rũnh xwỳnhjaja nẽ mẽ apê amrakati xwỳnhjaja. Kojã mẽ apiitã mẽ akagã hpa. Mẽ akwỳ nhõkrã kagã nẽ mẽ akwỳ xupòk rũm mẽ anhĩkra katut kagã.

¹⁷ —Gõ xujanãr rũm mrymnutita nhĩxi kot paj mẽ atã hipêx. Rỳ hixi hã nũm nhĩpêx. Hãmri ka mẽ axàpkur xà japrôr kaxyw nhỹhỹm mra nhũm mẽ atã hixita pumu nẽ rĩ kormã mẽ amã mẽmoj kwỳ ho wênê ka mẽ amnhĩm haprô nẽ ho axàpkur o ri apa. Nẽ mẽ ate mẽmoj to wênê xwỳnhjaja koja mẽ apê mẽmoj japrôr kaxyw mẽ awỳr mra ka mẽ tee ri nhỹhỹnh mẽ hã hixi japêr hãmri nẽ mẽ kãm mẽmoj to wênê hkêt nẽ. ãm nhỹhỹnh mẽ atã hixi hã kagãta pumunh pix kukwak ri kot kaj mẽ awjaprô rỳ mẽmoj to wênê. Anẽ.

¹⁸ E kwa kêr ka mẽ ixte mẽmoj pumunh nẽ mẽ amã hã kagãta pumu nẽ ama nẽ kãm ajamaxpêr tỳx o apa. Mrymnutita nhĩxi na kêp nũm. Nũmja kêp 666. E kaj mẽ akrã hi mex xwỳnhjaja kot kaj mẽ aprĩ hã ja mar tỳx kurê kumrêx.

14

Tĩrtũm mex ã mẽ grer

Apokarip 7.1-8

¹ Tã pa axte mẽmoj pumu. Nhũm mẽ pahte amnhĩ tomnuj pãnhã amnhĩrer xwỳnhja hixêt pê Siãwja nhĩmõk ã xa. Nẽ puhã mẽ ohtô rax kumrêx nẽ kuhê. Mẽ ohtô ho mẽ ohtô. Piitã kamã mẽ kêp 144.000. Nẽ piitã õkrã hã mẽ pahte amnhĩ tomnuj pãnhã amnhĩrer xwỳnh mẽ Hipêxã wa hixi jaxwỳr pa mẽ omu.

² Nhũm mẽ kaxkwa kamã grer o kuhê. Mẽ grerja mex o mex. Te kot gô hprôt tỳx hkoko htỳx pyræk. Nẽ te na katõtòk tỳx pyræk. Nẽ te wiorãw môr xwỳnhjaja kot hkakrênh mex pyræk pa mẽ mar o xa.

³ Nẽ mẽ grer xwỳnhjaja. Jejus puhã mẽ ohtô rax kumrêx nẽ mẽ kuhê xwỳnhjaja na prem Tĩrtũm kot mẽ ho amnhĩptâr ã hkrĩ xàta kuri grer o kuhê. Nẽ mẽmoj tĩr pẽ kwat xwỳnhjê mẽ mẽ àptâr tũm pẽ 24jê kuri grer o kuhê. Mẽ grer nyw o gre. ãm mẽ tapxipixjaja mẽ kot mẽ grer nywja mar. Ra mẽ kêp Tĩrtũm kra hã mẽ kot mẽ ôkrã hã Tĩrtũm mẽ Kra Jejus wa hixi ã kagà nhũm Tĩrtũm kot ra mrymnuti mẽ hõta wa kêp mẽ utâr nẽ amnhĩ wỳr mẽ ho àpir xwỳnh na pre mẽ. ãm mẽ tapxipixjaja mẽ grer nywja ma nẽ wa kãm ho grer o kuhê.

⁴⁻⁵ Na prem tãm amnhĩ nhĩpêx nẽ Tĩrtũm kôt amnhĩ nhĩpêx rãhã ho pa. Te mẽ kot amnhĩ prõ pix tãnopxar rãhã ho pata pyræk. Nẽ ri tanhmã hêx to rỳ tanhmã ri amnhĩ tomnuj to ho pa hkêt nẽ. ãm tãm ri amnhĩ nhĩpêx mex o pa. Mẽ kêp Tĩrtũm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kôt pix mã amnhĩ nhĩpêx o pa. Jakamã na prem mrymnuti kutã rôròk nẽ kãm mex o mex ã harênh kêt nẽ. Tã mẽ kumrêxjaja Tĩrtũm mẽ Kra wa kuri wa kãm grer o kuhê.

Tĩrtũm kapêr o wryk xwỳnh pijakrunêpxi jarênh

⁶ Tã pa axte Tĩrtũm kapêr o wryk xwỳnhjê hõ pumu nhũm kỳx pẽ ri htor o pa. Ahpỳnhã ri pika piitã hkôt mẽ uro hkwyjê hkôt. Na ahpỳnhã ri mẽ kapêr xwỳnhjê piitã mẽ hkôt mẽ kãm Tĩrtũm kot tanhmã mẽ hipêx to hã harênh kaxyw. Ahpỳnhã mẽ kapêr xwỳnh piitã mẽ kãm harênh o pa. Nẽ htor o pa pẽ kỳx pẽ mẽ kãm kapêr nẽ mẽ kãm:

⁷ “E na ra Tĩrtũm mẽ ate amnhĩ tomnuj mỳrapê tanhmã mẽ ato kaxyw. Jakamã kwa mẽ tokyx hã apijaàm kaxyw akõn krã ho arôròk nẽ akrĩ nẽ kãm mex o mex ã harê. Kêp mẽmoj piitã ho kator xwỳnh na. Na pre kaxkwa ho kato nẽ pika ho kato nẽ gô xujanãr o kato nẽ hino ho kato nẽ mẽmoj piitã ho kator pa. Jakamã kwa kêr ka mẽ tapxipix ã mãn apijaàm nẽ kãm mex o mex hã harênh rãhã ho apa.”

Anhỳr o mẽ kãm kapêr. ⁸ Hãmri nhũm hõja wanta kôt tẽ nẽ uræk nẽ kỳx pẽ mẽ kãm kapêr o:

—Koja Tĩrtũm tokyx Papirõn grãnh pa. Na hte krĩ nhõ xwỳnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagôxyhti ho hkõm nẽ amnhĩ mẽ mẽ piitã mẽ kãm õr nẽ ho mẽ ho pipãnh pyræk. Na htem mênijê piitã ho amnhĩkati o pa. Nẽ amnhĩ kwỳjê pẽ mẽ hprõ ho amnhĩkati. Nẽ amnhĩ mẽ pika piitã hkôt mẽ pa xwỳnhjê mã anhỳr o pa. Mẽ kot mẽ uræk nẽ ã amnhĩ nhĩpêx anhỳr o pa kaxyw mẽ kãm anhỳr o pa. Ja mỳrapê na ra Tĩrtũm kot tanhmã mẽ ho kaxyw mẽ hã amnhĩ jarê. Anẽ.

⁹ Tã nhũm wa hkôt hõja tẽ nẽ wa uræk nẽ kàx pẽ pika nhõ xwỳnhjê mã kapêr nẽ mẽ kãm:

—E mẽ ate mrymnuti kutã akõn krã ho arôròk nẽ akrĩ nẽ kãm mex ã harênh xwỳnhjaja. Nẽ mẽ ate karõ nhĩpêx nẽ kutã akõn krã ho akrĩ nẽ kãm mex ã harênh xwỳnhjaja. Nẽ mẽ anhõkrã nẽ mẽ anhĩhkra hã hixi hã kagà xwỳnhjaja.

¹⁰⁻¹¹ —Tĩrtũm na tee ja hã mẽ apumu nẽ mẽ akamã gryk tỳx kumrêx. Mẽ ate kapêr kuhpa hã mrymnuti hkôt amnhĩ xunhwỳr jakamã nhũm mẽ akamã gryk tỳx o mẽ akamã gryk tỳx. Jakamã koja kuwy hpòk rãhã ho rãhã xwỳnhhta kamã mẽ arênh pa ka mẽ amnhĩ xà htỳx kamã ajamak rãhã apa ho apa. Koja kuwy hpòkja aa hapêx kêt nẽ kurũm kàx mã hkũm àpir o pa rãhã nẽ. Koja ã mẽ ate amnhĩ tomnuj o mẽ apa xwỳnhjê nhĩpêx anẽ ka mẽ kamã apa ho apa nẽ aa kurũm ajapòx kêt nẽ kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỳr rãhã apa ho apa. Mẽ ate gôj rũm mrymnuti mẽ hkarõ ho sãnti wa kutã akõn krã ho arôròk nẽ akrĩ nẽ wa kãm wa mex ã wa harênhja mỳrapê kot kaj mẽ ã amnhĩ nhĩpêx anẽ. Kot mẽ pahte amnhĩ tomnuj pãnhã amnhĩrer xwỳnh mẽ Tĩrtũm kapêr o mẽ wryk xwỳnhjê noo mã kot kaj mẽ ã amnhĩ nhĩpêx anhỳr o apa.

¹² Anhÿr o mẽ kãm kapër jakamã kwa kêr pu mẽ pahte Tirtũm kôt amnhĩ xunhwÿr xwÿnhjaja mẽ hkukamã mẽ harênhja ma nê Tirtũm kapër kôt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nê amnhĩ kaxyw Jejus kôt pajamxpêr tÿx rãhã nê. Hãmri nê nhÿrmã mẽ kurom ma õ krĩ hwÿr api nê kamã pamex kumrêx nê papa ho papa.

Mẽ kêp Jejus kwÿ hã mẽ htyk xwÿnhjê jarênh

Wam Tesarôn 4.16

¹³ Tã nhũm kaxkwa kamã mēhōja axte inhmã kapër nê inhmã:
E Juãw. Kêr ka ã akwÿjê mã mẽmoj tã kagã anê nê mẽ kãm hã kagã ho: “E mẽ ate Tirtũm kôt ri amnhĩ nhĩpêx xwÿnhjaja. Mẽ kot Tirtũm ã mẽ apar nhũm mẽ atyk tã koja amnhĩ tã mẽ ato mex rax kumrêx.” Anhÿr o mẽ kãm hã kagã.

Anhÿr o inhmã kapër. Hãmri nhũm Tirtũm Karōja kuma nê kãm:

—Nà ãm hãmri na ka ã mẽ harênh anê. Ra Tirtũm kot amnhĩ tã mẽ omunh rãhã ho pa. Mẽ kot kôt pix mã amnhĩ nhĩpêx o pa pê mẽ kãm mẽ hkurê xwÿnhjê kutã amnhĩ to htÿx rãhã htykja nhũm Tirtũm kot amnhĩ tã mẽ omunh mex. Koja mẽ ho mex kumrêx. Mẽ kot Jejus ã mẽ hpar tã koja mẽ ho mex rax nê nhũm mẽ kuri mex rãhã nê pa ho pa nhũm mēhō axte tanhmã mẽ ho hkêt nê. Anê.

Tirtũm kot tanhmã mẽ kãm hkĩnh xwÿnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nê kamã mēhōj te panhĩ pyrã nê nhÿ. Nhũm ôr o pahi hã mẽ ahkã htu nê kuteere xwagixre py nê o nhÿ.

¹⁵ Hãmri nhũm kaxkwa kamã Tirtũm kapër o mẽ wrÿk xwÿnhjê hōja Tirtũm mã amnhĩ jarênh xã hã ixkre rũm kato nê kakrã jaka kamã ÿr xwÿnhta mã kapër. Kàx pê kãm kapër nê kãm:

—E pika nhō xwÿnhjaja te mẽ hpur kãm mẽmo hy ra hkamrêk nê hikênh mã mex pyrãk. Jakamã anhō kuteere ata py nê ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkênh o ri pa pyrãk o mẽ hipêx nê ma ho mẽ himex o ri apa. Anê.

¹⁶ Hãmri nhũm kuma nê pika piitã mÿri õ kuteere ho apê nê te mẽmo hy jakãr pyrãk o mẽ hipêx.

¹⁷ Hãmri nhũm axte Tirtũm mã amnhĩ jarênh xã hã ixkre rũm kapër o mẽ wrÿkjê hōja kato. ìhkra kamã kuteere xwa gixre py nê o xa. ¹⁸ Hãmri nhũm axte hōja ixkre rũm kê hkôt kato nê hkukamã kator xwÿnhta mã kapër. Kàx pê kãm kapër nê kãm:

—E na ra Tirtũm tanhmã mẽ kot amnhĩ tomnuj to hã tanhmã mẽ hipêx to kaxyw. Te mẽ kêp mẽ hpur kãm mẽmo xô pê uwa ra hkamrêk nê rênh mã tãm pyrãk. Jakamã ma pika hwÿr mẽ hwÿr wrÿ nê mẽ hkôt ri anhō kuteere ho mẽ himex o ri apa. Anê.

¹⁹ Hãmri nhũm kuma nê ma pika hwÿr wrÿ nê mẽ hipêx o te mẽ kot uwa xô rênh nê prês kãm hkapĩr nê kagô janênh pyrã nê mẽ hkôt ri kuteere ho mẽ hpar o pa. Tirtũm ra mẽ kamã gryk tÿx o mẽ kamã gryk tÿx jakamã nhũm ã mẽ hkôt mẽ hipêx anhÿr o ri pa.

²⁰ Jakamã nhũm mẽ hkamrô hpikapĩr rax kumrêx o uwa kagô jakre. Te ho pyhti hprôt o nör pyrãk. Jao upÿm o 2 met nê hkôt ho mēj met. Nom hprôt xã hkôt ry rax o ry rax. Ho 300 kirôm. Nhũm ã mẽ kamrô hprôt rax anê.

15

Tirtũm mex ã mẽ grer

¹ Tã pa axte kaxkwa kamã mẽmoj pumu. Hãmri nê amnhĩ jaêr pê omu nê tee ri hkukamã ijamxpêr. Aa mẽ pahte mẽmoj ã kot anhÿr pumunh kêt xwÿnh pa pre omu. Nhũm Tirtũm kapër o mẽ wrÿk xwÿnh pê 7jaja ahpÿnhã pika hkôt mẽ kot amnhĩ tomnuj xwÿnhjê homnuj kaxyw akuprô nê kuhê. ãm jajê pixjaja koja Tirtũm nhÿ hã axte tanhmã mẽ homnuj to nê ho anhÿr pa hãmri nhũm ra ja hapêx o hapêx.

² Jakamã pa axte Tirtũm kapem gô rax pumu. Te kot kàx karÿr jaxênh mẽ kuwy hpôk o pihkãr pyrãk xwÿnhja hprôt o nõ. Nhũm Tirtũm kra hkwyjaja gô mÿ ri ohtô rax kumrêx nê kuhê. Na pre ra mrymnutija tee ri amnhĩ kôt mẽ rênh mã nê tee ri mẽ hã amnhĩ nhĩxi hã kagã hprãm kaprÿ nom nhũm mẽ hkaga nê Jejus kôt amnhĩ nhĩpêx rãhã ho pa. Nê

mrymnuti karõ ho sãnti mã mex ã harênh kêr rãhã ty nê kaxkwa hwÿr api. Jakamã nhũm Tirtũm amnhĩ tã mẽ omu nê mẽ kãm wiorãwti hkwȳ gõ nhũm mẽ piitã hamȳ nê gõ rax mȳ ri ho kuhê.

³ Hãmri nê Tirtũm mã tanhmã amnhĩ to ho pa xwÿnh pê Mojes mẽ mẽ pahte amnhĩ tomnuj pãnhã amnhĩrer xwÿnhhta wa kot Tirtũm mã grerta nhũm mẽ Tirtũm mã ho grer o kuhê nê grer o:

E Pahi Maati Tirtũm. Na pa mẽ ra inhmex pê awÿr ixàpir pa.

Ãm hãmri na ka hte tanhmã amnhĩ nhĩpêx to ho ri apa.

Aa tanhmã axêx to hkêr.

Nê mẽ ixrom axihtȳx o axihtȳx.

Nê mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêr kwÿ ho anhÿr o apa.

Pika piitã hkôt ahpÿnhã mẽ ho amnhĩptãr xwÿnhjê nhõ Pahi Maati na ka.

Nê ate tãm amnhĩ nhĩpêx xwÿnh na ka.

⁴ Jakamã na htem piitã atã hpijaàm o pa.

Nê amã mẽ kapêr xàptãr pix o amã kapêr.

Nê amã amex o amex ã ajarênh rãhã nê. Ãm hãmri mẽ ixrom kapxipix amex o amex.

Jakamã koja ahpÿnhã pika piitã hkôt akrajê piitã ate tãm amnhĩ nhĩpêx nê tãm mẽ piitã tanhmã mẽ harênh to hã ajarênh ma nê awÿr mra nê akutã hkõn krã ho rôrõk nê hkrī nê amã amex o amex ã ajarê. Anê.

Mê homnu xà hã xijere jamÿnh xwÿnh jarênh

⁵ Tã na pa axte mẽmoj pumu. Kaxkwa kamã Tirtũm nhõrkwȳ hã hitom xà piitã amnhĩ kahê xà rê nê kuhê pa omu. Nê ixkre kamã õ hitom mex maati haxwȳja amnhĩ kahê xà mẽ nê xa.

⁶ Hãmri nhũm ixkreja rũm Tirtũm kapêr o mẽ wrȳk xwÿnh pê 7jaja hapõj nê kuhê. Mẽ ê hakajre nê hirã htÿx kumrêx. Nê mẽ hinõ pre xàja ôr pix o. Nê piitã Tirtũm mã tanhmã kot mẽ homnuj to xà hã xijere pê 7ta jamÿnh kaxyw kuhê.

⁷ Hãmri nhũm mẽmoj tĩr pê kwatjê oja mẽ kãm xijere hkwȳ jamȳ nê mẽ hwÿr o tẽ. Xijere kêp 7 nê piitã ôr o. Nhũm hamȳ nê Tirtũm kapêr o mẽ wrȳk xwÿnhhtajê hwÿr o tẽ nê ho mẽ hipêx nhũm mẽ ahpÿnhã hamȳ. Xijere kamã Tirtũm gryk xà jamȳ nê o kuhê.

⁸ Pu nhũm Tirtũm rũm kuwȳ hkũm hapõj. Tirtũm mex nê hihtȳx xwÿnhhta rũm hapõx rax o ixkreta kunor pa nhũm mẽ tee ri hwÿr gjêx prãm kaprȳ.

16

Xijere kamã mẽ homnu xà pê 7 jarênh

¹ Tã pa arĩ mẽmoj pumu nhũm Tirtũm nhõrkwȳ kamã mẽhõja kapêr o wrȳk xwÿnh pê 7jê mã kàx pê kapêr nê mẽ kãm:

—E na pa ra mẽ kot ixkapêr kwÿm ri amnhĩ nhĩpêx xwÿnhjê pumu nhũm ixpê ja omnuj tÿx o ixpê omnuj tÿx. Jakamã e mẽ anhõ xijereta jamȳ nê ma pika hwÿr mẽ hwÿr wrȳ nê axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwÿr wrȳ. Anê.

² Hãmri nhũm mẽ kuma nê axpên pãnhã mẽ hwÿr wrȳ. Nhũm wamta kumrêx pika piitã hkôt mẽ homnu xàta kapĩ. Pu nhũm mẽ kot mrymnuti mẽ õ sãnti wa kãm mex ã harênh nê amnhĩ tã wa hixi jaxwÿr xwÿnh piitã hkànhy hpa nê à htÿx kumrêx nê ri pa.

³ Hãmri nhũm wamta kôt hõja õ xijere py nê gõ xujanãr kãm hkapĩr pa nhũm gõ te mẽ htykjê kamrõ pyrã nê kamã mẽmo mry htyyxã rênh xwÿnh piitã pikaprãr pa.

⁴ Tã ra xijere kapĩr xwÿnh o axkrut nê õ xijere kapĩ hãmri nhũm hkôt hõta õ xijere py nê hpãnhã gõ hkryre piitã hkôt hkapĩr pa. Pyhti nê ri hino piitã hkôt hkapĩr pa nhũm piitã gõ xujanãr pyrã nê mẽ hkamrõ hã amnhĩ jahkre hpa.

⁵ Hãmri nhũm axtem Tirtũm kapêr o mẽ wrȳk xwÿnhjê hõ kot kãm gõ piitã hamãr xwÿnhhta ja hã omu nê Tirtũm mã kãm:

Pa amex rãhã apa ho apa xwÿnh. Nê arãhã apa ho apa xwÿnh.

Nã ãm hãmri na ka ã mẽ kêp gõta nhĩpêx anê.

⁶ Na prem mẽ kot akôt amnhĩ nhĩpêx xwỳnhjê mẽ mẽ kãm ri akapêr jarênh xwỳnhjê hpar o pa nhũm mẽ hkamrô hpikapĩr rax nê.

Tã ka ra mẽ hã mẽ kêp mẽ hkôm xà homnu hpa nhũm mẽ kêp mẽ hkamrô ã amnhĩ jahkre nhũm mẽ tee ri ho hkôm mã. Nà ãm hãmri na ka ã mẽ kêp gô nhĩpêx anê Tĩrtũm. Anê.

⁷ Hãmri nhũm mẽ kot Tĩrtũm mã mẽmoj nhõr xà hã mẽsti hpar pê hkrĩ xwỳnhjê hõja kuma nê kãm:

Nà ãm hãmri na ã ajarênh anê Tĩrtũm.

Ãm hãmri na ka ã akrajê hã mẽ hipêx anê.

Ra ate mẽ hã amnhĩ jarênh xà hkôt na ka hte tanhmã mẽ hipêx to.

Nà apê mẽ inhõ Tĩrtũm Maati na ka. Mẽ ixrom axihtỳx o axihtỳx nê axàhpumunh o axàhpumunh. Anê.

⁸ Tã ra axkrunêpxi nê õ xijere kapĩ. Jakamã nhũm mẽ hpãnhã hõja õ xijere o tẽ nê myyti hã hkapĩr pa nhũm hkagro htỳx nê pika hkôt mẽ pa xwỳnhjê hkà ho hxêt o pa.

⁹ Kagro htỳx o hkagro htỳx jakamã mẽ hkà ho hxêt nhũm mẽ kamã hkà kajê hpa. Hãmri nê tee ri amnhĩ pumu nê hamaxpêr o:

—Nà Tĩrtũmtija na ã mẽ pahtomnuj tỳx anê. Anê.

Hãmri nê kamã gryk tỳx nê haprỳ nê tanhmã ho kapêr punuj to ho pa. Nom mẽ kot amnhĩ tomnuj kaga nê kãm mex o mex ã harênh kêt nê arĩ tanhmã amnhĩ tomnuj to ho pa.

¹⁰ Nhũm ra kêp kwat nê õ xijere kamã mẽmojja kapĩ. Jakamã nhũm ra hpãnhã hõja õ xijere o tẽ nê gôj rũm mrymnuti kot mẽ ho amnhĩptàr xà hã hkrĩ xà hã hkapĩr pa. Jakamã nhũm ra kot mẽ ho amnhĩptàr xà hã pikaja kamã kamàt kô htyk par kumrêx. Hãmri nhũm mrymnuti mẽ hkôt mẽ kot amnhĩ nhĩpêx xwỳnhjê hã kamàt kô hpa nhũm mẽ amnhĩ xà htỳx ã maj amnhĩ nham o axpên kamnhar tỳx kumrêx. ¹¹ Nê ã Tĩrtũm kot mẽ hipêx anhỹr ã amnhĩ tã omu nê kamã gryk tỳx nê tanhmã ho kapêr punuj to ho pa. No ãm kot amnhĩ tomnuj xwỳnh ã amnhĩ pumunh nê kot amnhĩ tomnuj kaga hkêt nê.

¹² Nhũm prem ra kêp sĩk nê õ xijere kamã mẽmoj kapĩ. Jakamã nhũm hpãnhã hõja õ xijere kamã mẽmojta o tẽ nê pyhti pê Erax kamã hkapĩr pa nhũm gõja grà pa nê te kêp pry pyrà nê nõ. Jakamã nhũm myt japôx xà rũm mẽ ho amnhĩptàr xwỳnhjaja nê pôristijaja hãmri pijapu kaxyw Jerujarê hwỳr nojarêr nê hã hwỳr pa.

¹³ Tã nhũm kagãmnuti mẽ ÿ hã mẽ kãm hêx o pa xwỳnh mẽ mrymnutita wa mẽ hakwa rũm mẽmoj te priti pyrà nê hapôx o pa. No ãm priti hkêt mẽ kêp Satanasti mã mẽ àpênh xwỳnh kwỳy.

¹⁴ Jakamã na prem pika piitã hkôt mẽ kot aa mẽmoj pumunh kêt kwỳ ho anhỹr o hêx rom mẽ no kupyw o mẽ hkôt pa. Tã pika piitã hkôt mẽ ho amnhĩptàr xwỳnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtỳx o hihtỳx kurê kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwỳjê mã kapêr ã harênh

¹⁵ Tã nhũm Jejus pika hkôt hkrajaja arĩ mẽ htĩr nê pa xwỳnhjê mã kapêr nê mẽ kãm: E mẽ inhma ixkwỳjaja. Akupỹm ixte mẽ awỳr ixwryk xà hã arĩgroja ã kot paj te mẽ àhkĩnh xwỳnh kot amnhĩ nhĩpêx pyrà nê mẽ ajaer pê mẽ awỳr wrỳ. Jakamã kêr ka mẽ amnhĩ wỳr ijamãr rãhã ho apa. Kêr pa akupỹn wrỳ ka mẽ amnhĩ wỳr ixpumu nê akĩnh nê amnhĩ kamã amã ixpuma hkêt nê. Anê.

Mẽ kot axpên kurê kaxàr kaxyw mẽ pikuprõnh ã mẽ harênh

¹⁶ Tã nhũm Satanasti hkwyjaja pika piitã hkôt mẽ ho amnhĩptàr xwỳnhjê ho pikuprõnh pa nê mẽ hkurê kaxàr kaxyw ma Ijaew kot kãm “Amaketõ” jarênhja wỳr mra.

¹⁷ Hãmri nhũm Tĩrtũm kapêr o mẽ wryk xwỳnh pê 7 kot hitepta õ xijere py nê kax mã kamã mẽmoj kapĩr pa. Jakamã nhũm Tĩrtũm nhõrkwỳ kamã mẽ ho amnhĩptàr ã hkrĩ xà rũm Tĩrtũm kax pê kapêr o:

—E hāmri. Na pa ra mẽ kot amnhĩ tomnuj mỳrapê tanhmã mẽ ho jatur xàm mẽnh kaxyw. Anẽ.

¹⁸ Pu nhũm na hkatõtók nẽ hkrakrak nẽ haxênh nhũm pika htertet tỳx nẽ. Aa mẽ kot pika htertet tỳx kot anhỳr ã omunh kêt kumrêx.

¹⁹ Jakamã nhũm Papirõnja kajê axkrunêpxi. Papirõn nhõ xwỳnhjaja kot amnhĩ tomnuj tỳx o paja mỳrapê nhũm Tĩrtũm ã mẽ hipêx anẽ. Nẽ pika htertet o pika piitã hkõt krĩ grành pa. ²⁰ Nhũm gô hipôk piitã gôja hã axkamur nhũm hapêx pa. Nẽ kên prêk nẽ hkrã hixêt rôrôk nẽ hpigrành pa. Pika htertet tỳx kumrêx jakamã ã mẽmoj amnhĩ nhĩpêx anẽ. ²¹ Nẽ na mẽ pê jêr krã jakootija mẽ piitã mẽ hipy rôrôk. No ãm hkrã hkryre hkêt hkrã rũnh kumrêx. ãm hpỳnh nẽ kamã kêp 40 kir nẽ mẽ hã rôrôk nhũm mẽ tee ri amnhĩ tã ã omu nẽ Tĩrtũm kamã gryk tỳx nẽ haprỳ nẽ ho kapêr punuj nẽ.

17

Tĩrtũm kra hkêt xwỳnhjê jarênh

¹ Tã pa pre kê axte mẽmoj pumu. Nhũm kot xijere jamỳnh xwỳnhjê hõja ixwỳr tẽ nẽ inhmã:

—E ma ixkõt tẽ nẽ mẽmoj pumu. Anẽ.

Hāmri pa kuma nẽ ma hkõt tẽ nhũm inhmã:

—Nà ahpỳnhã gô rax mỳri krĩ nhõ xwỳnhjaja te ho ni hkuprỳ gô mỳ ri ỳr nẽ kãm mẽmyjê piitã hkĩnh o ỳr xwỳnhhta pyrãk. Na htem urãk nẽ Tĩrtũm kapêr kõt ri amnhĩ nhĩpêx kêt nẽ. ãm htỳx ri tanhmã amnhĩ tomnuj to ho pa. Jakamã koja Tĩrtũm tanhmã mẽ homnuj tỳx to nẽ mẽ ho hapêx. ² Krĩ piitã hkõt mẽ ho amnhĩptar xwỳnhjaja na hte ma mẽ õ krĩ hwỳr mra nẽ te mẽ kot mẽ hkuprỳjê ho amnhĩkati pyrãk o amnhĩ nhĩpêx. Nẽ te pipãnh nẽ htỳx ri amnhĩ nhĩpêx pyrãk o amnhĩ nhĩpêx o pa. Nhũm krĩ nhõ xwỳnhjaja mẽ urãk nẽ amnhĩ krã hkõt pix mã tanhmã amnhĩ tomnuj to ho ri pa. E ma ixkõt tẽ nẽ ja hã mẽ omu. Anẽ.

³⁻⁴ Hāmri nhũm Tĩrtũm Karõ tanhmã ixto nhũm kapêr o wrỳk xwỳnhja ma kapôt wỳr ixto mỗ pa kapôt ã mrymnuti hkrã kêp 7 nẽ kamã hpàr kêp 10 xwỳnhhta pumu nhũm hkamrêeti nẽ xa. Nẽ ì piitã hã tanhmã Tĩrtũm o kapêr punuj to hã kagà. Nhũm katut ã mẽhõ ni kuprỳta nhỹ. Mẽ ho amnhĩptar xwỳnh ã mẽ ê kakrã htyk nẽ hkamrêk o hkukar jaxà nẽ hã nhỹ. Nẽ ôr o ôkrexê. Nẽ ôr o hinwỳyxê nẽ ìhkra kamã kax. ãm ôr pix o hikukrêx. Nẽ kên mex karỳr pix o amnhĩ jamrêx. Nẽ ôr o kopti hõ py nẽ hã nhỹ. Kopti kamã ni kuprỳ kot amnhĩ tomnuj xà. ãm kot mẽ kêp mẽ mjên o amnhĩkati ho pa xà pix nhũm kupy nẽ o nhỹ.

⁵ Nẽ ôkrã hã amnhĩ nhĩxi hã kagà kot:

Inhĩxi pimxur pê PAPIRÕN RAXTI.

Nẽ ixpê mẽ kêp mẽ mjênjê ho amnhĩkati ho mẽ pa xwỳnhjê nã na pa.

Nẽ ixpê mẽ kot axpên prõ ho amnhĩkati o mẽ pa xwỳnhjê nã na pa.

Nẽ ixpê mẽ kot Tĩrtũm nẽ mẽ kãm hêx o ri mẽ pa xwỳnhjê nã na pa.

Nẽ ixpê mẽ kot Tĩrtũm kapêr kõt amnhĩ nhĩpêx o pa hkêt xwỳnhjê nã na pa.

Anhỳr o ôkrã hã amnhĩ nhĩxi hã kagà kot anhỳr. ⁶ Nhũm axpã nẽ nhỹ pa omu. No ãm kagôxỳhti ho hpiãnh kêt. Mẽ kot Jesus kõt amnhĩ xunhwỳr nẽ ri mẽ kãm Jesus kêp mẽ õ pahiti hã harênh xwỳnhjê kamnhwỳr o mẽ hpar nhũm mẽ hkamrô pikapĩr xwỳnhjê kamrô ho na pre axpã nẽ nhỹ. Pa ã kot amnhĩ nhĩpêx anhỳr ã omu nẽ tee ri ijamaxpêr.

⁷ Hāmri nhũm Tĩrtũm kapêr o wrỳk xwỳnhja inhmã:

—Kwa mon ka ri ja pumu nẽ tee ri ajamaxpêr? E kot paj ixprĩ hã amã harê ka inhma. Niti mẽ hã ỳr xwỳnh pê mrymnutita. Krã pê 7 nẽ kamã hpàr pê 10 xwỳnhhta kot paj ixprĩ hã amã hamẽ wa harê ka wa harênh ma.

⁸ —Nà mrymnutija na pre htĩr nẽ ri pa tã ty nẽ ahkre xupỳmti kamã hikwỹ. Nom koja akupỳm htĩr nẽ kurũm kato nhũm mẽ piitã omu nẽ ahpỳnhã tanhmã hamaxpêr to. Amnepêm kormã amrakati ri Tĩrtũm kot õ kagà kamã mẽ htĩr tũm nẽ mẽ pa mã xwỳnhjê nhĩxi jaxwỳr xwỳnhjaja koja kator ã omu nẽ ãm omu nẽ tanhmã hamaxpêr to hkêt nẽ.

No mẽ kot Jejus kôt amnhĩ xunhwỳr kêt xwỳnhjaja koja mẽ amnhĩ jaêr pê akupỳm kator ã omu nê tee ri hkukamã hamaxpêr. Hãmri nê axpên mã: “Kwa amnepêm htyk tă ra tanhmã amnhĩ to nê akupỳm htĩr nê api nê mỗ.” Anhỳr o axpên mã harê. Hãmri nhũm kato nê ma tẽ nhũm Tĩrtũm tă ho hapêx kumrêx nhũm hapêx o hapêx.

⁹—Kwa inhma nê jam ajamaxpêr tỳx nê. Mrymnuti krã pê 7ta te kêp hixêt prêk pê 7 pyrã nê hã ỳr xwỳnh ni kuprỳta te hixêt prêk pê 7ta ã ỳr pyrãk.

¹⁰—Nê mrymnuti hkrã pê 7ja te kêp mẽ ho amnhĩptàr xwỳnh pê 7 pyrãk. Nhũm mẽ ho amnhĩptàr xwỳnhjaja te mẽ kêp 5 nê ra htyk pyrãk nhũm hkôt hõja arĩ mẽ ho amnhĩptàr o pa. No kot hitepta kormã. Nom koja mẽ ho amnhĩptàr ry hkêt nê.

¹¹—Mrymnuti htĩr nê pa htã htyk nê ra akupỳm htĩr nê àpir xwỳnhhta koja hkrã hitepta pãnhã mẽ ho amnhĩptàr o pa. Jakamã te mẽ ho amnhĩptàr xwỳnh pê 7jê hõ pyrãk. Koja hkrã pê 7ja mẽ ho amnhĩptã nê gaa nê htyk mẽ nhũm hpãnhã mrymnutita hpãnhã mẽ ho amnhĩptã. Hãmri nhũm rĩ kormã Tĩrtũm tă mẽ ho hapêx par kumrêx.

¹²—Nê ate mrymnuti hkrã kamã pàr pê 10 pumunh xwỳnhhta te mẽ kêp mẽ ho amnhĩptàr xwỳnh pê 10 pyrãk. No ãm jaja na kormã mẽ ho amnhĩptàr kêt nê. Koja mẽ nhỹmã anhĩpê mrymnuti nhỹ hã ahpỳnhã ri mẽ ho amnhĩptàr o pa nom mẽ ho amnhĩptàr japjê hkêt nê. ¹³ Koja mẽ tanhmã ja hã axpên mar to hãmri nê mrymnuti mã anê nhũm mẽ hpãnhã mẽ piitã mẽ ho amnhĩptã.

¹⁴—Nê mẽ ho amnhĩptàr xwỳnh pê 10jaja koja mẽ pahte amnhĩ tomnuj pãnhã amnhĩrer xwỳnh kurê kaxàr kaxyw hwỳr mra nê kutã pijapu ho kuhê. No ãm tee ri kãm tanhmã ho hprãm hkapyr nhũm mẽ ho axtem nê amnhĩ tă mẽ himex pa. Hihtỳx o hihtỳx o kot mẽ ho hpimràatã mẽ hakrenh par. Nê kêp pika piitã hkôt mẽ ho amnhĩptàr xwỳnhjê nhõ Pahihti. Tãm na pre amnhĩ wỳr mẽ kot hkôt amnhĩ nhĩpêx o mẽ pa xwỳnhjê wỳ nhũm htem amnhĩ kaxyw hkôt hamaxpêr mex rãhã ho pa. ¹⁵—Nê krĩ pê Papirõn kapem gô xohtô mỳ ri ni kuprỳ hkrĩ xwỳnhhta. Gô xohtôja te kêp ahpỳnhã ri pika piitã hkôt mẽ uro kwỳ pyrãk. Nê te ahpỳnhã ri mẽ kapêr xwỳnh kwỳ pyrãk.

¹⁶—Nê mrymnuti hpàr pê 10ta kêp mẽ ho amnhĩptàr xwỳnh pê 10 pyrãk. Jakamã koja mẽ kãm ni kuprỳta prãm nõkati nê kamã gryk tỳx kumrêx. Hãmri nê hwỳr mra nê kêp hikukrêx piitã utà nê kêp ê hkwrỳnh pa nhũm hkênh mex nê xa. Hãmri nhũm mẽ kupĩ nê ì hkrêr pa nê kuwy kamã hi rê nhũm kaxàr pa nê hapêx.

¹⁷—Na pre pahi pê 10jaja mrymnuti hkôt amnhĩ xunhwỳ nhũm Tĩrtũm ãm ja hã mẽ omu nê tanhmã nê mẽ kãm nê hkêt nê. Jakamã koja mẽ ãm hkôt pix mã amnhĩ nhĩpêx o pa rãhã nhũm Tĩrtũm mẽ ho hapêx. Nê mẽ õ krĩ mẽ mẽ ho hpimràatã mẽ ho hapêx pa. Hãmri nê mẽ ho hapêx o mẽ ho hapêx.

¹⁸—Nê ate mễhõ ni kuprỳ pumunh xwỳnhhta te kêp krĩ rax pê Papirõn nhõ xwỳnhjê pyrãk. Nê mẽ ho amnhĩptàr xwỳnhja pika piitã hkôt mẽ ho amnhĩptàr xwỳnhjê hkrãhtũm na. Anê.

À Tĩrtũm kapêr o mẽ wrỳk xwỳnhja inhma mẽ harênh anê. Pa kuma nê ô ri mẽ amã hã kagà. Mẽ ate kamã harênh nê aprĩ hã mar tỳx kaxyw.

18

Tĩrtũm kot Papirõn grành par ã harênh

¹ Tã pa kê axte mẽmoj pumu. Nhũm axte Tĩrtũm kapêr o mẽ wrỳk xwỳnhjê hõja kaxkwa rũm ahpar mã wrỳk o tẽ. Tĩrtũm nhỹ hã hihtỳx nê kamã hirã rax kumrêx o pika piitã hkôt mẽ kãm hirã pa. ² Nê ahpar mã tẽn wrỳ nê kax pê kapêr o:

E koja Papirõnja pigrành pa nê hpãnhã kêp Satanasti mã mẽ àpênh xwỳnhjê papxà nê kêp nhõnhti papxà. Hãmri nê aa kamã mẽmoj mex kêt kumrêx.

³ Krĩ nhõ xwỳnhjaja na htem Tĩrtũm kapêr kôt amnhĩ nhĩpêx kêt nê amnhĩ krã hkôt kãm prãm xà hkôt pix mã tanhmã amnhĩ tomnuj to ho pa. Te mễhõ pipãnh nê htỳx ri amnhĩ nhĩpêx o pa pyrãk.

Nhũm krĩ piitã hkôt mẽ ho amnhĩptàr xwỳnhjaja mẽ hwỳr mra nê mênijê ho amnhĩkati ho pa.

Ně krī nhõ xwỳnhjaja mẽmoj pumu ně kãm hkĩnh ně haprôr kurê kumrêx o pa ně aa ujaoprôr o hapêx kêt ně.

Jakamã na hte krī hkwy nhõ xwỳnhjaja mẽ hwỳr mẽmoj to pa ně xatã mẽ kãm ho wênê ně mẽ kukwak ri mẽ hikàxpore rũnh ně pa.

Anhỹr o kapêr. ⁴ Hãmri nhũm Tĩrtũm Papirõn kamã hkrajê mã kapêr ně mẽ kãm:

E mẽ tokyx mẽ kot ri htỳx amnhĩ nhĩpêx xwỳnhjê nhõ krĩta rũm ajapôj ixkrajaja.

Kot kaj mẽ anhỹr kêt ně ra mẽ hkôt amnhĩ nhĩpêx pa mẽ ato apimràatã mẽ ate amnhĩ tomnuj ã mẽ atomnuj tỳx ně.

⁵ Krĩ nhõ xwỳnhjaja na htem amnhĩ tomnuj rũnh o pa.

Mẽ kot amnhĩ tomnuj xà te mẽ kot kên katutxô nhũm hprêk rax o kot kaxkwa kanhwỳr kaxyw pyrãk.

Na pa hte ã mẽ kot amnhĩ nhĩpêx anhỹr ã mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapôj.

Anhỹr o hkrajê mã kapêr. Hãmri ně kapêr o mẽ wrỳk xwỳnhjê mã kãm:

⁶ E kwa mẽ ma mẽ hwỳr wrỳ ně tanhmã ixkrajê hã mẽ ho.

No ãm kêr ka mẽ tanhmã mẽ ho htỳx o mẽ kot ra tanhmã ixpê ixkrajê nhĩpêx tota jakre.

Kê mẽ tanhmã ixpê mẽ ho grire htã ka mẽ hã tanhmã mẽ ho htỳx kumrêx o mẽ kot mẽ hipêxta jakre.

⁷ Krĩ nhõ xwỳnhjaja na prem mex ně pa.

Ně mẽ hikukrêx rũnh ně hkĩnh ně pa.

Ně tanhmã amnhĩ to jarkrar to ho ri pa ně amnhĩ jarênh o:

“Ot pa mẽ te pahi ni kot amnhĩ nhĩpêxta pyrã ně ixkrĩ xà mex pix kãm ixkrĩ pyrãk.

Ně te Tĩrtũm kot amnhĩ nhĩpêx pyrãk o na pa htem amnhĩ nhĩpêx o ri ixpa.

Ně mẽ ixkĩnh ně mẽ inhmex rãhã ri ixpa.

Ã mẽ ixte amnhĩ nhĩpêx anhỹr xwỳnh na pa mẽ.”

Anhỹr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj tỳx ně pa.

Ně kê mẽ hkaprĩ ně amnhĩ xà htỳx kãm hamak rãhã ně pa ho pa.

⁸ E kê mẽ ã amnhĩ nhĩpêx anhỹr o pa.

Jakamã koja mẽ arĩgro hpỳnh kãm mẽ hkwyjaja hpikaprãr rũnh ně nhũm arĩ mẽ htĩr xwỳnhjaja omnuj ně pa.

Ně tee ri amnhĩ pumu ně hkaprĩ xaj mỳr o pa.

Ně amnhĩ xà htỳx kãm hamak o pa.

Ně tee ri amnhĩ nhĩpêx o pa.

Ně kãm prãm ně pa rãhã ty nhũm kuwy mẽ ho hkaxàr pa.

Ixpê Pahi Maati Tĩrtũm kot paj ixihtỳx kãm ã mẽ hipêx anê. Anê.

⁹ Hãmri nhũm krĩ piitã kurũm mẽ ho amnhĩptàr xwỳnhjaja. Mẽ kot mẽ hwỳr mrrar ně mẽ hkuprỳjê ho amnhĩkati ně mẽ uràk ně mẽmoj pumunh ně haprôr rãhã ho pa xwỳnhjaja tee ri krĩ kaxàr ně kàx mã kuwy hkũm àpir o paja pumu ně hkaprĩ ně mỳr o kuhê.

¹⁰ Ně Tĩrtũm kot mẽ ho hapêx par ã mẽ omu ně kãm ma htỳx kumrêx. Amỳm mẽ omunh o kuhê ně tee ri amnhĩ kukamã hamaxpêr ně htertet tỳx ně. Ně mỳr kãm kapêr o:

Hêxta waa ně Papirõn nhõ xwỳnhjaja.

Mẽ amex ně axihtỳx mex ně apa htã nhũm Tĩrtũm mẽ anhĩmex pa. Hêxta waa ně. Anê.

¹¹ Ně mẽ hwỳr mrrar ně mẽ kãm mẽmoj to wênê ho mẽ pa xwỳnhjaja haxwỳja krĩ pumu ně tee ri amnhĩ kukamã hamaxpêr ně hkaprĩ ně mỳr o kuhê. Nhỹri koja mẽ tokyx axte mẽmoj to wênê? Mẽ kêp mẽmoj japrôr rũnh xwỳnhjaja hkaxàr par kumrêx kênã.

¹² Na prem mẽmoj piitã ho pa ně mẽ kãm ho wênê. Mẽmoj mex piitã. ôr o mẽ hkukrêx ně prat o mẽ hkukrêx ně kên jaxênh ã kàxpore xohtôô. Ně kupêxê mex. Kakrã htyk ně hkamrêk ně hkroore ně hã hapjê. Ně mẽmo pĩ kuxware ně pĩ htỳx ně kên jakàr ně kàx o ri mẽmo nhĩpêxja nhũm prem mẽ kãm ho wênê ho pa. ¹³ Ně mẽmo htwym ně mẽ hkuxwa xà. Ně mẽ ô ho ành xà ně mẽ ô kuxwa xà ně xwỳgrã ně harôj. Ně môx ně ôwêhti ně kawar

nē kaxyw kawarti hkjênh xà hã karrotre. Nē nhÿhÿnh krÿ hõ kamã panhÿ hkwỹ pynê nē mẽ hwÿr mẽ o pa nē mẽ kãm mẽ ho wênê nhũm mẽ amarÿ mẽ hkôt ri àpênh rÿnh o pa. Na prem ã mẽ kãm mẽmoj to wênê anhÿr o pa. Tã ra mẽ kot mẽ haprôr xwÿnh mẽ mẽ pimrààtã hapêx pa.

¹⁴ Jakamã nhũm mẽ tee ri mẽ hkukamã hamaxpêr nē te kot mẽ kãm kapêr pyrã nē mẽ kãm:

Hêxta waa nê. Mẽ amã mẽmoj prãm nê amnhÿm haprôr xwÿnhhta na mẽ apê hapêx par kumrêx.

Nē mẽ akãxpore rÿnh nē mẽ akukrêx rÿnhhta mẽ mẽ apimrààtã ajapêx pa. Kot kaj mẽ axte tanhmã amnhÿ nhÿpêx to ho apa hkêr nê. Anê.

¹⁵ Hãmri nê amÿm ri Tÿrtũm kot tanhmã mẽ hipêx to hã mẽ omu nê kãm ma xaj mur nê htertêr o kuhê.

¹⁶ Nê mÿr kãm kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nē mẽ hikukrêx mex o amnhÿ jamrêx nê ri hã mra.

Nē ôr nê kên mex ã ohtô xwÿnh o amnhÿ jamrêx nê ri hã mra.

¹⁷ Tã ra hapêx par kumrêx. Anê.

Hãmri nhũm gô xujanãr kãm pãr nhõ dôn nê mẽ kot mẽ kãm pãr o ri mrrar xwÿnhjaja nê mẽ kot kamã tep pynênh xà ho tep pynênh o ri mẽ pa xwÿnhjaja nê pãr kãm amarÿ mẽ pa xwÿnhjaja hãmri mẽ hwÿr mra nê wamtajê pyrã nê tee ri amÿm ri mẽ ô krÿ pumu nê mÿr o kuhê. ¹⁸ Nê kurũm kuwy hkũm xàpir o pa hã omu nê tee ri mẽ hkukamã hamaxpêr nê axpên mã:

Hêxta waa nê. Krÿ mÿj na pre mex o mex. Mex o krÿ piitã hakrenh par htã hapêx pa. Anê.

¹⁹ Hãmri nê mur nê hkaprÿ xaj pika hkwỹ jamÿ nê ho amnhÿ kamÿ nê mÿr kãm kapêr o:

Hêxta waa nê. Krÿ mÿj na pre rax o rax.

Nhũm pre nhÿhÿnh pãr kãm mẽmoj to wênê ho pa xwÿnhjaja mẽ hwÿr mẽmoj to pa nê mẽ kãm ho wênê nê mẽ hkukwak ri hikãxpore rÿnh nê ri pa.

Tã hãmri mẽ hapêx pa. Anê.

²⁰ Hãmri nhũm Tÿrtũmja krajê piitã mẽ kãm kapêr nê mẽ kãm:

E ixpê Tÿrtũm na pa ã mẽ hipêx anê.

Mẽ kot mẽ apê ixkrajaja tanhmã mẽ atomnuj to ho paja mÿrapê na pa mẽ atã ã mẽ hipêx anê.

Jakamã e kaxkwa kamã mẽ apê ixri mẽ apa xwÿnhjaja.

Nē mẽ ate inhÿ hã ri mẽ kãm ixkapêr jarênh o mẽ apa xwÿnhjaja.

Nē Jejus nhÿ hã mẽ akapêr o ri mẽ apa xwÿnhjaja. Mẽ apiitã mẽ apê ixkra na ka mẽ.

E mẽ amnhÿ tã ja pumu nê akÿnh nê axpên mã apikunhar o akuhê. Pa na pa mẽ atã ã mẽ ho ijapêx anê. Anê.

²¹ Tã nhũm kapêr o mẽ wryk xwÿnhjê hõja hihtÿx o kên rax kumrêxja mÿ nê o tẽ nê gô xujanãr kamã kãm gêt nê kumê nhũm mrõ nê akunok. Hãmri nhũm kapêr o:

E krÿta koja Tÿrtũm te ho ixte gôx kãm kên mênh nhũm mrõr nê hpikunor pyrãk o hipêx nhũm hapêx par kumrêx.

²²⁻²⁴ Na pre hte krÿja kamã mẽ kot ri mẽ kãm mẽmoj to wênê xwÿnhjaja amnhÿ to rÿnh o krÿ piitã hkôt mẽ hakrenh pa.

Nē krÿ nhõ xwÿnhjaja na prem pika piitã hkôt hêx rom tanhmã mẽ no kupyr to ho ri pa. Jakamã ra mẽmoj to wênê xwÿnhjê pyrã nê mẽ hikukrêx rÿnh gryk ã Tÿrtũm kaga.

No ãm ja pix kêt. Tÿrtũm krajê mẽ Tÿrtũm nhÿ hã kapêr o mẽ pa xwÿnhjaja na prem mẽ himex rax nê. Hãmri nhũm krÿ piitã kamã mẽ pa xwÿnhjaja mẽ kot mẽ hipêx ã mẽ omu nê mẽ urak nê ã mẽ hipêx anhÿr o pa.

Tã Papirõn nhõ xwÿnhjaja kot mẽ hipêx anhÿrja mÿrapê koja Tÿrtũm mẽ himex par kumrêx.

Jakamã koja mẽ axte hkÿnh nê hkÿnh xaj ri grer kêt nê.

Nē axte hkÿnh nê grer kãm hakwa kôr o ri pa kêt nê.

Ně axte ri wiorāw kakrênh hkêt ně.
 Ně axte ri amnhīm kawà hyr o hkrī hkêt ně.
 Ně axte harôj kahuk o kuhê hkêt ně.
 Ně axte mẽ ôrkwỹ kamã kanê hpôk kêt ně.
 Ně axte axpên mã ri hkrajê rer o ri pa hkêt ně. Kojã ã mẽmoj kot anhỹr piitã hapêx pa.
 Aně.

19

Mě kot Tirtũm mex ã mẽ harênh

¹ Tã pa kê axte mẽmoj pumu. Ně kaxkwa kamã mẽ kapêr ma nhũm mẽ ohtô rax kumrêx
 ně tanhmã axpên mã kapêr to. Ně anhípê kàx pê kapêr tỳx ně kapêr o:

E pu mẽ pahpiitã Tirtũm mã mex o mex ã harê.

Tapxipix na hihtỳx o hihtỳx.

Ně tapxipix na àhpumunh o àhpumunh.

Ně tapxipix na mex o mex.

Tapxipix na mex o kot mẽmoj piitã hakrenh par.

Ra kot mẽmoj punuj pê mẽ papytãr par jakamã kêp mẽ papytãr xwỳnh ã pixi mex na.

² Na hte amnhĩ jarênh xà hkôt tanhmã mẽmoj to ho pa.

Ně amnhĩ to hêx kêt ně.

Tã ãm hãmri na ã Papirôn nhô xwỳnhjê nhípêx aně.

Na prem mẽ kãm Tirtũm kapêr jarênh o mẽ pa xwỳnhjê nhĩmex rax kumrêx.

Ně krī piitã hkôt ri pa ně amnhĩ kôt mẽ kurê nhũm mẽ kuma ně mẽ hkôt amnhĩ tomnuj
 o pa.

Nhũm Tirtũm tee ri hã mẽ omu ně ã hkrajê hã mẽ hipêx kati aně. ãm hãmri na ã mẽ
 hipêx aně.

Anhỹr o axpên mã harê. ³ Hãmri ně xatã axpên mã:

Nà ãm hãmri na ã mẽ panhõ Tirtũmja mẽ hipêx aně nhũm mẽ kurũm kuwy hkũm kàx
 mã àpir o pa.

Koja krī nhô xwỳnhjaja amnhĩ xà htỳx kamã hamak rãhã ho pa ně aa à htỳx hapêx kêt.

E pu mẽ hã Tirtũm mã mex o mex ã harê. Aně.

⁴ Hãmri nhũm mẽ àptãr tũm pê 24 mẽ mẽmoj tĩr pê kwatjaja hãmri Tirtũm kot mẽ ho
 amnhĩptãr ã hkrī xà maati kutã rôrôk ně kãm hipô hpa. Hãmri ně ã mẽ kapêr anhỹr
 xwỳnhjê mã kapêr ně kãm:

Nà ãm hãmri na ka mẽ ã Tirtũm mex ã harênh aně. E pu mẽ pahpiitã kãm mex o mex ã
 harê. Aně.

⁵ Hãmri nhũm mẽhõja Tirtũm krī xà maati kamã kapêr o:

E mẽ axte Tirtũm mã mex o mex ã harê.

Mẽ ate Měpahpãm kôt amnhĩ nhípêx o mẽ apa xwỳnhjaja.

Ně mẽ apê mẽ ho amnhĩptãr xwỳnhjaja ně amarĩ ri mẽ apa xwỳnhjaja ně mẽ apiitã mẽ
 ate Tirtũm ã apijaãm o mẽ apa xwỳnhjaja kãm mex o mex ã harê. Aně.

Kot mẽ pahpãnhã amnhĩrer xwỳnh mẽ hkwỳjê jarênh

⁶ Tã pa tanhmã mẽ kapêr to hã mẽ kuma nhũm mẽ kàx pê kapêr tỳx ně. Te mẽ ohtô
 rax kumrêx kapêr pyrãk. Ně te gô koko htỳx rỳ na katõtôk tỳx pyrãk. Hãmri ně mẽ kapêr
 o:

E na ra Tirtũm kêp mẽmoj piitã ho amnhĩptãr xwỳnh.

Ně kêp mẽ panhõ Pahi Maati.

Ně hihtỳx o hihtỳx ně àhpumunh o àhpumunh.

E pu mẽ kãm mex o mex ã mãn harê.

⁷⁻⁸ Ně hã pahkĩnh ně.

Ně kãm hihtỳx o hihtỳx ã harê.

Te mẽ kot axpên mã mẽ rer xwỳnh kot amnhĩ nhípêx pyrãk.

Jao mẽ pahte amnhĩ tomnuj pãnhã amnhĩrer xwỳnhhta te kêp myja pyrãk.

Ně mẽ kot hkôt amnhĩ nhípêx xwỳnh piitã te mẽ kêp nija pyrãk.

Ně te mẽ kot axpën mã wa rer nhũm wa kot axpën kôt pa ho pa pyræk o koja mẽ amnhĩ nhĩpêx.

Ně te mẽ kot mjên mã xwỳnh mã ê mex jakare nhõr nhũm kot hagjênh pyræk. Ně ê mexja te mẽ kot tãm amnhĩ nhĩpêx xà pyræk. Aně.

⁹ Hãmri nhũm Tĩrtũm kapêr o wrỳk xwỳnhja inhmã:

—E Juãw. Pa amã mẽmoj jarê ka mar tỳx nẽ akwỳjê mã hã kagà. Tĩrtũm kapêr kwỳ kot paj amã harê. Kêp Tĩrtũm kapêr jakamã ãm hãmri na. Na hte mẽmoj jarênh o hêx kêt nẽ. E kapêr ã kagà ho:

Na htem axpën mã mẽ rer kaxyw nẽ amnhĩ wỳr hkwỳjê wỳ nhũm mẽ hwỳr mra nẽ wa hã hkĩnh nẽ apkur mex nẽ.

Ja pyrà nẽ Tĩrtũm kot amnhĩ wỳr mẽ hwỳr xwỳnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwỳnhhta wỳr api nẽ ã amnhĩ nhĩpêx anẽ nẽ hkĩnh nẽ apkur mex nẽ.

Hãmri nhũm Tĩrtũm mẽ ho mex rax kumrêx. Aně.

—E kêr ka ã akwỳjê mã ja hã kagà anẽ Juãw. Aně.

Hãmri pa kuma nẽ kagà ja kamã mẽ amã hã kagà. ¹⁰ Hãmri nẽ hã kagà hpa nẽ ra ixte kãm mex o mex ã harênh kaxyw kutã ixkõn krã ho tẽm nẽ nhỹ nhũm tee ri amnhĩ tã ixpumu nẽ inhmã:

—Kwa ã ri inhĩpêx anhỹr kêt nẽ. Apyrà nẽ ixte Jejus mã tanhmã amnhĩ nhĩpêx to xwỳnh kênã. Jejusja apyrà nẽ kêp inhõ pahшти na. Jejus kapêr na prem hkukamã mẽ kot Tĩrtũm nhỹ hã kapêr o mẽ pa xwỳnhjaja hã kagà nẽ mẽ kãm harênh o pa. Jakamã kwa pu mẽ Tĩrtũm pix kutã mãn pahkõn krã ho parôrôk nẽ pahkrĩ nẽ kãm mex o mex ã harê. Aně.

Kawar jaka hã ỹr xwỳnh jarênh

¹¹⁻¹⁶ Tã pa kê axte mẽmoj pumu. Nhũm kaxkwa axkjê nhũm kamã kawar jakajre xa nhũm mẽhõja hã nhỹ. Hixi na pre kêp “Aa kot Tĩrtũm kaga hkêt xwỳnh.” Anẽ nẽ hixi hõ na pre kêp: “Tĩrtũm kôt pix mã amnhĩ nhĩpêx o pa xwỳnh.” Aně. ã hixi kot anhỹr jakamã na hte katat kôt ahpỳnhã mẽ kot amnhĩ nhĩpêx ã mẽ omunh xà hkôt tanhmã mẽ harênh to. Mẽ kot amnhĩ to mex ã mẽ omunh xà hkôt tanhmã mẽ hkwỳjê jarênh to nẽ mẽ kot amnhĩ tomnuj ã mẽ omunh xà hkôt ahpỳnhã tanhmã hkwỳjê jarênh to. Na pre mẽ kot tanhmã hkwỳjê nhĩpêx to ho pa xwỳnhjê kutã amnhĩ xunhwỳ nẽ mẽ hã tanhmã mẽ ho. ã na pre kawar ã ỹr xwỳnhja amnhĩ nhĩpêx anhỹr o pa.

Ně no te kot kuwy hpøk pyræk jakamã hprĩ hã mẽmoj piitã omu nhũm mẽmoj kêp hpimxur kêt nẽ. Nẽ kêp pahi hã mẽ ahkà ho ohtô nẽ kutu. Nẽ nhỹhỹnh ì hã hixi hõ hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrô ho ê xy hpa nẽ xa. Nẽ hixi hõ pê:

TĨRTŨM KAPĚR O AMNHĪRĪT XWỠNH

Ně ê ryti hã hixi hõ hã kagà. Nẽ ihkjê hã ãm tãm. Hã kagà jarênh kot:

Ixpê mẽ ho amnhĩptar xwỳnh piitã mẽ õ Pahi Maati na pa.

Ně hakwa rũm wapo xwa gixre põm katon ajêt. Kot ho tanhmã mẽ kot Tĩrtũm mẽ wa kutã amnhĩ xunhwỳr xwỳnhjê nhĩpêx to kaxyw. Jakamã ra mẽ piitã mẽ ho pikuprõnh pa nẽ mẽ hipêx o te mẽ kot prês kãm uwa xô kagô janênh pyræk nhũm mẽ hkamrô hpikapĩr rax kumrêx. Tĩrtũm xihtỳx xwỳnh kot mẽ kamã gryk tỳx jakamã nhũm ã kãm mẽ hipêx anẽ. Mẽ kot amnhĩ tomnuj o paja mỳrapê.

Nhũm õ pōristi piitã uræk nẽ kawar jakare hã hkrĩ nẽ hkôt ri pa. Mẽ ê jaka muxre jagjê nẽ hã ma hkôt ri pa.

¹⁷⁻¹⁸ Tã pa axte Tĩrtũm kapêr o mẽ wrỳk xwỳnh õja pumu nhũm myyti kutã xa nẽ kàx pê nhõnhti mã kapêr nẽ mẽ kãm:

—E mẽ amnẽ mẽ ixwỳr wrỳ nẽ Tĩrtũm ã akĩnh nẽ mẽ htyk nẽ mẽ hikwỳ xwỳnhjê hã atu nẽ aku. Mẽ ho amnhĩptar xwỳnhjaja nẽ pōristijaja nẽ mẽ hkrãhtũm nẽ kawar nẽ kawar ã mẽ hkrĩ nẽ ri mrar xwỳnhjaja nẽ mẽ kot amnhĩ to rũnh xwỳnhjaja nẽ mẽ kot amnhĩ to hkryre xwỳnhjaja. Nẽ mẽ kãm mẽ àpênh xwỳnhjaja nẽ amnhĩ mã ri mẽ àpênh

xwỳnhjaja. Ām mẽ htyk nẽ mẽ hikwỹ xwỳnh mũj piitã mãmri mẽ hwỳr wrỳ nẽ mẽ hã atu nẽ mẽ aku. E mẽ tokyx nhônhti. Anẽ.

¹⁹ Tã nhũm mrymnuti nẽ krĩ piitã hkôt mẽ õ pahi nẽ mẽ õ pòristijaja piitã axpẽn wỳr akuprõ. Wam kawar jakare hã ỳr nẽ htẽm xwỳnh mẽ õ pòristijê hwỳr hprõt nẽ mẽ hkurê kaxàr kaxyw axpẽn mar kaxyw akuprõ.

²⁰⁻²¹ Hãmri nẽ mẽ hwỳr mra nẽ mẽ hkurê kapa. No ãm tee ri amnhĩ nhĩpêx nẽ tee ri kãm tanhmã mẽ ho hprãm hkapyrỹ nhũm wam kawar jakare hã ỳr nẽ htẽm xwỳnhhta hakwa rũm wapo xwagixre kator o mẽ himex pa. Hãmri nhũm mẽ hkwyjê pyràn htyk pa nẽ hikwỹ. Nhũm nhônhti mẽ omu nẽ mẽ hwỳr wrỳk o mra nẽ mẽ kuku hãmri nẽ kãm mẽ hkur kaga nẽ mẽ hkaga. No nhũm mrymnuti nẽ ỳ hã mẽ kãm hêx o pa xwỳnhhta wa nhũm mẽ axtem nẽ htĩr rãhã wa unê nẽ ma wa o tẽ nẽ ẽsõf o kuwy maati kamã wa kumẽ. Hãmri nhũm wa kamã htĩr tũm nẽ hxêt rãhã nẽ pa ho pa nẽ aa htyk kêt nẽ.

20

Mẽ kot Satanasti hpa hpre hã mẽ harẽnh

Wam Korĩt 15.20-28

¹ Tã pa kê axte mẽmoj pumu. Nhũm Tĩrtũm kapẽr o mẽ wrỳk xwỳnhjê hõja kaxkwa rũm wrỳ nẽ ahkre xupỳmti hpro xà ho htỳx xà hã safja py nẽ kàx pytĩhti ho mẽ hpre xàja õ py. ²⁻³ Hãmri nẽ kagãmnuti pẽ hêx xwỳnh maati Satanastija pynê. Amnepẽm Atãw mẽ Ewa wa kãm hêx xwỳnhhta pynê nẽ kàx pytĩ o hpa hpre nẽ hte hpre hãmri nẽ ahkre xupỳmti nhĩtom xà mẽ nẽ kamã kumẽ. Hãmri nẽ akupỹm hpro xà ho hpro nẽ saf o hã ho htỳx. Kot pika piitã hkôt mẽ kãm hêx o pa pymaj ã hipêx anẽ. Koja tokyx kator kêt ry rax kumrêx. Koja kamã arĩ hkrĩ hã amgrà xohtõ nẽ. Hã amgrà pẽ 1.000 nhũm rĩ kormã Tĩrtũm akupỹm kator nhũm kato nẽ ri pa. Nom pa hkrãnre.

⁴ Tã pa mẽ htyk nẽ akupỹm mẽ htĩr xwỳnh kwỳjê pumu. Kormã mẽ htĩr ri na prem Tĩrtũm kapẽr kôt pix mã amnhĩ nhĩpêx o pa. Nẽ Jejus kệp mẽ õ pahihti hã harẽnh rãhã ho pa. Aa mẽ kot mrymnuti kutã hkõnkrã ho rôrõk nẽ kãm mex ã harẽnh kêt. Nhũm prem tee mẽ õkrã hã nẽ mẽ ãhkra katut ã mrymnuti nhĩxi nhĩpêx kaxyw nom nhũm prem hkaga kamã hihtỳx nhũm prem kãm mẽ hkurê xwỳnhjaja tee ri ja hã mẽ omu nẽ mẽ mut jakàr o mẽ kupa. Hãmri nhũm Tĩrtũm akupỹm mẽ ho mẽ htĩr nẽ mẽ kot mẽ ho amnhĩptàr ã hkrĩ xà kamã mẽ hkrĩ. Jejus nhĩhkõ hã mẽ hkrĩ hã amgrà pẽ 1.000 kaxyw. ⁵ Mẽ kumrêx na pre Tĩrtũm akupỹm mẽ ho mẽ htĩr nhũm mẽ hkwyjaja mẽ hkĩnh ã arĩ ty nẽ hikwỹ hã amgrà pẽ 1.000 jakre nhũm rĩ kormã akupỹm mẽ ho mẽ htĩr.

⁶ Wam akupỹm mẽ htĩr xwỳnhjaja kệp Tĩrtũm kra jakamã koja mẽ Tĩrtũm kra hkêt xwỳnhjê kurom hkĩnh nẽ pa ho pa. Nẽ mẽ kurom mẽ kot amnhĩ xà htỳx kamã hamak o pa htũm xà wỳr pa hkêt nẽ. Nẽ mẽ kurom Tĩrtũm mẽ Kra Jejus Kris wa kuri mex kumrêx nẽ wa kãm tanhmã ri amnhĩ nhĩpêx to ho pa. Nẽ Jejus nhĩhkõ hã mẽ ho amnhĩptàr o pa hã amgrà pẽ 1.000.

Tĩrtũm kot kuwy hwỳr Satanasti mẽnh ã harẽnh

⁷ Tã koja amgrà pẽ 1.000 hapêx nhũm rĩ kormã Tĩrtũm kapẽr o wrỳk xwỳnhja akupỹm ahkre xupỹm wỳr tẽ nẽ Satanasti mã kahê xà mẽ nhũm kato. ⁸ Hãmri nẽ kê axte pika piitã hkôt tanhmã mẽ kãm hêx to ho ri pa. Gorti nhõ xwỳnhjê mã nẽ Makok nhõ xwỳnhjê mã nẽ krĩ piitã hkôt Tĩrtũm nẽ tanhmã mẽ kãm hêx to ho mẽ hkôt pa. Hãmri nẽ mẽ kot Tĩrtũm krajê kutã amnhĩ xunhwỳr nẽ mẽ hkurê kaxàr kaxyw amnhĩ kwỳjê ho akuprõ nhũm mẽ ohtõ rax kumrêx nẽ axpẽn wỳr akuprõ. Te pikahti grà xohtõ pyræk.

⁹ Hãmri nẽ ma Tĩrtũm krajê nhĩmex par kaxyw mẽ hwỳr mra nẽ mẽ õ krĩ mã hipõk pa nẽ kuhê. Mẽ õ krĩja Tĩrtũm mã mex tã nhũm mẽ kot kệp grành par kaxyw ma hwỳr mra. Hãmri nhũm kaxkwa rũm kuwy hpõkja mẽ haêr pẽ mẽ hã rôrõk nẽ mẽ ho hxêt pa.

¹⁰ No mẽ kãm hêx xwỳnh maati Satanastita nhũm Tĩrtũm kapẽr o wrỳk xwỳnhja axte unê nẽ ma ẽsõf o kuwy maati wỳr o tẽ nẽ kamã kumẽ. Ra mẽ kot kamã mrymnuti wa kot Tĩrtũm nẽ mẽ nokupyr o pa xwỳnh wa mẽnh tã wa hkôt Satanasti mã ho anẽ nẽ kamã

kumê nhũm kamã pa ho pa. Koja mẽ aa kator kêt kumrêx. Nê arĩ kamã amnhĩ xà htỳx kamã hamak rãhã nê pa ho pa.

*Tĩrtũm kot ahpỹnhã tanhmã mẽ piitã mẽ harênh to kaxyw
Matêwre 25.31-46; Juãw 5.25-29*

¹¹ Tã pa axte mẽmoj pumu nhũm kaxkwa mẽ pikaja wa ra hapêx pa. Pa Tĩrtũm kot tanhmã mẽ piitã mẽ harênh to hã hkrĩ xà raxja pumu. Nhũm hakajre nhũm Tĩrtũm kamã nhỹ.

¹²⁻¹³ Hãmri nhũm ra mẽ htyk nê mẽ hikwỹ xwỳnh piitã akupỹm hapôx pa nê Tĩrtũm kot tanhmã mẽ harênh to hã hkrĩ xàta kutã hkrĩ pa. Mẽ piitãã. Mẽ kot amnhĩ to rũnh xwỳnhjaja nê mẽ kot amnhĩ to hkryre xwỳnhjaja nê mẽ ho amnhĩptàr xwỳnhjaja nê gô xujanãr kãm mẽ mrôr nê mẽ htyk xwỳnhjaja. Ra mẽ htyk nhũm mẽ kot mẽ hagjênh xwỳnhjaja piitã mẽ htykjê papxà rũm hapôx pa nê Tĩrtũm kutã ohtô ho ohtô nê hkrĩ. Hãmri nhũm Tĩrtũm ô kagà py nê kamã mẽ piitã mẽ hixi japêr. Kagà kamã ra mẽ hkukamã mẽ htĩr tũm nê mẽ pa ho mẽ pa mã xwỳnhjê nhĩxi japêr. Nê kagà hõ kamã mẽ htĩr ri tanhmã mẽ kot amnhĩ nhĩpêx to ho pa hã mẽ piitã mẽ hã kagàja. Nhũm kupy nê kamã tanhmã mẽ harênh to nê hkôt hprĩ hã mẽ piitã mẽ omunh pa nê rĩ kormã ahpỹnhã tanhmã mẽ harênh to.

¹⁴⁻¹⁵ Hãmri nê mẽ htĩr tũm nê mẽ pa mã xwỳnhjê nhĩxi hã kagàja kamã tee ri mẽ hkwyjê nhĩxi japêr nhũm kamã amrakati. Jakamã nhũm mẽ ma kuwy maatita wỳr mẽ o mra nê kamã mẽ rênh pa. Te axte mẽ htyk nhũm mẽ kot kuwy kamã mẽ hagjênh pyrãk nhũm mẽ kamã rôrôk nê tee ri amnhĩ xà htỳx kamã hamak rãhã nê pa ho pa nê aa kator kêt kumrêx.

21

*Pika mẽ kaxkwa wa nyw jarênh
Sikũn Pêtre 3.8-13*

¹ Tã pa axte mẽmoj pumu. Nhũm Tĩrtũm ra pika mẽ kaxkwa nyw wa ho kato. Ra pika nê kaxkwa nê gô xujanãr tũmja hapêx pa nhũm kaxkwa mẽ pika nyw wa ho kato. Nom axte gô xujanãr o kator kêt nê.

² Hãmri nhũm Tĩrtũm nhõ krĩ mex pê Jerujarê nywja tanhmã amnhĩ to nê pika nyw wỳr wrỳk o mō. Krĩja mex kumrêx. Mex o mex. Te mjên mã xwỳnh ê mex jaxàr nê amnhĩ to muxre nê mjên wỳr htêm pyrã nê pika nyw wỳr mex kumrêx nê wrỳk o mō.

³ Hãmri nhũm Tĩrtũm kot mẽ ho amnhĩptàr ã hkrĩ xà maatija kamã mēhōja kapêr o:
—Nà ãm hãmri. Na ra Tĩrtũm hkrajê hkôt pa ho pa. Pika nyw kamã mẽ hkôt pa ho pa nhũm mẽ tã no ho omu nê hkôt pa ho pa rãhã nê. Nà ãm hãmri. Ja mex o mex.

⁴ —Koja hkrajaja hkôt pa ho pa nê axte htyk kêt kumrêx. Nhũm Tĩrtũm mẽ nê mẽ no kagô nhĩnhĩnh pa nhũm mẽ axte hkaprĩ nê mỳr kêt nê. Nê ri axte amnhĩ xà kamã hamak kêt nê. Nê axte ri tanhmã omnu hto hkêt nê. Ra mẽ hkaprĩ nê à nê mỳr o pata hapêx par kumrêx nhũm hpãnhã mẽmoj nyw pix. Anê.

⁵ Hãmri nhũm Tĩrtũm tãm tanhmã inhmã kapêr to. Krĩ xà maati kamã ỹr xwỳnhhta tãm inhmã kapêr o:

—E na pa ra akupỹm mẽmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mẽmoj jarênh anê. Ixêx kêt. Jakamã kêr ka akwỳjê mã piitã hã kagà hpa. Kê mẽ kamã harê nê tokyx kuma nê hkôt hamaxpêr rãhã ho pa.

⁶ —Ra ixte amnhĩ kukamã mẽmoj mã ijamaxpêr xwỳnhja na pa ra ho anhỹr pa. Ixpê mẽmoj piitã ho anhỹr o hkrax xwỳnh nê mãânên ixpê mẽmoj piitã ho ijapêx par xwỳnh. Nê ixrãhã ixpa xwỳnh. Amnepêm kormã mẽmoj kator kêt ri na pa pre ixrãhã ixpa. Nê ot pa arĩ ixrãhã ixpa. Tã mẽ kãm kôr nê kãm gô hkwy ho hkôm hprãm xwỳnhjê pyrã nê mẽ kãm ixpix prãm xwỳnhjaja kot paj te mẽ kãm inhõ hino rũm gô hkwy nhõr nhũm mẽ kot ho hkôm pyrãk o mẽ hipêx. Hãmri nhũm mẽ htĩr tũm nê ixri pa ho pa nê axte htyk kêt nê. Kot paj ã mẽ hipêx mex anê.

⁷—Mê ate tanhmã amnhĩ tomnuj to nê amnhĩ to htỳx nê ixkôt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhiĩpêx mex anê. Ka mẽ apê ixkra hã amex nê ixkôt ri apa rãhã ho apa. Pa ixpê mẽ anhõ Tĩrtũm ã tanhmã mẽ ato mex to rãhã ho ixpa.

⁸—No mẽ kot amnhĩ kaxyw ixkôt hamaxpêr kêt xwỳnhjaja. Nê mẽ kot amnhĩ tomnuj xwỳnhjaja nê mẽ kot ri mẽ hpar prãm xwỳnhjaja. Nê mẽ kot nhãm ri mênijê ho amnhĩkati xwỳnhjaja. Nê wajagajaja. Nê mẽ kot amnhĩ to sãnti hwỳr o pa xwỳnhjaja. Nê ri mẽ hêx nhi xwỳnhjaja. Æ mẽ kot amnhĩ nhĩpêx anhỳr xwỳnh piitã koja mẽ apê ixkrajê hkĩnhã ma kuwy maati wỳr hapêx par kumrêx. Te axte mẽ htyk pyræk nom koja mẽ axte htyk kêt nê. Anê.

Jerujarê nyw jarênh

Sikũn Korĩt 6.16; Karatas 4.26; Eprêw 12.22-24

⁹Tã nhũm mẽ kot xijere pê 7 kamã Tĩrtũm gryk xà jamỳnh xwỳnhjê hõja hãmri ixwỳr tẽ nê inhmã:

—E ma ixkôt tẽ nê mẽmoj pumu. Na ra krĩ nywja pika nyw wỳr wrỳk o mō. Te mjên mã xwỳnh ê mex jaxàr nê amnhĩ to muxre nê mjên wỳr htêm pyrà nê mex kumrêx nê kaxkwa rũm pika nyw wỳr wrỳk o mō. Nê kot ho mjên mã xwỳnhhta te mẽ pahte amnhĩ tomnuj pãnhã amnhĩrer xwỳnhhta pyræk. E tokyx tẽ nê omu. Anê.

¹⁰Hãmri nhũm Tĩrtũm Karõ tanhmã ixto pa ma kot inhmã kapêr xwỳnhhta kôt tẽ nhũm ma ixto mō nê kên krã hprêeti hwỳr ixto api nê himõk ã ixãm. Pa Tĩrtũm nhõ krĩ mex pê Jerujarê nywja pumunh o xa. Nhũm mex o mex. Æm hãmri te mjên mã xwỳnh kot ê mex jaxàr nê amnhĩ to muxre nê mjên wỳr htêm pyrà nê ahpar mã wrỳk o mō pa ixprĩ hã omu.

¹¹Na pre rax o rax nê mex o mex. Tĩrtũm kamã pa ho pa jakamã nhũm kamã hirã htỳx kumrêx. Te kên mex ã kàxpore xohtô jaxênh mex tỳx pyræk.

¹²⁻¹³Nê krĩ puhã kahêja hprêk rax nê. Nê hwỳr mẽ gjêx xà kêp 12. Na pre myt japõx xà rũm axkrunêpxi. Nê myt gjêx xà rũm haxwỳja axkrunêpxi. Nê akutã kahpa hkôt haxwỳja axkrunêpxi. Nê ahpỳnhã hakwakre hã Tĩrtũm kapêr o wrỳk xwỳnhjaja hamãr o kuhê. Nê hakwa kre piitã hã Ijaew pê ahpỳnhã mẽ pikjêr kãm mẽ kêp 12jaja mẽ hixi hã kagà.

¹⁴Nê kahê xunhwỳr xà hkukamã kên pytyrja ahpỳnhã kêp 12. Kên pytyrta ã na mẽ kot Jejus nhỹ hã mẽ ahkre o mẽ pa xwỳnh maati pê 12jê nhĩxi hikwỹ.

¹⁵Tã nhũm kot ixto mōr nê inhmã mẽmoj jahkre xwỳnhhta ôr o mẽmo pĩ py nê kot ho krĩ ho mĩdi kaxyw xa. Nê ho kahê piitã ho mĩdi kaxyw. Nê mẽ gjêx xàja ho mĩdi kaxyw.

¹⁶⁻¹⁷Hãmri nê ho mĩdi hpa. Krĩja ry nê kahpa piitã axpên pyræk. Nê hprêk piitã mããnên axpên pyræk. Kamã mẽmoj piitã ahpỳnhã kêp 2.200 kirõm. No puhã kahêja hprêk o 64 met pix nê.

¹⁸Nê kahêja kên jaxênh pix o kot amnhĩ nhĩpêx jakamã mex o mex. Nê hkarỳr tỳx kumrêx. Nê kahê hkre kamã krĩ kamã ahpỳnhã ri ixkreja ôr pix o kot amnhĩ nhĩpêx. Nê piitã hkarỳr tỳx.

¹⁹⁻²⁰Nê kahê xunhwỳr xà hkukamã kên pytyrta ahpỳnhã ri kên mex pix o kot amnhĩ nhĩpêx. Piitã mex kumrêx nê hkarỳrti.

Wamta kawax pê grãgrãre.

Nê hkôt ja kawax pê grãgrã kakrã htyk.

Nê hkôt ja kakrã htyk.

Nê hkôt hõja grãgrã karỳr.

Nê hkôt ja hkamrêk pihkãrti.

Nê hkôt ja grãgrã kakrã htyk.

Nê hkôt ja hkamrêk tỳx kumrêx.

Nê hkôt ja ràrààre.

Nê hkôt ja grãgrã mẽ pihkàr.

Nê hkôt ja ràràr mẽ pihkàr.

Ně hkôt ja grāgrā karỳre.

Ně hkôt ja kakrā htyk pihkàr.

Ā kěn pytyr mex kot anhÿr.

²¹ Ně mẽ gjêx xà hā hakwakre kahê xà pê 12ja mẽmo kěn jakooti rŭnh kumrêx pix o. Ně krĭ kahti hkôt pry nhĭkwÿ xwÿnhja âm ôr pix o. Ně hkarỳre.

²² Pa pre tee ri krĭ kamā Tĭrtŭm mã amnhĭ jarênh xà hā ixkre japêr nhŭm amrakati. Mo kaxyw koja mẽ axte ixkreja hwÿr mra? Ra Pahi Maati Tĭrtŭm xihtÿx xwÿnh mẽ mẽ pahte amnhĭ tomnuj pānhā amnhĭrer xwÿnhhta ra hkrajê kamā pa ho pa kēnā kot kêt mẽ axte ri ixkreta o presija. Koja mẽ kām wa mex ā wa kām harênh prām nê nhÿri tām wa hwÿr mra nê ā wa kām kapêr anê. Te mẽ pahte pahi hwÿr pamrar nê kām pakapêrta pyrā nê wa hwÿr mra nê wa kām kapêr.

²³ Ně koja krĭja kamā myyti nê mytwrÿre hkêt. Mo kaxyw kot kêt myyti nê mytwrÿreja arĭ ri hirā ho pa? Krĭ kamā Tĭrtŭm pa ho pa jakamā kamā hirā mex kumrêx. Ně mẽ pahte amnhĭ tomnuj pānhā amnhĭrer xwÿnhhta haxwÿja kamā pa ho pa. Te kêp kanê hpôk rax kumrêx pyrā nê hirā mex o pa. Kot hirā mex o kot myyti jakrenh. Ā Tĭrtŭm mẽ Kra wa krĭja kamā pa ho pa jakamā nhŭm mẽ axte myyti ho presija hkêt nê.

²⁴ Koja krĭ nhô xwÿnhjaja hirā mex pix kām ri pa ho pa nê tām ri amnhĭ nhĭpêx o ri pa. Tā koja mẽ ho amnhĭptār xwÿnhjaja Tĭrtŭm wÿr mra nê amnhĭ rom kām mex o mex ā harê nê kām:

—Na pre mẽ ixkwÿjaja mẽ ixpê mẽ ho amnhĭptār xwÿnh ā axpên mã mẽ inhmex nê mẽ ixàhpumunh ā ri axpên mã mẽ ijarê. Nom mẽ ixrom amex o amex nê axàhpumunh o axàhpumunh. Jakamā âm hāmri na htem amā amex o amex ā ajarê Tĭrtŭm. Anê.

²⁵ Ně krĭ hwÿr hakwakre koja amnhĭ kahê xà rēnh rāhā kuhê nê aa amnhĭ kahê hkêt nê. Jar mẽ panhō pika kamā na hte kamāt kaxyw nhŭm htem amnhĭ tā hakwakre kahê hpa. No mo kaxyw koja mẽ axte pika nywja kamā ā amnhĭ nhĭpêx anê? Koja kamāt kêt nê hirā rāhā ho rāhā jakamā nhŭm mẽ amnhĭ tā kahê hkêt rāhā nê pa ho pa.

²⁶ Ně koja mẽ piitā Tĭrtŭm wÿr mra nê kām mex o mex ā harê nê kām:

—Pa Tĭrtŭm. Hêxta waa nê. Anhô krĭja mex kumrêx. Mex o mex. Ně mẽ ixrom amex o amex nê axihtÿx o axihtÿx. Ně mẽ ixrom axàhpumunh o axàhpumunh. Âm hāmri na ka ra mẽ ixpê akrajê kamā apa ho apa Tĭrtŭm. Anê.

²⁷ Ně koja mẽmoj punuj krĭja wÿr gjêx kêt kumrêx. Mẽ hpijaàm kêt xwÿnhjaja nê ri mẽ hêx xwÿnhjaja hwÿr gjêx kêt nê. Âm mẽ pahte amnhĭ tomnuj pānhā amnhĭrer xwÿnhhta nhô kagà kamā Tĭrtŭm ri mẽ htĭr tŭm nê mẽ pa mã xwÿnhjê nhĭxi nhĭpêx xwÿnh pixjaja koja mẽ hwÿr agjê nê kamā pa ho pa.

22

¹⁻² Tā pa pre axte mẽmoj pumu. Nhŭm Tĭrtŭm kapêr o wrÿk xwÿnhja axte inhmā mẽmoj jahkre. Nhŭm Tĭrtŭm mẽ kot mẽ pahpānhā amnhĭrer xwÿnhja wa kot mẽ ho amnhĭptār ā hkrĭ xà maati rŭm pyhti hprôt. Krĭ kahti hkôt pry pohti nôr xwÿnhhta kahti hkôt hprôt o nō. Pyhti kamā gôja na htem ho ixkô nê htĭr tŭm nê pa ho pa. Gô karỳre. Nhŭm mẽmo pĭ hpār muxre xwÿnhja akutā hijê nê xa. Pĭ xôja na htem kuwô nê htĭr tŭm nê pa ho pa. Na hte apkati mẽ ô rāhā nê kuhê. Nê axtem hôja mẽ piitā mẽ mex nê à hkêt kaxyw na hôja.

³ Amnepêm na pre Tĭrtŭm Atāw mã kapêr nê kām:

—Ate amnhĭ tomnuj mÿrapê kot paj tanhmā pika homnu hto nhŭm apê mex kêt nê. Ka kamā apur nê kamā axápênh rŭnh o apa rāhā nê rĭ kormā kamā axàpkur o ri apa. Apê jamnuj tā kot kaj mẽ ā amnhĭ nhĭpêx anhÿr o apa rāhā ty. Anê.

Tā ra Tĭrtŭm nhô krĭ nyw kamā mẽ omnuj xāja amrakati kumrêx. Ně Tĭrtŭm mẽ kot mẽ pahpānhā amnhĭrer xwÿnhhta wa ô krĭ kamā pa ho pa jakamā mẽ pahte kamā mẽ papa xwÿnhjaja kot puj mẽ wa kām tanhmā amnhĭ nhĭpêx to ho ri papa.

⁴ Kot puj mẽ tā pano ho Tĭrtŭm pumunh o papa. Hāmri nhŭm te mẽ pahpiitā mẽ panhōkrā hā amnhĭ nhĭxi nhĭpêx pyrāk o mẽ panhĭpêx.

⁵ Nê kot puj mẽ Pahi Maati Tirtüm nhĩrã kamã ri papa nê axte myyti nhĩrã ho presija hkêt nê. Koja kamãt hapêx pa pu mẽ axte kanê ho presija hkêt nê. Nê Jejus nhĩhkô hã hirã kamã mẽmoj to amnhĩptãrã rãhã ho papa.

Jejus tokyx akupÿn wrÿk ã harênh

Apokarip 1.1-3

⁶ Tã nhũm Tirtüm kapêr o mẽ wrÿk xwÿnh kot ixto mör xwÿnhhta axte inhmã kapêr nê inhmã:

—E nã ãm hãmri na ixte amã mẽmoj piitã harênh xwÿnhja. ãm hãmri na. Jakamã kwa kêr ka arĩ hã ano htÿx rãhã ho apa. Amnepêm Tirtümja ÿ hã mẽ kapêr o pa xwÿnhjê mã tanhmã kapêr o amnhĩrit to. Kot tanhmã amnhĩ nhĩpêx to hkukamã mẽ kãm ho amnhĩrit nhũm prem kuma nê ô ri ma hkwÿjê mã harênh o ri mẽ hkôt pa. Tã ra mẽ hpãnhã pa mẽ awÿr inhmê. Mẽ ate Tirtüm mã tanhmã amnhĩ to ho apa xwÿnhjê mã ixte ja jarênh kaxyw Pahihti Tirtümja mẽ awÿr inhmê pa wrÿ. Nã koja mẽmoj tokyx ã amnhĩ nhĩpêx anê. ⁷ Na pre Jejus mẽ amã amnhĩ jarênh o: “Kot paj tokyx akupÿm mẽ awÿr wrÿ. Tã mẽ ate ijarênh ã kagã kamã harênh nê mar nê amnhĩ kaxyw hkôt ajamaxpêr nê hkôt amnhĩ nhĩpêx xwÿnhjaja kot kaj mẽ akĩnh nê ri apa.” Anhÿr o amnhĩ jarê. Anê.

⁸ Nã ixpê Juãw na pa pre ã inhno ho mẽmoj pumunh anê. Hãmri nê omunh pa nê Tirtüm kapêr o wrÿk xwÿnh kot inhmã harênh xwÿnhhta kutã ixkôn krã ho ixtêm nê inhÿr kaxyw. Nom nhũm amnhĩ nê inhmã kapêr kãm hihtÿx nê inhmã:

⁹ —Kwa nã ri ã inhĩpêx anhÿr kêt nê. ãm Tirtüm pix kutã na pu htem ã amnhĩ nhĩpêx anê. Apyrã nê ixpê Jejus kwÿ kênã. Na pa hte apyrã nê ÿ hã tanhmã amnhĩ nhĩpêx to ho ixpa. Nê mẽ apyrã nê kapêr ã kagã hkôt pix mã amnhĩ nhĩpêx. Na pu htem axpên kutã pahkôn krã ho parôrok kêt nê. ãm Tirtüm pix kutã na pu htem ã amnhĩ nhĩpêx anê.

¹⁰ —E ã ate mẽmoj pumunh nê mar anhÿr xwÿnhja koja tokyx ã amnhĩ nhĩpêx anê. Jakamã kwa kêr ka akwÿjê pê ho apimxur kêt nê. Piitã hã kagã hpa kê mẽ kamã harê nê kuma nê mẽmoj kot ã amnhĩ nhĩpêx anhÿr mã xwÿnhhta piitã hkukamã harênh ma. Koja tokyx mẽmoj ã amnhĩ nhĩpêx anê.

¹¹ —Jakamã kwãr mẽ mãmri piitã tanhmã kãm amnhĩ nhĩpêx to ho pa hprãm xã hkôt amnhĩ nhĩpêx o pa. Kwãr mẽ mẽ kot amnhĩ tomnuj xwÿnhjaja ã amnhĩ anhĩpêx anhÿr o pa. Nê kwãr mẽ kot tanhmã kapêr punuj to xwÿnhjaja mãmri ã amnhĩ nhĩpêx anhÿr o pa. Nê kwãr mẽ kot tãm amnhĩ nhĩpêx o ri mẽ pa xwÿnhjaja mãmri Tirtüm kôt pix mã ri tãm amnhĩ nhĩpêx o pa. Anê.

Nhũm pre ã kaxkwa hwÿr ixto àpir xwÿnhhta inhmã kapêr anê.

¹² Hãmri nhũm hpãnhã Jejus tãm inhmã kapêr nê inhmã:

—E kot paj tokyx akupÿm mẽ awÿr wrÿ. Nê akupÿm pøj hãmri nê mẽ kot amnhĩ tomnuj o mẽ pa xwÿnhjaja pa ja mÿrapê ma mẽ kot amnhĩ xã htÿx kamã hamak tũm xãta wÿr mẽ rênh pa. No mẽ kot ixkôt amnhĩ nhĩpêx xwÿnhjaja kot paj akupÿn inhõ krĩ hwÿr amnhĩ kôt mẽ ho api.

¹³ —Nê ixrãhãã xwÿnh na pa. Amnepê mã kormã mẽmoj kêt ri na pa pre ra ixrãhãã. Nê koja nhÿrmã mẽmoj piitã akupÿm hapêx pa arĩ ixrãhã nê ixpa ho ixpa.

¹⁴ —Nê Tirtüm kot mẽ anê mẽ ate amnhĩ tomnuj kuhõnh par xwÿnhjaja kot kaj mẽ amex kumrêx nê apa ho apa. Nê akĩnh nê ajamakêtkati nê ri atÿx apa ho apa. Te ho mẽ kot amnhĩ xê kahõnh nê mex jagiênh nê ri hã pata pyrãk. Koja Tirtüm mẽ amã anê ka mẽ ajamakêtkati nê õ krĩ hwÿr agiê nê kamã ri amex kumrêx nê ri apa ho apa. Nê kamã mẽmo pĩ xô mẽ kot kur nê htĩr tũm nê pa mã xwÿnhhta wÿr mra nê amnhĩm ô rê nê hkur o ri apa. Ra mẽ ate Jejus kôt amnhĩ xunhwÿr jakamã kot kaj mẽ axãmnhĩx hwÿr mra nê amnhĩm hkwÿ rê nê hkur o ri apa. Kot kaj mẽ ã amnhĩ nhĩpêx anê.

¹⁵ —Nom mẽ kot amnhĩ tomnuj o mẽ pa xwÿnhjaja koja mẽ akĩnhã inhõ krĩ hwÿr gjêx kêt nê. Mẽ kot ri mẽ y ho mẽ pa xwÿnhjaja. Nê mẽ kot nhãm ri mênijê ho amnhĩkati ho mẽ pa xwÿnhjaja. Nê mẽ kot ri mẽ hpar o mẽ pa xwÿnhjaja. Nê mẽ kot ri sãnti nhĩpêx o te

Tirtüm nhîpêx pyrâk o mẽ pa xwÿnhjaja. Nê mẽ kãm ri hêx prãm o ri mẽ pa xwÿnhjaja. Koja mẽ akĩnhã inhõ krĩ hwÿr pa hkêt nê.

¹⁶ —E Juãw. Nà ixpê Jejus na pa awÿr ixkapêr o mẽ wryk xwÿnhhta mẽ. Kot ixkwÿjê kaxyw amã ixkapêr jarênh kaxyw. Ixpê Tawi pâr krax na pa. Te ixpê arĩgro hkôt kanhêti hpôk rax kot arĩgro ho môr ã ho amnhĩrĩt xwÿnhhta pyrâk. Anê.

Nhũm pre ã Jejus inhmã kapêr anê. ¹⁷ Tirtüm Karõ mẽ Jejus kwÿjjaja na htem ã Jejus kot amnhĩ jarênh anhÿrja ma nê hkĩnh nê. Nê kãm kapêr o:

—Hêxta waa nê. Kwa amnhĩm anojarêt nê tokyx akupÿn mẽ ixwÿr wry Pahihtĩ. Pa mẽ tokyx ã amnhĩ nhîpêx anhÿr o ri war akôt ixpa. Anê.

Nê mẽ ate ja mar xwÿnhjaja kêr ka mẽ urâk nê ã kãm akapêr anê.

Nê te mẽ amã kôr nê ri mẽ apa pyrâk xwÿnhjaja kêr ka mẽ te Jejus wÿr amrar nê õ gô ho akôm pyrã nê hkôt amnhĩ xunhwÿ. Te Jejus amarĩ mẽ pamã õ gô nhôr pyrâk o mẽ panhîpêx pu mẽ hkôt amnhĩ xunhwÿ nê ra pahpê pahtĩr tũm nê papa mã xwÿnh. Hãmri nê amnhĩ pãnhã tanhmã kãm amnhĩrer to hkêt nê.

Nhÿrmã mẽmoj nyw par ã harênh jatur xà

¹⁸ E ixpê Juãw na pa Jejus nhÿ hã mẽ amã mẽmoj tanhmã kot amnhĩ nhîpêx to hkukamã ã mẽ amã hã kagã anê. Tã kwa mẽ o kora. Kêr ka mẽ atõ amnhĩ krã hkôt ri ajamaxpêr o te ho ja pyrã nê hijuk ri axte mẽmoj nhîpêx kêt nê. ãm kwarĩ ho kwarĩ. Kot ka mẽ atõ anê nhũm Tirtüm ja hã apumu nê kagãja kamã tanhmã mẽ hipêx kati hto xàta o tanhmã anhîpêx to ka arĩ amnhĩ pumu.

¹⁹ Rÿ ka mẽ atõ kagã kamã harê nê ama nê tanhmã ajamaxpêr to nê ajamaxpêr o:

—Nà ja kot anhÿr kêt. Na mẽ ãm harênh o hêx. Kot paj kuma nê ãm kuma.

Anhÿr o ajamaxpêr japêr. Hãmri nhũm Tirtüm amnhĩ tã ama nê kagã mexta kamã kot tanhmã mẽ ho mex toja o ato mex kêt nê. Ka õ krĩ hwÿr axàpir nê mẽmo pĩ xô mẽ kot hkur nê htĩr tũm nê pa kaxyw mã xwÿnhhta ka amnhĩm hõ hyr nê hkrêr kêt nê. Jakamã e kwa mẽ o kora. Kêr ka mẽ kagãta kamã ã mẽmoj kot amnhĩ nhîpêx anhÿr mã xwÿnhhta jarênh ma nê aprĩ hã piitã hkôt ajamaxpêr tÿx rãhã ho ri apa.

²⁰ E Jejus kot inhmã mẽmoj kukamã tanhmã ujarênh to xwÿnhhta na pre inhmã amnhĩ jarênh o: “Kot paj tokyx akupÿn mẽ awÿr wry.” Anê. ãm hãmri na pre ã amnhĩ jarênh anê. Koja tokyx akupÿn mẽ pahwÿr wry hãmri nhũm mẽmoj piitã mex o mex.

Jakamã kwa kêr ka amnhĩm anojarêt nê tokyx akupÿn mẽ ixwÿr wry Pahihtĩ Jejus.

²¹ Nê ixpyrã nê mẽ apê Tirtüm krajaja na pa hte mẽ ato Pahihtĩ Jejus wÿr rãhã ho ri ixpa nê kãm:

—Kwa akwÿjê pumu nê mẽ kutã anojarêt rãhã ho ri apa Pahihtĩ. Anê.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xô ri mẽ amã hã kagã hpa. E na hapêx.